

# TNÚHU NÍ CÁHÁ<sup>n</sup> YĂ NDIŎXÍ XITO CÙU UÚ

**El Nuevo Testamento**

**Mixteco de Peñoles**



**La Liga Bíblica**

*Las Sagradas Escrituras para Todos*

El Nuevo Testamento  
en el mixteco de Peñoles

La Liga Bíblica 5C primera edición 1979 [mil]

La Liga Bíblica 1M segunda edición 2002

La Liga Bíblica versión electrónica 2009

Publicado por

© La Liga Bíblica 2002

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

# Prólogo

El Nuevo Testamento forma parte de las Sagradas Escrituras, mejor conocidas como la Biblia. Consta de veintisiete libros distintos, cada uno de los cuales es proveedor de ricas bendiciones al que lo lee. Fue escrito originalmente en el idioma griego, pero a través de casi dos mil años se ha traducido en más de mil doscientos idiomas. En la actualidad, millones de personas de miles de pueblos pueden leerlo en su propio idioma.

El vocabulario y la gramática del idioma mixteco son muy distintos a los del griego, y también a los del español; sin embargo, el mixteco posee abundantes formas gramaticales y retóricas que pueden expresar a fondo el significado del griego original.

## ACLARACIONES DE LAS LETRAS DEL ALFABETO MIXTECO DE PEÑOLES

Muchas de las letras del alfabeto mixteco tienen los mismos sonidos que las letras del alfabeto español. Sin embargo, hay otras letras o combinaciones de letras en el alfabeto mixteco que representan sonidos que no existen en el alfabeto español, y otras que se usan de una manera diferente. Por ejemplo:

La **i** latina con una raya en medio representa la sexta vocal del mixteco que se pronuncia como en **qiti** ‘animal’.

La letra **x** en mixteco no tiene tantos sonidos como en español. En todos los casos se pronuncia igual, como en **xiti** ‘estómago, adentro’. La **y** del mixteco es el equivalente sonoro de la **x**. Se pronuncia como en **yaxi** ‘jícara’.

La letra **h** entre vocales representa el saltillo que es un breve corte de voz entre vocales. Compare la diferencia entre palabras con o sin el saltillo como en **coho** ‘plato’ y **cóó** ‘culebra’.

El mixteco se usa un símbolo especial para diferenciar claramente entre palabras con o sin nasalización, es decir, pronunciadas dejando o no pasar el aire por la nariz. El símbolo <sup>n</sup> (n volante) representa el sonido de nasalización de vocales. Compare la diferencia entre palabras con o sin nasalización, como en **caá<sup>n</sup>** ‘abrir’ y **caá** ‘hacha’.

En mixteco, las combinaciones de letras **mb**, **nch**, **nd**, **ng**, **ngü** se encuentran al principio o en medio de palabras y ocupan el lugar de una sola consonante en una sílaba, como en **mběé** ‘oveja’, **nchícanchii** ‘sol’, **ndaha** ‘mano’, **ngúxí** ‘higo’, **ngüita** ‘comienzo’.

Algunas palabras se distinguen solamente por sus tonos. Hay tres tonos: alto, medio y bajo. Se representa el tono alto con acento agudo, como en **íí<sup>n</sup>** ‘nueve’. El tono medio no tiene representación escrita, como en **ii<sup>n</sup>** ‘uno’. El tono bajo se representa con acento grave, como en **ndèti** ‘sombra’. Generalmente hay un tono en cada sílaba, y las sílabas de una sola palabra pueden tener diferentes tonos, como en **dícu** ‘leche’, **itá** ‘flor’, **sàhmi** ‘quema’, **yàhnchi** ‘brillante’. Sin embargo, a veces el tono bajo seguido por el tono alto se presentan en combinación en una sola sílaba, como en **lihli** ‘pequeño’, **căni** ‘anteayer’, **cõhyo** ‘húmedo’.

# Índice

## de los libros del Nuevo Testamento

SAN MATEO.....	1
SAN MARCOS.....	94
SAN LUCAS.....	151
SAN JUAN.....	240
LOS HECHOS.....	300
ROMANOS.....	381
1 CORINTIOS.....	419
2 CORINTIOS.....	457
GÁLATAS.....	481
EFESIOS.....	495
FILIPENSES.....	509
COLOSENSES.....	518
1 TESALONICENSES.....	527
2 TESALONICENSES.....	534
1 TIMOTEO.....	539
2 TIMOTEO.....	550
TITO.....	557
FILEMÓN.....	562
HEBREOS.....	564
SANTIAGO.....	594
1 PEDRO.....	602
2 PEDRO.....	613
1 JUAN.....	620
2 JUAN.....	628
3 JUAN.....	630
JUDAS.....	632
APOCALIPSIS.....	635



# TNÚHU NÍ CHÍDÓ TNÚNÍ TÉ MÀTEÚ

Nchaa cue téé ní xíndecu ndéé  
sanaha cùtnàhá vátá quíxí-gã Xítóhó  
Jesucristú  
(Lc. 3:23-38)

**1** Te ñaní tnáhá Xítóhó  
Jesucristú ní cuu ndíi Dàvíi  
ndíhi ndíi Àbrahám, cue téé ní  
xíndecu ndéé sanaha vîhi-gá  
ñuyú-a. Te duha ndùu cuendá  
dava-gá cue téé ní cuu ñaní  
tnáhá-gã ní xíndecu ndéé sanaha.  
2Ndíi Àbrahám ní xóo ì<sup>n</sup> déhe  
ndíi, te ndíi-án nǐ xínani ndíi Isàác.  
Te déhe ndíi Isàác-án nǐ cuu ndíi  
Jàcób, te déhe ndíi Jàcób-án nǐ cuu  
ndíi Jùdá, te diu-ni ndíi Jàcób-án  
nǐ cuu tătá dava-gá cue ñaní ndíi  
Jùdá-án. 3Te déhe ndíi Jùdá-án ndíhi  
ñadìhí ndíi, ndíi Tàmár ní cuu  
ndíi Fàrés ndíhi ndíi Zàrá. Te déhe  
ndíi Fàrés-án nǐ cuu ndíi Èsróm,  
te déhe ndíi Èsróm-án nǐ cuu ndíi  
Àrám. 4Te déhe ndíi Àrám-án nǐ  
cuu ndíi Aminàdáb, te déhe ndíi  
Aminàdáb-án nǐ cuu ndíi Nàsón,  
te déhe ndíi Nàsón-án nǐ cuu ndíi  
Sàlmón. 5Te ñadìhí ndíi Sàlmón-án  
nǐ xínani-a<sup>n</sup> Ràháb, te ní xóo ì<sup>n</sup>  
déhe-yu ní xínani-dě Bòóz. Te  
ñadìhí ndíi Bòóz-án nǐ xínani-a<sup>n</sup> Rùt,  
te ní xóo ì<sup>n</sup> déhe-yu ní xínani-dě

Òbéd, te déhe ndíi Òbéd-án nǐ cuu  
ndíi Isàí. 6Te déhe ndíi Isàí-án nǐ  
cuu ndíi Dàvíi téé ní xíndaha ñàha  
xii cue ñáyiú isràél. Te déhe ndíi  
Dàvíi-án ndíhi ñadìhí ndíi ní cuu  
ndíi Salòmón. Te díhna-gá ndíi  
Ùriás ní cándeca ndíi ñadìhí-án te  
dătnùní ní naquehe<sup>n</sup> ñaha ndíi  
Dàvíi-án.

7Te déhe ndíi Salòmón ní cuu ndíi  
Ròboám, te déhe ndíi Ròboám-án nǐ  
cuu ndíi Àbíás, te déhe ndíi Àbíás-án  
nǐ cuu ndíi Àsá. 8Te déhe ndíi Àsá-án  
nǐ cuu ndíi Josàfát, te déhe ndíi  
Josàfát-án nǐ cuu ndíi Jòrám, te déhe  
ndíi Jòrám-án nǐ cuu ndíi Ùziás.  
9Te déhe ndíi Ùziás-án nǐ cuu ndíi  
Jòtám, te déhe ndíi Jòtám-án nǐ cuu  
ndíi Àcáz, te déhe ndíi Àcáz-án nǐ  
cuu ndíi Ezèquiás. 10Te déhe ndíi  
Ezèquiás-án nǐ cuu ndíi Manàsés, te  
déhe ndíi Manàsés-án nǐ cuu ndíi  
Àmón, te déhe ndíi Àmón-án nǐ cuu  
ndíi Jòsiás. 11Te déhe ndíi Jòsiás-án  
nǐ cuu ndíi Jecòniás. Te diu-ni ndíi  
Jòsiás-án nǐ cuu tătá nchaa dava-gá  
cue ñaní ndíi Jecòniás-án. Te dàvá-án  
nǐ quide yica cuè téé ñuú Babiloniá  
ndécá-güedě ñáyiú isràél cuáhá<sup>n</sup>  
ñuú-güedě cuendá yàcá<sup>n</sup> cundecú-yu.  
12Te sátá nǐ yáha duca<sup>n</sup> nǐ cuu,  
te ndíi Jecòniás ní xóo ì<sup>n</sup> déhe

ndíi ndíhi ñadìhí ndíi, te téé-á<sup>n</sup> nǐ xínani-dě Salàtiél. Te déhe ndíi Salàtiél-á<sup>n</sup> nǐ cuu ndíi Zorobàbél. <sup>13</sup>Te déhe ndíi Zorobàbél-á<sup>n</sup> nǐ cuu ndíi Àbiúd, te déhe ndíi Àbiúd-á<sup>n</sup> nǐ cuu ndíi Eliàquím, te déhe ndíi Eliàquím-á<sup>n</sup> nǐ cuu ndíi Àzór. <sup>14</sup>Te déhe ndíi Àzór-á<sup>n</sup> nǐ cuu ndíi Sàdóc, te déhe ndíi Sàdóc-á<sup>n</sup> nǐ cuu ndíi Àquím, te déhe ndíi Àquím-á<sup>n</sup> nǐ cuu ndíi Èliúd. <sup>15</sup>Te déhe ndíi Èliúd-á<sup>n</sup> nǐ cuu ndíi Eleàzár, te déhe ndíi Eleàzár-á<sup>n</sup> nǐ cuu ndíi Mátán, te déhe ndíi Mátán-á<sup>n</sup> nǐ cuu ndíi Jàcób. <sup>16</sup>Te déhe ndíi Jàcób-á<sup>n</sup> nǐ cuu ndíi Chèé téé ní cuu yíi tá Màriá xíchí nǐ cuu ñàná Jèsús Yaá ní tendaha Dütú Ndiöxí ní quixi ñuyú-a.

<sup>17</sup>Te sa ní cuu úxúú tnàhá cue téé cùu ñaní tnàhá ndíi Àbrahám ndécú dàvá-á<sup>n</sup>, te dàtnùní ní cacu ndíi Dàvíí diu-ni ñaní tnàhá ndíi. Te núú tnàhá méé ndíi Àbrahám ndíhi ndíi Dàvíí ní cuu úxícúmí tnàhá-güedé. Te duca<sup>n</sup> te sa ní xínu úxícúmí-gǎ tucu-güedé ní cacu, te dàtnùní ní tni ñaha cuè téé ñuú Babiloniá xii ñáyiú isràèl ndécá ñàha-güedé xíí-yu cuáhá<sup>n</sup> ñuú-güedé cuèndá yàcá<sup>n</sup> cundecú-yu. Te sàtá nǐ yáha sá dúcá<sup>n</sup> nǐ cuu, te ní cacu úxúú tucu cue téé ní cuu ñaní tnàhá ndíi Àbrahám ndíhi ndíi Dàvíí, te dàtnùní ní cacu Xítohó Jesucristú ñuyú-a. Te núú tnàhá méé-gǎ ní cuu úxícúmí tnàhá-güedé.

### Ní cacu Jèsús

(Lc. 2:1-7)

<sup>18</sup>Te duha ní cuu cùtnàhá ní cacu Xítohó Jesucristú, chi dàvá-á<sup>n</sup> nǐ xíndecu ìí<sup>n</sup> xíchí cuéchí nǐ xínani

Màriá. Te xíchí-ǎ<sup>n</sup> sa ní cundáá tnúhu sá tnàndaha-xi ndíhi ìí<sup>n</sup> téé ñani Cheé. Te cùmání-gǎ tnàndaha-xi ndíhi téé-á<sup>n</sup> te Espiritú Yǎ Ndiöxí ní quide ní ngúhu<sup>n</sup> déhe-xi. <sup>19</sup>Te té Chèé téé cuíni candeca ñaha xii xíchí-ǎ<sup>n</sup> nǐ cutnùní iní-dé sá ñúhú dèhe-xi. Te cùu-dé ìí<sup>n</sup> téé quide ndáá, núu xíǎ<sup>n</sup> duu<sup>n</sup> duu<sup>n</sup> ní sani iní-dé sá vǎ tnàndaha-gǎ-dé ndíhi-xi, te dicó-ni sá ñà túú ní cǎhá<sup>n</sup>-dé chi ní cuíni-dé sá vǎ cǎhá<sup>n</sup> cuèhé cǎhá<sup>n</sup> duha ñáyiú cuèndá-xi. <sup>20</sup>Te sàtá dúcá<sup>n</sup> nǐ sani iní-dé te ní ngáva-dé ní xídí-dé, te núú sàní-dé ní sáhá<sup>n</sup> ìí<sup>n</sup> espíritú xínú cuèchi núú Yǎ Ndiöxí ní xáha<sup>n</sup>-xi xii-dé:

—Yòhó té Chèé téé cùu ñaní tnàhá ndíi Dàvíí, yúhú cǎchí tnúhu-í xii-n sǎ ñà túú nǎ cani iní-n, tnàndaha nahi-ni-n ndíhi tá Màriá cuèi ñuhu déhe-xi, chi mee Espiritú Yǎ Ndiöxí ní quide-xi duca<sup>n</sup> nǐ ngúhu<sup>n</sup> déhe-xi. <sup>21</sup>Te na cǎcu déhe-xi-á<sup>n</sup> te danàni-n-dé Jèsús. Te duca<sup>n</sup> cùnani-dé, chi téé-á<sup>n</sup> cada-dé cuèndá sá vǎ cùndècu-gǎ cue ñaní tnàhá-dé ñáyiú isràèl ichi cuèhé ichi duha —duha ní xáha<sup>n</sup> espíritú-á<sup>n</sup> xii té Chèé-á<sup>n</sup> núú sàní-dé.

<sup>22</sup>Te duca<sup>n</sup> nǐ cuu chi ní quee ndáá-xi nàcuáa ní xáha<sup>n</sup> Yǎ Ndiöxí xii ìí<sup>n</sup> téé ní cǎhá<sup>n</sup> tnúhu-gǎ ndéé sanaha. Te téé-á<sup>n</sup> nǐ chídó tnùnì-dé núú tütù-gǎ nàcuáa ní xáha<sup>n</sup>-gǎ xii-dé, te duha ní xáha<sup>n</sup>-gǎ:

<sup>23</sup>Cundecu ìí<sup>n</sup> xíchí cuéchí ndèé cuèé-gǎ.

Te òré ndécú íí-xi vátá ñihí-gǎ yíi-xi te ngúhu<sup>n</sup> déhe-xi.

Te òré ná cǎcú dèhe-xi te danàni ñàhá-yu Emànuél.



Duha ní xáha<sup>n</sup>-gǎ xii téé-á<sup>n</sup> ní chídó tñuní-dé núú tütú-gá. Te tnúhu Emànuél-á<sup>n</sup> quée-xí: Yá Ndiöxí ndécú ndìhi-o. Núu xíá<sup>n</sup> duca<sup>n</sup> ní cuu vitna.

<sup>24</sup>Te òré ní ndiquúú ìní té Chèé-á<sup>n</sup> te ní quide-dé nàcuáa ní xáha<sup>n</sup> espíritú-á<sup>n</sup> xii-dé chi ní tnándaha-dé ndìhi tá Màriá. <sup>25</sup>Dico ndi díí<sup>n</sup> ní xíndecú-yu ndéé ní sáá nduu ní cacu déhe-xi. Te òré ní cacu déhe-xi-á<sup>n</sup> te ní dánání ñaha-dé Jèsús.

### Cue téé cuángoto ñaha xii Jesús

**2** Te Jèsús ní cacu-gá ìí<sup>n</sup> ñuú nání Bèlén, te ñuú-á<sup>n</sup> yíndèhu-xi distritú Jùdeá. Te dàvá-á<sup>n</sup> cúnùu té Hèrodés yíndàha-dé ñáyiu. Te ñuú Jerusàlén ní quexio cue téé véxi ndàa xio nacuáa quène nchíanchii, cue téé túha dàcuaha cuendá nchaa sá ndéé andíu. <sup>2</sup>Te ndùcu tnúhu-güedé núú ñáyiu ñuú-á<sup>n</sup>, te xáha<sup>n</sup>-güedé:

—¿Vá cúndèe iní-ndó càchí tnúhu-ndo ndèé ndécú tée quindaha ñaha xii ñáyiu isràèl-á<sup>n</sup>? Chi ní xiní-ndí ní quene chódíní-dé ndàa xio nacuáa quène nchíanchii, núu xíá<sup>n</sup> véxi-ndí chi cuíní-ndí quiní-ndí-dé te chiñuhu-ndí-dé — càchí-güedé xáha<sup>n</sup>-güedé xii-yu.

<sup>3</sup>Te òré ní níhí tée cúnuu nani Herodés tnúhu sá ndúcú tnúhu cue téé-á<sup>n</sup> ndèé ndécú tée quindaha ñaha xii ñáyiu isràèl, te ñá túú tnàhí ni cùu váha iní-dé, te diu-ni duca<sup>n</sup> ñà túú ní cùu váha iní tnàhá nchaa ñáyiu ñuú-á<sup>n</sup>. <sup>4</sup>Te ní cana-dé cue téé cùu dútú cúnùu, ndìhi cue téé dàcuaha ñaha xii ñáyiu nchaa tnúhu ní chídó tñuní ndíi Moisés,

te ní xícá<sup>n</sup> tnúhú-dě núú-güedé ñuu xiní-güedé ndèé cacu Cristú tée tendaha Yá Ndiöxí quixi ñuyíu-a.

<sup>5</sup>Te ní xáha<sup>n</sup>-güedé xii-dé:

—Íí<sup>n</sup> ñuú yíndèhu distritú Jùdeá cacu-dé, te ñuú-á<sup>n</sup> nání-xí Bèlén, chi quee ndáá-xi nàcuáa ní xáha<sup>n</sup> Yá Ndiöxí xii ìí<sup>n</sup> téé ní xóo cáhá<sup>n</sup> tnúhu-gá ndéé sanaha. Te duha nduu tnúhu ní chídó tñuní-dé núú tütú-gá:

<sup>6</sup>Ñuú Bèlén cúu-xí ìí<sup>n</sup> ñuú líhli yíndèhu distritú Jùdeá, te ío-gá cúnùu-xi dacúúxí dáva-gá ñuú cúnùu yíndèhu distritú-á<sup>n</sup>,

chi diu ñuú-á<sup>n</sup> quee ìí<sup>n</sup> téé ío cúnuu.

Te téé cunuu-á<sup>n</sup> quindaha-dě ñáyiu cùu cuendá-í ñáyiu isràèl.

Duha ní xáha<sup>n</sup>-gǎ xii téé ní xóo cáhá<sup>n</sup> tnúhu-gá, te duca<sup>n</sup> ní chídó tñuní-dé núú tütú-gá —càchí-güedé xáha<sup>n</sup>-güedé xii té Hèrodés.

<sup>7</sup>Te sátá dúcá<sup>n</sup> te té Hèrodés dayuhu ní cana-dé cue téé ndùcu tnúhu núu ndèé ní cacu tée quindaha ñaha xii ñáyiu isràèl, te ní xícá<sup>n</sup> tnúhú-dě núú-güedé ná nduu cùu-xi nduu díhna nuu ní xiní-güedé chódíní. <sup>8</sup>Te sátá dúcá<sup>n</sup> te ní xáha<sup>n</sup>-dě xii-güedé:

—Chí cuahá<sup>n</sup> ñuú Bèlén te nducu tnúhu váha-ndo ñuu ndèé ní cacu tée duca<sup>n</sup> quindaha ñaha xii ñáyiu isràèl. Te òré ná nàníhí-ndó-dě te quixi-ndo càchí tnúhu-ndo cuendá quíhí<sup>n</sup>-í tnàhá-í chiñuhu-í-dé — càchí-dé xáha<sup>n</sup>-dě xii-güedé.

<sup>9</sup>Te sátá dúcá<sup>n</sup> ní xáha<sup>n</sup> tē Hèrodés-á<sup>n</sup> te ní xica-güedé cuahá<sup>n</sup>-güedé. Te chódíní ní

xiní-güedé ní quene ndàa xio nacuáa quène nchíanchii-á<sup>n</sup> yòdo nuu-di núú-güedé cuáhá<sup>n</sup>. Te ní ngüíñí chódíní-á<sup>n</sup>, te núú ní ngüíñí-di-á<sup>n</sup> yíndáá núú ndécú Jèsús. <sup>10</sup>Te òré ní xiní cue téé-á<sup>n</sup> ní ngüíñí chódíní-á<sup>n</sup> núú yíndáá ndécú-gá, te ní cudíí víhí ìní-güedé. <sup>11</sup>Te duca<sup>n</sup> te ní quexìo-güedé ndéé núú cáá vèhe ndecu Jesús. Te òré cuánguihu-güedé xítí vehe te ní xiní-güedé Jèsús ndécú-gá ndíhi náná-gá Màriá. Te ní ngüíñí xítí-güedé, te ní ngüíta-güedé ní cachí-güedé sá ìo càhnu cuu Jesús. Te dàtnùní ní nacaá<sup>n</sup>-güedé cajú xínehe-güedé, te ní tava-güedé díhú<sup>n</sup> cuàá<sup>n</sup>, ndíhi dúsa sá ìo váha sàhá<sup>n</sup> tnámí nàni insiensú, ndíhi yúcu sá nání mírrà ní taxi ndecu-güedé núú Jèsús cuendá cuu-xi ìí<sup>n</sup> táhú sá cúú-xí-gá. <sup>12</sup>Te Yá Ndiòxí ní cáhá<sup>n</sup>-gá núú sàní-güedé, te xáha<sup>n</sup>-gá xii-güedé sá vǎ náyáha-gá-güedé cáhá<sup>n</sup> ndíhi-güedé té Hèrodés. Núú xíá<sup>n</sup> cue téé-á<sup>n</sup> cuánuhú-güedé ìngá ichi, te ñá túú-gá ní náyáha-güedé núú ndécú té Hèrodés.

### **Cuáhá<sup>n</sup>-yu ndíhi Jèsús nàció<sup>n</sup> Ègiptú**

<sup>13</sup>Te sátá ní yáha cuánuhú cue téé ní sángoto ñaha xii Jesús, te ní quexìo ìí<sup>n</sup> espíritú xínú cuèchi núú Yá Ndiòxí núú sàní té Chèé, te xáha<sup>n</sup>-xi xii-dé:

—Véxi-í càhí tnúhu-í xii-n sǎ ndàcòo-n, te ndee-n ñùú-a ndíhi Jèsús, ndíhi náná-gá cunu-ndo quíhí<sup>n</sup>-ndó nàció<sup>n</sup> Ègiptú, chi té Hèrodés tendaha-dě cue téé quixi nanducu ñaha xii Jesús cuendá cahni ñaha-güedé. Te yacá<sup>n</sup>

cundecu-ndo ndéé cachí tnúhu-í xii-n ndùu ndixi-ndo —cachí espíritú-á<sup>n</sup> xáha<sup>n</sup>-xi xii té Chèé núú sàní-dé.

<sup>14</sup>Te té Chèé-á<sup>n</sup> ní ndacòo-dé, te niú ní xica-dé ndíhi tá Màriá ndécá-yu Jèsús cuáhá<sup>n</sup> nàció<sup>n</sup> Ègiptú. <sup>15</sup>Te nàció<sup>n</sup> Ègiptú-á<sup>n</sup> ndécú-yu ní xíhí té Hèrodés. Te duca<sup>n</sup> ní cuu chi ní quee ndáá-xi nàcuáa ní cachí ìí<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha ní quide-dé núú-gá ní cáhá<sup>n</sup>-dé yuhu-gá, te duha ní xáha<sup>n</sup>-gá ní cáhá<sup>n</sup>-dé: “Nàció<sup>n</sup> Ègiptú ndécú Dèhe-í ní cùu, te ní xáha<sup>n</sup>-í xii-dé sá ndéé-dě ñuú-á<sup>n</sup> vǎ cúndecu-gá-dé”, duha ní xáha<sup>n</sup>-gá xii téé ní cáhá<sup>n</sup> tnúhu-gá ní quide-dé núú-gá.

### **Té Hèrodés ní táúchíú<sup>n</sup>-dě cahni-güedé cue landú**

<sup>16</sup>Te cue téé ní sángoto ñaha xii Jesús ní dándàhú-güedé té Hèrodés, chi ñá túú ní náyáha-güedé cúñaha-güedé sá ní naníhí-güedé Jèsús. Te sátá ní cutnùní iní té Hèrodés sá ní dándàhú ñáhá-güedé xii-dé te ní cudéé<sup>n</sup> víhí-dě, te ní tendaha-dě cue téé cuáhá<sup>n</sup> ñuú Bèlén, ndíhi nchaa dava-gá ñuú cáá yàtni xíá<sup>n</sup> cuendá cahni-güedé mee-ni cuè landú téé. Te ndéé cue landú íchí ní cacu, ndíhi ndéé cue landú sa ní nútnahá úú cuíá-xi nchaa-güexi cahni-güedé ní xáha<sup>n</sup>-dě. Te duca<sup>n</sup> ní quide-dé chi ní quide cuendá-dé nàcuáa ndùu tnúhu ní xáha<sup>n</sup> cuè téé ní sángoto ñaha xii Jesús nduu ní xiní-güedé chódíní, núú xíá<sup>n</sup> duca<sup>n</sup> ní táúchíú<sup>n</sup>-dě ní quide cue téé-á<sup>n</sup>. <sup>17</sup>Te duca<sup>n</sup> ní cuu chi ní

quee ndáá-xi nàcuáa ní cachí ndíi Jeremiás tée ní xóo cáhá<sup>n</sup> tnúhu Yá Ndiöxí ndéé sanaha, te duha ní cachí ndíi:

<sup>18</sup> Ní tecú ndàhí víhí ñáyiú ñuú Ràmá sá ndìhú iní-yu, te ñáyiú xíndáhyú-á<sup>n</sup> cúú-yu ñaní tnáhá tã Ràquél, te ndàhyú-yu cuèndá sá ñí xíhí déhe-yu.

Te ñáyiú-á<sup>n</sup> ñà túú ní cuíní-yu dàñá-yu sá ndìhú iní-yu cuèndá sá ñí xíhí déhe-yu.

Duha ní cachí ndíi Jeremiás.

<sup>19</sup> Te sátá ñí xíhí té Hèrodés te ní sáhá<sup>n</sup> tucu espíritú xínú cuèchi núú Yá Ndiöxí núú sàni té Chèè òré ndécú-dě nàció<sup>n</sup> Ègíptú, te ní xáha<sup>n</sup>-xi xii-dé:

<sup>20</sup> —Véxi tucu-í càchí tnúhu-í xii-n sã ndácõo-n, te núhú-n ndìhi Jesús ndìhi nãná-gã ñuú cue ñaní tnáhá-n ñáyiú isràél cundecu-ndo, chi sa ní xíhí cue tée cuíní cahni ñaha xii Jesús ní cùu —cachí espíritú-á<sup>n</sup> xáha<sup>n</sup>-xi xii té Chèè núú sàni-dé.

<sup>21</sup> Te té Chèè-á<sup>n</sup> ñí ndacóo-dé, te ní ndee-dé ndìhi Jèsús ndìhi nãná-gã cuánuhú-yu ñuú cue ñáyiú isràél ñáyiú cùu ñaní tnáhá-yu.

<sup>22</sup> Te té Chèè ní níhí-dě tnúhu sá tẽ Arquèlaú ní nucúnutnii-dé núú tãtã-dě té Hèrodés distritú Jùdeá yíndaha-dé ñáyiú. Te ní yùhú té Chèè-á<sup>n</sup>, te ñà túú ní cuíní-dé quíhí<sup>n</sup>-dé cundecu-dé distritú-á<sup>n</sup>. Te Yá Ndiöxí ní cáhá<sup>n</sup>-gá núú sàni-dé, te ní xáha<sup>n</sup>-gã xii-dé sá quíhí<sup>n</sup>-dé distritú Galileá, núú xíá<sup>n</sup> yàcá<sup>n</sup> cuáhá<sup>n</sup>-yu. <sup>23</sup> Te òré ní quexió-yu distritú Galileá, te ní sáhá<sup>n</sup>-yu ñí ñuú nání Nàzarét ní xíndecú-yu. Te duca<sup>n</sup> ñí cuu chi ní quee ndáá-xi

nàcuáa ní cachí cue tée ní xóo cáhá<sup>n</sup> tnúhu Yá Ndiöxí ndéé sanaha sá Jèsús cuu-gá tée ñuú Nàzarét.

**Té Juàá tée dàcuandute ñaha xii ñáyiú cáhá<sup>n</sup>-dé tnúhu Yá Ndiöxí xití yucu**

(Mr. 1:1-8; Lc. 3:1-9, 15-17; Jn. 1:19-28)

**3** Te ní xica nduu sá dúcá<sup>n</sup> ñí cuu, te tée nàni Juáá tée dacuandute ñaha xii ñáyiú ní quexio-dé yucu distritú Jùdeá cáhá<sup>n</sup>-dé tnúhu Yá Ndiöxí núú ñáyiú xití yucu-á<sup>n</sup>. <sup>2</sup> Te xáha<sup>n</sup>-dẽ xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndìhu ndaha ñaha Yá Ndiöxí xii-ndo —càchí-dé xáha<sup>n</sup>-dẽ xii-yu.

<sup>3</sup> Te diu cuèndá té Juàá-á<sup>n</sup> ñí chídó tnùní ndíi Chàiaá tée ní xóo cáhá<sup>n</sup> tnúhu Yá Ndiöxí ndéé sanaha, te duha ndùu tnúhu ní chídó tnùní ndíi cuèndá-dé:

Tècú cáhá<sup>n</sup> níhi ñí tée yìhi xití yucu, te càchí-dé:

“Chí dáñá nchàa ichi cuehé ichi duha ndècu-ndo, te tñii-ndo ichi váha,

Te duca<sup>n</sup> càda-ndo cuèndá cundecu túha-ndo chi véxi Yaá ío cùnuu”, duha quesaha tẽ-á<sup>n</sup>.

Duha ndùu tnúhu ní chídó tnùní ndíi Chàiaá-á<sup>n</sup> cuèndá té Juáá.

<sup>4</sup> Te té Juàá-á<sup>n</sup> ñí xóo cuihnu-dé dóo idi caméyu, te ñí ñí ñí cuu pãñú xití-dé, te ní xóo caxi-dé tíca làngóstá ndìhi ndudí ñúñú cuéchi.

<sup>5</sup> Te ñáyiú ñuú Jerusàlén, ndìhi ñáyiú nchaa ñuú yíndèhu distritú Jùdeá, ndìhi ñáyiú nchaa ñuú cáá

yàtni yúte Jòrdán ní sáhá<sup>n</sup>-yu ní xíndedóho-yu nàcuáa ní cáhá<sup>n</sup> té Juáá. <sup>6</sup>Te ní nguíta-yu ní náhmá-yu nchaa cuéchi-yu núú Yă Ndióxí. Te òré duca<sup>n</sup> nĩ náhmá-yu te ní dácuaándute ñaha té Juáá xií-yu yúte Jòrdán.

<sup>7</sup>Te vai cue téee cùu fariséú ndihi cue téee cùu saducéú cuáhá<sup>n</sup>-güedé núú ndécú tẽ Juáá cuiní-güedé dacuaándute ñaha-dé xii-güedé. Te òré ní quexìo-güedé núú ndécú-dẽ, te ní xáha<sup>n</sup>-dẽ xii-güedé:

—iNchaa nchòhò cúú-ndó dàtná ìí<sup>n</sup> cóó dẽé<sup>n</sup> chi ío cuihna ínì-ndó! ¿Te nása ní cuu núu tnàhá nchòhò ndúcú-ndó nàcuáa cada-ndo càcu nihnu-ndo nũú tnũndòho cahnu vihi ta cuyatni ñaha xii-ndo véxi-i? <sup>8</sup>Te chí cádá vǎha vitna cundecu-ndo cuendá duca<sup>n</sup> cùtnuní sá nĩ dáñá-ndó nchàa ichi cuehé ichi duha ndècu-ndo. <sup>9</sup>Te vá càchí-ndó sǎ ìo càhnu cuu-ndo cuendá sá cúú-ndó ñàní tnàhá ndíi Àbrahám. Chi cuèi ndéé yúú te ndacu Yá Ndióxí ndada-gá ñáyiu te cuú-yu ñàní tnàhá ndíi Àbrahám. <sup>10</sup>Te caá chi ndècu túha-xi sá quèhndé-xi nchaa yutnu sá dúcá<sup>n</sup> ñà túú càváha sávidí-xi-á<sup>n</sup>, chi nchaa yutnu-á<sup>n</sup> tèhndé-xi te cuángée-xi núú ñuhú càyú-xi. Te duha sǎtnàhá-xi ndoho nchaa ñáyiu ñà túú quide váha-á<sup>n</sup> chi nchaa ñáyiu ñà túú quide váha cùú-yu dàtná nchaa yutnu sá ñà túú càváha sávidí-xi. <sup>11</sup>Te na càchí tnúhu ndáá-í xii-ndo sǎ yǎhú dácuaándute-í mee-ni ñáyiu ní dáñá nchàa ichi cuehé ichi duha. Dico nchícú<sup>n</sup> tucu íngá téee véxi, te téee-á<sup>n</sup> taxi-dé Espíritú Yă Ndióxí cundecu

ndihi-ndo. Te cùu-xi datná ìí<sup>n</sup> ñuhú, chi ndada ndoo ndada nine-xi ínì-ndó. Te téee-á<sup>n</sup> ìo-gá cùnùu-dé dàcúúxí yǎhú, chi yúhú cùú-í ìí<sup>n</sup> téee duu<sup>n</sup> duu<sup>n</sup> ñà túú tàú cuita nehe ni chàú-dé dico quide-í chiù<sup>n</sup>-dé. <sup>12</sup>Te téee-á<sup>n</sup> sa véxi túha-dé sá cádá dèí<sup>n</sup> ñaha-dé xii-o dàtná quidé ñáyiu ndàda ndoo triú, chi ñáyiu-á<sup>n</sup> sa nèhe túha-ná-yu yaxí<sup>n</sup>-yu òré nánãni cuendá ndada ndoo-yu. Te òré ndádá ndòo-yu triú-á<sup>n</sup> te dàquee díí<sup>n</sup>-yu mihi-xi, te tàxúha-yu mee-nǎ triú-á<sup>n</sup> te sǎhmí-yu mihi-xi-á<sup>n</sup>. Te dàtná quidé-yu mihi triú-á<sup>n</sup> duca<sup>n</sup> sǎtnahá-xi cada ñaha téee-á<sup>n</sup> xii nchaa ñáyiu ñà túú quide váha, chi daquèhí<sup>n</sup> ñáhá-dẽ xií-yu núú ñuhú núú càyú, te ñuhú-á<sup>n</sup> ñà túú tnàhí ndàhvá —càchí-dé xǎha<sup>n</sup>-dẽ xii-güedé.

### Sàndute Jesús

(Mr. 1:9-11; Lc. 3:21-22)

<sup>13</sup>Te Jèsús ní quee-gá distrìtú Galileá cuáhá<sup>n</sup>-gá yúte Jòrdán núú ndécú tẽ Juáá cuendá dacuaándute ñaha-dé xii-gá. <sup>14</sup>Te òré ní quexìo Jesús núú ndécú tẽ Juáá, te ñà cuiní-dé dacuaándute ñaha-dé xii-gá ní cùu, te ní xáha<sup>n</sup>-dẽ xii-gá:

—Yúhú tàú-í sá dácuaándute ñaha-n xii-í, te ñà díú dà yúhú dacuaándute ñaha-í xii-n —càchí-dé xǎha<sup>n</sup>-dẽ xii-gá.

<sup>15</sup>Te Jèsús ní xáha<sup>n</sup>-gǎ xii-dé: —Quehe<sup>n</sup> dañá, chi dacuití xìnì ñuhu-xi duca<sup>n</sup> cada-o nacuáa cundáá-ó nũú Yă Ndióxí —càchí-gá xǎha<sup>n</sup>-gǎ xii-dé.

Te té Juáá-á<sup>n</sup> nĩ sáhá<sup>n</sup> uu<sup>n</sup>-dé tnúhu ní xáha<sup>n</sup> Jèsús xii-dé. <sup>16</sup>Te ní dácuaándute-dé Jèsús. Te òré

ní nene-gá xítí ndute te ní xiní-gá nchí andiu, te ní quee Espíritú Yá Ndiöxí véxi cuu<sup>n</sup>-xi ngúndecu ndihi ñaha-xi xii-gá, te dàtná cáá ì<sup>n</sup> lómá cáá Espíritú-á<sup>n</sup> véxi cuu<sup>n</sup>-xi. <sup>17</sup>Te òré-á<sup>n</sup> ní tecú ní cáhá<sup>n</sup> Yá Ndiöxí ndéé andiu, te xáha<sup>n</sup>-gã xii Jèsús:

—Yòhó cúú-n Dèhe-í tée ío cùu iní-í te ío cùdíí iní ñáhà-í xii-n — càchí-gá xáha<sup>n</sup>-gã xii Jèsús.

**Sácuíhná quidé yica-xi cada Jesús sá ñà túú tàú-gá cada-gá ní cùu**

(Mr. 1:12-13; Lc. 4:1-13)

**4** Te Espíritú Yá Ndiöxí ndécá-xí Jèsús cuáhá<sup>n</sup> ì<sup>n</sup> xítí yucu cuendá yàcá<sup>n</sup> cundecu tnaa-gá, te yàcá<sup>n</sup> quexìo sácuíhná coto ndeé ñáhà-xí xii-gá te núu ndisa sá vã cádá-gã ì<sup>n</sup> sá ñà túú tàú-gá cada-gá.

<sup>2</sup>Te Jèsús ñá ní xèxi-gá údico nduu údico niú, te duca<sup>n</sup> te dàtnùní ní xicá<sup>n</sup> iní-gá caxi-gá. <sup>3</sup>Te sátá dúcá<sup>n</sup> te ní quexìo sácuíhná quidé yica-xi cada Jesús ì<sup>n</sup> sá ñà túú tàú-gá cada-gá, te xáha<sup>n</sup>-xi xii-gá: —Te núu ndisa sá cúú-n Dèhe Yá Ndiöxí te cúñaha xii yúú-a na ndùu-xi paá —càchí-xi xáha<sup>n</sup>-xi xii-gá.

<sup>4</sup>Te Jèsús ní xáha<sup>n</sup>-gã xii-xi: —Núú tütú Yá Ndiöxí càchí-xi: “Ñá díú mèe-ni paá candeca-xi iní ñáyiú ñuyíú, chi tnáhà nchaa tnúhu càhá<sup>n</sup> Yá Ndiöxí candeca-xi iní-yu”, duha càchí-xi núú tütú-gá —càchí-gá xáha<sup>n</sup>-gã xii-xi.

<sup>5</sup>Te dàtnùní sácuíhná-ã<sup>n</sup> ndécá ñaha-xi xii-gá cuáhá<sup>n</sup> ñuu Jerusàlén, te yàcá<sup>n</sup> ní xáha<sup>n</sup>-xi xii-gá cuásaá-gá díquí véñúhu càhnu sá ío cùnuu núú ñáyiú isràél, <sup>6</sup>te dàtnùní ní xáha<sup>n</sup> tucu-xi xii-gá:

—Te núu ndisa cùu-n Dèhe Yá Ndiöxí te cuandèe ndava núú ñúhú cuendá quee ndáá-xi nàcuáa càhá<sup>n</sup>-xi núú tütú-gá núú càchí-xi: “Yá Ndiöxí tendaha-gã cue espíritú xínú cuèchi núú-gã quixi-xi cuendá coto ñaha-xi xii-n, te núú ndáhà-xí càundodo-n cuendá sá vã dánícuèhé yúú sáhà-n”, duha càchí-xi núú tütú-gá —càchí sácuíhná-ã<sup>n</sup> xáha<sup>n</sup>-xi xii Jesús.

<sup>7</sup>Te Jèsús ní xáha<sup>n</sup>-gã xii-xi:

—Te càchí tucu-xi núú tütú Yá Ndiöxí: “Vá cání iní-n còto ndeé-n Dütú Ndiöxí Yaá cúú Ndiöxí-n cuendá-ni sá cuíní-n sã dácäcu nihnu ñaha-gã xii-n ì<sup>n</sup> sá sání iní-n càda-n”, duha càchí-xi núú tütú-gá —càchí-gá xáha<sup>n</sup>-gã xii-xi.

<sup>8</sup>Te sácuíhná ndécá tucu-xi Jesús cuáhá<sup>n</sup> ì<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhà-xí xii-gá nchaandí túhú nàció<sup>n</sup> cáá ñuyíú, ndihi nchaa sá vãha lò ì<sup>n</sup> ì<sup>n</sup> nàció<sup>n</sup>-á<sup>n</sup>. <sup>9</sup>Te ní xáha<sup>n</sup>-xi xii-gá:

—Te núu yòhó ngüíñí xítí-n nùú-í chiñuhu ñaha-n xii-í ñá, te taxi cuendá-í nchaa sá ní dánèhé ñáhà-í-a cuu cuendá-n —càchí-xi xáha<sup>n</sup>-xi xii-gá.

<sup>10</sup>Te Jèsús ní xáha<sup>n</sup>-gã xii-xi:

—Xocuñí yòhó sácuíhná nùú ndécú-í-a, chi vá cúú càda-í nàcuáa càchí-n, chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ñuu-ni-gá cada-ndo nchaa nacuáa càhá<sup>n</sup>-gã”, duha càchí-xi núú tütú-gá —càchí-gá xáha<sup>n</sup>-gã xii-xi.

<sup>11</sup>Te dàtnùní sácuíhná ní dáñá-xí Jèsús ní xica-xi cuáhá<sup>n</sup>-xi. Te sátá dúcá<sup>n</sup> te ní quexìo cue espíritú xínú cuèchi núú Yá Ndiöxí ní xinu cuèchi-xi núú Jèsús.

**Distrítú Galileá ní chisaha Jèsús  
chiù<sup>n</sup> ní táhú Tǎtá-gǎ Dútú Ndiöxi  
cada-gá**

(Mr. 1:14-15; Lc. 4:14-15)

<sup>12</sup>Te òré ní níhí Jèsús tnúhu sá nǐ ngava té Juàá téé dàcuandute ñaha xii ñáyiú vecaá, te ní xica-gá cuáhá<sup>n</sup>-gá distrítú Galileá. <sup>13</sup>Te ní ñà túú ní xíndecu-gá ñuú Nazàrét, chi ní yáha-gá cuáhá<sup>n</sup>-gá ndéé ñuú Capèrnaúm yàcá<sup>n</sup> ní xíndecu-gá, te ñuú-á<sup>n</sup> cáá yàtni yuhu lagúná, te yatni xíá<sup>n</sup> cáá ñuhu nani Zabulón, ndíhi ñuhu nàni Neftalí. <sup>14</sup>Te duca<sup>n</sup> nǐ cuu chi ní quee ndáá-xi nàcuáa ní chídó tnùní ndíi Chàíá téé ní xóo cáhá<sup>n</sup> tnúhu Yá Ndiöxi ndéé sanaha nǔú tütú-gá núú càchí-xi:

<sup>15</sup>Ñuhu nàni Zabulón, ndíhi ñuhu nàni Neftalí, ñuhu-á<sup>n</sup> yíndèhu-xi distrítú Galileá, te xíá<sup>n</sup> xíndecu cue ñáyiú ñà túú cùú ñáyiú isràèl, te càa-xi yatni yuhu lagúná te ndàa ìngá xio yúte Jòrdán cùú-xí.

<sup>16</sup>Te cue ñáyiú-á<sup>n</sup> ndécü-yu ìi<sup>n</sup> núú néé chi ndècú-yu ichi cuèhé ichi duha, te sáá nduu te cada iní-ndó sǎ ñáyiú-á<sup>n</sup> queé-yu núú ditó chi vá cùndècu-gá-yu ichi cuèhé ichi duha.

Te ñuú-ni ñáyiú-á<sup>n</sup> cùú-yu ñáyiú ta xíta nihnu duu<sup>n</sup> cuáhá<sup>n</sup>, dico sáá nduu te vá cuíta nihnu-gá-yu.

Duha ní chídó tnùní ndíi núú tütú-gá.

<sup>17</sup>Te dàvá-á<sup>n</sup> nǐ ngúíta Jèsús ní dǎnèhé-gá ñáyiú, te ní xáha<sup>n</sup>-gǎ xií-yu:

—Chí dándixi túu iní sǎ ñà túú quide váha-ndo ndècu-ndo te daña-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndiöxi xii-ndo — càchí-gá xáha<sup>n</sup>-gǎ xií-yu.

**Jèsús càhá<sup>n</sup>-gá cùmí tnàhá cue téé  
tnèi chácá**

(Mr. 1:16-20; Lc. 5:1-11)

<sup>18</sup>Te Jèsús ñuhú-gǎ ichi cuáhá<sup>n</sup>-gá tá yáha-gá yuhu làgúná Galileá, te ní xiní-gá úú tnàhá cue téé xídáquèe-güedé ñunu-güedé xití ndute tnèi-güedé chácá, chi quiti tnàhí-á<sup>n</sup> cùú chiù<sup>n</sup>-güedé tnèi-güedè-dí. Te ìi<sup>n</sup>-dé nání-dé Xímú, àdi Pelú chi úú ñuú-dé, te ñaní-dé cùú ìngá téé ndíhi-dé te téé-á<sup>n</sup> nání-dé Ndríxí. <sup>19</sup>Te Jèsús ní xáha<sup>n</sup>-gǎ xii-güedé:

—Chí dǎná chiù<sup>n</sup> quide-ndo-á<sup>n</sup> te quixi-ndo chìtnahá ñàhá-ndó xì-í, te taxi-í ìngá núú chiù<sup>n</sup> cada-ndo chi quíhí<sup>n</sup>-ndó dàcàhá<sup>n</sup>-ndó ñáyiú cuendá tuha ñàhá-yu xii-í — càchí-gá xáha<sup>n</sup>-gǎ xii-güedé.

<sup>20</sup>Te òré-ni-á<sup>n</sup> nǐ dǎná cuè téé-á<sup>n</sup> ñunu-güedé, te ní tuha-güedé Jèsús.

<sup>21</sup>Te ní xica tucu Jèsús cuáhá<sup>n</sup>-gá luha-gá, te ní xiní tucu-gá úú-gá tnàhá cue téé tnèi chácá. Te ìi<sup>n</sup> téé-á<sup>n</sup> nání-dé Jàcobó, te ñaní-dé cùú ìngá téé ndíhi-dé te téé-á<sup>n</sup> nání-dé Juàá, te ndí ndúú-güedé cùú-güedé déhe té Zebèdeú. Te xíxínucóo-güedé ndíhi tǎtá-güedé xití bàrcú xínatícu-güedé ñunu-güedé, te Jèsús ní cana ñaha-gǎ xii-güedé.

<sup>22</sup>Te òré-ni-á<sup>n</sup> nǐ dándöo-güedé bàrcú-güedé, ndíhi tǎtá-güedé, te ní tuha ñaha-güedé xii-gá.

**Jèsús dánèhé-gá cuéhé víhí ñáyiú**

(Lc. 6:17-19)

<sup>23</sup>Te Jèsús tá xica ndodo-gá nihí distritú Galileá cuáhá<sup>n</sup> tá dānehé-gá ñáyiú tnúhu váha tnúhu sá sánú ìchi ñaha xí-yu nàcuáa ndfhu ndaha ñaha Yá Ndiöxí xí-yu. Te ndi tnahá ì<sup>n</sup> ì<sup>n</sup> ñúú sàá-gá te duca<sup>n</sup> cuānguihu-gá xití veñúhu dānehé-gá ñáyiú tnúhu-á<sup>n</sup>. Te ndi dí<sup>n</sup> ndi dí<sup>n</sup> núú cuéhé tñahá ì<sup>n</sup> ì<sup>n</sup> ñáyiú dico nchaa-ní-yu ta quide tátna-gá cuáhá<sup>n</sup>. <sup>24</sup>Te ndéé nchaa ñáyiú yñdehu distritú Sìriá ní níhí-yu tnúhu nchaa nàcuáa quide Jèsús. Te ní queé-yu ñúú-yu te ndècá-yu nchaa ñáyiú tñahá ndi dí<sup>n</sup> núú cuéhé cuáhá<sup>n</sup> núú ndécú Jèsús. Te cuèi ñáyiú xiyíhí, ndihí ñáyiú ñá túú-gã càndá nihnu, ndihí ñáyiú yñhi ñaha espíritú cundñhi yucu ñávaha ndècá-yu cuáhá<sup>n</sup> núú-gã, te nchaa-yu ní quide tátna ñaha-gã xí-yu. <sup>25</sup>Te ío vài ñáyiú ní chinchícú<sup>n</sup> ñáhá xii Jèsús, chi ní chinchícú<sup>n</sup> ñáhá ñáyiú distritú Galileá, ndihí ñáyiú nchaa ñúú xíndáa Dècápolis, ndihí ñáyiú ñúú Jerusàlén, ndihí cue ñáyiú nchaa ñúú yíndèhu distritú Júdeá, ndihí ñáyiú xíndecu yatni yúte Jòrdán ndaa xio quene nchíanchii.

**Jèsús núcõo-gá ì<sup>n</sup> núú  
tìndúú dánèhé-gá ñáyiú**

**5** Te sátá ní xiní Jèsús sá cuéhé víhí ñáyiú nchícú<sup>n</sup> ñáhá xii-gá, te ní xica-gá cuásaá-gá ì<sup>n</sup> núú tìndúú te xía<sup>n</sup> ní ngóo-gá, te cue téé xica cuu ndihí-gá ní nadúcú<sup>n</sup> ndèé ñáhá-güedè xii-gá. <sup>2</sup>Te ní ngúíta-gá dánèhé ñáhá-gã xii-güedé ndihí cue ñáyiú-á<sup>n</sup>, te xáha<sup>n</sup>-gá:

**Cuèndá ñáyiú ío váha táhú-xi**

(Lc. 6:20-23)

<sup>3</sup>—Váha táhú nchaa ñáyiú cùtnuní iní-xi sá ío-gá cúmāñ-yu cudñú-yu núú Yá Ndiöxí, chi ñáyiú-á<sup>n</sup> nduu táhú-yu ndfhu ndaha ñaha-gá xí-yu.

<sup>4</sup>Váha táhú nchaa ñáyiú ndàhyú sá ndñhú iní-yu, chi Yá Ndiöxí cuāñaha-gã tnúhu ndee iní cundecu ndihí-yu.

<sup>5</sup>Váha táhú nchaa ñáyiú ndàhú iní-xi, chi ñáyiú-á<sup>n</sup> nduu táhú-yu cundecú-yu ì<sup>n</sup> xichi núú cuāñaha Yá Ndiöxí xí-yu.

<sup>6</sup>Váha táhú nchaa ñáyiú ío cuèní cada nchaa nàcuáa càhá<sup>n</sup> Yá Ndiöxí, chi ñáyiú-á<sup>n</sup> ío nduu vétú iní-yu.

<sup>7</sup>Váha táhú nchaa ñáyiú cùndahú iní tñaha ñáyiú-xi, chi ñáyiú-á<sup>n</sup> ñúu-ni duca<sup>n</sup> càda ñaha Yá Ndiöxí xí-yu cundàhú iní ñáhá-gã.

<sup>8</sup>Váha táhú nchaa ñáyiú ní nduu ndoo ní nduu nine iní-xi, chi cue ñáyiú-á<sup>n</sup> nduu táhú-yu cundecú-yu ndihí Yá Ndiöxí.

<sup>9</sup>Váha táhú nchaa ñáyiú càhá<sup>n</sup> dóho tñaha ñáyiú-xi nàcuáa cundecu ndihí váha tñahá-yu, chi cùtnuní sá ñáyiú-á<sup>n</sup> cuú-yu déhe Yá Ndiöxí.

<sup>10</sup>Váha táhú nchaa ñáyiú ío ndòho ndecu ñuyúí-a sá cuèndá sá quidè-yu nàcuáa càhá<sup>n</sup> Yá Ndiöxí, chi ñáyiú-á<sup>n</sup> nduu táhú-yu ndfhu ndaha ñaha-gá xí-yu.

<sup>11</sup>Te cùu-ndo ñáyiú ío váha táhú-xi te núu na cùcuèhé ñáhá ñáyiú, àdi cada úhú ñáhã-yu xii-ndo, àdi dacao díquí ñáhã-yu nándi cuèchi neñúú xii-ndo sá cuèndá-í. <sup>12</sup>Te órè duca<sup>n</sup> na càda

ñahá-yu xii-ndo te cudíí víhí-ní  
 ìní-ndó cùndecu-ndo, chi ío váha  
 càa sá ndécú àndiu nduu táhú-ndó  
 cùndecu ndíhi-ndo nduu na saá-ndó  
 yácá<sup>n</sup> cundecu-ndo, chi ñiu-ni duca<sup>n</sup>  
 ní xóo cada ñaha cuè ñaní tnáhá-yu  
 xii cue téé ní xóo cáhá<sup>n</sup> tnúhu Yá  
 Ndiöxí ní xíndecu ndéé sanaha.

**Cuèndá ñíí ndíhi cuèndá ñuhu**

(Mr. 9:50; Lc. 14:34-35)

13<sup>o</sup>Te nchòhó cada iní-ndó sá  
 cúú-ndó dàtná ñíí cuèndá ñuyíú-a.  
 Te ñíí chi nàndíhi-xi dico núu na  
 ndùu víxi<sup>n</sup>-xi, te ñá túú-gá nándíhi-xi  
 chi dǎngoyo-ná-ó, te yáha ñáyiú  
 xěnihnú-yu. Te duca<sup>n</sup> sǎtnahá-xi cùu  
 nchohó chi cùu-ndo datná ñíí vǎha  
 te núu na càda váha-ndo, te núu vá  
 cadá vǎha-ndo te quee tǎhú-ndó.

14<sup>o</sup>Te nchòhó cada iní-ndó sá  
 cúú-ndó dàtná ìí<sup>n</sup> sá dáyèhé ndécú  
 ñùyíú-a, chi sànu ichi-ndo ñáyiú  
 ichi váha. Te nchòhó xìní-ndó sá  
 nǔu ìí<sup>n</sup> ñuú cáá ìí<sup>n</sup> núú tǎndúú te  
 vá cúú càchí-ó sá nguǎvǎha-xi. 15<sup>o</sup>Te  
 ñá túú xìní-ó ìí<sup>n</sup> ñáyiú teñuhú-yu ìí<sup>n</sup>  
 lìntérná te chiváha-yu xití<sup>n</sup> ìí<sup>n</sup> càjá,  
 chi tàxi ndecú-yu núú ñnu cuèndá  
 cutnùní núu nchàa ñáyiú ndècu  
 vehe. 16<sup>o</sup>Te duca<sup>n</sup> càda nchohó cada  
 váha-ndo dàtná quidé ìí<sup>n</sup> ñuhu  
 dayèhe-xi núú ñáyiú, te duca<sup>n</sup> quini  
 ñáyiú nàcuáa quide-ndo ndecu-ndo,  
 te tnàhá-yu cachí-yu sá ìo càhnu  
 cuu Dútú Ndiöxí Yáá cúú Tǎtá-ndó  
 ndècu andiu chi quini-yu sá quidé  
 vǎha-ndo ndècu-ndo.

**Cuèndá tnúhu ní chídó  
 tnùní ndíí Moisés**

17<sup>o</sup>Te vá cání ìní-ndó sá yǔhú  
 véxi-í xocàni-í tnúhu ní chídó

tnùní ndíí Moisés, te ni vǎ cání  
 ìní-ndó sá véxi-í xocàni-í tnúhu ní  
 chídó tnùní cue téé ní xóo cáhá<sup>n</sup>  
 tnúhu Yá Ndiöxí ndéé sanaha, chi  
 yúhú véxi-í sá cadá-í nàcuáa càhá<sup>n</sup>  
 nchaa tnúhu-á<sup>n</sup>. 18<sup>o</sup>Te na càchí  
 tnúhu ndáá-í xii-ndo sá tnúhu ní  
 chídó tnùní ndíí Moisés ío ndáá  
 càhá<sup>n</sup>-xi, chi dacuitíí cùu nchaa  
 nacuáa càhá<sup>n</sup>-xi. Te yáchí-gá naa  
 andiu ndíhi ñuyíú dàcúúxí sá quee  
 cáva ìí<sup>n</sup> tnúhu-á<sup>n</sup>. 19<sup>o</sup>Núu xǎ<sup>n</sup> nchaa  
 ñáyiú na càchí sá dává tnúhu ní  
 chídó tnùní ndíí Moisés ñá túú xìní  
 ñuhu-xi chi ñá túú cùnuu-xi, te  
 ñáyiú-á<sup>n</sup> ñiu-ni duca<sup>n</sup> dǎnehé-yu  
 nchaa dava-gá tnàha ñáyiú-yu, te  
 sá dúcá<sup>n</sup> quidé-yu te vá cùnùu  
 vihí-yu núu ndécú Yǎ Ndiöxí táxí  
 tnùní-gá, chi cuú-yu dàtná ìí<sup>n</sup> ñáyiú  
 nchicú<sup>n</sup> cuí-nǎ. Dico nchaa ñáyiú  
 nchicú<sup>n</sup> nihnu quide nchaa nacuáa  
 càhá<sup>n</sup> nchaa tnúhu-á<sup>n</sup>, te ñiu-ni  
 duca<sup>n</sup> dǎnehé-yu nchaa dava-gá  
 tnàha ñáyiú-yu, te ñáyiú-á<sup>n</sup> ìo  
 cunùu-yu núu ndécú Yǎ Ndiöxí táxí  
 tnùní-gá. 20<sup>o</sup>Te na càchí tnúhu-í  
 xii-ndo sá ìo xìní ñuhu-xi cada-ndo  
 nchaa nacuáa càhá<sup>n</sup> Yǎ Ndiöxí, te  
 vá cadá-ndó dàtná xǐquide cue téé  
 dǎnehé ñáhá xìi ñáyiú nchaa tnúhu  
 ní chídó tnùní ndíí Moisés, ndíhi  
 dàtná xǐquide cue téé cùu fariséú,  
 chi núu na càda-ndo datná xǐquide  
 cue téé-á<sup>n</sup> ñá, te vá ndúú tǎhú-ndó  
 ndǐhu ndaha ñàha Yá Ndiöxí  
 xii-ndo.

**Jèsús càhá<sup>n</sup>-gá cuèndá ñáyiú cùdèé<sup>n</sup>**

(Lc. 12:57-59)

21<sup>o</sup>Te nchòhó sa xìní-ndó sá ncháá  
 ñáyiú ní cuu ñaní tnáhá-ndó ní  
 xíndecu ndéé sanaha ní níhí-yu



tnúhu sá vǎ cúú cǎhni-yu tnàha ñáyíu-yu, chi núu duca<sup>n</sup> na càdǎ-yu te nacháhu-yu cuéchi-yu. <sup>22</sup>Dico vitna na cǎchí tnúhu-í xii-ndo sǎ nǔu ndédani cǎa-ndo na cudéé<sup>n</sup>-ndó nǔú tnàha ñáyíu-ndo, te nacháhu-ndo sǎ dúcá<sup>n</sup> quide-ndo, àdi núu na cǔcuèhé-ndǒ-yu te núú chítú nǔú tàcǎ cundáá cuéchi-ndo te núu duca<sup>n</sup> na càda-ndo, àdi núu nà cúu-ndo tnàha ñáyíu-ndo ì<sup>n</sup> tnúhu vée vìhi, te cucuéchi vìhi xii-ndo chi quíhí<sup>n</sup>-ndó nǔú ùhú núú ndàhú.

<sup>23</sup>Te xǎ<sup>n</sup> nǔu nchòhó òré ndécú ndìhi-ndo ì<sup>n</sup> sá cuiní-ndó cuǎha-ndo Yǎ Ndiòxí nduu táhú-gǎ, te òré cuáhá<sup>n</sup>-ndó cuǎñaha-ndo xii-gǎ, te òré ní quexio-ndo núú dúcá<sup>n</sup> cuǎñaha-ndo xii-gǎ sá ndúú tǎhú-gǎ, te ní ndacu iní-ndó sǎ ndécú ñáyíu ñǎ túú cùu váha iní ñáhá xii-ndo cuendá ì<sup>n</sup> sá ní cumání nǔú tnáhá-ndó. <sup>24</sup>Te dǎndóo-ndo sǎ dúcá<sup>n</sup> nèhe-ndo cuáhá<sup>n</sup> nduu táhú Yǎ Ndiòxí, te díhna-gǎ quíhí<sup>n</sup>-ndó nàcahá<sup>n</sup> cǎhnú ìní tnáhá-ndó ndìhi ñáyíu ñǎ túú cùu váha iní ñáhá xii-ndo-á<sup>n</sup>, te dǎtnùní duca<sup>n</sup> te quíhí<sup>n</sup>-ndó cuǎha-ndo Yǎ Ndiòxí sá ndúú tǎhú-gǎ.

<sup>25</sup>Te núu ìó ì<sup>n</sup>-ndo ní sáhá<sup>n</sup> ñáyíu núú tée cùchiu<sup>n</sup> ní sacá<sup>n</sup> cuéchi-yu cuendá-ndó cuendá ì<sup>n</sup> sá ní quide-ndo, te òré ní naníhí tnáhá-ndó ndìhí-yu cuáhá<sup>n</sup>-ndó nǔú tée cùchiu<sup>n</sup>-á<sup>n</sup>, te nacáhá<sup>n</sup> cǎhnú ìní tnáhá-ndó ndìhí-yu cuendá sá vǎ cuǎha cuendá ñáhá-gǎ-yu xii-ndo nǔú tǎ cùchiu<sup>n</sup>, chi núu duca<sup>n</sup> na càdǎ-yu te tée cùchiu<sup>n</sup>-á<sup>n</sup> cuǎha cuendá ñáhá-dě xii-ndo nǔú cuè

tée cùu poleciá, te cue tée-á<sup>n</sup> chihi ñaha-güedě vecaá xii-ndo. <sup>26</sup>Te na cǎchí tnúhu ndáá-í xii-ndo sǎ vǎ cǎcu-ndo te núu na ngáva-ndo vecaá ndéé nacháhu-ndo nchàa sǎ tǎú-ndó.

### **Cuendá cue ñáyíu ñǎ túú quide váha**

<sup>27</sup>Te nchòhó sa xíní-ndó nàcuáa nduu tnúhu ní cǎhá<sup>n</sup> cue tée ní xíndecu ndéé sanaha, te duha ní cǎchí-güedé: “Nchaa cue tée vá cúú cǎhá<sup>n</sup> ndìhí-güedé ñadìhí te núu ñǎ díú ñadìhí-güedé cùú-yu, te díu-ni duca<sup>n</sup> tucu nchaa cue ñáyíu dìhí vá cúú cǎhá<sup>n</sup> ndìhí-yu tée te núu ñǎ díú yǎ-yu cùu-güedé”, duha ní cachi-güedé. <sup>28</sup>Dico yúhú cǎchí tnúhu-í xii-ndo sǎ ndèda-ni cǎa cue tée na cùndehe ì<sup>n</sup> ñadìhí te núu na cǎni iní-güedé cundecu díí ìní-güedé ndìhí-yu te cada iní-ndó sǎ dǎtná sá sá ní cǎhá<sup>n</sup> ndìhi ñaha-güedě xií-yu sá dúcá<sup>n</sup> ní sani iní-güedé.

<sup>29</sup>Te núu ì<sup>n</sup> xio tinùu-ndo quide-xi quide-ndo nándi sá cuèhé sá dúhá te tava-ndo, chi váha-gǎ sá ná cuíta te ñǎ díú ñìhí ní ndúú yìqui cuñú-ndó quíhí<sup>n</sup>-xi núú ùhú núú ndàhú. <sup>30</sup>Te núu ì<sup>n</sup> xio ndaha-ndo quide-xi quide-ndo nándi sá cuèhé sá dúhá te quehndé-ndó, chi váha-gǎ sá ná cuíta ì<sup>n</sup> xio ndaha-ndo te ñǎ díú sǎ ñìhí ní ndúú yìqui cuñú-ndó quíhí<sup>n</sup>-xi núú ùhú núú ndàhú.

### **Jesús cǎhá<sup>n</sup>-gǎ cuendá cue ñáyíu dàña tnaha**

(Mt. 19:9; Mr. 10:11-12; Lc. 16:18)

<sup>31</sup>Te nchòhó sa nàha tucu-ndo nacuáa ní cǎhá<sup>n</sup> tucu cue tée ní

xíndecu ndéé sanaha, te duha ní cachí-güedé: “Te núu ìí<sup>n</sup> téé na dàña tnaha-dé ndìhi ñadìhí-dé, te xini ñuhu-xi cadúha-dé ìí<sup>n</sup> tutú cuáñaha-dě núu càhá<sup>n</sup>-xi sá ní dáñá ñàha-dé”, duha ní cachí-güedé.

<sup>32</sup>Dico yúhú cächí tnúhu-í xii-ndo sã cúú dàña ìí<sup>n</sup> téé ñadìhí-dé, te núu cùtnuní ndáá iní-dé sá càhá<sup>n</sup> ndìhi-a<sup>n</sup> ingá téé. Dico núu ñá túú dùca<sup>n</sup> quide-a<sup>n</sup> te ñá túú ndùu váha-xi daña ñàha-dé. Te núu ñá túú dùca<sup>n</sup> quide ñadìhí-dé, te cada iní-ó sã méé-dě ní sanu ichi ñaha-dě xii-a<sup>n</sup> cáhá<sup>n</sup> ndìhi-a<sup>n</sup> ingá téé te núu na dàña ñaha-dé. Te téé na nàquehe<sup>n</sup> ñaha xii ñaha ní dáñá ñaha yii-xi-á<sup>n</sup>, te ñá ní ñá túú ní quide váha-dé sá dúcá<sup>n</sup> ní nàquehe<sup>n</sup>-dé ñaha-á<sup>n</sup>.

**Ñáyiú cãcunehe ñaha xii Yá  
Ndióxí cuendá cutnùní iní  
tnàha ñáyiú-yu sá ndáá cadá-yu  
ìí<sup>n</sup> sá sání iní-yu cadá-yu**

<sup>33</sup>Te sa nàha tucu-ndo nacuaá ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Te núu cãcunehe-ndo Yá Ndióxí núu tnàha ñáyiú-ndo nãcuáa cutnùní iní-yu sá ndáá cada-ndo ìí<sup>n</sup> sá sání iní-ndo càda-ndo, te cada-ndo”, duha ní cáhá<sup>n</sup> dóho tnàha-güedé. <sup>34</sup>Dico yúhú cächí tnúhu-í xii-ndo sã ñà túú nã cacunehe-ndo sã ndàa cada-ndo ìí<sup>n</sup> sá sání iní-ndo càda-ndo. Te ni vã cãcú nèhe-ndo andüu chi yàcá<sup>n</sup> cúú-xí nũú núcõ Yá Ndióxí táxi tnùní-gá. <sup>35</sup>Te ni vã cãcú nèhe-ndo ñuyúú-a, chi tnàhá ñuyúú-a ndècu-gá, te ni vã cãcú nèhe-ndo ñuú Jerusàlén chi ñuú-á<sup>n</sup>

cúú cuendá-gá, te ñá-gá cúú-gã Yá ío cùnuu. <sup>36</sup>Te ni vã cãcú nèhe-ndo díquí-ndó chi nàha-ndo sá ní ìí<sup>n</sup> idi díquí-ndó ñã ndácú-ndó ndàda cuixí<sup>n</sup>-ndó àdi ndada tnuu-ndo. <sup>37</sup>Te váha-gá sá nũu ìí<sup>n</sup> sá sání iní-ndo càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chi nchaa dava-gá sá chídó-ndó càhá<sup>n</sup>-ndó òrè duca<sup>n</sup> sàni iní-ndo càda-ndo ìí<sup>n</sup> sá cadá-ndó cùu-xi sá dácàhu iní ñàhá yùcu ñávàha.

**Cuendá ñáyiú nàchinaa sá quidé  
ñàha tnaha ñáyiú-xi**

(Lc. 6:29-30)

<sup>38</sup>Te sa nàha tucu-ndo nacuaá ní cáhá<sup>n</sup> tucu cue téé ní xíndecu ndéé sanaha, chi cue téé-á<sup>n</sup> ní cachí-güedé: “Ñáyiú na càda ñaha tnaha ñáyiú-xi ìí<sup>n</sup> sá ñà túú vãha, te nanchòcáva-yu nachinaá-yu sá ní quide ñaha tnàha ñáyiú-yu”, duha ní cachí-güedé. <sup>39</sup>Dico yúhú cächí tnúhu-í xii-ndo sã ñà túú nã cada-ndo nchaa cue ñáyiú cuihna iní-xi te núu quide ñahá-yu ìí<sup>n</sup> sá ñà túú vãha xii-ndo. Te núu ní canihá-yu ìí<sup>n</sup> xito te cuìní tucú-yu canihá-yu ingá xito te daña-ndo na cànihá-yu. <sup>40</sup>Àdi ní sacá<sup>n</sup> cuéchi-yu núu cuè téé cùchiu<sup>n</sup> cuendá-ndó, te cuìní-yu quendeé-yu dúhnú-ndó te daña-ndo na canehé-yu quíhí<sup>n</sup>, te tnàhá-ni dóó ndíxí ndòdo-ndo daña-ndo na canehé-yu quíhí<sup>n</sup>. <sup>41</sup>Te núu quide yicá-yu caca-ndo dàtná úú kilómetrú cuido-ndo ndàchiú<sup>n</sup>-yu ña, te chido-ndo úú-gá tucu kilómetrú cuido-ndo ndàchiú<sup>n</sup>-yu. <sup>42</sup>Te núu ò ìí<sup>n</sup> sá xicá<sup>n</sup>-yu núú-ndó te cuáñaha-ndo,

àdi ió i<sup>n</sup> sá sánùú-yu núú-ndó te  
cuañaha òu-ndo.

**Cuu iní-ó nchaa ñáyiú cùu úhú iní  
ñáhá xii-o**

(Lc. 6:27-28, 32-36)

<sup>43</sup>Te sa nàha tucu-ndo nacuaá  
ní cachí tucu cue téé ní xíndecu  
ndéé sanaha, chi cue téé-á<sup>n</sup> ñí  
cachí-güedé: “Cuu iní-ndó cué  
ñáyiú ndècu ndìhi váha-ndo, te cuu  
úhú iní-ndó cué ñáyiú cùu úhú iní  
ñáhá xii-ndo”, duha ní cachí-güedé.

<sup>44</sup>Dico yúhú càchí tnúhu-í xii-ndo  
sá cúú iní-ndó cué ñáyiú cùu úhú  
iní ñáhá xii-ndo, te cáhá<sup>n</sup> váha-ndo  
cuendá cue ñáyiú càhá<sup>n</sup> úhú ñáhá  
xii-ndo, te cada-ndo sã vâha sá  
cúú-xí cué ñáyiú cùu úhú iní ñáhá  
xii-ndo, te cáhá<sup>n</sup> ndìhi-ndo Yã  
Ndiõxí cuendá cue ñáyiú xícuehé  
ñáhá xii-ndo, ndìhi cuendá cue  
ñáyiú quide úhú ñáhá xii-ndo. <sup>45</sup>Te  
núu na càda-ndo nchaa nacuaá  
càhá<sup>n</sup>-í-a, te duca<sup>n</sup> te cutnùní sá  
cúú-ndó dèhe Tãtã-ndó Dütú Ndiõxí  
Yaá ndécú àndiu. Te ñiu-gá cúú-gã  
Yaá quidé quène nchíanchii, te  
ñiu-ni-gá cúú-gã Yaá dácùu<sup>n</sup> dáú  
ñuyú-a, te duca<sup>n</sup> quide-gá cuendá  
cuu-xi sã vâha sá cúú-xí cué ñáyiú  
quide váha, ndìhi sá cúú-xí cué  
ñáyiú ñá túú quide váha. <sup>46</sup>Te  
núu nchòhó ná cúú iní-ndó mèe-ni  
ñáyiú na cùu iní ñáhá xii-ndo, te vá  
càchí-ndó sã Yã Ndiõxí taxi-gá sá  
ndúú tãhú-ndó sã dúcá<sup>n</sup> quide-ndo,  
chi cuéi cue téé cuihna iní-xi quide  
cobrá ñáhá xii cue ñáyiú cuendá  
impuèstú duca<sup>n</sup> xíquide-güedé.

<sup>47</sup>Te núu mee-ni ñáyiú ndècu  
ndìhi váha-ndo ò vâha cáhá<sup>n</sup>  
ndìhi-ndò-yu, te vá càchí-ndó sã ò

vâha quide-ndo sá dúcá<sup>n</sup> quide-ndo,  
chi cuéi ndéé nchaa ñáyiú ñá túú  
xíní dana cuendá Yã Ndiõxí duca<sup>n</sup>  
xíquide-yu. <sup>48</sup>Te duha ndùu tnúhu  
càhá<sup>n</sup>-í cuendá sá nchòhó cada  
ndáá-ndó cùndecu-ndo datná quidé  
ndáá méé Tãtã-ndó Dütú Ndiõxí  
Yaá ndécú àndiu —duha ní dánèhé  
ñáhá Jèsús xii cue téé xica cuu  
ndìhi-gá ndìhi nchaa ñáyiú.

**Jèsús dánèhé-gá ñáyiú  
nàcuáa cadá-yu sã vâha**

**6** Te Jèsús ndécú-ní-gã  
dánèhé-gá cue téé xica cuu  
ndìhi-gá ndìhi nchaa ñáyiú, te  
xãhá<sup>n</sup>-gã:

—Te òré quidé-ndó sã vâha te  
vá cadá-ndó núú ñáyiú cuendá-ni  
sá cuíní-ndó cãhá<sup>n</sup> váha-yu  
cuendá-ndó, chi núu núú ñáyiú  
duca<sup>n</sup> na càda-ndo te Dütú Ndiõxí  
Yaá cúú Tãtã-ndó vã táxí-gã sá ndúú  
tãhú-ndó. <sup>2</sup>Te xíã<sup>n</sup> núu nchòhó  
òré chindèe-ndo ñáyiú ndàhú, te  
vá cùñaha-ndo xii cue ñáyiú sã  
chindèe-ndo cue ñáyiú ndàhú-á<sup>n</sup>  
dàtná xíquide cue ñáyiú dandahú  
méé-xí sã quidé ndáá te ñá ndáá sã  
quidé ndáá-yu, chi ñáyiú-á<sup>n</sup> duca<sup>n</sup>  
xíquide-yu òré sãhá<sup>n</sup>-yu veñúhu, chi  
dàtecú tnúhu-yu nchaa ñáyiú òré  
duca<sup>n</sup> chindeé-yu ñáyiú ndàhú. Te  
ñiu-ni duca<sup>n</sup> quidé-yu xãhá<sup>n</sup>-yu xii  
cue ñáyiú sã chindèe-yu cue ñáyiú  
ndàhú-á<sup>n</sup> nchaa núú xicá cùu-yu, te  
duca<sup>n</sup> xíquide-yu cuendá cuíní-yu  
cáhá<sup>n</sup> váha ñáyiú cuendá-yu. Te  
yúhú na càchí tnúhu ndáá-í  
xii-ndo sã ñá túú ñá nduu tãhú  
ñáyiú-á<sup>n</sup> núú Yã Ndiõxí sã dúcá<sup>n</sup>  
quidé-yu chi mee-ni núú tñaha  
ñáyiú-yu cùdiú-yu. <sup>3</sup>Te nchòhó

òré chindèe-ndo ñáyiú ndàhú,  
te cuèi ñáyiú ío-gá váha ndècu  
ndíhi-ndo dico vá cǔñaha-ndo  
sǎ dúcá<sup>n</sup> chindee-ndo cue ñáyiú  
ndàhú-á<sup>n</sup>, te ni cuè dava-gá ñáyiú  
vá cǔñaha-ndo. <sup>4</sup>Chi váha-gá sǎ  
íní méé-ní-ndó ná cùhu<sup>n</sup> sǎ dúcá<sup>n</sup>  
chindee-ndo cue ñáyiú ndàhú-á<sup>n</sup>.  
Te núu duca<sup>n</sup> na càda-ndo ña, te  
Dútú Ndiòxí Yaa cúú Tǎtá-ndó  
tàxi-gá sǎ ndúú tǎhú-ndó chi ðiu-ni  
mee-gǎ ndéhé-gǎ nàcuáa quide-ndo  
ndecu-ndo.

**Jèsús dánèhé-gá ñáyiú nàcuáa cǎhá<sup>n</sup>  
ndíhí-yu Yá Ndiòxí**

(Lc. 11:2-4)

<sup>5</sup>Te nchòhó òré cǎhá<sup>n</sup> ndíhi-ndo  
Yǎ Ndiòxí, te vá cǎdá-ndó dàtná  
xǐquide cue ñáyiú dàndahú méé-xí  
cǎchí sǎ quidé ndǎá te ñǎ ndǎá sǎ  
quidé ndǎá-yu, chi ñáyiú-á<sup>n</sup> tnàhá  
íní-yu cunutnǎi-yu cǎhá<sup>n</sup> ndíhí-yu  
Yá Ndiòxí òré yǎhǎ-yu veñúhu. Te  
ðiu-ni duca<sup>n</sup> xǐquidé-yu nchaa núú  
xícá cùú-yu, te duca<sup>n</sup> quidé-yu  
cuèndá sǎ cuíní-yu quíní ñáyiú  
nàcuáa xǐquidé-yu. Te na cǎchí  
tnúhu ndǎá-í xii-ndo sǎ ñǎ túú nǎ  
nduu tǎhú ñǎyiú-á<sup>n</sup> núú Yǎ Ndiòxí  
sǎ dúcá<sup>n</sup> quidé-yu chi mee-ni  
núú tnàha ñáyiú-yu cùdiú-yu.  
<sup>6</sup>Te nchòhó òré cuíní-ndó cǎhá<sup>n</sup>  
ndíhi-ndo Yǎ Ndiòxí, te ndíhu  
ndedí nihnu-ndo xǐtí vehe-ndo,  
chi ðiu-gá cúú Tǎtá-ndó te ndècu  
ndíhi ñaha-gá xii-ndo, te ðiu-ni  
mee-gǎ ndéhé ñaha-gá xii-ndo  
nàcuáa quide-ndo, te núu duca<sup>n</sup>  
na càda-ndo te taxi-gá sǎ ndúú  
tǎhú-ndó.

<sup>7</sup>Te òré cǎhá<sup>n</sup> ndíhi-ndo Yǎ  
Ndiòxí te vá sǔúní cuèndá-ni

dacàá-ndó tnúhu cǎhá<sup>n</sup>  
ndíhi-ndo-gǎ dàtná xǐquide cue  
ñáyiú ñǎ túú xíní tnúhu-gá, chi  
ñáyiú-á<sup>n</sup> sání íní-yu sǎ tédòho ñaha  
vǐhi-gá Yǎ Ndiòxí xíi-yu sǎ dúcá<sup>n</sup>  
sǔúní dàcaá-yu tnúhu cǎhá<sup>n</sup> ndíhi  
ñàhá-yu xii-gá dico ñàhá. <sup>8</sup>Dico  
nchòhó, vá cǎdá-ndó dàtná xǐquide  
cue ñáyiú-á<sup>n</sup>, chi mee Tǎtá-ndó  
Dútú Ndiòxí sa nàha-gá ná cúú  
nchàa sǎ xíní ñùhu-ndo cuèi òré  
vátá cǎcá<sup>n</sup>-gá-ndó núú-gǎ. <sup>9</sup>Te duha  
cǎhá<sup>n</sup>-ndó òré cǎhá<sup>n</sup> ndíhi-ndo Yǎ  
Ndiòxí:

Yòhó Tǎtá-ndí Dútú Ndiòxí Yaa  
ndécú àndíu,  
nchaa ñáyiú na cǎhá<sup>n</sup>-yu sǎ  
cúú-n Yàá ío yǎñúhu.

<sup>10</sup>Te xícá<sup>n</sup> tǎhú-ndí núú-n sǎ ná  
sǎá nduu ndíhu ndàhá-n-yu.

Te cada-n dàtná cǎchí íní-n  
ñùyíú-a dàtná quidé-n àndíu.

<sup>11</sup>Te xícá<sup>n</sup> tǎhú-ndí núú-n sǎ táxí-n  
sǎ cóhó-ndí sǎ cǎxí-ndí ìí<sup>n</sup>  
nduu ìí<sup>n</sup> nduu.

<sup>12</sup>Te cada cǎhnu íní-n nchàa yícá  
cuèchi-ndí, chi tnàhá nchúhú  
quidé cǎhnu íní-ndí nchaa sǎ  
quidé ñàha tnaha ñáyiú-ndí.

<sup>13</sup>Te vá dàñá-n dàcàhá<sup>n</sup> ñàhá yùcu  
ñǎvǎha xii-ndí cada-ndí sǎ  
ñǎ túú váha, chi coto ñaha-n  
xii-ndí cuèndá sǎ vǎ dúcá<sup>n</sup>  
càda ñaha-xi.

Te ðiu-n cùu-n Yaa ío cùnnu  
nchaa nduu nchaa quíú, te  
íó cǎhnu cuu-n, te ðiu-ni-n  
quìndaha ñaha-n xii-ndí ni caa  
ni quǐhí<sup>n</sup>. Te duca<sup>n</sup> na cùnduu.

Duha dànehé ñàhá-í xii-ndo cǎhá<sup>n</sup>  
ndíhi-ndo Yǎ Ndiòxí.

<sup>14</sup>Te núu nchòhó quidé cǎhnu  
íní-ndó nchàa sǎ quidé ñàha tnaha

ñáyi-ndo, te duca<sup>n</sup> te Tătá-ndó Dütú Ndiöxí Yaá ndécú àndiu cada cahnu iní-gá nchaa sá ñà túú vâha quide-ndo tucu. <sup>15</sup>Dico núu nchòhó vá cádá càhnu iní-ndó nchàa sá quidé ñàha tnaha ñáyi-ndo ña, te ni Dütú Ndiöxí Yaá cúú Tătá-ndó vâ cádá càhnu iní-gá nchaa sá quidé-ndó tùcu.

**Cuendá ñáyi ñà túú tnàhí ná xéxí àma càhá<sup>n</sup> ndihí-yu Yá Ndiöxí**

<sup>16</sup>Te nchòhó, nduu ñà túú tnàhí ná xéxí-ndó càhá<sup>n</sup> ndihí-ndo Yá Ndiöxí, te vá cündiyí-ndó dàtná xíquide nchaa ñáyi dándahú méé-xí càchí sá quidé ndáa te ñá ndáa sá quidé ndáa-yu, chi ñáyi-á<sup>n</sup> duca<sup>n</sup> xíquidé-yu cuendá sá cuñí-yu cutnùní iní ñáyi sá ñà túú tnàhí ná xéxí-yu càhá<sup>n</sup> ndihí-yu Yá Ndiöxí. Te yúhú càchí tnúhu-í xii-ndo sã sã dúcá<sup>n</sup> quidé-yu te ñà túú nã chindee ñàha-xi xií-yu cuendá níhí-yu ì<sup>n</sup> sá ndúú tãhú-yu núú Yá Ndiöxí. <sup>17</sup>Dico nchòhó, nduu dùca<sup>n</sup> quide-ndo ñà túú tnàhí ná xéxí-ndó càhá<sup>n</sup> ndihí-ndo Yá Ndiöxí, te váha váha naquete-ndo núú-ndó, te váha váha chihi-ndo cücá <sup>18</sup>cuendá sá vâ cútnùní iní ñáyi sá ñà túú nã xéxí-ndó nduu duca<sup>n</sup> cahá<sup>n</sup> ndihí-ndo Yá Ndiöxí. Te Dütú Ndiöxí Yaá cúú Tătá-ndó ndècu ndihí-ndo diu-ni mee-gã ndéhe-gã nàcuáa quide-ndo ndecu-ndo, te diu-gá taxi-gá sá ndúú tãhú-ndó.

**Cuendá nchaa sá vâha nduu tãhú-ó**  
(Lc. 12:33-34)

<sup>19</sup>Te vá cání iní-ndó cùu-ndo ñáyi cuica nãndi sá cündècu ndihí-ndo ñuyíú-a chi vá cúdii-xi,

chi dava quee tíquidi, te dava caxi cudi ñùhu, àdi quíhu ñadúhú vehe-ndo te duhu-güedë. <sup>20</sup>Te váha-gá chí ndúcú nàcuáa cada-ndo cuendá duca<sup>n</sup> ngündecu sá ndúú tãhú-ndó àndiu, te xíã<sup>n</sup> cudíi-xi cundecu ndihí-ndo nì caa ni quíhí<sup>n</sup>, chí yácá<sup>n</sup> vá quée-gã tíquidi, te ni vâ cãxí-gã cudi ñùhu, te ni vâ quíni-gá-ndó ñadúhú duhu-güedë ndachìu<sup>n</sup>-ndo. <sup>21</sup>Te núu cùu-ndo ñáyi cuica ndècu ñuyíú-a, te diu-ni nchaa sá ndécú ndihí-ndo ñuyíú-a ñùhu iní-ndó. Àdi cuu-ndo ñáyi quide nacuáa ngündecu sá ndúú tãhú-ndó àndiu, te diu-ni sá ndúú tãhú-ndó ndècu andiu-á<sup>n</sup> ñúhú iní-ndó.

**Núú-ó cùu-xi datná ì<sup>n</sup> ñuhú**  
(Lc. 11:34-36)

<sup>22</sup>Te cada iní-ndó sã núú-ndó cùu-xi datná ì<sup>n</sup> ñuhú. Te núu núú-ndó càváha te cùtnuní iní-ndó nã cúú sã ndécú núú-ndó. <sup>23</sup>Dico núu cùhú núú-ndó ñà túú cùtnuní cundehe-ndo ña, te ñà túú cùtnuní iní-ndó nã cúú sã ndécú núú-ndó. Te sá dúcá<sup>n</sup> cùhú núú-ndó te cada iní-ndó sã ndécú-ndó dàtná ì<sup>n</sup> núú néé. Te duha nduu tnúhu càhá<sup>n</sup>-í chi núu sàni váha iní-ndó cuendá Yá Ndiöxí ñã, te cùu vii cuu váha iní-ndó ndècu-ndo. Á<sup>n</sup> te núu ñà túú sàni váha iní-ndó cuendá-gá ñã, te ñà túú tnàhí cùu váha iní-ndó ndècu-ndo. Te sá dúcá<sup>n</sup> ñà túú sàni váha iní-ndó cuendá-gá te cada iní-ndó sã ndécú-ndó dàtná ì<sup>n</sup> núú néé.

**Vá ndácú ìì<sup>n</sup> tée cunu cuechi-dě núú úú pàtróó<sup>n</sup>**

(Lc. 16:13)

**24**<sup>n</sup>Te ni ìì<sup>n</sup> tée xìnu cuechi vá ndácú-dě cunu cuechi-dě núú úú pàtróó<sup>n</sup>, chi téé-á<sup>n</sup> cuu váha iní-dé núú ìì<sup>n</sup> pàtróó<sup>n</sup>-dě te tniì-dé nchaa tnúhu càhá<sup>n</sup> pàtróó<sup>n</sup> téé cùu váha iní-dé núú-xi-á<sup>n</sup>. Te núú ìngá tucu pàtróó<sup>n</sup>-dě vá cúú vǎha iní-dé, te ni vǎ tnií-dě tnúhu càhá<sup>n</sup> ìngá téé-á<sup>n</sup>. Te duca<sup>n</sup> sǎtnahá-xi cùu nchohó chi vá ndácú-ndó cunu cuechi-ndo núú Yǎ Ndiòxí te cuhu<sup>n</sup> iní-ndó nchàa sǎ íó ñuyú-a.

**Yá Ndiòxí xító-gǎ nchaa ñáyiu cùu déhe-gǎ**

(Lc. 12:22-31)

**25**<sup>n</sup>Te na càchí tnúhu-í xii-ndo sǎ vǎ ìo cani iní-ndó nǔu nása níhí-ndó sǎ cóhó sǎ cáxí-ndó, te ni vǎ ìo cani iní-ndó nǔu nása níhí-ndó dǒo cuihnu-ndo, chi cùnuu-gǎ méé-ndó dàcúúxí sǎ nchító-ndó, te duca<sup>n</sup> cùnuu-gǎ yiqui cùñú-ndó dàcúúxí dǒo sácuihnu-ndo. **26**<sup>n</sup>Te chí cádá cuèndá sǎ ncháá quìti ndava ñǎ túú tnàhí ná xítú-güèdi, te ni ñà túú ndèé cuáhá<sup>n</sup>-güedi nàtahu-güedi, te ni ñà túú nǎ nátaxúha-güedi, te ni ñà túú ndèé cáá yàcá-güedi, chi mee Tǎtá-ó Dütú Ndiòxí Yáa ndécú àndiù xito ñaha-gǎ xii-güedi nihí-güedi sǎ xéxí-güedi. Te núu cue quìti-á<sup>n</sup> duca<sup>n</sup> xito ñaha-gǎ xii-güedi, ite uu<sup>n</sup>-gǎ xító ñaha-gǎ xii nchòhó, chi nchòhó ío-gǎ cùnùu-ndo dacúúxí cuè quìti-á<sup>n</sup>! **27**<sup>n</sup>Te cuèi nándi sǎ sání vǐhi iní-ndó ndècu-ndo, dico ñǎ ndácú-ndó càda-ndo nacuáa cuehnu-ndo cuèdicó ìì<sup>n</sup> yiqui-gǎ.

**28**<sup>n</sup>Te vá ìo cani iní-ndó nǔu nása níhí-ndó dǒo cuihnu-ndo. Te chí cádá cuèndá nàcuáa sàhnu nchaa itá ío yucu, chi nchaa itá-á<sup>n</sup> ñà túú quide chiu<sup>n</sup>-xi, te ni ñà túú quèhe<sup>n</sup>-xi idi. **29**<sup>n</sup>Te na càchí tnúhu-í xii-ndo sǎ ndíi Salòmón cuèi ío vii ní xínduu dǒo nǐ xóo cuihnu ndíi, dico ñǎ túú nǔtnahá-xi nàcuáa càa nchaa itá, chi ío-gǎ vii càa nchaa itá. **30**<sup>n</sup>Te nchaa itá ío yucu tnaa-ni cùdii-xi, te yìchí-xi te sàhmi ñáyiu. Te cuèi duca<sup>n</sup> dico mee Yǎ Ndiòxí quidé-gǎ ío vii sàcúnduu-xi. Te núu nchaa itá-á<sup>n</sup> duca<sup>n</sup> quide-gǎ xító-gǎ sácúnduu vii-xi, te xíǎ<sup>n</sup> cùtnùní sǎ ìo-gǎ coto ñaha-gǎ xii-ndo, dicó-ni sǎ ñà túú sàndáá váha iní-ndó-gǎ. **31**<sup>n</sup>Te xíǎ<sup>n</sup> nǔu ñǎ túú xini ñuhu vihi-xi cani iní-ndó nǔu nása níhí-ndó sǎ cóhó sǎ cáxí-ndó, àdi nása níhí-ndó dǒo cuihnu-ndo. **32**<sup>n</sup>Chi nchaa ñáyiu ñǎ túú xini nàcuáa càhá<sup>n</sup> tnúhu Yá Ndiòxí mee-ni nchàa xíǎ<sup>n</sup> ñúhú iní-yu. Dico nchòhó chi mee Tǎtá-ndó Dütú Ndiòxí sa nàha-gǎ ná cúú sǎ xíní ñuhu-ndo. **33**<sup>n</sup>Te xíǎ<sup>n</sup> nǔu ío xini ñuhu-xi sǎ cùhú<sup>n</sup> iní-ndó sǎ Yǎ Ndiòxí yíndàha ñaha-gǎ xii-ndo, te duca<sup>n</sup> càda-ndo nchaa nacuáa cuíní-gǎ, te duca<sup>n</sup> te taxi-gǎ nchaa sǎ xíní ñuhu-ndo. **34**<sup>n</sup>Núu xíǎ<sup>n</sup> vá ìo cani iní-ndó nǎsa cundecu-ndo ndùu tneé, chi cani iní-ndó nàcuáa cada-ndo cundecu-ndo vitna, chi nduu tnèé-á<sup>n</sup> te òrè-nǎ te cutnùní nǔu nása cada-ndo cundecu-ndo. Chi nchòhó sa nàha-ndo sǎ ìo titní núú sǎ quidé-xí ìì<sup>n</sup> nduu ìì<sup>n</sup> nduu — duha ní dánèhé ñáhá Jèsús xii cue téé xica cuu ndíhi-gǎ ndíhi nchaa ñáyiu.

Vá càhá<sup>n</sup> cuèhé-ó cuèndá tnàha  
ñáyi-u-o

(Lc. 6:37-38, 41-42)

**7** Te Jèsús ndècuu-ni-gá dánhé-gá cue téé xica cuu ndihi-gá ndihi nchaa ñáyi-u, te xàha<sup>n</sup>-gá:  
—Vá càhá<sup>n</sup> cuèhé-ndó cuèndá tnàha ñáyi-u-ndo, te duca<sup>n</sup> te Yá Ndiöxí ñá túú nã tnúhu cúnaha-gã xii-ndo. <sup>2</sup>Chi núu na càhá<sup>n</sup> cuèhé-ndó cuèndá tnàha ñáyi-u-ndo, te Yá Ndiöxí íó ì<sup>n</sup> sá cádá ñaha-gá xii-ndo. Te núu nchòhó ná càhá<sup>n</sup> cuèhé víhí-ndó cuèndá tnàha ñáyi-u-ndo te Yá Ndiöxí ío-gá dandòho ñaha-gá xii-ndo. <sup>3</sup>¿Te ná cuèndá ndéhé-ndó ì<sup>n</sup> sá ñà túú vâha quide tnaha ñáyi-u-ndo te mee-ndo víhi-gá quidé-ndó-í? Te sá dúcá<sup>n</sup> quide-ndo te cada iní-ndó sã ndéhé-ndó dàtná ì<sup>n</sup> mihi líhli ñùhu núú tnàha ñáyi-u-ndo te mee-ndo ñùhu ì<sup>n</sup> mihi cahnu-gá núú-ndó te ñá túú quide cuendá-ndó. <sup>4</sup>Te núu na nàcanu ichi-ndo tnaha ñáyi-u-ndo cuèndá sá ñà túú quide vâha-yu ndècú-yu, te mee-ndo víhi-gá quidé-ndó ñá, te cada iní-ndó sã xàha<sup>n</sup>-ndo xì tnaha ñáyi-u-ndo sã nátava-ndo mihi líhli ñùhu núú-yu sá dúcá<sup>n</sup> quide-ndo, te mihi cahnu ñùhu núú méé-ndó ñà túú quide cuendá-ndó. <sup>5</sup>Te sá dúcá<sup>n</sup> quide-ndo te ío dandahú-ndó mèe-ndo sá quidé ndää-ndó te ñá ndàá sá quidé ndää-ndó, te xini ñùhu-xi díhna-gá daña-ndo nchàa sá ñà túú vâha quide-ndo, te dàtnuní duca<sup>n</sup> te cuu nàcanu ichi-ndo tnàha ñáyi-u-ndo cuèndá nchaa sá ñà túú vâha quidé-yu.

<sup>6</sup>Te nchaa ñáyi-u ío sàá iní-xi, te vá cádá yíca-ndó-yu cundedòho-yu tnúhu Yá Ndiöxí, chi núu na càda yíca-ndó-yu te ngóo-yu cuu úhú iní ñãhã-yu xii-ndo. Te ñáyi-u-á<sup>n</sup> cúu-yu dàtná iná chi quiti-á<sup>n</sup> núu na cuãñaha-o ì<sup>n</sup> sá cuãñaha-o, te núu ñá túú cùtnuní iní-dí ná cúú xǎ<sup>n</sup> te tnií ñaha-dí xii-o. Te cùu tucú-yu dàtná cùchí chi quiti-á<sup>n</sup> núu na chùcu-o núú-dí yúú vâha sá ío vii càa nani pér lá, te dicó-ni cùnu sáhá-dí chi ñá túú cùtnuní iní-dí sá cúú-xí yúú vâha.

Cácá<sup>n</sup>-ó núú Yá Ndiöxí núu ná  
cuiní-ó

(Lc. 11:9-13; 6:31)

<sup>7</sup>Te na càchí tnúhu-í xii-ndo sã cãcá<sup>n</sup>-ndó núú Yá Ndiöxí te núu ná cuiní-ndó te taxi-gá, te vá dáñá ndèe-ndó cãcá<sup>n</sup>-ndó núú-gã núu ná cuiní-ndó te duca<sup>n</sup> te níhí-ndó. Te cada iní-ndó sã ñí quexio-ndo vehe ì<sup>n</sup> tnaha ñáyi-u-ndo te ní càhá<sup>n</sup>-ndó, te ñáyi-u-á<sup>n</sup> ñí tedòho ñahá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yá Ndiöxí tedòho ñaha-gã xii-ndo, te taxi-gá sá ná càcá<sup>n</sup>-ndó núú-gã. <sup>8</sup>Chi nchaa ñáyi-u duca<sup>n</sup> xíquide, te Yá Ndiöxí tédòho ñaha-gã xií-yu te ñihí-yu sá cuiní-yu. Te ñiu-ni duca<sup>n</sup> tùcu nchaa ñáyi-u na càcá<sup>n</sup> núú-gã ì<sup>n</sup> sá cuiní-yu, chi sãñaha-gã sá xicá<sup>n</sup>-yu núú-gã. Te ñiu-ni duca<sup>n</sup> tùcu nchaa ñáyi-u ñá túú dàña ndéé xicá<sup>n</sup> núú Yá Ndiöxí sá cuiní-yu chi ñihí-yu. <sup>9</sup>Te nchòhó cue téé cùu tátá, ñá túú cùndee iní-ndó cuãñaha-ndo xii cue déhe-ndo ì<sup>n</sup> yúú caxi-güexi òré xicá<sup>n</sup>-güexi ì<sup>n</sup> paá núú-ndó cãxi-güexi. <sup>10</sup>Te ní ñà túú cùndee

iní-ndó cuñaha-ndo ì<sup>n</sup> cóo caxi-güexi òré xicá<sup>n</sup>-güexi ì<sup>n</sup> chácá nũú-ndó caxi-güexi. <sup>11</sup>Te nchòhó cuèi ndéé dau-na sàá iní-ndó dico sãha-ndo cuè déhe-ndo sã vãha xèxi-güexi oré ná cúú sã xicá<sup>n</sup>-güexi núú-ndó caxi-güexi. Te núu nchòhó duca<sup>n</sup> quide-ndo, ite uu<sup>n</sup>-gá duca<sup>n</sup> quide Tátá-ndó Dútú Ndiòxí Yá ndécú àndiu, chi taxi-gá sã vãha sá cúú-xí-ndó te núu na càcá<sup>n</sup>-ndó nũú-gã!

<sup>12</sup>Te nchaa sã vãha cuiní-ndó càda tnaha ñáyi-ndo, te cada-ndo tnàhá-ndó ndìhí-yu, chi duca<sup>n</sup> sànu ichi ñaha tnúhu ní chídó tnùní ndíi Moisés, te ñu-ni duca<sup>n</sup> sànu ichi ñaha tucu nchaa tnúhu ní chídó tnùní cue téé ní xóo càhá<sup>n</sup> tnúhu Yá Ndiòxí ndéé sanaha.

### **Yuyèhe cuiñi**

(Lc. 13:24)

<sup>13-14</sup>Te xini ñuhu-xi nducu-ndo nacuaa cada-ndo tnèi-ndo ichi Yá Ndiòxí. Te ichi-gá-án cúú-xí dàtná ì<sup>n</sup> ichi cuiñi, àdi datná ì<sup>n</sup> yuyèhe cuiñi. Te duha càhá<sup>n</sup>-í chi ío úhú xínu iní-ndó tnèi-ndo ichi Yá Ndiòxí, te sacú-ni nchòhó cue ñáyi-ndecu ñuyí-a tnèi-ndo ìchi-gá. Te nchaa ñáyi-ndecu ichi cuehé ichi duha ta xíta nihnú-yu cuáhá<sup>n</sup>. Te ichi ndécú-yu-án cada iní-ndó sã cúú-xí ì<sup>n</sup> ichi cahnu ichi quehé<sup>n</sup>, àdi ì<sup>n</sup> yuyehe quehé<sup>n</sup>. Te duha càhá<sup>n</sup>-í chi ío vai ñáyi-ndécú-yu ichi-án.

**Ndi díí<sup>n</sup> nũú yutnu xini-ó nã yutnu cùu-xi cuendá sã sãvidí-xi**

(Lc. 6:43-44)

<sup>15</sup>Te càchí tnúhu-í xii-ndo sã ìo quihí iní-ndó cundecu-ndo cuendá

sã vã dándàhú ñáhá cuè téé càchí sã càhá<sup>n</sup> tnúhu Yá Ndiòxí te ñá ndáá sã càhá<sup>n</sup>-güedé tnúhu-gá. Chi cue téé-án sànuu sã quidé-güedé dàtná quidé mbéé quiti ío vãha iní-xi, dico ñá ndáá chi ñá túú ñuhu vãha iní-güedé, chi quide-güedé dàtná quidé quiti déé<sup>n</sup> quiti nani yíhí. <sup>16</sup>Te òré quexio-güedé núú ndécú-ndó te cada cuendá-ndó nàcuáa quide-güedé cuendá duca<sup>n</sup> cùtnuní iní-ndó nã ñáyi-ndo cùu-güedé. Te nchòhó xini-ndó sã ñá túú cùu<sup>n</sup> ndéhé yoho yàha stilé tnu ìñu, te ni ñá túú xini-ndó cùu<sup>n</sup> ngúxí ì<sup>n</sup> tnu ìñu. <sup>17-18</sup>Te xini tucu-ndo sã ncháá yùtnu vãha cùu<sup>n</sup> sãvidí vãha, te nchaa yutnu vãha-án ñá túú cùu<sup>n</sup> sãvidí sã ñá túú vãha. Te nchaa yutnu sã ñá túú vãha ñá túú cùu<sup>n</sup> sãvidí vãha, chi mee-ni sãvidí sã ñá túú vãha cùu<sup>n</sup>. <sup>19</sup>Te nchaa yutnu sã ñá túú cùu<sup>n</sup> sãvidí vãha xèhndé-güedé, te cuánguee-xi núú ñùhú càyú-xi. Te duca<sup>n</sup> sãtnahá-xi yáha nchaa cue téé dándahú ñáhá càchí sã càhá<sup>n</sup> tnúhu Yá Ndiòxí te ñá ndáá sã càhá<sup>n</sup>-güedé tnúhu-gá, chi quíhí<sup>n</sup>-güedé núú ñùhú núú càyú. <sup>20</sup>Te nchòhó cutnùní iní-ndó nã ñáyi-ndo cùu cue téé-án cuendá nchaa sã quidé-güedé.

**Ñá ncháá ñáyi-ndo ngúndecú-yu núú ndécú Yá Ndiòxí táxi tnùní-gá**

(Lc. 13:25-27)

<sup>21</sup>Te na càchí tnúhu-í xii-ndo sã ìo vai ñáyi-ndo cachí-yu sã yùhú cùu-í Xítóhó-yu, dico ñá ncháá-yu nduu táhü-yu cundecú-yu núú ndécú Tátá-í Dútú Ndiòxí táxi tnùní-gá, chi mee-ni nchaa ñáyi-ndo na càda nchaa nacuaa càhá<sup>n</sup>-gá



ñáiyu-á<sup>n</sup> nduu táhũ-yu cundecú-yu núu ndécú-gã táxí tnùní-gá. <sup>22</sup>Te na sáá nduu càda ndáá Yã Ndiõxí cuéchi nchaa ñáiyu, te vâi-yu cúñáhá-yu xii-í: “Yòhó Xítohó Jesucristú nchúhú cúu-ndĩ ñáiyu ní cáhá<sup>n</sup> tnúhu-n nàcuáa ní cachí-n, te ñiu-ni-n ñí cacunehe-ndí te ní sándáá iní ñáhá nchàa espíritú cùndĩhi yucu ñávãha xii-ndí ní quee-xi yiqui cùñú ñáiyu, te ñiu-ni yòhó ní chindee ñàha-n xii-ndí ní ndacu-ndí ní quide-ndí titní núu sã vã yõ tnàhi ndàcu cada”, duha cúñáhá-yu xii-í dává-á<sup>n</sup>. <sup>23</sup>Dico yúhú cúñaha-ĩ xii-yu: “Ñá túú tnàhí xini ñàh-í xii nchòhó nõ ndèe ñáiyu cùu-ndo, te chí xócuñí nchaa nchòhó ñáiyu quide nchaa sã cuèhé sã dúhá nõú ndécù-í-a”, duha cúñaha-ĩ xii-yu.

**Íi<sup>n</sup> vehe ndècu cimientú-xi ndihi íi<sup>n</sup>  
vehe ñá túú cimientú-xi**

(Mr. 1:22; Lc. 6:47-49)

<sup>24</sup>Te nchaa ñáiyu sàcúndedóho tnúhu càhá<sup>n</sup>-í te núu na tñi-yu, te ñáiyu-á<sup>n</sup> cúu-yu dàtná íi<sup>n</sup> tée ío váha cùtnuní iní-xi. Chi tée-á<sup>n</sup> ñí dácáá-dẽ íi<sup>n</sup> vehe, dico díhna-gá ní xete-dé ndéé ní tnahá-dé yúú cáxí<sup>n</sup> te dàtnuní ní tava-dé cimientú-xi. <sup>25</sup>Te òré ní cuu<sup>n</sup> dáú te ní ndee ndute ñuhu, te ní dándáá-xí ndéé núu cáá vèhe-á<sup>n</sup>, dico ñá túú ní ndàcu-xi cuido-xi. Te ní quene tucu táchí ñihi dico ñá túú ní ndàcu-xi cuido-xi vehe-á<sup>n</sup>, te duca<sup>n</sup> chi tée ní dácáá vèhe-á<sup>n</sup> ñí tava-dé cimientú-xi núu yúú cáxí<sup>n</sup>. Duha sãtnahá-xi cùu nchaa ñáiyu tñi tnúhu càhá<sup>n</sup>-í. <sup>26</sup>Dico nchaa ñáiyu sàcúndedóho tnúhu

càhá<sup>n</sup>-í te ñá túú cuini-yu tñi-yu, ñáiyu-á<sup>n</sup> cúu-yu dàtná íi<sup>n</sup> tée ñá túú tnàhi cùtnuní iní-xi. Chi tée-á<sup>n</sup> ñí dácáá-dẽ íi<sup>n</sup> vehe núu yúú mèe-ni ñuhu cúchí. <sup>27</sup>Te òré ní cuu<sup>n</sup> dáú te ní ndee ndute ñuhu, te ní dándáá-xí ndéé núu cáá vèhe-á<sup>n</sup>, te ní quene táchí ñihi te íi-ni ní xido-xi vehe-á<sup>n</sup> cuendá sã nõú ñuhu cúchí ñí sáá. Duha sãtnahá-xi cùu nchaa ñáiyu sàcúndedóho tnúhu càhá<sup>n</sup>-í te ñá túú cuini-yu tñi-yu —duha ní dánèhé ñáhá Jèsús xii cue tée xica cuu ndihi-gá ndihi nchaa ñáiyu.

<sup>28</sup>Te òré ní ndihi Jèsús sã dúcá<sup>n</sup> ñí cáhá<sup>n</sup>-gá, te nchaa ñáiyu ní xíndedóho nchaa tnúhu ní cáhá<sup>n</sup>-gá ío ní cuñúhu-yu nàcuáa ní dánèhé ñáhá-gã xii-yu. <sup>29</sup>Chi ní cáhá<sup>n</sup>-gá dàtná càhá<sup>n</sup> cue tée cùnuu, te cùnuu ndisa-gá, te ñá túú ní càhá<sup>n</sup>-gá dàtná càhá<sup>n</sup> nchaa cue tée dàcuaha ñaha xii ñáiyu nchaa tnúhu ní chídó tnùní ndíi Moisés.

**Jèsús quidé tãtna-gá íi<sup>n</sup> tée tnàhá  
cuèhé sã dátèhyú nihnu-xi yiqui  
cùñú-ó**

(Mr. 1:40-45; Lc. 5:12-16)

**8** Te Jèsús ní xica-gá cuánuu-gá ñihi tindúú nõú dúcá<sup>n</sup> ní xíndecu-gá ní dánèhé-gã ñáiyu-á<sup>n</sup>, te cuèhé víhi ñáiyu nchicú<sup>n</sup> ñáhá xii-gá cuánuu. <sup>2</sup>Te ní quexio íi<sup>n</sup> tée tnàhá cuèhé sã dátèhyú nihnu-xi yiqui cùñú-ó nõú Jèsús, te ní ngúñí xítí-dẽ núu-gã, te xãha<sup>n</sup>-dẽ xii-gã: —Mèstrú, véxi-í càhá<sup>n</sup> ndàhú-í núu-n nõu vá cùndèe iní-n càda tãtna ñaha-n xii-í, chi cùtnuní iní-í sã ndácú-n —càchí-dé xãha<sup>n</sup>-dẽ xii-gã. <sup>3</sup>Te Jèsús ní dácáá-gã ndaha-gá ní tendaha ñaha-gã xii-dé, te xãha<sup>n</sup>-gã:

—Cuu cada tátna ñaha-ĩ xii-n, te vitna ndúha-n —càchí-gá xǎha<sup>n</sup>-gǎ xii-dé.

Te òré-ni-á<sup>n</sup> ñí xócuñí cuéhé tnàhá-dé. <sup>4</sup>Te Jèsús ní xáha<sup>n</sup> tucu-gá xii-dé:

—Te vitna cuanùhú te vá yǒo ì<sup>n</sup> cúñaha-n sǎ yǔhú ní quide tátna ñaha-ĩ xii-n, núú dǔtú-ni cuahá<sup>n</sup> cuendá sá ná quini ñáhá-dě xii-n sǎ ñí ndúha-n, te cuañaha-n sǎ ndúú tǎhú Yǎ Ndióxi dàtná ní cachí ndí Moisés. Te duca<sup>n</sup> càda-n cuendá cutnùni iní ñáyiú sá ñí ndúha-n —càchí-gá xǎha<sup>n</sup>-gǎ xii téé ní quide tátna-gá-á<sup>n</sup>.

**Jèsús quidé tátna-gá ì<sup>n</sup> téé xínu cuechi núú ì<sup>n</sup> téé cùu capitá<sup>n</sup>**

(Lc. 7:1-10)

<sup>5</sup>Te Jèsús ní xica-gá cuahá<sup>n</sup>-gá ñúú Capèrnaúm. Te òré cuánguìhu-gá ñúú-á<sup>n</sup> te ní quexìo ì<sup>n</sup> téé cùu capitá<sup>n</sup> càhá<sup>n</sup> ndàhú-dé núú-gǎ, <sup>6</sup>te xǎha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n nǔú vá cùndèe iní-n càda tátna-n ì<sup>n</sup> téé xínu cuechi núú-í, chi cùhú-dé te càhú víhí tnàhá-dé, te ío ndòho-dé te ni ñǎ cùndèe-gá-dé candá nihnu-dé —càchí-dé xǎha<sup>n</sup>-dě xii-gá.

<sup>7</sup>Te Jèsús ní xáha<sup>n</sup>-gǎ xii-dé:

—Te na quíhí<sup>n</sup>-ó càda tátna-í-dé —càchí-gá xǎha<sup>n</sup>-gǎ xii-dé.

<sup>8</sup>Te téé cùu capitá<sup>n</sup>-á<sup>n</sup> ñí xáha<sup>n</sup>-dě xii-gá:

—Mèstrú, ñá túú tàú-í sá quìhu-n ndèe xití vehe-í, chi cùu-í ì<sup>n</sup> téé cùtèxínu sá cúú-xí-n, te càhá<sup>n</sup>-ni sá ndúha téé xínu cuechi núú-í te ndúha-dé. <sup>9</sup>Chi yúhú ndècu cue téé tàxi tnuní ñáhá xii-í, te duca<sup>n</sup> yúhú

tucu ndècu cue sandadú táxi tnuní-í. Te òré xǎha<sup>n</sup>-ĩ xii ì<sup>n</sup>-dé quíhí<sup>n</sup>-dé ì<sup>n</sup> chiu<sup>n</sup> te cuahá<sup>n</sup>-dé, te òré xǎha<sup>n</sup>-ĩ xii ingá-dé quixi-dé te véxi-dé, te òré xǎha<sup>n</sup>-ĩ xii ì<sup>n</sup> téé xínu cuechi núú-í cada-dé ì<sup>n</sup> chiu<sup>n</sup> te quide-dé. Núú xǎh<sup>n</sup> yòhó càhá<sup>n</sup>-ni sá ndúha téé xínu cuechi núú-í te ndúha-dé —càchí-dé xǎha<sup>n</sup>-dě xii Jèsús.

<sup>10</sup>Te Jèsús ío ní cuñúhu-gá sá dúcá<sup>n</sup> ñí càhá<sup>n</sup> téé cùu capitá<sup>n</sup>-á<sup>n</sup>, te ní xáha<sup>n</sup>-gǎ xii nchaa ñáyiú nchicú<sup>n</sup> ñáhá xii-gá:

—Na càchí tnúhu ndáá-í xii-ndo sǎ vǎtá quini-gá-í ni ì<sup>n</sup> ñáyiú isràél, ñáyiú súúni ìo váha sàndáá iní ñáhá xii Yǎ Ndióxi dàtná sàndáá iní ñáhá tǎe-a xii-gá. <sup>11</sup>Te na càchí tnúhu ndáá tucu-í xii-ndo sǎ ìo cuéhé ñáyiú quixi ndàa xio nacuaá quène nchíanchii, te ñúu-ni duca<sup>n</sup> ìo cuéhé tucu-yu quixi ndàa xio nacuaá quée tucu nchíanchii. Te nchaa ñáyiú-á<sup>n</sup> naníhí tnáhǎ-yu ndihí té Àbrahám, ndihí té Isàac, ndihí té Jàcób núú ndécú Yǎ Ndióxi táxi tnuní-gá te yàcá<sup>n</sup> cundecu ndihí ñáhá-yu xii-güedé. <sup>12</sup>Te nchaa ñáyiú tàú nduu tǎhú cundecu núú ndécú Yǎ Ndióxi táxi tnuní-gá ní cùu, ñáyiú-á<sup>n</sup> quee tǎhú-yu, chi quíhí<sup>n</sup>-yu ì<sup>n</sup> xichi núú néé nǔú ìo ndohó-yu cundecú-yu, te yàcá<sup>n</sup> ìo ndáhí-yu, te dicó rúhñú-nǎ cuu núhu-yu sá sàtú iní-yu cuendá sá ndóhó-yu —càchí-gá xǎha<sup>n</sup>-gǎ xií-yu.

<sup>13</sup>Te Jèsús ní xáha<sup>n</sup> tucu-gá xii téé cùu capitá<sup>n</sup>-á<sup>n</sup>:

—Yòhó téé ndècu ndihí téé cùhú cuanùhú vehe-n vitna chi ndúha-dé chi ní sàndáá iní-n Yǎ Ndióxi —càchí-gá xǎha<sup>n</sup>-gǎ xii-dé.

Te diu-ni òré duca<sup>n</sup> nǐ xáha<sup>n</sup> Jèsús xii téé cùu capitá<sup>n</sup>-á<sup>n</sup> nǐ ndúha téé xìnu cuechi núú-dě.

**Jèsús quidé tǎtna-gá nǎná ñadìhí té Pèlú**

(Mr. 1:29-31; Lc. 4:38-39)

<sup>14</sup>Te Jèsús ní xica-gá cuáhá<sup>n</sup>-gá vehe té Pèlú, te òré ní quexìo-gá vehe-dé te ní xiní-gá cáá nǎná ñadìhí-dé cùhú-a<sup>n</sup> ñùhu vihi-a<sup>n</sup> cahni. <sup>15</sup>Te Jèsús ní tñii-gá ndaha ñaha cùhú-á<sup>n</sup>, te òré-ni-á<sup>n</sup> nǐ nchíco-a<sup>n</sup> cahni te ní ndacóo-a<sup>n</sup> ní xinu cuechi-a<sup>n</sup> nǔú-güedě ndìhi-gá.

**Jèsús quidé tǎtna-gá vǎi ñáyiú cùhú**

(Mr. 1:32-34; Lc. 4:40-41)

<sup>16</sup>Te òré ní dáhu nchícanchii te ní quexìo ñáyiú núú ndécú Jèsús, te ndècá-yu vǎi ñáyiú yǐhi ñaha espíritú cúndìhi yucu ñávǎha ní sáá núú-gǎ te ndèca tucú-yu vǎi ñáyiú tñàhá dava-gá núú cuèhé. Te ìì<sup>n</sup>-ni tñúhu ní cáhá<sup>n</sup> Jèsús ní tenàá-gá nchaa espíritú cúndìhi yucu ñávǎha yǐhi ñaha xii nchaa ñáyiú-á<sup>n</sup>, te ní quee-xi yiqui cùñú-yu cuáhá<sup>n</sup>-xi. Te tñàhá nchaa dava-gá ñáyiú cùhú-á<sup>n</sup> nǐ quide tǎtna-gá. <sup>17</sup>Te duca<sup>n</sup> nǐ cuu chi ní quee ndáá-xi nàcuáa ní cáhá<sup>n</sup> ndíi Chàíá téé ní xóo cáhá<sup>n</sup> tñúhu Yá Ndióxi ndéé sanaha, te duha ní cachí ndíi: “Mee-gǎ cada tǎtna ñaha-gǎ xii-o, chi diu-gá xocàni-gá nchaa sá quidé ùhú yiqui cùñú-ó”, duha ní cachí ndíi.

**Ñáyiú cuìní tuha ñaha xii Jesús**

(Lc. 9:57-62)

<sup>18</sup>Te òré ní xiní Jèsús sá ìo cuéhé ñáyiú xixúcu núú ndécú-gǎ, te ní xáha<sup>n</sup>-gǎ xii cue téé xica cuu

ndìhi-gá sá quèe-gá ndìhi-güedé bàrcú cuèndá téhndé-gá ndìhi-güedé ndàa ingá xio yuhu làgúná. <sup>19</sup>Te mei òré-á<sup>n</sup> nǐ quexìo ìì<sup>n</sup> téé dàcuaha ñaha xii cue ñáyiú nchaa tñúhu ní chídó tñùni ndíi Moisés, te xáha<sup>n</sup>-dě xii-gá:

—Mèstrú, cuìní-í canchicú<sup>n</sup> ñáhà-í xii-n ndèni ní cuu na quèhí<sup>n</sup>-n — cǎchí-dé xáha<sup>n</sup>-dě xii-gá.

<sup>20</sup>Te Jèsús ní xáha<sup>n</sup>-gǎ xii-dé: —Nchaa ñúcuui chi ndècu yaú cúú vèhe-güedi saquǐhi-güedi, te nchaa cue quitì ndáva caa tacá-güedi diquí yutnu. Dico yúhú Téé cùu ñaní tñàhá-ndó nchàa-ndo chi ñá túú ndéé cáá vèhe-í ñuyíú-a ndetatú-í — cǎchí-gá xáha<sup>n</sup>-gǎ xii-dé.

<sup>21</sup>Te ìì<sup>n</sup> téé ní chitnahá ñáhá xii Jesús ní xáha<sup>n</sup>-dě xii-gá:

—Jèsús, daña na nùhú-í cundetú-í cuú tǎtà-í te chindúxi-í-dé dàtñùni quixi-í chitnahá ñáhá dùca<sup>n</sup>-ná-í xii-n — cǎchí-dé xáha<sup>n</sup>-dě xii-gá.

<sup>22</sup>Te Jèsús ní xáha<sup>n</sup>-gǎ xii-dé: —Daña ñáyiú ñá túú sàndáá iní ñáhá xii-í ná chindúxi tñàha meé-yu, chi ñáyiú-á<sup>n</sup> cúú-yu dàtná ñáyiú ní xihí cuèi ndècu-ni-yu núú ñuyíú-a, te yòhó canchicú<sup>n</sup> ñáhá-ní xii-í — cǎchí-gá xáha<sup>n</sup>-gǎ xii-dé.

**Jèsús ngání-gǎ táchí ndìhi ndute làgúná**

(Mr. 4:35-41; Lc. 8:22-25)

<sup>23</sup>Te sátá dúcá<sup>n</sup> te Jèsús cuánguee-gá bàrcú ndìhi cue téé xica cuu ndìhi-gá, te ní xica bàrcú-á<sup>n</sup> cuáhá<sup>n</sup>-xi. <sup>24</sup>Te nini ñùhu bàrcú-á<sup>n</sup> ichi cuáhá<sup>n</sup>-xi núú ndute ní xídí Jèsús, te ní ngúfta-xi níhi vǐhi quene táchí, te ta nàdachítú-xi ndute xití bàrcú cuáhá<sup>n</sup>. <sup>25</sup>Te cue

tée xica cuu ndihi-gá cuáhá<sup>n</sup>-güedé núú cáá-gă xidí-gá, te xăha<sup>n</sup>-güedě xii-gá:

—iMèstrú, ndiquúú ìní chi dâcácu ñaha-n xii-o chi queé naa-o cuíní-xi! —cächí-güedé xăha<sup>n</sup>-güedě xii-gá.

<sup>26</sup>Te Jèsús ní xáha<sup>n</sup>-gă xii-güedé:

—¿Ná cuendá ndéé duca<sup>n</sup> ïo yùhú-ndó? ¿Náa ñá túú sàndáá ìní ñáhá ndisa-ndo xii-í-ă<sup>n</sup>? —cächí-gá xăha<sup>n</sup>-gă xii-güedé.

Te Jèsús ní ndacóo-gá te ní tenàá-gá táchí-ă<sup>n</sup> ndihi ndute-á<sup>n</sup>, te ní ngüíñí táchí-ă<sup>n</sup> te ní nucúndecu nahi-nă ndute làgúná-á<sup>n</sup>. <sup>27</sup>Te nchaa cue tée ñuhu xití bàrcú-á<sup>n</sup> ní cuñúhu-güedé sá dúcá<sup>n</sup> ñí quide-gá ní xiní-güedé, te ní xitnáha-güedé:

—¿Te ná tée cùu tée-a núu duha ní cáhá<sup>n</sup>-ni-dé te ní ngüíñí táchí te ní nucúndecu nahi-ni ndùte làgúná-a-í? —cächí-güedé xitnáha-güedé.

**Cue tée ñuú Gàdará cue tée yíhi ñaha espíritú cúndìhi yucu ñávăha**  
(Mr. 5:1-20; Lc. 8:26-39)

<sup>28</sup>Te òrè ní quèxio Jesús ndăa ìngá xio yuhu làgúná yucu cue tée ñuú Gàdará, te úú tñahá cue tée quide vehe núú yíndüxi ndýi ní quee-güedé cuáhá<sup>n</sup>-güedé núú ndécú Jèsús, te ndí ndúú-güedé yíhí ñàha espíritú cúndìhi yucu ñávăha xii-güedé, te ío màñá-güedé chi vá yôo tñahí dàña-güedé yáha yatni núú ndécú-güedě. <sup>29</sup>Te cue espíritú yíhí ñàha xii-güedé-á<sup>n</sup> ñí quide-xi níhi ní cáhá<sup>n</sup>-güedé, te xăha<sup>n</sup>-güedě xii-gá:

—¿Ná cuendá véxi-ô Jèsús Déhe Dútú Ndióxi chidácá ñáhá-n xii-ndí?

¿Á<sup>n</sup> sàma véxi-n dândoho ñaha-n xii-ndí? Te vátá sàá-gá nduu dùca<sup>n</sup> cada-n —cachí-güedé xăha<sup>n</sup>-güedě xii-gá.

<sup>30</sup>Te yatni xía<sup>n</sup> xíxica cuu vâi cuchí xíxexi-güedi. <sup>31</sup>Te cue espíritú cúndìhi yucu ñávăha yíhi ñaha xii cue tée-á<sup>n</sup> ñí cáhá<sup>n</sup> ndàhú-xi núú Jèsús, te xăha<sup>n</sup>-xi:

—Te núu vá dàñá-gă-n quíhi-ndí yiqui cùñú cue tée-a, te càhá<sup>n</sup> ndàhú-ndí núú-n să dàña-n na quíhí<sup>n</sup>-ndí quíhu-ndí yiqui cùñú nchaa cùchí-ă<sup>n</sup> —cächí cue espíritú-á<sup>n</sup> xăha<sup>n</sup>-xi xii-gá.

<sup>32</sup>Te Jèsús ní xáha<sup>n</sup>-gă xii cue espíritú cúndìhi yucu ñávăha-á<sup>n</sup>:

—Chí táquèe yiqui cùñú cue tée-á<sup>n</sup> te quíhí<sup>n</sup>-ndó ñuu ndéè ichi quíhí<sup>n</sup>-ndó —cächí-gá xăha<sup>n</sup>-gă xii nchaa espíritú-á<sup>n</sup>.

Te cue espíritú cúndìhi yucu ñávăha-á<sup>n</sup> ñí quee-xi yiqui cùñú cue tée-á<sup>n</sup>, te cuáhá<sup>n</sup>-xi cuánguìhu-xi nchaa cùchí-á<sup>n</sup>. Te cue quiti-á<sup>n</sup> ñí xinu-güedi duha ní queé-güedi ndăa núú dèhvá yuhu làgúná-á<sup>n</sup>, te ní ngaunihnu-güedi xití ndute, te ní ndihi-güedi ní cáhá.

<sup>33</sup>Te cue tée xito ñaha xii nchaa cuchí-á<sup>n</sup> ñí yùhú-güedé te ní xinu-güedé, te ní sáhá<sup>n</sup>-güedé ní cani-güedé cuendú núú cuè ñáyiu ndècu xití ñuú nchaa nàcuáa ní cuu cuendá cue tée ní xíhi ñaha nchaa espíritú cúndìhi yucu ñávăha-á<sup>n</sup>.

<sup>34</sup>Te nchaa ñáyiu ñuú-á<sup>n</sup> ñí queé-yu cuáhá<sup>n</sup>-yu núú ndécú Jèsús. Te òrè ní quexió-yu núú ndécú-gă te ní cáhá<sup>n</sup> ndàhú-yu núú-gă sá ná quèe-gá yucu ñuú-yu núhú-gá.

**Jèsús quidé tătna-gá ìi<sup>n</sup> tée cùhú ñá cùú-gă candá nihnu**  
(Mr. 2:1-12; Lc. 5:17-26)

**9** Te sátá dúcá<sup>n</sup> ñí cuu te Jèsús cuánde-gá bàrcú

cuáhá<sup>n</sup>-gá ní natehndé-gá ndàa ingá xio yuhu làgúná. Te xíá<sup>n</sup> ní ndexio-gá ñúú núú quidé ñùú-gá. <sup>2</sup>Te xíá<sup>n</sup> ndécú-gă ní quexìo cue tée nchìdo-güedé ìí<sup>n</sup> tée cùhú ñá cùú-gă candá nihnu ñùhu-dé xító, te Jèsús ní cutnùnì iní-gá sá sàndáá ndisa iní ñáhá-güedé xii-gá ñúú ní xáha<sup>n</sup>-gă xii tée cùhú-á<sup>n</sup>:

—Yòhó tée cùhú vá ndìhú-gá iní-n, chi sa ní quide càhnu iní-í nchaa cuéchi-n —càchí-gá xăha<sup>n</sup>-gă xii-dé.

<sup>3</sup>Te sá dúcá<sup>n</sup> ní cáhá<sup>n</sup>-gá ñúú xíá<sup>n</sup> cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ní sani iní-güedé: “Tée-a càhá<sup>n</sup> cuèhé-dé cuendá Yă Ndiôxí”, duha ní sani iní-güedé. <sup>4</sup>Te Jèsús ní cutnùnì iní-gá nàcuáa sàni iní-güedé ñúú ní xáha<sup>n</sup>-gă xii-güedé:

—¿Ná cuendá duca<sup>n</sup> sàni cuehé sání dùha iní-ndó? <sup>5</sup>Te sá dúhá ní xáha<sup>n</sup>-í xii tée cùhú-a sá ní quide càhnu iní-í nchaa yíca cuéchi-dé, te xíá<sup>n</sup> nchòhó ñá túú cùnùnì iní-ndó ñúú ndáá càhá<sup>n</sup>-í àdi ñá ndàá.

Dico núú cúu-í-dé sá ndácòo-dé te caca-dé, te cutnùnì ndáá iní-ndó ñúú ndáá càhá<sup>n</sup>-í àdi ñá ndàá, chi cundehe ñúú-ndó nàcuáa cada-í.

<sup>6</sup>Te vitna na càda-í nàcuáa cutnùnì iní-ndó nchàa-ndo sá yùhú Tée cùu ñanì tnáhá-ndó nchàa-ndo ndecu ndìhi-í tnúhu ndee iní ñuyúú-a sá cádá càhnu iní-í nchaa cuéchi ñáyiú —càchí-gá xăha<sup>n</sup>-gă xii-güedé.

Te sátá dúcá<sup>n</sup> te ní xáha<sup>n</sup>-gă xii tée cùhú-á<sup>n</sup>:

—Ndacóo, te ndocani-n xító ñùhu-n véxi-á<sup>n</sup> te núhú-n vèhe-n —cachí-gá xăha<sup>n</sup>-gă xii-dé.

<sup>7</sup>Te órè-ni-á<sup>n</sup> ní ndúha tée cùhú-á<sup>n</sup> te ní ndacóo-dé te ní ndocani-dé

xító ñùhu-dé ní quexìo-á<sup>n</sup> te ní xica-dé cuánuhú-dé vehe-dé.

<sup>8</sup>Te nchaa ñáyiú xíndecu-á<sup>n</sup> ño ní cuñúhu-yu sá dúcá<sup>n</sup> ní quide Jèsús ní xiní-yu, te ní cachí-yu sá ño càhnu cuu Yă Ndiôxí cuendá sá ní sáñaha-gă xii Jèsús tnúhu ndee iní cada-gá nchaa sá vă yòo tnàhí ndàcu cada.

**Jèsús càhá<sup>n</sup>-gá ìí<sup>n</sup> tée nàni Mateú chitnahá ñáhá-dě xii-gá**

(Mr. 2:13-17; Lc. 5:27-32)

<sup>9</sup>Te Jèsús ní nucúhu<sup>n</sup> tucu-gá ichi cuáhá<sup>n</sup>-gá, te ichi ñùhu-gá ní xiní-gá núcòo ìí<sup>n</sup> tée nàni Mateú quidé còbrá-dé ñáyiú chi còbràdòr impuèstú cúú-dě, te ní xáha<sup>n</sup>-gă xii-dé:

—Màteú, néhé chitnahá ñáhá-n xii-í —càchí-gá xăha<sup>n</sup>-gă xii-dé.

Te té Màteú-á<sup>n</sup> ní ndacuíñí-dé ní chitnahá ñáhá-dě xii-gá.

<sup>10</sup>Te ìí<sup>n</sup> xito ndècu Jesús ìí<sup>n</sup> vehe, te yìhi-gá mèsá ndìhi cue tée xica cuu ndìhi-gá xéxí ndìhi ñaha-gá xii-güedé. Te tnàhá cue tée cuihna iní-xi quide còbrá ñáhá xii ñáyiú cuendá impuèstú yíhí ndìhi-gá mèsá, te tnàhá tucu dava-gá cue tée ndècu ichi cuehé ichi duha yìhi ndìhi-gá mèsá. <sup>11</sup>Te sá ní xiní cue tée cùu fariséú xéxí Jèsús ndìhi nchaa cue tée-á<sup>n</sup>, te ní xícá<sup>n</sup> tnúhú-güedé núú cuè tée xica cuu ndìhi-gá, te xăha<sup>n</sup>-güedé:

—¿Ná cuendá duca<sup>n</sup> quide tée cùu mestrú-ndó xèxi-dé ndìhi cue tée cuihna iní-xi quide còbrá ñáhá xii ñáyiú cuendá impuèstú, ndìhi nchaa dava-gá cue tée ndècu ichi cuehé ichi duha-í? —càchí-güedé xăha<sup>n</sup>-güedé.

12-13 Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedě xii cue tée xica cuu ndihi-gá, núu ní xáha<sup>n</sup>-gã xii-güedé:

—Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhú-yu ñátátná. Te yúhú véxi-í cáhá<sup>n</sup>-í ñáyiú cùtnumí iní-xi sá ndécú cuèchi-xi cuendá dàhá-yu nchaa sá cuèhé sá dúhá quidé-yu, te ñá túú véxi-í cáhá<sup>n</sup>-í ñáyiú càchí sá ñà túú ndècu cuèchi-xi. Te chí cádá cuendá váha nàcuáa càhá<sup>n</sup> Yá Ndiöxí núu tütú-gá núu càchí-xi: “Yúhú cuíní-í sá cùndàhú iní-ndó cuè tnahá ñáyiú-ndo, te ñá díú mèe-ni sá cáhni-ndó quítì nduu táhù-í”, duha càchí-gá núu tütú-gá —càchí Jèsús xáha<sup>n</sup>-gã xii-güedé.

**Cue tée ndùcu tnúhu núu Jèsús cuendá ñáyiú ñá túú tnàhí ná xéxí áma càhá<sup>n</sup> ndihí-yu Yá Ndiöxí**  
(Mr. 2:18-22; Lc. 5:33-39)

14 Te cue tée xica cuu ndihi té Juáa tée dàcuandute ñaha xii ñáyiú ní sáhá<sup>n</sup>-güedé núu ndécú Jèsús, te xicá<sup>n</sup> tnúhú-güedě núu-gã, te xáha<sup>n</sup>-güedě:

—Cuíní-ndí cachí tnúhu-n ñá cuendá nchúhú, ndihi cue tée cùu fariséu ñá túú tnàhí ná xéxí-ndí áma càhá<sup>n</sup> ndihi-ndí Yá Ndiöxí, te cue tée xica cuu ndihi-n ñá túú dùca<sup>n</sup> quide-güedé —càchí-güedé xáha<sup>n</sup>-güedě xii-gá.

15 Te Jèsús ní xáha<sup>n</sup>-gã xii-güedé: —Nchòhó xini-ndó sã vã cúú cùñaha-o xì ñáyiú ñuhu vico tnándaha sã vã cúú càxí-yu nini ndècu ndihi ñaha tée tnándaha xii-yu, dico sáa nduu vã cùndècu

ndihi ñaha-gá tée tnándaha-á<sup>n</sup> xii-yu, te dàvá-á<sup>n</sup> te cahni iní-yu vá càxí-yu cuendá sá ndihú iní-yu.

16 Te ni vã yõ dandée luha dóo sáa ì<sup>n</sup> dóo sa ní cuu tühú víhí, chi dóo sáa-á<sup>n</sup> nàndiyi-xi te uu<sup>n</sup>-gá ndata-xi dõo sã ñì cuu tühú-á<sup>n</sup>.

17 Te ni vã yõ chihí ndidí sáa xití ì<sup>n</sup> lamba sa ní cuu tühú víhí, chi núu yoo duca<sup>n</sup> na càda te ndava lamba sa ní cuu tühú-á<sup>n</sup> chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu, núu xíã<sup>n</sup> xíní ñuhu-xi quée ndidí sáa-á<sup>n</sup> xití ì<sup>n</sup> lamba saa cuendá duca<sup>n</sup> ñà túú ñà cuu cováha-xi —càchí-gá xáha<sup>n</sup>-gã xii-güedé.

**Cuendá déhe yoco té Jàirú ndihi cuendá ì<sup>n</sup> ñaha ní tnándeé dóo Jèsús**

(Mr. 5:21-43; Lc. 8:40-56)

18 Te càhá<sup>n</sup> dúcá<sup>n</sup>-ní Jèsús ní quexio ì<sup>n</sup> tée cùnuu núu ndécú-gã, ì<sup>n</sup> tée tàxi tnuní veñúhu, te ní ngüñí xití-dě núu-gã càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núu-n ñuu vá cùndèe iní-n quíhí<sup>n</sup>-ó vèhe-í dandòto-n déhe yoco-í chi ní xíhí-xi tnàvíí, te yúhú cùtnuní iní-í sá ñuu quíhí<sup>n</sup>-n tëndaha-n yiqui cuñú-xi te ndoto-xi —càchí-dé xáha<sup>n</sup>-dě xii-gá.

19 Te Jèsús ní xica-gá cuáhá<sup>n</sup>-gã ndihi-dé ndihi cue tée xica cuu ndihi-gá. 20 Te ichi ñuhu-gá cuáhá<sup>n</sup>-gá ní sáhá<sup>n</sup> ì<sup>n</sup> ñadìhí ní tnándeé-a<sup>n</sup> yuhu dõo-gã ndàa sátá-gã, te ñaha-á<sup>n</sup> sa ní cuu úxúú cuía sã cùhú-a<sup>n</sup> ngòyo ñaha níñí xii-a<sup>n</sup>. 21 Te duca<sup>n</sup> ní quide-a<sup>n</sup> chi ní sani iní-a<sup>n</sup> sã ñuu ndacu-a<sup>n</sup>

tnándeé-a<sup>n</sup> cuèdicó luha yuhu dǒó Jèsús te ndúha-a<sup>n</sup> ní sani iní-a<sup>n</sup>.

<sup>22</sup>Te Jèsús ní nchócótó-gǎ ndàa sátá-gǎ te ní xiní-gǎ ñàdìhí-á<sup>n</sup>, te ní xáha<sup>n</sup>-gǎ:

—Yòhó ñaha cùhú, vá ndìhú-gǎ iní-n vitna chi sa ní ndúha-n, chi ní sándáá iní ñáhá-n xii-í —càchí-gǎ xáha<sup>n</sup>-gǎ xii-a<sup>n</sup>.

Te òré-ni-á<sup>n</sup> nǐ ndúha ñaha cùhú-ǎ<sup>n</sup>.

<sup>23</sup>Te òré ní quexìo Jesús vehe téé cùnuu taxi tnuí veñúhu-á<sup>n</sup>, te ní xiní-gǎ xǐndáhí víhí ñǎyiu, te xǐndecu mǐsicú. <sup>24</sup>Te ní xáha<sup>n</sup>-gǎ xií-yu:

—Chí táquèe xití vehe-a, chi xíchí-a ñá túú ní xǐhí-xi chi dìcò xídí-xi —càchí-gǎ xáha<sup>n</sup>-gǎ xií-yu.

Te ní sácú ndeé ñáhǎ-yu xii-gǎ sá dúcá<sup>n</sup> nǐ cáhá<sup>n</sup>-gǎ, chi sá cúu-xí mèè-yu te ní xǐhí ndisa xíchí-ǎ<sup>n</sup>.

<sup>25</sup>Te ñáyiu-á<sup>n</sup> nǐ queé-yu te cuánguǐhu Jèsús núu cándòdo xíchí nǐ xǐhí-á<sup>n</sup>, te ní tnií-gǎ ndaha-xi te òré-ni-á<sup>n</sup> nǐ ndacóo-xi. <sup>26</sup>Te nchaa ñúu cáá yàtni xía<sup>n</sup> nǐ níhí ñáyiu tnúhu nàcuáa ní quide Jèsús.

### Jèsús quidé tǎtna-gǎ núu úú tñahá cue téé cuáá

<sup>27</sup>Te sátá dúcá<sup>n</sup> nǐ cuu te ní xica Jèsús cuánuhú-gǎ, te ichi ñúhu-gǎ ní chinchícú<sup>n</sup> ñáhá úú tñahá cue téé cuáá xii-gǎ, te níhi càhá<sup>n</sup>-güedé, te xáha<sup>n</sup>-güedé xii-gǎ:

—Yòhó Jèsús, téé cùu ñaní tñahá ndíi Dàvíí, cundàhú iní ñáhá xii-ndí —càchí-güedé xáha<sup>n</sup>-güedé xii-gǎ.

<sup>28</sup>Te òré ní nasáá Jèsús núu quidé vehe-gǎ, te cue téé cuáá-á<sup>n</sup> nǐ quexìo-güedé ndéé núu-gǎ, te

ní xícá<sup>n</sup> tnúhú-gǎ núu-güedé, te xáha<sup>n</sup>-gǎ:

—¿Sándáá iní-ndó sǎ yǐhú ndacu-í cada tǎtna-í núu-ndó-ǎ<sup>n</sup>? —càchí-gǎ xáha<sup>n</sup>-gǎ xii-güedé.

Te ní xáha<sup>n</sup>-güedé xii-gǎ:

—Sándáá iní-ndí sá díú yòhó Jèsús ndacu-n cada tǎtna-n núu-ndí —càchí-güedé xáha<sup>n</sup>-güedé xii-gǎ.

<sup>29</sup>Te Jèsús ní dácáá-gǎ ndaha-gǎ ní tendaha-gǎ núu-güedé, te ní xáha<sup>n</sup>-gǎ xii-güedé:

—Te vitna, ndúha núu-ndó chi ní sándáá iní-ndó sǎ díú yǐhú ndacu-í cada tǎtna-í núu-ndó —càchí-gǎ xáha<sup>n</sup>-gǎ xii-güedé.

<sup>30</sup>Te òré-ni-á<sup>n</sup> nǐ ndúha núu-güedé, te Jèsús ní cáhá<sup>n</sup> víhí-gǎ dóho-güedé cuèndá sá vǎ càhá<sup>n</sup>-güedé nàcuáa ní cuu ní ndúha núu-güedé.

<sup>31</sup>Te cue téé-á<sup>n</sup> òré ní ndee-güedé núu ndécú Jèsús, te ní ngúíta-ni-güedé ní cani-güedé cuèndú núu ñáyiu nàcuáa ní quide ñaha-gǎ xii-güedé. Te nchaa dava-gǎ ñúu cáá yàtni xía<sup>n</sup> nǐ sáhá<sup>n</sup>-güedé ní cani-güedé cuèndú núu ñáyiu nàcuáa ní quide ñaha Jèsús xii-güedé.

### Jèsús quidé tǎtna-gǎ ií<sup>n</sup> téé ñìhí

<sup>32</sup>Te íchí nǐ ndee cue téé ní ndúha núu-xi-á<sup>n</sup> núu ndécú Jèsús, te ní quexìo ií<sup>n</sup> úú ñáyiu ndecá-yu ií<sup>n</sup> téé ñìhí yǐhí ñaha espíritú cündìhi yucu ñávǎha. <sup>33</sup>Te Jèsús ní queñuhu-gǎ espíritú cündìhi yucu ñávǎha yìhí ñaha xii téé-á<sup>n</sup>, te òré-ni-á<sup>n</sup> nǐ cuu ní nacáhá<sup>n</sup>-dé. Te nchaa ñáyiu xǐndecu-á<sup>n</sup> ïo ní cuñúhu-yu, te ní xítñahá-yu:

—Ñá túú tnàhí xìní-ó ì<sup>n</sup> tée duha cada ñúú nchoo cuè ñáyíu isràèl ní cùu —cachí-yu xìtnàhá-yu.

<sup>34</sup>Te cue tée cùu fariséú ní ngúífta-güedé xìtnàha-güedé:

—Tée-a chi sácúíhná chíndèe ñaha-xi xii-dé queññuhu-dé nchaa espíritú yíhí ñaha xii ñáyíu te ñíu-ni sácúíhná-ǎ<sup>n</sup> táxí tnùní-xi nchaa espíritú-á<sup>n</sup> —càchí-güedé xìtnàha-güedé.

### Jèsús cùndàhú iní-gá ñáyíu

<sup>35</sup>Te Jèsús cuáhá<sup>n</sup>-gá nchaa ñúú náhnú ndìhi nchaa ñúú líhli, te ndi tnahá ì<sup>n</sup> ì<sup>n</sup> ñúú sàà-gá te duca<sup>n</sup> cuànguìhu-gá ì<sup>n</sup> ì<sup>n</sup> veñúhu càa nchaa ñúú-á<sup>n</sup> dánèhé-gá ñáyíu tnúhu váha, tnúhu sá sánú ìchi ñaha xii-yu nàcuáa ndíhu ndaha ñaha Yá Ndiòxí xii-yu. Te duca<sup>n</sup>-ni ta quide tátna-gá nchaa ñáyíu cùhú cuáhá<sup>n</sup> cuèi ndi dí<sup>n</sup> ndi dí<sup>n</sup> nùú cuèhé tnàhá-yu ì<sup>n</sup> ì<sup>n</sup>-yu. <sup>36</sup>Te sá nì xini Jèsús sá ìo vài ñáyíu nchìcú<sup>n</sup> ñáhá xii-gá, te ní cundàhú iní ñáhá-gá xii-yu chi ío ndìhú iní-yu, te vá yò nèhe cuendá ñáhá xii-yu, te cùu-yu dàtná cue mbéé cue quiti ñá túú tòli-xi. <sup>37</sup>Te Jèsús ní xáha<sup>n</sup>-gá xii cue tée xica cuu ndìhi-gá:

—Nchòhó xini-ndó sǎ òrè ná sáà nduu cùu nchaa sá xítú ñáyíu te ío vài cuu. Te na càchí tnúhu ndáá-í xii-ndo sǎ dàtná ío vài sá xítú ñáyíu cùu, duca<sup>n</sup> ìo vài ñáyíu cùmání cundedóho tnúhu-í, te ío sacú ñáyíu dàcuaha ñaha xii-yu. <sup>38</sup>Núu xíá<sup>n</sup> xini ñùhu-xi cǎcǎ<sup>n</sup>-ndó nùú Yá Ndiòxí Yáa cùú Xìtohó-ndó ndìhí-yu cuendá sá ná dàcahá<sup>n</sup>-gá iní-yu cǎhá<sup>n</sup>-yu tnúhu-gá núú nchàa

dava-gá tnàha ñáyíu-yu cùmání cundedóho tnúhu-gá —càchí-gá xáha<sup>n</sup>-gá xii-güedé.

**Jèsús sǎnaha-gá tnúhu ndee iní xii ndi ùxúú cue tée xica cuu ndìhi-gá**

(Mr. 3:13-19; Lc. 6:12-16)

**10** Te Jèsús ní cana-gá ndi ùxúú cue tée xica cuu ndìhi-gá, te ní sǎnaha-gá xii-güedé tnúhu ndee iní cundecu ndìhi-güedé cuendá queññuhu-güedé nchaa espíritú cùndìhi yucu ñávàha yìhi ñaha xii ñáyíu, ndìhi cuendá sá cadá tátna-güedé nchaa dava-gá ñáyíu cùhú cuèi nándi núú cuèhé tnàhá-yu.

<sup>2</sup>Te duha xìnani ndi ùxúú cue tée-á<sup>n</sup>: tée cùnuu-gá nání-dě Xímú, àdi Pelú chi úú ñíu-dé, te ñaní-dé cùú tǎ Ndríxí, te tnàhá tée-á<sup>n</sup> cùú-dě tée xica cuu ndìhi Jesús, ndìhi té Jàcobó ndìhi ñaní té Jàcobó-á<sup>n</sup> tǎe nàni Juaá, te ndi ndùú cue tée-á<sup>n</sup> cùú-güedě déhe té Zebèdeú. <sup>3</sup>Te tnàhá té Lìpé xícá cùu ndìhi-gá, ndìhi té Bartolòmé, ndìhi té Mǎxí, ndìhi té Mǎteú tée cùu cobradór impuèstú ní cùu, ndìhi té Jàcobó déhe té Àlfeú, ndìhi té Lèbeú tée dànani-güedé Tàdeú, <sup>4</sup>ndìhi té Xímú tée ní cundìhi cue tée canànistá, ndìhi té Jùdás Iscàrioté tée ní sáà nduu nì sáha cuendá ñáhá xii Jesús núú cuè tée cùu úhú iní ñáhá xii-gá.

**Jèsús téndàha-gá ndi ùxúú cue tée xica cuu ndìhi-gá quíhí<sup>n</sup>-güedé cǎhá<sup>n</sup>-güedé tnúhu-gá núú ñáyíu**

(Mr. 6:7-13; Lc. 9:1-6)

<sup>5-6</sup>Te Jèsús ní xáha<sup>n</sup>-gá xii ndi ùxúú cue tée xica cuu ndìhi-gá sá



quìhí<sup>n</sup>-güedé cáhá<sup>n</sup>-güedé tnúhu-gá núú ñáyiú, te cùmání-gă caca-güedé quíhí<sup>n</sup>-güedé, te ní xáha<sup>n</sup>-gă xii-güedé:

—Na cächí tnúhu-í xii-ndo sã meé-ní ñúú núú xíndecu cue ñáyiú isràél quíhí<sup>n</sup>-ndó cãhá<sup>n</sup>-ndó tnúhu-í, te vã quíhí<sup>n</sup>-ndó ñi íí<sup>n</sup> ñúú yíndèhu distritú Sãmariá, te ni vã quíhí<sup>n</sup>-ndó dâva-gă ñúú núú xíndecu ñáyiú ñã túú cùu ñáyiú isràél. Te cue ñáyiú isràél-á<sup>n</sup> cúú-yu dàtná cue mbéé cue quiti ní xíta chi ta xíta nihnú-yu cuáhá<sup>n</sup>. <sup>7</sup>Te cúñaha-ndo xíí-yu sá sã ní cuyatni nduu ndíhu ndaha ñàha Yá Ndiöxí xií-yu. <sup>8</sup>Te cada tátna-ndo nchàa ñáyiú cùhú cuéi ñáyiú tnàhã cuéhé sã dátèhyú nihnu-xi yiqui cùñú-yu, te queñuhu-ndo nchàa espíritú cùndìhi yucu ñávãha yìhi ñaha xii ñáyiú, te dandòto-ndo cue ñáyiú sa ní xíhí, te vã càcá<sup>n</sup>-ndó yãhu-ndo núú ñáyiú òré cada-ndo nchàa chiu<sup>n</sup>-á<sup>n</sup>, chi sa nàha-ndo sã òré duca<sup>n</sup> ñi taxi-í tnúhu ndee ñi ndécú ndìhi-ndo.

<sup>9</sup>Te vã cànèhe-ndo díhú<sup>n</sup> cuu ichi-ndo, <sup>10</sup>te ni vã cànèhe-ndo ñunu cuhu<sup>n</sup> ndachiu<sup>n</sup>-ndo, te ni vã cànèhe-ndo ingá ichi dóó-ndó nàdama-ndo, te ni vã cànèhe-ndo úú-gă chàú-ndó chi ñi-ni chàú yíhí-ndó-á<sup>n</sup> xíá<sup>n</sup>-ni quíhi-ndo, te ni vã cànèhe-ndo tatnu, te duca<sup>n</sup> càda-ndo chi nchòhó sa nàha-ndo sã nchàá ñáyiú quide chiu<sup>n</sup> te ñi-ni cuendá chiu<sup>n</sup> quidé-yu ñihí-yu sã xéxi-yu.

<sup>11</sup>Te ndi tnahá ñúú ná quexio-ndo te nducu-ndo ñáyiú cùtnuní iní-ndó sã cúú-yu ñáyiú váha, te vehe ñáyiú-á<sup>n</sup> cundecu-ndo ndéé sáá nduu ndèe-ndo ñúú-á<sup>n</sup>. <sup>12</sup>Te òré

quexio-ndo vehé-yu te cúñaha-ndo xíí-yu: “Yá Ndiöxí chíndèe chitúu ñaha-gă xii-ndo ndècu-ndo”, duha cúñaha-ndo xíí-yu. <sup>13</sup>Te núú ní cáhá<sup>n</sup> váha ndihi ñàhá-yu xii-ndo, te cuu-xi sã váha sã cúú-xí-yu cuendá tnúhu ní xáha<sup>n</sup>-ndo-á<sup>n</sup>, dico núú ñã túú ní cãhá<sup>n</sup> váha ndihi ñàhá-yu xii-ndo, te cúñaha-ndo xíí-yu sã vã cúú-xí sã váha xií-yu tnúhu ní xáha<sup>n</sup>-ndo-á<sup>n</sup>. <sup>14</sup>Te núú ní sáá-ndó ñi ñúú àdi íí<sup>n</sup> vehe, te núú ñã túú ní cãhá<sup>n</sup> ndihi ñaha váha-yu xii-ndo te ni ñã túú ní cuñí-yu cundedóho-yu tnúhu càhá<sup>n</sup>-ndó te ndee-ndo ñúú-á<sup>n</sup> àdi vehe-á<sup>n</sup>, te naquidi-ndo tĩcã chúhmá ñi tñi sáhã-ndó cuendá ná cùtnuní iní-yu sã ñã túú quide váha-yu. <sup>15</sup>Te na cächí tnúhu ndáá-í xii-ndo sã sàa nduu te ío-gă dandòho ñaha Yá Ndiöxí xii ñáyiú duca<sup>n</sup> na càda ñaha xii-ndo-á<sup>n</sup> dàcúúxí ñáyiú ní xíndecu ñúú Sòdomá ndihi ñúú Gòmorrá.

#### Ndoho tnahá-ó cùndecu-o ichi Xítóhó Jesucristú

<sup>16</sup>Te cada iní-ndó sã cúú-ndó dàtná cue mbéé cue quiti cuáhá<sup>n</sup> núú ío yíhí. Te duca<sup>n</sup> sãtnahá-xi cùu-ndo chi yúhú tendaha ñaha-í xii-ndo quíhí<sup>n</sup>-ndó núú xíndecu cue ñáyiú cuíhna ñi-ni-xi, te ío váha cuáha-ndo cuendá nàcuáa cada-ndo dàtná quidé còó, dico cunduu váha iní-ndó ñã túú ñã cada-ndo dàtná quidé lõmá. <sup>17</sup>Te quíhi iní-ndó chi cue ñáyiú na cùu úhú iní ñàhá xii-ndo, te cuáha cuendá ñàhá-yu xii-ndo núú cuè téé cùchiu<sup>n</sup>, te caniha-güedé xii-ndo xití veñúhu-güedé. <sup>18</sup>Te dava tucu ñáyiú cuu úhú iní ñàhá xii-ndo

candeca ñahá-yu xii-ndo quíhí<sup>n</sup> núú cuè téé cùnuu yindaha nació<sup>n</sup>, àdi núú dàva-gá cue téé cùnuu sá cuendá-í. Te nchòhó níhí-ndó nàcuáa cada-ndo cáhá<sup>n</sup> váha-ndo cuendá-í núú-güedě ndíhi núú cuè ñáyiú ñá túú cùu ñáyiú isràél. <sup>19-20</sup>Dico òré cuáha cuendá ñáhă-yu xii-ndo nŭú nchàa cue téé-á<sup>n</sup>, te vá cáni iní-ndó nŭú nása cunduu tnúhu cáhá<sup>n</sup>-ndó nŭú-güedě, chi òré-nă te níhí-ndó tnŭhu cáhá<sup>n</sup>-ndó. Te ñá díú mèe-ndo cahu iní-ndó tnŭhu cáhá<sup>n</sup>-ndó, chi mee Espiritú Yă Ndióxi Yaá cúú Tătá-ndó dàcahú iní ñáhă-xí xii-ndo nacuáa cunduu tnúhu cáhá<sup>n</sup>-ndó.

<sup>21</sup>Te dava cue téé cuáha cuendá-güedě ñani-güedě núú cuè téé cùchiu<sup>n</sup> cuendá cahni ñaha-güedě, te dava cue téé cùu tátá ñi-ni duca<sup>n</sup> càda-güedě déhe-güedě, te ñi-ni duca<sup>n</sup> càda ñaha dava cue ñáyiú cùu déhe xii tătă-yu ndíhi nănă-yu, chi cuáha cuendá ñáhă-yu núú cuè téé cùchiu<sup>n</sup> cuendá cahni ñaha-güedě xíi-yu. <sup>22</sup>Te nchòhó chi nchaa ñáyiú ngúíta-yu cuu úhú iní ñáhă-yu xii-ndo sã cuendá-í. Te núu na càda ndee-ni iní-ndó càncicú<sup>n</sup> nihnu-ni-ndo ìchi-í cuèi nándi sá ná càda ñahá-yu xii-ndo ndèé ná sã nduu vă cùndècu-gá-ndó ñuyúú-a ña, te nduu táhú-ndó cùndecu-ndo ni caa ni quíhí<sup>n</sup> ndíhi Yă Ndióxi. <sup>23</sup>Te núu ñi<sup>n</sup> ñuú cuiní-güedě tni ñaha-güedě xii-ndo càda úhú ñáhă-güedě sá cuendá-í, te cunu-ndo nŭú-güedě quíhí<sup>n</sup>-ndó ìngá ñuú. Te na càchí tnúhu ndáá-í xii-ndo sã cùmání-gă quíhí<sup>n</sup>-ndó nchàa dava-gá ñuú núú xĩndecu

ñáyiú isràél cáhá<sup>n</sup>-ndó tnŭhu-í, te sa quixi tucu yúhú, Téé cùu ñani tnáhă-ndó nchàa-ndo ñuyúú-a.

<sup>24-25</sup>Te nchòhó xini-ndó sã ni ñi<sup>n</sup> téé dàcuaha ñá túú cùnuu-dé dàcúxí mèstrú-dé, te núu mèstrú téé-á<sup>n</sup> nándi yăha-dé ndécú-dě te tàú-dé nduu vétú iní-dé te núu tnáhă-dé yăha-dé dàtná yăha mèstrú-dé-á<sup>n</sup>. Te ñi-ni duca<sup>n</sup> sãtnahá tucu-xi cùu ñi<sup>n</sup> téé xinu cuechi, chi ñá túú cùnuu-dé dàcúxí pàtróó<sup>n</sup>-dě, te nchaa sá yăha pàtróó<sup>n</sup>-dě-á<sup>n</sup> te tàú-dé nduu vétú iní-dé te núu tnáhă-dé yăha-dé dàtná yăha pàtróó<sup>n</sup>-dě-á<sup>n</sup>. Te núu yúhú Yaá táxi tnùni ñáhă xii-ndo cachí-yu sá cùú-í sácúíhná, te uu<sup>n</sup>-gá duca<sup>n</sup> cŭñáhă-yu xii nchòhó cue téé cùndíhi-í.

**Vá yùhú-ó cuendá nchaa sá cádá ñaha ñáyiú xii-o**

(Lc. 12:2-7)

<sup>26</sup>Te nchòhó vá yùhú-ndó nŭú ñáyiú. Chi nchaa tnúhu sá cúú yùhu ni cuu vá cúú yùhu-gá, chi nchaa dacuití sã quée tŭu-xi núú ñáyiú. <sup>27</sup>Te nchaa tnúhu sá càchí tnúhu-í xii-ndo nŭú méé nŭú ñi<sup>n</sup>-ó, cùu-xi tnúhu sá ndúú yùhu ni cuu datúu-ndo nŭú cuè ñáyiú cuèi núú chítú núú tàcá. <sup>28</sup>Te xini ñuhu-xi sá vă yùhú-ndó cuè ñáyiú cuèi na càhni ñahá-yu xii-ndo, chi ñi-ni yiqui cŭñú-ndó ndàcú-yu cahni-yu, dico ñá túú năgá ndacu-yu cada ñahá-yu xii-ndo. Te tàú-ndó sã Yă Ndióxi yùhú-ndó chi Yaá-á<sup>n</sup> ndacu-gá danàa-gá yiqui cŭñú-ndó, te ndacu-gá daquihí<sup>n</sup> ñáhă-gă xii-ndo nŭú ùhú núú ndàhú.

<sup>29</sup>Te nchòhó xini-ndó sã ndèé úú tnáhă tíaáa cùyăhu-di núú

íí<sup>n</sup>-ní dǐhú<sup>n</sup>, te ni íí<sup>n</sup>-dí ñá túú xihí cùtexínu-dí chi ndéé nũ mee Yá Ndióxi Yaá cúú Tǎtá-ndó ná cǎchí-gá te xihí-dí. <sup>30</sup>Dico nchòhó chi ío-gá néhé cuendá ñáhá Yá Ndióxi xii-ndo chi ndéé idi díquí-ndó yìndehu. <sup>31</sup>Núu xíǎ<sup>n</sup> cǎchí-í sá vǎ yùhú-ndó chi cùnnu-gá-ndó dàcúúxí tǐlǎá cuèi vǎi vihi-güedi.

**Nchaa ñáyiú dàtúu núú tnàha ñáyiú-xi sá ndécú ndìhi-yu Xítóhó Jesucristú**

(Lc. 12:8-9)

<sup>32</sup>Te na cǎchí tnúhu-í xii-ndo sǎ ncháá ñáyiú na dàtúu núú tnàha ñáyiú-xi sá ndécú ndìhi ñáhá-yu xii-í, te duca<sup>n</sup> te tnàhá yúhú dàtúu-í núú Tǎtá-í Dútú Ndióxi Yaá ndécú àndiu sá ndécú ndìhi-í-yu. <sup>33</sup>Dico nchaa ñáyiú na cǔñaha xii tnaha ñáyiú-xi sá ñà túú ndècu ndìhi ñáhá-yu xii-í, te ñà túú ndécu ñà túú ndècu ndìhi-í-yu.

**Ñá túú cùu íí<sup>n</sup>nuu ñáyiú**

(Lc. 12:51-53; 14:26-27)

<sup>34</sup>Te na cǎchí tnúhu-í xii-ndo sǎ vǎ cání ínì-ndó sǎ yùhú véxi-í ñuyú-a te cuu íí<sup>n</sup>nuu-gǎ ñáyiú cundecú-yu, chi da ngüíta-yu vǎ cúú íí<sup>n</sup>nuu-gá-yu cundecú-yu, te duca<sup>n</sup> chi nchaa ñáyiú vǎ quìndáá ínì ñáhá xii-í ñáyiú-á<sup>n</sup> ngóo-yu cuu úhú ínì-yu nchaa ñáyiú quìndáá ínì ñáhá xii-í. <sup>35</sup>Te dava cue tée xǐndecu tǎtá-xi te ngóo-güedé cuu úhú ínì-güedé tǎtá-güedé, te ñà túú duca<sup>n</sup> cǎda cue ñáyiú dǐhí xǐndecu nǎná-xi, chi ngóo-yu cuu úhú ínì-yu

nǎná-yu, te ñà túú duca<sup>n</sup> cǎda tucu cue ñáyiú cùu sǎnu, chi ngóo-yu cuu úhú ínì-yu nǎná yí-yu. <sup>36</sup>Te ndí mèé-yu vehé-yu ngóo-yu vǎ cúú íí<sup>n</sup>nuu-gá-yu cundecú-yu.

<sup>37</sup>Te na cǎchí tnúhu tucu-í xii-ndo sǎ ncháá ñáyiú ío-gá ná cùu ínì tǎtá-xi àdi náná-xi dàcúúxí yùhú, te ñáyiú-á<sup>n</sup> ñà túú tàú-yu cundecu ndìhi ñáhá-yu xii-í, te nchaa ñáyiú ío-gá ná cùu ínì déhe ducu<sup>n</sup>-xi, àdi déhe yoco-xi dàcúúxí yùhú, te ñà túú duca<sup>n</sup> ñà túú tàú-yu cundecu ndìhi ñáhá-yu xii-í. <sup>38</sup>Te nchaa ñáyiú vǎ cǎchícú<sup>n</sup> nihnu ñaha xii-í cuendá sá yùhú-yu ndohó-yu dàtná ndoho-í ñáyiú-á<sup>n</sup> ñà túú tàú-yu cundecu ndìhi ñáhá-yu xii-í. <sup>39</sup>Te cue ñáyiú na yùhú cuú sá cuendá-í te ñáyiú-á<sup>n</sup> cuíta nihnú-yu, dico nchaa ñáyiú vǎ yùhú cuú sá cuendá-í, te ñáyiú-á<sup>n</sup> nduu táhù-yu cundecú-yu ni caa ni quǐhí<sup>n</sup> ndìhi Yá Ndióxi.

**Cuendá sá ndúú tǎhú-ó**

(Mr. 9:41)

<sup>40</sup>Te nchaa ñáyiú na quèhe<sup>n</sup> cuendá ñáhá xii-ndo te cada ínì-yu sá tnàhá yúhú ní quehe<sup>n</sup> cuendá-yu. Te nchaa ñáyiú na quèhe<sup>n</sup> cuendá ñáhá xii-í, te cada ínì-yu sá tnàhá Tǎtá-í Dútú Ndióxi Yaá ní tendaha ñaha xii-í véxi-í ñuyú-a ní quehe<sup>n</sup> cuendá-yu. <sup>41</sup>Te nchaa ñáyiú na quèhe<sup>n</sup> cuendá íí<sup>n</sup> tée cǎhá<sup>n</sup> tnúhu Yá Ndióxi cuendá sá quidé-dé chiu<sup>n</sup>-gá, te dàtná-ni cǎa táhú cuǎnaha-gǎ nduu táhú tée duca<sup>n</sup> cǎhá<sup>n</sup> tnúhu-gá-á<sup>n</sup>, ñà túú duca<sup>n</sup> cùnduu táhú cuǎnaha-gǎ nduu táhú ñáyiú duca<sup>n</sup> na quèhe<sup>n</sup> cuendá ñáhá xii-dé. Te nchaa ñáyiú na quèhe<sup>n</sup>

cuendá ìí<sup>n</sup> téé quèide váha cuendá sá dúcá<sup>n</sup> quèide váha-dé, te dàtná-ni càa táhú nduu táhú tée-á<sup>n</sup> òu-ni duca<sup>n</sup> cùnduu táhú nduu táhú ñáyi na quèhe<sup>n</sup> cuendá ñáhá xii-dé. <sup>42</sup>Te nchaa ñáyi na cuñaha ìí<sup>n</sup> yaxi<sup>n</sup> ndute coho ìí<sup>n</sup> ñáyi cùu cuendá-í cuendá sá ñí tuha ñàhá-yu xii-í cuèi ñá túú cùnuu vihi-yu, te ñáyi duca<sup>n</sup> na cuñaha ndùte-á<sup>n</sup> ñíhi-yu sá ndúú tãhú-yu núú Yã Ndiòxí — càchí Jèsús xãha<sup>n</sup>-gã xii-güedé.

**Jèsús càhá<sup>n</sup> ndihi-gá cue téé xica cuu ndihi té Juàá**

(Lc. 7:18-35)

**11** Te sátá ñí yáha duca<sup>n</sup> ñí xãha<sup>n</sup> Jèsús xii ndi ùxúú cue téé xica cuu ndihi-gá, te ní xica-gá cuáhá<sup>n</sup>-gá nchaa ñúú cáá yàtni xíá<sup>n</sup> dánèhé-gá ñáyi tnúhu-gá.

<sup>2</sup>Te té Juàá yèhi-dé vecaá te ní níhi-dé tnúhu nchaa nàcuáa quèide Xítoho Jesucristú. Te sátá dúcá<sup>n</sup> te ní tendaha-dé ìí<sup>n</sup> úú cue téé xica cuu ndihi-dé cuáhá<sup>n</sup>-güedé núú ndécú Jèsús. <sup>3</sup>Te òré ní quexìo-güedé núú ndécú-gã, te xicá<sup>n</sup> tnúhú-güedé núú-gã nàcuáa ní xãha<sup>n</sup> tã Juàá xii-güedé, te xãha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n ñúu sá díú-n cùu-n Cristú Yaá ní tendaha Yã Ndiòxí véxi ñuyíú-a, àdi sá cùndètu nahi-ni-ndí mei Yáá-á<sup>n</sup> —càchí-güedé xãha<sup>n</sup>-güedé xii-gá.

<sup>4</sup>Te Jèsús ní xãha<sup>n</sup>-gã xii-güedé:

—Chí cuánùhú te cani-ndo cuendú núú tã Juàá nchaa sá ñí xiní-ndó quèide-í, ndihi nchaa nàcuáa ndùu tnúhu ní càhá<sup>n</sup>-í ní xíndedóho-ndo.

<sup>5</sup>Te cúñaha-ndo xii-dé sá quidé

tãtna-í núú cuè ñáyi cuáá, te quèide tãtna-í cue ñáyi yacua, ndihi cue ñáyi tnàhá cuéhé sã dátèhyú nihnu-xi yiqui cùñú-yu, ndihi cue ñáyi doho, nchaa ñáyi-á<sup>n</sup> quidé tãtna-í, te ndùha-yu, te ndéé tnàhá cue ñáyi sa ní xíhi dándòto-í cúñaha-ndo. Te cúñaha tùcu-ndo xii-dé sá ndécuu-í dánèhé-í nchaa ñáyi ndàhú, tnúhu sá sánú ìchi ñaha xii-yu nàcuáa naníhi tãhú-yu. <sup>6</sup>Te cúñaha tùcu-ndo xii-dé sá ìo váha táhú nchaa ñáyi ñá túú quèide sáá iní-xi nchaa tnúhu càhá<sup>n</sup>-í, duha cúñaha-ndo xii-dé —càchí-gá xãha<sup>n</sup>-gã xii-güedé.

<sup>7</sup>Te sátá ñí yáha-güedé cuánuhú-güedé te ní ngúfta Jèsús ní càhá<sup>n</sup>-gá núú ñáyi cuendá té Juàá, te xãha<sup>n</sup>-gã xii-yu:

—Nchòhó ní sãhá<sup>n</sup> ndéhé-ndó ìí<sup>n</sup> téé ndècu xití yucu, te téé-á<sup>n</sup> ñà túú sàni ìí<sup>n</sup> sani úú iní-dé, chi ñá túú quèide-dé dàtná quidé nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tãchí. <sup>8</sup>Te ni ñà túú ní sãhá<sup>n</sup> ndéhé-ndó ìí<sup>n</sup> téé nihnu dóó vãha dóó vii càa. Te nchòhó xìní-ndó sã ncháá ñáyi nihnu dóó vãha dóó vii càa xíndecú-yu vehe cue téé cùnuu yindaha ñáyi. <sup>9</sup>Dico nchòhó chi ní sándéhé-ndó ìí<sup>n</sup> téé càhá<sup>n</sup> tnúhu Yã Ndiòxí, te ndáá sá díú ìí<sup>n</sup> téé càhá<sup>n</sup> tnúhu-gá cúú-dé, te cùnuu-gá-dé dàcúxí dàva-gá cue téé càhá<sup>n</sup> tnúhu-gá. <sup>10</sup>Te òu cuendá té Juàá-á<sup>n</sup> càhá<sup>n</sup>-xi núú tùtú Yã Ndiòxí nàcuáa ní xãha<sup>n</sup>-gã xii Cristú, te duha ní xãha<sup>n</sup>-gã:

Tendaha-í ìí<sup>n</sup> téé càhá<sup>n</sup>-dé tnúhu-í codonù-dé núú-n, cuendá dàtúha-dé ñáyi cuendá quíndáá iní-yu tnúhu-n.

Duha ní xáha<sup>n</sup>-gã, te duca<sup>n</sup> nĩ ngódó tñuní núú tütú-gá. <sup>11</sup>Te na càchí tñuhu ndáá-í xii-ndo sã nì ìí<sup>n</sup> cue tée ñuyíú-a ñá túú cùnuu-güedé dàtná cùnùu té Juàá tée dàcuandute ñaha xii ñáyiú. Te nchaa ñáyiú sa ta ndĩhu ndaha ñaha Yá Ndiöxí vitna cuáhá<sup>n</sup> cùnùu-gá-ni tucú-yu dàcúxí tẽ Juàá cuẽi cùú-yu ñáyiú ñá túú cùnuu dacúxí dàva-gá ñáyiú yindaha-gá.

<sup>12</sup>Te ndéé cútñhá ní ngüíta té Juàá tée dàcuandute ñaha xii ñáyiú càhá<sup>n</sup>-dé tñuhu Yá Ndiöxí ñuyíú-a, ndéé dàvá-á<sup>n</sup> nĩ ngüíta ñáyiú cuiní-yu sá ndĩhu ndaha ñaha Yá Ndiöxí xií-yu te ndècu ndeé-yu quidè-yu nàcuáa ndĩhu ndaha ñaha-gá xií-yu. <sup>13</sup>Te nchaa cue tée ní xóo cáhá<sup>n</sup> tñuhu Yá Ndiöxí ndéé sanaha nĩ cáhá<sup>n</sup>-güedé sá díú-gã ndĩhu ndaha-gã cue ñáyiú, te ñu-ndu duca<sup>n</sup> nĩ cáhá<sup>n</sup> tucu ndíi Moisés ní ngódó tñuní núú tütú ndíi. Te ñu-ndu duca<sup>n</sup> cùnuu nchaa tñuhu-á<sup>n</sup> càhá<sup>n</sup>-xi nàcuáa ndĩhu ndaha Yá Ndiöxí ñáyiú ndéé ní sáá nduu nĩ ngüíta té Juàá càhá<sup>n</sup>-dé tñuhu-gá ñuyíú-a. <sup>14</sup>Te na càchí tñuhu-í xii-ndo sã cádá cuendá-ndó, chi núú tütú Yá Ndiöxí càchí-xi sá ndíxí tẽ Èliás, te ñu-ndu núú tẽ Èliás-á<sup>n</sup> nĩ quide té Juàá. <sup>15</sup>Te nchaa nchòhó ñáyiú ndèdóho nchaa tñuhu càhá<sup>n</sup>-í-a te ío váha chí cuáha cuendá.

<sup>16</sup>Te na càchí tñuhu tucu-í xii-ndo nàcuáa sãtnahá-xi cùu ñáyiú ndècu vitna. Chi ñáyiú-á<sup>n</sup> cúú-yu dàtná cue landú sácõo núú yãhu dàdiqui-güexi te níhi càhá<sup>n</sup>-güexi, te xitnáha-güexi ndi mee landú-güexi: <sup>17</sup>“Ní tíú-ndí yaá ndíhi vílu te ñá túú ní cuiní-ndó càta-ndo.

Te ío yica ìní ní xita yuhu-ndí te ñá túú ní ndáhyú-ndó”, càchí-güexi xitnáha-güexi. Te duca<sup>n</sup> sãtnahá-xi cùu ñáyiú ndècu vitna, <sup>18</sup>chi té Juàá ío ndàhú ní xóo caxi-dé, te ni ñá túú ní xõ coho-dé ndudí ndéhé yoho yàha stilé sá sà ní nduu-xi ndidí, te sá dúcá<sup>n</sup> nĩ xóo cada-dé te ní cachí-yu sá nĩ xíndecu ndíhi-dé espíritú cündíhi yucu ñávaha. <sup>19</sup>Te sáta nĩ quexio yúhú Tée cùu ñaní tñhá-ndó nchaa-ndo, te xèxi-í xìhi-í quidè-í, te càchí-yu sá yúhú cùú-í ìí<sup>n</sup> tée xèxi vihi te xìhi vihi, te càchí tucú-yu sá cùú-í tée xica cuu ndíhi cue tée cuihna ìní-xi quide cobrá ñáhá xí-yu cuendá impuèstú ndíhi nchaa dava-gá cue tée ndècu ichi cuehé ichi duha, duha càchí-yu. Te ñáyiú ní tñhá tñuhu ndíhi Yá Ndiöxí, ñáyiú-á<sup>n</sup> quidè-yu sá vãha nàcuáa cutnùní sá mée-gã ío ndècu ndíhi-gá sá xìní tñuní-gá —càchí-gá xãha<sup>n</sup>-gã xií-yu.

**Cuendá ñáyiú dava ñuú ñá túú sãndáá ìní tñuhu Xítóhó Jesucristú**  
(Lc. 10:13-15)

<sup>20</sup>Te Jèsús ní ngüíta-gá càhá<sup>n</sup>-gá dóho nchaa ñáyiú ñuú núú ío-gá vãi núú sã vã yõ tñáhí ndàcu cada ní quide-gá, chi nchaa ñáyiú ñuú-á<sup>n</sup> ñá túú cuiní-yu ndixi túu ìní-yu sá ñá túú quide váha-yu ndècú-yu, te xãha<sup>n</sup>-gã xií-yu:

<sup>21</sup>—iNdàhú nchòhó cue ñáyiú ñuú Corazín! iTe ndàhú nchòhó cue ñáyiú ñuú Betsaidá! Chi núu dícó ñuú Tírú ndíhi ñuú Sidón ní quide-í nchaa sá vã yõ tñáhí ndàcu cada datná ní quide-í ñuú-ndó-á nĩ xìní-ndó ñá, te sá ndéé ama-gá cuihnú-yu dóo ndàhú te cunu cóo-yu núú yáá

cuèndá sá ndíxí cuèchi iní-yu sá ñà túú quide váha-yu ni cùu. <sup>22</sup>Dico sáá nduu te ío-gá dandòho ñaha Yá Ndiöxí xii-ndo dácúxí ñáyiú ñuú Tírú ndihi ñáyiú ñuú Sìdón. <sup>23</sup>Te nchòhó cue ñáyiú ñuú Capèrnaúm ío quide cahnu-ndo mee-ndo, te quide iní-ndó sá sà cuándaa-ná-ndó àndiu, dico ñáhá chi núú ùhú núú ndàhú nduu táhú-ndó cùndecu-ndo. Te núú dícó ñuú Sòdomá ní quide-í nchaa sá vǎ yǎo tnàhí ndàcu cada datná ní quide-í ñuú-ndó ñǎ xiní-ndó ñá, te ñáyiú-án vǎ nǎá-yu chi cundecu-ní-yu ndéé vitna ni cùu. <sup>24</sup>Te na càchí tnúhu-í xii-ndo sǎ sǎá nduu te ío-gá dandòho ñaha Yá Ndiöxí xii-ndo dácúxí ñáyiú ñuú Sòdomá — càchí-gá xǎha<sup>n</sup>-gǎ xii nchaa ñáyiú ñuú-án.

**Jèsús cuiní-gá sá túhá ñaha ñáyiú xii-gá**

(Lc. 10:21-22)

<sup>25</sup>Te sǎtá xǎá<sup>n</sup> te Jèsús ní nguíta-gá càhá<sup>n</sup> ndihi-gá Tǎtá-gǎ Dútú Ndiöxí, te xǎha<sup>n</sup>-gǎ: —Yòhó Tǎtá-í Dútú Ndiöxí, ío chiñuhu ñaha-í xii-n chi diu-n tàxi tnuní-n àndiu ndihi ñuyíú-a, te dànehé-n cuè ñáyiú nchaa tnúhu váha, te diu-ni ñáyiú-án cúú-yu ñáyiú ñá túú cùtnuní iní-xi nchaa tnúhu càhá<sup>n</sup> cue téé càchí sá ío túha, te nchaa tnúhu váha-án ñà túú dātúu-n núú ñáyiú càchí sá ío túha te ío váha sǎá díquí-xi. <sup>26</sup>Chi duca<sup>n</sup> cuiní-n cùnduu —cachí-gá xǎha<sup>n</sup>-gǎ xii Tǎtá-gǎ.

<sup>27</sup>Te xǎha<sup>n</sup>-gǎ xii nchaa ñáyiú xíndecu-án:

—Mee Tǎtá-í Dútú Ndiöxí ní cachí-gá sá cúnúu-í núú nchàandi

túhú sá ío. Te vǎ yǎo íi<sup>n</sup>-gá xìní nàcuáa sàni iní yúhú Déhe Dútú Ndiöxí, chi íi<sup>n</sup>dii díí-ni mee-gǎ xìní-gá nàcuáa sàni iní-í, te mee-í xìní-í nàcuáa sàni iní mée-gǎ. Te nchaa ñáyiú càchí iní-í sá quíní-yu nàcuáa sàni iní Tǎtá-í Dútú Ndiöxí te xǐtnúhu-í-yu, te vǎ yǎo íi<sup>n</sup>-gá xìní chi diu-ni ñáyiú duca<sup>n</sup> xǐtnúhu-í-án xìní-yu. <sup>28</sup>Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo túha ñaha-ndo xii-í nàcuáa duca<sup>n</sup> cùndecu váha iní-ndó. <sup>29</sup>Te cuu vii cuu váha iní-ndó tnii-ndo nchaa tnúhu càhá<sup>n</sup>-í, te ío dacuàha-ndo, te duca<sup>n</sup> càda-ndo chi yúhú ío càhnu iní-í, te ío ndàhú iní-í. Te núú duca<sup>n</sup> na càda-ndo te ío váha cuu iní-ndó cùndecu-ndo. <sup>30</sup>Te tnii-ndo nchaa tnúhu càhá<sup>n</sup>-í chi ñá túú cùu-xi íi<sup>n</sup> sá vǎe, chi cada iní-ndó sǎ cúú-xí dātá ñi<sup>n</sup> chii<sup>n</sup> ñamá —càchí-gá xǎha<sup>n</sup>-gǎ xii-yu.

**Cue téé xica cuu ndihi Jesús sàhnú-güedé yoco tríu nduu ndètatú ñáyiú**

(Mr. 2:23-28; Lc. 6:1-5)

**12** Te íi<sup>n</sup> nduu cùu-xi nduu ndetatú ñáyiú ñuhu Jesús ichi ndihi cue téé xica cuu ndihi-gá, te ta yǎha-gá ndihi-güedé íi<sup>n</sup> xichi núú cáá tríu te xǐxíhí-güedé docó núú xǎá<sup>n</sup> ní nguíta-güedé sàhnú-güedé yoco tríu-án, te ndihi ndaha-güedé quíí<sup>n</sup>-güedé quéé tríu-án tá xèxi-güedé cuáhá<sup>n</sup>. <sup>2</sup>Te cue téé cùu fariséú ní xiní-güedé nàcuáa quide cue téé xica cuu ndihi Jesús, núú ní xáha<sup>n</sup>-güedé xii-gá: —¿Ná cuèndá duca<sup>n</sup> quide cue téé xica cuu ndihi-n sahnú-güedé yoco

tríu, te vitna cùu-xi nduu ndetatú-i? Te ñá túú tàù-güedé duca<sup>n</sup> càda-güedé —càchí-güedé xáha<sup>n</sup>-güedé xii-gá.

<sup>3</sup>Te Jèsús ní xáha<sup>n</sup>-gá xii-güedé:

—¿Náa ñá túú dàcuaha-ndo núú tütú Yá Ndiöxí núú càhá<sup>n</sup>-xi nàcuáa ní quide ndíi Dàvíí cútnàhá ní xíhí ndíi docó ndíhi cue téé ní xica cuu ndíhi ndíi-á<sup>n</sup>? <sup>4</sup>Chi ndíi-á<sup>n</sup> ñí quíhu ndíi vehe Yá Ndiöxí ní quehe<sup>n</sup> ndíi pàà ní cuu íí ndécú-á<sup>n</sup> ñí xexi ndíi ndíhi cue téé ní xica cuu ndíhi ndíi, te ñá túú tàù ndíi sá dúcá<sup>n</sup> càda ndíi ndíhi cue téé-á<sup>n</sup> ní cùu, chi mee-ni cuè dútú tàù-güedé caxi-güedé pàà-á<sup>n</sup> ní cùu. <sup>5</sup>¿Te náa ñá túú xìní-ndó nàcuáa càhá<sup>n</sup>-xi núú tütú ndíi Moisés sá ncháá cuè dútú vã ndètátú-güedé nduu cùu-xi nduu ndetatú-á<sup>n</sup>? Te ñá díú ñí<sup>n</sup> cuéchi cùu-xi sá dúcá<sup>n</sup> ñà túú ndètátú-güedé nduu cùu-xi nduu ndetatú. <sup>6</sup>Te na càchí tnúhu-í xii-ndo sã yúhu cùu-í téé ío-gá cúnùu ndecu ndíhi-ndo dacúxí veñúhu sá ío cúnuu. <sup>7</sup>Dico nchòhó chi ñá tècú tnùnín-dó nàcuáa càhá<sup>n</sup> Yá Ndiöxí núú tütú-gá núú càchí-xi: “Yúhu cuíní-í sá cundàhú iní-ndó cuè tnaha ñáyíu-ndo te ñá díú mèe-ni sá cáhni-ndó quèti nduu táhù-í”, duha càchí-gá núú tütú-gá. Te núú dícó nchòhó tècú tnùnín-dó ñá, te vã càhá<sup>n</sup> cuèhé-ndó cuendá nchaa ñáyíu ñá túú ndecu cuéchi-xi. <sup>8</sup>Te yúhú Téé cùu ñaní tnàhá-ndó nchàa-ndo, tnàhá-í ndécú ndíhi-í tnúhu ndee iní sá cùu-í nchaa ñáyíu nàcuáa cadá-yu nduu ndètátú-ó-á —càchí-gá xáha<sup>n</sup>-gá xii-güedé.

**Íi<sup>n</sup> téé ní yíchí íi<sup>n</sup> xio ndaha-xi**

(Mr. 3:1-6; Lc. 6:6-11)

<sup>9</sup>Te Jèsús ní xica-gá cuáhá<sup>n</sup>-gá, te cuánguihu-gá xití íi<sup>n</sup> veñúhu.

<sup>10</sup>Te xíá<sup>n</sup> ndécú íi<sup>n</sup> téé ní yíchí íi<sup>n</sup> xio ndaha-dé. Te dava cue téé xíndecu-á<sup>n</sup> ndúcú-güedé nàcuáa cada-güedé cacá<sup>n</sup> cuéchi-güedé cuendá-gá núú cuè téé cúnuu, te ní xícá<sup>n</sup> tnúhú-güedé núú-gá, te xáha<sup>n</sup>-güedé:

—Cachí tnúhu xii-ndí nùu cuu cada tátna-o íi<sup>n</sup> téé cùhú nduu cùu-xi nduu ndetatú-ó á<sup>n</sup> ñáhá —càchí-güedé xáha<sup>n</sup>-güedé xii-gá.

<sup>11</sup>Te Jèsús ní xáha<sup>n</sup>-gá xii-güedé:

—Te nchòhó òré ná ngàunihnu íi<sup>n</sup> mbéé-ndó íi<sup>n</sup> déhvá cúnú te nàtava-ndo-di cuéi cùu-xi nduu ndetatú-ó. <sup>12</sup>Te íi<sup>n</sup> ñáyíu ío-gá cúnú-yu dàcúxí íi<sup>n</sup> mbéé, núú xíá<sup>n</sup> tàù-ó sã cadá-ó sã vãha sá cúu-xí-yu cuéi cùu-xi nduu ndetatú-ó —càchí-gá xáha<sup>n</sup>-gá xii-güedé.

<sup>13</sup>Te dàtnùní ní xáha<sup>n</sup>-gá xii téé cùhú ndaha-xi-á<sup>n</sup>:

—Ndacani ndaha-n —càchí-gá xáha<sup>n</sup>-gá xii-dé.

Te téé-á<sup>n</sup> ñí ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. <sup>14</sup>Te cue téé cùu fariséú ní ndee-güedé xití veñúhu, te ní ngúíta-güedé ndátnúhu-güedé nùu nása cada-güedé cahni-güedé Jèsús.

**Nàcuáa sa ndèé tnuní cuendá Jèsús**

<sup>15</sup>Te sátá ñí cutnùní iní Jèsús nàcuáa cuíní-güedé cada ñaha-güedé xii-gá te ní xica-gá cuáhá<sup>n</sup>-gá, te ío vai ñáyíu nchícú<sup>n</sup> ñáhá xìi-gá cuáhá<sup>n</sup>, te tnàhá cue ñáyíu cùhú nchícú<sup>n</sup> ñáhá xìi-gá cuáhá<sup>n</sup>, te ní quide tátna-gá cue ñáyíu-á<sup>n</sup>. <sup>16</sup>Te ní xáha<sup>n</sup>-gá xii-yu sá vã càhá<sup>n</sup>-yu yoo cùu-gá. <sup>17</sup>Te duca<sup>n</sup> ñí cuu chi ní quee ndáá-xi

nàcuáa ní xáha<sup>n</sup> Yă Ndiöxí xii ndíi Chàíá téé ní xóo cáhá<sup>n</sup> tnúhu-gá ndéé sanaha ní chídó tnùní ndíi núú tütú-gá, te duha ndùu tnúhu ní xáha<sup>n</sup>-gá:

<sup>18</sup> Téé-a cùu-dé téé ní sani iní-í sá cúnú cuèchi-dé núù-í, te ío cùu iní-í-dé, te cùdíí iní-í-dé.

Te yúhú cuáñaha-í Espíritú-í cundecu ndíhi-dé, te ñáyu-dé cúñaha-dé xii nchaa ñáyiú ñuyúú sá yúhú ío ndáá quídè-í.

<sup>19</sup> Te vá dácàà-dé tnúhu cáhá<sup>n</sup>-dé ndíhi ñáyiú, te ni vǎ cáná sàa-dé òré cáhá<sup>n</sup>-dé, te ni vǎ yǒo níhí tnúhu nása cáhá<sup>n</sup>-dé cuhu<sup>n</sup>-dé ichi.

<sup>20</sup> Te ni ñà túú nǎ cada-dé cue ñáyiú cùu datná ì<sup>n</sup> tnu ndóó sá cuñí-xi tnáhnú, te ñáyu-ni ñáyiú-á<sup>n</sup> cúú tucú-yu dàtná ì<sup>n</sup> mèchá càndíl sá ío quène ñúhmá te cuñí-xi ndahvá.

Te duca<sup>n</sup> sǎtnahá-xi cùu ñáyiú-á<sup>n</sup> chi ñá túú ñíhí ndéé-yu cundecú-yu sá cúú-xì-í, te mee-ni sǎ vǎha cada ñaha-dé xií-yu,

te ñáyu-ni duca<sup>n</sup> càda-dé ndéé sáá nduu cùnnumí iní nchaa ñáyiú sá ío ndáá quídè-dé.

<sup>21</sup> Te nchaa ñáyiú ñíhí ñuyúú ío cundee cùu cahnu iní ñáhǎ-yu xii-dé.

Duha ní xáha<sup>n</sup>-gǎ xii ndíi Chàíá ní chídó tnùní ndíi núú tütú-gá.

**Càchí-güedé sá ndécú ndíhi Jesús espíritú cündíhi yucu ñávǎha**

(Mr. 3:20-30; Lc. 11:14-23; 12:10)

<sup>22</sup> Te ní quexìo ì<sup>n</sup> úú cue téé núú ndécú Jèsús, te ndéca-güedé

ì<sup>n</sup> téé ñíhí te cuáà-dé, te yíhi ñaha espíritú cündíhi yucu ñávǎha xii-dé, te Jèsús ní queñuhu-gá espíritú cündíhi yucu ñávǎha yíhi ñaha xii-dé, te òré-ni-á<sup>n</sup> ní cuu ní nacáhá<sup>n</sup>-dé te ní ndúha núú-dé.

<sup>23</sup> Te nchaa ñáyiú xǐndecu-á<sup>n</sup> ío ní cuñúhu-yu sá dúcá<sup>n</sup> ní quide-gá, te ní xítñahá-yu:

—Váa téé-a cùu-dé ñaní tnáhá ndíi Dàvíí téé tendaha Yă Ndiöxí quixi ñuyúú-a —càchí-yu xítñahá-yu.

<sup>24</sup> Te cue téé cùu fariséú ní tecú dóho-güedé nàcuáa ndùu tnúhu xítñahá-yu, núu xíá<sup>n</sup> ní xítñaha-güedé:

—Téé-a ndèñuhu-dé nchaa espíritú cündíhi sácuíhǎ yíhí ñàha xii ñáyiú, chi ñáyu-ni sácuíhǎ-á<sup>n</sup> chíndèe ñaha-xi xii-dé te ñáyu-ni-xi tàxi tnuní-xi nchaa espíritú-á<sup>n</sup> — duha ní xítñaha-güedé.

<sup>25</sup> Te Jèsús ní cutnùní iní-gá nàcuáa ndùu tnúhu ní xítñaha-güedé, núu ní xáha<sup>n</sup>-gǎ xii-güedé:

—Te nchòhó xìní-ndó sǎ ñúu ì<sup>n</sup> téé yǐndaha ì<sup>n</sup> nació<sup>n</sup> vá cúú ì<sup>n</sup>nuu-dé ndíhi cue téé cündíhi-dé, te vá cúdíi-dé cunu-dé. Te ñáyu-ni duca<sup>n</sup> sǎtnahá tucu-xi cùu tucu cue téé cùchiu<sup>n</sup> ì<sup>n</sup> ñúú, chi núu vá cúú ì<sup>n</sup>nuu-güedé cundecu-güedé, te vá cúdíi-güedé cundecu-güedé taxi tnùní-güedé. Te ñáyu-ni duca<sup>n</sup> sǎtnahá tucu-xi cùu cue ñáyiú xǐndecu ì<sup>n</sup>-ni vèhe, chi núu vá cúú ì<sup>n</sup>nuú-yu cundecú-yu te vá cúdíi-yu cundecu càhnú-yu.

<sup>26</sup> Te núu sácuíhǎ duca<sup>n</sup> quide-xi queñuhu-xi cue espíritú cündíhi-xi yíhi ñaha xii ñáyiú ña, te ñá túú cùu ì<sup>n</sup>nuu-xi ndecu-xi te núu duca<sup>n</sup>,



te vá cúdii sácúíhná-ǎ<sup>n</sup> cundecu-xi taxi tnùní-xi te núu duca<sup>n</sup> quide-xi.  
 27 Te duha càhá<sup>n</sup>-í chi nchòhó cächí-ndó sǎ chíndèe ñaha sácúíhná xii-í queñùhu-í nchaa espíritú cúndìhi-xi yìhi ñaha xii ñáyiu. Te núu yúhú quidé cuendá-ndó sǎ sácúíhná chíndèe ñaha-xi xii-í, te xìni ñuhu-xi cada cuendá-ndó yòo chindee ñaha xii cue tée xica cuu ndìhi-ndo queñuhu-güedé nchaa espíritú cúndìhi yucu ñávǎha yìhi ñaha xii ñáyiu. Te mee-güedé cächí-güedé sǎ nchòhó ñá túú càhá<sup>n</sup> ndáá-ndó sǎ dúcá<sup>n</sup> càhá<sup>n</sup>-ndó.  
 28 Dico yúhú chi Espíritú Yǎ Ndiöxí chíndèe ñaha-xi xii-í queñùhu-í nchaa espíritú cúndìhi sácúíhná yíhí ñaha xii ñáyiu, te sǎ dúcá<sup>n</sup> chindee ñaha Espíritú-gá xii-í, xíǎ<sup>n</sup> cútñuní sǎ sǎ ní sǎá nduu cùní-gá ndíhu ndaha ñaha-gá xii-ndo.

29 Te nchòhó xìní-ndó sǎ cuè ñadúhú chi vá ndácú-güedé cuendá-ni quíhu-güedé duhu-güedé vehe ìi<sup>n</sup> téé ío ndee, chi díhna-gá xìní ñuhu-xi tñii-güedé téé-ǎ<sup>n</sup> dacùtu ñaha-güedé xii-dé dǎtnùní duca<sup>n</sup> te ndacu-güedé duhu-güedé nchaa sǎ ndécú ndìhi-dé.

30 Te nchaa ñáyiu ñá túú cúndìhi ñaha xii-í, te cùu úhú iní ñáhǎ-yu. Te nchaa ñáyiu ñá túú chindee ñaha xii-í, te dàquee tǎhǎ-yu chiù<sup>n</sup> quide-í.

31 Te na cächí tnúhu-í xii-ndo sǎ ncháá ñáyiu quide nchaa sǎ cuèhé sǎ dúhá cuu cada càhnu iní ñáhá Yǎ Ndiöxí xíí-yu, te ñiu-ni duca<sup>n</sup> cùu cada cahnu iní-gá nchaa tnúhu cuèhé tnúhu duha càhá<sup>n</sup>-yu. Dico cue ñáyiu na càhá<sup>n</sup> úhú cuendá Espíritú-gá, te ñáyiu-ǎ<sup>n</sup> vǎ cǎdá

càhnu iní ñáhá tnàhí-gá xíí-yu.

32 Te nchaa ñáyiu na càhá<sup>n</sup> úhú cuendá yúhú Téé cùu ñaní tnáhǎ-yu nchaá-yu, te cuu cada càhnu iní ñáhá Yǎ Ndiöxí xíí-yu. Dico cue ñáyiu na càhá<sup>n</sup> úhú cuendá Espíritú-gá te vá cǎdá càhnu iní ñáhá tnàhí-gá xíí-yu cuèi vitna ndècu vívǎ-yu, te cuèi na cùu-yu.

**Ndi díí<sup>n</sup> núú yutnu xìní-ó nǎ yutnu cùu-xi cuendá sǎ sǎvidí-xi**

(Lc. 6:43-45)

33 Te nchòhó xìní-ndó sǎ ndì díí<sup>n</sup> núú yutnu xìní-ó nǎ yutnu cùu-xi cuendá sǎ sǎvidí-xi, te xìní-ó sǎ ncháá yutnu váha cùu<sup>n</sup> mee-ni sǎvidí váha, dico nchaa yutnu sǎ ñá túú vǎha te cùu<sup>n</sup> mee-ni sǎvidí sǎ ñá túú vǎha. Te duha càhá<sup>n</sup>-í cuendá cada cuendá váha-ndo nàcuáa ndùu chiù<sup>n</sup> quide-ndo ìi<sup>n</sup> ìi<sup>n</sup>-ndo cuendá duca<sup>n</sup> cùtnuní ná ñáyiu cùu-ndo. 34 Dico nchòhó cùú-ndó dǎtná ìi<sup>n</sup> cóó dǎé<sup>n</sup> chi ío cuihna ìní-ndó, te vá cání ìní-ndó sǎ ndácú-ndó càhá<sup>n</sup>-ndó ìi<sup>n</sup> tnúhu váha, chi ío cuihna ìní-ndó. Te nchòhó xìní-ndó sǎ ncháá ñáyiu càhá<sup>n</sup>-yu nání véxi iní-yu. 35 Te nchaa ñáyiu váha iní-xi càhá<sup>n</sup>-yu tnúhu váha, chi ñiu-ni tnúhu váha-ǎ<sup>n</sup> ñúhú iní-yu. Te nchaa ñáyiu cuihna ìní-xi càhá<sup>n</sup>-yu tnúhu cuèhé tnúhu duha, chi ñiu-ni tnúhu cuèhé tnúhu duha-ǎ<sup>n</sup> ñúhú iní-yu. 36 Te na cächí tnúhu-í xii-ndo sǎ ná sǎá nduu càda ndáá Yǎ Ndiöxí cuéchi nchaa nchòhó ñáyiu ndècu ñuyúí-a, te nchaa tnúhu cuèhé tnúhu duha càhá<sup>n</sup>-ndó càhá<sup>n</sup>-gá sǎ ñá túú ní quide váha-ndo sǎ dúcá<sup>n</sup> ní càhá<sup>n</sup>-ndó tnúhu-ǎ<sup>n</sup>. 37 Te

nàcuáa ndùu tnúhu ní cáhá<sup>n</sup>-ndó ìi<sup>n</sup> ìi<sup>n</sup>-ndo, te duca<sup>n</sup> cǎhá<sup>n</sup> Yǎ Ndiöxí te núu ndècu cuéchi-ndo àdi ñá túú ndècu cuéchi-ndo. Te núu ñá túú cuéchi-ndo te cácu-ndo, dico núu ndècu cuéchi-ndo te vá cǎcu-ndo —càchí-gá xǎha<sup>n</sup>-gǎ xii cue tée cùu fariséú-á<sup>n</sup>.

**Cue tée cuení sá cádá Jèsús ìi<sup>n</sup> sá vǎ yõo tnàhí ndàcu cada**

(Mr. 8:12; Lc. 11:29-32)

<sup>38</sup>Te cue tée cùu fariséú, ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés xǎha<sup>n</sup>-güedě xii Jèsús:

—Mèstrú, cuení-ndí cada-n ìi<sup>n</sup> sá vǎ yõo tnàhí ndàcu cada cuendá duca<sup>n</sup> cùnuní iní-ndí sá Yǎ Ndiöxí chíndèe ñaha-gá xii-n —càchí-güedé xǎha<sup>n</sup>-güedě xii-gá.

<sup>39</sup>Te Jèsús ní xáha<sup>n</sup>-gǎ xii-güedé: —Ñáyiú ndècu ichi cuehé ichi duha ñá túú cuení-yu tnií-yu tnúhu càhá<sup>n</sup> Yǎ Ndiöxí, te ñáyiú-á<sup>n</sup> cuení-yu cada-í ìi<sup>n</sup> sá vǎ yõo tnàhí ndàcu cada nacuáa cutnùní iní-yu núu ndáá sá Yǎ Ndiöxí chíndèe ñaha-gá xii-í. Dico yúhú chi ñá túú nǎgá cada-í quení-yu, chi sa ñihí-yu tnúhu nàcuáa ní yáha ndíi Jònás tée ní xóo cáhá<sup>n</sup> tnúhu Yá Ndiöxí ndéé sanaha, te ñiu-ni duca<sup>n</sup> yǎha yúhú tucu. <sup>40</sup>Chi ndíi Jònás-á<sup>n</sup> ní xúhu<sup>n</sup> ndíi úní nduu úní niú xití ìi<sup>n</sup> chácá cáhnú vîhi nani ballená. Te ñiu-ni duca<sup>n</sup> yǎha yúhú Téee cùu ñaní tnàhá-ndó nchàa-ndo, chi úní nduu úní niú cuhu<sup>n</sup>-í xití ñuhu. <sup>41</sup>Te na sáá nduu càda ndáá Yǎ Ndiöxí cuéchi nchaa ñáyiú ndècu ñuyúú-a, te dàvá-á<sup>n</sup> cachí nchaa ñáyiú ñuú Ñinivé sá ñà túú ní quide ndáá

nchaa ñáyiú ndècu vitna, te duca<sup>n</sup> cǎhá<sup>n</sup>-yu chi mèé-yu ní dáñá-yu ichi cuèhé ichi duha cútñahá ní sáhá<sup>n</sup> ndíi Jònás ñuú-yu ní cáhá<sup>n</sup> ndíi tnúhu Yá Ndiöxí núú-yu. Dico vitna iha ndècu ndìhi ñaha-ndo xii yúhú, te ñiu-í ío-gá cúnùu-í dàcúúxí ndíi Jònás. <sup>42</sup>Te nduu càda ndáá Yǎ Ndiöxí cuéchi nchaa ñáyiú, te dàvá-á<sup>n</sup> quení-ndó ìi<sup>n</sup> ñadihí ñaha ní xíndaha ìi<sup>n</sup> nació<sup>n</sup> cáá ndàa xio datni núú quéné nchǎcanchii, te ñaha-á<sup>n</sup> ño xica ní xíndecu-a<sup>n</sup> te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní cáhá<sup>n</sup> ndíi Salòmón, chi ndíi-á<sup>n</sup> ño ní sáá sá xìní tnùní ndíi. Te tnàhá ñaha-á<sup>n</sup> cǎhá<sup>n</sup>-a<sup>n</sup> sá ñà túú ní quide ndáá nchaa ñáyiú ndècu vitna. Dico vitna iha ndècu ndìhi ñaha-ndo xii yúhú, te ñiu-í ío-gá cúnùu-í dàcúúxí ndíi Salòmón.

**Espíritú cúndìhi yucu ñávàha sá nánchòcáva xito cùu úú**

(Lc. 11:24-26)

<sup>43</sup>Te òré ná quée ñaha ìi<sup>n</sup> espíritú cúndìhi yucu ñávàha xii ìi<sup>n</sup> ñáyiú, te cuáhá<sup>n</sup>-xi ndùcu-xi ìi<sup>n</sup> xichi núú cúndècu-xi te ñá ñihí-xi te ní sani iní-xi: <sup>44</sup>“Váha-gá núhú tucu-í núú ní xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáyiú-á<sup>n</sup> dàtná cáá-nǎ ìi<sup>n</sup> vehe ní natíhú ní nduu víi-ná te vá yõo-gá ndécú. <sup>45</sup>Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xi úsá tnàhá espíritú cúndìhi-xi sá nèhé víhí-gǎ xíquide. Te òré ní ñihí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndìhi-xi ñáyiú-á<sup>n</sup>. Te ñáyiú-á<sup>n</sup> uu<sup>n</sup>-gá nándí yáha-yu dàcúúxí ndéé díhna. Te ñiu-ni

duca<sup>n</sup> sàtnahá-xi yáha nchaa ñáyi  
cuihna iní-xi ndècu ñuyíú-a vitna —  
càchí-gá xáha<sup>n</sup>-gá xii-güedé.

**Cue ñaní Jèsús ndihi náná-gá**

(Mr. 3:31-35; Lc. 8:19-21)

<sup>46</sup>Te càhá<sup>n</sup> dúcá<sup>n</sup>-ní Jèsús ní  
quexio náná-gá ndihi cue ñaní-gá  
cuiní-yu cáhá<sup>n</sup> ndihi ñàhá-yu xii-gá,  
te ní ngúnu tníi-yu ndàa quehé  
vehe núú ndécú-gá. <sup>47</sup>Te ìi<sup>n</sup> cue  
ñáyi xĩndecu-án<sup>n</sup> ní xáhã<sup>n</sup>-yu xii-gá:  
—Ní quexio náná-n ndihi cue  
ñaní-n xĩnutnĩi-yu quehé, te  
cuiní-yu cáhá<sup>n</sup> ndihi ñàhá-yu xii-n  
—càchí ñáyi-án<sup>n</sup> xáhã<sup>n</sup>-yu xii-gá.

<sup>48</sup>Te ní xáha<sup>n</sup>-gá xii ñáyi duca<sup>n</sup>  
xáha<sup>n</sup> xii-gá-án<sup>n</sup>:

—Te cachí tnúhu yóndi-gá ñáyi  
cùu datná náná-í ndihi dàtná cue  
ñaní-í —càchí-gá xáha<sup>n</sup>-gá xii  
ñáyi-án<sup>n</sup>.

<sup>49</sup>Te ní dánèhé ñàhá-gá nchaa cue  
tée xica cuu ndihi-gá, te ní xáha<sup>n</sup>-gá  
xii ñáyi-án<sup>n</sup>:

—Cue tée-a cùu-güedé dàtná  
náná-í, ndihi dàtná cue ñaní-í. <sup>50</sup>Te  
nchaa ñáyi na càda nchaa nacuáa  
càhá<sup>n</sup> Tàtà-í Dútú Ndiõxí Yáá ndécú  
àndiu, te ñáyi-án<sup>n</sup> cùu-yu dàtná  
náná-í, ndihi dàtná cue ñaní-í,  
ndihi dàtná cue cúha-í —càchí-gá  
xáha<sup>n</sup>-gá xii ñáyi duca<sup>n</sup> ní dáyaha  
tnúhu núú-gá-án<sup>n</sup>.

**Nàcuáa quide tée cuángacá<sup>n</sup> triú**

(Mr. 4:1-9; Lc. 8:4-8)

**13** Te diu-ni nduu-ã<sup>n</sup> ní quee  
Jèsús vehe núú ndécú-gá,  
te ní xica-gá cuáhá<sup>n</sup>-gá ní ngóo-gá  
yuhu làgúná. <sup>2</sup>Te ío cuéhé ñáyi ní  
tacá núú ndécú-gá. Te sá dúcá<sup>n</sup> ío  
cuéhé ñáyi núú ní quee-gá xití ìi<sup>n</sup>

bàrcú nútnĩi xití ndute làgúná-á<sup>n</sup>,  
te núú xĩã<sup>n</sup> ní ngóo-gá, te nchaa  
ñáyi-án<sup>n</sup> xixúcu-yu yuhu làgúná-á<sup>n</sup>.

<sup>3</sup>Te Jèsús ní ngúita-gá ní cani-gá  
titní cuendú núú-yu nàcuáa tecú  
tnúní-yu nchaa nàcuáa ndùu  
tnúhu-gá, te xáha<sup>n</sup>-gá xii-yu:

—Ìi<sup>n</sup> tée cuángacá<sup>n</sup>-dé triú, <sup>4</sup>te  
òré ní ngúita-dé dāngoyo-dé triú-án<sup>n</sup>,  
te dava ní quene ndava ní ngava  
ndéé ichi, te ní xiní cue tĩlaá te ní  
nadatàcá-güedi. <sup>5</sup>Te dava ní ngava  
ñuhu yadi núú yíhi vihi yúú, te  
ndĩhi-ni ní xínu-xi chi ñá túú cāvihí  
ñuhu. <sup>6</sup>Dico òré ní nayehé te ñá túú  
ní cùndee iní-xi chi ní yíchí-xi, chi  
ñá túú ní níhi quĩh<sup>n</sup> cùnú yóho-xi.  
<sup>7</sup>Te dava ní ngava núú yúcu ndĩqu<sup>n</sup>  
tnu ìñu, te ìi<sup>n</sup> nuu-ni ní xínu-xi ndihi  
tnu ìñu. Te tnu ìñu-án<sup>n</sup> ní sahnu-xi te  
ní dánáá-xí nchaa triú sá ní xínu-án<sup>n</sup>.

<sup>8</sup>Dico dava-gá triú ní ngava núú  
ndécú ñuhu coco<sup>n</sup> te xĩã<sup>n</sup> ío váha ní  
cuu, chi núú ìi<sup>n</sup>-ní triú-án<sup>n</sup> te dava  
yoco-xi ní nguĩhi ócú úxí triú-xi,  
te dava yoco-xi ní nguĩhi únídico  
triú-xi, te dava yoco-xi ní nguĩhi  
ìi<sup>n</sup> ciendú triú-xi. <sup>9</sup>Te vitna nchaa  
nchòhó ñáyi ní xíndedóho tnúhu  
ní cáhá<sup>n</sup>-í-a, te ío váha chí cuáha  
cuendá —càchí-gá xáha<sup>n</sup>-gá xii-yu.

**Cue tée xica cuu ndihi Jesús ndúcú  
tnúhu-güedé núú-gá ná cuendá  
cání-gá cuendú núú ñáyi**

(Mr. 4:10-12; Lc. 8:9-10)

<sup>10</sup>Te cue tée xica cuu ndihi Jesús  
ní sáhá<sup>n</sup>-güedé ndéé núú-gá, te  
xáha<sup>n</sup>-güedé xii-gá:

—Ndúcu tnúhu-ndí núú-n núu  
ná cuendá duca<sup>n</sup> mēe-ni cuendú  
cání-n núú ñáyi —càchí-güedé  
xáha<sup>n</sup>-güedé xii-gá.

<sup>11</sup>Te ní xáha<sup>n</sup>-gǎ xii-güedé:  
 —Nchòhó chi sa càchí tnúhu  
 Yá Ndiöxí xii-ndo ìí<sup>n</sup> sá vǎtá  
 quíní-gá-ndó, chi càchí tnúhu-gá  
 nàcuáa quide-gá ndíhu ndaha-gǎ  
 ñáyiú, dico dava-gá ñáyiú chi ñá  
 túú nǎ xáha<sup>n</sup>-gǎ xii-yu. <sup>12</sup>Te nchaá  
 ñáyiú sa tècú tnùní te uu<sup>n</sup>-gá cuita  
 tecú tnùní-yu quíhí<sup>n</sup>, te nchaá ñáyiú  
 ñá túú tècú tnùní te uu<sup>n</sup>-gá vǎ tècú  
 tnùní-yu. <sup>13</sup>Te xǐá<sup>n</sup> núu duha càni-í  
 mee-ni cuendú núú-yu, chi cuéi na  
 quíní-yu nchaá nàcuáa cuu dico  
 ni vǎ cùtnùní iní-yu ná cuendá  
 duca<sup>n</sup> cùu, te cuéi na cùndedóho-yu  
 dico ni vǎ tècú tnùní-yu. <sup>14</sup>Te ðiú  
 cuendá ñáyiú-á<sup>n</sup> nǐ xáha<sup>n</sup> Yá Ndiöxí  
 xii ndíi Chàiiá téé ní xóo cáhá<sup>n</sup>  
 tnúhu-gá ndéé sanaha nǐ chídó  
 tnùní ndíi núú tütú-gá núú càchí-xi:  
 Nchaá nchòhó cùndedóho-ndo  
 tnúhu càhá<sup>n</sup>-í, dico ni vǎ tècú  
 tnùní-ndó,  
 te cuéi na quíní-ndó nchàa  
 nacuáa cada-xi, dico ni vǎ  
 cùtnùní iní-ndó nǎ cuendá  
 duca<sup>n</sup> quide-xi.  
<sup>15</sup>Te duca<sup>n</sup> chi cùu-ndo ñáyiú ío  
 sǎá iní-xi,  
 te cùu-ndo ñáyiú ñá túú tècú  
 tnùní tnúhu càhá<sup>n</sup>-í,  
 te cùu tucu-ndo datná cue ñáyiú  
 cuáa chi ñá túú cuíní-ndó  
 càda cuendá-ndó tnúhu-í,  
 te ni ñá túú cuíní-ndó  
 cùndedóho-ndo,  
 te ni ñá túú cuíní-ndó tècú  
 tnùní-ndó,  
 te ni ñá túú cuíní-ndó nàtuha  
 ñaha-ndo xii-í cuendá cada  
 càhnu iní-í nchaá yíca  
 cuèchi-ndo nàcuáa ío váha  
 cuu iní-ndó cùndecu-ndo.

Duha ní xáha<sup>n</sup> Yá Ndiöxí xii ndíi  
 Chàiiá ní chídó tnùní ndíi núú  
 tütú-gá.

<sup>16</sup>Dico nchòhó chi ío váha  
 táhú-ndó chi cùtnuní iní-ndó  
 nchàa nacuáa quide-í, te cùtnuní  
 tucu iní-ndó nchàa nacuáa ndúu  
 tnúhu càhá<sup>n</sup>-í. <sup>17</sup>Te na càchí tnúhu  
 ndáá-í xii-ndo sǎ ío vǎi cue téé ní  
 xóo cáhá<sup>n</sup> tnúhu Yá Ndiöxí ndéé  
 sanaha ndíi nchaá dava-gá ñáyiú  
 váha iní-xi ní cuíní-yu cundèhé-yu  
 nchaá sá ndéhé-ndó vitna quide-í  
 dico ñá túú ní xìní-yu, te ní cuíní  
 tucú-yu cùndedóho-yu nchaá tnúhu  
 ndedóho-ndo vitna cáhá<sup>n</sup>-í te ñá túú  
 ní xǐndedóho-yu.

**Jèsús càhá<sup>n</sup>-gá nàcuáa quèe-xi  
 cuendá téé cuángacá<sup>n</sup> triú**

(Mr. 4:13-20; Lc. 8:11-15)

<sup>18</sup>Te vitna cùndedóho váha-ndo  
 na càchí tnúhu-í xii-ndo nàcuáa  
 quèe-xi cuendú téé cuángacá<sup>n</sup> triú  
 ní cani-í núú-ndó. <sup>19</sup>Te triú sá nǐ  
 quene ndava ní ngava ndéé ichi, xǐá<sup>n</sup>  
 cúú-xí dàtná ñáyiú ní xǐndedóho  
 tnúhu sá càhá<sup>n</sup> nàcuáa ndíhu ndaha  
 ñaha Yá Ndiöxí xii-yu, dico ñá túú  
 ní cuíní-yu tnií-yu, chi sácúíhǎ  
 cuǎhá<sup>n</sup>-xi nàdatuhú-xi iní-yu  
 cuendá sá vǎ cǎnchícú<sup>n</sup> nihnú-yu  
 nàcuáa càhá<sup>n</sup> tnúhu-á<sup>n</sup>. <sup>20</sup>Te triú sá  
 nǐ ngava ñuhu yadi núú yíhí vǐhi  
 yúú-ǎ<sup>n</sup>, xǐá<sup>n</sup> cúú-xí dàtná ñáyiú ní  
 xǐndedóho tnúhu Yá Ndiöxí te ðíí  
 ìní ní tnií-yu tnúhu-gá, <sup>21</sup>dico òrè  
 ná ngúíta ñáyiú cúcuèhé ñáhǎ-yu  
 xii-yu àdi nǎndí-gá sá yǎha-yu sá  
 cuendá tnúhu-gá, te ñá cùndèe  
 iní-yu chi ðǎná-yu tnúhu-gá cuendá  
 sá ñá túú nihí ndéé-yu. <sup>22</sup>Te triú  
 sá nǐ ngava núú yúú ndíquí<sup>n</sup> tnu

ĩnu-án, xíǎ<sup>n</sup> cúu-xí dàtná ñáyi  
 ní tecú dóho-xi tnúhu Yá Ndiǒxi  
 dico cuèé cuèé ní nacuanaá-yu  
 tnúhu-gá, chi cuèndá mee-ni sǎ ìò  
 ñuyíu-a ñùhu iní-yu, ndíhi cuèndá  
 sá ìò sàni iní-yu cuu cuicá-yu, te  
 mee-ni nchàa xíǎ<sup>n</sup> ñúhú ìní-yu  
 te ñá túú ñùhu iní-yu tnúhu sá  
 nǐ xíndedóho-yu-á<sup>n</sup> nàcuáa cada  
 váha-yu cundecú-yu. <sup>23</sup>Dico triú  
 sá nǐ ngava núú ndécú ñùhu  
 coco<sup>n</sup>-á<sup>n</sup>, xíǎ<sup>n</sup> cúu-xí dàtná ñáyi  
 ní xíndedóho tnúhu Yá Ndiǒxi te  
 quidé-yu nàcuáa càhá<sup>n</sup> tnúhu-gá.  
 Te cada iní-ndó sǎ ñáyi-yu-á<sup>n</sup> cúu-yu  
 dàtná triú sá nǐ nguǐhi yoco-xi ócó  
 úxí triú-xi, ndíhi triú sá nǐ nguǐhi  
 yoco-xi únídico triú-xi, ndíhi triú sá  
 nǐ nguǐhi yoco-xi ìi<sup>n</sup> cièndú triú-xi.  
 Duca<sup>n</sup> sǎtnahá-xi cùu-yu chi ío  
 váha quidé-yu —càchí-gá xǎha<sup>n</sup>-gǎ  
 xii-güedé.

**Cuèndá nchaa cùhú sǎ ñà  
 túú vǎha xĩnu xití triú**

<sup>24</sup>Te Jèsús ní cani-gá ìi<sup>n</sup> cuèndú  
 núú ñáyi nàcuáa tecú tnùnì-yu  
 tnúhu-gá, te xǎha<sup>n</sup>-gǎ xií-yu:

—Te vitna na càni-í ìi<sup>n</sup> cuèndú  
 núú-ndó nàcuáa tecú tnùnì-ndó  
 nàcuáa cada-xi òré ndíhu ndaha  
 ñàha Yá Ndiǒxi xii ñáyi. ìi<sup>n</sup> tée ío  
 váha triú ní sacá<sup>n</sup>-dé núú ñúhú-dě.

<sup>25</sup>Dico xití niú ní sáhá<sup>n</sup> ìi<sup>n</sup> tée  
 cùu úhú iní ñáhá xii-dé, te ní  
 dǎngoyo-dé ndíquí<sup>n</sup> yúcú sǎ ñà túú  
 vǎha núú nǐ sacá<sup>n</sup>-dé triú-á<sup>n</sup>. <sup>26</sup>Te  
 òré vitna váha váha ní nguíta-xi  
 quène yoco nchaa triú-á<sup>n</sup>, te ní  
 xínu coyo nchaa yúcú sǎ ñà túú  
 vǎha-á<sup>n</sup>. <sup>27</sup>Te cue tée xínu cuechi  
 núú tée ní sacá<sup>n</sup> triú-á<sup>n</sup> nǐ xítñùhu  
 ñàha-güedě xii-dé sá dúcá<sup>n</sup> nǐ

xínu cùhú sǎ ñà túú vǎha-á<sup>n</sup> núú  
 triú-dé, te xǎha<sup>n</sup>-güedé: “Pàtróó<sup>n</sup>,  
 ìnása ní cuu núu ní xínu cùhú  
 sǎ ñà túú vǎha núú triú-n, te ío  
 váha càa triú ní sacá<sup>n</sup>-n ní cùu?”  
 cachí-güedé xǎha<sup>n</sup>-güedě. <sup>28</sup>Te tée  
 cùu patróó<sup>n</sup>-güedě-á<sup>n</sup> nǐ xǎha<sup>n</sup>-dě  
 xii-güedé: “Ìi<sup>n</sup> tée cùu úhú iní  
 ñáhá nàhi xii-í duca<sup>n</sup> nǐ quide-dé  
 ní sáhá<sup>n</sup>-dé ní dǎngoyo-dé ndíquí<sup>n</sup>  
 cùhú sǎ ñà túú vǎha-á<sup>n</sup> núú  
 triú-í núu duca<sup>n</sup> nǐ xínu coyo-xi”,  
 càchí-dé xǎha<sup>n</sup>-dě xii-güedé. Te  
 cue tée xínu cuechi núú-dě ní  
 xǎha<sup>n</sup>-güedě xii-dé: “Te núu cuiní-n  
 te quíhí<sup>n</sup>-ndí tnuhu-ndí nchaa  
 cùhú sǎ ñà túú vǎha ní xínu núú  
 triú-n”, càchí-güedé xǎha<sup>n</sup>-güedě  
 xii-dé. <sup>29</sup>Te tée cùu xitohó triú-á<sup>n</sup>  
 nǐ xǎha<sup>n</sup>-dě xii cue tée xínu cuechi  
 núú-dě-á<sup>n</sup>: “Ñáhá, vá quíhí<sup>n</sup>-ndó  
 tnùhu-ndo, chi òré tnuhu-ndo  
 te tnàhá-ni triú quene chi càa  
 vihi cùhú-á<sup>n</sup>. <sup>30</sup>Váha-gá chí dáñá  
 ná cuíhnu nahi ndéé ná cùu  
 triú, te dàtnùnì nducu-í cue tée  
 quíhí<sup>n</sup>-güedé tnuhu-güedé nchaa  
 cùhú sǎ ñà túú vǎha-á<sup>n</sup>, te dacùtu  
 nuhní-güedé te cahmi-güedé, te  
 dàtnùnì nàquehndé-güedé triú  
 nacani-güedé te nataxúha-güedé xití  
 yacá-í”, càchí-dé xǎha<sup>n</sup>-dě xii-güedé  
 —duha ní cani Jèsús cuèndú núu-yu.

**Cuèndá ndíquí<sup>n</sup> yutnu nàni mostázá**

(Mr. 4:30-32; Lc. 13:18-19)

<sup>31</sup>Te Jèsús ní cani tucu-gá ingá  
 cuèndú núú ñáyi nàcuáa tecú  
 tnùnì-yu tnúhu-gá, te xǎha<sup>n</sup>-gǎ  
 xií-yu:

—Na càni-í ìi<sup>n</sup> cuèndú núú-ndó  
 nàcuáa tecú tnùnì-ndó nàcuáa cada-xi  
 òré ndíhu ndaha ñàha Yá Ndiǒxi xii

ñáyi. H<sup>n</sup> téé ní quehe<sup>n</sup>-dé ndíquí<sup>n</sup>  
yutnu nani mostázá te nêhe-dé cuáhá<sup>n</sup>  
ní sacá<sup>n</sup>-dé núú ñúhú-dě. <sup>32</sup>Te ndíquí<sup>n</sup>  
yutnu-á<sup>n</sup> ïo chàhu, dico òré ná  
xñu-xi te sàhnu-gá-xi dàcúúxí nchàa  
cúhú, te cue quití ndàva núú tàchí  
cádúha-güedi tacá-güedi núú dité-xi  
—càchí-gá xàha<sup>n</sup>-gá xí-yu.

### Nàcuáa quide levadurá

(Lc. 13:20-21)

<sup>33</sup>Te Jèsús ní xáha<sup>n</sup> tucu-gá xii ñáyi:  
—Te na càchí tnúhu tucu-í xii-ndo  
nàcuáa cada-xi òré ndíhu ndaha  
ñàha Yá Ndiòxí xii ñáyi. H<sup>n</sup> ñadìhí ní  
chihi-a<sup>n</sup> levadurá úní arròbá yuchi tríú,  
te levadurá-á<sup>n</sup> ñí quide-xi ní ndaa nihí  
yusa<sup>n</sup>-á<sup>n</sup> —càchí-gá xàha<sup>n</sup>-gá xí-yu.

**Mee-ni cuèndú ní cani Jèsús núú ñáyi**

(Mr. 4:33-34)

<sup>34</sup>Te mee-ni cuèndú ní cani Jèsús  
núú ñáyi ndí tnahá òré ní dánèhé  
ñáhá-gá xí-yu tnúhu-gá. <sup>35</sup>Te duca<sup>n</sup>  
ñí quide-gá chi ní quee ndáá-xi  
nàcuáa ní chídó tnùnì ñí<sup>n</sup> téé ní xóo  
cáhá<sup>n</sup> tnúhu Yá Ndiòxí ndéé sanaha  
núú tütù-gá núú càchí-xi:

Mee-ni cuèndú cani-í núú ñáyi  
òré danèhé-í-yu tnúhu-í  
cuèndá tecú tnùnì-yu,  
te nchaa tnúhu sá vátá yòo-gá  
cundedóho danèhé-í-yu, te  
nchaa tnúhu-á<sup>n</sup> ndúú yùhu-xi  
ndéé cútnàhá ní ngáva ñuyúú.  
Duha ní chídó tnùnì téé-á<sup>n</sup> núú tütù-gá.

**Jèsús càhá<sup>n</sup>-gá nàcuáa  
quèe-xi cuendá cúhú sá ñà  
túú vâha càa xití tríú**

<sup>36</sup>Te Jèsús ní dándácá-gá ñáyi  
te cuánuhú-gá vehe, te cue téé xica  
cuu ndíhi-gá ní xáha<sup>n</sup>-güedě xii-gá:

—Cachí tnúhu xii-ndí nása quèe-xi  
cuendá cúhú sá ñà túú vâha càa  
xití tríú —càchí-güedě xàha<sup>n</sup>-güedě  
xii-gá.

<sup>37</sup>Te Jèsús ní xáha<sup>n</sup>-gá xii-güedé:  
—Tée càchí-í ní sacá<sup>n</sup> tríú  
cávâha-á<sup>n</sup> cúú yùhú Tée cùu ñaní  
tnáhá-ndó nchàa-ndo. <sup>38</sup>Te nchaa  
núú ñí sacá<sup>n</sup> téé-á<sup>n</sup> tríú cúú-xí ñuyúú.  
Te tatá váha-á<sup>n</sup> cúú-xí cuè ñáyi  
yìndaha ñaha Yá Ndiòxí. Te nchaa  
cúhú sá ñà túú vâha-á<sup>n</sup> cúú-xí ñáyi  
yìndaha ñaha sàcuíhná. <sup>39</sup>Te téé  
ní dängoyo ndíquí<sup>n</sup> cúhú sá ñà  
túú vâha núú tríú-á<sup>n</sup> cúú-dě mee  
sàcuíhná. Te nduu nàtehndé-ná  
tríú-á<sup>n</sup> cúú-xí nduu ndíhi nihnu-ná  
nchaa sá lò ñuyúú-a. Te nchaa ñáyi  
nàquehndé tríú-á<sup>n</sup> cúú-yu mee-ni  
cuè espíritú xínú cuèchi núú Yá  
Ndiòxí. <sup>40</sup>Te dàtná cada cue téé  
quíhí<sup>n</sup> tnuhu nchaa cúhú sá ñà  
túú vâha-á<sup>n</sup> dacùtu nuhní-güedé  
te cahmi-güedé, duca<sup>n</sup> sàtnahá-xi  
yâha nchaa ñáyi cùndíhi yucu  
ñávâha na sàa nduu. <sup>41</sup>Te yùhú  
Tée cùu ñaní tnáhá-ndó nchàa-ndo  
tendaha-í nchaa espíritú xínú  
cuèchi núú-í quíhí<sup>n</sup>-xi nadatácá-xi  
nchaa ñáyi sànu ichi cue tnaha  
ñáyi-xi ichi cuèhé ichi duha,  
ndíhi nchaa dava-gá ñáyi ñá  
túú quide váha, te nchaa ñáyi-á<sup>n</sup>  
xíndecú-yu nchaa núú ndécú cuè  
ñáyi yìndaha-í. <sup>42</sup>Te cue espíritú-á<sup>n</sup>  
daquíhí<sup>n</sup>-xi cue ñáyi-á<sup>n</sup> núú ñùhú  
núú càyú, te yàcá<sup>n</sup> ío ndáhyú-yu  
te dicó rúhñú-ná cuu núhu-yu sá  
sátú iní-yu sá ndóhó-yu. <sup>43</sup>Te nchaa  
ñáyi quide nchaa nàcuáa cuíní  
Tătá-yu Dútú Ndiòxí, ñáyi-á<sup>n</sup> ïo  
cunùú-yu cundecú-yu núú ndécú-gá  
táxí tnùnì-gá, chi cúú-yu dàtná

nchícanhii dayèhé-yu cundecú-yu núú ndécú-gă. Te nchaa nchòhó ñáiyu ndèdòho nchaa tnúhu cáhá<sup>n</sup>-í-a, te ío váha chí cuăha cuëndá —càchí-gá xăha<sup>n</sup>-gă xii-güedé.

#### **Cuëndá ii<sup>n</sup> sá ïo ndèyáhu**

<sup>44</sup>Te Jèsús xăha<sup>n</sup> tucu-gá xii-güedé:

—Na càni tucu-í ingá cuëndú núú-ndó nàcuáa tecu tnùní-ndó nàcuáa cada-xi òré ndíhu ndaha ñàha Yá Ndiòxi xii ñáiyu. Hí<sup>n</sup> téé ní naníhí-dě ii<sup>n</sup> sá ïo ndèyáhu yìndúxi ii<sup>n</sup> xichi, te ní nachindúxi tucu-dé dïu-ni núú nǐ naníhí-dě-á<sup>n</sup>, te ío ní cudíí iní-dé sá dúcá<sup>n</sup> nǐ naníhí-dě xíá<sup>n</sup>. Te ní xica-dé cuánuhú-dé te ní nadico-dě nchaa sá ndécú ndíhi-dé, te ní nacuaa<sup>n</sup>-dě ñuhu núú dúcá<sup>n</sup> nǐ naníhí-dě xíá<sup>n</sup>.

#### **Cuëndá ii<sup>n</sup> sá ïo ndèyáhu nàni pèrlá**

<sup>45</sup>Te na càni tucu-í ingá cuëndú núú-ndó nàcuáa tecu tnùní-ndó nàcuáa cada-xi òré ndíhu ndaha ñàha Yá Ndiòxi xii ñáiyu. Hí<sup>n</sup> téé quide ndáhu ndúcú-dě sá nání pèrlá sá ïo ndèyáhu. <sup>46</sup>Te ní naníhí-dě ñáiyu ndècu ndíhi ii<sup>n</sup> pèrlá sá ïo-gá ndèyáhu, te ní xica-dé cuánuhú-dé te ní nadico-dě nchaa sá ndécú ndíhi-dé, te ní sáhá<sup>n</sup>-dé ní saa<sup>n</sup>-dé pèrlá sá ïo-gá ndèyáhu-á<sup>n</sup>.

#### **Cuëndá ñunu tnèi-güedé chácá**

<sup>47</sup>Te na càni tucu-í ingá cuëndú núú-ndó nàcuáa tecu tnùní-ndó nàcuáa cada-xi òré ndíhu ndaha ñàha Yá Ndiòxi xii ñáiyu. Cue téé tnèi chácá nǐ dáquëe-güedé ñunu-güedé xití ndute làmár

tníi-güedě chácá, te dácá nuu dácá nihnu chácá cuànguee-güedi xití ñunu-á<sup>n</sup>. <sup>48</sup>Te òré ní cutnùnì iní-güedé sá nǐ chítú ñunu-güedé, te ní natava-güedé ní nene yuhu làmár, te ní ngüfta-güedé nácăxi-güedé nchaa chácá-ă<sup>n</sup>. Te nchaa chácá văha dàquëe-güedé-di xití tídihi, te nchaa chácá nèhé dăngoyo-güedé-di. <sup>49</sup>Te dàtná ní quide cue téé-á<sup>n</sup> duca<sup>n</sup> càda cue espíritú xínú cuèchi núú Yă Ndiòxi ná sàá nduu vă cündècu-gá nchaa sá ïo ñuyíú-a, chi cue espíritú-á<sup>n</sup> daquëe dîi<sup>n</sup>-xi nchaa ñáiyu ní quide váha tnuú nchaa ñáiyu ñá túú ní quide váha. <sup>50</sup>Te nchaa ñáiyu ñá túú ní quide váha-á<sup>n</sup> daquèh<sup>n</sup> ñáhá-xí xîi-yu núú ñùhú núú càyú, te yàcá<sup>n</sup> ío ndáhyú-yu, te dîcò rúhñú-nă cuu núhu-yu sá sàtú iní-yu cuëndá sá ndòhò-yu —càchí-gá xăha<sup>n</sup>-gă xii cue téé xica cuu ndíhi-gá.

#### **Cuëndá cue téé ndècu ndíhi sá nǐ quee túu díhna ndíhi sá nǐ quee túu saa**

<sup>51</sup>Te Jèsús ní xícá<sup>n</sup> tnúhú-gă núú-güedě, te xăha<sup>n</sup>-gă xii-güedé: —Í ní tecú tnùní-ndó nàcuáa nduu nchaa tnúhu ní cáhá<sup>n</sup>-í-ă<sup>n</sup>? —càchí-gá xăha<sup>n</sup>-gă xii-güedé.

Te ní xáha<sup>n</sup>-güedě xii-gá: —Ní tecú tnùní-ndí —càchí-güedé xăha<sup>n</sup>-güedě xii-gá.

<sup>52</sup>Te ní xáha<sup>n</sup> tucu Jesús xii-güedé:

—Te núu ii<sup>n</sup> téé dàcuaha ñaha xii ñáiyu nchaa tnúhu ní chídó tnùnì ndíi Moisés ná cùnunì iní-dé nàcuáa quide Yá Ndiòxi ndíhu ndaha-gă ñáiyu, te téé-á<sup>n</sup> cúú-dě

dàtná ìí<sup>n</sup> téé cùu xítóhó vehe. Te téé cùu xítóhó vehe-á<sup>n</sup> ní queñuhu-dé nchaa sá ní quee túu díhna ndècu ndíhi-dé, ndíhi nchaa sá ní quee túu saa. Te duca<sup>n</sup> sátnahá-xi cùu téé-á<sup>n</sup> te núu na cùtnuní iní-dé nàcuáa quide Yá Ndiöxí ndíhu ndaha-gã ñáyiú —càchí-gá xáha<sup>n</sup>-gã xii-güedé.

**Jèsús ndécú-gã ñuú núu ní sahnú-gá**  
(Mr. 6:1-6; Lc. 4:16-30)

<sup>53</sup>Te sáta ñí yáha duca<sup>n</sup> ní cani Jèsús cuèndú núu-güedé, te ní xica-gá cuánuhú-gá. <sup>54</sup>Te ní ndexio-gá ñuú núu cùu ñuú-gá, te cuánguihu-gá xití veñúhu càa ñuú-á<sup>n</sup> te ní ngüíta-gá dánèhé-gá ñáyiú. Te nchaa ñáyiú ndèdóho nchaa tnúhu càhá<sup>n</sup>-gá xicúñúhu-yu, te xítnàhá-yu:

—¿Nása ní cuu núu ío váha cùtnuní iní téé-a nàcuáa cunduu tnúhu cáhá<sup>n</sup>-dé, te quide-dé nchaa sá vã yõo tnàhí ndàcu cada-i? <sup>55</sup>Te dícó déhe téé cùu carpinterú ndíhi tá Màriá cùu-dé, te ñaní-dé cùu tẽ Jàcobó, ndíhi té Chèé, ndíhi té Xímú, ndíhi té Jüdás. <sup>56</sup>Te cue cúha-dé ndécú ndíhi ñahá-yu xii-o ñuú-a. ¿Te nása ní quide-dé ñuú ndéé dàcá<sup>n</sup> ío váha cùtnuní iní-dé nàcuáa cunduu tnúhu cáhá<sup>n</sup>-dé-i? —càchí-yu xítnàhá-yu.

<sup>57</sup>Te ñá túú ní cuiní-yu cáhá<sup>n</sup> ndíhi váha-yu Jèsús, dico mee-gã ní xáha<sup>n</sup>-gã xií-yu:

—Te núu ìí<sup>n</sup> téé càhá<sup>n</sup> tnúhu Yá Ndiöxí ná nàsáá-dé ñuú-dé, te nchaa ñáyiú ñuú-dé-á<sup>n</sup> ndíhi nchaa ñáyiú cùu ndímee-dé ñá túú nèhé-yu sá yíñùhu núu-dé, dico cue ñáyiú nchaa dava-gã ñuú

chi nèhé-yu sá yíñùhu núu-dé —càchí-gá xáha<sup>n</sup>-gã xií-yu.

<sup>58</sup>Te ñá túú ní quide Jèsús titní núu sã vã yõo tnàhí ndàcu cada ñuú-á<sup>n</sup>, chi ñá túú ní cuiní-yu quindáá iní ñáhã-yu xii-gá.

**Nàcuáa ní cuu ní xíhí té Juàá téé**  
**dàcuandute ñaha xii ñáyiú**

(Mr. 6:14-29; Lc. 9:7-9)

**14** Te diu-ni dàvã-á<sup>n</sup> ní níhí tẽ Hèrodés tnúhu nchaa nàcuáa quide Jèsús, te té Hèrodés-á<sup>n</sup> cùu-dé téé tàxi tnuní distritú Galileá. <sup>2</sup>Te ní xáha<sup>n</sup>-dẽ xii nchaa cue téé ndècu ndíhi-dé:

—Téé dii cuèndú-xi níhí-ó-á<sup>n</sup> cùu-dé téé Juàá téé dàcuandute ñaha xii ñáyiú, téé ní xíhí ní cùu te ní ndoto-dé ñuú dàcá<sup>n</sup> ndácú-dé quidé-dẽ nchaa sá vã yõo tnàhí ndàcu cada —cachí-dé xáha<sup>n</sup>-dẽ xii-güedé.

<sup>3</sup>Te duca<sup>n</sup> ní cáhá<sup>n</sup> té Hèrodés chi mee-dẽ ní táúchíú<sup>n</sup>-dẽ ní tñii ñaha-güedé xii té Juàá, te ní dácútú ñaha-güedé xii-dé, te ní chihi ñaha-güedé vecaá. Te duca<sup>n</sup> ní quide té Hèrodés-á<sup>n</sup> sã cuèndá ñaha nàni Herodiás, ñaha ní cándeca ñaní-dé té Lìpé, te ní naquehe<sup>n</sup> ñaha-dẽ xii-a<sup>n</sup> ndèca ñaha-dé. <sup>4</sup>Te té Juàá ní xáha<sup>n</sup>-dẽ xii té Hèrodés:

—Ñá túú ní quide váha-n dùha ní naquehe<sup>n</sup>-n ñaha ní cándeca ñaní-n —duha ní xáha<sup>n</sup> tẽ Juàá xii té Hèrodés.

<sup>5</sup>Te sá dúcá<sup>n</sup> ní xáha<sup>n</sup> tẽ Juàá-á<sup>n</sup> xii té Hèrodés, te ní cuiní té Hèrodés-á<sup>n</sup> cahni-dé té Juàá-á<sup>n</sup>, dico ñá túú ní cùyii-dé chi ní yùhú-dé núu cuè ñáyiú, chi ncháa-yu ní cutnùní iní-yu sá tẽ Juàá cùu-dé ìí<sup>n</sup> téé càhá<sup>n</sup> tnúhu



Yá Ndiöxí. <sup>6</sup>Te ì<sup>n</sup> nduu ní quide té Hèrodés vico vehe-dé ní quide càhnu-dé nduu nǐ cacu-dé. Te ndècu ì<sup>n</sup> déhe yoco ñàha nani Herodiás-á<sup>n</sup>, te xíchí-ǎ<sup>n</sup> nǐ quǐhu-xi xití vehe núú cúú vico-á<sup>n</sup> nǐ xita saha-xi. Te nùcòó té Hèrodés ndìhi cue téé ní cáhá<sup>n</sup>-dé ndéhé-güedě, te ío ní cudí ìní-dé nàcuáa ní xita xíchí-ǎ<sup>n</sup>. <sup>7</sup>Te té Hèrodés-á<sup>n</sup> nǐ cacunehe-dé ndéé Yá Ndiöxí nàcuáa cutnùní iní xíchí-ǎ<sup>n</sup> sǎ ndàà cuǎñaha-dě nùu ná cúú sǎ ná càcá<sup>n</sup>-xi núú-dě. <sup>8</sup>Te xíchí-ǎ<sup>n</sup> nǐ dácáhu ìní ñáhá ñáná-xi xii-xi ná cúú sǎ càcá<sup>n</sup>-xi núú tǔ Hèrodés, núú xǐá<sup>n</sup> ní xáha<sup>n</sup>-xi xii-dé:

—Cuìní-í quehdé-n dǐquí tǔ Juàá téé dàcuandute ñaha xii ñáyiú te taxi-n, dico na cùhu<sup>n</sup> ì<sup>n</sup> xití cóhó taxi-n —càchí-xi xǎha<sup>n</sup>-xi xii-dé.

<sup>9</sup>Te sá dúcá<sup>n</sup> nǐ xáha<sup>n</sup>-xi, te ní cundíyí té Hèrodés, dico ñá túú ní nǐhí-dě nása cada-dé, chi ndèdóho ñáyiú òré ní cacunehe-dé Yá Ndiöxí sá ndàà cuǎñaha-dě ì<sup>n</sup> sá ná càcá<sup>n</sup>-xi núú-dě. Te ní quide-dé nàcuáa ní xáha<sup>n</sup>-xi. <sup>10</sup>Chi ní táuchíú<sup>n</sup>-dě ní sáhá<sup>n</sup> cue téé ní xehndé-güedé díquí tǔ Juàá òré yíhí-dě vecaá. <sup>11</sup>Te ní chihi-güedé díquí-dě ì<sup>n</sup> xití cóhó te nèhe-güedé cuánuhú ní sáñaha-güedě xii xíchí-ǎ<sup>n</sup>, te xíchí-ǎ<sup>n</sup> nǐ nacuǎñaha-xi xii náná-xi.

<sup>12</sup>Te cue téé xica cuu ndìhi té Juàá-á<sup>n</sup> ní sáhá<sup>n</sup>-güedé ní naquehe<sup>n</sup>-güedé yiqui cùnú-dé ní chindúxi-güedé, te dǎtnùní ní sáhá<sup>n</sup>-güedé ní xáha<sup>n</sup>-güedě xii Jèsús nàcuáa ní cuu.

**Jèsús dácàxi-gá úhú<sup>n</sup> mǐl cue téé te dǐ<sup>n</sup> ñáyiú dǐhí ndìhi landú**

(Mr. 6:30-44; Lc. 9:10-17; Jn. 6 :1-14)

<sup>13</sup>Te Jèsús ní níhí-gǎ tnúhu nàcuáa ní cuu ní xíhí té Juàá. Te

sátá xǐá<sup>n</sup> te cuánguee-gá ì<sup>n</sup> bàrcú cuáhá<sup>n</sup>-gá ì<sup>n</sup> xichi núú ñà túú ñáyiú ndècu, dico nchaa ñáyiú xǐndecu nchaa ñuú cáá yàtni xía<sup>n</sup> nǐ níhí-yu tnúhu sá cuáhá<sup>n</sup>-gá, te ní quee-yu ñuú-yu xica sahá-yu cuáhá<sup>n</sup> núú quidě-yu cuèndá quexio Jèsús. <sup>14</sup>Te òré ní quexio Jèsús núú cuáhá<sup>n</sup>-gá, te ní quene-gá bàrcú, te ní xiní-gá cuéhé víhí ñáyiú xixúcu-yu xía<sup>n</sup>, te ní cundàhú iní ñáhá-gǎ xii-yu, te ní quide tátna-gá nchaa ñáyiú cùhú ndìhí-yu. <sup>15</sup>Te sátá nǐ cuua te ní sáhá<sup>n</sup> cue téé xica cuu ndìhi Jèsús núú-gǎ, te xǎha<sup>n</sup>-güedě xii-gá:

—Sa ní cuu dandàca-n nchaa ñáyiú-a chi sa ní cuua, te na quǐh<sup>n</sup>-yu nchaa ñuú cáá yàtni iha cuaá<sup>n</sup>-yu sá cǎxí-yu, chi núú ndécú-ó ìha ñá túú tnàhí ná ío —càchí-güedé xǎha<sup>n</sup>-güedě xii-gá.

<sup>16</sup>Te Jèsús ní xáha<sup>n</sup>-gǎ xii-güedé: —Ñáhá, vá dándàca-í-yu, váha-gá mee-ndo chí cuǎñaha sǎ ná cǎxí-yu —càchí-gá xǎha<sup>n</sup>-gǎ xii-güedé.

<sup>17</sup>Te ní xáha<sup>n</sup>-güedě xii-gá:

—Ñá túú ñǎgá ndécú ndìhi-ndí, chi úhú<sup>n</sup> duha-ná pàà ndìhi úú-ñǎ chácá ndécú ndìhi-ndí —càchi-güedé xǎha<sup>n</sup>-güedě xii-gá.

<sup>18</sup>Te Jèsús ní xáha<sup>n</sup>-gǎ xii-güedé: —Chí cànèhe paá-á<sup>n</sup> ndìhi chácá-á<sup>n</sup> táquixi iha —cachí-gá xǎha<sup>n</sup>-gǎ xii-güedé.

<sup>19</sup>Te Jèsús ní xáha<sup>n</sup>-gǎ xii nchaa ñáyiú sá ná ngò-yu nchaa-yu núú ìtè cuíí càa xía<sup>n</sup>, te ní quehe<sup>n</sup>-gá ndí ùhú<sup>n</sup> pàà-á<sup>n</sup> ndìhi ndi ndúú chácá-á<sup>n</sup> te ní ndacoto-gá andiú, te ní ndacá<sup>n</sup> táhú-gǎ núú Yá Ndiöxí, te dǎtnùní ní táhú cuèchi-gá pàà-á<sup>n</sup> te ní sáñaha-gǎ xii cue téé xica cuu ndìhi-gá ní dácǎñu-güedé cue

ñáyiú ní xexí-yu. <sup>20</sup>Te nchaá-yu ní xexí-yu ní ndahá xití-yu. Te sátá ní túhú cóhō-yu te ní nadatàcá-güedé nchaa sá ní quendóo, te ní chítú ùxúú tnàhá tídihi mee-ni sá ní quendóo. <sup>21</sup>Te nchaa ñáyiú ní xexi-á<sup>n</sup> ní xínu úhú<sup>n</sup> mĩl mee-ni cuè téé chi mee-ni cuè téé-á<sup>n</sup> ní quíundehu, te ðĩ<sup>n</sup> cue ñáyiú ðĩhí ndihi cue landú.

**Jèsús xicá-gã núú ndute**

(Mr. 6:45-52; Jn. 6 :16-21)

<sup>22</sup>Te òré-ni-á<sup>n</sup> ní xáha<sup>n</sup> Jèsús xii cue téé xica cuu ndihi-gá sá quèe-güedé bàrcú téhndé-güedé ndàa ingá xio yuhu làgúná, te mee-gã quendóo-gá cada ndee ìní tnáhá-gã ndihi cue ñáyiú. <sup>23</sup>Te sátá ní yáha ní quide ndee ìní tnáhá-gã ndihi cue ñáyiú, te medì-gá ní xica-gá cuásaá-gá ì<sup>n</sup> tindúú cáa yàtni xíá<sup>n</sup> cuendá cáhá<sup>n</sup> ndihi-gá Yã Ndiòxí, te ðiu-ni medì-gá ndécú xíá<sup>n</sup> ní cundiquí<sup>n</sup>. <sup>24</sup>Te bàrcú sá ñúhú cuè téé xica cuu ndihi-gá-á<sup>n</sup> sa cuáhá<sup>n</sup>-xi ndéé cuádava xití làgúná-á<sup>n</sup>, te níhi v̄ihi quene táchí ndàa ichi cuáhá<sup>n</sup>-xi, te dàcandau ndeé-xi ndute nchaa ðĩñi-xi. <sup>25</sup>Te tàcuíhndá váhi-gá tá xica Jesús núú ndute cuáhá<sup>n</sup> tá cùyatni-gá bàrcú-á<sup>n</sup>. <sup>26</sup>Te cue téé xica cuu ndihi-gá ní xiní ñáhá-güedě xii-gá tá xica-gá núú ndute cuáhá<sup>n</sup>, te ní yùhú-güedé te níhi ní cáhá<sup>n</sup>-güedé te xitnàha-güedé:  
—iH<sup>n</sup> àlmá! —càchí-güedé xitnàha-güedé.

<sup>27</sup>Te Jèsús ní cáhá<sup>n</sup>-gá, te xãha<sup>n</sup>-gã xii-güedé:

—Ñíí cunduu-ndo v̄a yùhú-ndó, chi yùhú cúu-í —càchí-gá xãha<sup>n</sup>-gã xii-güedé.

<sup>28</sup>Te té Pèlú ní xáha<sup>n</sup>-dě xii-gá:  
—Mèstrú, te núu ðiu-n te tauchìu<sup>n</sup> sá tnàhá-í ná càca-í núú ndute quixi tnàhá ñàhà-í xii-n —càchí-dé xãha<sup>n</sup>-dě xii-gá.

<sup>29</sup>Te Jèsús ní xáha<sup>n</sup>-gã xii-dé:  
—Taquìxi —cachí-gá xãha<sup>n</sup>-gã xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáhá<sup>n</sup> cuátnahá ñáhá-dě xii-gá.

<sup>30</sup>Te ní cutnùnì iní-dé sá ìo níhi xico táchí, te ní ngüíta-dé yùhú-dé. Te òré-ni-á<sup>n</sup> tá quèe naa-dé xití ndute cuáhá<sup>n</sup> ní cùu, te níhi ní cáhá<sup>n</sup>-dé xãha<sup>n</sup>-dě xii Jèsús:

—iMèstrú, v̄a ðãñá-n quèe naa-í xití ndute! —càchí-dé xãha<sup>n</sup>-dě xii-gá.

<sup>31</sup>Te òré-ni-á<sup>n</sup> ní tniì Jèsús ndaha-dé, te ní xáha<sup>n</sup>-gã xii-dé:  
—ìNá cuendá ñá túú sàndáá ndisa iní ñáhá-n xii-í sàni ì<sup>n</sup> sani úú iní-n-i? —càchí-gá xãha<sup>n</sup>-gã xii-dé.

<sup>32</sup>Te òré cuánguee Jèsús ndihi té Pèlú xití bàrcú, te òré-ni-á<sup>n</sup> ní ngüíñí táchí. <sup>33</sup>Te cue téé ñùhu xití bàrcú-á<sup>n</sup> ní ngüíñí xití-güedé núú-gã, te xãha<sup>n</sup>-güedé xii-gá:

—Sá ndàa sá cutí sã díú yòhó cúu-n Dèhe Dútú Ndiòxí —  
càchí-güedé xãha<sup>n</sup>-güedé xii-gá.

**Jèsús quidé tãtna-gã ñáyiú cùhú ì<sup>n</sup> xichi núú nání Gènesarét**

(Mr. 6:53-56)

<sup>34</sup>Te ní quexìo Jesús ndihi cue téé xica cuu ndihi-gá ndàa ingá xio yuhu làgúná, te núú ní quexìo-gá ndihi-güedé-á<sup>n</sup> nání-xí Gènesarét.

<sup>35</sup>Te nchaa ñáyiú xĩndecu xíá<sup>n</sup> ní cutnùnì iní-yu sá díú-gã ní quexìo, te ní dátècú tñùhu-yu

nchaa dava-gá ñáyiú xĩndecu yatni xíá<sup>n</sup> sã ní quexìo-gá. Te ndècá-yu nchaa ñáyiú cùhú ndécú ndìhí-yu cuáhá<sup>n</sup> núú ndécú Jèsús. <sup>36</sup>Te nchaa ñáyiú cùhú-á<sup>n</sup> ní ngúfta-yu càhá<sup>n</sup> ndàhú-yu núú Jèsús sá ná dàña-gá tnándeé-yu cuèdicó luha yuhu dǒo-gã cuendá ndúha-yu, te cue ñáyiú cùhú, ñáyiú ní tnándeé yuhu dǒo-gã ní ndúha-yu.

**Cuendá nchaa sá quidé-xí ngũndecu cuéchi ñáyiú**

(Mr. 7:1-23)

**15** Te sátá dúcá<sup>n</sup> te ìí<sup>n</sup> ùú cue tée cùu fariséú ní quee-güedé ñúú Jerusàlén, ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés ní quexìo-güedé núú ndécú Jèsús, te xãha<sup>n</sup>-güedě xii-gá:

<sup>2</sup>—¿Ná cuendá cue tée xica cuu ndìhi-n ñá túú nàquete-güedé ndaha-güedé òré caxi-güedé nàcuáa ní cachí cue ñaní tnáhá-ó ní xĩndecu ndéé sanaha-i? — càchí-güedé xãha<sup>n</sup>-güedě xii-gá.

<sup>3</sup>Te Jèsús ní xáha<sup>n</sup>-gã xii-güedé: —Te nchòhó tucu, ¿ná cuendá ñá túú quide-ndo nacuáa ní cachí Yã Ndiõxí cada-ndo, núu da nàcuáa ta quide cue tée ñuyíú-a quide-ndo-i?

<sup>4</sup>Te Yã Ndiõxí càchí-gá núú tütú-gá: “Canehe-ndo sã yĩñuhu núú tãtã-ndó ndìhi núú ñáná-ndó”, càchí-gá. Te càchí tucu-gá ingá xichi núú tütú-gá: “Nchaa ñáyiú na càhá<sup>n</sup> úhú tãtã-xi àdi náná-xi te cahni ñaha-güedě xii-yu”, duha càchí-gá núú tütú-gá. <sup>5</sup>Dico nchòhó càchí-ndó sã cuè ñáyiú chi cuu cùñahá-yu xii tãtã-yu àdi nánã-yu: “Vá cúú chĩndee ñaha-ndí xii-n,

chi sá táxi-ndí xii-n ni cùu, xíá<sup>n</sup> ní nduu cuendá Yã Ndiõxí”, cuu duha cùñaha ñáyiú xii tãtã-yu àdi nánã-yu càchí-ndó. <sup>6</sup>Te càchí-ndó sã cuè ñáyiú duca<sup>n</sup> na cùñaha xii tãtã-xi àdi náná-xi te ñá túú-gã tàú-yu chĩndéé-yu ni tãtã-yu ni nánã-yu. Te duca<sup>n</sup> quide-ndo chi ní dáquéé tĩhú-ndó nàcuáa ní cachí Yã Ndiõxí cada-ndo, te mee-ni nàcuáa ta quide cue tée ñuyíú-a véxi nchicú<sup>n</sup> nihnu-ndo quide-ndo. <sup>7</sup>iTe nchòhó cúú-ndó ñáyiú ío dandahú méé-xí, chi càchí-ndó sã quidé ndáá-ndó te ñá ndáá sá quidé ndáá-ndó! Te ní quee ndáá-xi nàcuáa ní chídó tnùní ndíi Chàíá tée ní xóo càhá<sup>n</sup> tnúhu Yã Ndiõxí ndéé sanaha núú tütú-gá núú càhá<sup>n</sup>-xi nàcuáa ní càhá<sup>n</sup>-gã cuendá-ndó, te duha ní cachí-gá:

<sup>8</sup>Ñáyiú-a càchí-yu sá ìo càhnu cuu-í dico dicó-ni yuhu càhá<sup>n</sup>-yu,

chi duu<sup>n</sup> duu<sup>n</sup> ñá túú ñùhu iní ñáhã-yu xii-í.

<sup>9</sup>Te àú<sup>n</sup> ñã cuu chĩñuhu ñahá-yu xii-í chi ñá túú vèdana ndéé nándĩhi-xi,

chi cue ñáyiú-a dàcuahá-yu cue tnàha ñáyiú-yu nàcuáa cundecú-yu, dico mee-ni tnúhu sá ní cahu iní cue ñáyiú ñuyíú-a càhá<sup>n</sup>-yu.

Duha ní chídó tnùní ndíi Chàíá núú tütú Yã Ndiõxí nàcuáa ní càhá<sup>n</sup>-gã cuendá-ndó —càchí-gá xãha<sup>n</sup>-gã xii-güedé.

<sup>10</sup>Te ní xáha<sup>n</sup>-gã xii cue ñáyiú: —Chí táquixi ndehe iha, te cundedóho váha-ndo tnúhu na càhá<sup>n</sup>-í, te ío váha cuáha-ndo cuendá. <sup>11</sup>Nchaa sá xéxi-ndó chi

ñá túú nǎ quidé-xí ìní-ndó, dico nchaa sá cuèhé sá dúhá sàni ìní-ndó càhá<sup>n</sup>-ndó nchàa xǎá<sup>n</sup> quidé-xí ndècu cuéchi-ndo —càchí-gá xǎha<sup>n</sup>-gǎ xií-yu.

<sup>12</sup>Te cue tée xìca cuu ndìhi-gá ní sáhá<sup>n</sup>-güedé ndéé núú-gǎ, te xǎha<sup>n</sup>-güedě xii-gá:

—Véxi-ndí càchí tnúhu-ndí xii-n sǎ cuè tée cùu fariséú ñá túú cùu váha ìní-güedé cuendá tnúhu ní cáhá<sup>n</sup>-n —càchí-güedé xǎha<sup>n</sup>-güedě xii-gá.

<sup>13</sup>Te ní xáha<sup>n</sup>-gǎ xii-güedé:

—Nchaa ñáyiú ñá túú cùu cuendá Tǎtà-í Dútú Ndiòxí cuíta nihnú-yu, chi ñáyiú-á<sup>n</sup> cúú-yu dàtná nchaa cúhú sǎ ñà túú nàndíhi te tnúhu ñáyiú. <sup>14</sup>Te vá cádá cuendá-ndó nàcuáa càhá<sup>n</sup> cue tée-á<sup>n</sup>, chi cùu-güedé dàtná cue ñáyiú cuàá sácuíta nehe tnàha. Te nchòhó xìní-ndó sǎ núu ìí<sup>n</sup> ñáyiú cuàá ná cuítá nèhe tucú-yu ìngá ñáyiú cuàá, te ndí ndúú-yu quée-yu déhvá —càchí-gá xǎha<sup>n</sup>-gǎ xii-güedé.

<sup>15</sup>Te té Pèlú ní xáha<sup>n</sup>-dě xii-gá:

—Cachí tnúhu xii-ndí nàcuáa quèe-xi tnúhu ní cáhá<sup>n</sup>-n-ǎ<sup>n</sup> —càchí-dé xǎha<sup>n</sup>-dě xii-gá.

<sup>16</sup>Te Jèsús ní xáha<sup>n</sup>-gǎ:

—¿Náa tnàhá nchòhó ñá túú ní təcú tnùní-ndó nàcuáa ndùu tnúhu ní cáhá<sup>n</sup>-í núú ñáyiú-ǎ<sup>n</sup> ñǎ? <sup>17</sup>Nchaa sá xéxí-yu cuánguee-xi xití-yu, te dàtnùní náyǎha ñaha-xi xii-yu.

<sup>18</sup>Dico nchaa tnúhu cuèhé tnúhu duha càhá<sup>n</sup>-yu xǎá<sup>n</sup> véxi quene-xi ìní-yu, te diu nchaa xǎá<sup>n</sup> quidé-xí ndècu cuéchi-yu. <sup>19</sup>Te ìní-yu-á<sup>n</sup> cǎcú nihnu nchaa sá cuèhé sá dúhá, chi sàni cuèhé sání dùha ìní-yu, te sàhní-yu tnàha ñáyiú-yu, te cue tée càhá<sup>n</sup> ndìhi-güedé ñáyiú dìhí

te ñá dúú ñàdìhí-güedé cúú-yu. Te diu-ni duca<sup>n</sup> quide cue ñáyiú dìhí càhá<sup>n</sup> ndìhí-yu cue tée te ñá dúú yíí-yu cùu-güedé, te cuèi tée te cuèi ñàdìhí mee-ni ìchi díí ìní cúdǎí ìní-yu cundecú-yu, te dùhu ndachiu<sup>n</sup> tnàhá-yu, te dàcuandehndé-yu, te càhá<sup>n</sup> cuèhé-yu cuendá tnàha ñáyiú-yu. <sup>20</sup>Te nchaa xǎá<sup>n</sup> quidé-xí ndècu cuéchi-yu, dico ñá dúú sǎ ñà túú ndàhá-yu dàtná ní cachí cue tée ndéé sanaha, chi xǎá<sup>n</sup> ñá túú quide-xi cuendá ngúndecu cuéchi-yu —càchí-gá xǎha<sup>n</sup>-gǎ xii-güedé.

**Íí<sup>n</sup> ñàdìhí ñaha cùu ñaní tnàhá ñáyiú canànea ní sándáá ìní-a<sup>n</sup> Jèsús**

(Mr. 7:24-30)

<sup>21</sup>Te Jèsús ní xica-gá cuáhá<sup>n</sup>-gá ní sáa-gá yucu cue tée ñuú Tírú, ndìhi yucu cue tée ñuú Sìdón. <sup>22</sup>Te ìí<sup>n</sup> ñàdìhí ñaha cùu ñaní tnàhá ñáyiú canànea ndécú yàtni-a<sup>n</sup> xǎá<sup>n</sup>, te níhi ta càhá<sup>n</sup>-a<sup>n</sup> ní quexìo núú ndécú Jèsús, te xǎha<sup>n</sup>-a<sup>n</sup> xii-gá:

—iMèstrú, ñaní tnàhá ndíi Dàvíí, cundàhú ìní ñàhá xii-í cada tátna-n dèhe yoco-í! Chi yíhi ñaha espíritú cündìhi yucu ñávàha xii-xi te ío dándoho ñaha-xi —cachí-a<sup>n</sup> xǎha<sup>n</sup> xii-gá.

<sup>23</sup>Dico Jèsús ñá túú tnàhí ní cǎhá<sup>n</sup>-gá, te cue tée xìca cuu ndìhi-gá ní sáhá<sup>n</sup>-güedé núú-gǎ, te xǎha<sup>n</sup>-güedě xii-gá:

—Cúnaha xii ñaha-á<sup>n</sup> ná nùhú-a<sup>n</sup>, chi ío níhi càhá<sup>n</sup>-a<sup>n</sup> nchìcú<sup>n</sup> ñàhá-á<sup>n</sup> xii-o —cachí-güedé xǎha<sup>n</sup>-güedě xii-gá.

<sup>24</sup>Te Jèsús ní xáha<sup>n</sup>-gǎ xii-güedé:

—Yá Ndiòxí ní tendaha ñàha-gá xii-í véxi-í mee-ni ñùú núú xǎndecu

cue ñáyiú isràél, chi ñáyiú-á<sup>n</sup>  
cúŷ-yu dàtná cue mbéé cue quiti ní  
xíta, chi ta xíta nihnú-yu cuáhá<sup>n</sup> —  
càchí-gá xăhá<sup>n</sup>-gă xii-güedé.

<sup>25</sup>Te ñadîhí-á<sup>n</sup> nî sáhá<sup>n</sup>-a<sup>n</sup> ndéé  
núú Jèsús ní nguîfîí xítí-á<sup>n</sup>, te  
xăhá<sup>n</sup>-a<sup>n</sup> xii-gá:

—iMèstrú, chindee ñàha xii-í! —  
càchí-a<sup>n</sup> xăhá<sup>n</sup>-a<sup>n</sup> xii-gá.

<sup>26</sup>Te Jèsús ní xáha<sup>n</sup>-gă xii-a<sup>n</sup>:

—Vá cúú chindee-í cue ñáyiú  
ñá túú cùu ñáyiú isràél, chi ì<sup>n</sup>-ni  
cùu-xi núu na quèhe<sup>n</sup>-o paá cúú  
cuendá cue landú te cuáha-o ìná  
caxi-dí —càchí-gá xăhá<sup>n</sup>-gă xii-a<sup>n</sup>.

<sup>27</sup>Dico ñàha-á<sup>n</sup> nî xáha<sup>n</sup>-a<sup>n</sup> xii-gá:  
—Ndáá càhá<sup>n</sup>-n, dico cue iná chi  
nàdatacá-güedi sá ngóyó yùhu cóhó  
xítóhó-güedi —càchí-a<sup>n</sup> xăhá<sup>n</sup>-a<sup>n</sup>  
xii-gá.

<sup>28</sup>Te Jèsús ní xáha<sup>n</sup>-gă xii-a<sup>n</sup>:

—iYòhó ñàha cùhú déhe-xi, ío  
váha sàndáá iní ñáhá-n xii-í! Te na  
càda-í nàcuáa cuîní-n —càchí-gá  
xăhá<sup>n</sup>-gă xii-a<sup>n</sup>.

Te òré-ni-á<sup>n</sup> nî ndúha déhe-a<sup>n</sup>.

**Jèsús quidé tătna-gá vai ñáyiú cùhú**

<sup>29</sup>Te sátá dúcá<sup>n</sup> nî cuu te Jèsús ní  
xica-gá cuáhá<sup>n</sup>-gá ní yáha-gá yuhu  
làgúná distritú Galiléa, te cuásaá-gá  
ì<sup>n</sup> tindúú te xía<sup>n</sup> nî ngóo-gá. <sup>30</sup>Te  
xía<sup>n</sup> núcõo-gá ní quexìo cuéhé  
víhí ñáyiú, te ndécá-yu ñáyiú  
yacua, ndîhi ñáyiú ní yíchí ì<sup>n</sup> xio  
ndaha-xi, ndîhi ñáyiú cuáá, ndîhi  
ñáyiú ñîhí, te vai dava-gá cue ñáyiú  
cùhú tnàhá dava-gá núú cuéhé  
ndécá-yu ní quexìo núú ndécú-gă.  
Te ní taxi ndecu ñàhá-yu núú Jèsús  
te ní quide tătna ñàha-gă xii-yu  
te ní ndúha-yu. <sup>31</sup>Te nchaa ñáyiú  
xîndecu-á<sup>n</sup> ío ní cuñúhu-yu sá dúcá<sup>n</sup>

nî xini-yu ní cuu ní nacáhá<sup>n</sup> nchaa  
ñáyiú ñîhí, ndîhi cuendá sá nî  
ndúha nchaa cue ñáyiú yacua, ndîhi  
cuendá sá nî ndúha cue ñáyiú ní  
yíchí ì<sup>n</sup> xio ndaha-xi, ndîhi cuendá  
sá nî ndúha núú cuè ñáyiú cuáá. Te  
nchaá-yu ní cachí-yu sá ío càhnu  
cuu Yá Ndiõxí Yáá cúú Ndiõxí cue  
ñáyiú isràél.

**Jèsús dácaxi-gá cúmí mîl cue téé te  
dîí<sup>n</sup> ñáyiú dîhí ndîhi landú**

(Mr. 8:1-10)

<sup>32</sup>Te Jèsús ní cana-gá cue téé  
xica cuu ndîhi-gá, te ní xáha<sup>n</sup>-gă  
xii-güedé:

—Yúhú cündàhú iní-í nchaa  
ñáyiú-a, chi sa ní cuu úní nduu  
ndècu ndîhi ñàhá-yu xii-o ìha, te  
ñá túú tnàhí-gá sá cáxí-yu, te ñá  
túú cuîní-í natendaha-í-yu núhú  
tnámă-yu vehé-yu, chi ná ndéé  
cuáhá<sup>n</sup> cuneé-yu docó ichi —  
càchí-gá xăhá<sup>n</sup>-gă xii-güedé.

<sup>33</sup>Te ní xáha<sup>n</sup>-güedé xii-gá:

—¿Te ndèé níhí-ó să cuñàha-o  
càxi nchaa ñáyiú-a, te ío cuéhè-yu  
te ñá túú nă ío iha chi cùu-xi xití  
yucu-i? —càchí-güedé xăhá<sup>n</sup>-güedé  
xii-gá.

<sup>34</sup>Te Jèsús ní xícá<sup>n</sup> tnúhú-gă  
núú-güedé, te xăhá<sup>n</sup>-gă:

—¿Ná daha-gá pàá ndécú  
ndîhi-ndo-i? —cachí-gá xăhá<sup>n</sup>-gă  
xii-güedé.

Te ní xáha<sup>n</sup>-güedé xii-gá:

—Ndècu ndîhi-ndí úsá-gá tnàhá  
pàá ndîhi ì<sup>n</sup> úú-gá chácá —  
càchí-güedé xăhá<sup>n</sup>-güedé xii-gá.

<sup>35</sup>Te Jèsús ní xáha<sup>n</sup>-gă xii nchaa  
ñáyiú sá ná ngõo-yu nchaá-yu, te  
ní ngóo-yu. <sup>36</sup>Te ní quehe<sup>n</sup>-gá ndí  
úsá pàá-á<sup>n</sup> ndí ì<sup>n</sup> úú-gá chácá-á<sup>n</sup>, te

ní ndacá<sup>n</sup> táhú-gǎ núú Yǎ Ndiǒxí, te dǎtnùní ní táhú cuèchi-gá pàá-á<sup>n</sup> ndíhi chácá-ǎ<sup>n</sup> te ní sǎñaha-gǎ xii cue téé xica cuu ndíhi-gá ní dácǎhñu-güedé nchaa ñáyiú-á<sup>n</sup>.

<sup>37</sup>Te nchaa-yu ní xexí-yu ní ndahá xití-yu. Te sátá nǐ túhú cóhǒ-yu te ní nadatàcá-güedé nchaa sá nǐ quendóo, te ní chítú úsǎ tnàhá tídihi mee-ni sǎ nǐ quendóo-á<sup>n</sup>.

<sup>38</sup>Te núú ncháá ñáyiú ní xexi te ní xínu cúmí mǐl mee-ni cuè téé chi diu-ni cue téé-á<sup>n</sup> nǐ quíundehu, te dií<sup>n</sup> cue ñáyiú diíhi ndíhi cue landú.

<sup>39</sup>Te sátá dúcá<sup>n</sup> te Jèsús ní dándácá ñàha-gá xíi-yu, te cuánguee-gá bàrcú cuáhá<sup>n</sup>-gá yucu cue téé ñúú Màgdalá.

**Cue téé cùu fariséú ndíhi cue téé cùu saducéú xǎha<sup>n</sup>-güedé xii Jèsús cada-gá ií<sup>n</sup> sá vǎ yǒo tnàhí ndàcu cada**

(Mr. 8:11-13; Lc. 12:54-56)

**16** Te cue téé cùu fariséú ndíhi cue téé cùu saducéú ní sáá-güedé núú ndécú Jèsús xító ndèè ñàhá-güedé xii-gá, te xǎha<sup>n</sup>-güedé sá ná cǎdá-gǎ ií<sup>n</sup> sá vǎ yǒo tnàhí ndàcu cada cundehe-güedé nàcuáa cutnùní iní-güedé nǔu ndáá sá Yǎ Ndiǒxí ní tendaha ñàha-gá xii-gá véxi-gá ñuyíú-a. <sup>2</sup>Te Jèsús ní xǎha<sup>n</sup>-gǎ xii-güedé:

—Nchòhó chi òré tá cuàa cuáhá<sup>n</sup> te ndàcoto-ndo andiú, te càchí-ndó: “Ío váha cada-xi tneé chi càa vícò tícuèhé andiú”, duha càchí-ndó. <sup>3</sup>Te òré dǎtnéé ndàcòto tucu-ndo andiú, te càchí-ndó: “Vá cǎdá vǎha-xi nduu vitna chi ticuèhé andiú, te càa vícò”, duha càchí-ndó. iDico

nchòhó cúú-ndó ñáyiú ío dàndahú méé-xí sǎ quidé ndáá te ñá ndáá sá quidé ndáá-ndó! Te cùtnuní iní-ndó nàcuáa quide-xi andiú, dico ñá túú cùtnuní iní-ndó nàcuáa quèe-xi nchaa sá quidé Yǎ Ndiǒxí vitna.

<sup>4</sup>Dico nchaa nchòhó ñáyiú ndècu ñuyíú vitna ío cuihna iní-ndó, te ñá túú cuiní-ndó càda ndáá-ndó nǔú Yǎ Ndiǒxí, te cuiní-ndó càda-í ií<sup>n</sup> sá vǎ yǒo tnàhí ndàcu cada dico ñá túú nǎgá cada-í, chi diu-ni nàcuáa ní quide Yá Ndiǒxí ndíi Jònás diu-ni duca<sup>n</sup> càda tucu-gá vitna —càchí-gá xǎha<sup>n</sup>-gǎ xii-güedé.

Te duca<sup>n</sup> te ní xica-gá cuáhá<sup>n</sup>-gá ndíhi cue téé xica cuu ndíhi-gá.

**Cuendá cue téé cùu fariséú ndíhi cuendá cue téé cùu saducéú**

(Mr. 8:14-21)

<sup>5</sup>Te òré ní quexìo ndíhi ñaha-gá xii-güedé ndàa ingá xio yuhu làgúná, te ní ndacu iní-güedé sá nǐ cunaa-güedé canehe-güedé pàá quíhí<sup>n</sup> caxi-güedé. <sup>6</sup>Te Jèsús ní cáhá<sup>n</sup>-gá dóho-güedé, te xǎha<sup>n</sup>-gǎ xii-güedé:

—Na càchí tnúhu-í xii-ndo sǎ ío quíhi iní-ndó cùndecu-ndo, te vǎ cǎdá cuendá tnàhí-ndo lèvadurá cue téé cùu fariséú ndíhi cue téé cùu saducéú —càchí-gá xǎha<sup>n</sup>-gǎ xii-güedé.

<sup>7</sup>Te ní ngúíta-güedé xitnàha-güedé: —Cuendá sá ñá túú ní cǎnehe-o pàá quixí xǎá<sup>n</sup> duha càhá<sup>n</sup>-gá —càchí-güedé xitnàha-güedé.

<sup>8</sup>Te Jèsús ní cutnùní iní-gá nàcuáa ndiú tnúhu xitnàha-güedé, núú ní xǎha<sup>n</sup>-gǎ xii-güedé:

—Nchòhó chi ñá túú sàndáá iní ñàhá vǎha-ndo xii-í nǔu xǎá<sup>n</sup> da

sá ñà túú ní cãnehe-ndo pàà quixi cãhá<sup>n</sup>-ndó. <sup>9</sup>¿Te náa ñá ndácú ìní-ndó sã nũú ùhú<sup>n</sup>-ni pàá, te ní taxi-í ní dácãhũ-ndo ñi xexi ùhú<sup>n</sup> mĩl cue tée, chi ñiu-ni cue tée-á<sup>n</sup> ñi quíundehu, te sátá ñi túhú cóhó-güedě te ní chítú tìtní tídihi mee-ni sã ñi quendóo-ã<sup>n</sup>? Te ñá tècú tñuní-ndó nàcuáa quèe-xi nacuáa ní quide-í. <sup>10</sup>¿Te náa ñá ndácú tucu iní-ndó sã nũú ùsá-ni pàá te ní taxi-í ní dácãhũ tucu-ndo ñi xexi cúmí mĩl cue tée, chi ñiu-ni cue tée-á<sup>n</sup> ñi quíundehu, te sátá ñi túhú cóhó-güedě te ní nadatácá-ndó nchàa sã ñi quendóo, te ní chítú tìtní tídihi mee-ni sã ñi quendóo-ã<sup>n</sup>? <sup>11</sup>Dico nchòhó chi ñá túú ní quide cuendá-ndó nàcuáa ndùu tñuhu cãhá<sup>n</sup>-í òrè ní cachí-í sã vã quéhé<sup>n</sup> cuendá-ndó lèvadurá cue tée cùu fariséú ndihi cue tée cùu saducéú, chi ñá díú cuendá pàà ní cãhá<sup>n</sup>-í —càchí-gá xãhá<sup>n</sup>-gã xii-güedě.

<sup>12</sup>Te sátá dúcá<sup>n</sup> ñi xáha<sup>n</sup> Jèsús xii cue tée xica cuu ndihi-gá, te ní tecú tñuní-güedě sã xãhá<sup>n</sup>-gã xii-güedě sã vã tñíí-güedě tñuhu cãhá<sup>n</sup> cue tée cùu fariséú ndihi cue tée cùu saducéú, te ñá díú cuendá levadurá sã quíhu yuchi cuãha pàà ní cãhá<sup>n</sup>-gá.

**Té Pèlú xãhá<sup>n</sup>-dě xii Jèsús sã díú-gã cúu-gã Cristú**

(Mr. 8:27-30; Lc. 9:18-21)

<sup>13</sup>Te Jèsús ní quexìo-gá yucu cue tée ñuú Cèsareá Filipú, te ní xicá<sup>n</sup> tñuhú-gã núú cuè tée xica cuu ndihi-gá, te xãhá<sup>n</sup>-gã xii-güedě: —¿Yoo cùu yúhú Tée cùu ñaní tñáhá-ndó nchàa-ndo cachí cue

ñáyiu-va? —càchí-gá xãhá<sup>n</sup>-gã xii-güedě.

<sup>14</sup>Te ní xáha<sup>n</sup>-güedě xii-gá:

—Davá-yu càchí-yu sá cúu-n ndií Juáa tée ní xóo dacuàndute ñaha xii ñáyiu, te davá-yu càchí-yu sá cúu-n tẽ Èliás, te davá-yu càchí-yu sá cúu-n ndií Jeremiás tée ní xóo cãhá<sup>n</sup> tñuhu Yá Ndiòxí ndéé sanaha, àdi cuu-n ìngá tée ní xóo cãhá<sup>n</sup> tñuhu-gã ndéé sanaha, duha càchí-yu —càchí-güedě xãhá<sup>n</sup>-güedě xii-gá.

<sup>15</sup>Te Jèsús ní xicá<sup>n</sup> tñuhú tucu-gá núu-güedě, te xãhá<sup>n</sup>-gã xii-güedě:

—Te nchòhó, ¿yoo sàni iní-ndó cùu-í-i? —càchí-gá xãhá<sup>n</sup>-gã xii-güedě.

<sup>16</sup>Te té Xímú, àdi Pelú chi úú ñu-dé, ní xáha<sup>n</sup>-dẽ xii-gá:

—Yòhó cúu-n Cristú Yáa ní tendaha Yá Ndiòxí véxi ñuyúú-a, te ñiu Yá Ndiòxí cúu-gã Yáa ndécú nchàa nduu nchaa quíú, te yòhó cúu-n Dèhe-gá —càchí-dé xãhá<sup>n</sup>-dẽ xii-gá.

<sup>17</sup>Te Jèsús ní xáha<sup>n</sup>-gã xii-dé:

—Yòhó té Xímú dèhe té Jònás, ío váha táhú-n chi mee Tãtà-í Dútú Ndiòxí ní dácáhú ìní ñáhá-gã xii-n nàcuáa cunduu tñuhu cãhá<sup>n</sup>-n, te ñá díú ñi ñáyiu ñuyúú-a duca<sup>n</sup> ni dàcahu ìní ñáhã-yu xii-n tñuhu-á<sup>n</sup>.

<sup>18</sup>Te yúhú xãhá<sup>n</sup>-í Pèlú xii-n, te tñuhu-á<sup>n</sup> quèe-xí yúú, chi quèe ndáá-xi nàcuáa nàni-n, chi cuu-n ñi tée vá cání ñi caní úú ìní-xi canú ìchi-n cuè ñáyiu nàcuáa cundecu ndihi ñáhã-yu xii-í. Te nchaa ñáyiu cùu cuendá-í vá ndácú yucu ñávãha dacuíta nihnu ñaha-xi xii-yu. <sup>19</sup>Te yúhú taxi-í tñuhu ndee ìní cundecu ndihi-n cuendá cunuu-n núú cuè

ñáyiú yìndaha ñaha Yá Ndiöxí, te nchaa sá ná càhá<sup>n</sup>-n sá cúú-xí sá vâha, te ðiu-ni duca<sup>n</sup> cãhá<sup>n</sup> Yã Ndiöxí, te nchaa sá ná càhá<sup>n</sup>-n sá ñà túú cùu-xi sá vâha, te ðiu-ni duca<sup>n</sup> cãhá<sup>n</sup> tucu-gá, chi quide-n nacuaa cuiní-gá —càchí-gá xãha<sup>n</sup>-gã xii-dé.

<sup>20</sup>Te sátá dúcá<sup>n</sup> te ní xáha<sup>n</sup> Jèsús xii cue tée xica cuu ndihi-gá sá vâ yôo cúnaha-güedë sá ðíú-gã cúú-gã Cristú Yaa ní tendaha Yã Ndiöxí véxi ñuyíú-a.

### Jèsús càhá<sup>n</sup>-gá sá cáhni ñaha-güedë xii-gá

(Mr. 8:31-9:1; Lc. 9:22-27)

<sup>21</sup>Te ndéé dàvá-á<sup>n</sup> ní ngüíta Jèsús xãha<sup>n</sup>-gã xii cue tée xica cuu ndihi-gá:

—Dacuitíí sã quíhí<sup>n</sup>-í ñuú Jerusálén, te yàcá<sup>n</sup> cue tée cùu sacuéhé núú ñãyiú isràél, ndihi cue dútú cúnùu, ndihi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, nchaa cue tée-á<sup>n</sup> ïo dandòho ñaha-güedë xii-í, te cahni ñaha-güedë, dico nduu úní sá cùú-í te ndoto-í —càchí-gá xãha<sup>n</sup>-gã xii-güedë.

<sup>22</sup>Te té Pèlú ní cana-dé Jèsús ì<sup>n</sup> xio, te ní ngüíta-dé tènàà ñãhá-dë xii-gá, te xãha<sup>n</sup>-dë:

—iSá vâ càchí Ndiöxí sá dúcá<sup>n</sup> ndòho-n chi ñà túú tàù-n sã dúcá<sup>n</sup> ndòho-n! —cachí-dé xãha<sup>n</sup>-dë xii-gá.

<sup>23</sup>Te ndàa sátá Jèsús nútñi té Pèlú òré duca<sup>n</sup> xãha<sup>n</sup>-dë xii-gá núu ní nchócuíhnu-gá, te xãha<sup>n</sup>-gã xii-dé:

—iXocuñí yòhó yucu ñãvaha núú-í-a chi dicó quidé tñèñu-n! Chi ñà túú sàni iní-ò dàtná sání iní Yã Ndiöxí chi ì<sup>n</sup>-ni sàni iní-ò ndihi

dava-gá cue ñáyiú ndècu ñuyíú-a —càchí-gá xãha<sup>n</sup>-gã xii-dé.

<sup>24</sup>Te sátá dúcá<sup>n</sup> te ní xáha<sup>n</sup>-gã xii nchaa cue tée xica cuu ndihi-gá:

—Nchaa ñáyiú cuiní chitnahá ñãhá xii-í, te xini ñuhu-xi dañá-yu vá cádá-gã-yu sá sání iní méë-yu, te ïo cada ndee iní-yu cundecu túha-yu ndohó-yu cuendá-í, te cuëi na ndòhó-yu dàtná ndoho-í. <sup>25</sup>Te nchaa ñáyiú cuiní sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiú ñà túú tnàhí yùhú cuëi nándi sá ná yãha-yu cundecú-yu ñuyíú-a sá cuendá-í, te ñáyiú-á<sup>n</sup> naníhí tàhú-yu. <sup>26</sup>Te cuëi nchaandi túhú sá ïo ñuyíú-a na nihí ñáyiú cundecu ndihí-yu, dico núu ðiu nchaa xíã<sup>n</sup> ná càda cuíta nihnú-yu te ñà túú vèdana nàndíhi-xi sá dúcá<sup>n</sup> ndècu ndihí-yu nchaa xíã<sup>n</sup>. Te ni ì<sup>n</sup> sá ïo ñuyíú-a vá chindèe ñaha-xi xií-yu cuendá naníhí tàhú-yu. <sup>27</sup>Te ndáá quée-xí tnúhu càhá<sup>n</sup>-í, chi na quixi tucu yùhú Tée cùu ñani tnáhã-yu ncháá-yu, te dàvá-á<sup>n</sup> quini-yu sá ïo càhnu cuu-í dàtná càhnu cuu Tátà-í Dútú Ndiöxí, te quixi-í ndihi cue espíritú xínú cuèchi núú-gã, te dàvá-á<sup>n</sup> cuãha-í nchaa ñáyiú sá ndúú tãhú-yu nàcuáa nduu sá ní quidé-yu ì<sup>n</sup> ì<sup>n</sup>-yu. <sup>28</sup>Te na càchí tnúhu ndáá-í xii-ndo sã ïo dava nchòhó ñáyiú ndècu iha vitna vá cùú-ni-ndo, chi cundecu-ni-ndo ndèe quini-ndó quixi tucu yùhú Tée cùu ñani tnáhã-ndó nchàa-ndo taxi tnuni-í nchaa ñáyiú —càchí-gá xãha<sup>n</sup>-gã xii-güedë.

### Ní nadáma dóo Jèsús ndihi núú-gã

(Mr. 9:2-13; Lc. 9:28-36)

**17** Te núú ìñú nduu sá dúcá<sup>n</sup> ní cáhá<sup>n</sup> Jèsús, te ní



xica-gá cuásaá-gá ìí<sup>n</sup> yucu dùcú<sup>n</sup>, te ndèca-gá té Pèlú, ndihì té Jàcobó, ndihì té Juàá ñanì té Jàcobó-á<sup>n</sup> cuásaá. Te únì tnàhì-ni cue tée-á<sup>n</sup> ndécá-gă cuásaá. <sup>2</sup>Te yucu-á<sup>n</sup> ndécú-gă ní nadáma núú-gă ndihì dóó-gă, te núú-gă súúní dàtása<sup>n</sup>-xi dàtná quidé-xí nǔú nchìcanchii, te dóó-gă súúní nǔú nduu cuìxí<sup>n</sup> dàtná cáá ñùhú cuìxí<sup>n</sup>. <sup>3</sup>Te òrè-ni-á<sup>n</sup> ní xiní-güedé ndíi Moisés ndihì té Èliás nútñi-güedé ndihì-gá ndátñuhu ndihì ñaha-güedě xii-gá.

<sup>4</sup>Te té Pèlú ní xáha<sup>n</sup>-dě xii Jèsús: —Mèstrú, iváha ní cuu sá ndécú-ó ìha vitna! Te núu cuìní-n, te na dàcaa-ndí únì tnàhá vehe tnuvixi<sup>n</sup>, te ìí<sup>n</sup> cuu cuendá-n, te ìí<sup>n</sup> cuu cuendá té Moisés, te ìí<sup>n</sup> cuu cuendá té Èliás —càchí-dé xáha<sup>n</sup>-dě xii-gá.

<sup>5</sup>Te ñini dùca<sup>n</sup> cahá<sup>n</sup> té Pèlú ní quexio ìí<sup>n</sup> vícò nǔú ndécú-güedě ní dádáhu ñaha-xi xì-güedé te súúní chàhnchí. Te xití vícò-á<sup>n</sup> ní tecú ní cáhá<sup>n</sup> Yă Ndiöxí, te xáha<sup>n</sup>-gă xii-güedé:

—Tée-a cùu-dé Déhe-í tée ío cùu iní-í, te ío cùdíí iní-í-dé, te cundedóho-ndo nchàa tnúhu càhá<sup>n</sup>-dé —duha ní xáha<sup>n</sup>-gă xii-güedé.

<sup>6</sup>Te sá dúcá<sup>n</sup> ní cáhá<sup>n</sup> Yă Ndiöxí ní tecú dóho cue tée xica cuu ndihì Jesús te ío ní yùhú-güedé, te ní ngüíñí xítí-güedě te ní nuu núú-güedě ndàa núú ñùhú. <sup>7</sup>Te Jèsús cuáhá<sup>n</sup>-gá núú xíndecu cue tée xica cuu ndihì-gá, te ní tendaha ñaha-gá, te xáha<sup>n</sup>-gă xii-güedé:

—Chí ndácuíñí, vá yùhú-ndó —càchí-gă xáha<sup>n</sup>-gă xii-güedé.

<sup>8</sup>Te òrè ní ndanehe núú-güedě, te ñá túú-gă ní xiní-güedé cue tée

úú-á<sup>n</sup> chi mee-nă Jèsús. <sup>9</sup>Te òrè cuánuu ndihì ñaha Jèsús xii-güedé tindúú-á<sup>n</sup>, te ní xáha<sup>n</sup>-gă xii-güedé:

—Vá yòo cúñaha-ndo nǔú ìí<sup>n</sup> sá nǔú xiní-ndó nǔú ní sáá-ó-á, te cuu cáhá<sup>n</sup>-ndó dico ndéé ná yăha ndoto yùhú Tée cùu ñanì tnàhá-ndó nchàa-ndo sá cùú-í —càchí-gă xáha<sup>n</sup>-gă xii-güedé.

<sup>10</sup>Te cue tée xica cuu ndihì-gá ní xáha<sup>n</sup>-güedě xii-gá:

—Cuìní-ndí cachí tnúhu-n nă cuendá cue tée dàcuaha ñaha xii ñáyi u nchaa tnúhu ní chídó tnùnì ndíi Moisés càchí-güedé sá dǐhna-gá té Èliás quixi, te dàtnùnì quixi Yáá tendaha Yă Ndiöxí quixi ñuyíú-a —càchí-güedé xáha<sup>n</sup>-güedě xii-gá.

<sup>11</sup>Te Jèsús ní xáha<sup>n</sup>-gă xii-güedé: —Ndáá sá códó nùu ìí<sup>n</sup> tée quixi-dé te cada-dé dàtná ní quide té Èliás te tée-á<sup>n</sup> cada ndáá-dé nchaa nàcuáa cùu. <sup>12</sup>Te na càchí tnúhu-í xii-ndo vitna sá sà ní quixi tée ní quide dàtná ní xóo cada té Èliás, te cue ñáyi u ñá túú ní cùtnunì iní-yu sá dǐú-dě, te ní quide ñahá-yu xii-dé nchaa nàcuáa ní quixi iní mèè-yu, te diu-ni duca<sup>n</sup> càda ñaha tucú-yu xii yùhú Tée cùu ñanì tnàhá-yu ncháá-yu, chi dandòho ñahá-yu xii-í —càchí-gă xáha<sup>n</sup>-gă xii-güedé.

<sup>13</sup>Te cue tée xica cuu ndihì-gá ní cutnùnì iní-güedé sá cuendá ndíi Juàá tée ní xóo dacuàndute ñaha xii ñáyi u ní cáhá<sup>n</sup>-gá.

**Jèsús quidé tătna-gá ìí<sup>n</sup> tée cuechi  
tnàhá cuéhé xǐyìhí**

(Mr. 9:14-29; Lc. 9:37-43)

<sup>14</sup>Te Jèsús ní nasáá-gá ndihì cue tée ní sáá ndihì-gá tindúú-á<sup>n</sup> núú

xĩndecu vai ñáyiú, te ní quexìo ìí<sup>n</sup> téé núú-gǎ ní ngüñíí xítí-dě, te xǎha<sup>n</sup>-dě xii-gá:

<sup>15</sup>—Mèstrú, cundàhú iní déhe-í chi tnàhá-dé cuéhé xǐyìhí, te ío dándoho ñaha-xi xii-dé, te ní cuu vai xito daquée ñaha-xi nũú ñùhú xii-dé, te ní cuu vai tucu xito dangaunihnu ñaha-xi ndute xii-dé.

<sup>16</sup>Te sa ndèca-í-dé ní quixi núú cuè téé xìca cuu ndìhi-n dico ñá túú ní ndàcu-güedé cada tátna ñaha-güedě xii-dé —càchí-dé xǎha<sup>n</sup>-dě xii-gá.

<sup>17</sup>Te Jèsús ní xǎha<sup>n</sup>-gǎ xii nchaa ñáyiú xĩndecu-á<sup>n</sup>:

—Nchaa nchòhó ñáyiú ndècu ñuyúí-a, ío sàà iní-ndó chi ñá túú cuíní-ndó quèndáá iní-ndó Yǎ Ndiòxí, te ní cuu vai nduu quide ndee iní-í nchaa sá quídé-ndó. ¿Te ná ndéé ama vá dúcá<sup>n</sup>-gǎ cada-ndo-i? Te chí cándèca téé cùhú-á<sup>n</sup> táquixi iha —cachí-gá xǎha<sup>n</sup>-gǎ xii-yu.

<sup>18</sup>Te Jèsús ní tenáá-gá espíritú cùndìhi yucu ñávàha yìhi ñaha xii téé-á<sup>n</sup>, te ní quee ñaha-xi xii-dé, te òré-ni-á<sup>n</sup> nĩ ndúha-dé.

<sup>19</sup>Te sátá dúcá<sup>n</sup> te òré ndécú mèe Jesús ndìhi cue téé xìca cuu ndìhi-gá, te ní xícá<sup>n</sup> tnúhú-güedě núú-gǎ, te xǎha<sup>n</sup>-güedě xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cùndìhi yucu ñávàha yìhi ñaha xii téé-á<sup>n</sup> —càchí-güedě xǎha<sup>n</sup>-güedě xii-gá.

<sup>20</sup>Te Jèsús ní xǎha<sup>n</sup>-gǎ xii-güedé:

—Te ñá túú ní ndàcu-ndo, chi ñá túú sàndáá ndisa iní-ndó Yǎ Ndiòxí. Te na càchí tnúhu ndáá-í xii-ndo sǎ nũu nchòhó quèndáá ndisa iní-ndó Yǎ Ndiòxí cuèdicó luha líf dàtná

lǐhli ndíquí<sup>n</sup> yutnu nàni mostázá, te duca<sup>n</sup> te cuu cùñaha-ndo xii ìí<sup>n</sup> tindúú xocuñíí-xi núú ndécú-xí te xocuñíí-xi. Te nchaa núú sǎ vǎha ndacu-ndo càda-ndo te núu na quèndáá iní ndisa-ndo Yǎ Ndiòxí.

<sup>21</sup>Te xini ñuhu-xi sá ìo cáhá<sup>n</sup> ndìhi-ndo-gǎ te ñá túú tnàhí ná caxi-ndo cǎhá<sup>n</sup> ndìhi-ndo-gǎ, te duca<sup>n</sup> te ndacu-ndo queñuhu-ndo espíritú cùndìhi yucu ñávàha yìhi ñaha xii ñáyiú, dàtná cúú espíritú sá yíhí ñaha xii téé-á<sup>n</sup> ní cùu —cachí-gá xǎha<sup>n</sup>-gǎ xii-güedé.

**Jèsús càhá<sup>n</sup> tucu-gá sá cáhni ñaha-güedé xii-gá**

(Mr. 9:30-32; Lc. 9:43-45)

<sup>22</sup>Te ñini xìca cuu Jesús ndìhi cue téé xìca cuu ndìhi-gá distritú Galileá, te ní xǎha<sup>n</sup>-gǎ xii-güedé:

—Yúhú Téé cùu ñaní tnàhá-ndó nchàa-ndo sáá ìí<sup>n</sup> nduu te cuáha cuèndá ñáhá-güedě xii-í núú cuè téé cùu úhú iní ñáhá, <sup>23</sup>te cahni ñaha-güedě xii-í dico nduu úní sá cùú-í te ndoto-í —càchí-gá xǎha<sup>n</sup>-gǎ xii-güedé.

Te sá dúcá<sup>n</sup> nĩ xǎha<sup>n</sup>-gǎ xii-güedé, te ío ní ndíhú iní-güedé.

**Díhú<sup>n</sup> cuèndá veñúhu**

<sup>24</sup>Te òré ní quexìo Jesús ndìhi cue téé xìca cuu ndìhi-gá ñuu Capèrnaúm, te cue téé quide cobrá díhú<sup>n</sup> cuèndá veñúhu ní sáhá<sup>n</sup>-güedé ní cáhá<sup>n</sup> ndìhi-güedé té Pèlú, te xǎha<sup>n</sup>-güedé:

—¿Chǎhu mèstrú-ndó úú díhú<sup>n</sup> sǎ nání drǎcmá cuèndá veñúhu á<sup>n</sup> ñáhá? —càchí-güedé xǎha<sup>n</sup>-güedě xii-dé.

<sup>25</sup>Te té Pèlú ní xǎha<sup>n</sup>-dě:

—Chǎhu-dé —càchí-dé xǎha<sup>n</sup>-dě xii-güedé.

Te té Pèlú cuánguihu-dé xití vehe núú ndécú Jèsús, te díhna-gá ní cáhá<sup>n</sup>-gá, te xǎha<sup>n</sup>-gǎ xii-dé:

—Xímú, ìnása sàni iní-n, ná cúú ñǎyiu quide cobrá ñáhá cuè téé yìndaha ñáyiu ndècu ñuyíú-a cuendá nchaa sá ndúú yǎhu ñúú-güedé ndíhi cuendá nchaa díhú<sup>n</sup> sǎ ngáútnàha, cue ñáyiu ñúú-güedé ǎ<sup>n</sup> cuè ñáyiu véxi xica quide cobrá-güedé? —càchí-gá xǎha<sup>n</sup>-gǎ xii-dé.

<sup>26</sup>Te té Pèlú ní xǎha<sup>n</sup>-dě xii-gá:

—Cue ñáyiu véxi xica quide cobrá-güedé —càchí-dé xǎha<sup>n</sup>-dě xii-gá.

Te Jèsús ní xǎha<sup>n</sup>-gǎ xii-dé:

—Te núú duca<sup>n</sup> te cue ñáyiu ñúú-güedé ñá túú nǎ chǎhu-yu te núú duca<sup>n</sup>. <sup>27</sup>Dico cuendá sá vǎ yǒ dasátú-ó ìní-xi, te cuahá<sup>n</sup> làgúná te dàquée-n sǎ tníí-n chǎcá xití ndute, te chácá díhnanuu na tàva-n te cundehe-n yùhu-dí, chi yíhi ìí<sup>n</sup> díhú<sup>n</sup> cuixí<sup>n</sup>. Te díhú<sup>n</sup>-ǎ<sup>n</sup> canehe-n quíh<sup>n</sup> cháhu-n cuendá-í ndíhi cuendá-n, chi díhú<sup>n</sup>-ǎ<sup>n</sup> sa tnahá quéyǎhu cuendá-ó ndì ndúú-ó —càchí-gá xǎha<sup>n</sup>-gǎ xii-dé.

**Cue téé ndècu tnúhu núú Jèsús yoo ío-gá cúnùu**

(Mr. 9:33-37; Lc. 9:46-48)

**18** Te sátá dúcá<sup>n</sup> te cue téé xica cuu ndíhi Jesús ní sáhá<sup>n</sup>-güedé núú-gǎ, te xǎha<sup>n</sup>-güedě xii-gá:

—Cachí tnúhu xii-ndí, yoo ío-gá cúnùu núú cuè ñáyiu yìndaha ñaha Yá Ndiòxí —càchí-güedé xǎha<sup>n</sup>-güedě xii-gá.

<sup>2</sup>Te Jèsús ní cana-gá ìí<sup>n</sup> té líhli te ní sanutní ñaha-gǎ xii-dé cuádava tnuú-güedé. <sup>3</sup>Te xǎha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ núu vǎ dáñá-ndó nchaa sá ñà túú vǎha quide-ndo, te nduu ndàhú iní-ndó dàtná ndàhú iní té líhli-a, te vǎ ndúú tǎhú-ndó ndíhu ndaha ñàha Yá Ndiòxí xii-ndo. <sup>4</sup>Te ñáyiu quide datná quidé té líhli-a ndàhú iní-yu, te ñá túú quide cahnú-yu mèe-yu, ñáyiu-ǎ<sup>n</sup> ìo cunùu-yu núú ndécú Yǎ Ndiòxí táxí tnùnì-gá. <sup>5</sup>Te nchaa ñáyiu na quèhe<sup>n</sup> cuendá ìí<sup>n</sup> landú dàtná té líhli-a cuendá sá cúú ìní ñáhǎ-yu xii-í ñá, te cada iní-yu sá yǎhú ní quehe<sup>n</sup> cuendá-yu —càchí-gá xǎha<sup>n</sup>-gǎ xii-güedé.

**Quihi iní-ó vǎ cúndècu-o ichi cuehé ichi duha**

(Mr. 9:42-48; Lc. 17:1-2)

<sup>6</sup>Te Jèsús xǎha<sup>n</sup> tùcu-gá xii-güedé: —Te núú ìí<sup>n</sup> téé na dàcahá<sup>n</sup>-dé cue ñáyiu sàndáá iní ñáhá xii-í cadá-yu nándi sá cuèhé sá dúhá, te vǎha-gá sá ná dàcutu ndeé-güedé ìí<sup>n</sup> yúú yǒdó dücú<sup>n</sup>-dě, te dàquée ñaha-güedě xii-dé xití ndute làmár, te ñá díú sǎ cúndècu-dé duca<sup>n</sup> càda-dé. <sup>7</sup>Te ndàhú ní cuu nchaa ñáyiu xìndecu ñuyíú-a, chi coo cue téé dacáhá<sup>n</sup> ñáhá xii-yu cadá-yu nándi sá cuèhé sá dúhá te dacuití sǎ dúcá<sup>n</sup> càda-xi! Dico ndàhú ní cuu cue téé duca<sup>n</sup> na dàcahá<sup>n</sup> ñáhá xii-yu cadá-yu nándi sá cuèhé sá dúhá!

<sup>8</sup>Te núú ìí<sup>n</sup> xio ndaha-ndo àdi ìí<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi vǎha-gá sá nánihí tǎhú-ndó cuèi na cuíta ìí<sup>n</sup> xio ndaha-ndo àdi ìí<sup>n</sup>

xio sáhá-ndó, te ñá dítú sǎ quíhí<sup>n</sup>-ndó ñìhí ní ndúú-ndó nǔú ñùhú núú càyú. <sup>9</sup>Te núú íí<sup>n</sup> xio tìnùu-ndo quide-xi quide-ndo nándi sá cuèhè sá dúhá, te tava-ndo na cuíta-xi, chi váha-gá sá nánihí tǎhú-ndó cuèi na cuíta íí<sup>n</sup> xio tìnùu-ndo, te ñá dítú sǎ ndì ndúú xio núú-ndó quíhí<sup>n</sup>-ndó nǔú ñùhú núú càyú.

**Cuèndá íí<sup>n</sup> mběé quiti ní xíta**

(Lc. 15:3-7)

<sup>10</sup>Te vá dáquèe tihú-ndó cuè ñáyiu cùu cuendá-í cuèi cùu-yu ñáyiu ío ndàhú iní-xi. Te na cǎchí tñuhu-í xii-ndo sǎ cuè espíritú xínú cuèchi núú Yǎ Ndiǒxí, cue espíritú néhé cuèndá ñáhá xii-yu ñuyúú-a, nchaa-ni nduu nchaa-ni òré ndécú-xí nǔú Tǎtà-í Dítú Ndiǒxí Yaá ndécú àndiú. <sup>11</sup>Te duca<sup>n</sup> chi yúhú Tée cùu ñaní tñáhá-ndó nchàa-ndo véxi-í ñuyúú-a dàcácu nihnu-í ñáyiu núú ùhú núú ndàhú, ñáyiu ta xíta nihnu cuáhá<sup>n</sup>.

<sup>12</sup>Te nása sàni iní-ndó cuèndá íí<sup>n</sup> tée ndècu íí<sup>n</sup> ciendú mběé-xi?, chi núú na cuíta íí<sup>n</sup>-di te dàndóo-dé cúmídícó sǎhú<sup>n</sup> cúmí-di cundecu-di íí<sup>n</sup> yucu te quíhí<sup>n</sup>-dé cúnúndúcú-dě quiti ní xíta-á<sup>n</sup>. <sup>13</sup>Te núú na nánihí-dě-di, te nchòhó sa cùnuni iní-ndó sǎ ïo-gá cudíí iní-dé cuèndá quiti ní xíta-á<sup>n</sup> òré naníhí-dě-di dàcúúxí cúmídícó sǎhú<sup>n</sup> cúmí quiti ñá túú ní xíta-á<sup>n</sup>. <sup>14</sup>Te duca<sup>n</sup> sǎtnahá-xi quide Tátá-ó Dítú Ndiǒxí Yaá ndécú àndiú, chi cuìní-gá sá vǎ cuíta ni íí<sup>n</sup> cue ñáyiu cùu cuendá-gá.

**Cada cǎhnu iní-ó sǎ quidé ñaha tñaha ñáyiu-o**

(Lc. 17:3)

<sup>15</sup>Te núú íí<sup>n</sup> ñáyiu ndècu ndìhi-ndo ní quidé-yu íí<sup>n</sup> sǎ ñà

túú tàù-yu cadá-yu sá cúú-xí-ndó, te cǎhá<sup>n</sup>-ndó dǒho-yu núú mée nǔú íí<sup>n</sup>-ndó ndìhí-yu cuèndá sá ná ndìxi cuèchi iní-yu sá ñà túú quide váha-yu. Te núú ní tñíí-yu tñuhu ní xáha<sup>n</sup>-ndo xii-yu, te ní ndacu-ndo ñí nacanu ichi-ndǒ-yu.

<sup>16</sup>Te núú ñá túú ní cuìní-yu tñíí-yu tñuhu xǎha<sup>n</sup>-ndo xii-yu, te nducu-ndo íí<sup>n</sup> àdi úú tñáhá cue tée canehe núú-güedé cuèndá cundedóho-güedé nàcuáa ndùu tñuhu ndàtnúhu-ndo ndìhí-yu.

<sup>17</sup>Te tñáhá cue tée-á<sup>n</sup> cǎhá<sup>n</sup>-güedé dǒho-yu, dico núú ni tñuhu cǎhá<sup>n</sup> cue tée-á<sup>n</sup> ñà túú ní cuìní-yu tñíí-yu, te dàtúu-ndo nǔú dàva-gá ñáyiu ndècu ndìhi-ndo ichi Xítóhó Jesucristú cuèndá cutnùni iní-yu nàcuáa quide ñáyiu-á<sup>n</sup>. Te núú ñáyiu ndècuèchi-á<sup>n</sup> ñà túú ní cuìní-yu tñíí-yu tñuhu sá ñí xáha<sup>n</sup> dàva-gá cue ñáyiu ndècu ichi-gá, te cada-ná iní-ndó sǎ cúú-yu ñáyiu ñá túú ndècu ichi Yá Ndiǒxí dàtná cue tée cuihna iní-xi quide cobrá ñáhá xii ñáyiu cuèndá impuèstú.

<sup>18</sup>Te na cǎchí tñuhu ndáá-í xii-ndo sǎ nǔu nchòhó ná cǎchí-ndó sǎ ndécú cuèchi ñáyiu, te diu-ni duca<sup>n</sup> cǎhá<sup>n</sup> Yǎ Ndiǒxí, àdi cǎchí-ndó sǎ ñà túú cuèchi-yu te diu-ni duca<sup>n</sup> cǎhá<sup>n</sup> tucu-gá, te duca<sup>n</sup> chi nchòhó quidé-ndó nàcuáa cǎhá<sup>n</sup>-gá.

<sup>19</sup>Te na cǎchí tñuhu-í xii-ndo sǎ nǔu úú tñáhá-ndó cùu íí<sup>n</sup>nuu-ndo cǎhá<sup>n</sup> ndìhi-ndo Tǎtà-í Dítú Ndiǒxí Yaá ndécú àndiú xicá<sup>n</sup>-ndó nǔú-gǎ nǔu ná cúú sǎ cuìní-ndó, te taxi-gá nǔu ná cúú sǎ xicá<sup>n</sup>-ndó nǔú-gǎ.

<sup>20</sup>Te núú úú tñáhá-ndó àdi úní tñáhá-ndó ñí natacá-ndó íí<sup>n</sup> xichi

cuendá sá ñúhú ìní ñáhá-ndó xii-í, te xíá<sup>n</sup> ndécú ndìhi ñaha-í xii-ndo — cächí-gá xǎha<sup>n</sup>-gǎ xii-güedé.

<sup>21</sup>Te té Pèlú ní sáhá<sup>n</sup> ndehe yatni-dé núú Jèsús, te xǎha<sup>n</sup>-dë xii-gá:

—Mèstrú, cachí tnúhu xii-í ná daha xito cada càhnu iní-í tñaha ñáyiu-í te núu ì<sup>n</sup> sá ná càda ñahá-yu xii-í. ¿Cuèdìcò úsá xito-ǎ<sup>n</sup>? —cächí-dé xǎha<sup>n</sup>-dë xii-gá.

<sup>22</sup>Te Jèsús ní xáha<sup>n</sup>-gǎ xii-dé:

—Yúhú cächí-í sá ñà dǎú-ní úsá xito cada càhnu iní-n-yu, chi únídico úxí xito ndìhi úsá ndìhi úsá xito cada càhnu iní-n-yu —cächí-gá xǎha<sup>n</sup>-gǎ xii-dé.

**Cuendá téé ñá túú quide cahnu iní tñaha ñáyiu-xi**

<sup>23</sup>Te xǎha<sup>n</sup> tùcu-gá xii-güedé:

—Na càni-í ì<sup>n</sup> cuèndú núú-ndó nàcuáa tecú tnùnì-ndó nàcuáa cada-xi òré ndǎhu ndaha ñaha Yá Ndiòxí xii ñáyiu. ì<sup>n</sup> téé yìndaha ñaha xii ñáyiu ní sani iní-dé sá cadá ndǎá-dé ndìhi cue téé xìnu cuechi núú-dë cuendá nchaa sá tàú-güedé núú-dë. <sup>24</sup>Te òré sa ní ngúndecu túha-dé te ní quexìo ì<sup>n</sup> téé xìnu cuechi núú-dë. Te téé-á<sup>n</sup> tàú-dé cuéhé víhí dǎhú<sup>n</sup> núú-dë, chi tàú-dé úxí mǐl dǎhú<sup>n</sup> sǎ nání tàlentú. <sup>25</sup>Te téé xìnu cuechi-á<sup>n</sup> ñà túú dǎhú<sup>n</sup> ndécú ndìhi-dé nacháhu-dé sá tàú-dé núú pàtróo<sup>n</sup>-dë-á<sup>n</sup>, núu xíǎ<sup>n</sup> ní táuchíú<sup>n</sup> tée cùu pàtróo<sup>n</sup>-dë-á<sup>n</sup> dico ñaha-güedé xii-dé ndìhi ñadǎhí-dé ndìhi cue déhe-dé ndìhi nchaa sá ndécú ndìhi-dé cuendá nchaá-yu cuú-yu ñáyiu ñá túú tñahí daná quee núú chíú<sup>n</sup> pàtróo<sup>n</sup>-xi, te duca<sup>n</sup> te ndéyǎhu sá tàú-dé núú pàtróo<sup>n</sup>-dë.

<sup>26</sup>Te téé xìnu cuechi-á<sup>n</sup> ní ngüǎñí xítí-dë núú pàtróo<sup>n</sup>-dë, te xǎha<sup>n</sup>-dë:

“Pàtróo<sup>n</sup>, càhá<sup>n</sup> ndàhú-í núú-n sǎ ìo ndee ìo càhnu cada iní-n sǎ dúhá tàú-í núú-n, te ñá túú nǎ cani iní-n chi nacháhu-í nchaa sá tàú-í núú-n”, cächí-dé xǎha<sup>n</sup>-dë xii pàtróo<sup>n</sup>-dë.

<sup>27</sup>Te téé cùu pàtróo<sup>n</sup>-dë-á<sup>n</sup> ní cundàhú iní ñáhá-dë xii-dé, te ní quide càhnu iní ñáhá-dë, te ní dǎñá ñaha-dé cuánuhú-dé. <sup>28</sup>Te téé xìnu cuechi-á<sup>n</sup> ní naníhí-dë ì<sup>n</sup> téé xìnu cuechi ndìhi-dé ichi cuánuhú-dé, te téé ní naníhí-dë-á<sup>n</sup> tàú-dé sacú-ni dǎhú<sup>n</sup> núú-dë chi ì<sup>n</sup> cièndú-ni dǎhú<sup>n</sup> denàriú tàú-dé. Te ní tñií-dé téé tàú núú-dë-á<sup>n</sup> dácüèhné ñáhá-dë xii-dé, te xǎha<sup>n</sup>-dë: “Nacháhu sá tàú-n núú-í”, cächí-dé xǎha<sup>n</sup>-dë. <sup>29</sup>Te téé tàú-á<sup>n</sup> ní ngüǎñí xítí-dë núú tée dii núú-xi tàú-dé-á<sup>n</sup>, te xǎha<sup>n</sup>-dë: “Càhá<sup>n</sup> ndàhú-í núú-n sǎ cadá càhnu iní ñáhá-n xii-í sá tàú-í núú-n, te nacháhu cuèè-í nchaa sá tàú-í núú-n”, cächí-dé xǎha<sup>n</sup>-dë. <sup>30</sup>Dico téé dii núú-xi tàú-dé-á<sup>n</sup> ñà túú ní cuìní-dé cada ndee iní-dé cundetü-dé nacháhu cuèè téé-á<sup>n</sup> sǎ tàú-dé, chi ní chihi ñaha-dë vecaá cuendá yàcá<sup>n</sup> quíhi-dé ndéé nacháhu-dé nchaa sá tàú-dé. <sup>31</sup>Te dava-gá cue téé xìnu cuechi ní xini-güedé nàcuáa ní quide téé-á<sup>n</sup>, te ní cudéé<sup>n</sup>-güedë núú-dë, te ní sáhá<sup>n</sup>-güedé ní xítñuhu-güedé téé cùu pàtróo<sup>n</sup>-güedé sá dúcá<sup>n</sup> ní quide-dé. <sup>32</sup>Te téé cùu pàtróo<sup>n</sup>-güedé-á<sup>n</sup> ní cana-dé téé duca<sup>n</sup> ní quide-á<sup>n</sup>, te ní xáha<sup>n</sup>-dë: “Yòhó cúú-n ì<sup>n</sup> téé ìo cuihna iní-xi xìnu cuechi núú-í, chi yúhú ní quide càhnu iní ñáhà-í xii-n cuendá nchaa sá tàú-n núú-í òré ní càhá<sup>n</sup> ndàhú-n. <sup>33</sup>Te tñahá yòhó tàú-n dùca<sup>n</sup> cada-n

cada cahnu iní-n tée xínu cuechi ndíhi-n núu-í cuendá nchaa sá tàú-dé núu-n dàtná ní quide ñaha-í xii-n nǐ quide cahnu iní-í cuendá nchaa sá tàú-n”, cächí tée cùu patrón<sup>n</sup>-á<sup>n</sup> xǎha<sup>n</sup>-dě xii tée duca<sup>n</sup> nǐ quide-á<sup>n</sup>. <sup>34</sup>Te tée cùu patrón<sup>n</sup>-á<sup>n</sup> nǐ cudéé<sup>n</sup> víhí-dě sá dúcá<sup>n</sup> nǐ quide tée-á<sup>n</sup>, te ní táuchíú<sup>n</sup>-dě dandòho ñaha-güedé xii-dé ndéé nacháhu-dé nchaa sá tàú-dé —duha ní cani Jèsús cuendú núu-güedě.

<sup>35</sup>Te xǎha<sup>n</sup> tùcu-gá xii-güedé: —Dàtná ní quide tée cùu patrón<sup>n</sup>-á<sup>n</sup> nǐ dándóhó-dě tée tàú núu-dě-á<sup>n</sup> duca<sup>n</sup> càda ñaha Tátà-í Dútú Ndiöxí Yaá ndécú àndiü xii-ndo, te núu vá ní yùhu nǐ iní-ndó càda cahnu iní-ndó sǎ quidé ñàha tnahà ñáyiü-ndo xii-ndo — cächí-gá xǎha<sup>n</sup>-gǎ xii-güedé.

**Jèsús càhá<sup>n</sup>-gá cuendá cue ñáyiü dàña tnahà**

(Mr. 10:1-12; Lc. 16:18)

**19** Te sátá nǐ yáha duca<sup>n</sup> nǐ càhá<sup>n</sup> Jèsús, te ní ndee-gá distrítú Galileá cuáhá<sup>n</sup>-gá ndàa ingá xio yúte Jòrdán yucu distrítú Jùdeá.

<sup>2</sup>Te ío cuéhé ñáyiü nchícú<sup>n</sup> ñáhá xii-gá cuáhá<sup>n</sup>, te yàcá<sup>n</sup> ní quide tátna-gá nchaa ñáyiü cùhú.

<sup>3</sup>Te ní quexìo ìi<sup>n</sup> úú cue tée cùu fariséú núu ndécú Jèsús xító ndéé ñáhá-güedě xii-gá nǔu nása cunduu tnúhu càhá<sup>n</sup>-gá, te xǎha<sup>n</sup>-güedě xii-gá:

—Véxi-ndí xicá<sup>n</sup> tnúhú-ndǐ núu-n, ÷cuu dàña ìi<sup>n</sup> tée ñadìhí-dé nǔu ndédani càa ìi<sup>n</sup> sá ñà túú cùndáá-yu-ǎ<sup>n</sup>? —cächí-güedé xǎha<sup>n</sup>-güedě xii-gá.

<sup>4</sup>Te Jèsús ní xáha<sup>n</sup>-gǎ xii-güedé:

—Te nchòhó, ÷náa ñà túú dàcuaha-ndo núú tùtú Yǎ Ndiöxí, te diu núú tùtú-gá càhá<sup>n</sup>-xi sá cǔtnàhá ní cadúha-gá ñáyiü, te tée ñadìhí ní cadúha-gá-ǎ<sup>n</sup>? <sup>5</sup>Te duha cächí tucu-xi núú tùtú Yǎ Ndiöxí nàcuáa ní càhá<sup>n</sup>-gá: “Cue tée na ñihí ñadìhí-xi te ìi<sup>n</sup>-ná cada-güedé tǎtá-güedě ndíhi nǎná-güedě, chi ñadìhí-nǎ-güedé cuu cuu ndíhi-güedé, te cada iní-ndó sǎ ìi<sup>n</sup>-nǎ yiqui cùñú cuú-yu cundecú-yu”, duha cächí Yǎ Ndiöxí núú tùtú-gá. <sup>6</sup>Te xǐǎ<sup>n</sup> nǔu cada iní-ndó sǎ cuè ñáyiü úú-á<sup>n</sup> ìi<sup>n</sup>-nǎ yiqui cùñú cúü-yu, te ñà túú-gǎ ndí díi<sup>n</sup> ndí díi<sup>n</sup> yìqui cuñú cúü-yu. Núu xǐǎ<sup>n</sup> ñà túú ndùu váha-xi dàña cuè tée ñadìhí-güedé, chi mee Yǎ Ndiöxí ní cachí-gá sá cúú úú-yu cundecú-yu —cächí Jèsús xǎha<sup>n</sup>-gǎ xii-güedé.

<sup>7</sup>Te ní xáha<sup>n</sup>-güedě xii Jèsús:

—Te núu duca<sup>n</sup>, ÷te ná cuendá ndíi Moisés ní cachí ndíi sá nǔu ìi<sup>n</sup> tée cuìní-dé dàña-dě ñadìhí-dé, te cuu cadúha-dé ìi<sup>n</sup> tutú núú càhá<sup>n</sup>-xi sá nǐ dáñá-dě ñadìhí-dé, te duca<sup>n</sup> te cuu dàña ñàha-dé ní cachí ndíi vǎ<sup>n</sup>? —cächí-güedé xǎha<sup>n</sup>-güedě xii-gá.

<sup>8</sup>Te Jèsús ní xáha<sup>n</sup>-gǎ xii-güedé:

—Te duca<sup>n</sup> nǐ cachí ndíi Moisés sá cúú dàña-ndo ñadìhí-ndó, chi nchòhó ío sàà iní-ndó, dico ndéé díhna chi ní tecú tnúhu nchaa cue tée sá vǎ dáñá-güedě ñadìhí-güedé.

<sup>9</sup>Dico yúhú cächí tnúhu-í xii-ndo sǎ nǔu ìi<sup>n</sup> tée na dàña-dé ñadìhí-dé te naquehe<sup>n</sup>-dé ingá ñadìhí te ío nèhé quidé-dě, te núu ñà díú cuendá sá càhá<sup>n</sup> ndíhi-a<sup>n</sup> ingá tée duca<sup>n</sup> na dàña ñaha-dé. Te sá dúcá<sup>n</sup> cuendá-ni na dàña ìi<sup>n</sup> tée ñadìhí-dé,

te i<sup>n</sup>-ni cuéchi cùu-xi ndihi cuéchi quide téé ndèca ñadìhí te càhá<sup>n</sup> ndihi-dé ingá ñadìhí —càchí-gá xáha<sup>n</sup>-gá xii-güedé.

<sup>10</sup>Te cue téé xica cuu ndihi-gá ní xáha<sup>n</sup>-güedé xii-gá:

—Te núu duca<sup>n</sup> cùu cuendá cue téé ndihi ñadìhí-güedé, te váha-gá sá vǎ cándèca cue téé ñadìhí —càchí-güedé xáha<sup>n</sup>-güedé xii-gá.

<sup>11</sup>Te Jèsús ní xáha<sup>n</sup>-gá xii-güedé:

—Ñá ncháá ñáyiú duca<sup>n</sup> ndúu táhú-yu cundecú-yu, chi mee-ni ñáyiú ní cachí Yǎ Ndiòxí sá dúcá<sup>n</sup> tnàhí nduu táhú cundecu mee. <sup>12</sup>Te ió cue téé duca<sup>n</sup> tnàhí ní nduu táhú-güedé ndéé òré ní cacu-güedé sá vǎ cándèca-güedé ñadìhí. Te ió cue téé ñá ndácú-güedé candeca-güedé ñadìhí cuendá sá ní quide ñaha dàva-gá cue tnàha téé-güedé xii-güedé. Te dava-güedé ñá túú cǎndeca-güedé ñadìhí chi cuiní-güedé sá vǎ dáñá ndéé-güedé cunu cuechi-güedé núú Yǎ Ndiòxí. Te ncha cue téé duca<sup>n</sup> ní nduu táhú núú Yǎ Ndiòxí cundecu mee, te váha-ni te núu na cundecu mee-güedé —càchí-gá xáha<sup>n</sup>-gá xii-güedé.

**Jèsús xicá<sup>n</sup> táhú-gá núú Yǎ Ndiòxí cuendá landú**

(Mr. 10:13-16; Lc. 18:15-17)

<sup>13</sup>Te i<sup>n</sup> úú ñáyiú ndècá-yu landú líhli cuáhá<sup>n</sup> núú Jèsús, chi cuiní-yu sá téndàha ñaha-gá xii-güexi, te cáca<sup>n</sup> táhú-gá núú Yǎ Ndiòxí cuendá-güexi. Te cue téé xica cuu ndihi-gá ní ngúita-güedé ténáá ñáhá-güedé xii-yu, te xáha<sup>n</sup>-güedé sá vǎ dúcá<sup>n</sup> cadá-yu. <sup>14</sup>Te Jèsús ní xáha<sup>n</sup>-gá xii-güedé:

—Chí dáñá ná quixi nahi cue landú líhli-á<sup>n</sup> núú-í-a, te vá cadí-ndó ìchi-güexi, chi dàtná cúú váha iní cue landú líhli-á<sup>n</sup> duca<sup>n</sup> cùu váha iní cue ñáyiú yindaha ñaha Yǎ Ndiòxí —càchí-gá xáha<sup>n</sup>-gá xii-güedé.

<sup>15</sup>Te ní tendaha ñàha-gá xii-güexi, te ní xicá<sup>n</sup> táhú-gá núú Yǎ Ndiòxí cuendá-güexi, te sátá dúcá<sup>n</sup> ní quide-gá te ní xica-gá cuáhá<sup>n</sup>-gá.

**I<sup>n</sup> téé cuica càhá<sup>n</sup> ndihi-dé Jèsús**

(Mr. 10:17-31; Lc. 18:18-30)

<sup>16</sup>Te i<sup>n</sup> téé cuechi ní quexiò-dé núú ndécú Jèsús, te xicá<sup>n</sup> tnúhú-dé núú-gá, te xáha<sup>n</sup>-dè xii-gá:

—Yòhò Mèstrú, cùu-n téé ío váha iní-xi, te cuiní-í núu vá cúndèe iní-n càchí tnúhu-n nǎ cúú sǎ váha cada-í cuendá nduu táhú-í cundecu-í ndihi Yǎ Ndiòxí ní caa ní quíhí<sup>n</sup> —càchí-dé xáha<sup>n</sup>-dè xii-gá.

<sup>17</sup>Te Jèsús ní xáha<sup>n</sup>-gá xii-dé:

—¿Te cùtnuní iní-n nàcuáa ndúu tnúhu càhá<sup>n</sup>-n sǎ yúhú váha iní-á<sup>n</sup>?, chi i<sup>n</sup>dií díí-ni Yǎ Ndiòxí ío váha iní-gá. Te núu cuiní-n nànihí táhú-n te tnií-n nchàa tnúhu càhá<sup>n</sup> Yǎ Ndiòxí, tnúhu sá sánú ìchi ñaha xii ñáyiú nàcuáa cadá-yu cundecú-yu —càchí-gá xáha<sup>n</sup>-gá xii-dé.

<sup>18</sup>Te téé cuechi-á<sup>n</sup> ní xáha<sup>n</sup>-dè xii-gá:

—¿Te ndèndida càa tnúhu càhá<sup>n</sup> Yǎ Ndiòxí cada-í-i? —càchí-dé xáha<sup>n</sup>-dè xii-gá.

Te Jèsús ní xáha<sup>n</sup>-gá xii-dé:

—Te duha ní cachí Yǎ Ndiòxí cada ñáyiú: “Vǎ cáhní-ndó tnàha ñáyiú-ndo, vá càhá<sup>n</sup> ndihi-ndo ñadìhí te núu ñá díú ñadìhí-ndó cùú-yu, te duca<sup>n</sup>-ni nchòhò cue

ñáyiú ðìhí tucu vá càhá<sup>n</sup> ndìhi-ndo tée te núú ñá díú yìi-ndo cuu-güedé, te vá dúhú-ndó sã ndécú ndìhi tnahá ñáyiú-ndo, vá dácàcu-ndo cuéchi neñùú sá cúú-xí tñàha ñáyiú-ndo. <sup>19</sup>Te canehe-ndo sã yíñùhu núú tátá-ndó ndìhi núú nãná-ndó, te cundàhú iní-ndó tñàha ñáyiú-ndo dàtná cundàhú iní-ndó mée-ndo”, duha ní cachí Yã Ndiöxi cada ñáyiú —càchí-gá xãha<sup>n</sup>-gã xii-dé.

<sup>20</sup>Te tée cuechi-ã<sup>n</sup> ní xáha<sup>n</sup>-dë xii-gá:

—Nchaa xíã<sup>n</sup> ní ngüíta-í quídè-í ndéé cútnàhá cúú làndú-í, ÷te vitna nágá cúmãní cada-í-i? —càchí-dé xãha<sup>n</sup>-dë xii-gá.

<sup>21</sup>Te Jèsús ní xáha<sup>n</sup>-gã xii-dé:

—Te núú cuíni-n cùu-n ìi<sup>n</sup> tée ío váha cada ndáá, te cuàhá<sup>n</sup> dico-n nchàa sá ndécú ndìhi-n, te díhú<sup>n</sup>-n cuãha táhú-n cuè ñáyiú ndàhú, te duca<sup>n</sup> te nduu táhú-n ngündecu váha-n núú ndécú Yã Ndiöxi táxi tnùn-í-gá. Te sátá ná yãha duca<sup>n</sup> càda-n te quixi-n chìtnahá ñáhá-n xii-í —càchí-gá xãha<sup>n</sup>-gã xii-dé.

<sup>22</sup>Te sá dúcá<sup>n</sup> ñí xáha<sup>n</sup> Jèsús xii-dé te ío ní cundàyi-dé, chi ío cuica-dë, te ní xica-dé cuáhá<sup>n</sup>-dé.

<sup>23</sup>Te Jèsús ní xáha<sup>n</sup>-gã xii cue tée xica cuu ndìhi-gá:

—Na càchí tnúhu ndáá-í xii-ndo sã ÷o úhú quíndáá iní ñaha cuè ñáyiú cuica xii Yã Ndiöxi cuèndá ndíhu ndaha ñàha-gá xií-yu. <sup>24</sup>Te na càchí tnúhu tucu-í xii-ndo sã yáchí-gá yãha ìi<sup>n</sup> caméyu yaú ìi<sup>n</sup> yiqui tìcú dàcúxí sã quíndáá iní ìi<sup>n</sup> ñáyiú cuica Yã Ndiöxi cuèndá ndíhu ndaha ñàha-gá xií-yu —càchí-gá xãha<sup>n</sup>-gã xii-güedé.

<sup>25</sup>Te sá dúcá<sup>n</sup> ñí càhá<sup>n</sup> Jèsús, xíã<sup>n</sup> ío ní cuñúhu cue tée xica cuu ndìhi-gá, te ní ngüíta-güedé xìtnàha-güedé:

—¿Yoo naníhí tãhú te núú duca<sup>n</sup> vãi<sup>n</sup>? —càchí-güedé xìtnàha-güedé.

<sup>26</sup>Te Jèsús ní ndacoto-gá núú-güedë, te xãha<sup>n</sup>-gã xii-güedé:

—Nchaa ñáyiú ñuyúú-a chi vá ndácú-yu ná cadá-yu nàcuáa ndíhu ndaha ñàha Yã Ndiöxi xií-yu, dico mee-gã chi ndacu-gá ndíhu ndaha ñàha-gá xií-yu chi nchaandi túhú sá vãha ndàcu-gá quídé-gã —càchí-gá xãha<sup>n</sup>-gã xii-güedé.

<sup>27</sup>Te té Pèlú ní xáha<sup>n</sup>-dë xii-gá:

—Nchúhú ní dándòo-ndí nchaa sá ndécú ndìhi-ndí, te ní tuha ñaha-ndí xii-n, ÷te ná cúú sã ñìhí-ndí nduu táhú-ndí sá dúcá<sup>n</sup> ñí quide-ndí-i? —càchí-dé xãha<sup>n</sup>-dë xii-gá.

<sup>28</sup>Te Jèsús ní xáha<sup>n</sup>-gã xii-güedé:

—Na càchí tnúhu ndáá-í xii-ndo sã ná sàá nduu, ndùu saa nchaa sá ÷o andiu ndìhi ñuyúú-a, te dàvá-á<sup>n</sup> cunucóo yúhú Tée cùu ñaní tnáhá-ndó nchàa-ndo ìi<sup>n</sup> núú xilé váha, te nchaa ñáyiú quini-yu sá ÷o càhnu cuu-í, te nchòhó cue tée ní tuha ñaha xii-í tñàhá-ndó cùnucóo-ndo núú ìi<sup>n</sup> caa xilé váha ndi ùxúú tñàhá-ndó, te xíã<sup>n</sup> cunucóo-ndo càda ndáá-ndó cuéchi ndi ùxúú xichi cue ñáyiú isràél. <sup>29</sup>Te nchaa ñáyiú na dándòo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núú duca<sup>n</sup> na cadá-yu sá cuèndá-í te ío-gá cuéhé sã cuãñaha Yã Ndiöxi cundecu ndìhí-yu, te ñá díú-ní xíã<sup>n</sup> chi tñàhá nduu táhú-yu cundecú-yu ndìhi-gá ñí caa ñí quíhí<sup>n</sup>. <sup>30</sup>Te



dava ñáyiú cùnūu ndecu ichi Yá Ndióxi vitna, ñáyiú-á<sup>n</sup> sǎá nduu te vá ïo-gá cunúú-yu dàtná cúnúú-yu vitna, te dava ñáyiú nchìcú<sup>n</sup> ñá túú cùnūu vitna, ñáyiú-á<sup>n</sup> sǎá nduu te ío cunúú-yu —càchí-gá xǎha<sup>n</sup>-gǎ xii-güedé.

### Cuëndá cue tée quide chiu<sup>n</sup>

**20** Te xǎha<sup>n</sup> tùcu Jesús xii cue tée xica cuu ndìhi-gá: —Na càni-í ìi<sup>n</sup> cuëndú núú-ndó cuëndá tecú tnùnì-ndó nàcuáa cada-xi òré ndíhu ndaha ñàha Yá Ndióxi xii ñáyiú. Ìi<sup>n</sup> tée ní xitu-dé yoho yàha stilé, te ìi<sup>n</sup> nduu ní quee-dé nehé-ni cuándúcú-dě cue tée cada chiu<sup>n</sup> núú dúcá<sup>n</sup> nì xitu-dé yoho yàha stilé-á<sup>n</sup>. <sup>2</sup>Te òré ní níhí-dě cue tée cada chiu<sup>n</sup>-á<sup>n</sup>, te ní quide ndáá-dé ndìhi-güedé sá chǎhu ñaha-dě xii-güedé ìi<sup>n</sup> díhú<sup>n</sup> denàriú ìi<sup>n</sup> nduu. Te sátá dúcá<sup>n</sup> te ní tendaha ñaha-dé xii-güedé cuáhá<sup>n</sup>-güedé cada chiu<sup>n</sup>-güedé núú dúcá<sup>n</sup> nì xitu-dé yoho yàha stilé-á<sup>n</sup>. <sup>3</sup>Te dàtnùnì ní xica tucu-dé cuáhá<sup>n</sup>-dé dàtná òré caá ìi<sup>n</sup> dàtnéé cuándúcú-gǎ-dé cue tée cada chiu<sup>n</sup> núú nì xitu-dé yoho yàha stilé-á<sup>n</sup>, te ní xiní-dé xìnutnì ìi<sup>n</sup> úú cue tée núú yǎhu te ñá túú nǎ chiu<sup>n</sup> xiquide-güedé. <sup>4</sup>Te ní xáha<sup>n</sup>-dě xii-güedé: “Ñá túú cùdana cuyáchí-ndó càda-ndo chiu<sup>n</sup>-í te chǎhu ñaha-í xii-ndo nàcuáa tàú-xi cunduu-ǎ”, càchí-dé xǎha<sup>n</sup>-dě xii-güedé. Te cue tée-á<sup>n</sup> nì sáha-güedé tnúhu cada chiu<sup>n</sup>-güedé te ní xica-güedé cuáhá<sup>n</sup>-güedé. <sup>5</sup>Te tée ní xitu yoho yàha stilé-á<sup>n</sup> nì xica tucu-dé dàtná òré caúxúú nduu cuándúcú-gǎ-dé cue tée cada

chiu<sup>n</sup>-dé, te ní níhí tucu-dé cue tée cada chiu<sup>n</sup>. Te ní quee tucu-dé dàtná òré caá únì sacuaa, te ñi-ni duca<sup>n</sup> nì quide tucu-dé. <sup>6</sup>Te ní quee tucu-dé dàtná òré caá úhú<sup>n</sup> sacuaa cuándúcú-gǎ-dé cue tée cada chiu<sup>n</sup>-dé, te ní xiní-dé xìnutnì ìi<sup>n</sup> úú cue tée ñi-ni núú yǎhu-á<sup>n</sup> te ñá túú nǎ chiu<sup>n</sup> quide-güedé, te ní xáha<sup>n</sup>-dě xii-güedé: “Sànuu sá nchòhó ní cuu nchàca vitna ñá túú níhí-ndó chiu<sup>n</sup> cada-ndo”, cachí-dé xǎha<sup>n</sup>-dě xii-güedé. <sup>7</sup>Te cue tée-á<sup>n</sup> nì xáha<sup>n</sup>-güedé xii-dé: “Ñá túú níhí-ndí chiu<sup>n</sup> cada-ndí chi vá yò ndücu ñaha xii-ndí”, càchí-güedé xǎha<sup>n</sup>-güedé xii-dé. Te ní xáha<sup>n</sup>-dě xii-güedé: “Yúhú taxi-í chiu<sup>n</sup> cada-ndo, te quíhí<sup>n</sup>-ndó núú nì xitu-í yoho yàha stilé yàcá<sup>n</sup> cada chiu<sup>n</sup>-ndo, te chǎhu ñaha-í xii-ndo nàcuáa tàú-xi cunduu”, càchí-dé xǎha<sup>n</sup>-dě xii-güedé. <sup>8</sup>Te sátá nì dáhu nchícanchi, te tée dii chiu<sup>n</sup>-xi-á<sup>n</sup> nì xáha<sup>n</sup>-dě xii tée tàxi tnunì ñáhá xii cue tée quide chiu<sup>n</sup>-á<sup>n</sup>: “Cúñaha xii nchaa cue tée quide chiu<sup>n</sup>-á<sup>n</sup> ná quíxí-güedé te chǎhu-n-güedé, te díhna-gá cue tée nchìcú<sup>n</sup> cuì-nǎ cuánguihu núú chíú<sup>n</sup> ngüíta-n chǎhu-n, te ndéé núú nì ndìhi-ná chǎhu-n cuè tée cuánguihu díhna nuu-gǎ núú chíú<sup>n</sup>”, càchí-dé xǎha<sup>n</sup>-dě xii tée tàxi tnunì ñáhá xii cue tée quide chiu<sup>n</sup>-á<sup>n</sup>. <sup>9</sup>Te díhna-gá cue tée cuánguihu caá úhú<sup>n</sup> sacuaa ní quexìo-güedé cuëndá chǎhu ñaha-dě, te ní chǎhu ñaha-dě ìi<sup>n</sup> caa díhú<sup>n</sup> denàriú xii ìi<sup>n</sup> ìi<sup>n</sup>-güedé. <sup>10</sup>Te sátá nì chǎhu-dé dava-gá cue tée ní quide chiu<sup>n</sup>. Te ndéé núú nì ndìhi-ná ní chǎhu-dé cue tée cuánguihu díhna nuu-gǎ núú chíú<sup>n</sup>.

Te cue tée-á<sup>n</sup> nǐ sani iní-güedé sá vái-gǎ cháhu ñaha-dě xii-güedé, dico ñáhá chi ì<sup>n</sup> caa-ni díhú<sup>n</sup> denàriú ní cháhu ñaha-dě xii ì<sup>n</sup> ì<sup>n</sup>-güedé. <sup>11</sup>Te cue tée-á<sup>n</sup> nǐ quehe<sup>n</sup> cuendá-güedé díhú<sup>n</sup>-güedé dico ñá túú ní quide váha-xi iní-güedé. <sup>12</sup>Te ní xáha<sup>n</sup>-güedé xii tée dii chù<sup>n</sup>-xi ní quide-güedé: “¿Ná cuendá cue tée nchìcú<sup>n</sup> cuì<sup>n</sup>-ná cuánguìhu núú chíú<sup>n</sup> ì<sup>n</sup>-ni nǐ cháhu ñaha-n xii-ndí ndìhi-güedé, te ì<sup>n</sup>diì oré duha ní quide chù<sup>n</sup>-güedé? Te nchúhú nchàca nchaa ní sahani iní-ndí ní quide chù<sup>n</sup>-ndí, te ní ndoho-ndí cahni, te ì<sup>n</sup>-ni nǐ cháhu ñaha-n xii-ndí ndìhi-güedé”, cǎchí-güedé xǎha<sup>n</sup>-güedé xii tée dii chù<sup>n</sup>-xi ní quide-güedé. <sup>13</sup>Te tée dii chù<sup>n</sup>-xi ní quide-güedé-á<sup>n</sup> nǐ xáha<sup>n</sup>-dě xii ì<sup>n</sup> tée-á<sup>n</sup>: “Yòhó, ñá túú quide-í ì<sup>n</sup> sá ñà túú tàù-í cada-í sá cúú-xí-n, chi ní quide ndáá-ó sǎ díú-ní ì<sup>n</sup> díhú<sup>n</sup> denàriú cháhu ñaha-í xii-n ì<sup>n</sup> nduu. <sup>14</sup>Te vitna quehe<sup>n</sup> díhú<sup>n</sup> cuendá nduu-n te núhú-n, chi yúhú cuiní-í sá ì<sup>n</sup>-ní chǎhu ñaha-í xii-n ndìhi cue tée nchìcú<sup>n</sup> cuì<sup>n</sup>-ná cuánguìhu núú chíú<sup>n</sup>. <sup>15</sup>Chi yúhú cuu-ni cada-í nání cuiní-í ndìhi díhú<sup>n</sup>-í, ¿àdi dico ñá túú quide váha-xi iní-n sǎ dúhá cùndahú iní-í cue tée-á<sup>n</sup> duca<sup>n</sup> chǎhu-í-güedé?”, cǎchí tée cùu patrón<sup>n</sup>-á<sup>n</sup> xǎha<sup>n</sup>-dě xii tée-á<sup>n</sup>. Duha ndùu cuendú cǎni-í núú-ndó. <sup>16</sup>Te duha cǎhá<sup>n</sup>-í chi dava ñáyiù cùnùu ndecu ichi Yá Ndiòxí vitna sáá nduu te vá cùnùu vihi-gá-yu dàtná cùnùú-yu vitna, te dava ñáyiù ñá túú cùnùu vitna sáá nduu ìo cùnùú-yu. Te ío cuéhé ñáyiù cǎhá<sup>n</sup> ñáhá Yá Ndiòxí xii-yu dico sacú-ni-yu nduu táhú-yu

cundecú-yu ndìhi-gá —cǎchí-gá xǎha<sup>n</sup>-gǎ xii-güedé.

**Jèsús cǎhá<sup>n</sup> tucu-gá sá cǎhni ñaha-güedé xii-gá**

(Mr. 10:32-34; Lc. 18:31-34)

<sup>17</sup>Te ñùhu Jèsús ichi cuásaá-gá ñuú Jerusàlén ndìhi cue tée xica cuu ndìhi-gá, te ní cana ñaha-gǎ xii-güedé ní naníhí tnáhá-güedé ndìhi-gá, te ta ndàtnúhu ndìhi ñaha-gǎ xii-güedé cuáhá<sup>n</sup>, te xǎha<sup>n</sup>-gǎ xii-güedé:

<sup>18</sup>—Vitna ñùhu-o ichi cuásaá-ó ñuú Jerusàlén, te yàcá<sup>n</sup> cuáha cuendá ñáhá-güedé xii yúhú Tée cùu ñaní tnáhá-ndó nchàa-ndo núú cuè tée cùu dútú cùnùu, ndìhi núú cuè tée dàcuaha ñaha xii ñáyiù nchaa tnúhu ní chídó tnùnì ndíi Moisés. Te ñuú cue tée-á<sup>n</sup> cǎñaha-güedé xii dava-gá cue tée sá cǎhni ñaha-güedé xii-í. <sup>19</sup>Te cuáha cuendá ñáhá-güedé xii-í núú cuè tée ñá túú cùu cue tée isràél, te cue tée-á<sup>n</sup> cudíquí ndéé ñáhá-güedé xii-í, te caniha-güedé ndìhi ñìi, te dàtnùnì cata caa ñaha-güedé xii-í núú cùrúxí te núú cùrúxí-á<sup>n</sup> cuú-í, dico nduu únì sá cùú-í te ndoto-í —cǎchí-gá xǎha<sup>n</sup>-gǎ xii-güedé.

**Náná tǎ Jàcobó ndìhi té Juáá cuiní-a<sup>n</sup> sá cùnùu-güedé ndìhi Jèsús**

(Mr. 10:35-45)

<sup>20</sup>Te cue déhe té Zebèdeú té Jàcobó ndìhi té Juáá ndéca ñaha náná-güedé xii-güedé cuáhá<sup>n</sup> núú ndécú Jèsús, te òré ní quexìo-a<sup>n</sup> ndìhi-güedé núú ndécú-gǎ te ní ngúñí xítí-á<sup>n</sup> nùú-gǎ cuendá cuiní-a<sup>n</sup> ndàtnúhu ndìhi ñaha-a<sup>n</sup> xii-gá cuendá sá cúú-xí cuè déhe-a<sup>n</sup>.

21 Te cùmání-gă cáhá<sup>n</sup>-a<sup>n</sup> te ní xícá<sup>n</sup> tnúhú Jèsús núu-a<sup>n</sup>, te xăha<sup>n</sup>-gă:

—¿Ná cuíní-n? —càchí-gă xăha<sup>n</sup>-gă xii-a<sup>n</sup>.

Te ní xáha<sup>n</sup>-a<sup>n</sup> xii-gă:

—Véxi-í càhá<sup>n</sup> ndàhú-í núu-n nŭu vá cúndèe iní-n cùnucóo ìí<sup>n</sup> déhe-í-a xio cùha-n, te ingá-dé cunucóo-dé xio dàtni-n na saá nduu cùnucóo-n nŭú táxí tnúní-n —càchí-á<sup>n</sup> xăha<sup>n</sup>-a<sup>n</sup> xii-gă.

22 Te Jèsús ní xáha<sup>n</sup>-gă xii úú cue tée-á<sup>n</sup>:

—Nchòhó, ñá túú cùnuní váha iní-ndó nàcuáa ndùu sá xícá<sup>n</sup>-ndó nŭù-í. ¿Te náa cundee iní-ndó dândoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-ă<sup>n</sup>? —càchí-gă xăha<sup>n</sup>-gă xii-güedé.

Te ní xáha<sup>n</sup>-güedé xii-gă:

—Cundee iní-ndí yáha-ndí nchaa nàcuáa càhá<sup>n</sup>-n-ă<sup>n</sup> —càchí-güedé xăha<sup>n</sup>-güedé xii-gă.

23 Te Jèsús ní xáha<sup>n</sup>-gă xii-güedé:

—Ndáá sá cúndèe iní-ndó ndòho-ndo nchaa nacuáa ndoho-í, dico sá dúcá<sup>n</sup> cuíní-ndó să ìí<sup>n</sup>-ndó cùnucóo-ndo xio cuha-í, te ìí<sup>n</sup>-ndo cùnucóo-ndo xio datni-í, te xíă<sup>n</sup> chi ñá dŭú yŭhú tàù-í cachí-í nŭu sá cúú cùnucóo-ndo àdi sá vă cúú cùnucóo-ndo, chi mee Tătà-í Dútú Ndióxi cachí-gă te núu ná cúú ñáyiú nduu táhú cunucóo dăñi-í dává-á<sup>n</sup> —càchí-gă xăha<sup>n</sup>-gă xii-güedé.

24 Te òré ní níhí ŭxí-gă cue tée xica cuu ndihi-gă tnúhu nàcuáa ndùu sá cuíní cue tée úú-á<sup>n</sup>, te ní cudéé<sup>n</sup>-güedé núú cuè tée úú-á<sup>n</sup>. 25 Te Jèsús ní cana-gă nchaa cue tée xica cuu ndihi-gă, te ní xáha<sup>n</sup>-gă xii-güedé:

—Nchòhó xiní-ndó să cuè tée yŭndaha nació<sup>n</sup> quidé-güedé sá ìo cùnuu-güedé, te nchaa dava-gă cue tée cùnuu ndihi-güedé quidé-güedé tnàhá-güedé sá ìo cùnuu-güedé. 26 Dico nchòhó chi vá dúcá<sup>n</sup> càda-ndo, chi núu dava-ndo cuíní-ndó cùnuu-ndo, te xiní ñuhu-xi cunu cuechi núú tnàhá-ndó te vá cádá-ndó să cúnù-ndo. 27 Te núu dava-ndo cuíní-ndó quène cáva-ndo, te cuu-ndo dàtná cue ñáyiú ñá túú tnàhí dăñá quee núú chíú<sup>n</sup> pàtróo<sup>n</sup>-xi cunu cuechi nŭú tnàhá-ndó. 28 Te cada-ndo dàtná quidé yŭhú Tée cùu ñaní tnàhá-ndó nchàa-ndo, chi yúhú véxi-í ñuyíú-a dico ñá dŭú să cúnú cuèchi ñáyiú núú-í chi véxi-í sá cúnú cuèchi-í nŭú-yu. Te cuú-í ñuyíú-a cuendá vâi-yu cácu nihnú-yu núú ùhú núú ndàhú —càchí-gă xăha<sup>n</sup>-gă xii-güedé.

### Jèsús quidé tătna-gă núú ŭú tnàhá cue tée cuàá

(Mr. 10:46-52; Lc. 18:35-43)

29 Te òré ní quee Jèsús ñuú Jericó ndihi cue tée xica cuu ndihi-gă, te cuéhé víhí ñáyiú nchicú<sup>n</sup> ñahá xii-gă cuáhá<sup>n</sup>. 30 Te yuhu ìchi cuáhá<sup>n</sup>-gă xŭnucóo úú tnàhá cue tée cuàá, te cue tée-á<sup>n</sup> ní cutnùní iní-güedé sá Jèsús ñúhú-gă ichi-á<sup>n</sup> te ní ngúfta-güedé níhi càhá<sup>n</sup>-güedé, te xăha<sup>n</sup>-güedé xii-gă:

—iYòhó Mèstrú, ñaní tnàhá ndii Dávii, cundàhú iní ñahá xii-ndí! —càchí-güedé xăha<sup>n</sup>-güedé xii-gă.

31 Te cue ñáyiú tēnaá ñahă-yu xii-güedé, te xăhă<sup>n</sup>-yu sá ná càdí-güedé yuhu-güedé, dico uu<sup>n</sup>-gă níhi ní cáhá<sup>n</sup>-güedé, te xăha<sup>n</sup>-güedé xii-gă:

—iYòhó Mèstrú, ñaní tnáhá ndíi Dàvíí, cundàhú iní ñáhá xii-ndí! — cächí-güedé xáha<sup>n</sup>-güedě xii-gá.

<sup>32</sup>Te ní ngüíñí Jèsús te ní cana ñaha-gă xii-güedé, te ní xícá<sup>n</sup> tnúhú-gă núú-güedě, te xáha<sup>n</sup>-gă:

—¿Ná cuíní-ndó càda ñaha-í xii-ndo-i? —cächí-gá xáha<sup>n</sup>-gă xii-güedé.

<sup>33</sup>Te ní xáha<sup>n</sup>-güedě xii-gá:

—Mèstrú, cuíní-ndí sá cádá tătna-n núú-ndí cuendá cundehe-ndí —cächí-güedé xáha<sup>n</sup>-güedě xii-gá.

<sup>34</sup>Te Jèsús ní cundàhú iní ñáhá-gă xii-güedé, te ní tendaha-gă núú-güedě. Te òré-ni ní ndúha núú-güedě, te nchícú<sup>n</sup> ñáhá-güedě xii-gá cuáhá<sup>n</sup>.

### Jèsús cuánguïhu-gá ñuú Jerusàlén

(Mr. 11:1-11; Lc. 19:28-40; Jn. 12:12-19)

**21** Te òré sa ta cùyatni Jesús ndíhi cue téé xica cuu ndíhi-gá ñuú Jerusàlén, te ní quexìo-gá ndíhi-güedé yatni víí-nă ñuú Bèttagé, te xíá<sup>n</sup> cáá yùcu nani Olívú. Te ní ndatnúhu-gá ndíhi úú cue téé xica cuu ndíhi-gá, <sup>2</sup>te ní xáha<sup>n</sup>-gă xii-güedé:

—Chí cuáhá<sup>n</sup> ñuú cáá yàtni yacá<sup>n</sup>, te òré quexìo-ndo yacá<sup>n</sup> te nanihí-ndó ìí<sup>n</sup> búrru ðíhí ndètní-ðí ndíhi déhe-ðí, te nandaxi-ndo-güèdi te candeca-ndo-güèdi quixí. <sup>3</sup>Te núú ìò ñáyíu dàdaha<sup>n</sup> ñaha xii-güedi, te cúñaha-ndo xíi-yu sá yùhú Yaá xícá cùu ndíhi-ndo xini ñuhu-í-güedi, te ndíhi-ni natendaha-í-güedi núhú-güedi cúñaha-ndo —cächí-gá xáha<sup>n</sup>-gă xii-güedé.

<sup>4</sup>Te duca<sup>n</sup> ní cuu chi ní quee ndáá-xi nàcuáa ní chídó tnùnì ìí<sup>n</sup> téé ní xóo cáhá<sup>n</sup> tnúhu Yá Ndiòxí

ndéé sanaha núú tütú-gá núú cächí-xi:

<sup>5</sup>Chí cùñaha cuè ñáyíu ñuú Sìón ná cádá cuendá-yu, chi véxi téé yìndaha ñaha xíi-yu yòdo-dé ìí<sup>n</sup> búrru líhli déhe ìí<sup>n</sup> búrru quiti sa xido,

te cùu-dé ìí<sup>n</sup> téé ío ndàhú iní-xi. Duha ní chídó tnùnì ìí<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha núú tütú-gá.

<sup>6</sup>Te cue téé xica cuu ndíhi-gá ní xica-güedé cuáhá<sup>n</sup>-güedé, te ní quide-güedé nàcuáa ní xáha<sup>n</sup>-gă xii-güedé cada-güedé. <sup>7</sup>Te ní ndexìo-güedé ndécá-güedě ìí<sup>n</sup> búrru ðíhí ndíhi déhe-ðí, te ní sacá<sup>n</sup> ndodo-güedé dóo-güedě sátá-güedi, te dàtnùnì cuásaá Jèsús sátá ìí<sup>n</sup>-ðí ní ngódó ñaha-gá xii-ðí. <sup>8</sup>Te ío cuéhé ñáyíu ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dõo-yu-á<sup>n</sup> yáha-gá ndíhi quiti yòdo-gá. Te davá-yu xèhndé-yu ndaha yùtnu ñúú tá sàcá<sup>n</sup>-yu cuáhá<sup>n</sup>. <sup>9</sup>Te nchaa ñáyíu yòdonuu núú-gă ndíhi nchaa ñáyíu nchícú<sup>n</sup> ndàa sátá-gă ní ngüíta-yu níhi càhá<sup>n</sup>-yu, te cächí-yu:

—ííò càhnu cuu Yaá cúú ñàní tnáhá ndíi Dàvíí! íTe Yá Ndiòxí ío na chìndee ñaha-gá chi cùu-gá Yaá ní tendaha Yá Ndiòxí véxi quide núú-gă! íTe ndéé nchaa sá ío andíu na cächí-xi sá ío càhnu cuu-gá! — duha cächí-yu.

<sup>10</sup>Te òré cuánguïhu Jèsús ñuú Jerusàlén, te nchaa ñáyíu ñuú-á<sup>n</sup> ní ngüíta-yu xícuaá-yu, te davá-yu ní ngüíta-yu xitnàhá-yu:

—¿Yoo cùu téé-á<sup>n</sup>? —cächí-yu xitnàhá-yu.

<sup>11</sup>Te davá-yu xitnàhá-yu:

—Tée-ǎ<sup>n</sup> cúú-dě Jèsús tée càhá<sup>n</sup> tnúhu Yá Ndiöxí, te cùu-dé tée ñúú Nazàrét ñúú yíndèhu distritú Galiléa —càchí-yu xitnàhá-yu.

**Jèsús ñá túú tnàhá iní-gá nàcuáa xĩquide ñáyiú xití veñúhu**

(Mr. 11:15-19; Lc. 19:45-48; Jn. 2:13-22)

<sup>12</sup>Te Jèsús cuánguihu-gá xití veñúhu càhnu sá ïo cùnuu, te xití veñúhu-á<sup>n</sup> xĩndecu ñáyiú quide ndáhú nádìcò-yu, ndihi ñáyiú xĩsaa<sup>n</sup>, te nchaá-yu ní queñuhu ñaha Jèsús xii-yu quehé, te ní dándùá-gá mèsá nchaa ñáyiú dàma díhú<sup>n</sup>, ndihi nchaa xilé sácòo nchihi ñáyiú dìcò lómá xĩndecu xití veñúhu-á<sup>n</sup>. <sup>13</sup>Te ní xáha<sup>n</sup>-gá xii-yu:

—Núú tütú Yá Ndiöxí càhá<sup>n</sup>-xi nàcuáa ní càhá<sup>n</sup>-gá, te ní cachí-gá: “Vehe-í cúú-xí nũú càhá<sup>n</sup> ndihi ñaha ñáyiú xii-í”, duha ní càhá<sup>n</sup>-gá càchí-xi núú tütú-gá. Dico nchòhó quidé-ndò vèhe-gá vehe ñadúhú —càchí-gá xáha<sup>n</sup>-gá xii-yu.

<sup>14</sup>Te xía<sup>n</sup> ndécú Jèsús ní quexìo cue tée cuàà ndihi cue tée yacua, te ní quide tátna ñaha-gá xii-güedé te ní ndúha-güedé. <sup>15</sup>Te cue dútú cùnùu ndihi cue tée dàcuaha ñaha xii ñáyiú nchaa tnúhu ní chídó tnùní ndii Moisés ní xiní-güedé ní quide Jèsús sá vǎ yòo tnàhí ndàcu cada, te ndèdóho tucu-güedé níhi xicáhá<sup>n</sup> cue landú xití veñúhu càhnu sá ïo cùnuu-á<sup>n</sup>, te càchí-güexi: “Ío càhnu cuu Yaá cúú ñànì tnàhá ndii Dàvií”, càchí-güexi. Te ní cudéé<sup>n</sup>-güedé, <sup>16</sup>te ní xáha<sup>n</sup>-güedé xii Jèsús:

—¿Ndèdóho-n nàcuáa càhá<sup>n</sup> cue landú-ǎ<sup>n</sup> ñǎ? —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Ndèdóho-í, te nchòhó náa ñá túú dàcuaha-ndo núú tütú Yá Ndiöxí núú càhá<sup>n</sup>-xi cuendá cue landú-ǎ<sup>n</sup>, te duha càchí-xi:

Yòhò ní quide-n sǎ cuè landú vitna sàdì, ndihi cue dava-gá landú,

chiñuhu ñaha-güexi xii-n nàcuáa tàú-xi cunduu.

Duha càchí-xi núú tütú-gá —càchí-gá xáha<sup>n</sup>-gá xii-güedé.

<sup>17</sup>Te xía<sup>n</sup> ní dándòo ñaha Jèsús xii-güedé, te ní xica-gá cuáhá<sup>n</sup>-gá ñúú Bètaniá, yàcá<sup>n</sup> ní xĩndecu-gá niú-á<sup>n</sup>.

**Jèsús xáha<sup>n</sup>-gá xii yutnu ngüxí sá vǎ cúú<sup>n</sup>-gá sávidí-xi**

(Mr. 11:12-14, 20-26)

<sup>18</sup>Te nduu tnèé-á<sup>n</sup> nehé-ni cuáhá<sup>n</sup> tucu Jèsús ñúú Jerusalén, te ichi ñùhu-gá ní xihí-gá docó. <sup>19</sup>Te ní xiní-gá ií<sup>n</sup> yutnu ngüxí núnñi ií<sup>n</sup> xio yuhu ìchi, te ní xica-gá cuáhá<sup>n</sup> ndéhé-gá nũu ndèè sávidí-xi, dico ñá túú nǎ ndèè chi mee-ni ndàha-xi ndeé. Te ní xáha<sup>n</sup>-gá xii yutnu ngüxí-á<sup>n</sup>:

—iVitna te vǎ ií<sup>n</sup> ndùu-gá cuu<sup>n</sup> sávidí-n! —càchí-gá xáha<sup>n</sup>-gá xii-xi.

Te òrè-ni-á<sup>n</sup> ní yíchí yutnu ngüxí-á<sup>n</sup>. <sup>20</sup>Te sǎ dúcá<sup>n</sup> ní cuu ní xiní cue tée xica cuu ndihi Jesús, te ío ní cuñúhu-güedé, te ní xicá<sup>n</sup> tnúhú-güedé núú-gǎ, te xáha<sup>n</sup>-güedé:

—¿Nǎ cuendá ndéè dàcá<sup>n</sup> ío ndihi ní yíchí yutnu ngüxí-ǎ<sup>n</sup>-i? —càchí-güedé xáha<sup>n</sup>-güedé xii-gá.

<sup>21</sup>Te Jèsús ní xáha<sup>n</sup>-gá xii-güedé: —Na càchí tnúhu ndáá-í xii-ndo sǎ nũu nchòhó quíndáá ndisa iní-ndò

Yă Ndiöxí, te vá cání ìí<sup>n</sup> cani úú iní-ndó, te ñá díú-ní sá nǐ quide-í-a ní xiní-ndó ndàcu-ndo cada-ndo, chi ndéé tíndúú-a xocuñí-xi núú ndécú-xí te núú cúñaha-ndo sá xocuñí-xi te quíhí<sup>n</sup>-xi quée-xi xití làmár. Te díu duca<sup>n</sup> càda-xi te núú na quèndáá iní-ndó. <sup>22</sup>Te nchaá sá ná càcá<sup>n</sup>-ndó nǔú Yă Ndiöxí òré càhá<sup>n</sup> ndíhi-ndo-gă te taxi-gá te núú sàndáá ndisa iní-ndó sá táxí-gă sá xicá<sup>n</sup>-ndó nǔú-gă —càchí-gá xăha<sup>n</sup>-gă xii-güedé.

**Jèsús ndécú ndíhi-gá tnúhu ndee ìní**

(Mr. 11:27-33; Lc. 20:1-8)

<sup>23</sup>Te Jèsús cuánguihu-gá xití veñúhu càhnu sá ìo cùnno danehé-gá ñáyi, te xía<sup>n</sup> ndécú-gă ní quexìo cue dútu cùnno ndíhi cue tée cùu sacuéhé nǔú ñáyi israhèl, te xăha<sup>n</sup>-güedě xii-gá:

—Cuìní-ndí cachí tnúhu-n xii-ndí nása ndùu tnúhu ndee ìní ndécú ndíhi-n núú quide-n nándi sá quidé-n, ÷te yoo duca<sup>n</sup> nǐ taxi tnúhu ndee ìní-á<sup>n</sup> xii-n-i? —càchí-güedě xăha<sup>n</sup>-güedě xii-gá.

<sup>24</sup>Te Jèsús ní xăha<sup>n</sup>-gă xii-güedé: —Yúhú tnàhá-í cuìní-í càcá<sup>n</sup> tnúhu-í ìí<sup>n</sup> sá càcá<sup>n</sup> tnúhu-í núú-ndó, te núú na càchí tnúhu-ndo te cachí tnúhu-í xii-ndo yòo ní taxi tnúhu ndee ìní duha quide-í. <sup>25</sup>Te chí càchí tnúhu xii-í yoo ní táuchíú<sup>n</sup> nǐ dácúándute ndí Juàá ñáyi, ÷Yă Ndiöxí ă<sup>n</sup> cuè tée ñuyú-a ní táuchíú<sup>n</sup> dùca<sup>n</sup> ní quide ndí?, te chí càchí tnúhu —càchí-gá xăha<sup>n</sup>-gă xii-güedé.

Te ní nguíta-güedé xìtnàha-güedé: —÷Nása cúñaha-o? Chi núú na cúñaha-o sá Yă Ndiöxí ní táuchíú<sup>n</sup>

dùca<sup>n</sup> ní quide ndí Juàá ñá, te quesaha-dé: “÷Ná cuèndá ñá túú ní sàndáá iní-ndó tnúhu ní càhá<sup>n</sup> ndí vài<sup>n</sup>?”, quesaha-dě. <sup>26</sup>Te núú na cúñaha-o sá cuè ñáyi ñuyú-a ní táuchíú<sup>n</sup> dùca<sup>n</sup> ní quide ndí ña, te cudéé<sup>n</sup> ñáyi núú-ó, chi nchaá-yu càchí-yu sá Yă Ndiöxí ní xăha<sup>n</sup>-gă xii ndí sá càhá<sup>n</sup> ndí tnúhu-gá núú ñáyi —càchí-güedé xìtnàha-güedé.

<sup>27</sup>Te ní xăha<sup>n</sup>-güedě xii Jèsús: —Ñá túú xìní-ndí yoo ní táuchíú<sup>n</sup> dùca<sup>n</sup> ní dácúándute ndí Juàá ñáyi —càchí-güedé xăha<sup>n</sup>-güedě xii-gá.

Te ní xăha<sup>n</sup>-gă xii-güedé: —Te núú duca<sup>n</sup> te ni yúhú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xăha<sup>n</sup>-gă xii-güedé.

**Cuèndá ìí<sup>n</sup> tée ndíhi úú déhe-dé**

<sup>28</sup>Te Jèsús ní xăha<sup>n</sup> tùcu-gá xii-güedé:

—Na càni-í ìí<sup>n</sup> cuèndú núú-ndó nàcuáa tecú tnùn-ndó tnúhu càhá<sup>n</sup>-í. ìí<sup>n</sup> tée ndècu úú déhe-dé, te ní xăha<sup>n</sup>-dě xii déhe-dé tée sacuéhé-gă: “Yòhó déhe-í, véxi-í càhá<sup>n</sup> ndàhú-í núú-n nùu vá cùndèe ìní-n cuànundaha ñaha-n xii-í cada chù<sup>n</sup>-o núú nǐ xitu-í yoho yàha stilé”, càchí-dé xăha<sup>n</sup>-dě. <sup>29</sup>Te ní xăha<sup>n</sup> dèhe-dé xii-dé: “Vá quíhí<sup>n</sup>-í cada chù<sup>n</sup>-í núú chíú<sup>n</sup>-n”, càchí-dé xăha<sup>n</sup>-dě xii tătá-dě. Dico cuè ní nacani iní-dé te ní sáhá<sup>n</sup>-dé ní quide chù<sup>n</sup>-dé núú chíú<sup>n</sup> tătá-dě.

<sup>30</sup>Te tée-á<sup>n</sup> nǐ sáhá<sup>n</sup> tucu-dé ní xăha<sup>n</sup>-dě xii déhe-dé té lìhli-gá nùu vá cùndèe ìní-dé cuànundaha ñaha-dé, te ní xăha<sup>n</sup> dèhe-dé-á<sup>n</sup> xii-dé: “Cuu cuànundaha ñaha-í

xii-n", càchí-dé xǎha<sup>n</sup>-dě. Dico ñá túú ní sǎhá<sup>n</sup>-dé cada chiù<sup>n</sup>-dé. <sup>31</sup>Te vitna chí càhá<sup>n</sup> ñũ ndédacàa cue téé úú-á<sup>n</sup> ñĩ quide-güedé sá cuiní tǎtá-güedé —càchí-gá xǎha<sup>n</sup>-gǎ xii-güedé.

Te ní xáha<sup>n</sup>-güedé xii-gá:

—Tée cùu sacuéhé-gǎ, téé ní cáhá<sup>n</sup> ndíhi-dé díhna —càchí-güedé xǎha<sup>n</sup>-güedé xii-gá.

Te Jèsús ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ ncháá cuè téé cuihna ìní-xi quide cobrá ñáhá xii ñáyiú cuendá impuèstú, ndíhi cue ñáyiú dǐhí xǐndecu ichi díí ìní yáchí-gá ndíhu ndaha ñàha Yá Ndiöxí xii cue téé-á<sup>n</sup> ndíhi cue ñáyiú dǐhí-á<sup>n</sup> dàcúúxí nchòhó. <sup>32</sup>Chi ndíi Juáá téé ní xóo dacuàndute ñaha xii ñáyiú ní cáhá<sup>n</sup> ndíi nàcuáa cadá-yu cundecú-yu, dico nchòhó chi ñá túú cuiní-ndó quèndáá ìní-ndó nàcuáa ní cáhá<sup>n</sup> ndíi, dico cue téé cuihna ìní-xi quide cobrá ñáhá xii ñáyiú cuendá impuèstú, ndíhi cue ñáyiú dǐhí xǐndecu ichi díí ìní, chi sàndáá ìní-güedé ndíhi-yu tnúhu ní cáhá<sup>n</sup> ndíi. Te nchòhó cuèi ndèhe-ndo sá sàndáá ìní cue ñáyiú-á<sup>n</sup> nchaa tnúhu ní cáhá<sup>n</sup> ndíi, dico ñá túú cuiní-ndó ndixi cuèchi ìní-ndó cuendá nchaa sá cuèhé sá dúhá quide-ndo cuendá tñii-ndo tnúhu ní cáhá<sup>n</sup> ndíi —càchí-gá xǎha<sup>n</sup>-gǎ xii-güedé.

#### **Cuendá cue téé cuihna ìní-xi**

(Mr. 12:1-12; Lc. 20:9-19)

<sup>33</sup>Te xǎha<sup>n</sup> tùcu Jesús xii-güedé:

—Cundedóho-ndo na càni tucu-í ìngá cuèndú núú-ndó cuendá tecú tnùn-ndó tnúhu càhá<sup>n</sup>-í. Ìñí téé ní

nacúxi-dé mee-ni yòho yaha stilé núú ñúhú-dě, te ní chidoco-dě cuendá sá vǎ cúú dàñú, te ní cadúha-dé núú quíhni-dě ndéhé yoho yàha stilé-á<sup>n</sup> òré ná cùu, te ní cadúha-dé ìñí xító dùcú<sup>n</sup> núú cáúndòdo cue téé coto nchaa yoho yàha stilé-á<sup>n</sup>.

”Te ní sáá ìñí nduu quèe-dé quíngaca cuu xica-dě te ní dándöo ndaha-dě sá ñĩ xitu-dé-á<sup>n</sup> xii ìñí ùú cue téé xìní tnáhá ndíhi-dé cuendá cada chiù<sup>n</sup>-güedé, te ní ndatnúhu-güedé sá òré ná cúú te cuu cuendá dava-güedé, te duca<sup>n</sup> te ní quee-dé cuáhá<sup>n</sup>-dé. <sup>34</sup>Te sátá ñĩ sáá nduu ñĩ cuu ndéhé nchaa yoho yàha stilé sá ñĩ xitu-dé-á<sup>n</sup>, te ní xáha<sup>n</sup>-dě xii ìñí ùú cue téé xìnu cuechi núú-dě: “Chí cuáhá<sup>n</sup> cǎcǎ<sup>n</sup>-ndó sǎ cúú cuendá-í núú cue téé ní dándöo ndàha-í nchaa yoho yàha stilé sá ñĩ xitu-í”, càchí-dé xǎha<sup>n</sup>-dě xii-güedé. <sup>35</sup>Te cue téé ní dándöo ndaha-dě nchaa yoho yàha stilé sá ñĩ xitu-dé-á<sup>n</sup> ñĩ tñii-güedé cue téé xìnu cuechi núú-dě-á<sup>n</sup>, te ìñí-dé ní cani-güedé, te ìñí-dé ní sahni ñaha-güedé, te ìngá-dé ní sǎñaha-güedé yúú. <sup>36</sup>Te téé ní xitu yoho yàha stilé-á<sup>n</sup> ñĩ tendaha-dě titní-gá tucu cue téé xìnu cuechi núú-dě cuáhá<sup>n</sup>-güedé cuángácá<sup>n</sup>-güedé sá cúú cuendá-dé núú cuè téé ní dándöo ndaha-dě sá ñĩ xitu-dé-á<sup>n</sup>, dico diu-ni duca<sup>n</sup> ñĩ quide ñaha cuè téé-á<sup>n</sup> xii cue téé xìnu cuechi núú-dě-á<sup>n</sup>.

<sup>37</sup>Te téé cùu xítóhó nchaa

yoho yàha stilé-á<sup>n</sup> ñĩ sani ìní-dé: “Váha-gá ñũ tendaha-í déhe-í-a núhú-dé, chi òré quiní ñáhá-güedé xii-dé te canehé-güedé

sá yíñùhu núú-dě”, duha ní sani iní-dé. Te ní tendaha-dě déhe-dé cuánuhú-dé. <sup>38</sup>Dico òré ní xiní cue tée quide chiu<sup>n</sup>-á<sup>n</sup> dèhe tée cùu xítóhó nchaa yoho yàha stilé-á<sup>n</sup>, te ní xítñàha-güedé: “Tée-á<sup>n</sup> tée véxi nduu táhú ñuhu-a ndìhi nchaa sá cáá núú-xi, dico cahni-o-dě te mee-o ndùu táhú-ó sá ndúú táhú-dě”, càchí-güedé xítñàha-güedé. <sup>39</sup>Te ní tñii-güedé tée-á<sup>n</sup> te ndèca ñaha-güedé cuáhá<sup>n</sup> ìi<sup>n</sup> xio yuhu ñùhu-á<sup>n</sup>, te ní sahani ñaha-güedé xii-dé —duha cuáhá<sup>n</sup> cuendú ní cani Jèsús núú-güedé.

<sup>40</sup>Te ní xáha<sup>n</sup> tùcu Jesús

xii-güedé:

—¿Te nchòhó sa cùtnuní iní-ndó ñàsa cada ñaha xítóhó ñuhu-á<sup>n</sup> xii cue tée-á<sup>n</sup> ñǎ? —càchí-gá xǎha<sup>n</sup>-gǎ xii-güedé.

<sup>41</sup>Te cue tée-á<sup>n</sup> ñǎ xáha<sup>n</sup>-güedé xii-gá:

—Tée cùu xítóhó ñuhu-á<sup>n</sup> ñùhú-dé, te vǎ cùndàhú iní-dé cue tée cuihna iní-xi-á<sup>n</sup> chi cahni ñaha-dě xii-güedé, te dándóo ndaha-dě ñuhu-dé xii cue tée cùtnuní iní-dé cada ndáá cuendá ndì tnahá cúú<sup>n</sup> nděhé nchaa yoho yàha stilé sá ñǎ xitu-dé-á<sup>n</sup> te cuáñaha-güedé xii-dé sá cúú cuendá-dé —càchí-güedé xǎha<sup>n</sup>-güedé xii-gá.

<sup>42</sup>Te Jèsús ní xáha<sup>n</sup>-gǎ xii-güedé:

—Te nchòhó, nǎa ñǎ túú dàcuaha-ndo núú tütú Yǎ Ndiòxí núú càchí-xi:

Yúú sǎ ñǎ dáquéeé tǐhú cue tée dàcaa vehe, ní cuu-xi yúú cùnùu vitna.

Chi mee Dǔtú Ndiòxí duca<sup>n</sup> ñǎ cachí-gá cunduu, te cùu-xi ìi<sup>n</sup> sǎ ìo cùñùhu-o vitna.

Duha càchí-xi núú tütú-gá. <sup>43</sup>Te duha càhá<sup>n</sup>-í chi Yá Ndiòxí cada-gá te vǎ ñihí-ndó tñùhu ndee ìní cundecu ndìhi-ndo cuendá ndǐhu ndaha ñàha-gá xii-ndo, chi tñùhu ndee ìní-á<sup>n</sup> cundecu ndìhi cue ñáyiu cada ndáá cuendá ndǐhu ndaha ñàha Yá Ndiòxí xíi-yu. <sup>44</sup>Te yúú sǎ cùnùu-á<sup>n</sup> cúú-xí yǐhú, te nchaa ñáyiu ñǎ túú tñii tñùhu-í cùu-yu dàtná ìi<sup>n</sup> ñáyiu ndúá núú yǔú-á<sup>n</sup> te tñàhnú duú<sup>n</sup>-yu, àdì núu na tàù ñáhá-xí xíi-yu, te dacàchí duu<sup>n</sup> ñaha-xi —cachí-gá xǎha<sup>n</sup>-gǎ xii-güedé.

<sup>45</sup>Te sá dúcá<sup>n</sup> ndùu cuendú ní cani Jèsús te cue tée cùu dútú cùnùu-á<sup>n</sup>, ndìhi cue tée cùu fariséú ní cutnùní iní-güedé sá cuendá-güedé ní cáhá<sup>n</sup>-gá. <sup>46</sup>Te ní cuiní-güedé tñii ñaha-güedé xii-gá òré-á<sup>n</sup> dico ñǎ túú ní cùyii-güedé, chi ní yùhú-güedé cue ñáyiu, chi ní cutnùní iní-yu sá cúú-gǎ ìi<sup>n</sup> tée càhá<sup>n</sup> tñùhu Yá Ndiòxí.

### Cuendá ìi<sup>n</sup> vico tñándaha

**22** Te Jèsús ní ngúita tucu-gá cáni-gǎ ingá cuendú núú-güedé, te xǎha<sup>n</sup>-gǎ:

<sup>2</sup>—Na càni tucu-í ingá cuendú núú-ndó cuendá tecú tñùní-ndó nàcuáa cada-xi òré ndǐhu ndaha ñàha Yá Ndiòxí xii ñáyiu. ìi<sup>n</sup> tée yìndaha ñaha xii ñáyiu ní quide-dé ìi<sup>n</sup> vico ní dátñándaha-dé déhe ducu<sup>n</sup>-dé. <sup>3</sup>Te ní tendaha-dě cue tée xìnu cuechi núú-dě cuáhá<sup>n</sup>-güedé cuángana-güedé cue ñáyiu sa ní cáhá<sup>n</sup>-dé cuhu<sup>n</sup> vico, dico ñáyiu-á<sup>n</sup> ñà túú ní cuiní-yu quíhí<sup>n</sup>-yu. <sup>4</sup>Te ní xáha<sup>n</sup> tùcu-dé xii dava-gá cue tée xìnu cuechi núú-dě: “Quíhí<sup>n</sup>-ndó



cũñaha-ndo xii cue ñáyiú sa ní cáhá<sup>n</sup>-í cuhu<sup>n</sup> vico sá sà ní quide túha-í sá cáxí-yu, te sa ní sahní-í ndicutu ndihí nchaa dava-gá quiti ní dánucũihnu-í, te ncha sa ní quide túha-í, te na quixí-yu cuhú<sup>n</sup>-yu vico cächí-í cũñaha-ndo”, cächí-dé xãha<sup>n</sup>-dẽ xii cue tée xĩnu cuechi núú-dẽ-á<sup>n</sup>. <sup>5</sup>Dico ni ñ<sup>n</sup> ñáyiú ní cáhá<sup>n</sup>-dé-á<sup>n</sup> ñà túú ní cuini-yu quĩh<sup>n</sup>-yu cuhú<sup>n</sup>-yu vico. Chi ñ<sup>n</sup>-yu ní sáhá<sup>n</sup>-yu ní quide chĩú<sup>n</sup>-yu núú ñũh<sup>n</sup>-yu, te ingá-yu ní sáhá<sup>n</sup>-yu ní nadicó-yu núú nándi cùu ndáhú quidẽ-yu. <sup>6</sup>Te dava-gá-yu ní tñĩ-yu dava cue tée xĩnu cuechi núú tẽ quide vico-á<sup>n</sup>, te ní canihá-yu ndéé ní sahní ñàhá-yu xii-güedé. <sup>7</sup>Te tée yĩndaha ñaha xii ñáyiú quide vico-á<sup>n</sup> ñĩ cudéé<sup>n</sup> víhí-dẽ sá dúcá<sup>n</sup> ñĩ quidé-yu, te ní tendaha-dẽ cue sandadú-dé ní sáhá<sup>n</sup>-güedé ní sahní-güedé cue ñáyiú duca<sup>n</sup> ñĩ quide-á<sup>n</sup>, te ní sahní-güedé nchaa vehe càa ñuú-yu. <sup>8</sup>Te sátá dúcá<sup>n</sup> te ní xãha<sup>n</sup>-dẽ xii dava-gá cue tée xĩnu cuechi núú-dẽ: “Ncha sa ndècu túha, te cue ñáyiú ní cáhá<sup>n</sup>-í cuhu<sup>n</sup> vico-a ni cùu ñà túú-gã tàú-yu sá cúh<sup>n</sup>-yu. <sup>9</sup>Te chí cuàhá<sup>n</sup> ndèni ní cuu te cáhá<sup>n</sup>-ndó nchàa ñáyiú na nànhí-ndó ichi na quixí-yu cuhú<sup>n</sup>-yu vico-a”, cächí-dé xãha<sup>n</sup>-dẽ xii-güedé. <sup>10</sup>Te cue tée xĩnu cuechi-á<sup>n</sup> ñĩ quee-güedé cuáhá<sup>n</sup>-güedé, te ní cáhá<sup>n</sup>-güedé nchaa ñáyiú ní naníhí-güedé ichi, te cuẽ ñáyiú váha iní-xi, te cuẽ ñáyiú cuihna iní-xi, te ní chítũ-yu núú cúú vico-á<sup>n</sup>.

<sup>11</sup>Te sátá dúcá<sup>n</sup> te tée yĩndaha ñáyiú quide vico-á<sup>n</sup> ñĩ quĩhu-dé xití vehe ní xíndéhé-dẽ cue ñáyiú ñũhu

vico-á<sup>n</sup>, te ní xiní-dé ñ<sup>n</sup> tée ñũtnahá tnuú-yu te ñà túú càa dóó-dẽ dàtná cáá dõó níhnú cue ñáyiú ñũhu vico-á<sup>n</sup>. <sup>12</sup>Te ní xãha<sup>n</sup>-dẽ xii tée-á<sup>n</sup>: “¿Tãta, nása ní cuu cuánguihu-õ iha, te ñà túú càa dóó-n dàtná cáá dõó níhnú cue ñáyiú ñũhu vico tñándaha-i?”, cächí-dé xãha<sup>n</sup>-dẽ xii tée-á<sup>n</sup>. Dico tée-á<sup>n</sup> ñà túú ní ñĩhí-dẽ tñũhu cáhá<sup>n</sup>-dé. <sup>13</sup>Te tée yĩndaha ñáyiú quide vico-á<sup>n</sup> ñĩ xãha<sup>n</sup>-dẽ xii cue ñáyiú xĩnu cuechi núú mèsá: “Chí tñí tẽ-á<sup>n</sup> te dacùtu-ndo-dé, te queñuhu-ndo-dẽ ná quĩh<sup>n</sup>-dé cundecu-dé ñ<sup>n</sup> xichi núú néé ñũú ño ndoho-dé, te yàcá<sup>n</sup> ío ndáhyú-dé te dicó rúhñú-nã cuu núhu-dé sá sàtú iní-dé sá ndóhó-dẽ”, cächí-dé xãha<sup>n</sup>-dẽ xii cue ñáyiú xĩnu cuechi núú mèsá-á<sup>n</sup>. <sup>14</sup>Te duha ndũu cuendú càhá<sup>n</sup>-í chí ío cuéhé ñáyiú càhá<sup>n</sup> ñàhá Yã Ndiõxí xií-yu, dico sacú-ni-yu nduu táhũ-yu cundecú-yu ndihí-gá —cächí-gá xãha<sup>n</sup>-gã xii-güedé.

### Cuendá impuèstú

(Mr. 12:13-17; Lc. 20:20-26)

<sup>15</sup>Te cue tée cùu fariséú ní sáhá<sup>n</sup>-güedé ñ<sup>n</sup> xichi ní ndatnúhu-güedé nàcuáa cada-güedé datìcanuu-güedé Jèsús núú tñũhu càhá<sup>n</sup>-gá cuendá duca<sup>n</sup> ñĩhí-güedé nàcuáa cada-güedé cacá<sup>n</sup> cuéchi-güedé cuendá-gá. <sup>16</sup>Te ní tendaha-güedé ñ<sup>n</sup> úú cue tée cùndihí-güedé, ndihí cue tée cùndihí té Hèrodés cuáhá<sup>n</sup>-güedé núú ndécú Jèsús. Te òrè ní quexìo-güedé núú ndécú-gã, te ní xãha<sup>n</sup>-güedé xii-gá:

—Mèstrú, ñĩhí-ndí tñũhu sá ño ndáá càhá<sup>n</sup>-n, te càhá<sup>n</sup> ndáá-n

nàcuáa càhá<sup>n</sup> Yă Ndiöxí cundecu-o ñùyíu-a, te cuěi nděda-ni càa ñáyíu ì<sup>n</sup>-ni càhá<sup>n</sup>-n ndìhí-yu chi ñá túú quide cuendá-n cuěi ná ñáyíu cùu-yu. <sup>17</sup>Te cachí tnúhu xii-ndí, núu váha-ni quide-ndí sá chăhu-ndí té Cèsár tée ío cùnūu cuendá impuèstú á<sup>n</sup> ñáhá —càchí-güedé xăha<sup>n</sup>-güedě xii-gá.

<sup>18</sup>Dico Jèsús ní cutnùní iní-gá sá xító ndèe ñáhá-güedě xii-gá, núu ní xăha<sup>n</sup>-gă xii-güedé:

—Nchòhó cue tée dândahú mée-xí sá quidé ndăá te ñá ndăá sá quidé ndăá-ndó, ìná cuendá xító ndèe ñáhá-ndó xii-í? <sup>19</sup>Chí dánèhé ñáhá xii-í ì<sup>n</sup> díhú<sup>n</sup> să chăhu-ndo cuendá impuèstú nūu nása càa —cachí-gá xăha<sup>n</sup>-gă xii-güedé.

Te ní dánèhé ñáhá-güedě xii-gá ì<sup>n</sup> díhú<sup>n</sup> să nání dènaríu. <sup>20</sup>Te òré ní xiní-gá díhú<sup>n</sup>-ă<sup>n</sup> te ní xícá<sup>n</sup> tnúhú-gă nūu-güedě, te xăha<sup>n</sup>-gă:

—Chí càchí tnúhu yoo nūu-xi ndèe ndìhi yoo ðū-xi ndeé —càchí-gá xăha<sup>n</sup>-gă xii-güedé.

<sup>21</sup>Te ní xăha<sup>n</sup>-güedě xii-gá:

—Núú tē Cèsár ndèe ndìhi ðū-dé —càchí-güedé xăha<sup>n</sup>-güedě xii-gá.

Te Jèsús ní xăha<sup>n</sup>-gă xii-güedé:

—Te núu duca<sup>n</sup> te chí nácuaăha té Cèsár sá cúu cuendá-dé, te sá cúu cuendá mée Yă Ndiöxí te xíă<sup>n</sup> nacuáha-ndo-gă —càchí-gá xăha<sup>n</sup>-gă xii-güedé.

<sup>22</sup>Te cue tée-á<sup>n</sup> ío ní cuñúhu-güedé sá dúcá<sup>n</sup> nĩ cáhá<sup>n</sup>-gá, te ní natnii-güedé ichi cuánuhú-güedé.

### Cuendá cue ñáyíu ndoto

(Mr. 12:18-27; Lc. 20:27-40)

<sup>23</sup>Te ðū-ni nduu-ă<sup>n</sup> nĩ quexío ì<sup>n</sup> túú cue tée cùu saducéú núu ndécú

Jèsús. Te cue tée-á<sup>n</sup> ñà túú sàndáá iní-güedé sá ndótó cuè ñáyíu ní xíhí, te ní xăha<sup>n</sup>-güedě xii-gá:

<sup>24</sup>—Mèstrú, ndíi Moisés ní cachí ndíi sá nūu ì<sup>n</sup> tée ndècu ñadìhí-xi cuú-dé te quendóo ñadìhí-dé, te núu ñá túú dēhe-dé ní xōo ndìhi-a<sup>n</sup> te tée cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo dēhe-dé ndìhi-a<sup>n</sup> cuendá ñaní-dé tée ní xíhí-á<sup>n</sup>. <sup>25</sup>Te ñūú-ndí-a ní xíndecu úsá tnàhá cue tée mee-ni ndì ñaní-güedé. Te tée díhna ní níhí ñadìhí-dé te ñá túú ní cùdii-dé cundecu-dé chi ní xíhí-dé, te ni ì<sup>n</sup> dēhe-dé ñá túú ní xōo ndìhi ñadìhí-dé-á<sup>n</sup>. Te tée cùu uú ní nàquehe<sup>n</sup>-dé ñaha ní quendóo quèé-á<sup>n</sup>. <sup>26</sup>Dico ní xíhí tucu-dé, te ni ì<sup>n</sup> tucu dēhe-dé ñá túú ní xōo ndìhi ñaha-á<sup>n</sup>, te ðū-ni duca<sup>n</sup> nĩ yáha tée cùu uní, te ní xínu ndi ùsá-güedé ní cándeca ñaha-güedě xii ñaha-á<sup>n</sup> dico ðū-ni duca<sup>n</sup> nĩ xíhí-güedé. <sup>27</sup>Te ndéé núú ní ndìhi-ná te ní xíhí tnàhá ñadìhí-á<sup>n</sup>.

<sup>28</sup>Te na sàà nduu ndòto-güedé ndìhi ñaha-á<sup>n</sup>, ìte ndèdacàa-güedé ñadìhí-güedé cuu-a<sup>n</sup>-i? Chi ndi ùsá-güedé ní cándeca ñaha-güedě xii-a<sup>n</sup> —càchí-güedé xăha<sup>n</sup>-güedě xii-gá.

<sup>29</sup>Te Jèsús ní xăha<sup>n</sup>-gă xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xìní-ndó nàcuáa càhá<sup>n</sup> Yă Ndiöxí núu tütú-gá, te ni ñà túú cùnūnì iní-ndó să díú-gă ndácú-gă quidé-gă nchaandì túhú sá văha.

<sup>30</sup>Te na càchí tnúhu-í xii-ndo să òré ná sàà nduu ndòto nchaa ñáyíu ní xíhí, te dàvá-á<sup>n</sup> vă yōo-gá dasa<sup>n</sup> dēhe yoco-xi chi vá yōo-gá candeca tnàha, chi cuu-ná-yu dàtná cue

espíritú xínú cuèchi núú Yă Ndiöxí. <sup>31</sup>¿Te náa ñá túú quide cuendá-ndó nàcuáa càhá<sup>n</sup> Yă Ndiöxí núú tütú-gá núú càhá<sup>n</sup>-gá cuendá cue ñáyiú ní xíhí-ă<sup>n</sup>? Te duha càchí-gá: <sup>32</sup>“Yúhú cùu-í Ndiöxí tē Ābrahám, ndíhi té Isàác, ndíhi té Jàcób”, duha càchí-gá núú tütú-gá. Te cue tée-á<sup>n</sup> chi cuèi ní xíhí-güedé núú ñùyíú-a, dico sá cúu-xí Yă Ndiöxí chi ndècu vívú-ni-güedé. Chi ñiú-gá cúu-gă Ndiöxí mee-ni cuè ñáyiú xĩndecu vívú, te ñá túú cùu-gá Ndiöxí cue ñáyiú ñá túú ndècu vívú —càchí-gá xăha<sup>n</sup>-gă xii-güedé.

<sup>33</sup>Te sá dúcá<sup>n</sup> ñí càhá<sup>n</sup>-gá ní xíi-gá cue tée-á<sup>n</sup>, te ío ní cuñúhu nchaa ñáyiú cuendá sá ïo váha ndùu tnúhu ní càhá<sup>n</sup>-gá.

#### **Tnúhu sá ïo-gá cúnùu**

(Mr. 12:28-34)

<sup>34</sup>Te cue tée cùu fariséú ní xiní-güedé ní sadí Jèsús yuhu cue tée cùu saducéú, chi ñá túú ní ñíhí-gă-güedé tnúhu cúnaha-güedé xii-gá, te cue tée cùu fariséú-á<sup>n</sup> ñí nataká-güedé te cuáhá<sup>n</sup>-güedé núú ndécú Jèsús. <sup>35</sup>Te ñí<sup>n</sup> tée cùu fariséú-á<sup>n</sup> ïo váha cùtnuní iní-dé nàcuáa ndùu nchaa tnúhu ní chídó tnùní ndíi Moisés te xito ndeé-dé Jèsús, te xăha<sup>n</sup>-dē xii-gá:

<sup>36</sup>—Mèstrú, cachí tnúhu ndēdacàa tnúhu sá ñí chídó tnùní ndíi Moisés ío-gá cúnùu cada-o —cachí-dé xăha<sup>n</sup>-dē xii-gá.

<sup>37</sup>Te Jèsús ní xăha<sup>n</sup>-gă xii-dé: —Duha càhá<sup>n</sup> tnúhu sá ïo-gá cúnùu: “Cuu iní-ndó Dítú Ndiöxí Yáa cúu Ndiöxí-ndó ñi yuhu ní iní-ndó, te caní iní-ndó càda-ndo datná cuiní meé-gă, te mee-ni

tnúhu váha caní iní-ndó nàcuáa cuu víi cuu váha-ndo núú-gă”, <sup>38</sup>duha càhá<sup>n</sup> tnúhu sá ïo-gá cúnùu. <sup>39</sup>Te duha càhá<sup>n</sup> tucu ingá tnúhu cùu uú sá ïo cúnùu, te sa yatni ñí<sup>n</sup>-ni cùu-xi ndíhi tnúhu díhna nuu, te càchí-xi: “Cuu iní-ndó tnàha ñáyiú-ndo dàtná cúu iní-ndó mēe-ndo”, duha càhá<sup>n</sup> tnúhu cùu uú-á<sup>n</sup>. <sup>40</sup>Te cuendá úu tnúhu-a ní cáá nchaa tnúhu ní càhá<sup>n</sup> ndíi Moisés nàcuáa cada ñáyiú, te ñiú-ni cuendá úu tnúhu-a ní cáá tnúhu ní càhá<sup>n</sup> nchaa cue tée ní xóo càhá<sup>n</sup> tnúhu Yá Ndiöxí ndéé sanaha —càchí-gá xăha<sup>n</sup>-gă xii-güedé.

#### **Yoo cùu Xítohó Jesucristú**

(Mr. 12:35-37; Lc. 20:41-44)

<sup>41</sup>Te ndècu duca<sup>n</sup>-ni cue tée cùu fariséú núú ndécú Jèsús. <sup>42</sup>Te ní xícá<sup>n</sup> tnúhú-gă núú-güedé, te xăha<sup>n</sup>-gă: —Cuñí-í cachí tnúhu-ndo yòo déhe-xi cùu Cristú Yáa tendaha Yă Ndiöxí quixi ñuyíú-a —càchí-gá xăha<sup>n</sup>-gă xii-güedé.

Te ní xăha<sup>n</sup>-güedé xii-gá: —Déhe ndíi Dàvíí cúu Yàa-á<sup>n</sup> —càchí-güedé xăha<sup>n</sup>-güedé xii-gá.

<sup>43</sup>Te Jèsús ní xăha<sup>n</sup>-gă xii-güedé:

—¿Te nása càchí-tu-ndo să déhe ndíi Dàvíí cúu Cristú Yáa tendaha Yă Ndiöxí quixi ñuyíú-a, te mee ndíi Dàvíí-á<sup>n</sup> ñí dácáhu iní ñáhá Espíritú Yă Ndiöxí xii ndíi, te ní cachí ndíi sá Cristú Yáa tendaha Yă Ndiöxí quixi ñuyíú-a cùu-gá Xítohó ndíi? Te duha ní cachí ndíi:

<sup>44</sup>Dítú Ndiöxí ní xăha<sup>n</sup>-gă xii Yáa cúu Xítohó-í:

“Ngóo xio cùha-í, te yúhú cada-í te nchaa sá cúu ũhú iní ñáhá xii-n canehe-xi sá yíñùhu núú-n.”

Duha ní xáha<sup>n</sup> Dútú Ndiöxí xii Yaá cúu Xítohó-í, cächí ndíi. <sup>45</sup>¿Te nása cùu Cristú déhe ndíi Dàvíí, te mee ndíi ní cachí ndíi sá cúu-gǎ Xítohó ndíi? —cächí Jèsús xáha<sup>n</sup>-gǎ xii-güedé.

<sup>46</sup>Te ni ì<sup>n</sup>-güedé ñá túú-gǎ ní nìhí-güedé tnúhu cùñaha-güedé xii-gǎ. Te ndéé nduu-ǎ<sup>n</sup> ñà túú-gǎ ní cùyii-güedé ná tnúhu cacá<sup>n</sup> tnúhú-güedé núú-gǎ.

**Jèsús càhá<sup>n</sup>-gǎ cuendá cue tée cùu fariséú ndíhi cuendá cue tée dàcuaha ñaha xii ñáyiú**

(Mr. 12:38-40; Lc. 11:37-54; 20:45-47)

**23** Te Jèsús ní càhá<sup>n</sup> ndodo-gǎ núú nchàa ñáyiú, ndíhi núú cuè tée xica cuu ndíhi-gǎ, te xáha<sup>n</sup>-gǎ:

<sup>2</sup>—Cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi cue tée cùu fariséú ndécú ndíhi-güedé tnúhu ndee ìní càhá<sup>n</sup>-güedé nchaa tnúhu sá nì chídó tnùní ndíi Moisés-á<sup>n</sup>.

<sup>3</sup>Te cada-ndo nàcuáa dànehé ñáhá-güedé xii-ndo, dico vá cadá-ndó dàtná xíquide-güedé, chi tucu ndùu tnúhu càhá<sup>n</sup>-güedé, te tucu quide-güedé. <sup>4</sup>Te quide-güedé dàtná quidé ñáyiú dàcuído ì<sup>n</sup> tnaha ñáyiú-xi ì<sup>n</sup> sá ïo véé, te mée-yu ni lùha ñá túú cuíní-yu cuidó-yu. Te duca<sup>n</sup> sǎtnahá-xi cùu-güedé chi dànehé ñáhá-güedé xii-ndo nàcuáa cada-ndo, dico mee-güedé chi ni lùha ñá túú cuíní-güedé cada-güedé nàcuáa dànehé ñáhá-güedé xii-ndo.

<sup>5</sup>Te mee-ni ndùcu-güedé nàcuáa quide-güedé cuendá quiní ñáyiú sá ïo cùu cahnu-güedé. Te ndéé xindá sá ndèé ì<sup>n</sup> úú tnúhu Yá Ndiöxí

tneé-güedé ndíhi ndaha-güedé, te tnàhá ìní-güedé sá ïo-gǎ cunduu quèhé<sup>n</sup> xindá-á<sup>n</sup> dàcúúxí xindá dava-gǎ ñáyiú. Te tnàhá tucu ìní-güedé sá ïo-gǎ cunduu nàni núú dǒó sácuíhnu-güedé dàcúúxí dǒó sácuíhnu dava-gǎ-yu. <sup>6</sup>Te ndí tnahá òré sácǒo vico, òré quíhu-güedé mèsá caxi-güedé te ïo-gǎ cúdíí ìní-güedé cunucóo-güedé núú xilé núú sácǒo cue tée cùnuu-gǎ, te diu-ni duca<sup>n</sup> quide tucu-güedé cuéi xití veñúhu. <sup>7</sup>Te nchaa núú xíca cùu-güedé cuíní-güedé sá ndíhi tnúhu yinúhu càhá<sup>n</sup> ndíhi ñaha ñáyiú xii-güedé, te cuíní tucu-güedé sá cùñahá-yu xii-güedé mèstrú.

<sup>8</sup>Dico nchòhó vá cùñaha-ndo xii ñáyiú sá cùñahá-yu mèstrú xii-ndo, chi nchòhó ì<sup>n</sup>-ni cùu-ndo ndecu-ndo, chi duca<sup>n</sup> ì<sup>n</sup>dii-ni yúhú Yaá ní tendaha Yá Ndiöxí véxi ñuyúú-a cùu-í Mèstrú ndécú ndíhi ñaha-í xii-ndo. <sup>9</sup>Te ì<sup>n</sup>dii-ni Dútú Ndiöxí Yaá ndécú àndiú cuu-gǎ Tǎtá-ndó, núú xíá<sup>n</sup> vá càhá<sup>n</sup>-ndó sǎ dàva cue tée ñuyúú-a cùu-güedé tǎtá-ndó. <sup>10</sup>Te ni vá cání ìní-ndó càda-ndo nàcuáa càhá<sup>n</sup> ñáyiú sá cùnùu-ndo, chi ì<sup>n</sup>dii-ni yúhú Cristú Yaá ní tendaha Yá Ndiöxí véxi ñuyúú-a cùnuu-í. <sup>11</sup>Te ñáyiú ïo-gǎ cùnùu ndecu ndíhi-ndo, ñáyiú-á<sup>n</sup> cúú-yu ñáyiú xínu cuechi núú-ndó. <sup>12</sup>Te nchaa ñáyiú quide cahnu mee-xi ñáyiú-á<sup>n</sup> vá cúú-yu ñáyiú cùnuu, te nchaa ñáyiú ñá túú quide cahnu mee-xi ñáyiú-á<sup>n</sup> cùnùu-yu.

<sup>13</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cùu-ndo cue tée ïo dàndahú mée-xí sǎ quidé

ndáa te ñá ndáa sá quidé ndáa-ndó, te ndàhú ní cuu-ndo chi sàdí-ndó ìchi ñáyíu ñá dáñá-ndó ndíhu ndaha ñàha Yá Ndiöxí xií-yu, te ni mèe-ndo ñá túú quíde-ndo nacuaáa ndíhu ndaha ñàha-gá xii-ndo, te ni dàva-gá cue ñáyíu cuiní sá ndíhu ndaha ñàha-gá xií-yu ñá dáñá-ndó.

14<sup>o</sup>Te nchòhó cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúu-ndó cuè tée ío dándahú mée-xí sá quidé ndáa te ñá ndáa sá quidé ndáa-ndó, te ndàhú ní cuu-ndo chi quèndeé-ndó vèhe cue ñáyíu quèé, te ío naha càhá<sup>n</sup> ndíhi-ndo Yá Ndiöxí cuendá cuiní-ndó sá vã yõ cutnùní iní-xi nàcuáa quíde-ndo. Te sá dúcá<sup>n</sup> quíde-ndo te ío-gá ndoho-ndo núú ùhú núú ndàhú dàcúúxí dàva-gá ñáyíu.

15<sup>o</sup>Te nchòhó cue tée dàcuaha ñaha xii ñáyíu nchaa tnúhu ní chídó tnùní ndíi Moisés, ndíhi nchòhó cue tée cùu fariséú, cúu-ndó cuè tée ío dándahú mée-xí sá quidé ndáa te ñá ndáa sá quidé ndáa-ndó, te ndàhú ní cuu-ndo chi sàhni iní-ndó cuãhá<sup>n</sup>-ndó ndèni ní cuu dàcahá<sup>n</sup>-ndó ñáyíu cuendá cuiní-ndó tníi-yu ichi ndècu-ndo. Te òré ná xínu iní-yu tnií-yu ichi ndècu-ndo-á<sup>n</sup> te uu<sup>n</sup>-gá cuíta nihnú-yu dàcúúxí mée-ndo.

16<sup>o</sup>Te nchòhó cúu-ndó datná cue ñáyíu cuàá, chi ñá cútùní iní-ndó nàcuáa canu ichi-ndo ñáyíu, te ndàhú ní cuu-ndo chi càchí-ndó: “**H**<sup>n</sup> ñáyíu na càcunehe veñúhu càhnu sá ío cùnuu òré cuiní-yu cutnùní iní tnàha ñáyíu-yu sá ndáa cadá-yu **ii**<sup>n</sup> sá sání iní-yu cadá-yu, te vã cúú

cuèchi xií-yu cuèi vã cadá-yu. Dico núu na càcu nehé-yu díhú<sup>n</sup> cuàá<sup>n</sup> yíhí xítí veñúhu-á<sup>n</sup> te cuu cuèchi xií-yu te núu vã cadá-yu sá ñí cachí-yu cadá-yu”, duha càchí-ndó.

17<sup>o</sup>iNchòhó cúu-ndó cuè tée ío ñíi ðíquí-xi, te cùu-ndo datná cue ñáyíu cuàá chi ñá tècú tnùní-ndó! Te vã càchí-ndó sã ïo-gá cùnùu díhú<sup>n</sup> cuàá<sup>n</sup> dàcúúxí veñúhu, chi ðíu cuendá veñúhu-á<sup>n</sup> ñí cuu íí díhú<sup>n</sup> cuàá<sup>n</sup>-á<sup>n</sup>. 18<sup>o</sup>Te càchí tucu-ndo: “**H**<sup>n</sup> ñáyíu na càcunehe xító núú sácòdó sã ndúú tãhú Yá Ndiöxí òré cuiní-yu cutnùní iní tnàha ñáyíu-yu sá ndáa cadá-yu **ii**<sup>n</sup> sá sání iní-yu cadá-yu, te vã cúú cuèchi xií-yu cuèi vã cadá-yu, dico núu na càcu nehé-yu sá ndúú tãhú Yá Ndiöxí yódó núú xító-á<sup>n</sup> te cuu cuèchi xií-yu te núu vã cadá-yu sá ñí sani iní-yu cadá-yu”, duha càchí-ndó. 19<sup>o</sup>Te cùu-ndo cue tée ío ñíi ðíquí-xi, te cùu-ndo datná cue ñáyíu cuàá chi ñá tècú tnùní-ndó! Te vã cání iní-ndó sã ïo-gá nándíhi sá ndúú tãhú Yá Ndiöxí sácòdó núú xító núú sácòdó tnàhí sá ndúú tãhú-gã-á<sup>n</sup> dàcúúxí mée xító-á<sup>n</sup>. 20<sup>o</sup>Chi nchaa ñáyíu duca<sup>n</sup> càcunehe xító-á<sup>n</sup>, te tnàhá-ni sá yódó núú-xi càcu nehé-yu òré duca<sup>n</sup> càhá<sup>n</sup>-yu. 21<sup>o</sup>Te nchaa ñáyíu duca<sup>n</sup> càcunehe veñúhu càhnu sá ío cùnuu te ñá ðíú mée-ni veñúhu càcu nehé-yu òré duca<sup>n</sup> càhá<sup>n</sup>-yu, chi tnàhá-ni Yá Ndiöxí Yaá cúú cuendá veñúhu-á<sup>n</sup> cáci nèhé-yu òré duca<sup>n</sup> càhá<sup>n</sup>-yu. 22<sup>o</sup>Te nchaa ñáyíu càcunehe andíu cuendá cutnùní iní tnàha ñáyíu-yu sá ndáa cadá-yu **ii**<sup>n</sup> sá sání iní-yu cadá-yu, te ñá ðíú mée-ni andíu cacu nehé-yu chi tnàhá-ni núú

núcõo Yá Ndiõxí táxí tnùní-gá cáciu nèhé-yu òré duca<sup>n</sup> càhá<sup>n</sup>-yu, te tnàhá mée-gã cáciu nèhé-yu òré duca<sup>n</sup> càhá<sup>n</sup>-yu.

<sup>23</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue tée cùu fariséú, cúú-ndó cuè tée ío dándahú mée-xí sã quidé ndǎá te ñá ndàá sá quidé ndǎá-ndó. Te cuèi núú ùxí xichi yúcu mèná nihí-ndó, te sǎñaha-ndo ì<sup>n</sup> xichi xii Yá Ndiõxí, te ñiú-ni duca<sup>n</sup> quíde-ndo yúcu nání ànís, ndihi yúcu nání còminú, dico ndàhú ní cuu-ndo chi ñá túú quíde cuendá-ndó nàcuáa càhá<sup>n</sup> nchaa tnúhu sá ño-gá cúnúu sanu ichi ñaha xii-ndo, te tnúhu-á<sup>n</sup> cǎchí-xi sá ño xini ñuhu-xi cada ndǎá-ndó cùndecu-ndo, te cundàhú iní-ndó cuè tnaha ñáyiú-ndo, te quíndáá iní-ndó Yá Ndiõxí, te cada-ndo nchàa nacuáa ndùu tnúhu càhá<sup>n</sup>-ndó, te nchaa tnúhu-á<sup>n</sup> cúú-xí tnúhu sá ño cúnúu xini ñuhu-xi cada-ndo nacuáa càhá<sup>n</sup>-xi, dico vá dáñá ndèè-ndó càda-ndo nchaa dava-gá nàcuáa càhá<sup>n</sup> tnúhu sá sánú ichi ñaha xii-ndo. <sup>24</sup>Te nchòhó cúú-ndó dàtná cue ñáyiú cuáá, chi ñá túú cùnnumí iní-ndó nàcuáa canu ichi-ndo ñáyiú, chi quíde cuendá-ndó mée-ni nchaa tnúhu sá ñá túú ño cúnúu, dico nchaa tnúhu sá ño-gá cúnúu xini ñuhu-xi cada cuendá-ndó ñá túú quíde cuendá-ndó!

<sup>25</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue tée cùu fariséú, cùu-ndo cue tée ío dándahú mée-xí sã quidé ndǎá te ñá ndàá sá quidé

ndǎá-ndó. Te ndàhú ní cuu-ndo chi cùu-ndo datná cue ñáyiú nàquete sátá-ni tàsá<sup>n</sup> ndihi sátá-ni còhó te xití-xi càndehe caduha-ni. Te duca<sup>n</sup> sǎtnahá-xi cùu-ndo chi mee-ni sã ndécú ndihi tnaha ñáyiú-ndo ñuhu iní-ndó, te nándi dándahú-ndó-yu te quèhe<sup>n</sup>-ndo sá ndécú ndihí-yu.

<sup>26</sup>Te nchòhó cue tée cùu fariséú, cúú-ndó dàtná cue ñáyiú cuáá, chi ñá túú cùnnumí iní-ndó nàcuáa ndùu sá quidé-ndó. Te ío xini ñuhu-xi sá cádá-ndó nàcuáa nduu ndoo nduu nine iní-ndó cuèndá ndacu-ndo càda-ndo sá vǎha, te xǎ<sup>n</sup> nùu chí cádá dàtná xǎquide ñáyiú nàquete ndaa xití tàsá<sup>n</sup> ndihi ndàa xití còhó.

<sup>27</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue tée cùu fariséú, cùu-ndo cue tée ío dándahú mée-xí sã quidé ndǎá te ñá ndàá sá quidé ndǎá-ndó. Te ndàhú ní cuu-ndo chi cùu-ndo datná núú yíndùxi ndíyi núú nì cuáha vii te ní nacáhyú sã cuìxí<sup>n</sup>, dico xití yaú-á<sup>n</sup> chi càndehe caduha chi mee-ni yìqui ndíyi ñuhu. <sup>28</sup>Te duca<sup>n</sup> sǎtnahá-xi cùu-ndo chi sànuu sá cúú-ndó cuè tée váha dico iní-ndó chi mee-ni sã cuèhó sá dúhá ñuhu, te ío dándahú-ndó mée-ndo sá quidé ndǎá-ndó te ñá ndàá sá quidé ndǎá-ndó.

<sup>29</sup>Te nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue tée cùu fariséú, cúú-ndó cuè tée ío dándahú mée-xí sã quidé ndǎá te ñá ndàá sá quidé ndǎá-ndó. Te ndàhú ní cuu-ndo chi càdúha-ndo nchàa núú ní nguíndùxi cue tée ní xóo càhá<sup>n</sup>

tnúhu Yá Ndiöxí ndéé sanaha, te ío vii quide-ndo nchaa núú sã ní cuáha núú yíndüxi cue ñáyiú ní quide váha ní xíndecu ñuyíú-a. <sup>30</sup>Te cächí-ndó: “Te núú dícó nchoo ní xíndecu-o cütñahá ní xíndecu cue ñaní tnáhá-ó ndéé sanaha, te vá chítñahá-ó-güedě cahni-o cuè téé ní xóo cáhá<sup>n</sup> tnúhu Yá Ndiöxí dává-á<sup>n</sup> ní cùu”, duha cächí-ndó. <sup>31</sup>Te sá dúcá<sup>n</sup> cáhá<sup>n</sup>-ndó, te xǎ<sup>n</sup> cütñuní sá íí<sup>n</sup>-ní cùu-ndo ndíhi cue ñaní tnáhá-ndó cuè téé ní xíndecu ndéé sanaha, cue téé ní sahni ñaha xii cue téé ní cáhá<sup>n</sup> tnúhu Yá Ndiöxí dává-á<sup>n</sup>. <sup>32</sup>Te núú duca<sup>n</sup> te chí dǎxínu cava chiu<sup>n</sup> ní tausaha-güedě.

<sup>33</sup>Te nchòhó cùú-ndó cuè téé ío cuihna iní-xi, chí cùu-ndo datná cóó dǎé<sup>n</sup>! Te nchòhó vá nihí-ndó nàcuáa cada-ndo cǎcu nihnu-ndo núú úhú núú ndàhú. <sup>34</sup>Te cuèndá xǎ<sup>n</sup> núu tendaha-í cue téé cáhá<sup>n</sup> tnúhu Yá Ndiöxí quixi núú-ndó, ndíhi cue téé cùu mestrú danèhé ñáhá xii-ndo tnúhu-gá, ndíhi cue téé ío váha cütñuní iní-xi cuèndá cáhá<sup>n</sup>-güedé tnúhu-gá núú-ndó. Dico nchòhó chí da cùu úhú iní-ndó-güedě, chí dava-güedé cahni-ndo-güedě, te dava-güedé cata caa-ndo-güedě núú cùrúxí, te dava-güedé cani-ndo-güedě xití veñúhu, te ndi tnahá ñuú ndi tnahá ñuú quíhí<sup>n</sup>-ndó nànducu-ndo-güedé cuèndá cada úhú iní-ndó-güedě. <sup>35</sup>Te sá dúcá<sup>n</sup> ná càda-ndo, te ndadíquí-ndó cuè téé ní quide ndáá ní xíndecu ní xíhí ní sahni ñaha cuè ñaní tnáhá-ndó. Te ndéé ndíi Àbél téé ío váha ní quide ndáá ní xíndecu ní sahni-güedé ndadíquí-ndó, ndíhi nchaa dava-gá cue téé ní sahni-güedé, ndíhi ndéé

ndíi Zacàriá déhe ndíi Berèquíás téé ní sahni-güedé ndéé núú ní ndíhi-ná ndadíquí-ndó, te ndíi-á<sup>n</sup> ní sahni-güedé mei tnúú veñúhu càhnu sá ío cùnuu ndíhi xító núú sácódó sã ndúú tǎhú Yá Ndiöxí, te nchaa cue téé-á<sup>n</sup> ndadíquí-ndó chí dàtná tnúhu mee-ndo ní sahni-ndo cuè téé-á<sup>n</sup>, chí ñu-ni ñaní tnáhá mèe-ndo duca<sup>n</sup> ní sahni ñaha xii-güedé. <sup>36</sup>Te na cächí tnúhu ndáá-í xii-ndo sã nchaa cue téé ní quide ndáá ní xíndecu ní sahni-güedé, nchaa cue téé-á<sup>n</sup> ndadíquí nchaa ñáyiú ndècu vitna —cachí-gá xǎha<sup>n</sup>-gǎ xii-güedé.

**Jèsús cáhá<sup>n</sup>-gá cuèndá ñáyiú ñuú  
Jerusalén**

(Lc. 13:34-35)

<sup>37</sup>Te xǎha<sup>n</sup> Jèsús xii ñáyiú ñuú  
Jerusalén:

—Nchòhó ñáyiú ñuú Jerusalén sàhni-ndo cue téé ní tendaha Yá Ndiöxí véxi cáhá<sup>n</sup> tnúhu-gá núú-ndó, te mee-ni ndíhi yúú sáhní-ndó dáva-güedé. Te yúhú titní xito ní cuiní-í coto ñaha-í xii-ndo dàtná quidé nchùxi xito-güedi déhe-güedi sàquíhi-güedi xití ndíxí<sup>n</sup>-güedi, dico nchòhó ñá túú ní cuiní-ndó, te ñu-ni duca<sup>n</sup> sàni iní-í ndéé vitna! <sup>38</sup>Te na cächí tnúhu ndáá-í xii-ndo sã sàá nduu te ío ndàhú yáha ñuú-ndó, te vá cùndecu-gá-ndó. <sup>39</sup>Te na cächí tnúhu tucu-í xii-ndo sã vǎ quini ñáhá-gǎ-ndó xii-í, dico sáá nduu quini ñáhá tucu-ndo, te dává-á<sup>n</sup> cachí-ndó: “Ío càhnu cuu Yaá ní tendaha Dütú Ndiöxí véxi”, duha cachí-ndó —cächí-gá xǎha<sup>n</sup>-gǎ xii-yu.

**Jèsús cächí-gá sá ngóyó veñúhu***(Mr. 13:1-2; Lc. 21:5-6)*

**24** Te Jèsús ní quee-gá veñúhu cànhu sá ìo cùnunu, te mei òré ní quehe<sup>n</sup>-gá ichi quíhí<sup>n</sup>-gá ìí<sup>n</sup> xichi, te ní sándehe yatni cue tée xìca cuu ndìhi-gá dñi-gá, te xáha<sup>n</sup>-güedě xii-gá:

—Cundehe veñúhu-a nǎ ìo váha ní sáá —cächí-güedě xáha<sup>n</sup>-güedě xii-gá.

<sup>2</sup>Te Jèsús ní xáha<sup>n</sup>-gǎ xii-güedě:

—Na cächí tnúhu ndáá-í xii-ndo sǎ ncháá sǎ ndéhé-ndó-á vítna saá nduu te vá cündüu-gá-xi dàtná cáá-xí vítna, chi ní ìí<sup>n</sup>-gá yúú vǎ códó nchìhi tnaha-xi chi ndìhi ngoyo —cächí-gá xáha<sup>n</sup>-gǎ xii-güedě.

**Nàcuáa cada-xi nduu ta cùyatni naa ñuyúu-a***(Mr. 13:3-23; Lc. 21:7-24; 17:22-24)*

<sup>3</sup>Te Jèsús ní sáá-gá ndìhi cue tée xìca cuu ndìhi-gá yucu Òlívú, te xíá<sup>n</sup> nǐ ngóo-gá te núú núcõo-gá-á<sup>n</sup> nǐ sáhá<sup>n</sup> cue tée xìca cuu ndìhi-gá, te dayuhu nǐ xáha<sup>n</sup>-güedě xii-gá:

—Cuìní-ndí cachí tnúhu-n nǎ nduu dùca<sup>n</sup> cada-xi ngoyo veñúhu cànhu sá ìo cùnunu, ndìhi nándí cùu sá cádá-xí òré sa ta cùyatni nduu quixi tucu-n ñuyúu-a, ndìhi òré sa ta cùyatni naa-xí —cachí-güedě xáha<sup>n</sup>-güedě xii-gá.

<sup>4</sup>Te Jèsús ní xáha<sup>n</sup>-gǎ xii-güedě:

—Ìo quíhi iní-ndó cündecu-ndo cuendá sá vǎ yõ dandàhú ñáhá xii-ndo. <sup>5</sup>Chi ìo cuéhé cue tée coo ñuyúu, te danàni-güedě méé-güedě dàtná nání-í, te cachí-güedě: “Yúhú cùu-í Cristú

Yaá ní tendaha Yǎ Ndiõxí véxi ñuyúu-a”, duha cachí-güedě. Te sá dúcá<sup>n</sup> cǎhá<sup>n</sup>-güedě te ìo vǎi ñáyiu dandàhú-güedě. <sup>6</sup>Te níhi-ndó tnúhu nàá-güedě ndèni ní cuu, dico vá yùhú-ndó chi dacuitíí sǎ dúcá<sup>n</sup> càda-xi, dico vátá sàá-gá nduu nàa ñuyúu òré duca<sup>n</sup> càda-xi. <sup>7</sup>Chi cue tée ìí<sup>n</sup> nàció<sup>n</sup> nàá-güedě ndìhi cue tée ingá nàció<sup>n</sup>, te titní ñuu ngúita-güedě nàá-güedě, te titní xichi ñuyúu coo tnamá, te titní tucu xichi ñuyúu quixi cuéhé, te titní tucu xichi ñuyúu ìo níhi tnáa. <sup>8</sup>Te nchaa xǎ<sup>n</sup> cuu-xi tnúndòho sá vítná vǎha váha quèsaha sá cúu-xí cuè ñáyiu xíndecu ñuyúu.

<sup>9</sup>Te cue ñáyiu na cùu úhú iní ñáhá xii-ndo cuáha cuendá ñáhǎ-yu núu cuè tée cùchiu<sup>n</sup> cuendá caniha-güedě xii-ndo, te dava-ndo cànhi ñaha-güedě, te nchaa ñáyiu cuu úhú iní ñáhǎ-yu xii-ndo sǎ cuendá-í. <sup>10</sup>Te dàvá-á<sup>n</sup> ìo vǎi ñáyiu dàñá-yu sá sàndáá iní-yu Yǎ Ndiõxí, te ngóo-yu cuu úhú iní tnáhǎ-yu, te cuáha cuendá tnáhǎ-yu núu cuè tée cùchiu<sup>n</sup>. <sup>11</sup>Te ìo vǎi cue tée cachí-güedě sá cǎhá<sup>n</sup>-güedě tnúhu Yǎ Ndiõxí te ñǎ ndàá sá cǎhá<sup>n</sup>-güedě tnúhu-gá, te duca<sup>n</sup> ìo vǎi ñáyiu dandàhú-güedě. <sup>12</sup>Te dàvá-á<sup>n</sup> cunuu mèe-ni nchaa sá cuéhé sá dúhá cadá-yu, te vǎi-yu vá cúu iní-gá-yu tnàha ñáyiu-yu. <sup>13</sup>Dico nchaa ñáyiu na càda ndee-ni iní canchicú<sup>n</sup> nihnu ñaha-ni xii-í, ñáyiu-á<sup>n</sup> naníhí tàhú-yu. <sup>14</sup>Te nihí ñuyúu quíhí<sup>n</sup> ñáyiu cǎhá<sup>n</sup>-yu tnúhu váha, tnúhu sá cǎhá<sup>n</sup> nàcuáa ndíhu ndaha ñàha Yǎ Ndiõxí xii ñáyiu, te sátá ná nihí nchaa ñáyiu tnúhu-á<sup>n</sup> te naa ñuyúu.



15"Te ndíi Dàniél téé ní xóo cáhá<sup>n</sup> tnúhu Yá Ndiöxí ndéé sanaha ní chídó tnúní ndíi cuèndá ìí<sup>n</sup> sá dáquèe tihú Yá Ndiöxí cundecu ìí<sup>n</sup> xichi núú ní cuu íí, te xíá<sup>n</sup> cada-xi sá vâ cúndècu-gá ni ìí<sup>n</sup> ñáyiú xíá<sup>n</sup>. Te cada cuèndá váha-ndo nàcuáa ní cáhá<sup>n</sup> ndíi, chi nduu na quíní-ndó xíá<sup>n</sup> cundecu-xi núú dúcá<sup>n</sup> ní cuu íí, 16te dàvá-á<sup>n</sup> nchaa ñáyiú xíndecu distrítu Jùdeá xíní ñùhu-xi cunú-yu quíhí<sup>n</sup>-yu xítí yucu. 17Te nchaa ñáyiú ndáa ndódó ðíquí véhé-xí vâ ndíhu-gá-yu vehé-yu quehé<sup>n</sup>-yu ìí<sup>n</sup> ndachíú<sup>n</sup>-yu canehé-yu quíhí<sup>n</sup>. 18Te nchaa ñáyiú cuáhá<sup>n</sup> yucu vâ nùhú-gá-yu vehé-yu cúnúquehé<sup>n</sup>-yu dóó-yu. 19"Te ndàhú ní cuu nchaa ñáyiú ðíhí ñùhú ðèhe-xi, ndíhi cue ñáyiú ðíhí xíndeca déhe vitna sàdi na saá nduu dùca<sup>n</sup> cada-xi! 20Te nchòhó, chí càcá<sup>n</sup> táhú nùú Yá Ndiöxí cuèndá sá vâ dúcá<sup>n</sup> ndòho-ndo yóo quídé vîxí<sup>n</sup>-xi, te ni vâ dúcá<sup>n</sup> ndòho-ndo nduu cuu-xi nduu ndetatú-ndó. 21Chi dàvá-á<sup>n</sup> coo tnúndòho cahnu vihi ñuyúú, te vátá ìí<sup>n</sup> ndùu-gá coo tnúndòho cahnu vihi-á<sup>n</sup> ndéé cútnáhá ní ngáva ñuyúú, chi diu-ni dàvá-á<sup>n</sup> coo tnúndòho cahnu vihi-á<sup>n</sup>, te ni nùú cuáhá<sup>n</sup> núú véxi vâ cóo-gã tnúndòho-á<sup>n</sup>. 22Te Yá Ndiöxí càchí-gá sá vâ ìo vâi nduu coo tnúndòho cahnu vihi-á<sup>n</sup> sã cuèndá nchaa ñáyiú ní cáhá<sup>n</sup>-gá cundecu ndíhi-gá. Chi núú vâi nduu na coo tnúndòho-á<sup>n</sup> te vâ yóo cácu nihnu. 23"Te núú ìó ñáyiú càchí-yu xii-ndo: "Chí cúndèhe iha, chi iha ní quexìo Cristú Yáa ní tendaha Yá Ndiöxí véxi ñuyúú-a", àdi cachí-yu: "Chí cúndèhe yacá<sup>n</sup> chi

yacá<sup>n</sup> ndécú-gã", càchí-yu ña. Te vâ quèndáá iní-ndó tnúhu càhá<sup>n</sup>-yu. 24Chi coo cue téé cachí-güedé sá cúu-güedé Yáa ní tendaha Yá Ndiöxí véxi ñuyúú-a, te dava-güedé cachí-güedé sá cúu-güedé cue téé càhá<sup>n</sup> tnúhu Yá Ndiöxí dico ñá ndáa sá cúu-güedé cue téé càhá<sup>n</sup> tnúhu-gá, te cada-güedé titní núú sã vâ yóo tnàhí ndàcu cada cuèndá dandàhú-güedé ñáyiú. Te cani iní-güedé dandàhú-güedé ndéé cue ñáyiú ní cáhá<sup>n</sup> Yá Ndiöxí cundecu ndíhi-gá. 25Te duha ndùu tnúhu càhá<sup>n</sup>-í dátúha ñaha-ì xii-ndo. 26Te núu càchí-yu xii-ndo: "Xítí yucu-á<sup>n</sup> ní quexìo Yáa ní tendaha Yá Ndiöxí véxi ñuyúú-a", càchí-yu. Te vâ quèndáá iní-ndó quíhí<sup>n</sup>-ndó, àdi cachí-yu: "Vehe-á<sup>n</sup> ndécú Yáa ní tendaha Yá Ndiöxí véxi ñuyúú-a", càchí-yu. Te vâ quèndáá iní-ndó tnúhu càhá<sup>n</sup>-yu. 27Chi dàtná xìní nchaa ñáyiú quide-xi oré sàa nduté dàyehé-xi ni càa xico ñuyúú duca<sup>n</sup> càda-xi oré quixi tucu yúhú Tée cùu ñaní tnáhá-ndó nchaa-ndo chi nchaa-yu quini ñáhã-yu xii-í. 28Te nchòhó xìní-ndó sã ncháa nùú yúcu yìqui cuñú ní xíhí te yacá<sup>n</sup> tàcá nchaa ndíxíí xéxi-güedí.

**Nàcuáa cada-xi òré quixi tucu Tée cùu ñaní tnáhá cuè ñáyiú**

(Mr. 13:24-37; Lc. 21:25-33; 17:26-30, 34-36)

29"Te na yãha-ni coo tnúndòho cahnu vihi-á<sup>n</sup>, te vâ dàyèhé-gá nchícanhii, te ni vâ dàyèhé-gá yóo, te ngoyo nchaa chódíní ndéé andíu, te quídi-xi andíu 30nàcuáa cutnúní iní ñáyiú sá sã véxi yúhú Tée cùu ñaní tnáhã-yu nchaa-yu. Te cue ñáyiú nihíí ñuyúú ndãhyú-yu

sá ndihú iní-yu òré duca<sup>n</sup> càda-xi, te nchaá-yu quiní ñáhă-yu xii-í quee-í andiu quixi-í ichi xití vícò, te quiní-yu sá ïo càhnu cuu-í, te quide-í ncha sá vâha. <sup>31</sup>Te tauchiù<sup>n</sup>-í cue espíritú xínú cuèchi nùú-í níhi tiú-xi cútú nadatàcá-xi ncha ñáyiú ní cáhá<sup>n</sup>-í chitnahá ñáhă xii-í xĩndecu ni càa xico ñuyúú.

<sup>32</sup>Te nchòhò sa xìní-ndò nàcuáa quide yutnu ngúxí, chi yutnu-á<sup>n</sup> ndúú yùte núú dìtè-xi te nàtáhú ndaha-xi. Te òré duca<sup>n</sup> quide-xi te càchí-ndò sã sà ní cuyatni nuu cahni. <sup>33</sup>Te ñu-ni duca<sup>n</sup> sãtnahá-xi cada-xi ñuyúú-a òré ná quiní-ndò càda-xi ncha nacuáa ní cáhá<sup>n</sup>-í, te cutnùnì iní-ndò sã sà ní cuyatni vií-nã nduu nàa ñuyúú. <sup>34</sup>Te na càchí tnúhu ndáá-í xii-ndo sã òré vátá cùú-gá ncha ñáyiú xĩndecu ñuyúú-a vitna, te cada-xi ncha nàcuáa ní cáhá<sup>n</sup>-í. <sup>35</sup>Te andiu ndìhi ñuyúú-a chi ndìhi nihnu-xi, dico tnúhu-í chi vá ndíhí nihnu-xi chi cùu-xi tnúhu ndáá cuítì.

<sup>36</sup>Dico ñá túú cùtnuní ná nduu quixi tucu-í, te ni ñá túú cùtnuní ná òré chi vá yòo xìní, te ni cuè espíritú xínú cuèchi núú Yã Ndiòxi ñá túú xìní-xi ná nduu quixi-í, te ni mèe yúhú Tée cùu Déhe Dútú Ndiòxi ñá túú xìní-í ná nduu quixi tucu-í, chi ì<sup>n</sup>dii díí-ni mee-gã xìní-gá nõu ná nduu quixi-í.

<sup>37</sup>Te nduu na quixi tucu yúhú Tée cùu ñanì tnáhá-ndò nchàa-ndo ñuyúú-a te cada-xi dàtná ní quide-xi cùtnáhá ní xĩndecu ndíi Nòé. <sup>38</sup>Chi ncha ñáyiú ní xĩndecu dàvá-á<sup>n</sup> òré vátá ndáá-gã ndute ñuyúú, te xèxí-yu xihí-yu quidè-yu, te davá-yu ò-yu vico tnàndaha, te davá-yu

dàsá<sup>n</sup>-yu déhe yòcò-yu candeca ñaha tée, te duca<sup>n</sup>-ni xĩquidè-yu ndéé ní sáá nduu cuãnguee té Nòé xití bàrcú. <sup>39</sup>Te ñá túú ní cùtnuní iní-yu nàcuáa cada-xi ñuyúú ndéé ní sáá nduu ñĩ ngúíta-xi ní cuu<sup>n</sup> dáú ñĩ ndaa ndute ñuyúú ñĩ dánáá ñàha-xi xií-yu. Te ñu-ni duca<sup>n</sup> sãtnahá tucu-xi cada-xi nduu na quixi tucu yúhú Tée cùu ñanì tnáhă-yu nchaá-yu ñuyúú-a, chi nduu ñá túú ñã yíhí iní-yu te quixi tucu-í. <sup>40</sup>Te dàvá-á<sup>n</sup> nõu úú tnáhă cue tée yíhi-güedé xití yucu, te ì<sup>n</sup>-dé ndanchita te ì<sup>n</sup>-dé quendóo. <sup>41</sup>Àdi úú ñáyiú ñìhí nchicò-yu ì<sup>n</sup>-ni vehe, te ì<sup>n</sup>-yu ndanchita te ì<sup>n</sup>-yu quendóo.

<sup>42</sup>Te duha ndùu tnúhu càhá<sup>n</sup>-í cuendá nchòhò cundecu túha-ndo, chi ñá túú xìní-ndò ñã òré quixi tucu yúhú Yaá cúú Xìtohó-ndò.

<sup>43</sup>Te nchòhò xìní-ndò sã nõu ì<sup>n</sup> tée cùu xìtohó vehe xìní-dé ná òré cúú-xí nùú quíhu ñadúhú vehe-dé duhu-güedě, te quíhi iní-dé cundecu-dé cuendá sá vã dãná-dě quíhu ñadúhú-ã<sup>n</sup> vehe-dé duhu-güedě, dico ñá túú xìní-dé.

<sup>44</sup>Te duha càhá<sup>n</sup>-í chi nchòhò xìní ñùhu-xi cundecu túha-ndo, chi na cuáhá<sup>n</sup> òré ñá túú ñã yíhí ìnì-ndò quèxio yúhú Tée cùu ñanì tnáhá-ndò nchàa-ndo.

#### Cuendá ì<sup>n</sup> tée xìnu cuechi

(Lc. 12:41-48)

<sup>45</sup>Te na càni-í ì<sup>n</sup> cuendú núú-ndò. Ì<sup>n</sup> tée xìnu cuechi núú ì<sup>n</sup> pàtróó<sup>n</sup> cúú-dě ì<sup>n</sup> tée ïo váha tècú tnùnì, te quide ndáá-dé ndécú-dě. Te ì<sup>n</sup> xito ní dándòo ndaha ñaha patróó<sup>n</sup>-dě xii-dé ncha cue ñáyiú

ndècu vehe-dé cuendá coto ñaha-dě xii-yu cuañaha-dě sá caxi-yu òré tàú-xi caxi-yu, te tée cùu patróó<sup>n</sup>-á<sup>n</sup> ñi quee-dé cuáhá<sup>n</sup>-dé. <sup>46</sup>Te váha táhú tée xìnu cuechi-á<sup>n</sup> te núu ndècuu-dé quidé-dě nchaa nàcuáa ní xáha<sup>n</sup> pàtróó<sup>n</sup>-dě cada-dé mei òré ní nasáa pàtróó<sup>n</sup>-dě-á<sup>n</sup>. <sup>47</sup>Te na càchí tnúhu ndáá-í xii-ndo sã tée cùu patróó<sup>n</sup>-dě-á<sup>n</sup> cũñaha-dě xii-dé sá quíndàha-dé nchaa sá ndécú ndìhi-dé. <sup>48</sup>Dico núu tée xìnu cuechi-á<sup>n</sup> ní cùu-dé ìi<sup>n</sup> tée cuihna ìni-xi, te ngóo-dé cani iní-dé sá cùyaa patróó<sup>n</sup>-dě vá násàa ndìhi-dé. <sup>49</sup>Te ngúita-dé cani-dé nchaa dava-gá cue ñáyiú xìnu cuechi ndìhi-dé, te ngóo-dé caxi-dé coho-dé cada-dé ndìhi nchaa cue tée quihu. <sup>50</sup>Te ìi<sup>n</sup> nduu òré ñã túú yìhi iní-dé nasáa pàtróó<sup>n</sup>-dě, <sup>51</sup>te ío dandòho ñaha patróó<sup>n</sup>-dě xii-dé, chi daquìhí<sup>n</sup> ñáhá-dě xii-dé núu xíndecu cue ñáyiú ní cachí sá ñi quide ndáá te ñã ndàa sá ñi quide ndáá-yu. Te duca<sup>n</sup> sãtnahá-xi dandòho ñaha Yá Ndiòxi xii ñáyiú, chi daquìhí<sup>n</sup> ñáhá-gã xii-yu ìi<sup>n</sup> xichi núú ío ndohó-yu te yàcá<sup>n</sup> ío ndáhyú-yu, te dicó rúhñú-nã cuu núhu-yu sá sàtú iní-yu sá ndóhó-yu —càchí-gá xãha<sup>n</sup>-gã xii-güedé.

#### Cuendá úxi ñáyiú ìhí

**25** Te xãha<sup>n</sup> tùcu Jesús xii-güedé:

—Na càni-í ìi<sup>n</sup> cuendú núú-ndó nàcuáa tecú tnùn-í-ndó nàcuáa cada-xi òré ndíhu ndaha ñàha Yá Ndiòxi xii ñáyiú. Te úxi tnàhá ñáyiú ìhí ñáyiú cuechi ñi quehé<sup>n</sup>-yu linterná-yu, te cuáhá<sup>n</sup>-yu ìi<sup>n</sup> xichi núú cóo víco tnándaha cuendá

cundetú-yu quexìo tée tnándaha. <sup>2</sup>Te úhú<sup>n</sup> ñáyiú cuechi-á<sup>n</sup> ío váha cùtnuní iní-yu, te úhú<sup>n</sup>-yu ñáhá. <sup>3</sup>Te ndi úhú<sup>n</sup> ñáyiú cuechi dùca<sup>n</sup> ñã túú cùtnuní iní-xi-á<sup>n</sup> ñã túú ní cãnehé-yu sá ndëe linterná-yu. <sup>4</sup>Dico ndi úhú<sup>n</sup> ñáyiú cuechi cùtnuní iní-xi-á<sup>n</sup> nehé-yu sá ndëe linterná-yu. <sup>5</sup>Te tée tnándaha-á<sup>n</sup> cùyaa-dé quexìo-dé núú ndétú ñáhá-yu-á<sup>n</sup>, te ñini dùca<sup>n</sup> cuyaa-dé ní tñii ñaha sàni xii-yu ní xidí-yu. <sup>6</sup>Te cùu-xi datná dava niú níhi ní cáhá<sup>n</sup> dava-gá ñáyiú, te càchí-yu: “Sa véxi tée tnándaha, chí táquèe quehé quehe<sup>n</sup> cuendá-ndó-dě”, càchí-yu. <sup>7</sup>Te ndi úxi ñáyiú cuechi-á<sup>n</sup> ñi ndacóo-yu quide túha-yu linterná-yu. <sup>8</sup>Te ndi úhú<sup>n</sup> ñáyiú cuechi ñã túú cùtnuní iní-xi-á<sup>n</sup> ñi xáhã<sup>n</sup>-yu xii cue ndi úhú<sup>n</sup> ñáyiú cùtnuní iní-xi-á<sup>n</sup>: “Chí táxi nùu luha sá ndëe linterná-ndó ná ndëe linterná-ndí chi ñã cuiní-xi cáyú mee-ni ndáhvá”, càchí-yu xáhã<sup>n</sup>-yu. <sup>9</sup>Te cue ñáyiú cuechi cùtnuní iní-xi-á<sup>n</sup> ñi xáhã<sup>n</sup>-yu: “Vá táxi nùu-ndí chi vá tnàhá canehe chùu<sup>n</sup> mee-ndí, te váha-gá chí cuáhá<sup>n</sup> cuaa<sup>n</sup>-ndo núú cuè ñáyiú xidíco cuendá sá vã cúmãní xii-ndo, te vá cúmãní xii nchúhú tucu”, càchí-yu xáhã<sup>n</sup>-yu. <sup>10</sup>Te ñini cuáhá<sup>n</sup> ndi úhú<sup>n</sup> ñáyiú duca<sup>n</sup> ñã túú cùtnuní iní-xi-á<sup>n</sup> cuànguaá<sup>n</sup>-yu sá ndëe linterná-yu ní quexìo tée tnándaha. Te ndi úhú<sup>n</sup> ñáyiú cuechi cùtnuní iní-xi-á<sup>n</sup> ñi quehe<sup>n</sup> cuendá ñáhã-yu xii-dé, te cuànguihu ndìhi ñáhã-yu xii-dé núú cóo víco tnándaha, te sáta dúcá<sup>n</sup> te ní nandedí yuyèhe. <sup>11</sup>Te òré ní nasáa cue ñáyiú cuechi ñáyiú ní sãnguaa<sup>n</sup> sá ndëe linterná-xi-á<sup>n</sup>, te

ní nguíta-yu càhá<sup>n</sup>-yu xĩnutnĩ-yu ndaa sátá yuyèhe ndaa quehé, te xähä<sup>n</sup>-yu xii téé tnãndaha-á<sup>n</sup>: “iTäta, nacaá<sup>n</sup> yuyèhe na quĩhu-ndí!”, càchí-yu xähä<sup>n</sup>-yu xii-dé. <sup>12</sup>Te téé tnãndaha-á<sup>n</sup> nĩ xáha<sup>n</sup>-dë xii-yu: “Na càchí tnúhu ndáá-í xii-ndo sã nchòhó ñã túú tàù-ndó quĩhu-ndo vico-a, chi ñã túú tnàhá tnúhu ndihi ñaha-ndo xii-í”, càchí-dé xáha<sup>n</sup>-dë xii-yu —càchí Jèsús xáha<sup>n</sup>-gã xii-güedé.

<sup>13</sup>Te xáha<sup>n</sup> tùcu Jèsús xii-güedé: —Ío quĩhi iní-ndó cùndecu-ndo, chi ñã túú xini-ndó nã nduu, te ni ñã túú xini-ndó nã òré quixi tucu yúhú Téé cùu ñaní tnáhá-ndó nchàa-ndo —cachí-gá xáha<sup>n</sup>-gã xii-güedé.

#### **Cuendá cue téé ní ndóo ndaha díhú<sup>n</sup>**

(Lc. 19:11-27)

<sup>14</sup>Te xáha<sup>n</sup> tùcu Jèsús xii-güedé: —Na càni tucu-í ingá cuendú núu-ndó nàcuáa tecú tnùní-ndó nàcuáa cada-xi òré ndĩhu ndaha ñàha Yá Ndiõxí xii ñáyi. H<sup>n</sup> téé sa ñuhu ichi-ná-dé sá cáca-dë quíngaca cuu xica-dë, te ní cana-dé cue téé xinu cuechi núu-dë cuendá dándóo ndaha ñàha-dé díhú<sup>n</sup>-dë xii-güedé.

<sup>15</sup>Te nàcuáa ndùu chiu<sup>n</sup> quide h<sup>n</sup> h<sup>n</sup>-güedé te duca<sup>n</sup> díhú<sup>n</sup> nĩ sãñaha-dë xii-güedé, te h<sup>n</sup>-dë ní sãñaha-dë úhú<sup>n</sup> tnàhá díhú<sup>n</sup> sã ïo yahu nani talentú, te ingá-dé ní sãñaha-dë úú tnàhá díhú<sup>n</sup>-ã<sup>n</sup>, te ingá-dé ní sãñaha-dë h<sup>n</sup> díhú<sup>n</sup>-ã<sup>n</sup>, te dãtnùní ní quee-dé cuáhá<sup>n</sup>-dë. <sup>16</sup>Te téé ní quehe<sup>n</sup> cuendá úhú<sup>n</sup> tnàhá díhú<sup>n</sup> sã nání talentú ní quide-dé ndáhú ndihi-xi te ní níhí tucu-dé

úhú<sup>n</sup>-gá tucu tnàhá díhú<sup>n</sup>-ã<sup>n</sup>. <sup>17</sup>Te diu-ni duca<sup>n</sup> nĩ quide tucu téé ní níhí úú díhú<sup>n</sup> sã nání talentú-á<sup>n</sup>, chi ní quide-dé ndáhú te ní níhí tucu-dé úú-gá tucu tnàhá. <sup>18</sup>Dico téé ní níhí h<sup>n</sup>-ni díhú<sup>n</sup>-ã<sup>n</sup> chi da ní chiváha-dé díhú<sup>n</sup> pãtróo<sup>n</sup>-dë, chi ní xete-dé h<sup>n</sup> yaú te ní chindúxi-dé.

<sup>19</sup>Te ní cuu cuéhé nduu sá nĩ quee pãtróo<sup>n</sup>-güedë-á<sup>n</sup> ní sãngaca cuu-dé, te ní nasáa-dé te ní nguíta-dé quidé ndáa-dé ndihi-güedé cuendá díhú<sup>n</sup> sã ní dándóo ndaha ñàha-dé xii-güedé. <sup>20</sup>Te téé ní quendóo ndaha úhú<sup>n</sup> tnàhá díhú<sup>n</sup>-ã<sup>n</sup> nĩ xáha<sup>n</sup>-dë xii pãtróo<sup>n</sup>-dë: “Pãtróo<sup>n</sup>, náu úhú<sup>n</sup> tnàhá díhú<sup>n</sup> sã ní dándóo ndaha ñàha-n xii-í-a, te ní sáhá<sup>n</sup>-í ní quide-í ndihi-xi ndáhú te ní chídó-xí úhú<sup>n</sup>-gá tucu tnàhá, te náu-a naquehe<sup>n</sup> cuendá-n”, càchí-dé xáha<sup>n</sup>-dë xii pãtróo<sup>n</sup>-dë. <sup>21</sup>Te téé cùu pãtróo<sup>n</sup>-dë-á<sup>n</sup> nĩ xáha<sup>n</sup>-dë xii-dé: “Ío váha ní quide-n, te vitna quide ñaha-í xii-n h<sup>n</sup> téé váha téé quide ndáa, te sá sàcú díhú<sup>n</sup> nĩ dándóo ndaha ñaha-í xii-n te ní quide ndáa-n, te sá dúcá<sup>n</sup> ní quide-n te vãi-gá taxi cuendá ñàhà-í xii-n. Te vitna cuu cundecu-n nũú ndécù-í, te ío cudíí iní-ó cùndecu ndihi tnaha-o”, cachí téé cùu pãtróo<sup>n</sup>-dë-á<sup>n</sup> xáha<sup>n</sup>-dë xii-dé. <sup>22</sup>Te sátá dúcá<sup>n</sup> te téé ní quendóo ndaha úú tnàhá díhú<sup>n</sup> sã nání talentú-á<sup>n</sup> nĩ xáha<sup>n</sup>-dë xii pãtróo<sup>n</sup>-güedë: “Pãtróo<sup>n</sup>, náu úú tnàhá díhú<sup>n</sup> sã ní dándóo ndaha ñàha-n-a, te ní sáhá<sup>n</sup>-í ní quide-í ndihi-xi ndáhú, te ní chídó-xí úú-gá tucu tnàhá, te náu-a naquehe<sup>n</sup> cuendá-n”, càchí-dé xáha<sup>n</sup>-dë xii pãtróo<sup>n</sup>-güedë. <sup>23</sup>Te

ní xáha<sup>n</sup> tée cùu patróó<sup>n-á<sup>n</sup></sup> xii-dé: “Ío váha ní quide-n, te vitna quide ñaha-í xii-n ì<sup>n</sup> tée váha tée quide ndáá, te sá sàcú díhú<sup>n</sup> nǐ dándõ ndaha ñaha-í xii-n te ní quide ndáá-n, te sá dúcá<sup>n</sup> nǐ quide-n te vâi-gá taxi cuendá-í. Te vitna cuu cundecu-n nǔú ndécù-í, te ío cudíí ìní-ó cundecu ndihí tñaha-o”, cachí tée cùu patróó<sup>n-á<sup>n</sup></sup> xáha<sup>n</sup>-dë xii-dé. <sup>24</sup>Te tée ní ndóo ndaha ì<sup>n</sup>-ni díhú<sup>n-á<sup>n</sup></sup> nǐ xáha<sup>n</sup>-dë xii tée cùu patróó<sup>n-dë-á<sup>n</sup></sup>: “Pàtróó<sup>n</sup>, yúhú sa ñaha-í sá yòhó cúú-n ì<sup>n</sup> tée ndùcu mee-ni sá cúú-xí mèe-xi te tàhu-n chiu<sup>n</sup> cuáhá<sup>n</sup> nchúhú cue tée xìnu cuechi núú-n sàcá<sup>n</sup>-ndí tríú, te òré ná nàtaxi tñaha-ndí, te yòhó dicó-nǎ náquèhe<sup>n</sup> cuendá-n tàxúha-n. <sup>25</sup>Te núu xíá<sup>n</sup> ní yùhú-í cada-í ndáhú ndihí díhú<sup>n</sup>-n, te ní sáhá<sup>n</sup>-í ní xete-í ì<sup>n</sup> yaú te ní chindúxi-í, te náu díhú<sup>n-á<sup>n</sup></sup> naquehe<sup>n</sup> cuendá-n”, cächí-dé xáha<sup>n</sup>-dë xii tée cùu patróó<sup>n-á<sup>n</sup></sup>. <sup>26</sup>Te tée cùu patróó<sup>n-á<sup>n</sup></sup> nǐ xáha<sup>n</sup>-dë: “Yòhó cúú-n ì<sup>n</sup> tée cuihna ìní-xi xìnu cuechi núú-í te cuhndu-n, te núu yòhó sání ìní-n sǎ cúú-í ì<sup>n</sup> tée tàuchiu<sup>n</sup> cuáhá<sup>n</sup>-ndó sàcá<sup>n</sup>-ndó tríú te òré nàtaxi tñaha-ndo, te yúhú dicó-nǎ náquèhe<sup>n</sup> cuendá-í nàtàxúha-í. <sup>27</sup>Te núu sàni ìní-n sǎ dúcá<sup>n</sup> quide-í, te dasa<sup>n</sup> nùu-n díhú<sup>n-í</sup> te cúñaha-n chǎhu-yu díquí-xi ni cùu, te òré ndexìo-í te sa ngódó lùha-gá díquí-xi naquehe<sup>n</sup>-í ní cùu”, cachí-dé xáha<sup>n</sup>-dë xii tée xìnu cuechi-á<sup>n</sup>. <sup>28</sup>Te tée cùu patróó<sup>n-á<sup>n</sup></sup> nǐ xáha<sup>n</sup>-dë xii dava-gá cue tée ndècu ndihí-dé: “Chí quèndéé ì<sup>n</sup> díhú<sup>n</sup> sǎ nání tàlentú néhé tée-á<sup>n</sup>, te cuáhá-ndo tée nèhe úxí tñahá

dìu-ni díhú<sup>n-á<sup>n</sup></sup>. <sup>29</sup>Chi cue tée sa ndècu ndihí te níhí-gǎ-güedé cundecu ndihí-güedé, te ni vǎ níhí-gǎ-güedé ndèé cundecu nchaa sá cündècu ndihí-güedé. Te cue tée ñá túú nǎ ndécú ndihí vai, te nchaa sá ndécú ndihí-güedé vá cündècu ndihí-gǎ-güedé. <sup>30</sup>Te tée xìnu cuechi ñá túú vèdana nàndíhi-á<sup>n</sup>, chí tñíí-dë te daquih<sup>n</sup>-ndó-dë ì<sup>n</sup> xichi núú néé nǔú ìo ndoho-dé, te yàcá<sup>n</sup> ndáhyú-dé, te dicó rúhñú-nǎ cuu núhu-dé sá sàtú ìní-dé sá ndóhó-dë”, cächí tée cùu patróó<sup>n-á<sup>n</sup></sup> xáha<sup>n</sup>-dë xii-güedé. Duha sǎtnahá-xi ndoho nchaa ñáyiú ñá túú quide váha —cächí-gǎ xáha<sup>n</sup>-gǎ xii-güedé.

**Cuendá cue ñáyiú ní quide váha ndihí cuendá cue ñáyiú ñá túú ní quide váha**

<sup>31</sup>Te xáha<sup>n</sup> tùcu Jesús xii-güedé: —Te nduu na quixi tucu yúhú Tée cùu ñaní tñahá-ndó nchaa-ndo, te quixi-í ndihí nchaa cue espíritu xínú cuèchi núú-í, te nchaa ñáyiú quíní-yu sá ìo càhnu cuu-í, te dàvá-á<sup>n</sup> cunucóo-í núú táxí tñùn-í, te ío cuñúhu ñáyiú sá ìo càhnu cuu-í. <sup>32</sup>Te dàvá-á<sup>n</sup> nataká nchaa ñáyiú xìndecu ni càa xico ñuyíú cundecú-yu núú-í, te cada-í-yu dàtná quidé ì<sup>n</sup> toli oré táú dèi<sup>n</sup>-dé nchaa mbéé ndihí nchaa chivá chi dèi<sup>n</sup> taxi ndecu-dé nchaa mbéé, te dèi<sup>n</sup> taxi ndecu-dé nchaa chivá. <sup>33</sup>Te duca<sup>n</sup> sǎtnahá-xi cada-í chi nchaa ñáyiú ní quide ndáá núú-í ñáyiú-á<sup>n</sup> taxi ndecu-í-yu xio cùha-í, te nchaa ñáyiú cuihna ìní-xi ñá túú ní cuíní cada ndáá núú-í ñáyiú-á<sup>n</sup> taxi ndecu-í-yu xio dàtni-í.

34 Te duca<sup>n</sup> te yúhú tée ío cùnuu cúñaha-í xii ñáyiú na cùndecu xio cuha-í: “Nchaa nchòhó ñáyiú ní quide váha ñaha Tătà-í Dútú Ndiòxí, chí nèhé chi vitna ní sáá nduu cùndecu-ndo núú ndécú-gă táxí tnùnî-gă, chi ndéé cùtnàhá ní ngáva ñuyúú sa ndècu túha tnàhí núú ndécú-gă-á<sup>n</sup> sã nchòhó nduu táhú-ndó cùndecu-ndo. 35 Te duca<sup>n</sup> chi òré xihí-í docó te ní taxi-ndo sã ñí xexi-í, te òré yìchí-í ndute te ní taxi-ndo ndùte ní xihí-í, te òré ñùhù-í ichi te ní taxi-ndo vèhe ní ndetatú-í. 36 Te òré xíní ñùhu-í dóó cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xíhi-í vecaá te ní quixi tucu-ndo ñí quixi coto ñaha-ndo xii-í”, duha cúñaha-í xii nchaa ñáyiú-á<sup>n</sup>. 37 Te nchaa ñáyiú duca<sup>n</sup> ñí quide ndáá-á<sup>n</sup> cùñàhá-yu xii-í: “Yòhó Yaá cúú Xìtohó-ndí, ni ì<sup>n</sup> xito ñá túú ní tàxi-ndí sá cáxí-n òré xihí-n dòcò, te ni ì<sup>n</sup> xito ñá túú ní tàxi-ndí ndute coho-n òré yìchí-n. 38 Te ni ñà túú ní tàxi-ndí vehe ndetatú-n òré ñùhù-n ichi, te ni ñà túú ní tàxi-ndí dóó cuihnu-n òré xíní ñùhu-n. 39 Te ni ñà túú ní quìxi coto ñaha-ndí xii-n òré ní cuhú-n, te ni ñà túú ní quixi coto ñaha-ndí xii-n òré ní xíhi-n vècaá”, duha quesàhá-yu cùñàhá-yu xii-í. 40 Te yúhú tée cùnuu cúñaha-í xii-yu: “Na càchí tnúhu ndáá-í xii-ndo sã ncháá sã vâha ní quide-ndo sã cúú-xí nchàa ñáyiú xíndecu ichi-í cuèí ío ndàhú xíndáa-yu, te sá dúcá<sup>n</sup> ñí quide-ndo sã vâha sá cúú-xí-yu, te cada ínî-ndó sã mèe-í duca<sup>n</sup> ñí quide-ndo ñí xito ñaha-ndo xii-í”, duha cúñaha-í xii-yu.

41 Te dătnùnî cúñaha-í xii ñáyiú na cùndecu xio datni-í: “Nchaa nchòhó ñáyiú ní xíta nihnu chí xócuñíí núú ndécú-í-a, chi nchòhó ní nduu táhú-ndó cùndecu-ndo núú ñùhú núú càyú, diu-ni núú ñí quide túha-í cundecu sácuíhná ndihî nchaa espíritú cùndihî-xi, te yàcá<sup>n</sup> cundecu-ndo ñí caa ñí quíh<sup>n</sup>. 42 Chi yúhú òré xihí-í docó te ñá túú ní tàxi-ndo sá cáxí-í, te ni òré yìchí-í ndute te ñá túú ní tàxi-ndo ndute coho-í. 43 Te ni òré ní xúhu<sup>n</sup>-í ichi ñá túú ní tàxi-ndo vehe ndetatú-í, te ni òré xíní ñùhu-í dóó cuihnu-í te ñá túú ní tàxi-ndo, te ni òré ní cuhú-í te ñá túú ní quìxi-ndo quixi coto ñaha-ndo xii-í, te ni òré ní xíhi-í vecaá te diu-ni duca<sup>n</sup> ñí quide-ndo ñà túú ní quìxi-ndo quixi coto ñaha-ndo xii-í”, duha cúñaha-í xii-yu. 44 Te ñáyiú-á<sup>n</sup> cùñàhá-yu xii-í: “Yòhó Yaá cúú Xìtohó-ndí ni ì<sup>n</sup> xito ñá túú ní xínî-ndí òré xihí-n dòcò cuendá taxi-ndí sá cáxí-n, te ni ì<sup>n</sup> xito ñá túú ní xínî-ndí òré yìchí-n ndute cuendá taxi-ndí ndute coho-n, te ni ì<sup>n</sup> xito ñá túú ní xínî-ndí cuhú-n ichi cuendá taxi-ndí vehe ndetatú-n, te ni ì<sup>n</sup> xito ñá túú ní xínî-ndí òré xíní ñùhu-n dóó cuendá taxi-ndí dóó cuihnu-n, te ni ì<sup>n</sup> xito ñá túú ní xínî-ndí òré cùhú-n cuendá quixi coto ñaha-ndí xii-n, te ni ì<sup>n</sup> xito ñá túú ní xínî-ndí quihî-n vècaá cuendá quixi coto ñaha-ndí xii-n”, duha quesàhá-yu cùñàhá-yu xii-í. 45 Te yúhú cúñaha-í xii-yu: “Na càchí tnúhu ndáá-í xii-ndo sã sã cuendá sá ñà túú ní quide-ndo ì<sup>n</sup> sã vâha sá cúú-xí cuè ñáyiú ndècu ichi-í cuèí ío ndàhú xíndáa-yu, te sá dúcá<sup>n</sup> ñí quide-ndo

ñà túú ní quide-ndo sá vǎha sá cúú-xǐ-yu, te cada iní-ndó sǎ mée-í duca<sup>n</sup> ní quide-ndo ñà túú ní quide-ndo sá vǎha sá cúú-xǐ-í”, duha cúñaha-í xǐ-yu. <sup>46</sup>Te nchaa ñáyiú-á<sup>n</sup> quíh<sup>n</sup>-yu núú ùhú núú ndàhú ni caa ni quíh<sup>n</sup>. Te nchaa ñáyiú ní quide ndáá núú-í ní xíndecu ñuyú-a, ñáyiú-á<sup>n</sup> nduu táhǔ-yu ío váha cundecú-yu ni caa ni quíh<sup>n</sup> — cǎchí-gǎ xǎha<sup>n</sup>-gǎ xii-güedé.

**Cue tée cùu úhú iní ñáhá xii Jesús ndúcú-güedé ñacuáa cada-güedé tñii ñaha-güedé xii-gǎ**

(Mr. 14:1-2; Lc. 22:1-2; Jn. 11:45-53)

**26** Te sátá ñí yáha duca<sup>n</sup> ñí cáhá<sup>n</sup> Jèsús, te ní xáha<sup>n</sup>-gǎ xii cue tée xǐca cuu ndíhi-gǎ:

<sup>2</sup>—Nchòhó sa xìní-ndó sǎ cùmání ùú-gǎ nduu te coo vico pàscuá, te cǎchí tnúhu-í xii-ndo sǎ yǔhú Tée cùu ñaní tnáhá-ndó nchàa-ndo tñii ñaha-güedé xii-í, te cuáha cuendá ñáhá-güedé núú cuè tée cùu úhú iní ñáhá xii-í, te cata caa ñaha-güedé núú cùrúxí te núú cùrúxí-á<sup>n</sup> cuú-í — cǎchí-gǎ xǎha<sup>n</sup>-gǎ xii-güedé.

<sup>3</sup>Te ñiú-ni òré cǎhá<sup>n</sup> ndíhi Jèsús cue tée xǐca cuu ndíhi-gǎ ní natacá cue tée cùu dútú cúnùu, ndíhi cue tée ñacuaha ñaha xii ñáyiú nchaa tnúhu ní chídó tnùní ndíi Moisés, ndíhi cue tée cùu sacuéhé núú ñáyiú isràél. Te mei quèhé vehe núú cúú vèchiu<sup>n</sup> té Calfás tée cùu dútú ío-gǎ cúnùu ní natacá-güedé. <sup>4</sup>Te xǐá<sup>n</sup> ní ndatnúhu-güedé ñacuáa cada-güedé dandàhú-güedé Jèsús cuendá tñii ñaha-güedé xii-gǎ, te cahni ñaha-güedé. <sup>5</sup>Te ní xǐtnàha-güedé:

—Váha-gǎ sá vǎ tñí-ó Jèsús mei ndùu vico, chí núu duca<sup>n</sup> na

càda-o te ío dusa<sup>n</sup> càda ñáyiú — cǎchí-güedé xǐtnàha-güedé.

**Íi<sup>n</sup> ñadìhí chíhí-á<sup>n</sup> àcítí díquí Jèsús**

(Mr. 14:3-9; Jn. 12:1-8)

<sup>6</sup>Te ndècu Jesús ñuú Bètania vehe íi<sup>n</sup> tée nàni Xímú, tée ní tnahá cuéhé sǎ dátèhyú nihnu-xi yiqui cùñú-ó. <sup>7</sup>Te xǐá<sup>n</sup> ndécú-gǎ ní quexìo íi<sup>n</sup> ñadìhí néhé-á<sup>n</sup> íi<sup>n</sup> sá ñí cuáha yúú vǎha nàni alabastrú, te xití xǐá<sup>n</sup> ñúhú àcítí sàhá<sup>n</sup> tnámí sǎ ío ndèyáhu. Te yǐhi Jesús mèsá xéxí-gǎ, te ñaha-á<sup>n</sup> ní sáhá<sup>n</sup>-a<sup>n</sup> ní sódó-a<sup>n</sup> àcítí ñúhú xití xǐá<sup>n</sup> díquí-gǎ.

<sup>8</sup>Te òré ní xíní cue tée xǐca cuu ndíhi Jesús sá dúcá<sup>n</sup> ñí quide ñaha-á<sup>n</sup> te ní cudéé<sup>n</sup>-güedé, te ní nguíta-güedé xǐtnàha-güedé:

—Ñá túú quide váha ñaha-á<sup>n</sup> dàcá<sup>n</sup> quidé-á<sup>n</sup> dacuíta-a<sup>n</sup> acítí-á<sup>n</sup>.

<sup>9</sup>Chí váha-gǎ ñúu cuyáhu acítí-á<sup>n</sup> ní cùu chí ío ndèyáhu, te díhú<sup>n</sup> cuyáhu acítí-á<sup>n</sup> cuu cuendá cue ñáyiú ndàhú ní cùu — cǎchí-güedé xǐtnàha-güedé.

<sup>10</sup>Te Jèsús ní cutnùní iní-gǎ ñacuáa ndùu tnúhu xǐtnàha-güedé, núu ní xáha<sup>n</sup>-gǎ xii-güedé:

—Vá dásátú-ndó iní ñadìhí-a, chí sá ñí quide ñaha-a<sup>n</sup> xii-í cúú-xí íi<sup>n</sup> sá vǎha. <sup>11</sup>Chí cue ñáyiú ndàhú duca<sup>n</sup>-ni cùtnahá ñáyiú-á<sup>n</sup> tnuú-ndó, dico yúhú chí vá ncháá ndùu cundecu ndíhi ñaha-í xii-ndo ñuyúú-a. <sup>12</sup>Te sá dúhá ñí quide ñaha ñadìhí-a xii-í ní sódó-a<sup>n</sup> àcítí díquí-í, te xǐá<sup>n</sup> cada iní-ndó sǎ sá quide túha-a<sup>n</sup> yiqui cùñú-í cuendá nguíndúxi-xi. <sup>13</sup>Te na cǎchí tnúhu ndáá-í xii-ndo sǎ ndèni ní cuu nihíí ñuyúú ná cǎhá<sup>n</sup> ñáyiú tnúhu-í, te cǎhá<sup>n</sup>-yu tnahá cuendá ñadìhí-a

cuendá quiní nchaa ñáyiú nàcuáa ní quide-a<sup>n</sup> te duca<sup>n</sup> vǎ nàcuànaá-yu —càchí-gá xǎha<sup>n</sup>-gǎ xii-güedé.

**Té Jüdás ndúcú-dě nàcuáa cada-dé cuáha cuendá-dé Jèsús núú cuè téé cùu úhú iní ñáhá xii-gá**

(Mr. 14:10-11; Lc. 22:3-6)

<sup>14</sup>Te sátá dúcá<sup>n</sup> te té Jüdás Iscàrioté ní sáhá<sup>n</sup>-dé ní ndatnúhu-dé ndihi cue téé cùu dútú cùnùu. Te núú tnáhá té Jüdás-á<sup>n</sup> cúú ùxúú cue téé xica cuu ndihi Jesús. <sup>15</sup>Te ní xáha<sup>n</sup>-dě xii cue téé cùu dútú cùnùu-á<sup>n</sup>:

—¿Ndědau cháhu ñaha-ndo xii-í te taxi cuendá-í Jèsús xii-ndo-i? —càchí-dé xǎha<sup>n</sup>-dě xii-güedé.

Te cue dútú-ǎ<sup>n</sup> ñí xáha<sup>n</sup>-güedě xii-dé sá cuǎñaha-güedě ócò úxí dǐhú<sup>n</sup> cuìxí<sup>n</sup>, te ðiu-ni duca<sup>n</sup> ñí sǎñaha-güedě xii-dé. <sup>16</sup>Te ndéé òré ní quehe<sup>n</sup> cuendá té Jüdás-á<sup>n</sup> dǐhú<sup>n</sup>, te ní ngúíta-dé ndúcú-dě nàcuáa cada-dé cuáha cuendá-dé Jèsús núú-güedě.

**Cùdini Jesús ndihi cue téé xica cuu ndihi-gá**

(Mr. 14:12-25; Lc. 22:7-23; Jn. 13:21-30; 1 Co.11:23-26)

<sup>17</sup>Te ní sáá nduu ñí quesaha vico xexi ñáyiú pàá sá ñà túú yǎhi levadurá ðiu-ni vico pàscuá, te cue téé xica cuu ndihi Jesús ní sándehe yatni-güedé dǎñi-gá, te xǎha<sup>n</sup>-güedě xii-gá:

—Mèstrú, véxi-ndí xicá<sup>n</sup> tnúhú-ndí núú-n nùu ndèé cuìni-n càda túha-ndí cuendá cudini-o sacuaa nduu vico pascuá —càchí-güedé xǎha<sup>n</sup>-güedě xii-gá.

<sup>18</sup>Te Jèsús ní xáha<sup>n</sup>-gǎ xii-güedé:

—Chí cuahá<sup>n</sup> xití ñuú-ǎ<sup>n</sup>, te yàcá<sup>n</sup> naníhí-ndó ì<sup>n</sup> téé cùtnuní iní-ndó sǎ sà xiní ñáhá-dě xii-o, te cúñaha-ndo xii-dé: “Yáá cúú Mèstrú càchí-gá sá sà ní cuyatni nduu vǎ cùndecu-gá ñuyúú-a, te vehe-n cuìni-gá cada-gá vico pàscuá ndihi cue téé xica cuu ndihi-gá”, duha cúñaha-ndo xii téé-á<sup>n</sup> —càchí-gá xǎha<sup>n</sup>-gǎ xii-güedé.

<sup>19</sup>Te cue téé xica cuu ndihi-gá-á<sup>n</sup> ñí xica-güedé cuahá<sup>n</sup>-güedé, te ní quide-güedé nàcuáa ní xáha<sup>n</sup>-gǎ xii-güedé, te ní quide túha-güedé sá cùdini-güedé ndihi-gá sacuaa nduu vico pascuá-á<sup>n</sup>. <sup>20</sup>Te òré sa ní cundiqui<sup>n</sup> te cuánguihu Jèsús ndihi ndi ùxúú cue téé xica cuu ndihi-gá mèsá cuendá cudini-gá ndihi-güedé. <sup>21</sup>Te ñini xèxi-gá ndihi-güedé ní xáha<sup>n</sup>-gǎ xii-güedé:

—Na càchí tnúhu ndáá-í xii-ndo sǎ dǐú ì<sup>n</sup> nchohó cue téé xica cuu ndihi-í cuáha cuendá ñáhá-ndó xii-í núú cuè téé cùu úhú iní ñáhá —càchí-gá xǎha<sup>n</sup>-gǎ xii-güedé.

<sup>22</sup>Te sá dúcá<sup>n</sup> ñí xáha<sup>n</sup>-gǎ xii-güedé te ncha-güedé ní ngúíta-güedé cùndiyí-güedé, te da ì<sup>n</sup> da ì<sup>n</sup>-güedé ní ngúíta-güedé xǎha<sup>n</sup>-güedě xii-gá:

—Mèstrú, ñá dǐú yǎhú duca<sup>n</sup> sàni iní-n càda-í-u? —càchí-güedé xǎha<sup>n</sup>-güedě xii-gá.

<sup>23</sup>Te ní xáha<sup>n</sup>-gǎ xii-güedé: —Téé nacaxi ndihi-í ì<sup>n</sup>-ni cóhó caxi-ndí, téé-á<sup>n</sup> cuáha cuendá ñáhá-dě xii-í núú cuè téé cùu úhú iní ñáhá. <sup>24</sup>Te yúhú Téé cùu ñaní tnáhá-ndó nchàa-ndo ñuhu ichi-í cuahá<sup>n</sup>-í yáha-í nàcuáa càhá<sup>n</sup>-xi núú tútú Yǎ Ndiòxi, dico ndàhú ní cuu téé duca<sup>n</sup> na cuáha cuendá



ñáhá xii-í núú cuè téé cùu úhú iní ñáhá, chi váha-gá sá vǎ cǎcú tǎe-á<sup>n</sup> cundecu-dé ní cùu, te ñá díú sǎ ní cacu-dé te duca<sup>n</sup> càda-dé —càchí-gá xǎha<sup>n</sup>-gǎ xii-güedé.

<sup>25</sup>Te sǎtá dúcá<sup>n</sup> te ní cáhá<sup>n</sup> té Júdás téé cuáha cuendá ñáhá xii-gá, te xǎha<sup>n</sup>-dǎ:

—Mèstrú, ¿te náa sàni iní-n sǎ yǔhú cuáha cuendá ñáhà-í xii-n núú cuè téé cùu úhú iní ñáhá xii-n-á<sup>n</sup>? —càchí-dé xǎha<sup>n</sup>-dǎ xii-gá.

Te Jèsús ní xáha<sup>n</sup>-gǎ xii-dé:

—Diu-n —càchí-gá xǎha<sup>n</sup>-gǎ xii-dé.

<sup>26</sup>Te ñini cùdini cue téé xica cuu ndihi Jesús ní quehe<sup>n</sup>-gá pàà, te ní ndacá<sup>n</sup> táhú-gǎ núú Yǎ Ndiöxí, te dǎtnùní ní táhú cuèchi-gá te ní ngüíta-gá dǎcǎhñu-gá cue téé xica cuu ndihi-gá-á<sup>n</sup>, te xǎha<sup>n</sup>-gǎ xii-güedé:

—Chí quéhé<sup>n</sup> pàà-a caxi-ndo, te cada iní-ndó sǎ yǐqui cuñú-í cúu-xí —càchí-gá xǎha<sup>n</sup>-gǎ xii-güedé.

<sup>27</sup>Te ní quehe<sup>n</sup>-gá vǎsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiöxí, te dǎtnùní ní ngüíta-gá sǎñaha-gǎ xii-güedé cuendá coho-güedé luha luha sǎ ñúhú xǐtí-xi, te xǎha<sup>n</sup>-gǎ xii-güedé:

—Chí cóhó nchàa nchohó ndudí ndéhé yoho yàha stilé ñúhú xǐtí vǎsú-a. <sup>28</sup>Te cada iní-ndó sǎ cúu-xí dǎtná ñíñ-í sǎ cǎtí òré cahni ñaha-güedě xii-í, te sǎ dúcá<sup>n</sup> cǎtí ñíñ-í xǐá<sup>n</sup> cutnùní ndáá sǎ Yǎ Ndiöxí cada-gá ingá núú sǎ vǎha sǎ cúu-xí vǎi ñáyiú dǎtná ní cachí-gá cada-gá, te ío vǎi ñáyiú cada càhnu iní-gá cuèchi-yu. <sup>29</sup>Te na càchí tnúhu-í xii-ndo sǎ vítná-nǎ duha xǐhi ndihi ñaha-í xii-ndo ndùdí

ndéhé yoho yàha stilé-a, te vǎ cóhó ndihi ñaha-gá-í xii-ndo, dico na sǎà nduu ñànihí tnáhá-ó núú ndécú Tǎtà-í Dútú Ndiöxí táxí tnùní-gá te dǎvá-á<sup>n</sup> cada iní-ndó sǎ dǎtná sǎ cóhó ndihi ñaha tucu-í xii-ndo chi ío cudíí iní-ó —càchí-gá xǎha<sup>n</sup>-gǎ xii-güedé.

**Té Pèlú cúnaha-dě xii ñáyiú sǎ ñà túú xini-dé Jèsús**

(Mr. 14:26-31; Lc. 22:31-34; Jn. 13:36-38)

<sup>30</sup>Te Jèsús ní xita-gá ñ<sup>n</sup> ndudú ndihi cue téé xica cuu ndihi-gá, te dǎtnùní ní xica-gá cuáhá<sup>n</sup>-gá ndihi-güedé yucu Olívú. <sup>31</sup>Te yàcá<sup>n</sup> ní xáha<sup>n</sup>-gǎ xii-güedé:

—Na càchí tnúhu-í xii-ndo sǎ ncháá-ndó dǎndóo ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yǎ Ndiöxí núú càchí-xi: “Yúhú cuáha-í tnúhu cahni-güedé téé cùu toli, te nchaa mběé-dě ndihi-güedě cuténuu”, duha càchí-xi núú tütú-gá. <sup>32</sup>Dico na ndòto-í te codonùu-í núú-ndó quǐh<sup>n</sup> distritú Galilea —càchí-gá xǎha<sup>n</sup>-gǎ xii-güedé.

<sup>33</sup>Te té Pèlú ní xáha<sup>n</sup>-dǎ xii-gá:

—Te cuèi nchaa-güedé ná dǎndóo ñaha-güedě xii-n, dico yúhú chi vǎ dǎndóo ñaha-í xii-n —càchí-dé xǎha<sup>n</sup>-dǎ xii-gá.

<sup>34</sup>Te Jèsús ní xáha<sup>n</sup>-gǎ xii-dé:

—Na càchí tnúhu ndáá-í xii-n sǎ niú vitna cùmání-gǎ cana ñ<sup>n</sup> líhi, te úní xito cáhá<sup>n</sup>-n núú ñáyiú sǎ ñà túú xini ñáhá-n xii-í —càchí-gá xǎha<sup>n</sup>-gǎ xii-dé.

<sup>35</sup>Te té Pèlú ní xáha<sup>n</sup>-dǎ xii-gá:

—Cuèi na cùu ndihi ñaha-í xii-n dico vǎ càhá<sup>n</sup>-í núú ñáyiú sǎ ñà túú xini ñáhà-í xii-n —càchí-dé xǎha<sup>n</sup>-dǎ xii-gá.

Te nchaa dava-gá cue tée xica  
 cuu ndihi-gá diu-ni duca<sup>n</sup> ní  
 xáha<sup>n</sup>-güedě xii-gá.

**Jèsús càhá<sup>n</sup> ndihi-gá Yă Ndiöxí ii<sup>n</sup>  
 xichi núú nání Gětsemaní**

(Mr. 14:32-42; Lc. 22:39-46)

<sup>36</sup>Te Jèsús ní quexìo-gá ndihi cue  
 tée xica cuu ndihi-gá ii<sup>n</sup> xichi núú  
 nání Gětsemaní, te xíá<sup>n</sup> ní xáha<sup>n</sup>-gă  
 xii-güedě:

—Chí cúnúçöo iha cundetü-ndo  
 na quihí<sup>n</sup>-í yàcá<sup>n</sup> càhá<sup>n</sup> ndihi-í  
 Yă Ndiöxí —càchí-gă xáha<sup>n</sup>-gă  
 xii-güedě.

<sup>37</sup>Te nděca-gă té Pèlú, ndihi ndi  
 ndüü déhe té Zebèdeú cuáhá<sup>n</sup>, te ní  
 nguífta-xi súúní ndìhú iní-gă. <sup>38</sup>Te ní  
 xáha<sup>n</sup>-gă xii cue tée úní-á<sup>n</sup>:

—Súúní ndìhú iní-í dàtná sá cùú-í,  
 te chí quéndöo nchòhó iha te vá  
 cùdú-ndó chi yúhú vá cùdú-í —  
 càchí-gă xáha<sup>n</sup>-gă xii-güedě.

<sup>39</sup>Te sa ñunchíí luha ní xica  
 ndehe Jèsús núú ndécú-güedě, te  
 ní nguíftí xítí-gă te ní nuu núú-gă  
 ndàa núú ñhúhú, te ní nguífta-gă  
 càhá<sup>n</sup> ndihi-gă Tătá-gă Dútú Ndiöxí,  
 te xáha<sup>n</sup>-gă:

—Yòhó Tătá mèe-í, càhá<sup>n</sup> ndàhú-í  
 núú-n nùu vá cündèe iní-n tàunihnu  
 ñaha-n xii-í cuendá sá vă ndòhò-í  
 ná sàà òrè, dico vá cadá-n nàcuáa  
 càchí iní mèe-í, chi cada-n nàcuáa  
 càchí iní mèe-n —càchí-gă xáha<sup>n</sup>-gă  
 xii Tătá-gă Dútú Ndiöxí.

<sup>40</sup>Te sátá ní yáha ní càhá<sup>n</sup>  
 ndihi-gă Tătá-gă Dútú Ndiöxí, te  
 cuánuhú-gă núú ní dándöo-gă cue  
 tée úní-á<sup>n</sup> te xixídí-güedě òrè ní  
 nasáá-gă, te ní xáha<sup>n</sup>-gă xii té Pèlú:

—¿Náa ñá cündèe iní-ndó vá  
 cùdú-ni-ndo cuédicó ii<sup>n</sup> òrè nini

càhá<sup>n</sup> ndihi-í Yă Ndiöxí-ă<sup>n</sup>? <sup>41</sup>Te  
 chí quéndöo tucu te cuhu<sup>n</sup> iní-ndó  
 vă cùdú-ndó, te càhá<sup>n</sup> ndihi-ndo Yă  
 Ndiöxí cuendá sá vă dácàhá<sup>n</sup> ñáhá  
 yücu ñávàha xii-ndo càda-ndo  
 sá ñà túú tàú-ndó càda-ndo. Te  
 xìní ndáá-í sá nchòhó cuíní-ndó  
 càda-ndo nchaa nacúáa càhá<sup>n</sup>-í  
 dìcò-ni sá ñà túú ñihí ndéé-ndó —  
 càchí-gă xáha<sup>n</sup>-gă xii-güedě.

<sup>42</sup>Te xito cùu uú cuáhá<sup>n</sup> tucu  
 Jèsús càhá<sup>n</sup> ndihi-gă Tătá-gă Dútú  
 Ndiöxí, te xáha<sup>n</sup>-gă:

—Yòhó Tătá mèe-í, te núu vá  
 cündèe iní-n tàunihnu ñaha-n  
 xii-í cuendá sá vă ndòhò-í, te cada  
 nàcuáa càchí iní mèe-n —càchí-gă  
 xáha<sup>n</sup>-gă xii Tătá-gă Dútú Ndiöxí.

<sup>43</sup>Te òrè ní yáha ní càhá<sup>n</sup> ndihi-gă  
 Tătá-gă Dútú Ndiöxí, te cuánuhú  
 tucu-gă núú xĩndecu cue tée úní  
 xícá cùu ndihi-gă-á<sup>n</sup>, te xidí-ni  
 tucu-güedě òrè ní nasáá-gă, te duca<sup>n</sup>  
 ní quide-güedě chi súúní ñuhu saní  
 núú-güedě. <sup>44</sup>Te ní dándöo ñaha  
 tucu Jesús xii-güedě xíá<sup>n</sup>, te cuáhá<sup>n</sup>  
 tucu-gă xito cùu úní càhá<sup>n</sup> ndihi  
 tucu-gă Tătá-gă Dútú Ndiöxí, te  
 diu-ni tnúhu sá sà ní xáha<sup>n</sup>-gă xii  
 Tătá-gă Dútú Ndiöxí, diu-ni tnúhu-á<sup>n</sup>  
 ní xáha<sup>n</sup> tucu-gă. <sup>45</sup>Te sátá ní yáha ní  
 càhá<sup>n</sup> ndihi-gă Tătá-gă Dútú Ndiöxí,  
 te cuánuhú tucu-gă núú ndécú cue  
 tée xica cuu ndihi-gă-á<sup>n</sup>, te òrè ní  
 nasáá-gă, te ní xáha<sup>n</sup>-gă xii-güedě:

—¿Te náa xidí-ni tucu-ndo?  
 Te sa ní sáà òrè cuáha cuendá  
 ñáhá-güedě xii-í núú cuè tée ndècu  
 ichi cuehé ichi duha. <sup>46</sup>Dico vitna  
 chí ndáçöo na quihí<sup>n</sup>-ó, chi sa véxi  
 tée cuáha cuendá ñáhá xii-í núú  
 cuè tée cùu úhú iní ñáhá —càchí-gă  
 xáha<sup>n</sup>-gă xii-güedě.

**Ní tñii-güedé Jèsús ndécá  
ñaha-güedé xii-gá cuáhá<sup>n</sup>**

(Mr. 14:43-50; Lc. 22:47-53; Jn. 18:2-11)

<sup>47</sup>Te càhá<sup>n</sup> dúcá<sup>n</sup>-ní Jèsús ní quexio té Jùdás. Te núú tñàhá tée-á<sup>n</sup> cúú ùxúú tñàhá cue tée xìca cuu ndìhi-gá ní cùu te duca<sup>n</sup> ñí quide-dé. Te ndìhi-dé vài cue tée ní quexio te dava-güedé xñehe-güedé machítí, te dava-güedé xñehe-güedé carrutí. Te cue tée-á<sup>n</sup> ñí tendaha ñaha cue dútú cúnùu, ndìhi cue tée cùu sacuéhé núú ñáyiú isràél. <sup>48</sup>Te té Jùdás tée cuáha cuèndá ñáhá xii-gá-á<sup>n</sup> sa ní xítnùhu-dé cue tée-á<sup>n</sup> nàcuáa cada-dé cuáha cuèndá-dé Jèsús núú-güedé, te duha ní xáha<sup>n</sup>-dè xii-güedé:

—Cundehe-ndo tée na tèyuhu-í te tée-á<sup>n</sup> tñii-ndo-dè chi tée-á<sup>n</sup> cúú-dè tée ndèè iní-ndó —duha ní xáha<sup>n</sup>-dè xii-güedé.

<sup>49</sup>Te sátá dúcá<sup>n</sup> ñí xáha<sup>n</sup>-dè xii-güedé, te ní sándehe yatni-dé núú Jèsús, te ní xáha<sup>n</sup>-dè xii-gá:

—iRàció<sup>n</sup> Mèstrú! —càchí-dé xáha<sup>n</sup>-dè xii-gá.

Te ní teyuhu ñaha-dé xii-gá. <sup>50</sup>Te Jèsús ní xáha<sup>n</sup>-gã xii-dé:

—Yòhó tée ní chitnahá ñáhá xii-í, òná cuíní-n núú véxi-n núú-í? —càchí-gá xáha<sup>n</sup>-gã xii-dé.

Te òré-ni-á<sup>n</sup> ní tñii ñaha cuè tée ndìhi té Jùdás-á<sup>n</sup> xii Jèsús, te ndèca ñaha-güedé xii-gá cuáhá<sup>n</sup>.

<sup>51</sup>Te ìí<sup>n</sup> cue tée ndìhi Jèsús ní tava-dé machítí-dé, te ní xehndé-ni-dé ìí<sup>n</sup> xio lóho ìí<sup>n</sup> tée xìnu cuechi núú dútú cúnùu te ní quendeé duu<sup>n</sup> lóho-dé. <sup>52</sup>Te Jèsús ní xáha<sup>n</sup>-gã xii tée duca<sup>n</sup> ñí xehndé lóho tée-á<sup>n</sup>:

—Nachihí machítí-n ñii-xi, chi nchaa cue tée na nàá ndìhi machítí cahni-güedé tñaha ñáyiú-güedé te diu-ni ndìhi machítí cuú méé-güedé tucu. <sup>53</sup>Te na càchí tñúhu-í xii-ndo sã núu yúhú cuíní-í cácu-í te cáhá<sup>n</sup> ndìhi-í Tătà-í Dútú Ndiöxí, te tendaha-gã cuéhé víhí espíritú xínú cuechi núú-gã quixi-xi dàcácu ñaha-xi xii-í. <sup>54</sup>Dico núu duca<sup>n</sup> na càda-í te vá queé ndáá-xi nàcuáa càhá<sup>n</sup>-xi núú tütú Tătà-í Dútú Ndiöxí núú ndèè tñuní sá dàcuítíí xìni ñuhu-xi nándi ndoho-í —càchí-gá xáha<sup>n</sup>-gã xii-dé.

<sup>55</sup>Te Jèsús ní xáha<sup>n</sup>-gã xii cue tée duca<sup>n</sup> ñí tñii ñaha xii-gá-á<sup>n</sup>:

—Nchaa-ni nduu ní xini-ndó ñí xóo cunucóo-í xití veñúhu càhnu sá ìo cùnùu ní xóo danèhé-í ñáyiú, te ñá túú ní tñii ñaha-ndo xii-í, òte ná cuèndá vitna quide ñaha-ná-ndó xii-í dàtná quidé-ndó ìí<sup>n</sup> ñadúhú, nèhe-ná-ndó màchítí nèhe-ná-ndó càrrutí ní quexio ní tñii ñaha-ndo xii-í-í? <sup>56</sup>Dico dacuítíí sã dúhá càda-xi nàcuáa quee ndáá-xi nàcuáa ní cáhá<sup>n</sup> cue tée ní xóo cáhá<sup>n</sup> tñúhu Yá Ndiöxí ndéé sanaha ñí ngódó tñuní núú tütú-gá —càchí-gá xáha<sup>n</sup>-gã xii-güedé.

Te nchaa cue tée xìca cuu ndìhi-gá ní xinu-güedé ní dándöo ñaha-güedé xii-gá.

**Jèsús ndécú-gã jùndá**

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup>Te cue tée ní tñii ñaha xii Jesús ndécá ñaha-güedé xii-gá cuáhá<sup>n</sup> núú tã Caifás tée cùu dútú cúnùu-gá. Te núú ndécú dútú cúnùu-gá-á<sup>n</sup> sa ní tacá cue tée dàcuaha ñaha xii ñáyiú

nchaa tnúhu ní chídó tnùnì ndíi Moisés, ndíhi cue tée cùu sacuéhé nũú ñãyiuru isràél cuendá cada-güedé jündá. <sup>58</sup>Te té Pèlú xica xica-ni nchicú<sup>n</sup> ñáhá-dě xii-gá cuáhá<sup>n</sup> ní sáá-dé ndéé quehé vehe núú ndécú tée cùu dútú cúnù-gá-á<sup>n</sup>, te xíá<sup>n</sup> ní ngóo-dé ndíhi cue tée cùu poleciá cuendá cuíní-dé quiní-dé nása cada ñaha-güedé xii Jèsús.

<sup>59</sup>Te cue tée cùu dútú cúnù, ndíhi cue tée cùu sacuéhé nũú ñãyiuru isràél, ndíhi nchaa dava-gá cue tée xĩndecu jündá ndúcú-güedé nàcuáa cada-güedé dacàa-güedé ì<sup>n</sup> cuéchi díquí Jèsús cuèi cùu-xi ì<sup>n</sup> sá ñã ndàá cuendá níhí-güedé nàcuáa cada-güedé cahni ñaha-güedé xii-gá.

<sup>60</sup>Te vài cue tée ní ngüíta-güedé dácàa-güedé cuéchi díquí-gã, dico ñá túú ní cùndee tnúhu-güedé chi mee-ni tnúhu ndehnde cùu-xi. Te sátá dúcá<sup>n</sup> te ní quexìo tucu úú tnàhá cue tée dàcuandehnde-güedé, <sup>61</sup>te xàha<sup>n</sup>-güedé xii nchaa cue tée xĩndecu jündá:

—Véxi-ndí cächí tnúhu-ndí xii-ndo sã téa cächí-dé sá dãngòyo-dé veñúhu càhnu sá ìo cùnùu núú chíñúhu-o Yá Ndiòxí, te dandàa-dé ìngá veñúhu saa, diu-ni núú cáá tnàhí veñúhu-ã<sup>n</sup>, te xití úní-ni nduu sa nadaxĩnu-dé, duha cächí-dé — cächí-güedé xàha<sup>n</sup>-güedé.

<sup>62</sup>Te tée cùu dútú cúnù-gá-á<sup>n</sup> ní ndacuñí-dé, te xàha<sup>n</sup>-dě xii Jèsús: —¿Ná cuendá duha ndùu tnúhu càhá<sup>n</sup> cue téa cuendá-n? Te càhá<sup>n</sup> nũú nása cunduú tnúhu càhá<sup>n</sup>-n — cächí-dé xàha<sup>n</sup>-dě xii-gá.

<sup>63</sup>Dico Jèsús ñá túú tnàhí ni càhá<sup>n</sup>-gá. Te tée cùu dútú cúnù-gá-á<sup>n</sup> ní xàha<sup>n</sup> tucu-dé xii-gá:

—Yúhú, cáciu nèhe-í Yá Ndiòxí chi cuíní-í sá cächí tnúhu ndáá-n xii-ndí nũú sá dífú Crístú Déhe Yá Ndiòxí Yáá ní tendaha-gã véxi ñuyíú-a cùu-n —cächí-dé xàha<sup>n</sup>-dě xii-gá.

<sup>64</sup>Te Jèsús ní xàha<sup>n</sup>-gã xii-dé: —Diu Yáá-á<sup>n</sup> cùu-í dàtná cächí-n-ã<sup>n</sup>, te na cächí tnúhu-í xii-ndo sã sàá nduu te quiní-ndó yúhú Téa cùu ñaní tnàhá-ndó nchàa-ndo cunucóo-í xio cùha Dútú Ndiòxí Yáá ndácú quide nchaandi túhú sá vãha. Te dàvá-á<sup>n</sup> quiní ñáhá-ndó xii-í quee-í andiu quixi-í ichi xití vícò —cächí-gá xàha<sup>n</sup>-gã xii-dé.

<sup>65</sup>Te dútú cúnù-gá-á<sup>n</sup> ní ndátá-dě dóo níhnú-dě cuendá sá ñà túú ní tnàhá iní-dé nàcuáa ní càhá<sup>n</sup> Jèsús, te ní xàha<sup>n</sup>-dě xii nchaa cue tée xĩndecu jündá:

—Téa càhá<sup>n</sup> úhú-dé cuendá Yá Ndiòxí, te vitna ñá túú-gã xíní ñúhu-xi cue téa càhá<sup>n</sup> ndáá nũú ndáá sá ndècuéchi-dé àdi ñá túú ndècuéchi-dé, chi sa ní tecú dóho-o nàcuáa ndùu tnúhu ní càhá<sup>n</sup>-dé ní càhá<sup>n</sup> úhú-dé cuendá Yá Ndiòxí.

<sup>66</sup>Te nchaa-ndo chí càhá<sup>n</sup> vitna núu nása sàni iní-ndó cunduú cuendá téa-a —cächí-dé xàha<sup>n</sup>-dě xii nchaa cue téa-á<sup>n</sup>.

Te cue téa-á<sup>n</sup> ní xàha<sup>n</sup>-güedé: —Nchúhú cächí-ndí sá tàù-xi cuú-dé chi ndècuéchi-dé — cächí-güedé xàha<sup>n</sup>-güedé.

<sup>67</sup>Te ní ngüíta-güedé ní tíú díí ñáhá-güedé xii-gá te ní caniha-güedé, te tnàhá núú-gã ní cani-güedé. <sup>68</sup>Te ní cudíquí ndé ñáhá-güedé xii-gá, te xàha<sup>n</sup>-güedé: —Yòhò Téa cächí sá cúú Crístú Yáá ní tendaha Yá Ndiòxí véxi ñuyíú-a,

cáhá<sup>n</sup> ná còto yoo ní caniha xii-n —  
cachí-güedé xǎha<sup>n</sup>-güedě xii-gá.

**Té Pèlú xǎha<sup>n</sup>-dě xii ñáyiú sá ñà túú  
xìní-dé Jèsús**

(Mr. 14:66-72; Lc. 22:56-  
62; Jn. 18:15-18, 25-27)

<sup>69</sup>Te ñini ñucóo té Pèlú quehé,  
te ní sáhá<sup>n</sup> ì<sup>n</sup> xíchí xínú cuèchi  
vehe-á<sup>n</sup> nǔú-dě, te xǎha<sup>n</sup>-xi xii-dé:  
—Yòhó tñahá-n cùu-n téé xica cuu  
ndìhi Jesús téé distritú Galiléa —  
càchí-xi xǎha<sup>n</sup>-xi xii-dé.

<sup>70</sup>Te té Pèlú ñá túú ní ñnuu-dé,  
te ndèdóho nchaa ñáyiú xǎndecu-á<sup>n</sup>  
ní xáha<sup>n</sup>-dě xii xíchí-á<sup>n</sup>:

—Yúhú, ñá túú cùnuni iní-í nása  
ndùu tñúhu càhá<sup>n</sup>-n —càchí-dé  
xǎha<sup>n</sup>-dě xii-xi.

<sup>71</sup>Te ní xica té Pèlú cuáhá<sup>n</sup>-dé  
ndàa nacuáa nchíi yuyèhe vehe-á<sup>n</sup>,  
te ní xini ñáhá tùcu ingá xíchí  
xínú cuèchi vehe-á<sup>n</sup>, te xǎha<sup>n</sup>-xi xii  
nchaa ñáyiú xǎndecu-á<sup>n</sup>:

—Tée-a tñahá-dé xicá cùu-dé ndìhi  
Jèsús téé ñúú Nazàrét —càchí-xi  
xǎha<sup>n</sup>-xi xii-yu.

<sup>72</sup>Te té Pèlú ní xáha<sup>n</sup>-dě:

—Nchàcui<sup>t</sup>i Yá Ndiòxi sá ñà  
túú xìní-í téé càcunehe-ndo-á<sup>n</sup> —  
càchí-dé xǎha<sup>n</sup>-dě xii-yu.

<sup>73</sup>Te tna tnaa-ni ní cuu, te dava  
ñáyiú xǎndecu xía<sup>n</sup> ní xáha<sup>n</sup> tùcú-yu  
xii té Pèlú:

—Ndáá sá tñahá-n xica cuu-n  
ndìhi téé ndèca-güedé cuànguihu-á<sup>n</sup>,  
chi ñáyúhú càhá<sup>n</sup>-n —càchí-yu  
xǎhǎ<sup>n</sup>-yu xii-dé.

<sup>74</sup>Te té Pèlú ní xáha<sup>n</sup>-dě xii-yu:

—Nchàcui<sup>t</sup>i Yá Ndiòxi sá yúhú  
càhá<sup>n</sup> ndáá-í sá ñà túú xìní-í téé  
càcunehe-ndo-á<sup>n</sup> —càchí-dé  
xǎha<sup>n</sup>-dě xii-yu.

Te òrè-ni-á<sup>n</sup> ñi cana ì<sup>n</sup> líhi. <sup>75</sup>Te  
ní ndacu iní té Pèlú nàcuáa ní xáha<sup>n</sup>  
Jèsús xii-dé sá cùmání-gǎ cana ì<sup>n</sup>  
líhi te úní xito cáhá<sup>n</sup>-dé sá ñà túú  
xìní ñáhá-dě xii-gá. Te ní quee-dé  
tñúú ñáyiú-á<sup>n</sup> cuáhá<sup>n</sup>-dé ì<sup>n</sup> xio ní  
ndáhyú víhí-dě ní ndixi cuèchi  
iní-dé.

**Ndèca-güedé Jèsús cuáhá<sup>n</sup> núú tǎ  
Pilatú**

(Mr. 15:1; Lc. 23:1-2; Jn. 18:28-32)

**27** Te sátá ñi túndaá te nchaa  
cue téé cùu dútú cùnùu,  
ndìhi cue téé cùu sacuéhé nǔú  
ñáyiú isràél ní ndatnúhu-güedé  
nàcuáa cada-güedé cahni-güedé  
Jèsús. <sup>2</sup>Te ní dácútú ñàha-güedé  
xii-gá, te ndèca ñaha-güedé cuáhá<sup>n</sup>  
núú tǎ Pilatú téé cùu gobiernú.

**Ní xíhí té Jùdás**

<sup>3</sup>Te té Jùdás téé ní sáha cuèndá  
ñáhá xii Jesús ní cutnùní iní-dé sá  
cáhní ñàha-güedé xii-gá, te ní ndixi  
cuèchi iní-dé sá ñà túú ní quide  
váha-dé sá dúcá<sup>n</sup> ñi quide-dé ní  
sáha cuèndá ñáhá-dě xii-gá núú cuè  
téé cùu úhú iní ñáhá, te ní xica-dé  
cuáhá<sup>n</sup>-dé danchòcáva-dé ócò úxí  
díhú<sup>n</sup> cuixí<sup>n</sup> núú cuè dútú cùnùu-á<sup>n</sup>,  
ndìhi núú cuè téé cùu sacuéhé  
nǔú ñáyiú isràél, chi diu cue téé-á<sup>n</sup>  
ní sáñaha-güedé díhú<sup>n</sup> xii-dé.

<sup>4</sup>Te òrè ní quexio té Jùdás-á<sup>n</sup> nǔú  
ndécú-güedé, te xǎha<sup>n</sup>-dě xii-güedé:  
—Yúhú, ñá túú ní quide váha-í sá  
dúcá<sup>n</sup> ñi quide-í ní taxi cuèndá-í  
ì<sup>n</sup> téé ñá túú tñahí cuèchi-xi  
cahni-ndo-dě —càchí-dé xǎha<sup>n</sup>-dě  
xii-güedé.

Te cue téé-á<sup>n</sup> ñi xáha<sup>n</sup>-güedé  
xii-dé:

—Nchúhú, ñá túú nǎgá cuèndú cuìní-ndí cáhá<sup>n</sup> ndíhi ñaha-ndí xii-n, te mee-n ñaha núu nása sàni iní-n càda-n —cachí-güedé xáha<sup>n</sup>-güedé xii-dé.

<sup>5</sup>Te té Jùdás ní dǎngoyo-dé díhú<sup>n</sup>-ǎ<sup>n</sup> xití veñúhu càhnu sá ïo cùnunu, te ní xica-dé cuáhá<sup>n</sup>-dé ní dácuehné-dé méé-dé.

<sup>6</sup>Te cue dútú cùnùu ní naquehe<sup>n</sup>-güedé díhú<sup>n</sup>-ǎ<sup>n</sup>, te ní xitnàha-güedé:

—Díhú<sup>n</sup>-a ní queyǎhu cuèndá sá cùu ì<sup>n</sup> ñáyiu, núu xíǎ<sup>n</sup> vá cúu nàchihio xití cǎjá núu ñúhú sǎ cúu cuèndá Yǎ Ndiòxí —càchí-güedé xitnàha-güedé.

<sup>7</sup>Te ní ndatnúhu-güedé te ní cuu ì<sup>n</sup>nuu-güedé cuèndá nacuaa<sup>n</sup>-güedé ì<sup>n</sup> xichi núu cáá ñùhu danani-güedé Núu Cuǎha Nchaa Sá Cuǎha Ñuhu, te xíǎ<sup>n</sup> ñí saa<sup>n</sup>-güedé cuèndá xíǎ<sup>n</sup> nguñdǔxi nchaa ñáyiu véxi xica.

<sup>8</sup>Te ní nadáma ñù ñuhu-ǎ<sup>n</sup>, te vitna ñanani-güedé Ñuhu Yáhu Níñí, duha ñanani-güedé. <sup>9</sup>Te duca<sup>n</sup> ñí cuu chi ní quee ndáá-xi nàcuáa ní cáhá<sup>n</sup> ndí Jeremiás téé ní xóo cáhá<sup>n</sup> tnúhu Yá Ndiòxí ndéé sanaha, te duha ní cachí ndí: “Cue téé isràél ní cachí-güedé sá òcò úxí díhú<sup>n</sup> cuixí<sup>n</sup> cháhu-güedé cuèndá ì<sup>n</sup> téé quehe<sup>n</sup> cuèndá-güedé. Te díhú<sup>n</sup>-ǎ<sup>n</sup> nàquehe<sup>n</sup>-güedé, <sup>10</sup>te cuaa<sup>n</sup>-güedé ì<sup>n</sup> xichi núu nání Núu Cuǎha Nchaa Sá Cuǎha Ñuhu, te duca<sup>n</sup> càda-xi chi duca<sup>n</sup> ñí cachí Yǎ Ndiòxí cunduú”, duha ní cachí ndí Jeremiás-ǎ<sup>n</sup>.

### Jèsús ndécú-gǎ núu tǎ Pilatú

(Mr. 15:2-5; Lc. 23:3-5; Jn. 18:33-38)

<sup>11</sup>Te Jèsús ndécú-gǎ núu tǎ Pilatú téé cùu gobiernú, te téé-ǎ<sup>n</sup> ñí xicá<sup>n</sup> tnúhú-dé núu-gǎ, te xáha<sup>n</sup>-dǎ xii-gǎ:

—¿Ndáá sá díú-n cùu-n téé yíndaha ñaha xii ñáyiu isràél-ǎ<sup>n</sup>? —càchí-dé xáha<sup>n</sup>-dǎ xii-gǎ.

Te Jèsús ní xáha<sup>n</sup>-gǎ xii-dé:

—Diu-í yíndaha-í-yu —càchí-gǎ xáha<sup>n</sup>-gǎ xii-dé.

<sup>12</sup>Te cue dútú cùnùu ndíhi cue téé cùu sacuéhé núu ñáyiu isràél sàcá<sup>n</sup> cuéchi-güedé núu tǎ Pilatú cuèndá Jèsús, dico mee-gǎ ni ì<sup>n</sup> tnúhu ñá túu ní cáhá<sup>n</sup>-gǎ. <sup>13</sup>Te té Pilatú ní xáha<sup>n</sup>-dǎ xii-gǎ:

—Cáhá<sup>n</sup>, ná cuèndá ñá túu càhá<sup>n</sup>-n, te cundehe ñá ndéé duha titní cuéchi dàcaa cue téé-a díquí-n —càchí-dé xáha<sup>n</sup>-dǎ xii-gǎ.

<sup>14</sup>Dico Jèsús ñá túu tnàhí ni cáhá<sup>n</sup>-gǎ, te té Pilatú téé cùu gobiernú-ǎ<sup>n</sup> ïo ní cuñúhu-dé sá dúcá<sup>n</sup> ñá túu tnàhí ni cáhá<sup>n</sup>-gǎ.

### Ní quide ndáá-güedé sá cáhni-güedé

#### Jèsús

(Mr. 15:6-20; Lc. 23:13-25; Jn. 18:38-19:16)

<sup>15</sup>Te ndí tnahá nduu víco pascuá dácácu té Pilatú téé cùu gobiernú-ǎ<sup>n</sup> ì<sup>n</sup> téé yíhi vecaá chi duca<sup>n</sup> tnàhí quide-dé, te mee ñáyiu càhá<sup>n</sup>-yu te núu ndédacàa téé yíhi vecaá-ǎ<sup>n</sup> cǎcu-dé te téé-ǎ<sup>n</sup> dácácu-dé. <sup>16</sup>Te dàvá-ǎ<sup>n</sup> yíhí ì<sup>n</sup> téé nàni Barrabás vecaá, te téé-ǎ<sup>n</sup> lò cuèndú-dé sá ïo nèhé ní quide-dé. <sup>17</sup>Te ní nataká nchaa ñáyiu, te té Pilatú ní xicá<sup>n</sup> tnúhú-dé núu-yu, te xáha<sup>n</sup>-dǎ:

—¿Ndédacàa núu úu cue téé-a cuìní-ndó dàcácu-í-güedé-í? ¿Té Barrabás ǎ<sup>n</sup> Jèsús téé nàni Cristú? —càchí-dé xáha<sup>n</sup>-dǎ xii-yu.

<sup>18</sup>Te duca<sup>n</sup> ñí cáhá<sup>n</sup> té Pilatú, chi ní cutnùni iní-dé sá dicó sá cuèdú ínigüedé duca<sup>n</sup> ñí quide-güedé ní sáha cuèndá ñáhá-güedé xii Jèsús núu-dǎ.

<sup>19</sup>Te nini nùcòo té Pìlatú núu xèhndé-dé cuéchi ní tendaha ñàdihí-dé tnúhu cuáhá<sup>n</sup> núu-dě, te duha ndùu tnúhu ní tendaha-a<sup>n</sup>: “Vá cání ìní-n nă cada-n tée ní taxi cuendá ñáhá-güedě xii-n, tée ñă túú tnàhí cuéchi-xi, chi icuini ío nèhé ní dácótó ñàha saní-í cuendá-dé”, duha ndùu tnúhu ní xáha<sup>n</sup>-a<sup>n</sup> xii té Pìlatú.

<sup>20</sup>Dico cue tée cùu dútú cúnùu, ndihí cue tée cùu sacuéhé nũ ñăyiu isrâél ní xáha<sup>n</sup>-güedě xii ñăyiu sá ná cũñáhá-yu xii té Pìlatú dácacu-dé té Barrábás te cahni-dé Jèsús, te ní quidé-yu năcuáa ní xáha<sup>n</sup>-güedě. <sup>21</sup>Te té Pìlatú-á<sup>n</sup> ní xáha<sup>n</sup> tùcu-dé xii-yu:

—¿Ndédacàa núu úu cue tée-a cuení-ndó dácacu-í? —càchí-dé xăha<sup>n</sup>-dě xii-yu.

Te ní xáhă<sup>n</sup>-yu xii-dé:

—Té Barrábás dácacu-n —càchí-yu xăhă<sup>n</sup>-yu xii-dé.

<sup>22</sup>Te té Pìlatú ní xícá<sup>n</sup> tnúhú-dě nũ-yu, te xăha<sup>n</sup>-dě:

—¿Te ná cuení-ndó càda-í Jèsús tée nàni Cristú tée càchí sá Yă Ndiôxí ní tendaha ñàha xii-dé véxi-dé ñuyú-a-i? —càchí-dé xăha<sup>n</sup>-dě xii-yu.

Te nchaá-yu ní cáhá<sup>n</sup>-yu, te xăhă<sup>n</sup>-yu:

—Cata caa-dé núu cùrúxí —càchí-yu xăhă<sup>n</sup>-yu xii-dé.

<sup>23</sup>Te té Pìlatú ní xáha<sup>n</sup> tùcu-dé xii-yu:

—¿Te ná cúu cuéchi ní quide-dé nũ duca<sup>n</sup> cuení-ndó càda-í-dé-i? —càchí-dé xăha<sup>n</sup>-dě xii-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xăhă<sup>n</sup>-yu xii-dé:

—¡Cata caa-dé núu cùrúxí! —càchí-yu xăhă<sup>n</sup>-yu xii-dé.

<sup>24</sup>Te té Pìlatú ní cutnùnì iní-dé sá vă ñihí-dé năcuáa cada-dé, chi uu<sup>n</sup>-gá ní ngüíta ñăyiu xícuaá-yu, te xícă<sup>n</sup> ní xícá<sup>n</sup>-dé ndute ní ndáhá-dě núu nchàa ñăyiu, te ní xáha<sup>n</sup>-dě xii-yu:

—Tée-a cùu-dé ìí<sup>n</sup> tée ñă túú tnàhí cuéchi-xi, te nchòhó cuení-ndó sá cùú-dé, dico diu-ni mee-ndo cuido yáhu-ndo-dě chi yúhú vá cuidó yáhu-í-dé —càchí-dé xăha<sup>n</sup>-dě xii-yu.

<sup>25</sup>Te nchaá-yu ní xáhă<sup>n</sup>-yu xii-dé: —¡Diu nchúhú ndihí cue déhe-ndí cuido yăhu-ndí-dé! —càchí-yu xăhă<sup>n</sup>-yu.

<sup>26</sup>Te sátá dúcá<sup>n</sup> te té Pìlatú ní dácacu-dé té Barrábás, te ní táuchíú<sup>n</sup>-dě ní cani-güedé Jèsús. Te sátá dúcá<sup>n</sup> ñă quide ñaha-güedě xii-gá, te ní táuchíú<sup>n</sup>-dě candeca ñaha-güedě xii-gá quíhă<sup>n</sup> cata caa ñaha-güedě xii-gá núu cùrúxí.

<sup>27</sup>Te cue tée cùu sandadú té Pìlatú ndécá-güedě Jèsús cuánguihu xití vehe càhnu cuu cuendá-dé, te cue tée cùu sandadú-á<sup>n</sup> ñă cana-güedé dava-gá cue sandadú núu dúcá<sup>n</sup> ndèca-güedé Jèsús cuánguihu-á<sup>n</sup>.

<sup>28</sup>Te xícá<sup>n</sup> ñă taunuu-güedé dóo-gă, te ní dácúhă<sup>n</sup> ñàha-güedé xii-gá ìí<sup>n</sup> dóo tícuèhé víhí. <sup>29</sup>Te ní cadúha-güedé ìí<sup>n</sup> coroná ìñu ní chihi-güedé díquí-gă, te ní chitnîi-güedé ìí<sup>n</sup> carrútí ndaha cùha-gá, te ní ngüíñí xítí-güedé núu-gá cúdîquí ndeé ñáhá-güedé xii-gá, te xăha<sup>n</sup>-güedě:

—¡Ío càhnu cuu yohó tée yìndaha ñaha xii ñăyiu isrâél! —càchí-güedé xăha<sup>n</sup>-güedé xii-gá.

<sup>30</sup>Te ní tíú díí ñáhá-güedé xii-gá, te ní quehe<sup>n</sup>-güedé carrútí

sá ní sãñaha-güedě xii-gá te ní ducu<sup>n</sup>-güedé díquí-gã. <sup>31</sup>Te sátá ní yáha ní cudíquí ndéé ñáhá-güedě xii-gá, te ní nataunuu ñaha-güedě xii-gá dóó tícuèhé víhí sã ní dácúíhnu ñaha-güedé xii-gá, te ní dándíúnuu ñaha-güedě xii-gá dóó méé-gã, te dàtnùní ndécá ñaha-güedé cuáhá<sup>n</sup> núú cátá càa ñaha-güedé xii-gá núú cùrúxí.

### Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

<sup>32</sup>Te ñùhu-güedé ndíhi-gá ichi, te ní naníhí-güedě ìí<sup>n</sup> téé ñúú Cìrené nání-dě Xìmú, te téé-á<sup>n</sup> ní quide yica-güedě ní xido-dé cùrúxí sá nchídó Jèsús.

<sup>33</sup>Te ní sáá-güedé ndíhi-gá ìí<sup>n</sup> xichi núú nání Gõlgotá, te tnúhu-á<sup>n</sup> quée-xí: Núú nání yìquí díquí ndÿyí, duha quèe-xi tnúhu-á<sup>n</sup>. <sup>34</sup>Te xíá<sup>n</sup> sãñaha-güedě ndudí úá coho-gá ní cùu, te ñá túú ní xìhi-gá chi dico-ni ní xito ndéé-gá.

<sup>35</sup>Te ní sata caa ñaha-güedě xii-gá núú cùrúxí, te sátá dúcá<sup>n</sup> te cue téé cùu sandadú-á<sup>n</sup> ní xito ndéé-güedé ñù ndèdacàa-güedé cuu cuèndá-güedé dóó-gã. Te duca<sup>n</sup> ní cuu chi ní quee ndáá-xi nàcuáa ní cáhá<sup>n</sup> ìí<sup>n</sup> téé ní xóo cáhá<sup>n</sup> tnúhu Yá Ndiòxí ndéé sanaha yòdo tnuní núú tütú-gá, te duha càchí-xi: “Ní xito ndéé-güedé ñù ndèdacàa-güedé cuu cuèndá-güedé dóó-gã”, duha ní cachí téé-á<sup>n</sup> te duca<sup>n</sup> ní ngódó tnùní núú tütú-gá. <sup>36</sup>Te sátá dúcá<sup>n</sup> ní quide-güedé, te ní ngóo-güedé ndéé ñáhá-güedě xii-gá. <sup>37</sup>Te ní taxi ndecu-güedé ìí<sup>n</sup> sá ndéé lètrá ndàa díquí-gã. Te lètrá-á<sup>n</sup> càhá<sup>n</sup>-xi ná cuèndá duca<sup>n</sup> ní quide ñaha-güedě

xii-gá, te duha càhá<sup>n</sup> lètrá-á<sup>n</sup>: “Tée-a cùu-dé téé yìndaha ñaha xii ñáyiú isràèl”, duha càchí-xi. <sup>38</sup>Te tnàhá úú cue téé cùu ñadúhú ní sata caa-güedé díu-ni núú cùrúxí tucu, te ìí<sup>n</sup>-dé ní sata caa-güedé xio cùha-gá, te ingá-dé ní sata caa-güedé xio dàtni-gá. <sup>39</sup>Te nchaa ñáyiú yáha yatni núú tákàa-gá-á<sup>n</sup>, te dàcuicó-yu díquí-yu ndèhe ñahá-yu xii-gá, te xìcuèhé ñáhã-yu. <sup>40</sup>Te xãhã<sup>n</sup>-yu xii-gá:

—Yòhó càchí-n sã dàngoyo-n veñúhu càhnu sá ìo cùnuu, te dandaa-n ingá veñúhu saa, te xítí úní-ni nduu sa nadaxìnu-n, te vitna tanùu núú cùrúxí-á<sup>n</sup> dàcácu-n mée-n te núú ndisa sá Dèhe Yá Ndiòxí cúú-n —càchí-yu xãhã<sup>n</sup>-yu xii-gá.

<sup>41</sup>Te díu-ni duca<sup>n</sup> cùdíquí ndéé ñáhá cuè téé cùu dútú cùnùu xii-gá, ndíhi cue téé dàcuaha ñaha xii ñáyiú nchaa tnúhu ní chídó tnùní ndí Moisés, ndíhi cue téé cùu fariséú, ndíhi cue téé cùu sacuéhé nùú ñáyiú isràèl, te xìtnàha-güedé:

<sup>42</sup>—Tée-a ní ndacu-dé ní dàcácu-dé dava ñáyiú, te mee-dě ñá ndácú-dé dàcácu nihnu-dé méé-dě. Te núú ndisa sá cúú-dě téé yìndaha ñaha xii ñáyiú isràèl, te na cùndehe-o nuu-dé núú cùrúxí-a cuèndá quíndáa iní-ó-dě.

<sup>43</sup>Te càchí-dé sá sandáa iní-dé Yá Ndiòxí, te mee-gã ná dàcácu ñaha-gã xii-dé te núú cùndahú iní ñáhã-gã, chi mee-dě càchí-dé sá Dèhe-gá cúú-dě —càchí-güedé xìtnàha-güedé.

<sup>44</sup>Te ndéé tnàhá cue téé cùu ñadúhú tákàa xio xio diñi-gá xìcuèhé ñáhã-güedě xii-gá.

### Ní xíhí Jèsús

(Mr. 15:33-41; Lc. 23:44-49; Jn. 19:28-30)

<sup>45</sup>Te òré ní cuu cuádava nduu te ní cunee nihí ñuyíú, te duca<sup>n</sup>-ni



càa ní cuu caá úní sacuaa. <sup>46</sup>Te òré sa ta cùyatni cuu caá úní sacuaa-á<sup>n</sup>, te níhi ní cáhá<sup>n</sup> Jèsús, te cächí-gá:

—Èlí, Èlí, ìláma sabàctaní?  
—cächí-gá.

Te tnúhu-á<sup>n</sup> quéé-xí: Ndiöxí mée-í, Ndiöxí mée-í, ìná cuendá ní dáñá ñàha-n xii-í?, duha quèe-xi tnúhu-á<sup>n</sup>.

<sup>47</sup>Te dava cue téé xĩndecu yatni núú tácaà-gá-á<sup>n</sup> nĩ tecú dóho-güedé nàcuáa ní cáhá<sup>n</sup>-gá, te ní xítñaha-güedé:

—Tée-a càna-dé té Èliás — cächí-güedé xítñaha-güedé.

<sup>48</sup>Te òré-ni-á<sup>n</sup> nĩ quene cunu i<sup>n</sup> cue téé xĩndecu-á<sup>n</sup> nĩ quehe<sup>n</sup>-dé luha cáchí, te ní chindóyo-dé xití ndudí íá, te ní chinenu-dé díquí i<sup>n</sup> yutnu càni te ní ndocani-dé ní chihi-dé yuhu-gá. <sup>49</sup>Te dava-güedé ní xáha<sup>n</sup>-güedě xii téé-á<sup>n</sup>:

—Cundetú tnaa na cùndehe-o nacoto núu quixi té Èliás dàcácu ñaha-dě xii-dé —cächí-güedé xáha<sup>n</sup>-güedě xii téé-á<sup>n</sup>.

<sup>50</sup>Te Jèsús níhi ní cana saa-gá, te ní xihí-ni-gá. <sup>51</sup>Te sátá dúcá<sup>n</sup> te ní ndátá dõó cúú còrtiná xití veñúhu càhnu sá ìo cùnuu ní quéé dava ndáá, te ndáa núu ñnu ní nguíta-xi ní ndátá, te ní tnáa, te dava cava nàhnu ní táhú. <sup>52</sup>Te dava yaú núú yíndüxi ñáyiú ní xihí ní sándáá iní ñáhá xii Yá Ndiöxí ní nacaá<sup>n</sup> te ní ndotó-yu. <sup>53</sup>Te sátá nĩ yáha ní ndoto-Jèsús, te cue ñáyiú ní ndoto-á<sup>n</sup> cuànguñhú-yu xití ñúú Jerusálén, te cue ñáyiú ñúú-á<sup>n</sup> ìo vài-yu ní xiní-yu cue ñáyiú duca<sup>n</sup> nĩ ndoto-á<sup>n</sup>.

<sup>54</sup>Te sá dúcá<sup>n</sup> nãndi ní quide-xi, ndihi sá dúcá<sup>n</sup> nĩ tnáa xíá<sup>n</sup> ío ní yùhú téé cùu capitá<sup>n</sup> ndihi ncha

dava-gá cue téé ndècu ndihi-dé ndèe-güedé yiqui cùñú Jèsús, te ní xítñaha-güedé:

—Sá ndáa ndisa sá dñú tée-a cùu-dé Déhe Yá Ndiöxí ní cùu — cächí-güedé xítñaha-güedé.

<sup>55</sup>Te xica xĩnutnãí vài ñáyiú dñhí ndéhě-yu nchaa nàcuáa ní quide ñaha-güedě xii Jèsús, te ñáyiú-á<sup>n</sup> cúú-yu ñáyiú ní chindèe-yu Jèsús, te ndéé distritú Galileá ní chinchícú<sup>n</sup> ñáhã-yu xii-gá. <sup>56</sup>Te tnuú ñáyiú-á<sup>n</sup> tnàhá tá Màriá Magdalèná, ndihi tá Màriá nãná tẽ Jàcobó ndihi té Chèè, ndihi nãná cue déhe té Zebèdeu.

### Chĩndúxi-güedé Jèsús

(*Mr. 15:42-47; Lc. 23:50-56; Jn. 19:38-42*)

<sup>57</sup>Te ndècu i<sup>n</sup> téé cuica nàni-dé Chèè te cùu-dé téé ñúú Arimàtea, te tnàhá-dé ní tnàhá tnúhu-dé ndihi Jèsús. Te òré sa ní cuaa, <sup>58</sup>te ní sáhã<sup>n</sup>-dé núú tẽ Pilatú, te xáha<sup>n</sup>-dẽ ñnu vá cùndèe iní-dé daña-dě chĩndúxi-dé yiqui cùñú Jèsús. Te té Pilatú-á<sup>n</sup> nĩ sáha-dé tnúhu, te ní táúchíú<sup>n</sup>-dẽ sá cuáha cuendá-güedé té Chèè-á<sup>n</sup> yiqui cùñú-gá. <sup>59</sup>Te té Chèè-á<sup>n</sup> nĩ quehe<sup>n</sup> cuendá-dé yiqui cùñú-gá, te ní chidúcu<sup>n</sup>-nuu-dé i<sup>n</sup> dóó cuixí<sup>n</sup> dóó cándò. <sup>60</sup>Te sa nchíi i<sup>n</sup> yaú sáá nĩ caá<sup>n</sup> té Chèè-á<sup>n</sup> i<sup>n</sup> yiqui naha càva te xíá<sup>n</sup> cúú cuendá-dé, te yaú-á<sup>n</sup> nĩ chihi-dé yiqui cùñú Jèsús, te dàtnùní ní sadí-dé i<sup>n</sup> yúú cáhnu yúú quèhé<sup>n</sup> yuhu yaú-á<sup>n</sup>, te ní xica-dé cuánuhú-dé. <sup>61</sup>Te tnàhá tá Màriá Magdalèná, ndihi ìngá xíchí nání Màriá ní quexió-yu ní ngóo-yu yatni núú nchíi yaú-á<sup>n</sup>.

### Cue téé ndèe yaú núú yíhí yiqui cùñú Jèsús

<sup>62</sup>Te sátá nĩ yáha ní quide túha ñáyiú ncha sá nãndihi-yu nduu

tněe nduu ndètatú-yu-á<sup>n</sup>, te diu-ni nduu ndètatú-yu-á<sup>n</sup> nĩ sáhá<sup>n</sup> cue dútú cúnù, ndihi cue tée cùu fariséu ní cáhá<sup>n</sup> ndihi-güedé té Pilatú. <sup>63</sup>Te xáha<sup>n</sup>-güedě xii-dé:

—Yòhó tée cùnùu, véxi-ndí càchí tnúhu-ndí sá nĩ ndacu iní-ndí sá tée ndehnde nĩ xíhí-á<sup>n</sup> càchí-dé òré ndécú-gá-dé sá ndùu úní sá cùú-dé, te ndoto-dé. <sup>64</sup>Te tendaha-n cue tée na quíhí<sup>n</sup>-güedé cundeé-güedé yuhu yaú nùú nĩ chihi-güedé yiqui cùñú-dé, chi na cuáhá<sup>n</sup> quíhí<sup>n</sup> cue tée ní xica cuu ndihi-dé duhu-güedě yiqui cùñú-dé, te cùñaha-güedě xii ñáyiú sá nĩ ndoto-dé. Chi nùu duca<sup>n</sup> na càda-güedé te ío-gá dandáhú-güedé cue ñáyiú dàcúxí dàtná ní quide mee tée ní xíhí-á<sup>n</sup> — càchí-güedé xáha<sup>n</sup>-güedě.

<sup>65</sup>Te té Pilatú ní xáha<sup>n</sup>-dě xii-güedé:

—Náu cue sandàdú-a candeca-ndo-güedě quíhí<sup>n</sup>, te cadí váha-ndo ndihi-güedé yuhu yaú-á<sup>n</sup> nàcuáa tàù-xi cunduu, te na cundeé-güedé nàcuáa sàni iní-ndó cunduu —cachí-dé xáha<sup>n</sup>-dě xii-güedé.

<sup>66</sup>Te cue tée-á<sup>n</sup> nĩ xica-güedé cuáhá<sup>n</sup>-güedé, te ní tee-güedé ií<sup>n</sup> sèná yúú ndèdí yèhe yaú-á<sup>n</sup>, te ní dándòo-güedé cue sandàdú-á<sup>n</sup> ndèé-güedé yaú-á<sup>n</sup>, te duca<sup>n</sup> nĩ quide-güedé cuendá sá vã yòo quíhí<sup>n</sup> nacaá<sup>n</sup> yaú-á<sup>n</sup>.

### Ní ndoto Jèsús

(Mr. 16:1-8; Lc. 24:1-12; Jn. 20:1-10)

**28** Te sátá nĩ yáha nduu ndètatú ñáyiú, te ndumìngú nehé víhí-ní nĩ xica tá Màriá Magdalená ndihi ingá xíchí

nání Màriá cuángotó-yu yaú nùú nĩ chihi-güedé yiqui cùñú Jèsús. <sup>2</sup>Te uu<sup>n</sup>ni níhi vìhi ní tnáa, te òré duca<sup>n</sup> nĩ quide-xi chi ií<sup>n</sup> espíritú xínú cuèchi nùú Yã Ndióxi ní quexìo-xi nùú dúcá<sup>n</sup> nchíi yaú nùú nĩ chihi-güedé yiqui cùñú Jèsús, te ní xócání espíritú-á<sup>n</sup> yúú ndèdí yèhe yaú-á<sup>n</sup> te ní ngóo-xi nùú yúú-á<sup>n</sup>. <sup>3</sup>Te dàtná dátása<sup>n</sup>-xi òré sàa nduté dùca<sup>n</sup> datása<sup>n</sup>-xi nùú espíritú-á<sup>n</sup>, te dóo níhnú-xí cuixí<sup>n</sup> quiyí. <sup>4</sup>Te òré duca<sup>n</sup> nĩ quide-xi te cue sandàdú ndèé yaú-á<sup>n</sup> nĩ quidi ñaha-xi xii-güedé sá nĩ yùhú-güedé, te ní nduá-güedé, te ní xíta sá xìní tnùnì-güedé. <sup>5</sup>Te espíritú-á<sup>n</sup> nĩ xáha<sup>n</sup>-xi xii cue ñáyiú òhí cuángoto yaú-á<sup>n</sup>:

—Nchòhó ñáyiú òhí véxi coto yaú-a, vã yùhú-ndó chi yúhú cùtnùnì iní-í sá nchòhó véxi-ndo nànducu-ndo yiqui cuñú Jèsús Yaá ní xíhí nùú cùrúxí. <sup>6</sup>Dico Yaá-á<sup>n</sup> chi ñá túú-gã ndécú yiqui cuñú-gá iha, chi sa ní ndoto-gá, te diu duca<sup>n</sup> nĩ cachí-gá sá ndótó-gã cùtnàhá vátá cùú-gá, te chí táquixi cundehe-ndo nùú nĩ sacá<sup>n</sup>-güedé yiqui cùñú-gá ní cùu te quiní-ndó ñã ñá túú-gã. <sup>7</sup>Te vitna ío ndíhi chí cuáhá<sup>n</sup> nùú xíndecu cue tée ní xica cuu ndihi-gá, te duha cùñaha-ndo xii-güedé: “Ní ndoto Jèsús Yaá ní xíhí ní cùu, te codonùu-gá nùú-ndó quíhí<sup>n</sup> distrítú Galileá te yàcá<sup>n</sup> quiní-ndó-gã”, duha cùñaha-ndo xii-güedé. Duha ndùu tnúhu ní cachí tnúhu-í xii-ndo — càchí espíritú-á<sup>n</sup> xáha<sup>n</sup>-xi xii cue ñáyiú òhí-á<sup>n</sup>.

<sup>8</sup>Te cue ñáyiú òhí-á<sup>n</sup> nĩ natní-yu ichi, te súunì ndíhi cuánuhú-yu nùú xíndecu cue tée ní xica cuu ndihi Jèsús cuendá nacani

tnúhu-yu núu-güedě nàcuáa ní xáha<sup>n</sup> espíritú-á<sup>n</sup> xí-yu, te cuèi ní yùhú-yu dico súuní cùdí íní-yu. <sup>9</sup>Te ichi ñhúhu-yu cuánuhú-yu, te na íní-yu ní quexio Jesús núu-yu ní dándácóo váha ñaha-gă xí-yu. Te ñáyu-á<sup>n</sup> ní ngüíñí xítí-yu núu-gă, te ní numi ñàhá-yu xii-gă, te ní chiñuhu ñàhá-yu. <sup>10</sup>Te ní xáha<sup>n</sup>-gă xí-yu:

—Vá yùhú-ndó, chí cuàhá<sup>n</sup> cúñaha-ndo xii cue téé ní xica cuu ndíhi-í sá ná quíhí<sup>n</sup>-güedé distritú Galileá, te yàcá<sup>n</sup> quiní ñàhá-güedě xii-í —càchí-gă xáha<sup>n</sup>-gă xí-yu.

**Nàcuáa ndùu tnúhu ní nacani cue sandàdú**

<sup>11</sup>Te nini ñuhu cue ñáyu dñí-á<sup>n</sup> ichi cuánuhú-yu, te dava cue sandàdú cue téé ndéé yaú-á<sup>n</sup> ní cùu ní xica-güedé cuánuhú-güedé ñuu cuendá nacani tnúhu-güedé núu cuè téé cùu dútú cùnùu nacuáa ní cuu. <sup>12</sup>Te cue téé cùu dútú cùnùu-á<sup>n</sup> ní quide-güedé jündá ndíhi cue téé cùu sacuéhé núu ñáyu isràél, te ní ndatnúhu-güedé nàcuáa cada-güedé, te ní quide ndáá-güedé ndíhi cue sandàdú-á<sup>n</sup> sã cuñaha-güedě vai díhú<sup>n</sup> cuendá dacuàndehnde-güedé. <sup>13</sup>Te ní xáha<sup>n</sup>-güedě xii cue sandàdú-á<sup>n</sup>:

—Cuíní-ndí sá vã càhá<sup>n</sup> ndáá-ndó núu ñáyu nàcuáa ní cuu, chi cúñaha-ndo xii-yu sá òré xidí-ndó ní quixi cue téé ní xica cuu ndíhi-dé ní dúhú-güedě yiqui cùñú-dé néhé-güedě cuáhá<sup>n</sup>, duha cúñaha-ndo xii-yu. <sup>14</sup>Te núu na ñihí té Pilatú téé cùu gobiernú tnúhu nàcuáa cúñaha-ndo xii ñáyu, te nchúhú cada ndáá-ndí ndíhi-dé cuendá sá ñà túu nã cada ñaha-dě

xii-ndo —càchí-güedé xáha<sup>n</sup>-güedě xii cue sandàdú-á<sup>n</sup>.

<sup>15</sup>Te cue sandàdú-á<sup>n</sup> ní quehe<sup>n</sup> cuendá-güedé díhú<sup>n</sup>, te ní xica-güedé cuáhá<sup>n</sup>-güedé te ní càhá<sup>n</sup>-güedé nàcuáa ní xáha<sup>n</sup> cuè téé-á<sup>n</sup> càhá<sup>n</sup>-güedé. Te nchaa ñáyu isràél ní ñihí-yu tnúhu ní càhá<sup>n</sup>-güedé-á<sup>n</sup>, te ñu-ni tnúhu-á<sup>n</sup> càhá<sup>n</sup>-yu ndéé vitna.

**Jèsús xáha<sup>n</sup>-gă xii cue téé ní xica cuu ndíhi-gă nàcuáa ndùu chiu<sup>n</sup> cada-güedé**

(Mr. 16:14-18; Lc. 24:36-49; Jn. 20:19-23)

<sup>16</sup>Te ndí ùxí ñ<sup>n</sup> cue téé ní xica cuu ndíhi Jèsús ní xica-güedé cuáhá<sup>n</sup>-güedé ñ<sup>n</sup> yucu càa distritú Galileá núu ní xáha<sup>n</sup>-gă naníhí tnáhá-güedě ndíhi-gă. <sup>17</sup>Te òré ní xiní-güedé Jèsús te ní chiñuhu ñaha-güedě xii-gă, dico dava-güedé sàni ñ<sup>n</sup> sani úu íní-güedé núu ñu-gă àdi ñã dñú-gă. <sup>18</sup>Te Jèsús ní sàndehe yatni-gă ndéé núu-güedě, te ní xáha<sup>n</sup>-gă xii-güedé:

—Yúhú ndécú ndíhi-í tnúhu ndee ñni táxí tnúni-í cuèi andíu te cuèi ñuyú-a. <sup>19</sup>Te vitna tàuchiu<sup>n</sup>-í sá quíhí<sup>n</sup>-ndó ñihí ñuyú càhá<sup>n</sup>-ndó tnúhu-í núu ñáyu cuendá tuha ñàhá-yu xii-í, te dacuàndute-ndó-yu. Te òré duca<sup>n</sup> càda-ndo, te cacunehe-ndo tãtá-ó Dñtú Ndiöxí ndíhi yúhú Yaá cúu Dèhe-gă ndíhi Espíritú-gă. <sup>20</sup>Te cúñaha-ndo xii-yu sá ná càdá-yu nchaa nàcuáa sa ní dánèhé ñàhà-í xii-ndo càda-ndo. Te na càchí tnúhu-í sá cùndècu ndíhi ñaha-ni-í xii-ndo ñuyú-a ndéé ná sàá nduu nà-xi —cachí-gă xáha<sup>n</sup>-gă xii-güedé. Te duca<sup>n</sup> na cùnduu.

# TNÚHU NÍ CHÍDÓ TNÙNÍ TÉ MĂCÚ

Té Juàá tée dàcuandute ñaha xii  
ñáyiù càhá<sup>n</sup>-dé tnúhu Yá Ndiöxí xití  
yucu

(Mt. 3:1-12; Lc. 3:1-9, 15-17; Jn. 1:19-28)

**1** Duha ní quesaha tnúhu sá  
càhá<sup>n</sup> nàcuáa naníhí tãhú-ó  
tnúhu Xítóhó Jesucristú Déhe Yá  
Ndiöxí.

<sup>2</sup>Te ndíi Chàíá tée ní xóo cáhá<sup>n</sup>  
tnúhu Yá Ndiöxí ndéé sanaha ní  
chídó tnùní ndíi nàcuáa ní xáha<sup>n</sup>  
Yá Ndiöxí xii Déhe-gá, te duha ní  
xáha<sup>n</sup>-gã:

Tendaha-í ì<sup>n</sup> tée codonùu-dé  
núú-n,  
te dàtúha-dé ñáyiù cuèndá  
tníí-yu tnúhu-n.

<sup>3</sup>Te tée-á<sup>n</sup> quihi-dé xití yucu te  
níhi cáhá<sup>n</sup>-dé cúñaha-dě xii  
ñáyiù:

“Chí dáñá nchàa ichi cuehé ichi  
duha ndècu-ndo, te tníi-ndo  
ìchi váha, te duca<sup>n</sup> càda-ndo  
cuendá cundecu túha-ndo,  
chi véxi Yaá ío cùnùu”, duha  
cúñaha-dě xii-yu.

Duha ndùu tnúhu ní chídó tnùní  
ndíi Chàíá nàcuáa ní xáha<sup>n</sup> Yá  
Ndiöxí xii Déhe-gá. <sup>4</sup>Te tée dii  
cuèndá-xi ní ngódó tnùní-á<sup>n</sup> nání-dě  
Juàá, te tée-á<sup>n</sup> ní xíhi-dé xití yucu

ní cáhá<sup>n</sup>-dé tnúhu Yá Ndiöxí, te ní  
xóo dacuandute-dé ñáyiù, te duha  
ní xáha<sup>n</sup>-dě xii-yu:

—Chí dándixi túu iní sá ñà túú  
quide váha-ndo ndècu-ndo, te  
daña-ndo nchàa ichi cuehé ichi  
duha te cuandute-ndo, te duca<sup>n</sup> te  
Yá Ndiöxí cada càhnu iní-gá nchaa  
yíca cuèchi-ndo —duha ní xáha<sup>n</sup>-dě  
xii-yu.

<sup>5</sup>Te nchaa ñáyiù distrítú Jùdeá,  
ndíhi ñáyiù ñúú Jerusàlén ní  
sáhá<sup>n</sup>-yu ndéé yúte Jòrdán núú  
ndécú tè Juàá ní xíndedóho-yu  
nchaa tnúhu ní cáhá<sup>n</sup>-dé. Te  
cue ñáyiù ní náhmá nchaa yíca  
cuèchi-xi te ní dácuañdute ñaha-dé  
xii-yu.

<sup>6</sup>Te té Juàá-á<sup>n</sup> ní xíhnu-dé dóó  
idi càméyu, te ì<sup>n</sup> ñíi ní cuu pãñú  
xití-dé, te ní xóo caxi-dé tíca  
làngóstá ndíhi ndudí ñúñú cuéchi.

<sup>7</sup>Te ní xáha<sup>n</sup> tùcu-dé xii ñáyiù:

—Nchìcú<sup>n</sup> ì<sup>n</sup> tée véxi, te tée-á<sup>n</sup>  
ïo-gá cùnùu-dé dàcúúxí yúhú, chi  
yúhú cùú-í ì<sup>n</sup> tée duu<sup>n</sup> duu<sup>n</sup> ñá túú  
tàu-í ngúnundeyi-í nandaxi cuèdicó  
ñíi nihnu chàú-dé dico quide-í  
chù<sup>n</sup>-dé. <sup>8</sup>Te yúhú dácuañdute  
ñaha-í xii-ndo, dico mee-dě taxi-dé  
Espiritú Yá Ndiöxí cundecu  
ndíhi-ndo —càchí-dé xáha<sup>n</sup>-dě xii-yu.

### Sàndute Jesús

(Mt. 3:13-17; Lc. 3:21-22)

<sup>9</sup>Te dàvá-á<sup>n</sup> nǐ quee Jèsús ñuú Nazàrét ìí<sup>n</sup> ñuú yíndèhu distritú Galileá cuáhá<sup>n</sup>-gá yúte Jòrdán. Te yàcá<sup>n</sup> ní dácuañdute ñaha té Juàá xii-gá. <sup>10</sup>Te òré ní nene-gá xítí ndute, te ní xiní-gá nchìi andíu, te ní quee Espíritú Yă Ndiòxí véxi cuu<sup>n</sup>-xi ngúndecu ndíhi ñaha-xi xii-gá, te dàtná cáá ìí<sup>n</sup> lómá cáá Espíritú-á<sup>n</sup> véxi cuu<sup>n</sup>-xi. <sup>11</sup>Te òré-á<sup>n</sup> nǐ tecú ní cáhá<sup>n</sup> Yă Ndiòxí ndéé andíu, te xăha<sup>n</sup>-gă xii Jèsús:

—Yòhó cúú-n Dêhe-í tée ío cùu iní-í te ío cùdífí iní ñàhá-í xii-n — cächí-gá xăha<sup>n</sup>-gă.

**Sácuíhná quidé yica-xi cada Jesús sá ñà túú tàú-gá cada-gá dico ñá túú ní quide-gá**

(Mt. 4:1-11; Lc. 4:1-13)

<sup>12</sup>Te Espíritú Yă Ndiòxí ndécá-xí Jèsús cuáhá<sup>n</sup> ìí<sup>n</sup> xítí yucu. <sup>13</sup>Te xítí yucu-á<sup>n</sup> ló víhí quèti déé<sup>n</sup>, te xíá<sup>n</sup> ndécú Jèsús ní ngúíta sácuíhná quidé yica-xi cada-gá ìí<sup>n</sup> sá ñà túú tàú-gá cada-gá dico ñá túú ní sàndáá iní-gá. Te cue espíritú xínú cuèchi núú Yă Ndiòxí ní xinu cuechi-xi núú-gă. Te ní xíndecu-gá údico nduu xítí yucu-á<sup>n</sup>.

**Distritú Galileá ní chisaha Jèsús chùu<sup>n</sup> ní táhu Tătá-gă Dútú Ndiòxí cada-gá**

(Mt. 4:12-17; Lc. 4:14-15)

<sup>14</sup>Te sátá nǐ ngava té Juàá vecaá, te Jèsús cuáhá<sup>n</sup>-gá distritú Galileá dānehé-gá ñáyiú tnúhu váha, tnúhu sá càhá<sup>n</sup> nàcuáa ndíhu ndaha ñàha Yă Ndiòxí xií-yu. <sup>15</sup>Te xăha<sup>n</sup>-gă xií-yu:

—Vitna sa ní cuyatni nduu ndíhu ndaha ñàha Yă Ndiòxí xii-ndo, te chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá càhá<sup>n</sup> nàcuáa naníhí tǎhú-ndó —cächí-gá xăha<sup>n</sup>-gă xií-yu.

**Jèsús càhá<sup>n</sup>-gá cúmí tñàhá cue tée tñi chácá**

(Mt. 4:18-22; Lc. 5:1-11)

<sup>16</sup>Te Jèsús ñúhú-gă ichi cuáhá<sup>n</sup>-gá tá yăha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquëe-güedé ñunu-güedé xítí ndute tñi-güedé chácá, chí quiti tñáhi-á<sup>n</sup> cúú chùu<sup>n</sup>-güedé tñí-güedé-dí. <sup>17</sup>Te Jèsús ní xáha<sup>n</sup>-gă xii-güedé:

—Chí dáñá chùu<sup>n</sup> quide-ndo-á<sup>n</sup>, te quixi-ndo chitnahá ñàhá-ndó xii-í te taxi-í ingá núú chùu<sup>n</sup> cada-ndo chí quíhí<sup>n</sup>-ndó cǎhá<sup>n</sup>-ndó ñăyiú cuendá dacuàhá-yu tnúhu-í —cächí-gá xăha<sup>n</sup>-gă xii-güedé.

<sup>18</sup>Te òré-ni-á<sup>n</sup> nǐ dáñá cuè tée-á<sup>n</sup> ñunu-güedé te ní tuha ñaha-güedé xii-gá.

<sup>19</sup>Te cuáhá<sup>n</sup>-gá luha-gá, te ní xiní-gá té Jàcobó ndíhi ñaní-dé té Juàá ñúhú-güedé xítí bàrcú-güedé náticu-güedé ñunu-güedé, te ndi ndúu-güedé cúú-güedé déhe té Zebedeú.

<sup>20</sup>Te ní cana ñaha-gă xii-güedé, te ní dándoo-güedé tătá-güedé ndíhi cue tée xinu cuechi núú-güedé xítí bàrcú, te ní tuha ñaha-güedé xii-gá.

**Íí<sup>n</sup> tée yíhi ñaha espíritú cúndíhi yucu ñávàha**

(Lc. 4:31-37)

<sup>21</sup>Te ní quexìo Jesús ndíhi cue tée-á<sup>n</sup> ìí<sup>n</sup> ñuú nání Càpernaúm, te yàcá<sup>n</sup> ndécú-gă ní tñahá nduu ndètátú ñáyiú, te cuánguihu-gá

veñúhu ñáyiú isràél dànehé ñáhá-gǎ xií-yu. <sup>22</sup>Te xǐcuñúhu vihi-yu nchaa tnúhu càhá<sup>n</sup>-gá, chi quide-gá sá cúú-gǎ ì<sup>n</sup> Yaá táxi tnùni víhí, te ñá túú dàcuaha ñaha-gá xií-yu dàtná dácuaaha ñaha cue tée dàcuaha ñaha xií-yu nchaa tnúhu ní chídó tnùni ndí Moisés. <sup>23</sup>Te xítí veñúhu-á<sup>n</sup> ndécú tnàhá ì<sup>n</sup> tée yìhi ñaha ì<sup>n</sup> espíritú cúndìhi yucu ñávàha, te espíritú-á<sup>n</sup> ñí quide-xi níhi ní càhá<sup>n</sup> tée-á<sup>n</sup>, te xǎha<sup>n</sup>-dě xii Jèsús:

<sup>24</sup>—¿Te ná cuini yòhó Jèsús tée ñuú Nazàrét cada ñaha-n xii-ndí nùu véxi-n nùú ndécú-ndě-i? ¿Á<sup>n</sup> vèxi-n dànaa ñaha-n xii-ndí? Chi yúhú xìní ñáhà-í xii-n sǎ cúú-n ì<sup>n</sup> tée ñá túú tnàhí cuèchi-xi, chi núú Yǎ Ndiòxí ní quee-n vèxi-n ñuyíú-a —càchí-dé xǎha<sup>n</sup>-dě xii-gǎ.

<sup>25</sup>Dico Jèsús ní tenàá-gá espíritú cúndìhi yucu ñávàha-á<sup>n</sup>, te xǎha<sup>n</sup>-gǎ:

—iCadí yuhu-n, te taquèe yiqui cuñú tée-á<sup>n</sup>! —càchí-gǎ xǎha<sup>n</sup>-gǎ xii espíritú-á<sup>n</sup>.

<sup>26</sup>Te espíritú cúndìhi yucu ñávàha-á<sup>n</sup> ñí dácüyèhí ñáhá-xí xii tée-á<sup>n</sup>, te ní dácáná sàa ñaha-xi, te ní quee-xi yiqui cuñú-dé cuáhá<sup>n</sup>-xi.

<sup>27</sup>Te nchaa ñáyiú xíndecu-á<sup>n</sup> ò ní cuñúhu-yu, te ní xítñàhá-yu:

—¿Te nása ndùu-tu sá quidé tée-a? ¿Nduú sáà càhá<sup>n</sup>-tu-dé sánùu? Te quide-dé dàtná quidé ì<sup>n</sup> tée cùnùu vihi, chi càhá<sup>n</sup>-ni-dé te sàndáá iní ñáhá nchaa espíritú cúndìhi yucu ñávàha —càchí-yu xítñàhá-yu.

<sup>28</sup>Te ío ndìhi ní níhí nchaa ñáyiú dava-gá ñuú yíndèhu distritú Galileá tnúhu nchaa nàcuáa càhá<sup>n</sup> Jèsús ndìhi nchaa sá quidé-gǎ.

### Jèsús quidé tǎtna-gá ñáná ñadìhí té Xímú

(Mt. 8:14-15; Lc. 4:38-39)

<sup>29</sup>Te òré ní ndee Jèsús veñúhu cue ñáyiú isràél, te cuáhá<sup>n</sup>-gá ndìhi té Jàcobó ndìhi té Juáa vehe té Xímú ndìhi té Ndríxí. <sup>30</sup>Te ñáná ñadìhí té Xímú cùhú-a<sup>n</sup> ñùhu vihi-a<sup>n</sup> cahni, te ndìhi-ni ní xáha<sup>n</sup>-güedě xii Jèsús sá cùhú-a<sup>n</sup>. <sup>31</sup>Te ní sáhá<sup>n</sup>-gá núú cáá ñaha cùhú-á<sup>n</sup> te ní tñii-gá ndaha-a<sup>n</sup> ní ndocani ñaha-gǎ xii-a<sup>n</sup>. Te òré-ni-á<sup>n</sup> ñí nchíco-a<sup>n</sup> cahni, te ní ngüíta-a<sup>n</sup> xìnu cuechi-a<sup>n</sup> núú-güedě ndìhi-gǎ.

### Jèsús quidé tǎtna-gá vài ñáyiú cùhú

(Mt. 8:16-17; Lc. 4:40-41)

<sup>32</sup>Te òré sa cuini-xi cundiqui<sup>n</sup> te ní quexio ñáyiú núú ndécú Jèsús, te nchaa ñáyiú cùhú ní dátacá-yu ndecá-yu ní sáá núú-gǎ, te tnàhá cue ñáyiú yìhi ñaha espíritú cúndìhi yucu ñávàha ndecá-yu ní sáá núú-gǎ. <sup>33</sup>Te nchaa ñáyiú ñuú-á<sup>n</sup> ñí chítú níhnù-yu yuyèhe vehe núú ñí quexio Jesús. <sup>34</sup>Te Jèsús ní quide tǎtna-gá nchaa ñáyiú cùhú cuèi ndi díí<sup>n</sup> ndì díí<sup>n</sup> núú cuèhé tnàhá-yu ì<sup>n</sup> ì<sup>n</sup>-yu, te ní queñuhu-gá nchaa espíritú cúndìhi yucu ñávàha yìhi ñaha xii ñáyiú, te ñá túú ní dàña-gá càhá<sup>n</sup> cue espíritú cúndìhi yucu ñávàha-á<sup>n</sup> ni ì<sup>n</sup> tnúhu, te duca<sup>n</sup> ñí quide-gá chi cue espíritú-á<sup>n</sup> sa xìní-xi yoo cùu-gǎ.

### Jèsús càhá<sup>n</sup>-gá tnúhu Yá Ndiòxí distritú Galileá

(Lc. 4:42-44)

<sup>35</sup>Te òré vátá tündáa váha-gá ní ndacóo Jèsús cuáhá<sup>n</sup>-gá ì<sup>n</sup> xio

yuhu ñùú núú ñà túú ñáyiú ndècu cuendá yàcá<sup>n</sup> cáhá<sup>n</sup> ndihi-gá Yá Ndiöxí. <sup>36</sup>Te té Xímú ndihi cue tée cùndihi-dé nándücu ñaha-güedé xii-gá. <sup>37</sup>Te òré ní naníhí ñáhá-güedé xii-gá, te ní xáha<sup>n</sup>-güedé:

—Nchaa ñáyiú nàndücu ñahá-yu xii-n —càchí-güedé xáha<sup>n</sup>-güedé xii-gá.

<sup>38</sup>Te ní xáha<sup>n</sup>-gá xii-güedé:

—Chí ná quíhí<sup>n</sup>-ó nchaa ñuú xíndáa yatni-a, chí danèhé-í ñáyiú tnúhu Yá Ndiöxí chí diu chù<sup>n</sup>-á<sup>n</sup> vèxi-í —càchí-gá xáha<sup>n</sup>-gá xii-güedé.

<sup>39</sup>Te Jèsús tá xica ndodo-gá cuáhá<sup>n</sup> nchaa ñuú yíndèhu distritú Galileá dánèhé-gá ñáyiú, te ndi tnahá ñ<sup>n</sup> ñuú sàá-gá te duca<sup>n</sup> cuànguñhu-gá veñúhu-yu dànehé ñáhá-gá xií-yu tnúhu Yá Ndiöxí, te cue ñáyiú yíhi ñaha espíritú cùndihi yucu ñávaha ta quèñuhu-gá nchaa espíritú-á<sup>n</sup> yiquí cùñú-yu cuáhá<sup>n</sup>.

**Jèsús quidé tātna-gá ñ<sup>n</sup> tée tñahá cuéhé sá dátèhyú nihnu-xi yiquí cùñú-ó**

(Mt. 8:1-4; Lc. 5:12-16)

<sup>40</sup>Te ní quexìo ñ<sup>n</sup> tée tñahá cuéhé sá dátèhyú nihnu-xi yiquí cùñú-ó nñú Jèsús, te ní nguíñí xítí-dé núú-gá càhá<sup>n</sup> ndàhú-dé, te xáha<sup>n</sup>-dè xii-gá:

—Véxi-í càhá<sup>n</sup> ndàhú-í núú-n nñu vá cùndèe iní-n càda tātna ñaha-n xii-í chí cùtnuní iní-í sá ndácú-n —càchí-dé xáha<sup>n</sup>-dè xii-gá.

<sup>41</sup>Te Jèsús ní cundàhú iní ñáhá-gá xii-dé te ní dácàá-gá ndaha-gá ní tendaha ñaha-gá xii-dé, te xáha<sup>n</sup>-gá:

—Cuu cada tātna ñaha-í xii-n, te vitna ndúha-n —càchí-gá xáha<sup>n</sup>-gá xii-dé.

<sup>42</sup>Te òré-ni-á<sup>n</sup> ñí xócuñí cuéhé tñahá-dé. <sup>43-44</sup>Te Jèsús ní cáhá<sup>n</sup> víhí-gá dóho-dé, te xáha<sup>n</sup>-gá xii-dé:

—Vitna cuanùhú-na, dico vá yòo ñ<sup>n</sup> cùñaha-n sà ní quide tātna ñaha-í xii-n, te núú dütú-ni cuáhá<sup>n</sup> cuendá sá ná quíni ñáhá-dè xii-n sà ní ndúha-n te cuáha-n-dè sá ndúú tǎhú Yá Ndiöxí dàtná ní cachí ndíi Moisés cuendá ná quíni ñáyiú sá ndáa ní ndúha-n —càchí-gá xáha<sup>n</sup>-gá xii-dé.

<sup>45</sup>Te tée ní cuhú-á<sup>n</sup> ñí xica-dé cuáhá<sup>n</sup>-dè, te ní nguíta-dé xáha<sup>n</sup>-dè xii nchaa ñáyiú ta naníhí-dè nàcuáa ní quide Jèsús ní quide tātna ñaha-gá xii-dé. Te sá dúcá<sup>n</sup> ñí xíté nuu tée-á<sup>n</sup> cuendú nàcuáa ní quide ñaha Jèsús xii-dé ní quide tātna ñaha-gá ní ndúha-dé, te xíñ<sup>n</sup> nñu dayuhu ñí xóo quíhu-gá dava ñuú núú ño vai ñáyiú ndèhe ñaha xii-gá, te ní xóo cundecu-gá xití yucu núú ñà túú ñáyiú ndècu. Te nchaa ñuú ní quee ñáyiú ní sáhá<sup>n</sup>-yu núú ndécú-gá ní cáhá<sup>n</sup> ndihi ñáhá-yu xii-gá.

**Jèsús quidé tātna-gá ñ<sup>n</sup> tée cùhú ñá cúú-gá candá nihnu**

(Mt. 9:1-8; Lc. 5:17-26)

**2** Te sáta ñí cuu ñ<sup>n</sup> úú nduu sá ñí quee Jèsús ñuú Capèrnaúm te ní nasáa tucu-gá, te cue ñáyiú ní níhí-yu tnúhu sá ñí ndexìo-gá núú quidé vèhe-gá. <sup>2</sup>Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tñahá-gá-yu. Te ní nguíta-gá ní dánèhé ñáhá-gá xií-yu tnúhu Yá Ndiöxí. <sup>3</sup>Te òré-á<sup>n</sup> ñí quexìo cúmí tñahá cue tée núú ndécú-gá nchídó-güedé ñ<sup>n</sup> tée cùhú ñá cúú-gá candá nihnu-dé. <sup>4</sup>Dico ñá

túu ní ndàcu-güedé sáá-güedé ndéé núú-gǎ chi ío cuéhé ñáyiú ndècu. Te xíǎ<sup>n</sup> núu ní sáá-güedé díquí véhé núú yíhí-gǎ-á<sup>n</sup> ní caá<sup>n</sup>-güedé, te ichi ndàa díquí véhé-ǎ<sup>n</sup> ní dáquëe-güedé téé cùhú-á<sup>n</sup>, te ñùhu-dé ì<sup>n</sup> xító ní dáquëe ñaha-güedé ndéé núú-gǎ.

<sup>5</sup>Te Jèsús sa ní cutnùní iní-gá sá sàndáá iní ñáhá-güedé xii-gá núu ní xáha<sup>n</sup>-gǎ xii téé cùhú-á<sup>n</sup>:

—Yòhó téé cùhú, sa ní quide càhnu iní-í nchaá cuéchi-n — cǎchí-gá xǎha<sup>n</sup>-gǎ xii-dé.

<sup>6</sup>Te xíá<sup>n</sup> xǎnucóo ì<sup>n</sup> úú cue téé dàcuaha ñaha xii ñáyiú nchaá tnúhu ní chídó tnùní ndíi Moisés, te sá dúcá<sup>n</sup> ní cǎhá<sup>n</sup> Jèsús núú cue téé-á<sup>n</sup> ní sani iní-güedé: <sup>7</sup>“Tée-a cǎhá<sup>n</sup> cuéhé-dé cuèndá Yǎ Ndiòxí duha cǎhá<sup>n</sup>-dé, chi vá yòo ì<sup>n</sup> ndàcu cada cahnu iní nchaá yíca cuéchi ñáyiú chi ì<sup>n</sup> dǐi ní Yá Ndiòxí quidé càhnu iní-gá”, duha ní sani iní-güedé. <sup>8</sup>Dico òré-ni-á<sup>n</sup> ní cutnùní iní Jèsús nàcuáa sàni iní-güedé, núu ní xáha<sup>n</sup>-gǎ xii-güedé:

—¿Te ná cuèndá duca<sup>n</sup> sàni iní-ndó-í? <sup>9</sup>Te sá dúhá ní xáha<sup>n</sup>-í xii téé cùhú-a sá ní quide càhnu iní-í nchaá yíca cuéchi-dé, te xíǎ<sup>n</sup> nchòhó ñá túú cùtnuní iní-ndó núu ndáá cǎhá<sup>n</sup>-í àdi ñá ndàá. Dico núu cúu-í-dé sá ndácóo-dé, te ndocani-dé xító ñùhu-dé véxi, te caca-dé, te cutnùní ndáá iní-ndó núu ndáá cǎhá<sup>n</sup>-í àdi ñá ndàá chi cundehe núú-ndó nàcuáa cada-í.

<sup>10</sup>Te vitna na càda-í nàcuáa cutnùní iní-ndó nchàa-ndo sá yùhú Tée cùu ñaní tnáhá-ndó nchàa-ndo ndecu ndíhi-í tnúhu ndee iní sá cadá càhnu iní-í nchaá cuéchi

ñáyiú ñuyíú-a —cǎchí-gá xǎha<sup>n</sup>-gǎ xii-güedé.

Te sátá dúcá<sup>n</sup> te ní xáha<sup>n</sup>-gǎ xii téé cùhú-á<sup>n</sup>:

<sup>11</sup>—Ndacóo te ndocani-n xító ñùhu-n véxi-á<sup>n</sup>, te núhú-n vèhe-n — cǎchí-gá xǎha<sup>n</sup>-gǎ xii-dé.

<sup>12</sup>Te òré-ni-á<sup>n</sup> ní ndacóo-dé, te ní ndocani-dé xító ñùhu-dé ní quexio-á<sup>n</sup>, te ndèhe nchaá ñáyiú xǎndecu-á<sup>n</sup> ní ndee-dé tnuú-yu cuáhá<sup>n</sup>-dé. Te sá dúcá<sup>n</sup> ní quide Jèsús ní quide tátna-gá téé-á<sup>n</sup>, xíǎ<sup>n</sup> ío ní cuñùhu nchaá ñáyiú, te ní xítnahá-yu:

—Càhnu vihi cuu Yá Ndiòxí, chi ñá ì<sup>n</sup> ndùu quini-ó dùha cuu datná ní cuu vitna —cǎchí-yu xítnahá-yu.

**Jèsús cǎhá<sup>n</sup>-gá ì<sup>n</sup> téé nàni Leví**

(Mt. 9:9-13; Lc. 5:27-32)

<sup>13</sup>Te Jèsús cuáhá<sup>n</sup> tucu-gá yuhu làgúná, te ío cuéhé ñáyiú ní sátnáhá ñáhá xii-gá, te ní dánèhé ñáhá-gǎ xií-yu tnúhu Yá Ndiòxí.

<sup>14</sup>Te òré ní yáha ní dánèhé ñáhá-gǎ xií-yu, te ní naquehe<sup>n</sup>-gá ichi, te ní yáha yatni-gá ì<sup>n</sup> xichi núu núcóo ì<sup>n</sup> téé nàni Leví déhe ì<sup>n</sup> téé nàni Alfeú quidé còbrá-dé ñáyiú cuèndá impuèstú chi còbràdór cúu-dé. Te òré ní xiní ñáhá-gǎ xii-dé, te ní xáha<sup>n</sup>-gǎ:

—Néhe chitnahá ñáhá-n xii-í — cǎchí-gá xǎha<sup>n</sup>-gǎ xii-dé.

Te té Lèví-á<sup>n</sup> ní ndacuñí-dé, te ní tuha ñaha-dé xii-gá.

<sup>15</sup>Te té Lèví-á<sup>n</sup> cuáhá<sup>n</sup>-dé ndíhi Jèsús vehe-dé. Te yìhi Jèsús mèsá xéxi-gǎ ndíhi cue téé xica cuu ndíhi-gá, te tnàhá vài cue téé cuihna iní-xi quide còbrá ñáhá xii ñáyiú cuèndá impuèstú, ndíhi



dava-gá cue tée ndècu ichi cuehé ichi duha nùcòo ndìhi ñaha-güedě xii-gá xéxí ndìhi ñaha-güedě, te duca<sup>n</sup> chi ío vâi ñáyiú nchìcú<sup>n</sup> ñáhá xii-gá. <sup>16</sup>Te sá ní xíní cue tée dàcuáha ñaha xií-yu nchaa tnúhu ní chídó tnùní ndíi Moisés, ndìhi cue tée cùu fariséú xéxí Jèsús ndìhi nchaa cue tée-á<sup>n</sup> nùu ní xícá<sup>n</sup> tnúhú-güedě núu cuè tée xica cuu ndìhi-gá, te xáha<sup>n</sup>-güedě:

—¿Ná cuendá duca<sup>n</sup> quide tée cùu mestrú-ndó xèxi-dé ndìhi cue tée cuihna ìní-xi quide cobrá ñáhá xii ñáyiú cuendá impuèstú, ndìhi nchaa dava-gá cue tée ndècu ichi cuehé ichi duha-i? —càchí-güedě xáha<sup>n</sup>-güedě.

<sup>17</sup>Te Jèsús ní tecú dóho-gá nàcuáa ndùu tnúhu ní xáha<sup>n</sup>-güedě xii cue tée xica cuu ndìhi-gá, núu ní xáha<sup>n</sup>-gá xii-güedě:

—Nchaa ñáyiú ñá túú cùhú chi ñá túú xìni ñuhú-yu ñátátná, dico nchaa ñáyiú cùhú chi xìni ñuhú-yu ñátátná. Te yúhú véxi-í càhá<sup>n</sup>-í ñáyiú cùtnuní ìní-xi sá ndécú cuèchi-xi te ñá túú vèxi-í càhá<sup>n</sup>-í ñáyiú càchí sá ñá túú ndècu cuèchi-xi —càchí-gá xáha<sup>n</sup>-gá xii-güedě.

**Cuendá cue ñáyiú ñá túú tnàhí ná xéxí áma càhá<sup>n</sup> ndìhí-yu Yá Ndiöxí**

(Mt. 9:14-17; Lc. 5:33-39)

<sup>18</sup>Te cue tée xica cuu ndìhi té Juáá, ndìhi cue tée xica cuu ndìhi cue tée cùu fariséú ñá túú tnàhí ná xéxí-güedě áma càhá<sup>n</sup> ndìhi-güedě Yá Ndiöxí. Te ìi<sup>n</sup> nduu duca<sup>n</sup> xíquide-güedě, te ní sáhá<sup>n</sup> ñáyiú ní xícá<sup>n</sup> tnúhú-yu núu Jèsús, te xáhá<sup>n</sup>-yu xii-gá:

—Cuíní-ndí cachí tnúhu-n ñá cuendá cue tée xica cuu ndìhi té Juáá, ndìhi cue tée xica cuu ndìhi cue tée cùu fariséú ñá túú tnàhí ná xéxí-güedě áma càhá<sup>n</sup> ndìhi-güedě Yá Ndiöxí, te cue tée xica cuu ndìhi-n ñá túú duca<sup>n</sup> quide-güedě —càchí-yu xáhá<sup>n</sup>-yu xii-gá.

<sup>19</sup>Te Jèsús ní xáha<sup>n</sup>-gá xií-yu:

—Nchòhò xìní-ndó sá vâ cùú cùñaha-o xii ñáyiú ñuhu vico tnándaha sá vâ cùú càxi-yu ñini ndècu ndìhi ñaha tée tnándaha xií-yu. <sup>20</sup>Dico sáá nduu te vâ cündècu ndìhi ñaha-gá tée tnándaha-á<sup>n</sup> xií-yu, te dàvâ-á<sup>n</sup> te cahni ìní-yu vâ caxí-yu cuendá sá ndìhú ìní-yu.

<sup>21</sup>Te vâ yòo ìi<sup>n</sup> dándée luha dóo sáá ìi<sup>n</sup> dóo sa ní cuu tùhú víhí, chi dóo sáá-á<sup>n</sup> nàndiyi-xi te uu<sup>n</sup>-gá ndata-xi dóo sà ní cuu tùhú-á<sup>n</sup>. <sup>22</sup>Te ni vâ yòo ìi<sup>n</sup> chìhi ndidí sáá xití ìi<sup>n</sup> lamba sa ní cuu tùhú víhí, chi núu yoo duca<sup>n</sup> na càda te ndava lamba sa ní cuu tùhú-á<sup>n</sup>, chi ío níhi yóco ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup> te núu duca<sup>n</sup> na càdá-yu. Núu xíá<sup>n</sup> xíní ñuhu-xi quéé ndidí sáá-á<sup>n</sup> xití ìi<sup>n</sup> lamba saa —càchí-gá xáha<sup>n</sup>-gá xií-yu.

**Cue tée xica cuu ndìhi Jesús sàhnú-güedě yoco triú nduu ndetatú ñáyiú**

(Mt. 12:1-8; Lc. 6:1-5)

<sup>23</sup>Te ìi<sup>n</sup> nduu cùu-xi nduu ndetatú ñáyiú ñuhu Jesús ichi ndìhi cue tée xica cuu ndìhi-gá, te ta yáha-gá ndìhi-güedě ìi<sup>n</sup> xichi núú cáá triú, te ní ngúíta-güedě sàhnú-güedě yoco triú-á<sup>n</sup>. <sup>24</sup>Te cue tée cùu fariséú ní xáha<sup>n</sup>-güedě xii-gá:

—¿Ná cuendá duca<sup>n</sup> quide cue tée xica cuu ndihi-n sahnú-güedé yoco tríu vitna cùu-xi nduu ndetatú-i? Te ñá túu tàu-güedé duca<sup>n</sup> càda-güedé —càchí-güedé xăha<sup>n</sup>-güedé xii-gá.

<sup>25</sup>Te ní xăha<sup>n</sup>-gă xii-güedé:

—¿Te náa vátá dăcuàha tnahi-gá-ndó nŭú tûtú Yă Ndiöxí nŭú căhá<sup>n</sup>-xi năcuăa ní quide ndíi Dăvíi cŭtnăhá ní xíhí ndíi docó ndihi cue tée ní xica cuu ndihi ndíi-ă<sup>n</sup>? <sup>26</sup>Te dăvă-ă<sup>n</sup> nŭ xіндеcu ĩ<sup>n</sup> tée ní xínani Abiàtăr ní cuu-dé dútú cŭnŭu, te ndíi Dăvíi ní quŭhu ndíi xití vehe Yă Ndiöxí ní quehe<sup>n</sup> ndíi pàá ní cuu íí ndécú-ă<sup>n</sup> nŭ dăcăhŭu ndíi cue tée ní xica cuu ndihi ndíi ní xexi ndíi ndihi-güedé, te mee-ni cuè dútú tàu-güedé caxi-güedé pàá-ă<sup>n</sup> ní cùu —cachí-gă xăha<sup>n</sup>-gă xii-güedé.

<sup>27</sup>Te ní xăha<sup>n</sup> tucu Jesús xii-güedé:

—Mee Yă Ndiöxí ní taxi ndecu-gă nduu ndetatú ñăyiu, te ñá túu ní căchí-gă sá mée-yu nândi cani iní-yu cadă-yu canehe íy-yu nduu ndetatú-yu-ă<sup>n</sup>. <sup>28</sup>Te yúhú Tée cùu ñanı tñáhă-ndó nchăa-ndo, tñáhă-í ndécú ndihi-í tnúhu ndee ĩní sá cùu-í nchaa ñăyiu năcuăa cadă-yu nduu ndetatú-ó-ă<sup>n</sup> —căchí-gă xăha<sup>n</sup>-gă xii-güedé.

**Ī<sup>n</sup> tée ní yíchí ĩ<sup>n</sup> xio ndaha-xi**

(Mt. 12:9-14; Lc. 6:6-11)

**3** Te Jèsús cuanguihu tucu-gă xití veñúhu, te xití veñúhu-ă<sup>n</sup> ndécú ĩ<sup>n</sup> tée ní yíchí ĩ<sup>n</sup> xio ndaha-dé. <sup>2</sup>Te xíá<sup>n</sup> ndécú cuè tée xito dayuhu ñaha xii-gă, te nŭu cada tătna-gă tée cùhú-ă<sup>n</sup> nduu cùu-xi nduu ndetatú-güedé

ndihi ñăyiu, cuendá duca<sup>n</sup> te níhí-güedé năcuăa cada-güedé cacă<sup>n</sup> cuéchi-güedé cuendă-gă. <sup>3</sup>Te ní xăha<sup>n</sup>-gă xii tée cùhú ndaha-xi-ă<sup>n</sup>:

—Ndacuíñi te ngŭnutnŭi-n cuădava iha —căchí-gă xăha<sup>n</sup>-gă xii-dé.

<sup>4</sup>Te ní xícă<sup>n</sup> tnúhú-gă nŭú-güedé, te xăha<sup>n</sup>-gă:

—Chí căchí tnúhu ná cŭú să cŭú càda-o nduu ndetatú-ó. ¿Să văha ñă sá cuéhé? ¿Să cadă tătna-o ñăyiu cùhú ñă sá căhni-ó-yu? —căchí-gă xăha<sup>n</sup>-gă xii-güedé.

Dico ni ĩ<sup>n</sup>-güedé ñá túu tñáhí ni căhá<sup>n</sup>-güedé. <sup>5</sup>Te Jèsús ní xindéhé văha-gă nŭú nchăa-güedé te ní cudée<sup>n</sup>-gă, te ní ndíhú iní-gă chi ío sàá iní-güedé, te ní xăha<sup>n</sup>-gă xii tée cùhú ndaha-xi-ă<sup>n</sup>:

—Ndocani ndaha-n —căchí-gă xăha<sup>n</sup>-gă xii-dé.

Te ní ndocani-dé ndaha-dé, te òré-ni-ă<sup>n</sup> nŭ ndúha. <sup>6</sup>Te cue tée cùu fariséú ní xica-güedé cuáhă<sup>n</sup>-güedé ĩ<sup>n</sup> xichi nŭú nŭ naníhí tñáhă-güedé ndihi cue tée cündihi té Hèrodés cuendă ndatnúhu-güedé nása cada-güedé cahni-güedé Jèsús.

**Cuéhé víhí ñăyiu ní quexio yuhu lagúná**

<sup>7</sup>Te Jèsús ní xica-gă cuáhă<sup>n</sup>-gă ndihi cue tée xica cuu ndihi-gă yuhu làgúná distrítú Galileá, te ío cuéhé ñăyiu distrítú-ă<sup>n</sup> nchicú<sup>n</sup> ñăhă-yu xii-gă cuáhă<sup>n</sup>. <sup>8</sup>Te nŭú nŭ quexio-gă-ă<sup>n</sup> nŭ sáhă<sup>n</sup> ñăyiu distrítú Jùdeá, ñăyiu ñuú Jerusàlén, ñăyiu distrítú Idŭmeá, ñăyiu xіндеcu ndăa ĩngă xio yúte Jòrdán, ndihi ñăyiu xіндеcu yatni ñuú Tírú ndihi ñuú Sídón, te duca<sup>n</sup> ío văi-yu ní

sáhá<sup>n</sup> núú ndécú-gă chi ní níhĩ-yu tñúhu nchaa nàcuáa quide-gá. <sup>9</sup>Te Jèsús ní xáha<sup>n</sup>-gă xii cue tée xica cuu ndihi-gá sá cádá tũha-güedé ii<sup>n</sup> bàrcú cuendá caa-gá núú-xi cuendá sá vă dádèhnde ñàhá-yu xii-gá chi ío cuéhě-yu. <sup>10</sup>Te sá dúcá<sup>n</sup> nĩ níhĩ-yu tñúhu sá quidé tătna-gá ñáyiú cùhú, núú xíă<sup>n</sup> nchaa dava-gá ñáyiú cùhú súúni dícó ngõnchihi tñàhá-yu cuáhá<sup>n</sup>-yu núú ndécú-gă cuiní-yu tnàndeé ñàhá-yu xii-gá cuendá sá cuiní-yu ndúha-yu.

<sup>11</sup>Te cue ñáyiú yìhi ñaha espíritú cúndihi yucu ñávàha ní sanu xiti ñàha-xi xii-yu núú Jèsús òré ní xini ñàhá-xí xii-gá, te xíă<sup>n</sup> ní quide níhi ní cáhá<sup>n</sup>-yu, te xăhă<sup>n</sup>-yu xii Jèsús: —iYòhó cúú-n Dèhe Yá Ndiõxí! — càchí-yu xăhă<sup>n</sup>-yu xii-gá.

<sup>12</sup>Te Jèsús ní tenàá-gá nchaa espíritú cúndihi yucu ñávàha-á<sup>n</sup>, te ní xáha<sup>n</sup>-gă xii nchaa ñáyiú ní xíhi-xi-á<sup>n</sup> să vă càhá<sup>n</sup>-yu núú ñáyiú yoo cùu-gá.

**Jèsús caxi-gá úxúú tñàhá cue tée dacuàha ñaha xii ñáyiú tñúhu-gá**

(Mt. 10:1-4; Lc. 6:12-16)

<sup>13</sup>Te sátá dúcá<sup>n</sup> nĩ cuu te Jèsús ní sáá-gá ii<sup>n</sup> yucu, te xíă<sup>n</sup> ndécú-gă ní cana-gá nchaa cue tée càchí iní-gá. Te òré ní quexio nchaa cue tée-á<sup>n</sup> núú-gă, <sup>14</sup>te ní caxi-gá úxúú tñàhá cue tée caca cuu ndihi-gá, te diu-ni cue tée-á<sup>n</sup> tendaha-gă quíhí<sup>n</sup>-güedé cáhá<sup>n</sup>-güedé tñúhu-gá núú ñáyiú. <sup>15</sup>Te ní sáñaha-gă xii-güedé tñúhu ndee iní cundecu ndihi-güedé cuendá cada tătna-güedé ñáyiú cùhú, ndihi cuendá queñuhu-güedé nchaa espíritú cúndihi yucu ñávàha yìhi ñaha xii ñáyiú. <sup>16</sup>Te

duha xñani ndi ùxúú cue tée-á<sup>n</sup>: Hí<sup>n</sup>-dé nání-dě Xímú, te mee-gă ní taudiu ñaha-gá xii-dé sá cúnàni-dé Pèlú. <sup>17</sup>Te ingá-dé nání-dě Jàcobó, te ingá-dé nání-dě Juàá, te ñani té Jàcobó-á<sup>n</sup> cúú tē Juàá te ndi ndúú-güedé cúú-güedé déhe té Zebèdeú, te ndi ndúú cue tée-á<sup>n</sup> nĩ dánání ñàha Jèsús xii-güedé Boànergés, te tñúhu-á<sup>n</sup> quée-xi: Cue tée ío yáchí cúdèé<sup>n</sup>, duha quèe-xi tñúhu-á<sup>n</sup>. <sup>18</sup>Te duha xñani dàva-gá-güedé: Té Ndríxí, té Lìpé, té Bartolòmé, té Mâteú, té Măxí, té Jàcobó déhe té Àlféú, té Tàdeú, té Xímú tée ní cundihi cue tée canànistá ní cùu, <sup>19</sup>ndihi té Jùdás Iscàrioté tée ní sáá nduu nĩ sáha cuendá ñàhá xii Jèsús núú cuè tée cùu úhú iní ñàhá xii-gá, duha xñani cuè tée ní caxi Jèsús ní xica cuu ndihi-gá.

**Càchí-güedé sá ndécú ndihi Jèsús yucu ñávàha dico ñá ndàá**

(Mt. 12:22-32; Lc. 11:14-23; 12:10)

Te sátá dúcá<sup>n</sup> te cuáhá<sup>n</sup>-gá ndihi-güedé núú quidé vèhe-gá. <sup>20</sup>Te ío vai ñáyiú ní tacá-ni tucú-yu xíă<sup>n</sup>, te ni ñă ní níhĩ-gă nása cada-gá caxi-gá ndihi cue tée xica cuu ndihi-gá cuendá sá ío vâi-yu. <sup>21</sup>Te cue ñáyiú cùu ndi mee Jèsús ní níhĩ-yu tñúhu nchaa nàcuáa cùu, te nchaa ñáyiú ñá cùtnuni váha iní-xi ní cachí-yu sá nĩ nduu lùcú-gá nũ xíă<sup>n</sup> cuáhá<sup>n</sup> ñáyiú cùu ndi mee Jèsús núú ndécú-gă cuendá candeca ñàhá-yu xii-gá núhú ní cùu.

<sup>22</sup>Te cue tée dàcuaha ñaha xii ñáyiú nchaa tñúhu ní chídó tñuní ndíi Moisés véxi ndéé ñuú Jerusàlén ní cáhá<sup>n</sup> cuèhě-güedé cuendá Jèsús, chi ní xitnàha-güedé:

—Tée-a ndècu ndihi-dé sácufhná, te diu xíá<sup>n</sup> chíndèe ñaha-xi xii-dé queññuhu-dé nchaa espíritú cúndìhi-xi yihi ñaha xii ñáyiú, te diu-ni-xi tàxi tnuní-xi nchaa espíritú-á<sup>n</sup> —duha ní xítñaha-güedé.

<sup>23</sup>Te Jèsús ní cana ñaha-gã xii-güedé, te ní cani-gá ì<sup>n</sup> cuèndú núú-güedé nàcuáa tecú tnuní-güedé tnúhu-gá, te xãha<sup>n</sup>-gã xii-güedé:

—¿Te nása cada sácufhná queññuhu-xi cue espíritú cúndìhi-xi yihi ñaha xii ñáyiú-i? <sup>24</sup>Te nchòhó xíní-ndó sã núu ì<sup>n</sup> tée yìndaha ì<sup>n</sup> nació<sup>n</sup> vá cúú ì<sup>n</sup>nuu-dé ndihi cue tée cúndìhi-dé, te vá cúdĩi-dé cunuu-dě. <sup>25</sup>Te diu-ni duca<sup>n</sup> sãtnahá-xi cùu tucu ñáyiú xíndecu ì<sup>n</sup>-ni vèhe, chi núu vá cúú ì<sup>n</sup>nuú-yu, te vá cúdĩi-yu cundecu càhnú-yu. <sup>26</sup>Te núu sácufhná ñà túú cùu ì<sup>n</sup>nuu-xi ndihi cue espíritú cúndìhi-xi, te vá cúdĩi-xi cundecu-xi taxi tnuní-xi te núu duca<sup>n</sup> quide-xi.

<sup>27</sup>Te nchòhó xíní-ndó sã cuè ñadúhú chi vá ndácú-güedé cuèndá-ni quíhu-güedé duhu-güedé vehe ì<sup>n</sup> tée ío ndee, chi díhna-gá xíní ññuhu-xi tñi-güedé téé-á<sup>n</sup> dacùtu ñaha-güedé xii-dé dàtnuní duca<sup>n</sup> te ndacu-güedé duhu-güedé nchaa sá ndécú ndihi-dé.

<sup>28</sup>Te na càchí tnúhu ndáá-í xii-ndo sã ncháá sã cuèhé sá dúhá quide ñáyiú, ndihi nchaa tnúhu cuèhé tnúhu duha càhá<sup>n</sup>-yu cuèndá Yã Ndióxí cuu cada càhnu iní-gá.

<sup>29</sup>Dico cue ñáyiú na càhá<sup>n</sup> cuèhé cuèndá Espíritú Yã Ndióxí, ñáyiú-á<sup>n</sup> vã cádá càhnu iní ñáhá tñahi-gá xií-yu, chi cundecu-ni cuéchi-yu núú-gã ni caa ni quíhí<sup>n</sup> —càchí-gá xãha<sup>n</sup>-gã xii-güedé.

<sup>30</sup>Te duca<sup>n</sup> ní càhá<sup>n</sup>-gá chi càchí-güedé sá ndécú ndihi-gá espíritú cúndìhi yucu ñávãha.

**Náná Jèsús ndihi cue ñaní-gá**

(Mt. 12:46-50; Lc. 8:19-21)

<sup>31</sup>Te ní quexio náná Jèsús ndihi cue ñaní-gá núú ndécú-gã xínutnii-yu quehé, te ní xáhã<sup>n</sup>-yu xii ì<sup>n</sup> ñáyiú xíndecu-á<sup>n</sup> sã dáyãha-yu tnúhu núú-gã cuèndá quee-gá ndatnúhu ndihi ñaha-gã xií-yu. <sup>32</sup>Te cue ñáyiú xínucóo ni càndéé dñi-gá ní xáhã<sup>n</sup>-yu xii-gá:

—Náná-n ndihi cue ñaní-n ndécú-yu quehé nándùcu ñahá-yu xii-n —càchí-yu xáhã<sup>n</sup>-yu xii-gá.

<sup>33</sup>Te Jèsús ní xáha<sup>n</sup>-gã xií-yu: —Te cachí tnúhu-ndo yòndi-gá ñáyiú cùu datná nãná-í ndihi dàtná cue ñaní-í —càchí-gá xãha<sup>n</sup>-gã xií-yu.

<sup>34</sup>Te dàtnuní ní xíndéhé vãha-gá núú nchaa ñáyiú xínucóo ni càndéé dñi-gá-á<sup>n</sup>, te ní xáha<sup>n</sup>-gã xií-yu:

—Nchaa ñáyiú-a cùú-yu dàtná nãná-í ndihi dàtná cue ñaní-í. <sup>35</sup>Chi nchaa ñáyiú quide nacuáa càhá<sup>n</sup> Yã Ndióxí, ñáyiú-á<sup>n</sup> cúú-yu dàtná cue ñaní-í, ndihi dàtná cue cúha-í, ndihi dàtná nãná-í —càchí-gá xãha<sup>n</sup>-gã xií-yu.

**Nàcuáa quide téé cuángacá<sup>n</sup> triú**

(Mt. 13:1-9; Lc. 8:4-8)

**4** Te Jèsús ní nguíta-gá dácúaha tucu-gá ñáyiú yuhu làgúná. Te cuèhé vihí-yu ní tacá xíá<sup>n</sup> núu cuásaá-gá núú ì<sup>n</sup> bàrcú núnñi xití ndute làgúná-á<sup>n</sup>, te núú xíá<sup>n</sup> ní ngóo-gá te ní nguíta-gá dánèhé ñáhá-gã xií-yu, te ncháá-yu xíxúcu-yu yuhu làgúná-á<sup>n</sup>. <sup>2</sup>Te ní

ngüíta-gá ní cani-gá titní cuendú núu-yu nàcuáa tecú tnùnì-yu tnúhu-gá, te xǎha<sup>n</sup>-gǎ xií-yu:

<sup>3</sup>—Chí cùndèdóho váha ìí<sup>n</sup> cuendú ná càni-í-a. Ìí<sup>n</sup> téé cuángacá<sup>n</sup>-dé triú. <sup>4</sup>Te òrè ní ngüíta-dé dǎngoyo-dé triú-á<sup>n</sup>, te dava ní quene ndava ní ngava ndéé ichi, te ní xiní cue tílaá te ní nadatàcá-güedi. <sup>5</sup>Te dava ní ngava ñuhu yadi núu yíhí vihi yúu, te ndíhi-ni ní xínu-xi cuendá sá ñà túú càvihi ñuhu. <sup>6</sup>Dico òré ní nayehé ñá túú ní cùndee iní-xi chi ní yíchí-xi, chi ñá túú ní níhí quíhí<sup>n</sup> cùnú yóho-xi. <sup>7</sup>Te dava ní ngava núu yúcu ndíquí<sup>n</sup> tnu ìñu, te ìí<sup>n</sup>nuu-ni ní xínu-xi ndíhi tnu ìñu, te tnu ìñu-á<sup>n</sup> ní sahnu-xi te ní dánáá-xí nchàa triú sá ní xínu-á<sup>n</sup>. <sup>8</sup>Dico dava triú-á<sup>n</sup> ní ngava-xi núu ndécú ñuhu coco<sup>n</sup>, te xǎh<sup>n</sup> ní xínu-xi te ní sahnu-xi te ío váha ní cuu, chi núu ìí<sup>n</sup>-ní triú-á<sup>n</sup> te dava yoco-xi ní nguíhi ócú úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ìí<sup>n</sup> ciendú triú-xi —càchí-gá xǎha<sup>n</sup>-gǎ xií-yu.

<sup>9</sup>Te xǎha<sup>n</sup> tùcu-gá xií-yu:  
—Nchaa nchòhó ñáyiú ní xíndedóho nchaa tnúhu ní cáhá<sup>n</sup>-í-a, te ío váha chí cuáha cuendá —càchí-gá xǎha<sup>n</sup>-gǎ xií-yu.

**Jèsús càhá<sup>n</sup>-gá ná cuendá duca<sup>n</sup>  
càni-gá cuendú**

(Mt. 13:10-17; Lc. 8:9-10)

<sup>10</sup>Te sátá ní ndaca ñáyiú-á<sup>n</sup> te ní quendóo mee-nǎ Jèsús ndíhi cue téé xíca cuu ndíhi-gá, ndíhi ìí<sup>n</sup> úú-nǎ ñáyiú. Te ñáyiú-á<sup>n</sup> ndíhi cue téé-á<sup>n</sup> ní xíca<sup>n</sup> tnúhǔ-yu ndíhi-güedé núu-gǎ, núu nása quèe-xi cuendú ní

cani-gá núu-yu ndíhi-güedé. <sup>11</sup>Te ní xǎha<sup>n</sup>-gǎ:

—Nchòhó chi sa càchí tnúhu Yá Ndiöxí xii-ndo ìí<sup>n</sup> sá vǎtá quíni-gá-ndó, chi càchí tnúhu-gá nàcuáa cada-gá ndíhu ndaha-gǎ ñáyiú, dico dava-gá ñáyiú càni-í mee-ni cuendú núu-yu. <sup>12</sup>Chi cuéi na quíni-yu nchaa nàcuáa cuu dico ni vǎ cùtnùnì iní-yu ná cuendá duca<sup>n</sup> cùu, àdi cuéi na cùndedóho-yu dico ni vǎ tècú tnùnì-yu. Te duca<sup>n</sup> ndòhó-yu cuendá sá vǎ quíndáá iní-yu Yá Ndiöxí, ndíhi cuendá sá vǎ cǎdá càhnu iní-gá nchaa yíca cuèchi-yu —càchí-gá xǎha<sup>n</sup>-gǎ xií-yu ndíhi-güedé.

**Jèsús càhá<sup>n</sup>-gá nàcuáa quèe-xi  
cuendá téé cuángacá<sup>n</sup> triú**

(Mt. 13:18-23; Lc. 8:11-15)

<sup>13</sup>Te ní xǎha<sup>n</sup> tùcu Jèsús xii cue téé xíca cuu ndíhi-gá, ndíhi cue ñáyiú-á<sup>n</sup>:

—Nchòhó, ñá túú ní tècú tnùnì-ndó cuendú ní caní-í núu-ndó, te núu duca<sup>n</sup>, ¿te nása tecú tnùnì-ndó dàva-gá cuendú caní-í núu-ndó-í? Te na càchí tnúhu-í xii-ndo nàcuáa quèe-xi cuendú ní caní-í núu-ndó. <sup>14</sup>Te téé cuángacá<sup>n</sup> triú-á<sup>n</sup> cúú-dě dàtná ìí<sup>n</sup> téé cuáhá<sup>n</sup> càhá<sup>n</sup> tnúhu Yá Ndiöxí núu ñáyiú. <sup>15</sup>Te triú-á<sup>n</sup> cúú-xí dàtná tnúhu Yá Ndiöxí, te triú sá ní quene ndava ní ngava ndéé ichi, xǎh<sup>n</sup> cúú-xí dàtná ñáyiú ní tnahá iní-xi tnúhu Yá Ndiöxí, dico sácuíhna cuáhá<sup>n</sup>-xi xòcani-xi tnúhu-gá iní-yu cuendá sá vǎ cǎnchícú<sup>n</sup> nihnú-yu nàcuáa càhá<sup>n</sup> tnúhu-á<sup>n</sup>. <sup>16</sup>Te triú sá ní ngava ñuhu yadi núu yíhí vihi yúu, xǎh<sup>n</sup> cúú-xí

dàtná ñáiyu ní xíndedóho tnúhu Yá Ndiöxí te díí ìní ní tnií-yu tnúhu-gá. <sup>17</sup>Dico òrè ná ngúíta ñáiyu cúcuèhé ñáhá-yu xií-yu àdi nándi-gá sá yáha-yu sá cuendá tnúhu-gá, te ñá cùndèe iní-yu chi dàñá-yu tnúhu-gá cuendá sá ñà túú nihí ndéě-yu. <sup>18</sup>Te triú sá nǐ ngava núú yúcu ndíquǐ<sup>n</sup> tnu ìñu xíǎ<sup>n</sup> cúú-xí dàtná ñáiyu ní tecú dóho-xi tnúhu Yá Ndiöxí, <sup>19</sup>dico cuèé cuèé ní nacuanaa-yu tnúhu-gá, chi cuendá mee-ni sǎ cúú-xí mèè-yu ñùhu iní-yu, ndíhi cuendá sá ìo sàni iní-yu cuu cuicá-yu, ndíhi cuendá sá ìo cùdíí ìní-yu nchaa sá ìo ñuyúí-a, te ñá túú ñùhu iní-yu tnúhu sá nǐ xíndedóho-yu-á<sup>n</sup> nàcuáa cada váha-yu cundecú-yu. <sup>20</sup>Dico triú sá nǐ ngava núú ndécú ñùhu coco<sup>n</sup>, xíǎ<sup>n</sup> cúú-xí dàtná ñáiyu ní xíndedóho tnúhu Yá Ndiöxí te quidé-yu nchaa nàcuáa càhá<sup>n</sup> tnúhu-á<sup>n</sup>. Te cada iní-ndó sǎ ñáiyu-á<sup>n</sup> cúú-yu dàtná triú sá nǐ nguíhi yoco-xi ócò úxí triú-xi, ndíhi triú sá nǐ nguíhi yoco-xi únídico triú-xi, ndíhi triú sá nǐ nguíhi yoco-xi ì<sup>n</sup> cièndú triú-xi. Te duca<sup>n</sup> sǎtnahá-xi cùú-yu chi ìo váha quidé-yu —càchí-gá xǎha<sup>n</sup>-gǎ xii cue tée xìca cuu ndíhi-gá ndíhi cue ñáiyu-á<sup>n</sup>.

### Cuendá iti

(Lc. 8:16-18)

<sup>21</sup>Te xǎha<sup>n</sup>-gǎ xii nchaa ñáiyu: —Ñá túú nǐ ì<sup>n</sup> ñáiyu tēñuhú iti te chiváha-yu ì<sup>n</sup> xití quídí, àdi chiváha-yu ì<sup>n</sup> caha càamá, chi tàxi ndecú-yu ì<sup>n</sup> núú dùcú<sup>n</sup> cuendá cutnùní núú nchaa ñáiyu. <sup>22</sup>Te ni ì<sup>n</sup> tnúhu sá ñǎ tēcú tnùní ñáiyu vitna cachí-ó sǎ vǎ tēcú tnùní-yu

chi dacuitíí sǎ tēcú tnùní-yu, te ni ì<sup>n</sup> tnúhu sá càchí-ó cùu yuhu vitna vá cúú yùhu chi dacuitíí sǎ quèé tũu-xi núú ñáiyu. <sup>23</sup>Te nchòhó cue ñáiyu ní xíndedóho nchaa tnúhu ní cáhá<sup>n</sup>-í-a, te ìo váha chí ná cuáha cuendá —càchí-gá xǎha<sup>n</sup>-gǎ xií-yu.

<sup>24</sup>Te ní xáha<sup>n</sup> tùcu-gá:

—Ío váha chí cùndedóho tnúhu na càhá<sup>n</sup>-í-a. Te nàcuáa-ni quide-ndo danehé-ndó ñáiyu tnúhu Yá Ndiöxí, te diu-ni duca<sup>n</sup> càda ñaha-gá xii-ndo, te uu<sup>n</sup>-gá duca<sup>n</sup> càda-gá sá cúú-xí-ndó. <sup>25</sup>Te nchaa nchòhó ñáiyu tēcú tnùní tnúhu Yá Ndiöxí, uu<sup>n</sup>-gá cuita tecú tnùní-ndó tñùhu-gá quíhǐ<sup>n</sup>. Te nchaa nchòhó ñáiyu ñá túú tēcú tnùní tnúhu-gá, te uu<sup>n</sup>-gá vá tēcú tnùní-ndó —càchí-gá xǎha<sup>n</sup>-gǎ xií-yu.

### Nàcuáa sàhnu triú

<sup>26</sup>Te Jèsús xǎha<sup>n</sup> tùcu-gá:

—Na càni-í ì<sup>n</sup> cuèndú núú-ndó cuendá tecú tnùní-ndó nàcuáa cada-xi òrè ndíhu ndaha ñáha Yá Ndiöxí xii ñáiyu. ì<sup>n</sup> tée cuángacá<sup>n</sup>-dé triú. <sup>27-28</sup>Te sátá nǐ yáha ní sacá<sup>n</sup>-dé triú-á<sup>n</sup>, te cuánuhú-dé vehe-dé ndétátú-dé. Te duca<sup>n</sup>-ni ta xìca nduu cuáhá<sup>n</sup> te ní xínu triú-á<sup>n</sup>, te nàcuáa ta sàhnu-xi cuáhá<sup>n</sup> te ta quèe ndaha-xi, te duca<sup>n</sup>-ni cùu ní sáá nduu nǐ quene yoco-xi te ní nguíhi triú-xi, dico tée ní sacá<sup>n</sup> triú-á<sup>n</sup> ñà túú xìní-dé nása ní sahnu-xi, chi mee ñùhu ní quide-xi ní sahnu triú-á<sup>n</sup>. <sup>29</sup>Te òrè sa ní ndíhi ní cuaa<sup>n</sup> te ní ngúíta tée ní sacá<sup>n</sup>-á<sup>n</sup> náquèhndé-dé nátàxi tnaha-dé —càchí-gá xǎha<sup>n</sup>-gǎ xií-yu.

### Cuendá ndíquǐ<sup>n</sup> yutnu nàni mostázá

(Mt. 13:31-32; Lc. 13:18-19)

<sup>30</sup>Te xǎha<sup>n</sup> tùcu Jesús xií-yu:

—Na càni tucu-í ingá cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñàha Yá Ndiòxi xii ñáyiú. <sup>31</sup>Íí<sup>n</sup> yutnu nàni mostázá cúú-xí ìí<sup>n</sup> yutnu sá líhli víhi-gá ndíquí<sup>n</sup>-xi dàcúúxí ndíquí<sup>n</sup> nchaa cúhú, <sup>32</sup>dico òré ná càcá<sup>n</sup>-güedé núú ñúhú-güedé, te na xínu-xi te sàhnu-gá-xi dàcúúxí nchàa cúhú, te nchaa dité-xi ío cùu cahnu-xi, te ndéé cue quití ndàva núú tàchí sácóo-güedi nchaa núú dité-xi xínu ndeti-güedi —cachí-gá xàha<sup>n</sup>-gá xíí-yu.

**Ío titní cuèndú ní caní Jèsús núú ñáyiú**

(Mt. 13:34-35)

<sup>33</sup>Te ío-gá vài cuèndú ní caní Jèsús núú ñáyiú cuèndá tecú tnùní-yu tnúhu Yá Ndiòxi, dico dava cuèndú ñá túú ní càni-gá núú-yu, chi ní cutnùní iní-gá sá vǎ təcú tnùní-yu nchaa. <sup>34</sup>Te mee-ni cuèndú ní caní Jèsús núú ñáyiú ndí tnahá òré ní dánèhé ñáhá-gá xíí-yu tnúhu-gá. Te òré ndécú mèe Jesús ndíhi cue téé xica cuu ndíhi-gá, te ní xáha<sup>n</sup>-gá xii-güedé nàcuáa quèe-xi ìí<sup>n</sup> ìí<sup>n</sup> cuèndú ní caní-gá núú ñáyiú.

**Jèsús ngání-gǎ táchí ndíhi ndute làgúná**

(Mt. 8:23-27; Lc. 8:22-25)

<sup>35</sup>Te diu-ni nduu-ǎ<sup>n</sup> òré sa ta cùndiquí<sup>n</sup> cuáhá<sup>n</sup> ní xáha<sup>n</sup> Jèsús xii cue téé xica cuu ndíhi-gá:

—Chí ná quíhí<sup>n</sup>-ó ndàa ingá xio yuhu làgúná —càchí-gá xàha<sup>n</sup>-gá xii-güedé.

<sup>36</sup>Te ní quide ndee ìní-gá nchaa ñáyiú xíxúcu-á<sup>n</sup>, te

diu-ni bàrcú sá ñúhú-gǎ òré ní dánèhé-gá ñáyiú tnúhu-gá diu-ni xíǎ<sup>n</sup> ní dácácá cuè téé xica cuu ndíhi-gá ndécá ñàha-güedé xii-gá cuáhá<sup>n</sup>, te tnahá ìí<sup>n</sup> úú-gá bàrcú ní xica-xi nchicú<sup>n</sup>-xi bàrcú ñúhú-gǎ-á<sup>n</sup> cuáhá<sup>n</sup>. <sup>37</sup>Te ñúhu bàrcú ñúhú-gǎ-á<sup>n</sup> ichi cuáhá<sup>n</sup>-xi núú ndute, te ní quexìo ìí<sup>n</sup> táchí nǐhi, te ta nàdachitú-xi ndute xití bàrcú-á<sup>n</sup> cuáhá<sup>n</sup>, te sa cuíní-nǎ-xi quée naa bàrcú-á<sup>n</sup> xití ndute ní cùu. <sup>38</sup>Te Jèsús cáá-gǎ xidí-gá ìí<sup>n</sup> xichi ndàa sátá bàrcú-á<sup>n</sup>, te yìnchihi ìí<sup>n</sup> dóo dǐquí-gǎ. Te sá dúcá<sup>n</sup> cuíní-xi quée naa bàrcú-á<sup>n</sup> nùu ní sáhá<sup>n</sup>-güedé ní ndocani ñàha-güedé xii-gá, te xàha<sup>n</sup>-güedé: —iMèstrú, ndíquíú ìní! ¿Náa ñá túú ndíhú iní-n sǎ tá quée naa-o cuáhá<sup>n</sup>-ǎ<sup>n</sup>? —càchí-güedé xàha<sup>n</sup>-güedé xii-gá.

<sup>39</sup>Te Jèsús ní ndíquíú ìní-gá te ní ndacóo-gá, te ní tenàá-gá táchí-ǎ<sup>n</sup>, te ní xáha<sup>n</sup>-gá xii ndute làgúná: —iTnavíí-nǎ cuhu<sup>n</sup>, chi ío dusa<sup>n</sup>! —càchí-gá xàha<sup>n</sup>-gá xii ndute-á<sup>n</sup>.

Te òré-ni ní ngüíñí táchí-ǎ<sup>n</sup> te ní nucúndecu nahi-nǎ ndute làgúná-á<sup>n</sup>. <sup>40</sup>Te Jèsús ní xáha<sup>n</sup>-gá xii-güedé:

—¿Ná cuèndá ndéé dúcá<sup>n</sup> yùhú-ndó-í? ¿Náa ñá túú sàndáá iní ñáhá ndisa-ndo xii-í-ǎ<sup>n</sup>? —càchí-gá xàha<sup>n</sup>-gá xii-güedé.

<sup>41</sup>Dico mee-güedé chi ío ní yùhú-güedé sá duca<sup>n</sup> nǐ quide-gá ní xiní-güedé, te ní xitnàha-güedé:

—¿Te ná téé cùu téé-a núu ní cáhá<sup>n</sup>-ni-dé, te ní ngüíñí táchí te ní nucúndecu nahi ndute làgúná-a-í? —càchí-güedé xitnàha-güedé.

**Hi<sup>n</sup> téé yìhi ñaha espíritú cúndìhi  
yucu ñávàha**

(Mt. 8:28-34; Lc. 8:26-39)

**5** Te ní sáá Jèsús ndìhi cue téé xica cuu ndìhi-gá ndàa ingá xio yuhu làgúná yucu cue téé ñúú Gàdará. <sup>2</sup>Te òrè ní quene-gá xití bàrcú te i<sup>n</sup> téé yìhi ñaha espíritú cúndìhi yucu ñávàha ní quee-dé núú yíndüxi ndíyi cuáhá<sup>n</sup>-dé núú-gă. <sup>3</sup>Te mee-ni núú yíndüxi ndíyi-á<sup>n</sup> quidé vèhe-dé, te cuèi dàcutu ñaha-güedé cadèná xii-dé dico ñá túú tñáhi ndàcu-güedé núú-dě. <sup>4</sup>Te ío titní xito ní dácútú-güedě cadèná sáhá-dě ndìhi ndaha-dé dico ní dándává-ni-dě, te ní xóo dacàchi-gá-dé nchaa cadèná-á<sup>n</sup>, te ñá túú tñáhi ni ndàcu-güedé núú-dě. <sup>5</sup>Te cuèi nduu cuèi niú ní xóo cana saa-dé, te váha-ni núú xití yucu ndècu-dé àdi núú yíndüxi ndíyi dico càna saa nahi-ni-dé, te ío ní xóo dānícuehé-dé méé-dě ndìhi yúú. <sup>6</sup>Te òrè ní xiní-dé Jèsús te xínu-dé ní sáhá<sup>n</sup> núú-gă, te ní ngüíñi xití-dě, <sup>7</sup>te espíritú yíhi ñaha xii-dé-á<sup>n</sup> ní quide-xi níhi ní cáhá<sup>n</sup>-dé, te xăha<sup>n</sup>-dě xii-gă:

—¿Ná cuendá véxi yòhó Jèsús Déhe Dútú Ndióxi sàdí-n ìchi-í? Te càhá<sup>n</sup> ndàhú-í núú Ndióxi yuhu nū-n să vă dāndòho ñaha-n xii-í — cāchí-dé xăha<sup>n</sup>-dě xii-gă.

<sup>8</sup>Te duca<sup>n</sup> ní cáhá<sup>n</sup>-dé cuendá sá Jèsús ní xăha<sup>n</sup>-gă xii espíritú cúndìhi yucu ñávàha yìhi ñaha xii-dé-á<sup>n</sup> să queé ñaha-xi xii-dé.

<sup>9</sup>Te Jèsús ní xícá<sup>n</sup> tñuhú-gă núú-dě, te xăha<sup>n</sup>-gă:

—¿Nása nàni-n-í? —cachí-gă xăha<sup>n</sup>-gă xii-dé.

Te ní xăha<sup>n</sup>-dě:

—Vài Sandadú, duha nàni-í chi ío cuéhé-ndí —cāchí-dé xăha<sup>n</sup>-dě xii-gă.

<sup>10</sup>Te cue espíritú cúndìhi yucu ñávàha-á<sup>n</sup> ní cáhá<sup>n</sup> ndàhú-xi núú Jèsús sá vă téndàha ñaha-gă xii-xi quíh<sup>n</sup>-xi ingá xichi. <sup>11</sup>Te diu-ni yatni yucu núú ndécú Jèsús-á<sup>n</sup> yíhi vài cuchí xixexi-güedi. <sup>12</sup>Te nchaa cue espíritú-á<sup>n</sup> ní cáhá<sup>n</sup> ndàhú-xi núú-gă, te xăha<sup>n</sup>-xi xii-gă:

—Càhá<sup>n</sup> ndàhú-ndí núú-n să dáñá-n quíhu-ndí yiqui cūñú nchaa cūchí-á<sup>n</sup> —cāchí-xi xăha<sup>n</sup>-xi xii-gă.

<sup>13</sup>Te Jèsús ní xăha<sup>n</sup>-gă sá cúú quíhu-xi yiqui cūñú-güedi, te xínu dàtná úú mīl-güedi yìhi yucu-á<sup>n</sup>. Te nchaa espíritú cúndìhi yucu ñávàha yìhi ñaha xii téé-á<sup>n</sup> ní quee ñaha-xi xii-dé, te cuánguìhu-xi yiqui cūñú nchaa cūchí-á<sup>n</sup>, te nchaa-güedi ní xinu-güedi duha ní queé-güedi ndàa núú dèhvá yuhu làgúná-á<sup>n</sup>, te ní ngaunihnu-güedi xití ndute te ní ndìhi-güedi ní cáhá.

<sup>14</sup>Te òrè ní xiní cue téé xìto cuchí-á<sup>n</sup> nàcuáa ní cuu te ní xinu-güedé, te ní sáhá<sup>n</sup>-güedé ní cani-güedé cuendú núú cuè ñáyiú ndècu xití ñúú, ndìhi núú cuè ñáyiú ndècu xití yucu. Te nchaa ñáyiú ní níhi tñuhu ní xicá-yu cuáhá<sup>n</sup> ndéhě-yu nàcuáa ní cuu. <sup>15</sup>Te òrè ní quexió-yu núú ndécú Jèsús te ní xiní-yu téé ní xíhi ñaha cuè espíritú cúndìhi yucu ñávàha-á<sup>n</sup> núcòo-dé núú sàhá Jèsús, te nìhnu-ná-dé dóó-dě te núcòo-ná-dé dàtná i<sup>n</sup> ñáyiú váha, te ní yùhú-yu òrè ní xiní ñáhă-yu xii-dé. <sup>16</sup>Te nchaa ñáyiú ní xiní nàcuáa ní cuu ní ndúha téé yìhi ñaha cue espíritú



cúndìhi yucu ñávãha-á<sup>n</sup> ní cùu ní caní-yu cuèndú núu nchàa ñáyiu ní quexio-á<sup>n</sup> nàcuáa ní cuu ní ndúha téé-á<sup>n</sup> ndìhi nàcuáa ní cuu cuèndá nchaa cùchí-á<sup>n</sup>. <sup>17</sup>Te sá dúcá<sup>n</sup> ni níhí ñáyiu-á<sup>n</sup> tnùhu nàcuáa ní cuu núu nchaá-yu ní ngüíta-yu càhã<sup>n</sup> ndàhú-yu núu Jèsús sá ná quèe-gá yucu ñuú-yu núhú-gá.

<sup>18</sup>Te ní xica-gá cuáhã<sup>n</sup>-gá núu ndécú bàrcú, te òré ndée-gá bàrcú-á<sup>n</sup> nùhú-gá ní ngüíta téé ní xíhi ñaha cuè espíritú cúndìhi yucu ñávãha-á<sup>n</sup> càhã<sup>n</sup> ndàhú-dé núu-gã nùu vá cúndèe iní-gá quíhí<sup>n</sup> ndìhi ñaha-gã xii-dé. <sup>19</sup>Dico ñá túú ní sãha-gá tnúhu quíhí<sup>n</sup> ndìhi ñaha-gã xii-dé, te ní xáha<sup>n</sup>-gã xii-dé:

—Cuanùhú vehe-n, te cani-n cuèndú núu cuè ñáyiu sá Yã Ndiöxí ní cundàhú iní ñãhá-gã xii-n, te ío càhnu cuu nchaa sá vãha ní quide-gá sá cúu-xí-n —càchí-gá xãha<sup>n</sup>-gã xii-dé.

<sup>20</sup>Te téé-á<sup>n</sup> ñí xica-dé cuánuhú-dé, te ní sãhá<sup>n</sup>-dé ndí ùxí ñuú nání Dècápolis, te ní cani-dé cuèndú núu nchàa ñáyiu sá ío càhnu cuu nchaa sá vãha ní quide ñaha Jèsús xii-dé, te nchaá-yu ío ní cuñuhu-yu.

**Cuèndá déhe yoco té Jàirú ndìhi  
cuèndá ìí<sup>n</sup> ñadìhí ní tnàndeé dóo  
Jèsús**

(Mt. 9:18-26; Lc. 8:40-56)

<sup>21</sup>Te Jèsús cuánde-gá bàrcú, te ní natehdé-gá ndàa ìngá xio yuhu làgúná, te ío vãi ñáyiu ní tacá núu ní quexio-gá-á<sup>n</sup>, te xíá<sup>n</sup> ndécú-gã <sup>22</sup>ní quexio ìí<sup>n</sup> téé tàxi tnuní veñúhu núu-gã, te téé-á<sup>n</sup> nání-dé Jàirú, te ní ngüíñí xítí-dé núu-gã.

<sup>23</sup>Te ní ngüíta-dé càhã<sup>n</sup> ndàhú-dé núu-gã, te xãha<sup>n</sup>-dè xii-gã:

—Ío càhú tnàhá déhe yoco-í cùhú-xi, te ndècu-ná-xi sá cùu-xi, te véxi-í càhã<sup>n</sup> ndàhú-í núu-n nùu vá cúndèe iní-n quíhí<sup>n</sup>-ó vèhe-í tendaha-n-xi cuèndá ndúha-xi, te cundecu-xi —càchí-dé xãha<sup>n</sup>-dè xii-gã.

<sup>24</sup>Te Jèsús ní xica-gá cuáhã<sup>n</sup>-gá ndìhi téé-á<sup>n</sup>, te ío vãi ñáyiu nchìcú<sup>n</sup> ñãhá xii-gá cuáhã<sup>n</sup>, te dàdehnde ñaha-ná-yu xii-gã ni cùu. <sup>25</sup>Te tnuú nchaa ñáyiu-á<sup>n</sup> ñútnàhá ìí<sup>n</sup> ñaha cùhú, te ñaha-á<sup>n</sup> sa ní cuu úxúú cuíá sã cùhú-a<sup>n</sup> ngòyo ñaha níñí xii-a<sup>n</sup>. <sup>26</sup>Te ío ta ndòho-a<sup>n</sup> véxi, te ío cuéhé ñátátná ñí cuu ta quide tátna ñaha xii-a<sup>n</sup>, te sa ní ndìhi nchaa sá ndécú ndìhi-a<sup>n</sup> ní nadico-a<sup>n</sup> cuèndá ní níhí-a<sup>n</sup> díhú<sup>n</sup> ní quehe<sup>n</sup> nchaa ñáyiu ní quide tátna ñaha xii-a<sup>n</sup> dico ni ìí<sup>n</sup>-yu ñá túú ní ndàcú-yu ndúha-a<sup>n</sup>, chi da uu<sup>n</sup>-gã tá cùu cahú-a<sup>n</sup> cuáhã<sup>n</sup>. <sup>27</sup>Te òré ní níhí-a<sup>n</sup> tnúhu cuèndá Jèsús, te ní xica-a<sup>n</sup> cuáhã<sup>n</sup>-a<sup>n</sup> núu ndécú-gã. Te òré ní quexio-a<sup>n</sup> núu ndécú-gã te ní sãhá<sup>n</sup> ndehe yatni-a<sup>n</sup> ndàa sátá-gã ní tnàndeé-a<sup>n</sup> dóo-gã. <sup>28</sup>Te duca<sup>n</sup> ní quide-a<sup>n</sup> chi ní sani iní-a<sup>n</sup> sá nùu ndacu-a<sup>n</sup> tnàndeé-a<sup>n</sup> cuèdicó luha yuhu dóo Jèsús te ndúha-a<sup>n</sup> ní sani iní-a<sup>n</sup>. <sup>29</sup>Te òré duca<sup>n</sup> ñí quide-a<sup>n</sup> te ñá túú-gã ní ngòyo ñaha-gã níñí xii-a<sup>n</sup>, te òré-á<sup>n</sup> ní cutnùní iní-a<sup>n</sup> sá ñí ndúha-a<sup>n</sup> cuéhé tnàhá-a<sup>n</sup>. <sup>30</sup>Te Jèsús ní cutnùní iní-gã sá ìí<sup>n</sup> ñáyiu ní ndúha sá cuèndá-gã, núu ní nchócótó-gã ndàa sátá-gã te ní xícá<sup>n</sup> tnúhú-gã núu nchàa ñáyiu nchìcú<sup>n</sup> ñãhá xii-gã, te xãha<sup>n</sup>-gã xii-yu:

—¿Ndédacàa-ndo ní tnándeé ñáhá xii-í? —càchí-gá xǎha<sup>n</sup>-gǎ xii-yu.

<sup>31</sup>Te cue téé xica cuu ndihi-gá ní xǎha<sup>n</sup>-güedě xii-gá:

—Mèstrú, ndèhe-n sá vái ñáyiú nchìcú<sup>n</sup> ñáhá xii-n, te textio textio dàdehnde ñáhá-yu xii-n te xicá<sup>n</sup> tnúhú-gǎ-n yòò ní tnándeé ñáhá xii-n —cachí-güedé xǎha<sup>n</sup>-güedě xii-gá.

<sup>32</sup>Te Jèsús ní xíndéhé vǎha-gá xio xio dñi-gá núu ndédacàa ñáyiú ní tnándeé ñáhá xii-gá. <sup>33</sup>Te sá dúcá<sup>n</sup> nǐ cutnùnì iní ñadìhí-á<sup>n</sup> nàcuáa ní cuu, núu yùhú yùhú-a<sup>n</sup> ní sáhá<sup>n</sup>-a<sup>n</sup> ní ngüíñí xítí-á<sup>n</sup> núú Jèsús, te ní xǎha<sup>n</sup> ndǎá-a<sup>n</sup> xii-gá nàcuáa ndùu cuendá-a<sup>n</sup>. <sup>34</sup>Te Jèsús ní xǎha<sup>n</sup>-gǎ xii-a<sup>n</sup>:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndìhú-gá iní-n, chi vá dúcá<sup>n</sup>-gǎ ndoho-n —càchí-gá xǎha<sup>n</sup>-gǎ xii-a<sup>n</sup>.

<sup>35</sup>Te càhá<sup>n</sup> dúcá<sup>n</sup>-ní Jèsús ní sáá cue téé xinu cuechi vehe té Jàirú téé tàxi tnuní veñúhu-á<sup>n</sup>, te xǎha<sup>n</sup>-güedě xii-dé:

—Sa ní xíhí déhe-n, vá chíchìu<sup>n</sup>-gá-n Mèstrú —càchí-güedé xǎha<sup>n</sup>-güedě xii-dé.

<sup>36</sup>Dico Jèsús ñá túú ní quide cuendá-gá nàcuáa ndùu tnúhu ní cáhá<sup>n</sup> cue téé-á<sup>n</sup>, te ní xǎha<sup>n</sup>-gǎ xii téé tàxi tnuní veñúhu-á<sup>n</sup>:

—Ñá túú ñá canì iní-n, quindáá iní ñáhá-ní-n xii-í —càchí-gá xǎha<sup>n</sup>-gǎ xii-dé.

<sup>37</sup>Te Jèsús vá yòò-gá ní cuiní-gá canchicú<sup>n</sup> ñáhá xii-gá quíhí<sup>n</sup>, chi té Pèlú-ni, ndihi té Jàcobó-ni, ndihi ñaní-ni-dé té Juàá cuáhá<sup>n</sup> ndihi ñaha-gǎ xii-güedé. <sup>38</sup>Te òré ní

quexio-gá ndihi-güedé vehe téé tàxi tnuní veñúhu-á<sup>n</sup>, te ní xiní-gá sá ïo vài ñáyiú xíndecu, te súuní dùsa<sup>n</sup> quidé-yu te níhi xicáhá<sup>n</sup>-yu te xíndáhí-yu. <sup>39</sup>Te òré cuánguihu-gá xití vehe, te ní xǎha<sup>n</sup>-gǎ xii-yu:

—¿Ná cuendá ndéé dúcá<sup>n</sup> ïo dusa<sup>n</sup> quide-ndo, te ndàhyú-ndó? Te xíchí-a ñá túú ní xíhí-xi chi dicó xidí-xi —càchí-gá xǎha<sup>n</sup>-gǎ xii-yu.

<sup>40</sup>Te ní sácú ndéé ñáhá-yu xii-gá sá dúcá<sup>n</sup> nǐ cáhá<sup>n</sup>-gá, chi sá cúú-xí mèé-yu chi ní xíhí ndisa xíchí-ǎ<sup>n</sup>. Te òré-á<sup>n</sup> nǐ queñuhu-gá nchaá-yu quehé, te cuánguihu-gá núú cándòdo yiqui cuñú xíchí nǐ xíhí-á<sup>n</sup>. Te ndèca-gá tǎtá xíchí nǐ xíhí-á<sup>n</sup> ndihi ñaná-xi cuánguihu, te tnàhá cue téé únì ndihi-gá-á<sup>n</sup> cuánguihu ndihi-gá. <sup>41</sup>Te ní tñi-gá ndaha xíchí nǐ xíhí-á<sup>n</sup>, te ní xǎha<sup>n</sup>-gǎ:

—Tǎlíta, cúmí —càchí-gá xǎha<sup>n</sup>-gǎ.

Te tnúhu-á<sup>n</sup> quée-xí: Yòhó xíchí cuéchí yùhú càchí-í sá ndácòo-n, duha quèe-xi tnúhu-á<sup>n</sup>.

<sup>42</sup>Te òré-ni-á<sup>n</sup> nǐ ndoto xíchí cuéchí-ǎ<sup>n</sup> nǐ ndacóo-xi ní nacaca cuu-xi, te ndècu-xi úxúú cuíá-xi. Te ío ní cuñúhu nchaa ñáyiú sá dúcá<sup>n</sup> nǐ dándótó ñaha Jesús xii-xi. <sup>43</sup>Te Jèsús ní cáhá<sup>n</sup> víhí-gǎ dóho tǎtá-xi ndihi ñaná-xi sá vǎ yòò ñi<sup>n</sup> cúñàhá-yu sá nǐ dándótó ñaha-gá xii-xi. Te sǎtá dúcá<sup>n</sup> te ní xǎha<sup>n</sup>-gǎ xii-yu sá cuñàhá-yu xii-xi sá cáxí-xí.

### Jèsús ndécú-gǎ ñuú Nazàrét

(Mt. 13:53-58; Lc. 4:16-30)

**6** Te Jèsús ní ndee-gá ñuú núú nǐ dándótó-gǎ xíchí nǐ xíhí-á<sup>n</sup>, te cuánuhú-gá núú cúú ñùu-gá, te tnàhá cue téé xica cuu ndihi-gá

cuánuhú ndihi-gá. <sup>2</sup>Te ndècu Jesús ñuú-gá ní tnahá nduu ndètátú ñáyiú. Te nduu-á<sup>n</sup> cuànguihu-gá xití veñúhu dàcuaha ñaha-gá xíi-yu. Te vài ñáyiú ndèdóho nchaa tnúhu cáhá<sup>n</sup>-gá, te xicuñúhu vihi-yu, te xitnàhá-yu:

—¿Ndèé ní sáhá<sup>n</sup> dácuahá tée-a núu ndéé duha váha cáhá<sup>n</sup>-dé, nása ní quide-dé ñuu ndéé duha ío váha cùtnuní iní-dé, te ndàcu-dé quidé-dé nchaa sá vǎ yóo tnàhí ndàcu cada-i? <sup>3</sup>Te dicó carpintèrú cúú-dě, dicó déhe tá Màriá cúú-dě, te ñaní-dé cúú tě Jàcobó, ndihi té Chèé, ndihi té Jùdás, ndihi té Xímú, te diu-ni cue cúha-dé cúú ñáyiú ndècu ndihi-o ñuu-a —càchí-yu xitnàhá-yu.

Te ñá túú ní cuiní-gá-yu cáhá<sup>n</sup> ndihi váha ñàhá-yu xii-gá. <sup>4</sup>Te Jèsús ní xáha<sup>n</sup>-gǎ xíi-yu:

—Te núu ìi<sup>n</sup> tée cáhá<sup>n</sup> tnúhu Yá Ndiöxí ná nàsáá-dé ñuú-dé dacuàha-dé ñáyiú tnúhu-gá, te nchaa ñáyiú ñuú-dé-á<sup>n</sup>, ndihi nchaa ñáyiú ndècu ndihi-dé vehe-dé, ndihi nchaa ñáyiú cùu ndi mee-dé ñá túú nèhé-yu sá yíñúhu núú-dě, dico cue ñáyiú nchaa dava-gá ñuú chi nèhé-yu sá yíñúhu núú-dě —càchí-gá xǎha<sup>n</sup>-gǎ xíi-yu.

<sup>5</sup>Te ñá túú ní quide tátna Jèsús vài ñáyiú cuendá sá ñà túú ní sàndáá iní ñàhá-yu xii-gá, dico ní quide tátna-gá ìi<sup>n</sup> úú ñáyiú cùhú ní sàndáá iní ñàhá xii-gá. Te ní tendaha ñàha-ni-gá xíi-yu te ní ndúha-yu. <sup>6</sup>Te ío ní cuñúhu-gá sá dúcá<sup>n</sup> ñà túú ní cuiní-yu quindáá iní ñàhá-yu xii-gá. Te sátá dúcá<sup>n</sup> te ní xica-gá cuáhá<sup>n</sup>-gá nchaa dava-gá ñuú líhli càa yatní xía<sup>n</sup> cuendá dacuàha-gá ñáyiú tnúhu-gá.

**Jèsús táuchiu<sup>n</sup>-gá quíhí<sup>n</sup> cue tée xica cuu ndihi-gá cáhá<sup>n</sup>-güedé tnúhu Yá Ndiöxí núú ñáyiú**

(Mt. 10:5-15; Lc. 9:1-6)

<sup>7</sup>Te Jèsús ní cana-gá ndi ùxúú cue tée xica cuu ndihi-gá, te ní sáñaha-gǎ xii-güedé tnúhu ndee ìní cundecu ndihi-güedé cuendá queñuhu-güedé nchaa espíritú cündìhi yucu ñávàha yìhi ñaha xii ñáyiú. Te ní xáha<sup>n</sup>-gǎ xii-güedé sá ndi ndúú ndi ndúú-güedé quíhí<sup>n</sup>-güedé cáhá<sup>n</sup>-güedé tnúhu Yá Ndiöxí núú ñáyiú. <sup>8-9</sup>Te cùmání-gǎ caca-güedé quíhí<sup>n</sup>-güedé, te ní xáha<sup>n</sup>-gǎ xii-güedé:

—Vá cánèhe-ndo ñunu cuhu<sup>n</sup> ndachiu<sup>n</sup>-ndo, te ni vǎ cánèhe-ndo sá caxí-ndó, te ni vǎ cánèhe-ndo díhú<sup>n</sup>, chi ìi<sup>n</sup> caa-ni tàtnu canehe-ndo, te chàú yíhí-ní-ndó-á<sup>n</sup> xíá<sup>n</sup>-ni quíhi-ndo, te vǎ cánèhe-gá-ndó ìngá ichi dóó-ndó chi diu-ni dóó níhnú-ndó-á<sup>n</sup> xíá<sup>n</sup> tnàhí-ni cuihnu-ndo te ñá túú tnàhí-gá ná canehe-ndo —càchí-gá xǎha<sup>n</sup>-gǎ xii-güedé.

<sup>10</sup>Te xǎha<sup>n</sup> tùcu-gá:

—Te òré ná sàá-ndó ìi<sup>n</sup> ñuú, te ió ñáyiú cáhá<sup>n</sup> ñàhá-yu xii-ndo vèhé-yu, te xía<sup>n</sup>-ni cundecu-ndo ndèé ná sàá nduu ndèe-ndo ñuú-á<sup>n</sup>.

<sup>11</sup>Te núu ió dava ñuú ñá túú cuiní-yu cáhá<sup>n</sup> ndihi ñaha vǎha-yu xii-ndo, te ni ñà túú cuiní-yu cundedóho-yu tnúhu cáhá<sup>n</sup>-ndó, te ndee-ni-ndo ñuú-á<sup>n</sup> te naquidi-ndo tìcáchúhmá ní tníi sáhá-ndó cuendá ná cùtnuní iní-yu sá ñà túú quide váha-yu. Te na càchí tnúhu ndáá-í xii-ndo sǎ ná sàá nduu càda ndáá Yá Ndiöxí cuéchi nchaa ñáyiú, te cue

ñáyiú duca<sup>n</sup> na càda ñaha xii-ndo-á<sup>n</sup> ïo-gá ndohó-yu dàvá-á<sup>n</sup> dàcúúxí dàtná ndoho cue ñáyiú ñuú Sòdomá ndìhi cue ñáyiú ñuú Gòmorra — càchí-gá xáha<sup>n</sup>-gá xii-güedé.

<sup>12</sup>Te cue tée-á<sup>n</sup> ñí xica-güedé cuáhá<sup>n</sup>-güedé te ní ngüíta-güedé dácuaàha-güedé cue ñáyiú tnúhu Yá Ndiòxí, te xáha<sup>n</sup>-güedé xií-yu:

—Chí dándixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha ndècu-ndo. —càchí-güedé xáha<sup>n</sup>-güedé xií-yu.

<sup>13</sup>Te vài espíritú cündìhi yucu ñáváha yìhi ñaha xii ñáyiú ta queñuhu-güedé yiqui cùñú-yu cuáhá<sup>n</sup>, te vài tucu ñáyiú cùhú tá quide tátna-güedé cuáhá<sup>n</sup> chíhí ñàha-güedé acítí xií-yu te ndúha-yu.

**Nàcuáa ní cuu ní xihí té Juàá tée dácuaandute ñaha xii ñáyiú**

(Mt. 14:1-12; Lc. 9:7-9)

<sup>14</sup>Te nchaa xichi ní níhí ñáyiú tnúhu nchaa nàcuáa quide Jesús, te tnàhá té Hèrodés tée yìndaha ñaha xii ñáyiú ní níhí-dě tnúhu nchaa nàcuáa quide-gá, te ní cachí-dé:

—Té Juàá tée ní xóo dacuaandute ñaha xii ñáyiú ní ndoto núu dàcá<sup>n</sup> ndácú-dě quidé-dě nchaa sá vǎ yǒo tnàhí ndàcu cada —duha ní cachí-dé.

<sup>15</sup>Te dava ñáyiú càchí-yu sá tǎ Èliás tée ní xóo cáhá<sup>n</sup> tnúhu Yá Ndiòxí ndéé sanaha ní nasáá-dé.

Te davá-yu càchí-yu sá cúú-gǎ dàtná ñí tée ní xóo cáhá<sup>n</sup> tnúhu Yá Ndiòxí ndéé sanaha. <sup>16</sup>Te té Hèrodés ní níhí-dě tnúhu nchaa nàcuáa càhá<sup>n</sup>-yu, te ní cachí-dé:

—Diu té Juàá tée ní táúchú<sup>n</sup>-í ní xehndé-güedé díquí-xi ní ndoto —càchí-dé.

<sup>17-18</sup>Te duha ní cuu cúnàhá ní sahní té Hèrodés té Juàá, chi dàvá-á<sup>n</sup> ñí naquehe<sup>n</sup> té Hèrodés-á<sup>n</sup> ñí ñaha nàni Herodiás ndécá-dě, te ñaha-á<sup>n</sup> sà ní cándeca ñaha ñàní-dé té Lìpé. Te té Juàá ní xáha<sup>n</sup>-dě xii té Hèrodés sá ñà túú ní quide váha-dé sá dúcá<sup>n</sup> ñí naquehe<sup>n</sup>-dé ñaha ní cándeca ñàní-dé, núu sá cuendá ñaha-á<sup>n</sup> ñí táúchú<sup>n</sup> tǎ Hèrodés ní tñii-güedé té Juàá ní chihi ñaha-güedé vecaá, te ní dácútú ñàha-güedé xii-dé, te duca<sup>n</sup> ñí quide-dé cuendá sá ndécá ñàha-dé xii-a<sup>n</sup>.

<sup>19</sup>Te ñaha nàni Herodiás ndécá tǎ Hèrodés-á<sup>n</sup> ño ní cuu úhú iní-a<sup>n</sup> té Juàá, te ní cuiní-a<sup>n</sup> cahni-a<sup>n</sup>-dé, dico ñà túú ní níhí-a<sup>n</sup> nàcuáa cada-a<sup>n</sup>. <sup>20</sup>Te mee tǎ Hèrodés chi ní cutnùní ndáá iní-dé sá tǎ Juàá cúú-dě ñí tée quide mee-ni sá vǎha, te quide ndáá-dé núu Yǎ Ndiòxí, te ní xóo yùhú ñáhá-dě nùu xǎá<sup>n</sup> ñà túú ní dàña-dé ná cada ñaha ñàha ndeca-dé-á<sup>n</sup> xii té Juàá. Te té Hèrodés-á<sup>n</sup> ño ní cudíí iní-dé ní xíndedóho-dé nchaa tnúhu ní xáha<sup>n</sup> tǎ Juàá xii-dé, dico ñà túú ní sàni iní-dé duu<sup>n</sup> duu<sup>n</sup> tñii-dé tnúhu-á<sup>n</sup>. <sup>21</sup>Te ñí nduu ní xóo vico vehe té Hèrodés ní quide càhnu-dé nduu ñí cacu-dé. Te nduu-á<sup>n</sup> ñí níhí ñaha nàni Herodiás-á<sup>n</sup> nàcuáa cada-a<sup>n</sup> cuendá cuú té Juàá. Te nduu-á<sup>n</sup> ní cáhá<sup>n</sup> té Hèrodés nchaa cue tée cùchiu<sup>n</sup>, ndìhi nchaa cue tée tàxi tñuní ñáhá xii cue sandadú, ndìhi nchaa cue tée cuica ndècu distritú Galileá cuendá cudini ndìhi ñaha-dé xii-güedé nduu-á<sup>n</sup>. <sup>22</sup>Te ndècu ñí déhe yoco ñàha nani Herodiás-á<sup>n</sup>, te xíchí-á<sup>n</sup> ñí quíhu-xi

vehe núú cúú vico-á<sup>n</sup> nǐ xita saha-xi mèi oré yǐhí tǎ Hèrodés mèsa ndihì nchaa cue téé ní cáhá<sup>n</sup>-dé, te ío ní cudíí iní-dé ndihì nchaa cue téé-á<sup>n</sup> nàcuáa ní xita xíchí-ǎ<sup>n</sup>. Te té Hèrodés ní xáha<sup>n</sup>-dě xii-xi:

—Cáca<sup>n</sup> núù-í núu ná cuiní-n te taxi-í —càchí-dé xǎha<sup>n</sup>-dě xii-xi.

<sup>23</sup>Te ní cacunehe-dé ndéé Yǎ Ndiǒxí nàcuáa cutnùní iní xíchí-ǎ<sup>n</sup> sǎ ndàá cuǎñaha-dě núu ná cúú sǎ ná càcá<sup>n</sup>-xi núú-dě cuéi ndéé cuádava nchaa sá ndécú ndihì-dé, te núu na càcá<sup>n</sup>-xi. <sup>24</sup>Te sá dúcá<sup>n</sup> nǐ xáha<sup>n</sup>-dě xii-xi núu ní quee-xi quehè ní xáha<sup>n</sup>-xi xii náná-xi:

—Nǎá, ǐná cúú sǎ càcá<sup>n</sup>-í núú tǎ Hèrodés? —càchí-xi xǎha<sup>n</sup>-xi xii-a<sup>n</sup>.

Te nǎná-xi-á<sup>n</sup> nǐ xáha<sup>n</sup>-a<sup>n</sup> xii-xi:

—Cuáhá<sup>n</sup> cáca<sup>n</sup>-n dǐquí tǎ Juáá téé dàcuandute ñaha xii ñáyiú —càchí-a<sup>n</sup> xǎha<sup>n</sup>-a<sup>n</sup>.

<sup>25</sup>Te ndǐhi-ni cuándihu xíchí-ǎ<sup>n</sup> xití vehe núú yǐhí tǎ Hèrodés-á<sup>n</sup>, te xǎha<sup>n</sup>-xi xii-dé:

—Cuiní-í sá mèi nduu vitna quehndé-n dǐquí tǎ Juáá téé dàcuandute ñaha xii ñáyiú te taxi-n, dico na cùhu<sup>n</sup> ì<sup>n</sup> xití cóhó taxi-n —càchí-xi xǎha<sup>n</sup>-xi xii-dé.

<sup>26</sup>Te té Hèrodés ní nguíta-dé ndihú vǐhí iní-dé sá dúcá<sup>n</sup> nǐ xáha<sup>n</sup>-xi xii-dé, dico ñá túú ní cùyii-dé cùñaha-dě xii-xi sá vǎ cúú cuǎñaha-dě sá xicá<sup>n</sup>-xi, chi cuèndá sá núú nchaa ñáyiú ní xáha<sup>n</sup>-dě sá cúú cuǎñaha-dě núu ná cúú sǎ ná càcá<sup>n</sup>-xi, te ní cacunehe-dé ndéé Yǎ Ndiǒxí nàcuáa cutnùní iní-xi sá ndàá cuǎñaha-dě sá ná càcá<sup>n</sup>-xi núú-dě. <sup>27</sup>Te té Hèrodés-á<sup>n</sup> ndǐhi-ni ní xáha<sup>n</sup>-dě xii ì<sup>n</sup> sandàdú sá quǐh<sup>m</sup>-dé quehndé-dé dǐquí tǎ

Juáá. <sup>28</sup>Te sandàdú-á<sup>n</sup> nǐ xica-dé cuáhá<sup>n</sup>-dé vecaá núú yǐhí tǎ Juáá-á<sup>n</sup>, te ní quexio-dé te ní xehndé-ni-dé dǐquí tǎ Juáá, te ní chihi-dé ì<sup>n</sup> xití cóhó te nèhe-dé cuánuhú ní sáha-dé xíchí xicá<sup>n</sup>-á<sup>n</sup>, te xíchí-ǎ<sup>n</sup> nǐ nacuáha-xi nǎná-xi. <sup>29</sup>Te òré ní níhí nchaa cue téé ní xica cuu ndihì ndíi Juáá-á<sup>n</sup> tnúhu sá dúcá<sup>n</sup> nǐ sahani ñaha-güedě xii ndíi, te ní sáhá<sup>n</sup>-güedé ní ndocani-güedé yiquí cùñú ndíi te ní chindúxi-güedé.

**Jèsús dácaxi-gá úhú<sup>n</sup> mǐl cue téé te dǐí<sup>n</sup> ñáyiú dǐhí ndihì landú**

(Mt. 14:13-21; Lc. 9:10-17; Jn. 6:1-14)

<sup>30</sup>Te nchaa cue téé ní táuchíú<sup>n</sup> Jèsús cuáhá<sup>n</sup> cáhá<sup>n</sup> tnúhu Yǎ Ndiǒxí núú ñáyiú ní ndexìo-güedé núú-gǎ te ní nguíta-güedé nácàni tnúhu-güedé nchaa nàcuáa ní quide-güedé ndihì nchaa nàcuáa ní dánèhé ñáhá-güedé xií-yu. <sup>31</sup>Te Jèsús ní xáha<sup>n</sup>-gǎ xii-güedé:

—Chí nèhé ná quǐh<sup>m</sup>-ó ì<sup>n</sup> xichi núú ñà túú ñáyiú ndetatú-ó —càchí-gá xǎha<sup>n</sup>-gǎ xii-güedé.

Te duca<sup>n</sup> nǐ xáha<sup>n</sup>-gǎ xii-güedé, chi ío cuéhé ñáyiú cuáhá<sup>n</sup> véxi-yu cùú-yu núú ndécú-gǎ. Te ni ñá nihí-gá nása cada-gá caxi-gá ndihì cue téé xica cuu ndihì-gá. <sup>32</sup>Te Jèsús cuánguee-gá bàrcú ndihì mee-ni cuè téé ní táuchíú<sup>n</sup>-gǎ cáhá<sup>n</sup> tnúhu-gá, te cuáhá<sup>n</sup>-gá ndihì-güedé ì<sup>n</sup> xichi núú ñà túú ñáyiú ndècu.

<sup>33</sup>Dico vǎi ñáyiú ní cutnùní iní-yu sá díú-gǎ núhú bàrcú-á<sup>n</sup> cuáhá<sup>n</sup> ndihì cue téé xica cuu ndihì-gá, te nchaa ñuú cáá yàtni xía<sup>n</sup> nǐ quee ñáyiú xixinú-yu cuáhá<sup>n</sup> núú nǐ quidé-yu cuèndá quexìo Jèsús, te sa ndécú-yu xía<sup>n</sup> nǐ quexìo-gá. <sup>34</sup>Te

òré ní quene Jèsús xití bàrcú, te ní xiní-gá cuéhé víhí ñàyiú xíxúcu núú ní quexìo-gá-á<sup>n</sup>, te ní cundàhú iní ñáhá-gǎ xíi-yu chi ndécú-yu dàtná xíndecu cue mbéé cue quiti ñá túú tòli-xi, te ío vài núú sǎ ní ngúfta-gá ní dácúáhá ñàha-gá xíi-yu. <sup>35</sup>Te sátá tá cuàa cuáhá<sup>n</sup> te ní sáhá<sup>n</sup> cue téé xìca cuu ndìhi Jesús núú-gǎ, te xǎha<sup>n</sup>-güedě xii-gá:

—Sa ní cuaa te ñá túú ñàyiú ndècu yatni iha. <sup>36</sup>Váha-gá dandàca nchaa ñàyiú-a chi na quíhí<sup>n</sup>-yu nchaa vehe càa xití yucu-a, ndìhi nchaa ñúú cáa nchàa yatni iha cuaa<sup>n</sup>-yu sá cǎxí-yu —càchí-güedě xǎha<sup>n</sup>-güedě xii-gá.

<sup>37</sup>Te Jèsús ní xǎha<sup>n</sup>-gǎ:

—Mee-ndo chí cuǎñaha sǎ ná cǎxí-yu —càchí-gá xǎha<sup>n</sup>-gǎ xii-güedě.

Te xǎha<sup>n</sup>-güedě xii-gá:

—¿Te nása cada-ndí, chi xìni ñuhu-xi datná úú cièndú díhú<sup>n</sup> denàriú cuendá cuaa<sup>n</sup>-ndí sá cǎxí-yu? —càchí-güedě xǎha<sup>n</sup>-güedě xii-gá.

<sup>38</sup>Te Jèsús ní xǎha<sup>n</sup>-gǎ xii-güedě:

—Chí cuáhá<sup>n</sup> cundehe-ndo ñúú ná daha pàa ndécú ndìhi-ndo te cachí tñúhu-ndo —càchí-gá xǎha<sup>n</sup>-gǎ xii-güedě.

Te ní sáhá<sup>n</sup> ndéhé-güedě ñúú ná daha pàa ndécú, te ní xǎha<sup>n</sup>-güedě xii-gá:

—Úhú<sup>n</sup> duha-ná pàa ndìhi úú-nǎ chácá ndécú —càchí-güedě xǎha<sup>n</sup>-güedě xii-gá.

<sup>39</sup>Te Jèsús ní xǎha<sup>n</sup>-gǎ xii nchaa ñàyiú sá ná ñihí tnáhá-yu cuu titní xichí-yu, te ngóo-yu nchaa núú cǎhú cuíí càa xíá<sup>n</sup>. <sup>40</sup>Te nchaá-yu ní ngóo-yu, te dava xichí-yu ní

ngóo ìi<sup>n</sup> cièndú-yu, te dava xichí-yu ní ngóo údico úxí-yu. <sup>41</sup>Te sátá ñí ndihí-yu ní ngóo, te ní quehe<sup>n</sup> Jèsús ndi ùhú<sup>n</sup> pàa ndi úú chácá-ǎ<sup>n</sup>, te ní ndacoto-gá andiú te ní ndacá<sup>n</sup> táhú-gǎ núú Yǎ Ndiòxí, te dàtnùni ní táhú cuèchi-gá pàa-á<sup>n</sup> te ní sǎñaha-gǎ xii cue téé xìca cuu ndìhi-gá ní dácǎhñu-güedé nchaa ñàyiú-á<sup>n</sup> ñí xexí-yu. Te ñiú-ni duca<sup>n</sup> ñí quide tucu-gá úú chácá-ǎ<sup>n</sup>. <sup>42</sup>Te nchaá-yu ní xexí-yu ní ndahá xití-yu. <sup>43</sup>Te sátá ñí túhú cóhó-yu te ní nadatàcá-güedé nchaa sá ñí quendóo, te ní chítú ùxúú tnáhá tídihi mee-ni sǎ ñí quendóo núú ùhú<sup>n</sup>-ni pàa, ndìhi núú ùú-ni chácá. <sup>44</sup>Te nchaa ñàyiú ní xexi-á<sup>n</sup> chi xínu úhú<sup>n</sup> mǐl mee-ni cuè téé chí ñiú-ni cue téé-á<sup>n</sup> ñí quíúndehu, te ñií<sup>n</sup> ñàyiú ñihí ndìhi cue landú.

### Jèsús xícá-gǎ núú ndute

(Mt. 14:22-27; Jn. 6:16-21)

<sup>45</sup>Te òré-ni-á<sup>n</sup> ñí xǎha<sup>n</sup> Jèsús xii cue téé xìca cuu ndìhi-gá sá quèe-güedé bàrcú codonùu-güedé quíhí<sup>n</sup>-güedé ìi<sup>n</sup> ñúú nání Bètsaidá cáa ndàa ingá xio yuhu làgúná núú ndécú-güedě-á<sup>n</sup>, te mee-gǎ quendóo-gá cada ndee ìni tnáhá-gǎ ndìhi cue ñàyiú. <sup>46</sup>Te sátá ñí yáha ní quide ndee ìni tnáhá-gǎ ndihí-yu, te ní xica-gá cuáhá<sup>n</sup>-gǎ ìi<sup>n</sup> tìndúú cáa yàtni xíá<sup>n</sup> cuendá cáhá<sup>n</sup> ndìhi-gá Yǎ Ndiòxí. <sup>47</sup>Te òré sa ní cundíqui<sup>n</sup> te bàrcú sá ñíhú cuè téé xìca cuu ndìhi-gá sa cuáhá<sup>n</sup>-xi ndéé cuádava xití làgúná-á<sup>n</sup>, te mee-gǎ ndécú-gǎ ìi<sup>n</sup> núú tìndúú. <sup>48</sup>Te túú ndèhe-gá sá sùúni ndòho-güedé tá dàcaca-güedé bàrcú-á<sup>n</sup> cuáhá<sup>n</sup>, chi cuendá ndàa nacúáa cuáhá<sup>n</sup>-xi-á<sup>n</sup>

duha véxi táchí te nàtúndaha-xi. Te ingá nduu-ǎ<sup>n</sup> tàcuíhndá-gá sa ní cuyatni víi-nǎ Jèsús bàrcú ñúhú-güedě-á<sup>n</sup>, dico núu ndute tá xica-gá cuáhá<sup>n</sup> te luha-ná te yáha ñaha-gǎ xii-güedé ní cùu. <sup>49-50</sup>Te òré ní xiní ñáhá cuè téé ñùhu bàrcú-á<sup>n</sup> xii-gá te ní yùhú-güedé ní cana saa-güedé, chi ní sani iní-güedé sá ì<sup>n</sup> almá cúu-gǎ. Te ní xáha<sup>n</sup>-gǎ xii-güedé:

—iÑíí cunduu-ndo, vá yùhú-ndó, chi yùhú cúu-í! —càchí-gá xáha<sup>n</sup>-gǎ xii-güedé.

<sup>51</sup>Te Jèsús cuánguee-gá xití bàrcú ñúhú-güedě-á<sup>n</sup>, te sátá cuánguee-gá te òré-ni ní ngüíñí táchí, te ní cuñúhu vèhi-güedé. <sup>52</sup>Te duca<sup>n</sup> chi cue téé-á<sup>n</sup> ñà túú ní cùtnuní iní-güedé nása quide-gá, chi ñá túú ní cùtnuní váha iní-güedé nàcuáa ndùu sá ní quide-gá òré ní nadacàyá-gá pàá, chi ío nií dǐquí-güedě.

### Jèsús quidé tǎtna-gá ñáyiu cùhú ñúu Genesàrét

(Mt. 14:34-36)

<sup>53</sup>Te ní yáha-güedé ndìhi-gá ndàa ingá xio yuhu làgúná, te ní sáa-güedé ndìhi-gá yucu cue téé ñúu Genesàrét. Te yàcá<sup>n</sup> ní dácútú ndèè-güedé bàrcú-güedé yuhu làgúná. <sup>54</sup>Te òré ní quene Jèsús ndìhi cue téé xica cuu ndìhi-gá xití bàrcú, te nchaa ñáyiu xíndecu-á<sup>n</sup> ní cùtnuní iní-yu sá díú-gǎ. <sup>55</sup>Te ñáyiu-á<sup>n</sup> ndìhi-ni ní sáhá<sup>n</sup>-yu nchaa núu xíndecu cue ñáyiu cùhú, te cue ñáyiu cùhú-á<sup>n</sup> ní quée-yu xító nchìdo ñáhá-yu cuáhá<sup>n</sup> ndí tnahá ì<sup>n</sup> ì<sup>n</sup> xichi núu nihí-yu tnúhu quèxio Jesús. <sup>56</sup>Te nchaa ñúu nánú ndìhi

nchaa ñúu líhli núu cuáhá<sup>n</sup> Jèsús, duca<sup>n</sup> xíndecá-yu nchaa ñáyiu cùhú cuáhá<sup>n</sup> xití ñúu sàcá<sup>n</sup> ñáhá-yu núu-gǎ cuendá cada tǎtna ñaha-gǎ xíí-yu. Te òu-ni duca<sup>n</sup> xíquidé-yu nchaa dava-gá xichi núu cuáhá<sup>n</sup>-gá núu xíndecu cue ñáyiu, te càhá<sup>n</sup> ndàhú-yu núu-gǎ sá ná dǎñá-gǎ tnándeé cue ñáyiu cùhú-á<sup>n</sup> cuèdìcò luha yuhu dǒó-gǎ cuendá ndúha-yu. Te nchaa ñáyiu cùhú ní tnándeé yuhu dǒó-gǎ ní ndúha-yu.

### Cuendá nchaa sá quidé-xí ngúndecu cuéchi ñáyiu

(Mt. 15:1-20)

**7** Te ñúu Jerusalén ní quee cue téé dàcuaha ñaha xii ñáyiu nchaa tnúhu ní chídó tnùní ndíi Moisés, te ní quexìo-güedé núu ndécú Jèsús, te tnàhá cue téé cùu fariséu ní quexìo ndìhi-güedé. <sup>2</sup>Te cue téé-á<sup>n</sup> ní xiní-güedé sá dǎva cue téé xica cuu ndìhi Jesús ñá túú ndàha-güedé dàtná ndáhá mée cue téé cùu fariséu-á<sup>n</sup> òré caxi-güedé. Te xíá<sup>n</sup> ñúu cue téé ní quexìo-á<sup>n</sup> ní cáhá<sup>n</sup> cuèhé-güedé cuendá cue téé xica cuu ndìhi-gá. <sup>3</sup>Te duca<sup>n</sup> chi nchaa cue téé cùu fariséu-á<sup>n</sup> ndìhi nchaa ñáyiu isràèl nchìcú<sup>n</sup> nihnú-yu quidé-yu dàtná ní xóo cada nchaa cue ñaní tnáhá-yu ní xíndecu ndéé sanaha, chi nchaa ñáyiu-á<sup>n</sup> vá cǎxí-yu te núu vá ndáhá-yu dàtná ní xóo ndaha nchàa cue ñaní tnáhá-yu ní xíndecu ndéé sanaha-á<sup>n</sup>. <sup>4</sup>Te ñáyiu-á<sup>n</sup> ndi tnahá òré cuáhá<sup>n</sup>-yu núu yǎhu te nàsáa-yu, te ndàhá-yu nàcuáa sàni iní-yu ndùvétú iní Yǎ Ndiòxí, te núu vá dúcá<sup>n</sup> càdá-yu te vá cǎxí-yu. Te tnàhá náquètè-yu vàsú sá sácúhu<sup>n</sup> sá xíhí-yu, ndìhi

lïtu, ndihi cóhó càá, ndihi càamá.  
 Te nchaa xéhé náqueté-yu nàcuáa  
 sàni iní-yu ndùvétú iní Yă Ndiöxí.  
 Te ío-gá títńí sá nǐ xóo cada nchaa  
 ñáyiú ní xíndecu ndéé sanaha-ă<sup>n</sup>  
 nchícú<sup>n</sup> nihnú-yu quidé-yu. <sup>5</sup>Te  
 cue tée cùu fariséú-á<sup>n</sup>, ndihi cue  
 tée dàcuaha ñaha xii ñáyiú nchaa  
 tnúhu ní chídó tnùnǐ ndíi Moisés-á<sup>n</sup>  
 nǐ xáha<sup>n</sup>-güedě xii Jèsús:

—¿Ná cuendá cue tée xica cuu  
 ndihi-n ñá túú nàquete-güedé  
 ndaha-güedé òré caxi-güedé dàtná  
 ní cachí nchaa cue tée ní xíndecu  
 ndéé sanaha-i? —càchí-güedé  
 xáha<sup>n</sup>-güedě xii-gá.

<sup>6</sup>Te Jèsús ní xáha<sup>n</sup>-gă xii-güedé:  
 —Nchòhó cúú-ndó cuè tée ío  
 dândahú méé-xí chi càchí-ndó  
 sǎ ío quide ndáá-ndó te ñá ndàá  
 sá quidé ndáá-ndó. Te ní quee  
 ndáá-xi nàcuáa ní chídó tnùnǐ ndíi  
 Chàíá tée ní xóo cáhá<sup>n</sup> tnúhu Yă  
 Ndiöxí ndéé sanaha nǔú tütú-gá  
 núú càhá<sup>n</sup>-xi nàcuáa ní cáhá<sup>n</sup>-gá  
 cuendá-ndó, te duha ní cachí-gá:

Ñáyiú-a càchí-yu sá ío càhnu  
 cuu-í, dico dicò-ni yuhu  
 càhá<sup>n</sup>-yu,  
 chi ñá túú ñùhu iní ñáhă-yu  
 xii-í.

<sup>7</sup>Te áú<sup>n</sup> nă cuu chĩñuhu ñahá-yu  
 xii-í, chi ñá túú vèdana ndèè  
 nándĩhi-xi,  
 chi cue ñáyiú-a dàcuahá-yu  
 cue tnàha ñáyiú-yu nàcuáa  
 cundecú-yu, dico mee-ni  
 tnúhu sá ní cahu iní cue  
 ñáyiú ñuyíú-a càhá<sup>n</sup>-yu.

Duha ní chídó tnùnǐ ndíi Chàíá  
 núú tütú Yă Ndiöxí nàcuáa ní  
 cáhá<sup>n</sup>-gá cuendá-ndó. <sup>8</sup>Te nchòhó ní  
 dàñá-ndó nàcuáa ní cachí Yă Ndiöxí

cada-ndo, te nchícú<sup>n</sup> nihnu-ndo  
 quide-ndo nàcuáa ní cahu iní cue  
 ñáyiú ñuyíú-a, chi nàquete-ni-ndo  
 lítu, te nàquete-ni-ndo vasú  
 sácúhu<sup>n</sup> sá xíhí-ndó nàtava-ndo  
 nàcuáa ní xóo cada ñáyiú-á<sup>n</sup> nǐ xóo  
 naqueté-yu nchaa xǎă<sup>n</sup>, te nándi-gá  
 nchaa núú sǎ quidé-ndó —càchí  
 Jèsús xáha<sup>n</sup>-gă xii-güedé.

<sup>9</sup>Te ní xáha<sup>n</sup> tùcu-gá xii-güedé:  
 —Te nchòhó, ñá túú cuiní-ndó  
 càda-ndo nàcuáa cuiní Yă Ndiöxí,  
 chi mee-ni nàcuáa ní cachí cue tée  
 ní xíndecu ndéé sanaha nchícú<sup>n</sup>  
 nihnu-ndo quide-ndo. <sup>10</sup>Te ndíi  
 Moisés ní cachí ndíi sá ncháá  
 ñáyiú canehé-yu sá yĩñuhu núú  
 tătă-yu ndihi núú nănă-yu. Te  
 nchaa ñáyiú na càhá<sup>n</sup> úhú cuendá  
 tătă-yu àdi cuendá nănă-yu te  
 cahni ñaha-güedě xii-yu ní cachí  
 ndíi. <sup>11</sup>Te nchòhó càchí-ndó  
 sǎ nǔú ií<sup>n</sup> tée na cǔñaha-dě xii  
 tătă-dě ndihi nănă-dě sá sǎ nǐ  
 sani iní-dé cuañaha-dě xii-yu  
 cùu-xi Corbán, te ñá túú-gă xíní  
 ñùhu-xi sá cuañaha-dě xii-yu, te  
 tnúhu Còrbán-á<sup>n</sup> queé-xí: Sá cúú  
 cuendá Yă Ndiöxí. <sup>12</sup>Te sá dúcá<sup>n</sup>  
 ná càhá<sup>n</sup> ií<sup>n</sup> tée-á<sup>n</sup> te nchòhó  
 chíndèe tnúhu-ndo-dě cuendá sá  
 vǎ chíndèe-gá-dé tătă-dě ndihi  
 nănă-dě. <sup>13</sup>Te duca<sup>n</sup> quide-ndo  
 chi ní dáquéé tĩhú-ndó nàcuáa  
 ní cachí Yă Ndiöxí cada-ndo, te  
 mee-ni nàcuáa ta quide cue tée  
 ñuyíú-a véxi nchícú<sup>n</sup> nihnu-ndo  
 quide-ndo, te ðiú-ni duca<sup>n</sup> ta sànu  
 ichi tnaha-ndo véxi, te nándi-gá  
 nchaa sá cáhú ìní-ndó quide-ndo —  
 cachí-gá xáha<sup>n</sup>-gă xii-güedé.

<sup>14</sup>Te Jèsús ní xáha<sup>n</sup> tùcu-gá xii  
 cue ñáyiú xíndecu-á<sup>n</sup>:



—Chí táquixi ndehe iha, te cundedóho váha-ndo tnúhu na càhá<sup>n</sup>-í-a te ío váha cuáha-ndo cuendá. <sup>15</sup>Nchaa sá xéxí-ndó chi ñá túú nã quidé-xí ìní-ndó, dico nchaa sá cuèhé sá dúhá sàni ìní-ndó quide-ndo, nchaa xíá<sup>n</sup> quidé-xí ndècu cuéchi-ndo. <sup>16</sup>Te nchaa nchòhó ñáyiú ndédóho nchaa tnúhu càhá<sup>n</sup>-í-a ío váha chí cuáha cuendá —càchí-gá xáha<sup>n</sup>-gã xíi-yu.

<sup>17</sup>Te Jèsús ní dándöo-gá nchaa ñáyiú núú xixúcu-yu-á<sup>n</sup> te cuándihu-gá xití vehe. Te cue téé xica cuu ndihi-gá ní xicá<sup>n</sup> tnúhú-güedë núú-gã nüu nása quèe-xi cuendú ní cani-gá núú ñáyiú-á<sup>n</sup>. <sup>18</sup>Te ní xáha<sup>n</sup>-gã xii-güedé:

—¿Te náa tnàhá nchòhó ñá túú ní təcú tnùní-ndó cuendú ní cani-í núú ñáyiú-á<sup>n</sup>? Nchaa sá xéxí-yu cuánguee xití-yu ñá túú quide-xi ìní-yu nàcuáa ngúndecu cuéchi-yu. <sup>19</sup>Chi ñá díú ìní-yu cuánguee-xi chi cuánguee ndáá-xi xití-yu, te nàyáha ñaha-xi xíi-yu —càchí-gá xáha<sup>n</sup>-gã xii-güedé.

Te sá dúcá<sup>n</sup> nã cáhá<sup>n</sup>-gá te ní dátúu-gá sá cúú càxi-o nchaa núú sã cúú càxi-o. <sup>20</sup>Te ní xáha<sup>n</sup> tùcu-gá xii-güedé:

—Nchaa sá cuèhé sá dúhá quide ñáyiú xíá<sup>n</sup> cáciu ñihnu-xi ìní-yu, te nchaa xíá<sup>n</sup> quidé-xí ndècu cuéchi-yu. <sup>21</sup>Te ìní-yu-á<sup>n</sup> cáciu ñihnu nchaa sá cuèhé sá dúhá, chi sàni cuehé sání dùha ìní-yu. Te cue téé càhá<sup>n</sup> ndihi-güedé ñadìhí te ñá díú ñadìhí-güedé cúú-yu, te diu-ni duca<sup>n</sup> quide cue ñáyiú dèhí càhá<sup>n</sup> ndihi-yu téé te ñá díú yìi-yu cùu-güedé. Te sàhní-yu cue tnàha ñáyiú-yu, te mee-ni ichi díí

ìní cúdíí ìní-yu cundecú-yu. <sup>22</sup>Te dùhu ndachiu<sup>n</sup> tnahá-yu, te xihó-yu cundecu ndihí-yu sá ndécú ndihi tnaha ñáyiú-yu, te ío quide úhú ìní-yu sá cúú-xí tnàha ñáyiú-yu, te ío dándahú tnáhã-yu, te mee-ni nchàa sá cuèhé sá dúhá cùdíí ìní-yu quidé-yu, te ío cuédú ìní-yu, te ío yití yùhú-yu, te ío quide cahnú-yu mée-yu, te quidé-yu nándi-gá sá ñá túú tàù-yu cadá-yu. <sup>23</sup>Te nchaa sá cuèhé sá dúhá-ã<sup>n</sup> cáciu ñihnu-xi ìní-yu, te nchaa xíá<sup>n</sup> quidé-xí ndècu cuéchi-yu, te ñá túú cùu-xi sá váha sá cúú-xí ìní-yu.

**Ìí<sup>n</sup> ñadìhí véxi ñuú xicá nã sándáá  
ìní-a<sup>n</sup> Jèsús  
(Mt. 15:21-28)**

<sup>24</sup>Te ní xica Jèsús cuáhá<sup>n</sup>-gá ndée yucu cue téé ñuú Tirú, ndihi yucu cue téé ñuú Sidón. Te òré ní quexìo-gá xíá<sup>n</sup> te cuánguihu-gá ìí<sup>n</sup> vehe te xíá<sup>n</sup> cundecu-gá, te cuìní-gá sá vã quìní ñáyiú sá xíá<sup>n</sup> ndécú-gã ní cùu, dico dai ní ñihí-yu tnúhu. <sup>25</sup>Te ìí<sup>n</sup> ñadìhí ndécú ìí<sup>n</sup> déhe yoco-a<sup>n</sup>, te yìhi ñaha espíritú cùndìhi yucu ñávãha xii-xi, te ñaha-á<sup>n</sup> ío ndèhi ní ñihí-a<sup>n</sup> tnúhu sá nã quexìo Jesús xíá<sup>n</sup> nüu ní sáhá<sup>n</sup>-a<sup>n</sup> núú ndécú-gã, te ní ngüíñí xití-á<sup>n</sup> núú-gã. <sup>26</sup>Te ní ngüíta-a<sup>n</sup> càhá<sup>n</sup> ndàhú-a<sup>n</sup> núú-gã, te xáha<sup>n</sup>-a<sup>n</sup> sã nüu vá cùndèe ìní-gá queñuhu-gá espíritú cùndìhi yucu ñávãha yìhi ñaha xii déhe-a<sup>n</sup>. Dico ñá díú ñaha israél cúú-á<sup>n</sup> chi ñaha ñuú Sirofènicía cúú-á<sup>n</sup> te tnúhu grégú cúú tnúhu-a<sup>n</sup>. <sup>27</sup>Te xíá<sup>n</sup> nüu ní xáha<sup>n</sup> Jèsús xii-a<sup>n</sup>:

—Daña na càxi tnaa nchaa landú chítú xití-güexi, te dätñuní caxi

cue iná, chi ñá túú ndùu váha-xi quehe<sup>n</sup>-o sá xéxí làndú te cuáha-o iná —càchí-gá xǎha<sup>n</sup>-gǎ xii-a<sup>n</sup>.

<sup>28</sup>Te ní xáha<sup>n</sup>-a<sup>n</sup> xii-gá:

—Mèstrú, ndáá-ni càhá<sup>n</sup>-n, dico iná chi nàdatacá-güedi sá ngóyó yùhu cóhó làndú —càchí-a<sup>n</sup> xǎha<sup>n</sup>-a<sup>n</sup> xii-gá.

<sup>29</sup>Te Jèsús ní xáha<sup>n</sup>-gǎ xii-a<sup>n</sup>:

—Ío váha ní càhá<sup>n</sup>-n, te cuanùhú te ñá túú-gǎ ná cani iní-n, chi sa ní quee espíritú cündìhi yucu ñávàha yìhi ñaha xii déhe-n —càchí-gá xǎha<sup>n</sup>-gǎ xii-a<sup>n</sup>.

<sup>30</sup>Te ñaha-á<sup>n</sup> ñí nasáá-a<sup>n</sup> vehe-a<sup>n</sup> te càa déhe-a<sup>n</sup> núú càamá, dico ñá túú-gǎ espíritú cündìhi yucu ñávàha yìhi ñaha xii-xi chi sa ní quee ñaha-xi.

**Jèsús quidé tátna-gá ì<sup>n</sup> tée ñá cúú càhá<sup>n</sup> váha te doho-dě**

<sup>31</sup>Te Jèsús ní ndee-gá yucu cue tée ñúú Tìrú te ní yáha-gá yucu cue tée ñúú Sidón, ndìhi yucu ndi ùxí ñúú nání Dècápolís, te ní sáá-gá ndéé yuhu làgúná distritú Galileá.

<sup>32</sup>Te xíá<sup>n</sup> ndécú-gǎ ní quexìo ñáyìu ndéé núú-gǎ ndécá-yu ì<sup>n</sup> tée ñá cúú càhá<sup>n</sup> váha-dé te doho-dě. Te càhá<sup>n</sup> ndàhú-yu núú-gǎ sá ná tëndaha ñaha-gá xii-dé cuendá ndúha-dé.

<sup>33</sup>Te Jèsús ní queñuhu ñaha-gǎ xii-dé tnuú-yu, te ndèca ñaha-gá cuáhá<sup>n</sup> ì<sup>n</sup> xio, te ní dáquìhu-gá díquí ndáhá-gǎ yaú lóho-dé, te ní dácánù-gá díí-gǎ díquí ndáhá-gǎ, te ní tendaha-gǎ yàa-dé. <sup>34</sup>Te ní ndacoto-gá andìu te ní sánuu iní-gá, te ní càhá<sup>n</sup>-gá tnúhu mee-gǎ, te xǎha<sup>n</sup>-gǎ:

—ìĔfatá! —càchí-gá xǎha<sup>n</sup>-gǎ xii-dé.

Te tnúhu-á<sup>n</sup> quée-xí: Nacaá<sup>n</sup> yòhó lóho. <sup>35</sup>Te òré-ni-á<sup>n</sup> ñí nacaá<sup>n</sup> lóho-dé, te ní nduu váha yàa-dé, te ní cuu càhá<sup>n</sup> váha-dé. <sup>36</sup>Te Jèsús ní càhá<sup>n</sup> víhí-gǎ dóho ñáyìu ndìhi ñaha xii tée ní quide tátna-gá-á<sup>n</sup> sǎ vǎ yòo ì<sup>n</sup> cúnàhá-yu sá ñí quide tátna ñaha-gǎ xii-dé, dico uu<sup>n</sup>-gǎ ní quidé-yu ní càhá<sup>n</sup>-yu núú ñáyìu sá ñí quide tátna-gá tée-á<sup>n</sup>. <sup>37</sup>Te nchaá-yu ío ní cuñúhu-yu, te ní xítناهá-yu:

—Váha vìhi quide-dé, chi ncha-ni ndàcu-dé quidé-dě, chi quide tátna-ni-dé ñáyìu doho, te quide tátna-ni-dé ñáyìu ñìhí —càchí-yu xítناهá-yu.

**Jèsús dácàxi-gá cúmí mǐl ñáyìu**

(Mt. 15:32-39)

**8** Te ì<sup>n</sup> nduu tucu ío cuéhé ñáyìu ní tacá núú ndécú Jèsús, te ñá túú tnàhí sá cǎxí-yu. Te ní cana-gá cue tée xica cuu ndìhi-gǎ, te ní xáha<sup>n</sup>-gǎ xii-güedé:

<sup>2</sup>—Yúhú, cùndahú iní-í ncha ñáyìu-a chi sa ní cuu úní nduu ndècu ndìhi ñahá-yu xii-o ìha, te ñá túú tnàhí ná sá cǎxí-yu. <sup>3</sup>Te núu na nàtendaha-í-yu núhú tnámă-yu vehé-yu, te cuneé-yu docó ichi, chi davá-yu ío xica ndécú-yu —càchí-gá xǎha<sup>n</sup>-gǎ xii-güedé.

<sup>4</sup>Te ní xáha<sup>n</sup>-güedě xii-gá:

—ĭTe ndéé níhí-ó sǎ cuñàha-o cǎxi ncha ñáyìu-a, te ìha ñá túú nǎ ío chi cùu-xi xití yucu-ì? —càchí-güedě xǎha<sup>n</sup>-güedě xii-gá.

<sup>5</sup>Te Jèsús ní xíca<sup>n</sup> tnúhú-gǎ núú-güedě, te xǎha<sup>n</sup>-gǎ:

—ĭNá daha-gǎ pàá ndécú ndìhi-ndo-i? —cachí-gá xǎha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Ndècu ndihi-ndí úsá-gá tñàhá —  
càchí-güedé xáha<sup>n</sup>-güedě xii-gá.

<sup>6</sup>Te Jèsús ní xáha<sup>n</sup>-gǎ xii nchaa ñáyiú sá ngòo-yu nchaa-yu, te ní ngóo-yu, te ní quehe<sup>n</sup>-gá ndí úsá pàá-á<sup>n</sup>, te ní ndacá<sup>n</sup> táhú-gǎ núú Yǎ Ndiǒxí. Te dàtnùní ní táhú cuèchi-gá te ní sáñaha-gǎ xii cue tée xìca cuu ndihi-gá ní dácǎhñu-güedé nchaa ñáyiú-á<sup>n</sup>. <sup>7</sup>Te ndècu ndihi-güedé ìí<sup>n</sup> úú chácá líhli, te diu-ni duca<sup>n</sup> nǐ quide-gá ní ndacá<sup>n</sup> táhú-gǎ núú Yǎ Ndiǒxí. Te dàtnùní ní táúchíú<sup>n</sup>-gǎ ní dácǎhñu ñaha-güedě xií-yu.

<sup>8</sup>Te nchaa-yu ní xexí-yu ní ndahá xití-yu. Te sátá nǐ túhú cóhò-yu te ní nadatàcá-güedé nchaa sá nǐ quendóo, te ní chítú úsá tñàhá tídihi mee-ni sǎ nǐ quendóo-á<sup>n</sup>. <sup>9</sup>Te núú ncháá ñáyiú ní xexi-á<sup>n</sup> xǐnu dàtná cúmí mǐl-yu. Te sátá nǐ yáha ní dácáxí ñaha Jesús xií-yu te ní dándácá ñaha-gá. <sup>10</sup>Te dàtnùní cuánguee-gá bàrcú ndihi cue tée xìca cuu ndihi-gá cuáhá<sup>n</sup>-gá ndihi-güedé yucu cue tée ñúú Dalmànutá.

**Cue tée cùu fariséú xáha<sup>n</sup>-güedě xii**

**Jèsús cada-gá ìí<sup>n</sup> sá vǎ yǒo tñàhí  
ndàcu cada**

(Mt. 16:1-4; Lc. 12:54-56)

<sup>11</sup>Te núú nǐ quexìo Jesús xíá<sup>n</sup> nǐ sáá cue tée cùu fariséú, te ní ngúíta-güedé nándi tñúhu xáha<sup>n</sup>-güedě xii-gá xító ndèè ñáhá-güedě. Te xáha<sup>n</sup>-güedě sá ná cádá-gǎ ìí<sup>n</sup> sá vǎ yǒo tñàhí ndàcu cada cundehe-güedé nàcuáa cutnùní iní-güedé ñúu ndáá sá Yǎ Ndiǒxí ní tendaha ñaha-gá xii-gá véxi-gá ñuyíú-a. <sup>12</sup>Te ní sánuu iní-gá te ní xáha<sup>n</sup>-gǎ xii-güedé:

—Nchaa nchòhò ñáyiú ndècu ñuyíú-a cuìní-ndó càda-í ìí<sup>n</sup> sá vǎ yǒo tñàhí ndàcu cada nacúáa cutnùní iní-ndó ñúu ndáá sá Yǎ Ndiǒxí chíndèè ñaha-gá xii-í. Dico na càchí tñúhu ndáá-í xii-ndo sǎ vǎ cádà-í sá cuìní-ndó —càchí-gá xáha<sup>n</sup>-gǎ xii-güedé.

<sup>13</sup>Te ní dándòo-gá ñáyiú xǐndecu-á<sup>n</sup>, te cuánde-gá bàrcú ndihi cue tée xìca cuu ndihi-gá te cuáhá<sup>n</sup>-gá ndihi-güedé ndàa ingá xio yuhu làgúná.

**Nàcuáa quide cue tée cùu fariséú**

(Mt. 16:5-12)

<sup>14</sup>Te ní cunaa-güedé canehe-güedé sá cǎxí-güedě quíhí<sup>n</sup>, te ìí<sup>n</sup> dii-ni paá ndécú xití bàrcú-á<sup>n</sup> nǐ naníhí-güedě. <sup>15</sup>Te Jèsús ní cáhá<sup>n</sup>-gá dóho-güedé, te xáha<sup>n</sup>-gǎ xii-güedé:

—Na càchí tñúhu-í xii-ndo sǎ ìo quíhi iní-ndó cùndecu-ndo te vǎ cádá cuendá tñàhí-ndo lèvadurá cue tée cùu fariséú, ndihi levadurá cue tée cùndihi té Hèrodés —càchí-gá xáha<sup>n</sup>-gǎ xii-güedé.

<sup>16</sup>Te ní ngúíta-güedé xǐtñaha-güedé:

—Cuèndá sá ñà túú ní cǎnehe-o paá quixi núu xíá<sup>n</sup> duha càhá<sup>n</sup>-gá —càchí-güedé xǐtñaha-güedé.

<sup>17</sup>Te Jèsús ní cutnùní iní-gá nàcuáa ndùu tñúhu xǐtñaha-güedé, núu ní xáha<sup>n</sup>-gǎ xii-güedé:

—¿Ná cuèndá da sá ñà túú ní cǎnehe-ndo paá quixi càhá<sup>n</sup>-ndó? Te ñá díú cuèndá paá-á<sup>n</sup> ní cǎhá<sup>n</sup>-í, te dicó-ni sá méé-ndó ñà túú quide cuendá váha-ndo nàcuáa ndùu tñúhu càhá<sup>n</sup>-í, te ni ñà tècu tñùní-ndó chi ío ñi díquí-ndó.

18 Te cuèi ndèhe-ndo dico ñá túú cùtnuní iní-ndó nă cúú nchàa sá quídè-í, te cuèi ndèdóho-ndo nchàa tnúhu càhá<sup>n</sup>-í dico ñá cùtnuní iní-ndó năsa ndùu-xi, te ni ñă ndácú iní-ndó nchàa sá tá quíde-í véxi. 19 Te chí dándàcu iní cùtnàhá ní táhú cuèchi-í úhú<sup>n</sup>-ni pàà te ní xexi úhú<sup>n</sup> mĩl mee-ni cuè téé chí ðiu-ni cue téé-á<sup>n</sup> nĩ quíundehe. Te chí càchí tnúhu ná daha tídihi ní chítú mee-ni sã nĩ quendóo òré ní nadatàcá-ndó —càchí-gá xăha<sup>n</sup>-gă xii-güedé.

Te ní xáha<sup>n</sup>-güedé xii-gá:  
—Úxúú tnàhá tídihi ní chítú mee-ni sã nĩ quendóo —càchí-güedé xăha<sup>n</sup>-güedé xii-gá.

Te xăha<sup>n</sup> tùcu-gá:  
20 —Te cùtnàhá ní táhú cuèchi tucu-í úsá tnàhá pàà ní xexi cúmí mĩl ñáyíu, te chí càchí tnúhu ná daha tucu tídihi ní chítú mee-ni sã nĩ quendóo —càchí-gá xăha<sup>n</sup>-gă xii-güedé.

Te ní xáha<sup>n</sup>-güedé xii-gá:  
—Úsá tnàhá tídihi ní chítú mee-ni sã nĩ quendóo —càchí-güedé xăha<sup>n</sup>-güedé xii-gá.

21 Te Jèsús ní xáha<sup>n</sup> tùcu-gá xii-güedé:

—Vitna, ÷te sa ní tecú tnùní-ndó tnúhu ní càhá<sup>n</sup>-í ã<sup>n</sup> ñăhá? —càchí-gá xăha<sup>n</sup>-gă xii-güedé.

**Jèsús quídé tătna-gá ií<sup>n</sup> téé  
cuàá ñúú Bètsaidá**

22 Te Jèsús ní sáá-gá ndihi cue téé xica cuu ndihi-gá ñúú Bètsaidá. Te ñúú-á<sup>n</sup> ndécú-gá ní quexio ñáyíu núú-gă tánèhé-yu ií<sup>n</sup> téé cuàá, te càhá<sup>n</sup> ndàhú-yu núú-gă nũu vâ cùndèe iní-gá tendaha ñàha-gá

xii-dé cuendá ndúha núú-dé. 23 Te Jèsús ní tnií-gá ndaha téé cuàá-á<sup>n</sup>, te ní queñuhu ñaha-gă tnuú-yu, te ndèca ñaha-gá cuáhá<sup>n</sup> ií<sup>n</sup> xio yuhu ñúú. Te yàcá<sup>n</sup> ní dácánùu-gá díí-gá núú-dé te ní tendaha ñàha-gá xii-dé, te dàtnuní ní xícá<sup>n</sup> tnúhú-gă núú-dé, te xăha<sup>n</sup>-gă:

—¿Cùtnuní núú-n-ã<sup>n</sup>? —càchí-gá xăha<sup>n</sup>-gă xii-dé.

24 Te téé cuàá-á<sup>n</sup> nĩ ndonehe núú-dé, te xăha<sup>n</sup>-dè xii-gá:  
—Cùtnuní núú-í ndèhé-í nchaa cue téé-ã<sup>n</sup>, dico dà ndáa yutnu cuii ndáa-güedé te xica-güedé —càchí-dé xăha<sup>n</sup>-dè xii-gá.

25 Te Jèsús ní tendaha tùcu-gá núú-dé te ní cuu ní ndacoto váha-gá-dé, te òré-á<sup>n</sup> nĩ ndúha núú-dé. Te nchaandi túhú sá ndéhé-dé ní cutnùní váha núú-dé nándi cùu nchaa xíã<sup>n</sup>. 26 Te ní xáha<sup>n</sup> Jèsús xii-dé:

—Vitna te núhú-n, dico ndáá ichi vehe-n nũhú-n te ñá ðfú dà xití ñúú quíh<sup>n</sup>-n, te vâ yõo ií<sup>n</sup> cúñaha-n sã yũhú ní quide tătna-í núú-n nĩ ndúha —càchí-gá xăha<sup>n</sup>-gă xii-dé.

**Té Pèlú xăha<sup>n</sup>-dè xii Jèsús sá díú-gá  
cúú-gă Cristú**

(Mt. 16:13-20; Lc. 9:18-21)

27 Te Jèsús ní xica-gá cuáhá<sup>n</sup>-gá ndihi cue téé xica cuu ndihi-gá nchaa ñúú líhli càa ñúú Cèsareá Fìlipú, te òré ñũhú-gă ndihi-güedé ichi te ní xícá<sup>n</sup> tnúhú-gă núú-güedé, te xăha<sup>n</sup>-gă xii-güedé:

—Chí càchí tnúhu nása càhá<sup>n</sup> ñáyíu cuendá-í. ¿Yoo cùu-í càchí-yu-va? —càchí-gá xăha<sup>n</sup>-gă xii-güedé.

28 Te ní xáha<sup>n</sup>-güedé xii-gá:

—Davá-yu càchí-yu sá cúu-n ndíi Juàá téé ní xóo dacuàndute ñaha xii ñáiyu, te davá-yu càchí-yu sá cúu-n tē Ēlías, te dava tucú-yu càchí-yu sá cúu-n ñí<sup>n</sup> téé ní xóo cáhá<sup>n</sup> tnúhu Yá Ndiõxí ndéé sanaha, duha càchí-yu —càchí-güedé xãha<sup>n</sup>-güedě xii-gá.

<sup>29</sup>Te ní xícá<sup>n</sup> tnúhú tùcu-gá núu-güedě, te xãha<sup>n</sup>-gã xii-güedé:

—Te nchòhó, ¿yoo sàni iní-ndó cùu-í-í? —càchí-gá xãha<sup>n</sup>-gã xii-güedé.

Te té Pèlú ní xáha<sup>n</sup>-dě xii-gá:

—Yòhó cúu-n Crìstú Yáá ní tendaha Yá Ndiõxí véxi ñuyú-a —càchí-dé xãha<sup>n</sup>-dě xii-gá.

<sup>30</sup>Te Jèsús ní cáhá<sup>n</sup>-gá dóho-güedé, te xãha<sup>n</sup>-gã:

—Vá yòo ñí<sup>n</sup> cúnaha-ndo yòo cuu-í —càchí-gá xãha<sup>n</sup>-gã xii-güedé.

### Jèsús càhá<sup>n</sup>-gá sá cáhní ñaha-güedé xii-gá

(Mt. 16:21-28; Lc. 9:22-27)

<sup>31</sup>Te Jèsús ní ngúíta-gá xitnùhu-gá cue téé xica cuu ndíhi-gá nàcuáa yáha-gá, te xãha<sup>n</sup>-gã xii-güedé:

—Yúhú Téé cùu ñaní tnáhá-ndó nchàa-ndo chi ío ndoho-í, chi daquèe tìhú ñáhá nchàa cue téé cùu sacuéhé núú ñáiyu isràél, ndíhi cue dútú cúnùu, ndíhi cue téé dàcuaha ñaha xii ñáiyu nchaa tnúhu ní chídó tnùní ní chídó tnùní ndíi Moisés, nchaa cue téé-á<sup>n</sup> dàquee tìhú ñáhá-güedě xii-í. Te sáá nduu te cahni ñaha-güedě xii-í, dico nduu úní sá cùu-í te ndoto-í —càchí-gá xãha<sup>n</sup>-gã xii-güedé.

<sup>32</sup>Te duca<sup>n</sup> ñí cáhá<sup>n</sup> Jèsús núu cuè téé xica cuu ndíhi-gá nàcuáa tecú tnùní váha-güedé tnúhu càhá<sup>n</sup>-gá. Te té Pèlú ní cana ñaha-dě xii-gá ñí<sup>n</sup>

xio, te ní ngúíta-dé ténáá ñáhá-dě xii-gá ní cùu. <sup>33</sup>Dico Jèsús ndíhi-ni ní nchócuñhu-gá ní ndàcoto-gá núú nchàa-güedé chi ndàa sátá-gã xñdecu-güedé, te ní ngúíta-gá ténáá-gá té Pèlú, te xãha<sup>n</sup>-gã xii-dé:

—iXocuní yòhó núu-í-a, chi dàtná càhá<sup>n</sup> yucu ñávãha càhá<sup>n</sup>-n! Chi ñá túú sàni iní-ò dàtná sání iní Yá Ndiõxí, chi ñí<sup>n</sup>-ni sàni iní-ò ndíhi dava-gá cue ñáiyu ndècu ñuyú-a —càchí-gá xãha<sup>n</sup>-gã xii-dé.

<sup>34</sup>Te Jèsús ní cana-gá nchaa cue téé xica cuu ndíhi-gá, ndíhi nchaa ñáiyu xñdecu-á<sup>n</sup>, te ní xáha<sup>n</sup>-gã:

—Nchaa ñáiyu cuñi chitnahá ñáhá xii-í, te xini ñuhu-xi vá cádá-gã-yu sá sání iní méè-yu, te ío cada ndee iní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í. <sup>35</sup>Te nchaa ñáiyu cuñi sá ñà túú tnàhí ná yáha cundecu ñuyú-a cuíta nihnú-yu, dico nchaa ñáiyu ñá túú tnàhí yùhú cuèi nándi sá ná yãha-yu cundecú-yu ñuyú-a sá cuèndá-í, ndíhi sá cuèndá tnúhu-í, te ñáiyu-á<sup>n</sup> naníhí tàhú-yu. <sup>36</sup>Te cuèi nchaandi túhú sá ío ñuyú-a na nihí ñáiyu cundecu ndíhí-yu, dico núu ñi nchaa xíã<sup>n</sup> ná càda cuíta nihnú-yu te ñá túú vèdana nàndíhi-xi sá dúcá<sup>n</sup> ndècu ndíhí-yu nchaa xíã<sup>n</sup>. <sup>37</sup>Te ni ñí<sup>n</sup> sá ío ñuyú-a vá chindèe-xi ñáiyu cuèndá naníhí tàhú-yu. <sup>38</sup>Te nchaa ñáiyu na cùcaha<sup>n</sup> núu-xi cáhá<sup>n</sup> váha cuèndá-í, ndíhi cuèndá tnúhu-í núú nchàa ñáiyu dàquee tìhú ñáhá xii Yá Ndiõxí, ñáiyu xñdecu ichi cuèhé ichi duha, te tnàhá yúhú Téé cùu ñaní tnáhã-yu nchaa-yu cucaha<sup>n</sup> núu-í núu-yu òré ná quixi tucu-í ndíhi cue espíritú xínú cuèchi núú

Tàtá-í Dútú Ndiöxí. Te mee-gã cada cutnùní iní nchaa ñáyiú sá yùhú ío càhnu cuu-í.

**9** Te na càchí tnúhu ndáá-í xii-ndo sã ío dava nchòhò ñáyiú xĩndecu iha vitna vá cùú-ni-ndo, chí cundecu-ni-ndo ndèè quiní-ndó sàá nduu ndfhu ndaha ñaha Yá Ndiöxí xii ñáyiú, te dàvá-á<sup>n</sup> quiní-ndó sã ndácú-gã quidé-gã nchaandi túhú sá vãha — càchí-gã xãha<sup>n</sup>-gã xii cue téé xica cuu ndihi-gã ndihi cue ñáyiú-á<sup>n</sup>.

**Jèsús ní nadama dóó-gã ndihi núú-gã**

(Mt. 17:1-13; Lc. 9:28-36)

**2** Te núú ìnú nduu sá dúcá<sup>n</sup> ní cáhá<sup>n</sup> Jèsús te ní xica-gã cuásaá-gã ì<sup>n</sup> yucu dùcú<sup>n</sup>, te ndèca-gã té Pèlú, ndihi té Jàcobó, ndihi té Juáá cuásaá, te úní tnàhí-ni cue téé-á<sup>n</sup> ndécá-gã cuásaá. Te yucu-á<sup>n</sup> ndécú-gã ní nadama núú-gã, **3** te ní nadama dóó-gã. Te dóó-gã-á<sup>n</sup> sũúní ñ nduu cuixí<sup>n</sup> quiyí te tãsa<sup>n</sup>, te ni ì<sup>n</sup> ñáyiú ñuyúú-a ñá túú ndàcú-yu naqueté-yu ì<sup>n</sup> dóó nduu cuixí<sup>n</sup> dàtná ní nduu dóó-gã. **4** Te ní xiní-güedé té Moisés ndihi té Èliás nútñi-güedé ndihi-gã ndátnúhu ndihi ñaha-güedé xii-gã. **5** Te té Pèlú ní xãha<sup>n</sup>-dè xii Jèsús:

—Mèstrú, ivãha ní cuu sá ndécú-ó iha vitna! Te na dàcaa-ndí úní tnàhá vehe tnuvixí<sup>n</sup>, te ì<sup>n</sup> cuu cuendá-n te ì<sup>n</sup> cuu cuendá té Moisés te ì<sup>n</sup> cuu cuendá té Èliás — càchí-dé xãha<sup>n</sup>-dè xii-gã.

**6** Te duca<sup>n</sup> ní cáhá<sup>n</sup>-dé chí ío ní yùhú-güedé, te cuendá-ni ní cuu yáchí-dé ní cáhá<sup>n</sup>-dé, te ni mèè-dé ñá túú ní cùnùní iní-dé nása ndùu

tnúhu ní cáhá<sup>n</sup>-dé. **7** Te òré-á<sup>n</sup> ñí quexio ì<sup>n</sup> vícò núú ndécú-güedé ndihi Jèsús ní dádãhu ñaha-xi xii-güedé ndihi-gã, te xití vícò-ã<sup>n</sup> ñí cáhá<sup>n</sup> Yá Ndiöxí ní tecú dóho-güedé, te xãha<sup>n</sup>-gã xii-güedé:

—Tée-a cùu-dé Déhe-í téé ío cùu iní-í, te cundedóho-ndo nchàa tnúhu càhá<sup>n</sup>-dé —càchí-gã xãha<sup>n</sup>-gã xii-güedé.

**8** Te òré ní quide cuendá-güedé, te ñá túú-gã ní xiní-güedé cue téé úú-á<sup>n</sup> chí mee-ñá Jèsús ndécú.

**9** Te òré cuánuu ndihi ñaha-gã xii-güedé yucu-á<sup>n</sup>, te ní cáhá<sup>n</sup>-gã dóho-güedé, te xãha<sup>n</sup>-gã:

—Vá yõ ì<sup>n</sup> cúñaha-ndo nchàa sá ñí xiní-ndó núú ñí sáá-ó-á, te cuu cáhá<sup>n</sup>-ndó dico ndéé ná yãha ndoto yùhú Tée cùu ñaní tnàhá-ndó nchàa-ndo sá cùú-í —càchí-gã xãha<sup>n</sup>-gã xii-güedé.

**10** Núu xíã<sup>n</sup> cue téé-á<sup>n</sup> ñí xúhu<sup>n</sup> nahi-ni ìní-güedé nchaa sá ñí xiní-güedé núú ñí sáhá<sup>n</sup>-güedé ndihi Jèsús te ñá túú tnàhí ní cáhá<sup>n</sup>-güedé, dico ní ndúcú tnúhu núú tnàhá-güedé ná cuendá duca<sup>n</sup> ní cáhá<sup>n</sup>-gã sá ndèè ná yãha ndoto-gã sá cùú-gã te dàtnùní cáhá<sup>n</sup>-güedé nàcuáa ndùu nchaa sá ñí xiní-güedé. **11** Te ní xícá<sup>n</sup> tnúhú-güedé núú Jèsús, te xãha<sup>n</sup>-güedé xii-gã:

—¿Cuíní-ndí cachí tnúhu-n ñá cuendá càchí cue téé dàcuaha ñaha xii ñáyiú nchaa tnúhu ní chídó tnùní ndíi Moisés sá dñhna-gã té Èliás ndixi-dé te dàtnùní quixi Yá tendaha Yá Ndiöxí quixi ñuyúú-a? —càchí-güedé xãha<sup>n</sup>-güedé xii-gã.

**12** Te Jèsús ní xãha<sup>n</sup>-gã:

—Ndáá sá códó núu ì<sup>n</sup> téé quixi-dé te cada-dé dàtná ní quide

té Èliás, te tée-á<sup>n</sup> cada ndáá-dé nchaa nàcuáa cùu. Dico núú tütú Yá Ndiöxí càhá<sup>n</sup>-xi cuendá yúhu Téee cùu ñaní tnàhá-ndo nchaa-ndo sá ïo ndoho-í, te daquèe tihú ñàhá ñáyiú xii-í. <sup>13</sup>Te na càchí tnúhu-í xii-ndo vitna sá sà ní quixi ïi<sup>n</sup> tée ní quide dàtná ní xóo cada té Èliás, te cue ñáyiú ñá túú ní cànehé-yu sá yíñuhu núú-dě, te ní quide ñàhá-yu xii-dé nchaa nàcuáa ní quixi iní meě-yu. Te núú tütú Yá Ndiöxí sa ndèe tnuní nchaa nàcuáa yáha-dé, te nchaa xíá<sup>n</sup> sa ní quide ñaha ñáyiú xii-dé —càchí-gá xáha<sup>n</sup>-gã xii-güedé.

**Jèsús quidé tãtna-gá ïi<sup>n</sup> tée cuechi  
yìhi ñaha espíritú cündìhi yucu  
ñávãha**

(Mt. 17:14-21; Lc. 9:37-43)

<sup>14</sup>Te Jèsús ní ndexìo-gá ndìhi cue tée úní-á<sup>n</sup> núú xíndecu dava-gá cue tée xica cuu ndìhi-gá, te vai vihi ñáyiú ndècu núú ndécú-güedě-á<sup>n</sup>, te tnàhá cue tée dàcuaha ñaha xií-yu nchaa tnúhu ní chídó tnuní ndíi Moisés xíndecu, te cue tée-á<sup>n</sup> nãndi tnúhu xáha<sup>n</sup>-güedě xii cue tée xica cuu ndìhi Jesús. <sup>15</sup>Te òrè ní xiní-yu ní ndexìo-gá, te nchaa-yu ío ní cuñúhu-yu, te xinú-yu ní sáhá<sup>n</sup> ní cáhá<sup>n</sup> ndìhi ñàhá-yu xii-gá. <sup>16</sup>Te ní xicá<sup>n</sup> tnúhú-gã núú cuè tée xica cuu ndìhi-gá núú ná tnúhu ndàtnúhu-güedé ndìhi cue tée-á<sup>n</sup>. <sup>17</sup>Te ïi<sup>n</sup> ñáyiú xíndecu xíá<sup>n</sup> nĩ xáhã<sup>n</sup>-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhi ñaha espíritú cündìhi yucu ñávãha xii-dé, te ñiú xíá<sup>n</sup> ní quide ní cuu ñíhí-dé. <sup>18</sup>Te ío ndòho-dé chi súúní

ndèni ní cuu ngötnií ñaha-xi xii-dé, te òrè duca<sup>n</sup> quide ñaha-xi xii-dé te dànduá ñàhá-xí, te quène tíñú yuhu-dé, te cùrúhñú ñuhu-dé, te ndàda ruú<sup>n</sup> ñàhá-xí xii-dé. Te sa ní xáha<sup>n</sup>-í xii cue tée xica cuu ndìhi-n sá quèñuhu-güedé espíritú cündìhi yucu ñávãha yìhi ñaha xii-dé dico ñá túú ní ndàcu-güedé quèñuhu-güedé-xi —càchí ñáyiú-á<sup>n</sup> xáhã<sup>n</sup>-yu xii-gá.

<sup>19</sup>Te Jèsús ní xáha<sup>n</sup>-gã:

—iNchaa nchòhó ñáyiú ndècu ñuyíú-a ío sàà iní-ndó, chi ñá túú cuiní-ndó quèndáá iní-ndó Yá Ndiöxí, te ní cuu vai nduu quide ndee iní-í nchaa sá quidé-ndó! ¿Te ná ndéé ama vá dúcá<sup>n</sup>-gã cada-ndo-i? Te chí càndèca tée cùhú-á<sup>n</sup> táquixi iha —cachí-gá xáha<sup>n</sup>-gã xií-yu.

<sup>20</sup>Te ñáyiú ndìhi ñaha xii tée yìhi ñaha espíritú cündìhi yucu ñávãha-á<sup>n</sup> ndécá ñàhá-yu xii-dé cuáhá<sup>n</sup> ndéé núú Jèsús, te òrè ní xiní ñàhá espíritú cündìhi yucu ñávãha-á<sup>n</sup> xii-gá, te ní ngúíta-ni-xi sàhni yihí ñàhá tùcu-xi xii-dé, te ní dánduá ñàhá-xí xii-dé, te ní ngúíta-dé xíchí ñuhu-dé, te quène tíñú yuhu-dé. <sup>21</sup>Te Jèsús ní xicá<sup>n</sup> tnúhú-gã núú tãtá-dě, te xáha<sup>n</sup>-gã xii-dé:

—¿Ná ndéé ama ní ngúíta-xi duha ndòho déhe-n? —càchí-gá xáha<sup>n</sup>-gã xii-dé.

Te tée-á<sup>n</sup> nĩ xáha<sup>n</sup>-dě xii-gá:

—Ndéé cùtnàhá cúú lìhli-dé

ní ngúíta espíritú cündìhi yucu ñávãha duha quide ñaha-xi xii-dé.

<sup>22</sup>Te ní cùtitnĩ xito dàngaunihnu ñaha-xi xii-dé núú ñuhú, te ní cutitnĩ tucu xito dàngaunihnu ñaha-xi

xii-dé ndute cuíní-xi cahni ñaha-xi xii-dé. Te ndèca-í-dé véxi núú-n te núu ndacu-n càda tátna-n-dě, te cundàhú iní ñáhá-n xii-ndí chindee ñaha-n —cachí-dé xàha<sup>n</sup>-dě xii-gá.

<sup>23</sup>Te Jèsús ní xáha<sup>n</sup>-gá:

—Te ná cuèndá cächí-n nũ ndacu-í cada tátna-í déhe-n, chi nchaa ñáyi na quíndáá iní ñáhá xii-í te nihí-yu sá ná càcá<sup>n</sup>-yu núú-í —cächí-gá xàha<sup>n</sup>-gá xii-dé.

<sup>24</sup>Te tátá tõe cuechi-ã<sup>n</sup> ñihí ní cáhá<sup>n</sup>-dé xàha<sup>n</sup>-dě xii-gá:

—Sàndáá iní ñáhà-í xii-n, dico chindee ñaha xii-í cuèndá ná quíndáá iní ñáhá-gá-í xii-n —cächí-dé xàha<sup>n</sup>-dě xii-gá.

<sup>25</sup>Te Jèsús ndéhé-gá sá ïo vài ñáyi ta tàcá núú ndécú-gá-á<sup>n</sup>. Te ní tenàá-gá espíritú cúndìhi yucu ñávàha-á<sup>n</sup>, te xàha<sup>n</sup>-gá xii-xi:

—Yòhó espíritú cúndìhi yucu ñávàha, ní quide ñìhí-n ñì quide doho-n tõe-a, dico vitna yúhú cächí-í sá quée-n yìqui cuñú-dé te vá ndìhu-gá-n —cächí-gá xàha<sup>n</sup>-gá xii espíritú cúndìhi yucu ñávàha-á<sup>n</sup>.

<sup>26</sup>Te espíritú cúndìhi yucu ñávàha-á<sup>n</sup> ñì dácáná sàa ñaha-xi xii téé-á<sup>n</sup>, te ní sahni yìhí ñáhá tùcu-xi xii-dé, te dàtnùní ní quee ñaha-xi xii-dé cuáhá<sup>n</sup>-xi, dico téé-á<sup>n</sup> chi dacàa-ni ndíyi càa-dé cátuu-dé. Te nchaa ñáyi xíndecu xíá<sup>n</sup> cächí-yu sá ñì xíhí-dé ní cùu. <sup>27</sup>Te Jèsús ní tñii-gá ndaha-dé ní ndocani ñaha-gá xii-dé, te ní ndacóo-dé ní nucúnutñii-dé.

<sup>28</sup>Te Jèsús cuándìhu-gá xití vehe ndìhi cue téé xìca cuu ndìhi-gá, te òré ndéhé-güedě ñá túú-gá ñáyi, te ní xícá<sup>n</sup> tnúhú-güedě núú-gá, te xàha<sup>n</sup>-güedě xii-gá:

—Cachí tnúhu xii-ndí ná cuèndá ñá túú ní ndàcu-ndí queñuhu-ndí espíritú cúndìhi yucu ñávàha yìhi ñaha xii téé-ã<sup>n</sup> —cächí-güedě xàha<sup>n</sup>-güedě xii-gá.

<sup>29</sup>Te Jèsús ní xáha<sup>n</sup>-gá xii-güedé:

—Na cächí tnúhu-í xii-ndo sã nũ òré cuíní-ndó queñuhu-ndo espíritú cúndìhi yucu ñávàha yìhi ñaha xii ñáyi dàtná cúu espíritú cúndìhi-xi yìhi ñaha xii téé-ã<sup>n</sup> ní cùu ña, te xini ñuhu-xi sá ïo cáhá<sup>n</sup> ndìhi-ndo Yã Ndiõxí te ñá túú tnàhí ná caxi-ndo cáhá<sup>n</sup> ndìhi-ndo-gá, te duca<sup>n</sup> te ndacu-ndo queñuhu-ndo espíritú cúndìhi yucu ñávàha yìhi ñaha xii ñáyi —cächí-gá xàha<sup>n</sup>-gá xii-güedé.

**Jèsús cáhá<sup>n</sup> tucu-gá sá cahní ñaha-güedé xii-gá**

(Mt. 17:22-23; Lc. 9:43-45)

<sup>30</sup>Te Jèsús ní quee-gá núú ndécú-gá-á<sup>n</sup> ndìhi cue téé xìca cuu ndìhi-gá cuáhá<sup>n</sup>-gá ndìhi-güedé distritú Galileá, te cuíní-gá sá vã quíní ñáyi ndèè ichi cuáhá<sup>n</sup>-gá.

<sup>31</sup>Te duca<sup>n</sup> ñì sani iní-gá, chi mee-gá sa nàha-gá sá ndàa cada-xi nàcuáa xàha<sup>n</sup>-gá xii cue téé xìca cuu ndìhi-gá, te duha xàha<sup>n</sup>-gá xii-güedé:

—Yúhú Téé cùu ñaní tnáhá-ndó nchàa-ndo sáá ñì<sup>n</sup> nduu te cuáha cuèndá ñáhá-güedě xii-í núú cuè téé cùu úhú iní ñáhá, te cahni ñaha-güedě xii-í, dico nduu úní sá cùú-í te ndoto-í —cächí-gá xàha<sup>n</sup>-gá xii-güedé.

<sup>32</sup>Dico ñá túú tnàhí ni tècú tnùní-güedé nása nduu tnúhu ní cáhá<sup>n</sup>-gá, te ni ñà túú ní cùyii-güedé cécá<sup>n</sup> tnúhú-güedě núú-gá.



**Cue tée ndücu tnúhu núú tnáhá nũ  
ndëdacàa-güedé ío-gá cúnùu**

(Mt. 18:1-5; Lc. 9:46-48)

<sup>33</sup>Te Jèsús ní quexìo-gá ndìhi cue tée xica cuu ndìhi-gá ñũú Capèrnaúm, te òrè sa ndècu-gá ìì<sup>n</sup> vehe te ní xícá<sup>n</sup> tnúhú-gã núú-güedě, te xãha<sup>n</sup>-gã xii-güedé:

—¿Nándi cùu tnúhu ta xítñaha-ndo véxi? —càchí-gá xãha<sup>n</sup>-gã xii-güedé.

<sup>34</sup>Dico ñá túú tnàhí ni cãhá<sup>n</sup>-güedé cúñaha-güedě xii-gá nũu ná tnúhu xítñaha-güedé òrè ñúhú-güedě ichi. Te duca<sup>n</sup> ñi quide-güedé chi cuèndá tá ndàtnúhu-güedé nũu ndëdacàa-güedé ío-gá cúnùu. <sup>35</sup>Te Jèsús ní ngóo-gá, te ní xáha<sup>n</sup>-gã xii ndi ùxúú cue tée xica cuu ndìhi-gá:

—Chí táquixi iha te cundedóho-ndo tnũhu na càhá<sup>n</sup>-í-a. Te núu ío dava-ndo cuíní-ndó cùnuu-ndo, te cada-ndo sã cúú-ndó ñãyiú nchìcú<sup>n</sup> cuíí-nã, te cunu cuechi-ndo nũú tnàha ñãyiú-ndo —càchí-gá xãha<sup>n</sup>-gã xii-güedé.

<sup>36</sup>Te Jèsús ní sanutñi-gá ìì<sup>n</sup> té líhli cuádava tnuú-güedé, te dàtnùní ní nguídèhé ñáhá-gã xii-dé, te xãha<sup>n</sup>-gã xii-güedé:

<sup>37</sup>—Nchaa ñãyiú na quèhe<sup>n</sup> cuendá ìì<sup>n</sup> té líhli dàtná té líhli-a cuèndá sá ñúhú iní ñáhã-yu xii-í ñá, te cada iní-yu sá yúhú ní quehe<sup>n</sup> cuèndá-yu. Te nchaa ñãyiú na quèhe<sup>n</sup> cuendá ñáhá xii-í te ñá díú-ní mèe-í ní quèhe<sup>n</sup> cuendá-yu, chi tnàhá Tàtà-í Dútú Ndìòxí Yáá ní tendaha ñàha xii-í véxi-í ñuyúú-a ní quehe<sup>n</sup> cuèndá-yu —càchí-gá xãha<sup>n</sup>-gã xii-güedé.

**Nchaa ñãyiú ñá túú cùu úhú iní ñáhá  
xii-o te cùndìhi ñáhá-yu**

(Mt. 10:42; Lc. 9:49-50)

<sup>38</sup>Te té Juàá diu-ni ìì<sup>n</sup> té xica cuu ndìhi-gá ní xáha<sup>n</sup>-dě xii-gá:

—Mèstrú, ní xiní-ndí ìì<sup>n</sup> té cãcunehe ñaha-dé xii-n, te quèñuhu-dé espíritú cùndìhi yucu ñávãha yìhi ñaha xii ñãyiú, te nchúhú ñá túú ní dàña-gá-ndí duca<sup>n</sup> càda-dé, chi ñá túú xica cuu ndìhi ñaha-dé xii-o —càchí-dé xãha<sup>n</sup>-dě xii-gá.

<sup>39</sup>Te Jèsús ní xáha<sup>n</sup>-gã xii-güedé:

—Daña-ndo na càda nahi-dé ní cùu, chi ñá túú nì ìì<sup>n</sup> ñãyiú ndìhi ndìhi-ni ndacu cãhá<sup>n</sup> cuèhé cuèndá-í te núu cãcunehe ñáhá-yu xii-í, te quidé-yu sá vã yõ tnàhí ndàcu cada. <sup>40</sup>Te nchaa ñãyiú ñá túú cùu úhú iní ñáhá xii-o te cùndìhi ñáhá-yu. <sup>41</sup>Te na càchí tnúhu-í xii-ndo sã cuè ñãyiú na tàxi ìì<sup>n</sup> yaxi<sup>n</sup> ndute coho-ndo cuendá sá cúú-ndó cuè té xica cuu ndìhi-í, te ñãyiú-á<sup>n</sup> sãá nduu te dacuèí sá ñihí-yu sá ndúú tãhũ-yu —càchí-gá xãha<sup>n</sup>-gã xii-güedé.

**Cada cuèndá-ó vã cùndècu-o ichi  
cuèhé ichi duha**

(Mt. 18:6-9; Lc. 17:1-2)

<sup>42</sup>Te xãha<sup>n</sup> tùcu Jesús xii-güedé: —Te núu ìì<sup>n</sup> té xica cuu ndìhi-í ñãyiú sàndáá iní ñáhá xii-í cadá-yu nándi sá cuèhé sá dúhá, te váha-gá sá nũu na dàcutu ndeé-güedé ìì<sup>n</sup> yúú yódó dücú<sup>n</sup>-dě, te dàquée ñaha-güedě xii-dé xití ndute làmár, te ñá díú sã cùndècu-dé duca<sup>n</sup> càda-dé. <sup>43</sup>Te núu ìì<sup>n</sup> xio ndaha-ndo quide-xi quide-ndo nándi sá cuèhé

sá dúhá, te quehndé-ndó cuíta-xi, chi váha-gá sá nánihí tàhú-ndó cuèi na cuíta ì<sup>n</sup> xio ndaha-ndo te ñá díú sá quíhí<sup>n</sup>-ndó ñihíí ní ndúú-ndó nǔú ùhú núú ndàhú núú dícó sàà ndáhá itá ñuhú ni caa ni quíhí<sup>n</sup>. <sup>44</sup>Chi yàcá<sup>n</sup> cúú-xí nǔú ñà túú tnàhí ndàhvá ñuhú, te ío ndoho-ndo cùndecu-ndo xíá<sup>n</sup> ni caa ni quíhí<sup>n</sup>. <sup>45</sup>Te núú ì<sup>n</sup> xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuèi na cuíta ì<sup>n</sup> xio sáhá-ndó, te ñá díú sá quíhí<sup>n</sup>-ndó ñihíí ní ndúú-ndó nǔú ùhú núú ndàhú núú dícó sàà ndáhá itá ñuhú ni caa ni quíhí<sup>n</sup>. <sup>46</sup>Chi yàcá<sup>n</sup> ñá túú tnàhí ndàhvá ñuhú, te ío ndoho-ndo cùndecu-ndo xíá<sup>n</sup> ni caa ni quíhí<sup>n</sup>. <sup>47</sup>Te núú ì<sup>n</sup> xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndecu-ndo núú ndécú Yá Ndiöxí táxí tnùní-gá cuèi na cuíta ì<sup>n</sup> xio tinùu-ndo, te ñá díú sá ndì nduú xio núú-ndó quíhí<sup>n</sup>-ndó nǔú ùhú núú ndàhú. <sup>48</sup>Chi yàcá<sup>n</sup> ñá túú tnàhí ndàhvá ñuhú, te ío ndoho-ndo cùndecu-ndo xíá<sup>n</sup> ni caa ni quíhí<sup>n</sup>. <sup>49</sup>Te dàtná quidé-güedé quitì sàhni-güedé chìhi-güedé cuñú-di ñíí te dàquée-güedé núú ñuhú, duca<sup>n</sup> sàtnahá-xi ndoho cue ñáyiu chi ío ndohó-yu. <sup>50</sup>Te ñíí chi ío váha nàndìhi-xi, dico núú na ndùu víxi<sup>n</sup>-xi te ñá túú-gá nándìhi-xi te ni ñà túú-gá nása cada-o ndùu úhá tucu-xi. Te ío váha cada cuèndá-ndó nàcuáa cundecu-ndo cuèndá cuu-ndo ñáyiu váha, te duca<sup>n</sup> te cuu-ndo dàtná ñíí sá ñà túú ndùu víxi<sup>n</sup>, te ío váha cundecu ndìhi

tnàha-ndo —cachí-gá xàha<sup>n</sup>-gá xii-güedé.

**Jèsús càhá<sup>n</sup>-gá cuèndá cue ñáyiu dàña tnaha**

(Mt. 19:1-12; Lc. 16:18)

**10** Te Jèsús ní xica-gá cuáhá<sup>n</sup>-gá ní yáha-gá yucu distrítú Jùdeá ní téhndé-gá ndàa ingá xio yúte Jòrdán. Te yàcá<sup>n</sup> ndécú-gá ní tacá tucu cuéhé víhí ñáyiu, te ní ngúita-ni tucu-gá dánèhé ñáhá-gá xií-yu tnúhu-gá chi duca<sup>n</sup> tnàhí quide-gá. <sup>2</sup>Te ní quèxio ì<sup>n</sup> úú cue téé cùu fariséú núú ndécú Jèsús xíto ndèé ñáhá-güedé xii-gá nǔú nása cunduu tnúhu cáhá<sup>n</sup>-gá, te xàha<sup>n</sup>-güedé xii-gá:

—Véxi-ndí xicá<sup>n</sup> tnúhú-ndí núú-n nǔú cuu dàña ì<sup>n</sup> téé ñadìhí-dé ä<sup>n</sup> ñähá —càchí-güedé xàha<sup>n</sup>-güedé xii-gá.

<sup>3</sup>Te Jèsús ní xáha<sup>n</sup>-gá xii-güedé: —Te nchòhó, ìnása ní cachí ndíi Moisés cada-ndo-i? —càchí-gá xàha<sup>n</sup>-gá xii-güedé.

<sup>4</sup>Te ní xáha<sup>n</sup>-güedé xii-gá: —Ndíi Moisés ní cachí ndíi sá cúú dàña ì<sup>n</sup> téé ñadìhí-dé dícó-ni sá cadúha-dé ì<sup>n</sup> tutú cuañaha-dé, te núú tütú-á<sup>n</sup> codo tnùní sá ní dáña ñaha-dé, te duca<sup>n</sup> te cuu dàña-dé ñadìhí-dé —càchí-güedé xàha<sup>n</sup>-güedé xii-gá.

<sup>5</sup>Te Jèsús ní xáha<sup>n</sup>-gá xii-güedé: —Te duca<sup>n</sup> ní chídó tnùní ndíi Moisés cada-ndo cuèndá sá ío sàà iní-ndó. <sup>6</sup>Dico Yá Ndiöxí cútnàhá ní cadúha-gá ñuyúú ndìhi nchaa sá ío, chi téé ñadìhí ní cadúha-gá. <sup>7</sup>Te xíä<sup>n</sup> nǔú nchaa cue téé na ñihí ñadìhí-xi, te ì<sup>n</sup>-ná cada-güedé tátá-güedé ndìhi náná-güedé, chi mee-ñá

ñadìhí-güedé cuu cuu ndìhi-güedé.

<sup>8</sup>Te cue ñáyiú úú-á<sup>n</sup> ñà túú-gǎ ndí díí<sup>n</sup> ndí díí<sup>n</sup> yìqui cuñú cúú-yu, chi cada iní-ndó sǎ íí<sup>n</sup>-nǎ yìqui cuñú cúú-yu. <sup>9</sup>Te xǎ<sup>n</sup> núu ñǎ túú ndùu váha-xi daña cuè téé ñadìhí-güedé, chi mee Yǎ Ndiöxí ní cachí-gǎ sǎ cúú úú-yu cundecú-yu ndéé naa ndéé cuú-yu —càchí-gǎ xǎha<sup>n</sup>-gǎ xii-güedé.

<sup>10</sup>Te òré yíhí Jèsús ndìhi cue téé xìca cuu ndìhi-gǎ vehe, te ní xícá<sup>n</sup> tnúhú-güedé núú-gǎ nása ndùu tnúhu ní cáhá<sup>n</sup>-gǎ cuendá cue ñáyiú dàña tnaha. <sup>11</sup>Te Jèsús ní xáha<sup>n</sup>-gǎ xii-güedé:

—Te núu íí<sup>n</sup> téé na dàña-dé ñadìhí-dé te naquehe<sup>n</sup>-dé ingá ñadìhí, te ío nèhé quídé-dě, te íí<sup>n</sup>-ni cuèchi cùu-xi ndìhi cuèchi quìde téé ndèca ñadìhí te càhá<sup>n</sup> ndìhi-dé ingá ñadìhí. <sup>12</sup>Te ñiú-ni duca<sup>n</sup> sǎtnahá-xi cùu tucu ñáyiú ñìhí te núu na dàña-yu yíí-yu te naquehe<sup>n</sup>-yu ingá téé, chi íí<sup>n</sup>-ni cuèchi cùu-xi sǎ quídě-yu ndìhi sǎ quídé cuè ñáyiú ñìhí ndécú yìi-xi, te càhá<sup>n</sup> ndìhí-yu ingá téé —càchí-gǎ xǎha<sup>n</sup>-gǎ xii-yu.

**Jèsús xìcá<sup>n</sup> táhú-gǎ núú Yǎ Ndiöxí cuendá landú**

(Mt. 19:13-15; Lc. 18:15-17)

<sup>13</sup>Te íí<sup>n</sup> úú ñáyiú ndècá-yu landú líhli cuáhá<sup>n</sup> núú Jèsús, chi cuíní-yu sǎ téndàha ñaha-gǎ xii-güexi. Te cue téé xìca cuu ndìhi-gǎ ní ngüíta-güedé ténàà ñáhá-güedé xii-yu, te xǎha<sup>n</sup>-güedé sǎ vǎ dúcá<sup>n</sup> càdá-yu. <sup>14</sup>Te òré ní xiní-gǎ sǎ dúcá<sup>n</sup> quide-güedé, te ní cudéé<sup>n</sup>-gǎ núú-güedé, te xǎha<sup>n</sup>-gǎ xii-güedé:

—Chí dáñá ná quixi nahi cue landú líhli-á<sup>n</sup> núu-í-a te vǎ cadí-ndó

ìchi-güexi, chi dàtná cúú vǎha iní cue landú líhli-á<sup>n</sup> duca<sup>n</sup> cùu váha iní cue ñáyiú yìndaha Yǎ Ndiöxí.

<sup>15</sup>Te na càchí tnúhu ndáá-í xii-ndo sǎ núu vǎ quìndáá iní ñáhá-ndó dàtná quídé cuè landú líhli sàndáá iní ñáhá xii-í, te vǎ ndìhu ndaha ñàha Yǎ Ndiöxí xii-ndo —càchí-gǎ xǎha<sup>n</sup>-gǎ xii-güedé.

<sup>16</sup>Te sǎtá dúcá<sup>n</sup> ní xáha<sup>n</sup>-gǎ te ní nguídèhé-gǎ cue landú-á<sup>n</sup> te ní tendaha ñàha-gǎ xii-güexi, te ní xícá<sup>n</sup> táhú-gǎ núú Yǎ Ndiöxí cuendá-güexi.

**Íí<sup>n</sup> téé cuica càhá<sup>n</sup> ndìhi-dé Jèsús**

(Mt. 19:16-30; Lc. 18:18-30)

<sup>17</sup>Te òré sa ñùhu ichi Jèsús caca-gǎ quíhí<sup>n</sup>-gǎ ingá xichi ni cùu ní quexlò cunu íí<sup>n</sup> téé ní ngüííí xítí-dě núú-gǎ, te xǎha<sup>n</sup>-dě xii-gǎ: —Yòhò Mèstrú, cùu-n téé ío váha iní-xi, te cuíní-í núu vǎ cùndèe iní-n càchí tnúhu-n nǎ cúú sǎ càdà-í cuendá nduu táhù-í cundecu-í ndìhi Yǎ Ndiöxí ni caa ni quíhí<sup>n</sup> —càchí-dé xǎha<sup>n</sup>-dě xii-gǎ.

<sup>18</sup>Te Jèsús ní xáha<sup>n</sup>-gǎ xii-dé:

—¿Te cùtnuní iní-n nàcuáa ndùu tnúhu càhá<sup>n</sup>-n sǎ yùhú váha iní-ǎ<sup>n</sup>? Chi íí<sup>n</sup> ñiú ní Yǎ Ndiöxí ío váha iní-gǎ. <sup>19</sup>Te yòhò xiní-n nàcuáa ní cachí Yǎ Ndiöxí cada ñáyiú, te duha ní cachí-gǎ: “Nchòhó cue téé vǎ càhá<sup>n</sup> ndìhi-ndo ñadìhí te núu ñǎ díú ñadìhí-ndó cùu-yu, te duca<sup>n</sup>-ni nchòhó cue ñáyiú ñìhí tucu vǎ càhá<sup>n</sup> ndìhi-ndo tée te núu ñǎ díú yìi-ndo cuu-güedé, te vǎ cáhni-ndó tnàha ñáyiú-ndo, te ni vǎ dúhú-ndó sǎ ndécú ndìhí-yu, te ni vǎ dácàcu-ndo cuèchi neñùú sǎ cúú-xí tnàha ñáyiú-ndo, te ni vǎ

dácuañdehnde-ndo, te canehe-ndo sã yíñùhu núú tãtã-ndó ndìhi núú nãná-ndó”, duha ní cachí Yã Ndiõxi cada ñáyi —càchí-gá xãha<sup>n</sup>-gã xii-dé.

<sup>20</sup>Te tée-á<sup>n</sup> ñí xáha<sup>n</sup>-dẽ xii-gá:

—Mèstrú, nchaa xíã<sup>n</sup> ní ngüíta-í quidé-í ndéé cútnãhá cúú làndú-í —càchí-dé xãha<sup>n</sup>-dẽ xii-gá.

<sup>21</sup>Te Jèsús ní xíndéhé ñaha váha-gá xii-dé, te ní cuu váha iní ñáhã-gã, te ní xáha<sup>n</sup>-gã xii-dé:

—Dico cùmání ìngá núú sã cáda-n. Vitna te quíhí<sup>n</sup>-n te dico-n nchaa sã ndécú ndìhi-n, te díhú<sup>n</sup>-n cuãha táhú-n cuè ñáyi ndàhú. Te duca<sup>n</sup>, te nduu táhú-n núcúndecu váha-n nũú ndécú Yã Ndiõxi táxi tnũn-í-gá, te sátá ná yãha duca<sup>n</sup> càda-n, te quixi-n chìtnahã ñáhã-n xii-í cuèi na ndòho-n datná ndoho-í —càchí-gá xãha<sup>n</sup>-gã xii-dé.

<sup>22</sup>Te sã dúcã<sup>n</sup> ñí xáha<sup>n</sup> Jèsús xii-dé te ío ní cundýí-dé chi ío cuica-dẽ, te ní xica-dé cuánuhú-dé.

<sup>23</sup>Te ní ndacoto-gá ñí càndéé dñi-gá, te ní xáha<sup>n</sup>-gã xii cue tée xica cuu ndìhi-gá:

—Cue ñáyi cuica chi ío úhú quíndáá iní-yu Yã Ndiõxi cuèndá ndíhu ndaha ñaha-gá xií-yu —càchí-gá xãha<sup>n</sup>-gã xii-güedé.

<sup>24</sup>Te cue tée xica cuu ndìhi-gá-á<sup>n</sup> ño ní cuñúhu-güedé nàcuáa ní cáhá<sup>n</sup>-gá, te ní xáha<sup>n</sup> tùcu-gá xii-güedé:

—Nchòhó cue tée xica cuu ndìhi-í càchí tnúhu tucu-í xii-ndo sã ño úhú quíndáá iní cue ñáyi cuica Yã Ndiõxi cuèndá ndíhu ndaha ñaha-gá xií-yu, chi sàni iní-yu sã ncháá sã ndécú ndìhí-yu dàcácu nihnu ñaha-xi xií-yu núú úhú

núú ndàhú. <sup>25</sup>Te yáchí-gá yáha ñí<sup>n</sup> càméyu yaú ñí<sup>n</sup> yiqui tìcú dàcúxí sã quíndáá iní ñí<sup>n</sup> ñáyi cuica Yã Ndiõxi cuèndá ndíhu ndaha ñaha-gá xií-yu —càchí-gá xãha<sup>n</sup>-gã xii-güedé.

<sup>26</sup>Te cue tée xica cuu ndìhi-gá ní cuñúhu vìhi-gá-güedé sã dúcã<sup>n</sup> ñí cáhá<sup>n</sup>-gá, te ní ngüíta-güedé xìtnaha-güedé:

—¿Te yoo sa ndacu naníhí tãhú te núu duca<sup>n</sup> vãí<sup>n</sup>? —càchí-güedé xìtnaha-güedé.

<sup>27</sup>Te Jèsús ní xíndéhé vãha ñaha-gã xii-güedé, te ní xáha<sup>n</sup>-gã:

—Nchaa ñáyi ñuyíú-a chi vá ndácú-yu ná cáda-yu nàcuáa ndíhu ndaha ñaha Yã Ndiõxi xií-yu, dico mee-gã chi ndacu-gá ndíhu ndaha ñaha-gá xií-yu, chi nchaandi túhú sã vãha ndàcu-gá quidé-gã —càchí-gá xãha<sup>n</sup>-gã xii-güedé.

<sup>28</sup>Te té Pèlú ní xáha<sup>n</sup>-dẽ xii-gá:

—Nchúhú ní dándòo-ndí nchaandi túhú sã ndécú ndìhi-ndí te ní tuha ñaha-ndí xii-n —càchí-dé xãha<sup>n</sup>-dẽ xii-gá.

<sup>29</sup>Te Jèsús ní xáha<sup>n</sup>-gã xii-dé:

—Na càchí tnúhu ndáá-í xii-ndo sã ncháá ñáyi na dándóo vehe-xi, àdi ñaní-xi, cúha-xi, tãtã-xi, nãná-xi, déhe-xi, àdi ñuhu-xi, te núu duca<sup>n</sup> na cáda-yu sã cuèndá-í ndìhi sã cuèndá tnúhu-í, <sup>30</sup>te ío-gá cuéhé sã cuãnaha Yã Ndiõxi cundecu ndìhí-yu, chi níhí-yu vehé-yu, ñuhú-yu, ñaní-yu, cúha-yu, nãná-yu, déhe-yu, te ñã díú-í sã nchaa xíã<sup>n</sup> níhí-yu cundecu ndìhí-yu, chi tnãhá nduu táhú-yu cundecu ndìhi ñáhã-yu xii-í ñí caa ñí quíhí<sup>n</sup> ná sãa nduu. Dico díhna-gá ndoho tnahá-yu núú ñuyíú-a sã cuèndá-í. <sup>31</sup>Te dava ñáyi cùnno ndecu ichi Yã Ndiõxi vitna,

ñáyi-u-á<sup>n</sup> sáá nduu te vá ïo-gá cunúu-yu dàtná cúnúu-yu vitna, te dava ñáyi nchícú<sup>n</sup> ñá túú cúnuu vitna ñáyi-u-á<sup>n</sup> sáá nduu te ío cunúu-yu —càchí-gá xáha<sup>n</sup>-gá xii-güedé.

**Jèsús càhá<sup>n</sup> tucu-gá sá cáhni ñàha-güedé xii-gá**

(Mt. 20:17-19; Lc. 18:31-34)

<sup>32</sup>Te ñuhu Jesús ichi ndihi cue tée xica cuu ndihi-gá cuásaá ndihi ñaha-gá xii-güedé ñuu Jerusàlén, te yòdo nuu-gá núu-güedé cuásaá. Te cue tée-á<sup>n</sup> xícuñuhu-güedé sá dúcá<sup>n</sup> cuhá<sup>n</sup>-gá ñuu Jerusàlén, te dava cue ñáyi xínchícú<sup>n</sup> xíyùhú-yu. Te ní taudí<sup>n</sup>-gá ndí ùxúú cue tée xica cuu ndihi-gá, te ní ngúífta-gá cání-gá cuèndú núu-güedé nchaa nàcuáa yáha-gá. <sup>33</sup>Te xáha<sup>n</sup>-gá xii-güedé:

—Vitna ñuhu-o ichi cuásaá-ó ñuu Jerusàlén, te yàcá<sup>n</sup> cuáha cuèndá ñáhá-güedé xii yúhú Tée cùu ñani tnáhá-ndó nchàa-ndo núu cuè tée cùu dútú cúnúu, ndihi núu cuè tée dàcuaha ñaha xii ñáyi nchaa tnúhu ní chídó tnùní ndíi Moisés. Te diu cue tée-á<sup>n</sup> cññaha-güedé xii dava-gá cue tée sá cáhni ñàha-güedé xii-í, te cuáha cuèndá ñáhá-güedé xii-í núu cuè tée ñá túú cùu cue tée isràél. <sup>34</sup>Te cue tée-á<sup>n</sup> cudíquí ndéé ñáhá-güedé xii-í, te caniha-güedé ndihi ñíi, te tiú díí ñáhá-güedé, te cahni ñaha-güedé xii-í dico nduu úní sá cùú-í te ndoto-í —càchí-gá xáha<sup>n</sup>-gá xii-güedé.

**Té Jàcobó ndihi té Juàá càhá<sup>n</sup> ndàhú-güedé núu Jèsús sá cadá-gá ñí<sup>n</sup> sá cuìní-güedé**

(Mt. 20:20-28)

<sup>35</sup>Te cue déhe té Zebèdú té Jàcobó ndihi té Juàá ní

quexìo-güedé núu Jèsús, te xáha<sup>n</sup>-güedé xii-gá:

—Mèstrú, véxi-ndí càhá<sup>n</sup> ndàhú-ndí núu-n ñuu vá cündèe iní-n càda-n ñí<sup>n</sup> sá cuìní-ndí —càchí-güedé xáha<sup>n</sup>-güedé xii-gá.

<sup>36</sup>Te Jèsús ní xícá<sup>n</sup> tnúhú-gá núu-güedé, te xáha<sup>n</sup>-gá:

—¿Ná cùú sá cuìní-ndó càda-í-í? —càchí-gá xáha<sup>n</sup>-gá xii-güedé.

<sup>37</sup>Te ní xáha<sup>n</sup>-güedé xii-gá:

—Cuìní-ndí sá òré ná sáá nduu cündecu-n núu táxí tnùní-n, te ñí<sup>n</sup>-ndí cunucóo-ndí xio cùha-n te ñí<sup>n</sup>-ndí cunucóo-ndí xio dàtni-n —càchí-güedé xáha<sup>n</sup>-güedé xii-gá.

<sup>38</sup>Te Jèsús ní xáha<sup>n</sup>-gá xii-güedé:

—Nchòhò, ñá túú cùtnuní iní-ndó nàcuáa nduu sá xicá<sup>n</sup>-ndó ñùú-í. ¿Te náa cundee ìní-ndó dándòho ñaha ñáyi xii-ndo dàtná dándòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-á<sup>n</sup>? —càchí-gá xáha<sup>n</sup>-gá xii-güedé.

<sup>39</sup>Te ní xáha<sup>n</sup>-güedé xii-gá:

—Cundee ìní-ndí yáha-ndí nchaa nàcuáa càhá<sup>n</sup>-n-á<sup>n</sup> —càchí-güedé xáha<sup>n</sup>-güedé xii-gá.

Te Jèsús ní xáha<sup>n</sup>-gá xii-güedé:

—Ndáá sá cündèe iní-ndó ndòho-ndo nchaa nacuáa ndòho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í.

<sup>40</sup>Dico sá dúcá<sup>n</sup> cuìní-ndó sá íí<sup>n</sup>-ndó cùnucóo-ndo xio cuha-í te ñí<sup>n</sup>-ndo cùnucóo-ndo xio datni-í, te xíá<sup>n</sup> chi ñá díú yúhú tàù-í cachí-í te núu sá cùú cùnucóo-ndo àdi sá vâ cùú cùnucóo-ndo, chi mee Tàtà-í Dútú Ndiòxí cachí-gá te núu ná cùú ñáyi nduu táhú cunucóo dññí-í dàvâ-á<sup>n</sup> —càchí-gá xáha<sup>n</sup>-gá xii-güedé.

41 Te òré ní níhí ùxí-gá cue tée xica cuu ndihi-gá tnúhu nàcuáa ndùu sá cuìní té Jàcobó ndihi ñaní-dé té Juáá, te ní cudéé<sup>n</sup>-güedě núu cuè tée úú-á<sup>n</sup>. 42 Te Jèsús ní cana-gá nchaa cue tée xica cuu ndihi-gá-á<sup>n</sup>, te ní xáha<sup>n</sup>-gá xii-güedé:

—Nchòhó xìní-ndó sã cuè tée yìndaha ì<sup>n</sup> nació<sup>n</sup> quide-güedé sá ìo cùnùu-güedé, te nchaa dava-gá cue tée cùndihi-güedé tnáhá-güedé quídé-güedě sá ìo cùnùu-güedé. 43 Dico nchòhó chi vá dúcá<sup>n</sup> càda-ndo. Chi núu dava-ndo cuìní-ndó cùnùu-ndo te xìní ñuhu-xi cunu cuechi núú tnáhá-ndó te vá cádá-ndó sã cùnùu-ndo. 44 Te núu dava-ndo cuìní-ndó quène cáva-ndo, te cuu-ndo dàtná cue ñáyiu ñá túú tnàhí dàná quee núú chíú<sup>n</sup> pàtróó<sup>n</sup>-xi cunu cuechi nũú tnáhá-ndó. 45 Te yúhú Tée cùu ñaní tnáhá-ndó nchàa-ndo, chi ñá túú vèxi-í sá cúnú cuèchi ñáyiu núù-í, chi véxi-í sá cúnú cuèchi-í núù-yu. Te cuú-í ñuyúú-a cuèndá vài-yu cácu nihnu núú ùhú núú ndàhú — cächí-gá xáha<sup>n</sup>-gá xii-güedé.

**Jèsús quídé tãtna-gá ì<sup>n</sup> tée cuàá nání-dě Bartimeú**

(Mt. 20:29-34; Lc. 18:35-43)

46 Te Jèsús ní quexìo-gá ñúu Jericó ndihi cue tée xica cuu ndihi-gá, te ní yáha-gá ndihi-güedé ichi xití ñúú-á<sup>n</sup>, te ìo cuéhé ñáyiu nchìcú<sup>n</sup> ñáhá xii-gá cuáhá<sup>n</sup> te ì<sup>n</sup> xio yuhu ìchi sá ní quee xití ñúú-á<sup>n</sup> núcõ ì<sup>n</sup> tée cuàá nání-dě Bartimeú, te tãtá-dě nání-dě Tìmeú, te tée-á<sup>n</sup> núcõ-dé yuhu ìchi-á<sup>n</sup> xìcá<sup>n</sup> ndàhú-dé. 47 Te tée-á<sup>n</sup> ní cutnùnì

iní-dé sá Jèsús tée ñúú Nazàrèt ñúhú-dě ichi, te ní ngúíta-dé níhi càhá<sup>n</sup>-dé, te xáha<sup>n</sup>-dě xii-gá:

—iJèsús, ñaní tnáhá ndíi Dàvíí, cundàhú iní ñáhá xii-í! —cächí-dé xáha<sup>n</sup>-dě xii-gá.

48 Te vài ñáyiu tènaá ñáhã-yu xii-dé, te xáhã<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xáha<sup>n</sup>-dě xii-gá:

—iJèsús, ñaní tnáhá ndíi Dàvíí cundàhú iní ñáhá xii-í! —cächí-dé xáha<sup>n</sup>-dě xii-gá.

49 Te Jèsús ní ngúíñí-gá te ní xáha<sup>n</sup>-gá xii cue tée ndihi-gá:

—Chí cuãnguaca tée cuàá-ã<sup>n</sup> candeca-ndo-dě quixi iha — cächí-gá xáha<sup>n</sup>-gã.

Te cue tée-á<sup>n</sup> nĩ xica-güedé cuanguaca-güedé tée cuàá-á<sup>n</sup>, te òré ní quexìo-güedé núú-dě te ní xáha<sup>n</sup>-güedě xii-dé:

—Ndacuíñí te vá ndìhú-gá iní-n, na quìhí<sup>n</sup>-ó chi càna ñaha Jesús xii-n —cächí-güedé xáha<sup>n</sup>-güedě xii-dé.

50 Te tée-á<sup>n</sup> nĩ xócání-dě dóó ndíxí-dě, te ndíhi-ni ní ndacuíñí-dé te ní xica-dé cuáhá<sup>n</sup>-dé núú Jèsús.

51 Te òré ní quexìo-dé te ní xícá<sup>n</sup> tnúhú-gã núú-dě, te xáha<sup>n</sup>-gã xii-dé: —¿Ná cuìní-n càda ñaha-í xii-n-í? —cächí-gá xáha<sup>n</sup>-gã xii-dé.

Te tée cuàá-á<sup>n</sup> nĩ xáha<sup>n</sup>-dě xii-gá: —Mèstrú, cuìní-í cada tãtna-n nũù-í cuèndá cundehe-í —cächí-dé xáha<sup>n</sup>-dě xii-gá.

52 Te Jèsús ní xáha<sup>n</sup>-gã xii-dé:

—Cuanùhú vitna, chi sa ní ndúha núú-n chi ní sándáá iní-n Yã Ndiòxi —cächí-gá xáha<sup>n</sup>-gã xii-dé.

Te òré-ni-á<sup>n</sup> nĩ ndúha núú-dě te nchìcú<sup>n</sup>-dé Jèsús cuáhá<sup>n</sup>.

### Jèsús cuánguihu-gá ñúú Jerusàlén

(Mt. 21:1-11; Lc. 19:28-40; Jn. 12:12-19)

**11** Te Jèsús ní cuyatni-gá ndihi cue téé xica cuu ndihi-gá ñúú Bètaniá, ndihi ñúú Bèttagé, te xíá<sup>n</sup> cáá yùcu nani Olívú, te yatni víí-nă xíá<sup>n</sup> cáá ñúú Jerusàlén. Te Jèsús ní cana-gá úú-ni tnàhá cue téé xica cuu ndihi-gá. <sup>2</sup>Te ní xáha<sup>n</sup>-gă xii-güedé:

—Chí cuáhá<sup>n</sup> ñúú cáá yàtni yacá<sup>n</sup>, te òré quexìo-ndo yacá<sup>n</sup> te naníhí-ndó ì<sup>n</sup> búrru ndètníí-dí, te vátá yòo ì<sup>n</sup>-gá codo ñàha xii-dí, te nandaxi-ndo-dí te candeca-ndo-dí quìxi. <sup>3</sup>Te núu yoo na càcá<sup>n</sup> tnúhú nùú-ndó nă cuendá nándàxi-ndo-dí, te cúñaha-ndo să yùhú Yaá xíca cùu ndihi-ndo xini ñuhu-í-dí, te na yàha canehe chi<sup>n</sup>-í-dí te ndíhi-ni natendaha-í-dí, duha cúñaha-ndo — càchí-gá xáha<sup>n</sup>-gă xii-güedé.

<sup>4</sup>Te cue téé-á<sup>n</sup> nǐ xica-güedé cuáhá<sup>n</sup>-güedé, te òré ní quexìo-güedé ñúú-á<sup>n</sup> te ní naníhí-güedé ì<sup>n</sup> búrru ndètníí-dí ì<sup>n</sup> yutnu nìhnu yatni ì<sup>n</sup> yuyehe vehe caa yatni yuhu ichi, te ní ngúíta-güedé nándàxi-güedé-dí.

<sup>5</sup>Te mei òré nándàxi-güedé-dí ní quexìo ñáyíu xáhă<sup>n</sup>-yu xii-güedé:

—¿Ná cuendá nándàxi-ndo búrru-á<sup>n</sup>-i? —càchí-yu xáhă<sup>n</sup>-yu xii-güedé.

<sup>6</sup>Te cue téé-á<sup>n</sup> nǐ xáha<sup>n</sup>-güedé xíí-yu nàcuáa ní xáha<sup>n</sup> Jèsús cúñaha-güedé. Te sátá dúcá<sup>n</sup> te ní dǎñă-yu ndéca-güedé búrru-á<sup>n</sup> cuáhá<sup>n</sup> núú ndécú Jèsús. <sup>7</sup>Te òré ní quexìo-güedé ndihi-dí núú ndécú-gă, te ní sacá<sup>n</sup> ndodo-güedé dóo-güedé sátá-dí, ní ngódó ñàha

Jesús xii-dí. <sup>8</sup>Te ío cuéhé ñáyíu ta sàcá<sup>n</sup>-yu dóo-yu ichi cuáhá<sup>n</sup>-gá cuendá núú dóo-yu-á<sup>n</sup> yàha-gá ndihi quiti yòdo-gá, te davá-yu xèhndé-yu ndaha yùtnu ta sacá<sup>n</sup>-yu cuáhá<sup>n</sup>.

<sup>9</sup>Te nchaa ñáyíu yòdo nuu núú-gă ndihi nchaa ñáyíu nchícú<sup>n</sup> ndàa sátá-gă ní ngúíta-yu níhi càhá<sup>n</sup>-yu, te càchí-yu:

—Íío càhnu cuu Yaá-a! ¡Te Yá Ndiöxí ná chindee ñaha-gá, chi diu-gá cúú-gă Yaá ní tendaha-gă véxi quide núú-gă! <sup>10</sup>¡Te diu-ni Yaá-á cúú-gă Yaá véxi quindaha ñàha xii-o datná ní xóo cada ndí Dávíí! ¡Te ndéé nchaa sá ío andíu na càchí-xi sá ío càhnu cuu-gá! —duha càchí-yu.

<sup>11</sup>Te Jèsús ní quexìo-gá ñúú Jerusàlén, te cuánguihu-gá xítí veñúhu càhnu sá ío cùnuu, te ní xíndéhé vǎha-gá nchaa sá ndécú xítí veñúhu-á<sup>n</sup>. Te sátá dúcá<sup>n</sup> te ní ndee-gá cuáhá<sup>n</sup>-gá ñúú Bètaniá ndihi ndi ùxúú cue téé xica cuu ndihi-gá chi sa ní cuaa.

### Jèsús xáha<sup>n</sup>-gă xii yutnu ngúxí sá vǎ cúú<sup>n</sup>-gă sávídí-xi

(Mt. 21:18-19)

<sup>12</sup>Te nduu tnéé-á<sup>n</sup> nǐ quee Jèsús ñúú Bètaniá ndihi cue téé xica cuu ndihi-gá, te ichi ñuhu-gá ní xíhí-gá docó. <sup>13</sup>Te xica nǐ xíní-gá nútní ì<sup>n</sup> yutnu ngúxí, te ní xica-gá cuándéhé-gă nǔu ndéé sávídí-xi te ñă túú nă ndéé, chi mee-ni ndàha-xi ndéé chi ñă díú yòó sácúndéé sávídí-xi. <sup>14</sup>Te Jèsús ní xáha<sup>n</sup>-gă xii yutnu ngúxí-á<sup>n</sup>:

—Vitna te vá yòo ì<sup>n</sup>-gá caxi sávídí-n, chi vá cúú<sup>n</sup>-gă —càchí-gá xáha<sup>n</sup>-gă xii yutnu ngúxí-á<sup>n</sup>.

Te cue tée xica cuu ndihi-gá ní tecú dóho-güedé nàcuáa ní xáha<sup>n</sup>-gã xii yutnu ngüxí-á<sup>n</sup>.

**Jèsús ñá túú tnàhá iní-gá nàcuáa quide ñáyiú xití veñúhu**

(Mt. 21:12-17; Lc. 19:45-48; Jn. 2:13-22)

<sup>15</sup>Te Jèsús ní quexio tucu-gá ndihi cue tée xica cuu ndihi-gá ñúú Jerusálén, te cuánguñu tucu-gá xití veñúhu càhnu sá ïo cùnunu, te xití veñúhu-á<sup>n</sup> xíndecu cue ñáyiú quide ndáhú nádìcò-yu, ndihi cue ñáyiú xísaa<sup>n</sup>. Te nchaá-yu ní queñuhu ñaha Jèsús xíí-yu quehé, te ní dándúá-gá mèsá cue ñáyiú dàma díhú<sup>n</sup>, ndihi nchaá xilé sácõo nchihí cue ñáyiú dìcò lómá xíndecu xití veñúhu-á<sup>n</sup>. <sup>16</sup>Te ñá túú tnàhí-gá ní dàña-gá yáha cue ñáyiú ndihi nchaá sá nchídõ-yu ichi xití veñúhu-á<sup>n</sup>. <sup>17</sup>Te ní xáha<sup>n</sup>-gã xíí-yu: —Núú tütú Yã Ndiõxí càhá<sup>n</sup>-xi nàcuáa ní cáhá<sup>n</sup>-gá, te ní cachí-gá: “Vehe-í cúú-xí vèhe núú tàcá ñáyiú ñihí ñuyíú càhá<sup>n</sup> ndihi ñàhá-yu xii-í”, duha ní cáhá<sup>n</sup>-gá càchí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáha<sup>n</sup>-gã xíí-yu.

<sup>18</sup>Te nchaá dútú cúnùu, ndihi nchaá cue tée dàcuaha ñaha xíí-yu nchaá tnúhu ní chídó tnùnì ndíí Moisés ní tecú dóho-güedé nàcuáa ní cáhá<sup>n</sup>-gá te ní ngüíta-güedé ndúcú-güedé nàcuáa cada-güedé cahni ñaha-güedé xii-gá, chí yùhú-güedé sá ïo cunuu-gã, te duca<sup>n</sup> chí nchaá ñáyiú ïo cùnúhu-yu nchaá tnúhu càhá<sup>n</sup>-gá. <sup>19</sup>Te òré sa ní cuaa cuií-nã, te ní quee tucu Jèsús ndihi cue tée xica cuu

ndihi-gá ñúú Jerusálén cuáhá<sup>n</sup>-gá ndihi-güedé ingá xichi.

**Ní yíchí yutnu ngüxí**

(Mt. 21:20-22)

<sup>20</sup>Te nduu tnéé nehé-ni ní yáha tucu Jèsús ndihi cue tée xica cuu ndihi-gá núú ñíhnú yùtnu ngüxí, te ní xiní-güedé sa ní yíchí ñihí ndéé yóho-xi. <sup>21</sup>Te té Pèlú ní ndacu iní-dé nàcuáa ní xáha<sup>n</sup> Jèsús xii yutnu ngüxí-á<sup>n</sup>, te ní xáha<sup>n</sup>-dè xii-gá: —Mèstrú, cundehe nã ní yíchí yutnu ngüxí sá ñí xáha<sup>n</sup>-n sã vã cúú<sup>n</sup>-gã sávidí-xi —càchí-dé xáha<sup>n</sup>-dè xii-gá.

<sup>22</sup>Te Jèsús ní xáha<sup>n</sup>-gã xii-güedé: —Quindáá ndisa iní-ndó Yã Ndiõxí. <sup>23</sup>Te na càchí tnúhu ndáá-í xii-ndo sã ñúu nchòhó cúñaha-ndo xì tìndúú-a xocuní-xi núú ndécú-xí, te quíñí-xi queé-xi xití làmár. Te ñu duca<sup>n</sup> càda-xi te núu nchòhó vá cání ñ<sup>n</sup> cani úú iní-ndó, te quindáá iní-ndó sã dúcá<sup>n</sup> càda-xi. <sup>24</sup>Te xíá<sup>n</sup> ñúu càchí tnúhu-í xii-ndo sã nchàa sá ná càcá<sup>n</sup>-ndó ñúú Yã Ndiõxí òré càhá<sup>n</sup> ndihi-ndo-gã, te taxi-gá te núu nchòhó sàndáá ndisa iní-ndó sã táxí-gã sá xicá<sup>n</sup>-ndó ñúú-gã. <sup>25</sup>Te òré càhá<sup>n</sup> ndihi-ndo Yã Ndiõxí te dandacu iní-ndó te núu ndècu ñáyiú ñá túú cùu váha iní ñàhá xì-ndo, te cada càhnu iní-ndó-yu cuendá duca<sup>n</sup> càda cahnu iní ñàhá Tãtá-ndó Dütú Ndiõxí Yaá ndécú àndiu xii-ndo cuendá nchaá sá ñá túú váha quide-ndo. <sup>26</sup>Dico núu nchòhó vá cádá càhnu iní-ndó sã quidé ñàha tnaha ñáyiú-ndo xì-ndo, te ni Tãtá-ndó Dütú Ndiõxí vá cádá càhnu iní ñàhá-gã xii-ndo cuendá



nchaa sá ñà túú vǎha quǐde-ndo —  
cachí-gǎ xǎha<sup>n</sup>-gǎ xii-güedé.

**Jèsús ndécú ndìhi-gǎ tnúhu ndee ìní**

(Mt. 21:23-27; Lc. 20:1-8)

<sup>27</sup>Te Jèsús ní ndexìo tucu-gǎ ñuú  
Jerusalén ndìhi cue tée xica cuu  
ndìhi-gǎ, te cuánguǐhu tucu-gǎ  
xítí veñúhu cànhu sá ìo cùnuu  
ndìhi-güedé. Te xítí veñúhu-án<sup>n</sup>  
yíhí-gǎ ní quexìo cue dútú cúnuu  
ndìhi cue tée dàcuaha ñaha xii  
ñáyiú nchaa tnúhu ní chídó tnùní  
ndíi Moisés, ndìhi cue tée cùu  
sacuéhé núú ñáyiú isràél. <sup>28</sup>Te  
xǎha<sup>n</sup>-güedě xii-gǎ:

—Cuíní-ndí cachí tnúhu-n xii-ndí  
nása ndùu tnúhu ndee ìní ndécú  
ndìhi-n núu quǐde-n nándí sá  
quídé-n, ¿te yoo duca<sup>n</sup> ní taxi tnúhu  
ndee ìní-án<sup>n</sup> xii-n-í? —càchí-güedé  
xǎha<sup>n</sup>-güedě xii-gǎ.

<sup>29</sup>Te Jèsús ní xǎha<sup>n</sup>-gǎ xii-güedé:  
—Yúhú tnàhá-í cuíní-í cǎcá<sup>n</sup>  
tnúhu-í ìí<sup>n</sup> sá càcá<sup>n</sup> tnúhu-í núu-ndó  
te núu na càchí tnúhu-ndo, te cachí  
tnúhu-í xii-ndo yòo ní taxi tnúhu  
ndee ìní xii-í duha quǐde-í. <sup>30</sup>Te chí  
càchí tnúhu xii-í yoo ní táuchíú<sup>n</sup>  
ní dácúándüte ndíi Juàá ñáyiú,  
¿Yá Ndiòxí á<sup>n</sup> cuè tée ñuyúú-a ní  
táuchíú<sup>n</sup> dùca<sup>n</sup> ní quǐde ndíi? Te chí  
càchí tnúhu —càchí-gǎ xǎha<sup>n</sup>-gǎ  
xii-güedé.

<sup>31</sup>Te ní ngúíta-güedé  
xǐtnàha-güedé:

—¿Nása cúñaha-o? Chi núu na  
cúñaha-o sǎ Yá Ndiòxí ní táuchíú<sup>n</sup>  
dùca<sup>n</sup> ní quǐde ndíi Juàá ñá, te  
quesaha-dě: “¿Ná cuendá ñá túú ní  
sàndáá ìní-ndó tnúhu ní cǎhá<sup>n</sup> ndíi  
vài?””, quesaha-dě. <sup>32</sup>Te ní vǎ cúú  
cúñaha-o sǎ cuè ñáyiú ñuyúú-a ní

táuchíú<sup>n</sup> dùca<sup>n</sup> ní quǐde ndíi Juàá —  
càchí-güedé xǐtnàha-güedé.

Te duca<sup>n</sup> ní xǐtnàha-güedé  
chí ñá túú ní cùtnuní ìní-güedé  
nása cúñaha-güedě xii-gǎ, chí  
xǐyùhú-güedé cue ñáyiú chí  
nchaa ñáyiú-án<sup>n</sup> ní cutnùní ndáá  
ìní-yu sá Yá Ndiòxí ní táuchíú<sup>n</sup>-gǎ  
duca<sup>n</sup> ní quǐde ndíi Juàá. <sup>33</sup>Te ní  
xǎha<sup>n</sup>-güedě xii Jèsús:

—Ñá túú xìní-ndí yoo ní táuchíú<sup>n</sup>  
dùca<sup>n</sup> ní dácúándüte ndíi Juàá  
ñáyiú —càchí-güedé xǎha<sup>n</sup>-güedé  
xii-gǎ.

Te Jèsús ní xǎha<sup>n</sup>-gǎ xii-güedé:  
—Te núu duca<sup>n</sup> te ní yùhú vǎ càchí  
tnúhu-í xii-ndo yòo ní taxi tnúhu  
ndee ìní duha quǐde-í —càchí-gǎ  
xǎha<sup>n</sup>-gǎ xii-güedé.

**Cuendá cue tée cuihna ìní-xi**

(Mt. 21:33-46; Lc. 20:9-19)

**12** Te Jèsús ní ngúíta-gǎ  
cání-gǎ ìí<sup>n</sup> cuendú núú  
ñáyiú nàcuáa tecú tnùní-yu  
tnúhu-gǎ, te xǎha<sup>n</sup>-gǎ xii-yu:  
—Íí<sup>n</sup> tée ní nacúxi-dé mee-ni  
yòho yaha stilé núú ñúhú-dě, te ní  
chidoco-dě cuendá sá vǎ cúú dàñú,  
te ní cadúha-dé núú quíhni-dě  
ndéhé yoho yàha stilé-án<sup>n</sup> òré ná cùu,  
te ní cadúha-dé ìí<sup>n</sup> xító dùcú<sup>n</sup> núú  
cáúndòdo cue tée coto yoho yàha  
stilé-án<sup>n</sup>.

Te ní sáá ìí<sup>n</sup> nduu quèe-dé  
quíngaca cuu xica-dě vǎi nduu, te  
ní dándõo ndaha-dě sá ní xitu-dé-án<sup>n</sup>  
xii ìí<sup>n</sup> úú cue tée cǎhá<sup>n</sup> ndìhi-dé  
cuendá cada chùu-güedé, te ní  
ndatnúhu-güedé sá òré ná cúú te  
cuu cuendá dava-güedé te duca<sup>n</sup> te  
ní quee-dé cuáhá<sup>n</sup>-dé. <sup>2</sup>Te sǎtá ní  
sáá nduu ní cuu ndéhé yoho yàha

stilé sá nǐ xitu-dé-án, te ní xáha<sup>n</sup>-dě xii ìì<sup>n</sup> téé xìnu cuechi núú-dě: “Cuàhá<sup>n</sup> cáca<sup>n</sup>-n sǎ cúú cuèndá-í núú cuè téé ní dándöo ndàha-í nchaa yoho yàha stilé sá nǐ xitu-í-án”, càchí-dé xǎha<sup>n</sup>-dě. Te téé xìnu cuechi-án nǐ xica-dé cuáhá<sup>n</sup>-dé. <sup>3</sup>Te cue téé-án nǐ tniì-güedé téé xìnu cuechi-án, te ní caniha-güedě xii-dé, te dǎtnùni ní nacuícú<sup>n</sup> ñàhá-güedě, te ñá túú tñahí ná ní sǎñaha-güedě. <sup>4</sup>Te téé cùu xítóhó yoho yàha stilé-án nǐ tendaha tùcu-dé ingá téé xìnu cuechi núú-dě cuáhá<sup>n</sup>-dé. Te òré ní quexìo téé xìnu cuechi-án te cue téé-án nǐ sáha ñaha-güedě yúú xii-dé, te ní táhú-güedě díquí-dě, te ní xícuèhè ñàhá-güedě xii-dé. <sup>5</sup>Te téé cùu xítóhó nchaa yoho yàha stilé-án nǐ tendaha tùcu-dé ingá téé xìnu cuechi núú-dě cuáhá<sup>n</sup>-dé núú cuè téé-án, dico téé-án òré ní quexìo-dé te ní sahni ñaha-güedě xii-dé. Te téé cùu xítóhó nchaa yoho yàha stilé-án nǐ tendaha-dě vài-gá cue téé xìnu cuechi núú-dě cuáhá<sup>n</sup> ngácá<sup>n</sup>-güedé sá cúú cuèndá-dé ní cùu dico ñu-ni duca<sup>n</sup> nǐ quide ñaha tùcu cue téé ndèè nchaa yoho yàha stilé-án xii-güedé, chi dava-güedé ní caniha-güedě te dava-güedé ní sahni ñaha-güedě.

<sup>6</sup>Te téé cùu xítóhó nchaa yoho yàha stilé-án ndécú ìì<sup>n</sup>dii-ná téé tendaha-dě quíhí<sup>n</sup> núú cuè téé ní dándöo ndaha-dě sá nǐ xitu-dé-án, te téé tendaha-dě-án cúú-dě déhe ducu<sup>n</sup>-dé, te ío cùu iní ñàhá-dě. Te ní sani iní-dé: “Váha-gá ñu tendaha-í déhe-í-a núhú-dé, chi òré quini ñàhá-güedě xii-dé te cànehe-güedé sá yíñuhu núú-dě”, duha ní sani iní-dé. Te duca<sup>n</sup> te ní

xáha<sup>n</sup>-dě xii déhe-dé-án sǎ nùhú-dé, te téé-án cuñuhú-dé cuáhá<sup>n</sup> ngácá<sup>n</sup>-dé sá cúú cuèndá tǎtá-dě núú cuè téé-án. <sup>7</sup>Dico òré ní xiní cue téé quide chiu<sup>n</sup>-án déhe téé cùu xítóhó nchaa yoho yàha stilé-án, te ní xítñaha-güedé: “Tée-ǎ<sup>n</sup> téé véxi nduu táhú ñuhu-a ndihi sá cáá nǔú-xi, dico cahni-o-dě te mee-o ndùu táhú-ó sǎ ndúú táhú-dě”, duha ní xítñaha-güedé. <sup>8</sup>Te ní tniì-güedé téé-án, te ní sahni ñaha-güedě, te ní dáquéné-güedě yiqui cùñú-dé ìì<sup>n</sup> xio yuhu ñuhu núú cáá yòho yaha stilé-án —duha cuáhá<sup>n</sup> cuèndú ní cani Jèsús núú-yu.

<sup>9</sup>Te Jèsús ní xáha<sup>n</sup> tùcu-gá xií-yu: —¿Te nchòhó sa cùtnuní iní-ndó nàcuáa cada xítóhó ñuhu-án ǎ<sup>n</sup>? Chi núhú-dé te cahni-dé cue téé-án te dándóo ndaha-dě ñuhu-dé xii cue téé cùtnuní iní-dé cada ndáá —càchí-gá xǎha<sup>n</sup>-gǎ xií-yu.

<sup>10</sup>Te xǎha<sup>n</sup> tùcu-gá xií-yu: —Te nchòhó, náa ñá túú dàcuaha-ndo núú tütú Yǎ Ndiöxí núú càchí-xi:

Yúú sǎ nǐ dáquée tǐhú cue téé dàcaa vehe,  
ní cuu-xi yúú cùnùu vitna.

<sup>11</sup>Chi mee Yǎ Ndiöxí duca<sup>n</sup> nǐ cachi-gá cunduu, te cùu-xi ìì<sup>n</sup> sá ío cùñuhu-o vitna.

Duha càchí-xi núú tütú-gá —càchí Jèsús xǎha<sup>n</sup>-gǎ xií-yu.

<sup>12</sup>Te cue téé ní xíndedóho nàcuáa ndùu tñuhu ní cáhá<sup>n</sup>-gá ní cuini-güedé tniì ñaha-güedě xii-gá ní cùu, chi ní cutnuni iní-güedé sá cuèndá-güedé ní cáhá<sup>n</sup>-gá, dico ní yùhú-güedé tniì ñaha-güedě xii-gá cuèndá sá ío vài ñáyi, te ná ío ná cada ñàhá-yu xii-güedé

ní sani iní-güedé, te ní xica-güedé cuáhá<sup>n</sup>-güedé.

### **Cuëndá impuèstú**

(Mt. 22:15-22; Lc. 20:20-26)

<sup>13</sup>Te sátá nǐ xica-güedé cuáhá<sup>n</sup>-güedé, te ní tendaha-güedě ìí<sup>n</sup> úú cue téé cùu fariséú, ndíhi ìí<sup>n</sup> úú cue téé cùndíhi té Hèrodés cuáhá<sup>n</sup>-güedé núú ndécú Jèsús ndúcú-güedě nàcuáa cada-güedé datìcánuu ñaha-güedě xii-gá núú tnúhu càhá<sup>n</sup>-gá. <sup>14</sup>Te cue téé-á<sup>n</sup> nǐ quexio-güedé núú Jèsús, te xáha<sup>n</sup>-güedě xii-gá:

—Mèstrú, cùtnuní iní-ndí sá ìo ndáá càhá<sup>n</sup>-n, te ñá túú quide cuendá-n nàcuáa càhá<sup>n</sup> ñáyiú, te cuèi ndédani càá-yu ìí<sup>n</sup>-ni càhá<sup>n</sup>-n ndíhi-yu chi ñá túú quide cuendá-n cuèi ná ñáyiú cùú-yu, te càhá<sup>n</sup> ndáá-n nàcuáa càhá<sup>n</sup> Yá Ndiòxi cundecu-o ñùyíú-a. Te cachí tnúhu xii-ndí nǔu váha-ni quide-ndí sá chǎhu-ndí té Cèsár téé ío cùnuu cuendá impuèstú á<sup>n</sup> ñáhá — càchí-güedé xáha<sup>n</sup>-güedě xii-gá.

<sup>15</sup>Dico Jèsús ní cutnùní iní-gá sá xító ndèé ñáhá-güedě xii-gá, núu ní xáha<sup>n</sup>-gá xii-güedé:

—¿Ná cuendá duca<sup>n</sup> xìto ndeé ñáhá-ndó xii-í? Chí dánèhé ñáhá xii-í ìí<sup>n</sup> díhú<sup>n</sup> sǎ chǎhu-ndo cuendá impuèstú te núu nása càa — cachí-gá xáha<sup>n</sup>-gá xii-güedé.

<sup>16</sup>Te cue téé-á<sup>n</sup> nǐ dánèhé ñáhá-güedě xii-gá ìí<sup>n</sup> díhú<sup>n</sup> sǎ chǎhu-güedé cuendá impuèstú. Te Jèsús ní xáha<sup>n</sup>-gá xii-güedé:

—Chí càchí tnúhu xii-í nǔu yoo núú-xi ndèé ndíhi yoo ñu-xi ndeé — càchí-gá xáha<sup>n</sup>-gá xii-güedé.

Te ní xáha<sup>n</sup>-güedě xii-gá:

—Núú tǎ Cèsár ndèé ndíhi ñu-dé —càchí-güedé xáha<sup>n</sup>-güedě xii-gá.

<sup>17</sup>Te Jèsús ní xáha<sup>n</sup>-gá xii-güedé:

—Te núu duca<sup>n</sup> te chí nàcuáha té Cèsár sá cùú cuendá-dé, te sá cùú cuendá méé Yá Ndiòxi te xíá<sup>n</sup> nàcuáha-ndo-gá —càchí-gá xáha<sup>n</sup>-gá xii-güedé.

Te cue téé-á<sup>n</sup> ìo ní cuñúhu-güedé sá dúcá<sup>n</sup> nǐ cáhá<sup>n</sup>-gá.

### **Cuëndá cue ñáyiú ndoto**

(Mt. 22:23-33; Lc. 20:27-40)

<sup>18</sup>Te sátá dúcá<sup>n</sup> te ní quexio ìí<sup>n</sup> úú cue téé cùu saducéú núú ndécú Jèsús, te cue téé-á<sup>n</sup> ñá túú sàndáá iní-güedé sá ndótó cuè ñáyiú ní xíhí, te ní xáha<sup>n</sup>-güedě xii-gá:

<sup>19</sup>—Mèstrú, ndíi Moisés càchí ndíi núú tütú ndíi ndècu vitna sá nǔu ìí<sup>n</sup> téé na cùú-dé te quendóo ñadìhí-dé, te núu ñá túú ní xóo déhe-dé ndíhi ñadìhí-dé-á<sup>n</sup>, te téé cùu ñaní-dé naquehe<sup>n</sup>-dé ñaha ní quendóo quèè-á<sup>n</sup> cuendá coo déhe-dé ndíhi-a<sup>n</sup> cuendá téé ní xíhí-á<sup>n</sup>. <sup>20</sup>Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadìhí-dé, te ñá túú ní cùdíi-dé cundecu-dé chi ní xíhí-dé, te ni ìí<sup>n</sup> déhe-dé ñá túú ní xóo ndíhi ñadìhí-dé. <sup>21</sup>Te téé cùu uú ní naquehe<sup>n</sup>-dé ñaha ní quendóo quèè-á<sup>n</sup>, dico ní xíhí tucu-dé, te ni ìí<sup>n</sup> tucu déhe-dé ñá túú ní xóo ndíhi ñaha-á<sup>n</sup>. Te ñu-ni duca<sup>n</sup> ní xíhí téé cùu uní. <sup>22</sup>Te ní xínu ndí ùsá-güedé ní cándeca ñaha-güedé xii ñaha-á<sup>n</sup>, dico ni ìí<sup>n</sup>-güedé ñá túú ní xóo déhe-güedé ndíhi-a<sup>n</sup>, te ní ndíhi-güedé ní xíhí te ndeé núú nǐ ndíhi-ná ní xíhí tnàhá ñadìhí-á<sup>n</sup>. <sup>23</sup>Te na sàá nduu ndòto-güedé

ndihi ñaha-ǎ<sup>n</sup>, ðte ndëdacàa-güedé ñadìhí-güedé cuu-a<sup>n</sup>-i? Chi ndi ùsá-güedé ní cándeca ñaha-güedé xii-a<sup>n</sup> —càchí-güedé xǎha<sup>n</sup>-güedé xii-gá.

<sup>24</sup>Te Jèsús ní xáha<sup>n</sup>-gǎ xii-güedé:

—Ní xíta nchòhó tnúhu càhá<sup>n</sup>-ndó, chi ñá túú xìní-ndó nàcuáa càhá<sup>n</sup> Yǎ Ndiöxí núú tütú-gá, te ni ñà túú xìní-ndó sǎ díú-gǎ ndácú-gǎ quidé-gǎ nchaandi túhú sǎ vǎha. <sup>25</sup>Te na càchí tnúhu-í xii-ndo sǎ òré ná sàà nduu ndòto nchaa ñáyiú ní xíhí, te dàvá-á<sup>n</sup> vǎ yǒo-gǎ dasa<sup>n</sup> ðehe yoco-xi chi vǎ yǒo-gǎ candeca tnàha, chi na ndòtó-yu te cuu-ná-yu dàtná cue espíritú xínú cuèchi núú Yǎ Ndiöxí.

<sup>26</sup>Te núú nchòhó cuìní-ndó cǎhá<sup>n</sup>-ndó cuëndá nchaa ñáyiú ndoto, te díhna-gǎ dacuàha-ndo nacuáa ní chídó tnùní ndíi Moisés núú tütú ndíi ni cùu. Chi ðiu núú tütú ndíi càhá<sup>n</sup>-xi nàcuáa ní xáha<sup>n</sup> Yǎ Ndiöxí xii ndíi cútñahá ní càhá<sup>n</sup> ndíhi ñaha-gǎ ì<sup>n</sup> xichi núú níhnú tnùtaú nchicú<sup>n</sup> ñuhú. Te duha ní xáha<sup>n</sup>-gǎ xii ndíi: “Yúhú cùú-í Ndiöxí tǎ Àbrahám, ndíhi tǎ Isàac, ndíhi tǎ Jàcób”, duha ní xáha<sup>n</sup> Yǎ Ndiöxí xii ndíi càchí-xi núú tütú ndíi. <sup>27</sup>Te Yǎ Ndiöxí ñá túú cùu-gǎ Ndiöxí cue ñáyiú ní xíhí, chi cùu-gǎ Ndiöxí cue ñáyiú xíndecu vívú, núú xǎ<sup>n</sup> nchòhó ío xíta-ndo tnúhu càhá<sup>n</sup>-ndó. Te sǎ dúcá<sup>n</sup> ní càhá<sup>n</sup>-gǎ cuëndá cue tée-á<sup>n</sup>, te xǎ<sup>n</sup> cútñuní sǎ cuèi ní xíhí-güedé sǎ cùú-xí tnàha ñáyiú-güedé, dico ndècu vívú-güedé sǎ cùú-xí-gǎ —càchí-gǎ xǎha<sup>n</sup>-gǎ xii-güedé.

### Tnúhu sǎ ìo-gǎ cúnùu

(Mt. 22:34-40)

<sup>28</sup>Te tnàhá ì<sup>n</sup> tée dàcuaha ñaha xii ñáyiú nchaa tnúhu ní chídó

tnùní ndíi Moisés ndèdòho-dé nchaa tnúhu càhá<sup>n</sup> Jèsús ndíhi cue tée cùu saducéú-á<sup>n</sup>, te ndèdòho-dé sǎ sùúní vǎha ñihí-gǎ tnúhu nàdanchocáva-gǎ. Te ní sándehe yatni-dé núú-gǎ, te xǎha<sup>n</sup>-dǎ xii-gá: —Cachí tnúhu xii-í ndèdacàa tnúhu sǎ ñí càhá<sup>n</sup> Yǎ Ndiöxí ío-gǎ cúnùu cuu díhna —càchí-dé xǎha<sup>n</sup>-dǎ xii-gá.

<sup>29</sup>Te Jèsús ní xáha<sup>n</sup>-gǎ xii-dé:

—Duha càhá<sup>n</sup> tnúhu sǎ ìo-gǎ cúnùu: “Nchòhó ñáyiú isràél ío vǎha chí cündèdòho tnúhu-a. Ì<sup>n</sup>dií díí-ni Yǎ Ndiöxí ndécú, te ðiu-ni-gǎ cùú-gǎ Ndiöxí-ó. <sup>30</sup>Te cuu iní-ndó Dütú Ndiöxí Yaá cùú Ndiöxí-ndó ñí yuhu ni iní-ndó, te cani iní-ndó càda-ndo datná cuìní mée-gǎ, te mee-ni tnúhu vǎha cani iní-ndó cuëndá cuu vii cuu vǎha-ndo núú-gǎ, te coo iní-ndó càda-ndo nacuáa cuu vǎha iní-gǎ”, duha càhá<sup>n</sup> tnúhu sǎ ìo-gǎ cúnùu.

<sup>31</sup>Te duha càhá<sup>n</sup> tucu ìngǎ tnúhu cùu uú sǎ ìo cúnuu: “Cuu iní-ndó tnàha ñáyiú-ndo dàtná cùú ìni-ndó mèe-ndo”, duha càhá<sup>n</sup> tnúhu cùu uú-á<sup>n</sup>. Te úú duha-ni tnúhu-a cùu-xi tnúhu sǎ ìo-gǎ cúnùu —cachí-gǎ xǎha<sup>n</sup>-gǎ xii-dé.

<sup>32</sup>Te tée dàcuaha ñaha xii ñáyiú nchaa tnúhu ní chídó tnùní ndíi Moisés ní xáha<sup>n</sup>-dǎ xii-gá:

—Mèstrú, vǎha-ni càhá<sup>n</sup>-n chi ndáá sǎ ì<sup>n</sup>dií-ni Yǎ Ndiöxí ndécú, te ñá túú-gǎ ndèé ndécú ìngǎ ndiöxí.

<sup>33</sup>Te dàtná ní cachí-n sǎ ñí yuhu ni iní-ó cùu iní-ó Yǎ Ndiöxí, te cani iní-ó càda-o nacuáa cuu vii cuu vǎha iní-gǎ te ío vii ío vǎha cuu iní-ó dàtná cuìní mée-gǎ, te coo iní-ó càda-o nacuáa cuu vǎha iní-gǎ,

te cuu iní-ó cuè tnaha ñáyi-u  
dàtná cúú iní-ó mèe-o. Te nchaa xíǎ<sup>n</sup>  
ío-gá xíní ñùhu-xi cada-o dacúxí  
sǎ cuǎñaha-o quiti cahni-güedé te  
cáyú-di nduu táhú ñáhá Yǎ Ndiöxí,  
ndihi dàcúxí nchàa dava-gá sá  
sǎñaha-o ndùu táhú-gǎ —càchí-dé  
xǎha<sup>n</sup>-dě xii-gǎ.

<sup>34</sup>Te sá dúcá<sup>n</sup> ïo váha ndùu tnúhu  
ní cáhá<sup>n</sup> tée-á<sup>n</sup>, núu ní xáha<sup>n</sup> Jèsús  
xii-dé:

—Luha-ná cúmǎní xii-n te ndíhu  
ndaha ñaha Yǎ Ndiöxí —càchí-gá  
xǎha<sup>n</sup>-gǎ xii-dé.

Te sá dúcá<sup>n</sup> ñǎ xáha<sup>n</sup>-gǎ xii tée-á<sup>n</sup>,  
núu vá yǎo ì<sup>n</sup>-gǎ ní cùyì ñágá  
tnúhu nducu tnúhu-yu núu-gǎ.

#### Yoo cùu Xítóhó Jesucristú

(Mt. 22:41-46; Lc. 20:41-44)

<sup>35</sup>Te Jèsús yíhí-gǎ xití veñúhu  
càhnu sá ïo cùnuu danehé-gǎ ñáyi-u,  
te xǎha<sup>n</sup>-gǎ xii-yu:

—Cue tée dàcuaha ñaha xii ñáyi-u  
nchaa tnúhu ní chídó tnùní ndíi  
Moisés càchí-güedé sá Cristú Yaá  
tendaha Yǎ Ndiöxí quixi ñuyú-a  
cùu-gá déhe ndíi Dàvíí, te ndíi-á<sup>n</sup>  
ñǎ cunaha vǐhi ní xíhí ndíi. ¿Te ná  
cuendá duca<sup>n</sup> càhá<sup>n</sup>-güedé? <sup>36</sup>Te  
mee ndíi Dàvíí-á<sup>n</sup> ñǎ dácáhu iní  
ñáhá Espiritú Yǎ Ndiöxí xii ndíi  
nàcuáa cáhá<sup>n</sup> ndíi, te duha ní cachí  
ndíi:

Dútú Ndiöxí ní xáha<sup>n</sup>-gǎ xii Yaá  
cúú Xítóhó-í:

“Ngóo xio cùha-í,

te yúhú cada-í te nchaa sá cúú  
ùhú iní ñáhá xii-n canehe-xi  
sá yíñùhu núu-n.”

Duha ní xáha<sup>n</sup> Dútú Ndiöxí xii  
Yaá cúú Xítóhó-í.

Duha ní cachí ndíi. <sup>37</sup>¿Te nása cùu  
Cristú déhe ndíi Dàvíí, te mee ndíi  
ní cachí ndíi sá cúú-gǎ Xítóhó ndíi?  
—càchí Jèsús xǎha<sup>n</sup>-gǎ xii-yu.

Te ío cuéhé ñáyi-u ní xíndedóho  
nchaa tnúhu ní cáhá<sup>n</sup>-gǎ, te ío ní  
cudíí iní-yu ní xíndedóho ñáhá-yu  
xii-gǎ.

#### Jèsús càhá<sup>n</sup>-gǎ cuendá cue tée dàcuaha ñaha xii ñáyi-u nchaa tnúhu ní chídó tnùní ndíi Moisés

(Mt. 23:1-36; Lc. 11:37-54; 20:45-47)

<sup>38</sup>Te òré dánèhé ñáhá Jèsús xii  
cue ñáyi-u, te xǎha<sup>n</sup>-gǎ xii-yu:

—Cada cuendá-ndó vǎ cadá-ndó  
dàtná quidé cuè tée dàcuaha ñaha  
xii ñáyi-u nchaa tnúhu ní chídó  
tnùní ndíi Moisés, chi cue tée-á<sup>n</sup>  
tnàhá iní-güedé cuihnu-güedé dóó  
nání sǎ sácúihnu cue tée cùnuu-gǎ  
te cuiní-güedé sá méé-ní ndíhi  
tnúhu yíñùhu cáhá<sup>n</sup> ndíhi ñaha  
ñáyi-u xii-güedé nchaa núu xíca  
cùu-güedé. <sup>39</sup>Te nàcáxi-güedé xilé  
sácóo nchihi cue tée cùnuu-gǎ  
xití veñúhu sácóo nchihi-güedé.  
Te duca<sup>n</sup>-ni quide-güedé cuèi òré  
quíhu-güedé mèsá caxi-güedé  
òré ndécú-güedé ì<sup>n</sup> vico, chi  
mee-ni núu sácóo cue tée cùnuu  
cuiní-güedé coo-güedé. <sup>40</sup>Te  
quèndeé-güedé vehe nchaa ñáyi-u  
quèé, te ío naha càhá<sup>n</sup> ndíhi-güedé  
Yǎ Ndiöxí dándahú-güedé  
méé-güedé sá ïo quide ndáá-güedé  
cuendá sá cuiní-güedé cáhá<sup>n</sup> váha  
ñáyi-u cuendá-güedé. Te sá dúcá<sup>n</sup>  
quide-güedé te ío-gǎ ndoho-güedé  
núu ùhú núu ndàhú dàcúxí  
dàva-gǎ ñáyi-u —càchí-gǎ xǎha<sup>n</sup>-gǎ  
xii-yu.

**Díhú<sup>n</sup> nduu táhú Yă Ndiöxí ní dáquëe ìí<sup>n</sup> ñaha ndàhú ñaha quèè**

(Lc. 21:1-4)

<sup>41</sup>Te nùcòo Jèsús xití veñúhu yatni núú ndécú àlcan-ciá te ndèhe-gá xídáquëe ñáyiú díhú<sup>n</sup> xití alcanciá-á<sup>n</sup>, te tñahá cue ñáyiú cuica xídáquëe-yu vai díhú<sup>n</sup>. <sup>42</sup>Te ní quexìo ìí<sup>n</sup> ñaha ndahú ñaha quèè, te ndèhe-gá ní dáquëe-a<sup>n</sup> úú tñahá díhú<sup>n</sup> còbrí xití alcanciá, te díhú<sup>n</sup>-ă<sup>n</sup> ìo sacú yáhu-xi. <sup>43</sup>Te Jèsús ní cana-gá cue téé xica cuu ndihi-gá, te ní xáha<sup>n</sup>-gă xii-güedé:

—Na càchí tñúhu ndáá-í xii-ndo sã ñàha ndahú ñaha quèè-a ío-gá nándihi díhú<sup>n</sup> ní dáquëe-a<sup>n</sup> xití alcanciá dàcúxí díhú<sup>n</sup> ní dáquëe dava-gá-yu. <sup>44</sup>Chi nchaa ñáyiú-á<sup>n</sup> ní dáquëe-yu mee-nă díhú<sup>n</sup> sã ní quendóo-ná, dico ñaha quèè-a cuèi ndàhú-a<sup>n</sup> dico ní dáquëe-a<sup>n</sup> ñihí díhú<sup>n</sup> sã cuáá<sup>n</sup> sã cáxí-á<sup>n</sup> ní cùu — cachí-gá xăha<sup>n</sup>-gă xii-güedé.

**Jèsús càchí-gá sá ngóyó veñúhu**

(Mt. 24:1-2; Lc. 21:5-6)

**13** Te òrè ní ndee Jèsús xití veñúhu càhnu sá ìo cùnuu, te ìí<sup>n</sup> téé xica cuu ndihi-gá ní xáha<sup>n</sup>-dè xii-gá:

—iMèstrú, cundehe nă ío vii ní sáa veñúhu-a<sup>n</sup> ndihi nchaa vehe nèhe tñaha ndihi-xi, te ío vii ndăa nchaa yúú yíhí! —càchí-dé xăha<sup>n</sup>-dè xii-gá.

<sup>2</sup>Te Jèsús ní xáha<sup>n</sup>-gă xii-dé:

—Nchaa nàcuáa càa nchaa vehe sá cúnúhu-n-a vitna sáa nduu te vá cúndúu-gá-xi dàtná cáá-xí vitna, chi ni ìí<sup>n</sup>-gá yúú vă códó nchíhi tñaha-xi, chi ndihi ngoyo — càchí-gá xăha<sup>n</sup>-gă xii-dé.

**Nàcuáa cada-xi nduu ta cùyatni naa ñuyúú**

(Mt. 24:3-28; Lc. 21:7-24; 17:22-24)

<sup>3</sup>Te Jèsús ní xica-gá ndihi cue téé xica cuu ndihi-gá cuáhá<sup>n</sup> ndihi ñaha-gă xii-güedé yucu nàni Olívú, te yucu Olívú-á<sup>n</sup> tũu ndáá núú cáá veñúhu càhnu sá ìo cùnuu. Te Jèsús ní quexìo-gá ndihi-güedé yucu Olívú-á<sup>n</sup>, te xíá<sup>n</sup> ní ngóo-gá te núú núcòo-gá-á<sup>n</sup> ní sáhá<sup>n</sup> té Pèlú ndihi té Jàcobó ndihi té Juáa ndihi té Ndríxí, te dayuhu ní xáha<sup>n</sup>-güedé xii-gá:

<sup>4</sup>—Cuìní-ndí cachí tñúhu-n nă nduu dùca<sup>n</sup> cada-xi ngoyo veñúhu càhnu sá ìo cùnuu, àdi nándi cùu sá cádá-xí cuendá cutnùní iní-ndí sá sà ta cuyatni nduu duca<sup>n</sup> cada-xi — cachí-güedé xăha<sup>n</sup>-güedé xii-gá.

<sup>5</sup>Te Jèsús ní xáha<sup>n</sup>-gă xii-güedé: —Ío quihi iní-ndó cùndecu-ndo cuendá sá vă yõo dandàhú ñáhá xii-ndo. <sup>6</sup>Chi ío cuéhé cue téé coo ñuyúú te danàni-güedé mée-güedé dàtná nání-í, te cachí-güedé: “Yúhú cùu-í Crìstú Yáa ní tendaha Yă Ndiöxí véxi ñuyúú-a<sup>n</sup>”, duha cachí-güedé. Te sá dúcá<sup>n</sup> căhá<sup>n</sup>-güedé te ío vai ñáyiú dandàhú-güedé.

<sup>7</sup>Te òrè ná ñihí-ndó tñúhu sá nàá-güedé ndèni ní cuu, te vá yùhú-ndó chi dacuitíí sã dúcá<sup>n</sup> càda-xi, dico vátá sàa-gá nduu nàa ñuyúú òrè duca<sup>n</sup> càda-xi. <sup>8</sup>Chi cue téé ìí<sup>n</sup> nàció<sup>n</sup> nàá-güedé ndihi cue téé ingá nàció<sup>n</sup>, te titní ñúú ngúíta-güedé nàá-güedé, te titní xichi ñuyúú ñhi vihi tñáa, te titní tucu xichi ñuyúú coo tnamá, te ío-gá cuéhé sã yăha ñáyiú. Te nchaa

sá dúcá<sup>n</sup> càda-xi-á<sup>n</sup> cúu-xí tñúndòho sá vítná vǎha váha quèsaha-xi sácúu-xí cuè ñáyiú ndècu ñuyíú-a.

<sup>9</sup>Dico nchòhó ío quihí iní-ndó cùndecu-ndo, chi nchaa ñáyiú na cùu úhú iní ñáhá xii-ndo cuáha cuendá ñáhǎ-yu xii dava-ndo núú cuè téé cùchiu<sup>n</sup>, te candeca ñaha-güedě xii-ndo quihí<sup>n</sup> xití veñúhu-güedé, te yàcá<sup>n</sup> caniha-güedě xii-ndo. Te quihí<sup>n</sup>-ndó núú cuè téé yìndaha nació<sup>n</sup> àdi núú dàva-gá cue téé cùnuu sá cuendá-í, te nchòhó níhí-ndó nàcuáa cada-ndo cǎhá<sup>n</sup> váha-ndo cuendá-í núú-güedě. <sup>10</sup>Te cùmání-gǎ sáá nduu nàa ñuyíú-a te sa cuténuu tñúhu-í ni càa xico ñuyíú-a, te tñúhu-á<sup>n</sup> càhá<sup>n</sup>-xi nàcuáa naníhí tǎhú ñáyiú. <sup>11</sup>Te òré ná càndeca ñaha ñáyiú xii-ndo quihí<sup>n</sup> núú cuè téé cùchiu<sup>n</sup> cuáha cuendá ñáhǎ-yu, te òré vátá sàá-gá-ndó núú-güedě te vá cání ìní-ndó núú nása cunduu tñúhu cúñaha-ndo xii-güedé. Chi òré-nǎ te Yá Ndióxi dacàhu iní ñáhá-gǎ xii-ndo nása cunduu tñúhu cúñaha-ndo xii-güedé, te diu-ni tñúhu sá dacàhu iní ñáhá-gǎ-á<sup>n</sup> cùñaha-ndo xii-güedé. Te ñá dǐú mèe-ndo cǎhá<sup>n</sup>-ndó chi Espiritú Yá Ndióxi cǎhá<sup>n</sup>-xi yuhu-ndo. <sup>12</sup>Te dava cue téé cuáha cuendá-güedé ñaní-güedé núú cuè téé cùchiu<sup>n</sup> cuendá cahni ñaha-güedě. Te dava cue téé cùu tǎtá diu-ni duca<sup>n</sup> càda-güedé cuáha cuendá-güedé déhe-güedé núú cuè téé cùchiu<sup>n</sup>. Te dava cue téé cùu déhe cuu úhú iní-güedé tǎtá-güedě ndihí nǎná-güedě, te cuáha cuendá ñáhá-güedě xií-yu núú cuè téé cùchiu<sup>n</sup> cuendá cahni ñaha-güedě

xií-yu. <sup>13</sup>Te ío cuéhé ñáyiú cuu úhú iní ñáhǎ-yu xii-ndo sǎ cuendá-í, dico nchaa nchòhó ñáyiú na càda ndee-ni iní canchicu<sup>n</sup> nihnu ñaha-ni xii-í te naníhí tǎhú-ndó.

<sup>14</sup>Te ndíi Dániél téé ní xóo cǎhá<sup>n</sup> tñúhu Yá Ndióxi ndéé sanaha ní chídó tñúni ndíi núú tütú ndíi cuendá ìí<sup>n</sup> sá dáquèe tǐhú Yá Ndióxi cundecu ìí<sup>n</sup> xichi núú ñà túú tàu-xi cundecu-xi, te xíá<sup>n</sup> cada-xi sá vǎ cùndecu-gá ni ìí<sup>n</sup> ñáyiú xíá<sup>n</sup>. Te cada cuendá váha-ndo nàcuáa ní cǎhá<sup>n</sup> ndíi, chi nduu na quíní-ndó xǎá<sup>n</sup> cundecu-xi ìí<sup>n</sup> xichi núú ñà túú tàu-xi cundecu-xi, te dàvá-á<sup>n</sup> nchaa ñáyiú xíndecu distritú Jùdeá xíní ñùhu-xi cunú-yu quihí<sup>n</sup>-yu xití yucu. <sup>15</sup>Te nchaa ñáyiú ndáa ndódó dǐquí véhé-xí vǎ ndǐhu-gá-yu vehé-yu quehé<sup>n</sup>-yu ìí<sup>n</sup> ndachíu<sup>n</sup>-yu canehé-yu quihí<sup>n</sup>. <sup>16</sup>Te nchaa ñáyiú cuáhá<sup>n</sup> yucu ni vǎ nùhú-gá-yu vehé-yu cúnúquehé<sup>n</sup>-yu dóó-yu. <sup>17</sup>Te ndàhú ní cuu nchaa ñáyiú dǐhí ñùhú dǐhe-xi, ndihí cue ñáyiú dǐhí xíndeca déhe vitna sàdi na saá nduu dùca<sup>n</sup> cada-xi! <sup>18</sup>Te nchòhó ío chí càcá<sup>n</sup> tǎhú núú Yá Ndióxi cuendá sá vǎ dúcá<sup>n</sup> ndòho-ndo yóo quidé vǐxi<sup>n</sup>-xi. <sup>19</sup>Chi dàvá-á<sup>n</sup> coo tñúndòho cahnu vihi ñuyíú, te vátá ìí<sup>n</sup> ndùu-gá coo tñúndòho cahnu vihi-á<sup>n</sup> ndéé cútñhá<sup>n</sup> ní cadúha Yá Ndióxi ñuyíú, chi diu-ni dàvá-á<sup>n</sup> coo tñúndòho cahnu vihi-á<sup>n</sup>, te ni núú cuáhá<sup>n</sup> núú vǐxi vǎ cóo-gǎ tñúndòho-á<sup>n</sup>. <sup>20</sup>Te Yá Ndióxi cǎchí-gá sá vǎ ìo vǎi nduu coo tñúndòho cahnu vihi-á<sup>n</sup> ñuyíú sǎ cuendá nchaa ñáyiú ní cǎhá<sup>n</sup>-gá cundecu ndihí-gá. Te núú vǎi nduu na coo tñúndòho-á<sup>n</sup>, te vǎ yóo cácu nihnu.

<sup>21</sup>Te dàvá-án cǔñaha ñáyi u xii-ndo: “Chí cǔndèhe iha, chi iha ní quexìo Cristú Yaá ní tendaha Yǎ Ndiòxí véxi ñuyíú-a”, duha cǔñáhá-yu xii-ndo. Àdi quesahá-yu: “Chí cǔndèhe yacá<sup>n</sup> chi yacá<sup>n</sup> ndécú-gǎ”, quesáhá-yu. Te vá quíndáá iní-ndó tnúhu càhá<sup>n</sup>-yu. <sup>22</sup>Te coo cue tée danàni-güedé mée-güedé dàtná nání-í te cachí-güedé sá cúú-güedé Yaá ní tendaha Yǎ Ndiòxí véxi ñuyíú-a. Te dava-güedé cachí-güedé sá cúú-güedé cue tée càhá<sup>n</sup> tnúhu Yǎ Ndiòxí dico ñá ndáá sá cúú-güedé cue tée càhá<sup>n</sup> tnúhu-gá, te cada-güedé titní núú sǎ vǎ yǒo tnàhí ndàcu cada cuendá dandáhú-güedé ñáyi u, te caní iní-güedé dandáhú-güedé ndéé cue ñáyi u ní cáhá<sup>n</sup> Yǎ Ndiòxí cundecu ndíhi-gá. <sup>23</sup>Te vitna ío vǎha cuáha-ndo cuendá, te quíhi iní-ndó cǔndecu-ndo, chi nchaá sa ní dátúha ñaha-í xii-ndo.

**Nàcuáa cada-xi òré quixi tucu Tée cǔu ñaní tnáhá nchàa ñáyi u**  
(Mt. 24:29-35,42 -44; Lc. 21:25-36)

<sup>24</sup>Te nà yáha-ni coo tnúndòho cahnu vihi-á<sup>n</sup>, te vá dáyèhé-gá nchíanchii te ní vǎ dáyèhé-gá yóo. <sup>25</sup>Te ngoyo nchaá chódíní ndéé andíu, te quídi-xi andíu. <sup>26</sup>Te dàvá-án quíní ñáhá nchàa ñáyi u xii yúhú Tée cǔu ñaní tnáhá-yu nchaá-yu quee-í andíu quixi-í ichi xití vícò, te quíní-yu sá ío càhnu cuu-í, te quíde-í nchaá sá vǎha. <sup>27</sup>Te tendaha-í cue espíritú xínú cuèchi núú-í quíhí<sup>n</sup>-xi nadatàcá-xi nchaá ñáyi u ní cáhá<sup>n</sup>-í chitnahá ñáhá xii-í xǐndecu ní càa xico ñuyíú.

<sup>28</sup>Te cundehe-ndo nàcuáa quíde yutnu ngúxí, chi yutnu-á<sup>n</sup> ndúú yùte núú díté-xi te nàtahú ndaha-xi, te òré duca<sup>n</sup> quíde-xi te càchí-ndó sǎ sà ní cuyatni nuu cahni. <sup>29</sup>Te duca<sup>n</sup> sǎtnahá-xi cada-xi òré ná quíní-ndó càda-xi nchaá nacuáa ní cáhá<sup>n</sup>-í, te cutnúní iní-ndó sǎ sà ní cuyatni víi-nǎ nduu nàa ñuyíú. <sup>30</sup>Te na càchí tnúhu ndáá-í xii-ndo sǎ òré vátá cǔú-gá cue ñáyi u xǐndecu ñuyíú-a vitna, te cada-xi nchaá nàcuáa ní cáhá<sup>n</sup>-í. <sup>31</sup>Te andíu ndíhi ñuyíú-a chi ndíhi nihnu-xi, dico tnúhu-í chi vá ndíhí nihnu-xi chi cǔu-xi tnúhu ndáa.

<sup>32</sup>Dico ñá túú cǔtnuní ná nduu quíxi tucu-í, te ní ñà túú cǔtnuní ná òré chi vá yǒo xíní, te ní cue espíritú xínú cuèchi núú Yǎ Ndiòxí ñá túú xíní-xi ná nduu quíxi-í, te ní mèe yúhú tée cǔu Déhe Dútú Ndiòxí ñá túú xíní-í ná nduu quíxi tucu-í, chi ì<sup>n</sup>dii díí-ni mee Tǎtà-í Dútú Ndiòxí xíní-gá núu ná nduu quíxi-í.

<sup>33</sup>Te nchòhó xíní ñúhu-xi sá ío quíhi iní-ndó cǔndecu-ndo, te cáhá<sup>n</sup> ndíhi-ndo Yǎ Ndiòxí, chi ñá túú xíní-ndó nǎ nduu quíxi tucu-í.

<sup>34</sup>Te na càchí tnúhu-í xii-ndo cuendá ì<sup>n</sup> tée cuíní quíngaca cuu xica. Te tée-á<sup>n</sup> cǔmání-gǎ quee-dé vehe-dé te ní xáha<sup>n</sup>-dǎ xii cue tée xínu cuechi núú-dǎ sá ná cáda cuendá-güedé vehe-dé. Te ní sǎñaha-dǎ xii-güedé ndí díí<sup>n</sup> núú-güedé chiu<sup>n</sup> cada-güedé. Te ní xáha<sup>n</sup>-dǎ xii tée ndéé yuyèhe sá ná cǔndecu túha-ni-dé yuyèhe ndéé nàsáá-dé. <sup>35</sup>Te duha ndúu tnúhu càhá<sup>n</sup>-í cuendá nchòhó cundecu túha-ndo, chi ñá túú xíní-ndó nǎ



nduu te ni ñà túú xìní-ndó nã òré quixi tucu yúhú Yaá cúú Xíttohó-ndó, núu òré sa ní cundiquí<sup>n</sup>, àdi dava niú, àdi oré sa ní cana uu<sup>n</sup> líhi, àdi oré sa ta cùditó cuáhá<sup>n</sup>, núu xíá<sup>n</sup> ío chí cùndècu túha. <sup>36</sup>Te duha càhá<sup>n</sup>-í chí na cuáhá<sup>n</sup> òré ñà túú nã yíhí ìní-ndó quèxio-í, te ñà túú ndècu túha-ndo. <sup>37</sup>Te dàtná-ni xǎha<sup>n</sup>-í xii nchòhó sá cùndècu túha-ndo, te diu-ni duca<sup>n</sup> xǎha<sup>n</sup>-í xii nchaa dava-gá ñáyiú sá cùndècu túha-yu —càchí-gá xǎha<sup>n</sup>-gá xii-güedé.

**Ndùcu-güedé nàcuáa cada-güedé cahni-güedé Jèsús**

(Mt. 26:1-5; Lc. 22:1-2; Jn. 11:45-53)

**14** Te cùmání ùú-gá nduu te quesaha vico pascuá, vico xèxi ñáyiú pàà sá ñà túú yìhi levadurá. Te cue dútú cùnùu, ndìhi cue téè dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé dandáhú-güedé Jèsús cuendá tñii ñaha-güedé xii-gá te cahni ñaha-güedé. <sup>2</sup>Te ní xítñaha-güedé:

—Váha-gá sá vǎ tníí-ó Jèsús mei ndùu vico, chí núu duca<sup>n</sup> na càda-o te ío dusa<sup>n</sup> càda ñáyiú —càchí-güedé xítñaha-güedé.

**Ìí<sup>n</sup> ñadìhí chíhí-á<sup>n</sup> àcítí díquí Jèsús**

(Mt. 26:6-13; Jn. 12:1-8)

<sup>3</sup>Te Jèsús ndécú-gá ñúú Bètaniá vehe ìí<sup>n</sup> téè nàni Xímú, téè ní tnahá cuéhé sǎ dátèhyú nihnu-xi yiqui cùñú-ó. Te yìhi Jesús mèsá xéxí-gá ní quexio ìí<sup>n</sup> ñadìhí néhé-á<sup>n</sup> ìí<sup>n</sup> sá ní cuáha yúú vǎha yúú nání àlabastrú, te xítí xíá<sup>n</sup> ñúhú àcítí sàhá<sup>n</sup> tnámí sǎ nání nǎrdú sá ìo ndèyáhu, te ní

táhú-á<sup>n</sup> xǎ<sup>n</sup> te acítí ñúhú xítí-xi-á<sup>n</sup> ní sódó-a<sup>n</sup> díquí Jèsús. <sup>4</sup>Te ìí<sup>n</sup> ùú cue téè xíndecu-á<sup>n</sup> ní cudéé<sup>n</sup>-güedé sá dúcá<sup>n</sup> ní quide-a<sup>n</sup>, te ní xítñaha-güedé:

—Ñà túú quide váha ñaha-ǎ<sup>n</sup> dàcá<sup>n</sup> quidé-á<sup>n</sup>, chí íí ní dácúíta-a<sup>n</sup> acítí váha-ǎ<sup>n</sup>. <sup>5</sup>Chí váha-gá ñúu cuyáhu acítí-ǎ<sup>n</sup> sá ùni cièndú díhú<sup>n</sup> denàriú, te díhú<sup>n</sup> sǎ cùyáhu acítí-ǎ<sup>n</sup> cuu cuendá ñáyiú ndàhú ní cùu —càchí-güedé xítñaha-güedé.

Te ní tenàa-güedé ñaha-á<sup>n</sup> sǎ dúcá<sup>n</sup> ní quide-a<sup>n</sup>.

<sup>6</sup>Te Jèsús ní xáha<sup>n</sup>-gǎ xii-güedé:

—Chí dǎná, vá dásátú-ndó ìni ñadìhí-a, chí sá ní quide ñaha-a<sup>n</sup> xii-í cúú-xí ìí<sup>n</sup> sá vǎha. <sup>7</sup>Chí cue ñáyiú ndàhú duca<sup>n</sup>-ni cùtnahá ñáyiú-á<sup>n</sup> tnuú-ndó, te nání òré càchí ìní-ndó te chindee-ndǒ-yu. Dico yúhú chí vá ncháá ndùu cundecu ndìhi ñaha-í xii-ndo ñùyíú-a. <sup>8</sup>Te ñadìhí-a ní quide-a<sup>n</sup> ìí<sup>n</sup> sá vǎha ndèè není ní ndacu-a<sup>n</sup>, chí sá dúhá ní quide ñaha-a<sup>n</sup> xii-í ní chihi ñaha-a<sup>n</sup> àcítí, te xíá<sup>n</sup> cada ìní-ndó sǎ sǎ quide túha-a<sup>n</sup> yiqui cùñú-í cuendá quíndúxi-xi. <sup>9</sup>Te na càchí tnúhu ndáá-í xii-ndo sǎ ndèni ní cuu nihí ñuyíú ná càhá<sup>n</sup> ñáyiú tnúhu-í, te càhá<sup>n</sup>-yu tnahá cuendá ñadìhí-a cuendá quiní nchaa ñáyiú nàcuáa ní quide-a<sup>n</sup>, te duca<sup>n</sup> vǎ nàcuànaá-yu —càchí-gá xǎha<sup>n</sup>-gǎ xii-güedé.

**Té Jùdás ndúcú-dé nàcuáa cada-dé cuáha cuendá-dé Jèsús núu cue téè cùu úhú ìní ñáhá xii-gá**

(Mt. 26:14-16; Lc. 22:3-6)

<sup>10</sup>Te té Jùdás Iscarioté ní sáhá<sup>n</sup>-dé ní ndatnúhu-dé ndìhi cue téè cùu

dítú cúnù sá cuáha cuèndá-dé Jèsús núú-güedě, te núú tnàhá té Jüdás-á<sup>n</sup> cúú ùxúú tnàhá cue téé xica cuu ndihi-gá ní cùu.

<sup>11</sup>Te òré duca<sup>n</sup> ní ndatnúhu-dé ndihi-güedé, te ío ní cudíí iní-güedé, te ní xáha<sup>n</sup>-güedě xii-dé sá cuáñaha-güedě díhú<sup>n</sup> xii-dé. Te té Jüdás-á<sup>n</sup> ní ngúíta-dé ndúcú-dě nàcuáa cada-dé cuáha cuèndá-dé Jèsús núú-güedě.

**Cùdini Jesús ndihi cue téé xica cuu ndihi-gá**

*(Mt. 26:17-29; Lc. 22:7-23; Jn. 13:21-30; 1 Co.11:23-26)*

<sup>12</sup>Te ní sáá nduu ní quesaha vico pascuá, vico ñá túú xèxi ñáyiú pàà sá ñà túú yìhi levadurá, te diu-ni nduu-á<sup>n</sup> sáhní-güedě ì<sup>n</sup> mběé líhli xèxí-yu nduu vico pascuá-á<sup>n</sup>. Te cue téé xica cuu ndihi Jesús ní xicá<sup>n</sup> tnúhú-güedě núú-gă, te xăha<sup>n</sup>-güedě xii-gá:

—Mèstrú, véxi-ndí xicá<sup>n</sup> tnúhú-ndí núú-n nùu ndèè cáá vèhe cuiní-n càda túha-ndí sá cùdini-o sacuaa nduu vico pascuá —càchí-güedé xăha<sup>n</sup>-güedě xii-gá.

<sup>13</sup>Te Jèsús ní xáha<sup>n</sup>-gă xii úú-ni tnàhá cue téé xica cuu ndihi-gá:

—Chí cuáhá<sup>n</sup> xití ñuú-á<sup>n</sup>, te yàcá<sup>n</sup> naníhí-ndó ì<sup>n</sup> téé tànehe yóó ndute, te téé-á<sup>n</sup> cándèndaha-ndo-dě quíhí<sup>n</sup>. <sup>14</sup>Te núú ndèdacàa vehe na ndíhu-dé te xíá<sup>n</sup> quíhu-ndo. Te cúñaha-ndo xii xítóhó vehe-á<sup>n</sup>: “Yaá cúú Mèstrú càchí-gá sá nùu ndèdacàa xichi xití vehe-n cuáñaha nùu-n xii-gá cùdini-gá ndihi cue téé xica cuu ndihi-gá sacuaa nduu pascuá”, duha cúñaha-ndo. <sup>15</sup>Te dàtnùní danèhè ñáhá-dě xii-ndo

ì<sup>n</sup> quartú cahnú càa núú ñnu, chi vehe yòdo tnaha cuu-xi, te sa ní quide túha-dé nchaa sá nándíhi, te nchòhó dicó-nă comidá cada túha-ndo cùdini-o —cachí-gá xăha<sup>n</sup>-gă xii-güedé.

<sup>16</sup>Te cue téé-á<sup>n</sup> ní xica-güedé cuáhá<sup>n</sup>-güedé xití ñuú-á<sup>n</sup>, te nchaa-ni nàcuáa ní xáha<sup>n</sup> Jèsús ní cuu. Te ní quide túha-güedé sá cùdini-güedé ndihi-gá sacuaa nduu vico pascuá-á<sup>n</sup>.

<sup>17</sup>Te sátá ní cundiquí<sup>n</sup> te ní quexìo Jesús ndihi ndi ùxúú cue téé xica cuu ndihi-gá. <sup>18</sup>Te cuánguihu-gá mèsá ndihi-güedé cuèndá cùdini ndihi ñaha-gá xii-güedé, te òré yíhí-gă mèsá ndihi-güedé, te xăha<sup>n</sup>-gă xii-güedé:

—Na càchí tnúhu ndáá-í xii-ndo să ì<sup>n</sup> nchohó cue téé xèxi ndihi ñaha xii-í cuáha cuèndá ñáhá-ndó nùú cuè téé cùu úhú iní ñáhá xii-í —càchí-gá xăha<sup>n</sup>-gă xii-güedé.

<sup>19</sup>Te sá dúcá<sup>n</sup> ní xáha<sup>n</sup>-gă xii-güedé, te ncha-güedé ní ngúíta-güedé cùndíyí-güedé. Te da ì<sup>n</sup> da ì<sup>n</sup>-güedé ní ngúíta-güedé xicá<sup>n</sup> tnúhú-güedé núú-gă, te xăha<sup>n</sup>-güedě xii-gá:

—¿Ná díú yùhú duca<sup>n</sup> sàni iní-n càda-í-u? —càchí-güedé xăha<sup>n</sup>-güedě xii-gá.

<sup>20</sup>Te Jèsús ní xáha<sup>n</sup>-gă xii-güedé: —Diu-ni ì<sup>n</sup> nchòhó cue téé úxúú xicá cùu ndihi-í, téé na dàquèndaha còhó òré daquèndaha-í, téé-á<sup>n</sup> cuáha cuèndá ñáhá-dě xii-í núú cuè téé cùu úhú iní ñáhá. <sup>21</sup>Te yúhú Téé cùu ñaní tnáhá-ndó nchà-ndo ñuhu ichi-í cuáhá<sup>n</sup>-í ndoho-í nàcuáa càhá<sup>n</sup>-xi núú tütú Yă Ndiöxí. Dico ndàhú ní cuu téé duca<sup>n</sup> na cuáha

cuendá ñáhá xii-í núú cuè téé cùu úhú iní ñáhá, chi váha-gá sá vǎ cacú tǎe-á<sup>n</sup> cundecu-dé ní cùu, te ñá dǎú sǎ ñí cacu-dé te duca<sup>n</sup> càda-dé —càchí-gá xǎha<sup>n</sup>-gǎ xii-güedé.

<sup>22</sup>Te ñini cùdini cue téé xica cuu ndihi Jesús ní quehe<sup>n</sup>-gá pàá, te ní ndacá<sup>n</sup> táhú-gǎ núú Yǎ Ndiöxí, te dǎtnùní ní táhú cuèchi-gá, te ní ngüíta-gá dácǎhñu ñaha-gǎ xii-güedé, te xǎha<sup>n</sup>-gǎ:

—Chí quéhé<sup>n</sup> pàá-a caxi-ndo, te cada iní-ndó sǎ cúú-xí dǎtná yiqui cùñú-í —càchí-gá xǎha<sup>n</sup>-gǎ xii-güedé.

<sup>23</sup>Te ní quehe<sup>n</sup>-gá vǎsú ñúhú ndudí ndéhé yoho yàha stilé, te ní ndacá<sup>n</sup> táhú-gǎ núú Yǎ Ndiöxí, te dǎtnùní ní ngüíta-gá sǎñaha-gǎ xii-güedé cuendá coho-güedé luha luha sá ñúhú xǎtí-xi, te nchaa-güedé ní xihí. <sup>24</sup>Te ní xǎha<sup>n</sup>-gǎ xii-güedé:

—Ndudí ndéhé yoho yàha stilé-a cada iní-ndó sǎ cúú-xí dǎtná ñíñí-í sá cǎtí òré cahni ñaha-güedé xii-í. Te sá dúcá<sup>n</sup> cǎti ñíñí-í xǎá<sup>n</sup> cutnùní ndáá sá Yǎ Ndiöxí cada-gá ingá núú sǎ váha sá cúú-xí vǎi ñǎyiu dǎtná ní cachí-gá cada-gá. <sup>25</sup>Te na càchí tñuhu ndáá-í xii-ndo sǎ vítná-ñǎ duha xǎhi-í ndudí ndéhé yoho yàha stilé-a te vǎ cóhó-gǎ-í, dico na sǎá nduu cùndecu-í núú ndécú Yǎ Ndiöxí táxí tñuni-gá, te dǎvǎ-á<sup>n</sup> cada iní-í sǎ dǎtná sǎ cóhó tucu-í chi ío cudíí iní-í —càchí-gá xǎha<sup>n</sup>-gǎ xii-güedé.

**Jèsús càhá<sup>n</sup>-gá sǎ tǎ Pèlú cùñaha-dé xii ñáyiu sǎ ñà túú xìní ñáhá-dé xii-gá**

(Mt. 26:30-35; Lc. 22:31-34; Jn. 13:36-38)

<sup>26</sup>Te Jèsús ní xita-gá ñí<sup>n</sup> ndudú ndihi cue téé xica cuu ndihi-gá,

te dǎtnùní ní xica-gá cuáhá<sup>n</sup>-gá ndihi-güedé yucu Ólívú. <sup>27</sup>Te yàcá<sup>n</sup> ní xǎha<sup>n</sup>-gǎ xii-güedé:

—Na càchí tñuhu-í xii-ndo sǎ ncháá-ndó dàña nihnu ñaha-ndo xii-í niú vitna, chi quee ndáá-xi nàcuáa càhá<sup>n</sup>-xi núú tütú Yǎ Ndiöxí núú càchí-xi: “Yúhú cuáha-í tñuhu cahni-güedé téé cùu toli, te nchaa mbéé-dé ndihi-güedé cuténuu”, duha càchí-xi núú tütú-gá. <sup>28</sup>Dico na cùú-í te ndoto-í te codonù-í núú-ndó quǎhñ distritú Galileá —càchí-gá xǎha<sup>n</sup>-gǎ xii-güedé.

<sup>29</sup>Te té Pèlú ní xǎha<sup>n</sup>-dǎ xii-gá: —Te cuèi nchaa-güedé ná dǎndóo ñaha-güedé xii-n, dico yúhú chi vǎ dǎndóo ñaha-í xii-n —càchí-dé xǎha<sup>n</sup>-dǎ xii-gá.

<sup>30</sup>Te Jèsús ní xǎha<sup>n</sup>-gǎ xii-dé: —Na càchí tñuhu ndáá-í xii-n sǎ niú vitna cùmání-gǎ cana líhi úú xito, te úní xito càhá<sup>n</sup>-n nñú ñǎyiu sǎ ñà túú xìní ñáhá-n xii-í —càchí-gá xǎha<sup>n</sup>-gǎ xii-dé.

<sup>31</sup>Dico té Pèlú ní càhá<sup>n</sup> ñíí-dé, te xǎha<sup>n</sup>-dǎ xii-gá:

—Cuèi na cùu ndihi ñaha-í xii-n dico vǎ càhá<sup>n</sup>-í núú ñǎyiu sǎ ñà túú xìní ñáhà-í xii-n —càchí-dé xǎha<sup>n</sup>-dǎ xii-gá.

Te nchaa dava-gá cue téé xica cuu ndihi-gá ñuu-ni duca<sup>n</sup> ní xǎha<sup>n</sup>-güedé xii-gá.

**Jèsús càhá<sup>n</sup> ndihi-gá Yǎ Ndiöxí ñí<sup>n</sup> xichi núú nání Gètsemaní**

(Mt. 26:36-46; Lc. 22:39-46)

<sup>32</sup>Te Jèsús cuáhá<sup>n</sup>-gá ndihi cue téé xica cuu ndihi-gá ñí<sup>n</sup> xichi núú nání Gètsemaní. Te òré ní quexio-gá ndihi-güedé xǎá<sup>n</sup>, te ní xǎha<sup>n</sup>-gǎ xii-güedé:

—Chí cúnúćo iha cundetu-ndo na quìhí<sup>n</sup>-í yàcá<sup>n</sup> cáhá<sup>n</sup> ndìhi-í Yă Ndiöxí —càchí-gá xăha<sup>n</sup>-gă xii-güedé.

<sup>33</sup>Te ndêca-gá té Pèlú, ndìhi té Jăcobó, ndìhi té Juàá cuáhá<sup>n</sup>, te ñá túú tnàhí-gá cúú văha iní-gá te ní ngüfta-xi súúni ndìhú iní-gá. <sup>34</sup>Te ní xăha<sup>n</sup>-gă xii cue tée úní-á<sup>n</sup>:

—Súúni ndìhú iní-í dătná sá cùú-í, te chí quéndöo iha te vă cùdú-ndó —càchí-gá xăha<sup>n</sup>-gă xii-güedé.

<sup>35</sup>Te sa ñunchií luha ní xica ndehe Jèsús núú ndécú-güedě, te ní ngáundeyi-gá ndée ñuhu càhá<sup>n</sup> ndìhi-gá Tătá-gă Dútú Ndiöxí sá nŭu vă cündèe iní-gá taunihnu ñaha-gă xii-gá cuendá nchaa năcuáa yăha-gá. <sup>36</sup>Te òré càhá<sup>n</sup> ndìhi Jèsús Tătá-gă Dútú Ndiöxí, te xăha<sup>n</sup>-gă:

—Yòhó tătá mée-í, nchaandi túhú sá văha ndăcu-n quide-n, te càhá<sup>n</sup> ndăhú-í núú-n nŭu vă cündèe iní-n tàunihnu ñaha-n xii-í cuendá sá vă ndóhò-í ná sáà òré, dico vă cadá-n năcuáa càchí iní mée-í chi cada-n năcuáa càchí mee-n —càchí-gá xăha<sup>n</sup>-gă xii Tătá-gă Dútú Ndiöxí.

<sup>37</sup>Te sátá nŭ yăha ní cáhá<sup>n</sup> ndìhi-gá Tătá-gă Dútú Ndiöxí, te cuánuhú-gá núú nŭ dándöo-gá cue tée úní-á<sup>n</sup>, te xixídí-güedé òré ní nasáá-gá, te ní xăha<sup>n</sup>-gă xii té Pèlú:

—Xímú, ĩnáa sama xidí-n? ĩNáa ñá cündèe tnahi núú-n vă cùdú-ni-n cuědicó ĩi<sup>n</sup> òré-ă<sup>n</sup>? —càchí-gá xăha<sup>n</sup>-gă xii-dé.

Te ní xăha<sup>n</sup> tùcu-gá xii-güedé:

<sup>38</sup>—Te chí quéndöo tucu, te cuhu<sup>n</sup> iní-ndó vă cùdú-ndó, te cáhá<sup>n</sup> ndìhi-ndo Yă Ndiöxí cuendá sá vă dăcáhá<sup>n</sup> ñáhá yùcu ñávăha

xii-ndo càda-ndo sá ñà túú tàú-ndó càda-ndo. Te na càchí tnúhu ndáá-í xii-ndo sá nchòhó cuíní-ndó càda-ndo nchaa năcuáa càhá<sup>n</sup>-í dícó-ni sá ñà túú ñihí ndée-ndó —càchí-gá xăha<sup>n</sup>-gă xii-güedé.

<sup>39</sup>Te Jèsús ní xica tucu-gá cuáhá<sup>n</sup>-gá cáhá<sup>n</sup> ndìhi-gá Tătá-gă Dútú Ndiöxí, te diu-ni năcuáa ní xăha<sup>n</sup>-gă díhna xăha<sup>n</sup> tùcu-gá. <sup>40</sup>Te òré ní yăha ní cáhá<sup>n</sup> ndìhi-gá Tătá-gă Dútú Ndiöxí, te cuánuhú tucu-gá núú xĩndecu cue tée úní xícá cùu ndìhi-gá-á<sup>n</sup>, te xidí-ni tucu-güedé òré ní nasáá-gá, te duca<sup>n</sup> nŭ quide-güedé chi súúni ñuhu saní núú-güedě, te ñá ní ñihí-güedě tnúhu cúnaha-güedě xii-gá òré ní nasáá-gá. <sup>41</sup>Te ní sáhá<sup>n</sup> tucu-gá xito cùu úní ní cáhá<sup>n</sup> ndìhi-gá Tătá-gă Dútú Ndiöxí, te òré ní nasáá tucu-gá núú xĩndecu-güedé, te xăha<sup>n</sup>-gă xii-güedé:

—ĭTe náa xidí-ni tucu-ndo?, te vitna vă cùdú-gá-ndó chi sa ní sáà òré cuáha cuendá ñáhá-güedě xii yúhú Tée cùu ñaní tnáhá-ndó nchàa-ndo núú cuè tée nděcu ichi cuehé ichi duha. <sup>42</sup>Te vitna chí ndácöo na quìhí<sup>n</sup>-ó chi sa véxi tée cuáha cuendá ñáhá xii-í núú cuè tée cùu úhú iní ñáhá —càchí-gá xăha<sup>n</sup>-gă xii-güedé.

**Ní tnii-güedé Jèsús ndécá ñaha-güedé xii-gá cuáhá<sup>n</sup>**

(Mt. 26:47-56; Lc. 22:47-53; Jn. 18:2-11)

<sup>43</sup>Te càhá<sup>n</sup> dúcá<sup>n</sup>-ní Jèsús ní quexio té Júdás. Te núú tnáhá tée-á<sup>n</sup> cúú ùxúú tnáhá cue tée xica cuu ndìhi-gá. Te ndìhi-dé vâi cue tée ní quexio, te dava-güedé xĩnehe-güedé machití te dava-güedé

xĩnehe-güedé carrütí. Te cue tée-á<sup>n</sup> nĩ tendaha ñaha cue dútú cúnùu ndihi cue tée dàcuaha ñaha xii ñáyiú nchaa tnúhu ní chídó tnúní ndíi Moisés, ndihi cue tée cùu sacuéhé nũú ñáyiú isràél. <sup>44</sup>Te té Jùdás tée cuáha cuèndá ñáhá xii Jesús sa ní xítñúhu-dé cue tée-á<sup>n</sup> nàcuáa cada-dé cuáha cuèndá ñáhá-dě xii Jèsús núú-güedě. Te duha ní xáha<sup>n</sup>-dě xii-güedé:

—Cundehe-ndo tée na tèyuhu-í, te tée-á<sup>n</sup> tñii-ndo-dě chi tée-á<sup>n</sup> cúú-dě tée ndéé iní-ndó, te ío quíhi iní-ndó càndeca-ndo-dé quíhí<sup>n</sup> —duha ní xáha<sup>n</sup>-dě xii-güedé.

<sup>45</sup>Te òrè ní quexìo té Jùdás ndihi cue tée-á<sup>n</sup> nũú ndécú Jèsús, te ní xáha<sup>n</sup>-dě xii-gá:

—Mèstrú —càchí-dé xǎha<sup>n</sup>-dě xii-gá.

Te ní teyuhu ñaha-dé. <sup>46</sup>Te nchaa cue tée ndihi-dé-á<sup>n</sup> nĩ tñii-güedé Jèsús cuèndá candeca ñaha-güedě xii-gá quíhí<sup>n</sup>. <sup>47</sup>Te ìí<sup>n</sup> cue tée cùndihi Jesús ní tava-dé machití-dé, te ní xehndé-ni-dé ìí<sup>n</sup> xio lóho ìí<sup>n</sup> tée xinu cuechi núú dútú cúnùu, te ní quendeé duu<sup>n</sup> lóho tée-á<sup>n</sup>. <sup>48</sup>Te Jèsús ní xáha<sup>n</sup>-gǎ xii cue tée ní tñii ñaha xii-gá-á<sup>n</sup>:

—Nchòhó, nèhe-ná-ndó màchití, nèhe-ná-ndó càrrutí véxi ní tñii ñaha-ndo xii-í, dàtná quidé-ndó ìí<sup>n</sup> ñadúhú quidé ñaha-ndo xii-í. <sup>49</sup>Te nchaa-ni nduu ní xiní-ndó nĩ xĩndecu-í xití veñúhu càhnu sá ío cùnuu ní xóo danèhè-í ñáyiú, te ñá túú ní tñii ñaha-ndo xii-í. Dico dàcuití sǎ dúhá yǎha-í cuèndá quee ndáá-xi nàcuáa càhá<sup>n</sup>-xi núú tútú Yǎ Ndiǒxí —càchí-gǎ xǎha<sup>n</sup>-gǎ xii-güedé.

<sup>50</sup>Te nchaa cue tée xica cuu ndihi-gǎ ní xinu-güedé ní dándõo ñaha-güedě xii-gá.

**Ìí<sup>n</sup> tée cuechi nĩ xinu-dé**

<sup>51</sup>Te ìí<sup>n</sup> tée cuechi ndëndaha-dě Jèsús cuáhá<sup>n</sup>, te lavichi-dě, ìí<sup>n</sup>-ni dóó yádí yídúcú<sup>n</sup> nuu-dé ñihí-dé, te ní tñii ñaha-güedě xii-dé, <sup>52</sup>dico ní ndacu-dé ní quenuñii-dě te ní dándõo-dé dóó yídúcú<sup>n</sup> nuu-dé-á<sup>n</sup> nĩ xinu-dé.

**Jèsús ndécú-gǎ jùndá**

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup>Te cue tée ní tñii ñaha xii Jesús ndécá ñaha-güedé xii-gá cuáhá<sup>n</sup> núú tée cùu dútú cúnùu-gá. Te xía<sup>n</sup> nĩ tacá nchaa dava-gá cue tée cùu dútú cúnùu, ndihi cue tée cùu sacuéhé nũú ñáyiú isràél, ndihi cue tée dàcuaha ñaha xii-yu nchaa tnúhu ní chídó tnúní ndíi Moisés cuèndá cada-güedé jùndá. <sup>54</sup>Te té Pèlú xica xica-ni nchicú<sup>n</sup> ñáhá-dě xii-gá cuáhá<sup>n</sup> ní sáá-dé ndéé quehé vehe núú ndécú tée cùu dútú cúnùu-gá-á<sup>n</sup>, te xía<sup>n</sup> nĩ ngóo teté-dé yuhu nùhú ndihi cue tée cùu poleciá.

<sup>55</sup>Te cue tée cùu dútú cúnùu ndihi nchaa dava-gá cue tée xĩndecu jùndá ndúcú-güedě ñáyiú dacàa ìí<sup>n</sup> cuéchi díquí Jèsús cuèndá duca<sup>n</sup> nĩhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé. <sup>56</sup>Te cuéi vǎi ñáyiú dàcaá-yu cuéchi díquí-gǎ dico mee-ni sǎ nĩ cahu iní meé-yu ní cáhá<sup>n</sup>-yu, chi tucu càhá<sup>n</sup> ìí<sup>n</sup> tucu càhá<sup>n</sup> ìí<sup>n</sup>-yu. <sup>57</sup>Te davá-yu ní ndacuñí-yu te ní ngúíta-yu

dàcaá-yu i<sup>n</sup> cuéchi neñúú díquí-gǎ, te xǎhǎ<sup>n</sup>-yu xii nchaá cue téé cùnūu:

<sup>58</sup>—Nchúhú ní tecú dóho-ndí cǎchí-dé sá dǎngòyo-dé veñúhu cǎhnu sá ìo cùnūu sá nǐ dǎcǎá cuè téé ñuyíu-a, te dandàa tucu-dé ingá veñúhu saa, òu-ni núú cǎá tnàhí veñúhu-á<sup>n</sup> te xití úní-ni nduu sa nadaxínu-dé, te vǎ cúú-gǎ-xi veñúhu sá nǐ dǎcǎá cuè téé ñuyíu-a, duha cǎchí-dé ní tecú dóho-ndí — cǎchí-yu xǎhǎ<sup>n</sup>-yu xii-güedé.

<sup>59</sup>Dico ni òuca<sup>n</sup> ñǎ túú ní cùu i<sup>n</sup>nuú-yu nchaá tnúhu ní cǎhá<sup>n</sup>-yu.

<sup>60</sup>Te téé cùu dútú cùnūu-gǎ ní ndacuñí-dé tnuú nchaá ñáyi, te xǎha<sup>n</sup>-dǎ xii Jèsús:

—ìNǎ cuèndá duha ndùu tnúhu cǎhá<sup>n</sup> ñáyi-a cuèndá-n? Te cǎhá<sup>n</sup> nǔu nása ndùu tnúhu cǎhá<sup>n</sup>-n — cǎchí-dé xǎha<sup>n</sup>-dǎ xii-gǎ.

<sup>61</sup>Dico Jèsús ñǎ túú tnàhí ni cǎhá<sup>n</sup>-gǎ. Te téé cùu dútú cùnūu-gǎ-á<sup>n</sup> nǐ xǎha<sup>n</sup> tùcu-dé xii-gǎ:

—Cuìní-í cachí tnúhu-n xii-ndí nǔu sá díú Crístú Déhe Yá Ndiòxi Yáá ní tendaha-gǎ véxi ñuyíu-a cùu-n. Te òu Yá Ndiòxi cúú-gǎ Yáá quidé cǎhnu-ndí — cǎchí-dé xǎha<sup>n</sup>-dǎ xii-gǎ.

<sup>62</sup>Te Jèsús ní xǎha<sup>n</sup>-gǎ xii-dé:

—Òu Yáá-á<sup>n</sup> cùu-í, te na cǎchí tnúhu-í xii-ndo sǎ sàá nduu te quini-ndó yǐhú Téé cùu ñaní tnáhá-ndó nchàa-ndo cunucóo-í xio cùha Dútú Ndiòxi Yáá ndácú quide nchaandi túhú sá vǎha. Te dàvá-á<sup>n</sup> quini ñáhá-ndó xii-í quee-í andiu quixi-í ichi xití vícò — cǎchí-gǎ xǎha<sup>n</sup>-gǎ xii-dé.

<sup>63</sup>Te dútú cùnūu-gǎ-á<sup>n</sup> nǐ ndátá-dǎ dóó cání nihnu-dé cuèndá sá ñǎ

túú ní tnàhá iní-dé nàcuáa ní cǎhá<sup>n</sup> Jèsús, te ní xǎha<sup>n</sup>-dǎ xii nchaá cue téé xindecu jündá:

—Nǎ túú-gǎ xini ñuhu-xi cue téé cǎhá<sup>n</sup> nǔu ndǎá sá ndècuéchi-dé àdi ñǎ túú ndècuéchi-dé. <sup>64</sup>Chi sa ní xindedóho-o nàcuáa ndùu tnúhu ní cǎhá<sup>n</sup>-dé ní cǎhá<sup>n</sup> úhú-dé cuèndá Yǎ Ndiòxi, te nchaá-ndo chǐ cǎhá<sup>n</sup> vitna núu nása sàni iní-ndó cùnūu cuèndá téé-a — cǎchí-dé xǎha<sup>n</sup>-dǎ xii-í-güedé.

Te nchaá-güedé ní cachí-güedé sá ná cùu-dé.

<sup>65</sup>Te dava-güedé ní ngüíta-güedé ní tiú díí ñáhá-güedé xii-gǎ, te ní dádǎhu-güedé núú-gǎ, te ní ngüíta-güedé cǎniha-güedé xii-gǎ, te xǎha<sup>n</sup>-güedé:

—ìCǎhá<sup>n</sup> ná cótó ñǎ cúú tǎe ní caniha xii-n! —cachí-güedé xǎha<sup>n</sup>-güedé xii-gǎ.

Te cue téé cùu poleciá ní cani-güedé núú-gǎ.

**Té Pèlú cǎhá<sup>n</sup>-dé núú ñáyi sá ñǎ túú xini-dé Jèsús**

(Mt. 26:69-75; Lc. 22:56-

62; Jn. 18:15-18, 25-27)

<sup>66</sup>Te ndéé xití vehe càa núú ñnu quide-güedé jündá, chi vehe yòdo tnaha cuu-xi, te té Pèlú núcòo-dé quehé vehe-á<sup>n</sup>. Te i<sup>n</sup> xíchí xínú cuèchi núú òtúú cùnūu-á<sup>n</sup> nǐ quexio-xi núú núcòo té Pèlú. <sup>67</sup>Te òré ní xini ñáhá-xí xii-dé núcòo teté-dé yuhu nùhú, te ní xindéhé ñàha váha-xi xii-dé, te xǎha<sup>n</sup>-xi: —Yòhò tnàhá-n cùu-n téé xica cuu ndihi Jesús téé ñuú Nazàrét — cǎchí-xi xǎha<sup>n</sup>-xi xii-dé.

<sup>68</sup>Te té Pèlú ní xǎha<sup>n</sup>-dǎ xii-xi: —Yúhú ñǎ túú xini-í téé-ǎ<sup>n</sup>, te ni ñǎ túú cùnūu iní-í nása ndùu

tnúhu càhá<sup>n</sup>-n —càchí-dé xăha<sup>n</sup>-dě xii-xi.

Te té Pèlú ní xica-dé cuáhá<sup>n</sup>-dé ndàa nacuáa nchíi yuyèhe vehe-á<sup>n</sup>, te ní cana i<sup>n</sup> líhi. <sup>69</sup>Te xíchí xínú cuèchi-á<sup>n</sup> nǐ xíní ñáhá tùcu-xi xii-dé, te xăha<sup>n</sup>-xi xii nchaa ñáyiu xĩndecu-á<sup>n</sup>:

—Diu tée-ă<sup>n</sup> tnàhá-dé xícá cùu-dé ndíhi tée ndèca-güedé cuánguïhu-a —càchí-xi xăha<sup>n</sup>-xi xii-yu.

<sup>70</sup>Dico té Pèlú ñá túú ní nūnuu tucu-dé sá xícá cùu-dé ndíhi Jèsús. Te tna tnaa-ni ní cuu sá dúcá<sup>n</sup> nǐ xáha<sup>n</sup> xíchí-ă<sup>n</sup> xii-dé, te ní xáha<sup>n</sup> tùcu dava cue ñáyiu xĩndecu-á<sup>n</sup> xii-dé:

—Ndáá sá tnàhá-n cùu-n tée xica cuu ndíhi tée ndèca-güedé cuánguïhu-ă<sup>n</sup> chi cùu-n tée distrítú Galileá, te càhá<sup>n</sup>-n dàtná càhá<sup>n</sup>-güedé —càchí-yu xăhá<sup>n</sup>-yu xii-dé.

<sup>71</sup>Te té Pèlú ní xáha<sup>n</sup>-dě xií-yu:

—Nchàcuiti Yá Ndiöxi sá yùhu càhá<sup>n</sup> ndáá-í sá ñà túú xìní-í tée càcunehe-ndo-á<sup>n</sup> —càchí-dé xăha<sup>n</sup>-dě xií-yu.

<sup>72</sup>Te òré-ni-á<sup>n</sup> nǐ cana tucu líhi xito cùu uú, te òré-á<sup>n</sup> nǐ ndacu iní té Pèlú nàcuáa ní xáha<sup>n</sup> Jèsús xii-dé sá cùmání-gă cana i<sup>n</sup> líhi úu xito te úní xito càhá<sup>n</sup>-dé núú ñáyiu sá ñà túú xìní ñáhá-dě xii-gá. Te òré duca<sup>n</sup> nǐ ndacu iní-dé nàcuáa ní xáha<sup>n</sup> Jèsús xii-dé, te ní ndáhyú-dé ní ndixi cuèchi iní-dé.

### Jèsús ndécú-gă núú tǎ Pìlatú

(Mt. 27:1-2, 11-14; Lc. 23:1-5; Jn. 18:28-38)

**15** Te sáta nǐ túndaá te cue tée cùu dútú cúnùu, ndíhi cue tée cùu sacuéhé núú ñáyiu isràèl,

ndíhi cue tée dàcuaha ñaha xii ñáyiu nchaa tnúhu ní chídó tnùní ndíi Moisés, ndíhi nchaa dava-gá cue tée cūnuu ní xĩndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáhá<sup>n</sup> núú tǎ Pìlatú. <sup>2</sup>Te té Pìlatú ní xícá<sup>n</sup> tnúhú-dě núú Jèsús, te xăha<sup>n</sup>-dě xii-gá:

—¿Ndáá sá díú-n cùu-n tée yìndaha ñaha xii ñáyiu isràèl-ă<sup>n</sup>? —càchí-dé xăha<sup>n</sup>-dě xii-gá.

Te Jèsús ní xáha<sup>n</sup>-gă xii-dé:

—Diu-í yíndàha-í-yu —càchí-gá xăha<sup>n</sup>-gă xii-dé.

<sup>3</sup>Te cue tée cùu dútú cúnùu dacao-güedé vài cuèchi díquí-gă.

<sup>4</sup>Te té Pìlatú ní xícá<sup>n</sup> tnúhú tùcu-dé núú-gă, te xăha<sup>n</sup>-dě xii-gá:

—Cáhá<sup>n</sup>, ná cuèndá ñá càhá<sup>n</sup>-n te cundehe nă ndéé duha titní cuèchi dàcaa díquí ñáhá cuè tée-a xii-n —càchí-dé xăha<sup>n</sup>-dě xii-gá.

<sup>5</sup>Dico Jèsús ñá túú tnàhí ni cǎhá<sup>n</sup>-gá te té Pìlatú ío ní cuñúhu-dé sá dúcá<sup>n</sup> ñà túú tnàhí ni cǎhá<sup>n</sup>-gá.

### Cue ñáyiu xăhá<sup>n</sup>-yu xii té Pìlatú sá cǎhí-dě Jèsús

(Mt. 27:15-31; Lc. 23:13-25; Jn. 18:38-19:16)

<sup>6</sup>Te ndí tnahá nduu víco pascuá dácăcu té Pìlatú i<sup>n</sup> tée yìhi vecaá chi duca<sup>n</sup> tnàhí quide-dé, te mee ñáyiu càhá<sup>n</sup>-yu te núu ndèdacàa tée yìhi vecaá-á<sup>n</sup> căcu-dé, te tée-á<sup>n</sup> dácăcu-dé. <sup>7</sup>Te yìhi i<sup>n</sup> tée nàni Barrabás vecaá ndíhi dava-gá cue tée cundíhi-dé. Te té Barrabás-á<sup>n</sup> nǐ sanu ichi-dé ñáyiu ñuú ingá ichi, te ní ngúita-yu ndíhi-dé ní cuu úhú iní-yu cue tée cùchiu<sup>n</sup>, te ní sahani-dé ndíyi núu xǎ<sup>n</sup> ní chihí

ñaha-güedě vecaá xii-dé. <sup>8</sup>Te nchaa ñáyiú ní sáhá<sup>n</sup>-yu núú tě Pilatú, te cáhá<sup>n</sup> ndàhú-yu núú-dě sá ná cádá ñàhi-ni-dé dàtná quídé-dě. <sup>9</sup>Te tě Pilatú ní xáha<sup>n</sup>-dě xií-yu:

—¿Cuini-ndó sá dácacu-í tée yìndaha ñaha xii ñáyiú isràél-ǎ<sup>n</sup>? — cächí-dé xǎha<sup>n</sup>-dě xií-yu.

<sup>10</sup>Te duca<sup>n</sup> ñí cáhá<sup>n</sup> té Pilatú, chi ní cutnùni iní-dé sá dícó sá cuèdú iní cuè dútú cúnùu núú xiá<sup>n</sup> duca<sup>n</sup> ñí quide-güedé ní sáha cuendá ñáhá-güedě xii Jèsús núú-dě. <sup>11</sup>Te cue dútú cúnùu ní xáha<sup>n</sup>-güedě xii nchaa ñáyiú sá ná cǔñáhá-yu xii té Pilatú dácacu-dé té Barrábás, te ní quide-yu ñacuáa ní xáha<sup>n</sup>-güedě.

<sup>12</sup>Te tě Pilatú ní xicá<sup>n</sup> tnúhú-dě núú-yu, te xǎha<sup>n</sup>-dě xií-yu:

—¿Ná cuini-ndó càda-í tée cächí-ndó yìndaha ñaha xii ñáyiú isràél-i? — cächí-dé xǎha<sup>n</sup>-dě xií-yu.

<sup>13</sup>Te nchaá-yu níhi ní cáhá<sup>n</sup>-yu, te xǎhǎ<sup>n</sup>-yu xii-dé:

—iCata caa-dé núú cùrúxí! — cächí-yu xǎhǎ<sup>n</sup>-yu xii-dé.

<sup>14</sup>Te tě Pilatú ní xáha<sup>n</sup>-dě xií-yu:

—¿Te ná cúú cuèchi ní quide-dé te núú duca<sup>n</sup> cuini-ndó càda-í-dé-i? — cächí-dé xǎha<sup>n</sup>-dě xií-yu.

Dico nchaá-yu uu<sup>n</sup>-gá níhi ní cáhá<sup>n</sup>-yu, te xǎhǎ<sup>n</sup>-yu xii-dé:

—iCata caa-dé núú cùrúxí! — cächí-yu xǎhǎ<sup>n</sup>-yu xii-dé.

<sup>15</sup>Te tě Pilatú ní quide-dé ñacuáa ní xǎhǎ<sup>n</sup>-yu xii-dé cuendá sá cùdù-dé núú-yu, te ní dácacu-dé té Barrábás, te ní táuchíú<sup>n</sup>-dě ní cani-güedé Jèsús ndíhi ñii. Te sátá dúcá<sup>n</sup> ñí quide ñaha-güedě xii-gá, te ní táuchíú<sup>n</sup>-dě candeca ñaha-güedě quíhí<sup>n</sup> cata caa ñaha-güedě xii-gá núú cùrúxí.

<sup>16</sup>Te cue tée cùu sandadú ndéca ñàha-güedé xii-gá cuáhá<sup>n</sup> vechiú<sup>n</sup>, te diu-ni xiá<sup>n</sup> cúú vèhe tée cùu gobiernú. Te xiá<sup>n</sup> ñí tacá nchaa dava-gá cue tée cùu sandadú.

<sup>17</sup>Te xiá<sup>n</sup> ñí dácuihnú ñàha-güedé xii-gá ì<sup>n</sup> dóó tǔcuèhé víhí, te ní cadúha-güedé ì<sup>n</sup> coróná iñu ní chihi-güedé díquí-gǎ. <sup>18</sup>Te ní ngüíta-güedé níhi cáhá<sup>n</sup>-güedé cùdìquí ndeé ñáhá-güedě xii-gá, te xǎha<sup>n</sup>-güedé:

—Íío cànnyu cuu yohó tée yìndaha ñaha xii ñáyiú isràél! — cächí-güedé xǎha<sup>n</sup>-güedé xii-gá.

<sup>19</sup>Te cànny-güedé díquí-gǎ ndíhi ì<sup>n</sup> carrutí, te tǔú díí ñáhá-güedé xii-gá, te ngüñí xítí-güedé núú-gǎ quídé-güedé sá nehé-güedé sá yíñùhu núú-gǎ dico ñá ndàá chi dícó cùdìquí ndeé ñáhá-güedé xii-gá. <sup>20</sup>Te sátá dúcá<sup>n</sup> ñí cudíquí ndeé ñáhá-güedé xii-gá, te ní nataunuu ñaha-güedé xii-gá dóó tǔcuèhé víhí sǎ ñí dácuihnú ñàha-güedé, te ní dándíúnuu ñaha-güedé xii-gá dóó méé-gǎ. Te dàtnùni ndéca ñàha-güedé cuáhá<sup>n</sup> núú catá càa ñaha-güedé xii-gá núú cùrúxí.

**Sàta caa-güedé Jèsús núú cùrúxí**

(Mt. 27:32-44; Lc. 23:26-43; Jn. 19:17-27)

<sup>21</sup>Te ichi cuáhá<sup>n</sup>-güedé ndíhi Jèsús ní naníhí-güedé ì<sup>n</sup> tée ñuu Cirené nání-dě Xímú, te déhe-dé cúú ì<sup>n</sup> tée nàni Lijandrú, ndíhi ingá tée nàni Rúfú. Te tě Xímú-á<sup>n</sup> ñúhú-dě ichi duha cuándixi-dé ní sáhá<sup>n</sup>-dé yucu, te ní quide yica-güedé ní xido-dé cùrúxí sá nchídó Jèsús.

<sup>22</sup>Te ndèca-güedé Jèsús cuáhá<sup>n</sup> ì<sup>n</sup> xichi núú nání Gólgotá, te tnúhu-á<sup>n</sup>



quéé-xí: Һ<sup>n</sup> xichi núú nání yìqui díquí ndŷyi, duha quèe-xi tnúhu-á<sup>n</sup>.  
 23 Te ní sáñaha-güedě xii-gá ndudí sá nŷ quéé yúcu nání mŷrrá coho-gá ní cùu dico ñá túú ní xŷhi-gá. 24 Te ní sata caa ñaha-güedě xii-gá núú cùrúxí. Te sátá dúcá<sup>n</sup> te cue tée cùu sandadú-á<sup>n</sup> nŷ xito ndeé-güedé nŷu ndèdacàa-güedé cuu cuèndá-güedé dóó-gă.

25 Te cùu-xi caá Һ<sup>n</sup> dátneé òré ní sata caa ñaha-güedě xii-gá núú cùrúxí. 26 Te ní taxi ndecu-güedé Һ<sup>n</sup> sá ndèé lètrá núú tácàa-gá. Te lètrá-á<sup>n</sup> càhá<sup>n</sup>-xi ná cuèndá duca<sup>n</sup> nŷ quide ñaha-güedě xii-gá. Te duha càhá<sup>n</sup> lètrá-á<sup>n</sup>: “Tée yìndaha ñaha xii ñáyi u isràél”, duha càchí-xi. 27 Te tnàhá úú cue tée cùu ñadúhú ní sata caa-güedé ðiu-ni núú cùrúxí tucu. Te Һ<sup>n</sup>-dé ní sata caa-güedé xio cùha-gá, te ìngá-dé ní sata caa-güedé xio dàtni-gá. 28 Te duca<sup>n</sup> nŷ cuu chi ní quee ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi: “Һ<sup>n</sup>-ni nŷ quide ñaha-güedě xii-gá ndihi cue tée ndècu cuèchi-xi”, duha càchí-xi núú tütú-gá.

29 Te nchaa ñáyi yăha yatni núú tácàa-gá dácuicó-yu díquí-yu te xŷcuèhè ñáhă-yu xii-gá, te xăhá<sup>n</sup>-yu:  
 —Te ná cuèndá duca<sup>n</sup> càa-n tacaa-n xía<sup>n</sup>, te càchí-n să dàngoyo-n veñúhu càhnu sá ò cùnuu te dandàa-n ìngá veñúhu saa, te xití úní-ni nduu sa nadaxínu-n càchí-n. 30 Te vitna tanùu núú cùrúxí-á<sup>n</sup> dàcácu-n mèe-n — cachí-yu xăhá<sup>n</sup>-yu xii-gá.

31 Te ðiu-ni duca<sup>n</sup> nŷ quide cue tée cùu dútú cúnùu, ndihi cue tée dàcuaha ñaha xii ñáyi nchaa

tnúhu ní chídó tnùní ndíi Moisés, chi ní cudíquí ndeé ñáhá-güedě xii-gá, te ní xítñaha-güedé:

—Tée-a ní ndacu-dé ní dácácu nihnu-dé ñáyi u, ÷te ná cuèndá ñá ndácú-dě dàcácu nihnu-dé mée-dě-i? 32 Te núu ndáá sá dŷú-dě cùú-dě Cristú Yaá ní tendaha Yă Ndiöxí véxi ñuyíu-a quindaha ñaha xii ñáyi u isràél, te na cùndehe-o nuu-dé núú cùrúxí, cuèndá quíndáá iní-ó-dě —càchí-güedé xítñaha-güedé.

Te ndeé tnàhá cue tée tàcaa xio xio ðiñi-gá xŷcuèhè ñáhá-güedě xii-gá.

### Ní xŷhí Jèsús

(Mt. 27:45-56; Lc. 23:44-49; Jn. 19:28-30)

33 Te òré ní cuu cuádava nduu, te ní cunee nihi ñuyíu, te duca<sup>n</sup>-ni càa ní cuu ndeé caá úní sacuaa. 34 Te ðiu-ni òré caá úní sacuaa-á<sup>n</sup> nihi ní cáhá<sup>n</sup> Jèsús, te xăha<sup>n</sup>-gă xii Tătá-gă Dútú Ndiöxí:

—Elòí, Elòí, láma sabàctaní — càchí-gá xăha<sup>n</sup>-gă.

Te tnúhu-á<sup>n</sup> quéé-xí: Ndiöxí mée-í, Ndiöxí mée-í, ná cuèndá ní dáñá ñaha-n xii-í, duha quèe-xi tnúhu-á<sup>n</sup>.

35 Te dava cue tée xŷndecu yatni núú tácàa-gá-á<sup>n</sup> nŷ tecú dóho-güedé nàcuáa ní cáhá<sup>n</sup>-gá, te ní xítñaha-güedé:

—Chí cùndèdóho chi càna-dé té Èliás —càchí-güedé xítñaha-güedé.

36 Te Һ<sup>n</sup> cue tée xŷndecu-á<sup>n</sup> xínú-dě ní sáhá<sup>n</sup> ní chindóyo-dé luha cáchí xití ndudí íá, te ní chinenu-dé díquí Һ<sup>n</sup> yutnu càni te ní ndocani-dé chíhí-dě yuhu-gá cuèndá coho-gá. Te ní xáha<sup>n</sup> cuè tée xŷndecu-á<sup>n</sup> xii tée-á<sup>n</sup>:

—Cundetü tnaa na cùndehe-o nacoto núu quixi té Èliás nunehe ñaha-dě xii-dé núu cùrúxí — cächí-güedé xáha<sup>n</sup>-güedě xii-dé.

<sup>37</sup>Te Jèsús níhi ní canasaa-gá te ní xíhí-ni-gá. <sup>38</sup>Te sátá dúcá<sup>n</sup> te ní ndátá dǒó cúú còrtiná xití veñúhu càhnu sá ïo cùnnu ní quée dava ndáá, te ndàa núu ñnu ní ngüfta-xi ní ndátá. <sup>39</sup>Te tée cùu capitá<sup>n</sup> nútñí-dé ndàa núu Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndáá ndisa sá díú tée-a cùu-dé Déhe Yá Ndiòxí ní cùu — duha ní cachí-dé.

<sup>40</sup>Te xica xñutñí ïí<sup>n</sup> úú ñáyiú ðíhí ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalèná, ndíhi tá Salómé, ndíhi tá Màriá náná tē Chèè ndíhi té Jàcobó tée cächí-güedé cúú líhli-gá. <sup>41</sup>Te cue ñáyiú ðíhí-á<sup>n</sup> ñ xica cuú-yu ndíhi Jèsús distritú Galiléa ní xinu cuèchí-yu núu-gǎ. Te cue ñáyiú ðíhí-á<sup>n</sup> nchicú<sup>n</sup> ñáhǎ-yu xii-gá ní quexìo ndéé ñuú Jerusalén ndíhi dava-gá ñáyiú ðíhí nchicú<sup>n</sup> ñáhá xii-gá cuáhá<sup>n</sup>.

### Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

<sup>42</sup>Te cùu-xi nduu vispré nduu ndètátú ñáyiú. Te nduu-á<sup>n</sup> xíquide túha-yu sá cúú ìngá nduu nduu ndètátú-yu-á<sup>n</sup>, te ðiu-ni nduu-á sa ní cuaa víhi, <sup>43</sup>te ïí<sup>n</sup> tée nani Cheé tée ñuú Arimàtea ní cuyí-dě ní sáhá<sup>n</sup>-dé núu tē Pilatú, te ní xáha<sup>n</sup>-dě sá ñnu vá cùndèe iní-dé ðañá-dě chindúxi-dé yiqui cùñú Jèsús. Te tnàhá té Chèè-á<sup>n</sup> cúú-dě ïí<sup>n</sup> tée cùnnu cundihi-dé cue tée

quide jundá, te tnàhá-dé ndétú-dě sáá nduu ndíhu ndaha ñaha Yá Ndiòxí xii-dé ndíhi cue ñáyiú. <sup>44</sup>Te té Pilatú ïo ní cuñúhu-dé sá dúcá<sup>n</sup> ïo ndíhi ní xíhí Jèsús, te ní cana-dé tée cùu capitá<sup>n</sup> ní xícá<sup>n</sup> tnúhú-dě núu-dě ñnu ndisa sá sà ní xíhí-gá. <sup>45</sup>Te tée cùu capitá<sup>n</sup>-á<sup>n</sup> ñ xáha<sup>n</sup>-dě xii té Pilatú sá ndàá ní xíhí Jèsús, núu xíá<sup>n</sup> té Pilatú-á<sup>n</sup> ñ sáha-dé tnúhu chindúxi té Chèè-á<sup>n</sup> yiqui cùñú-gá. <sup>46</sup>Te té Chèè-á<sup>n</sup> ñ saa<sup>n</sup>-dé ïí<sup>n</sup> dóó vǎha, te ní sáhá<sup>n</sup>-dé ní nunehe-dé yiqui cùñú Jèsús núu cùrúxí, te ní chidúcú<sup>n</sup> nuu-dé yiqui cùñú-gá dóó vǎha sá ñ saa<sup>n</sup>-dé-á<sup>n</sup>, te dàtnùní néhé-dě yiqui cùñú-gá cuáhá<sup>n</sup> ní chihi-dé ïí<sup>n</sup> yaú nchí yiqui naha càva, te ní sadí-dé yuhu yaú-á<sup>n</sup> ndíhi ïí<sup>n</sup> yúú quèhé<sup>n</sup>. <sup>47</sup>Te tá Màriá Magdalèná, ndíhi tá Màriá náná tē Chèè ní xiní-yu núu ñ chihi-dé yiqui cùñú Jèsús.

### Ní ndoto Jèsús

(Mt. 28:1-10; Lc. 24:1-12; Jn. 20:1-10)

**16** Te sátá ñ cundiquí<sup>n</sup> nduu ndètátú ñáyiú, te tá Màriá Magdalèná, ndíhi tá Salómé, ndíhi tá Màriá náná tē Jàcobó ní saá<sup>n</sup>-yu acití sáhá<sup>n</sup> tnámí cuèndá canehé-yu quíhí<sup>n</sup> chihí-yu yiqui cùñú Jèsús. <sup>2</sup>Te ndumìngú nehé-ni òré vitna váha váha ní xínu coto núu nchìcanchí ní quexìo-yu núu nchí yaú yíhí yiqui cùñú Jèsús. <sup>3</sup>Te ní xítñàhá-yu:

—Yoo cùñaha-o xòcani yúú ndèdí yuhu yaú-a, chi vá yǒo tnàhí ndècu ïha —cachí-yu xítñàhá-yu.

<sup>4</sup>Te òré ní xíndéhé vǎha-yu te ní xiní-yu sá yúú cáhnú ndèdí yuhu yaú-á<sup>n</sup> ïí<sup>n</sup> xio-ná ndécú. <sup>5</sup>Te

cuánguihú-yu xití yaú-á<sup>n</sup>, te ní xini-yu núcóo íi<sup>n</sup> espíritú xínú cuèchi núú Yă Ndióxi ndàa xio cuhá-yu, te càa-xi datná cáá íi<sup>n</sup> téé cuechi, te nihnu-xi íi<sup>n</sup> dóó cuixí<sup>n</sup> dóó cání, te ní yùhú-yu òré ní xini-yu espíritú-á<sup>n</sup>. <sup>6</sup>Te espíritú-á<sup>n</sup> nǐ xáha<sup>n</sup>-xi xii-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yiqui cuñú Jèsús téé ñúú Nazàrét téé ní sahani-güedé núú cùrúxí, dico ñá túú-gă yiqui cùñú-dé ndécú ìha chi sa ní ndoto-dé, te chí cùndèhe núú nǐ sacá<sup>n</sup>-güedé yiqui cùñú-dé te quiní-ndó nă ñá túú-gă-dé. <sup>7</sup>Te chí cuáhá<sup>n</sup> núú ndécú tǎ Pèlú ndìhi dava-gá cue téé ní xica cuu ndìhi-dé, te duha cúñaha-ndo xii-güedé: “Jèsús codonùu-gá núú-ndó quǐhí<sup>n</sup> distrítú Galiléa, te yacá<sup>n</sup> quiní-ndó-gă dàtná ní cachí-gá xii-ndo”, duha cúñaha-ndo xii-güedé —càchí espíritú-á<sup>n</sup> xăha<sup>n</sup>-xi xii-yu.

<sup>8</sup>Te cue ñáyiú dǐhí-á<sup>n</sup> ìo ní yùhú-yu, te ní quene cunú-yu cuánuhú-yu, te quǐdì ñaha-ná-xi xii-yu sá ìo ní yùhú-yu, te ñá túú tñàhí ná tnúhu ni xăhă<sup>n</sup>-yu xii cue ñáyiú ní naníhí-yu ichi cuèndá sá ìo ní yùhú-yu.

**Tá Màriá Magdalèná ní xini-xi Jèsús**  
(Jn. 20:11-18)

<sup>9</sup>Te sátá dúcá<sup>n</sup> nǐ ndoto Jèsús ndumìngú nehé-ni-á<sup>n</sup>, te díhna nuu-gă tá Màriá Magdalèná ní quee túu-gá núú-xi, te ðiu tá Màriá-á<sup>n</sup> cúú-xí xíchí nǐ xíhi ñaha úsá espíritú cùndìhi yucu ñávăha ni cùu, te Jèsús ní queñuhu-gá ncha

espíritú-á<sup>n</sup> yiqui cùñú-xi. <sup>10</sup>Te xíchí-ă<sup>n</sup> nǐ sáhá<sup>n</sup>-xi ní xitnũhu-xi cue téé ní xica cuu ndìhi Jèsús nàcuáa ní cuu, te xǐndáhí-güedé sá ndìhú iní-güedé òré ní quexìo-xi núú ndécú-güedé. <sup>11</sup>Te òré ní xáha<sup>n</sup> tǎ Màriá xii-güedé sá nǐ ndoto Jèsús ndìhi sá nǐ xini ñáhá-xí xii-gă, te ñá túú ní sàndáá iní-güedé.

**Jèsús ní quee túu-gá núú úú cue téé ní xica cuu ndìhi-gá**

(Lc. 24:13-35)

<sup>12</sup>Te úú tñàhá cue téé ní xica cuu ndìhi Jèsús ñúhú-güedé ichi cuáhá<sup>n</sup>-güedé yucu, te uu<sup>n</sup>ni ní quee túu-gá núú-güedé, te ní dácótó ñàha-xi xii-güedé sá ñà túú-gă cáá-gă dàtná cáá-gă. <sup>13</sup>Te cue téé úú-á<sup>n</sup> nǐ xica-güedé cuáhá<sup>n</sup>-güedé ní xitnũhu-güedé nchaa dava-gá cue téé ní xica cuu ndìhi-gá sá nǐ xini ñáhá-güedé xii-gă, dico ðiu-ni duca<sup>n</sup> ñà túú ní sàndáá iní cue téé-á<sup>n</sup> tnũhu ní cáhá<sup>n</sup>-güedé.

**Jèsús xăha<sup>n</sup>-gă xii cue téé ní xica cuu ndìhi-gá nàcuáa ndùu chiu<sup>n</sup> cada-güedé**

(Mt. 28:16-20; Lc. 24:36-49; Jn. 20:19-23)

<sup>14</sup>Te ndí ùxí íi<sup>n</sup> cue téé ní xica cuu ndìhi Jèsús yíhí-güedé mèsá xéxi-güedé, te ní quee túu-gá núú-güedé te ní tenàá ñáhá-gă xii-güedé cuèndá sá ìo sàá iní-güedé ñá túú sàndáá iní ñáhá văha-güedé xii-gă, chi ñá túú ní cuini-güedé quíndáá iní-güedé nàcuáa ní xáha<sup>n</sup> ñáyiú ní xini ñáhá xii-gă sátá nǐ yáha ní ndoto-gă. <sup>15</sup>Te ní xáha<sup>n</sup>-gă xii-güedé:

—Quíhí<sup>n</sup>-ndó ñihí ñuyú cáhá<sup>n</sup>-ndó núú nchàa ñáyiú

tnúhu váha tnúhu sá càhá<sup>n</sup>  
 nàcuáa naníhí tàhú-yu. <sup>16</sup>Te  
 nchaa ñáyiú na quíndáá iní  
 tnúhu-á<sup>n</sup> te cuanduté-yu, te  
 naníhí tàhú-yu, dico nchaa  
 ñáyiú vá quíndáá iní tnúhu-á<sup>n</sup>  
 te cuíta nihnú-yu. <sup>17</sup>Te nchaa  
 ñáyiú na quíndáá iní ñáhá xii-í  
 te cadá-yu sá vǎ yǎo tnàhí ndàcu  
 cada, te cacunehe ñàhá-yu xii-í,  
 te queñuhú-yu nchaa espíritú  
 cúndìhi yucu ñávǎha yìhi ñaha  
 xii ñáyiú. Te uu<sup>n</sup>ni ndacú-yu  
 cáhá<sup>n</sup>-yu ingá núú tnúhu sá  
 vǎtá dácuaàha-gá-yu. <sup>18</sup>Te cuèi  
 na tnèi-yu cóo dǎé<sup>n</sup> dico ñá  
 túú nǎ cada ñaha-dì xii-yu, te  
 cuèi venènú ná cáxǐ-yu dico ñá  
 túú nǎ tnahá-yu, te tendàhá-yu

cue ñáyiú cùhú te ndúha-yu —  
 càchí-gá xǎha<sup>n</sup>-gǎ xii-güedé.

**Jèsús cuánda-gá andiu**

*(Lc. 24:50-53)*

<sup>19</sup>Te sátá ñǎ yáha duca<sup>n</sup> ñǎ  
 xáha<sup>n</sup> Jèsús xii cue téé ní xica  
 cuu ndìhi-gá, te ní ndanchita-gá  
 cuánda-gá andiu te ní ngóo-gá  
 xio cùha Dútú Ndiǒxí. <sup>20</sup>Te cue  
 téé-á<sup>n</sup> ñǎ xica-güedé cuáhá<sup>n</sup>-güedé,  
 te ní ngüíta-güedé càhá<sup>n</sup>-güedé  
 tnúhu Xítohó Jesucristú nchaa  
 xichi. Te mee-gǎ ní chindee  
 ñàha-gá xii-güedé ní quide-güedé  
 nchaa sá vǎ yǎo tnàhí ndàcu cada  
 cuendá cutnùní iní ñáyiú sá ndàá  
 càhá<sup>n</sup>-güedé tnúhu-gá. Duha ní cuu  
 dàvá-á<sup>n</sup>.

# TNÚHU NÍ CHÍDÓ TNÙNÍ TÉ LÚCÁ

Nàcuáa ní ngódó tnùnì  
tnúhu Yá Ndiöxí

**1** Te vài ñáyiú chìdo tnuní-yu nchaa nàcuáa ndùu tnúhu ñihí-yu nàcuáa ní cuu, te nchoo tnàhá-ó sà naha-o nacuáa ní cuu. <sup>2</sup>Te ñu-ni nchaa tnúhu chìdo tnuní-yu-á<sup>n</sup> cúú-xí tnúhu ní cáhá<sup>n</sup> nchaa cue téé ní xiní ndáá nàcuáa ní cuu ndéé díhna, cue téé ní cáhá<sup>n</sup> tnúhu Yá Ndiöxí. <sup>3</sup>Te yúhú sa ní cuu nduu quide cuendá-í nchaa nàcuáa ní cuu, núu xíá<sup>n</sup> ní sani iní-í tee váha-í nchaa tnúhu-a núú tütú sá cúú-xí yòhó té Tëofilú chi ío váha cùu iní-í sá cúú-xí-n, <sup>4</sup>te tèe-í cuendá cutnùnì iní-n sá sá ndáá cúú-xí nchaa sá ñí dánèhè ñáhá-güedè xii-n.

Ìí<sup>n</sup> espíritú xínú cuèchi núú  
Yá Ndiöxí càchí-xi sá cécú  
ìí<sup>n</sup> téé cunani Juáá

<sup>5</sup>Te cútñàhá ní xíndaha té Hèrodés ñáyiú distritú Jùdeá dàvá-á<sup>n</sup> ñí xíndecu ìí<sup>n</sup> dútú ní xínani-dě Zacàriá, te ní cundìhi-dé cue dútú Àbiás. Te ñadìhí-dé ní xínani-a<sup>n</sup> Èlisabét, te ñaha-á<sup>n</sup> ñí cuu-a<sup>n</sup> ñaní tnáhá ndii Àrón. <sup>6</sup>Te ndi ndùú-yu ío ní quide ndáá-yu

núú Dütú Ndiöxí, chi ní tñí-yu nchaa tnúhu ní cáhá<sup>n</sup>-gá. <sup>7</sup>Te ñá tútú ñí ìí<sup>n</sup> déhe-yu, chi duca<sup>n</sup> tǎhú tǎ Elisabét sá vǎ cóo děhe-a<sup>n</sup>, te duca<sup>n</sup> ndi nduú-yu ío ní sahnú-yu.

<sup>8</sup>Te ìí<sup>n</sup> nduu xínu cuechi tucu té Zacàriá ndihi nchaa cue téé cundìhi-dé núú Yá Ndiöxí xití veñúhu. <sup>9</sup>Te dàvá-á<sup>n</sup> ñí xito ndéé-güedé cuendá cutnùnì iní-güedé nùu ndèdacàa-güedé quíhu núú nàá xití veñúhu-á<sup>n</sup> cahmi-güedé sá sàhá<sup>n</sup> tnámí, te ní cutnùnì sá tǎ Zacàriá quíhu-dé. Te duca<sup>n</sup> ñí quide-güedé, chi duca<sup>n</sup> tnàhí ní xóo cada nchaa cue dútú dàvá-á<sup>n</sup>. <sup>10</sup>Te ñini sàhmi té Zacàriá sá sàhá<sup>n</sup> tnámí nùu nàá, te vài vihi ñáyiú xíndecu quehé veñúhu-á<sup>n</sup> càhá<sup>n</sup> ndihí-yu Yá Ndiöxí. <sup>11</sup>Te ní xiní té Zacàriá ìí<sup>n</sup> espíritú xínú cuèchi núú Yá Ndiöxí nútñi-xi xio cùha núú nàá núú càyú sá sàhá<sup>n</sup> tnámí-á<sup>n</sup>. <sup>12</sup>Te òré ní xiní té Zacàriá espíritú-á<sup>n</sup> te ñá ní cùtnunì iní-dé nása cada-dé chi ío ní yùhú-dé. <sup>13</sup>Te espíritú-á<sup>n</sup> ñí xáha<sup>n</sup>-xi:  
—Zacàriá, vǎ yùhú-n chi Yá Ndiöxí ní tedóho-gá tnúhu ní cáhá<sup>n</sup>-n, te vitna coo ìí<sup>n</sup> déhe ñadìhí-n tǎ Elisabét te danani-n-dé Juáá. <sup>14</sup>Te ío cudíí iní-n, te duca<sup>n</sup> ño

vài ñáyiú cudíí ìní-yu na càcu-dé.

<sup>15</sup>Te ío cudìu-dé núú Yă Ndiöxí, te ni vă còhó-dě ndidí te ni vă còhó-dě ndudí sá nǐ natiu, te sa cundecu ndihi-dé Espíritú Yă Ndiöxí òré cacu-dé. <sup>16</sup>Te diu-dé cada te ío vài ñáyiú isràél natuhá-yu ichi Dútú Ndiöxí Yaá cúú Ndiöxí-ó. <sup>17</sup>Te té Juàá-á<sup>n</sup> codonù-dé núú-gă, te cundecu ndihi-dé Espíritú-gá, te taxi tnùní-dé dàtná ní quide té Èliás. Te nacanu ichi-dé cue tée cùu sacuéhé cuèndá cada-güedé sá vâha sá cúú-xí cuè tée cuechi, te cuèi cue tée ío sàá ìní-xi, te diu-dé cada te tñi-güedé tnúhu váha, tnúhu càhá<sup>n</sup> ñáyiú quide ndáá. Te duca<sup>n</sup> càda-dé cada túha-dé ñáyiú cuèndá cunu cuèchí-yu núú Dütú Ndiöxí — càchí-xi xăha<sup>n</sup>-xi xii-dé.

<sup>18</sup>Te té Zacàriá ní ndúcú tnúhu-dé núú espíritú-á<sup>n</sup>, te xăha<sup>n</sup>-dë:

—¿Te nása cutnùní ndáá ìní-í tnúhu càhá<sup>n</sup>-n-í? Chi yúhú ío ní sahnu-í ndihi ñadìhí-í —càchí-dé xăha<sup>n</sup>-dë xii-xi.

<sup>19</sup>Te espíritú-á<sup>n</sup> nǐ xáha<sup>n</sup>-xi:

—Yúhú cùú-í espíritú nání Gábriél, te xínu cuechi-í núú Yă Ndiöxí, te mee-gă ní táuchíú<sup>n</sup>-gă nâhá-í tnúhu-gá véxi cuèndá cutnùní ìní-n nacuáa cada ñaha-gă xii-ndo. <sup>20</sup>Te vitna cuu ññhí-n te vâ càhá<sup>n</sup>-gá-n ndéé ná sàá nduu càcu déhe ñadìhí-n, chi ñá túú ní sàndáá-ni ìní-n tnúhu ní càhá<sup>n</sup>-í. Te dacuitíí sǎá nduu càda-xi nacuáa ní càhá<sup>n</sup>-í-a —càchí espíritú-á<sup>n</sup> xăha<sup>n</sup>-xi xii-dé.

<sup>21</sup>Te nchaa ñáyiú xĩndecu quehé ndétŭ-yu té Zacàriá, te xicuñúhu-yu sá ò cùyaa-dé xití veñúhu. <sup>22</sup>Te òré ní ndee té Zacàriá, te ñá ní cùu-gá

cáhá<sup>n</sup> ndihi ñaha-dě xií-yu, te òré-á<sup>n</sup> nǐ cutnùní ìní-yu sá nǐ xiní-dé ì<sup>n</sup> espíritú xínú cuèchi núú Yă Ndiöxí xití veñúhu. Te mee-nă ndaha-dé ní quide-dé núú-yu chi ñá ní cùu-gá càhá<sup>n</sup>-dë.

<sup>23</sup>Te ní xínu nduu nǐ xínu cuechi tē Zacàriá núú Yă Ndiöxí xití veñúhu, te cuánuhú-dé vehe-dé.

<sup>24</sup>Te sátá dúcá<sup>n</sup> nǐ cuu te ñadìhí-dé tá Elisàbét ní ngúhu<sup>n</sup> déhe-a<sup>n</sup>, te úhú<sup>n</sup> yóó ñà túú tnâhí-gá ní quèe-a<sup>n</sup> caca cuu-a<sup>n</sup>, te ní cachí-a<sup>n</sup>: <sup>25</sup>“Mee Dütú Ndiöxí duha ní cundâhú ìní ñâhá-gă sá cóó ì<sup>n</sup> déhe-í cuèndá sá vâ cúú yíchí ìní ñâhá ñáyiú xii-í”, duha ní cachí-a<sup>n</sup>.

#### Ì<sup>n</sup> espíritú xínú cuèchi núú Yă Ndiöxí càchí-xi sá cǎcú Jèsús

<sup>26-27</sup>Te núú ìñú yóó sǎ nǐ ngúhu<sup>n</sup> déhe tá Elisàbét, te ní tendaha tùcu Yă Ndiöxí espíritú nání Gábriél cuáhá<sup>n</sup>-xi ì<sup>n</sup> ñuú nání Nàzarét cuáhá<sup>n</sup> ngoto-xi ì<sup>n</sup> xíchí cuéchi nàni Mariá. Te ñuú-á<sup>n</sup> yĩndèhu-xi distritú Galileá. Te xíchí-á<sup>n</sup> sa ní cundáá tnúhu sá tnândaha-xi ndihi ì<sup>n</sup> tée nàni Chee ñaní tnâhá ndí Dàvíí. <sup>28</sup>Te espíritú-á<sup>n</sup> nǐ quíhu-xi ndéé xití vehe núú ndécú tǎ Màriá, te ní xáha<sup>n</sup>-xi:

—iCòvâha-n-a<sup>n</sup>! Dútú Ndiöxí ío cùu ìní ñâhá-gă xii-n te ndècu ndihi ñaha-gá, te ío-gá xító ñâha-gá xii-n dàcúúxí dâva-gá ñáyiú dîhí —càchí espíritú-á<sup>n</sup> xăha<sup>n</sup>-xi.

<sup>29</sup>Dico òré ní xiní tá Màriá espíritú-á<sup>n</sup>, te ní quiyùhú ìní-xi sá dúcá<sup>n</sup> nǐ càhá<sup>n</sup> espíritú-á<sup>n</sup>. Te ní sani ìní-xi: “¿Ná cuèndá duha càhá<sup>n</sup>-tu espíritú-a-í?”, duha ní sani ìní-xi. <sup>30</sup>Te espíritú-á<sup>n</sup> nǐ xáha<sup>n</sup>-xi:

—Màriá, vá yùhú-n chi duca<sup>n</sup> nǐ nduu táhú-n nǔu Yá Ndiöxí. <sup>31</sup>Te vitna ngúhu<sup>n</sup> déhe-n, te na càcu-dé te danàni-n-dé Jèsús. <sup>32</sup>Te ío cunuu-dě, chi Dútú Ndiöxí Yaá ío cūnuu cachí-gá sá Dēhe-gá cúú-dě, te ðiu-gá cada te cuu-dé ìi<sup>n</sup> tée cūnuu núú ñáyiú isràèl dàtná ní quide-gá ndíi Dàvií. <sup>33</sup>Te taxi tñuní-dé ñáyiú isràèl, te duca<sup>n</sup>-ni cūnuu-dé nǐ caa nǐ quíh<sup>n</sup> —càchí-xi xǎha<sup>n</sup>-xi.

<sup>34</sup>Te tá Màriá ní xáha<sup>n</sup>-xi xìi espíritú-á<sup>n</sup>:

—¿Te nása cuu tñúhu càhá<sup>n</sup>-n te ñá túú yìi-í-i? —càchí-xi xǎha<sup>n</sup>-xi.

<sup>35</sup>Te ní xáha<sup>n</sup> espíritú-á<sup>n</sup>:

—Espíritú Yá Ndiöxí quixi cundecu ndíhi-n, te duca<sup>n</sup> Yá Ndiöxí cada-gá ìi<sup>n</sup> sá vǎha sá cúú-xí-n ná càcu déhe-n. Te Yá Ndiöxí càchí-gá sá ío cundecu yíñùhu-dé núú-gǎ, chi Déhe-gá cúú-dě. <sup>36</sup>Te tñàhá didí-n tǎ Elisàbét ñúhú dēhe-a<sup>n</sup> cuèi ío ní sahnú-a<sup>n</sup>, te ðiu-a<sup>n</sup> càchí-yu sá vǎ cóó dēhe-a<sup>n</sup> ni cūu, te vitna sa ní cuu íñú yóó ñúhú dēhe-a<sup>n</sup>. <sup>37</sup>Chi Yá Ndiöxí ndácú-gǎ quidé-gǎ nchaa sá vǎ yǒo tñàhí ndàcu cada —cachí-xi xǎha<sup>n</sup>-xi.

<sup>38</sup>Te tá Màriá ní xáha<sup>n</sup>-xi:

—Yúhú ná cúnú cuèchi-í núú Dǔtú Ndiöxí, te mee-gǎ ná cádá ñàha-gá xii-í nàcuáa ní cachí-n —càchí-xi xǎha<sup>n</sup>-xi xìi espíritú-á<sup>n</sup>.

Te sátá dúcá<sup>n</sup> te espíritú-á<sup>n</sup> nǐ xica-xi cuáhá<sup>n</sup>-xi.

**Tá Màriá cuáhá<sup>n</sup> ngoto-xi tá Elisàbét**

<sup>39</sup>Te tá Màriá ío ndíhi cuáhá<sup>n</sup>-xi ìi<sup>n</sup> ñúú cáá xítí yucu distritú Jùdeá.

<sup>40</sup>Te ní sáá-xi vehe té Zacariá, te cuánguihu-xi ní dándácǒo vǎha-xi

tá Elisàbét. <sup>41</sup>Te òré ní tecú dóho tá Elisàbét ní cáhá<sup>n</sup> tá Màriá, te ní candá déhe-a<sup>n</sup> xítí-a<sup>n</sup>, te òré-á<sup>n</sup> nǐ ngúndecu ndíhi-a<sup>n</sup> Espíritú Yá Ndiöxí. <sup>42</sup>Te níhi ní cáhá<sup>n</sup>-a<sup>n</sup>, te xǎha<sup>n</sup>-a<sup>n</sup> xìi tá Màriá:

—Yá Ndiöxí ío xìto ñàha-gá xii-n dàcúxí dǎva-gá tñàha díhí-ó, te duca<sup>n</sup>-ni xìto-gá cuèi déhe-n. <sup>43</sup>¿Te ná cúú yùhú nǔu véxi coto ñàha yòhó ñàná Yaá cúú Xìtohó-í-í? <sup>44</sup>Chi òré-ni ní tecú dóho-í ní cáhá<sup>n</sup>-n te ní candá-ni déhe-í xítí-í sá cùdífí ìni-dé. <sup>45</sup>Te vǎha táhú yòhó sá ni sàndáá ìni-n, chi dacutíí sǎ cádá Dútú Ndiöxí nàcuáa ní cáhá<sup>n</sup> espíritú ní tendaha-gǎ ní quixi ní cachí tñúhu xii-n nàcuáa cada-gá —càchí-a<sup>n</sup> xǎha<sup>n</sup>-a<sup>n</sup> xìi tá Màriá.

<sup>46</sup>Te ní xáha<sup>n</sup> tǎ Màriá:

Ío càhnú cuu Dútú Ndiöxí,

<sup>47</sup>Ío cùdífí ìni-í chi ðiu-gá taunihnu ñàha-gǎ xii-í núú ùhú núú ndàhú.

<sup>48</sup>Chi ní ndacu ìni ñáhá-gǎ xii yúhú, te ðicó ìi<sup>n</sup> xíchí xínú cuèchi núú-gǎ cúú-í, te vitna te nchaandi túhú ñáyiú cachí-yu sá ío vǎha táhú-í.

<sup>49</sup>Te Yá Ndiöxí cándòo caa nine ìni-gá, te ío càhnú ìi<sup>n</sup> sá vǎha ní quide-gá sá cúú-xi-í.

<sup>50</sup>Te cùndahú ìni-gá nchaa ñáyiú nèhe sá yíñùhu núú-gǎ. Te duca<sup>n</sup>-ni cuèi ñáyiú sa ndècu ñuyíu-a ndíhi ñáyiú vitna véxi.

<sup>51</sup>Chi ta quide-gá nchaa sá vǎ yǒo tñàhí ndàcu cada véxi, te ta dándóo canúú-gǎ cue ñáyiú quide cahnu mee-xi.

<sup>52</sup>Te cue ñáyiú tàxi tñuní ñá túú-gǎ dáñá-gǎ taxi tñuní-yu,

te cue ñáyi ndàhú ní quide  
nínu ñaha-gă xí-yu.

<sup>53</sup> Te cue ñáyi ndècu ndihi  
tnúndòho tnúhu ndàhú ní  
quide váha ñaha-gă xí-yu,  
te cue ñáyi cuica ñà túú nă ní  
ñíhí-gă-yu cundecu ndihí-yu.

<sup>54</sup> Te chindee-gă ñáyi israhél,  
ñáyi xínu cuechi núú-gă, te  
ñá túú dàña nihnu ñaha-gă  
xí-yu, chi cundahú iní  
ñáhá-gă.

<sup>55</sup> Chi duca<sup>n</sup> ñí xáha<sup>n</sup>-gă xii ndíi  
Àbrahám, ndihi cue ñaní  
tnáhá ndíi.

Duha ní xáha<sup>n</sup> tă Màriá xii tá  
Elisàbét.

<sup>56</sup> Te ní xíndecu tá Màriá dàtná  
úni yóo ndihi tá Elisàbét te dàtnùní  
cuánuhú-xi vehe-xi.

**Ní cacu té Juàà téé dacuàndute  
ñaha xii ñáyi**

<sup>57</sup> Te ní sáá nduu ñí cacu ñí<sup>n</sup>  
dèhe téé tá Elisàbét. <sup>58</sup> Te nchaa  
ñáyi ndècu yatni ndihi-a<sup>n</sup>, ndihi  
nchaa ñaní tnáhá-á<sup>n</sup> ñí ñíhí-yu  
tnúhu nàcuáa ní chindee ñàha Yá  
Ndiöxí xii-a<sup>n</sup>. Te ío ní cudíi iní-yu  
cuendá-a<sup>n</sup>. <sup>59</sup> Te núú ùná nduu sá ñí  
cacu déhe-a<sup>n</sup>, te ní sáhá<sup>n</sup> ñáyi núú  
ndécú-á<sup>n</sup> cuendá cuáhă-yu sèñá ñíi  
déhe-a<sup>n</sup>. Te cuíní-yu cunani dèhe-á<sup>n</sup>  
Zacàriá dàtná nání tătă ní cùu. <sup>60</sup> Te  
ní xáha<sup>n</sup> năná dèhe-á<sup>n</sup>:

—Ñáhá, chi Juàà cunani-dě —  
càchí-a<sup>n</sup> xăha<sup>n</sup>-a<sup>n</sup> xí-yu.

<sup>61</sup> Te ní xáhă<sup>n</sup>-yu:

—¿Te ná cuendá te ñá túú ñí ñí<sup>n</sup>  
ñaní tnáhá-ndó dùca<sup>n</sup> nani-i? —  
cachí-yu xáhă<sup>n</sup>-yu.

<sup>62</sup> Te ní quidé-yu ndàhá-yu núú  
tătă dèhe-á<sup>n</sup> cuendá cuíní-yu núú

nása cuíní méé-dě cunani dèhe-dé.

<sup>63</sup> Te ní xícá<sup>n</sup>-dé ñí<sup>n</sup> tutú ní chídó  
tnùní-dé nàcuáa cunani dèhe-dé,  
te duha ní chídó tnùní-dé: “Juàà  
cunani-dě”, càchí-xi núú tütú ní  
tee-dé-á<sup>n</sup>. Te nchaa ñáyi xíndecu-á<sup>n</sup>  
ñí cuñúhu-yu nàcuáa ní cuu. <sup>64</sup> Te  
òré-á<sup>n</sup> ñí nacáhá<sup>n</sup> té Zacàriá sá ñí  
cuu ñíhí-dé ní cùu, te ní ngúíta-dé  
ní cachí-dé sá ío càhnu cuu Yá  
Ndiöxí. <sup>65</sup> Te nchaa ñáyi xíndecu  
yatni ndihi-dé ní cuñúhu-yu, te  
nchaa ñáyi xíndecu ñíhí xití  
yucu distritú Jùdeá ní ñíhí-yu  
tnúhu nàcuáa ní cuu. <sup>66</sup> Te nchaa  
ñáyi-á<sup>n</sup> ío vài ní sani iní-yu, te ní  
xítnàhá-yu:

—¿Ná cúú să cádá tée-á<sup>n</sup> ndéé  
ídá-gă ná cuèhnu-dé? —càchí-yu  
xítnàhá-yu.

Te duca<sup>n</sup> ñí xítnàhá-yu chi Dútú  
Ndiöxí ndécú ndíhi ñaha-gă xii-dé.

**Té Zacàriá càchí-dé sá ío  
càhnu cuu Yá Ndiöxí**

<sup>67</sup> Te té Zacàriá tătă tề líhli-á<sup>n</sup> ñí  
ngúndecu ndihi-dé Espiritú Yá  
Ndiöxí te ní cáhá<sup>n</sup>-dé nchaa tnúhu sá  
ñí dánèhé ñáhá-gă, te ní cachí-dé:

<sup>68</sup> Ío càhnu cuu Dútú Ndiöxí nchoo  
ñáyi israhél,

chi ní quixi coto ñaha-gă xii-o,  
te cùu-o ñáyi cùu cuendá-gă,  
chi dàcácu nihnu ñaha-gă  
xii-o vítna.

<sup>69</sup> Chi ní tendaha-gă ñí<sup>n</sup> téé véxi-dé  
dàcácu nihnu ñaha-dě xii-o  
núú ùhú núú ndàhú.

Te cùu-dé ñaní tnáhá ndíi Dàvíi  
téé ní xínu cuechi núú-gă  
ndéé sanaha.

<sup>70</sup> Te ñíu-ni tnúhu ní cáhá<sup>n</sup> Yá  
Ndiöxí ní cáhá<sup>n</sup> cue téé ní



quide ndáá ní xíndecu núú-gǎ ñuyíú-a ndéé sanaha.

<sup>71</sup> Te ní cachí-güedé sá táúnìhnu ñaha-gá xii-o núú nchàa ñáyiú cùu úhú iní ñáhá, ndìhi núú nchàa ñáyiú ñá túú cùu quini ndee ñáhá.

<sup>72</sup> Te ní xáha<sup>n</sup>-gǎ sá cúndàhú iní ñáhá-gǎ xii-o, te duca<sup>n</sup> càda-gá chi vá nácuànaa-gá tnúhu ní cáhá<sup>n</sup>-gá ndìhi-güedé.

<sup>73</sup> Te diu duca<sup>n</sup> ndùu tnúhu ní xáha<sup>n</sup>-gǎ xii ndíi Àbrahám sá

<sup>74</sup> táúnìhnu ñaha-gá xii-o núú nchàa ñáyiú cùu úhú iní ñáhá, cuendá sá vǎ yùhú-ó cùnu cuechi-o núú-gǎ.

<sup>75</sup> Te cada ndáá-ó, te cundecu yíñùhu-o núú-gǎ ndì nchàa nduu cundecu-o ñuyíú-a.

Duha ní cachí té Zacàriá.

<sup>76</sup> Te xǎha<sup>n</sup>-dè xii té líhli-á<sup>n</sup>:  
Te yòhó té líhli, cáhá<sup>n</sup> ñáyiú cuendá-n sǎ cúú-n ìi<sup>n</sup> téee càhá<sup>n</sup> tnúhu Dútú Ndiöxí Yaa ío cùnuu,

chi quíhí<sup>n</sup>-n còdonuu-n núú Yǎá cúú Xítohó-ó dàtúha-n ñáyiú cuendá cundecu túha-yu òré quexìo-gǎ.

<sup>77</sup> Te cúñaha-n xii ñáyiú isràèl sá cuìní-gá cada càhnu iní-gá nchaa cuèchi-yu, te naníhí tàhú-yu.

<sup>78</sup> Te duca<sup>n</sup> càda-gá chi ío cùu iní ñáhá-gǎ xii-o, chi ndéé andìu nǐ tendaha-gǎ ìi<sup>n</sup> téee véxi cuu<sup>n</sup>-dé dandixi túu-dé iní-ó cuendá cutnùnì iní-ó nácuáa ndùu cuendá Yǎ Ndiöxí.

<sup>79</sup> Te duca<sup>n</sup> dándixi túu-dé iní nchaa ñáyiú ndècu ichi cuehé

ichi duha ta xíta nihnu cuáhá<sup>n</sup> cuendá nucúnu ichí-yu ìi<sup>n</sup> ichi váha.

Duha ní xáha<sup>n</sup> tǎ Zacàriá xii déhe-dé.

<sup>80</sup> Te té líhli-á<sup>n</sup> tá sàhnu-dé, te ta chìndee chitúu ñaha Yǎ Ndiöxí xii-dé cuáhá<sup>n</sup>, te ní xíndecu-dé xití yucu ndéé ní sáá nduu nǐ ngúíta-dé ní cáhá<sup>n</sup>-dé núú cuè ñáyiú isràèl tnúhu Yǎ Ndiöxí.

### Ní cacu Jèsús

(Mt. 1:18-25)

**2** Te dàvá-á<sup>n</sup> nǐ táúchíú<sup>n</sup> tǎ Aùgustú Cèsár nucódó tnùnì nchaa ñáyiú nàció<sup>n</sup> yíndàha-dé. <sup>2</sup> Te xéhé sǎ díhnanuu nǐ nucódó tnùnì ñáyiú, te diu-ni dàvá-á<sup>n</sup> nǐ cunuu té Cìreniú distritú Sìriá. <sup>3</sup> Te nchaa ñáyiú ní natacá-yu ñuu núú nǐ cacú-yu cuendá nucódó tnùnì-yu. <sup>4</sup> Núu xíǎ<sup>n</sup> ní quee té Chèè ñuu Nazàrét ìi<sup>n</sup> ñuu yíndèhu distritú Galìleá, te cuáhá<sup>n</sup>-dé ñuu Bèlén ìi<sup>n</sup> ñuu yíndèhu distritú Jùdeá, chi xíǎ<sup>n</sup> nǐ cuu ñuu ndíi Dàvíí, te diu-ni ñani tnáhá tǎ Chèè-á<sup>n</sup> nǐ cuu ndíi. <sup>5</sup> Núu xíǎ<sup>n</sup> cuáhá<sup>n</sup>-dé ndéé ñuu Bèlén nucódó tnùnì-dé, te tnáhá tá Màriá xíchí nǐ cundáá tnúhu sá tnàndaha ndìhi-dé cuáhá<sup>n</sup> ndìhi ñaha-dé, te sa ñuhu déhe-xi. <sup>6</sup> Te nini cùyaá-yu ñuu Bèlén-á<sup>n</sup> nǐ sáá òré cacu déhe-xi. <sup>7</sup> Te ní cacu déhe díhna-xi, te ní chidúcú<sup>n</sup>nuu-xi dóó, te ní sacá<sup>n</sup> ñáhá-xí ìi<sup>n</sup> vehe núú cúú vèhe quiti, chi ñá túú ní nǐhí-yu vehe coó-yu.

**Cue espíritú xínú cuèchi núú  
Yǎ Ndiöxí ndìhi cue toli.**

<sup>8</sup> Te yatni ñuu-á<sup>n</sup> xíndecu ìi<sup>n</sup> úú toli ndèé-güedé mbèé-güedé

ndécú-güèdi majadá niú-á<sup>n</sup>. <sup>9</sup>Te uu<sup>n</sup> ni ní quexìo ìì<sup>n</sup> espíritú xínú cuèchi núú Yá Ndiòxí, te Yá Ndiòxí ní quide-gá ní dáyèhé-xi ní càndéé núú x̄ndecu-güedé, te ní yùhú víhí-güedé. <sup>10</sup>Te ní xáha<sup>n</sup> espíritú-á<sup>n</sup>:

—Vá yùhú-ndó, chi nàha-í ìì<sup>n</sup> tnúhu váha véxi sá cúú-xí-ndó, te ío cudíí ìní-ndó ndìhi nchaá ñáyíu. <sup>11</sup>Chi vitna ní cacu ìì<sup>n</sup> téé dàcácu nihnu ñaha xii-ndo núú ùhú núú ndàhú ñuú ndíi Dàvíí, te téé-á<sup>n</sup> cúú-dě Xítóhó Jesucrístú. <sup>12</sup>Te dàtná ìì<sup>n</sup> sèná te naníhí-ndó tē líhli-á<sup>n</sup> yídücü<sup>n</sup> nuu-dé dóó cáá-dě ìì<sup>n</sup> vehe quití —càchí-xi x̄há<sup>n</sup>-xi xii-güedé.

<sup>13</sup>Te òré-á<sup>n</sup> ñí quexìo cuéhé víhí espíritú véxi cuu<sup>n</sup> andíu ñí naníhí tnáhá-xí ndìhi espíritú-á<sup>n</sup>, te ní ngúíta-xi ní chiñuhu-xi Yá Ndiòxí, te càchí-xi:

<sup>14</sup>Ío càhnu cuu Yá Ndiòxí Yáá ndécú àndíu,  
te na cùndecu váha-ni nchaá ñáyíu cùu ìní mée-gá!  
Duha càchí cue espíritú-á<sup>n</sup>.

<sup>15</sup>Te òré cuándaa cue espíritú-á<sup>n</sup> andíu, te ní ngúíta cue toli-á<sup>n</sup> x̄itnàha-güedé:

—Na quíhí<sup>n</sup>-ó ñúú Bèlén quini-ó nàcuáa ní cuu, chi Dútú Ndiòxí sa ní cachí tnúhu-gá —càchí-güedé x̄itnàha-güedé.

<sup>16</sup>Te ní tñii-güedé ichi sùúni ndìhi cuáhá<sup>n</sup>-güedé, te ní naníhí-güedé tá Màriá ndìhi té Chèè, ndìhi té líhli-á<sup>n</sup> cáá-dě xití ìì<sup>n</sup> vehe quití. <sup>17</sup>Te òré ní xiní ñáhá-güedé te ní xáha<sup>n</sup>-güedé xií-yu nàcuáa ní xáha<sup>n</sup> espíritú-á<sup>n</sup> xii-güedé cuèndá té líhli-á<sup>n</sup>. <sup>18</sup>Te nchaá ñáyíu ní tecú

dóho-xi ní cuñúhu-yu nàcuáa ní cáhá<sup>n</sup>-güedé. <sup>19</sup>Dico tá Màriá chi ñùhu nahi-ni ìní-xi, te dicó-ni sàni ìní-xi cuèndá nchaá tnúhu-á<sup>n</sup>. <sup>20</sup>Te cue toli-á<sup>n</sup> ñí natñii-güedé ichi, te ta x̄itnàha-güedé cuánuhú sá ío càhnu cuu Yá Ndiòxí cuèndá nchaá tnúhu ní x̄indedóho-güedé, ndìhi cuèndá nchaá sá ñí xiní-güedé, chi cuèndá sá ndàa ní cuu nchaá nàcuáa ní tecú tnúhu-güedé.

#### Ndècá-yu Jèsús cuáhá<sup>n</sup> veñúhu

<sup>21</sup>Te núú ùná nduu sá ñí cacu té líhli-á<sup>n</sup>, te ní sáha-güedé sèná ñii-dé, te ní dánání ñaha-güedé Jèsús xii-dé, diu-ni nàcuáa ní xáha<sup>n</sup> espíritú xínú cuèchi núú Yá Ndiòxí xii tá Màriá ndéé cùtnàhá vátá ngùhu<sup>n</sup>-gá-dé xití-xi.

<sup>22</sup>Te sátá ñí tnahá nduu, ndùu íí-yu nàcuáa càhá<sup>n</sup> nchaá tnúhu ní chídó tnùní ndíi Moisés, te ndècá-yu té líhli-á<sup>n</sup> cuáhá<sup>n</sup> ñuú Jerusalén cuèndá quee túu-dé núú Dútú Ndiòxí. <sup>23</sup>Te duca<sup>n</sup> ñí quidé-yu, chi duca<sup>n</sup> càhá<sup>n</sup>-xi núú tütú Yá Ndiòxí sá ncháá làndú téé na càcu díhna quetúu-güexi núú-gá cuèndá cundecu-ná-güexi cuèndá-gá.

<sup>24</sup>Te ní quidé-yu nàcuáa càhá<sup>n</sup> Yá Ndiòxí núú tütú-gá núú càchí-xi: “Canehe-ndo úú lómá àdi úú cücü quíhí<sup>n</sup> nduu táhu ñáhá Yá Ndiòxí”, duha càhá<sup>n</sup>-gá núú tütú-gá.

<sup>25</sup>Te dàv-á<sup>n</sup> ndécú ìì<sup>n</sup> téé nani Míó ñuú Jerusalén. Te ío váha ìní-dé, te chiñuhu-dé Yá Ndiòxí, te ndètu-dé sáá nduu chindee ñaha Yá Ndiòxí xii ñáyíu isràél. Te ndècu ndìhi té Mìó-á<sup>n</sup> Espíritú Yá Ndiòxí. <sup>26</sup>Te sa ní xáha<sup>n</sup>-xi xii-dé sá vā cùu-ni-dé, chi dacuitíí quini-dé

Cristú Yaá tendaha Yă Ndiöxí quixi ñuyíú-a. <sup>27</sup>Te téé-á<sup>n</sup> ndécá ñaha Espíritú Yă Ndiöxí xii-dé cuáhá<sup>n</sup> veñúhu càhnu sá ïo cùnuu. Te cuáhá<sup>n</sup>-yu ndihi Jèsús veñúhu-á<sup>n</sup> cuendá cadá-yu ndihi-gá nàcuáa càhá<sup>n</sup> tnúhu ní chídó tnùní ndíi Moisés. <sup>28</sup>Te òré ní sáá-yu, te té Mió-á<sup>n</sup> ñí nguídèhé-dé Jèsús, te ní cáhá<sup>n</sup>-dé sá ïo càhnu cuu Yá Ndiöxí, te ní xáha<sup>n</sup>-dè xii-gá:

<sup>29</sup>Yòhó Dútú Ndiöxí sa ní cuu daña-n cùú-í vitna,  
chi sa ní quide-n nàcuáa ní cachí-n xii yúhú téé xínu cuechi núú-n.

<sup>30</sup>Chi sa ní xiní núú-í Yaá dàcácu nihnu ñaha xii ñáyiú núú ùhú núú ndàhú vitna.

<sup>31</sup>Te Yaá ní tendaha-n vèxi núú ndécú nchàa ñáyiú ñuyíú-a.

<sup>32</sup>Te cùu-gá dàtná ì<sup>n</sup> ñuhú, chi dandìxi túu-gá iní ñáyiú cuendá cutnùní iní-yu cuendá Yă Ndiöxí cuèí ñá díú ñáyiú isràél cùú-yu.

Te diu-gá cada, te canehe ñáyiú dava-gá ñuú sá yíñùhu núú ñáyiú isràél chi diu ñáyiú isràél cùú-yu ñáyiú cùu cuendá-n.

Duha ní xáha<sup>n</sup> tè Mió xii Yá Ndiöxí.

<sup>33</sup>Te té Chèè ndihi năná Jèsús ní cuñúhu-yu tnúhu ní cáhá<sup>n</sup> té Mió cuendá-gá. <sup>34</sup>Te dàtnùní té Mió ní xicá<sup>n</sup> táhú-dè núú Yă Ndiöxí cuendá-yu, te xáha<sup>n</sup>-dè xii tá Màriá năná Jèsús:

—Cundedóho tnúhu na càhá<sup>n</sup>-í-a, té líhli-a ní nduu táhú-dè nacanu ichi-dé dava ñáyiú isràél ichi Yá Ndiöxí, te davá-yu vá tníi-yu tnúhu cáhá<sup>n</sup>-dé, te ñáyiú-á<sup>n</sup> cuíta nihnú-yu,

te cada-dé nàcuáa cutnùní iní ñáyiú sá Yă Ndiöxí ní tendaha ñaha-gá xii-dé, dico vá quëndáá iní-yu, chi daquèe t́hú ñáhă-yu xii-dé. <sup>35</sup>Te duca<sup>n</sup> te cutnùní nàcuáa sàni iní ì<sup>n</sup> ì<sup>n</sup> ñáyiú. Dico sá cúú-xí yòhó chi ío cada ndàhú-xi iní-n, chi súúni dàtná sá ñí nícuèhé iní-n càda-xi — cachí-dé xáha<sup>n</sup>-dè xii tá Màriá.

<sup>36</sup>Te xíá<sup>n</sup> ndécú tnàhá ì<sup>n</sup> ñaha càhá<sup>n</sup> tnúhu Yá Ndiöxí nání-á<sup>n</sup> Áná, te tătá-a<sup>n</sup> ní xínani-dè Fànuél ñani tnàhá ndíi Àsér. Te ñaha-á<sup>n</sup> sa ní sahnu vihi-a<sup>n</sup>, te cuechi-ni-a<sup>n</sup> ñí tnándaha-a<sup>n</sup> te úsá-ni cuíá ñí xíndecu-a<sup>n</sup> ndihi yíi-a<sup>n</sup>, <sup>37</sup>te ní quendóo quèé-a<sup>n</sup>, te sa ñùhu-a<sup>n</sup> cúmídícó cümü cuíá-a<sup>n</sup>. Te ñá túú ní xòo quee-a<sup>n</sup> veñúhu càhnu sá ïo cùnuu, chi nduu niú ní xóo chiñuhu-a<sup>n</sup> Dútú Ndiöxí, te áma ñá túú tnàhí ná ní xòo caxi-a<sup>n</sup> ní xóo cáhá<sup>n</sup> ndihi-a<sup>n</sup> Yá Ndiöxí. <sup>38</sup>Te diu-ni òré ndécú-yu ndihi Jèsús ní quexio-a<sup>n</sup> núú-yu, te ní ndacá<sup>n</sup> táhú-á<sup>n</sup> núú Yă Ndiöxí cuendá sá ñí xiní-a<sup>n</sup> Jèsús, te dàtnùní ní nguíta-a<sup>n</sup> càhá<sup>n</sup> váha-a<sup>n</sup> cuendá-gá núú nchàa ñáyiú, ñáyiú ndètu quini sáá nduu dàcácu Yá Ndiöxí ñáyiú Jerusàlén núú tnündòho tnúhu ndàhú.

#### Cuánuhú-yu ñuú Nazàrèt

<sup>39</sup>Te sáta ñí quidé-yu nchaa nàcuáa càhá<sup>n</sup> tnúhu Yá Ndiöxí, te cuánuhú-yu ñuú Nazàrèt núú ndécú tnàhí-yu, te ñuú-á<sup>n</sup> yíndèhu-xi distritú Galileá. <sup>40</sup>Te té líhli nani Jesús-á<sup>n</sup> tá sahnu-dé, te ta nihí ndéé-dè cuáhá<sup>n</sup>, te duca<sup>n</sup> ïo váha ta sàá sá xiní tnùní-dé cuáhá<sup>n</sup>, chi Yá Ndiöxí ndécú ndihi ñaha-gá xii-dé.

#### Jèsús ndécú-gă veñúhu

<sup>41</sup>Te ndi tnàhá cuíá ñí xóo quíhí<sup>n</sup> té Chèè ndihi năná Jèsús vico

pàscuá ñuú Jerusalén. <sup>42</sup>Te cútnàhá ní chítú Jèsús úxúú cuíá-gă, te cuáhá<sup>n</sup>-yu ndihi-gá ñuú Jerusalén vico pàscuá, chi duca<sup>n</sup> tnàhí quidé-yu. <sup>43</sup>Te òrè ní yáha vico, te ní natníf-yu ichi cuánuhú-yu, te ní quendóo-gá ñuú Jerusalén, te ni năná-gă, te ni tē Chèè ñá túú ní xìní ní quendóo-gá. <sup>44</sup>Chi ní sani iní-yu sá ñútnàhá-gá tnuú nchaa ñáyiu ní sáhá<sup>n</sup> vico cuánuhú. Te ní xúhu<sup>n</sup>-yu ìí<sup>n</sup> nduu ichi ta ndücu tnúhu-yu-gá núú nchàa ñaní tnáhă-yu, ndihi núú nchàa ñáyiu xìní tnáhá ndìhí-yu, <sup>45</sup>te ñá túú ní nàníhí ñáhă-yu xii-gá. Núú ní nacuicó-yu cuánuhú tucú-yu ñuú Jerusalén cuendá yàcá<sup>n</sup> nanducu ñàhá-yu xii-gá.

<sup>46</sup>Te núú ùní nduu sá ñí dana núú ñáhă-yu xii-gá, te ní naníhí ñáhă-yu nùcáo-gá xití veñúhu càhnu sá ìo cùnuu tnuú cue téè dâcuaha ñaha xií-yu nchaa tnúhu ní chídó tnùní ndíi Moisés, te ndèdóho ñaha-gă xii-güedé, te nândi sá ndúcu tnúhu-gá núú-güedě. <sup>47</sup>Te nchaa cue téè xîndedóho ñaha xii-gá xîcuñúhu-güedé sá ìo váha sàá sá xìní tnùní-gá, te ío váha ñihí-gá tnúhu nâdanchocáva-gá. <sup>48</sup>Te òrè ní xìní ñáhá tē Chèè ndihi năná-gă xii-gá, te ío ní cuñúhu-yu, te ní xáha<sup>n</sup> năná-gă xii-gá:

—Yòhó déhe-í, ìná cuendá duca<sup>n</sup> ñí quide ñaha-n xii-ndí? Te tâtá-n ndihi yúhú ndìhú iní-ndí xícá nânducu ñaha-ndí xii-n —càchí-xi xáha<sup>n</sup>-xi xii-gá.

<sup>49</sup>Te ní xáha<sup>n</sup> Jèsús xií-yu:  
—¿Ná cuendá nândücu ñaha-ndo? ¿Náa ñá túú xìní-ndó sã nũú chíú<sup>n</sup> Tâtà-í tàù-í caca cuu-í-ã<sup>n</sup>? —  
càchí-gá xáha<sup>n</sup>-gă xií-yu.

<sup>50</sup>Dico mèè-yu ñá túú ní tècu tnùní-yu nâcuáa ní xáha<sup>n</sup>-gă.

<sup>51</sup>Te sátá dúcá<sup>n</sup> te cuánuhú ndihi ñàhá-yu xii-gá ñuú Nazàrét, te ío ní sándáá iní ñáhá-gă xií-yu. Te nchaa sá ñí quide-gá-á<sup>n</sup> ñí xúhu<sup>n</sup> nahi-ni ìní năná-gă. <sup>52</sup>Te Jèsús duca<sup>n</sup>-ni ta sàhnu-gá cuáhá<sup>n</sup>, te ta sàá-gá sá xìní tnùní-gá cuáhá<sup>n</sup>, te duca<sup>n</sup> cùdiu-gá núú Yă Ndiöxí, ndihi núú nchàa ñáyiu.

**Té Juàá téè dâcuandute ñaha xii ñáyiu càhá<sup>n</sup>-dé tnúhu Yá Ndiöxí xití yucu**

(Mt. 3:1-12; Mr. 1:1-8; Jn. 1:19-28)

**3** Te ní cuu sáhú<sup>n</sup> cuíá sã yîndâha té Tîberíu cuéhé nàció<sup>n</sup>, te dâvá-á<sup>n</sup> ñí cunuu té Pìlatú distrítú Jùdeá, te té Hèrodés ní cunuu-dě distrítú Galileá, te ñaní-dé té Lìpé ní cunuu-dě distrítú Itürea ndihi ìngá distrítú nání Tràconité, te té Lisàniás ní cunuu-dě distrítú Abiliniá. <sup>2</sup>Te té Ànás ndihi té Calfás ní cuu-güedé dútú cùnuu. Te dâvá-á<sup>n</sup> ñí càhá<sup>n</sup> ndihi ñaha Yă Ndiöxí xii té Juàá déhe té Zacàriá xití yucu sá quèh<sup>n</sup>-dé càhá<sup>n</sup>-dé tnúhu-gá núú ñáyiu. <sup>3</sup>Te té Juàá ní yáha-dé nchaa ñuú cáá yàtni yúte Jòrdán, te xáha<sup>n</sup>-dě xii nchaa ñáyiu:  
—Chí dândixi túu iní sá ñà túú quide váha-ndo, te dañà-ndo nchàa ichi cuehé ichi duha ndècu-ndo, te cuandute-ndo, te duca<sup>n</sup> te cada càhnu iní Yă Ndiöxí nchaa yícá cuèchi-ndo —duha ní xáha<sup>n</sup>-dě xií-yu.

<sup>4</sup>Te duca<sup>n</sup> ñí quide-dé chi ní quee ndáá-xi nâcuáa ní chídó tnùní ndíi Chàia téè ní xóo càhá<sup>n</sup> tnúhu Yá Ndiöxí ndéé sanaha nũú tütú ndíi núú càchí-xi:

Tècú càhá<sup>n</sup> níhi ì<sup>n</sup> téé yìhi xití yucu, te xǎha<sup>n</sup>-dě xii ñáyi: “Chí dáñá nchàa ichi cuehé ichi duha ndècu-ndo, te tñii-ndo ichi váha, te duca<sup>n</sup> càda-ndo cuendá cundecu túha-ndo, chi véxi Yaá ío cùnuu.

<sup>5</sup>Te nchaa núú cùnú nachítú, te nchaa tìndúú ndìhi nchaa yucu ngoyo nihnu cuendá nduu ndáá, te nchaa ichi ñá túú cuǎhá<sup>n</sup> ndáá nduu ndáá, te nchaa ichi ñá túú cāváha nduu váha.

<sup>6</sup>Te nchaa ñáyiú ñuyúú-a níhǐ-yu tnúhu sá Yǎ Ndiǒxí véxi-gá dácácu nihnu ñaha-gǎ xií-yu núú ùhú núú ndàhú.”

Duha ní chídó tñúní ndíi Chàia núú títú ndíi.

<sup>7</sup>Te òré ní xica ñáyiú cuáhá<sup>n</sup>-yu cuendá dacuàndute ñaha té Juàá xií-yu, te ní xáha<sup>n</sup>-dě:

—iNchaa nchòhó cúú-ndó dàtná ì<sup>n</sup> cóó děé<sup>n</sup> chi ío cuihna iní-ndó! ¿Te nása ní cuu núú tñàhá nchòhó ndúcú-ndó nàcuáa cácu nihnu-ndo núú tñùndòho cahnu vihi sá tá cùyatni ñaha xii-ndo véxi-i? <sup>8</sup>Te chí cádá vǎha vitna cuendá duca<sup>n</sup> cùtnuní sá ní dáñá-ndó nchàa ichi cuehé ichi duha ndècu-ndo. Te vá càchí-ndó sǎ ìo càhnu cuu-ndo cuendá sá cúú-ndó ñàní tnáhá ndíi Àbrahám, chi cuèi ndéé yúú te ndacu Yá Ndiǒxí ndada-gá ñáyiú te cuú-yu ñàní tnáhá ndíi Àbrahám.

<sup>9</sup>Te caá chi ndècu túha-xi sá quèhndé-xi nchaa yutnu sá ñà túú cāváha sávídí-xi, chi nchaa yutnu-ǎ<sup>n</sup> tèhndé-xi te cuánguee-xi núú ñùhú

cáyú-xi. Te duha sǎtnahá-xi ndoho nchaa ñáyiú ñá túú quide váha, chi nchaa ñáyiú duca<sup>n</sup> ñà túú quide váha cùú-yu dàtná nchaa yutnu sá ñà túú cāváha sávídí-xi. —càchí-dé xǎha<sup>n</sup>-dě xií-yu.

<sup>10</sup>Te ní xícá<sup>n</sup> tñúhu-yu núú-dě, te xǎhǎ<sup>n</sup>-yu:

—¿Te nása cada-ndí vái<sup>n</sup>? — càchí-yu xǎhǎ<sup>n</sup>-yu xii-dé.

<sup>11</sup>Te xǎha<sup>n</sup>-dě:

—Te núú ndèdacàa-ndo ndecu ndìhi-ndo úú dóó te cuáñaha-ndo ì<sup>n</sup> xii ñáyiú ñá túú ndècu ndìhi, àdi núú ndècu ndìhi-ndo sá nchító-ó te cuáha-ndǒ-yu na càxi-yu —càchí-dé xǎha<sup>n</sup>-dě xií-yu.

<sup>12</sup>Te ní quexìo ì<sup>n</sup> úú cue téé cuihna iní-xi quide cobrá ñáhá xii ñáyiú cuendá impuèstú cuendá cuàndute-güedé, te ní xícá<sup>n</sup> tñúhu-güedé núú tǎ Juàá, te xǎha<sup>n</sup>-güedé:

—Mèstrú, ¿te nása cada-ndí cuendá cuu váha iní Yǎ Ndiǒxí-i? — càchí-güedé xǎha<sup>n</sup>-güedé xii-dé.

<sup>13</sup>Te té Juàá ní xáha<sup>n</sup>-dě:

—Vá cuidó-ndó càda cobrá-ndó ñáyiú —càchí-dé xǎha<sup>n</sup>-dě xii-güedé.

<sup>14</sup>Te tñàhá ì<sup>n</sup> úú cue téé cùu sandadú xìndecu-ǎ<sup>n</sup> ní xícá<sup>n</sup> tñúhú-güedé núú tǎ Juàá, te xǎha<sup>n</sup>-güedé:

—Te nchúhú ìnása cada-ndí cuendá cuu váha iní Yǎ Ndiǒxí-i? — càchí-güedé xǎha<sup>n</sup>-güedé xii-dé.

Te ní xáha<sup>n</sup> tǎ Juàá:

—Vá quèndèé-ndó sǎ néhé tñàha ñáyiú-ndo, te ni vǎ dácàa díquí-ndǒ-yu ì<sup>n</sup> sá ñà túú ñà quídé-yu, te nduu vétú iní-ndó nàcuáa ñùhu yáhu-ndo —càchí-dé xǎha<sup>n</sup>-dě xii-güedé.

<sup>15</sup>Te nchaa ñáyiú xĩndetu sá quíxí Cristú sàni ìí<sup>n</sup> sani úú iní-yu núu sá dǎú Cristú Yaá tendaha Yǎ Ndiöxí quixi ñuyúú-a cùu te Juàá àdi ñáhá.

<sup>16</sup>Dico té Juàá ní cáhá<sup>n</sup> ndodo-dé núu-yu nchaa-yu, te xǎha<sup>n</sup>-dè:

—Na càchí tnúhu ndáá-í xii-ndo sǎ yǎhú véxi-í sá cuèndá-ni dacuàndute ñaha-í xii-ndo dàtná ní cachí Yǎ Ndiöxí, dico nchicú<sup>n</sup> ingá téé véxi, te téé-án taxi-dé Espíritú Yǎ Ndiöxí cundecu ndihì-ndo, te cùu-xi datná ìí<sup>n</sup> ñuhú, chi ndada ndoo ndada nine-xi iní-ndó. Te téé-án ìo-gá cúnùu-dé dàcúxí yǎhú, chi yúhú cùú-í ìí<sup>n</sup> téé duu<sup>n</sup> duu<sup>n</sup> ñá túú tàù-í nandaxi-í cuèdicò ñìi chàù-dé dico quide-í chù<sup>n</sup>-dè. <sup>17</sup>Te téé-án sa véxi túha-dé sá cáda dèi<sup>n</sup> ñaha-dé xii-o dàtná quidé ñáyiú ndàda ndoo triú, chi ñáyiú-án sa nèhe túha-ná-yu yaxí<sup>n</sup>-yu òré nǎñani cuèndá ndada ndoo-yu, te òré ndádá ndòo-yu triú-án te dàquee díí<sup>n</sup>-yu mihi-xi, te tàxúha-yu mee-nǎ triú-án, te mihi-xi-án sǎhmí-yu. Te dàtná quidè-yu mihi triú-án duca<sup>n</sup> sǎtnahá-xi cada ñaha téé-án xii nchaa ñáyiú ñá túú quide váha, chi daquìhí<sup>n</sup> ñáhá-dè xii-yu núú ñuhú núú càyú, te ñuhú-án ñà túú tñahí ndàhvá —càchí-dé xǎha<sup>n</sup>-dè xii-yu.

<sup>18</sup>Te titní víhí-gǎ tnúhu váha ní xáha<sup>n</sup> tè Juàá xii-yu òré ní dásàhú ñáhá-dè. <sup>19</sup>Te ní cáhá<sup>n</sup>-dé dóho té Hèrodés cuèndá sá ndécá-dè ìí<sup>n</sup> ñaha nàni Herodiás ñaha ní cándeca ñaní-dé té Lìpé, te ní xáha<sup>n</sup>-dè cuèndá nchaa dava-gá sá cuèhé sá dúhá quide-dé. <sup>20</sup>Dico té Hèrodés ñá túú ní quide cuèndá-dé tnúhu ní cáhá<sup>n</sup> té Juàá, chi nèhè-gá

tucu ní quide-dé, chi da vecaá ní chihi-dé té Juàá.

### Sàndute Jesús

(Mt. 3:13-17; Mr. 1:9-11)

<sup>21</sup>Te òré dácuañdute té Juàá nchaa ñáyiú, te tñahá Jèsús ní dácuañdute ñaha-dé xii-gá. Te ñini cáhá<sup>n</sup> ndihì-gá Dútú Ndiöxí ní nacaá<sup>n</sup> andiú, <sup>22</sup>te ní quee Espíritú Yǎ Ndiöxí véxi cuu<sup>n</sup> túu-xi, te cà-xi datná cáá ìí<sup>n</sup> lómá, te òré-án ñí tecú ní cáhá<sup>n</sup> Yǎ Ndiöxí ndéé andiú, te xǎha<sup>n</sup>-gǎ xii Jèsús:

—Yòhó cúú-n Dèhe-í téé ío cùu iní-í, te ío cùdǎí iní ñáhà-í xii-n —càchí-gǎ xǎha<sup>n</sup>-gǎ xii Jèsús.

### Cue téé ní xíndecu díhna-gá ñuyúú-a dàcúxí Xìtohó Jesucristú

(Mt. 1:1-17)

<sup>23</sup>Te ndècu Jesús dàtná ócò úxí cuíá-gǎ cùtnahá ní chisaha-gǎ chù<sup>n</sup> ní táhú Tǎtá-gǎ Dútú Ndiöxí cada-gá. Te ní cuu-gá déhe té Chèé chi duca<sup>n</sup> sàni iní ñáyiú ñuyúú-a. Te té Chèé-án ñí cuu-dé déhe té Èlì, <sup>24</sup>te téé-án ñí cuu-dé déhe té Mátát. Te té Mátát-án ñí cuu-dé déhe té Lèví, te téé-án ñí cuu-dé déhe té Mèlquí. Te té Mèlquí-án ñí cuu-dé déhe té Jàná, te téé-án ñí cuu-dé déhe té Chèé. <sup>25</sup>Te té Chèé-án ñí cuu-dé déhe té Matàtiás, te téé-án ñí cuu-dé déhe té Àmós. Te té Àmós-án ñí cuu-dé déhe té Nàhúm, te téé-án ñí cuu-dé déhe té Èslí. Te té Èslí-án ñí cuu-dé déhe té Nagàí, <sup>26</sup>te téé-án ñí cuu-dé déhe té Mátát. Te té Mátát-án ñí cuu-dé déhe té Matàtiás, te téé-án ñí cuu-dé déhe té Semèí. Te té Semèí-án ñí cuu-dé déhe té Chèé, te téé-án ñí cuu-dé

déhe té Jùdá. <sup>27</sup>Te té Jùdá-á<sup>n</sup> nĩ cuu-dé déhe té Jòaná, té téé-á<sup>n</sup> nĩ cuu-dé déhe té Rèså. Te té Rèså-á<sup>n</sup> nĩ cuu-dé déhe té Zorobàbél, te téé-á<sup>n</sup> nĩ cuu-dé déhe té Salàtiél. Te té Salàtiél-á<sup>n</sup> nĩ cuu-dé déhe té Nèrí, <sup>28</sup>te téé-á<sup>n</sup> nĩ cuu-dé déhe té Mèlquí. Te té Mèlquí-á<sup>n</sup> nĩ cuu-dé déhe té Àdí, te téé-á<sup>n</sup> nĩ cuu-dé déhe té Còsám. Te té Còsám-á<sup>n</sup> nĩ cuu-dé déhe té Elmòdám, te téé-á<sup>n</sup> nĩ cuu-dé déhe té Ęr. <sup>29</sup>Te té Ęr-á<sup>n</sup> nĩ cuu-dé déhe té Jòsué, te téé-á<sup>n</sup> nĩ cuu-dé déhe té Elièzér. Te té Elièzér-á<sup>n</sup> nĩ cuu-dé déhe té Jòrím, te téé-á<sup>n</sup> nĩ cuu-dé déhe té Mátát. <sup>30</sup>Te té Mátát-á<sup>n</sup> nĩ cuu-dé déhe té Lèví, te téé-á<sup>n</sup> nĩ cuu-dé déhe té Mió. Te té Mió-á<sup>n</sup> nĩ cuu-dé déhe té Jùdá, te téé-á<sup>n</sup> nĩ cuu-dé déhe té Chèé. Te té Chèé-á<sup>n</sup> nĩ cuu-dé déhe té Jònán, te téé-á<sup>n</sup> nĩ cuu-dé déhe té Eliàquíim. <sup>31</sup>Te té Eliàquíim-á<sup>n</sup> nĩ cuu-dé déhe té Mèleá, te téé-á<sup>n</sup> nĩ cuu-dé déhe té Mainán. Te té Mainán-á<sup>n</sup> nĩ cuu-dé déhe té Mátatá, te téé-á<sup>n</sup> nĩ cuu-dé déhe té Nátán. <sup>32</sup>Te té Nátán-á<sup>n</sup> nĩ cuu-dé déhe té Dàvíí, te téé-á<sup>n</sup> nĩ cuu-dé déhe té Isàí. Te té Isàí-á<sup>n</sup> nĩ cuu-dé déhe té Òbéd, te téé-á<sup>n</sup> nĩ cuu-dé déhe té Bòóz. Te té Bòóz-á<sup>n</sup> nĩ cuu-dé déhe té Sàlmón, te téé-á<sup>n</sup> nĩ cuu-dé déhe té Naàson. <sup>33</sup>Te té Naàson-á<sup>n</sup> nĩ cuu-dé déhe té Aminàdáb, te téé-á<sup>n</sup> nĩ cuu-dé déhe té Àrám. Te té Àrám-á<sup>n</sup> nĩ cuu-dé déhe té Èsróm, te téé-á<sup>n</sup> nĩ cuu-dé déhe té Fàrés. Te té Fàrés-á<sup>n</sup> nĩ cuu-dé déhe té Jùdá, <sup>34</sup>te téé-á<sup>n</sup> nĩ cuu-dé déhe té Jàcób. Te té Jàcób-á<sup>n</sup> nĩ cuu-dé déhe té Isàác, te téé-á<sup>n</sup> nĩ cuu-dé déhe té Àbrahám. Te té Àbrahám-á<sup>n</sup>

nĩ cuu-dé déhe té Tàré, te téé-á<sup>n</sup> nĩ cuu-dé déhe té Nàcór. <sup>35</sup>Te té Nàcór-á<sup>n</sup> nĩ cuu-dé déhe té Sèrúg, te téé-á<sup>n</sup> nĩ cuu-dé déhe té Ragaú. Te té Ragaú-á<sup>n</sup> nĩ cuu-dé déhe té Pèlég, te téé-á<sup>n</sup> nĩ cuu-dé déhe té Hèbér. Te té Hèbér-á<sup>n</sup> nĩ cuu-dé déhe té Sàlá, <sup>36</sup>te téé-á<sup>n</sup> nĩ cuu-dé déhe té Cainán. Te té Cainán-á<sup>n</sup> nĩ cuu-dé déhe té Arfaxád, te téé-á<sup>n</sup> nĩ cuu-dé déhe té Sëm. Te té Sëm-á<sup>n</sup> nĩ cuu-dé déhe té Nòé, te téé-á<sup>n</sup> nĩ cuu-dé déhe té Làméc. <sup>37</sup>Te té Làméc-á<sup>n</sup> nĩ cuu-dé déhe té Matusàlén, te téé-á<sup>n</sup> nĩ cuu-dé déhe té Ęnóc. Te té Ęnóc-á<sup>n</sup> nĩ cuu-dé déhe té Jàréd, te téé-á<sup>n</sup> nĩ cuu-dé déhe té Mahalàleél. Te té Mahalàleél-á<sup>n</sup> nĩ cuu-dé déhe té Cainán, <sup>38</sup>te téé-á<sup>n</sup> nĩ cuu-dé déhe té Ęnós. Te té Ęnós-á<sup>n</sup> nĩ cuu-dé déhe té Sèt, te téé-á<sup>n</sup> nĩ cuu-dé déhe té Àdán. Te té Àdán-á<sup>n</sup> chi mee Yà Ndiöxi ní cadúha ndaha ñàha-gá xii-dé.

**Sácuíhná quidé yica-xi cada Jesús sá ñà túú tàú-gá cada-gá ní cùu**  
(Mt. 4:1-11; Mr. 1:12-13)

**4** Te Jèsús ní naquehe<sup>n</sup>-gá ichi yuhu yúte Jòrdán cuánuhú-gá. Te sa ndècu ndihi-gá Espiritú Yà Ndiöxi, te Espiritú-á<sup>n</sup> ndécá ñàha-xi xii-gá cuáhá<sup>n</sup> i<sup>n</sup> xití yucu. <sup>2</sup>Te yàcá<sup>n</sup> ní xindecu-gá údico nduu, te sácuíhná nĩ cuiní-xi coto ndeé ñàhá-xí xii-gá te núu ndisa sá vǎ cádá-gǎ i<sup>n</sup> sá ñà túú tàú-gá cada-gá. Te ñǎ túú tñahí ná ní xèxi-gá ndi údico nduu-á<sup>n</sup>, te sátá dúcá<sup>n</sup> te ní xícá<sup>n</sup> iní-gá caxi-gá. <sup>3</sup>Te sácuíhná-ǎ<sup>n</sup> nĩ xáha<sup>n</sup>-xi xii-gá:

—Te núu ndisa sá cúú-n Dèhe Yà Ndiöxi, te cúñaha xii yúú-a na

ndùu-xi paá —càchí-xi xǎha<sup>n</sup>-xi xii-gá.

<sup>4</sup>Te Jèsús ní xáha<sup>n</sup>-gǎ xii-xi:

—Núú tütú Yǎ Ndiöxí càchí-xi:

“Ñá dǎú mèe-ni paá candeca-xi iní ñáyiú, chi tnàhá nchaa tnúhu càhá<sup>n</sup> Yǎ Ndiöxí candeca-xi iní-yu”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>5</sup>Te dàtnùní sácuíhná ndécá ñàha-xi xii-gá cuáhá<sup>n</sup> ìi<sup>n</sup> núú tìndúú dùcú<sup>n</sup>, te uu<sup>n</sup>ni ní dánèhé núú ñáhá-xí xii-gá nchaandi túhú nàció<sup>n</sup> cáá ñùyú. <sup>6</sup>Te ní xáha<sup>n</sup>-xi xii-gá:

—Yúhú cada-í, te taxi tnùnín-n nchàa-ndí túhú nàció<sup>n</sup>-a ndíhi nchaa sá vǎha ío ñiú-ni nchaa nàció<sup>n</sup>-a, te cachí ñáyiú sá ío cùnuu-n, chi yúhú cúú cuèndá-í nchaa sá ío nchaa nàció<sup>n</sup>-a, te ndédani càa ñáyiú cùu iní-í te cúñaha-í xii-yu taxi tnùnín-yu.

<sup>7</sup>Te núu ni yùhu ni iní-n chĩñuhu ñaha-n xii-í ñá, te nchaa taxi-í cuu cuèndá-n —càchí-xi xǎha<sup>n</sup>-xi xii-gá.

<sup>8</sup>Te Jèsús ní xáha<sup>n</sup>-gǎ xii-xi:

—Xocuní yòhó sácuíhná ñúú ndécú-í-a, chi vá cúú càda-í nàcuáa càchí-n chi núú tütú Yǎ Ndiöxí càchí-xi: “Chĩñuhu-ndo Dütú Ndiöxí Yaá cúú Ndiöxí-ndó, te ìi<sup>n</sup>dìi díi-ni-gǎ cada-ndo nchàa nacuáa càhá<sup>n</sup>-gǎ”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>9</sup>Te sácuíhná ndécá ñàha tucu-xi xii-gá cuáhá<sup>n</sup> ñúú Jerusalén, te ní xáha<sup>n</sup>-xi xii-gá cuásaá-gá díquí veñúhu càhnu sá ío cùnuu, te ní xáha<sup>n</sup> tucu-xi:

—Te núu ndisa cùu-n Déhe Yǎ Ndiöxí te cuandèe ndava ndéé núú ñúhú <sup>10</sup>cuèndá quee ndáá-xi nàcuáa càhá<sup>n</sup>-xi núú tütú Yǎ Ndiöxí núú càchí-xi:

Yǎ Ndiöxí tendaha-gǎ cue espíritú xínú cuèchi núú-gǎ quixi-xi coto ñaha-xi xii-n.

<sup>11</sup>Te núú ndáhá-xí càundodo-n cuendá sá vǎ dánícuèhé yúú sǎhá-n,

duha càchí-xi núú tütú-gá —càchí sácuíhná xǎha<sup>n</sup>-xi xii-gá.

<sup>12</sup>Te Jèsús ní xáha<sup>n</sup>-gǎ xii-xi:

—Te càchí tucu-xi núú tütú Yǎ Ndiöxí: “Vá cání iní-n còto ndeé-n Dütú Ndiöxí Yaá cúú Ndiöxí-n ñúu ndisa sá dácäcu nihnu ñaha-gǎ xii-n cuèndá ìi<sup>n</sup> sá sání iní-n càda-n sá cúú-xí mèe-n”, duha càchí-xi núú tütú-gá —càchí-gá xǎha<sup>n</sup>-gǎ xii-xi.

<sup>13</sup>Te sátá dúcá<sup>n</sup> te sácuíhná ñà túú-gǎ ní cùtnuní iní-xi nása cada-xi Jèsús, núu xíǎ<sup>n</sup> ní xica-xi cuáhá<sup>n</sup>-xi ní sanaa tnaa-xi.

### **Distritú Galileá ní chisaha Jèsús chiu<sup>n</sup> ní táhu Tǎtá-gǎ Dütú Ndiöxí cada-gá**

(Mt. 4:12-17; Mr. 1:14-15)

<sup>14</sup>Te Jèsús cuáhá<sup>n</sup> tucu-gá distritú Galileá, dico sa ndècu ndíhi-gá Espíritú Yǎ Ndiöxí, te ni càa xico xíǎ<sup>n</sup> ní níhí-yu tnúhu nchaa nàcuáa quide-gá. <sup>15</sup>Te ndi tnahá ñúú cuáhá<sup>n</sup>-gá duca<sup>n</sup> cuànguñhu-gá veñúhu-yu dànehé ñáhá-gǎ xii-yu, te nchaa-yu càchí-yu sá ío càhnu cuu-gá.

### **Jèsús ndécú-gǎ ñúú Nazàrét**

(Mt. 13:53-58; Mr. 6:1-6)

<sup>16</sup>Te Jèsús ní sáhá<sup>n</sup>-gá ñúú Nazàrét ñúú núú ní sahnú-gá. Te nduu ndètátú ñáyiú ní quíhu-gá veñúhu, chi duca<sup>n</sup> tnàhí quide-gá, te ní ngúnutnǎi-gá dácùaha-gá tutú ndéé tnúhu Yǎ Ndiöxí. <sup>17</sup>Te



ní sãñaha-güedë xii-gá tutú ndèé  
tnúhu ní cáhá<sup>n</sup> ndíi Chàiaá tée ní  
xóo cáhá<sup>n</sup> tnúhu Yá Ndiöxí ndéé  
sanaha, te òré ní nandicá-gá núú  
tütú-á<sup>n</sup> te ní naníhí-gã núú cãchí-xi:

<sup>18</sup> Espíritú Yã Ndiöxí ndécú ndíhi  
ñaha-xi xii-í,

chi ní cachí-gá sá cãhá<sup>n</sup>-í  
tnúhu-gá sá cúú-xí ñáyi  
ndàhú,

ñáyi vátá cündèdóho tnàhí-gá.

Te véxi-í cuendá vá ndíhú-gá  
iní ñáyi ñá túú ndècu váha  
iní-xi,

te cue ñáyi sa nèhe váha  
ñaha-ñá yucu ñãvãha dàcácu  
nihnu-í-yu.

Te cue ñáyi cuáá nacaá<sup>n</sup>-í  
núú-yu,

te ñáyi ndòho dandoho ñaha  
tnaha ñáyi-xi taunihnu-í-yu.

<sup>19</sup> Te cúñaha-í xii ñáyi sá sãá  
nduu càda Yá Ndiöxí ìí<sup>n</sup> sá  
vãha sá cúú-xí-yu.

Duha cãchí-xi núú tütú dácuaàha-gá.

<sup>20</sup> Te Jèsús ní nacadí-gá núú  
tütú-á<sup>n</sup>, te ní nacuaáha-gá ìí<sup>n</sup> tée  
xìnu cuechi veñúhu-á<sup>n</sup>, te ní  
ngóo-gá. Te nchaa ñáyi yìhi  
veñúhu ñá núú núú-yu ndèhe  
ñahá-yu xii-gá. <sup>21</sup> Te xãha<sup>n</sup>-gã xií-yu:  
—Mei vitna ní quee ndáá-xi  
nàcuáa cãhá<sup>n</sup>-xi núú tütú Yã Ndiöxí  
—cãchí-gá xãha<sup>n</sup>-gã xií-yu.

<sup>22</sup> Te nchaá-yu ní cáhá<sup>n</sup> váha-yu  
cuendá-gá, te ní cuñúhu-yu tnúhu  
váha cãhá<sup>n</sup>-gá, te xitnàhá-yu:  
—¿Te náa ñá díú tãe-a cùu-dé  
déhe té Chèé-ã<sup>n</sup>? —cãchí-yu  
xitnàhá-yu.

<sup>23</sup> Te Jèsús ní xãha<sup>n</sup>-gã:

—Na cãchí tnúhu ndáá-í xii-ndo  
sã ñúhú iní-ndó cúñaha-ndo xì-í ìí<sup>n</sup>

tnúhu cùtexínu sá cãhá<sup>n</sup> mée-ndó,  
te quesaha-ndo: “Ñátátná cada  
tátna mee-n”, duha quesaha-ndo.  
Te cúñaha tucu-ndo xii-í: “Sa ní  
níhí-ndí tnúhu nàcuáa ní quide-n  
ñúú Capèrnaúm, te cada-n tnàhá  
ñúú núú ñí sahnu-n”, duha  
quesaha-ndo —cãchí-gá xãha<sup>n</sup>-gã  
xií-yu.

<sup>24</sup> Te ní xãha<sup>n</sup> tucu-gá:

—Na cãchí tnúhu ndáá-í xii-ndo  
sã ñí ìí<sup>n</sup> tée cãhá<sup>n</sup> tnúhu Yá Ndiöxí  
ñá túú tnàhá iní ñáhá ñáyi ñúú-dé.

<sup>25</sup> Te na cãchí tnúhu ndáá tucu-í  
xii-ndo sã ìo vãi ñáyi ðíhí ñáyi  
quèé ní xíndecu nàció<sup>n</sup> Isràél  
cútnàhá ní xíndecu té Èliás cútnàhá  
ñá túú ní cùu<sup>n</sup> dáú ùní cuíá dava,  
te dàvá-á<sup>n</sup> ìo ní ndoho ñáyi docó  
nitùhú nàció<sup>n</sup>. <sup>26</sup> Dico Yá Ndiöxí ñá  
túú ní tëndaha-gá té Èliás quíhí<sup>n</sup>-dé  
vehe ndédani càa ñáyi ðíhí-á<sup>n</sup>,  
chi vehe ìí<sup>n</sup> ñaha ñúú Sàreptá ní  
xãha<sup>n</sup>-gã ní sáhá<sup>n</sup>-dé, te ñúú-á<sup>n</sup> cáá  
yàtni-xi ñúú Sidón. <sup>27</sup> Te ní xíndecu  
tucu ingá tée ní xóo cáhá<sup>n</sup> tnúhu  
Yá Ndiöxí ndéé sanaha, te tée-á<sup>n</sup> ñí  
xínani-dè Eliseú, te ðiu-ni dàvá-á<sup>n</sup>  
ñí xíndecu tucu vãi ñáyi cùhú  
nàció<sup>n</sup> Isràél, ñáyi ní tnahá cuéhé  
sã dátèhyú nihnu-xi yiqui cùnú-yu  
dico ñá túú ní ndúha-yu, chi  
ìí<sup>n</sup> ðii-ni té Nàamán tée ðistrítú Siriá  
ní ndúha-dé —cãchí-gá xãha<sup>n</sup>-gã  
xií-yu.

<sup>28</sup> Te sá dúcá<sup>n</sup> ñí cáhá<sup>n</sup>-gá te  
xíã<sup>n</sup> ní cudéé<sup>n</sup> víhí nchaa ñáyi  
yìhi veñúhu-ã<sup>n</sup> núú-gã. <sup>29</sup> Te ní  
queñuhú-yu Jèsús yuhu ðèhvá  
tìndúú núú cáá ñúú-yu-á<sup>n</sup> cuendá  
yàcá<sup>n</sup> dàquée-yu-gá ðèhvá ní cùu.

<sup>30</sup> Dico Jèsús vii-ni ní quee-gá  
tnúú-yu cuáhá<sup>n</sup>-gá.

**İi<sup>n</sup> tée yìhi ñaha espíritú cúndìhi  
yucu ñávàha**

(Mr. 1:21-28)

<sup>31</sup>Te Jèsús cuáhá<sup>n</sup>-gá ñuu Capèrnaúm, te ñuu-á<sup>n</sup> yíndèhu-xi distritú Galileá. Te yàcá<sup>n</sup> ndécú-gă ní tnahá nduu ndètatú ñáyiu, te ní ngúfta-gá dácuaà-gă ñáyiu. <sup>32</sup>Te xícuñuhu-yu nchaa nàcuáa dànehé ñáhá-gă xii-yu, chi càhá<sup>n</sup>-gá dàtná càhá<sup>n</sup> İi<sup>n</sup> tée cùnuu, te cùnuu ndisa-gă.

<sup>33</sup>Te xití veñúhu yìhi İi<sup>n</sup> tée yìhi ñaha İi<sup>n</sup> espíritú cúndìhi yucu ñávàha, te espíritú-á<sup>n</sup> nı quide-xi níhi ní cáhá<sup>n</sup> tée-á<sup>n</sup>, te xàha<sup>n</sup>-dè xii Jèsús:

<sup>34</sup>—İTe ná cuinı yòhó Jèsús tée ñuu Nazàrét cada ñaha-n xii-ndı ñuu vèxi-n nı ndécú-ndı-i? İÁ<sup>n</sup> vèxi-n dànaa ñaha-n xii-ndı? Chi yúhú xini ñáhà-ı xii-n sã cúu-n İi<sup>n</sup> tée ñá túu tnahı cuèchi-xi chi nıú Yã Ndiöxı ní quee-n vèxi-n ñuyú-a —càchı-dé xàha<sup>n</sup>-dè xii-gă.

<sup>35</sup>Te Jèsús ní tenàà-gă espíritú cúndìhi yucu ñávàha-á<sup>n</sup>, te xàha<sup>n</sup>-gă:

—ıCadı yuhu-n, te taquèe yiqui cuñú tée-á<sup>n</sup>! —càchı-gă xàha<sup>n</sup>-gă.

Te espíritú cúndìhi yucu ñávàha-á<sup>n</sup> nı dándú-a-xi tée-á<sup>n</sup> ndèe ñuhu tnuú ñáyiu xındecu-á<sup>n</sup>, te ñá túu-gă ná ní quide ñaha-xi, te ní quee ñaha-xi xii-dé. <sup>36</sup>Te nchaa ñáyiu xındecu-á<sup>n</sup> nı cuñuhu-yu, te ní xitnahá-yu:

—İTe nása nduu-tu tnuúhú càhá<sup>n</sup> tée-á<sup>n</sup> ñá? İTe càhá<sup>n</sup>-dè dàtná càhá<sup>n</sup> İi<sup>n</sup> tée tàxi tnuı víhı, chi càhá<sup>n</sup>-ni-dé te nchaa espíritú cúndìhi yucu ñávàha quèe-ni-xi

yiqui cuñú-yu! —càchı-yu xitnahá-yu.

<sup>37</sup>Te nchaa xichi ní níhı-yu tnuúhú nàcuáa quide Jèsús.

**Jèsús quidé tãtna-gă nãná ñadìhi té  
Xímú**

(Mt. 8:14-15; Mr. 1:29-31)

<sup>38</sup>Te Jèsús ní ndee-gă xitı veñúhu, te cuáhá<sup>n</sup>-gă vehe té Xímú. Te nãná ñadìhi té Xímú-á<sup>n</sup> cùhú-a<sup>n</sup> ñuhu vihi-a<sup>n</sup> cahni, te ní cáhá<sup>n</sup> ndàhú-yu núú Jèsús cuèndá-a<sup>n</sup>. <sup>39</sup>Te Jèsús ní sáhá<sup>n</sup>-gă núú ndécú-á<sup>n</sup>, te ní ngúnundeyi-gă te ní xáha<sup>n</sup>-gă xii cahni-á<sup>n</sup> sã ná xòcuñı-xi, te ní xòcuñı-ni-xi, te òrè-ni-á<sup>n</sup> nı ndúha ñaha cùhú-á<sup>n</sup> te ní ndacóo-a<sup>n</sup> ní xinu cuechi-a<sup>n</sup> nıú-güedè ndıhi-gă.

**Jèsús quidé tãtna-gă vài ñáyiu cùhú**

(Mt. 8:16-17; Mr. 1:32-34)

<sup>40</sup>Te òrè ní ngódó tnuú nchıcanchıi, te nchaa ñáyiu xındecu ndıhi ñáyiu cùhú vehe-xi ndèca ñahá-yu cuáhá<sup>n</sup> núú Jèsús. Te Jèsús ní sacá<sup>n</sup> ndodo-gă ndaha-gă díquı İi<sup>n</sup> İi<sup>n</sup> ñáyiu cùhú-á<sup>n</sup>, te duca<sup>n</sup> nı quide-gă te ní ndúha-yu. Te ndı díf<sup>n</sup> nıú cuèhé tnahá-yu İi<sup>n</sup> İi<sup>n</sup>-yu ni cùu.

<sup>41</sup>Te tnahá dava ñáyiu cùhú-á<sup>n</sup> yfhi ñaha espíritú cúndìhi yucu ñávàha xii-yu ni cùu, te òrè ní quee ñaha-xi xii-yu, te xıá<sup>n</sup> ní quide-xi níhi ní cáhá<sup>n</sup>-yu, te xáhã<sup>n</sup>-yu xii Jèsús:  
—Yòhó cúu-n Dèhe Dútú Ndiöxı —càchı-yu xáhã<sup>n</sup>-yu xii-gă.

Dico Jèsús níhi ní cáhá<sup>n</sup>-gă ní tenàà-gă nchaa espíritú cúndìhi yucu ñávàha-á<sup>n</sup>, te xàha<sup>n</sup>-gă sã vã dúcá<sup>n</sup>-gă cada-xi, chi sa xini-xi sã díú-gă cúu-gă Cristú Yáa ní tendaha Yã Ndiöxı vèxi ñuyú-a.

**Jèsús dánèhé-gá ñáyiú distritú  
Galiléá**

(Mr. 1:35-39)

<sup>42</sup>Te ìí<sup>n</sup> nduu ní túndaá-ni ní quee Jèsús ñuú núú ndécú-gă-á<sup>n</sup> cuáhá<sup>n</sup>-gá ìí<sup>n</sup> xichi núú ñă túú ñăyiú ndècu. Te cue ñáyiú ní ngúíta-yu nànducu ñahá-yu xii-gá te ní naníhí ñáhă-yu, te cuíní-yu ngani ñahá-yu xii-gá cuèndá sá ñà túú-gă ndèé quíhí<sup>n</sup>-gá ní cùu. <sup>43</sup>Dico ní xáha<sup>n</sup>-gă xií-yu:

—Dacuitíí quíhí<sup>n</sup>-í cúñaha-í xii nchaa ñáyiú dava-gá ñuú tnúhu sá càhá<sup>n</sup> nàcuáa ndíhu ndaha ñàha Yá Ndióxi xií-yu, chi chiú<sup>n</sup> tnahí-ă<sup>n</sup> vëxi-í —càchí-gá xăha<sup>n</sup>-gă xií-yu.

<sup>44</sup>Te ní xica cuu Jèsús ní dánèhé-gá ñáyiú tnúhu-gá nchaa xití veñúhu ndăa distritú Galiléá.

**Jèsús ní quide-gá ní níhí-güedě  
chácá**

(Mt. 4:18-22; Mr. 1:16-20)

**5** Te ìí<sup>n</sup> xito ndècu Jesús yuhu làgúná Genesàrét, te ío cuéhé ñăyiú ní sáá, te ta dàdehnde ñaha-ná-yu xii-gá cuáhá<sup>n</sup> sá cuíní-yu cundedóho-yu nchaa tnúhu càhá<sup>n</sup>-gá. <sup>2</sup>Te Jèsús ní xiní-gá úú bàrcú cue téé tñii chácá xínutnîi-xi yatni yuhu làgúná-á<sup>n</sup>, te sa ní quene cue téé ñúhu xití-xi-á<sup>n</sup> xínaquete-güedé ñunu-güedé. <sup>3</sup>Te Jèsús cuásaá-gá núú ìí<sup>n</sup> bàrcú-á<sup>n</sup>, te bàrcú-á<sup>n</sup> cúú-xí bàrcú té Xímú, te ní xáha<sup>n</sup>-gă xii té Xímú-á<sup>n</sup> să dánundehe-dé-xi luha-gá xití ndute. Te dătnùní ní ngóo-gá núú bàrcú-á<sup>n</sup>, te xíá<sup>n</sup> núcöo-gá ní ngúíta-gá dánèhé-gá ñáyiú. <sup>4</sup>Te òré ní túhú ní dánèhé ñahá-gă xií-yu, te ní xáha<sup>n</sup>-gă xii té Xímú:

—Daquihí<sup>n</sup> bàrcú-a xití làgúná mei núú cùnú-gá, te dàquée-ndo ñunu-ndo tñii-ndo chácá —càchí-gá xăha<sup>n</sup>-gă xii-dé.

<sup>5</sup>Te té Xímú ní xáha<sup>n</sup>-dë:

—Mèstrú, ni niú ní quide chiú<sup>n</sup>-ndí te ni ìí<sup>n</sup> chácá ñà túú ní nîhí-ndí, dico vitna cuèndá-ni sá yòhó táuchiu<sup>n</sup>-n te na dàquée-ndí ñunu-ndí vá<sup>n</sup> —càchí-dé xăha<sup>n</sup>-dë xii-gá.

<sup>6</sup>Te òré ní dáquëe-güedé ñunu-güedé te súúni vâi chácá nî níhí-güedě, te ta ndătá-ñă ñunu-güedé cuáhá<sup>n</sup> ní cùu. <sup>7</sup>Núu ní quide-güedé ndaha-güedé núú dâva-gá cue téé cündihî-güedé xíxúhu<sup>n</sup> íngá bàrcú cuèndá quíhí<sup>n</sup>-güedé chindee ñàha-güedé.

Te cue téé-á<sup>n</sup> nî sáhá<sup>n</sup>-güedé ní chindee tñaha-güedé ní dáchítú-güedé ndi ndúú bàrcú mee-ni chácá, te súúni nî cuu vée núu cuíní-na-xi quée naa-güedé ndihî bàrcú ní cùu. <sup>8</sup>Te sá dúcá<sup>n</sup> cuíní-xi quée naa bàrcú ní cùu, núu té Xímú, àdi Pelú chi úú dàu-dé, ní ngúíñî xítí-dë núú Jèsús, te xăha<sup>n</sup>-dë:

—Xocuíñî yòhó Jèsús núú ndécú-í-a, chi yúhú cùú-í ìí<sup>n</sup> téé ío ndècu cuéchi-xi —càchí-dé xăha<sup>n</sup>-dë xii-gá.

<sup>9</sup>Te duca<sup>n</sup> ní cáhá<sup>n</sup>-dé chi ní yúhú-dé, te ní cuñúhu-dé ndihî nchaa cue téé ndihî-dé-á<sup>n</sup> cuèndá sá ío vâi chácá nî níhí-güedě.

<sup>10</sup>Te tñahá té Jàcobó ndihî té Juáa cue déhe té Zebèdeú ío ní cuñúhu-güedé, te diu-ni cue téé cündihî té Xímú-á<sup>n</sup> cúú-güedé tñahá-güedé. Te Jèsús ní xáha<sup>n</sup>-gă xii té Xímú:

—Vá yùhú-n, chi není vitna quíh<sup>m</sup>-n dàcahá<sup>n</sup>-n ñàyiú cuèndá tuha ñàhá-yu xii-í —càchí-gá xàha<sup>n</sup>-gã xii-dé.

<sup>11</sup>Te ní quene-güedé ndihi bàrcú ndéé ñuhu yìchí yuhu làgúná-á<sup>n</sup>. Te òré-á<sup>n</sup> ñí dándò-güedé nchaandi túhú sá ndécú ndihi-güedé, te ní tuha-güedé Jèsús.

**Jèsús quidé tătna-gá ì<sup>n</sup> téé tñàhá cuéhé sã dátèhyú nihnu-xi yiqui cùñú-ó**

*(Mt. 8:1-4; Mr. 1:40-45)*

<sup>12</sup>Te òré ní quexìo Jèsús ì<sup>n</sup> ñuú, te ní quexìo ì<sup>n</sup> téé cùhú tñàhá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáhá<sup>n</sup>-dé núú ndécú-gã, te ní ngüíñí xítí-dé núú-gã te ní nuu núú-dě ndàa núú ñùhú te càhá<sup>n</sup> ndàhú-dé, te xàha<sup>n</sup>-dě xii-gá:

—Mèstrú, véxi-í càhá<sup>n</sup> ndàhú-í núú-n ñuu vá cùndèè iní-n càda tătna ñaha-n xii-í, chi cùtnuní iní-í sá ndácú-n —càchí-dé xàha<sup>n</sup>-dě xii-gá.

<sup>13</sup>Te Jèsús ní dácàà-gá ndaha-gá ní tendaha ñaha-gá xii-dé, te xàha<sup>n</sup>-gã:

—Cuu cada tătna ñaha-í xii-n, te vitna te ndúha-n —càchí-gá xàha<sup>n</sup>-gã xii-dé.

Te òré-ni ní xócuñí cuéhé tñàhá-dé. <sup>14</sup>Te dàtnuní ní xàha<sup>n</sup> tucu Jèsús xii-dé:

—Vá yõ ì<sup>n</sup> cùñaha-n sã ñí quide tătna ñaha-í xii-n, núú dütú-ni cuáhá<sup>n</sup> cuèndá sá ná quini ñàhá-dě xii-n sã ñí ndúha-n te cuáha-n-dě sá ndúú tãhú Yã Ndiõxi dàtná ní cachí ndíi Moisés cuèndá ná quini ñáyiú sá ndàa ní ndúha-n —càchí-gá xàha<sup>n</sup>-gã xii-dé.

<sup>15</sup>Te duca<sup>n</sup> ta xíté nuu-gá tñúhu nchaa nàcuáa quide Jèsús, te ío cuéhé ñáyiú ní xóo tacá nchaa núú ñí xíndecu-gá cuèndá sá cuini-yu cundedóho-yu tñúhu càhá<sup>n</sup>-gã, ndihi cuèndá sá cuini-yu cada tătna ñaha-gã xii-yu. <sup>16</sup>Dico Jèsús ní xóo quee nihni-gá tnuú-yu ní xóo quíh<sup>m</sup>-gá núú ñà túú ñáyiú ndècu ní xóo càhá<sup>n</sup> ndihi-gá Yã Ndiõxi.

**Jèsús quidé tătna-gá ì<sup>n</sup> téé cùhú ñá cùú-gã candá nihnu**

*(Mt. 9:1-8; Mr. 2:1-12)*

<sup>17</sup>Te ì<sup>n</sup> nduu dànehé-gá ñáyiú, te xínucóo ì<sup>n</sup> úú cue téé cùu fariséú, ndihi cue téé dàcuaha ñaha xii ñáyiú nchaa tñúhu ní chídó tñuní ndíi Moisés. Te cue téé-á<sup>n</sup> ñí quee-güedé nchaa ñuu yíndèhu distritú Galileá, ndihi distritú Jùdeá, ndihi ñuu Jerusàlén, te nchaa ñuu-á<sup>n</sup> ñí quee-güedé cuáhá<sup>n</sup>-güedé núú ndécú-gã. Te Yã Ndiõxi chíndèè ñaha-gá quidé tătna-gá ñáyiú cùhú.

<sup>18</sup>Te ì<sup>n</sup> úú cue téé nchido-güedé ì<sup>n</sup> téé cùhú ñá cùú-gã candá nihnu ñuhu-dé xító ní quexìo ndihi ñaha-güedé, te cuini-güedé quíhu ndihi ñaha-güedé ndéé xití vehe, sáá-güedé ndéé núú Jèsús ndihi téé cùhú-á<sup>n</sup>. <sup>19</sup>Dico ñá túú ní ñíhí-güedé ndéè ichi quíhu-güedé, chi cuèndá ío cuéhé ñáyiú ndècu, núú xíã<sup>n</sup> ní sáá-güedé díquí véhé-ã<sup>n</sup> ñí caá<sup>n</sup>-güedé te ndàa díquí véhé-ã<sup>n</sup> ñí dáquèe-güedé téé cùhú-á<sup>n</sup>, te ñuhu-ni-dé xító ní dáquèe ñaha-güedé tnuú ñáyiú ní sáá ndéé núú Jèsús. <sup>20</sup>Te Jèsús ní cutnuni iní-gá sá ñí yuhu ni iní-güedé sàndáá iní ñàhá-güedé xii-gá, núú ní xàha<sup>n</sup>-gã xii téé cùhú-á<sup>n</sup>:

—Yòhó tée cùhú, sa ní quide cànnu iní-í nchaa cuéchi-n — cächí-gá xǎha<sup>n</sup>-gǎ xii-dé.

<sup>21</sup>Te cue tée dàcuaha ñaha xií-yu nchaa tnúhu ní chídó tnùní ndíi Moisés ndíhi cue tée cùu fariséu ní sani iní-güedé: “¿Ná cúú tée-a núu cǎhá<sup>n</sup> cuèhé-dé cuendá Yǎ Ndiǒxí-i? Te vá yǒo ì<sup>n</sup> ndàcu cada cahnu iní nchaa yícá cuèchi ñáyiú, chi ì<sup>n</sup> ðií-díi-ni Yá Ndiǒxí quidé cànnu iní-gǎ”, duha ní sani iní-güedé.

<sup>22</sup>Dico Jèsús sa ní cutnùní iní-gǎ nàcuáa sàni iní-güedé nùu ní xáha<sup>n</sup>-gǎ xii-güedé:

—¿Te ná cuendá duca<sup>n</sup> sàni iní-ndó-í? <sup>23</sup>Te sá dúhá ní xáha<sup>n</sup>-í xii tée cùhú-a sá cǎdá cànnu iní-í nchaa yícá cuèchi-dé, te xǎ<sup>n</sup> nchòhó ñá túú cùtnuní iní-ndó nùu ndáá cǎhá<sup>n</sup>-í àdi ñá ndáá. Dico núu cúu-í-dé sá ndácòo-dé, te caca-dé te cutnùní ndáá iní-ndó nùu ndáá cǎhá<sup>n</sup>-í àdi ñá ndáá, chi cundehe nùú-ndó nàcuáa cada-í. <sup>24</sup>Te vitna na càda-í nàcuáa cutnùní iní-ndó nchàa-ndo sá yǔhú Tée cùu ñani tnáhá-ndó nchàa-ndo ndecu ndíhi-í tnúhu ndee ìni sá cǎdá cànnu iní-í nchaa cuéchi ñáyiú ñuyíú-a — cächí-gá xǎha<sup>n</sup>-gǎ xii-güedé.

Te sátá dúcá<sup>n</sup> te ní xáha<sup>n</sup>-gǎ xii tée cùhú-á<sup>n</sup>:

—Ndacóo, te ndocani-n xító ñuhu-n véxi-á<sup>n</sup>, te núhú-n vèhe-n — cachí-gá xǎha<sup>n</sup>-gǎ xii-dé.

<sup>25</sup>Te òrè-ni-á<sup>n</sup> ní ndúha tée cùhú-á<sup>n</sup> te ní ndacóo-dé, te ní ndocani-dé xító ñuhu-dé ní quexìo-á<sup>n</sup>, te ní natnii-dé ichi ta cǎhá<sup>n</sup>-dé cuánuhú sá ìo cànnu cuu Yá Ndiǒxí. <sup>26</sup>Te nchaa ñáyiú xǐndecu-á<sup>n</sup> ní cuñúhu-yu, te tnáhá-yu ní cachí-yu

sá ìo cànnu cuu Yá Ndiǒxí, te duca<sup>n</sup> ìo ní yùhú-yu, te ní xítñahá-yu:

—Vitna ní xiní-ó ì<sup>n</sup> sá ñà túú tnáhí xiní-ó ní cùu —cachí-yu xítñahá-yu.

### Jèsús cǎná-gǎ té Lèví

(Mt. 9:9-13; Mr. 2:13-17)

<sup>27</sup>Te sátá dúcá<sup>n</sup> ní cuu te ní quee Jèsús xíá<sup>n</sup>, te ní xiní-gǎ ì<sup>n</sup> tée nàni Leví núcòo-dé ì<sup>n</sup> xichi quide cobrá-dé ñáyiú cuendá impuèstú, chi cobràdór cúú-dé, te ní xáha<sup>n</sup>-gǎ xii-dé:

—Néhe chìtnahá ñáhá-n xii-í — cächí-gá xǎha<sup>n</sup>-gǎ xii-dé.

<sup>28</sup>Te té Lèví-á<sup>n</sup> ní ndàcuíñí-dé te ní dándòo-dé nchaa sá ndécú ndíhi-dé núu núcòo-dé-á<sup>n</sup>, te ní tuha-dé Jèsús.

<sup>29</sup>Te sátá dúcá<sup>n</sup> te té Lèví-á<sup>n</sup> ní quide-dé ì<sup>n</sup> vico cànnu vehe-dé sá cúú-xí Jèsús, te ní tacá vài cue tée quide chiu<sup>n</sup> quide-dé, te nchaa-güedé cuánguihu-güedé mèsá ní ngóo-güedé ndíhi dava-gǎ ñáyiú ní quexìo cuendá caxi-güedé ndíhi-yu. <sup>30</sup>Dico cue tée cùu fariséu ndíhi cue tée dàcuaha ñaha xií-yu nchaa tnúhu ní chídó tnùní ndíi Moisés ní ngúíta-güedé xícüèhé-güedé cue tée xica cuu ndíhi-gǎ, te xǎha<sup>n</sup>-güedé:

—¿Ná cuendá xéxi-ndó xíhi-ndo ndíhi cue tée cuihna iní-xi quide cobrá ñáhá xii ñáyiú cuendá impuèstú, ndíhi nchaa dava-gǎ cue tée ndècu ichi cuehé ichi duha-i? — cächí-güedé xǎha<sup>n</sup>-güedé.

<sup>31</sup>Te Jèsús ní xáha<sup>n</sup>-gǎ xii-güedé: —Nchaa ñáyiú ñá túú cùhú chi ñá túú xini ñuhú-yu ñátátná, dico nchaa ñáyiú cùhú chi xini ñuhu

ñahá-yu. <sup>32</sup>Te yúhú véxi-í càhá<sup>n</sup>-í ñáyiú cùtnuní iní-xi sá ndécú cuèchi-xi cuendá ðàhá-yu nchaa sá cuèhé sá dúhá quidé-yu, te ñá túú véxi-í càhá<sup>n</sup>-í ñáyiú càchí sá ñá túú ndècu cuèchi-xi —càchí-gá xáha<sup>n</sup>-gă xii-güedé.

**Cue tée ndücu tnúhu núú Jèsús cuendá ñáyiú ñá túú tnàhí ná xéxí áma càhá<sup>n</sup> ndihí-yu Yá Ndiöxí**  
(Mt. 9:14-17; Mr. 2:18-22)

<sup>33</sup>Te ní xáha<sup>n</sup>-güedě xii Jèsús: —Te áma ñá túú tnàhí ná xéxí cuè tée xica cuu ndihí té Juää càhá<sup>n</sup> ndihí-güedé Yá Ndiöxí, te ðiu-ni duca<sup>n</sup> quide cue tée xica cuu ndihí nchúhú cue tée cùu fariséú. ¿Te ná cuendá cue tée xica cuu ndihí-n ñá túú ðuca<sup>n</sup> quide-güedé ñuu nchaa-ni nduu xèxi-güedé xihí-güedé quidé-güedě-i? —cachí-güedé xáha<sup>n</sup>-güedě xii-gá.

<sup>34</sup>Te Jèsús ní xáha<sup>n</sup>-gă xii-güedé: —Nchòhó xini-ndó sã vã cúú cùñaha-o xìi cue ñáyiú ñùhu vico tnándaha sá vã cúú càxí-yu nini ndècu ndihí ñaha tée tnándaha-á<sup>n</sup> xií-yu. <sup>35</sup>Dico sáá nduu te vã cùndècu ndihí ñaha-gá tée tnándaha-á<sup>n</sup> xií-yu, te ðavá-á<sup>n</sup> te cahni iní-yu vã cáxí-yu sá ndihú iní-yu —càchí-gá xáha<sup>n</sup>-gă xii-güedé.

<sup>36</sup>Te ní cani-gá ì<sup>n</sup> cuendú núú ñáyiú nàcuáa tecú tnùní-yu tnúhu-gá, te xáha<sup>n</sup>-gă:

—Vá yõ ì<sup>n</sup> ðandée luha dóó sáá ì<sup>n</sup> dóó sa ní cuu tühú víhí, chi núu yoo duca<sup>n</sup> na càda, te dóó sáá-á<sup>n</sup> nàndiyi-xi te uu<sup>n</sup>-gá ndata-xi dóó sã ní cuu tühú-á<sup>n</sup>, te luha dóó sáá-á<sup>n</sup> ñá túú nàtaú-xi ndée dóó

sã ní cuu tühú-á<sup>n</sup>. <sup>37</sup>Te nì vá yõ ì<sup>n</sup> chihí ndidí sáá xití ì<sup>n</sup> lamba sa ní cuu tühú víhí, chi núu yoo duca<sup>n</sup> na càda, te ndava lamba sa ní cuu tühú-á<sup>n</sup> chi ío níhi yócó ndidí-á<sup>n</sup>, te cuíta-ni ndidí-á<sup>n</sup> te cuíta-ni lamba-á<sup>n</sup>. <sup>38</sup>Núu xíã<sup>n</sup> xíní ñùhu-xi quée ndidí sáá-á<sup>n</sup> xití ì<sup>n</sup> lamba saa cuendá duca<sup>n</sup> ñá túú ñá cuu cováha-xi. <sup>39</sup>Te ni ì<sup>n</sup> ñáyiú ñá túú tnàhá iní-yu cohó-yu ndidí sáá, te núu díhna-gá ná còhó-yu ndidí sá ní quene díhna-gá, chi càchí-yu sá xihí vãha-gá ndidí sá ní quene díhna-gá-á<sup>n</sup> ðacúxí ndidí sáá —càchí-gá xáha<sup>n</sup>-gă xií-yu.

**Cue tée xica cuu ndihí Jesús sàhnú-güedé yoco triú nduu ndetatú ñáyiú**

(Mt. 12:1-8; Mr. 2:23-28)

**6** Te ì<sup>n</sup> nduu cùu-xi nduu ndetatú ñáyiú ñùhu Jesús ichi ndihí cue tée xica cuu ndihí-gá, te ta yãha-gá ndihí-güedé ì<sup>n</sup> xichi núú cáá triú, te ní ngüita-güedé sàhnú-güedé yoco triú-á<sup>n</sup> te ndihí ndaha-güedé quí<sup>n</sup>-güedé quée triú tá xèxi-güedé cuáhá<sup>n</sup>. <sup>2</sup>Te ì<sup>n</sup> úú cue tée cùu fariséú ní xáha<sup>n</sup>-güedě xii cue tée xica cuu ndihí-gá: —¿Te ná cuendá duca<sup>n</sup> quide nchohó ì<sup>n</sup> sá ñá túú tàú-ó càda-o vitna cuu-xi nduu ndetatú-ó-í? —càchí-güedé xáha<sup>n</sup>-güedé.

<sup>3</sup>Te Jèsús ní xáha<sup>n</sup>-gă xii-güedé: —¿Te ná ñá túú ðacuaha-ndo núú tütú Yá Ndiöxí núú càhá<sup>n</sup>-xi nàcuáa ní quide ndíi Dàvíí cútnàhí ní xihí ndíi docó ndihí cue tée ní xica cuu ndihí ndíi-á<sup>n</sup>? <sup>4</sup>Chi ní quíhu ndíi vehe Yá Ndiöxí, te ní quehe<sup>n</sup> ndíi páá ní cuu íi ndécú-á<sup>n</sup> ní ðacãhñu

ndíi cue tée xica cuu ndihi ndíi ní xexi ndíi ndihi-güedé, te ñá túú tàú ndíi sá dúcá<sup>n</sup> cada ndíi ni cùu, chi mee-ni cuè dútú tàú-güedé caxi-güedé pàá-á<sup>n</sup> ní cùu —cachí-gá xăha<sup>n</sup>-gă xii-güedé.

<sup>5</sup>Te ní xăha<sup>n</sup> tùcu-gá:

—Te yúhú Tée cùu ñaní tnáhá-ndó nchăa-ndo, tnáhá-í ndécú ndíhi-í tnúhu ndee iní sá cùu-í nchaa ñáyiú năcuăa cadă-yu nduu ndetátú-ó-á —càchí-gá xăha<sup>n</sup>-gă xii-güedé.

**İ<sup>n</sup> tée ní yíchí İ<sup>n</sup> xio ndaha-xi**

(Mt. 12:9-14; Mr. 3:1-6)

<sup>6</sup>Te ingá nduu diu-ni nduu ndetátú ñáyiú cuánguihu Jèsús xití veñúhu dănehé-gá ñáyiú. Te xíá<sup>n</sup> ndécú İ<sup>n</sup> tée cùhú ní yíchí nihnu İ<sup>n</sup> xio ndaha cùha-dé. <sup>7</sup>Te cue tée dăcuaha ñaha xii ñáyiú nchaa tnúhu ní chídó tnùní ndíi Moisés, ndihi cue tée cùu fariséú ndéhé-güedé ñuu cada tătna ñaha Jèsús xii tée cùhú-á<sup>n</sup> nduu ndetátú-güedé-á<sup>n</sup> cuendá níhí-güedé năcuăa cada-güedé cacá<sup>n</sup> cuéchi-güedé cuendá-gá. <sup>8</sup>Dico Jèsús sa ní cutnùnı iní-gá năcuăa sàni iní-güedé, te ní xăha<sup>n</sup>-gă xii tée cùhú ndaha-xi-á<sup>n</sup>:

—Ndăcuiñı te ngúnutnı-n cuădava tnuú-ndı-a —càchí-gá xăha<sup>n</sup>-gă xii-dé.

Te tée-á<sup>n</sup> nı ndacuñı-dé te ní ngúnutnı-dé cuădava tnuú-güedé ndihi-gá. <sup>9</sup>Te dătnùnı Jèsús ní xícá<sup>n</sup> tnúhú-gă núú cuè ñáyiú xındecu-á<sup>n</sup>, te xăha<sup>n</sup>-gă xii-yu:

—Cuını-ı cachí tnúhu-ndo nă cúú să văha cada-o ndùu ndetátú-ó. İ<sup>n</sup> chıú<sup>n</sup> váha àdi İ<sup>n</sup> chiu<sup>n</sup> cuehé, sá cadá tătna-o ñáyiú cùhú àdi sá

căhni-ó-yu? —càchí-gá xăha<sup>n</sup>-gă xii-yu.

<sup>10</sup>Te dătnùnı ní ndacoto-gá núú-yu nchaa-yu, te ní xăha<sup>n</sup>-gă xii tée cùhú ndaha-xi-á<sup>n</sup>:

—Ndocani ndaha-n —càchí-gá xăha<sup>n</sup>-gă xii-dé.

Te ní ndocani-dé ndaha-dé, te òre-ni ní ndúha. <sup>11</sup>Te cue tée xındecu-á<sup>n</sup> sũúni nı cudéé<sup>n</sup>-güedé sá dúcá<sup>n</sup> nı quide tătna Jèsús tée cùhú-á<sup>n</sup>, te ní ngũfta-güedé ndătnúhu-güedé ñuu năsa cada ñaha-güedé xii-gá.

**Jèsús căxi-gá úxúú tnáhá cue tée dacuăha ñaha xii ñáyiú tnúhu-gá**

(Mt. 10:1-4; Mr. 3:13-19)

<sup>12</sup>Te sátá dúcá<sup>n</sup> nı cuu te ní xica Jèsús cuáhá<sup>n</sup>-gă xití yucu cuendá yacá<sup>n</sup> cáhá<sup>n</sup> ndihi-gá Tătá-gă Dútú Ndióxi, te ni niú ní cáhá<sup>n</sup> ndihi ñaha-gă. <sup>13</sup>Te sátá nı túndaá, te ní cana-gă nchaa cue tée xica cuu ndihi-gá, te ní caxi-gá úxúú tnáhá-güedé, te cue tée-á<sup>n</sup> nı xăha<sup>n</sup>-gă sá díú-güedé cuu-güedé cue tée quıh<sup>n</sup> cáhá<sup>n</sup> tnúhu-gá núú ñáyiú. <sup>14</sup>Te duha xınani ndi úxúú cue tée-á<sup>n</sup>. Té Xímú, àdi Pelú chi úú diu-dé, ndihi ñanı-dé té Ndrıxı, ndihi té Jăcobó, ndihi té Juăá, ndihi té Lipé, ndihi té Bartolómé, <sup>15</sup>ndihi té Măteú, ndihi té Măxi, ndihi té Jăcobó dehe té Ālfeú, ndihi ingá té Xímú tée ní cundihi cue tée canănistá, <sup>16</sup>ndihi té Júdás ñanı té Jăcobó, ndihi té Júdás İscarioté tée ní sáá nduu nı sáha cuendá ñáhá xii Jেসús núú cuè tée cùu úhú inı ñáhá xii-gá, duha xınani cuè tée nı caxi Jèsús ní xica cuu ndihi-gá.

**Jèsús dănèhé-gá cuéhé víhı ñáyiú**

(Mt. 4:23-25)

<sup>17</sup>Te Jèsús cuănuu-gá yucu núú nı sáá-gă-á<sup>n</sup>, te ní ngava-gă İ<sup>n</sup>

núu ndàá ndihi cue tée xica cuu ndihi-gá, te xía<sup>n</sup> nǐ ngúnutnǐ-gá. Te xía<sup>n</sup> ndécú dáva-gá cue tée xica cuu ndihi-gá ndihi vǎi ñáyi ndètu ñahá-yu xii-gá, te ñáyi-á<sup>n</sup> vèxi-yu nchaa ñuú cáá distritú Jùdeá, ndihi ñuú Jerusàlén, te ndècu ñáyi véxi ndàa yuhu lamár yatni ñuú Tìrú, ndihi ñuú Sìdón. Te nchaa ñáyi-á<sup>n</sup> nǐ quexìo-yu cuiní-yu cundedóho-yu nchaa tnúhu càhá<sup>n</sup> Jèsús, ndihi cuendá sá cuiní-yu ndúha-yu nchaa cuéhé tnàhá-yu. <sup>18</sup>Te tnàhá ñáyi yǐhi ñaha espíritú cùndǐhi yucu ñávàha. <sup>19</sup>Te nchaá-yu cuiní-yu dacàá-yu ndahá-yu tendàhá-yu Jèsús ní cùu cuendá sá nǐ níhǐ-yu tnúhu sá ndècu ndihi-gá tnúhu ndee ìni quidé tǎtna-gá nchaa ñáyi cùhú.

### **Cuendá ñáyi ío váha táhú-xi**

(Mt. 5:1-12)

<sup>20</sup>Te Jèsús ní ndacoto-gá núu cuè tée xica cuu ndihi-gá, te ní xáha<sup>n</sup>-gǎ:

—Váha táhú nchaa nchòhó cue ñáyi ndàhú, chi nduu táhú-ndó cùndecu-ndo núu táxí tnùnǐ Yá Ndiòxí.

<sup>21</sup>Váha táhú nchaa nchòhó ñáyi ío cuiní cundedóho tnúhu Yá Ndiòxí chi ío vii ío váha cuu iní-ndó.

’Váha táhú nchaa nchòhó ñáyi ndàhyú sá ndǐhú iní-ndó, chi sáá nduu te cudǐ iní-ndó nǐ caa ní quǐhǐ<sup>n</sup>.

<sup>22</sup>Váha táhú nchaa nchòhó ñáyi na cùu úhú iní ñáhá tnàha ñáyi-xi, chi sáá nduu te vá dáñá-gǎ-yu quǐhu-ndo vèñúhu, te cúcuèhé ñáhá-yu xii-ndo, te cachí-yu sá ñà díú ñáyi váha cùu-ndo, te duca<sup>n</sup>

càda ñahá-yu xii-ndo sǎ cuendá yúhú Tée cùu ñanǐ tnàhá-ndó nchàa-ndo. <sup>23</sup>Te òré duca<sup>n</sup> na càda ñahá-yu xii-ndo te cudǐ víhí-ní ìní-ndó cùndecu-ndo, chi sáá nduu ndúu táhú-ndó sǎ ïo váha càa ndecu andiu cundecu ndihi-ndo nduu na nasaá-ndó yàcá<sup>n</sup> cundecu-ndo, chi díu-ni duca<sup>n</sup> nǐ xóo cada ñaha cuè ñanǐ tnàhá-yu xii cue tée ní xóo cáhá<sup>n</sup> tnúhu Yá Ndiòxí ní xíndecu ndéé sanaha.

<sup>24</sup>’Te ndàhú ní cuu nchaa ñáyi cuica ñà túú sàndáá iní ñáhá xii Yá Ndiòxí, chi vitna ío váha ndécú-yu, dico sáá nduu te nduu ndàhú-yu.

<sup>25</sup>’Te ndàhú ní cuu tucu nchaa ñáyi ñà túú tnàhí ná cúmǎni xii-xi vitna, chi sáá nduu quiní-yu tnúndòho tnúhu ndàhú.

’Te ndàhú ní cuu nchaa ñáyi cùdǐ ìní-xi ndècu ichi cuehé ichi duha vitna, chi sáá nduu te ndàhyú-yu sá ndǐhú iní-yu.

<sup>26</sup>’Te ndàhú ní cuu nchaa ñáyi na càhá<sup>n</sup> váha dava-gá ñáyi cuendá-xi, chi duca<sup>n</sup> nǐ xóo cáhá<sup>n</sup> váha-yu cuendá nchaa cue tée ní xóo dandàhú ñáhá xii ñáyi ndéé sanaha, chi ní cachí-güedé sá càhá<sup>n</sup>-güedé tnúhu Yá Ndiòxí te ñà ndàá —càchí-gá xáha<sup>n</sup>-gǎ xii-güedé.

### **Cuu iní-ó nchàa ñáyi cùu úhú iní ñáhá xii-o**

(Mt. 5:38-48; 7:12)

<sup>27</sup>Te Jèsús ní xáha<sup>n</sup>-gǎ xii nchaa ñáyi xíndecu-á<sup>n</sup>:

—Nchaa nchòhó ñáyi xíndedóho ñaha càchí tnúhu-í xii-ndo sǎ cúú ìní-ndó ñáyi cùu úhú iní ñáhá xii-ndo, te cada-ndo sǎ váha sá cúú-xǐ-yu cuèi nándi sá



ná cádá ñàhá-yu xii-ndo. <sup>28</sup>Te cacadá<sup>n</sup> táhú-ndó núú Yá Ndiöxí cuendá ñáyiú càhá<sup>n</sup> úhú ñáhá xii-ndo, ndihi cuendá ñáyiú tèe ñaha cuéchi neñúú xii-ndo. <sup>29</sup>Te núú ní canihá-yu xii-ndo ì<sup>n</sup> xito te cuíní tucú-yu canihá-yu, te dañà-ndo na cànihá-yu, àdi núú na quèndeé-yu dóó ndíxí ndòdo-ndo, ndihi dúhnú-ndó, te dañà-ndo na cànehé-yu quíhí<sup>n</sup>. <sup>30</sup>Te núú xicá<sup>n</sup>-yu ì<sup>n</sup> sá nándíhi-yu núú-ndó te cuañaha-ndo, àdi quèndeé-yu ì<sup>n</sup> ndachìu<sup>n</sup>-ndo, te vá nándacá<sup>n</sup>-ndó núú-yu. <sup>31</sup>Te nchaa sá vâha cuíní-ndó càda tnaha ñáyiú-ndo, te cada-ndo tnàhá-ndó ndíhi-yu.

<sup>32</sup>Chi núú nchòhó ná cùu iní-ndó mèe-ni ñáyiú cùu iní ñáhá xii-ndo, te vá càchí-ndó sã ìo váha quède-ndo, chi tnàhá nchaa ñáyiú ndècu ichi cuehé ichi duha duca<sup>n</sup> xíquidé-yu. <sup>33</sup>Àdi mee-ni ñáyiú quède ñaha sá vâha xii-ndo quède váha-ndò-yu, te vá càchí-ndó sã ìo váha quède-ndo, chi tnàhá nchaa ñáyiú ndècu ichi cuehé ichi duha duca<sup>n</sup> xíquidé-yu. <sup>34</sup>Àdi mee-ni ñáyiú sàni iní-ndó nàcoto ñaha xii-ndo cuañaha-ndo ì<sup>n</sup> sá xicá<sup>n</sup>-yu núú-ndó, te vá cání iní-ndó sã ìo quède váha-ndo, chi tnàhá ñáyiú ndècu ichi cuehé ichi duha dàsà<sup>n</sup> nuú-yu ì<sup>n</sup> sá néhé vâha-yu, te ndètu cahnu-ná-yu nacoto ñaha ñáyiú ní sáha nùú-yu-á<sup>n</sup>. <sup>35</sup>Dico nchòhó xíní ñùhu-xi cuu iní-ndó ñáyiú cùu úhú iní ñáhá xii-ndo, te cada-ndo sã vâha sá cúú-xí-yu, te cuañaha nùu-ndo ì<sup>n</sup> sá ná ndíhi-yu te núú xicá<sup>n</sup>-yu núú-ndó, te vá cùndètu-ndo nacoto ñáhá-yu xii-ndo. Te duca<sup>n</sup> te ío-gá cuéhé ñíhí-ndó cùndecu

ndihi-ndo, te cuu ndisa-ndo dèhe Dútú Ndiöxí, chi ío càhnu iní-gá sá cúú-xí nchaa ñáyiú ñá túú ndacá<sup>n</sup> táhú núú-gã cuendá nchaa sá vâha quède-gá, ndihi sá cúú-xí nchaa ñáyiú ndècu ichi cuehé ichi duha. <sup>36</sup>Te cunduu càhnu iní nchòhó tucu dàtná càhnu iní Tátá-ó Dútú Ndiöxí.

**Vá càhá<sup>n</sup> cuèhé-ó cuendá tnàha ñáyiú-o**

(Mt. 7:1-5)

<sup>37</sup>Te vá càhá<sup>n</sup> cuèhé-ndó cuendá sá quidé tnàha ñáyiú-ndo, te duca<sup>n</sup> te Yá Ndiöxí ñá túú nà tnúhu cúñaha-gã xii-ndo. Te vá cùñaha-ndo xii ñáyiú sá quíhí<sup>n</sup>-yu ì<sup>n</sup> xichi núú ùhú núú ndàhú ndohó-yu cuendá nchaa sá ñá túú vâha quidé-yu, te duca<sup>n</sup> te Yá Ndiöxí vá cùñaha-gã xii-ndo sã tnàhá-ndó quíhí<sup>n</sup>-ndó ì<sup>n</sup> xichi núú ùhú núú ndàhú ndoho-ndo. Te chí cádá càhnu iní nchaa sá quidé-yu, te duca<sup>n</sup> te Yá Ndiöxí cada càhnu iní ñáhá-gã xii-ndo tucu. <sup>38</sup>Te chí cuañaha xii ñáyiú núú ná cúú sã xíní ñùhú-yu, te dàtná chitu ì<sup>n</sup> yicá súúní xidó coyo-ná, duca<sup>n</sup> tàxi Yá Ndiöxí xii-ndo. Te nánicuáa na càda-ndo cada váha-ndo sã cúú-xí tnàha ñáyiú-ndo, te ñi-u-ni duca<sup>n</sup> càda ñaha Yá Ndiöxí xii-ndo — càchí Jèsús xâha<sup>n</sup>-gã xí-yu.

<sup>39</sup>Te dàtnúni ní cani-gá ì<sup>n</sup> cuèndú núú-yu nàcuáa tecú tnùní-yu tnúhu-gá, te xâha<sup>n</sup>-gã:

—Ì<sup>n</sup> tée cuàá chi ñá ndácú-dé cuita nehe-dé ingá tée cuàá, chi núú duca<sup>n</sup> na càda-güedé te ndí ndúú-güedé ngaunihnu-güedé déhvá. <sup>40</sup>Te ni ì<sup>n</sup> landú yíhí scuèlá ñá túú cùnuu-gá-güexi dàcúxí

mèstrú-güexi, te ndéé nõu na cùtúha váha-güexi, te dàtnùní nùtnahá-güexi téé dànehé ñáhá xii-güexi.

<sup>41</sup>Te na càchí tnúhu-í xii-ndo sǎ nchàa cuéchi quide ñáyi u cùu-xi datná ìí<sup>n</sup> mihi líhli. ¿Te ná cuendá ndéhé-ndó ìí<sup>n</sup> sǎ ñà túú váha quide tnaha ñáyi u-ndo, te mee-ndo vîhi-gá quidé-ndó-í? Te sǎ dúcá<sup>n</sup> quide-ndo te cada iní-ndó sǎ ndéhé-ndó dàtná ìí<sup>n</sup> mihi líhli ñùhu núú tnaha ñáyi u-ndo, te mee-ndo ñùhu ìí<sup>n</sup> mihi cahnu-gá núú-ndó. <sup>42</sup>Te núu na nàcanu ichi-ndo tnaha ñáyi u-ndo cuendá sǎ ñà túú quide váha-yu ndècú-yu te mee-ndo vîhi-gá quidé-ndó ñá, te cada iní-ndó sǎ xǎha<sup>n</sup>-ndo xii-yu sǎ nátáva-ndo mihi líhli ñùhu núú-yu, te mihi càhnu ñuhu núú méé-ndó ñà túú quide cuendá-ndó. ¡Te sǎ dúcá<sup>n</sup> quide-ndo te ío dándahú-ndó mèe-ndo sǎ quidé ndǎá-ndó te ñá ndàá sǎ quidé ndǎá-ndó! Te xini ñuhu-xi díhna-gá dañ-ndo nchàa sǎ ñà túú váha quide-ndo, te dàtnùní duca<sup>n</sup> te cutnùní váha iní-ndó nàcuáa nàcanu ichi-ndo tnaha ñáyi u-ndo.

**Ndi díí<sup>n</sup> núú yutnu xini-ó nǎ yutnu cùu-xi cuendá sǎ sǎvidí-xi**

(Mt. 7:17-20; 12:34-35)

<sup>43</sup>Te ñá túú ni ìí<sup>n</sup> yutnu váha te quiní-ó cùu<sup>n</sup> sǎvidí sǎ ñà túú váha, te ni ìí<sup>n</sup> yutnu sǎ ñà túú váha, te quiní-ó cùu<sup>n</sup> sǎvidí váha, chi mee-ni sǎvidí sǎ ñà túú váha cùu<sup>n</sup>. <sup>44</sup>Te ndi díí<sup>n</sup> núú yutnu xini-ó nǎ yutnu cùu-xi cuendá sǎ sǎvidí-xi, chi ñá túú xini-ó cùu<sup>n</sup> ngúxí ìí<sup>n</sup> tnu ìñu, te ni ñà túú xini-ó cùu<sup>n</sup> ndéhé

yoho yàha stilé díquí ìí<sup>n</sup> yoho yàha cutexínu. <sup>45</sup>Te nchaa ñáyi u váha iní-xi càhá<sup>n</sup>-yu tnúhu váha, chi diu-ni tnúhu váha tnàhí-á<sup>n</sup> ñùhú ìni-yu, te nchaa ñáyi u ñá túú váha iní-xi càhá<sup>n</sup> cuèhé-yu, chi diu-ni tnúhu cuèhé tnàhí-á<sup>n</sup> ñùhú ìni-yu, chi nchaa sǎ ñùhú ìni-yu te xíǎ<sup>n</sup> càhá<sup>n</sup>-yu.

**Ìí<sup>n</sup> vehe ndècu cimientú-xi ndihi ìí<sup>n</sup> vehe ñá túú cimientú-xi**

(Mt. 7:24-27)

<sup>46</sup>¿Te ná cuendá càchí-ndó sǎ yùhú cùu-í Yaá cùú Xìtohó-ndó te ñá túú quide-ndo nchaa nacúaa càhá<sup>n</sup>-í-í? <sup>47</sup>Te na càchí tnúhu-í xii-ndo cuendá ñáyi u tùha ñaha xii-í, chi ñáyi u-á<sup>n</sup> sácúndedóho-yu nchaa tnúhu càhá<sup>n</sup>-í te tníí-yu. <sup>48</sup>Te ñáyi u-á<sup>n</sup> cùú-yu dàtná ìí<sup>n</sup> téé ní dácáá ìí<sup>n</sup> vehe, chi téé-á<sup>n</sup> díhna-gá ní xete-dé ndéé ní tnahá-dé yúú cáxí<sup>n</sup> te dàtnùní ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, dico ñá túú ní ndàcu-xi cuido-xi, te duca<sup>n</sup> chi téé ní dácáá vèhe-á<sup>n</sup> ní tava-dé cimientú-xi núú yúú cáxí<sup>n</sup>. Duha sǎtnahá-xi cùu nchaa ñáyi u sácúndedóho tnúhu càhá<sup>n</sup>-í te tníí-yu. <sup>49</sup>Te ñáyi u sácúndedóho tnúhu càhá<sup>n</sup>-í te ñá túú tníí-yu, ñáyi u-á<sup>n</sup> cùú-yu dàtná ìí<sup>n</sup> téé ní dácáá ìí<sup>n</sup> vehe, te ñá túú ní tava-dé cimientú-xi, te òré ní cuu<sup>n</sup> dáú, te ní ndee ndute ñuhu, te ní ndacá<sup>n</sup>-xi ndéé núú cáá vèhe-á<sup>n</sup>, te íí-ni ní xido-xi vehe-á<sup>n</sup> cuendá sǎ ñà túú ní quène cimientú-xi. Duha sǎtnahá-xi cùu nchaa ñáyi u sácúndedóho tnúhu-í te ñá túú cuini-yu tníí-yu —càchí-gá xǎha<sup>n</sup>-gǎ xii-yu.

**Jèsús quidé tătna-gá ì<sup>n</sup> téé xìnu  
cuechi núú ì<sup>n</sup> téé cùu capitá<sup>n</sup>**

(Mt. 8:5-13)

**7** Te sátá nǐ yáha ní cáhá<sup>n</sup> Jèsús ndìhi ñáyiú, te cuáhá<sup>n</sup>-gá ñúú Capèrnaúm. <sup>2</sup>Te yacá<sup>n</sup> ndécú ì<sup>n</sup> téé cùu capitá<sup>n</sup>, te cùhú ì<sup>n</sup> téé xìnu cuechi núú-dě téé ío-gá cúú ìní-dé, te sa ndècu-ná-dé sá cùú-dé. <sup>3</sup>Te òré ní níhí tée cùu capitá<sup>n</sup>-á<sup>n</sup> tnúhu cuèndá Jèsús, te ní tendaha-dě ì<sup>n</sup> úú cue téé cùu sacuéhé nǔú ñáyiú isràél cuáhá<sup>n</sup>-güedé cáhá<sup>n</sup> ndàhú-güedé núú-gǎ nǔú vá cùndèè ìní-gá quíhí<sup>n</sup>-gá cada tătna-gá téé xìnu cuechi núú-dě-á<sup>n</sup>. <sup>4</sup>Te ní quexio-güedé núú ndécú Jèsús, te ní ngüíta-güedé càhá<sup>n</sup> ndàhú víhí-güedé núú-gǎ, te xáha<sup>n</sup>-güedě: —Tée cùu capitá<sup>n</sup> ní cachí-dé véxi-ndí nǔú vá cùndèè ìní-n quíhí<sup>n</sup>-n càda tătna-n ì<sup>n</sup> téé xìnu cuechi núú-dě chi cùhú-dé, te tàú ndisa-n càda-n nacúaa càhá<sup>n</sup> capitá<sup>n</sup>-á<sup>n</sup>, <sup>5</sup>chi téé-ǎ<sup>n</sup> ío cùu ìní ñáhá-dě xii ncha nchúhú ñáyiú isràél te ñiú-dé ní táúchíú<sup>n</sup>-dě ní sáá veñúhu-ndí —càchí-güedé xáha<sup>n</sup>-güedě xii-gá.

<sup>6</sup>Te sátá dúcá<sup>n</sup> te Jèsús ní xica-gá cuáhá<sup>n</sup>-gá ndìhi-güedé, te òré tá cùyatni-gá vehe núú ndécú tée cùhú-á<sup>n</sup> cuáhá<sup>n</sup>, te téé cùu capitá<sup>n</sup>-á<sup>n</sup> nǐ xáha<sup>n</sup>-dě xii ì<sup>n</sup> úú cue téé càhá<sup>n</sup> ndìhi-dé:

—Quíhí<sup>n</sup>-ndó cǔñaha-ndo xii Yaa cúú Mèstrú sá càchí-í sá ñà túú nǎ caní ìní-gá, chi ñá túú tàú-í sá quíhu-gá ndéé xití vehe-í, <sup>7</sup>chi ní sá cùnú ndúcú mèe-í-gá ñá túú ní cùyii-í. Núú xiá<sup>n</sup> cǔñaha-ndo xii-gá sá ná càhá<sup>n</sup>-ni-gá sá ndúha téé

xìnu cuechi núú-í-a te ndúha-dé.

<sup>8</sup>Chi yúhú ndécú cuè téé tàxi tnuní ñáhá xii-í, te duca<sup>n</sup> yǔhú tucu ndècu cue sandadú táxi tnuní-í. Te òré xáha<sup>n</sup>-í xii ì<sup>n</sup>-dé quíhí<sup>n</sup>-dé ì<sup>n</sup> chù<sup>n</sup> te cuáhá<sup>n</sup>-dé, te òré xáha<sup>n</sup>-í xii ìngá-dé quixi-dé te véxi-dé, te òré xáha<sup>n</sup>-í xii téé xìnu cuechi núú-í cada-dé ì<sup>n</sup> chù<sup>n</sup> te quide-dé. Duha càchí-í cǔñaha-ndo xii-gá —càchí-dé xáha<sup>n</sup>-dě xii cue téé càhá<sup>n</sup> ndìhi-dé-á<sup>n</sup>.

<sup>9</sup>Te sátá dúcá<sup>n</sup> nǐ xáha<sup>n</sup>-güedě xii Jèsús, te ní cuñúhu-gá ncha tnúhu ní cáhá<sup>n</sup> téé cùu capitá<sup>n</sup>-á<sup>n</sup>, te ní nchócótó-gǎ núú ncha ñáyiú nchícú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gǎ:

—Na càchí tnúhu ndáá-í xii-ndo sǎ vǎtá quíní-gá-í ní ì<sup>n</sup> ñáyiú isràél, ñáyiú ío váha sàndáá ìní-xi Yá Ndióxi dàtná sàndáá ìní ñáhá tée-ǎ<sup>n</sup> xii-gá —càchí-gá xáha<sup>n</sup>-gǎ xií-yu.

<sup>10</sup>Te òré ní ndexio cue téé nèhe tnúhu-á<sup>n</sup> nǐ sáhá<sup>n</sup> núú Jèsús, te sa ní ndúha téé cùhú-á<sup>n</sup>.

**Jèsús dándòto-gá déhe ì<sup>n</sup> ñaha quèé**

<sup>11</sup>Te sátá dúcá<sup>n</sup> nǐ cuu te ní xica Jèsús cuáhá<sup>n</sup>-gá ì<sup>n</sup> ñúú nání Nàin, ndìhi cue téé xica cuu ndìhi-gá, ndìhi vǎi ñáyiú. <sup>12</sup>Te òré ní sáá-gá yuhu ñùú-á<sup>n</sup>, te ní xini-gá nchídó-güedě ì<sup>n</sup> ndíyi cuáhá<sup>n</sup> chindúxi ñaha-güedě, te ndíyi-á<sup>n</sup> cúú dèhe ì<sup>n</sup> ñaha quèé, te ì<sup>n</sup> ñi duca<sup>n</sup>-ni déhe-a<sup>n</sup> ndècu ní cuu te ní xihí-dé. Te ío cuéhé ñáyiú cuáhá<sup>n</sup> chindúxi ñaha. <sup>13</sup>Te òré ní xini ñáhá Jèsús xii-a<sup>n</sup> ndàhyú-a<sup>n</sup> te ní cundàhú ìní ñáhá-gǎ, te ní xáha<sup>n</sup>-gǎ: —Vá ndàhyú-n —càchí-gá xáha<sup>n</sup>-gǎ xii-a<sup>n</sup>.

<sup>14</sup>Te ní dáyátní-gǎ cǎjà ñúhú ndíyi-á<sup>n</sup> te ní dácàá-gǎ ndaha-gǎ te ní tendaha-gǎ cǎjà-á<sup>n</sup>, te ní ngúíñí cue téé nchìdo ñaha-á<sup>n</sup>. Te ní xǎha<sup>n</sup>-gǎ xii ndíyi-á<sup>n</sup>:

—Tée cuechi, yúhú cǎchí-í sǎ ndácòo-n —cǎchí-gǎ xǎha<sup>n</sup>-gǎ xii ndíyi-á<sup>n</sup>.

<sup>15</sup>Te téé ní xíhí-á<sup>n</sup> nǐ núcúnucóo-dé te ní ngúíta-dé cǎhá<sup>n</sup>-dé, te Jèsús ní nacuáha cuèndá ñáhá-gǎ xii-dé ndaha nǎná-dě. <sup>16</sup>Te sǎ dúcá<sup>n</sup> nǐ quide Jèsús ní xiní-yu te ío ní yùhú-yu, te ní xítñàhá-yu:

—Ío cǎhnu cuu Yá Ndiöxí chi ì<sup>n</sup> téé cǎhá<sup>n</sup> tnúhu-gǎ ní quexìo núú ndécú-ó —cǎchí-yu xítñàhá-yu.

Te ní xítñàha tucú-yu:

—Yá Ndiöxí véxi-gǎ chindee ñàha-gǎ xii nchaa nchoo ñáiyu cùu cuendá-gǎ —cǎchí-yu xítñàhá-yu.

<sup>17</sup>Te nchaa ñúú distrítú Jùdeá, ndíhi dava-gǎ ñúú ní níhí-yu tnúhu nàcuáa ní quide Jèsús.

**Cue téé ní tendaha té Juàá cuáhá<sup>n</sup>  
núú ndécú Jèsús**

(Mt. 11:2-19)

<sup>18</sup>Te cue téé xìca cuu ndíhi té Juàá ní xǎha<sup>n</sup>-güedě xii-dé nchaa sǎ nǐ quide-gǎ, núu ní cana-dé úú tnàhá-güedě <sup>19</sup>cuendá cúñaha-dě quíhí<sup>n</sup>-güedě nducu tnúhu-güedě núú Jèsús, te núu sǎ díú-gǎ cúú-gǎ Crístú Yáá ní tendaha Yá Ndiöxí véxi ñuyú-a àdi sǎ cùndètu nahi-ni-güedě mei Yáá-á<sup>n</sup>. <sup>20</sup>Te òré ní quexìo cue téé ní tendaha tǎ Juàá núú ndécú Jèsús, te xǎha<sup>n</sup>-güedě xii-gǎ:

—Té Juàá téé dàcuandute ñaha xii ñáiyu ní tendaha ñàha-dé xii-ndí

véxi-ndí cǎcá<sup>n</sup> tnúhú-ndí núú-n, núu sǎ díú-n cùu Crístú Yáá quixi ñuyú-a, àdi sǎ cùndètu-ndí mei Crístú cǎchí-dé —cǎchí-güedě xǎha<sup>n</sup>-güedě xii-gǎ.

<sup>21</sup>Te mei òré ní quexìo-güedě-á<sup>n</sup> nǐ quide tátna Jèsús vǎi ñáiyu cùhú, te davá-yu cǎhú víhí tnàhá-yu, te ndí díí<sup>n</sup> ndí díí<sup>n</sup> núú cuèhé tnàhá-yu ì<sup>n</sup> ì<sup>n</sup>-yu, te cue ñáiyu yíhi ñaha espíritú cùndíhi yucu ñávàha ní queñuhu-gǎ espíritú-á<sup>n</sup> yiqui cùñú-yu, te ío vǎi ñáiyu cuàá ní nacaá<sup>n</sup>-gǎ núú-yu. <sup>22</sup>Te Jèsús ní xǎha<sup>n</sup>-gǎ xii-güedé:

—Chí cuánùhú te cani-ndo cuèndú núú tǎ Juàá nchaa sǎ ní xiní-ndó quide-í, ndíhi nchaa nàcuáa ndùu tnúhu ní cǎhá<sup>n</sup>-í ní xíndedóho-ndo. Te cúñaha-ndo xii-dé sǎ quidé tátna-í núú cuè ñáiyu cuàá, te quide tátna-í cue ñáiyu yacua, ndíhi cue ñáiyu tnàhá cuèhé sǎ dátèhyú nihnu-xi yiqui cùñú-yu, ndíhi cue ñáiyu doho, nchaa ñáiyu-á<sup>n</sup> quide tátna-í te ndùha-yu, te ndéé cue ñáiyu sa ní xíhí dándòto-í cúñaha-ndo xii-dé, te cúñaha tùcu-ndo xii-dé sǎ ndécuu-í dánèhé-í nchaa ñáiyu ndàhú tnúhu sǎ sánú ìchi ñaha xii-yu nàcuáa naníhí tǎhú-yu. <sup>23</sup>Te cúñaha tùcu-ndo xii-dé sǎ ìo vǎha tǎhú nchaa ñáiyu ñá túú quide sǎá iní nchaa tnúhu cǎhá<sup>n</sup>-í, duha cúñaha-ndo xii-dé —cǎchí-gǎ xǎha<sup>n</sup>-gǎ xii-güedé.

<sup>24</sup>Te sǎtá nǐ yáha-güedě cuánuhú-güedé, te ní ngúíta Jèsús ní cǎhá<sup>n</sup>-gǎ núú ñáiyu cuèndá té Juàá, te xǎha<sup>n</sup>-gǎ xii-yu:

—Nchòhó ní sándéhé-ndó ì<sup>n</sup> téé ndècu xití yucu, te téé-á<sup>n</sup> ñà túú

sàni ìí<sup>n</sup> sani úú iní-dé, chi ñá túú quíde-dé dàtná quíde nchaa ité náhnú cuáhá<sup>n</sup>-xi duha cuáhá<sup>n</sup>-xi dàcá<sup>n</sup> òré quéné tächí. <sup>25</sup>Te ni ñà túú ní sàndéhé-ndó ìí<sup>n</sup> tée nihnu dóó vǎha dóó vii càa. Te nchòhó xìní-ndó sǎ ñáyiú sàcuíhnu dóó vǎha dóó vii càa ñá túú nǎ cúmǎní xií-yu, te nchaa ñáyiú-á<sup>n</sup> ndécǔ-yu vehe cue tée cùnū yìndaha ñaha xii ñáyiú. <sup>26</sup>Dico nchòhó chi ní sàndéhé-ndó ìí<sup>n</sup> tée càhá<sup>n</sup> tnúhu Yá Ndiòxí. Te ndáá sá dǔú tée càhá<sup>n</sup> tnúhu-gá cúú-dě dico cùnū-gá-dé dàcúxí dàva-gá cue tée càhá<sup>n</sup> tnúhu-gá. <sup>27</sup>Te ñiú cuèndá té Juàá-á<sup>n</sup> càhá<sup>n</sup>-xi núú tǔtú Yá Ndiòxí nàcuáa ní xáha<sup>n</sup>-gǎ xii Crìstú, te duha ní xáha<sup>n</sup>-gǎ:

Tendaha-í ìí<sup>n</sup> tée càhá<sup>n</sup> tnúhu-í codonù-dé núú-n cuèndá dàtúha-dé ñáyiú cuèndá quíndáá iní-yu tnúhu-n.

Duha ní xáha<sup>n</sup>-gǎ, te duca<sup>n</sup> ní ngódó tnùnì núú tǔtú-gá. <sup>28</sup>Te na càchí tnúhu-í xii-ndo sǎ ñi ìí<sup>n</sup> cue tée ñuyíú-a ñá túú cùnū-güedé dàtná cùnū té Juàá tée dàcuandute ñaha xii ñáyiú. Te nchaa ñáyiú sa ta ndǐhu ndaha ñaha Yá Ndiòxí vitna cuáhá<sup>n</sup> cùnū-gá-ni tucú-yu dàcúxí tǎ Juàá cuéi cúú-yu ñáyiú ñá túú cùnū dacúxí dàva-gá ñáyiú yìndaha-gá —càchí Jèsús xáha<sup>n</sup>-gǎ xií-yu.

<sup>29</sup>Te sá dúcá<sup>n</sup> ní càhá<sup>n</sup> Jèsús, núú nchaa ñáyiú ní dǎcuándute té Juàá ní cachí-yu sá ò vǎha quíde Yá Ndiòxí, te ñiú-ni duca<sup>n</sup> ní càhá<sup>n</sup> cue tée cuihna ìní-xi quíde cobrá ñáhá xii ñáyiú cuèndá impuèstú, cue tée ní dǎcuándute-dé. <sup>30</sup>Dico cue tée cùu fariséú, ndǐhi cue tée dàcuaha

ñaha xii ñáyiú nchaa tnúhu ní chídó tnùnì ndíi Moisés, cue tée ñá túú ní dàcuandute té Juàá ñá túú ní tnàhá iní-güedé cada-güedé nchaa sá vǎha cuìní Yá Ndiòxí. <sup>31</sup>Te Xítóhó Jesucristú ní xáha<sup>n</sup>-gǎ xií-yu:

—Na càchí tnúhu-í xii-ndo nàcuáa sǎtnahá-xi cùu ñáyiú ndècu vitna. <sup>32</sup>Chi ñáyiú-á<sup>n</sup> cúú-yu dàtná cue landú sácòo núú yǎhu dàdiqui-güexi te níhi càhá<sup>n</sup>-güexi, te xǐtnàha-güexi: “Ní tiú-ndí yaá ndǐhi vǐlu te ñá túú ní cuìní-ndó càta-ndo. Te ío yica ìní ní xita yuhu-ndǐ te ñá túú ní ndǎhyú-ndó”, càchí-güexi xǐtnàha-güexi. Te duca<sup>n</sup> sǎtnahá-xi cùu ñáyiú ndècu vitna. <sup>33</sup>Te té Juàá tée ní xóo dacuandute ñaha xii ñáyiú ío ndǎhú ní xóo caxi-dé, te ni ñà túú ní xóo coho-dé ndudí ndéhé yoho yàha stilé sá sà ní nduu-xi ndidí, te ní cachí-ndó sǎ ñi xíndecu ndǐhi-dé espíritú cúndǐhi yucu ñávǎha. <sup>34</sup>Te sátá ñi quexio yúhú Tée cùu ñanì tnàhá-ndó nchaa-ndo, te xèxi-í xǐhi-í ndécù-í te càchí-ndó sǎ cúú-í tée xèxi vihi te xǐhi vihi-í. Te càchí tucu-ndo sǎ cúú-í tée xica cuu ndǐhi cue tée cuihna ìní-xi quíde cobrá ñáhá xii ñáyiú cuèndá impuèstú, ndǐhi nchaa dava-gá cue tée ndècu ichi cuehé ichi duha, duha càchí-ndó. <sup>35</sup>Te ñáyiú ní tnahá tnúhu ndǐhi Yá Ndiòxí, ñáyiú-á<sup>n</sup> quíde-yu nàcuáa cutnùnì sá mée-gǎ ío ndècu ndǐhi-gá sá xìnì tnùnì-gá —càchí-gá xáha<sup>n</sup>-gǎ xií-yu.

**Jèsús ndécú-gǎ vehe ìí<sup>n</sup> tée cùu fariséú tée nàni Xímú**

<sup>36</sup>Te ìí<sup>n</sup> tée cùu fariséú ní càhá<sup>n</sup>-dé Jèsús vehe-dé caxi-gá, te

òré ní quexìo-gá te cuánguìhu-gá mèsá. <sup>37</sup>Te xíá<sup>n</sup> núcõo-gá ní sáá ìí<sup>n</sup> ñadìhí te diu-ni ñaha ñuú-á<sup>n</sup> cúú-á<sup>n</sup>, te ndècu-a<sup>n</sup> ichi díí ìní, te sá nǐ níhí-a<sup>n</sup> tnúhu sá cuängaxi Jèsús vehe tée cùu fariséú-á<sup>n</sup>, núu nèhe-a<sup>n</sup> ìí<sup>n</sup> yoó chitu àcití sàhá<sup>n</sup> tnámí. <sup>38</sup>Te ní ngóo-a<sup>n</sup> ìí<sup>n</sup> xio dǐñi Jesús, te ní ngúíta-a<sup>n</sup> ndàhyú-a<sup>n</sup> te ndìhi ndute núú-a<sup>n</sup> ní naquete-a<sup>n</sup> sàhá-gǎ. Te dàtnùní ní nadayìchí-a<sup>n</sup> ndìhi idi díquí-a<sup>n</sup>, te ní teyuhu-a<sup>n</sup> sàhá-gǎ, te ní chihi ñaha-a<sup>n</sup> àcití sàhá<sup>n</sup> tnámí-á<sup>n</sup>. <sup>39</sup>Te sá dúcá<sup>n</sup> nǐ quide-a<sup>n</sup> ní xiní tée cùu fariséú tée ní cáhá<sup>n</sup> ñáhá xii-gá-á<sup>n</sup> núu ní sani iní-dé: “Te núu dìcò ndisa tée càhá<sup>n</sup> tnúhu Yá Ndiòxí cúú tée-a ña, te sa cutnùní iní-dé yoo cùu ñaha tnándeé ñáhá xii-dé, àdi ná ñáyiu cùu-a<sup>n</sup>, te dìcò ìí<sup>n</sup> ñaha ndècu ichi díí ìní cúú-á<sup>n</sup>”, duha ní sani iní-dé.

<sup>40</sup>Te Jèsús ní xáha<sup>n</sup>-gǎ xii-dé:

—Xímú, ndècu ìí<sup>n</sup> tnúhu cachí tnúhu-í xii-n —càchí-gá xàha<sup>n</sup>-gǎ xii-dé.

Te tée cùu fariséú-á<sup>n</sup> xàha<sup>n</sup>-dě xii-gá:

—Cachí tnúhu, Mèstrú —càchí-dé xàha<sup>n</sup>-dě xii-gá.

<sup>41</sup>Te Jèsús ní xáha<sup>n</sup>-gǎ:

—Ní xíndecu ìí<sup>n</sup> tée ní xóo dasa<sup>n</sup> núu díhú<sup>n</sup>, te ní xítaú úú tnàhá-güedé núú-dě. Te ìí<sup>n</sup>-dè ní sàha-dé úhú<sup>n</sup> cièndú díhú<sup>n</sup> denàriú, te ìngá-dé ní sàha-dé údico úxí. <sup>42</sup>Te ñá ní níhí-güedé nacháhu-güedé núú-dě, te tée ní sánùu ñaha-á<sup>n</sup> nǐ quide càhnu iní-dé ndi ndúú-güedé. Te vitna cachí-ò tucu te núu nděda càa-güedé cúú ìní ñáhá-gǎ-güedé xii-dé —càchí-gá xáha<sup>n</sup>-gǎ xii-dé.

<sup>43</sup>Te ní xáha<sup>n</sup> tǐ Xímú-á<sup>n</sup>:

—Sànuu sá tǐe tàù vài-gá díhú<sup>n</sup> ò-gá cúú ìní-dé tée ní sánùu ñaha díhú<sup>n</sup>-á<sup>n</sup> —càchí-dé xàha<sup>n</sup>-dě xii-gá.

Te ní xáha<sup>n</sup> Jèsús:

—Sá ndàà càhá<sup>n</sup>-n —càchí-gá xáha<sup>n</sup>-gǎ xii-dé.

<sup>44-46</sup>Te Jèsús ní ndacoto-gá núú ñadìhí-á<sup>n</sup>, te ní xáha<sup>n</sup>-gǎ xii té Xímú-á<sup>n</sup>:

—¿Ndèhe-n nacuáa quide ñadìhí-a ñǎ? Chi cuánguìhu-í vehe-n, dico ñá túú ní tàxi-n ndute ndoo sàhá-í, te ni ñà túú ní tǐyuhu ñaha-n, te ni ñà túú ní chìhi-n acití díquí-í, dico ñadìhí-a ní naquete-a<sup>n</sup> ndìhi ndute núú-a<sup>n</sup> sàhá-í, te ní nadayìchí-a<sup>n</sup> ndìhi idi díquí-a<sup>n</sup>, te nuu núu teyuhu-a<sup>n</sup> sàhá-í, te ní chihi-a<sup>n</sup> acití sàhá<sup>n</sup> tnámí sàhá-í. <sup>47</sup>Te na càchí tnúhu-í xii-n sǎ ò cùu ìní ñáhá-á<sup>n</sup> xii-í, te núu xíá<sup>n</sup> cútnùní iní-ó sǎ cuèi ío vài sá cuèhé sá dúhá nǐ quide-a<sup>n</sup>, dico Yá Ndiòxí sa ní quide càhnu iní ñáhá-gǎ xii-a<sup>n</sup>. Chi Yá Ndiòxí quidé càhnu iní-gá ñáyiu cuèi vài àdi sacú cuèchi-yu, te núu sacú cuèchi-yu te sacú cúú ìní ñáhá-yu xii-í —càchí-gá xáha<sup>n</sup>-gǎ xii-dé.

<sup>48</sup>Te ní xáha<sup>n</sup>-gǎ xii ñadìhí-á<sup>n</sup>:

—Sa ní quide càhnu iní-í ncha cuèchi-n —càchí-gá xáha<sup>n</sup>-gǎ xii-a<sup>n</sup>.

<sup>49</sup>Te cue tée xínucóo ndìhi-gá xǐtnàha-güedé:

—¿Ná tée cùu tée-a núu nándi sá quidé-dě, te ndéé nchaa yíca cuèchi ñáyiu quide cahnu iní-dé-í? —càchí-güedé xǐtnàha-güedé.

<sup>50</sup>Te Jèsús ní xáha<sup>n</sup> tùcu-gá xii ñadìhí-á<sup>n</sup>:

—Sa ní cácu nihnu-n núú ùhú núú ndàhú vitna chi ní sándáá iní

ñáhá-n xii-í, te vitna cuanùhú te ñá túú-gǎ ná cani iní-n —càchí-gǎ xáha<sup>n</sup>-gǎ xii-a<sup>n</sup>.

**Ñáyiú ðìhí ní chindee ñàha xii Jesús**

**8** Te sátá dúcá<sup>n</sup> ñí cuu te Jèsús ní xica-gǎ cuáhá<sup>n</sup>-gǎ titní víhí ñúú náhnú, ndìhi ñúú líhli dànehé-gǎ ñáyiú nàcuáa ndíhu ndaha ñàha Yá Ndiöxí xii-yu. Te cuáhá<sup>n</sup> ndìhi-gǎ ndí ùxúú tnàhá cue téé xica cuu ndìhi-gǎ, <sup>2</sup>ndìhi ì<sup>n</sup> ùú ñáyiú ðìhí ní quide tátna-gǎ ní xíhi ñàha espíritú cundìhi yucu ñávàha, ndìhi ñáyiú tnàhá dava-gǎ cuéhé ùhú ní cùu. Te xíá<sup>n</sup> tnàhá tucu ì<sup>n</sup> ñàha nàni Mariá Magdalèná, te ñàha-á<sup>n</sup> ñí xíhi ñàha ùsá espíritú cundìhi yucu ñávàha xii-a<sup>n</sup> ní cùu, te ní quee ñàha-xi. <sup>3</sup>Te tnàhá ì<sup>n</sup> ñàha nàni Juáná ñadhí ì<sup>n</sup> téé nàni Chúza téé ní cunuu ñí xinu cuechi vèhe té Hèrodés, ndìhi ingá ñàha nàni Susaná nchaa ñáyiú-á<sup>n</sup> ñí chindee ñàhá-yu xii-gǎ ndìhi nchaa sá ndécú ndìhí-yu, te ðiu-ni duca<sup>n</sup> ñí quide vài-gǎ tucu ñáyiú nchicú<sup>n</sup> ñáhá xii-gǎ cuáhá<sup>n</sup>.

**Nàcuáa quide téé cuángacá<sup>n</sup> triú**

(Mt. 13:1-9; Mr. 4:1-9)

<sup>4</sup>Te ío vài ñáyiú ndaa ñúú ní tacá-yu núú ndécú Jèsús, te ní ngüíta-gǎ ní cani-gǎ ì<sup>n</sup> cuendú núú-yu cuendá tecú tnùní-yu tnúhu-gǎ, te xáha<sup>n</sup>-gǎ xii-yu:

<sup>5</sup>—Ì<sup>n</sup> téé cuángacá<sup>n</sup>-dé triú. Te òré ní ngüíta-dé dǎngoyo-dé triú-á<sup>n</sup> te dava ní quene ndava ní ngava ndéé ichi, te ní xénihnu ñáyiú, te ní xiní tláá te ní nadatàcá-güedi. <sup>6</sup>Te dava ní ngava ñuhu yadi núú yíhí vèhi yúú, te ní xínu-xi dico

núú sàcú-ni nduu te ní yíchí-xi, chi ñá túú cöhyo yèhi. <sup>7</sup>Te dava ní ngava núú yúcu ndíquí<sup>n</sup> tnu ì<sup>n</sup>u, te ì<sup>n</sup>nuu-ni ñí xínu-xi ndìhi tnu ì<sup>n</sup>u-á<sup>n</sup>, te tnu ì<sup>n</sup>u-á<sup>n</sup> ñí dánáá-xi nchaa triú sá ñí xínu-á<sup>n</sup>. <sup>8</sup>Dico dava triú-á<sup>n</sup> ñí ngava-xi núú ndécú ñuhu coco<sup>n</sup>, te xíá<sup>n</sup> ní xínu-xi te ní sahnu-xi, te ío váha ní cuu, chi núú ì<sup>n</sup>-ní triú te ní nguíhi yoco-xi ì<sup>n</sup> ciendú triú-xi —càchí-gǎ xáha<sup>n</sup>-gǎ xii-yu.

Te níhi ní cáhá<sup>n</sup>-gǎ ní xáha<sup>n</sup> tucu-gǎ xii-yu:

—Nchaa nchòhó ñáyiú ní xíndedóho tnúhu ní cáhá<sup>n</sup>-í-a, te ío váha chí cuáha cuendá —càchí-gǎ xáha<sup>n</sup>-gǎ xii-yu.

**Nàcuáa quèe-xi tnúhu ní cáhá<sup>n</sup> Jèsús**

(Mt. 13:10-17; Mr. 4:10-12)

<sup>9</sup>Te cue téé xica cuu ndìhi Jesús ní xicá<sup>n</sup> tnúhú-güedé núú-gǎ núu nása quèe-xi cuendú ní cani-gǎ núú ñáyiú. <sup>10</sup>Te ní xáha<sup>n</sup>-gǎ xii-güedé:

—Nchòhó chi sa càchí tnúhu Yá Ndiöxí xii-ndo ì<sup>n</sup> sá vǎtá quíní-gǎ-ndó, chi càchí tnúhu-gǎ nàcuáa cada-gǎ ndíhu ndaha-gǎ ñáyiú, dico dava-gǎ ñáyiú càni-í mee-ni cuendú núú-yu, chi cuéi na quíní-yu nchaa nàcuáa cuu dico ñí vá cútnùni iní-yu ná cuendá duca<sup>n</sup> cùu, àdi cuéi na cùndedóho-yu dico ñí vá tècú tnùní-yu —càchí-gǎ xáha<sup>n</sup>-gǎ xii-güedé.

**Jèsús càhá<sup>n</sup>-gǎ nàcuáa quèe-xi tnúhu cuendá téé cuángacá<sup>n</sup> triú**

(Mt. 13:18-23; Mr. 4:13-20)

<sup>11</sup>Te xáha<sup>n</sup> tucu-gǎ xii-güedé: —Duha quèe-xi cuendú ní cani-í núú-ndó, chi triú ní sacá<sup>n</sup> téé-á<sup>n</sup> cúú-xí dàtná tnúhu Yá Ndiöxí. <sup>12</sup>Te

triù sá nǐ quene ndava ní ngava ndéé ichi-á<sup>n</sup>, xíá<sup>n</sup> cúú-xí dàtná ñáyiú ní quée iní-xi tnúhu Yá Ndiöxí, dico sácuihná cuáhá<sup>n</sup>-xi xòcani-xi tnúhu-gá iní-yu cuendá sá vǎ quíndáá iní-yu, te vǎ nánihí tàhú-yu. <sup>13</sup>Te triù sá nǐ ngava ñuhu yadi núú yíhí vǐhi yúú, xíá<sup>n</sup> cúú-xí dàtná ñáyiú ní xíndedóho tnúhu Yá Ndiöxí te díí iní ní tñí-yu tnúhu-gá, dico òré ná dàcahá<sup>n</sup> ñáhá yècu ñávaha xií-yu nándi cadá-yu, te dàña nihnú-yu tnúhu-gá chi ñá nihí ndéé-yu canchicú<sup>n</sup> nihnú-yu nàcuáa càhá<sup>n</sup> tnúhu-gá. <sup>14</sup>Te triù sá nǐ ngava núú yúcu ndǐquí<sup>n</sup> tnu ññu-á<sup>n</sup>, xíá<sup>n</sup> cúú-xí dàtná ñáyiú ní tecú dóho-xi tnúhu Yá Ndiöxí, dico cuéé cuéé ní nacuanaa-yu tnúhu-gá, chi cuendá mee-ni sǎ cúú-xí mèe-yu ññu iní-yu, ndíhi cuendá sá ïo sàni iní-yu cuu cuicá-yu, ndíhi cuendá sá ïo cùdíí iní-yu nchaa sá ïo ñuyíú-a núú xíá<sup>n</sup> àú<sup>n</sup> nǎ cuu ní xíndedóho-yu tnúhu-gá. <sup>15</sup>Dico triù sá nǐ ngava núú ndécú ññu cocó<sup>n</sup>, xíá<sup>n</sup> cúú-xí dàtná ñáyiú váha iní-xi ní xíndedóho tnúhu Yá Ndiöxí chi ñá túú dàña nihnú-yu, te ni yùhu ní iní-yu quidé-yu nchaa nàcuáa càhá<sup>n</sup> tnúhu-gá.

### Nàcuáa quidé-yu iti

(Mr. 4:21-25)

<sup>16</sup>Te ñá túú nì ìí<sup>n</sup> ñáyiú tēñuhú-yu ìí<sup>n</sup> iti te dàdáhu-yu, àdi chiváha-yu ìí<sup>n</sup> caha càamá, chi tàxi ndecú-yu núú ññu cuendá cutnùní núú nchàa ñáyiú ndècu vehe. <sup>17</sup>Te ni ìí<sup>n</sup> tnúhu sá ñǎ tècú tnùnì ñáyiú vitna vǎ càchí-ó sǎ vǎ tècú tnùnì-yu chi dacuèí sá tècú tnùnì-yu, te ni ìí<sup>n</sup> tnúhu sá càchí-ó cùu yuhu vitna vǎ

cúú yùhu chi dacuitíí sǎ quée tũu-xi núú ñáyiú.

<sup>18</sup>Te chí cùndedóho váha tnúhu na càhá<sup>n</sup>-í-a. Nchaa ñáyiú sàndáá iní ñáhá xii Yá Ndiöxí ïo-gá cuita quíndáá-gá iní ñáhǎ-yu xii-gá quíhí<sup>n</sup>, te nchaa ñáyiú ñá túú sàndáá iní ñáhá xii-gá uu<sup>n</sup>-gá cuita cuu sáa-gá iní-yu núú-gǎ quíhí<sup>n</sup> — càchí-gá xáha<sup>n</sup>-gǎ xii-güedé.

### Cue ñani Jèsús ndíhi ñaná-gǎ

(Mt. 12:46-50; Mr. 3:31-35)

<sup>19</sup>Te ní quexio náná Jèsús ndíhi cue ñani-gá vehe núú ndécú-gǎ, te ñá ndácü-yu càhá<sup>n</sup> ndíhi ñáhá-yu xii-gá chí ïo cuéhé ñáyiú ndècu núú ndécú-gǎ. <sup>20</sup>Te ìí<sup>n</sup> ñáyiú xíndecu-á<sup>n</sup> nǐ dáyǎha-yu tnúhu núú-gǎ, te xǎhǎ<sup>n</sup>-yu:

—Ní quexio náná-n ndíhi cue ñani-n xínutnìí-yu quehé, te cuìní-yu càhá<sup>n</sup> ndíhi ñáhá-yu xii-n —càchí-yu xǎhǎ<sup>n</sup>-yu xii-gǎ.

<sup>21</sup>Te ní xáha<sup>n</sup>-gǎ:

—Nchaa ñáyiú sàcùndedóho tnúhu Yá Ndiöxí te quidé-yu nchaa nàcuáa càhá<sup>n</sup> tnúhu-gá, ñáyiú-á<sup>n</sup> cùú-yu dàtná ñànà-í ndíhi dàtná cue ñani-í —càchí-gá xáha<sup>n</sup>-gǎ xii ñáyiú ní dáyǎha tnúhu núú-gǎ-á<sup>n</sup>.

### Jèsús nganí-gǎ táchí ndíhi ndute làgúná

(Mt. 8:23-27; Mr. 4:35-41)

<sup>22</sup>Te ìí<sup>n</sup> nduu ní quée Jèsús bàrcú ndíhi cue téé xica cuu ndíhi-gá, te ní xáha<sup>n</sup>-gǎ:

—Chí ná quíhí<sup>n</sup>-ó ndàa ingá xio yuhu làgúná —càchí-gá xáha<sup>n</sup>-gǎ xii-güedé.

Te cuáhá<sup>n</sup>-güedé ndíhi-gá. <sup>23</sup>Te nini ññu barcú ichi cuáhá<sup>n</sup>-xi



núu ndute ní xídí Jèsús. Te ní ngúíta-xi níhi vìhi quene táchí te ta nàdachítú-xi ndute xítí bàrcú-á<sup>n</sup> cuǎhá<sup>n</sup>, te sa cuíní-nǎ-xi quee naa bàrcú-á<sup>n</sup> xítí ndute ní cùu. <sup>24</sup>Te ní sáhá<sup>n</sup>-güedé núu cáá Jèsús xídí-gá, te ní xáha<sup>n</sup>-güedě xii-gá:

—iMèstrú, ndiquíú ìní chi tà quee naa-o cuǎhá<sup>n</sup>! —càchí-güedé xáha<sup>n</sup>-güedě xii-gá.

Te Jèsús ní ndiquíú ìní-gá te ní ndacóo-gá te ní tenàá-gá táchí-ǎ<sup>n</sup> ndìhi ndute làgúná-á<sup>n</sup>, te ní ngüíñí-ni táchí-ǎ<sup>n</sup> te ní nucúndecu nahi-nǎ ndute làgúná-á<sup>n</sup>. <sup>25</sup>Te ní xáha<sup>n</sup>-gá xii-güedé:

—¿Náa ñá túu sàndáá ìní ñáhá ndìsa-ndo xii-í ǎ<sup>n</sup>? —càchí-gá xáha<sup>n</sup>-gá xii-güedé.

Te ní cuñúhu-güedé sá dúcá<sup>n</sup> ní quide-gá ní xiní-güedé, te ní yùhú-güedé, te ní xítìnhà-güedé:

—¿Te ná téé cùu téé-a núu ní cáhá<sup>n</sup>-ni-dé te ní ngüíñí táchí te ní nucúndecu nahi-ni ndùte làgúná-a-i? —càchí-güedé xítìnhà-güedé.

### Tée yìhi ñaha cue espíritú cùndìhi yucu ñávàha

(Mt. 8:28-34; Mr. 5:1-20)

<sup>26</sup>Te ní sáá-gá ndìhi-güedé yucu cue téé ñúú Gàdará, te yìhi ndáá-ni ndàa ìngá xio làgúná-á<sup>n</sup> cáá dístritú Galileá. <sup>27</sup>Te òré ní quene Jèsús xítí bàrcú te ní dáyátní ñaha ìí<sup>n</sup> téé ñúú-á<sup>n</sup> xii-gá, te yìhi ñaha títíni espíritú cùndìhi yucu ñávàha xii-dé. Te ní cunaha ñà túú-gǎ sácúìhnu-dé dóó-dě, te ni ñà túú-gǎ sácúndecu-dé vehe-dé, chi da nchaa núu yíndùxi ndíyí quide vehe-dé.

<sup>28</sup>Te òré ní xiní-dé Jèsús te ní ngüíñí

xítí-dě núú-gǎ, te cue espíritú yíhí ñàha xii-dé-á<sup>n</sup> ní quide-xi níhi ní cáhá<sup>n</sup>-dé, te xáha<sup>n</sup>-dě xii-gá:

—¿Ná cuendá véxi-ò Jèsús Déhe Dútú Ndiòxí sàdì-n ìchi-í-i? Te càhá<sup>n</sup> ndàhú-í núú-n sǎ và dándòho ñaha-n xii-í —càchí-dé xáha<sup>n</sup>-dě xii-gá.

<sup>29</sup>Te duca<sup>n</sup> ní cáhá<sup>n</sup>-dé cuendá sá Jèsús ní xáha<sup>n</sup>-gǎ xii nchaa espíritú cùndìhi yucu ñávàha yìhi ñaha sá ná quee ñaha-xi xii-dé. Te nchaa xíǎ<sup>n</sup> ní xóo dacàhá<sup>n</sup>-xi ìní-dé nándi sá ní xóo cada-dé ñúu ní xóo dacùtu ñaha-güedé cadèna xii-dé cuendá sá ñà túú-gǎ ná cada-dé, te ní xóo cundeé ñáhá-güedě, dico cuèi duca<sup>n</sup> dico ní xóo dandàva-ni-dé cadèna, te cue espíritú cùndìhi yucu ñávàha-á<sup>n</sup> ní xóo dacùnu ñaha-xi xii-dé ní xóo quíhí<sup>n</sup>-dé xítí yucu.

<sup>30</sup>Te Jèsús ní xícá<sup>n</sup> tnúhú-gǎ núú-dě, te xáha<sup>n</sup>-gǎ:

—¿Nása nàni-n-i? —cachí-gá xáha<sup>n</sup>-gǎ.

Te ní xáha<sup>n</sup>-dě:

—Vài Sandadú nàni-í —càchí-dé xáha<sup>n</sup>-dě xii-gá.

Te duca<sup>n</sup> ní xáha<sup>n</sup>-dě xii-gá cuendá sá ìo cuéhé espíritú cùndìhi yucu ñávàha yìhi ñaha xii-dé. <sup>31</sup>Te nchaa espíritú-á<sup>n</sup> ní cáhá<sup>n</sup> ndàhú-xi núu Jèsús sá và téndàha ñaha-gá xii-xi quíhí<sup>n</sup>-xi núu ùhú núu ndàhú.

<sup>32</sup>Te òru-ni yatni yucu núu ndécú Jèsús-á<sup>n</sup> yíhí vài cuchí xíxexi-güedi, te nchaa espíritú-á<sup>n</sup> ní cáhá<sup>n</sup> ndàhú-xi núú-gǎ sá ná dàña-gá quíhu-xi yiqui cùnú nchaa cùchí-á<sup>n</sup>, te Jèsús ní xáha<sup>n</sup>-gǎ sá cúu quíhu-xi yiqui cùnú-güedi. <sup>33</sup>Te ní quee ñaha nchaa espíritú-á<sup>n</sup> xii téé-á<sup>n</sup>, te ní quíhu-xi nchaa cùchí-á<sup>n</sup>, te cùchí-á<sup>n</sup>

ní xinu-güedi duha ní queé-güedi ndàa núu dèhvá yuhu làgúná-á<sup>n</sup>, te ní ngaunihnu-güedi xití ndute te ní ndìhi-güedi ní cáhá.

<sup>34</sup>Te òré ní xiní cue téé xìto cuchi-á<sup>n</sup> nàcuáa ní cuu te ní yùhú-güedé ní xinu-güedé, te ní sáhá<sup>n</sup>-güedé ní cani-güedé cuèndú núu cuè ñáyiú ndècu xití ñuú, ndìhi núu cuè ñáyiú ndècu xití yucu.

<sup>35</sup>Te nchaa ñáyiú ní níhí tñùhu ní queé-yu cuáhá<sup>n</sup> ndéhě-yu nàcuáa ní cuu. Te òré ní quexìo-yu núu ndécú Jèsús, te ní xiní-yu téé ní xíhi ñaha cuè espíritú cùndìhi yucu ñávàha-á<sup>n</sup> núcòo-dé núu sàhá Jèsús, te ñihnu-ná-dé dóo-dě, te núcòo-dé dàtná ì<sup>n</sup> ñáyiú váha, te ní yùhú-yu òré ní xiní ñáhă-yu xii-dé.

<sup>36</sup>Te nchaa ñáyiú ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávàha-á<sup>n</sup> ní cùu ní caní-yu cuèndú núu nchàa ñáyiú ní quexìo-á<sup>n</sup> nàcuáa ní cuu ní ndúha téé-á<sup>n</sup> ndìhi nàcuáa ní cuu cuèndá nchaa cùchí-á<sup>n</sup>. <sup>37</sup>Te sá dúcá<sup>n</sup> ní níhí-yu tñùhu nàcuáa ní cuu, núu nchaa ñáyiú ñuú Gàdará ío ní yùhú-yu te ní ngüíta-yu càhá<sup>n</sup> ndàhú-yu núu Jèsús sá ná nùhú-gá ñuú ndèè ichi véxi-gá. Te sá dúcá<sup>n</sup> ní cáhá<sup>n</sup>-yu núu cuáhá<sup>n</sup>-gá núu ndécú bàrcú. Te òré ndée-gá bàrcú-á<sup>n</sup> nùhú-gá <sup>38</sup>ní ngüíta téé ní xíhi ñaha cuè espíritú cùndìhi yucu ñávàha càhá<sup>n</sup> ndàhú-dé núu-gá ñuú vá cùndèè iní-gá quíhí<sup>n</sup> ndìhi ñaha-gă xii-dé, dico Jèsús ní quide ndee iní ñáhá-ni-gă xii-dé, te ní xáha<sup>n</sup>-gă:

<sup>39</sup>—Cuanùhú vehe-n, te cani-n cuèndú núu nchàa ñáyiú sá ío càhnu cuu nchaa sá vâha ní quide

ñaha Yă Ndióxí xii-n —càchí-gá xáha<sup>n</sup>-gă xii-dé.

Te téé-á<sup>n</sup> ní xica-dé cuánuhú-dé te ní ngüíta-dé ní cani-dé cuèndú núu nchàa ñáyiú xĩndecu ñihí ñuú sá ío càhnu cuu nchaa sá vâha ní quide ñaha Jèsús xii-dé.

**Cuèndá déhe yoco tē Jàirú, ndìhi cuèndá ì<sup>n</sup> ñadìhí ní tnándeé dóo**

**Jèsús**

(Mt. 9:18-26; Mr. 5:21-43)

<sup>40</sup>Te òré ní ndexìo Jèsús ndàa ìngá xio yuhu làgúná, te ñáyiú xĩndecu xíá<sup>n</sup> sa ndètu cahnu ñaha-ná-yu, te ío váha ní cáhá<sup>n</sup> ndìhi ñáhá-yu xii-gá òré ní nasáá-gá. <sup>41</sup>Te ì<sup>n</sup> téé tàxi tñuní veñùhu ní quexìo-dé núu ndécú Jèsús, te téé-á<sup>n</sup> nání-dě Jàirú, te ní ngüíñí xití-dě núu-gă càhá<sup>n</sup> ndàhú-dé, te xáha<sup>n</sup>-dě xii-gá:

—Véxi-í càhá<sup>n</sup> ndàhú-í núu-n ñuú vá cùndèè iní-n quíhí<sup>n</sup>-ó vèhe-í cada tátna-n dèhe yoco-í —càchí-dé xáha<sup>n</sup>-dě xii-gá.

<sup>42</sup>Te duca<sup>n</sup> ní xáha<sup>n</sup>-dě chi ndècu ì<sup>n</sup> dii-ni déhe yoco-dě, te ndècu-xi datná úxúú cuía-xi, te càhú víhí tñàhá-xi cùhú-xi te cuíní-xi cuú-xi. Te Jèsús ní xica-gá cuáhá<sup>n</sup>-gá ndìhi téé-á<sup>n</sup>, te ío vâi ñáyiú nchìcú<sup>n</sup> ñáhá xii-gá cuáhá<sup>n</sup>, te dàdehnde ñaha-ná-yu xii-gá ní cùu.

<sup>43</sup>Te tñuú nchaa ñáyiú-á<sup>n</sup> ñútnàhá ì<sup>n</sup> ñaha cùhú, te ñaha-á<sup>n</sup> sà ní cuu úxúú cuía sã cùhú-a<sup>n</sup> ngòyo ñaha níñí xii-a<sup>n</sup>, te ío cuéhé díhú<sup>n</sup> ní cuu dàndoñuhu-a<sup>n</sup> chi ní nadico-a<sup>n</sup> nchàa sá ndécú ndìhi-a<sup>n</sup> cuendá ní níhí-a<sup>n</sup> díhú<sup>n</sup> ní quehe<sup>n</sup> nchaa ñáyiú ní quide tátna ñaha xii-a<sup>n</sup>, dico ní ì<sup>n</sup>-yu ñá túú ní ndàcú-yu ndúha-a<sup>n</sup>.

44 Te ní sáhá<sup>n</sup> ndehe yatni-a<sup>n</sup> ndàa sàtá Jèsús, te ní tnándeé-a<sup>n</sup> luha yuhu dǒó-gǎ te òré-ni-á<sup>n</sup> ní ndúha-a<sup>n</sup>.

45 Te Jèsús ní xícá<sup>n</sup> tnúhú-gǎ núú-yu, te xáha<sup>n</sup>-gǎ:

— ÌNdédacàa-ndo ní tnándeé ñáhá xii-í? — cǎchí-gǎ xáha<sup>n</sup>-gǎ xií-yu.

Te nchaá-yu ní xáhǎ<sup>n</sup>-yu sá nǐ ì<sup>n</sup>-yu ñá túú ní tnándeé ñáhá xii-gǎ. Te té Pèlú ndìhi cue té cùndìhi-dé ní xáha<sup>n</sup>-güedé xii-gǎ:

— Mèstrú, ndèhe-n sá váí ñáiyu nchìcú<sup>n</sup> ñáhá xii-n, te xio xio dàdehnde ñahá-yu, te xìcá<sup>n</sup> tnúhú-gǎ-n yòo ní tnándeé ñáhá xii-n — cǎchí-güedé xáha<sup>n</sup>-güedé xii-gǎ.

46 Dico Jèsús ní xáha<sup>n</sup>-gǎ xií-yu:

— Dico diu ì<sup>n</sup>-ndo nǐ tnándeé ñáhá xii-í, chi ní cutnùnì iní-í sá ì<sup>n</sup> ñáiyu cùhú ní tnándeé ñáhá xii-í te ní ndúha-yu — cǎchí-gǎ xáha<sup>n</sup>-gǎ xií-yu.

47 Te sàtá nǐ xiní ñaha-á<sup>n</sup> sǎ nǐ cutnùnì iní Jèsús sá nǐ tnándeé ñáhá-á<sup>n</sup> xii-gǎ, te yùhú yùhú-a<sup>n</sup> ní sáhá-a<sup>n</sup> ní ngüíñí xítí-á<sup>n</sup> núú-gǎ, te ní náhmá-a<sup>n</sup> núú-gǎ, ndìhi núú nchàa ñáiyu ná cuendá duca<sup>n</sup> nǐ quide-a<sup>n</sup> ní tnándeé-a<sup>n</sup>-gǎ, ndìhi cuendá sá òré-ni-á<sup>n</sup> nǐ ndúha-a<sup>n</sup>.

48 Te Jèsús ní xáha<sup>n</sup>-gǎ xii-a<sup>n</sup>:

— Yòhó ñaha cùhú, ní sándáá iní ñáhá-n xii-í nǔu ní ndúha-n, te cuanùhú vitna te ñá túú-gǎ ná canì iní-n — cǎchí-gǎ xáha<sup>n</sup>-gǎ xii-a<sup>n</sup>.

49 Te cǎhá<sup>n</sup> dúcá<sup>n</sup>-ní Jèsús ní sáá ì<sup>n</sup> té xìnu cuechi vehe té Jàirú té tàxi tnunì veñúhu, te xáha<sup>n</sup> tée xìnu cuechi-á<sup>n</sup> xii-dé:

— Sa ní xíhí déhe-n, vá chíchiu<sup>n</sup>-gǎ-n Mèstrú — cǎchí-dé xáha<sup>n</sup>-dè.

50 Te sá dúcá<sup>n</sup> xáha<sup>n</sup> tée xìnu cuechi-á<sup>n</sup> xii té Jàirú ní tecú dóho Jèsús, núu ní xáha<sup>n</sup>-gǎ xii-dé:

— Vá ndìhú iní-n, quindáá iní ñáhá-ni-n xii-í te ndúha déhe-n — cǎchí-gǎ xáha<sup>n</sup>-gǎ xii-dé.

51 Te òré ní sáá-gǎ vehe té Jàirú te ñá ní dàña-gǎ quíhu ñáiyu cùtexínu, núu té Pèlú-ni ndìhi té Jàcobó-ni, ndìhi té Juáá-ni, ndìhi tǎtá ndìhi nǎná-ni xíchí nǐ xíhí-á<sup>n</sup> cuànguìhu ndìhi-gǎ xití vehe. 52 Te nchaa ñáiyu sa xíndecu vehe-dé-á<sup>n</sup> xíndáhyú-yu sá ndìhú iní-yu cuendá sá nǐ xíhí-xi. Te Jèsús ní xáha<sup>n</sup>-gǎ xií-yu:

— Vá ndàhyú-ndó, chi dícó-ni xidí-xi ñá túú ní xíhí-xi — cǎchí-gǎ xáha<sup>n</sup>-gǎ xií-yu.

53 Te ní sácú ndee ñáhǎ-yu xii-gǎ, chi sá cúú-xí mèe-yu chi ní xíhí ndisa xíchí-á<sup>n</sup>. 54 Te Jèsús ní tñii-gǎ ndaha xíchí nǐ xíhí-á<sup>n</sup>, te níhi ní cǎhá<sup>n</sup>-gǎ, te xáha<sup>n</sup>-gǎ:

— Xíchí cuéchí, ndacóo — cǎchí-gǎ xáha<sup>n</sup>-gǎ.

55 Te xíchí-á<sup>n</sup> nǐ ndoto-xi, te òré-ni ní ndacóo-xi, te Jèsús ní xáha<sup>n</sup>-gǎ sá ná cuǎñàhá-yu sá cǎxí-xí.

56 Te tǎtá-xi ndìhi nǎná-xi súunì nǐ cuñúhu-yu sá dúcá<sup>n</sup> nǐ dándótó ñàha Jesús xii-xi, te ní xáha<sup>n</sup>-gǎ xií-yu sá vǎ yòo ì<sup>n</sup> cùñàhá-yu sá dúcá<sup>n</sup> nǐ quide-gǎ.

**Jèsús téndàha-gǎ ndi ùxúú cue téé xica cuu ndìhi-gǎ quíhí<sup>n</sup>-güedé cǎhá<sup>n</sup>-güedé tnúhu-gǎ**

(Mt. 10:5-15; Mr. 6:7-13)

**9** Te Jèsús ní cana-gǎ ndi ùxúú cue téé xica cuu ndìhi-gǎ, te ní sǎñaha-gǎ xii-güedé tnúhu ndee iní cundecu ndìhi-güedé cuendá queñuhu-güedé ncha

espíritú cúndihi yucu ñávaha yìhi ñaha xii ñáiyu, ndihi cuendá sá cáda tátna-güedé nchaa ñáiyu cùhú. <sup>2</sup>Te ní xáha<sup>n</sup>-gã xii-güedé sá quihí<sup>n</sup>-güedé danèhé-güedé ñáiyu nàcuáa cada Yá Ndiöxí ndíhu ndaha ñaha-gá xií-yu, te duca<sup>n</sup> cáda tátna-güedé cue ñáiyu cùhú. <sup>3</sup>Te cùmání-gã caca-güedé quihí<sup>n</sup>-güedé, te ní xáha<sup>n</sup>-gã xii-güedé:

—Ñá túu tnàhí ná canehe-ndo cùu ichi-ndo, ni tàtnu, ni ñunu, ni sã cáxí-ndó, ni díhú<sup>n</sup>. Te ni vã cánèhe-ndo ingá ichi dóó-ndó, chi ñu-ni dóó níhnú-ndó-ã<sup>n</sup> xíã<sup>n</sup> tnàhí-ni. <sup>4</sup>Te ndédani càa vehe na saá-ndó, te xíá<sup>n</sup> cundecu-ndo ndèè ná sàà nduu ndèe-ndo. <sup>5</sup>Te núu ñá túu cuiní-yu quehe<sup>n</sup> cuendá ñáhã-yu xii-ndo, te ndee-ndo ñúú-á<sup>n</sup>, te naquidi-ndo tìcá chùhmá nì tníi sáhá-ndó cuendá sá ná cùtnuní iní-yu sá ñà túu quide váha-yu — cächí-gá xáha<sup>n</sup>-gã xii-güedé.

<sup>6</sup>Te sátá dúcá<sup>n</sup> nì xáha<sup>n</sup> Jèsús xii-güedé, te ní quee-güedé cuáhá<sup>n</sup>-güedé nchaa ñúu dácuaà-güedé ñáiyu tnúhu Yá Ndiöxí, tnúhu sá càhá<sup>n</sup> nàcuáa naníhí tàhú-yu, te duca<sup>n</sup> ta quide tátna-güedé nchaa ñáiyu cùhú cuáhá<sup>n</sup>.

**Nàcuáa ní cuu ní xíhí té Juàá téé dácuaandute ñaha xii ñáiyu**

(Mt. 14:1-12; Mr. 6:14-29)

<sup>7</sup>Te té Hèrodés téé cùu gobiernú ní níhí-dě tnúhu nchaa nàcuáa quide Jesús, te quèyuhú iní-dé te sàni iní-dé yoo cùu-gá. Te duca<sup>n</sup> ní sani iní-dé chi dava ñáiyu cächí-yu sá tã Juàá téé ní xóo dácuaandute ñaha xii ñáiyu ní ndoto cùu-gá. <sup>8</sup>Te

davá-yu cächí-yu sá tã Èliás cúu-gã, te davá-yu cächí-yu sá ìí<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha vìhi ní ndoto cùu-gá, cächí-yu.

<sup>9</sup>Dico té Hèrodés ní cächí-dé:

—Yúhú ní táuchíu<sup>n</sup>-í ní xehndé-güedé díquí tã Juàá. ¿Te yoo cùu téé dii cuendú-xi níhí-a sá sùúní cuèhé núú sã quidé-dě vái<sup>n</sup>? —duha ní cächí-dé.

Te té Hèrodés ndúcú-dě nàcuáa cada-dé cuendá quini-dé Jèsús.

**Jèsús dácaxi-gá úhú<sup>n</sup> míl cue téé te ñíi<sup>n</sup> ñáiyu ñíhí ndíhi landú**

(Mt. 14:13-21; Mr. 6:30-44; Jn. 6:1-14)

<sup>10</sup>Te nchaa cue téé ní táuchíu<sup>n</sup> Jèsús cuáhá<sup>n</sup> cáhá<sup>n</sup> tnúhu Yá Ndiöxí núú ñáiyu ní ndexìo-güedé núu-gã te ní ngúita-güedé nácàni tnúhu-güedé nchaa nàcuáa ní quide-güedé. Te dätñuní ní xica-gá medi-ni-gá ndécá ñaha-gá xii-güedé cuáhá<sup>n</sup> ìí<sup>n</sup> xichi núú ñà túu ñáiyu ndècu, yatni núu cáá ñúu Bètsaidá. <sup>11</sup>Dico òré ní níhí ñáiyu tnúhu sá cuáhá<sup>n</sup> Jèsús, te nchicú<sup>n</sup>-yu-gá cuáhá<sup>n</sup>, te òré ní quexìo-yu núu-gã, te ní quehe<sup>n</sup> cuendá ñáhá-gã xií-yu, te ní dánèhé ñáhá-gã xií-yu nàcuáa ndíhu ndaha ñaha Yá Ndiöxí xií-yu, te ní quide tátna-gá nchaa ñáiyu cùhú.

<sup>12</sup>Te òré sa ní cuaa te ní natacá ndi ùxúú cue téé xica cuu ndíhi-gá núu-gã, te ní xáha<sup>n</sup>-güedé xii-gá:

—Sa ní cuu dandàca-n nchaa ñáiyu-a, chi sa ní cuaa, te na quihí<sup>n</sup>-yu nchaa vehe càa yatni iha, ndíhi nchaa xití ñúú cáá yàtni iha cuaá<sup>n</sup>-yu sá cáxí-yu, te ñu-ni yacá<sup>n</sup> ndetatú-yu, chi núu ndécú-ó ìha ñá túu tnàhí ná ìo —cächí-güedé xàha<sup>n</sup>-güedé xii-gá.

**13**Te Jèsús ní xáha<sup>n</sup>-gǎ xii-güedé:  
—Mee-ndo chí cuǎñaha sǎ ná  
càxí-yu —càchí-gǎ xáha<sup>n</sup>-gǎ  
xii-güedé.

Te ní xáha<sup>n</sup>-güedě xii-gǎ:  
—Ná túú nǎgǎ ndécú ndìhi-ndí,  
chì úhú<sup>n</sup> duha-ná pàá, ndìhi úú-nǎ  
chácá ndécú ndìhi-ndí, te òu-ni  
núu quíhí<sup>n</sup>-ndí cuaa<sup>n</sup>-ndí sǎ cǎxí-yu  
—càchí-güedé xǎha<sup>n</sup>-güedě xii-gǎ.

**14**Te xínu dàtná úhú<sup>n</sup> mìl mee-ni  
cuè téé, te òhí<sup>n</sup> ñáyiú òhí ndìhi  
landú. Te Jèsús ní xáha<sup>n</sup>-gǎ xii cue  
téé xica cuu ndìhi-gǎ:

—Chí cǔñaha na ngöö ndi údico  
úxí ndi údico úxí-yu ì<sup>n</sup> ì<sup>n</sup> xichi —  
càchí-gǎ xáha<sup>n</sup>-gǎ xii-güedé.

**15**Te duca<sup>n</sup> ñi quide-güedé, te ní  
ngóo-yu nchaá-yu. **16**Te dàtnùní ní  
quehe<sup>n</sup>-gǎ ndi ùhú<sup>n</sup> pàá-á<sup>n</sup>, ndìhi  
ndi ndúú chácá-ǎ<sup>n</sup>. Te ní ndacoto-gǎ  
andíu, te ní ndacá<sup>n</sup> táhú-gǎ núú  
Yǎ Ndiòxí, te dàtnùní ní táhú  
cuèchi-gǎ pàá-á<sup>n</sup> ndìhi chácá-ǎ<sup>n</sup>, te  
ní sáha-gǎ nchaá cue téé xica cuu  
ndìhi-gǎ ní dácǎhñu ñaha-güedě  
xií-yu. **17**Te nchaá-yu ní xexí-yu  
ní ndahá xití-yu. Te sátá ñi túhú  
còhò-yu te ní nadatàcá-güedé nchaá  
sǎ ñi quendóo, te ní chítú ùxúú  
tnàhá tídihi mee-ni sǎ ñi quendóo.

**Té Pèlú xǎha<sup>n</sup>-dě xii Jèsús sǎ díú-gǎ  
cúú-gǎ Cristú**

(Mt. 16:13-19; Mr. 8:27-29)

**18**Te ì<sup>n</sup> nduu ndècu mee Jesús  
ndìhi cue téé xica cuu ndìhi-gǎ, te  
càhá<sup>n</sup> ndìhi-gǎ Yǎ Ndiòxí, te sátá ñi  
yáha ní càhá<sup>n</sup> ndìhi-gǎ Yǎ Ndiòxí,  
te ní xícá<sup>n</sup> tnúhú-gǎ núú-güedě, te  
xáha<sup>n</sup>-gǎ xii-güedé:

—Éyoo cùu yúhú càchí ñáyiú-va?  
—càchí-gǎ xáha<sup>n</sup>-gǎ xii-güedé.

**19**Te ní xáha<sup>n</sup>-güedě xii-gǎ:

—Davá-yu càchí-yu sǎ cúú-n ndíi  
Juáá téé ní xóo dacuàndute ñaha  
xii ñáyiú, te davá-yu càchí-yu sǎ  
cúú-n tǎ Èlías, te davá-yu càchí-yu  
sǎ ì<sup>n</sup> téé ní xóo càhá<sup>n</sup> tnúhu Yǎ  
Ndiòxí ndéé sanaha ñi ndoto cùu-n,  
duha càchí-yu —càchí-güedé  
xǎha<sup>n</sup>-güedě xii-gǎ.

**20**Te ní xícá<sup>n</sup> tnúhú tùcu-gǎ  
núú-güedě, te xáha<sup>n</sup>-gǎ xii-güedé:  
—Te nchòhò, éyoo sàni iní-ndó  
cùu-í-i? —càchí-gǎ xáha<sup>n</sup>-gǎ  
xii-güedé.

Te té Pèlú ní xáha<sup>n</sup>-dě xii-gǎ:  
—Yòhó cúú-n Cristú Déhe Dútú  
Ndiòxí —càchí-dé xǎha<sup>n</sup>-dě xii-gǎ.

**Jèsús càhá<sup>n</sup>-gǎ sǎ càhni ñaha-güedé  
xii-gǎ**

(Mt. 16:20-28; Mr. 8:30-9 :1)

**21**Te ní xáha<sup>n</sup>-gǎ xii-güedé sǎ vǎ  
yóo ì<sup>n</sup> cùñaha-güedě yoo cùu-gǎ.

**22**Te ní xáha<sup>n</sup>-gǎ xii-güedé:  
—Yúhú Téé cùu ñani tnáhá-ndó  
nchàa-ndo ío cuéhé sǎ ndòhò-í,  
chì daquèe tíhú ñáhá cuè téé cùu  
sacuéhé núú ñáyiú isràél, ndìhi cue  
dútú cùnù, ndìhi cue téé dàcuaha  
ñaha xii ñáyiú nchaá tnúhu ní  
chídó tnùnì ndíi Moisés, te sáá  
nduu te cahni ñaha-güedě xii-í,  
dico nduu únì sǎ cùu-í te ndoto-í —  
càchí-gǎ xáha<sup>n</sup>-gǎ xii-güedé.

**23**Te dàtnùní ní xáha<sup>n</sup>-gǎ xii  
nchaá ñáyiú:

—Nchaá ñáyiú cuini chitnahá  
ñáhá xii-í, te xini ñuhu-xi vǎ  
cádá-gǎ-yu sǎ sání iní mèé-yu,  
te ì<sup>n</sup> nduu ì<sup>n</sup> nduu cada ndee  
iní-yu cundecu túha-yu ndohó-yu  
cuendá-í, te cuèi na ndòhò-yu dàtná  
ndoho-í. **24**Te nchaá ñáyiú cuini

sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyíu ñá túú yùhú cuèi nándi sá ná yáha-yu cundecú-yu ñuyíú-a sá cuèndá-í, te ñáyíu-á<sup>n</sup> naníhí tãhú-yu. <sup>25</sup>Te cuèi nchaandi túhú sá ío ñuyíú-a na nihi ñáyíu cundecu ndíhí-yu, dico núu diu nchaa xíã<sup>n</sup> ná càda cuíta nihnú-yu te ñá túú vèdana nàndíhí-xi sá dúcá<sup>n</sup> ndècu ndíhí-yu nchaa xíã<sup>n</sup>. <sup>26</sup>Te nchaa ñáyíu na cùcaha<sup>n</sup> núu-xi cáhá<sup>n</sup> vãha cuèndá-í ndíhi cuèndá nchaa tnúhu-í, te tnàhá yùhú Tée cùu ñaní tnàhá-ndó nchàa-ndo cucaha<sup>n</sup> núu-í núú-yu òré quixi tucu-í ndíhi cue espíritú xínú cuèchi núú Tãtà-í Dútú Ndiõxí, te mee-gã cada cutnùnì iní nchaa ñáyíu sá ío càhnu cuu-í. <sup>27</sup>Te na càchí tnúhu ndáá-í xii-ndo sã ío dava nchòhó ñáyíu ndècu iha vitna vá cùu-ni-ndo, chi cundecu-ni-ndo ndéé quíní-ndó sãã nduu ndíhu ndaha ñaha Yã Ndiõxí xii ñáyíu —càchí-gã xáha<sup>n</sup>-gã xíí-yu.

### Ní nadáma dóo Jèsús ndíhi núu-gã

(Mt. 17:1-8; Mr. 9:2-8)

<sup>28</sup>Te ní cuu dàtná úná nduu sá dúcá<sup>n</sup> ñí cáhá<sup>n</sup> Jèsús, te cuásaá-gã ñí yucu cáhá<sup>n</sup> ndíhi-gã Yã Ndiõxí, te ndèca-gã té Pèlú, ndíhi té Jàcobó, ndíhi té Juàà cuásaá. <sup>29</sup>Te ñini càhá<sup>n</sup> ndíhi-gã Yã Ndiõxí ní nadáma núu-gã ndíhi dóo-gã, te dóo-gã-á<sup>n</sup> sũúní ñí nduu cuixí<sup>n</sup> víhí, te sũúní dàtása<sup>n</sup>-xi. <sup>30</sup>Te òré-ni-á<sup>n</sup> ñí xiní-güedé úú tnàhá cue téè càhá<sup>n</sup> ndíhi-gã, te ñí-dé cúú-dě té Moisés, te ingá-dé cúú-dě té Èliás, <sup>31</sup>te sũúní dàtása<sup>n</sup>-xi ñí càndéé núú ndécú cuè téè úú-á<sup>n</sup> ndíhi-gã, te xíndatnúhu-güedé nàcuáa ndoho

Jèsús cuú-gã ñúú Jerusàlén dàtná ní cachí mée-gã. <sup>32</sup>Te té Pèlú ndíhi úú-gã-güedé cuíní víhí-güedé cúdú-güedé, dico ní sahní iní-güedé ñá túú ní xídfí-güedé, te ní dánèhé núú ñáhá-xí xì-güedé sá sũúní vãha càa núú ndécú Jèsús, ndíhi úú cue téè càhá<sup>n</sup> ndíhi-gã-á<sup>n</sup>. <sup>33</sup>Te òré sa ndùcu ndee cue téè úú-á<sup>n</sup> caca-güedé núhú-güedé, te ní xáha<sup>n</sup> tẽ Pèlú xii-gã:

—Mèstrú, ivãha ní cuu sá ndécú-ó iha vitna! Te na dàcaa-ndí úní tnàhá vehe tnuvixí<sup>n</sup>, ñí<sup>n</sup> cuu cuèndá-n, te ñí<sup>n</sup> cuu cuèndá té Moisés, te ñí<sup>n</sup> cuu cuèndá té Èliás —càchí-dé xáha<sup>n</sup>-dẽ xii-gã.

Dico té Pèlú chi ñi mée-dé ñá túú ní cùtnuní iní-dé nása ndùu tnúhu ní cáhá<sup>n</sup>-dé. <sup>34</sup>Te ñini càhá<sup>n</sup>-dé ní quexio ñí<sup>n</sup> vícò núú ndécú-güedé-á<sup>n</sup> ñí dádãhu ñaha-xi xì-güedé, te ní yùhú-güedé sá dúcá<sup>n</sup> ñí quexio vícò-ã<sup>n</sup> ñí dádãhu ñaha-xi. <sup>35</sup>Te xití vícò-ã<sup>n</sup> ñí tecú ní cáhá<sup>n</sup> Yã Ndiõxí, te xáha<sup>n</sup>-gã xii-güedé:

—Tée-a cùu-dé Déhe-í, téè ío cùu iní-í, te tnií-ndo nchàa tnúhu càhá<sup>n</sup>-dé —duha ní xáha<sup>n</sup>-gã xii-güedé.

<sup>36</sup>Te sátá dúcá<sup>n</sup> ñí cáhá<sup>n</sup> Yã Ndiõxí, te ní quide cuèndá-güedé sá mèdii-ná Jèsús ndécú-gã xíã<sup>n</sup>. Te vá yõo ñí<sup>n</sup> ñí xáha<sup>n</sup>-güedé nàcuáa ndùu nchaa sá ñí xiní-güedé-á<sup>n</sup>.

### Jèsús quidé tãtna-gã ñí<sup>n</sup> téè cuechi yíhi ñaha espíritú cùndíhi yucu ñávãha

(Mt. 17:14-21; Mr. 9:14-29)

<sup>37</sup>Te ingá nduu-ã<sup>n</sup> cuãnuu-gã yucu-á<sup>n</sup> ndíhi-güedé, te ío cuéhé ñáyíu cuáhá<sup>n</sup> tnàhá ñáhá xìi-gã.

<sup>38</sup>Te ìí<sup>n</sup> téé ñùhu tnahá tnuú-yu-á<sup>n</sup> ní cáhá<sup>n</sup> níhi-dé, te xáha<sup>n</sup>-dè xii-gá:

—Mèstrú, ío cáhá<sup>n</sup> ndàhú-í núú-n ñùu vá cùndèe iní-n càda tátna-n dèhe-í, chí ìí<sup>n</sup>diì duha-dé ndécú,  
<sup>39</sup>te yìhi ñaha espíritú cùndìhi yucu ñávàha xii-dé, te òré ná nàtnìi ñaha-xi xii-dé, te dàcana saa ñaha-xi, te ndàda ruú<sup>n</sup> ñáhá-xí xii-dé, te tàva-xi tíñú yuhu-dé. Te ío dándoho ñaha-xi xii-dé, chí ndéé núú ñà cúú-gǎ, te dàña ñaha tnaa-xi xii-dé. <sup>40</sup>Te sa ní cáhá<sup>n</sup> ndàhú-í núú cuè téé xica cuu ndìhi-n queñuhu-güedé-xi, dico ñá túú ní ndàcu-güedé —càchí-dé xáha<sup>n</sup>-dè xii-gá.

<sup>41</sup>Te Jèsús ní xáha<sup>n</sup>-gǎ xii nchaa ñáyiu:

—iNchaa nchòhò ñáyiu ndècu ñuyú-a ío sàà iní-ndó, chí ñá túú cuíní-ndó quèndáá iní-ndó Yá Ndiòxí! Te ní cuu vài nduu quide ndee iní-í nchaa sá quidé-ndó, òte ná ndéé ama vá dúcá<sup>n</sup>-gǎ cada-ndo-i? —càchí-gá xáha<sup>n</sup>-gǎ xií-yu.

Te ní xáha<sup>n</sup>-gǎ xii téé cùhú déhe-xi-á<sup>n</sup>:

—Taxi déhe-n ìha —cachí-gá xáha<sup>n</sup>-gǎ xii-dé.

<sup>42</sup>Te òré cuáha<sup>n</sup> téé cuechi-ǎ<sup>n</sup> núú-gǎ, te espíritú cùndìhi yucu ñávàha-á<sup>n</sup> ní dándùà ñáhá-xí xii-dé, te sàhni yìhi ñáhá tucu-xi xii-dé ní cùu, dico Jèsús níhi ní cáhá<sup>n</sup>-gá ní tenàá-gá espíritú-á<sup>n</sup>, te ní quee ñaha-xi xii-dé, te ní nacúáha cuèndá ñáhá-gǎ xii-dé tātá-dè. <sup>43</sup>Te ncháa-yu ní cuñúhu-yu sá dúcá<sup>n</sup> ní cuu, te ní cachí-yu sá ìo càhnu cuu Yá Ndiòxí.

**Jèsús càhá<sup>n</sup> tucu-gá sá cùu-gá**

(Mt. 17:22-23; Mr. 9:30-32)

Te nini xícunúhu-yu nàcuáa ní quide Jèsús, te ní xáha<sup>n</sup>-gǎ xii cue téé xica cuu ndìhi-gá:

<sup>44</sup>—Nchòhò cundedóho váha-ndo tnúhu na càhá<sup>n</sup>-í-a, te vá ná cuànaa-ndo, chí yúhú Tée cùu ñaní tnahá-ndó nchàa-ndo sáá ìí<sup>n</sup> nduu te cuáha cuèndá ñáhá-güedé xii-í núú cuè téé cùu úhú iní ñáhá —càchí-gá xáha<sup>n</sup>-gǎ xii-güedé.

<sup>45</sup>Dico cue téé-á<sup>n</sup> ñà túú ní tècú tnùnì-güedé nàcuáa nduu tnúhu ní xáha<sup>n</sup>-gǎ xii-güedé, te duca<sup>n</sup> ní yáha-güedé, chí duca<sup>n</sup> tnahí ní cachí-gá sá vǎ tècú tnùnì-güedé, te ní yùhú-güedé cǎcá<sup>n</sup> tnúhú-güedé núú-gǎ nása nduu tnúhu ní xáha<sup>n</sup>-gǎ xii-güedé.

**Cue téé ndùcu tnúhu núú tnahá ñùu ndèdacàa-güedé ío-gá cùnùu**

(Mt. 18:1-5; Mr. 9:33-37)

<sup>46</sup>Te cue téé xica cuu ndìhi-gá ní ngúíta-güedé ndátnúhu-güedé ñùu ndèdacàa-güedé ío-gá cùnùu, <sup>47</sup>dico Jèsús ní cutnùnì iní-gá nàcuáa sàni iní-güedé ñùu ní cana-gá ìí<sup>n</sup> té lǐhli, te ní sanu tnǎi ñaha-gǎ ìí<sup>n</sup> xio dǎñi-gá. <sup>48</sup>Te ní xáha<sup>n</sup>-gǎ xii-güedé:

—Nchaa ñáyiu na quèhe<sup>n</sup> cuèndá ìí<sup>n</sup> té lǐhli dàtná té lǐhli-a cuèndá sá ñúhú iní ñáhǎ-yu xii-í ñá, te cada iní-yu sá yùhú ní quehe<sup>n</sup> cuèndá-yu, te nchaa ñáyiu na quèhe<sup>n</sup> cuèndá ñáhá xii yúhú, te cada iní-yu sá tnahá Tātá-í Dútú Ndiòxí Yáa ní tendaha ñaha xii-í véxi-í ñuyú-a ní quehe<sup>n</sup> cuèndá-yu. Te nchaa ñáyiu ío ndàhú iní-xi mee-ni xìnu

cuechí-yu, ñáyiú-á<sup>n</sup> ïo-gá cúnùú-yu  
—càchí-gá xáha<sup>n</sup>-gã xii-güedé.

**Ñáyiú ñá túú cùu úhú iní ñáhá  
cùndihí ñahá-yu xii-o**

(Mr. 9:38-40)

<sup>49</sup>Te té Juáá diu-ní ìí<sup>n</sup> tée xìca cuu  
ndihí-gá ní xáha<sup>n</sup>-dë xii-gá:

—Mèstrú, ní xiní-ndí ìí<sup>n</sup> tée  
càcunehe ñaha-dé xii-n, te  
ndèñuhu-dé espíritú cùndihí yucu  
ñávaha yìhi ñaha xii ñáyiú, te  
nchúhú ñá túú ní dàña-gá-ndí duca<sup>n</sup>  
càda-dé, chi ñá túú xìca cuu ndihí  
ñaha-dé xii-o —càchí-dé xáha<sup>n</sup>-dë  
xii-gá.

<sup>50</sup>Te Jèsús ní xáha<sup>n</sup>-gã xii-dé:

—Daña-ndo na càda nahi-dé ní  
cùu, chi ñáyiú ñá túú cùu úhú iní  
ñáhá xii-o te cùndihí ñahá-yu —  
càchí-gá xáha<sup>n</sup>-gã xii-dé.

**Jèsús càhá<sup>n</sup>-gá dóho té  
Jàcobó ndihí té Juáá**

<sup>51</sup>Te òré sa ta cùyatni ndaa Jesús  
andiú, te ní xica-gá cuáhá<sup>n</sup>-gá  
ñuú Jerusalén, chi duu<sup>n</sup> duu<sup>n</sup> ní  
sani iní-gá sá quíhí<sup>n</sup>-gá. <sup>52</sup>Te ní  
tendaha-gã cue tée yòdo nuu cuáhá<sup>n</sup>,  
te ní quexìo-güedé ìí<sup>n</sup> ñuú, te  
ñuú-á<sup>n</sup> yíndèhu-xi distritú Sàmariá,  
te ndücu-güedé ìí<sup>n</sup> vehe cada  
túha-güedé òré quexìo-gá. <sup>53</sup>Dico  
ñáyiú Sàmariá ñá túú ní cuiní-yu  
cuáñaha núu-yu vehe, chi cuendá sá  
ní cutnùní iní-yu sá ìchi yáha-ni-gá  
quíhí<sup>n</sup>-gá ñuú Jerusalén. <sup>54</sup>Te sá  
dúca<sup>n</sup> ní quidé-yu ñá túú ní cuiní-yu  
cuáñaha núu-yu vehe ndetatú-gá,  
núu ní xáha<sup>n</sup> tē Jàcobó ndihí té Juáá  
cue tée xìca cuu ndihí-gá xii-gá:

—Mèstrú, ìcuiní-n càcá<sup>n</sup> táhú-ó  
núú Yá Ndiöxí cuendá dangáva-gá

ñuhú danàa-gá ñáyiú ñuú-a dàtná  
ní quide té Èliás tée ní xóo càhá<sup>n</sup>  
tnúhu Yá Ndiöxí ndéé sanaha-á<sup>n</sup>? —  
càchí-güedé xáha<sup>n</sup>-güedé xii-gá.

<sup>55</sup>Te Jèsús ní nchócótó-gã  
núú-güedé, te níhi ní càhá<sup>n</sup>-gá  
dóho-güedé, te xáha<sup>n</sup>-gã:

—Nchòhó, chi ñá túú vaha iní-ndó  
te núu duca<sup>n</sup> càhá<sup>n</sup>-ndó. <sup>56</sup>Chi yúhú  
Tée cùu ñaní tnáhá-ndó nchàa-ndo  
véxi-í sá dácäcu nihnu-í ñáyiú, te  
ñá dñú véxi-í sá dáciuta nihnu-í-yu  
—càchí-gá xáha<sup>n</sup>-gã xii-güedé.

Te sátá dúca<sup>n</sup> ní xáha<sup>n</sup>-gã, te ní  
xica-gá cuáhá<sup>n</sup>-gá ndihí-güedé ingá  
ñuú.

**Ñáyiú cuiní chitnahá ñáhá xii Jesús  
ní cùu**

(Mt. 8:19-22)

<sup>57</sup>Te ñuhu Jesús ichi ndihí-güedé,  
te ìí<sup>n</sup> tée ní xáha<sup>n</sup>-dë xii-gá:

—Mèstrú, cuiní-í canchicú<sup>n</sup> ñáhà-í  
xii-n ndèni ní cuu na quíhí<sup>n</sup>-n —  
càchí-dé xáha<sup>n</sup>-dë xii-gá.

<sup>58</sup>Te Jèsús ní xáha<sup>n</sup>-gã xii-dé:

—Nchaa núcuui chi ndècu yaú cúú  
vèhe-güedi saquihí-güedi, te nchaa  
quiti ndàva caa tacá-güedi díquí  
yutnu, dico yúhú Tée cùu ñaní  
tnáhá-ndó nchàa-ndo chi ñá túú  
ndèé cáá vèhe-í ñuyúú-a ndetatú-í —  
càchí-gá xáha<sup>n</sup>-gã xii-dé.

<sup>59</sup>Te dàtnùní ní xáha<sup>n</sup> tucu-gá xii  
ingá-dé:

—Yòhó taquixi chitnahá ñáhá-n  
xii-í —càchí-gá xáha<sup>n</sup>-gã xii-dé.

Dico tée-á<sup>n</sup> ní xáha<sup>n</sup>-dë xii-gá:

—Mèstrú, dañá na nùhú-í  
cundetú-í cuú tătà-í te chindúxi-í-dé,  
te dàtnùní quixi-í chitnahá ñáhá  
dùca<sup>n</sup>-ná-í xii-n —càchí-dé xáha<sup>n</sup>-dë  
xii-gá.



<sup>60</sup>Te Jèsús ní xáha<sup>n</sup>-gã xii-dé:  
—Daña ñáyiú ñá túú sàndáá  
iní ñáhá xii-í ná chíndúxi tñaha  
meé-yu, chi ñáyiú-á<sup>n</sup> cúú-yu dàtná  
ñáyiú ní xíhí cuéi ndècu-ní-yu  
núú ñuyíú-a. Te yòhò taquixi, chi  
quíhí<sup>n</sup>-n dànehé-n ñáyiú nàcuáa  
cada Yá Ndiöxí ndíhu ndaha  
ñaha-gá xií-yu —càchí-gá xáha<sup>n</sup>-gã  
xii-dé.

<sup>61</sup>Te ní xáha<sup>n</sup> tùcu ingá-dé xii-gá:  
—Mèstrú, cuíní-í chitnahá ñàhà-í  
xii-n, dico díhna-gá daña na nùhú-í  
cada ndee iní-í nchaa ñáyiú ndècu  
vehe-í, te dàtnùnì quixi-í —càchí-dé  
xàha<sup>n</sup>-dè xii-gá.

<sup>62</sup>Te Jèsús ní xáha<sup>n</sup>-gã:  
—Nchaa ñáyiú ní sàndáá iní ñáhá  
xii-í, te núu vá cànchícú<sup>n</sup> nihnu  
ñàhá-yu ni yùhu ni iní-yu, te  
cúú-yu dàtná ì<sup>n</sup> téé ní tñii ndaha  
làtú cutu-dé, chi téé-á<sup>n</sup> núu na  
ndàcoto-dé ndàa sátá-dè òré xítú-dè,  
te vá quíhí<sup>n</sup> ndáá làtú-dé duca<sup>n</sup>  
sàtnahá-xi cúú-yu. Te cue ñáyiú  
chi vá cúú ndáá-yu nàcuáa ndíhu  
ndaha-gá dava-gá ñáyiú— càchí-gá  
xáha<sup>n</sup>-gã xii-dé.

**Jèsús téndàha-gá únídico úxí cue téé  
quíhí<sup>n</sup> cáhá<sup>n</sup> tnúhu-gá núú ñáyiú**

**10** Te sátá dúcá<sup>n</sup> ní cuu, te ní  
cáxi tucu Xítohó Jesucristú  
únídico úxí cue téé codonù-güedé  
quíhí<sup>n</sup>-güedé cáhá<sup>n</sup>-güedé  
tnúhu-gá nchaa ñúú, ndíhi nchaa  
dava-gá xichi núú quíhí<sup>n</sup>-gá, te  
ndi ndúú ndi ndúú-güedé tendaha  
ñaha-gá xii-güedé quíhí<sup>n</sup>-güedé.  
<sup>2</sup>Te cùmání-gã caca-güedé, te ní  
xáha<sup>n</sup>-gã xii-güedé:

—Nchòhó xíní-ndó sã òré ná sàá  
yóó cuu nchaa sá xítú ñáyiú, te ío

vài cuu. Te na càchí tnúhu ndáá-í  
xii-ndo sã dàtná vai sá xítú ñáyiú  
cùu, duca<sup>n</sup> ìo vai ñáyiú cùmání  
cundedóho tnúhu Yá Ndiöxí te ío  
sacú ñáyiú dàcuaha ñaha xií-yu  
tnúhu-gá, núu xíá<sup>n</sup> xíní ñùhu-xi  
cáca<sup>n</sup>-ndó núú Yá Ndiöxí cuendá sá  
ná dàcahá<sup>n</sup>-gá iní ñáyiú cáhá<sup>n</sup>-yu  
tnúhu-gá núú ñáyiú cùmání  
cundedóho tnúhu-gá. <sup>3</sup>Te nchòhó  
cúú-ndó dàtná cue mbéé cue quiti  
cuáhá<sup>n</sup> núú yíhí cué quiti déé<sup>n</sup>. Chi  
tendaha ñaha-í xii-ndo quíhí<sup>n</sup>-ndó  
núú xíndecu nchaa ñáyiú cuihna  
iní-xi. <sup>4</sup>Te vá cànèhe-ndo ñunu  
cuhu<sup>n</sup> ndachiu<sup>n</sup>-ndo, ni núú  
cúhú<sup>n</sup> díhú<sup>n</sup>-ndó, te ni vã cádá  
tùha-gá-ndó chàú-ndó chi ñu-ni  
chàú yíhí-ndó-á<sup>n</sup> xíá<sup>n</sup>-ni quíhi-ndo,  
te vá ìo cuyaa-ndo cãhá<sup>n</sup> ndíhi-ndo  
ñáyiú ñùhu ichi. <sup>5</sup>Te òré ná  
quèxio-ndo ì<sup>n</sup> vehe, te duha  
cúñaha-ndo xii ñáyiú dii vèhe-xi-á<sup>n</sup>:  
“Yá Ndiöxí chindee ñaha-gá xii-ndo  
ìo váha cuu iní-ndó cùndecu-ndo”,  
duha cúñaha-ndo xií-yu. <sup>6</sup>Te  
núu ñáyiú-á<sup>n</sup> ní nduu táhù-yu sá  
cúndècu váha iní-yu núú Yá Ndiöxí,  
te cuu-xi sá vãha sá cúú-xí-yu tnúhu  
cúñaha-ndo-á<sup>n</sup>, dico núu ñá túú ní  
càhá<sup>n</sup> váha ndíhi ñàhá-yu xii-ndo,  
te cúñaha-ndo sã vã cúú-xí sã vãha  
sá cúú-xí-yu. Dico núu ní cáhá<sup>n</sup>  
váha ndíhi ñàhá-yu xii-ndo, <sup>7</sup>te  
ñu-ni vehe-á<sup>n</sup> cada vehe tnaa-ndo,  
te ñá túú-gã ndèè nducu-ndo vèhe  
cundecu-ndo, te caxi-ndo nchaa  
sá ná tàxí-yu, chi nchaa cue téé  
quide chiu<sup>n</sup> dacuití tàu-güedé sá  
nìhí-güedé sá cáxí-güedé cuendá  
nchaa chiù<sup>n</sup> quide-güedé. <sup>8</sup>Te núu  
ní sáá-ndó ì<sup>n</sup> ñúú núú ní quehe<sup>n</sup>  
cuendá ñàhá-yu xii-ndo, te caxi-ndo

nchaa sá ná tàxí-yu. <sup>9</sup>Te cada tátna-ndo cuè ñáyiú cùhú xĩndecu ñúú-á<sup>n</sup>, te cúñaha-ndo xii-yu sá sá ní sáá nduu ndíhu ndaha ñaha Yá Ndiöxí xii-yu. <sup>10</sup>Dico núú ní sáá-ndó ñ<sup>n</sup> ñúú núú ñà túú ní quèhe<sup>n</sup> cuendá ñáhã-yu xii-ndo, te tñii-ndo ìchi cuita cáhá<sup>n</sup>-ndó cuáhã<sup>n</sup>, te cúñaha-ndo xii-yu: <sup>11</sup>“Ndéé tícá chúhmá ñí tñí sáhá-ndí ñúú-ndó nàquidí-ndí, te duha quide-ndí cuendá cutnùnì iní-ndó sã ñà túú quide váha-ndo ndècu-ndo. Dico cunaha-ndo sã sà ní sáá nduu ndíhu ndaha ñaha Yá Ndiöxí xii-ndo ni cùu”, duha cúñaha-ndo xii-yu. <sup>12</sup>Te na càchí tnúhu-í xii-ndo sã ná sáá nduu càda ndáá Yã Ndiöxí cuéchi nchaa ñáyiú, te ñáyiú ñúú-á<sup>n</sup> ïo-gá ndohó-yu dàvá-á<sup>n</sup> dàcúxí ñáyiú ñúú Sòdomá —càchí-gá xáha<sup>n</sup>-gã xii-güedé.

**Cuendá ñáyiú dava ñúú ñà túú sàndáá iní tnúhu Xítoho Jesucristú**  
(Mt. 11:20-24)

<sup>13</sup>Te Jèsús xáha<sup>n</sup>-gã xii ñáyiú dava ñúú ñà túú sàndáá iní tnúhu-gá: —iNdàhú nchòhó cue ñáyiú ñúú Corazín! iTe ndàhú nchòhó cue ñáyiú ñúú Bètsaidá! Chi núú dicó ñúú Tìrú, ndíhi ñúú Sidón ní quide-í nchaa sá vã yõ tñàhí ndàcu cada datná ní quide-í ñúú-ndó-á<sup>n</sup> ñí xiní-ndó ñã, te sá ndéé ama-gá cuihnú-yu dóó ndàhú, te cunucóo-yu núú yáá cuendá sá ndíxí cuèchi iní-yu sá ñà túú quide váha-yu ni cùu. <sup>14</sup>Dico sáá nduu te ïo-gá dandòho ñaha Yá Ndiöxí xii-ndo dàcúxí ñáyiú ñúú Tìrú, ndíhi ñáyiú ñúú Sidón. <sup>15</sup>Te nchòhó ñáyiú ñúú Capèrnaúm quide

iní-ndó sã sà cuándaa-ndo àndiu, dico ñáhá chi núú ùhú núú ndàhú cundecu-ndo —duha ní xáha<sup>n</sup>-gã xii nchaa ñáyiú ñúú-á<sup>n</sup>.

<sup>16</sup>Te xáha<sup>n</sup> tùcu-gá xii cue tée tendaha-gã quíhí<sup>n</sup> cáhá<sup>n</sup> tnúhu-gá-á<sup>n</sup>:

—Nchaa ñáyiú na cùndedóho nchaa tnúhu cáhá<sup>n</sup>-ndó, te cada iní-yu sá yúhú càhá<sup>n</sup>-í ndèdóho-yu, te nchaa ñáyiú na dàquee tíhú ñáhá xii-ndo, te tñàhã yúhú daquèe tíhú-yu, te nchaa ñáyiú duca<sup>n</sup> na dàquee tíhú ñáhá xii-í, te tñàhã Tãtà-í Dútú Ndiöxí Yáá ní tendaha ñaha xii-í véxi-í ñuyúú-a dàquee tíhú-yu —càchí-gá xáha<sup>n</sup>-gã xii-güedé.

Te duca<sup>n</sup> te ní xica-güedé cuáhã<sup>n</sup>-güedé.

**Ní nasáá cue tée únídico úxí ní tendaha Jèsús ní sáhá<sup>n</sup> ní cáhá<sup>n</sup> tnúhu-gá núú ñáyiú**

<sup>17</sup>Te cue tée únídico úxí-á<sup>n</sup> ñí nasáá-güedé te súuní cùdíí ìní-güedé, te xáha<sup>n</sup>-güedé xii Jèsús: —Mèstrú, ndéé espíritú cùndíhi yucu ñávãha sàndáá iní ñáhá-xí xii-ndí òrè cáciú nèhe ñaha-ndí xii-n —càchí-güedé xáha<sup>n</sup>-güedé xii-gá.

<sup>18</sup>Te Jèsús ní xáha<sup>n</sup>-gã: —Ndáá càhá<sup>n</sup>-ndó chi yúhú ní xiní-í cútnàhã ní xíta nihnu yucu ñávãha, chi dàtná ní ngava ñ<sup>n</sup> tasa<sup>n</sup> ñí ngava-xi ñuyúú-a. <sup>19</sup>Te dàtná quidé-ndó òrè xènihnu-ndo ñ<sup>n</sup> cóó, àdi ñ<sup>n</sup> nchacua duca<sup>n</sup> cada-ndo daquee tíhú-ndó yucu ñávãha, te ñã túú ñã cada ñaha-xi xii-ndo, chi ní taxi-í tnúhu ndee ìní ndécú ndíhi-ndo. <sup>20</sup>Dico vá cùdíí ìní-ndó cuendá sá sàndáá iní ñáhá cuè

espíritú cúndìhi yucu ñávãha xii-ndo, chi cudíí ìní-ndó cuendá sá sà yodo tñuní-ndó nũú tütú Yã Ndiöxí Yáá ndécú àndiu —cachí-gá xáha<sup>n</sup>-gã xii-güedé.

**Jèsús cúdìí ìní-gá**

(Mt. 11:25-27; 13:16-17)

<sup>21</sup>Te òré-á<sup>n</sup> sũúní nĩ quide díí ìní ñáhá Espíritú Yã Ndiöxí xii Jèsús, te ní xáha<sup>n</sup>-gã xii Yã Ndiöxí:

—Yòhó Tãtà-í Dútú Ndiöxí, ío chìñuhu ñaha-í xii-n chi ñiu-n tàxi tñuní-n àndiu ndìhi ñuyú-a, te dànehé-n cuè ñáyiú nchaa tñúhu váha, te ñiu-ni ñáyiú-á<sup>n</sup> cùú-yu ñáyiú ñá túú cùtnuní ìní-xi nchaa tñúhu càhá<sup>n</sup> cue téé túha, te nchaa tñúhu càhá<sup>n</sup>-n-ã<sup>n</sup> ñà túú ní dàtúu-n nũú ñáyiú càchí sá ío túha, te ío váha sàà díquí-xi. Te duca<sup>n</sup> quide-n, chi duca<sup>n</sup> cuìní-n cùnduu —cachí-gá xáha<sup>n</sup>-gã xii Yã Ndiöxí.

<sup>22</sup>Te xáha<sup>n</sup> tucu-gá xii cue téé ní nasáá-á<sup>n</sup>:

—Mee Tãtà-í Dútú Ndiöxí ní cachí-gá sá cùnùu-í núú nchaa-ndi túhú sá ío. Te vá yò ìí<sup>n</sup> xìní nàcuáa sàni ìní yúhú Déhe Dútú Ndiöxí, chi ìí<sup>n</sup>dii díí-ni mee-gã xìní-gá nàcuáa sàni ìní-í. Te duca<sup>n</sup> ìí<sup>n</sup>dii-ni yúhú xìní-í nàcuáa sàni ìní mée-gã, te nchaa ñáyiú càchí ìní-í sá quíni-yu nàcuáa sàni ìní Tãtà-í Dútú Ndiöxí te xitñuhu-í-yu, te vá yò ìí<sup>n</sup>-gá xìní nàcuáa sàni ìní-gá chi ñiu-ni ñáyiú duca<sup>n</sup> xitñuhu-í-á<sup>n</sup> xìní-yu —càchí-gá xáha<sup>n</sup>-gã xii-güedé.

<sup>23</sup>Te ní nchócótó-gã núú xindecu mee-ni cuè téé xica cuu ndìhi-gá, te ní xáha<sup>n</sup>-gã xii-güedé:

—Váha táhú nchòhó ndìhi nchaa ñáyiú ndèhe nchaa nacuáa

quide-í vitna. <sup>24</sup>Chi ío cuéhé cue téé ní xóo càhá<sup>n</sup> tñúhu Yá Ndiöxí ndéé sanaha, ndìhi cue téé ní xíndaha ñàha xii ñáyiú ní cuíni-güedé cundehe-güedé nchaa sá ndéhé-ndó quide-í vitna, te ñá túú ní xìní-güedé, te ní cuíni-güedé cundedóho-güedé nchaa tñúhu càhá<sup>n</sup>-í ndedóho-ndo vitna, te ñá túú ní xíndedóho-güedé —càchí-gá xáha<sup>n</sup>-gã xii-güedé.

**Nàcuáa ní quide ìí<sup>n</sup> téé distritú Sàmariá**

<sup>25</sup>Te ìí<sup>n</sup> téé dàcuaha ñaha xii ñáyiú nchaa tñúhu ní chídó tñuní ndíi Moisés ní ndacuñí-dé xító ndè-dé Jèsús nũú nása cunduu tñúhu càhá<sup>n</sup>-gá, te xáha<sup>n</sup>-dè xii-gá: —Mèstrú, íná cúú sã càdà-í cuendá nduu táhù-í cundecu-í ndìhi Yã Ndiöxí ni caa ni quíhí<sup>n</sup>-í? —càchí-dé xáha<sup>n</sup>-dè xii-gá.

<sup>26</sup>Te Jèsús ní xáha<sup>n</sup>-gã xii-dé:

—Cuíni-í cachí tñúhu-n nása càhá<sup>n</sup>-xi núú tütú ndíi Moisés —càchí-gá xáha<sup>n</sup>-gã xii-dé.

<sup>27</sup>Te xáha<sup>n</sup>-dè xii-gá:

—Ndíi Moisés càchí ndíi núú tütú ndíi: “Cuu ìní-ndó Dútú Ndiöxí Yáa cúú Ndiöxí-ndó nì yuhu nì ìní-ndó, te cani ìní-ndó càda-ndo datná cuíni mée-gã, te mee-ni tñuhu váha cani ìní-ndó nàcuáa cuu vii cuu váha-ndo nũú-gã, te coo ìní-ndó cùu ìní-ndó-gã. Te cuu ìní-ndó tñaha ñáyiú-ndo dàtná cúú ìní-ndó mée-ndo”, duha càchí ndíi núú tütú ndíi —càchí-dé xáha<sup>n</sup>-dè xii-gá.

<sup>28</sup>Te Jèsús ní xáha<sup>n</sup>-gã:

—Váha-ni càhá<sup>n</sup>-n, te núú cada-n nàcuáa càhá<sup>n</sup>-n ã<sup>n</sup>, te nduu táhú-n cùndecu-n ndìhi Yã Ndiöxí ni caa ni quíhí<sup>n</sup> —càchí-gá xáha<sup>n</sup>-gã xii-dé.

<sup>29</sup>Te sá dúcá<sup>n</sup> nĩ xáha<sup>n</sup> Jèsús xii-dé nũu ndũcu-dé nàcuáa cada-dé cácu nihnu-dé núu tnũhu ní cáhá<sup>n</sup>-dé, te ní xícá<sup>n</sup> tnũhú-dě núu-gă, te xăha<sup>n</sup>-dě:

—¿Yoo cùu tnaha ñáyi-u-í-i? —  
càchí-dé xăha<sup>n</sup>-dě xii-gă.

<sup>30</sup>Te Jèsús ní cani-gă ì<sup>n</sup> cuèndú núu-dě nàcuáa tecú tnùní-dé tnũhu-gă, te xáha<sup>n</sup>-gă:

—Ì<sup>n</sup> tée ní ndee-dé ñuú Jerusàlén ñũhú-dě ichi cuánuu-dé cuáhá<sup>n</sup>-dé ñuú Jericó, te ní quee ñadúhú ichi-dé ní dúhú-güedě dóó níhnú-dě, ndìhi nchaa sá néhé-dě, te ní caniha vîhi-güedé, te nchìto ñu-ná-dé ní dáñá ñaha-güedé te cuáhá<sup>n</sup>-güedé. <sup>31</sup>Te mei òré cātùu-dé-á<sup>n</sup> ñũhú ì<sup>n</sup> dútú ichi-á<sup>n</sup>, te òré ní xiní ñáhá dútú-ă<sup>n</sup> xii-dé, te ì<sup>n</sup> xio-ni ní xócõo ndee-dé ní yáha-dé. <sup>32</sup>Te ñũhu tucu ì<sup>n</sup> tée cùu levítá ichi-á<sup>n</sup>, te òré ní xiní-dé tée-á<sup>n</sup> cātùu-dé, te ñu-ni duca<sup>n</sup> nĩ quide-dé ì<sup>n</sup> xio-ni ní xócõo ndee-dé ní yáha-dé. <sup>33</sup>Dico ì<sup>n</sup> tée distrítú Sãmariá ñũhú tucu-dé ichi-á<sup>n</sup> te òré ní xiní-dé tée-á<sup>n</sup> cātùu-dé, te ní cundàhú iní ñáhá-dě. <sup>34</sup>Te ní sáhá<sup>n</sup>-dé núu cātùu tée-á<sup>n</sup>, te ní quide tátna-dé nchaa núu nĩ nícuèhé xii tée-á<sup>n</sup> nĩ chihi-dé yúcu, te ní dácútú-dě. Te dàtnùní ní dácáá ñaha-dé sátá quiti-dé, te ndèca ñaha-dé cuáhá<sup>n</sup> ì<sup>n</sup> vehe núu sácõo cue ñáyi-u sàcúhu<sup>n</sup> ichi, te yàcá<sup>n</sup> ní xito ñaha-dě. <sup>35</sup>Te ingá nduu òré ní nucúhu<sup>n</sup> tée Samaritànú-á<sup>n</sup> ichi, te ní tava-dé úu díhú<sup>n</sup> denàriú, te ní sáha-dé tée cùu xítóhó vehe-á<sup>n</sup>, te ní xáha<sup>n</sup>-dě: “Coto saú-n tẽ-a, te núu ñá ní tnàhá díhú<sup>n</sup> sã nĩ taxi-í, te cuẽi na dândoñuhu-gá-n díhú<sup>n</sup>-n

cuèndá-dé, te òré ná quixi tucu-í te nacháhu-í”, duha ní xáha<sup>n</sup> tẽe Samaritànú-á<sup>n</sup> xii tée dii vèhe xía<sup>n</sup>.

<sup>36</sup>Te vitna cáhá<sup>n</sup>, te núu ndèdacaà cue tée úní-á<sup>n</sup> cúu-güedě tée váha cùu iní-güedé tnàha ñáyi-u-güedé —càchí-gă xáha<sup>n</sup>-gă xii tée dàcuaha ñaha xii-í ñáyi-u-á<sup>n</sup> nchaa tnũhu ní chídó tnùní ndíi Moisés.

<sup>37</sup>Te tée-á<sup>n</sup> nĩ xáha<sup>n</sup>-dě xii-gă:

—Tée ní cundàhú iní ñáhá xii tée ní dánicuèhé ñáhá cue ñadúhú-ă<sup>n</sup>, tée-á<sup>n</sup> cúu-dě tée cùu iní tnàha ñáyi-u-xi —càchí-dé xăha<sup>n</sup>-dě xii-gă.

Te Jèsús ní xáha<sup>n</sup>-gă:

—Cuáhá<sup>n</sup> te ñu-ni duca<sup>n</sup> càda-n tnàhá-n —càchí-gă xáha<sup>n</sup>-gă xii-dé.

### Jèsús ndécú-gă vehe tá

#### Mărta ndìhi tá Măriá

<sup>38</sup>Te Jèsús ñũhú-ni-gă ichi cuáhá<sup>n</sup>-gă ndìhi cue tée xica cuu ndìhi-gă, te ní sáa-gă ì<sup>n</sup> ñuú líhli, te xía<sup>n</sup> nĩ quee ì<sup>n</sup> xíchí nání Mărta ní cáhá<sup>n</sup> ñáhá-xí xii-gă vehe-xi. <sup>39</sup>Te tá Mărta ndècu ì<sup>n</sup> cùhú-xi nàni-xi Mariá, te xíchí-ă<sup>n</sup> nĩ ngõo-xi núu Jèsús ndèdóho-xi nchaa tnũhu càhá<sup>n</sup>-gă. <sup>40</sup>Te tá Mărta-á<sup>n</sup> ndìhi vîhi-ni iní-xi quide-xi chi-u-xi, te ní sáhá<sup>n</sup>-xi núu Jèsús, te ní xáha<sup>n</sup>-xi: —Mèstrú, ònáa ñá túu tnàhí sàni iní-n sã nĩ dándõo ndaha ñaha cùhú-í nchaa chi-u-á<sup>n</sup>? Cúñaha sàù ná quixi-xi chindee ñaha-xi —cachí-xi xăha<sup>n</sup>-xi xii-gă.

<sup>41</sup>Dico Jèsús ní xáha<sup>n</sup>-gă:

—Yòhó Mărta, ñũhu tneñu vihi-n, te ndìhú iní-n sã ò vài chi-u-n ñũhu, <sup>42</sup>dico xini ñũhu vihi-gă-xi cundèdóho-n tnũhu càhá<sup>n</sup>-í, chi tá Măriá-a sa ndèdóho-xi tnũhu-í, te vá yõo ì<sup>n</sup> ndacu xocàni tnũhu-í sã

nĩ ngúndecu ndihi-xi —càchí-gá xáha<sup>n</sup>-gã xii-xi.

Jèsús dánèhé-gá cue téé xica cuu ndihi-gá nàcuáa cáhá<sup>n</sup> ndihi-güedé

Yă Ndiöxí

(Mt. 6:9-15, 7:7-11)

**11** Te ìi<sup>n</sup> nduu càhá<sup>n</sup> ndihi Jèsús Yă Ndiöxí ìi<sup>n</sup> xichi, te sátá nĩ yáha ní cáhá<sup>n</sup> ndihi-gá Yă Ndiöxí, te ní xáha<sup>n</sup> ìi<sup>n</sup> téé xica cuu ndihi-gá xii-gá:

—Mèstrú, danèhé ñáhá xii-ndí nása cáhá<sup>n</sup> ndihi-ndí Yă Ndiöxí dàtná ní quide ndíi Juáá ní dánèhé ndíi cue téé ní xica cuu ndihi ndíi —càchí-dé xáha<sup>n</sup>-dè xii-gá.

<sup>2</sup>Te Jèsús ní xáha<sup>n</sup>-gã:

—Òrè cáhá<sup>n</sup> ndihi-ndo Yă Ndiöxí, te cachí-ndó:

Yòhó tătá-ndí Dútú Ndiöxí Yaá ndécú àndiu,

nchaa ñáyiu na càhá<sup>n</sup>-yu sá cúú-n Yàá ío yìñùhu.

Te xicá<sup>n</sup> táhú-ndí núú-n sã ná sàá nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiu.

<sup>3</sup>Te xicá<sup>n</sup> táhú-ndí núú-n sã táxí-n sã cándèca iní-ndí ìi<sup>n</sup> nduu ìi<sup>n</sup> nduu.

<sup>4</sup>Te cada càhnu iní-n nchàa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñaha tnaha ñáyiu-ndí.

Te vá dáñá-n dàcahá<sup>n</sup> ñáhá yùcu ñávàha xii-ndí cada-ndí sá ñà túú vǎha, chi coto ñaha-n xii-ndí cuèndá sá vǎ dúcá<sup>n</sup> càda ñaha-xi,

duha cáhá<sup>n</sup>-ndó

—càchí-gá xáha<sup>n</sup>-gã xii-güedé.

<sup>5</sup>Te Jèsús ní xáha<sup>n</sup> tùcu-gá:

—Te núu ndèdacàa nchohó ndécú ìi<sup>n</sup> téé tnàha tnúhu ndihi-ndo, te dava niú cuáhá<sup>n</sup>-ndó vehe-dé, te òrè ní quexio-ndo, te xáha<sup>n</sup>-ndo xii-dé: “Véxi-í nũu vá cùndèe iní-n tàxi nuu-n úní tnàhá pàá, <sup>6</sup>chi ìi<sup>n</sup> téé xìní tnàhá ndihi-í ñùhú-dè ichi ní quexio-dé vehe-í, te ñá túú tnàhí ná cuñaha-í caxi-dé”, quesaha-ndo cũñaha-ndo. <sup>7</sup>Te téé-á<sup>n</sup> cáhá<sup>n</sup>-dé ndéé xití vehe-dé, te cũñaha-dé xii-ndo: “Vá dásátú nihá-n chi ndèdí yuyèhe-í, te càa-í ndihi cue landú-í, te vá cúú ndàcòo-í taxi-í sá cuiní-n”, quesaha-dé cũñaha-dé xii-ndo. <sup>8</sup>Te na càchí tnúhu-í xii-ndo sã cuèi cùu-dé téé tnàha tnúhu ndihi-ndo, dico duca<sup>n</sup> cũñaha-dé xii-ndo, dico dacuití sã ndàcòo-dé taxi-dé sá cuiní-ndó cuèndá sá vǎ dásátú-gá-ndó ìní-dé. <sup>9</sup>Te yúhú càchí-í xii-ndo sã cǎcá<sup>n</sup>-ndó nũu ná cuiní-ndó nũu Yă Ndiöxí te taxi-gá. Te vá dáñá ndèè-ndó cǎcá<sup>n</sup>-ndó nũú-gã nũu ná cuiní-ndó, te duca<sup>n</sup> te níhí-ndó. Te cada iní-ndó sã nĩ quexio-ndo vehe ìi<sup>n</sup> tnaha ñáyiu-ndo te ní cáhá<sup>n</sup>-ndó, te ñáyiu-á<sup>n</sup> nĩ tedóho ñàhá-yu xii-ndo te ní nacaá<sup>n</sup>-yu yuyèhe. Te duca<sup>n</sup> càda iní-ndó chi Yă Ndiöxí tedóho ñaha-gã xii-ndo, te taxi-gá sá ná cǎcá<sup>n</sup>-ndó nũú-gã. <sup>10</sup>Chi nchaa ñáyiu duca<sup>n</sup> xiquide te Yă Ndiöxí tedóho ñaha-gã xii-yu nihí-yu sá cuiní-yu. Te ñà túú dàña ndeé xicá<sup>n</sup> núú Yă Ndiöxí sá cuiní-yu, chi nihí-yu. <sup>11</sup>Te nchòhó cue téé cùu tátá ñà túú cùndee iní-ndó cuàha-ndo

cuè déhe-ndo ì<sup>n</sup> yúu caxi-güexi òré xicá<sup>n</sup>-güexi ì<sup>n</sup> pàá núú-ndó càxi-güexi, te ni ñà túú cùndee iní-ndó cuãñaha-ndo ì<sup>n</sup> cóó caxi-güexi òré xicá<sup>n</sup>-güexi ì<sup>n</sup> chácá nũú-ndó càxi-güexi. <sup>12</sup>Te ni ñà túú cùndee iní-ndó cuãñaha-ndo ì<sup>n</sup> nchacua caxi-güexi òré xicá<sup>n</sup>-güexi ì<sup>n</sup> ndíú nũú-ndó càxi-güexi. <sup>13</sup>Te nchòhó cuèi ndèé dau sàá iní-ndó, dico sãha-ndo cuè déhe-ndo sã vãha xèxi-güexi òré xicá<sup>n</sup>-güexi núú-ndó. Te núu nchòhó duca<sup>n</sup> quide-ndo, ite uu<sup>n</sup>-gá duca<sup>n</sup> quide Tátá-ndó Dütú Ndiöxí Yáá ndécú àndiu, chi taxi-gá Espíritú-gá cundecu ndihi-ndo te núu na càcá<sup>n</sup>-ndó nũú-gã! — cãchí-gá xáha<sup>n</sup>-gã xii-güedé.

**Cãchí-güedé sá ndécú ndihi Jesús yucu ñávãha**

(Mt. 12:22-30; Mr. 3:20-27)

<sup>14</sup>Te Jèsús ndèñuhu-gá espíritú cùndìhi yucu ñávãha yìhi ñaha xii ì<sup>n</sup> téé ní quide ñìhí-xi, te òré ní ndee ñaha espíritú-á<sup>n</sup> xii téé-á<sup>n</sup>, te ní nacáhá<sup>n</sup>-dé. Te ío ní cuñuhu ñáyiu sá dúcá<sup>n</sup> ñí quide-gá. <sup>15</sup>Te davá-yu ní xitnàhá-yu:

—Tée-a ndèñuhu-dé nchaa espíritú cùndìhi sácúíhná yíhí ñaha xii ñáyiu, chi ñiu-ni sácúíhná-ã<sup>n</sup> chíndèè ñaha-xi xii-dé, te ñiu-ni-xi tàxi tnuní-xi nchaa espíritú-á<sup>n</sup> — cãchí-yu xitnàhá-yu.

<sup>16</sup>Te davá-yu xito ndeé ñãhã-yu xii-gá, te xãhã<sup>n</sup>-yu sá ná cádá-gã ì<sup>n</sup> sá vã yõ tnàhí ndàcu cada ñuyúú-a cundehé-yu nàcuáa cutnùní iní-yu núu ndáá sá Yã Ndiöxí ní tendaha ñaha-gá xii-gá véxi-gá ñuyúú-a. <sup>17</sup>Dico mee-gã sa ní cutnùní iní-gá nchaa nàcuáa sàni iní-yu, núu ní xáha<sup>n</sup>-gã xii-yu:

—Te nchòhó xìní-ndó sã nũu ì<sup>n</sup> téé yìndaha ì<sup>n</sup> nació<sup>n</sup> vá cúú ì<sup>n</sup> nuu-dé ndihí cue téé cùndìhi-dé, te vá cúdíi-dé cunu-dé. Te ñiu-ni duca<sup>n</sup> sãtnahá tucu-xi cùu cue ñáyiu xíndecu ì<sup>n</sup>-ni vehe, chi núu vá cúú ì<sup>n</sup> nuú-yu cundecú-yu, te vá cúdíi-yu cundecu càhnú-yu. <sup>18</sup>Te duca<sup>n</sup> sãtnahá-xi cùu sácúíhná, chi núu vá cúú ì<sup>n</sup> nuu-xi ndihí nchaa espíritú cùndìhi-xi te vá cúdíi-xi cundecu-xi taxi tnuní-xi. Te duha càhá<sup>n</sup>-í chi nchòhó càchí-ndó sã sácúíhná chíndèè ñaha-xi xii-í quèñuhu-í nchaa espíritú cùndìhi-xi yìhi ñaha xii ñáyiu. <sup>19</sup>Te núu yúhú quidé cuendá-ndó sã sácúíhná chíndèè ñaha-xi xii-í, te xìni ñuhu-xi cada cuendá-ndó yòo chindee ñaha xii cue téé xica cuu ndihí-ndo queñuhu-güedé nchaa espíritú cùndìhi-xi yìhi ñaha xii ñáyiu. Te mee-güedé cãchí-güedé sá nchòhó ñà túú càhá<sup>n</sup> ndáá-ndó sã dúcá<sup>n</sup> càhá<sup>n</sup>-ndó. <sup>20</sup>Te ndáá sá Yã Ndiöxí chíndèè ñaha-gá xii-í quèñuhu-í nchaa espíritú cùndìhi sácúíhná yíhí ñaha xii ñáyiu, te xíã<sup>n</sup> cutnùní iní-ndó sã sà ní sáa nduu ndíhu ndaha ñaha Yá Ndiöxí xii-ndo.

<sup>21</sup>Te núu ì<sup>n</sup> téé ío ndee, te súuní ñìí cáá-dé, te ndèé-dé vehe-dé cuendá sá vã cuíta, te ní quide túha-dé titní sá dèé<sup>n</sup>, te ío váha nèhe váha-dé nchaa ndachüu<sup>n</sup>-dé. <sup>22</sup>Dico núu quexìo ingá téé ío-gá ñìí cáá te ndee-gã-dé, te ngúíta-dé nàá-dé ndihí téé ndèé vehe-xi-á<sup>n</sup>, te cada cànarí ñáhá tée-á<sup>n</sup> xii téé ndèé vehe-xi-á<sup>n</sup>, te quendéé-dé nchaa sá dèé<sup>n</sup> cùndèè iní-dé, te taxi tnuní-na-dé nchaa xíã<sup>n</sup>, ndihí nchaa

sá ndécú ndìhi-dé, te dácáhñu-dé nchaa cue téé cùndìhi-dé nchaa sá ná nìhí-dé.

<sup>23</sup>Te nchaa ñáyiú ñá túú cùndìhi ñaha xii-í, te cùu úhú iní ñáhă-yu, te nchaa ñáyiú ñá túú chindee ñaha xii-í, te dàquee tíhŭ-yu chiù<sup>n</sup> quide-í.

**Espiritú cùndìhi yucu ñávăha sá nanchòcáva xito cùu úú**

(Mt. 12:43-45)

<sup>24</sup>Te òré ná quèe ñaha ì<sup>n</sup> espíritú cùndìhi yucu ñávăha xii ì<sup>n</sup> ñáyiú, te cuáhá<sup>n</sup>-xi ndùcu-xi ì<sup>n</sup> xichi núú cùndècu-xi te ñá nìhí-xi, te ní sani iní-xi: “Văha-gá núhú tucu-í núú nŭ xindecu-í”, duha ní sani iní-xi. <sup>25</sup>Te cuánuhú-xi, te òré ní nasáá-xi, te ní xiní-xi sá cáá iní ñáyiú-á<sup>n</sup> dàtná cáá-nă ì<sup>n</sup> vehe ní natíhú, chi ní nduu vii-ná, vá yŏ-gá ndécú. <sup>26</sup>Te sátá dúcá<sup>n</sup> te ní xica-xi cuáhá<sup>n</sup>-xi cuándúcú-xí ũsá tnàhá espíritú cùndìhi-xi sá nèhè víhí-gă xŭquide, te òré ní nìhí-xi cue espíritú-á<sup>n</sup> te ndèca ñaha-xi cuáhá<sup>n</sup> cuendá ngúndecu ndìhi-xi ñáyiú-á<sup>n</sup>, te ñáyiú-á<sup>n</sup> uu<sup>n</sup>-gá nándi yăha-yu dácúúxí ndèe díhna —càchí-gă xăha<sup>n</sup>-gă xií-yu.

**Cuendá ñáyiú cùu văha ndisa iní-xi**

<sup>27</sup>Te nini càhá<sup>n</sup> Jèsús tnúhu-á<sup>n</sup> nŭú ñáyiú ní càhá<sup>n</sup> níhi ì<sup>n</sup> ñadìhí tnúu-yu, te xăha<sup>n</sup>-a<sup>n</sup> xii Jèsús: —iSá văha táhú ñadìhí ní dácácú ñaha xii-n, te ní dácuéhnú ñaha-a<sup>n</sup>! —cachí-a<sup>n</sup> xăha<sup>n</sup>-a<sup>n</sup> xii-gă.

<sup>28</sup>Te Jèsús ní xăha<sup>n</sup>-gă:

—iVăha-gă táhú nchàa ñáyiú sàcúndedóho nchaa tnúhu càhá<sup>n</sup> Yă Ndiŏxí te sàndáá iní-yu! —càchí-gă xăha<sup>n</sup>-gă xii-a<sup>n</sup>.

**Ñáyiú ñá túú sàndáá iní ñáhá xii Jèsús cuiní-yu cada-gá ì<sup>n</sup> sá vă yŏ tnàhí ndàcu cada**

(Mt. 12:38-42; Mr. 8:12)

<sup>29</sup>Te ta tàcá vâi ñáyiú te dâdehnde tnaha-ná-yu, te ní ngúfta Jèsús xăha<sup>n</sup>-gă xií-yu:

—Nchòhó ñáyiú ndècu ñuyúú vitna, chi ío sâá iní-ndó, te cuiní-ndó càda-í ì<sup>n</sup> sá vă yŏ tnàhí ndàcu cada cuendá cuiní-ndó cùtnuní iní-ndó nŭu ndisa sá Yă Ndiŏxí ní tendaha ñaha-gă xii-í véxi-í. Dico ñá túú năgá cada-í quini-ndó, chi sa nìhí-ndó tnŭhu nàcuáa ní yăha ndíi Jònás téé ní xóo càhá<sup>n</sup> tnúhu Yă Ndiŏxí ndéé sanaha, te diu-ni duca<sup>n</sup> yăha yúhú tucu. <sup>30</sup>Chi nchaa ñáyiú ñuú Nínivé ní cutnùní iní-yu sá Yă Ndiŏxí ní tendaha ñaha-gă xii ndíi Jònás ní sáhá<sup>n</sup> ndíi ñuú-yu. Te duca<sup>n</sup> sàtnahá-xi cùu yúhú Tée cùu ñaní tnáhá-ndó nchàa-ndo, chi sáá nduu te cutnùní iní-ndó să Yă Ndiŏxí ní tendaha ñaha-gă xii-í véxi-í ñuyúú-a. <sup>31</sup>Te na sâá nduu càda ndáá Yă Ndiŏxí cuéchi nchaa nchòhó ñáyiú ndècu ñuyúú-a, te dává-á<sup>n</sup> quini-ndó ì<sup>n</sup> ñadìhí ñaha ní xíndaha ì<sup>n</sup> nació<sup>n</sup> cáá ndàa xio cuha núú quéné nchĭcanchii. Te ñaha-á<sup>n</sup> ío xica nŭ xindecu-a<sup>n</sup>, te ní sáhá<sup>n</sup>-a<sup>n</sup> ní xíndedóho-a<sup>n</sup> nchaa tnúhu ní càhá<sup>n</sup> ndíi Salòmón, chi ndíi-á<sup>n</sup> ío ní sáá sá xiní tnùní ndíi. Te ñaha-á<sup>n</sup> căhá<sup>n</sup>-a<sup>n</sup> dává-á<sup>n</sup> să nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndìhi ñaha-ndo xii yúhú, te diu-í ío-gă cúnùu-í dácúúxí ndíi Salòmón. <sup>32</sup>Te diu-ni nduu càda ndáá Yă Ndiŏxí cuéchi nchaa

nchòhò ñáyiú ndècu ñuyíú-a vitna, dâvâ-á<sup>n</sup> tnàhá cue ñáyiú ní xíndecu ñúú Nñivé cundecú-yu núú Yá Ndiòxí, te tnàhá-yu cachí-yu sá ñà túú ní quide ndáá-ndó. Chi ñáyiú ñúú Nñivé-á<sup>n</sup> nǐ ndixi túu iní-yu sá ñà túú quide váha-yu ndècú-yu te ní natuhá-yu ichi Yá Ndiòxí cútnàhá ní cáhá<sup>n</sup> ndihí ñaha ndí Jónás tnúhu-gá xií-yu. Dico vitna iha ndècu ndihí ñaha-ndo xii yúhú téé càhá<sup>n</sup> tucu tnúhu Yá Ndiòxí, te diu-í ío-gá cúnùu-í dàcúúxí ndí Jónás.

**Núú-ó cùu-xi datná ì<sup>n</sup> ñuhú**

(Mt. 5:15; 6:22-23)

<sup>33</sup>Te ñà túú nǐ ì<sup>n</sup> ñáyiú tènùhú ì<sup>n</sup> lintérná, te taxi ndecú-yu ì<sup>n</sup> núú yídǎhu, àdi chiváha-yu xití ì<sup>n</sup> tídihi, chi tàxi ndecú-yu ì<sup>n</sup> núú nǐnu cuendá nchaa ñáyiú quíhu vehe cutnùnǐ núú-yu. <sup>34</sup>Te núú-ndó cùu-xi datná ì<sup>n</sup> ñuhú, chi ì<sup>n</sup> sá ná quíní-ndó te ndixi túu iní-ndó nǎ cúú xǎ<sup>n</sup>, te núu cáváha núú-ndó, te duca<sup>n</sup> cùtnuní iní-ndó nǎ cúú sǎ ndécú núú-ndó, á<sup>n</sup> te núu cùhú, te vǎ cútnùnǐ iní-ndó nǎ cúú sǎ ndécú núú-ndó. Te sá dúcá<sup>n</sup> cùhú núú-ndó te cada iní-ndó sǎ ndécú-ndó dàtná ì<sup>n</sup> núú néé. <sup>35</sup>Te ío cada cuendá-ndó vǎ cání cuèhé iní-ndó cuendá tnúhu Yá Ndiòxí cuendá cutnùnǐ iní-ndó nàcuáa cundecu-ndo, chi núu na càni cuèhé iní-ndó cuendá tnúhu-gá, te cùu-ndo datná ì<sup>n</sup> ñáyiú ñà túú cùtnuní núú-xí. <sup>36</sup>Te núu càndoo canine iní-ndó, te mee-ni sǎ vǎha ñùhu iní-ndó, te cùtnuní váha iní-ndó tnúhu ndáá dàtná cútnùnǐ váha núú-ndó òré càyú ñuhú, duca<sup>n</sup>

cùtnuní iní-ndó —càchí-gá xáha<sup>n</sup>-gǎ xií-yu.

**Jèsús càhá<sup>n</sup>-gá cuendá cue téé cùu fariséú ndihí cue téé dàcuaha ñaha xii-í ñáyiú**

(Mt. 23:1-36; Mr. 12:38-40; Lc. 20:45-47)

<sup>37</sup>Te òré ní ndihí tnúhu ní cáhá<sup>n</sup> Jèsús, te ì<sup>n</sup> téé cùu fariséú ní cáhá<sup>n</sup> ñàhá-dě xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. <sup>38</sup>Te téé cùu fariséú-á<sup>n</sup> ío ní cuñuhu-dé, chi Jèsús ñà túú ní ndàha-gá nàcuáa sàni iní-güedé nduu vétú iní Yá Ndiòxí òré ní ngóo-gá caxi-gá dàtná quidé mèe-güedé. <sup>39</sup>Te Jèsús ní xáha<sup>n</sup>-gǎ xii-dé:

—Nchòhó cue téé cùu fariséú xìní-ndó sǎ ío ñáyiú nàquete sátá-ni tàsá<sup>n</sup> ndihí sátá-ni còhó, te xití-xi càndehe caduha-ni. Te duca<sup>n</sup> sǎtnahá-xi cùu nchohó, chi ndaha-ni-ndo nàquete-ndo, te iní-ndó ñà túú ndùu ndoo, te nándí dándahú-ndó tnàha ñáyiú-ndo, te quèhe<sup>n</sup>-ndo sá ndécú ndìhí-yu, te nándí-gá nchaa sá cuèhé sá dúhá ñùhu iní-ndó quide-ndo. <sup>40</sup>Te nchòhó cúú-ndó cuè téé ío ñí iní-xi! ¿Te náa ñà túú cùtnuní iní-ndó sǎ Yá Ndiòxí Yaa ní cadúha yiquí cùñú-ó diu-ni-gá ní chihí-gá iní-ó-á<sup>n</sup>? <sup>41</sup>Te nchaa sá vǎha ndècu ndihí-ndo cuáha-ndo nchaa ñáyiú xìní ñuhu na cundecu ndìhí-yu, te núu duca<sup>n</sup> na càda-ndo, te cuu-ndo ñáyiú sa ní nduu ndoo ní nduu nine iní-xi.

<sup>42</sup>Te ndàhú ní cuu nchaa nchòhó cue téé cùu fariséú! Chi sǎha-ndo Yá Ndiòxí núú ùxí xichi yúcu nání mèntá, ndihí yúcu rùdá, ndihí



nchaa dava-gá núú yǔcú quèe comidá, dico ñá túú quide ndáá-ndó, te ni ñá túú ñùhu iní-ndó Yá Ndiöxí. Dico tnúhu cáhá<sup>n</sup>-í-a tàú-ndó càda-ndo, te ni vǎ dáñá ndéé-ndó càda-ndo nchaa dava-gá sá vǎha.

<sup>43</sup>'iTe ndàhú ní cuu nchòhó cue tée cùu fariséú! Chi cuíní-ndó cùnucóo-ndo núú sácóo cue tée ío cùnuu xití veñúhu, te cuíní-ndó mèe-ni ndìhi tnúhu yìñùhu cáhá<sup>n</sup> ndìhi ñaha ñáyiú xii-ndo nchàa núú xicá cùu-ndo.

<sup>44</sup>'iTe ndàhú ní cuu nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndìhi nchòhó cue tée cùu fariséú chi ío dándahú-ndó mèe-ndo sá quidé ndáá-ndó te ñá ndàá sá quidé ndáá-ndó! Chi cùu-ndo datná ì<sup>n</sup> ñáyiú ní xíhi te ní nguíndǔxi, te ñá túú cùtnuní-gá ndéé yíndǔxi-yu, te cuèi nà yáha ñáyiú dico ñá túú cùtnuní sá yíndǔxi ndǔyi. Te duca<sup>n</sup> sǎtnahá-xi cùu nchohó, chi nchaa ñáyiú ndèhe ñaha xii-ndo ñá túú cùtnuní iní-yu nchaa sá cuèhé sá dúhá sàni iní-ndó —càchí-gá xáha<sup>n</sup>-gǎ xii-güedé.

<sup>45</sup>Te ní xáha<sup>n</sup> ì<sup>n</sup> tée dàcuaha ñaha xii-yu nchaa tnúhu ní chídó tnùní ndíi Moisés xii-gá:

—Mèstrú, te sá dúcá<sup>n</sup> cáhá<sup>n</sup>-n te tnàhá nchúhú xícuehè-n ǎ<sup>n</sup> —càchí-dé xǎha<sup>n</sup>-dè xii-gá.

<sup>46</sup>Te Jèsús ní xáha<sup>n</sup>-gǎ:

—iNdàhú ní cuu tnàhá nchaa nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés! Chi quide-ndo datná quidé ñáyiú dàcuído ì<sup>n</sup> naha ñáyiú-xi ì<sup>n</sup> sá ïo vée, te mèe-yu ni lùha ñá túú cuíní-yu cuidó-yu.

Te duca<sup>n</sup> sǎtnahá-xi quide nchohó chi dānehé-ndó ñáyiú nācuāa cadá-yu, dico mee-ndo chi ni lùha ñá túú cuíní-ndó càda-ndo nacuāa dānehé-ndó-yu.

<sup>47</sup>'iTe ndàhú ní cuu tucu-ndo! Chi càdúha-ndo núú nǐ nguíndǔxi cue tée ní xóo cáhá<sup>n</sup> tnúhu Yá Ndiöxí ndéé sanaha cuendá sá cùnàha-ndo núú yíndǔxi cue ndíi, te ñiu-ni cue ñani tnàhá-ndó nǐ sahni-güedé cue ndíi. <sup>48</sup>Te nchòhó sa naha-ndo nacuāa ní quide cue ñani tnàhá-ndó, te càchí-ndó sǎ nǐ quide váha-güedé sá dúcá<sup>n</sup> nǐ sahni-güedé cue ndíi-á<sup>n</sup>, te vitna càdúha-ndo núú nǐ nguíndǔxi cue ndíi.

<sup>49</sup>'Te Yá Ndiöxí ío sàà nchaa sá xini tnùní-gá, te ní cachí-gá sá dácáhá<sup>n</sup>-gá iní cue tée cuendá cáhá<sup>n</sup>-güedé tnúhu-gá núú ñáyiú, te cada-güedé nchaa nācuāa cuíní-gá, te dava-güedé cahni ñàhá-yu xii-güedé, te dava-güedé ío dandòho ñahá-yu xii-güedé duha ní cachí-gá. <sup>50</sup>Te nchaa ñáyiú ñuyíú vitna tnàhá-yu nacháhu-yu núú Yá Ndiöxí cuendá sá nǐ sahni-güedé cue tée ní cáhá<sup>n</sup> tnúhu-gá ndéé cùtnàhá ní ngáva ñuyíú. <sup>51</sup>Te ndéé ndíi Àbél tée ní sahni-güedé ndéé díhna nuu, ndìhi ndéé ndíi Zacàriá tée ní sahni-güedé ndéé núú nǐ ndìhi-ná ndácá<sup>n</sup> cuendá ñàhá Yá Ndiöxí núú ñáyiú ndècu ñuyíú vitna, te ñiu ndíi-á<sup>n</sup> nǐ sahni-güedé mei tnùú veñúhu càhnu sá ío cùnuu, ndìhi xito núú sácódo sǎ ndúú tǎhú Yá Ndiöxí.

<sup>52</sup>'iTe ndàhú ní cuu tucu nchaa nchòhó cue tée dàcuaha ñaha xii ñáyiú nchaa tnúhu ní chídó tnùní ndíi Moisés! Chi quide-ndo datná

quidé ì<sup>n</sup> téé tàxi tñuní ì<sup>n</sup> vehe, chi nacadí-dé te ñá dáñá-dě quíhu ñáyiú te ni mée-dé ñá túú quíhu-dé. Te duca<sup>n</sup> sátnahá-xi quíde-ndo, chi dàcuaha-ndo tñúhu Yá Ndiöxí te ñá túú cuíní-ndó quèndáá iní-ndó te ni ñá túú dànehé-ndó ñáyiú cuíní tñi tñúhu-gá nàcuáa tàú-xi cunduu cuèndá naníhí tàhú-yu —càchí-gá xáha<sup>n</sup>-gá xii-dé.

<sup>53</sup>Te òré ní ndee Jèsús vehe téé cùu fariséú-á<sup>n</sup>, te cue téé dàcuaha ñaha xii ñáyiú nchaá tñúhu ní chídó tñuní ndíi Moisés, ndíhi cue téé cùu fariséú ní cudéé<sup>n</sup>-güedě núú-gá, te ní nguíta-güedě nándí sá xicá<sup>n</sup> tñuhú-güedě núú-gá cuèndá cuíní-güedé nñu vá cuíta-gá ì<sup>n</sup> tñúhu càhá<sup>n</sup>-gá <sup>54</sup>cuèndá duca<sup>n</sup> ñíhí-güedě nàcuáa cada-güedé cacá<sup>n</sup> cuéchi-güedé cuèndá-gá.

**Jèsús càhá<sup>n</sup>-gá cuèndá cue  
téé dàndahú méé-xí**

**12** Te òré-á<sup>n</sup> ñí tacá titní míl ñáyiú núú ndécú Jèsús, te súúní dícó ngõnchihi tñaha-ná-yu. Te ndèdóho-yu ní xáha<sup>n</sup> Jèsús xii cue téé xica cuu ndíhi-gá:

—Cada cuèndá-ndó vǎ cǎnchícú<sup>n</sup> nihnu-ndo nàcuáa quíde cue téé cùu fariséú, chi cue téé-á<sup>n</sup> ò dàndahú-güedé méé-güedě sá quíde ndǎá-güedé dico ñá ndǎá sá quíde ndǎá-güedé. <sup>2</sup>Te nchaá tñúhu sá cúú yùhu ni cuu vá cúú yùhu-gá, chi nchaá dacuitíí sǎ quée túu-xi núú ñáyiú. <sup>3</sup>Chi nchaá tñúhu càhá<sup>n</sup> dayuhu-ndo quèe túu-xi núú chítú núú tàcá, te nchaá tñúhu càhá<sup>n</sup> méé-ndó vèhe-ndo dacuitíí sǎ ñíhí ñáyiú tñúhu.

**Yá Ndiöxí xíní ñùhu-xi yuhú-ó-gǎ**  
(Mt. 10:26-31)

<sup>4</sup>Te nchòhó cue téé ò váha tñahá tñúhu ndíhi-í ná cǎchí tñúhu-í xii-ndo sǎ vǎ yùhú-ndó cue ñáyiú cuéi na cǎhni ñahá-yu xii-ndo, chi diu-ni yiqui cùñú-ndó ndacú-yu cǎhni-yu, te ñá túú nǎgá ndacú-yu cada ñahá-yu xii-ndo. <sup>5</sup>Te na cǎchí tñúhu-í xii-ndo sǎ Yǎ Ndiöxí tàú-ndó yùhú-ndó-gǎ, chi mee-gǎ ò cùnuu-gá, te diu-gá quíde-gǎ sá vǎ cùndècu-gá ñáyiú ñuyúú, te daquíhí<sup>n</sup> ñahá-gǎ xií-yu núú ùhú núú ndàhú, núú xǎá<sup>n</sup> cǎchí tñúhu-í xii-ndo sǎ Yǎá-á<sup>n</sup> tàú-ndó yùhú-ndó-gǎ.

<sup>6</sup>Te nchòhó xíní-ndó sǎ ndèé úhú<sup>n</sup> tñahá tǎlaá cúyǎhu-di núú ùú díhú<sup>n</sup>, dico Yá Ndiöxí ñá túú cùnaa-gá ni ì<sup>n</sup>-güedi, chi nèhe cuèndá ñahá-gǎ xii-güedi. <sup>7</sup>Te nchòhó ndéé ì<sup>n</sup> ì<sup>n</sup> idi díquí-ndó yìndehu, núú xǎá<sup>n</sup> cǎchí-í sá vǎ yùhú-ndó, chi cùnuu-gá-ndó dàcúúxí tǎlaá cuéi vǎi vihi-güedi.

**Ñáyiú na dàtúu núú dàva-gá ñáyiú sǎ  
ndécú ndíhi-yu Xítóhó Jesucristú**  
(Mt. 10:32-33; 12:32; 10:19-20)

<sup>8</sup>Te na cǎchí tñúhu-í xii-ndo sǎ nñu na dàtúu-ndo nñu dàva-gá ñáyiú sǎ ndécú ndíhi ñaha-í xii-ndo. Te duca<sup>n</sup> te tñahá yúhú Téé cùu ñaní tñahá-ndó nchàa-ndo datúu-í núú nchàa cue espíritú xínú cuèchi núú Yǎ Ndiöxí sǎ nchòhó ndécú ndíhi ñaha-ndo xii-í. <sup>9</sup>Dico núú na cùñaha-ndo xii ñáyiú sǎ ñá túú ndècu ndíhi ñaha-ndo xii-í, te diu-ni duca<sup>n</sup> càda yúhú Téé cùu ñaní tñahá-ndó nchàa-ndo, chi cúñaha-í xii cue espíritú xínú

cuèchi núú Yă Ndiöxí sá ñà túú ndècu ndìhi ñaha-í xii-ndo.

<sup>10</sup>Te ndédani càa ñáyiú na càhá<sup>n</sup> cuèhé cuèndá yúhú Tée cùu ñaní tñáhá-ndó ncháa-ndo, te cada càhnu iní ñáhá Yă Ndiöxí xií-yu. Dico ñáyiú na càhá<sup>n</sup> cuèhé cuèndá Espíritú Yă Ndiöxí, te ñáyiú-á<sup>n</sup> vă cádá càhnu iní ñáhá-gă xií-yu.

<sup>11</sup>Te òré ná càndeca ñaha-güedé xii-ndo quíhí<sup>n</sup> veñúhu, àdi núú cuè tée cùchiu<sup>n</sup>, te ni vă cání iní-ndó nñu nása cunduu tñúhu cùñaha-ndo xii-güedé, te ni vă cání iní-ndó nñu ná tñúhu nadànchocáva-ndo nñu ná tñúhu na cùñaha-güedé xii-ndo, <sup>12</sup>chi òré-nă te mee Espíritú Yă Ndiöxí dacàhu iní ñáhá-xí xii-ndo tñúhu cùñaha-ndo xii-güedé — càchí-gă xáha<sup>n</sup>-gă xii-güedé.

#### Cuèndá ìi<sup>n</sup> tée cuica

<sup>13</sup>Te ìi<sup>n</sup> tée ñùhu tnahá tnuú ñáyiú-á<sup>n</sup> nǐ xáha<sup>n</sup>-dě xii Jèsús: —Mèstrú, cùñaha xii ñaní-í sá ná chídava-dé sá nǐ dándó tátá-ndǐ cuu cuèndá-ndǐ —càchí-dé xáha<sup>n</sup>-dě xii-gă.

<sup>14</sup>Te Jèsús ní xáha<sup>n</sup>-gă xii-dé: —¿Te ná cuèndá duca<sup>n</sup> càhá<sup>n</sup>-n? Te ñá díú chiu<sup>n</sup>-á<sup>n</sup> vèxi-í cada-í, chi ñá díú tée cùchiu<sup>n</sup> cuu-í —càchí-gă xáha<sup>n</sup>-gă xii-dé.

<sup>15</sup>Te xáha<sup>n</sup>-gă xii ncháa ñáyiú xǐndecu-á<sup>n</sup>: —Ncháa nchòhó ñáyiú ndèdóhó ncháa tñúhu càhá<sup>n</sup>-í ío váha cada cuèndá-ndó, te vá cání iní-ndó nándi nducu-ndo cùndecu ndìhi-ndo, chi cuèi vâi vihi na nihí-ndó cùndecu ndìhi-ndo, dico vá chindèe ñaha-xi cudíi-ndo cùndecu-ndo ñuyúú-a — càchí-gă xáha<sup>n</sup>-gă xií-yu.

<sup>16</sup>Te dătnùní ní ngúíta-gă cání-gă ìi<sup>n</sup> cuèndú núú-yu cuèndá tecú tñùnì-yu tñúhu-gă, te xáha<sup>n</sup>-gă: —Ìi<sup>n</sup> tée cuica sùúní nǐ cuu ncháa tatá ní xitu-dé núú ñùhú-dě. <sup>17</sup>Te ní ngúíta-dé sání iní-dé: “¿Te nása cada-í? Te ñá túú ndèe nataxúha-í ncháa sá nǐ xitu-í”, duha ní sani iní-dé. <sup>18</sup>Te dătnùní ní sáha váha tucu-dé cuèndá nàcuáa cada-dé, te ní cachí-dé: “Duha na cunduu, dangòyo-í yacá-í, te ndada càhnu-gă-í, te xití-xi nataxúha-í nchaandi túhú sá nǐ xitu-í, ndìhi ncháa dava-gă sá ndécú ndìhi-í. <sup>19</sup>Te sátá dúcá<sup>n</sup>, te cachí-í: Ío vâi sá ndécú ndìhi-í, te cudíi-xi cuéhé cuíá, te vitna ndetatú-í, te coho-í te caxi-í cada-í, te nándi-gă cada-í cuèndá cudíi iní-í cundecu-í, duha quesaha-í”, càchí-dé. <sup>20</sup>Dico Yă Ndiöxí ní xáha<sup>n</sup>-gă xii-dé: “Yòhó, ñá túú nândíhi sá sání iní-n, chi yúhú càchí-í sá nùú vitna cuú-n, te ncháa sá ndécú ndìhi-n ÷yoo cuu sá vâha xii-a<sup>n</sup>-i?”, càchí-gă xáha<sup>n</sup>-gă xii-dé. <sup>21</sup>Duha yáha ncháa ñáyiú nándi sání iní-xi cundecu ndìhí-xi ñuyúú-a, dico ñáyiú-á<sup>n</sup> ío ndàhú-yu chi ñá túú nă nduu táhú-yu núú Yă Ndiöxí cundecu ndìhí-yu —càchí Jèsús xáha<sup>n</sup>-gă xií-yu.

#### Yă Ndiöxí xító-gă ncháa ñáyiú sàndáá iní ñáhá xii-gă

(Mt. 6:25-34)

<sup>22</sup>Te ní xáha<sup>n</sup> Jèsús xii cue tée xíca cuu ndìhi-gă:

—Te na càchí tñúhu-í xii-ndo sǎ vă ío caní iní-ndó nñu nása cundecu-ndo, àdi nása níhí-ndó sǎ caxí-ndó, àdi nása níhí-ndó dódó cuihnu-ndo. <sup>23</sup>Chi cùnuu-gă

mée-ndó dácúxí sǎ nchító-ndó, te duca<sup>n</sup> yìqui cuñú-ndó cùnuu-gá-xi dácúxí dǒó sácúihnu-ndo. <sup>24</sup>Te chí cuǎha cuendá nàcuáa quide cue tícacá, chi ni ñà túú chíhi-güedi tatá cuu itú natahu-güedi te ni ñà túú ndéè núnñi yacá-güedi, te nihí-güedi xèxi-güedi, chí Yá Ndiöxí xító ñaha-gá xii-güedi. iTe nchòhó cùnùu-gá-ndó dácúxí nchàa cue quiti ndava! <sup>25</sup>Te cuèi nándi sá sání vìhi iní-ndó ndècu-ndo, dico ñà ndácú-ndó càda-ndo nacuáa cuehnu-ndo cuèdicó ii<sup>n</sup> yiqui-gǎ. <sup>26</sup>Te núu ni sǎ lúhá xǎ<sup>n</sup> ñà ndácú-ndó càda-ndo, ìte ná cuendá ío sàni iní-ndó cuendá nchaa sá cuini-ndó ñihí-ndó cùndecu ndihi-ndo?

<sup>27</sup>Te chí cadá cuendá nàcuáa sàhnu ii<sup>n</sup> tnu itá, chí ni ñà túú quide chiu<sup>n</sup>-xi, te ni ñà túú quèhe<sup>n</sup>-xi idi. Te na càchí tnúhu-í xii-ndo sǎ ndíi Salòmón ío vii ní cáa nchaa sá ñi xíndecu ndihi ndíi, dico vií-gá tucu càa nchaa itá dácúxí nchàa sá ñi xíndecu ndihi ndíi. <sup>28</sup>Te cùhú sǎ ío vitna tnaa-ni cùdíi-xi te sàhmí-yu, te cuèi duca<sup>n</sup> dico ío vii càdúha Yá Ndiöxí nchaa cùhú-ǎ<sup>n</sup>. iTe nchòhó ío cùnuu-ndo dacúxí nchàa cùhú-ǎ<sup>n</sup>, núu xǎ<sup>n</sup> ío xito ñaha-gá xii-ndo, te dicó yica cùu iní-ndó sàndáá iní-ndó-gǎ! <sup>29</sup>Te vá ìo canchicú<sup>n</sup> nihnu-ndo sǎ cóhó sǎ cáxí-ndó, te ni vǎ dándíhú-ndó ìní-ndó núu nása cada-ndo ñihí-ndó. <sup>30</sup>Chi nchaa ñáyiú ñà túú sàndáá iní ñáhá xii Yá Ndiöxí duca<sup>n</sup> mée-ni sá cóhó sǎ cáxí-yu xica nchicú<sup>n</sup> nihnú-yu. Dico mee Tǎtá-ó Dütú Ndiöxí sa nàha-gá nándi cùu sá xíní ñuhu-ndo, te taxi-gá. <sup>31</sup>Te cada-ndo

nchàa nacuáa càhá<sup>n</sup> Yá Ndiöxí Yaá yíndàha ñaha xii-ndo, te duca<sup>n</sup> te taxi-gá nchaa sá xíní ñuhu-ndo.

### Cuendá sá vǎha nduu táhú-ó núu Yá Ndiöxí

(Mt. 6:19-21)

<sup>32</sup>Te vá yùhú nchòhó cue téé ndècu ndihi-í cuèi ío sacú-ndó, chí Tǎtá-ó Dütú Ndiöxí ní cachí-gá sá ndúú táhú-ndó cùndecu-ndo núu ndécú-gǎ taxi tnúní-ndó tnàhá-ndó. <sup>33</sup>Te chí dícó nchàa sá ndécú ndihi-ndo, te chí cuǎha nchaa ñáyiú ndàhú díhú<sup>n</sup>-ndó ñáyiú xini ñuhu, te cada váha-ndo cùndecu-ndo, te duca<sup>n</sup> te nduu táhú-ndó sǎ ìo-gá váha núu Yá Ndiöxí cùndecu ndihi-ndo, te xǎ<sup>n</sup> vá cúú tùhú tnàhí-gá-xi, te ni vǎ ndíhí ñihnu-gá-xi, te ni ñàdúhú vǎ ndácú-güedè duhu-güedè, te ni tǐquidi vá quée-dí. <sup>34</sup>Te núu xǎ<sup>n</sup> cúú cuendá-ndó ñà, te diu-ni xǎ<sup>n</sup> ñúhú ìní-ndó, á<sup>n</sup> te núu mee-ni sǎ ndécú ñúyíú-a ndècu ndihi-ndo, te diu-ni nchaa xǎ<sup>n</sup> ñúhú ìní-ndó.

### Xini ñuhu-xi quíhi iní-ó cùndecu-o

<sup>35-36</sup>Te ío quíhi iní-ndó cùndecu-ndo, te cada-ndo dàtná quidé dáva cue téé xínu cuechi sacúndecu túha-güedé cuèi nání òré-á<sup>n</sup> ndétú-güedè pàtróó<sup>n</sup>-güedè ná òré nasáá-dé sá cuahá<sup>n</sup>-dé vico tnàndaha. Te núu niú te sa cúu cáyú-ni ñuhú-güedé sá cùndètu ñaha-güedé, chí òré ná nàsáá-dé dacása<sup>n</sup>-dé yuyèhe, te ndíhi-ni nacaá<sup>n</sup>-güedé ndíhu-dé. <sup>37</sup>Te váha táhú nchaa cue téé xínu cuechi-á<sup>n</sup>, chí ndècu túha-ni-güedé ndétú-güedè ndéé

òré ní nasáá pàtróó<sup>n</sup>-güedě, te na cächí tnúhu ndáá-í xii-ndo sã òré ná nàsáá pàtróó<sup>n</sup>-güedě-á<sup>n</sup> te chihi ñaha-dě mèsá xii-güedé, te ndacá<sup>n</sup> ndee-dé dóó níhnú-dě nùú yíquí-dě, te ngúíta-dé cani-dé cóhó-güedě cuendá caxi-güedé. <sup>38</sup>Te ñi-<sup>n</sup>i duca<sup>n</sup> càda-dé cuèi dava niú, àdi tacuíhndá-gá, te nùú ñá túú xidí-güedé òré nasáá-dé, te cue tée xinu cuechi-á<sup>n</sup> ò váha tnahá-güedé. <sup>39</sup>Te nùú dícó ñ<sup>n</sup> tée cùu xítóhó ñ<sup>n</sup> vehe xìní-dé ná òré quíhu ñadúhú vehe-dé ñá, te quíhi iní-dé te vá cùdú-dé, te vá dáñá-dě nacaá<sup>n</sup>-güedé yuyèhe-dé quíhu-güedé duhu-güedě. <sup>40</sup>Te nchòhó tucu nchaa-ni nduu quíhi iní-ndó cùndecu túha-ndo, chi na cuáhá<sup>n</sup> nduu ñá túú yìhi iní-ndó, te quixi tucu yúhú Tée cùu ñani tñhá-ndó nchaa-ndo —cachí-gá xáha<sup>n</sup>-gã xii-güedé.

**Cue tée quide ndáá ndihi cue tée ñá túú quide ndáá**

(Mt. 24:45-51)

<sup>41</sup>Te té Pèlú ní xícá<sup>n</sup> tnúhú-dě nùú Jèsús, te xáha<sup>n</sup>-dě:

—Mèstrú, òte tnúhu ní cáhá<sup>n</sup>-n-á<sup>n</sup> cùu-xi mee-ni cuendá nchúhú á<sup>n</sup> cuendá nchaa ñáyiú? —cächí-dé xáha<sup>n</sup>-dě xii-gá.

<sup>42</sup>Te Jèsús ní xáha<sup>n</sup>-gã:

—Càhá<sup>n</sup>-í cuendá ñáyiú quide váha dàtná quidé ñ<sup>n</sup> tée tàxi tnuní ñáhá xii cue ñáyiú xinu cuechi ndecu vehe patróó<sup>n</sup>-xi, chi tée-á<sup>n</sup> ò váha tècú tnùní-dé, te quide-dé nchaa nàcuáa càhá<sup>n</sup> pàtróó<sup>n</sup>-dě, te dàcaxi-dé cue ñáyiú xinu cuechi oré tàú-xi caxí-yu. <sup>43</sup>Te nùú duca<sup>n</sup> quide váha tée tàxi tnuní ñáhá xii

cue ñáyiú xinu cuechi-á<sup>n</sup> ñá, te ò váha tnàhá-dé òré násáá pàtróó<sup>n</sup>-dě nùú ndèe cuáhá<sup>n</sup>-dé. <sup>44</sup>Te na cächí tnúhu ndáá-í xii-ndo sã tée quide ndáá táxi tnùní ñáhá xii cue ñáyiú xinu cuechi-á<sup>n</sup> cùñaha-ñá pàtróó<sup>n</sup>-dě xii-dé sá ncháandì túhú-ñá sá ndécú ndihi-dé quindaha-dě. <sup>45</sup>Dico nùú tée tàxi tnuní ñáhá xii cue ñáyiú xinu cuechi-á<sup>n</sup> ná càni iní-dé sá cùyàa patróó<sup>n</sup>-dě vá násáá ndihi-ni-dé ñá, te ngúíta-dé cani-dé nchaa ñáyiú xinu cuechi, cuèi tée cuèi ñadìhi, te ngúíta-dé caxi-dé coho-dé, te dàxíni-dé méé-dě, <sup>46</sup>te nduu ñá túú yìhi iní-dé te nasáá pàtróó<sup>n</sup>-dě, te dandòhò ñaha patróó<sup>n</sup>-dě-á<sup>n</sup> xii-dé, te daquìh<sup>n</sup> ñáhá-dě xii-dé nùú ndécú ñáyiú ñá túú ní quide ndáá.

<sup>47</sup>Te dava cue tée xinu cuechi xiní-güedé nàcuáa cuíní pàtróó<sup>n</sup>-güedě cada-güedé te ñá túú quide-güedé, te ni ñá túú cuíní-güedé cundecu túha-güedé cundetu-güedé pàtróó<sup>n</sup>-güedě, te nchaa cue tée duca<sup>n</sup> xíquide dandòhò ñaha patróó<sup>n</sup>-güedě, chi ñani vìhi-güedé. <sup>48</sup>Te dava cue tée xinu cuechi ñá túú xiní-güedé nàcuáa cuíní pàtróó<sup>n</sup>-güedě cada-güedé, te ní quide-güedé sá nènùú-güedé ñ<sup>n</sup> sá ñá túú tàú-güedé cada-güedé ñá, te cue tée-á<sup>n</sup> sacú-gá dandòhò ñaha patróó<sup>n</sup>-güedě, chi sacú-gá ñani-güedé. Te ñáyiú cùtnuní iní-xi nàcuáa cuíní Yá Ndiòxí cadá-yu, te ñi-<sup>n</sup>i duca<sup>n</sup> tàú-yu cadá-yu nàcuáa cuíní-gá. Te ñáyiú vài-gá tècú tnùní nàcuáa càhá<sup>n</sup>-gá, te ñi-<sup>n</sup>i duca<sup>n</sup> vài nchaa sá càhá<sup>n</sup>-gá tàú-yu cadá-yu.

**Ñá túú cùu ì<sup>n</sup>nuu ñáyiu**

(Mt. 10:34-36)

49<sup>o</sup>Te yúhú véxi-í ñuyíú-a cuendá cutnùnì iní ñáyiu nàcuáa cada ñaha Yá Ndióxi xií-yu, ite cuíní-í sá ndíhi-ni cada-gá nàcuáa sàni iní-gá! 50<sup>o</sup>Te yúhú ío vài tnúhu sàni iní-í, ichi sáa nduu te ío ndoho-í, te ñiu-ni xíá<sup>n</sup> cuhu<sup>n</sup> iní-í ndéé ná sáa nduu dùca<sup>n</sup> yáha-í! 51<sup>o</sup>Te nchòhó vá cánì iní-ndó sá yúhú véxi-í ñuyíú-a te cundecu ndíhi tnàha váha-ni ñáyiu, te ñáhá chi da nguíta-yu vá cúú ì<sup>n</sup>nuú-yu cundecú-yu. 52<sup>o</sup>Te ndéé není vitna nguíta ñáyiu vá cúú ì<sup>n</sup>nuú-yu cundecú-yu, te na càda-o cuendá te núu úhú<sup>n</sup> ñáyiu xíndecu ì<sup>n</sup>-ni vèhe, te vá cúú ì<sup>n</sup>nuu-gá-yu, chi únì-yu ndatnúhu-yu te nàá-yu ndíhi úú-gá-yu, àdi ñáyiu úú-á<sup>n</sup> ndatnúhu-yu te nàá-yu ndíhi ñáyiu únì-á<sup>n</sup>. 53<sup>o</sup>Te dava cue téé cùu tátá vá cúú ì<sup>n</sup>nuu-gá-güedé ndíhi déhe ducu<sup>n</sup>-güedé, te ni dàva cue ñáyiu cùu náná vá cúú ì<sup>n</sup>nuu-gá-yu ndíhi déhe yòcò-yu, te ni sànu-yu vá cúú ì<sup>n</sup>nuu ndíhi-gá-yu. Te duca<sup>n</sup> càdá-yu chi davá-yu quíndáá iní ñáhã-yu xii-í, te davá-yu vá quíndáá iní ñáhã-yu —càchí-gá xáha<sup>n</sup>-gã xii-güedé.

**Ñáyiu cùtnuní iní-xi nàcuáa quide-xi ñuyíú ndíhi andíu**

(Mt. 16:1-4; Mr. 8:11-13)

54<sup>o</sup>Te Jèsús ní xáha<sup>n</sup>-gã xii nchaa ñáyiu xíndecu-á<sup>n</sup>:

—Te nchòhó òré ndéhé-ndó ndànchita vícò ndàa xio quée nchíanchii, te càchí-ndó sá cúú<sup>n</sup> dǎú, te ñiu duca<sup>n</sup> ndísa quide-xi. 55<sup>o</sup>Te òré ná quène táchí ndàa xio

datni nàcuáa quène nchíanchii, te càchí-ndó sá ío cada ihni-xi, te ñiu duca<sup>n</sup> ndísa quide-xi. 56<sup>o</sup>Te nchòhó ío váha cùtnuní iní-ndó nàcuáa quide-xi andíu ndíhi ñuyíú, ète ná cuendá quidé-ní-ndó sá ñã tècú tnùnì-ndó nàcuáa quide Yá Ndióxi vitna? Te sá dúcá<sup>n</sup> quide-ndo-á<sup>n</sup> ío dándahú-ndó mèe-ndo sá ío váha cùtnuní iní-ndó, chi ñá ndàá sá cùtnuní iní-ndó.

**Nducu-o nàcuáa nucúndecu ndíhi váha-o ñáyiu cùu úhú iní ñáhá**

(Mt. 5:25-26)

57<sup>o</sup>Te nchòhó, ìná cuendá ñá túú dándixi túu-ndo ìní-ndó càda-ndo mee-ni sá váha sá tàú-ndó càda-ndo-i? 58<sup>o</sup>Te núu lò ì<sup>n</sup>-ndo nǐ sacá<sup>n</sup> cuéchi ñáyiu cuendá-ndó cuendá ì<sup>n</sup> sá nǐ quide-ndo, te cuáhá<sup>n</sup>-ndó ndíhí-yu núu tèe cùchiu<sup>n</sup>, te nini ñùhu-ndo ndíhí-yu ichi, te nducu-ndo nàcuáa cada-ndo nàcáhá<sup>n</sup> cáhnú iní tnáhá-ndó ndíhí-yu cuendá sá vǎ cándèca ñaha-gá-yu quíhí<sup>n</sup> núu tèe cùchiu<sup>n</sup>, chi núu duca<sup>n</sup> na càdá-yu te téé cùchiu<sup>n</sup>-á<sup>n</sup> nachíhi ñaha-dě ndaha cue téé cùu poleciá, te cue téé-á<sup>n</sup> chíhi ñaha-güedě vecaá xii-ndo. 59<sup>o</sup>Te na càchí tnúhu-í xii-ndo sá nǔu na ngáva-ndo vecaá, te vá cǎcu-ndo te núu vá náchãhu-ndo nchàa sá tàú-ndó —càchí-gá xáha<sup>n</sup>-gã xií-yu.

**Xìni ñuhu-xi natuha-o ichi Yá Ndióxi**

**13** Te ñiu-ni òré-á<sup>n</sup> nǐ ngúnutnǐ ì<sup>n</sup> úú ñáyiu núu Jèsús cánì-yu cuendú núu-gá nàcuáa ní quide ñaha té Pilatú xii cue téé distritú Galileá cue téé ní sahni quiti nduu táhú Yá Ndióxi,

te mei òré ní sahní-güedé cue quití-á<sup>n</sup> nǐ táuchíú<sup>n</sup> tǎ Pilatú cue sandádú-dé ní sahní-güedé cue tée Galileá-á<sup>n</sup>, te ní xica níñí-güedě núú ñúhú ndìhì níñí cue quití-á<sup>n</sup>, te ní nadácánuu-xi. <sup>2</sup>Te Jèsús ní xáha<sup>n</sup>-gǎ xií-yu:

—Te núu nchòhó sání ìní-ndó sǎ sá dúcá<sup>n</sup> nǐ yáha cue tée distrítú Galileá-á<sup>n</sup> te cùu-güedé cue tée ndècu vihi-gá cuèchi-xi dàcúxí cuè tée ñuú-güedé ñá. <sup>3</sup>Te na càchí tnúhu-í xii-ndo sǎ ñáhá. Te núu nchòhó vá ndíxí cuèchi ìní-ndó cuendá nchaa sá cuèhé sá dúhá quide-ndo ndecu-ndo ña, te tnahá nchaa nchòhó cuíta nihnu-ndo te núu vá nátnhì-ndo ichi Yá Ndiòxí. <sup>4</sup>Te núu nchòhó sání ìní-ndó sǎ ñáyíu sáhú<sup>n</sup> úní ní xíhí ní táú ñáhá vèhe ducú<sup>n</sup> Silòè ío-gá ndécú cuèchi-yu dàcúxí nchaa ñáyíu xǐndecu ñuú Jerusàlén ñá, <sup>5</sup>te na càchí tnúhu tucu-í xii-ndo sǎ ñáhá. Te núu nchòhó vá ndíxí cuèchi ìní-ndó cuendá nchaa sá cuèhé sá dúhá quide-ndo ndecu-ndo ña, te tnahá nchaa nchòhó cuíta nihnu-ndo te núu vá nátnhì-ndo ichi Yá Ndiòxí —càchí-gá xáha<sup>n</sup>-gǎ xií-yu.

**Yutnu ngǔxí ñá túú cùu<sup>n</sup> sávidí-xi**

<sup>6</sup>Te Jèsús ní caní tucu-gá ìh<sup>n</sup> cuèndú núú-yu nàcuáa tecú tñuní-yu tnúhu-gá, te xáha<sup>n</sup>-gǎ:  
—Ìh<sup>n</sup> tée nùtní ìh<sup>n</sup> yutnu ngǔxí núú ñúhú-dě, te cuáhá<sup>n</sup> ndéhé-dě núu ní cuu<sup>n</sup> sávidí-xi ní cùu, te ní ìh<sup>n</sup> ñá túú ní cùu<sup>n</sup>. <sup>7</sup>Te ní xáha<sup>n</sup> tǎe-á<sup>n</sup> xii tée ndèè ñuhu-dé: “Nàha-n sá vitna ní cuu úní cuíá quíxí còto-í yutnu ngǔxí-a te ñá túú xìní-í ní ìh<sup>n</sup>

sávidí-xi. Te quehndé-n vitna, chí àú<sup>n</sup> nǎ cuu nùtní-xi quide tneñu-xi núú ñuhu-á<sup>n</sup>”, càchí-dé xáha<sup>n</sup>-dě xii tée ndèè ñuhu-dé-á<sup>n</sup>. <sup>8</sup>Te tée ndèè ñuhu-á<sup>n</sup> ní xáha<sup>n</sup>-dě: “Pàtróó<sup>n</sup>, daña na cuìhnu-xi cuíá vitna-ná, te na nàdatayá-í ñuhu núú sàhá-xi, te chihi-í sahá<sup>n</sup>. <sup>9</sup>Te duca<sup>n</sup> te cudana cuu<sup>n</sup> sávidí-xi, àdi núu ñá túú ní cùu<sup>n</sup> sávidí-xi ña te téhndé-ñá-xi”, càchí-dé xáha<sup>n</sup>-dě xii pàtróó<sup>n</sup>-dě —càchí-gá xáha<sup>n</sup>-gǎ xií-yu.

**Jèsús quidé tǎtna-gá ìh<sup>n</sup>  
ñadìhí ní nduu cueyí sǎtá-xi  
nduu ndètátú ñáyíu**

<sup>10</sup>Te ìh<sup>n</sup> xito cùu-xi nduu ndetátú ñáyíu, te yìhi Jesús ìh<sup>n</sup> veñúhu dànehé-gá ñáyíu. <sup>11</sup>Te xíá<sup>n</sup> ndécú ìh<sup>n</sup> ñadìhí ní cuu sáhú<sup>n</sup> úní cuíá sǎ cùhú-a<sup>n</sup> yìhi ñaha espíritú cùndhì yucu ñávàha xii-a<sup>n</sup>, te xíá<sup>n</sup> ní ndada cueyí-xi sǎtá-a<sup>n</sup>, te ñá dáñá-gǎ-xi nucúnutnǐ ndáá-a<sup>n</sup>. <sup>12</sup>Te òré ní xìní ñáhá Jèsús xii-a<sup>n</sup> te ní cana ñaha-gǎ, te xáha<sup>n</sup>-gǎ:

—Yòhò ñaha cùhú, ndúha-n cuèhé tnahá-n —càchí-gá xáha<sup>n</sup>-gǎ xii-a<sup>n</sup>.

<sup>13</sup>Te ní dácàá-gá ndaha-gá ní tendaha ñaha-gá xii-a<sup>n</sup>, te òré-ni-á<sup>n</sup> nǐ ndúha-a<sup>n</sup> te ní nucúnutnǐ ndáá-a<sup>n</sup>, te ní ngúíta-a<sup>n</sup> ní cachí-a<sup>n</sup> sá ío càhnu cuu Yá Ndiòxí. <sup>14</sup>Dico tée tàxi tñuní veñúhu ní cudéé<sup>n</sup>-dě sá dúcá<sup>n</sup> nǐ quide Jèsús ní quide tǎtna-gá ñaha cùhú-á<sup>n</sup> nduu ndètátú-yu, te ní xáha<sup>n</sup>-dě xií-yu:  
—Íó ìnú nduu tàù-ó càda chiú<sup>n</sup>-o, te ndédani càa nduu-á<sup>n</sup> quixi-ndo cùtǎtna-ndo, dico ñá díú ndùu cuu-xi nduu ndetátú-ó —càchí-dé xáha<sup>n</sup>-dě xií-yu.

<sup>15</sup>Te ní xáha<sup>n</sup> Jèsús:

—Nchòhó chi ío dándahú-ndó mée-ndo sá quidé ndáá-ndó dico ñá ndàá sá quidé ndáá-ndó, ìnáa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetatú-ó à<sup>n</sup>? <sup>16</sup>Te ñadìhí-a cùu-a<sup>n</sup> ñaní tnáhá ndíi Àbrahám, te dicó-ni sá yùcu ñávàha quide duha cuhú-a<sup>n</sup> ní cuu sáhú<sup>n</sup> úní cuíá, ìte náa ñá túú xini ñuhu-xi cutátna-a<sup>n</sup> cuèi cùu-xi nduu ndetatú-ó à<sup>n</sup>? — càchí-gá xáha<sup>n</sup>-gã xii-dé.

<sup>17</sup>Te sá dúcá<sup>n</sup> ñí cáhá<sup>n</sup> Jèsús, núu nchaa cue tée cùu úhú iní ñáhá xii-gá ní cucaha<sup>n</sup> núú-güedé, dico nchaa dava-gá ñáyiu chi xícudíí iní-yu xíndéhě-yu nchaa sá vã yõo tnàhí ndàcu cada quide-gá.

### **Cuendá ndíquí<sup>n</sup> yutnu nàni mostázá**

(Mt. 13:31-32; Mr. 4:30-32)

<sup>18</sup>Te ní xáha<sup>n</sup>-gã xií-yu:

—Na càni-í ì<sup>n</sup> cuendú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndiòxí xii-ndo. <sup>19</sup>Ì<sup>n</sup> téé ní quehe<sup>n</sup>-dé ndíquí<sup>n</sup> yutnu nàni mostázá te nèhe-dé cuáhá<sup>n</sup> ní sacá<sup>n</sup>-dé núú ñúhú-dě te ní xínu-xi, te ní sahnu-xi ní cuu ducú<sup>n</sup>-xi, te cue quití ndàva núú tàchí cádúha-güedi tacá-güedi núú dité-xi —càchí-gá xáha<sup>n</sup>-gã xií-yu.

### **Nàcuáa quide levadurá**

(Mt. 13:33)

<sup>20</sup>Te ní xáha<sup>n</sup> tùcu Jesús xií-yu:

—Te na càchí tnúhu tucu-í xii-ndo nàcuáa cada tucu Yá Ndiòxí òré ndíhu ndaha ñàha-gá xii-ndo. <sup>21</sup>Ì<sup>n</sup> ñadìhí ní quehe<sup>n</sup>-a<sup>n</sup> levadurá ní chihi-a<sup>n</sup> úní arròbá yuchi trùú, te levadurá-á<sup>n</sup> ñí quide-xi ní ndaa ñihí yusa<sup>n</sup>-á<sup>n</sup> —càchí-gá xáha<sup>n</sup>-gã xií-yu.

### **Yuyèhe cuiñi**

(Mt. 7:13-14, 21-23)

<sup>22</sup>Te ichi ñùhu Jesús cuáhá<sup>n</sup>-gá ñuú Jerusàlén, te nchaa ñuú ñáhnú, ndìhi nchaa ñuú líhli ta yàha-gá duca<sup>n</sup> ta dànehé-gá ñáyiu tnúhu-gá cuáhá<sup>n</sup>. <sup>23</sup>Te ì<sup>n</sup> ñuú-á<sup>n</sup> ñí xáha<sup>n</sup> ì<sup>n</sup> téé xii-gá:

—Mèstrú, cuiñi-í cacá<sup>n</sup> tnúhu-í ì<sup>n</sup> tnúhu núú-n, ìndáá sá ìo sacú ñáyiu nàníhí tàhú-á<sup>n</sup>? —càchí-dé xáha<sup>n</sup>-dě xii-gá.

Te Jèsús ní xáha<sup>n</sup>-gã xii-dé ndìhi nchaa ñáyiu:

<sup>24</sup>—Cada-ndo sã nánihí tàhú-ndó, te tñii-ndo ìchi Yá Ndiòxí, te ichi-gá-á<sup>n</sup> cúu-xí dàtná ì<sup>n</sup> yuyèhe cuiñi, te càchí tnúhu-í xii-ndo sã ìo cuéhé ñáyiu cachí iní-yu quíhu-yu yuyèhe cuiñi-á<sup>n</sup> dico vá ndácú-yu. <sup>25</sup>Te na càni tucu-í ìngá cuendú núú-ndó nàcuáa tecú tnùní-ndó tnúhu càhá<sup>n</sup>-í. Te òré ná ndàcuñí téé cùu xítohó vehe, te nacadí-dé yuyèhe, te nchaa nchòhó ñáyiu na quèndóo quehé dacàsa<sup>n</sup>-ndo yuyèhe, te quesaha-ndo cũñaha-ndo xii-dé: “Tátá, nacaá<sup>n</sup> yuyèhe na quíhu-ndí”, quesaha-ndo cũñaha-ndo xii-dé. Dico téé cùu xítohó vehe-á<sup>n</sup> cũñaha-dě xii-ndo: “Ñá túú xini-í nchòhó ndèè ñáyiu cùu-ndo”, duha cũñaha-dě xii-ndo. <sup>26</sup>Te dàtnùní ngúíta nchòhó cũñaha-ndo xii-dé: “Nchúhú ní xexi ndìhi ñaha-ndí, te ní xihí ndìhi ñaha-ndí xii-n, te nchaa ichi ní xóo dacuàha ñaha-n xii-ndí”, quesaha-ndo cũñaha-ndo xii-dé. <sup>27</sup>Dico cachí tucu téé cùu xítohó vehe-á<sup>n</sup> cũñaha-dě xii-ndo: “Sa ní cachí-í sá ñà túú xini-í ndèè ñáyiu cùu-ndo. Te chí xócuñí



nchòhò ñáyiú ndècu ichi cuehé ichi duha núú ndècu-í”, quesaha-dě cúñaha-dě xii-ndo. <sup>28</sup>Te na sàá nduu dùca<sup>n</sup> cada-xi te quiní-ndó tē Àbrahám, ndìhi té Isàác, ndìhi té Jàcób, ndìhi nchaa cue tée ní xóo cáhá<sup>n</sup> tnúhu Yá Ndiòxí, te nchaa cue tée-á<sup>n</sup> ndécú-güedě núú ndécú-gǎ táxí tnùní-gá, te nchòhó quee tǐhú-ndó nǔú-gǎ sá tnúhu ñá túú ní cuiní cada ndáá, te dàvá-á<sup>n</sup> ndàhyú-ndó te cuu rúhñú-nǎ núhu-ndo sǎ sàtú iní-ndó cuendá sá ndóhó-ndó. <sup>29</sup>Te dàvá-á<sup>n</sup> quǐhu nchaa ñáyiú ndi cùmí xio ñuyúú nǔú ndécú Yǎ Ndiòxí táxí tnùní-gá caxí-yu ndìhi-gá, te cundecú-yu ndìhi-gá. <sup>30</sup>Te dava ñáyiú nchìcú<sup>n</sup> ñá túú cùnuu ndecu ichi Yá Ndiòxí vitna, ñáyiú-á<sup>n</sup> sǎá nduu te ío cunúú-yu. Te dava ñáyiú cùnuu ndecu ichi-gá vitna, ñáyiú-á<sup>n</sup> sǎá nduu te vá ïo-gá cunúú-yu — cǎchí-gá xáha<sup>n</sup>-gǎ xií-yu.

### Jèsús ndàhyú-gá cuendá ñáyiú ñuú

#### Jerusalén

(Mt. 23:37-39)

<sup>31</sup>Te ñuú-ni nduu-ǎ<sup>n</sup> nǐ quexìo ñ<sup>n</sup> úú cue tée cùu fariséú núú ndécú-gǎ, te xáha<sup>n</sup>-güedě xii-gá: —Quee-n ìha quǐh<sup>n</sup>-n nǔú ndèé quǐh<sup>n</sup>-n, chi tée cùu Herodés cuiní-dé cahni ñaha-dě xii-n — cǎchí-güedé xáha<sup>n</sup>-güedě xii-gá.

<sup>32</sup>Te Jèsús ní xáha<sup>n</sup>-gǎ:

—Chí cuàhá<sup>n</sup> te cúñaha-ndo xii tée nèhe mañá-á<sup>n</sup> sǎ cǎchí-í sá ná cùndedóho váha-dé ñ<sup>n</sup> tnúhu cáhá<sup>n</sup>-í, chi cùmání ñ<sup>n</sup> úú-gá nduu cundecu-í xocàni-í nchaa espíritú cùndìhi yucu ñávàha yǐhi ñaha xii ñáyiú, te cada tátna-í nchaa

dava-gá ñáyiú cùhú, te duca<sup>n</sup> te ndìhi chiú<sup>n</sup>-í, duha cúñaha-ndo xii-dé. <sup>33</sup>Dico dacuitíí sǎ cùhú<sup>n</sup>-í ichi ñ<sup>n</sup> úú-gá nduu, te duca<sup>n</sup> te sáá-í núú quǐh<sup>n</sup>-í, chi vá cúú tnàhí cuú ñ<sup>n</sup> tée cáhá<sup>n</sup> tnúhu Yá Ndiòxí ingá ñuú, chi mei ñuú Jerusalén cuú-güedé — cǎchí-gá xáha<sup>n</sup>-gǎ xii-güedé.

<sup>34</sup>Te ní xáha<sup>n</sup>-gǎ xii ñáyiú ñuú Jerusalén:

—Nchòhó chi sàhni-ndo nchaa cue tée cáhá<sup>n</sup> tnúhu Yá Ndiòxí, cue tée ní tendaha-gǎ véxi, te mee-ni ndìhi yúú sáhni-ndó-güedě. ìTe tǐtní xito ní cuiní-í nadatàcá ñàhà-í xii-ndo dàtná nádàtácá ñ<sup>n</sup> nchuxi cuè déhe-di sàquihí-güedi xití ndíxí<sup>n</sup>-di, dico ñá ní cuiní-ndó, te duca<sup>n</sup>-ni sàni iní-í ndéé vitna! <sup>35</sup>Te chí cùndedóho tucu ingá tnúhu na cáhá<sup>n</sup>-í-a: Yá Ndiòxí daña ñàha-gá xii-ndo. Te na cǎchí tnúhu tucu-í xii-ndo sǎ vǎ quíní ñáhá-gǎ-ndó xii-í, dico sáá nduu te quiní ñáhá tucu-ndo, te nduu-ǎ<sup>n</sup> cachí-ndó sǎ ïo cǎhnu cuu yúhú Yaá ní tendaha Dütú Ndiòxí véxi ñuyúú-a — cǎchí-gá xáha<sup>n</sup>-gǎ xií-yu.

### Jèsús quidé tátna-gá

#### ñ<sup>n</sup> tée ñùhu cuiñu

**14** Te duha ní cuu ñ<sup>n</sup> nduu, nduu ndètátú ñáyiú chí ñ<sup>n</sup> tée cùu fariséú cùnùu ní cáhá<sup>n</sup>-dé Jèsús vehe-dé caxi-gá, te cue tée ndècu vehe-dé ndéhé-güedě nǔú nása cada-gá. <sup>2</sup>Te xíá<sup>n</sup> ndécú tnàhá ñ<sup>n</sup> tée cùhú ñúhú-dě cuiñu. <sup>3</sup>Te Jèsús ní xicá<sup>n</sup> tnúhú-gǎ núú cuè tée dàcuaha ñaha xii ñáyiú nchaa tnúhu ní chídó tnùní ndíí Moisés, ndìhi núú cuè tée cùu fariséú, te xáha<sup>n</sup>-gǎ:

—¿Cuu cada tátna-o ì<sup>n</sup> ñáyiú cùhú nduu ndètatú-ó ã<sup>n</sup> ñáhá? —càchí-gá xáha<sup>n</sup>-gã xii-güedé.

<sup>4</sup>Dico cue téé-á<sup>n</sup> ñà túú tnàhí ni càhá<sup>n</sup>-güedé. Te ní dácàá-gá ndaha-gá ní tendaha-gã téé cùhú-á<sup>n</sup> nĩ quide tátna ñaha-gã xii-dé, te ní xáha<sup>n</sup>-gã sá ná nùhú-dé vehe-dé.

<sup>5</sup>Te ní xícá<sup>n</sup> tnùhú-gã núú nchàa cue téé-á<sup>n</sup>, te xáha<sup>n</sup>-gã:

—¿Te núú nchòhó ná ngáúñhnu ì<sup>n</sup> búrru-ndo àdi ì<sup>n</sup> ndicutu-ndo déhvá, te vá ná tàva ndíhi-ni-ndo-di cuèi cùu-xi nduu ndetatú-ndó-ã<sup>n</sup>? —càchí-gá xáha<sup>n</sup>-gã xii-güedé.

<sup>6</sup>Te ñá túú ní nĩhí-güedé tnúhu na dànhocáva-güedé.

**Ñáyiú càhá<sup>n</sup>-yu quíhí<sup>n</sup> vico tnándaha**

<sup>7</sup>Te ndèhe Jesús nàcuáa xíquide nchaa ñáyiú ndècu vico sá sũúni nĩ nacáxi-yu xilé sácõo nchihi cue téé cùnuu-gá conchihí-yu òré cuànguìhú-yu mèsá caxí-yu, núú ní xáha<sup>n</sup>-gã xií-yu:

<sup>8</sup>—Òré ná càhá<sup>n</sup> ñáhá ì<sup>n</sup> ñáyiú xii-ndo ì<sup>n</sup> vico tnándaha, te vá cóo-ndó núú xilé sácõo cue téé cùnuu-gá, chi núú duca<sup>n</sup> na càda-ndo, te cudana quexìo dava-gá ñáyiú cùnuu-gá dàcúúxí nchòhó.

<sup>9</sup>Te ñáyiú ní càhá<sup>n</sup> ñáhá xii-ndo-á<sup>n</sup> quixí-yu te cùñàhá-yu xii-ndo: “Chí cuãñaha xilé núcõo nchihi-ndo-ã<sup>n</sup> ná cònchihi ñáyiú ní quexìo-a”, quesàhá-yu cùñàhá-yu xii-ndo. Te cuiní-ndó ñáhá cuèi cùcaha<sup>n</sup> núú-ndó ndàcuñí-ndó quíhí<sup>n</sup>-ndó ngõ-ndo núú xilé xínutnfi ndéé núú nĩ ndíhi-ná ndàa sátá-xi.

<sup>10</sup>Te yúhú càchí-í sá òré ná càhá<sup>n</sup> ñáhá-yu xii-ndo, te ngóo-ndo núú xilé xínutnfi ndéé núú nĩ ndíhi-ná

ndàa sátá-xi chi cuendá òré ná quèxio ñáyiú ní càhá<sup>n</sup> ñáhá xii-ndo, te cùñàhá-yu xii-ndo: “Nchòhó cue ñáyiú càhá<sup>n</sup> ndíhi-í, chí yãha núú xilé sácõo cue téé cùnuu-gá coo-ndo”, duha cùñàhá-yu xii-ndo. Te duca<sup>n</sup> te cada nínu ñaha nchàa ñáyiú yìhi ndíhi-ndo mesá. <sup>11</sup>Te nchaa ñáyiú na càda nínu mee-xi, te ñáyiú-á<sup>n</sup> ñà túú cùu nínu-yu, te nchaa ñáyiú ñá túú quide nínu mee-xi, ñáyiú-á<sup>n</sup> cúú nĩnu-yu —càchí-gá xáha<sup>n</sup>-gã xií-yu.

<sup>12</sup>Te dàtnùni ní xáha<sup>n</sup>-gã xii téé ní càhá<sup>n</sup> ñáhá xii-gá:

—Te yòhó òré cuiní-n càda-n ì<sup>n</sup> vico, te vá càhá<sup>n</sup>-n mèe-ni cue téé càhá<sup>n</sup> ndíhi-n, ni cuè ñaní-n, ni cuè ñáyiú cùu ñaní tnáhá-n, ni cuè ñáyiú cuica ndècu yatni ndíhi-n, chí ñáyiú-á<sup>n</sup> duca<sup>n</sup> càdá-yu ì<sup>n</sup> nduu càhá<sup>n</sup> ñáhá-yu xii-n te ndéyãhu-ni sá nĩ quidè-n-yu. <sup>13</sup>Te ñáhá chí òré ná càda-n ì<sup>n</sup> vico, te càhá<sup>n</sup>-n ñáyiú ndàhú, ndíhi ñáyiú ñá cúú càca, ndíhi ñáyiú yacua, ndíhi ñáyiú cuáa. <sup>14</sup>Te núú duca<sup>n</sup> na càda-n, te cuu-xi ì<sup>n</sup> sá vãha xii-n, chí ñáyiú-á<sup>n</sup> vã nìhí-yu nacoto ñàhá-yu xii-n, dico na cùu-n te sáa nduu ndòto-n ndíhi nchaa ñáyiú ní quide ndáá ní xíndecu ichi Yá Ndiõxí, te dàvá-á<sup>n</sup> taxi-gá sá ndúú tàhú-n —càchí-gá xáha<sup>n</sup>-gã xii-dé.

**Nàcuáa xíquide ñáyiú òré càhá<sup>n</sup> ñáhá ì<sup>n</sup> téé cada vico**

(Mt. 22:1-10)

<sup>15</sup>Te sá dúcá<sup>n</sup> nĩ càhá<sup>n</sup> Jèsús ní tecú dóho cue téé yìhi mesá-á<sup>n</sup>, núú ní xáha<sup>n</sup> ì<sup>n</sup>-dé xii-gá:

—Ío vãha táhú nchaa ñáyiú na càxi nchaa sá cuãha ñaha Yã Ndiõxí

nduu na sàà-yu cundecú-yu núú ndécú-gǎ táxí tnùnì-gá —càchí-dé xǎha<sup>n</sup>-dě xii-gá.

<sup>16</sup>Te Jèsús ní xáha<sup>n</sup>-gǎ xii-dé:

—*Ī* tée quide-dé vico, te ní dátécú tnúhu-dé cuéhé víhí ñǎyiu quíh<sup>n</sup>-yu caxí-yu. <sup>17</sup>Te òré sa ní cuu-ná sá cáxǐ-yu, te ní xáha<sup>n</sup>-dě xii tée xínu cuechi núú-dě sá quíh<sup>n</sup>-dé cúñaha-dě quíh<sup>n</sup>-yu caxí-yu, chi sa ndècu túha ncha sá cáxǐ-yu.

<sup>18</sup>Dico nchaá-yu ní xáhǎ<sup>n</sup>-yu xii-dé sá ná cádá càhnu iní tée càhá<sup>n</sup> ñáhá-ǎ<sup>n</sup>, chi ñá túú cùyáchí-yu quíh<sup>n</sup>-yu vico-á<sup>n</sup>. Te tée ní cáhá<sup>n</sup> ndìhi tée xínu cuechi-á<sup>n</sup> dǐhna ní xáha<sup>n</sup>-dě: “Íchí ñǐ saa<sup>n</sup>-í ĩ<sup>n</sup> pedàsú ñuhu, te quíh<sup>n</sup> ndéhé-í tnavíí, núú xǐǎ<sup>n</sup> càhá<sup>n</sup> ndàhú-í núú-n sǎ cǔñaha-n xii tée càhá<sup>n</sup> ñáhá-ǎ<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dě. <sup>19</sup>Te ìngá-dé ní xáha<sup>n</sup>-dě: “Ní saa<sup>n</sup>-í úhú<sup>n</sup> yùndá ndicutu sa xítu, te cue quiti-á<sup>n</sup> quíh<sup>n</sup>-í coto ndeé-í-güedi vitna, núú xǐǎ<sup>n</sup> càhá<sup>n</sup> ndàhú-í núú-n sǎ cǔñaha-n xii tée càhá<sup>n</sup> ñáhá-ǎ<sup>n</sup> xii-í sá ná cádá càhnu iní-dé chi ñá túú cùyáchí-í”, càchí-dé xǎha<sup>n</sup>-dě. <sup>20</sup>Te ìngá tucu-dé ní xáha<sup>n</sup>-dě: “Íchí ñǐ tnándaha-í núú xǐǎ<sup>n</sup> vá cùyáchí-í quíh<sup>n</sup>-í”, càchí-dé xǎha<sup>n</sup>-dě. <sup>21</sup>Te òré ní nasáá tée xínu cuechi-á<sup>n</sup>, te ní nacani tnúhu-dé núú pàtróó<sup>n</sup>-dě ncha nàcuáa ní xáhǎ<sup>n</sup>-yu. Te ní cudéé<sup>n</sup> tée cùu patróó<sup>n</sup>-ǎ<sup>n</sup>, te ní xáha<sup>n</sup>-dě xii tée xínu cuechi núú-dě-á<sup>n</sup>: “Yáchí cuàhá<sup>n</sup> nanducu-n nchàa ñáyiu ndàhú, ndìhi ncha ñáyiu ñá cùú càca, ndìhi ncha ñáyiu yacua, ndìhi ncha ñáyiu cuàá, te ndèni ní cuu na nàníhǐ-n-yu te candècá-n-yu

quixi”, càchí-dé xǎha<sup>n</sup>-dě. <sup>22</sup>Te sáta ñǐ nasáá tée xínu cuechi-á<sup>n</sup>, te ní xáha<sup>n</sup>-dě xii pàtróó<sup>n</sup>-dě: “Pàtróó<sup>n</sup>, sa ní quide-í chùu<sup>n</sup> ní táhú-n, dico ndècu-gá núú cóo-yu”, càchí-dé xǎha<sup>n</sup>-dě. <sup>23</sup>Te tée cùu patróó<sup>n</sup>-dě-á<sup>n</sup> ñǐ xáha<sup>n</sup>-dě: “Cuàhá<sup>n</sup> tucu ndèni ní cuu te cada yica-n na quixí-yu quíhu-yu cuèndá ná chítú vehe-í. <sup>24</sup>Te na càchí tnúhu-í xii-n sǎ ñǐ ĩ<sup>n</sup> ñáyiu ní cáhá<sup>n</sup>-í dǐhna vá cùú-gǎ caxí-yu sá sà ní quide túha-í caxí-yu ní cùu”, cachí tée-á<sup>n</sup> xǎha<sup>n</sup>-dě xii tée xínu cuechi núú-dě —càchí-gá xáha<sup>n</sup>-gǎ xii tée-á<sup>n</sup>.

#### Ndoho-o cùndecu-o ichi Xítóhó Jesucristú

(Mt. 10:37-38)

<sup>25</sup>Te ío cuéhé ñáyiu nchìcú<sup>n</sup>-yu Jèsús, te ní xáha<sup>n</sup>-gǎ xii-yu:

<sup>26</sup>—Te núu dava nchòhó cuìni-ndó chitnahá ñáhá-ndó xii-í, te cuu iní ñáhá ndisa-ndo. Te cuéi na dàndóo-ndo tǎtá-ndó, ndìhi náná-ndó, ndìhi ñadihí-ndó, ndìhi déhe-ndo, ndìhi ñaní-ndó, ndìhi cúha-ndo, te cani iní-ndó sǎ cuéi na cùú-ndó sǎ cuèndá-í, te duca<sup>n</sup> te cuu ndisa-ndo cué ñáyiu tnahá tnúhu ndìhi-í. <sup>27</sup>Te ncha ñáyiu vá cáncǐcú<sup>n</sup> nihnu ñaha xii-í cuèndá sá yùhú-yu ndohó-yu dàtná ndoho-í, ñáyiu-á<sup>n</sup> vá cùú-yu ñáyiu tnahá tnúhu ndìhi-í. <sup>28</sup>Te núu ĩ<sup>n</sup> nchòhó ná càni iní-ndó dàca-ndo ĩ<sup>n</sup> vehe ducú<sup>n</sup>, ÷te náa ñá díú dǐhna-gá cada cuèndá-ndó núu ndèdau díhú<sup>n</sup> cuu, duca<sup>n</sup> te cutnùni iní-ndó núu tnahá díhú<sup>n</sup>-ndó càa vehe-á<sup>n</sup> àdi ñáhá? <sup>29</sup>Chi núu vá dúcá<sup>n</sup> càda-ndo, te na ngüita-ndo tàusaha-ndo te vá xínu cada-ndo, te ncha ñáyiu

na cùndehe ñaha xii-ndo, te cáhá<sup>n</sup> cuèhé-yu cuendá-ndó. <sup>30</sup>Te cachí-yu: “Tée-ǎ<sup>n</sup> ní nguíta-dé dácàa-dé i<sup>n</sup> vehe te ñá ní ndàcu-dé xínu”, cachí-yu. <sup>31</sup>Àdi te núu i<sup>n</sup> tée yìndaha ñaha xii ñáyiú cuiní-dé nàá-dé ndìhi ingá tucu tée yìndaha ñaha xii ñáyiú, ìte náa ñá díú díhna-gá cada cuendá-dé te núu ndacu-dé ndìhi úxí mǐl cue sandàdú-dé nàá-güedé, ndìhi ócò mǐl cue sandàdú ingá tucu tée yìndaha ñaha xii ñáyiú cùu úhú iní tnáhá ndìhi-dé-ǎ<sup>n</sup>? <sup>32</sup>Àdi te núu xito-dé sá vǎ ndácú-dé ñá, te òré vátá cùyàtni ñaha-gá tée cùu úhú iní tnáhá ndìhi-dé-á<sup>n</sup>, te tendaha-dé i<sup>n</sup> tée quíhí<sup>n</sup>-dé quíhu-dé tnúhu ndàhú núu tée-á<sup>n</sup> cuendá sá vǎ nàá-güedé. <sup>33</sup>Te duha càhá<sup>n</sup>-í chi núu nchòhó vá cádá ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vá cúu-ndó cuè ñáyiú tnáhá tnúhu ndìhi-í.

### Ñíí nǐ nduu víxí<sup>n</sup>

(Mt. 5:13; Mr. 9:50)

<sup>34</sup>Te ñíí chi ío váha, dico núu na nduu víxí<sup>n</sup>-xi, ìte nása-gá cada-o nándíhi-o te núu duca<sup>n</sup>-í? <sup>35</sup>Chi ñá túú-gǎ nándíhi-xi nì sá dàcá ñuhu, te nì sá dàcá sahá<sup>n</sup>, chi cuendá-nǎ dǎngoyo-o. Te nchaa nchòhó ñáyiú ní xíndedóho tnúhu ní cáhá<sup>n</sup>-í-a xini ñuhu-xi ío váha cuáha-ndo cuendá —càchí-gá xáha<sup>n</sup>-gǎ xii-yu.

### Cuendá i<sup>n</sup> mbéé quiti ní xíta

(Mt. 18:10-14)

**15** Te cue tée cuihna iní-xi quide cobrá ñáhá xii ñáyiú cuendá impuèstú ndìhi cue dava-gá

ñáyiú ndècu ichi cuehé ichi duha ní quexió-yu núu ndécú Jèsús cuendá cudedóho-yu tnúhu càhá<sup>n</sup>-gá.

<sup>2</sup>Te ní nguíta cue tée cùu fariséú, ndìhi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés xícáhá<sup>n</sup> cuèhé-güedé cuendá-gá, te càchí-güedé:

—Tée-a quèhe<sup>n</sup> cuendá-dé ñáyiú ndècu ichi cuehé ichi duha, te xèxi ndìhi ñaha-dé xii-yu —càchí-güedé xitnaha-güedé.

<sup>3</sup>Te Jèsús ní cani-gá i<sup>n</sup> cuendú nàcuáa tecú tnùnì-güedé tnúhu-gá, te xáha<sup>n</sup>-gǎ xii-güedé:

<sup>4</sup>—I<sup>n</sup> tée ndècu i<sup>n</sup> ciendú mbéé-dé, te ní xíta i<sup>n</sup>-di, te nchòhó sa cùtnunì iní-ndó nàcuáa cada tée-á<sup>n</sup>, chi dándóo-dé cúmídícó sǎhú<sup>n</sup> cúmí-di i<sup>n</sup> yucu, te cúnúndúcú-dé quiti ní xíta xíá<sup>n</sup> ndèe ndéé naníhí-dé-di. <sup>5</sup>Te òré ní naníhí-dé-di te ní dácáa-dé-di chíó-dé ní docó-dé-di sá cúdǐí iní-dé. <sup>6</sup>Te òré ní nasáa-dé vehe-dé, te ní dátàcá-dé nchaa cue tée càhá<sup>n</sup> ndìhi-dé, ndìhi nchaa ñáyiú ndècu yatni ndìhi-dé, te ní xáha<sup>n</sup>-dé: “Chí ná cùdíí iní-ó vitna, chi ní naníhí-í mbèè-í quiti ní xíta ni cùu”, cachí-dé xáha<sup>n</sup>-dé xii-yu. <sup>7</sup>Te yúhú càchí-í sá ò-gá cúdǐí iní Yǎ Ndiòxí ndìhi cue espíritú xínú cuèchi núú-gǎ núu i<sup>n</sup> ñáyiú ndècu ichi cuehé ichi duha na ndixi cuèchi iní-yu cuendá nchaa sá ñá túú vǎha quide-yu ndécú-yu te tnií-yu ichi-gá, dàcúxí cúmídícó sǎhú<sup>n</sup> cúmí ñáyiú sa ní tuha ichi-gá, chi ñá túú-gǎ xini ñuhu-xi ndixi cuèchi iní-yu chi sa ndécú-yu ichi-gá —càchí-gá xáha<sup>n</sup>-gǎ xii-güedé.

### Cuendá díhú<sup>n</sup> nǐ xíta

<sup>8</sup>Te ní cani Jèsús ingá cuendú núú-gǎ, te xáha<sup>n</sup>-gǎ:

—H<sup>n</sup> ñadìhí ndécú ndìhi-a<sup>n</sup> úxí díhú<sup>n</sup> cuixí<sup>n</sup>, te ní dácũta-a<sup>n</sup> ì<sup>n</sup> te ní teñuhú-a<sup>n</sup> ití, te ní ngũíta-a<sup>n</sup> nàtìhu-a<sup>n</sup> vehe, te súúní vâha vâha ní nanducu-a<sup>n</sup> ndéé ní naníhí-a<sup>n</sup>.  
 9Te òré ní naníhí-a<sup>n</sup>, te ní dátacá-a<sup>n</sup> nchaa ñáyiú ðíhí càhá<sup>n</sup> ndìhi-a<sup>n</sup> ndìhi nchaa ñáyiú ndècu yatni ndìhi-a<sup>n</sup>, te ní xáha<sup>n</sup>-a<sup>n</sup>: “Chí ná cùdí ìní-ó vîtna chi ní naníhí-í díhú<sup>n</sup>-í sá ñí xíta ni cùu”, cachí-a<sup>n</sup> xáha<sup>n</sup>-a<sup>n</sup> xíi-yu. 10Te yúhú càchí-í sá dúcá<sup>n</sup> ò cùdí ìní nchaa espíritú xínú cuèchi núú Yă Ndiòxí, núú ì<sup>n</sup> ñáyiú ndècu ichi cuéhé ichi duha na ndìxi cuèchi ìní-yu cuèndá nchaa sá ñà túú vâha quidè-yu, te tnií-yu ichi-gá —càchí-gá xáha<sup>n</sup>-gă xii-güedé.

#### **Cuèndá ì<sup>n</sup> téé ñà túú ní quide vâha**

11Te ní cani tucu Jèsús ìngá cuèndú núú-güedé, te xáha<sup>n</sup>-gă:  
 —H<sup>n</sup> téé ndècu úú déhe ducu<sup>n</sup>-dé, 12te téé líhli-gá ní xáha<sup>n</sup>-dè xii tâtá-dé: “Táu, taxi-n tãhú sã cúú cuèndá-í”, càchí-dé xáha<sup>n</sup>-dè. Te tâtá-dé-á<sup>n</sup> ñí sãñaha-dè ndí dí<sup>n</sup> núú-güedé sá cúú cuèndá-güedé. 13Te núú sàcú-ni nduu, te déhe-dé téé líhli-gá-á<sup>n</sup> ñí nadico-dè nchaa sá ñí sãñaha tâtá-dé, te ní xica-dé cuáhá<sup>n</sup>-dé ì<sup>n</sup> ñúú xícá, te yacá<sup>n</sup> ní tnií-dé ì<sup>n</sup> ichi cuéhé ichi duha, te ní ndìhi díhú<sup>n</sup>-dè ní dándóñuhu-dé ndìhi cue téé càhá<sup>n</sup> ndìhi-dé, ndìhi nchaa ñáyiú ðíhí xĩndecu ichi dí<sup>n</sup> ìní. 14Te ní ndìhi ndoo díhú<sup>n</sup>-dè ní dándóñuhu-dé, te núú sàcú-ni nduu ní sáá tnamá ñúú núú ndécú-dé-á<sup>n</sup>, te ñà ñihí-gá-dé sá caxí-dé, te xíhí-dé docó. 15Núú ní xica-dé cuáhá<sup>n</sup> ndúcú chiú<sup>n</sup>-dé núú ì<sup>n</sup> téé

diu-ni ñúú xícá<sup>n</sup>, te téé-á<sup>n</sup> ñí sãha chiú<sup>n</sup> ñaha-dé ì<sup>n</sup> xichi núú ñúhú-dé coto-dé cùchí. 16Te súúní xíhí-dé docó te cuíní-dé caxi-dé nchaa sá sãha-yu cùchí-á<sup>n</sup> ní cùu, dico ñà túú ní sãñahá-yu xii-dé. 17Te uu<sup>n</sup>ni ní sani vâha ìní-dé, te ní cachí-dé: “Íó cuéhé cue téé xĩnu cuechi vehe tâtá-í te ío cuéhé sã xéxi-güedé ndécú, te yúhú duha ndòho-í docó iha! 18Te ndacuñí-í te núhú-í vehe tâtá-í, te cùñaha-í xii-dé: Táu, ñà túú ní quide vâha-í núú Yă Ndiòxí te ni ñà túú ní quide vâha-í núú-n, 19te ñà túú-gă tâu-í sá cùú-í déhe-n vîtna, te cada ñaha-ñ-n xii-í dàtná ì<sup>n</sup> téé xĩnu cuechi núú-n”, duha ní sani ìní-dé cùñaha-dè xii tâtá-dé. 20Te sátá dúcá<sup>n</sup> ñí sani ìní-dé, te ní natnií-dé ichi cuánuhú-dé vehe tâtá-dé, te xica-gă cuánuhú-dé ní xini ñáhá tâtá-dé xii-dé te ní cundàhú ìní ñáhá-dé. Te xĩnu tâtá-dé-á<sup>n</sup> ñí sáhá<sup>n</sup> nútñahá ñáhá-dé, te ní numi ñaha-dé, te ío vâha ní cáhá<sup>n</sup> ndìhi ñaha-dé. 21Te ní xáha<sup>n</sup> déhe-dé-á<sup>n</sup> xii-dé: “Táu, ñà túú ní quide vâha-í núú Yă Ndiòxí te ni ñà túú ní quide vâha-í núú-n, te ñà túú-gă tâu-í sá cùú-í déhe-n vîtna”, cachí-dé xáha<sup>n</sup>-dè.

22Dico tâtá-dé-á<sup>n</sup> ñí xáha<sup>n</sup>-dè xii cue téé xĩnu cuechi núú-dé: “Chí quèñuhu ndíhi-ni dóó vâha-gá cuáha-ndo déhe-í-a na cuĩhnu-dé, ndìhi ì<sup>n</sup> dehé ná quèhi díquí ndáhá-dé, ndìhi chàú vâha na quèhi-dé. 23Te quíhí<sup>n</sup> ñguehe<sup>n</sup>-ndo ì<sup>n</sup> ndicutu numa quitì caváha-gá, te cahni-ndo-di, te na càda-o vico, te na càxi-o-di. 24Chi déhe-í-a ní sani ìní-í sá ñí xíhí-dé ní cùu, te ñáhá chi ndècu vívú-dé, te ní sani tucu

iní-í sá nǐ xíta-dé ní cùu te ní nasáá méé-dě”, càchí-dé xǎha<sup>n</sup>-dě xii cue tée xìnu cuechi núú-dě-á<sup>n</sup>. Te ní nguúfta-güedé ní quide-güedé vico.

<sup>25</sup>Te déhe-dé tée sàcuéhé-gǎ cuáhá<sup>n</sup>-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cúú vico. <sup>26</sup>Te ní cana-dé ìì<sup>n</sup> tée xìnu cuechi, te ní xícá<sup>n</sup> tnúhú-dě núú-dě ná cuendá duca<sup>n</sup> ío yaá. <sup>27</sup>Te tée xìnu cuechi-á<sup>n</sup> nǐ xáha<sup>n</sup>-dě: “Ñaní-n tée cuáhá<sup>n</sup> ní cùu ní nasáá-dé, te tǎtá-n nǐ táúchíú<sup>n</sup>-dě ní xíhí ìì<sup>n</sup> ndicutu nùma quitì caváha-gá cuendá sá nǐ nasáá váha-dé”, càchí-dé xǎha<sup>n</sup>-dě.

<sup>28</sup>Dico ñaní-dé tée sàcuéhé-ǎ<sup>n</sup> nǐ cudéé<sup>n</sup>-dě, te ní cachí-dé sá vǎ ndíhu-dé vehe cundecu-dé vico-á<sup>n</sup> ní cùu, dico ní quee tǎtá-güedé ní cáhá<sup>n</sup> ndàhú-dé núú-dě cuendá ndíhu-dé. <sup>29</sup>Te ní xáha<sup>n</sup>-dě xii tǎtá-dě: “Táu, cundedóho váha saú-n tnúhu na càhá<sup>n</sup>-í-a, yúhú ío cuéhé cuíá nǐ cuu xìnu cuechi-í núú-n, te ni ìì<sup>n</sup> xito ñá túú quide sáá iní-í núú-n, te ni ìì<sup>n</sup> chivá líhli ñá túú tàxi-n-di caxi díí iní-í-di ndíhi cue tée càhá<sup>n</sup> ndíhi-í. <sup>30</sup>Te vitna ní nasáá déhe-n tée ní sáhá<sup>n</sup> ní dándòñuhu díhú<sup>n</sup>-n ndíhi nchaa ñáyüu xíndecu ichi díí iní. Te ní sahani-n ìì<sup>n</sup> ndicutu numa quitì caváha-gá sá cuendá-dé”, càchí-dé xǎha<sup>n</sup>-dě xii tǎtá-dě. <sup>31</sup>Te ní xáha<sup>n</sup> tǎtá-dě xii-dé: “Yòhó déhe-í duca<sup>n</sup>-ni ndècu ndíhi ñaha-n xii-í, te nchaa sá ndécú ndíhi-í cúú-xí cuendá-n. <sup>32</sup>Te vitna dacuitíí tàú-xi sá cádá-ó vico, te cudíí iní-ó, chi ñaní-n-á<sup>n</sup> nǐ quide-í cuendá sá nǐ xíhí-dé ní cùu, te ñáhá chi ndècu vívú-dě, te sa ní xíta-dé ní cùu, te

ní nasáá méé-dě”, càchí-dé xǎha<sup>n</sup>-dě xii déhe-dé tée sàcuéhé-gǎ-á<sup>n</sup> — duha cuáhá<sup>n</sup> cuendú ní cani Jèsús núú-güedě.

**Nàcuáa ní quide ìì<sup>n</sup> tée tàxi tnuní ñáhá xii cue tée xìnu cuechi**

**16** Te Jèsús xáha<sup>n</sup>-gǎ xii cue tée xica cuu ndíhi-gá: —Ní xíndecu ìì<sup>n</sup> tée cuica, te duca<sup>n</sup> nǐ xíndecu ìì<sup>n</sup> tée ní taxi tnuní ñáhá xii cue tée ní xinu cuechi núú-dě. Te tée-á<sup>n</sup> nǐ xiní ñáhá ñáyüu dùhu-dé díhú<sup>n</sup> tée cùu patróó<sup>n</sup>-dě, te cuáhá<sup>n</sup>-dé dándòñuhu-dé, te ní xáhǎ<sup>n</sup>-yu xii tée cùu patróó<sup>n</sup>-dě sá dúcá<sup>n</sup> quide-dé. <sup>2</sup>Te tée cùu patróó<sup>n</sup>-dě-á<sup>n</sup> nǐ cana ñaha-dě xii-dé, te ní xáha<sup>n</sup>-dě: “¿Ná cuendá duha càhá<sup>n</sup> ñáyüu cuendá-n? Yáchí chi na tàxi cuendá-n nchàa chiu<sup>n</sup> ní quide-n, chi vitna te vǎ táxí tnuní-gá-n cuè tée xìnu cuechi núú-í”, càchí-dé xǎha<sup>n</sup>-dě. <sup>3</sup>Te tée tàxi tnuní ñáhá xii cue tée xìnu cuechi-á<sup>n</sup> nǐ sani iní-dé: “¿Te nása cada-í vitna na quèhndé patróó<sup>n</sup>-í chiú<sup>n</sup>-í? Chi ñá cúndèe-gá-í cada-í chiú<sup>n</sup> vée, te cùcaha<sup>n</sup> núú-í cácá<sup>n</sup> ndàhú-í. <sup>4</sup>Dico duha cada-í cuendá quehe<sup>n</sup> cuendá ñáhá ñáyüu vehé-yu òré ná quèhndé duu<sup>n</sup>-ná patróó<sup>n</sup>-í chiú<sup>n</sup>-í”, duha ní sani iní-dé. <sup>5</sup>Te sátá dúcá<sup>n</sup> te ní cana-dé ìì<sup>n</sup> ìì<sup>n</sup> cue tée tàú núú patróó<sup>n</sup>-güedě. Te tée díhna ní xícá<sup>n</sup> tnúhú-dě núú-dě, te xǎha<sup>n</sup>-dě: “¿Ndéé dau tàú-n núú patróó<sup>n</sup>-í?”, càchí-dé xǎha<sup>n</sup>-dě. <sup>6</sup>Te tée-á<sup>n</sup> nǐ xáha<sup>n</sup>-dě: “Tàú-í ìì<sup>n</sup> cièndú bàrríl acití”, càchí-dé xǎha<sup>n</sup>-dě. Te tée tàxi tnuní ñáhá xii cue tée xìnu cuechi-á<sup>n</sup> nǐ xáha<sup>n</sup>-dě: “Iha náu recíu-n-á, te ndadúha íngá sá údico úxí taxi-n”, càchí-dé xǎha<sup>n</sup>-dě. <sup>7</sup>Te

dătnùnî ní xícá<sup>n</sup> tnúhú tùcu-dé núú ìngá-dé, te xăha<sup>n</sup>-dê: “Te yòhó, ìndèé dau tàù-n-í?” cằchí-dé xăha<sup>n</sup>-dê. Te tée tàù-á<sup>n</sup> nĩ xăha<sup>n</sup>-dê: “H<sup>n</sup> cièndú ngohnchi trùu tàù-í”, cằchí-dé xăha<sup>n</sup>-dê. Te tée tàxi tnuní ñăhá xii cue tée xìnu cuechi-á<sup>n</sup> nĩ xăha<sup>n</sup>-dê: “Iha náu reciù-n-á, te cadúha ìngá sá cùmídícó-nă taxi-n”, cằchí-dé xăha<sup>n</sup>-dê. <sup>8</sup>Te tée cùu patróó<sup>n</sup>-á<sup>n</sup> nĩ cachí-dé sá ìo váha ñùhu díquí tée dùhu-á<sup>n</sup> nàcuáa cada-dé cundecu váha-dé. Te nchaa ñăyiu xĩndecu ichi cuèhè ichi duha, ío-gá váha ñùhu díquí-yu nàcuáa cadá-yu cundecu váha-yu ndìhi nchaa ñăyiu cundìhí-yu dàcúxí ñăyiu ndècu ichi Yá Ndiòxí.

<sup>9</sup>Te yúhú cằchí-í sá cadá-ndó să váha ndìhi nchaa sá ndécú ndìhi-ndo ní cuáha ñuyú yícá cuèchi-a, te duca<sup>n</sup> te coo cue tée ío váha tnahá tnúhu ndìhi-ndo, te òré ná ndìhi nchaa sá ìo ñuyú-a, te Yá Ndiòxí quehe<sup>n</sup> cuendá ñăhá-gă xii-ndo, te cundecu-ndo ndìhi-gá ni caa ni quíh<sup>n</sup>.

<sup>10</sup>Te núu ì<sup>n</sup> tée quide ndáá cuèi ì<sup>n</sup> chiù<sup>n</sup> líhli na cằda-dé, te diu-ni duca<sup>n</sup> quide ndáá-dé cuèi ì<sup>n</sup> chiù<sup>n</sup> cahnu na cada-dé. Dico tée ñá túú quide ndáá, chi cuèi chiù<sup>n</sup> líhli àdi chiu<sup>n</sup> cahnu na cada-dé dico ì<sup>n</sup>-ni quide-dé. <sup>11</sup>Te núu nchòhó vá cadá-ndó să váha ndìhi nchaa sá nĩ cuáha ñuyú yícá cuèchi-a ña, te Yá Ndiòxí vá táxi-gă sá váha ndècu ndìhi-gá xii-ndo. <sup>12</sup>Te núu vá cadá ndăá-ndó còto-ndo nchaa sá táxi nùu tnahă ñăyiu-ndo, te vá yòo taxi sá ndúú tàhú-ndó.

<sup>13</sup>Te ni ì<sup>n</sup> tée xìnu cuechi vá ndácú-dê cunu cuechi-dê núú

úú patróó<sup>n</sup>, chi tée-á<sup>n</sup> cuu váha iní-dé núú ì<sup>n</sup> patróó<sup>n</sup>-dê te tni-dé nchaa tnúhu cằhá<sup>n</sup> patróó<sup>n</sup> tée cùu váha iní-dé núú-xi-á<sup>n</sup>. Te núú ìngá tucu patróó<sup>n</sup>-dê vá cúú váha iní-dé, te ni vă tni-dê tnúhu cằhá<sup>n</sup> patróó<sup>n</sup>-dê-á<sup>n</sup>. Te duca<sup>n</sup> sătnahá-xi cùu nchòhó chi vá ndácú-ndó cunu cuechi-ndo núú Yá Ndiòxí te cuhu<sup>n</sup> iní-ndó nchăa sá ìo ñuyú-a — cằchí-gá xăha<sup>n</sup>-gă xii-güedé.

<sup>14</sup>Te nchaa cue tée cùu fariséú ío ñùhu iní-güedé nchaa sá ìo ñuyú-a, te xĩndedòho-güedé nchaa tnúhu cằhá<sup>n</sup> Jèsús, te ní cằhá<sup>n</sup> yíchí-güedé cuendá-gá. <sup>15</sup>Te Jèsús ní xăha<sup>n</sup>-gă xii-güedé:

—Nchòhó cúú-ndó cuè tée ío váha cằhá<sup>n</sup> núú ñăyiu cuendá-ni sá cuìni-ndó cằhá<sup>n</sup> váha-yu cuendá-ndó, dico Yá Ndiòxí xini ndáá-gá nàcuáa cằa iní-ndó ì<sup>n</sup> ì<sup>n</sup>-ndo, te nchaa sá cằchí cue ñăyiu ñuyú-a sá ìo nàndìhi, Yá Ndiòxí dáquèe tíhú-gă.

#### **Cuendá nchaa tnúhu ní chídó tnùnî ndíi Moisés**

<sup>16</sup>Te nchaa tnúhu ní chídó tnùnî ndíi Moisés cúnù-xi ni cuu, ndìhi nchaa tnúhu ní chídó tnùnî cue tée ní xóo cằhá<sup>n</sup> tnúhu Yá Ndiòxí ndéé sanaha. Dico cútnăhá ní ngúfta té Juáa tée ní xóo dacuàndute ñaha xii ñăyiu ní cằhá<sup>n</sup>-dé tnúhu-í, ndéé dává-á<sup>n</sup> ñà túú-gă ní cùnùu nchaa tnúhu ní chídó tnùnî ndíi Moisés ndìhi nchaa tnúhu ní chídó tnùnî cue tée ní xóo cằhá<sup>n</sup> tnúhu Yá Ndiòxí ndéé sanaha. Te diu-ni ndéé dává-á<sup>n</sup> nĩ quesaha ta təcú tnùnî ñăyiu nàcuáa ndíhu ndaha ñăha Yá Ndiòxí xii-yu, te vại ñăyiu ío sàni

iní-yu vitna nàcuáa cadá-yu ndíhu ndaha ñaha Yá Ndiöxí xií-yu. <sup>17</sup>Te nchaa tnúhu ní chídó tnùní ndíi Moisés ío ndáá càhá<sup>n</sup>-xi, te ndíhi-gá naa andíu ndíhi ñuyúu dàcúúxí sá ndíhí ì<sup>n</sup> ì<sup>n</sup> tnúhu-á<sup>n</sup> cada-xi nàcuáa càhá<sup>n</sup>-xi.

**Jèsús càhá<sup>n</sup>-gá cuèndá ñáiyu dàña tnahá**

(Mt. 19:1-12; Mr. 10:1-12)

<sup>18</sup>Te núu ì<sup>n</sup> té na dàña tnahá-dé, ndíhi ñadíhí-dé, te tnándaha tucu-dé ndíhi ingá-yu, te nèhé víhí quide-dé te núu duca<sup>n</sup> na càda-dé, te té na tnándaha ndíhi ñaha ní dáñá yì-xi, te ñu-ni duca<sup>n</sup> ñà túú cùu-xi sá vǎha te núu duca<sup>n</sup> na càdá-yu —càchí-gá xáha<sup>n</sup>-gá xii-güedé.

**Cuèndá ì<sup>n</sup> té na nàni Lázará ndíhi cuèndá ì<sup>n</sup> té na cuica**

<sup>19</sup>Te xǎha<sup>n</sup> tùcu-gá xii-güedé: —Ní xíndecu ì<sup>n</sup> té na cuica, te ní xóo cuihnu-dé mee-ni dǒo vǎha dóo vii càa, te nchaa nduu súúni vǎha ní xóo cada-dé vico vehe-dé. <sup>20</sup>Te ní xíndecu tucu ì<sup>n</sup> té na ndàhú ní xínani-dě Lázará, te té-á<sup>n</sup> ní cuhú-dé ní xíndecé-dé nitùhú-dé ndíhyi, te ì<sup>n</sup> nduu ì<sup>n</sup> nduu ní xóo taxinucóo ñaha-güedé xii-dé yuyèhe té na cuica-ǎ<sup>n</sup>. <sup>21</sup>Te té na ndàhú-á<sup>n</sup> ní xóo cuú-dé docó, te ní xóo cuiní-dé caxi-dé nchaa sá ñà túú-gǎ ní xǒo yáha caxi té na cuica-ǎ<sup>n</sup>, te ñà túú ní xǒo níhí-dě. Te cuèi iná ní xóo quíhí<sup>n</sup>-di ní xóo nayuu-di nchaa núu ndíhyi ndèé-dé-á<sup>n</sup>. <sup>22</sup>Te ní sáá ì<sup>n</sup> nduu te ní xíhí té na ndàhú-á<sup>n</sup>, te cue espíritu xínú cuèchi núu Yá Ndiöxí ndécá

ñaha-xi xii-dé cuándaa núu ndécú té Àbrahám cundecu-dé. Te ní sáá nduu ní xíhí té na cuica-ǎ<sup>n</sup> tnàhá-dé, te ní chindúxi ñaha-güedé xii-dé. <sup>23</sup>Te ní sáá-dé núu xíndecu nchaa ñáiyu ní xíhí ñà túú ní quide ndáá núu Yá Ndiöxí te xíá<sup>n</sup> ío ndòho-dé ndécú-dě, te ní ndonehe núu-dě te xica ní xini-dé té Àbrahám ndíhi té Lázará-á<sup>n</sup> xíndecu-güedé. <sup>24</sup>Te níhí ní càhá<sup>n</sup>-dé, te xǎha<sup>n</sup>-dě: “Yòhó tǎtá Àbrahám, cundàhú iní ñàhá xii-í, te cùñaha xii té Lázará ná dándaxi<sup>n</sup>-dé díquí ndàhá-dě, te na quixi-dé dándaxi<sup>n</sup>-dé yàa-í, chi ío ndòho-í ñùhù-í núu ñùhú núu càyú-a”, càchí-dé xǎha<sup>n</sup>-dě xii té Àbrahám. <sup>25</sup>Dico té Àbrahám ní xáha<sup>n</sup>-dě: “Ndàhú yòhó ñaní tnàhá-í, dandàcu iní sá ío váha ní xíndecu-n ñuyúu, te té Lázará ío ndàhú ní ndòho-dé ní xíndecu-dé. Te vitna ní nucúndecu váha-dé iha, te yòhó ndóhó-n vitna. <sup>26</sup>Te ñà díú-ní sá xǎha<sup>n</sup> tucu, chi cuádava ndècu ì<sup>n</sup> déhvá cùnú ñùhú nèhu-xi núu ndécú-ó, te cuèi nchaa ñáiyu xíndecu iha na càchí iní-yu quixí-yu núu ndécú-ndó dico vá ndácú-yu, te ní nchòhó vá ndácú-ndó quixi-ndo núu ndécú-ndí”, càchí-dé xǎha<sup>n</sup>-dě. <sup>27</sup>Te ní xáha<sup>n</sup> té na cuica-ǎ<sup>n</sup>: “Te núu duca<sup>n</sup> te càhá<sup>n</sup> ndàhú-í núu yòhó tǎtá Àbrahám vitna sá téndaha-n té Lázará ná quíhí<sup>n</sup>-dé vehe tǎtá-í, <sup>28</sup>chi ndècu úhú<sup>n</sup>-gá ñaní-í, te na cùñaha-dě xii-güedé sá vǎ càdá-güedé dàtná ní quide-í cuèndá sá vǎ quixí-güedé tnàhá-güedé núu ndécú-í ndóhò-í-a”, càchí-dé xǎha<sup>n</sup>-dě. <sup>29</sup>Te té Àbrahám ní xáha<sup>n</sup>-dě: “Mee-güedé ndécú ndíhi-güedé nchaa tnúhu ní chídó



tnùní ndíi Moisés, ndíhi nchaa tnúhu ní chídó tnùnì cue tée ní xóo cáhá<sup>n</sup> tnúhu Yá Ndiòxí ndéé sanaha, te nchaa tnúhu-á<sup>n</sup> ná tñi-güedé nàcuáa càhá<sup>n</sup>-xí”, càchí-dé xáha<sup>n</sup>-dë xii-dé. <sup>30</sup>Te ní xáha<sup>n</sup> tùcu tée cuica-ǎ<sup>n</sup>: “Tǎtá Àbrahám, dico vá cáda cuendá-güedé nchaa tnúhu-á<sup>n</sup>, dico núu ìi<sup>n</sup> ñáyiú ñá túú-gǎ ndécú ñyúyú ìi<sup>n</sup> ñáyiú ndècu ndíhi-n quíhí<sup>n</sup>-yu cáhá<sup>n</sup> ndíhi ñàhá-yu xii-güedé nàcuáa ndùu tnúhu váha, te ndixi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xáha<sup>n</sup>-dë xii-dé. <sup>31</sup>Dico té Àbrahám ní xáha<sup>n</sup>-dë: “Te núu ñá túú cuíní-güedé tñi-güedé tnúhu ní cáhá<sup>n</sup> ndíi Moisés, ndíhi tnúhu ní cáhá<sup>n</sup> cue tée ní xóo cáhá<sup>n</sup> tnúhu Yá Ndiòxí ndéé sanaha ña, te diu-ni duca<sup>n</sup> càda-güedé cuéi ìi<sup>n</sup> ñáyiú ní xíhí ná ndòtó-yu cúñàhá-yu nàcuáa ndùu tnúhu váha, chi vá quíndáá iní-güedé”, càchí té Àbrahám xáha<sup>n</sup>-dë xii tée cuica-ǎ<sup>n</sup> —càchí Jèsús xáha<sup>n</sup>-gǎ xii cue tée cùu fariséú.

### Quihi iní-ó vǎ cùndècu-o ichi cuèhé ichi duha

(Mt. 18:6-7, 21-22; Mr. 9:42)

**17** Te Jèsús ní xáha<sup>n</sup>-gǎ xii cue tée xica cuu ndíhi-gǎ:

—Dacuitíí sǎ cóo cuè tée dacàhá<sup>n</sup>-güedé ñáyiú cadá-yu nándi sá cuèhé sá dúhá, idico ndàhú ní cuu cue tée duca<sup>n</sup> na dàcahá<sup>n</sup> ñàhá xí-yu cadá-yu nándi sá cuèhé sá dúhá! <sup>2</sup>Chi váha-gǎ sá nùu na dàcutu ndéé ñáyiú ìi<sup>n</sup> yúú yǒdó dúcú<sup>n</sup>-güedé te dàquée ñàhá-yu xii-güedé xití ndute làmár, te ñá dǎú

sǎ cùndècu-güedé dacàhá<sup>n</sup>-güedé ñáyiú cadá-yu nándi sá cuèhé sá dúhá, cuéi ñáyiú ndàhú iní-xi dandàhú-güedé. <sup>3</sup>Te ío quíhi iní-ndó cùndècu-ndo.

Te núu ìi<sup>n</sup> ñanì tñàhá-ndó quide-dé ìi<sup>n</sup> sá ñà túú tàú-dé cada-dé sá cúú-xí-ndó te cáhá<sup>n</sup>-ndó dǒho-dé, te núu ní ndixi cuéchi iní-dé sá ñà túú ní quide váha-dé, te cada càhnu iní-ndó sǎ ñí quide-dé. <sup>4</sup>Te cuéi úsá xito na càda-dé nándi sá ñà túú tàú-dé cada-dé sá cúú-xí-ndó ìi<sup>n</sup> nduu, te núu na quíxi-dé úsá xito núú-ndó, te cachí-dé sá vǎ dúcá<sup>n</sup>-gǎ cada-dé, te xìni ñuhu-xi cada cahnu iní-ndó-dë —càchí-gǎ xáha<sup>n</sup>-gǎ xii-güedé.

### Ñáyiú sàndáá ndisa iní-xi

<sup>5</sup>Te ní xáha<sup>n</sup> cuè tée xica cuu ndíhi Jèsús xii-gǎ:

—Chindee ñàha xii-ndí cuendá duca<sup>n</sup> te quíndáá-gǎ iní-ndí sá Yá Ndiòxí ndácú-gǎ quidé-gǎ nchaa sá váha —càchí-güedé xáha<sup>n</sup>-güedé xii-gǎ.

<sup>6</sup>Te ní xáha<sup>n</sup> Jèsús:

—Te núu nchòhó quíndáá ndisa iní-ndó sùúnì cuèdicò luha líí dàtná cuíní-ndó càa ìi<sup>n</sup> ndíqu<sup>n</sup> yutnu nàni mostázá, te duca<sup>n</sup> te cuu cúñaha-ndo xii ìi<sup>n</sup> yutnu: “Quene-n ìha te quíhí<sup>n</sup>-n cuíhnu-n xití làmár”, duha cúñaha-ndo. Te duca<sup>n</sup> càda-xi te núu na quíndáá ndisa iní ñàhá-ndó xii-í —càchí-gǎ xáha<sup>n</sup>-gǎ xii-güedé.

### Nàcuáa tàù ìi<sup>n</sup> tée xìnu cuechi cada-dé

<sup>7</sup>Te xáha<sup>n</sup> tùcu-gǎ xii-güedé: —Te núu ìi<sup>n</sup> nchòhó ndécú ìi<sup>n</sup> tée xìnu cuechi núú-ndó, te cuáhá<sup>n</sup>-dé

yucu cuángada chiù<sup>n</sup>-dé, àdi cuáhá<sup>n</sup>-dé yucu coto-dé quiti, te òré ní nasáá-dé vehe sá ní sáhá<sup>n</sup>-dé yucu, te vá cũñaha nchòhó cue tée cùu patróó<sup>n</sup>-dë xii-dé: “Yáchí nehé caxi-n dítá”, vá dúhá cũñaha-ndo. <sup>8</sup>Chi nchòhó cue tée cùu patróó<sup>n</sup>-dë cúñaha-ndo xii-dé: “Cundihí iní cada túha sá cùdini-í, te díhna-gá-í caxi-í dítá te dătnùni caxi-n”, duha cúñaha nchòhó cue tée cùu patróó<sup>n</sup> xii-dé. <sup>9</sup>Te òré ná ndíhí chiù<sup>n</sup> ní táhú nchòhó cue tée cùu patróó<sup>n</sup> cada tée xínu cuechi núú-ndó, te ñá túú tàù-ndó ndacá<sup>n</sup> táhú-ndó nũú tée xínu cuechi núú-ndó. <sup>10</sup>Te duha cãhá<sup>n</sup>-í chi núú òré ná ndíhi nchaa chiu<sup>n</sup> ní táhú Yã Ndiöxí cada-ndo, te cachí-ndó: “Nchúhú cùú-ndï cue tée xínu cuechi núú Yã Ndiöxí, dico ñá túú tàù-gá ndacá<sup>n</sup> táhú-gã núú-ndï, chi mee-ni chiù<sup>n</sup> ní táhú-gã ní quide-ndï”, duha cachí-ndó —càchí-gã xáha<sup>n</sup>-gã xii-güedé.

**Jèsús quidé tătna-gá úxí cue tée tnàhá cuéhé sã dátèhyú nihnu-xi yiqui cùñú ñáyi**

<sup>11</sup>Te ñuhu Jesús ichi cuáhá<sup>n</sup>-gã ñuú Jerusalén, te ní yáha-gá núú ràyá distritú Sãmariá ndíhi distritú Galileá. <sup>12</sup>Te ta cùyatni-gá ì<sup>n</sup> ñuú líhli cuáhá<sup>n</sup>, te ní sátnahá ñáhá ùxí tnàhá cue tée cùhú xii-gá, te tnàhá-güedé cuéhé sã dátèhyú nihnu-xi yiqui cùñú-ó dico xica lùha ní ngúnu tníi-güedé, <sup>13</sup>te níhi ní cãhá<sup>n</sup>-güedé, te xãha<sup>n</sup>-güedë xii Jèsús:

—iMèstrú, cundáhú iní ñáhá xii-ndí! —càchí-güedé xãha<sup>n</sup>-güedë xii-gá.

<sup>14</sup>Te òré ní xiní ñáhá Jèsús xii-güedé, te ní xáha<sup>n</sup>-gã:

—Chí cuáhá<sup>n</sup> núú dütú ná cundehe ñaha-dé xii-ndo —càchí-gã xáha<sup>n</sup>-gã xii-güedé.

Te ní xica-güedé cuáhá<sup>n</sup>-güedé, te ichi-ni ñuhu-güedé cuáhá<sup>n</sup>-güedé ní ndúha-güedé cuéhé tnàhá-güedé.

<sup>15</sup>Te nchaa-güedé ní cutnùni iní-güedé sá ní ndúha-güedé, dico ì<sup>n</sup>-ni-dé ní nacuico-dë, te ní ngúita-dé níhi ní cãhá<sup>n</sup>-dé, te ní cachí-dé sá ìo cãhnu cuu Yã Ndiöxí.

<sup>16</sup>Te ní ngüññí xítí-dë núú Jèsús, te ní nuu núú-dë ndàa núú ññhú ndacá<sup>n</sup> táhú-dë núú-gã. Te tée-á<sup>n</sup> cùú-dë tée distritú Sãmariá. <sup>17</sup>Te Jèsús ní cachí-gá:

—Úxí tnàhá-güedé ní ndúha cuéhé tnàhá-güedé. ¿Te ndèè ndécú dàva-gã-güedé-i? <sup>18</sup>¿Te náa ì<sup>n</sup>dii-ni tée ìngá ñuú-a ní nacuico-dë ndacá<sup>n</sup> táhú-dë núú Yã Ndiöxí, te càchí-dé sá ìo cãhnu cuu-gã ñã? —càchí-gã.

<sup>19</sup>Te ní xáha<sup>n</sup>-gã xii tée-á<sup>n</sup>:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yã Ndiöxí —càchí-gã xáha<sup>n</sup>-gã xii-dé.

**Nàcuáa yìndaha ñaha Yã Ndiöxí**

(Mt. 24:23-28, 36-41)

<sup>20</sup>Te cue tée cùu fariséú ní xicá<sup>n</sup> tnúhú-güedë núú Jèsús nũu ná ama ngúita Yã Ndiöxí ndíhu ndaha-gã ñáyi. Te ní xáha<sup>n</sup>-gã:

—Ñá túú nã cada-xi ñuyúú quiní-ndó cuendá cutnùni iní-ndó sã ndíhu ndaha ñaha Yã Ndiöxí xii-ndo. <sup>21</sup>Te ni vã yõo cachí: “Iha ndècu-gã táxí tnùní-gã, àdi yacá<sup>n</sup> ndécú-gã táxí tnùní-gã”, chi tnuú-ndó sà ndecu-gã ndíhi nchaa

ñáyi u yindaha-gá —càchí-gá xáha<sup>n</sup>-gã xii-güedé.

<sup>22</sup>Te ní xáha<sup>n</sup>-gã xii cue téé xica cuu ndihí-gá:

—Te nchòhó chi sáá nduu, te cachí iní-ndó sã sũúni cuèdìcò ìí<sup>n</sup> nduu quini ñáhá-ndó xii yúhú Téé cùu ñaní tnáhá-ndó nchàa-ndo, dico vá quini ñáhá-gã-ndó xii-í. <sup>23</sup>Te coo ñáyi cúnàhá-yu xii-ndo: “Iha ndècu-gá, á<sup>n</sup> yàcá<sup>n</sup> ndécú-gã”, quesàhá-yu cúnàhá-yu xii-ndo. Dico vá quindáá iní-ndó quíhí<sup>n</sup>-ndó ndìhí-yu núu càchí-yu, te ni vã cání ìní-ndó quíhí<sup>n</sup> méé-ndó. <sup>24</sup>Chi dàtná cuíni-ndó quide-xi oré sàá ndúté àndiu, chi uu<sup>n</sup>ni dàyehé-xi nihí ñuyú, duca<sup>n</sup> càda-xi nduu na quixi tucu yúhú Téé cùu ñaní tnáhá-ndó nchàa-ndo, te dàvá-á<sup>n</sup> quini ñáhá nchàa-ndi túhú ñáyi xii-í. <sup>25</sup>Dico díhna-gá ndoho vìhi-í, te daquèe t́hú ñáhá ñáyi ñuyú-a xii-í. <sup>26</sup>Te cadá-yu dàtná ní quide ñáyi ní xíndecu cúnàhá ní xíndecu té Nòé, te diu-ni duca<sup>n</sup> sãtnahá-xi cada nchaa ñáyi ndècu vitna ndéé sáá nduu quixi tucu yúhú Téé cùu ñaní tnáhá-ndó nchàa-ndo. <sup>27</sup>Chi caxi-ní-yu, coho-ní-yu, te caca cuu-ni cue téé xica ndáhú, te tnãndaha-ní-yu, chi duca<sup>n</sup> ní quidé-yu dàvá-á<sup>n</sup> ndéé ní sáá nduu cuãnguee té Nòé xití bàrcú, te ní ngúita-xi ní cuu<sup>n</sup> dáu ní ndaa ndute ñuyú, te nchaá-yu ní xíhí ní cáhá-yu dàvá-á<sup>n</sup>. <sup>28</sup>Te diu-ni duca<sup>n</sup> ní quide tucu ñáyi cúnàhá ní xíndecu té Lõt, chi xèxi-yu xihí-yu, te sàá<sup>n</sup>-yu te nàdicó-yu, te xíxitú-yu nándi sá xíxitú-yu, te nchaa cue téé xidácáá-güedé vehe. <sup>29</sup>Te òrè ní quee té Lõt ñuú Sòdomá, te ní

ngoyo ñuhú andiu, te dàcá yúu sũúni dícó ní nduu ñuhú-nã-xi, te ní xíhí nchaandi túhú ñáyi ñuú-á<sup>n</sup>. <sup>30</sup>Te diu-ni duca<sup>n</sup> sãtnahá-xi cada ñáyi na sáá nduu quixi tucu yúhú Téé cùu ñaní tnáhá-ndó nchàa-ndo ñuyú-a.

<sup>31</sup>Te núu ìí<sup>n</sup> ñáyi càndodó-yu díquí vèhè-yu nduu-á<sup>n</sup>, te ni vá ndìhu-gá-yu quehé<sup>n</sup>-yu ìí<sup>n</sup> ndachíu<sup>n</sup>-yu canehé-yu quíhí<sup>n</sup>, te ñáyi cuáhá<sup>n</sup> yucu, te ni vá ñuhú-gá-yu vèhé-yu. <sup>32</sup>Te chí dándàcu iní nàcuáa ní yáha ñadìhí té Lõt. <sup>33</sup>Te nchaa ñáyi cuíni dàcácu nihnu mee-xi ñuyú-a ña, te cuíta nihnú-yu, te nchaa ñáyi na cùú sá cuendá-í, te naníhí tàhú-yu.

<sup>34</sup>Te na càchí tnúhu tucu-í xii-ndo sã ndùu-á<sup>n</sup>, te núu úú-yu càa ìí<sup>n</sup> núu xito, te ìí<sup>n</sup>-yu ndanchitá-yu ndaa-yu andiu, te ìí<sup>n</sup>-yu quendóo. <sup>35</sup>Te núu úú ñáyi dìhí nchícò-yu ìí<sup>n</sup>-ni vèhe, te ìí<sup>n</sup>-yu ndanchitá-yu ndaa-yu andiu, te ìí<sup>n</sup>-yu quendóo. <sup>36</sup>Te núu úú cue téé yìhi-güedé yucu, te ìí<sup>n</sup>-dé ndànchita-dé ndaa-dé andiu, te ìí<sup>n</sup>-dé quendóo —càchí-gá xáha<sup>n</sup>-gã xii-güedé.

<sup>37</sup>Te sá dúcá<sup>n</sup> ní cáhá<sup>n</sup>-gã ñuú ní xícá<sup>n</sup> tnúhú-güedé núu-gã, te xáha<sup>n</sup>-güedé xii-gá:  
—Mèstrú, ¿te ndéé duca<sup>n</sup> càda-xi-í?  
—cachí-güedé xáha<sup>n</sup>-güedé xii-gá.

Te ní xáha<sup>n</sup>-gã:  
—Te nchòhó xini-ndó sã ncháá ñúú yúcu yàqui cuñú ní xíhí, te yàcá<sup>n</sup> tàcá cue ndixí xéxi-güedé —cachí-gá xáha<sup>n</sup>-gã xii-güedé.

Jèsús càhá<sup>n</sup>-gá cuendá ìí<sup>n</sup> juèxi ndihí cuendá ìí<sup>n</sup> ñaha quèé

**18** Te Jèsús ní cani-gá ìí<sup>n</sup> cuendú núu-güedé cuendá

sá vǎ ná tǔhú iní-güedé cáhá<sup>n</sup>  
ndíhi-güedé Yǎ Ndiöxí nchaá-ni òré.

<sup>2</sup>Te xáha<sup>n</sup>-gǎ:

—Hí<sup>n</sup> ñúú ndécú ì<sup>n</sup> juéxí, te ni ñà túú sàndáá iní-dé Yǎ Ndiöxí, te ni ì<sup>n</sup> tnúhu xáha<sup>n</sup> ñǎyiu ñá túú cuíní-dé cada cuendá-dé. <sup>3</sup>Te òu-ni ñúú-á<sup>n</sup> ndécú tùcu ì<sup>n</sup> ñadihí ñaha quèé, te ní sáhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú juéxí-á<sup>n</sup> cuendá cada ndáá-dé ì<sup>n</sup> cuéchi. <sup>4</sup>Te titní xito ní cuu sàhá<sup>n</sup>-a<sup>n</sup> càhá<sup>n</sup> ndàhú-a<sup>n</sup> núú-dě te ñá túú cuíní-dé cada cuendá-dé tnúhu càhá<sup>n</sup>-a<sup>n</sup> ni cùu, te ndéé núú ñà cùú-gǎ te ní sani iní-dé: “Te cuèi ñá túú sàndáá iní-í Yǎ Ndiöxí, te ni ñà túú quide cuendá-í nchaá tnúhu càhá<sup>n</sup> ñǎyiu cada-í, <sup>5</sup>dico na càda ndáá-í cuendá ñaha quèé-a ndíhi ñáyiu cùu úhú iní tnáhá ndíhi-a<sup>n</sup>, chi vá cùndèe-gǎ iní-í nuu núú quixi-a<sup>n</sup> dasàtú iní ñáhá xii-í”, duha ní sani iní tée cùu juéxí-á<sup>n</sup> — càchí-gǎ xáha<sup>n</sup>-gǎ xii-güedé.

<sup>6</sup>Te ní xáha<sup>n</sup> tùcu-gǎ xii-güedé:

—Cada cuendá-ndó nàcuáa ní sani iní juéxí tée cuihna iní-xi-á<sup>n</sup>. <sup>7</sup>Te Yǎ Ndiöxí ío chindee-gǎ nchaá ñáyiu ní cáhá<sup>n</sup>-gǎ cundecu ndíhi-gǎ, chi cuèi nduu cuèi niú càhá<sup>n</sup> ndíhi ñáhá-yu xii-gǎ, te vá cùyàa-gǎ nachinaa-gǎ nchaá sá quidé ñaha nchaá ñáyiu cùu úhú iní ñáhá xii-yu. <sup>8</sup>Te ío ndíhi duca<sup>n</sup> càda-gǎ. Te òré ná quixí yúhú Tée cùu ñaní tnáhá-ndó nchàa-ndo, òte náa naníhí-gǎ-í ñáyiu sàndáá ndisa iní Yǎ Ndiöxí-ǎ”? —càchí-gǎ xáha<sup>n</sup>-gǎ xii-güedé.

**Nàcuáa quide ì<sup>n</sup> tée cùu fariséu  
ndíhi ì<sup>n</sup> tée cùu cobradó**

<sup>9</sup>Te Jèsús ní cáhá<sup>n</sup>-gǎ núú ñáyiu nàcuáa quide ñáyiu sàni iní sá ío

quide ndáá te dàquee tíhú-yu tnàha ñáyiu-yu, te xáha<sup>n</sup>-gǎ xii-yu:

<sup>10</sup>—Úú cue tée cuáhá<sup>n</sup>-güedé veñúhu càhnu sá ío cùnuu cáhá<sup>n</sup> ndíhi-güedé Yǎ Ndiöxí, te ì<sup>n</sup>-dé cùú-dě tée cùu fariséu, te ingá-dé cùú-dě tée cuihna iní-xi quide cobrá ñáhá xii ñáyiu cuendá impuèstú.

<sup>11</sup>Te tée cùu fariséu-á<sup>n</sup> nútní-dé càhá<sup>n</sup> ndíhi-dé Yǎ Ndiöxí, te xáha<sup>n</sup>-dě xii-gǎ: “Yòhó Dútú Ndiöxí ndàcá<sup>n</sup> tǎhù-í núú-n, chi ñá túú quide-í dàtná quidé dàva-gǎ-güedé, chi dùhu-güedé, càhá<sup>n</sup> ndíhi-güedé ñadihí te ñá dǎú ñadihí-güedé cùú-yu, te nándi-gǎ nchaá sá cuèhé sá dúhá quide-güedé, te ni ñà túú quide-í dàtná quidé tée cuihna iní-xi quide cobrá ñáhá xii ñáyiu cuendá impuèstú ndécú ìha. <sup>12</sup>Chi yúhú ñá túú tnàhí ná xéxi-í úú nduu xití samàná cuendá sá càhá<sup>n</sup> ndíhi ñaha-í xii-n, te nchaá sá ñíhí-í te càhu-í úxí xichi, te ì<sup>n</sup> xichi tàxi-í xii-n”, càchí-dé xáha<sup>n</sup>-dě xii Yǎ Ndiöxí. <sup>13</sup>Dico tée cuihna iní-xi quide cobrá ñáhá xii ñáyiu cuendá impuèstú-á<sup>n</sup> chi xica lùha nutní-dé, te ni lùha ñá túú cùyii-dé ndonehe núú-dě andiu cuendá sá ndíxí cuèchi iní-dé nchaá sá ñà túú vǎha quide-dé, te ndèdí ndaha-dé pèchú-dé sá ndíhú iní-dé, te xáha<sup>n</sup>-dě xii Yǎ Ndiöxí: “íYòhó Dútú Ndiöxí cundàhú iní ñáhá xii-í, chi ío cuèhé sǎ ñà túú vǎha quide-í núú-n!”, càchí-dé xáha<sup>n</sup>-dě xii Yǎ Ndiöxí. <sup>14</sup>Te na càchí tnúhu-í xii-ndo sǎ tée cuihna iní-xi quide cobrá ñáhá xii ñáyiu-á<sup>n</sup> ní tedóho Yǎ Ndiöxí nchaá tnúhu ní cáhá<sup>n</sup>-dé, te ní quide càhnu iní-gǎ nchaá sá ñà túú vǎha ní quide-dé, te

cuànuhú-dé vehe-dé. Te tée cùu fariséú-á<sup>n</sup> ñà túú ní tètóho ñaha Yă Ndióxí xii-dé. Chi nchaa ñáyiú na càda cahnu mee-xi ñuyíú-a te vá cùú-yu ñáyiú cùnuu, te nchaa ñáyiú ñá túú quide cahnu mee-xi, ñáyiú-á<sup>n</sup> cunúú-yu —càchí Jèsús xáha<sup>n</sup>-gă xii-yu.

### Jèsús quidé íí-gă landú

(Mt. 19:13-15; Mr. 10:13-16)

<sup>15</sup>Te íí<sup>n</sup> úú ñáyiú ndécá-yu landú líhli cuáhá<sup>n</sup> núú Jèsús chi cuíní-yu sá tэндàha ñaha-gă xii-güexi, te òré ní xiní cue tée xica cuu ndíhi-gă sá ndécă-yu landú-á<sup>n</sup> cuáhá<sup>n</sup> núú-gă, te ní ngüíta-güedé ténàá ñáhá-güedě xii-yu, te xáha<sup>n</sup>-güedě sá vă dúcá<sup>n</sup> càdá-yu. <sup>16</sup>Dico Jèsús ní cana ñaha-gă xii-güedé, te ní xáha<sup>n</sup>-gă:

—Chí dáñá ná quèxi nahi landú líhli-á<sup>n</sup> nùú-í-a, te vá càdí-ndó ìchi-güexi, chi dàtná cúú vâha iní cue landú líhli-á<sup>n</sup> duca<sup>n</sup> cùu váha iní cue ñáyiú yindaha ñaha Yă Ndióxí. <sup>17</sup>Te na càchí tnúhu ndáá-í xii-ndo să nùu vá quindáá iní ñáhá-ndó dàtná quidé dâva landú líhli sàndáá iní ñáhá xii-í, te vá ndíhu ndaha ñaha Yă Ndióxí xii-ndo, te vá ndúú tãhú-ndó cùndecu-ndo ndíhi-gă ní caa ní quíhí<sup>n</sup> —càchí-gă xáha<sup>n</sup>-gă xii-güedé.

### Íí<sup>n</sup> tée cuica càhá<sup>n</sup> ndíhi-dé Jèsús

(Mt. 19:16-30; Mr. 10:17-31)

<sup>18</sup>Te íí<sup>n</sup> tée cùnuu ní xicá<sup>n</sup> tnúhú-dě núú Jèsús, te xáha<sup>n</sup>-dě xii-gă:

—Yòhó Mèstrú, cùu-n tée ío váha iní-xi, te cuíní-í nùu vá cùndèe iní-n càchí tnúhu-n nă cúú să vâha cada-í

cuendá nduu táhú-í cundecu-í ndíhi Yă Ndióxí ní caa ní quíhí<sup>n</sup> —càchí-dé xáha<sup>n</sup>-dě xii-gă.

<sup>19</sup>Te Jèsús ní xáha<sup>n</sup>-gă xii-dé:

—¿Te cùtnuní iní-n nàcuáa nduu tnúhu càhá<sup>n</sup>-n să yúhú váha iní-á<sup>n</sup>? Chi íí<sup>n</sup> dîi díí-ni Yă Ndióxí váha iní-gă. <sup>20</sup>Te yòhó xiní-n nàcuáa ní cachí Yă Ndióxí cada ñáyiú, te duha ní cachí-gă: “Nchòhó cue tée vá càhá<sup>n</sup> ndíhi-ndo ñàdihí te núu ñá dîú ñàdihí-ndó cùu-yu, te duca<sup>n</sup>-ni nchòhó cue ñáyiú dîhí tucu vá càhá<sup>n</sup> ndíhi-ndo tée te núu ñá dîú yîi-ndo cuu-güedé, te vá cáhni-ndó tnàha ñáyiú-ndo, te ní vă dúhú-ndó să ndécú ndíhi-yu, te ní vă dácàcu-ndo cuéchi neñúú sá cúú-xí tnàha ñáyiú-ndo, te canehe-ndo să yíñuhu núú tâtá-ndó ndíhi núú năná-ndó”, duha ní cachí Yă Ndióxí cada ñáyiú —càchí Jèsús xáha<sup>n</sup>-gă xii-dé.

<sup>21</sup>Te tée-á<sup>n</sup> ní xáha<sup>n</sup>-dě xii-gă:

—Nchaa xíá<sup>n</sup> ní ngüíta-í quidè-í ndéé cútnàhá cúú làndú-í —càchí-dé xáha<sup>n</sup>-dě xii-gă.

<sup>22</sup>Te Jèsús ní xáha<sup>n</sup>-gă xii-dé:

—Dico cùmání ìngá núú să cadá-n, vitna te quíhí<sup>n</sup>-n te dico-n nchàa sá ndécú ndíhi-n, te díhú<sup>n</sup>-n cuáha táhú-n cuè ñáyiú ndàhú, te duca<sup>n</sup> te nduu táhú-n cùndecu váha-n nùú ndécú Yă Ndióxí táxí tnúní-gă, te na yâha duca<sup>n</sup> càda-n te quixi-n chitnahá ñáhá-n xii-í —càchí-gă xáha<sup>n</sup>-gă xii-dé.

<sup>23</sup>Te sá dúcá<sup>n</sup> ní xáha<sup>n</sup> Jèsús xii-dé, te ío ní cundÿí-dé, chi ío cuica-dě. <sup>24</sup>Te sá ní xiní ñáhá Jèsús xii-dé cundÿí-dé, núu ní cachí-gă:

—Íío úhú quindáá iní ñáyiú cuica Yă Ndióxí cuendá ndíhu ndaha ñaha-gă xii-yu! <sup>25</sup>Te yáchí-gă

yáha ì<sup>n</sup> càméyu yaú ì<sup>n</sup> yiqui tìcú dácúxí sǎ quèndáá iní ì<sup>n</sup> ñáyiu cuica Yǎ Ndiòxí cuèndá ndíhu ndaha ñàha-gá xíi-yu —duha ní cachí-gá.

<sup>26</sup>Te nchaa ñáyiu ní tecú dóho-xi tnúhu ní cáhá<sup>n</sup>-gá ní xáhǎ<sup>n</sup>-yu xii-gá:

—¿Te yoo naníhí tǎhú te núu duca<sup>n</sup> vai<sup>n</sup>? —càchí-yu xáhǎ<sup>n</sup>-yu xii-gá.

<sup>27</sup>Te Jèsús ní xáha<sup>n</sup>-gǎ xii-yu:

—Cue ñáyiu ñuyíu-a chi vá ndácū-yu ná cadá-yu nàcuáa ndíhu ndaha ñàha Yǎ Ndiòxí xii-yu, dico mee-gǎ chi ndacu-gá ndíhu ndaha ñàha-gá xii-yu chi nchaa sá vǎha ndàcu-gá quidé-gǎ —càchí-gá xáha<sup>n</sup>-gǎ xii-yu.

<sup>28</sup>Te té Pèlú ní xáha<sup>n</sup>-dǎ xii-gá:

—Nchúhú ní dándǎo-ndí nchaa sá ndécú ndíhi-ndí, te ní tuha ñaha-ndí xii-n —càchí-dé xǎha<sup>n</sup>-dǎ xii-gá.

<sup>29</sup>Te ní xáha<sup>n</sup>-gǎ xii ñáyiu:

—Na càchí tnúhu ndáá-í xii-ndo sǎ ncháá ñáyiu na dándóo vehe-xi, àdi tátá-xi, nǎná-xi, ñaní-xi, cúha-xi, ñadìhí-xi, déhe-xi cuèndá sá cuiní-yu ndíhu ndaha ñàha Yǎ Ndiòxí xii-yu, <sup>30</sup>te ío-gá cuéhé sǎ cuǎñaha-gǎ xii-yu cundecu ndíhí-yu, te ñá díú-ní xǎ<sup>n</sup>, chi tnàhá nduu tǎhǎ-yu cundecu ndíhi ñàhá-yu xii-í ni caa ni quíhí<sup>n</sup> ná sàá nduu —càchí-gá xáha<sup>n</sup>-gǎ xii-yu.

### Jèsús càhá<sup>n</sup> tucu-gá sá cáhni ñàha-güedé xii-gá

(Mt. 20:17-19; Mr. 10:32-34)

<sup>31</sup>Te Jèsús ní taudì<sup>n</sup>-gá ndi ùxúú cue téé xica cuu ndíhi-gá tnuú ñáyiu, te ní xáha<sup>n</sup>-gǎ xii-güedé:

—Vitna te quíhí<sup>n</sup>-ó ñúú Jerusálén, chi yàcá<sup>n</sup> cada-xi nchaa nàcuáa

sa ní chídó tnùní cue téé ní xóo cáhá<sup>n</sup> tnúhu Yǎ Ndiòxí ndéé sanaha nàcuáa yáha yúhú Téé cùu ñaní tnàhá-ndó nchàa-ndo. <sup>32</sup>Chi cuáha cuèndá ñàhá-güedé xii-í núú cuè téé ñá túú cùu cue téé israél, te cudíquí ndéé ñàhá-güedé xii-í, te cúcuèhé ñàhá-güedé, te tíú díí ñàhá-güedé xii-í. <sup>33</sup>Te caniha-güedé ndíhi ñíhi, te dàtnùní cahni ñaha-güedé xii-í, dico nduu úní sá cùú-í te ndoto-í —càchí-gá xáha<sup>n</sup>-gǎ xii-güedé.

<sup>34</sup>Dico ni ì<sup>n</sup> tnúhu ní cáhá<sup>n</sup>-gá ñá túú ní tècú tnùní-güedé, chi ío yidáhu tnúhu ní cáhá<sup>n</sup>-gá ñuu xǎ<sup>n</sup> ni ì<sup>n</sup> ñá túú ní tècú tnùní-güedé.

### Jèsús quidé tátna-gá núú ì<sup>n</sup> téé cuàá ñúú Jericó

(Mt. 20:29-34; Mr. 10:46-52)

<sup>35</sup>Te òré tá cùyatni Jesús ñúú Jericó cuáhá<sup>n</sup>, te yuhu ìchi cuáhá<sup>n</sup>-gá-án núcóo ì<sup>n</sup> téé cuàá xìcá<sup>n</sup> ndàhú-dé. <sup>36</sup>Te òré ní tecú dóho-dé xìcáhá<sup>n</sup> vai ñáyiu xíyáha-yu, te ní xìcá<sup>n</sup> tnúhú-dǎ núú ñáyiu ndècu ndíhi-dé ná cuèndá duca<sup>n</sup> vai-yu yáha. <sup>37</sup>Te ní xáhǎ<sup>n</sup>-yu sá Jèsús téé ñúú Nazàrét ñúhú-dǎ ichi. <sup>38</sup>Te níhi ní cáhá<sup>n</sup>-dé, te xǎha<sup>n</sup>-dǎ xii-gá: —iJèsús ñaní tnàhá ndíi Dàvíi, cundàhú iní ñàhá xii-í! —càchí-dé xǎha<sup>n</sup>-dǎ xii-gá.

<sup>39</sup>Te ñáyiu xìxódó núú ñúú Jèsús ní tenàá ñàhǎ-yu xii-dé, te xáhǎ<sup>n</sup>-yu sá ná càdí-dé yuhu-dé dico uu<sup>n</sup>-gá níhi ní cáhá<sup>n</sup>-dé xǎha<sup>n</sup>-dǎ xii-gá: —iYòhó téé cùu ñaní tnàhá ndíi Dàvíi, cundàhú iní ñàhá xii-í! —càchí-dé xǎha<sup>n</sup>-dǎ xii-gá.

<sup>40</sup>Te Jèsús ní ngüíñí-gá, te ní táúchí<sup>n</sup>-gǎ ní sǎnguehe<sup>n</sup> ñaha cue téé ndíhi-gá. Te òré ní quexio-dé

núu-gǎ, te ní xícá<sup>n</sup> tnúhú-gǎ núu-dě, te xáha<sup>n</sup>-gǎ:

<sup>41</sup>—¿Ná cuiní-n cada ñaha-í xii-n-í? —càchí-gá xáha<sup>n</sup>-gǎ xii-dé.

Te tée cuàá-á<sup>n</sup> ñí xáha<sup>n</sup>-dě:

—Mèstrú, cuiní-í cada tátna-n nùu-í cuendá cundehe-í —càchí-dé xáha<sup>n</sup>-dě xii-gǎ.

<sup>42</sup>Te Jèsús ní xáha<sup>n</sup>-gǎ:

—Sa ní ndúha núu-n chi ní sándáa iní-n Yá Ndiöxí —càchí-gá xáha<sup>n</sup>-gǎ xii-dé.

<sup>43</sup>Te òré-ni-á<sup>n</sup> ñí ndúha núu-dě, te ní chinchícú<sup>n</sup>-dé Jèsús, te ní cachí-dé sá ìo càhnu cuu Yá Ndiöxí. Te nchaa ñáyiú ní xiní nàcuáa ní cuu ní ndúha núu-dě tnàhá-yu ní cachí-yu sá ìo càhnu cuu Yá Ndiöxí.

### Jèsús ndìhi ìì<sup>n</sup> tée nàni Zaqueú

**19** Te Jèsús ní sáa-gǎ ñuú Jericó, te ta yáha-gǎ xití ñuú-á<sup>n</sup> cuáhá<sup>n</sup>. <sup>2</sup>Te ñuú-á<sup>n</sup> ndécú ìì<sup>n</sup> tée cuica nàni-dé Zaqueú, te cùnuu-dé táxí tnùní-dé cue tée cùndìhi-dé, cue tée cuihna iní-xi quìde cobrá ñáhá xii ñáyiú cuendá impuèstú. <sup>3</sup>Te tée-á<sup>n</sup> cuiní-dé quiní-dé Jèsús òré-á<sup>n</sup> ní cùu te ñá ní ndàcu-dé, chi ìo cuéhé ñáyiú, te ñá túú dùcú<sup>n</sup>-dé. <sup>4</sup>Te xinu-dé ní ngódo núu-dě te ní sáa-dé díquí ìì<sup>n</sup> yutnu sìcómorú nùtní yatni yuhu ichi núu yáha Jèsús cuendá cuiní-dé quiní ñáhá-dě xii-gǎ. <sup>5</sup>Te òré tá yáha Jèsús xía<sup>n</sup>, te ní ndonehe núu-gǎ díquí yutnu núu cándòdo-dé-á<sup>n</sup>, te ní xáha<sup>n</sup>-gǎ xii-dé:

—Zaqueú, tanùu ndíhi díquí yutnu-á<sup>n</sup>, chi tnaví quexìo-í vehe-n ndètátú-í —càchí-gá xáha<sup>n</sup>-gǎ xii-dé.

<sup>6</sup>Te té Zaqueú-á<sup>n</sup> ñí nuu ndíhi-dé díquí yutnu-á<sup>n</sup>, te ìo ní cudíí iní-dé

ní quehe<sup>n</sup> cuendá-dé Jèsús vehe-dé.

<sup>7</sup>Te sá ñí xiní ñáyiú ní quexìo Jesús vehe-dé, te nchaá-yu ní ngúita-yu càhá<sup>n</sup> cuéhé-yu cuendá-gǎ, te xitnàhá-yu:

—Tée-a cuánguihu-dé vehe ìì<sup>n</sup> tée ndécú ichi cuéhé ichi duha —càchí-yu xitnàhá-yu.

<sup>8</sup>Te té Zaqueú-á<sup>n</sup> ñí ndacuíní-dé tnuú-yu, te xáha<sup>n</sup>-dě xii Jèsús:

—Yòhò Mèstrú, na cuáha-í ñáyiú ndàhú cuádava nchaa sá ndécú ndìhi-í. Te núu yoo ní dándàhú-í ní dúhù-í, te codo ùní-gǎ tnàhá sá ñí dúhù-í-yu nacuáñaha-í xii-yu —càchí-dé xáha<sup>n</sup>-dě xii-gǎ.

<sup>9</sup>Te Jèsús ní xáha<sup>n</sup>-gǎ xii té Zaqueú:

—Vitna ní naníhí tàhú-n ndìhi nchaa ñáyiú xíndecu vehe-n, chi tnàhá-n cùu-n ñaní tnáhá ndí Àbrahám. <sup>10</sup>Te yúhú Tée cùu ñaní tnáhá-ndó nchàa-ndo véxi-í nándùcu-í ñáyiú ní xíta nihnu cuendá dàcácu nihnu-í-yu núu ùhú núu ndàhú —càchí-gǎ xáha<sup>n</sup>-gǎ xii-dé.

### Nàcuáa ní quide-güedé ndìhi díhú<sup>n</sup> cuáá<sup>n</sup>

(Mt. 25:14-30)

<sup>11</sup>Te nchaa ñáyiú-á<sup>n</sup> ñí sani iní-yu sá ndíhi-ni ndíhu ndaha ñaha Yá Ndiöxí xii-yu cuendá sá ñí cuyatni Jèsús ñuú Jerusalén, te xía<sup>n</sup> núu ní ngúita Jèsús ní caní-gǎ ìì<sup>n</sup> cuendú núu-yu cuendá tecú tnùní váha-yu tnúhu-gǎ. <sup>12</sup>Te xáha<sup>n</sup>-gǎ xii-yu:

—Ní xíndecu ìì<sup>n</sup> tée cùu ñaní tnáhá ñáyiú cùnuu, te cuáhá<sup>n</sup>-dé ìngá ñuú xícá cuendá yàcá<sup>n</sup> cuáha ñaha-güedé chiú<sup>n</sup> coo-dé, te dàtnùnì ndixi-dé quindaha-dě titní ñuú.

13 Te cùmání-gã quee-dé quíhí<sup>n</sup>-dé, te ní cana-dé úxí cue tée xínu cuechi núú-dě, te ní sáñaha-dě ndí díí<sup>n</sup> núú-güedě íí<sup>n</sup> caa íí<sup>n</sup> caa díhú<sup>n</sup> cuàá<sup>n</sup>, te ní xáha<sup>n</sup>-dě: “Chí cádá ndáhú ndíhi díhú<sup>n</sup>-ã<sup>n</sup> ndèé ná sàá nduu nàsáá-í”, cächí-dé xáha<sup>n</sup>-dě xii-güedé. 14 Dico nchaa ñáyiú ñúú quindaha-dě-á<sup>n</sup> ñà túú tnàhá iní-yu sá quíndàha ñaha-dé, núú ní tendàhá-yu cue tée nèhe tnúhu cuáhá<sup>n</sup> núú cuè tée cuáñaha chiú<sup>n</sup> coo-dé-á<sup>n</sup>, te ní xáhã<sup>n</sup>-yu sá cüñaha-güedé sá ñà túú tnàhá iní-yu sá tée-á<sup>n</sup> quindaha ñaha-dé xii-yu. 15 Dico dacuitíí sá ní sáha-güedé tée-á<sup>n</sup> chiú<sup>n</sup> coo-dé sá díú-dě quindaha-dě ñáyiú nchaa ñúú-á<sup>n</sup>, te ní nacuico-dě cuánuhú-dé ñúú-dé. Te òré ní nasáá-dé vehe-dé, te ní tendaha-dě íí<sup>n</sup> tée ní sánúcana ñaha xii cue tée xínu cuechi núú-dě, cue tée ní dándõ ndaha-dě díhú<sup>n</sup> cuendá cécá<sup>n</sup> tnúhú-dě núú-güedě íí<sup>n</sup> íí<sup>n</sup>-güedé núú ndèé dau ní chídó-xí díquí díhú<sup>n</sup> sá ní dándõ ndaha ñaha-dé-á<sup>n</sup>. 16 Te tée ní ndèxio díhna xáha<sup>n</sup>-dě: “Pàtróó<sup>n</sup>, ní quide-í ndáhú ndíhi díhú<sup>n</sup>-n sá ní dándõ ndaha ñaha-n xii-í, te sá íí<sup>n</sup> ní taxi-n te ní chídó-xí úxí-gá tnàhá te náu-a naquehe<sup>n</sup> cuendá-n”, cächí-dé xáha<sup>n</sup>-dě. 17 Te tée cùu patróó<sup>n</sup>-dě-á<sup>n</sup> ní xáha<sup>n</sup>-dě: “Ío váha tée xínu cuechi cuu-n chi ío váha ní quide-n, te sá ní quide váha-n ndíhi sacú díhú<sup>n</sup> sá ní dándõ ndaha ñaha-í xii-n, te xíá<sup>n</sup> núú yúhú cächí-í sá táxí tnùn-í úxí ñúú vitna”, cächí-dé xáha<sup>n</sup>-dě. 18 Te ní ndèxio ingá-dé, te ní xáha<sup>n</sup>-dě: “Pàtróó<sup>n</sup>, ní quide-í ndáhú ndíhi díhú<sup>n</sup>-n sá ní dándõ ndaha ñaha-n xii-í, te sá

íí<sup>n</sup> ní taxi-n te ní chídó-xí ùhú<sup>n</sup>-gá tnàhá te náu-a naquehe<sup>n</sup> cuendá-n”, cächí-dé xáha<sup>n</sup>-dě. 19 Te ní xáha<sup>n</sup> tée cùu patróó<sup>n</sup>-dě-á<sup>n</sup> xii-dé: “Te yòhó taxi tnùn-í ùhú<sup>n</sup> ñúú”, cächí-dé xáha<sup>n</sup>-dě xii tée xínu cuechi-á<sup>n</sup>. 20 Te dātnùn-í ní ndèxio tucu ingá-dé, te xáha<sup>n</sup>-dě: “Pàtróó<sup>n</sup>, náu díhú<sup>n</sup>-n-á, te naquehe<sup>n</sup> cuendá-n chi ní taxúha-í ní chidúcú<sup>n</sup> nuu-í íí<sup>n</sup> pāñú te ñà túú ní quide-í ndáhú ndíhi díhú<sup>n</sup>-n, 21 chi ní yùhú ñàhà-í xii-n, chi cùu-n íí<sup>n</sup> tée díí, te nàquehe<sup>n</sup>-n íí<sup>n</sup> sá ñà túú ní tàxi ndecu-n, te nàtahu-n íí<sup>n</sup> xichi núú ñà túú ní chihí-n tatá”, cächí-dé xáha<sup>n</sup>-dě xii pàtróó<sup>n</sup>-dě. 22 Te ní xáha<sup>n</sup> pàtróó<sup>n</sup>-dě xii-dé: “Yòhó cúu-n íí<sup>n</sup> tée cuihna iní-xi xínu cuechi núú-í, te ñu-ni nchaa tnúhu càhá<sup>n</sup>-n-ã<sup>n</sup> cächí tnùn-í-xi nàcuáa cuu ndáá cuéchi-n. Te núú sàni iní-n sá cúu-í íí<sup>n</sup> tée díí, te nàquehe<sup>n</sup>-í íí<sup>n</sup> sá ñà túú ní tàxi ndecu-í, te nàtahu-í íí<sup>n</sup> xichi núú ñà túú ní chihí-í tatá, 23 te núú duca<sup>n</sup> ña, ÷te ná cuendá ñà túú ní càhu iní-n dàsa<sup>n</sup> nuu-n díhú<sup>n</sup> ní taxi-í, te cüñaha-n chāhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naquehe<sup>n</sup> cuendá-í ní cùu-í?”, cächí-dé xáha<sup>n</sup>-dě xii tée xínu cuechi-á<sup>n</sup>. 24 Te ní xáha<sup>n</sup> tée cùu patróó<sup>n</sup>-á<sup>n</sup> xii cue tée xíndecu xíá<sup>n</sup>: “Chí quèndèé díhú<sup>n</sup> cuàá<sup>n</sup> nèhé tée-a, te cuáha-ndo tée nèhe úxí tucu díhú<sup>n</sup> cuàá<sup>n</sup>-á<sup>n</sup>”, cächí-dé xáha<sup>n</sup>-dě xii-güedé. 25 Te ní xáha<sup>n</sup>-güedé: “Pàtróó<sup>n</sup>, dico sa nèhe-dé úxí díhú<sup>n</sup> cuàá<sup>n</sup>”, cächí-güedé xáha<sup>n</sup>-güedé. 26 Te ní xáha<sup>n</sup> tée cùu patróó<sup>n</sup>-á<sup>n</sup>: “Na cächí tnúhu-í xii-ndo sá cuè ñáyiú lò xii-xi te níhí-gã-yu cundecu ndíhí-yu, te cue ñáyiú sacú ndécú ndíhi cuita ndíhi nihnu nchaa sá ndécú



ndihí-yu”, cächí tée cùu patróo<sup>n</sup>-á<sup>n</sup> xăha<sup>n</sup>-dê xii-güedé. <sup>27</sup>Te xăha<sup>n</sup> tûcu-dé xii-güedé: “Nchaa ñáyiú cùu úhú iní ñáhá xii-í ñá tnàhá iní-yu quindaha-ĩ-yu, te chí cándèca-yu taquixi iha, te cahni-ndö-yu núu-í-a”, cächí tée cùu patróo<sup>n</sup>-á<sup>n</sup> xăha<sup>n</sup>-dê xii-güedé —duha cuáhá<sup>n</sup> cuèndú ní cani Jèsús núú ñáyiú.

### Jèsús cuánguihu-gá ñúú Jerusàlén

(Mt. 21:1-11; Mr. 11:1-11; Jn. 12:12-19)

<sup>28</sup>Te sátá dúcá<sup>n</sup> ñí cáhá<sup>n</sup>-gá, te ní nucúhu<sup>n</sup> ichi-gá cuáhá<sup>n</sup>-gá ñúú Jerusàlén. <sup>29</sup>Te òré sa ní cuyatni-gá ñúú Bèttagé, ndihi ñúú Bètaniá te xíá<sup>n</sup> cáá yùcu nani Olívú, te ní xáha<sup>n</sup>-gá xii úú cue tée xica cuu ndihi-gá:

<sup>30</sup>—Chí cuáhá<sup>n</sup> ñúú cáá yàtni yacá<sup>n</sup>, te òré quexìo-ndo yacá<sup>n</sup>, te naníhí-ndó ì<sup>n</sup> búrru ndètní-dí, te vátá yò ì<sup>n</sup>-gá codo ñàha xii-dí, te nandaxi-ndo-dí te candeca-ndo-dí quixi. <sup>31</sup>Te núu yoo na càcá<sup>n</sup> tnúhu núú-ndó ñá cuèndá nándàxi-ndo-dí, te cúñaha-ndo xii-yu sá yúhu Yaá xicá cùu ndihi-ndo xini ñuhu-í-dí —cächí-gá xáha<sup>n</sup>-gá xii-güedé.

<sup>32</sup>Te cue tée-á<sup>n</sup> ñí xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús duca<sup>n</sup> ñí cuu, <sup>33</sup>chi mei òré nándàxi-güedé búrru-á<sup>n</sup> ñí quexìo cue ñáyiú cùu xítóhó-dí xicá<sup>n</sup> tnúhu-yu núú-güedé, te xăhá<sup>n</sup>-yu:

—¿Ná cuèndá nándàxi-ndo búrru-ndí-i? —cächí-yu xăhá<sup>n</sup>-yu.

<sup>34</sup>Te ní xáha<sup>n</sup>-güedé xii-yu:

—Nà ndaxi-ndí-dí chi Yaá xicá cùu ndihi-ndí xíní ñuhu ñaha-gá xii-dí —cächí-güedé xáha<sup>n</sup>-güedé xii-yu.

<sup>35</sup>Te ndèca-güedé-dí cuáhá<sup>n</sup> núú ndécú Jèsús, te òré ní quexìo-güedé

ndihi-di núú ndécú-gă te ní sacá<sup>n</sup> ndodo-güedé dóo-güedé sátá-dí, te ní ngódó ñáhá-gá xii-dí. <sup>36</sup>Te ío cuéhé ñáyiú ta sàcá<sup>n</sup>-yu dóo-yu ichi cuáhá<sup>n</sup>-gá cuèndá núú döo-yu-á<sup>n</sup> yăha-gá ndihi quiti yòdo-gá. <sup>37</sup>Te ní nucuíta nuu-gá ichi tindúú yucu Òlívú tá cùyatni-gá ñúú Jerusàlén cuáhá<sup>n</sup>, te nchaa ñáyiú sàndáá iní ñáhá xii-gá nchicú<sup>n</sup> ñáhă-yu te ní ngúíta-yu níhi cáhá<sup>n</sup>-yu sá cúdîí iní-yu, te cächí-yu sá ïo cànnu cuu Yá Ndiöxí cuèndá sá ñí xiní-yu nchaa sá vă yòo tnàhí ndàcu cada ní quide-gá. <sup>38</sup>Te cächí-yu:

—Ío cànnu cuu Yaá véxi quindaha ñàha xii-o, te diu-gá cúú-gă Yaá ní tendaha Yá Ndiöxí véxi quide núú-gă! iTe ío cànnu cuu mee-gă! iTe andiu ñà túú tnàhí ná cúú! —duha cächí-yu.

<sup>39</sup>Te ì<sup>n</sup> úú cue tée cùu fariséú ñúhú tnàhá tnuú ñáyiú-á<sup>n</sup> ñí xáha<sup>n</sup>-güedé xii Jèsús:

—Mèstrú, cúñaha nchaa ñáyiú ndihi-n na càdí-yu yuhú-yu —cächí-güedé xáha<sup>n</sup>-güedé xii-gá.

<sup>40</sup>Dico Jèsús ní xáha<sup>n</sup>-gá xii-güedé:

—Te na cächí tnúhu-í xii-ndo să nûu ñáyiú-a na càdí-yu yuhú-yu ña, te nchaa yúú cáhá<sup>n</sup> níhi-xi dàtná ì<sup>n</sup> ñáyiú —cächí-gá xáha<sup>n</sup>-gá xii-güedé.

<sup>41</sup>Te òré ní cuyatni-gá ñúú Jerusàlén te ní xiní-gá, te ní ndáhyú-gá cuèndá nchaa ñáyiú dii ñúú-xi-á<sup>n</sup> să ndihú iní-gá. <sup>42</sup>Te ní xáha<sup>n</sup>-gá xii cue ñáyiú-á<sup>n</sup>:

—Ío cuu váha iní-í te núu dícó nchòhó tecú tnúní-ndó vitna ì<sup>n</sup> tnúhu sá cadá văha ñaha xii-ndo, chi ñá túú-gă ná cuu cundecu-ndo,

te núu na tècú tnùní-ndó. Dico ñá tècú tnùní-ndó, chi ío yìdáhu tnúhu-a. <sup>43</sup>Te sáá nduu tnündòho tnúhu ndàhú sá cúú-xí-ndó, te nchaa cue tée dava-gá ñuu cúú ũhú iní tnáhá ndìhi-ndo quixi-güedé chidoco ñaha-güedé xii-ndo, te ni càndéé núú ndécú-ndó-ǎ<sup>n</sup> dacàa-güedé ndóho cuèndá xíá<sup>n</sup> quihi váha-güedé nàa ndìhi ñaha-güedé xii-ndo, te vá dáñá-güedé cunu-ndo. <sup>44</sup>Te cahni ñaha-güedé xii-ndo, te ndìhi nchaa vehe-ndo dàngoyo-güedé ndéé cimientú-xi, chi ñá túú ní cuíní-ndó nàcuáha-ndo cuèndá òré ní quixi coto ñaha Yá Ndiòxí xii-ndo —duha ní xáha<sup>n</sup>-gǎ xii ñáyiú ñuu-á<sup>n</sup>.

**Jèsús ñá túú tnàhá iní-gá nàcuáa quidé-yu veñúhu**

(Mt. 21:12-17; Mr. 11:15-19; Jn. 2:13-22)

<sup>45</sup>Te Jèsús cuánguihu-gá xití veñúhu càhnu sá ío cùnuu, te xití veñúhu-á<sup>n</sup> xíndecu cue ñáyiú quide ndàhú ndìhi cue ñáyiú xísaa<sup>n</sup>. Te ní queñuhu ñaha Jèsús xií-yu quehé.

<sup>46</sup>Te ní xáha<sup>n</sup>-gǎ xií-yu:

—Núú tütú Yá Ndiòxí càhá<sup>n</sup>-xi nàcuáa ní cáhá<sup>n</sup>-gá, te duha ní cachí-gá: “Vehe-í cúú-xí núú càhá<sup>n</sup> ndìhi ñaha ñáyiú xii-í”, duha ní cáhá<sup>n</sup>-gá càchí-xi núú tütú-gá. Dico nchòhó quidé-ndó vehe-gá vehe ñadúhú —càchí-gá xáha<sup>n</sup>-gǎ xií-yu.

<sup>47</sup>Te Jèsús nchaa nduu dànehé-gá ñáyiú xití veñúhu, dico cue tée cùu dútú cùnùu, ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndìhi cue tée cùnuu ñuu-á<sup>n</sup> ndúcú-güedé nàcuáa cada-güedé cahni ñaha-güedé xii-gá. <sup>48</sup>Dico ñá

nhí-güedé nàcuáa cada-güedé, chi cuèndá nchaa ñáyiú ío cùdíí iní-yu ndèdóho-yu nchaa tnúhu càhá<sup>n</sup>-gá.

**Jèsús ndécú ndìhi-gá tnúhu ndee iní**

(Mt. 21:23-27; Mr. 11:27-33)

**20** Te ìi<sup>n</sup> nduu yìhi Jèsús xití veñúhu càhnu sá ío cùnuu danehé-gá ñáyiú tnúhu sá càhá<sup>n</sup> nàcuáa naníhí tàhú-yu. Te ní quexio cue tée cùu dútú cùnùu ndìhi cue tée dàcuaha ñaha xii ñáyiú nchaa tnúhu ní chídó tnùní ndíi Moisés, ndìhi cue tée cùu sacuéhé núú ñáyiú isràél, <sup>2</sup>te ní xáha<sup>n</sup>-güedé xii-gá:

—Cuíní-ndí cachí tnúhu-n xii-ndí nása ndùu tnúhu ndee iní ndécú ndìhi-n núu quide-n nándi sá quidé-n. ¿Te yoo duca<sup>n</sup> ní taxi tnúhu ndee iní-á<sup>n</sup> xii-n? —càchí-güedé xáha<sup>n</sup>-güedé xii-gá.

<sup>3</sup>Te Jèsús ní xáha<sup>n</sup>-gǎ:

—Yúhú tnàhá-í cuíní-í cacá<sup>n</sup> tnúhu-í ìi<sup>n</sup> sá càcá<sup>n</sup> tnúhu-í núú-ndó, te cachí tnúhu-ndo. <sup>4</sup>Te chí càchí tnúhu xii-í yoo ní táuchíú<sup>n</sup> ní dácúándùte ndíi Juàà ñáyiú. ¿Yá Ndiòxí ǎ<sup>n</sup> cuè tée ñuyúú-a ní táuchíú<sup>n</sup> dùca<sup>n</sup> ní quide ndíi? —càchí-gá xáha<sup>n</sup>-gǎ xii-güedé.

<sup>5</sup>Te ní ngúíta-güedé xítnàha-güedé:

—¿Nása cúñaha-o? Chi núu na cúñaha-o sǎ Yá Ndiòxí ní táuchíú<sup>n</sup> dùca<sup>n</sup> ní quide ndíi Juàà ñá, te quesaha-dé: “¿Ná cuèndá ñá túú ní sàndáá iní-ndó tnúhu ní cáhá<sup>n</sup> ndíi vǎí?””, quesaha-dé. <sup>6</sup>Àdi te núu na cúñaha-o sǎ cuè ñáyiú ñuyúú-a ní táuchíú<sup>n</sup> dùca<sup>n</sup> ní quide ndíi ña, te nchaa ñáyiú cuáha ñahá-yu yúú xii-o, te cahni ñahá-yu, chi càchí-yu

sá ndàá sá Yá Ndiöxí ní táuchíú<sup>n</sup>-gǎ ní cáhá<sup>n</sup> ndí Juàá tnúhu-gá núú ñǎyiu —càchí-güedé xǐtnàha-güedé.

<sup>7</sup>Te ní xáha<sup>n</sup>-güedé xii-gá sá ñà túú xìní-güedé yoo ní táuchíú<sup>n</sup> dùca<sup>n</sup> ní dácuaándüte ndí Juàá ñáyiu. <sup>8</sup>Te ní xáha<sup>n</sup> Jèsús xii-güedé:

—Te núu duca<sup>n</sup> te ni yǔhú vá càchí tnúhu-í xii-ndo yòo ní taxi tnúhu ndee ìní duha quide-í —càchí-gá xáha<sup>n</sup>-gǎ xii-güedé.

### Cuèndá cue tée cuihna ìní-xi

(Mt. 21:33-44; Mr. 12:1-11)

<sup>9</sup>Te sáta dúcá<sup>n</sup> te ní ngúíta Jèsús ní cani-gá ìí<sup>n</sup> cuèndú núú ñǎyiu nàcuáa tecú tnùnì-yu tnúhu-gá, te xáha<sup>n</sup>-gǎ xií-yu:

—Ìí<sup>n</sup> téé ní xitu-dé mee-ni yòho yaha stilé núú ñúhú-dě. Te ní sáá ìí<sup>n</sup> nduu quǐngaca cuu xica-dě vǎi nduu te ní dándöo ndaha-dě sá ñí xitu-dé-á<sup>n</sup> xii ìí<sup>n</sup> úú cue téé càhá<sup>n</sup> ndìhi-dé cuèndá cada chiu<sup>n</sup>-güedé, te ní ndatnúhu-güedé sá òré ná cùu te cuu cuèndá dava-güedé te duca<sup>n</sup> te ní quee-dé cuáhá<sup>n</sup>-dé.

<sup>10</sup>Te sáta ñí sáá nduu ñí cuu nchaa ndéhe yoho yàha stilé sá ñí xitu-dé-á<sup>n</sup>, te ní xáha<sup>n</sup>-dě xii ìí<sup>n</sup> téé xìnu cuechi núú-dě: “Cuàhá<sup>n</sup> cáca<sup>n</sup>-n sǎ cúu cuèndá-í núú cuè téé ní dándöo ndàha-í nchaa yoho yàha stilé sá ñí xitu-í”, càchí-dé xǎha<sup>n</sup>-dě. Te téé xìnu cuechi-á<sup>n</sup> ñí xica-dé cuáhá<sup>n</sup>-dé, dico cue téé ndèé nchaa yoho yàha stilé-á<sup>n</sup> ñí tnií-güedé téé xìnu cuechi-á<sup>n</sup> te ní caniha-güedé, te ní nacuícú<sup>n</sup> ñáhá-güedé xii-dé, te ñá túú tnàhí ná ní sǎnaha-güedé. <sup>11</sup>Te dàtnùnì téé cùu xítóhó nchaa yoho yàha stilé-á<sup>n</sup> ñí tendaha tùcu-dé ingá téé

xìnu cuechi núú-dě cuáhá<sup>n</sup>-dé, dico ñiu-ni duca<sup>n</sup> ñí quide ñaha-güedé xii-dé, chi ní xícuehé ñáhá-güedé, te ní caniha-güedé te ní nacuícú<sup>n</sup> ñáhá-güedé, te ñá túú tnàhí ná ní sǎnaha-güedé. <sup>12</sup>Te téé cùu xítóhó nchaa yoho yàha stilé-á<sup>n</sup> ñí tendaha tùcu-dé ingá-dé cuáhá<sup>n</sup>-dé, te ñiu-ni duca<sup>n</sup> ñí quide ñaha tùcu-güedé, chi ní dánícuehé ñáhá-güedé, te ní nacuícú<sup>n</sup> ñáhá-güedé.

<sup>13</sup>Te téé cùu xítóhó nchaa yoho yàha stilé-á<sup>n</sup> ñí sani ìní-dé: “¿Nása cada-í vitna? Váha-gá tendaha-í déhe-í téé ío cùu ìní-a núhú-dé, chi cudana te òré quiní ñáhá-güedé xii-dé, te canehe-güedé sá yǐñuhu núú-dě”, duha ní sani ìní-dé.

<sup>14</sup>Dico òré ní xìnì cue téé quide chiu<sup>n</sup>-á<sup>n</sup> dèhe xítóhó nchaa yoho yàha stilé-á<sup>n</sup>, te ní xǐtnàha-güedé: “Tée-á<sup>n</sup> téé véxi nduu táhú ñuhu-a ndìhi nchaa sá cáá nǔú-xi, dico cahni-o-dé te mee-o nduu tahú-o sǎ ndúú tǎhú-dě”, càchí-güedé xǐtnàha-güedé. <sup>15</sup>Te ní queñuhu ñaha-güedé ìí<sup>n</sup> xio yuhu ñuhu-á<sup>n</sup>, te ní sahni ñaha-güedé xii-dé —duha cuáhá<sup>n</sup> cuèndú ní cani Jèsús núú-yu.

Te dàtnùnì ní xáha<sup>n</sup> tùcu-gá xií-yu: —¿Te nchòhó sa cùtnunì ìní-ndó nàcuáa cada ñaha xítóhó ñuhu-á<sup>n</sup> xii cue téé-á<sup>n</sup> ñǎ? <sup>16</sup>Chi núhú-dé te cahni-dé cue téé-á<sup>n</sup>, te dándöo ndaha-dě ñuhu-dé xii cue téé cùtnunì ìní-dé cada ndáá —càchí-gá xáha<sup>n</sup>-gǎ xií-yu.

Te sá dúcá<sup>n</sup> ñí cáhá<sup>n</sup>-gá, núu ní cachí-yu:

—Ísá vǎ càchí Ndiöxí sá dúcá<sup>n</sup> yàha-o! —càchí-yu.

<sup>17</sup>Te Jèsús ní ndacoto-gá núú-yu, te ní xáha<sup>n</sup>-gǎ:

—Chí cächí tnúhu nása quèe-xi nacuáa cáhá<sup>n</sup>-xi núú tütú Yă Ndiöxi, núú cächí-xi:

Yúú sã ní dáquée tǐhú cue tée ðàcaa vehe ní saa-xi cùu-xi yúú cúnùu vitna.

Duha cächí-xi núú tütú-gá.

<sup>18</sup>Te nchaa ñáyiú ñá túú cuíní tñii tnúhu-í, te ndohó-yu ðàtná ìi<sup>n</sup> ñáyiú tñàhnú duu<sup>n</sup> òré ndúá-yu núú yúú, àdi núu na tàù ñáhá-xí te ðàcachi duu<sup>n</sup> ñaha-xi —cachí-gá xáha<sup>n</sup>-gã xií-yu.

### Cuendá impuèstú

(Mt. 21:45-46; 22:15-22; Mr. 12:12-17)

<sup>19</sup>Te cue tée cùu dútú cúnùu, ndìhi cue tée ðàcuaha ñaha xii ñáyiú nchaa tnúhu ní chídó tnùní ndíi Moisés ní cuíní-güedé tñii-güedé Jèsús òré-ni-á ní cùu, chí ní cutnùní iní-güedé sá cuendá-güedé ní cáhá<sup>n</sup>-gá, dico ní yùhú-güedé cuendá sá ìo vai ñáyiú. <sup>20</sup>Te ní ndúcú-güedé ñacuáa cada-güedé tñii ñaha-güedé xii-gá, te ní tendaha-güedé cue tée cuáhá<sup>n</sup> ngoto dayuhu ñaha xii-gá, te cuáhá<sup>n</sup>-güedé ðàtná cue tée váha iní-xi, te ndúcu-güedé ñacuáa cada-güedé núu cáhá<sup>n</sup>-gá ìi<sup>n</sup> tnúhu sá ñà túú tàù-gá cáhá<sup>n</sup>-gá cuendá duca<sup>n</sup> te candeca ñaha-güedé xii-gá quíhí<sup>n</sup> cuáha cuendá ñáhá-güedé núú tée cùnùu. <sup>21</sup>Te ní xáha<sup>n</sup>-güedé xii Jèsús:

—Mèstrú, nihí-ndí tnúhu sá ðànèhé-n ñáyiú mee-ni tñúhu váha, te cuèi ndédani càa ñáyiú ìi<sup>n</sup>-ni cáhá<sup>n</sup>-n ndìhí-yu, te cáhá<sup>n</sup> ndáá-n ñacuáa cáhá<sup>n</sup> Yă Ndiöxi cundecu-ò ñùyíú-a. <sup>22</sup>Te cachí tnúhu xii-ndí núu váha-ni cháhu-ndí té Cèsár tée

ío cùnùu cuendá impuèstú à<sup>n</sup> ñáhá —cächí-güedé xáha<sup>n</sup>-güedé xii-gá.

<sup>23</sup>Dico Jèsús ní cutnùní iní-gá sá xító ndèé ñáhá-güedé xii-gá, núu ní xáha<sup>n</sup>-gã xii-güedé:

<sup>24</sup>—Chí ðànèhé ñáhá xii-í ìi<sup>n</sup> díhú<sup>n</sup> cuixí<sup>n</sup> te cachí tnúhu-ndo núu yoo núú-xi ndèé, ndìhi yoo ðùu-xi ndeé —cächí-gá xáha<sup>n</sup>-gã xii-güedé.

Te ní xáha<sup>n</sup>-güedé xii-gá:

—Núú tǐ Cèsár ndèé ndìhi ðùu-dé —cächí-güedé xáha<sup>n</sup>-güedé xii-gá.

<sup>25</sup>Te ní xáha<sup>n</sup> tucu-gá xii-güedé:

—Te núu duca<sup>n</sup> te chí ñacuáha té Cèsár sá cúú cuendá-dé, te sá cúú cuendá méé Yă Ndiöxi, te xíá<sup>n</sup> nacuáha-ndo-gã —cächí-gá xáha<sup>n</sup>-gã xii-güedé.

<sup>26</sup>Te ñá ní ndàcu tnahí-güedé ðatìcànuu ñaha-güedé xii-gá núú tñúhu cáhá<sup>n</sup>-gá, chí òré ní cáhá<sup>n</sup>-gá, te da ní cuñúhu-güedé nchaa tnúhu ní cáhá<sup>n</sup>-gá, te váha-gá ní sadí-güedé yuhu-güedé.

### Cuendá nchaa ñáyiú ndoto

(Mt. 22:23-33; Mr. 12:18-27)

<sup>27</sup>Te sátá dúcá<sup>n</sup> te ní sáá ìi<sup>n</sup> úú cue tée cùu saducéú núú ndécú Jèsús. Te cue tée-á<sup>n</sup> ñà túú sàndáá iní-güedé sá ndótó cuè ñáyiú ní xíhí, te ní xáha<sup>n</sup>-güedé xii-gá:

<sup>28</sup>—Mèstrú, ndíi Moisés cächí ndíi núú tütú ndècu vitna sá núu ìi<sup>n</sup> tée na cùu, te quendóo ñadìhí-dé te ñá túú ðèhe-dé ní xõ ndìhi-a<sup>n</sup>, te tée cùu ñaní-dé naquehe<sup>n</sup>-dé ñaha ní quendóo quèé-á<sup>n</sup> cuendá coo ðèhe-dé ndìhi-a<sup>n</sup> cuendá ñaní-dé tée ní xíhí-á<sup>n</sup>. <sup>29</sup>Te ní xíndecu úsá tñahá cue tée mee-ni ndì ñaní-güedé. Te tée díhna ní níhí ñadìhí-dé, dico ñá túú ní cùdí-dé

cundecu-dé chi ní xíhí-dé, te ni ìì<sup>n</sup> déhe-dé ñá túú ní xõ ndìhi ñadìhí-dé-á<sup>n</sup>. <sup>30</sup>Te téé cùu uú ní naquehe<sup>n</sup>-dé ñaha ní quendóo quèè-á<sup>n</sup> dico ní xíhí tucu-dé, te ni ìì<sup>n</sup> tucu déhe-dé ñá túú ní xõ ndìhi ñaha-á<sup>n</sup>. <sup>31</sup>Te téé cùu uní ní naquehe<sup>n</sup> tucu-dé ñaha ní quendóo quèè-á<sup>n</sup>, te òu-ni duca<sup>n</sup> ñì xíhí-dé, te ní xínu ndí ùsá-güedé ní cándeca ñaha-güedé xii ñaha-á<sup>n</sup>, dico ni ìì<sup>n</sup>-güedé ñá túú ní xõ déhe-güedé ndìhi-a<sup>n</sup>, te ní ndìhi-güedé ní xíhí. <sup>32</sup>Te ndéé núú ñì ndìhi-ná ní xíhí tnàhá ñadìhí-á<sup>n</sup>. <sup>33</sup>Te na sàà nduu ndòto-güedé ndìhi ñaha-á<sup>n</sup> ¿Te ndèdacàa-güedé ñadìhí-güedé cuu-a<sup>n</sup>-i? Chi ndí ùsá-güedé ní cándeca ñaha-güedé xii-a<sup>n</sup> — càchí-güedé xáha<sup>n</sup>-güedé xii-gá.

<sup>34</sup>Te Jèsús ní xáha<sup>n</sup>-gá xii-güedé: —Nchaa ñáyiú ñuyíú-a tnàndahá-yu. <sup>35</sup>Dico nchaa ñáyiú ní nduu táhú ndoto díhna nuu ñáyiú-á<sup>n</sup> cundecú-yu ndìhi Yá Ndiòxí ñì caa ñì quíhí<sup>n</sup>, te yàcá<sup>n</sup> ñá túú-gá sá cándeca tnahá-yu. <sup>36</sup>Te ni ñà túú-gá tnúhu xihí, chi cuu-ná-yu dàtná cue espíritú xínú cuèchi núú Yá Ndiòxí cuendá sá ñì ndotó-yu, chi cùu-yu déhe-gá. <sup>37</sup>Te ndéé ndíi Moisés ní chídó tnùní ndíi núú tütú ndíi sá ncháá ñáyiú ní xíhí ndotó-yu, te òu-ni xíá<sup>n</sup> càhá<sup>n</sup>-xi cuendá ntnutàù nchícú<sup>n</sup> ñuhú, te òu-ni xíá<sup>n</sup> càchí tucu-xi sá Yá Ndiòxí cùú-gá Ndiòxí ndíi Àbrahám, ndíi Isàác, ndìhi ndíi Jàcób. <sup>38</sup>Te cue téé-á<sup>n</sup> chi cuèi ní xíhí-güedé sá cùú-xí nchòhó, dico sá cùú-xí Yá Ndiòxí chi ndècu vívú-ni-güedé. Chi cùnuní iní-ó sá Yá Ndiòxí cùú-gá Ndiòxí mee-ni cuè ñáyiú xíndecu vívú, te ñá túú

cùu-gá Ndiòxí cue ñáyiú ñá túú ndècu vívú. Te sá cùú-xí mèe-gá chi nchaa ñáyiú ndècu ndìhi-gá ndécú vívú-yu cuèi sa ní xíhí-yu núú ñùyíú-a —càchí-gá xáha<sup>n</sup>-gá xii-güedé.

<sup>39</sup>Te ìì<sup>n</sup> téé dàcuaha ñaha xii ñáyiú nchaa tnúhu ní chídó tnùní ndíi Moisés ní xáha<sup>n</sup>-dè xii Jèsús: —Mèstrú, váha-ni càhá<sup>n</sup>-n — càchí-dé xáha<sup>n</sup>-dè xii-gá. <sup>40</sup>Te ñá túú-gá ní cùyii-güedé cacá<sup>n</sup> tnúhú-güedé ni ìì<sup>n</sup> tnúhu núú-gá.

### Yoo déhe-xi cùu Cristú

(Mt. 22:41-46; Mr. 12:35-37)

<sup>41</sup>Te Jèsús ní xáha<sup>n</sup>-gá xii-güedé: —¿Te nása càchí-tu-yu sá Cristú Yaá tendaha Yá Ndiòxí quixi ñuyíú-a cùu-gá déhe ndíi Dàvíí? <sup>42</sup>Te mee ndíi Dàvíí-á<sup>n</sup> ñì cachí ndíi núú libré Sălmú: Dútú Ndiòxí ní xáha<sup>n</sup>-gá xii Yaá cùú Xítohó-í: “Ngóo xio cùha-í, <sup>43</sup>te yúhú cada-í te nchaa sá cùú ùhú iní ñàhá xii-n canehe-xi sá yíñuhu núú-n.”

Duha ní xáha<sup>n</sup> Dútú Ndiòxí xii Yaá cùú Xítohó-í càchí ndíi núú libré Sălmú. <sup>44</sup>¿Te nása cùu Cristú déhe ndíi Dàvíí, te mee ndíi ní cachí ndíi sá cùú-gá Xítohó ndíi-i? —càchí Jèsús xáha<sup>n</sup>-gá xii-güedé.

### Jèsús càhá<sup>n</sup>-gá cuendá cue téé dàcuaha ñaha xii ñáyiú nchaa tnúhu ní chídó tnùní ndíi Moisés

(Mt. 23:1-36; Mr. 12:38-40; Lc. 11:37-54)

<sup>45</sup>Te òré ndátnúhu Jèsús ndìhi cue téé xica cuu ndìhi-gá xíndedóho ñaha ñáyiú, te xáha<sup>n</sup>-gá xii-güedé:

<sup>46</sup>—Cada cuendá-ndó vă cadá-ndó nàcuáa quide cue téé dàcuaha

ñaha xii ñáyi nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóó nání sá sácuihnu cue tée cùnuu. Te nchaa núú tàcá ñáyi cuiní-güedé sá ndíhi tnúhu yíñùhu cáhá<sup>n</sup> ndíhi ñàhá-yu xii-güedé, te nàcáxi-güedé xilé sácõo nchíhi cue tée cùnuu-gá xití veñúhu conchíhi-güedé, te duca<sup>n</sup>-ni quide-güedé cuèi òré quíhu-güedé mèsá caxi-güedé òré ndécú-güedé ìi<sup>n</sup> vico, chi mee-ni núú sácõo cue tée cùnuu-gá cuiní-güedé coo-güedé. <sup>47</sup>Te quèndeé-güedé vehe nchaa ñáyi dìhí ñáyi quèé, te ío naha càhá<sup>n</sup> ndíhi-güedé Yá Ndiõxí cuendá cuiní-güedé cáhá<sup>n</sup> váha-yu cuendá-güedé. Te sá dúcá<sup>n</sup> quide-güedé te sáá nduu te ío-gá ndoho-güedé núú ùhú núú ndàhú dàcúxí dàva-gá ñáyi —càchí-gá xáha<sup>n</sup>-gá xii-güedé.

**Díhú<sup>n</sup> nduu táhú Yá Ndiõxí ní dáquèe ìi<sup>n</sup> ñaha ndàhú ñaha quèé**

(Mr. 12:41-44)

**21** Te Jèsús ní xiní-gá xití veñúhu xídáquèe cue tée cuica díhú<sup>n</sup> nduu táhú Yá Ndiõxí xití alcanciá. <sup>2</sup>Te ní xiní-gá tnàhá ìi<sup>n</sup> ñaha ndàhú ñaha quèé ní dáquèe-a<sup>n</sup> úú díhú<sup>n</sup> còbrí, <sup>3</sup>te ní xáha<sup>n</sup> Jèsús xii cue ñáyi xíndecu-á<sup>n</sup>:

—Na càchí tnúhu ndáá-í xii-ndo sá ñàha ndahú ñaha quèé-a ío-gá nándíhi díhú<sup>n</sup> ní dáquèe-a<sup>n</sup> xití alcanciá nduu táhú Yá Ndiõxí dàcúxí díhú<sup>n</sup> ní dáquèe dàva-gá-yu. <sup>4</sup>Chi nchaa ñáyi-á<sup>n</sup> ní dáquèe-yu mee-ná sá ní ndóo-ná, dico ñaha quèé-a cuèi ndàhú-a<sup>n</sup> dico ní dáquèe-a<sup>n</sup> nihí díhú<sup>n</sup> sá cuáá<sup>n</sup>-á<sup>n</sup> sá caxí-á<sup>n</sup> ní cùu —cachí-gá xáha<sup>n</sup>-gá xii-yu.

**Jèsús càchí-gá sá ngóyó veñúhu**

(Mt. 24:1-2; Mr. 13:1-2)

<sup>5</sup>Te ìi<sup>n</sup> úú ñáyi xícáhá<sup>n</sup>-yu cuendá veñúhu càhnu sá ío cùnuu sá ío vii càa nchaa yúú yíhí, ndíhi cuendá nchaa sá ní sáñaha táhú ñáyi yíhi xití-xi. Te Jèsús ní xáha<sup>n</sup>-gá xii-yu:

<sup>6</sup>—Sáá nduu te nchaa sá cúñùhu-ndo-a vǎ cúndùu-gá-xi dàtná cáá-xí vitna, chi ní ìi<sup>n</sup>-gá yúú vǎ códó nchíhi tnaha-gá-xi chi ndíhi ngoyo —càchí-gá xáha<sup>n</sup>-gá xii-yu.

**Nàcuáa cada-xi nduu ta cùyatni naa ñuyúú**

(Mt. 24:3-28; Mr. 13:3-23)

<sup>7</sup>Te cue tée xíndecu-á<sup>n</sup> ní xícá<sup>n</sup> tnúhú-güedé núú Jèsús, te xáha<sup>n</sup>-güedé xii-gá:

—Mèstrú, ¿te ná nduu dùca<sup>n</sup> cada-xi ngoyo veñúhu, àdi nándi cùu sá cadá-xí cuendá cutnùní iní-ndí sá sà ta cuyatni nduu duca<sup>n</sup> cada-xi-i? —cachí-güedé xáha<sup>n</sup>-güedé xii-gá.

<sup>8</sup>Te Jèsús ní xáha<sup>n</sup>-gá xii-güedé: —Ío quíhi iní-ndó cùndecu-ndo, te vǎ dáñá-ndó mèe-ndo dandahú ñàhá ñáyi xii-ndo. Chi ío cuéhé cue tée coo ñuyúú-a, te danàni-güedé mée-güedé dàtná nání-í te cachí-güedé: “Yúhú cùu-í Crístú Yáá ní tendaha Yá Ndiõxí véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáhá<sup>n</sup>-í”, duha cachí-güedé. Dico vǎ quíndáá iní-ndó, te ní vǎ túhá-ndó-güedé. <sup>9</sup>Te òré ná nihí-ndó tnúhu sá títini

nàció<sup>n</sup> xǐnàá-güedé te dava ñuú xǐnàá-güedé ndi mée-güedé, te vá yùhú-ndó chi dacuitíí sǎ dúcá<sup>n</sup> càda-xi, dico vátá sàá-gá nduu nàa ñuyúú òré duca<sup>n</sup> càda-xi —cachí-gá xáha<sup>n</sup>-gǎ xii-güedé.

<sup>10</sup>Te xǎha<sup>n</sup> tùcu-gǎ xii-güedé:

—Nchaa cue téé ìí<sup>n</sup> nàció<sup>n</sup>

nàá-güedé ndihi cue téé ingá nàció<sup>n</sup>, te títíí ñuú ngüíta-güedé nàá-güedé. <sup>11</sup>Te títíí xichi ñuyúú ñíhi vèhi tnáa, te títíí tucu xichi ñuyúú coo tnamá, te títíí tucu xichi ñuyúú quixi cuéhé, te títíí núú sǎ cáda-xí àndi, te yùhú ñáyiu.

<sup>12</sup>Te òré cúmǎní-gǎ cada-xi nchaa nàcuáa càhá<sup>n</sup>-í-a, te cue téé cùu úhú iní ñáhá xii-ndo tñii ñaha-güedé, te candeca ñaha-güedé xii-ndo quíhí<sup>n</sup> xití veñúhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhí<sup>n</sup> núú cuè téé cùnuu yindaha nació<sup>n</sup> àdi núú dàva-gá cue téé cùnuu sá cuendá-í. <sup>13</sup>Te òré duca<sup>n</sup> na càda ñaha-güedé xii-ndo, te òré-á<sup>n</sup> tàù-xi càhá<sup>n</sup> váha-ndo cuendá-í núú-güedé. <sup>14</sup>Te vá cání ìní-ndó ñuu nása cunduu tnúhu cúñaha-ndo xii-güedé cuendá cácu nihnu-ndo. <sup>15</sup>Chi yúhú dacàhu iní ñáhá-í xii-ndo tnúhu cúñaha-ndo xii-güedé, te taxi-í sǎ vátá quíni tñuní-gá-ndó, te ni ìí<sup>n</sup> ñáyiu cùu úhú iní ñáhá xii-ndo vá ñíhí-gá-yu tnúhu cúñáhá-yu xii-ndo. <sup>16</sup>Te ndéé tǎtá-ndó, ndihi ñaní-ndó, ndihi cue ñáyiu cùu ñaní tnáhá-ndó, ndihi cue ñáyiu càhá<sup>n</sup> ndihi váha-ndo cuàha cuendá ñáhá-yu xii-ndo núú cuè téé cùchiu<sup>n</sup>, te dava-ndo càhni ñaha-güedé xii-ndo. <sup>17</sup>Te ío cuéhé ñáyiu cuu úhú iní

ñáhá-yu xii-ndo sǎ cuendá-í. <sup>18</sup>Dico Yá Ndióxi ío coto ñaha-gǎ xii-ndo chi ndéé idi díquí-ndó còto-gá. <sup>19</sup>Te núu na càda ndee iní-ndó càncicú<sup>n</sup> nihnu ñaha-ndo xii-í, te nduu táhú-ndó cùndecu-ndo ndihi Yá Ndióxi ni caa ni quíhí<sup>n</sup>.

<sup>20</sup>Te nduu na quíni-ndó ñuhu doco sandadú ni càndéé yuhu ñuú Jerusalén, te sa cutnùní iní-ndó sǎ sǎ ní cuyatni nduu dànaa-güedé ñuú-á<sup>n</sup>. <sup>21</sup>Te dàvá-á<sup>n</sup> nchaa ñáyiu xǐndecu distritú Jùdeá xíní ñuhu-xi cunú-yu quíhí<sup>n</sup>-yu xití yucu, te nchaa ñáyiu xǐndecu ñuú Jerusalén queé-yu xití ñuú-á<sup>n</sup>, te ñáyiu ñá túú xǐndecu ñuú-á<sup>n</sup> vǎ ndíhu-gá-yu. <sup>22</sup>Chi dàvá-á<sup>n</sup> cuu-xi nduu tnùndòho tnúhu ndàhú, te duca<sup>n</sup> càda-xi chi duca<sup>n</sup> ndéé tñuní núú tùtú Yá Ndióxi nàcuáa dandòho ñaha-gǎ xii-yu. <sup>23</sup>Te ndàhú ní cuu nchaa ñáyiu dèhí ñúhú dèhe-xi, ndihi nchaa ñáyiu ndèca déhe vitna sàdi na sáá nduu dùca<sup>n</sup> cada-xi! Chi ío cuéhé tnùndòho tnúhu ndàhú coo núú ndécú-yu dàvá-á<sup>n</sup>, te xíá<sup>n</sup> cuu-xi ìí<sup>n</sup> tnùndòho tendaha Yá Ndióxi quixi sǎ cúú-xí-yu. <sup>24</sup>Te dava cue téé cuú-güedé cahni ñaha-güedé, te dava-güedé tñii ñaha-güedé candeca ñaha-güedé quíhí<sup>n</sup> nchaa ñuú xícá, te cue téé dava-gǎ ñuú cùnuu-güedé ñuú Jerusalén, te mee Yá Ndióxi cachí-gǎ te núu ná daha nduu cùnuu-güedé ñuú-á<sup>n</sup>.

**Nàcuáa cada-xi òré quixi tucu Téé cùu ñaní tnáhá cuè ñáyiu**

(Mt. 24:29-35, 42-44; Mr. 13:24-37)

<sup>25</sup>Te cada-xi ìí<sup>n</sup> sǎ vátá quíni-gǎ ñáyiu núú nchícanhii, ndihi núú yóó, ndihi núú nchàa chódíní, te

ñuyíu-a coo tnúhu ndihú iní-xi te vá cutnùní iní-yu nása cadá-yu cuendá sá ìo dusa<sup>n</sup> càda ndute lamár òré candaundéé tnáhá-xí. <sup>26</sup>Te nchaa ñáyiú cuneé-yu sá yùhú-yu, ndihi sá ndihú iní-yu cuendá nchaa sá cadá-xí ñuyíu-a, te quidi-xi andiu. <sup>27</sup>Te sátá dúcá<sup>n</sup> te quini-ndó yùhú Tée cùu ñaní tnáhá-ndó nchàa-ndo quee-í andiu quixi-í ichi xití vícò, te dává-á<sup>n</sup> quini ñáhá nchàa ñáyiú sá ìo cùnùu-í te ndàcu-í quide-í nchaa sá vǎha. <sup>28</sup>Te òré ná ngùita-xi duca<sup>n</sup> càda-xi, te cuita cundee-gǎ iní-ndó quíhí<sup>n</sup>, te quíhi iní-ndó chi sa ní cuyatni víí-nǎ nduu cǎcu nihnu-ndo vǎ cùndècu-gǎ-ndó núú ñuyíú yíca cuèchi-a —càchí-gǎ xáha<sup>n</sup>-gǎ xii-güedé.

<sup>29</sup>Te ní cani-gǎ ìi<sup>n</sup> cuèndú núu-güedé nàcuáa tecú tnùní vǎha-güedé tnúhu-gǎ, te xáha<sup>n</sup>-gǎ xii-güedé:

—Chí cùndèhe yutnu ngúxí ndihi nchaa dava-gǎ yutnu. <sup>30</sup>Chi nàtahú ndaha-xi, te òré duca<sup>n</sup> quide-xi te càchí-ndó sǎ sà ní cuyatni nuu cahni. <sup>31</sup>Te ñu-ni duca<sup>n</sup> sǎtnahá-xi cùu òré ná quini-ndó càda-xi nchaa nacuáa càhá<sup>n</sup>-í, te sá dúcá<sup>n</sup> te cutnùní iní-ndó sǎ sà ní cuyatni nduu ndíhu ndaha ñàha Yá Ndiòxí xii-ndo.

<sup>32</sup>Te na càchí tnúhu ndáá-í xii-ndo sǎ òré vátá cùu-gǎ cue ñáyiú xíndecu ñuyíu-a vitna, te cada-xi nchaa nàcuáa ní càhá<sup>n</sup>-í. <sup>33</sup>Te andiu ndihi ñuyíu-a chi ndihi nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáá.

<sup>34</sup>Te quíhi iní-ndó vǎ cùndècu-ndo ichi cuehé ichi duha, te vá cúu-ndó ñáyiú quíhu, te vá

cúhú<sup>n</sup> iní-ndó mèe-ni nchaa sá ìo ñuyíu-a, chi núu duca<sup>n</sup> na càda-ndo te nacuanaa-ndo sǎ sǎá nduu càda-xi nacuáa ní càhá<sup>n</sup>-í. Te uu<sup>n</sup>ni sǎá nduu-ǎ<sup>n</sup>, <sup>35</sup>te cada-xi dàtná cuini-ndó quide ìi<sup>n</sup> trampá chi uu<sup>n</sup>ni ngáva-xi, te duca<sup>n</sup> càda-xi nchaa ñáyiú xíndecu ñuyíu-a, chi uu<sup>n</sup>ni sǎá nduu-ǎ<sup>n</sup>. <sup>36</sup>Te nchòhó cundecu túha-ndo te ío càhá<sup>n</sup> ndihi-ndo Yá Ndiòxí cuendá ndacu-ndo yǎha-ndo nchàa tnúndòho quixi ñuyíu-a, te duca<sup>n</sup> te nasáa-ndó cùndecu-ndo núú ndécú yùhú Tée cùu ñaní tnáhá-ndó nchàa-ndo —cachí-gǎ xáha<sup>n</sup>-gǎ xii-güedé.

<sup>37</sup>Te nduu ndùu ní xóo danèhé Jèsús ñáyiú tnúhu-gǎ xití veñúhu càhnu sá ìo cùnùu, te niú niú ní xóo quíhí<sup>n</sup> ngúdú-gǎ xití yucu Òlívú. <sup>38</sup>Te nehé nehé ní xóo quíhí<sup>n</sup> nchaa ñáyiú veñúhu-á<sup>n</sup> ní xóo cundedóho-yu nchaa tnúhu càhá<sup>n</sup>-gǎ.

### Ndùcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

**22** Te sa ní cuyatni nduu tnáhá vico pàscuá, te vico-á<sup>n</sup> xéxí ñáyiú pàa sá ñà túú yìhi levadurá. <sup>2</sup>Te cue tée cùu dútú cùnùu, ndihi cue tée dàcuaha ñàha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xíyùhú-güedé ñáyiú.

<sup>3</sup>Te yucu ñávàha ní dácáhú iní ñáhá-xí xii té Jùdás déhe té Iscàrioté, te núú tnáhá tée-á<sup>n</sup> cúú ùxúú tnáhá cue tée xica cuu



ndihi-gá ní cùu. <sup>4</sup>Te té Jùdás-á<sup>n</sup> nǐ sáhá<sup>n</sup>-dé ní ndatnúhu-dé ndihi cue tée cùu dútú cúnùu, ndihi cue tée tàxi tñuní ñáhá xii cue tée quide cuendá veñúhu nàcuáa cada-dé cuáha cuendá-dé Jèsús núu-güedě. <sup>5</sup>Te ío ní cudíí ìní-güedé, te ní xáha<sup>n</sup>-güedě xii-dé sá cuañaha-güedě díhú<sup>n</sup>, <sup>6</sup>te ní xáha<sup>n</sup>-dě sá cúu quèhe<sup>n</sup>-dé díhú<sup>n</sup>-ǎ<sup>n</sup>, te ní ngüíta-dé ndúcú-dě nàcuáa cada-dé cuáha cuendá-dé Jèsús núu-güedě òré ñá túu ñäyiu.

**Cùdini Jesús ndihi cue tée xica cuu ndihi-gá**

(Mt. 26:17-29; Mr. 14:12-25;

Jn. 13:21-30; 1 Co. 11:23-26)

<sup>7</sup>Te ní sáá nduu nǐ quesaha vico xexí-yu pàa sá ñà túu yìhi levadurá, te diu-ni nduu-ǎ<sup>n</sup> sáhní-güedě ì<sup>n</sup> mběě lìhli xexí-yu. <sup>8</sup>Te Jèsús ní xáha<sup>n</sup>-gǎ xii té Pèlú ndihi té Juàa: —Chí cuàhá<sup>n</sup> chi cada túha-ndo núu cùdini-o sacuaa nduu vico pascuá —càchí-gá xáha<sup>n</sup>-gǎ xii-güedé.

<sup>9</sup>Te ní xícá<sup>n</sup> tnúhú-güedě núu-gǎ, te xǎha<sup>n</sup>-güedě xii-gá:

—¿Te ndéé cáá vehe cuinín cada túha-ndí-i? —càchí-güedé xǎha<sup>n</sup>-güedě xii-gá.

<sup>10</sup>Te ní xáha<sup>n</sup> Jèsús xii-güedé:

—Chí cùndèdóho na càchí tnúhu-í xii-ndo nàcuáa cada-ndo. Òré quíhu-ndo xítí ñúu núu quíhí<sup>n</sup>-ndó, te naníhí-ndó ì<sup>n</sup> tée tànehe ì<sup>n</sup> yoó ndute, te tée-á<sup>n</sup> candéndaha-ndo-dě quíhí<sup>n</sup>, te núu ndèdacàa vehe na ndíhu-dé te xía<sup>n</sup> quíhu-ndo. <sup>11</sup>Te cúñaha-ndo xii xítóhó vehe-á<sup>n</sup>: “Yaá cúu Mèstrú càchí-gá núu ndèdacàa xichi xítí vehe-n cuañaha nùu-n

xii-gá cudini-gá ndihi cue tée xica cuu ndihi-gá sacuaa nduu vico pascuá”, duha cúñaha-ndo. <sup>12</sup>Te dàtnúní danèhé ñáhá-dě xii-ndo ì<sup>n</sup> cuartú cáhnú càa núu ññu, chi vehe yòdo tñaha cuu-xi, te sa ní quide túha-dé nchaa sá ná ndíhi, te nchòhó dícó-nǎ sá cùdini-o cada túha-ndo —càchí-gá xáha<sup>n</sup>-gǎ xii-güedé.

<sup>13</sup>Te ní xica-güedé cuáhá<sup>n</sup>-güedé, te nchaa-ni nàcuáa ní xáha<sup>n</sup> Jèsús xii-güedé ní cuu, chi nchaa sa ndècu túha, te ní quide túha-güedé sá cùdini-güedé ndihi-gá sacuaa nduu vico pascuá-á<sup>n</sup>.

<sup>14</sup>Te sátá nǐ tñahá òré cudini Jesús ndihi cue tée ní táuchíú<sup>n</sup>-gǎ cáhá<sup>n</sup> tnúhu-gá núu ñäyiu, te cuánguìhu ndihi ñaha-gǎ xii-güedé mèsá. <sup>15</sup>Te xáha<sup>n</sup>-gǎ xii-güedé:

—iDuca<sup>n</sup>-ni ìo sàni iní-í sá cùdini ndihi ñaha-í xii-ndo sàcuua nduu vico pascuá òré cùmǎní-gǎ sáá nduu ndòho-í te cuú-í! <sup>16</sup>Te na càchí tnúhu-í xii-ndo sǎ vǎ dúhá-gǎ caxi ndihi ñaha-í xii-ndo nduu vico pascuá, chi ndéé òré ná sàá nduu nàsáá-ndó núu táxí tñuní Yǎ Ndiòxí cundecu-o, te dàvǎ-á<sup>n</sup> cada iní-ndó sǎ dàtná sá caxí tucu-o chi ío váha cuu iní-ó cundecu-o —cachí-gá xáha<sup>n</sup>-gǎ xii-güedé.

<sup>17</sup>Te ní quehe<sup>n</sup>-gǎ ì<sup>n</sup> vàsú ñúhú ndùdí ndéhé yoho yàha stilé, te ní ndacá<sup>n</sup> táhú-gǎ núu Yǎ Ndiòxí, te dàtnúní ní xáha<sup>n</sup>-gǎ xii-güedé:

—Chí quéhé<sup>n</sup> vàsú ñúhú ndùdí ndéhé yoho yàha stilé-a, te coho-ndo lùha luha nchaa-ndo. <sup>18</sup>Te na càchí tnúhu tucu-í xii-ndo sǎ vítná-nǎ duha xìhi ndihi ñaha-í xii-ndo ndùdí ndéhé yoho yàha stilé-a te vá cóhó

ndìhi ñaha-gá-í, dico na sàá nduu nàníhí tnáhá-ó nũ ndécú Tătà-í Dútú Ndiöxí táxí tnùn-í-gá, te dàvá-án cada iní-ó sã dàtná sá cóhó ndìhi ñaha tucu-í xii-ndo, chi ío cudíí ñí-ó —càchí-gá xáha<sup>n</sup>-gã xii-güedé.

<sup>19</sup>Te sátá nĩ túhú cóhó-güedé ní cudini-güedé, te ní quehe<sup>n</sup>-gá pàá te ní ndacá<sup>n</sup> táhú tucu-gá núú Yã Ndiöxí, te dàtnùn-í ní táhú cuèchi-gá, te ní dácãhũ ñaha-gá xii-güedé, te xáha<sup>n</sup>-gã:

—Pàá-a cùu-xi datná yiqui cùnũ-í, chi cahni ñaha-güedé xii-í sá cuendá-ndó, te duca<sup>n</sup>-ni càxi-ndo paá-a cuendá ndacu iní ñáhá-ndó xii-í —càchí-gá xáha<sup>n</sup>-gã xii-güedé.

<sup>20</sup>Te ñu-ni duca<sup>n</sup> nĩ quide-gá ndìhi vàsú ñúhú ndúdí ndéhé yoho yáha stilé, chi ní quehe<sup>n</sup>-gá te òré sãñaha-gã xii-güedé coho-güedé, te ní xáha<sup>n</sup>-gã:

—Ndudí ñúhú vàsú-a cada iní-ndó sã cúú-xí dàtná nĩñ-í sá cátí òré cahni ñaha-güedé xii-í. Te sá dúcá<sup>n</sup> càti nĩñ-í xíã<sup>n</sup> cutnùn-í ndáá sá Yã Ndiöxí cada-gá ingá núú sã vãha sá cúú-xí-ndó.

<sup>21</sup>Dico vitna chi iha tnáhá tée cuáha cuendá ñáhá xii-í núú cuè tée cùu úhú iní ñáhá yìhi-dé mèsá.

<sup>22</sup>Te yúhú Tée cùu ñan-í tnáhá-ndó nchàa-ndo ñuhu ichi-í cuáhá<sup>n</sup>-í cuú-í dàtná ní cachí Yã Ndiöxí. ¡Dico ndàhú ní cuu tée duca<sup>n</sup> na cuáha cuendá ñáhá xii-í núú cuè tée cùu úhú iní ñáhá! —càchí-gá xáha<sup>n</sup>-gã xii-güedé.

<sup>23</sup>Te ní ngüíta-güedé ndúcú tnũhu núú tnáhá-güedé nũ ndèda càa-güedé duca<sup>n</sup> càda cuáha cuendá ñáhá xii-gá núú cuè tée cùu úhú iní ñáhá.

**Xĩndatnúhu-güedé  
ndèdacàa-güedé cunu-gá**

<sup>24</sup>Te sátá dúcá<sup>n</sup> te ní ngüíta-güedé xĩndatnúhu-güedé nũ ndèdacàa-güedé tàú-güedé cunu-güedé. <sup>25</sup>Dico Jèsús ní xáha<sup>n</sup>-gã xii-güedé:

—Nchaa cue tée yìndaha ñaha xii ñáyiú ío tàxi tnùn-í-güedé, te mee-güedé cuìn-í-güedé sá càhá<sup>n</sup> váha ñáyiú cuendá-güedé. <sup>26</sup>Dico nchòhó vá dúcá<sup>n</sup> càda-ndo, chi núú ñ-ndo cunu te cada-ni-ndo sã ñà túú cunu-ndo, àdi cuu-ndo ñ- tée tàxi tnùn-í ñáhá xii cue tée xinu cuechi, te cada-ni-ndo sã cúú-ndó ñ- tée xinu cuechi-án. <sup>27</sup>Te vá càchí-ó sã tée xinu cuechi cunu-gá-dé, chi tée quíhu mèsá cùnù-gá-dé. Dico yúhú ndécú ndìhi ñaha-í xii-ndo dàtná ñ- tée xinu cuechi.

<sup>28</sup>Te nchòhó duca<sup>n</sup>-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaa sá tàyáha-í véxi. <sup>29</sup>Te Tătà-í Dútú Ndiöxí ní cachí-gá sá táxí tnùn-í, te yúhú càchí-í xii-ndo sã sàá nduu te tnáhá-ndó tàxi tnùn-í-ndó. <sup>30</sup>Te dàvá-án caxi-o coho-o càda-o núú táxí tnùn-í, te yàcá<sup>n</sup> ngüíta-ndo càda ndáá-ndó cuèchi ndi ùxúú xichi ñáyiú isràèl —càchí-gá xáha<sup>n</sup>-gã xii-güedé.

**Jèsús càhá<sup>n</sup>-gá sá tẽ Pèlú cúnaha-dé  
xii ñáyiú sá ñà túú xini ñáhá-dé  
xii-gá**

(Mt. 26:31-35; Mr. 14:27-31; Jn. 13 :36-38)

<sup>31</sup>Te Xítóhó Jesucristú ní xáha<sup>n</sup>-gã xii té Ximú:

—Yòhó Ximú, cundedóho váha ñ- tnúhu na càhá<sup>n</sup>-í-a, chi dàtná

cuíní-n quide táchí tríú sàcá<sup>n</sup>-xi duha sàcá<sup>n</sup>-xi dàcá<sup>n</sup>, duca<sup>n</sup> quèsaha yucu ñávàha cada ñaha-xi xii-ndo. Chi coto ndeé ñáhá-xí xii-ndo te núu ndisa sàndáá iní ñáhá-ndó xii-í. <sup>32</sup>Dico yúhú xicá<sup>n</sup> táhù-í núú Yá Ndiöxí cuendá-n, cuendá sá vǎ dáñá ndèè-n quèndáá iní ñáhá-n xii-í. Te òré ndixi túu iní-n sǎ ñà túú ní quide váha-n, te quíhí<sup>n</sup>-n cuáha-n cuè téé cùndíhi-n tnúhu ndee iní cuendá canchicú<sup>n</sup> nihnu-ni-güedé ichi Yá Ndiöxí —càchí-gá xáha<sup>n</sup>-gǎ xii-dé.

<sup>33</sup>Te ní xáha<sup>n</sup>-dè xii-gá:  
—Mèstrú, sa ndècu túha-í sá quíhí<sup>n</sup> ndíhi ñaha-í xii-n vècaá, àdi cuéi na cùú ndíhi ñaha-í xii-n —càchí-dé xǎha<sup>n</sup>-dè xii-gá.

<sup>34</sup>Te Jèsús ní xáha<sup>n</sup>-gǎ:  
—Pèlú, na càchí tnúhu-í xii-n sǎ cùmání-gǎ cana ì<sup>n</sup> líhi te úní xito cǎhá<sup>n</sup>-n núú ñǎyiú sá ñà túú xini ñáhá-n xii-í —càchí-gá xáha<sup>n</sup>-gǎ xii-dé.

### Sa ní cuyatni ndoho Jèsús

<sup>35</sup>Te Jèsús ní xáha<sup>n</sup>-gǎ xii-güedé:  
—Te cùtnàhá ní tendaha ñaha-í xii-ndo ní sǎhá<sup>n</sup>-ndó chù<sup>n</sup>-í, chi ñá túú ní cǎnehe-ndo ni ì<sup>n</sup> sá cùhú<sup>n</sup> díhú<sup>n</sup>-ndó, te ni ì<sup>n</sup> sá cùhú<sup>n</sup> ndàchìu<sup>n</sup>-ndo ñá túú ní cǎnehe-ndo. Te chí càchí tnúhu núu ió ì<sup>n</sup> sá ní cumání xii-ndo —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedé:  
—Ñáhá, chi ni ì<sup>n</sup> sá ñà túú ní cùmání xii-ndí —càchí-güedé xǎha<sup>n</sup>-güedé xii-gá.

<sup>36</sup>Te ní xáha<sup>n</sup>-gǎ:  
—Te vitna núu ndècu ndíhi-ndo sá sácúhu<sup>n</sup> díhú<sup>n</sup>-ndó, àdi sá sácúhu<sup>n</sup>

ndachìu<sup>n</sup>-ndo te canehe-ndo. Te núu ñá túú ndècu ndíhi-ndo machití, te nadico-ndo dǎó tǐcachi nihnu-ndo te cuaa<sup>n</sup>-ndo. <sup>37</sup>Te na càchí tnúhu-í xii-ndo sǎ dàcuitíí sǎ yǎha-í nàcuáa cǎhá<sup>n</sup>-xi núú tütú Yá Ndiöxí núú càchí-xi: “<sup>H</sup><sup>n</sup>-ni ní quide ñaha-güedé xii-gá, ndíhi cue téé ndècu cuéchi-xi”, duha càchí-xi núú tütú-gá. Te ñá díú-ní xǎ<sup>n</sup> yáha-í chi nchaandi túhú nàcuáa cǎhá<sup>n</sup>-xi núú tütú-gá yáha-í —càchí-gá xáha<sup>n</sup>-gǎ xii-güedé.

<sup>38</sup>Te xǎha<sup>n</sup>-güedé:  
—Mèstrú, iha ndècu úú machití —càchí-güedé xǎha<sup>n</sup>-güedé xii-gá.

Te ní xáha<sup>n</sup>-gǎ:  
—Chí návíí-nǎ yuhu-ndo, vá cǎhá<sup>n</sup>-gǎ-ndó —càchí-gá xáha<sup>n</sup>-gǎ xii-güedé.

### Jèsús cǎhá<sup>n</sup> ndíhi-gá Yá Ndiöxí yucu Òlívú

(Mt. 26:36-46; Mr. 14:32-42)

<sup>39</sup>Te Jèsús ní quee-gá cuáhá<sup>n</sup>-gá yucu Òlívú, chi duca<sup>n</sup> tnàhí quide-gá. Te cue téé xica cuu ndíhi-gá nchicú<sup>n</sup> ñáhá-güedé xii-gá cuáhá<sup>n</sup>. <sup>40</sup>Te òré ní quexio-gá xía<sup>n</sup>, te ní xáha<sup>n</sup>-gǎ xii-güedé:

—Chí cǎhá<sup>n</sup> ndíhi Yá Ndiöxí cuendá sá vǎ dǎcǎhá<sup>n</sup> ñáhá yucu ñávàha xii-ndo càda-ndo sá ñà túú tàù-ndó càda-ndo —cachí-gá xáha<sup>n</sup>-gǎ xii-güedé.

<sup>41</sup>Te sǎtá dúcá<sup>n</sup> te ní quee dǎ<sup>n</sup>-gá tnuú-güedé cuáhá<sup>n</sup>-gǎ ì<sup>n</sup> xio, te sa ñùnchíí luha ní xica ndehe-gá núú ndécú-güedé, te xía<sup>n</sup> ní ngúíñí xítí-gǎ cǎhá<sup>n</sup> ndíhi-gá Tǎtá-gǎ Dútú Ndiöxí. <sup>42</sup>Te xáha<sup>n</sup>-gǎ:

—Táu, te núu dicó cachí-n te taunihnu ñaha-n xii-í cuendá sá vǎ

ndóhò-í ná sàà òré, dico vá cádá-n nàcuáa càchí iní mée-í, chi cada-n nàcuáa càchí iní mée-n —càchí-gá xáha<sup>n</sup>-gã xii Tátá-gã Dútú Ndiöxí.

<sup>43</sup>Te sátá dúcá<sup>n</sup> te ní quexìo ìì<sup>n</sup> espíritú xínú cuèchi núú Yá Ndiöxí ní sãñaha-gã-xi tnúhu ndee iní xii-gá. <sup>44</sup>Te òré súúní ndìhú iní-gá, te uu<sup>n</sup>-gá súúní nì yuhu nì iní-gá càhá<sup>n</sup> ndìhi-gá Dútú Ndiöxí, te tnée-gã cáá dàtná cáá nñí te ngóyó núú ñúhú.

<sup>45</sup>Te sátá ñí yáha ní cáhá<sup>n</sup> ndìhi-gá Tátá-gã Dútú Ndiöxí, te ní ndacuíñí-gá cuánuhú-gá núú ñí dándòo-gá cue tée-á<sup>n</sup>, te òré ní nasáá-gá te xixídí-güedé cuendá sá ìo cuéhé tnúhu sàni iní-güedé cuendá-gá. <sup>46</sup>Te xáha<sup>n</sup>-gã xii-güedé: —¿Ná cuendá xidí-ndó? Chí ndácòo, te cáhá<sup>n</sup> ndìhi-ndo Yá Ndiöxí cuendá sá vã dácàhá<sup>n</sup> ñãhá yùcu ñãvãha xii-ndo càda-ndo sá ñà túú tàù-ndó càda-ndo —cachí-gá xáha<sup>n</sup>-gã xii-güedé.

### Ní tñii-güedé Jèsús ndécá ñaha-güedé cuáhá<sup>n</sup>

(Mt. 26:47-56; Mr. 14:43-50; Jn. 18 :2-11)

<sup>47</sup>Te càhá<sup>n</sup> dúcá<sup>n</sup>-ní Jèsús ní quexìo vai cue tée, te ìì<sup>n</sup> tée xica cuu ndìhi-gá nání Jüdás cúnùu-dé yódó nùu-dé núú-güedé ní quexìo ndéé núú-gã, te ní teyuhu ñaha-dé xii-gá, te núú tnàhá tée-á<sup>n</sup> cúú ùxúú cue tée xica cuu ndìhi-gá. <sup>48</sup>Te ní xáha<sup>n</sup> Jèsús xii-dé:

—Jüdás, çte yòhó cuáha cuendá ñãhá-n xii yúhú Tée cùu ñani tnàhá-ndó nchàa-ndo núú cuè tée cùu úhú iní ñãhá xii-í cáhá<sup>n</sup>-n núu duha tàyuhu ñaha-n-á<sup>n</sup>? —càchí-gá xáha<sup>n</sup>-gã xii-dé.

<sup>49</sup>Te sátá ñí xiní nchaa cue tée cùndìhi Jèsús nàcuáa cùu cue tée ní quexìo-á<sup>n</sup>, núu ní xicá<sup>n</sup> tnúhú-güedé núú-gã, te xáha<sup>n</sup>-güedé xii-gá:

—Mèstrú, çcuu nàá-ndí ndìhi-güedé ndìhi machítí-a ñã? —càchí-güedé xáha<sup>n</sup>-güedé xii-gá.

<sup>50</sup>Te ìì<sup>n</sup>-dé ní xehndé-ni-dé lóho xio cùha ìì<sup>n</sup> cue tée ní quexìo-á<sup>n</sup>, te tée-á<sup>n</sup> xínú cuèchi-dé núú dütú cúnùu-gá, te ní quendeé duu<sup>n</sup> lóho-dé. <sup>51</sup>Te Jèsús ní xáha<sup>n</sup>-gã xii-güedé:

—Chí dáñá-güedé, vá dúcá<sup>n</sup> càda-ndo —cachí-gá xáha<sup>n</sup>-gã xii-güedé.

Te ní dácàa-gá ndaha-gá ní tendaha-gã núú ñí xindeé lóho tée-á<sup>n</sup>, te ní nduu váha dàtná-ni càa.

<sup>52</sup>Te nchaa cue tée cùu dütú cúnùu, ndìhi cue tée tàxi tnuní nchaa cue tée quide cuendá veñúhu sá ìo cúnùu, ndìhi cue tée cùu sacuéhé núú ñãyiu isràél, nchaa cue tée-á<sup>n</sup> vèxi tñii ñaha-güedé xii-gá, te ní xáha<sup>n</sup>-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécù-í, dàtná quidé-ndó ìì<sup>n</sup> ñadúhú quidé ñaha-ndo xii-í. <sup>53</sup>Te duca<sup>n</sup>-ni ñí xiní-ndó ñí xindecu-í xití veñúhu càhnu sá ìo cúnùu ní xóo danèhè-í ñãyiu, te ni lùha ñà túú ní cùu tnándeé ñãhá-ndó xii-í òré-á<sup>n</sup>, te vitna ní sáá òré duca<sup>n</sup> càda-ndo, te cada sácuíhná nàcuáa cùu iní-xi —càchí-gá xáha<sup>n</sup>-gã xii-güedé.

### Té Pèlú càhá<sup>n</sup>-dé núú ñãyiu sá ñà túú xíní-dé Jèsús

(Mt. 26:57-58, 69-75; Mr. 14:53-54, 66-72; Jn. 18 :12-18, 25-27)

<sup>54</sup>Te ní tñii-güedé Jèsús, te ndéca ñaha-güedé xii-gá cuáhá<sup>n</sup> vehe

tée cùu dútú cúnùu-gá, te té Pèlú xica xìca-ni nchicú<sup>n</sup> ñáhá-dě xii-gá cuáhá<sup>n</sup>. <sup>55</sup>Te òré ní quexìo-güedé xíá<sup>n</sup> te ní dátñáhá-güedé ñuhú quehé vehe-á<sup>n</sup>, te ni càndéé yuhu ñuhú-á<sup>n</sup> ñí ngóo teté-güedé, chi quìde víxí<sup>n</sup>-xi, te tñáhá té Pèlú ní ngóo teté ndìhi ñaha-dě xii-güedé.

<sup>56</sup>Te xíá<sup>n</sup> ndécú ñí xíchí xínú cuèchi vehe-á<sup>n</sup>, te òré ní xíní-xi ñucóo teté tñáhá té Pèlú, te ní ndacoto-xi núú-dě, te ní xáha<sup>n</sup>-xi xii-güedé:

—Tñáhá tée-a xica cuu ndìhi-dé tée ndèca-güedé cuánguihu-á<sup>n</sup> — cächí-xi xáha<sup>n</sup>-xi xii-güedé.

<sup>57</sup>Dico té Pèlú ñá túú ní ññuu-dé, te xáha<sup>n</sup>-dě xii-xi:

—Yúhú ñá túú xìní-í tée-á<sup>n</sup> — cächí-dé xáha<sup>n</sup>-dě xii-xi.

<sup>58</sup>Te tna tnaa-ni ní cuu, te ní xíní ñáhá tucu ñí<sup>n</sup>-dé, te xáha<sup>n</sup>-dě:

—Yòhó tñáhá-n xica cuu ndìhi-n tée ndèca-güedé cuánguihu-á<sup>n</sup> — cächí-dé xáha<sup>n</sup>-dě xii-dé.

Dico té Pèlú ní xáha<sup>n</sup>-dě:

—Ñáhá, ñá díú yúhú xíca cùu ndìhi-í-dé —cächí-dé xáha<sup>n</sup>-dě.

<sup>59</sup>Te sa ní cuu dàtná ñí<sup>n</sup> òré te cächí tucu ingá-dé:

—Ndáá sá tée-a xica cuu ndìhi-dé tée ndèca-güedé cuánguihu-á<sup>n</sup>, chi tñáhá-dé cúú-dě tée distritú Galìlea —cächí-dé xáha<sup>n</sup>-dě xii-güedé.

<sup>60</sup>Te té Pèlú ní xáha<sup>n</sup>-dě xii tée-á<sup>n</sup>:

—Yúhú ñá túú cùnuní iní-í nása ndùu tñuhu càhá<sup>n</sup>-n —cächí-dé xáha<sup>n</sup>-dě.

Te ni vátá xínu duca<sup>n</sup>-gá tñuhu càhá<sup>n</sup>-dé ní cana-ni ñí<sup>n</sup> líhi. <sup>61</sup>Te Xítóhó Jesucristú ní nchócótó-gá núú-dě, te òré-ni-á<sup>n</sup> ñí ndacu iní-dé tñuhu ní xáha<sup>n</sup>-gá xii-dé sá cùmání-gá cana ñí<sup>n</sup> líhi, te úní xito

cáhá<sup>n</sup>-dé sá ñá túú xìní ñáhá-dě xii-gá. <sup>62</sup>Te té Pèlú ní quee-dé tnuú-güedé cuáhá<sup>n</sup>-dé ñí<sup>n</sup> xio, te ní ndáhyú víhí-dě ní ndixi cuèchi iní-dé.

### Cùdiquí ndeé-güedé Jèsús

(Mt. 26:67-68; Mr. 14:65)

<sup>63-64</sup>Te cue tée ndèé ñáhá xii Jesús ní cudíquí ndeé ñáhá-güedé xii-gá, te ní dádáhu-güedé núú-gá, te ní caniha-güedé xii-gá, te xáha<sup>n</sup>-güedé:

—iCáhá<sup>n</sup> ná cótó yòo ní caniha xii-n! —cächí-güedé xáha<sup>n</sup>-güedé xii-gá.

<sup>65</sup>Te cuéhé víhí-gá tñuhu cuèhé ní xáha<sup>n</sup>-güedé xii-gá.

### Jèsús ndécú-gá jùndá

(Mt. 26:59-66; Mr. 14:55-64; Jn. 18 :19-24)

<sup>66</sup>Te sátá ñí túndaá, te ní tacá cue tée cùu sacuéhé ñúú ñáyiú isràel, ndìhi cue tée cùu dútú cúnùu, ndìhi cue tée dàcuaha ñaha xii-yu nchaa tñuhu ní chídó tñuní ndíi Moisés, te ndèca-güedé Jèsús cuáhá<sup>n</sup> núú cadá-güedé jùndá, te òré ní quexìo-güedé ndìhi-gá núú cadá-güedé jùndá-á<sup>n</sup>, te ní xáha<sup>n</sup>-güedé xii-gá:

<sup>67</sup>—Cuíní-ndí cachí tñuhu-n xii-ndí ñúu diu-n cùu-n Cristú Yaa ní tendaha Yá Ndióxi véxi ñuyú-a —cächí-güedé xáha<sup>n</sup>-güedé xii-gá.

Te ní xáha<sup>n</sup>-gá xii-güedé:

—Te núu na cächí-í sá díú-í cúú Cristú ñá, te ni vá quìndáá iní-ndó, <sup>68</sup>àdi te núu ñí<sup>n</sup> sá ná càcá<sup>n</sup> tñuhu-í núú-ndó, te ni vá cächí tñuhu-ndo, te ni vā dáñá ñaha-ndo. <sup>69</sup>Dico vitna ní cuyatni nduu ngóo yúhú Tée cùu ñaní tñáhá-ndó nchaa-ndo

xio cuha Dútú Ndiöxí Yaá ío cùnuu —càchí-gá xáha<sup>n</sup>-gã xii-güedé.

<sup>70</sup>Te dàtnùnì nchaa-güedé ní xícá<sup>n</sup> tnúhú-güedé nùú-gã, te xáha<sup>n</sup>-güedé xii-gá:

—¿Te yòhó cúú-n Dèhe Yá Ndiöxí te núu duca<sup>n</sup> vání? —càchí-güedé xáha<sup>n</sup>-güedé xii-gá.

Te ní xáha<sup>n</sup> Jèsús:

—Ndáá sá díú Dèhe-gá cúú-í dàtná càchí méé-ndó-ã —càchí-gá xáha<sup>n</sup>-gã xii-güedé.

<sup>71</sup>Te ní xítñaha-güedé:

—Ná túú-gã xíní ñuhu-xi cue téé cáhá<sup>n</sup> núu ndáá sá ndècuéchi-dé àdì ná túú ndècuéchi-dé chi yuhu mee-dé ní cáhá<sup>n</sup>-dé vitna ní xíndedóho-o —càchí-güedé xítñaha-güedé.

### Jèsús ndécú-gã núú tē Pilatú

(Mt. 27:1-2, 11-14; Mr. 15:1-5; Jn. 18:28-38)

**23** Te nchaa-güedé ní ndacuñí-güedé, te ndèca-güedé Jèsús cuáhá<sup>n</sup> núú tē Pilatú, <sup>2</sup>te núú tēe-á<sup>n</sup> ní ngüíta-güedé sàcá<sup>n</sup> cuéchi-güedé cuendá-gá, te xáha<sup>n</sup>-güedé:

—Ní naníhí-ndí tée-a dàndahú-dé ñáyiú ñuú-ó, chi xáha<sup>n</sup>-dē xií-yu sá vã chãhu-gá-yu impuestú xii té Cèsár tée ío cùnuu, te càchí-dé sá díú-dé cúú-dé Cristú Yaá ní tendaha Yã Ndiöxí véxi ñuyíú-a te yìndaha-dé ñáyiú càchí-dé —càchí-güedé xáha<sup>n</sup>-güedé xii-dé.

<sup>3</sup>Te té Pilatú ní xícá<sup>n</sup> tnúhu-dé núú-gã, te xáha<sup>n</sup>-dē xii-gá:

—¿Ndáá sá díú-n cùu-n tée yìndaha ñaha xii ñáyiú isràél-ã<sup>n</sup>? —càchí-dé xáha<sup>n</sup>-dē xii-gá.

Te Jèsús ní xáha<sup>n</sup>-gã xii-dé:

—Dìu-í yíndaha-í-yu —càchí-gá xáha<sup>n</sup>-gã xii-dé.

<sup>4</sup>Te té Pilatú ní xáha<sup>n</sup>-dē xii nchaa ñáyiú, ndihì cue téé cùu dútú cùnùu:

—Yúhú cútnùnì iní-í sá ñà túú ní ìì<sup>n</sup> cuéchi tée-a —càchí-dé xáha<sup>n</sup>-dē xií-yu.

<sup>5</sup>Dico níhi-gá ní cáhá<sup>n</sup>-güedé, te xáha<sup>n</sup>-güedé:

—Càchí-ndí sá ìo dusa<sup>n</sup> xíquide ñáyiú cuendá nchaa sá dánèhé ñáhá-dē xií-yu, te ní quesaha-dē ndéé distritú Galileá, te ní yáha-dé ñihí distritú Jùdeá dánèhé-dé ñáyiú, te vitna ní sáá-ni-tu-dé ndéé ndíha dànehé-dé-yu —càchí-güedé xáha<sup>n</sup>-güedé xii té Pilatú.

### Jèsús ndécú-gã núú tē Hèrodés

<sup>6</sup>Te sá dúcá<sup>n</sup> ní tecú dóho té Pilatú ní cacu nehé-yu distritú Galileá, núu xíã<sup>n</sup> ní xícá<sup>n</sup> tnúhú-dé núú-yu núu téé Galileá cúú-gã. <sup>7</sup>Te ní xáhã<sup>n</sup>-yu sá díú tée yàcá<sup>n</sup> cúú-gã, núu xíã<sup>n</sup> ní na dàyáha ñaha-dē xii-gá ndaha té Hèrodés tée cùu gobiernú distritú Galileá chi nduu-ã<sup>n</sup> ndécú-dé tñahá-dé ñuú Jerusalén-ã<sup>n</sup>.

<sup>8</sup>Te òré ní xiní té Hèrodés-ã<sup>n</sup> Jèsús te ío ní cudíí iní-dé, chi ní cunaha dùca<sup>n</sup>-ni cuiní-dé quini ñáhá-dē xii-gá te ñà túú tñahí xíní ñáhá-dē xii-gá ní cùu, chi cuendá-ni tnúhu ñihí-dé cuendá-gá, te ndètu-dé sáá ìì<sup>n</sup> nduu quini ñáhá-dē xii-gá, te cada-gá ìì<sup>n</sup> sá vã yò tñahí ndàcu cada cundehe-dé ní sani iní-dé.

<sup>9</sup>Te vài sá ñí xícá<sup>n</sup> tnúhú-dé núú Jèsús, dico ni ìì<sup>n</sup> tnúhu ñà túú ní cáhá<sup>n</sup>-gã. <sup>10</sup>Te xíá<sup>n</sup> xíndecu tñahá cue téé cùu dútú cùnùu, ndihì cue téé dàcuaha ñaha xii ñáyiú nchaa tnúhu ní chídó tñùnì ndíi Moisés, te cue tée-ã<sup>n</sup> sùúnì ìo iní-güedé

sàcá<sup>n</sup> cuèchi-güedé cuendá-gá.  
 11 Te té Hèrodés ndihi cue tée cùu sandadú-dé ñá túú ní cùu váha iní-güedé núú Jèsús, te ní cudíquí ndeé ñáhá-güedé xii-gá, te ní dácúíhnu ñàha-güedé dóó váha xii-gá dàtná cáá dǒó sácúíhnu cue tée sàquíndaha ñàha xii ñáyiú. Te dàtnùní té Hèrodés ní dánùhú ñáhá tùcu-dé xii-gá ndaha té Pilatú. 12 Te nduu-ǎ<sup>n</sup> ñí tnahá tnúhu té Pilatú ndihi té Hèrodés, chi cùu úhú iní tnáhá-güedé ní cùu.

**Càchí-güedé sá cáhni-güedé Jèsús**

(Mt. 27:15-26; Mr. 15:6-15; Jn. 18 :39-19 :16)

13 Te té Pilatú ní nadatàcá-dé nchaa cue tée cùu dútú cùnùu ndihi dava-gá cue tée cùnùu, ndihi nchaa ñáyiú ñúú-á<sup>n</sup>, 14 te ní xáha<sup>n</sup>-dǎ:  
 —Nchòhó ndécá-ndó tǎe-a véxi ní taxi cuendá-ndó-dǎ iha, te càchí-ndó sǎ ìo dusa<sup>n</sup> quide ñáyiú cuendá nchaa sá dánèhé ñáhá-dǎ xií-yu, te núú-ndó ndùcu tnúhu-í núú-dǎ ñúu ná ní quide-dé. Dico yúhú cútñuní iní-í sá ñà túú ñí ìí<sup>n</sup> cuèchi-dé dàtná càhá<sup>n</sup>-ndó-ǎ<sup>n</sup>.  
 15 Te cuèí té Hèrodés ñiú-ni duca<sup>n</sup> càhá<sup>n</sup>-dé sá ñà túú cuèchi-dé ñúu ní techiú<sup>n</sup> ñaha tucu-dé cuándixi-dé iha. Te vitna sa ní cutñuní iní-ó sǎ ñà túú tàú-xi cahni-o-dǎ chi ñà túú cuèchi ni quide-dé. 16 Te na dàndoho-ni-í-dé te dácácu-í-dé — càchí-dé xǎha<sup>n</sup>-dǎ xií-yu.

17 Te ndi tnahá nduu víco pascuá te dacuití sǎ dácácu té Pilatú-á<sup>n</sup> ìí<sup>n</sup> cue tée yìhi vecaá, chi duca<sup>n</sup> tnàhí quide-dé. 18 Dico nchaá-yu ní cuáá-yu, te xǎhǎ<sup>n</sup>-yu xii-dé:  
 —iQueñuhu té tée nàni Jesús-á<sup>n</sup>, te cahni-n-dǎ! iTe dácácu-n tǎ

Barràbás! —càchí-yu xǎhǎ<sup>n</sup>-yu xii-dé.

19 Te té Barràbás-á<sup>n</sup> ñí sanu ichi-dé ñáyiú ñúú ingá ichi, te ní ngüíta-yu ndihi-dé ní cuu úhú iní-yu cue tée cùchiu<sup>n</sup>, te ní sahni-dé ndíyi núu xǎ<sup>n</sup> ní chihi ñaha-güedé vecaá xii-dé. 20 Te té Pilatú cuiní-dé dácácu-dé Jèsús ñúu xǎ<sup>n</sup> càhá<sup>n</sup> ndihi ñaha tùcu-dé xií-yu ni cùu, 21 dico uu<sup>n</sup>-gá ñíhi ní cuáá-yu, te ní xǎhǎ<sup>n</sup>-yu xii-dé úú xito:

—iCata caá-dé núú cùrúxí! iCata caá-dé núú cùrúxí! —càchí-yu xǎhǎ<sup>n</sup>-yu xii-dé.

22 Te xito cuu úní ní xáha<sup>n</sup> tǎ Pilatú:

—¿Te ná cúú cuèchi ní quide-dé te núu duca<sup>n</sup> cuiní-ndó càda-í-dé-í? Te yúhú cútñuní iní-í sá ñà túú cuèchi ni quide-dé ñúu xǎ<sup>n</sup> ñà túú tàú-xi cahni-o-dǎ, te na dàndoho-ni-í-dé te dácácu-í-dé —càchí-dé xǎha<sup>n</sup>-dǎ xií-yu.

23 Dico ñíhi-ni càhá<sup>n</sup>-yu xǎhǎ<sup>n</sup>-yu sá ná càta caa ñaha-dé xii-gá núú cùrúxí, te ñáyiú-á<sup>n</sup> ndihi nchaa cue tée cùu dútú cùnùu xícáhá<sup>n</sup> ñíhi-güedé ndihí-yu ndéé ní xínu iní té Pilatú cada-dé nàcuáa càchí iní-yu. 24 Te ní xáha<sup>n</sup>-dǎ xií-yu sá cúú càda-dé nàcuáa xǎhǎ<sup>n</sup>-yu. 25 Te duca<sup>n</sup> te ní dácácu-dé té Barràbás tée ní sanu ichi ñáyiú ñúú ingá ichi, te ñiú-ni-dé ní sahni-dé ndíyi núu xǎ<sup>n</sup> ní xíhi-dé vecaá, te dàtnùní ní táuchíú<sup>n</sup>-dǎ cada-güedé Jèsús nàcuáa xǎhǎ<sup>n</sup>-yu.

**Sàta caa-güedé Jèsús núú cùrúxí**

(Mt. 27:32-44; Mr. 15:21-32; Jn. 19 :17-27)

26 Te ndéca-güedé Jèsús cuáhá<sup>n</sup> núú catá càa ñaha-güedé xii-gá, te ichi

cuáhá<sup>n</sup>-güedé ndihi-gá ní tnii-güedé ii<sup>n</sup> téé ñúú Cirené nání-dě Xímú ñhúhú-dě ichi duha cuándixi-dé ní sáhá<sup>n</sup>-dé yucu, te ní dácúidó ñaha-güedé xii-dé cùrúxí nchídó Jèsús, te ní ngüíta nchicú<sup>n</sup>-dé sátá-gă.

<sup>27</sup>Te ío cuéhé ñâyiu nchicú<sup>n</sup> ñáhá xii-gá cuáhá<sup>n</sup>, te vai ñâyiu ðihí ío níhi ndàhí-yu sá ndìhú iní-yu cuendá Jèsús. <sup>28</sup>Te Jèsús ní nchócótó-gă núŷ-yu, te ní xáha<sup>n</sup>-gă:

—Nchòhó ñâyiu ðihí ñúú Jerusálén, vá ndàhyú-ndó cuendá-í chí ndàhyú cuendá méé-ndó ndìhi cuendá déhe-ndo. <sup>29</sup>Chi sáá nduu quèsaha ñâyiu: “Sá vâha táhú nchaa ñâyiu ñá túú càcu déhe-xi, ndìhi nchaa ñâyiu vátá quíni-gá cuhu<sup>n</sup> déhe-xi, chi ni ñá túú xini-yu dacadí-yu”, duha quesàhá-yu. <sup>30</sup>Te dâvâ-á<sup>n</sup> cùñaha ñâyiu xii nchaa tìndúú ndìhi nchaa núú xìquí: “Chí tácu<sup>n</sup> ngónchihi ñaha-ndo xii-ndí”, duha cùñàhá-yu. <sup>31</sup>Te núú yúhú téé quide ndáá duha quide ñaha-güedé xii-í vitna, te ndèé-gá cada-güedé nchaa ñâyiu ndècu ichi cuehé ichi duha —càchí-gá xáha<sup>n</sup>-gă xii-yu.

<sup>32</sup>Te ndèca tucu-güedé úú tñàhá cue téé ndècu ndisa cuéchi-xi cuáhá<sup>n</sup> cuendá cahni ñaha-güedé xii-güedé ndìhi Jèsús. <sup>33</sup>Te òré ní quexìo-güedé ndìhi-gá ii<sup>n</sup> xichi núú nání Yiqui Díquí Ndiyi, te xía<sup>n</sup> ní sata caa ñaha-güedé xii-gá núú cùrúxí, ndìhi úú cue téé ndècu ndisa cuéchi-xi-á<sup>n</sup>, te ii<sup>n</sup>-dé ní sata caa-güedé xio cùha-gá te ingá-dé ní sata caa-güedé xio dàtni-gá ðiu-ni núú cùrúxí tucu. <sup>34</sup>Te ní xáha<sup>n</sup>-gă xii Tátá-gă Dútú Ndiöxí:

—Táu, cada càhnu iní sá quidé-güedé, chi ñá túú cùtnuní

iní-güedé ná cúú sá quidé-güedé —càchí-gá xáha<sup>n</sup>-gă.

Te cue téé cùu sandadú ní xito ndéé-güedé ñúu ndèdacàa-güedé cuu cuendá-güedé dóó-gă. <sup>35</sup>Te nchaa ñâyiu xìndecu-á<sup>n</sup> ndèhè-yu nàcuáa quide-güedé Jèsús, te nchaa cue téé cùnunu ní cudíquí ndéé ñáhá-güedé xii-gá, te ní xítñaha-güedé:

—Te dava ñâyiu ní ndacu-dé ní dácácu nihnu-dé, te vitna na dàcácu nihnu-dé méé-dě, te núu ndisa sá Crístú Yáá ní tendaha Yă Ndiöxí véxi ñuyúú-a cùu-dé —càchí-güedé xítñaha-güedé.

<sup>36</sup>Te tñàhá cue téé cùu sandadú ní cudíquí ndéé ñáhá-güedé xii-gá, chi ní sàndehe yatni-güedé núú tácàa-gă sãñaha-güedé ndudí íá còho-gá ní cùu, <sup>37</sup>te ní xáha<sup>n</sup>-güedé xii-gă:

—Te núu yòhó cúú-n téé yìndaha ñaha xii ñâyiu isràél, te dàcácu nihnu mee-n —càchí-güedé xáha<sup>n</sup>-güedé xii-gă.

<sup>38</sup>Te ní taxi ndecu-güedé ii<sup>n</sup> sá ndèé lètrá ndàa díquí-gă te ndèé úní núú tñuhu, tñuhu grìégú, ndìhi tñuhu làtín, ndìhi tñuhu hèbreú, te duha quèe-xi ndi nuní núú tñuhu-á<sup>n</sup> “Tée-a cùu-dé téé yìndaha ñaha xii ñâyiu isràél”, duha quèe-xi.

<sup>39</sup>Te ii<sup>n</sup> téé ndècu ndisa cuéchi-xi, téé ní sata caa-güedé ðiñi-gá xicuehé ñáhá-dě xii-gá, te xáha<sup>n</sup>-dè:

—Te núu yòhó cúú-n Crístú Yáá ní tendaha Yă Ndiöxí véxi ñuyúú-a, te dàcácu nihnu mee-n, te dàcácu nihnu ñaha xii nchúhú tñàhá-ndí tucu —càchí-dé xáha<sup>n</sup>-dè xii-gă.

<sup>40</sup>Dico ingá téé cùndihi-dé téé tàcaa ingá xio ðiñi-gá ní tenàá ñáhá-dě xii-dé, te xáha<sup>n</sup>-dè:



—¿Te náa ñá túú ndàcu iní-n Yá Ndiòxí vitna duha càa-o ndoho-o ndihi tée nàni Jesús-a ñá? <sup>41</sup> Chi nchoo tàù ndisa-o sá dúhá ndòho-o nacháhu-o cuèchi-o, dico Jèsús-a chi ñá túú cuèchi-dé —càchí-dé xáha<sup>n</sup>-dè xii tée tàcaa ndihi-dé-á<sup>n</sup>.

<sup>42</sup>Te dàtnùnì ní xáha<sup>n</sup>-dè xii-gá:

—Jèsús, ndacu iní ñáhá-n xii-í òrè ná quìxi-n taxi tñuní-n ñùyíú-a —càchí-dé xáha<sup>n</sup>-dè xii-gá.

<sup>43</sup>Te Jèsús ní xáha<sup>n</sup>-gá:

—Na càchí tñúhu ndáá-í xii-n sá méi ndùu vitna cundecu ndihi ñaha-í xii-n nùú nǐ nduu táhù-í cundecu-í —càchí-gá xáha<sup>n</sup>-gá xii-dé.

#### Ní xihí Jèsús

(Mt. 27:45-56; Mr. 15:33-41; Jn. 19 :28-30)

<sup>44</sup>Te òrè ní cuu cuádava nduu.

Te ní cunee nihí ñuyúú, te duca<sup>n</sup>-ni càa ní cuu ndéé caá únì sacuaa. <sup>45</sup>Chi ñá túú-gá ní dàyehé nchíanchii te ní ndátá dǒó cúú còrtiná veñúhu càhnu sá ò cùnnuu ní quée dava ndáá. <sup>46</sup>Te níhi ní cáhá<sup>n</sup> Jèsús, te xáha<sup>n</sup>-gá xii Tàtá-gá Dútú Ndiòxí:

—Táu, naquehe<sup>n</sup> cuèndá-n espíritú-í —càchí-gá xáha<sup>n</sup>-gá xii Tàtá-gá.

Te tñúhu-ná-á<sup>n</sup> nǐ cáhá<sup>n</sup>-gá te ní xihí-ni-gá.

<sup>47</sup>Te òrè ní xiní tée cùu capitá<sup>n</sup> sá dúcá<sup>n</sup> nǐ cuu, te ní ndacu iní-dé Yá Ndiòxí, te ní cachí-dé:

—Sá ndàà ndisa sá tǎe-a cùu-dé ii<sup>n</sup> téé ío quide ndáá ndécú ñùyíú-a ni cùu —duha ní cachí-dé.

<sup>48</sup>Te chitu ñáyiú ní tacá xía<sup>n</sup> chi cuíní-yu cundèhé-yu nása cada-güedé Jèsús. Te sátá nǐ yáha ní

xiní-yu nàcuáa ní quide ñaha-güedé xii-gá, te ní ndihí-yu ní ndaca ta caní-yu pèchú-yu cuánuhú sá ndihú iní-yu. <sup>49</sup>Dico ndècu tnahá cue ñáyiú xini tñáhá ndihi Jesús, ndihi ñáyiú òhí ní chinchícú<sup>n</sup> ñáhá xii-gá ndéé distritú Galileá, te ñáyiú-á<sup>n</sup> xica-ni xixínutnǐ-yu xǐndéhè-yu nchaa nàcuáa ní quide ñaha-güedé xii-gá.

#### Chindúxi-güedé Jèsús

(Mt. 27:57-61; Mr. 15:42-47; Jn. 19 :38-42)

<sup>50</sup>Te ndècu ii<sup>n</sup> téé ñúú Arimateá nání-dé Chèé, te ñúú-á<sup>n</sup> yǐndèhu-xi distritú Jùdeá, te ío váha iní-dé te quide ndáá-dé núú Yá Ndiòxí, te tñáhá-dé cúú-dé chiú<sup>n</sup> te ní xǐndecu-dé jùndá cue téé isràel.

<sup>51</sup>Te ñá ní tñáhá tñahí iní-dé nàcuáa ní cáhá<sup>n</sup>-güedé núú jùndá nàcuáa cada-güedé Jèsús. Te téé-á<sup>n</sup> ndétú-dé sáá nduu ndíhu ndaha ñaha Yá Ndiòxí xii-dé ndihi ñáyiú. <sup>52</sup>Te téé-á<sup>n</sup> nǐ sáhá<sup>n</sup>-dé núú tǎ Pilatú te ní xáha<sup>n</sup>-dè sá nùu vá cùndèe iní-dé dañá-dé chindúxi-dé yiqui cùñú Jèsús. Te té Pilatú-á<sup>n</sup> nǐ sáha-dé tñúhu. <sup>53</sup>Te ní nunehe-dé yiqui cùñú-gá núú cùrúxí, te ní chidúcú<sup>n</sup>nuu-dé ii<sup>n</sup> dǒó cuixí<sup>n</sup>, te ní chihi-dé ii<sup>n</sup> yaú nchí yiqui naha càva, te vátá yǒo ii<sup>n</sup>-gá nguándüxi yaú-á<sup>n</sup>. <sup>54</sup>Te cùu-xi nduu vispré nduu ndetátú ñáyiú, núu xǐquide túha-ná-yu sá cúú ìngá nduu.

<sup>55</sup>Te nchaa ñáyiú òhí ní chinchícú<sup>n</sup> ñáhá xii Jesús ndéé distritú Galileá ndèndàhá-yu té Chèé ní sáhá<sup>n</sup> núú nchí yaú-á<sup>n</sup>, núu ní xiní-yu nàcuáa ní sacá<sup>n</sup>-dé yiqui cùñú-gá xití yaú-á<sup>n</sup>. <sup>56</sup>Te duca<sup>n</sup> te cuánuhú-yu vehé-yu, te ní quide

túha-yu acití sàhá<sup>n</sup> tnámí, ndihi pomàdá, te ní ndetatú-yu ingá nduu-ǎ<sup>n</sup> nǐ quidé-yu nàcuáa càhá<sup>n</sup> tnúhu Yá Ndiöxí.

### Ní ndoto Jèsús

(Mt. 28:1-10; Mr. 16:1-8; Jn. 20:1-10)

**24** Te ndumìngú nehé víhí-ní cuáhá<sup>n</sup> tucu ñáyiú dìhí núú nchíí yaú ní chihi-güedé yiqui cùñú Jèsús, te nehé-yu nchaá sá sàhá<sup>n</sup> tnámí nǐ quide túha-yu-á<sup>n</sup> cuáhá<sup>n</sup>, te tnàhá tucu ìí<sup>n</sup> úú-gá tnàha dìhí-yu nchìcú<sup>n</sup> ñàhá xíí-yu cuáhá<sup>n</sup>. <sup>2</sup>Te òré ní quexìò-yu yuhu yàú-á<sup>n</sup> te ní xiní-yu sá yúú ndèdí ìí<sup>n</sup> xio-ná ndécú, <sup>3</sup>te ní quíhu-yu xití yaú-á<sup>n</sup>, dico ñá túú-gǎ yiqui cùñú Jèsús yíhí. <sup>4</sup>Te ñá ní cùtnuní tnàhí iní-yu ndèé ichi cuáhá<sup>n</sup> yiqui cùñú-gá, te ní xiní-yu úú espíritú xínú cuèchi núú Yá Ndiöxí xínutnǐ-xi dǐñí-yu te xǐxíhnu-xi dóó chàhnchí. <sup>5</sup>Te ní yùhú-yu te ñá túú ní cùyíí-yu cundèhé-yu cue espíritú-á<sup>n</sup>, te cue espíritú-á<sup>n</sup> nǐ xáha<sup>n</sup>-xi xíí-yu:

—¿Ná cuèndá nándücu-ndo Jesús Yaá ndécú vívú núú yíndüxi ñáyiú ní xíhí-i? <sup>6</sup>Te ñá túú-gǎ yiqui cùñú-gá ndécú ìha chi sa ní ndoto-gá, te chí dándàcu iní nàcuáa ní càhá<sup>n</sup>-gá cùtnàhá ní xíndecu-ndo ndìhi-gá distritú Galilea, <sup>7</sup>chi ní cachí-gá sá méé-gǎ cúú-gǎ ñaní tnàhá-ndó nchàa-ndo, te dacuití cuàha cuèndá ñàhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-á<sup>n</sup> cuú-gá dico nduu úní sá cùú-gá te ndoto-gá, duha ní cachí-gá xii-ndo.

<sup>8</sup>Te òré-á<sup>n</sup> nǐ ndacu iní-yu tnúhu ní càhá<sup>n</sup> Jèsús. <sup>9</sup>Te sátá dúcá<sup>n</sup> te

ní naquehé<sup>n</sup>-yu ichi cuánuhú-yu, te ní caní-yu cuèndú núú ndì úxí ìí<sup>n</sup> cue téé ní táuchíú<sup>n</sup> Jèsús càhá<sup>n</sup> tnúhu-gá, ndihi núú dàva-gá ñáyiú. <sup>10</sup>Te ñáyiú duca<sup>n</sup> ñaha tnúhu cuánuhú núú-güedé-á<sup>n</sup> cúú tǎ Màriá Magdalèná, ndihi tá Juáná, ndihi tá Màriá nǎná tǎ Jàcobó, ndihi dàva-gá ñáyiú dìhí. <sup>11</sup>Dico cue téé-á<sup>n</sup> nǐ sani iní-güedé sá dicó càhú ìní-yu tnúhu xǎhǎ<sup>n</sup>-yu xii-güedé nüú ñá túú ní sàndáá iní-güedé nàcuáa ní xáhǎ<sup>n</sup>-yu.

<sup>12</sup>Dico té Pèlú ní quee-dé xínú-dě cuáhá<sup>n</sup> cuándèhé-dě yaú núú nǐ chihi-güedé yiqui cùñú Jèsús, te ní sáá-dé te ní ngáundeyi-dé xító ñìhni-dé xití yaú-á<sup>n</sup> te ní xiní-dé sá méé-nǎ dóó nǐ xídúcú<sup>n</sup> nuu-gá yúcu ìí<sup>n</sup> xio, te ío ní cuñúhu-dé sá dúcá<sup>n</sup> nǐ cuu, te ní natnǐi-dé ichi cuánuhú-dé vehe núú xǐndecu-güedé.

### Ichi ñuú Emàús

(Mr. 16:12-13)

<sup>13</sup>Te diu-ni nduu-ǎ<sup>n</sup> ñúhú úú cue téé ní xica cuu ndihi Jèsús ichi cuáhá<sup>n</sup>-güedé ìí<sup>n</sup> ñuú nání Emàús, te sàcúhu<sup>n</sup>-güedé dàtná úú òré ichi ndéé ñuú Jerusàlén, te ndéé ñuú Emàús. <sup>14</sup>Te ta ndàtnúhu-güedé cuáhá<sup>n</sup> nchaá nàcuáa ní cuu, <sup>15</sup>te nini dúcá<sup>n</sup> xícáhá<sup>n</sup>-güedé, te Jèsús ní natnahá ñàhá-gǎ xii-güedé te ndèca tnaha-gá ndihi-güedé cuáhá<sup>n</sup>. <sup>16</sup>Te cuèi ndèhe ñaha-güedé xii-gá dico dàtná ìí<sup>n</sup> sá ndèdí núú-güedé, chi ñá ná quíni ñàhá-güedé xii-gá ní cùu. <sup>17</sup>Te Jèsús ní xícá<sup>n</sup> tnúhú-gá núú-güedé, te xáha<sup>n</sup>-gǎ:

—¿Ná tnúhu xícáhá<sup>n</sup>-ndó ñúhu-ndo ichi núú duca<sup>n</sup> ìo cùu

ndiyí-ndó-í? —càchí-gá xáha<sup>n</sup>-gǎ xii-güedé.

<sup>18</sup>Te ìí<sup>n</sup> téé nàni Cleofás ní xáha<sup>n</sup>-dě xii-gá:

—¿Te ná cuendá nchaa ñáyiú íchí ní sáá ñuú Jerusálén xíní-yu nchaa nàcuáa ní cuu, te ìí<sup>n</sup> ðii-ná yòhó ñá túú xíní-n-í? —càchí-dé xáha<sup>n</sup>-dě xii-gá.

<sup>19</sup>Te ní xáha<sup>n</sup>-gǎ xii-güedé:

—¿Te ná ní cuu-i? —càchí-gá xáha<sup>n</sup>-gǎ xii-güedé.

Te ní xáha<sup>n</sup>-güedě xii-gá:

—Cuendá Jèsús téé ñuú Nazàrét càhá<sup>n</sup>-ndí, chi téé-á<sup>n</sup> cúú-dě ìí<sup>n</sup> téé càhá<sup>n</sup> tnúhu Yá Ndiòxí, te ío váha ndùu tnúhu càhá<sup>n</sup>-dé ní cùu, te quìde-dé sá vǎ yòo tnàhí ndàcu cada nacuáa cudíí ìní Yá Ndiòxí ndìhi ñáyiú ni cùu. <sup>20</sup>Te cue téé cùu dútú cùnùu, ndìhi cue téé cùnùu taxi tnuní ñáhá xii-ndí ní sáha cuendá ñáhá-güedě xii-dé núú tě Pìlatú te ní sata caa ñaha-güedě te núú cùrúxí-á<sup>n</sup> ní xíhí-dé. <sup>21</sup>Dico vitna sa ní cuu úní nduu sá ní xíhí-dé, te nchúhú ní sani iní-ndí sá tée-á<sup>n</sup> dàcácu nihnu ñaha-dě xii nchúhú ñáyiú isràèl núú nchàa tnúndòho tnúhu ndàhú ndécú-ndí. <sup>22</sup>Dico ío cùñúhu-ndí cúú, chi ìí<sup>n</sup> úú ñáyiú ðìhí ní tuha ñaha xii-dé ndécú ndìhi-ndí ní sáhá<sup>n</sup> ngotó-yu ndéxuehe tàcuíhndá-gá yaú núú ní chihi-güedé yiqui cùñú-dé, <sup>23</sup>te ní nasáá-yu càchí-yu xii-ndí sá ñà túú-gǎ yiqui cùñú-dé yíhí xítí yaú-á<sup>n</sup>. Te ní xíní-yu espíritú xínú cuèchi núú Yá Ndiòxí, te ní xáha<sup>n</sup>-xi xíi-yu sá ndécú vívú-dě. <sup>24</sup>Te sátá dúcá<sup>n</sup> te ìí<sup>n</sup> úú cue téé cùndìhi-ndí ní sáhá<sup>n</sup> ndéhé-güedě yaú-á<sup>n</sup>, te ní xíní-güedé sá ndàá cúú-xí nchàa

tnúhu ní cáhá<sup>n</sup> ñáyiú ðìhí-á<sup>n</sup>, dico ñá túú ní xíní-güedé téé-á<sup>n</sup> —càchí-güedé xáha<sup>n</sup>-güedě xii-gá.

<sup>25</sup>Te Jèsús ní xáha<sup>n</sup>-gǎ xii-güedé:

—Íío cùmání sǎ xíní tnúní-ndó, chi ío cuèé sàndáá iní-ndó tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiòxí ndéé sanaha! <sup>26</sup>¿Te náa ñá túú tàù-xi sá ndóhó Crìstú òrè cùmání-gǎ sáá nduu ndàa-gá andiú núú ndécú Dütú Ndiòxí cundecu-gǎ-á<sup>n</sup>? —càchí-gá xáha<sup>n</sup>-gǎ xii-güedé.

<sup>27</sup>Te ní ngúíta-gǎ xáha<sup>n</sup>-gǎ nàcuáa quèe-xi nchaa tnúhu càhá<sup>n</sup>-xi núú tütú Yá Ndiòxí cuendá-gǎ, te díhna-gǎ ní cáhá<sup>n</sup>-gǎ nàcuáa ndùu nchaa tnúhu yòdo tnuní núú tütú ndíi Moisés, te dàtnùní ní cáhá<sup>n</sup>-gǎ nàcuáa ndùu nchaa tnúhu yòdo tnuní núú tütú nchaa cue téé ní xóo cáhá<sup>n</sup> tnúhu Yá Ndiòxí ndéé sanaha.

<sup>28</sup>Te òrè ní quexìo-güedé yuhu ñúú núú cuàhá<sup>n</sup>-güedé-á<sup>n</sup>, te Jèsús ní quide-ni-gǎ sá yǎha-gǎ quíhí<sup>n</sup>-gǎ íngá xichi ni cùu. <sup>29</sup>Dico ní cáhá<sup>n</sup> ndàhú-güedé núú-gǎ sá quéndòo-gǎ xíá<sup>n</sup> ndetatú-gǎ ndìhi-güedé, te xáha<sup>n</sup>-güedě xii-gá:

—Quendóo ndìhi ñaha xii-ndí iha ndetatú-n chi sa ní cuaa, te tnavíi cundiquí<sup>n</sup> —càchí-güedé xáha<sup>n</sup>-güedě xii-gá.

Te xíá<sup>n</sup> cáá ìí<sup>n</sup> vehe cuánguihu-güedé ndetatú-güedé ndìhi-gǎ. <sup>30</sup>Te òrè sa yìhi-güedé mèsá ndìhi-gǎ cùdini ndìhi ñaha-güedé, te ní quehe<sup>n</sup>-gǎ pàà te ní ndacá<sup>n</sup> táhú-gǎ núú Yá Ndiòxí, te ní táhú cuèchi-gǎ te dàtnùní ní dácàhñu ñaha-gǎ xii-güedé. <sup>31</sup>Te òrè-á<sup>n</sup> ní naquiní ñáhá-güedě xii-gǎ ní cùu, dico uu<sup>n</sup>ni ní ndòñúhú-gǎ.

<sup>32</sup>Te ní xítñaha-güedé:

—Te ndáá sá sũúni cùdíí ìní-ó òrè tá ndàtnúhu-o ndìhi Jesús véxi ichi, te ta dànehé ñáhá-gǎ xii-o nchàa nacuáa quèe-xi tnúhu càhá<sup>n</sup>-xi núú tütú Yǎ Ndiöxí —càchí-güedé xǐtnàha-güedé.

<sup>33</sup>Te ñá tujú-gǎ ní xǐndetu-güedé chi ndìhi-ni ní natnii-güedé ichi cuánuhú-güedé ñuú Jerusalén, te ní nasáa-güedé núú xǐndecu ndi ùxí ìi<sup>n</sup> cue téé ní táúchíú<sup>n</sup> Jèsús càhá<sup>n</sup> tnúhu-gá, ndìhi dava-gá ñáyiú. <sup>34</sup>Te cue téé xǐndecu-á<sup>n</sup> xǎha<sup>n</sup>-güedé:

—Ndáá sá ñí ndoto Yaá cúú Mèstrú, chi ní xiní ñáhá tǎ Xímú —càchí-güedé xǎha<sup>n</sup>-güedé.

<sup>35</sup>Te cue téé ní nasáa-á<sup>n</sup> ñí cani-güedé cuèndú nacuáa ní cuu ichi, ndìhi nàcuáa ní cuu ní naquiní-güedé Jèsús òrè ní tǎhú-gǎ pǎá ní dácǎhñu ñaha-gǎ xii-güedé.

### Jèsús ní quexìo-gá núú xǐndecu cue téé ní xica cuu ndìhi-gá

(Mt. 28:16-20; Mr. 16:14-18; Jn. 20 :19-23)

<sup>36</sup>Te càhá<sup>n</sup> dúcá<sup>n</sup>-ní-güedé nàcuáa ní cuu ní quexìo Jesús ní ngúnutnfi-gá ndéé tnuú-güedé, te xǎha<sup>n</sup>-gǎ xii-güedé:

—Yǎ Ndiöxí chíndèe ñaha-gǎ xii-ndo ìo váha cùu ìní-ndó ndècu-ndo —cachí-gá xǎha<sup>n</sup>-gǎ xii-güedé.

<sup>37</sup>Te da ní yùhú-güedé, te ní sani ìní-güedé sá dícó ìi<sup>n</sup> espíritú cúú sǎ ndéhé-güedé ní cùu. <sup>38</sup>Dico Jèsús ní xǎha<sup>n</sup>-gǎ xii-güedé:

—¿Ná cuèndá yùhú-ndó, te sàni ìi<sup>n</sup> sani úú ìní-ndó-ì? <sup>39</sup>Chí cùndèhe ndaha-í ndìhi sáhá-í te quiní-ndó ñǎ ñu-ní-í. Te chí téndàha ñaha xii-í te cundehe-ndo, te núú ìi<sup>n</sup> espíritú ndécú yìqui cuñú-xi dàtná ndécú

ndìhi yùhú —càchí-gá xǎha<sup>n</sup>-gǎ xii-güedé.

<sup>40</sup>Te sátá dúcá<sup>n</sup> ñí xǎha<sup>n</sup>-gǎ te ní dánèhé ñáhá-gǎ xii-güedé ndaha-gá ndìhi sáhá-gǎ. <sup>41</sup>Te ío ní cuñúhu-güedé, te ní cudíí ìní-güedé sá ndécú-gǎ tnuú-güedé dico sàni ìi<sup>n</sup> sani úú ìní-güedé, te ní xǎha<sup>n</sup> Jèsús xii-güedé:

—¿Ndècu ndìhi-ndo luha sá cǎxí-ó ìha ñá? —càchí-gá xǎha<sup>n</sup>-gǎ xii-güedé.

<sup>42</sup>Te ní sǎñaha-güedé xii-gá luha chácá ñí chíhó, ndìhi dítá ñũñú ñũhú ndúdí, <sup>43</sup>te ní quehe<sup>n</sup>-gá te ndèhe-güedé ní xexi-gá. <sup>44</sup>Te dàtnúni ní xǎha<sup>n</sup>-gǎ:

—Nchaa sá ñí yáha-í-a cùu-xi sá ñí cachí tnúhu-í xii-ndo cùtnàhá ndécú ndìhi ñaha-gá-í xii-ndo, chi ní cachí-í sá dàcuítí cǎda-xi nchaa nacuáa càhá<sup>n</sup>-xi núú tütú ndíi Moisés, ndìhi núú tütú ndèé tnúhu ní càhá<sup>n</sup> cue téé ní xóo càhá<sup>n</sup> tnúhu Yǎ Ndiöxí ndéé sanaha, ndìhi núú libré Sǎlmú —càchí-gá xǎha<sup>n</sup>-gǎ xii-güedé.

<sup>45</sup>Te òrè-á<sup>n</sup> ñí sǎñaha-gǎ sá xiní tnúni-güedé, te ní tecú tnúni-güedé nchaa tnúhu càhá<sup>n</sup>-xi núú tütú Yǎ Ndiöxí. <sup>46</sup>Te ní xǎha<sup>n</sup>-gǎ xii-güedé:

—Duca<sup>n</sup> ndéé tnúni núú tütú Yǎ Ndiöxí sá dàcuítí sǎ yùhú Crístú cúú-í, te nduu úní ndoto-í. <sup>47</sup>Te ñhì ñuyíú cùténuu tnúhu ní càhá<sup>n</sup>-í, dico díhna nuu-gǎ ñuú Jerusalén ngúfta-yu cacunehe ñáhá-yu xii-í, te càhá<sup>n</sup>-yu nàcuáa ní dánèhé-í-yu, te cùñàhá-yu xii cue ñáyiú sá ná dándixi túu-yu ìní-yu sá ñà tujú quide váha-yu, te dàñá-yu nchaa ichi cuèhé ichi duha ndécú-yu, te natnii-yu ichi

Yá Ndiöxí, te duca<sup>n</sup> te cada càhnu iní-gá nchaá yíca cuëchi-yu. <sup>48</sup>Te vitna nchòhó cuu-ndo cuè téé cáhá<sup>n</sup> ndáá nchaá nàcuáa ní cuu chi ní xiní núú-ndó. <sup>49</sup>Te yúhú tendaha-ĩ Espíritú Yă Ndiöxí quixi cundecu ndihi-ndo, chi duca<sup>n</sup> ñ cachí-gá. Dico chí cúndècu-ni ñúú Jerusàlén-á<sup>n</sup> ndèé ná quèxio Espíritú Yă Ndiöxí ngúndecu ndihi-ndo cuèndá chindee ñàha-xi xii-ndo cada-ndo nchaá nacuáa ní cáhá<sup>n</sup>-í —càchí-gá xáha<sup>n</sup>-gă xii-güedé.

**Jèsús cuándaa-gá andiü**

*(Mr. 16:19-20)*

<sup>50</sup>Te Jèsús ní queñuhu ñaha-gă xii-güedé ñúú Jerusàlén

ndécá ñàha-gá cuáhá<sup>n</sup> ñúú Bètaniá, te xíá<sup>n</sup> ñi ndonehe-gá ndaha-gá núú ñinu, te ní xíca<sup>n</sup> táhú ñàha-gá xii-güedé núú Yă Ndiöxí. <sup>51</sup>Te sátá ñi xíca<sup>n</sup> táhú ñàha-gá xii-güedé núú Yă Ndiöxí, te ní quee-gá tnuú-güedé cuándaa-gá andiü. <sup>52</sup>Te ní ngüíta-güedé ní cachí-güedé sá ïo càhnu cuu Jèsús, te ní natñii-güedé ichi cuánuhú-güedé ñúú Jerusàlén, te súúni cùdíí iní-güedé ñúhú-güedé ichi. <sup>53</sup>Te nchaá nduu ní xíndecu-güedé veñúhu càhnu sá ïo cùnunu ní ndacá<sup>n</sup> táhú-güedé núú Yă Ndiöxí, te ní cachí-güedé sá ïo càhnu cuu-gá. Duha ní cuu dàvá-á<sup>n</sup>.

# TNÚHU NÍ CHÍDÓ TNÙNÍ TÉ JUÀÁ

Déhe Yá Ndiöxí ní cuu-gá ì<sup>n</sup> ñáyiú

**1** Cùmání-gă ngáva ñuyíú, te sa ndècu ndìhi Yá Ndiöxí Déhe-gá. Te ì<sup>n</sup>-ni xìcuu-gá. Te Déhe-gá-á<sup>n</sup> nǐ cuu-gá dàtná ì<sup>n</sup> tnúhu, chi ní cachí tnúhu-gá nàcuáa cà Tátá-gă Dútú Ndiöxí. <sup>2</sup>Te sa ndècu-gá ndìhi Dútú Ndiöxí te ní ngáva ñuyíú. <sup>3</sup>Te òu-ni tnúhu mee Dútú Ndiöxí ní cuu ní cadúha Déhe-gá nchaa sá ló ñuyíú. Te núu ñá túú Déhe-gá ñá, te ñá túú nă coo ñuyíú-a ni cùu. <sup>4</sup>Te òu-ni Déhe-gá quídé-gă ndécú-ó, te ní dáyèhé-gá iní-ó nàcuáa cundecu-o. <sup>5</sup>Te tnúhu-gá ní xíté nuu-xi núú ndécú nchàa ñáyiú ñùhu ichi cuehé ichi duha. Te ñáyiú-á<sup>n</sup> cúú-yu dàtná cue ñáyiú ndècu ì<sup>n</sup> núú néé, te òu-ní-yu cachí iní-yu xocání-yu tnúhu-gá dico vá ndácú-yu.

<sup>6-7</sup>Te ní xíndecu ì<sup>n</sup> téé ní xínani-dě Juàá, te téé-á<sup>n</sup> nǐ táuchíú<sup>n</sup> Yá Ndiöxí sá càhá<sup>n</sup>-dé tnúhu-gá núú ñáyiú. Te ní xáha<sup>n</sup>-dě xií-yu sá vèxi Déhe-gá ñuyíú-a, te dandìxi túu-gá iní-yu cuendá cutnùni iní-yu nàcuáa ndùu cuendá Yă Ndiöxí cuendá quíndáá iní-yu tnúhu-gá. <sup>8</sup>Te ñá díú mèè té Juàá ní dándìxi túu-dé iní-yu cuendá cutnùni iní-yu nàcuáa ndùu cuendá Yă Ndiöxí,

chi cuendá-ni ní xica cuu-dé ní cáhá<sup>n</sup>-dé sá Déhe Yá Ndiöxí véxi-gá dandìxi túu-gá iní-yu. <sup>9</sup>Te ndáá ndisa sá méé-gă dándìxi túu-gá iní ñáyiú ñuyíú-a cuendá cutnùni iní-yu nàcuáa ndùu cuendá Yă Ndiöxí.

<sup>10</sup>Te ní xíndecu-gá ñuyíú-a, te ñáyiú ñuyíú-a ñá ní cùtnuní iní-yu yoo cùu-gá, te òu-ni mee-gă ní cadúha-gá ñuyíú-a ní quide-gá chù<sup>n</sup> ní táhú Dútú Ndiöxí. <sup>11</sup>Te ní quixi-gá ñuyíú nǐ cadúha mee-gă, dico cue ñáyiú ñuyíú-a ñá ní cùu váha iní-yu núú-gă. <sup>12</sup>Dico davá-yu ní sándáá iní ñáhă-yu xii-gá, te ní nduu táhù-yu ní nduu déhe ñaha Yă Ndiöxí xií-yu. <sup>13</sup>Te ñá túú ní ndùu déhe ñaha-gă xií-yu sá cúú-yu déhe ñáyiú ñuyíú-a, àdi sá ndécú tătă-yu, nănă-yu chi mee Yă Ndiöxí duca<sup>n</sup> nǐ cuiní-gá cunduu sá ndúú dèhe ñaha-gă xií-yu.

<sup>14</sup>Te Déhe-gá ní quixi túu-gá ñuyíú-a, te ní cuu-gá ì<sup>n</sup> yiquí cùñú ní xíndecu ndìhi ñaha-gă xii nchoo cuè ñáyiú ní xica cuu túu ndìhi-gá. Te ní xiní-ó sá ìo càhnu cuu-gá cuendá sá ì<sup>n</sup> dìi díi-ni-gă cúú-gă Déhe Yá Ndiöxí, te ío cùndahú iní ñáhă-gă chíndèe ñaha-gá xii nchoo ñáyiú ndècu ñuyíú-a, te ío

ndáá càhá<sup>n</sup>-gá. <sup>15</sup>Te duha ní cáhá<sup>n</sup> té Juàá cuèndá Déhe Yá Ndiöxí ní xáha<sup>n</sup>-dë xii ñáyi:

—Cuèndá téé iha ni cáhá<sup>n</sup>-í ndéé cãni-gá ní cachí-í sá quíxí ì<sup>n</sup> téé quixi. Te téé-á<sup>n</sup> cúnùu-gá-dé, chi díhna-gá-dé sa ndècu-dé dàcúxí yùhú —duha ní xáha<sup>n</sup>-dë xii-yu.

<sup>16</sup>Te ío váha iní Yaá-á<sup>n</sup> chi xìto ñaha-gá xii-o nchàa-o ì<sup>n</sup> nduu ì<sup>n</sup> nduu. <sup>17</sup>Te ndíi Moisés ní cachí tñúhu ndíi tñúhu Yá Ndiöxí tñúhu sá sánú ìchi ñaha xii-o nacúaa cundecu-o, dico Déhe-gá Xítohó Jesucristú ní cachí-gá sá ío cùu iní ñáhá Yá Ndiöxí xii-o. Te ní cáhá<sup>n</sup>-gá nchaa dava-gá tñúhu ndáá. <sup>18</sup>Te ñá í<sup>n</sup> ñáyi xìní túu-yu Yá Ndiöxí. Dico ì<sup>n</sup>dii díí-ni Déhe-gá Yaá ndécú ndìhi-gá càchí tñúhu-gá nàcuáa càa-gá.

**Té Juàá téé dàcuandute ñaha xii ñáyi càhá<sup>n</sup> váha-dé cuèndá Xítohó Jesucristú**

(Mt. 3:11-12; Mr. 1:7-8; Lc. 3:15-17)

<sup>19</sup>Te cue téé isràèl ndécú ñúu Jerusàlén ní tendaha-güedë cue dútú ndìhi cue téé cùu levítá cuáhá<sup>n</sup>-güedé núu ndécú tē Juàá ndúcú tñúhu-güedé núu-dë ñuu ná téé cùu-dé. <sup>20</sup>Te ní cáhá<sup>n</sup> ndáá-dé ní xáha<sup>n</sup>-dë xii-güedé:

—Yúhú, ñá díú Crístú Yaá ní tendaha Yá Ndiöxí véxi ñuyú-a cùu-í —càchí-dé xáha<sup>n</sup>-dë.

<sup>21</sup>Te ní xáha<sup>n</sup> tùcu-güedé: —¿Te yoo cùu yohó váí? ¿Á yohó cùu-n tē Èliás? —càchí-güedé xáha<sup>n</sup>-güedë xii-dé.

Te ní xáha<sup>n</sup> tē Juàá: —Yúhú, ñá díú tē Èliás cùu-í —càchí-dé xáha<sup>n</sup>-dë.

Te xáha<sup>n</sup> tùcu-güedé: —¿Te yohó cùu-n tē ní cachí cue téé ndéé sanaha quixi cáhá<sup>n</sup> tñúhu Yá Ndiöxí-á<sup>n</sup>? —càchí-güedé xáha<sup>n</sup>-güedë xii-dé.

Te ní xáha<sup>n</sup>-dë: —Ni ñá díú tē-á<sup>n</sup> cùu-í —càchí-dé xáha<sup>n</sup>-dë xii-güedé.

<sup>22</sup>Te ní xáha<sup>n</sup> tùcu-güedé: —¿Te ná téé cùu yohó váí<sup>n</sup>?, cuèndá duca<sup>n</sup> nàcani tñúhu-ndí núu cue téé ní tendaha ñaha xii-ndí véxi-ndí, te cáhá<sup>n</sup> duu<sup>n</sup>-n ñuu ná téé cùu-n —cachí-güedé xáha<sup>n</sup>-güedë xii-dé.

<sup>23</sup>Te ní xáha<sup>n</sup> tē Juàá: —Yúhú cùu-í téé xica cáhá<sup>n</sup> xití yucu nàcuáa ní cáhá<sup>n</sup> ndíi Chàiaá, chi ndíi-á<sup>n</sup> ní cachí ndíi: “Chí dáñá ìchi cuehé ichi duha ndècu-ndo te tñii-ndo ìchi váha, chi véxi Yaá ío cùnuu”, duha ní cachí ndíi —càchí té Juàá xáha<sup>n</sup>-dë xii-güedé.

<sup>24</sup>Te cue téé ndècu tñúhu núu tē Juàá ñuu ná téé cùu-dé, cue téé-á<sup>n</sup> ní tendaha ñaha cue téé cùu fariséú xii-güedé. <sup>25</sup>Te ní xáha<sup>n</sup> tùcu-güedé xii tē Juàá:

—¿Ná cuèndá dàcuandute-n ñáyi te núu ñá díú Crístú cùu-n, te ni ñá díú tē Èliás, te ni ñá díú tē véxi cáhá<sup>n</sup> tñúhu Yá Ndiöxí cùu-n váí<sup>n</sup>? —càchí-güedé xáha<sup>n</sup>-güedë xii-dé.

<sup>26-27</sup>Te ní xáha<sup>n</sup> tē Juàá: —Yúhú ní ngódó núu-í dàcuandute-í ñáyi. Dico nchícú<sup>n</sup> ì<sup>n</sup> téé véxi, te téé-á<sup>n</sup> cúnùu-gá-dé dàcúxí yùhú, chi yúhú cùu-í ì<sup>n</sup> téé duu<sup>n</sup> duu<sup>n</sup> ñá túú tàù nandaxi cuèdicó ñii chàú-dé dico quide-í chùu<sup>n</sup>-dé. Te téé-á<sup>n</sup> sa ñúhu tnahá-dé tnuú-ndó dicó-ni sá ñá túú xìní-ndó-dë —càchí-dé xáha<sup>n</sup>-dë.

<sup>28</sup>Duha ní cuu ñúú Bètábará ñúú cáá ndàa ingá xio yúte Jòrdán, yàcá<sup>n</sup> ní xíndecu té Juàá ní dácuañdùte-dé ñáyiu.

**Jèsús quidé càhnu iní-gá  
nchaa yíca cuèchi ñáyiu**

<sup>29</sup>Te nduu tnèé ní xiní té Juàá Jèsús véxi yatni-gá núú ndécú-dé ndíhi ñáyiu. Te ní xáha<sup>n</sup>-dè xí-yu: —Chí cùndèhe téé-ǎ<sup>n</sup>, chí téé-ǎ<sup>n</sup> cúú-dé Crístú Yáá ní tendaha Yǎ Ndiǒxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ì<sup>n</sup> mbèé quiti ío váha iní-xi. <sup>30</sup>Te ñiú téé-ǎ<sup>n</sup> ní cachí-í sá cáncchícú<sup>n</sup>-dé quixi. Te cùnno-gá-dé dàcúxí yúhú, chí díhna-gá-dé sa ndècu ní cachí-í xii-ndo. <sup>31</sup>Te ní yúhú ñá túú xiní-í-dé ní cùu, dico xica cuu-í dácuañdute-í ñáyiu cuendá nchaa ñáyiu isràèl quini ñáhà-yu xii-dé —cachí-dé xáha<sup>n</sup>-dè xí-yu.

<sup>32</sup>Te ní xáha<sup>n</sup> tùcu-dé: —Ní xiní-í Espíritú Yǎ Ndiǒxí ní quee-xi andiu véxi cuu<sup>n</sup>-xi ngúndecu ndíhi ñaha-xi xii-dé, te dàtná cáá lõmá cáá Espíritú-á<sup>n</sup> véxi cuu<sup>n</sup>-xi. <sup>33</sup>Te yúhú ñá túú xiní-í-dé ní cùu, dico Yá Ndiǒxí Yáá ní tendaha ñàha xii-í xíca cùu-í dácuañdute-í ñáyiu, Yáá-á<sup>n</sup> ní cachí tnúhu-gá sá tée na quini-í ngúndecu ndíhi Espíritú-gá sá véxi cuu<sup>n</sup> andiu, te téé-á<sup>n</sup> taxi-dé Espíritú-gá cundecu ndíhi-o. <sup>34</sup>Te yúhú ní xiní-í-dé te xini ndáá-í sá Dèhe Dútú Ndiǒxí cúú-dé. Te xíǎ<sup>n</sup> cachí tnúhu-í xii-ndo —cachí té Juàá xáha<sup>n</sup>-dè xí-yu.

**Cue téé díhna nuu xica  
cuu ndíhi Jesús**

<sup>35</sup>Te nduu tnèé-á<sup>n</sup> ñiú-ni xíá<sup>n</sup> ndécú tē Juàá ndíhi úú cue téé xica

cuu ndíhi-dé. <sup>36</sup>Te ní xiní-dé Jèsús ñúhú-gǎ ichi, te ní xáha<sup>n</sup>-dè xii cue téé xica cuu ndíhi-dé-á<sup>n</sup>:

—Chí cùndèhe téé-ǎ<sup>n</sup>, chí téé-ǎ<sup>n</sup> cúú-dé Crístú Yáá ní tendaha Yǎ Ndiǒxí véxi ñuyíú-a. Te cùu-dé dàtná ì<sup>n</sup> mbèé quiti ío váha iní-xi —cachí-dé xáha<sup>n</sup>-dè.

<sup>37</sup>Te sá dúcá<sup>n</sup> ní cáhá<sup>n</sup> té Juàá núú cuè téé úú ndíhi-dé-á<sup>n</sup> ñúú ní chinchícú<sup>n</sup>-güedé Jèsús. <sup>38</sup>Te ní nchócótó-gǎ ndàa sátá-gǎ, te ní xiní-gá sá nchícú<sup>n</sup> ñáhá-güedé xii-gá. Te ní xáha<sup>n</sup>-gǎ xii-güedé: —¿Ná nándücu-ndo? —cachí-gá xáha<sup>n</sup>-gǎ xii-güedé.

Te ní xáha<sup>n</sup>-güedé: —¿Ndèé ndécú-n, Ràbíí? —cachí-güedé xáha<sup>n</sup>-güedé xii-gá. Te Ràbíí-á<sup>n</sup> quée-xí Mèstrú tnúhu mee-güedé. <sup>39</sup>Te ní xáha<sup>n</sup> Jèsús xii-güedé: —Chí nèhé te quini-ndó —cachí-gá xáha<sup>n</sup>-gǎ.

Te ní xica-güedé cuáhá<sup>n</sup>-güedé, te ní quexio-güedé núú quidé vèhe-gá. Te ndècu-ni-güedé ndíhi-gá ní cuaa, chí dàtná òré caa cúmí sacuaa ní sáá-güedé.

<sup>40</sup>Te úú cue téé-á<sup>n</sup> ní tñii-güedé tnúhu ní cáhá<sup>n</sup> té Juàá, te ní chinchícú<sup>n</sup>-güedé Jèsús. Te núú úú cue téé-á<sup>n</sup>, ì<sup>n</sup>-dé nání-dè Ndríxí, te ñaní-dé cúú tē Xímú, àdi Pelú chí úú ñiú-dé. <sup>41</sup>Te té Ndríxí-á<sup>n</sup> ní nanducu-ni-dè ñaní-dé te ní xáha<sup>n</sup>-dè:

—Ní naníhí-ndí téé cùu Mesías —cachí-dé xáha<sup>n</sup>-dè.

Te Mèsiás-á<sup>n</sup> quée-xí Crístú tnúhu mee-güedé, Yáá ní tendaha Yǎ Ndiǒxí véxi ñuyíú-a. <sup>42</sup>Te ndèca té Ndríxí ñaní-dé cuáhá<sup>n</sup> núú ndécú



Jèsús. Te òré ní xíní ñáhá Jèsús xii té Xímú, te ní xáha<sup>n</sup>-gă:

—Yòhó cúú-n tē Xímú déhe té Jónás, te vitna danàni ñaha-í Céfás xii-n —càchí-gá xáha<sup>n</sup>-gă.

Te Céfás-ă<sup>n</sup> quée-xí Pèlú tnúhu mee-güedě.

**Jèsús ní cáhá<sup>n</sup>-gá té Lìpé  
ndìhi té Natanàél**

<sup>43</sup>Te nduu tnée ní sani iní-gá quíh<sup>n</sup>-gá distritú Galileá. Te ní naníhí-gă ì<sup>n</sup> tée nàni Lìpé, te ní xáha<sup>n</sup>-gă xii-dé:

—Néhe ná quíh<sup>n</sup>-ó nùú quíh<sup>n</sup>-í-a —càchí-gá xáha<sup>n</sup>-gă.

<sup>44</sup>Te té Lìpé-á<sup>n</sup> cúú-dě tée ñuú Bètsaidá. Te ñuú yàcá<sup>n</sup> cúú ñuú té Ndrìxí ndìhi té Pèlú. <sup>45</sup>Te té Lìpé ní naníhí tnáhá-dě ndìhi té Natanàél, te ní xáha<sup>n</sup>-dě:

—Ní naníhí-ndě tée dii cuèndú-xi ní chídó tnùnì ndìi Moisés ndìhi dava-gá cue tée ní xóo cáhá<sup>n</sup> tnúhu Yá Ndiòxí ndéé sanaha. Te tée-á<sup>n</sup> nánì-dě Jèsús déhe té Chèé, tée ñuú Nazàrét —càchí-dé xáha<sup>n</sup>-dě.

<sup>46</sup>Te ní xáha<sup>n</sup> tē Natanàél xii té Lìpé:

—¿Te náa ío váha càa ñuú Nazàrét nùu da yàcá<sup>n</sup> quee tée cáhá<sup>n</sup> tnúhu Yá Ndiòxí? —càchí-dé xáha<sup>n</sup>-dě.

Te ní xáha<sup>n</sup> tē Lìpé:

—Néhe ná quíh<sup>n</sup>-ó te quiní-n —càchí-dé xáha<sup>n</sup>-dě.

<sup>47</sup>Te òré ní xíní Jèsús té Natanàél tá cùyatni-dé cuáhá<sup>n</sup>, te ní cáhá<sup>n</sup>-gá cuèndá-dé te ní cachí-gá:

—Tée véxi-ă<sup>n</sup> cúú-dě mei tēe isràél, te ñá í<sup>n</sup> nduu dandahú-dé ñáyiú —càchí-gá xáha<sup>n</sup>-gă.

<sup>48</sup>Te ní xáha<sup>n</sup> tē Natanàél xii Jèsús:

—¿Te nása náquiní ñáhá-n? —càchí-dé xáha<sup>n</sup>-dě.

Te ní xáha<sup>n</sup> Jèsús:

—Yúhú sa ní xíní ñáhà-í xii-n òré ndécú-gă-n càha yutnu ngúxí-ă<sup>n</sup> te ni tē Lìpé vátá cáná ñaha-gá-dé xii-n òré-á<sup>n</sup> —càchí-gá xáha<sup>n</sup>-gă xii-dé.

<sup>49</sup>Te sá dúcá<sup>n</sup> ñí cáhá<sup>n</sup>-gă, núu ní xáha<sup>n</sup> tē Natanàél xii-gá:

—Mèstrú, yòhó cúú-n Dēhe Dútú Ndiòxí yíndàha-n ñáyiú isràél —càchí-dé xáha<sup>n</sup>-dě xii-gá.

<sup>50</sup>Te Jèsús ní xáha<sup>n</sup>-gă:

—Cuèndá sá ñí xíní ñáhà-í xii-n càha yutnu ngúxí xǎ<sup>n</sup> iní ñáhá-n, dico cuéhé-gă núú sǎ quínì-n —càchí-gá xáha<sup>n</sup>-gă xii-dé.

<sup>51</sup>Te ní xáha<sup>n</sup> tùcu-gá:

—Na càchí tnúhu ndáá-í sá sàà nduu, te quiní-ndó nàcaá<sup>n</sup> andiu. Te quiní-ndó cuè espíritú xínú cuèchi núú Yá Ndiòxí sá ndàa nuu-xi quide-xi núú cùndècu yúhú Tée cùu ñanì tnáhá-ndó nchàa-ndo —càchí-gá xáha<sup>n</sup>-gă xii-güedě.

**Vico tnàndaha iò ñuú Cànaá**

**2** Te nduu únì sá dúcá<sup>n</sup> ñí cuu te ní xóo ì<sup>n</sup> vico tnàndaha ñuú Cànaá, ì<sup>n</sup> ñuú yíndèhu distritú Galileá. Te yàcá<sup>n</sup> ní xíndecu nǎná Jèsús. <sup>2</sup>Te tnáhá Jèsús ndìhi cue tée xica cuu ndìhi-gá ní cáhá<sup>n</sup>-yu cuáhá<sup>n</sup>-gá ndìhi-güedé vico-á<sup>n</sup>. <sup>3</sup>Te òré ní ndìhi vinú, te ní xáha<sup>n</sup> nǎná Jèsús xii-gá:

—Ñá túú-gă vinú ndécú ndìhí-yu —càchí-a<sup>n</sup> xáha<sup>n</sup>-a<sup>n</sup>.

<sup>4</sup>Te ní xáha<sup>n</sup> Jèsús xii-a<sup>n</sup>:

—Nǎá, ñá túú xìnì ñuhu-xi da yúhú cùñaha-n cuèndá vinú-á<sup>n</sup>, chi vátá tnáhá-gá òré quiní-yu yoo cùu yúhú —càchí-gá xáha<sup>n</sup>-gă xii-a<sup>n</sup>.

<sup>5</sup>Te ní xáha<sup>n</sup>-a<sup>n</sup> xii ñáyiú xínu cuechi:

—Cada-ndo nchàa nacuaá na càh<sup>a</sup><sup>n</sup> Jèsús —càchí-a<sup>n</sup> xáha<sup>n</sup>-a<sup>n</sup>.

<sup>6</sup>Te yàcá<sup>n</sup> nútnǎi ínú quídi yúu te quée dàtná ì<sup>n</sup> cièndú lítrú ndute ì<sup>n</sup> ì<sup>n</sup> quídi-á<sup>n</sup>. Te ndute-á<sup>n</sup> nándǎhi ñáyiú isràél ndáhǎ-yu te nàqueté-yu cóhǒ-yu chi duca<sup>n</sup> tnàhí quidé-yu nàcuáa sàndáá iní-yu Yá Ndiòxí.

<sup>7</sup>Te ní xáha<sup>n</sup> Jèsús xii nchaa cue tée xínu cuechi:

—Nadachítú-ndó ndùte ndi nchaa quídi-á<sup>n</sup> —càchí-gá xáha<sup>n</sup>-gǎ xii-güedé.

Te ní nadachítú-güedé. <sup>8</sup>Te ní xáha<sup>n</sup>-gǎ:

—Vitna te tava-ndo lùha, te canehe-ndo quíhí<sup>n</sup> cuáha-ndo tée quide vico —cachí-gá xáha<sup>n</sup>-gǎ xii-güedé.

Te duca<sup>n</sup> ñi quide-güedé ní tava-güedé luha nèhe-güedé cuáhá<sup>n</sup> ní sáha-güedé tée quide vico. <sup>9</sup>Te ní xito ndéé tée quide vico-á<sup>n</sup>, te sa ní nduu-xi vínú, te ñá túu ní xíní-dé ndéé véxi-xi, dico mee cue tée xínu cuechi sa naha-güedé núu ñi tava-güedé. Duca<sup>n</sup> te tée quide vico-á<sup>n</sup> ñi cana-dé tée tnándaha.

<sup>10</sup>Te ní xáha<sup>n</sup>-dǎ:

—Nchaa ñáyiú quide vico queñuhú-yu díhna-gá vínú váha. Te sa vai vínú váha xihí-yu, te dàtnùnì queñuhú-yu vínú ndàhú. Te yòhò díhna-gá vínú ndàhú ní queñuhu-n, te ndéé núu ñi ndihí-ná ní queñuhu-n vínú váha —càchí tée quide vico-á<sup>n</sup> xáha<sup>n</sup>-dǎ xii tée tnándaha-á<sup>n</sup>.

<sup>11</sup>Te sá ñi nadatiu Jesús ndute-á<sup>n</sup> ñi nduu-xi vínú cúu-xí ì<sup>n</sup> chiu<sup>n</sup> díhna nuu sǎ vǎ yòo tnàhí ndàcu

cada ní quide-gá ñuu Cànaá, ì<sup>n</sup> ñuu yíndèhu distritú Galileá, te chiú<sup>n</sup> ní quide-gá-á<sup>n</sup> cúu-xí ì<sup>n</sup> chiu<sup>n</sup> cahnu vihi, núu xíá<sup>n</sup> ní cutnùnì iní-yu sá ìo càhnu cuu-gá, te ní sàndáá iní ñáhá nchàa cue tée xica cuu ndihí-gá.

<sup>12</sup>Te sátá ñi yáha vico, te ní xica Jèsús ndihí náná-gǎ, ndihí cue ñaní-gá, ndihí nchaa cue tée xica cuu ndihí-gá cuáhá<sup>n</sup>-yu ñuu Capèrnaúm. Te yàcá<sup>n</sup> ní xíndecú-yu ì<sup>n</sup> úú nduu ndihí-gá.

**Jèsús ñá túu tnàhá iní-gá nàcuáa quide ñáyiú xití veñúhu**

(Mt. 21:12-13; Mr. 11:15-18; Lc. 19:45-46)

<sup>13</sup>Te ta cùyatni cada ñáyiú isràél vico pàscuá, te ní xica Jèsús cuáhá<sup>n</sup>-gá ñuu Jerusalén. <sup>14</sup>Te sátá ñi sáá-gá yàcá<sup>n</sup>, te ní xica-gá cuáhá<sup>n</sup>-gá veñúhu càhnu sá ìo cùnuu, te xití veñúhu-á<sup>n</sup> ñi xíní-gá ndécú ñáyiú dìcò-yu ndicutu, mbéé ndihí lõmá, te tnàhá ñáyiú dàma díhú<sup>n</sup> núcò-yu ní xíní-gá. <sup>15</sup>Te ní quehe<sup>n</sup>-gá ì<sup>n</sup> úú yoho, te ní cáunuu tnàha-gá, te ní dáyùhu-gá ñáyiú ní queé-yu quehe veñúhu, ndihí ndicutú-yu ndihí mbéé-yu. Te cue ñáyiú dàma díhú<sup>n</sup>-ǎ<sup>n</sup> ní dàngöyo-gá díhú<sup>n</sup>-yu, te ní dándúá-gá mèsá-yu. <sup>16</sup>Te ní xáha<sup>n</sup>-gǎ xii cue ñáyiú dico lõmá:

—iQueñuhu-ndo nchàa quiti-a xití veñúhu-a! ¡Vá cáda-ndó vèhe núu yáhu núu cúu vèhe Tàtá-í Dútú Ndiòxí! —càchí-gá xáha<sup>n</sup>-gǎ xií-yu.

<sup>17</sup>Te xíá<sup>n</sup> ní ndacu iní cue tée xica cuu ndihí-gá sá dúcá<sup>n</sup> yòdo tnuní núu tütù-gá, te càchí-xi: “Ío cùyica iní-í chi ñá cuiní-yu canehe íi-yu vehe Tàtá-í”, duha càchí-xi núu tütù-gá.

<sup>18</sup>Te ní xáha<sup>n</sup> cuè téé isràèl xii-gá:  
—¿Ná cúú sǎ vǎ yǒo tnàhí ndàcu  
cada, cada-n cuèndá cutnùnì  
iní-ndí sá cúú òuha taxi tnunì  
ñáhá-n xii-ndí-i? —càchí-güedé  
xáha<sup>n</sup>-güedé xii-gá.

<sup>19</sup>Te ní xáha<sup>n</sup> Jèsús:  
—Chí dǎngòyo veñúhu-a, te není  
xití úní nduu te sa nadàxínu-í —  
càchí-gá xáha<sup>n</sup>-gǎ xii-güedé.

<sup>20</sup>Te ní xáha<sup>n</sup> tùcu cue téé isràèl:  
—Údico ìnú cuía nǐ  
xíndecuu-güedé ní sáá veñúhu-a, te  
yòhó cuìní-n nàdaxínu-n xití úní-ni  
nduu —càchí-güedé xáha<sup>n</sup>-güedé  
xii-gá.

<sup>21</sup>Dico sá nǐ cáhá<sup>n</sup>-gá chi ñá díú  
cuèndá veñúhu ni cǎhá<sup>n</sup>-gá chi  
cuèndá yiqui cùñú-gá ní cáhá<sup>n</sup>-gá.

<sup>22</sup>Núu sátá nǐ xíhí-gá, te ní ndoto-gá,  
te òré-á<sup>n</sup> nǐ ndacu iní cue téé ní xica  
cuu ndíhi-gá nàcuáa ní cáhá<sup>n</sup>-gá, núu  
xíá<sup>n</sup> ní sándáá iní-güedé tnúhu yòdo  
tnuní núu tütú-gá. Te duca<sup>n</sup> te ní  
sándáá iní-güedé tnúhu ní cáhá<sup>n</sup>-gá.

### Jèsús xiní-gá nàcuáa cà iní nchaa ñáyiú

<sup>23</sup>Te òré ndécú Jèsús vico pàscuá,  
te ío vǎi ñáyiú ní sándáá iní ñáhá  
xii-gá cuèndá ío titní sá vǎ yǒo  
tnàhí ndàcu cada ní quide-gá ní  
xiní-yu. <sup>24</sup>Dico Jèsús ñá ní cǎhá<sup>n</sup>-gá  
nchaa tnúhu ñúhu iní-gá, chi sa ní  
cutnùnì iní-gá sá ñà túú cùu váha  
iní-yu. <sup>25</sup>Te ñá túú xini ñuhu-gá ì<sup>n</sup>  
ñáyiú cùñaha nàcuáa cà iní nchaa  
tnàha ñáyiú-yu, chi mee-gǎ sa nàha  
ndáá-gá nàcuáa cà iní-yu nchaá-yu.

### Jèsús ndíhi té Nicòdemú

**3** Ní xíndecu ì<sup>n</sup> téé cùu fariséú  
ní xínani-dě Nicòdemú, te

ní cuu-dé ì<sup>n</sup> téé cùnuu núu ñáyiú  
isràèl. <sup>2</sup>Te téé-á<sup>n</sup> nǐ sáhá<sup>n</sup>-dé niú  
ní cáhá<sup>n</sup> ndíhi-dé Jèsús, te ní  
xáha<sup>n</sup>-dě:

—Mèstrú, yúhú ndíhi  
dava-gá-güedé sa nàha-ndí sá Yǎ  
Ndiòxí ní tendaha ñàha-gá xii-n  
vèxi-n dānehé ñáhá-n xii-ndí, chi  
núu ñá túú Yǎ Ndiòxí ndécú ndíhi-n,  
te vǎ ndácú-n càda-n nchaa sá vǎ  
yǒo tnàhí ndàcu cada quide-n —  
cachí-dé xáha<sup>n</sup>-dě.

<sup>3</sup>Te ní xáha<sup>n</sup> Jèsús:

—Na càchí tnúhu ndáá-í xii-n sǎ  
ncháá ñáyiú vǎ ná càcu saa tucu,  
te vǎ ndíhu ndaha ñàha Yǎ Ndiòxí  
xíi-yu —càchí-gá xáha<sup>n</sup>-gǎ xii-dé.

<sup>4</sup>Te ní xáha<sup>n</sup> tè Nicòdemú:

—¿Te nása cada ì<sup>n</sup> ñáyiú sa  
ní yíi te cacu-ni tucú-yu? ¿Náa  
ndíhu tucú-yu xití ñǎñá-yu te cacu  
tucú-yu xito cùu uú-ǎ<sup>n</sup>? —càchí-dé  
xáha<sup>n</sup>-dě xii-gá.

<sup>5</sup>Te ní xáha<sup>n</sup> Jèsús:

—Na càchí tnúhu ndáá-í xii-n sǎ  
ncháa ñáyiú na ndùu ndoo nduu  
nine iní-xi cuú-yu ñáyiú ní na càcu  
saa ndíhi ndute ndíhi Espíritú  
Yǎ Ndiòxí, ñáyiú-á<sup>n</sup> ndíhu ndaha  
ñàha-gá xíi-yu. <sup>6</sup>Te nchaa ñáyiú  
càcu ñuyíú-a, chi déhe ñáyiú  
ñuyíú-a cùú-yu. Te ñáyiú ní nduu  
ndoo ní nduu nine iní-xi, ñáyiú-á<sup>n</sup>  
nǐ nduu táhú-yu Espíritú Yǎ Ndiòxí  
te tàxi tnuní ñáhá-ñǎ Espíritú-gá  
xíi-yu. <sup>7</sup>Te vǎ cùñúhu-n tnúhu ní  
cáhá<sup>n</sup>-í-a, chi nchaa ñáyiú ní sándáá  
iní ñáhá xii-í ní nduu ndoo ní nduu  
nine iní-yu, te ñáyiú-á<sup>n</sup> cúú-yu  
dàtná ñáyiú ní nacacu saa. <sup>8</sup>Táchí  
nděni xíá<sup>n</sup> tècú dóho-o xico-xi, dico  
ñá túú xiní-ó ndéè ichi véxi-xi, te  
ní ñà túú xiní-ó ndéè ichi cuáhá<sup>n</sup>-xi.

Duca<sup>n</sup> sãtnahá-xi cùu Espiritú-gá ndécú ndíhi ñáyiú ní nduu ndoo ní nduu nine iní-xi —càchí-gá xáha<sup>n</sup>-gã xii-dé.

<sup>9</sup>Te dàtnùnì ní xícá<sup>n</sup> tnúhú tùcu té Nicòdemú núú-gã, te xáha<sup>n</sup>-dẽ xii-gá:

—¿Te nása ndùu tnúhu càhá<sup>n</sup>-n dùca<sup>n</sup> cahá<sup>n</sup>-n? —càchí-dé xáha<sup>n</sup>-dẽ xii-gá.

<sup>10</sup>Te ní xáha<sup>n</sup> Jèsús:

—Yòhó cúu-n ì<sup>n</sup> tée cùtnuní iní-xi, chi dàcuaha-n ñáyiú isràél, ¿te ñá tècú tnùnì-n tnúhu càhá<sup>n</sup>-í-u?

<sup>11</sup>Te na càchí tnúhu ndáá-í xii-n sã nchúhú càhá<sup>n</sup>-ndí ì<sup>n</sup> sá ñí tecú tnùnì-ndí, te càhá<sup>n</sup> ndáá-ndí cuendá ì<sup>n</sup> sá ñí xiní-ndí. Dico nchòhò ñá tècú tnùnì-ndó tnúhu càhá<sup>n</sup>-ndí.

<sup>12</sup>Te ñá sàndáá iní-ndó tnúhu càhá<sup>n</sup>-í cuendá nchaa nàcuáa cùu ñuyíú-a, te uu<sup>n</sup>-gá cada-ndo ñúu càhá<sup>n</sup>-í cuendá nchaa nàcuáa cùu andiú.

<sup>13</sup>Vá yòo ì<sup>n</sup> sàà andiú, te cani-xi cuendú nàcuáa càa. Chi ì<sup>n</sup>dii díí-ni yúhú véxi cuu<sup>n</sup>-í andiú, te cùu-í ñanì tnáhá-ndó nchàa-ndo. Te diu-ni yàcá<sup>n</sup> ndaa-í cundecu-í.

<sup>14</sup>Te dàtná ní ndanehe ndíi Moisés cóo ñí sata caa ndíi-dí xití yucu, duca<sup>n</sup> càda ñaha-güedé cata caa ñaha-güedé núú cùrúxí xii yúhú Tée cùu ñanì tnáhá-ndó nchàa-ndo ì<sup>n</sup> nduu, <sup>15</sup>te duca<sup>n</sup> yãha-í cuendá nchaa ñáyiú na quèndáá iní ñáhá xii-í te nduu táhú-yu cundecu-yu ndíhi Yá Ndiòxí ní caa ni quíh<sup>n</sup> —càchí-gá xáha<sup>n</sup>-gã xii-dé.

**Yá Ndiòxí ío cùu iní-gá ñáyiú ñuyíú-a**

<sup>16</sup>Te Yá Ndiòxí ío cùu iní-gá ñáyiú ñuyíú-a. Te ì<sup>n</sup>dii-ni Déhe-gá ndécú,

te ní tendaha ñàha-gá ní quixi-gá ñuyíú-a, te núu na quèndáá iní ñáhá ñáyiú, te vá cuíta nihnú-yu, chi nduu táhú-yu cundecu-yu ndíhi-gá ní caa ni quíh<sup>n</sup>. <sup>17</sup>Te Yá Ndiòxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyiú, chi ní tendaha-gã Déhe-gá ní quixi-gá sá dácäcu nihnu-gá ñáyiú ñuyíú-a núú ùhú núú ndàhú.

<sup>18</sup>Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáhá<sup>n</sup>-yu núú ùhú núú ndàhú, chi ñá túú sàndáá iní-yu Déhe Dútú Ndiòxí. <sup>19</sup>Chi ní quixi Déhe-gá ñuyíú-a ní dándíxí tùu-gá iní-yu cuendá cutnùnì iní-yu nàcuáa ndùu cuendá Yã Ndiòxí te tñí-yu ì<sup>n</sup> ichi váha ni cùu, te ñá ní tnàhá iní-yu, chi ní cudíí-gã iní-yu nchaa sá cuèhé sá dúhá dàcúúxí sã vãha, núu xíã<sup>n</sup> tá xíta nihnú-yu cuáhá<sup>n</sup>.

<sup>20</sup>Te nchaa ñáyiú quide nchaa sá cuèhé sá dúhá ñã tnàhá iní-yu cutnùnì iní-yu nàcuáa ndùu cuendá Yã Ndiòxí, te ñá tñí-yu tnúhu-gá cuendá yùhú-yu nduu tnùnì nchaa sá quidè-yu. <sup>21</sup>Te nchaa ñáyiú ñùhu ichi ndáá cuìní-yu cutnùnì iní-yu nàcuáa ndùu cuendá Yã Ndiòxí, te cùtnunì sá chindèe ñaha-gá xií-yu, chi quide váha-yu.

**Té Juàá tée dàcuandute ñaha xii ñáyiú càhá<sup>n</sup> váha tucu-dé cuendá Jèsús**

<sup>22</sup>Te sátá dúcá<sup>n</sup> ñí cuu, te ní quee Jèsús cuáhá<sup>n</sup>-gá ndíhi cue tée xica cuu ndíhi-gá distritú Jùdeá. Te yàcá<sup>n</sup> ní xíndecu tnaa-gá ndíhi-güedé ní xóo dacuàndute-güedé ñáyiú.

<sup>23</sup>Te ndècu té Juàá ìí<sup>n</sup> xichi núú nání Ènón yatni ñúú Sàlém dácuañdute-dé ñáyíu, chi yàcá<sup>n</sup> ío váha ñùhu ndute, núú xíá<sup>n</sup> ní xóo quíhí<sup>n</sup> ñáyíu yàcá<sup>n</sup> ní xóo cuanduté-yu. <sup>24</sup>Duha ní cuu cútñàhá vátá ngává-gǎ té Juàá vecaá.

<sup>25</sup>Te ní cacu ìí<sup>n</sup> cuèndú ní cáhá<sup>n</sup> cue tée xica cuu ndíhi té Juàá ndíhi ìí<sup>n</sup> úú cue tée isràél, núú ndèdacàa sá váha-gá cada ñáyíu cuèndá nduu íí-yu. <sup>26</sup>Te ní sáhá<sup>n</sup>-güedé núú ndécú tē Juàá ní xáha<sup>n</sup>-güedé:

—Mèstrú, tée ní quixi núú ní xíndecu-n ndàa íngá xio yúte Jòrdán, tée dii cuèndú-xi ní cáhá<sup>n</sup>-n, tée-ǎ<sup>n</sup> dácuañdute-dé tñàhá-dé ñáyíu. Te ío vài ñáyíu ní chinchícú<sup>n</sup> ñáhá xii-dé —càchí-güedé xǎha<sup>n</sup>-güedé xii-dé.

<sup>27</sup>Te ní xáha<sup>n</sup> tē Juàá:

—Te vá yóo ìí<sup>n</sup> ndàcu cada ìí<sup>n</sup> chiu<sup>n</sup> nacuaá cuu váha iní Yǎ Ndiöxí, te núú ñá túú mèe-gá chíndèe ñaha-gá xii-yu. <sup>28</sup>Te nchòhó sa nàha-ndo sá yúhú ní cáhá<sup>n</sup> ndáá-í sá ñà díú Crìstú cùu-í, dico mee Yǎ Ndiöxí ní tendaha ñàha-gá yódó nùu-í véxi núú Yàá-á<sup>n</sup>. <sup>29</sup>Te nchòhó xìní-ndó sǎ ìí<sup>n</sup> tée tñandaha te xíchi tñandaha ndíhi-ná-dé cúndíhi-dé. Te tée ní xica ndáhú ío cùdíí iní-dé ndèdóho-dé nchaa tñúhu càhá<sup>n</sup> tée tñandaha-á<sup>n</sup>. Te duca<sup>n</sup> sätñahá-xi cùu yúhú, chi ío cùdíí iní-í sá vái ñáyíu ta chinchícú<sup>n</sup> ñáhá xii Jesús cuáhá<sup>n</sup>. <sup>30</sup>Te uu<sup>n</sup>-gá cuita cuu vài ñáyíu cutnùní iní-xi sá ío cùnuu-gá, te yúhú cuita ndóo ndee-í quíhí<sup>n</sup> —càchí-dé xǎha<sup>n</sup>-dē xii-güedé.

#### Crìstú véxi cuu<sup>n</sup>-gá andíu

<sup>31</sup>Te ìí<sup>n</sup> dii díí-ni Crìstú Yáá véxi cuu<sup>n</sup> andíu cùnuu-gá núú ñùyíú-a.

Te nchaa ñáyíu ndècu ñuyíú-a cùu-yu ñáyíu ñuyíú iha, te càhá<sup>n</sup>-yu sá cùu-xí ñùyíú-a. Dico Crìstú Yáá véxi cuu<sup>n</sup> andíu <sup>32</sup>càhá<sup>n</sup>-gá ìí<sup>n</sup> sá ní xíní-gá, te càhá<sup>n</sup>-gá ìí<sup>n</sup> sá ní tecú dóho-gá. Te ñá túú cuíní-yu quíndáá iní-yu tñúhu càhá<sup>n</sup>-gá.

<sup>33</sup>Te nchaa ñáyíu tñèi tñúhu càhá<sup>n</sup> Yáá véxi cuu<sup>n</sup> andíu-á<sup>n</sup> càhá<sup>n</sup>-yu sá tñúhu Yá Ndiöxí cùu-xí ìí<sup>n</sup> sá ndáa.

<sup>34</sup>Te Déhe-gá Yáá véxi cuu<sup>n</sup> andíu càhá<sup>n</sup>-gá mee-ni tñúhu-gá. Te ñá ùhú iní-gá ní sáñaha-gǎ Espiritú-gá ndécú ndíhi Déhe-gá. <sup>35</sup>Te Dútú Ndiöxí ío cùu iní-gá Déhe-gá, núú ní xáha<sup>n</sup>-gǎ sá méé-gǎ taxi tñùní-gá nchaandi túhú sá ío. <sup>36</sup>Te nchaa ñáyíu na quíndáá iní ñáhá xii Déhe-gá, ñáyíu-á<sup>n</sup> cundecú-yu ndíhi-gá ni caa ni quíhí<sup>n</sup>. Te nchaa ñáyíu vá quíndáá iní ñáhá xii Déhe Yá Ndiöxí ío dandòho ñaha-gá xii-yu.

#### Jèsús ndíhi ìí<sup>n</sup> ñaha Sàmariá

**4** Te ní níhí cue tée cùu fariséú tñúhu sá vài-gá ñáyíu ta chinchícú<sup>n</sup> ñáhá xii Jesús. Te duca<sup>n</sup> vài-gá-yu ta dàcuandute-gá cuáhá<sup>n</sup> dàcúxí tē Juàá. <sup>2</sup>Te cuèi ñá díú mèe-gá dácuañdute ñaha-gá xii-yu, dico cue tée xica cuu ndíhi-gá dácuañdute ñaha-güedé xii-yu. <sup>3</sup>Te ní níhí Jèsús tñúhu nàcuáa càhá<sup>n</sup> cue tée cùu fariséú, núú ní ndee-gá distrítú Jùdeá cuánuhú tucu-gá distrítú Galiléa.

<sup>4</sup>Te ichi ñùhu-gá ní nayáha-gá distrítú Sàmariá. <sup>5</sup>Te ní sáá-gá ìí<sup>n</sup> ñúú nání Sicár te ñúu-á<sup>n</sup> yíndèhu-xi distrítú Sàmariá. Te xía<sup>n</sup> cáá yàtni ñuhu núú ní sáha táhú ndíi Jacób déhe ndíi ndíi Chèé. <sup>6</sup>Te yàcá<sup>n</sup> cáá

dòco ní cuu cuendá ndí Jàcób. Te cùu-xi datná cuádava nduu ñuhu Jesús ichi, te ío ní xàú-gá nũ ní sáá-gá yuhu dòco-á<sup>n</sup> ñí ngóo-gá ndétátú-gá. <sup>7-8</sup>Te ní xica cue tée xica cuu ndíhi-gá cuáhá<sup>n</sup>-güedé xítí ñuú Sicár cuánguaa<sup>n</sup>-güedé sá cáxí-güedě. Te yuhu dòco-á<sup>n</sup> núcõo-gá ní sáá ì<sup>n</sup> ñadìhí ñaha distrítú Sàmariá véxi quéhnu-a<sup>n</sup> ndute, te ní xáha<sup>n</sup> Jèsús:

—Taxi táhú luha ndute na còho-í —càchí-gá xáha<sup>n</sup>-gă.

<sup>9</sup>Te ní xáha<sup>n</sup> ñadìhí-á<sup>n</sup>:

—¿Ná cuendá da núú-í xicá<sup>n</sup>-n ndùte coho-n? Te yòhó cúú-n tēe isràél, te yúhú cúú-í ñaha Sàmariá —càchí-a<sup>n</sup> xăha<sup>n</sup>-a<sup>n</sup> xì-gă.

Te duca<sup>n</sup> ñí xáha<sup>n</sup>-a<sup>n</sup>, chi ñá túú ndècu váha ñáyíu isràél ndíhi ñáyíu distrítú Sàmariá. <sup>10</sup>Te ní xáha<sup>n</sup> Jèsús xii-a<sup>n</sup>:

—Ñá cútnùní iní-n nă taxi Yá Ndiõxí xii-n, te ni ñă cútnùní iní-n yòo xicá<sup>n</sup> ndute núú-n. Te núu dícò xìní-n yòo cuu yúhú á, te da mee-n cǎcá<sup>n</sup>-n ndùte núú-í coho-n, te yúhú taxi-í ndute cundecu ndíhi-n nũ cuáhá<sup>n</sup> núú vèxi —càchí-gá xáha<sup>n</sup>-gă.

<sup>11</sup>Te ní xáha<sup>n</sup> tùcu ñadìhí-á<sup>n</sup>:

—Tătá, nì sá quéhnu-n ndùte ñá túú nèhe-n, te doco-a cùnù víhí, te ñá túú ndèe quínguehe<sup>n</sup>-n ndùte taxi-n coho-í. <sup>12</sup>Ndí Jàcób ñaní tnáhá-ndí ní xíndecu ndèe sanaha ñí cadúha ndí doco-a ñí tóo ndute ní xíhi ndí, ndíhi nchaa déhe ndí, ndíhi nchaa quiti ndí, te ní ndóo cùu cuendá-ndí. ¿Te násai, te yòhó cùnù-gá-n dàcúxí ndí-ă<sup>n</sup>? —càchí-a<sup>n</sup> xăha<sup>n</sup>-a<sup>n</sup> xì-gă.

<sup>13</sup>Te ní xáha<sup>n</sup> Jèsús:

—Nchaa ñáyíu xíhi ndute doco-a, te vá cúú vètú dúcá<sup>n</sup> iní-yu chi dayichí ñáhá-ní tùcu-xi ndute-a.

<sup>14</sup>Dico nchaa ñáyíu na còho ndute na cuáñaha-í, te vá ì<sup>n</sup> ndùu-gá dayichí ñáhá-xí ndùte-á<sup>n</sup> xií-yu, chi ndute cuáñaha-í cúú-xí ndùte váha-gá. Te dàtná quée ñihni ndute xítí doco-a, nchaa-ni nduu ñuhu ñá túú yìchí, duca<sup>n</sup> sǎtnahá-xi cada-xi chi candeca-xi iní-yu ni caa ni quíhí<sup>n</sup>, te núu na còhó-yu ndute cuáñaha yùhú —càchí-gá xáha<sup>n</sup>-gă xii-a<sup>n</sup>.

<sup>15</sup>Te ní xáha<sup>n</sup>-a<sup>n</sup>:

—Tătá, taxi ndute-á<sup>n</sup> ná còho-í cuendá sá vă dáyichí ñáhá tnàhí-gá-xi ndute. Te vá quíxí-gă-í quixi quéhnu-í ndute doco-a —càchí-a<sup>n</sup> xăha<sup>n</sup>-a<sup>n</sup> xì-gă.

<sup>16</sup>Te ní xáha<sup>n</sup> Jèsús:

—Cuáhá<sup>n</sup> cuàngàna yìi-n, te quixi-ndo ìha —cachí-gá xáha<sup>n</sup>-gă xii-a<sup>n</sup>.

<sup>17</sup>Te ní xáha<sup>n</sup>-a<sup>n</sup>:

—Ñá túú yìi-í —càchí-a<sup>n</sup> xăha<sup>n</sup>-a<sup>n</sup> xì-gă.

Te ní xáha<sup>n</sup> tùcu Jesús:

—Ndáá càhá<sup>n</sup>-n sǎ ñà túú yìi-n.

<sup>18</sup>Dico ní cuu úhú<sup>n</sup> tée cǎndeca-n, te tée ndèca-n vitna chi ñá dífú yìi-n cuu-dé, te ndáá càhá<sup>n</sup>-n sǎ ñà túú yìi-n —cachí-gá xáha<sup>n</sup>-gă xii-a<sup>n</sup>.

<sup>19</sup>Te sá dúcá<sup>n</sup> ñí xáha<sup>n</sup>-gă nũ ní xáha<sup>n</sup> tùcu-a<sup>n</sup>:

—Tătá, yúhú sání iní-í sá yòhó cúú-n ì<sup>n</sup> tée càhá<sup>n</sup> tnúhu Yá Ndiõxí.

<sup>20</sup>Te cue ñaní tnáhá-ndí ní xíndecu ndéé sanaha ñí xóo cada càhnú-yu Yá Ndiõxí tindúú-a, dico nchòhó ñáyíu isràél càchí-ndó sǎ ndèe ñuú Jerusàlén cada càhnu-o-gá —càchí-a<sup>n</sup> xăha<sup>n</sup>-a<sup>n</sup> xì-gă.

<sup>21</sup>Te ní xáha<sup>n</sup> Jèsús xii-a<sup>n</sup>:  
—Ì<sup>n</sup> tnúhu na càhá<sup>n</sup>-í-a, te  
quindáá iní-n. Sa ta cùyatni  
sáá nduu sá ñà dífú-gã mee-ni  
tìndúú-a, te ni ñà dífú-gã mee-ni  
ñúú Jerusálén cada càhnu-ndo  
Tátá-ó Dütú Ndiöxí, chi ndëni  
ní cuu cada càhnu-ndo-gá. <sup>22</sup>Te  
nchòhó cue ñáyiú Sàmariá chi ñá  
cùtnùnì iní-ndó nã cúú sã quidé  
càhnu-ndo, dico nchúhú ñáyiú  
isràél, chi cùtnunì iní-ndí ná cúú sã  
quidé càhnu-ndí. Chi ì<sup>n</sup> tée isràél  
véxi-dé dàcácu nihnu-dé ñáyiú  
cuèndá vá quìh<sup>n</sup>-yu núú ùhú núú  
ndàhú. <sup>23</sup>Te není vitna ngúíta-yu  
cada càhnu ndisá-yu Tátá-ó Dütú  
Ndiöxí, te cadá-yu ni yùhu ni iní-yu  
sá cúú-xí-gã, chi mee-gã duca<sup>n</sup>  
cuìnì-gá cadá-yu cada càhnú-yu-gá.  
<sup>24</sup>Te Yá Ndiöxí chi ì<sup>n</sup> espíritú  
cúú-gã. Te nchaa ñáyiú na càda  
cahnu ñaha, te cadá-yu ni yùhu ni  
iní-yu sá cúú-xí-gã te cadá-yu dàtná  
càhá<sup>n</sup> tnúhu-gá —càchí-gá xáha<sup>n</sup>-gã  
xii-a<sup>n</sup>.

<sup>25</sup>Te ní xáha<sup>n</sup> ñàdìhí-á<sup>n</sup>:  
—Xìni-í sá quíxí tée cùu Mesías,  
tée càchí-güedé nání Cristú. Te  
tée-ã<sup>n</sup> ná sàá-dé, te cachí tnúhu  
ndáá-dé nàcuáa cuu —càchí-a<sup>n</sup>  
xáha<sup>n</sup>-a<sup>n</sup> xii-gá.

<sup>26</sup>Te ní xáha<sup>n</sup> Jèsús:  
—Diu tée-á<sup>n</sup> cúú yùhú tée  
ndàtnúhu ndìhi-n —càchí-gá  
xáha<sup>n</sup>-gã xii-a<sup>n</sup>.

<sup>27</sup>Te òré-á<sup>n</sup> nì ndexìo cue tée xìca  
cuu ndìhi-gá, te ní cuñúhu-güedé sá  
ndàtnúhu-gá ndìhi ñàdìhí-á<sup>n</sup>. Dico  
ni ì<sup>n</sup>-güedé ñá ní xìcá<sup>n</sup> tnúhú-güedé  
núú-gã ñúú ná cuèndú ndàtnúhu-gá  
ndìhi ñàdìhí-á<sup>n</sup>. <sup>28</sup>Duca<sup>n</sup> te ní  
dándöo ñàdìhí-á<sup>n</sup> yóó ndute-a<sup>n</sup>

xíá<sup>n</sup>, te ní xica-a<sup>n</sup> cuánuhú-a<sup>n</sup> ñúú  
cùtnúhu-a<sup>n</sup> ñáyiú cuèndá Jèsús.

<sup>29</sup>Te ní xáha<sup>n</sup>-a<sup>n</sup>:

—Chí nèhé ná quìh<sup>n</sup>-ó, chi  
quiní-ndó nã cúú ì<sup>n</sup> tée nùcáo yuhu  
dòco-á<sup>n</sup> ñúú ñá dífú Cristú Yáá ní  
tendaha Yá Ndiöxí véxi ñuyíú-a  
cùu-dé ñúú ní cáhá<sup>n</sup> ndáá-dé  
nàcuáa cùu ndecu-í —càchí-a<sup>n</sup>  
xáha<sup>n</sup>-a<sup>n</sup> xii-yu.

<sup>30</sup>Te sá nì níhí ñáyiú ñúú-á<sup>n</sup> tnúhu,  
xíá<sup>n</sup> ní xicá-yu cuáhá<sup>n</sup>-yu. <sup>31</sup>Te òré  
vátá sàá-gá-yu xíá<sup>n</sup> nì xáha<sup>n</sup> cuè tée  
xìca cuu ndìhi-gá xii-gá:

—Mèstrú, cudèhñu na cudehñu-o  
—cachí-güedé xáha<sup>n</sup>-güedé xii-gá.

<sup>32</sup>Te ní xáha<sup>n</sup>-gã:

—Ndècu ì<sup>n</sup> sá cáxi-í, ì<sup>n</sup> sá ñà túú  
xìni nchòhó —càchí-gá xáha<sup>n</sup>-gã  
xii-güedé.

<sup>33</sup>Te cue tée xìca cuu ndìhi-gá  
xìtnàha-güedé:

—Váa lò ñáyiú ní quixi nehe sá  
nì xexi-gá ñúú duha càhá<sup>n</sup>-gá —  
càchí-güedé xìtnàha-güedé.

<sup>34</sup>Te ní xáha<sup>n</sup>-gã:

—Dàtná cuìnì-ndó cùu vétú iní-ó  
òré xéxi-ó, duca<sup>n</sup> cùu vétú iní-í  
quidè-í nchaa nàcuáa ní cáhá<sup>n</sup>  
Yá Ndiöxí Yáá ní tendaha ñàha  
xii-í véxi-í ñuyíú-a, te chi<sup>n</sup>-gá ío  
cùdífí iní-í dandìhi-í. <sup>35</sup>Te nchòhó  
càchí-ndó sã cùmání cùmí-gã yóó  
te cuu itú. Dico yùhú càchí-í sá  
cundehe-ndo ñáyiú-ã<sup>n</sup>, chi sa ndècu  
túha-yu, dàtná cúú-nã itú sá sá  
ní cuu-ná natahu-o cùu-yu, chi sa  
ndècu túha-ná-yu cundedóho-yu  
tnúhu-í. <sup>36</sup>Te dàtná cúú ñáyiú  
nàtahu itú chi sa cúhu<sup>n</sup> yáhu-yu,  
duca<sup>n</sup> sàtnahá-xi cùu ñáyiú na  
càhá<sup>n</sup> tnúhu-í, chi cuañaha-í sá  
ndúú tãhú-yu na sàá nduu. Te

nchaa ñáyi na tn̄i tnúhu-í te nduu táhũ-yu cundecu-í ndihí-yu ni caa ni quíhí<sup>n</sup>. Te dàtná cúu ñáyi ní chihí tatá-xi, ndihí ñáyi ní natahu ítú-xi cùdífí-nǎ ín-yu. Duca<sup>n</sup> sǎtnahá-xi cùu ñáyi na càhá<sup>n</sup> tnúhu-í. <sup>37</sup>Chi ndáá quée-xí nàcuáa cuáhá<sup>n</sup> ìi<sup>n</sup> cuèndú sá càchí-xi: “Tucu téé ní chihí tatá, te tucu téé ní natahu”, duha cuáhá<sup>n</sup> cuèndú-án. <sup>38</sup>Te yúhú tendaha ñaha-ĩ xii-ndo quíhí<sup>n</sup>-ndó càhá<sup>n</sup>-ndó tnúhu-í núu sà ní yáha-güedé ní càhá<sup>n</sup>-güedé tnúhu-í. Te nchòhò quíhí<sup>n</sup>-ndó dicó-nǎ nduu cuèndá-ndó chùu<sup>n</sup>-án —càchí-gá xáha<sup>n</sup>-gǎ xii-güedé.

<sup>39</sup>Te ío cuéhé ñáyi núu-án ní xíndèdóho-yu cuèndú ní cani ñadìhí-án nǔ-yu sá Jèsús ní xáha<sup>n</sup>-gǎ nchaa nàcuáa quide-a<sup>n</sup>, te xíǎ ío vǎi-yu ní sándáá ín-yu Jèsús. <sup>40</sup>Te ní quexlò-yu núu ndécú-gǎ, te ní càhá<sup>n</sup> ndàhú-yu núu-gǎ sá quéndò-gá ñuu-yu, núu xíǎ ní xíndecu-gá ndihí-yu úu nduu. <sup>41</sup>Te ío cuéhé-gǎ-yu ní sándáá ín-yu tnúhu ní càhá<sup>n</sup> méé-gǎ. <sup>42</sup>Te ní xáhǎ<sup>n</sup>-yu xii ñadìhí-án:

—Vitna te ñá díú mèe-ni tnúhu ní càhá<sup>n</sup>-n ní sándáá ín-ndí-gǎ, chi ní càhá<sup>n</sup> méé-gǎ ní xíndedóho-ndí vitna núu ní sándáá ndisa ín-ndí sá díú-gǎ cúu-gǎ Crìstú Yaa ní tendaha Yǎ Ndiòxí véxi ñuyú-a dàcácu nihnu-gá ñáyi núu ùhú núu ndàhú —càchí-yu xáhǎ<sup>n</sup>-yu xii-a<sup>n</sup>.

**Jèsús quidé tǎtna-gá déhe ìi<sup>n</sup> téé ndèé chíú<sup>n</sup> nǔu gobièrnú**

<sup>43</sup>Te nduu úní ní nucúhu<sup>n</sup> Jèsús ichi cuáhá<sup>n</sup>-gá distritú Galileá. <sup>44</sup>Te cuáhá<sup>n</sup>-gá yàcá<sup>n</sup>, chi mee-gǎ ní cachí-gá sá nǔu ìi<sup>n</sup> téé na càhá<sup>n</sup>-dé

tnúhu Yá Ndiòxí ñuu núu ní cacu-dé, te ñá túu nèhé-yu sá yíñùhu núu-dé. <sup>45</sup>Te òré ní sáa-gá distritú Galileá, te ío váha ní cuu ínì ñáhǎ-yu xii-gǎ, chi cuèndá tnàhá-yu ní xíndecu ndihí-gá vico pàscuá ñuu Jerusàlén. Te yàcá<sup>n</sup> ní xiní-yu nchaa sá ñí quide-gá.

<sup>46</sup>Te ní sáhá<sup>n</sup> tucu-gá ñuu Cànaá ìi<sup>n</sup> ñuu yíndèhu distritú Galileá, núu ní nadatìu-gá ndute ní nduu-xi vínú. Te ñuu Capèrnaúm ndécú ìi<sup>n</sup> téé ndèé chíú<sup>n</sup> nǔu téé cùu gobièrnú, te téé-án cùhú ìi<sup>n</sup> déhe-dé.

<sup>47</sup>Te ní níhí-dé tnúhu sá ñí ndee Jèsús distritú Jùdeá ní ndexìo-gá distritú Galileá, núu ní sáhá<sup>n</sup>-dé núu ndécú-gǎ, te ní càhá<sup>n</sup> ndàhú-dé núu-gǎ sá quíhí<sup>n</sup>-gǎ cada tǎtna-gá déhe-dé, chi sa ndècu-na-dé sá cùu-dé. <sup>48</sup>Te ní xáha<sup>n</sup> Jèsús xii-dé: —Nchòhò, chi vá quíndáá ínì ñáhǎ-ndó xii-í te núu vá càdà-í ìi<sup>n</sup> sá vǎ yò tnàhí ndàcu cada quini-ndó —càchí-gá xáha<sup>n</sup>-gǎ xii-dé.

<sup>49</sup>Te ní xáha<sup>n</sup> tucu téé cùhú déhe-xi-án xii-gǎ:

—Tǎtá, cundee ínì-n ná quíhí<sup>n</sup>-ni-o càda tǎtna-n dèhe-í ná cuu-dé, chi càhú víhí tnàhá-dé —càchí-dé xáhǎ<sup>n</sup>-dè xii-gǎ.

<sup>50</sup>Te ní xáha<sup>n</sup> Jèsús:

—Cuanùhú te quini-n ñá ní ndúha déhe-n —càchí-gá xáha<sup>n</sup>-gǎ xii-dé.

Te ní sándáá ínì-dé tnúhu ní càhá<sup>n</sup> Jèsús, te cuánuhú-dé. <sup>51</sup>Te ñuhu-dé ichi cuánuhú-dé ní sánú tnàhá ñáhǎ cuè téé xínu cuechi núu-dé. Te ní xáha<sup>n</sup>-güedé sá sà ta ndúha déhe-dé cuáhá<sup>n</sup>.

<sup>52</sup>Te ní xíca<sup>n</sup> tnúhú-dé núu-güedé ná òré cúu-xí ní ngúíta-xi ta quètaú cuéhé-dé. Te ní xáha<sup>n</sup>-güedé:



—Icu dàtná òré caá ì<sup>n</sup> sacuaa ní nchíco-dé cahni —càchí-güedé xáha<sup>n</sup>-güedě xii-dé.

<sup>53</sup>Te tătă tée cùhú-á<sup>n</sup> nǐ ndacu iní-dé sá díú òré ní quétaú cuéhé-dě ní cáhá<sup>n</sup> ndihi-dé Jèsús ní xáha<sup>n</sup>-gǎ sá ndúha déhe-dé. Te xíá<sup>n</sup> núu ndi nchàa tée-á<sup>n</sup> vehe-dé ní sándáá iní-yu Jèsús.

<sup>54</sup>Te sá nǐ quide-gá-á<sup>n</sup> cúú úú xito quide-gá sá vǎ yõo tnàhí ndàcu cada. Te sá nǐ quide-gá xito cùu uú-á<sup>n</sup> cúú-xí sǎ nǐ quide-gá cútnàhá ní ndee-gá distritú Jùdeá cuánuhú-gá distritú Galileá.

**Jèsús quidé tătna-gá ì<sup>n</sup> tée cùhú ì<sup>n</sup> xichi núú nání Bètesdá**

**5** Te sátá dúcá<sup>n</sup> nǐ cuu, te ní tnahá nduu nǐ quide ñáyiú isràèl ì<sup>n</sup> vico. Te ní sáhá<sup>n</sup> Jèsús ñuuú Jerusàlén. <sup>2</sup>Te ni càa xico yuhu ñuu-á<sup>n</sup> ñúhú dòco, te tìtní yèhe-xi ndecu. Te ì<sup>n</sup> yèhe-xi-á<sup>n</sup> nání Yùyehe Mbéé, te yatni xíá<sup>n</sup> cáá ì<sup>n</sup> tanquí ndute dàna-ní-yu Bètesdá tnúhu mèe-yu tnúhu hèbreú, te yuhu tànquí-á<sup>n</sup> cáá úhú<sup>n</sup> corrèdór. <sup>3</sup>Te xití corrèdór-á<sup>n</sup> xíndecu cuéhé ñáyiú cùhú, ñáyiú cuáá, ñáyiú yacua, ñáyiú ñá cúú-gǎ candá nihnu, ndètú-yu candá ndute-á<sup>n</sup>. <sup>4</sup>Chi nihí-yu tnúhu sá áma nihnu cùu<sup>n</sup> ì<sup>n</sup> espíritú xínú cuèchi núú Yǎ Ndiõxí, te dàcandá-xi ndute ñúhu tanquí-á<sup>n</sup>. Te ñáyiú díhna nuu nà quée xití ndute-á<sup>n</sup>, te òré-ni ndúha-yu. <sup>5</sup>Te yàcá<sup>n</sup> ñútnàhá ì<sup>n</sup> tée ní cuu óco sáhú<sup>n</sup> úní cuíá sǎ cùhú-dé. <sup>6</sup>Te ní xiní Jèsús cáá-dě, te ní cutnùnì iní-gá sá nǐ cuu cuéhé cuíá cùhú-dé, te ní xáha<sup>n</sup>-gǎ:

—¿Cuíní-n ndúha-n-ǎ<sup>n</sup>? —càchí-gá xáha<sup>n</sup>-gǎ xii-dé.

<sup>7</sup>Te ní xáha<sup>n</sup> tée cùhú-á<sup>n</sup>:

—Tàta, vǎ yõo nihí-í dàquée ñaha xii-í xití tànquí-a òré càndá ndute, chi òré cuíní-í quée-í, te ìngá-ni tucú-yu quènduu-yu núu-í cuángueé-yu —càchí-dé xáha<sup>n</sup>-dě xii-gá.

<sup>8</sup>Te ní xáha<sup>n</sup> Jèsús:

—Ndacuñí, te ndaca-ni-n yùu-n, te caca-n —càchí-gá xáha<sup>n</sup>-gǎ xii-dé.

<sup>9</sup>Te òré-ni-á<sup>n</sup> nǐ ndúha tée cùhú-á<sup>n</sup>, te ní ndaca-ni-dé yuu-dé, te ní xica-dé cuáhá<sup>n</sup>-dé. Te nduu-ǎ<sup>n</sup> cúú-xí nduu ndetatú ñáyiú, <sup>10</sup>núu ní xáha<sup>n</sup> cuè tée isràèl xii tée ní cùhu-á<sup>n</sup>:

—Vitna cùu-xi nduu ndetatú-ó núu vǎ cúú cuído-n yuu-n —cachí-güedé xáha<sup>n</sup>-güedě xii-dé.

<sup>11</sup>Te ní xáha<sup>n</sup>-dě:

—Mee tée ní quide tătna ñaha xii-í ní cachí-dé sá ndàcàni-í yuu-í, te caca-í —càchí-dé xáha<sup>n</sup>-dě xii-güedé.

<sup>12</sup>Te ní xáha<sup>n</sup>-güedě:

—¿Te ná cúú tée duca<sup>n</sup> nǐ cachí sá ndàcàni-n yuu-n te caca-n-í? —càchí-güedé xáha<sup>n</sup>-güedě xii-dé.

<sup>13</sup>Dico tée ní cùhú-á<sup>n</sup> ñà túú ní cùtnunì iní-dé ná cúú tée ní quide tătna ñaha xii-dé, chi Jèsús òré-ni ní xica-gá cuáhá<sup>n</sup>-gá tnuú nchaa ñáyiú chitu xíndecu xíá<sup>n</sup>. <sup>14</sup>Te sátá dúcá<sup>n</sup> te ní naníhí tnahá Jèsús ndihi tée ní quide tătna-gá-á<sup>n</sup> xití veñúhu càhnu sá ìo cùnuu, te ní xáha<sup>n</sup>-gǎ xii-dé:

—Ní xiní-n nǎ ní ndúha-n-va. Te vitna vǎ cádá-gǎ-n nǎndì sá cuèhé sá dúhá, chi núu na càda-ni-n

ña, te quixi ingá cuéhé, te vìhi-gá ndoho-n —càchí-gá xáha<sup>n</sup>-gã xii-dé.

<sup>15</sup>Duca<sup>n</sup> te ní xica téé ní cuhú-á<sup>n</sup> cuängúñaha-dě xii cue téé isràél sá Jèsús ní quide tátna ñaha-gã xii-dé. <sup>16</sup>Núu sátá ñí níhí cue téé isràél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedě xii-gá cuendá sá dúcá<sup>n</sup> ñí quide tátna-gá nduu ndètátú-güedé. <sup>17</sup>Te ní xáha<sup>n</sup> Jèsús xii-güedé:

—Tătà-í Dútú Ndiöxí quidé chi<sup>n</sup>-ni-gá núu xíã<sup>n</sup> quidé chi<sup>n</sup>-í tnàhá-í —càchí-gá xáha<sup>n</sup>-gã xii-güedé.

<sup>18</sup>Te ní cudéé<sup>n</sup>-güedě sá ñã ní cãnehe íi-gã nduu ndètátú-güedé, te ní cuiní-güedé cahni ñaha-güedě, te uu<sup>n</sup>-gá ní cuiní-güedé cahni ñaha-güedě xii-gá sá ñí cachí-gá sá Tătá-gã cúú Dútú Ndiöxí, chi ní sani iní-güedé sá cuiní-gá nút nahá-gá Yã Ndiöxí núu xíã<sup>n</sup> ío ní cudéé<sup>n</sup>-güedě.

**Jèsús Déhe Yá Ndiöxí táxí tnùní-gá**

<sup>19</sup>Te ní xáha<sup>n</sup> tucu Jesús xii-güedé:

—Na càchí tnúhu ndáá-í xii-ndo sã yúhú chi ni ñí<sup>n</sup> sá ñã ndácù-í cada mee-í núu ñã túú mèe Tătà-í dãnèhé ñáhá-gã xii-í nàcuáa cada-í, chi nchaa sá quidé Tătà-í quidé-í tnàhá-í. <sup>20</sup>Te Tătà-í ío cùu iní ñáhá-gã xii-í núu dãnèhé ñáhá-gã nchaa nàcuáa quide-gá. Te vitna ndècu vai-gá chi<sup>n</sup> tahu-gá cada-í, chi<sup>n</sup> sá vátá quiní-gá-ndó càda-í nàcuáa cuñúhu vìhi-ndo. <sup>21</sup>Chi Tătà-í dandòto-gá ñáyiu ní xíhí. Te yúhú cada-í te nduu táhú nchaa ñáyiu càchí iní-í cundecu ndíhi ñàhá-yu xii-í ni caa ni quíhí<sup>n</sup>.

<sup>22</sup>Te na sàá nduu te ñã dífú Tătà-í cada ndáá-gá cuéchi ñáyiu, chi ní cachí-gá sá yúhú cada ndáá-í <sup>23</sup>cuendá nchaa ñáyiu canehé-yu sá yínùhu núu-í dàtná nèhè-yu sá yínùhu núu Tătà-í Yáá ní tendaha ñàha xii-í véxi-í ñuyúú-a. Te nchaa ñáyiu ñã túú nèhe sá yínùhu núu yúhú, te ni núú Tătà-í ñã túú nèhé-yu sá yínùhu.

<sup>24</sup>Te na càchí tnúhu ndáá-í xii-ndo sã nchaa ñáyiu na cùndedóho tnúhu na càhá<sup>n</sup>-í, te núu na quìndáá iní-yu Dútú Ndiöxí Yáá ní tendaha ñàha xii-í véxi-í ñuyúú-a ña, te vá cuíta nihnú-yu chi nduu táhú-yu cundecú-yu ndíhi-gá ni caa ni quíhí<sup>n</sup>.

<sup>25</sup>Te vitna na càchí tnúhu ndáá-í xii-ndo sã nchaa ñáyiu ndècu ichi cuehé ichi duha cùu-yu dàtná ñí<sup>n</sup> ñáyiu ní xíhí, te vitna ní sáá nduu cùndedóho-yu tnúhu càhá<sup>n</sup> yúhú Déhe Dútú Ndiöxí, te nchaa ñáyiu na quìndáá iní-xi, te naníhí tàhú-yu. <sup>26</sup>Te dàtná quidé mèe Tătà-í dàcácu nihnu-gá ñáyiu, duca<sup>n</sup> ñí cachí-gá cada-í dàcácu nihnu-í-yu. <sup>27</sup>Te ní cachí tucu-gá sá sàá ñí<sup>n</sup> nduu, te cada ndáá-í cuéchi nchaa ñáyiu ñã túú quide ndáá, chi yúhú táxí tnùní-í, te cùu-í ñaní tnáhá-ndó nchaa-ndo. <sup>28</sup>Te ni vã cúnùhu-ndo tnúhu càhá<sup>n</sup>-í, chi sáá nduu te nchaa ñáyiu ní xíhí tecú dóho-yu tnúhu càhá<sup>n</sup>-í. <sup>29</sup>Te ndoto nchaa ñáyiu ní quide váha cundecu ndíhi-í-yu ni caa ni quíhí<sup>n</sup>, te ndoto tnàhá nchaa ñáyiu ní quide cuèhé ní quide duha, te ñáyiu-á<sup>n</sup> quíhí<sup>n</sup>-yu núu ùhú núu ndàhú.

**Yá Ndiöxí chíndèe tnúhu-gá Jèsús**

<sup>30</sup>Te yúhú, chi ni ñí<sup>n</sup> sá ñã ndácù-í cada mee-í núu ñã dífú

mèe Yá Ndiöxí táúchíu<sup>n</sup>-gá nàcuáa cada-í. Te quide ndáá-í cuéchi ñáyi u nàcuáa tàxi tñuní-gá cada-í, te yúhú ñá túu quide-í sá cúu ìní mée-í chi Tătà-í ní táúchíu<sup>n</sup>-gá nàcuáa cada-í. <sup>31</sup>Te núu na càhá<sup>n</sup>-í sá mée-í táxi tñuní-í, te vá quindáá iní-ndó. <sup>32</sup>Chi Yá Ndiöxí chíndèe tñuhu ñaha-gá xii-í, te yúhú xìní-í sá tñuhu càhá<sup>n</sup>-gá cuendá-í cúu-xí ì<sup>n</sup> sá ndáa. <sup>33</sup>Te nchòhó ní téchíu<sup>n</sup>-ndó cuè téé ní sáhá<sup>n</sup> ní ndúcu tñuhu-güedé núu tē Juàá nñu ná tñuhu cáhá<sup>n</sup>-dé cuendá-í, te téé-ǎ<sup>n</sup> ní cáhá<sup>n</sup> ndáá-dé nàcuáa ndùu cuendá-í. <sup>34</sup>Dico yúhú, chi ñá túu xìni ñuhu-í ì<sup>n</sup> ñáyi u ñuyú-a chindee tñuhu ñàhá-yu xii-í, dico té Juàá ní cáhá<sup>n</sup> váha-dé cuendá-í, te xíǎ<sup>n</sup> càchí tñuhu tucu-í cuendá quindáá iní-ndó, te naníhí tǎhú-ndó. <sup>35</sup>Te dàtná cuiní-ndó cùu ì<sup>n</sup> iti ndéñuhú te dàyehé-xi, duca<sup>n</sup> sǎtnahá-xi ní cuu té Juàá, chi sacú-ni nduu ío ní cudí ìní-ndó tñuhu ní cáhá<sup>n</sup>-dé. <sup>36</sup>Te váha-ni ní cáhá<sup>n</sup> té Juàá, dico yúhú chi ndècu nchaa sá tá quide-í véxi nàcuáa ní táúchíu<sup>n</sup> Yá Ndiöxí cada-í, te nchaa xíǎ<sup>n</sup> cúu-xí ì<sup>n</sup> sá cútnuní iní-ndó sǎ mée Yá Ndiöxí ní tendaha ñaha-gá xii-í véxi-í ñuyú-a. <sup>37</sup>Te ñu-ni-gá chíndèe tñuhu ñaha-gá xii-í, dicó-ni sá mée-ndó ñá túu cuiní-ndó càda cuendá-ndó tñuhu càhá<sup>n</sup>-gá, te ni ñá túu xìní-ndó nàcuáa cà-gá. <sup>38</sup>Te ñá túu quèe iní nchòhó tñuhu càhá<sup>n</sup>-gá, chi ñá túu sàndáá iní ñàhá-ndó xii yúhú Déhe-gá. <sup>39</sup>Te dàcuaha vihi-ndo tutú ndéé tñuhu-gá, chi sàni iní-ndó sǎ xíǎ<sup>n</sup>-ni dacuàha-ndo te naníhí tǎhú-ndó. Te váha-ni quide-ndo, chi ñu tutú-á<sup>n</sup> càhá<sup>n</sup>-xi cuendá-í. <sup>40</sup>Te nchòhó ñá

túu cuiní-ndó quindáá iní ñàhá-ndó xii-í cuendá naníhí tǎhú-ndó.

<sup>41</sup>Te yúhú, ñá túu xìni ñuhu-í sá càdá càhnu ñaha-ndo xii-í. <sup>42</sup>Dico sa xìní-í nàcuáa sàni iní-ndó chi ñá túu cùu iní-ndó Yá Ndiöxí. <sup>43</sup>Te yúhú véxi-í ñuyú-a chi Tătà-í ní tendaha ñaha-gá, te nchòhó ñá túu cuiní-ndó tñi-ndo tñuhu càhá<sup>n</sup>-í, dico núu quixi ì<sup>n</sup> téé cáhá<sup>n</sup> cuendá mée-xí, chi quindáá iní-ndó. <sup>44</sup>Te ná váha nchòhó ná tñí-ndó tñuhu càhá<sup>n</sup>-í, te xio xio-ni quide cahnu tñaha-ndo, te ñá túu quide cuendá-ndó sǎ tñuhu váha càhá<sup>n</sup> Yá Ndiöxí cuu xii-ndo. <sup>45</sup>Te vá cání ìní-ndó sǎ yúhú ndàcá<sup>n</sup> cuéchi-í núu Tătà-í nàcuáa quide-ndo, chi ndíi Moisés ní chídó tñuní ndíi núu tütú Yá Ndiöxí nàcuáa quide-ndo sá ñá túu quide váha-ndo, te mee-ndo sàni iní-ndó sǎ naníhí tǎhú-ndó cuendá tñuhu ní cáhá<sup>n</sup> ndíi. <sup>46</sup>Chi núu nchòhó sàndáá ndisa iní-ndó tñuhu ní cáhá<sup>n</sup> ndíi Moisés ñá, te duca<sup>n</sup> te quindáá iní-ndó yúhú ní cùu, chi ndíi-ǎ<sup>n</sup> ní chídó tñuní ndíi nàcuáa cada-í ñuyú-a vitna. <sup>47</sup>Te núu ñá túu sàndáá iní-ndó tñuhu ní chídó tñuní ndíi, te ñu-ni duca<sup>n</sup> càda ñaha-ndo xii-í vá quindáá iní-ndó tñuhu càhá<sup>n</sup>-í —càchí-gá xáha<sup>n</sup>-gá xii-güedé.

**Jèsús dácaxi-gá úhú<sup>n</sup> mǐl ñáyi u**

(Mt. 14:13-21; Mr. 6:30-44; Lc. 9:10-17)

**6** Te sáta dúcá<sup>n</sup> ñí cuu, te ní quee Jèsús cuáhá<sup>n</sup>-gá ingá xio yuhu làgúná Galiléa, àdi Tiberías chi úu ñu-xi. <sup>2</sup>Te ío cuéhé ñáyi u nchícú<sup>n</sup> ñàhá xii-gá cuáhá<sup>n</sup> cuendá sá ñí xìní-yu nchaa sá vá yòo tñàhí ndàcu cada ní quide-gá, chi ní

quide tátna-gá nchaa ñáyiú cùhú.

<sup>3</sup>Te ní sáá Jèsús ndihí cue tée xica cuu ndihí-gá ìí<sup>n</sup> núú tìndúú, te xíá<sup>n</sup> ní ngóo-gá ndihí-güedé. <sup>4</sup>Te ta cùyatni coo vico pascuá, vico quide ñáyiú isràél. <sup>5</sup>Te ní xiní-gá sá ìo vài ñáyiú nchìcú<sup>n</sup> ñáhá xii-gá cuáhá<sup>n</sup>, te ní xáha<sup>n</sup>-gã xii té Lìpé:

—¿Ndèè quíhí<sup>n</sup>-ó quínguuaa<sup>n</sup>-o sá cáxí nchàa ñáyiú-a? —càchí-gá xáha<sup>n</sup>-gã xii-dé.

<sup>6</sup>Te duca<sup>n</sup> ní xáha<sup>n</sup>-gã xii-dé cuendá sá cuiní-gá quiní-gá nása cunduu tnúhu cáhá<sup>n</sup>-dé, dico mee-gã sa xiní-gá nàcuáa cada-gá.

<sup>7</sup>Te ní xáha<sup>n</sup> tẽ Lìpé xii-gá:

—Te cuèí úú ciendú díhú<sup>n</sup> denàriú ná dàndonuhu-o cuaa<sup>n</sup>-o paá, te ní vã tnàhá caxí-yu luha luha —càchí-dé xãha<sup>n</sup>-dẽ xii-gá.

<sup>8</sup>Te té Ndríxí ingá tée xica cuu ndihí-gá, ñaní té Xímú, àdi Pelú chi úú dùu-dé, ní xáha<sup>n</sup>-dẽ:

<sup>9</sup>—Iha ndècu ìí<sup>n</sup> té lìhli nèhe-dé úhú<sup>n</sup> pàá cebàdá te úú chácá, dico ndèè tnahá xéhé, te cuéhé víhí ñáyiú —càchí-dé xãha<sup>n</sup>-dẽ xii-gá.

<sup>10</sup>Te ní xáha<sup>n</sup> Jèsús xii-güedé:

—Chí cũñaha nà ngóo-yu nchaa-yu —càchí-gá xáha<sup>n</sup>-gã.

Te ñáyiú-á<sup>n</sup> ní ngóo-yu, te càa vihi ité núú ní ngóo-yu-á<sup>n</sup>, te xínu dàtná úhú<sup>n</sup> mìl mee-ni cuè tée, te ìhí<sup>n</sup> ñáyiú ìhí ndihí landú.

<sup>11</sup>Te ní quehe<sup>n</sup> Jèsús pàá, te ní ndacá<sup>n</sup> táhú-gã núú Yã Ndiöxí, te ní sãñaha-gã pàá-á<sup>n</sup> xii cue tée xica cuu ndihí-gá, te cue tée-á<sup>n</sup> ní dácãhñu-güedé ní xexi nchaa ñáyiú xixúcu-á<sup>n</sup>. Te ìiú-ni duca<sup>n</sup> ní quide-gá chácá, te ní dácãhñu tucu-güedé-ìí ní xexi ñáyiú ní ndahá xití-yu. <sup>12</sup>Te òrè

ní túhú cóhõ-yu, te ní xáha<sup>n</sup> Jèsús xii cue tée xica cuu ndihí-gá sá ná nàquehe<sup>n</sup>-güedé nchaa sá ní quendóo cuendá sá vã quíhí<sup>n</sup>-xi núú mìhí.

<sup>13</sup>Te cue tée-ã<sup>n</sup> ní naquehe<sup>n</sup>-güedé nchaa sá ní quendóo, te ní chítú ùxúú tídihi núú ùhú<sup>n</sup>-ni pàá cebàdá.

<sup>14</sup>Te sá ní xiní-yu ní nadacàyá-gá sá ní xexí-yu, xíã<sup>n</sup> ní ngúita-yu ní xítñahá-yu:

—Ndáá sá tẽe-a sa ìo cuendú sá quíxí-dẽ ñuyíú-a cáhá<sup>n</sup>-dé tnúhu Yá Ndiöxí —càchí-yu xítñahá-yu.

<sup>15</sup>Te ní cutnùní ìní Jèsús sá cádá yìcá-yu candeca ñàhá-yu xii-gá quíhí<sup>n</sup> cuendá cundecu-gá quindaha ñàha-gá xií-yu ni cùu, núú xíã<sup>n</sup> ní xica tucu-gá cuáhá<sup>n</sup>-gá xití yucu mee ìií chícúu-gá.

### Jèsús xícá-gã núú ndute

(Mt. 14:22-27; Mr. 6:45-52)

<sup>16</sup>Te òrè ní cuu ndiquí<sup>n</sup>, te cuáhá<sup>n</sup> cue tée xica cuu ndihí-gá yuhu làgúná. <sup>17</sup>Te ní quee-güedé bàrcú cuáhá<sup>n</sup>-güedé ñúú Capèrnaúm cáá ndàa ingá xio yuhu làgúná, te sa ní cuu ndiquí<sup>n</sup>, te ñá túú Jèsús quéxio quee-gá bàrcú ñúhú-güedẽ-á<sup>n</sup>. <sup>18</sup>Te ní ngúita-xi quène táchí ñíhi, te ñíhi dàcandau ndéè tnáhá ndùte làgúná-á<sup>n</sup>. <sup>19</sup>Te sa ní cuu dàtná úhú<sup>n</sup> kílometrú cuáhá<sup>n</sup>-güedé, te ní xiní-güedé Jèsús tá cùyatni-gá bàrcú ñúhú-güedẽ véxi-gá núú ndúté, te ní yùhú-güedé. <sup>20</sup>Te ní xáha<sup>n</sup> Jèsús xii-güedé:

—Yúhú véxi-í, vá yùhú-ndó —càchí-gá xáha<sup>n</sup>-gã xii-güedé.

<sup>21</sup>Te ìo ní cudíí ìní-güedé sá ní quexio-gá cuánguee-gá bàrcú, te òrè-ni ní quexio-güedé ndihí-gá

ndéé ingá xio yuhu làgúná núú  
cuàhá<sup>n</sup>-güedé.

**Ñáiyu nànducu ñaha xii Jesús**

<sup>22</sup>Te ingá nduu-ǎ<sup>n</sup> xĩndecu-ni  
nchaa ñáiyu ní quendóo yuhu  
làgúná. Te ní quide cuendá-yu sá  
íí<sup>n</sup> ðii-ná bàrcú nùtnǎi-ǎ<sup>n</sup> ní cùu  
ñá túú-gǎ, chi cue téé xica cuu  
ndihi Jesús ní quée-güedé bàrcú-ǎ<sup>n</sup>  
cuàhá<sup>n</sup>-güedé. Te ní níhǎ-yu tnúhu  
sá ñà túú ní quée tnàhá Jèsús. <sup>23</sup>Te  
ðiu-ni nduu-ǎ<sup>n</sup> nǎ quée íí<sup>n</sup> úú bàrcú  
ñuú Tìberias ní sáá-xi yatni núú  
nǎ xexí-yu pàá sá nǎ ndacá<sup>n</sup> táhú  
Jèsús núú Yǎ Ndiòxí. <sup>24</sup>Te ní xiní-yu  
sá ñà túú Jèsús ndihi cue téé xica  
cuu ndihi-gá, núú ní quée-yu  
bàrcú-ǎ<sup>n</sup> cuàhá<sup>n</sup>-yu ñuú Capernaúm  
cuánúndúcú ñàhá-yu xii-gá.

**Jèsús cúú-gǎ ðàtná íí<sup>n</sup> sá nchító-ó**

<sup>25</sup>Te ní sáá-yu ingá xio yuhu  
làgúná, xíá<sup>n</sup> nǎ naníhǎ-yu Jèsús, te  
ní xáhǎ<sup>n</sup>-yu xii-gá:  
—Mèstrú, òná òré ní sáá-n ìha? —  
cachí-yu xáhǎ<sup>n</sup>-yu xii-gá.

<sup>26</sup>Te ní xáha<sup>n</sup> Jèsús:

—Na cǎchí tnúhu ndáá-í sá  
nchòhó nándücu ñaha-ndo xii-í  
cuendá-ni sá nǎ xexí-ndo nǎ ndahá  
xítí-ndó, dico ñá díú cuendá sá  
nǎ quide-í sá vǎ yòo tnàhí ndàcu  
cada nanducu ñaha-ndo. <sup>27</sup>Te vǎ  
cádá cuendá-ndó sǎ méé-ní sǎ  
cáxí-ndó càda chiu<sup>n</sup>-ndo chi xíá<sup>n</sup>  
vǎ cúdǎi-xi. Chi ío-gá xíní ñuhu-xi  
cada cuendá-ndó tnúhu Yǎ Ndiòxí  
te tnii-ndo, te naníhǎ tǎhú-ndó. Te  
tnúhu-ǎ<sup>n</sup> cachí tnúhu yúhú Téé cùu  
ñaní tnàhá-ndó nchàa-ndo, te xíá<sup>n</sup>  
candeca-xi iní-ndó nǎ caa nǎ quíhǎ<sup>n</sup>,  
chi mee Dütú Ndiòxí ní cachí-gá sá

dúcá<sup>n</sup> càda-í —cǎchí-gá xáha<sup>n</sup>-gǎ  
xíí-yu.

<sup>28</sup>Te ní xáhǎ<sup>n</sup>-yu:

—¿Nása cada-ndí cuendá ngúnu  
ichi-ndí nàcuáa cuíní Yǎ Ndiòxí  
cunduu-i? —cǎchí-yu xáhǎ<sup>n</sup>-yu  
xii-gá.

<sup>29</sup>Te ní xáha<sup>n</sup> Jèsús xíí-yu:

—Yǎ Ndiòxí cuíní-gá sá quèndáá  
iní ñàhá-ndó xii yúhú, téé ní  
tendaha-gǎ véxi ñuyúí-a —cǎchí-gá  
xáha<sup>n</sup>-gǎ xíí-yu.

<sup>30</sup>Te ní xáha<sup>n</sup> tùcú-yu xii-gá:

—¿Ná cúú sǎ vǎ yòo tnàhí ndàcu  
cada, cada-n cùndehe-ndí cuendá  
quèndáá iní ñàhá-ndí xii-n-i? ¿Àdi  
nágá cúú sǎ cádá-n cuendá cutnùní  
iní-ndí sá ndàá cǎhá<sup>n</sup>-n-í? <sup>31</sup>Chi  
cue ñaní tnàhá-ó nǎ xĩndecu ndéé  
sanaha nǎ xexí-yu pàá naní mànáá  
xítí yucu ðàtná yódó tnùní núú tùtú  
Yǎ Ndiòxí núú cǎchí-xi: “Yǎ Ndiòxí  
ní sǎñaha-gǎ sá nǎ xexí-yu, te ní  
cuu<sup>n</sup> túu-xi andiu”, duha cǎchí-xi  
núú tùtú-gá —cǎchí-yu xáhǎ<sup>n</sup>-yu  
xii-gá.

<sup>32</sup>Te ní xáha<sup>n</sup> Jèsús:

—Na cǎchí tnúhu ndáá-í xii-ndo  
sǎ ñà díú ndíi Moisés ní sǎñaha  
ndíi pàá ní cuu<sup>n</sup> andiu nǎ xexí-yu,  
chi mee Tǎtà-í ní sǎñaha-gǎ sá  
nǎ xexí-yu. Te sá táxí-gǎ vitna  
cùu-xi <sup>33</sup>datná pàá véxi cuu<sup>n</sup> andiu  
càndeca-xi iní-ndó nǎ caa nǎ quíhǎ<sup>n</sup>  
—cǎchí-gá xáha<sup>n</sup>-gǎ xíí-yu.

<sup>34</sup>Te ní xáhǎ<sup>n</sup>-yu xii-gá:

—Tǎtà, mee-ni pàá-ǎ<sup>n</sup> taxi-n  
cǎxi-ndí —cǎchí-yu xáhǎ<sup>n</sup>-yu xii-gá.

<sup>35</sup>Te ní xáha<sup>n</sup> Jèsús:

—Yúhú cùu-í ðàtná íí<sup>n</sup> sá xexí-ndó  
càndeca-xi iní-ndó. Te duha  
nduu tnúhu cǎhá<sup>n</sup>-í, chi nchaa  
ñáiyu na quèndáá iní ñàhá xii-í,

te vá ndóhó-gǎ-yu docó te vá ndóhó-gǎ-yu ndute. <sup>36</sup>Dìcò-ni sá nchòhó ñá túú sàndáá iní ñáhá-ndó cuèi xìní ñáhá-ndó xii-í. <sup>37</sup>Te nchaa ñáyiú na càchí Tàtá-í nduu cuèndá-í nasaá-yu núù-í, te ñáyiú-á<sup>n</sup> vǎ dáquèè tǐhù-í-yu. <sup>38</sup>Te ñá díú yúhú sá vèxi cuu<sup>n</sup>-í andiú te quède-í nchaa sá cúú iní mèe-í, chi véxi cuu<sup>n</sup>-í sá cadá-í nchaa nàcuáa ní táúchíú<sup>n</sup> mèe Tàtá-í Dútú Ndiöxí Yaa ní tendaha ñàha xii-í véxi-í ñuyúú-a. <sup>39</sup>Te cuiní-gá sá ncháá ñáyiú ní cachí-gá nduu cuèndá-í vǎ dáñà-í-yu cuíta nihnú-yu, te na sáá nduu te diu-ni-í dandòto-í-yu. <sup>40</sup>Chi duca<sup>n</sup> ñí cachí Dútú Ndiöxí cunduu sá ncháá ñáyiú na tñì tñúhu càhá<sup>n</sup>-í, te quèndáá ndisa iní ñáhǎ-yu xii yúhú Déhe-gá, te nduu táhǎ-yu cundecú-yu ndihí Yá Ndiöxí ñi caa ñi quíhí<sup>n</sup>, te yúhú dandòto-í-yu na sáá nduu — càchí-gá xáha<sup>n</sup>-gǎ xií-yu.

<sup>41</sup>Te ñá ní tñáhá iní ñáyiú isràèl tñúhu ní cáhá<sup>n</sup> Jèsús núú ní nguíta-yu ní cáhá<sup>n</sup> cuèhé-yu cuèndá-gá cuèndá sá ñí xáha<sup>n</sup>-gǎ sá mèe-gǎ cúú-gǎ dàtná sá xéxi-ó vèxi cuu<sup>n</sup> andiú. <sup>42</sup>Te ní xítñàhá-yu: —¿Náa ñá díú tǎe-a cùu-dé Jèsús déhe té Chèè? Nchoo xìní-ó tǎtá-dě, te xìní-ó ñáná-dě, iná cachí-tu té-a sá andiú vèxi cuu<sup>n</sup>-dé! —càchí-yu xítñàhá-yu.

<sup>43</sup>Te ní xáha<sup>n</sup> Jèsús xií-yu: —Vǎ càhá<sup>n</sup> cuèhé-gá-ndó cuèndá-í, chí dáñá. <sup>44</sup>Vǎ yǒ quèndáá iní ñáhá xii yúhú núú ñá túú mèe Tàtá-í táxi cuèndá ñáhá-gǎ xií-yu. Te diu-gá ní tendaha ñàha-gá xii-í véxi-í, te yúhú dandòto-í-yu na sáá nduu. <sup>45</sup>Te núú tütú cue téé ní xóo

cáhá<sup>n</sup> tñúhu Yá Ndiöxí ndéé sanaha càchí-xi: “Yá Ndiöxí danèhé ñáhá-gǎ xií-yu tñúhu-gá”, duha càchí-xi. Te nchaa ñáyiú na cùndedóho nchaa tñúhu càhá<sup>n</sup> Dútú Ndiöxí, te cutúha-yu nàcuáa càhá<sup>n</sup>-gá, te ñáyiú-á<sup>n</sup> quèndáá iní ñáhǎ-yu xii yúhú.

<sup>46</sup>Te vá yǒo xìní ñáhá xii Dútú Ndiöxí chi ñí<sup>n</sup> dii-ni yúhú xìní-í-gá, chi núú ndécú-gǎ ní quee-í véxi cuu<sup>n</sup>-í —càchí-gá xáha<sup>n</sup>-gǎ xií-yu.

<sup>47</sup>Te xáha<sup>n</sup> tùcu-gá:

—Na càchí tñúhu ndáá-í xii-ndo sǎ nchàa ñáyiú na quèndáá iní ñáhá xii-í, te naníhí tàhù-yu. <sup>48</sup>Te yúhú cùú-í dàtná ñí<sup>n</sup> sá xéxi-ndó cǎndeca-xi iní-ndó, te duca<sup>n</sup> sǎtnahá-xi cùu-í chi yúhú cada-í te nduu táhú-ndó cùndecu-ndo ndihí Yá Ndiöxí ñi caa ñi quíhí<sup>n</sup>. <sup>49</sup>Te cue ñání tñáhá-ó ñí xíndecu ndéé sanaha ñí xexí-yu pàà nání mànáá xití yucu, dico ní sáá nduu te dacuitíí ñí xíhí-yu. <sup>50-51</sup>Te yúhú càhá<sup>n</sup>-í cuèndá mèe-í, chi véxi cuu<sup>n</sup>-í andiú. Te cùu-í dàtná ñí<sup>n</sup> sá nchító-ndó, te nchaa ñáyiú na càxi te candeca-xi iní-yu ñi caa ñi quíhí<sup>n</sup> te vá cuíta nihnu-gá-yu. Te sá táxi-í xii-ndo xǐá<sup>n</sup> cúú-xí yìqui cuñú-í, te cùu-xi cuèndá nchaa ñáyiú nihíí ñuyúú cuèndá nduu táhǎ-yu cundecú-yu ndihí Yá Ndiöxí ñi caa ñi quíhí<sup>n</sup> —càchí-gá xáha<sup>n</sup>-gǎ xií-yu.

<sup>52</sup>Te ní nguíta ñáyiú isràèl xítñàhá-yu:

—¿Nása cada-tu té-a núu càchí-tu-dé sá yìqui cuñú-dé taxi-dé caxi-o-í? —càchí-yu xítñàhá-yu.

<sup>53</sup>Te ní xáha<sup>n</sup> Jèsús:

—Na càchí tñúhu ndáá-í xii-ndo sǎ núu na càda iní-ndó sǎ dàtná sá

cáxí-ndó yìqui cuñú yúhú Tée cùu ñaní tnáhá-ndó nchàa-ndo, te cada tucu iní-ndó sã dàtná sá cóhó-ndó ññì-í ñá, te xiã<sup>n</sup> quée-xí sã quìndáá iní ñáhá-ndó nì yuhu ni iní-ndó te naníhí tãhú-ndó, te núu ñáhá te cuíta nihnu-ndo. <sup>54</sup>Nchaa ñáyiu na càda iní-xi sá dàtná sá cáxí-yu yiqui cùñú-í te cohó-yu ññì-í, ñáyiu-á<sup>n</sup> naníhí tãhú-yu te yúhú dandòto-í-yu na sàá nduu. <sup>55</sup>Chi yiqui cùñú-í ndìhi ññì-í cúu-xí mèe-í. <sup>56</sup>Te nchaa ñáyiu na càda iní-xi sá dàtná sá cáxí-yu yiqui cùñú-í te cohó-yu ññì-í, te ñáyiu-á<sup>n</sup> ìñ<sup>n</sup>-nã cuu-í ndìhí-yu chi cundecu ndìhi-í-yu. <sup>57</sup>Te yúhú nchìto-í chi duca<sup>n</sup> nchìto Tàtá-í Yaá ní tendaha ñaha xii-í véxi-í ñuyúú-a. Te òiu-ni duca<sup>n</sup> nchàa ñáyiu na quìndáá iní ñáhá xii-í te cundecu ndìhi-í-yu ni caa ni quíhí<sup>n</sup>. <sup>58</sup>Te yúhú cúu-í dàtná ìñ<sup>n</sup> sá nchító-ndó vèxi cuu<sup>n</sup> andiu, dico ñá dífú pàá sá nání mànáá ní xèxi cue ñaní tnáhá-ó nì xíndecu ndéé sanaha, chi ní xexi-yu pàá te dacuèi ní xíhí-yu. Te nchaa ñáyiu na quìndáá iní ñáhá xii yúhú Yaá véxi cuu<sup>n</sup> andiu, te cundecu ndìhi-í-yu ni caa ni quíhí<sup>n</sup> —càchí-gá xáha<sup>n</sup>-gã xií-yu.

<sup>59</sup>Nchaa tnúhu-a ní cáhá<sup>n</sup>-gá xití veñúhu ñáyiu ñúu Capèrnaúm.

**Jèsús càchí tnúhu-gá  
nàcuáa naníhí tãhú-ó**

<sup>60</sup>Te sá dúcá<sup>n</sup> nì cáhá<sup>n</sup>-gá ñuu vai ñáyiu nchìcú<sup>n</sup> ñáhá xii-gá ní xitnàhá-yu:

—Vá tníí cuíti-o tnúhu càhá<sup>n</sup>-dé chi ñá dífú tnúhu sá cúu vãha iní-ó càhá<sup>n</sup>-dé —càchí-yu xitnàhá-yu.

<sup>61</sup>Te ní cutnùní iní Jèsús sá ñà túú càhá<sup>n</sup> váha-yu cuèndá tnúhu ní cáhá<sup>n</sup>-gá, núu ní xáha<sup>n</sup>-gã xií-yu:

—¿Náa ñá tnàhá iní-ndó nàcuáa càhá<sup>n</sup>-í-a? <sup>62</sup>Te uu<sup>n</sup>-gá cada nchòhó ñuu quini-ndó yúhú Tée cùu ñaní tnáhá-ndó nchàa-ndo ndaa-í núu nì xíndecu-í dífna. <sup>63</sup>Te espíritú ndécú ndìhi yiqui cuñú-ó, xiã<sup>n</sup> ndécá ñàha-xi xii-o, te núu ñá túú xiã<sup>n</sup>, te yiqui cùñú-ó ñà túú nàndíhi-xi. Dico núu nchaa tnúhu càhá<sup>n</sup>-í-a quée-xi iní-ndó ñá, te quini-ndó nã xéhé candeca ñaha-xi xii-ndo núu cuàhá<sup>n</sup> núu vèxi. <sup>64</sup>Te dava nchòhó chi ñá túú sàndáá iní-ndó —càchí-gá xáha<sup>n</sup>-gã xií-yu.

Te duca<sup>n</sup> nì xáha<sup>n</sup>-gã chi sa ñaha-gá nándi cùu ñáyiu vá quìndáá iní ñáhá xii-gá. Te duca<sup>n</sup> sà naha-gá ndèdacàa téé cuáha cuèndá ñáhá xii-gá núu cuè téé cùu úhú iní ñáhá. <sup>65</sup>Te ní xáha<sup>n</sup> tucu Jèsús xií-yu:

—Te duha càhá<sup>n</sup>-í chi sa ní cachí tnúhu-í xii-ndo sã vã yòo ìñ<sup>n</sup> cuini tnií tnúhu-í te núu ñá túú Tàtá-í Dútú Ndiòxi sánú lchi ñaha-gá xií-yu —càchí-gá xáha<sup>n</sup>-gã xií-yu.

<sup>66</sup>Te òré-á<sup>n</sup> ò vai ñáyiu nchìcú<sup>n</sup> ñáhá xii-gá ní xócòo-yu ñá ní xica cuu-gá-yu ndìhi-gá. <sup>67</sup>Te xiã<sup>n</sup> ní xáha<sup>n</sup> Jèsús xii ndi ùxúú cue téé xica cuu ndìhi-gá:

—¿Cuini-ndó dàndóo ñaha-ndo tnàhá-ndó-á<sup>n</sup>? —càchí-gá xáha<sup>n</sup>-gã xii-güedé.

<sup>68</sup>Te ní xáha<sup>n</sup> tẽ Xímú, àdi Pelú chi úu òiu-dé:

—Mèstrú, ñá túú-gã ndéé quíhí<sup>n</sup>-ndí, chi nchúhú ñáhá-ndí sá tnúhu mee-n cùu-xi sá vãha candeca-xi iní-ndí ni caa ni quíhí<sup>n</sup>.

<sup>69</sup>Chi nchúhú sa ní sàndáá iní ñáhá-ndí xii-n chi ñaha-ndí sá yòhó cúu-n Cristú Déhe Dútú Ndiòxi yaá

ndécú àndiu —cachí-dé xǎha<sup>n</sup>-dě xii-gá.

<sup>70</sup>Te ní xáha<sup>n</sup> Jèsús:

—Nàha-ndo sá yǔhú ní cáh<sup>n</sup> ñáhà-í xii ndí ùxúú-ndó xica cuu ndìhi ñaha-í xii-ndo, dico ì<sup>n</sup>-ndo quǐhu ñaha yùcu ñávǎha xii-ndo —càchí-gá xáha<sup>n</sup>-gǎ xii-güedé.

<sup>71</sup>Duha ní cáh<sup>n</sup> Jèsús cuendá té Jùdás déhe té Xímú Iscarioté ì<sup>n</sup> téé ñùtnahá núú ùxí ì<sup>n</sup> cue téé xica cuu ndìhi-gá, chi sa nàha-gá sá tǎe-ǎ<sup>n</sup> cuǎha cuendá ñáhá-dě xii-gá ì<sup>n</sup> nduu núú cuè téé cùu úhú iní ñáhá.

**Cue ñaní Jèsús ñá túú  
sàndáá iní-güedé nàcuáa  
ndùu tnúhu càh<sup>n</sup>-gá**

**7** Te sátá dúcá<sup>n</sup> ñí cuu, te ní xica cuu Jèsús distritú Galileá, te ñá ní sǎhá<sup>n</sup>-gá distritú Jùdeá, chi yàcá<sup>n</sup> cuíní cue téé isràél cahni ñaha-güedé xii-gá ní cùu. <sup>2</sup>Te ní cuyatni nduu càdá-yu vico, vico sá dánàní-yu Vico Vehe Tnuvixí<sup>n</sup>. <sup>3</sup>Te ní xáha<sup>n</sup> cuè ñaní Jèsús xii-gá:

—Váha-gá quǐhí<sup>n</sup>-n dìstrítú Jùdeá te vá cùndècu-n iha, chi yàcá<sup>n</sup> cada-n nchàa sá quidé-n iha cuendá quíní nchaa ñáyíu cùndìhi ñaha xii-n ndecu yacá<sup>n</sup>. <sup>4</sup>Chi núú cuíní-ó quíní nchaa ñáyíu ná chiú<sup>n</sup> cada-o te vá cádá dáyuhu-o. Te yòhó cuéhé núú sǎ quidé-n, te cada-n na quíní nchaa ñáyíu —càchí-güedé xǎha<sup>n</sup>-güedé xii-gá.

<sup>5</sup>Duca<sup>n</sup> ñí cáh<sup>n</sup> cue ñaní-gá, chi ni mèe-güedé ñá túú sàndáá iní-güedé nàcuáa ndùu tnúhu càh<sup>n</sup>-gá. <sup>6</sup>Te ní xáha<sup>n</sup> Jèsús xii-güedé:

—Vátá tnàhá-gá òré quǐhí<sup>n</sup>-í dico nchòhó ndédani càa óré cuu

quǐhí<sup>n</sup>-ndó. <sup>7</sup>Chi nchaa ñáyíu ñùhu ichi cuehé ichi duha chi ñá túú cùu úhú iní ñáhá-yu xii nchòhó. Dico yúhú chi cùu úhú iní ñáhá-yu xii-í cuendá sá càh<sup>n</sup>-í sá quidé-yu nchaa sá cuéhé sá dúhá. <sup>8</sup>Te chí cuàhá<sup>n</sup> nchòhó vico chi yúhú vá quǐhí<sup>n</sup>-ni-í chi vátá tnàhá-gá òré quǐhí<sup>n</sup>-í —càchí-gá xáha<sup>n</sup>-gǎ xii-güedé.

<sup>9</sup>Te duca<sup>n</sup> ñí xáha<sup>n</sup>-gǎ te ní ndóo-gá Galileá, te cue téé-á<sup>n</sup> cuàhá<sup>n</sup>-güedé.

**Jèsús ndécú-gǎ ì<sup>n</sup> vico  
chìñuhú-yu Yá Ndiöxí**

<sup>10</sup>Dico sátá cuàhá<sup>n</sup> cue ñaní-gá, te ní xica-gá cuàhá<sup>n</sup>-gá tnàhá-gá dìcò-ni sá dáyuhu cuàhá<sup>n</sup>-gá. <sup>11</sup>Te ñáyíu isràél ñáyíu xǐndecu vico nànducú-yu Jèsús, te xǐtnàhá-yu: —¿Ndéé ndécú Jèsús? —càchí-yu xǐtnàhá-yu.

<sup>12</sup>Te nchaa ñáyíu xǐndecu vico xǐndatnúhu-yu cuendá-gá. Te davá-yu xǐtnàhá-yu sá ìo váha iní-gá, te davá-yu xǐtnàhá-yu sá ñà díú tǎe váha cùu-gá, chi dándahú-gá ñáyíu.

<sup>13</sup>Dico mee-ni xícáh<sup>n</sup> nǎhí-yu, chi xǐyùhú-yu cue téé cùnuu núú-yu.

<sup>14</sup>Te ta ngǔhu<sup>n</sup> dava vico, te cuánguǐhu Jèsús veñúhu càhnu sá ìo cùnuu, te ní ngúíta-gá dácuaàha-gá ñáyíu. <sup>15</sup>Te ñáyíu isràél ní cuñúhu vǐhí-yu sá ìo váha càh<sup>n</sup>-gá, te ní xǐtnàhá-yu:

—¿Ná cuendá ìo váha ñùhu-tu díquí tǎe-a tnúhu cáh<sup>n</sup>-dé te ñá túú ní dàcuaha-dé-í? —càchí-yu xǐtnàhá-yu.

<sup>16</sup>Te ní xáha<sup>n</sup> Jèsús:

—Ñá díú cuendá mèe-í cúú-xí sǎ dánèhé ñáhà-í xii-ndo, chi



cuendá Dútú Ndiöxí Yaá ní tendaha ñaha xii-í véxi-í cúú-xí. <sup>17</sup>Te núu ló dava-ndo ñi yuhu ñi iní-ndó cuíní-ndó càda-ndo nacuaá cuíní Yá Ndiöxí cunduu, te cutnùní ndáá iní-ndó sá tñuhu dàcuaha ñaha-í xii-ndo cùu-xi cuendá mée Dútú Ndiöxí, te ñá dífú cuendá mée-í cúú-xí. <sup>18</sup>Te téé cuíní sá cáda càhnu ñaha ñáyiu xii-dé, téé-á<sup>n</sup> càhá<sup>n</sup>-dé nàcuáa véxi iní mée-dé. Dico yúhú cuíní-í sá cáda càhnú-yu Dútú Ndiöxí Yaá ní tendaha ñaha xii-í véxi-í ñuyú-a, te càhá<sup>n</sup> ndáá-í te ñá túú dàcuandehnde-í.

<sup>19</sup>Te ndíi Moisés ní taxi ndíi tñuhu sá sánú ichi ñaha xii-ndo nacuaá cundecu-ndo, te ni dùca<sup>n</sup> ñá túú sàndáá iní-ndó nàcuáa càhá<sup>n</sup> tñuhu-á<sup>n</sup>. ¿Te ná cuendá cuíní-ndó càhni ñaha-ndo xii-í? —càchí-gá xáha<sup>n</sup>-gá xii-yu.

<sup>20</sup>Te ní xáhã<sup>n</sup>-yu xii-gá:

—Yucu ñávãha dàcoto ñaha xii-ó, chi vá yõ ñi<sup>n</sup> cuíní cahni ñaha xii-ndo —cachí-yu xáhã<sup>n</sup>-yu xii-gá.

<sup>21</sup>Te ní xáha<sup>n</sup> Jèsús xii-yu:

—Sá ñi quide-í ñi<sup>n</sup> sá vã yõ tñahí ndàcu cada nduu cuu-xi nduu ndetatú-ó, xíã<sup>n</sup> ío ní cuñúhu ñaha-ndo xii-í. <sup>22</sup>Te ndíi Moisés ní cachí ndíi sá cuãha-yu sèñá ñii cue landú téé, dico ñá dífú mée ndíi ni càhu iní ndíi chi duca<sup>n</sup> tñahí ní xóo cada cue ñaní tñahá-ó dàvá-á<sup>n</sup>, núu xíã<sup>n</sup> nchòhó sãha-ndo sèñá ñii landú téé cuèi cùu-xi nduu ndetatú-ó. <sup>23</sup>Te duca<sup>n</sup> quide-ndo cuendá sá ñà túú nã cumání-ndó núu tñuhu sá sánú ichi ñaha xii-ndo ní dándõ ndíi Moisés. ¿Te ná cuendá cúdeé<sup>n</sup>-ndó núu-í sá ñi quide tátna-í téé cùhú nduu ndetatú-ó-í? <sup>24</sup>Te váha váha

cada cuendá-ndó, te vá cuendá-ni cáhá<sup>n</sup>-ndó sã yúhú ndècuéchi-í chi ñá túú xini-ndó —càchí-gá xáha<sup>n</sup>-gá xii-yu.

Jèsús xáha<sup>n</sup>-gá xii-yu núu véxi-gá

<sup>25</sup>Te dava ñáyiu ñuú Jerusàlén ní ngúita-yu xitnàhá-yu:

—¿Náa ñá dífú tée-á<sup>n</sup>

nándücu-güedé cahni-güedé?, <sup>26</sup>núu náí-dé mútni núu chítú núu tàcá-ã<sup>n</sup> càhá<sup>n</sup>-dé, te vá yõ cùyii cúnaha xii-dé ñi<sup>n</sup> tñuhu. Cudana te cue téé cùchiu<sup>n</sup> sandáá iní-güedé sá dífú-dé cúú-dé Cristú Yaá ní tendaha Yá Ndiöxí véxi ñuyú-a. <sup>27</sup>Dico nchoo xini-ó ndèé ichi véxi téé-ã<sup>n</sup>, dico Cristú ná quixi-gá chi vá yõ ñi<sup>n</sup> quini ndèé ichi quixi Yaá-á<sup>n</sup> —càchí-yu xitnàhá-yu.

<sup>28</sup>Te yèhi Jesús xití veñúhu càhnu sá ño cùnuu danehe-gá ñáyiu, te ní tecú dóho-gá tñuhu càhá<sup>n</sup>-yu. Te níhi ní cáhá<sup>n</sup>-gá, te xáha<sup>n</sup>-gá xii-yu:

—iNá quini-tu nchòhó ndèé ichi véxi yúhú! Yúhú véxi-í dico ñá dífú sã cúú iní mée-í, chi Yá Ndiöxí Yaá quidé nchàa-ndi túhú sá vãha ní tendaha ñaha-gá xii-í véxi-í, te nchòhó ñá túú xini-ndó-gã. <sup>29</sup>Te yúhú xini-í-gá chi núu ndécú-gã ní quee-í véxi-í, te ñi<sup>n</sup> mee-gã ní tendaha ñaha-gá véxi-í —càchí-gá xáha<sup>n</sup>-gá xii-yu.

<sup>30</sup>Te sá dúcá<sup>n</sup> ñi cáhá<sup>n</sup>-gá, núu cuíní-güedé tñii ñaha-güedé xii-gá quíhí<sup>n</sup>-gá vecaá ní cùu, dico vá yõ ñi<sup>n</sup> ni cùyii tñii ñaha xii-gá chi vátá sàá-gá òré tñii ñaha-güedé. <sup>31</sup>Dico vãi-yu ní sàndáá iní ñáhã-yu xii-gá, te ní xitnàhá-yu:

—¿Nágá cúú sã cáda Cristú ná quixi-gá-i?, te tée-a ío cuéhé núu

sá tá quide-dé véxi. Váa diu tée-a cùu-dé Crìstú Yaá ní tendaha Yá Ndiöxí véxi ñuyú-a —càchí-yu xítñàhá-yu.

**Cue tée cùu fariséú cuiní-güedé quíhí<sup>n</sup> Jèsús vecaá**

<sup>32</sup>Te ní níhí cue tée cùu fariséú tnúhu nàcuáa càhá<sup>n</sup> ñáyiu cuendá Jèsús, núu ní ndatnúhu-güedé ndihí cue dútú cúnùu, te ní techiù<sup>n</sup>-güedé cue tée quide cuendá veñúhu cuáhá<sup>n</sup>-güedé cuátñi ñaha-güedé xii-gá ní cùu. <sup>33</sup>Te ní xáha<sup>n</sup>-gá xii-güedé:

—Sacú duha nduu cundecu ndihí ñaha-í xii-ndo, te núhú tucu-í núu ndécú tătà-í Yaá ní tendaha ñàha xii-í véxi-í ñuyú-a. <sup>34</sup>Te cuèi na nànducu ñaha-ndo dico vá ná nihí ñáhá-ndó chi vá sàá-ndó núu cündècu-í —càchí-gá xáha<sup>n</sup>-gá xii-güedé.

<sup>35</sup>Te ní nguíta ñáyiu isràèl xítñàhá-yu:

—¿Ndèé quíhí<sup>n</sup>-tu tée-a te vá ná nihí-ó-dě-i? ¿Àdi quíhí<sup>n</sup>-dé na chítñahá-dé ñáyiu isràèl ñáyiu nchíténuu nchaa ñuu xícá cuendá danèhé-dé ñáyiu grìégú? <sup>36</sup>¿Nása càhá<sup>n</sup>-tu-dé duha càhá<sup>n</sup>-dé: “Nanducu ñaha-ndo te vá nánihí ñáhá-ndó chi vá sàá-ndó núu cündècu-í”, càchí-tu-dé? —càchí-yu xítñàhá-yu.

**Nàcuáa cada Espíritú Yá Ndiöxí iní-ó**

<sup>37</sup>Te nduu ní yáha-ná vico cùu-xi nduu cahnu vihi, te nduu-ã<sup>n</sup> ní ngúnu tñí Jèsús tnuú ñáyiu, te níhí ní cáhá<sup>n</sup>-gá, te xáha<sup>n</sup>-gá xí-yu:

—Núu ió dava-ndo yichí-ndó ndùte, te quixi-ndo nù-í, te

coho-ndo. <sup>38</sup>Duha càhá<sup>n</sup>-í chi nchaa ñáyiu na quìndáá iní ñáhá xii-í, te cada-xi iní-yu dàtná ì<sup>n</sup> núu xícá ndùte, nchaa-ni nduu xica ñá túú yìchí, duca<sup>n</sup> càda-xi iní-yu núu cuáhá<sup>n</sup> núu véxi dàtná càhá<sup>n</sup>-xi núu tütú Yá Ndiöxí —càchí-gá xáha<sup>n</sup>-gá xí-yu.

<sup>39</sup>Te duca<sup>n</sup> ní cáhá<sup>n</sup>-gá cuendá sá quíxí Espíritú Yá Ndiöxí ngúndecu ndihí nchaa ñáyiu na quìndáá iní ñáhá xii-gá, chi sáá nduu ndàa-gá andiu càda cahnu ñaha Tátá-gá xii-gá, te dàv-á<sup>n</sup> te quixi Espíritú Yá Ndiöxí cundecu ndihí-yu.

**Ñá ní cùu ì<sup>n</sup>nuú-yu cuendá tnúhu ní cáhá<sup>n</sup> Jèsús**

<sup>40</sup>Te dava ñáyiu ní xíndedóho tnúhu ní cáhá<sup>n</sup> Jèsús ní xítñàhá-yu: —Ndáá sá tée-a cùu-dé tée càchí-yu quixi cáhá<sup>n</sup> tnúhu Yá Ndiöxí —càchí-yu xítñàhá-yu.

<sup>41</sup>Te dava tucú-yu xítñàhá-yu: —Tée-a cùu-dé Crìstú Yaá ní tendaha Yá Ndiöxí véxi ñuyú-a —càchí-yu xítñàhá-yu.

Te dava-gá tucú-yu xítñàhá-yu: —¿Náa ndàa distritú Galilea quixi Crìstú Yaá tendaha Yá Ndiöxí quixi ñuyú-a? <sup>42</sup>Chi núu tütú Yá Ndiöxí càchí-xi sá Crìstú Yaá tendaha Yá Ndiöxí quixi ñuyú-a cuu-gá ì<sup>n</sup> ñaní tñáh ndíi Dàvíí, te quee-gá ñuu Bèlén ñuu méé ndíi Dàvíí, duha càhá<sup>n</sup>-xi núu tütú Yá Ndiöxí —càchí-yu xítñàhá-yu.

<sup>43</sup>Te xíã<sup>n</sup> núu ñá ní cùu ì<sup>n</sup>nuú-yu cuendá Jèsús. <sup>44</sup>Te davá-yu cuiní-yu tñí-yu Jèsús quíhí<sup>n</sup>-gá vecaá ní cùu, dico ní ì<sup>n</sup>-yu ñá túú ní cùyí-yu tñí ñàhá-yu xii-gá.

**Cue tée cùchiu<sup>n</sup> ñá túú  
sàndáá iní-güedé Jèsús**

<sup>45</sup>Te cue tée cuáhá<sup>n</sup> tñii ñaha xii Jèsús ní cùu ní ndexio-güedé núú cuè tée cùu fariséú ndihi núú cuè dútú cùnùu. Te xáha<sup>n</sup> cuè tée cùnùu-á<sup>n</sup>:

—¿Ná cuendá ñá ní cãndeca-ndo tée-ã<sup>n</sup> quixi? —càchí-güedé xáha<sup>n</sup>-güedé.

<sup>46</sup>Te cue tée ní sáhá<sup>n</sup> chiu<sup>n</sup> ní xáha<sup>n</sup>-güedé:

—Ni ì<sup>n</sup> tée ñá túú xìní-ndí cáhá<sup>n</sup> dàtná càhá<sup>n</sup> tée-ã<sup>n</sup> —càchí-güedé xáha<sup>n</sup>-güedé.

<sup>47</sup>Te ní xáha<sup>n</sup> cuè tée cùu fariséú:

—¿Náa tñahá nchòhó ní sàndáá iní-ndó tñùhu ndehnde càhá<sup>n</sup> tée-ã<sup>n</sup>? <sup>48</sup>¿Náa ñá túú xìní-ndó sá nì ì<sup>n</sup> cue tée tàxi tñuní nchúhú, te ni ì<sup>n</sup> nchúhú cue tée cùu fariséú ñá túú sàndáá iní-ndí tée-ã<sup>n</sup> ñá?

<sup>49</sup>Nchaa ñáyiú tùha ñaha xii tée-ã<sup>n</sup> ñá túú sàndáá iní-yu nacuáa càhá<sup>n</sup> tñùhu sá sánú ìchi ñaha xii-o, dico cuíta nihnú-yu sá dúcá<sup>n</sup> quidé-yu —càchí-güedé xáha<sup>n</sup>-güedé xii cue tée-á<sup>n</sup>.

<sup>50</sup>Te té Nicòdemú tée ní sáhá<sup>n</sup> niú ní ndatnúhu-dé ndihi Jèsús cúú-dé tñahá-dé ì<sup>n</sup> tée fariséú, te ní xáha<sup>n</sup>-dè xii-güedé:

<sup>51</sup>—Tnúhu sá sánú ìchi ñaha xii-o nacúaa cundecu-o càchí-xi sá ndèé cundedóho-o ñasa càhá<sup>n</sup> tée tàú cuéchi cuendá cutnùní iní-ó ñá ní quide-dé, te dàtnùní cáhá<sup>n</sup>-ó ñúu ndisa ndècuéchi-dé àdi ñá túú ndècuéchi-dé —càchí-dé xáha<sup>n</sup>-dè.

<sup>52</sup>Te ní xáha<sup>n</sup>-güedé:

—Cùu ní cachí sá tñahá-ò cúú-n tée distritú Galileá ñúu duca<sup>n</sup>

càhá<sup>n</sup>-n. Dacuàha tutú yódó tñuní tñùhu Yá Ndiòxí te quiní-n nacuáa càhá<sup>n</sup>-xi sá nì ì<sup>n</sup> tée véxi distritú Galileá ñá túú càhá<sup>n</sup>-dé tñùhu Yá Ndiòxí —càchí-güedé xáha<sup>n</sup>-güedé.

<sup>53</sup>Duca<sup>n</sup> te ndi dí<sup>n</sup> cuãnuhú-güedé vehe-güedé.

**Ì<sup>n</sup> ñadìhí ndécú vihi cuéchi-xi**

**8** Te Jèsús cuáhá<sup>n</sup>-gá yucu Òlívú. <sup>2</sup>Te sátá ñí túndaá nduu tñéé, te cuáhá<sup>n</sup> tucu-gá veñùhu càhnu sá ìo cùnùu. Te ío cuéhé ñáyiú ní chítú níhnú-yu núú-gã, te ní ngóo-gá ní dánèhé ñáhá-gã xií-yu. <sup>3</sup>Te ní quexio cue tée dàcuaha ñaha xií-yu nchaa tñùhu ní chídó tñuní ndíi Moisés, ndihi cue tée cùu fariséú, te ndèca-güedé ì<sup>n</sup> ñadìhí ní sáá, te ñaha-á<sup>n</sup> ñí xíní ñáhã-yu càhá<sup>n</sup> ndihi-a<sup>n</sup> ì<sup>n</sup> tée dico ñá díú yìi-a<sup>n</sup> cuu-dé, te ní sanutñí ñaha-güedé xii-a<sup>n</sup> tnuú nchaa ñáyiú xíndecu núú Jèsús. <sup>4</sup>Te ní xáha<sup>n</sup>-güedé xii Jèsús:

—Mèstrú, ñadìhí-a ní xíní ñáhá ñáyiú xii-a<sup>n</sup> càhá<sup>n</sup> ndihi-a<sup>n</sup> ì<sup>n</sup> tée dico ñá díú yìi-a<sup>n</sup> cuu-dé. <sup>5</sup>Te tñùhu ní chídó tñuní ndíi Moisés càchí-xi sá yúu cahni-o nchaa ñáyiú dìhí duha quide. Te yòhó, ¿nása càchí-n cùnùu-i? —cachí-güedé xáha<sup>n</sup>-güedé xii-gá.

<sup>6</sup>Duha ní cáhá<sup>n</sup>-güedé chi cuendá sá cuíní-güedé coto ndeé ñáhá-güedé xii-gá ñúu nása cáhá<sup>n</sup>-gá cuendá núcòo nchihi ñaha-güedé xii-gá ní cáhá<sup>n</sup>-güedé. Te ní ngúnu ndeyi-gá te ní ngúita-gá tée-gã ndihi díquí ndáhá-gã lètrá núú ñúhú. <sup>7</sup>Te xicá<sup>n</sup> tñuhú-ní tucu-güedé núú-gã ñúu ní ndonehe núú-gã, te ní xáha<sup>n</sup>-gã:

—Ndëdani càa nchóhó te núu ñá túu nǎ cuéchi quèide-ndo te díhna nuu-gǎ-ndó chí cuǎha-a<sup>n</sup> yúu — cǎchí-gǎ xáha<sup>n</sup>-gǎ xii-güedé.

<sup>8</sup>Te ní ngúnu ndeyi tucu-gǎ téé tucu-gǎ lètrá núu ñúhú. <sup>9</sup>Te sá dúcá<sup>n</sup> ní xáha<sup>n</sup>-gǎ xii-güedé te ní ndixi túu iní-güedé sá ñà túu quèide váha mee-güedé tnàhá-güedé, núu da ì<sup>n</sup> da ì<sup>n</sup>-güedé ní ndee, te díhna-gǎ cue téé cùu sacuéhé ní ndee te ní ngúfta nchicú<sup>n</sup> dava-gǎ-güedé. Te sátá ní ndíhi-güedé ní ndee, te ní quendóo mee-nǎ Jèsús ndíhi ñàdìhí-á<sup>n</sup>. <sup>10</sup>Te ní ndonehe núu Jèsús te ní xiní-gǎ sá ní ndíhi-güedé cuáhá<sup>n</sup> te mee-nǎ ñàdìhí-á<sup>n</sup> ní ndóo-a<sup>n</sup>, te ní xáha<sup>n</sup>-gǎ xii-a<sup>n</sup>:

—¿Ndëndi cuáhá<sup>n</sup> cue téé cǎchí sá ní quèide-n cuéchi? ¿Ni ì<sup>n</sup>-güedé ñá ní cùndee tnúhu-güedé quíhí<sup>n</sup>-n cǎstíu-va? —cǎchí-gǎ xáha<sup>n</sup>-gǎ xii-a<sup>n</sup>.

<sup>11</sup>Te ní xáha<sup>n</sup>-a<sup>n</sup> xii Jèsús:

—Ñáhá, chi ni ì<sup>n</sup>-güedé ñá ní ndàcu-güedé —cǎchí-a<sup>n</sup> xáha<sup>n</sup>-a<sup>n</sup>.

Te ní xáha<sup>n</sup> Jèsús:

—Te ni yúhú vá dáquíhí<sup>n</sup> ñáhà-í cǎstíu xii-n. Te vitna te núhú-n te vá cǎdá-gǎ-n nǎndi sá cuèhé sá dúhá —cǎchí-gǎ xáha<sup>n</sup>-gǎ xii-a<sup>n</sup>.

### Jèsús dándixi túu-gǎ iní-ó

<sup>12</sup>Te ní cǎhá<sup>n</sup> tucu Jèsús núu ñáyi, te xáha<sup>n</sup>-gǎ xí-yu:

—Yúhú cùu-í dàtná ì<sup>n</sup> ñuhú dáyèhe-í ñuyíu-a, te nchaa ñáyi na chìtnahá ñáhá xii-í, te vá cùndècu-gǎ-yu ichi cuèhé ichi duha, chí yúhú dándixi túu-í iní-yu cuendá cutnùni iní-yu nàcuáa ndùu cuendá Yǎ Ndióxi, te cundecu-í ndíhí-yu ni caa ni quíhí<sup>n</sup> —cǎchí-gǎ xáha<sup>n</sup>-gǎ xí-yu.

<sup>13</sup>Te ní xáha<sup>n</sup> cuè téé cùu fariséu xii-gǎ:

—Medii-n cǎhá<sup>n</sup>-n sǎ cùu-n tée váha, te vá yóo ì<sup>n</sup>-gǎ chindèe tnúhu ñaha xii-n núu ná téé cùu-n, dico xǎ<sup>n</sup> ñá túu nàndíhi-xi — cǎchí-güedé xáha<sup>n</sup>-güedé xii-gǎ.

<sup>14</sup>Te ní xáha<sup>n</sup> Jèsús:

—Cuèi cǎhá<sup>n</sup>-í cuendá mée-í dico nàndíhi tnúhu cǎhá<sup>n</sup>-í. Chi yúhú nàha-í ndèe ichi véxi-í, te xiní-í ndèe ichi núhú-í, dico nchòhó chi ñá túu xiní-ndó ndèe ichi véxi-í, te ni ñà túu xiní-ndó ndèe ichi quíhí<sup>n</sup>-í. <sup>15</sup>Te nchòhó chi cuendá-ni cǎhá<sup>n</sup>-ndó cuendá ñáyi núu quèide váha-yu àdi ñá túu quèide váha-yu. Te yúhú ñá túu cǎhá<sup>n</sup>-í cuendá ñáyi núu quèide váha-yu àdi ñá túu quèide váha-yu. <sup>16</sup>Àdi núu cǎhá<sup>n</sup>-í dico ì<sup>n</sup> tnúhu ndáá cǎhá<sup>n</sup>-í chi ñá díu-ní mée-í cǎhá<sup>n</sup>, chi tnàhá Tǎtà-í Yaá ní tendaha ñaha xii-í véxi-í ñuyíu-a cǎhá<sup>n</sup>-gǎ chindèe tnúhu ñaha-gǎ xii-í. <sup>17</sup>Te tnúhu sá sánú ichi ñaha xii-ndo cachí-xi sá núu na cùndecu úu cue téé cǎhá<sup>n</sup> ndáá-güedé nàcuáa cùu ì<sup>n</sup> sá cùndáá, te núu ì<sup>n</sup>-ni tnúhu na cǎhá<sup>n</sup>-güedé ndi ndúu-güedé te xǎ<sup>n</sup> nàndíhi-xi, duha cǎchí tnúhu-á<sup>n</sup>. <sup>18</sup>Te diu-ni duca<sup>n</sup> cùu-xi yúhú chi cǎhá<sup>n</sup>-í ì<sup>n</sup> tnúhu ndáá sá cùu-xi mée-í, te diu-ni dàtná cǎhá<sup>n</sup>-í cǎhá<sup>n</sup> Tǎtà-í Yaá ní tendaha ñaha xii-í véxi-í ñuyíu-a —cǎchí-gǎ xáha<sup>n</sup>-gǎ xii-güedé.

<sup>19</sup>Te ní xáha<sup>n</sup>-güedé xii-gǎ:

—¿Te ndèe ndécú Tǎtà-n-í? — cǎchí-güedé xáha<sup>n</sup>-güedé.

Te ní xáha<sup>n</sup> Jèsús:

—Te núu dicó xiní-ndó yòo cuu yúhú-á te duca<sup>n</sup> te quiní-ndó Tǎtà-í.

Te ni yǔhú ñá túú xìní-ndó yòo  
 cuu-í nǔu xíǎ<sup>n</sup> ñá túú xìní-ndó  
 Tǎtà-í —càchí-gá xáha<sup>n</sup>-gǎ  
 xii-güedé.

<sup>20</sup>Duha ní cáhá<sup>n</sup> Jèsús nini  
 dàcuaha-gá ñáyiu xití veñúhu núú  
 ndécú àlcanciá díhú<sup>n</sup>. Te vá yòo ii<sup>n</sup>  
 ni cùyii tñii ñaha xii-gá chi vátá  
 sàá-gá òré tñii ñaha-güedé.

**Ñáyiu ñá túú sàndáá iní ñáhá  
 xii Jesús vá ndácú-yu quǐhí<sup>n</sup>-yu  
 núú nùhú-gá cundecu-gá**

<sup>21</sup>Te ní xáha<sup>n</sup> tùcu Jesús  
 xii-güedé:

—Yúhú nùhú-í te nanducu  
 ñaha-ndo te vá nánihí ñáhá-ndó, te  
 cuú-ndó nǔú yíca cuèchi-ndo, chi  
 vá ndácú-ndó sǎá-ndó nǔú nùhú-í  
 cundecu-í —càchí-gá xáha<sup>n</sup>-gǎ  
 xii-güedé.

<sup>22</sup>Te ní xítñaha cue téé isràél:  
 —¿Te náa cahni-dé méé-dě nǔu  
 càchí-dé sá vǎ ndácú-ó sàá-ó  
 nǔú quǐhí<sup>n</sup>-dé-ǎ<sup>n</sup>? —càchí-güedé  
 xítñaha-güedé.

<sup>23</sup>Te ní xáha<sup>n</sup> Jèsús xii-güedé:  
 —Nchòhó chi cue téé ñuyíú-a  
 cùu-ndo, núú ío ñuhu iní-ndó sǎ ío  
 ñuyíú-a. Te yúhú chi téé núú ñnu  
 cùu-í nǔu xíǎ<sup>n</sup> ñá túú sǎ ío ñuyíú-a  
 ñuhu iní-í. <sup>24</sup>Te xíǎ<sup>n</sup> nǔu càchí-í sá  
 cùu-ndó nǔú yíca cuèchi-ndo, chi  
 ñá cuíní-ndó quèndáá iní-ndó sǎ  
 yúhú véxi cuu<sup>n</sup>-í andiù, te núú xíǎ<sup>n</sup>  
 diu-ni núú yíca cuèchi-ndo cùu-ndó  
 —càchí-gá xáha<sup>n</sup>-gǎ xii-güedé.

<sup>25</sup>Te ní xícá<sup>n</sup> tnùhú-güedé núú-gǎ,  
 te xáha<sup>n</sup>-güedé:

—¿Te náa cùú yòhó nǔu duca<sup>n</sup>  
 càhá<sup>n</sup>-n-í? —càchí-güedé  
 xáha<sup>n</sup>-güedé xii-gá.

Te ní xáha<sup>n</sup>-gǎ:

—Sa ní cachí tnùhu-í xii-ndo  
 ndéé díhna —càchí-gá xáha<sup>n</sup>-gǎ  
 xii-güedé.

<sup>26</sup>Te xáha<sup>n</sup> tùcu-gá:

—Ndècu cuéhé tnùhu cáhá<sup>n</sup>-í cada  
 ndáá-í cuèndá nchòhó. Te Tǎtà-í Yáá  
 ní tendaha ñaha xii-í véxi-í ñuyíú-a  
 càhá<sup>n</sup>-gá tnùhu ndáá, te tnùhu  
 càhá<sup>n</sup> yúhú ñuyíú-a cùu-xi tnùhu ní  
 cáhá<sup>n</sup>-gá ní xíndedóho-í —càchí-gá  
 xáha<sup>n</sup>-gǎ xii-güedé.

<sup>27</sup>Te mee-güedé ñá túú ní tècú  
 tnùní-güedé sá cuèndá Dútú Ndiòxi  
 ní cáhá<sup>n</sup> Jèsús. <sup>28</sup>Te ní xáha<sup>n</sup>-gǎ  
 xii-güedé:

—Òré ná cátá càa ñaha-ndo xii  
 yúhú Téé cùu ñaní tnáhá-ndó  
 nchàa-ndo núú cùrúxí cahni  
 ñaha-ndo, te òré-á<sup>n</sup> cutnùní iní-ndó  
 yòo cuu-í, te ñá túú quide-í sá cùú  
 iní mèé-í, chi yúhú càhá<sup>n</sup>-í nàcuáa  
 ní dánèhé ñáhá Tǎtà-í <sup>29</sup>Yáá ní  
 tendaha ñaha xii-í véxi-í. Te diu-gá  
 ndécú ndìhi ñaha-gá xii-í, te ñá  
 túú dàña nihnu ñaha-gá chi quide-í  
 nchaa nàcuáa cùu iní-gá —càchí-gá  
 xáha<sup>n</sup>-gǎ xii-güedé.

<sup>30</sup>Te sá dúcá<sup>n</sup> nǐ cáhá<sup>n</sup>-gá nǔu ío  
 vǎi ñáyiu ní sàndáá iní ñáhá xii-gá.

**Ñáyiu sàndáá iní ñáhá xii Yá  
 Ndiòxi ndìhi ñáyiu ndècu  
 ichi cuehé ichi duha**

<sup>31</sup>Te ní xáha<sup>n</sup> Jèsús xii ñáyiu  
 isràél ñáyiu ní sàndáá iní ñáhá  
 xii-gá:

—Te núú vá dáñá ndèé-ndó  
 càda-ndo nchaa nàcuáa càhá<sup>n</sup>-í, te  
 cuu ndisa-ndo cuè téé tnàhá tnùhu  
 ndìhi-í, <sup>32</sup>te tecú tnùní-gá-ndó  
 tnùhu ndáá, te duca<sup>n</sup> te cácu  
 nihnu-ndo —càchí-gá xáha<sup>n</sup>-gǎ  
 xii-yu.

<sup>33</sup>Te ní xáhã<sup>n</sup>-yu:

—Nchúhú cúú-ndí cue ñaní tnáhá ndíi Àbrahám, te ni ì<sup>n</sup> nduu ñá túú ndèè sácúndedí nihnu-ndí ndoho tnahá-ndí nũu cächí-ò sá dácácu nihnu ñaha-n xii-ndí —cächí-yu xáhã<sup>n</sup>-yu xii-gá.

<sup>34</sup>Te ní xáha<sup>n</sup> Jèsús xií-yu:

—Na cächí tnúhu ndáá-í xii-ndo sã nchàa ñáyiú quide nchaa sá cuèhé sá dúhá tàxi tnuní ñáhá-nã-xi xií-yu.

<sup>35</sup>Te cue ñáyiú xìnu cuechi te vá cúú ì<sup>n</sup>-ná cuú-yu ndíhi ñáyiú dii vèhe-xi xinu cuechí-yu, dico cue déhe ñáyiú dii vèhe-xi-á<sup>n</sup> chi ì<sup>n</sup>-ni cùu ndíhi ñaha-güexi xií-yu. <sup>36</sup>Te núu yúhú Yaá cúú Dèhe Yá Ndiöxí dácácu nihnu ñaha-í xii-ndo nũú nchàa yíca cuèchi-ndo, te ndáá sá nchòhó cácu nihnu ndisa-ndo. <sup>37</sup>Te yúhú sa xìní-í sá nchòhó cúú-ndó ñàní tnáhá ndíi Àbrahám, te dicó-ní sá ñã tnàhá iní-ndó tnũhu càhá<sup>n</sup>-í nũu xiá<sup>n</sup> cuíní-ndó càhni ñaha-ndo.

<sup>38</sup>Te yúhú càhá<sup>n</sup>-í nàcuáa ní dánèhé ñáhá Tãtà-í, te nchòhó quidé-ndó nàcuáa càhá<sup>n</sup> tãtà-ndó —cächí-gá xáha<sup>n</sup>-gã xií-yu.

<sup>39</sup>Te ní xáhã<sup>n</sup>-yu:

—Ndíi Àbrahám cúú tãtà-ndí —cächí-yu xáhã<sup>n</sup>-yu xii-gá.

Te ní xáha<sup>n</sup> Jèsús:

—Núu ndisa ñaní tnáhá ndíi Àbrahám cúú-ndó, te cada-ndo nàcuáa ní xóo cada ndíi ni cùu.

<sup>40</sup>Te yúhú cuèi càhá<sup>n</sup>-í ì<sup>n</sup> tnúhu ndáá nàcuáa càhá<sup>n</sup> Yá Ndiöxí cächí tnúhu-gá xii-í, te cuíní-ndó càhni ñaha-ndo. ¡Dico ndíi Àbrahám chi ñá túú dùca<sup>n</sup> ni quide ndíi! <sup>41</sup>Te nchòhó quidé-ndó nàcuáa quide tãtà-ndó —cächí-gá xáha<sup>n</sup>-gã xií-yu.

Te ní xáhã<sup>n</sup>-yu:

—Nchúhú, ñá túú yàyacá<sup>n</sup> ndécú tãtà-ndí, chi ì<sup>n</sup> dèi Yá Ndiöxí cúú tãtà-ndí —cächí-yu xáhã<sup>n</sup>-yu xii-gá.

<sup>42</sup>Te ní xáha<sup>n</sup> Jèsús:

—Núu dicó Yá Ndiöxí ndisa cùu Tãtà-ndó te cuu iní ñáhá-ndó xii-í ní cùu chi yúhú ní quee-í núú ndécú-gã véxi-í ñuyíú-a. Te ñá túú véxi-í sá cúú iní mèe-í, chi mee-gã ní tendaha ñaha-gá véxi-í. <sup>43</sup>Te ñá túú tècú tnùní-ndó tnúhu càhá<sup>n</sup>-í chi ñá túú tnàhá iní-ndó.

<sup>44</sup>Te nchòhó chi tãtà-ndó cùu yucu ñãvãha núu cùdíf iní-ndó quide-ndo nchaa nacuáa cùu iní-xi, chi ndéé òrè ní ngáva ñuyíú duca<sup>n</sup>-ni ndècu-xi dacáhá<sup>n</sup>-xi iní-ndó sàhni tnaha-ndo. Te ñá ì<sup>n</sup> ndùu càhá<sup>n</sup>-xi ì<sup>n</sup> tnúhu ndáá chi ñá túú xìca-xi ichi ndáá, chi mee-ni ichi tnúhu ndehnde xìca-xi chi duca<sup>n</sup> iní-xi. Te ñu-xi dácahu-xi iní-ndó dácuandehnde-ndo. <sup>45</sup>Te yúhú càhá<sup>n</sup>-í tnúhu ndáá te ñá túú cuíní-ndó quèndáá iní ñáhá-ndó.

<sup>46</sup>¿Te ndèdacàa nchòhó xìní-ndó sã quidè-í ì<sup>n</sup> sá cuèhé sá dúhá-í?, te yúhú ñá túú ñã quidè-í chi càhá<sup>n</sup> ndáá-í, ¿te ná cuèndá ñá túú cuíní-ndó quèndáá iní-ndó tnúhu càhá<sup>n</sup>-í? <sup>47</sup>Te nchaa ñáyiú ndècu ichi Yá Ndiöxí, ñáyiú-á<sup>n</sup> sácúndedóho-yu nchaa tnúhu càhá<sup>n</sup>-gá. Te nchòhó chi ñá díú ichi Yá Ndiöxí ndécú-ndó nũu ñá túú sácúndedóho-ndo tnúhu càhá<sup>n</sup>-gá —cächí-gá xáha<sup>n</sup>-gã xií-yu.

**Díhna-gá Crìstú sa ndècu  
dacúxí ndíi Àbrahám**

<sup>48</sup>Te ní xáha<sup>n</sup> ñáyiú isràel:

—Váha-ni càhá<sup>n</sup>-ndí sá tèe samaritànú cúú-n, te yucu ñãvãha

ndècu ndihi-n —cachí-yu xǎhǎ<sup>n</sup>-yu xii-gá.

<sup>49</sup>Te ní xáha<sup>n</sup> Jèsús:

—Yúhú, ñá túú yùcu ñávǎha ndècu ndihi-í, chi Tǎtà-í quidé càhnu-í, te nchòhò da cùu úhú iní ñáhá-ndó xii-í —càchí-gá xáha<sup>n</sup>-gǎ xií-yu.

<sup>50</sup>Te xǎha<sup>n</sup> tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndiòxí cuiní-gá sá cádá càhnu ñaha-ndo xii-í. Te mee-gǎ cǎhá<sup>n</sup>-gá nùu ndèdacàa-ndo quide váha, te ndèdacàa-ndo ñá túú quide váha.

<sup>51</sup>Te na càchí tnúhu ndáá-í xii-ndo sǎ nchàa ñáyi u na tnèi tnúhu càhá<sup>n</sup>-í te vá cuíta nihnú-yu —càchí-gá xáha<sup>n</sup>-gǎ xií-yu.

<sup>52</sup>Te ní xáha<sup>n</sup> tùcu ñáyi u isràél:

—Vitna te ní xiní ndáá-ndí sá yùcu ñávǎha ndècu ndihi-n, chi ndíi Àbrahám ndihi nchaa cue téé ní xóo cǎhá<sup>n</sup> tnúhu Yá Ndiòxí ndéé sanaha ní xíhí-güedé, te yòhó càchí-tu-n sǎ ncháá ñáyi u na tnèi tnúhu càhá<sup>n</sup>-n te vá cùu-gá-yu. <sup>53</sup>¿Náa ío-gá càhnu cuu-ó dàcúuxí ñàní tnáhá-ndí ndíi Àbrahám-ǎn? Téé-án dai ní xíhí-dé ndihi cue téé ní xóo cǎhá<sup>n</sup> tnúhu Yá Ndiòxí ndéé sanaha. ¿Te yòhó nágá-tu cùu-n te vá cùu-n càhá<sup>n</sup>-n-i? —cachí-yu xǎhǎ<sup>n</sup>-yu.

<sup>54</sup>Te ní xáha<sup>n</sup> Jèsús:

—Te núu dicó mèè-í quidé càhnu-í mèè-í ñá, te ñá túú nàndíhi sá quidé-í nùu duca<sup>n</sup>. Dico Tǎtà-í quidé càhnu ñaha-gá xii-í, te diu-ni Yaá-án càchí-ndó cùu Ndióxi-ndó.

<sup>55</sup>Te nchòhò chi ñá túú xiní-ndó-gǎ. Te yúhú chi xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mèè-ndo. Te yúhú chi xiní

ndisa-í-gá te tnèi-í nchaa tnúhu càhá<sup>n</sup>-gá. <sup>56</sup>Te ndíi Àbrahám ñàní tnáhá-ndó ní xíndecu ndéé sanaha ío ní cudíí iní ndíi sá quíní ñáhá ndíi xii-í, te ní sáá nduu ní xiní ñáhá ndíi xii-í nùu ío ní cudíí iní ndíi —càchí-gá xáha<sup>n</sup>-gǎ xií-yu.

<sup>57</sup>Te ní xáha<sup>n</sup> ñáyi u isràél xii Jèsús:

—Ni vǎtá cúhú<sup>n</sup>-gǎ-n ùdico úxí cuía-n te càchí-n sǎ ní xiní-n ndíi Àbrahám, te ní cunaha vihi ní xíhí ndíi-án —càchí-yu xǎhǎ<sup>n</sup>-yu xii-gá.

<sup>58</sup>Te ní xáha<sup>n</sup> Jèsús:

—Te na càchí tnúhu ndáá-í xii-ndo sǎ cùmání-gǎ cundecu ndíi-án ñuyíu-a te yúhú sa ndècu-gá-í —càchí-gá xáha<sup>n</sup>-gǎ xií-yu.

<sup>59</sup>Te sá dúcá<sup>n</sup> ní cǎhá<sup>n</sup>-gá nùu xíá<sup>n</sup> ní quehé<sup>n</sup>-yu yúu cuǎha ñáhá-yu xii-gá ní cùu, te ní nguívǎha-gá núu-yu te ní quee-gá xití veñúhu cuáhá<sup>n</sup>-gá.

**Jèsús quidé tǎtna-gá ii<sup>n</sup> téé cuàá**

**9** Te núu xícá cùu Jesús ní naníhí-gǎ ii<sup>n</sup> téé cuàá, te sa duca<sup>n</sup> tnàhí càa núu-dě ní cacu-dé. <sup>2</sup>Te ní xáha<sup>n</sup> cuè téé xica cuu ndihi-gá xii-gá:

—Mèstrú, ¿ná cuèndá dàcá<sup>n</sup> cuàá téé-ǎn ní cacu-dé? ¿Sá cuèndá nchaa yícá cuèchi tǎtá-dě, ǎn sǎ cuèndá nchaa yícá cuèchi nǎná-dě, ǎn sǎ cuèndá nchaa yícá cuèchi mee-dě dàcá<sup>n</sup> cáá-dě ní cacu-dé? —càchí-güedé xǎha<sup>n</sup>-güedě xii-gá.

<sup>3</sup>Te ní xáha<sup>n</sup> Jèsús:

—Ni ñá dífú sǎ cuèndá nchaa yícá cuèchi mee-dě, te ni ñá dífú sǎ cuèndá nchaa yícá cuèchi tǎtá-dě, te ni ñá dífú sǎ cuèndá nchaa yícá cuèchi nǎná-dě, chi mee Yá Ndiòxí

ní cuiní-gá sá dúcá<sup>n</sup> cùnduu-dé sáá-dé ñuyíú-a cuendá sá ñuyíú-a quini ñáyiú nása cada ñaha Yá Ndiöxí xii-dé ndúha núú-dě. <sup>4</sup>Te vitna ló-gá nduu cùyica sá cadà-í nchaa chiú<sup>n</sup> ní táhú Yàà ní tendaha ñaha xii-í véxi-í ñuyíú-a, chí sáá nduu te vá ndácú-gá-í cada-í chiú<sup>n</sup>-gá. <sup>5</sup>Te nini ndècu-gá-í ñuyíú-a te dándixi túu-í iní nchaa ñáyiú cuendá cutnùní iní-yu nàcuáa nduu cuendá Yá Ndiöxí —càchí-gá xáha<sup>n</sup>-gá xii-güedé.

<sup>6</sup>Te sátá dúcá<sup>n</sup> ní cáhá<sup>n</sup>-gá, te ní sati-gá díf-gá núú ñhú te ní dácá-gá luha ñuhu ní cuáha ndéhyú, te ndéhyú-á<sup>n</sup> ní dácánù-gá ndúú xio núú tée cuàá-á<sup>n</sup>. <sup>7</sup>Te ní xáha<sup>n</sup>-gá xii-dé:

—Quíhí<sup>n</sup>-n nàquete-n núú-n ndùte tanquí Silòé —càchí-gá xáha<sup>n</sup>-gá xii-dé. Te Silòé-á<sup>n</sup> queé-xí tñhu mèe-yu: Tée xica chiú<sup>n</sup>.

Te ní sáhá<sup>n</sup> tée cuàá-á<sup>n</sup> ní naquete-dé núú-dě, te òré ní ndexio-dé te sa ndèhe-dé.

<sup>8</sup>Te nchaa ñáyiú ndècu yatni núú ndécú-dě ndihí nchaa ñáyiú xini ñáhá xii-dé núú xicá<sup>n</sup> ndàhú-dé ní xitnàhá-yu:

—¿Náa ñá díú tée-á<sup>n</sup> ní xoo cáca<sup>n</sup> ndàhú-dé? —càchí-yu xitnàhá-yu.

<sup>9</sup>Te davá-yu càchí-yu sá díú-dě, te davá-yu càchí-yu sá ñà díú-dě, dico duca<sup>n</sup> càa-dé, càchí-yu xitnàhá-yu.

Dico mee-dě ní xáha<sup>n</sup>-dě xií-yu sá díú-dě.

<sup>10</sup>Te ní xicá<sup>n</sup> tñhú-yu núú-dě, te xähä<sup>n</sup>-yu:

—¿Náa ní cuu núú ní ndúha núú-n ndèhe-n vitna? —cachí-yu xähä<sup>n</sup>-yu xii-dé.

<sup>11</sup>Te ní xáha<sup>n</sup>-dě:

—Tée nàni Jesús-á<sup>n</sup> ní cadúha-dé luha ndéhyú te ní dácánù-dé núú-í, te ní táuchíú<sup>n</sup>-dě ní sáhá<sup>n</sup>-í tànquí Silòé ní naquete-í núú-í, te òré-á<sup>n</sup> ní cuu cundehe-í —càchí-dé xáha<sup>n</sup>-dě xií-yu.

<sup>12</sup>Te ní xicá<sup>n</sup> tñhú tucú-yu núú-dě, te xähä<sup>n</sup>-yu:

—¿Te ndéé ndécú tée-á<sup>n</sup>? —càchí-yu xähä<sup>n</sup>-yu xii-dé.

Te ní xáha<sup>n</sup>-dě:

—Ná túú xini-í —càchí-dé xáha<sup>n</sup>-dě xií-yu.

### Cue tée cùu fariséú ndátnñhu-güedé ndihí tée ní ndúha núú-xi

<sup>13</sup>Te ndèca-güedé tée ní ndúha núú-xi-á<sup>n</sup> cuähá<sup>n</sup> núú cuè tée cùu fariséú. <sup>14</sup>Te cuendá sá ndùu ndetatú-yu ní cadúha Jèsús ndéhyú ní dácánù-gá núú tée-á<sup>n</sup> te ní ndúha, <sup>15</sup>xíä<sup>n</sup> nùu ní xicá<sup>n</sup> tñhú cuè tée cùu fariséú núú-dě, te xáha<sup>n</sup>-güedé:

—¿Náa ní cuu ní ndúha núú-n? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dě xii-güedé:

—Hí<sup>n</sup> tée ní dácánù-dé ndéhyú nùú-í te ní sáhá<sup>n</sup>-í ní naquete-í, te ní cuu ndèhe-í vitna —càchí-dé xáha<sup>n</sup>-dě xii-güedé.

<sup>16</sup>Te dava cue tée cùu fariséú ní xitnàha-güedé:

—Ná díú Yá Ndiöxí ní tëndaha ñaha-gá xii tée-á<sup>n</sup> véxi-dé nùu duha quide-dé nchaa sá vā yõ tñhí ndàcu cada, te ñá túú sàndáá iní-dé canehe íí-dě nduu ndetatú-ó —càchí-güedé xitnàha-güedé.

Te dava-güedé ní xitnàha-güedé:

—¿Náa ndacu-dé cada-dé sá vā yõ tñhí ndàcu cada te núu cùu-dé tée yicá cuèchi? —càchí-güedé xitnàha-güedé.



Te ñá túú ní cùu ì<sup>n</sup>nuu-güedé tñúhu ní cáhá<sup>n</sup>-güedé. <sup>17</sup>Te ní xí cá<sup>n</sup> tñúhú tucu-güedé núú tée ní ndúha núú-xi-á<sup>n</sup>, te xáha<sup>n</sup>-güedé:

—Te yòhó, ìnása càchí-n cuèndá tée ní quide tátna núú-n te ní ndúha? —càchí-güedé xáha<sup>n</sup>-güedé xii-dé.

Te ní xáha<sup>n</sup>-dë:

—Yúhú càchí-í sá í<sup>n</sup> tée càhá<sup>n</sup> tñúhu Yá Ndióxi cúú-dé —càchí-dé xáha<sup>n</sup>-dë xii-güedé.

<sup>18</sup>Dico cue tée isràél ñá ní sàndáá iní-güedé sá cuàá-dé ní cùu, chi cuèndá sa ní ndúha núú-dë ní xiní ñáhá-güedé, te xǎ<sup>n</sup> núu ní cana-güedé tǎtá-dë ndíhi nǎná-dë, <sup>19</sup>te ní xí cá<sup>n</sup> tñúhú-güedé núú-yu, te xáha<sup>n</sup>-güedé:

—¿Díu tée-a déhe-ndo tée càchí-ndó cuàá-dé ní cacu-dé-ǎ<sup>n</sup>? ¿Te nása ní cuu ní ndúha núú-dë? —càchí-güedé xáha<sup>n</sup>-güedé xii-yu.

<sup>20</sup>Te ní xáha<sup>n</sup> tǎtá-dë ndíhi nǎná-dë:

—Díu déhe-ndí cúú-dé te sa cuàá ndisa-dé ní cacu-dé, <sup>21</sup>dico ñá túú xìní-ndí nása ní cuu ní ndúha núú-dë, te ni ñá túú xìní-ndí yoo ní quide tátna. Chí càcá<sup>n</sup> tñúhú núú méé-dë xǎ<sup>n</sup> núu sa sàcuéhé-dë, te na càhá<sup>n</sup>-dé núu nása ní cuu ní ndúha núú-dë —càchí-yu xǎhá<sup>n</sup>-yu xii-güedé.

<sup>22</sup>Duha ní cáhá<sup>n</sup> tǎtá-dë ndíhi nǎná-dë ní xǎhá<sup>n</sup>-yu xii-güedé cuèndá sá yùhú-yu cue tée cùnuu núú ñǎyiu isràél, chi cue tée-ǎ<sup>n</sup> sa ní ndatnúhu-güedé ní cuu ì<sup>n</sup>nuu-güedé sá núu ndédacáa ñáyiu na càhá<sup>n</sup> sá Jèsús cúú-gǎ Cristú Yaá ní tendaha Yá Ndióxi véxi ñuyú-a, te vá dáñá-gǎ-güedé

quíhu-yu veñúhu. <sup>23</sup>Núu xǎ<sup>n</sup> ní xáha<sup>n</sup> tǎtá-dë ndíhi nǎná-dë sá ná càcá<sup>n</sup> tñúhú-güedé núú méé-dë chi sa sacuéhé-dë.

<sup>24</sup>Te xǎ<sup>n</sup> núu ní cana tucu-güedé tée ní ndúha núú-xi-á<sup>n</sup>, te ní xáha<sup>n</sup>-güedé:

—Cáhá<sup>n</sup>-n ì<sup>n</sup> tñúhu ndáá chi Yá Ndióxi ndéhe ndíi-gá nàcuáa ní cuu ní ndúha núú-n, chi nchúhú xìní-ndí sá dicó ì<sup>n</sup> tée ndècu yíca cuèchi-xi cùu tée càchí-n ní quide tátna núú-n —càchí-güedé xáha<sup>n</sup>-güedé xii-dé.

<sup>25</sup>Te ní xáha<sup>n</sup>-dë:

—Yúhú, ñá túú xìní-í te núu tée ndècu yíca cuèchi-xi cùu-dé àdi ñáhá. Dìcò-ni sá xìní-í sá cuàá-í ní cùu te vitna ní cuu cundehe-í —càchí-dé xáha<sup>n</sup>-dë xii-güedé.

<sup>26</sup>Te ní xí cá<sup>n</sup> tñúhú tucu-güedé núú-dë, te xáha<sup>n</sup>-güedé:

—¿Nása ní quide ñaha-dë xii-n te ní ndúha núú-n-í? —càchí-güedé xáha<sup>n</sup>-güedé xii-dé.

<sup>27</sup>Te ní xáha<sup>n</sup>-dë:

—Yúhú sa ní cáhá<sup>n</sup>-í te ñá túú quide cuèndá-ndó. ¿Te ná cuèndá cuìní-ndó càchí tñúhu-ni tucu-í? ¿Á tñàhá-ndó cuìní-ndó quìndáá iní-ndó tñúhu càhá<sup>n</sup>-dé? —càchí-dé xáha<sup>n</sup>-dë xii-güedé.

<sup>28</sup>Te ní cudé<sup>n</sup>-güedé núú-dë, te ní xáha<sup>n</sup>-güedé xii-dé:

—Te núu yòhó cuìní-n chinchí<sup>n</sup> tñúhu tée-ǎ<sup>n</sup> te cuàhá<sup>n</sup>, dico nchúhú chi canchí<sup>n</sup> nihnu nahi-ni-ndí nàcuáa ní cáhá<sup>n</sup> ndíi Moisés. <sup>29</sup>Te nchúhú chi nàha-ndí sá Yá Ndióxi ní cáhá<sup>n</sup> ndíi-gá ndíi Moisés, dico tée càchí-n-ǎ<sup>n</sup> chi ni ñá túú xìní-ndí ndè tée cùu-dé —càchí-güedé xáha<sup>n</sup>-güedé xii-dé.

<sup>30</sup>Te ní xáha<sup>n</sup> tée ní ndúha núú-xi-á<sup>n</sup>:

—¿Te náa ñá díú nchòhó cächí-ndó sã ïo túha-ndo? Te núu duca<sup>n</sup> cãhá<sup>n</sup>-ndó sã ñà túú xìní-ndó ndèè téè cùu-dé, te ñíu-dé ní quide tátna-dé núu-í ní ndúha —cächí-dé xãha<sup>n</sup>-dë xii-güedé.

Te xãha<sup>n</sup> tùcu-dé:

<sup>31</sup>—Xìní-ó sã Yã Ndiöxí ñá túú tédòho-gá tnúhu cãhá<sup>n</sup> ñáyiu quide nchaa sá cuèhé sá dúhá, chi nchaa ñáyiu quide cahnu ñaha xii-gá te quidé-yu nchaa nàcuáa cùu iní-gá, te ñáyiu-á<sup>n</sup> tédòho-gá tnúhu cãhá<sup>n</sup>-yu. <sup>32</sup>Te ñá íí<sup>n</sup> ndùu cãhá<sup>n</sup> ñáyiu cuendá íí<sup>n</sup> téè cada tátna núu íí<sup>n</sup> ñáyiu cuàá ndéé ní cacu-xi te ndúha. <sup>33</sup>Te núu ñá díú mèè Yã Ndiöxí ní tëndaha ñaha-gá xii téè-ã<sup>n</sup> véxi-dé ñá, te vá ndácú-dë cada tátna-dé núu-í ní cùu —cachí-dé xãha<sup>n</sup>-dë xii-güedé.

<sup>34</sup>Te ní xãha<sup>n</sup>-güedé:

—Dico yòhó ndèè yatni vãi cuéchi sa ta quide-n véxi, ¿te vitna nacanu ichi ñaha-n xii-ndí cãhá<sup>n</sup>-n-ã<sup>n</sup>? —cächí-güedé xãha<sup>n</sup>-güedé xii-dé.

Te ní queñuhu ñaha-güedé xii-dé tnuú-güedé ñá túú ní dàña-gá-güedé níhí tnáhá ndíhi ñaha-dé xii-güedé.

**Ñáyiu ñá túú ndixi túu iní cuendá nchaa sá cuèhé sá dúhá quidé-yu**

<sup>35</sup>Te ní níhí Jèsús tnúhu sá ní queñuhu-güedé téè ní kuhú núu-xi-á<sup>n</sup> tnuú-güedé cuendá sá vã tnàhá tnúhu ndíhi ñaha-gã-dé xii-güedé, te ní naníhí ñáhá-gã xii-dé te ní xãha<sup>n</sup>-gã:

—¿Sàndáá iní-n Dëhe Yã Ndiöxí-ã<sup>n</sup>? —cächí-gá xãha<sup>n</sup>-gã.

<sup>36</sup>Te ní xãha<sup>n</sup> téè ní kuhú núu-xi-á<sup>n</sup>:

—Mèstrú, cachí tnúhu núu ndèè ndécú téè-á<sup>n</sup> cuendá quíndáá iní-í-dé —cächí-dé xãha<sup>n</sup>-dë xii-gá.

<sup>37</sup>Te ní xãha<sup>n</sup> Jèsús:

—Sa xìní-n-dë chi ñíu-dé cùu yùhu téè ndàtnúhu ndíhi-n —cächí-gá xãha<sup>n</sup>-gã xii-dé.

<sup>38</sup>Te ní ngüíñí xítí-dë núu-gã, te ní xãha<sup>n</sup>-dë:

—Xítòhó Jesucristú, sàndáá iní ñáhà-í xii-n —cächí-dé xãha<sup>n</sup>-dë xii-gá.

<sup>39</sup>Te ní xãha<sup>n</sup> tùcu Jesús:

—Yúhú véxi-í ñuyúí-a cada ndáá-í cuéchi ñáyiu. Te nchaa ñáyiu ñá túú quide váha cùu-yu dàtná íí<sup>n</sup> ñáyiu cuàá, dico nchaa ñáyiu cùtnuní iní-xi sã ñá túú quide váha, te núu na quíndáá iní-yu tnúhu cãhá<sup>n</sup>-í, te cada iní-ndó sã dàtná sá ní nacaá<sup>n</sup> núu-yu chi tníí-yu tnúhu cãhá<sup>n</sup>-í. Te ñáyiu cächí sá quidé vãha vá ñuu núu-yu cuéchi-yu chi quesáhá-yu sã ïo ndáá quidë-yu, ñáyiu-á<sup>n</sup> cùu-yu dàtná íí<sup>n</sup> ñáyiu cuàá, chi vá ndíxí túu iní-yu sã ñà túú quide váha-yu ndécú-yu, te vá tníí-yu tnúhu cãhá<sup>n</sup>-í —cächí-gá xãha<sup>n</sup>-gã xii-dé.

<sup>40</sup>Te sá dúcá<sup>n</sup> ní cãhá<sup>n</sup>-gá, núu ní cãhá<sup>n</sup> íí<sup>n</sup> úu cue téè cùu fariséú, te xãha<sup>n</sup>-güedé:

—¿Te náa tnàhá nchúhú cuàá-ndí cãhá<sup>n</sup>-n-ã<sup>n</sup>? —cächí-güedé xãha<sup>n</sup>-güedé xii-gá.

<sup>41</sup>Te ní xãha<sup>n</sup> Jèsús:

—Te núu dicó nchòhó cuàá-ndó ñá, te vá cùndècu cuéchi-ndo ni cùu, dico cächí-ndó sã ndéhé-ndó íí<sup>n</sup> sá quidé-ndó te ñá ndáá, núu xíá<sup>n</sup> ío ndècu cuéchi-ndo.

**Jèsús cãhá<sup>n</sup>-gá cuendá cùrrálí mbëé**

**10** Te na cächí tnúhu ndáá-í xii-ndo sã íí<sup>n</sup> téè ñá túú

quíhu ndàa yuyehe i<sup>n</sup> currálí mbéé, te cùtexínu-ni na cuidó-dé, téé-á<sup>n</sup> cúú-dé ñádúhú. <sup>2</sup>Dico téé quíhu ichi yèhe currálí-güedi, téé-á<sup>n</sup> cúú-dé xítóhó-güedi. <sup>3</sup>Te téé ndèé yèhe currálí-güedi ñacaá<sup>n</sup>-dé te cuánguihu xítóhó-güedi te ní cáhá<sup>n</sup>-dé, te ní nucúhu<sup>n</sup> ndudú ñáhá-güedi xii-dé. Te ní cáhá<sup>n</sup> dífú-dé-güedi te ní queñuhu-dé-güedi currálí. <sup>4</sup>Te sátá ñí quee-güedi currálí, te ní ngódó núú-dé núú-güedi, te ní ngüíta nchicú<sup>n</sup> ñáhá-güedi xii-dé chi ní nucúhu<sup>n</sup> ndudú ñáhá-güedi. <sup>5</sup>Te ñá túú chìnchicú<sup>n</sup>-güedi i<sup>n</sup> téé tātú, chi núcúhu<sup>n</sup> ndudú-güedi sá ñà dífú xítóhó-güedi cùu-dé, núu xíá<sup>n</sup> xínú-güedi núú-dé —càchí-gá xáha<sup>n</sup>-gá xii-güedé.

<sup>6</sup>Duha ní cáhá<sup>n</sup> Jèsús cuendá sá cuení-gá dacuàhá-yu tnúhu-gá ní cùu, dico ñá ní tècú tnùnì-yu nása ndùu tnúhu ní cáhá<sup>n</sup>-gá.

#### Jèsús cúú-gá dàtná i<sup>n</sup> toli

<sup>7</sup>Te ní xáha<sup>n</sup> tùcu Jesús xii-güedé: —Na càchí tnúhu ndáá-í xii-ndo sá yúhú cúú-í dàtná i<sup>n</sup> yèhe currálí núu ndíhu cue mbéé. <sup>8</sup>Te ncha cue téé sa yòdo nuu-gá ní quixi ní dándàhú-güedé ñáyiú cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güedi xii-güedé, chi ní cutnùnì iní-güedi sá ñà dífú xítóhó-güedi cùu-güedé. <sup>9</sup>Te yúhú cúú-í dàtná yuyèhe currálí cue mbéé. Te duca<sup>n</sup> sätnahá-xi cùu-í chi ncha ñáyiú na tùha ñaha xii-í te naníhí tàhú-yu. Te cùu-yu dàtná cue mbéé quiti xíquee currálí-xi cuáhá<sup>n</sup>-güedi núu cáá ité caxi-güedi,

te dàtnùnì cuándihu-ná-güedi currálí, duca<sup>n</sup> sätnahá-xi cùu-yu.

<sup>10</sup>Ñádúhú òré véxi-dé chi dùhu-dé, sàhni-dé te dànaa-dé mbéé, dico yúhú chi véxi-í cuendá sá naníhí tàhú-ndó te ío cudíí iní-ndó cùnu cuechi-ndo núu Dütú Ndiöxí ni caa ni quíhí<sup>n</sup>. <sup>11</sup>Te yúhú cúú-í dàtná i<sup>n</sup> toli téé ío nèhe cuendá mbéé-xi, chi téé-á<sup>n</sup> cuéi na cùu-dé sá cúú-xí mbéé-dé cuendá-ñá sá ná cäcu-güedi. <sup>12</sup>Te núu i<sup>n</sup> téé na còto ñaha xii-güedi, te téé-á<sup>n</sup> cuendá-ni sá ñúhú yáhu-dé xító-dé-güedi. Te núu na quení-dé sáá i<sup>n</sup> quiti déé<sup>n</sup> te dàña-dé-güedi xínu-dé, te ndíhi-güedi xité nuu ñaha quiti déé<sup>n</sup>-á<sup>n</sup>, chi ñá dífú mèi xítóhó-güedi cùu-dé.

<sup>13</sup>Chi cuendá-ni sá ñúhú yáhu-dé xító-dé-güedi núu ñá túú ñà ndíhú iní-dé cuéi na dándíhi ñaha quiti cuihna. <sup>14</sup>Te yúhú cúú-í dàtná i<sup>n</sup> téé ío váha xito mbéé-xi, chi téé-á<sup>n</sup> da i<sup>n</sup> da i<sup>n</sup>-di xínì-í-dé nàcuáa ndáa-di, te duca<sup>n</sup> xini ñáhá-güedi xii-dé. Te duca<sup>n</sup> sätnahá-xi cùu yúhú ndíhi ncha ñáyiú sàndáá iní ñáhá xii-í, chi yúhú xini-í-yu te duca<sup>n</sup> mèé-yu xini ñáhá-yu xii-í.

<sup>15</sup>Te diu-ni duca<sup>n</sup> cùu-í ndíhi Tātà-í, chi xini ñáhá-gá xii-í te xini-í-gá. Te sáá nduu cùu-í cuendá ncha ñáyiú sàndáá iní ñáhá xii-í. <sup>16</sup>Te ndècu-gá ñáyiú vátá quindáá iní ñáhá-gá xii-í. Te xini ñuhu-xi cundedóho-yu tnúhu-í te quindáá iní ñáhá-yu cuendá i<sup>n</sup>-ñá ichi cuú-yu, te duca<sup>n</sup> cundecu i<sup>n</sup>-ná téé coto ñaha xii-yu cuu-dé dàtná i<sup>n</sup> tòlì-yu, te téé coto ñaha xii-yu-á<sup>n</sup> cúú yúhú.

<sup>17</sup>Te Tātà-í ío cudíí iní ñáhá-gá xii-í cuendá sá sáá i<sup>n</sup> nduu te cuú-í,

te cuú-í chi duca<sup>n</sup> cächí iní-í, te ñá dǎú sǎ cúú iní ñáyíu ñuyíú-a cuú-í, te cuú-í dico ndoto-í. <sup>18</sup>Te vá yǒo ìí<sup>n</sup> te ndacu cahni ñaha xii-í, te núu ñá dǎú sǎ cúú iní mée-í cuú-í. Te dàtná-ni cùu iní-í sá cùu-í te ñíu-ni duca<sup>n</sup> ndòto-í chi duca<sup>n</sup> ñí cachí Tǎtà-í Dútú Ndiǒxí cunduu — cächí-gá xáha<sup>n</sup>-gǎ xii-güedé.

<sup>19</sup>Te sá dúcá<sup>n</sup> ñí cáhá<sup>n</sup>-gá te ñá ní cùu ìí<sup>n</sup>nuu tucu ñáyíu isràél. <sup>20</sup>Te davá-yu ní xitnàhá-yu:

—¿Ná cuendá sàndáá-tu iní-ndó tnǎhu cǎhá<sup>n</sup> téé-ǎ<sup>n</sup>, te yucu ñávǎha ndècu ndìhi-dé, lùcú téé-ǎ<sup>n</sup>? — cächí-yu xitnàhá-yu.

<sup>21</sup>Te davá-yu ní xitnàhá-yu:

—¿Náa xiní-ndó ìí<sup>n</sup> téé ndècu ndìhi yucu ñávǎha duha váha cǎhá<sup>n</sup>-dé? ¿Náa xiní-ndó ñúu ndàcu yucu ñávǎha cada tátna-xi núú ìí<sup>n</sup> téé cuáá te ndúha? —cächí-yu xitnàhá-yu.

**Ñáyíu isràél dáquèe tíhǎ-yu Jèsús**

<sup>22</sup>Te ndi tnahá cuía ndáá cǎhnú-yu vico veñúhu cǎhnu sá ìo cùnuu ñúu Jerusàlén, te mei yǒo quidé víxi<sup>n</sup>-xi quidé-yu vico-á<sup>n</sup>. <sup>23</sup>Te corrèdór veñúhu-á<sup>n</sup> nání-xí Sàlomón, te xía<sup>n</sup> xicá cùu Jèsús. <sup>24</sup>Te ní chítú ñíhnú ñáyíu isràél núú-gǎ, te ní xǎhǎ<sup>n</sup>-yu:

—¿Ná ndéé òré cachí tnúhu ndáá-n, te núu sá Crístú Yaá ní tendaha Yǎ Ndiǒxí véxi ñuyíú-a cùu-n, àdi ná téé cùu-n?, cáhá<sup>n</sup>-ni-n —cächí-yu xǎhǎ<sup>n</sup>-yu xii-gá.

<sup>25</sup>Te ní xáha<sup>n</sup> Jèsús:

—Sa ní cachí tnúhu-í te ñá sàndáá iní-ndó, te ndèhe-ndo sá vái ñúú sǎ quidé-í sá ñí táúchíú<sup>n</sup> Tǎtà-í cada-í, te cùu-xi ìí<sup>n</sup> sá cútùnú iní-ndó ñá

tée cùu-í. <sup>26</sup>Dico nchòhó ñá sàndáá iní-ndó, chi ñá túú cùu-ndo ñáyíu ní chitnahá ñáhá xii-í. <sup>27</sup>Chi nchaa ñáyíu ní chitnahá ñáhá xii-í cùu-yu dàtná cue mbéé quiti xǐndecu ndìhi xítohó-xi chi nùcúhu<sup>n</sup> ndudú-güedí xítohó-güedí, te duca<sup>n</sup> nàquiní ñáhá-ní xítohó-güedí xii-güedí. Duca<sup>n</sup> sǎtnahá-xi cùu nchaa ñáyíu ní chitnahá ñáhá xii-í. <sup>28</sup>Te yúhú cada-í te nduu táhǎ-yu cundecu ndìhi ñáhá-yu xii-í ñí caa ñí quíh<sup>n</sup> te vá ìí<sup>n</sup> ndùu-gá cuíta nihnú-yu, te ñí vǎ yǒo ìí<sup>n</sup> ndacu naquendéé ñáhá xii-yu ndaha-í. <sup>29</sup>Chi Tǎtà-í ní taxi cuendá ñáhá-gǎ xii-yu. Te ío cùnuu-gá ñúu xía<sup>n</sup> vá yǒo ìí<sup>n</sup> ndacu naquendéé ñáhá xii-yu ndaha-gá. <sup>30</sup>Yúhú ndìhi Tǎtà-í Dútú Ndiǒxí ìí<sup>n</sup>-ni cùu-ndí —cächí-gá xáha<sup>n</sup>-gǎ xii-yu.

<sup>31</sup>Te ní quehe<sup>n</sup> tucu ñáyíu isràél yúú cuáha ñáhá-yu xii-gá ní cùu.

<sup>32</sup>Te ní xáha<sup>n</sup>-gǎ xii-yu:

—Ío cuéhé sǎ vǎha ní quide-í núú-ndó ñí chindee ñaha Tǎtà-í Dútú Ndiǒxí. ¿Te ndèdacàa sá ñá tnàhá iní-ndó ñúu cuiní-ndó cuáha ñaha-ndo yúú xii-í-í? —cächí-gá xáha<sup>n</sup>-gǎ xii-yu.

<sup>33</sup>Te ní xáha<sup>n</sup> ñáyíu isràél:

—Ñá dǎú cuendá nchaa sá vǎha ñí quide-n cuiní-ndí cuáha ñaha-ndí yúú xii-n, chi ìí<sup>n</sup> ñí-ni sá ìo cǎhá<sup>n</sup> úhú-n cuendá Yǎ Ndiǒxí. Te dicó ìí<sup>n</sup> téé ñuyíú-a cùu-n te cächí-n sǎ cúú-n Ndiǒxí —cächí-yu xǎhǎ<sup>n</sup>-yu xii-gá.

<sup>34</sup>Te ní xáha<sup>n</sup> Jèsús:

—Núú tütú Yǎ Ndiǒxí sá ndécú ndìhi-ndo cáhá<sup>n</sup>-xi nàcuáa ní cáhá<sup>n</sup>-gá, te duha ní cachí-gá: “Nchòhó quidé-ndó ñúu-í”, duha

ní cachí-gá. <sup>35</sup>Te nàha-o sá vǎ cúu quèhndé nihnu-o tñuhu yòdo tnuní núu tütú Yǎ Ndiöxí, chi mee-gǎ ní cachí-gá sá cadǎ-yu núu-gǎ, te vǎ cǎchí-ó sǎ ñǎ ndǎá. <sup>36</sup>Te núu duca<sup>n</sup> nǐ cáhá<sup>n</sup>-gá sá nǔú-gǎ quidé nchǎa ñáyiú ní sándǎá iní ñáhǎ xii-gǎ ñǎ, ¿te ná cuendǎ cúdǎé<sup>n</sup>-ndó nǔú yǔhú sá cǎchí-í sá cúu-í Déhe-gǎ? Te mee Yǎ Ndiöxí ní tendaha ñàha-gǎ xii-í véxi-í ñuyúú-a sá cadǎ-í chiú<sup>n</sup>-gá. <sup>37</sup>Te núu ñǎ túu quide-í nǎcuáa ní táuchíú<sup>n</sup> Tǎtǎ-í cada-í ñǎ, te vǎ quèndǎá iní ñáhǎ-ndó. <sup>38</sup>Te núu quide-í ñǎ, te cuèí vǎ quèndǎá iní ñáhǎ-ndó xii mee-í dico quèndǎá iní-ndó nchǎa chiu<sup>n</sup> quide-í. Duca<sup>n</sup> te cutnùní ndǎá iní-ndó sǎ Yǎ Ndiöxí ndécú ndìhi-í te ì<sup>n</sup>-ni cùu-ndí —cǎchí-gǎ xáha<sup>n</sup>-gǎ xii-yu.

<sup>39</sup>Te ní cuiní-güedé tñii ñaha tucu-güedé xii-gǎ quíhí<sup>n</sup>-gǎ vecaá ní cùu, dico ní xinu núu ñáhǎ-gǎ xii-güedé.

<sup>40</sup>Te ní xica-gǎ cuáhǎ<sup>n</sup>-gǎ ndǎa ìngǎ xio yúte Jòrdán núu nǐ xóo dacuàndute ndíi Juàá ñáyiú ndéé díhna, yàcǎ<sup>n</sup> ní xíndecu-gǎ. <sup>41</sup>Te yàcǎ<sup>n</sup> ío vǎi ñáyiú ní sáhǎ<sup>n</sup> ní cáhá<sup>n</sup> ndìhi ñaha xii-gǎ, te ní xítñahǎ-yu: —Ndíi Juàá, cuèí ñǎ túu ní quide ndíi sá vǎ yòo tñàhí ndàcu cada dico ndǎá ní cáhá<sup>n</sup> ndíi, chi dàtná-ni ní cáhá<sup>n</sup> ndíi quide téa-a —cǎchí-yu xítñahǎ-yu.

<sup>42</sup>Te yàcǎ<sup>n</sup> ío vǎi-yu ní sándǎá iní ñáhǎ-yu xii-gǎ.

#### Ní xíhí té Lǎzarú

**11** Ñúú Bètaniá ní xíndecu ì<sup>n</sup> téé ní xínani-dǎ Lǎzarú. Te cǎhú víhí nǐ tñahǎ-dé ní cuhú-dé, te ní xíndecu ndìhi-dé cue cúha-dé

tá Màriá ndìhi tá Màrta chi xía<sup>n</sup> ñúú-yu. <sup>2</sup>Te tá Màriá-á<sup>n</sup> cúu-xí xǐchí nǐ sódo àcítí sáhǎ<sup>n</sup> tñámí sáhǎ Jèsús, te ní nadayichí-xi sáhǎ-gǎ ndìhi idi díquí-xi. Te cuendǎ sá cùhú cúha-yu té Lǎzarú, <sup>3</sup>núu ní tendáhǎ-yu ñáyiú nàha tñuhu cuáhǎ<sup>n</sup> núu Jèsús, te xǎhǎ<sup>n</sup>-yu xii-gǎ:

—Mèstrú, téé ío cùu iní-n ío cǎhú tñahǎ-dé cùhú-dé —cǎchí-yu xǎhǎ<sup>n</sup>-yu xii-gǎ.

<sup>4</sup>Te sá dúcǎ<sup>n</sup> cǎa tñuhu ní sáá, núu ní xáha<sup>n</sup> Jèsús xii-yu:

—Dico cuéhé-ǎ<sup>n</sup> chi vǎ cùú-dé sá cùú dúcǎ<sup>n</sup>-dǎ, chi Yá Ndiöxí cuiní-gǎ sá quiní-yu nchǎa sá cadǎ-gǎ cuendǎ chiñuhu ñàhǎ-yu xii-gǎ, te ñiú-ni duca<sup>n</sup> chiñuhu ñahǎ-yu xii yúhú Déhe-gǎ —cǎchí-gǎ xáha<sup>n</sup>-gǎ xii-yu.

<sup>5</sup>Te cuèí ío cùu iní ñáhǎ Jèsús xii té Lǎzarú ndìhi cue cúha-dé <sup>6</sup>dico òré ní níhí-gǎ tñuhu, te ní cuyaa-gǎ úú-gǎ nduu núu ndécú-gǎ. <sup>7</sup>Te ní xáha<sup>n</sup>-gǎ xii cue téé xica cuu ndìhi-gǎ:

—Na quíhí<sup>n</sup> tucu-o dístrítú Jùdeá —cǎchí-gǎ xáha<sup>n</sup>-gǎ xii-güedé.

<sup>8</sup>Te ní xáha<sup>n</sup> cuè téé xica cuu ndìhi-gǎ xii-gǎ:

—Mèstrú, vitna-ni cuiní cue téé isràél xíndecu yàcǎ<sup>n</sup> cuáha ñaha-güedé xii-n yúú ní cùu, ¿te cuiní-ni tucu-n quíhí<sup>n</sup>-n-ú? —cǎchí-güedé xǎha<sup>n</sup>-güedé xii-gǎ.

<sup>9</sup>Te ní xáha<sup>n</sup> Jèsús:

—Úxúú òré cúu ì<sup>n</sup> nduu, te núu nduu na cǎca cuu-o, te ñǎ túu ñǎ candaundé-ó chi cùtnuní núú-ó chi ditó. <sup>10</sup>Dico núu niú ná cǎca cuu-o, te ío ná candaundé-ó chi vǎ cùtnuní núú-ó —cǎchí-gǎ xáha<sup>n</sup>-gǎ xii-güedé.

<sup>11</sup>Te ní xáha<sup>n</sup> Jèsús:

—Té Lázará tée ío váha tñhá  
tnúhu ndíhi-o ní xídí-dé dico  
quíhí<sup>n</sup>-ó chi ndocani-o-dě —  
càchí-gá xáha<sup>n</sup>-gã xii-güedé.

<sup>12</sup>Te ní xáha<sup>n</sup>-güedé xii-gá:

—Mèstrú, te núu xídí-dé te váa sa  
ta ndúha-dé cuáhá<sup>n</sup> —càchí-güedé  
xáha<sup>n</sup>-güedé xii-gá.

<sup>13</sup>Duha ní cáhá<sup>n</sup> Jèsús, chi té  
Lázará sa ní xíhí-dé te cue tée xica  
cuu ndíhi-gá ní sani iní-güedé sá  
ní xídí ndisa-dé. <sup>14</sup>Te Jèsús ní xáha<sup>n</sup>  
ndáá-gá xii-güedé:

—Sa ní xíhí té Lázará. <sup>15</sup>Váha-gá  
sá ñá ní sáhá<sup>n</sup>-í quíngoto-í-dé, chi  
ndècu ingá chiú<sup>n</sup> cada-í quini-ndó,  
te quindáá iní ñáhá-gã-ndó xii-í, te  
vitna na quíhí<sup>n</sup>-ó nũ ndécú yèqui  
cuñú ndíi —càchí-gá xáha<sup>n</sup>-gã  
xii-güedé.

<sup>16</sup>Te té Mǎxí tée xáha<sup>n</sup>-güedé  
cuáchí ní xáha<sup>n</sup>-dě xii  
dava-gá-güedé:

—Na quíhí<sup>n</sup>-ó nchàa-o chi yàcá<sup>n</sup>  
cuú-ó ndíhi-dé —càchí-dé xáha<sup>n</sup>-dě  
xii-güedé.

**Jèsús càhá<sup>n</sup>-gá sá cuèi na cùu ñáyi  
dico ndotó-yu cundecú-yu ndíhi-gá**

<sup>17</sup>Te òré ní sáá Jèsús nũu Bètania,  
te ní xáhá<sup>n</sup>-yu sá sà ní cuu cúmí  
nduu ní xíhí té Lázará. <sup>18</sup>Te nũu-á<sup>n</sup>  
cáá yàtni-ni-gá nũú Jerusàlén,  
dàtná cuádava-ná òré cuhu<sup>n</sup>-o ichi  
te saá-ó. <sup>19</sup>Núu xíá<sup>n</sup> vài ñáyi isràèl  
ní sáhá<sup>n</sup>-yu ní cáhá<sup>n</sup> ndíhí-yu tá  
Márta ndíhi cùhú-xi tá Màriá, te  
ní sáñhá<sup>n</sup>-yu tñuhu ndee iní sá  
dúcá<sup>n</sup> ní xíhí cúha-yu. <sup>20</sup>Te ní níhí  
tǎ Márta tñuhu sá ñúhú Jèsús ichi  
cuáhá<sup>n</sup>-gá núu ndécú-yu núu ní  
sáhá<sup>n</sup>-xi ní sátnahá-xi-gá, te cùhú-xi

tá Màriá ní ndóo-xi vehe. <sup>21</sup>Te  
òré ní naníhí tǎ Márta Jèsús, te ní  
xáha<sup>n</sup>-xi xii-gá:

—Mèstrú, te núu dicó ní xíndecu-n  
íha te vá cùu cúha-ndí ní cùu. <sup>22</sup>Te  
cuèi vitna te núu ná sá ná càcá<sup>n</sup>-n  
nũú Yǎ Ndiòxí te taxi-gá xii-n —  
càchí-xi xáha<sup>n</sup>-xi xii-gá.

<sup>23</sup>Te ní xáha<sup>n</sup> Jèsús:

—Vá ndíhú iní-n chi ndoto cúha-n  
—càchí-gá xáha<sup>n</sup>-gã xii-xi.

<sup>24</sup>Te ní xáha<sup>n</sup> tǎ Márta:

—Ndáá chi sa xini-í sá ndótó-dě  
ná quítnahá nduu ndòto nchaa  
ñáyi ní xíhí —càchí-xi xáha<sup>n</sup>-xi  
xii-gá.

<sup>25</sup>Te ní xáha<sup>n</sup> Jèsús:

—Yúhú dandòto-í-yu cuendá  
cundecú-yu ni caa ni quíhí<sup>n</sup> ná sáá  
nduu. Te nchaa ñáyi na quindáá  
iní ñáhá xii-í, te cuèi na cùu-yu dico  
ndotó-yu cundecú-í ndíhí-yu ni caa  
ni quíhí<sup>n</sup>. <sup>26</sup>Te nchaa ñáyi ndècu  
vívú ñuyú-a te núu na quindáá iní  
ñáhá-yu xii-í, te cundecu ndíhi-í-yu  
ni caa ni quíhí<sup>n</sup>. ¿Sàndáá iní-n  
tñuhu-a ñá? —càchí-gá xáha<sup>n</sup>-gã xii  
tá Márta.

<sup>27</sup>Te xáha<sup>n</sup>-xi:

—Mèstrú, sàndáá iní-í, te sàndáá  
tucu iní-í sá díú-n cùu-n Cristú Déhe  
Yá Ndiòxí, Yáá ní tendaha-gã véxi  
ñuyú-a —càchí-xi xáha<sup>n</sup>-xi xii-gá.

**Jèsús ndáhí-gá núu ní  
nguindúxi té Lázará**

<sup>28</sup>Sátá dúcá<sup>n</sup> ní cáhá<sup>n</sup>-xi te ní  
sáhá<sup>n</sup> ngana-xi cùhú-xi tá Màriá, te  
dayuhu ní xáha<sup>n</sup>-xi:

—Yàcá<sup>n</sup> ní quexio Mèstrú, te càna  
ñaha-dé xii-n —càchí-xi xáha<sup>n</sup>-xi.

<sup>29</sup>Te sá dúcá<sup>n</sup> xáha<sup>n</sup> cùhú tǎ  
Màriá sá cáná ñàha Jesús xii-xi,

núu ndíhi-ni ní xica-xi cuáhá<sup>n</sup>-xi núu ndécú-gă. <sup>30</sup>Te Jèsús vátá quíhu-gá xítí ñuú, chi ndècu-ni-gá núu ní sáhá<sup>n</sup> tnahá ñáhá tá Mărta. <sup>31</sup>Te ñáyiú isràél ndécú sãñaha tnúhu ndee ìní xii tá Măriá ndíhi cùhú-xi ní sani iní-yu sá cuáhá<sup>n</sup>-xi núu yíndüxi cúha-xi ndáhyú-xi ní cáhá<sup>n</sup>-yu, núu nchìcú<sup>n</sup>-yu-xi cuáhá<sup>n</sup>.

<sup>32</sup>Te ní sáá tá Măriá núu ndécú Jèsús te ní ngüñí xítí-xí núú-gă, te xăha<sup>n</sup>-xi xii-gá:

—Mèstrú, te núu dícó ní xíndecu-n ìha te vâ cùú cúha-ndí ní cùú — cachí-xi xăha<sup>n</sup>-xi xii-gá.

<sup>33</sup>Te sá ní xiní Jèsús ndáhyú tá Măriá ndíhi ñáyiú isràél nchìcú<sup>n</sup> ñáhá cuáhá<sup>n</sup>, xíá<sup>n</sup> ío ní cuyica ìní-gá. <sup>34</sup>Te ní xáha<sup>n</sup>-gă xii-yu:

—¿Ndèé ní taxi ndecu-ndo yèqui cuñú-dé-i? —càchí-gá xáha<sup>n</sup>-gă xii-yu.

Te ní xáhă<sup>n</sup>-yu:

—Mèstrú, néhé ná quèh<sup>n</sup>-ó te quiní-n —càchí-yu xáhă<sup>n</sup>-yu xii-gá.

<sup>35</sup>Te ní ndáhyú-gá tnahá-gá. <sup>36</sup>Te ní xítñaha ñáyiú isràél:

—Súuní cùú iní-dé ndíi ni cùú — cachí-yu xítñahá-yu.

<sup>37</sup>Te davá-yu xítñahá-yu:

—Tée-a ní quide tátna-dé núú tée cuáá te ní ndúha. ¿Te nása ní cuu núu ñá túú ní quide tátna-dé té Lăzarú cuendá sá vă cùú-dé ní cùú-i? —cachí-yu xítñahá-yu.

### Jèsús dándòto-gá té Lăzarú

<sup>38</sup>Te ío ní cuyica tùcu iní Jèsús òré ní quexio-gá yuhu yàú núú ní chihí-güedé yiqui cùñú té Lăzarú. Te yuhu yàú-á<sup>n</sup> ndèdí ìí<sup>n</sup> yúú. <sup>39</sup>Te ní xáha<sup>n</sup> Jèsús xii-yu:

—Chí xócàni yúú-ă<sup>n</sup> —càchí-gá xáha<sup>n</sup>-gă xii-yu.

Te ní xáha<sup>n</sup> tá Mărta cúha tée ní xíhí-á<sup>n</sup>:

—Mèstrú, sa tucu sáhá<sup>n</sup>-dé chi sa ní cuu cùmí nduu sá ní xíhí-dé — cächí-xi xăha<sup>n</sup>-xi xii-gá.

<sup>40</sup>Te ní xáha<sup>n</sup> Jèsús:

—¿Náa ñá dífú ní cachí-í sá nùu na quíndáá iní-n, te quiní-n sã ìo càhnu cuu Yá Ndiòxí? —càchí-gá xáha<sup>n</sup>-gă xii-xi.

<sup>41</sup>Te ní xócàni-yu yúú ndèdí yuhu yàú-á<sup>n</sup>. Te ní ndacoto-gá andü, te ní xáha<sup>n</sup>-gă xii Tătá-gă Dútú Ndiòxí:

—Táu, ndàcá<sup>n</sup> tãhù-í núú-n sã ní tèdoho-n tnúhu ní cáhá<sup>n</sup>-í. <sup>42</sup>Te yúhú sa nàha-í sá ncháá-ni òré ndèdóho ñaha-n xii-í, dico duha càhá<sup>n</sup>-í cuendá sá ná təcú dóho nchaa ñáyiú ndècu iha cuendá quíndáá iní-yu sá dífú-n ní tendaha ñaha-n xii-í véxi-í ñuyúú-a — cächí-gá xáha<sup>n</sup>-gă xii Dútú Ndiòxí.

<sup>43</sup>Te sátá dúcá<sup>n</sup> ní cáhá<sup>n</sup>-gá ndíhi Yá Ndiòxí, te níhi ní cáhá<sup>n</sup>-gá xáha<sup>n</sup>-gă xii tée ní xíhí-á<sup>n</sup>:

—iLăzarú, tandèe xíá<sup>n</sup>! —càchí-gá xáha<sup>n</sup>-gă xii-dé.

<sup>44</sup>Te ní ndee tée ní xíhí-á<sup>n</sup> yàú-á<sup>n</sup>, te ndùtu dóó cuñí ndàha-dé ndíhi sáhá-dě, te dăhu tucu ìí<sup>n</sup> dóó núú-dě. Te ní xáha<sup>n</sup> Jèsús xii-yu:

—Chí nándaxi-dé te dañ-a-ndo-dě ná cãcã-dě —càchí-gá xáha<sup>n</sup>-gă xii-yu.

### Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

<sup>45</sup>Te nchaa ñáyiú nchìcú<sup>n</sup> ñáhá xii tá Măriá cuáhá<sup>n</sup> ío vâi-yu ní sándáá iní-yu Jèsús sá ní xiní-yu nàcuáa ní quide-gá. <sup>46</sup>Dico davá-yu ní sáhá<sup>n</sup>-yu núú cuè tée cùú fariséú,

te ní caní-yu cuèndú núú-güedě nàcuáa ní quide Jèsús. <sup>47</sup>Te cue tée cùu fariséú ndìhi cue dútú cùnùu ní natacá-güedé ní xóo-güedé jùndá, te ní xítàha-güedé:

—¿Nása cada-o?, chi tée-ǎ<sup>n</sup> ío vài sá vǎ yǒo tnàhí ndàcu cada quide-dé. <sup>48</sup>Te núu na dàña ío te nchaa ñáyiú quindáá iní ñáhǎ-yu xii-dé, te quixi cue tée ñúú Rómá dangòyo-güedé veñúhu-o te danàa-güedé nchaa ñúú-ó — cǎchí-güedé xítàha-güedé.

<sup>49</sup>Te ì<sup>n</sup> cue tée-ǎ<sup>n</sup> nání-dě Caifás, te cùnùu-gá-dé núú dàva-gá cue dútú cuǎá-ǎ<sup>n</sup>, te ní xáha<sup>n</sup>-dě xii-güedé:

—Nchòhó ni lùha ñá túú cùtnuní iní-ndó. <sup>50</sup>Te ni ñǎ sǎha-ndo cuèndá sá vǎha-gá tnahá-ó, te núu na cùú ì<sup>n</sup>-ni tée cuèndá nchaa ñáyiú isràél, te ñá díú sǎ dánàa ñaha-güedé xií-yu — cǎchí-dé xǎha<sup>n</sup>-dě xii-güedé.

<sup>51</sup>Dico té Caifás chi ñá díú sǎ cúú ìní mée-dě ní cǎhá<sup>n</sup>-dé, chi cuèndá sá cuǎá-ǎ<sup>n</sup> ní cùnùu-dě núú cuè dútú, núu xǎá<sup>n</sup> Yǎ Ndiòxí ní dácáhu ìní ñáhǎ-gǎ nàcuáa cǎhá<sup>n</sup>-dé sá Jèsús cuú-gá sá cúú-xí nchaa ñáyiú isràél. <sup>52</sup>Te ñá díú cuèndá mee-ni ñáyiú-ǎ<sup>n</sup> cuú-gá, chi cuú-gá tnàhá cuèndá nchaa ñáyiú ní sándáá iní ñáhǎ xii-gá, ñáyiú nchítènuu nihí ñuyúú, te ì<sup>n</sup>-nǎ cuú-yu ndìhi-gá. <sup>53</sup>Núu ndéé nduu-ǎ<sup>n</sup> ní ndatnúhu cue tée cùnùu núú ñáyiú isràél nàcuáa cada-güedé cahni-güedé Jèsús.

<sup>54</sup>Te xǎá<sup>n</sup> núu ñá ní xica cuu-gá Jèsús quiní ñáhǎ ñáyiú isràél, te ní quee-gá cuáhǎ<sup>n</sup>-gá ñúú Efraín, ì<sup>n</sup> ñúú cáá yàtni yucu, yàcǎ<sup>n</sup> ní ngüíñí-gá ndìhi cue tée xica cuu ndìhi-gá.

<sup>55</sup>Te ta cùyatni nduu cadá-yu vico pàscuá. Te cuéhé ñǎyiú ní queé-yu ñúú-yu cuáhǎ<sup>n</sup>-yu ñúú Jerusálén cuèndá sá sà ndìhí-yu nchaa-yu nduu íí, te tnahá nduu vico pascuá.

<sup>56</sup>Te yàcǎ<sup>n</sup> nándùcú-yu Jèsús ní cùu te ñá túú-gǎ òré-ǎ<sup>n</sup>, te ní naníhí tnáhǎ-yu xití veñúhu, te xítàhá-yu:

—¿Nása sàni iní-ndó-í? ¿Quixi Jèsús vico ǎ<sup>n</sup> ñǎhá? — cǎchí-yu xítàhá-yu.

<sup>57</sup>Te cue tée cùu fariséú ndìhi cue dútú cùnùu sa ní xáha<sup>n</sup>-güedé xii ñáyiú sá núu ndéda-ni cǎa-yu xini-yu núu ndécú Jèsús te na cǎhá<sup>n</sup>-ni-yu cuèndá tni ñaha-güedé xii-gá.

**Ì<sup>n</sup> ñadìhí chíhí-ǎ<sup>n</sup> Jèsús acití**

(Mt. 26:6-13; Mr. 14:3-9)

**12** Ìnú-gá nduu cùmání tnahá vico pàscuá, te ní sáhǎ<sup>n</sup> Jèsús ñúú Bètaniá, ñúú té Lǎzarú tée ní dándótó-gǎ. <sup>2</sup>Te xǎá<sup>n</sup> ní cadúha-yu sá ní cudìni Jesús. Te tá Màrta ní sani-xi cóhó, te té Lǎzarú yíhí-dě mèsá ndìhi Jèsús, ndìhi dava-gá-güedé xéxí-güedé. <sup>3</sup>Te tá Màriá néhé-xí cuádava lìtrú acití sáhǎ<sup>n</sup> tnámí sǎ ìo ndèyáhu, te acití-ǎ<sup>n</sup> ní cuáha mee-ni yúcú nǎrdú, te ní sódó-xi sáhǎ Jèsús, te ní nadayìchí-xi ndìhi idi díquí-xi sáhǎ-gǎ. Te nihí xití vehe ní xité nuu dicó acití-ǎ<sup>n</sup>. <sup>4</sup>Te té Jùdás déhe té Xímú Iscàrioté òu-ni ì<sup>n</sup> tée xica cuu ndìhi-gá, tée cuáha cuèndá ñáhǎ xii-gá núú cuè tée cùu úhú iní ñáhǎ ní xáha<sup>n</sup>-dě xii-gá:

<sup>5</sup>—¿Ná cuèndá ñá ní cùyáhu acití-a sá úní cièndú díhú<sup>n</sup> denàriú cuu cuèndá ñáyiú ndàhú? — cǎchí-dé xǎha<sup>n</sup>-dě xii-gá.



<sup>6</sup>Dico sá dúcá<sup>n</sup> ní cáhá<sup>n</sup> té Jùdás chi ñá díú sá ndísá ñuhu iní-dé ñáiyu ndàhú chi dicó-ni ì<sup>n</sup> ñádúhú cúú-dě, chi ñu-dé néhé cuendá-dé díhú<sup>n</sup>-güedě nchaa-güedé te ní xóo duhu ñaha-dé xii-güedé. <sup>7</sup>Te ní xáha<sup>n</sup> Jèsús:

—Daña, vá dásatú-n iní xíchí-a na tàxúha nahi-xi àcití-a, chi nàndíhi ndéé òré ná nguñdúxi-í. <sup>8</sup>Chi nchòhó chi cuhu<sup>n</sup> tnahá-ni ñáiyu ndàhú tnuú-ndó, dico yúhú chi vá ncháá ndùu cundecu ndíhi ñaha-í xii-ndo —càchí-gá xáha<sup>n</sup>-gá xii-dé.

**Tnahá té Lázaru cuini-güedé  
cahni ñaha-güedé xii-dé**

<sup>9</sup>Te vai ñáiyu isràel ní níhí-yu tnúhu sá ndécú Jèsús ñuú Bètaniá. Te ní sáhá<sup>n</sup>-yu cuendá quini-yu-gá, te quini-yu tnahá té Lázaru tée ní dándótó-gá. <sup>10</sup>Te cue dútú cúnùu ní ndatnúhu-güedé ní cuu ì<sup>n</sup>nuu-güedé cuendá sá cáhni-güedé tnahá té Lázaru ní cùu, <sup>11</sup>chi ñu cuendá tée-á<sup>n</sup> ní cuu cuéhé ñáiyu isràel tá dàña nihnú-yu-güedé cuáhá<sup>n</sup> cuendá sá ní sándáá iní-yu Jèsús.

**Jèsús cuanguihu-gá ñuú Jerusálén**

(Mt. 21:1-11; Mr. 11:1-11; Lc. 19:28-40)

<sup>12</sup>Te nduu tnée-á<sup>n</sup> vai ñáiyu ní quexio ñuú Jerusálén cuendá cundecú-yu vico, te ní níhí-yu tnúhu sá Jèsús sáá-gá tnahá-gá cundecu-gá vico-á<sup>n</sup>, <sup>13</sup>núu ní xehndé-yu ndaha yùtnu ñúú, te nèhé-yu ní sáhá<sup>n</sup> ní sátnahá ñáhá-yu xii-gá. Te níhi ní cáhá<sup>n</sup>-yu, te càchí-yu:

—Ío càhnu cuu Yá Ndiöxí! Te duca<sup>n</sup>-ni ño càhnu cuu Yaá ní

tendaha-gá véxi quindaha ñaha xii-o —duha ní cachí-yu.

<sup>14</sup>Te Jèsús ní níhí-gá ì<sup>n</sup> búrru, te yòdo-gá-di cuáhá<sup>n</sup>. Te duca<sup>n</sup> ní cuu chi ní quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi:

<sup>15</sup>Vá yùhú nchòhó cue ñáiyu ndècu ñuú Siòn,

chi iha véxi tée yíndaha ñaha xii-ndo yodo-dé ì<sup>n</sup> búrru.

Duha càchí-xi núú tütú-gá. <sup>16</sup>Dico cue tée xica cuu ndíhi Jesús ñá ní ndàcu iní-güedé nàcuáa càhá<sup>n</sup>-xi núú tütú Yá Ndiöxí nàcuáa cada Jèsús. Dico sátá cuándaa-gá andiu càda cahnu ñaha Tátá-gá xii-gá, te ní ndacu iní-güedé sá dúcá<sup>n</sup> yòdo tñuní nàcuáa cada-gá, te duca<sup>n</sup> ní cuu.

<sup>17</sup>Nchaa ñáiyu ní xíndecu ndíhi Jèsús òré ní dándótó-gá té Lázaru, ya yàcá<sup>n</sup> ní caní-yu cuendú núú ñáiyu nàcuáa ní quide ñaha-gá xii-dé. <sup>18</sup>Te vai-yu ní sáhá<sup>n</sup>-yu núú ndécú Jèsús cuendá sá ní níhí-yu tnúhu ní quide-gá sá vā yò tnahí ndàcu cada. <sup>19</sup>Te cue tée cùu fariséu ní xitnaha-güedé:

—Ní xito-ndo nã ñá túú nàndíhi sá quidé-ó-vá, chi nchaa ñáiyu ní chinchícú<sup>n</sup> ñáhá-yu xii-dé —càchí-güedé xitnaha-güedé.

**Ñáiyu ñá túú cùu ñáiyu  
isràel nánducú-yu Jèsús**

<sup>20</sup>Te tnahá ñáiyu ñá túú cùu ñáiyu isràel ní sáhá<sup>n</sup>-yu vico ñuú Jerusálén ní quide càhnú-yu Yá Ndiöxí. <sup>21</sup>Te ñáiyu-á<sup>n</sup> ní sáhá<sup>n</sup>-yu núú tē Lipé tée ñuú Bèt saidá, te ñuú-á<sup>n</sup> yíndèhu-xi distritú Galileá. Te ní xáhá<sup>n</sup>-yu xii-dé:

—Tátá, vá cùndèe iní-n càchí tnúhu-n nùu ndèe ndécú Jèsús, chi

cuíní-ndí cáhá<sup>n</sup> ndihí-ndí-gá —  
càchí-yu xáhã<sup>n</sup>-yu xii-dé.

<sup>22</sup>Te té Lìpé ní naníhí-dě té Ndríxí  
te ní xáha<sup>n</sup>-dë nàcuáa càhá<sup>n</sup>-yu, te  
ndí ndùú-güedé ní sáhá<sup>n</sup>-güedé ní  
xáha<sup>n</sup>-güedé xii Jèsús nàcuáa càhá<sup>n</sup>-yu.  
<sup>23</sup>Te ní xáha<sup>n</sup> Jèsús xii-güedé:

—Vitna ní cuyatni òré cada càhnu  
ñaha Tátà-í xii-í, te quiní-yu sá  
ïo càhnu cuu yúhú Tée cùu ñaní  
tnáhã-yu nchaá-yu. <sup>24</sup>Te na càchí  
tnúhu ndáá-í xii-ndo sã nüü ì<sup>n</sup> tatá  
vá ngává-xí nüü ñúhú tēhyú-xi ña, te  
dïu-ni duca<sup>n</sup> cùnduu-xi cundecu-xi.  
Dico ì<sup>n</sup> tatá ná ngává nüü ñúhú xínu  
déhe-xi, te xíã<sup>n</sup> nádacayá tnáhã-xí, te  
mee-xi tēhyú-xi. <sup>25</sup>Te nchaá ñáyiú ío  
ñúhu iní-xi cundecu ñuyúú-a ñá túú  
ñúhu iní-yu Yá Ndiöxí, te ñáyiú-á<sup>n</sup>  
cuíta nihnú-yu. Te nchaá ñáyiú ío  
ñúhu iní ñáhã xii Yá Ndiöxí, ñáyiú-á<sup>n</sup>  
cundecú-yu ndihí-gá ni caa ni quíh<sup>n</sup>.  
<sup>26</sup>Te nchaá ñáyiú cuíní unu cuechi  
nüü-í xini ñuhu-xi natuha ñahã-yu  
xii-í, te nduu táhũ-yu cundecú-yu  
núú ñuhú-í cundecu-í. Te nchaá ñáyiú  
na cunu cuechi núü-í, te cada càhnu  
ñaha Tátà-í xii-yu —càchí-gá xáha<sup>n</sup>-gã  
xii-güedé.

**Jèsús càhá<sup>n</sup>-gá sá cáhni  
ñaha-güedé xii-gá**

<sup>27</sup>Te ní xáha<sup>n</sup> tùcu-gá:  
—Ío ndìhú iní-í. Te cúñaha-í xii  
Tátà-í taunihnu ñaha-gã nüü dicó sá  
cúú, dico vá cúú chi cuendá tnáhí-a  
véxi-í —càchí-gá xáha<sup>n</sup>-gã xii-güedé.

<sup>28</sup>Te ní xáha<sup>n</sup>-gã xii Tátà-gã Dútú  
Ndiöxí:

—Táu, cada nàcuáa ní sani iní-n  
cùnduu cuendá sá ná cádá càhnu  
ñaha ñáyiú xii-n —càchí-gá  
xáha<sup>n</sup>-gã.

Te duca<sup>n</sup> te ní tecú ní cáhá<sup>n</sup> Yá  
Ndiöxí ndéé andiú, te càchí-gá:

—Sa ní quide-í nàcuáa cachí ñáyiú  
sá ïo càhnu cuu-í. Te cada tucu-í  
cuendá cada càhnu ñaha-gá-yu  
xii-í —càchí Yá Ndiöxí xáha<sup>n</sup>-gã xii  
Déhe-gá.

<sup>29</sup>Te nchaá ñáyiú xíndecu ní tecú  
dóho-yu ní cáhá<sup>n</sup>-gá, dico ñá túú  
ní sàni iní-yu sá méé-gã ní cáhá<sup>n</sup>,  
chi davá-yu ní xítñahã-yu sá ñúhu  
ní cáhá<sup>n</sup>, te davá-yu ní xítñahã-yu  
sá ì<sup>n</sup> espíritú xínu cuèchi núú Yá  
Ndiöxí ní cáhá<sup>n</sup>. <sup>30</sup>Te ní xáha<sup>n</sup> Jèsús  
xií-yu:

—Ñá díú cuendá yúhú ní cáhá<sup>n</sup> Yá  
Ndiöxí, chi ní cáhá<sup>n</sup>-gá cuendá sá  
nchòhó cundedóho-ndo. <sup>31</sup>Te vitna  
ní sáá nduu càda ndáá Yá Ndiöxí  
cuèchi nchaá ñáyiú ñuyúú-a, te  
duca<sup>n</sup> te vá cùnùu-gá yucu ñávãha.  
<sup>32</sup>Te na càta caa ñaha-güedé xii-í  
núú cùrúxí, te xíã<sup>n</sup> cuú-í te níhí-yu  
tnúhu ni càa xico ñuyúú, te quindáá  
iní-yu tnúhu-í —càchí-gá xáha<sup>n</sup>-gã  
xií-yu.

<sup>33</sup>Duha ní cáhá<sup>n</sup>-gá cuendá  
cutnùní iní-yu nàcuáa ndoho-gá òré  
cuú-gá. <sup>34</sup>Te ní xáhã<sup>n</sup>-yu xii-gá:

—Ñihí-ndí tnúhu sá nüü tütú yódó  
tnùní tnúhu Yá Ndiöxí càhá<sup>n</sup>-xi sá  
Crístú Yaá tendaha-gã quixi ñuyúú-a  
cundecu-gá ni caa ni quíh<sup>n</sup>. ¿Te  
yòhó nása càhá<sup>n</sup>-tu-n sã ì<sup>n</sup> tée cùu  
ñaní tnáhã nchàa ñáyiú ñuyúú-a  
cahni ñaha-güedé núú cùrúxí?  
Te cachí tnúhu-n ná cúú tēe-á<sup>n</sup> —  
càchí-yu xáhã<sup>n</sup>-yu xii-gá.

<sup>35</sup>Te ní xáha<sup>n</sup> Jèsús:

—Yúhú cùu-í dàtná ì<sup>n</sup> ñuhú  
dáyèhé ñuyúú-a, dico sacú-ni  
nduu ndècu ndihí ñaha-í xii-ndo.  
Te caca-ndo ìchi ndáá vitna

dàyehe-gá-í núú-ndó chi na cùnee te vá cùtnùní-gá núú-ndó ndèé ichi quíhí<sup>n</sup>-ndó. <sup>36</sup>Quindáá iní ñáhá-ndó xii-í vitna ndècu ndíhi ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa ndùu cuendá Yă Ndiöxí, te cuu-ndo dèhe-í —càchí-gá xáha<sup>n</sup>-gă xií-yu.

Te sátá dúcá<sup>n</sup> nǐ cáhá<sup>n</sup> Jèsús, te ní quee-gá cuáhá<sup>n</sup>-gá ìí<sup>n</sup> núú vǎ ná nihí ñáhǎ-yu xii-gá.

**Ñáyiú israél ñá cuiní-yu  
quindáá iní-yu Jèsús**

<sup>37</sup>Te cuèi ío vǎi sá vǎ yǒo tnàhí ndàcu cada ní quide Jèsús ní xiní-yu, dico ní dùca<sup>n</sup> ñá túú ní sàndáá iní-yu-gá. <sup>38</sup>Te duca<sup>n</sup> nǐ quidè-yu chi dacuítí nǐ quee ndáá-xi nàcuáa ní chídó tnùnǐ ndíi Chàíá ndíi ní cáhá<sup>n</sup> tnúhu Yă Ndiöxí ndéé sanaha núú tütú-gá núú càchí-xi:

Yòhó Yaá cúú Xítohó-í, vá yǒo ìí<sup>n</sup> sàndáá iní tnúhu càhá<sup>n</sup>-ndí.

Te vá yǒo ìí<sup>n</sup> cùtnunǐ iní-xi sá ìo càhnu cuu-n.

Duha ní chídó tnùnǐ ndíi Chàíá núú tütú-gá. <sup>39</sup>Te ñá ní sàndáá iní-yu chi ní quee ndáá-xi nàcuáa ní chídó tnùnǐ tucu ndíi Chàíá núú tütú Yă Ndiöxí nàcuáa cáhá<sup>n</sup> Jèsús:

<sup>40</sup>Mee Yă Ndiöxí ní quide-gá sá vǎ tècu tnùnǐ-yu, chi ní dádǎhu ndodo iní ñáhá-gă xií-yu, chi ío sàà iní-yu núú ñá ní cuiní-gá-yu quindáá iní ñáhǎ-yu xii-gá.

Te ni vá túhá ñahá-yu xii yúhú cuendá dacăcu nihnu-í-yu.

<sup>41</sup>Duha ní chídó tnùnǐ ndíi Chàíá nàcuáa cáhá<sup>n</sup> Jèsús chi ní xiní ndíi sá ìo càhnu cuu-gá.

<sup>42</sup>Te cuèi duca<sup>n</sup> nǐ cuu dico titnǐ cue téé cùnūu núú ñáyiú israél ní sàndáá iní ñáhá-güedě xii-gá. Dico ñá túú ní xǒo cáhá<sup>n</sup> ndáá-güedé chi ní xóo yúhú-güedé sá vǎ dáñá-gă cue téé cùu fariséú quíhu-güedé veñúhu. <sup>43</sup>Chi ní xóo cudíí-gă iní-güedé sá càhá<sup>n</sup> ñáyiú dàcúxí tnúhu càhá<sup>n</sup> Yă Ndiöxí.

**Ñáyiú ñá túú sàndáá iní tnúhu  
Jèsús cuíta nihnú-yu**

<sup>44</sup>Jèsús nihí ní cáhá<sup>n</sup>-gá, te càchí-gá:

—Nchaa ñáyiú na quindáá iní ñáhá xii-í, te ñá dǐú-ní mèe-í quindáá iní-yu, chi tnàhá Tǎtà-í Yaá ní tendaha ñaha xii-í véxi-í ñuyú-a quindáá iní-yu. <sup>45</sup>Te ñáyiú xini ñáhá xii yúhú xini-yu tnàhá Tǎtà-í. <sup>46</sup>Te yúhú véxi-í dándixi túu-í iní ñáyiú ñuyú-a cuendá cutnùní iní-yu nàcuáa ndùu cuendá Yă Ndiöxí, te nchaa ñáyiú na quindáá iní ñáhá xii-í te vá cùndècu-gá-yu ichi cuèhé ichi duha. <sup>47</sup>Te núu ìo davá-yu ndedóho-yu nàcuáa càhá<sup>n</sup>-í te ñá túú tnèi-yu tnúhu-í, te ñá dǐú yúhú dàcuíta nihnu-í-yu, chi ñá túú véxi-í ñuyú-a sá dacúita nihnu-í-yu, chi véxi-í sá dacăcu nihnu-í-yu. <sup>48</sup>Te nchaa ñáyiú na cùyíchí iní ñáhá xii-í te ñá túú quide cuendá-yu nàcuáa càhá<sup>n</sup>-í, te ñáyiú-á<sup>n</sup> ná sàà nduu te cuíta nihnú-yu chi ñá ní tnèi-yu tnúhu ní cáhá<sup>n</sup>-í. <sup>49</sup>Te yúhú ñá túú càhá<sup>n</sup>-í tnúhu véxi iní mèe-í, chi mee Tǎtà-í Yaá ní tendaha ñaha xii-í véxi-í ñuyú-a ní cachí tnúhu-gá nàcuáa cunduu tnúhu cáhá<sup>n</sup>-í danèhé-í ñáyiú. <sup>50</sup>Te yúhú xini-í sá tnúhu ní táuchíú<sup>n</sup> Tǎtà-í cáhá<sup>n</sup>-í cúú-xí ìí<sup>n</sup> sá vǎha sá cúú xii-ndo

chi nduu táhú-ndó cùndecu-ndo ndihi-gá ni caa ni quíhí<sup>n</sup>, núu xíá<sup>n</sup> càhá<sup>n</sup>-í nchaa nàcuáa ní táúchíú<sup>n</sup>-gǎ —càchí-gá xáha<sup>n</sup>-gǎ xií-yu.

Jèsús náquète-gá sáhá cuè  
tée xica cuu ndihi-gá

**13** Te cùmání-gǎ tnahá vico pascuá, te Jèsús sa nàha-gá sá sà ní cuyatni òré dándóo-gá ñuyíú-a, te ndaa-gá núu ndécú Tǎtá-gǎ. Te ío ní cuu iní-gá nchaa ñáyu ní sándáa iní ñáhá xii-gá, te ní quide ndisa-gá sá ñí cuu iní ñáhá-gǎ xií-yu.

<sup>2-4</sup>Te ní quíhu yucu ñǎvǎha díquí tǎ Jüdás déhe té Xímú Iscàrioté, te ní sani iní-dé nàcuáa cada-dé cuáha cuèndá-dé Jèsús núu cuè tée cùu úhú iní ñáhá xii-gá. Te Jèsús sa nàha-gá sá méé Yǎ Ndiòxí Yaá cúu Tǎtá-gǎ ní sǎnaha-gǎ tnúhu ndee ñni xii-gá sá cadá-gǎ núu-gǎ, te nàha-gá sá díú núú Tǎtá-gǎ ní quee-gá véxi-gá ñuyíú-a. Te sáá nduu nàsáa tucu-gá núu Tǎtá-gǎ. Te cùdini Jèsús ndihi cue tée xica cuu ndihi-gá ní cùu, te ní ndacuíñí-gá yuhu mèsá, te ní taunuu-gá ñí<sup>n</sup> dóó ñíhnú-gǎ, te ní quehe<sup>n</sup>-gá ñí<sup>n</sup> dóó ñí dácútú-gǎ núu yíquí-gǎ. <sup>5</sup>Te ní chihi-gá ndute ñí<sup>n</sup> tǐná, te xíá<sup>n</sup> ñí naquete-gá sáhá cuè tée xica cuu ndihi-gá, te ndihi dóó ndútú núu yíquí-gǎ-á<sup>n</sup> ñí nadayìchí-gá sáhá-güedé.

<sup>6</sup>Te òré naquete-gá sáhá tǎ Xímú, àdi Pelú, ní cùu ní xáha<sup>n</sup>-dǎ xii-gá: —Mèstrú, ¿te yòhó naquete-n sǎhà-í-u? —càchí-dé xáha<sup>n</sup>-dǎ xii-gá.

<sup>7</sup>Te ní xáha<sup>n</sup> Jèsús: —Vitna ñá cúnùní iní-n sǎ quidé-í-a dico sáá nduu te cutnùní iní-n —càchí-gá xáha<sup>n</sup>-gǎ xii-dé.

<sup>8</sup>Te ní xáha<sup>n</sup> tǎ Pelú: —Yúhú chi vá íí<sup>n</sup> nduu te naquete-n sǎhà-í —càchí-dé xáha<sup>n</sup>-dǎ xii-gá.

Te ní xáha<sup>n</sup> Jèsús: —Te núu vá náquète-í sáhá-n á<sup>n</sup>, te vá cadá-gǎ-n cuèndá sá ndécú ndihi ñaha-í xii-n —càchí-gá xáha<sup>n</sup>-gǎ xii-dé.

<sup>9</sup>Te ní xáha<sup>n</sup> tǎ Pelú: —Te núu duca<sup>n</sup> te vá méé-ní sǎhà-í naquete-n, chi naquete-n tnàhá ndaha-í ndihi díquí-í —càchí-dé xáha<sup>n</sup>-dǎ xii-gá.

<sup>10</sup>Te ní xáha<sup>n</sup> Jèsús xii-dé: —Tée íchí ñí xichi chi xini ñuhu-xi sá sáhá-na-dǎ ndoo, te duca<sup>n</sup> te nduu ndoo-dé ñihí-dé. Te nchòhó sa càndoo-ndo cuéi ñá ncháá-ndó càndoo —cachí-gá xáha<sup>n</sup>-gǎ xii-dé.

<sup>11</sup>Te duca<sup>n</sup> ñí cáhá<sup>n</sup> Jèsús chi sa nàha-gá sá íí<sup>n</sup> cuè tée-á<sup>n</sup> cuáha cuèndá ñáhá-güedé xii-gá núu cuè tée cùu úhú iní ñáhá, xíá<sup>n</sup> núu ní xáha<sup>n</sup>-gǎ sá ñà túu càndoo-güedé nchaa-güedé.

<sup>12</sup>Te sátá ñí naquete-gá sáhá-güedé, te ní ndécuihnu-gá dóó-gǎ, te ní nucóo-gá yuhu mèsá, te ní xáha<sup>n</sup>-gǎ xii-güedé:

—¿Te ní cutnùní iní-ndó sǎ ñí quide ñaha-í xii-ndo-á<sup>n</sup>?

<sup>13</sup>Te nchòhó váha-ni càhá<sup>n</sup>-ndó sǎ cúnùu-í, te dǎnani ñaha tucu-ndo Mèstrú xii-í, te ndáá càhá<sup>n</sup>-ndó. <sup>14</sup>Te núu yúhú cùu-í Mèstrú, te cùu tucu-í tée cùnuu te nàquete-í sáhá-ndó, te diu-ni duca<sup>n</sup> càda nchòhó tucu naquete sáhá tnàhá-ndó. <sup>15</sup>Yúhú sànu ichi ñaha-í xii-ndo nàcuáa cada-ndo. <sup>16</sup>Te na càchí tnúhu ndáá-í xii-ndo sǎ ñí ñí<sup>n</sup> tée xinu cuechi ñá túu cùnuu-dé

dàcúxí pàtró<sup>n</sup>-dě, te ni ì<sup>n</sup> tée xica chiu<sup>n</sup> ñá túú cùnūu-dé dàcúxí tée tëndaha ñaha xii-dé cuáhá<sup>n</sup>-dé chiū<sup>n</sup>. Te duca<sup>n</sup> sǎtnahá-xi cūu yúhú ndihí nchòhó. <sup>17</sup>Te núu ní cutnùní iní-ndó nàcuáa ní quide ñaha-ĩ xii-ndo ña, te duca<sup>n</sup> càda tnaha-ndo te cuu váha iní ñáhá Yă Ndiöxí xii-ndo.

<sup>18</sup>Yúhú, ñá túú càhá<sup>n</sup>-í cuendá-ndó nchàa-ndo, chi yúhú sa nàha-í nàcuáa sàni iní ì<sup>n</sup> ì<sup>n</sup> nchòhó cue tée ní nanducu nihnu-í tnuu nchaa ñáyiu ñùhu ichi cuehé ichi duha ní cachí-í chitnahá ñáhá-ndó xii-í. Chi dacuití sǎ queé ndǎá-xi nàcuáa càhá<sup>n</sup>-xi núu tütú Yă Ndiöxí núu cǎchí-xi: “Tée xèxi ndihí ñaha xii-í ngóo-dé cuu úhú iní ñáhá-dě”, duha cǎchí-xi núu tütú-gá. <sup>19</sup>Te cùmání-gǎ sáá nduu càda ñaha-dé sá sání iní-dé, núu xí<sup>n</sup> cǎchí tnúhu-í xii-ndo nàcuáa cada-dé, chi na sǎá nduu-ǎ<sup>n</sup> te cutnùní iní-ndó sǎ yúhú cùu-í Crìstú Yaá ní tendaha Yă Ndiöxí véxi ñuyú-a. <sup>20</sup>Te na cǎchí tnúhu ndǎá-í xii-ndo sǎ nchàa ñáyiu na quèhe<sup>n</sup> cuendá ñáhá xii cue tée tendaha-ĩ càhá<sup>n</sup> tnúhu-í, te cada iní-yu sá tnàhá yúhú ní quehe<sup>n</sup> cuendá-yu. Te nchaa ñáyiu na quèhe<sup>n</sup> cuendá ñáhá xii-í, te cada iní-yu sá tnàhá Tǎtà-í Dútú Ndiöxí Yaá ní tendaha ñaha xii-í véxi-í ñuyú-a ní quehe<sup>n</sup> cuendá-yu —cǎchí-gá xáha<sup>n</sup>-gǎ xii-güedé.

**Jèsús cǎchí-gá sá tǎ Jùdás cuáha cuendá ñáhá-dě xii-gá núu cuè tée cūu úhú iní ñáhá**

(Mt. 26:20-25; Mr. 14:17-21; Lc. 22:21-23)

<sup>21</sup>Te sǎtá dúcá<sup>n</sup> nǐ càhá<sup>n</sup> Jèsús te ío ní ndíhú iní-gá, te ní xáha<sup>n</sup>-gǎ xii-güedé:

—Na cǎchí tnúhu ndǎá-í xii-ndo sǎ dǎú-ní ì<sup>n</sup> nchòhó cuáha cuendá ñáhá-ndó xii-í núu cuè tée cūu úhú iní ñáhá —cǎchí-gá xáha<sup>n</sup>-gǎ xii-güedé.

<sup>22</sup>Te ní ngúíta cue tée xica cuu ndihí-gá ndéhé ì<sup>n</sup> ndehe ì<sup>n</sup> núu tnáhá-güedé, chi ñá ní cutnùní iní-güedé ndédacàa-güedé cuendá-güedé ní càhá<sup>n</sup>-gá. <sup>23</sup>Te ì<sup>n</sup> tée-ǎ<sup>n</sup> ío cùdǐ iní ñáhá Jèsús, te ndècu yatni-dé dǐñi-gá cùdini-dé ndihí-gá. <sup>24</sup>Te té Xímú, àdi Pelú chi úu dǐu-dé, ní quide-dé sèñá núu tǎe ndècu yatni dǐñi-gá-ǎ<sup>n</sup> sá cǎcá<sup>n</sup> tnúhú-dě núu-gǎ nǔu ndédacàa-güedé cuendá-güedé ní càhá<sup>n</sup>-gá. <sup>25</sup>Te tée-ǎ<sup>n</sup> ní sáha<sup>n</sup> ndehe yatni-gá-dé dǐñi Jesús, te ní xáha<sup>n</sup>-dě xii-gá:

—Mèstrú, ìndédacàa-ndǐ cuendá-ndǐ ní càhá<sup>n</sup>-n-í? —cǎchí-dé xáha<sup>n</sup>-dě xii-gá.

<sup>26</sup>Te ní xáha<sup>n</sup> Jèsús:

—Na chindóyo-í luha pàá, te tée na cuáha-í te tée-ǎ<sup>n</sup> cùu-dě —cǎchí-gá xáha<sup>n</sup>-gǎ xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscàrioté. <sup>27</sup>Te òré ní quehe<sup>n</sup>-dé pàá, te ní ngúndecu ndihí ñaha dùu<sup>n</sup>-ná yucu ñǎvaha xii-dé. Te ní xáha<sup>n</sup> Jèsús:

—Sá nǐ sani iní-n càda-n te cada ndíhi-ni-n —cǎchí-gá xáha<sup>n</sup>-gǎ xii-dé.

<sup>28</sup>Te ní ì<sup>n</sup> cue tée cùdini ndihí-gá ñá ní tǎcú tnùní-güedé nása ndūu tnúhu ní xáha<sup>n</sup>-gǎ xii té Jùdás. <sup>29</sup>Te dava-güedé ní sani iní-güedé sá sǎ cuendá sá ndécú ndihí-dé sá ñúhú dǐhú<sup>n</sup>, te váa ío ì<sup>n</sup> sá cuáá<sup>n</sup>-dě nǎndíhi-güedé vico, àdi dǐhú<sup>n</sup>

cuáha-dé ñáiyu ndàhú xáha<sup>n</sup>-gã ní cáhá<sup>n</sup>-güedë. <sup>30</sup>Te sa ní cundiquí<sup>n</sup> ní quehe<sup>n</sup> cuendá té Jùdás pàá caxi-dé, te òré ní níhí-dë pàá-á<sup>n</sup> te ní quee-dé cuáhá<sup>n</sup>-dé.

**Jèsús càchí tnúhu-gá nàcuáa cada-o**

<sup>31</sup>Te sátá ñí quee té Jùdás cuáhá<sup>n</sup>-dé, te ní xáha<sup>n</sup> Jèsús xii dava-gá-güedé:

—Vitna te quiní-ndó ndìhi nchaa ñáiyu sá ïo càhnu cuu yúhú Tée cùu ñání tnáhá-ndó nchàa-ndo, te òré-á<sup>n</sup> cutnùní iní-ndó sã ïo càhnu cuu tucu mee Yá Ndiöxí. <sup>32</sup>Te núu yúhú quidé càhnu-í Yã Ndiöxí, te ñiu-ni duca<sup>n</sup> càda cahnu ñaha-gá xii yúhú, te ñá túú-gã títí nduu te duca<sup>n</sup> càda-gá. <sup>33</sup>Te nchòhó cue déhe-í na càchí tnúhu-í sá sàcú duha-ná nduu ndècu ndìhi ñaha-í xii-ndo. Te nchòhó nanducu ñàha-ndo xii-í dico vá ná níhí ñáhá-ndó dàtná ní xáha<sup>n</sup>-í xii ñáiyu isràél, te ñiu-ni duca<sup>n</sup> càhá<sup>n</sup>-í núu-ndó sã vã ndácú-ndó quíhí<sup>n</sup>-ndó núú quíhí<sup>n</sup>-í. <sup>34</sup>Te duha sànu ichi ñaha tucu-í xii-ndo nàcuáa cada-ndo sã cúú ñí tnáhá-ndó ñí<sup>n</sup> ñí<sup>n</sup>-ndo datná yúhú cúú ñí ñàhà-í xii-ndo. <sup>35</sup>Te núu na cùu ñí tnáhá-ndó ñí<sup>n</sup> ñí<sup>n</sup>-ndo ña, te duca<sup>n</sup> te cutnùní iní nchaa ñáiyu sá cúú-ndó cuè téé ní chitnahá ñáhá xii-í —càchí-gá xáha<sup>n</sup>-gã xii-güedé.

**Jèsús càhá<sup>n</sup>-gá sá tã Pèlú vá nūnuu-dé sá xícá cùu ndìhi ñaha-dé xii-gá**

(Mt. 26:31-35; Mr. 14:27-31; Lc. 22:31-34)

<sup>36</sup>Te ní xáha<sup>n</sup> tã Ximú, àdi Pelú chi úú ñuu-dé, xii Jèsús:  
—Mèstrú, ñndèè quíhí<sup>n</sup>-n-í? —  
càchí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Vitna te vá ndácú-n càncicú<sup>n</sup> ñáhá-n quíhí<sup>n</sup> núú quíhí<sup>n</sup>-í, dico na sàá nduu te dai sáá-n núú cùndècu-í —càchí-gá xáha<sup>n</sup>-gã xii-dé.

<sup>37</sup>Te ní xáha<sup>n</sup> tã Pèlú xii-gá:

—Mèstrú, ÷te ná cuendá núu vá ndácú-í càncicú<sup>n</sup> ñàhà-í xii-n quíhí<sup>n</sup> vitna-í? Chi yúhú ñá túú tnàhí yùhú-í cuèí na cùú-í sá cuendá-n —càchí-dé xáha<sup>n</sup>-dë xii-gá.

<sup>38</sup>Te ní xáha<sup>n</sup> Jèsús:

—÷Te ndáá sá xèhndé iní-n sã cuèí na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáhá<sup>n</sup>-n sã ñà túú xìní ñáhá-n xii-í —càchí-gá xáha<sup>n</sup>-gã xii-dé.

**Jèsús dánèhé ñáhá-gã nàcuáa cada-o nàsáá-ó núú ndécú Yã Ndiöxí**

**14** Te ní xáha<sup>n</sup>-gã xii-güedé:  
—Te ñá túú ñã cani iní-ndó. Quíndáá iní-ndó Yã Ndiöxí, te quíndáá iní-ndó yúhú. <sup>2</sup>Chi núú ndécú Tãtá-í ío nùne núú cùndècu-o, chi núú ñáhá ñã te sa cachí tnúhu-í xii-ndo ni cùu. Te vitna na nùhú-í te cada túha-í núú cùndècu-ndo. <sup>3</sup>Te dàtnùní quixi tucu-í te candeca ñaha-í xii-ndo quíhí<sup>n</sup> cuendá ñí<sup>n</sup>-ni xìchi cundecu-o. <sup>4</sup>Te sa ñaha-ndo ndéé quíhí<sup>n</sup>-í te sa xìní-ndó ichi —cachí-gá xáha<sup>n</sup>-gã xii-güedé.

<sup>5</sup>Te ní xáha<sup>n</sup> tã Mäxi xii-gá:

—Mèstrú, ñá túú xìní-ndí ndéé quíhí<sup>n</sup>-n te da ichi-ná quiní-ndí —càchí-dé xáha<sup>n</sup>-dë xii-gá.

<sup>6</sup>Te ní xáha<sup>n</sup> Jèsús:

—Yúhú cùú-í dàtná ñí<sup>n</sup> ichi te càhá<sup>n</sup>-í tnúhu ndáá, te yúhú cada-í te naníhí tàhú-ndó. Te ñí<sup>n</sup> ñí<sup>n</sup> díí-ni yúhú cada-í te sáá-ndó núú Yã

Ndiöxí cundecu-ndo te núu na quëndáá iní ñáhá-ndó xii-í. <sup>7</sup>Te núu dicó cutnùní ndisa iní-ndó yòo cuu-í-á<sup>n</sup>, duca<sup>n</sup> te cutnùní iní-ndó yòo cuu Tàtá-í ní cùu. Dico vitna dàtná sá nǐ xiní núu-ndó Dútú Ndiöxí Yaá cúú Tàtá-í cada iní-ndó, chi ní xiní-ndó yǔhú —càchí-gá xáha<sup>n</sup>-gǎ xii-dé.

<sup>8</sup>Te ní xáha<sup>n</sup> tǎ Lìpé xii-gá:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí —càchí-dé xáha<sup>n</sup>-dǎ xii-gá.

<sup>9</sup>Te ní xáha<sup>n</sup> Jèsús xii-dé:

—Lìpé, ¿te náa ñá túú xiní ñáhá-n xii-í? Te sa ní cuu vài nduu ndecu ndihi ñaha-í xii-ndo, chi ñáyiú xiní ñáhá xii-í te xiní-yu tnàhá Tàtá-í. ¿Te ná cuèndá yòhó càchí-n sǎ dánèhé ñáhá-í xii-ndo Tàtá-í?

<sup>10</sup>¿Náa ñá túú sàndáá iní-ndó sǎ yǔhú ndécù-í ndihi Tàtá-í? Te mee-gǎ ndécú ndihi ñaha-gá xii-í. Te nchaa tnúhu càhá<sup>n</sup>-í núu-ndó ñà túú càhá<sup>n</sup>-í sǎ vǎxi iní mèè-í, chi Tàtá-í Yaá ndécú ndihi ñaha xii-í chindèe ñaha-gá quidè-í chùu<sup>n</sup>-gá. <sup>11</sup>Te quëndáá iní-ndó sǎ yǔhú ndécù-í ndihi Tàtá-í, te duca<sup>n</sup> mèe-gá ndécú ndihi ñaha-gá xii-í. Te núu ñá túú sàndáá iní-ndó tnúhu càhá<sup>n</sup>-í-a, te dandàcu iní-ndó nchaa chiú<sup>n</sup> ta quide-í véxi, te quëndáá iní ñáhá-ndó. <sup>12</sup>Te na càchí tnúhu ndáá-í xii-ndo sǎ nchaa ñáyiú na quëndáá iní ñáhá xii-í, te cadá-yu chùu<sup>n</sup> quide-í te càhnu-gá chùu<sup>n</sup> cadá-yu chi yǔhú núhú-í núú ndécú Tàtá-í cundecu-í nàcuáa níhí ndéé-gǎ-yu cundecú-yu. <sup>13</sup>Te nchaa sǎ ná càcá<sup>n</sup>-ndó te taxi-í te núu na quëndáá iní ñáhá-ndó xii-í, te nchaa cada-í cuèndá cutnùní iní ñáyiú sǎ

ño càhnu cuu Tàtá-í Dútú Ndiöxí.

<sup>14</sup>Te yǔhú cada-í nchaa sǎ cuíní-ndó càcá<sup>n</sup> táhú-ndó nùu-í, te núu na quëndáá iní ñáhá ndisa-ndo xii-í.

**Jèsús càchí-gá sǎ téndàha-gá Espiritú Yǎ Ndiöxí quixi cundecu ndihi-o**

<sup>15</sup>Te núu nchòhó cúú iní ñáhá-ndó xii-í te tnii-ndo nchaa tnúhu càhá<sup>n</sup>-í.

<sup>16</sup>Te yǔhú cacá<sup>n</sup> táhù-í núú Tàtá-í sǎ téndàha-gá Espiritú-gá quixi cundecu ndihi-ndo cànu ichi ñaha-xi xii-ndo nacuéa cundecu-ndo, te chindee ñaha-xi xii-ndo ni caa ni quíh<sup>n</sup>. <sup>17</sup>Te nchaa ñáyiú ndècu ichi cuehé ichi duha ñá túú xiní-yu Espiritú Yǎ Ndiöxí te ni vǎ cúú cùndecu ndihí-yu. Dico nchòhó sa xiní-ndó Espiritú-gá te ndècu ndihi ñaha-xi xii-ndo. Te sáá ii<sup>n</sup> nduu te cunuu Espiritú-gá iní-ndó. <sup>18</sup>Te yǔhú vá dáñá nihnu ñaha-í xii-ndo, chi quixi tucu-í cundecu ndihi ñaha-í xii-ndo. <sup>19</sup>Te sácú duha-ná nduu ndècu-í te vá quíni ñáhá-gǎ ñáyiú xii-í, dico nchòhó chi quíni ñáhá-ní-ndó xii-í. Te duca<sup>n</sup>-ni cùndecu-ndo ichi váha chi cundecu ndihi ñaha-í xii-ndo nì caa ni quíh<sup>n</sup>.

<sup>20</sup>Te dàvá-á<sup>n</sup> cutnùní iní-ndó sǎ ndécù-í ndihi Tàtá-í, te duca<sup>n</sup> nchòhó cundecu ndihi ñaha-ni-ndo xii-í.

<sup>21</sup>Te nchaa ñáyiú dàcuaha tnúhu-í te tnii-yu, ñáyiú-á<sup>n</sup> quidé ndisá-yu sǎ cúú iní ñáhá-yu xii-í. Te duca<sup>n</sup> Tàtá-í cúú iní ñáhá-gǎ xií-yu, te duca<sup>n</sup>-ni yǔhú cúú iní-í-yu tucu, te duca<sup>n</sup> te cùtnuní iní-yu sǎ ndécú ndihi-í-yu —càchí-gá xáha<sup>n</sup>-gǎ xii-dé.

<sup>22</sup>Te ní càhá<sup>n</sup> ii<sup>n</sup> tée nani Judás dico ñá dǔú tǎ Jùdás déhe té Xímú Iscarioté ní càhá<sup>n</sup>, chi ingá té Jùdás ní xáha<sup>n</sup>-dǎ xii-gá:

—Mèstrú, ìnása cada-n cuèndá cutnùnì iní-ndí sá cùndècu ndìhi ñaha-n xii-ndí, te ñáyiú ñùhu ichi cuehé ichi duha vá cùndècu ndìhí-n-yu-i? —càchí-dé xáha<sup>n</sup>-dë xii-gá.

<sup>23</sup>Te ní xáha<sup>n</sup> Jèsús xii-güedé:

—Nchaa ñáyiú cùu iní ñáhá xii-í te tñí-yu tñúhu càhá<sup>n</sup>-í, te ñáyiú-á<sup>n</sup> cùú iní ñáhá Tătà-í xií-yu, te yúhú ndìhi Tătà-í ndécú-ndí ndìhí-yu.

<sup>24</sup>Te nchaa ñáyiú ñá túú cùu iní ñáhá xii-í te ñá túú tñí-yu tñúhu càhá<sup>n</sup>-í. Te nchaa tñúhu ní cáhá<sup>n</sup>-í ní xíndèdóho-ndo chi Tătà-í Yaá ní tendaha ñàha xii-í véxi-í ñuyíú-a ní dácáhu iní ñáhá-gă xii-í, te ñá dǫú mèe-í ní càhu iní-í tñúhu cáhá<sup>n</sup>-í.

<sup>25</sup>Duha ndùu tñúhu càhá<sup>n</sup>-í núu-ndó vitna ndecu ndìhi ñaha-gá-í xii-ndo. <sup>26</sup>Dico Yá Ndiöxi tendaha-gă Espiritú-gă quixi-xi cada-xi núu-í taxi-xi tñúhu ndee ìní xii-ndo, te ñiu-xi chindee ñàha-xi xii-ndo te danèhé ñáhá-xí xii-ndo nchaa sá cúmăní quini-ndó, te ñiu-ni-xi dandàcu iní ñáhá-xí xii-ndo nchaa nacuaá ní cáhá<sup>n</sup>-í.

<sup>27</sup>Te yúhú chindee chítuu ñaha-í xii-ndo ïo váha cuu iní-ndó cùndecu-ndo datná yúhú ïo váha cùu iní-í ndécú-í, chi sa ta cùyatni nduu núhú-í. Te yúhú càchí tñúhu ndáá-í sá chíndèe ñaha-í xii-ndo, te vá càdà-í dàtná quidé ñáyiú ñùhu ichi cuehé ichi duha. Te ni vǎ ndìhú iní-ndó, te ni vǎ yùhú-ndó. <sup>28</sup>Te sa ní xíndèdóho-ndo nǐ cáhá<sup>n</sup>-í sá nùhú-í, te quixi tucu-í cundecu ndìhi ñaha-í xii-ndo. Te núu ndisa cùu iní ñáhá-ndó xii-í ñá, te òrè ní nǐhí-ndó tñùhu sá nùhú-í núu ndécú Tătà-í, te cudíí ìní-ndó ní cùu, chi

ïo càhnu cuu-gá dácúxí yùhú. <sup>29</sup>Te sa ní cachí tñúhu-í sá nùhú-í, te na sàà òrè núhú-í núu ndécú Tătà-í, te quindáá iní ñáhá-ndó xii-í.

<sup>30</sup>Te ñá túú-gă vǎi tñúhu ndatnúhu ndìhi ñaha-í xii-ndo chi sa véxi yucu ñǎvǎha sá táxí tñuní ñuyíú-a, dico vá táxí tñuní ñáhá-xí xii yúhú. <sup>31</sup>Te cada-í nchaa nàcuáa ní táuchíú<sup>n</sup> Tătà-í cuèndá cutnùnì iní nchaa ñáyiú ñuyíú-a sá yùhú ïo cùu iní-í-gá. Te vitna chí ndácuñí ná quǐhí<sup>n</sup>-ó —càchí-gă xáha<sup>n</sup>-gă xii-güedé.

#### Cuèndá yoho yàha stilé ndìhi nchaa dité-xi

**15** Te ní xáha<sup>n</sup> tucu-gá xii-güedé:

—Yúhú cùu-í dàtná yoho yàha stilé, te Tătà-í cùu-gă dàtná ïí<sup>n</sup> tée xito yoho yaha stilé-á<sup>n</sup>. <sup>2</sup>Te nchaa ñáyiú ní sándáá iní ñáhá xii-í cùú-yu dàtná dité nchaa yoho yàha stilé-á<sup>n</sup>. Te tée xito yoho yaha stilé-á<sup>n</sup> xèhndé-dé nchaa dité-xi sá ñǎ cuíni-gă-xi cuu<sup>n</sup> ndéhé-xi, te ndàda ndoo-dé nchaa dité-xi sá cùú<sup>n</sup> cuèndá cuu<sup>n</sup>-gá. <sup>3</sup>Te duca<sup>n</sup> sǎtnahá-xi cùu nchohó, chi sa ní xócuñí nchaa sá cuèhé sá dúhá ndècu ndìhi-ndo, chi ní sándáá iní-ndó tñùhu ní cáhá<sup>n</sup>-í. <sup>4</sup>Te cuu ïí<sup>n</sup>nuu-ndo cùndecu ndìhi ñaha-ndo xii-í, te núu duca<sup>n</sup> na càda-ndo, te cundecu ndìhi ñaha-í xii-ndo. Chi núu ïí<sup>n</sup> yutnu vídí ná quèndèé dité-xi, te dité-xi sá nǐ quèndé-á<sup>n</sup> vǎ cùú<sup>n</sup>-gă sávidí-xi chí duu<sup>n</sup> duu<sup>n</sup> ní xíta-xi. Duca<sup>n</sup> sǎtnahá-xi cùu nchohó chi vá ndácú-ndó càda-ndo chiu<sup>n</sup>-í, te núu vá cùndècu ndìhi ñaha-í xii-ndo.



<sup>5</sup>Chi yúhú cùu-í dàtná yutnu vídí-á<sup>n</sup>, te nchòhó cùu-ndó dàtná nchaa dité-xi. Te nchaa ñáyiú cùu ì<sup>n</sup>nuu ndìhi ñaha xii-í, te ndècu ndìhi-í-yu, te ndàcù-yu quidè-yu chùu<sup>n</sup>-í. Te núu vá cùú ì<sup>n</sup>nuu ndìhi ñahá-yu xii-í, te vá ndácù-yu cadá-yu chùu<sup>n</sup>-í. <sup>6</sup>Te nchaa ñáyiú vá cùú ì<sup>n</sup>nuu ndìhi ñaha xii-í, te yáha-yu dàtná yáha ì<sup>n</sup> dité yutnu vídí sá ñà túú cùu<sup>n</sup> sávídí-xi, chi xèhndé-güedé yìchí-xi, te sàhmi-güedé.

<sup>7</sup>Cuu ì<sup>n</sup>nuu ndìhi ñaha-ndo xii-í, te vá nàcuànaa-ndo nacuéa ní cáhá<sup>n</sup>-í. Te núu duca<sup>n</sup> na càda-ndo, te nání cuìní-ndó cǎcá<sup>n</sup>-ndó nùú-í te taxi-í. <sup>8</sup>Te núu nchòhó ná cadá vaha-ndo cùndecu-ndo, te ío cada càhnu-ndo Tátà-í, te duca<sup>n</sup> cùtnuní sá ndísá cùu-ndo cue téé ní chitnahá ñáhá xii-í. <sup>9</sup>Te yúhú ío cùu iní ñáhà-í xii-ndo dàtná cùú iní ñáhá Yá Ndiòxí xii-í. Te cada-ni-ndo mèe-ni sá vaha cuèndá cudí iní ñáhá-gǎ-í xii-ndo. <sup>10</sup>Te núu na quèndáá iní-ndó càda-ndo nchaa nacuéa ní cáhá<sup>n</sup>-í, te ío cuu iní ñáhà-í xii-ndo, chi yúhú duca<sup>n</sup> ÿ sàndáá iní-í Tátà-í quidè-í nchaa nàcuáa ní cáhá<sup>n</sup>-gǎ, te xíǎ<sup>n</sup> nùu ío cùu iní ñáhá-gǎ xii-í.

<sup>11</sup>Duha càhá<sup>n</sup>-í núú-ndó cuèndá cudí ndisa iní-ndó dàtná cudí iní mèe-í. <sup>12</sup>Te duha ndùu tnúhu càhá<sup>n</sup>-í cuèndá sá cùú iní tnáhá-ndó ì<sup>n</sup> ì<sup>n</sup>-ndo datná cùú iní ñáhà-í xii-ndo. <sup>13</sup>Te núu ní xíhó sǎ cùú-xí ì<sup>n</sup> téé ío váha tnàhá tnúhu ndìhi-o, te xíǎ<sup>n</sup> cutnùnì iní ñáyiú sá ío cùu iní-ó-dě. <sup>14</sup>Te nchòhó cuu-ndo cuè téé ío váha tnàhá tnúhu ndìhi-í te núu na càda-ndo nchaa nacuéa

càhá<sup>n</sup>-í. <sup>15</sup>Te vá cǔñaha-gǎ-í xii-ndo sǎ cùú-ndó cuè téé xínu cuechi núú-í, chi ni ì<sup>n</sup> téé xínu cuechi ñá túú xíní-dé ná quidè pàtróó<sup>n</sup>-dě. Te yúhú càchí-í xii-ndo sǎ cùú-ndó cuè téé ío váha tnàhá tnúhu ndìhi-í, chi ní cachí tnúhu-í nchaa nàcuáa ní cáhá<sup>n</sup> Tátà-í. <sup>16</sup>Te ñá díú nchòhó ní càhá<sup>n</sup> ñáhá-ndó xii yúhú, chi yúhú ní cáhá<sup>n</sup> ñáhà-í xii-ndo. Te yúhú tauchùu<sup>n</sup>-í quíh<sup>n</sup>-ndó càda-ndo nchaa nacuéa ní cáhá<sup>n</sup>-í, chi tnúhu-á<sup>n</sup> vǎ ndíhí ñihnu-xi. Te duca<sup>n</sup> nchàa sá ná cǎcá<sup>n</sup>-ndó nùú Tátà-í Yá Ndiòxí te taxi-gǎ, te núu na quèndáá iní ñáhá-ndó xii-í. <sup>17</sup>Te yúhú càhá<sup>n</sup>-í dóho-ndo sǎ cùú iní tnáhá-ndó ì<sup>n</sup> ì<sup>n</sup>-ndo.

**Ñáyiú ndècu ichi cuehé ichi duha cùu úhú iní-yu Jèsús ndìhi nchaa ñáyiú sàndáá iní tnúhu-gǎ**

<sup>18</sup>Te nchaa ñáyiú ndècu ichi cuehé ichi duha ñá cùú quèní ñáhǎ-yu xii-ndo, te sa nàha-ndo sá díhna-gǎ yúhú ní ngúíta-yu duca<sup>n</sup> ñà cùú quèní ñáhǎ-yu xii-í. <sup>19</sup>Te núu dicó tnàhá nchòhó ndécú-ndó ìchi cuehé ichi duha ña, te cuu iní ñáhǎ-yu xii-ndo dàtná cùú iní tnáhǎ-yu ndí mèe-yu ni cùu. Te yúhú ní nanducu ñihnu ñaha-í xii-ndo tnúú ñáyiú ndècu ichi cuehé ichi duha, núu xíǎ<sup>n</sup> ío cùu úhú iní ñáhǎ-yu xii-ndo cuèndá sá ñà túú-gǎ chítnáhá-ndó-yu. <sup>20</sup>Te dandàcu iní-ndó nàcuáa ní cáhá<sup>n</sup>-í sá nì ì<sup>n</sup> téé xínu cuechi ñá túú cùnūu-dé dàcúúxí pàtróó<sup>n</sup>-dě. Te yúhú cùú úhú iní ñáhǎ-yu, te diu-ni duca<sup>n</sup> càda ñahá-yu xii nchòhó. Te núu dicó ní tnèi-yu tnúhu ní cáhá<sup>n</sup>-í ñá, te diu-ni duca<sup>n</sup> tnèi-yu tnúhu

cáhá<sup>n</sup>-ndó nǔú-yu ni cùu. <sup>21</sup>Te duca<sup>n</sup> càda ñahá-yu xii-ndo sǎ cuendá-í, chi ñá xini-yu Tǎtà-í Yaá ní tendaha ñàha xii-í véxi-í ñuyú-a.

<sup>22</sup>Te váa vá cúndècu cuèchi-yu ni cùu, te núu ñá túú yǔhú ní cǎhá<sup>n</sup>-í nǔú-yu, te vitna vá cúú tnàhí cachí-yu sǎ ñà túú cuèchi-yu. <sup>23</sup>Chi nchaa ñáyi u cùu úhú iní ñáhá xii-í, te cùu úhú iní-yu tnàhá Tǎtà-í. <sup>24</sup>Te váa ni ì<sup>n</sup> cuèchi-yu vá cúndècu ni cuu, te núu dico ñá túú ní xini-yu nchaa sǎ ní quide-í sǎ vǎ yǒo tnàhí ndàcu cada. Te cuèi ní xini-yu dico dai cùu úhú iní ñáhǎ-yu xii-í ndìhi Tǎtà-í. <sup>25</sup>Te duha quidé-yu chi dacuítíi quèe ndáá-xi nàcuáa yòdo tnuní núú tǔtú Yǎ Ndiòxí sǎ dácuahá-yu, chi cǎchí-xi sǎ ñà túú ñà cuèchi-í te cuu úhú iní ñáhǎ-yu xii-í.

<sup>26</sup>Te Espiritú Tǎtà-í Dútú Ndiòxí sǎ ndécú nǔú-gǎ tendaha-í quixi chindee ñàha-xi xii-ndo, te canu ichi ñàha-xi nàcuáa cundecu-ndo, te Espiritú-á<sup>n</sup> cǎhá<sup>n</sup> ndáá-xi cuendá cutnùni iní nchaa ñáyi u yoo cùu-í. <sup>27</sup>Te nchòhó tnàhá-ndó cǎhá<sup>n</sup> váha-ndo cuendá-í cuendá cutnùni iní-yu yoo cùu-í, chi nàha-ndo sǎ ndèe òré ní ngúíta-í quidè-í chiù<sup>n</sup> Tǎtà-í ní chitnahá ñáhá-ndó xii-í — cǎchí-gǎ xáha<sup>n</sup>-gǎ xii-güedé.

**16** Te ní xáha<sup>n</sup> tucu-gǎ xii-güedé:

—Duha cǎhá<sup>n</sup>-í cuendá ná nanchòcáva iní-ndó nǔhú-ndó ichi cuehé ichi duha. <sup>2</sup>Chi vá dáñá-gǎ-güedé quíhu-ndo venúhu, te ni vǎ cúú-gǎ quini ndeé ñáhá-güedé xii-ndo. Te sáá ì<sup>n</sup> nduu te cahni ñàha-güedé xii-ndo, te xíǎ<sup>n</sup> cuu caha<sup>n</sup>-güedé sǎ quidé-güedé

chiù<sup>n</sup> Yá Ndiòxí. <sup>3</sup>Te duca<sup>n</sup> càda-güedé chi ñá túú xini-güedé Tǎtà-í, te ni ñà túú xini ñáhá-güedé xii yúhú. <sup>4</sup>Te duha nduu tnúhu cǎhá<sup>n</sup>-í núú-ndó, chi na sáá òré te ndacu iní-ndó nchàa tnúhu sǎ sǎ ní cachí tnúhu-í xii-ndo nàcuáa cada ñàha-güedé xii-í.

**Nchaa chiù<sup>n</sup> quide Espiritú Yǎ Ndiòxí**

<sup>1</sup>Te ñá túú ní cǎchí tnúhu-í xii-ndo ndèe díhna chi ndècu ndìhi ñàha-í xii-ndo. <sup>2</sup>Dico vitna sa ta cùyatni nduu núhú-í núú ndécú Tǎtà-í Yaá ní tendaha ñàha xii-í véxi-í ñuyú-a. Te ni ì<sup>n</sup> nchòhó ñá túú xicá<sup>n</sup> tnúhú-ndó nǔú-í nǔú ndèe quíh<sup>n</sup>-í. <sup>3</sup>Chi mee-ni sǎ ndìhú iní-ndó sǎ dúcá<sup>n</sup> ní cǎhá<sup>n</sup>-í. <sup>4</sup>Te na cǎchí tnúhu ndáá-í xii-ndo sǎ vǎha-gǎ sǎ cúú-xi-ndó nǔú núhú-í, chi tendaha-í Espiritú Yǎ Ndiòxí quixi cundecu ndìhi-ndo chindee ñàha-xi, chi núu vá nùhú-í te vá quíxí Espiritú-gǎ cundecu ndìhi-ndo chindee ñàha-xi xii-ndo. <sup>5</sup>Te na quixi Espiritú-gǎ te dandixi túu-xi iní nchaa ñáyi u ndècu ichi cuehé ichi duha sǎ ñà túú quide váha-yu. Te dacàhu iní ñáhá-xí sǎ ndécú ì<sup>n</sup> ichi váha ichi ndáá. Te Espiritú-gǎ-á<sup>n</sup> cada-xi nàcuáa cutnùni iní-yu sǎ Yǎ Ndiòxí cada ndáá-gǎ cuèchi-yu. <sup>6</sup>Te duca<sup>n</sup> te cutnùni iní-yu sǎ ndécú cuèchi-yu, chi ñá túú sàndáá iní ñáhǎ-yu xii-í. <sup>7</sup>Te duca<sup>n</sup> te cutnùni iní-yu nàcuáa nduu cuendá ichi váha ichi ndáá, chi yúhú núhú-í núú ndécú Tǎtà-í, te nchòhó vá quini ñáhá-gǎ-ndó. <sup>8</sup>Te duca<sup>n</sup> te cutnùni iní-yu sǎ Yǎ Ndiòxí cada ndáá-gǎ cuèchi-yu, chi sa ní cǎhá<sup>n</sup>-gǎ sǎ yúcu ñávàha sǎ

táxi tnùnì ñuyú-a quíhí<sup>n</sup>-xi núú úhú núú ndàhú.

<sup>12</sup>Te vài-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. <sup>13</sup>Te na quíxi Espíritú Yă Ndiöxí, Espíritú càhá<sup>n</sup> ndáá cuítì, te Espíritú-á<sup>n</sup> danèhé ñáhá-xí nchàa tnúhu váha tnúhu ndáá. Te vá dácàhu iní ñáhá-xí xii-ndo sá vëxi iní mée-xí chi dacàhu iní ñáhá-xí nchàa sá càhá<sup>n</sup> Yă Ndiöxí, te cachí tnúhu-xi nchaa nàcuáa cada-xi ndéé núú cuáhá<sup>n</sup> núú vëxi-gá. <sup>14</sup>Te Espíritú-gá-á<sup>n</sup> cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo. <sup>15</sup>Te nchaa sá ndécú ndìhi Tătá-í ndécú ndìhi-í tnàhá-í, núú xíá<sup>n</sup> càchí-í sá Espíritú-gá danèhé ñáhá-xí nchàa tnúhu-í xii-ndo.

**Nchaa ñáyiu ndìhú iní-xi nduu díf iní-yu na quíxi tucu Jesús**

<sup>16</sup>Te ì<sup>n</sup> úú-nă nduu ndècu-í te vá quìnì ñáhá-gă-ndó xii-í, dico núú sàcú-ni nduu te quìnì ñáhá tùcu-ndo xii-í, te duca<sup>n</sup> chi núhú-í núú ndécú Tătá-í —càchí-gá xáha<sup>n</sup>-gă xii-güedé.

<sup>17</sup>Te sá dúcá<sup>n</sup> nǐ càhá<sup>n</sup>-gá nǔu ní ngúita ì<sup>n</sup> úú cue tée xica cuu ndìhi-gá xítñaha-güedé:

—¿Nása nduu-tu tnúhu càhá<sup>n</sup>-gá sá càchí-gá sá ì<sup>n</sup> úú-nă nduu ndècu-gá te vá quìnì-gá-ó-gă, dico núú sàcú-ni nduu te quìnì tucu-o-gă-í?, chi núhú-gá núú ndécú Tătá-gă —càchí-güedé xítñaha-güedé.

<sup>18</sup>Te xítñaha tucu-güedé:

—¿Nása cuáhá<sup>n</sup>-tu tnúhu-ă<sup>n</sup> sá sàcú-ni nduu? Te ñă tècú tnùnì-ó

nása nduu tnúhu càhá<sup>n</sup>-gá —càchí-güedé xítñaha-güedé.

<sup>19</sup>Te Jèsús ní cutnùnì iní-gá sá cuìnì-güedé cacă<sup>n</sup> tnúhú-güedé núú-gă nása nduu tnúhu ní càhá<sup>n</sup>-gá, núú ní xáha<sup>n</sup>-gá:

—Cuendá sá nǐ cachí-í sá ì<sup>n</sup> úú-nă nduu ndècu-í te vá quìnì ñáhá-gă-ndó xii-í, dico núú sàcú-ni nduu te quìnì ñáhá tùcu-ndo xii-í ní cachí-í, ¿xíá<sup>n</sup> ndúcú tnúhu núú tnáhá-ndó-ă<sup>n</sup>? —càchí-gá xáha<sup>n</sup>-gă xii-güedé.

<sup>20</sup>Te ní xáha<sup>n</sup> tùcu-gá:

—Te na càchí tnúhu ndáá-í xii-ndo sǎ nchòhó ndǐhú víhí iní-ndó te ndáhyú-ndó, dico nchaa ñáyiu ndècu ichi cuehé ichi duha chi da cudǐf iní-yu. Dico nchòhó ñáyiu ndáhyú chi sáá nduu te nduu díf iní-ndó. <sup>21</sup>Chi dàtná cuìnì-ndó cùu ì<sup>n</sup> ñadìhí ñaha ní tnahá nduu cacu déhe-xi vài sani iní-a<sup>n</sup> sá quidé úhú ñáhá-xí. Dico na yăha cacu déhe-a<sup>n</sup>, te ñă túú-gă ndácú iní-a<sup>n</sup> sá nǐ quide úhú ñáhá-xí xii-a<sup>n</sup> chi mee-nă sá cudǐf iní-a<sup>n</sup> déhe-a<sup>n</sup>. <sup>22</sup>Duca<sup>n</sup> sǎtnahá-xi cùu nchohó vitna chi ndìhú iní-ndó sǎ nùhú-í, dico quixi tucu-í quixi coto ñaha-í xii-ndo, te òrè-á<sup>n</sup> te cudǐf ndisa iní-ndó, te vá yǒo ì<sup>n</sup>-gá dandìhú iní ñáhá xii-ndo davá-á<sup>n</sup>.

<sup>23</sup>Te dàvá-á<sup>n</sup> ñă túú-gă ná nducu tnúhu-ndo nùu-í. Te na càchí tnúhu ndáá-í xii-ndo sǎ Tătá-í taxi-gá nchaa sá ná cacă<sup>n</sup>-ndó nǔú-gă nǔu na quíndáá iní ñáhá-ndó xii-í. <sup>24</sup>Te ndéé vitna vátá dúcá<sup>n</sup>-gă cada-ndo cacă<sup>n</sup>-ndó. Dico cacă<sup>n</sup>-ndó nǔú-gă nǔu ná cuìnì-ndó te taxi-gá cuendá cudǐf ndisa iní-ndó —càchí-gá xáha<sup>n</sup>-gă xii-güedé.

**Xítohó Jesucristú ní cuunu  
tnúhu-gá núú yucu ñávaha**

<sup>25</sup>Te xáha<sup>n</sup> tùcu-gá xii-güedé:  
—Mee-ni ñí chidáhu ndodo-í  
tnúhu ní cáhá<sup>n</sup>-í núú-ndó, dico  
sáá nduu te vá chidáhu-gá-í tnúhu  
cáhá<sup>n</sup>-í, chi cáhá<sup>n</sup> ndáá-na-í cuendá  
Tätä-í. <sup>26</sup>Te dává-á<sup>n</sup> cáca<sup>n</sup>-ndó núú  
Tätä-í núu ná cuini-ndó te taxi-gá,  
te núu na quindáá iní ñáhá-ndó xii  
yúhú Déhe-gá. Te ñá túú-gă xini  
ñúhu-xi sá yúhú cáca<sup>n</sup>-í núú-gă  
cuendá-ndó chi cáca<sup>n</sup> méé-nă-ndó.  
<sup>27</sup>Chi mee Tätà-í ío cùu iní ñáhá-gă  
xii-ndo cuendá cúú iní ñáhá-ndó  
xii-í, te sàndáá iní-ndó să núú-gă ní  
quee-í véxi-í. <sup>28</sup>Te yúhú ní quee-í  
núú Tätà-í véxi-í ñuyúú-a, te vitna  
dàndóo-í ñuyúú-a te núhú-í núú  
ndécú-gă —càchí-gă xáha<sup>n</sup>-gă  
xii-güedé.

<sup>29</sup>Te ní xáha<sup>n</sup> cuè téé xica cuu  
ndihi-gă:

—Vitna chi càhá<sup>n</sup> ndáá-nă-n, ñá  
túú-gă chidáhu-n tnúhu càhá-n.

<sup>30</sup>Te vitna ní xini-ndí sá ño váha  
cùtnuní iní-n nchàa nacúáa cùu, te  
cùtnuní iní-n nchàa nacúáa sàni  
iní nchaa ñáyiú. Te ñá túú xini  
ñúhu-xi nágá nducu tnúhu-yu núú-n  
chi nchaa sa ní dátúu-n núú-yu.  
Te xíá<sup>n</sup> núu sàndáá iní-ndí sá  
núú Yă Ndiöxí ní quee-n véxi-n —  
càchí-güedé xáha<sup>n</sup>-güedé xii-gă.

<sup>31</sup>Te ní xáha<sup>n</sup> Jèsús:

—¿Te vitna sàndáá iní-ndó-ă<sup>n</sup>?

<sup>32</sup>Vitna ní sáá nduu ñí sáá òré sá  
ncháá nchòhó cuténuu-ndo càa  
íí<sup>n</sup> caa úú cuu-ndo, te dàndóo mee  
ñàha-ndo xii-í. Dico ñá díú mèe dii-í  
quendóo chi ndècu ndihi-í Tätà-í.

<sup>33</sup>Duha càhá<sup>n</sup>-í cuendá cuu váha

iní-ndó cùndecu-ndo, chi ñuyúú-a  
cuu úhú iní ñáhă-yu xii-ndo, dico ni  
vă yùhú-ndó chi yùhú sa ní dáquée  
tìhù-í nchaa sá cuèhé sá dúhá  
lò ñuyúú-a —càchí-gă xáha<sup>n</sup>-gă  
xii-güedé.

**Jèsús xicá<sup>n</sup> táhú-gă núú  
Tätä-gă Dútú Ndiöxí cuendá  
cue téé xica cuu ndihi-gă**

**17** Te sátá dúcá<sup>n</sup> ñí cáhá<sup>n</sup> Jèsús  
te ní ndacoto-gă andiú, te  
ní xáha<sup>n</sup>-gă xii Tätà-gă Dútú Ndiöxí:  
—Táu, vitna ní sáá nduu càda  
cahnu ñaha-n xii-í cuendá duca<sup>n</sup>  
càda cahnu ñaha-í xii-n. <sup>2</sup>Chi mee-n  
ñí cachí-n sá táxí tnùn-í nchaa  
ñáyiú ñuyúú-a, te dàcacu nihnu-í  
nchaa ñáyiú ní cachí-n nàníhí tàhú.  
<sup>3</sup>Te cundecu ndihi-ö-yu ñi caa ñi  
quíh<sup>n</sup>, chi sàndáá iní ñáhă-yu sá íí<sup>n</sup>  
dìi díí-ñi yòhò cúú-n Ndiöxí ndisa,  
te duca<sup>n</sup> xini ñáhă-yu xii yúhú  
Jesucristú téé ní tendaha-n véxi  
ñuyúú-a.

<sup>4</sup>Te yúhú ní chiñuhu ñaha-í xii-n  
ñuyúú-a, te ní xínu chùu<sup>n</sup> ní cachí-n  
càda-í. <sup>5</sup>Táu, vitna na nàsáá-í núú-n  
te cada càhnu ñaha-n xii-í dàtná ní  
xóo cada càhnu ñaha-n xii-í ndéé  
cùtnàhá vátá ngáva-gă ñuyúú.

<sup>6</sup>Te nchaa ñáyiú ní nanducu  
nihnu-n tnuú nchaa ñáyiú ndècu  
ichi cuehé ichi duha, ní taxi  
cuendá-n-yu, te ní xáha<sup>n</sup>-í xii-yu  
yoo cùu-n. Te cuendá-n cúú-yu, te  
ní taxi cuendá-n-yu, te ní sàndáá  
iní-yu tnúhu-n. <sup>7</sup>Te vitna ní cutnùn-í  
iní-yu sá ncháá tnúhu ndècu  
ndihi-í diu-ñi mee-n ñí taxi-n. <sup>8</sup>Te  
ní dánèhé-í-yu nchaa tnúhu sá ñí  
dánèhé ñáhá-n xii-í, te ní sàndáá  
iní-yu. Te ní cutnùn-í iní-yu sá núú-n

nĩ quee-í véxi-í, te ní sándáá iní-yu sá yòhó ní tendaha ñàha-n xii-í véxi-í ñuyíú-a.

<sup>9</sup>Te yúhú càhá<sup>n</sup> ndàhú-í núú-n cuendá nchaa ñáyiú ní taxi cuendá-n. Te ñá túú càhá<sup>n</sup> ndàhú-í núú-n cuendá ñáyiú ndècu ichi cuehé ichi duha, chi cuendá nchaa ñáyiú ní taxi cuendá-n càhá<sup>n</sup>-í, chi cuendá-n cùú-yu. <sup>10</sup>Te nchaa sá cúú cuendá-í cúú-xí cuendá-n, te nchaa sá cúú cuendá-n cùu-xi cuendá-í tnàhá-í. Te xĩquide càhnu ñahá-yu xii-í.

<sup>11</sup>Te yúhú vá cùndècu-gá-í ñuyíú-a, dico mèe-yu chi cundecu-ní-yu, te yúhú ndixi-í núú ndécú-n. Táú, yòhó ío yĩñuhu ndecu-n, te yúhú càhá<sup>n</sup> ndàhú-í núú-n sã ní yùhu ni iní-n còto-n nchaa ñáyiú ní taxi cuendá-n, ñáyiú ní sándáá iní tnúhu-í cuendá sá íí<sup>n</sup>-ní ìchi cuú-yu cundecú-yu dàtná íí<sup>n</sup>-ni cùu nchoo. <sup>12</sup>Chi òré ndécù-í ndihí-yu ñuyíú-a ní xito-í-yu nàcuáa cùu iní-n, te ni íí<sup>n</sup>-yu ñá túú ní xíta nihnu, chi íí<sup>n</sup>-ni te Jùdás ní xíta nihnu tnàhí-dé, te duca<sup>n</sup> nĩ cuu cuendá sá nĩ quee ndáá-xi nàcuáa yòdo tnuní núú tütú-n.

<sup>13</sup>Te vitna sa ndixi-í núú ndécú-n, dico nini ndècu-gá-í ñuyíú-a duha càhá<sup>n</sup>-í cuendá sá cúdíí iní-yu dàtná cúdíí iní mèe-í. <sup>14</sup>Te yúhú ní dánèhé-í-yu tnúhu-n, dico nchaa ñáyiú ndècu ichi cuehé ichi duha cùu úhú iní ñáhã-yu xií-yu cuendá sá ñà túú-gã ndécú-yu ichi cuèhé ichi duha-á<sup>n</sup> dàtná yúhú ñá túú ndècu-í ichi-á<sup>n</sup>. <sup>15</sup>Te ñá túú càchí-í sá xócàní-n-yu ñuyíú-a, dico càhá<sup>n</sup> ndàhú-í núú-n sã dácăcu nihnú-n-yu núú yucu ñävãha. <sup>16</sup>Te yúhú ñá

túú ndècu-í ichi cuèhé ichi duha, te duca<sup>n</sup> mèe-yu ñá túú-gã ndécú-yu ichi cuèhé ichi duha. <sup>17</sup>Te ío na cùndecu yihí ñuhu-gá-yu núú-n dàcuahá-yu tnúhu-n, chi cùu-xi íí<sup>n</sup> tnúhu ndáá. <sup>18</sup>Te dàtná ní tendaha ñàha-n xii yúhú véxi-í tnuú nchaa ñáyiú ndècu ichi cuehé ichi duha, duca<sup>n</sup> càda-í tendaha-í-yu quíhí<sup>n</sup>-yu càhá<sup>n</sup>-yu tnúhu-í tnuú nchaa ñáyiú ndècu ichi cuehé ichi duha. <sup>19</sup>Te yúhú ndécú yĩñuhu-í núú-n, te cada ñaha-n xii-í nàcuáa cùu iní-n sã cuendá-yu, te duca<sup>n</sup> te cundecu yĩñuhú-yu núú-n dàcuahá-yu tnúhu-n.

<sup>20</sup>Te ñá díú cuendá mee-ni ñáyiú sa ní sándáá iní-xi càhá<sup>n</sup> ndàhú-í núú-n, chi tnàhá cuendá nchaa ñáyiú na quèndáá iní ñáhã xii-í ndéé idá-gã nũu na cùndedóho-yu tnúhu càhá<sup>n</sup> ñáyiú na tøndaha-í. <sup>21</sup>Te xicá<sup>n</sup> táhù-í núú-n sã nchãã-yu íí<sup>n</sup>-nã ichi na cùú-yu, te íí<sup>n</sup>-nã cani iní ndihí ñáhã-yu xii-o dàtná cúú nchòo íí<sup>n</sup>-ni cuu-o. Te duca<sup>n</sup> íí<sup>n</sup>-ná cuu-o ndihí-yu cuendá sá ná quèndáá iní nchaa ñáyiú ndècu ichi cuehé ichi duha sá díú-n nĩ tendaha ñàha-n xii-í véxi-í ñuyíú-a. <sup>22</sup>Te nchaa sá vãha ní taxi-n ndècu ndihí-í ní dánèhé-í-yu cuendá sá íí<sup>n</sup>-nã cuú-yu cundecú-yu dàtná ndécú nchòo. <sup>23</sup>Te yúhú cundecu ndihí-í-yu, te yòhó cundecu ndihí ñaha-n xii yúhú cuendá íí<sup>n</sup>-nã cuu ndisá-yu cundecú-yu. Te duca<sup>n</sup> te cutnùní iní nchaa ñáyiú ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúú iní ñáhã-n xii yúhú.

<sup>24</sup>Táú, mee-n nĩ taxi cuendá-n-yu, te cuiní-í sá cùndécú-yu núú

cúndecu-í cuendá quini-yu sá quidé cãhnu ñaha-n xii-í chi duca<sup>n</sup>-ni cùu iní ñáhá-n xii yúhú ndéé cútnàhá vátá ngãva-gá ñuyíú. <sup>25</sup>Táu, yòhó ío yĩñùhu ndecu-n. Te ñáyiú ndecu ichi cuehé ichi duha ñá túú xini ñáhá-yu xii-n, dico yúhú chi xini ñáhá-í xii-n, dico ñáyiú ní sándáá iní ñáhá xii-í sa xini-yu sá dǫú-n ñi tendaha ñaha-n xii-í véxi-í ñuyíú-a. <sup>26</sup>Te sa xãha<sup>n</sup>-í xii-yu yoo cùu-n, te dǫu-ni duca<sup>n</sup> càda-í cuendá cuu iní tnáhã-yu dàtná cúú iní ñáhá-n xii-í, te duca<sup>n</sup> cùndecu-í ndihí-yu — cãchí-gá xãha<sup>n</sup>-gã xii Tãtã-gã Dútú Ndiòxi.

**Ní tnií-güedé Jèsús ndecá ñaha-güedé cuáhá<sup>n</sup>**

(Mt. 26:47-56; Mr. 14:43-50; Lc. 22:47-53)

**18** Te sátá dúcá<sup>n</sup> ñi cãhá<sup>n</sup> Jèsús, te ní quee-gá ndihi cue tée xica cuu ndihi-gá cuáhá<sup>n</sup>-güedé ndàa ingá xio yuhu yùú Cèdrón. Te yacá<sup>n</sup> cáá ñi<sup>n</sup> lahuertá, te xití lahuertá-á<sup>n</sup> cuãnguihu Jèsús ndihi cue tée xica cuu ndihi-gá. <sup>2</sup>Te té Jüdás déhe té Xímú Iscarioté tée ní sãha cuendá ñáhá xii-gá núú cuè tée cùu úhú iní ñáhá sa xini-dé lahuertá-á<sup>n</sup> chi titní xito ní sãhá<sup>n</sup> Jèsús ndihi-güedé xía<sup>n</sup>. <sup>3</sup>Núú ndáá ichi xía<sup>n</sup> ñi sáá té Jüdás ndihi vai sandadú, ndihi cue tée quide cuendá veñúhu ní techiú<sup>n</sup> ñaha cue dútú cúnùu, ndihi cue tée cùu fariséú. Te xínehe-güedé machití ndihi ñi<sup>n</sup> úú-gá sá dǫé<sup>n</sup>, te yòtnúú-güedé lintérná ndihi iti ní sáá. <sup>4</sup>Te Jèsús sa ñaha-gá nchaa nãcuáa cada ñaha-güedé xii-gá ñúú ní sãhá<sup>n</sup> tuha ñaha-gã xii-güedé, te ní xãha<sup>n</sup>-gã:

—¿Yoo nãnducu-ndo? —cachí-gá xãha<sup>n</sup>-gã xii-güedé.

<sup>5</sup>Te ní xãha<sup>n</sup>-güedé:

—Jèsús tée ñuú Nazàrét nãnducu-ndí —cãchí-güedé xãha<sup>n</sup>-güedé xii-gá.

Te ní xãha<sup>n</sup> Jèsús:

—Yúhú duca<sup>n</sup> ñani-í, te náu-í ndécú-á te núu yúhú nãnducu-ndo —cachí-gá xãha<sup>n</sup>-gã xii-güedé.

Te tnáhá té Jüdás tée ní sãha cuendá ñáhá xii-gá ndihi-güedé. <sup>6</sup>Te òré ní xãha<sup>n</sup> Jèsús sá dǫú-gã cúú tée nãnducu-güedé, te ní nacaca dùma-güedé te ní nduá-güedé ndéé ñuhu. <sup>7</sup>Te ní xícá<sup>n</sup> tnúhú tucu Jesús núú-güedé yoo nãnducu-güedé. Te ní xãha<sup>n</sup> tucu-güedé sá Jèsús tée ñuú Nazàrét nãnducu-güedé, <sup>8</sup>núú ní xãha<sup>n</sup>-nã Jèsús:

—Sa ní cãhá<sup>n</sup>-í sá dǫú yúhú duca<sup>n</sup> ñani-í, te núu yúhú nãnducu-ndo, te daña-ndo nchãa cue tée iha na nùhú-güedé —cãchí-gá xãha<sup>n</sup>-gã xii-güedé.

<sup>9</sup>Duha ní cuu chi ní quee ndáá-xi nãcuáa ní cãhá<sup>n</sup> méé Jèsús chi ní cachí-gá sá nchãá ñãyiú ní sãha cuendá ñáhá Yã Ndiòxi cundecu ndihi-gá vã cuíta nihnú-yu. <sup>10</sup>Te té Xímú, àdi Pelú chi úú dǫu-dé, néhé-dé ñi<sup>n</sup> machití, te ní tava-dé machití-á<sup>n</sup> ñi<sup>n</sup>-xi te ní xehndé-dé lóho xio cùha ñi<sup>n</sup> tée ñani Malcú ní quéndeé duú<sup>n</sup>. Te tée-á<sup>n</sup> xínú cuèchi-dé núú dütú cúnùu-gá. <sup>11</sup>Te ní xãha<sup>n</sup> Jèsús xii té Pèlú:

—Nataxúha machití-á<sup>n</sup> ñúú ñúhú-xí, chi dacuitíí sã ndóhò-í nãcuáa ní cachí Tãtã-í cunduu — cãchí-gá xãha<sup>n</sup>-gã xii-dé.

**Jèsús ndécú-gã núú dütú cúnùu-gã**

(Mt. 26:57-58; Mr. 14:53-54; Lc. 22:54)

<sup>12</sup>Te cue sandadú ndihi cue tée cúnuu-gá núú-güedé, ndihi cue tée

quide cuendá veñúhu ní tnii-güedé Jèsús, te ní dácútú ñaha-güedé. <sup>13</sup>Te ndèca ñaha-güedé xii-gá cuáhá<sup>n</sup> núu ndécú tẽ Ánás, te té Ánás-án cúu-dẽ tãtã ñadìhí té Caifás. Te té Caifás-án nĩ cuu-dé dútú cúnùu-gá cuíá-ã<sup>n</sup>. <sup>14</sup>Te ñi-u-ni tée-án nĩ xáha<sup>n</sup>-dẽ xii ñáyi u isràél sá vãha-gá sá íí<sup>n</sup>-ní tẽe na cùu-dé sá cuendá-yu nchaá-yu.

**Té Pèlú càhá<sup>n</sup>-dé núu ñáyi u sá ñà túú xini-dé Jèsús**

(Mt. 26:69-70; Mr. 14:66-68; Lc. 22:55-57)

<sup>15</sup>Te té Pèlú, àdi Xímú chi úú ñi-u-dé, ndihi ingá tucu-dé nàcuáa xica cuu ndihi-güedé Jèsús nchicú<sup>n</sup> ñáhá-güedé xii-gá cuáhá<sup>n</sup>. Te ñi<sup>n</sup> tée-án xini tñáhá-dẽ ndihi dútú cúnùu-án nũu nchicú<sup>n</sup>-dé tñáhá-dé Jèsús cuánguihu ndéé núu cáá vèhe tée cúnùu-án. <sup>16</sup>Dico té Pèlú ní ndóo-dé yuyèhe ndaa quehé, núu ní ndee tée ndihi té Pèlú-án nĩ càhá<sup>n</sup> ndihi-dé ñaha ndèé yuyèhe, te ndèca-dé té Pèlú cuánguihu. <sup>17</sup>Te ní xáha<sup>n</sup> ñaha ndéé yuyèhe-án xii té Pèlú:

—¿Náa ñá díú yòhó tñáhá-n xica cuu ndihi-n tée ndèca-güedé cuánguihu-a? —càchí-a<sup>n</sup> xáha<sup>n</sup>-a<sup>n</sup> xii-dé.

Te ní xáha<sup>n</sup> tẽ Pèlú:

—Ñáhá, ñá túú tẽe-ã<sup>n</sup> xicá cùu ndihi-ú —càchí-dé xáha<sup>n</sup>-dẽ xii-a<sup>n</sup>.

<sup>18</sup>Te ío víxi<sup>n</sup> quide-xi núu cue tée xinu cuechi, ndihi cue tée quide cuendá veñúhu ní dátñáhá-güedé ñuhú, te xínutñi teté-güedé ndihi té Pèlú.

**Dútú cúnùu nducu tñuhu-dé núu Jèsús**

(Mt. 26:59-66; Mr. 14:55-64; Lc. 22:66-71)

<sup>19</sup>Te dútú cúnùu ní xicá<sup>n</sup> tñuhú-dẽ núu Jèsús nũu nándi cùu cue tée

xica cuu ndihi-gá, te nándi sá dánèhé ñáhá-gã xii-güedé. <sup>20</sup>Te ní xáha<sup>n</sup>-gã:

—Yúhu càhá<sup>n</sup> ndodo-í núu nchaa ñáyi u cuéi xití veñúhu càhnu sá ío cúnùu, te cuéi xití nchaa dava-gá veñúhu núu tàcá nchaa ñáyi u isràél duca<sup>n</sup>-ni dānehé-í-yu, te ñá túú dàyuhu càhá<sup>n</sup>-í. <sup>21</sup>Núu vá càcá<sup>n</sup> tñuhú-n nũu-í. Càcá<sup>n</sup> tñuhú nũu nchaa ñáyi u sàcúndedóho tñuhu càhá<sup>n</sup>-í, te na càhá<sup>n</sup>-yu núu nása ndùu tñuhu càhá<sup>n</sup>-í chi xini-yu —càchí-gá xáha<sup>n</sup>-gã xii-dé.

<sup>22</sup>Te sá dúcá<sup>n</sup> nĩ càhá<sup>n</sup> Jèsús nũu ñi<sup>n</sup> tée quide cuendá veñúhu nùtni-dé tñáhá-dé te ní cani-dé ñi<sup>n</sup> déhndé nũu-gã. Te ní xáha<sup>n</sup>-dẽ:

—¿Náa cuendá duca<sup>n</sup> càhá<sup>n</sup>-n nũu dútú cúnùu-i? —cachí-dé xáha<sup>n</sup>-dẽ xii-gá.

<sup>23</sup>Te ní xáha<sup>n</sup> Jèsús xii-dé:

—Te núu nèhé ní càhá<sup>n</sup>-í te càhá<sup>n</sup>-n nása ndùu tñuhu ní càhá<sup>n</sup>-í, te yúhú càhá<sup>n</sup> váha-í te duca<sup>n</sup> caniha-n —cachí-gá xáha<sup>n</sup>-gã xii-dé.

<sup>24</sup>Te ndùtu yoho-ni Jesús ní dánùhú ñáhá tẽ Ánás xii-gá ndaha té Caifás dútú cúnùu-gá.

**Té Pèlú càhá<sup>n</sup> tucu-dé núu ñáyi u sá ñà túú xini-dé Jèsús**

(Mt. 26:71-75; Mr. 14:69-72; Lc. 22:58-62)

<sup>25</sup>Te té Pèlú nùtni teté-ni-dé, te ní xáha<sup>n</sup>-güedé xii-dé:

—¿Náa ñá díú tñáhá yòhó xicá cùu ndihi tée ndèca-ndí véxi-ã<sup>n</sup>? —càchí-güedé xáha<sup>n</sup>-güedé xii-dé.

Te ní xáha<sup>n</sup> tẽ Pèlú:

—Ñáhá, ñá túú tẽe-ã<sup>n</sup> xicá cùu ndihi-ú —càchí-dé xáha<sup>n</sup>-dẽ xii-güedé.

<sup>26</sup>Te ñi<sup>n</sup> ñani tñáhá tẽe ní xehndé té Pèlú lóho-xi-á<sup>n</sup> xínú cuèchi-dé

tnàhá-dé núú dùtú cúnùu. Te tée-á<sup>n</sup> ní xáha<sup>n</sup>-dë xii té Pèlú:

—¿Náa ñá díú tnàhá-n ndìhi-n-dé ní xiní ñàhà-í òré ní tñii-ndí-dé xití lahuèrtá? —càchí-dé xàha<sup>n</sup>-dë xii-dé.

<sup>27</sup>Te té Pèlú ní xáha<sup>n</sup> tùcu-dé sá ñà díú-dë, te òré-á<sup>n</sup> ní cana ì<sup>n</sup> líhi.

### Jèsús ndécú-gã núú tã Pilatú

(Mt. 27:1-2, 11-14; Mr. 15:1-5; Lc. 23:1-5)

<sup>28</sup>Te ní ndeñuhu-güedé Jèsús vehe té Caífás, te ndèca ñaha-güedé xii-gá cuáhá<sup>n</sup> vechiù<sup>n</sup> tée cùu gobiernú. Te sa ta cùditó-ni-gá cuáhá<sup>n</sup> ñùu ñá ní cuíní cue tée isràèl quíhu-güedé xití vechiù<sup>n</sup> tée cùu gobiernú-á<sup>n</sup>. Te núu ñi quíhu-güedé vechiù<sup>n</sup>-á<sup>n</sup> ñá, te vá cùú-gã quíhu-güedé cudini-güedé vico pàscuá ní cùu chi duca<sup>n</sup> tnàhí quide-güedé. <sup>29</sup>Núu té Pilatú tée cùu gobiernú ní quee-dé vechiù<sup>n</sup>-dé ní cãhá<sup>n</sup> ndìhi ñaha-dë xii-güedé, te ní xáha<sup>n</sup>-dë:

—¿Ná cuéchi ní quide tée-a núu ndèca-ndo-dé véxi? —càchí-dé xàha<sup>n</sup>-dë xii-güedé.

<sup>30</sup>Te ní xáha<sup>n</sup>-güedé:

—Te núu dícó ñá túú cuéchi-dé-á<sup>n</sup> te vá cándèca-ndí-dé quixi núú-n ní cùu —cachí-güedé xàha<sup>n</sup>-güedé xii-dé.

<sup>31</sup>Te ní xáha<sup>n</sup> tùcu té Pilatú xii-güedé:

—Chí cándèca-dé cuánùhú, te cada ndáá-ndó cuéchi-dé ñacuáa càa leí méé-ndó —càchí-dé xàha<sup>n</sup>-dë xii-güedé.

Te ní xáha<sup>n</sup>-güedé:

—Dico nchúhú ñáyiù isràèl chi ñá túú dùca<sup>n</sup> taxi tñuní lèi sá cáhní-ndí —càchí-güedé xàha<sup>n</sup>-güedé xii-dé.

<sup>32</sup>Te duca<sup>n</sup> ní cuu chi dacuitíí ní quee ndáá-xi ñacuáa ní cãhá<sup>n</sup> méé Jèsús cada-xi cuú-gá. <sup>33</sup>Te cuándihu té Pilatú vechiù<sup>n</sup>-dé, te ní cana-dé Jèsús ní xícá<sup>n</sup> tñúhú-dë núú-gã, te xàha<sup>n</sup>-dë:

—¿Yòhó yíndàha-n ñáyiù isràèl-á<sup>n</sup>? —càchí-dé xàha<sup>n</sup>-dë xii-gá.

<sup>34</sup>Te ní xáha<sup>n</sup> Jèsús:

—¿Te xíã<sup>n</sup> cãhá<sup>n</sup>-n sã vëxi iní méé-n, àdi ió ì<sup>n</sup> ñáyiù ní cachí tñúhu xii-n cuendá-í? —càchí-gá xáha<sup>n</sup>-gã xii-dé.

<sup>35</sup>Te ní xáha<sup>n</sup> tã Pilatú xii-gá:

—Ñá díú tée isràèl cùú-í ñùu duca<sup>n</sup> cãhá<sup>n</sup>-n, chi cue ñaní tnàhá-n cué tée isràèl ndìhi cue dùtú cúnùu ní taxi cuendá ñáhá-güedé xii-n ìha. ¿Te ná ní quide-n? —càchí-dé xàha<sup>n</sup>-dë xii-gá.

<sup>36</sup>Te ní xáha<sup>n</sup> Jèsús:

—Ñá díú tée ñuyíú-a cùu-í te ni ñà túú vëxi-í taxi tñuní-í ñuyíú-a, chi núu dícó iha tàxi tñuní-í á<sup>n</sup> te cue tée xica cuu ndìhi-í nàá-güedé ndìhi cue tée isràèl cuendá sá vã tñí ñàha-güedé xii-í ní cùu, dico ñá túú vëxi-í sá táxi tñuní-í ñuyíú-a —càchí-gá xáha<sup>n</sup>-gã xii-dé.

<sup>37</sup>Te ní xáha<sup>n</sup> tã Pilatú:

—¿Te tée yíndaha ñáyiù cùu-ó vání? —càchí-dé xàha<sup>n</sup>-dë xii-gá.

Te ní xáha<sup>n</sup> Jèsús:

—Te dàtná càchí-n-á<sup>n</sup> yíndaha ndisa-í ñáyiù, chi yúhú véxi-í ñuyíú-a te iha ní cacu-í te cãhá<sup>n</sup>-í mee-ni tñúhu ndáá. Te nchaa ñáyiù na cùdíí iní-xi tñúhu ndáá, te tedóho-yu nchaa tñúhu cãhá<sup>n</sup>-í —càchí-gá xáha<sup>n</sup>-gã xii-dé.

<sup>38</sup>Te ní xáha<sup>n</sup> tã Pilatú:

—¿Te ná cúú-tu tñúhu ndáá-ái<sup>n</sup>? —càchí-dé xàha<sup>n</sup>-dë xii-gá.



**Càchí-güedé sá cáhni-güedé Jèsús***(Mt. 27:15-31; Mr. 15:6-20; Lc. 23:13-25)*

Te sátá nǐ yáha ní xícá<sup>n</sup> tnúhú tǎ Pìlatú núú Jèsús, te ní quee tucu-dé quehé, te xǎha<sup>n</sup>-dǎ xii cue tée isràél:

—Ná túú nǎ cuéchi tée-a. <sup>39</sup>Te

váha-ni chi duca<sup>n</sup> tnàhí quide nchohó sá ndì tnahá nduu vico pascuá cuiní-ndó sǎ dácäcu-í iǐ<sup>n</sup> tée yǐhi vecaá. Te núu cuiní-ndó te na dácäcu-í tée yìndaha ñaha xii-ndo —cachí-dé xǎha<sup>n</sup>-dǎ xii-güedé.

<sup>40</sup>Te sá dúcá<sup>n</sup> nǐ cáhá<sup>n</sup>-dé, núu nchaa-güedé níhi ní cáhá<sup>n</sup>-güedé, te xǎha<sup>n</sup>-güedé:

—iVá dácäcu-n tǎe-á<sup>n</sup>, té Barràbás dácäcu-n! —càchí-güedé xǎha<sup>n</sup>-güedé xii-dé.

Te té Barràbás-á<sup>n</sup> nǐ cuu-dé iǐ<sup>n</sup> ñadúhú.

**19** Te té Pìlatú ní táuchíú<sup>n</sup>-dǎ ní tñi ñaha cuè sandadú xii Jèsús, te ní caniha-güedé xii-gá ndìhi ñii. <sup>2</sup>Te ñu-ni cue tée-á<sup>n</sup> nǐ cadúha-güedé iǐ<sup>n</sup> coróná iñu ní chihi-güedé díquí-gǎ, te ní dáquǐ nuu ñaha-güedé xii-gá iǐ<sup>n</sup> dóo tícuèhé víhí. <sup>3</sup>Te ní sáhá<sup>n</sup> ndehe yatni-gá-güedé núú-gǎ, te ní xǎha<sup>n</sup>-güedé:

—Ío càhnu cuu yohó tée yìndaha ñaha xii ñáyiú isràél! —càchí-güedé xǎha<sup>n</sup>-güedé cúdíquí ndé ñáhá-güedé xii-gá.

Te ní cani-güedé déhndé núú-gǎ.

<sup>4</sup>Te ní quee tucu té Pìlatú quehé te ní xǎha<sup>n</sup>-dǎ xii nchaa ñáyiú xìndecu quehé:

—Te cundehe-ndo-dǎ ná ndéé ñùhu-í-dé iha, chi yúhú sǎha-í cuèndá sá ñà túú cuéchi-dé —càchí-dé xǎha<sup>n</sup>-dǎ xii-yu.

<sup>5</sup>Te ní ndeñuhu ñaha té Pìlatú xii Jèsús xití vechiú<sup>n</sup>-dé te ñùhu iǐ<sup>n</sup> coroná iñu díquí-gǎ, te nihnu-gá dóo tícuèhé víhí-ǎ<sup>n</sup>. Te ní xǎha<sup>n</sup> té Pìlatú xii-yu:

—iNái-dé-a! —càchí-dé xǎha<sup>n</sup>-dǎ xii-yu.

<sup>6</sup>Te ní xiní ñáhá cuè dútú cúnùu ndìhi cue tée quide cuendá veñùhu.

Te ní cuáá-güedé, te xǎha<sup>n</sup>-güedé: —iCata caa-dé! iCata caa-dé núú cùrúxí! —càchí-güedé xǎha<sup>n</sup>-güedé xii-dé.

Te ní xǎha<sup>n</sup> té Pìlatú:

—Váha-gá ñuu candeca mee-ndo-dǎ quǐhí<sup>n</sup> cata caa-ndo-dǎ núú cùrúxí, chi yúhú cútnùni iní-í sá ñà túú na cuéchi-dé —càchí-dé xǎha<sup>n</sup>-dǎ xii-güedé.

<sup>7</sup>Te ní xǎha<sup>n</sup> cuè tée isràél:

—Lèi ndécú ndìhi nchúhú càchí-xi sá dàì cuú-dé, chi càchí-dé sá Dèhe Yá Ndiòxí cúú-dǎ —càchí-güedé xǎha<sup>n</sup>-güedé xii-dé.

<sup>8</sup>Te sá dúcá<sup>n</sup> nǐ xǎha<sup>n</sup>-güedé xii té Pìlatú, te vaa-gá ní yùhú-dé. <sup>9</sup>Núu cuándihu tucu-dé vechiú<sup>n</sup>-dé, te ní xǎha<sup>n</sup> tucu-dé xii Jèsús:

—¿Te yòhó ndéè tée cùu-n-i? —cachí-dé xǎha<sup>n</sup>-dǎ xii-gá.

Dico Jèsús ñà túú ní cáhá<sup>n</sup>-gá.

<sup>10</sup>Núu ní xǎha<sup>n</sup> té Pìlatú xii-gá:

—¿Te vá càchí tnùhu-n ñuu ndéè tée cùu-n-u? ¿Náa ñà túú xiní-n sǎ yúhú táxí tnùn-í, te cuu-ni tauchiú<sup>n</sup>-í cata caa ñaha-güedé xii-n núú cùrúxí cuú-n, te cuu-ni dácäcu ñaha-í xii-n-ǎ<sup>n</sup>? —càchí-dé xǎha<sup>n</sup>-dǎ xii-gá.

<sup>11</sup>Te ní xǎha<sup>n</sup> Jèsús:

—Yòhó ñà túú sǎ táxí tnùn-í ñáhá-n xii yúhú ní cùu núu ñà túú Yá Ndiòxí ní cuiní-gá sá dúcá<sup>n</sup> cùnduu,

te tée ní taxi cuèndá ñáhá xii-í núu-n tée-á<sup>n</sup> ïo-gá ndècuéchi-dé dácúxí yòhò —càchí-gá xáha<sup>n</sup>-gã xii-dé.

<sup>12</sup>Te òré-á<sup>n</sup> ñí nguíta té Pilatú ndúcú-dé nàcuáa cada-dé dácácu-dé Jèsús ní cùu, dico cue tée isràél ní nguíta-güedé ní cuáá-güedé, te xáha<sup>n</sup>-güedé:

—Te núu na dácácu-n tée-á<sup>n</sup>, te ñá dǫú tée tnàhá tnúhu ndíhi té Cèsár cúu-n. Chi ndèda-ni càa tée na càchí sá cúu-dě tée yìndaha ñaha xii ñáyiú cùu úhú iní-dé té Cèsár. Te té Jèsús-á<sup>n</sup> càchí-dé sá táxí tnùní-dé —càchí-güedé xáha<sup>n</sup>-güedé xii-dé.

<sup>13</sup>Te sá dúcá<sup>n</sup> ñí xáha<sup>n</sup>-güedé xii té Pilatú núu ní quee-dé ndíhi Jèsús cuáhá<sup>n</sup> ndíhi ñaha-dě corrèdór núu ñí queé mee-ni yúú vǎha núu ñúhú, te xíá<sup>n</sup> nání-xí Gǎbatá tnúhu hèbreú. Te xíá<sup>n</sup> ndécú xilé sácòo nchihi té Pilatú xèhndé-dé cuéchi ñáyiú, núu ní nucóo-dé núu xilé-dé òré ní quexìo-dé ndíhi Jèsús. <sup>14</sup>Te cùu-xi datná cuádava nduu, nduu víspré vico pàscuá. Te ní xáha<sup>n</sup> tǎ Pilatú xii ñáyiú isràél:

—iNái tée yìndaha ñaha xii-ndo-a! —cachí-dé xáha<sup>n</sup>-dě xíí-yu.

<sup>15</sup>Te ní cuáá-yu, te xǎhǎ<sup>n</sup>-yu:

—iCahni-dé! iCahni-dé! iCata caa-dé núu cùrúxí! —càchí-yu xǎhǎ<sup>n</sup>-yu.

Te ní xáha<sup>n</sup> tǎ Pilatú:

—¿Te yúhú cata caa-í tée yìndaha ñaha xii-ndo-u? —cachí-dé xáha<sup>n</sup>-dě xíí-yu.

Te cue dútú cúnùu ní xáha<sup>n</sup>-güedé:

—Nchúhú ñá túú-gǎ tée yìndaha ñaha xii-ndí, chi ñí<sup>n</sup> dǫi-ni té Cèsár yìndaha ñaha-dé xii-ndí —càchí-güedé xáha<sup>n</sup>-güedé xii-dé.

<sup>16</sup>Te té Pilatú ní xáha<sup>n</sup>-dě ní quehe<sup>n</sup> cuèndá-güedé Jèsús ndécá ñaha-güedé cuáhá<sup>n</sup> cata caa ñaha-güedé núu cùrúxí.

**Sàta caa-güedé Jèsús núu cùrúxí**

(Mt. 27:32-44; Mr. 15:21-32; Lc. 23:26-43)

<sup>17</sup>Te ní quee Jèsús nchídó-gǎ cùrúxí cuáhá<sup>n</sup> ñí<sup>n</sup> xichi núu nání Yìqui Dǫíqui Ndǫyi. Te tnúhu hèbreú queé-xí Gǫlgotá. <sup>18</sup>Te yàcá<sup>n</sup> ní sata caa ñaha-güedé xii-gá núu cùrúxí-á<sup>n</sup>. Te xio xio dǫi<sup>n</sup>-gá ní sata caa-güedé úu cue tée ndècu ndisa cuéchi-xi dǫi-ni núu cùrúxí tucu. <sup>19</sup>Te ní táuchíú<sup>n</sup> tǎ Pilatú ní taxi ndecu-güedé ñí<sup>n</sup> sá ndèé lètrá núu cùrúxí tá càa-gá, te duha càchí lètrá-á<sup>n</sup>: “Jèsús tée ñúú Nazàrét, tée yìndaha ñaha xii ñáyiú isràél”, duha càchí-xi. <sup>20</sup>Te vǎi ñáyiú isràél ní xiní-yu nàcuáa càhá<sup>n</sup> lètrá-á<sup>n</sup>, chi yatni-ni yuhu ñúú ní sata caa ñaha-güedé xii-gá núu cùrúxí. Te lètrá-á<sup>n</sup> càhá<sup>n</sup>-xi tnúhu hèbreú, te càhá<sup>n</sup>-xi tnúhu grégú, te càhá<sup>n</sup>-xi tnúhu làtín. <sup>21</sup>Te ní xáha<sup>n</sup> cuè dútú cúnùu xii té Pilatú:

—Vá táuchìu<sup>n</sup>-n tee-güedé lètrá càhá<sup>n</sup>-xi “Tée yìndaha ñaha xii ñáyiú isràél” ní cùu, vǎha-gá tauchìu<sup>n</sup>-n tee-güedé lètrá càhá<sup>n</sup>-xi “Tée càchí yìndaha ñaha xii ñáyiú isràél ní cùu” —cachí-güedé xáha<sup>n</sup>-güedé xii-dé.

<sup>22</sup>Te ní xáha<sup>n</sup> tǎ Pilatú:

—Nàcuáa ní táuchíú<sup>n</sup>-í ní tee-güedé te duca<sup>n</sup> quèndóo-xi —càchí-dé xáha<sup>n</sup>-dě xii-güedé.

<sup>23</sup>Te sátá ñí sata caa ñaha cue sandadú xii Jèsús núu cùrúxí, te cùmí xichi ní quide-güedé dóó-gǎ, te ñí<sup>n</sup> ñí<sup>n</sup> xichi dóó-gǎ ní càhñu cue

sandàdú-á<sup>n</sup>. Te ndècu ìí<sup>n</sup> dóó-gǎ dóó cání ñà túú ní tǐcu. <sup>24</sup>Te cuendá dóó-ǎ<sup>n</sup> ñí xítàha cue sandadú-á<sup>n</sup>:

—Vá ndátá-ó dǒó-a, váha-gá ñúu na còto ndéé-ó cuendá quíní-ó ndédacàa-o cuu cuendá-ó — cǎchí-güedé xítàha-güedé.

Te duca<sup>n</sup> ñí quide-güedé chi ní quee ndáá-xi ñàcuáa càhá<sup>n</sup>-xi núú tütú Yǎ Ndiǒxí núú cǎchí-xi: “Títñí xichi ní cǎhñu-güedé dóò-í. Te ní xito ndéé-güedé cuendá cutnùní iní-güedé ndédacàa-güedé níhí-güedé dóò-í”, duha cǎchí-xi núú tütú-gá. Te sá dúcá<sup>n</sup> càhá<sup>n</sup>-xi núú tütú Yǎ Ndiǒxí ñúu xǎ<sup>n</sup> duca<sup>n</sup> ñí quide cue sandàdú-á<sup>n</sup>.

<sup>25</sup>Te yatni ðñí curúxí núú tácaà Jesús nùtnñí ñǎná-gǎ, ndihí cùhú-xi, ndihí tá Màriá ñàðihí té Clèofás, ndihí tá Màriá Magdalèná. <sup>26</sup>Te ní xiní Jèsús ñǎná-gǎ nùtnñí-a<sup>n</sup> ðñí ìí<sup>n</sup> téé ní xica cuu ndihí-gá, téé ío cùu iní-gá, te ní xáha<sup>n</sup>-gǎ xii ñǎná-gǎ:

—Ñáá, téé nùtnñí-á<sup>n</sup> nduu-dé ðàtná déhe mee-n —cǎchí-gá xáha<sup>n</sup>-gǎ xii-a<sup>n</sup>.

<sup>27</sup>Te ní xáha<sup>n</sup>-gǎ xii téé ní xica cuu ndihí-gá-á<sup>n</sup>:

—Ñaha-á<sup>n</sup> nduu-a<sup>n</sup> ðàtná ñǎná méé-n —cǎchí-gá xáha<sup>n</sup>-gǎ xii-dé.

Núu ndéé dàvá-á<sup>n</sup> ñí nduu ñǎná ñáhá tǎe-á<sup>n</sup> xii ñǎná-gǎ.

### Ní xíhí Jèsús

(Mt. 27:45-56; Mr. 15:33-41; Lc. 23:44-49)

<sup>28</sup>Te ní cutnùní iní Jèsús sá ñí ndihí chiù<sup>n</sup> ní táhú Tǎtá-gǎ Dútú Ndiǒxí ní quide-gá ñúu ní cachí-gá: —Yìchí-í ndute —cǎchí-gá.

Te duha ní càhá<sup>n</sup>-gá chi ní quee ndáá-xi ñàcuáa càhá<sup>n</sup>-xi núú tütú Yǎ Ndiǒxí.

<sup>29</sup>Te ndècu ìí<sup>n</sup> lítu ñùhu ndudí íá. Te sá dúcá<sup>n</sup> ñí càhá<sup>n</sup>-gá sá yìchí-gá ndute, núu xǎ<sup>n</sup> ní quehe<sup>n</sup>-güedé cǎchí te ní chindóyo-güedé xití ndudí íá-ǎ<sup>n</sup>, te ní chinenu-güedé díquí ìí<sup>n</sup> dité yutnu ñàni hisópó, te ní ndocani-güedé ní chihi-güedé yuhu-gá. <sup>30</sup>Te sátá ñí xihí-gá ndudí íá-ǎ<sup>n</sup>, te cǎchí-gá:

—Vitna ní dǎxínu cava-í nchaa chiù<sup>n</sup> ní cachí Tǎtá-í cada-í —duha ní cachí-gá.

Te ní xócuíta dúcú<sup>n</sup>-gǎ ndàa núú-gǎ, te ní xíhí-ni-gá.

**Ìí<sup>n</sup> sandàdú ní caá<sup>n</sup>-dé yiqui naha Jèsús ndihí ìí<sup>n</sup> pùyá yíhí caá núú-xi**

<sup>31</sup>Te cuendá sá ndùu vispré vico pàscuá cúu-xí ñúu ñá ní cuíní cue téé isràél cundecu-ni yiqui cùñú-gá núú cùrúxí ndihí yiqui cùñú cue téé ní sata caa-güedé ðñí-gá, chi cuendá nduu tnéé-á<sup>n</sup> cúu-xí ndùu ndetatú ñáyíu, te ío quide cahnú-yu nduu-á<sup>n</sup>, núu ní xáha<sup>n</sup>-güedé xii té Pilatú sá táuchìu<sup>n</sup>-dé quíh<sup>n</sup> cue téé cahnú-güedé díhí<sup>n</sup> Jèsús ndihí díhí<sup>n</sup> cue téé tàcaa ndihí-gá, te xocàni-güedé yiqui cùñú-gá ndihí yiqui cùñú-güedé yàcá<sup>n</sup>. <sup>32</sup>Te sátá dúcá<sup>n</sup> te ní sáhá<sup>n</sup> cue sandàdú ní sǎhnú-güedé díhí<sup>n</sup> cue téé tàcaa xio xio ðñí Jesús. <sup>33</sup>Te òré ní cuyatni-güedé núú-gǎ, te ní xiní-güedé sá sà ní xíhí-gá ñúu ñá ní sǎhnú-güedé díhí<sup>n</sup>-gá.

<sup>34</sup>Dico ìí<sup>n</sup> sandàdú-á<sup>n</sup> ñí cúxi-dé pùyá néhé-dé ìí<sup>n</sup> xio yiqui naha-gǎ, te yíhí caá núú-xi núu ní caá<sup>n</sup>-xi yiqui naha-gǎ ní quee níñí ndihí ndute cuí. <sup>35</sup>Te yúhú té Juáá téé ní cadúha tutú-a ní xiní-í ñàcuáa ní cuu ní xíhí Jèsús, te xǎ<sup>n</sup> ñúu càhá<sup>n</sup>

ndáá-í cuendá quíndáá iní-ndó. <sup>36</sup>Te duca<sup>n</sup> nǐ cuu ñá ní sǎhnú-güedé dǐhí<sup>n</sup> Jèsús, chi ní quee ndáá-xi nàcuáa càhá<sup>n</sup>-xi núú tütú Yǎ Ndiöxí núú càchí-xi: “Vá càhnú-güedé ni ì<sup>n</sup> yiqui-gá”, duha càchí-xi. <sup>37</sup>Te duca<sup>n</sup> nǐ quide-güedé Jèsús ní caá<sup>n</sup>-güedé yiqui naha-gǎ, chi ingá xichi núú tütú Yǎ Ndiöxí càchí-xi: “Sáá nduu te quiní-güedé ì<sup>n</sup> téé ní dánícuèhé-güedé”, duha càchí-xi.

### Chìndúxi-güedé Jèsús

(Mt. 27:57-61; Mr. 15:42-47; Lc. 23:50-56)

<sup>38</sup>Te sáta dúcá<sup>n</sup> nǐ cuu, te té Chèé téé ñúú Arimateá tñáhá-dé ní sándáá iní-dé tñúhu Jèsús dico dayuhu, chi ní xóo yùhú-dé cue téé cùnuu núú ñǎyiu isràél. Te téé-á<sup>n</sup> nǐ xáha<sup>n</sup>-dǎ xii té Pilatú nǎu vá dáñá-dǎ canehe-dé yiqui cùñú Jèsús quíhí<sup>n</sup> chindúxi-dé, te té Pilatú ní xáha<sup>n</sup>-dǎ xii-dé sá cùú cànehe-dé yiqui cùñú Jèsús quíhí<sup>n</sup>, núú ní sáhá<sup>n</sup>-dé ní nuu nehe-dé yiqui cùñú-gá núú cùrúxí nchídó-dǎ cuáhá<sup>n</sup>. <sup>39</sup>Te té Nicòdemú téé ní sáhá<sup>n</sup> niú ní cáhá<sup>n</sup> ndíhi-dé Jèsús ndéé díhna, téé-á<sup>n</sup> néhé-dǎ ócò úxí kíllú yuchi ní cuáha mee-ni yúcu sǎ nání mǐrrá ndíhi yúcu sǎ nání àloés. Te ío váha tñámi sahá<sup>n</sup>. <sup>40</sup>Te ní naníhí tñáhá-dǎ ndíhi té Chèé, te ní chidúcu<sup>n</sup> nuu-güedé yiqui cùñú Jèsús mee-ni dóó vǎha, te nàcuáa ta dùcu<sup>n</sup> nuu-güedé yiqui cùñú-gá dóó-ǎ<sup>n</sup>, te duca<sup>n</sup> ta chido-güedé yuchi sàhá<sup>n</sup> tñámí-ǎ<sup>n</sup> nǎu dóó-ǎ<sup>n</sup> chi duca<sup>n</sup> tñáhí quide ñǎyiu isràél òré chíndúxi tñáhá-yu. <sup>41</sup>Te yatni núú nǐ sata caa-güedé Jèsús cáá ì<sup>n</sup> lahuertá. Te xití lahuertá-á<sup>n</sup> nchíí ì<sup>n</sup> yáú cava duha cuáhá<sup>n</sup> ndáá-xi,

te vátá yǎo ì<sup>n</sup>-gá nguíndúxi xía<sup>n</sup>.

<sup>42</sup>Te cuendá sá nǐ cuyatni tnahá nduu ndetàtú ñǎyiu isràél núu xía<sup>n</sup> yáú cava nchíí yatni-ni xía<sup>n</sup> nǐ chihi-güedé yiqui cùñú Jèsús.

### Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

**20** Te ndumìngú tacuíhndá-gá cuáhá<sup>n</sup> tá Màriá Magdalèná cuáhá<sup>n</sup> ngoto-xi yáú núú nǐ chihi-güedé yiqui cùñú Jèsús, te ní sáá-xi ní xiní-xi sá ñà túú-gǎ ndèdí yúú yèhe yáú-á<sup>n</sup>. <sup>2</sup>Núu xìnu-xi cuánuhú núú ndécú tǎ Xímú, àdi Pelú chi úú òu-dé, ndíhi ingá téé ní xica cuu ndíhi-gá téé ío cùu iní-gá, te ní xáha<sup>n</sup>-xi xii-güedé: —Nèhe-güedé yiqui cùñú Jèsús cuáhá<sup>n</sup>, te ñá xìní-ó ndèé ní taxi ndecu-güedé —càchí-xi xáha<sup>n</sup>-xi xii-güedé.

<sup>3</sup>Te ní quee té Pèlú ndíhi ingá téé-á<sup>n</sup> cuáhá<sup>n</sup> ndéhé-güedé yáú núú nǐ chihi-güedé yiqui cùñú-gá. <sup>4</sup>Te ndùú-güedé xínú-güedé cuáhá<sup>n</sup> ní cùu, dico ingá téé-á<sup>n</sup> nǐ cuu níhi-gá sáhá-dǎ cuáhá<sup>n</sup>-dé nǎu díhna-gá-dé ní sáá-dé yuhu yàú núú nǐ chihi-güedé yiqui cùñú Jèsús ní cùu. <sup>5</sup>Te ní ngáundeyi-dé xító ñìhni-dé xití yáú-á<sup>n</sup>, te ní xiní-dé mee-nǎ dóó vǎha sá nǐ xídúcú<sup>n</sup> nuu-gá yúcu, dico ñá ní quíhu-dé. <sup>6</sup>Te sáta nǐ sáá té Pèlú te cuànguihu-dé xití yáú-á<sup>n</sup>, núu tñáhá-dé ní xiní-dé nchaa dóó nǐ xídúcú<sup>n</sup> nuu-gá yúcu-ǎ<sup>n</sup>. <sup>7</sup>Te ní xiní-dé sá dóó ní xíndútú dǐquí-gǎ ñá túú càtuu jundú-xi ndíhi dóó nǐ xídúcú<sup>n</sup> nuu-gá chi ní nadúcú<sup>n</sup> nuu-ná càtùu ì<sup>n</sup> xio. <sup>8</sup>Te nchícú<sup>n</sup> tucu téé ní sáá díhna-gá-á<sup>n</sup> cuànguihu xití yáú-á<sup>n</sup>, te ní xiní-dé

sá dǒo-nǎ yúcu, te ñá túú-gǎ yiqui cùñú Jèsús núu ní sándáá iní-dé sá ní ndoto-gá. <sup>9</sup>Chi vátá tècú tnùní-gǎ-güedé nàcuáa càhá<sup>n</sup>-xi núú tütú Yǎ Ndiǒxi núú càchí-xi sá Jèsús ndoto-gá. <sup>10</sup>Te ní xícó ndì ndúú cue téé ní sǎngoto yaú núú ní chihi-güedé yiqui cùñú Jèsús ní cùu cuánuhú-güedé vehe-güedé.

**Jèsús ní naníhí tnáhá-gǎ ndíhi tá  
Màriá Magdalèná**

(Mr. 16:9-11)

<sup>11</sup>Te ní sáá tucu tá Màriá yuhu yaú núú ní chihi-güedé yiqui cùñú Jèsús te ní ngüíta-xi ndàhyú-xi, te ní ngáundeyi-xi xìto nihni-xi xití yaú-á<sup>n</sup>. <sup>12</sup>Te xití yaú-á<sup>n</sup> ní xiní-xi úú espíritú xínú cuèchi núú Yǎ Ndiǒxi xǐshnu-xi mee-ni dǒo cuèxí<sup>n</sup> xǐndecu-xi núú ní cáa yiqui cùñú-gǎ. Te ì<sup>n</sup>-xi nùcúo núú ní cáa díquí-gǎ, te ì<sup>n</sup>-xi nùcúo núú ní cáa sáhá-gǎ. <sup>13</sup>Te espíritú-á<sup>n</sup> ní xáha<sup>n</sup>-xi xii tá Màriá:

—¿Ná cuendá ndàhyú-n? —  
càchí-xi xáha<sup>n</sup>-xi.

Te ní xáha<sup>n</sup> tà Màriá:

—Ndàhyú-í chi nèhe-güedé yiqui cùñú Yaá cúú Xǐtohó-í cuáhá<sup>n</sup>, te ñá túú xiní-í ndèé ní taxi ndecu-güedé —càchí-xi xáha<sup>n</sup>-xi xii cue espíritú-á<sup>n</sup>.

<sup>14</sup>Te tnúhu-ni-á<sup>n</sup> ní càhá<sup>n</sup>-xi te ní nchócótó-xí ì<sup>n</sup> xio, te ní xiní-xi Jèsús nútníhí-gǎ dico ñá túú ní cùnuní iní-xi sá díú mèe-gǎ. <sup>15</sup>Te ní xáha<sup>n</sup> Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gǎ xáha<sup>n</sup>-gǎ xii-xi.

Te mee-xi ní sani iní-xi sá tǎe xìto lahuertá-á<sup>n</sup> cúú tǎe-á<sup>n</sup>, núú ní xáha<sup>n</sup>-xi:

—Tǎta, te núu yòhó néhé-n yiqui cùñú Jèsús cuáhá<sup>n</sup>, te càhá<sup>n</sup>-n ndèé ní taxi ndecu-n chi cuendá naquehe<sup>n</sup>-í canehe-í núhú —càchí-xi xáha<sup>n</sup>-xi.

<sup>16</sup>Te ní càhá<sup>n</sup> díú ñàha-gǎ xii-xi, te xáha<sup>n</sup>-gǎ:

—ìMàriá! —càchí-gǎ xáha<sup>n</sup>-gǎ xii-xi.

Te ní ndacoto-xi núú-gǎ, te ní càhá<sup>n</sup>-xi tnúhu hèbreú, te xáha<sup>n</sup>-xi:

—ìRabòn! —càchí-xi xáha<sup>n</sup>-xi. Te tnúhu-á<sup>n</sup> queé-xí Mèstrú.

<sup>17</sup>Te ní xáha<sup>n</sup> Jèsús:

—Daña vá ngání ñàha-n chi vátá ndáá-gǎ-í núú ndécú Tǎtà-í. Te núhú-n cùñaha-n xii cue téé ío váha ní tnahá tnúhu ndíhi-í sá ndáà-í núú ndécú Tǎtà-í Dútú Ndiǒxi, te ñiú-gǎ cúú Tǎtà-ndó nchàa-ndo, te ñiú-ni-gǎ cúú Ndiǒxí-ndó —càchí-gǎ xáha<sup>n</sup>-gǎ xii-xi.

<sup>18</sup>Te ní natnii tá Màriá Magdalèná ichi cuánuhú-xi cùñaha-xi xii cue téé ní xica cuu ndíhi-gǎ sá ní xiní-xi Jèsús, te ní xáha<sup>n</sup>-xi xii-güedé nchaa nàcuáa ní xáha<sup>n</sup>-gǎ xii-xi.

**Ní quexìo Jesús núú xǐndecu cue téé  
ní xica cuu ndíhi-gǎ**

(Mt. 28:16-20; Mr. 16:14-18; Lc. 24:36-49)

<sup>19</sup>Te ñiú-ni ndumìngú sandíqui<sup>n</sup> ní natacá cue téé ní xica cuu ndíhi-gǎ, te xǐndedí nihnu-güedé vehe sá xǐyùhú-güedé cue téé cùnuu núú ñǎyiu isràél. Te ní quíhu Jèsús ndéé tnuú-güedé ní ngúnutnii-gǎ, te ní xáha<sup>n</sup>-gǎ:

—Yǎ Ndiǒxi chǐndèè ñaha-gǎ xii-ndo ío váha cùu iní-ndó ndècu-ndo —cachí-gǎ xáha<sup>n</sup>-gǎ xii-güedé.

<sup>20</sup>Te ní dánèhé ñáhá-gǎ ndaha-gǎ ndíhi yiqui naha-gǎ xii-güedé. Te ío

ní cudíí iní-güedé sá díú ndísa-gá ní xiní ñáhá-güedé. <sup>21</sup>Te ní xáha<sup>n</sup> tucu Jesús xii-güedé:

—Yá Ndiöxí chíndèe ñaha-gá xii-ndo ïo váha cùu iní-ndó ndècu-ndo. Te dàtná ní tendaha ñàha Tátà-í Dútú Ndiöxí xii-í véxi-í ñuyú-a, te duca<sup>n</sup> tèndaha ñaha-í xii-ndo quíh<sup>n</sup>-ndó cǎhá<sup>n</sup>-ndó tnúhu-í núú ñáyiú —càchí-gá xáha<sup>n</sup>-gǎ xii-güedé.

<sup>22</sup>Te ní chiyóco-gǎ núú-güedé, te ní xáha<sup>n</sup>-gǎ:

—Chí ndúú tàhú Espíritú Yǎ Ndiöxí cundecu ndíhi-ndo. <sup>23</sup>Te nchaa ñáyiú na quíndáá iní-xi tnúhu-í te cúñaha-ndo xii-yu sá ñí quide cǎhnu iní Yǎ Ndiöxí nchaa cuéchi-yu. Te nchaa ñáyiú vá quíndáá iní tnúhu-í te cúñaha-ndo xii-yu sá vǎ cǎdá cǎhnu iní-gǎ cuéchi-yu —càchí-gǎ xáha<sup>n</sup>-gǎ xii-güedé.

#### Té Mǎxí cǎhá<sup>n</sup> ndíhi-dé Jèsús

<sup>24</sup>Te núú ùxúú cue téé ní xica cuu ndíhi-gǎ, te ìí<sup>n</sup>-dé nání-dé Mǎxí téé ní xóo danàni-güedé Cuǎchí, te téé-á<sup>n</sup> ñà túú-dé ndécú ndíhi-güedé òré ní sáhá<sup>n</sup> Jèsús. <sup>25</sup>Te dava-gǎ cue téé ní xica cuu ndíhi-gǎ ní xáha<sup>n</sup>-güedé xii-dé:

—Ní xiní-ndí Jèsús —càchí-güedé xǎha<sup>n</sup>-güedé.

Te ní xáha<sup>n</sup> tǎ Mǎxí:

—Te vá quíndáá iní-í, chi ndéé quíní-í ndaha-gǎ núú ñí quée nduyú, te dàquíhu-í díquí ndáhá-í núú ñí caá<sup>n</sup> nduyú-á<sup>n</sup>, te dàquíhu ndàha-í yiqui naha-gǎ núú ñí caá<sup>n</sup>, duca<sup>n</sup> te quíndáá iní-í —càchí-dé xǎha<sup>n</sup>-dǎ xii-güedé.

<sup>26</sup>Te núú ùná tucu nduu ní nataká tucu cue téé ní xica cuu ndíhi

Jèsús ìí<sup>n</sup> vehe, te nduu-ǎ<sup>n</sup> tnàhá té Mǎxí ndécú ndíhi-güedé. Te cuéi ndédí nihnu-güedé vehe-á<sup>n</sup>, te ní quíhu Jèsús ndéé tnuú-güedé, te ní xáha<sup>n</sup>-gǎ:

—Yá Ndiöxí chíndèe ñaha-gá xii-ndo ïo váha cùu iní-ndó ndècu-ndo —cachí-gǎ xáha<sup>n</sup>-gǎ xii-güedé.

<sup>27</sup>Te ní xáha<sup>n</sup>-gǎ xii té Mǎxí:

—Cundehe ndàha-í te dàquíhu-n díquí ndáhá-n núú ñí quée nduyú, te dàquíhu-n ndàha-n yiqui naha-í-a cuendá quíndáá iní-n te vá cání ìí<sup>n</sup> caní úú iní-n —càchí-gǎ xáha<sup>n</sup>-gǎ xii-dé.

<sup>28</sup>Te ní xáha<sup>n</sup> tǎ Mǎxí xii-gǎ:

—Yòhó cúú-n Xìtohó-í! Yòhó cúú-n Ndiöxí-í! —càchí-dé xǎha<sup>n</sup>-dǎ xii-gǎ.

<sup>29</sup>Te ní xáha<sup>n</sup> Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdíí-gǎ iní nchaa ñáyiú ñá túú ní xiní núú ñáhá xii-í, te ní sándáá iní-yu —càchí-gǎ xáha<sup>n</sup>-gǎ xii-dé.

#### Quíndáá iní-ó tnúhu yòdo tnuú núú tütú-a

<sup>30</sup>Te vǎi-gǎ sá vǎ yòo tnàhí ndàcu cada ñá túú yòdo tnuú núú tütú-a ní quide Jèsús núú cué téé ní xica cuu ndíhi-gǎ. <sup>31</sup>Dico dava-gǎ ní ngódó tnuú núú tütú-a cuendá sá quíndáá iní-ndó sǎ Jèsús cúú-gǎ Cristú Déhe Dútú Ndiöxí, te naníhí tàhú-ndó te núú na quíndáá iní-ndó-gǎ.

#### Úsá cue téé ní xica cuu ndíhi Jèsús ní xiní ñáhá-güedé xii-gǎ

**21** Te ingá nduu tucu xíndecu cue téé ní xica cuu ndíhi Jèsús yuhu làgúná ñuú Tiberiás, te ní sáhá<sup>n</sup>-gǎ núú xíndecu-güedé-á<sup>n</sup>.

Te duha ní cuu ní xiní ñáhá-güedë xii-gá. <sup>2</sup>Te ndècu té Xímú, àdi Pelú chi úú òu-dé, ndihi té Mǎxí tée ní xóo cúñaha-güedë Cuǎchí, ndihi té Natanàél tée ñuú Cànaá, te ñuú-á<sup>n</sup> yíndèhu-xi distritú Galileá, te tnàhá ndi ndúú déhe té Zebèdeú, ndihi úú-gá tucu cue tée ní xica cuu ndihi-gá. <sup>3</sup>Te ní xáha<sup>n</sup> tē Pèlú xii-güedé:

—Quíhí<sup>n</sup>-í quítnii-í chácá — càchí-dé xáha<sup>n</sup>-dë xii-güedé.

Te ní xáha<sup>n</sup>-güedé:

—Tnàhá nchúhú canchicú<sup>n</sup> ñáhá-ndí xii-n quíhí<sup>n</sup> tucu — càchí-güedé xáha<sup>n</sup>-güedë xii-dé.

Te ní xica-güedé cuáhá<sup>n</sup>-güedé ní sáá-güedé núú ndécú bàrcú, te ní quée-güedé xití bàrcú-á<sup>n</sup> cuáhá<sup>n</sup>-güedé. Te niú-á<sup>n</sup> ñǎ ní ñíhí tnàhí-güedé chácá. <sup>4</sup>Te sa ta cùditó-ñǎ cuáhá<sup>n</sup> ní xiní-güedé Jèsús yuhu làgúná, dico ñá ní cùtnuní iní-güedé sá díú-gǎ. <sup>5</sup>Te ní xáha<sup>n</sup>-gǎ xii-güedé:

—Cue tée cuechi, ìní ñíhí-ndó chácá caxi-o ñǎ? —càchí-gǎ xáha<sup>n</sup>-gǎ xii-güedé.

Te ní xáha<sup>n</sup>-güedé:

—Vèdana chácá ñǎ túú ní ñíhí-ndí —càchí-güedé xáha<sup>n</sup>-güedë xii-gá.

<sup>6</sup>Te ní xáha<sup>n</sup> Jèsús:

—Chí dáquëe ñunu-ndo ndàa xio cuha barcú chi ñíhí-ndó-dí — càchí-gǎ xáha<sup>n</sup>-gǎ xii-güedé.

Te duca<sup>n</sup> ñí quide-güedé, te òrè nàtáva-güedé ñunu xití ndute, te ñá cùndèe-gǎ-güedé natava-güedé cuendá sá ñí chítú chácá xití-xi. <sup>7</sup>Te tée ní xica cuu ndihi-gá tée ío cùu iní-gá ní xáha<sup>n</sup>-dë xii té Pèlú:

—iDiu Xítohó Jesucristú! — càchí-dé xáha<sup>n</sup>-dë xii-dé.

Te sá ñí tecú dóho té Pèlú sá dúcá<sup>n</sup> càhá<sup>n</sup>-dé ñuu ní ndíunuu-dé dóo-dë, chi dóo sǎ yímàa-ni-dé níhnu-dë ní cùu. Duca<sup>n</sup> te ní nuu ndava-dé bàrcú ní ngaunihnu-dé ndute, te cuáhá<sup>n</sup>-dé núú ndute-á<sup>n</sup> ñí quene-dé ndéé ñuhu yìchí. <sup>8</sup>Te dava-gǎ cue tée ndihi té Pèlú òu-ni cue tée ní xica cuu ndihi Jèsús ní quendóo-güedé dàtná ì<sup>n</sup> ciendú-gǎ mètrú te quene-güedé yuhu ndute. Te tǎñuhu-ni-güedé ñunu-güedé chitu chácá ñí quene-güedé ndéé yuhu ndute. <sup>9</sup>Te òrè ní quene-güedé ñuhu yìchí, te ní xiní-güedé càyú ñuhú, te núú ñùhú-á<sup>n</sup> ñùhú ì<sup>n</sup> chácá ndihi ì<sup>n</sup> pàá. <sup>10</sup>Te ní xáha<sup>n</sup> Jèsús xii-güedé:

—Quíhí<sup>n</sup> nguehe<sup>n</sup>-ndo ì<sup>n</sup> úú chácá quití íchí ñí tñii-ndo —càchí-gǎ xáha<sup>n</sup>-gǎ xii-güedé.

<sup>11</sup>Núú té Pèlú ní sáhá<sup>n</sup>-dé núú ndécú bàrcú, te ní quée-dé xití-xi ní cándèe-dé ñunu ñuhu chácá tǎñuhu-dé ní quene ndéé ñuhu yìchí, te chitu chácá náhnú, te ñuhu ì<sup>n</sup> ciendú údico úxí úní-dí xití ñunu-á<sup>n</sup>, te cuëi duca<sup>n</sup> vǎi-dí ñuhu dico ñá ní ndǎtá ñunu-á<sup>n</sup>. <sup>12</sup>Te ní xáha<sup>n</sup> Jèsús:

—Chí nèhé cadí iní-ndó — càchí-gǎ xáha<sup>n</sup>-gǎ xii-güedé.

Dico ni ì<sup>n</sup> cue tée ní xica cuu ndihi-gǎ-á<sup>n</sup> ñǎ ní xicá<sup>n</sup> tnúhú-güedé núú-gǎ ñuu yoo cùu-gǎ, chi sa ní cutnùní iní-güedé sá díú Jèsús cùú-gǎ. <sup>13</sup>Te Jèsús ní sáhá<sup>n</sup>-gǎ ní quehe<sup>n</sup>-gǎ pàá ní sǎñaha-gǎ xii-güedé caxi-güedé, te dàtnùní ní quehe<sup>n</sup> tucu-gǎ chácá ñí sǎñaha-gǎ xii-güedé.

<sup>14</sup>Vitna cùu úní xito sá xìní ñáhá cue tée ní xica cuu ndihi-gǎ sátá ñí ndoto-gǎ.

**Jèsús càhá<sup>n</sup> ndihi-gá té Pèlú**

<sup>15</sup>Te sáta ní túhú cóhó-güedë ní sadí iní-güedé te ní xíca<sup>n</sup> tnúhú Jèsús núú tē Xímú, àdi Pelú chí úú ðiu-dé, te xáha<sup>n</sup>-gã:

—Xímú, déhe té Jònás, ÷cùu iní-gá-n yùhú dàcúúxí ðava-gá cue tée-a ñã? —càchí-gá xáha<sup>n</sup>-gã xii-dé.

Te ní xáha<sup>n</sup> tē Pèlú:

—Mèstrú, cùu iní ñáhà-í, yòhó sa ñaha-n —cachí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéé líhli-í —càchí-gá xáha<sup>n</sup>-gã xii-dé.

Te cue mbéé-á<sup>n</sup> cúu-güedì ñáyiú cùu cuendá-gá.

<sup>16</sup>Te ní xáha<sup>n</sup> tùcu-gá xii té Pèlú:

—Xímú, déhe té Jònás, ÷cùu iní ñáhá-n xii-í-u? —càchí-gá xáha<sup>n</sup>-gã xii-dé.

Te ní xáha<sup>n</sup> tùcu té Pèlú:

—Mèstrú, cùu iní ñáhà-í, yòhó sa ñaha-n —cachí-dé xáha<sup>n</sup>-dë xii-gá.

Te ní xáha<sup>n</sup>-gã:

—Te núu duca<sup>n</sup>, te coto-n cuè mbéè-í —càchí-gá xáha<sup>n</sup>-gã xii-dé.

<sup>17</sup>Te xito cùu uní ní xáha<sup>n</sup> tùcu-gá xii té Pèlú:

—Xímú, déhe té Jònás, ÷cùu iní ñáhá-n-ã<sup>n</sup>? —càchí-gá xáha<sup>n</sup>-gã xii-dé.

Te té Pèlú ío ní cundìyí-dé sá dúcá<sup>n</sup> ní cuu úní xito xíca<sup>n</sup> tnúhú-gã núú-dë nùu ndisa sá cúu ìní ñáhá-dë xii-gá, te ní xáha<sup>n</sup>-dë:

—Mèstrú, yòhó ncha sa xìní-n, te sa cùtnuní iní-n sã cúu ìní ñáhà-í xii-n —càchí-dé xáha<sup>n</sup>-dë xii-gá.

Te ní xáha<sup>n</sup> Jèsús:

—Te núu duca<sup>n</sup>, te dacàxi-n cue mbéè-í. <sup>18</sup>Te na càchí tnúhu ndáá-í

xii-n sã cùtnáhá cuechi-gã-n ní xóo ndécuihnu mee-n dóo-n, te ní xóo quíhí<sup>n</sup>-n ndëni ní xóo cachí iní-n, dico na yìi-n te dacàá-n ndàha-n, te ìngá tée dacuihnu ñaha xii-n dóo-n te cada yica-dë candeca ñaha-dë xii-n quíhí<sup>n</sup> ìi<sup>n</sup> núú ñà túú tnáhá iní-n —càchí-gá xáha<sup>n</sup>-gã xii-dé.

<sup>19</sup>Te sá dúcá<sup>n</sup> ní càhá<sup>n</sup> Jèsús cúu-xí sã ní dátécú tnúhu ñaha-gã xii té Pèlú nàcuáa cada-xi cuú-dé, te duca<sup>n</sup> càda cahnu-dé Yã Ndiöxí, te ní xáha<sup>n</sup>-gã xii-dé:

—iCanchicú<sup>n</sup> ñáhá-n xii-í! —càchí-gá xáha<sup>n</sup>-gã xii-dé.

**Tée ío cùu iní-gá**

<sup>20</sup>Te ní nchócótó tē Pèlú ndàa sáta-dë, te ní xiní-dé sá nchicú<sup>n</sup> ñáhá ìngá tée xica cuu ndihi-gá cuáhá<sup>n</sup>, tée ío cùu iní-gá tée ní xínucóo ðñi-gá òré ní cudini ndihi ñaha-gá xii-güedé, te ðiu-ni tée-á<sup>n</sup> ní xíca<sup>n</sup> tnúhú-dë núú-gã ðavá-á<sup>n</sup> nùu ndëda càa tée cuáha cuendá ñáhá xii-gá núú cuè tée cùu úhú iní ñáhá. <sup>21</sup>Te òré ní xiní té Pèlú sá nchicú<sup>n</sup> ñáhá tē-á<sup>n</sup>, te ní xíca<sup>n</sup> tnúhú-dë núú Jèsús, te xáha<sup>n</sup>-dë:

—Mèstrú, te tē-ã<sup>n</sup>, ÷ná cúu sã yáha-dé-i? —càchí-dé xáha<sup>n</sup>-dë xii-gá.

<sup>22</sup>Te ní xáha<sup>n</sup> Jèsús:

—Te núu yúhú cuíní-í sá cùndècu-ni-dé ndéé ná quixi tucu-í ñuyú-a, ÷te yòhó ná cuendá-n nùu xíca<sup>n</sup> tnúhú-n? Yòhó canchicú<sup>n</sup> ñáhá-ní xii-í —càchí-gá xáha<sup>n</sup>-gã xii-dé.

<sup>23</sup>Te ní xinu tnúhu núú nchàa ñáyiú sàndáá iní tnúhu-gá sã tē-ã<sup>n</sup> vã cùú-dé. Dico Jèsús ñá túú ðuca<sup>n</sup> ní xáha<sup>n</sup>-gã sã



vă cùú-dé, chi ní xáha<sup>n</sup>-gă:  
 “Núu yúhú cuìní-í sá tēe-ă<sup>n</sup>  
 cundecu-ni-dé ndéé ná quìxi  
 tucu-í ñuyíú-a, ÷te yòhó ná  
 cuèndá-n?”, duha ní xáha<sup>n</sup>-gă xii  
 té Pèlú.

<sup>24</sup>Te ðiu-ni yúhú té Juàá tée ní  
 sani iní-yu sá vă cùú càhá<sup>n</sup> ndáá-í  
 nchaa nàcuáa ní cuu, te duca<sup>n</sup>

ñí tee-í núu tütú-a, te cùtnuní  
 iní-ndó sã tnũhu ndáá cúú-xí.

<sup>25</sup>Te ndècu vai-gá núu sã ñí quide  
 Jèsús. Te núu ðicó ní ngũndee  
 nchaandi túhú ñá, te vaa ni te ñhí  
 ñuyíú te vá tnàhá núu-xi cundecu  
 lìbrú, te núu ðicó ní ngũndee ncha.  
 Te duca<sup>n</sup> na cùnduu. Te ío chí cádá  
 ndèe iní-nă vitna.

# NCHAA NÀCUÁA NÍ QUIDE CUE TÉE NÍ TÁÚCHÍÚ<sup>n</sup> JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá  
sá quíxí Espíritú Yă Ndiöxí  
cundecu ndihi ñáyiu

**1** Te duha ní cáhá<sup>n</sup> té Lùcá ní xii-dé té Tëofilú: Yúhú sa ní chídó tnùn-í núu libré ndéé díhna nchaa sá ñí quide Jèsús, ndihi nchaa sá ñí dácúáhá-gă ñáyiu. Te ní chídó tnùn-í nchaa sá ñí quide-gá ndéé nduu ñí quesaha-gă quidé chiu<sup>n</sup>-gá, <sup>2</sup>ndihi nchaa sá ñí quide-gá ndéé òré cuándaa-gá andiu. Te sa ta cùyatni nduu ndaa-gá andiu, te ní ndatnúhu-gá ndihi cue téé ní cáhá<sup>n</sup>-gá dacuàha ñaha xii ñáyiu tnúhu-gá, te mee Espíritú Yă Ndiöxí ní chindee ñaha-xi xii-gá ní xáha<sup>n</sup>-gă nàcuáa cada-güedé. <sup>3</sup>Te sáta ñí xíhí- gá te ní ndoto-gá, te ní xíndecu-gá údico nduu. Te titní xito ní sáhá<sup>n</sup>-gá núu ñí xíndecu-güedé, te duca<sup>n</sup> ñí quide-gá cuèndá quiní-güedé sá ndàá ní ndoto-gá, te ní xáha<sup>n</sup>-gă nàcuáa quide Yă Ndiöxí ndihu ndaha-gă ñáyiu.

<sup>4</sup>Te ñí<sup>n</sup> nduu ndècu ndihi ñaha-gá xii-güedé, te ní xáha<sup>n</sup>-gă:

—Vá quéé-ní-ndó ñúú Jerusàlén, chi cundetu-ndo quixi Espíritú Yă Ndiöxí cundecu ndihi-ndo, chi sa ní cachí tnúhu-í sá dúcá<sup>n</sup> ñí cáhá<sup>n</sup> Tătá-ó Dütú Ndiöxí Yáá ndécú àndiu nacuáa cunduu. <sup>5</sup>Te ndáá sá ndíi Juáá ní dácúándüte ñaha ndíi xii-ndo, dico vitna ñá túú-gă cuéhé nduu, te quexio Espíritú Yă Ndiöxí cundecu ndihi-ndo —càchí-gá xáha<sup>n</sup>-gă xii-güedé.

**Jèsús cuándaa-gá andiu**

<sup>6</sup>Te òré ní xíndecu-güedé ndihi Jèsús, te ní xáha<sup>n</sup>-güedé xii-gá:

—Mèstrú, cuíní-ndí cachí tnúhu-n ñúu sa ta cùyatni nduu chindee-n ñáyiu ñúú Isràél cuèndá taxi tnùn-í tucú-yu ñúú-yu —càchí-güedé xáha<sup>n</sup>-güedé xii-gá.

<sup>7</sup>Te ní xáha<sup>n</sup> Jèsús xii-güedé: —Ñá túú xini ñuhu-xi cunaha nchohó xíá<sup>n</sup>, chi Tătá-ó Dütú Ndiöxí nánhá-gă ná nduu càda-gá nchaa sá ñí cáhá<sup>n</sup>-gá. <sup>8</sup>Te òré quexio Espíritú Yă Ndiöxí cundecu ndihi-ndo, te cuyii-ndo ñí yuhu ñí iní-ndó quíhí<sup>n</sup>-ndó cáhá<sup>n</sup>-ndó tnúhu-í núu ñáyiu ñúú Jerusàlén

ndihi núú ñáyiú distritú Jùdeá ndihi núú ñáyiú distritú Sàmariá. Te duca<sup>n</sup>-ni cáhá<sup>n</sup>-ndó quíhí<sup>n</sup>-ndó nì caxico ñuyúú —càchí-gá xáha<sup>n</sup>-gǎ xii-güedé.

<sup>9</sup>Te sátá dúcá<sup>n</sup> ñí cáhá<sup>n</sup>-gá, te ndèhe-güedé ní ndanchita-gá cuándaa-gá andiu cuändihu-gá xití vícò, te ñá túú-gǎ ní xìní ñáhá-güedé xii-gá. <sup>10</sup>Te ndèhe vihi-güedé andiu núú ndéé quini ñáhá-güedé xii-gá yòtnúhu, te ní quexio cunu úú cue téé nihnu dóó cuixí<sup>n</sup> núú ndécú-güedé. <sup>11</sup>Te xáha<sup>n</sup>-güedé:

—Nchòhó cue téé Galileá, ¿ná cuendá ndéhe-ndó àndiu? Te dàtná-ni càa Jesús cuándaa-gá andiu vitna, te duca<sup>n</sup>-ni cunduú-gá quixi tucu-gá —càchí cue téé nihnu dóó cuixí<sup>n</sup>-á<sup>n</sup> xáha<sup>n</sup>-güedé.

**Cuendá sá ñà túú-gǎ ndíi Jùdás  
núú ní nanducu-güedé té Màtiá  
ní nucúnutnǎí-dé núú ndíi**

<sup>12</sup>Te ní ndee-güedé yucu Òlívú cuánuhú-güedé ñuú Jerusàlén, te ní xúhu<sup>n</sup>-güedé cuèdicò cuádava òré ichi. <sup>13</sup>Te òré ní ndexio-güedé ñuú-á<sup>n</sup>, te cuándaa-güedé cuártú ndéé núú ñnu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pèlú, té Jàcobó, té Juàá, té Ndríxí, té Lipé, té Mǎxí, té Bartolòmé, té Màteú, té Jàcobó déhe té Àlfeú, ndíhi té Xímú téé ní cundihi cue téé canànistá, ndíhi té Jùdás ñaní té Jàcobó. <sup>14</sup>Te ní naníhí tnáhá-güedé nchaa-güedé yàcá<sup>n</sup> ndíhi tá Màriá nǎná Jèsús, ndíhi cue ñaní-gá ndíhi dava-gá cue ñáyiú ñíhí. Te ìí<sup>n</sup>-ni ní cuú-yu ní cáhá<sup>n</sup> ndíhí-yu Yá Ndiöxí.

<sup>15</sup>Te ìí<sup>n</sup> nduu ní xíndecu dàtná ìí<sup>n</sup> cièndú ócò mee-ni ñáyiú sàndáá iní tnúhu Jèsús, te ní ngúnutnǎí té Pèlú núú-yu, te ní xáha<sup>n</sup>-dǎ xií-yu:

<sup>16-17</sup>—Nchòhó cue ñáyiú ndècu ndíhi-í ichi Xítóhó Jesucristú, na càni-í cuèndú núú-ndó nàcuáa ní chídó tnùní ndíi Dàvíí téé ní xíndecu ndéé sanaha nàcuáa ní cáhá<sup>n</sup> Espíritú Yá Ndiöxí cuendá té Jùdás. Te dacuitíí dùca<sup>n</sup> ní cuu, chi tnàhá té Jùdás ní xíndecu ndíhi-o, te ní xinu cuechi-o ndíhi-dé núú-gǎ sá díhna, te duca<sup>n</sup> ñí quide-dé ní sáha cuendá-dé Jèsús núú cuè téé cùu úhú iní ñáhá xii-gá. <sup>18</sup>Te ní cháhu ñaha-güedé xii-dé cuendá sá ñí sáha cuendá ñáhá-dǎ xii-gá. Te ní sáhá<sup>n</sup>-dé ìí<sup>n</sup> xichi ní sata caa-dé méé-dǎ, te ní ngava-dé, te ní cahndí duu<sup>n</sup> xití-dé te xíá<sup>n</sup> ñí xíhí-dé. Te ní naquehe<sup>n</sup>-güedé díhú<sup>n</sup> sǎ ñí cháhu-güedé ndíi, te ní nacuaa<sup>n</sup>-güedé ñuhu núú ñí ngava ndíi-á<sup>n</sup>. <sup>19</sup>Te nchaa ñáyiú Jerusàlén ní ñíhí-yu tnúhu, te ní dánání-yu ñuhu-á<sup>n</sup> Acèldamá. Te tnúhu mèè-yu quèè-xi: Ñuhu núú ñí satí ñíhí. <sup>20</sup>Te duha ní cáhá<sup>n</sup> ndíi Dàvíí ní chídó tnùní ndíi núú libréú Sǎlmú ní dándǎo ndíi: “Nà ndóo nahi vèhe-dé, vá yòo ìí<sup>n</sup> quíhí<sup>n</sup> cundecu”, duha ní cáhá<sup>n</sup> ndíi. Te ìngá tucu tnúhu ní cachí ndíi: “Na nànducu-güedé ìngá téé nucúnutnǎí núú ndíi”, duha ní cáhá<sup>n</sup> ndíi Dàvíí —càchí té Pèlú xáha<sup>n</sup>-dǎ xií-yu.

<sup>21-22</sup>Te ní xáha<sup>n</sup> tucu-dé:

—Te duca<sup>n</sup> ñí cáhá<sup>n</sup> ndíi Dàvíí, te vitna xìní ñuhu-xi nanducu-o ìí<sup>n</sup> téé nucúnutnǎí-dé núú ndíi Jùdás, te xìní ñuhu-xi ñu-ni ìí<sup>n</sup> téé ní xica cuu ndíhi Xítóhó Jesucristú

cútnàhá ní xica cuu-o ndìhi-gá, ìí<sup>n</sup> tée ní xiní ndéé òré ní dácuaándùte ñaha ndíi Juàá xii-gá, te ndéé òré cuàndaa-gá andíu. Te tée nanducu-o cùndecu-dé cáhá<sup>n</sup>-dé nàcuáa ní cuu ní ndoto-gá —càchí té Pèlú xàha<sup>n</sup>-dè xii-yu.

<sup>23</sup>Te ní cacunehe-güedé úú tnàhá-güedé nūu ndédacàa-güedé nduu táhú-güedè nucúnutnîi-güedé núú ndíi. Te ìí<sup>n</sup>-dé nání-dè Chèè Barsàbás, àdi Justú chi úú ñiú-dé, te ingá-dé nání-dè Màtiá. <sup>24</sup>Te ní cáhá<sup>n</sup> ndìhi-güedé Yá Ndiòxí, te xàha<sup>n</sup>-güedè xii-gá:

—Yòhó Dútú Ndiòxí xìní-n ìní nchaa ñáyíu, te mee-n nàha-n núu ndèda càa núú ùú cue tée-a tnàhá ìní-n <sup>25</sup>càhá<sup>n</sup>-güedé tnúhu-n nūú ñáyíu, te tée-á<sup>n</sup> nucúnutnîi-dé núú ndíi Jùdás, chi cuáhá<sup>n</sup> ndíi núú ùhú núú ndàhú núú tàù-xi quíh<sup>n</sup> ndíi —càchí-güedé xàha<sup>n</sup>-güedè xii-gá.

<sup>26</sup>Te ní xito ndéé-güedé, te ní cutnùnì sá tée nàni Matía quendóo-dé ndìhi úxí ìí<sup>n</sup> cue tée ní táúchíú<sup>n</sup>-gá dacuàha ñaha xii ñáyíu tnúhu-gá.

### Ní quexio Espíritú Yá Ndiòxí cundecu ndìhi ñáyíu

**2** Te ní sáá nduu còo vico Pentecostés te xíndecu nchaa ñáyíu ìí<sup>n</sup>-ni xìchi. <sup>2</sup>Te ní tecú dóho-yu uu<sup>n</sup>i ní ñhì andíu, dàtná quídé ìí<sup>n</sup> táchí ñhì vìhi ní quide-xi, te duca<sup>n</sup> ñí cuu ndéé xití vehe núú ndécü-yu nchaá-yu. <sup>3</sup>Te ní xiní-yu dàtná cáá itá ñuhú cáá sà ndécü xití vehe, te ní xité nuu-xi ní ngoyo ndodo-xi díquí-yu nchaá-yu. <sup>4</sup>Te duca<sup>n</sup> ñí quide-xi òré ní quexio Espíritú Yá Ndiòxí ní ngúndecu

ndìhí-yu nchaá-yu. Te ní ngúíta-yu ní cáhá<sup>n</sup>-yu tnúhu cue ñáyíu ñá túú cùu ñáyíu isràél, te nchaa xíá<sup>n</sup> ní quide Espíritú Yá Ndiòxí.

<sup>5</sup>Te vài ñáyíu isràél xíndecu nchaa dava-gá ñuu ní tacá-yu ñuu Jerusalén, te ñáyíu-á<sup>n</sup> ño ndücu ndeé-yu dàcuahá-yu nchaa ndudú sá dácuaàha tnahí-yu. <sup>6</sup>Te òré ní tecú dóho-yu ñhì, te ní sáhá<sup>n</sup>-yu ní xíndedóho-yu tnúhu càhá<sup>n</sup> méé-yu ìí<sup>n</sup> ìí<sup>n</sup> ñuu-yu, chi ndí díí<sup>n</sup> ndí díí<sup>n</sup> tnúhu càhá<sup>n</sup> ñáyíu ndècu-á<sup>n</sup>. <sup>7</sup>Te xíá<sup>n</sup> ío ní cuñúhu ñáyíu véxi dava-gá ñuu, te ní xítñàhá-yu:

—Ñáyíu duca<sup>n</sup> xícáhá<sup>n</sup> cúü-yu ñáyíu distrítú Galiléa. <sup>8</sup>¿Te nása ní quidé-yu ní cutúha-yu nàcuáa càhá<sup>n</sup>-ó ìí<sup>n</sup> ìí<sup>n</sup>-o ndéé líhli-o? <sup>9</sup>Te iha véxi ñáyíu dava nació<sup>n</sup>, chi véxi ñáyíu Pàrtiá, véxi ñáyíu Mèdiá, véxi ñáyíu Elám, véxi ñáyíu Mesopòtamiá, véxi ñáyíu Jùdeá, véxi ñáyíu Capàdociá, véxi ñáyíu Pòntó, véxi ñáyíu Àsiá, <sup>10</sup>véxi ñáyíu Frigiá, véxi ñáyíu Pànfilíá, véxi ñáyíu Ègiptú, véxi ñáyíu Áfricá ñáyíu ndècu ndéé núú-gá-xi ñuu Cirené. Te tnàhá ñáyíu ñuu Rómá véxi, te ñáyíu-á<sup>n</sup> chi ñá díú mèe-ni ñáyíu isràél cúü-yu nchaá-yu, dico ìí<sup>n</sup>-ni cùu sá dácuaàhá-yu. <sup>11</sup>Te véxi ñáyíu Crètá, véxi ñáyíu Àrabiá. Te nchaa-o sa ndèdóho-o càhá<sup>n</sup>-yu nàcuáa cuáhá<sup>n</sup> tnúhu mee-o ìí<sup>n</sup> ìí<sup>n</sup>-o. Te nchaa ñáyíu xícáhá<sup>n</sup> tnúhu-o càhá<sup>n</sup>-yu cuèndá nchaa sá vã yòo tnàhí ndàcu cada ní quide Yá Ndiòxí —càchí-yu xítñàhá-yu.

<sup>12</sup>Te ní cuñúhu vìhí-yu, te ñá ná sàá ìní-yu nása ní cuu, te xítñàhá-yu: —¿Nása ní cuu duha càhá<sup>n</sup>-yu tnúhu-o? —càchí-yu xítñàhá-yu.

<sup>13</sup>Te davá-yu ní sácú ndeé yíchí ñáhă-yu, te xĩtnàhá-yu:

—Xixíni ñáyi-u-á<sup>n</sup> núu ñá náhá-yu tnúhu càhá<sup>n</sup>-yu —càchí-yu xĩtnàhá-yu.

**Tnúhu ní xáha<sup>n</sup> tè Pèlú xii cue ñáyi-u**

<sup>14</sup>Te ní ngúnutní té Pèlú ndihí úxí ñí<sup>n</sup> cue téé ní táuchíú<sup>n</sup> Jèsús dacuàha ñaha xii ñáyi-u tnúhu-gá, te níhi ní cáhá<sup>n</sup>-dé, te xáha<sup>n</sup>-dé xií-yu:

—Nchaa nchòhó ñáyi-u distritú Jùdeá ndihí nchòhó ñáyi-u ñuú Jerusàlén, cundedóho váha-ndo tñúhu na càhá<sup>n</sup>-í-a. <sup>15</sup>Ñá ndàá tnúhu càhá<sup>n</sup>-ndó, chi ñá túú xĩni-ndí te duca<sup>n</sup> càhá<sup>n</sup>-ndó, chi davitna cùu-xi caá ñí<sup>n</sup> dátneé, vátá tñàhá-gá òré coho ñáyi-u ndidí. <sup>16</sup>Te yúhú ná càchí tnúhu-í xii-ndo vītna nacuáa ní xáha<sup>n</sup> Yă Ndiòxí xii ndíi Jòél téé ní xóo cáhá<sup>n</sup> tnúhu-gá ndeé sanaha nàcuáa cada ñaha-gă xii ñáyi-u, te ndíi-á<sup>n</sup> ní chídó tñuní ndíi nàcuáa ní cáhá<sup>n</sup>-gá. <sup>17</sup>Te duha ní xáha<sup>n</sup>-gă xii ndíi:

Cùmání-gă sáá nduu nàa ñuyíú, te cuañaha-ĩ Espíritú-í cundecu ndihí nchaa ñáyi-u na quèndáa iní ñáhá xii-í.

Te cue déhe-yu cáhá<sup>n</sup>-yu tnúhu-í, te cue téé cuechi dacòto núú ñáhá-xí xii-güedé, te duca<sup>n</sup>-ni cuè téé ni sàhnu cáhá<sup>n</sup> saní-güedé, te ñu-ni cuèndá nchaa sá quídè-í duca<sup>n</sup> dàcoto núú ñáhá-xí xii-güedé.

<sup>18</sup>Te nchaa ñáyi-u xinu cuechi núú-í cáhá<sup>n</sup>-yu tnúhu-í, te cuañaha-ĩ Espíritú-í cundecu ndihí-yu.

<sup>19</sup>Te ndeé andiu, yàcá<sup>n</sup> vài sá càdà-í nàcuáa cuñúhu vihi-yu, te núú ñuyíú-a cada-í ñí<sup>n</sup> sá vátá quini tñàhí-gá-yu, te ngoyo ñíí<sup>n</sup> te ngoyo ñuhú te quene vihi ñúhmá.

<sup>20</sup>Te vá dáyèhé-gá nchíanchii, cuu nee ñuyíú te cuu ticuèhé núú yóó dàtná ticuèhé ñíí<sup>n</sup>. Te dàvâ-á<sup>n</sup> sáá nduu quixi Yáa cúú Xitohó-yu, te nduu-á<sup>n</sup> cuu-xi ñí<sup>n</sup> nduu càhnu vihi, chi cada-gá nchaa sá ñà túú xini-yu, te cuñúhu vihi-yu.

<sup>21</sup>Te òré xíá<sup>n</sup> te nchaa ñáyi-u cáhá<sup>n</sup> ndihí ñaha xii Yáa cúú Xitohó-yu-á<sup>n</sup> naníhí tãhú-yu.

Duha ní xáha<sup>n</sup> Yă Ndiòxí xii ndíi Jòél ní chídó tñuní ndíi.

<sup>22</sup>Te nchòhó ñáyi-u isràél, cundedóho váha-ndo tñúhu na càhá<sup>n</sup>-í-a cuèndá Jèsús téé ñuú Nazàrét. Te Jèsús ní quide-gá chiu<sup>n</sup> Yă Ndiòxí, chi mee Yă Ndiòxí ní chindee ñàha-gá ní quide Jèsús ná daha núú chiu<sup>n</sup>, núú xíá<sup>n</sup> ní ndacu-gá ní quide-gá nchaa sá vá yóo tñàhí ndàcu cada, te xíá<sup>n</sup> ní cuñúhu vihi-ndo. Te sa ñaha-ndo nacuáa ní quide-gá cùtnàhá ní xica cuu-gá ñuyíú. <sup>23</sup>Te ndíi Jùdás ní taxi cuèndá ñáhá ndíi Jèsús xii nchòhó cue téé ní cuu úhú iní ñáhá xii-gá, te ní ndúcú-ndó cuè téé úhú iní-xí ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-á<sup>n</sup> ní xíhí-gá. Dico sa ní cutnùní iní Yă Ndiòxí sá dúcá<sup>n</sup> càda-ndo Jesús, te mee Yă Ndiòxí ní cachí-gá sá dúcá<sup>n</sup> ndòho Jesús. <sup>24</sup>Te ñu-ni mee Yă Ndiòxí ní dándótó-gă Jèsús, chi sa ní cáhá<sup>n</sup>-gá sá òré cuú-gá te vá cùú dúcá<sup>n</sup>-gă. <sup>25</sup>Te

ndii Dàvií tée ní xíndaha ñaha xii cue ñaní tnáhá-ó nǐ xíndecu ndéé sanaha nǐ chídó tnùnǐ ndii nàcuáa ní cáhá<sup>n</sup> Jèsús, te duha ní cáhá<sup>n</sup>-gá:

Cùtnunǐ iní-í sá ncháá ndùu ndecu ndihi-í Yă Ndiöxí, te ío chìndee ñaha-gá xii-í, te ñá túú tnàhǐ sá yùhú-í.

<sup>26</sup> Te ío ndàcá<sup>n</sup> táhù-í núú Yă Ndiöxí chi cùdǐí iní-í, chi sa nàha-í sá cùú-í dico ndoto-í,

<sup>27</sup> chi vá dǎñá-gă quǐhǐ<sup>n</sup> dúcá<sup>n</sup> àlmá-í núú ndécú ñăyiu ní xíhǐ, te vá dǎñá-gă téhyú yiqui cùñú-í chi cùu-í Déhe-gá, te yúhú sa nàha-í sá cúú iní ñáhá-gă xii-í.

<sup>28</sup> Te sa ní cachí tnúhu-gá nàcuáa cada-í cundecu-í ichi váha, te cuèndá sá ndécú ndihi ñaha-gá xii-í nùu ío cùdǐí iní-í.

Duha ní cáhá<sup>n</sup> Jèsús, te duca<sup>n</sup> ní chídó tnùnǐ ndii Dàvií.

<sup>29</sup> Te nchòhó cue ñaní tnáhà-í, na càchǐ tnúhu ndáá-í xii-ndo cuèndá ndii Dàvií tée ní xíndecu ndéé sanaha vihi, chi ní xíhǐ-dé, te ní chindúxi ñaha-güedě, te nàha-o tnavíí núú nǐ chindúxi ñaha-güedě.

<sup>30</sup> Te ndii Dàvií ní xóo cáhá<sup>n</sup> ndii tnúhu Yă Ndiöxí, te sa nàha ndii sá Yă Ndiöxí ní cáhá<sup>n</sup> ndáá cuiti-gá sá dǐú-nǐ ì<sup>n</sup> tnaha ndii taxi tnùnǐ-dé ñăyiu isràel ndéé cuèé-gá dàtná ní xóo taxi tnùnǐ méé ndii cútnàhá ní xíndecu ndii, te tée taxi tnùnǐ-á<sup>n</sup> cúú Cristú chi cùu-gá ì<sup>n</sup> tnàha ndii.

<sup>31</sup> Te sa ní cutnùnǐ iní ndii sá ndótó Cristú, núu xǐhǐ<sup>n</sup> ní chídó tnùnǐ ndii sá vá dǎñá Yă Ndiöxí sá quǐhǐ<sup>n</sup> dúcá<sup>n</sup> àlmá-gá cundecu-xi núú ndécú ñăyiu ní xíhǐ, te vá dǎñá-gă téhyú yiqui cùñú-gá.

<sup>32</sup> Te ndáá chi Yă Ndiöxí ní dándótó-gă Jèsús, te nchúhú ní xiní-ndǐ sá nǐ ndoto-gá. <sup>33</sup> Te ní xáha<sup>n</sup> Yă Ndiöxí xii Jèsús sá cùndecu ndihi ñaha-gá, te taxi tnùnǐ Jèsús ni caa ni quǐhǐ<sup>n</sup>. Te Yă Ndiöxí ní sǎñaha-gă Espíritú-gá ní ngúndecu ndihi-gá nàcuáa ní xáha<sup>n</sup>-gă, te diu Jèsús ní quide-gá nchaa sá nǐ xiní-ndó vitna ndihi nchaa sá nǐ xíndedóho-ndo. <sup>34</sup> Te ndii Dàvií ñá túú ní ndàa túu ndii andiu ndihi yiqui cuñú ndii, te òré ndécú-gă ndii ñuyíú-a ní cachí ndii:

Dútú Ndiöxí ní xáha<sup>n</sup>-gă xii Yaá cúú Xíttohó-í:

“Ngóo xio cùha-í,

<sup>35</sup> te yúhú cada-í te nchaa sá cúú ũhú iní ñáhá xii-n canehexi sá yǐñùhu núu-n.”

Duha ní xáha<sup>n</sup> Dútú Ndiöxí xii Yaá cúú Xíttohó-í càchǐ ndii.

<sup>36</sup> Te nchòhó ñăyiu isràel cùu-ndo ndi mee-í, te cuiní-í cundedóho váha-ndo ì<sup>n</sup> tnúhu na càhá<sup>n</sup>-í-a. Jèsús ní sata caa-ndo-gă núú cùrúxǐ, dico Yă Ndiöxí ní cachí-gá sá Jèsús dacăcu nihnu-gă ñăyiu, te vá cánǐ ì<sup>n</sup> cani úu iní-ndó, chi diu-gá cùnùu-gá núú nchàa ñăyiu —càchǐ té Pèlú xăha<sup>n</sup>-dě xií-yu.

<sup>37</sup> Te ñăyiu ní xíndedóho tnúhu ní cáhá<sup>n</sup> té Pèlú ní ndixi túu iní-yu nàcuáa quidé-yu ndécú-yu, te ní xáhă<sup>n</sup>-yu xii-dé ndihi dava-gá cue tée ní táúchíú<sup>n</sup> Jèsús dacuàha ñaha xií-yu tnúhu-gá:

—Nchaa nchòhó cue ñaní tnáhá-ndǐ, ònása cachí-ndó cùnduu, nása cada-ndǐ vitna? —càchǐ-yu xáhă<sup>n</sup>-yu xii-güedě.

<sup>38</sup> Te ní xáha<sup>n</sup> tǎ Pèlú xií-yu:

—Daña-ndo nchàa sá cuèhé sá dúhá quide-ndo, te cada càhnu iní

Yă Ndiöxí nchaa yíca cuéchi-ndo. Te cuandute-ndo cuèndá quiní-yu sá nǐ natuha-ndo ìchi Jesús, te duca<sup>n</sup> te taxi Yá Ndiöxí Espíritú-gá cundecu ndìhi-ndo, <sup>39</sup>chi cuíní-gá taxi-gá Espíritú-gá xii mee-ndo ndìhi déhe-ndo, te cuáñaha-gă Espíritú-gá xii nchaa ñáyíu nǐ cǎa xico ñuyíú, ñáyíu cáhá<sup>n</sup>-gá cundecu ìchi-gá ndéé ìdá-gá —càchí té Pèlú xăha<sup>n</sup>-dě xíi-yu.

<sup>40</sup>Te titní-gá tnúhu ní xăha<sup>n</sup>-dě năcuáa cadá-yu, te xăha<sup>n</sup> tùcu-dé: —Daña-ndo nchăa sá cuèhè sá dúhá quide-ndo, vá cadá-ndó sǎ quidé dăva-gá-yu —càchí-dé xăha<sup>n</sup>-dě.

<sup>41</sup>Te nchaa ñáyíu ní sándáá ìní-xi tnúhu ní cáhá<sup>n</sup> té Pèlú ní sanduté-yu, te ðiu-ni nduu-ă<sup>n</sup> nǐ cuu dătná úní mǐl ñáyíu ní sándáá ìní-xi ní xíndecu ndìhi ñáyíu xídăcuáhă tnúhu Yá Ndiöxí. <sup>42</sup>Te ío ní xíndedóho-yu tnúhu ní cáhá<sup>n</sup> cue tée ní táúchíú<sup>n</sup> Jèsús dacuàha ñaha xíi-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi cahnú-yu cuèndá năhă-yu sá dúcá<sup>n</sup> nǐ quide Jèsús cútnăhá vátá cahní ñaha-gă-güedé xii-gá, te ní xóo cáhá<sup>n</sup> ndíhí-yu Yá Ndiöxí.

**Năcuáa ní quide nchaa  
ñáyíu ní sándáá ìní tnúhu  
Jèsús ndéé díhna nuu**

<sup>43</sup>Te ncháa-yu ní cuñúhu vǐhí-yu, chi cue tée ní táúchíú<sup>n</sup>-gă dacuàha ñaha xíi-yu tnúhu-gá ní quide-güedé titní núú sǎ vǎ yóo tnăhí ndăcu cada, te xǐă<sup>n</sup> ní cutnùnǐ ìní-yu sá méé Yă Ndiöxí chíndèè ñaha-gă xii-güedé. <sup>44</sup>Te nchaa

ñáyíu sândáá ìní tnúhu Jèsús cǎhá<sup>n</sup> ndìhi tnăha váha-yu, te cuèi-ni nchaa ndachíu<sup>n</sup> nandíhi-yu ndècu cahnu. <sup>45</sup>Te ní dícö-yu nchaa ndachíu<sup>n</sup> sá ñă túú xini ñuhú-yu, te ní níhí-yu díhú<sup>n</sup> te ní sǎñăhá-yu xii nchaa ñáyíu ñă ñihí. <sup>46</sup>Te ìi<sup>n</sup> nduu ìi<sup>n</sup> nduu ní xóo quíh<sup>n</sup> ndìhi tnăhá-yu veñúhu cǎhnu sá ío cùnūu. Te ní xexi ndìhi tnăhá-yu vehé-yu. Te ío ní cudíí ìní-yu chi ìi<sup>n</sup>-ni ní cuú-yu ncháa-yu. <sup>47</sup>Te ío ní ndacá<sup>n</sup> táhǔ-yu núú Yă Ndiöxí, te nchaa dava-gá ñáyíu ní cáhá<sup>n</sup> váha-yu cuèndá ñáyíu-ă<sup>n</sup>. Te mee Yă Ndiöxí ní quide-gá ní sándáá ìní vǎi-gá ñáyíu, te ní xíndecú-yu ndìhi dava-gá ñáyíu xídăcuáhă tnúhu-gá.

**Quide tátna-güedé ìi<sup>n</sup> tée yacua**

**3** Te ìi<sup>n</sup> nduu òré caá úní sacuaa, òré xícáhă<sup>n</sup>-yu ndìhi Yá Ndiöxí cuáhă<sup>n</sup> té Pèlú ndìhi té Juăá veñúhu cǎhnu sá ío cùnūu sácúú-xí ñáyíu isrăél. <sup>2</sup>Te ndècu ìi<sup>n</sup> tée yacua, te duca<sup>n</sup>-ni cǎa-dé ní cacu-dé. Te sàhă<sup>n</sup> ndìhi ñăhá-yu veñúhu cǎhnu sá ío cùnūu, te sácóo-dé ìi<sup>n</sup> xio yuyèhe veñúhu sá nání Yèhe Vii Caa, chi duca<sup>n</sup> nani-xi, te xícă<sup>n</sup> ndàhú-dé núú nchăa ñáyíu sàhă<sup>n</sup> veñúhu. <sup>3</sup>Te ní xini-dé té Pèlú ndìhi té Juăá cuanguihu-güedé veñúhu, te xícă<sup>n</sup> ndàhú-dé núú-güedé. <sup>4</sup>Te ní ndacoto-güedé núú-dé, te ní xăha<sup>n</sup> tǎ Pèlú xii tée yacua-ă<sup>n</sup>:

—Cundehe ñaha xii-ndí —càchí té Pèlú xăha<sup>n</sup>-dě xii-dé.

<sup>5</sup>Te ní xíndéhé ñaha-dé xii-güedé, chi ní cáhá<sup>n</sup>-dě sá ío ìi<sup>n</sup> sá cuăñaha-güedé. <sup>6</sup>Te ní xăha<sup>n</sup> tǎ Pèlú: —Ñă túú tnăhí díhú<sup>n</sup> nêhé-í dico chindee ñaha-í xii-n, te Xítóhó

Jesucristú Yaá ní xíndecu ñúú Nazàrét, ndacu-gá cada tátna ñaha-gã xii-n, ndacuñí te caca-n — cachí-dé xáha<sup>n</sup>-dě.

<sup>7</sup>Te té Pèlú ní tñii-dé ndaha cùha tée yacua-ã<sup>n</sup>, te ní ngüíta-dé ndácàni ñaha-dé, te òré xía<sup>n</sup> ní naníhí ndéé-dě, te ní ndúha sáhá-dě. <sup>8</sup>Te ní ndacuñí cunu mee-dě te ní xica-dé, te ní cachí-dé sá ïo càhnu cuu Yá Ndiöxí cuendá sá ñí ndúha-dé, te ta sãndava-dé cuànguihu ndihí ñaha-güedě veñúhu. <sup>9</sup>Te nchaa ñáyiú xíndecu-á<sup>n</sup> ñí xiní-yu sá ñí nduu váha-dé, te ndèhé-yu ndàcá<sup>n</sup> táhú-dě núú Yá Ndiöxí. <sup>10</sup>Te ní naquiní ñáhã-yu xii-dé sá dífú tēe xìcá<sup>n</sup> ndàhú tēe ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vñí-yu sá ñí ndúha-dé.

**Té Pèlú ní cáhá<sup>n</sup>-dé corrèdór sá néhé òu ndíi Salòmón**

<sup>11</sup>Te sátá veñúhu càa corredór sá néhé òu ndíi Salòmón. Yàcá<sup>n</sup> ndécú tē Pèlú ndihí té Juàá ndihí tēe ní ndúha sáhá-xi, te ñá cuiní tēe ní ndúha sáhá-xi-á<sup>n</sup> dañá-dě quíh<sup>n</sup>-güedé dandò ñaha-güedé xii-dé. Te chítú-yu ní quexìo coyó-yu núú ndécú-güedě, te ní cuñúhu vñí-yu sá ñí ndúha sáhá tēe cùhú-á<sup>n</sup>. <sup>12</sup>Te té Pèlú ní xiní-dé ní quexìo coyó-yu, te ní xáha<sup>n</sup>-dě xíí-yu:

—Nchòhò ñáyiú isràél, òná cuendá ndéé dúcá<sup>n</sup> ndèhe ñaha-ndo xii-ndí te cùñúhu-ndo sã ñí ndúha tēe yacua-ái<sup>n</sup>? Nchòhò cáhá<sup>n</sup>-ndó sã méé-ndí ní quide tátna-ndí-dé sá ïo váha iní-ndí, dico ñáhá chi ñá díú mèe-ndí ní quide tátna-ndí-dé.

<sup>13</sup>Chi Yá Ndiöxí ní ndadúha ñaha-gã xii-dé, chi òu-gá cúú Ndiöxí ndíi Àbrahám ndihí ndíi Isàác ndihí ndíi Jàcób, te òu-ni cue tēe-á<sup>n</sup> cúú ñàní tnáhá-ó ñí xíndecu ndéé sanaha vñi. Te òu-ni Ndiöxí-á<sup>n</sup> ñí xáha<sup>n</sup>-gã xii Déhe-gá Jèsús sá táxí tnùnì-gá nchaa sá ïo andíu ndihí nchaa ñáyiú ndècu ñuyíú-a, dico mee-ndo ñí sáha cuendá-ndó Jèsús núú tēe cùchiu<sup>n</sup>. Te té Pilatú ní cuiní-dé dacăcu-dé Jèsús ní cùu, te mee-ndo ñã ní cuiní-ndó. <sup>14</sup>Te Yá Ndiöxí ní cachí-gá sá ïo váha iní Jèsús te ñá túú tnàhí cuéchi-gá. Te mee-ndo ñà túú ní cuiní-ndó căcu-gá ñuu ní xáha<sup>n</sup>-ndo xii té Pilatú sá vâha-gá dacăcu-dé ïí<sup>n</sup> tēe ndècu vihi cuéchi-xi, te vá dacăcu-dé Jèsús.

<sup>15</sup>Te ní xáha<sup>n</sup>-ndo sã cáhni-güedě Jèsús Yaá quidé nchìto-o ndecu-o, dico Yá Ndiöxí ní dándótó ñaha-gá, te ní xiní-ndí sá ndàà ní ndoto-gá. <sup>16</sup>Te nchúhú sa ñaha-ndí sá díú Xítòhó Jesucristú ní ndadúha-gá tēe yacua, te náí-dé nútñi-a. Te duca<sup>n</sup> ñí quide-gá chi ní sãndáá iní ñáhá-dě xii-gá, te vitna ní xiní-ndó sã ndàà ní ndúha-dé.

<sup>17</sup>Te nchòhò ndihí cue tēe cùnunu ní sahani-ndo Xítòhó Jesucristú, chi ñá ní cùnuni iní-ndó sã ñí quide-ndo. <sup>18</sup>Te cue tēe ní xóo cáhá<sup>n</sup> tnúhu Yá Ndiöxí ndéé sanaha ñí chídó tnùnì-güedé nàcuáa ní xáha<sup>n</sup> Yá Ndiöxí xii-güedé sá Cristú quixi-gá ñuyíú-a, te ndoho vihi-gá, te xíã<sup>n</sup> ñuu duca<sup>n</sup> ñí cuu ïo ní ndoho-gá. <sup>19</sup>Te vitna te dañá-ndo nchàa sá cuèhé sá dúhá quide-ndo. Te quindáá iní-ndó Yá Ndiöxí, te duca<sup>n</sup> te cada càhnu iní-gá nchaa sá ñà túú váha ní quide-ndo ñuyíú-a,



te canu ichi ñaha-gã xii-ndo ìi<sup>n</sup> ichi váha. <sup>20</sup>Te ní tendaha-gã Cristú ní quixi-gã ñuyú-a, chi mee Yã Ndiöxí ní cachí-gã sá díú Cristú taunihnu ñaha-gã xii-ndo. <sup>21</sup>Te dacuití cùndecu-gá andiu ndéé ná sáá nduu nàtaxi ndecu-gá nchaa sá ndécú ñuyú nàcuáa sàni iní méé-gã. Te díu duca<sup>n</sup> ñí cáhá<sup>n</sup> Yã Ndiöxí ñuu duca<sup>n</sup> ñí chídó tñuní cue tée ní xóo cáhá<sup>n</sup> tñuhu-gá ndéé sanaha. <sup>22</sup>Te ndíi Moisés ní xáha<sup>n</sup> ndíi xii cue ñaní tnáhá-ó ñí xíndecu ndéé sanaha: “Yá Ndiöxí tendaha-gã ìi<sup>n</sup> tée quixi-dé cáhá<sup>n</sup>-dé tñuhu-gá dàtná cuíní-ndó ñí quide ñaha-gã xii yúhú, te tée-á<sup>n</sup> cuu-dé ìi<sup>n</sup> ñaní tnáhá-ndó. Te cundedóho váha-ndo nchaa tñuhu cáhá<sup>n</sup>-dé. <sup>23</sup>Te nchaa ñáyiú vá quíndáá iní tñuhu cáhá<sup>n</sup>-dé, te cuíta nihnú-yu chi vá quíhí<sup>n</sup>-yu núú quíhí<sup>n</sup> ñáyiú sàndáá iní tñuhu Yá Ndiöxí”, duha ní xáha<sup>n</sup> ndíi Moisés xií-yu —càchí té Pèlú xáha<sup>n</sup>-dë xií-yu.

<sup>24</sup>Te ní xáha<sup>n</sup> tùcu té Pèlú xií-yu: —Ndíi Sàmúél ndíhi nchaa cue tée nchícú<sup>n</sup>-gá ní xóo cáhá<sup>n</sup> tñuhu Yá Ndiöxí ndéé sanaha ñí cáhá<sup>n</sup>-güedé nàcuáa cada-xi vitna. <sup>25</sup>Te Yá Ndiöxí ní cáhá<sup>n</sup>-gá ndíhi cue tée ní cáhá<sup>n</sup> tñuhu-gá ndéé sanaha. Te ní quide ndáá-gá ndíhi nchaa ñaní tnáhá-ó ñí xíndecu ndéé sanaha nàcuáa cada-gá naníhí tàhú-ó. Te duha ní xáha<sup>n</sup>-gã xii ndíi Àbrahám: “Ío nduu cacu ìi<sup>n</sup> tnàha-n, te tée-á<sup>n</sup> cada-dé te naníhí tàhú ñáyiú ñuyú-a”, duha ní xáha<sup>n</sup>-gã xii ndíi Àbrahám. <sup>26</sup>Núú xíá<sup>n</sup> ní tendaha-gã Déhe-gá ní quixi-gá núú ndécú-ndó cuèndá ña-ndo nchaa sá cuèhé sá

dúhá quide-ndo, te naníhí tàhú-ndó —càchí té Pèlú xáha<sup>n</sup>-dë xií-yu.

#### Té Pèlú ndíhi té Juàá ndécú-güedë ndaha tée cùchiu<sup>n</sup>

**4** Te té Pèlú ndíhi té Juàá càhá<sup>n</sup> dúcá<sup>n</sup>-ni-güedë ndíhi ñáyiú, ní quexìo cue dútú ndíhi tée tàxi tñuní ñáhá xii cue tée quide cuendá veñuhu càhnu sá ïo cùnuu, ndíhi cue tée cùu saducéú. <sup>2</sup>Te ní cudéé<sup>n</sup>-güedë nchaa-güedé núú té Pèlú ndíhi té Juàá sá xáha<sup>n</sup>-güedë xii ñáyiú sá ndótó ñáyiú ní xíhí dàtná ní ndoto Jèsús. <sup>3</sup>Te ní tñii ñaha-güedë ní chihí ñaha-güedë vecaá xii-güedé, te ñá ní quide ndáá tée cùchiu<sup>n</sup> cuèchi-güedé nduu-á<sup>n</sup> chi sa ní cuaa. <sup>4</sup>Te ío vài ñáyiú ní sándáá iní-yu tñuhu ní cáhá<sup>n</sup>-güedé, te ñáyiú-á<sup>n</sup> ndíhi ñáyiú sa ní sándáá iní-xi ndéé càni-gá ní xínu dàtná úhú<sup>n</sup> mìl mee-ni cuè tée, te dèi<sup>n</sup> ñáyiú dèhí ndíhi landú.

<sup>5</sup>Te nduu tñéé-á<sup>n</sup> díu-ni ñuú Jerusàlén-á<sup>n</sup> ñí tacá cue tée yíndaha veñuhu, ndíhi cue tée cùu sacuéhé núú ñáyiú isràèl ndíhi cue tée dàcuaha ñaha xií-yu nchaa tñuhu ní chídó tñuní ndíi Moisés. <sup>6</sup>Te tnàhá dútú cùnùu-gá tée nàni Anás ndécú ndíhi té Caifás, ndíhi té Juàá, ndíhi té Lijandrú ndíhi dava-gá ñaní tnáhá dútú cùnùu-gá-á<sup>n</sup> ndécú. <sup>7</sup>Te ní xáha<sup>n</sup>-güedë xii cue tée xínu cuechi núú-güedë:

—Chí cuàhá<sup>n</sup> queñuhu-ndo té Pèlú ndíhi té Juàá vecaá, te na quixi-güedé iha —càchí-güedé xáha<sup>n</sup>-güedë.

Te ní quexìo té Pèlú ndíhi té Juàá núú cuè tée cùnuu, te cue

tée cùnuu-á<sup>n</sup> ní xícá<sup>n</sup> tnúhú-güedě núú-güedě, te xáha<sup>n</sup>-güedě:

—¿Nása ní quide-ndo cuendá tée yacua-ă<sup>n</sup>? ¿Yoo ní táúchíu<sup>n</sup> dùca<sup>n</sup> cada-ndo? —cachí-güedě xáha<sup>n</sup>-güedě.

<sup>8</sup>Te ndècu ndìhi té Pèlú Espíritú Yă Ndiöxí, núu xíă<sup>n</sup> ní xáha<sup>n</sup>-dě xii-güedě:

—Nchòhó cue tée cùchiu<sup>n</sup> ndìhi nchòhó cue tée cùu sacuéhé nũú ñáyiú isrâél, <sup>9</sup>te núu cuiní-ndó quiní-ndó năsa ní quide-ndí ní ndúha tée yacua-ă<sup>n</sup>, <sup>10</sup>te cundedóho-ndo ì<sup>n</sup> tnúhu na càhá<sup>n</sup>-í-a. Xìni ñuhu-xi cundedóho nchaa ñáyiú isrâél cuendá quiní-yu nàcuáa ní cuu ní ndúha tée-ă<sup>n</sup>. Xítóhó Jesucristú Yaá ní xíndecu ñúú Nazàrét ní quide tátna-gá sáhá tée yacua ní ndúha, te ñiu-ni-gá ní sata caa-ndo nũú cùrúxí te núu cùrúxí-á<sup>n</sup> ní xíhí-gá, te ní dándótó ñàha Yă Ndiöxí xii-gá. <sup>11</sup>Te núu tütú Yă Ndiöxí càchí-xi: “Cristú cúú-gă dàtná ì<sup>n</sup> yúú ndécú xíquí ì<sup>n</sup> vehe. Te yúú càchí-yu sá ñà túú nàndíhi, te ñiu xíă<sup>n</sup> ní nàndíhi-xi ní ngúnutnî-xi xíquí véhé”, duha càchí-xi núu tütú-gá. Te duca<sup>n</sup> sãtnahá-xi cùu Jesús, chi càchí-ndó sã ñà túú nàndíhi-gá, <sup>12</sup>dico Yă Ndiöxí ñà túú ndèe ní tàxi ndecu-gá ingá tée dàcácu nihnu ñaha xii-o núú ùhú núú ndàhú, chi ì<sup>n</sup>dii díi-ni Déhe-gá Xítóhó Jesucristú dacăcu nihnu ñaha-gă xii-o —càchí té Pèlú xáha<sup>n</sup>-dě xii-güedě.

<sup>13</sup>Te té Pèlú ndìhi té Juàá ñà túú tũha-güedě, te cùñúhu cue tée cùchiu<sup>n</sup> sá ïo ñîf xíndáa-güedě. Te ní cutnùnì iní cue tée cùchiu<sup>n</sup>-ă<sup>n</sup> sã Jèsús ní xica cuu ndìhi-güedě,

núu xíă<sup>n</sup> ñà túú tnàhí yùhú-güedě càhá<sup>n</sup>-güedě. <sup>14</sup>Te cuendá ndécú ndìhi té Pèlú ndìhi té Juàá tée ní ndúha sáhá-xi, núu xíă<sup>n</sup> ñà ní ñîhí cue tée cùchiu<sup>n</sup> tnúhu càhá<sup>n</sup>-güedě. <sup>15</sup>Te ní xáha<sup>n</sup>-güedě xii té Pèlú ndìhi té Juàá sá quée-güedě quehé cuendá ndóo mee-güedě ndatnúhu-güedě. <sup>16</sup>Te ní xítñaha-güedě:

—¿Nása cada-o ũú cue tée-ă<sup>n</sup>?, chi nchaa ñáyiú ñúú Jerusalén náhă-yu sá ñî quide tátna-güedě ì<sup>n</sup> tée yacua, te xíă<sup>n</sup> xícunúhu vihi ñáyiú. Te vá cúú càchí-ó sã ñà ndàá, chi vâi ñáyiú ní xiní nàcuáa ní cuu. <sup>17</sup>Te dayùhú-ó-güedě te cùñaha-o sã vă càhá<sup>n</sup>-gá-güedě tnúhu Jèsús, chi núu ñáhá te quíndáa-gá iní-yu —càchí-güedě xítñaha-güedě.

<sup>18</sup>Te ní cana tucu-güedě té Pèlú ndìhi té Juàá, te xáha<sup>n</sup>-güedě sá vă dăcuàha-gá-güedě ñáyiú tnúhu Jèsús. <sup>19</sup>Te té Pèlú ndìhi té Juàá ní xáha<sup>n</sup>-güedě:

—Chí cuăha cuendá, te núu sá càchí nchòhó cada-ndí àdi sá càhá<sup>n</sup> Yă Ndiöxí cada-ndí. Te cada càhnu iní-ndó chi vá cúú càda-ndí sá càchí-ndó, chi cada nahi-ni-ndí sá càchí Yă Ndiöxí. <sup>20</sup>Chi dacutíí càhá<sup>n</sup>-ndí nàcuáa ní càhá<sup>n</sup> Jèsús, te càhá<sup>n</sup>-ndí nchaa sá ñî xiní-ndí ní quide-gá —càchí-güedě xáha<sup>n</sup>-güedě.

<sup>21</sup>Te cue tée cùchiu<sup>n</sup> níhi-gá ní càhá<sup>n</sup>-güedě xáha<sup>n</sup>-güedě sá cádá càstíú ñáhá-güedě nũu vá dáñá-güedě sá dăcuàha-güedě ñáyiú. Te duca<sup>n</sup> te ní dáñá ñàha-güedě cuánuhú-güedě, chi ñà ní ñîhí-güedě nása cada-güedě cada castíú ñáhá-güedě, chi nchaa-yu

ndàcá<sup>n</sup> táhũ-yu núú Yá Ndiöxí sá nĩ ndúha tée yacua. <sup>22</sup>Te tée ní quide tátna-güedé-á<sup>n</sup> ndécú-dě vihi-gá údico cuía-dě, te ío ní cuñúhu-yu sá nĩ ndúha-dé.

**Ñáyiú sàndáá iní tnúhu Jèsús  
xicá<sup>n</sup> táhũ-yu núú-gă sá vă  
yùhú-yu cáhá<sup>n</sup>-yu tnúhu-gă**

<sup>23</sup>Te ní ndee té Pèlú ndihi té Juàà cuánuhú-güedé núú ndécú cuè tée cùndihi-güedé, te ní nacani tnúhu-güedé nàcuáa ní xáha<sup>n</sup> cuè dútú cúnùu ndihi cue tée cùu sacuéhé nũú ñáyiú isràél.

<sup>24</sup>Te sátá nĩ xíndedóho-yu tnúhu ní cáhá<sup>n</sup>-güedé, te ì<sup>n</sup>-ni tnúhu ní cáhá<sup>n</sup>-yu nchaá-yu ndihi Yá Ndiöxí, te ní xáhă<sup>n</sup>-yu xii-gă:

—Yòhó Dútú Ndiöxí, ní cadúha-n àndiu, ní cadúha-n ñuyíú, ní cadúha-n làmár, ní cadúha-n nchàandí túhú sá ío ñuyíú. <sup>25</sup>Te ndíi Dàvíí ní sàndáá iní ndíi tnúhu ní cáhá<sup>n</sup>-n, te ní chídó tnùní ndíi nàcuáa ní xáha<sup>n</sup>-n cáhá<sup>n</sup> ndíi, te ñáyiú ñá túú cùu ñáyiú isràél ío cùdè<sup>n</sup>-yu núú Yá Ndiöxí, te cuíní-yu nàá-yu ndihi-gă, dico vá ndácũ-yu chi mee-gă cúnù-gă.

<sup>26</sup>Te cue tée yìndaha nació<sup>n</sup> ndihi cue tée cùchiu<sup>n</sup> tacá-güedé nàá-güedé ndihi Dútú Ndiöxí ndihi Cristú Yaá ní quixi ñuyíú-a.

Duha ní chídó tnùní ndíi Dàvíí nàcuáa ndùu tnúhu ní cáhá<sup>n</sup>-n — cächí-yu xáhă<sup>n</sup>-yu xii Yá Ndiöxí.

<sup>27</sup>Te xăha<sup>n</sup> tucú-yu xii-gă:

—Ndáá ní cáhá<sup>n</sup> ndíi Dàvíí chi ñáyiú ñá túú cùu ñáyiú isràél ndihi ñáyiú isràél ní cáhá<sup>n</sup> cuèhé-yu cuendá Jèsús. Te Yòhó Dútú Ndiöxí, Déhe-n cùu Jèsús nũu ío váha iní-gă, te ní sáha chiú<sup>n</sup>-n-gă, te ío úhú ní cuu iní ñáhá ñáyiú xii-gă. <sup>28</sup>Te ní quidé-yu nàcuáa ní sani iní-n càdá-yu ndéé sanaha, ndéé cùtnàhă ní ngáva ñuyíú. <sup>29</sup>Te Yòhó Dútú Ndiöxí sa nàha-n nása càhá<sup>n</sup> cue tée cuíní cada úhú ñáhá xii-ndí. Te quide-ndí chiú<sup>n</sup> tahu-n, te vitna chindee ñàha-n xii-ndí cuendá sá vă yùhú-ndí cáhá<sup>n</sup>-ndí tnúhu-n. <sup>30</sup>Te cada tátna-n ñáyiú cùhú, te chindee ñàha-n xii-ndí, te cada-ndí nchaa sá vă yòo tnàhí ndàcu cada nacuáa cuñúhu vihi-yu. Te xìní-ndí sá mée Jèsús chindee ñàha-gă xii-ndí, chi quide-gă chiú<sup>n</sup> tahu-n —cachí-yu xáhă<sup>n</sup>-yu xii Yá Ndiöxí.

<sup>31</sup>Te sátá nĩ yáha ní cáhá<sup>n</sup>-yu ndihi Yá Ndiöxí, te ní quidi-xi vehe núú xíndecú-yu, te òré-á<sup>n</sup> nĩ cutáhú tucú-yu nchaá-yu Espiritú-gă. Te ní cáhá<sup>n</sup>-yu tnúhu Yá Ndiöxí, te ñá túú tnàhí ni yùhú-yu.

**Cuendá nchaa ndachìu<sup>n</sup>  
cánehe chiú<sup>n</sup>-yu**

<sup>32</sup>Te nchaa ñáyiú ní sàndáá iní tnúhu Yá Ndiöxí ì<sup>n</sup>-ni tnúhu ní cáhá<sup>n</sup>-yu nchaá-yu. ì<sup>n</sup>-ni tnúhu ní sani iní-yu, te ní xóo chindee tnàhá-yu chi ní xóo cuáha táhú tnáhă-yu nchaa sá xíní ñùhú-yu, te ni ì<sup>n</sup>-yu ñá túú ní cáhá<sup>n</sup>-yu sá ndàchiú<sup>n</sup>-yu ì<sup>n</sup>-ni-nyu cùu nchaa sá ndécú ndíhí-yu. <sup>33</sup>Te cue tée ní táúchíú<sup>n</sup> Jèsús dacuàha ñàha xií-yu

tnúhu-gá ío váha ní cáhá<sup>n</sup>-güedé nàcuáa ní cuu ní ndoho Xítohó Jesucristú. Te ío ní chindee ñaha Yá Ndiöxí ní cáhá<sup>n</sup>-yu tnúhu-gá, te ñá túú ní cáhá<sup>n</sup> cuèhé dava-gá-yu cuendá ñáyiú dâcuaha tnúhu-gá. <sup>34</sup>Te ñá túú tnàhí ni cùndahú-yu díhú<sup>n</sup>, chi nchaa ñáyiú ndècu ndihí ñuhu-xi, ndihí nchaa ñáyiú càa vehe-xi ní nadicó-yu, te da ì<sup>n</sup> da ì<sup>n</sup> ndachìú<sup>n</sup>-yu ní nadicó-yu òré xíní ñùhú-yu díhú<sup>n</sup>. <sup>35</sup>Te ní sãñahá-yu xii cue téé ní táúchíú<sup>n</sup> Jèsús dacuàha ñaha xií-yu tnúhu-gá, te cue téé-á<sup>n</sup> ñí dácãhũ-güedé nchaa ñáyiú xìni ñuhu. <sup>36</sup>Te distritú Chìpré ndécú ì<sup>n</sup> téé nàni-dé Chèé ñaní tnáhá ndíi Lèví, te ní xóo cunu cuechi-dě veñúhu ñáyiú isràél. Te cuendá sá sãñaha-dě tnúhu ndee ìní xií-yu, xíã<sup>n</sup> ñũ ní dánání ñaha-güedé Vèè xii-dé. <sup>37</sup>Te téé-á<sup>n</sup> ñí nadico-dě luha ñuhu-dé, te nèhe-dé díhú<sup>n</sup> cuáhá<sup>n</sup> núú cuè téé ní táúchíú<sup>n</sup>-gã dacuàha ñaha xií-yu tnúhu-gá.

**Té Ananiás ndihí tá Sàfirá  
ñá túú ní quide ndáá-yu**

**5** Te ndècu ì<sup>n</sup> téé nàni Ananiás, te ñadìhí-dé nání-á<sup>n</sup> Sàfirá, te ñáyiú-á<sup>n</sup> ñí nadicó-yu luha ñuhú-yu. <sup>2</sup>Te ní taxúha-dé sacú díhú<sup>n</sup>, te sacú-gá néhé-dě cuáhá<sup>n</sup> ní sãñaha-dě xii cue téé ní táúchíú<sup>n</sup> Jèsús dacuàha ñaha xii ñáyiú tnúhu-gá, te ní dándàhú ñáhá-dě xii-güedé, chi ní xáha<sup>n</sup>-dě sá ñihí ní sãñaha-dě, te ñaha ñadìhí-dé sá dúcá<sup>n</sup> ñí quide-dé. <sup>3</sup>Te ní xáha<sup>n</sup> tẽ Pèlú xii-dé:

—Ananiás, ìná cuendá duca<sup>n</sup> ñí quide-n ñí dãná-n ñí

quíhu sácuíhná ìní-n? Te ní dâcuándèhnde-n núú Espíritú Yá Ndiöxí, te ní taxúha-n sâcú díhú<sup>n</sup> ñí ñihí-n cuendá ñuhu-n. <sup>4</sup>¿Te ñuhu-á<sup>n</sup> cuendá sá ñúhú mèe-n, àdi díhú<sup>n</sup>-ã<sup>n</sup> cuendá sá díhú<sup>n</sup> méé-n cùu-xi, te cuu-ni cada-n nàcuáa càchí ìní-n càha<sup>n</sup>-n ñá? ¿Ná cuendá duca<sup>n</sup> ñí quide-n? ¿Ná ní quide-xi ìní-n ñũ ní dâcuándèhnde-n núú Yá Ndiöxí? Chi ñá dúú-ní mèe-ni ñáyiú ni dândahú-n —càchí tẽ Pèlú xáha<sup>n</sup>-dě xii-dé.

<sup>5</sup>Te òré ní ndihí tnúhu ní xáha<sup>n</sup> tẽ Pèlú, te uu<sup>n</sup>ni ní nduá-dé te ní xíhí-ni-dé. Te nchaa ñáyiú ní ñihí tnúhu sá ñí xíhí-dé, te ní yùhú víhí-yu. <sup>6</sup>Te ní quixi ì<sup>n</sup> úú cue téé cuechi, te ní ndanehe ñaha-güedé ní sacá<sup>n</sup> ñáhá-güedé núú yuu, te ní ducu<sup>n</sup> nuu ñaha-güedé yuu-á<sup>n</sup>, te ní xido ñaha-güedé néhé ñaha-güedé cuáhá<sup>n</sup> chindúxi ñaha-güedé xii-dé.

<sup>7</sup>Te ní cuu úú uní òré, te ní quexio ñadìhí téé ní xíhí-á<sup>n</sup>, te vátá quìní-gá-a<sup>n</sup> sá ñí xíhí yii-a<sup>n</sup>. <sup>8</sup>Te ní xáha<sup>n</sup> tẽ Pèlú xii-a<sup>n</sup>:

—Cuiní-í cachí tnúhu ndáá-n. ¿Ndèdau ní dícó-ndó ñuhu, ní dícó-ndó nàcuáa ní cachí yii-n ã<sup>n</sup>? —càchí tẽ Pèlú xáha<sup>n</sup>-dě xii-a<sup>n</sup>.

Te ní xáha<sup>n</sup>-a<sup>n</sup>:  
—Ndáá sá dúú-ní dùca<sup>n</sup> —cachí-a<sup>n</sup> xáha<sup>n</sup>-a<sup>n</sup>.

<sup>9</sup>Te ní xáha<sup>n</sup> tẽ Pèlú:  
—¿Ná cuendá duca<sup>n</sup> ñí chitnàha tnúhu-ndo dùca<sup>n</sup> ní quide-ndo ñí cuiní-ndó dândahú-ndó Espíritú Yá Ndiöxí? Quiní-n, chi sa cuándixi cue téé ní sáhá<sup>n</sup> ní chindúxi yii-n, te yòhó tnáhá-n càndeca ñaha tucu-güedé xii-n quíhí<sup>n</sup> vitna —càchí-dé xáha<sup>n</sup>-dě xii-a<sup>n</sup>.

<sup>10</sup>Te òré-á<sup>n</sup> nǐ nduá-a<sup>n</sup> núú tǎ Pèlú, te ní xíhí-ni-a<sup>n</sup>. Te cuándihu cue tée cuechi-ǎ<sup>n</sup> xití vehe, te ní xiní-güedé sá sà ní xíhí-a<sup>n</sup>, núú ní xido ñaha tùcu-güedé cuáhá<sup>n</sup> chindúxi-güedé-a<sup>n</sup> ðñi yii-a<sup>n</sup>. <sup>11</sup>Te ní yùhú víhí ñǎyiu ní sándáá iní tnúhu Yá Ndiöxí, ndihi dava-gá ñǎyiu ní níhí tnúhu nàcuáa ní cuu.

**Ní quide-güedé titní núú  
sǎ vǎ yõ ñahí ndàcu cada  
te ío ní cuñúhu ñǎyiu**

<sup>12</sup>Te cue tée ní táuchíú<sup>n</sup> Jèsús dacuàha ñaha xii-yu tnúhu-gá titní víhí sǎ vǎ yõ ñahí ndàcu cada ní quide-güedé, te ní cuñúhu vǐhí-yu. Te nchaa ñǎyiu ní sándáá iní-xi tnúhu Jèsús ní xóo tacá-yu corrèdór néhé ðiú ndii Salòmón. <sup>13</sup>Te nchaa ñǎyiu ñá túú dàcuaha tnúhu-gá ñá ní cùyí-yu chitnahá-yu ñǎyiu ní sándáá iní-xi tnúhu-gá, dico nchaá-yu ní cáhá<sup>n</sup> váha-yu cuèndá ñǎyiu ní sándáá iní-xi tnúhu-gá. <sup>14</sup>Te vǎi tée, vǎi ñadihí ní sándáá iní-yu tnúhu-gá. <sup>15</sup>Te cuèndá sá ní níhí-yu tnúhu sá quidé tǎtna cue tée ní xica cuu ndihi Jèsús, núú xíá<sup>n</sup> ní queñuhú-yu nchaa ñǎyiu cùhú ichi, te davá-yu ní quide túha-yu camá te davá-yu ní quide túha-yu yuu, núú núú nchaa xíá<sup>n</sup> tá sàcá<sup>n</sup>-yu cue ñǎyiu cùhú-á<sup>n</sup> cuǎhá<sup>n</sup>, te xíá<sup>n</sup> cáǎ-yu ndètú-yu, chi ní sani iní-yu sá òré yáha té Pèlú te cuèdicó cuándáhú-dě yáha ndodo ñaha-xi xii-yu te ndúha-yu. <sup>16</sup>Te ní quixi ñǎyiu ñuú yatni Jerusàlén ndécǎ-yu ñǎyiu cùhú, ndihi ñǎyiu yìhi ñaha espíritú cùndìhi yucu ñávàha ní quixi, te nchaá-yu ní ndúha.

**Ío ní quide úhú-güedé té  
Pèlú ndihi té Juàá**

<sup>17-18</sup>Te dútú cùnùu-gá ndihi cue tée cùu saducéú cue tée cùndìhi-dé ní cudéé<sup>n</sup>-güedé sá ìo chítú-yu dàcuaha tnúhu Jèsús, núú xíá<sup>n</sup> ní tñii-güedé cue tée ní táuchíú<sup>n</sup> Jèsús dacuàha ñaha xii-yu tnúhu-gá ní chihí ñaha-güedé vecaá. <sup>19</sup>Te xití niú-á<sup>n</sup> nǐ quexìo ìi<sup>n</sup> espíritú xínú cuèchi núú Yá Ndiöxí ní nacaá<sup>n</sup>-xi yèhe vecaá ní quee-güedé, te ní xáha<sup>n</sup>-xi xii-güedé:

<sup>20</sup>—Quíhí<sup>n</sup>-ndó veñúhu cǎhnu sá ìo cùnùu te cùñaha-ndo xii ñǎyiu nàcuáa cadá-yu naníhí tǎhú-yu — cǎchí espíritú-á<sup>n</sup> xǎha<sup>n</sup>-xi xii-güedé.

<sup>21</sup>Te sá dúcá<sup>n</sup> nǐ xáha<sup>n</sup>-xi nǔu sátá nǐ túndaá, te ní sáhá<sup>n</sup>-güedé veñúhu cǎhnu sá ìo cùnùu sá cúú-xí ñǎyiu isràèl ní dácuahá ñaha-güedé xii-yu.

Te dútú cùnùu-gá ndihi cue tée cùndìhi-dé ní nadatàcá ñahá-güedé ndihi nchaa cue tée cùu sacuéhé nǔú ñǎyiu isràèl ndihi cue tée cùchiu<sup>n</sup>, te ní tendaha-güedé sandàdú cuáhá<sup>n</sup> queñuhu-güedé cue tée yìhi vecaá ní cùu. <sup>22</sup>Te ní quexìo-güedé yèhe vecaá, te ní xiní-güedé sá nì ìi<sup>n</sup>-gá cue tée dàcuaha ñaha xii ñǎyiu tnúhu Jèsús ñá túú-gǎ-güedé yíhí. Te cuánuhú-güedé <sup>23</sup>ní xitnùhu-güedé cue tée cùchiu<sup>n</sup>, te xǎha<sup>n</sup>-güedé:

—Ní sáhá<sup>n</sup>-ndí ní sándéhé-ndí vecaá, te ndéé chóó-ni, te xíndecu-ni sandàdú cue tée xíndéé yèhe vecaá. Te ní nacaá<sup>n</sup>-ndí vecaá, te vǎ yõ ìi<sup>n</sup>-gá yíhí — cǎchí-güedé xǎha<sup>n</sup>-güedé.

<sup>24</sup>Te sá dúcá<sup>n</sup> nǐ xáha<sup>n</sup>-güedě, te cuáhá<sup>n</sup> iní cue dútú cúnùu ndìhi tée tàxi tnuní cue tée xǐndecé veñúhu càhnu sá ïo cúnuu, te ní xǐtnàha-güedé:

—¿Nása cada-xi vitna duha càa ní cuu ní xinu cue tée yǐhi vecaá-i? —càchí-güedé xǐtnàha-güedé.

<sup>25</sup>Te ní quexìo ìi<sup>n</sup> tée ní xáha<sup>n</sup>-dě:

—Cundedóho-ndo na càchí tnúhu-í ìi<sup>n</sup> tnúhu. Cue tée ní chihi-ndo vècaá ndécú-güedě veñúhu càhnu sá ïo cúnuu dacuaha-güedé ñáyiú —càchí-dé xǎha<sup>n</sup>-dě.

<sup>26</sup>Te cue tée ndéé veñúhu ndìhi tée tàxi tnuní ñáhá xii-güedé cuánguaca ñaha-güedě, te ñá túú ní quide úhú ñáhá-güedě, chi ní yùhú-güedé cuáha yúú ñáhá ñáyiú dii ñùú-xi-á<sup>n</sup>. <sup>27</sup>Te ní ndexìo ndìhi ñaha-güedé núú cuè tée cùu sacuéhé ndìhi núú cuè tée cùchiu<sup>n</sup>. Te dútú cúnùu-gá ní ngúíta-dé ténàá ñáhá-dě xii-güedé, te xǎha<sup>n</sup>-dě:

<sup>28</sup>—Te náa ñá díú nǐ cachí-ndí sá vǎ dácuaàha-gá-ndó ñáyiú tnúhu Jèsús te dácuaaha-ni-ndó-yu, te vitna nchaa ñáyiú ñuú Jerusalén ní níhǐ-yu tnúhu nàcuáa càhá<sup>n</sup>-ndó. ¿Te ná cuendá duca<sup>n</sup> quide-ndo, te càchí-ndó sǎ nchǔhú ndècuéchi-ndí ní sahani-ndí Jèsús-i? —càchí dútú cúnùu-gá xǎha<sup>n</sup>-dě xii-güedé.

<sup>29</sup>Te té Pèlú ndìhi dava-gá cue tée ní táuchíú<sup>n</sup> Jèsús dácuaàha ñaha xí-yu ní xáha<sup>n</sup>-güedě xii cue tée cùchiu<sup>n</sup>:

—Nchúhú, Yá Ndiöxí cúnùu-gá sándáá iní-ndí tnúhu càhá<sup>n</sup>-gá dàcúúxí tnúhu càhá<sup>n</sup> ñáyiú. <sup>30</sup>Te nchòhó ní sata caa-ndo Jèsús núú cùrúxí te núú cùrúxí-á<sup>n</sup> nǐ xíhí-gá,

dico ní dándótó ñaha Yá Ndiöxí xii-gá. Te Yá Ndiöxí ní sándáá iní cue ñani tnáhá-ndí ní xíndecu ndéé sanaha. <sup>31</sup>Te Yá Ndiöxí ní xáha<sup>n</sup>-gǎ sá cúndècu Jèsús xio cùha-gá cuendá taxi tnùní-gá te dacácu nihnu-gá ñáyiú isràél núú ùhú núú ndàhú. Te duca<sup>n</sup>-ni dacácu nihnu-gá nchaa ñáyiú na dàña nchaa sá cuèhé sá dúhá, te cada càhnu iní-gá nchaa yícá cuèchi-yu. <sup>32</sup>Te ní xiní-ndí nàcuáa ní quide-gá, núú xǐǎ<sup>n</sup> cání-ndí cuendú núú nchàa ñáyiú, te Espíritú Yǎ Ndiöxí chíndèe ñaha-xi xii-ndí càhá<sup>n</sup>-ndí tnúhu-gá. Te diu-ni Espíritú-gá ní sǎñaha-gǎ xii nchaa ñáyiú ní sándáá iní-xi tnúhu-gá —càchí té Pèlú ndìhi dava-gá-güedé xǎha<sup>n</sup>-güedé xii cue tée cùchiu<sup>n</sup>.

<sup>33</sup>Te sátá dúcá<sup>n</sup> nǐ xáha<sup>n</sup>-güedě xii cue tée cùchiu<sup>n</sup>, te ní cudéé<sup>n</sup>-güedě, te ní ndatnúhu-güedé sá cáhni ñaha-güedé. <sup>34</sup>Te ìi<sup>n</sup> tée cùu fariséú tnàha-dé cúú-dě chùu<sup>n</sup>, te nàni-dé Gamàliél, te cùu-dé mèstrú dácuaàha-dé ñáyiú nàcuáa ní chídó tnùní ndíi Moisés, te ío yǐñùhu cahá<sup>n</sup> ndìhi ñáhá-yu xii-dé. Te ní ngúnutnǐ-dé, te ní xáha<sup>n</sup>-dě sá ná quèe tnaa té Pèlú ndìhi dava-gá-güedé quehé. <sup>35</sup>Te ní xáha<sup>n</sup>-dě xii cue tée cùchiu<sup>n</sup>:

—Nchòhó cue tée isràél, xini ñuhu-xi sá cání vǎha iní-ndó nása cada-ndo ndìhi cue tée-ǎ<sup>n</sup>. <sup>36</sup>Chi ní cunaha nǐ xíndecu ìi<sup>n</sup> tée ní xínani Tèudás, te ní cachí-dé sá cúnùu-dé, te ní cundìhi-dé dàtná cúmí cièndú cue tée, te ñá ní cuiní-güedé cuu ìi<sup>n</sup>nuu-güedé ndìhi cue tée cùchiu<sup>n</sup>. Te ní sahani ñaha cuè tée cùchiu<sup>n</sup>-á<sup>n</sup> xii té Tèudás, te ní ndìhi cue tée ní

xica cuu ndihi-dé ní xíté nuu-güedé, te ñá túú-gǎ ní quide-güedé nàcuáa ní sani iní-güedé cada-güedé. <sup>37</sup>Te sátá nì xíhí téé-á<sup>n</sup>, te ní tnahá nduu nùcódó tnùnì ñáyíu. Te dàvá-á<sup>n</sup> nì xíndecu ìí<sup>n</sup> téé distrítú Galiléa ní xínani-dě Jüdás. Te titní-güedé ní chitnahá ñáhá-güedě xii-dé. Te tñahá-dé ní sahnì ñaha tucu cue téé cùchiu<sup>n</sup>, te nchaá cue téé ní xica cuu ndihi-dé ní xíté nuu-güedé. <sup>38</sup>Te na càchí tnúhu-í sá dáñá-ndó cuè téé-á<sup>n</sup>, te nì ñá túú nǎgá tnúhu cúñaha-ndo xii-güedé, chi núu chiu<sup>n</sup> mee-güedé quidé-güedě te cuíta-güedé, <sup>39</sup>dico núu chiu<sup>n</sup> Yá Ndiöxí quidé-güedě, te vá ndínìhnu chiu<sup>n</sup> quide-güedé. Te núu quide-güedé chiu<sup>n</sup> Yá Ndiöxí, te vá nàá-ndó ndìhi-güedé, chi Yá Ndiöxí nàá ndìhi-ndo sǎ dúcá<sup>n</sup> xíquide-ndo —càchí té Gamàliél xǎha<sup>n</sup>-dě xii cue téé cùchiu<sup>n</sup>.

<sup>40</sup>Te nchaá-güedé ní cáhá<sup>n</sup> sǎ tnúhu ndáá càhá<sup>n</sup>-dé. Te dàtnùnì ní nacana tucu-güedé té Pèlú ndìhi dava-gǎ-güedé te ní caniha-güedě, te ní cáhá<sup>n</sup> níhi-güedé, te xǎha<sup>n</sup>-güedě sǎ vǎ càhá<sup>n</sup>-gǎ-güedé tnúhu Jèsús, te dàtnùnì ní dáñá ñaha-güedé cuánuhú-güedé. <sup>41</sup>Te ío ní cudíí iní-güedé, chi mee Yá Ndiöxí ní cachí-gǎ sǎ dúcá<sup>n</sup> ndòho-güedé dacuàha-güedé ñáyíu tnúhu Jèsús. <sup>42</sup>Te ìí<sup>n</sup> nduu ìí<sup>n</sup> nduu ní dácuahá-güedé ñáyíu xítí veñúhu càhnu sǎ ío cùnuu ndìhi nchaá vehé-yu. Te ní xǎha<sup>n</sup>-güedě xii-yu sǎ Jèsús cúú-gǎ Cristú Yáá ní quixi ñuyíú-a.

Ní ndúcú-güedě úsá cue téé cundecu dacǎhñu sǎ cáxí ñáyíu

**6** Te diu-ni dàvá-á<sup>n</sup> nì sándáá iní vǎi ñáyíu tnúhu Jèsús. Te cue ñáyíu griégú ní cáhá<sup>n</sup> cuèhè-yu

cuèndá ñáyíu isràél, sǎ ñáyíu dìhí ñáyíu quèé ñáyíu càhá<sup>n</sup> tnúhu griégú ñá túú tñahá sǎ cáxí-yu, chi ñá túú sǎñaha ìí<sup>n</sup>nuu-güedé. <sup>2</sup>Te cue téé úxúú ní táúchíú<sup>n</sup> Jèsús dacuàha ñaha xii-yu tnúhu-gǎ, cue téé-á<sup>n</sup> nì cana-güedé nchaá ñáyíu sándáá iní tnúhu Jèsús. Te ní xǎha<sup>n</sup>-güedě xii-yu:

—Nchúhú chi vá cúú dàcǎhñu-ndí sǎ cáxí-yu, chi mee-ni tnúhu Yá Ndiöxí càhá<sup>n</sup>-ndí. <sup>3</sup>Te nchòhó cue téé ndècu ndìhi-ndí ichi Xítóhó Jesucristú cáhá<sup>n</sup> ndìhi-ndo úsá cue téé xíndecu iha, cue téé càhá<sup>n</sup> ndìhi ñáhá-yu mee-ni tnúhu yíñùhu, cue téé ndècu ndìhi Espiritú Yá Ndiöxí, mee-ni cuè téé cùtnuní váha iní-xi. Te cue téé-á<sup>n</sup> cuàha-ndí-güedé chiu<sup>n</sup> cada-güedé dacǎhñu-güedé sǎ cáxí-yu. <sup>4</sup>Te nchúhú mee-ni Yá Ndiöxí cáhá<sup>n</sup> ndìhi-ndí, te mee-ni tnúhu-gǎ dacuàha-ndí-yu —càchí-güedé xǎha<sup>n</sup>-güedě xii-yu.

<sup>5</sup>Te nchaá-yu ní tñíí-yu tnúhu ní cáhá<sup>n</sup>-güedé, núu ní ndúcú-yu cue téé cada chiu<sup>n</sup>-á<sup>n</sup>. Te ìí<sup>n</sup>-dé nání-dě Těvá, te ío váha sándáá iní-dé Yá Ndiöxí, te ndècu ndìhi-dé Espiritú-gǎ. Te duha ní xínani dàva-gǎ-güedé: té Lipé, té Pröcoró, té Nicánór, té Tímón, té Pàrmenás, té Lǎxí téé ñúú Antiòquiá téé ní sándáá iní-xi sǎ dácuahá ñáyíu isràél te vitna ní sándáá iní-dé tnúhu Jèsús. <sup>6</sup>Te úsá cue téé-á<sup>n</sup> nì sáhá<sup>n</sup>-güedé núu cuè téé úxúú ní táúchíú<sup>n</sup> Jèsús dacuàha ñaha xii-yu tnúhu-gǎ, te cue téé úxúú-á<sup>n</sup> nì cáhá<sup>n</sup> ndìhi-güedé Yá Ndiöxí, te ní sacá<sup>n</sup> ndodo-güedé ndaha-güedé díquí cuè téé úsá-á<sup>n</sup>.

<sup>7</sup>Te ñáyíu ní sándáá iní tnúhu Jèsús cuáhá<sup>n</sup>-yu titní xichi càhá<sup>n</sup>-yu

tnúhu-gá. Te vâi-gá ñáyiú ta sândáá iní-yu tnúhu-gá cuáhá<sup>n</sup>, te ní xíndecú-yu ndíhi dava-gá ñáyiú dâcuaha tnúhu-gá ñuú Jerusalén. Te titní dútú ñí sândáá iní-güedé tnúhu-gá.

### Ní tñii-güedé té Těvá

<sup>8</sup>Te té Těvá ní quide-dé titní núú sá vâ yôo tnâhí ndâcu cada, te ní cuñúhu vîhí-yu sá dúcá<sup>n</sup> ñí quide-dé, te duca<sup>n</sup> ñí quide-dé chi ndècu ndíhi-dé Yă Ndiôxí chíndèe ñaha-gá.

<sup>9</sup>Te ní xíndecu cue téé ní xóo cunu cuechi núú ñí<sup>n</sup> téé tàxi tnuní, te téé tàxi tnuní-á<sup>n</sup> ñă ní xôo daña tnâhí-dé quee-güedé núú chíú<sup>n</sup>-dě, te ní xinu-ná-güedé. Te sátá xǎ<sup>n</sup>, te ní dácáá-güedě veñúhu-güedé, te veñúhu-á<sup>n</sup> sàhá<sup>n</sup> ñáyiú ñuú Cirené, ñáyiú ñuú Alejándriá, ñáyiú ñuú Ciliciá, ndíhi ñáyiú distrítú Àsiá. Te nchaa ñáyiú-á<sup>n</sup> ñí nàá ndíhi-yu té Těvá. <sup>10</sup>Te ñă ní ñíhí-yu tnúhu cáhá<sup>n</sup>-yu, chi ío váha ní sáá díquí-dě nâcuáa ní xáha<sup>n</sup>-dě xíí-yu, chi Espíritú Yă Ndiôxí ní chindee ñaha-xi xii-dé. <sup>11</sup>Te ní cháhu-yu cue téé ní dâcuándèhnde tnúhu ní cáhá<sup>n</sup> té Těvá núú-yu. Te ní xáha<sup>n</sup>-güedě sá cáhá<sup>n</sup> cuèhé-dé cuendá ndíi Moisés ndíhi cuendá Yă Ndiôxí. <sup>12</sup>Te cuendá sá dúcá<sup>n</sup> ñí dâcuándèhnde-güedé núú ní sândáá iní-yu, te ní cudé<sup>n</sup>-yu núú tě Těvá. Te ní cudé<sup>n</sup> cue téé cùu sacuéhé, te tnâhá cue téé dâcuaha ñaha xíí-yu nchaa tnúhu ní chídó tnùní ndíi Moisés ní cudé<sup>n</sup>-güedě. Te ní sáhá<sup>n</sup>-güedé ní tñii-güedé té Těvá ndécá ñaha-güedé cuáhá<sup>n</sup> núú quidé cuè téé cùchiu<sup>n</sup> jundá, ndíhi cue téé cùu sacuéhé. <sup>13</sup>Te ndécá-yu

cue téé dâcuandehnde cuáhá<sup>n</sup> núú quidé-güedě jundá, te ní quesaha-ni tûcu-güedé cáhá<sup>n</sup> cuèhé-güedé, te xáha<sup>n</sup>-güedě:

—Tée-a mee-ni cáhá<sup>n</sup> cuèhé-dé cuendá veñúhu sá ío cùnuu, veñúhu ní cuu íí, te cáhá<sup>n</sup> cuèhé-dé cuendá nchaa sá ñí chídó tnùní ndíi Moisés. <sup>14</sup>Te ní tecú dóho-ndí cächí-dé sá Jèsús téé ñuú Nazàrét dangoyo-dé veñúhu càhnu sá ío cùnuu te vá dáñá-gă-dé cada-ndí nâcuáa ní cachí ndíi Moisés cada-ndí — cächí-güedé xáha<sup>n</sup>-güedě.

<sup>15</sup>Te nchaa cue téé ndècu jundá ní ndacoto váha-güedé núú tě Těvá. Te ní dáyèhé-xi núú-dě dàtná quidé-xí núú espíritú xínú cuèchi núú Yă Ndiôxí.

### Té Těvá xáha<sup>n</sup>-dě sá ñà túú cuèchi-dé

**7** Te ní xáha<sup>n</sup> dútú cùnùu-gá xii-dé:

—¿Ndáá tnúhu cáhá<sup>n</sup>-güedé cuendá-n-ă<sup>n</sup>? —cächí-dé xáha<sup>n</sup>-dě.

<sup>2</sup>Te té Těvá ní xáha<sup>n</sup>-dě xii-güedé:

—Nchòhó cue ñaní tnáhà-í ndíhi nchòhó cue téé cùu sacuéhé, cundedóho-ndo ñí<sup>n</sup> tnúhu na cáhá<sup>n</sup>-í-a. Yă Ndiôxí ío cùnuu-gá, te ní cáhá<sup>n</sup> ndíhi-gá ndíi Àbrahám nâció<sup>n</sup> Mesopòtamiá cùtnâhá vátá quíhí<sup>n</sup>-gá ndíi cundecu ndíi ñuú Hârán. <sup>3</sup>Te ní xáha<sup>n</sup>-gă xii ndíi: “Daña-n nchàa ñaní tnáhá-n, te daña-n ñùhu-n, te quíhí<sup>n</sup>-n ñí<sup>n</sup> xichi núú dánèhé ñáhà-í cundecu-n”, duha ní xáha<sup>n</sup> Yă Ndiôxí xii ndíi Àbrahám. <sup>4</sup>Te sátá dúcá<sup>n</sup> ñí xáha<sup>n</sup> Yă Ndiôxí xii ndíi Àbrahám, te ní ndee ndíi ñuú Câldeá, te cuáhá<sup>n</sup> ndíi cundecu ndíi ñuú Hârán. Te sátá ñí xíhí tătá ndíi, te ní xáha<sup>n</sup>



Yă Ndiöxí quixi ndíi cundecu ndíi núú ndécú-ó vitna. <sup>5</sup>Te Yă Ndiöxí ñá túú ní sãñaha-gă ni lùha ñuhu cuu cuendá ndíi núú ní xíndecu ndíi. Te ní xáha<sup>n</sup> ndáá Yă Ndiöxí xii ndíi sá cuãñaha-gă ñuhu cuu cuendá ndíi, te na cùú ndíi, te ndóo ndíhi nchaa ñaní tnáhá ndíi cacu túu ndéé cuèé-gá. Te duca<sup>n</sup> ñí xáha<sup>n</sup>-gă cuèi vátá cundècu-gá ni ì<sup>n</sup> déhe ndíi. <sup>6</sup>Te ní xáha<sup>n</sup> tucu Yă Ndiöxí xii ndíi Àbrahám sá dífú-ní ñàní tnáhá ndíi quíh<sup>n</sup>-yu núú xíca cundecú-yu cúmí ciendú cuíá, te vá dãñã-yu queé-yu núú chíú<sup>n</sup>-yu, te ío dandòho ñaha-güedé núú cundècu-yu. Duha ní xáha<sup>n</sup> Yă Ndiöxí xii ndíi, te ndáá duca<sup>n</sup> ñí cuu. <sup>7</sup>Te ní xáha<sup>n</sup> tucu Yă Ndiöxí xii ndíi Àbrahám: “Yúhú dandòho-í nchaa ñáyiú na dândòho ñaha xii cue ñaní tnáhá-n. Te dàvã-á<sup>n</sup> te ndee cue ñaní tnáhá-n núú cundècu-yu, te quixí-yu chiñuhu ñàhã-yu xii-í iha”, duha ní xáha<sup>n</sup> Yă Ndiöxí xii ndíi Àbrahám, te ndáá duca<sup>n</sup> ñí cuu. <sup>8</sup>Te Yă Ndiöxí ní quide ndáá-gá ndíhi ndíi Àbrahám, te ní xáha<sup>n</sup>-gă xii ndíi sá cuãha-güedé sèñã ñíi nchaa landú tée cuendá cunáhã-yu nàcuãa ndùu sá ñí quide ndáá-gá ndíhi ndíi Àbrahám. Núú xíã<sup>n</sup> núú ùná nduu sá ñí cacu té Isàac déhe ndíi Àbrahám, te ní sáha ndíi sèñã ñíi-dé. Te ðiu-ni duca<sup>n</sup> ñí quide tucu té Isàac déhe-dé té Jàcób, te ðiu-ni duca<sup>n</sup> ñí quide té Jàcób, chí úxúú déhe-dé ní xíndecu, te nchaa-güedé duca<sup>n</sup> ñí quide-dé. Te ndí úxúú cue tée-á<sup>n</sup> ñí cuu-güedé ñaní tnáhá-ó.

<sup>9</sup>Te ì<sup>n</sup> déhe té Jàcób ní xínani-dě Chèé. Te ñã ní cùu váha iní cue

ñaní-dé núú-dě, núú ní dícó ñàha-güedé ní quehe<sup>n</sup> ñaha cuè tée cuáhã<sup>n</sup> nació<sup>n</sup> Ègiptú, te Yă Ndiöxí ñã ní dàña ñaha-gá xii-dé cuíta nihnu-dé. <sup>10</sup>Te ní chindee ñàha-gá xii-dé ní cácu-dé cùtnàhá ní ndoho vîhi-dé. Te tée yîndaha Egiptú ío ní cudíí iní-dé té Chèé, te ní cutnùní iní-dé sá ïo váha túha té Chèé, te duca<sup>n</sup> ñí cutnùní iní-dé, chí Yă Ndiöxí ní chindee ñàha-gá xii té Chèé. Te ní xáha<sup>n</sup> tée yîndaha Egiptú xii té Chèé sá dífú tē Chèé coo-dé gobièrnú Ègiptú, te taxi tnùnì-dé nchaa ñáyiú xínu cuechi núú tēe yîndaha Egiptú-á<sup>n</sup>.

<sup>11</sup>Te ní quíhu tnamá nihîi nació<sup>n</sup> Ègiptú ndíhi nació<sup>n</sup> Cànãá, te ío ní ndohó-yu. Te nchaa ñaní tnáhã-ó ñí xíndecu ndéé sanaha ñã ní xõo níhí-gã-yu sá cáxí-yu. <sup>12</sup>Te ní níhí tē Jàcób tnúhu sá ìo trìú Ègiptú, núú ní tendaha-dě cue déhe-dé ní sáhã<sup>n</sup>-güedé ní sãnguaa<sup>n</sup>-güedé trìú-á<sup>n</sup>, te dàvã-á<sup>n</sup> ñí sáhã<sup>n</sup> cue ñaní tnáhã-ó xìto díhna nuu nació<sup>n</sup> Ègiptú. <sup>13</sup>Te xito cùu uú cuáhã<sup>n</sup>-güedé, te ní xáha<sup>n</sup> tē Chèé sá ñàní-dé cúú-güedé. Te tēe yîndaha Egiptú ní cutnùnì iní-dé sá dífú-ní ñàní té Chèé cúú-güedé. <sup>14-15</sup>Te ní cana té Chèé tãtã-dě té Jàcób ndíhi nchaa ñaní tnáhã-dě. Te cùu-xi datná únídico sáhú<sup>n</sup>-yu ndèca té Jàcób cuáhã<sup>n</sup> nació<sup>n</sup> Ègiptú núú ndécú tē Chèé, te xíã<sup>n</sup> ñí quexió-yu ní ngóo-yu. Te yàcã<sup>n</sup> ní xíhí té Jàcób ndíhi nchaa déhe-dé cue ñaní tnáhã-ó. <sup>16</sup>Te sátã ñí cuu titní cuíá, te ní natava-güedé yiqui ndíi Jàcób ndíhi nchaa déhe ndíi nchìdo-güedé cuáhã<sup>n</sup> ñuú Siquém. Te ndíi Àbrahám sa ní cuu titní-gá

cuía sã nĩ nacuaa<sup>n</sup> ndíi ñuhu núu cuè déhe ndíi Hãmór. Te xía<sup>n</sup> nchĩi yaú ní nachindúxi-güedé yiquí-á<sup>n</sup>.

<sup>17</sup>Te cútnàhá vátá

nátava-gá-güedé yiquí cue ndíi, te sa ta tnàhá yatni cada Yá Ndiõxí nàcuáa ní xáha<sup>n</sup>-gã xii ndíi Àbrahám cada-gá sá cúu-xí ñãyiú isràél ndécú Ègiptú, te ta cãyá víhĩ-yu cuáhá<sup>n</sup>. <sup>18</sup>Te dàvá-án chi ingá tée yìndaha nació<sup>n</sup> Ègiptú, te ñã túú-gã ní xiní-dé nása ní xóo cada ndíi Chèé. <sup>19</sup>Te tée yìndaha Egiptú ñã ní quide ndáá-dé, chi ío ní dándóhó-dé ñaní tnáhá-ó ní xíndecu dàvá-án. Te ní táuchíú<sup>n</sup>-dẽ sá xócuñí-yu dándóo-yu déhe yiquí<sup>n</sup> cuèndá ndíhi-güexi cuú. <sup>20</sup>Te dàvá-án nĩ cacu té Moisés, te ío ní cudíí Ìní ñáhá Yã Ndiõxí xii-dé. Te ní xíndecu ndíhi ñaha ñaná-dẽ ndíhi tãtá-dẽ úní-ni yóo. <sup>21</sup>Te ndèca ñáhá-yu cuáhá<sup>n</sup> ingá xichi, te yàcá<sup>n</sup> ní dándóo ñáhá-yu xii-dé, te ní naníhí ñáhá dẽhe yoco tée yìndaha Egiptú, te ní xito-xi-dé dàtná xító-xí ì<sup>n</sup> déhe mee-xi nĩ xito-xi-dé ndéé ní sahnú-dé. <sup>22</sup>Te ní cutúha-dé nchaa sá xiní cue tée ègiptú, te ío váha ní sáá díquí-dẽ tnúhu cáhá<sup>n</sup>-dé ndíhi nchaa sá cadá-dẽ.

<sup>23</sup>Te cútnàhá ndécú-dẽ údico cuía-dẽ, te ní cachí-dé sá quíhí<sup>n</sup>-dé cáhá<sup>n</sup> ndíhi-dé cue ñaní tnáhá-dẽ ñãyiú isràél. <sup>24</sup>Te ní xiní-dé ní caniha ì<sup>n</sup> tée ègiptú xii ì<sup>n</sup> tée isràél, te ñã ní cundee iní-dé cundehe-dẽ nõu ní sáhá<sup>n</sup>-dé ní chindee-dẽ tée isràél, te ní sahní-dé tée ègiptú, <sup>25</sup>chi ní cachí Yã Ndiõxí sá díú-dẽ dacãcu-dé ñaní tnáhá-dẽ ñãyiú isràél núu cuè tée ègiptú. Te ní sani iní-dé sá cútnuní iní-yu nàcuáa ní

xáha<sup>n</sup> Yã Ndiõxí xii-dé, dico ñã túu ní cùtnuní iní-yu. <sup>26</sup>Te nduu tnèé ní xiní-dé nàá úu cue tée isràél, te ñã túu ní tnàhá iní-dé nàá-güedé nõu ní xáha<sup>n</sup>-dẽ xii-güedé: “¿Ná cuèndá duca<sup>n</sup> xĩnàá-ndó? ¿Náa ñã díú ndímee-ndo núu duca<sup>n</sup> xĩnàá-ndó?” Duha ní xáha<sup>n</sup> tẽ Moisés xii-güedé. <sup>27</sup>Te tée ndècuéchi ní sáhá<sup>n</sup>-dé ní chindaha ñihnu-dé té Moisés ì<sup>n</sup> xio, te ní xáha<sup>n</sup>-dẽ: “¿Ná cúu yòhó nõu véxi-n tàxi tnuní ñáhá-n?” <sup>28</sup>Te tnàhá-ni tucu yúhú cahni-n dàtná ní sahní-n tẽe ègiptú icu càha<sup>n</sup>-n á”, duha ní xáha<sup>n</sup>-dẽ xii té Moisés. <sup>29</sup>Te sá dúcá<sup>n</sup> nĩ cáhá<sup>n</sup> tée isràél nõu ní yùhú té Moisés ní xinú-dé cuáhá<sup>n</sup>-dé ní sáá-dé nació<sup>n</sup> Mèdián. Yàcá<sup>n</sup> ní ngóo-dé, te yàcá<sup>n</sup> ní tnàndaha-dé, te ní cacu úu déhe tée-dé.

<sup>30</sup>Te sátá nĩ xínu údico cuía, te ní sáhá<sup>n</sup> té Moisés ì<sup>n</sup> xio yucu Sinái. Te yàcá<sup>n</sup> ní xiní-dé ì<sup>n</sup> tnutàú nchicú<sup>n</sup> ñuhú, te xití itá ñuhú-án nĩ xiní-dé yíhí ì<sup>n</sup> espíritú xínú cuèchi núu Yã Ndiõxí. <sup>31</sup>Te òré ní xiní-dé sá yíhí-xí xití itá ñuhú-án, te ní cuñúhu vîhi-dé sá nĩ xiní-dé espíritú-án xití itá ñuhú-án, te ní sãndehe-gá-dé, te ní xíndéhe vãha-dé. Te ní tecú dóho-dé ní cáhá<sup>n</sup> Yã Ndiõxí, te xáha<sup>n</sup>-gã xii-dé: <sup>32</sup>“Yúhú cúu-í Ndiõxí ní cáhá<sup>n</sup> ndíhi cue ñaní tnáhá-n ndéé sanaha, ndíi Àbrahám ndíhi ndíi Isàac ndíhi ndíi Jácób, ndíhi dava-gá cue ñaní tnáhá-n. Nchaa cue ndíi-án nĩ xóo cáhá<sup>n</sup> ndíhi-í.” Duha ní xáha<sup>n</sup>-gã xii té Moisés. Te ní quidi ñaha-xi xii té Moisés sá nĩ yùhú-dé, te ñã ní cùyíi-gá-dé cundehe-dẽ tnutàú nchicú<sup>n</sup> ñuhú-án. <sup>33</sup>Te Yã Ndiõxí ní

xáha<sup>n</sup>-gã xii-dé: “Queñuhu chàú-n, chi núú ñúhú nĩ cuu íí nútnĩ-n. <sup>34</sup>Te yúhú ndéhè-í sá ïo ndòho nchaa ñáyiu cùu cuendá-í, ñáyiu ndècu nació<sup>n</sup> Ègiptú. Te ní tecú dóho-í sá ïo ndàhú xíčáhá<sup>n</sup>-yu, núu xíã<sup>n</sup> véxi-í càchí tnúhu-í sá ñuhú-n nació<sup>n</sup> Ègiptú cuendá ndeñùhú-n-yu yacá<sup>n</sup>.” Duha ní xáha<sup>n</sup> Yã Ndiöxí xii té Moisés.

<sup>35</sup>Te ñá ní sàndáá iní-yu té Moisés ndéé díhna, chi ní xáhã<sup>n</sup>-yu: “¿Ná cuendá véxi-n tàxi tnuní ñáhá-n xii-ndí?” Duha ní xáhã<sup>n</sup>-yu xii té Moisés. Te ñiu-ni té Moisés ní tendaha ñàha Yá Ndiöxí ní sáhá<sup>n</sup>-dé dacäcu-dé ñáyiu isràèl nació<sup>n</sup> Ègiptú cuèí ñá ní sàndáá iní ñáhã-yu xii-dé. Dico ní taxi tnùní-dé-yu, chi duca<sup>n</sup> nĩ xáha<sup>n</sup>-gã òré ní xiní-dé espíritú xínú cuèchi núú-gã xití tnutàù nchìcú<sup>n</sup> ñuhú. <sup>36</sup>Te té Moisés ní ngúíta-dé ní quide-dé sá vã yòo tnàhí ndàcu cada, te ní cuñúhu vñhí-yu sá dúcá<sup>n</sup> nĩ quide-dé, te duca<sup>n</sup> nĩ quide-dé Ègiptú ndihi Lámár Tícuèhé. Te ní ngódó núú-dè núú-yu ní quee-yu Ègiptú cuáhá<sup>n</sup>-yu ñ<sup>n</sup> ichi xití yucu núú vã yòo tnàhí ndècu, te ní xíhi-yu údico cuíá xití yucu-á<sup>n</sup>, te xíá<sup>n</sup> nĩ xóo cada-dé sá vã yòo tnàhí ndàcu cada. <sup>37</sup>Te ñiu-ni té Moisés ní xáha<sup>n</sup>-dè xii cue ñani tnáhá-dè dàvá-á<sup>n</sup>: “Yá Ndiöxí cada-gá te coo ñ<sup>n</sup> ñani tnáhá-ndó ndèé cuèé-gá, te téé-á<sup>n</sup> cáhá<sup>n</sup>-dé tnúhu-gá núú-ndó dàtná cuiní-ndó nĩ cachí-gá quidé yúhú, te ío xini ñuhu-xi cundedóho-ndo tnúhu cáhá<sup>n</sup>-dé”, duha ní xáha<sup>n</sup> tè Moisés xii-yu dàvá-á<sup>n</sup>. <sup>38</sup>Te ñiu-ni té Moisés ní xíndecu ndihi-dé ñáyiu isràèl xití

yucu, te ní sáá-dé yucu Sinàí, te xíá<sup>n</sup> nĩ quixi ñ<sup>n</sup> espíritú xínú cuèchi núú Yã Ndiöxí ní cáhá<sup>n</sup> ndihi ñaha-xi xii-dé, te yacá<sup>n</sup> ní dácuahá ñaha-xi tnúhu-gá, te ñiu-ni tnúhu-á<sup>n</sup> ní ndóo dàcuaha-o.

<sup>39</sup>Te cue ñani tnáhá-ó nĩ xíndecu ndéé sanaha ñã ní sàndáá iní-yu té Moisés, te ñá ní ndèe iní ñáhã-yu xii-dé, chi ní cuiní-yu nuhú tucú-yu ñúu Ègiptú cundecú-yu. <sup>40</sup>Te òré ndécú tè Moisés yucu ní xáhã<sup>n</sup>-yu xii ñani-dé té Àrón: “Cadúha-n ñ<sup>n</sup> úú ndiöxí díhú<sup>n</sup> cuáá<sup>n</sup> codonùu núú-ó cùhu<sup>n</sup>-o ichi, chi ñá túú cùtnuní iní-ó ndèe ichi cuáhá<sup>n</sup> té Moisés, téé yòdo nuu núú-ó ndùu ní quee-o Ègiptú”, duha ní xíí-yu té Àrón. <sup>41</sup>Te dàvá-á<sup>n</sup> nĩ cadúha-güedé ñ<sup>n</sup> chèhlu mee-ni díhú<sup>n</sup> cuáá<sup>n</sup>, te ní sahani-güedé ñ<sup>n</sup> úú quiti nchìto ní quide càhnu-güedé chèhlu-á<sup>n</sup>. Te ío ní cudíí ñni-yu quiti-á<sup>n</sup>, chi ní cachí-yu sá díú-ní ndiöxí cúú-dí. <sup>42</sup>Te sá dúcá<sup>n</sup> nĩ quidé-yu, xíã<sup>n</sup> ní dáñá ñàha Yá Ndiöxí xii-yu. Te ní dáñá-gã ní xóo cada càhnu-yu nchicanchii, ndihi yóó, ndihi nchaa chódíní. Te duha ní chídó tnùní ñ<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha nàcuáa ní xáha<sup>n</sup>-gã xii ñáyiu dàvá-á<sup>n</sup>:

Nchòho ñáyiu isràèl, ní cuu údico cuíá yíhí-ndó yùcu, te ní sahani-ndo quiti-ndo ní quide càhnu ñaha-ndo xii-í cáhá<sup>n</sup>-ndó, dico ñáhá chi ní sahani-ndo-güèdè ní quide càhnu-ndo sá nĩ cadúha mee-ndo.

<sup>43</sup>Te ní cadúha-ndo ñ<sup>n</sup> veñúhu líhli, te ní sanutñi-ndo Mòlóc sá càchí-ndó cùu ndiöxí-ndó xica nchido-ndo xití yucu,

te ní cadúha-ndo ìí<sup>n</sup> chódíní, te  
quití-ǎ<sup>n</sup> càchí-ndó sǎ cúú-dí  
ndiòxí Rènfán,

te ndi ndùú sá nǐ cadúha-ndo-ǎ<sup>n</sup>  
nǐ quide càhnu-ndo.

Te cuèndá sá dúcá<sup>n</sup> nǐ  
quide-ndo te yúhú queñuhu  
ñaha-ǐ xii-ndo quǐhí<sup>n</sup>-ndó  
cùndecu-ndo ìngá xio nàció<sup>n</sup>  
Babiloniá.

Duha ní xáha<sup>n</sup> Yǎ Ndiòxí xií-yu, te  
duca<sup>n</sup> nǐ chídó tnùní téé ní xóo  
cáhá<sup>n</sup> tnúhu-gá.

<sup>44</sup>Te xití yucu-á<sup>n</sup> nǐ dácáá-güedě  
ìí<sup>n</sup> veñúhu vehe dóó. Te vehe-á<sup>n</sup>  
nǐ cuu-xi ìí<sup>n</sup> sá cútùníní iní-yu sá  
Yǎ Ndiòxí ndécú ndìhi ñaha-gá  
xií-yu. Te vehe-á<sup>n</sup> nǐ dácáá-güedě  
nàcuáa ní xáha<sup>n</sup> Yǎ Ndiòxí xii té  
Moisés, chi ní dánèhè ñáhá-gǎ  
xii-dé nàcuáa dacàa-güedé. <sup>45</sup>Te  
sátá nǐ xíhí nchaa cue téé-á<sup>n</sup>, te  
ní ndóo ndìhi nchaa déhe-güedé  
veñúhu-á<sup>n</sup>. Te ní xido tucu-güedé  
veñúhu-güedé cuáhá<sup>n</sup>-güedé, te  
cuáhá<sup>n</sup> ndìhi-güedé té Jòsué núú  
cúndécú-yu. Te sátá nǐ quexió-yu,  
te ní dácúnǔ-yu ñáyiú dii ñùú-xi-á<sup>n</sup>  
chi mee Yǎ Ndiòxí ní chindee  
ñaha-gá xií-yu. Te sátá nǐ ndìhi  
nchaa ñáyiú ní xica nchido veñúhu  
dóó-ǎ<sup>n</sup> nǐ xíhí, te ní ndóo ndìhi  
dava-gá-yu. Te duca<sup>n</sup>-ni ndècu-xi ní  
cacu té Dàvíí, téé ní xíndaha ñaha  
xií-yu. <sup>46</sup>Te Yá Ndiòxí ní cudíí víhí  
iní-gá té Dàvíí. Te ní xícá<sup>n</sup> tnúhú-dě  
núú-gǎ nǔu cuu dacàa-dé veñúhu  
cuu cuèndá-gá, chi ìí<sup>n</sup>-ni Yá Ndiòxí  
ní xóo cada càhnu té Dàvíí ndìhi  
té Jàcób, ñaní tnáhá-ó nǐ xíndecu  
ndéé sanaha víhi-gá. <sup>47</sup>Te Yá  
Ndiòxí ñá ní dàña-gá dacàa té Dàvíí  
veñúhu-gá dico déhe-dé té Salòmón,

chi ní dáñá-gǎ ní dácáá-dě veñúhu  
cuu cuèndá-gá <sup>48</sup>cuèi ñá túú  
sàcúndecu-gá veñúhu dàcaa cue téé  
ñuyíú-a, chi ndèni xía<sup>n</sup> ndécú-gǎ  
chi espíritú cúú-gǎ. Te duha ní  
chídó tnùní téé ní xóo cáhá<sup>n</sup> tnúhu  
Yá Ndiòxí ndéé sanaha nàcuáa ní  
cáhá<sup>n</sup>-gá:

<sup>49</sup>Yúhú táxí tnùníní andiú ndìhi  
ñuyíú,  
te xía<sup>n</sup> nǔu nchòhó vá  
ndácú-ndó chìhi ñaha-ndo  
xití veñúhu dàtná quidě-yu  
sá càchí-yu cùu ndiòxí-yu ní  
cadúha-yu.

Te ñá túú xini ñuhu-í núú  
ndétátú-í,

<sup>50</sup>chi yúhú ní cadúha-í nchaa sá ìò  
ñuyíú-a.

Duha ní cáhá<sup>n</sup> Yǎ Ndiòxí, te diu-ni  
duca<sup>n</sup> nǐ chídó tnùní téé ní xóo  
cáhá<sup>n</sup> tnúhu-gá —duha ndùu nchaa  
tnúhu ní xáha<sup>n</sup> tǎ Těvá xii-güedé.

<sup>51</sup>Te ní xáha<sup>n</sup> tucu-dé:

—Nchòhó, ío sǎá iní-ndó chi  
quide-ndo datná quidé ñáyiú ñá  
túú cùu ñáyiú isràèl chi ñá túú  
tèdòho-ndo tnúhu càhá<sup>n</sup> Yǎ Ndiòxí,  
chi ñá cuíní-ndó quèndáá iní-ndó  
tnúhu-gá, mee-ni cùu úhú iní-ndó  
Espíritú-gá dàtná ní xóo cada cue  
ñaní tnáhá-ndó nǐ xíndecu ndéé  
sanaha. <sup>52</sup>Chi cue téé-á<sup>n</sup> ìo ní xóo  
dandòho-güedé nchaa cue téé ní  
xóo cáhá<sup>n</sup> tnúhu Yá Ndiòxí ndéé  
sanaha. Te ní sahní-güedé nchaa  
cue téé ní cáhá<sup>n</sup> sá quíxí Crístú  
ñuyíú-a, te Yaá-á<sup>n</sup> ñà túú cuèchi-gá.  
Te diu-ni duca<sup>n</sup> nǐ quide-ndo Crístú  
cútnàhá ní quixi-gá ñuyíú-a, chi ní  
sáha cuèndá-ndó-gǎ núú cuè téé  
ní cuu úhú iní ñáhá xii-gá ní sahní  
ñaha-güedé. <sup>53</sup>Te ndècu ndìhi-ndo

tnúhu ní chídó tnùnì ndíi Moisés nàcuáa ní xáha<sup>n</sup> espíritú xínú cuèchi núú Yá Ndiöxí xii ndíi, te ni òuca<sup>n</sup> ñá túú sàndáá iní-ndó tnúhu-á<sup>n</sup> ñúu ní sahani-ndo Jèsús. Te òiu-ni tnúhu-á<sup>n</sup> ndécú ndíhi-ndo ndéé vitna —càchí té Těvá xáha<sup>n</sup>-dě xii-güedé.

#### Ní sahani-güedé té Těvá

<sup>54</sup>Te sá dúcá<sup>n</sup> ñí xáha<sup>n</sup> tě Těvá xii-güedé, te ní cudéé<sup>n</sup> víhí-güedě núú-dě, núu ní quide rúhñú-güedě núhu-güedé sá sàtú iní-güedé. <sup>55</sup>Te té Těvá ndécú ndíhi-dé Espíritú Yá Ndiöxí, te ní ndacoto váha-dé andiu, te ní xiní-dé súuní òátása<sup>n</sup>-xi núú ndécú Yá Ndiöxí, te ní xiní-dé Xítóhó Jesucristú nútñi-gá xio cùha Yá Ndiöxí. <sup>56</sup>Te ní xáha<sup>n</sup> tě Těvá xii-güedé:

—Chí cúnðehe andiu chi yúhú ndéhè-í Xítóhó Jesucristú nútñi-gá xio cùha Yá Ndiöxí, te òiu-gá cúú-gã ñaní tnáhá-ndó nchàa-ndo —cachí-dé xáha<sup>n</sup>-dě.

<sup>57</sup>Te ní sadí-güedé dóho-güedé cuendá sá ñá ní tnáhá iní-güedé cundedóho-güedé tnúhu càhá<sup>n</sup>-dé, te uu<sup>n</sup>ni ní cuáá-güedé, te ní taxi ndaha ñaha-güedé xii-dé <sup>58</sup>ndécá ñaha-güedé cuáhá<sup>n</sup> ndéé i<sup>n</sup> xio yuhu ñúú, te yàcá<sup>n</sup> ní sãñaha-güedé yúú xii-dé. Te ndècu i<sup>n</sup> tée cuechi nàni-dé Sàulú, te téé-á<sup>n</sup> ñí quide cuendá-dé dóó-güedé cuendá ní nune ndaha-güedé ní sãñaha-güedé yúú xii té Těvá.

<sup>59</sup>Te òré sãñaha-güedé yúú, te ní càhá<sup>n</sup> ndíhi-dé Xítóhó Jesucristú te xáha<sup>n</sup>-dě:

—Yòhó Xítóhó Jesucristú, naquehe<sup>n</sup>-n iní-í —càchí-dé xáha<sup>n</sup>-dě xii-gá.

<sup>60</sup>Te ní ngüñí xítí-dě, te níhi ní càhá<sup>n</sup>-dé, te xáha<sup>n</sup>-dě:

—Yòhó Xítóhó Jesucristú, vá técuèchi-n cuè téé-a sá dúhá quide ñaha-güedé xii-í —càchí-dé xáha<sup>n</sup>-dě xii-gá.

Te xíá<sup>n</sup>-nã ní càhá<sup>n</sup>-dé, te ní xíhí-dé.

#### Té Sàulú chíhí-dě ñáyiú sàndáá iní-xi tnúhu Jèsús vecaá

**8** Te té Sàulú ní nduu vétú iní-dé sá ñí sahani-güedé té Těvá.

Te òiu-ni nduu-ã<sup>n</sup> ñí cuu níhi cuendá nchaa ñáyiú sàndáá iní-xi tnúhu Jèsús ñúu Jerusàlén. Te ní ndíhí-yu ní xíté nuu cuáhá<sup>n</sup>-yu òistrítú Jùdeá ndíhi òistrítú Sàmariá. Te cue téé ní táuchí<sup>n</sup> Jèsús dácuàha ñaha xii-yu tnúhu-gá ní ndóo-güedé ñúu Jerusàlén. <sup>2</sup>Te nchaa cue téé càhá<sup>n</sup> ndíhi Yá Ndiöxí ní chindúxi-güedé ndíi Těvá. Te ío ní ndáhyú ñáyiú ní sàndáá iní tnúhu Jèsús sá ñí xíhí ndíi. <sup>3</sup>Te té Sàulú ío òàndóho-dé-yu, chi ndi vehe ndi vehe cuáhá<sup>n</sup>-dé cuátñi-dé cuèi téé cuèi ñadèhí ndécá-dě cuáhá<sup>n</sup> vecaá.

#### Càhá<sup>n</sup>-yu tnúhu Yá Ndiöxí òistrítú Sàmariá

<sup>4</sup>Te nchaa ñáyiú ní xíté nuu cuáhá<sup>n</sup>-yu càhá<sup>n</sup>-yu tnúhu Jèsús nchaa núú quèxiò-yu. <sup>5</sup>Te té Lìpé cuáhá<sup>n</sup>-dé òistrítú Sàmariá càhá<sup>n</sup>-dé tnúhu Xítóhó Jesucristú Yaá ní tendaha Yá Ndiöxí ní quixi ñuyúí-a. <sup>6</sup>Te ío vài núú sã vã yòò tnàhí ndàcu cada ní quide-dé, te ní cuñúhu víhí-yu, te ní xíndedóho váha-yu nchaa tnúhu ní càhá<sup>n</sup>-dé.

<sup>7</sup>Te vâi ñáyiú yîhi ñaha espíritú cündîhi yucu ñávâha ní queñuhu-dé nchaa espíritú-á<sup>n</sup> yiqui cûñú-yu, te ní cana saa-xi òré ní ndee-xi yiqui cûñú-yu cuáhá<sup>n</sup>-xi, te ní ndúha-yu. Te vâi ñáyiú cùhú ñá cúú-gã candá nihnú-yu ndîhi ñáyiú yacua ní quide tátna-dé, te ní ndúha-yu. <sup>8</sup>Te sá dúcá<sup>n</sup> ñí cáhá<sup>n</sup>-dé tnúhu Jèsús te ní quide tátna-dé-yu, xîá<sup>n</sup> ío ní cudíí iní ñáyiú ñuú-á<sup>n</sup>.

<sup>9</sup>Te diu-ni ñuú-á<sup>n</sup> ndécú ñí<sup>n</sup> téé nâni Xímú, te téé-á<sup>n</sup> xìní-dé cada ndùu-dé, te ní cuu naha dùca<sup>n</sup> quide-dé, te ní xóo cuñúhu ñáyiú distritú Sàmariá sá dúcá<sup>n</sup> quide-dé, te ní cachí-dé sá dífú-ní-dě cúnù.

<sup>10</sup>Te nchaa ñáyiú cuèi ñáyiú cuica te cuèi ñáyiú ndàhú ío nèhé-yu sá yíñùhu núú-dě, te xîtnàhá-yu:

—Tée-á<sup>n</sup> ío chîndee ñaha Yá Ndiöxí xii-dé nûu vâi núú sá quidé-dě —càchí-yu xîtnàhá-yu.

<sup>11</sup>Te ní sándáá iní-yu nàcuáa ní xóo cada ndùu-dé, te ní xóo cuñúhu vîhí-yu, te ní cuu naha dùca<sup>n</sup>-ni dandahú ñáhá-dě xîí-yu. <sup>12</sup>Te té Lîpé ní cáhá<sup>n</sup>-dé tnúhu Xítóhó Jesucristú, te ní xáha<sup>n</sup>-dě xîí-yu sá Yá Ndiöxí cuiní-gá ndîhu ndaha ñàha-gá xîí-yu. Te cuèi téé cuèi ñadîhí ní sándáá iní-yu tnúhu-gá, te ní sanduté-yu. <sup>13</sup>Te tnàhá té Xímú ní sándáá iní-dé tnúhu-gá, te ní sandute-dé, te ní xica cuu-dé ndîhi té Lîpé, te ní cuñúhu-dé chi titní núú sá vâ yôo tnàhí ndàcu cada ní quide té Lîpé, te ní cuñúhu vîhi nchaa ñáyiú.

<sup>14</sup>Te dava-gá cue téé ní táuchíú<sup>n</sup> Jèsús dacuàha ñaha xii ñáyiú tnúhu-gá ní ñhí-güedě tnúhu sá ñáyiú distritú Sàmariá ní sándáá

iní-yu tnúhu Yá Ndiöxí. Te ní tendaha-güedě té Pèlú ndîhi té Juàá cuáhá<sup>n</sup>-güedé distritú Sàmariá. <sup>15</sup>Te ní quexìo-güedé, te ní cáhá<sup>n</sup> ndîhi-güedé Yá Ndiöxí ní xícá<sup>n</sup>-güedé Espíritú-gá quixi cundecu ndîhí-yu. <sup>16</sup>Chi ní ñí<sup>n</sup>-yu vátá sàá-gá Espíritú-gá cundecu ndîhí-yu, chi òré ní sanduté-yu, te mee-ni Jèsús ní cacunehe-güedé.

<sup>17</sup>Te òré ní sacá<sup>n</sup> ndodo-güedé ndaha-güedé díquí<sup>n</sup>-yu, te ní quexìo Espíritú-gá ní ngúndecu ndîhí-yu.

<sup>18</sup>Te ní xîní té Xímú nàcuáa ní quide-güedé ní quexìo Espíritú-gá ní ngúndecu ndîhí-yu, te cuiní-dé cuañaha-dě díhú<sup>n</sup> xii té Pèlú ndîhi té Juàá ní cùu. <sup>19</sup>Te ní xáha<sup>n</sup>-dě:

—Chindee ñàha-ndo cuendá ndëda-ni càa-yu cacá<sup>n</sup> ndodo-í ndaha-í díquí<sup>n</sup>-yu, te níhí-yu Espíritú Yá Ndiöxí cundecu ndîhí-yu —càchí-dé xàha<sup>n</sup>-dě xii-güedé.

<sup>20</sup>Te té Pèlú ní xáha<sup>n</sup>-dě xii-dé:

—Yòhó cuíta nihnu-n ndîhi díhú<sup>n</sup>-n, chi cuiní-n cuàa<sup>n</sup>-n sá vâha quide Yá Ndiöxí. <sup>21</sup>Yòhó vá cúú càda-n chiu<sup>n</sup> quide-ndí, chi ñá túú ndècu vâha iní-n núú Yá Ndiöxí.

<sup>22</sup>Te vá dúcá<sup>n</sup> cãhá<sup>n</sup>-n, chi ío nèhé càhá<sup>n</sup>-n sá dúcá<sup>n</sup> càhá<sup>n</sup>-n. Te cáhá<sup>n</sup> ndàhú-n núú Yá Ndiöxí sá ná cádá càhnu iní-gá tnúhu ní cáhá<sup>n</sup>-n. <sup>23</sup>Te yúhú sa xîní-í sá ío úhú iní-n, chi mee-ni sá cuèhé sá dúhá chîdo nuu-n quide-n —cachí té Pèlú xàha<sup>n</sup>-dě xii té Xímú.

<sup>24</sup>Te ní xáha<sup>n</sup> tè Xímú xii-güedé:

—Cáhá<sup>n</sup> ndàhú-ndó núú Yá Ndiöxí sá ñá túú ñá tnàhá-í sá dúcá<sup>n</sup> ní cáhá<sup>n</sup>-í —càchí-dé xàha<sup>n</sup>-dě.

<sup>25</sup>Te té Pèlú ndîhi té Juàá ní cáhá<sup>n</sup>-güedé tnúhu Yá Ndiöxí núú

ñäyiu ñuú-á<sup>n</sup>. Te ní xáha<sup>n</sup>-güedé nchaa nàcuáa ní quide Jèsús ní xiní-güedé òré ní xica cuu-gá ñuyú-a. Te ní tñi-güedé ichi cuánuhú-güedé ñuú Jerusàlén, te ní yáha-güedé titní ñuú yíndèhu distritú Sàmariá, te ní cáhá<sup>n</sup>-güedé tnúhu-gá.

**Té Lìpé ndihi ì<sup>n</sup> tée ñuú Etiòpiá**

<sup>26</sup>Te ì<sup>n</sup> espíritú xínú cuèchi núú Yá Ndiòxí ní quexio-xi ñuú Jerusàlén ní xáha<sup>n</sup>-xi xii té Lìpé: —Cada túha-n chi quée nuu-n ñùú Gázá, dico mee-ni xítí yucu cuáhá<sup>n</sup> ichi —càchí-xi xáha<sup>n</sup>-xi xii-dé.

<sup>27</sup>Te ní xica-dé cuáhá<sup>n</sup>-dé, te ní natnahá-dé ì<sup>n</sup> tée nació<sup>n</sup> Etiòpiá ñúhú-dě ichi. Te cùu-dé tesorèrú xínú cuèchi-dé núú ì<sup>n</sup> ñadìhí ñaha yìndaha nació<sup>n</sup> Etiòpiá, te ñaha-á<sup>n</sup> nání-á<sup>n</sup> Càndacé. <sup>28</sup>Te tée etiòpiá-á<sup>n</sup> nì sáhá<sup>n</sup>-dé ñuú Jerusàlén ní cáhá<sup>n</sup> ndihi-dé Yá Ndiòxí, te ñùhu-dé ichi cuánuhú-dé ñuú-dé ñúhú-dě carrètá, te dàcuaha-dé tnúhu ní chídó tnùnì ndíi Chàíá tée ní xóo cáhá<sup>n</sup> tnúhu Yá Ndiòxí ndéé sanaha. <sup>29</sup>Te ní xáha<sup>n</sup> Espíritú Yá Ndiòxí xii té Lìpé: —Quíhí<sup>n</sup> tuha-n càrretá-á<sup>n</sup> —càchí Espíritú-gá xáha<sup>n</sup>-xi xii-dé.

<sup>30</sup>Te té Lìpé ní sátuha-dé carrètá-á<sup>n</sup>, te ní tecú dóho-dé nàcuáa cáhá<sup>n</sup> tée etiòpiá-á<sup>n</sup>, tée ñùhu carretá-á<sup>n</sup> dácuaaha-dé nàcuáa ní chídó tnùnì ndíi Chàíá. Te ní xáha<sup>n</sup> tē Lìpé xii tée etiòpiá-á<sup>n</sup>: —¿Técú tnùnì-n nchàa tnúhu dácuaaha-n-á<sup>n</sup>? —càchí té Lìpé xáha<sup>n</sup>-dě xii-dé.

<sup>31</sup>Te ní xáha<sup>n</sup> tē etiòpiá: —¿Nása tecú tnùnì-í te vá yõ dènehé ñáhá xii-í? Ta quène iha

coo-n chi danèhé ñáhá-n —càchí-dé xáha<sup>n</sup>-dě xii té Lìpé.

Te cuáaá té Lìpé núú carrètá ní ngóo-dé. <sup>32</sup>Te ndèdóho-dé nàcuáa dácuaaha tée etiòpiá-á<sup>n</sup> nàcuáa ní chídó tnùnì ndíi Chàíá núú tütú Yá Ndiòxí núú càchí-xi:

Dàtná quidé ì<sup>n</sup> mbéé cada-dé òré candeca ñaha-güedé xii-dé quíhí<sup>n</sup> cahni ñaha-güedé chi ñá túú nã cada-dé, dàtná cuínì-ndó quide mbéé òré dètè-dì ñá túú ndàhí-dì duca<sup>n</sup> càda-dé òré cahni ñaha-güedé chi ni vã cáhá<sup>n</sup>-dé.

<sup>33</sup>Te mee-ni cùdiquí ndéé ñáhá-güedé xii-dé, te ni vã ndúcú tnúhu-güedé núú-dě nùu ndáá ndècuéchi-dé.

Te ío cuu nduu cuihna ìní cue ñaní tnáhá-dě, chi cahni ñaha-güedé xii-dé ñuyú-a.

Duha cáhá<sup>n</sup> tutú ní dácuaá há tē etiòpiá ní xíndedóho té Lìpé.

<sup>34</sup>Te ní xáha<sup>n</sup> tucu tée Etiòpiá xii té Lìpé:

—Cundee ìní-n càchí tnúhu-n yòo cacunehe tée ní cáhá<sup>n</sup> tnúhu Yá Ndiòxí ndéé sanaha, núu cáhá<sup>n</sup>-dé cuendá méé-dě àdi cáhá<sup>n</sup>-dé cuendá ìngá ñäyiu —càchí tée etiòpiá-á<sup>n</sup> xáha<sup>n</sup>-dě xii té Lìpé.

<sup>35</sup>Te té Lìpé ní cani-dé cuèndú núú tē etiòpiá nàcuáa ní cáhá<sup>n</sup> ndíi Chàíá nàcuáa cada Jèsús òré quixi-gá ñuyú-a. Te ní xáha<sup>n</sup>-dě nàcuáa nduu tnúhu Jèsús ndihi nàcuáa ní quide-gá. <sup>36</sup>Te ñùhu-güedé ichi cuáhá<sup>n</sup>-güedé ní naníhí-güedé ì<sup>n</sup> xichi núú ñúhú ndùte, te ní xáha<sup>n</sup> tē etiòpiá:

—Iha ñùhu ndute, ¿te vá cúú cuàndute-í iha-á<sup>n</sup>? —càchí-dé xáha<sup>n</sup>-dě xii té Lìpé.

<sup>37</sup>Te xăha<sup>n</sup> tĕ Lìpé:

—Te núu sàndáá ndisa iní-n Jèsús, te cuu cuandute-n —càchí-dé xăha<sup>n</sup>-dě.

Te ní xáha<sup>n</sup> tĕe etiòpiá:

—Sàndáá ndisa iní-í sá Dĕhe Yá Ndiòxí cúú Xítóhó Jesucristú —càchí-dé xăha<sup>n</sup>-dě.

<sup>38</sup>Te ní ngani-dé carrètá, te ní nuu-güedé ndi ndúu-güedé, te cuánguee-güedé xití ndute, te ní dácuaándute ñaha té Lìpé xii-dé.

<sup>39</sup>Te òré ní nene-güedé xití ndute, te ndèca ñaha Espíritú Yă Ndiòxí xii té Lìpé cuáhá<sup>n</sup>. Te ñá túú ní xìní tée ní sandute-á<sup>n</sup> ndèe ichi cuáhá<sup>n</sup> té Lìpé. Te ío ní cudíí iní-dé sá ñí natuha-dé ichi Yá Ndiòxí, te cuándaa-dé núu carrètá-dé cuánuhú-dé. <sup>40</sup>Te ní quexio té Lìpé ñúú Àzotó, te ndi tnahá ñúú ndi tnahá ñúú cuáhá<sup>n</sup>-dé càhá<sup>n</sup>-dé tnúhu Yá Ndiòxí, te ní yáha-dé cuáhá<sup>n</sup>-dé ní quexìo-dé ndéé ñúú Cèsareá.

### Té Sàulú ní tuha-dé ichi Xítóhó Jesucristú

(Hch. 22:6-16; 26:12-18)

**9** Te té Sàulú mee-ni càhá<sup>n</sup> cuèhé-dé cuendá ñáyiu ní sàndáá iní tnúhu Jèsús, te cuiní-dé cahni ñaha-dĕ xíí-yu. Te ní sáhá<sup>n</sup>-dé núu dütú cúnúu-gá, <sup>2</sup>te ní xáha<sup>n</sup>-dě sá cádúha dütú-ă<sup>n</sup> ìi<sup>n</sup> tutú canehe-dé quíhí<sup>n</sup> cuáha-dé cue tée xindeé nchito veñúhu ñúú Dàmascú, chi cuiní-dé tñii-dé nchaa ñáyiu dàcuaha tnúhu Xítóhó Jesucristú candeca ñaha-dĕ quíhí<sup>n</sup> ñúú Jerusàlén. <sup>3</sup>Te ní xica-dé cuáhá<sup>n</sup>-dé tá cùyatni-dé ñúú Dàmascú, te uu<sup>n</sup>ni ní quee ñuhú andiú, te ní

dáyèhé-xi ndéé núu núnñi-dé. <sup>4</sup>Te ní nduá-dé ndéé ñuhu, te ní tecú dóho-dé càhá<sup>n</sup> ìi<sup>n</sup> sá càhá<sup>n</sup> núu ñnu, te xăha<sup>n</sup>-xi xii-dé:

—Yòhó Sàulú, ìná cuendá cúú úhú iní ñáhá-n xii-í te dândoho ñaha-n? —cachí sá càhá<sup>n</sup>-á<sup>n</sup> xăha<sup>n</sup>-xi xii-dé.

<sup>5</sup>Te ní xáha<sup>n</sup>-dě:

—ìNá cúú yòhó sá càhá<sup>n</sup>-á<sup>n</sup>-i? —càchí-dé xăha<sup>n</sup>-dě.

Te ní xáha<sup>n</sup> să càhá<sup>n</sup> xii-dé:

—Yúhú cúú-í Jèsús tée cùu úhú iní-n. Te ío dândoho-n mee-n, chi dàtná quidé ndìcutu quide-n, chi quiti-á<sup>n</sup> ñnu na cùxi-güedé-di pùyá te săha-di patàdá núu-xi, te quide úhú-di mee-di. Te duca<sup>n</sup> sätnahá-xi cùu yohó chi ñá túú sàndáá iní ñáhá-n xii-í —càchí sá càhá<sup>n</sup>-á<sup>n</sup> xăha<sup>n</sup>-xi xii-dé.

<sup>6</sup>Te té Sàulú ní quidi ñaha-xi xii-dé sá ñí yùhú-dé, te ní xáha<sup>n</sup>-dě:

—Xítóhó Jesucristú, ìte ná cuiní-n càda-í-i? —càchí-dé xăha<sup>n</sup>-dě.

Te Jèsús ní xáha<sup>n</sup>-gă xii-dé:

—Ndacóo, te quíhí<sup>n</sup>-n ñúú-ă<sup>n</sup>, te yàcá<sup>n</sup> tecú tnúhu-n ñă cúú să cádá-n —càchí-gá xáha<sup>n</sup>-gă xii-dé.

<sup>7</sup>Te cue tée cuáhá<sup>n</sup> ndihi té

Sàulú ní tecú dóho-güedé càhá<sup>n</sup> ìi<sup>n</sup> sá càhá<sup>n</sup>, dico vâ yòo tnahí ni xìní-güedé, te ní yùhú víhí-güedé, te ñá túú tnahí ni căhá<sup>n</sup>-güedé.

<sup>8</sup>Te ní ndacóo té Sàulú, te ñá ní cùu-gá cundehe-dĕ, chi ní cuaa-dĕ, te ní tñii-güedé ndaha-dé ndécá ñaha-güedé cuáhá<sup>n</sup> ñúú Dàmascú.

<sup>9</sup>Te yàcá<sup>n</sup> ní xindecu-dé úní nduu, te ñá ní cùu tnahí cundehe-dĕ, te ñá túú ñă ní xèxi-dé, te ñá túú ní xìhi-dé ndute.

<sup>10</sup>Te ndècu tée sàndáá iní tnúhu Jèsús ñúú Dàmascú, nání-dĕ



Ananiás, te ní sáhá<sup>n</sup> Jèsús núú sàni-dé, te ní xáha<sup>n</sup>-gǎ xii-dé:

—iAnaniás! —càchí-gǎ xáha<sup>n</sup>-gǎ.

Te ní xáha<sup>n</sup>-dě:

—¿Yúhú càhá<sup>n</sup> ndihi-n-ǎ<sup>n</sup>? —  
càchí-dé xáha<sup>n</sup>-dě.

<sup>11</sup>Te ní xáha<sup>n</sup>-gǎ:

—Ndacuñí, te quíh<sup>n</sup>-n ì<sup>n</sup> chiu<sup>n</sup> ichi núú dánàni-güedé Ichi Ndáá, te yacá<sup>n</sup> nanducu-n vehe té Jüdás, chi vehe téé-á<sup>n</sup> ndécú ì<sup>n</sup> téé ñúú Tàrsú nání-dě Sàulú, te téé-á<sup>n</sup> sa càhá<sup>n</sup> ndihi ñaha-dě xii-í. <sup>12</sup>Te téé-á<sup>n</sup> ní dácótó ñaha-xi sá ní xini ñáhá-dě xii-n ní quexio-n núú ndécú-dě, te ní sacá<sup>n</sup> ndodo-n ndàha-n díquí-dě, te duca<sup>n</sup> te ní nacaá<sup>n</sup> núú-dě ní dácótó ñaha-xi xii-dé —càchí-gǎ xáha<sup>n</sup>-gǎ.

<sup>13</sup>Te té Ananiás ní xáha<sup>n</sup>-dě:

—Yòhó Xítohó Jesucristú, càchí tnúhu-í xii-n sǎ ní níhí-í tnúhu nàcuáa quide-dé sá ìo quide úhú-dé ñáyiu càhá<sup>n</sup> ndihi-n ñúú Jerusàlén. <sup>14</sup>Chi nèhe-dé tutú ní sǎnaha cué dútú cúnùu cuendá níhí-dě nàcuáa cada-dé tni-dé nchaa ñáyiu sàndáá iní ñáhá xii-n —cachí-dé xáha<sup>n</sup>-dě xii-gǎ.

<sup>15</sup>Te Jèsús ní xáha<sup>n</sup>-gǎ xii-dé:

—Quíh<sup>n</sup>-n ndàtnúhu-n ndihi-dé, chi cuiní-í cada-dé chiú<sup>n</sup>-í, quíh<sup>n</sup>-dé càhá<sup>n</sup>-dé tnúhu-í núú cué ñáyiu isràél, ndihi núú cué ñáyiu ná túú cùu ñáyiu isràél, ndihi núú cué téé yìndaha ñaha xií-yu. <sup>16</sup>Te yúhú cúnaha-í xii-dé sá ndóhó vihi-dé cuendá-í —càchí-gǎ xáha<sup>n</sup>-gǎ xii té Ananiás.

<sup>17</sup>Te cuáhá<sup>n</sup> té Ananiás vehe núú ndécú tè Sàulú te ní sacá<sup>n</sup> ndodo-dé ndaha-dé díquí tè Sàulú, te ní xáha<sup>n</sup>-dě:

—Yòhó té Sàulú téé ndècu ndihi-í ichi Xítohó Jesucristú, diu-ni Xítohó Jesucristú Yaá ní càhá<sup>n</sup> ndihi ñaha xii-n ichi ní tendaha ñaha-gǎ véxi-í cuendá cacá<sup>n</sup> táhù-í núú-gǎ cuendá-n te ndúha núú-n, te dǎtnùní quixi Espiritú-gǎ cundecu ndihi-n —càchí-dé xáha<sup>n</sup>-dě.

<sup>18</sup>Te dǎtná sá ní xócání-ó ì<sup>n</sup> sá ndedí núú-dě ní quide ñaha-xi xii-dé, te ní nacaá<sup>n</sup> núú-dě, te ní sandute-dé. <sup>19</sup>Te ní xexi-dé, te ní naníhí ndéé-dě, te titní nduu ní xíndecu ndihi-dé ñáyiu ní sàndáá iní tnúhu-gǎ ñúú Dàmascú.

#### Té Sàulú dácua<sup>n</sup>-dé ñáyiu tnúhu Yá Ndiöxí ñúú Dàmascú

<sup>20</sup>Te sátá ní ndúha núú-dě, te ní sáhá<sup>n</sup>-dé veñúhu cue ñáyiu isràél ní xáha<sup>n</sup>-dě sá Jèsús cúú-gǎ Déhe Yá Ndiöxí. <sup>21</sup>Te nchaa ñáyiu ní xíndedóho tnúhu ní càhá<sup>n</sup>-dé, te ní cuñúhu vihi-yu, te ní xítnàhá-yu:

—Diu téé-ǎ<sup>n</sup> ní sahani-dé ñáyiu ní xóo chiñuhu ñaha xii Jesús ñúú Jerusàlén. Te ní quixi-dé iha ní cuiní-dé tni ñaha-dě xií-yu candeca ñaha-dě quíh<sup>n</sup> núú cué dútú cúnùu ni cuu —cachí-yu xítnàhá-yu.

<sup>22</sup>Te ìo iní-gǎ té Sàulú xáha<sup>n</sup>-dě xií-yu sá díú Jèsús cúú-gǎ Cristú Yaá ní tendaha Yá Ndiöxí ní quixi ñuyíú-a, te xíá<sup>n</sup> ná ní níhí ñáyiu isràél ndécú ñúú Dàmascú tnúhu càhá<sup>n</sup>-yu, te ní cuñúhu vihi-yu.

#### Té Sàulú ní dáxió-dě núú ñáyiu isràél

<sup>23</sup>Te sátá ní cuu titní nduu, te ní ndatnúhu cue téé isràél sá cáhni-güedě té Sàulú. <sup>24</sup>Te té Sàulú ní níhí-dě tnúhu nàcuáa càhá<sup>n</sup>-güedé cada ñaha-güedé

xii-dé, te cuèi nduu cuèi niú néhé cuèndá-güedé yuyèhe núú ñúðòco ndóho yuhu ñúú cuèndá cuìní-güedé tñi ñaha-güedé xii-dé te cahni ñaha-güedé. <sup>25</sup>Te ìí<sup>n</sup> niú ndécá ñàha cue téé ní sándáá iní-xi tñúhu Jèsús cuáhá<sup>n</sup> ndéé núú ñúðòco ndóho yuhu ñúú. Te ní sáá-güedé núú ndóho, te ní chihi ñaha-güedé xii-dé xití tídihi te ní dándéè ñaha-güedé núú ñúhú, te ní quene-dé cuáhá<sup>n</sup>-dé.

### Te Sàulú ndécú-dé ñúú Jerusàlén

<sup>26</sup>Te té Sàulú ní nasáá-dé ñúú Jerusàlén, te cuìní-dé chitnahá-dé ñáyiú sàndáá iní tñúhu Jèsús, te ní yùhú-yu chi ní cáhã<sup>n</sup>-yu sá dándàhú ñàhá-dé sá sàndáá iní-dé Jèsús. <sup>27</sup>Te té Bèè ndécá-dé té Sàulú cuáhá<sup>n</sup> núú ndécú cuè téé ní táúchíú<sup>n</sup> Jèsús dacuàha ñaha xií-yu tñúhu-gá. Te ní cani té Bèè cuèndú núú-güedé nàcuáa ní cuu ní naníhí tñáhá tē Sàulú ndíhi Jèsús ichi, te ní cáhá<sup>n</sup> ndíhi ñaha-gã xii-dé. Te ní xáha<sup>n</sup> tùcu té Bèè nàcuáa ní cáhá<sup>n</sup> té Sàulú tñúhu Jèsús núú ñáyiú Dàmascú, te ñá túú tñàhí ni yùhú-dé ní cáhá<sup>n</sup>-dé, càchí té Bèè xãha<sup>n</sup>-dē xii-güedé. <sup>28</sup>Te ní xíndecu té Sàulú ndíhi ñáyiú xídácúahá tñúhu-gá ñúú Jerusàlén. Te ní ndicuu ndicuu-dé ní cáhá<sup>n</sup>-dé tñúhu Jèsús, te ñá túú tñàhí ni yùhú-dé <sup>29</sup>ní cáhá<sup>n</sup> ndíhi-dé ñáyiú isràèl ñáyiú càhá<sup>n</sup> tñúhu grìégú. Te ñáyiú-á<sup>n</sup> nǐ ngúfta-yu ndàtñúhu-yu sá cáhní ñàhá-yu xii-dé. <sup>30</sup>Te ñáyiú sàndáá iní tñúhu-gá ní níhí-yu tñúhu nàcuáa cuìní ñáyiú càhá<sup>n</sup> tñúhu grìégú cada ñàhá-yu xii té Sàulú, núú ní sàndeca ñàhá-yu

xii-dé ñúú Cèsareá, te yàcá<sup>n</sup> ní tendaha ñàhá-yu cuánuhú-dé ñúú Tàrsú.

<sup>31</sup>Te sátá xǐá<sup>n</sup> te ní sanaá-yu ñá túú-gã ní xòo cada úhú-yu nchaa ñáyiú sàndáá iní tñúhu Jèsús níhí distrítú Jùdeá, ndíhi distrítú Galileá, ndíhi distrítú Sàmariá. Te ní níhí ndéè-yu ní quidé-yu nàcuáa ní xáha<sup>n</sup> Yã Ndiöxí cadá-yu, te ío ní xíndecu yiñùhú-yu núú-gã, te Espíritú-gá ní chindee ñaha-xi xií-yu, te vai-gá ñáyiú ní sàndáá iní-yu tñúhu-gá.

### Té Pèlú ní quide tátna-dé té Èneás

<sup>32</sup>Titní xichi ní sáhá<sup>n</sup> té Pèlú ní cáhá<sup>n</sup>-dé tñúhu Yá Ndiöxí. Te ìí<sup>n</sup> nduu ní sáhá<sup>n</sup>-dé ñúú Lìdá ní cáhá<sup>n</sup> ndíhi-dé ñáyiú sàndáá iní ñàhá xii Jesús. <sup>33</sup>Te yàcá<sup>n</sup> ní naníhí-dé ìí<sup>n</sup> téé nàni Eneás, te ní cuu úná cuíá cùhú-dé, te ni lùha ñá cúú-gã candá nihnu-dé. <sup>34</sup>Te ní xáha<sup>n</sup> tē Pèlú xii-dé:

—Èneás, Xítóhó Jesucristú cada tátna ñaha-gã xii-n tñàvíí. Ndacóo te ndocani-n yùu-n —cachí-dé xãha<sup>n</sup>-dē.

Te órè-ni ní ndacóo-dé. <sup>35</sup>Te nchaa ñáyiú ñúú Lìdá ndíhi ñáyiú ñúú Sàrón ní xiní-yu sá nǐ ndúha-dé, te ní sàndáá víhí iní-yu Xítóhó Jesucristú.

### Ní ndoto tá Dòrcás

<sup>36</sup>Te ñúú Jòpé ndécú ìí<sup>n</sup> ñadihí sàndáá iní-a<sup>n</sup> tñúhu Jèsús, te nàni-a<sup>n</sup> Tabitá, te tñúhu grìégú xãhã<sup>n</sup>-yu Dòrcás, te ío váha ní xóo cada-a<sup>n</sup> chi ío váha iní-a<sup>n</sup>, te ní xóo chindee-a<sup>n</sup> ñáyiú ndàhú. <sup>37</sup>Te váha-ni ndècu-a<sup>n</sup> ni cuu, te

ní tñii ñaha cuèhé nǐ xíhí-a<sup>n</sup>, te ní nadacùchi ñahá-yu, te ní chihii ñàhá-yu ì<sup>n</sup> cuàrtú ndécú ndéé núu nǐnu. <sup>38</sup>Te ñáyiú ní sándáá iní tnúhu Jèsús ñúú Jòpé ní níhǐ-yu tnúhu sá ndécú tǔ Pèlú ñúú Lìdá. Te yatni-ni càa ñúú-á<sup>n</sup>, te ní tendàhá-yu úú cue tée cuáhá<sup>n</sup>-güedé núu ndécú-dě cuendá cúñaha-güedě candeca ñaha-güedě xii-dé quíhǐ<sup>n</sup> núu ndécú-yu. Te ní xáha<sup>n</sup>-güedě xii té Pèlú:

—Yáchí ná quíhǐ<sup>n</sup>-ó ñúú-ndí, chi yacá<sup>n</sup> cáná ñàhá-yu quíhǐ<sup>n</sup>-n tnàvíí —càchí-güedé xáha<sup>n</sup>-güedě xii té Pèlú.

<sup>39</sup>Te té Pèlú ní xica-dé cuáhá<sup>n</sup>-dé ndíhi cue tée-á<sup>n</sup> ñúú Jòpé, te òré ní quexìo-güedé ndíhi-dé, te cuásaá ndíhi ñaha-güedě cuàrtú ndéé núu nǐnu. Te nchaa ñáyiú ðíhǐ ñáyiú quèé ní tacá ndèé ñáhá xii ndíyi-á<sup>n</sup> xǐndáhyú-yu, te ní dánèhé ñáhǎ-yu nchaa dóó nǐ cadúha ñaha ní xíhí-á<sup>n</sup>. Chi ní xóo cadúha-a<sup>n</sup> dícú<sup>n</sup>, te ní xóo cadúha-a<sup>n</sup> díó òré ní xíndecu-a<sup>n</sup> ñuyíú-a, te nchaa xíá<sup>n</sup> ní dánèhé ñáhǎ-yu xii té Pèlú.

<sup>40</sup>Te té Pèlú ní xáha<sup>n</sup>-dě sá quèé-yu nchaá-yu quehé, te ní queé-yu. Te ní ngüíñí xítí-dě te ní cáhá<sup>n</sup> ndíhi-dé Yǎ Ndiòxí, te dàtnúní ní ndacoto-dé núu cándòdo ndíyi-á<sup>n</sup>, te ní xáha<sup>n</sup>-dě:

—Tàbitá, ndacóo —càchí-dé xáha<sup>n</sup>-dě.

Te ní ndacoto-a<sup>n</sup> núu tǔ Pèlú te ní ndacóo-a<sup>n</sup>. <sup>41</sup>Te ní tñii-dé ndaha-a<sup>n</sup> ní nacanutnǐ ñaha-dě. Te ní cana-dé nchaa ñáyiú ðíhǐ ñáyiú quèé ndíhi nchaa ñáyiú sándáá iní tnúhu Jèsús cuendá quiní-yu sá nǐ ndoto-a<sup>n</sup>. <sup>42</sup>Te nchaa ñáyiú

ñúú Jòpé ní níhǐ-yu tnúhu nàcuáa ní quide té Pèlú ní ndoto ñaha ní xíhí-á<sup>n</sup>, te vǎi-yu ní sándáá iní-yu Xítóhó Jesucristú. <sup>43</sup>Te tǐtní nduu ní xíndecu té Pèlú vehe té Xímú tée dàcuitá ñii.

### Té Pèlú ndíhi té Còrneliú

**10** Te ndècu ì<sup>n</sup> tée nàni-dé Còrneliú ñúú Cèsareá te cùu-dé capitá<sup>n</sup>, te ndècu ndíhi-dé ì<sup>n</sup> ciendú sandàdú. Te cue tée-á<sup>n</sup> nání-güedě Sandàdú Itàlianú. <sup>2</sup>Te tée cùu capitá<sup>n</sup> ío váha iní-dé, te mee-dě ndíhi ñadíhí-dé ndíhi nchaa landú-dé ío nèhé-yu sá yǐñuhu núú Yǎ Ndiòxí, te sáha-dé ñáyiú ndàhú ñáyiú isràèl díhú<sup>n</sup>, te ío càhǎ<sup>n</sup> ndíhi-dé Yǎ Ndiòxí. <sup>3</sup>Te ì<sup>n</sup> nduu dàtná òré caá úní sacuaa ní dácótó nǔú ñáhá-xí xii-dé sá ni sǎhá<sup>n</sup> ì<sup>n</sup> espíritú xínú cuèchi núú Yǎ Ndiòxí núú-dě, te ní xáha<sup>n</sup>-xi:

—Còrneliú —càchí-xi xáha<sup>n</sup>-xi xii-dé.

<sup>4</sup>Te ní xiní-dé ndí ndùú xio núú-dě espíritú-á<sup>n</sup>. Te ío ní yùhú-dé. Te ní xáha<sup>n</sup>-dě:

—¿Ná chíú<sup>n</sup> vǎxi-n? —càchí-dé xáha<sup>n</sup>-dě.

Te xáha<sup>n</sup>-xi:

—Ío càhǎ<sup>n</sup> ndíhi-n Yǎ Ndiòxí, te ñáyiú ndàhú sǎñaha-n díhú<sup>n</sup>-n, te nchaa xíá<sup>n</sup> sa nàha-gá. <sup>5</sup>Te vitna tendaha-n cuè tée na quíhǐ<sup>n</sup>-güedé ñúú Jòpé quíngana-güedé ì<sup>n</sup> tée nàni Xímú, àdi Pelú chi úú ðùu-dé, te candeca ñaha-güedě quixi. <sup>6</sup>Te òré quexìo-dé te cachí tnúhu-dé nchaa dava-gá sá cuíní Yǎ Ndiòxí cada-n. Te ndècu-dé vehe ingá tucu tée nàni Xímú tée dàcuitá ñii, te vehe tée-á<sup>n</sup> caá ì<sup>n</sup> xio yuhu lamár —càchí-xi xáha<sup>n</sup>-xi xii-dé.

<sup>7</sup>Te sáta cuáhá<sup>n</sup> espíritú-á<sup>n</sup>, te té Còrneliú ní cana-dé úú tñàhá cue tée xínu cuechi núú-dě ndìhi ì<sup>n</sup> sandàdú xínu cuèchi tucu núú-dě, te tñàhá sandàdú-á<sup>n</sup> ìo càhá<sup>n</sup> ndìhi-dé Yă Ndiòxí. <sup>8</sup>Te té Còrneliú ní cani-dé cuèndú núú-güedě nàcuáa ní càhá<sup>n</sup> espíritú xínu cuèchi núú Yă Ndiòxí. Te ní tendaha ñàha-dé xii-güedé cuáhá<sup>n</sup>-güedé ñuú Jòpé.

<sup>9</sup>Te nduu tněé-á<sup>n</sup> ñúhú-ní-güedě ichi cuáhá<sup>n</sup>-güedé, te cùu-xi datná òré caúxúú nduu ta cùyatni-güedé ñuú-á<sup>n</sup>, te òré-á<sup>n</sup> nǐ sáá té Pèlú díquí véhé càhá<sup>n</sup> ndìhi-dé Yă Ndiòxí. <sup>10</sup>Te òré-á<sup>n</sup> sa xìhí-dé docó cuìní-dé caxi-dé, te ñini càdúha-yu sá caxí-dě ní dácótó núú ñàhá-xí <sup>11</sup>sá nǐ xíní-dé ì<sup>n</sup> sá ndécú àndiú, te càa datná cáá ì<sup>n</sup> dóó cáhnú nchìcú<sup>n</sup> yoho ndí cùmí xíquí-xi véxi cuu<sup>n</sup> núú ñúhú. <sup>12</sup>Te núú dóó-ă<sup>n</sup> yódó cǒó ndìhi quítì ndàva ndìhi nchaa núú quítì ndèè cùmí sàhá-xi. <sup>13</sup>Te ní tecú dóho-dé càhá<sup>n</sup> ì<sup>n</sup> sá càhá<sup>n</sup>, te xăha<sup>n</sup> sǎ càhá<sup>n</sup>-á<sup>n</sup> xii-dé:

—Pèlú, ndacuñí cahni-n nděda-ni càa quítì-a caxi-n-dì —cachí sá càhá<sup>n</sup>-á<sup>n</sup> xăha<sup>n</sup>-xi xii-dé.

<sup>14</sup>Te té Pèlú ní xáha<sup>n</sup>-dě:

—Vá càhnì-í-dì chi càchí tñuhu sá sánú ichi ñaha xii nchúhú ñáyiú isràel sá vǎ cúú càxi-ndí nchaa quítì-a chi cuu cuèchi, te vátá caxí-gǎ-í-dì ni ì<sup>n</sup> xito —cachí-dé xăha<sup>n</sup>-dě.

<sup>15</sup>Te ní càhá<sup>n</sup> tucu sá nǐ càhá<sup>n</sup>-á<sup>n</sup>, te xăha<sup>n</sup>-xi:

—Vá cúú càchí-n sǎ vǎ cúú càxi-n-dì, chi mee Yă Ndiòxí ní cachí-gá sá dífú nchaa quítì-a cuu caxi-o vitna —cachí sá nǐ càhá<sup>n</sup>-á<sup>n</sup> xăha<sup>n</sup>-xi xii-dé.

<sup>16</sup>Te duca<sup>n</sup> nǐ càhá<sup>n</sup> sá nǐ càhá<sup>n</sup>-á<sup>n</sup> ũní xito, te dǎtnùní cuándaa tucu dóó-ă<sup>n</sup> andiú. <sup>17</sup>Te té Pèlú ñá ní cùtnuní iní-dé ná cuèndá duca<sup>n</sup> nǐ dácótó núú ñàhá-xí xii-dé, núu xǎá<sup>n</sup> ìo cuéhé nǐ sani iní-dé. Te òré-á<sup>n</sup> nǐ quexìo cue tée ní tendaha té Còrneliú ndéé yuyèhe, chi ndi vehe ndi vehe cuáhá<sup>n</sup>-güedé ndúcú tñuhu-güedé ndèè cáá vèhe té Xímú tée dii vèhe-xi ndecu té Pèlú. <sup>18</sup>Te ní càhá<sup>n</sup> níhi-güedé, te xăha<sup>n</sup>-güedě: —Ñá túú cùdana iha ndecu ì<sup>n</sup> tée nànducu-ndí nání-dě Xímú, àdi Pèlú chi úú dǎu-dé —càchí-güedé xăha<sup>n</sup>-güedé.

<sup>19</sup>Te té Pèlú vǎi sani iní-dé sá nǐ dácótó núú ñàhá-xí xii-dé. Te òré-á<sup>n</sup> nǐ xáha<sup>n</sup> Espíritú Yă Ndiòxí xii-dé: —Cundedóho-n ì<sup>n</sup> tñuhu na càhá<sup>n</sup>-í-a. Ní quexìo úní cue tée nànducu ñaha xii-n. <sup>20</sup>Yáchí, cuandèè chi quíhí<sup>n</sup>-n ndìhi-güedé, te vǎ yùhú-n chi yúhú ní xáha<sup>n</sup>-í véxi cuaca ñaha-güedě xii-n —càchí Espíritú-gá xăha<sup>n</sup>-xi xii té Pèlú.

<sup>21</sup>Te ní xica-dé cuándeé-dé núú ndécú cuè tée xica nanducu ñaha xii-dé, te xăha<sup>n</sup>-dě xii-güedé:

—Yúhú cúú tée nànducu-ndo-á<sup>n</sup>. Náu-í-a núu ná chíú<sup>n</sup> cuìní ñàhá-ndó —càchí-dé xăha<sup>n</sup>-dě xii-güedé.

<sup>22</sup>Te xăha<sup>n</sup>-güedě:

—Tée cùu capitá<sup>n</sup> tée nàni Còrneliú ní tendaha ñàha-dé véxi-ndí, te tée-á<sup>n</sup> ìo váha iní-dé, chi ìo sàndáá iní-dé Yă Ndiòxí, te nchaa ñáyiú isràel ìo váha càhá<sup>n</sup>-yu cuèndá-dé. Te ì<sup>n</sup> espíritú xínu cuèchi núú Yă Ndiòxí ní xáha<sup>n</sup>-xi xii-dé sá cáná ñàha-dé xii-n quíhí<sup>n</sup>-n vèhe-dé dacuàha-n-dé

tnúhu Yá Ndiöxí —càchí cue téé ní tendaha té Còrneliú xǎha<sup>n</sup>-güedě xii té Pèlú.

<sup>23</sup>Te ní xáha<sup>n</sup> tǎ Pèlú sá quǐhu-güedé vehe-dé, te candeca tnàha-güedé ndihi-dé quǐhí<sup>n</sup> ndéé nduu tnéé. Te nduu tnéé-á<sup>n</sup> nǐ xica-güedé ndécá tnàha-güedé ndihi té Pèlú cuáhá<sup>n</sup>, te tnàhá ìh<sup>n</sup> úú cue téé sàndáá iní tnúhu Jèsús ñúú Jòpé cuáhá<sup>n</sup> ndihi ñaha-güedě xii-dé.

<sup>24</sup>Te ndéé ingá nduu ní quexio-güedé ñúú Cèsareá. Te té Còrneliú ndétú ñàha-dé xii-güedé vehe-dé te sa ndècu túha-dé ndihi ñadìhí-dé ndihi nchaa landú-dé ndihi cue téé ío váha tnàhá tnúhu ndihi-dé, chi ní cana ñaha-dě ní nítnáhǎ-yu ndihi-dé cundetú-yu té Pèlú. <sup>25</sup>Te sátá nǐ quèxio té Pèlú vehe té Còrneliú, te ní quee-dé quehé, te ní ngüñí xítí-dě núú tǎ Pèlú chíñùhu ñaha-dé ní cùu. <sup>26</sup>Te té Pèlú ní xáha<sup>n</sup>-dě:

—Ndacuñí vǎ ngüñí xítí-n nǔù-í chi ñá díú Ndiöxí cùú-í, dìcò ìh<sup>n</sup> téé ñuyú-a cùu-í —càchí té Pèlú xǎha<sup>n</sup>-dě xii-dé.

<sup>27</sup>Te ta cǎhá<sup>n</sup> té Pèlú ndihi té Còrneliú cuanguǐhu-güedé xití vehe, te chitu ñáyiú xixǐhi xití vehe. <sup>28</sup>Te ní xáha<sup>n</sup> tǎ Pèlú xií-yu:

—Sa ñaha-ndo sá càchí tnúhu sá sánú ìchi ñaha xii nchúhú ñáyiú isràél sá vǎ cùú quixi-ndí vehe ni ìh<sup>n</sup> nchohó ñáyiú ñá túú cùu ñáyiú isràél te ni vǎ cùú tnàhá tnúhu ndihi ñaha-ndí xii-ndo. Dico Yá Ndiöxí ní cachí-gá sá vǎ cùú cǎhá<sup>n</sup>-í sá vǎ cùú cǎhá<sup>n</sup> ndihi-í ñáyiú ñá túú cùu ñáyiú isràél, chi cuu cuèchi. <sup>29</sup>Núú xǎh<sup>n</sup> ndǐhi-ni véxi-í òré ní

quexio tnúhu sá cáná ñàha-ndo. Te cachí tnúhu-ndo ñá cuendá cáná ñàha-ndo —cachí té Pèlú xǎha<sup>n</sup>-dě xií-yu.

<sup>30</sup>Te té Còrneliú ní xáha<sup>n</sup>-dè: —Ní cuu cùmí nduu, te ñiu-ni dàtná òré iha cùu-xi, te yúhú ndècu-í ñiu-ni vehe-í, te ñá túú tnàhí ná véxi-í cǎhá<sup>n</sup> ndihi-í Yá Ndiöxí, te òré-á<sup>n</sup> nǐ quexio ìh<sup>n</sup> espíritú xínú cuèchi núú-gǎ níhnú-xí dǒò cuixí<sup>n</sup> dóó chàhnhí.

<sup>31</sup>Te càchí-xi: “Còrneliú, ní xíndedóho Yá Ndiöxí tnúhu ní cǎhá<sup>n</sup>-n ndǐhi-gá, te xini-gá sá sǎñaha-n díhú<sup>n</sup> xii ñáyiú ndàhú. <sup>32</sup>Te ñúú Jòpé ndécú ìh<sup>n</sup> téé nàni Xímú, àdi Pelú chi úú dǎu-dé, te ndècu-dé vehe ìh<sup>n</sup> téé nàni tucu Xímú téé dàcuitá ñii, te càa vehe-dé ìh<sup>n</sup> xio yuhu làmár, te cana-n-dě ná quixi-dé ndatnúhu-n ndǐhi-dé”, duha ní cǎhá<sup>n</sup> espíritú xínú cuèchi núú Yá Ndiöxí. <sup>33</sup>Núú xǎh<sup>n</sup> ndǐhi-ni ní cana ñaha-í xii-n. Te táxǎhu xii-n sǎ véxi-n chi iha ndècu-ndí nchaa-ndí ndétú ñàha-ndí xii-n cùndedóho-ndí tnúhu Yá Ndiöxí, te cuini-ndí cachí tnúhu-n nchàa tnúhu ní cachí Yá Ndiöxí cǎhá<sup>n</sup>-n —càchí té Còrneliú xǎha<sup>n</sup>-dě.

#### Té Pèlú ní ndatnúhu-dé ndihi ñáyiú ní tacá vehe té Còrneliú

<sup>34</sup>Te té Pèlú xǎha<sup>n</sup>-dě xií-yu: —Vitna ní xini-í sá Yá Ndiöxí cǎhá<sup>n</sup> ndihi-gá ñáyiú cuèi ndèda-ni càa ñúú, te ìh<sup>n</sup>-ni quide-gá ndihi ncháa-yu. <sup>35</sup>Te nchaa ñáyiú nèhe sá yíñùhu núú Yá Ndiöxí, te xǐquide váha-yu, te ncháa-yu cùu váha iní ñáhá-gǎ xií-yu. Te ñá túú quide cuendá-gá cuèi ná ñáyiú

ñuú cúũ-yu. <sup>36</sup>Te Yá Ndiöxí ní tendaha-gã Xítohá Jesucristú ní sáhá<sup>n</sup>-gá ní xíndecu-gá nàció<sup>n</sup> Isràél, te ní xáha<sup>n</sup>-gã xií-yu ií<sup>n</sup> tnúhu váha nàcuáa cuu váha iní-yu. Te ðiu-ni mee Jèsús cúnũ-gá núú ñáyiú ni càa xico ñuyíú. <sup>37</sup>Te ñaha-ndo sá ðíhna-gá ndíi Juàá ní cáhá<sup>n</sup> ndíi tnúhu Yá Ndiöxí núú ñáyiú, te ní dácuándute ñaha ndíi xií-yu. Te dàtnùnì ní ngüíta Jèsús ní cáhá<sup>n</sup>-gá tnúhu-gá distrítú Galileá, te dàtnùnì ní sáhá<sup>n</sup>-gá nihíi nàció<sup>n</sup> Isràél ní cáhá<sup>n</sup>-gá tnúhu-gá núú ñáyiú. <sup>38</sup>Te sa ñaha-ndo sá Yá Ndiöxí ní sáñaha-gã Espíritú-gá xii Jèsús téé ñuú Nazàrét ndécú ndíhi-dé chíndèè ñaha-xi xii-dé. Te ñaha-ndo sá ñí xica cuu Jèsús ní quide tátna-gá nchaa ñáyiú yíhi ñaha espíritú cúndíhi yucu ñávãha. Te ío vãi-gá sá vãha ní quide ñaha-gã xií-yu, te duca<sup>n</sup> ñí quide-gá, chi Yá Ndiöxí ní chindee ñaha-gá. <sup>39</sup>Te mee-ndí ní xiní-ndí nàcuáa ní quide Jèsús ñuú Jerusàlén ndíhi nihíi nàció<sup>n</sup> Isràél. Te ní sata caa ñaha-güedè xii-gá núú cùrúxí te yácá<sup>n</sup> ní xíhí-gá. <sup>40</sup>Te núú ùnì nduu ní dándótó ñaha Yá Ndiöxí xii-gá. Te ní cuiní-gá sá cúndècu Xítohá Jesucristú titní nduu sáta ñí ndoto-gá cuèndá cáhá<sup>n</sup> ndíhi ñaha-gã xii-ndí nchaa-ndí nàcuáa ní xica cuu-ndí ndíhi-gá. <sup>41</sup>Te ñá ncháá ñáyiú ni xìnì ñáhá xii-gá, chi mee-ni nchũhú cue téé ní cachí-gá sá càhá<sup>n</sup> ndáá-ndí sá ñí ndoto-gá, chi ní xíndecu ndíhi-ndí-gá, te ní xíhi ní xexi-ndí ndíhi-gá, núu càhá<sup>n</sup> ndáá-ndí sá ñí ndoto-gá. <sup>42</sup>Te ní cachí-gá sá nchũhú quíhí<sup>n</sup>-ndí cúnãha-ndí xii ñáyiú sá méé Yá

Ndiöxí ní táúchíú<sup>n</sup>-gã sá Jèsús cada ndáá-gá cuéchi nchaa ñáyiú ndècu vívú ndíhi cuéchi nchaa ñáyiú ní xíhí. Te duca<sup>n</sup> ñí xáha<sup>n</sup> Yá Ndiöxí xii Jèsús, te ðiu-ni duca<sup>n</sup> ñí cachí Jèsús cáhá<sup>n</sup>-ndí. <sup>43</sup>Te cue téé ní cáhá<sup>n</sup> tnúhu Yá Ndiöxí ndéé sanaha ñí cáhá<sup>n</sup>-güedé sá quíxí Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuéchi-yu — càchí té Pèlú xáha<sup>n</sup>-dè xií-yu.

**Ní quexìo Espíritú Yá Ndiöxí  
ní ngúndecu ndíhi cue ñáyiú  
ñá túú cùu ñáyiú isràél**

<sup>44</sup>Te mei òrè càhá<sup>n</sup>-dé ndèdóho-yu ní quexìo Espíritú Yá Ndiöxí ní ngúndecu ndíhi nchaa ñáyiú-á<sup>n</sup>. <sup>45</sup>Te cue téé isràél cuáhá<sup>n</sup> ndíhi té Pèlú, cue téé ní sándáá iní tnúhu Jèsús ní cuñúhu víhi-güedé sá ñí quexìo Espíritú Yá Ndiöxí ní ngúndecu ndíhí-yu, chi cuèndá sá ñà ðíú ñáyiú isràél cúũ-yu núu xíá<sup>n</sup> ní cuñúhu-güedé. <sup>46</sup>Te ní cutnùnì sá ñí quexìo Espíritú Yá Ndiöxí ní ngúndecu ndíhí-yu, chi ní ngüíta-yu càhá<sup>n</sup>-yu tnúhu sá dácàhu iní ñáhá Espíritú-gá, tnúhu sá ñà túú xìnì-yu cáhá<sup>n</sup>-yu. Te ní ndacá<sup>n</sup> táhũ-yu núu Yá Ndiöxí cuèndá nchaa sá ñí quide-gá. <sup>47</sup>Te dàtnùnì ní xáha<sup>n</sup> tè Pèlú:

—Vítna te cuandute ñáyiú ní natuha ichi Xítohá Jesucristú chi sa ndècu ndíhí-yu Espíritú Yá Ndiöxí dàtná cuiní-ndó ndècu ndíhi nchoo, núu xíá<sup>n</sup> vá cúú càchí dava-gá ñáyiú sá vã cúú cuànduté-yu —càchí-dé xáha<sup>n</sup>-dè xií-yu.

<sup>48</sup>Te dàtnùnì ní xáha<sup>n</sup>-dè xii ñáyiú:

—Vitna te cuandute-ndo, te òré-á<sup>n</sup> te cacunehe-ndo Xítohó Jesucristú —càchí-dé xǎha<sup>n</sup>-dě xíi-yu.

Te dǎtnùnì ní cǎhá<sup>n</sup> ndàhú-yu núú tǎ Pèlú cundecu ndìhi ñaha-dě xíi-yu ìi<sup>n</sup> úú nduu.

Té Pèlú ní cani-dé cuèndú  
núú ñáyiú sàndáá iní tnúhu  
Jèsús ñuú Jerusàlén

**11** Te cue tée ní táuchíú<sup>n</sup> Jèsús dacuàha ñaha xii ñáyiú tnúhu-gá, ndìhi cue ñáyiú ní sàndáá iní tnúhu-gá, ñáyiú ndècu distritú Jùdeá ní níhǎ-yu tnúhu sá ñáyiú ñá túú cùu ñáyiú isràèl ní sàndáá iní-yu tnúhu Yá Ndiòxí. <sup>2</sup>Te òré ní ndexìo té Pèlú ñuú Jerusàlén, te ñáyiú isràèl ñáyiú ní cachí sá cáda nchàa nacuáa ní cǎhá<sup>n</sup> ndíi Moisés ní satnuhu ñàhá-yu xii-dé. <sup>3</sup>Te ní xáhǎ<sup>n</sup>-yu xii té Pèlú:

—¿Ná cuèndá ní sáhá<sup>n</sup>-n ndéé ndíacǎ<sup>n</sup> ní cǎhá<sup>n</sup> ndìhi-n ñáyiú-ǎ<sup>n</sup>, te ñá túú quidé-yu dàtná quidé nchòo-i? Te ní sáhá<sup>n</sup>-n yàcǎ<sup>n</sup> ní xexi-n ndìhǎ-yu —càchí-yu xáhǎ<sup>n</sup>-yu xii-dé.

<sup>4</sup>Te té Pèlú ní cani-dé cuèndú nàcuáa ní cuu núú ñí sáhá<sup>n</sup>-dé, te xǎha<sup>n</sup>-dě:

<sup>5</sup>—Ní xíndecu-í ñuú Jòpé. Te òré cǎhá<sup>n</sup> ndìhi-í Yá Ndiòxí, te ní dácótó ñaha-xi xii-í sá vǎxi cuu<sup>n</sup> ìi<sup>n</sup> dóo cǎhnú àndiu, te ndùtu ndi cumí xíquí-xi, te ní ngava-xi núú ndécù-í. <sup>6</sup>Te ní xíndéhé vǎha-í, te ní xiní-í nchaa quiti yòdo núú-xi. Te ìi<sup>n</sup> xichi yòdo quiti cúmí sáhá-xi, te ìi<sup>n</sup> xichi yòdo quiti déé<sup>n</sup>, te ìi<sup>n</sup> xichi yòdo cóo, te ìi<sup>n</sup> xichi yòdo quiti ndava. <sup>7</sup>Te ní tecú dóho-í cǎhá<sup>n</sup> ìi<sup>n</sup> sá cǎhá<sup>n</sup>, te cǎchí-xi: “Pèlú, ndacuñí cǎhni-n

nděda-ni cǎa quiti-a caxi-n-dí”, cachí sá ñí cǎhá<sup>n</sup>-á<sup>n</sup>. <sup>8</sup>Te ní xǎha<sup>n</sup>-í: “Vá cǎhni-í-di chi cǎchí tnúhu sá sánú ìchi ñaha xii nchúhú ñáyiú isràèl sá vǎ cúú cǎxi-ndí nchaa quiti-a”, xǎha<sup>n</sup>-í. <sup>9</sup>Te ní tecú dóho-í cǎhá<sup>n</sup>-ni tucu núú ñínu, te cǎchí sá cǎhá<sup>n</sup>-á<sup>n</sup>: “Vá cúú cǎchí-n sǎ vǎ cúú cǎxi-n-di, chi mee Yá Ndiòxí ní cachí-gá sá díú nchàa quiti-á<sup>n</sup> cuu caxi-o”, cǎchí sá cǎhá<sup>n</sup>-á<sup>n</sup>. <sup>10</sup>Te duca<sup>n</sup> ñí cǎhá<sup>n</sup> sá ñí cǎhá<sup>n</sup>-á<sup>n</sup> úní xito, te dǎtnùnì cuàndaa dóo-ǎ<sup>n</sup> ndìhi nchaa quiti-á<sup>n</sup> andiu. <sup>11</sup>Te òré-ni ní quexìo úní cue tée vehe núú ndécù-í. Te cue tée-á<sup>n</sup> ñí tendaha ñaha ìi<sup>n</sup> tée ñuú Cèsareá nándùcu ñaha-güedé xii-í. <sup>12</sup>Te mee Espiritú Yá Ndiòxí ní cachí-xi sá quihǎ<sup>n</sup>-í ndìhi-güedé, te ní cachí-xi sá ñà túú ñá cani iní-í. Te tnàhá ìñú cue tée ndècu iha ní sáhá<sup>n</sup> ndìhi ñaha-güedé xii-í, te nchaa-ndí ní sáhá<sup>n</sup>-ndí vehe té Còrneliú ñuú Cèsareá. <sup>13</sup>Te ní cani-dé cuèndú nàcuáa ní cuu ní sáhá<sup>n</sup> ìi<sup>n</sup> espíritú xínú cuèchi núú Yá Ndiòxí vehe-dé, te ní quíhu-xi ndéé xití vehe-dé, te ní xǎha<sup>n</sup>-xi xii-dé: “Tendaha-n cuè tée na quihǎ<sup>n</sup>-güedé ñuú Jòpé quíngana-güedé ìi<sup>n</sup> tée nàni Xímú, àdi Pelú chí úú òú-dé. Te candeca ñaha-güedé quixi. <sup>14</sup>Te tée-á<sup>n</sup> cachí tnúhu-dé nása cada-n nànhí tǎhú-n ndìhi ñadìhí-n, ndìhi landú-n, ndìhi nchaa ñáyiú xínu cuechi vehe-n”, duha ní xǎha<sup>n</sup> espíritú-á<sup>n</sup> xii té Còrneliú. <sup>15</sup>Te òré ní ngúíta-í cǎhá<sup>n</sup> ndìhi-í-yu ní quexìo Espiritú Yá Ndiòxí ní ngúndecu ndìhǎ-yu dàtná ní quide-xi cútnàhá ní taxi Yá Ndiòxí Espiritú-gá ndéé díhna ní ngúndecu ndìhi nchoo. <sup>16</sup>Te ní

ndacu iní-í nàcuáa ní cáhá<sup>n</sup> Xítohó Jesucristú, te duha ní cachí-gá: “Té Juáa ní xóo dacuàndute-dé ñáiyu, dico yúhú sãñaha-ĩ Espíritú Yã Ndiöxí cundecu ndihí-yu”, duha ní cachí-gá. <sup>17</sup>Te Yá Ndiöxí ní sãñaha-gã Espíritú-gá cundecu ndihí ñáiyu ñá túú cùu ñáiyu isràèl dàtná ní quide-gá cútnàhá ní sándáa iní-ó tnúhu Jèsús, núu xíã<sup>n</sup> vã càchí-í sá vã cúú càda-í ì<sup>n</sup> sá cuiní Yã Ndiöxí cada-í —càchí té Pèlú xãha<sup>n</sup>-dë xií-yu.

<sup>18</sup>Te sátá dúcá<sup>n</sup> ní xáha<sup>n</sup> tẽ Pèlú, te ñá túú-gã ná tnúhu ni cãhá<sup>n</sup>-yu, te ío ní cudíí iní-yu nchaa nàcuáa ní quide Yá Ndiöxí, te ní xítñàhá-yu: —Tnàhá nchaa ñáiyu ñá túú cùu ñáiyu isràèl naníhí tãhú-yu núu na dàñã-yu nchaa sá cuèhé sá dúhá quidé-yu, chi duca<sup>n</sup> cuiní Yã Ndiöxí cunduu —càchí-yu xítñàhá-yu.

### Ñáiyu sándáa iní tnúhu Jèsús ñúú Antiòquiá

<sup>19</sup>Te sátá ní sahani-güedé té Tëvã, te ní cuiní-güedé cada úhú-güedé nchaa ñáiyu ní sándáa iní-xi tnúhu Jèsús, te ní xíté nuú-yu ndi tnahá ì<sup>n</sup> ì<sup>n</sup> ñúú. Te davá-yu cuáhã<sup>n</sup>-yu ndéé distritú Fèniciá ndihí distritú Chìpré ndihí ñúú Antiòquiá. Te ní cáhá<sup>n</sup>-yu tnúhu Jèsús núu mee-ni ñáiyu isràèl, te ñá ní xítñúhu-yu dava-gá-yu.

<sup>20</sup>Te dava-gá ñáiyu distritú Chìpré ndihí ñáiyu ñúú Cirené ní sáhã<sup>n</sup>-yu ñúú Antiòquiá. Te ñá dífú mèe-ni ñáiyu isràèl ní cáhá<sup>n</sup> ndihí-yu, chi tnahá ñáiyu ñá túú cùu ñáiyu isràèl ní xáhã<sup>n</sup>-yu tnúhu Jèsús. <sup>21</sup>Te ní chindee ñaha-gá xii ñáiyu càhá<sup>n</sup> tnúhu-gá, te vãi-gá-yu ní sándáa iní-yu-gá chi ní tuhá-yu ichi-gá.

<sup>22</sup>Te ñáiyu ndècu ñúú Jerusalén ñáiyu ní sándáa iní tnúhu Jèsús ní níhí-yu tnúhu nàcuáa ní cuu, núu xíã<sup>n</sup> ní tendàhá-yu té Bèè cuáhã<sup>n</sup>-dë ñúú Antiòquiá. <sup>23</sup>Te òré ní quexio té Bèè, te ní xiní-dé nàcuáa ní quide ñaha-gã xií-yu sá ñí naníhí tãhú-yu, núu xíã<sup>n</sup> ío ní cudíí iní-dé. Te ní dácáhú iní ñáhã-dë, te ní xáha<sup>n</sup>-dë: —Ío nducu ndèe-ndo cada-ndo nchaa sá càchí Yã Ndiöxí cada-ndo —càchí-dé xãha<sup>n</sup>-dë xií-yu.

<sup>24</sup>Te té Bèè cúú-dë ì<sup>n</sup> tée váha iní-xi, te ndècu ndihí-dé Espíritú Yã Ndiöxí, te ío sándáa iní-dé tnúhu Jèsús. Te vãi vihi ñáiyu ní tuhá-yu ichi-gá.

<sup>25</sup>Te dàtnùní cuáhã<sup>n</sup> té Bèè ñúú Tàrsú cuánúndúcú-dë té Sàulú. <sup>26</sup>Te òré ní naníhí ñáhã-dë, te ndèca ñaha-dé cuáhã<sup>n</sup> ñúú Antiòquiá, te yàcá<sup>n</sup> ní xíndecu-güedé ì<sup>n</sup> cuíá ndihí ñáiyu ní sándáa iní tnúhu Jèsús, te vãi-yu ní dácuhá ñaha-güedé tnúhu-gá. Te diu-ni ñúú Antiòquiá ní dánání ñahã-yu Cristiànú xii nchaa ñáiyu sándáa iní tnúhu Jèsús.

<sup>27</sup>Te ndéé dàvã-á<sup>n</sup> ní quee ì<sup>n</sup> úú cue tée càhá<sup>n</sup> tnúhu Yã Ndiöxí ñúú Jerusalén cuáhã<sup>n</sup>-güedé ñúú Antiòquiá. <sup>28</sup>Te ì<sup>n</sup>-dë nání-dë Àgabú, te ní chindee ñaha Espíritú Yã Ndiöxí xii-dé, te ní sáhã<sup>n</sup>-dë núu nchaa ñáiyu sándáa iní tnúhu-gá, te ní xáha<sup>n</sup>-dë xií-yu sá quíxí ì<sup>n</sup> tnamá nihí ñuyú. Te duca<sup>n</sup> ní cuu sátá ní ngúnutnái té Claudiú tée yìndaha cuéhé nació<sup>n</sup>.

<sup>29</sup>Núu xíã<sup>n</sup> nchaa ñáiyu sándáa iní tnúhu Jèsús ñúú Antiòquiá ní ndatnúhu-yu sá chíndèe-yu nchaa ñáiyu sándáa iní tnúhu-gá ndécú distritú Jùdeá cuendá vã ndóhó



vihí-yu docó. Te nàcuáa ní níhí-yu, te duca<sup>n</sup> ní sacá<sup>n</sup> tnáhá-yu. <sup>30</sup>Te ní tacá díhú<sup>n</sup>-ǎ<sup>n</sup>, te nèhe té Bèè ndihi té Sàulú cuáhá<sup>n</sup>, cuáha-güedé cue tée yìndaha ñáiyu sàndáá iní tnúhu-gá.

**Sátá nǐ xíhí té Jàcobó, te ní ngava té Pèlú vecaá**

**12** Te ndéé dàvá-á<sup>n</sup> nǐ ngúíta té Hèrodés tée yìndaha ñaha xii ñáiyu isràél ní quide úhú-dé ì<sup>n</sup> úú ñáiyu sàndáá iní tnúhu Yá Ndiöxí. <sup>2</sup>Te ní táuchíú<sup>n</sup>-dè ní tniì-güedé té Jàcobó ñaní té Juàá, te ní sahani ñaha-güedè ndihi machítí. <sup>3</sup>Te ío ní cudíí iní dava ñáiyu isràél cuendá sá nǐ sahani ñaha-güedè xii té Jàcobó, núu xíá<sup>n</sup> ní tendaha tùcu té Hèrodés sandàdú-dé ní sáhá<sup>n</sup> tniì tucu-güedé té Pèlú. Te duca<sup>n</sup> nǐ quide-dé cùtnàhá ní xóo vico ní xexí-yu pàà sá ñà túú yìhi levadurá. <sup>4</sup>Te ní naníhí-güedè té Pèlú, te ní tniì ñaha-güedè ndécá ñaha-güedé cuáhá<sup>n</sup> vecaá. Te té Hèrodés ní táuchíú<sup>n</sup>-dè cuáhá<sup>n</sup> sáhú<sup>n</sup> ì<sup>n</sup> sandàdú cùndeé-güedé té Pèlú. Te ní xáha<sup>n</sup>-dè:

—Cundeé-ndó ndì cùmí ndi cùmí-ndó tée-ǎ<sup>n</sup> —càchí-dé xáha<sup>n</sup>-dè xii-güedé.

Te té Hèrodés ní sani iní-dé queñuhu-dé té Pèlú vecaá òré ná yáha vico cuendá cahni ñaha-güedè cáhá<sup>n</sup>-dè ní cùu. <sup>5</sup>Te ní xíhi-ni té Pèlú vecaá, te ní xindeé cuaa ñaha sàndadú xii-dé. Te cue ñáiyu sàndáá iní tnúhu Yá Ndiöxí ío ní xícá<sup>n</sup> táhú-yu núu-gǎ cuendá sá ñà túú nǎ cada ñaha-güedè xii-dé.

**Yá Ndiöxí ní dácäcu-gá té Pèlú vecaá**

<sup>6</sup>Ì<sup>n</sup> niú-gá quíhi té Pèlú vecaá ní cùu, te nduu tnèé tauchiú<sup>n</sup> té

Hèrodés quíhí<sup>n</sup> sandàdú queñuhu ñaha-güedè xii-dé vecaá cuendá quini nchaa ñáiyu nása cada ñaha-güedè ní cùu. Te té Pèlú cáá-dè xidí-dé xití vecaá, te ndi ndúú dúcú<sup>n</sup> ndáhá-dè ndútú càdená, te xio xio dñi-dé ndécú sàndadú, te dava-gá sandàdú xindeé-güedé yèhe vecaá. <sup>7</sup>Te ní quexio ì<sup>n</sup> espíritú xínú cuèchi núu Yá Ndiöxí xití vecaá núu cáá tē Pèlú xidí-dé, te uu<sup>n</sup> ni ní dáyèhé-xi xití vecaá, te ní danguñhi ñaha-xi xii-dé, te xáha<sup>n</sup>-xi xii-dé:

—Yáchí, ndàcáo —càchí-xi xáha<sup>n</sup>-xi xii-dé.

Te ní ndacóo-dé, te nchaa cadèna ndútú dúcú<sup>n</sup> ndáhá-dè ní nandaxí. <sup>8</sup>Te ní xáha<sup>n</sup> tùcu espíritú-á<sup>n</sup> xii-dé: —Yáchí, nucuíhnu dóo-n, te ndíhu-n chàu-n —càchí-xi xáha<sup>n</sup>-xi xii-dé.

Te ní ndíhu nuu-dé dóo-dè, te ní xáha<sup>n</sup> tùcu espíritú-á<sup>n</sup>:

—Candixi dóo-n, te na quíhí<sup>n</sup>-ó —càchí-xi xáha<sup>n</sup>-xi xii-dé.

<sup>9</sup>Te té Pèlú ní chinchícu<sup>n</sup>-dè espíritú-á<sup>n</sup>, te ñá ní cùtnuní iní-dé núu ndáá ì<sup>n</sup> espíritú xínú cuèchi núu Yá Ndiöxí duca<sup>n</sup> quide àdi ñáhá, te dàcoto ñaha-xi xii-dé ní sani iní-dé.

<sup>10</sup>Te ndèndaha-ni-dè espíritú-á<sup>n</sup> cuáhá<sup>n</sup> ní yáha-dé nàcuáa xìnutnǐ sandàdú, te ta yáha-gá-dé núu ndécú dàva-gá-güedé. Te ní sáá-dé ndéé yuyèhe núu ndèdí caá nàcuáa ní yáha ichi sá cuáhá<sup>n</sup> ndéé xití ñuu, te ní nacaá<sup>n</sup> mée yèhe-á<sup>n</sup>, te ní quee-dé cuáhá<sup>n</sup>-dè ndihi espíritú-á<sup>n</sup>. Te ní tnahá-dé ì<sup>n</sup> tnuú, te yàcá<sup>n</sup> ní dándöo ñaha espíritú-á<sup>n</sup> xii-dé. <sup>11</sup>Te dàtnuní ní nene váha saní núu-dè, te ní cùtnuní iní-dé, te ní cachí-dé:

—Ndáá sá Yă Ndiöxí ní tendaha-gă espíritú-ă<sup>n</sup> ní quixi-xi ní dácăcu ñaha-xi xii-í cuendá sá và cáhni ñaha té Hèrodés. Te dava ñăyiu isrâel ío ní cudíí iní-yu cuendá sá ñ cuiní té Hèrodés cahni ñaha-dě xii-í —duha ní cachí-dé sátá ñ cutnùní iní-dé.

<sup>12</sup>Te sátá ñ cutnùní iní-dé sá ñ cácu-dé, te cuáhá<sup>n</sup>-dé vehe ì<sup>n</sup> ñaha nàni Mariá năná tē Juàá, àdi Mácú chi úú ðu-dé, te xiá<sup>n</sup> ndécú vâi-yu cáhá<sup>n</sup> ndihí-yu Yá Ndiöxí. <sup>13</sup>Te té Pèlú ní quexìo-dé ndéé yuyèhe ní dácásá<sup>n</sup>-dē, te ní quixi ì<sup>n</sup> xíchí nání Ròdè ní quixi ndehe-xi nă cúú ñăyiu dăcasa<sup>n</sup>. <sup>14</sup>Te ní nucúhu<sup>n</sup> ndudú-xi sá dđú tē Pèlú, te ní cudíí vîhí iní-xi, dico ñá ní năcaá<sup>n</sup>-xi yuyèhe. Te ní quene cunu-xi cuáhá<sup>n</sup> ngúñaha-xi xii-yu sá nůtnîi té Pèlú yuyèhe ndaa quehé. <sup>15</sup>Te ñá ní sàndáá iní-yu tnúhu ní cáhá<sup>n</sup>-xi, te xăhă<sup>n</sup>-yu xii-xi:

—iNá tnúhu vîhi cáhá<sup>n</sup>-đ<sup>n</sup> xíchí lùcú! —càchí-yu xăhă<sup>n</sup>-yu.

Te xăha<sup>n</sup>-xi să ndàà nůtnîi-dé, te xăhă<sup>n</sup>-yu:

—Ñá dđú tē Pèlú chi espíritú sá xító ñaha xii-dé cúú să cáhá<sup>n</sup> —càchí-yu xăhă<sup>n</sup>-yu xii-xi.

<sup>16</sup>Te òrè duca<sup>n</sup> xitnàhá-yu, te té Pèlú ní dácásá<sup>n</sup> tùcu-dé yuyèhe. Te ní sáhá<sup>n</sup>-yu ní nacaá<sup>n</sup>-yu yuyèhe, te ní xiní-yu sá dđú tē Pèlú, te ní cuñúhu vîhí-yu. <sup>17</sup>Te ní quide-dé ndaha-dé núú-yu cuendá cadí-yu yuhú-yu. Te ní ngúíta-dé ní cani-dé cuendú năcuáa ní quide ñaha Yă Ndiöxí xii-dé sá ní dácăcu ñaha ì<sup>n</sup> espíritú xínú cuèchi núú-gă xii-dé vecaá, te ní xáha<sup>n</sup>-dē xii-yu:

—Cúu-ndo tē Jăcobó ndîhi dava-gă ñăyiu sàndáá iní tnúhu

Jèsús năcuáa ní quide ñaha Yă Ndiöxí xii-í —càchí-dé xăha<sup>n</sup>-dē xii-yu.

Te sátá dúcá<sup>n</sup> ñ xáha<sup>n</sup>-dē, te ní quee-dé cuáhá<sup>n</sup>-dé ingá xichi.

<sup>18</sup>Te sátá ñ túndaá, te ní ngúíta nchaa sandádú cáhá<sup>n</sup> ì<sup>n</sup> cáhá<sup>n</sup> ì<sup>n</sup>-güedé, te xitnàha-güedé:

—Ñá túú-gă té Pèlú yîhí vècaá, ðte nása cada-o-i? —càchí-güedé xitnàha-güedé.

<sup>19</sup>Te té Hèrodés ní tendaha-dē titnî sandádú cuáhá<sup>n</sup>-güedé cuánúndúcú ñaha-güedé, te ñá ní nàníhí ñáhá-güedé xii-dé. Te dătnùní ní cana-dé sandádú cue tée ní xindee ñáhá xii té Pèlú, te ní tenáá ñáhá-dē xii-güedé, te ní xáha<sup>n</sup>-dē xii dava-gá cue sandádú-dé:

—Cahni-ndo cuè tée-ă<sup>n</sup> —càchí té Hèrodés xăha<sup>n</sup>-dē.

Te dătnùní ní quee té Hèrodés distritú Jùdeá cuáhá<sup>n</sup>-dé ñuú Cèsareá, yacá<sup>n</sup> ní ngúndecu-dé.

### Ní xíhí té Hèrodés

<sup>20</sup>Té Hèrodés ní cudéé<sup>n</sup>-dē núú ñăyiu ñuú Tírú ndîhi núú ñăyiu ñuú Sídón. Te xiá<sup>n</sup> ní ndatnúhu-yu ní cuu ì<sup>n</sup>nuu tnúhu-yu, te ní xicá-yu cuáhá<sup>n</sup>-yu cuáhá<sup>n</sup> ndatnúhu ndîhi ñáhá-yu xii-dé, te ní ndatnúhu ndihí-yu té Blástú. Te tée-ă<sup>n</sup> cúú-dē chù<sup>n</sup> quide-dé núú tē Hèrodés, te ní chindee tnúhu ñaha-dē xii-yu, chi ní cáhá<sup>n</sup> ndàhú-yu núú tē Hèrodés sá và cádá ũhú ñáhá-dē xii-yu. Te duca<sup>n</sup> ñ quidé-yu cuendá ñuú té Hèrodés-ă<sup>n</sup> quéé să xéxi-yu. <sup>21</sup>Te ní xáha<sup>n</sup> tē Hèrodés ná nduu quîhî<sup>n</sup>-yu ndatnúhu ndîhi ñaha-dē xii-yu, te nduu-ă<sup>n</sup> ñ quîfunuu-dé ì<sup>n</sup> dóó văha, ì<sup>n</sup> sá sácuihnu tée tàxi tnuní. Te

ní ngóo-dé núú xilé váha, xilé sá sácóo nchihi téé tàxi tñuní, te ní ngúíta-dé ní cáhá<sup>n</sup> sàhú-dé dóho-yu.

<sup>22</sup>Te uu<sup>n</sup> ní ní cuáá-yu te càchí-yu:

—iTéé-a càhá<sup>n</sup>-dé dico ñá dífú tée ñuyú-a cùu-dé chi ndiöxí cúú-dě! —càchí-yu xitnàhá-yu.

<sup>23</sup>Te ñu-ni òré-á<sup>n</sup> ñí yáha ìí<sup>n</sup> espíritú xínú cuèchi núú Yá Ndiöxí, te ní sáñaha-xi cuhé xii té Hèrodés. Te duca<sup>n</sup> ñí tnahá-dé chi mee-dě ñá ní xáha<sup>n</sup>-dě sá ñáyiú cùu-dé, te ní cáhá<sup>n</sup>-yu sá ndiöxí cúú-dě. Te nchìto-gá-dé ní sanú ñáhá tìndácú xii-dé, te dàtnùní ní xíhí-dé.

<sup>24</sup>Te ío tìtní xichi ní sáhá<sup>n</sup> ñáyiú sàndáá iní tñuhu Yá Ndiöxí ní cáhá<sup>n</sup>-yu tñuhu-gá, te ío chítú-yu ní sàndáá iní-yu tñuhu-gá.

<sup>25</sup>Te té Bèè ndihi té Sàulú ní ndihi chùu<sup>n</sup>-güedé, te ní ndee-güedé ñuú Jerusàlén cuáhá<sup>n</sup>-güedé ndihi té Juàá, àdi Mácú chi úú ñu-dé.

**Té Bèè ndihi té Sàulú cuáhá<sup>n</sup>-güedé dácua<sup>n</sup>ha-güedé ñáyiú tñuhu Yá Ndiöxí nchaa ñuú xíca**

**13** Te ñuú Antiòquia ndécú ìí<sup>n</sup> úú cue tée càhá<sup>n</sup> tñuhu Yá Ndiöxí núú nchaa ñáyiú ní sàndáá iní-xi tñuhu-gá. Te ndècu tucu ìí<sup>n</sup> úú cue tée cùu mestrú dácua<sup>n</sup>ha ñaha-güedé xií-yu tñuhu-gá. Ìí<sup>n</sup>-dé nání-dě Bèè, te ìí<sup>n</sup>-dé nání-dě Xímú, te té Xímú-á<sup>n</sup> xáha<sup>n</sup>-güedé Nègrú chi tnuu-dě. Te ingá-dé nání-dě Lùciú, te tée-á<sup>n</sup> cúú-dě tée ñuú Cirené. Te ingá-dé nání-dě Sàulú, te ingá tucu-dé nání-dě Manàén. Te té Manàén-á<sup>n</sup> ndihi té Hèrodés tée cùu gobiernú Galilea ío váha ní xóo cáhá<sup>n</sup> ndihi tñaha-güedé cútñahá ní cuu líhli-güedé. <sup>2</sup>Te ìí<sup>n</sup> nduu ñá

túú ñá ní xèxi ñáyiú ní sàndáá iní tñuhu Yá Ndiöxí cuendá mee-ni-gá ní cáhá<sup>n</sup> ndihí-yu, te ní xáha<sup>n</sup>

Espíritú Yá Ndiöxí xií-yu:

—Tendaha-ndo tē Bèè ndihi té Sàulú quíhí<sup>n</sup>-güedé dava-gá ñuú cada-güedé chùu<sup>n</sup> tahu-í, chi duca<sup>n</sup> cuíní-í cunduu —càchí Espíritú-gá xáha<sup>n</sup>-xi xii-yu.

<sup>3</sup>Te ní cáhá<sup>n</sup> ndihi tucú-yu Yá Ndiöxí, te ñá túú tñahí ná ní xèxi tucú-yu, te ní sacá<sup>n</sup> ndodo-güedé ndaha-güedé díquí tē Bèè ndihi té Sàulú. Te sátá dúcá<sup>n</sup> ñí quide-güedé, te ní quide ndee ñni ñáhá-yu xii-güedé.

**Té Bèè ndihi té Sàulú cuáhá<sup>n</sup>-güedé distrítú Chìpré cáhá<sup>n</sup>-güedé tñuhu Yá Ndiöxí**

<sup>4</sup>Te té Bèè ndihi té Sàulú ní quee-güedé cuáhá<sup>n</sup>-güedé cuendá duca<sup>n</sup> cuíní Espíritú Yá Ndiöxí cunduu sá cáca cùu-güedé dava-gá ñuú, te ní quexìo-güedé ñuú Selèuciá, te yàcá<sup>n</sup> ní quee-güedé bàrcú cuáhá<sup>n</sup>-güedé distrítú Chìpré. Te ñuú-á<sup>n</sup> cáá xití lámár chi ndècu ñuhu yichí xití ndute.

<sup>5</sup>Te ní quexìo-güedé mei ñuú Salaminá, te ní quene-güedé bàrcú, te ní xica-güedé cuáhá<sup>n</sup>-güedé nchaa veñúhu ñáyiú isràél càhá<sup>n</sup>-güedé tñuhu Yá Ndiöxí. Te cuáhá<sup>n</sup> ndihi-güedé té Juàá cuendá chindee ñaha-dé xii-güedé. <sup>6</sup>Te ní tñii-güedé ichi cuáhá<sup>n</sup>-güedé ñuú Páfós cáá ndàa ingá xio Chìpré, te yàcá<sup>n</sup> ní naníhí tñahá-güedé ndihi ìí<sup>n</sup> tée isràél nání-dě Barjèsús, te tée-á<sup>n</sup> xini-dé cada nduu-dé, te càchí-dé sá càhá<sup>n</sup>-dé tñuhu Yá Ndiöxí dico ñá ndàá. <sup>7</sup>Te tée-á<sup>n</sup>

quidé chiù<sup>n</sup>-dé ndihi té Sèrgiú, àdi Páblú chi úú ðiú-dé, te cùu-dé gobièrnú Chìpré, te ío túha-dé. Te ní cana-dé té Bèé ndihi té Sàulú, chi cuìní-dé cundedóho-dé tnúhu Yá Ndiòxí. <sup>8</sup>Te téé quide nduu-á<sup>n</sup> ñá ní dàña-dé cáhá<sup>n</sup>-güedé tnúhu-gá, chi ñá ní cuìní-dé sá téé cùu gobièrnú-á<sup>n</sup> tuha-dé ichi Yá Ndiòxí. Te duca<sup>n</sup> ñí quide té Barjèsús, téé xáha<sup>n</sup>-güedé Èlimás. <sup>9</sup>Te tnàhá tucu té Sàulú ndécú úú ðiú-dé chi xáha<sup>n</sup> tucu-güedé Páblú, te ndècu ndihi-dé Espíritú Yá Ndiòxí. Te ní xíndéhé ñíí ñáhá-dé xii téé quide nduu-á<sup>n</sup>. <sup>10</sup>Te ní xáha<sup>n</sup>-dè:

—Yòhó, chi dàtná quidé yùcu ñávàha quide-n chi mee-ni dàndahú-n ñáyiú. Yòhó cúú-n dèhe sácufíhna, chi nchaá tnúhu váva cuìní Yá Ndiòxí cáhá<sup>n</sup>-yu, te yòhó ñá dáña<sup>n</sup>. <sup>11</sup>Te vitna quini<sup>n</sup> nàcuáa cunduu, chi taxi Yá Ndiòxí ìí<sup>n</sup> castlú xii-n chi vá cútnúni-gá núú-n càca cuu-n ìí<sup>n</sup> úú nduu — càchí-dé xáha<sup>n</sup>-dè xii téé quide nduu-á<sup>n</sup>.

Te òré duca<sup>n</sup> ñí xáha<sup>n</sup> tē Páblú xii-dé, te òré-ni ní cuaa-dé, te ñá túú ní cùtnúni tnàhí-gá núú-dè, te ní xóo nducu-ñá-dé ñáyiú ní xóo cuita nehe ñaha xii-dé. <sup>12</sup>Te téé cùu gobièrnú ní xiní-dé nàcuáa ní quide té Páblú, te ío ní cuñúhu-dé. Te ní tnahá iní-dé tnúhu Jèsús, núu xíá<sup>n</sup> ní sándáá iní-dé.

**Té Páblú ndihi té Bèé ndécú-güedé ñúú Antiòquiá Pìsidíá**

<sup>13</sup>Te té Páblú ndihi dava-gá cue téé xica cuu ndihi-dé ní queé-güedé bàrcú, te ní quee-güedé ñúú Páfós cuáhá<sup>n</sup>-güedé ñúú Pèrgé, te ñúú-á<sup>n</sup>

yíndèhu-xi distritú Pànfiliá. Te té Juàá ní nacuico-dè ní dándóo ñaha-dé xii-güedé cuánuhú-dé ñúú Jerusalén. <sup>14</sup>Te dava-gá-güedé ní quee-güedé ñúú Pèrgé cuáhá<sup>n</sup>-güedé ñúú Antiòquiá, te Pìsidíá yíndàha-xi ñúú-á<sup>n</sup>. Te nduu xíndetatú-yu, te ní sáhá<sup>n</sup>-güedé veñúhu ñáyiú isràél, te ní ngóo-güedé xití veñúhu. <sup>15</sup>Te cue téé ndècu veñúhu ní quehe<sup>n</sup>-güedé tutú yódó tnúni nchaá tnúhu sá ñí chídó tnúni ndíi Moisés ndihi tutú yódó tnúni nchaá tnúhu sá ñí chídó tnúni dava-gá cue téé ní xóo cáhá<sup>n</sup> tnúhu Yá Ndiòxí ndéé sanaha, te ní dácuáhá-güedé ní xíndedóho cue ñáyiú, te dàtnúni cue téé yíndaha veñúhu-á<sup>n</sup> ñí xáha<sup>n</sup>-güedé xii té Páblú ndihi dava-gá-güedé:

—Nchòhó cue téé cùu ñaní tnáhá-ndí, te núu cuìní-ndó cáhá<sup>n</sup>-ndó tnúhu Yá Ndiòxí, te cuu cáhá<sup>n</sup>-ndó tnávíi cuèndá cutúha-yu —càchí-güedé xáha<sup>n</sup>-güedé.

<sup>16</sup>Te té Páblú ní ndacuñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáhá<sup>n</sup>-dé, te ní xáha<sup>n</sup>-dè:

—Te nchòhó ñáyiú quide nchaá nacuáa càhá<sup>n</sup> Yá Ndiòxí ndihi nchaá nchòhó ñáyiú isràél, cundedóho-ndo nchàa-ndo ìí<sup>n</sup> tnúhu na càhá<sup>n</sup>-í-a. <sup>17</sup>Te cuèi ndéé sanduu te cuèi vitna chindee ñaha-ni Yá Ndiòxí xii nchaá ñáyiú isràél, te ní nacáxi ñaha-gá xii-yu te ní chindee ñaha-gá cuèndá cáyá-yu, chi cuìní-gá sá cúú vài-yu, te duca<sup>n</sup> ñí quide-gá cútnàhá ní xíndecú-yu nàció<sup>n</sup> Ègíptú. Te dàtnúni ní dácacu ñaha-gá xii-yu ñúú-á<sup>n</sup>, chi mee-gá nchaá ndàcu-gá quidé-gá. <sup>18</sup>Te ní xíndecú-yu ìí<sup>n</sup> xichi núú ñà túú

tnàhí sàcúndecu ñáyiú údico cuíá, te xítí údico cuíá-ǎ<sup>n</sup> nǐ cundee ìní-gá nchaa sá nǐ quidé-yu. <sup>19</sup>Te Yá Ndiöxí ní chindee ñàha-gá xii ñáyiú isràél, te ní dánáǎ-yu úsá nàció<sup>n</sup>, chi cuèndá ní cuiní-gá cuu cuèndá-yu ñuhú-á<sup>n</sup>. <sup>20</sup>Te dàtnùnì ní cachí Yá Ndiöxí sá dǎú-ní cuè tée cùchiu<sup>n</sup> taxi tñuní-güedé nchaa ñáyiú, te duca<sup>n</sup> nǐ quide-güedé dàtná cúmí cièndú dava cuíá. Te sátá xǎ<sup>n</sup>, te ní xíndecu té Sàmuel tée ní cáhá<sup>n</sup> tñuhu Yá Ndiöxí. <sup>21</sup>Te dàv-á<sup>n</sup> nǐ cuiní ñáyiú isràél sá cùndècu ì<sup>n</sup> tée quindaha ñàha-dé xií-yu, te Yá Ndiöxí ní cachí-gá sá tǎ Sàúl quindaha-dě-yu, te tée-á<sup>n</sup> nǐ cuu-dé déhe té Cǐs, te té Benjámín tée ní xíndecu ndéé sanaha-gǎ ní cuu ñaní tnáhá-dě. Te té Sàúl ní xíndaha-dě ñáyiú údico cuíá. <sup>22</sup>Te Yá Ndiöxí ñá ní cuiní-gá cundecu-ni-dé quindaha-dě ñáyiú, chi ní cuiní-gá sá tǎ Dàvíí ndǎhu ndaha-dě cue ñáyiú isràél, te ní cachí-gá: “Ío váha ní tnahá iní-í nàcuáa quide té Dàvíí déhe tée Isàí, te cada-dé nchaa nàcuáa cúñaha-ǎ xii-dé”, duha ní cachí Yá Ndiöxí — cächí té Pǎblú xǎha<sup>n</sup>-dě xií-yu.

<sup>23</sup>Te ní xáha<sup>n</sup> tucu té Pǎblú:

—Diu-ni ñaní tnáhá tǎ Dàvíí cúú Jèsús. Te Yá Ndiöxí ní tendaha-gǎ Jèsús ní quixi-gá ñuyíú-a cuèndá nchaa ñáyiú isràél ná quindáá iní ñáhá xii Jesús naníhí tǎhú-yu, chi duca<sup>n</sup> nǐ cachí Yá Ndiöxí cunduu. <sup>24</sup>Te cútnáhá vátá ngüíta-gá Jèsús cáhá<sup>n</sup>-gá tñuhu Yá Ndiöxí, te ní cáhá<sup>n</sup> té Juáá núú ñáyiú isràél sá xíní ñuhu-xi dañá-yu nchaa sá cuèhé sá dúhá, te cuanduté-yu. <sup>25</sup>Te sa ta cùyatni-ni-gá cuú-dé, te ní

xáha<sup>n</sup>-dě xií-yu: “Nchòhó cächí-ndó sǎ yǎhú cúú-í Cristú Yáá ndétú-ndó dico ñáhá, chi ñá dǎú yǎhú cúú-í Crístú, chi davitna quixi Cristú Yáá tendaha Yá Ndiöxí quixi ñuyíú-a. Te yǎhú cúú-í ì<sup>n</sup> tée duu<sup>n</sup> duu<sup>n</sup> ñá túú tàú nandaxi cuèdicó chàú-gá dico quide-í chiú<sup>n</sup>-gá”, duha ní cáhá<sup>n</sup> te Juáá —cächí té Pǎblú xǎha<sup>n</sup>-dě xií-yu.

<sup>26</sup>Te ní xáha<sup>n</sup> tucu té Pǎblú:

—Cundedóho tucu-ndo ìngá tñuhu na cáhá<sup>n</sup>-í. Nchòhó tnáhá-ndó cùu-ndo ñaní tnáhá ndíi Àbrahám, te xíní-ndó sǎ Yá Ndiöxí cúnúu-gá. Te diu-ni-gá cuiní-gá sá ncháá-ndó cùndedóho-ndo tñuhu-gá, chi cùu-xi tñuhu sá cáhá<sup>n</sup> nàcuáa naníhí tǎhú-ndó. <sup>27</sup>Te nchaa ñáyiú ndècu ñuu Jerusàlén ndíhi nchaa cue tée cùnúu ñá ní cùtnuní iní-yu ndíhi-güedé sá Yá Ndiöxí ní tendaha-gǎ Jèsús ní quixi-gá ñuyíú-a. Te ñá ní sǎha-yu cuèndá sá dǎú Jèsús ní cacunehe cue tée ní cáhá<sup>n</sup> tñuhu Yá Ndiöxí ndéé sanaha cuèí ní dácúáhǎ-yu tñuhu-gá veñuhu-yu ndí tnahá úná nduu, nduu ndètátú-yu. Te ní cachí-yu sá ndècuéchi Jèsús, te ní xáhǎ<sup>n</sup>-yu sá cáhni ñàha-güedé xii-gá. Te xǎ<sup>n</sup> sa ñàha cue tée ní xóo cáhá<sup>n</sup> tñuhu-gá ndéé sanaha sǎ dúcá<sup>n</sup> cáhá<sup>n</sup>-yu. <sup>28</sup>Te cuèí ñá túú ñá ní quide-gá te ní xáhǎ<sup>n</sup>-yu xii té Pilatú tée cùu gobiernú sá táuchiu<sup>n</sup>-dé cahni ñàha-güedě xii-gá. <sup>29</sup>Te xǎ<sup>n</sup> ñuu ní sata caa ñàha-güedě xii-gá núú cùrúxí. Te ní quide-güedé nchaa nàcuáa ní chídó tñuní cue tée ní cáhá<sup>n</sup> tñuhu Yá Ndiöxí ndéé sanaha. Te sátá nì xíhí-gá, te ní nunehe ñàha-güedě xii-gá núú cùrúxí, te

nchìdo ñaha-güedé cuáhá<sup>n</sup>, te ní chihí ñaha-güedé ìí<sup>n</sup> xití yaú. <sup>30</sup>Te Yá Ndiöxí ní dándótó-gă Jèsús. <sup>31</sup>Te titní xito ní sáhá<sup>n</sup> Jèsús núú ndécú ñáyiú ní xica cuu ndihí-gă, ñáyiú ní quee distritú Galileá ní sáhá<sup>n</sup>-yu ndihí-gă ñuú Jerusálén. Te vitna nchaa ñáyiú-á<sup>n</sup> xăhă<sup>n</sup>-yu xii dava-gă ñáyiú isrâél năcuáa ní cuu ní ndoto-gă.

<sup>32</sup>Te nchúhú cəhá<sup>n</sup>-ndí năcuáa cada-ndo naníhí tǎhú-ndó, chi Yá Ndiöxí ní xáha<sup>n</sup>-gă xii cue ñaní tnáhá-ó ní xindecu ndéé sanaha sǎ téndàha-gă Déhe-gă Jèsús quixi-gă ñuyú-a. <sup>33</sup>Te ní quixi-gă ní xihí-gă, te ní dándótó ñaha Yá Ndiöxí xii-gă, te núú xǎ<sup>n</sup> naníhí tǎhú-ó núu na quindáa iní-ó-gă. Te ìí<sup>n</sup> téé ní cəhá<sup>n</sup> tnúhu Yá Ndiöxí ndéé sanaha ní chídó tnùní-dé núú sǎlmú cúú ùú năcuáa ní cəhá<sup>n</sup> Yá Ndiöxí ní xáha<sup>n</sup>-gă xii Déhe-gă, te duha ní xáha<sup>n</sup>-gă: “Yòhó cúú-n Dēhe-í, te vitna cutnùní iní ñáyiú sá yǎhú cúú-í Tǎtá-n”, duha ní xáha<sup>n</sup>-gă xii Jèsús. Te ðiú-ni duca<sup>n</sup> ní chídó tnùní téé ní cəhá<sup>n</sup> tnúhu-gă ndéé sanaha. <sup>34</sup>Te ingá xichi tucu núú tütú-gă ní chídó tnùní ìí<sup>n</sup> téé ní xindecu ndéé sanaha năcuáa ní xáha<sup>n</sup>-gă xii Déhe-gă, te duha ní xáha<sup>n</sup>-gă: “Mee-ni sǎ vǎha cada ñaha-í dǎtná ní xii-í té Dàvíí”, duha ní xáha<sup>n</sup>-gă. Te duca<sup>n</sup> ní chídó tnùní téé ní xindecu ndéé sanaha năcuáa ní cəhá<sup>n</sup> Yá Ndiöxí, chi òrè ní xihí Jèsús te ní dándótó ñaha-gă cuendá sá vǎ tǎfú yǐqui cuñú-gă. <sup>35</sup>Te núú xǎ<sup>n</sup> duha ní chídó tnùní ìí<sup>n</sup> téé ní xindecu ndéé sanaha núú libré Sǎlmú năcuáa ní xáha<sup>n</sup>-dē xii-gă: “Vá dǎná-n sǎ tǎfú yǐqui cuñú

Déhe-n chi ío vǎha quide-gă”, duha ní chídó tnùní téé ní xindecu ndéé sanaha —cəchí té Pǎblú xǎha<sup>n</sup>-dē xii-yu.

<sup>36</sup>Te xáha<sup>n</sup> tucu-dé:

—Te té Dàvíí ní quide-dé nchaa chiú<sup>n</sup> ní tǎhú Yá Ndiöxí cada-dé, te dǎtnùní ní xihí-dé. Te ní chindúxi ñaha-güedé xii-dé yatni năcuáa yǐndúxi cue ñaní tnáhá-dē ndéé sanaha-gă, te xǎ<sup>n</sup> ní téhyú yǐqui cuñú-dé. <sup>37</sup>Te Jèsús chi ñá ní tǎhyú yǐqui cuñú-gă, chi ní dándótó ñaha Yá Ndiöxí xii-gă. <sup>38</sup>Te cuini-í cachí tnúhu-í xii-ndo cuendá cutnùní iní-ndo nchaa-ndo sá cadá cǎhnu iní Yá Ndiöxí nchaa cuéchi-o, chi ní xihí Jèsús cuendá naníhí tǎhú-ó. <sup>39</sup>Te nchaa ñáyiú na quindáa iní ñáhá xii Jèsús te cada cǎhnu iní-gă nchaa sá ñà túú vǎha ní quidé-yu, chi núu mee-ni tnúhu ní chídó tnùní ndí Moisés ná quindáa iní-yu te vǎ naníhí tǎhú-yu. <sup>40-41</sup>Te ío coto-ndo mēe-ndo cuendá sá vǎ yǎha-ndo dǎtná ní cachí Yá Ndiöxí yáha cue ñáyiú ñá túú ní quide vǎha ní xindecu ndéé sanaha. Te năcuáa ní cəhá<sup>n</sup>-gă ní chídó tnùní ìí<sup>n</sup> téé ní cəhá<sup>n</sup> tnúhu-gă ndéé sanaha, te duha ní xáha<sup>n</sup>-gă xii-yu dǎvǎ-á<sup>n</sup>:

Cundedóho nchaa nchòhó ñáyiú cuèhé yuhu-xi na cəhá<sup>n</sup>-í ìí<sup>n</sup> tnúhu te quiní-ndó nǎ cuñúhu-ndo, yúhú quidé-í vǎi núú sǎ ío vǎha vitna ndècu-ndo ñuyú-a, te cuèi na còo ñáyiú cachí tnúhu xii-ndo năcuáa ndúu nchaa sá vǎha-á<sup>n</sup>, dico nchòhó vǎ quindáa iní-ndó, te sá dúcá<sup>n</sup> cǎda-ndo vǎ quindáa iní-ndó, te dăcuíta nihnu-ndo mēe-ndo.

Duha ní xáha<sup>n</sup>-gǎ xií-yu te duca<sup>n</sup> ní chídó tnùní téé ní cáhá<sup>n</sup> tnúhu-gǎ ndéé sanaha —càchí té Pǎblú xáha<sup>n</sup>-dě xií-yu.

<sup>42</sup>Te òré ní ndee té Pǎblú veñúhu ñáyiú isràél ndìhi cue téé xica cuu ndìhi-dé, te ní cáhá<sup>n</sup> ndàhú ñáyiú yìhi veñúhu núú-dě sá quìh<sup>n</sup>-dé núú ùná nduu, te òu-ni tnúhu ní cáhá<sup>n</sup>-dé cáhá<sup>n</sup> tucu-dé òré quexìo-dé. <sup>43</sup>Te sǎtá nǐ túhú veñúhu-yu, te vǎi ñáyiú isràél ndìhi ñáyiú ní chitnahá ñáhá xǐ-yu nchìcú<sup>n</sup> nihnu quide nacuaá quidé-yu càhá<sup>n</sup> ndìhí-yu Yá Ndiòxí cuáhá<sup>n</sup> ndìhí-yu té Pǎblú ndìhi té Bèé. Te ní xáha<sup>n</sup>-güedě xií-yu sá vǎ dáhá ndèé-yu canchicú<sup>n</sup> nihnú-yu tnúhu sá càhá<sup>n</sup> nàcuáa quide Yá Ndiòxí sá cúú-xǐ-yu.

<sup>44</sup>Te núú ùná nduu, nduu ndètatú-yu ní quexìo vai vihi ñáyiú, chi nihíi ñuú ní quexìo ndedóho-yu tnúhu Yá Ndiòxí. <sup>45</sup>Te cuèndá sá ò vǎi ñáyiú ní quexìo, núú xǐǎ<sup>n</sup> ní cuu cuédú ínì ñáhá ñáyiú isràél xii té Pǎblú, te ní xícuèhé ñáhǎ-yu xii-dé. Te ní xáhǎ<sup>n</sup>-yu xii-dé sá dándàhú ñáhá-dě xií-yu ndìhi tnúhu càhá<sup>n</sup>-dé. <sup>46</sup>Te té Pǎblú ndìhi té Bèé ñá túú ní yùhú ñáhá-güedě xií-yu. Te ní xáha<sup>n</sup>-güedě:

—Xìni ñuhu-xi díhna-gǎ nchòhó ñáyiú isràél cáhá<sup>n</sup> ndìhi-ndí tnúhu Yá Ndiòxí, te mee-ndo ñǎ cuíní-ndó cùndedóho-ndo. Te sá dúcá<sup>n</sup> quide-ndo, te vǎ nánìhí tàhú-ndó, te ni vǎ càhá<sup>n</sup>-gǎ-ndí tnúhu Yá Ndiòxí núú-ndó, dico cáhá<sup>n</sup>-ndí núú dàva-gǎ ñáyiú cuèi ñá díú ñáyiú isràél cúú-yu, <sup>47</sup>chi duca<sup>n</sup> nǐ táuchíú<sup>n</sup> Yá Ndiòxí cada-ndí. Te ní cachí-gǎ:

Cuíní-í cundecu-ndo dàtná i<sup>n</sup> téé yòtnuú ñuhú cundecu-ndo cáhá<sup>n</sup>-ndó tnúhu-í núú nchàa ñáyiú ñá túú cùndìhi-ndo ñáyiú ndècu nihíi ñuyíú, te naníhí tàhú-yu,

duha ní cáhá<sup>n</sup>-gǎ —càchí té Pǎblú ndìhi té Bèé xáha<sup>n</sup>-güedě xií-yu.

<sup>48</sup>Te ñáyiú ñá túú cùu ñáyiú isràél ío ní cudǎí ìní-yu sá dúcá<sup>n</sup> nǐ cáhá<sup>n</sup>-güedé, te ní xítàhá-yu sá ò vǎha cuáhá<sup>n</sup> tnúhu Yá Ndiòxí. Te mee Yá Ndiòxí sa nàha-gǎ nándi cùu ñáyiú naníhí tàhú, te òu-ni ñáyiú-á<sup>n</sup> nǐ sándáá ínì-yu. <sup>49</sup>Te nchaa xichi xǐá<sup>n</sup> nǐ sáhá<sup>n</sup>-yu ní cáhá<sup>n</sup>-yu tnúhu-gǎ. <sup>50</sup>Te cue téé isràél ní ndatnúhu-güedé ndìhi cue téé cùnuu, ndìhi cue ñáyiú òhí cùnùu, te ñáyiú òhí-á<sup>n</sup> ñá túú tnàhí cùmánì-yu veñúhu. Te ní xáha<sup>n</sup>-güedě sá cádá ùhú-yu té Pǎblú ndìhi té Bèé, te dàtnùnì cuícú<sup>n</sup> ñáhǎ-yu xii-güedé, te duca<sup>n</sup> nǐ quidé-yu. <sup>51</sup>Te ní casa<sup>n</sup> ñuhu té Pǎblú ndìhi té Bèé sáhá-güedé ní naquidí-güedé tícá chúhmá nǐ tnǐ sáhá-güedé. Te duca<sup>n</sup> nǐ quide-güedé cuèndá cutnùnì ínì-yu sá ñá túú ní quide vǎha-yu. Te dàtnùnì ní quee-güedé cuáhá<sup>n</sup>-güedé ñuú Ìconiú. <sup>52</sup>Te ñáyiú ní sándáá ínì-xi tnúhu Jèsús ío vǎha ní cuu ínì-yu cuèndá sá nǐ naníhí tàhú-yu, te nchaá-yu sa ndècu ndìhí-yu Espiritú Yá Ndiòxí.

**Té Pǎblú ndìhi té Bèé ndécú-güedě ñuú Ìconiú**

**14** Te ní quexìo té Pǎblú ndìhi té Bèé ñuú Ìconiú. Te ní sáhá<sup>n</sup>-güedé veñúhu ñáyiú isràél, te ío vǎha ní cáhá<sup>n</sup>-güedé tnúhu

Yá Ndiöxí, te vai ñáyiú isràél ndihi ñáyiú ñá túú cùu ñáyiú isràél ní sàndáá iní-yu tnúhu-gá. <sup>2</sup>Te dava ñáyiú isràél ñá ní sàndáá iní-yu, te ní cáhá<sup>n</sup> cuèhé-yu cuèndá té Páblú ndihi té Bèè cuèndá sá vǎ quìndáá iní ñáyiú ñá túú cùu ñáyiú isràél.

<sup>3</sup>Te ní xìndecu-güedé titní nduu, te ñá túú tnàhí ni yùhú-güedé ní dácuáhá-güedé ñáyiú tnúhu Yá Ndiöxí. Te mee-gǎ ní chindee ñàha-gá ní quide-güedé titní núú sǎ vǎ yǒo tnàhí ndàcu cada, te ío ní cuñúhu-yu. Te duca<sup>n</sup> ñǎ quide-gǎ cuèndá cutnùní iní-yu sá ndáá càhá<sup>n</sup>-güedé sá méé-gǎ ío cùu iní ñáhá-gǎ xíí-yu, te naníhí tàhú-yu núu na quìndáá iní-yu tnúhu-gá.

<sup>4</sup>Te ní quee dava ñáyiú ñúú Ìconíú, davá-yu cùndihí-yu ñáyiú isràél ñáyiú ñá túú sàndáá iní tnúhu Jèsús. Te davá-yu cùndihí-yu cue téé ní táuchíú<sup>n</sup> Jèsús càhá<sup>n</sup> tnúhu-gá. <sup>5</sup>Te ñáyiú isràél ndihi dava-gǎ ñáyiú ñá túú sàndáá iní-xi ní cuu ì<sup>n</sup>nùú-yu ndihi cue téé cùnuu sá cání-yu-güedé, te cuáha yúú ñáhǎ-yu xii-güedé.

<sup>6</sup>Te té Páblú ndihi té Bèè ní níhí-güedé tnúhu sá cuíní-yu canihá-yu, núu xíǎ<sup>n</sup> dayuhu ní quee-güedé cuáhá<sup>n</sup>-güedé ñúú Lìstrá ndihi ñúú Dèrbé. Te ndí ndúú ñúú-á<sup>n</sup> yíndèhu-xi Licaoniá. Te ní sáhá<sup>n</sup>-güedé dava-gǎ ñúú líhli càa yatni xíá<sup>n</sup>. <sup>7</sup>Te nchaa ñúú-á<sup>n</sup> ní cáhá<sup>n</sup>-güedé tnúhu Jèsús.

### Ñúú Lìstrá ní sáha yúú ñáhǎ-yu xii té Páblú

<sup>8</sup>Te ñúú Lìstrá ndécú ì<sup>n</sup> téé yacua, mee-ni nùcúo-dé chi duca<sup>n</sup> tnàhí càa-dé ní cacu-dé. <sup>9</sup>Te ndèdóho-dé

tnúhu càhá<sup>n</sup> té Páblú, te ní cutnùní iní té Páblú sá ío sàndáá iní téé yacua-ǎ<sup>n</sup> sǎ Yá Ndiöxí cada tátna ñàha-gǎ xii-dé, núu xíǎ<sup>n</sup> ní xíndéhé ñàha váha té Páblú xii-dé. <sup>10</sup>Te té Páblú ní cáhá<sup>n</sup> níhi-dé, te ní xáha<sup>n</sup>-dè:

—Ndacuíñí cunutnǎí váha-n —  
càchí-dé xáha<sup>n</sup>-dè.

Te ní ndacuíñí cunu-dé te ní xica-ni-dé. <sup>11</sup>Te òrè ní xiní-yu sá tǎ Páblú ní quide tátna-dé téé yacua-ǎ<sup>n</sup>, te nchaá-yu ní cáhá<sup>n</sup>-yu tnúhu mèé-yu tnúhu Licàoniá. Te ní cáhá<sup>n</sup> níhi-yu, te xǐtnàhá-yu:

—Cue téé-ǎ<sup>n</sup> sànuu sá ñáyiú cùu-güedé dico ñáhá, chi ndiöxí cúú-güedé te ní quexio-güedé ñuyúú-a —càchí-yu xǐtnàhá-yu.

<sup>12</sup>Te ní cachí-yu sá tǎ Bèè cúú-dè ndiöxí dánàni-yu Jüpitér, te té Páblú cúú-dè ndiöxí dánàni-yu Mèrcuriú, chi cuèndá téé-á<sup>n</sup> cúú-dè téé càhá<sup>n</sup>. <sup>13</sup>Te càa ì<sup>n</sup> veñúhu yuhu ñùú-á<sup>n</sup> núú quidé càhnú-yu ndiöxí sá dánàni-yu Jüpitér. Te dútu yíndàha veñúhu-á<sup>n</sup> ndécá-dè ì<sup>n</sup> úú ndicutu cuáhá<sup>n</sup> quehé veñúhu, te ñúhu itá dúcú<sup>n</sup>-güedé. Te cue quití-á<sup>n</sup> cahni-dé cada càhnú-dé ndihí-yu té Bèè ndihi té Páblú ní cùu, chi duca<sup>n</sup> quidé-yu quide cahnú-yu ndiöxí-yu. <sup>14</sup>Te té Bèè ndihi té Páblú ní níhí-güedé tnúhu nàcuáa sàni iní-yu cadá-yu, te ní ndátá-güedé dóo-güedé cuèndá cutnùní iní-yu sá ñá tnàhá iní-güedé nàcuáa sàni iní-yu cadá-yu. Te xínu-güedé cuánguihu-güedé tnuú-yu, te níhi ní cáhá<sup>n</sup>-güedé, te xáha<sup>n</sup>-güedé:

<sup>15</sup>—¿Ná cuèndá duca<sup>n</sup> cuíní-ndó càda-ndo? Te diu-ni tnàha ñáyiú-ndo cùu-ndí, dicó-ni tnúhu



Yá Ndiöxi véxi-ndí dachuàha ñaha-ndí xii-ndo cuèndá sá vǎ cádá-gǎ-ndó nàcuáa quide-ndo, te quindáá iní-ndó Yǎ Ndiöxi, chi ìí<sup>n</sup>dii-ni Yá Ndiöxi ndécú. Te ðiu-gá ní cadúha-gá andiu ndihi ñuyú-a ndihi lámár ndihi nchaandi túhú sá ío ñuyú-a. <sup>16</sup>Te ndéé sanaha ní dáńá Yǎ Ndiöxi ní quidé-yu nàcuáa cuáhá<sup>n</sup> iní méé-yu. <sup>17</sup>Te ní xóo cada-gá sá vǎha cuèndá cutnùní iní-yu sá ío váha iní-gá. Te ðiu-gá dácù<sup>n</sup>-gá dáú, te tàxi-gá sá nchító-ó chi xító-gá nchaa tata xítú-ó, te xíá<sup>n</sup> cúdǎí iní-ó ndècu-o ñuyú-a —càchí té Pǎblú ndihi té Bèé xǎha<sup>n</sup>-güedé xíí-yu.

<sup>18</sup>Te cuèi duca<sup>n</sup> ní xǎha<sup>n</sup>-güedé nchaa tnúhu-á<sup>n</sup>, dico ío úhú ní sándáá iní-yu ñá ní sàhni-yu ndicutu-á<sup>n</sup> chi cuèndá duca<sup>n</sup> tnàhí quidé-yu sàhni-yu ndicutu òrè quidé càhnú-yu ndiöxi-yu.

<sup>19</sup>Te ñuú Antiòquiá ndihi ñuú Ìconiú xǐndecu dava ñáyiu isràèl, te ní quee-yu cuáhá<sup>n</sup>-yu ñuú Lìstrá núú ndécú tè Pǎblú. Te xíá<sup>n</sup> ní quexiò-yu te ní xǎhǎ<sup>n</sup>-yu xii ñáyiu dii ñuú xíá<sup>n</sup> sǎ cáhni-yu té Pǎblú. Te ní sáha yúú ñáhǎ-yu xii-dé, te ní cáhǎ<sup>n</sup>-yu sá ní xíhí-dé, te ní tniì ñaha-güedé xii-dé, te tàñuhu ñaha-güedé xii-dé cuáhá<sup>n</sup> ìí<sup>n</sup> xio yuhu ñuú ní sá dáquéné ñaha-güedé. <sup>20</sup>Te ní quexiò cue ñáyiu sándáá iní tnúhu Jèsús núú cǎtùu-dé-á<sup>n</sup>, te ní nadúcú<sup>n</sup> ndéé ñáhǎ-yu xii-dé, te nini xǐnutnǐ-yu-á<sup>n</sup> ní ndacóo-dé cuánuhú ndihi ñaha tùcu-dé xíí-yu xití ñuú. Te nduu tnéé-á<sup>n</sup> ní ndee-dé ndihi té Bèé cuáhá<sup>n</sup>-güedé ñuú Dèrbé.

<sup>21</sup>Te ní cáhǎ<sup>n</sup>-güedé tnúhu Yá Ndiöxi ñuú-á<sup>n</sup>, te ío vǎi ñáyiu ní

sándáá iní-yu tnúhu-gá. Te dàtnùní ní quee-güedé cuáhá<sup>n</sup> tucu-güedé ñuú Lìstrá, ndihi ñuú Ìconiú, ndihi ñuú Antiòquiá. <sup>22</sup>Te ní xǎha<sup>n</sup>-güedé xíí-yu sá vǎ dáńá ñihnú-yu tnúhu Jèsús. Te sá dúcá<sup>n</sup> ní cáhǎ<sup>n</sup>-güedé, te vǐhi-gá ní cudǎí iní-yu cadá-yu nàcuáa cuèní Yǎ Ndiöxi cadá-yu, te ní xǎha<sup>n</sup>-güedé:

—Dacuití cùndecu-o ñuyú-a ndoho-o, te dàtnùní duca<sup>n</sup> te nacuaca ñaha Yǎ Ndiöxi xii-o —càchí-güedé xǎha<sup>n</sup>-güedé xíí-yu.

<sup>23</sup>Te ní sáhǎ<sup>n</sup>-güedé ndi tnahá ìí<sup>n</sup> ìí<sup>n</sup> xichi núú ndécú ñáyiu dàcuaha tnúhu Yá Ndiöxi, te ní taxi ndecu-güedé cue téé quindaha ñaha xíí-yu, te ní cáhǎ<sup>n</sup> ndihi-güedé Yǎ Ndiöxi, te ñá túú tnàhí ná ní xèxi-güedé cuèndá sá ní cáhǎ<sup>n</sup> ndihi-güedé-gá. Te ní xǎha<sup>n</sup>-güedé sá Yǎ Ndiöxi coto ñaha-gǎ xíí-yu chi ðiu-ni-gá ní sándáá iní-yu.

**Té Pǎblú ndihi té Bèé cuáhá<sup>n</sup>  
tucu-güedé ñuú Antiòquiá Siríá**

<sup>24-25</sup>Te dàtnùní ní quee té Pǎblú ndihi té Bèé cuáhǎ<sup>n</sup>-güedé, ní yáha-güedé distrítú Pìsidiá. Te ní quexiò-güedé ñuú Pèrgé, xíá<sup>n</sup> ní cáhǎ<sup>n</sup>-güedé tnúhu Jèsús. Te ñuú-á<sup>n</sup> yǐndèhu-xi Panfilíá. Te dàtnùní cuáhǎ<sup>n</sup>-güedé ñuú Àtaliá. <sup>26</sup>Te yàcá<sup>n</sup> ní quee-güedé bàrcú cuánuhú tucu-güedé ñuú Antiòquiá. Te ñuú-á<sup>n</sup> cúu-xí ñuú núú ní xícá<sup>n</sup> táhǎ-yu núú Yá Ndiöxi cuèndá sá chíndèe ñaha-gǎ xii-güedé chiú<sup>n</sup> quide-güedé. Te cuèndá sá ní ndihi chiú<sup>n</sup>-güedé nchaa ñuú núú ní sáhǎ<sup>n</sup>-güedé, núú xíá<sup>n</sup> cuánuhú-na-güedé. <sup>27</sup>Te ní ndexiò-güedé ñuú-á<sup>n</sup>, te ní

cana-güedé nchaa ñáyiú sàndáá iní tnúhu-gá, te ní cani-güedé cuèndú núú-yu nchaa nàcuáa ní cuu núú ní sáhá<sup>n</sup>-güedé, te xáha<sup>n</sup>-güedé: “Yá Ndiöxí ío ní chindee ñàha-gá xii-ndí ní cáhá<sup>n</sup>-ndí tnúhu-gá núú ní sáhá<sup>n</sup>-ndí, te mee-gã ní quide sá tnàhã ñáyiú ñá túú cùu ñáyiú isràél ní xíndedóho-yu tnúhu-gá cuèndá quíndáá iní-yu”, càchí-güedé xáha<sup>n</sup>-güedé xií-yu. <sup>28</sup>Te vâi nduu ní xíndecu-güedé ñúú Antiòquiá ndíhi nchaa ñáyiú ní sàndáá iní tnúhu Jèsús.

Ní nataká ñáyiú sàndáá iní  
tnúhu Jèsús ñúú Jerusalén

**15** Te ní quee ìí<sup>n</sup> úú cue tée distritú Jùdeá cuáhá<sup>n</sup>-güedé ñúú Antiòquiá, te ní sáá-güedé, te ní xáha<sup>n</sup>-güedé xii ñáyiú sàndáá iní tnúhu Jèsús sá ñúú vâ cuáha-güedé sèñá ñìì nchaa cue tée dàtná ní cachí ndíi Moisés, te vâ náníhí tàhú-güedé. <sup>2</sup>Te sá dúcá<sup>n</sup> ní cáhá<sup>n</sup> cue tée-á<sup>n</sup>, te ní ngúíta té Páblú ndíhi té Bèè ní tenàá-güedé cue tée-á<sup>n</sup>, chi dandàhú ñàhá-güedé cuìni-güedé ní cùu. Te nchaa ñáyiú sàndáá iní tnúhu-gá ní cachí-yu sá quíhí<sup>n</sup> té Páblú ndíhi té Bèè ndíhi ìí<sup>n</sup> úú-gá-güedé ñúú Jerusalén. Te yàcá<sup>n</sup> cada-güedé ìí<sup>n</sup> jùndá ndíhi mee-ni cuè tée ní táuchíú<sup>n</sup> Jèsús càhá<sup>n</sup> tnúhu-gá, ndíhi cue tée yìndaha ñáyiú sàndáá iní tnúhu-gá ñúú-á<sup>n</sup>, te jùndá-á<sup>n</sup> cada ndáá-güedé tnúhu ní cáhá<sup>n</sup> cue tée ní sáá ñúú Antiòquiá.

<sup>3</sup>Te nchaa ñáyiú sàndáá iní tnúhu-gá ní quide ndee ìni ñáhã-yu xii-güedé, te ní tñii-güedé ichi cuáhá<sup>n</sup>-güedé. Te ní yáha-güedé

distritú Fèniciá ndíhi distritú Sàmariá, te yàcá<sup>n</sup> ní cani-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiöxí, te ní cudíí víhí ìni nchaa ñáyiú ní xíndedóho-á<sup>n</sup>.

<sup>4</sup>Te té Páblú ndíhi té Bèè ní ndexio-güedé ñúú Jerusalén, te ío ní cudíí ìni-yu sá ñí ndexio váha-güedé. Te ndècu dava-gá cue tée ní táuchíú<sup>n</sup> Jèsús dácuaàhã ñaha xií-yu tnúhu-gá, ndíhi cue tée yìndaha ñaha xií-yu, ndíhi dava-gá ñáyiú sàndáá iní tnúhu-gá, te ní cani-güedé cuèndú núú-yu nàcuáa ní quide Yá Ndiöxí ní chindee ñàha-gá xii-güedé ní quide-güedé chìu<sup>n</sup>-gá. <sup>5</sup>Te ndècu ìí<sup>n</sup> úú cue tée ní tuha ichi Yá Ndiöxí, te cue tée-á<sup>n</sup> cúú-güedé cue tée fariséú, te ní ndacuñí-güedé, te ní xáha<sup>n</sup>-güedé: —Dacuítíí xìni ñuhu-xi sá cuáha-güedé sèñá ñìì cue tée cùmání cue tée ñá túú cùu ñáyiú isràél, te cúñaha-ndo sã ná cádá-güedé nchaa nàcuáa ní chídó tñuní ndíi Moisés —càchí cue tée cùu fariséú-á<sup>n</sup> xáha<sup>n</sup>-güedé xii-güedé.

<sup>6</sup>Te cue tée ní táuchíú<sup>n</sup> Jèsús dácuaàhã ñaha xii ñáyiú tnúhu-gá, ndíhi cue tée yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. <sup>7</sup>Te vâi vihi tnúhu ní cáhá<sup>n</sup>-güedé. Te té Pèlú ní ndacuñí-dé, te ní xáha<sup>n</sup>-dè xii-güedé:

—Nchòhò cue tée ndècu ndíhi-í ichi Xítóhó Jesucristú, chí cùndedóho ìí<sup>n</sup> tnúhu na càhá<sup>n</sup>-í-a. Sa nàha-ndo sá ñí cachí Yá Ndiöxí sá díú-í cáhá<sup>n</sup>-í tnúhu Jèsús núú

ñáiyu ñá túú cùu ñáiyu isràél  
 cuèndá sá quíndáá iní-yu, te  
 naníhí tàhú-yu. <sup>8</sup>Dico Yá Ndiöxí sa  
 nàha-gá nása càa iní ì<sup>n</sup> ì<sup>n</sup> ñáiyu. Te  
 cùtnuní iní-ó sá cúú iní ñáhá-gã xii  
 cue ñáiyu ñá túú cùu ñáiyu isràél,  
 chi ní sánaha-gã Espíritú-gá ndécú  
 ndìhí-yu dàtná cuíní-ndó nǐ taxi-gá  
 ndécú ndìhí nchoo. <sup>9</sup>Chi Yá Ndiöxí  
 ì<sup>n</sup>nuu-ni cùu iní ñáhá-gã xii-o  
 nchàa-o ndìhí cue ñáiyu ñá túú  
 cùu ñáiyu isràél, chi tnàhá-yu ní  
 xócání-gã nchaa sá cuèhé sá dúhá  
 nǐ xóo cadá-yu ndéé òré ní sándáá  
 iní-yu Jèsús. <sup>10</sup>¿Te ná cuèndá  
 nchòhò cuíní-ndó càda ñáiyu ní  
 sándáá iní tnúhu-gá ì<sup>n</sup> sá ñá tnàhá  
 iní-gá sá cadá-yu? Te cuíní-ndó  
 dàndoho-ndó-yu. Te ni nchò te ni  
 cue ñaní tnáhá-ó nǐ xíndecu ndéé  
 sanaha ñá ní ndàcú-yu cadá-yu  
 nchaa xǎ<sup>n</sup>. <sup>11</sup>Te vá dúcá<sup>n</sup> cǎhá<sup>n</sup>-ndó,  
 chi sa nàha-ndo sá Yá Ndiöxí ní  
 cundàhú iní ñáhá-gã xii-o, te dìó  
 duca<sup>n</sup> nǐ quide-gá sá nánihí tàhú-ó  
 nchàa-o. Te òu-ni duca<sup>n</sup> nǐ quide-gá  
 ñáiyu ñá túú cùu ñáiyu isràél, te  
 ní naníhí tàhú-yu —càchí té Pèlú  
 xǎha<sup>n</sup>-dǎ xii-güedé.

<sup>12</sup>Te dàtnùní té Bèè ndìhí té Pǎblú  
 ní ngúíta-güedé ní cǎhá<sup>n</sup>-güedé, te  
 ní xíndedóho-yu nchaa tnúhu ní  
 cǎhá<sup>n</sup>-güedé. Te ní xǎha<sup>n</sup>-güedé  
 xii-yu nàcuáa ní chindee ñàha Yá  
 Ndiöxí xii-güedé, te ní quide-güedé  
 vǎi núú sǎ vǎ yòo tnàhí ndàcu  
 cada, te duca<sup>n</sup> te ní cutnùní iní  
 ñáiyu ñá túú cùu ñáiyu isràél sá  
 ndàá cǎhá<sup>n</sup>-güedé. <sup>13</sup>Te òré ní ndìhí  
 cuèndú ní cǎhá<sup>n</sup>-güedé, te té Jàcobó  
 ní xǎha<sup>n</sup>-dǎ:

—Nchòhó cue téé ndècu ndìhí-í  
 ichi Xítóhó Jesucristú, chí

cúndedóho ì<sup>n</sup> tnúhu na càhá<sup>n</sup>-í-a.  
<sup>14</sup>Té Xímú, àdi Pelú chi úú òu-dé,  
 ní cani-dé cuèndú nàcuáa ní quide  
 Yá Ndiöxí ndéé dǐhna ní dáquée  
 dǐh<sup>n</sup>-gá ñáiyu ñá túú cùu ñáiyu  
 isràél tnuú nchaa ñáiyu ñá túú  
 ndècu ichi-gá, cuèndá cuíní-gá  
 chiñuhu ñáhá-yu xii-gá. <sup>15</sup>Te  
 dàtnùní ní cǎhá<sup>n</sup>-dé nàcuáa ní cǎhá<sup>n</sup>  
 Yá Ndiöxí ndéé sanaha. Te duha  
 ní chídó tnùní cue téé ní xóo cǎhá<sup>n</sup>  
 tnúhu-gá ndéé sanaha nàcuáa ní  
 cǎhá<sup>n</sup>-gá, te duha ní cachí-gá:

<sup>16</sup>Dàtná cuíní-ndó cùu ì<sup>n</sup> vehe  
 ní sáa te ní ngoyo te  
 dàndaa-güedé xito cùu úú,  
 duca<sup>n</sup> sǎtnahá-xi cada-xi ì<sup>n</sup>  
 nduu,

chi ñaní tnáhá ndǐ Dáví ní xóo  
 cǎhá<sup>n</sup> ndìhí ñáhá-yu xii-í ní  
 cùu, te ní dáñá ndèè-yu ichi-í,  
 te na quìxi-í te natuha ñàha  
 túcú-yu.

<sup>17</sup>Te duca<sup>n</sup> te vǎi ñáiyu ñá túú cùu  
 ñáiyu isràél nandúcú-yu ichi-í  
 te cǎhá<sup>n</sup> ndìhí ñáhá-yu.

<sup>18</sup>Duha ní cǎhá<sup>n</sup> Yá Ndiöxí, te duca<sup>n</sup>  
 ní chídó tnùní cue téé ní xóo cǎhá<sup>n</sup>  
 tnúhu-gá ndéé sanaha —càchí té  
 Jàcobó xǎha<sup>n</sup>-dǎ xii-güedé.

<sup>19</sup>Te xǎha<sup>n</sup> tucu-dé:

—Yúhú càchí iní-í sá vǎ cúú  
 dàsatú-ó iní nchaa ñáiyu ta sàndáá  
 iní-xi tnúhu Yá Ndiöxí, ñáiyu ñá  
 túú cùu ñáiyu isràél, te ì<sup>n</sup> úú-ni  
 tnúhu cúñaha-o nàcuáa cadá-yu.

<sup>20</sup>Dico xini ñuhu-xi daquihí<sup>n</sup>-ó  
 tütú cúñaha-o sǎ vǎ cǎxí-gǎ-yu  
 nchaa sá nchító-ó ndùu táhú nchaa  
 sá càchí-yu cùu ndióxí-yu. Te  
 cúñaha-o sǎ vǎ cǎhá<sup>n</sup> ndìhí cue téé  
 ñàdìhí te núu ñá díú ñàdìhí-güedé  
 cúú-yu, te ni cuè ñáiyu dǐhí vá cǎhá<sup>n</sup>

ndihí-yu té te núu ñá díú yí-yu cùu-güedé, te vá cáxí-yu cuñú quiti cuèhné, te vá cáxí-yu níñí. <sup>21</sup>Te duca<sup>n</sup> cññaha-o, chi ndi tnahá ñuú núu ndécú-yu, te xñdecu ñáyiú isràél dácuaHà-yu tnúhu ní chídó tnùní ndíi Moisés, te ndi tnahá nduu ndètatú-yu dácuaHà-yu tnúhu ndíi veñuhu-yu —càchí té Jàcobó xàha<sup>n</sup>-dè xii-güedé.

<sup>22</sup>Te dätñuní cue téé ní táúchíú<sup>n</sup> Jèsús dácuaHà ñaha xii-yu tnúhu-gá, ndihi cue téé yìndaha ñáyiú sàndáá iní tnúhu-gá ní cachí-güedé sá ndúcú-güedé ì<sup>n</sup> úú-gá cue téé quíhí<sup>n</sup> ndihi té Pàblú ndihi té Bèé ñuú Antiòquiá, te ñuú-duca<sup>n</sup> ñí cáhá<sup>n</sup> dava-gá ñáyiú ndècu ichi-gá. Te úú cue téé ní ndúcú-güedé, ì<sup>n</sup>-dè nání-dè Silás, te ì<sup>n</sup>-dè nání-dè Jùdás, àdi Barsabás chi úú ñuú-dé, te cùnuu-güedé ndi ndúú-güedé. <sup>23</sup>Te ní cadúha ncha cue téé cùnuu tutú canehe-güedé quíhí<sup>n</sup>, te duha càhá<sup>n</sup>-xi:

“Còvaha díí-ndó nchàa-ndo. Nchúhú cue téé ní táúchíú<sup>n</sup> Jèsús cáhá<sup>n</sup>-ndí tnúhu-gá, ndihi cue téé yìndaha cue ñáyiú sàndáá iní tnúhu-gá quide ndee iní ñàhá-ndí xii nchòhó cue ñáyiú ndècu ndíi-ndí ichi-gá cuéi ñá díú ñáyiú isràél cúu-ndó. Te nchòhó ñáyiú xñdecu ñuú Antiòquiá, ndíi nchòhó ñáyiú ndècu distritú Siríá, ndíi nchòhó ñáyiú ndècu distritú Ciliciá, càchí tnúhu-ndí xii-ndo sã <sup>24</sup>ní níhí-ndí tnúhu sá ì<sup>n</sup> úú cue téé ndècu iha ní quixi-güedé núu ndécú-ndó, te ñá túú chiú<sup>n</sup> ni tahu-ndí quixi-güedé. Te sá ì<sup>n</sup> tnúhu ní cáhá<sup>n</sup>-güedé ní xàha<sup>n</sup>-güedé xii-ndo sã ngñdecu

sèñá ñii-ndo, te canchicú<sup>n</sup> nihnu-ndo nchàa nacuaá ní chídó tnùní ndíi Moisés, te xiá<sup>n</sup> ní sani ì<sup>n</sup> ní sani úú iní-ndó, chi ñá túú xini-ndó ñuú ndáá tnúhu càhá<sup>n</sup>-güedé àdi ñá ndáá. <sup>25</sup>Te ní ndatnúhu-ndí nàcuáa cunduu sá téndàha-ndí úú cue téé quixi-güedé ndíi té Bèé ndíi té Pàblú, cue téé ío cùu iní-ndí, te cue téé-á<sup>n</sup> cáhá<sup>n</sup>-güedé nàcuáa càhá<sup>n</sup>-ndí-a. <sup>26</sup>Te ñuú-ni té Bèé ndíi té Pàblú ní sáhá<sup>n</sup>-güedé ní cáhá<sup>n</sup>-güedé tnúhu Xítóhó Jesucristú ncha xichi. Te ndi tnahá cuáhá<sup>n</sup>-güedé cuíni-yu cahni ñàhá-yu xii-güedé. <sup>27</sup>Te tendaha-ndí té Jùdás ndíi té Silás quixi-güedé tñàhá-güedé cachí tnúhu váha-güedé nàcuáa cuáhá<sup>n</sup> tnúhu càhá<sup>n</sup>-ndí. <sup>28</sup>Te ñuú-ni duca<sup>n</sup> càhá<sup>n</sup>-ndí càchí tnúhu-ndí nàcuáa càhá<sup>n</sup> Espiritú Yá Ndiòxí cada-ndo, chi nchúhú vá càhá<sup>n</sup>-ndí sá cadá-ndó nchàa sá ñí cáhá<sup>n</sup> ndíi Moisés cada ñáyiú, chi ío úhú, te vá yò ndacu cada. Te vitna na càhá<sup>n</sup>-ndí ì<sup>n</sup> úú-ni tnúhu nàcuáa cada-ndo. <sup>29</sup>Vá cáxí-ndó sã nchító-ó ndúu táhú ncha sá càchí ñáyiú cùu ndiòxí-yu, te vá cáxí-ndó níñí, te vá cáxí-ndó cùñú quiti cuèhné, te vá càhá<sup>n</sup> ndíi cue téé ñadíhí te núu ñá díú ñadíhí-güedé cúu-yu, te ni cué ñáyiú ñíhí vá càhá<sup>n</sup> ndíi-yu téé te núu ñá díú yí-yu cùu-güedé. Te núu na càda-ndo ncha nacuaá càhá<sup>n</sup>-ndí-a, te cada váha-ndo. Te vitna ío cada ndee ìni-ndó nchàa-ndo-na.” Duha ní chídó tnùní-güedé núu tütú ní tendaha-güedé cuáhá<sup>n</sup>.

<sup>30</sup>Te ní quide ndee iní-yu cue téé quíhí<sup>n</sup> ñuú Antiòquiá, te duca<sup>n</sup> te

ní xica-güedé cuáhá<sup>n</sup>-güedé. Te òré ní quexio-güedé ñuú-á<sup>n</sup>, te ní cana-güedé nchaa ñáyi sàndáá iní tnúhu Jèsús, te ní sáñaha-güedé tutú xií-yu. <sup>31</sup>Te ní dácuahá-yu tutú ní sáñaha-güedé-á<sup>n</sup>, te ní cudíí víhí iní-yu chí ío váha càhá<sup>n</sup> tutú-á<sup>n</sup>. <sup>32</sup>Te té Jüdás ndihi té Silás tnàhá-güedé ní nduu táhú-güedé cáhá<sup>n</sup>-güedé tnúhu sá dácàhu iní ñáhá Yá Ndiòxí. Te ní xáha<sup>n</sup>-güedé vài tnúhu nàcuáa cadá-yu, te vèhi-gá ní cudíí iní-yu cadá-yu nàcuáa càhá<sup>n</sup> Yá Ndiòxí cadá-yu. <sup>33</sup>Te ní xíndecu-güedé ì<sup>n</sup> úú nduu ndihí-yu, te dätñuní ní quide ndee ìní ñáhá-yu xii-güedé cuèndá sá nùhú-güedé núú vèxi-güedé, te mee-ni tē Jüdás cuánuhú-dé. <sup>34</sup>Te té Silás ní xáha<sup>n</sup>-dē sá vā nùhú-ni-dé. <sup>35</sup>Te té Pāblú ndihi té Bèè ní ndóo-güedé ní cáhá<sup>n</sup>-güedé tnúhu Yá Ndiòxí ñuú Antiòquiá, te vài-gá tucu ñáyi Antiòquiá ní cáhá<sup>n</sup>-yu tnúhu-gá.

**Xito cùu uú cuáhá<sup>n</sup> té Pāblú càhá<sup>n</sup>-dé tnúhu Yá Ndiòxí núú ñáyi**

<sup>36</sup>Te sātá ní cuu cuéhé nduu, te ní xáha<sup>n</sup> tē Pāblú xii té Bèè:

—Na quèhí<sup>n</sup>-ó nchaa ñuú núú ní sáhá<sup>n</sup>-ó ní cáhá<sup>n</sup>-ó tnúhu Yá Ndiòxí cáhá<sup>n</sup> ndihi-o nchaa ñáyi ní tuha ichi-gá cuèndá quini-ó nùu ndècu váha-yu —càchí-dé xāha<sup>n</sup>-dē.

<sup>37</sup>Te té Bèè ní xáha<sup>n</sup>-dē sá quèhí<sup>n</sup> ndihi-güedé té Juàá, àdi Mácú chí úú òu-dé. <sup>38</sup>Dico té Pāblú ñá ní dàna-gá-dé quíhí<sup>n</sup> té Juàá, chí ní dándóo ñaha-dē xii-güedé cútnàhá ní xíndecu-güedé Pānfilíá, te ní nacuíco-dē cuánuhú-dé, te ñá túú-gá ní sáhá<sup>n</sup> ndihi ñaha-dē

xii-güedé. <sup>39</sup>Xíá<sup>n</sup> ní cuu ní tenàá tnàhá tē Bèè ndihi té Pāblú, te ichi cāa ichi cāa ní cuu-güedé. Te té Bèè ndihi té Mácú ní quée-güedé bàrcú cuáhá<sup>n</sup>-güedé Chìpré. <sup>40</sup>Te té Pāblú ní xáha<sup>n</sup>-dē xii té Silás sá quèhí<sup>n</sup> ndihi ñaha-dē, te ñáyi sàndáá iní-xi tnúhu Jèsús ní cáhá<sup>n</sup> ndihí-yu Yá Ndiòxí sá chíndèe ñaha-gá xii-güedé. <sup>41</sup>Te ní xica-güedé cuáhá<sup>n</sup>-güedé te ní yáha-güedé nihí distritú Síríá ndihi distritú Ciliciá. Te ní cáhá<sup>n</sup>-güedé tnúhu Jèsús núú nchaa ñáyi ní sàndáá iní tnúhu-gá, núú xíá<sup>n</sup> ío-gá ní cudíí iní-yu cadá-yu nàcuáa càhá<sup>n</sup> Yá Ndiòxí.

**Tnàhá té Timùteú cuáhá<sup>n</sup> ndihi-dé té Pāblú ndihi té Silás**

**16** Te té Pāblú ndihi té Silás cuáhá<sup>n</sup>-güedé ñuú Dèrbé ndihi ñuú Lìstrá, te ñuú Lìstrá yàcá<sup>n</sup> ndécú ì<sup>n</sup> tée nàni Timuteú. Te tée-á<sup>n</sup> sàndáá iní-dé tnúhu Jèsús, te tnàhá ñáná-dē sàndáá iní-a<sup>n</sup> tnúhu-gá, te ñaha isràèl cúú-á<sup>n</sup>, te tée grìégú cúú tātá-dē.

<sup>2</sup>Te nchaa ñáyi ní sàndáá iní tnúhu-gá ñáyi ndècu ñuú Lìstrá, ndihi ñáyi ñuú Ìconiú, nchaa ñáyi-á<sup>n</sup> cudíí iní-yu nàcuáa quide-dé.

<sup>3</sup>Te ní cuini té Pāblú sá tnàhá té Timùteú quèhí<sup>n</sup> ndihi-dé dava-gá ñuú, núú xíá<sup>n</sup> díhna-gá sēñá ní sáha té Pāblú ñii té Timùteú, chí ñá ní tnàhá iní té Pāblú sá càhá<sup>n</sup> cuéhé ñáyi isràèl cuèndá té Timùteú. Te nchaa ñáyi isràèl ndécú ñuú-á<sup>n</sup> xini-yu sá tē grìégú cúú tātá-dē, te ñá díú tē isràèl cúú-dē, te xíá<sup>n</sup> ní sáha té Pāblú sēñá ñii té Timùteú. <sup>4</sup>Te ndi tnàhá ñuú ndi tnàhá ñuú cuáhá<sup>n</sup>-güedé càhá<sup>n</sup> ndihi-güedé nchaa ñáyi

ní sándáá iní tnúhu Jèsús. Te ní xáha<sup>n</sup>-güedě nàcuáa càhá<sup>n</sup> tutú ní cadúha cue tée ní táuchíú<sup>n</sup> Jèsús dacuàha ñaha xí-yu tnúhu-gá, ndihi cue tée yìndaha ñáyiú sándáá iní tnúhu-gá ñuú Jerusalén. <sup>5</sup>Te cuendá duca<sup>n</sup> ní sáhá<sup>n</sup>-güedé nchaa ñuú núú ndécú ñáyiú sándáá iní tnúhu-gá ní dácúhá<sup>n</sup> ñaha-güedé xí-yu, núú xíá<sup>n</sup> tá cùu túha-gá-yu tnúhu Yá Ndiöxí, te vài-gá-yu ní tuhá-yu ichi-gá.

**Ní dácótó ñaha-xi xii té Páblú sá ní xiní-dé ì<sup>n</sup> tée distritú Macèdoniá**

<sup>6</sup>Te ñá ní dàña Espíritú Yá Ndiöxí quíhí<sup>n</sup>-güedé cáhá<sup>n</sup>-güedé tnúhu-gá distritú Àsiá, núú ní sáhá<sup>n</sup>-güedé distritú Frìgiá ndihi distritú Gàlaciá cáhá<sup>n</sup>-güedé tnúhu-gá. <sup>7</sup>Te ní sáá-güedé yuhu distritú Mìsiá. Te quíhí<sup>n</sup>-güedé distritú Bitiniá ní cùu, dico ñá ní dàña Espíritú Yá Ndiöxí quíhí<sup>n</sup>-güedé yàcá<sup>n</sup>. <sup>8</sup>Te ní yáha-güedé Mìsiá, te ní quexìo-güedé ñuú Tròás, te yàcá<sup>n</sup> ní nanínáhá-ndí ndihi-dé. <sup>9</sup>Te ì<sup>n</sup> niú ní dácótó-xí núú tè Páblú sá ní xiní-dé ì<sup>n</sup> tée distritú Macèdoniá nútñí-dé, te ní xáha<sup>n</sup> tée-á<sup>n</sup> xii té Páblú: “Cada ndee iní-n quíhí<sup>n</sup>-n Màcedoniá chi dacuàha ñaha-n nchaa sá xiní-n”, càchí-dé xáha<sup>n</sup>-dè, ní dácótó ñaha-xi xii té Páblú. <sup>10</sup>Te cuendá sá dúcá<sup>n</sup> ní dácótó ñaha-xi xii té Páblú núú ní ndatnúhu-ndí quíhí<sup>n</sup>-ndí Macèdoniá, chi ní cutnùní iní-ndí sá cáná ñaha Yá Ndiöxí quíhí<sup>n</sup>-ndí cáhá<sup>n</sup>-ndí tnúhu-gá núú ñáyiú yàcá<sup>n</sup>.

**Té Páblú ndihi té Silás ndécú-güedé ñuú Filipú**

<sup>11</sup>Te ní quee-ndí bàrcú ñuú Tròás, te cuáhá<sup>n</sup> ndáá-ndí ñuú Samòtraciá,

te yàcá<sup>n</sup> ní quexìo-ndí, te ní yáha-ni-ndí cuáhá<sup>n</sup>-ndí. Te nduu tnèé ní quexìo-ndí ñuú Nèàpòlís. <sup>12</sup>Te yàcá<sup>n</sup> ní quene-ndí bàrcú, te xìca-na-ndí cuáhá<sup>n</sup>-ndí ñuú Filipú te ñuú-á<sup>n</sup> yíndèhu-xi distritú Macèdoniá. Te yàcá<sup>n</sup> ní cudíi-ndí ní xíndecu tnaa-ndí. Te ñuú Filipú-á<sup>n</sup> ìo cùnuu-xi, chi ìo chitu ñáyiú ròmá ní ngóo-yu. <sup>13</sup>Te nduu ndètatú-yu ní quee-ndí ñuú cuáhá<sup>n</sup>-ndí ì<sup>n</sup> xio yuhu yùte, chi yàcá<sup>n</sup> sáhá<sup>n</sup>-yu càhá<sup>n</sup> ndihí-yu Yá Ndiöxí. Te òrè ní quexìo-ndí, te ní naníhí tnáhá-ndí ndihi mee-ni ñáyiú òhí, te ní cáhá<sup>n</sup>-ndí tnúhu Yá Ndiöxí ní xíndedóho-yu. <sup>14</sup>Te ndècu ì<sup>n</sup> ñaha nani Lidiá ní xíndedóho-a<sup>n</sup> nàcuáa ní cáhá<sup>n</sup>-ndí, te ñaha ñuú Tiàtirá cúú-á<sup>n</sup>, te dico-a<sup>n</sup> dóo muràdú, te ìo càhá<sup>n</sup> ndihí-a<sup>n</sup> Yá Ndiöxí. Te òu-ni mee Yá Ndiöxí ní chindee ñaha-gá ní sándáá iní-a<sup>n</sup> tnúhu ní cáhá<sup>n</sup> té Páblú. <sup>15</sup>Te ní sandute-a<sup>n</sup> ndihi landú-a<sup>n</sup>, ndihi nchaa ñáyiú xínu cuechi núú-a<sup>n</sup>, te ní cachí-a<sup>n</sup> xii-ndí: —Te núú ní cutnùní iní-ndó sá ní sándáá ndisa iní-í tnúhu Jèsús, te cundecu tnaa-ndo vèhe-í —càchí-a<sup>n</sup> xii-ndí.

Te ní quide yica-a<sup>n</sup> ní xíndecu-ndí vehe-a<sup>n</sup>.

<sup>16</sup>Te ì<sup>n</sup> nduu ñuhu-ndí ichi cuáhá<sup>n</sup>-ndí núú càhá<sup>n</sup> ndihí-yu Yá Ndiöxí, te ní naníhí-ndí ì<sup>n</sup> xíchí ñúhú ichi, te yìhi ñaha espíritú cùndèhi yucu ñávaha xii-xi. Te xíá<sup>n</sup> ní quide ní cáhá<sup>n</sup>-xi nchaa sá vā yōo tnàhí cùtnuní iní-xi núú nchaa ñáyiú ní sángándihí ñaha xii-xi. Te ñáyiú dii vèhe-xi xínu cuechi-xi ìo vài díhú<sup>n</sup> ní níhí-yu chi ní cháhu nchaa ñáyiú ní sángándihí ñaha

xii-xi. <sup>17</sup>Te xíchí-ǎ<sup>n</sup> nǐ chinchícú<sup>n</sup> ñáhá-xí xii-ndí ndihi té Pǎblú ndëndaha ñaha-xi cuáhá<sup>n</sup>, te ní cáhá<sup>n</sup> níhi-xi xǎha<sup>n</sup>-xi xii dava-gá ñáyi:

—Cue té-a xìnu cuechi-güedé núú Yǎ Ndiǒxí, chi ío càhnu cuu-gá, te càchí tnúhu-güedé nása cada-ndo naníhí tàhú-ndó —càchí-xi xǎha<sup>n</sup>-xi xii-yu.

<sup>18</sup>Te titní xito ní yáha-ndí duca<sup>n</sup>-ni nǐ cáhá<sup>n</sup>-xi. Te ñá ní cùndee-gá iní té Pǎblú sá dúcá<sup>n</sup> càhá<sup>n</sup>-xi, núu ní nanchocuíhnu-dé núu nútñi-xi, te ní xáha<sup>n</sup>-dě xii espíritú cùndìhi yucu ñávǎha yìhi ñaha xii-xi:

—Ío càhnu cuu Xítóhó Jesucristú, núu xíǎ<sup>n</sup> càchí-í sá xócuñí-n vǎ quíhí-gǎ-n yìqui cuñú xíchí-a —càchí-dé xǎha<sup>n</sup>-dě.

Te òré-ni ní quee espíritú cùndìhi yucu ñávǎha-ǎ<sup>n</sup> yiqui cuñú-xi.

<sup>19-20</sup>Te ñáyi dii vèhe-xi xinu cuechi-xi-ǎ<sup>n</sup> nǐ cutnùní iní-yu sá vǎ ñihí-gá-yu díhú<sup>n</sup> cuendá tnúhu càhá<sup>n</sup>-xi, núu ní tñí-yu té Pǎblú ndihi té Silás ndécá ñáhá-yu cuáhá<sup>n</sup> núu cuè tée cùchiu<sup>n</sup> Romá, te xáhǎ<sup>n</sup>-yu xii-güedé:

—Cue té-a cùu-güedé cue tée isràél, te ío dusa<sup>n</sup> xǐquide-güedé ñúú-ó. <sup>21</sup>Te cuíní-güedé cada-o nàcuáa quide-güedé, te vǎ cúu dùca<sup>n</sup> cada-o chi ñáyi nàció<sup>n</sup> Rómá cúu-ó —càchí-yu xáhǎ<sup>n</sup>-yu xii cue tée cùchiu<sup>n</sup>.

<sup>22</sup>Te uu<sup>n</sup>ni ní cáhá<sup>n</sup> nchaá-yu, te xáhǎ<sup>n</sup>-yu sá ñà túu quide váha té Pǎblú ndihi té Silás. Te cue tée cùchiu<sup>n</sup> ní cándeé-güedé dóo tǎ Pǎblú ndihi dóo tǎ Silás ní ndátá-güedé, te ní táuchíú<sup>n</sup>-güedé

caniha-güedé ndihi tnudi xii-güedé. <sup>23</sup>Te ní caniha-güedé, te dàtnùní ní chihi ñaha-güedé vecaá. Te ní xáha<sup>n</sup>-güedé xii tée ndëchito vecaá sá cadá cuèdadú víhí-dé cuendá ná canú-güedé vecaá. <sup>24</sup>Te cuendá sá dúcá<sup>n</sup> nǐ cáhá<sup>n</sup>-güedé, núu tée ndëchito vecaá ní dáyǎha ñaha-dé ingá cuàrtú ndécú xítí vecaá, te ní chihi-dé sáhá-güedé yaú nduhu, te ní quide tii-dé.

<sup>25</sup>Te dava niú ní cáhá<sup>n</sup> ndihi té Pǎblú ndihi té Silás Yǎ Ndiǒxí, te ní xita-güedé ndudú ní quide càhnu ñaha-güedé xii-gá. Te dava-gá cue tée yìhi vecaá ní xíndedóho-güedé nàcuáa ní xita-güedé. <sup>26</sup>Te uu<sup>n</sup>ni níhi vìhi ní tnáa ní quidi-xi ndéé cimièntú vecaá, te ní nacaá<sup>n</sup> nchaa yèhe vecaá, te ní ndihi cadèna ndútú cuè tée yìhi vecaá ní nandáxí. <sup>27</sup>Te ní ndiquíú cúnú iní tée ndëchito vecaá, te ní quide cuendá-dé nchìi nchaa yèhe vecaá. Te ní tava-dé machítí-dé cahni-dé méé-dé ní cùu, chi ní cáhá<sup>n</sup>-dě sá ní ndihi cue tée yìhi vecaá ní xinu ni cùu. <sup>28</sup>Te té Pǎblú ní cáhá<sup>n</sup> níhi-dé, te xáhǎ<sup>n</sup>-dě xii tée ndëchito vecaá: —Vǎ dúcá<sup>n</sup> càda-n cahni-n mee-n, chi nchaa-ni-ndí yíhí —càchí-dé xáhǎ<sup>n</sup>-dě xii tée ndëchito vecaá.

<sup>29</sup>Te dàtnùní ní xícá<sup>n</sup> tée ndëchito vecaá ñuhú, te xìnu-dé cuánguihu xítí vecaá núu yíhí tǎ Pǎblú ndihi té Silás, te quidi ñaha-ná-xi xii-dé ní quexìo-dé ní ngüíñí xítí-dé núu-güedé. <sup>30</sup>Te dàtnùní ndécá ñaha-dé xii-güedé ní ndee vecaá, te ní xícá<sup>n</sup> tnúhú-dé núu-güedé, te xáhǎ<sup>n</sup>-dě:

—Nchòhó cachí tnúhu-ndo ñasa cada-í naníhí tàhú-í —càchí-dé xáhǎ<sup>n</sup>-dě.

<sup>31</sup> Te ní xáha<sup>n</sup>-güedë:

—Quindáá iní-n ndíhi ñadihí-n, ndíhi landú-n, ndíhi nchaa ñáyiú xínu cuechi núú-n tnúhu cáhá<sup>n</sup> Xítohó Jesucristú, te naníhí tàhú-ndó —càchí-güedé xáha<sup>n</sup>-güedë.

<sup>32</sup> Te ní dácuáhá ñaha-güedé xii tée ndëchito vecaá ndíhi nchaa ñáyiú ndècu vehe-dé tnúhu Yá Ndiöxí. <sup>33</sup> Te ñiú-ni òré-án ní naquete-dé sátá-güedé núú ní ñáni, te dàtnùnì ní sandute-dé ndíhi-yu. <sup>34</sup> Te ndèca ñaha-dé cuáhá<sup>n</sup> vehe-dé ní sáñaha-dë sá ní xexi-güedé, te ní cudíí víhí iní tée ndëchito vecaá ndíhi nchaa-dé vehe-dé sá ní tuhá-yu ichi Yá Ndiöxí. Te cuándíhu tucu té Páblú ndíhi té Silás vecaá.

<sup>35</sup> Te nduu tnèé ní xáha<sup>n</sup> cuè tée cùchiu<sup>n</sup> xii poleciá cuáhá<sup>n</sup>-güedé cùu-güedé tée ndëchito vecaá queñuhu-dé úú cue tée cuánguihu ndedí nduu ñcu núhú-güedé. <sup>36</sup> Te tée ndëchito vecaá ní xáha<sup>n</sup>-dë xii té Páblú ndíhi té Silás:

—Cue tée cùchiu<sup>n</sup> ní cachí-güedé sá quée-ndó nùhú-ndó, chi ñá túú-gá ná cada-güedé, chi sa ní yáha cuëndá-ndó —càchí tée ndëchito vecaá xáha<sup>n</sup>-dë xii-güedé.

<sup>37</sup> Te té Páblú ní xáha<sup>n</sup>-dë xii cue tée cùu poleciá:

—Tée ròma cúú-ndí, te vá cúú dùca<sup>n</sup>-ni cunduu, chi ní caniha-güedé tnudii xii-ndí, te ní xiní-yu nchaá-yu. Te ñá túú tnàhí ní xicá<sup>n</sup> tnúhú-güedé nùu ndáá ndècuéchi-ndí àdi ñáhá, chi cuëndá-ni ní chihi ñaha-güedé vecaá xii-ndí. Te vitna cuíní-güedé dacácu ñaha-güedé núhú-ndí cuëndá sá vǎ yóo quiní ñáhá

nùhú-ndí cáhá<sup>n</sup>-güedé, dico vá cúú dùca<sup>n</sup> cada ñaha-güedé xii-ndí. Chí cuáhá<sup>n</sup> cùñaha-ndo na quixi mee-güedé queñuhu ñaha-güedé —càchí té Páblú xii-dé cue poleciá.

<sup>38</sup> Te cue tée cùu poleciá cuánuhú-güedé núú ndécú cuè tée cùchiu<sup>n</sup>, te ní xáha<sup>n</sup>-güedé nàcuáa ní cáhá<sup>n</sup> té Páblú. Te sá dúcá<sup>n</sup> ní xáha<sup>n</sup> pòleciá sá tée ròma cúú-güedé, xíǎ<sup>n</sup> ní yùhú-güedé. <sup>39</sup> Te ní sáhá<sup>n</sup> cue tée cùchiu<sup>n</sup> yehe vecaá, te ní xáha<sup>n</sup>-güedé sá cadá càhnu iní-güedé sá ní chihi ñaha-güedé vecaá, te ní ndeñuhu ñaha-güedé vecaá. Te ní cáhá<sup>n</sup> ndàhú-güedé núú cuè tée ní xíhi vecaá sá ndéé-güedé ñuú-á<sup>n</sup> nùhú-güedé. <sup>40</sup> Te ní ndee-güedé vecaá, te cuáhá<sup>n</sup>-güedé vehe tá Lidiá, te ní ndatnúhu-güedé ndíhi nchaa ñáyiú ní sándáá iní-xi tnúhu Jèsus, te ní xáha<sup>n</sup>-güedé xií-yu nàcuáa cadá-yu, te ío ní cudíí ñni-yu, te duca<sup>n</sup> te ní xica-güedé cuáhá<sup>n</sup>-güedé.

**Ío dusa<sup>n</sup> quide ñáyiú ñuú Tesalónica**

**17** Te ní yáha-güedé ñuú Anfípolis ndíhi ñuú Apòloniá, te ní quexìo-güedé ñuú Tesalónica, te yacá<sup>n</sup> cáá ñ<sup>n</sup> veñuhu ñáyiú israél. <sup>2</sup> Te ní sáhá<sup>n</sup> té Páblú veñuhu-án, chi duca<sup>n</sup> tnàhí quide-dé, te ndi tnahá nduu ndetatú-yu ní sáhá<sup>n</sup>-dé veñuhu-án ùní xito. Te ní ndatnúhu ndíhi ñaha-dë xií-yu nàcuáa ní chídó tnùnì cue tée ní xóo cáhá<sup>n</sup> tnúhu Yá Ndiöxí ndéé sanaha. <sup>3</sup> Te ní xítnúhu ñaha-dë nàcuáa ní cáhá<sup>n</sup> cue tée-án sá Crístú Yaá tendaha Yá Ndiöxí quixi ñuyúú-a ndoho vñhi-gá, te cuú-gá, te ndoto-gá, te xáha<sup>n</sup>-dë:



—Te diu Jèsús cúu Crìstú Yaá ní tendaha Yă Ndiöxí ní quixi ñuyú-a, núu xíă<sup>n</sup> cächí tñuhu-í vitna —cächí té Păblú xăha<sup>n</sup>-dě xií-yu.

<sup>4</sup>Te dava ñáyiú isrâél ní sándáá iní-yu tñuhu ní cáhá<sup>n</sup> té Păblú, te ní níhí tñáhă-yu ndihi-dé, ndihi té Silás. Te vai ñáyiú griégú ñáyiú cáhă<sup>n</sup> ndihi Yá Ndiöxí ní sándáá iní-yu tñuhu Jèsús. Te ndècu titní ñáyiú dîhî ñáyiú cùnuu, te ñáyiú-á<sup>n</sup> tñahă-yu ní sándáá iní-yu tñuhu-gá. <sup>5</sup>Te dava ñáyiú isrâél ñá túu ní cùu váha iní-yu núu tē Păblú ñuu ní ndúcü-yu cue tē cuihna iní-xi tuhío-güedé cada chü<sup>n</sup>-güedé, chi ndi cuihnu ndi cuihnu-ni-güedé, te nchaá-yu ndihi cue tē-á<sup>n</sup> ndi coyo ndi coyó-yu xícuáá-yu. Te sátá ñi tecú dóho dava-gá-yu, te ní sáhă<sup>n</sup> tuhá-yu, te ío ní quide dúsă<sup>n</sup>-yu. Te nísáhă<sup>n</sup>-yu vehe té Jàsón, te ní quide yìcá-yu ní quíhu-yu vehe-dé nándücü-yu té Păblú ndihi té Silás cuendá queñuhu ñahă-yu núu nchàa ñáyiú. <sup>6</sup>Te ñá ní nàníhî ñahă-yu xii-güedé, núu xíă<sup>n</sup> ní tñií-yu té Jàsón ndihi ñi<sup>n</sup> úú-gá cue tē sándáá iní tñuhu Jèsús, te tãñuhu ñahă-yu xii-güedé cuáhă<sup>n</sup> núu cuè tē cùchiu<sup>n</sup>. Te òré ní quexíó-yu núu ndécú cuè tē cùchiu<sup>n</sup>, te ní ngúíta-yu ní cuáá-yu, te xăhă<sup>n</sup>-yu xii-güedé:

—Ní quexíó cue tē-ă<sup>n</sup> ñuu-ó, te ío dusa<sup>n</sup> quide-güedé, te duca<sup>n</sup>-ni quide-güedé nchaa ñuu núu xíca cùu-güedé. <sup>7</sup>Te té Jàsón-ă<sup>n</sup> ní xáhă<sup>n</sup>-dě sá cúu cùndecu-güedé vehe-dé, te ñá túu sándáá iní-güedé nàcuáa cáhă<sup>n</sup> té Cèsár tēe yìndaha cuéhé nació<sup>n</sup>, te cächí-güedé sá ndécú ñngá tēe cùnuu-gá tucu

nàni-dé Jèsús —cächí-yu xăhă<sup>n</sup>-yu xii cue tē cùchiu<sup>n</sup>.

<sup>8</sup>Te sátá dúcă<sup>n</sup> ñi cáhá<sup>n</sup>-yu, te ní cudéé<sup>n</sup> víhî cuè tē cùchiu<sup>n</sup> ndihi dava-gá ñáyiú ndèdóho. <sup>9</sup>Te vai díhú<sup>n</sup> ñi xíca<sup>n</sup> cue tē cùchiu<sup>n</sup> núu tē Jàsón ndihi dava-gá cue tē cuáhă<sup>n</sup> ndihi-dé cuendá té Păblú ndihi té Silás, te núu na ndèe-güedé nùhú-güedé, te nacuañaha cuè tē cùchiu<sup>n</sup> díhú<sup>n</sup>-güedé.

**Té Păblú ndihi té Silás  
ndécú-güedé ñuu Bèrea**

<sup>10</sup>Te òré ní cundiqui<sup>n</sup>, te ní quide ndee iní ñahă ñáyiú sándáá iní tñuhu Jèsús xii té Păblú ndihi té Silás, te ní xica-güedé cuáhă<sup>n</sup>-güedé ñuu Bèrea. Te diu-ni nduu ñi sáa-güedé yàcá<sup>n</sup> ní sáhă<sup>n</sup>-güedé veñuhu ñáyiú isrâél. <sup>11</sup>Te váha-gá iní ñáyiú ñuu Bèrea dácúúxî ñáyiú ñuu Tesalónica, chi ío ní cudí iní-yu ní xíndedóho-yu tñuhu Jèsús, te ñi<sup>n</sup> nduu ñi<sup>n</sup> nduu ní dácuañă-yu tñuhu ní chídó tñuní cue tē ní xóo cáhá<sup>n</sup> tñuhu Yá Ndiöxí ndéé sanaha cuendá cuiní-yu quini-yu núu ndáa cáhă<sup>n</sup> té Păblú ndihi té Silás. <sup>12</sup>Te titní ñáyiú isrâél ní sándáá iní-yu tñuhu-gá ndihi titní cue tē griégú ndihi ñáyiú dîhî ñáyiú cùnuu ní sándáá iní-yu. <sup>13</sup>Te dava ñáyiú isrâél ndécü-yu ñuu Tesalónica, te ñáyiú-á<sup>n</sup> ñi níhî-yu tñuhu sá ndécú tē Păblú ndihi té Silás ñuu Bèrea cáhă<sup>n</sup>-güedé tñuhu Yá Ndiöxî, núu xíă<sup>n</sup> ní sáhă<sup>n</sup>-yu ñuu Bèrea ní dácuañdèndé-yu núu nchàa ñáyiú vátá dácuañha-gá. Te ñáyiú-á<sup>n</sup> ñi sándáá iní-yu tñuhu ndehnde te ní cudéé<sup>n</sup> víhî-yu núu-güedé. <sup>14</sup>Te òré-ă<sup>n</sup> ñi xáhă<sup>n</sup> ñáyiú sándáá iní

tnúhu-gá xii té Páblú sá quíh<sup>n</sup>-dé yuhu làmár, te ní xica-dé cuáhá<sup>n</sup>-dé, te té Silás ndíhi té Timùteú ní quendóo-güedé ñúú Bèrea. <sup>15</sup>Te ì<sup>n</sup> ùú-güedé cuáhá<sup>n</sup> ndíhi-güedé té Páblú, te ndèca ñaha-güedé cuáhá<sup>n</sup> ndéé ñúú Àtenás, te ní xáha<sup>n</sup> té Páblú xii-güedé:

—Núu na nùhú-ndó, te cúu-ndo tē Silás ndíhi té Timùteú ná quíxí ndíhi-ni-güedé nanítnáhá-ndí iha — cächí-dé xáha<sup>n</sup>-dē.

Te ní xica-güedé cuánuhú-güedé.

### Té Páblú ndécú-dē ñúú Àtenás

<sup>16</sup>Te ñúú Àtenás ndétú tē Páblú quíh<sup>n</sup> té Silás ndíhi té Timùteú. Te yacá<sup>n</sup> ní xiní-dé sá ìo cuéhé sá cächí-yu cùu ndiòxí-yu ndècu te ñá ndàà sá díú ndiòxí cúu-xí, te xíá<sup>n</sup> ñá túú ní cùu váha iní-dé, chi ñá tnàhá iní-dé nàcuáa quidé-yu. <sup>17</sup>Te ní sáhá<sup>n</sup>-dé veñúhu ní cáhá<sup>n</sup> ndíhi-dé ñáyíu isràél ndíhi dava-gá ñáyíu cáhá<sup>n</sup> ndíhi Yá Ndiòxí. Te ì<sup>n</sup> nduu ì<sup>n</sup> nduu sàhá<sup>n</sup>-dé xití ñúú cáhá<sup>n</sup>-dé tnúhu-gá ndíhi nchaa ñáyíu xica cuu yacá<sup>n</sup>. <sup>18</sup>Te cue tée cùu epicureú ndíhi cue tée cùu estoicú, cue tée-á<sup>n</sup> ñí ndatnúhu-güedé ndíhi té Páblú, te dava-güedé xítnàha-güedé:

—iNá tnúhu vîhi cáhá<sup>n</sup> tée lúcú-á<sup>n</sup>! —cächí-güedé xítnàha-güedé.

Te dava-güedé xítnàha-güedé:

—Sàni iní-ndí sá cáhá<sup>n</sup>-dé cuendá ndiòxí sá vätá quíní-gá-ó — cächí-güedé xítnàha-güedé.

Te duca<sup>n</sup> xítnàha-güedé, chi cáhá<sup>n</sup> té Páblú tnúhu Jèsús, te ní cáhá<sup>n</sup>-dé nàcuáa ní dándótó ñàha Yá Ndiòxí xii-gá, xíá<sup>n</sup> núu duca<sup>n</sup> xítnàha-güedé. <sup>19</sup>Te ndèca

ñaha-güedé xii té Páblú cuáhá<sup>n</sup> ì<sup>n</sup> xichi núu nání Àreópagú, te ní xáha<sup>n</sup>-güedé xii-dé:

—Cachí tnúhu ndáá-n nàsa cuáhá<sup>n</sup> tnúhu cáhá<sup>n</sup>-n, chi na cùtnuní ndáá iní-ndí, <sup>20</sup>chi duca<sup>n</sup>-ni cáhá<sup>n</sup>-n tnúhu sá ñà túú sàcúndèdóho-ndí, te cuíní-ndí cachí tnúhu ndáá-n nàsa nduu tnúhu-á<sup>n</sup> cuendá cutnùní váha iní-ndí —cächí-güedé xáha<sup>n</sup>-güedé xii-dé.

<sup>21</sup>Te nchaa ñáyíu ñúú Àtenás ndíhi ñáyíu dava-gá ñúú, mee-ni tnúhu saa cuíní-yu cáhá<sup>n</sup>-yu, nchaa sá vätá cùndèdóho-gá-yu cuíní-yu cundedóho-yu.

<sup>22</sup>Te té Páblú ní ngúnutnî-dé núú xíxúcu-yu nchaa-yu, te xáha<sup>n</sup>-dē:

—Nchòhó cue ñáyíu ñúú Àtenás, cundedóho-ndo nchàa tnúhu na cáhá<sup>n</sup>-í-a. Ío quide cahnu nchòhó sá cächí-ndó cùu ndiòxí-ndó. <sup>23</sup>Te vitna ní quexìo-í ñúú-ndó, te ní xiní-í sá yàyacá<sup>n</sup> ndécú nchàa sá cächí-ndó cùu ndiòxí-ndó cáhá<sup>n</sup> ndíhi-ndo. Te ní xiní-í ì<sup>n</sup> xichi núú ndéé tnuní quidé cahnu-ndo Yá Ndiòxí Yáá ñá túú xìní-ndó, te diu-ni duca<sup>n</sup> cáhá<sup>n</sup> lètrá ndéé tnuní xíá<sup>n</sup>, te cächí-xi: “Iha quide cahnu-ndí Ndiòxí sá ñà túú xìní-ndí”, duha cáhá<sup>n</sup> lètrá-á<sup>n</sup>.

Te quide cahnu-ndo Yá Ndiòxí cáhá<sup>n</sup>-ndó, dico ñá túú xìní-ndó nàsa càa-gá, te yúhú xìní ndáá-í nàcuáa càa Yá Ndiòxí, chi diu-ni Yá Ndiòxí cáhá<sup>n</sup> ndíhi-í, te diu tnúhu-gá cáhá<sup>n</sup>-í vitna.

<sup>24</sup>Te diu Yá Ndiòxí ní cadúha-gá ñuyú-a ndíhi nchaa sá ìo, núu diu-gá cúu Xìtohó ñuyú-a ndíhi andíu. Te ñá túú xìní ñuhu-gá vehe dàca ñáyíu ñuyú-a cundecu-gá.

<sup>25</sup>Te ñá túú xìni ñuhu-gá ñáyiú chindee ñàhá-yu xii-gá, chi mee-gá quidé-gá nchító-ó ndècu-o te tàxi-gá yóco tächí-ó ndìhi nchaa sá xíní ñuhu-o.

<sup>26</sup>Te ndéé sanaha ñí cadúha-gá ìí<sup>n</sup>dii-ni tée, te ñiu-ni níñí-dě cúú ñáyiú ndècu ñicaxico ñuyíú. Te ñiu-ni mee Yá Ndiöxí ní xáha<sup>n</sup>-gá nchaa núú cundécú-yu, te mee-gá ní cáhá<sup>n</sup>-gá ná daha cuía cudíi nchaa nació<sup>n</sup> ndìhi mèè-yu. <sup>27</sup>Te cuíní-gá sá ncháá ñáyiú nanducu ñàhá-yu cáhá<sup>n</sup> ndìhi ñàhá-yu xii-gá, te mee-gá ndécú tũha-gá sá càhá<sup>n</sup> ndìhi ñaha-gá xií-yu ìí<sup>n</sup> ìí<sup>n</sup>-yu. <sup>28</sup>Te ñiu-ni Yá Ndiöxí xító ñaha-gá xií-yu núú cùdíi-yu ndècu-yu te càndá-yu. Te duha ní cáhá<sup>n</sup> ìí<sup>n</sup> ñaní tnàhá-ndó, tée ní cutnùní iní-xi ní xíndecu ndéé sanaha, te ní xáha<sup>n</sup>-dě xií-yu: “Nchaa-o cùu-o déhe Yá Ndiöxí”, duha ní xáha<sup>n</sup>-dě xií-yu. <sup>29</sup>Te núú déhe Yá Ndiöxí cúú-yu ncháá-yu, te vá cúú cãhá<sup>n</sup>-yu sá Yá Ndiöxí cúú sã ñí cadúha-yu ndahá-yu. Te sá ñí cadúha-yu cùu ndiöxí-yu-á<sup>n</sup>, dava cùu-xi díhú<sup>n</sup> cuáá<sup>n</sup>, dava cùu-xi díhú<sup>n</sup> cuixí<sup>n</sup>, dava cùu-xi yúú. Te mèè-yu ní cahu iní-yu nàcuáa cunduu sá cúú ndiöxí-yu. <sup>30</sup>Te cùtnàhá ñá túú ní cùtnuní iní-yu sá nèhè ní quidé-yu ní cadúha-yu nchaa xiá<sup>n</sup>, te ñá túú ní quide cuendá Yá Ndiöxí sá dúcá<sup>n</sup> ñí quidé-yu. Te vitna càchí Yá Ndiöxí sá dãná nchaa ndi túhú-yu nchaa sá cuèhé sá dúhá quidé-yu. <sup>31</sup>Te Yá Ndiöxí nãhá-gã ná nduu cundecu nchaa ñáyiú núú-gã, te mee-gã sa ñaha-gã ndëndida càa ñáyiú ní quide váha, te ndëndida càa ñáyiú ñá túú ní quide váha. Te mee-gã ní

xáha<sup>n</sup>-gã xii Déhe-gá Yaá nání Jèsús cúñaha-gã xií-yu núú ndëndida càa-yu ní quide váha te ndëndida càa-yu ñá túú ní quide váha. Te mee Jèsús cáhá<sup>n</sup> ndáá cuiti-gá, te sa ñaha-o sá ncháá xĩá<sup>n</sup> cada Jèsús, chi ñiu cuendá-á<sup>n</sup> ñí dándótó ñaha Yá Ndiöxí xii-gá —càchí té Pãblú xãhá<sup>n</sup>-dě xií-yu.

<sup>32</sup>Te óré ní cáhá<sup>n</sup> té Pãblú sá ñí ndoto Jèsús, te dava ñáyiú ñá ní tnàhá iní-xi tnúhu ní cáhá<sup>n</sup>-dè ní cáhá<sup>n</sup> yíchí-yu. Te davá-yu ní xáhã<sup>n</sup>-yu xii-dé:

—Te ingá xito quixi-n, te cáhá<sup>n</sup> tucu-n tnúhu ní cáhá<sup>n</sup>-n vitna —cachí-yu xáhã<sup>n</sup>-yu xii-dé.

<sup>33</sup>Te ní xica-dé cuáhá<sup>n</sup>-dè. <sup>34</sup>Te dava ñáyiú ní xíndedóho tnúhu ní cáhá<sup>n</sup> té Pãblú ní sándáá iní-yu Jèsús, te ní chindee tnúhu ñàhá-yu xii-dé. Te ìí<sup>n</sup> tée cùchiu<sup>n</sup> Areópagú nání-dě Nixú ndìhi ìí<sup>n</sup> ñadìhí nání-á<sup>n</sup> Dãmarís, tnàhá-yu ní sándáá iní-yu tnúhu-gá ndìhi dava-gá-yu.

#### Té Pãblú ndécú-dě ñuú Còrintú

**18** Te té Pãblú ní quee-dé ñuú Atenás cuáhá<sup>n</sup>-dè ñuú Còrintú. <sup>2</sup>Te yacá<sup>n</sup> ní naníhí tnàhá-dě ndìhi ìí<sup>n</sup> tée isràel nání-dě Àquilú, te tée-á<sup>n</sup> cúú-dě tée distrítú Pòntó, te ní xíndecu-dé ndìhi ñadìhí-dé tá Priscilá ñuú Rómá. Te té Cèsár tée yìndaha cuèhé nació<sup>n</sup>, tée nani Claudiú ní xáha<sup>n</sup>-dè sá vá cúú-gã cundecu ñáyiú isràel ñuú Rómá, te xiá<sup>n</sup> ñúú ní ndee té Àquilú ndìhi ñadìhí-dé cuáhá<sup>n</sup>-yu ñuú Còrintú. Te sácú-ni nduu ní cuu sá ñí quexió-yu ñuú-á<sup>n</sup>, te ní sáhá<sup>n</sup> té Pãblú ní ndatnúhu ndìhi ñaha-dě xií-yu vehé-yu. <sup>3</sup>Te ní xáhã<sup>n</sup>-yu

sá cùndècu-dé cada chiù<sup>n</sup> ndihi ñahá-yu, chi ì<sup>n</sup>-ni chiù<sup>n</sup> quide-dé ndihí-yu, te ní xóo dacàá-yu vehe dóó. Te núu xíá<sup>n</sup> ní xíndecu ndihi ñaha tẽ Pãblú ní quide chiù<sup>n</sup> ndihi ñaha-dé xíí-yu. <sup>4</sup>Te núu ùná núu ùná nduu, nduu ndètatú-yu, ní xóo quíhí<sup>n</sup>-dé veñúhu ñáyiu isràél. Te ní ndatnúhu-dé ndihi ñáyiu isràél ndihi ñáyiu ñá túú cùu ñáyiu isràél, te ní xáha<sup>n</sup>-dẽ sá quèndáá iní-yu tnúhu Jèsús.

<sup>5</sup>Te té Silás ndihi té Timùteú ní quee-güedé distrítú Macèdoniá cuáhá<sup>n</sup>-güedé núu ndécú tẽ Pãblú. Te òré ní quexìo-güedé, te ní cáhá<sup>n</sup>-ni té Pãblú tnúhu Yá Ndiòxí núu ñáyiu isràél, te xãha<sup>n</sup>-dẽ xíí-yu sá Jèsús cúú-gã Crístú Yáá ní tendaha Yá Ndiòxí ní quixi ñuyíú-a. <sup>6</sup>Te sá dúcá<sup>n</sup> ñí cáhá<sup>n</sup>-dé ñuu ní nàà ndihi ñàhá-yu xii-dé, te ní cáhá<sup>n</sup> cuèhé-yu cuèndá-dé, núu xíá<sup>n</sup> ní naquidi-dé dóó-dẽ. Te duca<sup>n</sup> ñí quide-dé cuèndá sá cútñuní iní-yu sá ñã ní tñàhá iní-dé nàcuáa ní cáhá<sup>n</sup>-yu, te ní xáha<sup>n</sup>-dẽ xíí-yu:

—Yúhú ñá túú cuèchi-í, te núu ní xíta nihnu-ndo, xíá<sup>n</sup> quèndóo cuèchi mee-ñã-ndó. Te vitna quíhí<sup>n</sup>-í cáhá<sup>n</sup> ndihí-í ñáyiu ñá túú cùu ñáyiu isràél, te vá nándùcu-gá-í nchòhó ñáyiu isràél cáhá<sup>n</sup> ndihi ñaha-í xii-ndo —càchí-dé xãha<sup>n</sup>-dẽ xíí-yu.

<sup>7</sup>Te ní xica-dé cuáhá<sup>n</sup>-dé vehe ì<sup>n</sup> tée nàni Justú, te tée-á<sup>n</sup> ndécú yàtni-dé núu cáá veñúhu, te tñàhá-dé càhá<sup>n</sup> ndihi-dé Yá Ndiòxí. <sup>8</sup>Te té Crìspú tée yìndaha veñúhu-á<sup>n</sup> ñí sándáá iní-dé Jèsús ndihi ñadìhí-dé ndihi landú-dé. Te vãi ñáyiu ñuú Còrintú ní sáhá<sup>n</sup>-yu

ní xíndedóho-yu tnúhu-gá, te ní sándáá iní ñãhã-yu xii-gá, te ní sanduté-yu. <sup>9</sup>Te ì<sup>n</sup> niú ní cáhá<sup>n</sup> saní té Pãblú sá ñí xáha<sup>n</sup> Yá Ndiòxí xii-dé:

—Cáhá<sup>n</sup>-ni-n tnúhu-í, te vá yùhú-n nchàa tnúhu cuèhé tnúhu duha càhá<sup>n</sup> ñáyiu, <sup>10</sup>chi yúhú chindee ñàhá-í xii-n, te vá yóo ì<sup>n</sup> cada úhú ñàhá xii-n, te vãi-gá ñáyiu ñuú-á<sup>n</sup> quèndáá iní-yu tnúhu-í —càchí-gá xáha<sup>n</sup>-gã núu sàní-dé.

<sup>11</sup>Te ñuú Còrintú ní xíndecu té Pãblú ì<sup>n</sup> cuíá dava, te mee-ni tnúhu Yá Ndiòxí ní xóo dacuàha-dé ñáyiu.

<sup>12</sup>Te ndècu-gá-dé ñuú-á<sup>n</sup> ñí ngóo té Gàlìon chiù<sup>n</sup> taxi tñuní-dé distrítú Acãyá. Te dàvá-á<sup>n</sup> ñí cudéé<sup>n</sup> ñáyiu isràél núu tẽ Pãblú, te ní tñi ñàhá-yu xii-dé ndécá ñàhá-yu cuáhá<sup>n</sup> núu cuè tée cùchiu<sup>n</sup>. <sup>13</sup>Te ní xáhã<sup>n</sup>-yu xii té Gàlìon tée cùu gobiernú:

—Tée-a ní quexìo-dé ñuú-ó xica cuu-dé te cuìní-dé dandàhú ñàhá-dẽ chitnahá-ndí-dé cada-ndí nàcuáa quide-dé quidé càhnu-dé Ndiòxí-dẽ, te dañã-ndí vá cádá-gã-ndí nàcuáa càhá<sup>n</sup> tnúhu sá sánú ìchi ñaha xii-o nacuáa cundecu-o cuìní-dé —càchí-yu xáhã<sup>n</sup>-yu xii tée cùu gobiernú.

<sup>14</sup>Te té Pãblú cuìní-dé cani-dé cuèndú ní cùu, te ní ngúíta té Gàlìon càhá<sup>n</sup>-dé, te xãha<sup>n</sup>-dẽ xíí-yu:

—Nchòhó ñáyiu isràél, cundedóho-ndo tnúhu na càhá<sup>n</sup>-í-a. Te núu ndècu núu ì<sup>n</sup> cuèchi ní quide-dé àdi ní sahani-dé ì<sup>n</sup> ndíyi, te cuu cundáá-xi iha, te cáhá<sup>n</sup>-ndó ñuu nándi cùu sá ñí quide-dé, <sup>15</sup>àdi dico-ni sá ì<sup>n</sup> tnúhu ní cáhá<sup>n</sup>-dé, te yáchí-gá chí cuáhá<sup>n</sup> yacá<sup>n</sup>

ndatnúhu-ndo nǔú méé-ndó, chi mee-ni sǎ ñà túú quide-dé nàcuáa càhá<sup>n</sup> tnúhu sá sánú ìchi ñaha xii-ndo cahá<sup>n</sup>-ndó, te yúhú ñá túú tnàhá iní-í cada ndáá-í nchaa xǎá<sup>n</sup> —càchí-dé xǎha<sup>n</sup>-dě.

<sup>16</sup>Te ní cudéé<sup>n</sup>-dě, te ní ndeñuhu ñaha-dě xií-yu vechiú<sup>n</sup>. <sup>17</sup>Te ñáyiu ñá túú cùu ñáyiu isràél ní tñí-yu té Sòstenés téé yìndaha veñúhu ñáyiu isràél, te ndèhe té Gàlìón téé cùu gobiernú ní canihá-yu xii-dé, dico ñá túú tnàhí ná tnúhu ni cǎhá<sup>n</sup>-dé taunihnu-dé téé ní caní-yu-á<sup>n</sup>.

**Té Páblú cuáhá<sup>n</sup> tucu-dé ñuú Antiòquiá, te yàcá<sup>n</sup> ní xica tucu-dé cuáhá<sup>n</sup>-dé dava-gá ñuú càhá<sup>n</sup>-dé tnúhu Yá Ndiòxí**

<sup>18</sup>Te títñí-gá nduu ní xíndecu té Páblú ñuú Còrintú, te ní quide ndee ìní-dé nchaa ñáyiu ní sándáá iní-xi tnúhu Jèsús, te ní tñi-dé ìchi cuáhá<sup>n</sup>-dé distritú Sìriá ndìhi té Àquilú ndìhi ñadìhí té Àquilú-á<sup>n</sup> tă Priscilá, te ní quexìó-yu ñuú Cèncreá. Te cùmání-gǎ tñí-yu ìchi quíhí<sup>n</sup>-yu ñuú Éfesú, te ní dèté díquí<sup>n</sup> tē Páblú, chi duca<sup>n</sup> nǐ xáha<sup>n</sup>-dě xii Yá Ndiòxí sá ndéé xínu ìi<sup>n</sup> chiú<sup>n</sup> ní sani iní-dé cada-dé cuèndá-gá, te dǎtnùnì dèté-dé. Te ní quée-yu bàrcú cuáhá<sup>n</sup>-yu. <sup>19</sup>Te ní quexìó-yu ñuú Éfesú, te yàcá<sup>n</sup> ní xáha<sup>n</sup> tē Páblú sá cúndècu té Àquilú ndìhi ñadìhí-dé, te mee-dě quíhí<sup>n</sup>-dé dava-gá ñuú. Te cùmání-gǎ caca-dé quíhí<sup>n</sup>-dé, te ní sáhá<sup>n</sup>-dé veñúhu ñáyiu isràél ní ndatnúhu ndìhi ñaha-dě xií-yu. <sup>20</sup>Te ní xáhǎ<sup>n</sup>-yu sá cúndècu-dé títñí nduu, te ñá ní cuìní-dé cundecu-dé. <sup>21</sup>Te ní xáha<sup>n</sup>-dě:

—Núhú-í chi dacuití<sup>n</sup> xini ñuhu-xi cundecu-í vico coo ñuú Jerusálén, te quixi tucu-í te núu Ndiòxí ná càchí-gá, te vitna chí cádá ndèe iní —càchí-dé xǎha<sup>n</sup>-dě xií-yu.

Te ní quée-dé bàrcú cuáhá<sup>n</sup>-dé. <sup>22</sup>Te ní quexìó-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusálén, te ní ndexìó-dé, te ní dándácòo váha-dé ñáyiu ndècu ìchi Yá Ndiòxí, te dǎtnùnì ní xica-dé cuáhá<sup>n</sup>-dé ñuú Antiòquiá. <sup>23</sup>Te yàcá<sup>n</sup> ní xíndecu-dé títñí nduu, te dǎtnùnì ní tñi-dé ìchi cuáhá<sup>n</sup>-dé. Te ní sáhá<sup>n</sup>-dé ñihì distritú Gàlaciá ndìhi distritú Frìgiá. Te ndi tnahá ñuú ní sáhá<sup>n</sup>-dé ní cáhá<sup>n</sup>-dé ndìhi ñáyiu sàndáá iní tnúhu Yá Ndiòxí, te ní ndúcú ndéé-gǎ-yu ní quidè-yu nchaa nàcuáa ní xáha<sup>n</sup>-dě cadá-yu.

**Té Àpolós càhá<sup>n</sup>-dé tnúhu Yá Ndiòxí ñuú Éfesú**

<sup>24</sup>Te dàvǎ-á<sup>n</sup> nǐ quèxio ìi<sup>n</sup> téé isràél ñuú Éfesú, te nani-dé Àpolós, te cùu-dé téé ñuú Alejàndriá, te ío váha túha-dé tnúhu Yá Ndiòxí, te ío váha ñuhu díquí<sup>n</sup>-dē nàcuáa cáhá<sup>n</sup>-dé, <sup>25</sup>chi sa xìnì-dé nàcuáa ní xóo cáhá<sup>n</sup> ndíi Juáá cútñahá ní xóo dacuàndute ndíi ñáyiu. Te ío ní cudí<sup>n</sup> ìní-dé ní cáhá<sup>n</sup>-dé nchaa nàcuáa ní cuu cuèndá Jèsús, dico vátá dácua<sup>n</sup>ha-gá-dé nchaa tnúhu ní cáhá<sup>n</sup> méé Jèsús. <sup>26</sup>Te ní sáhá<sup>n</sup>-dé veñúhu ñáyiu isràél, te yàcá<sup>n</sup> ní cáhá<sup>n</sup>-dé nǐ yùhu ni iní-dé. Te ndècu té Àquilú ndìhi ñadìhí-dé tă Priscilá ndèdóho-yu tnúhu ní cáhá<sup>n</sup>-dé, te ní xáhǎ<sup>n</sup>-yu sá quíhí<sup>n</sup>-dé vehé-yu, te ní sáhá<sup>n</sup>-dé, te ní xítñúhu ñahá-yu xii-dé dava-gá tnúhu Yá Ndiòxí

sá ñà túú xìní-dé. <sup>27</sup>Te ní cachí té Àpolós sá quíhí<sup>n</sup>-dé distritú Acáyá, núu xíá<sup>n</sup> ní cadúha ñáyiú ñúú Éfesú íí<sup>n</sup> tutú canehe-dé quíhí<sup>n</sup> ndaha ñáyiú sàndáá iní tnúhu-gá xíndecu Acáyá. Te xáhá<sup>n</sup>-yu núu tütú-yu: “Cáhá<sup>n</sup> váha-ndo ndíhi té Àpolós ñúú ní quexio-dé”, cächí-yu xáhá<sup>n</sup>-yu núu tütú-yu. Te ní xica-dé cuáhá<sup>n</sup>-dé, te ní quexio-dé Acáyá. Te nchaa ñáyiú sàndáá iní tnúhu-gá yacá<sup>n</sup>, ñiú-ni mee Yá Ndiöxí ní chindee ñaha-gá ní sàndáá iní ñáhá-yu xii-gá. Te té Àpolós ío váha ní cáhá<sup>n</sup>-dé tnúhu Yá Ndiöxí núú-yu, te xíá<sup>n</sup> ío ní ndúcú ndéé-gá-yu ní quidé-yu chiú<sup>n</sup>-gá. <sup>28</sup>Te té Àpolós ní ndatnúhu-dé ndíhi ñáyiú isràél, te ní xíndedóho dava-gá-yu. Te ío váha ní cani-dé cuèndú nchaa ñacuáa ní xóo cáhá<sup>n</sup> cue téé ndéé sanaha sá quíxí Crístú ñuyúú-a. Te ní cáhá<sup>n</sup> ndáá-dé ní xáha<sup>n</sup>-dè sá díú-ní Jèsús cúú-gá Crístú Yaá ní tendaha Yá Ndiöxí ní quixi ñuyúú-a. Te ñáyiú isràél xíndatnúhu-yu sá ñà ndàa ñacuáa càhá<sup>n</sup>-dé, dico ñá ní ñíhí-yu tnúhu cúñàhá-yu xii-dé, chi ío váha ñúhu díquí-dè tnúhu cáhá<sup>n</sup>-dé.

#### Té Páblú ndécú-dè ñúú Éfesú

**19** Te cútnàhá ndécú-gá té Àpolós ñúú Còrintú, te ní xica té Páblú cuáhá<sup>n</sup>-dé tá yáha-dé mee-ni xítí yucu cuáhá<sup>n</sup>, te ní sáá-dé ndéé ñúú Éfesú. Te ñúú-á<sup>n</sup> ñí naníhí tnáhá-dè ndíhi cue téé sàndáá iní tnúhu Jèsús. <sup>2</sup>Te ní xicá<sup>n</sup> tnúhú-dè núú-güedè, te xáha<sup>n</sup>-dè: —¿Sa ní quexio Espíritú Yá Ndiöxí ní ngúndecu ndíhi-ndo ndéé òré ní sàndáá iní-ndó Jèsús-á<sup>n</sup>? —cächí-dé xáha<sup>n</sup>-dè xii-güedè.

Te ní xáha<sup>n</sup>-güedè:  
—Ñá túú xìní-ndí sá ìó Espíritú Yá Ndiöxí —cächí-güedè xáha<sup>n</sup>-güedè xii-dé.

<sup>3</sup>Te ní xáha<sup>n</sup> tùcu-dé:  
—¿Nása ní cáhá<sup>n</sup> téé ní dácúándüte ñaha xii-ndo-i? —cachí-dé xáha<sup>n</sup>-dè xii-güedè.

Te ní xáha<sup>n</sup>-güedè:  
—Ní cáhá<sup>n</sup>-dé ñacuáa ní xóo cáhá<sup>n</sup> ndíi Juàá —cächí-güedè xáha<sup>n</sup>-güedè xii-dé.

<sup>4</sup>Te ní xáha<sup>n</sup> tè Páblú:  
—Ndíi Juàá ní dácúándüte ñaha ndíi xii ñáyiú, chi ní cuiní-yu sá dáñá-yu nchaa sá cuèhé sá dúhá quidé-yu. Te ní xáha<sup>n</sup> ndíi xii-yu: “Quíndáá iní-ndó tnúhu Jèsús chi dacuití quíxi-gá íí<sup>n</sup> nduu”, duha ní xáha<sup>n</sup> ndíi Juàá xii-yu —cächí té Páblú xáha<sup>n</sup>-dè xii-güedè.

<sup>5</sup>Te sá dúcá<sup>n</sup> ñí cáhá<sup>n</sup> té Páblú xáha<sup>n</sup>-dè xii-güedè, núu xíá<sup>n</sup> ní sandute-güedè ñacuáa ní dándöo tnúhu Jèsús. <sup>6</sup>Te ní sacá<sup>n</sup> ndodo té Páblú ndahá-dé díquí-güedè, te òré-ni ní quexio Espíritú Yá Ndiöxí ní ngúndecu ndíhi-güedè, te ní ngüíta-güedè ní cáhá<sup>n</sup>-güedè tnúhu sá dácàhu iní ñáhá Espíritú-gá, tnúhu sá ñà túú xìní-güedè cáhá<sup>n</sup>-güedè, te ní cáhá<sup>n</sup>-güedè tnúhu Yá Ndiöxí ñacuáa ní dácáhu iní ñáhá Espíritú-gá xii-güedè. <sup>7</sup>Te cùu datná úxúú tnàhá-güedè.

<sup>8</sup>Te té Páblú ní sáhá<sup>n</sup>-dé veñúhu ñáyiú isràél ní cáhá<sup>n</sup> ndíhi-dé-yu, te úní yóo ñí xínu ní xica cuu-dé veñúhu-yu. Te ío váha ñúhu díquí-dè tnúhu cáhá<sup>n</sup>-dé, núu xíá<sup>n</sup> ní cuyii-dè ní cáhá<sup>n</sup>-dé, te ní xáha<sup>n</sup>-dè sá quíndáá iní-yu tnúhu Jèsús, te duca<sup>n</sup> te ndíhu ndaha ñaha Yá Ndiöxí

xii-yu. <sup>9</sup>Te davá-yu ío sàá iní-yu ñá ní cuíní-yu quindáá iní-yu, te ío ní cáhá<sup>n</sup> cuèhé-yu cuendá Jèsús xití veñúhu núú dàva-gá-yu. Te té Páblú ní ndee-dé veñúhu cuáhá<sup>n</sup>-dé ndihi ñáiyu sàndáá iní tnúhu Jèsús. Te ii<sup>n</sup> nduu ii<sup>n</sup> nduu ní sáhá<sup>n</sup>-dé scuèlá té Tiranú ní dáciuhá ñaha-dé xii-yu. <sup>10</sup>Te úú cuíá duca<sup>n</sup> ní sáhá<sup>n</sup>-dé scuèlá ní dáciuhá-dé ñáiyu. Te nchaa ñáiyu isràèl ñáiyu ndècu nihí distritú Àsiá ndihi nchaa ñáiyu ñá túú cùu ñáiyu isràèl ní xíndedóho-yu tnúhu Jèsús. <sup>11</sup>Te té Páblú ío ní chindee ñaha Yá Ndiöxí xii-dé ní quide-dé vai núú sá vā yōo tnàhí ndàcu cada. <sup>12</sup>Te pañú díquí-dé ndihi dóó cándèé núú yíquí-dé ní xíca<sup>n</sup>-yu nèhé-yu ní sáhá<sup>n</sup> núú ndécú ñáiyu cùhú, te xǎ<sup>n</sup> ní tñii ñáiyu cùhú ndihi ñáiyu yìhi ñaha espíritú cúndìhi yucu ñávàha, te ní ndúha-yu.

<sup>13</sup>Te ñúu Isràèl véxi cue tée tatna xica cuu-güedé quidé tátna-güedé ñáiyu yìhi ñaha espíritú cúndìhi yucu ñávàha. Te ní ngüíta-güedé ní cacu nèhe-güedé Jèsús cuendá quee espíritú-á<sup>n</sup> yiqui cùnú-yu, te ní xáha<sup>n</sup>-güedé:

—Xocuiñí-n, chi càchí Jèsús sá vā cúndècu ndihi-gá-n tēe-a. Te diu-ni Jèsús cacú nèhe té Páblú òrè càhá<sup>n</sup>-dé tnúhu-gá —càchí-güedé xáha<sup>n</sup>-güedé xii espíritú-á<sup>n</sup>.

<sup>14</sup>Te úsá tnàhà-güedé duca<sup>n</sup> ní xóo cada-güedé. Te tátá-güedé ní xínani-dé Èsevá, te téé-á<sup>n</sup> ní cuu-dé dútú cúnù. <sup>15</sup>Te sá dúcá<sup>n</sup> ní cáhá<sup>n</sup>-güedé, te ní xáha<sup>n</sup> espíritú cúndìhi yucu ñávàha-á<sup>n</sup> xii-güedé:

—¿Te ná cúú nchòhó nùu dayùhú ñáhá-ndó? Te xini-í Jèsús, te xini-í yoo cùu té Páblú, te nchòhó ñá

túú xini ñáhà-í xii-ndo —càchí espíritú-á<sup>n</sup> xáha<sup>n</sup>-xi xii-güedé.

<sup>16</sup>Te téé yìhi ñaha espíritú cúndìhi yucu ñávàha-á<sup>n</sup> ní ndanchita-dé ní tñii-dé cue téé quide tátna-á<sup>n</sup>, te ní ndihi dóó-güedé ní ndátá-dé, te ní dánicuehé ñáhá-dé xii-güedé, te ní xinu-güedé cuáhá<sup>n</sup>-güedé. <sup>17</sup>Te nchaa ñáiyu isràèl ndécú ñúu Èfesú ndihi dava-gá ñáiyu ndècu diu-ni ñúu-á<sup>n</sup> ní nihí-yu tnúhu nàcuáa ní cuu, te ío ní yùhú-yu, te vāi-yu ní cachí sá ío càhnu cuu Xitohó Jesucristú.

<sup>18</sup>Te dava ñáiyu ní sándáá iní-xi tnúhu Jèsús ní sáhá<sup>n</sup>-yu núú ndécú tē Páblú, ndihi núú ndécú nchaa ñáiyu ní sándáá iní tnúhu-gá ní náhmá-yu nàcuáa ní xóo cada-yu. <sup>19</sup>Te titní ñáiyu ni xóo cada ndùu nehé-yu tutú-yu ní sáhá<sup>n</sup> núú ndécú nchaa ñáiyu sàndáá iní-xi tnúhu-gá, te yàcá<sup>n</sup> ní ndada cuendá-yu sá ío yahu ní sáha-yu tutú-yu, chi ndéé údico úxí mǐl díhú<sup>n</sup> cuixí<sup>n</sup> ní sáha-yu núú ncháá. Te ncháá-yu ní sahmí-yu tutú-yu. <sup>20</sup>Te sátá ní cáyú nchaa tutú-á<sup>n</sup>, te vai-gá ñáiyu ní tuhá-yu ichi Yá Ndiöxí, te ní sáha-yu cuendá sá ío xini ñuhu tnúhu Yá Ndiöxí.

<sup>21</sup>Te ní cachí té Páblú sá quíhí<sup>n</sup>-dé distritú Macèdoniá ndihi distritú Acáyá, te dàtnuní nùhú-dé ñúu Jerusalén, te duca<sup>n</sup> te dàtnuní quíhí<sup>n</sup>-dé ñúu Rómá. <sup>22</sup>Te ndècu ndihi-dé té Timùteú ndihi té Èrastú cue téé chindee ñaha xii-dé. Te té Páblú ní xáha<sup>n</sup>-dē xii-güedé sá códo nùu-güedé quíhí<sup>n</sup> Macèdoniá, te ní xica-güedé cuáhá<sup>n</sup>-güedé, te mee-dé ní quendóo-dé.

**Náyiu Éfesú ío dusa<sup>n</sup>  
quidé-yu ñuú-yu**

<sup>23</sup>Te dàvá-á<sup>n</sup> ío ní cudéē<sup>n</sup>-yu núu nchàa ñáyiu ní tuha ichi Yá Ndiöxí.

<sup>24</sup>Te ì<sup>n</sup> téé ñuú Éfesú nání-dě Demètriú. Te téé-á<sup>n</sup> ñí xóo canehe chi<sup>u</sup><sup>n</sup>-dé mee-ni díhú<sup>n</sup> cuixí<sup>n</sup> ní xóo cadúha-dé veñúhu líhli, dàtná cuiní-ndó càa veñúhu Diàná sá cúú ndiöxí-yu. Te vài díhú<sup>n</sup> ñí xóo ñihí-dě ndihi cue téé ní xóo cada chi<sup>u</sup><sup>n</sup> ndihi-dé. <sup>25</sup>Te ní cana-dé cue téé quide chi<sup>u</sup><sup>n</sup> ndihi-dé, ndihi nchaa cue téé quide chi<sup>u</sup><sup>n</sup> ndihi díhú<sup>n</sup> cuixí<sup>n</sup>, te ní xáha<sup>n</sup>-dě xii-güedé:

—Nàha-ndo sá ío váha ñihí-ó díhú<sup>n</sup> cuendá chi<sup>u</sup><sup>n</sup> quide-o. <sup>26</sup>Te nàha-ndo sá càchí té Pàblú sá ñà díú ndiöxí cúú sá ñí cadúha ñáyiu ñuyíú-a. Te duca<sup>n</sup> càhá<sup>n</sup>-dé ñuú-ó, te duca<sup>n</sup>-ni càhá<sup>n</sup>-dé ñihí distritú Àsiá, te ío-gá vài ñáyiu sàndáá iní tnúhu càhá<sup>n</sup>-dé. <sup>27</sup>Te ío úhú ñuu na cuíta chi<sup>u</sup><sup>n</sup> quide-o, vá yóo-gá cuaa<sup>n</sup> sá cadúha-o. Te nguíta-yu càhá<sup>n</sup>-yu sá veñúhu Diàná ñá túú càváha, te vá cadá càhnu-gá-yu sàndú-ó. Te nàha-ndo sá ío càhnu cuu Dianá, chi nchaa ñáyiu distritú Àsiá quidé càhnu ñahá-yu ndihi ñáyiu xĩndecu ñí càa xico ñuyíú —càchí té Demètriú xáha<sup>n</sup>-dě xii-güedé.

<sup>28</sup>Te sá dúcá<sup>n</sup> ñí càhá<sup>n</sup> té Demètriú, xíá<sup>n</sup> ní cudéé<sup>n</sup>-güedě núu tẽ Pàblú, te uu<sup>n</sup>-ni ní cuáá-güedé te càchí-güedé:

—Íío càhnu cuu Dianá sàndú ñáyiu Éfesú! —càchí-güedé.

<sup>29</sup>Te nchaa ñáyiu ñuú Éfesú ndi coyo ndi coyó-yu xicáhá<sup>n</sup>-yu. Te tnàhá úú cue téé distritú

Macèdoniá xicá cùu-güedé ndihi té Pàblú, ì<sup>n</sup>-dé nání-dě Gáyú, te ì<sup>n</sup>-dé nání-dě Aristarcú. Te ní tñii-güedé úú cue téé-á<sup>n</sup>, te cuánguihu coyo ndihi ñaha-güedě vehe núu quidé-güedě jündá. <sup>30</sup>Te té Pàblú cuiní-dé quíhu-dé tnàhá-dé vehe-á<sup>n</sup> cãhá<sup>n</sup> ndihi ñaha-dě ní cùu, te ñá ní dàña cue téé ní sàndáá iní tnúhu-gá. <sup>31</sup>Te ì<sup>n</sup> úú cue téé cùnno distritú Àsiá ní càhá<sup>n</sup> váha-güedé cuendá té Pàblú, te ní xáha<sup>n</sup>-güedě xii ì<sup>n</sup> téé xĩnu cuechi núu-güedě ní sáhá<sup>n</sup>-dé ní xáha<sup>n</sup>-dě xii té Pàblú sá vã quíhu-dé vehe núu quidé-güedě jündá. <sup>32</sup>Te uu<sup>n</sup>-ni ní cuáá-yu nchaa-yu, te ñá ì<sup>n</sup>-ní tnúhu ni càhá<sup>n</sup>-yu, chi ndi díí<sup>n</sup> tnúhu ní càhá<sup>n</sup>-yu ì<sup>n</sup> ì<sup>n</sup>-yu. Te chitu-gã ñáyiu ñá ní cùtnuní iní-yu ná cuendá ní dátàcã ñahá-güedě xití vehe-á<sup>n</sup>, chi ñá ì<sup>n</sup>-ní tnúhu ni càhá<sup>n</sup>-yu. <sup>33</sup>Te davá-yu ní càhá<sup>n</sup>-yu sá cuèchi té Lijandrú cúú-xí, chi ní xáha<sup>n</sup> ñáyiu isràél xii-dé sá càhá<sup>n</sup>-dé yuhú-yu chindee tnúhu ñaha-dě xií-yu. Te ní quide-dé ndaha-dé núú-yu sá cùndedóho-yu tnúhu càhá<sup>n</sup>-dé chindee tnúhu ñaha-dě xií-yu yòtnúhu. <sup>34</sup>Te ní cutnùní iní-yu sá tẽ isràél cúú-dě, te uu<sup>n</sup>-ni ní cuáá tucú-yu, ñá ní dàñá-yu càhá<sup>n</sup>-dé, te càchí-yu: —Íío cùnno Dianá sàndú ñuú Éfesú! —càchí-yu. Te dàtná úú òrè ì<sup>n</sup>-ni tnúhu ní càhá<sup>n</sup>-yu.

<sup>35</sup>Te téé cùu secretariú-ni-gá ní càhá<sup>n</sup>-dé, te dàtnùní cuèé cuèé ní sadí-yu yuhú-yu. Te ní xáha<sup>n</sup>-dě xií-yu:

—Nchaa-ndo cùndedóho-ndo ì<sup>n</sup> tnúhu na càhá<sup>n</sup>-í-a. Ío cùnno Dianá, te nchaandí túhú ñáyiu



sa nàhá-yu sá ncháá-ó ò nèhe cuendá-ó venúhu-á<sup>n</sup>. Te nàhá-yu sá nêhé cuendá-ó sàndú-á<sup>n</sup>, chi véxi cuu<sup>n</sup>-gá andiu. <sup>36</sup>Te vá yõ ì<sup>n</sup> càchí sá ñã ndáá. Te coto-ndo mèe-ndo, te vá cuídó-ndó càda-ndo, te vá cuídó-ndó cãhá<sup>n</sup>-ndó. <sup>37</sup>Te ná cuendá ndécá-ndó cuè téé-á<sup>n</sup> vèxi, te ñá túú ñã ní quide-güedé, te ñá túú ñã ní dùhu-güedé venúhu, te ñá túú càhá<sup>n</sup> cuèhé-güedé cuendá Diàná. <sup>38</sup>Te núu ò yoo nàà ndìhi ñaha xii té Demètriú ndìhi cue téé quide chiu<sup>n</sup> ndìhi-dé, te quíhí<sup>n</sup>-güedé cacá<sup>n</sup> cuèchi-güedé núú cuè téé cùchiu<sup>n</sup>. Te cue téé cùchiu<sup>n</sup> na cundoho-güedé nõu quehndé-güedé cuèchi-yu àdi ñáhá. <sup>39</sup>Àdi ío-gá ná cuendú ñúhú ìní-ndó, te càhá<sup>n</sup>-ndó òré ná cóo jùndá. <sup>40</sup>Te ío úhú nõu na ñihí téé tàxi tñuní ñáhá xii-o tñúhu sá dúhá ò quide dusa<sup>n</sup>-o, te cachí-dé sá ndècuèchi-o chi ñá túú sàndáá ìní-ó-dé quesaha-dé. Te ñá túú tñahí ndùu váha-xi sá dúhá càda-o ni cuu, te vitna duha ní quide-o, te ñá cùtnùní ìní-ó ñása cùñaha-o xii téé tàxi tñuní ñáhá xii-o núu na càna ñaha-dé —càchí téé cùu secretariú xãha<sup>n</sup>-dè xii-yu.

<sup>41</sup>Te ní xáha<sup>n</sup>-dè sá nùhú-yu te ní ndìhi-yu cuánuhú.

**Té Pãblú cuáhá<sup>n</sup>-dé distrítú Macèdoniá ndìhi distrítú Grèciá**

**20** Te òré ñá túú-gã ní quide dusá<sup>n</sup>-yu, te ní cana ñaha tã Pãblú xii nchaá ñáyiu sàndáá ìní tñúhu Jèsús ní càhá<sup>n</sup>-dé dóho-yu nàcuáa cadá-yu. Te ní quide ndee ìní ñáhá-dè xii-yu, te ní tñii-dé ichi cuáhá<sup>n</sup>-dé distrítú Macèdoniá. <sup>2</sup>Te

tayãha-dé cuáhá<sup>n</sup> ì<sup>n</sup> ì<sup>n</sup> ñúu yíndèhu Macedoniá. Te càhá<sup>n</sup>-dé dóho nchaá ñáyiu sàndáá ìní tñúhu Jèsús nàcuáa cadá-yu, te ní cudhí ìní-yu cadá-yu nàcuáa càhá<sup>n</sup> Yã Ndiõxí cadá-yu sá dúcá<sup>n</sup> ní càhá<sup>n</sup>-dé dóho-yu. Té ní quexìo-dé distrítú Grèciá. <sup>3</sup>Te xía<sup>n</sup> ní xíndecu-dé úní yóó. Te xía<sup>n</sup> quèe-dé bàrcú quíhí<sup>n</sup>-dé distrítú Siriá ní cùu, te ní ñihí-dè tñúhu sá ndétú ñaha ì<sup>n</sup> úú cue téé isràèl cahni ñaha-güedé xii-dé ní cùu, núu xíã<sup>n</sup> ní tñii-dé ichi cuáhá<sup>n</sup>-dé ní yáha-dé ichi distrítú Macèdoniá. <sup>4</sup>Te cuáhá<sup>n</sup> ndìhi-dé té Sopatér téé ñúu Bèréa, ndìhi té Arístarcú, ndìhi ì<sup>n</sup> téé nani Segundú. Te ndi ndúu cue téé-á<sup>n</sup> cúu-güedé cue téé ñúu Tesalónica. Te tñahá té Gãyú téé ñúu Dèrbé, ndìhi té Timùteú cuáhá<sup>n</sup> ndìhi-dé, te tñahá té Tiquicú ndìhi té Trõfimú cuáhá<sup>n</sup> ndìhi-dé, te úú cue téé-á<sup>n</sup> cúu-güedé cue téé distrítú Àsiá. Te nchaá cue téé-á<sup>n</sup> cuãhá<sup>n</sup> ndìhi-güedé té Pãblú. <sup>5-6</sup>Te ní quexìo-güedé ñúu Filipú, te yacá<sup>n</sup> ní naníhí ñáhá-güedé xii-ndí. Te té Pãblú ní tendaha-dè cue téé ndìhi-dé cuáhá<sup>n</sup>-güedé ñúu Tròás, te ní xáha<sup>n</sup>-dè sá díú-ní yacá<sup>n</sup> cundetu ñaha-güedé xii-ndí. Te ní ndóo-í ndìhi-dé, te ní xíndecu-ndí vico xèxi-yu pàa sá ñã túú yìhi levadurá. Te sátá ñí yáha vico, te ní quèe-ndí bàrcú cuáhá<sup>n</sup>-ndí, te ní xúhu<sup>n</sup>-ndí ichi úhú<sup>n</sup> nduu, te ní quexìo-ndí ñúu-á<sup>n</sup>. Te yacá<sup>n</sup> ní naníhí tñahá-ndí ndìhi cue téé yòdo nuu cuáhá<sup>n</sup> ní xíndecu-ndí úsá nduu.

**Té Pãblú cuáhá<sup>n</sup> ngándìhi-dé ñáyiu ñúu Tròás**

<sup>7</sup>Te ì<sup>n</sup> nduu ndumìngú ní naníhí tñahá-ndí ndìhi nchaá ñáyiu ní

sándáá iní-xi tnúhu Jèsús ní xexi-ndí pàá ndihí-yu. Te duca<sup>n</sup> ní quide-ndí, chi ní cachí Jèsús sá dúcá<sup>n</sup> càda-o cuendá sá vǎ nácuànaa-o sá ní xihí-gá cuendá naníhí tǎhú-ó. Te té Pǎblú ní ngúíta-dé càhá<sup>n</sup>-dé tnúhu-gá, te càhá<sup>n</sup>-dé ní cuu dava niú, chi cuendá ná tǔndaá ingá nduu-á<sup>n</sup>, te caca-dé quíhí<sup>n</sup>-dé ingá xichi. <sup>8</sup>Te ndécú-yu vehe yòdo tnaha, te yǎhí-yu ndéé cuàrtú cúu ùní núu nǎnu, te càyú víhí ñuhú xití cuàrtú-á<sup>n</sup>. <sup>9</sup>Te ìí<sup>n</sup> tée sa ta cùu sacuéhé luha nàni-dé Eùticú núcòo-dé yèhe ventaná, cuiní-dé cúdú-dé, chi ní cunaha vìhi cahá<sup>n</sup> té Pǎblú, te ní tñii ñaha sàní xii-dé ní xidí-dé, te ní ngava-dé ndéé ñuhu. Te ní nuú-yu núu ñuhú cuendá ndacani ñàhá-yu, te sa ní xihí-dé, chi ío dúcú<sup>n</sup> ní ngava-dé. <sup>10</sup>Te tnàhá té Pǎblú nchìcú<sup>n</sup>-dé ní nuu. Te ní quexìo cunu-dé núu cǎtùu tée ní xihí-á<sup>n</sup>, te ní numi ñaha-ni-dě, te ní xáha<sup>n</sup>-dě xií-yu: —Vǎ ndǎhú iní-ndó, chi ní ndoto-dé —càchí-dé xǎha<sup>n</sup>-dě xií-yu.

<sup>11</sup>Te dǎtnùní cuándaa ndíhi ñaha tǔcu-dé xií-yu cuàrtú núu yǎhí-yu ní cùu, te yàcá<sup>n</sup> ní xexi ndíhi ñaha-dě xií-yu, dǎtnùní ní ngúíta-dé vǎi-gá tnúhu ní cáhá<sup>n</sup>-dé, te càhá<sup>n</sup>-ni-dé ní tǔndaá, te dǎtnùní ní xica-dé cuáhá<sup>n</sup>-dé. <sup>12</sup>Te tée ní ngava-á<sup>n</sup> ní sánúndeca ñàhá-yu xii-dé ndéé vehe-dé, te ío ní cudíí iní-yu sá ní ndoto-dé.

**Ní quee-güedé ñuú Tròás  
cuáhá<sup>n</sup>-güedé ñuú Miletú**

<sup>13</sup>Te té Pǎblú ní cachí-dé sá quíhí<sup>n</sup>-ndí ndíhi bàrcú ndéé ñuú

Àsón, te mee-dě caca saha-dě, te yàcá<sup>n</sup> naníhí tnàhá-ndí ndíhi-dé te quee-dé bàrcú, te ní quee-ndí bàrcú cuáhá<sup>n</sup>-ndí. <sup>14</sup>Te ní naníhí tnàhá-ndí ndíhi-dé ñuú Àsón, te yàcá<sup>n</sup> ní quee-dé bàrcú tnàhá-dé cuáhá<sup>n</sup>-ndí ñuú Mitilené. <sup>15</sup>Te ní quexìo-ndí ndéé ingá nduu yatni ñuú Quíú, te ndéé nduu tnéé ní quexìo-ndí ñuú Sǎmú te yàcá<sup>n</sup> ní yáha-ndí, te ní quexìo-ndí ñuú Trògiliú. Te ndéé nduu ìdǎ ní quexìo-ndí ñuú Miletú. <sup>16</sup>Te té Pǎblú ñǎ ní cuiní-dé yáha-ndí ñuú Éfesú, chi ñǎ túú ní tnàhá iní-dé cuyaa-dě ichi, chi ío ndíhi iní-dé cuendá cuiní-dé quini-dé ñuú vá ndácú-dě ndexìo-dé ñuú Jerusàlén cundecu-dé vico Pentecòstés.

**Té Pǎblú càhá<sup>n</sup> ndíhi-dé cue tée  
yǎndaha ñaha xii ñáyiú sándáá  
iní tnúhu Jèsús ñuú Éfesú**

<sup>17</sup>Te òré ndécú tǎ Pǎblú ñuú Miletú, te ní cana-dé cue tée yǎndaha ñaha xii ñáyiú sándáá iní tnúhu Jèsús ñuú Éfesú sá quíhí<sup>n</sup>-güedé núu ndécú-dě. <sup>18</sup>Te sǎtá ní quexìo-güedé, te ní xáha<sup>n</sup>-dě xii-güedé:

—Nàha-ndo nacuáa ní quide-í ndéé cǔtnàhá ní quexìo-í distrítu Àsiá. <sup>19</sup>Chi ní quide-í nàcuáa ní cáhá<sup>n</sup> Yǎ Ndiòxí cada-í, ñǎ túú ní tǔhío-í, te ñǎ túú ní quide cahnu-í mèe-í, te ío ní ndáhyú-í sá quidé dǎvǎ-yu, chi ío sǎá iní-yu. Te sa nàha-ndo sǎ tǐtní xito ní cuiní ñáyiú isràél cahni ñàhá-yu xii-í ní cùu, te ío ní ndoho-í ní cácu-í. <sup>20</sup>Te sa nàha-ndo sǎ nchǎándí tǔhú sa ní cachí tnúhu-í nàcuáa cada-ndo cuendá sǎ chíndèe ñaha Yǎ Ndiòxí

xii-ndo. Te ní cáhá<sup>n</sup>-í tnúhu-gá núú-ndó nchàa-ndo, te ñiu-ni duca<sup>n</sup> nĩ quixi-í ndi tnahá vehe-ndo nĩ cáhá<sup>n</sup>-í tnúhu-gá núú-ndó. <sup>21</sup>Te ní xáha<sup>n</sup>-í xii ñáyiú isràèl ndihí ñáyiú ñá túú cùu ñáyiú isràèl sá dāñā-yu nchaa sá cuèhé sá dúhá quidé-yu te quindáá iní-yu tnúhu Xítohó Jesucristú. <sup>22</sup>Te dacuití quĩh<sup>n</sup>-í ñúú Jerusálén, chi Espíritú Yá Ndiòxí ní cachí-xi sá dáí quĩh<sup>n</sup>-í, te ñá túú xini-í nándi cada ñaha-güedě xii-í yàcá<sup>n</sup> te núu na quèxio-í. <sup>23</sup>Te ñ<sup>n</sup> ñ<sup>n</sup> ñúú núú sàhá<sup>n</sup>-í càchí tnúhu Espíritú-gá sá chíhí ñaha-güedé vecaá, te cada úhú ñáhá-güedě. <sup>24</sup>Dico ñá túú tnàhí ná cuu cuèi na càhni ñaha-güedé xii-í, dico cuini-í sá dñí iní dandñi-í nchaa sá nĩ cachí Xítohó Jesucristú cada-í. Te ní cachí Yá Ndiòxí sá càhá<sup>n</sup>-í núú ñáyiú sá ño cùu iní ñáhá-gă xií-yu, te naníhí tãhú-yu núu na quindáá iní-yu tnúhu-gá.

<sup>25</sup>Te sa ní cachí tnúhu-í xii-ndo nchàa-ndo sá ñuu na quindáá iní-ndó Yá Ndiòxí, te ndñhu ndaha ñaha-gá xii-ndo. Te na càchí tnúhu-í sá nĩ ñ<sup>n</sup> nduu-gá vá quini ñáhá-ndó xii-í ñuyúú-a. <sup>26-27</sup>Te yúhú ñá túú cuèchi-í ñuu ño ñáyiú vá naníhí tãhú, chi sa ní cachí tnúhu-í nchaa sá nĩ cáhá<sup>n</sup> mée Yá Ndiòxí cada-ndo. <sup>28</sup>Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espíritú-gá ní cachí-xi sá cùnù-ndo núú-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu duca<sup>n</sup> càda-ndo cuendá, chi nàha-ndo sá Jèsús ní sati níñi-gă, te ní xihí-gă cuendá naníhí tãhú-ó ndihí-yu.

<sup>29</sup>Te yúhú sa cùtnuní iní-í sá òrè ñá túú-gă-í ndécú, te quixi ñáyiú dandàhú ñáhá xii-ndo cuendá dañà-ndo tnúhu Yá Ndiòxí, te cada ñáhá-yu xii-ndo dàtná quidé ñāñā òrè tníí-dí mbéé. <sup>30</sup>Te ñiu-ni ñ<sup>n</sup> úú cue téé ndècu ndihí-ndo, cue téé-á<sup>n</sup> dacuandehnde-güedé, te cudana davá-yu quindáá iní-yu chítnáhá ñáhá-yu xii-güedé. <sup>31</sup>Te xíā<sup>n</sup> ñuu càchí tnúhu-í sá ño quihí iní-ndó cùndecu-ndo ndihí nchaa ñáyiú sàndáá iní tnúhu-gá. Te nàha-ndo sá yúhú ní xíndecu-í úní cuíá nĩ cáhá<sup>n</sup>-í tnúhu Jèsús núú ñáyiú cuèi nduu cuèi níú. Te áma ní xóo ndáhyú-í, chi ñá ní cuini-yu quindáá iní-yu ncháa-yu tnúhu ní cáhá<sup>n</sup>-í —càchí té Pãblú xãha<sup>n</sup>-dě xii-güedé.

<sup>32</sup>Te xãha<sup>n</sup> tùcu-dé:

—Nchòhó cue téé ndècu ndihí-í ichi Xítohó Jesucristú, ño cuini-í sá mée Yá Ndiòxí chindee ñaha-gá xii-ndo. Te mee-gă ní cáhá<sup>n</sup>-gá sá ño cùdñí iní ñáhá-gă xii-ndo. Te naníhí tãhú-ndó ndihí nchaa ñáyiú cùu cuendá-gá, te chindee ñaha-gá xii-ndo cuendá cada-ndo nchaa sá càhá<sup>n</sup>-gá. <sup>33</sup>Te òrè ní xíndecu ndihí ñaha-í xii-ndo, te ni díhú<sup>n</sup> ni dõõ ñá túú ní cùdñí iní-í. <sup>34</sup>Te mee-ndo sà naha-ndo sá yúhú ní quide chiu<sup>n</sup>-í, te ní níhí-í nchaa sá ní nandñi-í ndihí cue téé xica cuu ndihí-í. <sup>35</sup>Te sa ní xiní-ndó nacuáa ní quide-í ní quide chiu<sup>n</sup>-í, te ñiu-ni duca<sup>n</sup> càda chiu<sup>n</sup>-ndo cuendá chindee-ndo nchaa ñáyiú ndàhú, chi sa nàha-ndo nacuáa ní cachí Xítohó Jesucristú, te duha ní cachí-gă: “Cùdñí-gă iní-ó cuãha-o ñáyiú ndàhú sá xini ñuhú-yu dàcúúxí sã táxi-yu xii

mee-o”, duha ní cachí-gá —càchí té Páblú xáha<sup>n</sup>-dë xii-güedé.

<sup>36</sup>Te sátá dúcá<sup>n</sup> nǐ cáhá<sup>n</sup>-dé, te ní ngüíñí xítí-dë ndíhi dava-gá-güedé, te ní cáhá<sup>n</sup> ndíhi-dé Yá Ndiöxí.

<sup>37</sup>Te sátá nǐ túhú tnúhu ní cáhá<sup>n</sup>-dé ndíhi Yá Ndiöxí, te ní ndáhyú víhí-güedé sá quíh<sup>n</sup>-dé, te ní numi ñaha-güedé, te ní teyuhu ñaha-güedé. <sup>38</sup>Te ní ndíhú víhí ínì-güedé, chi ní xáha<sup>n</sup> té Páblú sá nǐ ìí<sup>n</sup> nduu-gá vá náníhí tnáhá-güedé cáhá<sup>n</sup> ndíhi tnàha-güedé. Te cuáhá<sup>n</sup> ndíhi ñaha-güedé xii-dé núú ndécú bàrcú.

### Té Páblú cuáhá<sup>n</sup>-dé ñuú Jerusàlén

**21** Te ní quide ndee ínì-ndí nchaa cue tée cùnuu. Te ní queé-ndí bàrcú cuáhá<sup>n</sup> ndáá ichi-ndí ñuú Cös. Te nduu tnée ní sáhá<sup>n</sup>-ndí ñuú Ròdás, te ní yáha-ndí cuáhá<sup>n</sup>-ndí ñuú Pàtará. <sup>2</sup>Te yàcá<sup>n</sup> ní naníhí-ndí ìí<sup>n</sup> bàrcú ñúhú ìchi-xi quíh<sup>n</sup>-xi distrítú Fèniciá, xíá<sup>n</sup> ní queé-ndí cuáhá<sup>n</sup>-ndí. <sup>3</sup>Te ichi cuáhá<sup>n</sup>-ndí ní xiní-ndí distrítú Chìpré cáá cuädava xítí làmár, te ní yáha-ndí, te ní quendóo ñuú-á<sup>n</sup> xio dàtni-ndí. Te cuáhá<sup>n</sup>-ndí ñuú Tírú ìí<sup>n</sup> ñuú yándèhu distrítú Sìriá cuèndá yàcá<sup>n</sup> tava-güedé nchaa sá nchídó bàrcú. <sup>4</sup>Te yàcá<sup>n</sup> ní naníhí tnáhá-ndí ndíhi ñáyiú ní sándáá ínì tnúhu Jèsús, te ní xíndecu-ndí úsá nduu ndíhí-yu. Te ní xáhá<sup>n</sup>-yu sá vá quíh<sup>n</sup> té Páblú ñuú Jerusàlén, chi Espíritú Yá Ndiöxí ní xáha<sup>n</sup>-xi xii-yu sá ndóhó víhi-dé ñúu na quíh<sup>n</sup>-dé. <sup>5</sup>Te sátá nǐ yáha nduu úsá, te ní quee-ndí cuáhá<sup>n</sup>-ndí yuhu làmár. Te ní quee nchaa ñáyiú ní sándáá ínì tnúhu-gá, tée, ñadìhí, nchaa landú,

nchaá-yu ní sándeca ñàhá-yu yuhu làmár, te òré ní quexio-ndí, te ní ngüíñí xítí-ndí ní cáhá<sup>n</sup> ndíhi-ndí Yá Ndiöxí. <sup>6</sup>Te ní quide ndee ínì tnáhá-ndí ndíhí-yu, te dàtnùní ní quee-ndí bàrcú, te ní naquehé<sup>n</sup>-yu ichi cuánuhú-yu vehé-yu.

<sup>7</sup>Te ní xica bàrcú ñúhú-ndí ní quee-xi ñuú Tírú cuáhá<sup>n</sup>-ndí ndíhi-xi ñuú Tolèmaidá. Te xíá<sup>n</sup> nǐ sáa-xi te ní quene-ndí, te ní sáhá<sup>n</sup>-ndí ní cáhá<sup>n</sup> ndíhi-ndí nchaa ñáyiú sándáá ínì-xi tnúhu Jèsús, te ní xíndecu-ndí ndíhí-yu ìí<sup>n</sup> nduu. <sup>8</sup>Te nduu tnée ní ndée tucu-ndí bàrcú cuáhá<sup>n</sup>-ndí ñuú Cèsareá, te yàcá<sup>n</sup> ní quene tucu-ndí bàrcú, te cuáhá<sup>n</sup>-ndí vehe té Lìpé cundecu-ndí ndíhi-dé. Te tée-á<sup>n</sup> nǐ xóo cada chù<sup>n</sup> ndíhi-dé ìí<sup>n</sup>-gá cue tée ní chindee ñaha xii ñáyiú sándáá ínì tnúhu-gá ñuú Jerusàlén ní xóo cuáñaha-güedé sá nǐ xóo caxí-yu. Te dàtnùní mee-nǎ tnúhu Yá Ndiöxí càhá<sup>n</sup>-dé xíca cùu-dé. <sup>9</sup>Te té Lìpé-á<sup>n</sup> ndècu cùmí dèhe dìhí-dé, te ni ìí<sup>n</sup>-yu vátá ndúcú ñaha-gá tée xii-yu, te nchaá-yu càhá<sup>n</sup>-yu tnúhu Yá Ndiöxí tnúhu sá dácàhu ínì ñàhá mèe-gá. <sup>10</sup>Te xíá<sup>n</sup> nǐ cuu títí nduu ndècu-ndí, te ní quexio ìí<sup>n</sup> tée nani Agabú ñuú-á<sup>n</sup>, véxi-dé distrítú Jùdeá, te tée-á<sup>n</sup> tnáhá-dé càhá<sup>n</sup>-dé tnúhu Yá Ndiöxí. <sup>11</sup>Te ní níhí-dé tnúhu núú ndécú-ndí ñúu ní quixi-dé ní cáhá<sup>n</sup> ndíhi ñaha-dé xii-ndí. Te ní xíca<sup>n</sup>-dé cìrchú té Páblú, te ní ngóo-dé, te ní ngüíta-dé ní dácútú-dé sáhá-dé ndíhi ndaha-dé, te ní cachí-dé xii-ndí: —Espíritú Yá Ndiöxí ní cachí-xi sá tée dii cìrchú-xi-a tñi ñaha cue tée isràèl ñuú Jerusàlén, te duha

dacùtu ñaha-güedé xii-dé, te cuáha cuendá ñáhá-güedé xii-dé núu cuè téé ñuú Rómá. Duha ní cáhá<sup>n</sup> Espiritú-gá —càchí té Ágabú.

<sup>12</sup>Te sá dúcá<sup>n</sup> ñí cáhá<sup>n</sup>-dé, te ní xáha<sup>n</sup>-ndí nchaa-ndí sá vǎ quíhí<sup>n</sup> té Páblú ñuú Jerusálén. <sup>13</sup>Te té Páblú ní cachí-dé:

—¿Ná cuendá ndéé dúcá<sup>n</sup> ndàhyú-ndó dándihú iní ñáhá-ndó xii-í-i? Te ñá túú ñǎ cuu cuèi na dàcutu ñaha-güedé, àdi cuèi na càhni ñaha-güedé xii-í cuendá sá càhá<sup>n</sup> ndíhi-í Jèsús, chi sa ndècu túha-í sá cùú-í —càchí-dé.

<sup>14</sup>Te ñá túú ní sàndáá iní-dé sá dúcá<sup>n</sup> xǎha<sup>n</sup>-ndí, núu xíǎ<sup>n</sup> ñǎ túú-gǎ ná ní xǎha<sup>n</sup>-ndí xii-dé sá vǎ quíhí<sup>n</sup>-dé, te ní xítñaha-ndí:

—Mee-ni-gǎ Yǎ Ndiöxí ná cùnaha-gá nása sàni iní-gá cada-gá —xítñaha-na-ndí.

<sup>15</sup>Te ní quehe<sup>n</sup>-ndí ndàchiu<sup>n</sup>-ndí, te ní xica-ndí cuáhá<sup>n</sup>-ndí ñuú Jerusálén. <sup>16</sup>Te cuáhá<sup>n</sup> ndíhi-ndí ñí<sup>n</sup> úú cue téé Cèsareá, cue téé ní sàndáá iní tnúhu Jèsús. Te ndèca ñaha-güedé xii-ndí cuáhá<sup>n</sup> vehe té Mnàson, te téé-á<sup>n</sup> cúú-dé téé distrítu Chìpré, te ndècu-dé ñuú Jerusálén, te sa ní cuu vǎi nduu ní sàndáá iní-dé tnúhu-gá, te vehe téé-á<sup>n</sup> ñí xíndecu-ndí.

**Té Páblú ndátnúhu-dé  
ndíhi té Jàcobó**

<sup>17</sup>Te òré ní quexio-ndí ñuú Jerusálén, te nchaa ñáyiú ní sàndáá iní tnúhu Jèsús ní quixí-yu ní dándácõo váha ñáhá-yu, chi ní cudíí víhí iní-yu sá ñí quexio-ndí. <sup>18</sup>Te nduu tnéé cuáhá<sup>n</sup> ndíhi-ndí té Páblú cuendá cáhá<sup>n</sup> ndíhi-ndí té Jàcobó,

te òré ní quexio-ndí núu ndécú-dé, te ndècu ndíhi-dé nchaa cue téé yíndaha ñaha xii ñáyiú sàndáá iní tnúhu Jèsús. <sup>19</sup>Te té Páblú ní dándácõo váha ñaha-dé xii-güedé, te ní xáha<sup>n</sup>-dé nàcuáa ní quide Yá Ndiöxí ní chindee ñaha-gá xii-dé ní cáhá<sup>n</sup>-dé tnúhu-gá núu ñáyiú ñǎ túú cùu ñáyiú isràél. <sup>20</sup>Te sátá ñí yáha ní cáhá<sup>n</sup>-dé, te ní ndácá<sup>n</sup> tǎhú-yu núu Yǎ Ndiöxí cuendá nchaa sá ñí quide-gá. Te dàtnùní ní xáha<sup>n</sup>-güedé xii té Páblú:

—Yòhó sa ñaha-n sá ñí cuu titní mǐl ñáyiú isràél ní sàndáá iní-yu tnúhu Jèsús, te càchí-yu sá ño xini ñuhu-xi cadá-yu nchaa nàcuáa càhá<sup>n</sup> tnúhu sá ñí chídó tnùní ndíi Moisés. <sup>21</sup>Te ní níhí-yu tnúhu sá dácuàha-n ñáyiú isràél ñáyiú ndècu ñuú xícá cuendá sá vǎ cadá-gǎ-yu nàcuáa ní cachí ndíi Moisés cadá-yu. Te xǎha<sup>n</sup>-n xii-yu sá vǎ cuǎha-gǎ-yu sèñǎ ñíi landú-yu, te vǎ cadá-gǎ-yu dàtnǎ ní xóo cada ñáyiú ndéé sanaha, duha dàcuaha-n ñáyiú ní níhí-yu tnúhu. <sup>22</sup>Te na níhí-yu tnúhu sá ndécú-n ñha, te tnáví ngúíta-yu cáhá<sup>n</sup> cuèhé-yu cuendá-n. <sup>23</sup>Te na càchí tnúhu-ndí nàcuáa cada-n. Ndècu cúmí cue téé vátá cadá-gǎ-güedé nàcuáa ní cáhá<sup>n</sup> méé-güedé sá cadá-güedé cuendá nduu vétú iní Yǎ Ndiöxí. <sup>24</sup>Te quíhí<sup>n</sup>-n ndíhi-güedé te cada-n nchàa nàcuáa ní xóo cada ñáyiú ndéé sanaha cuendá nduu vétú iní Yǎ Ndiöxí. Te tava-n díhú<sup>n</sup> cuu núú-güedé cháhu-güedé veñúhu, te duca<sup>n</sup> te dàtnùní ndacu dèté díquí-güedé. Nchaa xíǎ<sup>n</sup> cada-n, te quini ñáyiú sá ñǎ ndáá tnúhu càhá<sup>n</sup> nchaa ñáyiú càhá<sup>n</sup> cuèhé cuendá-n.

Te na cùnuní iní-yu sá tnàhá-n quide-n nchaa nacuáa ní chídó tnùní ndíi Moisés cadá-yu. <sup>25</sup>Te sa ní quide ndáá-ndí cuendá nchaa ñáyiú ñuú xícá, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáhá<sup>n</sup> ndaha nchaa ñáyiú-án sã vã cáxí-yu nchaa sá nchító-ó ndúu táhú nchaa sá cächí-yu cùu ndióxí ní cadúha cue ñáyiú ñuyíú-a. Te ní xáha<sup>n</sup>-ndí sá vã cáxí-yu níñí, te vã cáxí-yu cuñú nchaa quití cuèhné. Te vã càhá<sup>n</sup> ndíhi cue téé ñadìhí te núu ñá díú ñadìhí-güedé cúú-yu, te ni cuè ñáyiú dìhí vã càhá<sup>n</sup> ndìhí-yu téé te núu ñá díú yíí-yu cùu-güedé. Duha ní tee-ndí núu tütú cuáhá<sup>n</sup> —cächí-güedé xáha<sup>n</sup>-güedé xii té Páblú.

**Ní tñii-güedé té Páblú  
xití veñúhu ñáyiú isràél**

<sup>26</sup>Te nduu tnéé cuáhá<sup>n</sup> té Páblú ndíhi cúmí cue téé veñúhu càhnu sá ìo cùnuu núu ñáyiú isràél cada-güedé nàcuáa ní xóo cada ñáyiú ndéé sanaha cuendá nduu vétú iní Yã Ndiòxí. Te ní quíhu-dé veñúhu càhnu sá ìo cùnuu-án ní xáha<sup>n</sup>-dè ná daha-gá nduu cùmání dandìhi-güedé nàcuáa ní xóo cada ñáyiú ndéé sanaha, te dàtnuní cànehe-güedé sá ndúú táhú Yã Ndiòxí quíhí<sup>n</sup> veñúhu.

<sup>27</sup>Te cùmání-gã cuu úsá nduu sá ní sáhá<sup>n</sup>-güedé veñúhu càhnu sá ìo cùnuu, te sa ndècu tucu té Páblú veñúhu. Te cue téé isràél véxi distritú Àsiá ní xiní-güedé té Páblú yíhí-dé veñúhu, te ní tñii ñaha-güedé xii-dé, te ío ní càhá<sup>n</sup> cuèhé-güedé cuendá-dé núu

dàva-gá ñáyiú yíhi veñúhu cuendá sá cúdèè<sup>n</sup>-yu núu té Páblú. <sup>28</sup>Te níhi ní càhá<sup>n</sup>-güedé, te xáha<sup>n</sup>-güedé xii-yu:

—iNchòhò ñáyiú isràél, yáchí-ndó chì cuánundaha ñaha-ndo! Chi téé-a yayàcá<sup>n</sup> cuáhá<sup>n</sup>-dé càhá<sup>n</sup>-dé sá ñà túú nàndíhi-o, te càhá<sup>n</sup>-dé sá vã cadá-ó nchàa nacuáa càhá<sup>n</sup> tnúhu sá ní chídó tnùní ndíi Moisés, te cächí-dé sá ñà túú nàndíhi veñúhu-a. Te ñá díú-ní xǎ<sup>n</sup> chi sa ní quíhu-dé veñúhu-a ndíhi cue téé ñá túú cùu ñáyiú isràél, te sá dúcá<sup>n</sup> ní quide-dé, te ñá túú-gã ní cànehe íi-dé xití veñúhu. Te veñúhu-a cùu-xi vehe Yã Ndiòxí —cächí-güedé xáha<sup>n</sup>-güedé xii-yu.

<sup>29</sup>Te duca<sup>n</sup> ní càhá<sup>n</sup>-güedé chi ní sani iní-güedé sá ní quíhu ndíhi-dé té Tròfimú veñúhu-güedé, chi ní xiní-güedé xícá cùu ndíhi ñaha-dé xití ñuú. Te téé-án cúú-dé téé ñuú Éfesú, te ñá díú tée isràél cúú-dé.

<sup>30</sup>Te chitu ñáyiú ñuú-án ní tacá-yu ní tñii-yu té Páblú tãñùhu ñahá-yu ní ndee veñúhu càhnu sá ìo cùnuu, te òré-ni ní nacadí-güedé yèhe veñúhu-án. <sup>31</sup>Te sa cahní-yu té Páblú ní cùu, te ní sáhá<sup>n</sup> ií<sup>n</sup> úú-güedé núu ndécú tée cùu capitá<sup>n</sup> cúnùu-gá, te ní xáha<sup>n</sup>-güedé xii-dé sá ncháá ñáyiú ñuú Jerusàlén xǎnàa-yu. <sup>32</sup>Te òré-án cuáhá<sup>n</sup> téé cùu capitá<sup>n</sup> cúnùu-gá ndíhi dava-gá cue téé nchìcú<sup>n</sup>-gá ndíhi sandàdú-dé. Te òré ní xiní-yu ní quexìo coyo-güedé núu xixúcu-yu, te ní yùhú-yu ñá túú-gã ní caní-yu té Páblú. <sup>33</sup>Te téé cùu capitá<sup>n</sup> ní sátuha-dé té Páblú, te ní xáha<sup>n</sup>-dè xii cue sandàdú-dé sá tñí ñaha-güedé dacùtu ñaha-güedé úú cadená. Te dàtnuní ní xícá<sup>n</sup> tnúhú-dè núú-yu, te xáha<sup>n</sup>-dè:

—¿Ná cúu tée-a? ¿Ná ní quide-dé? —càchí-dé xăha<sup>n</sup>-dě xíi-yu.

<sup>34</sup>Te tée cùu capitá<sup>n</sup>-á<sup>n</sup> ñă ní cùtnuní iní-dé nũu ná cúu să ní quide té Păblú, chi uu<sup>n</sup>ni ní cuáá-yu. Te tucu căhá<sup>n</sup> i<sup>n</sup>, tucu căhá<sup>n</sup> i<sup>n</sup>-yu, núu xǎ<sup>n</sup> ní xăha<sup>n</sup>-dě cue sandàdú-dé sá cándèca ñaha-güedé xii-dé quíhí<sup>n</sup> cuàrtél núu ndécú-güedě. <sup>35-36</sup>Te nchicú<sup>n</sup> ñáhă-yu cuáhá<sup>n</sup> ní quexìo ndéé năcuáa căa nchìo cuiní-yu cahni ñáhă-yu xii-dé ni cùu. Te níhi ní cáhá<sup>n</sup>-yu xăhă<sup>n</sup>-yu sá cahní ñaha-güedé, te xǎ<sup>n</sup> ní ndacani ñaha-güedě ndécá ñaha-güedé cuásáa nchìo-ă<sup>n</sup>.

**Té Păblú xăha<sup>n</sup>-dě xii-güedé sá ñà túú cuěchi-dé**

<sup>37</sup>Te cuánguïhu-güedé cuàrtél ndihí té Păblú ní cùu, te ní xăha<sup>n</sup>-dě xii tée cùu capitá<sup>n</sup> cùnũu-gá:

—Căhá<sup>n</sup> ndăhú-í núu-n cùndetu-n na cúñaha-ï i<sup>n</sup> úú tnúhu xíi-yu —càchí-dé xăha<sup>n</sup>-dě.

Te tée tàxi tnuní-á<sup>n</sup> ní xăha<sup>n</sup>-dě:

—¿Năa tnăhá yòhó căhá<sup>n</sup>-n tnúhu grìegú? <sup>38</sup>Te ní cáhà<sup>n</sup>-í sá tée ègiptú cúu-n, chi diu-n ní ndúcú-n cuè tée ní nàa ndihí tée cùchiu<sup>n</sup> Césár ní cáhà<sup>n</sup>-í, chi diu i<sup>n</sup> tée yàcá<sup>n</sup> ní ndúcú-dě cúmí mǐl cue tée ní sahní ndíyi. Te ndèca tnaha-güedé ní sáhá<sup>n</sup> xití yucu ní xíhi váha-güedé —càchí-dé xăha<sup>n</sup>-dě xii té Păblú.

<sup>39</sup>Te té Păblú ní xăha<sup>n</sup>-dě:

—Ñă díú tée ègiptú cúu-í, chi tée isràél cúu-í, chi diu-ni tée isràél cúu tătà-í, te dicó-ni sá ní cacu-í ñuú Tàrsú ñuú cahnú, te ñuú-ă<sup>n</sup> yíndèhu-xi distritú Ciliciá. Te cuiní-í cada ndee iní-n dàña-n

na cahá<sup>n</sup> ndihí-í-yu —càchí-dé xăha<sup>n</sup>-dě.

<sup>40</sup>Te ní xăha<sup>n</sup> tée cùu capitá<sup>n</sup> cùnũu-gá sá cúu căhá<sup>n</sup> té Păblú, núu ní ngúnutnfi-dé núu nchìo, te ní quide-dé ndaha-dé sá cùndèdòho-yu. Te ní sadí-yu yuhú-yu, te ní cáhá<sup>n</sup>-dé tnúhu ñăyiú isràél, te xăha<sup>n</sup>-dě xíi-yu:

**22** —Chí cádá căhnu iní nchòhó cue tée sa cuéhé ndihí nchòhó cue tée cuechi, na cáhá<sup>n</sup>-í i<sup>n</sup> tnúhu cundèdòho-ndo să ñà túú cuěchi-í, chi ñà túú ñă ní quide-í, te ni ñà túú ñă tnúhu cáhá<sup>n</sup>-í —càchí-dé xăha<sup>n</sup>-dě xii-güedé.

<sup>2</sup>Te cuendá sá dúcá<sup>n</sup> ní cáhá<sup>n</sup>-dé tnúhu mée-yu núu tnàvíi-ñă ní sadí-yu yuhú-yu ní xíndedòho-yu ní cáhá<sup>n</sup>-dé, te xăha<sup>n</sup>-dě:

<sup>3</sup>—Yúhú cúu-í tée isràél, te ní cacu-í ñuú Tàrsú, te ñuú-ă<sup>n</sup> yíndèhu-xi Ciliciá. Te davitna líhli-í cùtnăhá ní quexìo-í ñuú Jerusalén ní dăcuáhă ñaha té Gamaliél. Te ní dăcuáhă-í nchaa tnúhu ní chídó tnùnì nchaa cue tée ndéé sanaha năcuáa cada ñăyiú. Te yúhú ní cahu iní-í ní quide-í titní núu chùu<sup>n</sup> nacuáa cuu váha iní Yă Ndiöxí ní cáhà<sup>n</sup>-í, te diu-ni duca<sup>n</sup> quide nchohó tucu. <sup>4</sup>Te ní sánú ndúcú-í nchaa ñăyiú sàndáá iní-xi tnúhu Jèsús, cuéi tée, cuéi ñăyiú dñhí ní dácútù-í-yu, te ní chihi-í-yu vecaá, te ní níhi-í tnúhu ndee iní sá cahní-ndí-yu.

<sup>5</sup>Te dútú cùnũu-gá ndihí cue tée cùnũu núu-ndó ñaha-güedé sá ndàá cáhá<sup>n</sup>-í chi mee-güedé ní taxi-güedé tutú cuñaha-ï xii ñăyiú isràél ñăyiú ndècu ñuú Dàmascú cuendá cutnùnì iní-yu ná chíú<sup>n</sup> cuáhá<sup>n</sup>-í ní

cùu. Te ñuhu-í ichi cuáhá<sup>n</sup>-í ñuú-á<sup>n</sup> cuánúndúcù-í ñáiyu ní sándáá iní-xi tnúhu Jèsús cuendá dacùtu-í-yu te candeca-í-yu ndixi, te iha cada úhú ñáhá-güedë xií-yu ni cùu.

**Té Páblú xáha<sup>n</sup>-dë xii ñáiyu nàcuáa ní cuu ní tuha-dé ichi Jèsús**

(Hch. 9:1-19; 26:12-18)

<sup>6</sup>Te ta cùyatni-í ñuú Dàmascú cuáhá<sup>n</sup>-í, te cùu-xi datná òré cauxúu nduu, te uu<sup>n</sup>ni ní quee ñuhú andiu, te ní dáyèhé-xi ndéé núu nútnñ-í.

<sup>7</sup>Te ní quide nee-xi núu-í, xiá<sup>n</sup> ní nduá-í ndéé ñuhu. Te ní tecú dóho-í càhá<sup>n</sup> ì<sup>n</sup> sá càhá<sup>n</sup> andiu, te càchí-xi: “Yòhó té Sàulú, ¿ná cuendá cúu úhú iní ñáhá-n dàndoho ñaha-n xii-í?”, càchí sá càhá<sup>n</sup>-á<sup>n</sup>. <sup>8</sup>Te ní xáha<sup>n</sup>-í: “¿Ná cúu yòhó sá càhá<sup>n</sup>-ái<sup>n</sup>?”, xáha<sup>n</sup>-í. Te ní càhá<sup>n</sup> tucu ingá xito te càchí-xi: “Yúhú cúu-í Jèsús téé ní xíndecu ñuú Nazàrét, te duca<sup>n</sup> ño dàndoho ñaha-n xii-í”, càchí sá càhá<sup>n</sup>-á<sup>n</sup>. Te xiá<sup>n</sup> ní cutnùní iní-í sá díú Jèsús càhá<sup>n</sup>. <sup>9</sup>Te nchaa cue téé ndíhi-í ní xiní-güedé ní dáyèhé ñuhú, te ní yùhú-güedé, dico ñá túu ní tècú dóho-güedé òré ní càhá<sup>n</sup>-gá.

<sup>10</sup>Te ní xáha<sup>n</sup>-í xii-gá: “Yòhó Xítóhó Jesucristú, ¿ná cuiní-n càda-í?”, xáha<sup>n</sup>-í xii-gá. Te ní cachí-gá: “Ndacóo, te quíhí<sup>n</sup>-n ñuú Dàmascú, yàcá<sup>n</sup> tecú tnúhu-n nchàa nacúaa cuiní Yá Ndiöxí cada-n”, càchí-gá — càchí té Páblú xáha<sup>n</sup>-dë xií-yu.

<sup>11</sup>Te ní xáha<sup>n</sup> tùcu té Páblú:

—Te cuendá sá ñí dácúaa ñaha ñuhú xii-í ñuu ní tññ cue téé ndíhi-í ndaha-í ndécá ñaha-güedé cuáhá<sup>n</sup> ndéé ñuú Dàmascú.

<sup>12</sup>Te yàcá<sup>n</sup> ndécú ì<sup>n</sup> téé nàni Ananiás, te ío vai sá ñí chídó tnùní

ndíi Moisés cadá-yu quide-dé. Te nchaa ñáiyu ñuú Dàmascú ío váha càhá<sup>n</sup> ndíhi ñáhá-yu xii-dé. <sup>13</sup>Te ní quexio-dé núu ndécú-í, te ní cachí-dé: “Yòhó té Sàulú, téé ndècu ndíhi-í ichi Xítóhó Jesucristú, ndúha núu-n”, càchí-dé. Te òré-ni ní nacaá<sup>n</sup> núu-í te ní xiní-í-dé. <sup>14</sup>Te dàtnùní ní cachí-dé: “Yá Ndiöxí ní càhá<sup>n</sup> ndíhi-gá ñaní tnáhá-ó ñí xíndecu ndéé sanaha. Te diu-gá ní caxi ñaha-gá xii-n cuendá quiní-n nchàa sá vâha cuiní-gá cada-n. Te quiní-n Jèsús Yáá ñá túu cuèchi-xi, te diu-ni mee-gá càhá<sup>n</sup> ndíhi ñaha-gá xii-n. <sup>15</sup>Te càhá<sup>n</sup>-n tnúhu Jèsús núu nchàa ñáiyu, te càhá<sup>n</sup>-n nchàa sá ñí xiní-n ndíhi nchaa sá ñí xíndedóho-n. <sup>16</sup>Tnávíi, te quíhí<sup>n</sup>-n cuandute-n, te càhá<sup>n</sup> ndíhi-n Yá Ndiöxí cuendá cada càhnu iní-gá nchaa sá cuèhé sá dúhá ñí quide-n”, duha ní cachí té Ananiás xii-í — càchí té Páblú xáha<sup>n</sup>-dë xií-yu.

**Té Páblú ní cani-dé cuendú nàcuáa ní xáha<sup>n</sup> Jèsús cada-dé quíhí<sup>n</sup>-dë ñuú núu xíndecu ñáiyu ñá túu cùu ñáiyu israhél**

<sup>17</sup>Te ní xáha<sup>n</sup> tùcu té Páblú:

—Te ní ndee-í cuándixi-í ñuú Jerusalén. Te ní sáhá<sup>n</sup>-í veñúhu càhnu sá ño cùnuu ní càhá<sup>n</sup> ndíhi-í Yá Ndiöxí, te ní dácótó núu ñáhá-xí sá méé Jèsús ní xiní-í xití veñúhu, <sup>18</sup>te ní cachí-gá: “Yáchí, quee-n ñuú Jerusalén, chí ñáiyu-a vá quíndáá iní-yu nàcuáa ní cachí-í cúñaha-n xii-yu cuendá-í”, duha ní cachí-gá xii-í. <sup>19</sup>Te ní xáha<sup>n</sup>-í xii-gá: “Yòhó Xítóhó Jesucristú, sa xiní-n sá ncháá ñáiyu ñáhá-yu sá ñí sáhá<sup>n</sup>-í ndí tnahá ì<sup>n</sup> ndí tnahá ì<sup>n</sup> veñúhu



nànducu-í ñáyiù sàndáá iní tnúhu-n, te ní tñii-í-yu, ní chihi-í-yu vecaá, te ní táuchíú<sup>n</sup>-í ní caniha-güedé xií-yu. <sup>20</sup>Te cútñhá ní sahani-güedé ndíi Těvá tée ní xóo cáhá<sup>n</sup> tnúhu-n, te tñhá-í ndécú órě-á<sup>n</sup> te ní xíndeé-í dóó cue tée ní sahani ñaha xii ndíi. Te yúhú ní cáhá<sup>n</sup>-í sá nǐ quide váha-güedé sá dúcá<sup>n</sup> nǐ quide-güedé”, duha ní xáha<sup>n</sup>-í xii-gá. <sup>21</sup>Te ní cachí tnúhu-gá xii-í: “Cuàhá<sup>n</sup> chi cuíní-í quíh<sup>n</sup>-n nchàa ñuú xicá nǐú xíndecu cue ñáyiù ñá túú cùu ñáyiù isràèl cáhá<sup>n</sup>-n tnúhu-í”, càchí-gá —càchí té Pàblú xáha<sup>n</sup>-dě xií-yu.

**Te Pàblú ndihi tée tàxi tñuní ñáhá xii cue sandadú**

<sup>22</sup>Te sá dúcá<sup>n</sup> nǐ cáhá<sup>n</sup>-dé, te ñá ní tñhá-gá iní-yu cundedóho-yu tnúhu càhá<sup>n</sup>-dé. Te ì<sup>n</sup>-ni ní cuú-yu nchaá-yu, te ní cuáá-yu, te xáh<sup>n</sup>-yu:

—iChí cáhni-dě! iÑá díú sǎ cùndècu-dé ñuyú-a! —càchí-yu xáh<sup>n</sup>-yu.

<sup>23</sup>Te mei órě duca<sup>n</sup> nǐ cáhá<sup>n</sup>-yu, te ní ndátǎ-yu dóó-yu, te ní dáquéně-yu núú ñnu sá sàtú iní-yu. Te ní quéhnu-yu ñuhu, te ní dácàcòyó-yu núú ñnu sá ò sàtú iní-yu. <sup>24</sup>Te tée cùu capitá<sup>n</sup> cùnùu-gá ní xáha<sup>n</sup>-dě xii cue sandadú-dé:

—Chí dítá-dě ná quíhu-dé ndéé xití vehe, te cani-ndo-dě ñii, chi na quène yuhu-dé ná tnúhu ní cáhá<sup>n</sup>-dé nǐú ndéé dúcá<sup>n</sup> cùdèé<sup>n</sup>-yu núú-dě —càchí-dé xáha<sup>n</sup>-dě xii-güedé.

<sup>25</sup>Te sàtá nǐ dácútú ñaha-güedé xii té Pàblú sá cání ñaha-güedé

ní cùu, te ní xáha<sup>n</sup>-dě xii tée cùu capitá<sup>n</sup> ndécú-á<sup>n</sup>:

—Te na càchí tnúhu-í sá vǎ cùú cànaha-güedé ñii, chi tée ròmá cùú-í, te vátá quini ndáá-gá-ndó nǐú ndècuéchi-í àdi ñáhá —càchí-dé xáha<sup>n</sup>-dě xii tée cùu capitá<sup>n</sup>.

<sup>26</sup>Te sá dúcá<sup>n</sup> nǐ cáhá<sup>n</sup>-dé, te ní sáhá<sup>n</sup> tée cùu capitá<sup>n</sup> núú tée cùnùu-gá, te ní xáha<sup>n</sup>-dě:

—Vá cùú cànì-o tée-á<sup>n</sup>, chi tée ròmá cùú-dě —càchí-dé xáha<sup>n</sup>-dě.

<sup>27</sup>Te ní sáhá<sup>n</sup> tée cùu capitá<sup>n</sup> cùnùu-gá ndéé núú tǎ Pàblú, te ní xáha<sup>n</sup>-dě:

—Cáhá<sup>n</sup> ndáá-n nǐú ndisa tée ròmá cùú-n —càchí-dé xáha<sup>n</sup>-dě.

Te ní xáha<sup>n</sup> tǎ Pàblú:

—Ndáá sá tǎe ròmá cùú-í —càchí té Pàblú xáha<sup>n</sup>-dě xii tée cùnùu-á<sup>n</sup>.

<sup>28</sup>Te ní xáha<sup>n</sup> tǎe cùnùu-á<sup>n</sup>:

—Yúhú tñhá-í cùú-í tée ròmá, chi vài díhú<sup>n</sup> nǐ cháhu-í —càchí-dé xáha<sup>n</sup>-dě.

Te té Pàblú ní xáha<sup>n</sup>-dě:

—Tñhá-í cùú-í tée yàcá<sup>n</sup> tucu, chi tǎtǎ-í cùú-dě tée ròmá —càchí té Pàblú xáha<sup>n</sup>-dě xii tée cùu capitá<sup>n</sup> cùnùu-gá.

<sup>29</sup>Te uu<sup>n</sup>ni ní nacaca sata cuè tée cuáhá<sup>n</sup> caniha xii-dé ní cùu. Te ní yúhú tée tàxi tñuní sá dúcá<sup>n</sup> nǐ xáha<sup>n</sup> tǎ Pàblú sá tǎe ròmá cùú-dě, chi ní xáha<sup>n</sup>-dě ní dácútú ñaha-güedé xii-dé, núú xiá<sup>n</sup> ní yúhu-dé.

**Té Pàblú ní cáhá<sup>n</sup> ndihi-dé cue tée cùnùu órě ní quide-güedé jùndá**

<sup>30</sup>Te tée tàxi tñuní sandadú ñá ní xini-dé ná cuéchi ní dácáá ñáyiù isràèl díquí tǎ Pàblú, núú xiá<sup>n</sup> nduu

tněé ní cana-dé cue dútú cúnùu, ndìhi cue tée cùchiu<sup>n</sup>, ndìhi cue tée cùu sacuéhé, te ní xáha<sup>n</sup>-dě sá cáda-güedě jündá cuendá nducu tnùhu-güedé núú tē Păblú ná cuéchi ní dácáá-yu díquí-dě. Te ní xáha<sup>n</sup>-dě xii cue sandàdú sá nándàxi ñaha-güedé cadená ndútú-dě, te candeca ñaha-güedé quíh<sup>n</sup> núú cáda-güedě jündá. Te ní sáhá<sup>n</sup>-güedé ní nandaxi ñaha-güedé xii-dé ndécá ñaha-güedé cuáhá<sup>n</sup> jündá, te ní quexìo-güedé, te ní ngúnutnîí-dé núú cuè tée cùchiu<sup>n</sup>.

**23** Te yàcá<sup>n</sup> ní xíndéhé vâha té Păblú núú nchàa-güedé, te ní xáha<sup>n</sup>-dě:

—Cada càhnu iní nchòhó cue tée cùchiu<sup>n</sup>, te duca<sup>n</sup> nchòhó cue tée cùu sacuéhé, véxi-í càchí tnùhu-í sá ñà túú cuèchi-í, chi mee Yă Ndiöxí nâhá-gă nása ndècu-í ñuyíu-a, te ñà túú cùcaha<sup>n</sup> núú-í núú-gă —càchí tē Păblú xăha<sup>n</sup>-dě xii-güedé.

<sup>2</sup>Te tē Ananiás tē cùu dútú cúnùu-gá ní xáha<sup>n</sup>-dě xii cue tēe nùtnîí yatni dîñi tē Păblú sá cání-güedě déhndé yuhu-dé. <sup>3</sup>Te tē Păblú ní xáha<sup>n</sup>-dě xii dútú-ă<sup>n</sup>:

—Yòhó, chi úhú tnàhí iní-n, chi ní ndúcú-n tēe ní caniha xii-í, te ñà túú cuèchi-í, dico quiní-n nă cada ñaha Yă Ndiöxí xii-n. Te yòhó ní cana ñaha-n ndùcu tnùhu-n nùu quide-í nchaa nàcuáa càhá<sup>n</sup> tnùhu sá nî chídó tnùnî ndîi Moisés cada-o. Te mee-n nî ndúcú-n tēe ní caniha, te ñà túú dùca<sup>n</sup> ní càhá<sup>n</sup> ndîi cada-o —càchí tē Păblú xăha<sup>n</sup>-dě xii dútú cúnùu-gă-ă<sup>n</sup>.

<sup>4</sup>Te cue tēe xînutnîí dîñi tē Păblú ní xáha<sup>n</sup>-güedě xii-dé:

—Nèhé ní quide-n chi ní xícuéhé-n dútú cúnùu-gá tēe xínu cuechi

núú Yă Ndiöxí —càchí-güedé xăha<sup>n</sup>-güedě xii tē Păblú.

<sup>5</sup>Te tē Păblú ní xáha<sup>n</sup>-dě xii-güedé:

—Cada càhnu iní-ndó chi ñà túú xìnî-í sá dútú cúnùu-gá cúú-dě, chi núú tútú Yă Ndiöxí càchí-xi sá vă cúú cãhá<sup>n</sup> cuèhé-ó cuendá ï<sup>n</sup> tēe cùnùu ñuú-ó yòtnùhu. Te yúhú ñà túú xìnî-í sá tēe cùnùu cuu-dé nùu ní sácóo-í ní càhá<sup>n</sup>-í —càchí tē Păblú xăha<sup>n</sup>-dě xii-güedé.

<sup>6</sup>Te òrè-á<sup>n</sup> nî cutnùnî iní tē Păblú sá dává-güedě cündîhi-güedé cue tēe cùu saducéú, te dava-güedé cündîhi-güedé cue tēe cùu fariséú, te níhi ní càhá<sup>n</sup>-dé ní xáha<sup>n</sup>-dě xii-güedé:

—Yúhú cúú-í tēe fariséú, te tnàhá tătà-í ndìhi xî-í cúú-güedě cue tēe fariséú tucu. Te tnàhá yúhú sàndáá iní-í sá ndótó nchàa ñáyiu ní xíhí, te núu xíă<sup>n</sup> cuinî-ndó ndùcu tnùhu-ndo nùú-í cáná ñaha-ndo —cachí-dé xăha<sup>n</sup>-dě xii-güedé.

<sup>7</sup>Te sá dúcá<sup>n</sup> nî càhá<sup>n</sup>-dé xíă<sup>n</sup> ní nàá ndìhi tnàha cue tēe cùu fariséú ndìhi cue tēe cùu saducéú, chi ñà ï<sup>n</sup>-ní tnùhu ni cãhá<sup>n</sup>-güedé, chi ní ndi quehe<sup>n</sup> ndi quehe<sup>n</sup>-güedé sá nî càhá<sup>n</sup>-güedé. <sup>8</sup>Te cue tēe cùu saducéú càchí-güedé sá vă ndótó cuè ñáyiu ní xíhí, te cue tēe cùu fariséú càchí-güedé sá ndótò-yu. Te cue tēe cùu saducéú càchí-güedé sá ñà túú espíritú xínú cuèchi núú Yă Ndiöxí, te cue tēe cùu fariséú càchí-güedé sá ió espíritú xínú cuèchi núú-gă. <sup>9</sup>Te ta cùdée<sup>n</sup>-güedě cuáhá<sup>n</sup>, te níhi-gá cúú iní-güedé càhá<sup>n</sup>-güedé, te ï<sup>n</sup> úú cue tēe cùu fariséú cue tēe dàcuaha ñaha xii ñáyiu nchaa tnùhu ní chídó tnùnî

ndíi Moisés ní cáhá<sup>n</sup> níhi-güedé, te xáha<sup>n</sup>-güedé:

—Ná túú cuèchi-dé, te cudana te ní cáhá<sup>n</sup> ndíhi-dé ì<sup>n</sup> espíritú xínú cuèchi núú Yă Ndiõxí te vá ngõo vá cúú vâha iní-ó nũú-gă —càchí cue tée cùu fariséú xáha<sup>n</sup>-güedé xii-güedé.

<sup>10</sup>Te cuendá sá ìo xĩnàá-güedé, xíá<sup>n</sup> ní yùhú tée cùu capitá<sup>n</sup> cúnùu-gá sá cáhni-güedé té Păblú, núú xíá<sup>n</sup> ní xáha<sup>n</sup>-dé sá quĩh<sup>n</sup>-güedé cúnúcuaca ñaha-güedé candeca ñaha-güedé nùhú cuàrtél.

<sup>11</sup>Te ndéé niú cúú ùú ní quexìo Xítóhó Jesucristú núú ndécú tè Păblú, te ní xáha<sup>n</sup>-gă:

—Ñíi cunduu-n, vá yùhú-n, chi nàcuáa ní cáhá<sup>n</sup>-n nĩ cacunehe ñaha-n xii-í iha, te diu-ni duca<sup>n</sup> cáhá<sup>n</sup>-n càcunehe ñaha-n xii-í quĩh<sup>n</sup>-n ñùú Rómá —càchí-gá xáha<sup>n</sup>-gă xii-dé.

#### Cahni-güedé té Păblú ní cùu

<sup>12-13</sup>Te nduu tnéé ní natacá vìhi-gá údico cue tée isràél ní ndatnúhu-güedé sá cáhni-güedé té Păblú, te ní xitnàha-güedé:

—Ni dítá vă caxí-ó te ni ndùte vá cohó-ó ndéé ndacu-o càhni-o té Păblú, te dàtnùní caxi-o dítá, te coho-o ndùte, chi sa ní sani iní-ó sã cádá-ó, te cuu cuèchi xii-o nũú vá cádá-ó —càchí-güedé xitnàha-güedé.

<sup>14</sup>Te ní sáhá<sup>n</sup>-güedé núú ndécú nchàa dútú cúnùu ndíhi nchaa cue tée cùu sacuéhé, te ní xáha<sup>n</sup>-güedé:

—Ní cachí-ndí sá ni dítá vă caxí-ndí ndéé nũú ní ndacu-ndí ní sahani-ndí té Păblú, chi sa ní

sani iní-ndí sá cádá-ndí, te cuu cuèchi núú vá cádá-ndí. <sup>15</sup>Te duha cada-ndo ndíhi dava-gá cue tée cúnùu, chi cùñaha-ndo xii tée cùu capitá<sup>n</sup> cúnùu-gá: “Quixi ndíhi-n tè Păblú núú ndécú-ndí cuendá ndatnúhu ndíhi-ndí-dé, chi cuiní-ndí nducu tnũhu váha-gá-ndí ná cúú sã nĩ quide-dé”, duha cùñaha-ndo xii tée tàxi tnuní sandádú. Te duca<sup>n</sup>-ni cùñaha-ndo dândahú-ndó-güedé cuendá quixi ndíhi-güedé té Păblú, te nchúhú sa cundetú-ndí-güedé ichi, chi quiní té Păblú ná cahni-ndí-dé —càchí-güedé xáha<sup>n</sup>-güedé xii cue tée cùchiu<sup>n</sup>.

<sup>16</sup>Te déhe cùha té Păblú ní níhi-dé tnúhu nàcuáa cada-güedé dító-dé. Te ní sáhá<sup>n</sup>-dé cuàrtél, te ní xáha<sup>n</sup>-dē xii dító-dé nàcuáa càhá<sup>n</sup>-güedé cada ñaha-güedé. <sup>17</sup>Te ní cana té Păblú ì<sup>n</sup> tée cùu capitá<sup>n</sup>, te ní xáha<sup>n</sup>-dē:

—Vă cùndèe iní-n, quĩh<sup>n</sup> ndíhi-n tēe-a na càhá<sup>n</sup> ndíhi-dé tée cúnùu-gá, chi ndècu ì<sup>n</sup> cuendú cùñaha-dē cuiní-í —càchí té Păblú xáha<sup>n</sup>-dē xii tée cùu capitá<sup>n</sup>.

<sup>18</sup>Te dàtnùní ní xica tée cùu capitá<sup>n</sup> ndécá-dē dăxí<sup>n</sup> tè Păblú cuáhá<sup>n</sup> núú ndécú tēe cúnùu-gá, te òré ní quexìo-güedé núú-dē, te ní xáha<sup>n</sup> tēe cùu capitá<sup>n</sup> xii-dé:

—Té Păblú tēe vìhi vecaá ní cana ñaha-dē xii-í, te ní cachí-dé véxi-í ndíhi tēe-a cuendá cachí tnúhu-dé ì<sup>n</sup> cuendú cuiní-dé —càchí-dé xáha<sup>n</sup>-dē xii tēe cúnùu-gá.

<sup>19</sup>Te tēe cúnùu-á<sup>n</sup> nĩ tnií-dé ndaha dăxí<sup>n</sup> tè Păblú, te tànehe ñaha-dé cuáhá<sup>n</sup> ì<sup>n</sup> xio, te ní xícá<sup>n</sup> tnúhú-dē núú-dē, te xáha<sup>n</sup>-dē:

—¿Ná cuendú cuiní-n cáhá<sup>n</sup>-n? —càchí-dé xáha<sup>n</sup>-dē xii dăxí<sup>n</sup> tè Păblú.

<sup>20</sup>Te ní xáha<sup>n</sup>-dě xii téé cùnuu-á<sup>n</sup>:

—Cue téé isràél ní ndatnúhu ndáá-güedé sá quíxí-güedé tneé cáhá<sup>n</sup> ndàhú-güedé núu-n càndeca-n té Pàblú quíhí<sup>n</sup> jùndá, te yàcá<sup>n</sup> cacá<sup>n</sup> tnúhú ndáá-güedé núu-dě ná cúú sá nǐ quide-dé, cächí-güedé xǐtnàha-güedé.

<sup>21</sup>Te vá quìndáá iní-n chi dicó dandàhú ñáhá-güedé, chi vihi-gá údico-güedé ndátnúhu-güedé cundedí-güedé ichi cahni ñaha-güedé. Te xǐtnàha-güedé sá ni dítá vǎ cǎxí-güedé, te ni ndüte vá còhó-güedé ndéé nǔu ní ndacu-güedé ní sahani ñaha-güedé, te dǎtnùni caxi-güedé dítá, te coho-güedé ndute, chi sa ní sani iní-güedé sá cǎdá-güedé, te cuu cuéchi núu vá cǎdá-güedé, cächí-güedé xǐtnàha-güedé. Te cundecu túha-ná-güedé cundetu ñaha-güedé tneé, te núu na quìndáá iní-n càndeca-n-dé quíhí<sup>n</sup> jùndá — cächí-dé xǎha<sup>n</sup>-dě xii téé cùnuu-á<sup>n</sup>.

<sup>22</sup>Te téé cùnuu-á<sup>n</sup> nǐ xáha<sup>n</sup>-dě:

—Cuanùhú, te vá yǒo tnàhí cùñaha-n sǎ nǐ quixi-n nǐ cachi tnúhu-n nàcuáa cǎhá<sup>n</sup>-güedé cada-güedé té Pàblú — cächí-dé xǎha<sup>n</sup>-dě.

**Ndèca-güedé té Pàblú cuáhá<sup>n</sup>  
núú tǎ Juéllí téé cùu gobiernú**

<sup>23</sup>Te téé cùnuu-gá ní cana-dé úú cue téé cùu capitá<sup>n</sup>, te xǎha<sup>n</sup>-dě: —Tava-ndo úú cièndú sandàdú cue téé xica saha, ndihi únídico úxí sandàdú cue téé yòdo cuayú, ndihi úú cièndú sandàdú mee-ni cuè téé xínehe lànzá. Te cada túha-ndo chi caca-ndo òrè caá í<sup>n</sup> niú quíhí<sup>n</sup>-ndó ñùú Cèsareá ndihi té Pàblú. <sup>24</sup>Te

nducu-ndo cuèdicó í<sup>n</sup> úú cuayú codo-dě ndihi cue téé ndèé ñáhá xii-dé. Te cada cuèdàdú-ndó-dě ichi, te candeca-ndo-dě quíhí<sup>n</sup> quíndeca-ndo-dě núú téé cùu gobiernú — cächí téé cùnuu-á<sup>n</sup> xǎha<sup>n</sup>-dě xii cue téé cùu capitá<sup>n</sup>.

<sup>25</sup>Te téé cùnuu-á<sup>n</sup> nǐ cadúha-dé tutú cuèndá quíhí<sup>n</sup> ndaha té Juéllí téé cùu gobiernú. Te duha ní chídó tnúni-dé núú tütú cuáhá<sup>n</sup>:

<sup>26</sup>“Còvǎha díí-n, tǎtǎ gobernàdór. Ío cada cǎhnu iní, yúhú nánì-í Clàudiú Lìsiás. Yúhú ní tendaha-í í<sup>n</sup> tutú véxi ndaha-n cuèndá quiní tnúni-n nàcuáa ní cuu iha.

<sup>27</sup>Cue téé isràél ní tnií-güedé í<sup>n</sup> téé nàni Pàblú cuini-güedé cahni ñaha-güedé ní cùu, te ní níhì-í tnúhu sá tǎe ròmá cúú-dě nǔu ní sáhá<sup>n</sup>-í ndihi sandàdú-í ní dǎcǎcu-ndí-dé. <sup>28</sup>Te ní cuini-í quiní-í ná cuèndá téé ñaha-güedé cuéchi xii-dé, núu xǎ<sup>n</sup> ndécà-í-dé ní sáhá<sup>n</sup> núú nǐ quide cue téé cùchiu<sup>n</sup> isràél jùndá. <sup>29</sup>Te yàcá<sup>n</sup> ní níhì-í tnúhu sá ñà túú nǎ cuéchi ni quide-dé, chi cuèndá-ni sá nǐ níhí-güedé tnúhu sá ñà túú sandáá iní-dé cada-dé nchaa sá nǐ xóo cada ñáyiú ní xíndecu ndéé sanaha nchìcú<sup>n</sup> nihnu-güedé quide-güedé, xǎ<sup>n</sup> ní cudéé<sup>n</sup>-güedé núu-dé. Te ñà túú cuéchi cǎhnu ni quide-dé nǔu quíhí<sup>n</sup>-dé vecaá àdi cahni-í-dé. <sup>30</sup>Te ní níhì-í tnúhu sá cuè téé isràél ndúcú-güedé nàcuáa cada-güedé cahni ñaha-güedé xii-dé, xǎ<sup>n</sup> ní xáha<sup>n</sup>-í xii sandàdú-í sá cándèca ñaha-güedé quixi xǎ<sup>n</sup>. Te ní xáha<sup>n</sup>-í xii cue téé tǎe ñaha cuéchi sá quíxí-güedé ndéé xǎ<sup>n</sup> cǎhá<sup>n</sup>-güedé nǔu ná cuéchi ní quide-dé. Te cada

càhnu iní-n chi duha-ni ndùu tnúhu càhá<sup>n</sup>-í, te cundee iní-n quèhe<sup>n</sup> cuendá-n-dě”, duha ní chídó tnùní tée ní cadúha tutú cuáhá<sup>n</sup> ndaha té Juélí.

<sup>31</sup>Te cue sandàdú ní quide-güedé nàcuáa ní xáha<sup>n</sup> tée tàxi tnuní ñáhá xii-güedé chi ní xica-güedé ndihi té Páblú òré caá í<sup>n</sup> niú, te diu-ni niú-á<sup>n</sup> ní quexio-güedé ñuú Antipatrís.

<sup>32</sup>Te sátá ní túndaá, te ní nacuico cuè tée xínehe lànzá ndihi dava-gá sandàdú xícá sàha cuánuhú-güedé cuàrtél, te mee-ná sandàdú cue tée yòdo cuayú cuáhá<sup>n</sup> ndihi té Páblú. <sup>33</sup>Te òré ní quexio-güedé ñuú Cèsareá, te ní sáha-güedé tée cùu gobiernú tutú néhé-güedé cuáhá<sup>n</sup>. Te ní quehe<sup>n</sup> cuendá-dé té Páblú. <sup>34</sup>Te sátá ní dácúhá tée cùu gobiernú-á<sup>n</sup> tutú-á<sup>n</sup> te ní xícá<sup>n</sup> tnúhú-dě núu tē Páblú, te xáha<sup>n</sup>-dě: —¿Ndèé tée cùu-n? —cachí-dé xáha<sup>n</sup>-dě.

Te ní xáha<sup>n</sup> tē Páblú:

—Tée Ciliciá cùu-í —càchí-dé xáha<sup>n</sup>-dě.

<sup>35</sup>Te ní xáha<sup>n</sup> tée cùu gobiernú-á<sup>n</sup>: —Òré quexio cue tée tē ñaha cuéchi xii-n, te cáhá<sup>n</sup>-n nása ní cuu, chi níhì-í nàcuáa cada ndáá-í cuendá-n —càchí-dé xáha<sup>n</sup>-dě xii té Páblú.

Te ní xáha<sup>n</sup>-dě xii sandàdú sá cùndèe-güedé té Páblú vehe càhnu té Hèrodés.

**Té Páblú xáha<sup>n</sup>-dě xii té Juélí sá ñà túu cuéchi-dé**

**24** Te sátá ní cuu úh<sup>n</sup> nduu, te té Ananiás dútú cùnùu-gá cuáhá<sup>n</sup>-dé ñuú Cèsareá ndihi cue tée cùu sacuéhé ndihi

ii<sup>n</sup> tée nàni Tértulú tée càhá<sup>n</sup> yuhu-güedé. Te cuáhá<sup>n</sup>-güedé núu tē cùu gobiernú cuáhá<sup>n</sup> dácúandèhnde-güedé núu-dě sá ndècuéchi té Páblú. <sup>2</sup>Te ní sánguaca-güedé té Páblú. Te òré ní quexio-dé núu-güedé, te ní nguíta té Tértulú xáha<sup>n</sup>-dě xii té Juélí nàcuáa càa cuéchi tē-güedé té Páblú:

—Ío càhnu cada iní tātá gobernàdór. Duha ndùu chiu<sup>n</sup> ndéé iní ñáhá-ndě xii-n vèxi-ndí, núu nása cachí-n cùnduu. Tàxáhu xii-n, chi ío váha ndècu nchaa ñáyiú, te ñá túu nàá-yu chi ío váha quide-n. <sup>3</sup>Te ío cùdífí iní-yu chi nchaa-ni nduu xíndecu váha-yu nchaá-yu, te ío táxáhu Ndiöxi xii-n sá dúcá<sup>n</sup> quide-n. <sup>4</sup>Te cada càhnu iní, cuiní-í ndatnúhu-o ii<sup>n</sup> úu-ni cuendú cuendá sá vā cùyàa-o dácúita-í chiu<sup>n</sup>-n. <sup>5</sup>Te ii<sup>n</sup> tée iha ío dásatú iní ñáhá-dě, chi ndèni ní cuu cuáhá<sup>n</sup>-dé ndátnúhu-dé ndihi ñáyiú isràél dánàa-dé-yu. Te nèhé quídé-dě chi cuáhá<sup>n</sup>-dé dácàhá<sup>n</sup>-dé nchaa ñáyiú cuendá quíndáa iní-yu tnúhu tée ní xíndecu ñuú Nazàret. <sup>6</sup>Chi duca<sup>n</sup> càhá<sup>n</sup> cue tée iha sá ní sáhá<sup>n</sup>-dé veñúhu càhnu sá ío cùnuu, te cuiní-dé daquèe tífú-dě veñúhu cuendá cuiní-dé xocàni-dé sá íi ndécú, núu xíá<sup>n</sup> ní tnií ñaha-güedé ndécá ñaha-güedé cuáhá<sup>n</sup> núu cuè tée cùchiu<sup>n</sup> cuendá caca<sup>n</sup> tnúhú-güedé núu-dě ñuú ná cuendá duca<sup>n</sup> cuiní-dé cada-dé, chi duca<sup>n</sup> càa leí ndécú ndihi-güedé sá cáda ndáa-güedé ñuú ná ii<sup>n</sup> sá cúu. <sup>7</sup>Te té Lisiú tée cùu capitá<sup>n</sup> cùnùu-gá ní quexio-dé ndihi sandàdú, te ní dácúnú-güedé nchaa cue tée

nùtní ndihi té Páblú, te dàtnùní ní tniî ñaha-güedë xii-dé ndécá ñaha-güedé cuáhá<sup>n</sup>. <sup>8</sup>Te sátá xǎ<sup>n</sup>, te ní xáha<sup>n</sup>-dë sá quíxí-güedë ndéé ndíha cundáá cuéchi-dé. Te yòhó cundee ìní-n càcá<sup>n</sup> tnúhú-n núú-dë, te núu ndáá duca<sup>n</sup> ñí quide-dé àdi ñáhá —càchí té Tèrtulú xáha<sup>n</sup>-dë xii té Juèlí tée cùu gobiernú.

<sup>9</sup>Te dava-gá cue tée isràél xǎnutnǎí xǎá<sup>n</sup> ñí càhá<sup>n</sup>-güedé sá ndáá càhá<sup>n</sup> té Tèrtulú. <sup>10</sup>Te tée cùu gobiernú ní quide-dé ndaha-dé núú tè Páblú cuendá càhá<sup>n</sup>-dé, te té Páblú ní xáha<sup>n</sup>-dë:

—Yòhó sa ní cuu titní cuía ndécú-n ìha xehndé-n cuéchi nchaa ñáyiú xǎnàá, núu xǎ<sup>n</sup> ío cùdǎí ìní-í sá ndíha téhndé cuéchi tée ñaha-güedé xii-í. Te cundee ìní-n cùndedóho-n na càni-í cuèndú nàcuáa ní cuu. <sup>11</sup>Te nducu tnúhu-n te quini-n ñá càhá<sup>n</sup> ndáá-í, chi sa ní cuu úxúú nduu sá ñí sáhá<sup>n</sup>-í veñúhu càhnu sá ìo cùnno ñúú Jerusalén ní càhá<sup>n</sup> ndihi-í Yá Ndiòxí. <sup>12</sup>Te ni ñà túú ní nàá-í ndihi ñáyiú xití veñúhu, te ñá túú ní xáha<sup>n</sup>-í nàá-yu ni ì<sup>n</sup> xichi, te ni ì<sup>n</sup> veñúhu líhli ní sáhá<sup>n</sup>-í ñá túú ñá ní xáha<sup>n</sup>-í cada-yu. <sup>13</sup>Te ni ñà túú quèñuhu-güedé cue tée càhá<sup>n</sup> ndáá te núu ndáá duca<sup>n</sup> ñí quide-í. <sup>14</sup>Te yúhú càhá<sup>n</sup> ndáá-í sá càhá<sup>n</sup> ndihi-í Yá Ndiòxí, chi diu-ni Yá Ndiòxí ní xóo càhá<sup>n</sup> ndihi ñáyiú ndéé sanaha, núu xǎ<sup>n</sup> ní tuha-í ichi-gá. Te cue tée-a càchí-güedé sá ñà díú ì<sup>n</sup> ichi váha ni tuha-í. Te yúhú sàndáá ìní-í nchaa sá ñí chídó tnùní ndíi Moisés ndihi dava-gá cue tée ní xóo càhá<sup>n</sup> tnúhu Yá Ndiòxí ndéé sanaha. <sup>15</sup>Te sàndáá tucu ìní-í sá ndótó nchaa ñáyiú ní xíhí, cuèi

ñáyiú váha ìní-xi, te cuèi ñáyiú úhú ìní-xi, dico ndotó-yu. Te duca<sup>n</sup> ñí xóo quindáá ìní nchaa ñáyiú ní xíndecu ndéé sanaha. <sup>16</sup>Te yúhú ío ndücu ndee-í quidè-í nchaa sá càhá<sup>n</sup> Yá Ndiòxí cuendá sá vǎ cúú càha<sup>n</sup> núú-í núú-gǎ ndihi núú ñáyiú ñuyíú-a.

<sup>17</sup>Te sa ní cuu titní cuía sǎ ñà túú-gǎ sáhá<sup>n</sup>-í ñúú Jerusalén, te ní sáhá<sup>n</sup> tucu-í nehè-í díhú<sup>n</sup> ñí taxi ñáyiú ñúú xícá cuendá cuañaha-í xii ñáyiú ñúú Jerusalén. Te ní ndúcú-í sá cuáha táhú-í Yá Ndiòxí. <sup>18</sup>Te ní xíndecu-í veñúhu càhnu sá ìo cùnno ní quide-í nchaa nàcuáa ní xóo cada ñáyiú ní xíndecu ndéé sanaha cuendá nduu vétú ìní Yá Ndiòxí. Te ñá túú chítú-yu ni sáhá<sup>n</sup>, te ni ñà túú ñá ní cùu, te ní naníhí ñáhá ì<sup>n</sup> úú cue tée isràél xii-í, cue tée véxi distritú Àsiá. <sup>19</sup>Te quixi mee-güedë iha càhá<sup>n</sup>-güedé, te núu sá ndáá ní xini-güedé sá yúhú ndècuéchi-í ní cùu, <sup>20</sup>àdi ñáhá. Dico cachí tnúhu cue tée-á<sup>n</sup> ñasa ní cuu òré ní xíndecu-í jundá-güedé ñúu ndècuéchi-í àdi ñá túú ndècuéchi-í. <sup>21</sup>Dico ñá túú cuéchi-í chi ì<sup>n</sup> dii-ni tnúhu ni càhá<sup>n</sup>-í ní xáha<sup>n</sup>-í xii-güedé sá sàndáá ìní-í sá ndótó nchaa ñáyiú ní xíhí, te diu-ni núu xǎ<sup>n</sup> càchí-güedé sá ndècuéchi-í —càchí té Páblú xáha<sup>n</sup>-dë xii té Juèlí.

<sup>22</sup>Te té Juèlí sa xíni váha-dé nàcuáa cuáhá<sup>n</sup> tnúhu Jèsús, núu xǎ<sup>n</sup> ñá ní cuini-gá-dé ndatnúhu-dé ndihi té Páblú, te ní xáha<sup>n</sup>-dë:

—Sa ní cuu, cundetu-n na quèxio té Lisiú tée cùu capitá<sup>n</sup> cùnno-gá, te òré-á<sup>n</sup> cundáá cuendá-n —càchí té Juèlí xáha<sup>n</sup>-dë.

<sup>23</sup>Te ní xáha<sup>n</sup>-dě xii tée cùu capitá<sup>n</sup>:

—Cundeé-n tē Păblú-ă<sup>n</sup>, te núu nása cächí-dé cada-n, te dañ-n na cãhá<sup>n</sup> ndihi-dé cue tée xini tnãhá ndihi-dé núu cuãñaha-güedē nchaa sá xini ñuhu-dé àdi nása cada-güedé —cächí té Juělí xáha<sup>n</sup>-dě xii tée cùu capitá<sup>n</sup>.

<sup>24</sup>Te ní cuu titní nduu, te ní sáhá<sup>n</sup> té Juělí vechiú<sup>n</sup> ndihi ñadihí-dé, te ñaha-á<sup>n</sup> nání-á<sup>n</sup> Drùsilá, te ñaha isràél cúu-á<sup>n</sup>. Te ní xáha<sup>n</sup>-dě sá quñgueñuhu-güedé té Păblú, te òré ní quexio-dé vechiú<sup>n</sup>, te ní cãhá<sup>n</sup>-dé núu-yu ncháa-yu sá quëndáá iní-yu tnúhu Xítoho Jesucrístú. <sup>25</sup>Te ní xáha<sup>n</sup>-dě:

—Mee-ni sã vãha cada-ndo. Te coto-ndo mēe-ndo, te vá cãdá-ndó ni ñ<sup>n</sup> sá cuèhé sá dúhá, chi ñ<sup>n</sup> nduu cãhá<sup>n</sup> Yã Ndiõxí ndēdacàa ñáyiú vãha iní-xi, te ndēdacàa ñáyiú úhu iní-xi —cächí té Păblú xáha<sup>n</sup>-dě.

Te sá dúcá<sup>n</sup> ñ xáha<sup>n</sup>-dě, te ní yùhu té Juělí, te ní xáha<sup>n</sup>-dě:

—Vá cãhá<sup>n</sup>-gá-ó tnáví, cuahá<sup>n</sup>, te òré cùyächí-í, te cana ñaha-í xii-n —cächí-dé xáha<sup>n</sup>-dě.

<sup>26</sup>Te té Juělí ní quide-dé cuendá sá cuãñaha tē Păblú díhú<sup>n</sup> te vá ndíhu-gá-dé vecaá ní cùu, núu xiá<sup>n</sup> titní xito ní cana-dé té Păblú vechiú<sup>n</sup> ní ndatnúhu ndihi tnãha-güedé, dico ñá túú ní chãhu-dé. <sup>27</sup>Te úú cuíá duca<sup>n</sup> ñ quide-güedé, te dãtnúni ní xínu té Juělí chiú<sup>n</sup>-dé, te ní ngúnutní té Pòrsiú Fèstú. Te òré ní xínu té Juělí chiú<sup>n</sup>-dé, te ní dándõ-dé té Păblú yíhí-ni-dé vecaá. Te duca<sup>n</sup> ñ quide-dé cuendá ní cuini-dé cudú-dé núu cuè tée isràél.

Té Păblú cãhá<sup>n</sup> ndihi-dé té Fèstú

**25** Te ní cuu úní nduu sá ñ quexio té Fèstú ñúu Cèsareá ní quehe<sup>n</sup>-dé chiú<sup>n</sup>, te ní quee-dé cuahá<sup>n</sup>-dé ñúu Jerusalén.

<sup>2</sup>Te yacá<sup>n</sup> ní naníhí tnãhá-dē ndihi nchaa dútú cúnúu ndihi nchaa cue tée tàxi tñuní ñáhá xii ñáyiú isràél, te xáha<sup>n</sup>-güedē xii té Fèstú sá ndáá ndēcuéchi té Păblú. <sup>3</sup>Te ní cãhá<sup>n</sup> ndáhú-güedé núu-dē sá téndãha-dé sandádú-dé quingueñuhu

ñaha-güedē vecaá xii-dé ndéé ñúu Cèsareá te candeca ñaha-güedē quíhí<sup>n</sup>. Te duca<sup>n</sup> ñ cãhá<sup>n</sup>-güedé, chi ní ndatnúhu-güedé sá cãhni ñaha-güedé xii té Păblú ichi ni cùu.

<sup>4</sup>Te té Fèstú ní xáha<sup>n</sup>-dě:

—Vá cúu quixi-dé ndéé ndíha. Na cùndetu-dé ñúu Cèsareá chi sacú-ni nduu cuyaa-í iha te dãtnúni núhú-í yacá<sup>n</sup>. <sup>5</sup>Te yáchí-gá quíhí<sup>n</sup> ndihi-í cue té cùnúu-gá, te yacá<sup>n</sup> cuu cãhá<sup>n</sup>-ndó núu ndáá ndēcuéchi-dé àdi cãhá<sup>n</sup> mēé-dē núu ndáá ndēcuéchi-dé àdi ñáhá, te cutnúni iní-ndó —cächí-dé xáha<sup>n</sup>-dě.

<sup>6</sup>Te ní xindecu té Fèstú úná úxi nduu ñúu Jerusalén, te dãtnúni cuánuhú-dé ñúu Cèsareá. Te nduu tnēé cuahá<sup>n</sup>-dé vechiú<sup>n</sup>, te òré ní quexio-dé, te ní xáha<sup>n</sup>-dě xii cue sandádú xínú cuèchi sá quíhí<sup>n</sup>-güedé queñuhu-güedé té Păblú vecaá te candeca ñaha-güedē quíhí<sup>n</sup> vechiú<sup>n</sup>. <sup>7</sup>Te òré ní quexio té Păblú vechiú<sup>n</sup>, te sa ndēcu cue tée isràél cue tée ní quee ñúu Jerusalén, te cuánguihu-güedé ndéé ññi té Păblú ní ngúnutní-güedé, te xáha<sup>n</sup>-güedē xii cue tée cùchiú<sup>n</sup> sá ndēcuéchi vñhi-dé, dico ñá túú ní

cùndee tnúhu-güedé. <sup>8</sup>Te té Păblú ní xăha<sup>n</sup>-dĕ xii té Fĕstú:

—Ŋá túú ndĕcuéchi-í, ŋá túú nă ní quide-í, chi ŋá túú tnăhá iní-í cada-í iĭ<sup>n</sup> sá căchí lĕi sá vă cúú căda-o. Te ni xití veŋúhu căhnu sá ŋo cùnuu ŋá túú nă quidĕ-í, te ni té Cĕsăr tĕe yĭndaha cuéhé năció<sup>n</sup> ŋá túú căhá<sup>n</sup> cuéhé-í cuendá-dé —căchí té Păblú xăha<sup>n</sup>-dĕ xii-dé.

<sup>9</sup>Te té Fĕstú ní cuiní-dé cada-dé năcuáa cudù-dé núú cuè tĕe isrăél ní cùu, núú xĭă<sup>n</sup> ní xăha<sup>n</sup>-dĕ xii té Păblú:

—¿Cundee iní-n quĭhĭ<sup>n</sup>-n ñúú Jerusălén-ă<sup>n</sup>? Te yăcá<sup>n</sup> cundáá cuéchi sá sàá díquí-n —căchí té Fĕstú xăha<sup>n</sup>-dĕ xii té Păblú.

<sup>10</sup>Te xăha<sup>n</sup> tĕ Păblú:

—Điu-ni iĭ<sup>n</sup> vechi<sup>n</sup> tĕe cùchiu<sup>n</sup> Cĕsăr ndĕcù-í iha, te điu-ni iha cada ndáá-n nŭu cuiní-n ní cùu. ¿Te ná cuendá candeca ŋaha-n quĭhĭ<sup>n</sup> ingá xichi? Yòhó tnăhá-n xĭn-í nă ŋá túú nă quidĕ-í ŋăyiu isrăél. <sup>11</sup>Chi núú đicó yúhú ní quide-í iĭ<sup>n</sup> cuéchi căhnu, te ŋá túú nă cada-xi cuĕi na căhni ŋaha-ndo xii-í ní cùu. Te sa ní cutnùni iní-n să ŋă ndăá, chi mee-ni tnŭhu ndehnde xĭcăhá<sup>n</sup>-güedé, te ŋá túú ndùu váha-xi duca<sup>n</sup> căda-n cúŋaha-n să quĭhĭ<sup>n</sup>-í ndiĭhi-güedé ingá xichi. Te xĭă<sup>n</sup> cuiní-í quĭhĭ<sup>n</sup>-í núú tĕ Cĕsăr tĕe yĭndaha cuéhé năció<sup>n</sup>, te yăcá<sup>n</sup> căhá<sup>n</sup> mĕé-dĕ nŭu ndáá ndĕcuéchi-í —căchí té Păblú xăha<sup>n</sup>-dĕ xii té Fĕstú.

<sup>12</sup>Te ní ndatnúhu té Fĕstú ndiĭhi cue tĕe chĭndee tnúhu ŋaha xii-dé, te đătnùni ní xăha<sup>n</sup>-dĕ xii té Păblú:

—Te sa ní căhá<sup>n</sup>-n să quĭhĭ<sup>n</sup>-n quĭtnăhá-n tĕ Cĕsăr te điu-ni quĭhĭ<sup>n</sup>-n, te quiní-n năsa căhá<sup>n</sup>

tĕe-ă<sup>n</sup> yăcá<sup>n</sup> —căchí-dé xăha<sup>n</sup>-dĕ xii té Păblú.

**Té Păblú căhá<sup>n</sup> ndiĭhi-dé té Āgripá tĕe yĭndaha năció<sup>n</sup> Isrăél**

<sup>13</sup>Te sátá nĭ cuu cuéhé nduu, te ní quee té Āgripá tĕe yĭndaha năció<sup>n</sup> Isrăél cuáhá<sup>n</sup>-dé ñúú Cĕsareá ndiĭhi ñadĭhĭ-dé, te ŋaha-ă<sup>n</sup> nání-ă<sup>n</sup> Berĕnicé te òré ní quexiò-yu, te ní căhá<sup>n</sup> ndiĭhi-yu té Fĕstú. <sup>14</sup>Te sátá nĭ cuu titnĭ nduu, te ní căhá<sup>n</sup> té Fĕstú cuendá té Păblú ní xii-dé té Āgripá: —Ndĕcu iĭ<sup>n</sup> tĕe ní dăndĕo té Juĕlí vecaá nání-dĕ Păblú. <sup>15</sup>Te cútnăhá ní sáhá<sup>n</sup>-í ñúú Jerusălén ní nanĭtnăhá-í ndiĭhi cue dútú cúnùu ndiĭhi cue tĕe cùu sacuéhé nŭú ŋăyiu isrăél. Te ní dăcáá đĭquí-güedĕ té Păblú cuéchi, te ní cachĭ-güedĕ sá táuchĭu<sup>n</sup>-í cahni ŋaha-güedĕ xii-dé ní cùu. <sup>16</sup>Te ní xăha<sup>n</sup>-ĭ xii-güedĕ sá vă cúú, chi ŋá túú đuca<sup>n</sup> quide nchúhú cue tĕe rómă cùtexĭnu cada castiù-ndĭ ŋăyiu, chi đĭhna-gá ndúcú tnŭhu-ndĭ núú ŋăyiu sàá cuéchi díquí-xi cuendá quiní-ndĭ nŭu năsa căhá<sup>n</sup> mĕĕ-yu ndiĭhi ŋăyiu sàcá<sup>n</sup> cuéchi cuendá-yu, te òré-ă<sup>n</sup> cútnùni iní-ndĭ nŭu ndáá ndĕcuéchi-yu àđi ŋăhá, te duca<sup>n</sup> te ñihĭ-ndĭ năcuáa quide ndáá-ndĭ cuendá-yu, duha ní xăha<sup>n</sup>-ĭ xii-güedĕ —căchí té Fĕstú xăha<sup>n</sup>-dĕ xii té Āgripá.

<sup>17</sup>Te ní xăha<sup>n</sup> tucu té Fĕstú:

—Te sátá nĭ quexiò-güedĕ ndĕé ndĭha, te nduu tnĕé ní sáhá<sup>n</sup>-ni-ndĭ vechi<sup>n</sup>. Te ní xăha<sup>n</sup>-ĭ sá quĭgueŋuhu-güedĕ té Păblú candeca ŋaha-güedĕ quixi, te òré ní quexiò-dé, <sup>18</sup>te ní ngŭíta-güedĕ xăha<sup>n</sup>-güedĕ sá ndĕcuéchi-dé. Te



ní sani iní-í sá íí<sup>n</sup> cuèchi càhnu tee ñaha-güedé dico ñáhá, chi dícó-ni sá íí<sup>n</sup> tnùhu ní cáhá<sup>n</sup>-dé, xíǎ<sup>n</sup> duca<sup>n</sup> nǐ quide-güedé. <sup>19</sup>Te ní tenàà ñáhá-güedé xii-dé, chi càchí-güedé sá ñà túú càhá<sup>n</sup> váha-dé cuendá ndiòxí-güedé. Te tnàhá-ni cuendá íí<sup>n</sup> téé nàni Jesús càhá<sup>n</sup>-dé, chi càchí-dé sá nǐ xíhí téé-á<sup>n</sup> te ní ndoto-dé càchí-dé xǎha<sup>n</sup>-dé xii-güedé, càchí-güedé. <sup>20</sup>Te ñá ní cùtnuní iní-í nása cùñaha-í xii-güedé cuendá téhndé cuèchi-dé. Te xíǎ<sup>n</sup> ní xícá<sup>n</sup> tnúhu-í núú tǎ Pǎblú nǔu cundee ín-dé quíhí<sup>n</sup>-dé ñúú Jerusàlén, te ndéé ndiácǎ<sup>n</sup> cada ndáá-ndí cuendá-dé, te núu ndáá ndècuèchi-dé nàcuáa càhá<sup>n</sup>-güedé àdi ñáhá ní cùu. <sup>21</sup>Te dàtnùní té Pǎblú ní cachí-dé sá cùndècu tnaa-dé vecaá te dàtnùní quíhí<sup>n</sup>-dé núú tǎ Cèsár, te téé-á<sup>n</sup> cada ndáá-dé cuendá-dé. Te cuendá sá dúcá<sup>n</sup> nǐ cáhá<sup>n</sup> té Pǎblú, xíǎ<sup>n</sup> nǔu ní xáha<sup>n</sup>-í sá cùndèé ñáhá cuè sandadú xii-dé, nini na còto-í nása cada-í quíhí<sup>n</sup>-dé núú tǎ Cèsár, duha ní xáha<sup>n</sup>-í xii-güedé —càchí té Fèstú xǎha<sup>n</sup>-dǎ xii té Àgripá.

<sup>22</sup>Te té Àgripá ní xáha<sup>n</sup>-dǎ xii té Fèstú:

—Te tnàhá yúhú ío cudíí ín-í cundedóho-í tnúhu càhá<sup>n</sup>-dé —càchí-dé xǎha<sup>n</sup>-dǎ.

Te ní xáha<sup>n</sup> tǎ Fèstú:

—Tneé cana-í-dé te cundedóho-n nása cáhá<sup>n</sup>-dé —càchí-dé xǎha<sup>n</sup>-dǎ.

<sup>23</sup>Te nduu tnéé ní quexio té Àgripá ndíhi ñadhí<sup>n</sup>-dé tá Berènicé vechiú<sup>n</sup>, te ío ní quide càhnu ñaha-güedé xíí-yu. Te cuánguihú-yu vechiú<sup>n</sup> ndíhi cue téé cùu capitá<sup>n</sup> cùnùu-gá ndíhi cue téé cùnùu ñúú

Cèsareá. Te té Fèstú ní xáha<sup>n</sup>-dǎ sá quíngueñuhu-güedé té Pǎblú vecaá, te òré ní quexio-dé, <sup>24</sup>te ní xáha<sup>n</sup> tǎ Fèstú xii té Àgripá ndíhi nchaa ñáyiú xǐndecu-á<sup>n</sup>:

—Chí cùndèhe téé iha chi téé-a càchí cue téé isràèl sá ndècuèchi-dé, te cùtnàhá ní xǐndecu-í ñúú Jerusàlén ní cachí-güedé sá ndàá ndècuèchi-dé, te diu-ni duca<sup>n</sup> càhá<sup>n</sup>-güedé iha. Te nchaa-güedé ní cuáá-güedé te càchí-güedé sá táuchìu<sup>n</sup>-í cahni ñaha-güedé xii-dé ní cùu. <sup>25</sup>Te sátá nǐ ndíhi cuèndú ní cáhá<sup>n</sup>-güedé, te ní cutnùní iní-í sá ñà túú nǐ íí<sup>n</sup> cuèchi càhnu ni quide-dé, núu ñá túú ní tàuchiú<sup>n</sup>-í cahni ñaha-güedé xii-dé. Te mee-dǎ ní cachí-dé sá quíhí<sup>n</sup>-dé núú tǎ Cèsár téé yǐndaha cuéhé nació<sup>n</sup>, te ní xáha<sup>n</sup>-í sá cúu quíhí<sup>n</sup>-dé.

<sup>26</sup>Te ñá túú ní xìní váha-í nása ní quide-dé, núu xíǎ<sup>n</sup> ñá ní nǐhì-í nàcuáa cadúha-í tutú quíhí<sup>n</sup> ndaha té Cèsár, te xíǎ<sup>n</sup> ní cana-í-dé véxi-dé iha cuendá nchaa-ndo cǎhá<sup>n</sup> ndíhi-ndo-dǎ. Te duca<sup>n</sup> cànuu cadíhna-gá yòhò tǎtá Àgripá cácá<sup>n</sup> tnúhú-n nǔú-dǎ nǔu nása cáhá<sup>n</sup>-dé, te òré-á<sup>n</sup> cutnùní iní-í nása cada-í cadúha-í tutú quíhí<sup>n</sup> ndaha té Cèsár. <sup>27</sup>Chi sàni iní-í sá ñà túú ndùu váha-xi sá quíhí<sup>n</sup> íí<sup>n</sup> téé tàu cuèchi te núu vá códó tnùní núú íí<sup>n</sup> tutú nàcuáa càa cuèchi tàú-dé —càchí té Fèstú xǎha<sup>n</sup>-dǎ xii-güedé.

Te Pǎblú càhá<sup>n</sup> ndíhi-dé té Àgripá

**26** Te dàtnùní ní xáha<sup>n</sup> té Àgripá téé yǐndaha nació<sup>n</sup> Isràèl xii té Pǎblú:

—Te vitna cáhá<sup>n</sup>-n nǔu nása ní cuu cuendá-n —càchí-dé xǎha<sup>n</sup>-dǎ.

Te té Păblú ní ndacani-dé ndaha-dé sá cùndedóho-güedé, te ní xáha<sup>n</sup>-dë xii té Àgripá tée yìndaha nació<sup>n</sup> Isràél:

<sup>2-3</sup>—Tătá Àgripá, ío cùdí íní-í sá nǐ naníhí tnáhá-ó vitna, chi yòhó ío váha xìní-n nchàa nacuáa quide ñáyiú isràél quidé càhnú-yu Yá Ndiöxí, te ío váha xìní-n nchàa tnúhu xǐtnáhá-yu. Te vitna cundee iní-n cùndedóho-n ì<sup>n</sup> úú tnúhu na càhá<sup>n</sup>-í. Na càchí tnúhu-í sá ñã ndàá ní quide-í nchaa sá càhá<sup>n</sup> cue tée isràél.

**Té Păblú càhá<sup>n</sup>-dé nàcuáa ní quide-dé cùtnáhá vátá túhá-gã-dé ichi Yá Ndiöxí**

<sup>4</sup>Te sa nàha nchaa cue tée cùnūu nūú ñáyiú isràél nàcuáa ní quide-í ñūú-í ndihí ñūú Jerusàlén cùtnáhá ní cuu landú-í. <sup>5</sup>Te mee-güedé náhá-güedé sá ndèè líhli-í ní chitnahá-í cue tée cùu fariséú. Te nūu cuíní-güedé càhá<sup>n</sup>-güedé sá tée fariséú cùu-í àdi ñáhá dico nchaa-güedé sa nàha-güedé sá cuè tée-á<sup>n</sup> nǐ chitnahá-í. Te cue tée cùu fariséú-á<sup>n</sup> ío cuíní-güedé cada-güedé nchaa nàcuáa nchicú<sup>n</sup> nihnu ñáyiú quidé-yu. Te yúhú nchaa sá nchicú<sup>n</sup> nihnú-yu quidé-yu-á<sup>n</sup> nǐ quide-í. <sup>6</sup>Te vitna ndècu-í iha, te càhá<sup>n</sup>-n nūu váha-ni quide-í àdi ñáhá, chi cue tée-á<sup>n</sup> tée ñàha-güedé cuéchi xii-í cuendá sá sàndáá iní-í sá ndótó nchàa ñáyiú ní xíhí. Te ñūu-ni duca<sup>n</sup> nǐ xáha<sup>n</sup> Yá Ndiöxí xii nchaa ñaní tnáhá-ó ní xíndecu ndéé sanaha. <sup>7</sup>Te nchaa ñáyiú-á<sup>n</sup> xíndetú-yu nduu ndòto ñáyiú ní xíhí ní cùu. Te ñūu-ni duca<sup>n</sup> ndètu nchaa ñaní tnáhá-ó ndècu

ñuyú-a ndéé vitna, te xíá<sup>n</sup> nūu cuéi nduu cuéi níu càhá<sup>n</sup> ndihí-yu Yá Ndiöxí. Te sá sàndáá iní-í nūu xíá<sup>n</sup> ní càhá<sup>n</sup>-í, te tée ñaha cue tée isràél cuéchi xii-í. <sup>8</sup>¿Te ná cuendá nchòho cue tée isràél ñã túú cuíní-ndó quíndáá iní-ndó sã dándòto Yá Ndiöxí nchaa ñáyiú ní xíhí? —càchí té Păblú xáha<sup>n</sup>-dë.

**Té Păblú cání-dë cuendú sá nǐ xóo chihi-dé ñáyiú sàndáá iní tnúhu Jèsús vecaá**

<sup>9</sup>Te ní xáha<sup>n</sup> tucu té Păblú: —Ndéé dàvá-á<sup>n</sup> nǐ quide úhú-í ñáyiú sàndáá iní-xi tnúhu Jèsús Yaá ní quee ñūú Nazàrét, te ní càhá<sup>n</sup>-í sá vâha-ni ní quide-í sá dúcá<sup>n</sup> nǐ quide-í. <sup>10</sup>Te ñūu-ni duca<sup>n</sup> nǐ quide-í ñūú Jerusàlén. Te cue dútú cùnūu ní taxi-güedé ì<sup>n</sup> tutú cuendá tñi-í ñáyiú ní sàndáá iní tnúhu Jèsús, te vâi-yu ní chihi-í vecaá. Te òré ní càhá<sup>n</sup>-güedé sá càhni-güedé ñáyiú-á<sup>n</sup>, te tnáhá-í ní càhá<sup>n</sup>-í sá cùú càhni ñaha-güedé xii-yu. <sup>11</sup>Te títñí xito ní sáhá<sup>n</sup>-í nchaa veñúhu ñáyiú isràél, te ní caní-í-yu te ní xáha<sup>n</sup>-í sá dáñã-yu ichi Jèsús. Te cuendá ío ní cudè<sup>n</sup>-í nūu-yu, xíá<sup>n</sup> ní sáhá<sup>n</sup>-í nchaa ñūu xicá nǐ sánúndúcù-í dava-gá ñáyiú sàndáá iní tnúhu-gá cuendá dandòho ñaha-güedé xii-yu.

**Té Păblú càhá<sup>n</sup> tucu-dé nása ní cuu ní tuha-dé ichi Yá Ndiöxí**  
(Hch. 9:1-19; 22:6-16)

<sup>12</sup>Te cuendá xíá<sup>n</sup> ní xica tucu-í cuáhá<sup>n</sup>-í ñūú Dàmascú, nêhè-í tutú ní taxi cue dútú cùnūu cuáhá<sup>n</sup>, cuendá sá ndàcù-í tñi-í nchaa ñáyiú sàndáá iní tnúhu Jèsús ní

cùu. <sup>13</sup>Te òré caúxúú nduu ñuhu-í ichi cuáhá<sup>n</sup>-í, te uu<sup>n</sup>ni ní quee ñuhú andiu ní dáyèhé-xi ndéé núú nútnñi-í ndihi cue téé ndèca tnahá ndihi-í, te níhi-gá ní dáyèhé-xi dàcúxí nchìcanchii. <sup>14</sup>Te nchaa-ndí ní nduá-ndí ndéé ñuhu, te ní tecú dóho-í càhá<sup>n</sup> ìí<sup>n</sup> sá càhá<sup>n</sup> tnúhu ñáyiú isràél, te càchí-xi: “Yòhó Sàulú, ¿Ná cuèndá cúú ùhú iní ñáhá-n xii-í dándòho ñaha-n? Te ío dándòho-n mee-n, chi dàtná cuíní-n quide ndicutu quide-n chi quiti-á<sup>n</sup> òré cùxi-güedé-di pùyá te sàha-di patadá núú-xi, te sá dúcá<sup>n</sup> quide-di te quide úhú-di mee-di. Te duca<sup>n</sup> sàtnahá-xi cùu yohó chi ñá túú sàndáá iní ñáhá-n xii-í”, càchí sá ní càhá<sup>n</sup>-á<sup>n</sup>. <sup>15</sup>Te ní xáha<sup>n</sup>-í: “¿Ná cúú yòhó sá ní càhá<sup>n</sup>-á<sup>n</sup>?”, xáha<sup>n</sup>-í. Te càchí sá càhá<sup>n</sup>-á<sup>n</sup>: “Yúhú cúú-í Jèsús Yaá cúú ùhú iní-n”, duha ní cachí sá càhá<sup>n</sup>-á<sup>n</sup>. Te xíá<sup>n</sup> ní cutnùní iní-í sá Jèsús càhá<sup>n</sup>. <sup>16</sup>Te ní cachí-gá: “Ndacuíñí-n chi yúhú càhá<sup>n</sup>-í chi cuíní-í quíhí<sup>n</sup>-n càda-n chiu<sup>n</sup>-í, chi quíhí<sup>n</sup>-n càhá<sup>n</sup>-n núú ñáyiú nàcuáa ní cuu ní xiní ñáhá-n xii-í vitna, te quixi tucu-í càhá<sup>n</sup> ndihi ñaha-í xii-n, te cúñaha-n xii-yu nàcuáa càhá<sup>n</sup>-í. <sup>17</sup>Chi cuíní-í quíhí<sup>n</sup>-n càhá<sup>n</sup>-n tnúhu-í núú ñáyiú isràél ndihi núú ñáyiú ñá túú cùu ñáyiú isràél, te coto ñaha-í xii-n cuèndá vá càhí ñáhá-yu xii-n. <sup>18</sup>Te cuíní-í quíhí<sup>n</sup>-n cúñaha-n xii-yu sá dáñá-yu nchaa ichi cuèhé ichi duha ndècú-yu, te tuhá-yu ichi váha cuèndá vá quèndáá iní-yu cadá-yu sá càhá<sup>n</sup> yucu ñávàha, te quindáá iní-yu cadá-yu nchaa nàcuáa càhá<sup>n</sup> Yá Ndiòxí. Te núu na quèndáá iní-yu tnúhu càhá<sup>n</sup>-í, te cada càhnu

iní-í nchaa cuèchi-yu, te nanhí tàhú-yu ndihi dava-gá ñáyiú sa ní xócuñí nchaa sá cuèhé sá dúhá ní xíndecu iní-yu”, duha ní cachí-gá xii-í —càchí té Pàblú xáha<sup>n</sup>-dè xii té Àgripá téé yìndaha nació<sup>n</sup> Isràél.

**Té Pàblú quidè-dè nchaa nàcuáa ní xáha<sup>n</sup> Jèsús cada-dé**

<sup>19</sup>Te ní xáha<sup>n</sup> tucu té Pàblú xii té Àgripá:  
—Ná túú dàña ndéé-í quidè-í nchaa nàcuáa ní càhá<sup>n</sup> Jèsús òré ní càhá<sup>n</sup>-gá andiu. <sup>20</sup>Te díhna-gá ñáyiú ñuú Dàmascú ní càhá<sup>n</sup>-í tnúhu-gá núú-yu, te ní xáha<sup>n</sup>-í xii-yu sá dáñá-yu nchaa sá cuèhé sá dúhá quidè-yu, te càhá<sup>n</sup> ndihí-yu Yá Ndiòxí, te cadá-yu mee-ni sá vaha cuèndá cutnùní iní dava-gá-yu sá ní dáñá-yu nchaa sá ñà túú vaha ní xóo cadá-yu. Te duca<sup>n</sup>-ni ní xáha<sup>n</sup>-í xii ñáyiú ñuú Jerusàlén ndihi ñáyiú ñáhí nació<sup>n</sup> Isràél ndihi nchaa ñáyiú ñá túú cùu ñáyiú isràél. <sup>21</sup>Te cuèndá sá dúcá<sup>n</sup> ní càhá<sup>n</sup>-í núu ní tñi ñaha cuè téé isràél xii-í cùtnàhá ní sáhá<sup>n</sup>-í veñuhu càhnu sá ío cùnno cahni ñaha-güedé ní cùu. <sup>22</sup>Te diu-ni mee Yá Ndiòxí ní chindee ñaha-gá xii-í núu ndècu-í iha tnàví càhá<sup>n</sup>-í tnúhu-gá, te mee-ni tnúhu-gá càhá<sup>n</sup> ndihi-í nchaa-yu, cuè ñáyiú cuica, te cuè ñáyiú ndàhú. Te ndíi Moisés ndihi dava-gá cue téé ní xóo càhá<sup>n</sup> tnúhu Yá Ndiòxí ndéé sanaha ní càhá<sup>n</sup>-güedé nàcuáa cada-xi vitna, te diu-ni duca<sup>n</sup> càhá<sup>n</sup>-í nchaa-ni nduu. <sup>23</sup>Te cue téé-á<sup>n</sup> ní cachí-güedé sá Crístú Yaá tendaha Yá Ndiòxí quixi ñuyíú-a ndoho tnahá-gá, te cuú-gá, te dàtnùní ndoto-gá. Te duca<sup>n</sup> càda-xi nchaa ñáyiú ní xihí

ndotó-yu núu na sàà nduu chi duca<sup>n</sup> càda-xi ní cachí méé Yá Ndiöxí. Te cuendá sá dúcá<sup>n</sup> ñí ndoto-gá, xíã<sup>n</sup> cútnùnì sá cúú nàníhí tãhú ñáyiu, cuèi ñáyiu isràél, te cuèi ñáyiu ñá túú cùu ñáyiu isràél. Te dàtná-ni ndùu tnúhu ní cáhá<sup>n</sup> cue téé ní xóo cáhá<sup>n</sup> tnúhu-gá ndéé sanaha-ã<sup>n</sup>, te ðiu-ni duca<sup>n</sup> càhá<sup>n</sup> yúhú tucu — cãchí té Pãblú xãha<sup>n</sup>-dë.

### Té Pãblú xãha<sup>n</sup>-dë xii té Àgripá sá quindáá iní-dé tnúhu Jèsús

<sup>24</sup>Te sá dúcá<sup>n</sup> ñí cáhá<sup>n</sup> té Pãblú, te ní cáhá<sup>n</sup> níhi té Fèstú, te xãha<sup>n</sup>-dë: —Pãblú, ío lúcú càhá<sup>n</sup>-n! Cuendá ío vai ní dácuahá<sup>n</sup>, núu xíã<sup>n</sup> ndadá lúcú ñáhá-xí xii-n —cachí-dé xãha<sup>n</sup>-dë.

<sup>25</sup>Te ní xãha<sup>n</sup> tã Pãblú: —Ñáhá, vá dúcá<sup>n</sup> càhá<sup>n</sup>-n chi ñá dúú sã lúcú-í duha càhá<sup>n</sup>-í, chi tnúhu ndáá càhá<sup>n</sup>-í. <sup>26</sup>Te té Àgripá-a sa nãha-dé ndihi nchaa ñáyiu isràél nãcuáa ní cuu, chi sa ní níhí-dë tnúhu ndihi dava-gá-yu nãcuáa ní cáhá<sup>n</sup>-í, núu xíã<sup>n</sup> cùyì-í càhá<sup>n</sup> ndihi-í-dé —cãchí-dé xãha<sup>n</sup>-dë xii té Fèstú.

<sup>27</sup>Te ní xãha<sup>n</sup>-dë xii té Àgripá: —Yúhú sa xini-í sá sãndáá iní-n tnúhu ní chídó tnùnì cue téé ní xóo cáhá<sup>n</sup> tnúhu Yá Ndiöxí ndéé sanaha —cãchí-dé xãha<sup>n</sup>-dë.

<sup>28</sup>Te ní xãha<sup>n</sup> tã Àgripá: —¿Quide-n cuendá sá íí<sup>n</sup> úú tnúhu ní cáhá<sup>n</sup>-n te quindáá iní-í tnúhu Jèsús cáhá<sup>n</sup>-n-ã<sup>n</sup>? —cãchí-dé xãha<sup>n</sup>-dë.

<sup>29</sup>Te ní xãha<sup>n</sup> tucu té Pãblú: —Cuèi vitna te cuèi ndéé cuèé-gá dico cuiní-í sá dàcuitíí sã quindáá iní-n tnúhu Jèsús. Te ðiu-ni duca<sup>n</sup>

xìcá<sup>n</sup> táhù-í núú Yá Ndiöxí sá ncháá ñáyiu ndècu ndihi-o iha quindáá iní-yu tnúhu-gá dàtná cuiní-n ñí quide yúhú, duca<sup>n</sup> càdá-yu. Dico-ni sá núu vá quíhí<sup>n</sup>-ni-yu vecaá dàtná cuiní-n ndòho yúhú —cãchí-dé xãha<sup>n</sup>-dë xii té Àgripá.

<sup>30</sup>Te sátá dúcá<sup>n</sup> ñí cáhá<sup>n</sup>-dë, te ní ngúnutnì té Àgripá téé yìndaha nació<sup>n</sup> Isràél, ndihi té Fèstú téé cùu gobiernú, ndihi tá Berènicé ndihi dava-gá ñáyiu xìnucóo yatni. <sup>31</sup>Te ní tnahá-yu ndèca tnahá-yu cuáhá<sup>n</sup> ìí<sup>n</sup> xio. Te ní xítnahá-yu:

—Tée-ã<sup>n</sup> ñá túú ñã cuèchi ní quide-dé núu chihi ñaha-güedë vecaá àdi cahni ñaha-güedë — cãchí-yu xítnahá-yu.

<sup>32</sup>Te té Àgripá ní xãha<sup>n</sup>-dë xii té Fèstú:

—Cuèchi mee-dë chi ní cachí-dé sá quítnahá-dé té Cèsár, xíã<sup>n</sup> núu ndíhu tucu-dé vecaá, te núu ñá túú dùca<sup>n</sup> ní cáhá<sup>n</sup>-dë, te cácu-dé ní cùu —cachí-dé xãha<sup>n</sup>-dë xii té Fèstú.

### Té Pãblú cuáhá<sup>n</sup>-dë ñuú Rómá

**27** <sup>1-2</sup>Te ní ndatnúhu-güedë sá quíhí<sup>n</sup> té Pãblú ndihi bàrcú nació<sup>n</sup> Itàliá, te tnahá yúhú quíhí<sup>n</sup>-í ndihi-dé. Te tnahá ìí<sup>n</sup> téé nàni Aristarcú cuiní-dé quíhí<sup>n</sup> ndihi-ndí-dé, te cùu-dé téé ñuú Tesalónica, te ñuú-ã<sup>n</sup> yìndèhu-xi distritú Macèdoniá. Te ní sãha cuendá-güedë té Pãblú ndihi ìí<sup>n</sup> úú-gá cue téé xixíhi vecaá ní quehe<sup>n</sup> cuendá ñáhá tã Jülüú téé cùu capitá<sup>n</sup>, téé yìndaha nchaa sandadú nání Àugustú, te ní queé-ndí nchaa-ndí bàrcú ñuú Adràmitiú. Te ní xica bàrcú-ã<sup>n</sup> cuáhá<sup>n</sup>-ndí ndihi-xi te cuita yãha-ndí ìí<sup>n</sup> úú

ñúú yíndèhu distritú Àsiá quíhí<sup>n</sup>.  
<sup>3</sup>Te nduu tnéé ní quexio-ndí ñúú Sídon. Te ío váha ní quide té Júliú, chi ní dǎñá-dé ní quene té Páblú ní sáhá<sup>n</sup>-dé ní cáhá<sup>n</sup> ndíhi-dé cue tée ío váha tnàhá tnúhu ndíhi-dé ñúu cudana cundàhú iní ñáhá-güedě cuáñaha-güedě nchaa sá xíní ñúhu-dé. <sup>4</sup>Te dǎtnùní ní ndée tucu-dé bàrcú cuáhá<sup>n</sup>-ndí. Te ío níhi táchí te ñá ní dǎña-xi caca ndáá bàrcú, te ní sáhá<sup>n</sup> bàrcú ndée yatni yuhu dístritú Chìpré, te distritú-á<sup>n</sup> cáá cuádava xití lámár, te xía<sup>n</sup> ñà túú cuèhé táchí ni yáha-ndí. <sup>5</sup>Te ta yáha-ndí cuáhá<sup>n</sup>, te ní yáha-ndí ìí<sup>n</sup> xio yuhu dístritú Cìlicia ndíhi yuhu dístritú Pànfilia, te ní sáá-ndí ndée ñúú Mírà ìí<sup>n</sup> ñúú yíndèhu distritú Lìciá.

<sup>6</sup>Te ní quene tée cùu capitá<sup>n</sup> cuándúcú-dě ingá bàrcú, te ní níhí-dě ìí<sup>n</sup> bàrcú tée ñúú Alejandriá, ñúhú ìchi-xi quíhí<sup>n</sup>-xi nació<sup>n</sup> Italiá. Te ní ndicuaca ñaha-dě xii-ndí cuáhá<sup>n</sup>-ndí ní quée-ndí bàrcú-á<sup>n</sup>, te ní xica-xi cuáhá<sup>n</sup>-xi. <sup>7</sup>Te ío cuèé cuáhá<sup>n</sup> bàrcú-á<sup>n</sup>, cuèhé nduu ní xúhu<sup>n</sup>-xi ichi, te yica-ni ñí quexio-ndí yuhu ñúú Nidú, te ñá ní dǎña-gá táchí quíhí<sup>n</sup> ndáá bàrcú ñúu ní xícó ndùú-xi. Te ní yáha-ndí ìí<sup>n</sup> xio yuhu dístritú Crètá núú ñà túú quene vihi táchí, te diu-ni cuádava tucu lámár cáá dístritú-á<sup>n</sup>. Te ní yáha-ndí yuhu ñúú Sàlmón, te diu-ni Crètá yíndàha-xi ñúú-á<sup>n</sup>. <sup>8</sup>Te ní yáha-ndí cuáhá<sup>n</sup>-ndí mee-nǎ núú ràyá distritú Crètá, te ío ní ndoho-ndí ní sáá-ndí ìí<sup>n</sup> xichi núú nání Puèrtú Váha, yatni víi-ni-gá ñúú Làseá.

<sup>9</sup>Te ní cuyaa vihi-ndí ichi, duca<sup>n</sup>-ni cùu-ndí ní tnahá yóó cúú<sup>n</sup>

dǎú táchí, te ío úhú yáha bàrcú ñúu na quíhí<sup>n</sup>-ni-xi. <sup>10</sup>Te ní xáha<sup>n</sup> tǎ Páblú xii-güedé:

—Nchaa-ndo cündedóho-ndo tnúhu na càhá<sup>n</sup>-í-a. Ío úhú núú na càda yica-o quíhí<sup>n</sup>-ó ndíhi barcú chi cuíta càrgá te cuíta bàrcú, te cuu-ni iní-xi tnàhá-ni mee-o cùú-ó chi càhá-ó ñúu na ngàunihnu-o xití ndute —càchí-dé xǎha<sup>n</sup>-dě xii-güedé.

<sup>11</sup>Te tée cùu capitá<sup>n</sup> ñá ní sándáá iní-dé tnúhu ní cáhá<sup>n</sup> té Páblú. Dico tnúhu ní cáhá<sup>n</sup> tée dàcaca barcú ndíhi xitohó-xi chi ní sándáá iní-dé. <sup>12</sup>Te ñá ní tnàhá iní-güedé Puèrtú Váha cuèndá sá ñí tnahá yóó cúú<sup>n</sup> dǎú táchí, te ñá túú dǎhu váha táchí xǎá<sup>n</sup>, núu vǎi-güedé ní cuini-güedé yáha-güedé quíhí<sup>n</sup>-güedé sáá-güedé ndée ñúú Fènicé ní cùu. Te yàcá<sup>n</sup> cundecu-güedé yóó cúú<sup>n</sup> dǎú táchí cuèi ñá túú càváha vihi, chi nchíi nàcuáa yáha bàrcú, te yàcá<sup>n</sup> quíhu táchí, dico dǎhu-gá. Núu xǎá<sup>n</sup> ndée ndiáccá<sup>n</sup> nátacá bàrcú yóó cúú<sup>n</sup> dǎú táchí, te diu-ni Crètá yíndàha-xi ñúú-á<sup>n</sup>.

#### Nitùhú lámár cúú<sup>n</sup> dǎú táchí

<sup>13</sup>Te duha ní quene nuu luha táchí, xǎá<sup>n</sup> ní sani iní-güedé sá ndácú-güedě quíhí<sup>n</sup>-güedé, núu ní natava-güedé caá ndètníi ndée bàrcú, te ní xica-xi cuáhá<sup>n</sup>-xi ní yáha-ndí yatni víi yuhu dístritú Crètá. <sup>14</sup>Te tnaa-ni ní cuu sá ñí xica bàrcú, te duha ní cunuu dǎú táchí ìí<sup>n</sup> xio yuhu ñúú-á<sup>n</sup> <sup>15</sup>te nchita ichi cuáhá<sup>n</sup> bàrcú. Te ñá ní ndàcu-gá-xi quíhí<sup>n</sup> ndáá-xi nàcuáa cuáhá<sup>n</sup>-xi ni cùu, núu ní dǎñá-ndí cuáhá<sup>n</sup>

mée-nă bãrcú. <sup>16</sup>Te ní yáha-ndí ìí<sup>n</sup> ñúú nání Clàudá, te ñúú-á<sup>n</sup> cáá cuădava xití lâmár. Te ìí<sup>n</sup> xio yuhu ñúú núú ñà túú quène vihi táchí ní yáha-ndí, te bãrcú lîhli sá nchicú<sup>n</sup> sátá bãrcú cáhnú, chi ní ndacu-ndí ní taxúha-ndí xití bãrcú cáhnú.

<sup>17</sup>Te sátá ní ndacu-ndí ní taxúha-ndí bãrcú lîhli, te ní ducu<sup>n</sup> nuu-güedé yoho bãrcú cáhnú. Te ío ní yùhú-güedé sá yáha bãrcú ndéé núú ñúhú cùchí yuhu ñùú Sîrté, núú xîá<sup>n</sup> ní ndîhi dóó nchítá dîquí bãrcú ní nuu nehe-güedé, chi dóó-ă<sup>n</sup> ò níhi chîndaha táchí, núú xîá<sup>n</sup> cuáhá<sup>n</sup> bãrcú ìí<sup>n</sup> xio. Te ní dáñá-güedé ñá túú-gă ní dâcaca-güedé, núú cuáhá<sup>n</sup> mée-nă-xi ta chîndaha táchí cuáhá<sup>n</sup>.

<sup>18</sup>Te ío níhi dáu táchí, te ñá ní cuiní tnâhî-xi yáha. Te nduu úú sá dúcá<sup>n</sup> ñà túú-gă ní dâcaca-güedé bãrcú te ní nguîfta-güedé ní dângöyo-güedé sá nchídó-xí cuendá cuiní-güedé nduu ñamá-xi. <sup>19</sup>Te nduu úní ní dângoyo-güedé ncha ndachùu<sup>n</sup> cânehe chùu<sup>n</sup>-güedé xití bãrcú. <sup>20</sup>Te cuéhé nduu ñá túú ní xîní-ndí ni chòdíní ni nchîcanchii, chi ío níhi ní cuu<sup>n</sup> dáu táchí, núú ní cáhá<sup>n</sup>-ndí sá vâ cäcu-ndí, chi ndîhi-ndí cáhá ní cáhá<sup>n</sup>-ndí.

<sup>21</sup>Te ní cuu tîtní nduu ñá túú-gă xéxí-ndí, núú xîá<sup>n</sup> ní ngúnutnîí té Păblú núú-güedé, te xâha<sup>n</sup>-dê:

—Quindáá iní-ndó tnùhu ní cáhá<sup>n</sup>-í, te cundecu nahi-o Crêtá ní cùu. Te núú ni tnâi-ndo tnùhu-í, te vâ dâcuîta-o càrgá ndîhi dava-gă ndâchiu<sup>n</sup> ni cuu. <sup>22</sup>Te vâ yùhú-ndó chi vâ cùú ni ìí<sup>n</sup>-ndo dico bãrcú chi cuîta. <sup>23</sup>Te nàha-ndo sá yùhú cáhá<sup>n</sup> ndîhi-í Yă Ndiöxí te quide-í nâcuáa cáhá<sup>n</sup>-gá. Te diu-ni mee-gă ní

techùu<sup>n</sup>-gá ìí<sup>n</sup> espíritú xínú cuèchi núú-gă ní quixi, <sup>24</sup>te ní cachí-xi xii-í: “Vâ yùhú-n chi vâ cùú-n, dico dacuîtí quîhî<sup>n</sup>-n cáhá<sup>n</sup> ndîhi-n té Cèsár. Te ni ìí<sup>n</sup> té ndîhi-n vâ cùú, chi ío cùdîí iní ñáhá Yă Ndiöxí xii-n”, duha ní cáhá<sup>n</sup> espíritú xínú cuèchi núú-gă ní cachí tnùhu-xi xii-í. <sup>25</sup>Núu xîá<sup>n</sup> càchí tnùhu-í sá vâ yùhú-ndó, chi sa cùtnuní iní-í sá cádá Yă Ndiöxí nâcuáa ní cáhá<sup>n</sup> espíritú xínú cuèchi núú-gă. <sup>26</sup>Te mee tâchí chîndaha-xi bãrcú daquîhî<sup>n</sup>-xi ndéé yuhu ndute — cachí té Păblú xâha<sup>n</sup>-dê xii-güedé.

<sup>27</sup>Te sa ní cuu sâhú<sup>n</sup> nduu sâhú<sup>n</sup> niú sá ní nguîfta-xi cùu<sup>n</sup> dáu táchí, te ñá túú-gă dâcaca-güedé bãrcú, chi mee-nă táchí tá chîndaha-xi barcú cuáhá<sup>n</sup> núú ndute lâmár Âdriá. Te sátá ní cuu dava niú, te ní quide cuendá cue té dâcaca barcú sá tá cùyatni-güedé ñuhu yîchí. <sup>28</sup>Te ní chîcuahá-güedé ná daha-gá mëtrú néhé-xí sâ cùnú xití ndute cuendá cutnùní iní-güedé sá tá cùyatni-xi ndéé yuhu lâmár, te nèhe-xi ócò sâhú<sup>n</sup> ìí<sup>n</sup>-ni-gá mëtrú. Te ní xica tucu bãrcú luha-gá, te dâtnùní ní chîcuahá tucu-güedé, te xîá<sup>n</sup> néhé-xí ócò úsá-ni-gá mëtrú. <sup>29</sup>Te ní yùhú-güedé sá candaundé-xi cava, te ní quehe<sup>n</sup>-güedé cúmí caá náhnú sâ nchicú<sup>n</sup> yoho, te ní dáquêe-güedé xití ndute ndâa sátá bãrcú, te dâtnùní ní nguîhî-xi ñá ní xîca-gá-xi, te ní cuiní-güedé sá òré-ni túndaá ní cùu. <sup>30</sup>Te cue té dâcaca barcú ní natava-güedé bãrcú lîhli dândéé-güedé núú ndute ni cùu, te ní cachí-güedé sá quîhî<sup>n</sup>-güedé ndâa núú bãrcú dàquêe-güedé úú-gá caá cuendá cuita candéé-xi bãrcú

cáhnú cuendá sá vǎ cáca-xí. Te cuíní-güedé dandàhú-güedé dava-gá nchúhú cue tée ñuhu ndíhi-güedé bàrcú, chi ní ndatnúhu-güedé sá cúnú-güedé ní cùu. <sup>31</sup>Te té Páblú ní xáha<sup>n</sup>-dě xii tée cùu capitá<sup>n</sup> ndíhi dava-gá sandàdú:

—Te núu na dàndóo ñaha cuè tée dàcaca barcú cunu-güedé, te vǎ cácu-o —càchí-dé xáha<sup>n</sup>-dě.

<sup>32</sup>Te sá dúcá<sup>n</sup> ní xáha<sup>n</sup>-dě ñuu ní sáhá<sup>n</sup> sandàdú ní xehndé-güedé yoho nchícú<sup>n</sup> bàrcú líhli dǎngáunìhnu-güedé xití ndute cuáhá<sup>n</sup>-xi.

<sup>33</sup>Te váha váha-ni ta tǔndaá cuáhá<sup>n</sup>, te ní xáha<sup>n</sup> tǎ Páblú:

—Sa ní cuu sáhú<sup>n</sup> nduu ñá túu tnàhí xexi-ndo sá ndíhú iní-ndó. <sup>34</sup>Te vitna yáchí-ndó, chi caxi-ndo cuendá naníhí ndéé-ndó, te vǎ yùhú-ndó chi ñá túu nǎ tnahá ni ñ<sup>n</sup>-ndo —cachí-dé xáha<sup>n</sup>-dě xii-güedé.

<sup>35</sup>Te sátá dúcá<sup>n</sup> ní cáhá<sup>n</sup>-dé, te ní quehe<sup>n</sup>-dé ñ<sup>n</sup> pǎá, te ní ndacá<sup>n</sup> táhú-dě núú Yǎ Ndiöxí, te núú-güedé nchaa-güedé duca<sup>n</sup> ní quide-dé, te dǎtnùnì ní táhú-dě luha ní xexi-dé. <sup>36</sup>Te duca<sup>n</sup> te dǎtnùnì ní cuyí-güedé ní xexi-güedé nchaa-güedé. <sup>37</sup>Te úú ciendú únídico sáhú<sup>n</sup> ñ<sup>n</sup>-ndí ñúhú bàrcú núú tnàhá té Páblú, te nchaa-ndí ní xexi ndíhi-ndí-dé. <sup>38</sup>Te ní xexi-ndí ní ndahá xití-ndí. Te dǎtnùnì ní ngúíta-güedé ní tava-güedé nchaa ngohnchi triú ní dǎngoyo-güedé xití ndute cuendá nduu ñamá-gá bàrcú.

#### Ní dáhu bàrcú xití làmár

<sup>39</sup>Te sátá ní tǔndaá, te ñá ní cùtnuní-gá iní-güedé ndéé cúú-xí ñúú ní sǎá-güedé, te ní xiní-güedé ñ<sup>n</sup> xichi

núú ní xícó ndúú luha yuhu làmár, te vǎ vihi cúchí dándáá-xí yùhu ndute, te xía<sup>n</sup> ñà túú dàcandá víhí táchí ndute. Te ní ndatnúhu-güedé sá ndácú-güedé dacàca-güedé bàrcú quíh<sup>n</sup>-xi ndéé núú ñúhú cúchí. <sup>40</sup>Te xía<sup>n</sup> ñuu ní sáhá<sup>n</sup>-güedé ní xehndé-güedé nchaa yoho nchícú<sup>n</sup> caá tácàndeé bàrcú ní ndóo xití làmár, te ní nadatàya-güedé vítú sǎ dácuico-xi bàrcú, te ní nacata caa-güedé ñ<sup>n</sup> dóo dǐquí bàrcú, te ta chìndaha táchí cuáhá<sup>n</sup> yuhu làmár tá cùyatni-xi ñuhu yichí cuáhá<sup>n</sup>. <sup>41</sup>Te ndècu ñ<sup>n</sup> xichi ní natacá víhí cúchí xití ndute, te xía<sup>n</sup> ní nguíndüxi nihnu bàrcú-güedé, te ní cutí-xi xití cúchí, te ñá ní nǐhí-gǎ-güedé nàcuáa cada-güedé nene-xi. Te ío níhi ní dácandá táchí ndute, te ní chúcú ndèé-xi ndàa sátá bàrcú, te ní ndíhi ní táhú-xí. <sup>42</sup>Te cue sandàdú ní xitnáha-güedé sá cáhni-güedé nchaa cue tée ní xíhi vecaá cuendá sá vǎ quíh<sup>n</sup>-güedé núú ndute te cunu-güedé. <sup>43</sup>Te tée cùu capitá<sup>n</sup> ñá ní dàña-dé cahni-güedé cue tée ní xíhi vecaá, chi ñá ní cùndee iní-dé cahni-güedé tnàhá té Páblú. Te ní xáha<sup>n</sup>-dě xii-güedé sá cuè tée xícuu cada quíh<sup>n</sup> núú ndute te na yáha-güedé ndute quene-güedé yuhu làmár. <sup>44</sup>Te dava cue tée ñá cúú càda, ní xáha<sup>n</sup>-dě nanducu-güedé vítú ní ñá òdi vítú ní táhú sǎ ní xíhi bàrcú, te núú xía<sup>n</sup> caundodo-güedé yáha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

#### Té Páblú ndécú-dě ñúú Máltá cáá cuádava làmár

**28** Te sátá ní cácu-ndí ní nene-ndí ñuhu yichí, te

ní níhí-ndí tnúhu nàcuáa nàni ñuú núú ní sáá-ndí, te ñuú-á<sup>n</sup> nání-xí Máltá, te càa-xi cuádava làmár. <sup>2</sup>Te ío quide víxi<sup>n</sup>-xi cuèndá ío cùu<sup>n</sup> dáú. Te ñáyíu ñuú-á<sup>n</sup> ní cundàhú iní ñàhà-yu xii-ndí, ní dátñàhà-yu ñuhú te ní cana ñàhà-yu ní sáhá<sup>n</sup>-ndí ní nacuídí-ndí. <sup>3</sup>Te té Páblú dátàcá-dé nducú, te tñàhà-ni ì<sup>n</sup> cóó dēē<sup>n</sup> ní tñi nihnu-dé-dí, te òré cuáhá<sup>n</sup> ndaha-dé chucu-dē núú ñùhú, te ní ñàni-dí cahni, te ní ndee-dí xití nducú ní sándú-dí ndaha-dé, te ní xexiha<sup>n</sup>-dí xii-dé. <sup>4</sup>Te nchaa ñáyíu ndèhé-yu sá təcàndeé-dí ndaha-dé, te ní ngúíta-yu ní xítñàhà-yu:

—Váa ndíyí ní sahani té-a, te ñá ní xíhí-dé làmár, te dacuitíí sá cùú-dé vitna, chi sa ñàha Yá Ndiöxí ná ní quide-dé ñuyú-a —càchí-yu xítñàhà-yu.

<sup>5</sup>Te té Páblú ní quidi-dé ndaha-dé ní ngaunihnu-dí núú ñùhú, te ñá túú tñàhí ná ní cùu núú ní xexi-dí. <sup>6</sup>Te ñáyíu ñuú-á<sup>n</sup> xíndéhě-yu núu daquihí<sup>n</sup>-xi chúhú<sup>n</sup> àdi nduá-dé cuú-dé. Te naha ní xíndéhé ñàhà-yu núu nása cada ñàha-xi xii-dé, te ñá túú tñàhí ná ní quide ñàha-xi, te ní xítñàhà-yu:

—Váa ndiöxí cúú tē-a núu dàcá<sup>n</sup> ñá túú tñàhí ná ní quide-xi ndaha-dé núú ní xexi cóó —càchí-yu xítñàhà-yu.

<sup>7</sup>Te yatni núú dúcá<sup>n</sup> ní xexiha<sup>n</sup> cōó-á<sup>n</sup> cáá ñùhu xitu téa nàni Publiú, te té-a<sup>n</sup> táxí tñùnì-dé ñihí ñuú cáá cuádava xití làmár núú ndécú-ndí nduu-á<sup>n</sup>. Te ío váha iní-dé chi ní cana ñàha-dé ní sáhá<sup>n</sup>-ndí ní xíndecu-ndí úní nduu vehe-dé. <sup>8</sup>Te tətá tē Pùbliú-á<sup>n</sup> cáá-dé cùhú-dé ñùhú-dé cahni,

te tñàhà-dé daxi. Te té Páblú ní sáhá<sup>n</sup>-dé núú cáá-dé, te ní cáhá<sup>n</sup> ndihí-dé Yá Ndiöxí, te ní sacá<sup>n</sup> ndodo-dé ndaha-dé díquí tēe cùhú-á<sup>n</sup>, te duca<sup>n</sup>-ni ní quide-dé, te ní ndúha tēe cùhú-á<sup>n</sup>. <sup>9</sup>Te sátá dúcá<sup>n</sup> ní quide té Páblú, te ní quixi nchaa ñáyíu cùhú núú ndécú-ndí, te ní quide tátña ñàha tē Páblú xií-yu te ní ndúha-yu. <sup>10</sup>Te òré ndécú-ndí xíá<sup>n</sup>, te vài sá ní taxi táhú-güedē, te òré ní xica-ndí ní taxi tucu-güedē nchaa sá xíní ñùhu-ndí ichi.

### Té Páblú ní quexio-dé ñuú Rómá

<sup>11</sup>Te yàcá<sup>n</sup> ní xíndecu-ndí úní yóó, te sa ndècu ì<sup>n</sup> barcú tēe ñuú Alejàndriá òré ní quexio-ndí, te ní xíndecu-xi ñihí yóó cúú<sup>n</sup> dàú táchí. Te núú-xi cándodo sandú sá dánàni-güedé Cástór ndihí sàndú sá dánàni-güedé Pólúx, te xití bàrcú-á<sup>n</sup> ní quée-ndí cuáhá<sup>n</sup>-ndí. <sup>12</sup>Te ní quexio-ndí ñuú Siràcusá, te yàcá<sup>n</sup> ní xíndecu-ndí úní nduu. <sup>13</sup>Te ní xica tucu bàrcú cuáhá<sup>n</sup>-xi, te ní quexio-ndí ñuú Règiú. Te nduu tñéé duha ní quene nuu táchí. Te ní xica bàrcú cuáhá<sup>n</sup>-xi, te ndéé nduu úú ní quexio-ndí ñuú Pùteolí. <sup>14</sup>Te yàcá<sup>n</sup> ní naníhí tñàhà-ndí ndihí ñáyíu sàndáá iní tnúhu Jèsús, te ní cachí-yu sá cùndècu-ndí úná nduu, núú xíá<sup>n</sup> ní xíndecu-ndí úná nduu ndihí-yu. Te ní xica tucu bàrcú cuáhá<sup>n</sup>-xi, te ní quexio-ndí ñuú Rómá. <sup>15</sup>Te ñáyíu rómá ñáyíu sàndáá iní tnúhu Jèsús, ní níhí-yu tnúhu sá cuàhà<sup>n</sup>-ndí, te ní quixí-yu ní quixi tñàhà ñàhà-yu ichi. Te davá-yu ní naníhí-ndí ñuú Fòrú Àpiú, te davá-yu ní naníhí-ndí ñuú Úní Tàbernás. Te òré ní xiní té



Päblú nchaá ñáyiú véxi tnahá ñáhá xii-ndí, te ndee ndèe ní cuu iní-dé, te ní ndacá<sup>n</sup> táhú-dě núú Yă Ndiöxí sá dúcá<sup>n</sup> ní quidé-yu. <sup>16</sup>Te sátá ní quexio-ndí ñúú Rómá, te cue tée cùchiu<sup>n</sup> ní xáha<sup>n</sup>-güedě xii té Päblú sá cündècu ñí<sup>n</sup>-dé, te ní xindee ñáhá cuàa sandadú xii-dé.

### Té Päblú càhá<sup>n</sup>-dé tnúhu

#### Yá Ndiöxí ñúú Rómá

<sup>17</sup>Nduu úní sá ní quexio té Päblú, te ní cana-dé cue tée cùnuu núú ñáyiú isràél ndécú ñúú Rómá, te ní sáhá<sup>n</sup>-güedé núú ndécú-dě, te ní xáha<sup>n</sup>-dě:

—Nchòhó cue tée isràél, càchí tnúhu-í sá ñà túú ñà ní quide-í ni ñí<sup>n</sup> ñáyiú cùtnàhá ní xindecu-í ñúú Jerusàlén. Te ñà túú ní càhá<sup>n</sup> cuèhé-í sá quidě-yu nchaá nàcuáa ní xóo cada cue ñaní tñáhá-ó ní xindecu ndéé sanaha, te ñà túú ñà ní quide-í te ní tñi ñaha-güedě ní sáha cuendá ñáhá-güedě xii-í núú cuè tée rómá, cue tée ndècu yacá<sup>n</sup>. <sup>18</sup>Te cue tée-á<sup>n</sup> ní ndúcú tñihu-güedé ñuu ndáá ndècuéchi-í, te ní cutnùni iní-güedé sá ñà túú ñà ní quide-í, te xiá<sup>n</sup> cuini-güedé queñuhu ñaha-güedě xii-í vecaá ní cùu. <sup>19</sup>Te ñiú-ni cue tée isràél ñà ní dàña-güedé cácu-í, chi cuini-güedé sá cáhni ñaha cue tée rómá, cue tée xindecu yacá<sup>n</sup> xii-í ní cùu, te xiá<sup>n</sup> ñuu ní xáha<sup>n</sup>-í sá quixí-í càhá<sup>n</sup> ndihi-í té Cèsár cuendá iha cada ndáá méé-dě cuendá-í, te vá yòo ñí<sup>n</sup> tee-í cuéchi. <sup>20</sup>Núu xiá<sup>n</sup> ní cana ñaha-í xii-ndo cuendá cunaha-ndo nàcuáa ní cuu. Te ní xáha<sup>n</sup>-í sá sàndáá iní-í sá ndótó ñáyiú ní xíhí, te ñiú-ni duca<sup>n</sup> càhá<sup>n</sup> dava-gá ñáyiú

isràél, te sá dúcá<sup>n</sup> ní càhá<sup>n</sup>-í, te ní chihí ñaha-güedě vecaá, te xindee ñáhá-güedě ndéé vitna —càchí té Päblú xáha<sup>n</sup>-dě xii-güedé.

<sup>21</sup>Te ní xáha<sup>n</sup>-güedě xii-dé:

—Ñà túú tñàhí tutú ní tëndaha cue tée distrítú Jùdeá quixi cuendá-n. Te ni cuè tée isràél ñà túú ní quixi-güedé càhá<sup>n</sup> cuèhé-güedé cuendá-n. <sup>22</sup>Te cuini-ndí cundedóho-ndí nása cunduu tnúhu càhá<sup>n</sup>-n, chi sa ní níhí-ndí tnúhu sá ncháá xìchi ío xícáhá<sup>n</sup> cuèhé-yu cuendá nchaá ñáyiú sàndáá iní tnúhu Jèsús —càchí-güedé xáha<sup>n</sup>-güedě xii té Päblú.

<sup>23</sup>Te ní xáha<sup>n</sup>-güedě nduu cùyáchí-güedé te quixi-güedé cundedóho-güedé dava-gá cuendú càhá<sup>n</sup> té Päblú. Te ní tnahá nduu ní ndatnúhu-güedé quíhí<sup>n</sup>-güedé núú quidé vèhe-dé, te vài-yu ní sáhá<sup>n</sup>-yu ní xindedóho-yu tnúhu ní càhá<sup>n</sup>-dé, te nchàca nchaá ní càhá<sup>n</sup> ndihi-dé-yu. Te ní xáha<sup>n</sup>-dě xií-yu sá ndíi Moisés ndihi dava-gá cue tée ní xóo càhá<sup>n</sup> tnúhu Yá Ndiöxí ndéé sanaha ní chídó tñuni-güedé núú tütú-güedé sá dífú-gă tendaha-gă Crístú quixi-gă ñuyúú-a. Te ní chídó tñuni-güedé nchaá nàcuáa cada-gá, te ñiú-ni nàcuáa càhá<sup>n</sup> tutú-güedé cada Crístú, te duca<sup>n</sup> ní quide-gá cùtnàhá ní xica cuu-gá ñuyúú-a, núu xiá<sup>n</sup> ní cutnùni sá dífú Jèsús cútú-gă Crístú Yaá ní tendaha Yă Ndiöxí ní quixi ñuyúú-a. Te núu quindáá iní-yu, te ndíhu ndaha ñaha Yá Ndiöxí xií-yu. <sup>24</sup>Te davá-yu ní sàndáá iní-yu tnúhu ní càhá<sup>n</sup>-dé, te davá-yu ñà túú ní sàndáá iní-yu. <sup>25</sup>Te cuendá

sá ñǎ íí<sup>n</sup>-ní tnǎhu ni cǎhá<sup>n</sup>-yu, núu xǎá<sup>n</sup> cuíní-yu núhú-yu ni cùu. Te ní xáha<sup>n</sup> tǎ Pǎblú sá cúndetu tnaá-yu cǎhá<sup>n</sup>-dé ingá tnúhu, te xǎha<sup>n</sup>-dě:

—Ní xáha<sup>n</sup> Espíritú Yǎ Ndiǒxí xii ndíi Chàia nácuáa cǎhá<sup>n</sup> ndíi núu nchàa ñaní tnáhá-ó ní xíndecu ndéé sanaha. Te ní cǎhá<sup>n</sup> Espíritú-gá íí<sup>n</sup> sá ndàá ní xáha<sup>n</sup>-xi xii ndíi, te duha ní xáha<sup>n</sup>-xi:

<sup>26</sup> Quíhí<sup>n</sup>-n te cúñaha-n xii ñáyiú: Nchòhó mee-ni cùndedóho-ndo tnǎhu cǎhá<sup>n</sup> Yǎ Ndiǒxí, dico ni vǎ tècú tnùní-ndó.

Te cada-gá titní núu sǎ vǎ yǒo tnàhí ndàcu cada, dico ni vǎ cútnùní iní-ndó nácuáa ndùu sá cǎdá-gǎ,

<sup>27</sup> chi cuendá sá ìo sàá iní-ndó, xǎá<sup>n</sup> duca<sup>n</sup> ñà túú sǎha-ndo cuendá nása cuáhá<sup>n</sup> tnúhu cǎhá<sup>n</sup>-gá, chi ñǎ cuíní-ndó cùndedóho-ndo, te ni ñǎ sàndáá iní-ndó.

Te ni ñǎ cuíní-ndó dàña-ndo nchaa sá cuèhé sá dúhá quède-ndo

cuendá xocàni-gá nchaa xǎá<sup>n</sup> iní-ndó, duha cúñaha-n xii-yu.

Càchí Espíritú-gá xǎha<sup>n</sup>-xi xii ndíi. <sup>28</sup>Te na càchí tnúhu-í sá quíhí<sup>n</sup> cue tée cǎhá<sup>n</sup> tnúhu Yá Ndiǒxí cǎhá<sup>n</sup>-güedé tnúhu-gá núu ñáyiú ñǎ túú cùu ñáyiú isràél, chi ñáyiú isràél ñǎ túú cuíní-yu cùndedóho-yu. Dico ñáyiú ñǎ túú cùu ñáyiú isràél chi cùdǎí iní-yu cùndedóho-yu, núu xǎá<sup>n</sup> naníhí tàhú-yu —càchí té Pǎblú xǎha<sup>n</sup>-dě xii-yu.

<sup>29</sup>Te sátá ní ndíhi cuendú ní xáha<sup>n</sup>-dě, te ní ndeé-yu cuánuhú-yu ta ndàtnúhu-yu cuáhá<sup>n</sup>.

<sup>30</sup>Te úú cuíá ní xínu ní xíndecu té Pǎblú íí<sup>n</sup> vehe ní chǎhu-dé. Te ní xóo cǎhá<sup>n</sup> váha-dé ndíhi nchaa ñáyiú ní xóo quíhí<sup>n</sup> vehe-dé. <sup>31</sup>Te ní xáha<sup>n</sup>-dě sá ndíhu ndaha ñàha Yá Ndiǒxí xii-yu núu quíndáá iní-yu tnúhu-gá, te vǎ yǒo íí<sup>n</sup> ni sàdí yuhu-dé. Te mee-ni tnǎhu Xítóhó Jesucrístú ní cǎhá<sup>n</sup>-dé núú-yu.

# TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑUÚ RÒMÁ

Té Páblú cadúha-dé tutú quíhí<sup>n</sup>  
ndaha ñáyiú xĩndecu ichi Xítóhó  
Jesucristú ndécú ñúú Rómá

**1** Yúhú té Páblú xínú cuèchi-í  
núú Xítóhó Jesucristú, chi  
mee Yă Ndiöxí ní cachí-gá sá cùu-í  
ii<sup>n</sup> téé cáhá<sup>n</sup> tnúhu-gá núú ñáyiú,  
te tnúhu-gá cúu-xí tnúhu sá cáhá<sup>n</sup>  
nàcuáa naníhí tǎhú-ó, núú diu-gá  
ní tendaha ñàha-gá xii-í xícá cùu-í  
cáhá<sup>n</sup>-í tnúhu-gá.

<sup>2</sup>Te ndéé sanaha ñí cachí Yă  
Ndiöxí sá dàcuítíí sàá nduu  
ngũndecu ndihi ñáyiú tnúhu-gá.  
Te duca<sup>n</sup> ñí xáha<sup>n</sup>-gǎ xii cue téé ní  
cáhá<sup>n</sup> tnúhu-gá dàvá-á<sup>n</sup> ñí chídó  
tnùn-í-güedé núú tütú-gá. <sup>3</sup>Te  
tnúhu-gá sá cáhá<sup>n</sup>-í-a cáhá<sup>n</sup>-xi  
diu-ni cuendá Xítóhó Jesucristú Yaá  
cúú Dêhe-gá. Te Dêhe-gá-á<sup>n</sup> cúu-gǎ  
ii<sup>n</sup> ñáyiú, te cùu-gá ñaní tnáhá  
ndií Dàvií. <sup>4</sup>Te cùu-gá Yaá ñá ná tütú  
tnáhí cuèchi-xi. Te ní xíhí-gá te  
ní ndoto-gá, te xíá<sup>n</sup> cútñuní iní-ó  
sǎ cúu-gǎ Dêhe Yă Ndiöxí, te ío  
càhnu cuu-gá. <sup>5</sup>Te diu-ni Xítóhó  
Jesucristú ní quide-gá ní nduu  
táhù-í núú Yă Ndiöxí sá cáhá<sup>n</sup>-í  
tnúhu-gá núú cuè ñáyiú ñuyú-a  
cuendá quíndáá iní-yu tnúhu-gá

te canchicú<sup>n</sup> nihnú-yu cadá-yu  
nchaa nàcuáa cáhá<sup>n</sup>-xi, te duca<sup>n</sup> ño  
cúu càhnu-gá. <sup>6</sup>Te tnàhá nchòhó  
cúu-ndo ñáyiú sa nchicú<sup>n</sup> nihnu  
quide-ndo nchaa nacuáa cáhá<sup>n</sup>  
tnúhu-á<sup>n</sup>, chi ní cachí Yă Ndiöxí  
sá nchòhó tnahá tnúhu-ndo ndií  
Xítóhó Jesucristú. <sup>7</sup>Te nchòhó  
ñáyiú xĩndecu ñúú Rómá, ñáyiú ío  
cùu iní ñáhá Yă Ndiöxí, cadúha-í  
tutú-a daquixi-í ndaha-ndo. Te  
diu-ni nchòhó cúu-ndo cuè ñáyiú  
ní cachí Yă Ndiöxí cada ndáá  
cundecu-ndo nùú-gǎ. Te xicá<sup>n</sup> tǎhù-í  
núú Tǎtá-ó Dütú Ndiöxí ndiíhí núú  
Xítóhó Jesucristú sá ño na chĩndee  
chitúu ñaha-gǎ xii-ndo, te duca<sup>n</sup>  
ndi nduú-gá ná càda te ío váha cuu  
iní-ndo cundecu-ndo.

Té Páblú cuíní-dé quíhí<sup>n</sup> ngoto-dé  
cue ñáyiú xĩndecu ichi Xítóhó  
Jesucristú ndécú ñúú Rómá

<sup>8</sup>Te díhna nuu-gǎ càchí tnúhu-í  
xii-ndo sǎ ño ndàcá<sup>n</sup> tǎhù-í núú  
Yă Ndiöxí cuendá sá ño sàndáá  
iní-ndó-gǎ, te nchaa ñáyiú nihí-yu  
tnúhu sá dúcá<sup>n</sup> quide-ndo. Te  
Xítóhó Jesucristú dáyǎha-gá nchaa  
tnúhu cáhá<sup>n</sup>-í núú Yă Ndiöxí. <sup>9</sup>Te  
ndi tnahá òrè cáhá<sup>n</sup> ndiíhí-í Yă

Ndiöxí duca<sup>n</sup>-ni xicá<sup>n</sup> táhù-í núú-gă cuendá-ndó, te mee-gă nâhá-gă sá cãhá<sup>n</sup> ndáá-í, te ðiu-ni núú-gă xínú cuèchi-í ní yèhu ni iní-í, chi cãhá<sup>n</sup>-í nàcuáa ní quide Déhe-gă Xítóhó Jesucristú cuendá naníhí tàhù-ó.

<sup>10</sup>Te xicá<sup>n</sup> táhù-í núú Yă Ndiöxí sá nũu mee-gă ná cãchí te sáá ì<sup>n</sup> nduu quixi coto ñaha-í xii-ndo. <sup>11</sup>Chi ío cuiní-í cundecu ndíhi ñaha-í xii-ndo dânehé ñâhá-í ì<sup>n</sup> úú tnúhu nàcuáa ío-gă chindee ñâha Espíritú Yă Ndiöxí xii-ndo, te duca<sup>n</sup> ío-gă cuita nducu ndèe-ndo cada-ndo nchaa nacúaa cuiní-gă. <sup>12</sup>Te ío chí ná cuăha tnâha-o tnúhu ndee ìní cundecu-o ìchi-gă, chi nchòhó ndíhi yúhú ío sàndáá iní-ó-gă.

<sup>13</sup>Te nchòhó ñáyíu ndècu ndíhi-í ichi Xítóhó Jesucristú na cãchí tnúhu-í xii-ndo sã dúcá<sup>n</sup>-ní ío sàni iní-í quixi coto ñaha-í xii-ndo. Te cuiní-í sá òré quixi coto ñaha-í xii-ndo, te vá cuíta chìu<sup>n</sup> quixi-í dàtná quidè-í òré sãngoto-í nchaa ñáyíu dava-gă ñúú ñá túú xíta chìu<sup>n</sup>-í chi ío váha sàhúu<sup>n</sup>-yu tnúhu cãhá<sup>n</sup>-í, dico ñá ndácù-í quixi-í quixi coto ñaha-í xii-ndo. <sup>14</sup>Te yúhú yídìquì-í cãhá<sup>n</sup>-í tnúhu Xítóhó Jesucristú núú nchàa ñáyíu cãhá<sup>n</sup> tnúhu grìégú, ndíhi núú nchàa ñáyíu cãhá<sup>n</sup> dava-gă núú tnúhu, ndíhi núú nchàa ñáyíu túha, ndíhi núú nchàa ñáyíu ñá túú tũha. <sup>15</sup>Te cuendá sá dúhá yìdìquì-í cãhá<sup>n</sup>-í tnúhu-gă, xíã<sup>n</sup> ío cuiní-í danèhé ñâhá-í xii nchaa nchòhó ñáyíu ñúú Ròmá nàcuáa ndùu tnúhu sá cãhá<sup>n</sup> nàcuáa naníhí tàhù-ó.

**Ío cùnuu tnúhu Xítóhó Jesucristú**

<sup>16</sup>Te yúhú ñá túú tnâhí cùcaha<sup>n</sup> núú-í cãhá<sup>n</sup>-í tnúhu Xítóhó

Jesucristú, chi cùu-xi tnúhu ío cùnuu, chi Yă Ndiöxí ní cachí-gă sá nchàá ñáyíu na quindáá iní-xi tnúhu-á<sup>n</sup> te naníhí tàhù-yu. Te ní cachí-gă sá dîhnanuu-gă ñáyíu isrâél ngúndecu ndíhí-yu tnúhu-á<sup>n</sup> te dàtnùní ngúndecu ndíhi ñáyíu ñá túú cùu ñáyíu isrâél. <sup>17</sup>Te tnúhu-á<sup>n</sup> dánèhé ñâhá-xí xii-o sá cúdìu-o núú Yă Ndiöxí te núu mee-ni sã quindáá iní-ó-gă dàtná cãhá<sup>n</sup>-xi núú tütú-gă núú cãchí-xi: “Nchaa ñáyíu sàndáá iní ñâhá xii Yă Ndiöxí cúdìu-yu núú-gă, te ndècu ndíhi ñahá-yu xii-gă”, duha cãchí-xi núú tütú-gă.

**Nchaa ñáyíu ndècu  
ñuyú ndècuéchi-yu**

<sup>18</sup>Te ndéé andíu tëndaha Yă Ndiöxí sá úhú quixi sá cúú-xí nchàa ñáyíu ñá túú quide ndáá núú-gă, ñáyíu quide nchaa sá cuèhé sá dúhá. Te cuendá nchaa sá quidè-yu-á<sup>n</sup> xíã<sup>n</sup> ñá túú cuiní-yu tníí-yu tnúhu ndáá tnúhu Yă Ndiöxí cuendá cuu-xi ì<sup>n</sup> sá vâha sá cúú-xí-yu. <sup>19</sup>Te cuèi duca<sup>n</sup> quidè-yu dico cùtnuní ndáá iní-yu nàcuáa ndùu sá sání ìní Yă Ndiöxí ndíhi nàcuáa ndùu sá quidè-gă dàtná cùtnuní iní nchaa dava-gă-yu, chi ðiu-gă dánèhé ñâhá-gă xii-yu.

<sup>20</sup>Te ni vã ndácú-ó quiní núú-ó nãsa càa-gă, te ni vã ndácú-ó quiní-ó nãsa càa iní-gă, te ni vã ndácú-ó quiní-ó nãsa quide-gă táxí tnùní-gă nchaa nduu nchaa quíú. Te cuèi duca<sup>n</sup> dico ndéé cùtnâhá ní ngáva ñuyú ní ngúita nchaa ñáyíu tècú tnùní váha-yu nàcuáa ndùu sá sání ìní-gă ndíhi nàcuáa ndùu sá quidè-gă te duca<sup>n</sup> tècú tnùní-yu cuendá nchaa sá ñí cadúha-gă ndéhè-yu ío ñuyú-a, núu xíã<sup>n</sup> vã

càchí-yu sá ñà túú cuèchi-yu. <sup>21</sup>Te cuéi duca<sup>n</sup> ní cutnùní iní-yu cuèndá Yá Ndiöxí dico ñá túú cuiní-yu canehé-yu sá yíñùhu núú-gǎ nàcuáa tàú-xi cunduu. Te ni ñà túú cuiní-yu ndacá<sup>n</sup> táhǔ-yu núú-gǎ cuèndá nchaa sá vǎha quide ñaha-gá xí-yu, chi mee-ni nchàa sá ñà túú vèdana nàndíhi ñùhu iní-yu. Te quidé-yu dàtná quidé ì<sup>n</sup> ñáiyu ñá túú ndècu ndíhi nchaa sá xìní tnùní-xi. Te uu<sup>n</sup>-gá uu<sup>n</sup>-gá tá quidé-yu cuáhá<sup>n</sup>. <sup>22</sup>Te càchí-yu sá cúú-yu ñáiyu ío váha sàá sá xìní tnùní-xi dico ñá ndàá, chi cùú-yu ñáiyu ío nìi ðíquí-xi. <sup>23</sup>Te ñá túú cuiní-yu cáhá<sup>n</sup>-yu sá ío càhnu cuu Yá Ndiöxí Yaá ndécú nchàa nduu nchaa quíú, chi da nchaa sá ní cadúha mèe-yu quide cahnú-yu. Te ní cadúha-yu nchaa sá nàhá ñáiyu ñá túú cùdí ndècu ñuyíú-a. Te ní cadúha-yu sá nàhá quiti ndàva, ndíhi sá nàhá quiti sàcuíta ñuhu mee-xi, ndíhi sá nàhá nchaa dava-gá quiti, nchaa xíá<sup>n</sup> quidé càhnú-yu.

<sup>24</sup>Te xíá<sup>n</sup> núu ní dáñá Yá Ndiöxí quidé-yu nchaa sá cuèhé sá dúhá sàni iní-yu. Te xíá<sup>n</sup> ío quide ndíhi tnahá-yu sá cuèhé sá dúhá sàcúú-xí yìqui cuñú-yu. <sup>25</sup>Te duca<sup>n</sup> quidé-yu chi ñá túú sàndáá iní-yu tnúhu ndáá tnúhu Yá Ndiöxí. Te mee-ni tnúhu ndehnde sàndáá iní-yu, te nèhé-yu sá yíñùhu núú dàva sá ní cadúha-gá ío ñuyíú-a ndíhi dava sá ndèé andiu te quide cahnú-yu, te ñá túú càchí-yu sá méé-gǎ ío càhnu cuu-gá, dico mee-gǎ xìní ñùhu-xi cáhá<sup>n</sup>-yu sá ío càhnu cuu-gá ni caa ni quíhí<sup>n</sup>. Te ndáá ndisa sá ío càhnu cuu-gá.

<sup>26</sup>Te sá dúcá<sup>n</sup> ñà túú quide váha-yu núu xíá<sup>n</sup> ní dáñá-ñá Yá

Ndiöxí quidé-yu nchaa sá cuèhé sá dúhá sàni iní méé-yu. Te dava ñáiyu ðíhí càhá<sup>n</sup> ndíhi tnahá-yu ndi mèe ðíhí-yu te ñá túú quidé-yu nàcuáa ní nduu táhǔ-yu cadá-yu. <sup>27</sup>Te ðiu-ni duca<sup>n</sup> xíquide dava cue téé chi sàni cuehé sání dùha iní-güedé sá cúú-xí yìqui cuñú-güedé ndi mèe tnahá téé-güedé, chi càhá<sup>n</sup> ndíhi tnahá ndi mee-güedé te ñá túú quide-güedé nàcuáa ní nduu táhǔ-güedé cada-güedé, te sá dúcá<sup>n</sup> quide-güedé te ñá túú tnahí cùu váha iní-güedé ndécú-güedé, te duca<sup>n</sup> tnahí tàú-xi ndoho-güedé cundecu-güedé.

<sup>28</sup>Te ñá túú tnahí ñùhu iní-yu Yá Ndiöxí núu xíá<sup>n</sup> duu<sup>n</sup> duu<sup>n</sup> ní dáñá ñìhnu ñaha-gá xí-yu sàni cuehé sání dùha iní-yu, te quidé-yu nchaa sá ñà túú tàú-yu cadá-yu.

<sup>29</sup>Te nchaa núú sǎ cuèhé sá dúhá cùnnuu quidé-yu. Te cue téé càhá<sup>n</sup> ndíhi-güedé ñáiyu ðíhí te ñá díú ñàðíhí-güedé cúú-yu. Te ðiu-ni duca<sup>n</sup> xíquide cue ñáiyu ðíhí chi càhá<sup>n</sup> ndíhí-yu cue téé te ñá díú yì-yu cùu-güedé. Te mee-ni sǎ ñà túú vǎha quidé-yu sá cúú-xí tnahá ñáiyú-yu, te xìhó-yu cundecu ndíhí-yu sá ndécú ndíhi dava-gá tnahá ñáiyú-yu, te ío sàni cuehé sání dùha iní-yu sá cúú-xí tnahá ñáiyú-yu, te ío cuédú íñí-yu, te sàhni tnahá-yu, te ío plètú-yu, te dàndahú tnahǎ-yu, te cùu úhú iní-yu cue tnahá ñáiyú-yu, te ío yiti yùhú-yu. <sup>30</sup>Te càhá<sup>n</sup> cuèhé-yu cuèndá nchaa dava-gá tnahá ñáiyú-yu, te cùu úhú iní-yu Yá Ndiöxí, te xio xio cuiní-yu cunuu tnúhu-yu, te mee-ni sàni iní-yu sá ío váha cunduú-yu, te ío quide

cahnú-yu mèè-yu, te ío sàni iní-yu sá cáda ũhú-yu tnàha ñáiyú-yu, te ñá túú sàndáá iní-yu ni tátã-yu ni nãñã-yu. <sup>31</sup>Te ñá túú tècú tnùní-yu sá vâha, te ñá túú quidé-yu ñí<sup>n</sup> sá càhá<sup>n</sup>-yu, te ñá túú cùu iní-yu ni ñáiyu cùu ndí meé-yu, te ni dàva-gá tnàha ñáiyú-yu, te ñá túú quide cahnu iní-yu ñí<sup>n</sup> sá cúmãní nũú tnáhã-yu, te ni ñà túú cùndahú iní-yu tnàha ñáiyú-yu. <sup>32</sup>Te Yá Ndiõxí ní cachí-gá sá ncháá ñáiyu duca<sup>n</sup> xĩquide quíhí<sup>n</sup>-yu núú ùhú núú ndàhú. Te xìní-yu sá Yá Ndiõxí daquíhí<sup>n</sup> ñáhã-gã xíí-yu núú ùhú núú ndàhú sá dúcã<sup>n</sup> quidé-yu, dico uu<sup>n</sup>-gã quidě-yu chi váha-gã cúú ìní-yu cue ñáiyu quide datná quidé mèè-yu.

Yá Ndiõxí cada ndáá-gã cuéchi nchaa ñáiyu ndècu ñuyúú

**2** Te nchòhó ñáiyu càchí sá ío ndècu cuéchi dava-gã ñáiyu tnàhá-ndó ío ndècu cuéchi-ndo cuéi nágá ñáiyu cùu-ndo, chi tnàhá-ndó quide-ni-ndo nchaa nacuaá quide dava-gã ñáiyu càchí-ndó ndècu cuéchi-xi, te sá dúcã<sup>n</sup> càhá<sup>n</sup>-ndó sã ndécú cuéchi ñáiyu-á<sup>n</sup> te dàcaa-ndo cuéchi díquí-ndó chi tnàhá-ndó quide-ndo datná quidě-yu. <sup>2</sup>Te nchoo xìní-ó sã Yá Ndiõxí ío váha cùtnuní iní-gã nacuaá cada ndáá-gã cuéchi ñí<sup>n</sup> ñí<sup>n</sup> nchoo ñáiyu ndècu ñuyúú-a, chi daquíhí<sup>n</sup>-gã nchaa ñáiyu quide nacuaá ní càhá<sup>n</sup>-í núú ùhú núú ndàhú. <sup>3</sup>Te nchòhó ñáiyu ñí<sup>n</sup>-ni quide ndíhi ñáiyu càchí mèé-ndó sã ndécú cuéchi-xi dacuítíí sã ná chãhu-ndo nũú Yá Ndiõxí sá dúcã<sup>n</sup> quide-ndo. <sup>4</sup>Te ñá túú cùu váha iní-ndó sã Yá Ndiõxí

cúndàhú iní ñáhã-gã xii-ndo, te ni ñà túú cùu váha iní-ndó sã ío cuíní-gã cada càhnu iní-gã nchaa sá ñà túú váha quide-ndo, te ni ñà túú quide cuendá-ndó sã Yá Ndiõxí quidé vâha ñaha-gã xii-ndo cuendá cuíní-gã sá nchòhó ndixi túu iní-ndó sã ñà túú quide váha-ndo ndècu-ndo. <sup>5</sup>Te nchòhó cúú-ndó ñáiyu ío sàá iní-xi, chi ñá túú cuíní-ndó ndixi túu iní-ndó sã ñà túú quide váha-ndo ndècu-ndo, te xíã<sup>n</sup> nũu ío-gã tá cùu vai tnúndòho sá cúú-xí-ndó. Te na sàá nduu tnúhu ndòho tnúhu ndàhú te ío ndoho-ndo, chi Yá Ndiõxí cada ndáá-gã nacuaá ndùu cuéchi-ndo. <sup>6</sup>Te dàvá-á<sup>n</sup> cada ndáá Yá Ndiõxí nchaa nacuaá ndùu nchaa sá ñí quide ñí<sup>n</sup> ñí<sup>n</sup> ñáiyu ndècu ñuyúú-a. <sup>7</sup>Te nchaa ñáiyu nchìcú<sup>n</sup> nihnu-ni quide mee-ni sá vâha, ñáiyu-á<sup>n</sup> nduu táhũ-yu cundecú-yu ndíhi Yá Ndiõxí ni caa ni quíhí<sup>n</sup>, te duca<sup>n</sup> quide váha-yu chi cuíní-yu sá Yá Ndiõxí cuu váha iní ñáhã-gã xíí-yu, te cuíní tucú-yu nduu táhũ-yu núú ío váha càa ndecu Yá Ndiõxí cundecú-yu ni caa ni quíhí<sup>n</sup>. <sup>8</sup>Te ío cùdée<sup>n</sup>-gã núú nchaa ñáiyu ñũhu iní mee-ni sã cúú-xí mèè-xi, te ñá túú sàndáá iní-yu tnúhu ndáá chi mee-ni sã cuèhé sá dúhá quidé-yu. <sup>9</sup>Te nchaa ñáiyu duca<sup>n</sup> xĩquide ío ndíhú iní-yu. Te díhna-gã ñáiyu isràél ngúíta-xi ndohó-yu, te dàtnuní ngúíta-xi ndoho nchaa ñáiyu ñá túú cùu ñáiyu isràél. <sup>10</sup>Te nchaa ñáiyu ní quide váha, te Yá Ndiõxí cada-gã te ngúndecú-yu núú ío váha càa ndecu-gã, te cachí-gã sá ñí quide váha-yu, te ío váha cuu iní-yu cundecú-yu. Te díhna-gã ñáiyu isràél ñáiyu ní quide váha

duca<sup>n</sup> càda ñaha-gá xii-yu, te dàtnùnì duca<sup>n</sup> càda ñaha-gá xii ñáiyu ñá túú cùu ñáiyu isràèl ñáiyu ní quide váha.

<sup>11</sup>Te ñá túú quide cuendá-gá cuèi nái ñáiyu cùu-yu. <sup>12</sup>Te nchaa ñáiyu ndècu ndihi nchaa tnúhu ní chídó tnùnì ndíi Moisés, Yá Ndiöxí cada ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Te nchaa ñáiyu ñá túú ndècu ndihi tnúhu ní chídó tnùnì ndíi-á<sup>n</sup>, Yá Ndiöxí vá cáda ndáá-gá cuéchi-yu nàcuáa càhá<sup>n</sup> nchaa tnúhu-á<sup>n</sup>. Dico nchaa ñáiyu quide nándi sá cuèhé sá dúhá dàcuitíi cuíta nihnú-yu cuèi ndècu ndihí-yu tnúhu ní chídó tnùnì ndíi Moisés àdi ñá túú ndècu ndihí-yu. <sup>13</sup>Te nchaa ñáiyu dicó-ni sàcúndedóho nchaa tnúhu ní cáhá<sup>n</sup> ndíi Moisés te ñá túú tnèi-yu, ñáiyu-á<sup>n</sup> ñà túú cùdiú-yu núú Yá Ndiöxí, dico nchaa ñáiyu tnèi nchaa tnúhu ní cáhá<sup>n</sup> ndíi, ñáiyu-á<sup>n</sup> càchí Yá Ndiöxí sá cùdñú-yu núú-gă, chi ñá túú-gă cuéchi-yu ndècu núú-gă.

<sup>14</sup>Te nchaa ñáiyu ñá túú ndècu ndihi tnúhu ní chídó tnùnì ndíi Moisés, te núu quidé-yu nchaa nàcuáa ní cáhá<sup>n</sup> ndíi te cùu-xi ñi<sup>n</sup> sá sání tnàhí iní mée-yu cadá-yu, te sá sání iní-yu-á<sup>n</sup> cúú-xí ñi<sup>n</sup> tnúhu váha sá sánú ichi ñaha xii-yu nàcuáa cada váha-yu cundecú-yu. <sup>15</sup>Te sá dúcá<sup>n</sup> quidé-yu xíã<sup>n</sup> cútñuní sá sání iní-yu dàtná càhá<sup>n</sup> tnúhu ní chídó tnùnì ndíi Moisés cada ñáiyu isràèl, te ío váha cùtnuní iní-yu nchaa nàcuáa quidé-yu chi ndixi túu iní-yu òré ñá túú quide váha-yu. <sup>16</sup>Te sáá nduu te Yá Ndiöxí cúñaha-gă xii Xítoho Jesucristú cada ndáá-gá nchaa cuéchi ñáiyu,

nchaa sá sání iní mée-yu nduu yuhu, te cada-gá dàtná càhá<sup>n</sup> tnúhu sá sánú ichi ñaha xii-o nàcuáa naníhí tàhú-ó, tnúhu sá dánèhé ñáhà-í xii-ndo.

**Cuendá ñáiyu isràèl ndihi  
cuendá nchaa tnúhu ní  
chídó tnùnì ndíi Moisés**

<sup>17</sup>Te nchòhó ñáiyu isràèl nchaa-ndo cùu-ndo ndi mee-í, te càchí-ndó sã nchicú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndíi Moisés núu xíã<sup>n</sup> ndécú vâha-ndo, te càchí-ndó sã ío càhnu cuu-ndo sá ndécú ndihi-ndo Yá Ndiöxí. <sup>18</sup>Te cùtnuní iní-ndó nchàa nàcuáa cuíní Yá Ndiöxí cada-ndo, te sá dúcá<sup>n</sup> nchicú<sup>n</sup> nihnu-ndo quide-ndo nàcuáa càhá<sup>n</sup> tnúhu-á<sup>n</sup> xíã<sup>n</sup> cútñuní iní-ndó nchàa sá ío-gă váha xìni ñuhu-xi cada-ndo. <sup>19</sup>Te càchí-ndó sã ío váha xìní-ndó cànuichi-ndo nchaa ñáiyu ñá túú cùtnuní iní-xi, te càchí tucu-ndo sã ío váha xìní-ndó nà canu ichi-ndo nchaa ñáiyu ndècu ichi cuehé ichi duha. <sup>20</sup>Te sànu ichi-ndo nchaa ñáiyu ío ñi dñquí-xi, ndihi nchaa ñáiyu vitna ta tècu tnùnì nchaa sá vâha, te duca<sup>n</sup> quide-ndo chi ndècu ndihi-ndo nchaa tnúhu ní chídó tnùnì ndíi Moisés, te tnúhu-á<sup>n</sup> cúú-xí tnúhu ndáá, chi sànu ichi ñaha-xi xii-ndo nàcuáa cada-ndo. <sup>21</sup>Te nchòhó dàcuaha-ndo ñáiyu nàcuáa cadá-yu, te mee-ndo ñà túú dàcuaha-ndo cada-ndo nchaa nàcuáa tàú-xi cunduu, te xãha<sup>n</sup>-ndo xii-yu sá vã cúú dùhú-yu te mee-ndo dùhu-ndo. <sup>22</sup>Te dàcuaha-ndó-yu sá cuè tée vá cúú càhá<sup>n</sup> ndihi-güedé ñáiyu

dihí te núu ñá díú ñàdihí-güedé cúú-yu, te duca<sup>n</sup>-ni cuè ñáiyu dihí, vá cúú cǎhá<sup>n</sup> ndihí-yu tée te núu ñá díú yǐ-yu cùu-güedé. Te nchaa sá xǎha<sup>n</sup>-ndo vǎ cúú càda ñáiyu te mee-ndo quide-ni-ndo, te xǎha<sup>n</sup>-ndo xií-yu sá vǎ cǎnèhé-yu sá yǐñùhu núu nchàa sá cǎchí-yu cùu ndiòxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. <sup>23</sup>Te cǎchí-ndó sǎ ìo cùnuu nchaa tnúhu ní chídó tnùnì ndíi Moisés, te ñá túú quide-ndo nchaa nacuaáa ní cǎhá<sup>n</sup> ndíi, te sá dúcá<sup>n</sup> quide-ndo-á<sup>n</sup> te dàquee tǐhú-ndó Yǎ Ndiòxí. <sup>24</sup>Te quèe ndáá-xi nàcuáa cǎhá<sup>n</sup>-xi núu tütú Yǎ Ndiòxí nàcuáa quide-ndo-á<sup>n</sup> nǔú cǎchí-xi sá nchǎá ñáiyu ñá túú cùu ñáiyu isràél cǎhá<sup>n</sup> cuèhé-yu cuèndá Yǎ Ndiòxí sá cuèndá-ndó.

<sup>25</sup>Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihi-ndo seña ñii-ndo, te vǎha-ni sá dúcá<sup>n</sup> te núu quide-ndo nchaa nacuaáa ní cǎhá<sup>n</sup> ndíi Moisés. Dico núu ñá túú quide-ndo nchaa nacuaáa ní cǎhá<sup>n</sup> ndíi ña, te ñá túú nàndǐhi-xi sá cúú-ndó ñáiyu isràél cuèi ndècu seña ñii-ndo. <sup>26</sup>Te nchaa ñáiyu ñá túú ndècu ndihi seña ñii-xi, te núu quidé-yu nchaa nàcuáa ní cǎhá<sup>n</sup> ndíi Moisés, te cùú-yu dàtná cue ñáiyu ndècu ndihi seña ñii-xi, chi quidé-yu nchaa nàcuáa ní cǎhá<sup>n</sup> ndíi. <sup>27</sup>Te ñáiyu ñá túú ndècu ndihi seña ñii-xi, te núu na càdá-yu nchaa nàcuáa ní cǎhá<sup>n</sup> ndíi Moisés, te ñáiyu-á<sup>n</sup> cǎchí-yu sá ña túú quide ndáá nchaa nchòhó ñáiyu ndècu ndihi seña ñii-xi, chi ndècu ndihi-ndo nchaa tnúhu ní chídó

tnùnì ndíi te ñá túú quide-ndo nacuaáa cǎhá<sup>n</sup> tnúhu-á<sup>n</sup>. <sup>28</sup>Te nchòhó ñáiyu isràél, ñáiyu nchicú<sup>n</sup> nihnu-ni quide nchaa nacuaáa ta quide tnahi-ndo véxi, ñá túú quide-ndo sá cúú-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuaáa tàú-xi cada nchaa ñáiyu ndècu seña ñii-xi, te mee-ni sèñá-á<sup>n</sup> sǎha-ndo ñii-ndo te ñá túú quide-ndo nacuaáa cuiní Yǎ Ndiòxí cada-ndo. <sup>29</sup>Te nchaa ñáiyu sàndáá ndisa iní-xi Yǎ Ndiòxí, ñáiyu-á<sup>n</sup> cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yǎ Ndiòxí duca<sup>n</sup> ñi quide-xi, dico ñá díú sǎ sǎha-yu seña ñii-yu dàtná ní cǎchí ndíi Moisés. Te ñáiyu-á<sup>n</sup> cúú vǎha iní ñáhá Yǎ Ndiòxí xií-yu cuèi ñá túú cǎhá<sup>n</sup> vǎha tnàha ñáiyú-yu cuèndá-yu.

**3** Te sá dúhá cǎhá<sup>n</sup>-í te ió dava ñáiyu quesàhá-yu sá ìí<sup>n</sup>-ní cùu ñáiyu ñá túú cùu ñáiyu isràél ndihi nchoo ñáiyu isràél, te quesaha tucú-yu sá ìí<sup>n</sup>-ní quide tucu-xi cuèi na cuàha àdi vá cuàha seña ñii-yu. <sup>2</sup>Dico yúhú cǎchí-í sá nchǎá ñáiyu isràél ió-gá cùnùú-yu, chi ió titní núú sǎ vǎha ní quide ñaha Yǎ Ndiòxí xií-yu, chi ní sǎnaha-gǎ tnúhu-gǎ ndécú ndihí-yu. <sup>3</sup>Te davá-yu ñá túú cuiní-yu cada ndáá-yu, dico ñá díú sǎ xǎ<sup>n</sup> te cùyica iní Yǎ Ndiòxí ñá túú quide ndáá-gǎ. <sup>4</sup>Dico ñáhá chi xini ñuhu-xi sá nchǎá ñáiyu cada cuèndá-yu sá Yǎ Ndiòxí cúú-gǎ Yǎ quidé ndáá cuiti, te cuèi ncháá-yu na cǎchí-yu sá ña túú quide ndáá-gǎ, dico mee-gǎ chi quide ndáá-ni-gǎ. Te núú tütú-gǎ cǎhá<sup>n</sup>-xi nàcuáa ní xǎha<sup>n</sup> ìí<sup>n</sup> tée ní xíndecu ndéé sanaha xii-gǎ, te duha ní xǎha<sup>n</sup>-dè:



Yòhó Dútú Ndiöxí, cùtnuní iní ñáyiú sá ïo ndáá càhá<sup>n</sup>-n, te cùnuu nahi-ni tnúhu-n cuèi òré càchí ñáyiú sá ñà túú càhá<sup>n</sup> ndáá-n.

Duha ní xáha<sup>n</sup> tée ndéé sanaha-ǎ<sup>n</sup> xii-gá càchí-xi núú tütú-gá.

<sup>5</sup>Te cuèndá nchaa sá cuèhé sá dúhá quide ñáyiú, xíǎ<sup>n</sup> cùtnuní iní-yu sá Yǎ Ndiöxí cúú-gǎ Yaá ío váha quide ndáá, chi mee-gǎ ñá túú dùca<sup>n</sup> quide-gá. Te cuèi duca<sup>n</sup> dico vá cání ìní-yu sá Yǎ Ndiöxí ñá túú quide ndáá-gá sá dándòho ñaha-gá xii-yu na sàà nduu, te núú duca<sup>n</sup> na càni iní-yu, te sàni iní-yu dàtná sání ìní cue ñáyiú ñá túú ndècu ichi-gá.

<sup>6</sup>Te vá dúcá<sup>n</sup> càni iní-yu, chi núú Yǎ Ndiöxí ñá túú quide ndáá-gá ñá, te vá cúú càda ndáá-gá nchaa cuèchi cue ñáyiú ñuyíú-a te núú duca<sup>n</sup>.

<sup>7</sup>Te núú yúhú ná càni iní-í cáhá<sup>n</sup>-í ìí<sup>n</sup> tnúhu ndehnde, te sá tnúhu-ǎ<sup>n</sup> te cani tucu iní-í sá quidé càhnu-gá-í tnúhu ndáá tnúhu Yǎ Ndiöxí, te sá dúcá<sup>n</sup> ná càhá<sup>n</sup>-í te cani tucu iní-í sá vǎ cúú cǎhá<sup>n</sup> Yǎ Ndiöxí sá ndécú cuèchi-í. <sup>8</sup>Te núú na càni tucu iní-í sá vǎha-gá cada-í nchaa sá cuèhé sá dúhá cuèndá Yǎ Ndiöxí cada-gá sá vǎha, dico ñá ndáá. Te ìo ñáyiú càhá<sup>n</sup> cuèhé cuèndá-í te càchí-yu sá díú-ní dùca<sup>n</sup> dacuaha-í ñáyiú dico ñá ndáá sá dúcá<sup>n</sup> dānehé-í-yu, te ñáyiú-ǎ<sup>n</sup> nacháhu-yu tnúhu càhá<sup>n</sup>-yu, chi duca<sup>n</sup> tàù-xi cunduu.

**Nchaa ñáyiú ñuyíú-a ndècuèchi-yu**

<sup>9</sup>Te vitna càchí dava ñáyiú sá ïo-gá cúnùu nchoo cue ñáyiú isràél dācúúxí dāva-gá ñáyiú, dico yúhú càchí-í sá ñǎhá, te sa ní cachí tnúhu ndáá-í xii-ndo sǎ nchàa ñáyiú

ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél.

<sup>10</sup>Te núú tütú Yǎ Ndiöxí càchí-xi:

Vá yǒo ìí<sup>n</sup> quide ndáá,

<sup>11</sup>te ni vá yǒo ìí<sup>n</sup> tècú tnùní tnúhu vǎha,

te ni vá yǒo ìí<sup>n</sup> nānducu nihnu

Yǎ Ndiöxí.

<sup>12</sup>Chi nchaa-yu ñá túú nchìcú<sup>n</sup>

nihnú-yu ichi váha, te

nchaa-yu cùu-yu ñáyiú

xīndecu neñùu sá cúú-xí Yǎ

Ndiöxí.

Te ni ìí<sup>n</sup>-yu ñá túú quidé-yu ìí<sup>n</sup>

sá vǎha.

<sup>13</sup>Te cada iní-ndó sǎ yúhǔ-yu

cùu-xi datná cúú ìí<sup>n</sup> yaú núú

yīndǔxi ndýi núú ïo ndehe

sǎhá<sup>n</sup>,

te duca<sup>n</sup> sǎtnahá-xi cùu yuhú-yu,

chi ío càhá<sup>n</sup> cuèhé-yu, te

mee-ni dāndahú-yu nchaa

tnàha ñáyiú-yu.

Te cada iní-ndó sǎ vènenú cóo

yíhí yùhú-yu chi mee-ni

càhá<sup>n</sup> úhú-yu cuèndá tnàha

ñáyiú-yu.

<sup>14</sup>Te ìo iní-yu càhá<sup>n</sup> úhú tnǎhǎ-yu.

<sup>15</sup>Te àù<sup>n</sup> nǎ cuu àù<sup>n</sup> nǎ xíǎ<sup>n</sup>

xīsahni tnàhǎ-yu.

<sup>16</sup>Te nchaa núú xícá cùu-yu quide

úhú iní-yu nchaa tnàha

ñáyiú-yu nācuáa ndǎhú iní

ñáyiú-ǎ<sup>n</sup>.

<sup>17</sup>Te ñá túú cuìní-yu cundecu

ndǎhi tnàha váha-yu.

<sup>18</sup>Te ñá túú sàni iní-yu canehé-yu

sá yīñùhu núú Yǎ Ndiöxí.

Duha quidé-yu càchí-xi núú tütú-gá.

<sup>19</sup>Te cùtnuní iní-ó sǎ nchàa tnúhu

ní chídó tnùní ndíi Moisés cúú-xí

cuèndá nchaa ñáyiú nchìcú<sup>n</sup> nihnu

nchaa tnúhu-ǎ<sup>n</sup>. Te tnúhu-ǎ<sup>n</sup> cúú-xí

cuèndá sá vǎ yǎo tǎhí cachí sá ñà túú cuèchi-xi, te duca<sup>n</sup> te nchaandi túhú ñáyíu cutnùní iní-yu sá ná chǎhu-yu nchaa sá quídě-yu núú Yǎ Ndiǒxí. <sup>20</sup>Te duca<sup>n</sup> càda-xi chi ní ì<sup>n</sup> ñáyíu vǎ cǎchí-ó sǎ vǎ cùndècu cuèchi-yu núú Yǎ Ndiǒxí cuèndá-ni sá nchìcú<sup>n</sup> nihnú-yu nchaa tǎnúhu sá ñí chídó tǎnùní ndíi Moisés, te tǎnúhu-ǎ<sup>n</sup> cǎchí tǎnúhu-xi cuèndá-ni sá cùtnùní iní-ó sǎ ndécú-ó ìchi cuèhé ìchi duha.

**Te núú na quèndáá iní-ó Xítóhó Jesucristú te naníhí tǎhú-ó**

<sup>21</sup>Te vitna ní cutnùní iní-ó sǎ ñà dǎú sǎ cǎdá-ó nchàa nacuaá ní cǎhá<sup>n</sup> ndíi Moisés cudǎu-o núú Yǎ Ndiǒxí, chi mee-gǎ quídé cùdǎu-o núú-gǎ. Te núú tǎtú ndíi Moisés ndíhi núú tǎtú cue téé ní xóo cǎhá<sup>n</sup> tǎnúhu Yǎ Ndiǒxí ndéé sanaha cǎhá<sup>n</sup>-xi nàcuáa cada ñaha-gǎ xii-o vitna. <sup>22</sup>Te duca<sup>n</sup> cùdǎu-o núú Yǎ Ndiǒxí te núú na quèndáá iní-ó Xítóhó Jesucristú. Te dǎu-ni duca<sup>n</sup> cùdǎu nchaa ñáyíu ñuyú te núú na quèndáá iní ñáhǎ-yu xii-gǎ, chi ì<sup>n</sup>-ni cùu-o nchaa-o sǎ cúú-xí Yǎ Ndiǒxí. <sup>23</sup>Chi nchaa-yu ndècu cuèchi-yu, chi ñǎ ì<sup>n</sup>-yu quídé-yu nàcuáa cǎhá<sup>n</sup> Yǎ Ndiǒxí sǎ cúú-yu ñáyíu quide váha. <sup>24</sup>Dico Yǎ Ndiǒxí ío váha iní-gǎ chi ní quide ñaha-gǎ xii-o ì<sup>n</sup> sǎ vǎha, chi dǎcú-ni duca<sup>n</sup> ñí quide-gǎ nàcuáa vǎ cùndècu-gǎ cuèchi-o ñúú-gǎ, chi Xítóhó Jesucristú ní sati níñí-gǎ te ní xíhí-gǎ, te duca<sup>n</sup> ñí yáha-gǎ cuèndá sǎ vǎ cùndècu-gǎ cuèchi-o. <sup>25</sup>Te Yǎ Ndiǒxí ní taxi ndecu-gǎ Xítóhó Jesucristú núú ñáyíu ñuyú-a, te ní xíhí-gǎ sǎ cuèndá nchaa yíca

cuèchi-yu, te duca<sup>n</sup> ñí cuu cuèndá sǎ ncháá ñáyíu na quèndáá iní ñáhǎ xii-gǎ te vǎ náchǎhu-yu cuèchi-yu núú Yǎ Ndiǒxí. Te Yǎ Ndiǒxí ní quide ndee iní-gǎ nchaa sǎ cuèhé sǎ dúhá ñí quide cue ñáyíu ní xíndecu ndéé sanaha. Te xǎ<sup>n</sup> ní xíhí Xítóhó Jesucristú cuèndá cutnùní iní-ó sǎ Yǎ Ndiǒxí cúú-gǎ Yaá ío váha quide ndáá cuèi duca<sup>n</sup> ñí quide ndee iní-gǎ nchaa sǎ ñí quide cue ñáyíu-ǎ<sup>n</sup>. <sup>26</sup>Núu xǎ<sup>n</sup> vitna ní cutnùní ndisa iní-ó sǎ quídé ndǎá-gǎ, te quide-gǎ sǎ cuè ñáyíu vǎ cùndècu-gǎ cuèchi-yu núú-gǎ, te núú na quèndáá iní-yu Xítóhó Jesucristú.

<sup>27</sup>Te vitna vǎ cǎchí-ó sǎ ío cǎhnu cuu-o cuendá sǎ ñà túú-gǎ cuèchi-o ndècu núú Yǎ Ndiǒxí, te duca<sup>n</sup> ñà túú-gǎ cuèchi-o ndècu núú-gǎ cuèndá sǎ sàndáá iní-ó Xítóhó Jesucristú, te ñǎ dǎú sǎ cuèndá nchaa tǎnúhu ní cǎhá<sup>n</sup> ndíi Moisés. <sup>28</sup>Te cùtnuní iní-ó sǎ ndèda-ni càa ñáyíu vǎ cùndècu-gǎ cuèchi-yu núú Yǎ Ndiǒxí te núú na quèndáá iní-yu Xítóhó Jesucristú cuèi ní quidé-yu nchaa nàcuáa ní cǎhá<sup>n</sup> ndíi Moisés àdi ñǎ túú ní quidé-yu.

<sup>29</sup>Te cùtnuní iní-ó sǎ Yǎ Ndiǒxí cúú-gǎ Ndiǒxí nchaandi túhú ñáyíu, te ñǎ dǎú mèe-ni Ndiǒxí ñáyíu isràèl cúú-gǎ. <sup>30</sup>Te ì<sup>n</sup>-dǎi dǎi-gǎ cúú-gǎ Ndiǒxí, te nchaa ñáyíu sàndáá iní ñáhǎ xii Xítóhó Jesucristú te vǎ cùndècu-gǎ cuèchi-yu núú Yǎ Ndiǒxí cuèi cùu-yu ñáyíu isràèl àdi ñǎ túú cùu-yu. <sup>31</sup>Te ñǎ dǎú sǎ sàndáá iní-ó Xítóhó Jesucristú te cachí-ó sǎ ñà túú nàndíhi nchaa tǎnúhu sǎ sánú ìchi ñaha xii-o nacuaá cada-o, te ñáhǎ chi sǎ dúhá

sàndáá iní-ó-gǎ te xǎ<sup>n</sup> nchìcú<sup>n</sup>  
nihnu-o quìde-o nacuáa càhá<sup>n</sup>  
tnúhu-á<sup>n</sup>.

#### Cuèndá ndíi Àbrahám

**4** Te vitna na càchí tnúhu-í  
xii-ndo cuèndá ndíi Àbrahám  
tée ní cuu ñaní tnáhá-ó ní xíndecu  
ndéé sanaha. <sup>2</sup>Te ndíi-á<sup>n</sup> ñà túú  
ní xíndecu cuéchi ndíi núú Yá  
Ndiöxí, dico ñá díú cuèndá ìi<sup>n</sup>  
chìu<sup>n</sup> ní quide ndíi duca<sup>n</sup> ñà túú  
ní xíndecu cuéchi ndíi núú-gǎ. Chi  
núu cuèndá ìi<sup>n</sup> chìu<sup>n</sup> ní quide ndíi  
duca<sup>n</sup> ñà túú ní xíndecu cuéchi ndíi  
núú Yá Ndiöxí ñá, te cada càhnu  
ndíi mee ndíi ni cùu, dico ñá díú  
núú Yá Ndiöxí cada càhnu ndíi  
mee ndíi te núu duca<sup>n</sup> ñi quide  
ndíi. <sup>3</sup>Te chí dándàcu iní nàcuáa  
càhá<sup>n</sup>-xi núú tütú Yá Ndiöxí núú  
càchí-xi: “Té Àbrahám ní sàndáá  
iní-dé Yá Ndiöxí, te xǎ<sup>n</sup> ní cachí-gá  
sá cùdù-dé núú-gǎ”, duha càchí-xi  
núú tütú-gǎ. <sup>4</sup>Te sá cùhú<sup>n</sup> yǎhu  
ìi<sup>n</sup> tée quide chiu<sup>n</sup>, te vá càchí-ó  
sǎ xǎ<sup>n</sup> cúú-xí ìi<sup>n</sup> táhú sǎ cúú-xí-dé  
chi yáhu tnàhí-dé cúú-xí. <sup>5</sup>Te vá  
yöo ìi<sup>n</sup> ndàcu cada ìi<sup>n</sup> chiu<sup>n</sup> nacuáa  
cudù-xi núú Yá Ndiöxí. Te ñá túú  
nǎ chìu<sup>n</sup> xini ñuhu-xi cada ñáyiu te  
cudù-yu núú-gǎ, chi xini ñuhu-ni-xi  
sá quìndáá-ni iní-yu-gǎ. Te diu-gǎ  
càchí-gá sá ñáyiu ndècu ichi cuehé  
ichi duha vá cùndècu-gǎ cuéchi-yu  
núú-gǎ, te núu na quìndáá iní  
ñáhà-yu xii-gǎ. <sup>6</sup>Te diu-ni duca<sup>n</sup> ñi  
cáhá<sup>n</sup> ndíi Dàvií, chi ní cachí ndíi  
sá ïo váha táhú nchaa ñáyiu ní  
cachí Yá Ndiöxí cudù núú-gǎ, dico  
ñá díú cuèndá ìi<sup>n</sup> chìu<sup>n</sup> quidè-yu  
cudù-yu núú-gǎ. <sup>7</sup>Te duha ní cachí  
ndíi:

Váha táhú nchaa ñáyiu quide  
cahnu iní Yá Ndiöxí nchaa  
cuéchi-xi,  
te ñá túú-gǎ quidè cuèndá-gǎ  
nchaa sá cuèhé sá dúhá ñi  
quidè-yu.

<sup>8</sup>Váha táhù-yu chi Yá Ndiöxí  
càchí-gá sá ñà túú-gǎ  
cuéchi-yu.

Duha ní cachí ndíi Dàvií.

<sup>9</sup>Te ñá díú mèe-ni ñáyiu  
ngündecu sèñá ñii-xi duca<sup>n</sup> vǎha  
táhù-yu, chi tnàhá ñáyiu ñá túú  
ngündecu sèñá ñii-xi duca<sup>n</sup> vǎha  
táhù-yu. Te sa nàha-o sá Yá Ndiöxí  
ní cachí-gá sá cùdù ndíi Àbrahám  
núú-gǎ cuèndá sá ni sàndáá iní  
ñáhá ndíi xii-gǎ. <sup>10</sup>Te cunaha-ndo  
sǎ dǐhna-gǎ ní cachí Yá Ndiöxí  
sá cùdù ndíi Àbrahám núú-gǎ  
te dǎtnùnì ngündecu sèñá ñii  
ndíi. <sup>11</sup>Te ní ngündecu sèñá ñii  
ndíi cuèndá xǎ<sup>n</sup> cuu-xi ìi<sup>n</sup> sèñá sá  
cùdù ndíi núú Yá Ndiöxí. Te ndéé  
cùtnàhá vátá ngündecu-gǎ sèñá  
ñii ndíi, te sa cùdù ndíi núú-gǎ  
chi ní sàndáá iní ñáhá ndíi xii-gǎ.  
Te sá dúcá<sup>n</sup> ñà túú ndècu sèñá ñii  
ndíi cùtnàhá ní sàndáá iní ndíi Yá  
Ndiöxí xǎ<sup>n</sup> ní cuu ndíi dǎtná ìi<sup>n</sup> dǐhí  
dütú nchaa ñáyiu sàndáá iní ñáhá  
xii-gǎ, ñáyiu ñá túú ní ngündecu  
sèñá ñii-xi, te cùdù-yu núú-gǎ.  
<sup>12</sup>Te ndíi Àbrahám ní cuu tucu ndíi  
dǎtná ìi<sup>n</sup> dǐhí dütú nchaa ñáyiu ní  
ngündecu sèñá ñii-xi, dico ñá díú  
cuèndá-ni sá ñi ngündecu sèñá  
ñii-yu cùu ndíi dǐhí dütù-yu, chi  
cuèndá sá sàndáá iní-yu Yá Ndiöxí  
nchìcú<sup>n</sup> nihnú-yu nàcuáa ní quide  
ndíi ní sàndáá iní ñáhá ndíi xii-gǎ  
ndéé cùtnàhá vátá ngündecu-gǎ  
sèñá ñii ndíi.

**Yá Ndiöxí cada-gá nchaa nàcuáa ní cachí-gá te núu na quèndáá iní-ó-gá**

<sup>13</sup>Te Yá Ndiöxí ní xáha<sup>n</sup>-gá xii ndíi Àbrahám sá ndúú tǎhú ndíi cunuú ndíi ñuyíú, ndíhi cue déhe ndíi, ndíhi nchaa dava-gá cue ñaní tnáhá ndíi vitna cacu túu. Te duca<sup>n</sup> ní xáha<sup>n</sup> Yá Ndiöxí xii ndíi ndíhi cue ñaní tnáhá ndíi, chi ní sándáá iní ñáhá ndíi xii-gá núu xíǎ<sup>n</sup> ní cudǎu ndíi núú-gá. Te duca<sup>n</sup> ní xáha<sup>n</sup>-gá xii ndíi dico ñá dǎú cuèndá sá ñi quide ndíi nàcuáa ní xáha<sup>n</sup> Yá Ndiöxí xii ndíi Moisés cada ñáyiu ndéé cuéé-gá. <sup>14</sup>Te núu mee-ni ñáyiu nchicú<sup>n</sup> nihnu quide nacuaá ní cáhá<sup>n</sup> ndíi Moisés ní ndúu tǎhǎ-yu cunúú-yu ñuyíú-a ni cùu ña, te ñá túú xini ñuhu-xi quèndáá iní-ó Yá Ndiöxí, te ñá túú nàndǎhi tnúhu ní xáha<sup>n</sup> Yá Ndiöxí xii ndíi Àbrahám ní cùu te núu duca<sup>n</sup>. <sup>15</sup>Te núu ì<sup>n</sup> ñáyiu ñá túú quide nacuaá càhá<sup>n</sup> tnúhu sá sánú ìchi ñaha xii-o nacuaá cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ìchi ñaha-xi xii-o nacuaá cada-o ni cùu ña, te ñá túú cuèchi-o ni cùu.

<sup>16</sup>Te duca<sup>n</sup> ní xáha<sup>n</sup> Yá Ndiöxí xii ndíi Àbrahám nàcuáa cada-gá, chi cuèndá sá ni sándáá iní ñáhá ndíi xii-gá. Te duca<sup>n</sup> ní quide-gá chi ío váha iní-gá, dico ñá dǎú sǎ ì<sup>n</sup> chiu<sup>n</sup> ni quide ndíi duca<sup>n</sup> ní xáha<sup>n</sup>-gá. Te sá dúcá<sup>n</sup> ní cuu te cùu-xi ì<sup>n</sup> tnúhu ndáá sá cúú-xí nchàa ñaní tnáhá ndíi, ñáyiu sándáá iní ñáhá xii-gá dàtná ní sándáá iní ñáhá mèe ndíi xii-gá, te ñá dǎú mèe-ni cuendá nchaa ñaní tnáhá ndíi nchicú<sup>n</sup> nihnu nchaa nàcuáa ní cáhá<sup>n</sup> ndíi

Moisés, chi ndíi Àbrahám-á<sup>n</sup> ní cuu ndíi dàtná ì<sup>n</sup> dǎhi dǎtú cue ñáyiu sándáá iní ñáhá xii Yá Ndiöxí. <sup>17</sup>Te núu tǎtú Yá Ndiöxí càhá<sup>n</sup>-xi nàcuáa ní xáha<sup>n</sup>-gá xii ndíi, te duha ní xáha<sup>n</sup>-gá: “Yòhó té Àbrahám ní quide ñaha-ì xii-n dàtná ì<sup>n</sup> dǎhi dǎtú cue ñáyiu xǎndecu nihí ñuyíú.” Duha ní xáha<sup>n</sup> Yá Ndiöxí xii ndíi, càchí-xi núú tǎtú-gá. Te Yá Ndiöxí náhá ndáá-gá sá cadá-xí nàcuáa ní xáha<sup>n</sup>-gá xii ndíi Àbrahám, te ðiu-ni-gá cúú Yàá ní sándáá iní ndíi, te ðiu-ni-gá dándòto-gá ñáyiu ní xíhí, te ðiu-ni-gá quidé tá ngǎndecu nchaa sá vǎtá cǎndècu-gá ñuyíú-a.

<sup>18</sup>Te Yá Ndiöxí ní xáha<sup>n</sup>-gá xii ndíi Àbrahám sá ío cuéhé ðèhe ndíi coo, te ío ní sándáá iní ndíi nàcuáa ní xáha<sup>n</sup>-gá dico ñá túú ní cǎtnuní iní ndíi nása cada-gá, chi ío ní sahnu ndíi. Te cuèndá sá dúcá<sup>n</sup> ío ní sándáá iní ndíi tnúhu ní xáha<sup>n</sup>-gá núu xíǎ<sup>n</sup> ní cuu ndíi dǎhi dǎtú vǎi ñáyiu xǎndecu nihí ñuyíú. <sup>19</sup>Te ndíi Àbrahám ñúhu ndíi ì<sup>n</sup> cièndú cuíá cǎtnáhá duca<sup>n</sup> ní xáha<sup>n</sup> Yá Ndiöxí xii ndíi, te ní cǎtnuní iní ndíi sá ñà túú tǎhú ndíi sá cóo ðèhe ndíi ndíhi ñadǎhi ndíi ndíi Sǎrá, chi ndí ndúú-yu sa ní sahnu vihí-yu, te cuèi duca<sup>n</sup> dico ní sándáá-ni iní ndíi nàcuáa ní xáha<sup>n</sup> Yá Ndiöxí. <sup>20</sup>Te ñá túú ní sàni ì<sup>n</sup> sani úú iní ndíi nàcuáa ní xáha<sup>n</sup> Yá Ndiöxí cada-gá sá cúú-xí ndíi, chi da uu<sup>n</sup>-gá váha ní sándáá iní ndíi nàcuáa ní xáha<sup>n</sup>-gá, te ní cachí ndíi sá ío càhnu cuu-gá. <sup>21</sup>Te ní cǎtnuní ndáá iní ndíi sá Yá Ndiöxí ndácú-gá quidé-gá nchaa sá càhá<sup>n</sup>-gá. <sup>22</sup>Te sá ni sándáá iní ndíi nàcuáa ní cáhá<sup>n</sup> Yá Ndiöxí, núu xíǎ<sup>n</sup> ní cachí-gá sá cúú ndíi ì<sup>n</sup> téé ñá túú cuèchi-xi núú-gá.

<sup>23</sup>Te ní ngódó tñuní núú tütú Yă Ndiöxí cuendá ndíi Àbrahám sá nĩ cachí-gá sá ñà túú cuèchi ndíi núú-gă, te ñà díú-ní cuendá méé ndíi ni ngódó tñuní núú tütú-gă. <sup>24</sup>Chi tñàhá cuendá-ó nchaa-o ní ngódó tñuní núú tütú-gă. Te cächí-gá sá ñà túú cuèchi-o nũú-gă chi sàndáá iní-ó-gă, te diu-gá cúú-gă Yaá ní dándótó ñàha xii Xítóhó Jesucristú Yaá cúú Xítóhó-ó. <sup>25</sup>Te Yá Ndiöxí ní cachí-gá sá díú Xítóhó Jesucristú cuú-gá cuendá nacháhu-gá nchaa cuéchi-o. Te ní xíhí-gá te ní ndoto-gá cuendá nchaa-o vă cùndècu-gá cuéchi-o nũú Yă Ndiöxí te núu na quèndáá iní-ó-gă.

Ío váha tñàhá ñáyiu cächí Yă Ndiöxí sá ñà túú cuèchi-xi

**5** Te vitna, ñà túú-gă cuéchi-o ndècu núú Yă Ndiöxí chi sàndáá iní-ó Xítóhó Jesucristú, te ío váha ndècu ndíhi-o Yá Ndiöxí vitna sá cuendá Xítóhó Jesucristú. <sup>2</sup>Te cuendá sá ni sàndáá iní-ó Xítóhó Jesucristú xíă<sup>n</sup> diu-gá ní quide ní ngúndecu váha-o nũú Yă Ndiöxí, te duca<sup>n</sup>-ni cùndecu-o, te ío cùdíí iní-ó chi ndècu ndíhi-o tñúhu ndee iní sá sàà nduu ngúndecu-o nũú ío váha càa ndecu Yá Ndiöxí. <sup>3</sup>Te ñà díú-ní sá cuendá sá ndúú tǎhú-ó cùndecu-o núú ndécú-gă cùdíí iní-ó, chi cùdíí iní-ó ndòho-o cuendá-gá, chi cùtnuní iní-ó sá nũu na ndòho-o cuendá-gá te cunduu càhnu-gá iní-ó, <sup>4</sup>te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uu<sup>n</sup>-gá tá ngúndecu ndíhi-o tñúhu ndee

iní cuáhá<sup>n</sup> sá cádá váha ñàha Yă Ndiöxí xii-o. <sup>5</sup>Te núu duca<sup>n</sup> te vá íí<sup>n</sup> ndùu ndixi cuéchi iní-ó sá ndécú ndíhi-o tñúhu ndee iní ngúndecu váha-o. Te Espíritú sá nĩ taxi Yá Ndiöxí ndécú ndíhi-o xíă<sup>n</sup> quidé-xí cùtnuní iní-ó sá ío cùu iní ñàhá Yă Ndiöxí xii-o.

<sup>6</sup>Te nchoo ñà túú vèdana ná ní ndàcu-o cada-o cuendá dàcácu nihnu-o mèe-o, dico Xítóhó Jesucristú ní xíhí-gá cuendá-ó, ndíhi cuendá nchaa dava-gá ñáyiu ñà túú tñàhá tñúhu ndíhi Yá Ndiöxí, te ní xíhí-gá mei ndùu taú-xi cuú-gá. <sup>7</sup>Te cudana-ni núu xíhí íí<sup>n</sup> ñáyiu sá cuendá íí<sup>n</sup> ñáyiu quide ndáá, te áma xíhí tucu íí<sup>n</sup>-yu sá cuendá ñáyiu quide váha tñàha ñáyiu-xi. <sup>8</sup>Te Yá Ndiöxí ní quide-gá sá nchóó cùtnuní iní-ó sá ío cùu iní ñàhá-gă xii-o, chi cùtnàhá ndécú-ó ichi cuehé ichi duha te ní tendaha-gă Xítóhó Jesucristú ní quixi-gá ñuyúí-a ní xíhí-gá cuendá-ó. <sup>9</sup>Te sá cuendá sá nĩ xíhí Xítóhó Jesucristú xíă<sup>n</sup> ñà túú-gă cuéchi-o ndècu núú Yă Ndiöxí, te vitna ní cùtnuní ndáá iní-ó sá vă dáquíhí<sup>n</sup> ñàhá-gă Yă Ndiöxí xii-o nũú ùhú núú ndàhú sá cuendá Xítóhó Jesucristú. <sup>10</sup>Te cùtnàhá ñà túú tñàhá tñúhu-o ndíhi Yá Ndiöxí ní cùu ní xíhí Xítóhó Jesucristú Yaá cúú Dèhe-gá cuendá cuu váha iní ñàhá-gă xii-o, te duca<sup>n</sup> te nduu táhú-ó cùndecu-o ndíhi-gá ni caa ni quíhí<sup>n</sup> cuendá sá nĩ ndoto Xítóhó Jesucristú. <sup>11</sup>Te ndètu-o sáà nduu ngúndecu-o ndíhi-gá ni caa ni quíhí<sup>n</sup>, te ñà díú-ní xíă<sup>n</sup> quidé-ó chi tñàhá cùdíí iní-ó Yă Ndiöxí, chi Xítóhó Jesucristú ní quide-gá duca<sup>n</sup> cùdíí iní-ó-gă, te diu-ni Xítóhó

Jesucristú ní quide-gá ní nucúndecu váha-o ndìhi Yá Ndiòxí.

**Nàcuáa ní quide ndíi Àdán ndìhi  
nàcuáa ní quide Xítohó Jesucristú**

<sup>12</sup>Te ndíi Àdán ñá túú ní quide ndáá ndíi núú Yá Ndiòxí nùu xíá<sup>n</sup> ní ngúndecu nchaa sá cuèhé sá dúhá ñùyíú-a, te sá cuèndá nchaa sá cuèhé sá dúhá quide ñáyiú xíá<sup>n</sup> xihí-yu, te nchaá-yu xihí-yu chi nchaá-yu quidé-yu nchaa sá cuèhé sá dúhá. <sup>13</sup>Te sa quide-gá-yu nchaa sá cuèhé sá dúhá te dàtnùní ní ngúndecu nchaa tnúhu sá ní chídó tnùní ndíi Moisés nàcuáa ní xáha<sup>n</sup> Yá Ndiòxí cada ñáyiú, te nchoo cùtnuní iní-ó sá nùu ñá túú tnùhu sá sánú ìchi ñaha xii-o nacúaa cada-o, te ñá túú cuèchi-o sànuu. <sup>14</sup>Te ndéé cùtnàhá ní xíndecu ndíi Àdán ní quesaha-xi xihí ñáyiú, te duca<sup>n</sup>-ni xihí-yu ndéé ní sáá nduu ní xíndecu ndíi Moisés. Te duca<sup>n</sup> ní xihí-yu chi ní quidé-yu nchaa sá cuèhé sá dúhá cuèí ñá túú ní quidé-yu nàcuáa ní quide ndíi Àdán, chi ndíi-á<sup>n</sup> ñà túú ní sàndáá iní ndíi nàcuáa ní xáha<sup>n</sup> Yá Ndiòxí cada ndíi. Te ndíi Àdán ní cuu ndíi ì<sup>n</sup> téé cùu cahnu ní xíndecu ñùyíú-a, te sáta dúcá<sup>n</sup> te ní quixi Xítohó Jesucristú te Yaá-á<sup>n</sup> ío-gá càhnu cuu-gá.

<sup>15</sup>Te sá ní quide ndíi Àdán te vá cächí-ó sá ì<sup>n</sup>-ní cùu-xi ndìhi sá ní cachí Yá Ndiòxí nduu táhú-ó vìtna. Te sá ñà túú ní quide ndáá ndíi xíá<sup>n</sup> nchaa ñáyiú xihí-yu, dico Yá Ndiòxí ío váha iní-gá chi ío váha ní quide-gá sá cúu-xí nchàa nchoo ñáyiú ndècu ñùyíú-a, chi dícó duca<sup>n</sup> ní cachí-gá sá nánihí tàhú-ó,

te ì<sup>n</sup>dii-ni téé tnàhá-dé ío váha ní quide-dé sá cúu-xí-ó, te téé-á<sup>n</sup> cúu-dé Xítohó Jesucristú. <sup>16</sup>Te sá ní quide ì<sup>n</sup>dii-ni ndíi Àdán ñá túú ì<sup>n</sup>-ni cuu-xi ndìhi sá ní quide Yá Ndiòxí sá cúu-xí-ó, chi ndíi-á<sup>n</sup> ñà túú ní quide ndáá ndíi núú-gá. Te sá dúcá<sup>n</sup> ní quide ndíi te xíá<sup>n</sup> ní cuu-xi cuéchi díhna nuu ní quide ndíi, núu xíá<sup>n</sup> ní cachí Yá Ndiòxí sá cuè ñáyiú quíhí<sup>n</sup>-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gá ní quide sá cuè ñáyiú naníhí tàhú-yu dícó-ni duca<sup>n</sup>, te duca<sup>n</sup> te vá cùndècu-gá cuéchi-yu núú-gá cuèí ío vèi cuéchi-yu. <sup>17</sup>Te sá dúcá<sup>n</sup> ñà túú ní quide ndáá ì<sup>n</sup>dii-ni ndíi Àdán-á<sup>n</sup> nùú Yá Ndiòxí, xíá<sup>n</sup> ní quide-xi xihí nchaa ñáyiú. Te sá cuèndá sá ní quide ì<sup>n</sup>dii-ni Xítohó Jesucristú xíá<sup>n</sup> ío váha ní quide ñaha Yá Ndiòxí xii ñáyiú, chi dícó-ni duca<sup>n</sup> ní nduu táhú-yu cùdiú-yu núú-gá. Te nchaa ñáyiú duca<sup>n</sup> cùdiu núú-gá nduu táhú-yu cunùú-yu ndìhi Xítohó Jesucristú cuèndá sá ní quide-gá sá vaha sá cúu-xí-yu.

<sup>18</sup>Te sá dúcá<sup>n</sup> ní quide ndíi Àdán ñá túú ní quide ndíi nàcuáa ní xáha<sup>n</sup> Yá Ndiòxí xii ndíi ì<sup>n</sup> xito, núu xíá<sup>n</sup> ní cachí-gá sá ncháá ñáyiú tàú-yu nacháhu-yu nchaa cuéchi-yu, dico Xítohó Jesucristú ní quide-gá ì<sup>n</sup> sá vaha cuèndá nchaa ñáyiú vá cùndècu-gá cuéchi-yu núú Yá Ndiòxí te núu na quèndáá iní ñáhá-yu xii-gá, te duca<sup>n</sup> te cundecú-yu ndìhi-gá ní caa ní quíhí<sup>n</sup>. <sup>19</sup>Te sá ñà túú ní sàndáá iní ì<sup>n</sup>dii-ni ndíi Àdán nàcuáa ní xáha<sup>n</sup> Yá Ndiòxí xii ndíi, xíá<sup>n</sup> ní nguínchicú<sup>n</sup> nihnu nchaa ñáyiú

quidé-yu nchaa sá cuèhé sá dúhá. Te duca<sup>n</sup> ì<sup>n</sup>dii-ni Xítohó Jesucristú ní quide-gá nàcuáa ní xáha<sup>n</sup> Yá Ndiöxí cuendá sá Yá Ndiöxí cachí-gá sá cúdú-yu núú-gă.

<sup>20</sup>Te Yá Ndiöxí ní xáha<sup>n</sup>-gă xii ndíi Moisés nàcuáa cada ñáyi, te sá cuendá tnúhu-á<sup>n</sup> uu<sup>n</sup>-gá ní ngúíta nchaa ñáyi quidé-yu nchaa sá cuèhé sá dúhá, te Yá Ndiöxí uu<sup>n</sup>-gá cundàhú iní ñáhá-gă xii-yu tucu. <sup>21</sup>Te sá cuendá nchaa cuéchi ñáyi xí<sup>n</sup> xihí-yu, dico Yá Ndiöxí ío váha iní-gá chi diu-gá ní cachí-gá sá ncháá ñáyi na tnàhá tnúhu ndíhi ñaha xii-gá cudú-yu núú-gă, te cundecú-yu ndíhi-gá ni caa ni quíh<sup>n</sup>, te duca<sup>n</sup> chi Xítohó Jesucristú ní quide-gá sá vâha sá cúú-xí-yu.

**Ñáyi ñá túú-gă ndécú ichi  
cuehé ichi duha ndécú-yu  
cuendá Xítohó Jesucristú**

**6** Te sá dúcá<sup>n</sup> quide Yá Ndiöxí, te vá cání ìní-ó cànchicú<sup>n</sup> nihnu-ni-o ichi cuehé ichi duha, chi ñá díú sã cànchicú<sup>n</sup> nihnu-o ìchi-á<sup>n</sup> te ngóo càni ìní-ó sã ìo-gá cundàhú iní ñáhá-gă xii-o. <sup>2</sup>Te vá cúú cànchicú<sup>n</sup> nihnu-o ìchi cuehé ichi duha, chi nchoo cùu-o datná cue ñáyi sa ní xihí, núu xí<sup>n</sup> vá cúú-gă canchicú<sup>n</sup> nihnu-o ìchi-á<sup>n</sup>. <sup>3</sup>Te sa nàha-o sá cuendá sá ní sandute-o quèe-xi sá tnàhá tnúhu-o ndíhi Xítohó Jesucristú. Te sá ní sandute-o quèe tucu-xi sá cúú-ó dàtná ñáyi ní xihí ndíhi-gá. <sup>4</sup>Te ñá díú-ní sã ní xihí-ó ndíhi-gá chi quèe tucu-xi sá ní nguíndüxi-o ndíhi-gá te ní ndoto-o dàtná ní ndoto mee-gă ní dándótó ñaha Dútú Ndiöxí Yáá

ío càhnu cuu, te duca<sup>n</sup> ní cuu cuendá sá vâ cundècu-gá-ó dàtná ní xindecu-o.

<sup>5</sup>Te núu ì<sup>n</sup>-ni cùu-o ndíhi Xítohó Jesucristú cuendá sá cúú-ó dàtná ñáyi ní xihí ndíhi-gá, te ndáá sá cúú-ó dàtná ñáyi ní ndoto ní ngúndecu váha dàtná ní ndoto mee-gă ní nucúndecu váha-gá. <sup>6</sup>Te nchoo nàha-o sá cúú-ó ñáyi ío ndècu cuéchi-xi ni cùu, dico sátá ní cuu-o dàtná ñáyi ní xihí dàtná ní xihí Xítohó Jesucristú núú cùrúxí, te ndéé dàvá-á<sup>n</sup> ní dáñá-ó nchàa ichi cuehé ichi duha ndècu-o ni cuu, te ñá túú-gă cúnúu sá cuèhé sá dúhá ìní-ó. <sup>7</sup>Chi nchaa ñáyi ní xihí ñá túú-gă ndécü-yu ichi cuehé ichi duha. <sup>8</sup>Te núu cùu-o datná ñáyi ní xihí dàtná ní xihí Xítohó Jesucristú ñá, te cùtnuní ndáá ìní-ó sã cundècu-o ndíhi-gá ni caa ni quíh<sup>n</sup>. <sup>9</sup>Te sa nàha-o sá Xítohó Jesucristú ní xihí-gá te ní ndoto-gá te vá ì<sup>n</sup> ndüu ì<sup>n</sup> quíú-gă te cuú-gá, chi ñá túú năgá sá cádá cùú-gá. <sup>10</sup>Te Xítohó Jesucristú ní xihí-gá ì<sup>n</sup> xito-ni sá cuendá nchaa cuéchi nchoo ñáyi ñuyú, te vá ì<sup>n</sup> ndüu-gá cuú-gá, te ndècu-ni-gá sá cúú-xí Yá Ndiöxí. <sup>11</sup>Núu xí<sup>n</sup> nchòhó cada ìní-ndó sã dàtná sá ní xihí-ndó vâ cundècu-gá-ndó sá cúú-xí ìchi cuehé ichi duha, chi ndècu-ná-ndó sã cúú-xí Yá Ndiöxí, chi ní tnàhá tnúhu-ndo ndíhi Xítohó Jesucristú Yáá cúú Xítohó-ó.

<sup>12</sup>Te núu xí<sup>n</sup> vá dáñá-gă-ndó cúnúu ni ì<sup>n</sup> sá cuèhé sá dúhá ìní-ndó cuendá sá vâ cádá-gă-ndó ni ì<sup>n</sup> sá cuèhé sá dúhá sàni ìní-ndó. <sup>13</sup>Te vá dáñá-ndó tàxi tunni ñáhá ni ì<sup>n</sup> sá cuèhé sá dúhá-ă<sup>n</sup> xii-ndo

cuendá sá vǎ cáda-gǎ-ndó, te chí dáñá ná tàxi tñuní ñáhá Yǎ Ndiöxí xii-ndo, te chí dáñá ná chindee ñaha-gá cada-ndo mée-ni sá vǎha, te duca<sup>n</sup> te cada iní-ndó sǎ cúú-ndó dàtná ñáyiú ní xíhí te ní ndoto ndècu. <sup>14</sup>Te duca<sup>n</sup> càda-ndo chí vǎ ndácú-gǎ ni ì<sup>n</sup> sá cuèhé sá dúhá tàxi tñuní ñáhá-xí xii-ndo, chí Yǎ Ndiöxí cùndàhú iní ñáhá-gǎ chindèe ñaha-gá xii-ndo. Te duca<sup>n</sup> chí ñá túú-gǎ cùnùu nchaa tñúhu sá ñí chídó tñuní ndíi Moisés cada ñáyiú.

#### Ñáyiú nchìcú<sup>n</sup> nihnu sá vǎha

<sup>15</sup>Te ñá díú sǎ cùndàhú iní ñáhá Yǎ Ndiöxí xii-o chindee ñaha-gá ndíhi sá ñà túú-gǎ cùnùu nchaa tñúhu ní chídó tñuní ndíi Moisés, te cachí-ó sǎ cúú-ní cùndecu-o ichi cuehé ichi duha. <sup>16</sup>Te nchoo xíní-ó sǎ ñúu na cuǎha-o tñúhu cunu cuechi-o ñúú ì<sup>n</sup> ñáyiú cuíní cunu cuechi-o ñúú-xi, te cùu-ná-ó ñáyiú xìnu cuechi núú-yu te quide-o nchaa chiu<sup>n</sup> tahú-yu. Te duca<sup>n</sup> sǎtnahá-xi cùu nchaa ñáyiú quide nchaa sá cuèhé sá dúhá chí tàxi tñuní ñáhá-ñǎ-xi xíí-yu, te ñiú nchaa xíǎ<sup>n</sup> dácúíta nihnu ñaha-xi xíí-yu, te ñiú-ni duca<sup>n</sup> sǎtnahá-xi cùu nchaa ñáyiú sàndáá iní ñáhá xii Yǎ Ndiöxí chí tàxi tñuní ñáhá-gǎ xíí-yu, te quidé-yu nchaa sá vǎha nàcuáa cuíní méé-gǎ cadá-yu. <sup>17</sup>Te nchòhó duca<sup>n</sup> ñí xóo cada-ndo nchàa sá cuèhé sá dúhá ní cùu, dico táxǎhu xii Yǎ Ndiöxí chí vitna ni yùhu ni iní-ndó quide-ndo nchaa nacuáa càhá<sup>n</sup> tñúhu-gǎ sá ñí ngúndecu ndíhi-ndo. <sup>18</sup>Te vitna ñá túú-gǎ táxí tñuní ñáhá

ni ì<sup>n</sup> sá cuèhé sá dúhá xii-ndo, te quide-ná-ndó nchàa sá vǎha tàuchiú<sup>n</sup> Yǎ Ndiöxí cada-ndo. <sup>19</sup>Te duha càhá<sup>n</sup>-í cuendá cue ñáyiú xìnu cuechi cuendá sá nchòhó tecú tñuní-ndó nàcuáa ndùu tñúhu càhá<sup>n</sup>-í. Te nchòhó ní dáñá-ndó ñí taxi tñuní ñáhá nchàa sá cuèhé sá dúhá xii-ndo, te ñá túú ní quide-ndo nacuáa ní càhá<sup>n</sup> Yǎ Ndiöxí cada-ndo chí da vìhi-gǎ ní quide-ndo, te ñiú-ni duca<sup>n</sup> chǐ dáñá ná tàxi tñuní ñáhá Yǎ Ndiöxí xii-ndo vitna cuendá cada-ndo mée-ni sá vǎha nàcuáa cuíní méé-gǎ cada-ndo, te duca<sup>n</sup> te cuu-ndo ñáyiú quide ndáá cundecu núú-gǎ.

<sup>20</sup>Te nchoo cùtnàhá ní xóo cada-o nchàa sá cuèhé sá dúhá ñà túú ní xǎo cada-o ni ì<sup>n</sup> sá vǎha cuíní Yǎ Ndiöxí cada-o. <sup>21</sup>Te dicó sácá<sup>n</sup>-núú sǎñaha nchàa sá cuèhé sá dúhá-ǎ<sup>n</sup> te núu na càda-o, te ni ì<sup>n</sup> sá vǎha vǎ ñihí-ó te núu na càda-o nchaa xíǎ<sup>n</sup>, te ñiú nchaa xíǎ<sup>n</sup> dácúíta nihnu ñaha-xi xii-o. <sup>22</sup>Te vitna ñá túú-gǎ cúú-ó ñáyiú ndècu ichi cuehé ichi duha, chí cùu-ná-ó ñáyiú quide nchaa nacuáa càhá<sup>n</sup> Yǎ Ndiöxí. Te sá dúhá quide-o cuu ndisa-xi ì<sup>n</sup> sá vǎha sá cúú-xí-ó, te cùu-o ñáyiú quide ndáá ndécú-ó ñúú-gǎ vitna, te sáá nduu cùndecu-o ndíhi-gǎ ni caa ni quíhí<sup>n</sup>. <sup>23</sup>Te nchaa sá cuèhé sá dúhá dicó dácúíta nihnu ñaha-xi xii-o, dico Yǎ Ndiöxí ní quide-gǎ sá dicó-ni duca<sup>n</sup> ndùu táhú-ó cùndecu-o ndíhi-gǎ ni caa ni quíhí<sup>n</sup>, chí ní tnahá tñúhu-o ndíhi Xítóhó Jesucristú Yaá cúú Xítóhó-ó.

#### Cuendá ñáyiú tñàndaha

**7** Te nchaa nchòhó ñáyiú ndècu ndíhi-í ichi Xítóhó Jesucristú



sa nàha-ndo nacuaá càhá<sup>n</sup> tnúhu sá dánèhé ñáhá xii-o nacuaá cada-o cùndecu-o, chi tnúhu-á<sup>n</sup> càhá<sup>n</sup>-xi dóho nchaa ñáyiú xĩndecu vǐvú ñuyú-a. <sup>2</sup>Te nchaa ñáyiú ðìhí sa ndècu yii-xi, te ðiú tnúhu-á<sup>n</sup> dánèhé ñáhá-xí xii-yu sá vǎ dáñǎ-yu yii-yu, dico núu na cùú yii-yu te ñá túú-gǎ ná càhá<sup>n</sup> tnúhu-á<sup>n</sup> cuèndá-yu.

<sup>3</sup>Dico núu vátá cùú-gá yii-yu te ñá túú ndùu váha-xi naquehé<sup>n</sup>-yu ìngá téé, dico núu na cùú yii-yu te quendóo mèé-yu, te ñá túú ñǎgá càhá<sup>n</sup> tnúhu sá dánèhé ñáhá xii-yu nàcuáa cadá-yu te duca<sup>n</sup> te cuu naquehé<sup>n</sup>-yu ìngá téé, te ñá túú cùu-xi ì<sup>n</sup> cuèchi.

<sup>4</sup>Te nchòhó cue ñáyiú ndècu ndìhi-í ichi Xítohó Jesucristú cùú-ndó dàtná ñáyiú ní xihí dàtná ní xihí-gá. Te xíǎ<sup>n</sup> ñá túú-gǎ táxí tnùnì ñáhá nchàa tnúhu ní chídó tnùnì ndíi Moisés xii-ndo. Te duca<sup>n</sup> ñí cuu cuèndá nchòhó ngúndecu-ndo ndìhi Xítohó Jesucristú Yaá ní xihí ní cùu te ní ndoto-gá. Te duca<sup>n</sup> ñí cuu cuèndá nchaa nchoo ñáyiú ndècu ichi-gá cada-o nchàa nacuaá càhá<sup>n</sup> Yǎ Ndiöxí. <sup>5</sup>Te nchoo ñí xĩndecu-o ìchi cuehé ichi duha, te tnúhu sá sánú ìchi ñaha xii-o nacuaá cada-o cùndecu-o cachí-xi sá ñà túú vǎha cundecu-o ìchi-á<sup>n</sup>, te nchoo dà uu<sup>n</sup>-gá ní quide-o nchàa sá cuèhé sá dúhá sǎ dúcá<sup>n</sup> càhá<sup>n</sup> tnúhu-á<sup>n</sup>, te sá dúcá<sup>n</sup> ñí quide-o te ta xíta nihnu-o cuǎhá<sup>n</sup> ní cùu. <sup>6</sup>Te vitna cada iní-ó sǎ cùú-ó dàtná ñáyiú ní xihí sá cùú-xí tnúhu sá dánèhé ñáhá xii-o nacuaá cada-o cùndecu-o, chi ñá túú-gǎ cúnùu-xi, te vitna mee-ñǎ Espíritú Yǎ Ndiöxí chĩndèe ñaha-xi

xii-o xinu cuechi-o núú-gǎ, te ñá dǐú cuèndá nchaa tnúhu sá ñí ngúndèe ndéé díhna cada ñáyiú xinu cuechi-o núú-gǎ vitna.

**Nchaa sá cuèhé sá dúhá ñùhu iní-í**

<sup>7</sup>Te cuèi duha càhá<sup>n</sup>-í dico vá cùú tnàhí càhá<sup>n</sup>-ó sǎ tnúhu sá sánú ìchi ñaha xii-o nacuaá cada-o cùndecu-o ñá dǐú tnúhu váha cùu-xi. Te yúhú ñá túú cùtnuní iní-í ná cùú nchàa sá cuèhé sá dúhá ní cùu te núu ñá túú tnúhu-á<sup>n</sup> ní càchí tnúhu-xi xii-í, te ni ñá túú cùtnuní tucu iní-í nùu váha àdi ñá túú vǎha sá nchídó ìní-í sá ndécú ndìhi tnaha ñáyiú-o ní cùu te núu ñá túú tnúhu-á<sup>n</sup> ní càchí-xi sá vǎ cùú cùu iní-í sá ndécú ndìhi-yu. <sup>8</sup>Te tnúhu-á<sup>n</sup> ñí dánèhé ñáhá-xí xii-í sá vǎ cùú càda-í ni ì<sup>n</sup> sá cuèhé sá dúhá, dico sá cuèndá tnúhu-á<sup>n</sup> uu<sup>n</sup>-gá duca<sup>n</sup> ñí sani iní-í ní quide-í. Te núu ñá túú tnúhu sá sánú ìchi ñaha xii-o nacuaá cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. <sup>9</sup>Te cùtnàhá vátá ñihí-gá-í tnúhu-á<sup>n</sup> te ñá túú tnàhí ná sání ìní-í ndécú-í ni cùu, dico sátá ñí ñihí-í tnúhu-á<sup>n</sup> te ní cutnùnì iní-í sá ndécú cuèchi-í, te ta xíta nihnu-í cuáhá<sup>n</sup> ní cùu. <sup>10</sup>Te núu ni quide-í nchaa nàcuáa càhá<sup>n</sup> tnúhu-á<sup>n</sup> te sa ndéé ama-gá naníhí tàhú-í ní cùu, dico ñá túú ní quide-í nùu ní cutnùnì iní-í sá tá xíta nihnu-í cuáhá<sup>n</sup> ní cùu. <sup>11</sup>Te sá xíi tnúhu-á<sup>n</sup> xíǎ<sup>n</sup> uu<sup>n</sup>-gá ní cunuu nchàa sá cuèhé sá dúhá ñí dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhá<sup>n</sup> ní cùu.

<sup>12</sup>Te tnúhu sá sánú ìchi ñaha xii-o nacuaá cada-o cùndecu-o cuu-xi

tnúhu ío yĩ̀nùhu ní taxi Yá Ndiòxí, te ìí<sup>n</sup> ìí<sup>n</sup> tnúhu-á<sup>n</sup> cúú-xí mề-ni tnúhu vaha, te ni ìí<sup>n</sup> tnúhu cuèhé tnúhu duha ñá túú ñùhu tnahá.  
**13**Te vá cúú cächí-í sá tnùhu váha-á<sup>n</sup> nĩ quide-xi ta xĩta nihnu-í cuáhá<sup>n</sup> ní cùu, chi nchaa sá cuèhé sá dúhá nĩ quide-í, xĩá<sup>n</sup> tá dàcuíta nihnu ñaha-xi xii-í cuáhá<sup>n</sup> ní cùu, te sá cuèndá tnúhu váha-á<sup>n</sup> nĩ cutnùní iní-í sá quidè-í nchaa sá cuèhé sá dúhá, te xĩá<sup>n</sup> tá xĩta nihnu-í cuáhá<sup>n</sup> ní cùu. Te sá cuèndá nchaa nàcuáa cáhá<sup>n</sup> tnúhu sá sánú ìchi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

**14**Te tnúhu-á<sup>n</sup> nĩ taxi Espiritú Yá Ndiòxí ndécú ndìhi-o cachí tnúhu-xi nàcuáa cada váha-o. Te nchoo cùu-o mee-ni ñáyiu yíca cuèchi, te tàxi tñuní ñáhá nchàa sá cuèhé sá dúhá xii-o ni cuu. **15**Dico nchoo tnàhá iní-ó càda-o nchaa sá vaha dico ñá túú quide-o, te da nchaa sá ñà túú tnàhá iní-ó càda-o quide-o, te ñá túú cùtnuní iní-ó ñà cuèndá duca<sup>n</sup> quide-o. **16**Te sá dúcá<sup>n</sup> quide-o nchaa sá ñà túú tnàhá iní-ó, te xĩá<sup>n</sup> ndíxí tũu iní-ó sã tnùhu sá dúcá<sup>n</sup> sànu ìchi ñaha xii-o nacuáa cada-o cùndecu-o cuu-xi tnúhu ío váha. **17**Te cùtnuní iní-ó sã nchàa sá cuèhé sá dúhá ñùhu iní-ó, xĩá<sup>n</sup> quidè-xí dùca<sup>n</sup> quide-o sá ñà túú vaha, te ñá díú sã cáhú iní mée-ó dùca<sup>n</sup> quide-o. **18**Te cùu-o cue ñáyiu sàni cuehé sání dùha iní-xi, te cuiní-ó càda-o nchaa sá vaha dico ñá túú nihí ndéé-ó càda-o. **19**Te cuiní-ó càda-o nchaa sá vaha dico ñá ndácú-ó, te ñá túú cuiní-ó càda-o datná quidé nchàa ñáyiu

ndècu ìchi cuehé ìchi duha, chi ñáyiu-á<sup>n</sup> mee-ni nchàa sá cuèhé sá dúhá quidé-yu, dico diu-ni nchaa xĩá<sup>n</sup> quidé-ó tnàhá-ó. **20**Te sá dúcá<sup>n</sup> quide-o nchaa sá ñà túú tnàhá iní-ó càda-o te ñá díú mề-o duca<sup>n</sup> cahu iní-ó quide-o, chi nchaa sá cuèhé sá dúhá ñùhu iní-ó xĩá<sup>n</sup> quidé-xí dùca<sup>n</sup> quide-o.

**21**Te duca<sup>n</sup> tnàhí yáha-o òré cuiní-ó càda-o sá vaha, chi da mee-ni nchàa sá cuèhé sá dúhá quide-o. **22**Te ío cùdíí iní-ó càda-o nchaa nacuáa cáhá<sup>n</sup> Yá Ndiòxí, **23**te òcò-ni sá ncháá sã cuèhé sá dúhá ñùhu iní-ó, xĩá<sup>n</sup> quidé-xí ngàni ñaha-xi xii-o ñá túú quide-o sá vaha sàni iní-ó càda-o, te duca<sup>n</sup> yaha-o chi nchaa sá cuèhé sá dúhá-á<sup>n</sup> cùnùu-xi taxi tñuní ñáhá-xí xii-o.

**24**iTe ndàhú ní cuu nchoo! Chi vá yõ ìí<sup>n</sup> ni ndàcu cada nacuáa vá táxi tñuní ñáhá-gã nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu. **25**Te táxãhu xii Yá Ndiòxí sá Xítohó Jesucristú ní quide-gá cuèndá sá vã táxi tñuní ñáhá-gã ni ìí<sup>n</sup> sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sàni iní-ó càda-o nchaa nacuáa cáhá<sup>n</sup> Yá Ndiòxí, dico núu nchaa sá cuèhé sá dúhá ná cùnùu-xi taxi tñuní ñáhá-xí xii-o, te diu-ni nchaa xĩá<sup>n</sup> cada-o.

#### Ñáyiu quide nchaa nacuáa cáhá<sup>n</sup> Espiritú Yá Ndiòxí

**8** Te vitna nchaa nchoo ñáyiu tnàhá tnúhu ndìhi Xítohó Jesucristú vá cuíta nihnu-gá-ó, chi ñá túú-gã ndécú-ó ìchi cuehé ìchi duha, chi mee-ñà nchaa nàcuáa

càhá<sup>n</sup> Espíritú Yă Ndiöxí quidé-ó.  
<sup>2</sup>Te Espíritú Yă Ndiöxí-ă<sup>n</sup> táxí tñuní ñáhá-xí xii-o, te duca<sup>n</sup> chi ndècu ndihi-o Xítóhó Jesucristú, te sá dúcá<sup>n</sup> tàxi tñuní ñáhá Espíritú-gá xii-o nũu xíă<sup>n</sup> ñá túú-gă táxí tñuní ñáhá nì ìi<sup>n</sup>-gá sá cuèhé sá dúhá xii-o, te duca<sup>n</sup> quide Espíritú-gá cuendá sá vă cuíta nihnu-o, te diu-ni Espíritú-gá quidé-xí cuendá sá nchóó ndũu táhú-ó cùndecu-o ndihi-gá ni caa ni quíhí<sup>n</sup>. <sup>3</sup>Te nchoo ñă ní ndàcu-o cada-o nchaa nacuáa càhá<sup>n</sup> tñũhu sá sánú ìchi ñaha xii-o nacuáa cada-o cùndecu-o, núu xíă<sup>n</sup> tñũhu-á<sup>n</sup> ñà túú ní nihí ndéé-xí càda-xi cuendá sá nchóó vă cuíta nihnu-o. Dico Yă Ndiöxí ní tendaha-gă Déhe mee-gă ní quixi ñuyú-a, te Yaá-á<sup>n</sup> cúú-gă ìi<sup>n</sup> ñăyiu, te càa-gá dàtná cáá ñăyiu ndècu cuéchi-xi xĩndecu ñuyú-a, te sá cuendá nchaa cuéchi nchaa nchoo ñăyiu xĩndecu ñuyú-a ní quixi-gá, te ndéé dává-á<sup>n</sup> ní quide-gá cuendá sá vă táxí tñuní ñáhá-gă ni ìi<sup>n</sup> sá cuèhé sá dúhá xii-o. <sup>4</sup>Te duca<sup>n</sup> ní quide-gá cuendá nchoo nchicú<sup>n</sup> nihnu-o quide-o nacuáa càhá<sup>n</sup> tñũhu sá sánú ìchi ñaha xii-o nacuáa cada-o, chi ñá túú-gă cùnũu ni ìi<sup>n</sup> sá cuèhé sá dúhá iní-ó, chi Espíritú Yă Ndiöxí-ă táxí tñuní ñáhá-xí xii-o.

<sup>5</sup>Te nchaa ñăyiu cùnũu nchaa sá cuèhé sá dúhá iní-xi mee-ni xíă<sup>n</sup> ñũhú iní-yu te quidé-yu. Dico nchoo ñăyiu quide nchaa nacuáa cuíní Espíritú Yă Ndiöxí ñũhú iní-ó mèe-ni nacuáa càhá<sup>n</sup> Espíritú-gá-á<sup>n</sup> te quide-o. <sup>6</sup>Te núu mee-ni nchàa sá cuèhé sá dúhá cùnũu iní-ó, te cuíta nihnu-o, dico núu mee-ni

nchàa tñũhu càhá<sup>n</sup> Espíritú Yă Ndiöxí cùnũu iní-ó, te ío váha cuu iní-ó cùndecu-o ndihi-gá ni caa ni quíhí<sup>n</sup>. <sup>7</sup>Te nchaa ñăyiu ñũhu iní mee-ni sá cuèhé sá dúhá cùu úhú iní-yu Yă Ndiöxí, te ñá túú cuíní-yu cadá-yu nàcuáa càhá<sup>n</sup>-gá, te ni ñă ndácũ-yu cadá-yu. <sup>8</sup>Te nchaa ñăyiu duca<sup>n</sup> cùnũu nchaa sá cuèhé sá dúhá iní-xi-á<sup>n</sup> ñà túú cùdiú-yu núu Yă Ndiöxí.

<sup>9</sup>Te nchòhó chi ñá túú-gă cùnũu sá cuèhé sá dúhá iní-ndó, chi mee-nă nàcuáa càhá<sup>n</sup> Espíritú Yă Ndiöxí quidé-ndó, te duca<sup>n</sup> quide-ndo chi ndècu ndihi-ndo Espíritú-gá, te diu-ni Espíritú-gá-á<sup>n</sup> ní tendaha Xítóhó Jesucristú véxi ndècu ndihi-o, te nchaa ñăyiu ñá túú ndècu ndihi Espíritú sá ní tendaha Xítóhó Jesucristú véxi ndècu ndihi-o ñá túú ndècu ndihi ñahá-yu xii-gá. <sup>10</sup>Te núu ndècu ndihi-ndo Xítóhó Jesucristú, te cuèí na cùú yiqui cùñũ-ndó sã cuendá nchaa sá cuèhé sá dúhá ío ñuyú-a, dico iní-ndó chi cundecu ndihi-xi Yă Ndiöxí chi ñá túú-gă cuéchi-ndo ndècu núu-gă. <sup>11</sup>Te núu ndècu ndihi-ndo Espíritú Yă Ndiöxí Yaá iní dándótó ñaha xii Xítóhó Jesucristú, te diu-ni-gá cada te ndoto yiqui cùñũ-ndó sã tá xíta nihnu cuáhá<sup>n</sup> nũu na cùú-xi, te duca<sup>n</sup> chi ndècu ndihi-ndo Espíritú-gá.

<sup>12</sup>Te nchòhó ñăyiu ndècu ndihi-í ìchi Xítóhó Jesucristú, ñá túú-gă tàũ-ndó cùnũu ni ìi<sup>n</sup> sá cuèhé sá dúhá iní-ndó nàcuáa vá cùndecu-gá-ndó ìchi cuèhé ìchi duha. <sup>13</sup>Chi núu na cùnũu sá cuèhé sá dúhá iní-ndó te cuíta nihnu-ndo, chi quíhí<sup>n</sup>-ndó nũu ùhú núu ndàhú.

Dico núu dañando mée-ndo chindee ñaha Espiritú Yá Ndióxi xii-ndo cuendá sá vǎ cúnú-gá sá cuèhé sá dúhá iní-ndo ñá, te nduu táhú-ndó cùndecu-ndo ndihi-gá ni caa ni quíhí<sup>n</sup> te núu duca<sup>n</sup> na càda-ndo.

<sup>14</sup>Chi nchaa ñáyiú quide nchaa nacuaa sànu ichi ñaha Espiritú Yá Ndióxi cúu-yu déhe-gá. <sup>15</sup>Te Espiritú sá ñi taxi Yá Ndióxi ndécú ndihi-o ñá túú quide-xi sá nchóó yúhú-ó cùnu cuechi-o núu-gǎ, chi Espiritú-á<sup>n</sup> quidé-xí sǎ nchóó cùu-o déhe-gá, te ñi-ni Espiritú-á<sup>n</sup> quidé xǎha<sup>n</sup>-o xii Yá Ndióxi: “iYòhó Dútú Ndióxi cúu-n Tǎtǎ mée-ndí!”), duha xǎha<sup>n</sup>-o xii-gá. <sup>16</sup>Te ñi-ni Espiritú-gá-ǎ<sup>n</sup> tñahá tñuhu-xi ndihi iní-ó, te cǎhá<sup>n</sup> ndáá-xi sá nchóó cùu-o déhe-gá. <sup>17</sup>Te sá dúcá<sup>n</sup> cùu-o déhe Yá Ndióxi xǎh<sup>n</sup> ní cachí-gá sá tñahá-ó ndùu táhú-ó sǎ ñi nduu táhú Xítóhó Jesucristú, te duca<sup>n</sup> ndùu táhú-ó te núu na càda ndee iní-ó ndòho-o datná ní ndòho Xítóhó Jesucristú, te núu duca<sup>n</sup> te ío cuu cǎhnu-o ndihi-gá ni caa ni quíhí<sup>n</sup>.

<sup>18</sup>Te yúhú cǎchí-í sá ñà túú ñà cada-xi cuèi ndòho-o cuendá-gá ndécú-ó ñuyú-a, chi ío váha càa núu ndúú tǎhú-ó cùndecu-o na saá nduu. <sup>19</sup>Te nchaandi túhú sá ñi cadúha Yá Ndióxi ní taxi ndecu-gá ñuyú-a ndètu cǎhnu-ná-xi sáá nduu cǎchí-gá sá ío cǎhnu cuu nchaa déhe-gá. <sup>20</sup>Te nchaa sá ñi cadúha Yá Ndióxi ní taxi ndecu-gá ñuyú-a ní sáá nduu ñà túú-gǎ cúu-xí sǎ vǎha sá cúu-xí-gǎ. Te ñá díú mée sá ñi taxi ndecu Yá Ndióxi ñuyú-a duca<sup>n</sup> ni sàni iní-xi cunduu, chi mee-gǎ

duca<sup>n</sup> tñahí ní cachí-gá cunduu sá sáá nduu vǎ cúu-xí sǎ vǎha sá cúu-xí-gǎ, dico sáá tucu nduu te nchaa xǎh<sup>n</sup> cuu tucu-xi sá vǎha sá cúu-xí-gǎ. <sup>21</sup>Te nchaa sá ñi taxi ndecu-gá ñuyú-a vǎ cùndú-gá-xi datná cáá-xí vitna te ni vǎ dánàa-gá, chi nduu saa-xi te ngúndecu váha-xi datná ngúndecu váha nchaa cue déhe-gá. <sup>22</sup>Te ñaha-o sá ncháandí túhú sá nchító ñi cadúha Yá Ndióxi ndécú ñuyú-a ndòho-xi vitna datná ndóhó ñi<sup>n</sup> ñadíhí sa ní tñahá òré cacu déhe-xi. <sup>23</sup>Te ñá díú-ní nchaa sá dúcá<sup>n</sup> ñi cadúha-gá-ǎ<sup>n</sup> duca<sup>n</sup> ndòho-xi, chi tñahá nchoo dùca<sup>n</sup> ndòho-o ndecu-o ñuyú-a tucu, te nchoo sà ní nduu táhú-ó Espiritú Yá Ndióxi Espiritú sá ñi cachí mée-gǎ nduu táhú-ó díhnanuu. Te ío ndòho tñahá-ó ndècu-o ñuyú-a te ndètu cǎhnu-ná-ó sáá nduu ndàda saa-gá yiqui cùnú-ó, te cǎhá<sup>n</sup>-gá sá cúu-ó dèhe-gá. <sup>24</sup>Te Yá Ndióxi ní quide-gá ní naníhí tǎhú-ó núu xǎh<sup>n</sup> ní ngúndecu ndihi-o tñuhu ndee ñi ndétú-ó sáá nduu càda-gá nàcuáa ní cachí-gá, te núu sa ndècu ndihi-o sá ndúú tǎhú-ó te vǎ cúu cǎhá<sup>n</sup>-ó sǎ cùndètu-o sá ndúú tǎhú-ó chi sa ndècu ndihi-o. <sup>25</sup>Dico sá ndétú-ó ndùu táhú-ó cùu-xi sá vǎtá cùndècu ndihi-gá-ó, te xini ñuhu-ni-xi cada ndee-ni iní-ó cùndetu-o ndée sáá nduu ndùu táhú-ó sǎ dúcá<sup>n</sup> ñi cachí Yá Ndióxi nduu táhú-ó.

<sup>26</sup>Te Espiritú-gá chindee ñaha-xi xii-o nacuaa níhí ndée-ó cùndecu-o, te nchoo ñà túú xini-ó cǎhá<sup>n</sup> ndihi-o Yá Ndióxi nàcuáa tǎu-xi cunduu dico Espiritú-gá cǎhá<sup>n</sup> ndàhú-xi núu-gǎ cuendá-ó cuèi òré ñá ñihí-ó tñuhu cǎhá<sup>n</sup>-ó cuendá

nchaa sá ïo cuiní-ó cǎcǎ<sup>n</sup>-ó núú-gǎ.  
 27 Te Yá Ndiöxí sa nàha ndáá-gá  
 nchaa nàcuáa sàni iní-ó, te duca<sup>n</sup> sà  
 naha ndáá-gá nchaa nàcuáa sàni  
 iní Espíritú-gá. Te Espíritú-gá càhá<sup>n</sup>  
 ndàhú-xi núú-gǎ cuendá nchoo  
 ñáyiú yindaha-gá, te càhá<sup>n</sup> ndàhú-xi  
 núú-gǎ nàcuáa cuiní méé-gǎ  
 cunduu.

**Nchaa sá ná càda ñaha ñáyiú  
 te vá ndácú-yu nadatúhú-yu  
 iní-ó chi ndacu nahi-ni-o yáha-o  
 nchàa sá ná cǎdá ñàhá-yu**

28 Te sa nàha-o sá Yá Ndiöxí  
 quidé-gǎ sá ncháá sǎ yáha-o  
 ndècu-o ñuyíú-a cùu-xi sá vǎha  
 sá cúú-xí nchòo cue ñáyiú cùu iní  
 ñáhá xii-gá, chi cùu-o ñáyiú ní  
 cǎhá<sup>n</sup>-gá cundecu ndíhi-gá dàtná  
 ní cachí iní méé-gǎ. 29 Te ndéé  
 cútnàhá vátá ngǎva-gá ñuyíú, te  
 Yá Ndiöxí sa nàha-gá nándi cùu  
 ñáyiú cundecu ndíhi-gá, te ñiú-ni  
 ndéé dàvǎ-á<sup>n</sup> ní cachí-gá sá ñáyiú-á<sup>n</sup>  
 cunduu váha iní-yu dàtná váha iní  
 Déhe mee-gǎ, te duca<sup>n</sup> ní cachí-gá  
 cuendá sá Déhe mee-gǎ-á<sup>n</sup> cunuu-gǎ  
 núú nchàa ñáyiú cundecu ndíhi-gá.  
 30 Te nchaa ñáyiú duca<sup>n</sup> ní cachí-gá  
 cundecu ndíhi-gá ndéé cútnàhá  
 vátá ngǎva-gá ñuyíú càhá<sup>n</sup> ñáhá-gǎ  
 xií-yu vitna, te nchaa ñáyiú duca<sup>n</sup>  
 càhá<sup>n</sup>-gá cǎchí-gá sá ñà túú-gǎ  
 cuéchi-yu ndècu núú-gǎ, te ñiú-ni  
 ñáyiú-á<sup>n</sup> cachí-gá sá ïo càhnu  
 cuú-yu.

31 Te vitna ní cutnùní iní-ó, te ñà  
 túú nǎgá cani iní-ó, chi Yá Ndiöxí  
 ndécú ndíhi ñaha-gá xii-o, te vá yǒo  
 ì<sup>n</sup>-gá ndacu quehdé nihnu cuendá  
 sá vǎ chíndèe ñaha-gá xii-o. 32 Te  
 Yá Ndiöxí ñà túú ní cùdí iní-gá

Déhe-gá sá cùú-gá cuendá nchaa  
 nchoo ñáyiú xíndecu ñuyíú-a, te sá  
 dúcǎ<sup>n</sup> ndéé Déhe-gá ñà túú ní cùdí  
 iní-gá xǐá<sup>n</sup> cútnùní iní-ó sǎ táxi-gǎ  
 nchaandi túhú sá xíní ñùhu-o. 33 Te  
 vá yǒo ì<sup>n</sup> ndacu cacǎ<sup>n</sup> cuéchi núú  
 Yá Ndiöxí cuendá nchaa ñáyiú  
 ní cachí-gá cundecu ndíhi-gá te  
 núu ná cúú cuéchi-yu ndècu. Chi  
 mee-gǎ cǎchí-gá sá ñà túú ndècu  
 cuéchi-yu núú-gǎ. 34 Te vá yǒo ì<sup>n</sup>  
 ndacu daquìh<sup>m</sup> ñáhá xii-o núú ùhú  
 núú ndàhú, chi Xítóhó Jesucrístú  
 ní xíhí-gá te ní ndoto-gá, te  
 cuándaa-gá núú ndécú Dütú Ndiöxí  
 núcǒo-gá xio cùha-gá, te duca<sup>n</sup> ïo  
 cùnuu-gá, te yàcǎ<sup>n</sup> càhá<sup>n</sup> ndàhú-gá  
 núú Dütú Ndiöxí cuendá-ó. 35 Te  
 vá yǒo ì<sup>n</sup> ndacu cada ñaha xii-o  
 ì<sup>n</sup> sá ñà túú vǎha cuendá sá vǎ cúú  
 ìní ñáhá-gǎ Xítóhó Jesucrístú xii-o,  
 te ni tnúndòho tnúhu ndàhú, te  
 ni sá ndíhú iní-ó ñǎ cútnùní iní-ó  
 nǎsa cada-o cǎcu nihnu-o ì<sup>n</sup> sá ná  
 yáha-o, te ni nchàa sá cǎdá ñàha  
 ñáyiú sá cuendá-gá, te cuéi-ni sá vǎ  
 nihí-ó sǎ cóhó sǎ cǎxí-ó, te cuéi-ni  
 sá vǎ nihí-ó dǒo cuihnu-o, te cuéi  
 ndècu-ná-ó sǎ yáha-o ì<sup>n</sup> sá yáha-o,  
 te cuéi sa ndècu-ná-ó sǎ cǎhni  
 ñáhá-yu, dico Xítóhó Jesucrístú vá  
 dáñá ndéé-gá sá cúú ìní ñáhá-gǎ  
 xii-o. 36 Te quee ndáá-xi nàcuáa ní  
 cǎhá<sup>n</sup> ì<sup>n</sup> téé ní xóo cǎhá<sup>n</sup> tnúhu Yá  
 Ndiöxí ndéé sanaha ní ngódó tnùní  
 núú tütú-gá núú cǎchí-xi:

Yòhó Dütú Ndiöxí nchaa-ni  
 nduu nchaa-ni òré cuiní ñáyiú  
 cahni ñáhá-yu xii-ndí sá  
 cuendá-n,  
 te cǎchí-yu sá cúú-ndí dàtná  
 cue mbéé cue quití sa ndècu  
 túha-ná cahní-yu.

Duha ní cachí tée ní xóo cáhá<sup>n</sup> tnúhu-gá-á<sup>n</sup>, te duca<sup>n</sup> nǐ ngódo tnùnǐ núu tütú-gá. <sup>37</sup>Te cuéi duca<sup>n</sup> nǎndǐ sá ná càda ñahá-yu xii-o, dico vá ndácũ-yu nadatùhú-yu iní-ó chi ndacu nahi-ni-o yǎha-o nchaa sá dúcá<sup>n</sup> ná càda ñahá-yu xii-o, te duca<sup>n</sup> chi Xítóhó Jesucristú Yaá ío cùu iní ñáhá xii-o ndecu ndíhi ñaha-gá chíndèe ñaha-gá. <sup>38-39</sup>Te yúhú cútñuní ndáá iní-í sá nǐ ì<sup>n</sup> sá ío ñuyíú-a vá ndácú-xí càda-xi cuendá sá vǎ cúú iní ñáhá-gǎ Yǎ Ndiòxí xii-o, te ni sǎ cùú-ó, te ni sǎ cúndècu-o ñuyíú-a, te ni ì<sup>n</sup> espíritú sá ío cùnuu cundíhi yucu ñávǎha te ni ì<sup>n</sup> dava-gá cue espíritú cúndíhi-xi vá ndácú-xí càda-xi cuendá sá vǎ cúú iní ñáhá Yǎ Ndiòxí xii-o. Te ni sǎ cúú ñùyíú-a vitna, te ni sǎ cúú ndéé cuéé-gá, te ni ì<sup>n</sup> sá ndécú àndíu, te ni ì<sup>n</sup> sá ndécú ñùyíú-a, te ni ì<sup>n</sup> sá nǐ cadúha mee Yǎ Ndiòxí, ni ì<sup>n</sup> xǎá<sup>n</sup> vá ndácú-xí càda-xi cuendá sá vǎ cúú iní ñáhá-gǎ xii-o chi ndècu ndíhi-o Xítóhó Jesucristú Yaá cúú Xítóhó-ó.

**Yá Ndiòxí ní cachí-gá sá ñáiyu isràél cuú-yu ñáiyu canchicú<sup>n</sup> nihnu ñaha xii-gá**

**9** Te yúhú càhá<sup>n</sup> ndáá-í chi cùu-í ì<sup>n</sup> tée ndècu ndíhi Xítóhó Jesucristú, te ndècu ndíhi-í Espíritú Yǎ Ndiòxí nǔu xǎá<sup>n</sup> cútñuní iní-í sá càhá<sup>n</sup> ndáá-í. <sup>2</sup>Te nchaa-ni nduu nchaa-ni òrè ío ndíhú iní-í, te duca<sup>n</sup>-ni ío quide úhú-xi iní-í <sup>3</sup>sá cuendá nchaa ñáiyu cùu ndi mee-í. Te núu dícó cúú-xí ì<sup>n</sup> sá chíndèe ñaha xií-yu nucúndecu váha-yu núu Yǎ Ndiòxí ñá, te dàña-í mèé-í dàcuíta nihnu ñaha

Xítóhó Jesucristú nǔu dícó sá cúú. <sup>4</sup>Te nchaa ñáiyu cùu ndi mee-í-á<sup>n</sup> cúú-yu ñáiyu isràél, te Yá Ndiòxí ní cachí-gá sá cúú-yu déhe-gá, te ní quide-gá nàcuáa ní cutñuní iní-yu sá ío càhnu cuu-gá, te ní cáhá<sup>n</sup> ndáá-gá núú-yu nàcuáa cada ñaha-gǎ xií-yu, te ní xáha<sup>n</sup>-gǎ xii ndíi Moisés ní chídó tnùnǐ ndíi nàcuáa cadá-yu cundecú-yu. Te ní xáha<sup>n</sup>-gǎ xií-yu nàcuáa cadá-yu cada càhnu ñahá-yu xii-gá, te ní xáha<sup>n</sup> tucu-gá xií-yu nchaa nàcuáa cada-gá ndéé cuéé-gá. <sup>5</sup>Te nchaa ñáiyu-á<sup>n</sup> cúú-yu ñanǐ tnáhá nchàa cue tée ní cunuu nǐ xíndecu ndéé sanaha, te díu-ni ñanǐ tnáhǎ-yu cùu Xítóhó Jesucristú Yaá ní tendaha Dütú Ndiòxí ní quixi ñuyíú-a, te tnáhá-gá cúú-gǎ Ndiòxí te ío cùnuu-gá, te nchaa nduu nchaa quíú ío càhnu cuu-gá. Te duca<sup>n</sup> na cùnduu.

<sup>6</sup>Te vá càchí-ó sǎ Yǎ Ndiòxí ñá túú ní quide-gá nchaa nàcuáa ní cachí-gá cada-gá cuendá sá ñà túú sàndáá iní ñáhá dàva ñáiyu isràél xii-gá. Te sá dúcá<sup>n</sup> xǐquide davá-yu te ñá túú quidé-yu nàcuáa tàù-xi cadá-yu sá cúú-yu ñáiyu isràél. Te ñáiyu duca<sup>n</sup> xǐquide-á<sup>n</sup> cúú-yu ñáiyu ñá túú cùu cuendá ñáhá Yǎ Ndiòxí. <sup>7</sup>Te cuéi nchaá-yu cùu-yu ñanǐ tnáhá ndíi Àbrahám dico ñá túú quidé-yu nchaa nàcuáa tàù-xi cunduu cadá-yu sá cúú-yu ñanǐ tnáhá ndíi. Te Yá Ndiòxí ní xáha<sup>n</sup>-gǎ xii ndíi Àbrahám: “Nchaa cue ñanǐ tnáhá tǎ Isàac tée cùu déhe ducu<sup>n</sup>-n, mee-ni cué ñáiyu-á<sup>n</sup> cuu ñanǐ tnáhá-n”, duha ní xáha<sup>n</sup>-gǎ xii ndíi Àbrahám. <sup>8</sup>Te xǎá<sup>n</sup> cútñuní iní-ó sá ñǎ ncháá ñáiyu cùu ñanǐ tnáhá ndíi

Àbrahám cúu-yu ñáyiú cùu cuendá Yă Ndiöxí, chi mee-ni ñáyiú sàndáá iní nàcuáa ní cáhá<sup>n</sup>-gá cada-gá, ñáyiú-á<sup>n</sup> cúu cuendá-gá. <sup>9</sup>Te duha ndùu tnúhu ní xáha<sup>n</sup> Yă Ndiöxí xii ndíi Àbrahám: “Sáá nduu te yúhú cada-í te coo ì<sup>n</sup> déhe-n ndìhi ñadìhí-n tă Sărá”, duha ní xáha<sup>n</sup>-gă xii ndíi.

<sup>10</sup>Te ñá díú-ní xǎ<sup>n</sup> ní quide Yá Ndiöxí, chi tnàhá ní ndatnúhu-gá ndìhi ndíi Rèbecá cútnàhá vitna ñùhu úú déhe ndíi ndìhi ndíi Isàác téé ní cuu ñaní tnáhá-ó ní xíndecu ndéé sanaha. <sup>11-13</sup>Te cútnàhá vitna ñùhu-gá déhe ndíi Rèbecá, cútnàhá vátá cádá-gă-güexi ni ì<sup>n</sup> sá cuèhé sá dúhá, te ni ì<sup>n</sup> sá vǎha, ní xáha<sup>n</sup> Yă Ndiöxí xii ndíi: “Déhe-n tée díhna na càcu te téé-á<sup>n</sup> tñii-dé nchaa tnúhu cáhá<sup>n</sup> déhe-n tée cùu uú ná càcu”, duha ní xáha<sup>n</sup>-gă xii ndíi Rèbecá. Te ní quee ndáá-xi nàcuáa ní cáhá<sup>n</sup> Yă Ndiöxí núú tütú-gá núú càchí-xi: “Té Jàcób ní cuu váha iní-í núú-dě, te té Esàù ñá túú ní cùu váha iní-í núú-dě”, duha càchí-gá núú tütú-gá. Te duca<sup>n</sup> ní cuu chi duca<sup>n</sup> ní cachí méé-gă cunduu sá càhá<sup>n</sup>-gá nchaa ñáyiú cuiní méé-gă, te ñá díú cuendá ì<sup>n</sup> chùu<sup>n</sup> quidé-yu càhá<sup>n</sup> ñáhá-gă xii-yu.

<sup>14</sup>Te vá cúu tnàhí cáhá<sup>n</sup>-ó sǎ Yă Ndiöxí ñá túú quide váha-gá sá dúcá<sup>n</sup> quide-gá chi mee-gă ío ndáá quidé-gă! <sup>15</sup>Te mee-gă ní xáha<sup>n</sup>-gă xii ndíi Moisés: “Cundàhú iní-í chindee-í mee-ni cuè ñáyiú càchí iní-í”, duha ní xáha<sup>n</sup>-gă xii ndíi. <sup>16</sup>Te xǎ<sup>n</sup> cútnùní iní-ó sǎ cùndàhú iní-gá ñáyiú chi duca<sup>n</sup> cuiní méé-gă cunduu, dico ñá túú cùndahú iní ñáhá-gă xii-yu cuendá sá dúcá<sup>n</sup>

cuiní-yu cada-gá, te ni ñà túú cùndahú iní ñáhá-gă xii-yu cuendá sá ío ndùcu ndeé-yu quidé-yu ì<sup>n</sup> sá quidé-yu. <sup>17</sup>Te núú tütú Yă Ndiöxí càhá<sup>n</sup>-xi nàcuáa ní xáha<sup>n</sup>-gă xii téé ní cuu Faràón téé ní xíndaha nàció<sup>n</sup> Ègíptú, te duha ní xáha<sup>n</sup>-gă: “Yúhú ní quide-í yíndàha-n ñáyiú cuendá cada-í titní núú sǎ cádà-í núú-n cuendá cutnùní iní-n sǎ ío càhnu cuu-í, te duca<sup>n</sup> nchaa ñáyiú ñuyúú cutnùní iní-yu sá yúhú cúú-í Ndiöxí”, duha ní xáha<sup>n</sup>-gă xii téé ní cuu Faràón. <sup>18</sup>Te xǎ<sup>n</sup> cútnùní iní-ó sǎ Yă Ndiöxí cùndàhú iní-gá mee-ni cuè ñáyiú càchí iní méé-gă, te duca<sup>n</sup> ndàda díi-gá iní nchaa ñáyiú càchí iní méé-gă duca<sup>n</sup> càda-gá.

<sup>19</sup>Te sá dúhá càhá<sup>n</sup>-í te dava-ndo quèsaha-ndo: “Ná cuendá Yă Ndiöxí dácàa-gá cuéchi díquí ñáyiú núu ni ì<sup>n</sup>-yu ñá ndácü-yu quehndé nihnú-yu cuendá sá vǎ cádá Yă Ndiöxí nàcuáa cuiní-gá”, quesaha-ndo. <sup>20</sup>Te chí cuàha cuendá sá dícó ñáyiú ñuyúú-a cùu-ndo te ñá túú ndùu váha-xi sá nchòhó cáhá<sup>n</sup>-ndó ì<sup>n</sup> tnúhu sá ñà túú ndùu váha sá cúú-xí Yă Ndiöxí. Te duha na càhá<sup>n</sup>-í núú-ndó nàcuáa tecú tñùní-gá-ndó nàcuáa ndùu tnúhu càhá<sup>n</sup>-í. Te ñá túú xini-ó sǎ ì<sup>n</sup> quídi ñuhu cúñaha-xi xii ñáyiú ní cadúha ñaha xii-xi: “Ná cuendá duha ní cadúha ñaha-n xii-í”, cúñaha-xi. <sup>21</sup>Chi ñáyiú càdúha nchaa quídi-á<sup>n</sup> cuu-ni cadúha-yu ndìhi ñuhu cuèi nása na cùnduu quídi cadúha-yu canehe chùú<sup>n</sup>-yu, chi ì<sup>n</sup>-ni ñùhu cadúha-yu quídi cánehe chùú<sup>n</sup>-yu ndi tnahá nduu sàcòo-yu vico ndìhi quídi sá cánehe chùú<sup>n</sup>-yu nduu cùtèxínu.

<sup>22</sup>Te ñi-ni duca<sup>n</sup> quide Yá Ndiöxí, chi cuení-gá dandòho-gá ñáiyu ñá túú quide nchaa nacúa nduu vétú iní-gá, te cada-gá nàcuáa cutnùní iní-yu sá ño càhnu cuu-gá. Te sa ndècu túha-ná-yu sá quèh<sup>n</sup>-yu núú ùhú núú ndàhú, te cuèi duca<sup>n</sup> dico ío ta quide cahnu iní-gá cuáhá<sup>n</sup>. <sup>23</sup>Te duca<sup>n</sup> quide-gá cuendá cutnùní iní nchaa ñáiyu ñuyú sá ño váha quide-gá sá cúú-xí nchàa nchoo ñáiyu cùndahú iní-gá, chi ní cachí-gá sá nchóo cuè ñáiyu cùndahú iní-gá nduu táhú-ó cùndecu-o ndìhi-gá núú ño váha càa ndecu-gá. <sup>24</sup>Te dava nchoo ñáiyu ní cáhá<sup>n</sup> Yá Ndiöxí cúú-ó ñáiyu isràél, te dava-o cùu-o ñáiyu ñá túú cùu ñáiyu isràél. <sup>25</sup>Te ní quee ndáá-xi nàcuáa ní xáha<sup>n</sup> Yá Ndiöxí xii ndíi Òseás téé ní xóo cáhá<sup>n</sup> tnúhu-gá ndéé sanaha ní chídó tnùní ndíi núú tütú-gá núú càchí-xi:

Ñáiyu ñá túú cùu cuendá-í ní cùu te nduu cuendá-í-yu, te ñi-ni ñáiyu-á<sup>n</sup> ñà túú cùu váha iní-í núú-yu ni cùu, dico vitna cùu váha iní-í núú-yu.

<sup>26</sup>Te ñi-ni ñuú núú dúcá<sup>n</sup> ní cachí-í sá ñà túú ñáiyu cùu cuendá-í ñi-ni ñuú-á<sup>n</sup> coo ñáiyu cuu déhe yúhú Dútú Ndiöxí Yaá ndécú tũu andũ.

Duha ní xáha<sup>n</sup> Yá Ndiöxí xii ndíi Òseás ní chídó tnùní ndíi núú tütú-gá. <sup>27</sup>Te ndíi Chàia téé ní xóo cáhá<sup>n</sup> tucu tnúhu Yá Ndiöxí ndéé sanaha ní cáhá<sup>n</sup> ndíi cuendá ñáiyu isràél, te duha ní cachí ndíi: “Cuèi cuéhé víhí ñáiyu isràél dàtná cuéhé ñuhu cúchí lámár dico sacú-ni-yu vá quení-yu tnúndòho tnúhu ndàhú.

<sup>28</sup>Te Yá Ndiöxí ío ndìhi cada-gá

nchaa nàcuáa càhá<sup>n</sup>-gá ñuyú”, duha ní cachí ndíi. <sup>29</sup>Te ní cáhá<sup>n</sup> tucu ndíi nàcuáa cada-xi ndéé cuèé-gá, te ní cachí ndíi:

Yá Ndiöxí Yaá táxí tnùní nchaandi túhú sá ío andũ ndìhi ñuyú ñà túú ní dànaa-gá nchaa ñáiyu isràél, chi núu ni ndìhí-yu danàa ñaha-gá,

te nchoo cùu-o datná ní cuu nchaa ñáiyu ní xíndecu ñuú Sòdomá ndìhi nchaa ñáiyu ní xíndecu ñuú Gòmorrá, te ndìhi-o nàa datná ní naa nchaa ñáiyu-á<sup>n</sup> ní cùu.

Duha ní cachí ndíi.

Ñáiyu isràél ñá túú sàndáá iní-yu tnúhu Xítóhó Jesucristú

<sup>30</sup>Te sá cuendá xíá<sup>n</sup> ñuú vitna càchí tnúhu-í xii-ndo sá cuè ñáiyu ñá túú cùu ñáiyu isràél ñá túú ní nànducu nihnú-yu nàcuáa cadá-yu cudíu-yu núú Yá Ndiöxí, dico vitna cùdiú-yu núú-gá chi ní sàndáá iní-yu Xítóhó Jesucristú. <sup>31</sup>Te ñáiyu isràél nchìcú<sup>n</sup> nihnú-yu tnúhu sá dánèhé ñáhá xì-yu nàcuáa cadá-yu cudíu-yu núú Yá Ndiöxí dico ñá túú cùdiú-yu núú-gá chi ñá ndácú-yu cadá-yu nchaa nàcuáa càhá<sup>n</sup>-xi. <sup>32</sup>Te duca<sup>n</sup> ñà túú cùdiú-yu núú Yá Ndiöxí chi ñá túú sàndáá iní-yu Xítóhó Jesucristú, te sàni iní-yu sá sá cuendá mee-ni nchàa sá quidé mèè-yu cudíu-yu núú-gá, te sá dúcá<sup>n</sup> quidé-yu te cùu-yu dàtná ñ<sup>n</sup> ñáiyu nguñenu ñ<sup>n</sup> yúú te ndùá-yu. Te duca<sup>n</sup> sàtnahá-xi cùu-yu chi ñá túú cùu váha iní-yu núú Xítóhó Jesucristú. <sup>33</sup>Te quee ndáá-xi nàcuáa ní cáhá<sup>n</sup> Yá Ndiöxí ñ<sup>n</sup> xichi núú tütú-gá núú càchí-xi:



Yúhú táxí ndècu-í ìí<sup>n</sup> téé ñúú  
 Sìón, te cuu-dé dàtná ìí<sup>n</sup> yúú,  
 te yúú-à<sup>n</sup> nguñenu ñáyíu te  
 nduá-yu,  
 te nchaa ñáyíu na quìndáá  
 iní ñáhá xii-dé, te vá ndíxí  
 cuèchi iní-yu sá dúcá<sup>n</sup> ñí  
 sándáá iní ñáhã-yu xii-dé.

Duha càchí-gá núú tütú-gá.

**10** Te nchòhò ñáyíu ndècu  
 ndìhi-í ichi Xítohó  
 Jesucristú càchí tnúhu-í xii-ndo  
 sã cãhá<sup>n</sup> ndìhi-í Yã Ndiòxí cuendá  
 ñáyíu isràél, chi ío cuiní-í sá nánìhí  
 tàhú-yu. <sup>2</sup>Te na càhá<sup>n</sup> ndáá-í  
 cuendá-yu sá ìo ndècu ndeé-yu  
 xìnu cuechí-yu núú Yã Ndiòxí, te  
 dìcò-ni sá ñà túú quidè-yu nàcuáa  
 cuiní mée-gã cadá-yu. <sup>3</sup>Chi ñã túú  
 quidè cuendá-yu nàcuáa cuiní Yã  
 Ndiòxí cada ñaha-gã xii-yu nàcuáa  
 cudù-yu núú-gã, te quidè-ní-yu  
 nàcuáa sàni iní mée-yu cudù-yu  
 núú-gã te ñã túú cuiní-yu tñí-yu  
 tnúhu càhá<sup>n</sup>-gã nàcuáa cudù-yu  
 núú-gã. <sup>4</sup>Te Xítohó Jesucristú ní  
 quidè-gá cuendá sá vã cúnù-gá  
 nchaa tnúhu ní chídó tnùní ndíi  
 Moisés, te nchaa ñáyíu na quìndáá  
 iní ñáhá xii-gá te ñu-gá cada te  
 cudù-yu núú Yã Ndiòxí.

<sup>5</sup>Te ndíi Moisés càhá<sup>n</sup> ndíi núú  
 tütú ndíi cuendá ñáyíu cuiní cudù  
 núú Yã Ndiòxí cuendá sá nchicú<sup>n</sup>  
 nihnú-yu nchaa nàcuáa ní càhá<sup>n</sup>  
 ndíi. Te ní cachí ndíi sá ncháá ñáyíu  
 na càda nchaa nàcuáa ní xáha<sup>n</sup> Yã  
 Ndiòxí xii ndíi ní chídó tnùní ndíi  
 te naníhí tàhú-yu, te núu dìcò  
 ndacú-yu cadá-yu nchaa nàcuáa  
 ní càhá<sup>n</sup> ndíi. <sup>6</sup>Dico vitna núu na  
 quìndáá iní-ó Xítohó Jesucristú, te  
 cudù-o núú Yã Ndiòxí. Te duha

càchí tnúhu ní chídó tnùní ndíi núú  
 tütú-gá: “Vá cání iní-ndó sã xíní  
 ñùhu-xi cada-ndo ìí<sup>n</sup> sá vã yõo tnàhí  
 ndàcu cada sá cáá tũu-ndo àndiù  
 te cúñaha-ndo xii Cristú cuu<sup>n</sup>-ndo  
 ndìhi-gá núú ñùyíú-a. <sup>7</sup>Te ni vã  
 cání tũcu iní-ndó sã quìhí<sup>n</sup> túu-ndo  
 nũú xĩndecu nchaa ñáyíu ní xíhí  
 te cada-ndo sã Cristú ndoto-gã”,  
 duha càchí tnúhu-á<sup>n</sup> sã vã dúcá<sup>n</sup>  
 càni iní-ó. <sup>8</sup>Te càchí tucu tnúhu-á<sup>n</sup>:  
 “Tnúhu Yã Ndiòxí sá ndécú ndìhi  
 ñaha-xi xii-ndo chi sàni iní-ndó  
 cuendá tnúhu-á<sup>n</sup> te càhá<sup>n</sup>-ndó”,  
 duha càchí tnúhu-á<sup>n</sup>. Te tnúhu sá  
 ndécú ndìhi-ndo-á<sup>n</sup> cúú-xí tñùhu  
 càhá<sup>n</sup>-ndí núú ñáyíu, te xìni ñuhu-xi  
 sá quìndáá iní-yu tnúhu-á<sup>n</sup>. <sup>9</sup>Te núu  
 na ñũnuu-ndo càhá<sup>n</sup>-ndó sã Xítohó  
 Jesucristú cúú-gã Xítohó-ndó, te  
 quìndáá iní-ndó ñi yuhu ni iní-ndó  
 sã Yã Ndiòxí ní dándótó-gã Xítohó  
 Jesucristú, te naníhí tàhú-ndó te  
 núu duca<sup>n</sup> na càda-ndo. <sup>10</sup>Te nchaa  
 ñáyíu duca<sup>n</sup> sàndáá iní te càhá<sup>n</sup>-yu  
 sá Xítohó Jesucristú cúú-gã  
 Xítohó-yu, ñáyíu-á<sup>n</sup> cudù-yu núú  
 Yã Ndiòxí te naníhí tàhú-yu.

<sup>11</sup>Te núú tütú Yã Ndiòxí càchí-xi  
 sá ñi ìí<sup>n</sup> ñáyíu sàndáá iní ñáhá xii  
 Xítohó Jesucristú vá ndíxí cuèchi  
 iní-yu sá dúcá<sup>n</sup> sàndáá iní ñáhã-yu  
 xii-gá. <sup>12</sup>Te sá cúú-xí Xítohó  
 Jesucristú chi ìí<sup>n</sup>-ni cùu ñáyíu isràél  
 ndìhi ñáyíu ñã túú cùu ñáyíu isràél,  
 chi ñu-gá cúú-gã Yáa cúnù taxi  
 tnuní-gá nchaa ñáyíu, te ío váha  
 quidè-gá sá cúú-xí nchaa ñáyíu  
 càhá<sup>n</sup> ndìhi ñaha xii-gá. <sup>13</sup>Te quèe  
 ndáá-xi nàcuáa càhá<sup>n</sup>-xi núú tütú  
 Yã Ndiòxí núú càchí-xi: “Nchaa  
 ñáyíu na càhá<sup>n</sup> ndàhú núú Xítohó  
 Jesucristú sá dácãcu nihnu ñaha-gã

xíi-yu, te ñáyi-u-á<sup>n</sup> naníhí tàhú-yu”, duha càchí-xi núú tütú-gá. <sup>14</sup>Te ñáyi-u-á<sup>n</sup> vǎ nihí-yu nàcuáa cáhá<sup>n</sup> ndàhú-yu núú-gǎ te núú ñá túú sàndáá iní ñáhǎ-yu xii-gá, te ni vǎ nihí-yu nàcuáa cadá-yu quindáá iní ñáhǎ-yu xii-gá te núú vátá cùndèdóho-gá-yu tnúhu-gá, te ni vǎ nihí-yu tnúhu-gá te núú vǎ yõo quíhí<sup>n</sup> cútnuhu ñaha xii-yu. <sup>15</sup>Te ni vǎ yõo quíhí<sup>n</sup> duca<sup>n</sup> cútnuhu ñaha xii-yu tnúhu-gá te núú Yá Ndiõxí vǎ téndàha-gá ñáyi-u quíhí<sup>n</sup> cútnuhu ñaha xii-yu. Te núú tütú Yǎ Ndiõxí càchí-xi: “Ío vii ío váha cùu iní-ó vèxi ñáyi-u dànehé ñáhǎ xii-o nàcuáa ndùu tnúhu sá càhá<sup>n</sup> nàcuáa naníhí tàhú-ó”, duha càhá<sup>n</sup>-xi núú tütú-gá.

<sup>16</sup>Te ñá ncháǎ-yu cuìní-yu quindáá iní-yu tnúhu-á<sup>n</sup>. Te ní quee ndáá-xi nàcuáa ní xáha<sup>n</sup> ndíi Chàia xii Yá Ndiõxí te duha ní xáha<sup>n</sup> ndíi xii-gá: “Yòhó Dútú Ndiõxí na nàcani tnúhu-í núú-n sǎ ïo sacú-ni ñáyi-u sàndáá iní-yu tnúhu càhá<sup>n</sup>-ndí”, duha ní xáha<sup>n</sup> ndíi xii-gá. <sup>17</sup>Te xini ñuhu-xi sá dǐhna-gá cundedóho-yu tnúhu-á<sup>n</sup> cuèndá duca<sup>n</sup> te quindáá iní-yu, te tnúhu-á<sup>n</sup> cúu-xí tnúhu Xítóhó Jesucristú.

<sup>18</sup>Te vǎ cúu cǎhá<sup>n</sup>-ó sǎ ñà túú ní nihí ñáyi-u isràél tnúhu-gá, chi nchaá-yu ní nihí-yu tnúhu-gá, chi núú tütú Yǎ Ndiõxí càchí-xi:

Cue tée ní cáhá<sup>n</sup> tnúhu Yá Ndiõxí ní cáhá<sup>n</sup>-güedé tnúhu-gá núú ñáyi-u, te tnúhu-á<sup>n</sup> ní xité nuu-xi nihí ñuyú.

Duha càchí-xi núú tütú-gá. <sup>19</sup>Te ni vǎ càhá<sup>n</sup>-ó sǎ ñáyi-u isràél ñá túú ní cùu tnuní iní-yu nàcuáa ndùu

tnúhu-gá chi ní tecú tnùní-yu. Te ndéé sanaha ní chídó tnùní ndíi Moisés nàcuáa ní xáha<sup>n</sup> Yǎ Ndiõxí xii ñáyi-u isràél, te duha ní xáha<sup>n</sup>-gǎ xii-yu:

Yúhú cada váha-í nchaa ñáyi-u ñá túú cùu ñáyi-u isràél, ñáyi-u ñá túú cùtnuní iní-xi nàcuáa cada váha cundecu núú-í, te nchòhó cudéé<sup>n</sup>-ndó nǔú-yu te cuu cuédú iní-ndó-yu.

Duha ní xáha<sup>n</sup> Yǎ Ndiõxí xii-yu te duca<sup>n</sup> ní chídó tnùní ndíi Moisés.

<sup>20</sup>Te ndíi Chàia ñá túú tnàhí ni yúhú ndíi ní quide ndíi núú Yǎ Ndiõxí ní cáhá<sup>n</sup> ndíi tnúhu-gá, te ní cachí ndíi:

Ñáyi-u ñá túú nànducu ñaha xii-í ní cùu ní naníhí ñáhǎ-yu xii-í, te ni ñá túú ndùu tnúhu ñáhǎ-yu xii-í ní cùu te ní xiní ñáhǎ-yu.

Duha ní cachí ndíi Chàia ní cáhá<sup>n</sup> ndíi tnúhu Yá Ndiõxí. <sup>21</sup>Te ní quide tucu ndíi núú Yǎ Ndiõxí ní cáhá<sup>n</sup> ndíi tnúhu-gá cuèndá ñáyi-u isràél, te ní cachí ndíi: “Nchaa-ni nduu yìhí-í càhá<sup>n</sup>-í ñáyi-u isràél te ñá túú cuìní-yu quindáá iní-yu chi ío sàá iní-yu”, duha ní cachí ndíi Chàia ní cáhá<sup>n</sup> ndíi tnúhu Yá Ndiõxí.

**Cuèndá ñáyi-u isràél ñáyi-u naníhí tàhú**

**11** Te cuèi duca<sup>n</sup> dico vǎ càhá<sup>n</sup>-ó sǎ Yǎ Ndiõxí dáquèe tíhú-gǎ ñáyi-u isràél chi diu-ni ñáyi-u-á<sup>n</sup> cúu cuèndá-gá, chi yúhú tnàhà-í cúu-í mei tée isràél, te ñaní tnàhà-í ní cuu ndíi Àbrahám tée ní xindecu ndéé sanaha vihi-gá, te diu-ni ñaní tnàhà-í ní cuu tucu ndíi Benjàmín. <sup>2</sup>Te ndéé sanaha

duca<sup>n</sup> ní cachí Yá Ndiöxí sá nchúhú ñáyiú isràél cúú-ndí ñáyiú cùu cuendá-gá, te ñá túú dàquee tǎhú ñáhá-gǎ xii-ndí, te nchòhó sa xìní-ndó nàcuáa càhá<sup>n</sup>-xi núú tütú Yá Ndiöxí núú càchí-xi nàcuáa ní quide té Èliás ní ndacá<sup>n</sup> cuéchi-dé núú-gǎ cuendá ñáyiú isràél. <sup>3</sup>Te duha ní xáha<sup>n</sup>-dě xii-gá: “Yòhó Dútú Ndiöxí, ná nàcani tnúhu-í núú-n sǎ ñí sahní-yu cue tée càhá<sup>n</sup> tnúhu-n, te ní dátanú-yu núú xihí quitì ndùu táhú-n, te yúhú-nǎ ní cácu-í ndécù-í dico nànducu ñahá-yu chi tnàhá-í cuìní-yu cahni ñàhá-yu xii-í”, duha ní xáha<sup>n</sup>-dě xii Yá Ndiöxí. <sup>4</sup>Te Yá Ndiöxí ní xáha<sup>n</sup>-gǎ xii-dé: “Sa ní dáquée ìh<sup>n</sup>-í úsá mǐl cue tée cùu cuendá-í, te ñá túú nèhe-güedé sá yǐñùhu núú Bàál sá càchí-yu cùu ndiöxí-yu te ñá ndáá sá ndiöxí cúú-xí”, duha ní xáha<sup>n</sup>-gǎ xii té Èliás. <sup>5</sup>Te duca<sup>n</sup> sǎtnahá-xi cùu vitna chi xǐndecu ñáyiú ní cáhá<sup>n</sup>-gá ní chìtnahá ñáhá xii-gǎ, te duca<sup>n</sup> ñí quide-gá chi ní cundàhú iní ñáhá-gǎ xii-yu. <sup>6</sup>Te duca<sup>n</sup> ñí cáhá<sup>n</sup> ñáhá-gǎ xii-yu sá cundàhú iní ñáhá-gǎ, te ñá dǐú cuendá ìh<sup>n</sup> chù<sup>n</sup> quidé-yu duca<sup>n</sup> ñí cáhá<sup>n</sup> ñáhá-gǎ xii-yu, chi núú dicó cuendá ìh<sup>n</sup> chù<sup>n</sup> quidé-yu duca<sup>n</sup> ñí cáhá<sup>n</sup> ñáhá-gǎ xii-yu ña, te ñá dǐú-gǎ sá cúú iní méé-gǎ duca<sup>n</sup> ñí cáhá<sup>n</sup> ñáhá-gǎ xii-yu te núú duca<sup>n</sup>. <sup>7</sup>Te na càchí tnúhu-í xii-ndo nàcuáa cùu vitna sá ñáyiú isràél cuìní-yu cudǐú-yu núú Yá Ndiöxí dico ñá ndácù-yu, dico dava ñáyiú ní cáhá<sup>n</sup>-gá ñáyiú-á<sup>n</sup> cudǐú-yu núú-gǎ, te ñáyiú duca<sup>n</sup> ñà túú cùdùu núú-gǎ-á<sup>n</sup> ïo ní cuu sàá iní-yu núú-gǎ. <sup>8</sup>Te ní quee ndáá-xi

nàcuáa càhá<sup>n</sup>-xi núú tütú Yá Ndiöxí núú càchí-xi: “Yá Ndiöxí ní cachí-gá sá cúú-yu ñáyiú ío ñí dǐquí-xi, chi cuéi ndéhé-yu nàcuáa càhá<sup>n</sup> tnúhu-gá dico ñá cùtnùní iní-yu nàcuáa càhá<sup>n</sup>-xi, te cuéi ndedóho-yu dico ñá túú quee dǐquí-yu, te duca<sup>n</sup>-ni quidé-yu ndée vitna”, duha càchí-xi núú tütú-gá.

<sup>9</sup>Te ndíi Dàvíí ní cachí ndíi: Ñáyiú ío váha ndècu te cùdǐí iní-yu quidé-yu vico, dico yáha-yu dátaná yǎha ìh<sup>n</sup> quitì ngáva trampá àdi ìh<sup>n</sup> quitì ñá cùtnùní iní-xi quee xití ñunu, chi cuíta nihnú-yu te nacháhu-yu nchaa sá quidè-yu.

<sup>10</sup>Te cùu-yu ñáyiú ñá túú vèdana tècú tnùní, te cùu tucú-yu dátaná ìh<sup>n</sup> ñáyiú ío ndòho nchido ìh<sup>n</sup> sá vèe.

Duha ní cachí ndíi Dàvíí.

### Ñáyiú ñá túú cùu ñáyiú isràél naníhí tàhú-yu

<sup>11</sup>Te cuéi duca<sup>n</sup> dico vá càchí-ó sǎ sá dúcá<sup>n</sup> ñà túú ní quide ndáá ñáyiú isràél te ní xíta nihnu duú<sup>n</sup>-yu, te ñáhá chi sá dúcá<sup>n</sup> ñí quidé-yu te ní ngúndecu ndíhi dava-gǎ ñáyiú tnúhu sá càhá<sup>n</sup> nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudǐí iní-yu naníhí tàhú-yu. <sup>12</sup>Te sá dúcá<sup>n</sup> ñí quide sàá iní-yu ñá túú ní quide ndáá-yu núú Yá Ndiöxí, te xǐá<sup>n</sup> ní cuu-xi ìh<sup>n</sup> sá váha sá cúú-xí ñáyiú nihí ñuyúú, dico sáá nduu te cada ñáyiú isràél nchaa nàcuáa càhá<sup>n</sup> Yá Ndiöxí, te dàvá-á<sup>n</sup> ïo-gǎ váha cuu xii nchaa ñáyiú nihí ñuyúú.

<sup>13</sup>Te nchòhò ñáyiú ñá túú cùu ñáyiú isràél càchí tnúhu-í xii-ndo sá Yă Ndiöxí ní cachí-gá sá cãhá<sup>n</sup>-í tnúhu-gá núú-ndó, te yúhú càchí-í sá ïo cãhnu cuu chiú<sup>n</sup> quide-í. <sup>14</sup>Te duha cãhá<sup>n</sup>-í cuendá sá nũu cudana ïo dava ñáyiú cùu ndi mee-í cudíí ìní-yu cada váha ñaha Yă Ndiöxí xií-yu dàtná quidé vãha ñaha-gã xii-ndo, te naníhí tãhú-yu. <sup>15</sup>Te sá cuendá sá ñí quee tĩhú ñáyiú isràél ní nacáhá<sup>n</sup> cáhnú ìní tnáhá ñáyiú nihĩ ñuyúú ndihĩ Yă Ndiöxí, dico na sãà nduu núcúndecu váha ñáyiú isràél ndihĩ Yă Ndiöxí, te ïo-gá váha tnahá ñáyiú nihĩ ñuyúú, te ñáyiú-á<sup>n</sup> cada ìní-ó sã cúú-yu dàtná ñáyiú ní xihí, dico dàvá-á<sup>n</sup> cada tucu ìní-ó sã cúú-yu dàtná ñáyiú ní ndoto chi nucúndecu váha-yu ndihĩ-gá. <sup>16</sup>Te núu sá lúhá-ní ìí<sup>n</sup> tĩlúú yusa<sup>n</sup> cãváha te ðiu-ni duca<sup>n</sup> cãváha nihĩ. Te núu cãváha yóho ìí<sup>n</sup> yutnu te ðiu-ni duca<sup>n</sup> cãváha-xi nihĩ-xi. Te ðiu-ni duca<sup>n</sup> sãtnahá-xi cùu ñáyiú isràél, chi ñaní tnãhá-yu ní xindecu ndéé sanaha ñí cuú-yu ñáyiú ní cuu cuendá ñáhá Yă Ndiöxí, te ðiu-ni duca<sup>n</sup> cùu cuendá ñáhá-gã xii mèe-yu ndéé vitna.

<sup>17</sup>Te ïo ìí<sup>n</sup> yutnu váha nàni olívú, te dava dité yutnu-á<sup>n</sup> ñí téhndé te ní nucodó dité yutnu òlívú cùtèxínu, te mee-ñá yutnu òlívú váha-á<sup>n</sup> ïo váha quide-xi nchito dité yutnu òlívú cùtèxínu-á<sup>n</sup>. Te dité nchaa yutnu òlívú váha-á<sup>n</sup> cúú-xí dàtná ñáyiú isràél, te nchaa dité-xi sá ñí téhndé-á<sup>n</sup> cúú-xí ðiu-ni ñáyiú isràél ñáyiú ñá túú tnàhá tnúhu ndihĩ Yă Ndiöxí. Te dité yutnu òlívú cùtèxínu sá ñí nucodó tnáhá-ã<sup>n</sup> cúú-xí dàtná ñáyiú ñá túú cùu ñáyiú isràél tnàhá

tnúhu ndihĩ Yă Ndiöxí. <sup>18</sup>Te vá cáni ìní-ndó sã sã dúcá<sup>n</sup> ndècu váha-ndo ndihĩ Yă Ndiöxí te ïo cùnuu-ndo dacúxí ñáyiú isràél, te vá dúcá<sup>n</sup> cànì ìní-ndó chi sá cuendá nchaa ñaní tnáhá ñáyiú isràél ní xindecu ndéé sanaha duca<sup>n</sup> ndècu váha-ndo ndihĩ Yă Ndiöxí vitna, te ñá dúú sã cuendá nchòhò ndécú ndihĩ váha ñáyiú-á<sup>n</sup> Yă Ndiöxí vitna.

<sup>19</sup>Te cudana sàni ìní-ndó te càchí-ndó sã ñáyiú isràél ní quee tĩhú-yu cuendá sá nchòhò nucuíñí-ndó nũú-yu nucúndecu váha-ndo ndihĩ Yă Ndiöxí. <sup>20</sup>Te ndáá sá ñí quee tĩhú-yu chi ñá túú ní sàndáá ìní ñãhá-yu xii-gá, te nchòhò ïo váha cùu ndecu-ndo ndihĩ-gá chi ní sàndáá ìní-ndó-gã, dico vá càchí-ndó sã ïo cãhnu cuu-ndo, te ïo váha chí cuãha cuendá nàcuáa cundecu-ndo. <sup>21</sup>Te cue ñáyiú isràél cúú-yu ñáyiú cùu cuendá-gá ní cùu te ní dáquéé tĩhú ñáhá-gã xií-yu cuendá sá ñá túú ní sàndáá ìní ñãhá-yu xii-gá, te tnàhá nchòhò daquèe tĩhú ñáhá-gã xii-ndo te núu na càda-ndo datná ní quide ñáyiú-á<sup>n</sup>. <sup>22</sup>Te chí cadá cuendá sá Yă Ndiöxí ïo váha ìní-gá, dico cùdèé<sup>n</sup>-gã núú nchàa ñáyiú ñá túú sàndáá ìní ñáhá xii-gá, dico sá cúú-xí nchòhò cue ñáyiú sàndáá ìní ñáhá xii-gá chi ïo váha ìní-gá. Te duca<sup>n</sup>-ni cùnduu váha ìní-gá sá cúú-xí-ndó te núu vá dàñá ndéé-ndó càda-ndo nacuáa cãhá<sup>n</sup>-gá cuendá sá ïo váha ìní-gá, te núu ñáhá te tnàhá nchòhò quee tĩhú-ndó dàtná ní quee tĩhú ñáyiú isràél, ñáyiú ñá túú ní sàndáá ìní ñáhá xii-gá. <sup>23</sup>Dico núu ñáyiú isràél ñáyiú ní dáquéé tĩhú ñáhá Yă Ndiöxí quíndáá ìní

ñáhă-yu xii-gá te nduu cuendá ñáhá tùcu-gá xii-yu, te ñáyi-u-á<sup>n</sup> cúu-yu dàtná dava dité yutnu òlívú sá ñí téhndé te ní nucódó tnáhá tùcu. Te duca<sup>n</sup> sätnahá-xi cùu-yu te núu na quëndáá iní ñáhă-yu xii-gá. <sup>24</sup>Te nchòhó cúu-ndó dàtná nchaa dité yutnu òlívú cùtexínu, chi ñá díú ñáyi-u isràél cúu-ndó, te dité nchaa yutnu òlívú cùtexínu-á<sup>n</sup> ñí nucódó-xi núu dité yutnu òlívú váha-á<sup>n</sup>. Te yáchí-gá nucúndecu váha ñáyi-u isràél ndìhi Yá Ndiòxí, chi cùu-yu dàtná nchaa dité yutnu òlívú váha sá ñí téhndé te ní nucódó tnáhá tùcu. Te duca<sup>n</sup> sätnahá-xi cùu-yu te núu na quëndáá iní ñáhă-yu xii-gá.

#### Sáa nduu te naníhí tàhú ñáyi-u isràél

<sup>25</sup>Te nchòhó ñáyi-u ndècu ndìhi-í ichi Xítohó Jesucristú, na cächí tnúhu-í xii-ndo ì<sup>n</sup> tnúhu ndùu yuhu ni cuu, cuendá sá vă cání iní-ndó sã ïo-gá váha sàa díquí-ndó dàcúxí ñáyi-u isràél, chi dava ñáyi-u isràél cúu sàa iní-yu núu Yá Ndiòxí nini na ndìhi ñáyi-u ní cachí Yá Ndiòxí ngúndecu váha ndìhi ñáhă-yu xii-gá, ñáyi-u ñá túu cùu ñáyi-u isràél. <sup>26</sup>Te nduu na ndìhi ñáyi-u-á<sup>n</sup> ngúndecu váha-yu ndìhi Yá Ndiòxí, te dàvâ-á<sup>n</sup> naníhí tàhú ñáyi-u isràél chi quee ndáá-xi nàcuáa càhá<sup>n</sup> Yá Ndiòxí núu tùtú-gá núu cächí-xi:

Ndàa ñúú Sìon quixi Yaá cada naníhí tàhú nchaa ñáyi-u, te ñi-u-ni Yaá-á<sup>n</sup> cada-gá cuendá sá dàná nchaa ñáyi-u isràél ichi cuèhé ichi duha.

<sup>27</sup>Te yúhú cada càhnu iní-í nchaa cuèchi ñáyi-u isràél, chi cada-í dàtná ní cachí-í ndéé sanaha.

Duha cächí Yá Ndiòxí núu tùtú-gá.

<sup>28</sup>Te sá cuendá tnúhu sá càhá<sup>n</sup> nàcuáa naníhí tàhú-ó xíã<sup>n</sup> cúu ùhú iní ñáyi-u isràél Yá Ndiòxí, te sá dúcá<sup>n</sup> quidé-yu xíã<sup>n</sup> nchòhó ní níhí-ndó tnúhu sá càhá<sup>n</sup> nàcuáa naníhí tàhú-ndó. Te ní cachí Yá Ndiòxí sá ñáyi-u isràél cuu cuendá-gá, te cùu iní ñáhă-ní-gá xii-yu, te duca<sup>n</sup> quide-gá chi duca<sup>n</sup> ñí xáha<sup>n</sup>-gá xii cue ñaní tnáhă-yu ní xíndecu ndéé sanaha. <sup>29</sup>Te Yá Ndiòxí ñá túu ndùu úhú iní-gá ì<sup>n</sup> sá táxi-gá, te ni ñá túu ndìxi cuèchi iní-gá sá càhá<sup>n</sup> ñáhă-gá xii-o. <sup>30</sup>Te nchòhó chi ñá túu sàndáá iní-ndó Yá Ndiòxí ní cùu, dico vitna nini ñá túu sàndáá iní ñáhă ñáyi-u isràél xii-gá, te ní cundàhú iní ñáhă-gá ní dácăcu nihnu ñaha-gá xii-ndo núu ùhú núu ndàhú. <sup>31</sup>Te vitna quidé-yu dàtná ní xóo cada nchòhó cùtnàhá ñá túu ní xóo quëndáá iní-ndó-gá. Dico sáa nduu te natuha ñáhă-yu xii-gá te dácăcu nihnu ñaha-gá xii-yu sá cùndàhú iní ñáhă-gá dàtná ní quide ñaha-gá xii nchòhó. <sup>32</sup>Te Yá Ndiòxí ní dàná-gá sá dúcá<sup>n</sup> cùnduu saá iní nchaa ñáyi-u cuendá cùiní-gá cundàhú iní ñáhă-gá xii-yu. <sup>33</sup>Te súuní vâha quide ñaha Yá Ndiòxí xii-o, te ío váha xini-gá nchaa cuèi sá ío andi-u te cuèi sá ío ñuyúí-a, te duca<sup>n</sup> ïo váha sàa nchaa sá xini tnùní-gá. Te ñá ndácú-ó cùtnuní iní-ó ñá cúu nchaa sá sání iní-gá cada-gá, te ni ñá ndácú-ó cùtnuní iní-ó nàcuáa ndùu cuendá nchaa sá quidé-gá. <sup>34</sup>Te núu tùtú-gá cächí-xi: “Vá yóo ì<sup>n</sup> cùtnuní iní-xi nàcuáa sàni iní Yá Ndiòxí, te ni vâ yóo ì<sup>n</sup> ndàcu dacahu iní ñáhă xii-gá nàcuáa càhá<sup>n</sup>-gá. <sup>35</sup>Te Yá

Ndiöxí ñá túú quide yica iní-gá cada-gá sá vâha sá cúú-xí ñâyiu cuendá ì<sup>n</sup> sá sãñâhá-yu xii-gá chi ñá túú dùca<sup>n</sup> quide-gá”, duha cächí-xi núú tütú-gá. <sup>36</sup>Te duca<sup>n</sup> chi mee Yã Ndiöxí ní taxi ndecu-gá nchaandi túhú sá ìò ñuyú, te diu-ni mee-gã táxi tñuní-gá nchaa sá ní taxi ndecu-gá, te nchaa cùu-xi cuendá-gá. Te vitna chí ná cächí-ó sã ìo càhnu cuu-gá ni caa ni quíh<sup>m</sup>. Te duca<sup>n</sup> na cùnduu.

**Cada-o nàcuáa nduu  
vétú iní Yã Ndiöxí**

**12** Te vitna nchòhò ñâyiu ndècu ndìhi-í ichi Xítóhó Jesucristú cächí tñúhu-í xii-ndo sã Yã Ndiöxí cùndàhú iní ñáhá-gã xii-o chindee ñaha-gá, núú xíã<sup>n</sup> cãhá<sup>n</sup> ndàhú-í núú-ndó sã dáñá-ndó mèe-ndo núú ndáhá-gã, te cada iní-ndó sã cúú-ndó dàtná ì<sup>n</sup> táhú sã nchító-ó ní nduu táhú-gã. Te cuu-ndo ñâyiu váha ñâyiu cada nchaa nàcuáa nduu vétú iní Yã Ndiöxí chi duca<sup>n</sup> tàù-ndó càda-ndo sá cúú-xí-gã. <sup>2</sup>Te vá cãnchicú<sup>n</sup> nihnu-gá-ndó càda-ndo datná xíquide nchaa ñâyiu ndècu ichi cuehé ichi duha ndècu ñuyú-a, te vá cúhú<sup>n</sup>-gã iní-ndó ichi cuehé ichi duha-á<sup>n</sup>, chi mee-nã sá vâha cuhu<sup>n</sup> iní-ndó, te duca<sup>n</sup> te cutnùní iní-ndó nchãa nacuáa cuíní Yã Ndiöxí cada-ndo, te nchaa sá cuíní-gá cada-ndo cùu-xi mee-ni sá vâha, sã ìo váha ndùu vétú iní-gá, te cùu-xi nchaa sá xíní ñùhu-xi cada-ndo núú-gã.

<sup>3</sup>Te sá cuendá chiù<sup>n</sup> ní cundàhú iní ñáhá Yã Ndiöxí ní taxi-gá xii-í xíã<sup>n</sup> núu na cãhá<sup>n</sup>-í dóho-ndo

vitna: Vá cání iní-ndó ì<sup>n</sup> sá ñà túú tàù-ndó càni iní-ndó te cucaha<sup>n</sup>-ndo sã ìo càhnu cuu-ndo. Te nchòhó ní sándáá iní-ndó Yã Ndiöxí núu chindee ñaha-gá xii-ndo, te vitna chí cuãha cuendá núu ná daha núú chiù<sup>n</sup>-gá ndacu-ndo càda-ndo. <sup>4</sup>Te nchoo tìtní xichi cùu yiqui cuñú-ó, te ndi dí<sup>m</sup> ndì dí<sup>m</sup> chiù<sup>n</sup> quide-xi ì<sup>n</sup> ì<sup>n</sup>-xi. <sup>5</sup>Te duca<sup>n</sup> sãtnahá tucu-xi cùu nchoo ñâyiu ndècu ndìhi Xítóhó Jesucristú chi cuèi ná daha tnàhá-ó dico ì<sup>n</sup>-ni cùu-o ndìhi-gá, te duca<sup>n</sup> mèe-o tucu ì<sup>n</sup>-ni cùu-o.

<sup>6</sup>Te mee Yã Ndiöxí ní cundàhú iní ñáhá-gã xii-o ní taxi-gá chiù<sup>n</sup> taù-ó càda-o ì<sup>n</sup> ì<sup>n</sup>-o te chindee ñaha-gá xii-o, te xini ñuhu-xi cada-o nacuáa ndùu chiù<sup>n</sup> ní taxi-gá cada-o. Te núu ní nduu táhú-ó núú-gã sá cãhá<sup>n</sup>-ó tñúhu sá dácàhu iní ñáhá mèe-gã xii-o te cãhá<sup>n</sup>-ó nàcuáa sàndáá iní-ó chindee ñaha-gá xii-o, <sup>7</sup>àdi ní nduu táhú-ó núú-gã sã ìo váha chindee-o tnàha ñâyiu-o te diu-ni duca<sup>n</sup> càda-o, àdi ní nduu táhú-ó dànehé-ó ñâyiu tñúhu-gã te diu-ni duca<sup>n</sup> càda-o, <sup>8</sup>àdi ní nduu táhú-ó núú-gã sã dácãhá<sup>n</sup>-ó ñâyiu canchicú<sup>n</sup> nihnú-yu ichi-gá te diu-ni duca<sup>n</sup> càda-o, àdi ní nduu táhú-ó núú-gã sã cuãñaha-o xii tñaha ñâyiu-o sã ñihí-ó ndècu ndìhi-o te diu-ni duca<sup>n</sup> càda-o, dico ni yùhu ni iní-ó cuãñaha-o xii-yu, àdi ní nduu táhú-ó núú-gã taxi tñuní-ó te diu-ni duca<sup>n</sup> càda-o, te ni yùhu ni iní-ó càda-o, àdi ní nduu táhú-ó núú-gã chindee-o cuè ñâyiu ndècu ndìhi tñúndòhò tñúhu ndàhú te diu-ni duca<sup>n</sup> càda-o, te ìo cudíí iní-ó càda-o chiù<sup>n</sup>-á<sup>n</sup>.

**Nchaa nàcuáa tàù-xi cada nchaa  
ñâyiu ndècu ichi Xítóhó Jesucristú**

<sup>9</sup>Te cuu iní tnáhá ndisa-ndo ì<sup>n</sup> ì<sup>n</sup>-ndo, te dañà-ndo nchãa

sá cuèhé sá dúhá te cada-ndo mèe-ni sá vâha. <sup>10</sup>Te ío cuu iní tnáhá-ndó, te cada-ndo cuèndá sá íí<sup>n</sup>-ní ñáiyu cùu-ndo, te íí<sup>n</sup> íí<sup>n</sup>-ndo càni-gá iní-ndó cànehe yiñuhu núu tnáhá-ndó.

<sup>11</sup>Te nducu ndèe-ndo cada-ndo nchaa chiu<sup>n</sup> tahu Xítóhó Jesucristú vâ tũhío-ndo, te cada-ndo ñi yuhu ni iní-ndó sá cúú-xí-gă.

<sup>12</sup>Te ío cudíí iní-ndó cùndecu-ndo chi ní ngúndecu ndíhi-ndo tnũhu ndee iní sá cùndecu ndíhi-ndo Xítóhó Jesucristú, te cada càhnu iní-ndó cuèi nándi na càda ñaha ñáiyu xii-ndo sá cuèndá-gă, te vâ dáñá ndèe-ndó cãhá<sup>n</sup> ndíhi-ndo Yă Ndiöxí.

<sup>13</sup>Te chindee tnàha-ndo te núu ió dava nchòhó ñáiyu ndècu ichi-gă ió íí<sup>n</sup> sá cúmăni xii-ndo, te ío váha cuu iní-ndó còto-ndo ñáiyu véxi vehe-ndo.

<sup>14</sup>Te cacă<sup>n</sup> táhú-ndó núú Yă Ndiöxí cuèndá nchaa ñáiyu nándi quide ñaha xii-ndo, te cacă<sup>n</sup> táhú-ndó núú-gă sá ná chindee ñaha-gă xií-yu te ñá díú dà cacă<sup>n</sup> táhú-ndó núú-gă sá ná dàcuíta nihnu ñaha-gă xií-yu.

<sup>15</sup>Te núu ió ñáiyu cùdíí iní-xi te cudíí iní-ndó ndíhi-yu, te núu ió ñáiyu ndíhú iní-xi te ndíhú iní-ndó ndíhi-yu.

<sup>16</sup>Te cuu íí<sup>n</sup>nuu-ndo cùndecu-ndo, te vâ cádá càhnu-ndo mee-ndo, te tnahá tnũhu-ndo ndíhi nchaa ñáiyu ndàhú iní-xi, te vâ cáni iní-ndó sá ió-gă túha-ndo.

<sup>17</sup>Te vâ nánchòcáva-ndo nàchinaa-ndo íí<sup>n</sup> sá quidé ñaha ñáiyu xii-ndo, te ío nducu ndèe-ndo cada-ndo mee-ni sá vâha nàcuáa cuu váha iní ñáiyu. <sup>18</sup>Te ío nducu

ndèe-ndo cada-ndo sá ndácú-ndó cùndecu váha-ndo ndíhi nchaa ñáiyu. <sup>19</sup>Te nchòhó ñáiyu ío cùu iní-í, vâ cáni iní-ndó nàchinaa-ndo íí<sup>n</sup> sá cádá ñaha ñáiyu xii-ndo, chi cundetu-ndo sá mée Yă Ndiöxí ná nàchinaa-gă sá quidé ñahá-yu xii-ndo, chi quee ndáá-xi nàcuáa càhá<sup>n</sup> Yă Ndiöxí núu tûtú-gă núu càchí-xi: “Yúhú dandòho-í-yu chi nachinaa-í nchaa sá quidé-yu”, duha càchí-gă núu tûtú-gă. <sup>20</sup>Te xini ñuhu tucu-xi cada-ndo nacuáa càhá<sup>n</sup> tucu-xi ingá xichi núu tûtú-gă núu càchí-xi: “Te núu ñáiyu cùu úhú iní ñahá xii-ndo ñá túú sá cóhó sá cáxi-yu te cuãñaha-ndo xii-yu, te núu duca<sup>n</sup> na càda-ndo te ío cucaha<sup>n</sup> núú-yu”, duha càchí-xi núu tûtú-gă. <sup>21</sup>Te núu ió íí<sup>n</sup> sá quidé ñaha tnaha ñáiyu-ndo xii-ndo te vâ nánchòcáva-ndo nàchinaa-ndo sá quidé ñahá-yu xii-ndo, chi cada-ndo sá vâha sá cúú-xí-yu, te duca<sup>n</sup> te vâ cádá-ndó sá ñà túú tàú-ndó càda-ndo núu Yă Ndiöxí dàtná quidé-yu.

**13** Te nchaa ñáiyu tàú-yu quindáa iní-yu nchaa cue tée cùchiu<sup>n</sup>, chi Yă Ndiöxí ní cachí-gă sá cùndecu tée cùchiu<sup>n</sup> ñuyúí-a, núu xíá<sup>n</sup> xĩndecu-güedé vitna. <sup>2</sup>Te nchaa ñáiyu ñá túú sàndáa iní ñahá xii cue tée cùchiu<sup>n</sup> ñá túú tnáhá iní Yă Ndiöxí sá dúcá<sup>n</sup> quidé-yu, chi mee-gă ní cachí-gă sá cùndecu-güedé. Te nchaa ñáiyu duca<sup>n</sup> ñà túú sàndáa iní ñahá xii cue tée cùchiu<sup>n</sup> nacháhu-yu sá dúcá<sup>n</sup> quidé-yu. <sup>3</sup>Te nchaa ñáiyu quide váha ñá túú yùhú-yu cue tée cùchiu<sup>n</sup> chi quide váha-yu, dico nchaa ñáiyu ñá túú quide váha

chi xǐyùhú-yu cue tée cùchiu<sup>n</sup>.  
 Te vitna núu nchòhó cuìní-ndó  
 sǎ vǎ yùhú-ndó cuè tée cùchiu<sup>n</sup>  
 te chí cádá vǎha, te duca<sup>n</sup> te  
 cáhá<sup>n</sup> váha-güedé cuendá-ndó.  
 4Te Yá Ndiòxí duca<sup>n</sup> nǐ cachí-gá  
 cundecu-güedé cuendá cada-güedé  
 sǎ ñà túú nǎ cuu cundecu-ndo,  
 te núu ñá túú quide váha-ndo  
 ndècu-ndo te quiyùhú iní-ndó  
 nǔú-güedě, chi ñá túú àú<sup>n</sup> nǎ cuu  
 ndècu ndìhi-güedé tnúhu ndee iní  
 dandòho-güedé nchaa ñáyiú ñá túú  
 quide váha, chi Yá Ndiòxí duca<sup>n</sup> nǐ  
 cachí-gá cundecu-güedé sǎ dúcá<sup>n</sup>  
 càda-güedé dandòho-güedé nchaa  
 ñáyiú ñá túú quide váha. 5Núu xǐǎ<sup>n</sup>  
 ío xìni ñuhu-xi sǎ quèndáá iní-ndó  
 nchàa cue tée cùchiu<sup>n</sup>, te ñá díú  
 sǎ yùhú-ndó dándohò ñaha-güedé  
 xii-ndo, chi cada-ndo sǎ cùtnùní  
 iní-ndó sǎ cúú-xí ì<sup>n</sup> sǎ vǎha. 6Chi  
 ñiú cuendá xǐǎ<sup>n</sup> sàcá<sup>n</sup>-ndó díhú<sup>n</sup>  
 nǔú cuè tée cùchiu<sup>n</sup>, te duca<sup>n</sup>  
 chi Yá Ndiòxí duca<sup>n</sup> nǐ cachí-gá  
 cundecu-güedé te ñiú-ná chù<sup>n</sup>  
 ndeé-güedé ñúhú iní-güedé.

7Te nacháhu-ndo nchàa sǎ  
 tàú-ndó nǔú nchàa ñáyiú tàú-ndó  
 nǔú-xi, te cuè díhú<sup>n</sup> tàú-ndó  
 cuendá ñuhu-ndo nǔú cuè tée  
 cùchiu<sup>n</sup> àdí nágá díhú<sup>n</sup> tàú-ndó  
 nǔú-güedě te nacháhu-ndo  
 nǔú-güedě. Te ío-gá canehe-ndo sǎ  
 yíñùhu núu nchàa ñáyiú cùnùu, te  
 cáhá<sup>n</sup> váha-ndo ndìhí-yu. 8Te vǎ  
 dácuidó-ndó ndùu nacháhu-ndo sǎ  
 tàú-ndó nǔú tnàha ñáyiú-ndo, te  
 cuu iní tnáhá-ndó ì<sup>n</sup> ì<sup>n</sup>-ndo. Te  
 núu duca<sup>n</sup> quide-ndo ndecu-ndo  
 ña, te quide-ndo nchaa nacuaá  
 càhá<sup>n</sup> tnúhu sǎ sánú ìchi ñaha xii-o  
 nacuaá cada-o cùndecu-o. 9Te duha

ndùu tnúhu càhá<sup>n</sup> Yǎ Ndiòxí cuendá  
 nchaa sǎ vǎ cúú càda-o: “Nchaa  
 nchòhó cue tée vǎ càhá<sup>n</sup> ndìhi-ndo  
 ñáyiú ñáyiú te núu ñá díú ñàdìhí-ndó  
 cùú-yu, te duca<sup>n</sup>-ni nchàa nchòhó  
 cue ñáyiú ñáyiú tucu vǎ càhá<sup>n</sup>  
 ndìhi-ndo tée te núu ñá díú yì-ndo  
 cuu-güedé, te vǎ cáhni-ndó tnàha  
 ñáyiú-ndo, te vǎ dúhú-ndó sǎ ndécú  
 ndìhí-yu, te vǎ dácàcu-ndo cuèchi  
 neñùú, te vǎ xíhó-ndó sǎ ndécú  
 ndìhi tnàha ñáyiú-ndo”, nchaa xéhe  
 càchí Yǎ Ndiòxí sǎ vǎ cúú càda-o.  
 Te tnúhu-a quide-o ndìhi nchaa  
 dava-gá tnúhu sǎ sánú ìchi ñaha  
 xii-o nacuaá cada-o cùndecu-o, te  
 núu quide-o íngá tnúhu sǎ càchí-xi:  
 “Cuu iní-ndó nchàa tnàha ñáyiú-ndo  
 dàtná cúú iní-ndó mèe-ndo”, duha  
 càhá<sup>n</sup> tnúhu-á<sup>n</sup>. Te nchaa dava-gá  
 quidé-ó te núu quide-o nacuaá càhá<sup>n</sup>  
 tnúhu-a. 10Te nchaa ñáyiú cùu  
 iní tnàha ñáyiú-xi te ñá túú quide  
 úhú iní-yu tnàha ñáyiú-yu, te núu  
 duca<sup>n</sup> cùu iní-yu tnàha ñáyiú-yu  
 te quidé-yu nacuaá càhá<sup>n</sup> tnúhu sǎ  
 sánú ìchi ñaha xii-o nacuaá cada-o  
 cùndecu-o.

11Te duca<sup>n</sup> xìni ñuhu-xi cada-ndo  
 chi sa ní cutnùní iní-ndó nacuaá  
 ta xìca nduu cuáhá<sup>n</sup> ñuyíú-a, te ní  
 sǎá nduu sǎ ío xìni ñuhu-xi ndixi  
 túu iní-ó càda-o nchaa nacuaá  
 càhá<sup>n</sup> Yǎ Ndiòxí, chi vitna sa ní  
 cuyatni-gá nduu nàcuaca ñaha  
 Xítohó Jesucristú xii-o dácúxí  
 ndèe cùtnàhá ní sándáá iní-ó  
 tnúhu-gá. 12Te cada iní-ndó sǎ  
 dàtná ì<sup>n</sup> níú sǎ sǎ ta cuyatni  
 túndaá, duca<sup>n</sup> sǎtnahá-xi cùu ñuyíú  
 yícá cuèchi-a chi sa ta cùyatni nduu  
 quixi tucu Xítohó Jesucristú, te núu  
 xǐǎ<sup>n</sup> xíní ñuhu-xi ñaha-ndo nchaa sǎ



cuèhé sá dúhá te cada-o mée-ni sá vâha, te duca<sup>n</sup> te ni ì<sup>n</sup> sá cuèhé sá dúhá vâ cùnù-xi taxi tnuní ñáhá-xí xii-o, te duca<sup>n</sup> te vâ cúú-gă-ó dàtná ñáiyu ndècu núú nées chi cuu-ná-ó dàtná ñáiyu ndècu núú ditó. <sup>13</sup>Te cada-o nchàa nacuáa tàù-xi cunduu cundecu-o dàtná tàù-xi cada ñáiyu ndècu ichi Xítóhó Jesucristú, te vâ quihí<sup>n</sup>-ó vico cuehé vico duha, te vâ cúú-ó ñáiyu quihu, te ni vâ càhá<sup>n</sup> ndihí-o ñáiyu ðihí te núú ñá dǫú ñàðihí-ó cùú-yu, te duca<sup>n</sup>-ni cuè ñáiyu ðihí tucu vâ càhá<sup>n</sup> ndihí-yu téé te núú ñá dǫú yè-yu cùu-güedé, te ni vâ cùndècu-o ichi dǫú ìní, te ni vâ nàá-ó ndihí tnaha ñáiyu-o, te ni vâ cúú-ó ñáiyu cuédú ìní. <sup>14</sup>Te vitna nchòhó dañà-ndo mée-ndo sá Xítóhó Jesucristú ná chindee ñaha-gá xii-ndo càda váha-ndo cùndecu-ndo datná quidé mée-gá ndécú-gă, te vâ cání-gă iní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá iní-ndó.

**Vá cuátnùhu tnaha-o nacuáa ndècu-o ichi Xítóhó Jesucristú**

**14** Te núú ì<sup>n</sup> ñáiyu ndècu ichi Xítóhó Jesucristú ñá túú tècú tnuní váha-yu nàcuáa cuíní Yá Ndiòxí cadá-yu, te quehe<sup>n</sup> cuendá-ni-ndö-yu te vâ ténàá tnáhá-ndó ndihí-yu. <sup>2</sup>Chi ió ñáiyu sàni iní sá cúú váha iní Yá Ndiòxí sá cúú càxí-yu nání nihí-yu, te dava ñáiyu ñá túú cùtnuní váha iní-yu nàcuáa càhá<sup>n</sup> Yá Ndiòxí te mee-ni yǫú xéxí-yu. <sup>3</sup>Te ñáiyu xèxi nchaa núú sá nihí-yu te vâ dáquèe tǫhǫ-yu ñáiyu ñá túú xèxi, te duca<sup>n</sup>-ni ñáiyu duca<sup>n</sup> ñá túú xèxi-á<sup>n</sup>

vâ cuátnùhú-yu nchaa ñáiyu duca<sup>n</sup> xèxi nchaa núú sá nihí-xi-á<sup>n</sup>, chi tnàhá ñáiyu duca<sup>n</sup> xèxi nchaa núú sá nihí-xi-á<sup>n</sup> quèhé<sup>n</sup> cuendá ñáhá Yá Ndiòxí xii-yu. <sup>4</sup>Te ñá túú ndècu ndihí-o tnúhu ndee ìní cuatnúhu-o ñáiyu xìnu cuechi, chi mee ñáiyu cùu patróó<sup>n</sup>-yu tàù-yu cáhá<sup>n</sup>-yu te núú cùndáá ñáiyu xìnu cuechi núú-yu àdi ñá túú cùndáá-yu. Te duca<sup>n</sup> sàtnahá-xi cùu ñáiyu xìnu cuechi núú Yá Ndiòxí, chi mee-gă cáhá<sup>n</sup>-gá te núú nása quidé-yu, te ðiu-ni mee-gă cada te cùndáá-yu cundecú-yu núú-gă.

<sup>5</sup>Te na càchí tnúhu tucu-í xii-ndo sá ió ñáiyu càchí sá ió dava nduu ío càhnu cuu-xi, te ió tucu dava ñáiyu càchí-yu sá ì<sup>n</sup>-ni cuu-xi nchaa-ni nduu, te xìni ñuhu-xi sá cùtnuní ndáá iní-yu sá ndáá cúú-xí nàcuáa càhá<sup>n</sup>-yu ì<sup>n</sup> ì<sup>n</sup>-yu. <sup>6</sup>Te ñáiyu cánehe íí dava nduu quidé-yu sá néhǫ-yu sá yǫñùhu núú Yá Ndiòxí, te ñáiyu càchí sá ì<sup>n</sup>-ní cùu-xi nchaa-ni nduu quidé-yu sá néhǫ-yu sá yǫñùhu núú Yá Ndiòxí tnàhá-yu. Te ðiu-ni duca<sup>n</sup> sàtnahá-xi cùu nchaa ñáiyu xèxi nchaa nání nihí-yu, chi quidé-yu sá néhǫ-yu sá yǫñùhu núú Yá Ndiòxí, chi ndàcá<sup>n</sup> tǫhǫ-yu núú-gă cuendá nchaa sá nihí-yu. Te ðiu-ni duca<sup>n</sup> sàtnahá-xi cùu nchaa ñáiyu ñá túú xèxi nchaa núú sá nchító-ó chi quidé-yu sá néhǫ-yu sá yǫñùhu núú Yá Ndiòxí, te ndàcá<sup>n</sup> tǫhǫ-yu núú-gă cuendá nchaa sá nihí-yu.

<sup>7</sup>Te nchoo cuèi vitna ndècu vívú-ó àdi cuèi na cùú-ó dico ñá dǫú cuendá mée-ó cùú-ó. <sup>8</sup>Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó

dico cuú-ó ðiu-ni sá cúu-xí-gă, núu xíă<sup>n</sup> cuéi vitna ndècu vívú-ó àdi cuéi na cùú-ó dico ðiu-ni Xítohó Jesucristú cúu cuendá ñáhá-gă xii-o. <sup>9</sup>Chi Xítohó Jesucristú ní xíhí-gá te ní ndoto-gá, te vitna cùu-gá Xítohó nchaa ñáyi, cuéi ñáyi xíndecu vívú te cuéi ñáyi ní xíhí.

<sup>10</sup>Te nchòhó, ñá túú ndùu váha-xi cuatnuhu tnàha-ndo nacuáa ndècu-ndo ichi Xítohó Jesucristú, te ni ñà túú ndùu váha-xi daquèe tíhú tnáhá-ndó, chi nchaa-o sáa nduu cùndecu-o núu Xítohó Jesucristú, te mee-gă cachí-gá te núu ní quide ndáá-ó àdi ñá túú ní quide ndáá-ó.

<sup>11</sup>Te Yá Ndiòxí cèchí-gá núu tùtú-gá: Yúhú Yă Ndiòxí ndécú-í cèchí tnúhu ndáá-í xii-ndo sã nchàa ñáyi nguíñí xítí-yu núu-í, te ncháa-yu cáhá<sup>n</sup>-yu sá yúhú cúu-í Ndiòxí.

Duha cèchí Yă Ndiòxí núu tùtú-gá.

<sup>12</sup>Núu xíă<sup>n</sup> nchaa-o ndì díí<sup>n</sup> nàcani tnúhu-o núu Yă Ndiòxí nchaa sá nì quide-o.

#### Vá dácúita nihnu tnàha-o

<sup>13</sup>Núu xíă<sup>n</sup> vá cuátnúhu tnaha-gá-ndó, te cada yica-ndo càda-ndo mee-ni sá vâha, te vá cádá-ndó ñí<sup>n</sup> sá ñà túú tàu-ndó càda-ndo cuendá sá vâ cuíta nihnu dava ñáyi ndècu ndihi-ndo ichi Xítohó Jesucristú. <sup>14</sup>Te yúhú ndécú ndihi-í Xítohó Jesucristú te cùtnuní ndáá iní-í sá ncháá núú sã cúu càxi-o cuu-ni caxi-o te vá cúu cuèchi. Te ñáyi sàni iní sá vâ cúu càxi-yu te núu na càxi-yu te cuu cuèchi xii-yu. <sup>15</sup>Te nchòhó, te núu cuendá sá xéxi-ndó nchàa núú sã cúu càxi-ndo, cuendá xíă<sup>n</sup>

ñá túú-gă cúu vâha iní nchaa ñáyi ndècu ndihi-ndo ichi Xítohó Jesucristú, te ñá túú-gă quidé-ndó sã cúu iní ndisa-ndó-yu te núu duca<sup>n</sup> na càda-ndo, te núu ñí<sup>n</sup> sá sání iní-ndó càxi-ndo te cùtnuní iní-ndó sã xíă<sup>n</sup> cada-xi cuíta nihnu ñáyi ndècu ndihi-ndo ichi Xítohó Jesucristú te vá cáxi-ndó xíă<sup>n</sup> te núu duca<sup>n</sup>, chi Xítohó Jesucristú ní xíhí-gá cuendá-yu. <sup>16</sup>Te núu ñí<sup>n</sup> sá quidé-ndó sàni iní-ndó sã cúu-xí ñí<sup>n</sup> sá vâha, te ñáyi cèchí-yu sá ñà túú vâha te vá cádá-ndó cuendá sá vâ càhá<sup>n</sup> cuèhé-yu cuendá-ndó. <sup>17</sup>Te sá yíndàha ñaha Yá Ndiòxí xii-o xíă<sup>n</sup> ío xini ñuhu-xi cada ndáá-ó cùndecu-o, te cundecu váha ndihi tnàha-o, te cudíí iní-ó cùndecu-o chi Espíritú-gá ndécú ndihi ñaha-xi xii-o, te nchaa xéhé ño-gá cùnùu dacúxí sã cóhó sã cáxi-ó. <sup>18</sup>Te nchaa ñáyi duca<sup>n</sup> quide nchaa sá ño-gá xini ñuhu-xi, xinu cuechí-yu núu Xítohó Jesucristú, te sá dúcá<sup>n</sup> quidé-yu te ndùu vétú iní Yă Ndiòxí, te cùdíu-yu núu ñáyi.

<sup>19</sup>Te nchoo chí ñá ndùcu-o nacuáa cada-o cùndecu ndihi váha tnàha-o, te nducu tùcu-o nacuáa cada-o chìndee tnúhu tnàha-o nacuáa cuita cundáá-gá-ó núu Xítohó Jesucristú quíhí<sup>n</sup>. <sup>20</sup>Te ñá díú sã cuendá ñí<sup>n</sup> núú sã xéxi-ó, te dàquee tíhú-ó sã vâha ní quide ñaha Yă Ndiòxí xii tnàha ñáyi-o. Te na cèchí tnúhu ndáá-í xii-ndo sã ncháá-ní núú sã cúu càxi-o, te dícó-ni sá ñà túú ndùu váha-xi núu sá cuendá-ni sá cáxi-ó ñí<sup>n</sup> núú sã cúu càxi-o cuíta nihnu ñí<sup>n</sup> tnàha ñáyi-o. <sup>21</sup>Te váha-gá sá vâ cáxi-ó cùnùu te vá cóhó ndídí, te ni ñà túú năgá

cada-o te núu xito-o sá xǎ<sup>n</sup> cada te ngüíta tnàha ñáyi-u-o càdá-yu sá ñà túú vǎha, àdi xito-o sá xǎ<sup>n</sup> cada te ngüíta-yu cani ì<sup>n</sup> cani úú iní-yu cundecú-yu ichi Xítóhó Jesucristú, te vá cundǎá-gá-yu núú-gǎ te núu duca<sup>n</sup> na càda-o. <sup>22</sup>Te núu ì<sup>n</sup> sá vǎha sàni iní-ó càda-o, te vá dátü-u-o núú ñǎyi-u chi mee-ni núú Yǎ Ndiöxí dátü-u-o. Te nchoo cùu-o ñáyi-u ío váha táhú-xi te núu cùtnuní ndǎá iní-ó sǎ quidé ndǎá-ó núu nándi cùu sá quidé-ó, te cùtnuní iní-ó sǎ ñà dǎú ì<sup>n</sup> cuéchi cùu-xi sá quidé-ó. <sup>23</sup>Te núu nchoo sàni iní-ó sǎ quidé vǎha-o àdi ñà túú quide váha-o òrè xéxí-ó ì<sup>n</sup> núú sǎ xéxí-ó, te cuu cuéchi xii-o te núu duca<sup>n</sup> na càda-o. Te duca<sup>n</sup> cùu cuéchi xii-o chi ñà túú ì<sup>n</sup>-ni sá sání ìní-ó, chi nchaa núú sǎ quidé-ó sàni ì<sup>n</sup> sani úú iní-ó núu váha-ni àdi ñà túú vǎha-ni, te cuu cuéchi xii-o sǎ dúcá<sup>n</sup> quide-o.

**Cada-o sǎ vǎha sá cúu-xí  
tnàha ñáyi-u-o**

**15** Te nchoo ñáyi-u ío váha sàndǎá iní ñáhá xii Xítóhó Jesucristú, xini ñuhu-xi cuǎñaha-o tnǎhu ndee ìní xii ñáyi-u ñà túú ñihí ndéé cùndecu ichi-gá, te vá càdá-ó mèe-ni sá cúu-xí mèe-o. <sup>2</sup>Te cada-o sǎ vǎha nàcuáa cuu váha iní tnàha ñáyi-u-o cuendá cuu-xi sá vǎha sá cúu-xí-yu, te duca<sup>n</sup> cuíta níhí ndéé-gǎ-yu quindǎá iní-yu Xítóhó Jesucristú. <sup>3</sup>Te Xítóhó Jesucristú ñà túú ní quide-gá mee-ni sǎ cúu vǎha iní méé-gǎ, te ní quee ndǎá-xi nàcuáa càhá<sup>n</sup>-xi núú tütú Yǎ Ndiöxí nàcuáa ní xáha<sup>n</sup> Xítóhó Jesucristú xii-gá, te càchí-xi: “Nchaa ñáyi-u

cùu úhú iní ñáhá xii-n ní xícuèhé ní xíduha ñáhá-yu xii-í”, duha càhá<sup>n</sup>-xi núú tütú Yǎ Ndiöxí nàcuáa ní xáha<sup>n</sup> Xítóhó Jesucristú xii-gá. <sup>4</sup>Te ndéé sanaha ñí ngúndeé nchaa tnúhu Yǎ Ndiöxí núú tütú-gá, te duca<sup>n</sup> ñí ngúndeé cuendá dacuàha-o, te tnúhu-á<sup>n</sup> dánèhé ñáhá-xí cùnduu cahnu iní-ó cuéi nándi nà yáha-o cùndecu-o ichi-gá, te sá xíí tnǎhu-á<sup>n</sup> te vá ndǎhú-gá iní-ó cùndecu-o, te diu-ni sá xíí tnǎhu-á<sup>n</sup> cùndecu ndihi-o tnǎhu ndee ìní. <sup>5</sup>Te Yǎ Ndiöxí quidé-gǎ ndécú ndihi-o tnúhu càhnu iní, te diu-ni-gá quidé-gǎ ñà túú ndǎhú iní-ó ndècu-o. Te xicá<sup>n</sup> táhù-í núú-gǎ sá dǎú-gǎ ná càdá te cuu ì<sup>n</sup>nuu-ndo cùndecu-ndo datná ní quide mee Xítóhó Jesucristú cùtnàhá ní xíndecu-gá ñuyíú-a. <sup>6</sup>Te duca<sup>n</sup> nchàa-ndo cuu ì<sup>n</sup>nuu-ndo, te danihí tnáhá-ndó yóco táchí-ndó te cachí-ndó sǎ ìo càhnu cuu Yǎ Ndiöxí Yaá cúú Tǎtá Xítóhó Jesucristú.

**Ñáyi-u ñà túú cùu ñáyi-u isràél ní  
níhí-yu tnúhu Xítóhó Jesucristú**

<sup>7</sup>Te núu xǎ<sup>n</sup> chí quéhé<sup>n</sup> cuendá tnáhá datná ní quide Xítóhó Jesucristú ní quehe<sup>n</sup> cuendá ñáhá-gǎ xii-o, te núu duca<sup>n</sup> na càda-ndo te ío cuu càhnu Yǎ Ndiöxí. <sup>8</sup>Te na càchí tnúhu-í xii-ndo sǎ Xítóhó Jesucristú ní quixi-gá ní quide-gá sá vǎha sá cúu-xí ñáyi-u isràél, te sá dúcá<sup>n</sup> ñí quide-gá xǎ<sup>n</sup> cùtnuní ndǎá iní-ó sǎ Yǎ Ndiöxí quidé-gǎ ì<sup>n</sup> sá càhá<sup>n</sup>-gá, chi Xítóhó Jesucristú ní quide-gá nchaa nàcuáa ní xáha<sup>n</sup> Yǎ Ndiöxí xii cue ñaní tnáhá-ó ñí xíndecu ndéé sanaha. <sup>9</sup>Te duca<sup>n</sup> ñí quide

Xítóhó Jesucristú sá vǎha sá cúú-xí ñáiyu isràél cuèndá nchaa ñáiyu ñá túú cùu ñáiyu isràél cachí-yu sá ïo càhnu cuu Yá Ndiöxí, te duca<sup>n</sup> quèsahá-yu chí ïo cùndahú iní ñáhá-gǎ chíndèe ñaha-gǎ xíí-yu, te quee ndáá-xi nàcuáa càhá<sup>n</sup>-xi núú tütú Yá Ndiöxí núú càchí-xi:

Yúhú cachí-í sá ïo càhnu cuu-n núú nchàa ñáiyu ñá túú cùu ñáiyu isràél,  
te cata-í ndudú chiñuhu ñaha-í xii-n.

Duha càchí-xi núú tütú-gǎ <sup>10</sup>Te càchí tucu-xi núú tütú-gǎ:

Te nchòhó ñáiyu ñá túú cùu ñáiyu isràél ïo chí cúdǐí iní ndìhì ñáiyu isràél ñáiyu ndècu ndìhì-í.

Duha càchí-xi núú tütú-gǎ. <sup>11</sup>Te càchí tucu-xi ingá xichi núú tütú-gǎ:

Nchaa nchòhó ñáiyu ñá túú cùu ñáiyu isràél chí càhá<sup>n</sup> sá ïo càhnu cuu Yá Ndiöxí,  
te nchaa ñáiyu na càhá<sup>n</sup>-yu sá ïo càhnu cuu-gǎ.

Duha càchí-xi núú tütú-gǎ. <sup>12</sup>Te ndí Chàíá càchí tucu ndí núú tütú Yá Ndiöxí:

Coo ìí<sup>n</sup> ñaní tnáhá ndí Isàí téé ní xíndecu ndéé sanaha,  
te téé-á<sup>n</sup> taxi tnùnì-dé cue ñáiyu ñá túú cùu ñáiyu isràél,  
te ñáiyu-á<sup>n</sup> cundee cùu cahnu iní ñáhǎ-yu xii-dé.

Duha ní càhá<sup>n</sup> ndí Chàíá càchí-xi núú tütú-gǎ.

<sup>13</sup>Te xicá<sup>n</sup> tǎhù-í núú Yá Ndiöxí Yaá ní taxi tnúhu ndee ìní ndécú ndìhì-o sá méé-gǎ ná càda ïo cudíí ìní-ndó cùndecu-ndo, te duca<sup>n</sup> ïo váha cundecu ìní-ndó núú-gǎ chí sàndáá ìní-ndó-gǎ, te

duca<sup>n</sup> Espíritú-gǎ ná càda te uu<sup>n</sup>-gǎ uu<sup>n</sup>-gǎ cuita ngúndecu ndìhì-ndo tnúhu ndee ìní quíhì<sup>n</sup> sá càdá vǎha ñaha-gǎ xii-ndo.

<sup>14</sup>Te nchòhó ñáiyu ndècu ndìhì-í ichi Xítóhó Jesucristú cùtnuní ndáá ìní-í sá nchòhó ïo váha ìní-ndó, te duca<sup>n</sup> ïo váha cùtnuní ìní-ndó nchàa tnúhu váha, te duca<sup>n</sup> ïo dàsahú tnáhá-ndó nàcuáa cundecu-ndo. <sup>15</sup>Te dava tnúhu ní chídó tnùnì-í núú tütú-a cùu-xi tnúhu sá ïo càhá<sup>n</sup>-í dóho-ndo, te duca<sup>n</sup> ní tee-í cuèndá sá nchòhó dandàcu ìní-ndó tnúhu-á<sup>n</sup>, te ní tee-í chí Yá Ndiöxí ní cundahú iní ñáhá-gǎ xii-í ní taxi-gǎ chiù<sup>n</sup> quide-í <sup>16</sup>xínú cuèchi-í núú Xítóhó Jesucristú càhá<sup>n</sup>-í tnúhu-gǎ núú ñáiyu ñá túú cùu ñáiyu isràél. Te tnúhu-á<sup>n</sup> cúú-xí tnúhu sá sánú ìchi ñaha xii-o nacuáa naníhí tǎhú-ó, te duca<sup>n</sup> dànehé-í ñáiyu ñá túú cùu ñáiyu isràél tnúhu Yá Ndiöxí cuèndá cuú-yu dàtná ìí<sup>n</sup> sá ndúú tǎhú-gǎ, te Espíritú-gǎ quidé-xí cùu-yu ñáiyu cùdiu núú-gǎ, te cùu váha iní ñáhá-gǎ xíí-yu.

<sup>17</sup>Te ïo váha cùu ìní-í cuèndá nchaa chiù<sup>n</sup> quide-í sá cúú-xí Yá Ndiöxí, chí Xítóhó Jesucristú ndécú ndìhì ñaha-gǎ xii-í. <sup>18</sup>Te mee-ni nàcuáa quide Xítóhó Jesucristú chíndèe ñaha-gǎ xii-í xíǎ<sup>n</sup>-ni càhá<sup>n</sup>-í, te sá dúcá<sup>n</sup> quide-gǎ xíǎ<sup>n</sup> ní sàndáá ìní cue ñáiyu ñá túú cùu ñáiyu isràél tnúhu-gǎ. Te duca<sup>n</sup> chí ní chindee ñaha-gǎ xii-í ní càhá<sup>n</sup>-í tnúhu-gǎ te duca<sup>n</sup>-ni ní chindee ñaha-gǎ xii-í ní quide-í títní núú sǎ ní quide-í núú-yu ní xiní-yu. <sup>19</sup>Te Espíritú Yá Ndiöxí ní quide-xi ní quide-í títní núú sǎ vǎ

yõ tnàhí ndàcu cada ní xiní-yu te ío ní cuñúhu-yu. Te nchaa ñúú ní sáhá<sup>n</sup>-í ní cáhá<sup>n</sup>-í tnúhu Xítóhó Jesucristú núú ñáyiú cuèi ndéé ñúú Jerusalén, te cuèi ndéé distritú Ílírícu, núu nchaa ñúú-á<sup>n</sup> ní sáhá<sup>n</sup>-í ní cáhá<sup>n</sup>-í núú-yu tnúhu sá cáhá<sup>n</sup> nàcuáa naníhí tàhú-ó. <sup>20</sup>Te duca<sup>n</sup> ïo ndùcu ndee-í cáhá<sup>n</sup>-í tnúhu sá cáhá<sup>n</sup> nàcuáa naníhí tàhú-ó núú vátá ñihí-gá-yu tnúhu cuèndá Xítóhó Jesucristú, te duca<sup>n</sup> quide-í chi ñá túú cuñí-í quíhí<sup>n</sup>-í cáhá<sup>n</sup>-í tnúhu-gá núú sà xíndecu ñáyiú cáhá<sup>n</sup> tnúhu-gá. <sup>21</sup>Te quide-í nàcuáa cáhá<sup>n</sup>-xi núú tütú Yã Ndiõxí núú càchí-xi:

Ñáyiú vátá ñihí-gá tnúhu  
cuèndá Yaá quixi ñuyíú te  
níhí-yu,  
te duca<sup>n</sup> tècú tnùní-yu tnúhu-gá.  
Duha càchí-xi núú tütú-gá.

**Té Páblú cuñí-dé  
quíhí<sup>n</sup>-dé ñúú Rómá**

<sup>22</sup>Te sá dúcá<sup>n</sup> cáhá<sup>n</sup>-í tnúhu-gá núú xíã<sup>n</sup> ñá túú ní ndàcu-í quixi-í quixi coto ñaha-ï xii-ndo cuèi duca<sup>n</sup>-ni sàni iní-í quixi coto ñaha-ï. <sup>23</sup>Te ní cuu titní cuíá duca<sup>n</sup>-ni sàni iní-í quixi coto ñaha-ï xii-ndo, te vitna ní ndíhi-í nchaa iha ní cáhá<sup>n</sup>-í tnúhu Xítóhó Jesucristú núú nchàa ñáyiú. <sup>24</sup>Núú xíã<sup>n</sup> sání iní-í sá ndùu na quíhí<sup>n</sup>-í nació<sup>n</sup> Èspaña te yáha cáhá<sup>n</sup>-í quini-í nása ndècu-ndo, te dàvá-á<sup>n</sup> ïo cudíí iní-ó cùndecu tnaa-o, te duca<sup>n</sup> te òré nucúhu<sup>n</sup> tucu-í ichi te cada ndee ìní-ndó chindee ñaha-ndo xii-í. <sup>25</sup>Te vitna quíhí<sup>n</sup>-í ñúú Jerusalén quínehe-í sá ndúú táhú ñáyiú ndècu ichi Xítóhó Jesucristú xíndecu yacá<sup>n</sup>. <sup>26</sup>Te ñáyiú

xíndecu ichi Xítóhó Jesucristú ndécú distritú Macèdoniá, ndíhi distritú Acáyá ní cuu ì<sup>n</sup> ñúú-yu ní sacá<sup>n</sup> tnáhã-yu sá ndúú táhú ñáyiú ndàhú xíndecu ichi-gá ndécú ñúú Jerusalén. <sup>27</sup>Te duca<sup>n</sup> tnàhí ní cudíí iní-yu cadá-yu, te duca<sup>n</sup> tnàhí tàú-yu cadá-yu chindèe-yu ñáyiú xíndecu ñúú Jerusalén. Te ñáyiú Macèdoniá ndíhi ñáyiú Acáyá-á<sup>n</sup> ñà túú cùú-yu ñáyiú isràél. Te ñáyiú xíndecu ñúú Jerusalén cúú-yu mee-ni ñáyiú isràél, te duca<sup>n</sup> tàú-yu cadá-yu chi sá cuèndá ñáyiú isràél-á<sup>n</sup> ní ñihí-yu tnúhu sá cáhá<sup>n</sup> nàcuáa naníhí tàhú-yu, núú xíã<sup>n</sup> tàú-yu chindee ñàhá-yu ndíhi nchaa sá ñihí-yu. <sup>28</sup>Te sátá ná yáha quínguáha cuèndá-í-yu sá ndúú táhú-yu, te duca<sup>n</sup> te dàtnùní quee-í quíhí<sup>n</sup>-í nació<sup>n</sup> Èspaña, te ichi yáha-í yáha cáhá<sup>n</sup>-í núú ndécú-ndó. <sup>29</sup>Te cùtnuní ndáá iní-í sá òré ná quèxio-í núú ndécú-ndó, te Xítóhó Jesucristú ío chindee ñàha-gá xii-í cáhá<sup>n</sup>-í tnúhu-gá núú-ndó nàcuáa ío váha cundecu-ndo ìchi-gá.

<sup>30</sup>Te nchòhò ñáyiú ndècu ndíhi-í ichi Xítóhó Jesucristú cáhá<sup>n</sup> ndàhú-í núú-ndó sã ïo chindee ñàha-ndo xii-í cáhá<sup>n</sup> ndíhi-o Yã Ndiõxí cuèndá-í, te duca<sup>n</sup> càda-ndo chi ndècu ndíhi-ndo Xítóhó Jesucristú. Te Espíritú Yã Ndiõxí quidè-xí cuu iní tnáhá-ó ì<sup>n</sup> ì<sup>n</sup>-o. <sup>31</sup>Te ío chí càcá<sup>n</sup> táhú núú Yã Ndiõxí sá ná còto ñaha-gá xii-í, te ñá túú ñà cada ñaha nchàa ñáyiú ñá túú sàndáá iní ñáhá xii-gá xíndecu distritú Jùdeá. Te cãcá<sup>n</sup> táhú tucu-ndo núú-gã sá ncháá sã cànèhe-í quíhí<sup>n</sup> nduu táhú ñáyiú ndècu ichi-gá ndécú ñúú Jerusalén ío váha cuu

iní-yu quehe<sup>n</sup> cuendá-yu. <sup>32</sup>Te duca<sup>n</sup> càda-ndo cuendá sá nõu Yá Ndiõxí ná cächí-gá te ío cudíí iní-í òré quexio-í núú ndécú-ndó, te ío váha cuu iní-í cundecu ndihi ñaha tnài xii-ndo. <sup>33</sup>Te vitna xicá<sup>n</sup> táhù-í núú Yá Ndiõxí Yaá quidé ò váha cùu iní-ó ndècu-o sá ná chindee chitúu ñaha-gã xii-ndo nchàa-ndo. Te duca<sup>n</sup> na cunduu.

Té Páblú quidé ndèe iní-dé  
ñáyiu ndècu ñuú Rómá

**16** Te yúhú tendaha-í tá Fèbé quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quide-xi chiu<sup>n</sup> Yá Ndiõxí sá cúú-xí ñáyiu ndècu ichi Xítohó Jesucristú xĩndecu ñuú Cèncreá. <sup>2</sup>Te cuiní-í sá ò váha cuu iní-ndó quèhe<sup>n</sup> cuendá-ndó-xí, chi ndècu ndihi-xi Xítohó Jesucristú, te cada-ndo nàcuáa tàù-xi cunduu dàtná tàù-xi cada ñáyiu ndècu ichi-gá, te ío chindee-ndo-xi te núu ná cúú sã xíní ñùhu-xi, chi tnàhá-xi ío chindee-xi cue ñáyiu ndècu ichi Xítohó Jesucristú, te tnàhá yúhú duca<sup>n</sup> ò chindee-xi.

<sup>3</sup>Te cúñaha-ndo ò na càda ndee iní té Àquilú ndihi ñadìhí-dé tá Priscilá, chi ñáyiu-á<sup>n</sup> nĩ quide chiu<sup>n</sup>-í ndihí-yu ní quide-ndí chiu<sup>n</sup> Xítohó Jesucristú. <sup>4</sup>Chi mèe-yu ní cácu cuú-yu sá cuendá sá nĩ dácäcu ñàhá-yu xii-í sá nĩ yáha-í, núu xíã<sup>n</sup> ío ndàcá<sup>n</sup> táhù-í núú-yu, te ñá dífú-ní yúhú duca<sup>n</sup> ò ndàcá<sup>n</sup> táhù-í núú-yu chi tnàhá nchaa ñáyiu ñá túú cùu ñáyiu isràel xĩndecu ichi-gá xĩndecu nchaa xichi duca<sup>n</sup> ò ndàcá<sup>n</sup> táhù-yu núú tè Àquilú ndihi núú ñadìhí-dé tá Priscilá. <sup>5</sup>Te cúñaha

tùcu-ndo sá ò na càda ndee iní nchaa ñáyiu xĩndecu ichi Xítohó Jesucristú tàcá vehe té Àquilú ndihi tá Priscilá dácua<sup>n</sup>há-yu tnúhu-gá, te cúñaha tùcu-ndo sá ò na càda ndee iní té Epènetú chi tnàhá-dé ío ñùhu iní-í-dé, chi téé-á<sup>n</sup> cúú-dě téé díhna nuu nĩ sándáá iní tnúhu Xítohó Jesucristú distrítú Acãyá. <sup>6</sup>Te cúñaha tùcu-ndo sá ò na càda ndee iní tá Màriá xíchí ndécú ndihi-ndo, xíchí ò ndècu ndee xinu cuechi núú Xítohó Jesucristú. <sup>7</sup>Te cúñaha tùcu-ndo sá ò na càda ndee iní cue téé cùu ndi mee-í té Àndrónicú ndihi té Jùniás, chi tnàhá-güedé ní xíhi ndihi ñaha-güedě xii-í vecaá, te ío cùdiu-güedé núú nchàa cue téé ní táúchíú<sup>n</sup> Jèsús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítohó Jesucristú dácúúxí yúhú.

<sup>8</sup>Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucristú. <sup>9</sup>Te cúñaha tùcu-ndo xii té Bãnú téé cùndihi ñaha xii-o quide-o chiu<sup>n</sup> Xítohó Jesucristú sá ná càda ndee iní-dé, te cúñaha tùcu-ndo xii té Èstaquis sá ná càda ndee iní-dé chi tnàhá-dé ío ñùhu iní-í-dé. <sup>10</sup>Te cúñaha tùcu-ndo xii té Àpelés sá ò na càda ndee iní-dé, chi téé-á<sup>n</sup> ò váha cùndáá-dé núú Xítohó Jesucristú, te cúñaha tùcu-ndo xii ñáyiu xĩndecu vehe té Aristóbulú sá ò na càda ndee iní-yu. <sup>11</sup>Te cúñaha-ndo xii té Heròdiòn téé cùu ndi mee-í sá ò na càda ndee iní-dé, te cúñaha-ndo xii ñáyiu ndècu ichi Xítohó Jesucristú xĩndecu vehe té Nàrcisú sá ò na càda ndee iní-yu. <sup>12</sup>Te cúñaha-ndo

xii tnahá tá Trifená ndihi tá Trifosá sá ïo na càda ndee iní-yu, chi tnahá-yu quidé-yu chiù<sup>n</sup> Xítohó Jesucristú. Te tnahá tá Përsidá xíchí ndécú ndihi-o ichi Xítohó Jesucristú cúñaha-ndo xii-xi sá ïo na càda ndee iní-xi, chi tnahá-xi ío ndècu ndee-xi quide-xi chiu<sup>n</sup> Xítohó Jesucristú. <sup>13</sup>Te cúñaha-ndo tnahá té Rűfú tée ío váha sàndáá iní tnúhu Xítohó Jesucristú sá ïo na càda ndee iní-dé ndihi năná-dě, chi ñaha-á<sup>n</sup> quidé iní-í sá cúú-á<sup>n</sup> dàtná nănà-í. <sup>14</sup>Te cúñaha-ndo sá ïo na càda ndee iní té Àsíncritú, ndihi té Flègonté, ndihi té Hěrmás, ndihi té Pàtrobás, ndihi té Hěrmés, ndihi nchaa dava-gá cue ñáyiú ndècu ndihi-o ichi Xítohó Jesucristú xĩndecu ndihi-güedé. <sup>15</sup>Te cúñaha tucu-ndo sá ïo na càda ndee iní té Filólogó, ndihi tá Jűliá, ndihi té Nèrèú, ndihi cúha té Nèrèú, ndihi tá Òлимпás, ndihi nchaa dava-gá ñáyiú sàndáá iní tnúhu Xítohó Jesucristú xĩndecu ndihí-yu.

<sup>16</sup>Te ío yĩñuhu cada ndee iní tnahá-ndó ì<sup>n</sup> ì<sup>n</sup>-ndo. Te nchaa ñáyiú tàcá nchaa iha dàcuaha tnúhu Xítohó Jesucristú quidé ndèe iní ñáhă-yu xii-ndo.

<sup>17</sup>Te nchòhó ñáyiú ndècu ndihi-í ichi Xítohó Jesucristú càhá<sup>n</sup>-í dóho-ndo sá cádá cuendá-ndó nũu ío ñáyiú quide nacuáa vá cúú ì<sup>n</sup>nuu-ndo cundecu-ndo, chi ñáyiú-á<sup>n</sup> sánú ichi ñahá-yu ì<sup>n</sup> ichi ñá túú văha, chi ñá túú ì<sup>n</sup>-ni cuu-xi tnúhu càhá<sup>n</sup>-yu ndihi tnúhu sá nĩ níhí-ndó ndècu ndihi-ndo, te ñáyiú duca<sup>n</sup> xĩquide vá nihí tnahá-gă-ndó ndihí-yu. <sup>18</sup>Chi ñáyiú-á<sup>n</sup> ñà túú quidé-yu chiù<sup>n</sup> sá cúú-xí Xítohó

Jesucristú, chi mee-ni sá cúú-xí mèe-yu quidé-yu, te mee-ni nchaa tnúhu sá ïo víi ío váha cuáhá<sup>n</sup> càhá<sup>n</sup>-yu órè cuáhá<sup>n</sup>-yu dándahú-yu nchaa ñáyiú ío yáchí sàndáá iní-xi ì<sup>n</sup> tnúhu. <sup>19</sup>Te nchaa ñáyiú nihí-yu tnúhu sá nchòhó sàndáá iní-ndó tnũhu Xítohó Jesucristú, núu xíă<sup>n</sup> ío cùdĩí iní-í. Te cuiní-í sá nchòhó ío váha cutnũmí iní-ndó nàcuáa cada-ndo mèe-ni sá văha, te vá cámí iní-ndó càda-ndo datná xĩquide nchaa ñáyiú ndècu ichi cuehé ichi duha. <sup>20</sup>Te Yá Ndiõxí Yáá quidé ío váha cùu iní-ó ndècu-o ío ndĩhi cada-gá cuendá sá sàcuíhná ñà túú-gă ná cada ñaha-xi xii-ndo, te xicá<sup>n</sup> táhù-í núú Xítohó Jesucristú sá ïo na chĩndee chitúu ñaha-gă xii-ndo.

<sup>21</sup>Te té Timũteú tée quide ndihi-í chiù<sup>n</sup> Xítohó Jesucristú iha quide ndee iní ñáhă-dě xii-ndo, te tnahá té Lùciú, ndihi té Jàsón, ndihi té Sosipàtér cue tée cùu ndi mee-í quidé ndèe iní ñáhă-güedě xii-ndo.

<sup>22</sup>Te tnahá yúhú té Tèrciú tée càdúha tutú-a cuendá té Păblú quidé ndèe iní ñáhă-í xii-ndo, chi ì<sup>n</sup>-ni cùu-o ndihi Xítohó Jesucristú.

<sup>23</sup>Te tnahá té Găyú tée dii vèhe-xi ndecu-í quidé ndèe iní ñáhă-dě xii-ndo, te diu-dé ní taxi nũu-dé vehe tàcá ñáyiú dàcuahá-yu tnúhu Xítohó Jesucristú. Te tnahá té Èrastú tée yĩndaha díhú<sup>n</sup> ñúú quidé ndèe iní ñáhă-dě xii-ndo, te tnahá té Cuártú tée ndècu ndihi-o ichi Xítohó Jesucristú quidé ndèe iní ñáhă-dě xii-ndo.

<sup>24</sup>Te xicá<sup>n</sup> táhù-í núú Xítohó Jesucristú sá ïo na chĩndee chitúu ñaha-gă xii-ndo nchaa-ndo. Te duca<sup>n</sup> na cùnduu.

**Cáhá<sup>n</sup>-ó sǎ ǐo cǎhnu cuu Yá Ndiöxí**

<sup>25</sup>Te vitna chí ná cǎchí-ó sǎ ǐo cǎhnu cuu Yá Ndiöxí, chi mee-gǎ cada te ǐo-gǎ cuita níhí ndéé-gǎ-ndó cùndecu-ndo ichi Xítóhó Jesucrístú dǎtná cǎchí tnúhu sǎ cǎhá<sup>n</sup> nǎcuáa naníhí tǎhú-ó, tnúhu sǎ dánèhé-í ñǎyiu cuèndá Xítóhó Jesucrístú, te nchaa tnúhu-a ǐ<sup>n</sup>-ni cùu-xi ndíhí nchaa tnúhu sǎ ñí cachí Yǎ Ndiöxí cuu yuhu ndèé cùtnàhá ní ngáva ñuyíú, te vitna ní quee túu-xi, <sup>26</sup>chi mee Yǎ Ndiöxí ní dátũu-gǎ núú-ó vitna, te cǎhá<sup>n</sup>-ndí nǎcuáa ní chídó

tnùní cue téé ní xóo cǎhá<sup>n</sup> tnúhu Yá Ndiöxí ndéé sanaha. Te duca<sup>n</sup> tnúhu sǎ ndúú yùhu ni cuu ta xíté nuu-xi ñihí ñuyíú cuǎhá<sup>n</sup>, chi duca<sup>n</sup> ñí cachí Yǎ Ndiöxí Yaá ndécú nchaa nduu nchaa quíú cunduu cuèndá sǎ quìndáá iní ñáhá ñǎyiu xii-gǎ, te tníí-yu nchaa tnúhu cǎhá<sup>n</sup>-gǎ.

<sup>27</sup>Te ǐ<sup>n</sup>dii-ni Yá Ndiöxí cúú-gǎ Yaá ǐo sǎá sǎ xíní tnùní-xi! Te nchaa-o chí ná cǎchí-ó sǎ ǐo cǎhnu cuu-gǎ, chi ndècu ndíhí-o Xítóhó Jesucrístú, te duca<sup>n</sup>-ni cǎda-o ni caa ni quíh<sup>n</sup>! Te duca<sup>n</sup> na cùnduu. Te ǐo chí cǎdá ndèe iní-nǎ vitna.



# TUTÚ DÍHNA NUU NÏ CADÚHA TÉ PÄBLÚ QUÍHÍ<sup>n</sup> NDAHA ÑÁYIU ÑUÚ CÒRINTÚ

---

Té Páblú cádúha-dé tutú quíhí<sup>n</sup>  
ndaha ñáyiú xĩndecu ichi Xítóhó  
Jesucristú ndécú ñùú Còrintú

**1** Yúhú té Páblú ní cáhá<sup>n</sup> ñáhá  
Yă Ndiöxí xii-í cuendá sá  
cáhá<sup>n</sup>-í tnúhu Xítóhó Jesucristú  
núú ñáyiú, chi duca<sup>n</sup> ñĩ cachí Yă  
Ndiöxí cunduu. Te cádúha-í tutú-a  
ndìhi té Söstenés tée ndècu ndìhi-o  
ichi Xítóhó Jesucristú <sup>2</sup>cuendá  
daquixi-í ndaha nchòhó ñáyiú  
xĩndecu ichi Yă Ndiöxí ndécú ñùú  
Còrintú, chi nchòhó cúú-ndó ñáyiú  
cùu cuendá Yă Ndiöxí cuendá sá  
ndécú ndìhi-ndo Xítóhó Jesucristú.  
Te ñiú-ni-ndo cùu-ndo ñáyiú ní  
cáhá<sup>n</sup> ñáhá Yă Ndiöxí cuendá  
cundecu yiñùhu-ndo núú-gă, ndìhi  
nchaa dava-gă ñáyiú ndècu nchaa  
xichi, ñáyiú càchí sá ño càhnu cuu  
Xítóhó Jesucristú. Te Yaá-á<sup>n</sup> cúú-gă  
Xítóhó-yu, te ñiú-ni-gă cúú-gă  
Xítóhó nchoo tùcu. <sup>3</sup>Te xìcá<sup>n</sup> táhù-í  
núú Tătá-ó Dütú Ndiöxí ndìhi núú  
Xítóhó Jesucristú sá ndè nduú-gă  
ío na chĩndee chitúu ñaha-gă  
xii-ndo, te ío váha cuu iní-ndó  
cùndecu-ndo.

Yă Ndiöxí ío chĩndee ñaha-gă  
xii-o cuendá sá ndécú-ó  
ndìhi Xítóhó Jesucristú

<sup>4</sup>Te duca<sup>n</sup>-ni ño ndácá<sup>n</sup> táhù-í  
núú Yă Ndiöxí cuendá-ndó,  
chi mee-gă ío chĩndee chitúu  
ñaha-gă xii-ndo sá cuendá  
Xítóhó Jesucristú. <sup>5</sup>Te cuendá sá  
ndécú-ndó ndìhi Xítóhó Jesucristú,  
núú xíá<sup>n</sup> Yă Ndiöxí ío chĩndee  
ñaha-gă xii-ndo sáá díquí-ndó  
nàcuáa cáhá<sup>n</sup>-ndó, ndìhi nàcuáa  
cùtnuní iní-ndó, <sup>6</sup>chi tnúhu sá ni  
ñĩhí-ndó cuendá Xítóhó Jesucristú  
ní quée-xi iní-ndó. <sup>7</sup>Te xíá<sup>n</sup> ñùu  
nchaa sá vâha ñá túú tnàhí  
cùmání xii-ndo chi Yă Ndiöxí  
ío chĩndee ñaha-gă. Te duca<sup>n</sup>  
quide-gă nini nchòhó ni yùhu  
ni iní-ndó ndètu-ndo sáá nduu  
quixi tucu Xítóhó Jesucristú. <sup>8</sup>Te  
Yă Ndiöxí duca<sup>n</sup>-ni ño chĩndee  
ñaha-gă xii-ndo cuendá sá vâ  
yõ teñaha cuèchi nduu na  
quixi tucu Xítóhó Jesucristú. <sup>9</sup>Te  
nchaa sá cáhá<sup>n</sup> Yă Ndiöxí dacuitíí  
quide-gă, te ñiú-gă cúú-gă Yaá ní  
cáhá<sup>n</sup> ñáhá xii-ndo cuendá cuu

ii<sup>n</sup>nuu-ndo ndìhi Déhe-gá Xítóhó Jesucristú Yáá cúú Xítóhó-ó.

**Ná túú cùu ii<sup>n</sup>nuu ñáyiú ndècu  
ichi Xítóhó Jesucristú**

<sup>10</sup>Te nchòhó ñáyiú ndècu ndìhi-í ichi Xítóhó Jesucristú càhá<sup>n</sup>-í dóho-ndo sã vã ndì díí<sup>n</sup> càni iní-ndó, te ío cuu ii<sup>n</sup>nuu-ndo cùndecu-ndo, te ii<sup>n</sup>-ni càni iní-ndó, te ii<sup>n</sup>-ni càda-ndo chi duca<sup>n</sup> cuiní-gá cunduu. <sup>11</sup>Te duha càhá<sup>n</sup>-í dóho nchòhó ñáyiú ndècu ndìhi-í ichi Xítóhó Jesucristú, chi cue ñáyiú vehe té Clòé ní cachí tnúhu-yu xii-í sã ñà túú cùu ii<sup>n</sup>nuu-ndo ndecu-ndo. <sup>12</sup>Te duha ndùu tnúhu ní níhì-í nàcuáa cùu ndecu-ndo, chi dava-ndo càchí-ndó: “Yúhú cùu-í cuendá té Păblú.” Te dava-ndo càchí-ndó: “Yúhú cùu-í cuendá té Àpolós.” Te dava-ndo càchí-ndó: “Yúhú cùu-í cuendá té Pèlú.” Te dava tucu-ndo càchí-ndó: “Yúhú cùu-í cuendá Xítóhó Jesucristú”, duha càchí-ndó. <sup>13</sup>Te vã dúcá<sup>n</sup> cãhá<sup>n</sup>-ndó chi ñà túú nã daha Xítóhó Jesucristú ndécú chi ii<sup>n</sup>dii-ni-gá. Te ñà díú yúhú té Păblú ní xíhì-í núú cùrúxí sã cuendá-ndó, te ni ñà túú ní sàndute-ndo cuendá sã yúhú cuu cuendá ñáhà-í xii-ndo. <sup>14</sup>Te táxăhu xii Yá Ndiöxí chi ñà díú nchàa-ndo ni dacuandute-í, chi té Crispú-ni ndìhi té Găyú-ni ní dăcuândute-í-güedé. <sup>15</sup>Te xiă<sup>n</sup> nũu vã cúú tnàhí cãhá<sup>n</sup>-ndó sã ñi sandute-ndo sã cúú cuendá ñáhà-í xii-ndo. <sup>16</sup>Te ní ndacu tucu iní-í sã tnàhá tucu ñáyiú cùu ndi mee té Èstéfanás ní dăcuândute-í, te diu-ná ñáyiú-á<sup>n</sup> te sànuu sã ñà túú-gã nágá ñáyiú ni dăcuandute-í. <sup>17</sup>Te

Xítóhó Jesucristú ñà túú ní tëndaha ñaha-gá xii-í sã dăcuândute-í ñáyiú, chi ní tendaha ñaha-gá xii-í sã càhá<sup>n</sup>-í tnúhu-gá nũu-yu, tnúhu sã càhá<sup>n</sup> nàcuáa naníhí tãhú-ó. Te ñà túú càhá<sup>n</sup>-í dătná càhá<sup>n</sup> ñáyiú túha. Te duca<sup>n</sup> quide-í cuendá sã nchòhó quíndáá váha iní-ndó tnúhu sã càhá<sup>n</sup> nàcuáa ní xíhí Xítóhó Jesucristú núú cùrúxí. Chi núu na càhá<sup>n</sup>-í dătná càhá<sup>n</sup> ñáyiú túha te nchòhó vã quíndáá iní-ndó tnúhu-á<sup>n</sup> nàcuáa tàù-xi cunduu.

**Sá cuendá Xítóhó Jesucristú cútnùni  
iní-ó sã ío cãhnu cuu Yá Ndiöxí**

<sup>18</sup>Te nchaa ñáyiú ta xíta nihnu cuáhá<sup>n</sup> càchí-yu sã ñà túú nândíhi tnúhu sã càhá<sup>n</sup> nàcuáa ní xíhí Xítóhó Jesucristú núú cùrúxí, dico sã cúú-xí nchòo ñáyiú sa ní naníhí tãhú, chi tnúhu-á<sup>n</sup> cúú-xí ii<sup>n</sup> tnúhu sã ñi taxi Yá Ndiöxí ndécú ndìhi-o cuendá ndacu-gá cada-gá nchaa nàcuáa cuiní-gá iní-ó, <sup>19</sup>te quèe ndáá-xi nàcuáa càhá<sup>n</sup>-gá núú tütú-gá núú càchí-xi:

Yúhú cada-í te nchaa ñáyiú túha vã nândíhi-gá nchaa sã xiní tnùnì-yu,

te nchaa ñáyiú ío váha sàà díquí-xi vã nândíhi-gá nchaa nàcuáa sàni iní-yu.

Duha càchí Yá Ndiöxí núú tütú-gá.

<sup>20</sup>Te xiă<sup>n</sup> cútnùni iní-ó sã ncháá ñáyiú sàni iní-xi sã ío túha ndècu ñuyúú-a, ndìhi nchaa cue tée dàcuaha ñaha xií-yu nchaa tnúhu ní chídó tnùnì ndíi Moisés, ndìhi nchaa ñáyiú ío váha sàà díquí-xi càhá<sup>n</sup> cuendá nchaa sã ío ñuyúú-a, te nchaa ñáyiú-á<sup>n</sup> càchí Yá Ndiöxí sã ñà túú nândíhi nchaa sã xiní

tnùnì-yu sá cúú-xí-gǎ. <sup>21</sup>Te Yá Ndiòxí ío váha cùtnuní iní-gá nàcuáa quide-gá, chi ñá túú dàña-gá cundecu ndihi ñàhá-yu xii-gá sá cuèndá nchaa sá ñí sáá díquí méè-yu, te duca<sup>n</sup> quide-gá chi cuiní-gá sá cùndèdóho-yu tnúhu sá sání iní-yu ñá túú nàndíhi. Te sá cuèndá tnúhu-á<sup>n</sup> te naníhí tǎhú-yu te núu na quèndáá iní ñáhǎ-yu xii-gá.

<sup>22</sup>Te cue ñáyíu isràèl cuiní-yu quiní-yu sá vǎ yǒo tnàhí ndàcu cada, te cue ñáyíu griégú nchicú<sup>n</sup> nihnú-yu nchaa sá dácuaàha ñáyíu ío túha. <sup>23</sup>Dico nchoo yìhi-o cáhá<sup>n</sup>-ó núú ñáyíu sá Xítóhó Jesucristú ní xíhí-gá núú cùrúxí. Te cue ñáyíu isràèl ñá túú tnàhí tnàhá iní-yu cundèdóho-yu tnúhu-á<sup>n</sup>. Te cue ñáyíu ñá túú cùu ñáyíu isràèl càchí-yu sá ñà túú vèdana nàndíhi tnúhu-á<sup>n</sup>. <sup>24</sup>Dico sá cúú-xí nchàa ñáyíu ní cáhá<sup>n</sup> ñáhá Yǎ Ndiòxí chi cuèl cùú-yu ñáyíu isràèl àdi ñá túú cùú-yu, dico ñáyíu-á<sup>n</sup> càchí-yu sá sǎ cuèndá Xítóhó Jesucristú cùtnùnì iní-yu sá ìo càhnu cuu Yá Ndiòxí te ndècu ndihi-gá nchaa sá xìnì tnùnì-gá. <sup>25</sup>Te sá quidé Yǎ Ndiòxí càchí ñáyíu ñuyíú-a sá ñà túú nàndíhi, dico xǎ<sup>n</sup> ío-gá nándíhi dácúxí sǎ sání iní méè-yu. Te sá ñí xíhí Xítóhó Jesucristú núú cùrúxí, xǎ<sup>n</sup> càchí ñáyíu sá ñǎ túú ní ñíhí ndéé Yǎ Ndiòxí cada-gá sá ñí sani iní-gá cada-gá. Dico sá dúcá<sup>n</sup> ní quide Yá Ndiòxí, xǎ<sup>n</sup> cúú-xí sǎ ìo-gá ní ñíhí ndéé-gǎ ní quide-gá ì<sup>n</sup> sá ñí sani iní-gá dácúxí sǎ sání iní méé ñáyíu ñuyíú-a. <sup>26</sup>Te nchòhó ñáyíu ndècu ndihi-í ichi Xítóhó Jesucristú, chí dándàcu iní nàcuáa ndècu-ndo

cùtnàhá ní cáhá<sup>n</sup> ñáhá Yǎ Ndiòxí xii-ndo, chi sacú-ni-ndo túha dácúxí ñáyíu ñá túú ndècu ichi-gá. Te duca<sup>n</sup> sacú-ni-ndo tǎxi tnuní-ndó, te ñíu-ni duca<sup>n</sup> sacú-ndó nèhe ñáyíu sá yǎñuhu núú-ndó. <sup>27</sup>Te ñáyíu ñá túú ndècu ichi Yá Ndiòxí càchí-yu sá ñà túú tnàhí túha dava-gá tnàha ñáyíu-yu, dico dava ñáyíu ñá túú túha-á<sup>n</sup> càhá<sup>n</sup> ñáhá Yǎ Ndiòxí xii-yu cundecú-yu ichi-gá, te cundecu ndihi ñaha-gǎ xii-yu, te duca<sup>n</sup> dándóo canúú-yu nchaa ñáyíu càchí sá ìo túha. Te càhá<sup>n</sup> tucu-gá ñáyíu càchí dava-gá ñáyíu sá ñà túú tnàhí tàú cunuu cundecú-yu ichi-gá, te duca<sup>n</sup> cundecu ndihi ñaha-gá xii-yu, te dándóo canúú-yu nchaa ñáyíu càchí sá táxí tnùnì. <sup>28</sup>Te duca<sup>n</sup> Yǎ Ndiòxí càhá<sup>n</sup>-gá ñáyíu ñá túú tnàhí cùnuu cundecu ndihi-gá, ndihi ñáyíu quèe tǎhú núú dǎva-gá tnàha ñáyíu-xi, ndihi ñáyíu càchí-yu sá ñà túú vèdana nàndíhi, nchaa ñáyíu-á<sup>n</sup> càhá<sup>n</sup>-gá cundecu ndihi-gá, te duca<sup>n</sup> quide-gá cuèndá dándóo canúú-yu nchaa ñáyíu càchí sá ìo cùnuu. <sup>29</sup>Te núu xǎ<sup>n</sup> ní ì<sup>n</sup> ñáyíu vá cúú càchí-yu sá ìo càhnu cuú-yu núú Yǎ Ndiòxí. <sup>30</sup>Dico nchòhó chi mee Yǎ Ndiòxí ní quide-gá ndécú-ndó ndíhi Xítóhó Jesucristú, te Xítóhó Jesucristú ní quide-gá ní cùtnùnì iní-ó sǎ Yǎ Ndiòxí cúú-gǎ Yaá ndécú ndíhi nchaa sá xìnì tnùnì-gá. Te ñíu-ni Xítóhó Jesucristú ní quide-gá cuèndá sá nchóo vǎ cùndècu-gá cuèchi-o núú Yǎ Ndiòxí, te duca<sup>n</sup> cundecu yǎñuhu-o núú-gǎ, te nduu tǎhú-ó cundecu-o ndihi-gá ní caa ní quíhí<sup>n</sup>. <sup>31</sup>Te sá dúcá<sup>n</sup> quide-gá núu xǎ<sup>n</sup> xìnì ñuhu-xi cada-o nàcuáa càhá<sup>n</sup>-xi núú tütú Yǎ Ndiòxí núú

càchí-xi: “Vá càchí-ndó sã méé-ndó ïo càhnu cuu-ndo, chi cachí-ndó sã Yáá cúú Xítóhó-ndó ïo càhnu cuu-gá”, duha càchí-xi núú tütú-gá.

**Tnúhu sá càhá<sup>n</sup> nàcuáa ní cuu ní xíhí Xítóhó Jesucristú núú cùrúxí**

**2** Te nchòhó ñáyiú ndècu ndìhi-í ichi Xítóhó Jesucristú sa ñaha-ndo sá cùtnàhá ní quixi-í ní càhá<sup>n</sup>-í tnúhu Yá Ndiòxí núú-ndó, te ñá túú ní càhá<sup>n</sup>-í dàtná càhá<sup>n</sup> ìì<sup>n</sup> ñáyiú ío váha sàà díquí-xi, àdi datná càhá<sup>n</sup> ìì<sup>n</sup> ñáyiú ío túha. **2** Chi cùtnàhá ní xíndecu ndìhi ñaha-í xii-ndo chi ní sani iní-í sá méé-ní cuèndá Xítóhó Jesucristú càhá<sup>n</sup>-í núú-ndó ndìhi nacuáa ní cuu ní xíhí-gá, te ñá duca<sup>n</sup> ñí quide-í. **3** Te cùtnàhá ní quexìo-í núú ndécú-ndó te ni ñá cùtnùnì iní-í nása cada-í ní cùu, te ío ní quiyùhú iní-í ní càhá<sup>n</sup>-í tnúhu-gá núú-ndó. **4** Te cùtnàhá ní càhá<sup>n</sup>-í nàcuáa ndùu tnúhu Xítóhó Jesucristú núú-ndó, te ñaha-ndo sá Espíritú Yá Ndiòxí ní chindee ñaha-xi xii-í ní càhá<sup>n</sup>-í tnúhu-gá núú-ndó, te tnúhu-á<sup>n</sup> ñí queé-xi iní-ndó. Te ñá túú ní càhá<sup>n</sup>-í ìì<sup>n</sup> tnúhu càhnu núú-ndó tnúhu sá càhá<sup>n</sup> cue ñáyiú ío váha sàà díquí-xi. **5** Te duca<sup>n</sup> ñí cuu cuèndá sá nchòhó quíndáá iní-ndó tnúhu Yá Ndiòxí chi ní quide-gá sá vaha sá cúú-xí iní-ndó, te ñá díú sã cuèndá tnúhu sá càhá<sup>n</sup> ñáyiú càchí sã ïo túha duca<sup>n</sup> ñí sándáá iní-ndó tnúhu-gá.

**Espíritú Yá Ndiòxí quidé-xí cùtnuní iní-ó nàcuáa sàni iní-gá**

**6** Te nchoo càhá<sup>n</sup>-ó tnúhu càhnu núú ñáyiú sa ní ñíhí ndéé ndècu

ichi Xítóhó Jesucristú. Te tnúhu-á<sup>n</sup> ñà túú càhá<sup>n</sup> ñáyiú ñá túú ndècu ichi-gá, te ni cue téé yìndaha ñaha xii-yu ñá túú càhá<sup>n</sup>-güedé tnúhu-á<sup>n</sup> chi cue téé-á<sup>n</sup> naa-güedé. **7** Te tnúhu càhnu-á<sup>n</sup> cúú-xí tnúhu Yá Ndiòxí, te mee-gá ní cachí-gá ndéé cùtnàhá vátá ngáva-gá ñuyíú sã ncháá ñáyiú na quíndáá iní tnúhu-á<sup>n</sup> te nduu táhú-yu cundecú-yu ndìhi-gá núú ïo váha càa ndecu-gá ni caa ni quíhí<sup>n</sup>. Te tnúhu-á<sup>n</sup> ndúú yùhu-xi ni cuu. **8** Te ni ìì<sup>n</sup> cue téé yìndaha cue ñáyiú ñuyíú-a ñá túú tècú tnùnì-güedé tnúhu-á<sup>n</sup>, chi núú dìcò tècú tnùnì-güedé tnúhu-á<sup>n</sup> te vá cátá càa-güedé Xítóhó Jesucristú núú cùrúxí cahni ñaha-güedé xii-gá ní cùu. Te ñá duca<sup>n</sup> ñí cuu chi ní quee ndáá-xi nàcuáa càhá<sup>n</sup>-xi núú tütú Yá Ndiòxí núú càchí-xi:

Yá Ndiòxí sa ní sani iní-gá nchaa nàcuáa cada-gá sá cúú-xí cuèndá nchaa ñáyiú cùu iní ñáhá xii-gá.

Te sá ñí sani iní-gá cada-gá cúú-xí sã vátá quínì-gá ñáyiú te ni vátá cùndèdóho-gá-yu, te ni ñá túú tnàhí cùtnuní iní-yu nása cada-gá.

Duha càchí-xi núú tütú-gá.

**10** Te mee Yá Ndiòxí ní cachí-gá sá Espíritú-gá cada-xi te nchoo cùtnuní iní-ó nchaa nacuáa sàni iní-gá cada-gá, ñuu xíá<sup>n</sup> duca<sup>n</sup> tècú tnùnì-ó vitna, chi Espíritú-gá xini-xi nchaandi túhú nàcuáa sàni iní-gá cada-gá.

**11** Te ñá ìì<sup>n</sup> ñáyiú xini ndáá-yu nàcuáa sàni iní ingá ñáyiú, chi mee ñáyiú-á<sup>n</sup> xini ndáá-yu nchaa nàcuáa sàni iní-yu. Te duca<sup>n</sup> sàtnahá-xi cùu

Yá Ndiöxí chi medii-ni Espíritú-gá xìní-xi nchaa nàcuáa sàni iní-gá. <sup>12</sup>Te nchoo chi Yá Ndiöxí ní taxi-gá Espíritú-gá ndécú ndìhi-o, te ñá díú ñùyúú-a duca<sup>n</sup> ni quèe espíritú ní ngúndecu ndìhi-o. Te duca<sup>n</sup> nǐ taxi-gá Espíritú-gá ndécú ndìhi-o cuendá duca<sup>n</sup> cùtnuní iní-ó nàcuáa ndùu nchaa sá vǎha sá dícó duca<sup>n</sup> nǐ taxi-gá ndécú ndìhi-o. <sup>13</sup>Te cuendá nchaa sá vǎha-án cǎhá<sup>n</sup>-ndí, te cǎhá<sup>n</sup>-ndí nàcuáa dàcahu iní ñáhá Espíritú Yǎ Ndiöxí xii-ndí, te ñá túú cǎhá<sup>n</sup>-ndí nàcuáa cǎhu iní ñáyúu ñuyúú-a cǎhá<sup>n</sup>-yu, te diu-ni nchaa tnúhu dàcahu iní ñáhá Espíritú-gá xii-ndí cǎhá<sup>n</sup>-ndí, diu-ni nchaa xǎ<sup>n</sup> dánèhé-ndí nchaa ñáyúu ndècu ndìhi tucu Espíritú-gá.

<sup>14</sup>Te ñáyúu ñá túú ndècu ndìhi Espíritú Yǎ Ndiöxí ñá túú tnàhá iní-yu nàcuáa ndùu tnúhu dàtecú tnúhu ñaha Espíritú-gá xií-yu, te ni ñà túú tècú tnùní-yu, te cǎchí-yu sá ñà túú nàndíhi-xi. Te duca<sup>n</sup> chi mee-ni nchàa ñáyúu ndècu ndìhi Espíritú-gá tècú tnùní-yu nàcuáa ndùu tnúhu-án. <sup>15</sup>Te cue ñáyúu duca<sup>n</sup> ndècu ndìhi Espíritú Yǎ Ndiöxí cùtnùní ndáá iní-yu ná cúú nchàa sá vǎha, te vá yǒo ìí<sup>n</sup> xìní nchaa nàcuáa sàni iní-yu. <sup>16</sup>Te núú tütú Yǎ Ndiöxí cǎchí-xi: “Vá yǒo ìí<sup>n</sup> xìní nàcuáa sàni iní Yǎ Ndiöxí, núú xǎ<sup>n</sup> vá yǒo ìí<sup>n</sup> ndacu ná danèhé ñáhá xii-gá”, duha cǎchí-xi núú tütú-gá. Te nchoo chi ìí<sup>n</sup>-ni sàni iní-ó ndìhi Xítóhó Jesucrístú.

**Cue téé xǐquide chiù<sup>n</sup> Yá Ndiöxí**

**3** Te nchòhò ñáyúu ndècu ndìhi-í ichi Xítóhó Jesucrístú cǎchí tnúhu-í xii-ndo sǎ ñá ní nǐhì-í

nàcuáa cada-í cǎhá<sup>n</sup>-í tnúhu-gá núú-ndó dàtná cǎhá<sup>n</sup>-í núú nchàa ñáyúu quide nchaa nàcuáa cǎhá<sup>n</sup> Espíritú Yǎ Ndiöxí, chi ní cǎhá<sup>n</sup>-í núú-ndó dàtná cǎhá<sup>n</sup>-í núú nchàa ñáyúu cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyúu íchí nǐ sándáá iní tnúhu Xítóhó Jesucrístú, núú xǎ<sup>n</sup> duca<sup>n</sup> nǐ cǎhá<sup>n</sup>-í núú-ndó. <sup>2</sup>Te ní quide ñaha-í xii-ndo dàtná ìí<sup>n</sup> déhe yǐqui<sup>n</sup> vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ìí<sup>n</sup> sá ñà túú tnàhí úhu tecú tnùní-ndó, te ñá túú ní dànehé ñáhà-í xii-ndo ìí<sup>n</sup> sá xítò-í sá vǎ tècú tnùní-ndó. Te quide cuendá-í sá díú-ní dùca<sup>n</sup> vá tècú tnùní-ndó ndèe vitna te núu na dànehé ñáhà-í xii-ndo nchàa dava-gá tnúhu. <sup>3</sup>Te duca<sup>n</sup> chi quide-ni-ndo nàcuáa sàni iní mée-ndó, chi ndècu-ni-ndo ichi cuédú iní, te nàà ndìhi tnàha-ni-ndo, te ñá túú tnàhí cùu ìí<sup>n</sup>nuu-ndo ndecu-ndo. Te xǎ<sup>n</sup> cùtnùní sá mée-ní nchàa nàcuáa sàni iní mée-ndó quide-ndo, te xǐquide-ndo dàtná quidé nchàa ñáyúu ñá túú ndècu ichi Xítóhó Jesucrístú. <sup>4</sup>Te dava-ndo cǎchí-ndó: “Yúhú cùu-í cuendá té Pǎblú.” Te dava-ndo cǎchí-ndó: “Yúhú cùu-í cuendá té Àpolós”, duha cǎchí-ndó. Te sá dúcá<sup>n</sup> cǎhá<sup>n</sup>-ndó xǎ<sup>n</sup> cùtnùní sá quidé-ní-ndó mée-ni nchaa nàcuáa sàni iní mée-ndó.

<sup>5</sup>Te yúhú té Pǎblú cǎchí tnúhu-í xii-ndo sǎ ñà túú cùnuu-í, te ni té Àpolós ñá túú cùnuu-dé chi dícó cue téé xínu cuechi núú Yǎ Ndiöxí cúú-ndí, te ní cǎhá<sup>n</sup>-ndí tnúhu-gá

núu-ndó, núu xíá<sup>n</sup> ní sándáá iní-ndó. Te ndi díí<sup>n</sup> ndi díí<sup>n</sup> ndùu chiu<sup>n</sup> ní táhú Yá Ndiöxí cada-ndí. <sup>6</sup>Te yúhú cúu-í dàtná ìí<sup>n</sup> téé chihhi tatá chi dàcahá<sup>n</sup> ñáhà-í xii-ndo tùha-ndo ichi Yá Ndiöxí. Te té Àpolós cúu-dě dàtná ìí<sup>n</sup> téé nàcuhũu chi téé-á<sup>n</sup> ndécú-dě dánèhé ñáhà-dě xii-ndo tnũhu-gá. Te Yá Ndiöxí cúu-gã Yaá quidé sàhnu tatá ní chihhi-í-á<sup>n</sup>, te duha càhá<sup>n</sup>-í chi ñu-gá quidé-gã tá nihí ndéé-ndó ndècu-ndo ichi-gá. <sup>7</sup>Te núu xíá<sup>n</sup> ni téé chihhi tatá te ní téé nàcuhũu ñá túú cùnnu-güedé, dico Yá Ndiöxí ío cùnnu-gá chi ñu-gá quidé-gã xĩnu tatá-á<sup>n</sup> te sàhnu-xi. <sup>8</sup>Te ìí<sup>n</sup>-ni cùu téé chihhi tatá ndihhi téé nàcuhũu. Te duca<sup>n</sup> sãtnahá-xi cùu nchúhú cue téé xĩquide chiu<sup>n</sup> Yá Ndiöxí, te nàcuáa ndùu chiu<sup>n</sup> ní quide-ndí te duca<sup>n</sup> cùnduu táhú taxi Yá Ndiöxí nduu táhú-ndí. <sup>9</sup>Te nchòhó cúu-ndó dàtná ìí<sup>n</sup> xichi núu ní quée tatá, te nchúhú cúu ìí<sup>n</sup>-nuu-ndí quidé chiu<sup>n</sup>-ndí xíá<sup>n</sup>. Te duca<sup>n</sup> sãtnahá-xi cùu-ndo chi cùu cuendá ñáhá Yá Ndiöxí xii-ndo, te nchúhú cúu ìí<sup>n</sup>-nuu-ndí quidé-ndí chiu<sup>n</sup>-gá.

Te cùu tucu-ndo datná ìí<sup>n</sup> vehe sá vítná sáá, te duca<sup>n</sup> sãtnahá-xi cùu-ndo chi Yá Ndiöxí quidé-gã tá sàhnu nihnu-ndo ichi-gá cuáhá<sup>n</sup>. <sup>10</sup>Te yúhú cúu-í dàtná ìí<sup>n</sup> téé cùnnu dacao vehe te ní tava-í cimièntú-xi, te ñi<sup>n</sup> cue téé véxi dàcaa-güedé ndóho, te ìí<sup>n</sup> ìí<sup>n</sup> cue téé-á<sup>n</sup> ío xini ñuhu-xi cada cuendá-güedé nàcuáa dàcàa-güedé. Núu duca<sup>n</sup> sãtnahá-xi cùu yúhú chi Yá Ndiöxí ní taxi-gá chiu<sup>n</sup> quide-í te chindee ñaha-gá, chi díhna-gá-í ní quixi-í ní cáhá<sup>n</sup>-í tnúhu Xítohó Jesucristú núu-ndó, te

ñi<sup>n</sup> cue téé véxi dàcuaha ñaha-ná xii-ndo tnũhu-gá, te ìí<sup>n</sup> ìí<sup>n</sup> cue téé-á<sup>n</sup> ío xini ñuhu-xi cada cuendá-güedé nàcuáa dacuáa ñaha-güedé xii-ndo tnũhu-gá. <sup>11</sup>Te cimièntú vehe-á<sup>n</sup> cada iní-ó sã cúu-xí mèe Xítohó Jesucristú, te duca<sup>n</sup> chi yúhú ní dánèhé ñáhà-í xii-ndo ní ngúndecu ndihhi-ndo Xítohó Jesucristú, te vá yõ-gá cundecu ndihhi-ndo chi ìí<sup>n</sup>dií díí-ni-gã ndécú. <sup>12</sup>Te dava cue téé dàcaa-güedé vehe váha te chihhi-güedé díhú<sup>n</sup> cuáá<sup>n</sup>, ndihhi díhú<sup>n</sup> cuixí<sup>n</sup>, ndihhi yúu sã ío vii càa. Te dava-güedé dàcàa-güedé vehe vítú, te dava-güedé dàcàa-güedé vehe ité, te dava-güedé dàcàa-güedé vehe tnuvixi<sup>n</sup>. <sup>13</sup>Te sáá nduu te nchaa vehe-á<sup>n</sup> cãyú-xi, te vehe vítú-ã<sup>n</sup> ndihhi vehe ité-á<sup>n</sup> ndihhi vehe tnuvixi<sup>n</sup>-á<sup>n</sup> ndoo ndoo cãyú, te nchaa vehe váha-á<sup>n</sup> vã cãyú-xi cuèi na yãha ñuhú. Te nchaa cue téé ní dácáá vèhe váha-á<sup>n</sup> cada iní-ó sã cúu-güedé ñáyiu ío váha quide chiu<sup>n</sup> Yá Ndiöxí. Te nchaa cue téé ní dácáá vèhe vítú, ndihhi cue téé ní dácáá vèhe ité, ndihhi cue téé ní dácáá vèhe tnuvixi<sup>n</sup> cada iní-ó sã cúu-güedé ñáyiu ñá túú cuiní cada chiu<sup>n</sup> Yá Ndiöxí nàcuáa tàu-xi cunduu. Te sáá nduu te cutnùní nàcuáa ndùu chiu<sup>n</sup> ní quide ìí<sup>n</sup> ìí<sup>n</sup> ñáyiu, chi Yá Ndiöxí cáhá<sup>n</sup>-gá nàcuáa ndùu chiu<sup>n</sup> ní quide ìí<sup>n</sup> ìí<sup>n</sup> ñáyiu ní quide chiu<sup>n</sup>-gá. <sup>14</sup>Te cue ñáyiu ío váha xĩquide chiu<sup>n</sup> Yá Ndiöxí te cùdí chiu<sup>n</sup> quidé-yu, te ñáyiu-á<sup>n</sup> ñihĩ-yu sá ndúú tãhũ-yu. <sup>15</sup>Te cue ñáyiu ñá túú quide chiu<sup>n</sup> Yá Ndiöxí nàcuáa tàu-xi cunduu, te vá cùdí chiu<sup>n</sup> ní quidé-yu chi cuíta te ndóo-ná-yu duha, dico mèe-yu chi nanhí tãhũ-yu.

<sup>16</sup>Te yúhú càhá<sup>n</sup>-í dóho-ndo dándacu-í iní-ndó sã cúú-ndó dàtná vehe Yá Ndiöxí, chi Espiritú-gá ndécú ndìhi ñaha-xi xii-ndo. <sup>17</sup>Te núu yoo na dànaa ñaha xii nchohó ñáyiú cùu veñúhu-gá, te Yá Ndiöxí danàa ñaha-gá xii ñáyiú-á<sup>n</sup>, te duca<sup>n</sup> càda-gá chi nchòhó cúú-ndó ñáyiú cùu cuendá-gá.

<sup>18</sup>Te vá dándàhú-ndó mèe-ndo sá ìo túha-ndo. Te núu ìo dava-ndo sàni iní-ndó sã túha-ndo dàtná sání ìní cue ñáyiú ñá túú ndècu ichi Yá Ndiöxí, te cada-ndo sã cúú-ndó dàtná ñáyiú ñá túú tnàhí túha, te duca<sup>n</sup> te cuu ndisa-ndo ñáyiú túha sá cúú-xí Yá Ndiöxí. <sup>19</sup>Te nchaa sá xìní tnùnì nchaa ñáyiú càchí sá ìo túha ñá túú ndècu ichi Yá Ndiöxí ñá túú nàndíhi-xi sá cúú-xí-gã. Te càchí-xi núú tütú-gá: “Nchaa ñáyiú càchí sá ìo túha te Yá Ndiöxí dandöo canúú ñáhá-gã xií-yu núú nchàa sá quidě-yu”, duha càchí-xi núú tütú-gá. <sup>20</sup>Te càchí tucu-xi ìngá xichi: “Yá Ndiöxí cútùnì iní-gá nchaa nàcuáa sàni iní ñáyiú càchí sá ìo túha. Te nchaa nàcuáa sàni iní-yu-á<sup>n</sup> càchí-gá sá ñà túú vèdana nàndíhi-xi”, duha càchí-xi núú tütú-gá. <sup>21</sup>Núú xiá<sup>n</sup> càhá<sup>n</sup>-í dóho-ndo sã vã càchí-ndó sã nchùhú cue tée dànehé ñáhá xii-ndo tnúhu-gá ìo càhnu cuu-ndí. Te nchaa sá ìo ñuyúú-a cùu-xi sá vãha sá cúú-xí-ndó. <sup>22</sup>Te cuèi yúhú ndìhi té Àpolós ndìhi té Pèlù ndécú-ndí sá cúú-xí-ndó, te cuèi nchaa sá ìo ñuyúú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vãha sá cúú-xí-ndó. Te cuèi nchaa sá ndécú tnàvíí, te cuèi nchaa sá

cóo ndèe cuèe-gá nchaa cùu-xi sá vãha sá cúú-xí-ndó. <sup>23</sup>Te mee-ndo ndècu-ndo sá cúú-xí Xìtohó Jesucristú, te mee Xìtohó Jesucristú ndécú-gã sá cúú-xí Yá Ndiöxí.

**Nàcuáa nduu chiu<sup>n</sup> quide cue tée ní táuchíú<sup>n</sup> Xìtohó Jesucristú càhá<sup>n</sup> tnúhu-gá**

**4** Te cada cuendá-ndó sã nchùhú dícó-ni cue tée xinu cuechi núú Xìtohó Jesucristú cúú-ndí, te chiu<sup>n</sup>-á<sup>n</sup> nì taxi Yá Ndiöxí quidè-ndí càhá<sup>n</sup>-ndí tnúhu sá nì cachí-gá yíyùhu ni cuu. <sup>2</sup>Te xini ñuhu-xi sá ncháá ñáyiú duca<sup>n</sup> nì sáñaha Yá Ndiöxí chiu<sup>n</sup> quidè-yu cada ndáá-yu cadá-yu chiu<sup>n</sup>-á<sup>n</sup>. <sup>3</sup>Te yúhú ñá túú quide cuendá-í nùu nása nduu tnúhu càhá<sup>n</sup>-ndó cuendá-í nùu cùu-í tée vãha àdi ñá túú cùu-í. Te òu-ni duca<sup>n</sup> ñà túú quide cuendá-í nùu nása-gá càhá<sup>n</sup> nchaa dava-gá ñáyiú cuendá-í. Te ni mèe-í ñá túú càhá<sup>n</sup>-í nùu cùu-í tée vãha àdi ñá túú cùu-í. <sup>4</sup>Te sànuu iní-í sá ñà túú nã cúmàni-í núú Yá Ndiöxí, dico ñá díú sã xíã<sup>n</sup> te cachí-í sá ñá túú cuèchi-í ndécú núú-gã, chi mee-gã náhá ndáá-gá te núu nása quide-í ndécú-í. <sup>5</sup>Te nchòhó vá càhá<sup>n</sup>-gá-ndó sã ñà túú cundáá ñáyiú núú Yá Ndiöxí, chi vátá sàá-gá nduu cundáá cuèchi-yu. Te na sàá nduu quixi tucu Xìtohó Jesucristú te dàvã-á<sup>n</sup> dàtúu-gá nchaa sá quidè-yu, nchaa sá ñà túú xini-ó quidè-yu vitna, te duca<sup>n</sup> dàtúu-gá nchaa nàcuáa sàni iní-yu. Te Yá Ndiöxí càhá<sup>n</sup> vãha-gá cuendá nchaa ñáyiú ní quide vãha. <sup>6</sup>Te nchòhó ñáyiú ndècu ndìhi-í ichi Xìtohó Jesucristú, càcunehe-í té Àpolós ndìhi yúhú núú-ndó dànehé

ñàhà-í xii-ndo nàcuáa cada-ndo cuendá duca<sup>n</sup> cùu-xi ìí<sup>n</sup> sá vǎha sá cúu-xí-ndó, ndìhi cuendá sá nchòhó canchicú<sup>n</sup> nihnu-ndo càda-ndo mee-ni nchaa nacuáa yòdo tnuní núu tútú Yǎ Ndiòxí. Te duca<sup>n</sup> te vá càchí-ndó sǎ ìí<sup>n</sup> tée càhá<sup>n</sup> tnúhu Yá Ndiòxí ío-gá càhnu cuu-dé dácúúxí ìngá-dé. <sup>7</sup>Te nchòhó vá càchí-ndó sǎ ío-gá cúnùu-ndo dacúúxí dǎva-gá ñáyiu chi Yá Ndiòxí ní quide-gá ní ngúndecu ndìhi-ndo nchàa sá xíní tnùní-ndó. Te mee-gǎ duca<sup>n</sup> nǐ quide-gá ¿Te ná cuendá nchòhó duca<sup>n</sup> quide cahnu-ndo mee-ndo? Te quide-ndo datná tnúhu sá méé-ndó nǐ quide-ndo dùca<sup>n</sup> ní ngúndecu ndìhi-ndo nchàa sá xíní tnùní-ndó.

<sup>8</sup>Te nchòhó quidé-ndó sǎ ñà túu tnàhí-gá ná cúmǎní-ndó núú Yǎ Ndiòxí, te quide-ndo sá ni nǐhí-ndó nchàa sá cuíní-ndó núú-gǎ ndécú ndìhi-ndo, te sànuu sá cúu-ñǎ-ndó dàtná cue tée yǐndaha ñáyiu, te nchúhú ñà túu cùu ìí<sup>n</sup>nuu ndìhi ñaha-ndí xii-ndo quǐndaha ndìhi ñaha-ndí xii-ndo ñáyiu, ite váha-ni te núu dícó ndisa sá yǐndàha-ndo ñáyiu chi tnàhá nchúhú ní tnahá ndìhi ñaha-ndí xii-ndo quǐndaha-ó-yu te núu dícó cúu-xí ìí<sup>n</sup> sá ndàá dico ñàhá! <sup>9</sup>Te yúhú quidé cuendá-í sá nchúhú cue tée ní táuchíú<sup>n</sup> Xítóhó Jesucristú cáhá<sup>n</sup> tnúhu-gá núu ñáyiu ní cachí Yǎ Ndiòxí sá cúu-ndǐ cue tée ñà túu nàndíhi sá cúu-xí dǎva-gá ñáyiu. Te ní cachí tucu-gá sá cúu-ndǐ dàtná cue ñáyiu sa ní tnahá òré cuú-xi quíhí<sup>n</sup> nacháhu cuéchi-xi, te nchaa ñáyiu cuñúhu ñàhá-yu xii-ndí sá dúcá<sup>n</sup> ndòho-ndí, te tnàhá nchaa espíritú cuñúhu ñaha-xi xii-ndí.

<sup>10</sup>Te cuendá sá xínú cuéchi-ndí núu Xítóhó Jesucristú, xǐá<sup>n</sup> cúu-ndǐ dàtná cue tée ñà túu vèdana nàndíhi sá cúu-xí ñáyiu. Te nchòhó quidé-ndó sǎ cúu-ndó ñáyiu ío túha ndècu ndìhi Xítóhó Jesucristú. Te ñáyiu càchí-yu sá nchúhú cúu-ndǐ cue tée ñà túu ndàcu cada ìí<sup>n</sup> sá cǎdá sǎ cúu-xí Yǎ Ndiòxí. Te nchòhó quidé-ndó sǎ cúu-ndó ñáyiu ío váha ndàcu quide ìí<sup>n</sup> sá sání ìní-ndó sǎ cúu-xí-gǎ. Te cue ñáyiu dàquee tǐhú ñàhá-yu xii-ndí, te nchòhó néhè-yu sá yǐnùhu núu-ndó. <sup>11</sup>Te nchúhú chi nchaa-ni nduu ío ndòho-ndí, chi xìhí-ndí docó, yìchí-ndí ndute, te ñà túu dǒó-ndǐ, te nchaa ñáyiu quide úhú ñàhá-yu xii-ndí, te ni vèhe-ndí ñà túu ndèé cáá cùndecu-ndí.

<sup>12</sup>Te ío ndòho-ndí quidé chùu<sup>n</sup>-ndí nìhí-ndí sá xéxí-ndǐ. Te cue ñáyiu xǐcuéhé ñàhá-yu xii-ndí dico xǐcá<sup>n</sup> táhú-ndǐ núu Yǎ Ndiòxí cuendá-yu, te ñà cúu tnàhí quíní ndeé ñàhá-yu xii-ndí dico quide cahnu ìní-ndí nchaa sá quidé ñàhá-yu. <sup>13</sup>Te mee-ni tnúhu cuéhé tnúhu duha càhá<sup>n</sup>-yu cuendá-ndí dico sàcahnu ìní-ndí te dāsahú-ndí-yu mee-ni tnúhu váha. Te càchí-yu sá cúu-ndǐ dàtná ìí<sup>n</sup> sá ñà túu-gǎ vèdana nàndíhi, te nchaa-ni nduu duca<sup>n</sup> càhá<sup>n</sup>-yu xǎhǎ<sup>n</sup>-yu xii-ndí.

<sup>14</sup>Te yúhú duha càhá<sup>n</sup>-í núu tútú-a dāsahú ñàhá-í xii-ndo, dico ñà díú tnúhu sá cúu càha<sup>n</sup> núu-ndó càhá<sup>n</sup>-í. Te duha càhá<sup>n</sup>-í dóho-ndo chi quide ìní-í sá sùúní dàtná déhe mee-í cúu-ndó chi ío cùu ìní ñàhá-í xii-ndo. <sup>15</sup>Te nchaa-o ndècu-o ichi Xítóhó Jesucristú vitna, dico yúhú cùu-í tée díhna nuu nǐ dǎnehé ñàhá xii-ndo nacuáa ndùu tnúhu sá càhá<sup>n</sup> nàcuáa naníhí tǎhú-ó,



núu xíã<sup>n</sup> cúu-í dàtná tătă-ndó. Te cuéi vâi vihi cue tée na quixi-güedé danèhé ñáhá-güedé xii-ndo tnúhu-gá dico ì<sup>n</sup> ði-ni yúhú cúu-í tée díhna nuu-gã ní dánèhé ñáhá xii-ndo tnúhu-gá. <sup>16</sup>Núu xíã<sup>n</sup> càhá<sup>n</sup>-í dóho-ndo sã cáncñícú<sup>n</sup> nihnu-ndo càda-ndo nchaa nacuáa quide-í.

<sup>17</sup>Te xíã<sup>n</sup> núu sa ní tendaha-í té Timúteú véxi coto ñaha-dé xii-ndo, te tée-á<sup>n</sup> ò cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítóhó Jesucristú, te tée-á<sup>n</sup> cachí tnúhu-dé xii-ndo nchaa nacuáa quide-í ndécù-í ichi-gá. Te ðiu-ni nàcuáa na càchí tnúhu-dé-á<sup>n</sup> ðiu-ni duca<sup>n</sup> quide-í nchaa xichi núú tàcá ñáyiu dàcuaha tnúhu Xítóhó Jesucristú. <sup>18</sup>Te dava nchòhó ío quide cahnu-ndo mee-ndo chi sàni iní-ndó sã vã quíxí-gã-í quixi coto ñaha-í xii-ndo. <sup>19</sup>Dico núu mee Yã Ndiòxí ná càchí-gá te ío ndìhi quixi coto ñaha-í xii-ndo, te dàvã-á<sup>n</sup> quiní-í te núu nása quide nchaa ñáyiu duca<sup>n</sup> ò xíquide càhnu mee-xi-á<sup>n</sup> ndécũ-yu ichi Xítóhó Jesucristú. Te vã cádá cuendá-í tnúhu càhá<sup>n</sup>-yu chi chùu<sup>n</sup> quidé-yu cada cuendá-í. <sup>20</sup>Te vitna yìndaha ñaha Yã Ndiòxí xii-o, te chìndee ñaha-gá xii-o quide-o nchaa sã vãha sàni iní-ó quide-o te ñã díú mèe-ni sã càhá<sup>n</sup>-ó. <sup>21</sup>Te ío chí cání iní núu ndédacàa sã vãha-gá cada-í òré ná quéxió-í núú ndécú-ndó, núu sã ténàà ñáhà-í xii-ndo àdi sã càhá<sup>n</sup> ndìhi ñaha-í xii-ndo ndìhi tnúhu vii tnúhu vãha nàcuáa cutnùní iní-ndó sã cúú iní ñáhà-í xii-ndo.

#### Ì<sup>n</sup> cuéchi càhnu vihi

**5** Te yúhú sa ní níhí ndáá-í tnúhu nàcuáa cùu ndecu-ndo,

chi ì<sup>n</sup> tée ndècu ndìhi-ndo ndeca-dé ñaná chàhá-dé. Te xíã<sup>n</sup> cúu-xí ì<sup>n</sup> cuéchi càhnu vihi, chi ndéé nchaa ñáyiu ñã túú ndècu ichi Yã Ndiòxí càchí-yu sã vã cúú tnàhí duca<sup>n</sup> càda-o. <sup>2</sup>Te nchòhó ío quide cahnu-ni-ndo mee-ndo xíndecu-ndo! íTe tàú-ndó sã cùndìyí-ndó ndixi cuéchi iní-ndó sã dúcá<sup>n</sup> cùu ndecu-ndo ni cuu! Te tée duca<sup>n</sup> quide-á<sup>n</sup> xíní ñùhu-xi sã vã dáñá-gã-ndó nihí tnáhá ndìhi ñaha-dé xii-ndo ni cùu dico ñã túú dùca<sup>n</sup> quide-ndo. <sup>3</sup>Te yúhú ñã túú ndècu ndìhi ñaha-í xii-ndo dico dàtná tnúhu sã ndécú ndìhi ñaha-í xii-ndo chi duca<sup>n</sup>-ni ò ñùhu iní ñáhà-í xii-ndo. Te yúhú càchí-í sã náchãhu tée-á<sup>n</sup> cuéchi-dé sã dúcá<sup>n</sup> quide-dé, te ðiu-ni duca<sup>n</sup> càhá<sup>n</sup>-í núú-ndó te núu ðicó ndécú ndìhi ñaha-í xii-ndo. <sup>4</sup>Te òré nátacá-ndó càhá<sup>n</sup> ndìhi-ndo Yã Ndiòxí te ðiu-ni Xítóhó Jesucristú ñã túú dàña ndéé-gá chíndèe ñaha-gá xii-ndo, te òré-á<sup>n</sup> cada-ndo nàcuáa cuení Xítóhó Jesucristú cada-ndo, te cada iní-ndó sã tnáhà-í ndécú ndìhi ñaha-í xii-ndo. <sup>5</sup>Chi tàú-xi sã tée duca<sup>n</sup> quide-á<sup>n</sup> daquèe tíhú-ndó-dé, te duca<sup>n</sup> te sácúíhná dandòho ñaha-xi xii-dé cuéi na cùu-dé, dico na sàá nduu te nduu táhú-dé cundecu-dé ndìhi Xítóhó Jesucristú.

<sup>6</sup>Te nchòhó ñã túú ndùu vãha-xi sã càchí-ndó sã ò càhnu cuu-ndo. Te xíní-ndó sã cuéi luha-ni levadùrà ná quíhu yuchi cuáha pàá dándàa-xi cuéi luha-ni nà quíhu te nihí-ni yuchi sàhá<sup>n</sup> ndoho-xi. Te duca<sup>n</sup> sàtnahá-xi cùu nchòhó chi núu ndècu ndìhi-ndo ì<sup>n</sup> ñáyiu quide sã ñã túú vãha te nchaa-ndo ñã

túú-gǎ cúú vǎha iní-ndó ndècu-ndo. <sup>7</sup>Te xini ñuhu-xi sá cǎdá-ndó dàtná quidé cuè ñáyiú quide vico pascuá, chi ñá túú chihí-yu levadurá yuchi cuáha pǎá xéxi-yu nduu quidé-yu vico-á<sup>n</sup>. Te sá quǐhu pǎá-á<sup>n</sup> cada iní-ó sǎ cúú-xí nchàa sá cuèhé sá dúhá ñí xóo cada-ndo. Te vǎ cǎdá-gǎ-ndó ñí ìi<sup>n</sup> sá cuèhé sá dúhá, te duca<sup>n</sup> te cuu-ndo ñáyiú váha chi sa ní nduu ndoo ní nduu nine iní-ndó. Te cue mbéé cue quití ní xóo cahni-güedé nduu pascuá cue quití-á<sup>n</sup> cada iní-ó sǎ cúú-güèdi datná Xítóhó Jesucristú nàcuáa ní xihí-gǎ núú cùrúxí. <sup>8</sup>Te núú xǐǎ<sup>n</sup> xíní ñuhu-xi sá vǎ cǎdá-gǎ-ndó ñí ìi<sup>n</sup> sá cuèhé sá dúhá sǎ ñí xóo cada-ndo, te ni vǎ cúhú<sup>n</sup>-gǎ iní-ndó te ni vǎ cǎdá-gǎ-ndó, te ni yùhu ni iní-ná-ndó càda-ndo mee-ni sá vǎha.

<sup>9</sup>Te tutú sá sà ní dáquixí-í ndaha-ndo ñí cachí-í sá vǎ ñihí tnáhá-ndó ndìhi cue ñáyiú ndècu ichi díí iní. <sup>10</sup>Te sá dúcá<sup>n</sup> cǎhá<sup>n</sup>-í núú tütú ní dáquixí-í ndaha-ndo te vǎ cǎní iní-ndó sǎ yùhú cǎchí-í sá vǎ cúú-gǎ tnahá tnúhu-ndo ndìhi cue ñáyiú ndècu ichi cuehé ichi duha, ndìhi ñáyiú ndècu ichi díí iní, ndìhi ñáyiú xiho nchaa sá ió ñuyúú, ndìhi ñáyiú dùhu sá ndécú ndìhi tnaha ñáyiú-xi, ndìhi ñáyiú quide cahnu sá cǎchí-yu cùu ndióxí te ñá ndàá sá ndióxí cúú-xí chi dicó cue tée ñuyúú-a ní cadúha nchaa xǐǎ<sup>n</sup>, chi núú duca<sup>n</sup> na càda-ndo vǎ tnáhá tnúhu-gǎ-ndó ndìhí-yu te xini ñuhu-xi sá vǎ cùndècu-gǎ-ndó núú ndécú-yu. <sup>11</sup>Te ñá túú dùca<sup>n</sup> quee-xi nacuáa cǎhá<sup>n</sup>-í núú tütú-í, chi yùhú cǎchí-í sá vǎ cúú tnáhá tnúhu-ndo ndìhi ñáyiú cǎchí sá ndécú ichi

Xítóhó Jesucristú te ñá ndàá sá ndécú-yu ichi-gǎ. Te núú cùú-yu ñáyiú ndècu ichi díí iní, àdi cuú-yu ñáyiú xiho nchaa sá ió ñuyúú-a, àdi cuú-yu ñáyiú quide cahnu nchaa sá cǎchí-yu cùu ndióxí te ñá ndàá chi dicó cue tée ñuyúú-a ní cadúha nchaa xǐǎ<sup>n</sup>, àdi cuú-yu ñáyiú yiti yùhu-xi, àdi cuú-yu ñáyiú quǐhu, àdi cuú-yu ñáyiú dùhu sá ndécú ndìhi tnaha ñáyiú-xi, te nchaa ñáyiú duca<sup>n</sup> cǎchí sá ndécú ichi-gǎ te ñá ndàá te duca<sup>n</sup> xǐquidé-yu, te ni vǎ cúú ñihí tnáhá-ndó ndìhí-yu caxi-ndo ndìhí-yu. <sup>12-13</sup>Te ñá díú yùhú cúú-í tée cǎhá<sup>n</sup> cuendá nchaa ñáyiú ñá túú ndècu ichi Xítóhó Jesucristú núú quide ndàá-yu àdi ñá túú quide ndàá-yu ndécú-yu, chi mee Yǎ Ndiöxí cǎhá<sup>n</sup>-gǎ te núú nása quidé-yu ndécú-yu. Dico nchòhó chi tàú-ndó càda cuendá-ndó núú nása quide cue ñáyiú ndècu ndìhi-ndo ichi Xítóhó Jesucristú. Núú xǐǎ<sup>n</sup> xíní ñuhu-xi daquee tíhú-ndó tée duca<sup>n</sup> ñá túú quide váha ndècu ndìhi-ndo-á<sup>n</sup>, te vǎ dáñá-gǎ-ndó ñihí tnáhá ndìhi ñaha-dé xii-ndo.

**Nàcuáa tàú-xi cada ñáyiú ndècu ichi Xítóhó Jesucristú te núú ñá túú ndècu ndìhi váha tnáhá-yu**

**6** Te dava nchòhó òrè ñá túú ndècu ndìhi váha tnàha-ndo te cùyii-ndo cuáhá<sup>n</sup>-ndó núú cuè tée cùchiu<sup>n</sup> ñá túú ndècu ichi Xítóhó Jesucristú sàcá<sup>n</sup> cuéchi-ndo, te ñá túú dùca<sup>n</sup> taú-xi cada-ndo chi núú cuè tée ndècu ichi-gǎ duca<sup>n</sup> tàú-ndó quǐhí<sup>n</sup>-ndó cǎcá<sup>n</sup> cuéchi-ndo. <sup>2</sup>Te nchòhó sa nàha-ndo sá ncháá ñáyiú cùu cuendá Yǎ Ndiöxí sáá nduu cǎhá<sup>n</sup>-yu te núú ní quide ndàá

nchaa dava-gá ñáyiú àdi ñá túú ní quide ndáá-yu, te nchòhó tnhá-ndó cùu-ndo ñáyiú duca<sup>n</sup> cǎhá<sup>n</sup>, te núu duca<sup>n</sup> te cutnùnì iní-ndó sǎ ndácú-ndó càda ndáá-ndó nchàa cuéchi sá ñá túú ùhú cundáá vitna ndècu-ndo ñuyíú-a. <sup>3</sup>Te nchòhó sa nàha-ndo sá ncháá ndéé cue espíritú xínú cuéchi núú Yǎ Ndiòxí sáá nduu cǎhá<sup>n</sup>-ó te núu nása quide-xi ndecu-xi. iNúu xǎ<sup>n</sup> cútñunì iní-ó sǎ úú<sup>n</sup>-gǎ ndacu-o càda ndáá-ó nchàa cuéchi sá ìó ñuyíú-a! <sup>4</sup>Te núu ìó dava-ndo ìó nása cùu ndecu-ndo te xǎnǎá-ndó, te vá quǐhí<sup>n</sup>-ndó càcá<sup>n</sup> cuéchi-ndo nǔú cuè téé ndèhe-ndo sá ñà túú ndècu-güedé ichi Yǎ Ndiòxí, dico nchòhó chi da núú cuè téé-á<sup>n</sup> cuǎhá<sup>n</sup>-ndó sàcá<sup>n</sup> cuéchi-ndo. <sup>5</sup>Te duha càhá<sup>n</sup>-í cuendá cucaha<sup>n</sup> núú-ndó chi ñá túú quide váha-ndo sǎ dúcá<sup>n</sup> quide-ndo. ¿Te náa dícó-nǎ ñá túú tnháí ì<sup>n</sup> téé cùtnunì iní-xi nàcuáa cada ndáá cuéchi-ndo ndècu ndìhi-ndo ichi Xítóhó Jesucristú-ǎ<sup>n</sup>? <sup>6</sup>Te nchòhó, ñá túú quide váha-ndo, chi dava-ndo cuǎhá<sup>n</sup>-ndó nǔú cuè téé ñá túú ndècu ichi Xítóhó Jesucristú sàcá<sup>n</sup> cuéchi-ndo cuendá dava-gá cue ñáyiú ndècu ndìhi-ndo ichi-gá.

<sup>7</sup>Te ñá túú quide váha-ndo sǎ dúcá<sup>n</sup> nàa ndìhi tnhàha-ndo te cuǎhá<sup>n</sup>-ndó sàcá<sup>n</sup> cuéchi-ndo, te váha-gá sá cadá càhnu iní-ndó cuèi nándì na càda ñaha tnhà ñáyiú-ndo xìi-ndo cuèi dùhú-yu sá ndécú ndìhi-ndo dico cada càhnu-ni iní-ndó. <sup>8</sup>Dico nchòhó chi ñá túú quide càhnu iní-ndó chi da uu<sup>n</sup>-gǎ ñá túú quide váha-ndo sàcúú-xí tnhà ñáyiú-ndo, chi cùu ùhú iní-ndó-yu, te dùhu-ndó-yu, te

ndéé méé-ndó nàcuáa ndècu-ndo ichi Xítóhó Jesucristú duca<sup>n</sup> quide tnhàha-ndo.

<sup>9</sup>Te nchòhó sa nàha-ndo sá ncháá ñáyiú ndècu ichi cuehé ichi duha vá ndúú tǎhǔ-yu cundecú-yu núú ndécú Yǎ Ndiòxí táxí tñunì-gá, núu xǎ<sup>n</sup> vá cǎní iní-ndó sǎ ñáyiú-á<sup>n</sup> nduu tǎhǔ-yu cundecú-yu ndìhi-gá. Te ni cuè ñáyiú ndècu ichi díí iní, te ni cuè ñáyiú quide càhnu nchaa sá càchí-yu cùu ndiòxí te ñá ndáa chi dícó cue téé ñuyíú-a ní cadúha nchaa xǎ<sup>n</sup>, te ni cuè téé càhá<sup>n</sup> ndìhi ñadìhí te ñá díú ñadìhí-güedé cúú-yu, te ni cuè ñáyiú dǐhí càhá<sup>n</sup> ndìhi téé te ñá díú yǐi-yu cùu-güedé, te ni cuè téé càhá<sup>n</sup> ndìhi tnhàa téé-xi, <sup>10</sup>te ni cuè ñáyiú dùhu, te ni cuè ñáyiú xìho sá ndécú ndìhi tnhà ñáyiú-xi, te ni cuè ñáyiú quǐhu, te ni cuè ñáyiú càhá<sup>n</sup> úhú, te ni cuè ñáyiú dànícuehé tnhà ñáyiú-xi te dùhu ñahá-yu, te ni ì<sup>n</sup> cue ñáyiú duha xǐquide vá ndúú tǎhǔ-yu cundecú-yu núú ndécú Yǎ Ndiòxí táxí tñunì-gá. <sup>11</sup>Te dava nchòhó duca<sup>n</sup> ní xóo cada-ndo ni cùu, te vitna ní cuu-ndo ñáyiú sa ní nduu ndoo ní nduu nine iní-xi, te ní cuu-ndo ñáyiú cùu cuendá Yǎ Ndiòxí, te ní cuu tucu-ndo ñáyiú ñá túú-gǎ cuéchi-xi ndècu núú-gǎ. Te duca<sup>n</sup> ní quide ñaha Yǎ Ndiòxí xii-ndo sǎ váha sá cuendá Xítóhó Jesucristú, te ní ngúndecu ndìhi-ndo Espíritú Yǎ Ndiòxí.

#### Nàcuáa ndùu cuendá yiqui cùñú-ó

<sup>12</sup>Te càchí ñáyiú sá ncháá sǎ sání iní-ó cuu cada-o, te ndáá càhá<sup>n</sup>-yu dícó-ni sá ñá ncháá cùu-xi sá váha sá cúú-xí-ó. Te núu cuíní nchaa sá

sání iní-ó-ǎ<sup>n</sup> taxi tnùnì ñáhá-xí te vǎ cádá-ó. <sup>13</sup>Te nchòhó sa xìnì-ndó sǎ ncháá sǎ xéxí-ó cuǎnguee-xi xití-ó, te xití-ó nǐ cuáha tnàhí-xi sǎ cúhú<sup>n</sup> ncháa sǎ cáxí-ó, dico xití-ó ndìhi ncháa sǎ xéxí-ó chi naa-xi. Te Xítóhó Jesucristú néhé cuendá-gá yìqui cuñú-ó, te duca<sup>n</sup> yìqui cuñú-ó cùu-xi cuendá-gá, te ñá túú ní cuáha yìqui cuñú-ó sǎ cùndècu-xi ichi díí iní. <sup>14</sup>Te dàtná ní quide Yá Ndiòxí ní dándótó-gǎ Xítóhó Jesucristú duca<sup>n</sup> càda ñaha-gá xii nchoo tùcu chi dandòto ñaha-gá xii-o nǔu na cùú-ó, chi ndàcu-gá quidé-gǎ ncháa sǎ vǎha.

<sup>15</sup>Te nchòhó sa nàha-ndo sǎ yìqui cuñú-ó cùu-xi cuendá Xítóhó Jesucristú chi ìi<sup>n</sup>-ni cùu-o ndìhi-gá, núu xǐǎ<sup>n</sup> ñá túú tnàhí ndùu váha-xi cáhá<sup>n</sup> ndìhi-o ñáyiú ndècu ichi díí iní, chi yìqui cuñú-ó cùu-xi cuendá Xítóhó Jesucristú, te núu duca<sup>n</sup> na càda-o te cada iní-ó sǎ cuendá-ñá ñáyiú-ǎ<sup>n</sup> cúú yìqui cuñú-ó, núu xǐǎ<sup>n</sup> ñá túú tnàhí ndùu váha-xi duca<sup>n</sup> càda-o. <sup>16</sup>Te sa xìnì-ndó sǎ nǔu ìi<sup>n</sup> tée na càhá<sup>n</sup> ndìhi-dé ìi<sup>n</sup> ñadìhí ndécú ichi díí iní te cada iní-ó sǎ íí<sup>n</sup>-ná yìqui cuñú cúú-yu. Te duca<sup>n</sup> càhá<sup>n</sup>-xi núú tütú Yǎ Ndiòxí núú càchí-xi: “Í<sup>n</sup> tée na càhá<sup>n</sup> ndìhi-dé ìi<sup>n</sup> ñadìhí te ìi<sup>n</sup>-ná yìqui cuñú cúú-yu”, duha càchí-xi. <sup>17</sup>Te duca<sup>n</sup> sǎtnahá-xi cùu ncháa ñáyiú tnàhá tnúhu ndìhi Xítóhó Jesucristú, chi ìi<sup>n</sup>-ná cúú-yu ndìhi-gá.

<sup>18</sup>Te núu xǐǎ<sup>n</sup> càhá<sup>n</sup>-í dóho-ndo sǎ vǎ cùndècu-ndo ichi díí iní, chi núu duca<sup>n</sup> na càda-ndo te ñá túú tnàhí sǎ vǎha cùu-xi sǎ cúú-xí yìqui cuñú-ndó chi ío dàcuíta nihnu-xi yìqui cuñú-ndó. Te ncháa dava-gá

sǎ cuèhé sǎ dúhá ñà túú quide-xi yìqui cuñú-ndó dàtná quidé xǐǎ<sup>n</sup>. <sup>19</sup>Te nchòhó sa cùtnuní iní-ndó sǎ yìqui cuñú-ndó cùu-xi datná ìi<sup>n</sup> vehe núú ndécú Espíritú Yǎ Ndiòxí. Te duca<sup>n</sup> sǎtnahá-xi cùu yìqui cuñú-ndó chi ndècu-ndo ndìhi Espíritú-gá. Te mee-gǎ ní taxi-gá Espíritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yá Ndiòxí cúú cuendá ñáhá-gǎ xii-ndo. <sup>20</sup>Te duca<sup>n</sup> cùu-ndo ñáyiú cùu cuendá Yǎ Ndiòxí chi Xítóhó Jesucristú ní nacháhu-gá ncháa yíca cuèchi-ndo. Te núu xǐǎ<sup>n</sup> xíní ñùhu-xi sǎ ñìhí ní ndúú-ndó càda-ndo nacuaá cuu càhnu Yá Ndiòxí, te duca<sup>n</sup> tàú-xi cada-ndo chi espíritú-ndó ndìhi yìqui cuñú-ndó cùu-xi cuendá-gá.

#### Sáhú sǎ cúú-xí ñáyiú ní tnándaha

**7** Te ní quexio tutú sǎ nǐ dáquixí-ndó ndàha-í, te vitna na càchí tnúhu-í xii-ndo cuendá tnúhu càhá<sup>n</sup>-ndó nǔu tütú-ndó. Te váha cada-xi te núu vǎ cándèca tée ñadìhí, te duca<sup>n</sup>-ni vǎha cada-xi te núu ñáyiú òhí vǎ cándècá-yu tée. <sup>2</sup>Te dicó-ni sǎ nǔu duca<sup>n</sup> na càda-ndo te dava-ndo càni iní-ndó cùndecu-ndo ichi díí iní. Núu xǐǎ<sup>n</sup> xíní ñùhu-xi sǎ ncháá cuè tée ndi díí<sup>n</sup> cùndecu ñadìhí-güedé, te duca<sup>n</sup>-ni tùcu ncháa cue ñáyiú òhí ndi díí<sup>n</sup> cùndecu yíi-yu. <sup>3</sup>Te càchí tnúhu-í xii-ndo sǎ ncháá cuè tée vǎ cúú càchí-güedé sǎ vǎ cúú càhá<sup>n</sup> ndìhi-güedé ñadìhí-güedé, te diu-ni duca<sup>n</sup> cuè ñáyiú òhí tucu, vǎ cúú càchí-yu sǎ vǎ cúú càhá<sup>n</sup> ndìhi-yu yíi-yu. <sup>4</sup>Te ncháa cue ñáyiú òhí chi ñá díú mèe-ní-yu cùu cuendá-yu

yiqui cùñú-yu chi tnàhá cúú cuendá yíi-yu, te duca<sup>n</sup>-ni nchàa cue tée tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadìhí-güedé. <sup>5</sup>Te cue tée vá cúú càchí-güedé sá vǎ cúú cǎhá<sup>n</sup> ndìhí-güedé ñadìhí-güedé. Te ni cuè ñáyiú dìhí vá cúú càchí-yu sá vǎ cúú cǎhá<sup>n</sup> ndìhí-yu yíi-yu. Àdi te núú ní ndatnúhu-yu sá vǎ dúcá<sup>n</sup> càdá-yu ìi<sup>n</sup> úú nduu cuendá sá cuìní-yu ío cǎhá<sup>n</sup> ndìhí-yu Yá Ndiòxí, dico nà yáha núú ná daha nduu duca<sup>n</sup> ní ndatnúhu-yu sá vǎ dúcá<sup>n</sup> càdá-yu te naníhí tnàhá tùcú-yu, chi núú ñáhá te cudana te vá cuácàhnu iní-yu te sácúíhna dacàhá<sup>n</sup> ñáhá-xí xii-yu cadá-yu sá ñà túú tàú-yu cadá-yu.

<sup>6</sup>Te tnúhu cǎhá<sup>n</sup>-í-a quèe-xi sá tée ndìhí ñadìhí cuu candeca tnàhá-yu dico ñá túú quìde yica-í sá dúcá<sup>n</sup> càdá-yu. <sup>7</sup>Te yúhú sání iní-í sá núu dicó sá cúú te nchaa-ndo cùndecu-ndo datná ndécù-í, dico ñáhá chi mee Yá Ndiòxí ní cachí-gá nàcuáa nduu táhú-ó ìi<sup>n</sup> ìi<sup>n</sup>-o cundecu-o, chi dava-o ní cutáhú-ó núú-gǎ sá cùndècu ñadìhí-ó te dava-o ñáhá. <sup>8</sup>Te càchí tnúhu-í xii nchòhó cue tée vátá nihí-gá ñadìhí-xi sá vǎha-gá sá núu vá cùndècu ñadìhí-ndó dàtná yúhú. Te duca<sup>n</sup>-ni nchòhó cue ñáyiú dìhí ñáyiú vátá nihí-gá yii-xi sá vǎha-gá sá núu vá cùndècu yii-ndo. Te diu-ni duha cǎhá<sup>n</sup>-í sá cúú-xí nchàa nchòhó ñáyiú dìhí ní quendóo quèe sá vǎha-gá sá núu vá cándèca-gá-ndó tée. <sup>9</sup>Te càchí tnúhu-í xii nchaa-ndo sá núu xito-ndo sá vǎ cùndèe iní-ndó cùndecu mee-ndo te vǎha-gá sá núu

tnándaha-ndo, te ñá díú sá mée-ní càni cuehé cani duha iní-ndó cùndecu-ndo.

<sup>10</sup>Te nchaa nchòhó ñáyiú sa ní tnándaha cǎhá<sup>n</sup>-í dóho-ndo, te ñá díú mée-í duha càhu iní-í cǎhá<sup>n</sup>-í dóho-ndo chi Xítóhó Jesucristú duca<sup>n</sup> dàcahu iní ñáhá-gǎ xii-í, chi mee-gǎ cuìní-gá cada-ndo nàcuáa na cǎhá<sup>n</sup>-í-a. Te nchaa nchòhó cue ñáyiú dìhí cǎhá<sup>n</sup>-í dóho-ndo sá vǎ dáñá-ndó yii-ndo. <sup>11</sup>Te núú ìo dava-ndo sá ní dáñá-ndó yii-ndo, te xini ñuhu-xi sá vǎ cándèca-gá-ndó tée, chi cundecu mee-ñá-ndó àdi núú ñáhá te naquehe<sup>n</sup> tucu-ndo tée ní cuu yii-ndo. Te nchaa nchòhó cue tée ndècu ñadìhí-xi cǎhá<sup>n</sup>-í dóho-ndo sá vǎ dáñá-ndó ñáyiú cùu ñadìhí-ndó.

<sup>12</sup>Te tnúhu na cǎhá<sup>n</sup>-í-a cùu-xi sá ní sani iní mée-í te ñá díú tnúhu sá ní cachí Xítóhó Jesucristú cǎhá<sup>n</sup>-í cúú-xí. Te núu dava nchòhó cue tée ndècu ichi Xítóhó Jesucristú ndécá-ndó ñáyiú dìhí ñáyiú ñá túú ndècu ichi-gá, te vá dáñá-ndó-yu te núu cùu vǎha iní-yu ndèca ñáhá-yu xii-ndo. <sup>13</sup>Te núu dava nchòhó cue ñáyiú dìhí ñáyiú ndècu ichi Xítóhó Jesucristú ndécá-ndó cuè tée ñá túú ndècu ichi-gá te vá dáñá-ndó-güedé te núu cùu vǎha iní-güedé ndécá ñàha-güedé xii-ndo. <sup>14</sup>Te núu ìi<sup>n</sup> tée ñá túú sàndáa iní-dé Xítóhó Jesucristú te ñadìhí-dé sàndáa iní ñáhá-á<sup>n</sup> xii-gá, te tée-á<sup>n</sup> ní cuu-dé ìi<sup>n</sup> tée sa ní cuyatni tnahá tnúhu ndìhí ñàha xii-gá sá cuendá ñadìhí-dé. Te duca<sup>n</sup> sàtnahá-xi cùu tucu ñadìhí ñá túú sàndáa iní ñáhá xii Xítóhó Jesucristú te yii-a<sup>n</sup> sàndáa iní ñáhá-dě xii-gá,

te ñaha-á<sup>n</sup> sa ní cuyatni tnahá tnúhu-a<sup>n</sup> ndihi-gá sá cuendá yii-a<sup>n</sup>, te ñu-ni duca<sup>n</sup> sátnahá-xi cùu cue landú-yu chi sa ní cuyatni tnahá tnúhu-güexi ndihi-gá. Te núu vá dúcá<sup>n</sup> cùu te cue landú-yu-á<sup>n</sup> ño xica cùndecu-güexi núu-gă. <sup>15</sup>Te núu ñi<sup>n</sup> téé ñá túú sàndáá iní ñáhá xii Xítóhó Jesucristú cuiní-dé dañá tñaha-dé ndihi ñadìhí-dé ñaha sàndáá iní ñáhá xii Xítóhó Jesucristú, te ñu-ni na càda-dé nàcuáa sàni iní-dé. Te ñu-ni duca<sup>n</sup> tucu te núu ñadìhí ñaha ñá túú sàndáá iní ñáhá xii Xítóhó Jesucristú cuiní-a<sup>n</sup> dañá-a<sup>n</sup> téé sàndáá iní ñáhá xii-gá, téé cùu yii-a<sup>n</sup> te ñu-ni na càda-a<sup>n</sup> nacuáa sàni iní-a<sup>n</sup>. Chi téé sàndáá iní ñáhá xii Xítóhó Jesucristú ñá túú tàù-dé cada yica-dé ñadìhí-dé cundecu ndihi ñaha-a<sup>n</sup> xii-dé te núu ñá túú cuiní-a<sup>n</sup>. Te ñu-ni duca<sup>n</sup> ñadìhí ñaha sàndáá iní ñáhá xii-gá ñá túú tàù-a<sup>n</sup> cada yica-a<sup>n</sup> cundecu ndihi ñaha yii-a<sup>n</sup> xii-a<sup>n</sup> te núu ñá túú cuiní-dé cundecu ndihi ñaha-dé xii-a<sup>n</sup>, chi Yá Ndiöxí cuiní-gá sá ncháá nchò ñáyiu ndècu ichi-gá cundecu váha-o vă nàà-ó. <sup>16</sup>Chi cue téé sàndáá iní tnúhu Xítóhó Jesucristú ñá túú cùnuni iní-güedé te núu ndacu-güedé canu ichi-güedé ñadìhí-güedé ichi-gá àdi ñáhá te núu ñá túú sàndáá iní ñáhă-yu xii-gá, te duca<sup>n</sup>-ni cuè ñáyiu ñihí sàndáá iní tnúhu Xítóhó Jesucristú ñá túú cùnuni iní-yu te núu ndacú-yu canu ichí-yu yii-yu ichi-gá àdi ñáhá te núu ñá túú sàndáá iní ñáhá-güedé xii-gá.

<sup>17</sup>Te duha na càchí tnúhu-í xii-ndo, nchaa chiù<sup>n</sup> ní nduu

táhú-ndó núú Yá Ndiöxí quidé-ndó ndèé cùtnahá ní cáhá<sup>n</sup> ñáhá-gă xii-ndo ní natuha-ndo ìchi-gá te ñu-ni chiù<sup>n</sup>-á<sup>n</sup> cada-ndo cùndecu-ndo. Te nchaa xichi núú tàcá ñáyiu dàcuaha tnúhu-gá ñu-ni duha càhá<sup>n</sup>-í dóho-yu. <sup>18</sup>Te nchaa cue téé ndècu seña ñii-xi dàtná ní cachi ndíi Moisés, cue téé ní cáhá<sup>n</sup> Yá Ndiöxí ndécú ìchi-gá, te ñu-ni duca<sup>n</sup> cùnduu-güedé cundecu-güedé, te nchaa cue téé ñá túú ndècu seña ñii-xi ní cáhá<sup>n</sup>-gá cundecu ichi-gá, ñu-ni duca<sup>n</sup> cùnduu-güedé cundecu-güedé vá cuăha-güedé seña ñii-güedé. <sup>19</sup>Te ñi<sup>n</sup>-ni cùu-xi cuéi na cuăha-o seña ñii-o àdi vá cuăha-o. Te sá ño-gá xíní ñuhu-xi cada-o xíă<sup>n</sup> cúú-xí sá cádá-ó nchaa nacuáa cuiní Yá Ndiöxí. <sup>20</sup>Chi xini ñuhu-xi sá cùndècu-ni-o datná ndécú-ó cùtnahá ní cáhá<sup>n</sup> ñáhá Yá Ndiöxí xii-o ní ngùndecu-o ìchi-gá. <sup>21</sup>Te núu cùu-ndo ñáyiu ñá túú tñahí dàná quee núú chíú<sup>n</sup> pàtróó<sup>n</sup>-xi cùtnahá ní cáhá<sup>n</sup> ñáhá Yá Ndiöxí xii-ndo, te ñá túú nă cani iní-ndó, dico núu dañá ñaha patróó<sup>n</sup>-ndó quèe-ndo núú chíú<sup>n</sup>-ndó te váha-ni quee-ndo núú chíú<sup>n</sup>-ndó. <sup>22</sup>Te sáta ní cáhá<sup>n</sup> ñáhá Xítóhó Jesucristú xii nchòhò ñáyiu duca<sup>n</sup> ñà túú tñahí dàná quee núú chíú<sup>n</sup> pàtróó<sup>n</sup>-xi-á<sup>n</sup>, te ní cuu-ndo dàtná ñáyiu dàná quèe núú chíú<sup>n</sup> pàtróó<sup>n</sup>-xi sá cúú-xí-gă, te duca<sup>n</sup> chi ñá túú-gă ndécú-ndó ìchi cuehé ichi duha. Te nchòhò ñáyiu dàná quèe núú chíú<sup>n</sup> pàtróó<sup>n</sup>-xi cùu-ndo datná ñáyiu ñá túú tñahí dàná quee núú chíú<sup>n</sup> pàtróó<sup>n</sup>-xi sá cúú-xí Xítóhó Jesucristú, te duca<sup>n</sup> chi xinu cuechi-ná-ndó

núu-gă. <sup>23</sup>Te Yá Ndiöxí ní nduu cuendá ñáhá-gă xii-o chi Xítóhó Jesucrístú ní nacháhu-gá nchaa yíca cuèchi-o sá ndécú núu Yá Ndiöxí ní cùu, te vá dáñá-ndó sá tnàha ñáyiundu ndatuhú iní ñáhá-yu xii-ndo vǎ cúnú cuèchi-ndo núu Xítóhó Jesucrístú nàcuáa tàu-xi cunduu. <sup>24</sup>Te núu xíǎ<sup>n</sup> càchí tnúhu-í xii nchaa nchòhó ñáyiundu ndècu ndìhi-í ichi Xítóhó Jesucrístú sá cùndècu-ni-ndo datná-ni ndècu-ndo ndéé cùtnàhá ní cáhá<sup>n</sup> ñáhá-gă xii-ndo, te ðiu-ni duca<sup>n</sup> cùndecundu ichi-gă.

<sup>25</sup>Te càchí tnúhu tucu-í xii-ndo sá Xítóhó Jesucrístú ñá túú càchí tnúhu-gă xii-í núu nása cáhá<sup>n</sup>-í cuendá nchaa ñáyiundu vátá tnàndaha-gă. Te duha sàni iní-í cáhá<sup>n</sup>-í cuendá-yu, te nchòhó cuu quíndáá iní-ndó tnúhu càhá<sup>n</sup>-í chi Xítóhó Jesucrístú chíndèe chítúu ñaha-gă xii-í. <sup>26</sup>Te yúhú càchí-í sá sá cuendá nchaa tnúndòhó tnúhu ndàhú ío ñuyíu-a vitna, te váha-gă sá ncháá ñáyiundu te núu nása xíndecú-yu te duca<sup>n</sup>-ni na cùndecú-yu. <sup>27</sup>Te nchaa cue téé ndècu ñadìhí-xi te duca<sup>n</sup>-ni na cùndecú-güedé ndìhí-yu, te nchaa cue téé ñá túú ñadìhí-xi te duca<sup>n</sup>-ni na cùndecú-güedé vá ndúcú-güedé ñadìhí-güedé. <sup>28</sup>Dico nchaa cue téé na ndècu ñadìhí-xi te ñá díú ì<sup>n</sup> cuèchi cùu-xi sá dúcá<sup>n</sup> ná ndècu-güedé ñadìhí-güedé, te ðiu-ni duca<sup>n</sup> cùu tucu cue ñáyiundu ðìhí te núu na ñìhí-yu yíi-yu chi ñá díú ì<sup>n</sup> cuèchi cùu-xi sá dúcá<sup>n</sup> ñìhí-yu yíi-yu. Te núu cue téé na ñìhí-güedé ñadìhí-güedé te nándi ndohó-yu cùndecú-yu ñuyíu-a, te

núu xíǎ<sup>n</sup> duha càhá<sup>n</sup>-í cuendá sá vǎ ndúcú-güedé ñadìhí-güedé cuendá sá vǎ ndòhò-yu.

<sup>29</sup>Te nchaa nchòhó ñáyiundu ndècu ndìhi-í ichi Xítóhó Jesucrístú na càchí tnúhu-í xii-ndo sá ñá túú-gă vǎi nduu cumání te quixi tucu Xítóhó Jesucrístú, núu xíǎ<sup>n</sup> xíní ñùhu-xi sá ndéé vitna ngüíta nchaa cue téé ndècu ñadìhí-xi cada-güedé chi<sup>n</sup> Xítóhó Jesucrístú, te cada-güedé dátá sá ñá túú ñadìhí-güedé. <sup>30</sup>Te nchaa ñáyiundu ndìhú iní-xi te na càda-ní-yu sá ñá túú ndìhú iní-yu cadá-yu chi<sup>n</sup> Yá Ndiöxí. Te nchaa ñáyiundu cùdíí iní-xi te na càda-ní-yu sá ñá túú cùdíí iní-yu cadá-yu chi<sup>n</sup>-gă, te nchaa ñáyiundu ndècu ndìhi nándi sá ndécú ndìhi te na càda-ní-yu sá ñá túú ñá ndécú ndìhí-yu cadá-yu chi<sup>n</sup>-gă. <sup>31</sup>Te nchaa ñáyiundu nèhe chi<sup>n</sup> nchaa sá ío ñuyíu-a te na càda-ní-yu cuendá sá ñá túú ñá néhé chi<sup>n</sup>-yu cadá-yu chi<sup>n</sup> Yá Ndiöxí, chi nchaa sá ío ñuyíu-a sa ñùhu-xi ichi cuáhá<sup>n</sup>-xi núu ndìhí ñìhnu-xi.

<sup>32</sup>Te cuíní-í sá vǎ cúhú<sup>n</sup> ñì-ndó nándi sá ío ñuyíu-a, te ni ñá túú tnàhí ná cani iní-ndó cùndecundu, chi nchaa cue téé ndècu ichi Xítóhó Jesucrístú xíndecú mee ío ñùhu iní-güedé cada-güedé chi<sup>n</sup>-gă nàcuáa cudìu-güedé núu-gă. <sup>33</sup>Te nchaa cue téé sa ndècu ñadìhí-xi cue téé ndècu ichi-gă ñùhu iní-güedé nàcuáa cada-güedé cùndecú-güedé ñuyíu-a cuendá duca<sup>n</sup> cùdiu-güedé núu ñadìhí-güedé. <sup>34</sup>Te ðiu-ni duca<sup>n</sup> cùu tucu cue ñáyiundu ðìhí chi ñá túú ì<sup>n</sup>-ni cuu ñáyiundu sa ndècu yíi-xi ndìhi ñáyiundu vátá cùndecú-gă yíi-xi, chi

ñáyiú ndècu ichi Xítohó Jesucristú ñá túú ndèca tée ío ñùhu iní-yu cadá-yu chiú<sup>n</sup>-gá nàcuáa ñihí ní ndúú-yu cundecu yiñùhú-yu núú Yá Ndiòxí, dico cue ñáyiú ðihí ndécá tée ndècu ichi-gá ío ñùhu iní-yu nàcuáa cundecú-yu ñuyíú-a cuèndá cudúú-yu núú yíí-yu.

<sup>35</sup>Te duha càhá<sup>n</sup>-í cuèndá cúú-xí ì<sup>n</sup> sá vâha xii-ndo, te cudúú núú tnáhá-ndó, te cuu-ndo ñáyiú cada ndáá núú Xítohó Jesucristú, te mee-ni-gã cuhu<sup>n</sup> iní-ndó. Te ñá díú sã dúhá càhá<sup>n</sup>-í te quide yica-í sá cadá-ndó nàcuáa càhá<sup>n</sup>-í.

<sup>36</sup>Te núú ío dava-ndo sàni iní-ndó sã ñà túú ndùu váha-xi sá ìo cuu sacuéhé ðèhe yoco-ndo cundecú-yu ña, te núú sàni iní-ndó sã vâha-gá candecá-yu tée te cada-ndo nàcuáa sàni iní-ndó, chi ñá díú ì<sup>n</sup> cuéchi cùu-xi. <sup>37</sup>Te núú dava-ndo ndècu ðèhe yoco-ndo, te vá yõ ì<sup>n</sup> cada yica ñaha xii-ndo sá cándecá-yu tée. Te núú mee-ndo sàni váha iní-ndó nàcuáa cada-ndo, te núú vá dásá<sup>n</sup>-ndó ðèhe yoco-ndo càndeca ñaha tée te quide váha-ndo sã dúcá<sup>n</sup> quide-ndo. <sup>38</sup>Te nchaá ñáyiú dàsa<sup>n</sup> ðèhe yoco-xi càndeca ñaha tée te váha-ni quidé-yu, te nchaá ñáyiú ñá túú dàsa<sup>n</sup> ðèhe yoco-xi càndeca ñaha tée te váha-gá tucu quidé-yu sá dúcá<sup>n</sup> quidé-yu.

<sup>39</sup>Te nchaá ñáyiú ðihí ndécú yìi-xi xini ñuhu-xi sá cundècu-ní-yu ndìhi yíí-yu nini ndècu vívú-güedè chi duca<sup>n</sup> càhá<sup>n</sup> tnúhu sá dãnèhé ñáhá xii-o nacuáa cada-o cundecu-o, dico núú na cùú-güedé te cuu naquehé<sup>n</sup>-yu ingá tée candecá-yu ðicó-ni sá ðiú-ni tée ndècu ichi Xítohó Jesucristú. <sup>40</sup>Te yúhú sání

iní-í sá ìo-gá váha cundecú-yu te núú vá nánducú-yu ingá tée candecá-yu, te duha càhá<sup>n</sup>-í chi Espíritú Yá Ndiòxí duca<sup>n</sup> dàcahu iní ñáhá-xí xii-í càhá<sup>n</sup>-í.

**Cuèndá nchaá sá nchító-ó sãñaha ñáyiú ndùu táhú nchaá sá càchí-yu cùu ndiòxí**

**8** Te vitna na càhá<sup>n</sup>-í cuèndá nchaá sá nchító-ó sãñaha ñáyiú ndùu táhú nchaá sá càchí-yu cùu ndiòxí te ñá ndáá chi ðicó ndaha cue tee ñuyíú-a ní cuáha nchaá xíá<sup>n</sup>. Te nchoo sa cùtnuní váha iní-ó cuèndá nchaá xíá<sup>n</sup>, ðicó-ni sá cuèndá nchaá sá cùtnuní váha iní-ó xíá<sup>n</sup> quidé càhnu-o mee-o, dico núú cùu iní-ó tnàha ñáyiú-o te canu ichi-ò-yu ichi váha. <sup>2</sup>Te núú dava-ndo sàni iní-ndó sã tũha-ndo dico cùu-ndo ñáyiú vátá cùtũha-gá nàcuáa tàú-xi cunduu. <sup>3</sup>Te núú nchòhó cúú iní-ndó Yá Ndiòxí te mee-gã càhá<sup>n</sup>-gá sá cúú-ndó ñáyiú cùu cuendá-gá.

<sup>4</sup>Te vitna na càchí tnúhu-í xii-ndo nàcuáa ndùu cuendá nchaá sá nchító-ó sãñaha ñáyiú ndùu táhú nchaá sá càchí-yu cùu ndiòxí te ñá ndáá chi ðicó ndaha cue tée ñuyíú-a ní cuáha nchaá xíá<sup>n</sup>. Te nchoo cùtnuní iní-ó sã ncháá sã càchí ñáyiú cùu ndiòxí cadũha-yu ñuyíú-a ñá túú cùu-xi ndiòxí, chi ì<sup>n</sup> ðii díí-ni Yá Ndiòxí ndécú. <sup>5</sup>Te cue ñáyiú ñuyíú-a càchí-yu sá cuèi andiú te cuèi ñuyíú-a ndècu titní ndiòxí. Te ndáá sá ndèni ní cuu ndècu espíritú sá càchí ñáyiú cùu ndiòxí te ñá ndáá sá ndiòxí cúú-xí, te nchaá xíá<sup>n</sup> táxi tnuní ñáhá-xí xii-yu. <sup>6</sup>Te nchoo cùtnuní ndáá iní-ó sã ì<sup>n</sup> ðii



díí-ni Yá Ndiöxí ndécú te diu-gá cúú-gă Tătá-ó, te nchoo cùu-o ñáyiú cùu cuendá-gá. Te diu-ni mee-gă ní táúchíú<sup>n</sup>-gă ní cuáha nchaa sá ló ñuyíú-a, te cùtnuní tucu iní-ó sá ì<sup>n</sup>dii díí-ni Xítóhó Jesucristú ndécú, te Yaá-á<sup>n</sup> ñí quide-gá nchaa chiú<sup>n</sup> ní táhú Dütú Ndiöxí ní cadúha-gá nchaandí túhú sá ló ñuyíú. Te diu-ni mee Xítóhó Jesucristú quidé ndècu-o ichi-gá vitna.

<sup>7</sup>Te ñá ncháá nchòhó ñáyiú ndècu ichi Xítóhó Jesucristú cùtnuní iní-ndó nàcuáa ndùu tnúhu cáhá<sup>n</sup>-í. Chi sa ní cáa<sup>n</sup>-ndo quide cahnu-ndo nchaa sá cächí-yu cùu ndiöxí ní cùu. Te cuendá xǎ<sup>n</sup> nùu nàquehe<sup>n</sup>-ni-ndo nchaa sá nchító-ó ndùu táhú nchaa sá cächí-yu cùu ndiöxí-á<sup>n</sup> xéxí-ndó, te sàni-ni iní-ndó sá quidé cahnú-ndo nchaa sá cächí-yu cùu ndiöxí-á<sup>n</sup> te ñá ndàá sá ndiöxí cúú-xí. Te núu sàni iní-ndó sá ñà túú vâha caxi-ndo sá dúcá<sup>n</sup> ndùu táhú-xi-á<sup>n</sup> te xèxi-ndo te xǎ<sup>n</sup> ñá túú cùu váha iní-ndó cuendá sá dúcá<sup>n</sup> quide-ndo. <sup>8</sup>Te ñá díú ncháa sá xéxí-ó quide-xi cudíu-o núú Yă Ndiöxí, chi ì<sup>n</sup>-ni quide-xi cuéi na caxi-o àdi vá caxí-ó chi ni ì<sup>n</sup> sá caxí-ó vă chíndèe ñaha-xi cudíu-o núú Yă Ndiöxí. Te cuéi vá caxí-ó dico ñá díú xǎ<sup>n</sup> cada sá vă cùdúu-o núú-gă. <sup>9</sup>Te cuu-ni caxi-ndo ncháa nání nihí-ndó. Te dicó-ni sá càda cuendá-ndó sá ñà díú cuendá sá xéxí-ndó-á<sup>n</sup> cuíta nihnu dava ñáyiú ndècu ndihi-ndo ichi Xítóhó Jesucristú cadá-yu nándí sá cadă-yu nàcuáa vá cúú vâha iní Yă Ndiöxí chi ñáyiú-á<sup>n</sup> ñà túú cùtnuní iní-yu. <sup>10</sup>Te nchòhó ñáyiú xiní váha cuendá nchaa sá cächí-yu

cùu ndiöxí, te núu na quèhí<sup>n</sup>-ndó nùú ndécú ncháa xía<sup>n</sup> te ngóo-ndo caxi-ndo nchaa sá ñí cutáhú-xi, te quini ñáyiú ndècu ndihi-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa sá dúcá<sup>n</sup> cächí-yu cùu ndiöxí-á<sup>n</sup>, te cuéi sàni iní-yu sá ñà túú quide váha-ndo sá dúcá<sup>n</sup> quide-ndo te cudana te cada yicá-yu caxí-yu tnàhá-yu nchaa sá dúcá<sup>n</sup> ñí nduu táhú nchaa sá cächí-yu cùu ndiöxí-á<sup>n</sup> te ñá ndàá sá ndiöxí cúú-xí. <sup>11</sup>Te núu duca<sup>n</sup> cùtnuní iní-ndó nàcuáa ndùu cuendá nchaa xǎ<sup>n</sup> te duca<sup>n</sup> quide-ndo, te sá dúcá<sup>n</sup> quide-ndo-á<sup>n</sup> te dàcuíta nihnu-ndo dâva-gá ñáyiú ndècu ndihi-ndo ichi Xítóhó Jesucristú, ñáyiú vátá cùtnuní-gá iní-xi nàcuáa ndùu cuendá nchaa xǎ<sup>n</sup>, te diu cuendá tnàhá ñáyiú-á<sup>n</sup> ñí xíhí Xítóhó Jesucristú. <sup>12</sup>Te sá dúcá<sup>n</sup> quide-ndo-á<sup>n</sup> cúú-xí ì<sup>n</sup> cuéchi núú Xítóhó Jesucristú, chi quide-ndo nacuáa xínu iní-yu cadá-yu ì<sup>n</sup> sá sání iní-yu ñá túú vâha, núu xǎ<sup>n</sup> ñá túú quide váha-ndo sá cúú-xí-yu. <sup>13</sup>Te núu yúhú cùtnuní iní-í sá sá cuendá ì<sup>n</sup> sá caxí-í te ngóo ì<sup>n</sup> ñáyiú ndècu ndihi-í ichi Xítóhó Jesucristú cadá-yu ì<sup>n</sup> sá vă cúú vâha iní Yă Ndiöxí, te váha-gá sá vă caxí-gă-í xǎ<sup>n</sup> cuendá sá vă cadă-yu ì<sup>n</sup> sá vă cúú vâha iní-gá.

**Nchaa sá cúú càda cue téé ní táúchíú<sup>n</sup> Xítóhó Jesucristú cáhá<sup>n</sup> tnúhu-gá**

**9** Te yúhú chi cuu cada-í nchaa sá sání iní-í, chi tnàhá-í ní táúchíú<sup>n</sup> Xítóhó Jesucristú cáhá<sup>n</sup>-í tnúhu-gá núú ñáyiú. Te yúhú ní xiní núú-í Xítóhó Jesucristú Yaá cúú

Xítóhó-ó te nchòhó cúú-ndó ñáyiú ní sándáá iní tnúhu-gá sá càhá<sup>n</sup>-í te duca<sup>n</sup> chi ndècu ndìhi-í-gá. <sup>2</sup>Te ìò dava ñáyiú ñá túú sándáá iní-yu sá Xítóhó Jesucristú ní táúchíú<sup>n</sup>-gá càhá<sup>n</sup>-í tnúhu-gá, dico nchòhó chi cùtnuní ndáá iní-ndó sá díú-gá ní tendaha ñàha-gá xii-í xícá cùu-í càhá<sup>n</sup>-í tnúhu-gá, te duca<sup>n</sup> chi yúhú ní càhá<sup>n</sup>-í tnúhu-gá núú-ndó te ní sándáá iní-ndó-gá te xíá<sup>n</sup> cùtnuní sá díú-gá ní tendaha ñàha-gá xii-í xícá cùu-í càhá<sup>n</sup>-í tnúhu-gá núú ñáyiú.

<sup>3</sup>Te duha ndùu tnúhu càhá<sup>n</sup>-í cuendá cundedóho nchaa ñáyiú sàtnuhu ñaha xii-í. <sup>4</sup>Chi yúhú cuu-ni caxi-í nchaa núú sá cúú càxi-o na taxi ñáyiú. <sup>5</sup>Te cuu-ni cundecu ñadìhí-í te caca ndeca-í-yu nchaa núú xícá cùu-í càhá<sup>n</sup>-í tnúhu Yá Ndiòxí dàtná quidé dàva-gá cue téé càhá<sup>n</sup> tnúhu-gá, ndìhi cue téé cùu ñaní Xítóhó Jesucristú, ndìhi té Pèlú. <sup>6</sup>Te tnàhá yúhú ndìhi té Bèè cuu dañá-ndí chùu<sup>n</sup> quide-ndí te cada-ndí dàtná xíquide dava-gá-güedé càhá<sup>n</sup>-güedé tnúhu Xítóhó Jesucristú. <sup>7</sup>Te nchoo xìní-ó sá ncháá cuè sandadú dacuitíí sá ñúhú yáhu-güedé xínú cuèchi-güedé, te ñá túú dicó duca<sup>n</sup> xìnu cuechi-güedé. Te duca<sup>n</sup> sàtnahá-xi cùu tucu ñáyiú xìtu ìí<sup>n</sup> sá xítú chi dacuitíí ñìhí-yu ìí<sup>n</sup> sá xítú-yu xèxí-yu, te ñá díú dicó duca<sup>n</sup> xítú-yu. Te duca<sup>n</sup> cùu tucu cue téé cùu toli chi quìhni-güedé dícu quiti xìto-güedé xìhi-güedé te ñá túú dicó duca<sup>n</sup> xìto-güedé-dí. <sup>8</sup>Te vá cání ìní-ndó sá sá dúhá càhá<sup>n</sup>-í te càhu ìní mèè-í duha càhá<sup>n</sup>-í, chi tnúhu càhá<sup>n</sup>-í-a ìí<sup>n</sup>-ni quèè-xi ndìhi tnúhu ní càhá<sup>n</sup> ndí Moisés. <sup>9</sup>Chi ndíí-á<sup>n</sup>

ní chídó tnùní ndíí núú tütú ndí nàcuáa ní xáha<sup>n</sup> Yá Ndiòxí xii ndí, te càchí-xi: “Vá chíhí-ndó ñunu yuhu ndicutu oré danchìhí-dí triú”, duha càchí-xi núú tütú ndí. Te ñá díú sá dúcá<sup>n</sup> ní càhá<sup>n</sup> Yá Ndiòxí te càhá<sup>n</sup>-gá mee-ni cuendá ndicutu-á<sup>n</sup>. <sup>10</sup>Chi ní càhá<sup>n</sup>-gá cuendá nchoo cuè ñáyiú ndècu ichi-gá, te ndáá sá díú cuendá-ó dùca<sup>n</sup> ní càhá<sup>n</sup>-gá. Te nchaa cue téé xìtu chihi tatá sàni ìní-güedé sá díú tàtá chíhí-güedé-á<sup>n</sup> cuu sá caxí-güedé, te ñu-ni duca<sup>n</sup> cùu tucu cue téé xìcani triú chi cànì-güedé cuendá quee caxi-güedé. <sup>11</sup>Te duca<sup>n</sup> sàtnahá-xi cùu nchúhú cue téé càhá<sup>n</sup> tnúhu Xítóhó Jesucristú, chi dànehé ñáhá-ndí xii-ndo cuendá nchaa sá vǎha quide ñaha Yá Ndiòxí xii-o, núú xíá<sup>n</sup> dai tàù-xi sá nchòhó chindee ñàha-ndo xii-ndí ñuu ná cúú sá xíní ñùhu-ndí. <sup>12</sup>Te núú dava cue téé càhá<sup>n</sup> tnúhu Yá Ndiòxí chindèe-ndo-güedé, te uu<sup>n</sup>-gá duca<sup>n</sup> tàù-ndó chindèe-ndo nchúhú cue téé ní sanu ichi ñaha xìi-ndo ichi-gá.

Te cuèi tàù ndisa-ndo sá chindèe ñaha-ndo xii-ndí dico ñá túú dùca<sup>n</sup> cahá<sup>n</sup>-ndí núú-ndó càda-ndo, te quide cahnu ìní-ndí cuèi nándí sá tá yáha-ndí véxi. Te duca<sup>n</sup> quide-ndí cuendá sá ñà túú ñà cani ìní ñáyiú cuendá-ndí te duca<sup>n</sup> cuita cuténuu-gá tnúhu sá càhá<sup>n</sup> nàcuáa naníhí tàhú-ó quíhí<sup>n</sup>. <sup>13</sup>Te nchòhó xìní-ndó sá ncháá cuè téé xìnu cuechi veñúhu ñu-ni xíá<sup>n</sup> ñìhí-güedé xéxí-güedé, te ñu-ni cue téé-á<sup>n</sup> xínú cuèchi-güedé núú xìhí quiti ndùu tàhú Yá Ndiòxí, te ñu-ni xíá<sup>n</sup> ñìhí tucu-güedé sá xéxí-güedé. <sup>14</sup>Te ñu-ni duca<sup>n</sup> sàtnahá-xi cùu

nchúhú cue téé càhá<sup>n</sup> tnúhu sá càhá<sup>n</sup> nàcuáa naníhí tàhú-ó, chi Xítóhó Jesucristú ní cachí-gá sá díú-ní cuèndá chiú<sup>n</sup> quide-ndí níhí-ndí caxi-ndí. <sup>15</sup>Te ñá í<sup>n</sup> ndùu cáhá<sup>n</sup>-í núú-ndó càda-ndo nacuáa tàú-xi cunduu sá cúú-xì-í, te vâ cání iní-ndó sã sà dúhá càhá<sup>n</sup>-í te ì<sup>n</sup> sá xìcá<sup>n</sup>-í núú-ndó. iChi cuèi na cùú-í sá ndòhò-í te ñá díú sã càhá<sup>n</sup> ñáyiú sá sã cuèndá sá càhá<sup>n</sup>-í tnúhu Xítóhó Jesucristú ñihí-í xéxi-í!

<sup>16</sup>Te yúhú ñá túú quide cahnú-í mèe-í sá càhá<sup>n</sup>-í tnúhu sá càhá<sup>n</sup> nàcuáa naníhí tàhú-ó, chi tàú tnàhá-í sá cáda-í chi duca<sup>n</sup> ñí cachí Yã Ndiöxí cada-í. iTe ndàhú ní cuu yúhú te núu vâ càhá<sup>n</sup>-í tnúhu-á<sup>n</sup>! <sup>17</sup>Te ñá túú càhá<sup>n</sup>-í tnúhu-gá sá cúú ìní mèe-í chi mee-gã ní táúchíú<sup>n</sup>-gã càhá<sup>n</sup>-í tnúhu-gá. Te núu càhá<sup>n</sup>-í tnúhu-gá sá cúú ìní mèe-í te tàú-í ñihí-í sá ndúú tãhù-í ní cùu. <sup>18</sup>Dico sá sà ní nduu tãhù-í cúú-xí sã ïò cùdî iní-í sá dîcò duca<sup>n</sup> càhá<sup>n</sup>-í tnúhu sá càhá<sup>n</sup> nàcuáa naníhí tàhú-ó. Te cuèi tàú-í quehe<sup>n</sup>-í sá táxi-ndó ndùu tãhù-í sá cuèndá sá càhá<sup>n</sup>-í tnúhu Xítóhó Jesucristú, dico ñá túú dùca<sup>n</sup> quide-í. <sup>19</sup>Te sá dúcá<sup>n</sup> dicò duca<sup>n</sup> càhá<sup>n</sup>-í tnúhu sá càhá<sup>n</sup> nàcuáa naníhí tàhú-ó, xíã<sup>n</sup> ni ì<sup>n</sup> ñáyiú ñuyíú-a vâ cúú càchí-yu sá táxi tnùnì ñáhã-yu xii-í, te cuèi duca<sup>n</sup> dico mee-í ní sani iní-í sá cùú-í dàtná ì<sup>n</sup> téé xínu cuechi núú nchàa ñáyiú cuèndá duca<sup>n</sup> cuita cuu vai-yu tuhá-yu ichi Xítóhó Jesucristú quíhí<sup>n</sup>. <sup>20</sup>Te òrè ñúhú tnàhí tnuú cue ñáyiú isràél te quide-í sá í<sup>n</sup>-ní cùu-í ndihí-yu cuèi ñá túú nchìcú<sup>n</sup> ñihnu-í tnúhu ní cáhá<sup>n</sup> ndíi Moisés, te duca<sup>n</sup> quide-í

cuèndá sá ñáyiú-á<sup>n</sup> quíndáá iní-yu tnúhu càhá<sup>n</sup>-í te tuhá-yu ichi Xítóhó Jesucristú. <sup>21</sup>Te òrè ñúhú tnàhí tnuú nchaa ñáyiú ñá túú nchìcú<sup>n</sup> ñihnu tnúhu ní cáhá<sup>n</sup> ndíi Moisés, te quide-ni-í sá quidè-í dàtná quidé mèe-yu cuèndá quíndáá iní-yu tnúhu càhá<sup>n</sup>-í, te tuhá-yu ichi Xítóhó Jesucristú. Te cuèi duca<sup>n</sup> quide-í dico ñá túú dàña ndeé-í quidè-í nchaa nàcuáa cuínì Yã Ndiöxí cada-o, te duca<sup>n</sup> chi nchìcú<sup>n</sup> ñihnu-í quidè-í nchaa nàcuáa càhá<sup>n</sup> Xítóhó Jesucristú. <sup>22</sup>Te òrè ndécú-í ndihí nchaa ñáyiú ñá túú cùtnunì váha iní-xi nàcuáa cundecu ichi Xítóhó Jesucristú, te tnàhá-í quidè-í dàtná quidè-yu cuèndá sá ná tédòho-yu nchaa tnúhu càhá<sup>n</sup>-í te duca<sup>n</sup> cùtnunì-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ì<sup>n</sup>-ni cuu-í ndihí-yu cuèndá duca<sup>n</sup> ñihí-í nàcuáa cada-í te cundedòho-yu tnúhu càhá<sup>n</sup>-í te tnií-yu ichi Xítóhó Jesucristú te naníhí tãhù-yu. <sup>23</sup>Te duha quide-í cuèndá sá cuitá quíndáá iní-yu tnúhu sá càhá<sup>n</sup> nàcuáa naníhí tãhù-ó quíhí<sup>n</sup>, te duca<sup>n</sup> te tnàhá yúhú ío váha cundecu-í dàtná càhá<sup>n</sup> tnúhu-á<sup>n</sup>. <sup>24</sup>Te nchòhò sa xínì-ndó sã ncháá cuè téé xínu quíhu màrcúhyú nchaa-güedé xínú-güedè, dico ì<sup>n</sup>-ni-dé cúú tée ndàcu ngodó núú te téé-á<sup>n</sup> cúú tée ñihí sá ndúú tãhù-xi, te duca<sup>n</sup> xínì ñuhu-xi cada nchohó tucu chi cada-ndo nchàa nacuáa cuínì Yã Ndiöxí cada-ndo cuèndá duca<sup>n</sup> ñihí-ndó sã ndúú tãhù-ndó. <sup>25</sup>Te nchaa cue téé xínì dadìqui te váha váha quide cuèndá-güedé ñuu ná cúú sã cáda

tnèñu te xòcani-güedé cuèndá sá ñà díú xǎ<sup>n</sup> cada te cuíta-güedé òré dadìqui-güedé. Te duca<sup>n</sup> quide-güedé cuèndá cuìní-güedé níhí-güedé sá ndúú tǎhú-güedé, te sá ndúú tǎhú-güedé-á<sup>n</sup> cúu-xí ì<sup>n</sup> sá ndíhí ñihnu ñuyíú-a. Dico nchoo ndücu ndee-o quide-o nacuáa níhí-ó sá ndúú tǎhú-ó, te xǎ<sup>n</sup> cudí-xi cundecu ndíhi-o ñi caa ñi quíhí<sup>n</sup>.  
 26 Te yúhú quidè-í dàtná quidé cuè téé xínu, chi cue téé-á<sup>n</sup> xìní-güedé núú quèxio-güedé, te quide tucu-í dàtná xǐquide cue téé sa ní cutúha ñàá, te ñá túú quide-í dàtná quidé cuè téé vitna dàcuaha naá. Te duca<sup>n</sup> chi yúhú quidè-í nchaa ñacuáa cuìní Yǎ Ndiòxí cunduu. 27 Te yúhú ñá túú dàña-í taxi tnùnì ñáhá ñi ì<sup>n</sup> sá cuèhé sá dúhá xii-í chi yòtni-í mèe-í. Te duca<sup>n</sup> quide-í chi yúhú càhá<sup>n</sup>-í tnúhu Xítóhó Jesucristú núú ñáyiú, te cuìní-í sá vǎ cuíta sá ñi cachí Yǎ Ndiòxí nduu tǎhú-í.

**Cuèndá nchaá sá ñi cadúha cue téé ñuyíú-a quide cahnu ñáyiú**

**10** Te nchòhó ñáyiú ndècu ndíhi-í ichi Xítóhó Jesucristú na càchí tnúhu-í xii-ndo cuèndá nchaá ñanì tnáhá-ndí ñáyiú isràèl ní xíndecu ndéé sanaha, chi vitna tnáhá nchòhó cúu-ndo dàtná cue ñanì tnáhá nchàa ñáyiú-á<sup>n</sup> chi ndècu-ndo ichi-gá. Te nchaá ñáyiú-á<sup>n</sup> ñi taxi ndecu Yá Ndiòxí ì<sup>n</sup> vícò ñi dánèhé ñáhá-xí xii-yu ichi quíhí<sup>n</sup>-yu, te ní quée dava ndute lámár nánì Mǎr Tícuèhé te nchaá-yu ní yáha-yu. 2 Te sá dúcá<sup>n</sup> ñi cuu te nchaá-yu ì<sup>n</sup>-ná ní cuú-yu ndíhi ndíí Moisés, te ní xǐhi ndaha ñàha ndíí xii-yu. 3 Te nchaá-yu ní

xexí-yu sá ñi sǎñaha Yǎ Ndiòxí xii-yu. 4 Te duca<sup>n</sup> nchàa tucú-yu ní xihí-yu ndute sá ñi sǎñaha-gǎ xii-yu, ndute sá ñi quee yiqui ñàha cava. Te cava-á<sup>n</sup> cada iní-ó sá cúu-xí dàtná Xítóhó Jesucristú te duca<sup>n</sup> chi ndíhi ñàha-gǎ xii-yu ichi cuáhá<sup>n</sup>-yu dàvá-á<sup>n</sup>. 5 Dico ío vǎ-yu ñá túú ní quidé-yu ñacuáa càhá<sup>n</sup> Yǎ Ndiòxí, te xǎ<sup>n</sup> ñá túú ní cùu váha iní ñáhá-gǎ xii-yu. Te sá dúcá<sup>n</sup> ñi quidé-yu núu xǎ<sup>n</sup> òré ñúhú-yu ichi cuáhá<sup>n</sup>-yu xití yucu ío vǎ-yu ní xihí.

6 Te duca<sup>n</sup> ñi cuu cuèndá nchoo vǎ càncǐcú<sup>n</sup> ñihnu-o càda-o nacuáa ní quidé-yu, chi ñáyiú-á<sup>n</sup> mee-ñi nchàa sá cuèhé sá dúhá ñi sani iní-yu ní quidé-yu. Te nchoo xini ñuhu-xi sá vǎ dúcá<sup>n</sup> càda-o. 7 Te yúhú càhá<sup>n</sup>-í dóho-ndo sǎ vǎ quíndáá iní-ndo te ni vǎ cadá càhnu-ndo ni ì<sup>n</sup> sá càchí-yu cùu ndiòxí ní cadúha cue téé ñuyíú-a dàtná ní quide cue ñanì tnáhá-ndí ní xíndecu ndéé sanaha. Chi ñáyiú-á<sup>n</sup> ñi quidé-yu dàtná càhá<sup>n</sup>-xi núú tütú Yǎ Ndiòxí núú càchí-xi: “Nchaá ñáyiú ní xexí-yu ní xihí-yu ní quidé-yu vico, ní quide càhnú-yu sá càchí-yu cùu ndiòxí ní cadúha-yu te ñá ndàá sá ndiòxí cúu-xí”, duha càchí-xi núú tütú-gá. 8 Te ni vǎ cùndècu-ndo ichi díí ñi dàtná ní quide dava ñáyiú-á<sup>n</sup>, chi sá dúcá<sup>n</sup> ñi quidé-yu te ní xihí ócò únì mìl-yu ì<sup>n</sup>-ni ndùu. 9 Te vá cánì ñi-ndo sǎ sǎ càhnú ñi Yǎ Ndiòxí te nándi sá cuèhé sá dúhá càda-ndo cuèndá cuìní-ndo quíni-ndo ñu nása cada ñàha-gǎ xii-ndo, chi ñáyiú ní xíndecu ndéé sanaha-á<sup>n</sup> duca<sup>n</sup> ñi xóo cadá-yu, te ní xihí-yu ní xexiha<sup>n</sup> còó. 10 Te

ni vǎ cǎhá<sup>n</sup> cuèhé-ndó cuèndá Yǎ Ndiǒxí, chi dava ñáyiú ní xíndecu ndéé sanaha-ǎ<sup>n</sup> duca<sup>n</sup> nǐ quidé-yu ní cǎhá<sup>n</sup> cuèhé-yu cuèndá-gǎ te ní quixi espíritú xínú cuèchi núú-gǎ ní sahni ñaha-xi xii-yu.

<sup>11</sup>Te duca<sup>n</sup> nǐ cuu te duca<sup>n</sup> nǐ ngúndeé núú tütú Yǎ Ndiǒxí cuèndá dacuàha-o vitna ta cuyatni nduu naa ñuyúú-a. Te nchaa tnúhu sá nǐ ngódó tnúni-á<sup>n</sup> cǎhá<sup>n</sup> dóho ñaha-xi xii-o cuèndá sá vǎ cǎdá-ó dàtná ní quide ñáyiú-á<sup>n</sup>. <sup>12</sup>Te xǎá<sup>n</sup> núu nchaa nchòhò ñáyiú sàni iní sá ïo váha cùndáá ndécú ìchi Xítóhó Jesucristú cada cuèndá-ndó sǎ dúcá<sup>n</sup>-ní cùndáá-ndó núú-gǎ, te vǎ dáná cuèndá-ndó càda-ndo sá ñà túú cùu váha iní Yǎ Ndiǒxí. <sup>13</sup>Te ðiu-ni dàtná quidé sàcuíhná dácàhá<sup>n</sup>-xi iní nchaa dava-gǎ ñáyiú nándi quidé-yu, te ðiu-ni duca<sup>n</sup> quide ñaha-xi xii-ndo. Dico mee Yǎ Ndiǒxí cúú-gǎ Yaá quidé ndáá chi quide-gǎ nchaa sá cǎhá<sup>n</sup>-gǎ, te ñá dǎná-gǎ sá sùúni cuídó sàcuíhná coto ndeé ñáhá-xí xii-ndo, chi není-ni nàcuáa cùndee iní-ndó dàña-gǎ duca<sup>n</sup> quide ñaha-xi xii-ndo. Te ðiu-ni-gǎ chindee ñaha-gǎ xii-ndo cùndee iní-ndó vǎ cǎdá-ndó cuèi nándi sá ná dàcahu iní ñáhá-xí xii-ndo.

<sup>14</sup>Te xǎá<sup>n</sup> núu cǎhá<sup>n</sup>-í dóho nchòhò ñáyiú ïo cùu iní-í sá vǎ quèndáá iní-ndó nǐ ì<sup>n</sup> sá cǎchí-yu cùu ndióxí te ñá ndáá chi ðicó ndaha cue téé ñuyúú-a ní cuáha nchaa xǎá<sup>n</sup>, te ni vǎ cǎdá cǎhnu-ndo. <sup>15</sup>Te ðuha cǎhá<sup>n</sup>-í chi cùu-ndo ñáyiú tècú tnúni, te mee-ndo ïo váha cuáha-ndo cuèndá te núu váha-ni cǎhá<sup>n</sup>-í àdi ñá túú vǎha-ni. <sup>16</sup>Te nchoo ndàcá<sup>n</sup> táhú-ó núú Yǎ Ndiǒxí

cuèndá ndudí ndéhé yoho yàha stilé sá xǎhí-ó, te sá dúcá<sup>n</sup> xǎhí-ó ndúdí ndéhé yoho yàha stilé-á<sup>n</sup>, te xǎá<sup>n</sup> ndácú iní-ó sǎ ì<sup>n</sup>-ní cùu-o ndìhi Xítóhó Jesucristú cuèndá sá nǐ sati ñíñí-gǎ ní xǎhí-gǎ núú cùrúxí, te ðiu-ni duca<sup>n</sup> sǎtnahá tucu-xi cùu paá sá xéxí-ó òré xǎhí-ó ndúdí ndéhé yoho yàha stilé-á<sup>n</sup>, chi sá dúcá<sup>n</sup> xèxi-o paá-á<sup>n</sup> xǎá<sup>n</sup> ndácú iní-ó sǎ ì<sup>n</sup>-ní cùu-o ndìhi Xítóhó Jesucristú sá cuèndá yiqui cùñú-gǎ. <sup>17</sup>Te cuèi vǎi vihi-o dico ì<sup>n</sup> ðii-ni paá xéxí-ó, te sá dúcá<sup>n</sup> ì<sup>n</sup> ðii-ni paá xéxí-ó xǎá<sup>n</sup> ndácú iní-ó sǎ ì<sup>n</sup>-ní cùu-o ndìhi Xítóhó Jesucristú.

<sup>18</sup>Te cada cuèndá-ndó nàcuáa quide ñáyiú isràél, chi ñáyiú-á<sup>n</sup> xéxí-yu sá ndúú tǎhú Yǎ Ndiǒxí. Te sá dúcá<sup>n</sup> quidé-yu-á<sup>n</sup> cùtnúni iní-ó sǎ tnàhá tnúhu-yu ndìhi-gǎ. <sup>19</sup>Te vǎ cǎní iní-ndó sǎ sà dúhá cǎhá<sup>n</sup>-í te cachí-ndó sǎ cùnuu nchaa sá cǎchí-yu cùu ndióxí ní cadúha cue téé ñuyúú-a chi ñá túú nǎ cúú nǐ ì<sup>n</sup> nchaa xǎá<sup>n</sup>. Te ðiu-ni duca<sup>n</sup> cùu tucu nchaa sá sǎñaha ñáyiú ndùu táhú-xi chi ñá túú cùnuu-xi, chi ì<sup>n</sup>-ni cùu-xi ndìhi nchaa dava-gǎ sá xéxí-ó. <sup>20</sup>Te yúhú cǎchí-í sá sǎ dúcá<sup>n</sup> quide nchaa ñáyiú ñá túú tnàhá tnúhu ndìhi Yǎ Ndiǒxí, te ðicó nchaa espíritú cùndìhi yucu ñávàha sǎñahá-yu sá ndúú tǎhú-xi sá dúcá<sup>n</sup> quidé-yu. Te ñá ðíú Yǎ Ndiǒxí sǎñahá-yu sá ndúú tǎhú-gǎ. Te yúhú cuíni-í sá vǎ tnàhá tnúhu-ndo ndìhi cue espíritú cùndìhi yucu ñávàha. <sup>21</sup>Te duca<sup>n</sup> chi vǎ cúú tnàhá tnúhu-o ndìhi cue espíritú cùndìhi yucu ñávàha te tnàhá tnúhu-o ndìhi Xítóhó Jesucristú, te ñá túú ndùu váha-xi ngóo cǎxi-o

coho-o sá ndúú tǎhú cue espíritú cündǐhi yucu ñávǎha-á<sup>n</sup>, te ngóo càda-o nacuaá ní dándõo tnúhu Xítohó Jesucristú coho-o ndúdí ndéhé yoho yǎha stilé, te caxi-o pǎá cada-o sǎ ndácú ìní-ó sǎ ñí xíhí-gá núú cùrúxí. <sup>22</sup>Te vá cání ìní-ó dùca<sup>n</sup> cada-o cuendá sá vǎ cúdée<sup>n</sup> Yǎ Ndiõxí, chí ñá túú ñǎ cǎhnu cuu-o núu cada-o ñǎni véxi ìní mée-ó, chí mee-gǎ ío cǎhnu cuu-gǎ.

### Cada-o nchàa nacuaá cuu cǎhnu Yǎ Ndiõxí

<sup>23</sup>Te ndáá sá ncháá sǎ cuíní-ó càda-o te cuu cada-o dico ñǎ ncháá cùu-xi sá vǎha sá cúu-xí-ó, te ni ñǎ ncháá-xí chindee ñaha-xi nacuaá níhí ndée-gǎ-ó cùndecu-o ichi Xítohó Jesucristú. <sup>24</sup>Te xìni ñuhu-xi sá cádá-ó sǎ vǎha sá cúu-xí tnàha ñáyiu-o te ñǎ díú mèe-ni sá cúu-xí mèe-o cada-o.

<sup>25</sup>Te nchòhó cuu caxi-ndo nchàa cuñú sá cùyǎhu cuñú sá xìní caxi-ndo, te vá ndúcú tnúhu-ndo te núu cùu-xi cuñú sá ñí nduu táhú sǎ cǎchí-yu cùu ndiõxí. Te ñǎ túú ñǎ cani ìní-ndó cǎxi-ndo, <sup>26</sup>chí ñuyíú-a ndǐhi nchaa sá ìo cúu-xí cuendá Yǎ Ndiõxí.

<sup>27</sup>Te núu ìí<sup>n</sup> ñáyiu ñǎ túú ndècu ichi Xítohó Jesucristú cǎhá<sup>n</sup> ñáhǎ-yu xii-ndo quíhí<sup>n</sup>-ndó cǎxi-ndo díta vehé-yu, te núu sàni ìní-ndó sǎ quíhí<sup>n</sup>-ndó te cuu quíhí<sup>n</sup>-ndó te caxi-ndo cuèi náí cùu sá táxí-yu dico vá cǎcá<sup>n</sup> tnúhú-ndó nǔh-yu núu ndèe ní níhí-yu, te duca<sup>n</sup> te cuu váha ìní-ndó cǎxi-ndo. <sup>28</sup>Te núu ìí<sup>n</sup> ñáyiu cǎchí-yu sá xǎ<sup>n</sup> cúu-xí sǎ ñí nduu táhú sǎ cǎchí-yu cùu ndiõxí te vá cǎxí-ndó cuendá sá ñáyiu duca<sup>n</sup>

cǎhá<sup>n</sup>-á<sup>n</sup> cuu váha ìní-yu te ñǎ túú tnàhí ná cani ìní-yu. <sup>29</sup>Te yúhú cǎhá<sup>n</sup>-í cuendá nàcuáa sàni ìní mée ñáyiu duca<sup>n</sup> cǎhá<sup>n</sup>-á<sup>n</sup> te ñǎ díú sǎ nàcuáa sàni ìní mée-ndó quide-ndo.

Te dava-ndo cǎchí-ndó: “Cuu-ni cada-o nchàa nacuaá sàni ìní mée-ó cuèi dava-gǎ ñáyiu sàni ìní-yu sá ñǎ túú nduu váha-xi sá dúcá<sup>n</sup> càda-o”, duha cǎchí-ndó. <sup>30</sup>Te cǎchí tucu-ndo: “Ñǎ túú tàú-xi cǎhá<sup>n</sup> cuèhé ñáyiu cuendá-ó sǎ cuendá nchaa sá xéxi-ó chí ndàcá<sup>n</sup> táhú-ó nǔú Yǎ Ndiõxí òrè xéxi-ó”, duha cǎchí-ndó. <sup>31</sup>Te cuèi nándi sá xìní caxi-ndo ñihí-ndó xèxi-ndo àdi quide-ndo, te cada-ndo nàcuáa cǎhá<sup>n</sup> váha ñáyiu cuendá Yǎ Ndiõxí. <sup>32</sup>Te vá cádá-ndó sǎ ñǎ túú tàú-ndó càda-ndo cuendá sá vǎ cádá ñáyiu ìí<sup>n</sup> sá ñǎ túú cùu váha ìní Yǎ Ndiõxí. Te ni sǎ cúu-xí cuè ñáyiu isràél, te ni sǎ cúu-xí cuè ñáyiu ñǎ túú cùu ñáyiu isràél, te ni sǎ cúu-xí cuè ñáyiu ndècu ichi-gǎ vá dúcá<sup>n</sup> càda-ndo sá cúu-xí-yu. <sup>33</sup>Te yúhú ío ndècu ndee-í quidè-í nàcuáa cudǎu-í núú nchàa ñáyiu, te quide-í sá vǎha sá cúu-xí-yu, te ñǎ túú quide-í mee-ni sǎ cúu-xí mèe-í. Te duca<sup>n</sup> quide-í cuendá quíndáá ìní-yu tnúhu Xítohó Jesucristú te naníhí tàhú-yu.

**11** Te chí cǎnchìcú<sup>n</sup> nihnu cada-ndo nchàa nacuaá quide-í nchìcú<sup>n</sup> nihnu-í nchaa nàcuáa quide Xítohó Jesucristú.

### Nàcuáa tàú-xi cada nchaa ñáyiu òhí núú tàcá-yu òacuahá-yu tnúhu Yǎ Ndiõxí

<sup>2</sup>Te nchòhó ñáyiu ndècu ndǐhi-í ichi Xítohó Jesucristú cǎchí tnúhu-í

xii-ndo sã ïo cùdĩ ìní-í, chi ndàcu ìní ñáhá-ndó xii-í, te quide-ndo nchaa nacuaá ní dánhèhè ñáhà-í xii-ndo. <sup>3</sup>Te cuiní-í sá nchòhó cutnùnì ìní-ndó sã ìì<sup>n</sup>dii-ni Yá Ndiòxí cúú-gã Yáá cúnùu taxi tñuní ñáhá xii Xítóhó Jesucristú, te duca<sup>n</sup> Xítóhó Jesucristú ìì<sup>n</sup>dii-ni-gã cúnùu taxi tñuní-gã nchaa cue téé, te nchaa cue téé ñà-ni mee-güedè cúnùu-güedé táxí tñuní-güedé ñadìhí-güedé. <sup>4</sup>Te núu nchoo cuè téé na dàdàhu-o díquĩ-ó òré càhá<sup>n</sup>-ó nùú ñáyiú tñúhu sá dácàhu ìní ñáhá Yá Ndiòxí xii-o àdi òré càhá<sup>n</sup> ndihí-o-gã, te ìì<sup>n</sup> sácá<sup>n</sup>nùú cúú-xí te núu duca<sup>n</sup> na càda-o dadáhu-o díquĩ-ó. <sup>5</sup>Dico núu ñáyiú ñàhí vã dádàhu-yu díquĩ-yu òré càhá<sup>n</sup> ndihí-yu Yá Ndiòxí, àdi òré càhá<sup>n</sup>-yu tñúhu sá dácàhu ìní ñáhá-gã xii-yu núú tñàhá ñáyiú-yu, te sácá<sup>n</sup>nùú cúú-xí te núu vã dádàhu-yu díquĩ-yu, chi ìì<sup>n</sup>-ni cùu-xi te núu na dèté ndíí-yu díquĩ-yu. <sup>6</sup>Te núu ñã túú cuiní cue ñáyiú ñàhí dàdàhu-yu díquĩ-yu te vãha-gã sá ná dèté ndíí-yu díquĩ-yu. Te núu cùcaha<sup>n</sup> núú-yu sá dèté díquĩ-yu te vãha-gã sá ná dàdàhu-yu díquĩ-yu. <sup>7</sup>Te nchoo cuè téé vã cúú dàdàhu-o díquĩ-ó òré càhá<sup>n</sup> ndihí-o Yá Ndiòxí ni òré càhá<sup>n</sup>-ó tñúhu sá dácàhu ìní ñáhá-gã xii-o nùú ñáyiú chi dífna-gã-ó ñí cadúha ñaha Yá Ndiòxí xii-o, te ní taxi ndecu-gã nchaa sá xìní tñuní-ó dàtná ndécú nchàa sá xìní tñuní méé-gã. Te duca<sup>n</sup> ñí quide-gã chi cuiní-gã sá nchóó càda-o nacuaá càhá<sup>n</sup> nchaa dava-gã ñáyiú sã ïo càhnu cuu-gã, te cue ñáyiú ñàhí quidè-yu nacuaá

cunuu nchòo cue téé. <sup>8</sup>Te Yá Ndiòxí ní cadúha-gã téé, dico ñã díú yìquì naha ñadìhí ní quenehe-gã ní cadúha-gã téé chi yiquì naha téé ní quenehe-gã ní cadúha-gã ñadìhí. <sup>9</sup>Te sá cuendá téé duca<sup>n</sup> ñí cadúha-gã ñadìhí-á<sup>n</sup> te ñã díú sã cuendá ñadìhí ní cadúha-gã téé. <sup>10</sup>Núu xíã<sup>n</sup> tàú-xi sá ncháá ñáyiú ñàhí dàdàhu-yu díquĩ-yu cuendá duca<sup>n</sup> cùtnuní sã ñà túú cùnuú-yu dàtná cúnùu nchoo cue téé. Te duca<sup>n</sup> xìnì ñuhu-xi cadá-yu sã cuendá nchaa espíritú xínú cuèchi núú Yá Ndiòxí. <sup>11</sup>Te vitna nchoo ñáyiú ndècu ichi Xítóhó Jesucristú, vã càchí-ó sã cuè téé ñã túú xìnì ñuhu-güedé cue ñáyiú ñàhí chindee ñàhá-yu, te ni vã càchí-ó sã cuè ñáyiú ñàhí ñã túú xìnì ñuhú-yu cue téé chindee ñàha-güedé xií-yu. <sup>12</sup>Te ìì<sup>n</sup> yìquì naha téé ní queñuhu Yá Ndiòxí ní cadúha-gã ñadìhí, dico vitna chi ñáyiú ñàhí dácàcú-yu téé. Te téé, ñadìhí ní cadúha Yá Ndiòxí, te ñà-ni duca<sup>n</sup> ñí cadúha-gã nchaa dava-gã sã ïó.

<sup>13</sup>Te mee-ndo càda cuendá-ndó te núu ndùu vãha-xi sã vã dádàhu cue ñáyiú ñàhí díquĩ-yu òré càhá<sup>n</sup> ndihí-yu Yá Ndiòxí àdi ñáhá. <sup>14</sup>Te nchaa ñáyiú càhá<sup>n</sup>-yu sã ñà túú ndùu vãha-xi sã cuè téé cunduu nàni idi díquĩ-güedè, chi ìì<sup>n</sup> sácá<sup>n</sup>nùú cúú-xí càchí-yu. <sup>15</sup>Te nchaa ñáyiú ñàhí ñáyiú nàni idi díquĩ-xi càchí ñáyiú sã ìì<sup>n</sup> sã vãha cùu-xi sã cúú-xí-yu sã dúcá<sup>n</sup> nàni idi díquĩ-yu. Te duca<sup>n</sup> chi Yá Ndiòxí ní càchí-gã sã dúcá<sup>n</sup> cùnduú-yu cuendá quidáhu-xi díquĩ-yu. <sup>16</sup>Te núu ïó ñáyiú cuiní dacàá cuendú cuendá sã ñí càhá<sup>n</sup>-í-a, te na

cùnahá-yu sá ncháá nchúhú cue tée càhá<sup>n</sup> tnúhu Xítóhó Jesucristú ñáyu ndéu ichi-gá.

**Cuèndá ñáyu ñá túú quide datná ní quide Xítóhó Jesucristú cútnàhá ní cudini-gá ndihi cue tée ní xica cuu ndihi-gá**

<sup>17</sup>Te nchòhó ñá túú quide váha-ndo ndècu-ndo núu xiǎ<sup>n</sup> duha na càhá<sup>n</sup>-í dóho-ndo, chi nchòhó òré tàcá-ndó ñá túú quide váha-ndo chi ñá túú chìndee tnaha-ndo cada-ndo sá vǎha, chi da nàdatuhú iní tnáhá-ndó nàcuáa ndècu-ndo. <sup>18</sup>Te díhna-gá na càchí tnúhu-í xii-ndo sǎ ñihí-í tnúhu sá òré tàcá-ndó quide-ndo nacuáa ní càhá<sup>n</sup> Xítóhó Jesucristú, te ñá túú cùu ñ<sup>n</sup>nuu-ndo oré duca<sup>n</sup> quide-ndo nacuáa ní càhá<sup>n</sup>-gá. Te dava sá càhá<sup>n</sup> ñáyu sàndáá iní-í te dava ñáhá. <sup>19</sup>iTe ndáá sá dúcá<sup>n</sup> tnáhi cada-xi vá cúú ñ<sup>n</sup>nuu-ndo cuendá duca<sup>n</sup> cùtnuní ñuu ndèdacàa-ndo sandáá ndisa iní-ndó tnúhu Xítóhó Jesucristú te ndèdacàa-ndo ñáhá! <sup>20</sup>Te ndi tnahá òré tàcá-ndó quide-ndo datná ní quide Xítóhó Jesucristú cútnàhá ní cudini-gá ndihi cue tée ní xica cuu ndihi-gá, te ñá túú quide-ndo nacuáa tàù-xi cunduu chi cùtexínu-ni quide-ndo. <sup>21</sup>Chi òré tàcá-ndó quide-ndo nacuáa ní cachí Xítóhó Jesucristú, te dava-ndo ngòdó núú-ndó díhna-gá-ndó xèxi-ndo sá néhé-ndó te ñá túú sǎ cúndètu tnaha-ndo, te ñá túú càhá<sup>n</sup> tnáhá-ndó ñuu xiǎ<sup>n</sup> dava-ndo ñá túú xèxi-ndo ndahá xití-ndó, te dava-ndo xidó-ndó

quide-ndo chi xini-ndo. <sup>22</sup>Te vá dúcá<sup>n</sup> càda-ndo chi càa vehe-ndo núú dúcá<sup>n</sup> càxi-ndo coho-ndo cada-ndo ndéé ndahá xití-ndó, chi sá dúcá<sup>n</sup> quide-ndo te dàquee tíhú-ndó nchàa dava-gá ñáyu ndècu ndihi-ndo ichi Yá Ndiöxí, te dándóo canúú-ndó nchàa ñáyu ndàhú sá dúcá<sup>n</sup> quide-ndo. iNúu xiǎ<sup>n</sup> vá cúú càchí-í sá cúú-ndó ñáyu quide váha chi ñá túú quide váha-ndo sǎ dúcá<sup>n</sup> quide-ndo ndecu-ndo!

**Xítóhó Jesucristú ní dándóo tnúhu-gá sá cóhó-ó ndùdí ndéhé yoho yàha stilé te caxi-o pàá cuèndá ndacu iní-ó sǎ ñí xihí-gá**

(Mt. 26:26-29; Mr. 14:22-25; Lc. 22:14-20)

<sup>23</sup>Te dàtná-ni ní dánèhé ñáhá Xítóhó Jesucristú xii-í te ñá túú duca<sup>n</sup> ñí dánèhé ñáhà-í xii-ndo, chi ñá túú niú cútnàhá ní sáha cuèndá ñáhá ndii Jùdás Iscarioté xii-gá núú cuè tée cùu úhú iní ñáhá ñí quehe<sup>n</sup>-gá pàá, <sup>24</sup>te ní ndacá<sup>n</sup> táhú-gǎ núú Yǎ Ndiöxí, te ní táhú cuèchi-gá, te ní xáha<sup>n</sup>-gǎ xii cue tée xica cuu ndihi-gá: “Chí quéhé<sup>n</sup>” pàá-a caxi-ndo te cada iní-ndó sǎ cúú-xí dàtná yiqui cùnú-í, chi yúhú cuú-í sácùendá-ndó. Te duca<sup>n</sup>-ni càda-ndo cundecu-ndo cuendá ndacu iní ñáhá-ndó xii-í”, càchí-gá xǎha<sup>n</sup>-gǎ xii-güedé. <sup>25</sup>Te sátá ñí yáha ní xexi-güedé pàá sá ñí sǎñaha-gǎ, te ní quehe<sup>n</sup>-gá tàsá<sup>n</sup> ñúhú ndùdí ndéhé yoho yàha stilé, te ní ndacá<sup>n</sup> táhú tùcu-gá núú Yǎ Ndiöxí. Te ní xáha<sup>n</sup>-gǎ xii cue tée xica cuu ndihi-gá: “Chí cóhó ndùdí ndéhé yoho yàha stilé-a, te cada iní-ndó sǎ cúú-xí dàtná ñíñi-í,



te cuendá nĩĩ-í sá cáti òré cuú-í cutnùnĩ ndáá sá Yă Ndiöxí cada-gá ingá núú sã vâha sá cúú-xí ñâyiu. Te ndi tnahá òré coho-ndo ndùdí ndéhé yoho yâha stilé-â<sup>n</sup> te ndacu iní ñáhá-ndó xii-í, te duca<sup>n</sup>-ni càda-ndo cundecu-ndo”, cachí-gá xâha<sup>n</sup>-gã xii-güedé. <sup>26</sup>Te ndi tnahá òré xéxi-ndó pàá te xihhi-ndo ndudí ndéhé yoho yâha stilé, te xíã<sup>n</sup> dátüu-ndo nüü ñâyiu sá Xítóhó Jesucristú ní xihí-gá cuendá-yu, te duca<sup>n</sup>-ni càda-ndo cundecu-ndo ndéé ná sàá nduu quixi tucu Xítóhó Jesucristú.

**Nàcuáa cada-o òré caxi-o pàá ndihi òré coho-o ndùdí ndéhé yoho yâha stilé dàtná ní cachí Xítóhó Jesucristú**

<sup>27</sup>Te dava-ndo ñà túú quide-ndo nacuaá cuiní Yă Ndiöxí cada-ndo òré xéxi-ndó pàá ndihi òré xihí-ndó ndùdí ndéhé yoho yâha stilé, te sá dúcá<sup>n</sup> quide-ndo-â<sup>n</sup> te cucuéchi xii-ndo chi ñá túú nèhe-ndo sá yĩñũhu sá cúú-xí yiqui cuñũ Xítóhó Jesucristú, te ni ñà túú nèhe-ndo sá yĩñũhu sá cúú-xí ñĩĩ-gã. <sup>28</sup>Te ío váha cada cuendá-ndó te núu ndècu váha iní-ndó nüü Xítóhó Jesucristú òré cúmãní-gã caxi-ndo pàá ndihi òré cúmãní-gã coho-ndo ndùdí ndéhé yoho yâha stilé. Te núu ndècu váha iní-ndó nüü-gã te caxi-ndo te coho-ndo. <sup>29</sup>Te dava nchòhó ñá túú sàni váha iní-ndó cuendá yiqui cuñũ Xítóhó Jesucristú te xèxi-ndo paá te xihhi-ndo ndudí ndéhé yoho yâha stilé, te nacháhu-ndo sã dúcá<sup>n</sup> ñà túú sàni váha iní-ndó. <sup>30</sup>Te ñiu sá dúcá<sup>n</sup> quide-ndo núu xíã<sup>n</sup> vai-ndo cuhú, te ío ndàhú ndécú-ndó, te

dava ñâyiu ndècu ndihi-ndo sa ní xihí-yu. <sup>31</sup>Dico núu ío váha sáha-o cuendá nàcuáa ndècu-o núú Yă Ndiöxí, te vá dúcá<sup>n</sup> dândoho ñaha-gá xii-o. <sup>32</sup>Te òré ndéhé Yă Ndiöxí sá ñà túú quide ndáá-ó ndècu-o te dândoho ñaha-gá xii-o. Te duca<sup>n</sup> quide-gá cuendá sá vã cuíta nihnu-o, chi núu ñáhá te cuíta nihnu-o ndihi nchaa ñâyiu ndècu ichi cuehé ichi duha.

<sup>33</sup>Te núu xíã<sup>n</sup> càhá<sup>n</sup>-í dóho nchaa nchòhó ñâyiu ndècu ndihi-í ichi Xítóhó Jesucristú sá òré tacá-ndó càda-ndo nacuaá ní quide Xítóhó Jesucristú cútñahá ní cudini-gá ndihi cue téé ní xica cuu ndihi-gá, te cundetu tñaha-ndo nduu nchaa-ndo te dàtnùnĩ duca<sup>n</sup> càda-ndo. <sup>34</sup>Te núu dava-ndo xihí-ndó dòcò te caxi duu<sup>n</sup>-ndo vèhe-ndo te dàtnùnĩ natacá-ndó, cuendá òré natacá-ndó te vá cádá-ndó ì<sup>n</sup> sá ñà túú tàú-ndó càda-ndo cuendá sá vã dándòho ñaha Yă Ndiöxí xii-ndo. Te òré quixi coto ñaha-ĩ xii-ndo te dàvá-â<sup>n</sup> cachí tñuhu-í xii-ndo nchàa dava-gá sá cúmãní.

**Nàcuáa chindee ñaha Espiritú Yă Ndiöxí cada-o ì<sup>n</sup> ì<sup>n</sup>-o**

**12** Te nchòhó ñâyiu ndècu ndihi-í ichi Xítóhó Jesucristú cuiní-í cachí tñuhu-í xii-ndo nàcuáa chindee ñaha Espiritú Yă Ndiöxí xii-o ì<sup>n</sup> ì<sup>n</sup>-o cuendá cutnùnĩ iní-ndó.

<sup>2</sup>Te nchòhó sa ñaha-ndo sá cútñahá vátá cündècu-gá-ndó ichi Xítóhó Jesucristú ní xóo dandàhu ñáhá yücu ñávâha xii-ndo, te ní xóo quíndáá iní-ndó nchàa sá ñi

cadúha cue ñáyiú ñuyúú-a nchaa sá cächí-yu cùu ndióxí te ñá ndàá sá ndiöxí cúú-xí, te nchaa xíá<sup>n</sup> ñá túú cãhá<sup>n</sup>-xi. <sup>3</sup>Te cuíní-í sá nchòhó cutnùní iní-ndó sã Espíritú Yã Ndiöxí ñá túú chindee-xi ni ì<sup>n</sup> ñáyiú cuendá sá cãhá<sup>n</sup> úhú-yu Xítohó Jesucristú. Te ni ì<sup>n</sup> ñáyiú ñá túú càhu iní-yu cãhá<sup>n</sup>-yu sá Xítohó Jesucristú cúú-gã Xítohó-yu te núu ñá túú Espíritú Yã Ndiöxí dácàhu iní ñáhá-xí xì-yu.

<sup>4</sup>Te ndi díí<sup>n</sup> ndì díí<sup>n</sup> ndùu chiu<sup>n</sup> ní cachí Espíritú Yã Ndiöxí cada-o, te ñiú-ni ì<sup>n</sup> ñiú-ni Espíritú-gá ndécú. <sup>5</sup>Te ndi díí<sup>n</sup> ndùu chiu<sup>n</sup> quide-o xinu cuechi-o núu ì<sup>n</sup> ñiú-ni Xítohó Jesucristú. <sup>6</sup>Te ndi díí<sup>n</sup> ndì díí<sup>n</sup> chindee ñaha Yã Ndiöxí xii-o nàcuáa cada-o chiú<sup>n</sup>-gá, te ñiú-ni ì<sup>n</sup> ñiú-gá ndécú chindee-gá nchaa ñáyiú. <sup>7</sup>Te Espíritú Yã Ndiöxí quidé-xí sã nchóó càda-o sá vãha, te duca<sup>n</sup> chindee-o cue ñáyiú ndècu ndìhi-o ichi Xítohó Jesucristú. <sup>8</sup>Te dava-o ní nduu táhú-ó núú Yã Ndiöxí sá Espíritú-gá cada te ndacu-o cãhá<sup>n</sup>-ó tnúhu sá ìo càhnu cuu ñiú-ni tnúhu mee Yã Ndiöxí, te dava tucu-o ní nduu táhú-ó cùnùní iní-ó nàcuáa cãhá<sup>n</sup> tnúhu-gá te cãhá<sup>n</sup>-ó nàcuáa cuíní Espíritú-gá. <sup>9</sup>Te dava tucu-o ní nduu táhú-ó sã ìo quíndáá iní-ó Xítohó Jesucristú cuendá cada-gá ì<sup>n</sup> sá cuíní-ó, te duca<sup>n</sup> chi Espíritú Yã Ndiöxí chíndèe ñaha-xi xii-o. Te dava tucu-o ní nduu táhú-ó sã càcá<sup>n</sup> táhú-ní-ó núú Xítohó Jesucristú cuendá ñáyiú cùhú te ndúha-yu. <sup>10</sup>Te dava tucu-o ní nduu táhú-ó sã ndácú-ó càda-o nchaa sá vã yòo tnàhí ndàcu cada, te dava tucu-o

ní nduu táhú-ó núú Yã Ndiöxí sá cãhá<sup>n</sup>-ó tnúhu sá dácàhu iní ñáhá-gã xii-o, te dava tucu-o ní nduu táhú-ó sã cùnùní iní-ó núu ñiú Espíritú Yã Ndiöxí chíndèe ñaha-xi xii ñáyiú òrè cãhá<sup>n</sup>-yu tnúhu-gá àdi cue espíritú cùndìhi yucu ñávãha. Te dava tucu-o ní nduu táhú-ó cãhá<sup>n</sup>-ó tnúhu sá dácàhu iní ñáhá Espíritú Yã Ndiöxí xii-o tnúhu sá ñá túú xìní-ó, te dava tucu-o ní nduu táhú-ó cãhá<sup>n</sup>-ó nàcuáa quèe-xi nchaa tnúhu-á<sup>n</sup>.

<sup>11</sup>Te ì<sup>n</sup> ñiú ní díí-ni Espíritú Yã Ndiöxí duca<sup>n</sup> chindee ñaha-xi, te ñiú-ni Espíritú-gá dácãhñu ñaha-xi xii-o ndi díí<sup>n</sup> núú chiú<sup>n</sup> sá cuíní mée-xí càda-o.

#### **Nchaa-o ì<sup>n</sup>-ni cuu-o ndìhi Xítohó Jesucristú**

<sup>12</sup>Te nchoo ñáyiú ndècu ñuyúú-a titní xichi cùu yiqui cuñú-ó dico ì<sup>n</sup>-ni cùu-xi, te ñiú-ni duca<sup>n</sup> sãtnahá-xi cùu-o vitna ndecu-o ichi Xítohó Jesucristú chi ì<sup>n</sup>-ni cùu-o ndìhi-gá. <sup>13</sup>Te dava-o cùu-o ñáyiú isràèl, te dava-o ñá túú cùu-o ñáyiú isràèl, te dava-o cùu-o ñáyiú ñá túú tnàhí dàñá quee núú chíú<sup>n</sup> pàtróó<sup>n</sup>-xi, te dava-o cùu-o ñáyiú dàñá quèe núú chíú<sup>n</sup> pàtróó<sup>n</sup>-xi. Te mee Espíritú Yã Ndiöxí ní quide-xi sá ncháá-ó ì<sup>n</sup>-ná cúú-ó ndècu-o ndìhi Xítohó Jesucristú. Te Yã Ndiöxí ní cachí-gá sá ncháá-ó cùndècu ndìhi-o Espíritú-gá.

<sup>14</sup>Te nchòhó xìní-ndó sã titní xichi cùu yiqui cuñú-ó te ñá díú ì<sup>n</sup>-ni xichi cuu-xi. <sup>15</sup>Te cuèi sáhá-ó ndìhi ndaha-o ñá túú ì<sup>n</sup>-ni cuu-xi dico vá cúú cächí-ó sã sáhá-ó ñá túú cùu-xi yiqui cuñú-ó. <sup>16</sup>Te cuèi lóho-o ndìhi

tĩnuu-o ñá túú ìí<sup>n</sup>-ni cuu-xi dico vá cǎchí-ó sǎ lõho-o ñà túú cùu-xi yiqui cuñú-ó. <sup>17</sup>Te núu ñihíí ní ndúú yiqui cuñú-ó ní xĩndéé mee-ni tĩnuu-o, te ñá túú ndéé cundéé lõho-o cùndedóho ni cùu te núu duca<sup>n</sup>, àdi núu ñihíí yiqui cùñú-ó ní xĩndéé mee-ni lõho-o te ñá túú ndéé cundéé dítní-ó ní cùu te núu duca<sup>n</sup>. <sup>18</sup>Dico mee Yǎ Ndiõxí ní taxi ndecu-gá ìí<sup>n</sup> ìí<sup>n</sup> xichi yiqui cùñú-ó nàcuáa ní cachí iní mée-gǎ. <sup>19</sup>Te núu ìí<sup>n</sup>-ni sǎ ní xĩndecu ñihíí yiqui cùñú-ó, te vá cùndùu-xi nacuáa tàú-xi cunduu ni cùu te núu duca<sup>n</sup>. <sup>20</sup>Dico títní xichi cùu yiqui cuñú-ó, te ìí<sup>n</sup>-ni cùu-xi ñihíí-xi.

<sup>21</sup>Te sa nàha-o sá vǎ cúú cǎchí-ó sǎ tĩnuu-o ñá túú xìni ñuhu-xi ndaha-o, àdi díquí-ó ñà túú xìni ñuhu-xi sáhá-ó. <sup>22</sup>Te nchoo sǎ naha-o sá dává xichi yiqui cuñú-ó sǎ cǎchí-ó sǎ ñà túú cùnuu ío-gá xíní ñuhu-xi. <sup>23</sup>Te dava xichi yiqui cùñú-ó sǎ ñà túú quide cuendá cávihí-ó nchàa xíǎ<sup>n</sup> sá quidáhu dóó sácuĩhnu-o, te dava xichi yiqui cùñú-ó ñà cúú cùtúu chi dacuitíí sǎ quidáhu. <sup>24</sup>Te nchaa xichi yiqui cùñú-ó sǎ cúú cùtúu ñá túú xìni ñuhu-xi quidáhu. Te Yǎ Ndiõxí ní taxi ndecu-gá nchaa xichi yiqui cùñú-ó nàcuáa tàú-xi cunduu. Te ní cachí-gá sá dává-gǎ xichi yiqui cùñú-ó núú vǎ cúú cùtúu quidáhu. <sup>25</sup>Te duca<sup>n</sup> ní quide-gá cuendá sá íí<sup>n</sup>-ní cùu yiqui cuñú-ó. Te duca<sup>n</sup> ndí tnahá ìí<sup>n</sup> ìí<sup>n</sup> xichi yiqui cùñú-ó chĩndee tnahá-xi. Te duca<sup>n</sup> sǎtnahá-xi cùu nchoo vitna ndecu-o ichi Xítóhó Jesucristú chi chĩndee tnahá-o. <sup>26</sup>Te núu ìí<sup>n</sup> xichi yiqui cùñú-ó ná tñàhúhú te ñihíí-ó quide

úhú-xi, te núu ìí<sup>n</sup> xichi yiqui cùñú-ó ïo váha ndècu-xi te duca<sup>n</sup> ñihíí yiqui cùñú-ó cúú vǎha-xi. Te duca<sup>n</sup> sǎtnahá-xi cùu-o vitna ndecu-o ichi Xítóhó Jesucristú.

<sup>27</sup>Te nchoo ndècu ndíhi-o Xítóhó Jesucristú, te cùu-o datná yiqui cùñú-gá te ìí<sup>n</sup> ìí<sup>n</sup>-o cùu-o datná ìí<sup>n</sup> ìí<sup>n</sup> xichi yiqui cùñú-gá. <sup>28</sup>Te duca<sup>n</sup> sǎtnahá-xi cùu-o chi Yǎ Ndiõxí ní taxi-gá ndí díí<sup>n</sup> ndí díí<sup>n</sup> chùu<sup>n</sup> quide-o sá cúú-xí nchàa ñáyiú ndècu ichi-gá. Te díhna-gá cue téé caca cuu cáhá<sup>n</sup> tñuhu-gá núú ñáyiú ní taxi ndecu-gá, te dǎtnùní ní taxi ndecu-gá cue téé cáhá<sup>n</sup> tñuhu-gá nàcuáa dàcahu iní ñáhá mée-gá, te dǎtnùní ní taxi ndecu-gá cue téé dǎnehé ñáhá xii ñáyiú tñuhu-gá núú tàcá-yu, te dǎtnùní ní taxi ndecu tucu-gá cue téé ndàcu quide sá vǎ yǒo tñàhí ndàcu cada. Te ní taxi ndecu tucu-gá cue téé xicá<sup>n</sup> táhú-ní núú Xítóhó Jesucristú cuendá ñáyiú cùhú te ndúha-yu. Te ní taxi ndecu tucu-gá cue téé chĩndee cue ñáyiú ndècu ichi-gá. Te ní taxi ndecu tucu-gá cue téé yĩndaha ñaha xii ñáyiú ndècu ichi-gá, te ní taxi ndecu tucu-gá cue téé càhá<sup>n</sup> tñuhu sá dácàhu iní ñáhá Espíritú-gá tñuhu sá ñà túú xíní-güedé. <sup>29</sup>Te ñá ncháá-ó cùu-o cue téé ní táuchíú<sup>n</sup> Xítóhó Jesucristú cáhá<sup>n</sup> tñuhu-gá núú ñáyiú, te ñá ncháá-ó cùu-o cue téé càhá<sup>n</sup> tñuhu sá dácàhu iní ñáhá Yǎ Ndiõxí xii-o. Te ñá ncháá-ó cùu-o cue téé dácuaaha ñaha xii-yu. Te ñá ncháá-ó cùu-o cue téé quide sá vǎ yǒo tñàhí ndàcu cada. <sup>30</sup>Te ñá ncháá-ó cùu-o cue téé dicó-ni cácá<sup>n</sup> táhú núú Xítóhó Jesucristú cuendá ñáyiú cùhú te ndúha-yu. Te ñá

ncháá-ó cùu-o cue téé càhá<sup>n</sup> tnúhu sá dácàhu iní ñaha Espiritú Yă Ndiöxí tnúhu sá ñà túú xìní-ó, te ñà ncháá-ó cùu-o cue téé cùtnuní iní-xi cáhá<sup>n</sup> nàcuáa ndùu tnúhu-á<sup>n</sup>. <sup>31</sup>Te ío nducu ndèe-ndo cada-ndo nacuáa nduu táhú-ndó nǔú Yă Ndiöxí nchaá sá ío-gá cúnùu cada-ndo. Te vitna na dànehé ñáhá tùcu-í xii-ndo nàcuáa cada-ndo, dico sá dánèhé ñàhà-í-a ío-gá cúnùu-xi.

### Cuu iní-ó tnàha ñáyiu-o

**13** Te núu nchoo xìní-ó cáhá<sup>n</sup>-ó tnúhu sá ío vii ío váha cuáhá<sup>n</sup> càhá<sup>n</sup> ñáyiu ñuyíu-a, àdi xìní-ó cáhá<sup>n</sup>-ó tnúhu sá ío vii ío váha cuáhá<sup>n</sup> càhá<sup>n</sup> cue espíritú xínú cuèchi núu Yă Ndiöxí, te núu xìní-ó cáhá<sup>n</sup>-ó nchàa tnúhu-á<sup>n</sup> te ñà túú cùu iní-ó cuè tnaha ñáyiu-o ña, te ñà túú nàndíhi-xi sá xìní-ó cáhá<sup>n</sup>-ó tnúhu-á<sup>n</sup> te cùu-o datná dava caá sá ío dusa<sup>n</sup> quíde. <sup>2</sup>Te núu cùu-o ñáyiu càhá<sup>n</sup> tnúhu sá dácàhu iní ñáhá Yă Ndiöxí, àdi cuu-o ñáyiu cùtnuní iní-xi nàcuáa cuáhá<sup>n</sup> nchaá tnúhu ndùu yuhu ni cuu, àdi cuu-o ñáyiu ío váha cùtnuní iní-xi nchaá nàcuáa quíde Yá Ndiöxí, àdi cuu-o ñáyiu ío váha sàndáá iní ñáhá xii Yá Ndiöxí nàcuáa ndacu-o cùu-o ì<sup>n</sup> yucu xocuiñí-xi núu ndécú-xí, te núu nchaá xíá<sup>n</sup> xìní-ó càda-o te ñà túú cùu iní-ó cuè tnaha ñáyiu-o ña, te ñà túú vèdana nàndíhi-xi te núu vá cúú iní-ó tnàha ñáyiu-o cuèi na càda-o nchaá xíá<sup>n</sup>. <sup>3</sup>Te cuèi nchaá sá ndécú ndíhi-o na dacáhũu-o, te cuèi na cuàha cuèndá-ó mèe-o cáyú-ó sǎ cúú-xí Yă Ndiöxí, dico ñà túú vèdana chindee ñaha-xi xii-o

sá dúcá<sup>n</sup> càda-o te núu ñà túú cùu iní-ó cuè tnaha ñáyiu-o.

<sup>4</sup>Dico núu cùu iní-ó cuè tnaha ñáyiu-o, te càhnu iní-ó, te quíde váha-o, te ñà túú cùu-o ñáyiu cuédú iní, te ni ñà túú càhá<sup>n</sup>-ó nǔu cùu cahnu-o, te ni ñà túú sàni iní-ó càda cahnu-o mee-o, <sup>5</sup>te ni ñà túú ñùhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gǎ cúdèé<sup>n</sup>-ó cuèndá ì<sup>n</sup> sá cúú, te ni ñà túú-gǎ sácũhu<sup>n</sup> iní-ó sǎ quíde ñàha tnaha ñáyiu-o xii-o. <sup>6</sup>Te ni ñà túú-gǎ cúdǐí iní-ó nchàa sá ñà túú vǎha quíde ñáyiu, chi mee-nǎ cuèndá nchaá sá vǎha cùdǐí iní-ó. <sup>7</sup>Te nchaá sá yǎha-o sàcahnu iní-ó, te sàni váha iní-ó cuèndá nchaá ñáyiu, te sàni iní-ó sǎ dǐú-ní nchàa sá vǎha cuu xii nchaá tnàha ñáyiu-o ndèe cuèe-gǎ, te ío quíde cahnu iní-ó cuèi nándí sá yǎha-o, te nchaá xíá<sup>n</sup> quíde-ó te núu cùu iní-ó cuè tnaha ñáyiu-o.

<sup>8</sup>Te ni caa ni quíh<sup>n</sup> duha-ni cuu iní-ó cuè tnaha ñáyiu-o. Dico sáá nduu te vá cóó-gǎ ñáyiu cáhá<sup>n</sup> tnúhu sá dácàhu iní ñáhá Yă Ndiöxí, te ni vǎ cóó-gǎ ñáyiu cáhá<sup>n</sup> tnúhu sá dácàhu iní ñáhá Espíritú Yă Ndiöxí tnúhu sá ñà túú xìní-yu, te ni vǎ cóó-gǎ ñáyiu túha dàtná túha ñáyiu vitna. <sup>9</sup>Te vitna ñà túú cùtnuní iní-ó nchàa nacuáa sàni iní Yă Ndiöxí chi sacú-ni cùtnuní iní-ó, te duca<sup>n</sup> sàcú-ni càhá<sup>n</sup>-ó nàcuáa ndùu tnúhu-gǎ, dico càhá<sup>n</sup>-ó tnúhu-gǎ nàcuáa dàcahu iní ñáhá-gǎ xii-o. <sup>10</sup>Te na sáá nduu càda Yá Ndiöxí nchaá nàcuáa tàù-xi cunduu, te dàv-á<sup>n</sup> te nchaá sá càchí-gǎ ñà túú ndècu-xi

nacuáa tàú-xi cunduu vá dúcá<sup>n</sup>-gã cundecu-xi.

<sup>11</sup>Te yúhú cúnàhá ní cuu landú-í ní xóo cada-í sá cù-í landú, ní xóo cáhá<sup>n</sup>-í, ní xóo cani iní-í, te ní xóo tecú tnùn-í dàtná quidé cuè landú xĩndecu vitna, dico sátá nĩ cuu-í ì<sup>n</sup> tée cùu sacuéhé te ñá túú-gã quidé-í dàtná ní xóo cada-í cúnàhá ní cuu landú-í. <sup>12</sup>Te duca<sup>n</sup> sãtnahá-xi cùu-o vitna ndecu-o ichi Xítohó Jesucristú, chi ñá túú cùnuni váha iní-ó nàcuáa cùu cuendá Yã Ndiöxí, te cùu-o datná ñáyi ndèhe ì<sup>n</sup> núú yütátá sã ñà túú tũ váha núú-xi, te duca<sup>n</sup> sãtnahá-xi cùu-o chi ñá túú cùnuni váha iní-ó ñasa cùu cuendá-gá, dico sáá nduu quini núú-ó-gã. Te nchoo sácú-ni cùnuni iní-ó nàcuáa nduu-gá vitna dico na sáá nduu te quini ndáá-ó nàcuáa càa nacuáa nduu-gá dàtná xini ñáhá mée-gá xii-o. <sup>13</sup>Te ni caa ni quíh<sup>n</sup> duca<sup>n</sup>-ni quindáá iní-ó Yã Ndiöxí, te duca<sup>n</sup>-ni cundecu ndihi-o tnúhu ndee ìni cundecu-o ndihi-gá, te duca<sup>n</sup>-ni ìo cuu iní-ó-gã ndihi tnàha ñáyi-o. Te sá cúú iní-ó Yã Ndiöxí ndihi sá cúú iní-ó tnàha ñáyi-o xíã<sup>n</sup> ìo-gá cúnùu-xi dacúxí dàva-gá.

Ñáyi cãhá<sup>n</sup> tnúhu sá dácàhu iní ñáhá Espíritú Yã Ndiöxí

**14** Te vá dãná ndéé-ndó cùu iní-ndó tnàha ñáyi-ndo, te cuhú<sup>n</sup> iní-ndó sã nduu táhú-ndó nũú Yã Ndiöxí titní núú chiú<sup>n</sup> cada-ndo nacuáa chindee ñàha Espíritú-gá xii-ndo, te ìo cuhú<sup>n</sup> iní-ndó sã ndúú táhú-ndó cãhá<sup>n</sup>-ndó tnúhu sá dácàhu iní ñáhá Yã Ndiöxí xii-ndo. <sup>2</sup>Te cue ñáyi cãhá<sup>n</sup> tnúhu

sá dácàhu iní ñáhá Espíritú Yã Ndiöxí tnúhu sá ñà túú xini-yu, te tnúhu cãhá<sup>n</sup>-yu-á<sup>n</sup> cúú-xí sã cúú-xí Yã Ndiöxí te ñá dũú sã cúú-xí ñáyi chi ñá túú tècú tnùn-iyu, te mee Espíritú Yã Ndiöxí quidé-xí dũca<sup>n</sup> cãhá<sup>n</sup>-yu tnúhu yiyuhu. <sup>3</sup>Te cue ñáyi ní nduu táhú nũú Yã Ndiöxí cáhá<sup>n</sup> tnúhu sá dácàhu iní ñáhá-gã xii-yu, te ñáyi-á<sup>n</sup> dácãhá<sup>n</sup>-yu ñáyi nàcuáa cuita níhí ndéé-gã-yu cundecu-yu ichi-gá, te duca<sup>n</sup> cuñàhá-yu tnúhu ndee ìni xii-yu òrè ndìhú iní-yu. <sup>4</sup>Te ñáyi cãhá<sup>n</sup> tnúhu sá dácàhu iní ñáhá Espíritú Yã Ndiöxí xii-yu tnúhu sá ñà túú xini-yu-á<sup>n</sup>, ñáyi-á<sup>n</sup> mee-ni-yu níhí ndéé-yu ndécú-yu ichi-gá. Dico ñáyi cãhá<sup>n</sup> tnúhu sá dácàhu iní ñáhá-gã xii-yu, cãhá<sup>n</sup>-yu tnúhu-á<sup>n</sup> nàcuáa níhí ndéé dàva-gá ñáyi nchicú<sup>n</sup> nihnu ichi-gá.

<sup>5</sup>Te yúhú ìo cudí<sup>n</sup> ìni-í te núu nchaa-ndo cãhá<sup>n</sup>-ndó tnúhu sá dácàhu iní ñáhá Espíritú Yã Ndiöxí xii-ndo tnúhu sá ñà túú xini-ndó. Dico ìo-gá cudí<sup>n</sup> ìni-í te núu nchaa-ndo cãhá<sup>n</sup>-ndó tnúhu sá dácàhu iní ñáhá-gã, chi ìo-gá xini ñúhu-xi sá cãhá<sup>n</sup>-ndó tnúhu-á<sup>n</sup> dácúxí sã cãhá<sup>n</sup>-ndó tnúhu sá dácàhu iní ñáhá Espíritú-gá cáhá<sup>n</sup>-ndó tnúhu sá ñà túú xini-ndó. Dico ì<sup>n</sup>-ni nũtnahá-xi quide-ndo te núu nchòhò ñáyi cãhá<sup>n</sup> tnúhu sá dácàhu iní ñáhá Espíritú-gá cáhá<sup>n</sup>-ndó nàcuáa quèe-xi tnúhu-á<sup>n</sup>. Te duca<sup>n</sup> te nchaa ñáyi ndècú ichi Yã Ndiöxí cuita níhí ndéé-gã-yu quíh<sup>n</sup> cundecu-yu ichi-gá. <sup>6</sup>Te núu yúhú quexìo-í núú ndécú nchòhò ñáyi ndècú ndihi-í ichi Xítohó Jesucristú, te nguíta-í cáhá<sup>n</sup>-í

mee-ni tnúhu sá dácàhu iní ñáhá Espíritú Yă Ndiöxí xii-í tnúhu sá ñà túú xìní-í, te ñá túú nă sá vâha cuu-xi sá cúú-xí-ndó. Dico cuu-xi sá vâha xii-ndo te núu na cãhá<sup>n</sup>-í núú-ndó nchaa tnúhu sá dánèhé ñáhá Yă Ndiöxí xii-í tnúhu sá vătá dácuaàha-gá-í, ndìhi nchaa tnúhu sá sà xìní-í, ndìhi nchaa tnúhu sá dácàhu iní ñáhá-gă xii-í cãhá<sup>n</sup>-í, ndìhi nchaa dava-gă tnúhu-gă.

<sup>7</sup>Te na càda-o cuendá sá nũu ìí<sup>n</sup> tée tìú-dé vîlu àdi cani-dé àrpá te núu ñá túú sàhnú-dé ndìhi-xi ìí<sup>n</sup> yaá, te ñá cútnùni iní-ó nă yaá cání-dé àdi ná yaá tìú-dé te núu duca<sup>n</sup> na càda-dé. <sup>8</sup>Te ñiú-ni duca<sup>n</sup> sãtnahá-xi cùu tucu tée cùu sandadú tìú cútú, chi núu vá tìú váha-dé nàcuáa tàú-xi cunduu òrè quíhí<sup>n</sup>-güedé nàa-güedé, te vá ngündecu túha dava-gă cue sandàdú te núu duca<sup>n</sup> na càda-dé vá tìú váha-dé. <sup>9</sup>Te duca<sup>n</sup> sãtnahá-xi cùu nchohó te núu vá cãhá<sup>n</sup>-ndó ìí<sup>n</sup> tnúhu nàcuáa tàú-xi cunduu núú ñâyíu te vá tècú tnùní-yu tnúhu cãhá<sup>n</sup>-ndó. ¡Chi àú<sup>n</sup> nă cuu cãhá<sup>n</sup>-ndó te núu duca<sup>n</sup> na càda-ndo! <sup>10</sup>Te ío títí núú tnúhu ìò ñuyíú, te ìí<sup>n</sup> ìí<sup>n</sup> núú tnúhu-á<sup>n</sup> cútnùni iní ñâyíu nàcuáa quèe-xi. <sup>11</sup>Te núu nchoo ñă tècú tnùní-ó ìí<sup>n</sup> tnúhu cãhá<sup>n</sup> ìí<sup>n</sup> ñâyíu, te quide-ó-yu ñâyíu ñúú xícá chi ñá túú cãhá<sup>n</sup>-yu tnúhu cãhá<sup>n</sup>-ó, te ñiú-ni duca<sup>n</sup> quide ñahá-yu xii nchoo tucu. <sup>12</sup>Te xíă<sup>n</sup> nũu cãchí tnúhu-í xii nchaa nchòhò ñâyíu ío cuiní nduu táhú nũú Yă Ndiöxí sá Espíritú-gă chindee ñaha-xi xii-ndo cada-ndo ná daha núú chiú<sup>n</sup>, te ío nducu ndèe-ndo cada-ndo chiú<sup>n</sup> sá ñí nduu táhú-ndó nàcuáa cuita níhí ndéé-gă ñâyíu ndècu ichi-gă quíhí<sup>n</sup>.

<sup>13</sup>Te núu cãhá<sup>n</sup>-ndó tnúhu sá ñà túú xìní-ndó, tnúhu sá dácàhu iní ñáhá Espíritú Yă Ndiöxí xii-ndo, te xìni ñuhu-xi sá càcá<sup>n</sup> táhú-ndó nũú Yă Ndiöxí cuèndá sá ná chindee ñaha-gă xii-ndo cãhá<sup>n</sup>-ndó nũú ñâyíu núu nása quèe-xi tnúhu-á<sup>n</sup>. <sup>14</sup>Chi núu nchoo na cãhá<sup>n</sup> ndìhi-o Yă Ndiöxí ndìhi tnúhu sá ñà túú xìní-ó, te ñi yùhu ñi iní-ó cãhá<sup>n</sup> ndìhi-o-gă dícó-ni sá ñă tècú tnùní-ó nàcuáa ndùu tnúhu cãhá<sup>n</sup>-ó. <sup>15</sup>Te xíă<sup>n</sup> nũu xìni ñuhu-xi cãhá<sup>n</sup> ndìhi-o Yă Ndiöxí ñi yùhu ñi iní-ó nàcuáa chindee ñaha Espíritú-gă xii-o te cãhá<sup>n</sup>-ó nàcuáa tecu tnùní-ó, te ñiú-ni duca<sup>n</sup> càda-o oré xítá yùhu-o chiñuhu-o Yă Ndiöxí, chi ñi yùhu ñi iní-ó dùca<sup>n</sup> cada-o nàcuáa chindee ñaha Espíritú-gă xii-o, te cùtnuní iní-ó nàcuáa cuáhá<sup>n</sup> nchaa tnúhu cãhá<sup>n</sup>-ó xíta-o. <sup>16</sup>Chi núu nchoo na ndàcá<sup>n</sup> táhú-ó nũú Yă Ndiöxí ndìhi mee-ni tnúhu sá ñà túú xìní-ó tnúhu sá dácàhu iní ñáhá Espíritú-gă xii-o, te ñâyíu ñá túú ní ndùu táhú cãhá<sup>n</sup> tnúhu cãhá<sup>n</sup>-ó ndèdóho ñahá-yu xii-o, te ñâyíu-á<sup>n</sup> vă ndácü-yu cãhá<sup>n</sup>-yu tnúhu cãhá<sup>n</sup>-ó ndàcá<sup>n</sup> táhú-ó ndìhí-yu núú Yă Ndiöxí chi ñá túú tècú tnùní-yu tnúhu cãhá<sup>n</sup>-ó. <sup>17</sup>Te váha-ni quide-o sá dúcá<sup>n</sup> cãhá<sup>n</sup>-ó ndàcá<sup>n</sup> táhú-ó nũú Yă Ndiöxí, te dícó-ni sá tnúhu-á<sup>n</sup> ñà túú chindee-xi ñâyíu nàcuáa cuita níhí ndéé-gă-yu cundecü-yu ichi-gă. <sup>18</sup>Te yúhú ío ndàcá<sup>n</sup> táhú-í núú Yă Ndiöxí chi cãhá<sup>n</sup>-í tnúhu sá ñà túú xìní-í tnúhu sá dácàhu iní ñáhá Espíritú-gă xii-í, te cãhá<sup>n</sup>-gá-í dácúxí nchaa nchohó. <sup>19</sup>Te òrè tàcá ñâyíu ndècu ichi Yă Ndiöxí dácuaàhá-yu tnúhu-gă, te cãhá<sup>n</sup>-í

tnúhu-gá núu-yu sá sà ní cutnùnì iní mée-í nàcuáa duca<sup>n</sup> cùtnunì iní-yu nàcuáa ndúu tnúhu càhá<sup>n</sup>-í. Te tnàhá-gá iní-í cáhá<sup>n</sup>-í úhú<sup>n</sup>-ni tnúhu-á<sup>n</sup> núu-yu dàcúúxí sá càhá<sup>n</sup>-í úxí mĩ tnúhu sá ñà túú xìní-í, tnúhu sá dácàhu iní ñáhá Espíritú Yá Ndiöxí xii-í càhá<sup>n</sup>-í.

<sup>20</sup>Te nchòhó ñáyiú ndècu ndìhi-í ichi Xítohó Jesucristú, vá cánì ìní-ndó dàtná sání ìní cue landú, chi canì iní-ndó dàtná tàù-xi cunduu chi sa sacuéhé-ndó. Dico cuu-ndo dàtná cue landú líhli vá cundècu-ndo ichi cuehé ichi duha, chi cue landú-á<sup>n</sup> ñà túú ndècu-güexi ichi-á<sup>n</sup>. <sup>21</sup>Te núú tütú Yá Ndiöxí càhá<sup>n</sup>-xi nàcuáa ní cáhá<sup>n</sup>-gá, te cächí-xi: “Cue tée ñúú xícá càhá<sup>n</sup> ndì dí<sup>n</sup> núú tnúhu quíh<sup>n</sup>-güedé cáhá<sup>n</sup>-güedé tnúhu-í núú ñáyiú isràél cada-güedé núú-í, te cuèi duca<sup>n</sup> dico vá quèndáá iní-yu tnúhu-í”, duha ní cachí Yá Ndiöxí te duca<sup>n</sup> ní ngúndeé núú tütú-gá. <sup>22</sup>Te tnúhu sá dácàhu iní ñáhá Espíritú Yá Ndiöxí xii-o tnúhu sá ñà túú xìní-ó, xíá<sup>n</sup> cúú-xí cuèndá sá cùtnùnì iní cue ñáyiú ñà túú sàndáá iní tnúhu Yá Ndiöxí sá ñà túú cùu váha iní ñáhá-gá xíí-yu. Dico sá cúú-xí cuè ñáyiú sàndáá iní tnúhu-gá ñà túú ñà quidé-xí sá cúú-xí-yu. Te tnúhu sá dácàhu iní ñáhá Yá Ndiöxí xii-o, xíá<sup>n</sup> cúú-xí cuèndá sá cùtnùnì iní cue ñáyiú sàndáá iní tnúhu-gá sá ndécú ndìhi ñaha-gá xíí-yu, dico ñà túú dùca<sup>n</sup> sani iní cue ñáyiú ñà túú sàndáá iní tnúhu-gá. <sup>23</sup>Te núú ní tacá ncha nchòhó ñáyiú ndècu ichi Yá Ndiöxí, te ncha-ndo ní ngúíta-ndo càhá<sup>n</sup>-ndó tnúhu

sá dácàhu iní ñáhá Espíritú Yá Ndiöxí xii-ndo tnúhu sá ñà túú xìní-ndó, te mei òrè-á<sup>n</sup> quexìo cue ñáyiú ñà túú sàndáá iní tnúhu-gá, ndìhi cue ñáyiú vátá quìnì dana-gá tnúhu-gá núú ndécú-ndó, te ñáyiú-á<sup>n</sup> quesàhá-yu sá lúcú-ndó te núú duca<sup>n</sup> càhá<sup>n</sup>-ndó tnúhu sá dácàhu iní ñáhá Espíritú-gá xii-ndo òrè quexìo-yu. <sup>24</sup>Dico núú ncha-ndo càhá<sup>n</sup>-ndó tnúhu sá dácàhu iní ñáhá Yá Ndiöxí xii-ndo, te mei òrè-á<sup>n</sup> quexìo cue ñáyiú duca<sup>n</sup> ñà túú sàndáá iní-xi tnúhu-gá, ndìhi cue ñáyiú duca<sup>n</sup> ñà túú xìnì dana tnúhu-gá-á<sup>n</sup>, te ñáyiú-á<sup>n</sup> cutnùnì iní-yu sá ndécú cuèchi-yu núú-gá, te ngúíta-yu cuáha-yu cuèndá sá ñà túú quide váha-yu ndécú-yu cuèndá sá càhá<sup>n</sup>-ndó tnúhu-gá ndèdóho-yu. <sup>25</sup>Te ncha sá cuèhé sá dúhá ní quidé-yu sàni iní-yu yìyuhu ndacu iní-yu, te ngúíta-yu náhmá-yu ncha sá ñà túú vaha ní quidé-yu núú Yá Ndiöxí, te cachí-yu sá ìo càhnu cuu-gá, te cachí tucú-yu sá ndáá ndécú ndìhi-ndo-gá.

#### Cada-o nàcuáa tàù-xi cunduu

<sup>26</sup>Te vitna nchòhó ñáyiú ndècu ndìhi-í ichi Xítohó Jesucristú xini ñuhu-xi duha cada-ndo. Òrè tàcá-ndó te dava-ndo càta yuhu-ndo chiñuhu-ndo Yá Ndiöxí, te dava-ndo dàsahú-ndó ñáyiú tnúhu-gá, te dava-ndo cáhá<sup>n</sup>-ndó nàcuáa dàquixi túu Yá Ndiöxí iní-ndó, te dava-ndo cáhá<sup>n</sup>-ndó tnúhu sá dácàhu iní ñáhá Espíritú Yá Ndiöxí xii-ndo tnúhu sá ñà túú xìní-ndó, te dava-ndo cáhá<sup>n</sup>-ndó nàcuáa quèe-xi tnúhu-á<sup>n</sup>. Te ncha sá quidé-ndó ná cùu-xi nacuáa chindee-xi ñáyiú nàcuáa

cuita níhí ndéé-gǎ-yu cundecú-yu ichi-gá. <sup>27</sup>Te òré càhá<sup>n</sup>-ndó tnúhu sá dácàhu iní ñáhá Espíritú Yá Ndiòxí xii-ndo tnúhu sá ñà túú xìní-ndó, te úú-ni-ndo àdi úní-ni tnàhá-ndó cǎhá<sup>n</sup>-ndó tnúhu-á<sup>n</sup> te vǎ úú<sup>n</sup> ní cǎhá<sup>n</sup>-ndó chi ndéé ndíhi ì<sup>n</sup>-ndo te dǎtnùnì ngüíta ingá-ndó cǎhá<sup>n</sup>-ndó. Te xìnì ñuhu-xi sá ì<sup>n</sup> ñǎyiú cǎhá<sup>n</sup>-yu nàcuáa quèe-xi tnúhu càhá<sup>n</sup>-ndó-ǎ<sup>n</sup>. <sup>28</sup>Te núu ñá túú ñǎyiú tècú tnùnì nàcuáa quèe-xi tnúhu càhá<sup>n</sup>-ndó-ǎ<sup>n</sup>, te núú mée núú ì<sup>n</sup>-ní-ndó cǎhá<sup>n</sup>-ndó tnúhu-á<sup>n</sup> cǎhá<sup>n</sup> ndíhi-ndo Yá Ndiòxí te vǎ càhá<sup>n</sup>-ndó núú ñǎyiú. <sup>29</sup>Te òré càhá<sup>n</sup>-ndó tnúhu sá dácàhu iní ñáhá Yá Ndiòxí xii-ndo te úú-ni-ndo àdi úní-ni tucu-ndo cǎhá<sup>n</sup>, te dava-gá-ndó cùndedóho-ndo tnúhu-á<sup>n</sup> te cǎhá<sup>n</sup>-ndó núu váha-ni cǎhá<sup>n</sup>-güedé àdi ñá túú váha-ni. <sup>30</sup>Te núu ì<sup>n</sup>-ndo ní dácáhú ìní ñáhá Yá Ndiòxí xii-ndo ì<sup>n</sup> tnúhu cǎhá<sup>n</sup>-ndó, te núu ì<sup>n</sup>-ndo sǎ cahá<sup>n</sup>-ndó te ngüíñí-ndó te quíhu tucu ingá-ndó cǎhá<sup>n</sup>-ndó nàcuáa ní dácáhú ìní ñáhá Yá Ndiòxí xii-ndo. <sup>31</sup>Te nchaá nchòhó ñáyiú ní nduu táhú cǎhá<sup>n</sup> tnúhu sá dácàhu iní ñáhá Yá Ndiòxí, te vǎ úú<sup>n</sup>-ní cǎhá<sup>n</sup>-ndó chi díhna-gá ì<sup>n</sup>-ndo cǎhá<sup>n</sup> te dǎtnùnì cǎhá<sup>n</sup> tucu ingá-ndó. Te duca<sup>n</sup> càda-ndo cuendá nchaá-ndo tècú tnùnì-ndó nàcuáa ndùu tnúhu càhá<sup>n</sup> ì<sup>n</sup> ì<sup>n</sup>-ndo, te duca<sup>n</sup> te cudíí-gǎ ìní-ndó cànchicú<sup>n</sup> nihnu-ndo ichi-gá. <sup>32</sup>Te nchaá ñáyiú càhá<sup>n</sup> tnúhu Yá Ndiòxí sa nàha-ná mée-yu nàcuáa quidé-yu càhá<sup>n</sup>-yu tnúhu-gá nàcuáa ñá túú quide cutexínu-yu. <sup>33</sup>Te Yá Ndiòxí cúú-gǎ Yaá quidé ìo váha cùu ì<sup>n</sup>-nuu-ndo ndecu-ndo, te ñá túú dǎticá nuu ñaha-gǎ xii-ndo.

Te na cǎchí tnúhu-í xii-ndo nàcuáa càhá<sup>n</sup>-í nchaá núú tàcá cue ñáyiú ndècu ndíhi-o ichi Xítohó Jesucristú. <sup>34</sup>Te yúhú cǎchí-í sá vǎ cúú cǎhá<sup>n</sup> cue ñáyiú díhí òré tàcá-ndó dàcuaha-ndo tnúhu-gá, chi ñá túú dùca<sup>n</sup> cuiní-gá cadá-yu, te quíndáá-ni ìní-yu cadá-yu nàcuáa tàú-xi cunduu. <sup>35</sup>Te núu ì<sup>n</sup> sá cuiní-yu nducu tnúhu-yu te ndéé òré nasáá-yu vehé-yu te nducu tnúhu-yu núú yíí-yu, chi ñá túú ndùu váha-xi sá càhá<sup>n</sup>-yu núú tàcá nchaá ñáyiú dàcuáha ndíhí-yu tnúhu-gá.

<sup>36</sup>Te chí dándàcu ìní sá ñà dǎú nchòhó cúú-ndó ñǎyiú ní ngúndecu ndíhi tnúhu Yá Ndiòxí díhna nuu nàcuáa datècú tnúhu-ndo dǎva-gá ñáyiú, te ni ñà dǎú mèe-ni nchòhó sa ní ngúndecu ndíhi-ndo tnúhu Yá Ndiòxí vitna, núu xǎ<sup>n</sup> vǎ cǎchí-ndó sǎ ìo cùnuu-ndo. <sup>37</sup>Te núu dava nchòhó sání ìní-ndó sǎ càhá<sup>n</sup>-ndó nàcuáa dàcahu iní ñáhá Yá Ndiòxí xii-ndo àdi sani ìní-ndó sǎ quidé-ndó nàcuáa chindee ñaha Espíritú-gá xii-ndo, te cuáha váha-ndo cuendá sá ncháá tnúhu càhá<sup>n</sup>-í-a cùu-xi tnúhu sá ní cachí tnúhu mee Xítohó Jesucristú cada-o. <sup>38</sup>Te ndéda-ni càa ñáyiú ndècu ndíhi-ndo te núu ñá túú sàndáá ìní-yu tnúhu càhá<sup>n</sup>-í, te vǎ cadá cuendá-ndó tnúhu càhá<sup>n</sup>-yu.

<sup>39</sup>Te vitna nchòhó ñáyiú ndècu ndíhi-í ichi Xítohó Jesucristú, ìo cani ìní-ndó cǎhá<sup>n</sup>-ndó tnúhu sá dácàhu iní ñáhá Yá Ndiòxí núú ñǎyiú, te daña-ndo na càhá<sup>n</sup> cue ñáyiú ní nduu táhú núú Yá Ndiòxí sá càhá<sup>n</sup>-yu tnúhu sá dácàhu iní ñáhá Espíritú-gá xíí-yu tnúhu sá ñà



túu xini-yu. <sup>40</sup>Te cada-ndo nchaa nacuaa tau-xi cunduu nacuaa na tuu na cuu cundecu-ndo.

### Ni ndoto Xitohó Jesucristú

**15** Te vitna nchòhò ñayiu ndècu ndihi-í ichi Xitohó Jesucristú cuini-í sá dándacu ini-ndo nacuaa ní dánèhé ñàhà-í xii-ndo tnùhu sá càhá<sup>n</sup> nacuaa naníhí tǎhú-ó, chi diu tnùhu-á<sup>n</sup> ní sándáá ini-ndo te nchicú<sup>n</sup> nihnu-ndo. <sup>2</sup>Te sá xíi tnùhu-á<sup>n</sup> níhnú-ndo ìchi cuáhá<sup>n</sup>-ndó núú ndúú tǎhú-ndó cundecu-ndo ndihi Yá Ndiòxí ni caa ni quíhí<sup>n</sup>, te duca<sup>n</sup> ndùu tǎhú-ndó núú cundècu-ndo ni caa ni quíhí<sup>n</sup> ndihi Yá Ndiòxí te núu nchicú<sup>n</sup> nihnu-ndo nacuaa ní dánèhé ñàhà-í xii-ndo, te núu ñá túu nchicú<sup>n</sup> nihnu-ndo te ñá túu ní sándáá ini-ndo nacuaa tau-xi cunduu.

<sup>3</sup>Te yúhú sa ní cachí tnùhu-í xii-ndo ì<sup>n</sup> tnùhu sá ìo cùnuu ní níhì-í, chi ní cachí tnùhu-í xii-ndo sǎ Xitohó Jesucristú ní xíhí-gá cuendá nchaa yíca cuèchi-o, te duca<sup>n</sup> ní cuu chi duca<sup>n</sup> càhá<sup>n</sup>-xi núú tütú Yá Ndiòxí sá dúcá<sup>n</sup> yàha-gá.

<sup>4</sup>Te ní chindúxi ñaha-güedé xii-gá te nduu úní ní dándótó ñàha Yá Ndiòxí xii-gá, te duca<sup>n</sup> ní cuu chi duca<sup>n</sup> càhá<sup>n</sup>-xi núú tütú Yá Ndiòxí.

<sup>5</sup>Te sátá ní ndoto-gá te ní quee túu-gá núú tǎ Pèlú, te dàtnùní ní quee túu-gá núú dàva-gá cue tée ní táuchíú<sup>n</sup>-gǎ càhá<sup>n</sup> tnùhu-gá. <sup>6</sup>Te sátá dúcá<sup>n</sup> te dàtnùní ní quee túu-gá núú úhú<sup>n</sup> cièndú cue ñayiu ndècu ichi-gá, te vǎi-yu xíndecu-ní-yu vitna chi sacú-ni-yu ní xíhí. <sup>7</sup>Te dàtnùní ní quee túu-gá núú tǎ

Jàcobó, te sátá dúcá<sup>n</sup> te dàtnùní ní quee túu-gá núú nchaa cue tée ní táuchíú<sup>n</sup>-gǎ càhá<sup>n</sup> tnùhu-gá.

<sup>8</sup>Te ndéé núú ní ndihi-ná te ní quee túu-gá núú mée-í, te òrè ní quee túu-gá núu-í te cùu-í dàtná ì<sup>n</sup> déhe yiquí<sup>n</sup> vǎtá sàá-gá nduu càcu chi cùu-í ì<sup>n</sup> tée ñá túu sàni vǎha ini-xi cuendá-gá ní cùu. <sup>9</sup>Te yúhú ñá túu cùnuu-í dàtná cùnùu cue tée ní táuchíú<sup>n</sup> Xitohó Jesucristú càhá<sup>n</sup> tnùhu-gá. Te cùu-í ì<sup>n</sup> tée ní táuchíú<sup>n</sup>-gǎ càhá<sup>n</sup> tnùhu-gá, cuèi ñá túu tau-í sá càhá<sup>n</sup>-í tnùhu-gá, chi ní xóo cuu úhú ini-í cue ñayiu ndècu ichi Yá Ndiòxí. <sup>10</sup>Dico Yá Ndiòxí ío vǎha ini-gá chi ní quide ñaha-gǎ xii-í ì<sup>n</sup> tée vǎha, chi ñá túu-gǎ quidè-í dàtná ní xóo cada-í. Te ío cùndahú ini ñàhá-gǎ chindèe ñaha-gǎ xii-í dico ñá túu àu<sup>n</sup> ná cuu chindee ñaha-gá, chi ío-gá vǎi chiu<sup>n</sup>-gá ní cuu sa ta quide-í cuáhá<sup>n</sup> dàcúxí dàva-gá cue tée ní táuchíú<sup>n</sup>-gǎ càhá<sup>n</sup> tnùhu-gá te ñá dǎú mée-í duca<sup>n</sup> quide-í chi mee Yá Ndiòxí ío cùndahú ini ñàhá-gǎ chindèe ñaha-gǎ xii-í quidè-í chiu<sup>n</sup>-gá. <sup>11</sup>Te ñá túu ná cada-xi cuèi dava-gǎ-güedé sa ní cuu vǎi-gǎ chiu<sup>n</sup>-gǎ quidè-güedé àdi yúhú, chi ì<sup>n</sup>-ni tnùhu càhá<sup>n</sup>-ndí te tnùhu-á<sup>n</sup> cúu tnùhu ní sándáá ini-ndo.

### Cue ñayiu ní xíhí ndotó-yu

<sup>12</sup>Te nchúhú cue tée càhá<sup>n</sup> tnùhu Xitohó Jesucristú càhá<sup>n</sup>-ndí sá ní xíhí-gá te ní ndoto-gá, ¿te ná cuendá dava nchòhò càhí-ndó sǎ vǎ ndótó cuè ñayiu ní xíhí? <sup>13</sup>Te núu duca<sup>n</sup> sàni ini-ndo sǎ vǎ ndótó cuè ñayiu ní xíhí te ní Xitohó Jesucristú ñá túu ní

ndòto-gá te núu duca<sup>n</sup>. <sup>14</sup>Te núu dicó Xítohó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñà túú nàndíhi-xi te núu duca<sup>n</sup>, te àú<sup>n</sup> nã cuu sàndáá iní-ndó-gã te núu duca<sup>n</sup>. <sup>15</sup>Te núu dicó cúú-xí ìí<sup>n</sup> sá ndàá tnúhu sàni iní dava-ndo ña, te dàcuandehnde-ndí sá càhá<sup>n</sup>-ndí tnúhu Yá Ndiòxí núú-ndó te núu duca<sup>n</sup>, te ñá túú càhá<sup>n</sup> ndáá-ndí núú-ndó sã Yã Ndiòxí ní dándótó-gã Xítohó Jesucristú, te núu ndáá nàcuáa sàni iní dava-ndo sã vã ndótó cuè ñáyiu ní xíhí, dico ñá ndàá nàcuáa sàni iní-ndó. <sup>16</sup>Te núu vã ndótó cuè ñáyiu ní xíhí te ni Xítohó Jesucristú ñá túú ní ndòto-gá. <sup>17</sup>Te núu Xítohó Jesucristú ñá túú ní ndòto-gá ñá, te àú<sup>n</sup> nã cuu sàndáá iní-ndó-gã te núu duca<sup>n</sup>, te ndècu-ni cuèchi-ndo núú Yã Ndiòxí te núu duca<sup>n</sup>. <sup>18</sup>Te núu ndáá nàcuáa sàni iní-ndó ñá te cue ñáyiu ní sàndáá iní ñáhá xii Xítohó Jesucristú ñáyiu ní xíhí ní xíta nihnú-yu te núu duca<sup>n</sup>. <sup>19</sup>Te núu nchoo ndècu ndíhi-o tnúhu ndee iní núú Xítohó Jesucristú cuèndá-ni sá cùndècu-o ñuyíú-a ña, te cùu-o ñáyiu ío-gá duu<sup>n</sup> duu<sup>n</sup> ndàhú sá cúú-xí dàva-gá ñáyiu te núu duca<sup>n</sup>.

<sup>20</sup>Dico ndáá sá Xítohó Jesucristú ní xíhí-gá te ní ndoto-gá núú xíá<sup>n</sup> cútnùnì iní dava-o sã ndótó cuè ñáyiu ní xíhí ñáyiu ní sàndáá iní tnúhu-gá. <sup>21</sup>Te sá cuèchi ìí<sup>n</sup> ddi-ni téé ní xíndecu ñuyíú-a xíá<sup>n</sup> xíhí ñáyiu, te sá cuèndá ìí<sup>n</sup> ddi-ni tucu ingá téé te ndoto cue ñáyiu ní xíhí. <sup>22</sup>Te nchaa ñáyiu xíhí-yu sá cuèchi ìí<sup>n</sup> téé, te téé-á<sup>n</sup> cúú-dě ndíí Àdán téé díhna nuu nĩ cuu ñanì

tnáhá cuè ñáyiu ñuyíú. Te ddi-ni duca<sup>n</sup> sã cuèndá ìí<sup>n</sup> ddi-ni téé te ndoto cue ñáyiu ní xíhí, te téé-á<sup>n</sup> cúú-dě Xítohó Jesucristú chi nchaa ñáyiu ndècu ndíhi-gá ndotó-yu.

<sup>23</sup>Te díhna-gá Xítohó Jesucristú ní ndoto-gá xíá<sup>n</sup> cútnùnì iní dava-o sã ndùu na quixi tucu-gá ñuyíú-a te dàvá-á<sup>n</sup> ndoto nchaa ñáyiu ní xíhí ñáyiu ní sàndáá iní tnúhu-gá.

<sup>24</sup>Te dàtnùnì duca<sup>n</sup> te sáá nduu nàa nchaa sá ío ñuyíú, te Xítohó Jesucristú danàa-gá nchaa ndí túhú sá cùnùu ío ñuyíú-a, chi danàa-gá nchaa ñáyiu ío cùnùu, ndíhi yucu ñávãha, ndíhi nchaa espíritú xínú cuèchi núú-xi. Te duca<sup>n</sup> te cúñaha-gã xii Tãtã-ó Dütü Ndiòxí taxi tnùnì-gá. <sup>25</sup>Chi Xítohó Jesucristú dacuítí tãxi tnùnì-gá ndéé ná sáá nduu dànaa-gá nchaa sá cúú ùhú iní ñáhá xii-gá. <sup>26</sup>Te ndéé núú nĩ ndíhi-ná te danàa-gá sá quidé xíhí ñáyiu. <sup>27</sup>Te duca<sup>n</sup> chi càhá<sup>n</sup>-xi núú tütú Yã Ndiòxí sá méé-gá ní nachihi-gá nchaa sá ío ndaha Xítohó Jesucristú cuèndá sá méé Xítohó Jesucristú taxi tnùnì-gá, te vã yõ ìí<sup>n</sup> tàxi tnùnì ñáhá xii Yã Ndiòxí, chi mee Yã Ndiòxí cúú-gã Yáá ní nachihi-gá nchaa sá ío ndaha Xítohó Jesucristú. <sup>28</sup>Te díhna-gá ní xáha<sup>n</sup> Yã Ndiòxí xii Xítohó Jesucristú Yáá cúú Dèhe-gá sá quíndaha-gá nchaa sá ío, te òré ná quíndaha Xítohó Jesucristú nchaa sá ío, te cúñaha-gã xii Yã Ndiòxí taxi tnùnì ñáhá-gã xii-gá, te duca<sup>n</sup> te mee-nã Yã Ndiòxí taxi tnùnì-gá nchaandi túhú sá ío.

<sup>29</sup>Te núu ñá túú ndáá càhá<sup>n</sup>-í, ète ná cuèndá dava ñáyiu sànduté-yu

cuendá ñáyiú ní xíhí nũ ñá túú ndáá sá ndótó ñáyiú ní xíhí?

<sup>30</sup>Te nchúhú duca<sup>n</sup>-ni sàni iní ñáyiú cahni ñàhá-yu xii-ndí, te núu vá ndótó ñáyiú ní xíhí te àú<sup>n</sup> nã cuu duca<sup>n</sup> quide cahnu iní-ndí duca<sup>n</sup> cuiní-yu cahni ñàhá-yu xii-ndí te núu duca<sup>n</sup>. <sup>31</sup>Te nchòhó ñáyiú ndècu ndìhi-í ichi Xítóhó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sã ì<sup>n</sup> nduu ì<sup>n</sup> nduu ndeé iní ñàhá ñáyiú cahni ñàhá-yu xii-í. <sup>32</sup>Te núu dícó ndáá sá vã ndótó ñáyiú ní xíhí dàtná càchí dava ñáyiú, te àú<sup>n</sup> nã cuu ní xíndecu-í ñuú Éfésú ní cuu úhú iní ñàhá ñáyiú xii-í te núu duca<sup>n</sup>, chi ñáyiú-á<sup>n</sup> nĩ quidé-yu dàtná quidé ì<sup>n</sup> quiti déé<sup>n</sup> sã cúu-xì-í. Te núu ndáá sá vã ndótó ñáyiú ní xíhí ñá, te váha-gá nũ cachí-ó dàtná càchí ñáyiú: “Vitna na còho-o te na càxi-o chi tneé idá cuú-ó”, duha càchí-yu.

<sup>33</sup>Te vá dáñá-ndó mèe-ndo dandahú ñàhá ñáyiú ndècu ichi cuehé ichi duha xii-ndo, te ngüíta-ndo càni iní-ndó dàtná sání iní-yu. Chi quèe ndáá-xi nàcuáa càhá<sup>n</sup> tucu dava-gá ñáyiú, chi càchí-yu sá nũ ñáyiú quide váha na nihí tnáhã-yu ndìhi ñáyiú ndècu ichi cuehé ichi duha, te ngüíta ñáyiú quide váha-á<sup>n</sup> cadá-yu tnàhá-yu nchaá sá cuèhé sá dúhá dàtná quidé ñáyiú-á<sup>n</sup>. <sup>34</sup>Te ío váha cuáha-ndo cuendá nàcuáa cundecu-ndo, te vá cadá-gã-ndó dàtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yã Ndiöxí. Te

duha càhá<sup>n</sup>-í cuendá sá cúcàha<sup>n</sup> núu-ndó cuendá nchaá sá ñà túú váha quide-ndo.

#### Nàcuáa ndoto ñáyiú ní xíhí

<sup>35</sup>Te cudana dava-ndo ndècu tnúhu-ndo nũ nása ndoto ñáyiú ní xíhí, te nása cunduu yiqui cùñú-yu òré ndotó-yu. <sup>36</sup>Te nchòhó ñáyiú duca<sup>n</sup> càhá<sup>n</sup> cúu-ndó ñáyiú ñá túú tnàhí cùtnuní iní-xi, te duha na càhá<sup>n</sup>-í nàcuáa tecú tnùní-ndó. Te núu ì<sup>n</sup> tatá ná chíhí-ó te tèhyú méé-xí te xínu déhe-xi. <sup>37</sup>Dico ñá dífú sã sà ní xínu ta sàhnu cuáhá<sup>n</sup> ní cùxi-o, te ñu-ni duca<sup>n</sup> quide-o cuéi tríú ndìhi nchaá dava-gá tatá xítú-ó. <sup>38</sup>Te Yã Ndiöxí quidé-gã sácünduu tatá xínu-á<sup>n</sup> dàtná cuiní méé-gã cunduu. Te ndèda-ni càa tatá te ñu-ni-gá quidé-gã sácünduu-xi nàcuáa tàù-xi cunduu. <sup>39</sup>Te ndi díí<sup>n</sup> ndáa nchaá yiqui cùñú, chi tucu càa yiqui cuñú nchoo cuè ñáyiú, te tucu càa yiqui cuñú nchaá quiti xica núu ñúhú, te tucu càa yiqui cuñú nchaá quiti ndáva, te tucu càa yiqui cuñú nchaá chácá. <sup>40</sup>Te duca<sup>n</sup> ñà túú ì<sup>n</sup>-ni caa nchaá yiqui cuñú sá ío andiú ndìhi nchaá yiqui cuñú ñáyiú ío ñuyíú-a, te duca<sup>n</sup> ñà túú ì<sup>n</sup>-ni ndáa vii nchaá sá ío andiú ndìhi ñuyíú-a. <sup>41</sup>Te duca<sup>n</sup> cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaá chódíní, te duca<sup>n</sup> ñà túú ì<sup>n</sup>-ni dayehé nchaá chódíní. <sup>42</sup>Te duca<sup>n</sup> sàtnahá-xi cùu ñáyiú ní xíhí te ndoto, chi tucu càa yiqui cuñú-yu sá nguñdúxi te tucu cunduu yiqui cùñú-yu òré ndotó-yu, te yiqui cùñú sá ndótó ndìhi-yu-á<sup>n</sup> vã ndíhí nihnu-gá-xi.

<sup>43</sup>Te yiqui cùñú ñáyiú xihí ñá túú nàndíhi-xi, dico yiqui cùñú sá ndótó ndíhi-yu te ío váha cunduu. Te nchaa yiqui cùñú ñáyiú xihí ñá túú tnàhí-gá ndee-xi, dico yiqui cùñú ndoto ndíhi-yu xíã<sup>n</sup> ío cunduu ndee-xi. <sup>44</sup>Te yiqui cùñú nchaa ñáyiú xihí cúú-xí cuèndá ñuyúú-a, dico yiqui cùñú sá ndótó ndíhi-yu xíã<sup>n</sup> cundecu-ná-xi cuèndá Espíritú Yă Ndiöxí. Te dàtná ío yiqui cùñú sá cúú-xí cuèndá ñuyúú-a, te duca<sup>n</sup> ío yiqui cùñú sá cúú-xí cuèndá mee-nă Espíritú Yă Ndiöxí.

<sup>45</sup>Te núú tütú Yă Ndiöxí càchí-xi: “Ndíi Àdán ndíi ní xíndecu ndéé díhna ní chihi Yă Ndiöxí iní ndíi”, duha càchí-xi núú tütú-gá. Te íngá tucu téé cùu-dé dàtná ndíi Àdán te téé-á<sup>n</sup> cúú-dě Xítohó Jesucristú, te Yaá-á<sup>n</sup> quidé-gă sá mée-ná Espíritú Yă Ndiöxí quidé-xí ndècu-o ichi-gá vitna. <sup>46</sup>Te díhna-gá yiqui cùñú cuèndá ñuyúú-a ní ngúndecu, te dàtnùní ngúndecu yiqui cùñú cundecu ndíhi mee-nă Espíritú Yă Ndiöxí. <sup>47</sup>Te téé díhna nuu ní xíndecu ñuyúú-a chi ñuhu ní cadúha ñaha Yă Ndiöxí xii-dé, te téé-á<sup>n</sup> cúú-dě ndíi Àdán, te íngá tucu téé ní cuu<sup>n</sup>-dé andíu te téé-á<sup>n</sup> cúú-dě Xítohó Jesucristú. <sup>48</sup>Te nchaa ñáyiú cãa yiqui cuñú-yu dàtná cáa yiqui cuñú té Àdán téé duca<sup>n</sup> ní cuáha ñuhu-á<sup>n</sup>, te nchaa ñáyiú ní nduu táhú cundecu ndíhi téé duca<sup>n</sup> vèxi cuu<sup>n</sup> andíu-á<sup>n</sup>, ñáyiú-á<sup>n</sup> nduu yiqui cùñú-yu dàtná cáa yiqui cuñú ní nduu táhú-dě ndécú ndíhi-dé vitna, te téé-á<sup>n</sup> cúú-dě Xítohó Jesucristú. <sup>49</sup>Te nchaa ñáyiú ñuyúú-a cãa-yu dàtná-ni cãa datná-ni ndùu téé duca<sup>n</sup> ní cuáha ñuhu-á<sup>n</sup>. Te nchaa

nchoo ñáyiú ní nduu táhú cundecu ndíhi téé duca<sup>n</sup> vèxi cuu<sup>n</sup> andíu-á<sup>n</sup> nduu-o dàtná-ni cãa datná-ni ndùu téé-á<sup>n</sup> tucu.

<sup>50</sup>Te nchòhó ñáyiú ndècu ndíhi-í ichi Xítohó Jesucristú càchí tnúhu-í xii-ndo sã nchãá nàcuáa cãa yiqui cuñú ñáyiú xíndecu vitna vá sãà-xi cundecu-xi núú ndécú Yă Ndiöxí táxí tnùní-gá, chi ñuyúú-a ndíhi nihnu-xi. Dico sá tàú-xi sáá núú ndécú-gă táxí tnùní-gá xìni ñuhu-xi cuu-xi sá cúdíi cundecu. <sup>51</sup>Te na càchí tnúhu-í xii-ndo ì<sup>n</sup> tnúhu sá yíyùhu ni cuu: Dava-o cùú-ó te dava-o cùndecu-ni-o, dico nchaa-o nàdãma yiqui cuñú-ó. <sup>52</sup>Te uu<sup>n</sup>ni duca<sup>n</sup> nàdãma yiqui cuñú-ó òré cáhá<sup>n</sup> ì<sup>n</sup> cútú, te cútú-ã<sup>n</sup> cãhá<sup>n</sup>-xi òré sa ta cùyatni naa ñuyúú. Te òré cáhá<sup>n</sup> cútú-ã<sup>n</sup> te ndoto nchaa ñáyiú ní xihí ñáyiú ní xíndecu ichi Xítohó Jesucristú, te duca<sup>n</sup> te vá í<sup>n</sup> ndùu ì<sup>n</sup> quíú-gă cuú-yu. Te nchaa ñáyiú ndècu vívú te nàdãma yiqui cuñú-yu tnàhá-yu. <sup>53</sup>Te nchaa yiqui cùñú ndécú ndíhi nchaa ñáyiú ndècu ñuyúú-a vitna ñá túú cùdíi-xi chi xihí-xi, dico yiqui cùñú nduu táhú nchoo ñáyiú ndècu ichi Xítohó Jesucristú chi cudíi-xi ní caa ní quíh<sup>n</sup> chi vá cùú-gá-xi. <sup>54</sup>Te òré ná ndùu táhú-ó yiqui cuñú sá dúcá<sup>n</sup> cùdíi ní caa ní quíh<sup>n</sup>-á<sup>n</sup>, te vá cùndècu ndíhi-gá-ó yiqui cuñú sá ñã túú cùdíi. Te dàvá-á<sup>n</sup> te quee ndáá-xi nàcuáa cãhá<sup>n</sup>-xi núú tütú Yă Ndiöxí núú càchí-xi: “Vitna ñá túú-gă xihí ñáyiú chi mee-nă Yă Ndiöxí cùnùu-gá táxí tnùní ñãhá-gă xii-yu. <sup>55</sup>Te ñá túú tnàhí-gá ná ndoho ñáyiú sá cuèndá tnúhu xihí, chi vá cóó-gă tnúhu xihí”,

duha càchí-xi núú tùtú Yá Ndiöxí.  
<sup>56</sup>Te cue ñáyiú ndècu ndihí-yu  
 tnúhu sá sánú ichi ñaha xii-yu  
 nàcuáa cadá-yu cundecú-yu dico  
 uu<sup>n</sup>-gá quidè-yu nchaa sá cuèhé  
 sá dúhá. Te sá cuendá nchaa sá  
 cuèhé sá dúhá quidè-yu-á<sup>n</sup>, te xíá<sup>n</sup>  
 ní ngúndecu tnúhu xihí dándòho  
 ñaha-xi xii-yu. <sup>57</sup>Dico táxähu xii Yá  
 Ndiöxí chi ní taxi-gá tnúhu ndee  
 ìní ndécú ndìhi-o sá sàá nduu te vá  
 quìní-gá-ó tnúhu xihí, te duca<sup>n</sup> chi  
 ndècu ndìhi-o Xítóhó Jesucristú.

<sup>58</sup>Te xíá<sup>n</sup> núu càhá<sup>n</sup>-í dóho  
 nchòhó cue ñáyiú ndècu ndìhi-í  
 ichi Xítóhó Jesucristú chi ío cùu iní  
 ñàhá-í xii-ndo, te càhá<sup>n</sup>-í dóho-ndo  
 sã cãchícú<sup>n</sup> nihnu-ni-ndo ichi  
 Xítóhó Jesucristú cuèi nándi  
 na càda ñaha ñáyiú xii-ndo sã  
 cuendá-gá, te ío nducu ndè-ni-ndo  
 cada-ndo chiu<sup>n</sup>-gá, chi sa nàha-ndo  
 sá ncháá chù<sup>n</sup> quide-o cuendá-gá  
 ñá túú àú<sup>n</sup> nã cuu quide-o.

Nàcuáa sàcá<sup>n</sup> tnáhá ñáyiú díhú<sup>n</sup>

**16** Te na càchí tnúhu-í  
 xii-ndo cuendá díhú<sup>n</sup> sã  
 sàcá<sup>n</sup> tnáhá-ndó sã cúú-xí ñáyiú  
 ñúú Jerusálén, chi diu-ni duha  
 ní dánèhé-í cue ñáyiú xíndecu  
 ichi Xítóhó Jesucristú ndécú  
 ìí<sup>n</sup> ìí<sup>n</sup> xichi distritú Gàlaciá. <sup>2</sup>Te  
 duha cada-ndo ndì tnahá nduu  
 ndumìngú, te ìí<sup>n</sup> ìí<sup>n</sup>-ndo dàquee  
 dìí<sup>n</sup>-ndo sacú díhú<sup>n</sup> nàcuáa chindee  
 ñaha Yá Ndiöxí xii-ndo nihí-ndó  
 cuendá òré quexìo-í te sa cundecu  
 túha díhú<sup>n</sup>-á<sup>n</sup>. <sup>3</sup>Te òré quexìo-í  
 te mee-ndo cãxi-ndò-yu núu  
 ndèdacàa-yu sàni iní-ndó càda ndáá  
 canehe díhú<sup>n</sup>-á<sup>n</sup> quíhí<sup>n</sup> ndaha ñáyiú  
 xíndecu ichi Xítóhó Jesucristú

ndécú ñúú Jerusálén. Te cadúha-í  
 ìí<sup>n</sup> úú tutú canehé-yu quíhí<sup>n</sup> cuendá  
 cutnùnì iní ñáyiú ñúú Jerusálén  
 nàcuáa ndùu chiu<sup>n</sup> cuáhá<sup>n</sup>-yu. <sup>4</sup>Te  
 núu xini ñuhu-xi sá quíhí<sup>n</sup>-í te  
 candeca-í-yu quíhí<sup>n</sup>.

Té Páblú sání iní-dé quíngoto-dé cue  
 ñáyiú ndècu ichi Xítóhó Jesucristú

<sup>5</sup>Te yúhú sání iní-í yáha-í ìí<sup>n</sup>  
 úú ñúú cáá distritú Macèdoniá,  
 te dãtnùnì duca<sup>n</sup> te sáá-í núú  
 ndécú-ndó. <sup>6</sup>Te òré quexìo-í te  
 cudana cundecu ndìhi ñaha-í  
 xii-ndo vài nduu, àdi cudana te  
 cundecu ndìhi ñaha-í xii-ndo ndéé  
 yáha nchaa yóó quidè vïxi<sup>n</sup>-xi. Te  
 sátá dúcá<sup>n</sup> te cada ndee ìní-ndó  
 chindee ñaha-ndo xii-í òré nucúhu<sup>n</sup>  
 ichi-í te núu ndéé ichi na quíhí<sup>n</sup>-í.  
<sup>7</sup>Te duha càhá<sup>n</sup>-í chi núu Yá Ndiöxí  
 ná càchí-gá te cundecu ndìhi ñaha  
 tnàa-í xii-ndo òré quexìo-í te ñá dífú  
 dícó-ni ichi yáha-í. <sup>8</sup>Te cundecu-ni-í  
 ñúú Èfesú-a ndéé tnahá vico  
 Pentecòstés. <sup>9</sup>Te duca<sup>n</sup> chi iha  
 ío tédòho ñáyiú tnúhu Xítóhó  
 Jesucristú sã càhá<sup>n</sup>-í núú-yu. Núu  
 xíá<sup>n</sup> ío váha quèe cuendá cada-í  
 chiu<sup>n</sup>-gá cuèi ío vài ñáyiú ñá túú  
 tnàhá iní-yu sã càhá<sup>n</sup>-í tnúhu-gá.  
<sup>10</sup>Te núu na quixi coto ñaha  
 té Timùteú xii-ndo, te ío váha  
 cuu iní-ndó cãhá<sup>n</sup> ndìhi-ndo-dé  
 cuendá duca<sup>n</sup> ñà túú nã cani iní-dé  
 cundecu ndìhi ñaha-dé xii-ndo,  
 chi tnàhá-dé cúú-dé téé quide  
 chiu<sup>n</sup> Xítóhó Jesucristú dàtná  
 quidè-í. <sup>11</sup>Te cuìní-í sá ñi ìí<sup>n</sup>-ndo  
 vá cání cuèhé iní-ndó cuendá-dé,  
 te chindee-ndo-dé nàcuáa cuu  
 váha iní-dé òré quixi-dé quixi  
 coto ñaha-dé xii-í, chi yúhú ndìhi

dava-gá ñáyi ndècu ichi Xítoho Jesucristú ndétú-ndí-dé quexìo-dé.

<sup>12</sup>Te ío ní cáhá<sup>n</sup> ndàhú-í núú tẽ Àpolós tée ndècu ndìhi-o ichi Xítoho Jesucristú cuendá quixi-dé ndìhi dava-gá cue tée ndècu ndìhi-o ichi-gá quixi coto ñaha-güedẽ xii-ndo dico ñá túú ní cuíní-dé quixi-dé vitna, dico quixi-dé ndéé cuèé-gá.

### Tnúhu ndéé núú ñí ndìhi-ná

<sup>13</sup>Te ío quíhi iní-ndó cùndecu-ndo ichi Xítoho Jesucristú, te vá dáñá ndèé-ndó quèndáá iní-ndó-gã, te ío yíi cùnduu iní-ndó cùndecu-ndo ichi-gá, te ío nducu ndèe-ndo canchicú<sup>n</sup> nihnu-ndo ìchi-gá. <sup>14</sup>Te ío vâha cuu iní tnáhá-ndó, te duca<sup>n</sup> ño vâha cada tnàha-ndo te núú nándi cùu sá vâha sàni iní-ndó càda-ndo.

<sup>15</sup>Te nchòhò ñáyi ndècu ndìhi-í ichi Xítoho Jesucristú sa nàha-ndo sá dñhnanuu cuè ñáyi cùu ndi mee té Èstéfanás ndécú dístítú Acãyá ní sándáá iní-yu tnúhu Xítoho Jesucristú. Te vitna ñá túú dàña ndéé-yu quidé-yu sá vâha sá cúú-xí dâva-gá ñáyi sàndáá iní tnúhu-gá. <sup>16</sup>Te càhá<sup>n</sup> ndàhú-í núú-ndó sã quèndáá iní-ndó nchàa ñáyi duca<sup>n</sup> xíquide, ndìhi nchaa dava-gá ñáyi ío ndùcu ndee quide chiu<sup>n</sup> ndìhi-ndo cuendá Xítoho Jesucristú. <sup>17</sup>Te ío cùdí iní-í sá ñí quexìo té Èstéfanás, ndìhi té Fortunátú, ndìhi té Acàcú, chi

cue tée-á<sup>n</sup> ñí quide-güedé núú-ndó ñí quide-güedé nchaa sá ñà túú ndàcu-ndo cada-ndo cuendá-í ní cùu. <sup>18</sup>Te ío tàxi-güedé tnúhu ndee ìní xii-í, te diu-ni duca<sup>n</sup> tàxi-güedé tnúhu ndee ìní xii nchòhò tucu, te núú xíã<sup>n</sup> xíní ñùhu-xi sá cànèhe-ndo sá yíñùhu núú nchàa cue tée duha xíquide váha.

<sup>19</sup>Te nchaa ñáyi xñdecu ichi Xítoho Jesucristú ndécú dístítú Àsiá quide ndee ìní ñáhã-yu xii-ndo, te ío cada ndee ìní-ndó càchí té Àquilú ndìhi ñadìhí-dé tá Priscilá, te duca<sup>n</sup> quide ndee ìní ñáhá tucu nchaa ñáyi tàcá dâcuàha tnúhu Yá Ndiöxí vehé-yu xii nchaa nchòhò ñáyi ndècu ichi-gá. <sup>20</sup>Te cada ndee ìní tucu-ndo càchí cue dava-gá ñáyi ndècu ndìhi-o ichi Xítoho Jesucristú. Te ñí yùhu ñí iní-ndó càda ndee ìní tnáhá-ndó ñí ñí-ndo.

<sup>21</sup>Te vitna ndaha mee yùhú té Pãblú tée-í tnúhu-a quide ndee ìní ñáhà-í xii-ndo.

<sup>22</sup>Te ñáyi ñá túú cùu váha iní-xi núú Xítoho Jesucristú te na cuíta nihnú-yu. Te vitna nchaa-o chĩ ná càchí-ó sã Xítoho Jesucristú quixi tucu-gá.

<sup>23</sup>Te xicá<sup>n</sup> táhù-í núú Xítoho Jesucristú sá ná chindee chítúu ñaha-gã xii-ndo. <sup>24</sup>Te ío cùu ìní ñáhà-í xii-ndo nâcuáa ndècu-o ichi Xítoho Jesucristú, te duca<sup>n</sup> na cùnduu, te ío chí cadá ndèe ìní-nã vitna.

# TUTÚ CÚÚ ÒÚ NÍ CADÚHA TÉ PÄBLÚ QUÍHÍ<sup>n</sup> NDAHA ÑÁYIU ÑUÚ CÒRINTÚ

Té Páblú cádúha-dé tutú quíhí<sup>n</sup>  
ndaha ñáyiú xĩndecu ichi Xítóhó  
Jesucristú ndécú ñúú Còrintú

**1** Yúhú té Páblú càhá<sup>n</sup>-í tnúhu Xítóhó Jesucristú chi duca<sup>n</sup> ñí cachí Yá Ndiöxí cunduu. Te cádúha-í tutú-a ndíhi té Timúteú téé ndècu ndíhi-o ichi-gá cuendá daquixi-í ndaha nchòhó ñáyiú xĩndecu ichi Yá Ndiöxí ndécú ñúú Còrintú, te tutú-a cuu-xi tnàhá cuendá nchaa ñáyiú cùu cuendá Yá Ndiöxí xĩndecu nchaa ñúú yíndèhu distritú Acáyá. <sup>2</sup>Te xicá<sup>n</sup> táhú-í núú Tātá-ó Dütú Ndiöxí ndíhi núú Xítóhó Jesucristú sá ïo na chĩndee chitúu ñaha-gá xii-ndo, te ñiu-ni ndí ndúú-gá ná càda te ïo váha cuu iní-ndó cùndecu-ndo.

Té Páblú càhá<sup>n</sup>-dé nchaa  
nàcuáa ndòho-dé

<sup>3</sup>Te chí ná càchí-ó sá ïo váha iní Dütú Ndiöxí Yaá cúú Tātá Xítóhó Jesucristú, te ñiu-ni Dütú Ndiöxí cúú-gá Yaá ïo cùndahú iní ñáhá xii-o, te ñiu-ni-gá cúú-gá Yaá táxí tnúhu ndee iní. <sup>4</sup>Te cuéí nándi ndòho-o ndecu-o dico ñiu-ni Dütú Ndiöxí táxí-gá tnúhu ndee iní

xii-o, te duca<sup>n</sup> quide-gá cuendá sá nchóó cuñaha-o tnúhu ndee iní xii nchaa ñáyiú nándi ndòho ndecu, te ñiu-ni nchaa tnúhu ndee iní táxí-gá xii-o ñiu-ni nchaa tnúhu ndee iní-á<sup>n</sup> cuñaha-o xii-yu. <sup>5</sup>Te Xítóhó Jesucristú ïo ní ndoho-gá, te duca<sup>n</sup> nchòo tucu ïo ndòho-o, te duca<sup>n</sup> ïo vèi tnúhu ndee iní ñíhí-ó ndècu ndíhi-o chi ndècu-o ndíhi Xítóhó Jesucristú. <sup>6</sup>Te nchúhú nándi ndòho-ndí ndécú-ndí cuendá sá nchòhó ñíhí-ndó tnúhu ndee iní cundecu ndíhi-ndo te naníhí táhú-ndó. Te Yá Ndiöxí táxí-gá tnúhu ndee iní xii-ndí, te duca<sup>n</sup> quide-gá cuendá sá nchòhó tnàhá-ndó ñíhí-ndó tnúhu ndee iní-á<sup>n</sup> te naníhí táhú-ndó, te duca<sup>n</sup> càda ndee cada cahnu iní-ndó ndòho-ndo datná ndóhó nchúhú. <sup>7</sup>Te nchúhú ïo váha sàni ndáa iní-ndí cuendá-ndó chi ndòho-ndo datná ndóhó-ndí, te duca<sup>n</sup> tàxi Yá Ndiöxí tnúhu ndee iní xii-ndo datná táxí-gá xii-ndí.

<sup>8</sup>Te nchòhó ñáyiú ndècu ndíhi-ndí ichi Xítóhó Jesucristú cuiní-ndí cachí tnúhu-ndí xii-ndo nàcuáa ní yáha-ndí cùtnàhá ní xĩndecu-ndí distritú Àsiá chi dàvá-á<sup>n</sup> ïo ní

ndoho-ndí, te luha-ná te vá cúndèe iní-ndí yáha-ndí nchaa tnúndòho-á<sup>n</sup> ní cùu chi ní xehndé iní-ndí sá vâ cǎcu-ndí. <sup>9</sup>Chi ní sani iní-ndí sá ndíyi-ná cuu-ndí ní cùu, te duca<sup>n</sup> nǎ yáha-ndí cuendá sá ò-gá quíndáá iní-ndí Yǎ Ndiòxí sá díú-gǎ taunihnu ñaha-gǎ xii-ndí, te ñá díú mèe-ndí taunihnu-ndí méé-ndí, te díu-gá cúú-gǎ Yaá dándòto cuéi ñáyi su ní xíhí. <sup>10</sup>Te díu-ni-gá ní taunihnu ñaha-gǎ ñá túú ní sàhni ñaha ñáyi xii-ndí, te díu-ni-gá táunihnu ñaha-gá xii-ndí cuéi vitna, te cùtnuní ndáá iní-ndí sá díú-ní-gǎ taunihnu ñaha-gǎ xii-ndí núú cuáhá<sup>n</sup> núú vèxi te vá cáhni ñaha ñáyi. <sup>11</sup>Te nchòhó tnàhá-ndó chindee ñaha-ndo xii-ndí chi càhá<sup>n</sup> ndíhi-ndo Yǎ Ndiòxí cuendá-ndí, te ío vâi ñáyi cuáhá<sup>n</sup> ndíhi ñàhá-yu xii-gá cuendá-ndí, te duca<sup>n</sup> ò vâi ñáyi ndàcá<sup>n</sup> táhũ-yu núú-gǎ cuendá nchaa sá vâha quide ñaha-gá xii-ndí.

**Té Pǎblú càhá<sup>n</sup>-dé ná cuendá ñá túú ní nàyáha-dé ñúú Còrintú**

<sup>12</sup>Te ío váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuiní Yǎ Ndiòxí cunduu ndècu-ndí ñuyíú-a, te díu-ni duca<sup>n</sup> quide-ndí sá cúú-xí-ndó chi mee-gǎ cúndàhú iní ñàhá-gǎ xii-ndí chindèe ñaha-gǎ, te ñá túú quide-ndí dàtná sání iní cue ñáyi ñuyíú-a. <sup>13-14</sup>Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñá túú ũhú tecu tnùní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuiní-ndí sá ò-gá váha tecu

tnùní-ndó cuendá sá òrè ná quixi tucu Xítóhó Jesucristú, te dàvá-á<sup>n</sup> ò cada nínu ñaha-ndo xii-ndí dàtná cada nínu ñaha-ndí xii-ndo. <sup>15</sup>Te cuendá xǎ<sup>n</sup> núu ní sani iní-í yáha cáhá<sup>n</sup>-í úú xito núú ndécú-ndó cuendá ío cudíí iní-ndó. <sup>16</sup>Chi ní sani iní-í sá òrè quíhí<sup>n</sup>-í distrítú Macèdoniá te yáha cáhá<sup>n</sup>-í núú ndécú-ndó, te òrè ndixi tucu-í te nayáha cáhá<sup>n</sup> tucu-í, te òrè nayáha cáhá<sup>n</sup>-í te taxi-ndo sǎ cúú ìchi-í cuendá quíhí<sup>n</sup>-í distrítú Jùdeá, duha ní sani iní-í ní cùu. <sup>17</sup>Te sá dúcá<sup>n</sup> ñá túú ní quixi coto ñaha-í xii-ndo te cudana sàni iní-ndó sǎ yúhú ñá túú ní sǎha váha-í cuendá nàcuáa ní sani iní-í cada-í, àdi cudana ñáyi ndècu ichi cuehé ichi duha, chi cue ñáyi-á<sup>n</sup> tnaa càchí-yu sá cúú càdá-yu ìí<sup>n</sup> sá sání iní-yu càdá-yu te tnaa càchí-yu sá ñàhá. <sup>18</sup>Dico Yá Ndiòxí Yaá ío váha quide ndáá ñaha ndáá ñàhá càxi-gá sá nchũhú ñá túú dàma-ndí sá càhá<sup>n</sup>-ndí. <sup>19</sup>Te yúhú ndíhi té Silvanú ndíhi té Timùteú dánèhé ñàhá-ndí xii-ndo cuendá Xítóhó Jesucristú Yaá cúú Dèhe Yá Ndiòxí, te Xítóhó Jesucristú cúú-gǎ Yaá ñá túú dàma-gá tnúhu càhá<sup>n</sup>-gá, chi cùu-gá Yaá càhá<sup>n</sup> mee-ni tnúhu ndáá tnúhu cuiti. <sup>20</sup>Te díu-ni Xítóhó Jesucristú cúú-gǎ Yaá quidé nchaa nàcuáa ní cachí Yǎ Ndiòxí. Te sá cuendá sá dúcá<sup>n</sup> quide Xítóhó Jesucristú xǎ<sup>n</sup> càchí-ó sǎ ò càhnu cuu Yá Ndiòxí. Te nchaa-o na càchí-ó sǎ díú-ní dùca<sup>n</sup> na cada-gá. <sup>21</sup>Te mee Yǎ Ndiòxí quidé-gǎ ndécú-ní-ó ìchi Xítóhó Jesucristú. Te díu-ni mee-gǎ ní cáhá<sup>n</sup> ñàhá-gǎ xii-o cuendá cunu cuechi-o núú-gǎ. <sup>22</sup>Te Yá Ndiòxí ní quide-gá sá nchóó



cùu-o ñáyi u cùu cuendá-gá, te ní taxi-gá Espíritú-gá ní ngúndecu ndìhi-o cuendá cutnùnì iní-ó sá ndáá cada ñaha-gã xii-o nàcuáa ní cachí-gá cada-gá.

<sup>23</sup>Te Yá Ndiöxí náhá-gã sá yǔhú cãhá<sup>n</sup> ndáá-í ná cuendá vátá quíxí-gã-í quixi coto ñaha-í xii-ndo, te vátá quíxí-gã-í chi ñá túú cuíní-í dandìhú-í iní-ndó. <sup>24</sup>Te nchúhú ñá túú tàù-ndí cada yica ñàha-ndí xii-ndo nàcuáa quíndáá iní-ndó Yã Ndiöxí, chi sa sàndáá váha iní-ndó-gã, chi nchúhú cuíní-ndí chindee tnǔhu ñaha-ndí xii-ndo nàcuáa ío-gá cudíí ìní-ndó cùndecu-ndo.

**2** Te ní sani ndáá iní-í sá vã quíxí ndìhi-ni-í quixi coto ñaha-í xii-ndo cuendá sá vã dándìhú-í iní-ndó. <sup>2</sup>Te nchòhó cúú-ndó ñáyi u tàxi tnúhu ndee ìní xii-í cúdíí ìní-í ndécú-í, te xíã<sup>n</sup> nǔu ñá túú cuíní-í dandìhú-í iní-ndó, chi núu duca<sup>n</sup> na càda-í te vã cùndècu váha-gá iní-ndó nàcuáa taxi-ndo tnǔhu ndee ìní xii-í. <sup>3</sup>Te xíã<sup>n</sup> nǔu ní tendaha-í tutú véxi ndaha-ndo cuendá sá òré quixi coto ñaha-í xii-ndo, te dàvá-á<sup>n</sup> quíní-í sá quidé-ndó nàcuáa cudíí ìní-í te ñá díú dà dandìhú-ndó ìní-í òré quexio-í, chi nchòhó tàù-ndó càda-ndo sá yǔhú cudíí ìní-í. Te cùtnuní ndáá iní-í sá nǔu yúhú cúdíí ìní-í te tnàhá nchòhó cúdíí ìní-ndó cuendá sá dúcá<sup>n</sup> cudíí ìní-í. <sup>4</sup>Te ndàhyú-í sá ndìhú iní-í òré ní cadúha-í tutú ní dáquixì-í ndaha-ndo, chi ío cuéhé sá sání ìní-í, te ñá túú ní dàquixi-í tutú-á<sup>n</sup> ndaha-ndo cuendá sá dándìhú iní ñàhá-í xii-ndo, chi ní dáquixì-í

cuendá sá nchòhó cutnùnì iní-ndó sá ïo cùu iní ñàhá-í xii-ndo.

**Nàcuáa tàù ñáyi u ñuú Còrintú cadá-yu cuendá ìí<sup>n</sup> ñáyi u ñá túú quide ndáá**

<sup>5</sup>Te na càchí tnúhu-í xii-ndo cuendá ìí<sup>n</sup> téé ní quide ìí<sup>n</sup> sá ñà túú tàù-dé cada-dé ndécú ndìhi-ndo, te ní quide ndàhú-xi luha iní-í cuendá sá ní quide-dé-á<sup>n</sup> dico nchòhó tnàhá-ndó ní dándìhú-dé luha iní-ndó, te duha càchí-í sá lúhá-ní ní dándìhú-dé iní-ndó cuendá sá vã cuídó-gá-í ná tnúhu cáhá<sup>n</sup>-í. <sup>6</sup>Te nàcuáa ní ndatnúhu-ndo ní quide ndáá-ndó cuèchi téé-á<sup>n</sup> te sa ndói-gá cuu nàcuáa ní quide-ndo-dé. <sup>7</sup>Te vitna tàù-ndó càda cahnu iní-ndó sá ní quide-dé, te cuãñaha-ndo tnúhu ndee ìní xii-dé chi núu ñàhá te vã ñihí ndéé-gã-dé cada-dé sá vãha cuendá sá ndìhú iní-dé. <sup>8</sup>Te xíã<sup>n</sup> nǔu cãhá<sup>n</sup> ndàhú-í núú-ndó sá cadá tùcu-ndo sá cúú ìní-ndó-dé. <sup>9</sup>Te ñu-ni cuendá iha cãhá<sup>n</sup>-í ìí<sup>n</sup> núú tùtú sá sá ní dáquixì-í ndaha-ndo, te duca<sup>n</sup> ní quide-í xító ndéè ñàhá-í xii-ndo nǔu ndisa cuíní-ndó càda-ndo nchaa nàcuáa cãhá<sup>n</sup>-í. <sup>10</sup>Te ndéda-ni càa ñáyi u na càda cahnu iní-ndó ìí<sup>n</sup> sá quidè-yu, te tnàhá yúhú cada cahnu iní-í sá quidè-yu tucu. Te núu ío ìí<sup>n</sup> sá xíní ñùhu-xi cada cahnu iní-í te quide cahnu iní-í, te mee Xìtohó Jesucristú náhá-gã sá dúcá<sup>n</sup> quide-í, te duca<sup>n</sup> quide-í cuendá sá nchòhó cuu-xi sá vãha xii-ndo. <sup>11</sup>Te duca<sup>n</sup> te sácufhná vã ñihí-xi ná cada ñaha-xi xii-o, chi nchoo sá xíní-ó nàcuáa quide-xi.

**Té Pãblú ndìhú iní-dé ndécú-dé ñuú Tròàs**

<sup>12</sup>Te ní xica-í cuáhá<sup>n</sup>-í ñuú Tròàs cuendá yacá<sup>n</sup> cáhá<sup>n</sup>-í tnúhu sá

càhá<sup>n</sup> nàcuáa naníhí tàhú-ó tnúhu Xítohó Jesucristú, te òré ní quexio-í te ní níhì-í ì<sup>n</sup> ichi càhnu cáhá<sup>n</sup>-í tnúhu-gá. <sup>13</sup>Dico ñá túú ní cùu váha iní-í chi ñá túú ní nàníhì-í té Títú té ndècu ndìhi-o ichi Xítohó Jesucristú, núu xíá<sup>n</sup> ní quide ndee iní tnáhà-í ndìhi cue ñáyiú ñúú-á<sup>n</sup>, te ní xica-í cuáhá<sup>n</sup>-í distritú Macèdoniá.

**Dàquetfíhú-ó yùcu ñávàha chi ndècu ndìhi-o Xítohó Jesucristú**

<sup>14</sup>Te táxähu xii Yá Ndiöxí chi duca<sup>n</sup>-ni sànu ichi ñaha-gá xii-ndí nàcuáa cunu-ndí núú yucu ñávàha chi ndècu ndìhi-ndí Xítohó Jesucristú, te mee Yá Ndiöxí sáchi<sup>n</sup> ñaha-gá xii-ndí càhá<sup>n</sup>-ndí tnúhu-gá. Te cada iní-ó sã tnúhu-gá-á<sup>n</sup> cúu-xí dàtná ì<sup>n</sup> yúcu sã ïo váha sàhá<sup>n</sup> te ta xítenuu dicó-xi ndèni ní cuu cuáhá<sup>n</sup>. Te duca<sup>n</sup> sãtnahá-xi cùu tnúhu-gá chi nchúhú quidé-ndí nàcuáa ta xítenuu ndèni ní cuu cuáhá<sup>n</sup>. <sup>15</sup>Te cùu-ndí dàtná dicó ì<sup>n</sup> yúcu sã ïo váha sàhá<sup>n</sup>, te nàcani cuendá Xítohó Jesucristú núú Yá Ndiöxí, te dicó yúcu-á<sup>n</sup> nchítá cuèi núú xíndecu cue ñáyiú sa ní naníhí tàhú, te cuèi núú xíndecu cue ñáyiú ta xíta nihnu cuáhá<sup>n</sup>. <sup>16</sup>Te sá cúu-xí cuè ñáyiú ta xíta nihnu cuáhá<sup>n</sup>-á<sup>n</sup>, dicó yúcu-á<sup>n</sup> cúu-xí dàtná ì<sup>n</sup> sá sáhní ñaha xi-yu, dico sá cúu-xí cuè ñáyiú sa ní naníhí tàhú, dicó yúcu-á<sup>n</sup> cúu-xí dàtná ì<sup>n</sup> sá ndécá iní-yu, duca<sup>n</sup> sãtnahá-xi cùu nchúhú. Te vitna chí cuàha cuendá nùu ná cúu ñáyiú sàni iní-ndó ndàcu cada nacúáa ndùu tnúhu càhá<sup>n</sup>-í-a. <sup>17</sup>Chi nchúhú càhá<sup>n</sup>-ndí tnúhu Yá Ndiöxí dico ñá túú ndähú

quidé-ndí ndìhi tnúhu-gá dàtná xíquide dava-gá-güedé, chi quide ndáá-ndí càhá<sup>n</sup>-ndí tnúhu-gá, te mee-gã ní cachí-gá sá dúcá<sup>n</sup> càda-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndìhi-ndí Xítohó Jesucristú.

**Cuendá ingá núú sã váha ní cachí Yá Ndiöxí cada-gá ñáyiú**

**3** Te cuèi duha càhá<sup>n</sup>-ndí núú-ndó dico ñá túú xini ñuhu-xi sá cñaha-ndí xii-ndo sã cúu-ndí cue té quide váha, te ni ñà túú xini ñuhu-xi cacanehe-ndí ì<sup>n</sup> tutú núú càhá<sup>n</sup>-xi sá cúu-ndí cue té váha danèhé ñáhá xii-ndo datná xíquide dava-gá-güedé, te ni ñà túú xini ñuhu-xi sá nchòhó taxi-ndo ì<sup>n</sup> tutú núú càhá<sup>n</sup>-ndó sã nchúhú cúu-ndí cue té quide váha. <sup>2</sup>Te ñá túú xini ñuhu-xi duca<sup>n</sup> cada-ndí. Te cùtnuní ndáá iní-ndí sã nchòhó cúu-ndó dàtná ì<sup>n</sup> tutú sã ïo váha càhá<sup>n</sup> cuendá-ndí. Te duca<sup>n</sup> sãtnahá-xi cùu-ndo chi nchaa ñáyiú nihí-yu tnúhu nàcuáa quide-ndo ndecu-ndo, te xíá<sup>n</sup> cùtnuní iní-yu sã nchúhú cúu-ndí cue té quide váha. <sup>3</sup>Te nchòhó cúu-ndó cuendá Xítohó Jesucristú, te cùu-ndo datná tutú-gá te tutú-á<sup>n</sup> ní táuchíú<sup>n</sup>-gã xii-ndí ní cadúha-ndí, te mee-ni ndìhi Espiritú Yá Ndiöxí ní ngúndeé tnúhu-á<sup>n</sup> te ñá díú ndìhi tindá ní ngúndeé. Te ñá díú ì<sup>n</sup> núú yúú ní ngúndeé chi iní-ndó cùu-xi núú dúcá<sup>n</sup> ní ngúndeé tnúhu-á<sup>n</sup> te duca<sup>n</sup> sãtnahá-xi cùu-ndo.

<sup>4</sup>Te duha càhá<sup>n</sup>-ndí chi cùtnuní ndáá iní-ndí sã Yá Ndiöxí quidé váha ñaha-gã xii-ndí, chi ndècu ndìhi-ndí Xítohó Jesucristú. <sup>5</sup>Te

nchúhú chi ndàcu-ndí quidé-ndí sá vâha dico ñá díú mée-ndí duca<sup>n</sup> ndàcu-ndí quidé-ndí, chi mee Yă Ndiôxí chîndèe ñaha-gá xii-ndí nũ ndàcu-ndí quidé-ndí sá vâha. <sup>6</sup>Te mee Yă Ndiôxí ní quide-gá sá nchũhú ndacu-ndí cunu cuechi-ndí núú-gă cãhá<sup>n</sup>-ndí núú ñâyiu cuendá ñgá núú sã vâha ní cachí-gá cada ñaha-gă xií-yu. Te sá vâha ní cachí-gá cada ñaha-gă xií-yu-á<sup>n</sup> ñà túú ñ<sup>n</sup>-ni cuu-xi ndîhi nchaa tnúhu sá ñ xáha<sup>n</sup>-gă xii ndíi Moisés ní chídó tnùní ndíi, te duca<sup>n</sup> chi espíritú Yă Ndiôxí néhé chîu<sup>n</sup>-xi nchaa tnúhu sá cãhá<sup>n</sup> cuendá nchaa sá vâha-á<sup>n</sup>. Te nchaa tnúhu ní chídó tnùní ndíi Moisés, dándixi túu-xi iní nchaa ñâyiu ndècu ndîhi tnúhu-á<sup>n</sup> sã cuíta nihnú-yu cuendá nchaa cuéchi-yu, dico cue ñâyiu ndècu ndîhi Espíritú Yă Ndiôxí ñâyiu-á<sup>n</sup> ndécú ndîhí-yu tnúhu ndee iní sá cãcu nihnú-yu.

<sup>7</sup>Te tnúhu sá ñ cãhá<sup>n</sup> Yă Ndiôxí ndéé díhna nãcuáa cada ñâyiu ní ngúndeé-xi ñ<sup>n</sup> núú yúú quèhé<sup>n</sup>. Te òré ní dátũu ndíi Moisés nãcuáa cãhá<sup>n</sup> tnúhu sá ñ cãhá<sup>n</sup> Yă Ndiôxí ndèé núú yúú-ã<sup>n</sup> nũ cuè ñâyiu isrâél, te súuní ñ tãsa<sup>n</sup> núú ndíi te ñá túú-gă ní cùu cundehé-yu núú ndíi, te duca<sup>n</sup>-gă duca<sup>n</sup>-gă quidé-xí dâtãsa<sup>n</sup>-xi núú ndíi ni cùu ñá túú-gă duca<sup>n</sup> ni quide-xi. Te tnúhu ndèé núú yúú-ã<sup>n</sup> dándixi túu-xi iní cue ñâyiu sá cuíta nihnú-yu sá cuendá nchaa cuéchi-yu, te ío váha ní quide-xi cútnãhá ní ngúndecu ndîhi cue ñâyiu isrâél tnúhu-á<sup>n</sup>. <sup>8</sup>Te sá dúcã<sup>n</sup> ñ quide-xi xíá<sup>n</sup> cútnùní sá tnũhu cãhá<sup>n</sup> Espíritú Yă Ndiôxí vitna uu<sup>n</sup>-gá duca<sup>n</sup> ño-gá váha

quide-xi. <sup>9</sup>Te núu duca<sup>n</sup> ño váha ní quide-xi cútnãhá ní ngúndecu ndîhi cue ñâyiu isrâél tnúhu sá dándixi túu iní-yu sá cuíta nihnú-yu sá cuendá nchaa cuéchi-yu, te uu<sup>n</sup>-gá duca<sup>n</sup> vâha quide-xi vitna ní ngúndecu ndîhi-o tnũhu sá cãhá<sup>n</sup> nãcuáa quide Yă Ndiôxí cuendá sá vã cúndècu-gá cuéchi ñâyiu núú-gă. <sup>10</sup>Te vá cãchí-ó sã cútnãhá ní ngúndecu ndîhi cue ñâyiu isrâél tnúhu ndèé núú yúú-ã<sup>n</sup> ño-gá váha ní quide-xi, te ñãhá chi uu<sup>n</sup>-gá váha quide-xi vitna cuendá tnúhu sá cãhá<sup>n</sup> nãcuáa quide Yă Ndiôxí. <sup>11</sup>Te núu duca<sup>n</sup> ño váha ní quide-xi cútnãhá ní ngúndecu ndîhi ñâyiu isrâél tnúhu sá ñà túú ní cùdíi, te uu<sup>n</sup>-gá duca<sup>n</sup> ño váha quide-xi vitna ní ngúndecu ndîhi-o tnũhu sá vã ndíhí nihnu tnahí-gá.

<sup>12</sup>Te cùtnuní iní-ndí sá vã ndíhí nihnu sá dúcã<sup>n</sup> ño váha quide-xi, núu xíã<sup>n</sup> ío vii ío váha cùu iní-ndí cãhá<sup>n</sup>-ndí tnúhu sá ñ ngúndecu ndîhi-o. <sup>13</sup>Te ñá túú quide-ndí dãtná ní xóo cada ndíi Moisés, chi ndíi-á<sup>n</sup> ñ xóo dãdáhu ndíi núú ndíi òré dâtãsa<sup>n</sup>-xi núú ndíi cuendá sá vã quíní cue ñâyiu isrâél òré ñá túú-gă dâtãsa<sup>n</sup>-xi núú ndíi. <sup>14</sup>Te cue ñâyiu isrâél ñá túú ní tècú tnùní váha-yu nãcuáa ní xóo danèhé ñãhá ndíi Moisés xií-yu, te cuèi ndéé vitna ñá túú tècú tnùní-yu òré dãcuãhá-yu tnúhu sá ñ cãhá<sup>n</sup> Yă Ndiôxí ndéé díhna nãcuáa cada-gá, te cada iní-ó sã dãtná sá ñ xídãhu núú ndíi Moisés yídãhu núu-yu cuendá sá vã cútnùní núu-yu cundehé-yu te tecú tnùní-yu, dico núu tnahá tnúhu-yu ndîhi Xítohó Jesucrístú te tecú tnùní-yu. <sup>15</sup>Te cuèi ndéé

vitna òré dácuahá-yu nchaa tnúhu sá nǐ chídó tnùnǐ ndí Moisés nchaa núú tútú ndí, te cada iní-ó sǎ dàtná sá nǐ xídáhu núú ndí yídáhu núú-yu chi ñá túú tècú tnùnǐ-yu.

<sup>16</sup>Dico cue ñáyiú na tùha ñaha xii Xítóhó Jesucristú te tècú tnùnǐ-yu tnúhu-gá. <sup>17</sup>Te Xítóhó Jesucristú ì<sup>n</sup>-ni cùu-gá ndíhi Espíritú Yǎ Ndiòxí, te nchaa ñáyiú ndècu ndíhi Espíritú-gá ñá túú-gǎ táxí tnùnǐ ñáhá nǐ ì<sup>n</sup> sá ñà túú vǎha xií-yu. <sup>18</sup>Te dàtná cúú ì<sup>n</sup> yutátá sǎ dánèhé núú ñáhá-xí xii ñáyiú ì<sup>n</sup> sá vǎha, duca<sup>n</sup> sǎtnahá-xi cùu-o chi quide-o nacuaá cáhá<sup>n</sup> ñáyiú sá ìo cǎhnu cuu Xítóhó Jesucristú, te duca<sup>n</sup> ù<sup>n</sup>-gá uu<sup>n</sup>-gá tá cùndáá-ó ndècu-o ichi-gá dàtná quidé mèe-gá quidé ndǎá-gá. Te Espíritú-gá quidé-xí dùca<sup>n</sup> ta cundáá-ó nǔú-gǎ cuáhá<sup>n</sup>.

**4** Te mee Yǎ Ndiòxí ní cundàhú iní ñáhá-gǎ xii-ndí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá, núú xiǎ<sup>n</sup> ñá túú tnàhí nàtùhú iní-ndí càhá<sup>n</sup>-ndí tnúhu-gá. <sup>2</sup>Te nchúhú dàquee tǐhú-ndí nchaandi túhú sá ñà túú vǎha quide dayuhu ñáyiú, chi nchaa xiǎ<sup>n</sup> cúú-xí ì<sup>n</sup> sácá<sup>n</sup>nǔú sǎ cúú-xí-yu, te nchúhú ñá túú sàni iní-ndí dandàhú-ndí ñáyiú te ni ñǎ túú sàni iní-ndí dama-ndí nàcuáa càhá<sup>n</sup> tnúhu Yǎ Ndiòxí, chi càhá<sup>n</sup> ndáá-ndí nàcuáa tàu-xi cáhá<sup>n</sup>-ndí, te mee Yǎ Ndiòxí nahá-gǎ nàcuáa ndùu tnúhu càhá<sup>n</sup>-ndí núú ñáyiú, te ñáyiú-á<sup>n</sup> cútùnǐ iní-yu sá nchúhú càhá<sup>n</sup> váha-ndí. <sup>3</sup>Te cue ñáyiú ñá túú tècú tnùnǐ nàcuáa ndùu tnúhu sá càhá<sup>n</sup> nàcuáa naníhí tàhú-ó càhá<sup>n</sup>-ndí núú-yu, ñáyiú-á<sup>n</sup> cúú-yu ñáyiú ta xíta nihnu cuáhá<sup>n</sup>. <sup>4</sup>Te cue ñáyiú-á<sup>n</sup> cúú-yu ñáyiú ìo sàà

iní-xi chi ñá túú cuìni-yu quíndáá iní-yu tnúhu Xítóhó Jesucristú, te xiǎ<sup>n</sup> nǔu sácuihná cùnùu-xi núú-yu te nihí-xi nàcuáa quide-xi dadáhu ndodo iní ñáhá-xí xií-yu cuendá sá vǎ tècú tnùnǐ-yu tnúhu sá càhá<sup>n</sup> nàcuáa naníhí tàhú-yu, te tnúhu-á<sup>n</sup> cúú-xí tnúhu sá ìo váha chi càhá<sup>n</sup>-xi sá ìo cǎhnu cuu Xítóhó Jesucristú, te cùu-gá dàtná mèe Tǎtá-gǎ Dútú Ndiòxí. <sup>5</sup>Te nchúhú ñá túú càhá<sup>n</sup>-ndí cuendá sá cúú-xí mèe-ndí núú-ndó chi càhá<sup>n</sup>-ndí cuendá Xítóhó Jesucristú, te càchí-ndí xii-ndo sǎ díú-gǎ cúú-gǎ Yaá ìo cùnùu, te càchí-ndí xii-ndo sǎ mèe-ndí cúú-ndí dícó-ni cue tée xìnu cuechi sá cúú-xí-ndó, te duca<sup>n</sup> quide-ndí nàcuáa cuu vii cuu váha iní Xítóhó Jesucristú. <sup>6</sup>Te Yǎ Ndiòxí Yaá ní dáyèhé ndéé cútñahá nee ñuyú ní cùu, Yaá-á<sup>n</sup> nǐ cachí-gá sá Xítóhó Jesucristú cada-gá nàcuáa tecú tnùnǐ-ó sǎ ìo cǎhnu cuu mee Yǎ Ndiòxí. Te sá dúcá<sup>n</sup> nǐ quide-gá te cada iní-ó sǎ dàtná tnúhu sá nǐ dáyèhé-gá iní-ó.

#### Ío quíndáá iní-ó Yǎ Ndiòxí

<sup>7</sup>Te nchúhú ndécú ndíhi-ndí tnúhu Xítóhó Jesucristú, te tnúhu-gá cúú-xí dàtná ì<sup>n</sup> sá ìo váha ñùhu ì<sup>n</sup> xití quídi ñuhu, te nchúhú cúú-ndí dàtná quídi-á<sup>n</sup>. Te duca<sup>n</sup> sǎtnahá-xi cùu-ndí chi tnúhu-gá ìo cǎhnu cuu-xi te mee-ndí ñáhá, te duca<sup>n</sup> cùu nacuaá cutùnǐ sá mèe Yǎ Ndiòxí quidé-gǎ nchaa sá vǎha te ñá díú mèe-ndí. <sup>8</sup>Te cuèi ìo ndòho-ndí ndécú-ndí dico nihí-ndí nàcuáa quide-ndí tá yǎha-ndí nchaa tnúndòho-á<sup>n</sup> cuáhá<sup>n</sup>, cuèi áma sa ndètu vií-nǎ quehndé

iní-ndí sá vǎ ndácú-ndí yáha-ndí nchaa tnúndòho-á<sup>n</sup>, dico ndàcu-ndí yáha-ndí. <sup>9</sup>Te cuèi nànducu ñaha ñáyiú cuíní-yu ná cada ñàhá-yu xii-ndí dico ñá túú dàña ñaha Yá Ndiòxí xii-ndí, te cuèi cànihá-yu xii-ndí dico càcu-ndí ñá túú sàhni ñàhá-yu. <sup>10</sup>Te ndèni ní cuu cuáhá<sup>n</sup>-ndí xíca cùu-ndí, te càcu càcu cahni ñàhá-yu xii-ndí dàtná ní quidé-yu Xítohó Jesucristú, te duca<sup>n</sup> yáha-ndí cuèndá cutnùni sá ndécú tũu Xítohó Jesucristú andiú te chindee ñaha-gá xii-ndí. <sup>11</sup>Te nchúhú ñini ndècu-ndí ñuyíú-a te nchaa-ni nduu càcu càcu cahni ñaha ñáyiú xii-ndí sá cuèndá Xítohó Jesucristú, te duca<sup>n</sup> yáha-ndí ndécú-ndí cuèndá cutnùni sá Xítohó Jesucristú ndécú ndìhi ñaha-gá xii-ndí cuèi vá cúdii yiqui cùñú-ndí cundecu-xi. <sup>12</sup>Te sá dúcá<sup>n</sup> càcu càcu cahni ñaha ñáyiú xii-ndí xíá<sup>n</sup> nchòhó uu<sup>n</sup>-gá tá ñihí ndéé-ndó cuáhá<sup>n</sup> ndécú-ndó ìchi Xítohó Jesucristú.

<sup>13</sup>Te ìi<sup>n</sup> téé ní xindecu ndéé sanaha ñi chídó tnùnì-dé núú tütú Yá Ndiòxí núú càchí-xi: “Yúhú ní sándáá iní-í Yá Ndiòxí nũu xíá<sup>n</sup> ní cáhá<sup>n</sup>-í”, duha ní cachí téé-á<sup>n</sup>. Te dàtná-ni ní sani iní téé-á<sup>n</sup> ñi cáhá<sup>n</sup>-dé te ñi duca<sup>n</sup> sàni iní nchúhú tucu núú xíá<sup>n</sup> càchí-ndí: “Sàndáá iní-ndí Yá Ndiòxí nũu xíá<sup>n</sup> càhá<sup>n</sup>-ndí”, duha càchí-ndí. <sup>14</sup>Te cùnuní iní-ndí sá nũu na cùú-ndí te Yá Ndiòxí dandòto ñaha-gá xii-ndí dàtná ní dándótó-gǎ Xítohó Jesucristú, te tnàhá nchòhó duca<sup>n</sup> càda ñaha-gá xii-ndo, te dàvǎ-á<sup>n</sup> candeca ñaha-gǎ xii-o quíhí<sup>n</sup> nucúndecu-o núú-gǎ. <sup>15</sup>Te nchúhú

nándi cùu sá tá yáha-ndí véxi cuèndá nchòhó ngúndecu váha-ndo, te duca<sup>n</sup> cuíta cáyá-gǎ ñáyiú ngúndecu váha sá xíí Yá Ndiòxí, te ñi duca<sup>n</sup> cuíta cuu vai-gǎ ñáyiú ndacá<sup>n</sup> táhũ-yu núú-gǎ te cachí-yu sá ñi càhnu cuu-gǎ.

<sup>16</sup>Te xíá<sup>n</sup> nũu nchúhú ñá túú tnàhi nàtúhú iní-ndí ndécú-ndí ìchi Xítohó Jesucristú, te cuèi yiqui cùñú-ndí tá xàú-xi cuáhá<sup>n</sup> dico iní-ndí chi uu<sup>n</sup>-gá uu<sup>n</sup>-gá tá ñihí ndéé-xí cuáhá<sup>n</sup>. <sup>17</sup>Te nchaa sá ndòhó-ndí ñuyíú-a ñá túú càchí-ndí sá cúú-xí ìi<sup>n</sup> tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndiòxí ñi váha cada ñaha-gǎ xii-ndí nduu na sàá-ndí núú ndécú-gǎ, te ñi duca<sup>n</sup> càda ñaha-gá xii-ndí ñi caa ñi quíhí<sup>n</sup>. <sup>18</sup>Te nchúhú ñá túú nchìcú<sup>n</sup> ñi ñi núú ndèhe-ndí ñi ñuyíú-a, chi nchìcú<sup>n</sup> ñi ñi núú ndèhe-ndí ñi ñuyíú-a vá cúdii-xi cundecu-xi, te nchaa sá ñá túú tũu ndècu andiú xíá<sup>n</sup> cudíi-xi cundecu-xi ñi caa ñi quíhí<sup>n</sup>.

**5** Te yiqui cùñú-ó cùu-xi datná ìi<sup>n</sup> vehe, te vehe-á<sup>n</sup> ñá túú cùdii-xi, te duca<sup>n</sup> sàtnahá-xi cùu yiqui cuñú-ó chi vá cúdii-xi, te na sàá nduu vǎ cùndècu-gǎ-ó ndìhi yiqui cuñú-ó, te Yá Ndiòxí taxi-gǎ ìi<sup>n</sup> yiqui cùñú sá sá cúú-xí-ó, te xíá<sup>n</sup> cúú-xí dàtná ìi<sup>n</sup> vehe sá ñá túú ní càdúha cue ñáyiú ñuyíú-a, chi mee Yá Ndiòxí ní càdúha-gǎ vehe-á<sup>n</sup> te vehe-á<sup>n</sup> cudíi-xi cundecu-xi ñi caa ñi quíhí<sup>n</sup> andiú. Te duca<sup>n</sup> sàtnahá-xi cùu yiqui cuñú sá táxí Yá Ndiòxí

xii-o chi cudíi-xi cundecu-xi ni caa ni quíhí<sup>n</sup>. <sup>2</sup>Te nchúhú ndècu ndíhi-gá-ndí yiqui cùñú-ndí sá ndécú ndíhi-ndí vitna te sama cuíní-ndí sá ío ndíhi taxi Yá Ndiòxí yiqui cùñú sáá cundecu ndíhi-ndí. <sup>3</sup>Chi mee-gă vâ dâñâ-gă sá dúcá<sup>n</sup>-ní cùnduu-ndí cundecu-ndí, chi dai taxi-gă yiqui cùñú sáá-ă<sup>n</sup> xii-ndí. <sup>4</sup>Te nini ndècu-ndí ndíhi yiqui cùñú-ndí vitna ío sàni iní-ndí te ndíhú iní-ndí, dico ñá dúú sâ dúhá quide-ndí te ñá túú-gă tñahá iní-ndí cundecu-ndí ndíhi yiqui cùñú-ndí, chi cuíní-ndí sá Yă Ndiòxí ío ndíhi taxi-gă yiqui cùñú sáá ndùu táhú-ndí, chi xíă<sup>n</sup> cudíi-xi ni caa ni quíhí<sup>n</sup> te yiqui cùñú-ndí sá tá ndíhi nihnu cuáhá<sup>n</sup>-a vâ cudíi-xi cundecu-xi. <sup>5</sup>Te duca<sup>n</sup> tñahí ní cachí Yă Ndiòxí cunduu sá dúcá<sup>n</sup> ndùu táhú-ó yiqui cuñú sáá-ă<sup>n</sup>, te ní taxi-gă Espíritú-gă ní ngúndecu ndíhi-o cuendá cutnùní iní-ó sâ ndâá taxi-gă yiqui cùñú sáá-ă<sup>n</sup> nduu táhú-ó.

<sup>6</sup>Te xíă<sup>n</sup> núu nchúhú nihí ndéé-ndí ndécú-ndí, te cùtnuní iní-ndí sá nini ndecu-ndí ndíhi yiqui cùñú-ndí sá ndécú ndíhi-ndí vitna te vátá sâá-gă-ndí cundecu-ndí mei núu ndécú Xítohó Jesucristú. <sup>7</sup>Te duca<sup>n</sup> cùtnuní iní-ndí chi sàndâá iní-ndí Yă Ndiòxí ndécú-ndí ñuyúú-a cuéi ñá túú xìní-ndí-gă. <sup>8</sup>Te ío váha cùu iní-ndí ndécú-ndí, te sàni iní-ndí sá vâha-gă sá núu vâ cùndècu-gă-ndí ndíhi yiqui cùñú-ndí sá ndécú ndíhi-ndí vitna. Te duca<sup>n</sup> sàni iní-ndí chi váha-gă cundecu-ndí mei núu ndécú Xítohó Jesucristú. <sup>9</sup>Te ío ndùcu ndee-ndí quidé-ndí nàcuáa cuu vii cuu váha iní Xítohó

Jesucristú vitna ndècu-ndí ñuyúú-a, te diu-ni duca<sup>n</sup> càda-ndí cuéi òré vâ cùndècu-gă-ndí. <sup>10</sup>Te dacuitíí sâ nchâá-ó cùndecu-o núu Xítohó Jesucristú íi<sup>n</sup> nduu, te dâvâ-á<sup>n</sup> mee-gă cáhá<sup>n</sup>-gă te núu nása ndùu chiu<sup>n</sup> ní quide-o íi<sup>n</sup> íi<sup>n</sup>-o, núu ní quide váha-o àdi ñá túú ní quide váha-o, te nàcuáa ndùu chiu<sup>n</sup> ní quide-o íi<sup>n</sup> íi<sup>n</sup>-o te duca<sup>n</sup> ndùu sá táxi-gă nduu táhú-ó.

#### Nàcuáa ní cuu ní ngúndecu váha-o ndíhi Yá Ndiòxí

<sup>11</sup>Te nchúhú quáyùhú iní-ndí nàcuáa cada Xítohó Jesucristú, núu xíă<sup>n</sup> càhá<sup>n</sup>-ndí tñúhu-gă núu ñáyiú cuendá xínu iní-yu tuha ñahá-yu xii-gă. Te mee Yă Ndiòxí sa nâha-gă nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí. <sup>12</sup>Te sâ dúhá càhá<sup>n</sup>-ndí te vâ cání iní-ndó sâ nchúhú càhá<sup>n</sup> váha-ndí cuendá-ndí nàcuáa nchòhó cuu váha iní ñáhá-gă-ndó xii-ndí te ñáhá, chi duha càhá<sup>n</sup>-ndí cuendá sá nchòhó níhí-ndó tñúhu càhá<sup>n</sup> váha-gă-ndó cuendá-ndí núu ñáyiú. Te duca<sup>n</sup> níhí-ndó tñúhu cùñaha-ndo xii cuu ñáyiú quide nínu mee-xi, chi cue ñáyiú-á<sup>n</sup> ñà túú quide cuendá-yu nása ndècu iní-yu. <sup>13</sup>Te núu nchòhó sání iní-ndó sâ lúcú-ndí cuendá nàcuáa quide-ndí ndécú-ndí te cùu-xi cuendá Yă Ndiòxí, àdi núu sàni iní-ndó sâ ñà túú lúcú-ndí cuendá nàcuáa quide-ndí ndécú-ndí te cùu-xi sá vâha sá cúú-xí-ndó. <sup>14</sup>Te quide-ndí nàcuáa cuíní Xítohó Jesucristú chi cùtnuní iní-ndí sá ío cùu iní-gă nchaa ñáyiú, te duca<sup>n</sup> xìní ndâá-ndí sá ní xíhí-gă cuendá

nchaá-yu, te xíá<sup>n</sup> nũu cada iní-ó sá dàtná tnúhu sá ncháá ñáyiú ní xíhí-yu ndíhi-gá. <sup>15</sup>Te duca<sup>n</sup> ñí xíhí Xítóhó Jesucristú cuendá nchaa ñáyiú chi cuení-gá sá ncháá-yu cundecú-yu cadá-yu nàcuáa cuení méé-gá te vá cadá-yu nàcuáa cuení méé-yu, chi mee-gá ní xíhí-gá te ní ndoto-gá cuendá cuu-xi sá vâha sá cúu-xí-yu. <sup>16</sup>Te xíá<sup>n</sup> nũu nchúhú ñá túú-gá ná sání iní-ndí cuendá tnàha ñáyiú-ndí nũu nàndíhi-yu àdi ñá túú nàndíhi-yu dàtná ní xóo cani iní-ndí cútnàhá ní xíndecu-ndí ichi cuèhé ichi duha, te dàvá-á<sup>n</sup> ñí xóo cani iní-ndí cuendá Xítóhó Jesucristú dàtná sání iní cue ñáyiú ndècu ichi cuehé ichi duha vitna. <sup>17</sup>Te nchaa nchoo ñáyiú ní tnahá tnúhu ndíhi Xítóhó Jesucristú ní nduu-o dàtná ñí ñáyiú saa, te duca<sup>n</sup> chi ñá túú-gá quidé-ó dàtná ní xóo cada-o cǔtnàhá ní xíndecu-o ichi cuehé ichi duha, chi ní ngúíta-o quide-o mee-ná sá vâha te nchaa xíá<sup>n</sup> cúu-xí sá sáá sá cúu-xí-ó chi vátá quení-gá-ó càda-o.

<sup>18</sup>Te duca<sup>n</sup> quide-o ndecu-o chi mee Yá Ndiöxí quidé-gá sá dúcá<sup>n</sup> càda-o cundecu-o. Te Xítóhó Jesucristú ní quide-gá ní ngúndecu váha-o ndíhi Yá Ndiöxí vitna, te duca<sup>n</sup> chi mee Yá Ndiöxí duca<sup>n</sup> tnàhí ní cachí-gá cunduu, te diu-ni mee Yá Ndiöxí ní taxi-gá chù<sup>n</sup> quide-ndí càhá<sup>n</sup>-ndí tnúhu-gá nàcuáa ngúndecu váha cue ñáyiú ndíhi-gá. <sup>19</sup>Te duca<sup>n</sup> chi mee-gá ní cachí-gá sá Xítóhó Jesucristú cada-gá nàcuáa nucúndecu váha nchaa nchoo cuè ñáyiú ndècu ñuyú-a ndíhi Yá Ndiöxí. Te nchaa ñáyiú ní tuha ñaha xii-gá ñá túú-gá

sání iní-gá sá ñáyiú-á<sup>n</sup> nacháhu-yu cuéchi-yu núú-gá. Te mee Yá Ndiöxí ní taxi-gá chiu<sup>n</sup> quide-ndí càhá<sup>n</sup>-ndí tnúhu-gá núú ñáyiú nàcuáa ngúndecu ndíhi ñaha vâha-yu xii-gá. <sup>20</sup>Te Xítóhó Jesucristú ní cachí-gá sá nchúhú càhá<sup>n</sup>-ndí tnúhu-gá núú nchàa ñáyiú, te sá dúhá quide-ndí càhá<sup>n</sup>-ndí tnúhu-gá te quide-ndí núú Yá Ndiöxí càhá<sup>n</sup>-ndí yuhu-gá, te xíá<sup>n</sup> nũu càhá<sup>n</sup> ndàhú-ndí núú-ndó sá tnàhá tnúhu-ndo ndíhi Yá Ndiöxí cuendá cundecu váha-ndo ndíhi-gá, te duha càhá<sup>n</sup>-ndí chi duca<sup>n</sup> càchí Xítóhó Jesucristú cada-ndí. <sup>21</sup>Te Xítóhó Jesucristú cúu-gá Yaá ñá túú tnàhí cuéchi-xi, dico Yá Ndiöxí ní quide ñaha-gá xii-gá dàtná ñí ñáyiú ndècu cuéchi-xi, te duca<sup>n</sup> chi Xítóhó Jesucristú ní xido-gá cuéchi nchaa nchoo ñáyiú ñuyú-a, te duca<sup>n</sup> ñí xido Xítóhó Jesucristú nchaa cuéchi-o cuendá sá nũu na tnàhá tnúhu-o ndíhi-gá te cudúu-o núú Yá Ndiöxí, te duca<sup>n</sup> ñí cuu chi mee Yá Ndiöxí duca<sup>n</sup> ñí cachí-gá cunduu.

**6** Te nchoo ñí-ni cùu-o quide chiu<sup>n</sup>-o cuendá Yá Ndiöxí nũu xíá<sup>n</sup> càhá<sup>n</sup> ndàhú-ndí núú-ndó sá vâ dicó-ni duca<sup>n</sup> cùndedóho-ndo tnúhu Yá Ndiöxí, chi cada-ndo nàcuáa na chindee ñaha-ni-gá. <sup>2</sup>Chi mee-gá càchí-gá ñí xichi núú tütú-gá núú càchí-xi:

Sáá nduu te cundàhú iní ñàhà-í xii-ndo chindee ñaha-í cuendá naníhí tàhú-ndó,  
te ní sáá nduu tàù-xi sá cùndàhú iní ñàhà-í xii-ndo chindee ñaha-í cuendá naníhí tàhú-ndó, núú xíá<sup>n</sup> ní xíndedóho-í tnúhu ní

cáhá<sup>n</sup>-ndó te ní chindee  
ñàha-í xii-ndo nàcuáa naníhí  
tàhú-ndó.

Duha càchí-gá núú tùtú-gá. Te vitna  
cùu-xi nduu cundahú iní ñáhá Yá  
Ndiòxí chindèe ñaha-gá, te cùu-xi  
nduu naníhí tàhú-ó.

<sup>3</sup>Te nchúhú ñá túú quide-ndí ì<sup>n</sup>  
sá ñà túú tàù-ndí cada-ndí sá cúú-xí  
ñáyiú, chi cuìní-ndí sá vǎ càhá<sup>n</sup>  
cuèhé-yu cuèndá chiù<sup>n</sup> quide-ndí.

<sup>4</sup>Te nchaa sá quidé-ndí cúú-xí  
nàcuáa cutnùnì iní cue ñáyiú sá  
nchúhú xínú cuèchi-ndí núú Yá  
Ndiòxí, te ío quide cahnu iní-ndí  
cuèndá nchaa sá ndóhó-ndí, chi  
nándí quide ñaha ñáyiú xii-ndí, te  
duca<sup>n</sup>-ni ta quide cahnu iní-ndí cuèi  
nándí-gá nchaa sá tá yǎha-ndí véxi.

<sup>5</sup>Te duha ta yǎha-ndí véxi, núú  
cànìha ñáyiú xii-ndí, núú chíhí  
ñàhá-yu vecaá, núú cuáá ndeé ñáhá  
ñáyiú xii-ndí xícuèhé ñáhǎ-yu, te  
íó ndòho-ndí quidé-ndí chiù<sup>n</sup> Yá  
Ndiòxí, te áma xìdí-ndí te áma ñá  
túú xìdí-ndí, te áma ñìhí-ndí sá  
xéxí-ndí te áma ñá túú ñìhí-ndí.

<sup>6</sup>Te quide ndáá-ndí ndécú-ndí, te  
cùtnuní váha iní-ndí nàcuáa càhá<sup>n</sup>  
tnúhu Yá Ndiòxí, te quide cahnu  
iní-ndí cuèi nándí quide ñaha ñáyiú  
xii-ndí, te cùndahú iní-ndí tnàha  
ñáyiú-ndí, te quide-ndí nchaa sá  
vǎha nàcuáa chindee ñaha Espíritú  
Yá Ndiòxí xii-ndí, te ío ndisa iní-ndí  
cúú iní-ndí cue tnàha ñáyiú-ndí.

<sup>7</sup>Te dànehé-ndí ñáyiú mee-ni tnúhu  
ndáá, te nchaa chiù<sup>n</sup> quide-ndí te  
quide-ndí nàcuáa chindee ñaha Yá  
Ndiòxí xii-ndí, te cuèndá sá quidé  
ndáá-ndí ndécú-ndí núu xǎ<sup>n</sup> ñìhí  
ndeé-ndí dáquèe tíhú-ndí nchaa  
sá cuèhé sá dúhá. <sup>8</sup>Te dava ñáyiú

quide nínu ñàhá-yu xii-ndí, te  
davá-yu tnúhu cuèhé tnúhu duha  
càhá<sup>n</sup>-yu xǎhǎ<sup>n</sup>-yu xii-ndí, te  
davá-yu xǎcáhá<sup>n</sup> váha-yu cuèndá-ndí  
te davá-yu xǎcáhá<sup>n</sup> cuèhé-yu, te  
davá-yu càchí-yu sá dándàhú-ndí  
ñáyiú dico ñá ndáá chi càhá<sup>n</sup>  
ndáá-ndí. <sup>9</sup>Te davá-yu càchí-yu sá  
ñà túú xìní-yu ná ñáyiú cùu-ndí, te  
davá-yu càchí-yu sá xìní-yu yoo  
cùu-ndí, te davá-yu cuìní-yu cahni  
ñàhá-yu xii-ndí dico vátá càhní  
ñàha-gá-yu chi ndècu-ni-ndí. Te ío  
ndòho-ndí ndécú-ndí ichi Yá Ndiòxí,  
te cuèi ndòho-ndí dico ñá túú  
cùu-xi sá cùú-ndí. <sup>10</sup>Te cuèi ndìhú  
iní-ndí dico ñá túú dàña ndeé-ndí  
sá cúdí<sup>n</sup> iní-ndí, te cùu-ndí cue tée  
ndàhú dico sànu ichi-ndí vǎi ñáyiú  
ichi Yá Ndiòxí cuèndá ngúndecu  
váha-yu sá cuèndá-gá, te cuèi ñá  
túú nǎ ndécú ndìhi-ndí dico ñá túú  
nǎ cúmǎnì xii-ndí.

<sup>11</sup>Te nchòhó ñáyiú ndècu ndìhi-í  
ichi Xítóhó Jesucristú ndécú  
ñùú Còrintú ío cùu iní ñáhá-ndí  
xii-ndo, te ni yùhu ni iní-ndí  
càhá<sup>n</sup>-ndí nchaa tnúhu càhá<sup>n</sup>-ndí  
sá cúú-xí-ndó. <sup>12</sup>Te nchúhú chi ni  
yùhu ni iní-ndí cúú iní ñáhá-ndí  
xii-ndo, dico nchòhó chi ñá túú  
dùca<sup>n</sup> quide-ndo sá cúú-xí-ndí.  
<sup>13</sup>Te yúhú càhá<sup>n</sup> ndàhú-í núú-ndó  
dàtná quidé ì<sup>n</sup> tée cùu tátá òrè  
càhá<sup>n</sup> ndìhi-dé cue déhe-dé sá ni  
yuhu ni iní-ndó cùu iní ñáhá-ndó  
xì-ndí dàtná quidé mèe-ndí cúú iní  
ñáhá-ndí xii-ndo.

**Nchoo cùu-o datná ì<sup>n</sup> vehe Yá Ndiòxí**

<sup>14</sup>Te cue ñáyiú ñá túú sàndáá iní  
tnúhu Xítóhó Jesucristú, te vá cúú  
ì<sup>n</sup>nuu-ndo ndìhí-yu cada-ndo dàtná



xǐquidé-yu, chi ðì<sup>n</sup> cuu nchaa sá vǎha te ðì<sup>n</sup> cuu nchaa sá cuèhé sá dúhá, te ñúmí nchíanchii ndihi niú chi ñá túú ì<sup>n</sup>-ni cuu-xi. Te duca<sup>n</sup> sǎtnahá-xi cùu nchaa sá vǎha ndihi nchaa sá cuèhé sá dúhá chi ñá túú ì<sup>n</sup>-ni cuu-xi. <sup>15</sup>Te ðiu-ni duca<sup>n</sup> ñà túú ì<sup>n</sup>-ni cuu Xítóhó Jesucristú ndihi sácuíhná, te ðiu-ni duca<sup>n</sup> ñǎ túú ì<sup>n</sup>-ni cuu ñáyiú sàndáá iní ñáhá xii Xítóhó Jesucristú ndihi ñáyiú ñá túú sàndáá iní ñáhá xii-gá. <sup>16</sup>Te ðiu-ni duca<sup>n</sup> sǎtnahá tucu-xi cùu vehe Yá Ndiòxí ndihi nchaa sá càchí ñáyiú cùu ndióxí ní cadúha cue téé ñuyú-a, chi vá cúú quíhi ni ì<sup>n</sup> xǐǎ<sup>n</sup> xití vehe-gá. Te nchoo cùu-o datná vehe Yá Ndiòxí Yaá ndécú tũu andiu, chi mee-gǎ càchí-gá núú tütú-gá núú càchí-xi:

Yúhú vá cúmǎní cundecu-í  
ndihí-yu ndëni ní cuu na  
cùndecú-yu,  
te ðiu-ni yúhú cuu-í Ndiòxí-yu,  
te mèé-yu cuú-yu ñáyiú cùu  
cuendá-í.

Duha càchí-gá núú tütú-gá. <sup>17</sup>Te xǐǎ<sup>n</sup> nũu càchí tucu-gá ingá xichi núú tütú-gá núú càchí-xi:

Chí tá quèe tnuú nchaa ñáyiú ñá  
túú sàndáá iní ñáhá xii-í,  
te vá cání iní-ndó càda-ndo ni ì<sup>n</sup>  
sá cuèhé sá dúhá,  
te duca<sup>n</sup> te quehe<sup>n</sup> cuendá  
ñáhà-í xii-ndo,

<sup>18</sup>te yúhú cuu-í Tǎtá-ndó,  
te nchòhó cuu-ndo cuè déhe  
ducu<sup>n</sup>-í, ndihi cue déhe yoco-í,  
duha càhá<sup>n</sup> yúhú Yaá ío càhnu  
cuu.

Duha càchí-gá núú tütú-gá.

**7** Te sá dúcá<sup>n</sup> ío váha càhá<sup>n</sup> Yá Ndiòxí sá cúú-xí-ó nũu xǐǎ<sup>n</sup>

càhá<sup>n</sup>-í dóho nchòhó ñáyiú ío cùu iní-í sá dùu<sup>n</sup> duu<sup>n</sup> daña-o nchaa sá cuèhé sá dúhá, chi nchaa xǐǎ<sup>n</sup> ñá túú cùu-xi sá vǎha sá cúú-xí iní-ó ndihi yiqui cuñú-ó, te cada-o nàcuáa tàù-xi cunduu nàcuáa cundáá-ó nũu Yá Ndiòxí, te cada-o sǎ néhé-ó sǎ yínũhu núú-gǎ.

**Cue ñáyiú ñuú Còrintú quidé vǎha-yu**

<sup>2</sup>Te ni yũhu ni iní-ndó chì cúú iní ñáhá xii-ndí, chi nchúhú vá yõo ì<sup>n</sup> quide úhú iní-ndí, te ni vǎ yõo ì<sup>n</sup> dàcuíta nihnu-ndí, te ni vǎ yõo ì<sup>n</sup> dándahú-ndí. <sup>3</sup>Te sá dúhá càhá<sup>n</sup>-í te vá cání iní-ndó sǎ ì<sup>n</sup> cuéchi dàcaa-í dǐquí-ndó, chi dàtná sa ní cachí-í xii-ndo sǎ yũhú ío cùu iní ñáhà-í xii-ndo, te cuèi vitna ndècu-gá-ó ñuyú-a àdi cuéi na cùu-ó dico ðiu-ni duca<sup>n</sup> cùu iní ñáhà-í xii-ndo. <sup>4</sup>Te yúhú ío váha sàni iní-í cuendá-ndó, te duca<sup>n</sup> ío váha càhá<sup>n</sup>-í cuendá-ndó, te ío ndècu ndihi-í tnúhu ndee ìní cuendá-ndó, te ío cùdǐí iní-í sá cuendá-ndó cuèi nándi ndòho-í ndihi dava-gá-güedé ndécú-ndí.

<sup>5</sup>Te nchúhú cùtnàhá ní sáhá<sup>n</sup>-ndí distrítú Macèdoniá, te ñá túú tnàhi ni ndètátú-ndí cuendá nchaa sá nǐ yáhandi chi ío ní ndoho-ndí cuendá nchaa sá nǐ quidé-yu, chi ío ní cuándeé ñáhà-yu xii-ndí, te ío ní sani iní-ndí nũu nása-gá yáha-ndí ní cùu. <sup>6</sup>Dico Yá Ndiòxí ní taxi-gá tnúhu ndee ìní xii-ndí òré ní quexìo té Títú núú ndécú-ndí, te ðiu-ni Yaá-á<sup>n</sup> cúú-gǎ Yaá sǎñaha-gǎ tnúhu ndee ìní xii cue ñáyiú ndǐhú iní-xi. <sup>7</sup>Te duca<sup>n</sup> nǐ taxi Yá Ndiòxí tnúhu ndee ìní xii-ndí cuendá sá nǐ quexìo té Títú núú ndécú-ndí, te

ñá díú-ní sá cuendá ní quexìo-dé chi ní níhí tucu-ndí tnúhu ndee ìní cuendá ní cani-dé cuendú núú-ndí sá nchòhó ní sãñaha-ndo tnúhu ndee ìní xii-dé, te ní cachí tnúhu-dé xii-ndí sá nchòhó ío cuíní-ndó cãhá<sup>n</sup> ndìhi ñaha-ndo xii-ndí, te ní cachí tnúhu tucu-dé xii-ndí sá nchòhó ío ndìhú ìní-ndó cuendá nàcuáa cùu ndecu-ndo ni cuu, ndìhi cuendá sá ìo sàni ìní-ndó cuendá-í, te sá dúcá<sup>n</sup> ndùu cuendú ní cani-dé núú-ndí nũu xíã<sup>n</sup> ío ní cudíí ìní-í.

<sup>8</sup>Te nchòhó ní ndíhú ìní-ndó cuendá tnúhu cãhá<sup>n</sup>-í núú tütú sá ní dáquixì-í ndaha-ndo, te òré ní níhì-í tnúhu sá ndìhú ìní-ndó te tnaa-ni ní ndixi cuéchi ìní-í sá dúcá<sup>n</sup> nĩ quide-í te dãtnùni ñá túú-gã ní ndixi cuéchi ìní-í. <sup>9</sup>Te vitna ní ndíhú ìní-ndó, te xíã<sup>n</sup> ní quide-xi ní ndixi cuéchi ìní-ndó sã ñà túú quide váha-ndo ndècu-ndo ni cuu, te ní cudíí ìní-í dico ñá dǫú cuendá sá ni ndìhú ìní-ndó nĩ cudíí ìní-í chi cuendá sá nĩ ndixi cuéchi ìní-ndó, te ní ndíhú ìní-ndó nàcuáa ní cuu váha ìní Yã Ndiòxí, te xíã<sup>n</sup> nũu ní cuu-xi ìí<sup>n</sup> sá váha sá cúú-xí-ndó cuendá tnúhu ní cãhá<sup>n</sup>-í te ñá túú ní cùu-xi ìí<sup>n</sup> sá cuèhé sá cúú-xí-ndó. <sup>10</sup>Te nchoo nũu na ndìhú ìní-ó nàcuáa cuu váha ìní Yã Ndiòxí, te ndixi cuéchi ìní-ó te núu ñá túú quide váha-o ndècu-o, te sá dúcá<sup>n</sup> quide-o te nàníhí tãhú-ó, te vá ndìhú ìní-ó sã dúcá<sup>n</sup> nĩ quide-o, te dava ñáyiú xĩndecu ichi cuèhé ichi duha ndìhú ìní-yu dico ñá túú ndixi cuéchi ìní-yu cuendá nchaa sá ñà túú váha quidé-yu, te sá dúcá<sup>n</sup> quidé-yu te cuíta nihnú-yu. <sup>11</sup>Te sá dúcá<sup>n</sup> nĩ ndíhú ìní-ndó nàcuáa ní cuu váha ìní Yã

Ndiòxí, te xíã<sup>n</sup> nũu ndècu ndee-ndo quide-ndo nchaa nacuáa tàú-xi cunduu, te vitna ní yùhu ní ìní-ndó cãhá<sup>n</sup>-ndó sã quidé váha-ndo, te ío cùdèé<sup>n</sup>-ndó nũu méé-ndó sã ñà túú quide váha-ndo ndècu-ndo ni cuu, te yùhú-ndó ndècu-ndo cuendá sá ñà túú quide váha-ndo ni cùu, te ío ní xúhu<sup>n</sup> ìní ñáhá-ndó xii-í, te ní ndúcú ndéé-ndó nĩ quide ndáá-ndó cuendá téé ndècuéchi ndècu ndìhi-ndo, te sá dúcá<sup>n</sup> nĩ quide-ndo te xíã<sup>n</sup> ní cutnùni sá méé-ndó ñà túú cuèchi-ndo. <sup>12</sup>Te ní cadúha-í tutú ní dáquixì-í ndaha-ndo, te ní quide-ndo nàcuáa ní cãhá<sup>n</sup>-í, te sá dúcá<sup>n</sup> nĩ quide-ndo xíã<sup>n</sup> ní cutnùni ìní-ndó sã ìo cùu ìní ñáhá-ndó xii-í. Te Yã Ndiòxí nãhá-gã sá díú cuendá xíã<sup>n</sup> ní dáquixì-í tutú ndaha-ndo, te ñá díú-ní cuendá sá sání ìní-í cuendá téé ndècuéchi ndècu ndìhi-ndo, te ni ñà dǫú-ní cuendá ñáyiú ní dándìhú téé ndècuéchi-ã<sup>n</sup> ìní-xi ní càdúha-í tutú ní dáquixì-í ndaha-ndo. <sup>13</sup>Te cuendá sá quidé váha-ndo ndècu-ndo xíã<sup>n</sup> cúú-xí tnúhu ndee ìní ndécú ndìhi-ndí.

Dico ñá díú-ní xíã<sup>n</sup> chi tnàhá ío cùdíí ìní-ndí cuendá sá ìo cùdíí ìní té Títú, te duca<sup>n</sup> cùdíí ìní-dé chi nchòhó ní sãñaha-ndo tnúhu ndee ìní xii-dé. <sup>14</sup>Te yúhú ñá túú cùcaha<sup>n</sup> núú-í sá ní cãhá<sup>n</sup> váha-í cuendá-ndó nũu tã Títú cùtnàhá vátá quixí-gã-dé núú ndécú-ndó, chi ní cutnùni ìní-dé sá ndàá cãhá<sup>n</sup> váha-í nàcuáa quide-ndo datná cúú-xí sã ndàá nchaa tnúhu dàcuaha ñaha-í xii-ndo. <sup>15</sup>Te vitna ío-gá váha cùu ìní té Títú cuendá-ndó, chi ndàcu ìní-dé sá ncháá-ndó ìo váha ní tni-ndo nchàa tnúhu ní cãhá<sup>n</sup>-dé

núu-ndó, te ndàcu tucu iní-dé sá nǐ quehe<sup>n</sup> cuendá váha-ndo-dě, te ní dátúu-ndo núu-dě sá ò ní quiyùhú iní-ndó sǎ vǎ ndácú-ndó càda-ndo nchaa nacuáa tàú-xi cunduu.

<sup>16</sup>Te ò cùdí iní-í cuendá-ndó chi cùtnuní ndáá iní-í sá ñà túú dàña ndeé-ndó quide-ndo nchaa nacuáa tàú-xi cunduu.

### Ío váha cuu iní-ó chindee tnahao

**8** Te nchòhó ñáyiú ndècu ndihí-ndí ichi Xítohó Jesucristú càchí tnúhu-ndí xii-ndo nàcuáa quide ñaha Yá Ndiòxí xii cue ñáyiú xíndecu ichi-gá ndécú dìstrítú Macèdoniá, chi ò chindee ñaha-gá xií-yu cuendá sá quidé vǎha-yu ndécú-yu. <sup>2</sup>Te cuèi ndòho vihi-yu ndécú-yu dico ò-ni cùdí ìní-yu, te cuendá xǎ<sup>n</sup> núu ni yùhu ni iní-yu ní sacá<sup>n</sup> tnáhǎ-yu díhú<sup>n</sup> sǎ cúú-xí tnàha ñáyiú-yu, te ñá túú tnáhí ni xínduu dí-yu cuèi ò ndàhú-yu. <sup>3</sup>Te ñá díú-ní nàcuáa ní sani iní-yu ndacú-yu cacá<sup>n</sup> tnáhǎ-yu, chi ní quide yica ìní-yu ní sacá<sup>n</sup> tnáhá-gǎ-yu, te yúhú càchí tnúhu ndáá-í xii-ndo sǎ nì yuhu ni iní-yu duca<sup>n</sup> nǐ quidé-yu. <sup>4</sup>Te ò ní cǎhá<sup>n</sup> ndàhú-yu núu-ndí cuendá sá cuǎha-ndí tnúhu sá tnàhá-yu chindèe-yu dava-gá cue ñáyiú cùu cuendá Yǎ Ndiòxí. <sup>5</sup>Te ñá díú-ní nàcuáa ní sani iní-ndí ní quidé-yu, chi ní xídó-gǎ-yu ní quide váha-yu, te duca<sup>n</sup> chí mèe-yu ní sani iní-yu sá cǎdǎ-yu nchaa nàcuáa cuení Yǎ Ndiòxí, te dàtnuní duca<sup>n</sup> te ní cachí-yu sá cúú cǎdǎ-yu nchaa nàcuáa na cùñaha-ndí xií-yu. Te duca<sup>n</sup> nǐ quidé-yu chi duca<sup>n</sup> nǐ cuiní méé Yǎ Ndiòxí cunduu. <sup>6</sup>Te sá dúcá<sup>n</sup>

nǐ quide ñáyiú-á<sup>n</sup> núu xǎ<sup>n</sup> cǎhá<sup>n</sup> ndàhú-ndí núú tǎ Títú sá quíxí tucu-dé núú ndécú-ndó cuendá dàxínu cava-dé chùu<sup>n</sup> sá sà ní nguíta-dé quidé-dě dátacá-dé díhú<sup>n</sup> sǎ sà ní nguíta-ndo sàcá<sup>n</sup> tnáhá-ndó, te duca<sup>n</sup> quide-ndo chi cùndahú iní-ndó tnàha ñáyiú-ndo. <sup>7</sup>Te nchòhó cúú-ndó ñáyiú ò ngòdónúú quide nchaa sá vǎha, te ò váha sàndáá iní-ndó Xítohó Jesucristú, te ò váha cùtnuní iní-ndó nàcuáa cǎhá<sup>n</sup> tnúhu-gá, te ò váha dàcuaha-ndo ñáyiú tnúhu-gá, te ò ndècu ndee-ndo quide-ndo mee-ni sá vǎha, te duca<sup>n</sup> ò cùu iní ñáhá-ndó xii-ndí, te sá dúcá<sup>n</sup> quide-ndo núu xǎ<sup>n</sup> cǎhá<sup>n</sup> ndàhú-í núú-ndó sǎ ngòdó núú-gǎ-ndó càda-ndo sá cúú-xí tnàha ñáyiú-ndo.

<sup>8</sup>Dico yúhú ñá túú tàuchiú<sup>n</sup>-í sá dúcá<sup>n</sup> càda-ndo, chi cuendá-ni sá càchí tnúhu-í xii-ndo nàcuáa quide dava-gá cue ñáyiú ndècu ichi Xítohó Jesucristú, chi cue ñáyiú-á<sup>n</sup> ni yùhu ni iní-yu quidé-yu sá vǎha sá cúú-xí tnàha ñáyiú-yu, te càchí tnúhu-í xii-ndo nàcuáa quidé-yu cuendá cutnùní núu nása cada-ndo núu ndisa sá cúú iní-ndó cuè tnahà ñáyiú-ndo. <sup>9</sup>Te nchòhó sa xíní-ndó sǎ Xítohó Jesucristú ò cùndahú iní ñáhá-gǎ xii-ò, te ò váha ndècu-gá ní cùu te ní quixi-gá ñuyúú-a ní quide váha ñaha-gǎ xii-ò, te ñuyúú-a ñá túú ní xíndecu váha-gá, te duca<sup>n</sup> nǐ quixi-gá ñuyúú-a cuèi ñá túú ní xíndecu váha-gá cuendá sá nchò ngúndecu váha-ò núú ndécú-gǎ.

<sup>10</sup>Te na càchí tnúhu-í xii-ndo nàcuáa sàni iní-í. Chùu<sup>n</sup> sá nì yuhu ni iní-ndó nǐ nguíta-ndo quide-ndo cuíá nì yáha chí cùu-xi sá vǎha sá

cúu-xí-ndó nũ na dàxínu cava-ndo. <sup>11</sup>Te dàtná-ni ni yùhu ni iní-ndó nĩ tausaha-ndo chiù<sup>n</sup>-á<sup>n</sup> te duca<sup>n</sup>-ni ni nì yuhu ni iní-ndó dàxínu cava-ndo, te cacá<sup>n</sup> tnàhá-ndó sã ndécú ndìhi-ndo nacuaa xito mee-ndo ndacu-ndo.

<sup>12</sup>Te núu nchòhò nĩ yùhu ni iní-ndó càcá<sup>n</sup> tnàhá-ndó sã xító mèe-ndo ndacu-ndo ña, te cùu váha iní Yã Ndiòxí, chi mee-gã sa nàha-gá nása ndècu-o te ndùu vétú-ni iní-gá.

<sup>13</sup>Te sá dúhá ndùu tnúhu càhá<sup>n</sup>-í te vá cání iní-ndó sã yùhú cuiní-í sã nchòhò ndoho-ndo cùndecu-ndo te dava-gá-yu ngúndecu váha-yu sã cuendá-ndó. <sup>14</sup>Te vitna ndècu ndee iní-ndó nàcuáa ndacu-ndo chindee-ndo cue ñáyiú xini ñuhu, te nduu ñã túú ndècu ndee iní-ndó te cue ñáyiú-á<sup>n</sup> chindee ñàhá-yu xii-ndo te núu ndècu ndee iní-yu, te duca<sup>n</sup> te ni nchòhò ñã túú ñã cumání xii-ndo te ni cuè ñáyiú-ã<sup>n</sup> ñã túú ñã cumání xií-yu. <sup>15</sup>Te duca<sup>n</sup> te quee ndáá-xi nàcuáa càhá<sup>n</sup>-xi núú tütú Yã Ndiòxí núú càchí-xi: “Cue ñáyiú ío vãi sã ni nĩhí ñã túú ní cùu sobrá xií-yu, te cue ñáyiú sacú ní nĩhí ñã túú ní cùmání xií-yu”, duha càchí-xi núú tütú-gá.

#### Té Títú ndìhi cue tée cùndìhi-dé

<sup>16</sup>Te ndacá<sup>n</sup> táhù-í núú Yã Ndiòxí chi mee-gã ní quide sã tẽ Títú ío ñuhu iní ñàhá-dẽ xii-ndo dàtná ñúhú iní ñàhá-í xii-ndo. <sup>17</sup>Te yúhú ní xáha<sup>n</sup>-í xii-dé sã quixí còto ñaha-dé xii-ndo te ní sáha-dé tnúhu, te ñã dũú mèe-ni sã dúcá<sup>n</sup> nĩ xáha<sup>n</sup>-í xii-dé quixi coto ñaha-dẽ xii-ndo, chi mee-dẽ cúdĩĩ tnàhí iní-dé quixi coto ñaha-dẽ xii-ndo.

<sup>18</sup>Te tendaha-ndĩ ñĩ<sup>n</sup> tée ndècu ndìhi-o ichi Xítóhó Jesucristú

quixi-dé ndìhi té Títú, te tée quixi ndìhi té Títú-á<sup>n</sup> cúu-dẽ ñĩ<sup>n</sup> tée ío váha càhá<sup>n</sup> cue ñáyiú xĩndecu ichi Xítóhó Jesucristú cuendá-dé cuendá sã ío váha quide-dé chiù<sup>n</sup> Xítóhó Jesucristú càhá<sup>n</sup>-dé tnúhu-gá tnúhu sã càhá<sup>n</sup> nàcuáa naníhí tãhú-ó. <sup>19</sup>Te cue ñáyiú xĩndecu ichi Xítóhó Jesucristú ñã dũú-ní sã càhá<sup>n</sup> váha-yu cuendá-dé, chi tnàhá ní caxi ñàhá-yu xii-dé cuendá sã cacá cùu ndìhi ñaha-dé xii-ndĩ chindee ñaha-dé tacá sã cúu-xí ñáyiú ndàhú, te quide-ndĩ chiù<sup>n</sup>-a cuendá ío cuu càhnu Yã Ndiòxí, te cue ñáyiú cutnùní iní-yu sã nchòhò nĩ yùhu ni iní-ndó quide-ndo nchaa sã vãha sã cúu-xí cuè tnaha ñáyiú-ndo. <sup>20</sup>Te cuiní-ndĩ sã vã càhá<sup>n</sup> cuèhè ñáyiú cuendá nàcuáa quide-ndĩ ndìhi sã ngãutnàha sã cúu-xí cuè tnaha ñáyiú-o, te ío vãi cuu-xi. <sup>21</sup>Chi ndùcu ndee-ndĩ quidé-ndĩ nàcuáa càhá<sup>n</sup> váha Xítóhó Jesucristú cuendá-ndĩ, te quide tucu-ndĩ nàcuáa càhá<sup>n</sup> váha ñáyiú sã quidé vãha-ndĩ.

<sup>22</sup>Te tendaha tucu-ndĩ ingá tucu tée ndècu ndìhi-o ichi Xítóhó Jesucristú quixi-dé ndìhi cue tée úú quixi coto ñaha xii-ndo, te tée quixi ndìhi-güedé-á<sup>n</sup> nĩ cuu vãi xito quide-dé nàcuáa cutnùní iní-ndĩ sã ío ndùcu ndee-dé quidé-dẽ sã vãha, te vitna ío-gá cuiní-dé cada-dé sã vãha vitna quixi-dé núú ndécú-ndó, chi cùtnuní ndáá iní-dé sã cúu-ndó cuè ñáyiú quide váha. <sup>23</sup>Te càchí tnúhu-í xii-ndo sã tẽ Títú cúu-dẽ ñĩ<sup>n</sup> tée cùndìhi-í quidé-ndĩ chiù<sup>n</sup> Xítóhó Jesucristú, te tnàhá-dé cúu-dẽ ñĩ<sup>n</sup> tée xínu cuechi núu-ndó càhá<sup>n</sup>-dé tnúhu-gá. Te càchí

tnúhu tucu-í xii-ndo cuendá cue tée úu quixi ndihi-dé, chi cue tée-á<sup>n</sup> cúu-güedě cue tée tendaha cue ñáyiú xĩndecu ichi Xítohó Jesucristú quixi coto ñaha xii-ndo. Te cue tée-á<sup>n</sup> quidě-güedě nàcuáa cachí ñáyiú sá ïo càhnu cuu Xítohó Jesucristú. <sup>24</sup>Te chí cádá sá cúu ìní ndisa-ndo-güedě cuendá duca<sup>n</sup> na cùtnuní iní nchaa dava-gá ñáyiú xĩndecu ichi Xítohó Jesucristú sá ndàá ndisa duca<sup>n</sup> quide-ndo, te duca<sup>n</sup> cùtnuní iní-yu sá ndàá ndisa quide váha-ndo dàtná càhá<sup>n</sup>-ndí cuendá-ndó sá quidě vâha-ndo.

**Cuendá sá ngäutnàha sá cúu-xí cuè ñáyiú xĩndecu ichi Xítohó Jesucristú**

**9** Te cuendá sá ngäutnàha sá cúu-xí cuè ñáyiú ndècu ichi Xítohó Jesucristú ñá túú-gă xíní ññuhu-xi cachí tnúhu-í xii-ndo núú tütú-a nàcuáa cada-ndo, <sup>2</sup>chi sa cùtnuní iní-í sá ïo cuiní-ndó chĩndee-ndó-yu. Te duca<sup>n</sup>-ni ïo váha càhá<sup>n</sup>-í cuendá-ndó núú ñáyiú xĩndecu ichi Xítohó Jesucristú ndécú dístítú Macèdoniá, te xăha<sup>n</sup>-í xí-yu sá nchòhó ñáyiú xĩndecu ichi Xítohó Jesucristú ndécú dístítú Acăya sa ní cuu ì<sup>n</sup> cuíá duca<sup>n</sup> cuiní-ndó càcá<sup>n</sup> tnáhá-ndó sá cúu-xí cuè ñáyiú ndàhú ndécú ìchi-gá. Te vai cue ñáyiú dístítú Macèdoniá cuiní-yu cacá<sup>n</sup> tnáhă-yu sá cúu-xí cuè ñáyiú ndàhú ndécú ìchi Xítohó Jesucristú cuendá sá ñí níhĩ-yu tnúhu sá nchòhó ío cuiní-ndó dùca<sup>n</sup> cada-ndo. <sup>3</sup>Te cuendá sá sání iní-ndó càda-ndo xíă<sup>n</sup> tendaha-í cue tée ndècu ndihi-o ichi Xítohó Jesucristú quixi-güedě núú ndécú-ndó cuendá

dátúha ñaha-güedě xii-ndo, cuendá sá vă quée ndèhnde-í núú ñáyiú sá ñí càhá<sup>n</sup> váha-í cuendá-ndó, te duca<sup>n</sup> cùndecu túha ndisa-ndo dàtná sa ní càhá<sup>n</sup>-í núú-yu. <sup>4</sup>Chi na cuáhá<sup>n</sup> ndée quixi-í ndihi ì<sup>n</sup> úú cue ñáyiú dístítú Macèdoniá núú ndécú-ndó te quiní-yu sá ñà túú ndècu túha-ndo, te cucaha<sup>n</sup> núú-í núú-yu sá ñí càhá<sup>n</sup> váha-í cuendá-ndó te núu ñă túú ndècu túha-ndo, te tnáhá-ndó cùcaha<sup>n</sup> núú-ndó. <sup>5</sup>Te xíă<sup>n</sup> núu ní sani iní-í sá vâha-gá codonùu cue tée ndècu ndihi-o ichi Xítohó Jesucristú quixi coto ñaha-güedě xii-ndo cuendá chĩndee ñaha-güedě tacá sá ñí sani iní-ndó càcá<sup>n</sup> tnáhá-ndó cuendá sá cùndècu túha-xi, te cuu-xi dàtná ì<sup>n</sup> táhú sá ñí quene cuu iní méé-ndó càcá<sup>n</sup> tnáhá-ndó sá cúu-xí cuè tnaha ñáyiú-ndo. Te duca<sup>n</sup> te vá yõo cani iní-xi quesáhă-yu sá nchũhú ní quide yica-ndě duca<sup>n</sup> ñí sacá<sup>n</sup> tnáhá-ndó.

<sup>6</sup>Te nchòhó sa xíní-ndó sá ñáyiú na chĩhi vai tatá te vai ñíhĩ-yu cùu, te cue ñáyiú na chĩhi sacú tatá te sacú ñíhĩ-yu cùu. Duca<sup>n</sup> sãtnahă-xi cùu ñáyiú sàcá<sup>n</sup> tnáhă sá cúu-xí tnaha ñáyiú-yu. <sup>7</sup>Te ì<sup>n</sup> ì<sup>n</sup>-ndo càcá<sup>n</sup> tnáhá-ndó nàcuáa quene cuu iní méé-ndó, te ío váha cuu iní-ndó dùca<sup>n</sup> cada-ndo te vá cádá-ndó cuendá-ni sá quidě yica ñaha ñáyiú xii-ndo, chi Yá Ndiõxí cúu vâha iní-gá núú nchàa ñáyiú cùdíf iní sàcá<sup>n</sup> tnáhă sá cúu-xí cuè tnaha ñáyiú-xi. <sup>8</sup>Te Yá Ndiõxí ndacu-gá chĩndee ñaha-gá xii-ndo nàcuáa cundecu váha-ndo, chi diu-gá cada te níhĩ-ndó nchàa núú sá xíní ññuhu-ndo cundecu ndihi-ndo, te ñă

túu tnàhí-gá ná cumání xii-ndo, te mee-gã chindee ñaha-gá xii-ndo ñihí-ndó ïo vãi cundecu ndihi-ndo cuendá duca<sup>n</sup> chindee-ndo cue tnaha ñáyiu-ndo. <sup>9</sup>Te núú tütú Yá Ndiöxí cächí-xi ì<sup>n</sup> xichi:

Ì<sup>n</sup> ñáyiu ío vãi sá ñí sãñàhá-yu xii ñáyiu ndàhú,  
te sá ñí quide ñáyiu-á<sup>n</sup> ñí cuu-xi sá vãha sá vã yõo cùnaa.

Duha cächí-xi núú tütú-gá. <sup>10</sup>Te mee Yá Ndiöxí táxí-gã nchaa sá cúú tàtá nchaa nchòhó ñáyiu xìtu nándí sá xítú cuendá cuu sá cúú nchìto-ndo, te ñiu-gá cada te ío vãi sá ñihí-ndó cùndecu ndihi-ndo, te duca<sup>n</sup> ïo-gá vãi sá vãha cada-ndo sã cúú-xí cuè tnaha ñáyiu-ndo. <sup>11</sup>Te Yá Ndiöxí taxi-gá vãi núú sã cùndècu ndihi-ndo cuendá duca<sup>n</sup> ñí yuhu ñí iní-ndó vãi cuãñaha-ndo sã cúú-xí tnaha ñáyiu-ndo. Te cuendá nchaa sá sàcá<sup>n</sup> tnáhá-ndó quèhe<sup>n</sup> cuendá-ndí cuu xii tnaha ñáyiu-ndo, te cue ñáyiu-á<sup>n</sup> ïo ndacá<sup>n</sup> táhũ-yu núú Yá Ndiöxí cuendá sá dúcá<sup>n</sup> sàcá<sup>n</sup> tnáhá-ndó sã cúú-xí-yu. <sup>12</sup>Te sá dúcá<sup>n</sup> quide-ndo sacá<sup>n</sup> tnáhá-ndó sã cúú-xí cuè ñáyiu cùu cuendá Yá Ndiöxí, te ñáyiu-á<sup>n</sup> ñà túú-gã ná cumání xií-yu, te ío ndacá<sup>n</sup> táhũ-yu núú Yá Ndiöxí sá dúcá<sup>n</sup> quide-ndo. <sup>13</sup>Te ñáyiu-á<sup>n</sup> cutnùní iní-yu sá nchòhó quidé-ndó sã sàndáá ndisa iní-ndó tnũhu Xítohó Jesucristú, te cuendá xíã<sup>n</sup> te ñáyiu-á<sup>n</sup> chiñhú-yu Yá Ndiöxí, te cuendá sá dúcá<sup>n</sup> ñí yuhu ñí iní-ndó sàcá<sup>n</sup> tnáhá-ndó sã cúú-xí-yu ndihi sá cúú-xí nchàa dava-gá ñáyiu, te cachí-yu sá ïo càhnu cuu Yá Ndiöxí. <sup>14</sup>Te ñáyiu-á<sup>n</sup> cãhá<sup>n</sup> ndihí-yu Yá Ndiöxí cuendá-ndó, te ío cuu vãha

iní ñáhã-yu xii-ndo cuendá sá Yá Ndiöxí chindèe ñaha-gá xii-ndo quide-ndo sá vãha sá cúú-xí-yu ndihi dava-gá ñáyiu. <sup>15</sup>Te ío ndacá<sup>n</sup> táhũ-ó núú Yá Ndiöxí cuendá sá ñí taxi-gá sá ïo vãha ndècu ndihi-o, te ñí ñã cùtnùní iní-ó ñãsa cunduu tnũhu cãhá<sup>n</sup>-ó cuendá sá vãha ñí taxi-gá.

**Té Pãblú ndécú ndihi-dé  
tnũhu ndee iní sá cãhá<sup>n</sup>-dé  
tnũhu Xítohó Jesucristú**

**10** Te Xítohó Jesucristú ío càhnu iní-gá, te cùndahú iní ñáhã-gã xii-o chindee ñaha-gá, núú xíã<sup>n</sup> yúhú té Pãblú duca<sup>n</sup> quide-í cãhá<sup>n</sup> ndàhú-í núú-ndó nàcuáa cada-ndo. Te dava-ndo cächí-ndó sã yũhú ío ndàhú iní-í òrè ndécú ndihi ñaha-í xii-ndo, te òrè ñã túú ndècu ndihi ñaha-í xii-ndo te ío ñíí cãà-í. <sup>2</sup>Te cãhá<sup>n</sup> ndàhú-í núú-ndó sã cãdá-ndó nàcuáa vã cãhá<sup>n</sup> ñíí-í núú-ndó òrè quixi-í quixi coto ñaha-í xii-ndo. Te cuñí-í sá ndihi tnũhu ñíí iní-xi cãhá<sup>n</sup> ndihi-í cue ñáyiu cächí sá ì<sup>n</sup>-ni cuu-í ndihi cue ñáyiu ñã túú sàndáá iní tnũhu Xítohó Jesucristú. <sup>3</sup>Te nchúhú cùu-ndí cue tée ñuyíu-a, dico ndècu ndee-ndí quidé-ndí nàcuáa ndàcu-ndí dáquèe tñhú-ndí nchaa sá cuèhé sá dúhá, dico ñã dñú mèe-ndí duca<sup>n</sup> ndàcu-ndí quidé-ndí, <sup>4</sup>te ñí ì<sup>n</sup> sá ìo ñuyíu-a ñã túú chindee ñaha-xi, chi mee Yá Ndiöxí chindèe ñaha-gá xii-ndí dáquèe tñhú duu<sup>n</sup>-ndí nchaa núú sã cuèhé sá dúhá. <sup>5</sup>Te xíã<sup>n</sup> ñũ ñihí-ndí tnũhu cãhá<sup>n</sup>-ndí sàdí-ndí yuhu cue ñáyiu cãhá<sup>n</sup> tnũhu sá ñà túú cùu vãha iní Yá Ndiöxí, ñáyiu xiquide

nínu mee-xi càchí sá ñà túú nàndíhi tnúhu-gá. Te quide-ndí sá ñáyiú-á<sup>n</sup> quindáá iní-yu tnúhu Xítohó Jesucristú. <sup>6</sup>Te nchúhú sa ndècu túha-ndí sá dáquètíhú-ndí cue ñáyiú ñá túú cuíní cada nàcuáa cuíní Xítohó Jesucristú, dico díhna-gá xíní ñùhu-xi sá ncháá nchòhó ñáyiú cuíní cada nàcuáa cuíní-gá cundáá-ndó.

<sup>7</sup>Te nchòhó nàcuáa ndùu sá ndéhé-ndó te duca<sup>n</sup> sàni iní-ndó, dico vá dúcá<sup>n</sup> càni iní-ndó cuendá-ndí. Chi núu cùnuni ndáá iní-ndó sã cúú-ndó cuendá Xítohó Jesucristú, te diu-ni duca<sup>n</sup> tàù-ndó càni iní-ndó cuendá-ndí tucu. <sup>8</sup>Te Xítohó Jesucristú ní taxi-gá tnúhu ndee ìní ndécú ndìhi-ndí sá dánèhé ñáhà-ndí xii-ndo nàcuáa cuita cuehnu nihnu-ndo ìchi-gá quíhí<sup>n</sup>, te ñá díú sã dánèhé ñáhà-ndí xii-ndo nàcuáa cuíta nihnu-ndo, te cuèi na chido-gá-í cáhá<sup>n</sup>-í cada nínu-í mèè-í cuendá tnúhu ndee ìní ní taxi Xítohó Jesucristú ndécú ndìhi-ndí, dico vá cúcàha<sup>n</sup> núú-í chi cáhá<sup>n</sup> ndáá-í. <sup>9</sup>Te ñá túú cuíní-í sá nchòhó caní iní-ndó sã yùhú dáyùhú ñáhà-í xii-ndo nàcuáa ndùu tnúhu cáhá<sup>n</sup>-í núú tútú-í. <sup>10</sup>Te dava-ndo càchí-ndó sã ténàà ñáhà-í xii-ndo nùú tútú-í, te mee-ni tnùhu càhnu sá ïo cùnuu cuu-xi, te càchí tucu-ndo sã òré ndécú ndìhi ñaha-í xii-ndo te ñá túú càa-í sá cùú-í ìí<sup>n</sup> tée cùu váha cùu dico iní-ndó, te càchí tucu-ndo sã ñà túú tnàhá iní-ndó nàcuáa quide-í òré dácuaà ñaha-í xii-ndo. <sup>11</sup>Te nchòhó ñáyiú duca<sup>n</sup> cáhá<sup>n</sup> cada cuendá váha-ndo sã dàtná-ni cáhá<sup>n</sup>-ndí núú tútú-ndí diu-ni duca<sup>n</sup> quide-ndí òré ndécú ndìhi ñaha-ndí xii-ndo.

<sup>12</sup>Te nchúhú, vá cúú tnàhí cáhá<sup>n</sup>-ndí sá ìí<sup>n</sup>-ni cuu-ndí ndìhi cue ñáyiú càhà<sup>n</sup> váha cuendá mèé-xí, chi ñáyiú-á<sup>n</sup> sání iní-yu ná cúú sã váha te quidé-yu te xíá<sup>n</sup> càchí-yu sá ïo váha quidé-yu, te càchí-yu sá quidé váha-gá-yu dàcúúxí tnàha ñáyiú-yu, te sá dúcá<sup>n</sup> cáhá<sup>n</sup>-yu te quidé-yu dàtná quidé cuè ñáyiú ñá túú tnàhí cùnuni iní-xi. <sup>13</sup>Te dico nchúhú ñá túú xidó-ndí cáhá<sup>n</sup> váha-ndí cuendá-ndí, chi càhà<sup>n</sup> váha-ndí cuendá-ndí dico nàcuáa ndùu chiu<sup>n</sup> ní taxi Yá Ndiöxí cáhá<sup>n</sup>-ndí, chi mee-gã ní cachí-gá ndèè neni sáá-ndí cáhá<sup>n</sup>-ndí tnúhu-gá, te ní sáá-ndí ndéè ñuú-ndó cáhá<sup>n</sup>-ndí tnúhu-gá. <sup>14</sup>Te vitna ndècu ndìhi-ndí tnúhu ndee ìní sá tnàhá nchòhó cuu cáhá<sup>n</sup> ndìhi ñaha-ndí xii-ndo, chi díhna-gá nchúhú ní quixi-ndí ní cáhá<sup>n</sup>-ndí tnúhu Xítohó Jesucristú ñuú-ndó, tnúhu sá cáhá<sup>n</sup> nàcuáa naníhí tàhú-ó. <sup>15</sup>Te nchúhú ñá túú quide cahnu-ndí mèé-ndí cuendá chiu<sup>n</sup> quide dava-gá-güedé quesaha-ndí sá chíú<sup>n</sup> mèè-ndí cúú-xí. Te cuíní-ndí sá nchòhó cuita quindáá-gá iní-ndó Xítohó Jesucristú, te duca<sup>n</sup> te níhí-gã-ndí nàcuáa cada-ndí chiu<sup>n</sup>-gá nchaa dava-gá xichi núú ní cachí-gá cada-ndí chiu<sup>n</sup>-gá. <sup>16</sup>Chi cáhá<sup>n</sup>-ndí tnúhu-gá tnúhu sá cáhá<sup>n</sup> nàcuáa naníhí tàhú-ó, te yáha-gá-ndí ñuú-ndó quíhí<sup>n</sup>-ndí nchaa dava-gá xichi cáhá<sup>n</sup>-ndí, te vá cadá càhnu-ndí mèé-ndí cuendá chiu<sup>n</sup> sá sà ní quide dava-gá-güedé. <sup>17</sup>Te cue ñáyiú cuíní cada càhnu mee-xi te vá dúcá<sup>n</sup> càdá-yu, chi mee Xítohó Jesucristú ná càda cahnú-yu-gá. <sup>18</sup>Te nchaa ñáyiú

na càhá<sup>n</sup> váha Xítohó Jesucristú  
cuendá-yu, ñáyi-u-á<sup>n</sup> cúdiú-yu  
núú-gã, te ñá túú cùdiú-yu núú-gã  
cuendá sá càhá<sup>n</sup> váha-yu cuendá  
mèé-yu.

**Cuendá té Páblú ndihi cuendá  
cue tée càchí sá càhá<sup>n</sup> tnúhu  
Yá Ndiöxí te ñá ndää**

**11** Te cuiní-í sá nchòhó  
cada ndee iní-ndó  
cùndedóho-ndo tnúhu na càhá<sup>n</sup>-í,  
chi càhá<sup>n</sup>-í dàtná càhá<sup>n</sup> cue  
ñáyi-u ñá túú cùtnuní iní-xi, te  
cuèi nása-gá ná cùnduu tnúhu  
càhá<sup>n</sup>-í dico chí cádá ndèe iní  
cùndedóho-ndo. <sup>2</sup>Chi yúhú ío  
ñúhu iní ñáhà-í xii-ndo dàtná  
ñúhú iní ñáhá mèe Yá Ndiöxí  
xii-o, te ní càhá<sup>n</sup>-í tnúhu Xítohó  
Jesucristú núú-ndó nùu xíã<sup>n</sup> ní  
tnahá tnúhu-ndo ndihi-gá vitna, te  
sá dúcá<sup>n</sup> ñí quide-í te cada iní-ndó  
sã yúhú cùú-í dàtná ìí<sup>n</sup> tée xica  
ndáhú te nchòhó cúú-ndó dàtná ìí<sup>n</sup>  
xíchí cuéchí, te Xítohó Jesucristú  
cúú-gã dàtná ìí<sup>n</sup> tée tnándaha ndihi  
xíchí cuéchí-ã<sup>n</sup>. Te duca<sup>n</sup> càda  
iní-ndó chi na sàà nduu te yúhú  
na càni cuendá ñáhà-í xii-ndo nùú  
Xítohó Jesucristú, te cuu-ndo ñáyi-u  
vá cùndècu tnahí-gá cuéchi-xi.  
<sup>3</sup>Te yúhú-í sá sàcúíhná dandàhú  
ñáhá-xí xii-ndo vá cání-gã iní-ndó  
cànchicú<sup>n</sup> nihnu-ndo ñí yuhu ní  
iní-ndó ìchi Xítohó Jesucristú  
dàtná nchicú<sup>n</sup> nihnu-ndo vitna. Te  
yúhú-í ná yáha-ndo dàtná ní yáha  
tá Èvã, chi sàcúíhná ñí nduu-xi  
cóó ñí dándàhú ñáhá-xí xii-xi, chi  
sàcúíhná-ã<sup>n</sup> ìo váha ní xito-xi  
nàcuáa ní quide-xi ní dándàhú-xi  
tá Èvã-á<sup>n</sup>. <sup>4</sup>Te nchòhó, quidé

ndèe iní-ndó sàcùndedóho-ndo  
nchàa tnúhu càhá<sup>n</sup> cue tée càhá<sup>n</sup>  
ingá núú tnúhu cuendá Jèsús  
tnúhu sá ñà túú dànehé ñáhá-ndí  
xii-ndo, te quide ndee tucu iní-ndó  
ndèdóho-ndo dànehé ñáhá-güedé  
xii-ndo cuendá ingá espíritú, te  
ñá díú cuendá Espíritú Yá Ndiöxí  
sá ñí ngúndecu ndihi-ndo dànehé  
ñáhá-güedé xii-ndo, te quide  
ndee tucu iní-ndó ndèdóho-ndo  
dànehé ñáhá-güedé xii-ndo ingá  
núú tnúhu sá càchí-güedé càhá<sup>n</sup>  
nàcuáa naníhí tãhú-ndó, te ñá díú  
nàcuáa nduu tnúhu sá ní sàndáa  
iní-ndó cuendá naníhí tãhú-ndó  
càhá<sup>n</sup>-güedé. <sup>5</sup>Te cue tée duca<sup>n</sup>  
càhá<sup>n</sup>-á<sup>n</sup> càchí-güedé sá Yá Ndiöxí  
ní tendaha ñàha-gá xii-güedé xícã  
cùu-güedé càhá<sup>n</sup>-güedé tnúhu-gã  
te ío cùnuu-güedé, dico ñá ndää  
sá càhá<sup>n</sup>-güedé tnúhu-gã. Te yúhú  
cùtnuní iní-í sá cuè tée-ã<sup>n</sup> ñá túú  
cùnuu-güedé dàtná cùnùu yúhú.  
<sup>6</sup>Te cuèi ñá túú càhá<sup>n</sup>-í dàtná càhá<sup>n</sup>  
cue tée ío váha sàà díquí-xi dico  
íó váha cùtnuní iní-í cuendá nchaa  
sá dácúaha-í, te yúhú sa quide-í  
nàcuáa cùtnuní iní-ndó sã ìo váha  
cùtnuní iní-í nàcuáa nduu nchaa  
tnúhu càhá<sup>n</sup>-í.

<sup>7</sup>Te cudana te sàni iní-ndó sã  
yúhú ñá túú ní quide váha-í sá ñí  
quide-í mèe-í dàtná ìí<sup>n</sup> tée ío ndáhú  
iní-xi, chi ñá túú ní xicã<sup>n</sup>-í yáhu-í  
núú-ndó cuendá sá ñí càhá<sup>n</sup>-í tnúhu  
Yá Ndiöxí tnúhu sá càhá<sup>n</sup> nàcuáa  
naníhí tãhú-ó nùú-ndó. <sup>8</sup>Te ní  
quehe<sup>n</sup>-í díhú<sup>n</sup> ñí taxi dava-gá cue  
ñáyi-u ndècu ichi Xítohó Jesucristú,  
te díhú<sup>n</sup>-ã<sup>n</sup> ñí dándòñúhu-í ní saa<sup>n</sup>-í  
nchaa sá ñí xini ñúhu-í cùtnàhá  
ní càhá<sup>n</sup>-í tnúhu Xítohó Jesucristú



núu-ndó. <sup>9</sup>Te cútnàhá ní xíndecu ndihí ñaha-í xii-ndo te áma ní xóo cumání sá xíní ñuhu-í, te ñá túú ná ní xícá<sup>n</sup>-í núú ni ì<sup>n</sup>-ndo. Chi cue ñáyiú xíndecu ichi Xítohó Jesucristú ndécú distritú Macèdoniá ní quixí-yu ní taxí-yu sá cúmání xii-í, te ñá túú tnàhí ni dàsatú iní ñáhà-í xii-ndo cǎcá<sup>n</sup>-í núú-ndó nǔu ná cúú sǎ xíní ñuhu-í, te ñi-u-ni duca<sup>n</sup> cǎda-í. <sup>10</sup>Te ñi-u-ni duha cǎhá<sup>n</sup> váha-í cuendá-í te ni ì<sup>n</sup> cue ñáyiú distritú Acǎyá vá ñihí-yu tnúhu cúñhàh-yu xii-í cuendá cadí-yu yuhu-í. Te mee Xítohó Jesucristú nǎhá-gǎ sá ndǎá cǎhá<sup>n</sup>-í dàtná cǎhá<sup>n</sup> ndǎá mée-gǎ. <sup>11</sup>Te cudana te sàni iní-ndó sǎ sǎ dúhá cǎhá<sup>n</sup>-í te ñá túú cùu iní ñáhà-í xii-ndo, dico ñáhà chi mee Yǎ Ndiòxí nǎhá-gǎ sá yúhú ío cùu iní ñáhà-í xii-ndo.

<sup>12</sup>Te nǎcuáa-ni ta quide-í véxi te ñi-u-ni duca<sup>n</sup> cǎda-í cuendá sá cuè téé cuíní cada nínu mee-xi cǎchí sá ì<sup>n</sup>-ni cuu ndihí ñaha-güedé xii-í vá ñihí-güedé tnúhu cǎhá<sup>n</sup>-güedé cǎchí-güedé sá ì<sup>n</sup>-ni chiu<sup>n</sup> quide ndihí ñaha-güedé xii-í. <sup>13</sup>Te cue téé-á<sup>n</sup> cǎchí-güedé sá Yǎ Ndiòxí ní tendaha ñàha-gǎ xii-güedé xícá cùu-güedé cǎhá<sup>n</sup>-güedé tnúhu-gǎ dico ñá ndǎá, chi mee-ni dǎndahú-güedé ñáyiú ndihí tnúhu cǎhá<sup>n</sup>-güedé, te quide-güedé dàtná quidé cuè téé cǎhá<sup>n</sup> tnúhu Xítohó Jesucristú dico ñá ndǎá sá cúú-güedé cue téé cǎhá<sup>n</sup> tnúhu-gǎ. <sup>14</sup>Te vá cúñhu-o sǎ dúcá<sup>n</sup> quide cue téé-á<sup>n</sup>, chi mee sǎcuíhná quidé-xí sǎ cúú-xí dàtná ì<sup>n</sup> espíritú xínú cuèchi núú ío váha cǎa ndecu Yǎ Ndiòxí dico ñá ndǎá sá xínú cuèchi-xi xíá<sup>n</sup>. <sup>15</sup>Te

xíá<sup>n</sup> vá cúñhu-o sǎ cuè téé xínu cuèchi núú-xi quide-güedé sá cúú-güedé cue téé quide váha chi ñá ndǎá sá quidé váha-güedé chi dǎndahú-güedé ñáyiú. Te nǎcuáa ndùu nchaa sá quidé-güedé te duca<sup>n</sup> nǎcháhu-güedé núú Yǎ Ndiòxí.

**Té Pǎblú ío ndòho-dé cuendá  
sá cúú-dé téé cǎhá<sup>n</sup> tnúhu  
Xítohó Jesucristú**

<sup>16</sup>Te yúhú cǎhá<sup>n</sup> tucu-í dóho-ndo sǎ vǎ cǎní iní-ndó sǎ yúhú cúú-í ì<sup>n</sup> téé cǎhá<sup>n</sup> lùcú cǎhá<sup>n</sup> duha, te núu dava-ndo dùca<sup>n</sup> sani iní-ndó dico chí cǎdá ndèe iní cundedóho-ndo tnúhu na cǎhá<sup>n</sup>-í cuendá duca<sup>n</sup> tnàhá-í cada nínu-í mée-í. <sup>17</sup>Te vitna na cǎhá<sup>n</sup>-í dàtná cǎhá<sup>n</sup> ì<sup>n</sup> téé ñá túú cùtnuní iní-xi, chi tnúhu cǎhá<sup>n</sup>-í ñá túú ì<sup>n</sup>-ni cuu-xi ndihí tnúhu Xítohó Jesucristú, chi vitna cǎhá<sup>n</sup>-í nǎcuáa cada nínu-í mée-í. <sup>18</sup>Te ío cuéhé ñáyiú quide nínu mee-xi cuendá nchaa sá ío ñuyíú-a te xíá<sup>n</sup> nǔu tnàhá-í cuíní-í cada nínu-í mée-í. <sup>19</sup>Chi cùtnuní sá nchòhó quidé ndèe iní-ndó sǎcúndedóho-ndo nchàa tnúhu cǎhá<sup>n</sup> cue téé cǎhá<sup>n</sup> lùcú cǎhá<sup>n</sup> duha, te duca<sup>n</sup> quide ndee iní-ndó sǎcúndedóho-ndo tnúhu cǎhá<sup>n</sup>-güedé chi cǎchí-ndó sǎ ío túha-ndo. <sup>20</sup>Te nchòhó, quide ndee iní-ndó tnì-ndo nchaa tnúhu cǎhá<sup>n</sup> cue téé quide yica ñaha xii-ndo sá cúnú cuèchi-ndo núú-güedé, te xícá<sup>n</sup>-güedé nǎndi sá xícá<sup>n</sup>-güedé núú-ndó, te tàxi tnuní ñáhà-güedé xii-ndo, te quide-güedé sá ío cùnuu-güedé ndécú ndihí ñaha-güedé xii-ndo, te cǎniha-güedé xii-ndo, te cuèí nchaa

xĩã quidé ñaha-güedé xii-ndo dico quide ndee-ni iní-ndó. <sup>21</sup>Te nchòhó càchí-ndó sã cúú-ndĩ cue tée ñã túú ní cùyì cada nándi sá cádá, te ndáá chi ñã túú ì<sup>n</sup>-ni cuu-ndĩ ndìhi cue tée duca<sup>n</sup> xĩquide.

Dico núu cue tée-á<sup>n</sup> cùyì-güedé quidé ñnu-güedé méé-güedě, te tnàhá-í cùyì-í duca<sup>n</sup> càda-í. Te sá dúhá càhá<sup>n</sup>-í te càhá<sup>n</sup>-í dàtná ì<sup>n</sup> tée ñã túú cùtnuní iní-xi. <sup>22</sup>Te núu quide cahnu-güedé méé-güedě cuendá sá càhá<sup>n</sup>-güedé tnúhu hèbreú, te yúhú tucu ñnu-ni tée càhá<sup>n</sup> tnúhu hèbreú cùú-í, àdi quide cahnu-güedé méé-güedě cuendá sá cúú-güedě cue tée isràél, te yúhú tucu tnàhá-í cùú-í tée isràél, àdi quide cahnu-güedé méé-güedě cuendá sá cúú-güedě ñaní tnàhá ndĩ Àbrahám, te tnàhá yúhú cùú-í ñaní tnàhá ndĩ Àbrahám tucu. <sup>23</sup>Àdi quide cahnu-güedé méé-güedě cuendá sá sání iní-güedé sá díú nũ Xítóhó Jesucristú xínú cuèchi-güedé, dico yúhú ío-gá xínú cuèchi ndisa-í núú-gã. Te sá dúhá quide cahnu-í mèe-í te càhá<sup>n</sup>-í dàtná ì<sup>n</sup> tée ñã túú cùtnuní iní-xi, te yúhú cùú-í ì<sup>n</sup> tée ío-gá quidé chù<sup>n</sup>-gá dàcúxí cuè tée-á<sup>n</sup>, te vài xito ní cuu càniha ñáyiu xii-í, te vài xito ní cuu chìhi ñahá-yu vecaá xii-í, te vài xito ní cuu cãcu cãcu cahni ñaha ñáyiu xii-í. <sup>24</sup>Te cue ñáyiu isràél ní canihá-yu xii-í úhú<sup>n</sup> xito, te ndi tnahá ì<sup>n</sup> ì<sup>n</sup> xito ní canihá-yu ní dáquẽe-yu ócò sáhu<sup>n</sup> cúmí ñì sàtà-í. <sup>25</sup>Te úní xito ní caniha tucu ñáyiu xii-í ndìhi carrutí, te ì<sup>n</sup> xito ní sáha yúú ñahã-yu xii-í, te ní cuu úní xito quẽe naa bàrcú xití ndute òré sácúhu<sup>n</sup>-í, te ì<sup>n</sup> xito ío ní

ndoho-í ní xíndecu-í ì<sup>n</sup> nduu ì<sup>n</sup> niú núú ndute làmár. <sup>26</sup>Te ío titní xichi ní cuu xica cuu-í, te dava xichi ní cãcu cuido ñaha ndüte ñuhu xii-í, te dava xichi ní cãcu duhu ñadúhú nchaa ndachù<sup>n</sup>-í, te dava xichi ní cãcu cada ñaha cuè ñáyiu cùu ndi mee-í ì<sup>n</sup> sá cádá ñahá-yu xii-í, te ñnu-ni duca<sup>n</sup> ñi cãcu cada ñaha tucu cue ñáyiu ñã túú cùu ndi mee-í ì<sup>n</sup> sá cádá ñahá-yu xii-í ní cùu, te cuèi xití ñuu<sup>n</sup> te cuèi xití yucu cãcu cãcu cada ñaha ñáyiu xii-í ì<sup>n</sup> sá cádá ñahá-yu, te ñnu-ni duca<sup>n</sup> cãcu cãcu quiní-í tnúndòho oré ñùhù-í bàrcú cuáhá<sup>n</sup> núú ndute làmár. Te cue ñáyiu càchí sá ndécú ìchi Xítóhó Jesucristú te ñã ndáá cãcu cãcu cada ñahá-yu xii-í ì<sup>n</sup> sá cádá ñahá-yu. <sup>27</sup>Te ío ndòho-í cuendá chù<sup>n</sup> quide-í chi ío xàú-í, te ní cuu vài xito ñã túú xidí-í, te titní xito ní cuu xihí víhì-í docó, te titní xito ní cuu yìchì-í ndute, te titní xito ní cuu ñã túú tnàhí ná xéxì-í cuendá chù<sup>n</sup> quide-í, te titní xito ní cuu ndòho-í sá vixi<sup>n</sup>, te titní xito ní cuu ñã túú ñihí-í dóó cuihnu-í.

<sup>28</sup>Te ñã dífú-ní xĩã<sup>n</sup> chi ì<sup>n</sup> nduu ì<sup>n</sup> nduu ío sání iní-í cuendá nchaa ñáyiu ndècu ichi Xítóhó Jesucristú xíndecu nchaa xichi. <sup>29</sup>Te ndèda-ni càa ñáyiu ñã túú ñihí ndéé cùndecu ichi Xítóhó Jesucristú, te ío cùndahú iní-í chi sànuu sá tnàhá-í ñã túú ñihí ndèè-í cùndecu-í ichi-gá sá dúcá<sup>n</sup> quidé-yu. Te núu ì<sup>n</sup> ñáyiu quidé-yu sá ì<sup>n</sup> nchòhó ñáyiu ndècu ichi Xítóhó Jesucristú quidé-ndó ì<sup>n</sup> sá ñã túú tàù-ndó càda-ndo te vá cúú vãha iní-í chi cudèè<sup>n</sup>-í. <sup>30</sup>Te núu xini ñuhu-xi sá cádá càhnu-í mèe-í, te cuu duca<sup>n</sup> càda-í te càhá<sup>n</sup>-í

mee-ni cuendá nchaa sá quidé nàcuáa ñá túú ñihí ndéé yìqui cuñú-í. <sup>31</sup>Te Dútú Ndiöxí Yáa cúú Tātá Xìtohó Jesucristú nánhá-gǎ sá yúhú càhá<sup>n</sup> ndáá-í núú-ndó, te diu-gá tàù-gá cachí-ó sǎ ïo càhnu cuu-gá ñi caa ñi quíhí<sup>n</sup>. <sup>32</sup>Te cútnàhá ní xíndecu-í ñúú Dàmascú te tée cùu gobiernú tée cùndìhi tée yìndaha ñáyiu nàni Aretás ní taxi ndecu-dé cue tée ní xíndedí yuyèhe sá ñúhú dòco ñúú cuendá òré quee-í te tñi ñaha-güedě xii-í ní cùu. <sup>33</sup>Dico yúhú ní queè-í ñi<sup>n</sup> xití tídihi, te cue ñáyiu cùndìhi ñaha xii-í ní queñuhu ñàhá-yu ndàa ventaná nchì yìqui naha sǎ ñúhú dòco ñúú-á<sup>n</sup>, te duca<sup>n</sup> te ní càcu-í ñá túú ní ndàcu-güedé tñi ñaha-güedě xii-í.

**Té Páblú càhá<sup>n</sup>-dé sá ïo vii  
càa sá ñi dánhé núú ñàhá  
Xìtohó Jesucristú xii-dé**

**12** Te ñá túú ndéé nándìhi-xi sá càhá<sup>n</sup> váha-o cuendá méé-ó, dico vitna xini ñuhu-xi duca<sup>n</sup> cada-í chi càhá<sup>n</sup>-í nàcuáa ní quide ñaha Xìtohó Jesucristú xii-í, chi ní quide-gá sá ñi cutnùnì iní-í nàcuáa ndùu tñuhu-gá, te vai núú sǎ ñi dánhé núú ñàhá-gǎ xii-í. <sup>2</sup>Te yúhú xini-í ñi<sup>n</sup> tée sàndáa iní ñàhá xii Xìtohó Jesucristú, te sa ní cuu úxícúmí cuíá sǎ tée-á<sup>n</sup> ñi sáa-dé ndéé andiu cùu uní, te ñá túú xini-í te núu ndìhi yiqui cuñú-dé ní sáa-dé àdi ñàhá, chi ñi<sup>n</sup> díf-ñi Yá Ndiöxí nánhá-gǎ te núu nása càa-dé ní sáa-dé. <sup>3</sup>Te yúhú càhá<sup>n</sup> ndáá-í cuendá téa-á<sup>n</sup>, dico dàtná ní cachí-í sá ñà túú xini-í te núu ndìhi yiqui cuñú-dé ní sáa-dé andiu àdi ñàhá,

chi mee Yá Ndiöxí nánhá-gǎ te núu nása càa-dé ní sáa-dé. <sup>4</sup>Te tée-á<sup>n</sup> ñi sáa-dé ñi<sup>n</sup> xichi núú ïo váha càa andiu, te yacá<sup>n</sup> ní xíndedóho-dé tñuhu mee-ni sǎ cúú-xi cuendá méé-dě, te tñuhu-á<sup>n</sup> vǎ cúú tñahí càhá<sup>n</sup>-dé núú ñi<sup>n</sup> ñáyiu. <sup>5</sup>Te yúhú quidé ñinu-í tée-á<sup>n</sup>, dico mee-í ñá túú càhá<sup>n</sup> váha-í cuendá-í cuendá cada nínu-í mèè-í, chi càhá<sup>n</sup>-ni mee-ni cuendá nchaa sá quidé nàcuáa ñá túú ñihí ndéé yìqui cuñú-í. <sup>6</sup>Te núu dícó yúhú cuiní-í te cuu càhá<sup>n</sup> váha-í cuendá-í cuendá cada nínu-í mèè-í, te núu duca<sup>n</sup> na càhá<sup>n</sup>-í te ñá túú cùu-xi ñi<sup>n</sup> tñuhu neñúú càhá<sup>n</sup>-í, chi cùu-xi ñi<sup>n</sup> sá càhá<sup>n</sup> ndáá-í te núu na càhá<sup>n</sup>-í. Dico vǎ dúcá<sup>n</sup> càda-í chi cuiní-í sá nchòhó cada cuendá-ndó nàcuáa ndùu tñuhu càhá<sup>n</sup>-í ndìhi nàcuáa quide-í, te duca<sup>n</sup> mèe-ndo càhá<sup>n</sup>-ndó te núu ná tée cùu-í, te ñá díf sǎ yúhú càhá<sup>n</sup> váha-í cuendá mèè-í cuendá nchòhó cachí-ndó sǎ ïo cùnuu-í.

<sup>7</sup>Te sá ñi dánhé núú ñàhá Xìtohó Jesucristú xii-í cúú-xi sǎ xidó ïo váha, te cuendá sá vǎ cǎdá càhnu-í mèè-í nùu xíá<sup>n</sup> Xìtohó Jesucristú ní quide-gá duha ndòho yiqui cuñú-í vitna. Te sá dúcá<sup>n</sup> quide ñaha-gá xii-í te xíá<sup>n</sup> sácúíhna ñi ñihí-xi ichi càhnu dandoho ñaha-xi xii-í. <sup>8</sup>Te ní cuu úní xito càhá<sup>n</sup> ndàhú-í núú Xìtohó Jesucristú sá ná cǎdá-gǎ nàcuáa vǎ ndóhó-gǎ yiqui cuñú-í. <sup>9</sup>Dico mee-gǎ cǎchí-gǎ xii-í: “Yúhú ïo cùndahú iní ñàhá-í xii-n chindee ñaha-í, te ñá túú nǎ cùmǎní xii-n, te cùtnuní sǎ ïo-gǎ chindèe-í cue ñáyiu ñá túú ñihí ndéé cùndecu”, duha ní cachí-gǎ xii-í. Te xíá<sup>n</sup> nùu yúhú ïo cùdíf iní-í sǎ ñà túú ñihí

ndèè-í ndècù-í, chi diu cuendá xíã<sup>n</sup> Xítohó Jesucristú ñá túú dàña nihnu ñaha-gá xii-í chindèe ñaha-gá. <sup>10</sup>Te xíã<sup>n</sup> núu cùdífí ìní-í sá dúhá ñá túu ñihí ndèè-í ndècù-í, te cùdífí tucu iní-í cuendá nchaa tnúhu cuèhé tnúhu duha càhá<sup>n</sup> ñáyiú cuendá-í, te cùdífí ìní-í cuendá nchaa sá ndóhò-í, te cùdífí tucu iní-í cuendá sá quidé ñàha ñáyiú xii-í, te cùdífí tucu iní-í cuendá nchaa dava-gá sá ndóhò-í cuendá Xítohó Jesucristú. Te òré ñá túú ñihí ndèè-í te Xítohó Jesucristú chindèe ñaha-gá xii-í ñihí ndèè-í.

**Té Páblú ío sàni iní-dé cuendá cue ñáyiú xindecu ichi Xítohó Jesucristú ndécú ñùù Còrintú**

<sup>11</sup>Te cùu-í dàtná ìí<sup>n</sup> téé ñá túú cùtnuní iní-xi sá dúhá càhá<sup>n</sup> váha-í cuendá-í, te duca<sup>n</sup> quide-í chi mee-ndo quide-ndo sá dúcá<sup>n</sup> cãhá<sup>n</sup>-í, dico mee-ndo tàù-ndó cãhá<sup>n</sup> váha-ndo cuendá-í ní cùu. Te dava cue téé ío quide cahnu-güedé mée-güedé, te cãchí-güedé sá Xítohó Jesucristú ní táuchíú<sup>n</sup>-gã sá càhá<sup>n</sup>-güedé tnúhu-gá, dico yúhú cúnùu-gá-í dàcúúxí cuè téé-á<sup>n</sup> cuèi ñá túú vèdana ná cùu-í ndécù-í ñuyú-a. <sup>12</sup>Te cùtnàhá ní xindecu ndíhi ñaha-í xii-ndo ò ní quide càhnu iní-í nándi sá ñí yáha-í ní quide-í chiu<sup>n</sup> Xítohó Jesucristú sá cúu-xí-ndó. Te ní chindee ñàha-gá xii-í ní quide-í titní núú sã vã yòo tnàhí ndàcu cada te ní cuñúhu-ndo, te sá dúcá<sup>n</sup> ñí chindee ñàha-gá xii-í ní cutnùní iní-ndó sã yúhú cúu ndísa-í ìí<sup>n</sup> téé ní cachí Xítohó Jesucristú sá càhá<sup>n</sup>-í tnúhu-gá. <sup>13</sup>Te yúhú ìí<sup>n</sup>-ni quide ndíhi ñaha-í

xii-ndo ndíhi nchaa dava-gá cue ñáyiú ndècu ichi Xítohó Jesucristú, te dicó-ni sá yúhú ñá túú ní cuiní-í taxi-ndo sã xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcá<sup>n</sup> ñí quide-í ñá túú ní cuiní-í chindee ñàha-ndo te chí cãdá càhnu iní ñàhá xii-í.

<sup>14</sup>Te vitna sa ndècu túha-í sá quixí-í núú ndécú-ndó, te sá quixí còto ñaha tucu-í xii-ndo cùu-xi xito cuu úní sá quixí-í, te cuiní-í sã vã dándhú-ndó ìní-ndó ndècu-ndo sá táxí-ndó cùu xii-í, chi ñá díú xíã<sup>n</sup> ndèé iní-í chi mee-ndo ndèé iní-í quixi-í. Te duha càhá<sup>n</sup>-í chi nchòhó xíní-ndó sã cuè téé cùu tátá sãñaha-güedé sá cúu-xí cuè déhe-güedé te ñá díú cuè déhe-güedé sãñaha-güedé sá cúu-xí mée-güedé. <sup>15</sup>Te yúhú ío váha cùu iní-í dandòñuhu-í sá ndécú ndíhi-í nàcuáa ndacu-í chindee ñàha-í xii-ndo cùndecu váha-ndo sã cúu-xí Yã Ndiõxí chi ío cùdífí ìní-í, te cuèi na cùu-í sá cuendá-ndó, chi ío cùu iní ñàhá-í xii-ndo, te sá dúcá<sup>n</sup> cùu iní ñàhá-í xii-ndo, te sànuu sá nchòhó ñá túú cùu iní ñàhá càvihi-ndo xii-í.

<sup>16</sup>Te ñaha-ndo sá ñà túú ní dándhú-í iní-ndó ñá taxi-ndo cùu xii-í, dico dava-ndo cãchí-ndó sã ò váha ní xito-í nàcuáa ní quide-í nàcuáa ní dándhú ñàhá-í xii-ndo. <sup>17</sup>Te chí càhá<sup>n</sup> te núu yúhú ní dándhú ñàhá-í xii-ndo ndíhi cue téé ní tendaha-í ní quixi coto ñaha xii-ndo. <sup>18</sup>Te ní càhá<sup>n</sup> ndàhú-í núú tẽ Titú ndíhi núú ìngá tucu téé ndècu ndíhi-o ichi Xítohó Jesucristú ní quixi coto ñaha-güedé xii-ndo. Te nchòhó cùtnuní iní-ndó

să tễ Títú ñá túú ní dándahú ñáhá-dě xii-ndo, te duca<sup>n</sup> chi ì<sup>n</sup>-ni sàni iní-ndí te ì<sup>n</sup>-ni quide-ndí.

<sup>19</sup>Te cudana te sàni iní-ndó sã sà dúhá càhá<sup>n</sup>-ndí te tàunihnu-ndí mée-ndí, dico ñá díú dùca<sup>n</sup> quee-xi tnúhu càhá<sup>n</sup>-ndí, chi càhá<sup>n</sup>-ndí nàcuáa tàú-xi càhá<sup>n</sup>-ndí chi ndècu ndìhi-ndí Xítóhó Jesucristú, te mee Yá Ndiòxí nánhá ndáá-gá nàcuáa ndùu tnúhu càhá<sup>n</sup>-ndí, te ncha sá càhá<sup>n</sup>-ndí cúú-xí cuèndá nchòhò cue ñáyiú ío cùu iní-ndí, te càhá<sup>n</sup>-ndí nàcuáa cundecu váha-ndo ìchi Xítóhó Jesucristú. <sup>20</sup>Te ío sàni iní-í cuèndá-ndó chi na cuáhá<sup>n</sup> te òré quixi-í quixi coto ñaha-í xii-ndo, te ñá túú quide-ndo nàcuáa cuu váha iní-í, te sá dúcá<sup>n</sup> te yúhú càhá<sup>n</sup>-í nàcuáa vá cúú vãha iní-ndó, te duca<sup>n</sup> ío sàni iní-í cuèndá-ndó chi na cuáhá<sup>n</sup> òré quexio-í te nàá-ndó, àdi ndecu-ndo ìchi cuédú íní, àdi cudéé<sup>n</sup> núú tnáhá-ndó, àdi ñá túú cùu ì<sup>n</sup>-nuu-ndo ndecu-ndo, àdi càhá<sup>n</sup> cuèhé-ndó cuèndá tnàha ñáyiú-ndo núú chítú núú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusa<sup>n</sup> dóho tnàha-ndo. <sup>21</sup>Te ío sàni iní-í cuèndá-ndó chi na cuáhá<sup>n</sup> òré quixi-í, te Yá Ndiòxí cada-gá te cucaha<sup>n</sup> núú-í sá cuèndá-ndó, te ío ndíhú iní-í cuèndá-ndó te núu vátá dánhá-gã-ndó nchàa sá cuèhé sá dúhá ní ngúíta-ndo quide-ndo ndéé sanduu, te vài-ndo ní ngúíta-ndo dùca<sup>n</sup> quide-ndo, chi ndècu-ndo ìchi díí iní te nándi-gá ncha sá cuèhé sá dúhá quide-ndo, te duca<sup>n</sup> ío ndíhú iní-í te núu vátá dánhá-gã-ndó nchàa xiá<sup>n</sup>.

### Tnúhu ndéé núú ní ndìhi-ná

**13** Te sá quíxì-í vitna núú ndécú-ndó cùu-xi xito cuu úní sá quíxì còto ñaha-í xii-ndo. Te càchí tnúhu-í xii-ndo sã òré cundáa cuèchi-ndo te canehe núú úú àdi úní ñáyiú càhá<sup>n</sup> ndáa nàcuáa ndùu cuèchi-ndo. <sup>2</sup>Te yúhú sa ní càhá<sup>n</sup>-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te diu-ni duca<sup>n</sup> càhá<sup>n</sup> tucu-í dóho-ndo vitna vátá quíxì tucu-gá-í quixi coto ñaha-í xii-ndo. Te nchòhò ñáyiú ní cunduu ní ngúíta quide ncha sá cuèhé sá dúhá, tenàá ñáhà-í xii-ndo òré quexio-í te núu vátá dánhá-gã-ndó nchàa sá cuèhé sá dúhá quide-ndo te tnàhá ncha dava-gã-ndó tènàá ñáhà-í xii-ndo. <sup>3</sup>Te nchòhò cuìní-ndó quìní-ndó núu ndáa sá quidè-í núú Xítóhó Jesucristú càhá<sup>n</sup>-í yuhu-gá, dico dàvá-á<sup>n</sup> cutnùnì ndáa iní-ndó. Te Xítóhó Jesucristú quidè-gã nàcuáa cutnùnì iní-ndó sã ío càhnu cuu-gá te ñá túú quide-gá dàtná quidè ì<sup>n</sup> ñáyiú ñá túú nìhí ndéé cundecu. <sup>4</sup>Te Xítóhó Jesucristú ní ndoho-gá dàtná ì<sup>n</sup> ñáyiú ñá túú nìhí ndéé cundecu, chi ní sahani ñaha-güedè xii-gá núú cùrúxì dico mee Yá Ndiòxí ní quide-gá ní nìhí ndéé Xítóhó Jesucristú ní ndoto-gá ndécú-gã vitna, te tnàhá nchúhú tucu duca<sup>n</sup> yãha-ndí ñá túú nìhí ndéé-ndí cundecu-ndí, dico mee Yá Ndiòxí chindèe ñaha-gá xii-ndí nìhí ndéé-ndí ndécú-ndí cuèndá sá ndécú ndìhi-ndí Xítóhó Jesucristú, te xiá<sup>n</sup> núu ndàcu-ndí quidè-ndí nàcuáa tàú-xi cunduu sá cúú-xí-ndó.

<sup>5</sup>Te chí cádá cuendá váha te núu ndisa sá sàndáá iní-ndó tnúhu Xítohó Jesucristú, te núu ndáá sá ndécú-ndó ichi-gá te cùtnuní iní-ndó sá ndécú-ndó ndìhi-gá. <sup>6</sup>Te cuíní-ndí sá nchòhó cutnùnì ndáá iní-ndó sá nchùhú ndécú ndìhi ndisa-ndí Xítohó Jesucristú. <sup>7</sup>Te nchùhú càhá<sup>n</sup> ndìhi-ndí Yá Ndiòxí cuendá-ndó cuendá sá vǎ cádá-ndó nì ì<sup>n</sup> sá cuèhé sá dúhá, te vǎ cǎní iní-ndó sǎ sà dúcá<sup>n</sup> càhá<sup>n</sup> ndìhi-ndí-gá cuendá-ndó, te cuíní-ndí sá nchòhó cutnùnì iní-ndó sǎ nchùhú ío ndècu yĩñuhu-ndí núú-gǎ, te ñáhá chi càhá<sup>n</sup> ndìhi-ndí-gá cuendá-ndó chi cuíní-ndí sá nchòhó cada váha-ndo cùndecu-ndo cuéi sàni iní-ndó sǎ nchùhú cúú-ndǐ cue téé ñá túú ndècu yĩñuhu núú-gǎ. <sup>8</sup>Te nchùhú mee-ni càhá<sup>n</sup> váha-ndí cuendá tnúhu ndáá tnúhu Yá Ndiòxí, te ñá túú càhá<sup>n</sup>-ndí ì<sup>n</sup> tnúhu sá ñà túú tàú-xi càhá<sup>n</sup>-ndí cuendá tnúhu-á<sup>n</sup>. <sup>9</sup>Te cùdǐ iní-ndí sá ñà túú-gǎ xíní ñùhu-xi cada-ndí nàcuáa níhí ndéé-ndǐ tenàà ñáhá-ndǐ xii-ndo càhá<sup>n</sup>-ndí dóho-ndo, chi nchòhó sa ní níhí ndéé-ndó ndècu-ndo ichi-gá. Te nchùhú càhá<sup>n</sup> ndìhi-ndí Yá Ndiòxí cuendá-ndó cuendá sá nchòhó cundáá-ndó cùndecu-ndo ñá túú-gǎ ná cumání-ndó nǔú-gǎ. <sup>10</sup>Te xǐǎ<sup>n</sup> nǔú duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndìhi

ñaha-í xii-ndo, cuendá sá òré ná cùndecu ndìhi ñaha-í xii-ndo te vǎ ìo níhi càhá<sup>n</sup>-í dóho-ndo nàcuáa ndùu tnúhu ndee ìní ní taxi Xítohó Jesucristú ndécú ndìhi-í, chi ní taxi-gá tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quǐh<sup>n</sup>, te ñá dǐú cuendá sá cǎnúichi ñaha-í xii-ndo cuíta nihnu-ndo.

<sup>11</sup>Te vitna nchaa nchòhó ñáyiu ndècu ndìhi-ndí ichi Xítohó Jesucristú ío quǐde ndee ìní ñáhá-ndǐ xii-ndo, te ío chí ndúcú nàcuáa cada-ndo cùndáá-ndó nǔú Yá Ndiòxí cuendá sá ñà túú tnàhí-gá ná cùmání-ndó nǔú-gǎ, te ndee ndèe cada iní-ndó cùndecu-ndo, te chí cúú ì<sup>n</sup>nuu cundecu ndìhi tnaha, te duca<sup>n</sup> te Yá Ndiòxí cundecu ndìhi ñaha-gǎ xii-ndo chi ío cùu ìní ñáhá-gǎ xii-o, te ðiu-gá quǐdé-gǎ ío váha cùu ìní-ó ndècu-o. <sup>12</sup>Te ndìhi tnúhu yĩñùhu chí cádá ndèe ìní tnáhá. <sup>13</sup>Te nchaa ñáyiu cùu cuendá Yá Ndiòxí ndécú ìha quǐde ndee ìní ñáhǎ-yu xii-ndo.

<sup>14</sup>Te xìcá<sup>n</sup> táhú-ndǐ núú Xítohó Jesucristú sá ìo na chìndee chítúu ñaha-gǎ xii-ndo. Te mee Yá Ndiòxí ná cádá-gǎ nàcuáa cutnùnì iní-ndó sǎ ìo cùu ìní ñáhá-gǎ xii-ndo, te Espíritú-gá cundee cùu cahnu ìní-ndó cùndecu-ndo. Te duca<sup>n</sup> na cùnduu. Te ío chí cádá ndèe ìní-ñá vitna.

# TUTÚ NÍ CADÚHA TÉ PÄBLÚ QUÍHÍ<sup>n</sup> NDAHA ÑÁYIU DISTRÌTÚ GÀLACIÁ

Té Păblú cádúha-dé tutú quíhí<sup>n</sup>  
ndaha nchaa ñáyiú sàndáá  
iní ñáhá xii Xítóhó Jesucristú  
ndécú dìstrítú Gàlaciá

**1** Te yúhú té Păblú ní tendaha ñàha Xítóhó Jesucristú, ndíhi Dútú Ndiöxí véxi-í càhá<sup>n</sup>-í tnúhu-gá. Te diu Yá Ndiöxí ní dándótó-gă Xítóhó Jesucristú Yaá ní xíhí ní cùu. Te càchí tnúhu-í xii-ndo sã ñà dǫú ñáyiú ñuyú-a ni tëndaha ñaha xii-í véxi-í, te ni Yá Ndiöxí te ni Xítóhó Jesucristú ñá túú ní xăha<sup>n</sup>-gă xii ì<sup>n</sup> ñáyiú quixí-yu cachí tnúhu-yu nàcuáa cada-í. <sup>2</sup>Te yúhú té Păblú cádúha-í tutú-a ndíhi nchaa dava-gă ñáyiú ndècu ichi Yá Ndiöxí ndécú ndíhi-í iha cuèndá daquixi-í ndaha nchòhó ñáyiú sàndáá iní ñáhá xii Xítóhó Jesucristú ndécú dìstrítú Gàlaciá. <sup>3</sup>Te xicá<sup>n</sup> táhù-í núú Dútú Ndiöxí, ndíhi núú Xítóhó Jesucristú sá ìo na chindee chitúu ñaha-gă xii-ndo, te duca<sup>n</sup> ndì nduú-gă ná cádá te ìo váha cuu iní-ndó cùndecu-ndo. <sup>4</sup>Te Xítóhó Jesucristú ní xíhí-gă sá cuèndá nchaa cuéchi nchoo cuè ñáyiú ndècu ñuyú-a. Te duca<sup>n</sup> nǫ quide-gă, chi cuiní-gă sá vǫ cùndècu-o ichi cuehé ichi duha.

Te duca<sup>n</sup> nǫ cuu, chi Dútú Ndiöxí duca<sup>n</sup> nǫ cuiní-gă cunduu. <sup>5</sup>Te ìo chí ná ndàcá<sup>n</sup> táhù-ó nǫú Yá Ndiöxí cuèndá sá ìo càhnu cuu-gă, te diu-ni duca<sup>n</sup> càda-o ni caa ni quíhí<sup>n</sup>! Te duca<sup>n</sup> na cùnduu.

Mee-ni tnúhu Xítóhó  
Jesucristú cúu-xí tnúhu sá  
càhá<sup>n</sup> nàcuáa naníhí tàhù-ó

<sup>6</sup>Te ìo cùñúhu-í cúú chi ìo ndíhi ní dáñá-ndó ichi Yá Ndiöxí. Te Yaá-á<sup>n</sup> nǫ càhá<sup>n</sup> ñáhá-gă xii-ndo, chi Xítóhó Jesucristú ìo ní cundàhú iní ñáhá-gă ní quide váha ñaha-gă xii-ndo, te vitna dàcuaha tucu-ndo ìngá tnúhu, te càchí-ndó sã xǫ<sup>n</sup> dàcácu nihnu ñaha-xi xii-ndo núú ùhú núú ndàhú. <sup>7</sup>Dico ñáhá, chi ñá túú-gă tnúhu sá dácácu nihnu ñaha xii-o núú ùhú núú ndàhú. Te dicó-ni sá ìo ñáyiú véxi dàticá nuu ñahá-yu xii-ndo dànehé ñáhà-yu tnúhu sá dácúta nihnu ñaha xii-ndo, chi tnúhu-á<sup>n</sup> ñà túú cùu-xi tnúhu Xítóhó Jesucristú. <sup>8</sup>Te yúhú càhá<sup>n</sup>-í tnúhu Xítóhó Jesucristú, dico núú ìo ñáyiú véxi dànehé ñáhá xii-ndo ìngá tnúhu sá ñà túú ní dànehé ñáhà-í xii-ndo, te nchòhó cachí-ndó sã ñáyiú-á<sup>n</sup> nacháhu-yu núú Yá Ndiöxí

sá dúcá<sup>n</sup> quidé-yu. Te cuèi yúhú, te núu na dàma-í tnúhu danèhé ñáhà-í xii-ndo, te ðiu-ni duca<sup>n</sup> cǎhá<sup>n</sup>-ndó sǎ nǎchǎhu-í núú-gǎ te núu duca<sup>n</sup> na càda-í. Àdi te núu ìi<sup>n</sup> espíritú xínú cuèchi núú-gǎ véxi-xi cǎhá<sup>n</sup>-xi ingá tnúhu sá ñà túú ní dǎnehé ñáhà-í xii-ndo nàcuáa naníhí tǎhú-ndó ñá, te ðiu-ni duca<sup>n</sup> cǎhá<sup>n</sup>-ndó sǎ nǎchǎhu-xi núú Yǎ Ndiòxí te núu duca<sup>n</sup> na càda-xi. <sup>9</sup>Te ðiu-ni duha sa ní dǎnehé ñáhà-í xii-ndo sǎ ñuu véxi ñáyiú dǎnehé ñáhá ìngá tnúhu sá ñà túú ní dǎnehé ñáhà-í xii-ndo nàcuáa naníhí tǎhú-ndó ñá, te cachí-ndó sǎ ñǎyiú-á<sup>n</sup> nacháhu-yu núú Yǎ Ndiòxí sá dúcá<sup>n</sup> quidé-yu, duha ní cachí-í xii-ndo.

<sup>10</sup>Te duha ndùu tnúhu cǎhá<sup>n</sup>-í chi nchòhó sa xíní-ndó sǎ yúhú cuiní-í sá Yǎ Ndiòxí cǎhá<sup>n</sup>-gǎ sá quidé vǎha-í ndécù-í, te ñá ðíú sǎ ñáyiú ñuyíú-a cachí-yu sá quidé vǎha-í, àdi sá ìo cùdífí ìní-yu nchaa nàcuáa quide-í ndécù-í. Te núu na càni ìní-í cudù-í núú ñáyiú ñuyíú-a, te ñá túú cùu-í téé xínu cuechi núú Xítóhó Jesucristú te núu duca<sup>n</sup> na càda-í.

**Nàcuáa ní cuu ní ngúíta té Pǎblú cǎhá<sup>n</sup>-dé tnúhu Yǎ Ndiòxí**

<sup>11-12</sup>Te nchòhó ñáyiú ndècu ndìhi-í ichi Xítóhó Jesucristú cǎchí tnúhu-í xii-ndo sǎ tnúhu sá dǎnehé ñáhà-í xii-ndo nàcuáa naníhí tǎhú-ndó cùu-xi tnúhu sá ñí cachí tnúhu mee Xítóhó Jesucristú xii-í, te ñá ðíú ìi<sup>n</sup> ñáyiú ñuyíú-a ni cǎhu ìní-yu tnúhu-á<sup>n</sup>, àdi danehé ñáhà-yu xii-í, chi mee Xítóhó Jesucristú ní dǎnehé ñáhá-gǎ.

<sup>13</sup>Te nchòhó sa ñihí-ndó tnúhu nàcuáa ní xóo cada-í cùtnàhǎ

nchìcú<sup>n</sup> nihnu-í nchaa nàcuáa dàcuaha ñáyiú cùu ndi mee-í ñáyiú isràèl ní cùu. Te dàvá-á<sup>n</sup> ìo ní xóo cuu úhú ìní-í nchaa ñáyiú ndècu ichi Yǎ Ndiòxí, te nándi sá ñí xóo cada-í-yu, te ní cuiní-í danàa-í-yu ni cùu. <sup>14</sup>Te yúhú ìo-gǎ ní xóo quene cáva-í ní xóo dacuàha-í nchaa sá dǎcuàha ñáyiú cùu ndi mee-í dǎcúxí ñáyiú ìi<sup>n</sup>-ni cuíà-í ndìhí-yu ni cùu, te ìo-gǎ ní xóo cuiní-í cada ndáá-í canchicú<sup>n</sup> nihnu-í nchaa nàcuáa ní dǎnehé ñáhá cuè ñanì tǎhà-í ní xíndecu ndéé sanaha ni cùu. <sup>15</sup>Te ndéé cùtnàhǎ vátá cǎcú-gǎ-í Yǎ Ndiòxí sa nèhe váha ñaha-gǎ xii-í cuendá sá cǎhá<sup>n</sup>-í tnúhu-gǎ, núu xíǎ<sup>n</sup> ní cǎhá<sup>n</sup> ñáhá-gǎ xii-í quidé-í chùu<sup>n</sup>-gǎ vitna, te sá dúcá<sup>n</sup> ñí quide-gǎ te ìo váha ní quide ñaha-gǎ xii-í. <sup>16</sup>Te òrè ní cǎhá<sup>n</sup> ñáhá Yǎ Ndiòxí xii-í te ní cachí tnúhu-gǎ cuendá Déhe-gǎ Xítóhó Jesucristú. Te duca<sup>n</sup> ñí quide Yǎ Ndiòxí cuendá sá cuiní-gǎ sá cǎhaha-í xii ñáyiú ñá túú cùu ñáyiú isràèl cuendá Yaá cúú Dèhe-gǎ. Te cùtnàhǎ ní cǎhá<sup>n</sup> ñáhá Yǎ Ndiòxí xii-í, te vǎ yòo ìi<sup>n</sup> ðii núú-xi ni ndècu tnúhu-í nàcuáa cada-í. <sup>17</sup>Te ni ñà túú ní sǎhá<sup>n</sup>-í ñuu Jerusalén nducu tnúhu-í núú cuè téé díhna nuu ñí tendaha Xítóhó Jesucristú cǎhá<sup>n</sup> tnúhu-gǎ ñuu nása cada-í, chi ndìhi-ni ní sǎhá<sup>n</sup>-í distritú Àrabíá ní xíndecu tnaa-í te dàtnùní cuánuhú tucu-í ñuu Dàmascú.

<sup>18</sup>Te núú ùní cuíá sǎ ñí cǎhá<sup>n</sup> ñáhá Yǎ Ndiòxí xii-í, te ní sǎhá<sup>n</sup> tucu-í ñuu Jerusalén ní cǎhá<sup>n</sup> ndìhi-í té Pèlú, te ní xíndecu-í ndìhi-dé sǎhú<sup>n</sup> nduu. <sup>19</sup>Te tnàhǎ té Jàcobó ñanì Xítóhó Jesucristú



ní cáhá<sup>n</sup> ndihi-í. Te ñá túú ní xìní-í dava-gá cue téé ní tendaha Xítohó Jesucristú cáhá<sup>n</sup> tnúhu-gá. <sup>20</sup>Te Yá Ndiöxí ndéhé ndìi ndehe caxi-gá sá ncháá tnúhu tèe-í núú tütú-a sá cúu-xí-ndó cùu-xi ìí<sup>n</sup> sá ndáá.

<sup>21</sup>Te sátá nǐ sáhá<sup>n</sup>-í ñúú Jerusalén, te dàtnùnì ní sáhá<sup>n</sup>-í distritú Sìriá, ndìhi distritú Ciliciá. <sup>22</sup>Te nchaa ñáyiú xǐndecu ichi Xítohó Jesucristú ndécú distritú Jùdeá ñá túú xìnì ñáhǎ-yu xii-í ní cùu. <sup>23</sup>Dico ní xóo níhǐ-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhá xii nchaa nchoo ñáyiú ndècu ichi Xítohó Jesucristú cáhá<sup>n</sup>-dé tnúhu-gá núú ñáyiú cuendá quǐndáá iní ñáhǎ-yu xii-gá, te diu-dé nándi sá quídé ñàha-dé, te cuiní-dé danàa ñaha-dé cuendá sá vǎ cóo-gǎ ñáyiú quǐndáá iní ñáhá xii-gá ní cùu”, duha ní cachí-yu cuendá-í. <sup>24</sup>Te ní nguíta-yu ní cachí-yu sá ìo càhnu cuu Yá Ndiöxí cuendá sá ñà túú-gǎ quídè-í dàtná ní xóo cada-í.

**Té Páblú ní níhí tnáhá-dé  
ndìhi dava-gá cue téé  
càhá<sup>n</sup> tnúhu Yá Ndiöxí**

**2** Te ní nútahá úxícúmí cuǐá sǎ nǐ sáhá<sup>n</sup>-í ñúú Jerusalén ní cáhá<sup>n</sup> ndihi-í té Pèlú, te dàtnùnì ndécà-í té Bèè ní sáhá<sup>n</sup>, te tnàhá té Títú ní sáhá<sup>n</sup> ndìhi-ndí-dé. <sup>2</sup>Te ní sáhá<sup>n</sup>-í chi mee Yá Ndiöxí ní cachí-gá sá quǐhǐ<sup>n</sup>-í. Te yàcá<sup>n</sup> ní tacá mee-ni cuè téé cùnūu. Te ní xáha<sup>n</sup>-í xii-güedé nàcuáa ndùu tnúhu dànehé-í ñáyiú ñá túú cùu ñáyiú isràél cuendá naníhí tǎhú-yu. Te duca<sup>n</sup> nǐ quide-í cuendá cuiní-í quini-güedé nàcuáa ndùu chiu<sup>n</sup>

quide-í, chi nacuahá<sup>n</sup> cachí-güedé sá ñà túú nǎndíhi-xi. <sup>3</sup>Te té Títú téé ndècu ndihi-í chi ñá dǐú tée isràél cúu-dé, dico ñá túú ní quide yica-güedé cuáha-güedé sèñá ñii-dé. <sup>4</sup>Te ñáyiú cǎchí sá ndécú ìchi Xítohó Jesucristú te ñá ndàá sá ndécú-yu ichi-gá, ñáyiú-á<sup>n</sup> nǐ chitnahá ñáhǎ-yu xii-ndí cuendá cuiní-yu quini-yu nása quide-ndí ndécú-ndǐ ichi Xítohó Jesucristú. Te duca<sup>n</sup> nǐ quidé-yu cuendá sá nchúhú sa ní cácu nihnu-ndí ñá túú-gǎ quídé-ndǐ nchaa nàcuáa ní cáhá<sup>n</sup> ndíi Moisés. Te cuiní-yu sá núcuíta saa tùcu-ndí cada-ndí nchaa nàcuáa ní cáhá<sup>n</sup> ndíi nucúndecu-ndí dàtná ní xǐndecu-ndí cúnahá vátá cǎcu nihnu-gá-ndí núú tnúhu-á<sup>n</sup> ni cùu. <sup>5</sup>Te nchúhú ñá túú tnàhí ni dàña-ndí méé-ndǐ dandàhú ñáhǎ-yu xii-ndí. Te duca<sup>n</sup> nǐ quide-ndí, chi cuiní-ndí sá ñà túú nǎgá tnúhu dácánuu ndìhi tnúhu sá càhá<sup>n</sup> nàcuáa naníhí tǎhú-ó ndècu ndìhi-ndo.

<sup>6</sup>Te ni ìí<sup>n</sup> tnúhu sá vátá quini-gá-í ñá túú ní cǎchí tnúhu cue téé cùnūu núú ñáyiú cada-í. Dico yúhú chi ñá túú ní quide cuendá-í nǔu cùnūu-güedé àdi ñá túú cùnūu-güedé, chi núú Yá Ndiöxí ìí<sup>n</sup>-ni cùu-o nchaa-o. <sup>7</sup>Te ní cutnùnì iní-güedé sá Yá Ndiöxí ní cachí-gá xii-í sá càhá<sup>n</sup>-í tnúhu-gá núú ñáyiú ñá túú cùu ñáyiú isràél dàtná ní quide-gá té Pèlú ní xáha<sup>n</sup>-gǎ càhá<sup>n</sup>-dé tnúhu-gá núú ñáyiú isràél. <sup>8</sup>Te duca<sup>n</sup> nǐ cutnùnì iní-güedé, chi diu-ni Yá Ndiöxí Yaá chǐndèe ñaha xii té Pèlú càhá<sup>n</sup>-dé tnúhu-gá núú ñáyiú isràél, diu-ni Yaá-á<sup>n</sup> chǐndèe ñaha-gá xii-í càhá<sup>n</sup>-í tnúhu-gá núú ñáyiú ñá túú cùu ñáyiú isràél.

<sup>9</sup>Te té Jàcobó, ndihi té Pèlú, ndihi té Juàá, cue tée ío cùnunu-gá ní cutnùní iní-güedé sá Yá Ndiöxí ío chindee ñaha-gá xii-í quidè-í chiù<sup>n</sup>-gá. Te ío váha ní cáhá<sup>n</sup> ndihi ñaha-güedè xii-í, ndihi té Bèé, te ní cuu i<sup>n</sup>nuu-ndí sá nchùhú quíhí<sup>n</sup>-ndí cáhá<sup>n</sup>-ndí tnúhu Yá Ndiöxí núu nchàa ñáyiú ñá túú cùu ñáyiú isràél, te mee-güedè cáhá<sup>n</sup>-güedè tnúhu-gá núú ñáyiú isràél. <sup>10</sup>Te i<sup>n</sup>-ni tnúhu ní cáhá<sup>n</sup>-güedè dóho-ndí te ní cachí-güedè xii-ndí sá chindèe-ndí cue ñáyiú ndàhú, te sa duca<sup>n</sup> tnàhí sàni iní-ndí cada-ndí.

**Té Pàblú càhá<sup>n</sup>-dé dóho té  
Pèlú ñuú Antiòquiá**

<sup>11</sup>Te cùtnàhá ní sáhá<sup>n</sup> té Pèlú ñuú Antiòquiá yàcá<sup>n</sup> ní cáhá<sup>n</sup>-í dóho-dé, chi quide-dé i<sup>n</sup> sá ñà túú tàù-dé cada-dé ní cùu. <sup>12</sup>Te quide váha-dé ní cùu chi xèxi-dé ndihi ñáyiú ñá túú cùu ñáyiú isràél, dico òrè ní sáá i<sup>n</sup> ùú ñáyiú cùndihi té Jàcobó, te òrè-á<sup>n</sup> ñà túú-gá ní cuiní-dé caxi-dé ndihi ñáyiú-á<sup>n</sup>. Te duca<sup>n</sup> ní quide-dé chi ní yùhú-dé cue ñáyiú nchìcú<sup>n</sup> nihnu quide nchaa nacuaá ní cáhá<sup>n</sup> ndí Moisés sá vǎ càhá<sup>n</sup> váha-yu cuendá-dé. <sup>13</sup>Te tnàhá dava-gá ñáyiú isràél xíndecu ichi Yá Ndiöxí ñá túú quide váha-yu, chi quidè-yu dàtná quidè tè Pèlú ní cùu, te ndéé tnàhá té Bèé ní nguíta-dé duca<sup>n</sup> quide-dé ní cùu. <sup>14</sup>Te òrè ní xiní-í sá ñà túú quide-güedè ndihí-yu nàcuáa càhá<sup>n</sup> tnúhu Yá Ndiöxí, te núú nchàa ñáyiú ndècu ichi Yá Ndiöxí ní xáha<sup>n</sup>-í xii té Pèlú: “Yòhó cúú-n tée isràél, te ñá túú quide-n nchaa nacuaá quide ñáyiú isràél, chi quide-ni-n datná

quidè nchàa ñáyiú ñá túú cùu ñáyiú isràél. Te núu duca<sup>n</sup> quide-n, ¿te ná cuendá dánèhé-n ñáyiú ñá túú cùu ñáyiú isràél sá cadǎ-yu nchaa nàcuáa quide ñáyiú isràél?” duha ní xáha<sup>n</sup>-í xii té Pèlú.

**I<sup>n</sup>-ni nàníhí tàhú-ó ndihi ñáyiú  
isràél núu na quèndáá iní-ó  
Xítóhó Jesucristú ndihí-yu**

<sup>15</sup>Te yúhú ndihi té Pèlú cúú-ndí ñaní tnàhá ñáyiú isràél, te ñá túú ndècu-ndí ichi cuèhé ichi duha dàtná ndécú nchàa ñáyiú ñá túú cùu ñáyiú isràél. <sup>16</sup>Te xiní-ó sǎ vǎ cùndècu-gá cuéchi-o núú Yá Ndiöxí te núu na quèndáá iní-ó Xítóhó Jesucristú, te ñá dǎú sǎ cǎnchícú<sup>n</sup> nihnu-o càda-o nchaa nacuaá ní cáhá<sup>n</sup> ndí Moisés. Te tnàhá dava nchùhú ñáyiú isràél sàndáá iní-ndí Xítóhó Jesucristú, te xíǎ<sup>n</sup> cùtnùní iní-ndí sǎ ñà túú-gǎ cuéchi-ndí ndécú núú-gǎ, dico ñá dǎú sǎ ní cǎnchícú<sup>n</sup> nihnu-ndí ní quide-ndí nàcuáa ní cáhá<sup>n</sup> ndí Moisés, chi cuendá sǎ sàndáá iní-ndí Xítóhó Jesucristú. Te vǎ yòo i<sup>n</sup> cachí-ó sǎ ñà túú ndècu cuéchi-xi núú Yá Ndiöxí cuendá sǎ nchìcú<sup>n</sup> nihnú-yu nchaa nàcuáa ní cáhá<sup>n</sup> ndí Moisés.

<sup>17</sup>Te núu cuiní-ó sǎ vǎ cùndècu cuéchi-o núú Yá Ndiöxí cuendá sǎ sàndáá iní-ó Xítóhó Jesucristú, te xíǎ<sup>n</sup> cùtnùní iní-ó sǎ ñà túú quide váha-o. ¡Te vǎ cúú tnàhí cani iní-ó sǎ Xítóhó Jesucristú dánèhé ñáhá-gǎ xii-o sǎ vǎ cadǎ vǎha-o cùndecu-o! <sup>18</sup>Te yúhú càchí-í sǎ vǎ cǎnchícú<sup>n</sup> nihnu-gǎ-ó nchàa nacuaá ní cáhá<sup>n</sup> ndí Moisés, dico núu vitna càchí-í sǎ xiní ñùhu-xi cada-o nchaa nacuaá ní cáhá<sup>n</sup> ndí

ña, te ñá túú quide váha-í núú Yá Ndiöxí te núu duca<sup>n</sup> na càda-í. <sup>19</sup>Te yúhu duu<sup>n</sup> duu<sup>n</sup> ní cutnùní iní-í sá vǎ ndácù-í cada-í nchaa nàcuáa ní cáhá<sup>n</sup> ndíi Moisés núu xǎ<sup>n</sup> ní dáñà-í ñá túú-gǎ nchìcù<sup>n</sup> nihnu-í nchaa nàcuáa ní cáhá<sup>n</sup> ndíi cuèndá sá cuìní-í cundecu-í sá cúú-xí Yá Ndiöxí. <sup>20</sup>Te Xítóhó Jesucristú ní xíhí-gǎ cuèndá-í, dico dàtná tnúhu sá tnàhá-í ní xíhí ndìhi-gǎ, chi ñá cúú-gǎ cada-í nchaa nàcuáa sàni iní mée-í, chi Xítóhó Jesucristú-ñá ndécú ndìhi ñaha-gǎ xii-í táxí tnùnì ñáhá-gǎ. Te vitna ndècu-í ñuyíú-a, te ío sàndáá iní-í Xítóhó Jesucristú Déhe Yá Ndiöxí, te chindee ñaha-gǎ xii-í. Te diu-ni Xítóhó Jesucristú ío cùu iní ñáhá-gǎ xii-í núu ní xíhí-gǎ núú cùrúxí sá cuèndá-í. <sup>21</sup>Te vitna ñá túú dàquee tǎhù-í sá vǎha ní quide ñaha Yá Ndiöxí xii-í, chi núu ni ndàcu-o vá cùndècu cuéchi-o núú Yá Ndiöxí cuèndá sá nchìcù<sup>n</sup> nihnu-o quide-o nchaa nacuáa ní cáhá<sup>n</sup> ndíi Moisés ní cùu ña, te àú<sup>n</sup> nǎ cuu ní xíhí Xítóhó Jesucristú ní cùu te núu duca<sup>n</sup>.

**Vá dáñá ndèé-ó quèndáá iní-ó  
tnúhu Xítóhó Jesucristú**

**3** Te nchòhó ñáyiú distrìtú Gàlaciá, ñáyiú sa xǐndecu ichi Xítóhó Jesucristú, ìná cuèndá ío ñíí iní-ndó ñá cuìní-ndó tnèi-ndo nchaa tnúhu càhá<sup>n</sup>-gǎ?, ùte yoo ní dádähu ndodo iní ñáhá xii-ndo núu duca<sup>n</sup> quide-ndo? Te nàha-ndo sá ío váha ní dánèhé ñáhá-ndí xii-ndo nàcuáa ní cuu ní xíhí Xítóhó Jesucristú. <sup>2</sup>Te vitna cáhá<sup>n</sup>-ndó núu sá nchìcù<sup>n</sup> nihnu-ndo nchàa nacuáa ní cáhá<sup>n</sup> ndíi Moisés ní níhí-ndó Espiritú

Yá Ndiöxí ndécú ndìhi-ndo, àdi sá ni sàndáá iní-ndó tnúhu Xítóhó Jesucristú sá ní dánèhé ñáhá-ndí xii-ndo ní níhí-ndó Espiritú-gǎ ndécú ndìhi-ndo. <sup>3</sup>Te nchòhó ío ñíí dǐquí-ndó chi Espiritú Yá Ndiöxí tá quide váha ñaha-xi xii-ndo cuáhá<sup>n</sup> ní cùu. ùTe náa vitna mee-ñá-ndó cuìní-ndó càda-ndo nacuáa ta quide ñaha Espiritú-gǎ cuáhá<sup>n</sup> xii-ndo ni cùu-á<sup>n</sup>? <sup>4</sup>Te sàni ìí<sup>n</sup> sàni úú iní-í cuèndá-ndó sǎ àú<sup>n</sup> nǎ cuu nándi yáha-ndo ndècu-ndo ichi Yá Ndiöxí. <sup>5</sup>Te xìní-ndó sǎ Yá Ndiöxí ní taxi-gǎ Espiritú-gǎ ní ngúndecu ndìhi-ndo, te ní quide-gǎ sá vǎ yòo tnàhí ndàcu cada núú-ndó ní xìní-ndó. Te duca<sup>n</sup> ní quide-gǎ, chi ní sàndáá iní-ndó-gǎ, dico ñá díú cuèndá nchaa nàcuáa ní cachí ndíi Moisés cada ñáyiú duca<sup>n</sup> ní quide-gǎ.

<sup>6</sup>Te ndíi Àbrahám duca<sup>n</sup> ío ní sàndáá iní ndíi Yá Ndiöxí, núu xǎ<sup>n</sup> ní cachí-gǎ sá ní cudùu ndíi núú-gǎ sá dúcá<sup>n</sup> ní quide ndíi. <sup>7</sup>Te càchí tnúhu ndáá-í xii-ndo sǎ ncháá ñáyiú sàndáá iní ñáhá xii Yá Ndiöxí dàtná ní sàndáá iní ñáhá ndíi Àbrahám xii-gǎ, ñáyiú-á<sup>n</sup> ìí<sup>n</sup>-ni cùú-yu ndìhi ndíi núú-gǎ. <sup>8</sup>Te núu tütú Yá Ndiöxí ní ngódó tnùnì tnúhu váha, tnúhu sá ní xáha<sup>n</sup> Yá Ndiöxí xii ndíi Àbrahám, te duha ní xáha<sup>n</sup>-gǎ xii ndíi: “Nchaa ñáyiú nihì ñuyíú cada váha-í-yu sá cuèndá-n”, duha ní xáha<sup>n</sup>-gǎ xii ndíi. Te sá dúcá<sup>n</sup> ní ngódó tnùnì núu tütú Yá Ndiöxí ndéé dàvá-á<sup>n</sup>, te xǎ<sup>n</sup> cùtnùnì sá sàà nduu, te cue ñáyiú ñá túú cùu ñáyiú isràél vá cùndècu-gǎ cuéchi-yu núú-gǎ te núu na quèndáá iní ñáhá-yu xii-gǎ. <sup>9</sup>Te xǎ<sup>n</sup> núu nchaa ñáyiú sàndáá iní ñáhá xii Yá Ndiöxí

cada váha ñaha-gã xií-yu dàtná ní quide váha-gá ndíi Àbrahám, chi ndíi-á<sup>n</sup> duca<sup>n</sup> ñí sándáá iní ñáhá ndíi xii-gá.

<sup>10</sup>Te nchaa ñáyiú cuíní cada nchaa ñacuáa ní cáhá<sup>n</sup> ndíi Moisés cuendá sá cuíní-yu sá vã cúndècu-gá cuéchi-yu núú Yã Ndiöxí, ñáyiú-á<sup>n</sup> daña ñihnu ñaha-gá xií-yu, chi vã ndácũ-yu cadá-yu ñacuáa sàni iní-yu, te duca<sup>n</sup> càda-gá chi quèe ndáá-xi ñacuáa càhá<sup>n</sup>-xi núú tütú-gá núú càchí-xi sá ncháá ñáyiú ñá túú quide nchaandi túhú ñacuáa ní cáhá<sup>n</sup> ndíi Moisés te daña ñihnu ñaha-gá xií-yu. <sup>11</sup>Te núú na càncicú<sup>n</sup> ñihnu-ni-o càda-o nacuáa ní cáhá<sup>n</sup> ndíi Moisés, te ñá túú vèdana chindee ñaha-xi xii-o nacuáa vã cúndècu-gá cuéchi-o núú Yã Ndiöxí. Te ndáá chi núú tütú-gá càchí-xi sá ncháá ñáyiú sándáá iní ñáhá xì-gá, ñáyiú ñá túú-gã cuéchi-xi ndècu ío váha ndècú-yu núú-gã. <sup>12</sup>Te núú dicó ío ñáyiú quide nchaandi túhú ñacuáa ní cáhá<sup>n</sup> ndíi Moisés ñá, te ñá túú xìni ñuhu-xi quindáá iní-yu tnúhu Xítohó Jesucristú, chi núú tütú Yã Ndiöxí càchí-xi sá núú dicó ío ñáyiú ndacu cada nchaa ñacuáa ní cáhá<sup>n</sup> ndíi Moisés ñá, te cundecu váha-yu núú Yã Ndiöxí.

<sup>13</sup>Te tnúhu ní chídó tnùnì ndíi Moisés càchí-xi sá ío ndècu cuéchi-o núú Yã Ndiöxí cuendá sá ñá ndácú-ó càda-o nchaa nacuáa ní cáhá<sup>n</sup> ndíi, te cuendá xíá<sup>n</sup> tá dàña ñihnu ñaha-gá xii-o cuáhá<sup>n</sup>. Dico Xítohó Jesucristú ní xido-gá nchaa cuéchi-o cuendá sá vã dáñá ñihnu ñaha-gá Yã Ndiöxí xii-o. Te càchí-xi núú tütú Yã Ndiöxí: “H<sup>n</sup>

tée na càta caa-güedé ih<sup>n</sup> yutnu, te tée-á<sup>n</sup> cúú-dé tée dàña ñihnu ñaha Yá Ndiöxí”, duha càchí-xi núú tütú-gá. <sup>14</sup>Te duca<sup>n</sup> ñí yáha Xítohó Jesucristú, chi cuíní Yã Ndiöxí sá ndùu táhú nchaa ñáyiú ñá túú cùu ñáyiú isràèl cundecu váha-yu dàtná ní nduu táhú ndíi Àbrahám ndécú váha ndíi. Te duca<sup>n</sup> ñí yáha-gá cuendá nchaa nchoo ñáyiú sándáá iní ñáhá xii-gá ngúndecu ndíhi-o Espiritú Yã Ndiöxí sá ñí cachí mée-gã taxi-gá.

#### Nàcuáa ní cachí Yã Ndiöxí cada-gá

<sup>15</sup>Te nchòhó cue ñáyiú ndècu ndíhi-í ichi Yá Ndiöxí na càchí tnúhu-í xii-ndo ñacuáa quide cue ñáyiú ñuyíú-a cuendá tecú tnùnì-gá-ndó ñacuáa quide Yá Ndiöxí. Chi ñáyiú-á<sup>n</sup> òrè cuíní-yu cadá-yu ih<sup>n</sup> sá cadã-yu, te díhna-gá ndátnúhu-yu te òrè cúú ih<sup>n</sup>nuú-yu, te sáha firmá-yu ih<sup>n</sup> tutú te tutú-á<sup>n</sup> vã yòo ih<sup>n</sup> ndacu cáhá<sup>n</sup> sá vã nándíhi-gá-xi, te ni vã yòo-gá ndacu nágá tnúhu chido tnùnì núú-xí. <sup>16</sup>Te duca<sup>n</sup> ñí quide Yá Ndiöxí ndíhi ndíi Àbrahám, chi ní xáha<sup>n</sup>-gã xii ndíi ñacuáa cada-gá, te tnúhu-á<sup>n</sup> cúú-xí cuendá mée ndíi ndíhi cuendá ih<sup>n</sup> ñaní tnáhá ndíi cundecu ñuyíú-a ndéé cuéé-gá. Te núú tütú-gá càchí-xi sá tnúhu-á<sup>n</sup> cúú-xí cuendá ih<sup>n</sup>-ni ñaní tnáhá ndíi te ñá díú cuendá ncháá-yu. Te ñaní tnáhá ndíi tée cùu cuendá tnúhu-á<sup>n</sup> cúú Xítohó Jesucristú. <sup>17</sup>Te na càchí tnúhu-í xii-ndo sã Yã Ndiöxí ní quide ndáá duu<sup>n</sup>-gá ndíhi ndíi Àbrahám ñacuáa cada-gá. Te sa ní cuu cúmí cièndú ócò úxí cuíá sã dúcá<sup>n</sup> ñí xáha<sup>n</sup> Yã Ndiöxí xii ndíi

Àbrahám, te dàtnùnì ní xáha<sup>n</sup>-gǎ xii ndíi Moisés chido tnùnì ndíi nàcuáa cada ñáyi, te nchaá tnúhu ní chídó tnùnì ndíi Moisés ñá túú dàquee tǎhú-xi tnúhu sá ñí xáha<sup>n</sup> Yǎ Ndiöxí xii ndíi Àbrahám nàcuáa cada-gá.

<sup>18</sup>Te núu dicó cuendá nchaá tnúhu sá ñí chídó tnùnì ndíi Moisés ní nánihí tàhú-ó ñá, te ñá túú-gǎ xíní ñùhu-xi cada cuendá-ó tnúhu ní xáha<sup>n</sup> Yǎ Ndiöxí xii ndíi Àbrahám cada-gá ní cùu te núu duca<sup>n</sup>. Te ndíi-á<sup>n</sup> ñí naníhí tàhú ndíi chi duca<sup>n</sup> ñí cachí Yǎ Ndiöxí cada ñaha-gǎ xii ndíi.

<sup>19</sup>Te nchaá tnúhu ní cáhá<sup>n</sup> ndíi Moisés ní ngódó núu-xí nchícú<sup>n</sup> nihnu ñáyi cuendá duca<sup>n</sup> cùtnunì iní-yu sá ndécú cuèchi-yu, te nchícú<sup>n</sup> nihnu-ní-yu ndéé ní sáá nduu ñí quexìo Yaá cúu ñàni tnáhá ndíi Àbrahám, chi Yaá-á<sup>n</sup> duca<sup>n</sup> ñí xáha<sup>n</sup> Yǎ Ndiöxí quixi-gá cada váha-gá nchaá ñáyi. Te nchaá tnúhu ní chídó tnùnì ndíi Moisés, chi Yá Ndiöxí ní tendaha-gǎ cue espíritú xínú cuèchi núu-gǎ ní sáhá<sup>n</sup>-xi ní xítnúhu ñaha-xi xii ndíi nàcuáa danèhé ndíi ñáyi. <sup>20</sup>Te Yá Ndiöxí ñá túú ní cáhá<sup>n</sup>-gá núu méé ñáyi, chi ndíi Moisés ní cáhá<sup>n</sup> ndíi yuhu-gá núu-yu, dico cùtnàhá ní cáhá<sup>n</sup> ndíi-á<sup>n</sup> ndíi Àbrahám chi núu méé núú íí<sup>n</sup> ndíi ndíi-á<sup>n</sup> ní xáha<sup>n</sup>-gǎ xii ndíi nàcuáa cada-gá.

#### Nàcuáa ndùu nchaá tnúhu ní chídó tnùnì ndíi Moisés

<sup>21</sup>Te nchaá nàcuáa ní chídó tnùnì ndíi Moisés, ndíi nchaá nàcuáa ní xáha<sup>n</sup> Yǎ Ndiöxí xii ndíi Àbrahám cada-gá, ñá túú dàquee tǎhú tnáhá-xí. Te núu dicó nánihí

tàhú ñáyi nchícú<sup>n</sup> nihnu nchaá nàcuáa ní cáhá<sup>n</sup> ndíi Moisés ñá te cudúu-yu núu-gǎ cuendá-ni sá nchícú<sup>n</sup> nihnú-yu nchaá nàcuáa ní cáhá<sup>n</sup> ndíi ni cùu. <sup>22</sup>Te núu tütú Yǎ Ndiöxí càchí-xi: “Nchaá nchòhó ñáyi ndècu ñuyíú ndécú cuèchi-ndo”, duha càchí-xi. Te duca<sup>n</sup> càhá<sup>n</sup>-xi cuendá quíndáá iní-ó Xítóhó Jesucristú, te naníhí tàhú-ó chi duca<sup>n</sup> ñí cachí Yǎ Ndiöxí cada-gá.

<sup>23</sup>Te cùtnàhá vátá cùndècu ndíi-á<sup>n</sup> gá-ó tnúhu Xítóhó Jesucristú, te nchícú<sup>n</sup> nihnu-o nchàa nacuáa ní cáhá<sup>n</sup> ndíi Moisés, te ní cùtnunì iní-ó sǎ ño ndècu cuèchi-o ni cùu. Te duca<sup>n</sup>-ni nchícú<sup>n</sup> nihnu-o ndéé ní sáá nduu ñí quexìo Xítóhó Jesucristú ñuyíú-a, te ní sándáá iní-ó-gǎ. <sup>24</sup>Te nchaá tnúhu sá ñí chídó tnùnì ndíi Moisés ní sanu ichi ñaha-xi xii-o nacuáa cada-o cùndècu-o, te duca<sup>n</sup>-ni sànu ichi ñaha-xi xii-o ndéé ní sáá nduu ní quexìo Xítóhó Jesucristú ñuyíú-a. Te duca<sup>n</sup> ñí cuu cuendá quíndáá iní-ó-gǎ, te vá cùndècu-gá cuèchi-o núú Yǎ Ndiöxí. <sup>25</sup>Te vitna ní ngúndècu ndíi-o tnúhu Xítóhó Jesucristú, te ñá túú-gǎ xíní ñùhu-xi canu ichi ñaha nchaá tnúhu ní chídó tnùnì ndíi Moisés.

<sup>26</sup>Te vitna tnàhá nchaá nchòhó cúu-ndo dèhe Yá Ndiöxí, chi ní sándáá iní-ndo Xítóhó Jesucristú. <sup>27</sup>Te nchòhó ní sandute-ndo dàtná càchí-gá, te ndècu-ndo ndíi-á<sup>n</sup> gá, te quide-ndo nchaá nacuáa ní cáhá<sup>n</sup>-gá ndécú-ndo, te ío ndècu yìñuhu-ndo núú Yǎ Ndiöxí dàtná ndécú yìñuhu mee Xítóhó Jesucristú. <sup>28</sup>Te vitna íí<sup>n</sup>-ni cùu-o nchaá-o ndècu-o

ndihi Xítohó Jesucristú cuéi cùu-o ñáyiú israél àdi ñá túú cùu-o, te cuéi cùu-o ñáyiú ñá túú tnàhí dàñá quee núú chíú<sup>n</sup> pàtróo<sup>n</sup>-xi àdi cuu-o ñáyiú dàñá queé núú chíú<sup>n</sup> pàtróo<sup>n</sup>-xi, te cuéi téé te cuéi ñadìhí ì<sup>n</sup>-ni cùu-o nchaa-o ndecu-o ndihi Xítohó Jesucristú. <sup>29</sup>Te nchòhó ndécú ndìhi-ndo Xítohó Jesucristú, te cùu-ndo datná cue ñaní tnáhá ndíi Àbrahám, chi ní nduu táhú-ndó cùndecu váha-ndo núú Yá Ndiòxí dàtná ní nduu táhú ndíi-án ndécú váha ndíi núú-gã, te duca<sup>n</sup> chi mee-gã duca<sup>n</sup> ñí cachí-gã cunduu.

**4** Te nchòhó xìní-ndó sã ì<sup>n</sup> té lìhli chi vátá ñágá cuãñaha tãtã-dě cuu cuëndá-dé chi lìhli-dé, te ì<sup>n</sup>-ni cùu-dé ndihi téé xìnu cuechi, dico na sàá nduu cuèhnu-dé, te nduu táhú-dě nchaa sá ndécú ndìhi tãtã-dě. <sup>2</sup>Te xitó-yu té lìhli-án sáhnú-dě ndéé sàá nduu ñí cachí tãtã-dě sá cuãñaha-dě sá ndúú táhú-dě. <sup>3</sup>Te duca<sup>n</sup> sãtnahá-xi cùu nchoo, chi nchìcú<sup>n</sup> nihnu-o nchàa nacuáa ní cáhá<sup>n</sup> cue téé ní xìndecu ndéé sanaha ni cùu. <sup>4</sup>Te ní sáá nduu ñí quide Yá Ndiòxí dàtná ní cachí-gã, te ní tendaha-gã Déhe-gã Xítohó Jesucristú ní quixi-gã ñuyí-a, ní dácácú ñaha ì<sup>n</sup> ñadìhí te ní cuu-gã ñáyiú, te ní quide-gã nchaa nàcuáa ní cáhá<sup>n</sup> ndíi Moisés. <sup>5</sup>Te duca<sup>n</sup> ñí tendaha Yá Ndiòxí Déhe-gã cuëndá sá vã cãnchìcú<sup>n</sup> nihnu-gã-ó nchàa nacuáa ní chídó tnùní ndíi Moisés cuëndá duca<sup>n</sup> te cuu-o dèhe Yá Ndiòxí.

<sup>6</sup>Te Yá Ndiòxí ní taxi-gã Espiritú Déhe-gã Xítohó Jesucristú ndécú ndìhi-ndo chi cùu-ndo déhe-gã,

te Espiritú-án chíndèe ñaha-xi xii-ndo te cãchí-ndó: “Yòhó Dútú Ndiòxí cùú-n Tãtã mée-ndĩ”, duha cãchí-ndó. <sup>7</sup>Te xíã<sup>n</sup> cútnùnì iní-ndó sã cùú-ndó dèhe Yá Ndiòxí vitna, te ñá túú-gã cùú-ndó dàtná cue ñáyiú ñá túú tnàhí dàñá quee núú chíú<sup>n</sup> pàtróo<sup>n</sup>-xi. Te sá dúcá<sup>n</sup> cùu-ndo déhe-gã, te Xítohó Jesucristú taxi-gã nchaa sá vãha ní cachí Yá Ndiòxí nduu táhú-ndó.

**Té Pãblú ío sàni iní-dé cuëndá nchaa ñáyiú ndècu ichi Xítohó Jesucristú**

<sup>8</sup>Te cútnàhá vátá quìndáá-gã iní-ndó tnùhu Yá Ndiòxí ní xìnu cuechi-ndo núú nchàa sá cãchí-yu cùu ndiòxí te ñá ndáá sá ndiòxí cùú-xí. <sup>9</sup>Te vitna nchòhó cãhá<sup>n</sup> ndìhi-ndo Yá Ndiòxí, te mee-gã xìnì ñáhá-gã xii-ndo, te ñá túú nduu váha-xi nanchòcáva iní-ndó cada tucu-ndo nacuáa ní xóo cada-ndo dǐhna, chi nchaa xíã<sup>n</sup> ñá túú vèdana nàndìhi-xi. <sup>10</sup>Te nchòhó cãnehe íi-ni-ndo nduu cachí-ndó íí, te diu-ni duca<sup>n</sup> quide-ndo dava yoó ndihi dava cuíá, te ndí tnahá nduu sàcáo vico diu-ni duca<sup>n</sup> quide-ndo cãnehe íi-ndó nduu-án. <sup>11</sup>Te ío sàni iní-í cuëndá-ndó, chi na cuáhá<sup>n</sup> àú<sup>n</sup> ñã cuu ní dánèhè ñáhà-í xii-ndo tnùhu Yá Ndiòxí.

<sup>12</sup>Te cãhá<sup>n</sup> ndàhú-í núú nchòhó ñáyiú ndècu ndìhi-í ichi Xítohó Jesucristú sá cádá-ndó dàtná quidè-í ñá túú nchìcú<sup>n</sup> nihnu-í nchaa tnùhu ní cáhá<sup>n</sup> ndíi Moisés, chi yúhú quidè-í vitna dàtná ní quide nchòhó ñá túú ní cãnchìcú<sup>n</sup> nihnu-ndo nàcuáa ní cáhá<sup>n</sup> ndíi. Te cútnàhá ní xìndecu ndìhi ñaha-í xii-ndo ñí quide váha ñaha-ndo

xii-í. <sup>13</sup>Te sa nàha-ndo sá cǔtnàhá ní cáhá<sup>n</sup>-í tnúhu Xítohá Jesucristú núú-ndó ndèé díhna ní cuhú-í, núu xíá<sup>n</sup> ní xíndecu ndíhi ñaha-í xii-ndo ní cáhá<sup>n</sup>-í tnúhu-gá núú-ndó. <sup>14</sup>Te cuéhé sǎ ní tnahá-í-á<sup>n</sup> cúú-xí ìí<sup>n</sup> cuéhé sǎ vǎ yǒo tnàhí cundee ìní-xi cundecu ndíhi ñaha xii-í ní cùu, dico nchòhó chi ío váha ní cáhá<sup>n</sup> ndíhi ñaha-ndo xii-í, te ñá túú ní sàni cuehé ní sàni duha iní-ndó cuendá-í, te ní cáhá<sup>n</sup> ndíhi ñaha-ndo xii-í dàtná tnúhu sá yǔhú cúú-í ìí<sup>n</sup> espíritú xínú cuèchi núú Yǎ Ndiǒxí àdi datná méé Xítohá Jesucristú. <sup>15</sup>¿Te ná ní tnahá-ndo nǔu ñá túú-gǎ sání vǎha iní-ndó cuendá-í dàtná ní xóo cada-ndo ndèé díhna ío váha ní xóo caní iní-ndó cuendá-í? Te na càchí tnúhu ndáá-í xii-ndo sǎ ìo ní cuu iní ñáhá-ndó xii-í cǔtnàhá ní xíndecu ndíhi ñaha-í xii-ndo, te nándí sá ndécú ndíhi-ndo taxi-ndo xii-í ní cùu, te núu dìcò sá cúú te ndéé tinùu-ndo tava-ndo te taxi-ndo xii-í ní cùu. <sup>16</sup>¿Te náa cùu úhú iní ñáhá-ndó xii-í vitna cuendá sá càhá<sup>n</sup>-í tnúhu ndáá tnúhu Yá Ndiǒxí núú-ndó-ǎ<sup>n</sup>?

<sup>17</sup>Te ìo ñáyiú ío váha càhá<sup>n</sup> ndíhi ñaha xii-ndo, dico ñáyiú-á<sup>n</sup> ñúhú cuéhé iní-yu, chi cuíní-yu sá vǎ cúú-gǎ cáhá<sup>n</sup> ndíhi tnàha-o, chi mee-ñǎ-yu cundecu ndíhi-ndo cuíní-yu. <sup>18</sup>Te váha quide ñáyiú càhá<sup>n</sup> ndíhi ñaha xii-ndo ndíhi tnúhu yiñùhu, te núu cuíní-yu cadá-yu ìí<sup>n</sup> sá vǎha sá cúú-xí-ndó. Te duca<sup>n</sup>-ni na càdá-yu cuèi òrè ñá túú ndècu ndíhi ñaha-í xii-ndo. <sup>19</sup>Te nchòhó ñáyiú ní sanu ichi-í ichi Xítohá Jesucristú càchí tnúhu-í

xii-ndo sǎ quidé-xí iní-í dàtná quidé-xí iní ìí<sup>n</sup> ñadìhí ñaha sa ní tnahá òrè cacu déhe-xi, te duca<sup>n</sup> quide-xi iní-í, chi ío vǎi sani iní-í cuendá-ndó dàtná ní xóo cada-í ndéé díhna, te duca<sup>n</sup>-ni càda-í ndéé ná sàá nduu càda-ndo nchaa nacuaá càhá<sup>n</sup> Xítohá Jesucristú. <sup>20</sup>Te ío váha cada-xi te núu dìcò tnavíi sa ndècu ndíhi ñaha-í xii-ndo cuendá cáhá<sup>n</sup>-í núú-ndó nàcuáa cada-ndo, te ñá cǔtnùnì iní-í nása cada-í cuendá-ndó!

### Cuendá ndíi Àgár ndíhi ndíi Sǎrá

<sup>21</sup>Te nchòhó ñáyiú cuíní canchicú<sup>n</sup> nihnu nchaa tnúhu ní cáhá<sup>n</sup> ndíi Moisés, ìnáa ñá túú tècú tnùnì-ndó nàcuáa càhá<sup>n</sup>-xi tnúhu ní chídó tnùnì ndíi? <sup>22</sup>Chi càchí tnúhu ní chídó tnùnì ndíi-á<sup>n</sup> sǎ ndíi Àbrahám ní xíndecu úú déhe ducu<sup>n</sup> ndíi, te ìí<sup>n</sup>-dé ní cuu déhe ndíi ndíhi ñadìhí méé ndíi ndíi Sǎrá, te ingá-dé ní cuu-dé déhe ndíi ndíhi ìí<sup>n</sup> ndíi ní xinu cuechi nǔǔ-yu ní xínani Àgár. <sup>23</sup>Te sá dúcá<sup>n</sup> ní cacu déhe ndíi Sǎrá, chi mee Yǎ Ndiǒxí ní cundàhú iní ñáhá-gǎ xii-a<sup>n</sup>, chi duca<sup>n</sup> ní cachí-gǎ cada-gǎ. Dico ndíi ní xinu cuechi-ǎ<sup>n</sup> chi duca<sup>n</sup> tnàhí ní nduu táhú ndíi-á<sup>n</sup> sǎ cóo dèhe ndíi. <sup>24</sup>Te na càchí tnúhu-í xii-ndo ñǎ cúú sǎ nánèhé ndi ndúú cue ndíi òhí-á<sup>n</sup>. Te úú xito ní cáhá<sup>n</sup> Yǎ Ndiǒxí nàcuáa cada-gǎ, te ìí<sup>n</sup> ndíi-á<sup>n</sup> nánèhé ndíi nàcuáa ní cáhá<sup>n</sup> Yǎ Ndiǒxí xito díhna nuu, te ingá tucu ndíi-á<sup>n</sup> nánèhé ndíi nàcuáa ní cáhá<sup>n</sup> tucu-gǎ xito cùu uú. Te ndíi Àgár-á<sup>n</sup> nánèhé ndíi nàcuáa ní xáha<sup>n</sup> Yǎ Ndiǒxí xii ndíi Moisés yucu Sináí cada ñáyiú, te nchaa ñáyiú nchicú<sup>n</sup>

nihnu nchaa tnúhu-á<sup>n</sup> cúu-yu dàtná déhe ndíi Àgár téé ní xinu cuechi, chi téé-á<sup>n</sup> ñà túú tnàhí ní dàñá-dé quee-dé núú chíú<sup>n</sup> pàtróó<sup>n</sup>-dè, te duca<sup>n</sup> sàtnahá-xi cúu-yu chi nchìcú<sup>n</sup> nihnú-yu nchaa nàcuáa ní xáha<sup>n</sup> Yá Ndiöxí xii ndíi Moisés. <sup>25</sup>Te tnúhu Àgár quée-xi: Yucu Sinàí, te yucu-á<sup>n</sup> yíndèhu-xi nació<sup>n</sup> Àrabiá. Te ndíi Àgár-á<sup>n</sup> nánèhé tucu ndíi cue ñáyiú ndècu ñuu Jerusàlén, chi ñáyiú-á<sup>n</sup> ndécú-ní-yu dàtná ní xíndecu ndíi Àgár ndíhi déhe ndíi, chi cue ndíi-á<sup>n</sup> ní cuu cue ndíi ñáyiú ñá túú tnàhí ní dàñá quee núú chíú<sup>n</sup> pàtróó<sup>n</sup>-xi, te duca<sup>n</sup> sàtnahá-xi cùu ñáyiú-á<sup>n</sup> chi nchìcú<sup>n</sup> nihnu-ní-yu nchaa nàcuáa ní cáhá<sup>n</sup> ndíi Moisés. <sup>26</sup>Dico nchoo ní nduu táhú-ó cùndecu-o ñuu Jerusàlén sáá núú ndécú Yá Ndiöxí, te vitna chi ñá túú-gã nchìcú<sup>n</sup> nihnu-o nchàa nacúáa ní cáhá<sup>n</sup> ndíi Moisés. <sup>27</sup>Te duha càhá<sup>n</sup>-í, chi núú tütú Yá Ndiöxí càchí-xi:

Yòhó ñaha ní nduu táhú vã cóó dèhe-xi ni cùu, vitna cana saa-n sã cúdĩí ìní-n cuèi vátá quíní-gá-n nãsa càcu ìí<sup>n</sup> landú. Te cuèi ní cuu táhú-n sã vã cóó dèhe-n ni cùu dico ío-gá titní déhe-n còo dacúúxí xíchí ní cuu táhú tnàhí sá cóó dèhe-xi.

Duha càchí-xi núú tütú-gã. <sup>28</sup>Te nchoo cuè ñáyiú ndècu ichi Xítohó Jesucristú vitna cùu-o datná ndíi Isàác, chi ndíi-á<sup>n</sup> ní cacu ndíi, chi mee Yá Ndiöxí ní cachí-gã sá cacú ndíi. Te duca<sup>n</sup> sàtnahá-xi cùu nchoo chi ní nduu-o dèhe-gã vitna chi duca<sup>n</sup> ní cachí tucu-gã cunduu. <sup>29</sup>Te déhe ndíi Àgár ní nduu táhú tnàhí ndíi sá cacú ndíi ñuyúú-a, te ndíi-á<sup>n</sup> ní cuu úhú iní ndíi ndíi

Isàác, te ndíi Isàác-á<sup>n</sup> chi Espiritú Yá Ndiöxí ní quide ní cacu ndíi. Te duca<sup>n</sup> sàtnahá-xi cùu vitna, chi nchaa nchoo ñáyiú ndècu ndíhi Espiritú Yá Ndiöxí cúú úhú iní ñáhá ñáyiú xii-o. <sup>30</sup>Te núú tütú Yá Ndiöxí càchí-xi: “Chí nàcuíú<sup>n</sup> xíchí xínú cuèchi ndíhi déhe-xi na nùhú-yu, chi déhe xíchí xínú cuèchi-á<sup>n</sup> ñà túú nã níhí-dè nduu táhú-dè, chi mee-ni déhe ñaha ndècu vehe-xi nduu táhú-dè sá cuñaha tãtã-dè”, duha càchí-xi núú tütú-gã. <sup>31</sup>Te nchoo cuè ñáyiú ndècu ichi Xítohó Jesucristú ñá túú-gã cúú-ó dàtná cúú dèhe ndíi ní xinu cuechi-á<sup>n</sup>, chi ní cuu-o vitna datná cúú ndíi ní nduu táhú nchaa sá ní sãñaha tãtã-xi-á<sup>n</sup>. Te duca<sup>n</sup> ní cuu, chi Yá Ndiöxí ní dácäcu ñaha-gã xii-o cuendá sá vã cãchìcú<sup>n</sup> nihnu-gã-ó nchàa nacúáa ní cáhá<sup>n</sup> ndíi Moisés.

#### Canchicú<sup>n</sup> nihnu-ni-o ichi Xítohó Jesucristú

**5** Te Xítohó Jesucristú ní quide-gã nàcuáa vã cání ìní-ó sã nánihí tàhú-ó te núu na cãchìcú<sup>n</sup> nihnu-o nàcuáa ní cáhá<sup>n</sup> ndíi Moisés, te ñuu-ni duca<sup>n</sup> càni ìní-ó cùndecu-o te vã ngõo càni ìní-ó sã nánihí tàhú-ó te núu na cãchìcú<sup>n</sup> nihnu-o càda-o nacúáa ní cáhá<sup>n</sup> ndíi, chi núu duca<sup>n</sup> na càda-o te ío dandòho-o mee-o datná ní xóo ndoho-o cùtnàhá vátá cùndècu-gã-ó ichi-a.

<sup>2</sup>Te yúhú té Pãblú cuíní-í sá cùndedòho-ndo ìí<sup>n</sup> tnúhu na càhá<sup>n</sup>-í-a. Te núu nchòhò cuáha-ndo sèñá ñii-ndo cuendá sá sàndáá ìní-ndó nàcuáa ní cachí ndíi Moisés cada-ndo, te núu duca<sup>n</sup> na càda-ndo



ña, te àú<sup>n</sup> nã cuu ndècu-ndo ichi Xítohó Jesucristú te núu duca<sup>n</sup>. <sup>3</sup>Te dàtná ní cachí-í xii-ndo, te diu-ni duca<sup>n</sup> càhá<sup>n</sup> tucu-í vitna sá nõu ndèda-ni càa ìi<sup>n</sup> tée na cuãha-dé sèñá ñii-dé, te xini ñuhu-xi sá dàcuítí tãú-dé cada-dé nchaa nacuaá ní cáhá<sup>n</sup> ndíi Moisés. <sup>4</sup>Te nchaa nchòhó ñáyiu sàni iní sá ñà túú-gã cuéchi-xi ndècu núú Yã Ndiõxí cuèndá sá nchìcú<sup>n</sup> nihnu-ndo nchàa nacuaá ní cáhá<sup>n</sup> ndíi Moisés, ñà túú-gã ndécú-ndó ndìhi Xítohó Jesucristú, te ni Yã Ndiõxí ñà túú-gã cùndàhú iní ñáhá-gã xii-ndo càda váha ñaha-gã. <sup>5</sup>Dico nchaa nchoo ñáyiu sàndáá iní ñáhá xii-gá cùdiu-o núú-gã, chi chindee ñaha Espiritú-gá xii-o, te ndètu cahnu-ná-ó sàá nduu cũñaha nõú Yã Ndiõxí xii-o sã cùdũ-o núú-gã. <sup>6</sup>Te nchoo cuè ñáyiu ndècu ndìhi Xítohó Jesucristú ìi<sup>n</sup>-ni quide-xi cuèi na cuãha-o sèñá ñii-o àdi vá cuãha-o, chi ñà túú chindee ñaha-xi xii-o nacuaá cundecu váha-o ndìhi-gá. Te ìi<sup>n</sup>-dii díf-ni sá xíní ñuhu-xi quindáá iní-ó Xítohó Jesucristú, te núu duca<sup>n</sup> na càda-o te cuu iní-ó cuè tnaha ñáyiu-o.

<sup>7</sup>Te nchòhó ío váha quide-ndo ndecu-ndo ichi Yã Ndiõxí ní cùu, te vitna cùñúhu-í sá ñà túú-gã sàndáá váha iní-ndó tnũhu-gá, te duca<sup>n</sup> quide-ndo chi ndècu ñáyiu sànu ichi ñaha xii-ndo ingá ichi. <sup>8</sup>Te ñà díú Yã Ndiõxí Yá ní cáhá<sup>n</sup> ñáhá xii-ndo duca<sup>n</sup> ni cachí-gá cada-ndo sã vã quindáá-gá iní-ndó tnũhu-gá. <sup>9</sup>Te nchòhó xíní-ndó sã nõu luha levadurá ná quĩhu yuchi te dandaa-xi. Duca<sup>n</sup> sãtnahá-xi cùu ñáyiu dandahú

ñáhá xii-ndo, chi cuíní-yu dàcuíta nihnu ñáhá-yu xii-ndo nchàa-ndo. <sup>10</sup>Te yúhú cùtnùní ndáá iní-í sá Xítohó Jesucristú chindee ñaha-gá xii-ndo cuèndá sá ñã túú nãgá tnúhu quindáá iní-ndó, dico nchaa ñáyiu duca<sup>n</sup> dandahú ñáhá xii-ndo nacháhu-yu núú Yã Ndiõxí nchaa sá quidè-yu cuèi náí-gá ñáyiu cùú-yu.

<sup>11</sup>Te càchí tnúhu-í xii nchòhó ñáyiu ndècu ndìhi-í ichi Yã Ndiõxí sá nõu dicó dānehé-ni-í ñáyiu sá cuãha-yu sèñá ñii-yu dàtná ní cachí ndíi Moisés ñã, te vá yõo cuu úhú iní ñáhá xii-í ní cùu, te ni vã tũu úhú iní-yu cuèndá sá ñĩ xíhí Xítohó Jesucristú núú cùrúxí ní cùu. <sup>12</sup>Te nchaa ñáyiu dàsatú iní ñáhá xii-ndo sã cuãha-ndo sèñá ñii-ndo, te váha-gá sá ná càdã-yu mée-yu ìi<sup>n</sup> tnúndòho, te ñà díú sã dúcá<sup>n</sup> cànuichi ñahá-yu xii-ndo cùndecu-ndo.

<sup>13</sup>Te nchòhó ñáyiu ndècu ndìhi-í ichi Xítohó Jesucristú diu-gá ní taunihnu ñaha-gã xii-ndo cuèndá sá vã cānchìcú<sup>n</sup> nihnu-gá-ndó nchàa nacuaá ní cáhá<sup>n</sup> ndíi Moisés, dico vá cāní iní-ndó sã sã dúcá<sup>n</sup> ñĩ taunihnu ñaha-gã xii-ndo, te cuu-ni cada-ndo nāndi sá cuèhé sá dúhá vèxi iní-ndó, dico cuu iní tnáhá-ndó ìi<sup>n</sup> ìi<sup>n</sup>-ndo te chindee tnàha-ndo. <sup>14</sup>Chi duca<sup>n</sup> càhá<sup>n</sup> Yã Ndiõxí sá cúú iní-ó cuè tnaha ñáyiu dàtná cúú iní-ó mée-o. Te núu duca<sup>n</sup> na càda-o, te quide-o nchaa nacuaá tàú-xi cada-o dàtná càhá<sup>n</sup> nchaa tnúhu ní chídó tnùní ndíi Moisés. <sup>15</sup>Te núu nchòhó cúú úhú iní tnáhá-ndó ndècu-ndo, te ñà túú quide váha-ndo te núu duca<sup>n</sup> quide-ndo, dico yúhú càchí-í sã vã dúcá<sup>n</sup>-gã

cada-ndo cùndecu-ndo cuendá sá vǎ dǎcuíta nihnu tnàha-ndo.

**Nàcuáa sàni iní ñáyiú ndècu  
ichi cuehé ichi duha ndìhi  
nàcuáa sàni iní ñáyiú ndècu  
ndìhi Espíritú Yǎ Ndiòxí**

<sup>16</sup>Te na cǎchí tnúhu-í xii-ndo sǎ cǎdá-ndó nchàa nacuáa cuìní mée Espíritú Yǎ Ndiòxí cada-ndo, te duca<sup>n</sup> te vǎ cǎní-gǎ iní-ndó cǎda-ndo nándi nchaa sǎ cuehé sǎ dúhá sàni iní mée-ndó. <sup>17</sup>Chi nchaa xǎ<sup>n</sup> ñǎ túú tnàhá tnúhu-xi ndìhi Espíritú Yǎ Ndiòxí. Te ðiu-ni duca<sup>n</sup> quide Espíritú Yǎ Ndiòxí, chi ñǎ túú tnàhá iní-xi nchaa sǎ cuehé sǎ dúhá sàni iní-ndó. Te sǎ dúcǎ<sup>n</sup> ñǎ túú tnàhá tnúhu tnàha-xi xǎ<sup>n</sup> ñǎ túú ñihí ndéé-ndó cǎda-ndo ì<sup>n</sup> sǎ vǎha sàni iní-ndó cǎda-ndo. <sup>18</sup>Te núu quide-ndo nchaa nacuáa sànu ichi ñaha Espíritú Yǎ Ndiòxí, te ñǎ túú-gǎ táxí tnùnǐ ñáhǎ nchàa tnúhu ní chídó tnùnǐ ndíi Moisés xii-ndo.

<sup>19</sup>Te nchaa ñáyiú xìnǐ-yu nchaa nàcuáa quide ñáyiú quide cuehé quidé ðuha. Te ðuha quidé-yu: Cue téé cǎhá<sup>n</sup> ndìhi-güedé ñáyiú ðìhǐ te ñǎ díú ñàðihǐ-güedé cúú-yu, te ðiu-ni duca<sup>n</sup> xǐquide cue ñáyiú ðìhǐ, te nándi-gǎ nchaa sǎ cuehé sǎ dúhá cuǎhá<sup>n</sup> véxi-yu quidé-yu. <sup>20</sup>Te quide cahnú-yu nchaa sǎ cǎchǐ-yu cùu ndiòxí te ñǎ ndàá sǎ ndiòxí cúú-xí, te quide nduu tnahá-yu, te cùu úhú iní tnáhǎ-yu, te nàa-yu, te cùu cuiñú tnáhǎ-yu, te ío yáchǐ cúdǎ<sup>n</sup>-yu, te ndùcú-yu mee-ni sǎ cúú-xí mèé-yu, te ñǎ túú cùu ì<sup>n</sup>nuú-yu cundecú-yu, te quide ðii<sup>n</sup> tnahá-yu. <sup>21</sup>Te cùu cuedú ñí-yu nchaa sǎ ndécú ndìhi dava-gǎ-yu, te

sàhni tnahá-yu, te ío quihú-yu, te ndì cuu ndi cuú-yu quidé-yu nchaa sǎ cuehé sǎ dúhá, te nándi-gǎ nchaa sǎ cuehé sǎ dúhá quidé-yu. Te sa cǎchǐ tnúhu-í xii-ndo sǎ ncháá ñáyiú duca<sup>n</sup> xǐquide vǎ ndúú tǎhú-yu cundecú-yu núu ndécú Yǎ Ndiòxí táxí tnùnǐ-gǎ.

<sup>22</sup>Dico Espíritú Yǎ Ndiòxí chǐndèè ñaha-xi xii-o cuu iní tnáhǎ-ó, te cùðí iní-ó ndècu-o, te ío váha cùu iní-ó, te cǎhnu iní-ó, te váha iní-ó, te cùndahú iní tnáhǎ-ó, te quide ndáá-ó ndècu-o. <sup>23</sup>Te ndàhú iní-ó, te quide-o nchaa nacuáa tàú-ó cǎda-o, te nchaa xǎ<sup>n</sup> chǐndèè ñaha Espíritú Yǎ Ndiòxí quidé-ó, te núu duca<sup>n</sup> quide-o, te vǎ yǒo ì<sup>n</sup>-gǎ cǎhá<sup>n</sup> sǎ ñǎ túú quide váha-o ndècu-o.

<sup>24</sup>Te nchoo cuè ñáyiú ndècu ndìhi Xítóhó Jesucristú, sa nàha-o sǎ ní xǐhǐ-gǎ núu cùrúxǐ sǎ cuendá-ó, núu xǎ<sup>n</sup> duu<sup>n</sup> duu<sup>n</sup> ní ðǎná-ó nchàa ichi cuehé ichi duha, te ñǎ túú-gǎ táxí tnùnǐ ñáhǎ ní ì<sup>n</sup> sǎ cuehé sǎ dúhá sǎ ní xóo cani iní-ó ní cùu. <sup>25</sup>Te vitna ní ngúndecu ndìhi-o Espíritú Yǎ Ndiòxí chǐndèè ñaha-xi, te xìnǐ ñuhu-xi sǎ cǎdá-ó nàcuáa sànu ichi ñaha Espíritú-gǎ cada-o.

<sup>26</sup>Te vǎ cǎdá cǎhnu-o mee-o, te vǎ ndúcú-ó plètú, te ni vǎ cúú cuedú iní-ó sǎ ndécú ndìhi tnaha ñáyiú-o.

**Chindee tnàha-o ì<sup>n</sup> ì<sup>n</sup>-o**

**6** Te nchòhó ñáyiú ndècu ndìhi-í ichi Xítóhó Jesucristú cǎchǐ tnúhu-í xii-ndo sǎ ñuu ì<sup>n</sup> ñáyiú ndècu ndìhi-ndo ichi-gǎ ní quidé-yu ì<sup>n</sup> sǎ ñǎ túú tàú-yu cadá-yu núú-gǎ, te nchòhó ñáyiú quide váha ndècu ndìhi Espíritú Yǎ Ndiòxí cǎhá<sup>n</sup>-ndó ðòho cue ñáyiú duca<sup>n</sup> xǐquide-á<sup>n</sup>

cuendá nucúnu ichí-yu, te vii vii cáhá<sup>n</sup> ndihi-ndö-yu, te ío coto-ndo mèe-ndo cuendá sá vǎ cádá-ndó ìí<sup>n</sup> sá ñà túú tàú-ndó càda-ndo núú-gǎ. <sup>2</sup>Te ío chindee tnàha-ndo, te cuáha tnàha-ndo tnúhu ndee ìní cundecu-ndo cuendá nchaa sá yǎha-ndo. Te núu duca<sup>n</sup> na càda-ndo, te quide-ndo nchaa nacuáa ní cáhá<sup>n</sup> Xítohó Jesucristú cada-o.

<sup>3</sup>Te núu ìó ìí<sup>n</sup>-ndo càchí-ndó sǎ ìo váha quide-ndo ndecu-ndo ichi Yá Ndiöxí te ñá ndàá ñá, te dicó dándàhú-ndó mèe-ndo sá dúcá<sup>n</sup> quide-ndo. <sup>4</sup>Te ndi díí<sup>n</sup> ndi díí<sup>n</sup> càda cuendá-ndó nǔu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíí ìní-ndó sǎ cúu-xí mèe-ndo, te vá cání ìní-ndó sǎ quidé vǎha-gá-ndó dàcuúxí dàva-gá-yu. <sup>5</sup>Chi tàú-ó sǎ ndi díí<sup>n</sup> ndi díí<sup>n</sup> càda cuendá-ó nàcuáa ndècu-o.

<sup>6</sup>Te nchaa nchòhó ñáyiú dàcuaha tnúhu Yá Ndiöxí chindee-ndo cuè téè dàcuaha ñaha xii-ndo tnúhu-gá cuañaha-ndo nǎndi sá xíní ñuhu-güedé.

<sup>7</sup>Te vá dándàhú-ndó mèe-ndo cundecu-ndo, chi vá cúu cùdiquí ndeé-ó Yǎ Ndiöxí, chi nchòhó xíní-ndó sǎ nǔu na càda váha-o cundecu-o, te cùu-xi ìí<sup>n</sup> sá vǎha sá cúu-xí-ó, dico núu vá cádá váha-o ña, te ío ndoho-o te núu duca<sup>n</sup> na càda-o. <sup>8</sup>Te núu quide-o nchaa sá cuèhé sá dúhá sàni iní-ó, te diu-ni xíǎ<sup>n</sup> dàcuíta nihnu ñaha-xi xii-o, dico núu quide-o nchaa nacuáa sànu ichi ñaha Espíritú Yǎ Ndiöxí xii-o, te cundecu ndihi-o Yǎ Ndiöxí ní caa ní quíhí<sup>n</sup>. <sup>9</sup>Te xíní ñuhu-xi vá

dáñá ndèé-ó càda váha-o cundecu-o, te duca<sup>n</sup> te sáá nduu càda váha ñaha Yǎ Ndiöxí xii-o, te núu vá ná tǔhú iní-ó càda váha-o cundecu-o. <sup>10</sup>Te cada-o sǎ vǎha sá cúu-xí nchàa tnaha ñáyiú-o vitna ndecu-o ñuyíú-a, te ío-gá tàú-ó chindee-o cue ñáyiú ndècu ndihi-o ichi Xítohó Jesucristú.

#### Tnúhu ndeé núu ní ndihi-ná

<sup>11</sup>Te cundehe-ndo sǎ ndǎa ndǎa lètrá téè-í núu tǔtú-a sá cúu-xí-ndó. <sup>12</sup>Te nchaa ñáyiú quide yicá sá cuǎha-ndo sèñá ñii-ndo dàtná ní cachí ndíi Moisés, ñáyiú-á<sup>n</sup> cúu-yu ñáyiú cuíní cudíu núu tnàha ñáyiú-xi. Te duca<sup>n</sup> quidé-yu cuendá sá vǎ ndóhó-yu cuendá nchaa tnúhu sá dánèhé ñáhá sǎ ní xíhí Xítohó Jesucristú núu cùrúxí. <sup>13</sup>Te ni ñáyiú sa ní ngúndecu ndihi sèñá ñii-xi ñá túú quidé-yu nchaa nàcuáa ní cáhá<sup>n</sup> ndíi Moisés, dico mèe-yu cuíní-yu sá cuǎha-ndo sèñá ñii-ndo. Te duca<sup>n</sup> quidé-yu chi quide cahnú-yu mèe-yu núu nchàa dava-gá ñáyiú. <sup>14</sup>Te yúhú chi ñá túú quide cahnu-í mèe-í cuendá nchaa sá quidè-í, chi mee-ni sǎ ìo cùu váha iní-í sá Xítohó Jesucristú ní xíhí-gá núu cùrúxí cuendá-ó. Te diu cuendá sá ní xíhí-gá ñá túú-gǎ ndécù-í ichi cuèhé ichi duha, te ni ñà túú-gǎ táxi tnúní ñáhá ní ìí<sup>n</sup> sá cuèhé sá dúhá xii-í. <sup>15</sup>Te ñá túú nǎ chindèe ñaha-xi xii-o cuéi na cuǎha-o sèñá ñii-o àdi vá cuǎha-o, chi ndècu ndihi-o Xítohó Jesucristú, te ní nduu-o dàtná ìí<sup>n</sup> ñáyiú saa, te xíǎ<sup>n</sup> cúu-xí sǎ ìo-gá xíní ñuhu-xi. <sup>16</sup>Te xìcá<sup>n</sup> táhù-í núu Yǎ Ndiöxí sá ncháá nchòhó ñáyiú quide nchaa nacuáa

càhá<sup>n</sup>-í-a cundecu nahi-ndo, nchòhó ñáyiú cùu cuendá Yă Ndiöxí dàtná ñáyiú isràél chi ñáyiú-á<sup>n</sup> ñĩ cachí-gá sá cúú cuendá-gá. Te mee-gă ío cundàhú iní ñáhá-gă xii-ndo chindee ñaha-gá.

<sup>17</sup>Te není vitna cuìní-í sá vă yôo ìì<sup>n</sup>-gá chidácá nihnu ñaha xìi-í cuendá chùu<sup>n</sup> quide-í, chi

yayàcá<sup>n</sup> sa ní nduu tílòhó ñii-í cuendá sá ndóhò-í cuendá Xítóhó Jesucrìstú.

<sup>18</sup>Te nchòhó ñáyiú ndècu ndihi-í ichi Xítóhó Jesucrìstú xìcá<sup>n</sup> táhù-í núú-gă sá ïo na chindee ñaha-gá xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nă vitna.

# TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑUÚ ÉFESÚ

Té Páblú cádúha-dé tutú quíhí<sup>n</sup>  
ndaha ñáyiú xĩndecu ichi Xítóhó  
Jesucristú ndécú ñuú Éfesú

**1** Yúhú té Páblú ní tendaha ñaha  
Yá Ndiöxí càhá<sup>n</sup>-í tnúhu Xítóhó  
Jesucristú núú ñáyiú, chi duca<sup>n</sup> ñí  
cachí Yá Ndiöxí cunduu, te vitna  
cádúha-í tutú-a cuendá daquixi-í  
ndaha nchaa nchòhó ñáyiú cùu  
cuendá Yá Ndiöxí xĩndecu ñuú  
Éfesú, te ñuú-ni nchòhó cúú-ndó  
ñáyiú sàndáá iní ñáhá xì Xítóhó  
Jesucristú.

<sup>2</sup>Te xicá<sup>n</sup> táhù-í núú Dütú Ndiöxí  
Yaá cúú Tátá-ó, ndìhi núú Xítóhó  
Jesucristú sá ná chĩndee chitúu  
ñaha-gã xii-ndo, te duca<sup>n</sup> ndì  
nduú-gá ná cádá te ío váha cuu  
iní-ndó cùndecu-ndo.

Espíritú Yá Ndiöxí chĩndèe  
ñaha-xi xii-o chi ndècu  
ndìhi-o Xítóhó Jesucristú

<sup>3</sup>Te cachí-ó sã ño càhnu cuu  
Yá Ndiöxí Yaá cúú Tátá Xítóhó  
Jesucristú, te ndéé andiu quide Yá  
Ndiöxí nchaa sá vãha sá cúú-xí-ó  
cuendá sá ndécú ndìhi-o Espíritú-gá,  
te duca<sup>n</sup> quide-gá chi ndècu ndìhi-o  
Xítóhó Jesucristú. <sup>4</sup>Te ndéé cùtnàhá

vátá ngãva-gá ñuyíú ñí cachí Yá  
Ndiöxí sá nchóó cùu-o ñáyiú cùu  
cuendá-gá, te duca<sup>n</sup> ñí cachí-gá sá  
cuendá Xítóhó Jesucristú cuendá sá  
nchóó cùu-o ñáyiú ñá túú tnàhí ná  
cumání cundecu núú-gã, te duca<sup>n</sup>  
te vá cùndècu cuéchi-o. <sup>5</sup>Te Yá  
Ndiöxí ío cùu iní ñáhá-gã xii-o ñuú  
xíã<sup>n</sup> duca<sup>n</sup> ñí cachí-gá ndéé cùtnàhá  
vátá ngãva-gá ñuyíú sã nchóó  
nduú-o déhe-gá. Te sá cuendá  
nchaa sá cádá Xítóhó Jesucristú  
sá cúú-xí-ó, xíã<sup>n</sup> duca<sup>n</sup> ñí cachí Yá  
Ndiöxí, te duca<sup>n</sup> ñí cachí-gá chi  
duca<sup>n</sup> tnàhí ní sani iní-gá cunduu.  
<sup>6</sup>Te xíã<sup>n</sup> ñuú xini ñuhu-xi sá  
nchóó càchí-ó sã ño càhnu cuu Yá  
Ndiöxí, chi ío cùndahú iní ñáhá-gã  
chĩndèe ñaha-gã xii-o. Te duca<sup>n</sup>  
quide-gá chi ndècu ndìhi-o Xítóhó  
Jesucristú Yaá ío cùu iní-gá. <sup>7</sup>Te  
Yá Ndiöxí ío cùu iní ñáhá-gã xii-o  
ñuú xíã<sup>n</sup> Xítóhó Jesucristú ní sati  
níñí-gã te ní xíhí-gá cuendá dacäcu  
nihnu ñaha-gã xii-o ñuú ùhú núú  
ndàhú, te duca<sup>n</sup> càda cahnu iní-gá  
nchaa yícá cuéchi-o. <sup>8</sup>Te Yá Ndiöxí  
ío cùndahú iní ñáhá-gã chĩndèe  
ñaha-gã xii-o, nàcuáa ngúndecu  
ndìhi-o nchaa sá xini tnùn-ó te  
duca<sup>n</sup> te cuu-o ñáyiú tècú tnùn-í.

<sup>9</sup>Te Yá Ndiöxí ní dánèhé ñáhá-gă xii-o nchàa sá ndúú yùhu, nchaa sá nǐ sani iní-gá cada-gá. Te duca<sup>n</sup> nǐ quide-gá chi duca<sup>n</sup> nǐ sani iní-gá cunduu. <sup>10</sup>Te sá nǐ sani iní-gá cada-gá te dacuítí sǎ cádá-gă ná sàá nduu, te na sàá nduu-á<sup>n</sup> te mee-gă cada sá Xítóhó Jesucristú quindaha-gă nchaa sá ìo andiu, ndíhi nchaa sá ìo ñuyú-a.

<sup>11</sup>Te nchoo nǐ nduu táhú-ó nǐ nduu-o ñáyiú cùu cuendá Yă Ndiöxí chi ndècu ndíhi-o Xítóhó Jesucristú. Te duca<sup>n</sup> nǐ cuu chi duca<sup>n</sup> tnàhí ní sani iní Yă Ndiöxí cunduu. Te nchaandi túhú sá quidé-gă, quide-gá nàcuáa sàni iní méé-gă cunduu. <sup>12</sup>Te duca<sup>n</sup> nǐ cuu cuendá sá nchǔhú ñáyiú díhna nuu nǐ sándáá iní tnúhu Xítóhó Jesucristú cáhá<sup>n</sup>-ndí sá ìo càhnu cuu mee Yă Ndiöxí cuendá nchaa sá vǎha quide-gá. <sup>13</sup>Te nchòhó tucu cǔtnàhá ní xíndedóho-ndo tnúhu ndáá tnúhu sá cáhá<sup>n</sup> nàcuáa naníhí tàhú-ó ní cuu ìi<sup>n</sup>nuu-ndo ndíhi Xítóhó Jesucristú chi ní sándáá iní-ndó-gă. Te xǎ<sup>n</sup> cǔtnúní sá nchòhó ní nduu-ndo ñáyiú cùu cuendá Yă Ndiöxí, chi ní ngúndecu ndíhi-ndo Espíritú-gá sá nǐ cachí-gá taxi-gá. <sup>14</sup>Te sá ndécú ndíhi-o Espíritú Yă Ndiöxí xǎ<sup>n</sup> cǔtnúní sá ndáá nduu táhú-ó cùndecu-o ndíhi-gá ná sàá nduu nàcuaca ñaha-gá xii nchaa nchoo ñáyiú cùu cuendá-gá, te sá dúcá<sup>n</sup> càda-gá nǔu xǎ<sup>n</sup> táú-ó cǎchí-ó sǎ ìo càhnu cuu-gá.

**Té Pǎblú xìcá<sup>n</sup> táhú-dě núú Yă Ndiöxí cuendá cue ñáyiú ndècu ichi-gá**

<sup>15</sup>Te yúhú ñìhí-í tnúhu sá nchòhó ìo vǎha sándáá iní-ndó Xítóhó

Jesucristú, te nchaa ñáyiú cùu cuendá Yă Ndiöxí ìo cùu iní-ndó-yu.

<sup>16</sup>Te xǎ<sup>n</sup> nǔu ñá túú dàña ndeé-í ndàcá<sup>n</sup> táhú-í núú-gă cuendá-ndó, te ìo xìcá<sup>n</sup> táhú-í <sup>17</sup>núú Yă Ndiöxí Yaá cúú Tǎtá Xítóhó Jesucristú cuendá-ndó. Te òu-ni Yă Ndiöxí cúú-gă Yaá ìo càhnu cuu. Te xìcá<sup>n</sup> táhú-í núú Yă Ndiöxí sá méé-gă ná cádá sǎ Espíritú-gá chindee ñàha-xi xii-ndo cuendá cuu-ndo ñáyiú tècú tnúní, te na càda-xi sá cǔtnúní iní-ndó nàcuáa sàni iní Yă Ndiöxí. <sup>18</sup>Te duca<sup>n</sup> xìcá<sup>n</sup> táhú-í núú Yă Ndiöxí cuendá-ndó, cuendá sá nchòhó tecú tnúní-ndó nàcuáa ndùu tnúhu ndee ìní ní taxi-gá ní ngúndecu ndíhi-ndo cǔtnàhá ní cáhá<sup>n</sup> ñáhá-gă xii-ndo. Te duca<sup>n</sup> cǔtnúní tucu iní-ndó sǎ ncháá sǎ nǐ cachí-gá taxi-gá nduu táhú nchoo cuè ñáyiú cùu cuendá-gá cúú-xí mèe cuií-ni sá ìo-gá váha. <sup>19</sup>Te cǔtnúní tucu iní-ndó sǎ Yă Ndiöxí ìo càhnu cuu-gá quidé-gă nchaa núú sǎ vǎha sá cúú-xí nchòo ñáyiú sándáá iní ñáhá xì-gá, chi quide-gá sá vǎ yòo tnàhí ndàcu cada sá cúú-xí-ó dàtná ní quide-gá <sup>20</sup>ní dándótó-gă Xítóhó Jesucristú cǔtnàhá ní xíhí-gá. Te ní taxinucóo-gá Xítóhó Jesucristú xio cùha-gá táxí tnúní-gá. <sup>21</sup>Te Xítóhó Jesucristú ìo-gá cúnùu-gá dàcúúxí nchàa núú cuè espíritú, ndíhi dàcúúxí nchàa cue téé yìndaha ñáyiú, ndíhi dàcúúxí nchàa dava-gá cue téé cùnùu. Te cuèi vitna te cuèi ndéé núú cuàhá<sup>n</sup> núú vèxi duca<sup>n</sup>-ni ìo cùnùu-gă taxi tnúní-gá. <sup>22</sup>Te mee Yă Ndiöxí ní quide-gá sá Xítóhó Jesucristú taxi tnúní-gá nchaandi túhú sá ìo, te òu-ni mee Yă Ndiöxí

ní cachí-gá sá ncháá ñáyiú cùu cuendá-gá quindaha ñaha Xítohó Jesucristú. <sup>23</sup>Te cada iní-ó sá ncháá ñáyiú cùu cuendá Yă Ndiöxí cúŷ-yu yiquí cuñú Xítohó Jesucristú, chi ìí<sup>n</sup>-ni cúu-yu ndìhi-gá, te mee-gă táxí tnùní-gá nchaandi túhú sá íó.

**Yă Ndiöxí ío cùndahú iní ñáhá-gă xii-o núu xíă<sup>n</sup> ní dácăcu nihnu ñaha-gă**

**2** Te nchòhó cúú-ndó dàtná ñáyiú ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndìhi Yă Ndiöxí ni caa ni quíhí<sup>n</sup>. <sup>2</sup>Te duca<sup>n</sup> nŷ xíndecu-ndo ìchi cuehé ichi duha, chi ní cáncicú<sup>n</sup> nihnu-ndo nchàa sá cuèhé sá dúhá íó ñuyíú-a, te ní xóo cada-ndo nchàa nacuaá càhá<sup>n</sup> sácúíhná, te ñiú-ni sácúíhná-ă<sup>n</sup> táxí tnùní-xi nchaa dava-gă espíritú cùndìhi-xi, te ñiú-ni-xi ndècu ndìhi-xi nchaa ñáyiú ñá túú cuení tnií tnúhu càhá<sup>n</sup> Yă Ndiöxí, te dàcàhá<sup>n</sup> ñáhá-xí xii-yu cuendá cundecu-ní-yu ichi cuèhé ichi duha. <sup>3</sup>Te nchaa-o dùca<sup>n</sup> ní xóo cada-o dàtná quidé cuè ñáyiú-á<sup>n</sup>, chi ní xóo cada-o nchàa sá cuèhé sá dúhá ní xóo cani iní-ó, te nándi-gă nchaa sá cuèhé sá dúhá ní xóo cahu iní-ó ní xóo cada-o, núu xíă<sup>n</sup> tàú-ó sá dándòho ñaha Yă Ndiöxí xii-o ni cùu datná tàú-xi dandòho-gă nchaa ñáyiú duca<sup>n</sup> ndècu ichi cuehé ichi duha-á<sup>n</sup>. <sup>4</sup>Te Yă Ndiöxí ío cùu iní ñáhá-gă xii-o núu xíă<sup>n</sup> ní cundàhú iní ñáhá-gă xii-o <sup>5</sup>cuèí cùu-o datná ñáyiú ní xíhí sá cuendá nchaa sá cuèhé sá dúhá quide-o ni cuu. Te

duca<sup>n</sup> nŷ quide-gá ní cundàhú iní ñáhá-gă xii-o cuendá cundecu-o ndìhi Xítohó Jesucristú vitna, te cuu ìí<sup>n</sup>nuu-o ndìhi-gă. Te sá cuendá-ni sá cùndàhú iní ñáhá Yă Ndiöxí xii-o xíă<sup>n</sup> ní quide-gă năcuáa nchoo nàníhí tàhú-ó. <sup>6</sup>Te cada iní-ó sá dàtná ní quide Yă Ndiöxí cùtnàhá ní dándótó-gă Xítohó Jesucristú cùtnàhá ní xíhí-gă duca<sup>n</sup> nŷ quide ñaha-gă xii-o chi ndècu-o ndìhi-gă vitna. Te Xítohó Jesucristú sa ndècu-gă andiú nŷú ndécú Yă Ndiöxí. Te cada iní-ó sá Yă Ndiöxí sa ní quide-gă sá nchóó nŷ ngúndecu túu-o ndìhi Xítohó Jesucristú, chi ío váha ndècu-o vitna. <sup>7</sup>Te Yă Ndiöxí quidé vâha ñaha-gă xii-o vitna cuendá sá ná sàá nduu, te ñiú-ni mee-gă cada te cutnùní iní nchaa ñáyiú sá ío cùu iní ñáhá-gă xii-o, te duca<sup>n</sup> ío chindee chitúu ñaha-gă xii-o cuendá sá ndécú ndìhi-o Xítohó Jesucristú. <sup>8</sup>Te Yă Ndiöxí ío cùndahú iní ñáhá-gă xii-ndo núu xíă<sup>n</sup> ní quide-gă sá nchòhó naníhí tàhú-ndó. Te duca<sup>n</sup> nŷ quide-gă chi ní sándáá iní-ndó-gă. Te ñá díú sá cuendá ìí<sup>n</sup> chiu<sup>n</sup> ni quide-ndo duca<sup>n</sup> ní nàníhí tàhú-ndó, chi mee Yă Ndiöxí ní cuiní-gă sá dicó-ni duca<sup>n</sup> nàníhí tàhú-ndó. <sup>9</sup>Te mee Yă Ndiöxí ní cachí-gá sá ñà díú cuendá ìí<sup>n</sup> chiu<sup>n</sup> quide-o naníhí tàhú-ó, te duca<sup>n</sup> nŷ cachí-gă cuendá sá vă cadá càhnu-o mee-o. <sup>10</sup>Te Yă Ndiöxí ní quide ñaha-gă xii-o dàtná ìí<sup>n</sup> ñáyiú saa cuendá sá ní tnahá tnúhu-o ndìhi Xítohó Jesucristú, te duca<sup>n</sup> nŷ quide-gă cuendá sá cadá-ó mè-ni sá vâha. Te Yă Ndiöxí duca<sup>n</sup> tnàhí ní sani iní-gă cunduu sá nchóó cùu-o ñáyiú cada mee-ni sá vâha.

**Xítohó Jesucristú quidé-gã  
ío váha cùu iní-ó ndècu-o**

<sup>11</sup>Te nchòhó chí dándàcu iní nàcuáa ní xíndecu-ndo ni cùu, chi ñá túú cùu-ndo ñáyiú isràél, te ni ñà túú quide-ndo datná quidé ñáyiú-á<sup>n</sup>, chi ñáyiú-á<sup>n</sup> sãha-yu sèñá ñíí-yu, te dàquee tìhù-yu nchaa ñáyiú ñá túú ndècu seña ñíí-xi. <sup>12</sup>Te chí dándàcu iní nàcuáa ní xíndecu-ndo, chi dàvã-á<sup>n</sup> ñà túú ní xíndecu-ndo ndìhi Xítohó Jesucristú, te ni ñà túú ní xõ cuu tnahá tnúhu-ndo ndìhi ñáyiú isràél, te ni ñà túú ní xìní tnùní-ndó nàcuáa ndùu tnúhu sá ñí cáhá<sup>n</sup> ndáá Yã Ndiõxí nàcuáa cada váha-gã ñáyiú, te ni ñà túú ní cùu-ndo ñáyiú quindaha-gã, te ni ñà túú ní xõ níhí-ndó tnúhu ndee iní sá cùndècu-ndo ndìhi-gã. <sup>13</sup>Te cuèi ní cuu-ndo ñáyiú ñá túú tnàhá tnúhu ndìhi Yá Ndiõxí ní cùu, dico vitna ní tnahá tnúhu-ndo ndìhi-gã chi cùu ìí<sup>n</sup>nuu-ndo ndìhi Xítohó Jesucristú, cuendá sá ñí sati nííí-gã te ní xíhí-gã te xíá<sup>n</sup> duca<sup>n</sup> tnàhá tnúhu-ndo ndìhi Yá Ndiõxí vitna. <sup>14</sup>Te Xítohó Jesucristú ní quide-gã sá nchóó ïo váha cuu iní-ó cùndecu-o, te ðiu-ni-gã ní quide cuendá sá vã dáquèe tìhù ñáhá ñáyiú isràél xii ñáyiú ñá túú cùu ñáyiú isràél, te duca<sup>n</sup> ìí<sup>n</sup>-ná cuú-yu cundecú-yu. <sup>15</sup>Te sá ñí xíhí Xítohó Jesucristú, xíá<sup>n</sup> ñá túú-gã cúnùu nchaa tnúhu sá sánú ichi ñaha xii ñáyiú nàcuáa cadá-yu cundecú-yu ni cùu. Te duca<sup>n</sup> ñí xíhí Xítohó Jesucristú cuendá sá cuè ñáyiú isràél ndìhi cue ñáyiú ñá túú cùu ñáyiú isràél ìí<sup>n</sup>-ná cuú-yu

cundecú-yu ichi-gã, te duca<sup>n</sup> te vã dáquèe tìhù tnàhá-gã-yu, te ïo váha cundecu ndìhi tnàhá-yu. <sup>16</sup>Te duca<sup>n</sup> ñí quide Xítohó Jesucristú ní xíhí-gã núú cùrúxí cuendá sá cuè ñáyiú cùu ñáyiú isràél ndìhi cue ñáyiú ñá túú cùu ñáyiú isràél vã dáquèe tìhù tnàhá-gã-yu. Te duca<sup>n</sup> ñí xíhí-gã cuendá ìí<sup>n</sup>-ná cuú-yu tnahá tnúhu-yu ndìhi Yá Ndiõxí nàcuáa cuu váha iní ñáhá-gã xii-yu.

<sup>17</sup>Te cuèi cùu-ndo ñáyiú ñá túú tnàhí xìní ndáá cuendá Yã Ndiõxí ní cùu, dico Xítohó Jesucristú ní quixi-gã ñuyúí-a ní cáhá<sup>n</sup>-gã tnúhu váha nàcuáa ïo váha cuu iní-ndó cùndecu-ndo ndìhi Yá Ndiõxí. Te ðiu-ni duca<sup>n</sup> ñí quide-gã sá cúú-xí nchaa ñáyiú sa xìní cuendá Yã Ndiõxí, ðiu-ni ñáyiú isràél. <sup>18</sup>Te cuèi cùu-o ñáyiú isràél àdi ñá túú cùu-o dico ðiu-ni mee Xítohó Jesucristú ní quide-gã sá ncháá-ó tnàhá tnúhu-o ndìhi Dútú Ndiõxí Yáa cúú Tãtá-ó. Te duca<sup>n</sup> ñí tnahá tnúhu-o ndìhi Yá Ndiõxí chi ní ngúndecu ndìhi-o Espiritú-gã. <sup>19</sup>Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnàhá tnúhu ndìhi Yá Ndiõxí ní cùu, dico vitna chi ìí<sup>n</sup>-ná ní cuu-ndo ndìhi nchaa dava-gã ñáyiú cùu cuendá-gã chi cùu-ndo déhe-gã. <sup>20</sup>Te cada iní-ó sã cuè téé ní táúchíú<sup>n</sup> Xítohó Jesucristú cáhá<sup>n</sup> tnúhu-gã, ndìhi cue téé ní xóo cáhá<sup>n</sup> tnúhu Yá Ndiõxí ndéé sanaha cùu-güedé dàtná cimientú ìí<sup>n</sup> vehe, te nchòhó cúú-ndó dàtná ndóho sá sàá vehe-á<sup>n</sup>, te cada tucu iní-ó sã Xítohó Jesucristú cúú-gã ìí<sup>n</sup> yúú cúnùu cuu cimientú vehe-á<sup>n</sup>. <sup>21</sup>Te duca<sup>n</sup> ïo váha cùu



ii<sup>n</sup>nuu nchaa ndóho-á<sup>n</sup> ndihi yúú cúnùu-á<sup>n</sup>, te duca<sup>n</sup> tucu ío váha ta quée tnàha nchaa ndóho-á<sup>n</sup> cuásaá. Te xíá<sup>n</sup> cada iní-ó sá cúu-xí vehe Yá Ndiöxí, vehe sá ío ní cuu íí. Te duca<sup>n</sup> sätnahá-xi cùu nchaa ñáyiú ndècu ichi Xítóhó Jesucristú chi ní tnahá tnúhu-yu ndihí-gá, te ii<sup>n</sup> nduu ii<sup>n</sup> nduu ta cùu vii cuu váha-gá-yu núú Yá Ndiöxí cuáhá<sup>n</sup>.<sup>22</sup> Te tnàhá nchòhó duca<sup>n</sup> sätnahá-xi cùu-ndo chi ní ngúndecu ndihí-ndo Xítóhó Jesucristú, te duca<sup>n</sup> ta cùu vii cuu váha tucu-ndo nùú Yá Ndiöxí cuáhá<sup>n</sup>, te cùu-ndo datná vehe Yá Ndiöxí chi ndècu ndihí-ndo Espiritú-gá.

**Té Páblú yíhí díquí-dě cáhá<sup>n</sup>-dé tnúhu Xítóhó Jesucristú núú ñáyiú ñá túú cùu ñáyiú isràél**

**3** Te yúhú té Páblú yíhí-í vecaá sá cuendá sá cáhá<sup>n</sup>-í tnúhu Xítóhó Jesucristú núú nchòhó ñáyiú ñá túú cùu ñáyiú isràél, núu xíá<sup>n</sup> díu cuendá-gá duha yìhi-í vecaá vitna.<sup>2</sup> Te nchòhó sa nàha-ndo sá Yá Ndiöxí ní cundàhú iní ñáhá-gă xii-í, te ní cachí-gá sá yúhú quihi díquí-í cáhá<sup>n</sup>-í tnúhu Xítóhó Jesucristú núú-ndó, te cuendá sá cáhá<sup>n</sup>-í tnúhu-gá núú-ndó te cuu-xi sá vâha sá cúu-xí-ndó.<sup>3</sup> Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ni cuu, sá ní cachí tnúhu Yá Ndiöxí xii-í.<sup>4</sup> Te òré dàcuaha-ndo tnúhu ndùu yuhu-á<sup>n</sup> ní cùu te quiní-ndó sá yúhú tècú tnùn-í nàcuáa ndùu tnúhu-á<sup>n</sup>, te tnúhu-á<sup>n</sup> cáhá<sup>n</sup>-xi cuendá Xítóhó Jesucristú.<sup>5</sup> Te tnúhu-á<sup>n</sup> cúu-xí tnúhu sá vâ yò tnàhí xíní ní cùu, dico cue téé ní táuchíú<sup>n</sup> Xítóhó

Jesucristú cáhá<sup>n</sup> tnúhu-gá, ndihí cue téé cáhá<sup>n</sup> nàcuáa dàcahu iní ñáhá Yá Ndiöxí ní níhí-güedé tnúhu ndùu yuhu-á<sup>n</sup>, chi Espiritú Yá Ndiöxí ní xáha<sup>n</sup>-xi xii-güedé.<sup>6</sup> Te duha cáhá<sup>n</sup> tnúhu ndùu yuhu-á<sup>n</sup> ní cùu: “Cuèi ñáyiú ñá túú cùu ñáyiú isràél te cuèi ñáyiú cùu ñáyiú isràél dico ii<sup>n</sup>-ni ndùu táhù-yu sá vâha núú Yá Ndiöxí, te núu na quindáá iní-yu tnúhu sá cáhá<sup>n</sup> nàcuáa naníhí tãhú-yu, te ii<sup>n</sup>-nã cúu-yu cundecú-yu, te duca<sup>n</sup> ii<sup>n</sup>-ni cada váha ñaha Yá Ndiöxí xií-yu te núu na cùndecu ndihí-yu Xítóhó Jesucristú”, duha ndùu tnúhu ndùu yuhu-á<sup>n</sup> ní cùu.

<sup>7</sup> Te Yá Ndiöxí ní cundàhú iní ñáhá-gă xii-í ní taxi-gá chiú<sup>n</sup> quide-í cáhá<sup>n</sup>-í tnúhu-gá, te mee-gă quidé-gă sá yúhú ndacu-í cáhá<sup>n</sup>-í tnúhu-gá.<sup>8</sup> Te nchaa ñáyiú cùu cuendá Yá Ndiöxí cúu-yu ñáyiú ío-gá cúnùu cadá-yu chiú<sup>n</sup>-gá dàcúxí yúhú, te cuèi duca<sup>n</sup> dico Yá Ndiöxí ní cundàhú iní ñáhá-gă xii-í ní taxi-gá chiú<sup>n</sup> quide-í cáhá<sup>n</sup>-í tnúhu-gá núú cuè ñáyiú ñá túú cùu ñáyiú isràél. Te tnúhu-gá-á<sup>n</sup> cáhá<sup>n</sup>-xi sá sùúní ío váha cada ñaha Xítóhó Jesucristú xii-o.<sup>9</sup> Te duca<sup>n</sup> ní cachí Yá Ndiöxí sá cáhá<sup>n</sup>-í tnúhu-gá cuendá danèhé-í nchaa ñáyiú. Te sá dánèhé-í-yu-á<sup>n</sup> cúu-xí tnúhu ndùu yuhu sá ní sani iní-gá ndéé sanaha nàcuáa cada váha-gá cue ñáyiú. Te ndéé dàvá-á<sup>n</sup> ní quesaha ndùu yuhu tnúhu-á<sup>n</sup> ní cùu. Te díu-ni-gá cúu-gă Yaá ní cadúha nchaandi túhú sá ío.<sup>10</sup> Te duca<sup>n</sup> ndùu yuhu tnúhu-á<sup>n</sup> ní cùu cuendá sá ncháá espíritú cúnùu ndecu andiú quiní-xi vitna nàcuáa quide nchaa ñáyiú

ní tuha ñaha xii Yá Ndiöxí cuendá duca<sup>n</sup> cùtnuní iní-xi sá ïo váha cùtnuní iní-gá nàcuáa cada-gá. <sup>11</sup>Te Yá Ndiöxí ní sani iní-gá ndéé sanaha nàcuáa ní cuiní-gá cada Xítohó Jesucristú, te ní sáá nduu nǐ quide Xítohó Jesucristú nàcuáa ní cuiní Yá Ndiöxí cada-gá. <sup>12</sup>Te vitna cùyhi-o cáhá<sup>n</sup> ndihi-o Yá Ndiöxí cuendá sá ndécú ndihi-o Xítohó Jesucristú, te sàndáá iní-ó-gă. <sup>13</sup>Te núu xǎ<sup>n</sup> càhá<sup>n</sup>-í dóho-ndo sǎ cuèi duha ndòho-í vitna dico vá ná tǔhú iní-ndó cànchicú<sup>n</sup> nihnu-ndo ìchi Xítohó Jesucristú. Te sá dúhá ndòho-í te cùu-xi sá vǎha sá cúu-xí-ndó, chi cuu-ndo ñáyi u cùu càhnu núu Yá Ndiöxí.

#### Xítohó Jesucristú ío cùu iní ñáhá-gă xii-o

<sup>14</sup>Te sá cuendá ncha sá nǐ sani iní Dútú Ndiöxí quidé-gă xǎ<sup>n</sup> yúhú ngüñí xítì-í núu-gă càhá<sup>n</sup> ndihi-í-gă, te diu-ni-gă cúu Yáa cúu Tǎtá Xítohó Jesucristú. <sup>15</sup>Te mee Yá Ndiöxí ní cachí-gă sá ncháá espíritú ndécú àndiu cunduu-xi datná ní cachí mée-gă cunduu-xi. Te ní cachí tucu-gă sá nchóo cùu-o ñáyi u, te cunduu-o datná cuiní mée-gă cunduu-o. <sup>16</sup>Te xicá<sup>n</sup> táhù-í núu Dútú Ndiöxí sá Espíritú-gă ná cáda nàcuáa cuita níhí ndée-gă-ndó quǐh<sup>n</sup> cundecu-ndo ìchi-gă, te duca<sup>n</sup> xicá<sup>n</sup> táhù-í núu-gă cada Espíritú-gă chi ío càhnu cuu-gă. <sup>17</sup>Te xicá<sup>n</sup> táhú tucu-í núu Yá Ndiöxí sá Xítohó Jesucristú ná cundecu ndihi ñaha-ni-gă xii-ndo chi sàndáá iní-ndó-gă, te duca<sup>n</sup> te vá dáńá ndèé-ndó ío cuu iní tnáhá-ndó. <sup>18</sup>Te xicá<sup>n</sup> táhú tucu-í núu Yá Ndiöxí

cuendá-ndó ndihi cuendá dava-gă ñáyi u cùu cuendá-gă, cuendá sá cùtnuní iní-ndó sǎ sǔnúní cùu iní ñáhá Xítohó Jesucristú xii-o. <sup>19</sup>Te duha xicá<sup>n</sup> táhù-í núu Yá Ndiöxí chi cuiní-í sá ncháá-ndó tècu tñuní-ndó sǎ ïo cùu iní ñáhá Xítohó Jesucristú xii-o cuèi vá ndácú cava-o quiní-ó nàcuáa cùu iní ñáhá-gă xii-o. Te xicá<sup>n</sup> táhú tucu-í núu Yá Ndiöxí sá ïo na cundecu ndihi ñaha-gă xii-ndo, te duca<sup>n</sup> cànchicú<sup>n</sup> nihnu-ndo càda-ndo ncha nacuáa quide mee-gă.

<sup>20</sup>Te Yá Ndiöxí ío-gă vai sá ndácú-gă táxi-gă dàcúxí sǎ xicá<sup>n</sup>-ó nǔú-gă, te cuèi ndéé ncha sá ñà túu sàni iní-ó níhí-ó te tàxi-gă, te duca<sup>n</sup> chi mee-gă ndécú ndihi ñaha-gă xii-o, te ndàcu-gă quidé-gă nándi sá vǎha sá cúu-xí-ó. <sup>21</sup>Te vitna ncha nchoo ñáyi u ndècu ìchi Xítohó Jesucristú chí ná càchí-ó sǎ ïo càhnu cuu Yá Ndiöxí, te duca<sup>n</sup>-ni càhá<sup>n</sup>-ó sǎ ïo càhnu cuu-gă ni caa ni quǐh<sup>n</sup> chi ndècu ndihi-o Xítohó Jesucristú. Te duca<sup>n</sup> na cunduu.

#### Espíritú Yá Ndiöxí quidé-xí cùu ii<sup>n</sup>nuu-o ndecu-o

**4** Te yúhú té Pǎblú yíhì-í vecaá sá cuendá Xítohó Jesucristú, te càhá<sup>n</sup> ndàhú-í núu-ndó sǎ cáda vǎha-ndo cundecu-ndo datná tàú-xi cada cue ñáyi u ní cáhá<sup>n</sup> Yá Ndiöxí cundecu ndihi-gă. Te nchòhó tnáhá-ndó cùu-ndo ñáyi u ní cáhá<sup>n</sup> ñáhá Yá Ndiöxí cundecu ndihi-gă. <sup>2</sup>Te vá cáda càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nàcuáa duca<sup>n</sup> cundee iní-ndó nǔu ná cúu sǎ cúmǎni nǔú

tnáhá-ndó. <sup>3</sup>Te ío nducu ndèe-ndo cuu ì<sup>n</sup>nuu-ndo cundecu-ndo, chi Espíritú Yă Ndiöxí chindee ñàha-xi xii-ndo, te duca<sup>n</sup> ío váha cuu iní-ndó cundecu-ndo chi cùu ì<sup>n</sup>nuu-ndo. <sup>4</sup>Te nchoo ñăyiu ndècu ichi Xítóhó Jesucristú ì<sup>n</sup>-ni cùu-o, te duca<sup>n</sup> ì<sup>n</sup>-ni Espíritú Yă Ndiöxí ndécú, te ðiu-ni duca<sup>n</sup> ì<sup>n</sup>-ni tnúhu ndee ìní ní ngúndecu ndìhi-o cùtnàhá ní cáhá<sup>n</sup> ñàhá Yă Ndiöxí xii-o. <sup>5</sup>Te ì<sup>n</sup>-ni Xítóhó Jesucristú ndécú tàxi tnuní ñàhá-gă xii-o, te ì<sup>n</sup>-ni cùu-o sandáá iní-ó tnúhu-gá, te ì<sup>n</sup>-ni nǐ sandute-o. <sup>6</sup>Te ì<sup>n</sup>-ni Dütú Ndiöxí cúú Yàá cúú Tătá-ó nchàa-o, te ðiu-gá cúnúu-gá yíndàha ñàha-gá xii-o nchàa-o. Te Yă Ndiöxí dácàhá<sup>n</sup>-gá iní-ó quíde-o chiu<sup>n</sup>-gá, te duca<sup>n</sup> ndècu ndìhi ñàha-gá xii-o nchàa-o.

<sup>7</sup>Te nchoo ndì ðí<sup>n</sup> ndì ðí<sup>n</sup> chindee ñàha Yă Ndiöxí xii-o quíde-o nacuáa ndùu chiu<sup>n</sup> ní cachí Xítóhó Jesucristú cada-o. <sup>8</sup>Te quèe ndáá-xi nàcuáa càhá<sup>n</sup>-xi núú tütú Yă Ndiöxí núú càchí-xi:

Xítóhó Jesucristú cuándaa-gá andiu te ío cúnúu-gá,  
chi nchaa cue espíritú cúú ũhú  
iní ñàhá xì-gá ñá túú ní  
ndàcu-xi naá ndìhi ñàha-xi  
xii-gá,  
te mee-gă ní cachí-gá nàcuáa  
ndùu chiu<sup>n</sup> nduu táhú ì<sup>n</sup> ì<sup>n</sup>  
ñáyiu cadá-yu.

Duha càchí-xi núú tütú-gá.

<sup>9</sup>Te sá dúcá<sup>n</sup> càhá<sup>n</sup>-xi sá cuándaa-gá andiu xíá<sup>n</sup> cúnùní iní-ó sǎ nǐ cuu<sup>n</sup>-gá ñuyúú-a. <sup>10</sup>Te Xítóhó Jesucristú ní cuu<sup>n</sup>-gá ñuyúú-a, te ðiu-ni-gá cuándaa-gá andiu cuèndá ío cunu-gă taxi tnùní-gá nchaandi

túhú sá íó. <sup>11</sup>Te ní dácăhñu-gá cue tée xínu cuechi núú-gă ì<sup>n</sup> ì<sup>n</sup> núú chiu<sup>n</sup> cada-güedé. Te ní cachí-gá sá dàva-güedé cáhá<sup>n</sup>-güedé tnúhu-gá, te dava-güedé ní cachí-gá sá cǎhá<sup>n</sup>-güedé nàcuáa dàcahu iní ñàhá Yă Ndiöxí xii-güedé. Te dava-güedé ní cachí-gá sá cúú-güedé cue tée datècú tnúhu cue ñáyiu nàcuáa cadá-yu naníhí tàhú-yu. Te dava-güedé ní cachí-gá sá cúú-güedé cue tée quíndaha ñàha xii ñáyiu dacuàha ñàha-güedé xií-yu tnúhu-gá. <sup>12</sup>Te duca<sup>n</sup> nǐ cachí-gá cada cue tée-á<sup>n</sup> cuèndá canu ichi-güedé cue ñáyiu cùu cuèndá Yă Ndiöxí cuèndá duca<sup>n</sup> ñáyiu-á<sup>n</sup> nǐhǐ-yu nàcuáa cadá-yu chiu<sup>n</sup>-gá, te duca<sup>n</sup> cuíta níhí ndéé-gă-yu cundecú-yu ichi Xítóhó Jesucristú. <sup>13</sup>Te duca<sup>n</sup> nǐ cachí Xítóhó Jesucristú cunduu ndéé sáá nduu cùu ì<sup>n</sup>nuu-o quíndáá iní-ó tnúhu-gá, te duca<sup>n</sup> cùu ì<sup>n</sup>nuu-o tecú tnùní-ó nàcuáa ndùu cuèndá-gá chi ðiu-gá cúú-gă Déhe Yă Ndiöxí, te cuu-o ñáyiu ío quíde ndáá dàtná quíde mèe Xítóhó Jesucristú. Te duca<sup>n</sup> te ñá túú tnàhí-gá ná cùmání-ó nǔú Yă Ndiöxí. <sup>14</sup>Te duca<sup>n</sup> te vá cúú-gă-ó dàtná cue landú vátá cúnùní váha-gá iní-xi, te ni vǎ cadá-gă-ó dàtná quíde ndüte lamár, chi ndute-á<sup>n</sup> óré quéné tǎchí te cuáhá<sup>n</sup>-xi duha cuáhá<sup>n</sup>-xi dácá<sup>n</sup>, te duca<sup>n</sup> chi vá quíndáá-gá iní-ó tnúhu càhá<sup>n</sup> nchaa ñáyiu dándahú ñàhá xì-o, chi ñáyiu-á<sup>n</sup> ío váha xító-yu nàcuáa dándahú ñàhá-yu xii-o chi càchí-yu sá càhá<sup>n</sup>-yu tnúhu Yă Ndiöxí dico ñá ndáá. <sup>15</sup>Te nchoo ío cuu iní tnáhá-ó, te vá dándahú tnáhá-ó, chi cáhá<sup>n</sup>-ó mèe-ni sá ndáá.

Te xini ñuhu-xi sá ñ<sup>n</sup> nduu ñ<sup>n</sup> nduu cuita cada ndáá-gá-ó quíhí<sup>n</sup> dàtná quidé ndáá méé-gă, te diu-ni-gá cúú-gă Yaá cúnúu cuu díhna tàxi tnuní ñáhá-gă xii-o. <sup>16</sup>Te diu-ni Xítóhó Jesucristú quidé ñàha-gá xii nchaa nchoo ñăyiu ndècu ichi-gá dàtná yiqui cùñú méé-gă, chi ñ<sup>n</sup> yiqui cùñú ío váha ní queé tnàha ñ<sup>n</sup> ñ<sup>n</sup> xichi, te duca<sup>n</sup> yíhi túchi yiqui cùñú-ă<sup>n</sup> yótnî-xi nchaa nacuaa ní queé tnàha. Te duca<sup>n</sup> sătnahá-xi cùu nchoo chi ñ<sup>n</sup>-ni cùu-o ndecu-o ichi Xítóhó Jesucristú táxi tnuní ñáhá-gă xii-o. Te núu nchoo quide-o nchaa nacuaa tàú-xi cunduu te cùu iní tnáhá-ó, te duca<sup>n</sup> ta ñihí ndéé-gă-ó cuáhá<sup>n</sup> ndécú-ó ichi-gá.

**Vá cádá-gă-ó dàtná ní xóo cada-o cùtnàhá ní xíndecu-o ichi cuehé ichi duha**

<sup>17</sup>Te vitna yúhú càhá<sup>n</sup>-í dóho-ndo quide-í núú Xítóhó Jesucristú sá vă cùndècu-gá-ndó dàtná xíndecu ñăyiu ñá túú sàndáá iní ñáhá xii Yá Ndiòxí, chi nchaa ñăyiu-á<sup>n</sup> ñà túú vèdana nàndíhi nchaa sá sání iní-yu. <sup>18</sup>Te ni ñà túú vèdana cùtnuní iní-yu nàcuáa ndùu tnúhu ndáá tnúhu Yá Ndiòxí. Te ñăyiu-á<sup>n</sup> ñà túú ndùu táhŭ-yu cundecú-yu nàcuáa cuiní Yă Ndiòxí, chi ñá túú vèdana tècú tnuní-yu te duca<sup>n</sup> chi ío sáá iní-yu. <sup>19</sup>Te ñá túú tnàhí-gă ná sání iní-yu ndècú-yu ichi cuehé ichi duha, te ío cùdíí iní-yu ndècú-yu ichi díí iní, te ñá díú-ní xíă<sup>n</sup> chi nándi-gă nchaa sá cuehé sá dúhá quidé-yu ndécú-yu. <sup>20</sup>Dico tnúhu Xítóhó Jesucristú sá ní sàndáá iní-ndó chi ñá túú dùca<sup>n</sup> sanu ichi ñaha-xi xii-ndo cada-ndo. <sup>21</sup>Te

nchòhó ní cutnùní iní-ndó nàcuáa ndùu cuendá Xítóhó Jesucristú, te dàcuaha-ndo tnúhu ndáá diu-ni tnúhu-gá nàcuáa ndècu-ndo ichi-gá. <sup>22</sup>Te vitna vă cání-gă iní-ndó càda-ndo datná ní xóo cada-ndo cùtnàhá ní xíndecu-ndo ichi cuehé ichi duha, chi núu nchaa-ni sá cuehé sá dúhá-ă<sup>n</sup> ná cùhu<sup>n</sup>-ni iní-ndó càda-ndo, te uu<sup>n</sup>-gá uu<sup>n</sup>-gá cuita dacuíta nihnu ñaha-xi xii-ndo quíhí<sup>n</sup>, chi núu nchaa-ni sá cuehé sá dúhá-ă<sup>n</sup> ná cùhu<sup>n</sup>-ni iní-ndó te dàticá nuu ñaha-xi xii-ndo. <sup>23</sup>Te nchòhó, xini ñuhu-xi sá vă dúcá<sup>n</sup>-gă cani iní-ndó càda-ndo te tàú-ndó ndùu-ndo datná ñ<sup>n</sup> ñăyiu ní cacu túu saa. <sup>24</sup>Te nduu iní-ndó dàtná cuiní méé Yă Ndiòxí cunduu, chi nduu-xi nàcuáa càa iní méé-gă, te duca<sup>n</sup> te cuu-ndo ñăyiu ío váha cada ndáá, te cuu ndisa-ndo ñăyiu ñá túú tnàhí ná cumání cundecu núú-gă.

<sup>25</sup>Te cuendá xíă<sup>n</sup> núu càhá<sup>n</sup>-í dóho-ndo să nchòhó vă dácuañdehnde-gá-ndó dàtná ní xóo cada-ndo, te mee-nă sá ndáá cáhá<sup>n</sup> ndihí tnàha-ndo, chi ñ<sup>n</sup>-ni cùu-o ndecu-o ichi Xítóhó Jesucristú.

<sup>26</sup>Te núu cùdéé<sup>n</sup>-ndó te cada cuendá-ndó să vă cádá-ndó ñ<sup>n</sup> cuechi sá dúcá<sup>n</sup> cùdéé<sup>n</sup>-ndó, te vă dúcá<sup>n</sup>-ní cùhu<sup>n</sup> iní-ndó tnúhu sàtú iní-á<sup>n</sup>. <sup>27</sup>Te vă dáñá-ndó mèe-ndo dandahú ñáhá sàcúíhná xii-ndo.

<sup>28</sup>Te núu dava-ndo cùu-ndo ñadúhú te vă dúcá<sup>n</sup>-gă cada-ndo, chi nducu-nă-ndó ñ<sup>n</sup> chiu<sup>n</sup> váha cada-ndo nàcuáa duca<sup>n</sup> ñihí-ndó să chíndèe-ndo cue ñăyiu ndàhú ñăyiu ñá túú ñà ndécú ndíhi.

<sup>29</sup>Te vă càhá<sup>n</sup>-gă-ndó ní ñ<sup>n</sup> tnúhu cuehé, chi mee-nă tnúhu vii tnúhu

váha cáhá<sup>n</sup>-ndó nàcuáa duca<sup>n</sup> ngũnu ichi cue ñáyiũ ndèdóho ñaha xii-ndo, te núu duca<sup>n</sup> na càda-ndo te cuu-xi sá vâha sá cúú-xí ñáyiũ duca<sup>n</sup> ndèdóho ñaha xii-ndo-á<sup>n</sup>.

<sup>30</sup>Te vá cádá-gã-ndó ñi ì<sup>n</sup> sá ñà túú tàũ-ndó càda-ndo cuendá sá vâ dándìhú-ndó ìní Espiritú Yá Ndiöxí, chi ñu Espiritú-gá ndécú ndìhi-ndo, te xíã<sup>n</sup> cútnùnì iní-ndó sá sàa nduu nàcuaca ñaha-gá xii-ndo cùndecu-ndo ndìhi-gá ñi caa ni quíh<sup>n</sup>.

<sup>31</sup>Te vá dásàtú-gá-ndó ìní tnàha ñáyiũ-ndo, te ni vâ cúhú<sup>n</sup> ìní-ndó tnũhu sàtú iní, te ni vâ cúdèè<sup>n</sup>-gã-ndó, te cuèi núu chítú nũú tàcá vâ càhá<sup>n</sup> cana-ndo cùcuèhé-ndó tnàha ñáyiũ-ndo, te ni vâ cuátnũhu-ndo tnaha ñáyiũ-ndo, te ni vâ cáni cuèhé cani duha iní-ndó cuendá tnàha ñáyiũ-ndo.

<sup>32</sup>Te cundàhú iní tnáhá-ndó, te cada tnàha-ndo sá vâha, te cada càhnu iní tnáhá-ndó nũu ná cúú sá cúmãní nũú tnáhá-ndó dàtná ní quide Yá Ndiöxí ní quide càhnu iní-gá nchaa yíca cuèchi-ndo sá cuendá Xítóhó Jesucristú.

**Nàcuáa tàũ-xi cundecu nchaa ñáyiũ cùu déhe Yá Ndiöxí**

**5** Te nchòhó cúú-ndó ñáyiũ ío cùu iní ñáhá Yá Ndiöxí, te ñu déhe-gá cúú-ndó nũu xíã<sup>n</sup> xínì ñũhu-xi canchicú<sup>n</sup> nihnu-ndo càda-ndo datná quidé mèe-gá. <sup>2</sup>Te ío cuu iní tnáhá-ndó cùndecu-ndo datná cúú ìní ñáhá Xítóhó Jesucristú xii-ndo, chi ñu-gá ní cachí-gá sá cùú-gá cuendá nchaa cuèchi-o te ní xíhí-gá, te sá dúcá<sup>n</sup> ñi xíhí-gá te ní cuu-gá dàtná ì<sup>n</sup> táhú

sá cúú-xí Yá Ndiöxí, te ío váha ní cuu iní Yá Ndiöxí sá dúcá<sup>n</sup> ñi quide-gá.

<sup>3</sup>Te sá cuendá sá nchòhó cúú-ndó ñáyiũ cùu cuendá Yá Ndiöxí nũu xíã<sup>n</sup> nchaa nchòhó cue téé vâ càhá<sup>n</sup> ndìhi-ndo ñáyiũ ñìhí te núu ñá ñá dífú ñàdìhí-ndó cùu-yu, te duca<sup>n</sup>-ni nchàa nchòhó cue ñáyiũ ñìhí tucu vâ càhá<sup>n</sup> ndìhi-ndo cuè téé te núu ñá dífú yìi-ndo cuu-güedé, te ni vâ cáni tnáhí iní-ndó cùndecu-ndo ichi dífú ìní, te ni vâ xíhó-ndó ñi ì<sup>n</sup> sá ndécú ndìhi tnaha ñáyiũ-ndo, te ni ì<sup>n</sup> nchaa xíã<sup>n</sup> vâ cáni iní-ndó càda-ndo, te ni vâ cácu nèhe-ndo.

<sup>4</sup>Te ni vâ càhá<sup>n</sup>-ndó ì<sup>n</sup> tnúhu sá ni vâ cúú cùndedóho ñáyiũ, te ni vâ càhá<sup>n</sup>-ndó ì<sup>n</sup> tnúhu cùtèxínu, te ni dàva-gá nchaa tnúhu sá ñà túú vèdana nàndìhí vâ càhá<sup>n</sup>-ndó, chi nchaa tnúhu-á<sup>n</sup> ñà túú tàũ-xi cáhá<sup>n</sup>-ndó, te xínì ñũhu-xi sá vâha-gá sá ndàcá<sup>n</sup> táhú-ndó nũú Yá Ndiöxí cuendá nchaa sá vâha quide-gá. <sup>5</sup>Te nchòhó sa xínì ndáá-ndó sá ncháá cuè téé càhá<sup>n</sup> ndìhi ñáyiũ ñìhí te ñá dífú ñàdìhí-güedé cúú-yu, ndìhi cue ñáyiũ ñìhí càhá<sup>n</sup> ndìhi cue téé te ñá dífú yìi-yu cùu-güedé, nchaa ñáyiũ-á<sup>n</sup> vâ ndúú tãhũ-yu cundecú-yu núu ndécú Yá Ndiöxí ndìhi Xítóhó Jesucristú táxi tnùnì-gá. Te ni cuè ñáyiũ xíndecu ichi dífú ìní, te ni cuè ñáyiũ xìho nchaa sá ndécú ndìhi tnaha ñáyiũ-xi vâ ndúú tãhũ-yu cundecú-yu ndìhi-gá núu ndécú-gã táxi tnùnì-gá. Te tnúhu sá càchí-ó xìho-o nchaa sá ndécú ndìhi tnaha ñáyiũ-o, ì<sup>n</sup>-ni cùu-xi ndìhi tnúhu sá càchí ñáyiũ quide cahnú-yu nchaa sá càchí-yu cùu ndiöxí te

ñá ndàá sá ndiöxí cúu-xí. <sup>6</sup>Te vá quíndáá iní-ndó nì ìí<sup>n</sup> tnúhu sá ñà túú nàndíhi càhá<sup>n</sup> ñáyiú, chi ñáyiú-á<sup>n</sup> ío dandòho ñaha Yá Ndiöxí xií-yu cuèndá nchaa sá cuèhé sá dúhá quidé-yu chi ñà túú sàndáá iní ñáhá-yu xii-gá. <sup>7</sup>Núu xíá<sup>n</sup> càhá<sup>n</sup>-í dóho-ndo sá vǎ ñihí tnáhá-ndó ndìhi cue ñáyiú-á<sup>n</sup>.

<sup>8</sup>Te nchòhó ní cuu-ndo dàtná cue ñáyiú ní xíndecu núú néé chi ní xíndecu-ndo ìchi cuehé ichi duha, dico vitna ní ngúndecu-ndo ìchi Xítohó Jesucristú, te ñà túú-gǎ ndécú-ndó nǔú néé dàtná ní xíndecu-ndo ni cùu. Te vitna cada-ndo nchàa nacuáa tàù-xi cunduu chi ndècu-ndo ichi-gá. <sup>9</sup>Te sá cuèndá sá ndécú-ndó ìchi-gá nǔu xíá<sup>n</sup> cúu-ndó ñáyiú váha, te quide ndáá-ndó ndècu-ndo, te ñà túú dàcuandehnde-ndo chi càhá<sup>n</sup>-ndó mèe-ni sá ndáá. <sup>10</sup>Te ío váha cada cuèndá-ndó nchàa sá cúu vǎha iní Xítohó Jesucristú, te xíá<sup>n</sup> cada-ndo. <sup>11</sup>Te vá cáncñícú<sup>n</sup> nihnu-ndo tnáhá-ndó càda-ndo datná quidé cuè ñáyiú ndècu ichi cuehé ichi duha, chi nchòhó tàú-ndó cǎhá<sup>n</sup>-ndó dǎho nchaa ñáyiú duca<sup>n</sup> ndècu ichi cuehé ichi duha-á<sup>n</sup> cuèndá nchaa sá quidè-yu. <sup>12</sup>Te cucaha<sup>n</sup> núú-ndó vǎ càhá<sup>n</sup>-ndó cuèndá ni ìí<sup>n</sup> sá cuèhé sá dúhá quide dayuhu nchaa ñáyiú-á<sup>n</sup>. <sup>13</sup>Dico òrè dándixi túu tnúhu Yá Ndiöxí iní-yu nàcuáa quidé-yu te cùtnuní iní-yu sá ñà túú quide váha-yu, te duca<sup>n</sup> ndìxi cuéchi iní-yu cuèndá nchaa sá cuèhé sá dúhá quidé-yu. <sup>14</sup>Te núú tùtú Yá Ndiöxí càchí-xi:

Nchòhó cúu-ndó dàtná ñáyiú xídí, te vitna ndiquíú iní-ndó, te cùu tucu-ndo datná ñáyiú ní xíhí, te vitna ndoto-ndo, te Xítohó Jesucristú chindee ñàha-gá xii-ndo nàcuáa vá cùndècu-gá-ndó ìchi cuehé ichi duha.

Duha càhá<sup>n</sup>-xi núú tùtú-gá.

<sup>15</sup>Te ío váha cada cuèndá-ndó nàcuáa cada-ndo cùndecu-ndo, te vá cadá-ndó dàtná xíquide cue ñáyiú ñà túú tècú tnùní, chi cada-ndo dàtná xíquide ñáyiú ío váha sàà díquí-xi. <sup>16</sup>Te ìí<sup>n</sup> nduu ìí<sup>n</sup> nduu cani iní-ndó càda-ndo nchaa nacuáa tàù-xi cunduu, chi vitna ío cùnuu nchaa sá cuèhé sá dúhá. <sup>17</sup>Te cuu-ndo ñáyiú tècú tnùní cuèndá duca<sup>n</sup> cùtnuní iní-ndó nàcuáa cuìní Yá Ndiöxí cada-ndo, te vá cadá-ndó dàtná xíquide cue ñáyiú ñà túú tnàhí cùtnuní iní-xi nàcuáa cuìní Yá Ndiöxí cadá-yu. <sup>18</sup>Te vá cúu-ndó ñáyiú quíhu chi núu duca<sup>n</sup> na càda-ndo te dàcuíta nihnu-ndo mèe-ndo, te dañà-ndo mèe-ndo sá Espíritú Yá Ndiöxí ná tàxi tnuní ñáhá-xí xii-ndo. <sup>19</sup>Te càhá<sup>n</sup>-ndó nàcuáa-ni cuáhá<sup>n</sup> ndudú sá nǐ xóo cata nchaa cue ñáyiú ndéé sanaha nǐ xóo chiñuhu-yu Yá Ndiöxí. Te càhá<sup>n</sup>-ndó nàcuáa cuáhá<sup>n</sup> ndudú sá chíñuhu-ndo Yá Ndiöxí, te cata-ndo. Te cuèi nchaa dava-gá ndudú diu-ni duca<sup>n</sup> cǎhá<sup>n</sup>-ndó te cata-ndo. Te ni yùhu ni iní-ndó càta-ndo nchaa ndudú-á<sup>n</sup> chiñuhu-ndo Yá Ndiöxí. <sup>20</sup>Te vá dáñá ndèè-ndó ndàcá<sup>n</sup> táhú-ndó nǔú Tǎtá-ó Dùtú Ndiöxí cuèi ndècu váha-ndo àdi ñà túú ndècu váha-ndo. Te duca<sup>n</sup> càda-ndo

chi ndècu ndihi-ndo Xítohó Jesucristú.

**Tàú-xi sá quíndáá iní tnáhá cuè ñáyiú ndècu ichi Xítohó Jesucristú**

<sup>21</sup>Te nchòhó ñáyiú ndècu ichi Xítohó Jesucristú tàú-xi sá quíndáá iní tnáhá-ndó, te duca<sup>n</sup> càda-ndo chi nèhe-ndo sá yíñùhu núú Yá Ndiöxí.

<sup>22</sup>Te nchaa nchòhó ñáyiú òhí ndécú yìi-xi, xini ñuhu-xi sá quíndáá iní-ndó yìi-ndo datná sàndáá iní-ndó Xítohó Jesucristú.

<sup>23</sup>Chi yìi-ndo tàxi tñuní ñáhá-güedě xii-ndo dàtná quidé Xítohó Jesucristú táxi tñuní ñáhá-gă xii nchoo cuè ñáyiú ndècu ichi-gá. Te òu-gá cúú-gă Yaá ní dácăcu nihnu ñaha xii-o núú ùhú núú ndàhú, te cùu-o datná yiqui cùñú-gá. <sup>24</sup>Te dàtná quidé nchò ñáyiú ndècu ichi Xítohó Jesucristú sàndáá iní-ó tñi-o nchaa tñuhu càhá<sup>n</sup>-gá, duca<sup>n</sup> tàú-xi cada nchaa nchòhó ñáyiú òhí quíndáá iní-ndó tñi-ndo nchaa tñuhu càhá<sup>n</sup> yìi-ndo.

<sup>25</sup>Te tñáhá nchaa nchòhó cue téé tucu tàú-xi sá òo cuu iní-ndó ñàðihí-ndó dàtná quidé Xítohó Jesucristú cúú iní ñáhá-gă xii nchaa nchoo ñáyiú ndècu ichi-gá, chi mee-gă ní xihí-gá sá cuèndá-ó sá cúú iní ñáhá-gă xii-o. <sup>26</sup>Te duca<sup>n</sup> ní quide-gá cuèndá sá ncháá ñáyiú vitna ngúndecu ichi-gá cuu yíñùhú-yu núú Yá Ndiöxí, te duca<sup>n</sup> ndàda ndoo ndada nine-gá iní-yu sá cuèndá sá quíndáá iní-yu tñuhu Yá Ndiöxí, te cuanduté-yu. <sup>27</sup>Te duca<sup>n</sup> ní quide-gá cuèndá sá ncháá ñáyiú na ngúndecu ichi-gá ío váha cundécú-yu núú-gă, te duca<sup>n</sup>

vă cúndècu-gá ni ì<sup>n</sup> cuéchi-yu núú-gă, te ni ì<sup>n</sup>-gá sá ñà túú-gă ná cumání-yu núú-gă chi ío cundecu yíñùhú-yu. <sup>28</sup>Te sá dúcá<sup>n</sup> quide Xítohó Jesucristú sá cúú-xí cuè ñáyiú ndècu ichi-gá, xǎ<sup>n</sup> tàú-xi sá nchòhó cue téé xíndecu ñàðihí-xi cuu iní-ndó ñàðihí-ndó, te coto-ndö-yu dàtná xító-ndó yiqui cuñú méé-ndó, te cada iní-ndó sá ncháá cuè téé ío cùu iní ñàðihí-xi cùu iní-güedé méé-güedě chi ì<sup>n</sup>-nă cúú-yu. <sup>29</sup>Te nchoo sà naha-o sá nì ì<sup>n</sup> ñáyiú ñà túú dàquee tñù-yu yiqui cùñú-yu, chi da uu<sup>n</sup>-gá chíndèé-yu te xító-yu. Te òu-ni duca<sup>n</sup> quide Xítohó Jesucristú ndihi nchaa ñáyiú ndècu ichi-gá, <sup>30</sup>chi cùu-o datná yiqui cùñú méé-gă, te duca<sup>n</sup> chi ì<sup>n</sup>-ni cùu-o ndihi-gá. <sup>31</sup>Te tñuhu Yá Ndiöxí càchí-xi: “Sá cuèndá xǎ<sup>n</sup> nñu nchaa cue téé na nihí ñàðihí-xi te òhí<sup>n</sup>-ná cada-güedé tătá-güedě ndihi náná-güedě, te ñàðihí-nă-güedé cuu cuu ndihi-güedé, te duca<sup>n</sup> ì<sup>n</sup>-ná cuu-güedé ndihí-yu”, duha càchí-xi. <sup>32</sup>Te tñuhu-a cùu-xi ì<sup>n</sup> tñuhu càhnu vihi, te duca<sup>n</sup> sá tñáhá-xi cùu Xítohó Jesucristú ndihi cue ñáyiú ndècu ichi-gá. <sup>33</sup>Te càhá<sup>n</sup>-ni tucu-í dóho nchaa nchòhó cue téé xíndecu ñàðihí-xi sá òo cuu iní-ndó ñàðihí-ndó te coto-ndö-yu dàtná xító-ndó mèe-ndo, te duca<sup>n</sup>-ni ncháa nchòhó ñáyiú òhí tucu canehè-ndo sá yíñùhu núú yìi-ndo.

**6** Te nchaa nchòhó cue landú, quíndáá iní-ndó tătá-ndó ndihi náná-ndó chi duca<sup>n</sup> cuení Yá Ndiöxí cunduu, te òu duca<sup>n</sup> tñáhí tàú-xi cada-ndo. <sup>2</sup>Te Yá Ndiöxí ní càchí-gá sá cànèhe-ndo sá yíñùhu

núu tátá-ndó ndihi núu náná-ndó. Te tnúhu-á<sup>n</sup> cúu-xí tnúhu cùnuu ní cáhá<sup>n</sup>-gá cada cue ñáyi cuendá cada váha ñaha-gă xii-yu. <sup>3</sup>Te ní cachí-gá sá nũu duca<sup>n</sup> na càda-ndo te ío váha cundecu-ndo, te duca<sup>n</sup> ño naha cùdíi-ndo cùndecu-ndo ñuyú-a.

<sup>4</sup>Te nchaa nchòhó cue tée cùu tátá, vá dásatú-ndó ìní cue déhe-ndo chi canu ichi-ndo-güèxi nacuaa tàú-xi cunduu, te dacuàha-ndo-güèxi nchaa tnúhu váha nàcuáa cuíni Yă Ndiöxi cunduu.

<sup>5</sup>Te nchaa nchòhó cue ñáyi xinu cuechi, quindáá ìní-ndó cuè ñáyi dii chiú<sup>n</sup>-xi quide-ndo, te canehe-ndo sã yĩñùhu nũ-yu, te ío váha cuu ìní-ndó càda-ndo chiú<sup>n</sup>-yu, te duca<sup>n</sup> nì yuhu nì ìní-ndó càda-ndo. Te cada ìní-ndó sã dàtná tnúhu sá chíú<sup>n</sup> Xítóhó Jesucristú quidé-ndó. <sup>6</sup>Te dava ñáyi xinu cuechi, mee-ni òrè ndéhé ñáyi dii chiú<sup>n</sup>-xi quidé-yu ío ndècu ndeé-yu quide chiu<sup>n</sup> váha-yu cuendá cuíni-yu cudù-yu. Dico nchòhó vá dúcá<sup>n</sup> càda-ndo, chi cuèi ndècu ñáyi dii chiú<sup>n</sup>-xi quide-ndo àdi ñá túy-yu dico cada chiú<sup>n</sup> váha-ni-ndo, te cada ìní-ndó sã dàtná tnúhu sá chíú<sup>n</sup> Xítóhó Jesucristú quidé-ndó, te cada-ndo nì yuhu nì ìní-ndó nàcuáa cuíni Yă Ndiöxi cunduu. <sup>7</sup>Te ío váha cuu ìní-ndó càda-ndo chiu<sup>n</sup>-á<sup>n</sup>, chi cada ìní-ndó sã dàtná tnúhu sá chíú<sup>n</sup> Xítóhó Jesucristú quidé-ndó te ñá díú chiú<sup>n</sup> cue ñáyi ñuyú-a. <sup>8</sup>Te nchòhó sa cùnuni ìní-ndó sã nàcuáa nduu chiu<sup>n</sup> váha ní quide-ndo ñi<sup>n</sup> ñi<sup>n</sup>-ndo, te duca<sup>n</sup> cùnduu sá táxi Xítóhó Jesucristú

nduu táhú-ndó cuèi cùu-ndo ñáyi dàñá queé nũ chíú<sup>n</sup> pàtróo<sup>n</sup>-xi àdi cuu-ndo ñáyi ñá túu tnàhí dàñá quee núu chíú<sup>n</sup> pàtróo<sup>n</sup>-xi.

<sup>9</sup>Te nchaa nchòhó ñáyi xindecu ndihi ñáyi xinu cuechi, tnàhá-ndó tàú-ndó càda váha-ndo sã chíú-xí cuè ñáyi xinu cuechi núu-ndó, te vá cùnduu nínu ìní-ndó nũ-yu, te chí cuàha cuendá sá díú-ní Xítóhó Jesucristú Ya ndécú àndiu taxi tnumí ñáhá-gă xii-ndo ndihí-yu, te sá chíú-xí mèe-gá chi ñi<sup>n</sup>-ni cùu-ndo núu-gă, te ñi<sup>n</sup>-ni càda ñaha-gă xii-ndo.

**Yă Ndiöxi chindèe-gá cue ñáyi ndècu ichi-gá cuendá sá vã ndácú sàcuíhná nàa ndihi ñaha-xi xii-yu**

<sup>10</sup>Te vitna nchaa nchòhó ñáyi ndècu ndihi-í ichi Xítóhó Jesucristú càhí tnúhu-í xii-ndo sã ño nducu-ndo nàcuáa cada-ndo ñihí ndéé-ndó cùu ñi<sup>n</sup>nuu-ndo ndihi Xítóhó Jesucristú, chi mee-gă ío càhnu cuu-gá, te chindee ñaha-gă xii-ndo. <sup>11</sup>Te ñi-ni nchaa sá ní nduu táhú-ndó nũ Yă Ndiöxi ñi-ni nchaa xí<sup>n</sup> cuhu<sup>n</sup> ìní-ndó, chi xí<sup>n</sup> chindee ñaha-xi xii-ndo ñihí ndéé-ndó cùndecu-ndo cuendá sá vã dándàhú ñáhá sàcuíhná xii-ndo. <sup>12</sup>Chi nchoo ñà díú cuè ñáyi ñuyú-a nàa ndihi-o, chi ndihi cue espíritú cùndihi yucu ñávàha, te ñi-ni nchaa espíritú-á<sup>n</sup> cùnù-xi cuèi núu ñi<sup>n</sup> quide-xi nchaa sá cuèhé sá dúhá, te ñi-ni-xi cùnù-xi ñuyú-a sànu ichi-xi cue ñáyi quidé-yu nchaa sá cuèhé sá dúhá. <sup>13</sup>Te ío cuhu<sup>n</sup> ìní-ndó nchaa sá ní nduu táhú-ndó nũ Yă Ndiöxi cuendá duca<sup>n</sup> ñihí ndéé-ndó



cùndecu-ndo, te vá ndácú yùcu ñávãha ná cada ñaha-xi xii-ndo oré cuíní-xi coto ndeé ñáhá-xí. Te sátá ná dàquee tìhú-ndó yùcu ñávãha te ñíí-ni cunduu-ndo cùndecu-ndo ichi Yá Ndiöxí. <sup>14</sup>Te duca<sup>n</sup> cùndecu-ni-ndo ichi Yá Ndiöxí cada-ndo dàtná xíquide cue sandàdú, chi cue téé-á<sup>n</sup> ño ñíí xíndáa-güedé. Te cáhá<sup>n</sup>-ndó mèe-ni tnúhu ndáá tnúhu Yá Ndiöxí, te cuu-ndo dàtná cue sandàdú cue téé ndàda tii xití-xi òré quíhí<sup>n</sup>-güedé nàa-güedé. Te duca<sup>n</sup> sãtnahá-xi cuu-ndo te núu na càhá<sup>n</sup>-ndó mèe-ni tnúhu ndáá tnúhu Yá Ndiöxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xíxíhnu sá yídãhu ñaha xii-güedé òré nàa-güedé cuendá sá vã ñícuèhé-güedé. Te duca<sup>n</sup> sãtnahá-xi cuu-ndo te núu na càda ndáá-ndó cùndecu-ndo ichi-gá. <sup>15</sup>Te cundecu túha-ndo càhá<sup>n</sup>-ndó tnúhu Xítoho Jesucrístú, tnúhu sá càhá<sup>n</sup> nàcuáa cuu váha iní ñáyi cuendécú-yu, te cuu-ndo dàtná cue sandàdú cue téé ndíhu zapátú-xi quíhí<sup>n</sup>-güedé nàa-güedé. Te duca<sup>n</sup> sãtnahá-xi cuu-ndo te núu na cùndecu túha-ndo càhá<sup>n</sup>-ndó tnúhu Xítoho Jesucrístú núu ñáyi. <sup>16</sup>Te càchí tnúhu tucu-í xii-ndo sã ño quindáa iní-ndó Yã Ndiöxí cuendá sá vã ndácú sàcuíhna ná cada ñaha-xi xii-ndo, te duca<sup>n</sup> te cuu-ndo dàtná cue sandàdú cue téé xínehe vítú chínèe-güedé sáquídãhu ñaha-xi xii-güedé cuendá sá vã cuicú<sup>n</sup>-güedé sá nchicú<sup>n</sup> ñuhú téé ñaha cue téé nàa ndíhi-güedé. Te duca<sup>n</sup> sãtnahá-xi cuu-ndo te núu na quindáa iní-ndó Yã Ndiöxí.

<sup>17</sup>Te ío cuhu<sup>n</sup> iní-ndó sã ñí naníhí tãhú-ndó, te cuu-ndo dàtná cue sandàdú cue téé ñùhu mbelú cáxí<sup>n</sup>. Te duca<sup>n</sup> sãtnahá-xi cuu-ndo te núu na cùhu<sup>n</sup> iní-ndó sã ñí naníhí tãhú-ndó. Te ío cuhu<sup>n</sup> iní-ndó tnúhu Yá Ndiöxí, chi tnúhu-á<sup>n</sup> ñí taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuáhá<sup>n</sup>-güedé nàa-güedé. Te duca<sup>n</sup> sãtnahá-xi cuu-ndo te núu na cùhu<sup>n</sup> iní-ndó tnúhu Yá Ndiöxí. <sup>18</sup>Te vá dáñá ndeé-ndó càhá<sup>n</sup> ndíhi-ndo Yã Ndiöxí nàcuáa chindee ñaha Espíritú-gá xii-ndo, te cáca<sup>n</sup> tãhú-ndó nùu-gã nùu ná cuíní-ndó, te ío cundecu túha-ndo càhá<sup>n</sup> ndíhi-ndo-gã, te vá nátùhú iní-ndó càca<sup>n</sup> tãhú-ndó nùu-gã cuendá nchaa dava-gá cue ñáyi cuu cuendá-gá. <sup>19</sup>Te tnàhá cuendá-í cáca<sup>n</sup> tãhú-ndó nùu Yã Ndiöxí cuendá sá ná chindee ñaha-gá xii-í níhi-í tnúhu càhá<sup>n</sup>-í òré càhá<sup>n</sup>-í tnúhu-gá, te duca<sup>n</sup> vã yùhú-í càhá<sup>n</sup>-í nàcuáa ndùu tnúhu sá càhá<sup>n</sup> nàcuáa naníhí tãhú-ó nùu ñáyi tnúhu sá vãtá cùndèdóho-gá-yu. <sup>20</sup>Te Yá Ndiöxí ní cachí-gá sá yùhú cuu-í ñí<sup>n</sup> téé cada-í núu-gã càhá<sup>n</sup>-í tnúhu-gá núu ñáyi, te ñíu cuendá tnúhu-á<sup>n</sup> yíhí-í vecaá vitna. Te ío cáca<sup>n</sup> tãhú-ndó nùu Yã Ndiöxí cuendá-í cuendá sá yùhú cuyí-í ñí yùhu ní iní-í càhá<sup>n</sup>-í tnúhu-gá núu ñáyi nàcuáa tàu-xi cunduu.

#### Tnúhu ndeé núu ñí ndíhi-ná

<sup>21</sup>Te té Tiquicú téé ío cùu iní-í ndécú ndíhi-o ichi Xítoho Jesucrístú cúu-dẽ ñí<sup>n</sup> téé ío váha quide ndáá xínú cuèchi-dé núu

Xĩtohó Jesucristú, téé-á<sup>n</sup> cachí  
 tnúhu-dé xii-ndo nàcuáa cùu  
 ndecu-í ndìhi nchaà nàcuáa  
 quide-í cuèndá duca<sup>n</sup> cùtnuní  
 iní-ndó. <sup>22</sup>Te cuèndá xíá<sup>n</sup> nũu  
 cuìní-í tendaha-ĩ-dé quixi-dé núú  
 ndécú-ndó cuèndá cachí tnúhu-dé  
 xii-ndo nchàa nacuáa cùu ndecu-ndí  
 iha, te duca<sup>n</sup> tàxi-gá-dé tnúhu ndee  
 iní cundecu ndìhi-ndo.

<sup>23</sup>Te xìcá<sup>n</sup> táhù-í núú Tǎtá-ó  
 Dütú Ndiöxí ndìhi núú Xĩtohó

Jesucristú sá ncháá nchòhó ñáyiu  
 ndècu ndìhi-í ichi-gá sá òu-gá  
 ná cádá te ío váha cuu iní-ndó  
 cùndecu-ndo, te duca<sup>n</sup> òo cuu  
 iní tnáhá-ndó, te ío quindáá  
 iní-ndó-gǎ. <sup>24</sup>Te nchòhó ío cùu  
 iní-ndó Xĩtohó Jesucristú, te ñá  
 túú dàña ndeé-ndó cùu iní-ndó-gǎ.  
 Te mee Yǎ Ndiöxí ío na chìndee  
 chitúu ñaha-gǎ xii-ndo. Te duca<sup>n</sup>  
 na cùnduu. Te ío chí cádá ndèe  
 iní-nǎ vitna.

# TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑUÚ FÌLIPÚ

Té Páblú cádúha-dé tutú quíhí<sup>n</sup>  
ndaha ñáyiú quide ndáá xíndecu ichi  
Xítohó Jesucristú ndécú ñúú Filipú

**1** Yúhú té Páblú ndíhi té  
Timùteú cúú-ndí cue téé xínu  
cuechi núú Xítohó Jesucristú, te  
tèndaha-ndí tutú-a véxi ndaha  
nchòhó cue téé yíndaha nchaa  
ñáyiú ndècu ichi Xítohó Jesucristú,  
ndíhi cue téé chindee ñaha xii-ndo,  
ndíhi nchaa dava-gá ñáyiú xíquide  
ndáá ndécú ichi-gá ñúú Filipú. <sup>2</sup>Te  
xìcá<sup>n</sup> táhù-í núú Tátá-ó Dütú Ndiöxí  
ndíhi núú Xítohó Jesucristú sá ná  
chindee chitúu ñaha-gá xii-ndo, te  
duca<sup>n</sup> ndí nduú-gá ná cádá te ío  
váha cuu iní-ndó cùndecu-ndo.

Té Páblú càhá<sup>n</sup> ndíhi-dé Yá Ndiöxí  
cuendá nchaa ñáyiú ndècu ichi-gá

<sup>3</sup>Te ndí tnahá òré ndácú iní  
ñáhà-í xii-ndo, te ndácá<sup>n</sup> táhù-í  
núú Tátá-ó Dütú Ndiöxí sá  
ndécú-ndó ichi-gá. <sup>4</sup>Te ndí tnahá  
òré duca<sup>n</sup> quide-í te ío cùdí iní-í  
càhá<sup>n</sup> ndíhi-í-gá cuendá-ndó. <sup>5</sup>Chi  
ndéé cùtnàhá ní sándáá iní-ndó-gá  
ní ngúíta-ndo tnahá-ndó quide  
váha-ndo ndècu-ndo cuendá sá  
quèndáá iní ñáyiú tnúhu Xítohó

Jesucristú. <sup>6</sup>Te yúhú sàni ndáá  
iní-í sá Yá Ndiöxí Yaá ní quesaha  
chindee ñaha xii-ndo quide  
váha-ndo ndècu-ndo, te diu-ni-gá  
chindee ñaha-gá xii-ndo càda  
váha-ndo cùndecu-ndo ndéé  
ná sàá nduu quixi tucu Xítohó  
Jesucristú. <sup>7</sup>Te duca<sup>n</sup> tnàhí tàú-xi  
cani iní-í sá cúú-xí-ndó, chi ío cùu  
iní ñáhà-í xii-ndo. Te tnàhá-ndó  
ío chindee chitúu ñaha Yá Ndiöxí  
xii-ndo ndècu-ndo, te diu-ni duca<sup>n</sup>  
chindee ñaha-gá xii-ndo tnàhá-ndó  
cuèi vitna yèhi-í vecaá, te diu-ni  
duca<sup>n</sup> chindee ñaha-gá xii-í cuèi  
òré cuáhá<sup>n</sup>-í núú cuè ñáyiú ñá  
túú tnàhá iní tnúhu-gá, chi nìhí-í  
tnúhu nàdanhocáva-í ñuu ná  
tnúhu càhá<sup>n</sup>-yu cuendá-gá, te  
nchaa ñáyiú xàha<sup>n</sup>-í xíi-yu sá  
tnúhu-gá cúú-xí tnúhu ndáá cuiti.  
<sup>8</sup>Te mee Yá Ndiöxí nàhá ndáá-gá  
sá yúhú ío cùu iní ñáhà-í xii-ndo  
dàtná cúú iní ñáhá mèe Xítohó  
Jesucristú xii-o. <sup>9</sup>Te xìcá<sup>n</sup> táhù-í  
núú Yá Ndiöxí sá díú-gá ná chindee  
ñaha-gá xii-ndo te uu<sup>n</sup>-gá cuita  
cuu iní tnàhá-gá-ndó quíhí<sup>n</sup>, te  
duca<sup>n</sup> ío váha cuita cutnùní iní-ndó  
nchàa nacúáa sàni iní-gá cada-ndo,  
te duca<sup>n</sup> ío váha cuita cutnùní

tucu iní-ndó nàcuáa cundecu-ndo. <sup>10</sup>Te duca<sup>n</sup> cùtnuní tucu iní-ndó nchàa sá ïo-gá váha xini ñuhu-xi cada-ndo, te duca<sup>n</sup> te cuu-ndo ñáyi u cada mee-ni sá vâha, te duca<sup>n</sup> ñà túú tnàhí ná cùmání-ndó nũ Yă Ndiöxí ndéé ná sàá nduu quixi tucu Xítohó Jesucristú. <sup>11</sup>Te diu-ni Xítohó Jesucristú chindee ñaha-gá xii-ndo càda-ni-ndo nchaa núú sá vâha nàcuáa cuiní Yă Ndiöxí. Te sá dúcá<sup>n</sup> ná càda-ndo te ío cada càhnu-ndo-gá, te nchaa dava-gá ñáyi u cáhá<sup>n</sup> váha-yu cuendá-gá.

**Xítohó Jesucristú ío cùnuu-gá ndécú ndìhi-gá té Pàblú**

<sup>12</sup>Te nchaa nchòhó ñáyi u ndècu ndìhi-í ichi Xítohó Jesucristú na càchí tnúhu-í xii-ndo sá úú<sup>n</sup>-gă tá xíté nuu tnúhu-gá vitna yìhi-í vecaá. <sup>13</sup>Te nchaa cue tée cùu sandadú xĩndecu vechi<sup>n</sup> núú ndécú tée cùnuu xiní-güedé sá sá cuendá sá càhá<sup>n</sup>-í tnúhu Xítohó Jesucristú duha yìhi-í vecaá, te diu-ni duca<sup>n</sup> sà xiní nchaa dava-gá ñáyi u sá sá càhá<sup>n</sup>-í tnúhu-gá duha yìhi-í vecaá. <sup>14</sup>Te cuendá sá dúhá yìhi-í vecaá xĩ<sup>n</sup> ío-gá vâi ñáyi u ndècu ichi Yă Ndiöxí ta cùtnuní-gá iní-yu sá cúú-gă i<sup>n</sup> Yáa ío quide ndáá, te uu<sup>n</sup>-gă tá cùyí-yu càhá<sup>n</sup>-yu tnúhu-gá, te ñá túú tnàhí-gá yùhú-yu càhá<sup>n</sup>-yu.

<sup>15</sup>Te na càchí-í tnúhu ndáá-í xii-ndo sá dâva ñáyi u càhá<sup>n</sup>-yu tnúhu Xítohó Jesucristú cuendá-ni sá cúú cuedú iní ñáhă-yu xii-í sá ïo chindee ñaha-gá xii-í càhá<sup>n</sup>-í tnúhu-gá. Te duca<sup>n</sup> quidé-yu chi cuiní-yu nàá ndìhi ñáhă-yu xii-í, dico davá-yu chi ío váha sàni

iní-yu càhá<sup>n</sup>-yu tnúhu-gá. <sup>16-17</sup>Te ñáyi u-á<sup>n</sup> càhá<sup>n</sup>-yu tnúhu-gá chi cùu iní ñáhă-yu xii-í, te sa nàhá-yu sá sá cuendá sá càhá<sup>n</sup> váha-í cuendá tnúhu-gá núú ñáyi u ñá túú tnàhí iní tnúhu-gá, cuendá xĩ<sup>n</sup> yìhi-í vecaá. Te dava-gá-yu càhá<sup>n</sup>-yu tnúhu Xítohó Jesucristú cuendá-ni sá cuiní-yu cuu sá vâha xii mée-yu, te ñá díú sá càhá<sup>n</sup>-yu cuendá sá sání vâha iní-yu. Te duca<sup>n</sup> quidé-yu chi cuendá cuiní-yu sá nãndi-gá cada ñaha-güedé xii-í. <sup>18</sup>Dico ío cùdí iní-í sá càhá<sup>n</sup>-yu tnúhu Xítohó Jesucristú cuèi cùu váha iní-yu àdi ñá túú cùu váha iní-yu càhá<sup>n</sup>-yu.

Te diu-ni duca<sup>n</sup> cùdí iní-í núú cuahá<sup>n</sup> núú vèxi. <sup>19</sup>Te cùtnuní iní-í sá sá cuendá nchaa sá quidé ñaha-güedé xii-í, cuendá xĩ<sup>n</sup> cada váha ñaha Yă Ndiöxí xii-í, chi nchòhó ío càhá<sup>n</sup> ndìhi-ndo-gă cuendá-í, te Espiritú ní taxi Xítohó Jesucristú ndécú ndìhi-o ío chindee ñaha-xi xii-í. <sup>20</sup>Te cuiní-í sá ñà túú tnàhí ná cumání-í núú Yă Ndiöxí cuendá sá vă cúú càhá<sup>n</sup> núú-í, te cùtnuní iní-í sá díú-gă chindee ñaha-gá xii-í. Te cuiní tucu-í sá ïo cuyi-í cáhá<sup>n</sup>-í tnúhu-gá vitna dâtná tá quide-í véxi, te duca<sup>n</sup> ïo cada nínu-í Xítohó Jesucristú cuèi vitna nini ndècu-í ñuyú-a te cuèi na cùú-í duca<sup>n</sup>-ni càda nínu-í-gá. <sup>21</sup>Te nini ndècu-í ñuyú-a te Xítohó Jesucristú ío cùnuu-gá ndécú ndìhi ñaha-gá xii-í, te na sàá nduu cùú-í te ío-gá váha tnahá-í chi nucúndecu-í ndìhi-gá. <sup>22</sup>Te núu na cùndecu-gá-í ñuyú-a te cada-gá-í chù<sup>n</sup> sá cúú-xí Yă Ndiöxí, te ñá cùtnuní iní-í nása cada-í nũu sá cùndècu-í àdi sá cùú-í. <sup>23</sup>Te ío vâi

sani iní-í te cuíní-í cuú-í chi ío-gá váha cundecu-í núú ndécú Xítohó Jesucristú. <sup>24</sup>Dico sá cúú-xí nchòhó chi ío xini ñuhu-xi cundecu-í. <sup>25</sup>Te cùtnuní ndáá iní-í sá ì<sup>n</sup> tnúhu ndáá càhá<sup>n</sup>-í, te cùtnuní tucu iní-í sá cùndècu-ni-í cundecu ndìhi ñaha-í xii-ndo nchàa-ndo cuendá chindee ñaha-í xii-ndo cuíta quindáá-gá iní-ndó Xítohó Jesucristú quíh<sup>n</sup>, te duca<sup>n</sup> ío cudíí iní-ndó cùndecu-ndo. <sup>26</sup>Te duca<sup>n</sup> te uu<sup>n</sup>-gá cachí-ndó sá ìo càhnu cuu Xítohó Jesucristú cuendá sá ní dácacu ñaha-gá xii-í ndécú ndìhi ñaha-í xii-ndo.

<sup>27</sup>Te xini ñuhu-xi cada-ndo nchaa nacuaá càhá<sup>n</sup> tnúhu Xítohó Jesucristú. Te núu ní ndacu-í véxi coto ñaha-í xii-ndo, te dàvá-á<sup>n</sup> quiní ndáá-í sá ndécú-ní-ndó ìchi Xítohó Jesucristú. Dico núu ñá túú ní ndàcu-í quixi coto ñaha-í xii-ndo ña, te dñu-ni níhì-í tnúhu sá ndécú-ní-ndó ìchi-gá, te níhí tucu-í tnúhu sá ì<sup>n</sup>-ní cùu-ndo ndecu-ndo, te níhí tucu-í tnúhu sá ì<sup>n</sup>nuu nducu ndee-ndo cahá<sup>n</sup>-ndó tnúhu Yá Ndiöxí núú ñáyiú, tnúhu sá sàndáá iní-ndó. <sup>28</sup>Te ñá túú yùhú-ndó nchàa sá quidé ñaha ñáyiú cùu úhú iní ñáhá xii-ndo, te sá dúcá<sup>n</sup> quide-ndo ñá túú yùhú-ndó nchàa sá quidé ñáhá-yu xii-ndo, te ndìxi túu iní-yu sá nchòhó ndécú-ndó ì<sup>n</sup> ichi núú nánihí tàhú-ndó, te ñáyiú-á<sup>n</sup> cuíta nihnú-yu, chi duca<sup>n</sup> ní cachí Yá Ndiöxí cunduu. <sup>29</sup>Te mee Yá Ndiöxí ní taxi-gá tnúhu ndee ìní sá quindáá iní-ó Xítohó Jesucristú, te ñá dñú-ní sá quindáá iní-ó-gá chi tnàhá ndoho-o cuendá-gá. <sup>30</sup>Te tnàhá nchòhó ndóhó-ndó cuendá-gá vitna, te

nchòhó ní xiní núú-ndó nàcuáa ní ndoho-í, te vitna níhí-ndó tnúhu nchaa nàcuáa ndòho tucu-í.

**Xítohó Jesucristú ñá túú ní quide nínu-gá méé-gá dico Yá Ndiöxí ní quide nínu ñaha xii-gá**

**2** Te Xítohó Jesucristú dácàhu iní ñáhá-gá xii-ndo nàcuáa cundecu-ndo, te cùu iní ñáhá-gá xii-ndo nàcuáa cuu váha iní-ndó cùndecu-ndo, te ndècu ndìhi-ndo Espiritú Yá Ndiöxí, te ío cùndahú iní tnàhá-ndó. <sup>2</sup>Te xíä<sup>n</sup> núu càhá<sup>n</sup>-í dóho-ndo sá ìo cuu ì<sup>n</sup>nuu-ni-ndo cùndecu-ndo nacuaá ío-gá cudíí iní-í, te ì<sup>n</sup>-ni cùu iní tnàhá-ndó, te ì<sup>n</sup>-ni càni iní-ndó, te ì<sup>n</sup>-ni càda-ndo. <sup>3</sup>Te vá cadá ñinu-ndo mèe-ndo nducu-ndo mee-ni sá cúú-xí mèe-ndo, chi cunduu ndàhú iní-ndó, te cani iní-ndó sá tnàha ñáyiú-ndo ío-gá cùnùú-yu dácúxí mèe-ndo. <sup>4</sup>Te ní vâ cání iní-ndó nducu-ndo mee-ni sá vâha sá cúú-xí mèe-ndo, chi nducu-ndo sá cúú-xí tnàhá cuendá tnàha ñáyiú-ndo.

<sup>5</sup>Te ío váha cani iní-ndó nàcuáa cundecu-ndo dàtná quidé mèe Xítohó Jesucristú. <sup>6</sup>Te ì<sup>n</sup>-ni cùu Xítohó Jesucristú ndìhi Yá Ndiöxí. Te cuèi duca<sup>n</sup> dico mee Xítohó Jesucristú ní sani iní-gá sá ñá túú cùyica cundecu-gá taxi tnùnì-gá ndìhi Yá Ndiöxí. <sup>7</sup>Te ní dñá-gá sá cùnùu-gá andñu te ní quixi-gá ñuyúú-a ní cuu-gá ì<sup>n</sup> ñáyiú, te ní quide-gá dàtná quidé ì<sup>n</sup> tée xinu cuechi. <sup>8</sup>Te ní cuu-gá ì<sup>n</sup> tée dàtná ndàa cue tée xíndecu ñuyúú-a, te ní cuu-gá ì<sup>n</sup> tée ío ndàhú iní-xi chi ñá túú ní quide nínu-gá méé-gá, te ní sàndáá iní-gá ní quide-gá nchaa

nàcuáa ní xáha<sup>n</sup> Yá Ndiöxí xii-gá cútñàhá ní quixi-gá ñuyíú-a. Te sá dúcá<sup>n</sup> ñí sàndáá iní-gá xiǎ<sup>n</sup> ní xíhí-gá núú cùrúxí. <sup>9</sup>Te xiǎ<sup>n</sup> ío ní quide nínu ñaha Yá Ndiöxí xii Xítóhó Jesucristú cuendá ío cunu-gă. Te ní xáha<sup>n</sup> Yá Ndiöxí xii Xítóhó Jesucristú sá cúú-gă Xítóhó nchaa ñáyíu ndècu ñuyíú-a. <sup>10</sup>Te duca<sup>n</sup> ñí quide Yá Ndiöxí cuendá nchaa Espíritú ndécú àndíu, ndíhi nchaa ñáyíu ndècu ñuyíú-a, ndíhi nchaa ñáyíu ní xíhí ngüññí xítÿ-yu ndíhi nchaa espíritú-á<sup>n</sup> te cachí-yu ndíhi-xi sá ío càhnu cuu Xítóhó Jesucristú. <sup>11</sup>Te nchaá-yu cachí-yu sá Xítóhó Jesucristú cúú-gă Yaá táxí tñuní. Te sá dúcá<sup>n</sup> càdá-yu, te quide cahnu-yu Dútú Ndiöxí.

**Ñáyíu ndècu ichi Xítóhó Jesucristú cúú-yu dàtná ìí<sup>n</sup> ñuhú**

<sup>12</sup>Te xiǎ<sup>n</sup> ñúu nchaa nchòhó ñáyíu ío cùu iní-í cuiní-í sá quíndáá iní ñáhá-ndó xì-í dàtná ní quide-ndo cútñàhá ní xíndecu ndíhi ñaha-í xii-ndo, chi dàvá-á<sup>n</sup> ñà túú tñàhí ni dàña ndeé-ndó ñí sàndáá iní ñáhá-ndó xì-í. Te cuiní-í sá úú<sup>n</sup>-gă quíndáá iní ñáhá-ndó xì-í vitna ñá túú ndècu ndíhi ñaha-í xii-ndo. Te ío nducu ndèe-ndo cada-ndo nchaa nacuáa tàú-xi cunduu ndéé ná sàá nduu ndùu táhú-ndó cùndecu-ndo ndíhi Xítóhó Jesucristú, te ío canehe-ndo sá yíñùhu núú-gă. <sup>13</sup>Te Yá Ndiöxí ío váha dàcahu iní ñáhá-gă xii-ndo càda-ndo nchaa nacuáa cuiní méé-gă, te diu-ni mee-gă chíndèè ñaha-gá xii-ndo dùca<sup>n</sup> quide-ndo.

<sup>14</sup>Te vá cání iní-ndó ñà tñúhu cáhá<sup>n</sup>-ndó cuendá ñáyíu, te ni

ñà túú nàndí tñúhu cútñàha-ndo ndíhí-yu, <sup>15</sup>te duca<sup>n</sup> te cuu-ndo ñáyíu ñà túú cuèchi-xi núú Yá Ndiöxí. Te nchòhó ñáyíu cùu déhe Yá Ndiöxí, ñà túú tñàhí-gá ná cumání-ndó ñúú-gă ñini ndècu-ndo tnuú nchaa ñáyíu ndècu ichi cuèhé ichi duha ñuyíú-a, ñáyíu cuihna ìní-xi. Te cuu-ndo dàtná chódíní sá dáyèhé níu nee, <sup>16</sup>te duca<sup>n</sup> chi dàcuaha-ndo ñáyíu tñúhu Yá Ndiöxí tñúhu sá càhá<sup>n</sup> nàcuáa naníhí tàhú-yu. Te núu duca<sup>n</sup>-ni na càda-ndo te òré ná sàá nduu càda ndáá Xítóhó Jesucristú nchaa yícá cuèchi ñáyíu, te dàvá-á<sup>n</sup> vǎ cúú càha<sup>n</sup> núú-í, chi ñà túú dió duca<sup>n</sup> ni sàhni iní-í cada-í nchaa chùu<sup>n</sup> ní táhú-gă. <sup>17</sup>Te nchòhó ío váha quide-ndo ndecu-ndo ichi Yá Ndiöxí chi sàndáá iní-ndó-gă, te yúhú cahni ñaha-güedè xii-í cuendá nchaa sá vǎha quide-ó. Te xiǎ<sup>n</sup> ío cùdǎí iní-í te cùdǎí tucu iní-í dàtná cùdǎí iní-ndó cuendá nchaa sá vǎha quide-ndo. <sup>18</sup>Te diu-ni duca<sup>n</sup> ío chí cùdǎí iní dàtná cùdǎí iní mèè-í cuendá nchaa sá yǎha-í ndècù-í.

**Té Timùteú ndíhi té Epafròditú**

<sup>19</sup>Te núu Xítóhó Jesucristú ná càchí-gă te ndíhi-ni tendaha-í té Timùteú quixi-dé quixi coto ñaha-dè xii-ndo nàcuáa cudǎí iní-ndó. Te òré ndixi-dé canaha-dè tñúhu ndixi núu nása cùu ndecu-ndo, te tñàhá yúhú ío cudǎí iní-í tucu. <sup>20</sup>Te núú ncháá cuè téé ndècu ndíhi-í te ìí<sup>n</sup>diì-ni té Timùteú-a cùu-dé téé ío váha sàni iní-xi dàtná sání iní-í, chi diu tñàhí-ni-dé ío sàni iní-dé ñúu nása ndècu-ndo. <sup>21</sup>Chi dava-gă-güedè

mee-ni sã cúu-xí mèe-güedé ío sàni iní-güedé, te ñá túú sàni iní-güedé cada-güedé chiú<sup>n</sup> tahu Xítóhó Jesucristú. <sup>22</sup>Te nchòhó sa xìní-ndó sã tẽ Timùteú-a cùu-dé ìí<sup>n</sup> tée quide váha chi nándi sá tá yãha-dé véxi te quide ndee iní-dé. Te cùu-dé dàtná ìí<sup>n</sup> déhe-í ndécú ndìhi ñaha-dé xii-í xínú cuèchi-ndí nùú Xítóhó Jesucristú càhá<sup>n</sup>-ndí tnúhu-gá nùú ñáyiu. <sup>23</sup>Te òré ná cùtnuní nùu nása cada ñaha-güedé xii-í te ndìhi-ni tendaha-í-dé quixi coto ñaha-dé xii-ndo. <sup>24</sup>Te sàni iní-í sá Xítóhó Jesucristú cada-gá te tnàhá mèe-í ío ndìhi quixi coto ñaha-í xii-ndo.

<sup>25</sup>Te tnàhá sání iní-í sá ìo xìni ñuhu-xi tendaha-í té Epafròditú tée ndècu ndìhi-o ichi Xítóhó Jesucristú ndixi coto ñaha-dé xii-ndo, chi tnàhá-dé quidé-dé chiú<sup>n</sup>-gá te quide ndee iní-dé tnàhá-dé nándi yáha-dé sá cuendá-gá, te ñu mee-ndo ñi tendaha-ndo-dé véxi-dé cuendá coto ñaha-dé xii-í. <sup>26</sup>Te duca<sup>n</sup> cuiní-í tendaha-í-dé ndixi-dé chi mee-dé ío sàni iní-dé ndixi cáhá<sup>n</sup> ndìhi ñaha-dé xii-ndo, te ío ndìhú iní-dé sá ni ñihí-ndó tnúhu sá cùhú-dé ní cùu. <sup>27</sup>Te ndáá sá ñi cùhú-dé chi luha ndiqui<sup>n</sup>-ná cuú-dé ní cùu, dico Yá Ndiòxí ní cundàhú iní ñáhá-gã xii-dé ní quide tátna ñaha-gã te ní ndúha-dé. Te ñá díú-ní mèe-dé duca<sup>n</sup> ñi cundahú iní ñáhá-gã xii-dé chi tnàhá yúhú ío ní cundàhú iní ñáhá-gã xii-í, chi nùu ni xíhí-dé te ío-gá ndíhú iní-í ní cùu. <sup>28</sup>Te xíã<sup>n</sup> ío ndìhi cuiní-í tendaha-í-dé ndixi-dé cuendá òré nasáá-dé nùú-ndó te ío cudíí iní-ndó, te duca<sup>n</sup> yúhú ñá túú-gã ná cani iní-í. <sup>29</sup>Te òré nasáá-dé te ío cudíí

iní-ndó nàquehe<sup>n</sup> cuendá-ndó-dé, te duca<sup>n</sup> ìo ndacá<sup>n</sup> táhú-ndó nùú Xítóhó Jesucristú cuendá-dé. Te ío canehe-ndo sã yíñhu nùú nchaa cue tée quide datná quidé-dé. <sup>30</sup>Chi tée-a sa luha ndiqui<sup>n</sup>-ná cuú-dé ní cùu sá xínú cuèchi-dé nùú Xítóhó Jesucristú, te ní sani iní-dé sá ñá túú ñá cada-xi cuèi na cùu-dé ní quide-dé nchaa chiú<sup>n</sup> sá cúmãni cada-ndo cuendá-í ní cùu.

### Ñáyiu cundáá nùú Yá Ndiòxí

**3** Te vitna nchaa nchòhó ñáyiu ndècu ndìhi-í ichi Xítóhó Jesucristú càhá<sup>n</sup> ndàhú-í nùú-ndó sã ìo cudíí iní-ndó sã yíndàha ñaha-gá xii-ndo. Te yúhú ñá túú cùu dusa<sup>n</sup>-í tee tucu-í nchaa tnúhu sá sà ní dánèhé ñáhà-í xii-ndo, chi cùu-xi tnúhu sá ìo chìndee ñaha-xi xii-ndo. <sup>2</sup>Te ío quíhi iní-ndó vã cáda cuendá-ndó ñi ìí<sup>n</sup> tnúhu càhá<sup>n</sup> cue tée ío cuihna iní-xi ñá túú tnàhí cuiní cada sá vãha, chi cue tée-á<sup>n</sup> néhé-güedé iní iná chi càchí-güedé sá ncháá cuè tée xìni ñuhu-xi cuáha-güedé sèñá ñii-güedé cuendá duca<sup>n</sup> cùdiu-güedé nùú Yá Ndiòxí. <sup>3</sup>Dico nchoo chi cùdiu-o nùú Yá Ndiòxí cuèi dava-o sà ní ngúndecu sèñá ñii-o te dava-o ñáhá, chi Espíritú-gá chíndèe ñaha-xi xii-o quide-o nchaa nacuaa tàú-xi cunduu cuendá cuu càhnu-gá. Te ío cudíí iní-ó càchí-ó sã ìo càhnu cuu Xítóhó Jesucristú, te ñá túú sàni iní-ó sã sã cuendá nchaa sá vãha quide-o cùdiu-o nùú Yá Ndiòxí. <sup>4</sup>Te nùu dicó cuendá nchaa sá vãha quide-o cùdiu-o nùú Yá Ndiòxí, te yúhú sa ama-gá cùdiu-í nùú-gã cuendá nchaa sá ñi quide-í

ní cùu te núu dìcò duca<sup>n</sup>. Te ìo cue tée càchí-güedé sá cùdiu-güedé núu Yá Ndiòxí cuendá nchaa sá vâha quide-güedé. Te yúhú uu<sup>n</sup>-gá duca<sup>n</sup> cáhá<sup>n</sup>-í nùu dìcò sá cùú chi yúhú ní xídó-gá-í ní quide-í dàcúxí dàva-gá-güedé. <sup>5</sup>Te núu ùná-ni nduu sá nǐ cacu-í te ní sáha-güedé sèñá ññ-í, te yúhú cùú-í tée isràél, te mei ñàní tnáhá ndíi Benjàmín tée ní xíndecu ndéé sanaha cùu-í. Te càhá<sup>n</sup>-í tnúhu hèbreu tnúhu càhá<sup>n</sup> tâtà-í ndíhi nánà-í, te ní cundihi-í nchaa cue tée cùu fariséu, te ní cánchezú<sup>n</sup> nihnu-í nchaa nàcuáa ní cáhá<sup>n</sup> ndíi Moisés dàtná xíquide mee-güedé. <sup>6</sup>Te yúhú ní sani iní-í sá ì<sup>n</sup> ichi ndáá ndécù-í ní cùu, te ío ní cuiní-í cunu cuechi-í núu Yá Ndiòxí, núu xíá<sup>n</sup> nándi sá nǐ quide-í nchaa ñáyi ndècu ichi Xítóhó Jesucristú, te vá yò ì<sup>n</sup> ni xóo cúnaha ì<sup>n</sup> tnúhu xii-í cachí-yu sá ñà túú quide-í nàcuáa ní cáhá<sup>n</sup> ndíi Moisés ní cùu. <sup>7</sup>Te nchaa sá sání iní-í sá ìo nàndíhi nchicú<sup>n</sup> nihnu-í ní cùu, ní cutnùní iní-í sá ñà túú tnàhí chindee ñaha-xi nacuáa cundáá-í núu Yá Ndiòxí, núu xíá<sup>n</sup> duu<sup>n</sup> duu<sup>n</sup> ní xehndé iní-í sá vâ chíndèe ñaha-xi cuendá sá nǐ cuiní-í cundecu ndíhi-í Xítóhó Jesucristú. <sup>8</sup>Te nchaa sá càchí ñáyi chindee ñaha cundáá-ó núu Yá Ndiòxí ní cutnùní iní-í sá ñà túú chindee ñaha-xi. Te yúhú ní cutnùní iní-í sá ìo-gá vâha tnahá tnúhu-o ndíhi Xítóhó Jesucristú. Te nchaa sá sání iní-í chíndèe ñaha xii-í ní cùu, ñà túú-gá sàndáá iní-í sá chíndèe ñaha-xi vitna chi ní cutnùní iní-í sá ñà túú nàndíhi-xi. Te duca<sup>n</sup> quide-í ñà túú-gá sàndáá

iní-í nchaa xíá<sup>n</sup> sá chíndèe ñaha-xi, chi cuiní-í sá úú<sup>n</sup>-gá cuita tnahá tnúhu-í ndíhi Xítóhó Jesucristú quíhí<sup>n</sup>, <sup>9</sup>te cuu ì<sup>n</sup>nuu-í ndíhi-gá, te duca<sup>n</sup>-ni cundáá-í núu Yá Ndiòxí dàtná cundáá-í vitna, dico ñà díú cuendá sá nchicú<sup>n</sup> nihnu-í nàcuáa ní cáhá<sup>n</sup> ndíi Moisés ní cùu, chi cuendá sá sàndáá iní-í Xítóhó Jesucristú. Te Yá Ndiòxí ní quide-gá cundáá-í núu-gá, te duca<sup>n</sup> chi ní sàndáá iní-í Xítóhó Jesucristú. <sup>10</sup>Te cuiní-í cutnùní iní-í nchaa nàcuáa sàni iní-í Xítóhó Jesucristú, te cuiní-í sá ìo chindee ñaha-gá, te diu-ni-gá cùú-gá Yáa ní xíhí te ní ndoto-gá, te duca<sup>n</sup> cuiní-í cada-gá cuendá cada-í nchaa nàcuáa cuiní-gá. Te cuiní-í tnàhá-í ndoho-í dàtná ní ndoho-gá. Te yúhú cuiní-í sá vâ cadà-í ni ì<sup>n</sup> sá ñà túú tnàhá iní-í Yá Ndiòxí, chi diu cuendá-á<sup>n</sup> nǐ xíhí Xítóhó Jesucristú. <sup>11</sup>Te cuiní-í sá Yá Ndiòxí cachí-gá te tnàhá-í ndoto na sàá nduu ndòto nchaa ñáyi sa ní xíhí ní xíndecu ichi-gá.

**Cada-o nchaa nacuáa tàú-xi cunduu cuendá níhí-ó sá ndúú tãhú-ó**

<sup>12</sup>Te cumání-gá cada-í nchaa nàcuáa càhá<sup>n</sup>-í-a, te cumání-gá cada-í nchaa nàcuáa càhá<sup>n</sup> Yá Ndiòxí cuendá sá ñà túú-gá ná cumání-í núu-gá. Te ío nducu ndee-í nchicú<sup>n</sup> nihnu-í quidè-í nàcuáa duca<sup>n</sup> ñà túú-gá ná cumání-í núu-gá, chi diu cuendá-á<sup>n</sup> nǐ cáhá<sup>n</sup> ñáhá Xítóhó Jesucristú xii-í. <sup>13</sup>Te nchaa nchòhó ñáyi ndècu ndíhi-í ichi Xítóhó Jesucristú càchí tnúhu-í xii-ndo sá cùnùní ndáá iní-í sá vítná cumání-gá cada-í nchaa nàcuáa ñà túú-gá ná cumání-í



núu-gã. Te ní níhì-í ìí<sup>n</sup> sá ïo xìnì ñuhu-xi cada-í te xíá<sup>n</sup> quidè-í, te ñá túú-gã quidé cuendá-í nchaa sá ñí xóo cada-í, te ío ndücu ndee-í quidè-í nchaa nàcuáa càhá<sup>n</sup> Yá Ndiöxí. <sup>14</sup>Te ndücu ndee vihi-í nchicú<sup>n</sup> nihnu-í quidè-í nchaa nàcuáa càhá<sup>n</sup>-gá, te ñiu-ni duca<sup>n</sup> càda-í ndéé ná sáá nduu sáá-í núú ndécú-gã taxi-gá sá ndúú tãhù-í. Te duca<sup>n</sup> tñàhí sa ní cáhá<sup>n</sup> ñáhá-gã xii-o cündecu-o ndihí-gá, te duca<sup>n</sup> ñí cáhá<sup>n</sup> ñáhá-gã xii-o sá cuendá Xítóhó Jesucristú chi tñàhá tñuhu-o ndihí-gá.

<sup>15</sup>Te nchaa nchòhó ñáyiú quide váha ndècu ichi Yá Ndiöxí xìnì ñuhu-xi cani iní-ndó dàtná sání ìní-í-a, àdi núu dava-ndo ñà túú sàni iní-ndó dàtná sání ìní-í-a, dico mee Yá Ndiöxí dandixi túu-gá iní-ndó te cutnùni iní-ndó nàcuáa cada-ndo. <sup>16</sup>Te xìnì ñuhu-ni-xi cada-o nchaa nacuáa ta quide-o véxi.

<sup>17</sup>Te nchaa nchòhó ñáyiú ndècu ndihí-í ichi Xítóhó Jesucristú càhá<sup>n</sup>-í dóho-ndo sã cáncchícú<sup>n</sup> nihnu-ndo càda-ndo datná quidè-í. Te cundehe-ndo nàcuáa quide nchaa ñáyiú sa nchicú<sup>n</sup> nihnu nchaa nàcuáa dànehé ñáhà-í xii-ndo cuendá duca<sup>n</sup> càda-ndo tñahá-ndó. <sup>18</sup>Te sa ní cuu vai xito cachí tñuhu-í xii-ndo sã ìo ñáyiú ñá túú tñàhí cùu váha iní-xi sá ñí xíhí Xítóhó Jesucristú núú cùrúxí cuendá sá nánihí tãhù-ó. Te ndihí ndute núu-í dándàcu iní ñáhà-í xii-ndo cuendá-yu. <sup>19</sup>Te sáá nduu te nchaa ñáyiú duca<sup>n</sup> xíquide-á<sup>n</sup> cuíta nihnú-yu, chi mee-ni nchàa sá cuèhé sá dúhá ñuhu iní-yu te

ñiu-ni nchaa xíá<sup>n</sup> cúnùu quidé-yu, te cucaha<sup>n</sup> núu-yu cuendá nchaa sá quidé-yu núu dicó sá cúú, dico ñáhá chi da quide cahnú-yu mèe-yu cuendá nchaa xíá<sup>n</sup>. Te mee-ni nchàa sá ìo ñuyíú-a ñuhu iní-yu. <sup>20</sup>Dico nchoo chi andíu ndècu núú cúú ñúú-ó, te ndètu cahnu-o sáá nduu quixi tucu Xítóhó Jesucristú nacuaca ñaha-gã xii-o. Te ñiu-ni-gá cúú-gã Yaá ní dácàcu nihnu ñaha xii-o núú ùhú núú ndàhú. <sup>21</sup>Te yiqui cùñú-ó chi vá cùdíi-xi cundecu-xi dàtná cáá-xí vitna, dico mee Xítóhó Jesucristú nadama-gá yiqui cùñú-ó te ndada-gá dàtná ní nduu yiqui cùñú mèe-gã cútnàhá ní ndoto-gá. Te duca<sup>n</sup> càda-gá chi ndàcu-gá quidé-gã nchaa sá vãha càchí iní-gá, te duca<sup>n</sup> tàxi tñuní-gá nchaandí tùhú sá ìo.

**Ío cudíí ìní-ó sã ndécú-ó  
ichi Xítóhó Jesucristú**

**4** Te nchaa nchòhó ñáyiú ío cùu iní-í ndécú ndihí-í ichi Xítóhó Jesucristú ío cuíní-í cáhá<sup>n</sup> ndihí ñaha-í xii-ndo. Te ío cudíí ìní-í cuendá nchaa sá vãha quide-ndo chi ñá túú ní xíta chiú<sup>n</sup> Yá Ndiöxí ní quide-í sá cúú-xí-ndó, te ñiu-ni nchòhó ñáyiú ío cùu iní-í càhá<sup>n</sup>-í dóho-ndo sã cáncchícú<sup>n</sup> nihnu-ni-ndo ichi Xítóhó Jesucristú.

<sup>2</sup>Te yòhó tá Vòdiá ndihí yòhó tá Sñtiqué càhá<sup>n</sup> ndàhú-í núú-ndó sã cúú ìí<sup>n</sup>nuu-ndo cundecu-ndo ichi Xítóhó Jesucristú. <sup>3</sup>Te yòhó téé cundihí-í quide ndáá quidé nchàa chiu<sup>n</sup> quide-í, càhá<sup>n</sup> ndàhú-í núú-n sã chindèe tñuhu-n úú ñáyiú ñíhí-á<sup>n</sup> cuendá sá ná cùu ìí<sup>n</sup>nuú-yu cundecú-yu, chi cútnàhá ní xíndecu

ndihi ñàhá-yu xii-í ío ní chindee ñàhá-yu xii-í, ndihi té Clémenté, ndihi nchaa dava-gá-yu ní quide-ndí chiu<sup>n</sup> Xítohó Jesucristú, te nchaa ñáyi-u-á<sup>n</sup> sa yòdo tnuní-yu núú tútú Yá Ndiöxí sá ndúú tǎhǔ-yu cundecú-yu ndihi-gá ni caa ni quíhí<sup>n</sup>.

<sup>4</sup>Te nchaa-ni nduu ío cudíí ìní-ndó sǎ ndécú-ndó ìchi Xítohó Jesucristú. iTe càhá<sup>n</sup>-ni tucu-í dóho-ndo sǎ cúdíí ndisa ìní-ndó! <sup>5</sup>Te ío váha cuu ìní-ndó cǎhá<sup>n</sup> ndihi-ndo ñǎyi-u cuèndá ná cùnuni ìní-yu sá cúú-ndó ñǎyi-u váha ìní-xi, chi sa ta cùyatni nduu quixi tucu Xítohó Jesucristú.

<sup>6</sup>Te ñá túú tnahí ná cani ìní-ndó te núu nása cùu ndecu-ndo, chi cǎhá<sup>n</sup> ndihi-ndo Yá Ndiöxí cuèndá sá ná chindee ñaha-gá xii-ndo. Te ío ndacá<sup>n</sup> táhú-ndó núú-gǎ. <sup>7</sup>Te núu duca<sup>n</sup> na càda-ndo te Yá Ndiöxí cada-gá te ío váha cuu ìní-ndó cùndecu-ndo. Te nchoo ñǎyi-u ñá túú cùnuni ìní-ó nása quide-gá ndéé duca<sup>n</sup> ío váha cùu ìní-ó, te duca<sup>n</sup> ío váha cùu ìní-ó chi cùu ìí<sup>n</sup>nuu-o ndihi Xítohó Jesucristú.

**Mee-ni sǎ váha cuhu<sup>n</sup> ìní-ó**

<sup>8</sup>Te càhá<sup>n</sup> ndàhú tucu-í núú nchaa nchóhó ñáyi-u ndècu ndihi-í ìchi Xítohó Jesucristú sá méé-ní sǎ váha cuhu<sup>n</sup> ìní-ndó. Te xini ñuhu-xi cuhu<sup>n</sup> ìní-ndó mèe-ni nchaa tnúhu ndáá, ndihi nchaa tnúhu yíñùhu, ndihi nchaa tnúhu sǎ ío cudíí ìní-ó, ndihi nchaa tnúhu sǎ ío vii ío váha cuáhá<sup>n</sup>, ndihi nchaa tnúhu sǎ ñá túú ñuhu tnahá tnúhu cuèhé, ndihi nchaa tnúhu sǎ cǎchí ñáyi-u váha, ndihi nchaa dava-gá tnúhu sǎ sání

ìní méé-ndó sǎ ío váha te diu-ni nchaa xíá<sup>n</sup> cuhu<sup>n</sup> ìní-ndó.

<sup>9</sup>Te cútnàhá ní xindecu ndihi ñaha-í xii-ndo ní dánèhé ñàhá-í nàcuáa cada-ndo te ní sándáá ìní-ndó. Te xíá<sup>n</sup> càhá<sup>n</sup>-í dóho-ndo sǎ vǎ dáñá ndéé-ndó càda-ndo, te diu-ni duca<sup>n</sup> vǎ dáñá ndéé-ndó càda-ndo nchaa nacuáa ní quide-í ní xiní-ndó. Te núu duca<sup>n</sup> na càda-ndo te Yá Ndiöxí Yaá quidé ío váha cùu ìní-ó ndècu-o cundecu ndihi ñaha-gá xii-ndo.

**Ñáyi-u ñuú Filipú ndécú ìchi Xítohó Jesucristú sǎñàhá-yu sá ndúú tǎhǔ tǎ Pǎblú**

<sup>10</sup>Te cùdíí víhí ìní-í ndacá<sup>n</sup> táhù-í núú Xítohó Jesucristú sǎ ní ndacu ìní ñáhá-ndó xii-í, dico ñá díú sǎ ñá túú ñuhu ìní ñáhá-ndó xii-í chi dicó sǎ ñá ñihí-ndó nàcuáa cada-ndo chindee ñaha-ndo xii-í ní cùu. <sup>11</sup>Te ñá díú sǎ dúhá càhá<sup>n</sup>-í te cani ìní-ndó sǎ cǎchí tnúhu-í xii-ndo sǎ lò ìí<sup>n</sup> sǎ cùmǎní xii-í, chi yúhú cùu váha-ni ìní-í núu lò xii-í àdi ñá túú lò. <sup>12</sup>Te xini-í cunduu ndàhú-í, te xini-í cunduu cuica-í, te xini-í caxi-í ndahá xití-í, te xini-í cuú-í docó, te xini-í nàcuáa quide-xi oré ñá túú vǎdana ná ndécú ndìhi-o, te xini-í nàcuáa quide-xi oré xidó ndécú ndìhi-o. Te duca<sup>n</sup> ní cutúha-í quidè-í cuèndá nchaa nàcuáa ta yǎha-í véxi. <sup>13</sup>Te nchaa ndàcu-í quidè-í chi Xítohó Jesucristú chindèe ñaha-gá xii-í. <sup>14</sup>Te nchòhó ío váha ní quide-ndo ní cundàhú ìní ñáhá-ndó xii-í ní chindee ñaha-ndo vitna ndecu ndihi-í tnúndòho.

<sup>15</sup>Te nchòhó cue ñáyi-u ñuú Filipú sa nàha-ndo nacuáa ní cuu cútnàhá

ní ngúíta-í càhá<sup>n</sup>-í tnúhu Xítóhó Jesucristú distrítú Macèdoniá, te cútnàhá ní ndee-í distrítú-á<sup>n</sup> te ðiu tnàhí-ni nchòhó ní taxi-ndo sã ndúú tãhù-í, te nchaa ñáyiú ndècu ichi Xítóhó Jesucristú dava-gá xichi ñá túú tnàhí ni chìndee ñahá-yu xii-í. <sup>16</sup>Te cuèi cútnàhá ní xìndecu-í ñuú Tesalónica tít ní xito ní tendaha-ndo sã ndúú tãhù-í sá ñí cutnùní iní méé-ndó ñí xini ñùhu-í. <sup>17</sup>Te vá cání iní-ndó sã sà dúhá càhá<sup>n</sup>-í te cuiní-í nándi-gá taxi táhú-ndó, te duha càhá<sup>n</sup>-í chi Yá Ndiöxí ío-gá vùi sá vãha cada ñaha-gã xii-ndo sã dúcá<sup>n</sup> quide-ndo. <sup>18</sup>Te ní xidó vùi nchaa sá xíní ñùhu-í ndécú ndìhi-í vitna, te duca<sup>n</sup> ïo vùi sá ndécú ndìhi-í ní cuu chi ní tendaha tùcu-ndo sã ndúú tãhù-í véxi ndìhi té Epafròditú. Te táhú-a cùu-xi datná ì<sup>n</sup> táhú sã ñí sáha-ndo mée Yá Ndiöxí, te cùu vii cuu váha iní-gá sá dúcá<sup>n</sup> ñí quide-ndo. <sup>19</sup>Te núu ná cúú sã xíní ñùhu-ndo, te

mee Yá Ndiöxí ío vùi taxi-gá chi ío vùi sá ndécú ndìhi-gá, te duca<sup>n</sup> càda-gá chi ndècu ndìhi-o Xítóhó Jesucristú. <sup>20</sup>Te vitna nchaa-o chĩ ná càhí-ó sã ïo càhnu cuu Tátá-ó Dútú Ndiöxí ni caa ni quíhí<sup>n</sup>. Te duca<sup>n</sup> na cùnduu.

#### **Tnúhu ndéé núú ñí ndìhi-ná**

<sup>21</sup>Te cúñaha-ndo sã ïo na càda ndee iní nchaa ñáyiú ndècu ichi Xítóhó Jesucristú, ñáyiú cùu cuendá Yá Ndiöxí. Te tnàhá nchaa ñáyiú xìndecu ichi Xítóhó Jesucristú ndécú ndìhi-í quidé ndèe iní ñáhã-yu xii-ndo. <sup>22</sup>Te nchaa ñáyiú cùu cuendá Yá Ndiöxí xínú cuèchi vehe té Cèsár tée yìndaha cuéhé nàció<sup>n</sup> quidé ndèe iní ñáhã-yu xii-ndo, ndìhi nchaa dava-gá ñáyiú cùu cuendá-gá.

<sup>23</sup>Te Xítóhó Jesucristú ío na chìndee chitúu ñaha-gã xii-ndo nchàa-ndo. Te duca<sup>n</sup> na cùnduu. Te ío chí cadá ndèe iní-ñã vitna.

# TUTÚ NÍ CADÚHA TÉ PÄBLÚ QUIHÍ<sup>n</sup> NDAHA ÑÁYIU ÑUÚ CÒLOSÁ

Té Päblú cádüha-dé tutú quihí<sup>n</sup>  
ndaha ñáyiú xíndecu ichi Xítóhó  
Jesucristú ndécú ñúú Còlosá

**1** Yúhú té Päblú ní tendaha  
ñaha Yá Ndiöxí càhá<sup>n</sup>-í tnúhu  
Xítóhó Jesucristú núú ñáyiú chi  
duca<sup>n</sup> cuení méé Yá Ndiöxí cunduu,  
te cádüha-í tutú-a ndihi té Timùteú  
<sup>2</sup>cuendá daquixi-í ndaha nchòhó  
ñáyiú ñúú Còlosá, ñáyiú cùu cuendá  
Yá Ndiöxí, ñáyiú quide ndáá ndécú  
ichi Xítóhó Jesucristú, te xicá<sup>n</sup>  
táhù-í núú Tătá-ó Dütú Ndiöxí sá ïo  
na chìndee chitúu ñaha-gá xii-ndo,  
te duca<sup>n</sup> ndì nduú-gá ná cádá te ïo  
vaha cuu iní-ndó cùndecu-ndo.

Té Päblú càhá<sup>n</sup> ndihi-dé Yá  
Ndiöxí cuendá ñáyiú sàndáá iní  
ñáhá xii Xítóhó Jesucristú

<sup>3</sup>Te duca<sup>n</sup>-ni càhá<sup>n</sup> ndihi-ndí  
Yá Ndiöxí Yaá cúú Tătá Xítóhó  
Jesucristú ndàcá<sup>n</sup> táhú-ndí núú-gá  
cuendá nchaa nàcuáa quide-ndo  
ndecu-ndo, <sup>4</sup>chi ñihí-ndí tnúhu sá  
ïo sàndáá iní-ndó Xítóhó Jesucristú,  
te duca<sup>n</sup> ïo cùu iní-ndó nchaa  
ñáyiú cùu cuendá Yá Ndiöxí. <sup>5</sup>Te  
duca<sup>n</sup> quide-ndo chi sàndáá iní-ndó  
sá ndúú táhú-ndó cùndecu-ndo

núú ndécú Xítóhó Jesucristú, te  
tnúhu-á<sup>n</sup> ñí ñihí-ndó cùtnàhá ní  
xíndedóho-ndo tnúhu ndáá tnúhu  
Xítóhó Jesucristú. <sup>6</sup>Te tnúhu Xítóhó  
Jesucristú tá xíte nuu-xi ñihí ñuyíú  
cuáhá<sup>n</sup>. Te vai ñáyiú ta sàndáá  
iní-yu cuáhá<sup>n</sup>, te ta quidé-yu mee-ni  
sá vaha cuáhá<sup>n</sup> ndécü-yu ichi-gá. Te  
nchòhó chi ndéé cùtnàhá ní tecú  
dóho-ndo tnúhu-gá ní quesaha-xi  
ta cùu vai ñáyiú ñuú-ndó tá  
quide ndáá-yu núú-gá cuáhá<sup>n</sup>. Te  
dává-á<sup>n</sup> ñí cutnùní ndáá ndisa  
iní-ndó sá Yá Ndiöxí ïo chìndee  
chitúu ñaha-gá xii-ndo. <sup>7</sup>Te duca<sup>n</sup>  
ñí dánèhé ñáhá tè Èpafrás tée  
ïo cùu iní-ndí, chi tnàhá-dé ïo  
quide ndáá-dé xínú cuèchi-dé núú  
Xítóhó Jesucristú quidé-dé núú-ndí  
dàcuàha ñaha-dé xii-ndo tnúhu-gá.  
<sup>8</sup>Te càchí tnúhu-dé xii-ndí sá ïo  
cùu iní ñáhá-ndó xii-ndí, te duca<sup>n</sup>  
quide-ndo chi Espiritú Yá Ndiöxí  
chíndèe ñaha-xi xii-ndo.

<sup>9</sup>Te ndéé cùtnàhá ní ñihí-ndí  
tnúhu nàcuáa quide-ndo ndecu-ndo  
ndéé dává-á<sup>n</sup> ñí ngúita-ndí ñá túú  
dàña ndee-ndí xicá<sup>n</sup> táhú-ndí núú  
Yá Ndiöxí cuendá-ndó sá Espiritú-gá  
ná tàxi-xi nchaa-gá sá cúmàní quini  
tnùní-ndó, te duca<sup>n</sup> te cutnùní

váha-gá iní-ndó nàcuáa cuíní Yá Ndiöxí cada-ndo. <sup>10</sup>Te sá dúcá<sup>n</sup> te ndacu-ndo càda-ndo mee-ni sá vâha dàtná cuíní Xítohó Jesucristú cada nchaa ñáyiu ndècu ichi-gá. Te duca<sup>n</sup> ïo nduu vétú iní-gá te núu na càda-ndo nchaa núú sá vâha. Te duca<sup>n</sup> ïo-gá cuita cutnùní iní-ndó nchàa nacuáa cuíní Yá Ndiöxí cada-ndo. <sup>11</sup>Te mee-gã cúú-gã Yaá ío cùnuu, te ðiu-gá ío chindee ñàha-gá xii-ndo, te cudíí iní-ndó cuèi nándi na càda ñaha ñáyiu xii-ndo sã cuèndá-gá, te duca<sup>n</sup> ïo cunduu càhnu iní-ndó. <sup>12</sup>Te ndacá<sup>n</sup> táhú-ó núú Dütú Ndiöxí chi ní quide túha ñaha-gã xii-o cuèndá nduu táhú-ó cùndecu-o ndíhi nchaa dava-gã ñáyiu yàndaha-gã xíndecu núú cándòo canine ñá túú tñàhí-gá ni ì<sup>n</sup> cuèchi ío. <sup>13</sup>Te ðiu-gá ní quide ní dáñá-ó nchàa ichi cuehé ichi duha núú táxí tñùní yucu ñãvâha, te ní nachihi ñaha-gã xii-o ndàha Déhe-gá Yaá ío cùu iní-gá. <sup>14</sup>Te Déhe-gá ní xíhí-gá cuèndá sá nchóó càcu nihnu-o núú ùhú núú ndàhú, te ní quide càhnu iní-gá nchaa sá cuèhé sá dúhá nĩ quide-o.

**Ñáyiu cùu ì<sup>n</sup>nuu ndíhi Yá Ndiöxí cuèndá sá nĩ xíhí Xítohó Jesucristú**

<sup>15</sup>Te Yá Ndiöxí cúú-gã Yaá vá cúú quíní-ó dico Xítohó Jesucristú chi ní quixi túu-gã ñuyúú-a, te ní quide-gá nchaa nàcuáa sàni iní-gá. Te dàtná-ni sàni iní-gá te duca<sup>n</sup> sàni iní Yá Ndiöxí, te Yaá-á<sup>n</sup> duca<sup>n</sup>-ni ndècu-gá ndéé cùtnàhá vátá ngãva-gã ñuyúú. <sup>16</sup>Te Xítohó Jesucristú ní quide-gá núú Yá Ndiöxí ní cadúha-gã nchaa sá ío andiu ndíhi nchaa sá ío ñuyúú-a, te

ní cadúha-gã nchaa sá cúú quíní núú-ó cùndehe-o, ndíhi nchaa sá vã quíní tñàhí-o, ndíhi nchaa espíritú cùnùu vihi xinu cuechi núú Yá Ndiöxí, ndíhi nchaa dava-gã espíritú xínú cuèchi. Te nchaa ní cadúha Xítohó Jesucristú chi duca<sup>n</sup> nĩ cachí Yá Ndiöxí cunduu. Te duca<sup>n</sup> nĩ cachí Yá Ndiöxí cunduu cuèndá nchaa cuu-xi mee-ni sã vâha sá cúú-xí Xítohó Jesucristú. <sup>17</sup>Te Xítohó Jesucristú duca<sup>n</sup>-ni ndècu-gã ndéé cùtnàhá vátá ngãva-gã ñuyúú-a, te ðiu núú ndáhá-gã cándòo ñuyúú-a, ndíhi andiu, ndíhi nchaandi túhú sá ío. <sup>18</sup>Te ðiu Xítohó Jesucristú cùnùu-gã yíndàha ñaha-gã xii nchaa nchoo ñáyiu ndècu ichi-gá, te ðiu-gã quidé-gã ndécú vâha-o núú-gã. Te núú ncháá ñáyiu ndoto ðiu-gã cúú-gã Yaá ío càhnu cuu sa ní ndoto, te sá dúcá<sup>n</sup> nĩ ndoto-gã te xíã<sup>n</sup> cúú-gã Yaá ío tàxi tñuní nchaandi túhú sá ío ñuyúú-a ndíhi andiu. <sup>19</sup>Te duca<sup>n</sup> ïo cùnùu-gã táxí tñùní-gá chi ndáá sá ì<sup>n</sup>-ni cuu-gã ndíhi Yá Ndiöxí. <sup>20</sup>Te Xítohó Jesucristú ní xíhí-gá núú cùrúxí, chi duca<sup>n</sup> nĩ cuíní Yá Ndiöxí cunduu cuèndá sá vã yõo ì<sup>n</sup>-gã cuu úhú iní ñàhá xii-gã cuèi ñáyiu xíndecu ñuyúú-a, te cuèi cue espíritú ndécú àndiu.

<sup>21</sup>Te nchòhó cùtnàhá vátá cùndècu-gã-ndó ìchi Xítohó Jesucristú ñá túú tñàhí ni xõ cáhã<sup>n</sup> ndíhi-ndo-gã, chi mee-ni nĩ xóo cuu úhú iní-ndó-gã, te mee-ni nchàa sá cuèhé sá dúhá nĩ xóo cunuu nĩ xóo cada-ndo ni cùu, dico Xítohó Jesucristú ní quide-gá ní tñahá tñúhu-ndo ndíhi Yá Ndiöxí vitna.

<sup>22</sup>Chi ðiu cuèndá-á<sup>n</sup> nĩ xíhí Xítohó

Jesucristú núú cùrúxí cuèndá sá nchóó ndùu ndoo nduu nine iní-ó ngúndecu-o núú Yá Ndiöxí, te duca<sup>n</sup> te ñá túú tnàhí-gá ná cumání-ó núú-gá, te vá yöö ìí<sup>n</sup>-gá cachí sá nchóó ndècu cuéchi-o. <sup>23</sup>Te núú vá dáñá ndéè-ndó quíndáá iní-ndó Xítóhó Jesucristú, te cundecu-ni-ndo ìchi-gá, te vá cání ìní-ndó dàña-ndo tnúhu ndee ìní ní taxi-gá ndécú ndìhi-o. Te nchaa tnúhu-gá-á<sup>n</sup> tá xíté nuu-xi ñihí ñuyú cuáhá<sup>n</sup>, te òu-ni tnúhu-á<sup>n</sup> càhá<sup>n</sup> yúhú té Páblú dánèhé-í ñáyiú.

**Té Páblú yíhí díquí-dě cáhá<sup>n</sup>-dé  
tnúhu Xítóhó Jesucristú  
núú ñáyiú ndècu ìchi-gá**

<sup>24</sup>Te vitna ío cùdíí ìní-í ndóhò-í cuèndá-ndó, chi Xítóhó Jesucristú ío ní ndoho-gá cuèndá-ó, te tnàhá yúhú ndóhò-í cuèndá nchaa ñáyiú ndècu ìchi-gá, dico vitna cùmání-gá ndoho-í cuèndá-yu. <sup>25</sup>Te Yá Ndiöxí ní cachí-gá sá yúhú quíhi díquí ñáhà-í xii nchaa nchòhò ñáyiú ndècu ìchi-gá cuèndá danèhé ñáhá vâha-í xii-ndo tnúhu-gá cuèndá cuu-xi sá vâha sá cúú-xí-ndó. <sup>26</sup>Te nchaa tnúhu sá dánèhé ñáhà-í xii-ndo ñá túú ní tècú dóho nchaa ñáyiú ní xíndecu ndéé sanaha, te mee-gá ní cuíní-gá sá ncháá nchò ñáyiú yíndaha-gá vitna cundecu ndìhi-o tnúhu-á<sup>n</sup>. <sup>27</sup>Te mee-gá ní cachí-gá sá dátüu-gá nchaa tnúhu sá ò vii ío váha cuáhá<sup>n</sup> núú nchàa ñáyiú yíndaha-gá. Te tnúhu-á<sup>n</sup> cúú-xí cuèndá tnàhá nchaa nchòhò ñáyiú ñá túú cùu ñáyiú isrâél. Te tnúhu-á<sup>n</sup> dánèhé ñáhá-xí xii-ndo sá Xítóhó Jesucristú ndécú ndìhi ñaha-gá xii-ndo. Te cuèndá xíá<sup>n</sup> ní

ngúndecu ndìhi-ndo tnúhu ndee ìní cundecu-ndo ndìhi-gá ni caa ni quíhí<sup>n</sup>.

<sup>28</sup>Te nchúhú mee-ni cuèndá Xítóhó Jesucristú càhá<sup>n</sup> váha-ndí, te dàsahú-ndí ñáyiú nàcuáa cadá-yu. Te váha vîhi danehé-ndí nchaa ñáyiú nàcuáa tecú tnùnì-yu tnúhu-gá, te duca<sup>n</sup> dànèhé-ndí-yu nàcuáa cundáá-yu núú Yá Ndiöxí, te duca<sup>n</sup> chi tnàhá tnúhu-yu ndìhi Xítóhó Jesucristú. <sup>29</sup>Te cuèndá xíá<sup>n</sup> ío ndùcu ndee-í quídè-í chiú<sup>n</sup> Xítóhó Jesucristú, te mee-gá ío chìndee ñaha-gá xii-í núú xíá<sup>n</sup> ndácù-í quídè-í chiú<sup>n</sup>-gá.

**2** Te cuíní-í sá nchòhò cutnùnì ìní-ndó sá ò sàni ìní-í cuèndá-ndó, ndìhi cuèndá nchaa ñáyiú ndècu ñúú Laodiceá, ñáyiú xíndecu ìchi Xítóhó Jesucristú. Te duca<sup>n</sup>-ni ò sàni ìní-í cuèndá nchaa ñáyiú vátá quìnì ñáhá-gá xii-í. <sup>2</sup>Te cuíní-í sá nchòhò ndìhi nchaa ñáyiú-á<sup>n</sup> ò nducu ndèe-ndo canchicú<sup>n</sup> nihnu-ndo ìchi Xítóhó Jesucristú, te ío cuu ìní tnàhá-ndó, te duca<sup>n</sup> cùu ìí<sup>n</sup>nuu-ndo cundecu-ndo. Te cuíní-í sá nchòhò ndìhi dava-gá ñáyiú-á<sup>n</sup> ò váha sáá sá xínì tnùnì-ndó cuèndá tecú tnùnì-ndó nchàa nacuáa ndùu cuèndá Xítóhó Jesucristú chi ío ndùu yuhu ni cuu, dico vitna ní dátüu-gá núú-ó. <sup>3</sup>Te Xítóhó Jesucristú néhé vâha-gá nchaa tnúhu sá ò xínì ñuhu-xi tecú tnùnì-ó. <sup>4</sup>Te duha càhá<sup>n</sup>-í chi cuíní-í sá vâ quíndáá ìní-ndó ñí ìí<sup>n</sup> tnúhu càhá<sup>n</sup> nchaa ñáyiú cuínì dandàhú ñáhá xii-ndo cuéí ío váha càhá<sup>n</sup>-yu. <sup>5</sup>Te cuéí ñá túú ndècu ndìhi ñaha-í xii-ndo dico duca<sup>n</sup>-ni ò ñuhu

iní ñáhà-í, te ío cùdíí ín-í chi ñihí-í tnúhu sá ïo cùu ìí<sup>n</sup>nuu-ndo ndecu-ndo, te ñá túú dàña ndéé-ndó sàndáá ín-í-ndó Xítohó Jesucristú.

<sup>6</sup>Te dàtná-ni ní sándáá ín-í-ndó Xítohó Jesucristú, te duca<sup>n</sup>-ni quìndáá ín-í-ndó-gã canchicú<sup>n</sup> nihnu-ndo ìchi-gá. <sup>7</sup>Te ñi yùhu ñi ín-í-ndó cànchicú<sup>n</sup> nihnu-ndo ìchi-gá, te duca<sup>n</sup> cuíta cutnuni-gá ín-í-ndó nchàa nacuaá càhá<sup>n</sup>-gá quíhí<sup>n</sup>. Te vá dàná ndèe tñàhí-ndo quìndáá ín-í-ndó nchàa tnúhu sá ñi dánèhé ñáhá cuè tée càhá<sup>n</sup> tnúhu-gá xii-ndo. Te xini ñuhu-xi ndacá<sup>n</sup> táhú vîhi-ndo núú Yã Ndiöxí cuendá nchaa tnúhu-á<sup>n</sup>.

**Ñáyiu ío váha tñahá tnúhu  
ndîhi Xítohó Jesucristú**

<sup>8</sup>Te ío quíhi ín-í-ndó cùndecu-ndo chi xica cuu ñáyiu cuíní dandàhú ñáhá xii-ndo, te ñáyiu-á<sup>n</sup> càhá<sup>n</sup>-yu mee-ni nchàa tnúhu ní cahu ín-í nchaa cue tée ñuyú-a, te nchaa tnúhu-á<sup>n</sup> ñá túú vèdana nàndîhi-xi. Te duca<sup>n</sup> quidé-yu chi nchicú<sup>n</sup> nihnu-ni-yu nchaa nàcuáa ní xoo cada ñáyiu ní xíndecu ndéé sanaha. Te càhá<sup>n</sup>-yu nàcuáa sàni ín-í yucu ñávàha, te ñá túú càhá<sup>n</sup>-yu nàcuáa cuíní méé Xítohó Jesucristú.

<sup>9</sup>Te Xítohó Jesucristú cúu-gã ìí<sup>n</sup> ñáyiu dico ìí<sup>n</sup>-ni cùu-gã ndîhi Dútú Ndiöxí. <sup>10</sup>Te nchòhó chi ñá túú tñahí-gá ná cúmăní-ndó nùú-gã chi ndècu ndîhi-ndo Xítohó Jesucristú. Te ío cùnuu-gá te tàxi tñuní-gá nchaa núú cuè espíritu cùnùu. <sup>11</sup>Te mee-gã ní ndada ndoo ní ndada nine-gã ín-í-ndó chi ní ngúndecu ndîhi-ndo-gã te duca<sup>n</sup> ñà túú-gã ndécú-ndó ìchi cuehé ichi duha, te cada ín-í-ndó sã ñi

ngúndecu ndîhi-ndo ìí<sup>n</sup> señá, chi ní ndada ndoo ní ndada nine-gã ín-í-ndó, dico ñá dúú ìí<sup>n</sup>-ni cuu-xi ndîhi señá sá sãha cue tée isràél ñii-güedé.

<sup>12</sup>Te nchòhó sa ní sandute-ndo te cada ín-í-ndó sã dàtná tnúhu sá ñi xíhí-ndó ndîhi Xítohó Jesucristú, te ní nguíndüxi-ndo ndîhi-gá, te ní ndoto-ndo ndîhi-gá, te duca<sup>n</sup> càda ín-í-ndó chi ñá túú-gã ndécú-ndó ìchi cuehé ichi duha. Te duca<sup>n</sup> chi sàndáá ín-í-ndó nchàa nacuaá quide Yã Ndiöxí, te ñi-gã ní dándótó-gã Xítohó Jesucristú. <sup>13</sup>Te nchòhó cùtñahá ndécú-ndó ìchi cuehé ichi duha cùu-ndo datná ñáyiu ní xíhí, chi ñá túú tñahá tnúhu-ndo ndîhi Yã Ndiöxí ní cùu, te ñi ñà dúú ñáyiu isràél cúu-ndó. Te Yã Ndiöxí ní cachí-gã sá nchóó ïo váha tñahá tnúhu-o ndîhi Xítohó Jesucristú vitna. Te duca<sup>n</sup> ñi quide-gã chi sa ní quide càhnu ín-í-gã nchaa sá cuèhé sá dúhá ñi xoo cada-o. <sup>14</sup>Te vitna duu<sup>n</sup> duu<sup>n</sup> ñá túú-gã cuéchi-o ndècu núú-gã. Te nchoo ñà túú cuíní-ó càda-o nacuaá càhá<sup>n</sup>-gã, te cuendá xíã<sup>n</sup> ío ndècuéchi-o, te vâi nacháhu-o nùú-gã ní cùu. Te vitna ñá túú-gã ñi ìí<sup>n</sup> cuéchi-o ndècu núú-gã, chi ñi cuendá-á<sup>n</sup> ñi xíhí Xítohó Jesucristú núú cùrúxí. <sup>15</sup>Te sá dúcá<sup>n</sup> ñi xíhí Xítohó Jesucristú núú cùrúxí, te duu<sup>n</sup> duu<sup>n</sup> ní dáquée tíhú-gã sácúíhna ndîhi nchaa espíritu cùndîhi-xi, te ní quendóo canúú-xi, te mee-gã ïo cùnuu-gã táxi tñuní-gã.

**Nanducu nihnu-o mee-ni sá  
vãha càchí Xítohó Jesucristú**

<sup>16</sup>Te núu dava ñáyiu xicuehé ñáhã-yu xii-ndo cuendá sá ñà túú xèxi-ndo xîhi-ndo datná quidé

mèe-yu te vǎ cǎdá cuèndá-ndó, te ni vǎ cǎdá cuèndá-ndó te núu xǐcuèhé ñáhǎ-yu xii-ndo cuèndá sǎ ñà túú cǎnehe íí-ndó vico quide meé-yu núú cuíá núú cuíá, ndíhi vico quidé-yu ndi tnahá yóó, ndíhi cuèndá sǎ ñà túú cǎnehe íí-ndó ndùu ndetatú-yu. <sup>17</sup>Te nàcuáa quidé-yu ndi tnahá òré quidé-yu nchaa vico-á<sup>n</sup>, ndíhi nàcuáa quidé-yu ndi tnahá nchaa nduu cǎnehe íí-yu-á<sup>n</sup>, te cada iní-ó sǎ sà quidé-yu-á<sup>n</sup> dánèhé núú ñáhǎ-xí nàcuáa cada Xítóhó Jesucristú núú cuáhǎ<sup>n</sup> núú vèxi. <sup>18</sup>Te vǎ quèndáá iní-ndó nì ì<sup>n</sup> tnúhu cǎhá<sup>n</sup> ñáyiu cǎchí sǎ cuíta nihnu-ndo cuèndá sǎ ñà túú tnèi-ndo tnúhu cǎhá<sup>n</sup>-yu, chi cǎchí-yu sǎ ìo xini ñuhu-xi cada cahnu-o nchaa cue espíritú xínú cuèchi núú Yǎ Ndiòxí, te ni yùhu ni iní-ó cǎnehe-o sǎ yǎñùhu núú-xi. Te ñáyiu-á<sup>n</sup> cǎchí-yu sǎ ndàà cǎhá<sup>n</sup>-yu chi dàcoto ñaha saní-yu nàcuáa cǎhá<sup>n</sup>-yu, te ío quide cahnú-yu mèe-yu cuèndá nchaa sǎ sání ìni mèé-yu quidé-yu, te ñà túú vèdana nàndíhi nchaa sǎ quidé-yu. <sup>19</sup>Te nchaa ñáyiu duca<sup>n</sup> xǐquide-á<sup>n</sup> ñà túú tnàhá tnúhu-yu ndíhi Xítóhó Jesucristú. Te mee-gǎ cúú-gǎ Yaa cúnùu taxi tnuní ñáhǎ-gǎ xii nchaa nchoo ñáyiu ndècu ichi-gǎ, te chindee ñaha-gǎ xii-o ndècu-o ichi-gǎ, te mee-gǎ quidé-gǎ cúú ì<sup>n</sup>nuu-o ndècu-o, te ta quide-o nchaa nacuáa cuíní Yǎ Ndiòxí cuáhǎ<sup>n</sup>.

<sup>20</sup>Te nchòhó cúú-ndó dàtná ñáyiu ní xíhí ndíhi Xítóhó Jesucristú cuèndá sǎ vǎ cǎnchicú<sup>n</sup> nihnu-gǎ-ndó nàcuáa cǎhá<sup>n</sup> ñáyiu ñà túú ndècu ichi-gǎ. Te núu duca<sup>n</sup>

ñà, ìte ná cuèndá tníí-ní-ndó tnúhu cǎhá<sup>n</sup> ñáyiu-á<sup>n</sup> te quide-ni-ndo datná quidé-yu? <sup>21</sup>Chi ñáyiu-á<sup>n</sup> cǎchí-yu sǎ ìo sǎ ni vǎ cúú tèe ndaha-o, te dava ni vǎ cúú cǎxi-o, te dava ni vǎ cúú tnèi-o. <sup>22</sup>Te nchaa xǎ<sup>n</sup>, núú néhé chiù<sup>n</sup>-ni-o ndíhi nihnu-xi. Te nchaa sǎ dúcá<sup>n</sup> cǎhá<sup>n</sup>-yu-á<sup>n</sup> cúú-xí mèe-ni sǎ ñí cahu iní mèé nchàa ñáyiu ñuyúú-a nàcuáa cadá-yu cundecú-yu. <sup>23</sup>Te nchaa tnúhu cǎhá<sup>n</sup>-yu-á<sup>n</sup> sánùu sǎ cúú-xí ì<sup>n</sup> tnúhu cǎhá<sup>n</sup> ì<sup>n</sup> tée ío váha sàà díquí-xi, chi cǎchí-yu sǎ cǎdá cǎhnu-o Yǎ Ndiòxí nàcuáa véxi iní mèé-ó, te cunduu ndàhú iní-ó dico ñà túú dànehé ñáhǎ-yu nàcuáa tàú-xi cunduu. Te cǎchí tucú-yu sǎ cǎdá ùhú-ó mèe-o, chi duca<sup>n</sup> cuíní Yǎ Ndiòxí cada-o cǎchí-yu. Te nchaa xǎ<sup>n</sup> ñà túú vèdana chindee ñaha-xi xii-o cuendá sǎ vǎ táxí tnùní ñáhǎ nì ì<sup>n</sup> sǎ cuèhé sǎ dúhá sàni iní-ó.

**3** Te nchòhó cada iní-ndó sǎ ní xíhí-ndó ndíhi Xítóhó Jesucristú te ní ndoto-ndo ndíhi-gǎ, núu xǎ<sup>n</sup> tàú-ndó cǎda-ndo nchaa sǎ vǎha dàtná cuíní mèé-gǎ chi mee-gǎ núcòo-gǎ xio cùha Dútú Ndiòxí chi tnàhá-gǎ ío cúnuu-gǎ. <sup>2</sup>Te ío cuhu<sup>n</sup> iní-ndó nchàa sǎ vǎha cǎchí Xítóhó Jesucristú nduu táhú-ndó cundecu ndíhi-ndo, te vǎ cúhú<sup>n</sup> ìni-ndó mèe-ni nchaa sǎ ìo ñuyúú-a. <sup>3</sup>Te duca<sup>n</sup> cǎda-ndo chi cùu-ndo datná ñáyiu ní xíhí ndíhi Xítóhó Jesucristú, chi ñà túú-gǎ ndécú-ndó ìchi cuehé ichi duha. Te Yǎ Ndiòxí néhé cuèndá ñáhǎ-gǎ xii-ndo chi tnàhá tnúhu-ndo ndíhi Xítóhó Jesucristú. <sup>4</sup>Te Xítóhó Jesucristú cúú-gǎ Yaa ndécú ndíhi ñaha xii-o vitna, te sǎá nduu quèe túu ndíhi



ñaha-gã xii-o àndiu, te tnàhá-ó ïo cunuu-o ndìhi-gá.

**Duu<sup>n</sup> duu<sup>n</sup> daña-o nchàa sá cuèhé sá dúhá ñùhu iní-ó te cada-o mèe-ni sá vâha**

<sup>5</sup>Te duu<sup>n</sup> duu<sup>n</sup> daña-ndo nchàa sá cuèhé sá dúhá ñùhu iní-ndó. Te nchaa nchòhó cue téé vá càhá<sup>n</sup> ndìhi-ndo ñâyüu ðìhí te núu ñá díú ñàdihí-ndó cùú-yu, te duca<sup>n</sup>-ni nchàa nchohó cue ñâyüu ðìhí tucu vá càhá<sup>n</sup> ndìhi-ndo cuè téé te núu ñá díú yìi-ndo cuu-güedé, te nchaa-ndo vâ cání-gã iní-ndó càda-ndo ni ìi<sup>n</sup> sá cuèhé sá dúhá ndìhi tnaha ñâyüu-ndo. Te vá cání cuèhé cani duha-gá iní-ndó sá cúú-xí-ndó ndìhí-yu, te vá cání-gã iní-ndó ni ìi<sup>n</sup> sá cuèhé sá dúhá, te ni vâ xíhó-ndó ìi<sup>n</sup> sá ndécú ndìhi tnaha ñâyüu-ndo, chi núu duca<sup>n</sup> na càda-ndo xiho-ndo sá ndécú ndìhí-yu te ìi<sup>n</sup>-ni cùu-ndo ndìhi ñâyüu chĩñuhu nchaa sá càchí-yu cùu ndiòxí te ñá ndáá sá ndiòxí cúú nchàa xíá<sup>n</sup>. <sup>6</sup>Te nchaa ñâyüu duca<sup>n</sup> xíquide ío dandòho ñaha Yá Ndiòxí xií-yu na sàá nduu tnúndòho tnúhu ndàhú, chi ñá túú sàndáá iní ñáhã-yu xii-gá. <sup>7</sup>Te nchòhó cútñahá ní xíndecu-ndo ìchi cuehé ichi duha, te tnàhá-ndó ní xóo cada-ndo dàtná quidé nchàa ñâyüu-á<sup>n</sup>. <sup>8</sup>Te vitna duu<sup>n</sup> duu<sup>n</sup> daña-ndo nchàa sá ná càchí tnúhu-í-a: Vá cúdeé<sup>n</sup>-gã-ndó, te ni vâ cùndùu líhli-gá iní-ndó, te ni vâ cúú ùhú-gá iní-ndó tnàha ñâyüu-ndo, te ni vâ cúcuèhé-gã-ndó-yu, te ni ìi<sup>n</sup>-gá tnúhu cuèhé vá càhá<sup>n</sup>-ndó. <sup>9</sup>Te ni vâ dácuàndehnde-gã-ndó, chi nchòhó sa ní dáñá-ndó nchàa ichi cuehé ichi duha, te ñá túú-gã

sání cuèhé sání dùha iní-ndó nã cada-ndo vitna datná ní xóo cada-ndo. <sup>10</sup>Te vitna nchòhó ní nduu-ndo ñâyüu váha, te uu<sup>n</sup>-gá tá cùtnuní iní-ndó nchàa nacuaá cuíní Yá Ndiòxí cada-ndo, te duca<sup>n</sup> ta ndücu ndee-ndo quide-ndo mee-ni sá vâha dàtná quidé mèe-gá. <sup>11</sup>Te vitna ní ngúndecu ndìhi-ndo Xítóhó Jesucristú, te vá cádá cuendá-gã-ndó ñüu cùu-ndo ñâyüu isràèl àdi ñá túú cùu-ndo, te ni vâ cádá cuendá-ndó ñüu cùu-ndo ñâyüu ní ngúndecu sèñá ñii-xi àdi ñáhá, te ni vâ cádá cuendá-ndó ñüu cùu-ndo ñâyüu véxi ñüú xícá, te ni vâ cádá cuendá-ndó ñüu cùu-ndo ñâyüu cùu neñuú, te ni vâ cádá cuendá-ndó ñüu cùu-ndo ñâyüu ñá túú tnàhí dàñá quee núú chíú<sup>n</sup> pàtróo<sup>n</sup>-xi, te ni vâ cádá cuendá-ndó ñüu cùu-ndo ñâyüu dàñá queé núú chíú<sup>n</sup> pàtróo<sup>n</sup>-xi, chi Xítóhó Jesucristú cúnùu-gá ndécú ndìhi ñaha-gá xii-o nchàa-o.

<sup>12</sup>Te Yá Ndiòxí ní dáquée ðìi<sup>n</sup> ñaha-gá xii-ndo cuendá cundecu-ndo ndìhi-gá, te vitna cùu-ndo ñâyüu quide ndáá ndécú ìchi-gá. Te mee-gã ío cùu iní ñáhã-gã xii-ndo ñüu xíá<sup>n</sup> tàú-ndó cùndahú iní tnáhã-ndó, te ío váha cuu iní-ndó chindee tnaha-ndo, te cuu-ndo ñâyüu ndàhú iní-xi, te ío vii ío váha cuu iní-ndó cùndecu ndìhi tnaha-ndo, te ío càhnu cunduu iní-ndó cuendá nchaa sá quidé ñàha ñâyüu xii-ndo. <sup>13</sup>Te duca<sup>n</sup> cànehe-ndo tnúhu càhnu iní núú ndi mèe-ndo nacuaá ndècu-ndo ichi-gá, te cada càhnu tucu iní-ndó ñüu ná cúú sã cúmãní núú tnáhã-ndó. Te dàtná ní quide càhnu iní Xítóhó Jesucristú nchaa sá

ñà túú vǎha ní xóo cada-ndo duca<sup>n</sup> càda-ndo cada cahnu iní-ndó nchàa sá cúmǎní núú tnáhá-ndó ndècu-ndo. <sup>14</sup>Te xìni ñuhu vihi-xi sá ío cuu iní tnáhá-ndó cùndecu-ndo, chi núu duca<sup>n</sup> na càda-ndo, te quide-ndo nchaa dava-gá sá càhá<sup>n</sup>-í, te ñá túú tnàhí-gá ná cúmǎní-ndó. <sup>15</sup>Te daña-ndo sǎ Yǎ Ndiǒxí ná chindee ñaha-gá nàcuáa ío váha cuu iní-ndó cùndecu-ndo, chi ñi cuendá-án ñi cáhá<sup>n</sup> ñáhá Yǎ Ndiǒxí xii-ndo cuendá cuu ñi nuu-ndo ndíhi nchaa dava-gá ñáyiú ndècu ichi-gá, te duca<sup>n</sup>-ni ío ndacá<sup>n</sup> táhú-ndó núú-gǎ.

<sup>16</sup>Te ío cuhu<sup>n</sup> iní-ndó tnúhu Xítóhó Jesucristú, te ío váha cuáha-ndo cuendá nàcuáa càhá<sup>n</sup> tnúhu-gá te duca<sup>n</sup> dànehé tnáhá-ndó. Te ío cáhá<sup>n</sup> dóho tnàha-ndo nacuáa cada-ndo càncicú<sup>n</sup> nihnu-ndo càda-ndo nchaa nacuáa càhá<sup>n</sup> tnúhu-gá, te cata-ndo ndùdú ndèé núú tütú Yǎ Ndiǒxí, ndíhi nchaa dava-gá ndudú sá xíní méé-ndó xíta-ndo te nchaa xǎ<sup>n</sup> cata-ndo chĩñuhu-ndo Yǎ Ndiǒxí. Te òré xítá-ndó te ni yùhu ni iní-ndó ndacá<sup>n</sup> táhú-ndó núú-gǎ. <sup>17</sup>Te cuhu<sup>n</sup> iní-ndó Xítóhó Jesucristú òré sání iní-ndó càda-ndo ñi<sup>n</sup> chiu<sup>n</sup> àdi ná tnúhu cuíni-ndó càhá<sup>n</sup>-ndó, te ñi-ni-gá cuhu<sup>n</sup> iní-ndó. Te xìni ñuhu-xi ndacá<sup>n</sup> táhú-ndó núú Yǎ Ndiǒxí, te ñi-ni Xítóhó Jesucristú chindee ñaha-gá xii-ndo ndacá<sup>n</sup> táhú-ndó núú Tǎtá-ó Dütú Ndiǒxí.

**Nàcuáa tàú ñáyiú ndècu ichi  
Xítóhó Jesucristú cadá-yu  
sá cúú-xí ndí meé-yu**

<sup>18</sup>Te nchaa nchòhó ñáyiú ñíhí ñáyiú ndècu yíi-xi quindáa iní-ndó yíi-ndo, chi duca<sup>n</sup> tàú-xi

cada nchaa ñáyiú ñíhí ndécú ichi Xítóhó Jesucristú. <sup>19</sup>Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cùcuèhé-ndó-yu. <sup>20</sup>Te nchaa nchòhó ñáyiú ndècu tǎtá-xi ndíhi nǎná-xi quindáa iní-ndó-yu, chi núu duca<sup>n</sup> na càda-ndo te ndúu vétú iní Yǎ Ndiǒxí. <sup>21</sup>Te nchaa nchòhó ñáyiú cùu tǎtá ndíhi nǎná vá dásátú-ndó ñi cue déhe-ndo, chi núu duca<sup>n</sup> na càda-ndo te ni vá quíxí-gǎ iní-güexi cada-güexi sá vǎha. <sup>22</sup>Te nchaa nchòhó ñáyiú xínu cuechi quindáa iní-ndó nchaa ñáyiú cùu patróo<sup>n</sup>-ndó, te ni yùhu ni iní-ndó càda-ndo nchaa chiu<sup>n</sup> tahú-yu cuèi òré ndécú-yu àdi òré ñá túú-yu, te ñá dǎú òré-ni ndèhé-yu cada-ndo cuendá-ni sá cuíni-ndó cùñi-ndo núú-yu, chi cada-ndo sǎ néhé-ndó sǎ yíñuhu núú Xítóhó Jesucristú. <sup>23</sup>Te nchaa chiu<sup>n</sup> sani iní-ndó càda-ndo te cada-ndo ñi yuhu ni iní-ndó, te sá dúcá<sup>n</sup> càda-ndo-án te cada-ndo cuendá sá xínu cuèchi-ndo núú Xítóhó Jesucristú te ñá dǎú núú ñáyiú ñuyíú-a xínu cuechi-ndo. <sup>24</sup>Te nchòhó sa ñaha-ndo sá Xítóhó Jesucristú taxi-gá sá ndúú táhú-ndó te núu duca<sup>n</sup> na càda-ndo, chi cùu-ndo ñáyiú xínu cuechi núú-gǎ. <sup>25</sup>Te nchaa ñáyiú quide nchaa sá cuèhé sá dúhá nàcháhu-yu núú Yǎ Ndiǒxí cuendá nchaa sá quidè-yu, te mee-gǎ vá cadá cuendá-gá cuèi náí ñáyiú cùu-yu, chi nchaá-yu nacháhu-yu nchaa sá ñà túú vǎha quidè-yu núú-gǎ.

**4** Te nchaa nchòhó ñáyiú cùu patróo<sup>n</sup> cuu-ndo ñáyiú váha, te cada-ndo nchaa nacuáa tàú-xi cunduu ndíhi nchaa ñáyiú xínu

cuechi núú-ndó, te cunaha-ndo sã àndiu ndecu Yaá cúú Xítóhó-ndó tàxi tnuní ñáhá-gã xii-ndo.

<sup>2</sup>Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cãhá<sup>n</sup> ndihi-ndo Yã Ndiöxí, te ío cuhu<sup>n</sup> iní-ndó-gã òré cãhá<sup>n</sup> ndihi-ndo-gã, te òré-á<sup>n</sup> ïo ndacá<sup>n</sup> táhú-ndó núú-gã. <sup>3</sup>Te caca<sup>n</sup> táhú-ndó tnàhá cuendá-ndí núú-gã cuendá sá dífú-gã ná cáda te ndacu-ndí cãhá<sup>n</sup>-ndí tnúhu-gá núú nchàa dava-gá ñáyiú, te duca<sup>n</sup> cãhá<sup>n</sup>-ndí tnúhu Xítóhó Jesucristú sá ñã túú ní xíndecu ndihi nchaa ñáyiú ní xíndecu ndéé sanaha, te ðiu cuendá tnúhu-á<sup>n</sup> yíhì-í vecaá vitna. <sup>4</sup>Te cãhá<sup>n</sup> ndihi-ndo Yã Ndiöxí cuendá cãhá<sup>n</sup>-í nàcuáa tàú-xi cunduu te tecú tnúní-yu.

<sup>5</sup>Te cada-ndo nchàa nacuáa tàú-xi cunduu sá cúú-xí nchàa ñáyiú ñã túú ndècu ichi-gá, te duca<sup>n</sup>-ni ïo nducu ndèe-ndo cada-ndo nchaa nacuáa tàú-xi cunduu. <sup>6</sup>Te cada cuendá-ndó sã ïo vii ío váha cunduu tnúhu cãhá<sup>n</sup> ndihi-ndö-yu, te cãhá<sup>n</sup>-ndó ì<sup>n</sup> tnúhu nàcuáa cuu váha iní-yu, te ío váha cundehe-ndo nàcuáa cunduu tnúhu cúñaha-ndo xii ì<sup>n</sup> ì<sup>n</sup>-yu.

#### **Tnúhu ndéé núú ñí ndihi-ná**

<sup>7</sup>Te té Tìquicú téé ío cùu iní-ó ndècu ndihi-o ichi Xítóhó Jesucristú, téé-á<sup>n</sup> cachí tnúhu-dé nchaa nàcuáa cùu ndecu-í. Te tnàhá-dé xínú cuèchi-dé núú Xítóhó Jesucristú te ío váha quide ndáá-dé. <sup>8</sup>Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee ìní cundecu ndihi-ndo. <sup>9</sup>Te

tnàhá tucu té Ònésimú téé ío cùu iní-ó ndècu ndihi-o ichi Xítóhó Jesucristú quixi ndihi-dé, te ðiu-ni téé ñuú-ndó cùu-dé te tnàhá-dé ío váha quide ndáá-dé. Te ndi ndúú-güedé cachí tnúhu-güedé nchaa nàcuáa cùu iha.

<sup>10</sup>Te té Arístarcú téé yíhì ndihi-í vecaá quidé ndèe iní ñáhá-dě xii-ndo ndihi té Măcú ñaní pŕímú tě Bèé. Te sa nàha-ndo nchaa nacuáa ní cãhá<sup>n</sup>-í cada-ndo quèhe<sup>n</sup> cuendá-ndó tě Măcú, te núu na quixi-dé quixi coto ñaha-dě xii-ndo, te ío váha cuu iní-ndó quèhe<sup>n</sup> cuendá-ndó-dě. <sup>11</sup>Te tnàhá téé nàni Jesús, àdi Bustú chi úú ðiu-dé, quidé ndèe iní ñáhá-dě xii-ndo. Te cue téé-a cùu-güedé cue téé isràél ní chitnahá ñáhá-güedě xii-í cãhá<sup>n</sup>-ndí núú ñáyiú nàcuáa ndíhu ndaha ñaha Yá Ndiöxí xií-yu, te ni ì<sup>n</sup>-gá ñáyiú isràél ñã túú quide datná quidé-güedě. Te ío váha tàxi-güedé tnúhu ndee ìní xii-í. <sup>12</sup>Te tnàhá téé ñuú-ndó tě Ępafrás quidé ndèe iní ñáhá-dě xii-ndo, te cùu-dé tnàhá-dé téé xínu cuechi núú Xítóhó Jesucristú. Te duca<sup>n</sup>-ni ñè yuhu ñè iní-dé xicá<sup>n</sup> táhú-dě núú Yã Ndiöxí cuendá-ndó cuendá sá cãchicú<sup>n</sup> nihnu-ni-ndo ichi-gá, te duca<sup>n</sup> te ío váha tecú tnúní-ndó nchàa nacuáa cuíní Yã Ndiöxí cada-ndo, te ðiu-ni duca<sup>n</sup> cãchicú<sup>n</sup> nihnu-ndo càda-ndo. <sup>13</sup>Te yúhú cãchí tnúhu ndáá-í xii-ndo sã sũúní sàni iní-dé sá méé-ní sã váha cuu xii-ndo cùndecu-ndo ndihi nchaa ñáyiú xíndecu ichi Xítóhó Jesucristú ndécú ñuú Laodiceá, ndihi nchaa ñáyiú xíndecu tucu ichi-gá ndécú ñuú Hièrapólís. <sup>14</sup>Te

tnàhá té Lùcá téé xìní nchaa núú yǔcú sǎ quídé tǎtna quíde ndee iní ñáhá-dě xii-ndo téé ío cùu iní-ó, te tnàhá tucu té Dēmás quídé ndèe iní ñáhá-dě xii-ndo.

<sup>15</sup>Te cúñaha-ndo na càda ndee iní nchaa ñáyiú ndècu ndìhi-o ichi Xítóhó Jesucristú ndécú ñùú Laodiceá, ndìhi tá Mǐnfás, ndìhi nchaa ñáyiú ndècu ichi-gá tàcá vehe-xi dàcuahá-yu tnúhu-gá.

<sup>16</sup>Te tutú cádǔha-í-a tendaha-ǐ quixi ndaha-ndo, te òré ná ndǐhí dàcuaha-ndo te tendaha-ndo quǐhí<sup>n</sup> ndaha ñáyiú xǐndecu ichi-gá ndécú ñùú Laodiceá cuèndá dacuàhá-yu tnàhá-yu. Te òdu-ni duca<sup>n</sup> dàcuaha-ndo tutú

tendaha-ǐ quǐhí<sup>n</sup> ndaha ñáyiú ñùú Laodiceá òré ná dǎndixí-yu ndaha-ndo. <sup>17</sup>Te na càchí tnúhu-í xii-ndo nàcuáa cúñaha-ndo xii té Àrquipú, te duha cúñaha-ndo xii-dé: “Yá Ndiǒxí ní taxi-gá chù<sup>n</sup> quíde-n, te ío váha cada cuèndá-n càda-n nchaa nacuáa ní cachí-gá”, duha cúñaha-ndo xii-dé.

<sup>18</sup>Te yúhú té Pǎblú ndìhi ndaha mee-ǐ téè-í ì<sup>n</sup> ũú tnúhu-a quíde ndee iní ñáhà-í xii-ndo, te cunaha-ndo sǎ yǔhú yǐhì-í vecaá. Te Yá Ndiǒxí ío na chìndee chitúu ñaha-gǎ xii-ndo. Te duca<sup>n</sup> na cùnduu. Te ío chí cádá ndèe iní-nǎ vitna.

# TUTÚ DÍHNA NUU NÏ CADÚHA TÉ PÄBLÚ QUÍHÍ<sup>n</sup> NDAHA ÑÁYIU ÑUÚ TESÀLÓNICÁ

Té Páblú ndihi cue tée cùndihi-dé  
cádúha-güedé tutú quíhí<sup>n</sup> ndaha  
ñáyiú xĩndecu ichi Xítohó  
Jesucristú ndécú ñúú Tesàlónicá

**1** Yúhú té Páblú cádúha-í tutú-a  
ndihi té Silvanú, ndihi té  
Timùteú cuèndá daquixi-í ndaha  
nchòhó ñáyiú ndècu ndihi-ndí  
ichi Xítohó Jesucristú ndécú ñúú  
Tesàlónicá, chi cùu ì<sup>n</sup>nuu-ndo ndihi  
Tátá-ó Dütú Ndiöxí, ndihi Xítohó  
Jesucristú. Te xicá<sup>n</sup> táhú-í núú Dütú  
Ndiöxí, ndihi núú Xítohó Jesucristú  
sá ïo na chĩndee chitúu ñaha-gã  
xii-ndo, te duca<sup>n</sup> ndì nduú-gã  
ná càda te ío váha cuu iní-ndó  
cùndecu-ndo.

Ñáyiú ñuú Tesàlónicá ío váha  
sàndáá iní-yu Yá Ndiöxí

<sup>2</sup>Te ndì tnahá òré càhá<sup>n</sup> ndihi-ndí  
Yá Ndiöxí ndàcá<sup>n</sup> táhú-ndí núú-gã  
sá ïo quide váha-ndo ndècu-ndo,  
te duca<sup>n</sup> xicá<sup>n</sup> táhú-ndí núú-gã sá  
ná còto ñaha-gã xii-ndo. <sup>3</sup>Te ío  
ndàcá<sup>n</sup> táhú-ndí núú Tátá-ó Dütú  
Ndiöxí sá ñì yuhu ñì iní-ndó sàndáá  
iní-ndó-gã, te xinu cuechi-ndo

núú-gã, te cùu iní tnahá-ndó  
nàcuáa ndècu-ndo ichi-gã ñúu  
xíã<sup>n</sup> ío xìto tnahá-ndo. Te cùtnuní  
ndáá iní-ndó sã quíxí tucu Xítohó  
Jesucristú ñúu xíã<sup>n</sup> ñá túú dàña  
ndeé-ndó ndètu-ndo-gã. <sup>4</sup>Te nchòhó  
ñáyiú ndècu ndihi-ndí ichi Xítohó  
Jesucristú sa nàha-ndí sá Yá Ndiöxí  
íó cùu iní ñáhá-gã xii-ndo, te  
diu-gã ní càhá<sup>n</sup> ñáhá-gã xii-ndo  
cuèndá cundecu-ndo ìchi-gã. <sup>5</sup>Te  
cùtnàhá ní dánhé ñáhá-ndí xii-ndo  
tnúhu-gã, chi ñá díú sã cúú ìní  
mèé-ndí duca<sup>n</sup> ñì dánhé ñáhá-ndí  
xii-ndo, chi mee Espiritú Yá Ndiöxí  
ní chĩndee ñàha-xi ní càhá<sup>n</sup>-ndí ñì  
yùhu ñì iní-ndí tnúhu-gã núú-ndó.  
Te nàha-ndo sá cùtnàhá ní xĩndecu  
ndihi ñaha-ndí xii-ndo ñì quide-ndí  
nàcuáa càhá<sup>n</sup> Yá Ndiöxí cuèndá sá  
cúú-xí sã váha sá cúú-xí-ndó.

<sup>6</sup>Te nchòhó nchìcú<sup>n</sup> nihnu-ndo  
quide-ndo vitna datná quidé-ndí,  
chi quide váha-ndo dàtná quidé  
mèe Xítohó Jesucristú, te díí ìní  
ní tñii-ndo ìchi-gã cuèí ní ndoho  
ní tnahá-ndó, chi mee Espiritú-gã  
ní chĩndee ñàha-xi xii-ndo. <sup>7</sup>Te  
sá dúcá<sup>n</sup> quide váha-ndo núú Yá

Ndiöxí, xíã<sup>n</sup> yínchícú<sup>n</sup> nihnu ñáyiú distritú Macèdoniá, ndihi ñáyiú distritú Acáyá xĩquide váha-yu tnàhá-yu, ñáyiú xĩndecu ichi-gá. <sup>8</sup>Te ñu-ndo ní sanu ichi-ndo ñáyiú distritú Macèdoniá, ndihi ñáyiú distritú Acáyá, te ñá díú-ní ñáyiú nchaa ñuú-á<sup>n</sup> chi nchaa ñáyiú dava-gá ñuú nihí-yu tnúhu sá ïo sàndáá iní-ndó Yá Ndiöxí. Te ñá túú-gã ná tnúhu cáhá<sup>n</sup>-ndí cuendá-ndó, chi ncháá-yu sa nihí-yu tnúhu sá ïo váha quide-ndo ndecu-ndo. <sup>9</sup>Te mée-yu xĩcáhá<sup>n</sup> váha-yu cuendá-ndó sã ïo váha ní quehe<sup>n</sup> cuendá ñáhá-ndó xii-ndí cútnàhá ní quixi-ndí díhna nuu. Te ní dáñá-ndó nchaa sá càchí-ndó cùu ndiöxí-ndó chi ñá díú ndiöxí cúú-xí, te ní tñi-ndo ìchi Yá Ndiöxí Yaá ndécú tũu andũu chi ñu-gá cúú-gã Ndiöxí ndisa, te xĩnu cuechi-ndo núú-gã vitna, <sup>10</sup>te ndètu-ndo quixi tucu Xítohó Jesucristú Déhe Yá Ndiöxí Yaá ndécú àndũu, chi ñu-ni-gá ní quixi-gá ñuyúú-a ní xíhí-gá, te ní ndoto-gá ní dándótó ñàha Yá Ndiöxí xii-gá. Te ñu-ni Xítohó Jesucristú dácäcu nihnu ñaha-gã xii-o núú ùhú núú ndàhú, chi sàndáá iní-ó-gã.

**Nàcuáa ndũu chiú<sup>n</sup> ní quide  
té Páblú ñuú Tesalónica**

**2** Te nchòhó ñáyiú ndècu ndihi-ndí ichi Xítohó Jesucristú nàha-ndo sá ñà díú àú<sup>n</sup> nã cuu ní quixi coto ñaha-ndí xii-ndo, chi ní sàndáá iní-ndó tnúhu Yá Ndiöxí. <sup>2</sup>Te nàha-ndo sá cùtnàhá ní xĩndecu-ndí ñuú Filipú ïo ní xúhu<sup>n</sup> tnúhu cuèhé tnúhu duha núú-ndí, te ní caniha-güedë xii-ndí.

Te ní ndee-ndí ní quixi-ndí ñuú-ndó, te ñá túú ní yùhú-ndí ní cáhá<sup>n</sup>-ndí tnúhu Yá Ndiöxí núú-ndó, chi mee-gã ní chindee ñàha-gá xii-ndí cuèí ïo chitu ñáyiú ní cuu úhú iní ñáhá xii-ndí. <sup>3</sup>Te ñá túú ní dándahú ñáhá-ndí xii-ndo chi mee-ni tnúhu ndáá ní cáhá<sup>n</sup>-ndí núú-ndó, te ni ñà túú ni ì<sup>n</sup> tnúhu cuèhé ñúhú ìní-ndí ní cáhá<sup>n</sup>-ndí tnúhu-gá núú-ndó chi sa ní nduu ndoo ní nduu nine iní-ndí. <sup>4</sup>Te mee Yá Ndiöxí ní cachí-gá sá càhá<sup>n</sup>-ndí tnúhu-gá, te càhá<sup>n</sup>-ndí nàcuáa cùu iní mée-gã, chi sa nàha-gá nàcuáa càa iní-ndí, te ñá túú càhá<sup>n</sup>-ndí nàcuáa cùu iní ñáyiú. <sup>5</sup>Te nàha-ndo sá ñà díú ì<sup>n</sup> tnúhu cudíí ìní-ndó cùndecu-ndo ichi ñuyúú ní càhá<sup>n</sup>-ndí núú-ndó cuendá taxi-ndo díhú<sup>n</sup>. Te Yá Ndiöxí sa nàha-gá sá càhá<sup>n</sup> ndáá-ndí. <sup>6</sup>Te ñá í<sup>n</sup> ndũu ni quide-ndí ì<sup>n</sup> sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gá ñáyiú, te cuèí tàú ndisa-ndí sá cádá càhnu ñaha-ndo xii-ndí ní cùu, chi chiú<sup>n</sup> Xítohó Jesucristú quidé-ndí, te dícó-ni sá nchùhú ñá túú ní cuìní-ndí sá dúcá<sup>n</sup> càda-ndo. <sup>7</sup>Te ïo vii ïo váha ní cáhá<sup>n</sup>-ndí núú-ndó, dàtná quidé ì<sup>n</sup> ñaha cuu náná vii vii càhá<sup>n</sup> ndihi cue déhe-a<sup>n</sup> dàcuehnu ñaha-a<sup>n</sup> xii-güexi. <sup>8</sup>Te duca<sup>n</sup> ïo cùu iní ñáhá-ndí xii-ndo, dico ñá díú-ní sã ní cáhá<sup>n</sup>-ndí tnúhu Yá Ndiöxí núú-ndó, chi ndéé iní-ndí taxi-ndí ní dácótó ñàha-xi, te núu dícó ní cùu-xi sá cúú, cuendá sá ïo cùu iní ñáhá-ndí xii-ndo. <sup>9</sup>Te nchòhó ñáyiú ndècu ndihi-ndí ichi Xítohó Jesucristú nàha-ndo sá ïo ní quide chiú<sup>n</sup>-ndí cuendá ní níhí-ndí sá

nĩ xexi-ndí. Te cuẽi nduu cuẽi niú ní quide chiu<sup>n</sup>-ndí ní níhí-ndĩ sá nĩ xexi-ndí ní cáhá<sup>n</sup>-ndí tnúhu Yá Ndiõxí núú-ndó cuendá sá ñà túú ní cuiní-ndí chichiu<sup>n</sup> ñaha-ndí xii-ndo.

<sup>10</sup>Te nchòhó ñáyiu sàndáá iní tnúhu Yá Ndiõxí xiní ndáá-ndó sã cúú-ndĩ cue téé váha te duca<sup>n</sup> sà naha Yá Ndiõxí tucu, te ní xica-ndí ichi ndáá òré ní cáhá<sup>n</sup>-ndí tnúhu-gá núú-ndó te ñu-ni duca<sup>n</sup> quide-ndí vitna. Te vá yõ ì<sup>n</sup> càhá<sup>n</sup> sá ñà túú quide ndáá-ndí ndécú-ndí.

<sup>11</sup>Te ñaha tucu-ndo sá nĩ dácàhá<sup>n</sup> ñáhá-ndĩ xii-ndo, te ní taxi-ndí tnúhu ndee ìní xii-ndo nchàa-ndo, te dàtná quidé ì<sup>n</sup> tátá ndìhi cue déhe-dé ní quide-ndí. <sup>12</sup>Te ní cachí-ndí xii-ndo sã cádá ndáá-ndó cùndecu-ndo nacuaá tàú-xi cada nchaa ñáyiu tnàhá tnúhu ndìhi Yá Ndiõxí, chi mee-gã ní cáhá<sup>n</sup> ñáhá-gã xii-o cuendá nduu táhú-ó cùndecu-o ndìhi-gá núú ò váha càa ndecu-gá táxi tnùnì-gá.

<sup>13</sup>Te xíã<sup>n</sup> ò ndàcá<sup>n</sup> táhú-ndĩ núú Yá Ndiõxí sá nchòhó òré ní tedòho-ndo tnúhu-gá ní cáhá<sup>n</sup>-ndí, te ní sàndáá iní-ndó chi ní cutnùnì iní-ndó sã díú tnúhu Yá Ndiõxí cúú-xí, te ñà díú tnúhu ñáyiu ñuyú-a cùu-xi. Te ndáá sá cúú-xí ì<sup>n</sup> sá ò váha sá cúú-xí nchòo cue ñáyiu ní sàndáá iní tnúhu-gá. <sup>14</sup>Te nchòhó ñáyiu ndècu ndìhi-í ichi Xítóhó Jesucristú, ò ní ndoho ní tnahá-ndó sã nĩ quide ñaha ñáyiu ñuú-ndó. Te nchòhó ní ndoho-ndo dàtná ní ndoho nchaa ñáyiu tàcá dácuaá tnúhu Xítóhó Jesucristú ndécú òstrítú Jùdeá, chi tnàhá-yu ò ní dándóhó ñaha ñáyiu ñuú-yu. <sup>15</sup>Te ñu-ni ñáyiu òstrítú Jùdeá-á<sup>n</sup>

nĩ sahní-yu cue téé ní xóo cáhá<sup>n</sup> tnúhu Yá Ndiõxí ndéé sanaha. Te ñu-ni ñanì tnàhá-yu cùu cue ñáyiu ní sahnì ñaha xii Xítóhó Jesucristú, te sátá xíã<sup>n</sup> te ní ngüíta-yu ní cuu úhú iní ñáhá-yu xii-ndí, núu xíã<sup>n</sup> ñà túú tnàhá iní Yá Ndiõxí nchaa sá quidé-yu, te ndéé nchaa dava-gá ñanì tnàhá-yu cùu úhú iní-yu. <sup>16</sup>Te ò chidácá nihnu ñáhá-yu xii-ndí òré càhá<sup>n</sup>-ndí tnúhu Yá Ndiõxí núú ñáyiu ñà túú cùu ñáyiu isràél, te duca<sup>n</sup> quide ñáyiu-á<sup>n</sup> cuendá cuiní-yu sá vã càhá<sup>n</sup>-ndí tnúhu-gá, sá cádá cuendá naníhí tàhú ñáyiu ñà túú cùu ñáyiu isràél-á<sup>n</sup>, te sá dúcá<sup>n</sup> quidé-yu te ò ta cùu vai-gá cuéchi-yu cuáhá<sup>n</sup>. Te Yá Ndiõxí ò cùdée<sup>n</sup>-gã núú-yu, te tendaha-gã ì<sup>n</sup> tnúndòho quixi sá cúú-xí-yu te ò ndohó-yu.

**Té Páblú cuiní-dé quíngoto-dé ñáyiu xíndecu ichi Xítóhó Jesucristú ndécú ñuú Tesalónica**

<sup>17</sup>Te nchòhó ñáyiu ndècu ndìhi-ndí ichi Xítóhó Jesucristú ní quee-ndí núú-ndó, te cuẽi ní cuxica-ndĩ dico duca<sup>n</sup>-ni ñuhu iní ñáhá-ndĩ xii-ndo, te ò ñuhu iní-ndí sá quixí còto ñaha tucu-ndí xii-ndo. <sup>18</sup>Te yúhú té Páblú duca<sup>n</sup>-ni ñuhu iní-í sá cuèdicó mèe-í quixi-í, quixi coto ñaha-í xii-ndo, dico yucu ñávaha chidácá nihnu ñaha-xi xii-í. <sup>19</sup>Te nchoo ñáyiu ndècu ichi Xítóhó Jesucristú ndètu-ni-gá-ó quèxio-gá candeca ñaha-gã xii-o ndàa andiu cundecu-o ndìhi-gá. Te cùdíí víhí ònì-ndí sá cuendá-gá chi ní chindee ñaha-gá ní sanu ichi ñaha-ndí xii-ndo òchi-gá, te ò vãi ñáyiu cáhá<sup>n</sup> váha-yu cuendá-ndí ná sàá

nduu quìxi tucu-gá. <sup>20</sup>Te duca<sup>n</sup> ìo vài ñáyiu cáhá<sup>n</sup> váha-yu cuendá-ndí cuendá sá ñí sanu ichi ñaha-ndí xii-ndo ìchi-gá, te quide váha-ndo. Te xíá<sup>n</sup> ìo cùdí ìní-ndí.

**3** <sup>1-2</sup>Te sa ní cunduu ñá túú-gá càhá<sup>n</sup> ndìhi tnàha-o, núu xíá<sup>n</sup> ñá ní cùndee-gá ìní-ndí ní tendaha-ndí té Timùteú ní quixi coto ñaha-dé xii-ndo, te nchúhú ní quendóo-ndí ñuú Àtenás, chi tnàhá-dé xínú cuèchi-dé núu Yá Ndiöxí, ndìhi núu Xítóhó Jesucristú càhá<sup>n</sup>-dé tnúhu-gá núu ñáyiu. Te ní quixi-dé ní taxi-dé tnúhu ndee ìní xii-ndo cuendá sá ìo quindáá-ni ìní-ndó Xítóhó Jesucristú, te canchicú<sup>n</sup> nihnu-ni-ndo ñí yuhu ñí ìní-ndó ìchi-gá. <sup>3</sup>Te vá nátùhú ìní-ndó càncchicú<sup>n</sup> nihnu-ndo ìchi-gá sá dúhá cùu úhú ìní ñáhá ñáyiu xii-o, te nchòhó sa ñaha-ndo sá dàcuítí sá ndóhó vìhi-o cuendá-gá. <sup>4</sup>Te ndéé cùtnàhá ndécú ndìhi ñaha-gá-ndí xii-ndo ñí cachí tnúhu ndáá-ndí sá ìo ndoho-o, te duca<sup>n</sup> ndisa quide-xi. <sup>5</sup>Te xíá<sup>n</sup> núu ñá ní cùu váha-gá ìní-í chi cuendá ñá túú-gá ní ñhì-í tnúhu nàcuáa cùu ndecu-ndo núu ní tendaha-í té Timùteú ní quixi-dé ní ndúcú tnúhu-dé núu-ndó núu ndecu-ni-ndo ichi Xítóhó Jesucristú, chi ní sani ñí<sup>n</sup> ní sani úú ìní-í sá cúu-xí-ndó, chi ná ndèé chidácá nihnu ñaha yùcu ñávàha xii-ndo te cuíta chiu<sup>n</sup> ní quide-ndí sá cúu-xí-ndó ñí cáhà<sup>n</sup>-í.

<sup>6</sup>Te ñáhá, chi ní ndexìo té Timùteú sá ñí quixi-dé ñuú-ndó, te ñaha-dé tnúhu ní nasáá sá ñí yuhu ñí ìní-ni-ndo sàndáá ìní-ndó Yá Ndiöxí, te cùu ìní-ndó cuè tnaha ñáyiu-ndo. Te càchí-dé sá ìo ñùhu

ìní ñáhá-ndó xii-ndí, te ìo cuíní-ndó cáhá<sup>n</sup> ndìhi ñaha-ndo, te ñu-ni duca<sup>n</sup> ìo cuíní nchúhú cáhá<sup>n</sup> ndìhi ñaha-ndí xii-ndo tùcu. <sup>7</sup>Te ìo ndòho-ndí chi ìo cùu úhú ìní ñáhá ñáyiu xii-ndí, dico sá ñí ñíhí-ndí tnúhu sá nchòhó ñáyiu ndècu ndìhi-ndí ichi Xítóhó Jesucristú ñá túú dàña ndéé-ndó sàndáá ìní-ndó Yá Ndiöxí, te xíá<sup>n</sup> cúu-xí ñí<sup>n</sup> tnúhu càhnu ìní ní ñíhí-ndí chi ní naníhí ndéé-ndí. <sup>8</sup>Te ní nduu vétú ìní-ndí sá ñí ñíhí-ndí tnúhu ndècu-ni-ndo ichi-gá. <sup>9</sup>Te òré càhá<sup>n</sup> ndìhi-ndí Yá Ndiöxí, te ìo ndàcá<sup>n</sup> táhú-ndí núu-gá cuendá sá ñà túú dàña nihnu-ndo ichi-gá, núu xíá<sup>n</sup> ìo cùdí ìní-ndí. <sup>10</sup>Te cuèi nduu cuèi niú xìcá<sup>n</sup> táhú-ndí núu Yá Ndiöxí sá méé-gá ná càda te sáá ñí<sup>n</sup> nduu nàñíhí tnáhá-ó cuendá danèhé ñáhá vâha-gá-ndí tnúhu-gá sá cùmáñí-gá xii-ndo.

<sup>11</sup>Te mee Tătá-ó Dütú Ndiöxí, ndìhi Xítóhó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. <sup>12</sup>Te mee Xítóhó Jesucristú ná chindee ñaha-gá xii-ndo, te ìo-gá cuita cuu ìní tnáhá-gá-ndó nàcuáa ndècu-ndo ichi-gá ndìhi nchaa dava-gá ñáyiu dàtná cúu ìní ñáhá-ndí xii-ndo. <sup>13</sup>Te xìcá<sup>n</sup> táhú tùcu-ndí núu Tătá-ó Dütú Ndiöxí sá ñí yuhu ñí ìní-ndó càncchicú<sup>n</sup> nihnu-ni-ndo ìchi-gá, te duca<sup>n</sup> te cundáá-ndó núu-gá, te ñá túú-gá ná cumáñí-ndó òré ná sáa nduu quixi tucu Xítóhó Jesucristú ndìhi nchaa ñáyiu sa ndècu ndìhi-gá.

**Nàcuáa cuíní Yá Ndiöxí cada-o**

**4** Te nchòhó ñáyiu ndècu ndìhi-í ichi Xítóhó Jesucristú càhá<sup>n</sup>



ndàhú-í nùú-ndó sã cùndèdóho-ndo na càhá<sup>n</sup>-í nàcuáa ndùu tnúhu càhá<sup>n</sup> Xítóhó Jesucristú, chi mee-gã cuiní-gá sá cáda-ndó nàcuáa ní dánèhé ñáhá-ndí xii-ndo cuendá cuu váha iní Yá Ndiöxí nùú-ndó, te duca<sup>n</sup>-ni càda-ndo ndéé nùú cuàhá<sup>n</sup> nùú vëxi.

<sup>2</sup>Te nchòhó sa nàha-ndo nacuáa ní cáhá<sup>n</sup>-ndí nùú-ndó, chi ní cáhá<sup>n</sup>-ndí nàcuáa ní táuchíú<sup>n</sup> Xítóhó Jesucristú te ní cachí-gá sá <sup>3</sup>Yá Ndiöxí cuiní-gá sá cáda ndáá-ó cùndecu-o ichi-gá. Te nchoo cuè téé vá càhá<sup>n</sup> ndíhi-o ñáyyiu òhí te nùú ñá díú ñàdihí-ó cùú-yu, te ni cuè ñáyyiu òhí vá càhá<sup>n</sup> ndíhi-yu téé nùú ñá díú yí-yu cùu-güedé. <sup>4</sup>Te nùú xíá<sup>n</sup> nchaa nchòhó tnàha téé-í ndí díí<sup>n</sup> cùndecu ñadihí-ndó, te òu-ndí duca<sup>n</sup> nchòhó cue ñáyyiu òhí tucu ndí díí<sup>n</sup> cùndecu yí-ndo, te mee-ni tnúhu yíñùhu càhá<sup>n</sup> ndíhi tnàha-ndo.

<sup>5</sup>Te vá cání cuèhé cani duha iní-ndó dàtná quidé cuè ñáyyiu ñá túú sàndáá iní tnúhu Yá Ndiöxí. <sup>6</sup>Te ni òhí-ndo vá cání iní-ndó dandahú-ndó tnàha téé-ndo càhá<sup>n</sup> ndíhi-ndo ñadihí-güedé. Te duca<sup>n</sup>-ni nchòhó cue ñáyyiu òhí tucu vá cání iní-ndó dandahú-ndó tnàha òhí-ndó càhá<sup>n</sup> ndíhi-ndo yí-yu. Chi nùú duca<sup>n</sup> na càda-ndo, te Yá Ndiöxí ío dandòho ñaha-gá xii-ndo dàtná ní cachí-ndí ndéé díhna. <sup>7</sup>Chi Yá Ndiöxí ní cáhá<sup>n</sup> ñáhá-gã xii-o cuendá sá cáda-ó mèe-ni sá váha, te ñá díú sã cuèhé sá dúhá. <sup>8</sup>Te nchaa ñáyyiu na càda sáá iní-xi tnúhu càhá<sup>n</sup>-ndí, te quide sáá iní-yu nùú Yá Ndiöxí, chi ñá díú tnúhu téé ñuyúú-a cùu-xi, chi tnúhu Yá Ndiöxí, Yaá ní taxi Espíritú-gá ndécú ndíhi-o cuu-xi.

<sup>9</sup>Te nchòhó ñáyyiu ndècu ndíhi-í ichi Xítóhó Jesucristú, ñá túú-gã

xíní ñùhu-xi cachí tnúhu-í xii-ndo sã cúú iní tnáhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndíhi nàcuáa cuu iní-ndó dàva-gá tnàha ñáyyiu-ndo. <sup>10</sup>Te duca<sup>n</sup> xíquide-ndo ndíhi nchaa ñáyyiu ndècu ndíhi-ndo ichi Xítóhó Jesucristú ndécú òstrítú Macèdoniá. Te càhá<sup>n</sup> ndàhú-ndí nùú-ndó sã cáda ndáá-gá-ndó, te cuita cuu iní-gá-ndó cuè tnàha ñáyyiu-ndo quíh<sup>n</sup>. <sup>11</sup>Te cada ndee iní-ndó cùndecu ñucaxi iní-ndó, te cuhu<sup>n</sup> iní-ndó chùu<sup>n</sup> mee-ndo, te xíá<sup>n</sup> cada-ndo dàtná ní dánèhé ñáhá-ndí xii-ndo. <sup>12</sup>Te duca<sup>n</sup> te tnàha nchaa ñáyyiu ñá túú sàndáá iní tnúhu Yá Ndiöxí cáhá<sup>n</sup> váha-yu cuendá-ndó, te duca<sup>n</sup> te ñá túú tnáhí-gá ná cùmání xii-ndo.

#### Nàcuáa cada-xi òré quixi tucu Xítóhó Jesucristú

<sup>13</sup>Te vitna na càchí tnúhu-ndí xii nchòhó ñáyyiu ndècu ndíhi-ndí ichi Xítóhó Jesucristú cuendá nchaa ñáyyiu sa ní xíhí, ñáyyiu ní sàndáá iní tnúhu Yá Ndiöxí cuendá sá vã ndíhú iní-ndó cuendá-yu dàtná xíquide nchaa ñáyyiu ñá túú yíhi iní-xi sá quixí tucu Xítóhó Jesucristú ñuyúú-a. <sup>14</sup>Te nchoo sàndáá iní-ó sã ní xíhí Xítóhó Jesucristú te ní ndoto-gá ní dándótó ñàha Yá Ndiöxí, te sàndáá tucu iní-ó sã dàtná ní dándótó Yá Ndiöxí Xítóhó Jesucristú, duca<sup>n</sup> dandoto-gá nchaa ñáyyiu ní xíhí ñáyyiu ní sàndáá iní ñáhá xii-gá.

<sup>15</sup>Te na càchí tnúhu tucu-ndí ingá tnúhu nàcuáa ní cáhá<sup>n</sup> Xítóhó Jesucristú, chi ní cachí-gá sá ná sáá nduu quixi tucu-gá te nchaa

ñáyiú sàndáá iní tnúhu-gá ndécú vívú ñuyíú-a vá códó nùú-yu núú ñáyiú ní xíhí ndaa andiú, chi jündú candeca ñaha-gă xií-yu ndaa. <sup>16</sup>Chi Xítohó Jesucristú quee túu-gá andiú, te cana-gá nchaa ñáyiú ní sándáá iní tnúhu-gá, te òré-á<sup>n</sup> Yă Ndiòxí cada-gá te òré-á<sup>n</sup>, cáhá<sup>n</sup> ì<sup>n</sup> cútú te òré-ni-á<sup>n</sup> ndoto nchaa ñáyiú ní xíhí, ñáyiú ní sándáá iní tnúhu-gá. <sup>17</sup>Te dàtnùní nchaa nchoo ñáyiú xĩndecu vívú ñuyíú-a naníhí tnáhá-ó ndìhí-yu, te ndanchita-o ndìhu-o xìtí vícò naníhí tnáhá-ó ndìhi Xítohó Jesucristú, te candeca ñaha-gă xii-o ndàa andiú cundecu ndìhi-o-gá ni caa ni quíhí<sup>n</sup>. <sup>18</sup>Núú xíá<sup>n</sup> chí cuăha tnàha tnúhu ndee iní, te vá ndìhú iní-ndó chi naníhí tàhú-ndó nũú-gă.

**5** Te nchòhó ñáyiú ndècu ndìhi-í ichi Xítohó Jesucristú ñá túú-gă xíní ñùhu-xi sá càchí tnúhu-í xii-ndo sã quíxí tùcu-gá, te ni ñà túú-gă xíní ñùhu-xi sá càchí tnúhu-í xii-ndo ñasa cada-xi òré quixi-gá. <sup>2</sup>Chi nchòhó sa ñaha ndáá-ndó sã Xítohó Jesucristú quixi-gá nduu ñà túú yìhi iní-ó, chi dàtná quidé ì<sup>n</sup> ñadúhú cada-gá òré quixi-gá, chi nduu ñà túú ñă yíhí iní-ó quixi tucu-gá. <sup>3</sup>Te sáá nduu te cachí nchaa ñáyiú ndècu ichi cuehé ichi duha: “Vítna ío váha cùu iní-ó ndècu-o, te ñá túú-gă ná cúmăní xii-o”, duha quesáhá-yu. Te ñáyiú-á<sup>n</sup> òré ñá túú ñă yíhí iní-yu, te quèxio tnúndòhó tnúhu ndàhú sá cúú-xí-yu. Chi cada-xi dàtná quidé-xí ì<sup>n</sup> ñáyiú òhí ní tnahá òré cacu déhe-xi, chi na iní-yu ní dátñhú ñáhá-xí te vá càcu-yu núú tnúndòhó-yu, te duca<sup>n</sup> sã tnáhá-xi yáha nchaa ñáyiú ñá túú ndècu ichi-gá, chi na iní-yu quèxio tnúndòhó sá cúú-xí-yu te vá càcu-yu núú tnúndòhó-á<sup>n</sup>. <sup>4</sup>Te

nchòhó ñáyiú ndècu ndìhi-í ichi Xítohó Jesucristú, ñá túú-gă ndécú-ndó ichi cuehé ichi duha, núú xíá<sup>n</sup> sa yìhi-ná iní-ndó nduu quixi-gá te vá yáha-ndo dàtná yáha nchaa ñáyiú ñá túú ndècu ichi-gá, chi ñáyiú-á<sup>n</sup> ñà túú ñă yíhí iní-yu sá quíxí-gă. Te na iní-yu quèxio-gá dàtná quidé ñadúhú na iní-ó quíhu-güedé vehe-o dùhu-güedé duca<sup>n</sup> càda-gá òré quixi-gá. <sup>5</sup>Te nchoo ñà túú-gă ndécú-ó ichi cuehé ichi duha, te ichi-á<sup>n</sup> cúú-xí dàtná ì<sup>n</sup> ichi nee ndècu-o ni cuu, te vitna sa ní ngúndecu-o ichi váha, te duca<sup>n</sup> chi Yá Ndiòxí ní dándíxí tũu-gá iní-ó cuendá cutnùní iní-ó ñacuáa nduu cuendá-gá. <sup>6</sup>Te xini ñuhu-xi dandixi túu-o iní-ó, te cada váha-o cùndecu-o ichi-gá, te vá cadá-ó dàtná quidé nchaa ñáyiú ñá túú sàndáá iní ñáhá xii-gá, chi ñáyiú-á<sup>n</sup> ñà túú-gă quidé cuendá-yu te núú quidé váha-yu àdi ñá túú quidé váha-yu ndécú-yu. <sup>7</sup>Te nchaa ñáyiú quidé cuehé quidé dùha cuú-yu dàtná ì<sup>n</sup> ñáyiú xidí àdi xini, chi ñá túú quidé cuendá-yu ñacuáa cadá-yu ì<sup>n</sup> sá vâha dàtná cuíní Yă Ndiòxí. <sup>8</sup>Te nchòhó ñáyiú sa ní cutnùní iní-xi ñacuáa nduu ichi váha, dandixi túu-ndo iní-ndó cùndecu-ndo, te quĩndáá ndisa iní-ndó Yă Ndiòxí, te cuu iní-ndó cuè tnaha ñáyiú-ndo te duca<sup>n</sup> te vá táxí tnùní ñáhá ni ì<sup>n</sup> sá cuèhé sá dúhá xii-ndo. Te ío cuhu<sup>n</sup> iní-ndó sã cùndècu-ndo ndìhi-gá ni caa ni quíhí<sup>n</sup>. <sup>9</sup>Chi Yá Ndiòxí ní cachí-gá sá vâ quíhí<sup>n</sup>-ó núú ùhú núú ndàhú, chi mee-gă nacuaca ñaha-gă xii-o cùndecu-o ndìhi-gá, chi ní sándáá iní-ó Xítohó Jesucristú. <sup>10</sup>Te mee Xítohó Jesucristú ní xíhí-gá sá cuendá nchaa yícá cuèchi-o, te ní ndoto-gá cuendá nduu táhú-ó cùndecu-o ndìhi-gá andiú na sàá nduu

cuéi sa ní xíhí-ó, àdi vátá cùú-gá-ó.

<sup>11</sup>Núu xíá<sup>n</sup> chí cuǎha tnàha tnúhu ndee ìní, te chindee tnàha-ndo cundecu-ndo ichi-gá dàtná tá quide-ndo véxi.

**Té Páblú dáquini sàhú-dé ñáyiu ndècu ichi Xítóhó Jesucristú**

<sup>12</sup>Te nchòhò ñáyiu ndècu ndìhi-ndí ichi Xítóhó Jesucristú, càhá<sup>n</sup> ndàhú-ndí núú-ndó sǎ cànèhe-ndo sá yíñùhu núú cuè téè cùnūu xinu cuechi núú Yǎ Ndiòxí, cue téè dānehé ñáhá xii-ndo nacuáa cundecu-ndo ìchi-gá. <sup>13</sup>Te càhá<sup>n</sup> váha-ndo ndìhi-güedé, te cuu iní-ndó-güedé, chi nàha-ndo sá chíú<sup>n</sup> Yǎ Ndiòxí quidé-güedé. Te cundecu ndìhi váha tnàha-ndo nchaa-ndo.

<sup>14</sup>Te càhá<sup>n</sup> ndàhú tucu-ndí núú-ndó sǎ càhá<sup>n</sup>-ndó dōho nchaa ñáyiu ñá túú cuini cada chù<sup>n</sup>, te duca<sup>n</sup> cuǎñaha-ndo tnúhu ndee ìní xii nchaa ñáyiu quèyuhu iní-xi canchicú<sup>n</sup> nihnu ichi-gá, te chindee tucu-ndo nchaa ñáyiu vátá ngūnu ichi váha-gá, te cunduu càhnu iní-ndó nǔú-yu nchaá-yu.

<sup>15</sup>Te cada ndee ìní-ndó te núu ndècu tnaha ñáyiu-ndo cùú úhú iní ñáhǎ-yu xii-ndo, te vá tnàhá-ni-ndo cùú úhú iní-ndó-yu. Te mee-ni sǎ vǎha cada-ndo sǎ cúú-xí nchaa tnaha ñáyiu-ndo.

<sup>16</sup>Te nchaa nduu ío cudí iní-ndó cundecu-ndo. <sup>17</sup>Te ìí<sup>n</sup> nduu ìí<sup>n</sup> nduu càhá<sup>n</sup> ndìhi-ndo Yǎ Ndiòxí. <sup>18</sup>Te ndacá<sup>n</sup> táhú-ndó nǔú-gǎ te núu nándi cùú sǎ yǎha-ndo ndècu-ndo, chi duca<sup>n</sup> cuini-gá cada-o, te diu duca<sup>n</sup> ndùu tnúhu càhá<sup>n</sup> Xítóhó Jesucristú.

<sup>19</sup>Te vá quèhndé nihnu-ndo chù<sup>n</sup> quide Espiritú Yǎ Ndiòxí iní-ndó.

<sup>20</sup>Te vá cǎdá sǎá iní-ndó nǔú cuè téè càhá<sup>n</sup> tnúhu Yǎ Ndiòxí nàcuáa dàcahu iní ñáhá-gǎ xii-güedé. <sup>21</sup>Te cada cuendá váha-ndo nàcuáa càhá<sup>n</sup>-güedé, te tnií-ndo nchaa tnúhu váha càhá<sup>n</sup>-güedé. <sup>22</sup>Te dañā-ndo nchaa ichi cuehé ichi duha.

<sup>23</sup>Te mee Yǎ Ndiòxí quidé-gǎ ío váha cùú iní-ó ndècu-o ichi-gá. Te xicá<sup>n</sup> táhú-í núú-gǎ sǎ ná càda íí ñáhá-gǎ xii-ndo, te na còto ñaha-gǎ xii-ndo ndìhi iní-ndó cuendá sǎ vǎ cǎdá-gǎ-ndó nì ìí<sup>n</sup> sǎ cuèhé sǎ dúhá, te diu-ni duca<sup>n</sup> na càda-gǎ sǎ cúú-xí-ndó ndéé ná sǎá nduu quèxi tucu Xítóhó Jesucristú ñuyúú-a.

<sup>24</sup>Chi Yǎ Ndiòxí Yaá ní càhá<sup>n</sup> ñáhá xii-o cada-gǎ nàcuáa ní càhá<sup>n</sup>-gǎ, te chindee ñàha-gǎ xii-ndo.

**Té Páblú quidé ndèe iní-dé ñáyiu xíndecu ichi Xítóhó Jesucristú ndécú ñùú Tesalónica**

<sup>25</sup>Te nchòhò ñáyiu ndècu ndìhi-í ichi Xítóhó Jesucristú, cǎcá<sup>n</sup> táhú-ndó nǔú Yǎ Ndiòxí sǎ ná chindee ñaha-gǎ xii-ndí.

<sup>26</sup>Te cúñaha-ndo xii nchaa ñáyiu ndècu ndìhi-o ichi Xítóhó Jesucristú sǎ nì yuhu nì iní-ndí quidé ndèe iní ñáhá-ndí xii-ndo ndìhí-yu.

<sup>27</sup>Te vitna mee Yǎ Ndiòxí ndéhe-gǎ sǎ càhá<sup>n</sup> ndàhú-í núú-ndó sǎ dǎcuàha-ndo tutú-a núu nchaa ñáyiu ndècu ndìhi-o ichi-gá.

<sup>28</sup>Te Xítóhó Jesucristú ío na chindee chitúu ñaha-gǎ xii-ndo nǔú cuahá<sup>n</sup> núu véxi. Te duca<sup>n</sup> na cunduu. Te ío chí cǎdá ndèe iní-nǎ vitna.

# TUTÚ CÚÚ ÒÚ NÍ CADÚHA TÉ PĀBLÚ QUÍHÍ<sup>n</sup> NDAHA ÑÁYIU ÑUÚ TESÀLÓNICÁ

Té Pāblú ndihi cue tée cùndihi-dé  
cádúha-güedé tutú quíhí<sup>n</sup> ndaha  
ñáyiú xĩndecu ichi Xítóhó  
Jesucristú ndécú ñúú Tesàlónicá

**1** Yúhú té Pāblú cádúha-í tutú-a  
ndihi té Silvanú, ndihi té  
Timùteú cuendá daquixi-í ndaha  
nchòhó ñáyiú ndècu ndihi-ndí  
ichi Xítóhó Jesucristú ndécú ñúú  
Tesàlónicá, chi tnàhá tnúhu-ndo  
ndihi Tátá-ó Dütú Ndiöxí, ndihi  
Xítóhó Jesucristú. <sup>2</sup>Te xicá<sup>n</sup> táhú-ndí  
núú Dütú Ndiöxí, ndihi núú Xítóhó  
Jesucristú sá ná chĩndee chitúu  
ñaha-gá xii-ndo, te duca<sup>n</sup> ndí  
nduú-gá ná cádá te ío váha cuu  
iní-ndó cùndecu-ndo.

Yá Ndiöxí cada ndáá-gá cuéchi  
nchaa ñáyiú ndècu ichi cuehé  
ichi duha na sàá nduu quixi  
tucu Xítóhó Jesucristú

<sup>3</sup>Te nchòhó ñáyiú ndècu ndihi-ndí  
ichi Xítóhó Jesucristú, càchí tnúhu-í  
xii-ndo sã cúnàha-ndo sá ñà túú  
dãña ndee-ndí ndácá<sup>n</sup> táhú-ndí núú  
Yá Ndiöxí cuendá-ndó, chi dacuitíí  
dúca<sup>n</sup> taú-xi cunduu chi ío-gá

tá sàndáá iní-ndó-gã cuáhá<sup>n</sup>, te  
duca<sup>n</sup> ùu<sup>n</sup>-gá tá cùu iní tnáhá-ndó  
nàcuáa ndècu-ndo ichi Yá Ndiöxí.  
<sup>4</sup>Núu xíã<sup>n</sup> nchúhú ío váha càhá<sup>n</sup>-ndí  
cuendá-ndó núú nchàa ñáyiú  
sàndáá iní tnúhu Yá Ndiöxí nchaa  
núú tàcá-yu dàcuahá-yu tnúhu-gá,  
chi ío sàndáá iní-ndó-gã, te ñà túú  
dãña ndeé-ndó nchícú<sup>n</sup> nihnu-ndo  
ìchi-gá, te quide cahnu-ni iní-ndó  
cuèi nándí sá yãha-ndo ndècu-ndo  
ìchi-gá. <sup>5</sup>Te sá dúcá<sup>n</sup> quide  
váha-ndo ndècu-ndo xíã<sup>n</sup> cùtnùní  
nàcuáa cada ñaha Yá Ndiöxí xii-ndo  
na sàá nduu, chi nduu táhú-ndó  
cùndecu-ndo núú táxí tnùní-gá, te  
duca<sup>n</sup> càda-gá chi cùu-gá Yaá quidé  
ndää cuiti. Te vitna ndòho-ndo  
nacuáa ndíhu ndaha-gã dava-gá  
ñáyiú.

<sup>6</sup>Te Yá Ndiöxí ío váha ndáá  
quidé-gã, chi mee-gã nachinaa-gá  
nchaa sá quidé ñàha ñáyiú cùu úhú  
iní ñáhá xii-ndo, <sup>7</sup>te nchoo ñáyiú  
ndòho cuendá Xítóhó Jesucristú  
nucúndecu váha-o na sàá nduu  
núú túu-gá andíu, te tnàhá cue  
espíritú xínú cuèchi núú Yá Ndiöxí  
cúu<sup>n</sup> ndihi-gá, te cue espíritú-ái<sup>n</sup>

quidé-xí nchàa núu chiù<sup>n</sup> tahu-gá. Te òré nuu túu-gá andiù ndìhi cue espíritú-á<sup>n</sup>, te ío dátása<sup>n</sup>-xi andiù. <sup>8</sup>Te dandòho-gá nchaa ñáyiù ñá túú tnàhá tnúhu ndìhi Yá Ndiòxí, ñáyiù ñá túú sàndáá iní tnúhu Xítóhó Jesucristú tnúhu sá càhá<sup>n</sup> nàcuáa naníhí tàhú-yu. <sup>9</sup>Te nchaa ñáyiù-á<sup>n</sup> ío dandòho ñaha-gá xii-yu, chi ndohó-yu ni caa ni quíhí<sup>n</sup>, te vá cundècú-yu núú ío váha càa ndecu-gá táxi tnùnì-gá. <sup>10</sup>Te duca<sup>n</sup> càda ñaha-gá xii-yu na sàá nduu, te dàvá-á<sup>n</sup> ío cada càhnu ñaha nchaa ñáyiù sàndáá iní ñáhá xii-gá. Te tnàhá nchaa nchòhó ñáyiù ní sàndáá iní tnúhu ní càhá<sup>n</sup>-ndí duca<sup>n</sup> càda-ndo, te nchaa-o ío cuñúhu-o-gá dàvá-á<sup>n</sup>.

<sup>11</sup>Te cuèndá xíá<sup>n</sup> núu ío xìcá<sup>n</sup> táhú-ndí núú Dütú Ndiòxí sá ná chìndee ñaha-gá xii-ndo cundecu váha-ndo ìchi-gá dàtná cuìnì mée-gá cundecu nchaa ñáyiù ní càhá<sup>n</sup>-gá cundecu ndìhi-gá. Te xìcá<sup>n</sup> táhú tucu-ndí núu-gá sá ío na chìndee ñaha-gá xii-ndo càda-ndo nchaa sá vâha sàni iní-ndó, ndìhi cuèndá chiù<sup>n</sup> quide-ndo cuèndá-gá, te duca<sup>n</sup> chi sàndáá iní-ndó-gá. <sup>12</sup>Te núu duca<sup>n</sup> na càda-ndo, te càhá<sup>n</sup> váha ñáyiù cuèndá Xítóhó Jesucristú, te tnàhá-ni nchòhó càhá<sup>n</sup> váha-yu cuèndá-ndó, chi mee Yá Ndiòxí ndìhi Xítóhó Jesucristú cundàhú iní ñáhá-gá chìndèe ñaha-gá xii-ndo.

#### Tée quixi dandàhú ñáyiù

**2** Te nchòhó ñáyiù ndècu ndìhi-ndí ichi Xítóhó Jesucristú càchí tnúhu-ndí xii-ndo nàcuáa cada-xi nduu na quixi

tucu-gá, chi quixi-gá nacuaca ñaha-gá xii-o, núu xíá<sup>n</sup> càhá<sup>n</sup>-ndí dóho-ndo. <sup>2</sup>Te ñá dífú sá íf<sup>n</sup> tnúhu tecú dóho-ndo te ngúíta-ndo càni íf<sup>n</sup> cani úú iní-ndó, te ni vâ yùhú-ndó te núu véxi íf<sup>n</sup> tée càchí-dé sá càhá<sup>n</sup>-dé tnúhu Yá Ndiòxí, te càchí-dé sá sà véxi Xítóhó Jesucristú, te vá quèndáá iní-ndó tnúhu càhá<sup>n</sup>-dé chi ñá ndàá, àdi véxi íf<sup>n</sup> tée nèhe íf<sup>n</sup> tutú núu-ndó te càchí-dé sá yùhú ní tendaha-í véxi, te núú tütù-á<sup>n</sup> càhá<sup>n</sup>-xi sá sà véxi Xítóhó Jesucristú, te ñi-ni vá quèndáá iní-ndó nàcuáa càhá<sup>n</sup>-xi, te ndèda-ni càa ñáyiù càhá<sup>n</sup>-yu dàvá-á<sup>n</sup> sá sà véxi-gá dico vá quèndáá tnàhí iní-ndó. <sup>3</sup>Núu xíá<sup>n</sup> dátùha ñaha-í xii-ndo cuèndá sá vâ dàñá tnàhí-ndo mèe-ndo dandahú ñáhá ñáyiù. Chi cùmání-gá sàá nduu quixi tucu Xítóhó Jesucristú, te ngúíta nchaa ñáyiù cuu úhú iní-yu Yá Ndiòxí, te dàvá-á<sup>n</sup> quini-yu íf<sup>n</sup> tée xidó quidé nchaa sá cuèhé sá dúhá, te tée-á<sup>n</sup> quíhí<sup>n</sup>-dé núú ùhú núú ndàhú ni caa ni quíhí<sup>n</sup>. <sup>4</sup>Te ñi-ni tée-á<sup>n</sup> vâ ndèe iní-dé nchaa sá càchí ñáyiù cùu ndiòxí-yu ndìhi nchaa dava-gá sá quidé càhnú-yu, te cachí-dé sá ío cùnuu-dé, te quíhu-dé ndéé xití veñúhu núú ndécú cuè ñáyiù chìñuhu ñaha xii Yá Ndiòxí coo-dé, te cùñaha-dé xii-yu sá cúú-dé Yá Ndiòxí.

<sup>5</sup>Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xìndecu ndìhi ñaha-í. <sup>6</sup>Te nchòhó sa cùtnuní iní-ndó ñá cúú sá ngání ñaha xii tée-á<sup>n</sup> núu ñá túú-dé vitna, dico na sàá nduu tàù-xi queue-dé caca cuu-dé te dàvá-á<sup>n</sup> quini ñáhá nchaa ñáyiù.

<sup>7</sup>Te ío titní núú sǎ cuèhé sá dúhá quide yucu ñávaha òcò-ni sá vǎtá quíní-gá ñáyíu, dico ndècu íí<sup>n</sup> sá ñǎ dáǎná càda-xi nchaandi túhú nàcuáa càchí iní-xi, dico sáá nduu xòcuíñí sá ñǎ dáǎná-ǎ<sup>n</sup> te dǎvǎ-ǎ<sup>n</sup> cada-xi nchaa nàcuáa càchí iní-xi. <sup>8</sup>Te sáá nduu quíní-yu tée quide nchaa sá cuèhé sá dúhá-ǎ<sup>n</sup> ñuyíú-a. Te òré ná quíxi túu Xítóhó Jesucristú, te mee-ni sǎ dátǎsa<sup>n</sup>-xi, ndíhi yóco yuhu-gá cuú tée-ǎ<sup>n</sup>. <sup>9</sup>Te sácuíhná tendaha-xi tée-ǎ<sup>n</sup> quixi-dé, te cuǎñaha-xi tnúhu ndee ínì cada-dé nándi sá cáda-dé. Te cada-dé sá ñǎ túú tnáhí ndàcu ni íí<sup>n</sup> ñáyíu ñuyíú-a cadá-yu, dico mee-ni dàndahú ñáhá-dé xíí-yu caca cuu-dé. <sup>10</sup>Te nchaa núú sǎ cuèhé sá dúhá càda-dé dandàhú-dé nchaa ñáyíu sa ñùhu ichi cuáhá<sup>n</sup> núú ùhú núú ndàhú, chi ñǎ túú ní cuíní-yu quíndáá iní-yu tnúhu ndáá tnúhu Yá Ndiòxí cuèndá naníhí tǎhú-yu. <sup>11</sup>Te sá dúcá<sup>n</sup> ñǎ túú ní cuíní-yu quíndáá iní-yu tnúhu ndáá, núu xǎ<sup>n</sup> daña Yá Ndiòxí dacàhá<sup>n</sup> yucu ñǎvǎha iní-yu quíndáá iní-yu nchaa tnúhu ndehnde <sup>12</sup>cuèndá cuíta nihnú-yu, te duca<sup>n</sup> yǎha-yu chi ñǎ túú sàndáá iní-yu tnúhu ndáá càhá<sup>n</sup> Yá Ndiòxí, chi mee-ni nchaa sá cuèhé sá dúhá cùdíí iní-yu quidé-yu, te cuíta nihnú-yu chi duca<sup>n</sup> ñí cachí Yá Ndiòxí cunduu.

**Ñáyíu ní cachí Yá Ndiòxí naníhí tǎhú**

<sup>13</sup>Te nchòhó ñáyíu ndècu ndíhi-ndí ichi Xítóhó Jesucristú, ñáyíu ío cùu iní-gá càchí tnúhu-ndí xii-ndo sǎ ñǎ túú dàña ndee-ndí ndàcá<sup>n</sup> tǎhú-ndí núú Yá Ndiòxí cuèndá-ndó, chi duca<sup>n</sup> tàù-xi cunduu, chi Yá Ndiòxí

ní cachí-gá ndéé cùtnàhá vátá ngǎva-gá ñuyíú sǎ naníhí tǎhú-ndó, te òu Espíritú-gá dácàhá<sup>n</sup>-xi iní-ndó ndècu yíñuhu-ndo núú-gǎ, te sàndáá iní-ndó tnúhu ndáá càhá<sup>n</sup>-gá núu xǎ<sup>n</sup> ní naníhí tǎhú-ndó. <sup>14</sup>Chi cuèndá tnáhí-a ní cáhá<sup>n</sup> ñáhá Yá Ndiòxí xii-ndo, te duca<sup>n</sup> ñí naníhí tǎhú-ndó chi ní sàndáá iní-ndó tnúhu Xítóhó Jesucristú ní cáhá<sup>n</sup>-ndí núú-ndó, te sáá nduu te cundecu-ndo tnáhá-ndó núú ío váha càa ní nduu tǎhú Xítóhó Jesucristú ndécú-gǎ.

<sup>15</sup>Núu xǎ<sup>n</sup> nchòhó ñáyíu ndècu ndíhi-ndí ichi Xítóhó Jesucristú ío càhá<sup>n</sup>-ndí dóho-ndo sǎ vǎ dáǎná nihnu-ndo ichi-gá, te ni vǎ nácuànaa-ndo nchaa tnúhu ní cáhá<sup>n</sup>-ndí núú-ndó cùtnàhá ní xíndecu ndíhi ñaha-ndí xii-ndo, te òu-ni duca<sup>n</sup> càda-ndo nchaa tnúhu tëndaha-ndí véxi. <sup>16-17</sup>Te xìcá<sup>n</sup> tǎhú-ndí núú-gǎ sá ná dàcàhá<sup>n</sup>-gá iní-ndó cundecu-ni-ndo ichi-gá, te duca<sup>n</sup> ío na chìndee ñaha-gá xii-ndo càhá<sup>n</sup>-ndó mèe-ni tnúhu váha, te cada váha-ndo cundecu-ndo nacúáa cuu váha iní-gá, chi mee Dùtú Ndiòxí ío cùu iní ñáhá-gǎ xii-o, te òu-gá ní taxi-gá tnúhu ndee ínì cundecu ndíhi-o ñí caa ni quíhí<sup>n</sup>, te ní cachí tnúhu tucu-gá íngá tnúhu váha sá cùndètu-o Xítóhó Jesucristú.

**Cáhá<sup>n</sup> ndíhi-ndo Yá Ndiòxí cuèndá-ndí**

**3** Te nchòhó ñáyíu ndècu ndíhi-ndí ichi Xítóhó Jesucristú, ndéé núú ndíhí-ñǎ càchí tnúhu-í xii-ndo sǎ càhá<sup>n</sup> ndíhi-ndo Yá Ndiòxí cuèndá-ndí cuèndá sá

ná chindee ñaha-gá xii-ndí, te duca<sup>n</sup> ndíhi-ni cuténuu tnúhu Xítóhó Jesucristú nchaa xichi, te cudíí iní-yu tnúhu-gá dàtná quidé nchòhó. <sup>2</sup>Te cáhá<sup>n</sup> ndíhi tucu-ndo Yă Ndiöxí cuendá sá ná còto ñaha-gá xii-ndí, te ñá túú nă cada ñaha ñăyiu cuihna iní-xi ndècu ichi cuehé ichi duha xii-ndí, chi ñá ncháá-yu sàndáá iní-yu tnúhu-gá. <sup>3</sup>Dico Xítóhó Jesucristú quidé-gă nchaa sá cáhá<sup>n</sup>-gá, te diu-gá cada te nchòhó cundecu-ni-ndo ichi-gá, te coto ñaha-gă xii-ndo cuendá sá ñá túú nă cada ñaha yùcu ñăvăha. <sup>4</sup>Te Xítóhó Jesucristú quidé-gă cútnùní iní-ndí sá nchòhó quidé-ndó nchàa nacúáa ní dánèhé ñáhá-ndí xii-ndo, te diu-ni duca<sup>n</sup> càda-ndo cundecu-ndo. <sup>5</sup>Te xicá<sup>n</sup> táhú-ndí núú Yă Ndiöxí sá ná chindee ñaha-gá xii-ndo cùu iní-ndó-gă, te diu-ni-gá ná chindee ñaha-gá xii-ndo cùnduu cahnu iní-ndó, chi Xítóhó Jesucristú duca<sup>n</sup> ïo cáhnu iní-gá.

#### Tàú-ó càda chiu<sup>n</sup>-o

<sup>6</sup>Te nchòhó ñăyiu ndècu ndíhi-í ichi Xítóhó Jesucristú, cáhá<sup>n</sup>-í dóho-ndo să méé-gă cuiní-gá sá vă ñíhí tnáhá-gă-ndó ndíhi ndéda-ni càa ñăyiu cächí sá sàndáá iní tnúhu-gá, ñăyiu ñá túú cuiní cada chiu<sup>n</sup>, chi ñăyiu duca<sup>n</sup> xíquide ñá túú cuiní-yu tñí-yu tnúhu sá ñí dánèhé ñáhá-ndí xii-ndo. <sup>7</sup>Te nchòhó sa xìní-ndó nàcuáa cada-ndo cùndecu-ndo canchicú<sup>n</sup> nihnu-ndo nàcuáa quide-ndí. Te cútnàhá ní xíndecu ndíhi ñaha-ndí xii-ndo chi ni ìi<sup>n</sup> nduu ñá túú ní tùhío-ndí. <sup>8</sup>Te ni ñà

túú dícó duca<sup>n</sup> ni quèhe<sup>n</sup>-ndí sá ndécú ndíhi ñăyiu caxi-ndí àdi canehe-ndí, chi cuèi nduu cuèi niú ío ní quide chiu<sup>n</sup>-ndí ní níhí-ndí díhú<sup>n</sup> ñí saa<sup>n</sup>-ndí nchaa sá ñí nàndíhi-ndí cuendá sá ñà túú ní cuiní-ndí chichiu<sup>n</sup> ñaha-ndí xii-ndo. <sup>9</sup>Te cuèi tàù ndisa-ndí cachí tnúhu-ndí xii-ndo să chíndèe ñaha-ndo xii-ndí ní cùu, dico ní quide chiu<sup>n</sup>-ndí cuendá ní cuiní-ndí danèhé ñáhá-ndí xii-ndo nàcuáa cada-ndo cùndecu-ndo. <sup>10</sup>Te cútnàhá ní xíndecu ndíhi ñaha-ndí xii-ndo ñí cachí-ndí sá ncháá ñăyiu ñá túú cuiní cada chiu<sup>n</sup> te vă cuăha-ndö-yu sá caxí-yu. <sup>11</sup>Te vitna ñíhí-ndí tnúhu sá ío dava nchòhó ñá túú tnàhí quide chiu<sup>n</sup>-ndo, chi àú<sup>n</sup> nă cuu ndí cuu ndí cuu-ni-ndo núú ndécú dăva-gă tnàha ñăyiu-ndo. <sup>12</sup>Te yúhú cáhá<sup>n</sup>-í dóho nchaa nchòhó ñăyiu duca<sup>n</sup> ñà túú cuiní cada chiu<sup>n</sup> sá cádá chiu<sup>n</sup>-ndo cuendá níhí-ndó nchàa sá còhó să caxí-ndó, te duha cáhá<sup>n</sup>-í dóho-ndo, chi duca<sup>n</sup> cuiní Xítóhó Jesucristú Yaá táxí tnùní ñáhá xii-o cada-ndo, te òré cada chiu<sup>n</sup>-ndo te vă ïo cada dusa<sup>n</sup>-ndo.

<sup>13</sup>Te nchòhó ñăyiu ndècu ndíhi-í ichi Xítóhó Jesucristú, vă dáñá ndèe-ndó càda-ndo mee-ni sá văha. <sup>14</sup>Te núú ìi<sup>n</sup> ñăyiu ndècu ndíhi-ndo ñá túú cuiní-yu tñí-yu tnúhu cáhá<sup>n</sup>-ndí núú tütú-a, te cundehe-ni-ndo nùu ndéda càa-yu, te vă ñíhí tnáhá-gă-ndó ndíhí-yu cuendá sá ná cùcaha<sup>n</sup> núú-yu, <sup>15</sup>dico vă cúú ùhú iní-ndö-yu, chi cáhá<sup>n</sup>-ndó dōho-yu cada-ndo să ndécú-ndó ichi Xítóhó Jesucristú ndíhí-yu.

**Tnúhu ndéé núú nǐ ndihi-ná**

<sup>16</sup>Te mee Xǐtohó Jesucristú ío váha cùu iní-gá ndécú-gǎ, te xìcá<sup>n</sup> táhù-í núú-gǎ sá méé-gǎ ná cádá te ío váha cuu iní-ndó tnàhá-ndó cùndecu-ndo cuéi nása-gá ná cùndecu-ndo. Te mee-gǎ ná cùndecu ndihi ñaha-gá xii-ndo nchàa-ndo.

<sup>17</sup>Te vitna yúhú té Pǎblú tée-í tnúhu-a quìde ndee iní ñáhà-í xii-ndo, te diu-ni duha càa nchaa letrá-í nchaa núú tútú cádǔha-í.

<sup>18</sup>Te xìcá<sup>n</sup> táhù-í núú Xǐtohó Jesucristú sá ìo na chìndee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nǎ vitna.



# TUTÚ DÍHNA NUU NĪ CADÚHA TÉ PĀBLÚ QUÍHÍ<sup>n</sup> NDAHA TÉ TIMÙTEÚ

Té Pāblú cādūha-dé tutú quíhí<sup>n</sup> ndaha té Timùteú

**1** Yúhú té Pāblú ní tendaha ñàha Yá Ndiöxí cāhá<sup>n</sup>-í tnúhu Xítóhó Jesucrístú núú ñáyiú chi duca<sup>n</sup> nĭ cachí Yă Ndiöxí cunduu, te diu-gá cúú-gă Yáa ní dácăcu nihnu ñaha xii-o núú ùhú núú ndàhú. Te tnàhá Xítóhó Jesucrístú duca<sup>n</sup> nĭ cachí-gá sá cāhá<sup>n</sup>-í tnúhu-gá, te diu-gá ní taxi-gá tnúhu ndee iní xii-o să cundecu-o ndihí-gá ni caa ni quíhí<sup>n</sup>. <sup>2</sup>Te yòhó té Timùteú cúú-n ì<sup>n</sup> tée ní sanu ichi ndisa-í ichi Xítóhó Jesucrístú chi ío váha ní sándáá iní-n-gă. Te cādúha-í ì<sup>n</sup> tutú daquixi-í ndaha-n. Te xicá<sup>n</sup> táhù-í núú Tătá-ó Dütú Ndiöxí ndihí núú Xítóhó Jesucrístú sá ío na chindee chitúú ñaha-gă xii-n, te duca<sup>n</sup> ndĭ nduú-gá ná cádá te ío váha cuu iní-n cundecu-n.

**Cuendá nchaa ñáyiú dāndahú tnàha ñáyiú-xi**

<sup>3</sup>Te nàha-n nacuáa ní cāhá<sup>n</sup>-í cúnàhá ní quee-í ñuú Éfésú véxi-í distritú Macèdoniá, chi ní cachí-í sá quéndoo-n ñuú-á<sup>n</sup> cāhá<sup>n</sup>-n dōho nchaa ñáyiú dāndahú ñáhá cāhí

sá cāhá<sup>n</sup> tnúhu Yá Ndiöxí te ñá ndàá sá cāhá<sup>n</sup>-yu tnúhu-gá, te diu-ni duca<sup>n</sup> cāhá<sup>n</sup>-í vitna cada-n cundecu-n. <sup>4</sup>Te cúñaha-n xii-yu sá vă cádá cuendá-yu nchaa cuendú ñihí-yu năcuáa ní xóo cada ñáyiú ní xindecu ndéé sanaha, te nchaa cuendú-á<sup>n</sup> dicó chinàá ñáhá-xí chi ñá túú vĕdana nāndíhi-xi, te ni ñá túú chindee ñaha-xi cada-o nacuáa cuiní Yă Ndiöxí, chi mee-ni să quindáá iní-ó-gă quídé-xí quide-o nchaa nacuáa cuiní-gá.

<sup>5</sup>Te duha cāhá<sup>n</sup>-í cúñaha-n xii-yu cuendá sá ná cùu iní-yu tnàha ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiöxí, te vá cání ì<sup>n</sup> cani úú iní-yu, te núu duca<sup>n</sup> na cādá-yu te cuu iní ndisá-yu nchaa tnàha ñáyiú-yu.

<sup>6</sup>Chi dava ñáyiú ñá túú-gă quídě-yu nchaa năcuáa cāhá<sup>n</sup>-í-a, chi mee-nă nchaa cuendá sá ñá túú vĕdana nāndíhi xicāhá<sup>n</sup>-yu. <sup>7</sup>Te cuiní-yu cāhá<sup>n</sup>-yu nchaa tnúhu ní cāhá<sup>n</sup> ndĭ Moisés dico ñá ndăcŭ-yu, chi cuéi ni yùhu ni iní-yu cāhá<sup>n</sup>-yu dico ñá tècú tnùní-yu năcuáa ní cāhá<sup>n</sup> ndí, te ni tnúhu cāhá<sup>n</sup> mée-yu ñá cútnùní iní-yu năcuáa nduu-xi.

<sup>8</sup>Te sa nàha-o sá ncháá tñuhu ní cáhá<sup>n</sup> ndíi Moisés váha, te núu na tècú tñuní-ó nã cuendá duca<sup>n</sup> nĩ ngúndecu nchaa tñuhu-á<sup>n</sup>. <sup>9</sup>Te cùtnuní iní-ó sã ñà díú sã cúú-xí nchàa ñáyiú quide váha ndècu ñuyíú-a ni ngúndecu nchaa tñuhu-á<sup>n</sup>, chi ní ngúndecu-xi sá cúú-xí nchàa ñáyiú ñá túú quide váha, ndihi cuendá nchaa ñáyiú ío sàà iní-xi, ndihi cuendá nchaa ñáyiú quide cuehé quidé dùha, ndihi cuendá nchaa ñáyiú ío ndècu cuéchi-xi, ndihi cuendá nchaa ñáyiú ñá túú nèhe védana sá yíñùhu núú Yã Ndiöxí, ndihi cuendá nchaa ñáyiú ñá túú càhá<sup>n</sup> váha cuendá ichi Yá Ndiöxí, ndihi cuendá nchaa ñáyiú sàhni tátá-xi ndihi nãná-xi, ndihi cuendá nchaa dava-gá ñáyiú sàhni tnaha, <sup>10</sup>ndihi cuendá nchaa cue tée càhá<sup>n</sup> ndihi ñáyiú ðíhí te ñá díú ñàðíhí-güedé cúú-yu, ndihi cuendá tucu nchaa ñáyiú ðíhí càhá<sup>n</sup> ndihi cue tée te ñá díú yì-yu cùu-güedé, ndihi cuendá nchaa cue tée càhá<sup>n</sup> ndihi tnàha ndi mee tée-xi, ndihi cuendá nchaa ñáyiú chiváha tnàha ñáyiú-xi cuendá sá cuiní-yu níhí-yu díhú<sup>n</sup>, ndihi cuendá nchaa ñáyiú ndehnde, ndihi cuendá nchaa ñáyiú càcunehe ndéé Yã Ndiöxí cuendá cuiní-yu cutnùní iní tnàha ñáyiú-yu sá càhá<sup>n</sup> ndáá-yu, te ñá ndáá sá càhá<sup>n</sup> ndáá-yu, ndihi cuendá nchaa ñáyiú quide nchaa dava-gá sá ñà túú tàuchiú<sup>n</sup> Yá Ndiöxí cadá-yu. Cuendá nchaa ñáyiú duca<sup>n</sup> xíquide ní ngúndecu nchaa tñuhu-á<sup>n</sup>. <sup>11</sup>Te nchaa tñuhu-á<sup>n</sup> ìi<sup>n</sup>-ni cùu-xi ndihi nchaa tñuhu sá nĩ cachí Yã Ndiöxí cáhá<sup>n</sup>-í, te tñuhu-á<sup>n</sup> cúú-xí tñuhu váha vihi, chi mee-gã ío váha iní-gá.

**Té Pãblú ndàcá<sup>n</sup> táhú-dë  
núú Yã Ndiöxí sá nĩ cundàhú  
iní ñáhá-gã xii-dé**

<sup>12</sup>Te Xítoho Jesucristú ní cutnùní iní-gá sá cadá ndáá-í cada-í nchaa chiú<sup>n</sup> tahu-gá. Te ndàcá<sup>n</sup> táhú-í núú-gã sá nĩ taxi-gá chiú<sup>n</sup>-gá quidè-í, te ío chindee ñaha-gá xii-í. <sup>13</sup>Te ní taxi-gá chiú<sup>n</sup>-gá quidè-í cuèi ní xóo cáhá<sup>n</sup> cuèhé-í cuendá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá nĩ xóo cada-í-yu dico ní cundàhú iní ñáhá Yã Ndiöxí xii-í, chi vátá quindáá-gá iní-í Xítoho Jesucristú cùtnàhá duca<sup>n</sup> nĩ xóo cada-í, te ni ñã cùtnùní iní-í nchaa sá quidè-í ní cùu, te cuèi duca<sup>n</sup> nĩ xóo cada-í, <sup>14</sup>dico Yá Ndiöxí ío ní cundàhú iní ñáhá-gã xii-í te chindee ñaha-gá. Te mee Xítoho Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

<sup>15</sup>Te nihí-ó tñuhu sá Xítoho Jesucristú ní quixi-gá ñuyíú-a cuendá sá dácäcu nihnu-gá nchaa ñáyiú ndècu ichi cuehé ichi duha. Te tñuhu-á<sup>n</sup> cúú-xí ìi<sup>n</sup> tñuhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cùu-í téé ío-gá ndécú cuèchi-xi núú Yã Ndiöxí ní cùu. <sup>16</sup>Te Yá Ndiöxí ní cundàhú iní ñáhá-gã ní dácäcu nihnu ñaha-gã xii yúhú téé xidó ndécú cuèchi-xi ni cùu, cuendá cutnùní iní nchaa ñáyiú sá Xítoho Jesucristú ío càhnu iní-gá. Te sá dúcá<sup>n</sup> nĩ quide ñaha-gã xii-í, te xíá<sup>n</sup> cutnùní iní-yu sá nñu na quindáá iní ñáhá-yu xii-gá te cundecú-yu ndihi-gá ni caa ni

quíhí<sup>n</sup>. <sup>17</sup>Te nchaa-o chí ná càchí-ó sǎ ío càhnu cuu Yá Ndiöxí, te canehe-o sǎ yíñùhu núú-gǎ ní caa ní quíhí<sup>n</sup>, chí mee-gǎ cúú-gǎ Yá táxí tñùní nchaa nduu nchaa quíú. Te cùu-gá íí<sup>n</sup> Yáá ñá túú xìní núú-ó, te íí<sup>n</sup>dii díí-ni-gǎ ío ndècu ndihi-gá nchaa sá xìní tñùní-gá.

<sup>18</sup>Te yòhó té Timùteú té cùu datná íí<sup>n</sup> déhe mee-í sa nàha-n nacuáa ní cáhá<sup>n</sup> dava-gá cue téé càhá<sup>n</sup> tñúhu Yá Ndiöxí cuendá-n, te diu-ni duca<sup>n</sup> càhá<sup>n</sup>-ú tucu, te cada-n nchàa nacuáa càhá<sup>n</sup> tñúhu-á<sup>n</sup> chí diu nchaa tñúhu-á<sup>n</sup> canu ichi ñaha-xi xii-n cada-n nchaa nacuáa cuiní Yá Ndiöxí. <sup>19</sup>Te ío quindáa iní-n Xítóhó Jesucristú, te cada váha-n cùndecu-n nacuáa cundecu váha iní-n, chí dava ñáyiú ñá túú-gǎ duca<sup>n</sup> quidé-yu núu xíá<sup>n</sup> ñá túú-gǎ sàndáa iní-yu nàcuáa càhá<sup>n</sup> tñúhu-gá. <sup>20</sup>Te diu-ni duca<sup>n</sup> ní quide té Himèneú ndihi té Lijandrú ní dáñá ndèé-güedé ñá túú-gǎ sàndáa iní-güedé nàcuáa càhá<sup>n</sup> tñúhu Xítóhó Jesucristú, te ní xáha<sup>n</sup>-í xii-güedé sá ná cùndoho-ná-güedé nùu nása cada ñaha sàcuíhna xii-güedé, te duca<sup>n</sup> ní xáha<sup>n</sup>-í cuendá sá vǎ càhá<sup>n</sup> cuèhé-gá-güedé cuendá Yá Ndiöxí.

#### Nàcuáa cáhá<sup>n</sup> ndihi-o Yá Ndiöxí

**2** Te na càchí tñúhu-í xii-n nchàa nacuáa cada-n. Te díhna-gá càchí tñúhu-í sá cǎhá<sup>n</sup> ndihi-n Yá Ndiöxí cuendá nchaa ñáyiú te núu nása cùu xíndecú-yu, te cáca<sup>n</sup> táhú-n nùú-gǎ cuendá-yu, te duca<sup>n</sup> ío ndaca<sup>n</sup> táhú-n nùú-gǎ cuendá nchaa sá vǎha quide ñaha-gá xií-yu. <sup>2</sup>Te duca<sup>n</sup> cǎhá<sup>n</sup>

ndihi-n Yá Ndiöxí cuendá nchaa cue téé cùnuu ndihi cuendá nchaa dava-gá cue téé cùchiu<sup>n</sup> cuendá cada váha-güedé, te duca<sup>n</sup> nchòo ñá túú ná cuu cundecu-o, te ñá túú tñàhí ná cani iní-ó cùndecu-o, te ío cundecu yíñùhu-o núú Yá Ndiöxí, te cada-o nchàa nacuáa tàù-xi cunduu. <sup>3</sup>Te núu duca<sup>n</sup> na càda-o cáhá<sup>n</sup> ndihi-o Yá Ndiöxí cuendá nchaa ñáyiú te quide váha-o, te ndùu vétú iní Yá Ndiöxí Yáá ní dáçacu nihnu ñaha xii-o núú ùhú núú ndàhú. <sup>4</sup>Te mee-gǎ cuiní-gá sá ncháá ñáyiú tecú tñùní-yu nchaa tñúhu càhá<sup>n</sup>-gá, chí cuiní-gá sá nánihí tàhú-yu. <sup>5</sup>Te íí<sup>n</sup>-ni Dútú Ndiöxí ndécú, te íí<sup>n</sup>-ni Xítóhó Jesucristú, te medii-ni Xítóhó Jesucristú quidé-gǎ tñàhá tñúhu-o ndihi Yá Ndiöxí. <sup>6</sup>Te Xítóhó Jesucristú ní dáñá-gǎ méé-gǎ ní sahani ñaha-güedé xii-gá cuendá sá cuiní-gá sá çacu nihnu nchaa ñáyiú ndècu ñuyúú nùú ùhú núú ndàhú. Te Yá Ndiöxí cuiní-gá sá ncháá ñáyiú ñuyúú ndécú vitna níhí-yu tñúhu nàcuáa ní cuu ní xíhí Xítóhó Jesucristú. <sup>7</sup>Te Yá Ndiöxí ní cachí-gá sá càhá<sup>n</sup>-í tñúhu-á<sup>n</sup> ndèni ní cuu núu xíndecu ñáyiú ñá túú cùu ñáyiú isràél, te mee-ni tñúhu ndáa dánèhé-í-yu nàcuáa quindáa iní ñàhá-yu xii-gá, te yúhú càhá<sup>n</sup> ndáa-í sá Yá Ndiöxí ní cachí-gá sá càhá<sup>n</sup>-í tñúhu-gá chí ndècu ndihi-í Xítóhó Jesucristú, te ñá túú dándahú ñàhá-í xii-n. <sup>8</sup>Te yúhú cuiní-í sá ncháá xichi cáhá<sup>n</sup> ndihi cue téé Yá Ndiöxí, te na cùnduu ndoo cunduu nine iní-güedé òre ndonehe-güedé ndaha-güedé cáhá<sup>n</sup> ndihi ñaha-güedé xii-gá, chí vá cúú cùdèé<sup>n</sup>-güedé cuendá nchaa sá

quidé ñàha ñáyi xii-güedé, te ni vâ cáni ínigüedé cúcuèhé tnáhá-güedé ndíhí-yu. <sup>9</sup>Te càchí tnúhu-í xii-n sã ncháá ñáyi ðíhí ná cùnduu dío-yu nàcuáa tàù-xi cunduu, te vâ cùnduu cuehé cunduu duha dàtná cáa dío nchaa ñáyi ndècu ichi cuehé ichi duha, te na ndáda-yu díquí-yu nàcuáa tàù-xi cunduu, te vâ ndáda cuèhé ndada duhá-yu, te vâ cáni ínigüedé vií-yu ndíhí sã ño ndèyáhu, te ni vâ cáni ínigüedé cuihnú-yu dóo sã ño ndèyáhu. <sup>10</sup>Te mee-ni sã vâha cada-yu, chi duca<sup>n</sup> tàù-xi cada nchaa ñáyi ðíhí ndécú ichi Yá Ndiöxí. <sup>11</sup>Te òré tàca-yu núu dácuahá-yu tnúhu Yá Ndiöxí, te cue ñáyi ðíhí-á<sup>n</sup> na nãhi dacuahá-yu tnúhu-gá, te cada-yu nchaa nàcuáa càhá<sup>n</sup> cue tée dácuaaha ñaha xii-yu tnúhu-gá. <sup>12</sup>Te yúhú càchí-í sã vâ cúu dácuaaha ñáyi ðíhí cue tée, te ni vâ cúu tàxi tnuní ñáhã-yu xii-güedé chi cunduu tnáví-ni yuhú-yu cundedóho-yu. <sup>13</sup>Te duca<sup>n</sup> xini ñuhu-xi cada-yu, chi Yá Ndiöxí ní cadúha-gá díhna-gá té Àdán te dàtnuní ní cadúha-gá tá Èvá. <sup>14</sup>Te ñá díu mée té Àdán ní dándahú ñáhá sácúíhná xii-dé, chi tá Èvá ní dándahú-xi, te ñá túu ní quide váha-xi núu Yá Ndiöxí sã dúcá<sup>n</sup> ní sándáa ínigüedé ní tnúhu ní càhá<sup>n</sup> sácúíhná-ã<sup>n</sup>. <sup>15</sup>Dico ñáyi ðíhí ní nduu táhú-yu sã cóo ðèhe-yu, te nanhí táhú-yu te núu vâ dána ndèe-yu canchicú<sup>n</sup> nihnú-yu ichi Yá Ndiöxí, te cundecu yíñuhú-yu núu-gã, te cuu ínigüedé nchaa tnàha ñáyi-yu, te cada-yu nchaa nàcuáa tàù-xi cunduu cundecú-yu.

**Nàcuáa tàù cue tée yìndaha ñaha xii ñáyi ndècu ichi Yá Ndiöxí cada-güedé**

**3** Te lò ñá<sup>n</sup> tnúhu càhá<sup>n</sup> ñáyi sã núu ñá<sup>n</sup> tée cuíni quindaha

ñàha xii ñáyi ndècu ichi Yá Ndiöxí, te ñá<sup>n</sup> sã vâha cuíni-dé cada-dé càchí-yu, te ndáa quée-xi tnúhu càhá<sup>n</sup>-yu. <sup>2</sup>Te yúhú càchí-í sã cuè tée duca<sup>n</sup> na quìndaha ñaha xii ñáyi te xini ñuhu-xi cuu-güedé cue tée quide ndáa cuendá sã vâ càhá<sup>n</sup> ñáyi cuendá-güedé sã ñà túu quide ndáa-güedé. Te na cù-güedé cue tée ndèca ñá<sup>n</sup> caa-ni ñadíhí, te na cù-güedé cue tée ñá túu quide cutexínu ndècu, te na cù-güedé cue tée quide nchaa nàcuáa tàù-xi cunduu, te na cù-güedé cue tée sãñaha nùu vehe ndetatú nchaa ñáyi ñuhu ichi, te na cù-güedé cue tée dānehé ñáhá vâha xii ñáyi tnúhu Yá Ndiöxí. <sup>3</sup>Te vâ cúu-güedé cue tée quihu, te ni vâ cúu-güedé cue tée ndècu pletú, te ni vâ cúu-güedé cue tée ðicó-ni duca<sup>n</sup> ñíhí díhú<sup>n</sup>, te ni vâ cúu-güedé cue tée sãni ínigüedé, te ni vâ cúu-güedé cue tée ñuhu ínigüedé. Chi na cù-güedé cue tée váha ínigüedé. <sup>4</sup>Te na cù-güedé cue tée ío váha sãnu ichi ñadíhí-xi ndíhí landú-xi, te na cù-güedé cue tée quide nàcuáa sãndáa ínigüedé ñáhá ñandú-xi cuendá canehe-güexi sã yíñuhu núu-güedé. <sup>5</sup>Chi núu cù-güedé cue tée ñá ndácú canuichi ñadíhí-xi ndíhí landú-xi, te vâ ndácú-güedé quindaha-güedé cue ñáyi ndècu ichi Yá Ndiöxí. <sup>6</sup>Te vâ cúu-güedé cue tée íchí ni sãndáa ínigüedé tnúhu Yá Ndiöxí, chi na cuáhá<sup>n</sup> te cada ñinu-güedé mée-güedé te cuíta nihnú-güedé dàtná ní xita nihnú sácúíhná. <sup>7</sup>Te xini ñuhu-xi cuu-güedé cue tée càhá<sup>n</sup> váha ñáyi cuendá-xi, cuèi ñá díu ñáyi

ndècu ichi Yá Ndiöxí cuèndá sá vǎ cuátñuhu ñaha ñáyiú xii-güedé, chi núu ñáhá te cudana te sácuihná quesaha-xi tàxi tñuní ñáhá-xi xii-güedé.

**Cue tée chindee ñaha xii cue  
téé yìndaha ñaha xii ñáyiú  
ndècu ichi Yá Ndiöxí**

<sup>8</sup>Te tñahá cue tée chindee ñaha xii cue téé yìndaha ñaha xii ñáyiú ndècu ichi Yá Ndiöxí xíní ññuhu-xi cuu-güedé cue téé quide nchaa nacuaá tàù-xi cunduu, te vǎ cúú-güedé cue téé càchí sá càhá<sup>n</sup> ndáá te ñá ndáá, te ni vǎ cúú-güedé cue téé quihu, te ni vǎ cúú-güedé cue téé sàni iní-xi òicó-ni duca<sup>n</sup> ñíhí òíhú<sup>n</sup>. <sup>9</sup>Te xìní ññuhu-xi cuu-güedé cue téé ñá túú òaño ndeé sàndáá iní tñuhu Yá Ndiöxí, te na cùu-güedé cue téé ío váha cùu iní-xi cuèndá nchaa sá váha quide-güedé. <sup>10</sup>Te xìní ññuhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedé cue téé yìndaha ñaha xii ñáyiú ndècu ichi Yá Ndiöxí. <sup>11</sup>Te tñahá tucu nchaa ñáyiú òíhí ná càdáyú nchaa nàcuáa tàù-xi cunduu, te vǎ cùndùu yiti yuhú-yu, te ni vǎ cúú-yu ñáyiú quide cutexínu ndècu, te na cùu-yu ñáyiú ío váha quide ndáá. <sup>12</sup>Te nchaa cue téé chindee ñaha xii cue téé yìndaha ñaha xii ñáyiú ndècu ichi Yá Ndiöxí, xìní ññuhu-xi cuu-güedé cue téé ndècu ì<sup>n</sup> caa-ni ñadihí-xi, te na cùu-güedé cue téé sànu ichi váha ñadihí-xi òíhí landú-xi. <sup>13</sup>Te núu na càda ndáá-güedé chindee-güedé cue téé

yìndaha ñaha xii ñáyiú ndècu ichi Yá Ndiöxí, te canehé-yu sá yíññuhu núu-güedé, te duca<sup>n</sup> te vǎ cúú càhá<sup>n</sup> núu-güedé càhá<sup>n</sup>-güedé núu ñáyiú tñuhu Xítohó Jesucristú sá sàndáá iní-güedé.

**Ío càhnu cuu tñuhu càhá<sup>n</sup> Yá Ndiöxí**

<sup>14</sup>Te cuíní-í òíhí-ni quixi coto ñaha-í xii-n dico òíhna-gá càdúha-í tutú-a daquixi-í ndaha-n <sup>15</sup>chi na cuáhá<sup>n</sup> cuyaa-í. Te xía<sup>n</sup> núu càdúha-í tutú-a daquixi-í ndaha-n cuèndá cutnùní iní-n ñása cada-n cùndecu-n òíhí nchaa ñáyiú ndècu ichi Yá Ndiöxí. Te ñáyiú-á<sup>n</sup> cúú-yu òatná ì<sup>n</sup> vehe cùu cuendá Yá Ndiöxí Yáa ndécú nchaa nduu nchaa quíú, chi ndècu òíhí ñaha-gá xii-yu, te cùu-yu ñáyiú càhá<sup>n</sup> váha cuèndá tñuhu-gá. <sup>16</sup>Te cùtñuní ndáá iní-ó sǎ ío càhnu cuu tñuhu càhá<sup>n</sup> Xítohó Jesucristú, tñuhu sá càhá<sup>n</sup> nàcuáa ndùu ichi ndecu-o, te duha càhá<sup>n</sup> tñuhu-á<sup>n</sup>:

Te ní quixi Yá cúú Ndiöxí ñuyíú-a ní cuu-gá ì<sup>n</sup> ñáyiú, te Espiritú Yá Ndiöxí ní càhá<sup>n</sup> ndáá-xi sá cúú-gǎ ì<sup>n</sup> Yaa ío váha quide ndáá, te cue espíritú xínú cuèchi núú Yá Ndiöxí ní xíní ndáá-xi nchaa nàcuáa ní quide Yaa ní quixi ñuyíú-a.

Te ní xíte nuu tñuhu-gá òíhí ñuyíú-a, te ndèni ní cuu ní ngúita-yu sàndáá iní ñáhá-yu xii-gá, te mee-gǎ cuánda-gá andiu.

Duha càchí tñuhu-á<sup>n</sup>.

**Ñáyiú òaño òíhnu vá  
quìndáá-gá iní-yu Yá Ndiöxí**

**4** Te Espiritú Yá Ndiöxí càhá<sup>n</sup> ndáá-xi sá sàá nduu òaño

nihnu dava ñáyi ndècu ichi-gá vá quíndáá iní ñáhá-gǎ-yu xii-gá, te duca<sup>n</sup> chi cue espíritú cùndíhi yucu ñávaha dandáhú ñáhá-xí xii-yu, te mee-nǎ nchaa tnúhu càhá<sup>n</sup> nchaa ñáyi cùndíhi nchaa espíritú-á<sup>n</sup> cuhu<sup>n</sup> iní-yu. <sup>2</sup>Te nchaa ñáyi duca<sup>n</sup> cùndíhi cue espíritú cùndíhi yucu ñávaha-á<sup>n</sup> cúu-yu ñáyi ío dándahú méé-xí chi càchí-yu sá càhá<sup>n</sup> ndáá-yu te ñá ndáá, te ñá túú tnáhí-gá ná quidé-xí iní-yu cuendá nchaa sá cuèhé sá dúhá quidé-yu. <sup>3</sup>Te ñáyi-á<sup>n</sup> quesáhá-yu sá vǎ cúú càndeca tnaha ñáyi, te ni vǎ cúú càxí-yu dava núú sǎ xìní-yu caxí-yu, dico Yá Ndiöxí ní cadúha-gá nchaa sá nchító-ó cuendá caxi-o, te cuiní-gá sá ncháá nchòo ñáyi sàndáá iní tnúhu-gá ndacá<sup>n</sup> táhú-ó nǎú-gǎ òré caxi-o. <sup>4</sup>Te nchaa sá ní cadúha Yá Ndiöxí cúú-xí sǎ vǎha te vá dáquèe tǎhú-ó, te xini ñuhu-xi ndacá<sup>n</sup> táhú-ó nǎú-gǎ cuendá nchaa xǎ<sup>n</sup>. <sup>5</sup>Te Yá Ndiöxí càchí-gá sá méé-gǎ quidé-gǎ cúú-xí sǎ vǎha sá cúú-xí-ó te núu na ndacá<sup>n</sup> táhú-ó nǎú-gǎ.

**Tée quide ndáá xínú cuèchi  
núú Xítohó Jesucristú**

<sup>6</sup>Te núu na dàcuaha-n ñáyi ndècu ndíhi-o ichi Xítohó Jesucristú nchaa nàcuáa càhá<sup>n</sup>-í-a ña, te cuu-n ñi<sup>n</sup> tée quide ndáá xínú cuèchi núú-gǎ, te nducu ndèe-ni-n dacuaha-n tnúhu Yá Ndiöxí sá sàndáá iní-n, te canchicú<sup>n</sup> nihnu-ni-n càda-n nchaa nàcuáa càhá<sup>n</sup>-gá, te núu duca<sup>n</sup> nà cada-n, te níhí ndéé-n cùndecu-n ichi-gá. <sup>7</sup>Te vá cáda cuendá-n nchaa cuendú cuèhé cuendú duha càhá<sup>n</sup> ñáyi,

ndíhi nchaa dava-gá cuendú sá ña túú nàndíhi cuendá sá ña túú ña cumání-n cùndecu-n núú Yá Ndiöxí. <sup>8</sup>Te núu ñi<sup>n</sup> chiú<sup>n</sup> cada-o te nàcaá luha yiqui-o te nàndíhi-xi luha, dico ío-gá nàndíhi-xi te núu cada-o sǎ cùndecu yíñuhu-o núú Yá Ndiöxí. Te núu duca<sup>n</sup> na càda-o te cùu-xi ñi<sup>n</sup> sá vǎha sá cúú-xí-ó vitna, te ni caa ni quíhí<sup>n</sup> duca<sup>n</sup> cùu-xi ñi<sup>n</sup> sá vǎha sá cúú-xí-ó. <sup>9</sup>Te xini ñuhu-xi sá ncháá-ndó quíndáá iní-ndó nchaa tnúhu càhá<sup>n</sup>-í-a chi cùu-xi tnúhu ndáá. <sup>10</sup>Te vitna ío ndècu ndee-o quide-o chiu<sup>n</sup> Yá Ndiöxí Yaá ndécú nchaa nduu nchaa quíú te quide ndee iní-ó cuendá nchaa sá quidé ñaha ñáyi xii-o, chi sàndáá iní-ó sǎ díú-gǎ chíndèe ñaha-gá xii-o. Te nchaa ñáyi cùndahú iní ñáhá-gǎ te chindee ñaha-gá xii-yu, dico ñáyi sàndáá iní ñáhá xii-gá ío-gá cúnúu-yu chindee ñaha-gá xii-yu, chi dàcácu nihnu ñaha-gǎ núú ùhú núú ndáhú.

<sup>11</sup>Te nchaa tnúhu-á<sup>n</sup> cǎñaha-n xii-yu, te càhá<sup>n</sup>-n dǎho-yu sá ná càdá-yu nchaa nàcuáa càhá<sup>n</sup>-xi. <sup>12</sup>Te ío cada váha-n cùndecu-n cuendá sá vǎ yǎo daquèe tǎhú ñáhá xii-n cuendá sá cúú-n tée cuechi, te ío váha cada-n nchaa sá tàu-n càda-n cuendá duca<sup>n</sup> cànchicú<sup>n</sup> nihnu nchaa ñáyi ndècu ichi Yá Ndiöxí, te vii vii càhá<sup>n</sup> ndíhí-n-yu, te cuu iní-n-yu, te ío quíndáá iní-n Yá Ndiöxí, te mee-ni sǎ vǎha cani iní-n, te duca<sup>n</sup> càda-n cuendá canchicú<sup>n</sup> nihnú-yu. <sup>13</sup>Te nini cùyaa-í quixi-í, te ío nducu ndèe-n càhá<sup>n</sup> ndodo-n tnúhu Yá Ndiöxí núú-yu, te dacuáhá-n-yu nàcuáa càhá<sup>n</sup> tnúhu-gá, te càhá<sup>n</sup>-n dǎho-yu

nàcuáa cuu vii cuu váha iní-yu cundecú-yu ichi Yá Ndiöxí. <sup>14</sup>Te vá dáñá ndèé-n càda-n nacuáa nduu táhú ní taxi Yá Ndiöxí ní ngúndecu ndihí-n cùtnàhá ní sacá<sup>n</sup> ndodo cue téé yìndaha ñaha xii ñáyiú ndècu ichi Yá Ndiöxí ndaha-güedé díquí-n, te ní cachí tnúhu-güedé sá dúcá<sup>n</sup> ní cuiní Yá Ndiöxí cunduu.

<sup>15</sup>Te ni yùhu ni iní-n càda-n nchaa nacuáa càhá<sup>n</sup>-í-a cuendá sá ná quíní ñáyiú sá ïo-gá váha ta quide-n cuáhá<sup>n</sup>. <sup>16</sup>Te ío váha cundehe-n nchàa nacuáa quide-n, ndihí nchaa nàcuáa dànehé-n-yu, te vá dáñá ndèé-n dùca<sup>n</sup> cada-n. Te núu duca<sup>n</sup> na càda-n te nduu táhú-n cùndecu váha-n nùú Yá Ndiöxí ni caa ni quíhí<sup>n</sup> ndihí nchaa ñáyiú na tédóho nchaa tnúhu càhá<sup>n</sup>-n.

**Nàcuáa tàú-xi cada-o  
cùndecu-o ndihí ñáyiú sàndáá  
iní tnúhu Yá Ndiöxí**

**5** Te vá ténàa-n nchàa cue téé cùu sacuéhé chi vii vii cáhá<sup>n</sup>-n dõho-güedé, te cada iní-n sã dàtná tãtá-n cùu-güedé, te diu-ni duca<sup>n</sup> vìi vii cáhá<sup>n</sup>-n dõho nchaa cue téé cuechi, te cada iní-n sã dàtná cue ñani-n cùu-güedé. <sup>2</sup>Te diu-ni duca<sup>n</sup> vìi vii cáhá<sup>n</sup> tucu-n dõho nchaa ñáyiú ðhí ñáyiú cùu sacuéhé, te cada iní-n sã dàtná nãná-n cùu-yu, te diu-ni duca<sup>n</sup> vìi vii cáhá<sup>n</sup> tucu-n dõho nchaa ñáyiú ðhí ñáyiú cuechi, te cada iní-n sã dàtná cue cúha-n cùu-yu, te ío cuu váha iní-n òrè duca<sup>n</sup> cãhá<sup>n</sup>-n dõho nchaa ñáyiú cuechi-ã<sup>n</sup>.

<sup>3</sup>Te canehé-n sã yíñuhu núú ñáyiú ðhí ní quendóo quèé, te chindèé-n-yu núu ndàhú-yu.

<sup>4</sup>Te núu ii<sup>n</sup> ñaha quèé ndécú cuè déhe-a<sup>n</sup> àdi cue déhe ñani-a<sup>n</sup>, te ío xìni ñuhu-xi cada-güexi nchaa nacuáa tàú-xi cunduu núu-a<sup>n</sup> chi duca<sup>n</sup> cuiní Yá Ndiöxí cada-güexi. Te núu duca<sup>n</sup> na càda-güexi te nànchocáva-güexi quide-güexi sá váha sá cúu-xí ñáyiú ní dácuéhnú ñaha xii-güexi. Te núu duca<sup>n</sup> na càda-güexi te quide váha-güexi te ío nduu vétú iní Yá Ndiöxí. <sup>5</sup>Te ñáyiú quèé ñáyiú ndàhú ndécú ichi Yá Ndiöxí sàndáá iní-yu sá ðfú-gã chindèe ñaha-gá xií-yu, te cuèi nduu cuèi niú ñá túú dàña ndeé-yu càhá<sup>n</sup> ndihí ñàhá-yu xii-gá. <sup>6</sup>Te nchaa ñáyiú quèé cùdíí iní quidé nchàa sá cuèhé sá dúhá cùu-yu dàtná ñáyiú ní xíhí cuèi ndècu vívũ-yu. <sup>7</sup>Te cúñaha-n xii nchaa ñáyiú sá ná cadã-yu nchaa tnúhu càhá<sup>n</sup>-í-a cuendá sá ñà túú ñã cumání-yu cundecú-yu, te duca<sup>n</sup> vã yõo cáhá<sup>n</sup> cuèhé cuendá-yu. <sup>8</sup>Te ío xìni ñuhu-xi chindeé-yu cue tnàha ñáyiú-yu, dico ío-gá xíní ñuhu-xi chindeé-yu cue ñáyiú cùu ndi meé-yu ndècu ndihí-yu, te núu vá dúcá<sup>n</sup> cadã-yu te ñá túú-gã sàndáá iní-yu cadã-yu nàcuáa càhá<sup>n</sup> Yá Ndiöxí. Te sá dúcá<sup>n</sup> ná cadã-yu te vìhi-gá quidé-yu dácúxí ñáyiú ndècu ichi cuehé ichi duha.

<sup>9</sup>Te chido tnùní-n mèe-ni ñáyiú quèé ñáyiú sa ndècu únídico cuíá-xi àdi vìhi-gá cuendá ñáyiú-á<sup>n</sup> cadã-yu nchaa nàcuáa cuiní Yá Ndiöxí núú nchàa ñáyiú ndècu ichi-gá, te ñáyiú-á<sup>n</sup> xíní ñuhu-xi cuú-yu mee-ni ñáyiú ní quide ndáá ní xíndecu ndihí yii-xi. <sup>10</sup>Te na cùu-yu ñáyiú quèé quidé váha cùdiu núú nchàa ñáyiú, te na cùu-yu ñáyiú quèé

xíní canu ichi váha cue landú-xi, te na cùu-yu ñáyiú sãñaha nùu vehe ndetatú cue ñáyiú ñùhu ichi, te na cùu-yu ñáyiú ndècu túha quide nání chiù<sup>n</sup> cuendá cue ñáyiú ndècu ichi Yá Ndiöxí, te na cùu-yu ñáyiú chindee nchaa ñáyiú ndècu ndíhi tnúndòho tnúhu ndàhú, te na cùu-yu ñáyiú ñá túú dàña ndeé quidé nchaa núú sã váha.

<sup>11</sup>Te vá chídó tnúni-n ñáyiú quèé ñáyiú ñá túú ndècu únídico cuíá-xi cada chiù<sup>n</sup> Yá Ndiöxí, chi núu cuechi-gã-yu ña, te vá cundãá-yu cadá-yu chiù<sup>n</sup>-gá, chi quesahá-yu natnándaha tucú-yu. <sup>12</sup>Te sá cuendá xíã<sup>n</sup> te nacháhu-yu núú Yã Ndiöxí, chi vá cadá-gã-yu nacuáa ní cuu tnúhu cadá-yu ni cùu. <sup>13</sup>Te nguíta-yu cani iní-yu quíhí<sup>n</sup>-yu ndí vehe ndí vehe caca nihní-yu, te nchaa ñáyiú duca<sup>n</sup> quide ío cùu cuhndú-yu, te cùyiti yuhú-yu, te ndèni ní cuu cuáhá<sup>n</sup>-yu chinee díquí-yu vehe tnàha ñáyiú-yu ndèhé-yu núu nása ndècú-yu, te ñá túú tàu-yu duca<sup>n</sup> càdá-yu, te càhá<sup>n</sup>-yu mee-ni tnúhu sá ña túú nàndíhi. <sup>14</sup>Núu xíã<sup>n</sup> cuiní-í sá ncháá ñáyiú quèé ñáyiú cuechi na nàtnándaha tucú-yu cuendá cuú-yu nãná, te duca<sup>n</sup> càdá-yu nchaa sá xíní ñùhu-xi cadá-yu vehé-yu, te núu duca<sup>n</sup> na càdá-yu, te nchaa ñáyiú cùu úhú iní ñáhá xii-o vá nihí-gá-yu tnúhu càhá<sup>n</sup> cuèhé-yu cuendá tnúhu Yá Ndiöxí. <sup>15</sup>Te dava ñáyiú quèé ndécú ichi Yá Ndiöxí ní cùu ní dãnã-yu te ní tñí-yu tnúhu càhá<sup>n</sup> sácufíhná.

<sup>16</sup>Te núu dava ñáyiú ndècu ichi Yá Ndiöxí ndécú ndíhi-yu ñí ñaha quèé cúu ndí meé-yu ña, te tàu-yu

chindee ñáhá-yu xii-a<sup>n</sup> cuendá sá vã ío chi chiù<sup>n</sup>-a<sup>n</sup> nchaa ñáyiú ndècu ichi Yá Ndiöxí, te duca<sup>n</sup> te nchaa ñáyiú ndècu ichi-gá-á<sup>n</sup> ñíhi ndeé-gã-yu chindèé-yu dava-gá ñáyiú quèé ñá túú vèdana ndècu ndíhi.

<sup>17</sup>Te nchaa cue tée ío váha quide yindaha ñaha xii ñáyiú ndècu ichi Yá Ndiöxí ío xini ñuhu-xi canehe sá yíhí ñùhu núu-güedé, te chindee ñaha xii-güedé. Te uu<sup>n</sup>-gá tàu ñáyiú duca<sup>n</sup> càdá-yu sá cúu-xí nchaa cue tée ni yùhu ni iní càhá<sup>n</sup> tnúhu-gá. <sup>18</sup>Te núu tütú Yã Ndiöxí càchí-xi: “Vá chíhí-ndó ñùnu yuhu ndicutu oré danchíhí-di triú”, duha càchí-xi. Te càchí tucu-xi íngá xichi: “H<sup>n</sup> tée quide chiù<sup>n</sup> dacuítí tàu-xi sá cúhú<sup>n</sup> yàhu-dé”, duha càchí-xi núu tütú-gá.

<sup>19</sup>Te núu ío ñáyiú véxi sàcá<sup>n</sup> cuéchi núu-n cuendá ñí tée yindaha ñaha xii ñáyiú ndècu ichi Yá Ndiöxí ñá, te cada cuendá-n tnúhu càhá<sup>n</sup>-yu te núu véxi-yu ndíhi úú àdi úní ñáyiú càhá<sup>n</sup> ndáá nacuáa ní cuu, á<sup>n</sup> núu ñáhá te vá cadá cuendá-n tnúhu càhá<sup>n</sup>-yu. <sup>20</sup>Te núu cue tée yindaha ñaha xii ñáyiú-á<sup>n</sup> ndécú cuèchi-güedé, te càhá<sup>n</sup>-n dõho-güedé núu nchaa ñáyiú ndècu ichi-gá cuendá sá dává-gã-yu vá cúyí-yu duca<sup>n</sup> càdá-yu. <sup>21</sup>Te Yá Ndiöxí ndíhi Xítoho Jesucristú náhá-gã ndíhi cue espíritú xínú cuèchi núu-gá sá yùhú càhá<sup>n</sup>-í dóho-n sã cadá-n nchaa nacuáa càhá<sup>n</sup>-í-a, te ñí-ni càhá<sup>n</sup> ndíhi-n cue tée xíní tnáhá ndíhi-n, ndíhi cue tée ñá túú xíní tnáhá ndíhi-n. <sup>22</sup>Te vá ío cundíhí iní-n tàxi ndecu-n ñí tée quindaha ñaha xii ñáyiú, chi díhna-gá cada cuendá-n te



núu cùu-dé ìí<sup>n</sup> téé quide ndáá, chi núu cuendá-ni na tàxi ndecu-n-dé te vá cáda ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mée-n vá cáda-n nì ìí<sup>n</sup> sá cuèhé sá dúhá.

<sup>23</sup>Te duca<sup>n</sup> ìo mee-ni cùhú xití-n te vá cóhó-n mée-ni ndute, chi tnàhá luha vìnú ndéhé yoho yàha stilé coho-n cuendá cada tátna-xi.

<sup>24</sup>Te dava ñáyiu cùtnuní nchaa sá cuèhé sá dúhá quidé-yu, te cùtnuní tucu sá náchãhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sàá nduu cùndáá cuèchi-yu te dàvá-á<sup>n</sup> cutnùní. <sup>25</sup>Te duca<sup>n</sup> sãtnahá-xi cùu nchaa sá vãha quide davá-yu chi cùtnuní, te cuèi ñá túú cùtnuní òré-ni dico dacuitíi sã sàá nduu cùtnuní.

**6** Te nchaa ñáyiu ndècu tnuú quidé chiú<sup>n</sup> ndìhi ìí<sup>n</sup> patróó<sup>n</sup> xìni ñuhu-xi ío canehé-yu sá yíñùhu núú-dé cuendá sá vã càhá<sup>n</sup> cuèhé ñáyiu cuendá Yã Ndiòxí, te ni vã càhá<sup>n</sup> cuèhé-yu cuendá tnúhu-gá.

<sup>2</sup>Te núu patróó<sup>n</sup> cue ñáyiu xìnu cuechi-á<sup>n</sup> sàndáá iní-dé Yã Ndiòxí, te ñá díú sã dúcá<sup>n</sup> sàndáá iní-dé Yã Ndiòxí te vá cánèhé-yu sá yíñùhu núú-dé, chi uu<sup>n</sup>-gá tàú-yu cada váha-yu cunu cuèchí-yu núú-dé, te duca<sup>n</sup> na càdá-yu chi xìnu cuechí-yu núú tée sàndáá iní ndìhí-yu tnúhu Yã Ndiòxí. Te vá dáñá ndèè-n dànehé-n-yu nchaa nàcuáa càhá<sup>n</sup>-í-a, te cúñaha-n xìi-yu sá ná càdá-yu.

#### Nduu vétú iní-ó cùndecu-o

<sup>3</sup>Te ío cue téé ñá túú tnèi-güedé nàcuáa càhá<sup>n</sup> tnúhu Xítohó

Jesucristú, te cue téé-á<sup>n</sup> càchí-güedé sá càhá<sup>n</sup> ndáá-güedé dico ñá ndáá, chi ñá túú càhá<sup>n</sup>-güedé nàcuáa cuáhá<sup>n</sup> tnúhu-gá. Te nchaa tnúhu Xítohó Jesucristú cúu-xí mée-ni tnúhu ndáá, te chindee ñaha-xi cada ndáá-ó cùndecu-o ichi-gá.

<sup>4</sup>Te nchaa cue téé duca<sup>n</sup> xíquide quide cahnu-güedé méé-güedé dico ñá túú vèdana xìní-güedé, te cue téé-á<sup>n</sup> ñà túú ndècu váha iní-güedé chi nándi tnúhu sá ñà túú nàndíhi cuiní-güedé cùtnàha-güedé. Te ngüita-güedé cúu cuèdú iní tnáhá-güedé, te nàá ndìhi tnáhá-güedé, te xícuèhé tnáhá-güedé, te ñá túú-gã cúu váha iní núu tnáhá-güedé. <sup>5</sup>Te cue téé-á<sup>n</sup> mee-ni nàá-güedé chi ñá túú sàni váha iní-güedé, te ni ñà túú xìní-güedé nàcuáa cuáhá<sup>n</sup> tnúhu ndáá tnúhu Yã Ndiòxí, te càchí-güedé sá ìo váha cundecu-güedé ichi-gá chi sàni iní-güedé sá ìo vãi díhú<sup>n</sup> ñìhí-güedé cundecu ndìhi-güedé. Te yúhú càhá<sup>n</sup>-í dóho-n sã vã ñìhí tnáhá-n ndìhi nchaa cue téé duca<sup>n</sup> xíquide.

<sup>6</sup>Te ndáá sá ichi Yã Ndiòxí cúu-xí ìí<sup>n</sup> ichi sá ìo váha cundecu-o, dico xìni ñuhu-xi nduu vétú iní-ó nàcuáa ndècu-o ñuyú-a. <sup>7</sup>Te nchoo cuè ñáyiu chi ñá túú vèdana nèhe-o ní quexìo ñuyú-a, te díu-ni duca<sup>n</sup> ñà túú vèdana canehé-o quíhí<sup>n</sup> òré ná cùú-ó. <sup>8</sup>Te ío xìni ñuhu-xi nduu vétú iní-ó te núu ndècu-ni sá cùnchìto-o ndìhi dóó cuihnu-o. <sup>9</sup>Te ío ñáyiu ío cuiní-yu cuu cuicá-yu, te ñáyiu-á<sup>n</sup> dácàhu iní ñáhá yècu ñávãha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidé-yu, te

nchaa sá quídě-yu-á<sup>n</sup> ñà túú vědana nàndíhi-xi chi uu<sup>n</sup>-gá ndádá ndàhú ñáhá-xí xíi-yu, te dàcuíta nihnu ñaha-xi. <sup>10</sup>Chi nchaa ñáyiú ñùhu iní mee-ni díhú<sup>n</sup>, te xiá<sup>n</sup> quídě-xí ngúíta-yu sàni iní-yu cadá-yu nándi sá cuèhé sá dúhá. Te ío ñáyiú ndècu ichi Yá Ndiöxí te sá tnùhu duca<sup>n</sup> ñùhu iní mee-ni díhú<sup>n</sup> ní dáñá-yu ñá túú-gă sàndáá iní ñáhă-yu xii-gă, te vitna ñá túú tnàhí-gă ndécú vâha iní-yu.

**Cahni iní-ó càda-o nchaa nacuáa càhá<sup>n</sup> Yá Ndiöxí chi sàndáá iní-ó-gă**

<sup>11</sup>Te yòhó tée quide chiu<sup>n</sup> Yá Ndiöxí xini ñuhu-xi vá cadá-n dàtná quídě nchàa ñáyiú ní cachí-í sá ñà túú quide ndáá, te vá dáñá ndèe-n càda ndáá-n cùndecu-n, te cada-n nàcuáa nduu vétú iní Yá Ndiöxí, te ío quindáá iní-n-gă, te cuu iní-n nchàa tnaha ñáyiú-n, te cada càhnu iní-n nchàa sá ná yâha-n cùndecu-n ichi-gă, te cunduu ndàhú iní-n. <sup>12</sup>Te cahni iní-n càda-n nchaa nacuáa cuini Yá Ndiöxí chi sàndáá iní-n-gă, te ío cuhu<sup>n</sup> iní-n sã cùndècu-n ndíhi Yá Ndiöxí ní caa ní quíhí<sup>n</sup>, chi diu cuendá tnàhí-á<sup>n</sup> ní cáhá<sup>n</sup> ñáhá-gă xii-n, te ní cáhá<sup>n</sup> ndáá-n núú vai ñáyiú sá ío váha sàndáá iní-n-gă. <sup>13</sup>Te Yá Ndiöxí Yaá quídě nchìto nchaandi túhú sá ío ñuyú náha-gă sá càhá<sup>n</sup>-í dóho-n vitna, te diu-ni duca<sup>n</sup> nàha tucu Xítohó Jesucristú Yaá ní cáhá<sup>n</sup> tnúhu ndáá núú tē Pilatú <sup>14</sup>sá quindáá iní-n càda-n nchaa nacuáa càhá<sup>n</sup> Yá Ndiöxí, te nchaa tnúhu càhá<sup>n</sup>-gă cada-n nàcuáa vá dáquèe tíhú ñáhá ñáyiú xii-n, te duca<sup>n</sup>-ni càda-n ndéé ná sàá nduu quixi tucu Xítohó

Jesucristú. <sup>15</sup>Te quixi tucu-gă chi duca<sup>n</sup> ní cachí Yá Ndiöxí cunduu, te mee Yá Ndiöxí ñáhá-gă ná nduu quixi tucu Xítohó Jesucristú. Te Yá Ndiöxí ío váha cùu iní-gă te ìi<sup>n</sup>dií díi-ni-gă ío-gă cùnùu-gă dàcúxí cuè tée tàxi tnuní ìi<sup>n</sup> ìi<sup>n</sup> nàció<sup>n</sup> ndíhi nchaa dava-gă cue tée cùnùu, chi tàxi tnuní ñáhá-gă xii-güedé, te nchaa ñáyiú ndècu ñuyú-a tàxi tnuní-gă. <sup>16</sup>Te diu-gă cúú-gă Yaá ndécú nchàa nduu nchaa quíú, te ío càhnu cuu-gă chi dàtná dáyèhé nchícanhii dáyehé-xi núú ndécú-gă, te vá yòo ìi<sup>n</sup> cùyii dayatni núú ndécú-gă, te ni ñà túú ní ìi<sup>n</sup> ñáyiú xini ñáhá xii-gă te ni vâ ndácú-yu quiní ñáhă-yu xii-gă. Te ío na cànehe nchaa ñáyiú sá yíñùhu núú-gă ní caa ní quíhí<sup>n</sup>, te duca<sup>n</sup> ío na tàxi tnuní-gă ní caa ní quíhí<sup>n</sup>. Te duca<sup>n</sup> na cùnduu.

<sup>17</sup>Te cáhá<sup>n</sup>-n dôho nchaa ñáyiú cuica ndècu ndíhi nchaa sá ío ñuyú-a cuendá sá vâ cadá càhnú-yu mée-yu, te duu<sup>n</sup> duu<sup>n</sup> vá cùndéé iní-yu ní ìi<sup>n</sup> sá ndécú ndíhí-yu chi vá cúdíi-xi, te cáhá<sup>n</sup>-n dôho-yu sá ná cùndéé iní-yu Yá Ndiöxí chi diu-gă cúú-gă Yaá ndécú nchàa nduu nchaa quíú, te chitu núú ndáhá tàxi-gă nchaa sá xini ñùhu-o, chi cuini-gă sá ío cuu váha iní-ó cùndecu-o. <sup>18</sup>Te cáhá<sup>n</sup> tucu-n dôho-yu sá ná càdá-yu mee-ni sã vâha, te cuendá nchaa sá vâha cadá-yu-á<sup>n</sup> te cuú-yu ìi<sup>n</sup> ñáyiú cuica sã cúú-xí Yá Ndiöxí, te na cùndecu túha-yu chindèe-yu cue ñáyiú ndàhú cuáñáhá-yu sá xini ñùhú-yu. <sup>19</sup>Te núu duca<sup>n</sup> na càdá-yu te Yá Ndiöxí cuáñaha-gă sá ndúú tãhú-yu na sàá nduu, te ngúndecu váha-yu ndíhi-gă ní caa ní quíhí<sup>n</sup>.

**Tnúhu ndéé núú nǐ ndíhi-ná**

**20**Te yòhó té Timùteú càhá<sup>n</sup>-í dóho-n sǎ ìo cada cuèndá-n vǎ dǎma tnúhu ní taxi Yá Ndiǒxí danèhé-n ñáyiú, te vǎ cǎdá cuèndá-n nchàa cuendú cuèhé cuèndú duha ìo ñuyíú-a chi ñá túú nàndíhi-xi, te ni vǎ cǎdá cuèndá-n nchàa tnúhu xǐtnàha ñáyiú cǎchí

sá xícá nàha tnúhu cue tée túha chi ñá dǐú ìi<sup>n</sup> tnúhu ndáá cúú-xí.

**21**Te ìo ñáyiú ñá túú-gǎ sàndáá iní-yu tnúhu Yá Ndiǒxí, chi ní quide cuèndá-yu nchaa tnúhu xìca naha ñáyiú-á<sup>n</sup>.

Te Yá Ndiǒxí ná chindee chitúu ñaha-gǎ xii-n. Te duca<sup>n</sup> na cùnduu. Te ìo cada ndee ìní-nǎ vitna.

# TUTÚ CÚÚ ÒÚ NÍ CADÚHA TÉ PÄBLÚ QUÍHÍ<sup>n</sup> NDAHA TÉ TIMÛTEÚ

Té Păblú cádŭha-dé tutú  
quíhí<sup>n</sup> ndaha té Timùteú

**1** Yúhú té Păblú ní tendaha ñaha Yá Ndiöxí cáhá<sup>n</sup>-í tnúhu Xítóhó Jesucrístú núú ñăyiu, chi duca<sup>n</sup> ní cachí Yă Ndiöxí cunduu. Te cáhá<sup>n</sup>-í dàtná ní cachí Yă Ndiöxí sá ncháá nchò ñăyiu ndècu ndìhi Xítóhó Jesucrístú naníhí tǎhú-ó. <sup>2</sup>Te yúhú té Păblú cádŭha-í tutú-a daquixi-í ndaha yòhó té Timùteú chi ío cùu iní ñáhà-í xii-n, te ñiu-í ní sanu ichi ñaha-í xii-n ichi Xítóhó Jesucrístú, te xìcá<sup>n</sup> tǎhù-í núú Dütú Ndiöxí ndìhi núú Xítóhó Jesucrístú sá ío na chindee chitúu ñaha-gǎ xii-n, te cundàhú iní ñáhà-gǎ, te duca<sup>n</sup> ndì nduú-gǎ ná cǎdá te ío váha cuu iní-n cùndecu-n.

Cáhá<sup>n</sup> váha-o cuendá  
Xítóhó Jesucrístú

<sup>3</sup>Te cuèi nduu cuèi niú duca<sup>n</sup>-ni cáhá<sup>n</sup> ndìhi-í Yă Ndiöxí cuendá-n, te ndàcá<sup>n</sup> tǎhù-í núú-gǎ, te xìnu cuechi-í núú-gǎ dàtná ní quide cue ñaní tnáhà-í ní xíndecu ndéé sanduu, te cùtnuní iní-í sá quidé ndǎá-í núú-gǎ dàtná ní xóo cada-güedé. <sup>4</sup>Te ío sàni iní-í naníhí

tnáhà-ó cuendá ío cudíí iní-í, chi ndàcu iní-í sá ío ní ndáhyú-n sá ndìhú iní-n cùtnáhà ní quide ndee iní-í tnáhà-ó. <sup>5</sup>Te nàha-í sá sàndáá ndisa iní-n Yă Ndiöxí dàtná ní ngüíta díhna-gǎ xǐtná-n tǎ Lòidá ndìhi nǎná-n tǎ Eùnicé quidé-yu, te cùtnuní ndáá iní-í sá díú tnáhà-n ío váha sàndáá iní-n-gǎ.

<sup>6</sup>Te xǐǎ<sup>n</sup> dándàcu iní ñáhà-í xii-n cuendá sá ío-gǎ nducu ndèe-n cada-n chiu<sup>n</sup> ní nduu tǎhú-n núú Yă Ndiöxí cada-n, chi ní taxi-gǎ tnúhu ndee ìní ní ngúndecu ndìhi-n cùtnáhà ní sacá<sup>n</sup> ndodo-í ndaha-í díquí-n sá díú chiu<sup>n</sup>-gǎ cada-n. <sup>7</sup>Te Espíritú sá ní taxi Yă Ndiöxí ndécú ndìhi-o ñá túú cùu-xi ìí<sup>n</sup> Espíritú sá cǎdá nàcuáa yùhú-ó, chi cùu-xi ìí<sup>n</sup> Espíritú sá táxí tnúhu ndee ìní cada-o chiu<sup>n</sup>-gǎ, te ñiu-xi quide cuu iní tnáhà-ó ìí<sup>n</sup> ìí<sup>n</sup>-o, te ñiu-ni tucu-xi quide cùtnuní iní-ó nàcuáa cada-o cùndecu-o. <sup>8</sup>Te xǐǎ<sup>n</sup> núú vá cùcàha<sup>n</sup> núú-n cǎhá<sup>n</sup> váha-n cuendá Xítóhó Jesucrístú, te ni vǎ cùcàha<sup>n</sup> núú-n sǎ dúhá yìhi-í vecaá sá cuendá-gǎ, te xìni ñuhu-xi sá tnáhà-n ndòho-n sá cuendá tnúhu-gǎ, te cundee ìní-n ndòho-n, chi Yă Ndiöxí chindee ñaha-gǎ xii-n. <sup>9</sup>Te Yă Ndiöxí ní

dácăcu nihnu ñaha-gă xii-o nŭú ùhú núú ndàhú, te ní cachí-gá sá cádá-ó nchàa nacuáa cuíní mée-gă cunduu, te duca<sup>n</sup> ñi quide-gá chi duca<sup>n</sup> ñi sani iní mée-gă cunduu sá cádá vâha ñaha-gă xii-o, te ñá dŭú sã ïo váha quide-o ndecu-o duca<sup>n</sup> ñi quide-gá. Te ndéé cŭtnàhá vátá ngăva-gá ñuyúú ñi cachí-gá sá cádá vâha ñaha-gă xii nchaa nchoo ñăyiu ní ngúndecu ndîhi Xítohó Jesucristú vitna. <sup>10</sup>Te vitna cŭtnuní iní-ó sã ïo váha quide ñaha-gă xii-o, chi ní quixi Xítohó Jesucristú ñuyúú-a ní dácăcu nihnu ñaha-gă xii-o nŭú ùhú núú ndàhú, te Yaá-á<sup>n</sup> ñi quide-gá cuendá sá vã cùú-gá-ó cùú dúcá<sup>n</sup>-ó, chi ní cachí-gá sá cŭndècu-o ñi caa ñi quíhí<sup>n</sup> te núu na quíndáá iní-ó tnŭhu-gá.

<sup>11</sup>Te ní cachí-gá sá càhá<sup>n</sup>-í tnúhu-gá núú ñăyiu ñá túú cùu ñăyiu isràél te dacuàha váha-í-yu tnúhu-gá, te cuèi ndèni ní cuu ndècú-yu te quíhí<sup>n</sup>-í cáhá<sup>n</sup>-í tnúhu-gá núú-yu chi duca<sup>n</sup> ñi cachí-gá cunduu. <sup>12</sup>Te cuendá xíă<sup>n</sup> nándi sá ndóhò-í vitna cuendá-gá, dico ñá túú cùcaha<sup>n</sup> núú-í chi cŭtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dăná-í mée-í núú ndáhá-gă, te cŭtnuní ndáá iní-í sá cótó ñàha-gă xii-í ndéé ná sàá nduu nàcuaca ñaha-gá.

<sup>13</sup>Te vá dăná ndèe-n càda-n nchaa nacuáa càhá<sup>n</sup> tnúhu váha ní dánèhé ñàhá-í xii-n, te ío quíndáá iní-n Yă Ndiôxi, te nchaa-o nàcuáa ndècu-o ndîhi Xítohó Jesucristú ío cuu iní tnáhá-ó ñi<sup>n</sup> ñi<sup>n</sup>-o. <sup>14</sup>Te cada cuendá váha-n sã vã dăma tnúhu Yá Ndiôxi sá ñi taxi-gá ndécú ndîhi-n, te

Espíritú-gá sá ñi taxi-gá ndécú ndîhi-o chindee ñaha-xi xii-n.

<sup>15</sup>Te yòhò sa xini-n sã nchaa ñăyiu ndècu distritú Àsiá, ñăyiu ní sándáá iní tnúhu Xítohó Jesucristú ní dăná ñàhá-yu xii-í, te tnàhá té Fígeló ndîhi té Hèrmógenés ní dăná ñàha-güedé xii-í. <sup>16</sup>Te xicá<sup>n</sup> tãhù-í núú Xítohó Jesucristú sá ná chindee-gá cue ñăyiu cùu ndi mee té Onèsiforó, chi diu-dé ío vâi xito ní quixi-dé ní quide cuendá ñàhá-dé xii-í, te ní taxi-dé tnúhu ndee iní, te ñá túú ní cùcaha<sup>n</sup> núú-dě sá yíhì-í vecaá. <sup>17</sup>Te cŭtnàhá ní xindecu-dé ñuú Rómá duca<sup>n</sup>-ni ñi xóo nanducu ñàha-dé xii-í ndèe ndéé naníhí ñàhá-dé. <sup>18</sup>Te xicá<sup>n</sup> tãhú tùcu-í núú Xítohó Jesucristú sá ná cùndahú iní ñàhá-gă xii-dé nduu na sàá cundáá cuèchi nchaa ñăyiu. Te yòhò sa xini ndáá-n sã ïo ní chindee ñàha-dé xii-o cŭtnàhá ní xindecu-o ñuú Éfesú.

#### Tée quide ndáá xínú cuèchi núú Xítohó Jesucristú

**2** Te yòhò tée cùu datná ñi<sup>n</sup> déhe mee-í ío nducu ndèe-n cada-n nacuáa níhí ndéé-gă-n cundecu-n ichi Xítohó Jesucristú chi diu-gá chindee ñàha-gă xii-n. <sup>2</sup>Te nchaa tnúhu sá ñi dánèhé ñàhá-í xii-n ndîhi nchaa dava-gá ñăyiu, xíă<sup>n</sup> danèhé-n dăva-gá cue tée quide ndáá cuendá danèhé-güedé dava-gá ñăyiu.

<sup>3</sup>Te cahni iní-n ndòho-n cunu cuechi-n núú Xítohó Jesucristú dàtná cuíní-n ndòho ñi<sup>n</sup> sandadú sàhni iní-dé xínú cuèchi-dé. <sup>4</sup>Chi ñi ñi<sup>n</sup> sandadú ñá túú năgá sání iní-dé cada-dé òré xínú cuèchi-dé

cuendá cudü-dé núú tée tàxi tnuní ñáhá. <sup>5</sup>Te ñu-ni duca<sup>n</sup> sátnahá-xi cùu tucu ñi<sup>n</sup> tée dàdiqui, chi núú vá dádiqui-dé nàcuáa tàú-xi cunduu te vá ñihí-dé sá ndúú tãhú-dě. <sup>6</sup>Te núú ñi<sup>n</sup> tée xinu cuechi ío ndücu ndee-dé quidé chü<sup>n</sup>-dé chíhí-dě tatá, te ñu-dé tàú-dé díhna-gá-dé ñihí-dě sá cúhú<sup>n</sup> yãhu-dé. <sup>7</sup>Te cani iní-n nchàa tnúhu càhá<sup>n</sup>-í-a, te Xítohó Jesucristú chindee ñaha-gá xii-n te tecú tnúni-n nchàa.

<sup>8</sup>Te ndacu iní-n sã Xítohó Jesucristú ní cuu-gá ñaní tnáhá ndüi Dàvií, te ní xihí-gá te ní ndoto-gá, te ñu duca<sup>n</sup> ndüu tnúhu dànehé-í ñáyü. <sup>9</sup>Te ío dândoho ñaha ñáyü xii-í cuendá sá càhá<sup>n</sup>-í tnúhu-gá, te quide ñahá-yu xii-í dàtná quidě-yu ñi<sup>n</sup> tée ní quide ñi<sup>n</sup> cuéchi càhnu, chi ní chihi ñahá-yu vecaá xii-í, dico tnúhu Yá Ndiöxí chi vá ndácü-yu nganí-yu. <sup>10</sup>Te xíã<sup>n</sup> núu cuéi nándi cùu nchaa sá quidé ñahá-yu xii-í, dico quide cahnu iní-í cuendá sá nánihí tãhú tnàhá nchaa dava-gá ñáyü cuini Yã Ndiöxí cundecu ndihi-gá, chi nchaa ñáyü na tnàhá tnúhu ndihi Xítohó Jesucristú nduu tãhü-yu cundecú-yu ndihi-gá núú ío váha càa ndecu-gá ni caa ni quíhí<sup>n</sup>.

<sup>11</sup>Te xéhé cúú-xí ñi<sup>n</sup> tnúhu ndáá cuiti:

Nchoo cùu-o datná ñáyü ní xihí ndihi Xítohó Jesucristú chi ñá túú-gã ndécú-ó ichi cuehé ichi duha,  
te xíã<sup>n</sup> núu cuéi na sáa nduu cùú-ó ñüyíú-a, dico ñu-ni cundecu-o ndihi-gá.

<sup>12</sup>Te núu na cùndee iní-ó ndòho-o nándi sá ndóhó-ó sã cuendá-gá, te sáa nduu te cunuu-o ndihi-gá.

Te núu na càhá<sup>n</sup>-ó sã ñà túú xini-ó-gã, te ñu-ni duca<sup>n</sup> cüñaha-gã xii-o sã ñà túú xini ñáhá-gã ná sáa nduu càda ndáá-gá cuéchi nchaa ñáyü.

<sup>13</sup>Te núu nchoo ñà túú quide ndáá-ó ndècu-o núú-gã ñá, dico mee-gã chi ío ndáá quidé-gã,  
chi Yá Ndiöxí nchaa sá sání iní-gá quidé-gã.

**Tée quide nacuáa ndüu  
vétú iní Yã Ndiöxí**

<sup>14</sup>Te dandacu iní-n nchàa ñáyü ndècu ndihi-o ichi Xítohó Jesucristú nchaa tnúhu càhá<sup>n</sup>-í-a, te cúñaha-n xii-yu sã Xítohó Jesucristú cuini-gá sã ñà túú-gã nándi tnúhu cütñahá-yu, chi nchaa tnúhu càhá<sup>n</sup>-yu-á<sup>n</sup> dácüita nihnu-xi ñáyü ndèdóho ñaha xii-yu, chi ñá túú vèdana nàndíhi nchaa tnúhu-á<sup>n</sup>.

<sup>15</sup>Te ío nducu ndèe-n cada ndáá-n cùndecu-n núú Yã Ndiöxí, te cada-n chü<sup>n</sup>-gã nàcuáa nduu vétú iní-gá, te càhá<sup>n</sup> ndáá-n tnúhu-gá, cuendá sá vã cúcàha<sup>n</sup> núú-n núú-gã. <sup>16</sup>Te vá cáda cuendá-n nchàa tnúhu sã ñà túú vèdana nàndíhi càhá<sup>n</sup> ñáyü cuendá Yã Ndiöxí, chi nchaa ñáyü càhá<sup>n</sup> tnúhu-á<sup>n</sup> ndihi nchaa ñáyü sàcúndedóho ñaha xii-yu uu<sup>n</sup>-gá quidě-yu nchaa sá cuéhé sá dúhá.

<sup>17</sup>Te nchaa tnúhu-á<sup>n</sup> cüténuu-xi dàtná quidé ñi<sup>n</sup> cuéhé sã ñáni ñaha xii ñáyü xité nuu-xi ñihí yiqui cùñú-yu. Te tnàhá té Himènéu ndihi té Filetú càhá<sup>n</sup>-güedé tnúhu-á<sup>n</sup> quidé-güedě dàtná quidé ñáyü-á<sup>n</sup>. <sup>18</sup>Te cue tée-á<sup>n</sup> ñà túú-gã càhá<sup>n</sup> ndáá-güedé dàtná càhá<sup>n</sup> tnúhu Yá Ndiöxí, chi càhí-güedé

sá ncháá nchò ñáyi ndècu ichi Yá Ndiöxí cúú-ó dàtná cue ñáyi sa ní ndoto, dico na cùú ndisa-o te vâ ndótó-gă-ó cächí-güedé. Te dava ñáyi ní dâñă-yu sá sândáá iní-yu tnúhu Yá Ndiöxí sá dúcá<sup>n</sup> cãhá<sup>n</sup>-güedé. <sup>19</sup>Te cuëi duca<sup>n</sup> quide davă-yu, dico Yá Ndiöxí ní taxi ndecu-gá cue ñáyi ni yùhu ni iní ndécú ichi-gá, te cùtnuní sá ndécú ndîhi ñaha-gá xîi-yu, chi i<sup>n</sup> xichi núú tütú-gá cächí-xi sá méé-gă xîní-gá cue ñáyi cùu cuendá-gá. Te ingá tucu xichi núú tütú-gá cächí-xi sá ncháá ñáyi sândáá iní ñáhá xîi Xítóhó Jesucristú xîní ñùhu-xi sá vâ cùndècu-gá-yu ichi cuèhé ichi duha.

<sup>20</sup>Te ñáyi cuica chi ndècu ndîhi-yu vehé-yu cóhó sã ní cuáha mee-ni dîhú<sup>n</sup> cuàá<sup>n</sup>, ndîhi cóhó sã ní cuáha mee-ni dîhú<sup>n</sup> cuixí<sup>n</sup>, te nchaa cóhó-ă<sup>n</sup> cúú-xí dàtná cue ñáyi ñá túú nă cúmăní núú Yá Ndiöxí. Te ndècu ndîhi tucú-yu cóhó sã ní cuáha mee-ni ñùhu, ndîhi cóhó sã ní cuáha mee-ni yùtnu, te nchaa cóhó-ă<sup>n</sup> cúú-xí dàtná cue ñáyi ñá túú quide ndáá núú Yá Ndiöxí. <sup>21</sup>Te nchaa ñáyi ío ndècu yiñuhu núú Yá Ndiöxí cúú-yu ñáyi ñá túú ñîhi tnáhá ndîhi cue ñáyi ñá túú quide ndáá núú-gă, te cue ñáyi ndècu yiñuhu núú-gă-ă<sup>n</sup> ñà túú tnàhí quée cáva-yu quidè-yu nchaa chù<sup>n</sup> tahu-gá.

<sup>22</sup>Te ío cada cuendá-n vâ cádá-n nàcuáa quide cue téé cuechi ndècu ichi cuehé ichi duha, te cada-n nàcuáa cundáá-n cùndecu-n ichi Yá Ndiöxí, te quindáá iní-n-gă, te cuu iní-n nchàa tnaha ñáyi-n, te cundecu nahi-n, chi duca<sup>n</sup> tàú-xi cada-n ndîhi nchaa dava-gá ñáyi

sa ní nduu ndoo ní nduu nine iní-xi ñáyi cãhá<sup>n</sup> ndîhi ñaha xîi Yá Ndiöxí. <sup>23</sup>Te vâ cádá cuendá-n ni i<sup>n</sup> tnúhu xîtnàha ñáyi chi ñá túú vèdana nândîhi-xi, chi núu na càda cuendá-ó te dicó dánáá ñáhá-xí.

<sup>24</sup>Chi nchaa cue téé xînu cuechi núú Yá Ndiöxí xîní ñùhu-xi cãhá<sup>n</sup> váha-güedé ndîhi nchaa ñáyi, te danèhé ñáhá vâha-güedé tnúhu-gá, te cunduu càhnu iní-güedé te vâ nàá-güedé. <sup>25</sup>Te vii vii cãhá<sup>n</sup>-güedé dóho nchaa ñáyi sàá iní-xi, ñáyi ñá túú tnàhá iní tnúhu ndáá tnúhu Yá Ndiöxí, te duca<sup>n</sup> te cudana Yá Ndiöxí cada-gá te ndixi túu iní-yu sá ñá túú quide váha-yu ndècu-yu te quindáá iní-yu tnúhu-gá. <sup>26</sup>Te duca<sup>n</sup> te cutnùní iní-yu sá sàcuíhna cùnù-xi taxi tnuní ñáhá-xí xîi-yu, chi dàcahu iní ñáhá-xí xîi-yu quidè-yu nchaa nàcuáa cùu iní-xi ni cùu.

**Nàcuáa cada ñáyi òré sa ta cùyatni sáá nduu quixi tucu Xítóhó Jesucristú**

**3** Te cächí tnúhu-í xii-n cuendá cunaha-n nàcuáa cada-xi òré sa ta cùyatni sáá nduu quixi tucu Xítóhó Jesucristú, chi dàvá-á<sup>n</sup> ío cada úhú-xi. <sup>2</sup>Chi ngüita ñáyi cuhu<sup>n</sup> iní-yu mee-ni sã cúú-xí mèé-yu, te cuhu<sup>n</sup> iní-yu mee-ni dîhú<sup>n</sup>, te ío cada càhnú-yu mèé-yu, te cunduu yíchí iní-yu, te cãhá<sup>n</sup> cuèhé-yu cuendá Yá Ndiöxí, te vâ quindáá-gá iní-yu ni tătă-yu ni nănă-yu, te ni vâ ndacá<sup>n</sup> táhú núú tnáhă-yu cuendá nchaa sá vâha cada tnàhá-yu, te cadá-yu mee-ni sã ñá túú tnàhá iní Yá Ndiöxí. <sup>3</sup>Te vâ cúú iní tnáhá ndî meé-yu, te nàá-yu

te vá cuánàá-yu, te tee tnàhá-yu cuéchi neñùú, te vá cuánàá-yu cadá-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnàhá iní-yu nchaa sá vâha. <sup>4</sup>Te dayuhu cuâha cuendá tnáhă-yu núú cuè téé cùchiu<sup>n</sup>, te ío cunduu yîi ìní-yu cadá-yu nándi sá ñà túú vâha, te ío cada nínu-yu mée-yu, te mee-ni nchàa sá cúdîí iní-yu cadá-yu, te vá cúdîí iní-yu nanducu niñnú-yu Yá Ndiöxí. <sup>5</sup>Te quesàhá-yu sá tnàhá-yu ndécú-yu ichi Yá Ndiöxí dico vá cadă-yu nchaa nàcuáa càhá<sup>n</sup>-gá.

Te yúhú càchí tnúhu-í xii-n sâ vâ nihí tnàhá-n ndîhi nchaa ñáyiú duca<sup>n</sup> quide. <sup>6</sup>Te dava ñáyiú-á<sup>n</sup> quîhî<sup>n</sup>-yu dava vehe núú xîndecu ñáyiú, te nguîfta-yu dandâhú-yu ñáyiú ðîhî ñá túú xîní dana cuendá Yâ Ndiöxí, te ñáyiú ðîhî-á<sup>n</sup> cúú-yu ñáyiú ndècu vihi cuéchi-xi, chi ío cùdîí ìní-yu quidé-yu nchaa nání sá cuèhé sá dúhá sàni iní-yu. <sup>7</sup>Te cuèi ío dàcuahá-yu, dico ñá túú cùtnuní iní-yu nása cuáhá<sup>n</sup> tnúhu ndáá tnúhu Yá Ndiöxí. <sup>8</sup>Te ñáyiú duca<sup>n</sup> dândahú ñáhá xii cue ñáyiú ðîhî-á<sup>n</sup> ñà túú càhá<sup>n</sup> váha-yu cuendá tnúhu Yá Ndiöxí, chi quidé-yu dàtná ní quide ndîi Jănés ndîhi ndîi Jămbrés chi cue ndîi-á<sup>n</sup> ñà túú ní cùu váha iní cue ndîi núú ndîi Moisés cuendá tnúhu ní cáhá<sup>n</sup> ndîi. Te ñáyiú-á<sup>n</sup> cúú-yu ñáyiú sàni iní mee nîne-ni nchaa sá cuèhé sá dúhá, te cuèi càchí-yu sá sândáá iní-yu Yá Ndiöxí dico ñá ndàá sá sândáá iní ñáhă-yu xii-gá. <sup>9</sup>Dico vá ndácú-gă-yu dandâhú-yu vâi ñáyiú, chi nchaa ñáyiú cutnùní iní-yu sá ïo niî ðîquî-yu, te ñá túú càhá<sup>n</sup>

ndáá-yu dàtná ní quide cue téé úú ñá túú ní tnàhá iní tnúhu ní cáhá<sup>n</sup> ndîi Moisés.

#### Té Păblú dásàhú-dé té Timùteú

<sup>10</sup>Te yòhó quidé-n nchàa nacuáa ní dánèhé ñáhà-í xii-n, te ní xîní-n nchàa nacuáa quide-í ndécù-í, te cùtnuní iní-n nàcuáa sàni iní-í ndécù-í ñuyúú-a, te xîní-n sâ ïo sândáá iní-í Yâ Ndiöxí, te ío càhnu iní-í, te cùu iní-í nchaa ñáyiú, te xîní tucu-n sâ ïo quide cahnu iní-í cuèi nándi sá yâha-í ndécù-í dico ñá túú dàna ndeé-í ichi-gá. <sup>11</sup>Te ío vâi sá quidé ñàha ñáyiú xii-í dândòho ñáhă-yu sá ndécù-í ichi Xítòhó Jesucristú, te sa nàha tucu-n datná ní quide ñáhă-yu xii-í cútnàhá ní xîndecu-í ñuú Antiòquiá, ndîhi ñuú Ìconiú, ndîhi ñuú Lìstrá, chi ío ní dândóhó ñáhă-yu xii-í sá cuendá-gá. Dico Xítòhó Jesucristú ío ní xito ñàha-gă xii-í te ní chindee ñàha-gá cuèi nándi cùu sá ñî yâha-í. <sup>12</sup>Te na càchí tnúhu ndáá-í xii-n sâ ïo vâi sá ñà túú vâha cada ñàha ñáyiú xii nchaa ñáyiú cuiní sá ñà túú ñă cumání nùú Yâ Ndiöxí cuendá sá ndécú ndîhî-yu Xítòhó Jesucristú. <sup>13</sup>Dico dava ñáyiú càchí-yu sá càhá<sup>n</sup>-yu tnúhu Yá Ndiöxí te ñá ndàá sá càhá<sup>n</sup>-yu tnúhu-gá, ñáyiú-á<sup>n</sup> uu<sup>n</sup>-gá cuita cada-gá-yu nchaa sá cuèhé sá dúhá quîhî<sup>n</sup>, te duca<sup>n</sup>-ni ïo dandâhú tnáhă-yu.

<sup>14</sup>Te yòhó chi ío váha ní sândáá iní-n tnúhu Yá Ndiöxí sá dâcuàha-n, te vitna càhá<sup>n</sup>-í dóho-n sâ vâ dáñá ndèé-n quindáá iní-n tnúhu-á<sup>n</sup>, te yòhó sa nàha-n ná cúú ñáyiú ní dánèhé ñáhă xii-n tnúhu-gá. <sup>15</sup>Te yòhó chi ndéé cútnàhá cúú làndú-n



ní ngúíta-n dâcuaha-n tnúhu ndèé núú tùtú Yă Ndiöxí, te diu-ni nchaa tnúhu-gá canu ichi ñaha-xi xii-n te naníhí tǎhú-n, chi sàndáá iní-n Xítóhó Jesucristú. <sup>16</sup>Te nchaa cue tée ní tee tnúhu Yă Ndiöxí, chi diu-ni mee-gă ní dácáhú iní ñáhá-gă xii-güedé nâcuáa tee-güedé, te tnúhu-gá ío váha dacuàha-o nchaa dava-gá ñáyiú, te càhá<sup>n</sup>-xi dóho-o sǎ vǎ cündècu-gá-ó ichi cuehé ichi duha, te núú ñá túú quide ndáá-ó ndècu-o te nâcanu ichi ñaha-xi, te dânehé ñáhá-xí nâcuáa cada-o cündáá-ó núú Yă Ndiöxí. <sup>17</sup>Te diu-ni tnúhu-gá dátúha ñaha vǎha-xi xii nchoo cue ñáyiú ndècu ndíhi-gá cuendá cada-o nchàa núú sǎ vǎha.

**4** Te Xítóhó Jesucristú quixi-gá taxi tnúní-gá ñuyíú-a, te cada ndáá-gá cuèchi nchaa ñáyiú sa ní xíhí, ndíhi cuèchi nchaa ñáyiú xîndecu vívú. Te mee-gă ndíhi Yă Ndiöxí náhá-gă sǎ ïo càhá<sup>n</sup>-í dóho-n vitna <sup>2</sup>sǎ ïo dacuàha-n ñáyiú tnúhu-gá, te vǎ dǎná ndèé-n dâcuahá-n-yu ndèda-ni càa oré cuèí ñá túú cuíní-yu cundedóho-yu, te nchaa ñáyiú ñá túú cuíní cada ndáá cúñaha ndǎá-n nchàa nacuáa quidé-yu. Te cúñaha tùcu-n xii-yu sǎ vǎ dúcá<sup>n</sup>-gă cadá-yu, te cáhá<sup>n</sup>-n dôho-yu cuendá cada ndáá-yu cundecú-yu. Te ío cunduu càhnu iní-n òrè cáhá<sup>n</sup>-n dôho-yu, te ío dacuàhá-n-yu tnúhu-gá. <sup>3</sup>Chi sǎá nduu te vǎ càchí-gá-yu cundedóho-yu nchaa tnúhu sǎ sánú ichi ñaha cundecu váha-o núú Yă Ndiöxí, chi mee-nǎ nchaa sǎ cúdǎí iní mée-yu cundedóho-yu, te ndúcú-yu cue tée danèhé ñáhá xii-yu nchaa tnúhu cùu iní-yu-á<sup>n</sup>.

<sup>4</sup>Te vǎ cadá cuendá tnàhí-gá-yu tnúhu ndáá tnúhu Yă Ndiöxí, chi mee-nǎ tnúhu sǎ ñà túú nàndǎhi cada cuendá-yu. <sup>5</sup>Dico yòhó ío quíhi iní-n cündecu-n, te cahni iní-n cuèí nándi na ndòho-n, te dacuàha-ni-n ñáyiú tnúhu Yă Ndiöxí, ñáyiú vátá quindáá iní ñáhá-gă xii-gá, te cada-ni-n nchàa chiú<sup>n</sup> ní tǎhú-gă cada-n.

<sup>6</sup>Te yúhú sa ñùhu ichi-ná-í quíh<sup>n</sup>-í núú ndécú Yă Ndiöxí cundecu-í, chi sa ní cuyatni cahni ñaha-güedě xii-í cuendá sǎ xínú cuèchi-í núú-gă. <sup>7</sup>Te ní quide-í nchaa chiú<sup>n</sup> ní tǎhú Yă Ndiöxí cada-í te vitna ní xínu cava nchaa chiú<sup>n</sup> ní tǎhú-gă-á<sup>n</sup> ní quide-í, te ñá túú ní dǎña ndeé-í ní sàndáá iní-í-gá, te duca<sup>n</sup>-ni sàndáá iní-í-gá ndéé vitna. <sup>8</sup>Te vitna sa ndècu túha-ná sǎ ndúú tǎhù-í cuendá sǎ quidé ndǎá-í núú Yă Ndiöxí, te Xítóhó Jesucristú taxi-gá tǎhú-ǎ<sup>n</sup> nduu tǎhù-í ná sǎá nduu, chi cùu-gá ii<sup>n</sup> Yaá quidé ndǎá cuiti, te ñá díú-ní yúhú taxi-gá tǎhú-ǎ<sup>n</sup> cuu cuendá-í, chi tnàhá nchaa ñáyiú ndètu cahnu-ná sǎá nduu quixi tucu-gá ñuyíú-a cuǎñaha-gă tǎhú-ǎ<sup>n</sup> nduu tǎhù-yu.

**Chiú<sup>n</sup> tahu té Pǎblú cada té Timùteú**

<sup>9</sup>Te cuíní-í sǎ ïo ndíhi quixi-n quixi coto ñaha-n xii-í. <sup>10</sup>Chi té Dêmás ñá túú-gă quidé cuendá ñáhá-dě xii-í, chi mee-nǎ nchaa sǎ ío ñuyíú-a ío cùdíí iní-dé. Te ní dándõ ñaha-dě cuáhá<sup>n</sup>-dé ñúú Tesalónica, te té Crèscenté cuáhá<sup>n</sup>-dé cundecu-dé distritú Gàlaciá, te té Títú cuáhá<sup>n</sup>-dé cundecu-dé distritú Dàlmaciá.

<sup>11</sup>Te ì<sup>n</sup>dii-ná té Lùcá ndécú ndìhi ñaha-dé xii-í, te cúñaha-n xii té Mǎcú quixi-n ndìhi-dé, chi téé-á<sup>n</sup> ndacu-dé cada-dé ì<sup>n</sup> chiu<sup>n</sup>-í. <sup>12</sup>Te té Tìquicú ní tendaha-í-dé cuáhá<sup>n</sup>-dé ñuú Éfesú. <sup>13</sup>Te òré quixi-n te yáha-n vèhe té Càrpú cáá ñuú Tròás canehe-n ì<sup>n</sup> dóó tǐcachi ní dándòo-í vèhe-dé quixi, ndìhi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chi xíá<sup>n</sup> ío-gá xíní ñuhu-í. <sup>14</sup>Te té Lìjandrú téé cùu rerú ío vài sá ñà túú vǎha ní cuu quide ñaha-dé xii-í, dico mee Yǎ Ndiǒxí náhá-gǎ nása cada ñaha-gǎ xii-dé cuendá sá dúcá<sup>n</sup> quide-dé. <sup>15</sup>Te vá ñihí tnáhá-n ndìhi-dé chi ío càhá<sup>n</sup> cuèhé-dé cuendá nchaa tnúhu càhá<sup>n</sup>-ó.

<sup>16</sup>Te cútnàhá ndécá ñaha-güedé xii-í ní sáhá<sup>n</sup> núú cuè téé cùchiu<sup>n</sup> xito díhna nuu, chi mee òí ní sáhá<sup>n</sup> te ñá túú ní sáhá<sup>n</sup> ni ì<sup>n</sup> cuè téé cùndìhi-í, chi nchaa-güedé ní dándòo ñaha-güedé xii-í, te yúhú xìcá<sup>n</sup> táhù-í núú Yǎ Ndiǒxí sá vǎ cádá cuendá-gá sá dúcá<sup>n</sup> ñí quide-güedé. <sup>17</sup>Dico Xítóhó Jesucristú ní chindee ñaha-gá xii-í, chi ní taxi-gá tnúhu ndee ìní ní cáhá<sup>n</sup>-í tnúhu-gá ñacuáa tàu-xi cunduu núú cuè téé-á<sup>n</sup> ndìhi núú nchàa ñáyiú, dico ñá díú ñáyiú

isràél cúü-yu, te diu-gá ní dácäcu nihnu ñaha-gǎ xii-í ñá túú ní sàhni ñaha-güedé. <sup>18</sup>Te mee Xítóhó Jesucristú coto ñaha-gǎ xii-í te ñá túú ñá cuu cuèi náandi sá ná cádá ñaha ñáyiú xii-í te diu-ni-gá coto ñaha-gǎ xii-í ndéé ná sàá nduu sǎá-í andiu núú ndécú-gǎ táxí tnùn-í-gá. Te nchaa-o chǐ ná càhí-ó sǎ ìo càhnu cuu-gá ñi caa ñi quíh<sup>n</sup>. Te duca<sup>n</sup> na cunduu.

#### Tnúhu ndéé núú ñí ndìhi-ná

<sup>19</sup>Te ío cúñaha-n na càda ndee ìní tá Priscá, ndìhi té Àquilú, ndìhi cue ñáyiú cùu ndi mee té Onèsiforó. <sup>20</sup>Te té Èrastú ní quendóo-dé ñuú Còrintú, te té Trǒfimú ní dándòo-í-dé ñuú Miletú chi cùhú-dé. <sup>21</sup>Te ío cundìhí ìní-n quixi-n oré vátá sàá-gá yóó quidé vǐxi<sup>n</sup>-xi. Te ío cada ndee ìní-n càhí té Èúbulú, ndìhi té Pùdenté, ndìhi té Lǐnú, ndìhi tá Claudiá, ndìhi nchaa dava-gá ñáyiú sàndáá ñí tnúhu Xítóhó Jesucristú.

<sup>22</sup>Te xìcá<sup>n</sup> táhù-í núú Xítóhó Jesucristú sá ná cùndecu ndìhi ñaha-gá xii-n ndìhi nchaa dava-gá-yu. Te duca<sup>n</sup> ìo na chindee chitúu ñaha-gǎ xii-ndo nchàa-ndo. Te duca<sup>n</sup> na cunduu. Te ío chí cádá ndèe ìní-ñá vitna.

# TUTÚ NÍ CADÚHA TÉ PÄBLÚ QUÍHÍ<sup>n</sup> NDAHA TÉ TÌTÚ

Té Păblú cádũha-dé tutú  
quíhí<sup>n</sup> ndaha té Títú

**1** Yúhú té Păblú xínú cuèchi-í núú Yă Ndiöxí, te diu-gá ní tendaha ñaha-gá xii-í cáhá<sup>n</sup>-í tnúhu Xítóhó Jesucristú núú ñáyiú cuendá quíndáá iní nchaá ñáyiú ní cachí Yă Ndiöxí naníhí tǎhú, ndihí cuendá sá tēcú tnúní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. <sup>2</sup>Te yúhú dácuaaha-í-yu tnúhu-gá cuendá cundecu ndihí-yu tnúhu ndee iní sá cundècu ndihí-yu Yá Ndiöxí ní caa ní quíhí<sup>n</sup>, chi ndéé cútnáhá vátá ngăva-gá ñuyíú-a ní cachí-gá sá cundècu ndihí ñaha-gá xií-yu, te ñá túú dándahú ñáhá-gă, chi quide-gá ii<sup>n</sup> sá cáhá<sup>n</sup>-gá. <sup>3</sup>Te ní sáá nduu ní cachí-gá sá ñihí-yu tnúhu nàcuáa cuáhá<sup>n</sup> tnúhu-gá, te diu-ni tnúhu-á<sup>n</sup> ní cachí Yă Ndiöxí Yaá dácăcu nihnu ñaha xii-o núú ùhú núú ndàhú sá dácuaaha-í ñáyiú. <sup>4</sup>Te tutú-a cádúha-í cuendá daquixi-í ndaha yòhó té Títú, téé ní sanu ichi ndisa-í ichi Xítóhó Jesucristú, chi ii<sup>n</sup>-ni tnúhu sàndáá iní-ó. Te xicá<sup>n</sup> tǎhú-í núú Tătá-ó Dútú Ndiöxí sá ïo na chindee chitúú ñaha-gă xii-n,

te diu-ni-gá ná cãda te ío váha cuu iní-n cundecu-n. Te xicá<sup>n</sup> tǎhú tũcu-í núú Xítóhó Jesucristú Yaá dácăcu nihnu ñaha xii-o núú ùhú núú ndàhú sá dícú-ní dũca<sup>n</sup> na cada ñaha-gá xii-n.

**Chiu<sup>n</sup> quide té Títú distritú Crétá**

<sup>5</sup>Te yúhú ní dándöo ñaha-í xii-n distritú Crétá, chi cuení-í cada-n nchàa chiu<sup>n</sup> cumání, te cuení-í taxi ndecu-n cuè téé quíndaha ñaha xii cue ñáyiú sàndáá iní tnúhu Yá Ndiöxí xíndecu ii<sup>n</sup> ii<sup>n</sup> ñuú yíndèhu distritú-á<sup>n</sup>, te cada-n nàcuáa ní cachí-í cada-n. <sup>6</sup>Te cue téé cada chiu<sup>n</sup>-á<sup>n</sup> xíní ñũhu-xi cuu-güedé mee-ni cuè téé ío váha quide ndáá nàcuáa vá yõ cáhá<sup>n</sup> dóho-güedé, te na cùu-güedé cue téé ndècu ii<sup>n</sup> dii-ni ñadíhí-xi. Te duca<sup>n</sup> nchàa landú-güedé ná cùu-güexi landú sàndáá iní ñáhá xii Yá Ndiöxí cuendá sá vǎ yõ cuatnuñaha xii-güexi quesahá-yu sá ïo sàá iní-güexi te quide-güexi nándí sá ñà túú tàú-güexi cada-güexi. <sup>7</sup>Chi xini ñũhu-xi sá ncháá cuè téé quíndaha ñaha xii ñáyiú sàndáá iní tnúhu Yá Ndiöxí ío cundecu yíñũhu-güedé, chi duca<sup>n</sup> tàú-xi cada nchaá cue

tée quide chiu<sup>n</sup> Yá Ndiöxí, te xini ñuhu tucu-xi sá vǎ cúú-güedě cue tée ñí iní-xi, te ni vǎ cúú-güedě cue tée líhli iní-xi, te ni vǎ cúú-güedě cue tée quihu, te ni vǎ cúú-güedě cue tée plètú, te ni vǎ cúú-güedě cue tée dicó-ni duca<sup>n</sup> ñíhí dǐhú<sup>n</sup>.

<sup>8</sup>Te xini ñuhu-xi cuu-güedě cue tée sǎnaha ñuu vehe ndetatú cue ñáyiú ñuhu ichi, cue tée quide váha sá cúú-xí tnàha ñáyiú-xi, cue tée ío váha cùtnuní iní-xi nàcuáa cada cundecu ñuyíú-a, cue tée quide ndáá xǐndecu, cue tée quide nchaa nacuáa ndùu vétú iní Yá Ndiöxí, cue tée xìto mee-xi ñá túú quide cutexínu. <sup>9</sup>Te na cùu-güedě cue tée ío váha sàndáá iní tnúhu váha tnúhu Yá Ndiöxí sá ñí dánèhé ñáhà-í xii-ndo cuendá duca<sup>n</sup> te cue tée-á<sup>n</sup> ndacu-güedé cáhá<sup>n</sup>-güedé dóho ñáyiú cuendá cádá-yu nchaa nàcuáa cáhá<sup>n</sup> Yá Ndiöxí, te ñíhí-güedě tnúhu cáhá<sup>n</sup> váha-güedé núú nchàa ñáyiú dàquee tǐhú tnúhu Yá Ndiöxí, te mee-ni cue tée duca<sup>n</sup> quide váha taxi ndecu-n quǐndaha-güedé ñáyiú sàndáá iní tnúhu-gá.

<sup>10</sup>Te na càchí tnúhu-í xii-n sǎ vǎí ñáyiú sàá iní-xi ío, te cáhá<sup>n</sup>-yu mee-ni tnúhu sá ñà túú nàndǐhí, te dàndahú-yu tnàhá ñáyiú-yu, te ñáyiú isràél ío-gá vǎi-yu duca<sup>n</sup> xǐquide. <sup>11</sup>Te nchaa ñáyiú duca<sup>n</sup> xǐquide xini ñuhu-xi nducu-o tnúhu cúñaha-o xǐ-yu cuendá cadí-yu yuhú-yu, chi dànehé-yu dava-gá ñáyiú ì<sup>n</sup> sá ñà túú tǎú-yu dacuàhá-yu, te duca<sup>n</sup> quidé-yu cuendá-ni sá ñíhí-yu dǐhú<sup>n</sup>, te ío titní xichi ní cuu dàndahú-yu nchaa ñáyiú xǐndecu ì<sup>n</sup>-ni vèhe.

<sup>12</sup>Te ní cachí ì<sup>n</sup> tée ío váha sàá díquí-xi ndècu mei ñuú distritú Crètá sá ncháá ñáyiú ñuú-dé-á<sup>n</sup> ío ndèhndé-yu, te ío cuihna ìni-yu, te ío vǎi xexí-yu, te cùhndú-yu.

<sup>13</sup>Te ndáá ní cáhá<sup>n</sup>-dé chi duca<sup>n</sup> quidé-yu, te xǐá<sup>n</sup> ío cáhá<sup>n</sup>-n dóho-yu cuendá sá ná quǐndáá váha iní-yu tnúhu Yá Ndiöxí. <sup>14</sup>Te cúñaha-n xǐ-yu sá vǎ cádá cuendá-yu nchaa tnúhu ndehnde cáhá<sup>n</sup> ñáyiú isràél, te ni vǎ cádá cuendá-yu nchaa tnúhu cáhá<sup>n</sup> ñáyiú ñá túú cuini quǐndáá iní tnúhu Yá Ndiöxí.

<sup>15</sup>Te nchaa sá ñí cadúha Yá Ndiöxí ío ñuyíú-a cùu-xi mee nine-ni sá váha sá cúú-xí nchàa ñáyiú sa ní nduu ndoo ní nduu nine iní-xi ndècu ichi Yá Ndiöxí. Dico nchaa sá ñí cadúha-gá ñá túú cùu-xi sá váha sá cúú-xí nchàa ñáyiú ndècu ichi cuehé ichi duha, chi ñá túú sàndáá iní-yu tnúhu-gá, chi mee-ni sǎ cuèhé sá dúhá ñuhu iní-yu, te ñá túú quide cuendá-yu núu quide váha-yu àdi ñá túú quide váha-yu ndècú-yu. <sup>16</sup>Te càchí-yu sá sàndáá iní-yu Yá Ndiöxí, dico nchaa sá quidé-yu-á<sup>n</sup> càchí tnùní-xi sá ñà ndáá. Te Yá Ndiöxí chi duu<sup>n</sup> duu<sup>n</sup> ñá túú tnàhá iní-gá nchaa nàcuáa quidé-yu, chi ío sàá iní-yu, te ñá túú quidé-yu ni ì<sup>n</sup> sá váha.

### Tnúhu váha tnúhu Yá Ndiöxí

**2** Te yòhó òrè dánèhé-n ñáyiú, te danèhé-n-yu mee-ni nàcuáa cáhá<sup>n</sup> tnúhu váha tnúhu Yá Ndiöxí. <sup>2</sup>Te nchaa cue tée cùu sacuéhé ná càda cuendá-güedé vǎ cádá cùtexínu-güedé cundecu-güedé, te na cùndecu yǐñuhu-güedé, te na cuàha váha-güedé cuendá nàcuáa

cada-güedé cundecu-güedé, te na quindáá váha iní-güedé Yá Ndiöxí, te na cùu iní-güedé tnàha ñáyi-güedé, te na cundu cañu iní-güedé cuèí nándí sá ná yáha-güedé. <sup>3</sup>Te vitna cáhá<sup>n</sup> tucu-í sá cúu-xí nchàa ñáyi dìhí ñáyi cùu sacuéhé sá ná cundecu yiñuhú-yu, te vâ cúu-yu ñáyi yiti yùhu-xi, te ni vâ cúu-yu ñáyi quihu, te na dànehé-yu nchaa dava-gá ñáyi cada váha-yu. <sup>4</sup>Te na dàsahú-yu nchaa ñáyi dìhí ñáyi cuechi cuendá ná cùu iní-yu yí-yu, ndihí cue landú-yu, <sup>5</sup>ndihí cuendá sá ná càni váha iní-yu nàcuáa cundecú-yu, ndihí cuendá sá vâ cání iní-yu cadá-yu ni ì<sup>n</sup> sá cuèhé sá dúhá, ndihí cuendá sá ná cadá-yu nchaa chiù<sup>n</sup> ñuhu vehé-yu, ndihí cuendá sá cadá vâha-yu nchaa tnàha ñáyi-yu, ndihí cuendá sá ná cadá-yu nchaa nàcuáa cáhá<sup>n</sup> yí-yu, te duca<sup>n</sup> xini ñuhu-xi cadá-yu cuendá sá vâ yõ cáhá<sup>n</sup> cuèhé cuendá tnúhu Yá Ndiöxí. Duha cúñaha-n xii cue ñáyi dìhí ñáyi cùu sacuéhé cuendá duca<sup>n</sup> dàsahú-yu nchaa ñáyi dìhí ñáyi cuechi.

<sup>6</sup>Te yòhó cáhá<sup>n</sup>-n dôho nchaa cue téé cuechi cuendá sá ná càni váha iní-güedé nàcuáa cundecu-güedé, <sup>7</sup>te cada-n mèe-ni sá vâha cuendá duca<sup>n</sup> cànchicú<sup>n</sup> nihnu-güedé cada-güedé, te òré danèhé-n-güedé te ío váha cuu iní-n dànehé-n-güedé, te ndihí tnúhu yiñuhu cáhá<sup>n</sup> ndihí-n-güedé. <sup>8</sup>Te cáhá<sup>n</sup>-n mèe-ni tnúhu váha, te duca<sup>n</sup> te vâ yõ ì<sup>n</sup> cáhá<sup>n</sup> cuèhé cuendá tnúhu cáhá<sup>n</sup>-n, te nchaa ñáyi cùu úhú iní ñáhá xii-o cucaha<sup>n</sup> núu-yu, te vâ nihí-yu tnúhu cáhá<sup>n</sup> cuèhé-yu cuendá-ó.

<sup>9</sup>Te ío cáhá<sup>n</sup>-n dôho nchaa cue téé xinu cuechi sá ná quindáá iní-güedé cada-güedé nchaa chiù<sup>n</sup> tahu patróo<sup>n</sup>-güedé nàcuáa cudù-güedé núu cuè téé-á<sup>n</sup>, te vâ cáhá<sup>n</sup> sàá iní-güedé. <sup>10</sup>Te vâ cání iní-güedé duhu-güedé, te cada ndáá-güedé cuendá sá ñà túú nã cani iní ñáhá cuè patróo<sup>n</sup>-güedé, te duca<sup>n</sup> te cutnùní iní ñáyi sá tnúhu Yá Ndiöxí ío váha dànehé ñáhá-xí nàcuáa cada-o cundecu-o, te diu-gá cúu-gã Yaá dácacu nihnu ñaha xii-o núu ùhú núu ndàhú.

<sup>11</sup>Te nchoo ñí cutnùní iní-ó sá Yá Ndiöxí ío cundahú iní-gá nchaa nchoo ñáyi ndècu ñuyú-a, te ní taxi-gá tnúhu ndee ìní sá nánihí tàhú nchaandí túhú ñáyi te núu na quindáá iní ñáhã-yu xii-gá.

<sup>12</sup>Te ní cachí-gá sá dáñá-ó nchaa ichi cuehé ichi duha chi ñã tnàhá iní-gá cundecu-o ìchi-á<sup>n</sup>, te vâ ìo cuhu<sup>n</sup> iní-ó nchaa sá lò ñuyú-a, te ní cachí tucu-gá sá ìo cani iní-ó nàcuáa cundecu-o vitna ndecu-o ñuyú-a te cada ndáá-ó cundecu-o cuendá nduu vétú iní-gá. <sup>13</sup>Te cundetu-o sãá nduu càhnu vihi, nduu quixi tucu Xítoho Jesucristú Yaá cúu Ndiöxí-ó, te diu-gá ní dácacu nihnu ñaha-gã xii-o núu ùhú núu ndàhú. Te nduu-ã<sup>n</sup> ìo cudíí iní-ó. <sup>14</sup>Te mee-gã ní xihí-gá chi duca<sup>n</sup> ñí cuiní-gá cundu, te duca<sup>n</sup> ñí quide-gá cuendá nchoo vâ cundècu-gá-ó ìchi cuehé ichi duha, te nduu ndoo nduu nine iní-ó, te duca<sup>n</sup> te cuu-o cuè ñáyi quindaha-gã, te ni yùhu ni iní-ó càda-o mee-ni sá váha.

<sup>15</sup>Te nchaa tnúhu-á<sup>n</sup> danèhé-n-yu te cúñaha-n xii-yu nàcuáa cadá-yu,

te cáhá<sup>n</sup>-n dõho-yu te núu ñá túú quide ndáá-yu. Te cada-n sá cúú-n ì<sup>n</sup> téé xinu cuechi núú Yá Ndiõxí, te vá dáñá-n mèe-n daquee tíhú ñáhá ñáyiú xii-n.

**Nchaa sá tàù ñáyiú ndècu  
ichi Yá Ndiõxí cadá-yu**

**3** Te cúñaha-n xii-yu sá ná quindáá iní-yu cadá-yu nchaa nàcuáa càhá<sup>n</sup> nchaa cue téé cùchiu<sup>n</sup>, te tàù-yu chindee ñáhá-yu xii-güedé nchaa chiù<sup>n</sup> váha quide-güedé. <sup>2</sup>Te vá càhá<sup>n</sup> cuèhé-yu cuendá ñáyiú, te vá cùndùu pletú-yu, te na cùú-yu ñáyiú ndàhú iní-xi, te na cùndahú iní-yu nchaa tnàha ñáyiú-yu.

<sup>3</sup>Te tnàhá-ó nǐ xóo cada-o dàtná quidé ñáyiú-á<sup>n</sup> vitna, chi ío nǐ ðǐquí-ó chi ñá tècú tnùní-ó nàcuáa càhá<sup>n</sup> tnúhu Yá Ndiõxí ní cùu, te ío ní xínduu sàá iní-ó núú-gǎ, te ní xíndecu-o ì<sup>n</sup> ichi sá ñà túú tàù-ó cùndecu-o ni cuu, te nándi sá cuèhé sá dúhá ló ñuyíú-a ní xóo cudíí iní-ó nǐ xóo cada-o chi ní xóo taxi tnùní ñáhá-xí xii-o, te ní xóo cada cuèhé ní xóo cada duha-o ni cùu, te ní xíndecu-o ichi cuedú iní, te cuendá nchaa sá nǐ xóo cada-o-á<sup>n</sup> xǐá<sup>n</sup> ío ní xóo cuu úhú iní ñáhá ñáyiú xii-o, te duca<sup>n</sup>-ni nchòo tucu ní xóo cuu úhú iní-õ-yu. <sup>4</sup>Te Yá Ndiõxí Yaá ní dácäcu nihnu ñaha xii-o núú ùhú núú ndàhú ní dándíxí tũu-gá iní-ó nàcuáa cutnùní iní-ó sǎ lo váha iní-gá, te cùu iní ñáhá-gǎ xii nchaa nchoo ñáyiú ndècu ñuyíú-a. <sup>5</sup>Te Yá Ndiõxí ní dácäcu nihnu ñaha-gǎ xii-o núú ùhú núú ndàhú, dico ñá dǐfú cuendá ì<sup>n</sup> sá váha quide-o ndecu-o ñuyíú-a duca<sup>n</sup> nǐ quide-gá, chi mee-gǎ duca<sup>n</sup> tnàhí

ní cundàhú iní ñáhá-gǎ xii-o. Te ní nduu ndoo ní nduu nine iní-ó, te ní cuu-o dàtná ì<sup>n</sup> ñáyiú saa, chi Espiritú Yá Ndiõxí duca<sup>n</sup> nǐ quide ñaha-xi xii-o. <sup>6</sup>Te Espiritú-gá ní taxi-gá ni yùhu ni iní-gá ndécú ndìhi-o, te duca<sup>n</sup> nǐ quide-gá chi ní sándáá iní-ó Xítohó Jesucristú Yaá ní dácäcu nihnu ñaha xii-o núú ùhú núú ndàhú. <sup>7</sup>Te ío cùndahú iní ñáhá-gǎ xii-o núu sa ní quide ndáá-gá cuèchi-o te ní cuu-o dèhe-gá, núu xǐá<sup>n</sup> vitna ndètu-ná-ó sǎá nduu ndùu táhú-ó cùndecu-o ndìhi-gá ni caa ni quíhí<sup>n</sup>.

<sup>8</sup>Te tnúhu ní cáhá<sup>n</sup>-í-a cùu-xi tnúhu ndáá cuiti, te cuiní-í sá nǐ yuhu ni iní-n càhá<sup>n</sup>-n tnúhu-gá núú-yu cuendá sá ncháá ñáyiú sàndáá iní ñáhá xii Yá Ndiõxí nducu ndèé-yu cadá-yu mee-ni sǎ váha, te tnúhu-á<sup>n</sup> cúú-xí mèe-ni tnúhu váha, te ío váha sá cúú-xí-yu. <sup>9</sup>Te vá cadá cuendá-n nchàa tnúhu sá ñà túú nàndíhi xítnàha ñáyiú, te vá cadá cuendá-n ñáyiú nándi càhá<sup>n</sup> cuendá nchaa sá nǐ xóo cada cue ñáyiú ní xíndecu ndéé sanaha, te vá cadá cuendá-n nchàa tnúhu xítnàha ñáyiú xícuèhé tnáhá cuendá tnúhu ní chídó tnùní ndíi Moisés, chi nchaa tnúhu xítnàhá-yu-á<sup>n</sup> ñà túú tnàhí nandíhi-xi, te dàcuíta ñaha-xi xii-o.

<sup>10</sup>Te núu ío ñáyiú ní ngúíta-yu nándi tnúhu càhá<sup>n</sup>-yu cuendá sá vá cúú ì<sup>n</sup>nuu cue ñáyiú ndècu ichi Yá Ndiõxí ñá, te ñáyiú-á<sup>n</sup> càhá<sup>n</sup> sàhú-n dõho-yu ì<sup>n</sup> úú xito, te núu vá tníi-yu tnúhu càhá<sup>n</sup>-n ñá, te vá nìhí tnáhá-gǎ-n ndìhi-yu. <sup>11</sup>Te duca<sup>n</sup> càda-n, chi ñáyiú-á<sup>n</sup> duu<sup>n</sup> duu<sup>n</sup> ñá túú-gǎ cuiní-yu cadá-yu sá

váha, chi mee-nă sá cuèhé sá dúhá  
tnàhá iní-yu cadá-yu, te cùtnuní iní  
méě-yu sá nà túú quide ndáá-yu, te  
sáá nduu te nacháhu-yu nchaa sá  
quídě-yu.

#### Nàcuáa cada té Titú

<sup>12</sup>Te cuiní-í tendaha-ĩ té Àrtemás  
quixi-dé núú ndécú-n àdi té Tìquicú,  
te òré ná quèxio ndéda-ni càa ĩ<sup>n</sup>  
cue téa-núú ndécú-n, te ío nducu  
ndèe-n quíhí<sup>n</sup>-n ñùú Nicópolis  
núú quíhí<sup>n</sup>-í cundecu-í, chi yàcá<sup>n</sup>  
cuiní-í quíhí<sup>n</sup>-í cundecu-í yóó quidé  
vĩxi<sup>n</sup>-xi. <sup>13</sup>Te ío cuáñaha-n nchàa sá  
xíní ñùhu té Zènáas téa ío váha xíní  
nchaa nàcuáa càhá<sup>n</sup> lèi, ndihí té

Àpolós cuendá sá nà túú nă cumání  
xii-güedé ichi. <sup>14</sup>Te cuiní-í sá ncháá  
ñáyi ndècu ndihí-o ichi Yá Ndiõxí  
cada váha-yu, te cuáñahá-yu ĩ<sup>n</sup> sá  
xíní ñùhu ñáyi, te ío váha chù<sup>n</sup>  
cadá-yu te núu duca<sup>n</sup> na càdá-yu.

#### Tnúhu ndéé núú ñí ndihí-ná

<sup>15</sup>Te vitna ío cada ndee ìní-n  
càchí nchaa ñáyi ndècu ndihí-í  
iha, te cúñaha-n sã ĩo na càda ndee  
iní nchaa ñáyi cùu iní ñáhá xì-o,  
ñáyi sàndáá iní ñáhá xii Yá Ndiõxí.  
Te Yá Ndiõxí ío na chindee chitúu  
ñaha-gã xii-ndo nchàa-ndo. Te duca<sup>n</sup>  
na cùnduu. Te ío chí cadá ndèe  
iní-nă vitna.

# TUTÚ NÍ CADÚHA TÉ PÄBLÚ QUÍHÍ<sup>n</sup> NDAHA TÉ FILEMÓN

## Té Păblú cādūha-dé tutú quíhí<sup>n</sup> ndaha té Filemón

<sup>1</sup>Te yúhú té Păblú tée yìhi vecaá sá cuendá Xítóhó Jesucristú cādūha-í ìí<sup>n</sup> tutú ndìhi té Timùteú cuendá daquixi-í ndaha yòhó té Filemón, te ío cùu iní ñàhà-í xii-n chi tñàhá-n quide-n chiú<sup>n</sup> Yá Ndiòxí. Te tutú-a tëndaha-í quixi ndaha-n <sup>2</sup>ndìhi ndaha ñaha nàni Apiá ñaha ndècu ndìhi-o ichi Xítóhó Jesucristú, ndìhi ndaha té Àrquipú, chi tñàhá-dé quídé-dě chiú<sup>n</sup> Yá Ndiòxí, ndìhi ndaha nchaa ñáyiu tàcá vehe-n dàcuahá-yu tñúhu-gá. <sup>3</sup>Te xicá<sup>n</sup> táhù-í núú Tătá-ó Dütú Ndiòxí ndìhi núú Xítóhó Jesucristú sá ìo na chindee chitúu ñaha-gá xii-ndo, te duca<sup>n</sup> ndì nduú-gá ná cádá te ío váha cuu iní-ndó cùndecu-ndo.

## Té Filemón ío sàndáá iní-dé Xítóhó Jesucristú te cùu iní-dé tñàha ñáyiu-dé

<sup>4</sup>Te ndi tñàhá òré càhá<sup>n</sup> ndìhi-í Yá Ndiòxí cuendá-n ndácá<sup>n</sup> táhù-í núú-gá. <sup>5</sup>Chi ñihí-í tñúhu sá ìo sàndáá iní-n Xítóhó Jesucristú, te cùu iní-n cuè ñáyiu ndècu ichi-gá.

<sup>6</sup>Te xicá<sup>n</sup> táhù-í núú Yá Ndiòxí sá dàtná-ni sàndáá iní-n-gă duca<sup>n</sup>-ni dānehé-n ñáyiu cuendá duca<sup>n</sup> ngūnu ichí-yu tñàhá-yu, te cutnùní iní-yu nācuāa ndūu nchaa sá vāha tàxi Xítóhó Jesucristú xii-o, te tñàhá-yu nduu táhū-yu nchaa sá vāha-á<sup>n</sup>. <sup>7</sup>Te yòhó té Filemón cúú-n tēe ndècu ndìhi-í ichi Xítóhó Jesucristú càhí tñúhu-í xii-n sá ìo cùdíí iní-í cuendá sá ìo váha quide-n ndecu-n, chi cùu iní-n nchaa ñáyiu ndècu ichi Yá Ndiòxí, te uu<sup>n</sup>-gá ñihí ndèè-í sá dúcá<sup>n</sup> quide-n, te diu-n ìo sáhă-n-yu tñúhu ndee iní ndécú ndìhí-yu.

## Té Păblú chindèe tñúhu-dé té Ònésimú

<sup>8</sup>Te yúhú té Păblú ní taxi Xítóhó Jesucristú tñúhu ndee ìní ndécú ndìhi-í sá táxi tñùnì ñàhà-í xii-n te tahu-í chiú<sup>n</sup> cada-n, dico vá táxi tñùnì ñàhà-í xii-n, <sup>9</sup>chi váha-gá sá càhá<sup>n</sup> ndàhú-í núú-n sã cádá-n nchaa nacuāa càhá<sup>n</sup>-í chi ío cùu iní ñàhà-í xii-n. Chi yúhú sa ta yì-í cuáhá<sup>n</sup>, te yìhi-í vecaá cuendá sá càhá<sup>n</sup>-í tñúhu Xítóhó Jesucristú. <sup>10</sup>Te càhá<sup>n</sup> ndàhú-í núú-n sã ñà tùú nă cani iní-n cuendá té Ònésimú,



chi ní cuu-dé vitna dàtná ìí<sup>n</sup> déhe-í, chi ní sándáá iní-dé tnúhu Yá Ndiöxí ní xáha-í xii-dé vitna yìhi-í vecaá.

<sup>11</sup>Te nàha-n sá cùtnàhá ní xíndecu ndihi-n-dě ñá túú ní quide ndáá-dé, dico vitna ío váha quide-dé ndécú ndihi-í-dé, te diu-ni duca<sup>n</sup> càda-dé òré cundecu ndihi tucu-n-dě. <sup>12</sup>Te vitna tendaha-í-dé ndixi-dé cundecu tucu-n ndihi-dé, te òré quehe<sup>n</sup> cuèndá-n-dě, te cada iní-n sǎ yùhú ní quehe<sup>n</sup> cuèndá-n. <sup>13</sup>Te vitna yìhi-í vecaá sá cuèndá tnúhu Xítóhó Jesucristú, te cuíní-í ngani-í-dé cunu cuechi-dě núú-í cuèndá cada-dé núú-n ní cùu.

<sup>14</sup>Dico ñá túú ní ngàni-í-dé, chi vátá ndátnùhu ndihi ñaha-gǎ-í xii-n nùu nása cachí-n cùnduu. Te ñá cùndèe iní-í cada yica-í cada-n ìí<sup>n</sup> sá váha sá cúu-xì-í, chi cuíní-í sá méé-n càni iní-n nùu cuu àdi sá vǎ cúu. <sup>15</sup>Te ní cunduu nǐ quee té Ònésimú vehe-n, te cudana te mee Yá Ndiöxí duca<sup>n</sup> nǐ cachí-gǎ cunduu cuèndá dacuàha-dé cada váha-dé. Te ndixi tucu-dé cundecu ndihi duca<sup>n</sup>-nǎ-n-dě. <sup>16</sup>Te vá cúu-gǎ-dé dàtná ìí<sup>n</sup> tée xìnu cuechi chi ní cuu-dé dàtná ìí<sup>n</sup> ñani-ó chi ní sándáá iní-dé Yá Ndiöxí, te yùhú ío cùu iní-í-dé, dico yòhó uu<sup>n</sup>-gǎ cuu iní-n-dě, chi cùu-dé ìí<sup>n</sup> tnàha ñáyi-u-o, te ndècu-dé ichi Yá Ndiöxí.

<sup>17</sup>Te ìí<sup>n</sup>-ni cùu-o ndecu-o ichi Yá Ndiöxí nùu xǐǎ<sup>n</sup> càhá<sup>n</sup> ndàhú-í núú-n sǎ quéhé<sup>n</sup> cuèndá-n-dě dàtná quéhé<sup>n</sup> cuèndá-n yùhú òré quéxio-í vehe-n. <sup>18</sup>Te núu ío ìí<sup>n</sup> sá nǐ cumání-dě núú-n ñá túú ní quide

ndáá-dé cùtnàhá ní xíndecu-n ndihi-dé, àdi ío ìí<sup>n</sup> sá tàú-dé te vá ndacá<sup>n</sup> cuèndá-n nùú-dě, chi yùhú ndacá<sup>n</sup> cuèndá-n nùú-í. <sup>19</sup>Te ndaha mee yùhú té Pǎblú cǎdùha-í tutú-a càchí tnúhu-í xii-n sǎ ná chǎhu-í nchaa sá nǐ quide-dé. Dico dandacu saú iní-n sǎ yùhú ní sanu ichi ñaha-í xii-n ìchi Xítóhó Jesucristú. <sup>20</sup>Dico yòhó té ndècu ndihi-í ichi Xítóhó Jesucristú cada ndee ìní-n càda-n tnúhu ndàhú càhá<sup>n</sup>-í núú-n chi ndècu-o ichi-gǎ. Te duca<sup>n</sup> càda-n nacuaa cuu-xi dàtná ìí<sup>n</sup> tnúhu ndee ìní sá cúu-xì-í, chi ndi ndùú-ó ndècu-o ichi-gǎ.

<sup>21</sup>Te cùtnuní iní-í sá cǎdá-n nchàa nacuaa càhá<sup>n</sup>-í, te cùtnuní tucu iní-í sǎ ìo-gǎ vǎi sǎ váha cada-n dàcúxí tnùhu ndàhú càhá<sup>n</sup>-í núú-n, núu xǐǎ<sup>n</sup> tendaha-í tutú-a véxi ndaha-n. <sup>22</sup>Te vitna cuíní-í cada túha-n ìí<sup>n</sup> vehe cundecu-í, chi sàni iní-í sǎ quíxí còto ñaha-í xii-ndo, te ndètu-í sǎá nduu-ǎ<sup>n</sup> chi nchòhó xicá<sup>n</sup> tǎhú-ndó nùú Yá Ndiöxí cuèndá-í.

#### Tnúhu ndéé núú nǐ ndihi-ná

<sup>23</sup>Te ío cada ndee ìní-n càchí té Ępafrás té yìhi ndihi-í vecaá sǎ cuèndá tnúhu Xítóhó Jesucristú.

<sup>24</sup>Te ío cada ndee ìní tucu-n càchí té Mǎcú, ndihi té Arístarcú, ndihi té Dēmás, ndihi té Lùcá, chi tnàhá cue téé-ǎ<sup>n</sup> quide-güedé chiú<sup>n</sup> Xítóhó Jesucristú.

<sup>25</sup>Te Xítóhó Jesucristú ío na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cǎdá ndèe iní-nǎ vitna.

# TUTÚ QUÍHÍ<sup>n</sup> NDAHA CUE ÑÁYIU HÈBREÚ

---

Dútú Ndiöxí ní cachí-gá sá  
Děhe-gá cada núú-gă

**1** Te ndéé sanaha, Yá Ndiöxí ní xáha<sup>n</sup>-gă xii cue tée ní cachí iní méé-gă cada núú-gă cáhá<sup>n</sup>-güedé tnúhu-gă núú nchàa ñaní tnáhá-ó nǐ xíndecu ndéé dàvá-á<sup>n</sup> te diu duca<sup>n</sup> nǐ quide-güedé. Te titní xito duca<sup>n</sup> nǐ xáha<sup>n</sup>-gă xii-güedé ní cáhá<sup>n</sup>-güedé tnúhu-gă. Te ndi díí<sup>n</sup> ndi díí<sup>n</sup> nǐ xítñúhu ñaha-gă xii-güedé nàcuáa cáhá<sup>n</sup>-güedé tnúhu-gă núú-yu. <sup>2</sup>Te sátá nǐ cuu vai nduu ta yáha cuáhá<sup>n</sup>, te ní sáá nduu nǐ cachí Yá Ndiöxí sá Děhe-gá cada núú-gă cáhá<sup>n</sup> tnúhu-gă núú-ó. Te diu-ni mee-gă ní táuchíú<sup>n</sup> nǐ cadúha Děhe-gă ñuyíú ndihi nchaa sá íó, te ní cachí-gá sá ncháá cùu-xi cuendá Děhe-gá. <sup>3</sup>Te Děhe Yá Ndiöxí ío càhnu cuu-gă dàtná càhnu cuu mee-gă, te dàtná-ni sàni iní méé-gă diu-ni duca<sup>n</sup> sàni iní Děhe-gă chi tnáhá-gă cúú-gă Ndiöxí, te sá cuendá tnúhu cáhá<sup>n</sup> Děhe-gă xíă<sup>n</sup> ndécú-ní nchàa sá íó ñuyíú, te duca<sup>n</sup> chi ío càhnu cuu Děhe-gă, te diu-ni Děhe-gă ní quide nàcuáa vá cùndecu-gă cuèchi-o. Te sátá dúcá<sup>n</sup> te ní ngóo-gă xio cùha Tátá-gă Dútú Ndiöxí Yáá ío cùnnu ndecu andiu.

Děhe Dútú Ndiöxí ío-gă  
cùnnu-gă dàcúxí cuè espíritú  
xínú cuèchi núú-gă

<sup>4</sup>Te Děhe Yá Ndiöxí ío-gă cùnnu-gă dàcúxí cuè espíritú xínú cuèchi núú-gă, te duca<sup>n</sup> chi ní nduu táhú-gă núú Tátá-gă Dútú Ndiöxí sá ío-gă cunuu-gă dàcúxí cuè espíritú-á<sup>n</sup>. <sup>5</sup>Chi Yá Ndiöxí ñá túú ní xáha<sup>n</sup>-gă xii ni ì<sup>n</sup> cue espíritú xínú cuèchi núú-gă dàtná ní xáha<sup>n</sup>-gă xii Děhe-gă, te duha ní xáha<sup>n</sup>-gă:

Yòhó cúú-n Děhe mee-í,  
te duca<sup>n</sup>-ni cùndecu-n núú  
ndécù-í.

Duha ní xáha<sup>n</sup>-gă. Te ní cachí tucu  
Yá Ndiöxí:

Yúhú cúú-í Tátá Yàá-ă<sup>n</sup>,  
te mee-gă cúú-gă Děhe-í.

Duha ní cachí-gă. <sup>6</sup>Te cútnàhá ní tendaha-gă Děhe-gă Yáá ío cùnnu ní quixi-gă ñuyíú-a, te ní cachí-gă:

Tàú-xi sá ncháá cuè espíritú xínú  
cuèchi núú-í chiñuhu-xi Děhe-í.

Duha ní cachí-gă. <sup>7</sup>Te Yá Ndiöxí ní cáhá<sup>n</sup>-gă cuendá cue espíritú xínú cuèchi núú-gă, te ní cachí-gă:

Yúhú quidè-í sá ncháá cuè  
espíritú xínú cuèchi núú-í  
cúú-xí dàtná táchí,

te diu-ni cue espíritú-á<sup>n</sup> quidè-í  
sá cúu-xí dàtná itá ñuhú.

Duha càchí-gá. <sup>8</sup>Dico Déhe-gá chi  
ñá túu dùca<sup>n</sup> ni xáha<sup>n</sup>-gá, chi duha  
ní xáha<sup>n</sup>-gá:

Yòhó tnàhá-n cùu-n Ndióxi  
dàtná cúu yúhú Yaá cúu  
Tátá-n,

te duca<sup>n</sup>-ni tàxi tnuní-n nì caa  
ni quíhí<sup>n</sup>,

te ío váha ndáá quidé-n tàxi  
tnuní-n.

<sup>9</sup>Te dàquee tihú-n nchàa sá cuèhé  
sá dúhá, te cùu iní-n nchàa sá  
vãha,

núu xíã<sup>n</sup> yúhú Yaá cúu Tátá-n nì  
quide-í sá ïo-gá vii ïo-gá váha  
cuu iní-n,

dàcúuxí nchàa dava-gá ñáyi  
ndècu ndihi-n.

Duha ní xáha<sup>n</sup>-gá xii Déhe-gá.

<sup>10</sup>Te ní xáha<sup>n</sup> tùcu Yá Ndióxi xii  
Déhe-gá:

Yòhó cúu-n Yàá ío cùnuu, chi  
ndéé cútñhá ñá túu vèdana  
ná ío te ní cadúha-n ñuyú  
ndihi andiu.

<sup>11</sup>Te andiu ndihi ñuyú chi naa-xi,  
dico yòhó chi cundecu-ni-n nì  
caa ni quíhí<sup>n</sup>.

Te andiu ndihi ñuyú chi  
ndihi-xi dàtná ndíhí ì<sup>n</sup> dóó,

<sup>12</sup>te dàtná cuiní-n quide ñáyi  
ndihi ì<sup>n</sup> dóó òré ndàcá<sup>n</sup>  
tnáhnü-yu tàxi ndecú-yu ì<sup>n</sup>  
xio, duca<sup>n</sup> càda-n ñuyú ndihi  
andiu,

te dàtná nádãma dóó ñáyi duca<sup>n</sup>  
càda tucu-n ñuyú ndihi andiu.

Te yòhó dàtná-ni càa-n ndecu-n  
vitna duca<sup>n</sup>-ni cùnduu-n  
cundecu-n ni caa ni quíhí<sup>n</sup>,  
chi vá yí tnàhí-n.

Duha ní xáha<sup>n</sup> Yá Ndióxi xii  
Déhe-gá. <sup>13</sup>Te Yá Ndióxi ñá túu ní  
xáha<sup>n</sup>-gá xii ni ì<sup>n</sup> cue espíritú xínú  
cuèchi núu-gá dàtná ní xáha<sup>n</sup>-gá xii  
Déhe-gá, te duha ní xáha<sup>n</sup> tùcu-gá:

Ngóo xio cùha-í taxi tnùnín,  
te yúhú cada-í te nchaa sá cúu  
úhú iní ñáhá xii-n canehe-xi  
sá yíñuhu núu-n.

Duha ní xáha<sup>n</sup>-gá xii Déhe-gá. <sup>14</sup>Te  
nchaa espíritú xínú cuèchi núu Yá  
Ndióxi mee-ni chiù<sup>n</sup>-gá quidé-xí, chi  
tèndaha-gá cue espíritú-á<sup>n</sup> cuáhá<sup>n</sup>-xi  
nchaa núu ndécú cuè ñáyi ní nduu  
táhu cundecu ndihi-gá chindee  
ñaha-xi xií-yu.

Vá dáñá ndèé-ó tnühu sá  
cáhá<sup>n</sup> nàcuáa naníhí tàhú-ó

**2** Te sá cuendá sá ïo cùnuu  
Xítohó Jesucristú, núu xíã<sup>n</sup>  
íó xìni ñuhu-xi cada cuendá-ó  
nchàa tnúhu càhá<sup>n</sup>-gá sá sà ní  
xíndedóho-o cuendá sá vã dáñá  
nihnu-o. <sup>2</sup>Te cue espíritú xínú  
cuèchi núu Yá Ndióxi ní càhá<sup>n</sup>-xi  
tnúhu-gá ndéé sanaha, te tnúhu  
ní càhá<sup>n</sup> cue espíritú-á<sup>n</sup> cúu-xí sá  
ndáa cuiti. Te nchaa ñáyi ñá túu ní  
cuiní tni nchaa tnúhu ní càhá<sup>n</sup> cue  
espíritú-á<sup>n</sup>, te ni ñà túu ní cuiní-yu  
cundedóho-yu, nchaa ñáyi-á<sup>n</sup> ní  
nacháhu-yu nàcuáa ndùu nchaa  
cuèchi ní quidé-yu ì<sup>n</sup> ì<sup>n</sup>-yu. <sup>3</sup>Te  
sá dúcá<sup>n</sup> ní yáha cue ñáyi-á<sup>n</sup>,  
xíã<sup>n</sup> cútñuní ndáá iní-ó sã vã cãcu  
nihnu-o te núu na dàña nihnu-o  
tnúhu sá càhá<sup>n</sup> nàcuáa naníhí  
tàhú-ó, tnúhu sá ïo cùnuu, chi  
nacháhu-o te núu duca<sup>n</sup> na càda-o.  
Te díhna-gá Xítohó Jesucristú ní  
cáhá<sup>n</sup>-gá tnúhu-á<sup>n</sup> te nchaa ñáyi  
ní xíndedóho nchaa nàcuáa ndùu

tnúhu-á<sup>n</sup> ní cáhá<sup>n</sup> ndáá-yu tnúhu-á<sup>n</sup> nũú-ó. <sup>4</sup>Te tnàhá Yă Ndiöxí cündîhi-gá nchaa ñáyiu-á<sup>n</sup> quidé-gă nàcuáa cutnùnî iní-ó sã tnúhu-á<sup>n</sup> cúú-xí tnúhu ndáá, chi quide-gá titní núú sã vã yõo tnàhí ndàcu cada te ío cùnúhu-o. Te Espíritú Yă Ndiöxí quidé-xí nàcuáa nduu táhú-ó ndî díí<sup>n</sup> nũú chùu<sup>n</sup> cada-o nacuáa cuiní mée-gă. Te sá dúcá<sup>n</sup> quide Yă Ndiöxí nchaa xiă<sup>n</sup>, xiă<sup>n</sup> cútnùnî iní-ó sã tnàhá-gá càhá<sup>n</sup>-gá sá tnúhu-á<sup>n</sup> cúú-xí tnúhu ndáá.

**Xítóhó Jesucristú ní xínduu yiqui cùnú-gá dàtná cáá yiqui cuñú nchoo cuè ñáyiu ñuyíú-a**

<sup>5</sup>Te Yă Ndiöxí vá táxí ndècu-gá cue espíritú xínú cuèchi núú-gă taxi tnùnî-xi ñuyíú sáá sã vátá quiní-gá-ó, te díu cuendá xiă<sup>n</sup> càhá<sup>n</sup>-í. <sup>6</sup>Te núú tütú Yă Ndiöxí cächí-xi:

Yòhó Dútú Ndiöxí ñá túú nã cúú cuè ñáyiu ñuyíú nũ ndacu iní-n-yu, àdî chindeé-n-yu.

<sup>7</sup>Te yòhó ní cachí-n sã nchàa ñáyiu ñuyíú-a vá cúnúu-yu dàtná cúnúu cue espíritú xínú cuèchi núú-n, dico ní cachí-n sã sàá nduu te ío cunúu-yu tnàhá-yu, te mee-n càhá<sup>n</sup>-n sã ío càhnu cuú-yu, te ní cachí tucu-n sã táxí tnùnî-yu nchaa sá ñí cadúha-n.

<sup>8</sup>Te duca<sup>n</sup> nchàandi túhú sá ío quindàhá-yu.

Duha cächí-xi núú tütú-gá. Te sá dúcá<sup>n</sup> ñí cachí Yă Ndiöxí sá quindàha ñáyiu ñuyíú nchaa sá ío, xiă<sup>n</sup> cútnùnî sá ncháándî túhú sá ío taxi tnùnî-yu, dico vátá sàá-gá nduu

dúca<sup>n</sup> quini-ó càda-xi. <sup>9</sup>Te nchoo sa nàha-o sá tnáá-ní ñí quide Yă Ndiöxí cuendá sá vã cúnúu Xítóhó Jesucristú dàtná cúnúu cue espíritú xínú cuèchi núú-gă. Te duca<sup>n</sup> ñí quide Yă Ndiöxí chi ní cundàhú iní-gá nchaa ñáyiu ñuyíú-a, chi ní cachí-gá sá Dêhe-gá cuú cuendá nchaa-yu, te Xítóhó Jesucristú ío ní ndoho-gá òré ní xíhí-gá, núu xiă<sup>n</sup> ñí nduu táhú-gă cúnúu vihi-gá vitna. Te mee Yă Ndiöxí cächí-gá sá ío càhnu cuu Dêhe-gá.

<sup>10</sup>Te Yă Ndiöxí ní cadúha-gá nchaandi túhú sá ío nàcuáa ní cachí iní mée-gă, te sá dúcá<sup>n</sup> ñí quide-gá nũu xiă<sup>n</sup> váha-ni sá ñí cachí-gá sá Xítóhó Jesucristú nândî ndoho-gá te cuú-gá cuendá duca<sup>n</sup> ñà túú tnàhí-gá ná cùmání-gă núú Yă Ndiöxí. Te sá dúcá<sup>n</sup> ñí cuu núu xiă<sup>n</sup> ní ñíhí Yă Ndiöxí nàcuáa cada-gá càndeca-gá nchaa ñáyiu cùu déhe-gá quíhí<sup>n</sup> núú ío váha càa cundecú-yu ndîhi-gá ni caa ni quíhí<sup>n</sup>. Te Xítóhó Jesucristú cúú-gă Yaá ní quide nàcuáa nduu táhú cue ñáyiu cundecú-yu ndîhi Yă Ndiöxí. <sup>11</sup>Te Xítóhó Jesucristú cúú-gă Yaá quidé ndècu yíñuhu ñáyiu núú Yă Ndiöxí ñáyiu sàndáá iní ñàhá xii-gá, te Xítóhó Jesucristú ndîhi cue ñáyiu-á<sup>n</sup> ñí-ni Yàá cúú Tătã-yu ndîhi-gá, núu xiă<sup>n</sup> Xítóhó Jesucristú Yaá cúú Dêhe Dútú Ndiöxí ñá túú cùcaha<sup>n</sup> núú-gă càhá<sup>n</sup>-gá sá ñàní-gá ndîhi cúha-gá cúú nchàa ñáyiu-á<sup>n</sup>. <sup>12</sup>Te quèe ndáá-xi nàcuáa càhá<sup>n</sup>-xi núú tütú Yă Ndiöxí núú cächí-xi nàcuáa ní xáha<sup>n</sup> Xítóhó Jesucristú xii Tătã-gă Dútú Ndiöxí, te duha ní xáha<sup>n</sup>-gă:

Cáhá<sup>n</sup> váha-í cuendá-n nũú nchàa cue téé cùu datná

ñani-í ndihi núu nchaa cue  
ñáyiú ðíhí cúú ðàtná cúha-í,  
te cata-í ndudú chíñuhu ñaha-í  
xii-n núú tàcá-yu.

Duha yòdo tnuní núú tùtú-gá  
nàcuáa ní xáha<sup>n</sup> Dêhe-gá xii-gá.

<sup>13</sup>Te ìngá tucu xichi núú tùtú Yă  
Ndiôxí càhá<sup>n</sup>-xi nàcuáa ní càhá<sup>n</sup>  
Xítóhó Jesucristú cuendá-gá, te  
duha ní cachí-gá:

Yúhú nchaa-ni nduu quindáa  
iní-í Tătà-í Dútú Ndiôxí.

Duha càchí-xi núú tùtú Yă Ndiôxí  
nàcuáa ní càhá<sup>n</sup> Xítóhó Jesucristú.  
Te ìngá tucu xichi núú tùtú Yă  
Ndiôxí càhá<sup>n</sup>-xi nàcuáa ní càhá<sup>n</sup>  
tucu Xítóhó Jesucristú, te duha ní  
cachí-gá:

Iha ndècu ndíhi-í nchaa ñáyiú  
cùu déhe Tătà-í Dútú Ndiôxí,  
te ðiu-ni ñáyiú-án<sup>n</sup> ní taxi  
cuendá Tătà-í cuu cuendá-í.

Duha càchí-xi núú tùtú-gá nàcuáa  
ní càhá<sup>n</sup> Xítóhó Jesucristú.

<sup>14</sup>Te sá cuendá nchaa ñáyiú  
cùu déhe Yă Ndiôxí cúú-yu yíqui  
cùñú, núu xíă<sup>n</sup> duca<sup>n</sup> tnàhá Xítóhó  
Jesucristú ní cuu-gá yíqui cùñú, te  
duca<sup>n</sup> ní cuu-gá yíqui cùñú cuendá  
cuú-gá, te sá dúcá<sup>n</sup> cúú-gá te  
ndacu-gá daquèe fhú-gă sácufhná,  
te ðiu sácufhná-ă<sup>n</sup> quidé-xí xihí  
ñáyiú. <sup>15</sup>Te duca<sup>n</sup> ní quide-gá  
cuendá sá cuè ñáyiú ñuyúú-a vá  
yùhú-gá-yu sá cùú-yu, chi nchaa-ni  
nduu yùhú-yu sá cùú-yu. <sup>16</sup>Te  
na càchí tnúhu ndáá-í sá Xítóhó  
Jesucristú ní quixi-gá cuendá  
chindee-gă cue ñáyiú cùu ñaní  
tnàhá ndíi Àbrahám, te ñá ðíú  
cuendá sá chindèe-gá cue espíritú  
xínú cuèchi núú Yă Ndiôxí. <sup>17</sup>Te  
cuendá xíă<sup>n</sup> núu dai ní xini ñuhu-xi

sá cúú-gă ñáyiú cuendá yăha-gá  
nándi sá yăha-gá ðàtná yăha cue  
ñáyiú cùu ndi mee-gá cuendá  
duca<sup>n</sup> cùu-gá dútú ïo cùnuu te cuu  
ndáá-gá núú Yă Ndiôxí, te cundàhú  
iní-gá nchaa ñáyiú te cuú-gá cuendá  
sá vă cùndècu-gá cuèchi-yu núú  
Yă Ndiôxí. <sup>18</sup>Te mei òré ndóhó  
Xítóhó Jesucristú ní xito ndéé ñáhá  
sàcufhná xii-gá te núu ndisa sá  
vă cádá-gă ni ïi<sup>n</sup> sá ñà túú tàú-gá  
cada-gá, te sá dúcá<sup>n</sup> ní ndoho-gá  
xíă<sup>n</sup> núu ndácú-gă chindèe-gá nchaa  
ñáyiú duca<sup>n</sup> yăha.

### Xítóhó Jesucristú ío-gá cùnùu-gá dàcúúxí ndíi Moisés

**3** Te nchòhó cúú-ndó ñáyiú  
ndècu ndíhi-í ichi Xítóhó  
Jesucristú ñáyiú cùu cuendá Yă  
Ndiôxí, te tnàhá-ndó cùu-ndo  
ñáyiú ní càhá<sup>n</sup> ñáhá-gă cuendá  
cundecu-ndo ndíhi-gá. Te yúhú  
càchí tnúhu-í xii-ndo să ïo váha cada  
cuendá-ndó nàcuáa nduu cuendá  
Xítóhó Jesucristú, chi ðiu-gá cúú-gă  
Yaá ní tendaha ñàha Dútú Ndiôxí ní  
quixi-gá ñuyúú-a, te ðiu-gá cúú-gă  
Dútú ïo cùnuu chi quide-gá núú Yă  
Ndiôxí. Te ðiu-ni cuendá Xítóhó  
Jesucristú càhá<sup>n</sup> tnúhu sá ni sàndáa  
iní-ó. <sup>2</sup>Te mee Yă Ndiôxí ní sáha  
chìu<sup>n</sup>-gá Xítóhó Jesucristú, te ío ndáa  
quidé-gă chìu<sup>n</sup>-án<sup>n</sup> să cúú-xí Yă Ndiôxí,  
te ðiu-ni duca<sup>n</sup> ní quide ndíi Moisés  
ní quide ndíi chìu<sup>n</sup> ní táhú Yă Ndiôxí,  
te ío ndáa ní quide ndíi chìu<sup>n</sup>-gá sá  
cúú-xí nchaa ñáyiú cùu cuendá-gá,  
te cue ñáyiú-án<sup>n</sup> cúú-yu ðàtná vehe  
mee-gă. <sup>3</sup>Te ïi<sup>n</sup> téé dàcaa ïi<sup>n</sup> vehe  
váha ío càhnu-gá cúú-dě dàcúúxí  
vehe dacaa-dé. Te duca<sup>n</sup> sàtnahá-xi  
cùu Xítóhó Jesucristú chi ío-gá

càhnu cuu-gá dácúxí ndíi Moisés.  
 4Te nchoo sà naha-o sá ncháá vèhe  
 dacuití ndècu cue tée ní dácáá, dico  
 sa nàha tucu-o sá Yá Ndiöxí quidé-gã  
 ndécú ncháa sá lõ ñuyíú-a. 5Te ndíi  
 Moisés-án ïo ndáá ní quide ndíi chiùn  
 ní táhú Yá Ndiöxí ní quide ndíi sá  
 cúú-xí ncháa ñáyíu cùu cuendá-gá.  
 Te sá dúcá<sup>n</sup> ñí quide ndíi xíã<sup>n</sup> ní cuu  
 ndíi ì<sup>n</sup> tée ní xinu cuechi núú Yá  
 Ndiöxí. Te ní xáha<sup>n</sup> ndíi xii ncha  
 ñáyíu cùu cuendá-gá nàcuáa cáhá<sup>n</sup>-gá  
 ndéé cuéé-gá. 6Dico Xítohó Jesucristú  
 cúú-gã Déhe mee Yá Ndiöxí, te cùu-gá  
 Yaá ïo quide ndáá yíndàha-gá ncha  
 ñáyíu cùu cuendá Yá Ndiöxí. Te  
 tnàhá-ó cùu-o ñáyíu cùu cuendá-gá,  
 te ñíu-ni duca<sup>n</sup> cùu cuendá ñàhá-gã  
 xii-o te núu na càncicú<sup>n</sup> nihnu-ni-o  
 càni ndáá iní-ó cuendá-gá ndéé ná  
 sáá nduu ngúndecu-o ndíhi-gá.

**Cue ñáyíu cùu cuendá Yá Ndiöxí ïo  
 váha cùu iní-yu ndécú-yu ndíhi-gá**

7Te núu tütú Yá Ndiöxí yódó  
 tnùní nàcuáa ní cáhá<sup>n</sup> Espíritú-gá,  
 te duha ní cachí-xi:

Te núu nchòhó ndédóho-ndo  
 ncháa tnúhu càhá<sup>n</sup> Yá Ndiöxí  
 vitna,

8te vá cúnduu sáá iní-ndó dàtná  
 ní xínduu sáá iní ñáyíu ní  
 dáquéé tñhú tnúhu Yá Ndiöxí,  
 ñáyíu ní xíndecu xití yucu,  
 chi ñáyíu-án ñí xito ndéé-yu Yá  
 Ndiöxí núu nása cada ñaha-gã  
 xii-yu.

Duha ní cachí Espíritú-gá. 9Te càchí  
 tucu Espíritú Yá Ndiöxí nàcuáa ní  
 cáhá<sup>n</sup> méé-gã, te duha ní cachí-gá:

Xití yucu ní xito ndéé ñàhá cué  
 ñaní tnàhá-ndó ñí xíndecu  
 ndéé sanaha xii-í,

te duca<sup>n</sup> ñí quide ñàhá-yu cuéi  
 ní xiní-yu ncha sá ñí quide-í  
 ndí ùdico cuíá ñí xíndecu-yu  
 xití yucu-á<sup>n</sup>.

10Te sá dúcá<sup>n</sup> ñí quidé-yu núu xíã<sup>n</sup>  
 ní cudéè<sup>n</sup>-í núú-yu,  
 núu xíã<sup>n</sup> ní cáhá<sup>n</sup>-í cuendá-yu,  
 te ní cachí-í:

“Ñáyíu-a quide-ní-yu ncha sá  
 ñà túú tàú-yu cadá-yu te ni ñà  
 túú cuíní-yu cadá-yu ncha  
 nàcuáa sàni iní-í,

te ni ñà túú cuíní-yu cadá-yu  
 nàcuáa càhá<sup>n</sup>-í”,  
 duha ní cáhá<sup>n</sup>-í cuendá-yu.

11Te xíã<sup>n</sup> núu ní cudéè<sup>n</sup>-í núú-yu  
 te ní xáha<sup>n</sup> ndáá-í xii-yu sá  
 vã ndúú tãhú-yu cundecu  
 váha-yu núu ndécú-í.

Duha ní cachí Yá Ndiöxí càchí  
 Espíritú-gá.

12Te nchòhó ñáyíu ndècu ndíhi-í  
 ichi Xítohó Jesucristú, càhá<sup>n</sup>-í  
 dóho-ndo sã ïo cada cuendá-ndó  
 vã cání cuéhé iní-ndó te ngóo-ndo  
 vã quíndáá-gá iní-ndó Yá Ndiöxí te  
 dañá-ndo ìchi-gá, te ñíu-gá cúú-gã  
 Yaá ndécú ncháa nduu ncha quíú.  
 13Te ì<sup>n</sup> nduu ì<sup>n</sup> nduu ïo chí cuáha  
 tnàha tnúhu ndee ìní cundecu-ndo  
 nìni ndecu-ndo ñuyíú-a cuendá sá  
 vã xínu iní-ndó càda-ndo nándi sá  
 cuéhé sá dúhá, te duca<sup>n</sup> te vá cúú sáá  
 iní-ndó núú Yá Ndiöxí. 14Te vá dáñá  
 ndéé-ó càni ndáá iní-ó nàcuáa cada  
 ñaha Yá Ndiöxí xii-o, te dàtná-ni ní  
 sani iní-ó ndéé cútñhá ní tuha-o ìchi  
 Yá Ndiöxí, te ñíu-ni duca<sup>n</sup> càni iní-ó  
 ndéé ná sáá nduu vã cúndecu-gá-ó  
 ñuyíú-a, te núu duca<sup>n</sup> na càda-o te  
 cùu ì<sup>n</sup> nuu-o ndíhi Xítohó Jesucristú.

15Te duha càhá<sup>n</sup>-xi ì<sup>n</sup> xichi núu  
 tütú Yá Ndiöxí:

Te núu nchòhó ndèdóho-ndo  
 nàcuáa càhá<sup>n</sup> Yă Ndiòxí vitna,  
 te vá cùndúu sáá iní-ndó dàtná  
 ní xínduu sàá iní cue ñáyi  
 ní dáquée tǎhú tnǎhu-gá ndéé  
 sanaha.

Duha càchí-xi núu tǎtú-gá. <sup>16</sup>Te  
 cue ñáyi duca<sup>n</sup> nǎ xínduu sàá  
 iní-xi cùu-yu ñáyi ní ndeñuhu ndí  
 Moisés nàció<sup>n</sup> Ēgíptú, te ñáyi-á<sup>n</sup> nǎ  
 xíndedóho-yu tnǎhu ní càhá<sup>n</sup> Yă  
 Ndiòxí te ní quide sàá iní-yu ní  
 dáquée tǎhǎ-yu tnǎhu-gá. <sup>17</sup>Te ndi  
 ũdico cuía nǎ xúhu<sup>n</sup>-yu ichi ío ní  
 cùdée<sup>n</sup> Yă Ndiòxí núu-yu cuèndá sá  
 nǎ quidé-yu nándi nchaa sá cuèhé  
 sá dúhá, te ñáyi-á<sup>n</sup> nǎ xíhí-yu xití  
 yucu. <sup>18</sup>Te nchaa ñáyi-á<sup>n</sup> ñà túú ní  
 cuíní-yu tñí-yu tnǎhu ní càhá<sup>n</sup> Yă  
 Ndiòxí núu xǎ<sup>n</sup> ní càhá<sup>n</sup> ndáá-gá  
 sá vǎ ndúú tǎhǎ-yu cundecú-yu  
 núu ío váha càa ndecu-gá. <sup>19</sup>Te xǎ<sup>n</sup>  
 núu nchoo cùtnuní iní-ó sǎ nchàa  
 ñáyi-á<sup>n</sup> ñà túú ní ndúu tǎhǎ-yu  
 cundecu váha-yu núu ndécú-gǎ, chi  
 ñá túú ní sàndáá iní-yu tnǎhu ní  
 càhá<sup>n</sup>-gá.

**4** Te vitna ndècu ndíhi-gá-ó  
 tnǎhu Yă Ndiòxí tnǎhu sá  
 dánèhé ñáhá xì-o sá cúu cùndecu  
 váha-o núu ndécú-gǎ, te tǎu-xi  
 quiyùhú iní-ó chi na cuáhá<sup>n</sup> te  
 vá ndúú tǎhú-ó cùndecu váha-o  
 núu ndécú-gǎ. <sup>2</sup>Te tñàhá nchoo  
 nǎ ngúndecu ndíhi-o tnǎhu sá  
 càhá<sup>n</sup> nàcuáa naníhí tǎhú-ó dàtná  
 ní xíndecu ndíhi cue ñáyi ndéé  
 sanaha, dico ñáyi-á<sup>n</sup> chi ñá  
 túú vèdana ni nàndíhi-xi cuèi ní  
 xíndedóho-yu tnǎhu-á<sup>n</sup> chi ñá túú  
 ní sàndáá iní ñáhǎ-yu xii-gá. <sup>3</sup>Dico  
 nchoo cùu-o ñáyi ní sàndáá iní  
 tnǎhu Yă Ndiòxí, núu xǎ<sup>n</sup> nduu

tǎhú-ó cùndecu váha-o núu  
 ndécú-gǎ, te ní quee ndáá-xi nàcuáa  
 càhá<sup>n</sup>-gá núu tǎtú-gá núu càchí-xi:  
 Yúhú ní cudée<sup>n</sup>-í núu-yu, te ní  
 càhá<sup>n</sup> ndáá-í sá vǎ ndúú tǎhǎ-yu  
 cundecu váha-yu núu ndécú-í.

Duha ní cachí-gá. Te cuu nduu  
 tǎhǎ-yu cundecu váha-yu núu  
 ndécú Yă Ndiòxí ní cùu, chi sa ní  
 xínu cava nchaa chiú<sup>n</sup> ní quide-gá  
 sá nǎ cadúha-gá ñuyúú. <sup>4</sup>Te núu  
 tǎtú Yă Ndiòxí càhá<sup>n</sup>-xi nàcuáa ní  
 quide-gá nduu úsá, te duha càchí-xi:  
 Yă Ndiòxí ní quide chiú<sup>n</sup>-gá  
 ínú nduu ní quide-gá nchaa  
 chiú<sup>n</sup>-gá te ní ndetatú-gá  
 nduu úsá.

Duha càchí-xi núu tǎtú-gá. <sup>5</sup>Te càchí  
 tucu-xi núu tǎtú Yă Ndiòxí nàcuáa  
 ní càhá<sup>n</sup>-gá cuèndá cue ñáyi ndéé  
 sanaha, te duha ní cachí-gá:

Cue ñáyi-a vá ndúú tǎhǎ-yu  
 cundecu váha-yu núu ndécú-í  
 ndétátú-í.

Duha ní cachí-gá. <sup>6</sup>Te ñáyi ní  
 xíndedóho tnǎhu sá càhá<sup>n</sup> nàcuáa  
 naníhí tǎhú-ó ndéé sanaha, ñá túú  
 ní ndúu tǎhǎ-yu cundecu váha-yu  
 núu ndécú Yă Ndiòxí ndétátú-gá,  
 te duca<sup>n</sup> chi ñá túú ní sàndáá iní  
 ñáhǎ-yu xii-gá, dico íó-gá ñáyi  
 nduu tǎhú cundecu váha núu  
 ndécú-gǎ ndétátú-gá. <sup>7</sup>Te ní xica  
 cuèhé nduu sá dúcá<sup>n</sup> ñà túú ní  
 sàndáá iní ñáhá ñáyi-á<sup>n</sup> xii-gá, te  
 dàtnuní ní càhá<sup>n</sup> ndí Dávíi yuhu-gá  
 nàcuáa cada-gá vitna, te diu-ni  
 nàcuáa sa yòdo tñuní diu-ni duca<sup>n</sup>  
 chido tñuní tucu-í nàcuáa ní càhá<sup>n</sup>  
 ndí yuhu-gá, te duha ní cachí-gá:

Te núu nchòhó ndèdóho-ndo  
 tnǎhu càhá<sup>n</sup>-í te vá cáda sàá  
 iní-ndó.

Duha ní cachí-gá. <sup>8</sup>Te ndíi Jòsué ní sanu ichi ndíi ñáyiú núú quíhí<sup>n</sup>-yu cundecu váha-yu, dico ñá dítú cuendá xíá<sup>n</sup> ní cáhá<sup>n</sup> Yá Ndiöxí, chi cuendá nàcuáa cada-gá vitna ní cáhá<sup>n</sup>-gá. <sup>9</sup>Núú xíá<sup>n</sup> sáá nduu ndùu táhú nchaa ñáyiú cùu cuendá Yá Ndiöxí ngúndecu váha-yu núú ndécú-gá ndétátú-gá. <sup>10</sup>Te nchaa ñáyiú duca<sup>n</sup> na ndùu táhú cundecu váha núú ndécú Yá Ndiöxí ndétátú-gá, te tnàhá-yu ndetátú-yu cuendá nchaa sá váha ní quidé-yu dàtná ndétátú méé-gá. <sup>11</sup>Te xini ñuhu-xi sá nchóó ïo nducu ndèe-o nducu-o nacuáa cada-o cuendá nduu táhú-ó ngúndecu váha-o núú ndécú Yá Ndiöxí ndétátú-gá, chi na cuáhá<sup>n</sup> dava-ndo càda-ndo datná ní quide cue ñáyiú ñá túú ní sàndáá iní ñáhá xii-gá, te vá ndúú táhú-ndó cùndecu váha-ndo núú ndécú-gá te núu duca<sup>n</sup> na càda-ndo.

<sup>12</sup>Te tnúhu Yá Ndiöxí cúú-xí dàtná ìí<sup>n</sup> sá nchító-ó chi quide-xi nándi sá quidé-xí, te cùu-xi datná ìí<sup>n</sup> sá déé<sup>n</sup> víhí-gá dàcúúxí ìí<sup>n</sup> yuchí sá ndèé úú xio núú-xi. Te duca<sup>n</sup> sàtnahá-xi cùu tnúhu-gá chi queé-xi iní-ó, te dándixi túu-xi nchaandi túhú sá sání iní-ó te núu quide váha-o àdi ñá túú quide váha-o ndècu-o. <sup>13</sup>Te ni ìí<sup>n</sup> sá ñí cadúha Yá Ndiöxí vá cáni iní-ó sá ndácú-xí nguǎváha-xi núú-gá, chi nchaandi túhú sá sání iní-ó ndècu túu-xi núú-gá, te diu núú Yàá-á<sup>n</sup> na càni cuendá-ó nchàa sá quidé-ó.

**Xítóhó Jesucristú cúú-gá  
Dútú ïo cùnuu**

<sup>14</sup>Te Xítóhó Jesucristú cúú-gá Dútú ïo cùnuu ndecu ndíhi-o, te

diu-gá cúú-gá Déhe Dútú Ndiöxí, te Yáá-á<sup>n</sup> cuándaa-gá andiu ní nucúndecu-gá núú Yá Ndiöxí, núu xíá<sup>n</sup> tàù-xi sá cáncchicú<sup>n</sup> nihnu-ni-o quíndáá iní-ó-gá. <sup>15</sup>Te mee Yàá-á<sup>n</sup> ïo cùnuu-gá cúú-gá dútú-ó ndècu ndíhi-o, te ïo na cùndahú iní ñáhá-gá xii-o cuendá sá ñá ñíhí ndéé-ó cùndecu-o. Te duca<sup>n</sup> càda-gá chi ní yáha-gá dàtná yáha mee-o, chi nchaa sá ñí yáha-gá-á<sup>n</sup> ñí cuu-xi sá cadá-gá nándi nchaa sá cuèhé sá dúhá ní cùu dico ni ìí<sup>n</sup> ñá túú ní quide-gá. <sup>16</sup>Núú xíá<sup>n</sup> tàù-ó sá nchóó ñí yuhu ñí iní-ó cáhá<sup>n</sup> ndíhi-o Yá Ndiöxí Yáá ïo cùndahú iní ñáhá xii-o chindee ñaha-gá, te duca<sup>n</sup> càda-o te cundahú iní ñáhá-gá chindee ñaha-gá xii-o ndèda-ni càa oré xini ñuhu-o-gá.

**5** Te nchaa cue dútú cùnúu núú ñáyiú isràèl diu-ni ñáyiú cùu-güedé, te duca<sup>n</sup> ñí ngúndecu-güedé cuendá cada-güedé chùu<sup>n</sup> sá cúú-xí Yá Ndiöxí cuendá-yu, chi diu cue téé-á<sup>n</sup> ñí xóo nacani cuendá-güedé núú-gá quiti ní xóo cahni-güedé ní xóo nduu táhú-gá, te duca<sup>n</sup> ñí xóo cada-güedé cuendá sá cadá càhnu iní Yá Ndiöxí cuéchi-yu, te duca<sup>n</sup> ñí xóo nacani cuendá tucu-güedé núú-gá nchaa dava-gá sá ñí xóo níhí-güedé ní xóo nduu táhú-gá. <sup>2</sup>Te nchaa cue dútú-á<sup>n</sup> ñí xóo cundee iní-güedé nchaa sá ñí xóo cada nchaa ñáyiú ñá túú ní quide ndáá ñáyiú ñá túú cùtnuní iní-xi, te duca<sup>n</sup> ñí xóo cada cue dútú-á<sup>n</sup> chi tnàhá-güedé ñá túú ní xóo níhí ndéé-güedé cundecu-güedé cuendá nchaa sá ñí xóo yáha-güedé. <sup>3</sup>Te sá cuendá sá dúcá<sup>n</sup> ñà túú ní xóo níhí ndéé-güedé núu xíá<sup>n</sup> dai



ní xini ñuhu-xi sá tnàhá-güedé  
cuáha-güedé Yá Ndiöxí sá ndúú  
tǎhú-gǎ cuendá méé-güedé dàtná  
quidé-güedé cuendá ñáyiú.

<sup>4</sup>Te ni ìí<sup>n</sup> téé vá ndácú-dě cuu-dé  
dútú cúnùu cuendá-ni sá càchí  
iní méé-dě te núu ñá díú mèe Yá  
Ndiöxí duca<sup>n</sup> cuiní-gá sá cúú-dě  
dútú cúnùu datná ní quide-gá ndíi  
Àrón. <sup>5</sup>Te cuéi Xítohó Jesucristú chi  
ñá díú mèe-gá ní quide-gá méé-gǎ  
ìí<sup>n</sup> dútú cúnùu nacuaá cada nínu-gá  
mées-gǎ, chi mee Tǎtá-gǎ Dútú  
Ndiöxí duca<sup>n</sup> ní cachí-gá sá cúú-gǎ  
Dútú cúnùu, te duca<sup>n</sup> chi Yá Ndiöxí  
ní xáha<sup>n</sup>-gǎ:

Yòhó cúú-n Děhe-í,

te cuiní-í sá dúhá-ní cùndecu-n  
núú ndécù-í.

Duha ní xáha<sup>n</sup>-gǎ xii Xítohó  
Jesucristú. <sup>6</sup>Te núú tútú Yá Ndiöxí  
yódó tnùní nàcuáa ní xáha<sup>n</sup> tucu-gá  
xii Xítohó Jesucristú, te duha ní  
xáha<sup>n</sup>-gǎ:

Yòhó cúú-n dútú cundecu ni caa  
ni quíhí<sup>n</sup>,

te cùu-n datná ní cuu ndíi  
Melquisèdec.

Duha ní xáha<sup>n</sup>-gǎ xii Xítohó  
Jesucristú. <sup>7</sup>Te cútnàhá ní xíndecu  
Xítohó Jesucristú ñuyúú-a te níhi  
ní xóo cáhá<sup>n</sup> ndíhi-gá Yá Ndiöxí  
te ní xóo cáhá<sup>n</sup> ndàhú-gá núú-gǎ,  
te ní xóo ndáhyú-gá òré duca<sup>n</sup> ní  
xóo cáhá<sup>n</sup> ndíhi-gá Yá Ndiöxí, te  
duca<sup>n</sup> ní quide-gá chi nàha-gá  
sá Yá Ndiöxí cúú-gǎ Yaá ndacu  
dácácu nihnu ñaha xii-gá cuendá  
sá vǎ cùú dúcá<sup>n</sup>-gǎ. Te Yá Ndiöxí  
ní xíndedóho-gá nchaa tnúhu ní  
cáhá<sup>n</sup> Xítohó Jesucristú cuendá sá  
ní quide-gá nchaa nàcuáa ní xáha<sup>n</sup>  
Yá Ndiöxí cada-gá. <sup>8</sup>Te sá cuendá

nchaa sá ní ndoho Xítohó Jesucristú  
xíǎ<sup>n</sup> ní cutnùní iní-gá cada-gá nchaa  
dava-gá sá vǎha nàcuáa cuiní méé  
Yá Ndiöxí cada-gá. Te duca<sup>n</sup> ní cuu  
cuéi cùu-gá Déhe Yá Ndiöxí. <sup>9</sup>Te  
sá dúcá<sup>n</sup> ní quide-gá nchaa nàcuáa  
cuiní méé Yá Ndiöxí, xíǎ<sup>n</sup> núu vitna  
cùu-gá Yaá dácácu nihnu nchaa  
ñáyiú sàndáá iní ñáhá xii-gá núú  
ùhú núú ndàhú. <sup>10</sup>Te mee Yá Ndiöxí  
ní cachí-gá sá Xítohó Jesucristú  
cúú-gǎ dútú cúnùu datná ní cunuu  
ndíi Melquisèdec cútnàhá ní cuu  
ndíi dútú ñuyúú-a.

**Cuendá ñáyiú cuiní daña  
nínhu ichi Yá Ndiöxí**

<sup>11</sup>Te vǎi-gá tnúhu ndècu cáhá<sup>n</sup>-í  
nàcuáa ndùu cuendá Xítohó  
Jesucristú, ndíhi ndíi Melquisèdec,  
te dícó-ni sá nchòhó ío cuéé  
tècú tnùní-ndó, te yúhú ío úhú  
níhí-í nàcuáa cáhá<sup>n</sup>-í nàcuáa tecú  
tnùní-ndó.

<sup>12</sup>Te nchòhó sa ní cuu cuéhé nduu  
ndècu-ndo ichi Xítohó Jesucristú,  
te tàú-ndó dānehé-ndó cué ñáyiú  
ndècu ichi-gá tnúhu-gá núu dícó  
sá cúú, dico xini ñuhu-ni-xi sá  
cúndècu ñáyiú danèhé ñáhá  
tnúhu-gá xii-ndo, tnúhu sá ní  
dácúhá-ndó ndéé díhna sá ñà túú  
ùhú tecú tnùní-ndó. Te sá dúcá<sup>n</sup>  
quide-ndo núu xíǎ<sup>n</sup> cúú-ndó dàtná  
cue landú vitna sàdi camá, landú  
vátá cúú-gǎ caxi dítá. <sup>13</sup>Chi nchaa  
ñáyiú cùu datná landú vitna sàdi,  
ñáyiú-á<sup>n</sup> cúú nèñuú-yu ñá túú  
cùtnuní iní-yu nàcuáa càhá<sup>n</sup> tnúhu  
sá càhá<sup>n</sup> nàcuáa cada ndáá-yu  
cundecú-yu. <sup>14</sup>Te nchaa sá vǎtá  
cúú-gǎ caxi cue landú yíquí<sup>n</sup> xíǎ<sup>n</sup>  
cúú-xí cuendá cue ñáyiú sacuéhé, te

xíã<sup>n</sup> cúú-xí dàtná tnúhu sá dácuaàha ñáyiú sa ní níhí ndéé ndècu ichi-gá, ñáyiú sa ní cutnùní váha iní-xi nándí cùu nchaa sá cuèhé sá dúhá, ndíhi nándí cùu nchaa sá vâha.

**6** Te xíã<sup>n</sup> nũu vitna xini ñuhu-xi dacuaha-o dava-gá tnúhu Yá Ndiõxí cuendá duca<sup>n</sup> te cuu-o ñáyiú tècú tnùní nchaa tnúhu-gá. Te xini ñuhu-xi sá ncháá tnúhu Xítohó Jesucristú sá ñí dácuaáhá-ó ndèé díhna vá dácuaàha-gá-ó dàtná ní dácuaáhá-ó chi sa tècú tnùní-ó. Te ñá túú-gã xíní ñuhu-xi dacuaha-o datná ní dácuaáhá-ó ndèé díhna nàcuáa cada-o ndíxi cuéchi iní-ó cuendá nchaa sá cuèhé sá dúhá quide-o, sá tá dàcuíta nihnu ñaha xii-o cuáhá<sup>n</sup> ní cùu. Te duca<sup>n</sup> vâ dácuaàha-gá tucu-o dàtná ní dácuaáhá-ó ndèé díhna nàcuáa cada-o quèndáá iní-ó Yã Ndiõxí, <sup>2</sup>ndíhi cuendá nàcuáa ní dácuaáhá-ó nàcuáa cuandute-o, ndíhi cuendá nàcuáa cada-o càcá<sup>n</sup> ndodo-o ndàha-o díquí ñáyiú ní sándáá iní ñáhá xii-gá. Te duca<sup>n</sup> ñà túú-gã xíní ñuhu tucu-xi dacuaha-o datná ní dácuaáhá-ó ndèé díhna cuendá nàcuáa ndoto cue ñáyiú ní xíhí, ndíhi cuendá nàcuáa ní dácuaáhá-ó sã Yã Ndiõxí daquihí<sup>n</sup>-gã ñáyiú núú ùhú núú ndàhú ní caa ní quíhí<sup>n</sup>. <sup>3</sup>Te núú Yá Ndiõxí ná càchí-gá, te cuita dacuàha-gá-ó nchàa dava-gá tnúhu sá cúmãní quíhí<sup>n</sup>.

<sup>4</sup>Te cue ñáyiú sa tècú tnùní tnúhu Yá Ndiõxí, ñáyiú sa xini nchaa nàcuáa ndùu nchaa sá vâha quide ñaha Yá Ndiõxí xii-o ndíhi-yu, ñáyiú sa chindee ñaha Espíritú Yã Ndiõxí, <sup>5</sup>ñáyiú sa cùtnuní iní-xi sã ïo váha tnúhu Yá Ndiõxí, ñáyiú

sa xini nàcuáa ta quide Yá Ndiõxí véxi nchaa sá vâ yõo tnàhí ndàcu cada, <sup>6</sup>te núú ñáyiú-á<sup>n</sup> ná ngüíta tucú-yu daquèe tífú duú<sup>n</sup>-yu tnúhu Yá Ndiõxí, te vá ndácú-gã-ó nà canu ichi-ó-yu nàcuáa ndíxi cuéchi iní-yu te núú duca<sup>n</sup> na càdá-yu, te sá dúcá<sup>n</sup> ná càdá-yu te tnàhá-yu cùú-yu dàtná cue téé ní sahani ñaha xii Xítohó Jesucristú Déhe Yá Ndiõxí núú cùrúxí. Te sá dúcá<sup>n</sup> ná càdá-yu te ngóo dava-gá ñáyiú cáhá<sup>n</sup> cuèhé-yu cuendá Xítohó Jesucristú. <sup>7</sup>Te nchaa ñáyiú cùú-yu dàtná ñuhu, chi ñuhu-á<sup>n</sup> ndi tnahá òré cúú<sup>n</sup> dãú te xíhi-xi ndute, te dava ñuhu váha cùu sá xítú ñáyiú, te sá cúú nũú ñuhu-á<sup>n</sup> ïo nàndíhi-xi, te mee Yã Ndiõxí quidé-gã cúú sã vâha núú ñúhú-ã<sup>n</sup>. <sup>8</sup>Dico núú da iñu na ndàa núú ñuhu-á<sup>n</sup> te ñá túú vèdana nàndíhi-xi te núú duca<sup>n</sup>, te Yá Ndiõxí vá cúú vâha iní-gá cuendá ñuhu-á<sup>n</sup> sã dúcá<sup>n</sup> dà iñu ndaa núú-xi, te iñu-á<sup>n</sup> ndíhi-xi cáyú. Te duca<sup>n</sup> sãtnahá-xi cùu ñáyiú dàquèe tífú tnúhu Yá Ndiõxí chi ñá túú cùu váha iní-gá núú-yu.

#### Níhí-ó sã ndétú-ó ndùu táhú-ó

<sup>9</sup>Te cuéi duha càhá<sup>n</sup>-í dico nchòhó cue ñáyiú ïo cùu iní-í, chi cùtnuní ndáá iní-í sã vâ càdá-ndó dàtná xíquide dava-gá ñáyiú, te mee-ni sã vâha cuu xii-ndo chi cùu-ndo ñáyiú sa ní naníhí tàhú. <sup>10</sup>Te duca<sup>n</sup> chi Yá Ndiõxí cúú-gã Yaá ïo váha quide ndáá, te vá dáná ndòdo iní-gá nchaa sã vâha quide-ndo, te ni vâ dáná ndòdo iní-gá nàcuáa quide-ndo cuu iní-ndó-gã, te sá dúcá<sup>n</sup> quide-ndo cuu iní-ndó-gã xíã<sup>n</sup> chíndèe-ndo cue ñáyiú ndècu

ndihi-ndo ichi Xítohó Jesucristú, te duca<sup>n</sup>-ni ta quide-ndo véxi ndéé vitna. <sup>11</sup>Te cuini-í sá ì<sup>n</sup> ì<sup>n</sup>-ndo nducu ndee-ndo cada-ndo nacuaa cuini Yá Ndiöxí dàtná tá quide-ndo véxi, te diu-ni duca<sup>n</sup> càda-ndo ndéé ná sàá nduu nduu táhú-ndó cùndecu-ndo ndihi-gá núú ndécú-gă, te duca<sup>n</sup> te níhí-ndó nchàandi túhú sá ndétú-ndó nduu táhú-ndó cùndecu ndihi-ndo ni caa ni quíhí<sup>n</sup>.

<sup>12</sup>Te yúhú cuini-í sá nchòhó vá tùhío-ndo càda-ndo nchaa nacuaa cuini Yá Ndiöxí, te cada-ndo dàtná quidé ñáyiú sàndáá iní tnúhu-gá, ñáyiú càhnu iní-xi. Te sá dúcá<sup>n</sup> quidé-yu xíá<sup>n</sup> nihí-yu nchaa sá ní cachí Yá Ndiöxí nduu táhú-yu.

<sup>13</sup>Te cùtnàhá ní xáha<sup>n</sup> Yá Ndiöxí xii ndíi Àbrahám nàcuáa cada-gá, te ní cacunehe-gá méé-gă nàcuáa cutnùní iní ndíi sá ndàá cada-gá nàcuáa ní xáha<sup>n</sup>-gă xii ndíi, te vá yòo ì<sup>n</sup> ni càcunehe-gá cuendá sá quèndáá iní ndíi tnúhu ní cáhá<sup>n</sup>-gá. Te duca<sup>n</sup> ní quide-gá chi ì<sup>n</sup>dìi díi-ni mee-gă ío cùnuu-gá. <sup>14</sup>Te duha ní xáha<sup>n</sup>-gă xii ndíi Àbrahám: “Yòhó té Àbrahám na càchí tnúhu ndáá-í xii-n sà ìo chindee ñàha-í xii-n, te cáyá cuéhé víhí ñàni tnáhá-n”, duha ní xáha<sup>n</sup>-gă xii ndíi. <sup>15</sup>Te ndíi Àbrahám ío ní quide ndee iní ndíi ní xíndetu ndíi, te duca<sup>n</sup> te Yá Ndiöxí ní quide-gá nàcuáa ní xáha<sup>n</sup>-gă cada-gá sá cúú-xí ndíi.

<sup>16</sup>Te núú ì<sup>n</sup> ñáyiú càhá<sup>n</sup> ì<sup>n</sup> tnúhu ndáá cuiti te càcu nehé-yu Yá Ndiöxí cuendá quèndáá iní tnàha ñáyiú-yu tnúhu càhá<sup>n</sup>-yu, te òré duca<sup>n</sup> na càhá<sup>n</sup>-yu te ñá túú-gă sá dácàá ñáyiú càhá<sup>n</sup> ndihí-yu cuèndú. <sup>17</sup>Te duca<sup>n</sup> ní quide Yá Ndiöxí ní

cáhá<sup>n</sup> ndáá-gá sá cádá-gă nàcuáa ní cachí-gá, te duca<sup>n</sup> ní cáhá<sup>n</sup>-gá cuendá nchaa ñáyiú ní cachí-gá nduu táhú sá cádá-gă nàcuáa cutnùní iní-yu sá quidé-gă ì<sup>n</sup> sá càhá<sup>n</sup>-gá, te ni ñà túú nàdáma-gá ì<sup>n</sup> sá càhá<sup>n</sup>-gá. <sup>18</sup>Te nchoo ní natuha-o Yá Ndiöxí cuendá dácácu nihnu ñaha-gă xii-o núú ùhú núú ndàhú, te ní níhí-ó tnúhu ndee iní ndécú ndihi-o cuendá sá vă dáñá ndéé-ó cùndetu-o sáá nduu nduu táhú-ó cùndecu-o ndihi-gá. Te duca<sup>n</sup> ní níhí-ó tnúhu ndee iní chi Yá Ndiöxí ní cáhá<sup>n</sup> ndáá-gá sá cádá-gă nàcuáa ní cachí-gá, te ñá túú dándahú ñáhá-gă, te ni ñà túú nàdáma-gá ì<sup>n</sup> sá ní cachí-gá cada-gá. <sup>19</sup>Te tnúhu ndee iní ndécú ndihi-o xíá<sup>n</sup> quidé-xí cùtnuní ndáá iní-ó sá ndúú táhú-ó cùndecu-o ndihi Yá Ndiöxí núú ndécú-gă, te duca<sup>n</sup> cùtnuní ndáá ndisa iní-ó sá cuendá Xítohó Jesucristú Yaá ndécú núú Yá Ndiöxí. <sup>20</sup>Te duca<sup>n</sup> ní nucùndecu Xítohó Jesucristú núú Yá Ndiöxí cuendá duca<sup>n</sup> cànchicú<sup>n</sup> nihnu-o càda-o, te duca<sup>n</sup> ní nucùndecu-gá núú Yá Ndiöxí chi cùu-gá dútú cùnùu datná ní cunuu ndíi Melquisèdec ñuyúí-a, te duca<sup>n</sup>-ni cùu-gá dútú cùnùu ni caa ni quíhí<sup>n</sup>.

**Xítohó Jesucristú cúú-gă dútú dàtná ní cuu ndíi Melquisèdec**

**7** Te ndíi Melquisèdec ní xíndaha ndíi cue ñáyiú ñuu Sàlém, te ní cuu ndíi dútú ní xinu cuechi ndíi núú Dútú Ndiöxí Yaá ío cùnuu. Te ndíi Melquisèdec-á<sup>n</sup> ní xícá<sup>n</sup> táhú ndíi núú Yá Ndiöxí cuendá ndíi Àbrahám cùtnàhá ní sáhá<sup>n</sup> ndíi Àbrahám-á<sup>n</sup> ní nàá ndíi

ndihi cue dava-gá cue tée yìndaha ñáyi. Te cue tée-á<sup>n</sup> ñà túú ní ndàcu-güedé nàá-güedé ndihi ndíi Àbrahám-á<sup>n</sup> chi ní xíta-güedé. <sup>2</sup>Te nchaa sá ñí níhí ndíi Àbrahám-á<sup>n</sup> núú ñí nàà ndíi, te ní quide ndíi úxí xichi te ì<sup>n</sup> xichi núú ùxí-á<sup>n</sup> ñí sáñaha ndíi xii ndíi Melquisèdec. Te ðiu ndíi Melquisèdec-á<sup>n</sup> quée-xí: Tée ío váha quide ndáá yìndaha ñaha xii ñáyi, duha quèe-xi. Te ní xóo danàni ñahá-yu xii ndíi Tée yìndaha ñuú Sàlém, duha ní xóo danàni ñahá-yu. Te tnúhu Sàlém-á<sup>n</sup> quée-xí: Ñuú ndécú ñahi, duha quèe-xi tnúhu-á<sup>n</sup>. Núú xíá<sup>n</sup> quée tucu-xi nacuaa ñani ndíi Tée yìndaha ñuú ndécú ñahi, duha quèe tucu-xi ðiu ndíi. <sup>3</sup>Te ñà túú tnúhu núú yoo cùu tátá ndíi ndihi ñaná ndíi, te ni ñà túú tnúhu núú yoo cùu xíi ndíi ndihi xítná ndíi, te ni ñà túú tnúhu núú náandi cùu ñáyi ní cuu ñani tnáhá ndíi ní xíndecu ndée sanaha-gã, te ni ñà túú tnúhu núú ná ama ní cacu ndíi, te ni ñà túú tnúhu núú ná ama ní xíhí ndíi. Te ndíi-á<sup>n</sup> duca<sup>n</sup>-ni ñí cuu ndíi dútú ñí xíndecu ndíi, te duca<sup>n</sup> sãtnahá-xi cùu Xítoho Jesucristú déhe Yá Ndiõxí chi cuu-gá dútú ñí caa ni quíhí<sup>n</sup>.

<sup>4</sup>Te vitna chí cuãha váha cuendá sá ndíi Melquisèdec ní cuu ndíi ì<sup>n</sup> tée ío ní cuu càhnu ní xíndecu ñuyíú-a, chi ndíi Àbrahám tée ní cuu ñani tnáhá-ó ñí xíndecu ndée sanaha ñí quide ndíi úxí xichi nchaa sá ñí níhí ndíi núú ñí nàà ndíi. Te ì<sup>n</sup> xichi núú ùxí-á<sup>n</sup> ñí sáñaha ndíi xii ndíi Melquisèdec. <sup>5</sup>Te ndíi Moisés ní chídó tnùní ndíi ñacuáa cada nchaa dútú, cue tée ní cuu ñani tnáhá ndíi

Lèví sá cuè tée-á<sup>n</sup> quehe<sup>n</sup>-güedé ì<sup>n</sup> xichi núú ùxí xichi sá ñihí cue ñáyi isràél ñáyi cùu ñani tnáhá-güedé cuu cuendá-güedé. Te duca<sup>n</sup> quide-güedé cuèi ñani tnáhá-güedé ndíhí-yu ní cuu ndíi Àbrahám. <sup>6</sup>Te cuèi ñà díú ñani tnáhá ndíi Melquisèdec cùu ndíi Àbrahám dico ní quehe<sup>n</sup> ndíi Melquisèdec-á<sup>n</sup> ì<sup>n</sup> xichi núú ùxí xichi nchaa sá ñí níhí ndíi Àbrahám. Te ndíi Melquisèdec-á<sup>n</sup> ñí xíca<sup>n</sup> táhu ndíi núú Yá Ndiõxí cuendá ndíi Àbrahám. Te ðiu-ni ndíi Àbrahám-á<sup>n</sup> ñí xáha<sup>n</sup> Yá Ndiõxí xii ndíi sá cáda váha ñaha-gã xii ndíi. <sup>7</sup>Te sa cùnuni iní-ó sã núú ì<sup>n</sup> tée na càcá<sup>n</sup> táhú-dé núú Yá Ndiõxí cuendá ì<sup>n</sup> ñáyi, te tée-á<sup>n</sup> cùnù-gá-dé. <sup>8</sup>Te cue dútú ñáyi isràél quèhé<sup>n</sup>-güedé ì<sup>n</sup> xichi núú ùxí xichi nchaa sá ñihí-yu cùu cuendá-güedé, te cue tée-á<sup>n</sup> cuú-güedé. Te núú tütú Yá Ndiõxí càchí-xi sá ndíi Melquisèdec ndécú-ní ndíi, te duca<sup>n</sup> càhá<sup>n</sup>-xi chí ñà túú tnúhu sá ñí xíhí ndíi. <sup>9-10</sup>Te sá dúca<sup>n</sup> ñí sáñaha ndíi Àbrahám sá ñí nduu táhú ndíi Melquisèdec, te xíá<sup>n</sup> cada iní-ó sã sã ndecu ndíi ndíi Àbrahám cue ñani tnáhá ndíi Lèví cue tée cùu dútú, cue tée quehe<sup>n</sup> ì<sup>n</sup> xichi núú ùxí xichi nchaa sá ñihí ñáyi isràél cuèi vátá cáciu-gã-güedé. Te cada iní-ó sã tnáhá-güedé ní sáha-güedé ndíi Melquisèdec ì<sup>n</sup> xichi núú ùxí xichi nchaa sá ñí níhí ndíi Àbrahám núú ñí nàà ndíi. Te duca<sup>n</sup> càda iní-ó chí cue tée-á<sup>n</sup> cúu-güedé ñani tnáhá ndíi Àbrahám cuèi vátá cáciu-gã-güedé dàv-á<sup>n</sup>.

<sup>11</sup>Te sá cuendá cue dútú cue tée cùu ñani tnáhá ndíi Lèví ní

ngúndecu ndihi cue ñáyi isràél  
 tnúhu sá sánú ichi ñaha xií-yu  
 nàcuáa cadá-yu cundecú-yu. Te ñaní  
 tnáhá ndíi Àrón cúu cuè dútú-ǎ<sup>n</sup>. Te  
 núu dícó cue dútú-ǎ<sup>n</sup> ní ndàcu-güedé  
 cada-güedé nàcuáa cudü ñáyi  
 isràél núu Yǎ Ndiǒxí, te ñá túú-gǎ  
 xíní ñuhu-xi ngúndecu ingá dútú  
 dàtná ndíi Melquisèdec ní cùu. Te  
 dútú-ǎ<sup>n</sup> ñà túú ní cùu-dé dàtná ní  
 cuu cue ñaní tnáhá ndíi Àrón. <sup>12</sup>Te  
 núu cuè dútú cue téé cùu ñaní  
 tnáhá ndíi Lèví-ǎ<sup>n</sup> ní ngúndecu ingá  
 dútú. Te sá dúcá<sup>n</sup> ní ngúndecu ingá  
 dútú xǎ<sup>n</sup> dacuítí ní xini ñuhu-xi sá  
 dǎma nàcuáa ndùu tnúhu sá sánú  
 ichi ñaha xií-yu nàcuáa cadá-yu  
 cundecú-yu. <sup>13-14</sup>Te ñu-ni cuendá  
 dútú-ǎ<sup>n</sup> sa nihí-ó tnúhu, te dútú-ǎ<sup>n</sup>  
 cúu Xítóhó Jesucristú, te ñá díú ñàní  
 tnáhá ndíi Àrón cúu-gǎ chi ñaní  
 tnáhá ndíi Jùdá cúu-gǎ. Te nchaa-o  
 tà xini ndáá-ó sǎ ñàní tnáhá ndíi  
 Jùdá cúu-gǎ, te ndíi Moisés ñá túú  
 tnàhí ná ní càchí ndíi cuendá cue  
 ñaní tnáhá ndíi Jùdá sá cúu-güedé  
 dútú, chi ni ì<sup>n</sup>-güedé ñá túú ní  
 cùu-güedé dútú ní cùu.

<sup>15</sup>Te vitna cùtnuní ndáá iní-ó  
 nàcuáa ní cuu, chi Xítóhó  
 Jesucristú cúu-gǎ ingá dútú dàtná  
 ní cuu ndíi Melquisèdec. <sup>16</sup>Te ñá  
 díú cuendá tnúhu sá sánú ichi  
 ñaha xii ñáyi nàcuáa cadá-yu  
 cundecú-yu duca<sup>n</sup> ni cùu-gǎ dútú,  
 chi ní cuu-gǎ dútú cuendá sá cúu-gǎ  
 Yaá cundecu ni caa ni quíh<sup>n</sup> chi  
 vá í<sup>n</sup> ndùu te ndíi nihnu-gǎ. <sup>17</sup>Te  
 duha ní xáha<sup>n</sup> Yǎ Ndiǒxí xii-gǎ:

Yòhó cúu-n dütú dàtná ní cuu  
 ndíi Melquisèdec,  
 te cundecu-n nchàa nduu nchaa  
 quíú.

Duha ní xáha<sup>n</sup> Yǎ Ndiǒxí xii-gǎ.  
<sup>18</sup>Te xǎ<sup>n</sup> nùu nchaa tnúhu ndéé  
 díhna, tnúhu sá ní xíndecu ndíhi  
 cue dútú ñà túú-gǎ cùnùu-xi vitna  
 chi ñá túú-gǎ xíní ñuhu-xi te ni ñà  
 túú nǎ chíndèe ñaha-xi. <sup>19</sup>Te ñu-ni  
 tnúhu-ǎ<sup>n</sup> cúu-xí tnúhu sá ní chídó  
 tnùní ndíi Moisés canu ichi ñaha xii  
 ñáyi nàcuáa cadá-yu cundecú-yu.  
 Te tnúhu-ǎ<sup>n</sup> ñà túú vèdana ni  
 quide-xi nacuáa chindee-xi ñáyi  
 cudü-yu núu Yǎ Ndiǒxí. Dico vitna  
 ní ngúndecu ndíhi-o tnúhu ndee iní  
 sá ìo-gǎ váha dàcúxí tnúhu ndéé  
 díhna, chi ndècu ndíhi-o Xítóhó  
 Jesucristú Yaá cúu dütú-ó. Te Yaá-ǎ<sup>n</sup>  
 quidé-gǎ tnàhà tnúhu-o ndíhi Yá  
 Ndiǒxí vitna.

<sup>20</sup>Te Yá Ndiǒxí ní cáhá<sup>n</sup> ndáá  
 cuíti-gǎ sá Xítóhó Jesucristú  
 cuu-gǎ dütú. <sup>21</sup>Dico ñá túú dùca<sup>n</sup>  
 ní cáhá<sup>n</sup>-gǎ cuendá cue ñaní tnáhá  
 ndíi Lèví cue téé ní cuu dütú,  
 cuèi mei òré ní chisaha-güedé ní  
 cuu-güedé dütú. Te cùtnàhà ní  
 chisaha Xítóhó Jesucristú cúu-gǎ  
 dütú, te Yá Ndiǒxí ní xáha<sup>n</sup> ndáá  
 cuíti-gǎ xii-gǎ, te duha ní xáha<sup>n</sup>-gǎ:

Yúhú Dütú Ndiǒxí càhá<sup>n</sup> ndáá  
 cuíti-í te vá dàmà-í tnúhu  
 càhá<sup>n</sup>-í:

“Yòhó cúu-n dütú dàtná ndíi  
 Melquisèdec,

te cundecu-n nì caa ni quíh<sup>n</sup>.”

Duha ní xáha<sup>n</sup> Yǎ Ndiǒxí xii Xítóhó  
 Jesucristú. <sup>22</sup>Te Xítóhó Jesucristú  
 quidé-gǎ nàcuáa cùtnuní ndáá iní-ó  
 sǎ Yǎ Ndiǒxí cada-gǎ ingá núu sǎ  
 váha sá cúu-xí-ó dàtná ní cachí-gǎ,  
 te xǎ<sup>n</sup> cúu-xí sǎ ìo-gǎ váha dàcúxí  
 tnúhu ní cáhá<sup>n</sup>-gǎ ndéé díhna.

<sup>23</sup>Te ío cuéhé cue ñaní tnáhá ndíi  
 Lèví ní cuu-güedé dütú, te duca<sup>n</sup>

cuendá sá ñà túú ní cùdí-güedé cundecu-güedé chi ní ndíhi-güedé ní xíhí. <sup>24</sup>Dico Xítohó Jesucristú chi vá cùú-gá, chi cundecu-gá ni caa ni quíhí<sup>n</sup> núu xíá<sup>n</sup> ñíu-ni-gá cuu-gá dútú, te vá yóo íí<sup>n</sup>-gá cuu dútú cada núú-gă. <sup>25</sup>Te núu xíá<sup>n</sup> Xítohó Jesucristú dácăcu nihnu ñaha-gă xii nchoo ñăyiu núú ùhú núú ndàhú, nchoo ñăyiu sàndáá iní ñáhá xii-gá, te ñíu-ni nchoo cùu-o ñăyiu tñàhá tñúhu ndíhi Yá Ndiöxí, te vá íí<sup>n</sup> ndùu-gá te cuíta nihnu-o. Te duca<sup>n</sup> chi Xítohó Jesucristú ñá túú xòcuíñí-gá núú Yá Ndiöxí càhá<sup>n</sup> ndàhú-gá cuendá-ó.

<sup>26</sup>Te Xítohó Jesucristú cúú-gă Yaá cúú dútú cúnùu xini ñuhu-o cundecu ndíhi-o, te ñíu-gá cúú-gă Yaá chíndèe chitúu ñaha xii-o, te cùu-gá Yaá ío quide ndáá núú Yá Ndiöxí, te cùu-gá Yaá cándòo canine chi ñá túú tñàhí cuéchi-gá. Te ñá túú tñàhí quide-gá dàtná quidé nchaa cue ñăyiu ndècu ichi cuehé ichi duha, te cùu-gá Yaá ní nucúndecu andíu núú ndécú Yá Ndiöxí te yàcá<sup>n</sup> táxí tñuní-gá. <sup>27</sup>Te ñá túú quide-gá dàtná ní quide cue dútú ní cunuu ní xíndecu, chi cue dútú-ă<sup>n</sup> íí<sup>n</sup> nduu íí<sup>n</sup> nduu ní xóo cahni-güedé quiti ní xóo nduu táhú Yá Ndiöxí, te díhna-gá cuendá nchaa cuéchi mee-güedé duca<sup>n</sup> ní xóo cada-güedé te dătnúni duca<sup>n</sup> ní xóo cada tucu-güedé cuendá nchaa cuéchi ñăyiu. Dico Xítohó Jesucristú chi íí<sup>n</sup> xito-ni ní xíhí-gá sá cúú-xí nchaa ñăyiu chi duca<sup>n</sup> ní sani iní-gá, te vá íí<sup>n</sup> ndùu-gá duca<sup>n</sup> càda tucu-gá. <sup>28</sup>Te sá cuendá nchaa tñúhu ní chídó tñuní ndíi Moisés xíá<sup>n</sup> ní xíndecu cue téé ní cuu dútú

cúnùu, te cue téé-á<sup>n</sup> ní cuu-güedé cue téé yíca cuéchi-xi. Te sátá dúcá<sup>n</sup> ní chídó tñuní ndíi Moisés nàcuáa cada ñăyiu, te ní xica cuehé víhí ndùu te dătnúni ní cáhá<sup>n</sup> ndáá cuíti Yá Ndiöxí sá Dêhe-gá cuu-gá dútú cúnùu. Te Yaá cúú Dêhe-gá-ă<sup>n</sup> ní quide-gá nchaa nàcuáa tàù-xi cunduu, te ñíu-ni duca<sup>n</sup> càda-gá ni caa ni quíhí<sup>n</sup>.

### Xítohó Jesucristú cúú-gă dútú cúnùu

**8** Te Xítohó Jesucristú Yaá cúú dútú cúnùu ndecu ndíhi-o cuándaa-gá andíu, te ní ngóo-gá xio cùha Dútú Ndiöxí Yaá ío cúnuu, te tñàhá-gá cúnùu-gá. Te ñíu cuendá-a cùu-xi sá ío-gá cúnùu ta cáhá<sup>n</sup>-ndí véxi. <sup>2</sup>Te núú ndécú Yá Ndiöxí cúú-xí núú íí víhí. Te cada iní-ó sá cúú-xí íí<sup>n</sup> vehe te xíá<sup>n</sup> ndécú Xítohó Jesucristú cúú-gă dútú, te vehe-á<sup>n</sup> ní dácáá mèe Yá Ndiöxí te ñá dñú cuè téé ñuyíu-a. <sup>3</sup>Te sá cuendá nchaa tñúhu ní chídó tñuní ndíi Moisés xíá<sup>n</sup> ní xíndecu cue dútú cúnùu cuendá sá cáhni-güedé quiti nduu táhú Yá Ndiöxí, te nacani cuendá-güedé núú-gă nchaa dava-gá sá nihí-güedé nduu táhú-gă. Te xíá<sup>n</sup> núu dai ní xini ñuhu-xi sá tñàhá Xítohó Jesucristú cuañaha-gă íí<sup>n</sup> sá ndúú táhú Yá Ndiöxí, te táhú-ă<sup>n</sup> cúú-xí mèe-gá chi ní xíhí-gá ní cuu-gá dàtná íí<sup>n</sup> táhú sá cúú-xí Yá Ndiöxí. <sup>4</sup>Te núu ni xíndecu-ni Xítohó Jesucristú ñuyíu-a te vá cúú-gă dútú ní cùu, chi sa ndècu cue dútú sãñaha nchaa sá ndúú táhú Yá Ndiöxí dàtná càhá<sup>n</sup> nchaa tñúhu ní chídó tñuní ndíi Moisés. <sup>5</sup>Te nchaa sá quidé cuè dútú ñăyiu isràèl nùtnahá-xi luha nchaa sá

quidé Xítoho Jesucristú Yaá cúu dütú cúnüu ndecu andüu. Te quèe ndáá-xi nàcuáa ní xáha<sup>n</sup> Yá Ndiöxí xii ndíi Moisés cútnàhá tá cùyatni ngüíta ndíi dacàa ndíi vehe-gá, te duha ní xáha<sup>n</sup>-gã: “Ío váha cada cuèndá-n nàcuáa dacàa-n vehe-í dàtná cáá sã ní dánèhé ñáhà-í xii-n xítí yucu”, duha ní xáha<sup>n</sup>-gã xii ndíi. <sup>6</sup>Dico vitna chi Xítoho Jesucristú cúu-gã dütú cúnüu, te ío-gá càhnu nduu chiu<sup>n</sup> quide-gá dàcúxí cuè dütú cue ñáyiü isràél. Te diu Xítoho Jesucristú cúu-gã Yaá quidé tnàhá tnúhu-o ndíhi Yá Ndiöxí, te duca<sup>n</sup> chi Yá Ndiöxí ío-gá váha ndüu tnúhu ní cáhá<sup>n</sup>-gá xito cùu uú dàcúxí tnúhu ní cáhá<sup>n</sup>-gá ndéé díhna, te duca<sup>n</sup> ío váha ndüu tnúhu ní cáhá<sup>n</sup>-gá xito cùu uú chi ní cachí-gá sá ìngá núú sã ío-gá váha cada ñaha-gã xii-o vitna.

<sup>7</sup>Te núu nàcuáa ní cachí Yá Ndiöxí cada ñaha-gã xii-o ndéé díhna ni quide-xi nchaa nacuáa tàú-xi cunduu nàcuáa nduu táhú-ó cùndecu váha-o núú-gã ñá, te ñá túú xìni ñuhu-xi cáhá<sup>n</sup> tucu-gá sá cádá-gã ìngá núú sã vãha sá cúu-xí-ó vitna ni cuu. <sup>8</sup>Te Yá Ndiöxí ñá túú ní cùu váha iní-gá núú ñáyiü isràél núu xíã<sup>n</sup> ní cáhá<sup>n</sup>-gá cuèndá-yu, te duha ní cachí-gá:

Yúhú cúu-í Dütú Ndiöxí, te duha ndüu tnúhu na càhá<sup>n</sup>-í: Sáa nduu te cada-í ìngá núú sã vãha sá cúu-xí cuè ñaní tnáhá ñáyiü isràél, ndíhi cue ñaní tnáhá ndíi Jüdá diu-ni ñáyiü isràél.

<sup>9</sup>Te tnúhu sá càhá<sup>n</sup>-í-a ñá túú ìi<sup>n</sup>-ni cuu-xi ndíhi tnúhu sá ní xáha<sup>n</sup>-í xii cue ñáyiü ní

cuu ñaní tnáhá-yu ní xíndecu ndéé sanaha càda-í-yu, te diu-ni dàvá-á<sup>n</sup> ní quide yica-í ní ndeñuhu-í-yu nàció<sup>n</sup> Ègiptú, te ñá túú ní cuìní-yu tñí-yu tnúhu ní xáha<sup>n</sup>-í xii-yu cuèndá duca<sup>n</sup> càda váha-í-yu, te xíã<sup>n</sup> núu ní dàhá ñihnu-í-yu ñá túú-gã ní quide cuendá-í-yu.

<sup>10</sup>Te na sàa nduu te duha ndüu tucu ìngá núú sã vãha cada-í cue ñáyiü isràél.

Te yúhú cada-í nàcuáa cutnùní váha iní-yu nàcuáa cuìní-í cadá-yu, te duca<sup>n</sup> ñi yuhu ni iní-yu cadá-yu.

Te yúhú Yá Ndiöxí quíndaha-í-yu, te mèe-yu cuú-yu ñáyiü cùu cuendá-í.

<sup>11</sup>Te dàvá-á<sup>n</sup> chi ni ñáyiü cùu ndí meé-yu, te ni cuè dava-gá ñáyiü vá cùtnúhu tnàhá-yu sá nátùha ñahá-yu xii-í, chi dàvá-á<sup>n</sup> nchaa ñáyiü cundecu ndíhi ñahá-yu xii-í, cuèi ñáyiü cùnuu te cuèi ñáyiü ñá túú cùnuu.

<sup>12</sup>Te dàvá-á<sup>n</sup> cada càhnu iní-í nchaa sá cuèhé sá dúhá quidé-yu, te vá íi<sup>n</sup> ndüu-gá ndacu iní-í nchaa sá quíde-yu.

Duha ní cachí Yá Ndiöxí cuèndá ñáyiü isràél. <sup>13</sup>Te sá dúcá<sup>n</sup> ní cáhá<sup>n</sup> Yá Ndiöxí sá cádá-gã ìngá núú sã vãha sá cúu-xí ñáyiü xíã<sup>n</sup> cùtnùní sá tnúhu sá ní cáhá<sup>n</sup>-gá díhna ñá túú-gã xíní ñuhu-xi. Te cada iní-ó sã tnúhu-á<sup>n</sup> cúu-xí ìi<sup>n</sup> sá ní cunaha

ndècu te ñá túú-gǎ nándĩhi-xi te cuíta-ná-xi, duca<sup>n</sup> sǎtnahá-xi cùu tnúhu sá ñí cáhá<sup>n</sup>-gǎ ndéé díhna.

### Cuèndá vehe Yá Ndiöxí

**9** Te tnúhu sá ñí cáhá<sup>n</sup> Yǎ Ndiöxí ndéé díhna cùu-xi cuendá nàcuáa cada ñáyiu isràél chiñuhu ñàhá-yu xii-gǎ, ndihi cuèndá vehe-gǎ caa ñuyúú-a. <sup>2</sup>Te ñáyiu isràél ní dácǎǎ-yu vehe Yá Ndiöxí, te vehe-á<sup>n</sup> ñí cuu-xi vehe dóó te ní xúhu<sup>n</sup> nehu xití-xi. Te cuártú díhna ní xínani-xi cuártú ní cuu íí, te xíǎ<sup>n</sup> ní xíndecu ìí<sup>n</sup> sá ndèé dité-xi sá ñí cándodó ìí<sup>n</sup> caa candíl núú dité-xi, te ní xínutnǎí ìí<sup>n</sup> mèsá ní xóo códó pàá ní xóo nduu táhú Yǎ Ndiöxí. <sup>3</sup>Te cuártú cúú úú ní xínani-xi cuártú ní cuu íí víhí-gǎ. <sup>4</sup>Te xití cuártú-á<sup>n</sup> ñí xínutnǎí ìí<sup>n</sup> sá ñí cuáha mee-ni díhú<sup>n</sup> cuáá<sup>n</sup> te núú xǎǎ<sup>n</sup> ní xóo cahmi-güedé dúsa sá sàhá<sup>n</sup> tnámí. Te ñiu-ni xíǎ<sup>n</sup> ní xíndecu tucu ìí<sup>n</sup> càjá ní cuu mee-ni díhú<sup>n</sup> cuáá<sup>n</sup> te xití càjá-á<sup>n</sup> ñí xúhu<sup>n</sup> ìí<sup>n</sup> lítu ní cuáha mee-ni díhú<sup>n</sup> cuáá<sup>n</sup>, te xití lítu-á<sup>n</sup> ñí xúhu<sup>n</sup> mànáá sá ñí xóo caxí-yu dàvá-á<sup>n</sup>. Te ñiu-ni xití càjá-á<sup>n</sup> ñí xúhu<sup>n</sup> tnudii ndíi Àrón sá ñí saa itá-xi, ndihi yúú sǎ ñí xíndéé tnúhu ní cáhá<sup>n</sup> Yǎ Ndiöxí nàcuáa cada ñáyiu. Te duha ní xínani càjá-á<sup>n</sup>: Càjá sá ñúhú tnúhu ní cáhá<sup>n</sup> Yǎ Ndiöxí sá cúú-xí ñáyiu, duha ní xínani-xi. <sup>5</sup>Te núú càjá-á<sup>n</sup> ñí cándodó úú tnàhá sá ñí cadúha-yu, te xíǎ<sup>n</sup> cáá-xí dàtná cáá espíritú xínú cuèchi núú Yǎ Ndiöxí. Te cuèndá úú xíǎ<sup>n</sup> ní cutnùní iní-yu sá ño càhnu cuu Yǎ Ndiöxí, te sá ñí cadúha-yu-á<sup>n</sup> ndèé ndíxí<sup>n</sup>-xi, te ndíxí<sup>n</sup>-xi-á<sup>n</sup> ñáhu-xi xio xio núú

quidé càhnu iní Yǎ Ndiöxí nchaa yíca cuèchi ñáyiu, dico vá cúú-gǎ cáhá<sup>n</sup>-í cuèndá nchaa dava-gǎ xǎǎ<sup>n</sup> vitna.

<sup>6</sup>Te nchaa xǎǎ<sup>n</sup> ní xíndecu xití vehe Yá Ndiöxí, te cue dútú ñí xóo quíhu-güedé ìí<sup>n</sup> nduu ìí<sup>n</sup> nduu xití cuártú díhna ní xóo cada-güedé nàcuáa tàú-güedé cada-güedé sá cúú-xí Yǎ Ndiöxí. <sup>7</sup>Te cuártú cúú úú-á<sup>n</sup> chi mee-ni dütú cúnùu ní xóo quíhu-dé ìí<sup>n</sup> xito-ni ndi tnahá cuíá. Te ndi tnahá òrè duca<sup>n</sup> ñí xóo quíhu dútú cúnùu-á<sup>n</sup> te ní xóo canehe-dé nííí ñí xóo quíhu ní xóo nduu táhú Yǎ Ndiöxí. Te duca<sup>n</sup> ñí xóo cada dútú-á<sup>n</sup> cuèndá sá Yǎ Ndiöxí cada càhnu iní-gǎ nchaa yíca cuèchi mee-dě, ndihi nchaa yíca cuèchi ñáyiu. <sup>8</sup>Te sá dúcá<sup>n</sup> mèe-ni dútú cúnùu ní xóo quíhu-dé xití cuártú ní cuu íí-gǎ-á<sup>n</sup>, xǎǎ<sup>n</sup> Espíritú Yǎ Ndiöxí quidé-xí cùtnuní iní-ó sá ñèni duca<sup>n</sup> ní xíndecu vehe-á<sup>n</sup> ñí xóo cadá-yu nàcuáa ní xóo cúñaha Yǎ Ndiöxí cadá-yu. Te xíǎ<sup>n</sup> cùtnuní sá vǎtá sàá-gǎ nduu càhá<sup>n</sup> ndíhí-yu Yǎ Ndiöxí nàcuáa tàú-xi cunduu. <sup>9</sup>Te sá dúcá<sup>n</sup> ñí xíndecu vehe-á<sup>n</sup>, ndihi sá dúcá<sup>n</sup> ñí xóo cada nchaa cue dútú-á<sup>n</sup>, xǎǎ<sup>n</sup> cùtnuní iní-ó nàcuáa quide Yǎ Ndiöxí vitna, chi nchaa quiti ní xóo cahni cue dútú-á<sup>n</sup> ñí xóo nduu táhú Yǎ Ndiöxí, ndihi nchaa dava-gǎ sá ñí xóo nduu táhú-gǎ ñá túú ní quide-xi nacuáa nduu ndoo nduu nine iní cue ñáyiu nàcuáa cutnùní iní-yu sá ñà túú-gǎ cuèchi-yu ndècu núú Yǎ Ndiöxí. <sup>10</sup>Te sá dúcá<sup>n</sup> ñí xóo cada nchaa dútú-á<sup>n</sup> ñí níhí tnàhá-xí ndihi nchaa tnúhu sá dánèhè ñàhá xii ñáyiu ná cúú sǎ caxí-yu ndihi ná cúú sǎ cúú



còhó-yu ndihi nàcuáa ndàhá-yu. Te tnúhu-á<sup>n</sup> nĩ cuu-xi mee-ni sã nĩ sanu ichi ñaha xif-yu nàcuáa cundecú-yu ñuyú-a. Te tnúhu-á<sup>n</sup> nĩ nàndfhi-xi ndéé ní sáá nduu nĩ nadama Yá Ndiöxí tnúhu-á<sup>n</sup> cuendá sá vã dúcá<sup>n</sup>-gã cadá-yu cundecú-yu.

<sup>11</sup>Te Xítohó Jesucrístú ní quixi-gá ñuyú-a, te ñu-gá cúu-gã Yáá cúu dútú cúnùu, te xíã<sup>n</sup> ñuu quide-gá nchaa sá vãha sá cúu-xí-ó. Te vitna ní nucúndecu-gá núu ïo vii ío váha càa, te núu ndécú-gã-á<sup>n</sup> ñà túú cùu-xi ì<sup>n</sup> vehe sá nĩ dácáa cuè téé ñuyú-a. <sup>12</sup>Te cada iní-ó sã Xítohó Jesucrístú cuánguihu-gá xití cuártú núu nĩ cuu íí víhí dàtná ní xóo cada dútú cúnùu ní xíndecu ndéé sanaha, chi ní nucúndecu-gá núu ndécú Yá Ndiöxí. Dico ñà túú ni quide-gá dàtná ní xóo cada dútú cúnùu ní xíndecu ndéé sanaha, chi dútú-ã<sup>n</sup> òré ní xóo quíhu-dé xití cuártú ní cuu íí-gã-á<sup>n</sup>, te ní xóo canehe-dé nĩñí chivá ndihi nĩñí chëhlu ní xóo quíhu. Dico Xítohó Jesucrístú chi nĩñí méé-gã ní sati ní xíhí-gá núu cùrúxí, te xíã<sup>n</sup> duu<sup>n</sup> duu<sup>n</sup> cuáhá<sup>n</sup>-gá ní nucúndecu-gá núu ndécú Yá Ndiöxí. Te sá dúcá<sup>n</sup> nĩ quide-gá xíã<sup>n</sup> ní naníhí tàhú-ó. <sup>13</sup>Te nchaa ñáyiú ní xóo cada nàcuáa vá cúu-gã-yu ñáyiú ní cuu íí, ñáyiú-á<sup>n</sup> nĩ xóo códó ñáhá cuè dútú nĩñí ndicutu, ndihi nĩñí chivá, ndihi yáá cùnú chëhlu quiti sàhni-güedé cuendá nduu íí tucú-yu. <sup>14</sup>Dico nĩñí Xítohó Jesucrístú chi ío-gá nándfhi-xi sá cúu-xí nchò ñáyiú xíndecu vitna! Te cuendá nĩñí-gã-á<sup>n</sup>, chi Espíritú Yá Ndiöxí sá ndécú nchàa nduu nchaa quíú nĩ cuu ì<sup>n</sup>nuu-xi ndìhi Xítohó Jesucrístú sá cúu cùu-gá

cuendá cuu-gá dàtná ì<sup>n</sup> táhú sã cúu-xí Yá Ndiöxí cuèi cùu-gá Yáá ñà túú tnàhí cuèchi-xi, te ní sati nĩñí-gã te ní xíhí-gá. Te cuendá xíã<sup>n</sup> ní cutnùnì iní-ó sã Yá Ndiöxí ní quide càhnu iní-gá nchaa sá ñà túú vãha ní quide-o, te ní nduu ndoo ní nduu nine iní-ó. Te duca<sup>n</sup> nĩ nduu ndoo ní nduu nine iní-ó cuendá sá ndácú-ó cùnù cuechi-o núu Yá Ndiöxí Yáá ndécú nchàa nduu nchaa quíú.

<sup>15</sup>Te Xítohó Jesucrístú ní quide ndáa-gá núu Yá Ndiöxí cuendá cue ñáyiú ndècu ñuyú-a. Te cuendá xíã<sup>n</sup> Yá Ndiöxí cada-gá ingá núu sã vãha sá cúu-xí-yu dàtná ní cachí-gá, te duca<sup>n</sup> càda-gá sá cuendá nchaa ñáyiú ní cáhá<sup>n</sup>-gá cundecu ndihi-gá, chi ñáyiú-á<sup>n</sup> nduu táhú-yu cundecu ndihi váha ñàhá-yu xii-gá ni caa ni quíhí<sup>n</sup> chi duca<sup>n</sup> nĩ cachí-gá, te duca<sup>n</sup> chi Xítohó Jesucrístú ní xíhí-gá núu cùrúxí cuendá sá Yá Ndiöxí cada càhnu iní-gá nchaa yíca cuèchi-yu, nchaa cuèchi sá nĩ quide-yu cùtnàhá ní cunuú tnúhu sá nĩ cáhá<sup>n</sup>-gá díhna. <sup>16</sup>Te nchoo xíní-ó sã ñuu ì<sup>n</sup> téé na càdúha ì<sup>n</sup> tutú nàcuáa cada ñáyiú dàcáhñu-yu nchaa sá ndécú ndìhi-dé, te tutú-á<sup>n</sup> xíní ñùhu-xi ndéé ná yãha nduu cùu-dé. <sup>17</sup>Te ñà túú tàu-xi cada ñáyiú nàcuáa càhá<sup>n</sup>-xi núu tütú-á<sup>n</sup> nini ndècu téé ní cadúha, dico sátá ná yãha cuú-dé te cadá-yu nàcuáa càhá<sup>n</sup>-xi. <sup>18</sup>Te cuèi tnúhu ní cáhá<sup>n</sup> Yá Ndiöxí ndéé díhna nàcuáa cada váha-gá ñáyiú, te ñu-ni ndihi nĩñí nĩ cundáa-xi chi ní sahni-güedé quiti te ní sati nĩñí-güedi. <sup>19</sup>Te ndíi Moisés ní cáhá<sup>n</sup> ndodo ndíi núu nchàa ñáyiú nàcuáa ní cachí

Yă Ndiöxí cadá-yu, te nàcuáa-ni ndüu tnúhu ní chídó tnùní ndíi núú tütú ndíi ní cáhá<sup>n</sup> ndíi, te ní dácá ndíi ndute nííí chěhlu ndíhi nííí chívá líhli, te ní quehe<sup>n</sup> ndíi ìí<sup>n</sup> dité yutnu nàni hisópó ndíhi luha idi ticuèhé, te ní chindóyo ndíi nííí-ă<sup>n</sup>. Te ní sódó ndíi núú tütú ndèe tnúhu Yă Ndiöxí sá ní chídó tnùní ndíi-ă<sup>n</sup>, te tnàhá cue ñáyiu xĩndecu-ă<sup>n</sup> ní chúcú ndíi. <sup>20</sup>Te ní xáha<sup>n</sup> ndíi Moisés xií-yu: “Cuèndá nííí-a ní cundáá sá Yă Ndiöxí cada ñaha-gă xii-ndo să vâha chi duca<sup>n</sup> ní cachí-gă cada-gă sá cúú-xí-ndó”, duha ní xáha<sup>n</sup> ndíi xií-yu. <sup>21</sup>Te ñu-ni duca<sup>n</sup> ní quide tucu ndíi ní chúcú ndíi nííí vehe-gă ndíhi nchaá sá nándíhi-güedé òré chíñùhu-güedé Yă Ndiöxí ndécú xití vehe-gă-ă<sup>n</sup>. <sup>22</sup>Te tnúhu ní chídó tnùní ndíi Moisés càchí-xi sá méé-ní nííí chucu-güedé nchaá sá cãnehe chíu<sup>n</sup>-güedé òré chíñùhu-güedé Yă Ndiöxí, te sacú-nă te ndíhi ndoo nchaá xĩă<sup>n</sup> chucu-güedé nííí ni cùu. Te dacuitíí ní xini ñuhu-xi să cáti nííí cuèndá duca<sup>n</sup> càda cahnu iní Yă Ndiöxí nchaá yícá cuèchi ñáyiu.

**Xítohó Jesucristú ní xíhí-gă núú cùrúxí cuèndá sá vă cùndècu-gă cuèchi-o núú Yă Ndiöxí**

<sup>23</sup>Te sá cuèndá sá ní xíhí Xítohó Jesucristú núú cùrúxí, xĩă<sup>n</sup> ñá túú-gă cuèchi-o ndècu núú Yă Ndiöxí. Te cuèndá nchaá sá ní xíhi xití vehe-gă sá ní dácáá ñáyiu isràél xĩă<sup>n</sup> cútnùní iní-ó nàcuáa quide-xi núú ndécú-gă. Te dacuitíí ní xini ñuhu-xi să cáhni-güedé cue quiti ní cachí Yă Ndiöxí cuèndá nduu íí nchaá sá ní xíhí xití vehe-gă-ă<sup>n</sup>.

Te cuèi duca<sup>n</sup> ní sahní-güedé cue quiti-ă<sup>n</sup> dico ñá túú ní quide-xi nacuáa ngúndecu váha-o núú Yă Ndiöxí. Dico Xítohó Jesucristú ní xíhí-gă, te sá ní xíhí-gă xĩă<sup>n</sup> ní quide-gă nàcuáa ngúndecu váha-o núú Yă Ndiöxí. <sup>24</sup>Te Xítohó Jesucristú cuándaa-gă andiu núú ndécú Yă Ndiöxí càhá<sup>n</sup> ndàhú-gă cuèndá-ó, te Xítohó Jesucristú chi ñá dáu ìí<sup>n</sup> vehe ní dácáá cuè téé ñuyú-a cuànguihu-gă. Te vehe Yă Ndiöxí sá ní dácáá cuè ñáyiu isràél ñuyú-a ndéé sanaha, ndíhi nchaá nàcuáa ní xóo cada-güedé xití vehe-gă-ă<sup>n</sup> xĩă<sup>n</sup> cútnùní iní-ó nàcuáa quide-xi núú ndécú-gă. <sup>25</sup>Te dútú cúnüu núú ñáyiu isràél ní xóo quíhu-dé núú cuíá núú cuíá xití cuàrtú ní cuu íí víhí-gă-ă<sup>n</sup>, te ní xóo canehe-dé nííí ní xóo quíhu xití cuàrtú-ă<sup>n</sup> dico ñá dáu nííí méé-dé. Dico Xítohó Jesucristú chi ñá túú dùca<sup>n</sup> ni quide-gă chi ìí<sup>n</sup> xito-ni ní sati nííí-gă te ní xíhí-gă. <sup>26</sup>Chi núu ni xíhí-gă nuu núu te ndéé cútnàhá ní ngáva ñuyú duca<sup>n</sup> ngüíta-gă cada-gă ní cùu, te vítna ta ndíhi nduu cuáhá<sup>n</sup> ní quixi-gă ñuyú-a ní xíhí-gă ìí<sup>n</sup> xito-ni cuèndá cuu-gă dàtná ìí<sup>n</sup> táhu să cúú-xí Yă Ndiöxí, te duca<sup>n</sup> ní quide-gă cuèndá sá vă cùndècu-gă cuèchi ñáyiu núú Yă Ndiöxí. <sup>27</sup>Te nchoo cuè ñáyiu ñuyú-a chi ìí<sup>n</sup> xito-ni cuú-ó te dàtnùní duca<sup>n</sup> te cada ndáá Yă Ndiöxí cuèchi-o. <sup>28</sup>Te duca<sup>n</sup> sãtnahá-xi cùu Xítohó Jesucristú chi ìí<sup>n</sup> xito-ni ní xíhí-gă cuèndá sá vă cùndècu-gă cuèchi ñáyiu núú Yă Ndiöxí, te duca<sup>n</sup> ní cuu ní xíhí-gă chi mee-gă duca<sup>n</sup> ní cachí-gă cunduu. Te quixi tucu

Xítohó Jesucristú ñuyúí-a dico ñá díú-gă sá cadá-gă cuendá sá vă cündècu-gă cuéchi ñáyiú núú Yă Ndiöxí, chi quixi-gă nacuaca-gă nchaa ñáyiú ndètu ñaha xii-gă cuendá cundecú-yu ndihi-gă ni caa ni quíhí<sup>n</sup>.

**10** Te nchaa tnúhu ní xáha<sup>n</sup> ndíi Moisés xii ñáyiú israhél cadá-yu, nchaa tnúhu-á<sup>n</sup> ní quide-xi ní cutnùní luha iní-yu nàcuáa cada Yă Ndiöxí cada váha ñaha-gă xii-o vitna. Dico ñá díú mèi nacuáa ní xáha<sup>n</sup> ndíi Moisés xii ñáyiú quide Yă Ndiöxí vitna chi dăma quide-gă. Te nchaa tnúhu ní cáhá<sup>n</sup> ndíi Moisés ñá túú ní ndàcu-xi cada-xi nacuáa cundáa nchaa ñáyiú tùha ñaha xii Yă Ndiöxí cuéi ní xóo cahni-güedé quiti ní xóo nduu táhú-gă núú cuiá núú cuiá. <sup>2</sup>Te núú dicó sá ní xóo cahni-güedé quiti ní xóo nduu táhú Yă Ndiöxí ní quide-xi nacuáa nduu ndoo nduu nine iní cue ñáyiú, te vá cáhni-gă-güedé cue quiti-á<sup>n</sup> nduu táhú-gă ní cùu, te duca<sup>n</sup> te cutnùní iní-yu sá ñà túú-gă cuéchi-yu ndècu núú Yă Ndiöxí ní cùu. <sup>3</sup>Te sá dúcá<sup>n</sup> ní xóo cahni-güedé quiti ní xóo nduu táhú Yă Ndiöxí núú cuiá núú cuiá, xiá<sup>n</sup> ní xóo ndacu iní cue ñáyiú nchaa sá cuéhé sá dúhá ní xóo cadá-yu. <sup>4</sup>Te duca<sup>n</sup> chi níñí ndicutu-á<sup>n</sup> ndihi níñí chivá-á<sup>n</sup> ñà túú ní xóo ndacu-xi cada-xi nàcuáa vá cündècu cuéchi-yu núú Yă Ndiöxí.

<sup>5</sup>Te xiá<sup>n</sup> nñu cúnàhá ní quexio Xítohó Jesucristú ñuyúí-a ní xáha<sup>n</sup>-gă xii Yă Ndiöxí:

Yòhó Tătà-í, ñá túú ndùu vétú váha iní-n sã sáhní-güedé quiti ndùu táhú-n,

te ni ñă túú ndùu vétú váha tucu iní-n cuendá nchaa dava-gă sá táxí-güedé ndúú táhú-n,  
núú xiá<sup>n</sup> ní quide túha-n yìqui cuñú-í cuendá yúhú cuú-í te nduu táhú ñáhá-n xii-í.

<sup>6</sup>Te ni ñà túú ndùu vétú váha iní-n cuendá quiti sàhmi-güedé ndúú táhú-n te ni ñà túú ndùu vétú váha iní-n cuendá nchaa dava-gă sá táxí-güedé ndúú táhú-n cuendá sá vă cündècu-gă cuéchi ñáyiú núú-n.

<sup>7</sup>Núú xiá<sup>n</sup> yúhú ní cachí-í xii yòhó Tătà-í Dútú Ndiöxí sá yúhú véxi-í ñuyúí-a cada-í nchaa sá cuiní-n càda-í dàtná yódó tnùní cuendá-í núú tütú-n.

Duha ní xáha<sup>n</sup> Xítohó Jesucristú xii Tătá-gă Dútú Ndiöxí. <sup>8</sup>Te Xítohó Jesucristú díhna-gă ní xii-gă Yă Ndiöxí Yaá cúú Tătá-gă: “Yòhó Tătà-í ñá túú ndùu vétú váha iní-n cuendá quiti sàhni-güedé ndúú táhú-n, ndihi cuendá quiti sàhmi-güedé ndúú táhú tucu-n cuendá sá vă cündècu-gă cuéchi ñáyiú núú-n, ndihi cuendá nchaa dava-gă táhú sã táxí-güedé xii-n ñà túú ndùu vétú váha iní-n cuendá nchaa xiá<sup>n</sup>”, duha ní xáha<sup>n</sup> Xítohó Jesucristú xii Tătá-gă Dútú Ndiöxí. Te duca<sup>n</sup> ní xáha<sup>n</sup>-gă cuéi núú tütú ndíi Moisés yódó tnùní sá dúcá<sup>n</sup> càda-güedé. <sup>9</sup>Te sáta dúcá<sup>n</sup> te ní xáha<sup>n</sup> tucu-gă xii Tătá-gă Dútú Ndiöxí: “Yòhó Tătà-í Dútú Ndiöxí, mee-í véxi-í ñuyúí-a cuendá cada-í nchaa nàcuáa cuiní-n”, duha ní xáha<sup>n</sup>-gă xii Tătá-gă. Te sá dúcá<sup>n</sup> ní cáhá<sup>n</sup> Xítohó Jesucristú xiá<sup>n</sup> ní

cutnùní sá ñà túú-gă xíní ñùhu-xi  
 duca<sup>n</sup> cada-güedé cahni-güedé  
 nchaa quiiti-á<sup>n</sup>, te duca<sup>n</sup> chi mee  
 Xítohó Jesucristú ní xíhí-gá ní  
 cuu-gá dàtná ì<sup>n</sup> táhú sá cúú-xí Yă  
 Ndiöxí, te duca<sup>n</sup> ñí cuu chi duca<sup>n</sup>  
 tnàhí ní cachí Yă Ndiöxí cunduu.  
<sup>10</sup>Te Xítohó Jesucristú ní quide-gá  
 nàcuáa ní cuiní Yă Ndiöxí cada-gá,  
 chi ní xíhí-gá núú cùrúxí chi duca<sup>n</sup>  
 ñí cuiní méé-gă cunduu, te ì<sup>n</sup> xito-ni  
 ní xíhí-gá sá cuendá nchaa ñáyiú,  
 te cuendá xíá<sup>n</sup> núú ndècu yíñuhu-o  
 núú-gă vitna.

<sup>11</sup>Te cue dútú ñáyiú isràél chi ì<sup>n</sup>  
 nduu ì<sup>n</sup> nduu ní xóo cahni-güedé  
 quiiti ní xóo nduu táhú-gă, te ñá  
 túú ní dâma-güedé nàcuáa ní xóo  
 cada-güedé. Te nchaa sá ñí xóo  
 cada-güedé-á<sup>n</sup> ñà túú ní quide-xi  
 nacuáa vá cùndècu-gá cuéchi  
 ñáyiú núú Yă Ndiöxí. <sup>12</sup>Dico Xítohó  
 Jesucristú ní cachí-gá sá cúú cùú-gă,  
 te ní xíhí-gá núú cùrúxí cuendá  
 nchaa yícá cuéchi nchaa nchoo  
 ñáyiú ndècu ñuyúú-a. Te sátá dúcá<sup>n</sup>  
 te dàtnùní ní ngóo-gá xio cùha  
 Dútú Ndiöxí táxí tnùní-gá, te vá  
 ì<sup>n</sup> ndùu ì<sup>n</sup> quíú-gă te cuú-gá. <sup>13</sup>Te  
 diu-ni xíá<sup>n</sup> cundecu-gá cundetú-gá  
 ndéé sáá nduu cànehe nchaa sá  
 cúú ùhú iní ñáhá xii-gá sá yíñuhu  
 núú-gă. <sup>14</sup>Te cuendá sá ñí xíhí  
 Xítohó Jesucristú ì<sup>n</sup> xito-ni xíá<sup>n</sup> ní  
 cuu-gá dàtná ì<sup>n</sup> táhú sá cúú-xí Yă  
 Ndiöxí, xíá<sup>n</sup> ní quide-xi sá ncháá  
 ñáyiú cùu cuendá-gá ñá túú-gă  
 ná cumání-yu núú-gă ni caa ni  
 quíhí<sup>n</sup>. <sup>15</sup>Te mee Espíritú Yă Ndiöxí  
 càhá<sup>n</sup> ndáá-xi nàcuáa ní cáhá<sup>n</sup>-gá  
 cuendá-ó, te duha ní cáhá<sup>n</sup>-gá:

<sup>16</sup>Sáá nduu te cada-í nchaa ñáyiú  
 nàcuáa na càhá<sup>n</sup>-í-a,

te cada-í nàcuáa cutnùní iní-yu  
 tnúhu sá dánèhé-í-yu tnúhu  
 sá cánúichi ñaha xií-yu  
 nàcuáa cadá-yu cundecú-yu,  
 te cada tucu-í sá tní<sup>n</sup>-yu nchaa  
 tnúhu-á<sup>n</sup>.

Duha ní cachí-gá. <sup>17</sup>Te ní cachí  
 tucu-gá:

Te vá ì<sup>n</sup> ndùu ì<sup>n</sup> quíú-gă ndacu  
 iní-í sá quidé sàá iní-yu  
 tnúhu-í,  
 te ni vă ì<sup>n</sup> ndùu ì<sup>n</sup> quíú-gă te  
 ndacu iní-í nchaa sá cuèhé sá  
 dúhá quidé-yu.

Duha ní cáhá<sup>n</sup> Yă Ndiöxí càchí  
 Espíritú-gá. <sup>18</sup>Te sá dúcá<sup>n</sup> quide  
 cahnu iní Yă Ndiöxí nchaa cuéchi-o,  
 núú xíá<sup>n</sup> ñá túú-gă xíní ñùhu-xi cuú  
 quiiti nduu táhú-gă cuendá nchaa sá  
 cuèhé sá dúhá quide-o.

#### Tàú-ó sá tnàhá tnúhu-o ndìhi Yá Ndiöxí

<sup>19</sup>Te cue dútú ñí xóo cunuu núú  
 ñáyiú isràél cue téé-á<sup>n</sup> ñí xóo  
 quíhu-güedé xití cuàrtú ní cuu  
 íí víhí-gă. Dico nchoo cuè ñáyiú  
 ndècu ichi Xítohó Jesucristú vitna  
 tàú-ó sá ñè yuhu ni iní-ó tnàhá  
 tnúhu-o ndìhi Yá Ndiöxí. Te cuu  
 tnàhá tnúhu-o ndìhi-gá chi Xítohó  
 Jesucristú ní sati níñí-gă te ní  
 xíhí-gá núú cùrúxí. <sup>20</sup>Te cada iní-ó  
 sá dđó sá ñí xíndedí nàcuáa ní xóo  
 quíhu-güedé xití cuàrtú ní cuu  
 íí víhí-gă-á<sup>n</sup> ñí xócuñí, te duca<sup>n</sup>  
 càda iní-ó chi Xítohó Jesucristú  
 ní xíhí-gá cuendá nchoo níhí-ó  
 nàcuáa cada-o ngündecu váha-o  
 sá cúú-xí-gă. <sup>21</sup>Te diu-gá cúú-gă  
 Yaá cúú dútú-ó, te diu-gá cúú-gă  
 Dútú cùnùu ndecu-gá núú ndécú Yă  
 Ndiöxí. <sup>22</sup>Núú xíá<sup>n</sup> xíní ñùhu-xi sá

ÿo tnahá tnúhu-o ndìhi Yá Ndiöxí, te vá cáni ìi<sup>n</sup> cani úú iní-ó, te ío váha quindáá iní-ó-gă chi ðiu-gá ní ndada ndoo ní ndada nine-gá iní-ó cuendá nchoo cùtnuní iní-ó sã ñà túú-gă cuéchi-o ndècu núú-gă. Te ní sandute-o cuendá sá dúcá<sup>n</sup> nĩ nduu ndoo ní nduu nine iní-ó. <sup>23</sup>Te nchoo cãhá<sup>n</sup> ndáá-ó sã ndécú ndìhi-o tnúhu ndee iní sá ndúú tãhú-ó cùndecu ndìhi-o Yá Ndiöxí, te xini ñuhu-xi sá vã dáñã ndèé-ó cànchicú<sup>n</sup> nihnu-o tnúhu ndee iní-á<sup>n</sup> chi Yá Ndiöxí cada-gá nàcuáa ní cachí-gá sá cúú-xí-ó. <sup>24</sup>Te xini ñuhu-xi cuhu<sup>n</sup> iní tnáhá-ó te chindee tnàha-o nacuáa duca<sup>n</sup> cùu iní tnáhá-gă-ó, te cada-o mèe-ni sá vãha. <sup>25</sup>Te nchoo vã dáñã ndèé-ó nàtacá-ó nũú dácuaàha-o tnúhu Yá Ndiöxí, te vá cáda-ó dàtnã xĩquide davá-yu ñá túú-gă cuiní-yu quixí-yu núú dácuaàha-o tnúhu-gá. Chi xini ñuhu-xi sá cuãha tnàha-o tnúhu ndee iní canchicú<sup>n</sup> nihnu-o ìchi-gá, te uu<sup>n</sup>-gá duca<sup>n</sup> tàú-xi cada-o vitna ta cuyatni nduu quixi tucu Xítohó Jesucristú ñuyíú-a.

<sup>26</sup>Te cue ñáyiu sa ní tecú tnùní nàcuáa cãhá<sup>n</sup> tnúhu Yá Ndiöxí te núu na ngüíta-yu ñucùu<sup>n</sup> cadá-yu nándi sá cuèhé sá dúhá, te àu<sup>n</sup> nã cuu ní xíhi Xítohó Jesucristú cuendá-yu, te ni vã yõo ìi<sup>n</sup>-gá cuú cuendá sá vã cùndècu-gá cuéchi-yu núú Yá Ndiöxí. <sup>27</sup>Te núu duca<sup>n</sup> na càdá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiöxí xí-yu. Chi nchaa ñáyiu cùu úhú iní ñáhã xì-gá daquihí<sup>n</sup> ñáhã-gă xí-yu núú ñùhú núú càyú núú ÿo ndohó-yu. <sup>28</sup>Te nchaa ñáyiu ní xóo daquèe tĩhú tnúhu ní cãhá<sup>n</sup>

ndíi Moisés, te núu ndècu úú àdi úní ñáyiu cãhá<sup>n</sup> ndáá sá dúcá<sup>n</sup> nĩ dáquèé tĩhú-yu tnúhu ní cãhá<sup>n</sup> ndíi, te vá yõo ní xóo cundãhú iní ñáhã xìi nchaa ñáyiu duca<sup>n</sup> nĩ xóo cada chi ní xóo cahni ñaha-güedé. <sup>29</sup>Te núu duca<sup>n</sup> nĩ ndoho cue ñáyiu duca<sup>n</sup> nĩ dáquèé tĩhú tnúhu ní cãhá<sup>n</sup> ndíi Moisés-á<sup>n</sup>, te uu<sup>n</sup>-gá ndoho cue ñáyiu dàquee tĩhú ñáhã xìi Xítohó Jesucristú Yaá cúú Dèhe Yá Ndiöxí ðiu-ni ñáyiu cãchí sá ñà túú nãndíhi níñí-gă. Te níñí-gă-á<sup>n</sup> nĩ sati, te ní xíhi-gá, te duca<sup>n</sup> nĩ cuu cuendá cada Yá Ndiöxí ingá núú sã vãha sá cúú-xí nchòo ñáyiu ndècu ñuyíú-a dàtnã ní cachí-gá cada-gá. Te ðiu-ni cuendá níñí-gă-á<sup>n</sup> nĩ nduu ndoo ní nduu nine iní cue ñáyiu-á<sup>n</sup> ní cùu, te ðiu-ni ñáyiu-á<sup>n</sup> cãhá<sup>n</sup> úhú-yu Espíritú Yá Ndiöxí sá chindèe chitúu ñaha xii-o. <sup>30</sup>Te nchoo sã naha-o sá Yá Ndiöxí cãchí-gá ìi<sup>n</sup> xichi núú tütú-gá: “Yúhú cada-í te nacháhu ñáyiu nchaa sá quidè-yu, te duha cãhá<sup>n</sup>-í chi nachinaa-í cuendá nchaa sá quidè-yu-á<sup>n</sup>”, duha cãchí-gá. Te sa naha tucu-o nacuáa cãhá<sup>n</sup>-xi núú tütú-gá núú cãchí-xi: “Yá Ndiöxí cada ndáá-gá cuendá nchaa sá quidè ñáyiu cùu cuendá-gá”, duha cãchí-xi núú tütú-gá. <sup>31</sup>Íte ío ndàhú ndoho cue ñáyiu na dàndoho ñaha Yá Ndiöxí, te ðiu-gá cúú-gă Yaá cúnùu nchaa nduu nchaa quíú!

<sup>32</sup>Te chí dándàcu iní nàcuáa ní quide-ndo cùtnáhã vitna cuu saa ní tecú tnùní-ndó tnúhu Yá Ndiöxí, chi dàvá-á<sup>n</sup> nĩ quide cãhnu iní-ndó cuèi nándi sá ní yãha-ndo cuendá-gá. <sup>33</sup>Te dava-ndo ní quide úhú ñáhã ñáyiu xii-ndo nũú chítú nũú tàcã, te nándi

tnúhu cuèhé tnúhu duha ní xáhã<sup>n</sup>-yu xii-ndo. Te dava-ndo ní cuyii-ni-ndo ní xindecu ndihi tnàha-ndo cuèi nándi ní ndoho dava-gá-ndó. <sup>34</sup>Te ní cundàhú iní-ndó cuè ñáyiú yìhi vecaá, te cuèi ní quendeé ñáyiú sá ndécú ndihi-ndo dico ñá túú ní ndǐhú iní-ndó chi ní cudǐí-ni iní-ndó. Te duca<sup>n</sup> ní quide-ndo chi sa nàha-ndo sá ndúú tǎhú-ndó sǎ ïo-gá váha, te xǐǎ<sup>n</sup> cundecu ndihi-ndo nì caa nì quǐhǐ<sup>n</sup>. <sup>35</sup>Te xǐǎ<sup>n</sup> vá dàñá ndèé-ndó quindáá iní-ndó nàcuáa ní cachí Yǎ Ndiöxí cada ñaha-gǎ xii-ndo, chi sáá nduu te ío váha cada ñaha-gǎ xii-ndo. <sup>36</sup>Te nchòhó xíní ñùhu-xi ío cada ndee iní-ndó càda-ndo nchaa nacuaa càhá<sup>n</sup> Yǎ Ndiöxí, te duca<sup>n</sup> te nduu táhú-ndó sǎ nì cachí-gá nduu táhú-ndó cundecu ndihi-ndo nì caa nì quǐhǐ<sup>n</sup>. <sup>37</sup>Te Yǎ Ndiöxí càchí-gá núú tütú-gá:

Ta cùyatni vií-nǎ nduu quìxi Yaá quixi ñuyíú-a, te vá cùyàa-gá.

<sup>38</sup>Te nchaa ñáyiú cundáá núú-í ñá túú dàña ndeé-yu sàndáá iní ñáhã-yu xii-í, te cuendá xǐǎ<sup>n</sup> cundecu-ní-yu ichi-í, dico núu na dàñá-yu ichi-í te vá cúú vǎha iní-í núú-yu.

Duha càchí Yǎ Ndiöxí núú tütú-gá.

<sup>39</sup>Dico nchoo chi ñá túú cùu-o ñáyiú duca<sup>n</sup> xiquide dàñá-ó ìchi Yǎ Ndiöxí, chi cùu-o ñáyiú nchicú<sup>n</sup> nihnu-ni sàndáá iní-ó-gǎ, te sá dúcá<sup>n</sup> te nduu táhú-ó cundecu-o ndihi-gá nì caa nì quǐhǐ<sup>n</sup>, te ñá túú cùu-o ñáyiú dàña nihnu ichi-gá te xǐta nihnú-yu.

Ñáyiú sàndáá iní ñáhã xii Yǎ Ndiöxí

**11** Te núu sàndáá ndisa iní-ó Yǎ Ndiöxí te duca<sup>n</sup> cùtnuní

ndáá iní-ó sǎ nihí-ó sǎ cuíní-ó nǔú-gǎ. Te núu sàndáá iní-ó-gǎ te duca<sup>n</sup> cùtnuní ndáá tucu iní-ó sǎ càhá<sup>n</sup> ndáá-gá cuendá nchaa sá ñà túú xíní-ó. <sup>2</sup>Te duca<sup>n</sup> ní quide ñáyiú ní xindecu ndéé sanaha ío ní sàndáá iní-yu Yǎ Ndiöxí te xǐǎ<sup>n</sup> nǔú ío váha ní cuu iní ñáhã-gǎ xii-yu.

<sup>3</sup>Te núu nchoo sàndáá ndisa iní-ó Yǎ Ndiöxí te cùtnuní ndáá iní-ó sǎ sǎ cuendá tnúhu ní càhá<sup>n</sup>-gá ní cuáha andiu ndihi ñuyíú-a. Te cùtnuní iní-ó sǎ ñà dǐú sǎ cuendá ìí<sup>n</sup> sá tǔu ndèhe-o ío ñuyíú-a ní cuáha andiu ndihi ñuyíú-a.

<sup>4</sup>Te ndíi Àbél ío ní sàndáá iní ndíi Yǎ Ndiöxí nǔú xǐǎ<sup>n</sup> ío-gá ní cuu iní-gá sá nì sǎñaha ndíi ní nduu táhú-gǎ dàcúúxí sǎ nì sǎñaha ndíi Cǎin xii-gá ní nduu táhú-gǎ. Te ndíi Àbél-á<sup>n</sup> nì cutnùní iní ndíi sá nì cudǐu ndíi núú Yǎ Ndiöxí cuendá sá nì quehe<sup>n</sup> cuendá-gá sá nì sǎñaha ndíi ní nduu táhú-gǎ. Te cuèi ñá túú-gǎ ndíi ndècu ñuyíú-a dico yòdo tnuní sá nì sàndáá iní ndíi Yǎ Ndiöxí cuendá duca<sup>n</sup> càda-o canchicú<sup>n</sup> nihnu-o.

<sup>5</sup>Te té Ènóc téé ní xindecu ndéé sanaha ñà túú ní xǐhí-dé chi ní nacuaca ñaha túu Yǎ Ndiöxí xii-dé cuendá sá nì sàndáá iní ñáhã-dé xii-gá. Te vá yòo nì nànihí ñáhã xii-dé chi mee-gǎ ní nacuaca ñaha-gǎ xii-dé. Te núú tütú Yǎ Ndiöxí càchí-xi sá cùtnàhá vátá nàcuàca ñaha-gá xii té Ènóc, te ní quide-dé mee-ni nàcuáa ní cuu váha iní ñáhã-gǎ xii-dé. <sup>6</sup>Te nchaa ñáyiú ñá túú sàndáá iní ñáhã xii Yǎ Ndiöxí ñá ndácú-yu cadá-yu nàcuáa cudǐu-yu núú-gǎ, chi nchaa ñáyiú cuíní tuha ñaha xii-gá xíní ñùhu-xi

sá quíndáá iní-yu sá ndécú-gă, te quíndáá iní-yu sá nũu na nànducu nihnu ñahá-yu xii-gá te cuañaha-gă xii-yu sá ndúú tǎhũ-yu.

<sup>7</sup>Te Yá Ndiöxí ní dátũha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáha<sup>n</sup> Yá Ndiöxí cada ndíi, te ní cadúha ndíi ì<sup>n</sup> bàrcú cuèndá xití bàrcú-á<sup>n</sup> quèe ndíi ndíhi nchaa ñáyiú vehe ndíi cuèndá cácu nihnú-yu. Te duca<sup>n</sup> ñí quide ndíi chi ní sándáá iní ndíi Yá Ndiöxí. Te sá dúcá<sup>n</sup> ñí sándáá iní ndíi-á<sup>n</sup> Yá Ndiöxí xíá<sup>n</sup> ní cutnùní sá ncháá ñáyiú ío ndècu cuèchi-yu, chi ñá túú ní cànchicú<sup>n</sup> nihnú-yu cadá-yu nàcuáa ní quide ndíi. Te sá dúcá<sup>n</sup> ñí quide ndíi ní sándáá iní ndíi Yá Ndiöxí xíá<sup>n</sup> ío ní cundáá ndíi núú-gă.

<sup>8</sup>Te Yá Ndiöxí ní xáha<sup>n</sup>-gă xii ndíi Àbrahám sá quèe ndíi ñuú núú ndécú ndíi quíhí<sup>n</sup> ndíi ìngá xichi cundecu ndíi. Te ní quide ndíi nàcuáa ní xáha<sup>n</sup> Yá Ndiöxí chi ní quee ndíi cuáhá<sup>n</sup> ndíi núú cuañaha Yá Ndiöxí cundecu ndíi. Te óré ní quee ndíi núú ndécú ndíi te ñá túú ní cùnùní iní ndíi ndèe cúú nũú cuáhá<sup>n</sup> ndíi cundecu ndíi. Te duca<sup>n</sup> ñí quide ndíi chi ní sándáá iní ndíi Yá Ndiöxí. <sup>9</sup>Te sá dúcá<sup>n</sup> ñí sándáá iní ndíi Yá Ndiöxí nũu xíá<sup>n</sup> ní xíndecu ndíi núú ñí sǎñaha-gă cundecu ndíi, te cuèi duca<sup>n</sup> dico ñá túú ní quide ñuú ndíi xíá<sup>n</sup>. Te ní xóo cundecu ndíi vehe cùtèxínu vehe dóó. Te diu-ni duca<sup>n</sup> ñí quide ndíi Isàac ndíhi ndíi Jàcób chi tñahá cue ndíi-á<sup>n</sup> ñí cachí Yá Ndiöxí sá ndúú tǎhú cue ndíi xíá<sup>n</sup> cundecu cue ndíi. <sup>10</sup>Te duca<sup>n</sup> ñí quide ndíi Àbrahám chi ní xíndetu ndíi ndéé ní sáá nduu

ndùu tǎhú ndíi cundecu ndíi núú ndécú Yá Ndiöxí. Te núú ndécú-gă-á<sup>n</sup> cúú-xí ñuú ní cadúha mee-gă, te ñuú-á<sup>n</sup> cudíi-xi ñí caa ñí quíhí<sup>n</sup>.

<sup>11</sup>Te ndíi Sǎrá, sa ní xídó cuíá ndíi sá cóó dèhe ndíi chi sa ní sahnu vìhi ndíi, dico Yá Ndiöxí ní quide-gă te ní xóo ì<sup>n</sup> déhe ndíi. Te duca<sup>n</sup> chi ní sándáá iní ndíi Yá Ndiöxí te ní cutnùní ndáá iní ndíi sá cadá-gă nàcuáa ní xáha<sup>n</sup>-gă xii ndíi. <sup>12</sup>Te cuèi ío ní sahnu ndíi Àbrahám ndíhi ñadìhí ndíi, ndíi Sǎrá dico dacuitíí ñí nduu tǎhũ-yu ní xóo ì<sup>n</sup> déhe-yu. Te xíá<sup>n</sup> nũu ío cuéhe ndíquí<sup>n</sup> yává ndíi Àbrahám ní cáyá dàtná cuéhe chòdíní ndèe andíu, ndíhi dàtná cuéhe ñuhu cúchí làmár, chi ni vǎ yóo ì<sup>n</sup> ndacu cahu ñaha xii-yu sá cuèhè-yu.

<sup>13</sup>Te cue ndíi-á<sup>n</sup> duca<sup>n</sup>-ni ñí sándáá iní cue ndíi Yá Ndiöxí ndéé ní sáá nduu ñí xíhí cue ndíi. Te cue ndíi-á<sup>n</sup> ñà túú ní ndùu tǎhú cue ndíi quíní cue ndíi nchaa nàcuáa ní cachí Yá Ndiöxí cada-gă, dico ní cutnùní ndáá iní cue ndíi-á<sup>n</sup> nàcuáa cada-gă núú cuáhá<sup>n</sup> núú vèxi. Te ío ní cudíí ìní cue ndíi, te ní cachí cue ndíi sá dícó-ni ichi yáha cue ndíi ñuyíú-a, chi ñá díú ñùyíú-a cundecu duca<sup>n</sup> cuè ndíi. <sup>14</sup>Te sá dúcá<sup>n</sup> ndùu tñúhu ní cáhá<sup>n</sup> cue ndíi-á<sup>n</sup>, xíá<sup>n</sup> ní cutnùní sá cuíní cue ndíi ìngá xichi núú cùndècu cue ndíi. <sup>15</sup>Te ni ñà díú ñuú núú ñí quee cue ndíi ni cuíní cue ndíi núhú cue ndíi. Chi núu duca<sup>n</sup> ni sàni iní cue ndíi te núhú cue ndíi ni cùu. <sup>16</sup>Dico ñáhá chi cuíní cue ndíi quíhí<sup>n</sup> cue ndíi ì<sup>n</sup> xichi núú vǎha-gă cáá cùndecu cue ndíi. Te núú dúcá<sup>n</sup> ño-gá vǎha càa-á<sup>n</sup> cúú-xí ñuú núú ndécú Yá

Ndiöxí, te sá dúcá<sup>n</sup> nĩ sani iní cue ndíi xíá<sup>n</sup> nõu ío váha cùu iní Yá Ndiöxí càchí-gá sá ñà túú cùcaha<sup>n</sup> núú-gã cúú-gã Ndiöxí cue ndíi-á<sup>n</sup>, te cùtnuní iní-ó sã ndàà sá dúcá<sup>n</sup> càhá<sup>n</sup>-gá chi ní quide túha-gá iĩ<sup>n</sup> xichi núú cùndècu cue ndíi-á<sup>n</sup>.

<sup>17</sup>Te ndíi Àbrahám ní xíndecu iĩ<sup>n</sup>dii-ni déhe ndíi ndíhi ñadĩhí ndíi, te cùtnàhá ní xito ndéé ñáhá Yá Ndiöxí xii ndíi ní xícá<sup>n</sup>-gá déhe ndíi, ndíi Isàác cuendá nduu táhú ñáhá-gã xii ndíi. Te ní xáha<sup>n</sup> ndíi sá cúú ndùu táhú-gã déhe ndíi, te duca<sup>n</sup> nĩ quide ndíi chi ní sándáá iní ñáhá ndíi xii-gá. Te sa ndècu túha ndíi sá cuãñaha ndíi déhe ndíi xii-gá cuèi mee Yá Ndiöxí ní xáha<sup>n</sup> ndáá-gá xii ndíi <sup>18</sup>sá sã cuendá ndíi Isàác te ngúndecu cue ñaní tnáhá ndíi. <sup>19</sup>Te duca<sup>n</sup> nĩ quide ndíi Àbrahám, chi ní cutnùní ndáá iní ndíi sá Yá Ndiöxí ndácú-gã dándòto-gá cuèi ñáyiú sa ní xíhí. Te sá dúcá<sup>n</sup> nĩ xáha<sup>n</sup> ndíi xii Yá Ndiöxí sá cúú ndùu táhú-gã déhe ndíi, te xíá<sup>n</sup> cada iní-ó sã sà ní xíhí ndíi Isàác te ní ndoto tucu ndíi ní nucúndecu ndíi ndíhi tãtá ndíi, ndíi Àbrahám.

<sup>20</sup>Te ndíi Isàác ní xícá<sup>n</sup> táhú ndíi núú Yá Ndiöxí cuendá sá cadá vãha-gá cue déhe ndíi, ndíi Jàcób ndíhi ndíi Esàù núú cuahá<sup>n</sup> núú vèxi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. <sup>21</sup>Te sa ta cùyatni-ná nduu cùú ndíi Jàcób, te ní xícá<sup>n</sup> táhú ndíi núú Yá Ndiöxí cuendá cue déhe ñaní ndíi déhe ndíi Chèé. Te yìtuu-ná ndíi tatnu ndíi ní chiñuhu ndíi Yá Ndiöxí. Te duca<sup>n</sup> nĩ quide ndíi chi ní sándáá iní ñáhá ndíi xii-gá. <sup>22</sup>Te cùtnàhá sa ta cùyatni víí-nã nduu cùú

ndíi Chèé, te ní cachí ndíi sá cuè ñáyiú isràél sáá nduu quèè-yu núú xíndecú-yu-á<sup>n</sup>. Te ní cáhá<sup>n</sup> tucu ndíi nàcuáa cadá-yu yiqui cùñú ndíi na sàá nduu quèè-yu núú ndécü-yu-á<sup>n</sup>. Te duca<sup>n</sup> nĩ quide ndíi chi ní sándáá iní ndíi Yá Ndiöxí.

<sup>23</sup>Te cùtnàhá ní cacu ndíi Moisés te ní chiváha ñaha ñaná ndíi ndíhi tãtá ndíi úní yóó. Te duca<sup>n</sup> nĩ quide cue ndíi-á<sup>n</sup> chi ní sándáá iní cue ndíi Yá Ndiöxí. Te ní quide cuendá cue ndíi-á<sup>n</sup> sã ío váha càa ndíi Moisés déhe cue ndíi, te ñá túú ní yùhú cue ndíi nàcuáa ní cáhá<sup>n</sup> tée cùu Faraón sá cáhni-dě cue landú. <sup>24</sup>Te sátá nĩ sahnu ndíi Moisés te duu<sup>n</sup> duu<sup>n</sup> ní cachí ndíi sá vã càhá<sup>n</sup> ñáyiú sá dèhe yoco tée cùu Faraón cúú ñaná ndíi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. <sup>25</sup>Te duca<sup>n</sup> nĩ quide tucu ndíi chi ní tnahá-gá iní ndíi ndoho ndíi ndíhi nchaa ñáyiú cùu cuendá Yá Ndiöxí dàcúúxí sã cùdĩ iní ndíi cundecu tnaa ndíi ichi cuèhé ichi duha. <sup>26</sup>Chi ní sani iní ndíi sá vãha-gá ndoho ndíi cùcuèhé ñáhá cuè ñáyiú xii ndíi sá cuendá Yaá quixi ñuyúú-a dàcúúxí sã cùndècu ndíhi ndíi nchaa sá lò Ègiptú. Te duca<sup>n</sup> nĩ quide ndíi chi ní xúhu<sup>n</sup> iní ndíi sá Yá Ndiöxí cuãñaha-gã sá ndúú táhú ndíi. <sup>27</sup>Te ndíi Moisés ní quee ndíi nació<sup>n</sup> Ègiptú te ñá túú ní quide cuendá ndíi sá ío cùdèé<sup>n</sup> tée cùu Faraón núú ndíi. Te duca<sup>n</sup> nĩ quide ndíi chi ní sándáá iní ndíi Yá Ndiöxí. Te ní quide càhnu iní ndíi cuendá nchaa sá ñí yáha ndíi, te ní quide iní ndíi sá Yá Ndiöxí ndécú ndíhi ñaha túu-gá xii ndíi cuèi ñá túú ní xíní núú ñáhá ndíi xii-gá. Te



duca<sup>n</sup> nĩ sani iní ndíi chi Yá Ndiöxí ndécú ndìhi ñaha-gá xii ndíi.

<sup>28</sup>Te ndíi Moisés cúu ndíi téé ní tausaha nĩ quide vico pàscuá ndìhi cue ñáyiú isràél, te dàvá-á<sup>n</sup> nĩ táuchíú<sup>n</sup> ndíi ní sahní-yu mběé te níñĩ quiti-á<sup>n</sup> nĩ dácánùú-yu yuyehé-yu. Te duca<sup>n</sup> nĩ quide ndíi chi ní sándáá iní ndíi Yá Ndiöxí. Te duca<sup>n</sup> nĩ quide tucu ndíi cuendá sá espíritú sá nĩ tendaha Yá Ndiöxí cahni-xi mee-ni dēhe téé dēhe díhna cue ñáyiú Ègíptú, te vá cáhni-xí nĩ ì<sup>n</sup> dēhe cue ñáyiú isràél. <sup>29</sup>Te ndute làmár sá nání Mǎr Tícuèhé ní quée dava-xi ní natúu ñuhu yìchí ní níhí nĩ yáha cue ñáyiú isràél. Te duca<sup>n</sup> nĩ cuu chi ní sándáá iní-yu Yá Ndiöxí. Te cue téé Ègíptú tnàhá-güedé nchicú<sup>n</sup>-güedé cuáhá<sup>n</sup> dico ñá túú ní ndàcu-güedé yáha-güedé chi ní ndìhi-güedé ní cáhá.

<sup>30</sup>Te cue ñáyiú isràél ní dúcú<sup>n</sup> ndèé-yu úsá nduu ñuú Jericó te ní ngoyo nchaá sá ñúðòco. Te duca<sup>n</sup> nĩ cuu chi ní sándáá iní-yu Yá Ndiöxí. <sup>31</sup>Te ì<sup>n</sup> ñaha ní xíndecu ichi díí ìnì ní xínani-a<sup>n</sup> Ràháb, ñaha-á<sup>n</sup> ñà túú ní xíhí-a<sup>n</sup> dàtná ní xíhí nchaá ñáyiú ío ní cuu sàá iní-xi núú Yá Ndiöxí, chi ní cuu váha iní-a<sup>n</sup> núú cuè téé ní tendaha cuè ñáyiú isràél ní sángoto dayuhu ñúú-a<sup>n</sup>. Te duca<sup>n</sup> nĩ quide-a<sup>n</sup> chi ní sándáá iní-a<sup>n</sup> Yá Ndiöxí.

<sup>32</sup>Te núu dicó sá cúu te cáhá<sup>n</sup>-í cuendá ndíi Gedèón, ndìhi cuendá ndíi Bàrác, ndìhi cuendá ndíi Sànsón, ndìhi cuendá ndíi Jèfté, ndìhi cuendá ndíi Dàvíí, ndìhi cuendá ndíi Sàmuel, ndìhi cuendá nchaá cue téé ní xóo cáhá<sup>n</sup> tnúhu

Yá Ndiöxí ndéé sanaha, te nchaá cuendá cue téé-á<sup>n</sup> cǎhá<sup>n</sup>-í te núu dicó cùyáchí-í dico ñá túú cùyáchí-í. <sup>33</sup>Te nchaá cue ndíi-á<sup>n</sup> ní sándáá iní cue ndíi Yá Ndiöxí nũu xíá<sup>n</sup> ní xóo ndacu cue ndíi ní xóo nàá cue ndíi ndìhi nchaá ñáyiú dava-gá ñuú. Te nchaá ñáyiú-á<sup>n</sup> ñà túú ní xóo ndacú-yu nàá-yu ndìhi cue ndíi, te ní xóo cada cue ndíi nchaá nàcuáa tàú-xi cunduu, te ní quide váha ñaha Yá Ndiöxí xii cue ndíi dàtná ní cachí-gá cada ñaha-gǎ xii cue ndíi. Te cuèi nchaá cue quiti déé<sup>n</sup> ñà túú ní ndàcu-güedi ná cada ñaha-güedi xii cue ndíi. <sup>34</sup>Te ní xóo ndacu cue ndíi ní xóo ndahvá cue ndíi ñuhú sá vǎ yóo tnàhí ndàcu ndahvá, te ní cácu cue ndíi vá yóo ni ndàcu cahni ñaha xii cue ndíi. Te cue ndíi-á<sup>n</sup> ñà túú nìhí ndéé cuè ndíi ni cùu, dico ní níhí ndéé cuè ndíi chi Yá Ndiöxí ní chindee ñàha-gá xii cue ndíi, te nchaá ndíi-á<sup>n</sup> ío ní níhí ndéé cuè ndíi ní nàá cue ndíi ndìhi nchaá ñáyiú ní cuu úhú iní ñáhá xii cue ndíi, te nchaá ñáyiú duca<sup>n</sup> nĩ xóo nàá ndìhi cue ndíi-á<sup>n</sup> ñà túú ní xóo ndacú-yu nàá ndìhi ñàhá-yu xii cue ndíi chi ní xóo cunú-yu. Te duca<sup>n</sup> nĩ cuu chi ní sándáá iní cue ndíi Yá Ndiöxí. <sup>35</sup>Te dava ñáyiú ðìhí ní nduu táhũ-yu ní ndoto cue ñáyiú ní xíndecu ndìhí-yu ní nucúndecu ndìhi ñaha tùcú-yu.

Te dava ñáyiú ío ní dándóhó ñaha tnaha ñáyiú-yu te ní xíhí-yu, dico ñá túú ní dàñá-yu ichi váha nàcuáa cácu nihnú-yu núú tnàha ñáyiú-yu, te duca<sup>n</sup> chi ní cuiniú-yu sá ndótò-yu ndéé cuèé-gá nàcuáa ngúndecu váha-yu núú ndécú Yá Ndiöxí. <sup>36</sup>Te dava cue ndíi ío ní ndoho cue ndíi chi ío ní cudíquí

ndée ñáhá ñáyiú xii cue ndíi, te ní canihá-yu xii cue ndíi, te dava cue ndíi ní dácútú ñàhá-yu, te ní chihí ñàhá-yu xii cue ndíi vecaá. <sup>37</sup>Te dava cue ndíi ní sahní ñàhá-yu ndíhi yúú. Te dava cue ndíi ní chidava ndáá ñáhá-yu ní xehndé ñáhá-yu ndíhi sièrrá. Te dava cue ndíi ní xito ndée ñáhá-yu te núu ndisa sá sàndáá iní cue ndíi Yá Ndiöxí, te dava cue ndíi ní sahní ñàhá-yu ndíhi machítí. Te mee-ni ñìì mbéé ndíhi ñìì chivá, ní xóo cuu dóó cue ndíi. Te mee-ni ñìì cue quití-án ní xóo cuu dóó cue ndíi cuèi ndèni ní cuu ní xóo caca cuu cue ndíi. Te mee-ni cuè téé ndàhú ní cuu cue ndíi. Te ío ní xóo dandìhú-yu iní cue ndíi, te nándi sá ñì xóo cada ñàhá-yu xii cue ndíi ní xóo dandòho ñàhá-yu. <sup>38</sup>Te cue ndíi-án ìo-gá ní xínduu váha iní cue ndíi dàcúúxí nchàa dava-gá ñáyiú. Te nchaa cue ndíi-án ní xica cuu cue ndíi cuèi nchaa núú ñà túú vǎ yǒ tñàhí ndècu, te cuèi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndèni ní cuu nchíi yaú ní xóo cundecu cue ndíi. <sup>39</sup>Te ío ní cudùu cue ndíi núú Yá Ndiöxí cuendá sá ní sàndáá iní ñáhá cuè ndíi xii-gá. Te cuèi duca<sup>n</sup> ní quide cue ndíi dico ñà túú ní xíní cue ndíi nchaa sá ñì cachí Yá Ndiöxí cada-gá. <sup>40</sup>Te duca<sup>n</sup> ní cuu chi ìì<sup>n</sup> sá ìo-gá váha ní cachí Yá Ndiöxí cada-gá. Te sá dúcá<sup>n</sup> ìo-gá váha ní cachí-gá cada-gá cúú-xí cuendá nchoo ndíhi cuendá cue ndíi-án cuendá sá ñà díú mèe-ni cue ndíi-án cundáá cue ndíi núú-gǎ, chi tñàhá nchoo cundáá-ó núú-gǎ.

Ío cuhu<sup>n</sup> iní-ó Xítohó Jesucristú

**12** Te cue ñáyiú ní xíndecu ndée sanaha ñì quidé-yu

nàcuáa ní cutnùnì sá ñì sándáá iní-yu Yá Ndiöxí. Te cada iní-ó sǎ ncháá ñáyiú-á<sup>n</sup> xíndéhé ñàhá-yu xii-o vitna. Núu xíá<sup>n</sup> xíní ñùhu-xi sá vǎ cádá-ó ñì ìì<sup>n</sup> sá cuèhé sá dúhá chi diu nchaa xíá<sup>n</sup> quidé-xí ñà túú cundáá-ó núú Yá Ndiöxí. Te vǎ cádá cuendá-ó nchàa sá quidé tñèñu iní-ó nàcuáa ndacu-o càda-o nchaa nacuáa càhá<sup>n</sup>-gá. Te ío càhnu cunduu iní-ó càncicú<sup>n</sup> nihnu-o càda-o nchaa nacuáa ní cachí-gá cada-o cundecu-o ñuyúú-a. <sup>2</sup>Te ío cuhu<sup>n</sup> iní-ó Xítohó Jesucristú, chi diu-gá ní quide ní sándáá iní-ó Yá Ndiöxí, te diu-ni duca<sup>n</sup> quide-gá cuèi vitna te cuèi ndée núú cuahá<sup>n</sup> núú vèxi diu-ni duca<sup>n</sup> càda-gá sá quèndáá iní-ó Yá Ndiöxí. Te Xítohó Jesucristú ío ní quide ndee iní-gá ní ndoho-gá te ní xíhí-gá núú cùrúxí, te ñà túú ní quide cuendá-gá cuèi ìì<sup>n</sup> sácá<sup>n</sup> núú cúú-xí sǎ dúcá<sup>n</sup> ní ndoho-gá. Te duca<sup>n</sup> ní quide-gá chi sa ñàha-gá sá ná yǎha sá dúcá<sup>n</sup> ndòho-gá te ío cudíí iní-gá. Te vitna núcóo-gá xio cùha núú núcóo Yá Ndiöxí te tàxi tñuní-gá.

<sup>3</sup>Te xínì ñùhu-xi sá ìo cada cuendá-ndó nàcuáa ní quide Xítohó Jesucristú chi Yaá-án ìo ní quide càhnu iní-gá nchaa sá ñì ndoho-gá ní quide ñàha nchàa ñáyiú ndècu ichi cuèhé ichi duha xii-gá. Te duca<sup>n</sup> càda cuendá-ndó nàcuáa ní quide-gá cuendá sá vǎ túu dusa<sup>n</sup>-ndo, te ní vǎ nátùhú iní-ndó càda-ndo nchaa nacuáa càhá<sup>n</sup>-gá. <sup>4</sup>Te nchòhò dáquèè tìhú-ndó nchàa sá cuèhé sá dúhá dico vátá cáhni ñàha-gá-yu xii-ndo sǎ dúcá<sup>n</sup> quide-ndo. <sup>5</sup>Te ndacu iní-ndó nàcuáa càhá<sup>n</sup> Tàtá-ó Dítú Ndiöxí

dásàhú ñáhá-gǎ xii nchoo cuè ñáyi  
cùu déhe-gá. Te duha càchí-gá núu  
tùtú-gá:

Nchòhó cue déhe mee-ĩ, vá  
cání ìní-ndó sǎ àù<sup>n</sup> nǎ cuu  
dàndoho ñaha-í xii-ndo,  
te ni vǎ nátùhú ìní-ndó òrè  
càhá<sup>n</sup>-í dóho-ndo nàcuáa  
cada-ndo cùndecu-ndo.

<sup>6</sup> Chi mee-ĩ dándòho-í nchaa  
ñáyi cùu ìní-í cuèndá sá  
cúndǎá-yu núu-í,  
te quide úhú-í-yu, te òu-ní-yu  
cùu-yu ñáyi càchí-í cúu  
dèhe-í.

Duha càchí-gá núu tùtú-gá. <sup>7</sup> Te  
ío cada ndee ìní-ndó sǎ dúcá<sup>n</sup>  
dàndoho ñaha Yá Ndiòxí xii-ndo,  
chi quide-gá sá cúu-gǎ Tǎtá-ó. Te  
ñá túu ñi ì<sup>n</sup> tée cùu tǎtá te cachí-ó  
sǎ ñà túu sànu ichi-dé cue déhe-dé  
nàcuáa tàú-xi cunduu. <sup>8</sup> Te núu Yá  
Ndiòxí ñá túu dàndoho ñaha-gá  
xii-ndo dàtná dándòho-gá cue  
ñáyi càchí-gá cúu dèhe-gá, te ñá  
díú dèhe mee-gǎ cúu-ndó te núu  
duca<sup>n</sup>, chi cùu-ndo datná cue ñáyi  
ñá túu cùtnuní yoo cùu tǎtá-xi. <sup>9</sup> Te  
nchoo sà naha-o sá cùtnàhá ní cuu  
landú-ó ñi sanu ichi ñaha tǎtá-ó  
nàcuáa tàú-xi cunduu, te duca<sup>n</sup> ñi  
xóo canehe-o sǎ yíñuhu núu-güedě  
te òu-ni duca<sup>n</sup> nèhe-o sá yíñuhu  
núu-güedě vitna. Te núu duca<sup>n</sup> ñi  
sándǎá ìní-ó tǎtá-ó, te ío-gá xíní  
ñuhu-xi quíndǎá ìní-ó Tǎtá-ó Dütú  
Ndiòxí cuèndá duca<sup>n</sup> ndùu táhú-ó  
cùndecu-ndo ndìhi-gá ñi caa ñi quíhí<sup>n</sup>,  
chi òu-gá cúu-gǎ Yaá ní chihí ìní-ó.  
<sup>10</sup> Te cùtnàhá ní cuu landú-ó, ñá túu  
tìtní nduu ñi càniha tǎtá-ó ñi sanu  
ichi ñaha-güedě xii-o nàcuáa ní cuu  
ìní mée-güedě. Te Yá Ndiòxí duca<sup>n</sup>

dàndoho ñaha-gá xii-o sànu ichi  
ñaha-gá cuèndá cúu-xí sǎ vǎha sá  
cúu-xí-ó, te duca<sup>n</sup> quide-gá cuèndá  
nchoo càda ndǎá-ó dàtná quidé  
mèe-gá. <sup>11</sup> Te òrè véxi ì<sup>n</sup> tnúndòho  
sá cúu-xí-ó te ñá túu cùdí ìní-ó  
chi dándìhú ìní ñáhá-xí xii-o. Te  
nchaa ñáyi ngúnu ichi sá cuèndá  
nchaa tnúndòho-á<sup>n</sup> te ngüíta-yu  
quide ndǎá-yu, te ío vǎha cùu ìní-yu  
ndècú-yu.

**Vá dáquèe tihú-ó tnùhu Yá Ndiòxí**

<sup>12</sup> Te núu xǎ<sup>n</sup> ío chí ndúcú  
ndèe-gá canchicú<sup>n</sup> nihnu-ndo ìchi  
Xítóhó Jesucristú, te vá dícó yica  
cùu ìní-ndó càchicú<sup>n</sup> nihnu-ndo  
ìchi-gá. <sup>13</sup> Te cada váha-ndo  
cùndecu-ndo ichi-gá cuèndá nchaa  
ñáyi sàni ì<sup>n</sup> sani úu ìní-xi níhí  
ndèe-yu cundecú-yu ichi-gá te vá  
ná tùhú ìní-yu canchicú<sup>n</sup> nihnú-yu.

<sup>14</sup> Te nducu-ndo nàcuáa cada-ndo  
cùndecu váha-ndo ndìhi cue tnaha  
ñáyi-ndo, te ío cada váha-ndo  
cùndecu-ndo nacuáa cundǎá-ndó  
núu Yá Ndiòxí chi núu vá dúcá<sup>n</sup>  
càda-ndo te vá ndúu táhú-ndó  
cùndecu-ndo ndìhi-gá. <sup>15</sup> Te ío váha  
cada cuèndá-ndó nàcuáa cada-ndo  
cùndecu-ndo, chi núu ñáhá te vá  
chíndèe ñaha-gá Yá Ndiòxí xii-ndo.  
Te ío váha cada cuèndá tucu-ndo  
nàcuáa cundecu-ndo vǎ cání cuèhè  
ìní-ndó cuèndá Yá Ndiòxí, chi núu  
duca<sup>n</sup> na càda-ndo te dava-gá ñáyi  
ndècú ndìhi-ndo ichi-gá tnàhá-yu  
ngüíta-yu duca<sup>n</sup> càdá-yu, te vá  
cùndècú váha-gá-ndó ndìhí-yu  
ichi-gá. <sup>16</sup> Te cada cuèndá tucu-ndo  
sǎ vǎ cùndècú-ndo ichi díí ìní, te  
ni vǎ dáquèe tihú-ndó ñi ì<sup>n</sup> sá cúu  
cuèndá Yá Ndiòxí dàtná ní quide

ndii Esàú, chi sá cuñaha tătă ndii-á<sup>n</sup> nduu táhú ndii ni cùu ní dama ndii ì<sup>n</sup> cóhó comidá. <sup>17</sup>Te nchòhó sa nàha-ndo sá cùtnàhá ní cuiní ndii Esàú cáca<sup>n</sup> táhú tătă ndii núu Yă Ndiöxí cuendá nchaa sá ndúú tǎhú ndii ni cùu, te ñá túú ní xicá<sup>n</sup> tǎhú tătă ndii núu Yă Ndiöxí nàcuáa cuiní méé ndii ni cùu. Te ní ndáhyú víhí ndii, te cuèi duca<sup>n</sup> ní quide ndii dico ñá túú ní ndàcu-gá ndii nàníhí ndii táhú sǎ ní dama ndii comidá.

<sup>18</sup>Te cue ñáyiú isràél ní sátuhá-yu ì<sup>n</sup> yucu núu càyú ñuhú, te nchòhó ñá túú ndèé duca<sup>n</sup> sàhá<sup>n</sup> tuha-ndo ì<sup>n</sup> yucu núu càyú ñuhú dàtná ní quide cue ñáyiú-á<sup>n</sup>. Te cùtnàhá duca<sup>n</sup> ní sátuhá-yu yucu-á<sup>n</sup> te ní cunee vîhi níhií yucu-á<sup>n</sup>, te ní quene táchí níhi. <sup>19</sup>Te ní tecú dóho-yu ní cáhá<sup>n</sup> ì<sup>n</sup> cútú, te ní tecú tucu dóho-yu ní cáhá<sup>n</sup> Yă Ndiöxí ní cáhá<sup>n</sup> ndihi ñaha-gǎ xií-yu. Te nchaa ñáyiú ní tecú dóho-xi ní cáhá<sup>n</sup>-gá te ní cuiní-yu sá vǎ càhá<sup>n</sup>-gá. <sup>20</sup>Te duca<sup>n</sup> ní quidé-yu chi ñá túú ní cùndee iní-yu nàcuáa ní cáhá<sup>n</sup>-gá, te duha ní cachí-gá: “Te cuèi ì<sup>n</sup> quiti nà yáha xití yucu-a, te cahni-ndo-dí ndihi yúú àdi ndihi ì<sup>n</sup> yutnu puyá”, duha ní cachí-gá. <sup>21</sup>Te sá dúcá<sup>n</sup> ní quide-xi ní xiní-yu xǎ<sup>n</sup> ío ní dáyùhú ñáhá-xí xǎ<sup>n</sup>-yu. Te tnhá té Moisés ní yùhú-dé, te ní cachí-dé: “Quèi ñaha-xi xii-í sá yùhú-í”, duha ní cachí-dé.

<sup>22</sup>Te nchòhó, ñá túú quide-ndo datná ní quide cue ñáyiú-á<sup>n</sup> ní sáhá<sup>n</sup> tuhá-yu yucu-á<sup>n</sup>, dico cada iní-ndó sǎ sǎ ní tuha-ndo yùcu Sión sá ndécú nǔú ndécú Yă Ndiöxí, ndihi ñúú-gá ñúú Jerusalén sá cáá àndiu

te diu-gá cúú-gǎ Yaá ndécú nchaa nduu nchaa quíú. Te diu-ni xǎ<sup>n</sup> xǎndecu cuéhé víhí cuè espíritú xinú cuèchi núú-gǎ <sup>23</sup>chíñùhu ñaha-xi xii-gá. Te nchòhó cúú-ndó cuè ñáyiú cùu cuendá Yă Ndiöxí, te ní tnhá tñuhu-ndo ndihi nchaa dava-gá ñáyiú cùu cuendá-gá, ñáyiú yòdo tnuí núú tütú-gá ndécú àndiu, te diu-ni ñáyiú-á<sup>n</sup> cuñaha-gǎ xií-yu sá ndúú tǎhǔ-yu. Te nchòhó ní tuha-ndo Yă Ndiöxí Yaá cada ndáá yícá cuèchi nchaa ñáyiú. Te cada iní-ndó sǎ ní tnhá tñuhu-ndo ndihi cue ñáyiú ní quide ndáá ní xǎndecu ichi Yă Ndiöxí ñuyú-a. Te ñáyiú-á<sup>n</sup> ñá túú tnhá-gá ná cùmǎñi-yu vitna ndécú-yu núú-gǎ. <sup>24</sup>Te ní tnhá tñuhu-ndo ndihi Xítóhó Jesucristú Yaá ní quide nàcuáa cada Yă Ndiöxí ìngá núú sǎ vǎha sá cúú-xí nchaa nchoo ñáyiú ndècu ñuyú-a, chi ní sati níñi-gǎ te ní xǎhí-gá núú cùrúxi. Te níñi Xítóhó Jesucristú ñá túú ì<sup>n</sup>-ni cuu-xi ndihi níñi ndii Àbél, chi diu cuendá níñi-gǎ-á<sup>n</sup> ní quide càhnu iní Yă Ndiöxí nchaa cuèchi-o.

<sup>25</sup>Núu xǎ<sup>n</sup> ío cada cuendá-ndó vǎ dáquèe tihú-ndó tñuhu càhá<sup>n</sup> Yă Ndiöxí, chi nchaa ñáyiú ní xǎndecu ndéé sanaha dùca<sup>n</sup> ní quidé-yu ní dáquée tǎhǔ-yu tñuhu ní cáhá<sup>n</sup>-gá ñuyú-a sá cúú-xǎ<sup>n</sup>-yu. Te ñá túú ní cǎcu-yu chi ní nacháhu-yu sá dúcá<sup>n</sup> ní quidé-yu. Te uu<sup>n</sup>-gá tucu nchoo chi vǎ cǎcu-o te núu duca<sup>n</sup> na dàquee tihú-ó tñuhu càhá<sup>n</sup> Yă Ndiöxí ndéé àndiu sǎ cúú-xǎ<sup>n</sup>-ó. <sup>26</sup>Te cùtnàhá ní cáhá<sup>n</sup> Yă Ndiöxí ndéé sanaha te ní quidi-xi ñuyú. Te vitna càchí-gá: “Yúhú quidi tucu-í ìngá xito ñuyú, te ñá dǎú mèe-ni ñuyú duca<sup>n</sup> quidi-í chi tnhá àndiu

quèdi-í”, càchí-gá. <sup>27</sup>Te sá dúcá<sup>n</sup> cãhá<sup>n</sup>-gá sá ìngá xito tucu duca<sup>n</sup> càda-gá xíã<sup>n</sup> cútnùnì sá ncháándì túhú sá túu ndèhe-o danaa-gá. Te nchaa sá ñà túú ndèé túu quíní-ó ñyúí-a xíã<sup>n</sup> vá quídí-xí te ni vã náá-xí. <sup>28</sup>Te núú nĩ cachí Yã Ndiöxí nduu táhú-ó cùndecu-o chi mee-gã táxí tnùnì-gá xíã<sup>n</sup>, te ni vã quídí-xí te ni vã náá-xí. Te xíã<sup>n</sup> ío xìni ñuhu-xi ndacá<sup>n</sup> táhú-ó núú-gã, te yĩñuhu yĩñuhu cunu cuechi-o núú-gã nàcuáa cuu váha iní-gá, te duca<sup>n</sup> cùhu<sup>n</sup> iní-ó sã ïo càhnu cuu-gá. <sup>29</sup>Te Tãtá-ó Dütú Ndiöxí cúú-gã dàtná ì<sup>n</sup> ñuhú chi danàa-gã nchaa sá ñà túú quide nacuáa cuu váha iní-gá.

Nàcuáa tàù-xi cada-o cuèndá  
cuu váha iní Yã Ndiöxí

**13** Te nchaa nchòhó ñáyiú ndècu ichi Xítóhó Jesucristú, vá dáñá ndèé-ndó cùu iní tnáhá-ndó nàcuáa ndècu-ndo ichi-gá. <sup>2</sup>Te cunaha-ndo sã núu ìò ñáyiú ñùhu ichi ní quexìó-yu vehe-ndo te cuãñaha-ndo vèhe ndetatú-yu, te cuãñaha-ndo sã cãxí-yu. Chi davá-yu ndéé espíritú xínú cuèchi núú Yã Ndiöxí ní sáhá<sup>n</sup> vehé-yu ní quehe<sup>n</sup> cuèndá-yu te ñá túú ní cùtnuní iní-yu sá díú espíritú xínú cuèchi núú-gã cúú-xí.

<sup>3</sup>Te ndacu tucu iní-ndó cuè ñáyiú xìxíhi vecaá, te cada iní-ndó sã tnàhá-ndó yìhi-ndo vecaá ndihí-yu. Te ndacu tucu iní-ndó nchàa ñáyiú ío ndòho, te cada iní-ndó sã tnàhá-ndó ndòho-ndo ndihí-yu.

<sup>4</sup>Te nchaa ñáyiú na càchí-yu sá ì<sup>n</sup> sá váha cùu-xi sá ì<sup>n</sup> téé ndihí ì<sup>n</sup> ñàdihí ná nihí tnáhá-yu

candeca tnàhá-yu. Te nchòhó cue téé vá cání ìní-ndó cãhá<sup>n</sup> ndihí-ndo ñàdihí te núu ñá díú ñàdihí-ndó cùú-yu. Te duca<sup>n</sup>-ni nchòhó cue ñáyiú dèhí tucu vá cání ìní-ndó cãhá<sup>n</sup> ndihí-ndo téé te núu ñá díú yìhi-ndo cuu-güedé, chi Yã Ndiöxí dandòho-gá nchaa ñáyiú ndècu ichi díí ìní.

<sup>5</sup>Te vá cúhú<sup>n</sup> ìní-ndó mèe-ni díhú<sup>n</sup>. Te núu nándi cùu nchaa sá ndécú ndihí-ndo te diu-ni nchaa xíã<sup>n</sup> sa nduu vétú iní-ndó, chi Yã Ndiöxí ní cachí-gá: “Nĩ ì<sup>n</sup> nduu vá dáñá nihnu ñaha-í xii-ndo, chi nchaa-ni nduu chindee ñaha-í”, duha ní cachí-gá. <sup>6</sup>Te xíã<sup>n</sup> núu nchoo ñi yuhu ñi iní-ó cãhá<sup>n</sup>-ó ì<sup>n</sup> ì<sup>n</sup>-o, te cachí-ó:

Yã Ndiöxí cúú-gã Yaá chíndèe  
ñaha xii-í,  
núu xíã<sup>n</sup> ñá túú yùhú-í cuèi  
nándi càhá<sup>n</sup> ñáyiú cada  
ñàhá-yu xii-í.

Duha cachí-ó.

<sup>7</sup>Chí ndácú ìní cue téé ní sanu ichi ñaha xii-ndo ichi Xítóhó Jesucristú cue téé ní cãhá<sup>n</sup> tnúhu Yã Ndiöxí núú-ndó, te ío váha chí nàcuãha cuèndá nàcuáa ní quide nchaa cue téé-á<sup>n</sup> nĩ xíndecu-güedé ndéé ní sáá nduu nĩ xíhí-güedé. Te ío quíndáá iní-ndó Yã Ndiöxí dàtná ní xóo cada cue téé-á<sup>n</sup>.

<sup>8</sup>Te dàtná-ni ní quide Xítóhó Jesucristú ndéé sanaha diu-ni duca<sup>n</sup> quide-gá vitna, te diu-ni duca<sup>n</sup> càda-gá ndéé núú cuàhá<sup>n</sup> núú vèxi. <sup>9</sup>Te vá dáñá-ndó mèe-ndo dandahú ñáhá ñáyiú dacàhá<sup>n</sup> ñáhá xii-ndo natuha-ndo ìngá ichi, ñáyiú dànehé tnàha ñáyiú-xi nándi sá nĩ cutúha-yu, te nchaa xíã<sup>n</sup> ñá túú

î<sup>n</sup>-ni cahá<sup>n</sup>-xi ndîhi tnúhu sá ndécú ndîhi-ndo. Te Yá Ndiöxí chîndèè ñaha-gá xii-o nàcuáa níhí ndéé-ó cùndecu-o ichi-gá, te duca<sup>n</sup> te cuu-xi sá vãha sá cúú-xí-ó, te ñá dǎú cuèndá î<sup>n</sup> sá xéxí-ó ñihí ndéé-ó ndècu-o ichi-gá. Te dava ñáyiú cächí-yu sá dává núú comidá cuu caxi-o te dava ñáhá nàcuáa níhí ndéé-ó cùndecu-o ichi-gá, dico ñá ndàà sá sǎ dúcá<sup>n</sup> vã cǎxí-ó nchàa núú comidá níhí ndéé-ó cùndecu-o ichi-gá.

<sup>10</sup>Chi Xítóhó Jesucristú ní xíhí-gá cuèndá-ó núú cùrúxí, te nchaa ñáyiú nchìcú<sup>n</sup> nihnu-ni quide nchaa nacuáa ní quide nchaa dútú ñǎ xinu cuechi núú Yá Ndiöxí ndéé sanaha, ñáyiú-á<sup>n</sup> vã cúú tnàhá tnúhu-yu ndîhi Xítóhó Jesucristú Yáá ní xíhí núú cùrúxí sá dúcá<sup>n</sup> quidé-yu. <sup>11</sup>Chi dútú cúnù-gá ní xíndecu ndîhi cue ñáyiú isràèl, téé-á<sup>n</sup> ñǎ xóo canehe-dé ñíñí nchaa quiti ní xóo cahni-dé ní xóo quíhu ndéé xití cuàrtú ní cuu íí-gǎ. Te duca<sup>n</sup> ñǎ xóo cada dútú-á<sup>n</sup> cuèndá cada càhnu iní Yá Ndiöxí nchaa yícá cuèchi ñáyiú, te cuñú nchaa quiti-á<sup>n</sup> ñǎ xóo cahmi-güedé î<sup>n</sup> xio yuhu ñúú. <sup>12</sup>Te duca<sup>n</sup> ñǎ yáha Xítóhó Jesucristú chi ndéé î<sup>n</sup> xio yuhu ñúú ní sahní ñaha-güedé xii-gá. Te cuèndá ñíñí-gǎ sá ñǎ sati núú cùrúxí núú ñǎ xíhí-gá, ní nduu ndoo ní nduu nine iní cue ñáyiú sàndáá iní ñáhá xii-gá. <sup>13</sup>Te vitna chí ná tùha-o Xítóhó Jesucristú te cada ndee iní-ó ndòho-o datná ní ndoho-gá. <sup>14</sup>Te ñuyúú-a ni î<sup>n</sup> xichi ñá túú ndéé cáá î<sup>n</sup> ñúú cudí ni caa ni quíhí<sup>n</sup> cuèndá cundecu-o, dico duca<sup>n</sup>-ni ñùhu iní-ó î<sup>n</sup> xichi núú ndúú tǎhú-ó cùndecu-o ni caa ni quíhí<sup>n</sup>.

<sup>15</sup>Te núu xíá<sup>n</sup> xíní ñùhu-xi sá vã dáñá ndéé-ó chîñuhu-o Dútú Ndiöxí chi Xítóhó Jesucristú ní quide-gá nàcuáa ndacu-o tnàhá tnúhu-o ndîhi Yá Ndiöxí, te òré càhá<sup>n</sup> ndîhi-o-gǎ te nuu núu ndacá<sup>n</sup> tǎhú-ó núú-gǎ. Te nchaa tnúhu càhá<sup>n</sup>-ó òré càhá<sup>n</sup> ndîhi-o-gǎ cúú-xi dàtná î<sup>n</sup> tǎhú sǎ cúú-xí-gǎ. <sup>16</sup>Te vá dáñá ndéé-ndó càda-ndo mee-ni sá vãha cundecu-ndo, te duca<sup>n</sup> chîndee tnaha-ndo î<sup>n</sup> î<sup>n</sup>-ndo ndîhi sá ndécú ndîhi-ndo. Te núu duca<sup>n</sup> na càda-ndo te cani iní-ndó sǎ cúú-xí dàtná î<sup>n</sup> tǎhú sǎ ïo vãha cùu iní Yá Ndiöxí.

<sup>17</sup>Te quindáá iní-ndó càda-ndo nchaa nacuáa càhá<sup>n</sup> cue téé yìndaha ñaha xii-ndo nacuáa ndècu-ndo ichi Xítóhó Jesucristú, chi diu cue téé-á<sup>n</sup> quidé cuèndá ñáhá-güedé xii-ndo nàcuáa cundecu vãha-ndo núú-gǎ. Te sáá nduu nàcani tnúhu-güedé núú-gǎ núú ní quide vãha-güedé àdi ñá túú ní quide vãha-güedé ní xíndecu ndîhi ñaha-güedé xii-ndo. Te núu duca<sup>n</sup> na càda-ndo quindáá iní-ndó-güedé te cudí ñí-güedé cundecu ndîhi ñaha-güedé xii-ndo, te vá ndîhu iní-güedé. Te núu vá dúcá<sup>n</sup> càda-ndo te vá cúú-xí sǎ vãha xii-ndo nchàa sá quidé-güedé sá cúú-xí-ndó.

<sup>18</sup>Te càhá<sup>n</sup> ndàhú-í núú-ndó sǎ càhá<sup>n</sup> ndîhi-ndo Yá Ndiöxí cuèndá-ndí. Te nchúhú cùtnùní ndáá iní-ndí sá ñà túú ñá cúmǎní-ndí núú Yá Ndiöxí, te duca<sup>n</sup> chi ndùcu-ndí nàcuáa quide-ndí cundáá-ndí núú-gǎ. <sup>19</sup>Te càhá<sup>n</sup> ndàhú tucu-í núú-ndó sǎ ïo cácá<sup>n</sup> tǎhú-ndó núú Yá Ndiöxí cuèndá sá

méé-gǎ ná cádá te ío ndĩhi quixi coto ñaha tùcu-í xii-ndo.

**Tnúhu ndéé núú nĩ ndĩhi-ná**

<sup>20</sup>Te Yá Ndiõxí Yáá quidé cùu vǎha iní-ó ndècu-o, Yáá-á<sup>n</sup> nĩ dándótó-gǎ Xítohó Jesucristú. Te Xítohó Jesucristú-á<sup>n</sup> cúú-gǎ dàtná ì<sup>n</sup> toli ío-gǎ quéné cǎva xito mbéé. Te duca<sup>n</sup> sǎtnahá-xi cùu-gǎ cuendá sá nĩ sati nĩnĩ-gǎ te ní xíhí-gǎ, te duca<sup>n</sup> nĩ cuu cuendá sá nĩ quide ndáá-gǎ ndĩhi Yá Ndiõxí sá cádá-gǎ ingá núú sǎ vǎha sá cúú-xí nchòo cue ñáyiú ndècu ñuyúú-a. Te nàcuáa ní quide ndáá-gǎ ndĩhi Yá Ndiõxí te ðiu-ni duca<sup>n</sup> càda-xi núú cuàhá<sup>n</sup> núú vèxi. <sup>21</sup>Te xicá<sup>n</sup> táhù-í núú Yǎ Ndiõxí sá méé-gǎ ná chìndee ñaha-gǎ xii-ndo cuendá cada-ndo mèe-ni sá vǎha nàcuáa cuiní méé-gǎ, te mee-gǎ ná cádá ñaha-gǎ xii-o nchàa sá vǎha sá sání iní-gǎ. Te ðiu-ni duca<sup>n</sup> na tàuchiu<sup>n</sup>-gǎ cada Xítohó Jesucristú sá cúú-xí-ó, duha xicá<sup>n</sup> táhù-í núú-gǎ. Te vitna nchaa-o chí ná càchí-ó sǎ ìo càhnu cuu Xítohó Jesucristú ni caa ni quíhí<sup>n</sup>. Te duca<sup>n</sup> na cùnduu.

<sup>22</sup>Te càhá<sup>n</sup> ndàhú-í núú nchòhó ñáyiú ndècu ndĩhi-í ichi Xítohó Jesucristú sá cádá càhnu iní-ndó nàcuáa ndùu nchaa tnúhu càhá<sup>n</sup>-í dásàhú ñáhà-í xii-ndo, chi ñá túú vǎi tnúhu chìdo tnuní-í núú tütú-a sá cúú-xí-ndó.

<sup>23</sup>Te càchí tnúhu-í xii-ndo sǎ tǎ Timùteú téé ndècu ndĩhi-o ichi Xítohó Jesucristú ní cácu-dé ñá túú-gǎ yíhí-dě vecaá. Te núu na quèxio ndĩhi-dé núú ndècù-í te quixi-í ndĩhi-dé núú ndécú-ndó quìxi coto ñaha-ndí.

<sup>24</sup>Te cúñaha-ndo sǎ ìo na càda ndee iní nchaa cue téé yìndaha ñaha xii-ndo nacuáa ndècu-ndo ichi Yá Ndiõxí. Te duca<sup>n</sup> cǔñaha tùcu-ndo xii nchaa dava-gǎ ñáyiú cùu cuendá-gǎ sá ìo na càda ndee iní-yu. Te cue ñáyiú nàció<sup>n</sup> Itàliá ñáyiú ndècu ndĩhi-o ichi-gǎ càchí-yu sá ìo cada ndee ìní-ndó. <sup>25</sup>Te Yá Ndiõxí ío na chìndee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-nǎ vitna.

# TUTÚ NÍ CADÚHA TÉ SÀNTIAÚ

Té Sàntiaú cadúha-dé tutú  
quíh<sup>n</sup> ndaha ñáyiú isràél  
nchíté nuu ñihí ñuyúú

**1** Yúhú té Sàntiaú xínú cuèchi-í  
núú Yă Ndiöxí ndihí núú  
Xítóhó Jesucristú, te tèe-í tñuhu-a  
quide ndee iní ñáhà-í xii nchòhó  
ñáyiú isràél nchíté nuu ñihí  
ñuyúú-a.

Yă Ndiöxí táxí-gă sá xìní tñuní-ó

<sup>2</sup>Te nchòhó ñáyiú ndècu ndihí-í  
ichi Xítóhó Jesucristú, ío cudíí  
ìní-ndó cùndecu-ndo cuéi náí  
cùu sá ùhú véxi cuendá-ndó, <sup>3</sup>chi  
duca<sup>n</sup> te cutnùní iní-ndó sã sàndáá  
ndisa iní-ndó-gă, te cunduu càhnu  
iní-ndó cuéi náí ná yáha-ndo. <sup>4</sup>Te  
cunduu càhnu-ni iní-ndó te duca<sup>n</sup> te  
cuu-ndo ñáyiú váha, te cundáá-ndó  
núú Yă Ndiöxí, te duca<sup>n</sup> te ñá túú-gă  
ná cumání-ndó núú-gă.

<sup>5</sup>Te núu cùmání sã xìní tñuní-ó,  
te cãcã-ó núú Yă Ndiöxí te mee-gă  
taxi-gă, chi ío váha iní-gă, te ñá túú  
cùnini iní-gă núú-ó. <sup>6</sup>Te ni yùhu  
ni iní-ó cãcã-ó núú-gă, te quindáá  
ndisa iní-ó sã táxí-gă sá cúmání  
quiní tñuní-ó, te vá cání ñ<sup>n</sup> caní úú  
iní-ó. Chi nchaa ñáyiú sàni ñ<sup>n</sup> sani  
úú iní-xi cùú-yu dàtná ndute làmár

cuáhá<sup>n</sup>-xi duha cuáhá<sup>n</sup>-xi dàcá<sup>n</sup>  
nàá-xi òré quéné tãchí. <sup>7</sup>Te nchaa  
ñáyiú duca<sup>n</sup> sàni iní-xi, te vá cání  
ìní-yu sá ñihí-yu sá xicá<sup>n</sup>-yu núú-gă.  
<sup>8</sup>Chi nchaa ñáyiú sàni ñ<sup>n</sup> sani úú  
iní-xi ñá cùtnùní iní-yu ndèdaca sá  
sání iní-yu cadá-yu.

<sup>9</sup>Te nchaa ñáyiú ndàhú ñáyiú  
ndècu ichi-gă, xìni ñuhu-xi ñá  
túú-gă ná caní iní-yu, mee-ñá  
cudíí iní-yu, chi Yă Ndiöxí chindèe  
ñaha-gă xií-yu. <sup>10</sup>Te nchaa ñáyiú  
cuica xìni ñuhu-xi cundecu váha  
iní-yu núú Yă Ndiöxí cuéi náí ná  
yáha-yu. Chi ñáyiú-á<sup>n</sup> cúú-yu dàtná  
itá nchaa cùhú sã ñà túú cùdíí  
naha. <sup>11</sup>Chi òré ní cuu níhi cahni  
nchícanhii, te ní dádìí-ni-xi nchaa  
cùhú cuíí-ă<sup>n</sup> te ní cóyo-ni nchaa  
itá-xi, te ñá túú-gă cáá vìi. Te duca<sup>n</sup>  
sãtnahá-xi cùu ñáyiú cuica chi núú  
chíú<sup>n</sup>-ní-yu xihí-yu.

Nchaa ñáyiú quide cahnu  
iní-xi nchaa sá yáha-yu

<sup>12</sup>Te váha táhú nchaa ñáyiú  
quide cahnu-ni iní-xi cuéi nándì sá  
yáha-yu ndècú-yu ichi Yă Ndiöxí,  
chi òré ná ndíhí nchàa xíă<sup>n</sup> yáha-yu,  
te cuáñaha Yă Ndiöxí ñ<sup>n</sup> coróná  
váha vìhi cundecu ndíhí-yu, te  
ndáá chi duca<sup>n</sup> càhá<sup>n</sup> Yă Ndiöxí sá



táxí-gǎ xii nchaa nchoo ñǎyiu ñũhu iní ñáhá xii-gǎ. <sup>13</sup>Te nchaa ñáyiu sàni iní-xi cada nándi sá cuèhé sá dúhá, te vá cání iní-yu sá Yǎ Ndiǒxí táuchiu<sup>n</sup>-gǎ duca<sup>n</sup> càdá-yu, chi Yá Ndiǒxí ñá quúu te caní iní-gǎ cada-gǎ ì<sup>n</sup> sá cuèhé sá dúhá, te ni ñà túú tàuchiu<sup>n</sup>-gǎ sá dúcá<sup>n</sup> càdá-yu. <sup>14</sup>Te cuíní-yu cadá-yu nchaa sá cuèhé sá dúhá chi duca<sup>n</sup> vèxi iní-yu. <sup>15</sup>Te nchaa ñáyiu ío ñũhu iní nchaa sá cuèhé sá dúhá te quidé-yu, te núu na càda-ní-yu te cuíta nihnú-yu.

<sup>16</sup>Te nchòhó ñáyiu ío cùu iní-í ndécú ndìhi-í ichi Xítohó Jesucristú, vá dàñá-ndó mèe-ndo dandahú ñáhá ñáyiu xii-ndo. <sup>17</sup>Chi nchaa sá vǎha véxi-xi núú Yǎ Ndiǒxí Yaá ndécú àndiu, chi ñiu mee-gǎ ní cadúha-gǎ andiu ndìhi nchaa chódíní, ndìhi yóó, ndìhi nchíanchii. Te Yá Ndiǒxí ñá túú ndì quehe<sup>n</sup> ndì quehe<sup>n</sup>-gǎ sá cání ìní-gǎ, te ni ñà túú cùu-gǎ dàtná ì<sup>n</sup> cuándáhú cuǎhá<sup>n</sup>-xi duha cuáhá<sup>n</sup>-xi dàcá<sup>n</sup>, chi ì<sup>n</sup>-ni sǎ sání iní-gǎ. <sup>18</sup>Te Yá Ndiǒxí ní cuíní-gǎ sá cúú-ó dèhe-gǎ, te ndáá sá cúú-ó dèhe-gǎ chi sàndáá iní-ó tnũhu-gǎ. Te nchoo ñáyiu sàndáá iní-xi tnũhu-gǎ cúnũu-gǎ-ó chi ní nduu-o dèhe-gǎ.

### Ichi ndáá cuíti

<sup>19</sup>Te nchòhó ñáyiu ío cùu iní-í ndécú ndìhi-í ichi Xítohó Jesucristú, cundedóho-ndo ì<sup>n</sup> tnũhu na càhá<sup>n</sup>-í-a. Te cuíní-í sá cùndecu túha-ndo cùndedóho-ndo tnũhu Yá Ndiǒxí, te caní váha iní-ndó nàcuáa càhá<sup>n</sup>-ndó, te cunduu càhnu iní-ndó te vá cùdèé<sup>n</sup>-ndó. <sup>20</sup>Chi núu na cùdèé<sup>n</sup>-ó te ñá túú quide váha-o núú Yǎ Ndiǒxí. <sup>21</sup>Te dañá-ndo

nchàa sá cuèhé sá dúhá ío ñuyúú-a. Te quindáá iní-ndó tnũhu Yá Ndiǒxí ndécú ndìhi-ndo, te vá cùndũu sáá iní-ndó, te duca<sup>n</sup> te naníhí tàhú-ndó.

<sup>22</sup>Te quindáá iní-ndó tnũhu-gǎ te vá cuendá-ni cundedóho-ndo, chi núu na cùndedóho-ndo te vá tníí-ndó ñá, te dicó-ni dandahú-ndó mèe-ndo te vá naníhí tàhú-ndó.

<sup>23</sup>Chi nchaa ñáyiu dicó-ni sàcùndedóho tnũhu-gǎ te ñá túú sàndáá iní-yu, ñáyiu-á<sup>n</sup> cúú-yu dàtná ì<sup>n</sup> ñáyiu sàcùndéhé-ní nũú-xi núú yùtátá. <sup>24</sup>Chi nini ndèhé-yu ní xiní-yu núú-yu, te ní xócání-yu te ní nacuanáa-ní-yu nàcuáa càa núú-yu. Te duca<sup>n</sup> sàtnahá-xi cùu ñáyiu sàcùndedóho tnũhu Yá Ndiǒxí, te ñá túú tníí-yu. <sup>25</sup>Te nchaa ñáyiu dàcuaha ndisa tnũhu ní dándõo Yá Ndiǒxí ñihnu-ní-yu ichi-gǎ, chi ñá dũú ì<sup>n</sup> sá vèe cùu-xi. Te ñáyiu-á<sup>n</sup> ñá túú dicó-ni sàcùndedóho-yu chi quide ndáá-yu núú-gǎ, te cùdíf iní-yu xíndecú-yu.

<sup>26</sup>Te nchaa ñáyiu càchí sá ndécú ichi ndáá te cùtèxínu-ni càhá<sup>n</sup>-yu, te xíǎ<sup>n</sup> dicó-ni dandahú-yu mèe-yu sá ndécũ-yu ichi ndáá. <sup>27</sup>Te núu ndècu-o ichi ndáá cuíti ichi Dútú Ndiǒxí, te chindee-o nchàa ñáyiu ní ndóo ndàhú, ndìhi ñáyiu quèè ndécú ndìhi tnúndõho tnũhu ndàhú, te vá càdá-ó nǎndi sá cuèhé sá dúhá ío ñuyúú-a.

### Ì<sup>n</sup>nuu-ni cùu iní-ó nchàa tnahá ñáyiu-o

**2** Te nchòhó ñáyiu ndècu ndìhi-í ichi Xítohó Jesucristú Yaá cúnũu, ì<sup>n</sup>nuu-ni càhá<sup>n</sup> ndìhi váha-ndo nchàa tnahá ñáyiu-ndo. <sup>2</sup>Te núu núú nàtácá-ndó

chiñuhu-ndo Yá Ndiöxí ní sáá ì<sup>n</sup> tée ío váha càa dóo níhnú-dě, te ní sáá tucu ì<sup>n</sup> tée ñihnu dóo ndàhú, <sup>3</sup>te núu tée ñihnu dóo vâha-ni-á<sup>n</sup> nèhé-ndó sã yíñuhu núú-dě, te taxinucóo-ndo-dě ì<sup>n</sup> núú xilé váha, te tée ndàhú-á<sup>n</sup> daxòcáo-ndo-dě ì<sup>n</sup> xio àdi canucóo-ndo-dě núú ñùhú, <sup>4</sup>te núu duca<sup>n</sup> na càda-ndo te ñá túú quide váha-ndo. Chi ì<sup>n</sup>-ni-dé cúú iní-ndó, te ì<sup>n</sup>-dé ñá túú cùu iní-ndó.

<sup>5</sup>Te nchòhó ñáyiú ío cùu iní-í ndécú ndìhi-í ichi Xítóhó Jesucristú, chí cùndèdóho tucu tnúhu na càhá<sup>n</sup>-í-a. Yá Ndiöxí càhá<sup>n</sup>-gá vâi ñáyiú ndàhú cuendá tnahá tnúhu ndìhi ñàhá-yu xii-gá, te ndècu váha-gá-yu dàcúúxí ñáyiú cuica ñáyiú ñá túú sàndáá iní tnúhu-gá, chí ní cachí-gá sá ncháá ñáyiú na cùu iní ñáhá xii-gá nduu táhù-yu cundecú-yu ndìhi-gá ni caa ni quíhí<sup>n</sup>. <sup>6</sup>Te nchòhó, ñá túú nèhe-ndo sã yíñuhu núú ñáyiú ndàhú, chí núú ñáyiú cuica-ni nèhe-ndo sã yíñuhu. ¿Te náa ñá cùtnùní iní-ndó sã ñáyiú cuica dándohó ñaha-gá-yu xii-ndo, te cãndeca ñàhá-yu sàhá<sup>n</sup> núú cuè tée cùchiu<sup>n</sup>-á<sup>n</sup>? <sup>7</sup>Te diu-ní-yu ío càhá<sup>n</sup> cuèhé-yu cuendá Xítóhó Jesucristú, te nchòhó sa ní nduu-ndo dèhe-gá.

<sup>8</sup>Te ì<sup>n</sup> ndudú cùnùu-gá ní càhá<sup>n</sup> Yá Ndiöxí ní ngódó tnùní núú tütú-gá càchí-xi sá cúú iní-ó tñaha ñáyiú-o dàtná cúú iní-ó mèe-o. Te núu duca<sup>n</sup> na càda-o te quide váha-o. <sup>9</sup>Dico núu ñá túú cùu iní ì<sup>n</sup>nuu-o cuè tñaha ñáyiú-o, te cuu cuéchi xii-o chí ñá túú quide-o nacuaá càhá<sup>n</sup> Yá Ndiöxí. <sup>10</sup>Te núu ì<sup>n</sup> ñáyiú ndàunihnu ì<sup>n</sup> sá càhá<sup>n</sup> Yá Ndiöxí, te dava-ni quide-yu ña, te

ñáyiú-á<sup>n</sup> ñà túú quidé-yu nacuaá càhá<sup>n</sup> ndudú Yá Ndiöxí. <sup>11</sup>Te Yá Ndiöxí ní cachí-gá sá tée ndècu ñadìhí-xi vá càhá<sup>n</sup> ndìhi-dé ingá ñadìhí. Te diu-ni-gá ní cachí-gá sá vã cáhni-ó tñaha ñáyiú-o. Te cuèi ñá túú càhá<sup>n</sup> ndìhi-o ingá ñadìhí, te núu sàhni-o tñaha ñáyiú-o te ñá túú quide-o nacuaá càhá<sup>n</sup> ndudú Yá Ndiöxí. <sup>12</sup>Te nchoo xini ñuhu-xi càhá<sup>n</sup>-ó tñuhu váha te cada ndáá-ó, chí ñá díú ì<sup>n</sup> sá vèe cùu-xi sá ní cachí Yá Ndiöxí cada-o. Te mee-gã ní cachí-gá sá cádá ndáá-gá cuéchi-o na sàa nduu. <sup>13</sup>Te nchaa ñáyiú ñá túú cùndahú iní tñaha ñáyiú-xi, te vá cùndahú iní ñáhá-gã xií-yu na sàa nduu càda ndáá-gá cuéchi-yu. Te nchaa ñáyiú cùndahú iní tñaha ñáyiú-xi te Yá Ndiöxí cùndahú iní ñáhá-gã xií-yu na sàa nduu-á<sup>n</sup>.

#### Quindáá iní-ó Yá Ndiöxí te cada váha-o

<sup>14</sup>Te nchòhó ñáyiú ndècu ndìhi-í ichi Xítóhó Jesucristú, te núu càchí-ó sã sàndáá iní-ó Yá Ndiöxí te ñá túú quide-o sá vâha, te ñá túú ndèé nándìhi-xi, chí vá nánìhí tàhú-ó te núu duca<sup>n</sup> na càda-o. <sup>15</sup>Te núu ndèhe-o ì<sup>n</sup> tñaha ñáyiú-o ñà túú dõõ-yu àdi ñá túú sã cùunchitò-yu, <sup>16</sup>te xãha<sup>n</sup>-o: “Núhú-n te nducu-n dõó cuihnu-n te nducu-n sã cáxi-n”, xãha<sup>n</sup>-o, te ñá túú ñã sãñaha-o, te sá dúcá<sup>n</sup> quide-o te ñá túú quide váha-o. <sup>17</sup>Te núu càchí-ó sã sàndáá iní-ó Yá Ndiöxí te ñá túú quide váha-o ndècu-o, te vèdana nándìhi-xi.

<sup>18</sup>Te iò ñáyiú càchí-yu sá sàndáá iní-yu Yá Ndiöxí, te iò

ñáiyu cächí-yu sá méé-ní sá vâha quidé-yu. Te yúhú cächí-í sá nõu ñá túú quide-o sá vâha, te ñá túú sàndáá iní-ó Yă Ndiõxí. Te nchoo quide-o sá vâha núu xíã<sup>n</sup> cútnùní iní-ó sá sàndáá iní-ó-gă. <sup>19</sup>Te iò ñáiyu cächí sá ì<sup>n</sup>dii-ni Yá Ndiõxí ndécú, te váha-ni cãhá<sup>n</sup>-yu. Te tnàhá yucu ñãvâha ndihi nchaa espíritú cúndìhi-xi xiní-xi sá ndécú ì<sup>n</sup>dii-ni Yá Ndiõxí, te yúhú-xi dico ñá túú tñi-xi tnúhu-gă. <sup>20</sup>Te ío nii dǐquí-ó te núu na cächí-ó sá sàndáá iní-ó Yă Ndiõxí, te vá cádá-ó sá vâha. <sup>21</sup>Te ñani tnáhá-ó ndii Àbrahám tée ní xíndecu ndée sanaha ñi ngúndecu váha ndii núú Yă Ndiõxí, chi ní xito ndée ñáhá-gă xii ndii núu ndisa sá cáhni ndii déhe ndii té Isàac nduu táhú-gă ní cùu, te dāvá-á<sup>n</sup> ñi cutnùní iní-gă sá iò sàndáá iní ñáhá ndii xii-gă, núu ñá ní dàña-gă cahni ndii déhe ndii. <sup>22</sup>Te nàha-o sá ndii Àbrahám ñá dǐú-ní sá méé-ní sá ni sàndáá iní ñáhá ndii xii-gă, chi ní tñi ndii tnúhu-gă. <sup>23</sup>Te duca<sup>n</sup> ñi quee ndáá-xi nàcuáa cãhá<sup>n</sup>-xi núú tütú Yă Ndiõxí núú cächí-xi: “Ndii Àbrahám ní sàndáá iní ndii ní quide ndii nchaa nàcuáa ní xáha<sup>n</sup> Yă Ndiõxí, te ní ngúndecu váha ndii núú-gă, te ní cachí-gă sá cúú ndii ì<sup>n</sup> tée ío váha tnàhá tnúhu ndihi-gă”, duha cächí-xi núú tütú-gă.

<sup>24</sup>Te xíã<sup>n</sup> cútnùní iní-ó sá ñá dǐú mèe-ni sá quèndáá iní-ó Yă Ndiõxí, chi núu na càda-o nacuáa cuu váha iní-gă te ngúndecu váha-o núú-gă <sup>25</sup>dàtná ní quide-gă tá Ràháb ì<sup>n</sup> ñadǐhí ní xíndecu ndée sanaha, chi xíchí-ã<sup>n</sup> ñi xíndecu-xi ichi dǐí ìní, dico ní tuha-xi ichi Yá Ndiõxí te ní

ngúndecu váha-xi núú-gă, chi ní chindee-xi cuè tée isràél cue tée ní xica chiù<sup>n</sup>-gă, te ní sanu ichi ñaha-xi xii-güedé ì<sup>n</sup> ichi núú vâ nánìhí ñáhá cuè tée cùu úhú iní ñáhá xii-güedé. <sup>26</sup>Te nchaa ñáiyu cächí sá sàndáá iní Yă Ndiõxí, te ñá túú quidé-yu nàcuáa cãhá<sup>n</sup>-gă ñáiyu-á<sup>n</sup> cúú-yu dàtná ì<sup>n</sup> ñáiyu ní xíhí. Chi ñá túú-gă ndíxí tũu iní-yu nchaa sá cuèhé sá dúhá quidé-yu. Duha sãtnahá-xi cùu nchaa ñáiyu ñá túú cuìní tñi tnúhu cãhá<sup>n</sup> Yă Ndiõxí.

### Nàcuáa quide yaa-o

**3** Te nchòhó ñáiyu ndècu ndihi-í ichi Xítohó Jesucristú, vá ncháá-ndó càni iní-ndó cùu-ndo mestrú dacuàha-ndo ñáiyu tnúhu Yá Ndiõxí chi íí cáá-xí. Chi na quǐtnahá nduu nàcuáha-o cuèndá núú-gă, te núu ñá túú ní quide ndáá-ó ñá, te vá cúú vâha iní-gă núú-ó. <sup>2</sup>Te nchaa-o iò cuèhé sá ñá túú vâha quide-o. Te nchaa ñáiyu ñá túú cãhá<sup>n</sup> tnúhu cuèhé tnúhu duha cùu-yu ñáiyu ñá túú ñá cúmǎni chi ío ndáá quídě-yu. Te xiní-yu cotñi-yu mèe-yu, te quide váha-yu núú Yă Ndiõxí. <sup>3</sup>Te dàtná cuìní-ndó cùu ì<sup>n</sup> quiti te núu na chìhi-o frenú yuhu-dí, te cotñi-o-dí te ngúnu ichi-dí, te duca<sup>n</sup> sãtnahá-xi cùu ñáiyu sàcòtni mee-xi, chi ñá túú cãhá<sup>n</sup>-yu tnúhu cuèhé tnúhu duha. <sup>4</sup>Te dàtná cuìní-ndó cùu barcú cuèi ñàhnu vihi-xi, dico òré quéné ñihi táchí te tùndaha-xi ì<sup>n</sup> xio, dico tée dàcaca ndacu-dé dáquihí<sup>n</sup>-dé-xi ndihi ì<sup>n</sup> yutnu sá dánani-güedé òmú ndàa núú cächí iní-dé quíhí<sup>n</sup>-xi. <sup>5</sup>Te duca<sup>n</sup>

cùu tucu yaa-o chi ío líhli-xi dico ío cuéhé tn̄hu càhá<sup>n</sup>-ó ndìhi-xi. Te duca<sup>n</sup>-ni sãtnahá-xi cùu tucu sã lúhá ñùhú chi sãhmi-xi ì<sup>n</sup> yucu. <sup>6</sup>Te ñiu-ni duca<sup>n</sup> sãtnahá-xi cùu yaa-o chi ío cuéhé tn̄hu cuèhé tn̄hu duha càhá<sup>n</sup>-ó ndìhi-xi, te ñacuíta nihnu ñaha-xi xii-o. Te ío cuéhé cuèchi quide-o ndìhi-xi cuendá sã ñùyíu-a ñùhu tnahá ñùhú tn̄i yucu ñãvãha ñaticá nihnu ñaha-xi. <sup>7</sup>Te ndacu-o càda masú-ó nchãa núu quiti ío ñuyíu cuèi quiti déé<sup>n</sup> quiti xica núu ñùhú, te cuèi quiti ndãva, te cuèi cóó, te cuèi quiti ñùhu xití ndute làmár, chi duca<sup>n</sup> quide dava cue tée ñuyíu-a. <sup>8</sup>Dico yãa-o chi vá yõ ì<sup>n</sup> ndacu cada masú ñáhã xii-xi nacuaá càhá<sup>n</sup>-ó mée-ni tn̄hu váha ndìhi-xi, chi mee-ni tn̄hu cuèhé tn̄hu duha cùnũu-gã càhá<sup>n</sup>-ó ndìhi-xi. Te cùu-xi datná ì<sup>n</sup> venènú chi ñatiu-xi iní-ó. <sup>9</sup>Te ñiu-ni ndìhi yãa-o quide cahnu-o Dútú Ndiõxí Yaa cúu Tãtã-ó, te ñiu-ni ndìhi yãa-o cahã<sup>n</sup> úhú-ó cuè tnahã ñãyiũ-o. Te xini ñuhu-xi vá dúcã<sup>n</sup> càda-o, chi mee-gã ní chihi-gã sã xini tn̄nĩ-ó ndìhi iní-ó, ñatná cáã mée-gã ñùhú iní-gã. <sup>10</sup>Te ñiu-ni yuhu-o quèe tn̄hu váha càhá<sup>n</sup>-ó, te ñiu-ni yuhu-o quèe tn̄hu cuèhé tn̄hu duha. Te nchõhõ ñãyiũ ndècu ndìhi-í ichi Xitohó Jesucristú cunaha-ndo sã ñã túu ndũu váha-xi duca<sup>n</sup> càda-o. <sup>11</sup>Te ñã túu xini-ndó sã ì<sup>n</sup> núu quèe ñihni ndute, te quèe ndute váha te quèe ndute úã-ã<sup>n</sup>. <sup>12</sup>Te nchõhõ ñãyiũ ndècu ndìhi-í ichi Xitohó Jesucristú, te ñã túu xini-ndó sã ì<sup>n</sup> yutnu ngúxí, te cùu<sup>n</sup> aceitúnã, ñdi xini-ndó sã ì<sup>n</sup> yoho yaha stilé te cùu<sup>n</sup> ngúxí. Te

duca<sup>n</sup> cuèi ì<sup>n</sup> núu quèe ñihni ndute, vá cúu quèe ndute váha te quèe ndute úhá. Te duca<sup>n</sup> sãtnahá-xi cùu yuhu-o chi vá cúu càhá<sup>n</sup>-ó tn̄hu váha te càhá<sup>n</sup>-ó tn̄hu cuèhé tn̄hu duha.

**Nchaa sã váha xini tn̄nĩ-ó  
tàxi Yã Ndiõxí**

<sup>13</sup>Te núu ndècu ñãyiũ túha tnuú-ndó ñãyiũ cutnuni iní-xi, te xini ñuhu-xi mee-ni sã váha cadã-yu, duca<sup>n</sup> te cutnuni iní-ó sã túha ndisã-yu, te vá cadã cahnú-yu mée-yu. <sup>14</sup>Te núu nchoo cuèdú iní-ó te cuini-ó cùnũu-o núu tn̄ha ñãyiũ-o, te vá càchí-ó sã túha-o, chi ñã túu quide ndãá-ó te núu duca<sup>n</sup> na càda-o. <sup>15</sup>Chi ñã ñúú xĩã<sup>n</sup> ní ñanehé ñáhã Yã Ndiõxí, chi ñuyíu iha ní cacu nihnu-xi cuendá sã yucu ñãvãha ñacahu iní ñáhã-xi. <sup>16</sup>Te núu ndécú ñãyiũ cuèdú iní ñãyiũ cuini cunuũ, te yãcã<sup>n</sup> mee-ni ndãhú nãã xĩndecú-yu, te ñã túu quide váha-yu, chi mee-ni nchãa sã cuèhé sã dúhá quide-yu. <sup>17</sup>Te núu ní taxi Yã Ndiõxí sã xini tn̄nĩ-ó, te cada váha-o, te càhá<sup>n</sup> ndìhi váha-o nchãa tnahã ñãyiũ-o, te tn̄i-o tn̄hu váha càhá<sup>n</sup>-yu, te cundãhú iní-ó-güë-yu te chindee-õ-yu, te vá caní ì<sup>n</sup> caní úú iní-ó, te ío cunduũ ndãã iní-ó. <sup>18</sup>Te núu cuini-ó ñã túu ñã cuu cundecu-o ñùyíu-a, te cada váha-o sã cúu-xi tn̄ha ñãyiũ-o cuendá sã ñã túu ñã cuu cundecu-o ndìhí-yu. Te duca<sup>n</sup> te nguínchicú<sup>n</sup> dava-gã tn̄ha ñãyiũ-o càda váha-yu.

**Vã cúu cundecu-o ichi Yã Ndiõxí  
te cada-o ñãndi sã cuèhé sã dúhá**

**4** ¿Te xini-ndó ñã cuendá nã ñãyiũ te xisãhni tn̄hã-yu-ã<sup>n</sup>?

Te nàa-yu sá tnũhu cuédú ínì, chi diu-ni xíǎ<sup>n</sup> ñúhú ínì-yu, te ñá túú ndècu váha ínì-yu. <sup>2</sup>Chi cuìnì-yu cundecu ndihí-yu ì<sup>n</sup> sá ñà túú ndècu ndihí-yu, te ñá túú ñihí-yu núu xíǎ<sup>n</sup> xícuu cuédú ínì tnáhǎ-yu, te xícuehé tnáhǎ-yu, te càni tnahá-yu, te xĩsahni tnáhǎ-yu. Te ñá túú ñihí-yu sá cuìnì-yu chi ñá túú xìcá<sup>n</sup>-yu núú Yǎ Ndiǒxí. <sup>3</sup>Te cuèi xìcá<sup>n</sup>-yu ì<sup>n</sup> sá cuìnì-yu núú-gǎ te ñá túú sǎñaha-gǎ, chi ñá túú xìcá<sup>n</sup>-yu ì<sup>n</sup> sá cúú xíi-yu sá váha, chi ì<sup>n</sup> sá ná ndĩhi-yu núú cǎdǎ-yu nchaa sá cuèhé sá dúhá xìcá<sup>n</sup>-yu, núu xíǎ<sup>n</sup> ñá ñihí-yu. <sup>4</sup>Te nchaa ñáyiu duca<sup>n</sup> xĩquide ío cùu sáá ínì-yu núú Yǎ Ndiǒxí. Te nàha-ndo sá ncháá ñáyiu cùdǎfí ìnì-xi cundecu ichi cuèhé ichi duha cùu úhú ínì-yu Yá Ndiǒxí, chi vá cúú cùndecu-o ichi cuehé ichi duha, te cundecu-o ìchi-gǎ. <sup>5</sup>Te ñá túú dío duca<sup>n</sup> càhá<sup>n</sup>-xi núú tütú Yǎ Ndiǒxí núú càchí-xi: “Yá Ndiǒxí ní taxi-gǎ Espíritú-gǎ ndécú ndĩhi-o. Te Espíritú-gǎ-á<sup>n</sup> cuìnì-xi sá mée-ní-gǎ cuhu<sup>n</sup> ínì-ó”, duha càchí-xi núú tütú-gǎ. <sup>6</sup>Te Yá Ndiǒxí ío chĩndee ñaha-gǎ cuendá cada ndáá-ó núú-gǎ dàtná càchí tucu-xi núú tütú-gǎ núú càchí-xi: “Yá Ndiǒxí ñá túú cùu váha ínì-gǎ núú nchàa ñáyiu quide cahnu mee-xi, dico chĩndee-gǎ cue ñáyiu ndàhú ínì-xi”, duha càhá<sup>n</sup>-xi núú tütú-gǎ. <sup>7</sup>Te cada-ndo nàcuáa càhá<sup>n</sup> Yǎ Ndiǒxí. Te vá cǎdá-ndó nàcuáa cuìnì yucu ñávaha, duca<sup>n</sup> te xóo cóo ndéé ñáhǎ-xí xii-ndo. <sup>8</sup>Te tniì-ndo tnũhu càhá<sup>n</sup> Yǎ Ndiǒxí te cundecu ndihí ñaha-gǎ xii-ndo. Te nchaa nchòhó ñáyiu ndècu ichi cuehé ichi duha daña-ndo

ìchi-á<sup>n</sup> te cada váha-ndo. Te nchaa nchòhó ñáyiu sàni ínì cunu cuechi núú Yǎ Ndiǒxí te quide-ni-ndo nchaa sá cuèhé sá dúhá, te ñá túú quide váha-ndo núu duca<sup>n</sup>, chi xìni ñuhu-xi sá càcá<sup>n</sup>-ndó núú Yǎ Ndiǒxí sá ná ndádá ndòo ndada nine-gǎ ínì-ndó. <sup>9</sup>Te ndixi cuechi ínì-ndó nchàa sá quidé-ndó ndèé ndáhyú ndisa-ndo sǎ ndĩhú ínì-ndó, te ñá dǎfú dà cudǎfí ìnì-ndó. <sup>10</sup>Te náhmá-ndó núú Yǎ Ndiǒxí nchaa sá ñǎ quide-ndo, te ngúndecu váha-ndo núú-gǎ.

**Vá càhá<sup>n</sup>-ó nchàa sá quidé tnàha ñáyiu-o**

<sup>11</sup>Te nchòhó ñáyiu ndècu ndihí-í ichi Xítóhó Jesucristú, vá cuátnũhu tnaha-ndo, chi nchaa ñáyiu sàtnuhu tnaha dicó-ni ndàa nuú-yu ndèhe tnahá-yu, te ñá túú càhá<sup>n</sup> váha-yu cuendá tnũhu Yá Ndiǒxí sá sánú ìchi ñaha xii-yu nàcuáa cundecú-yu, chi dàquee tĩhú-yu tnũhu-á<sup>n</sup>. Te núu càchí-ndó sǎ ñà túú càhá<sup>n</sup> váha tnũhu Yá Ndiǒxí, te xíǎ<sup>n</sup> queé-xí sǎ ñà túú sàndáá ínì-ndó tnũhu càhá<sup>n</sup>-gǎ, te cuìnì-ndó cùnuu tnũhu-ndo núú tnũhu-gǎ. <sup>12</sup>Te mee Yǎ Ndiǒxí ní cachí-gǎ nàcuáa cada-o, te diu-ni mee-gǎ càhá<sup>n</sup>-gǎ te núu ní quide váha-o, àdi ñá túú ní quide váha-o. Te diu-ni mee-gǎ dàcácu nihnu ñaha-gǎ xii-o núú ùhú núú ndàhú, te diu-ni-gǎ daquĩh<sup>n</sup> ñáhǎ-gǎ xii-o núú ùhú núú ndàhú-á<sup>n</sup> te núu vá cǎdá váha-o. Te nchoo ñà túú ñǎ cúú-ó, te núu mee-ni nchàa sá quidé tnàha ñáyiu-o cùndehe-o.

**Ñá túú cùtnuní ínì-ó nǎsa  
túndaá-ó ìngá nduu**

<sup>13</sup>Te dava nchòhó càchí-ndó sǎ vítná àdi tneé quĩh<sup>n</sup>-ndó ì<sup>n</sup> ñuú, te

yàcá<sup>n</sup> cundecu-ndo ì<sup>n</sup> cuíá cada-ndo ì<sup>n</sup> ndáhú te níhí-ndó díhú<sup>n</sup>. <sup>14</sup>Te ni ñá xìní-ndó ná cúú sǎ yǎha-ndo vitna àdi tneé. Te nchoo cùu-o datná ì<sup>n</sup> vícò nùhú, chi vícò-ǎ<sup>n</sup> tnàvíí ndéhé-ó te tna tnaa-gá sa ní ndóñúhú-xí. Duca<sup>n</sup> sǎtnahá-xi cùu nchoo chi ì<sup>n</sup> úú nduu duha vèxi-o ñuyú-a te ndoñuhu-o. <sup>15</sup>Te núu sàndáá iní-ó Yǎ Ndiòxí te duha cáhá<sup>n</sup>-ó: “Te núu Ndiòxí ná cǎchí-gá sá cùndècu tnaa-o ñuyú-a te cada chi<sup>n</sup>-o”, duha cachí-ó. <sup>16</sup>Dico mee-ndo chi ío ñíí iní-ndó cuíní-ndó cùnnoo tnúhu-ndo núú Yǎ Ndiòxí, te ñá túú ndùu váha-xi sá dúcá<sup>n</sup> quíde-ndo. <sup>17</sup>Te núu xìní-ó cǎda-o sá vǎha te ñá túú quíde-o, te cùu-xi ì<sup>n</sup> cuéchi núú-gǎ.

**Tnúhu sá dátüha ñaha xii  
nchaa ñáyiú cuica ñà túú  
sàndáá iní tnúhu Yǎ Ndiòxí**

**5** Te nchòhó ñáyiú cuica ñáyiú cuihna iní-xi cundedóho-ndo tnúhu na cǎhá<sup>n</sup>-í-a. Vitna ngúíta-ndo ndíhú iní-ndó, te ndáhyú víhí-ndó, chi quixi ì<sup>n</sup> tnúndòho cuendá-ndó te ndoho víhi-ndo. <sup>2</sup>Te nchaa sá ndécú ndíhi-ndo ndíhi cuíta tju quíhí<sup>n</sup>, te quee tíquidi dóó-ndó, <sup>3</sup>te díhú<sup>n</sup>-ndó caxi cudi ñúhu. Te xíá<sup>n</sup> cuita naquiní ndeé-ndó tnúndòho sá ñà túú quíde váha-ndo. Te ndíhi-ndo ndíhi díhú<sup>n</sup>-ndó sǎ ní taxúha-ndo, chi vitna sa ta cùyatni sáá nduu ndíhi ñuyú-a. <sup>4</sup>Te nchaa cue téé ní quíde chi<sup>n</sup> núú chíú<sup>n</sup>-ndó ní ndatnúhu-ndo ndíhi-güedé nàcuáa cháhu-ndo-güedé ní cùu, te ñá túú ní chǎhu-ndo-güedé nàcuáa ní xáha<sup>n</sup>-ndo xì-güedé,

núu xíá<sup>n</sup> ío ndècuéchi-ndo. Te Yǎ Ndiòxí Yáá ndécú àndiu ní tecú dóho-gá nàcuáa cǎhá<sup>n</sup>-güedé sá ní dándáhú-ndó-güedé. <sup>5</sup>Te nchòhó ñáyiú cuica, sá ndécú vǎha-ni-ndo cùndee iní-ndó, núu quíde-ni-ndo nchaa sá vèxi iní-ndó. Te cùu-ndo datná ì<sup>n</sup> quíti nùcuíhnu mee-ni xèxi-dí, te sáá nduu sǎhni-güedé-dí. Te duca<sup>n</sup> sǎtnahá-xi cùu nchohó chi ndècu váha-ndo vitna, te sáá ì<sup>n</sup> nduu nàcháhu-ndo nchàa sá quíde-ndó núú Yǎ Ndiòxí te núu vá quèndáá iní-ndó-gǎ. <sup>6</sup>Te quíde úhú iní-ndó sǎhni-ndo cue ñáyiú quíde ndáá núú Yǎ Ndiòxí, te ñá túú ná quídě-yu.

**Cunduu cǎhnu iní-ó te  
cǎhá<sup>n</sup> ndíhi-o Yǎ Ndiòxí**

<sup>7</sup>Te nchòhó ñáyiú ndècu ndíhi-í ichi Xítóhó Jesucristú, cada ndee-ni ìní-ndó cùndetu-ndo ndéé ná quíxi tucu-gá ñuyú-a, te cada-ndo dàtná quíde nchàa ñáyiú chíhi tatá chi sàcùndetú-yu ndéé cúú<sup>n</sup> dáú te chíhí-yu. Te cùndee-ni iní-yu sàcùndetú-yu ndéé cúú<sup>n</sup>-gǎ dáú te cùu itú-yu, te ndùdíí iní-yu. <sup>8</sup>Te duca<sup>n</sup> cǎda nchohó tucu cada ndee ìní-ndó cùndetu-ndo, chi sa ta cùyatni nduu quixi tucu Xítóhó Jesucristú. <sup>9</sup>Te duha ndùu tnúhu cǎhá<sup>n</sup>-í núu nchòhó ñáyiú ndècu ndíhi-í ichi Xítóhó Jesucristú, vá ndàcá<sup>n</sup> cuéchi núú tnáhá-ndó te núu nása cùu ndecu-ndo, chi ñá cuèhé-gá nduu cùmání te quixi Crístú nacuaca ñaha-gǎ xii-o cùndecu-o núú Yǎ Ndiòxí, te mee-gǎ cada ndáá-gá cuéchi-o. <sup>10</sup>Te nchòhó ñáyiú ndècu ndíhi-í ichi Xítóhó Jesucristú, ndacu iní-ndó nàcuáa

ní quide nchaa cue téé ní xóo cáhá<sup>n</sup> tnúhu Yá Ndiöxí ndéé sanaha sá ïo càhnu ní xínduu iní-güedé cuëi nándi ní ndoho-güedé. <sup>11</sup>Te cùtnuní iní-ó sá cúú-ó ñáyiú ío váha táhú-xi te núu na càda cahnu iní-ó nchaa sá ná yáha-o cuendá Yá Ndiöxí. Te nàha-ndo sá ndíi Jöb duca<sup>n</sup> nï quide ndíi, chi nándi sá nï yáha ndíi te ní quide càhnu iní ndíi. Te sátá nï yáha ní ndoho ndíi, te ío cuéhé sá nï sánaha Yá Ndiöxí xii ndíi. Chi ío váha iní-gá te ío cùndahú iní-gá nchaa ñáyiú ío càhnu iní-xi.

<sup>12</sup>Te nchòhó ñáyiú ndècu ndihi-í ichi Xítoho Jesucrìstú, chí cùndèdóho tucu tnúhu na càhá<sup>n</sup>-í-a, chi ío xini ñuhu-xi. Vá cácu nèhe-ndo Yá Ndiöxí òrè cuìní-ndó sá cùtnùnì iní ñáyiú sá ndàá cada-ndo ì<sup>n</sup> sá càhá<sup>n</sup>-ndó. Te nì vá cácu nèhe-ndo sá càchí-yu cùu ndiöxí cádüha cue téé ñuyíú-a. Te núu ì<sup>n</sup> sá xicá<sup>n</sup> tnàha ñáyiú-ndo nùú-ndó te cùñaha-ni-ndo te núu cuu àdi sá vâ cúú. Te vá cácu nèhe-ndo Yá Ndiöxí, duca<sup>n</sup> te vá dándòho ñaha-gá xii-ndo.

<sup>13</sup>Te núu ndòho-ndo te cáhá<sup>n</sup> ndihi-ndo Yá Ndiöxí, àdi te núu ndècu váha-ndo te cudíí iní-ndó te chiñuhu-ndo-gã, <sup>14</sup>àdi núu cùhú-ndó te cana-ndo cuè téé yìndaha ñaha xii-ndo nacuaá ndècu-ndo ichi Yá Ndiöxí cuendá tee-güedé acití díquí-ndó, te cáca<sup>n</sup> táhú-güedé núú-gá cuendá-ndó dàtná ní cachí méé-gã cunduu. <sup>15</sup>Te núu quindáá ndisa iní-ndó sá

ndüha-ndo, te ndüha-ndo chi Yá Ndiöxí cada tátna ñaha-gã xii-ndo, àdi núu ní quide-ndo ì<sup>n</sup> sá ñà túú tàú-ndó càda-ndo núú-gã te cada càhnu iní-gá cuéchi-ndo. <sup>16</sup>Te xini ñuhu-xi cùtnúhu tnàha-ndo oré ñà túú cùndáá-ndó nùú Yá Ndiöxí cuendá chindee tnúhu tnàha-ndo cáhá<sup>n</sup> ndihi-ndo-gã te xocàni-gá cuéhé-ndó, te cada càhnu iní-gá nchaa sá ñà túú vâha ní quide-ndo te núu cundecu váha iní-ndó. Te nchaa ñáyiú ndècu váha iní-xi núú Yá Ndiöxí na càcá<sup>n</sup>-yu ì<sup>n</sup> sá cuìní-yu núú-gã te ñihí-yu, chi sàá tnúhu-yu núú-gã. <sup>17</sup>Te té Èliás, téé ní xíndecu ndéé sanaha nï cáa-dé dàtná cáá nchò. Te ní cáhá<sup>n</sup> ndihi-dé Yá Ndiöxí nì yùhu nì iní-dé ní xáha<sup>n</sup>-dè xii-gá sá vâ dácùu<sup>n</sup>-gá dáú, te ní tñii-gá tnúhu ní cáhá<sup>n</sup>-dé, te ñà ní dàcuu<sup>n</sup>-gá dáú ùní cuíá dava. <sup>18</sup>Te dàtnùnì duca<sup>n</sup> te ní cáhá<sup>n</sup> ndihi tucu té Èliás-á<sup>n</sup> Yá Ndiöxí sá dácùu<sup>n</sup>-gá dáú te ní cuu<sup>n</sup>, te ní cuu tucu nchaa sá nï xitu-güedé.

<sup>19</sup>Te nchòhó ñáyiú ndècu ndihi-í ichi Xítoho Jesucrìstú, te núu dava-ndo sà ndecu-ndo ichi Yá Ndiöxí ní cùu te ní dáñá-ndó, te ndècu tucu dava-ndo nadaxínu iní tnáhá-ndó nùcùndecu tucu-ndo ìchi-gá, <sup>20</sup>te núu duca<sup>n</sup> na càda-ndo te dàcácu nihnu tnàha-ndo núú ùhú núú ndàhú, te mee Yá Ndiöxí cada càhnu iní ñáhá-gã xii-ndo cuëi ío cuéhé cuëchi ní quide-ndo.

# TUTÚ DÍHNA NUU NĚ CADÚHA TÉ PÈLÚ

Té Pèlú cadúha-dé tutú sá cúú-xí cuè ñáyiú sàndáá iní ñáhá xii Yá Ndiöxí

**1** Yúhú té Pèlú ní tendaha ñaha Xítóhó Jesucristú xíca cùu-í càhá<sup>n</sup>-í tnúhu-gá, te càdúha-í tutú-a sá cúú-xí nchòhó ñáyiú xĩnchíté nuu ndècu distritú Pòntó, ndìhi distritú Gàlaciá, ndìhi distritú Capàdociá, ndìhi distritú Àsiá, ndìhi distritú Bitiniá. <sup>2</sup>Chi Dútú Ndiöxí ní cachí-gá sá cúú-ndó dèhe-gá ndéé cútñàhá vátá ngàva-gá ñuyíú, te Espiritú-gá ní quide-xi ndècu yiñuhu-ndo núú-gã vitna. Te ní cachí-gá sá cúú-ndó dèhe-gá cuendá tñii-ndo nchàa tnúhu càhá<sup>n</sup> Xítóhó Jesucristú, ndìhi cuendá nduu ndoo nduu nine iní-ndó, chi diu cuendá-ã<sup>n</sup> nĩ xíhí Xítóhó Jesucristú. Te xicá<sup>n</sup> táhù-í núú Yá Ndiöxí sá ïo na chĩndee chitúu ñaha-gã xii-ndo cuèi vitna te cuèi núú cuàhá<sup>n</sup> núú vèxi, te diu-ni-gá ná cádá te ïo váha cuu iní-ndó cùndecu-ndo.

**Tnúhu ndee ìní sá ndécú ndìhi ñáyiú sàndáá iní ñáhá xii Yá Ndiöxí**

<sup>3</sup>Te vitna chí ná càchí-ó sã ïo càhnu cuu Yá Ndiöxí Yaá cúú Tãtã Xítóhó Jesucristú, chi diu-gá

ïo ní cundàhú iní ñáhá-gã xii-o nũu xíã<sup>n</sup> ní quide-gá sá nchóó nĩ nduu-o dàtná ìi<sup>n</sup> ñáyiú saa vitna. Te duca<sup>n</sup> nĩ quide ñaha-gã xii-o cuendá sá Xítóhó Jesucristú ní xíhí-gá te ní ndoto-gá. Te cuendá sá nĩ nduu-o dàtná ìi<sup>n</sup> ñáyiú saa, xíã<sup>n</sup> ní ngúndecu ndìhi-o tnũhu ndee ìní <sup>4</sup>sá cùndècu ndìhi-o-gá ni caa ni quĩhĩ<sup>n</sup>, chi duca<sup>n</sup> nĩ cachí-gá cunduu. Te yàcá<sup>n</sup> vá quini-gá-ó nĩ ìi<sup>n</sup> sá cuèhè sá dúhá, te ïo cudíí iní-ó cùndecu-o ndìhi-gá ni caa ni quĩhĩ<sup>n</sup>. <sup>5</sup>Te sá sàndáá iní-ó Yá Ndiöxí, núu xíã<sup>n</sup> coto ñaha-gã xii-o ndèé ná sàá nduu nàquehe<sup>n</sup> cuendá ñáhá-gã chi ïo càhnu cuu-gá.

<sup>6</sup>Te xíã<sup>n</sup> ïo cùdĩí ìní-ndó ndècu-ndo, te cuèi nándi ndòho-ndo ndecu-ndo dico sacú-ni nduu duca<sup>n</sup> ndòho-ndo. <sup>7</sup>Te òrè ná cádá càhnu iní-ndó yãha-ndo nchàa sá ná càda ñaha ñáyiú xii-ndo, te duca<sup>n</sup> te cutnùní sàndáá ndisa iní-ndó Yá Ndiöxí, te sá dúcá<sup>n</sup> sàndáá iní-ndó Yá Ndiöxí ïo-gá váha dàcúúxí díhú<sup>n</sup> cuàá<sup>n</sup> chi xíã<sup>n</sup> ñá túú cùdĩí-xi. Te cuèi duca<sup>n</sup> dico xito ndéé náhí-ní-güedě nũu ndisa cùu-xi díhú<sup>n</sup> cuàá<sup>n</sup>. Te duca<sup>n</sup> sãtnahá-xi cùu nchohó cuendá nchaa sá



ndóhó-ndó, te na sàá nduu quìxi tucu Xítohó Jesucristú te cúñaha-gă xii-ndo: “Ío váha ní quide-ndo, te vitna ío càhnu cuu-ndo, te tàú-ndó nùcúndecu váha-ndo”, duha cúñaha-gă xii-ndo.

<sup>8</sup>Te vitna ío cùu iní-ndó Xítohó Jesucristú cuèi vátá quìní-gá-ndó-gă, te duca<sup>n</sup> ío sàndáá iní-ndó-gă, te ío cùdíí iní-ndó te sùúni ñí ná cùtnùní iní-ndó năsa cunduu tnúhu cáhá<sup>n</sup>-ndó sá dúcá<sup>n</sup> ío cùdíí iní-ndó <sup>9</sup>cuendá sá ñí naníhí tàhú-ndó, chi ní sàndáá iní-ndó-gă.

<sup>10</sup>Te cue téé ní xóo cáhá<sup>n</sup> tnúhu Yá Ndiöxí ndéé sanaha ñí cachí-güedé nàcuáa cada-gá cundàhú iní ñáhá-gă xii-o vitna. Te cue téé-á<sup>n</sup> ío váha ní dácúáhá-güedě nàcuáa cada Yá Ndiöxí dácácu nihnu ñaha-gă xii-o vitna.

<sup>11</sup>Te Espíritú Xítohó Jesucristú ní ngúndecu ndíhi cue téé-á<sup>n</sup> ní xáha<sup>n</sup>-xi xii-güedé nàcuáa ndoho-gă, te ní xáha<sup>n</sup> tucu-xi xii-güedé sá sãtá ná yăha ndoho-gă te ío cunuu-gă ndíhi Yá Ndiöxí. Te ío ní sani iní-güedé nūu ná nduu sãá duca<sup>n</sup> càda-xi, ndíhi nchaa nándi-gá cúu sã cádá-xí. <sup>12</sup>Te Yá Ndiöxí ní xáha<sup>n</sup>-gă xii-güedé sá ncháá tnúhu váha càhá<sup>n</sup>-güedé vá cúu-xí cuendá méé-güedě, chi cuendá nchoo cuè ñáyiú ndècu ñuyíú-a vitna cùu-xi. Te ñiu-ni tnúhu-á<sup>n</sup> cúu tnúhu càhá<sup>n</sup> nchúhú cue téé càhá<sup>n</sup> tnúhu Yá Ndiöxí núú-ndó. Te Espíritú sá ñí taxi Yá Ndiöxí ndécú ndíhi-o chindee ñaha-xi xii-ndí càhá<sup>n</sup>-ndí tnúhu-gă. Te cue espíritú xínú cuèchi núú Yá Ndiöxí ío cuìní-xi quíní ndáá-xi nchaa nàcuáa cuáhá<sup>n</sup> tnúhu-á<sup>n</sup>.

### Yá Ndiöxí càchí-gá sá cádá-ó mèe-ni sá văha

<sup>13</sup>Te sá dúcá<sup>n</sup> ío váha ní quide ñaha Yá Ndiöxí xii-ndo xíá<sup>n</sup> xíní ññuhu-xi ío váha cuáha-ndo cuendá nàcuáa cundecu-ndo te vá cání iní-ndó càda-ndo ni ñí<sup>n</sup> sá cuèhé sá dúhá, te ío quindáá iní-ndó sã Yá Ndiöxí cada váha ñaha-gă nduu na quixi tucu Xítohó Jesucristú.

<sup>14</sup>Te ío tñii-ndo nchàa tnúhu càhá<sup>n</sup> Yá Ndiöxí, te vá cúhú<sup>n</sup>-gă iní-ndó nãndi sá cuèhé sá dúhá sã ñí xúhu<sup>n</sup> iní-ndó cùtnàhá vátá cùndècu-gá-ndó ìchi-gá te ni vă cádá-ndó. <sup>15</sup>Te cada-ndo mèe-ni sá văha cundecu-ndo dàtná quidé mèe Yá Ndiöxí Yaá ní cáhá<sup>n</sup> ñáhá xii-o cundecu-o ndíhi-gá. <sup>16</sup>Te càchí-gá núú tütú-gá: “Cada-ndo mèe-ni sá văha cundecu-ndo, chi duca<sup>n</sup> quide yúhú”, duha càchí-gá núú tütú-gá.

<sup>17</sup>Te Yá Ndiöxí cada ndáá-gá cuèchi nchaa ñáyiú, te vá cádá cuendá-gá cuèi náí ñáyiú cùu-yu, te nchòhó càchí-ndó sã díú Tãtá-ndó cùu-gá te ndáá, núu xíá<sup>n</sup> xíní ññuhu-xi canehe-ndo sá yíññuhu núú-gă ndí nchàa nduu cundecu-ndo ñuyíú-a. <sup>18</sup>Te ñiu-gá ní dácácu nihnu ñaha-gă xii-ndo ñí<sup>n</sup> ichi sá ñà túú nàndíhi ní sanu ichi ñaha cuè ñaní tnáhá-ndó ñí xíndecu ndéé sanaha ni cùu, te nchòhó sa nàha-ndo sá sã dúcá<sup>n</sup> ñí quide ñaha Yá Ndiöxí ní dácácu nihnu ñaha-gă xii-ndo ìchi-á<sup>n</sup> ñà túú ní chăhu-gá ni ñí<sup>n</sup> díhú<sup>n</sup> cuàá<sup>n</sup>, te ni ñí<sup>n</sup> díhú<sup>n</sup> cuixí<sup>n</sup> sá ndíhí ññuhu ñuyíú-a cuendá-ndó. <sup>19</sup>Chi Xítohó Jesucristú ní quixi-gá ní sati ñíñí-gă, te ní xíhí-gá núú cùrúxí cuendá

sá nchóó nàníhí tànhú-ó, te cùu-gá dàtná ìí<sup>n</sup> mbéé quiti ío váha iní-xi, quiti càndoo canine. <sup>20</sup>Te duca<sup>n</sup> nĩ ndoho Xítóhó Jesucristú, chi duca<sup>n</sup> tnàhí ndéé tnuní ndoho-gá ndéé cútnàhá vátá ngáva-gá ñuyúú. Te duca<sup>n</sup> nĩ yáha-gá cútnàhá ní quixi-gá òré vitna cùmání sǎá nduu nàa ñuyúú-a cuendá nchoo cùu-xi sá vǎha xii-o vitna. <sup>21</sup>Te nchòhó sa nihí-ndó tnũhu nàcuáa ní yáha Xítóhó Jesucristú cútnàhá ní quixi-gá ñuyúú-a, núu xǎá sàndáa iní-ndó Yǎ Ndiòxí. Te Yǎ Ndiòxí ní dándótó-gǎ Xítóhó Jesucristú, te sátá nĩ dándótó ñàha-gá te ní cachí-gá sǎ ío càhnu cuu Xítóhó Jesucristú. Te sá dúcá<sup>n</sup> nĩ cuu, xǎá<sup>n</sup> ío sàndáa iní-ndó Yǎ Ndiòxí, te ní taxi-gá tnúhu ndee ìní ndécú ndìhi-ndo sá sàá nduu cùndecu-ndo ndìhi-gá ni caa ni quíhí<sup>n</sup>.

<sup>22</sup>Te Espíritú Yǎ Ndiòxí ní guide-xi te ní sàndáa iní-ndó tnũhu-gá, te xǎá<sup>n</sup> ní nduu ndoo ní nduu nine iní-ndó, te cùu iní tnáhá ndisa-ndo nacúaa ndècu-ndo ichi Yǎ Ndiòxí, te xìni ñuhu ndisa-xi sǎ ío ni yùhu ni iní-ndó cùu iní tnáhá-ndó ìí<sup>n</sup> ìí<sup>n</sup>-ndo. <sup>23</sup>Te nchòhó ní nduu-ndo dàtná ìí<sup>n</sup> ñáyiú saa sá cuendá tnúhu Yǎ Ndiòxí, te tnúhu-á<sup>n</sup> candeca-xi iní-ndó nì caa ni quíhí<sup>n</sup>, te vá íí<sup>n</sup> ndùu ndìhi nihnu-xi, te ñá díú cuendá ñáyiú ñuyúú-a ni ndùu-ndo ìí<sup>n</sup> ñáyiú saa chi cuendá tnúhu-gá. <sup>24</sup>Chí núu tütú Yǎ Ndiòxí cǎchí-xi:

Nchaa ñáyiú ndècu ñuyúú-a cùu-yu dàtná cùhú, chi cùhú-ǎ<sup>n</sup> tnaa-ni cùdìi-xi te xìhí-xi, duca<sup>n</sup> sǎtnahá-xi cùu-yu.

Te nchaa sá ndécú ndìhí-yu cùu-xi datná ìí<sup>n</sup> itá cùhú-ǎ<sup>n</sup>, chi itá-á<sup>n</sup> tnaa-ni tucu cùdìi-xi te ndàhvǎ-xi, duca<sup>n</sup> sǎtnahá-xi cùu nchaa sá ndécú ndìhí-yu.

<sup>25</sup>Dico tnúhu Yǎ Ndiòxí chi vá náá tnàhí-xi, chi duha-ni ndècu-xi, te ñiú-ni duha cundecu-xi ni caa ni quíhí<sup>n</sup>.

Duha cǎchí-xi núu tütú-gá. Te ñiú tnúhu-á<sup>n</sup> ní dǎnhé ñáhá nchùhú cue tée cǎhá<sup>n</sup> tnúhu Yǎ Ndiòxí xii-ndo.

**2** Te xǎá<sup>n</sup> xíní ñùhu-xi dañá-ndo nchaa núu sǎ cuèhé sá dúhá, te dañá-ndo ìchi tnúhu ndehnde, te dañá-ndo vǎ dándàhú-gá-ndó mèe-ndo sá quidé vǎha-ndo, te dañá-ndo ìchi cuedú ìní, te dañá-ndo nchàa tnúhu yiti. <sup>2</sup>Te cada-ndo cuendá sá cúú-ndó dàtná cue landú yíquí<sup>n</sup> vitna sadi camá, chi landú-ǎ<sup>n</sup> mee-ni sàdi-güexi te sàhnu-güexi. Te cada iní-ndó sǎ dúcá<sup>n</sup> càda-ndo chi xìni ñuhu-xi sǎ ío cuhu<sup>n</sup> iní-ndó dàcuaha-ndo tnúhu Yǎ Ndiòxí, chi xǎá<sup>n</sup> cúú-xí mèe-ni tnúhu váha, te duca<sup>n</sup> te cuita cuehnu nihnu-ndo ìchi-gá quíhí<sup>n</sup> ndéé ná sàá nduu cùndecu-ndo núu ndécú-gǎ. <sup>3</sup>Te duca<sup>n</sup> xìni ñuhu-xi cada-ndo, chi nchòhó sa ní cutnùnì ndisa iní-ndó sǎ Yǎ Ndiòxí ío váha iní-gá.

**Xítóhó Jesucristú cúú-gǎ  
dàtná ìí<sup>n</sup> yúú**

<sup>4</sup>Te ío nanducu ñihnu-ni-ndo Xítóhó Jesucristú Yáa quidé nàcuáa naníhí tànhú-ó. Te ñiú-gá ní cuu-gá dàtná ìí<sup>n</sup> yúú sǎ ñà túú nàndìhí sá cúú-xí ñáyiú ñuyúú-a, chi ní dáquéeé tìhú ñáhǎ-yu xii-gá. Dico

Yá Ndiöxí ní cachí-gá sá Xítohó Jesucristú cúú-gă dâtná ìí<sup>n</sup> yúú sǎ ïo-gá váha, chí ío cùnuu-gá. <sup>5</sup>Te nchòhó sa ní naníhí tàhú-ndó, te ío-gá chí nándùcu nihnu Yá Ndiöxí cuèndá cuu ìí<sup>n</sup>nuu-ndo cùndecu-ndo ndìhì Espíritú-gá. Te núu duca<sup>n</sup> na càda-ndo te cuu-ndo dâtná yúú vǎha dàcaa-güedé dava vehe, te cuu tucu-ndo dâtná cue dútú nǐ xinu cuechi nǔú Yǎ Ndiöxí ndéé sanaha, nàcuáa nǎ túú nǎ cumání-ndó nǔú-gǎ, chí nchaa cue téé-á<sup>n</sup> nǐ xóo cuáha ñaha-güedé sá nǐ xóo nduu táhú-gǎ. Te nchòhó vitna tàù-ndó càda-ndo nchaa nacuáa càhá<sup>n</sup>-gá, te nduu vétú iní-gá. Te duca<sup>n</sup> càda-ndo chí ndècu-ndo ndìhì Xítohó Jesucristú. <sup>6</sup>Te Yá Ndiöxí càchí-gá núú tütú-gá:

Yúhú taxi ndecu-í ìí<sup>n</sup> Yaá ñuú Sión, te cuu-gá dâtná ìí<sup>n</sup> yúú vǎha sá sánútnǐ-güedé xíquí cimièntú ìí<sup>n</sup> vehe, chí yúhú ní cachí-í sá Yàá-á<sup>n</sup> ío cunuu-gǎ.

Te nchaa ñáyíu quèndáá iní ñáhá xii-gá vǎ íí<sup>n</sup> ndùu ndixi cuèchi iní-yu sá dúcá<sup>n</sup> sàndáá iní ñáhǎ-yu xii-gá.

Duha càchí-gá núú tütú-gá. <sup>7</sup>Te nchòhó ñáyíu sàndáá iní ñáhá xii Xítohó Jesucristú ío cùu iní-ndó-gǎ, te nchaa ñáyíu ñǎ túú sàndáá iní ñáhá xii-gá quidè-yu dâtná càhá<sup>n</sup>-xi núú tütú Yǎ Ndiöxí núú càchí-xi:

Yúú sǎ nǐ dáquéeé tǐhú cue téé dàcaa vehe, xíá<sup>n</sup> cúú-xí yúú sǎ ïo-gá nándǐhi vitna.

Duha càchí-xi núú tütú-gá. Te yúú-ǎ<sup>n</sup> cada iní-ó sǎ cúú-xí Xítohó Jesucristú, chí ní dáquéeé tǐhú ñáhá-güedé xii-gá. <sup>8</sup>Te càchí tucu-xi ìngá xichi núú tütú Yǎ Ndiöxí:

Yúú-ǎ<sup>n</sup> nguñenu ñáyíu te ndùá-yu.

Duha càchí-xi núú tütú-gá. Te tnúhu-á<sup>n</sup> quée-xí sǎ ïo quide sáá iní ñáyíu núú-gǎ, chí ñǎ túú cuíní-yu tnií-yu tnúhu càhá<sup>n</sup>-gá, te duca<sup>n</sup> tnàhí ndéé tnuní sá ncháá ñáyíu ñǎ túú cuíní tnií tnúhu càhá<sup>n</sup>-gá, te ío cùu sáá iní-yu núú-gǎ.

**Ñáyíu ndècu ndìhì Yá Ndiöxí**

<sup>9</sup>Te nchoo cùu-o ñáyíu sa ní dáquéeé dèí<sup>n</sup> ñaha Yá Ndiöxí xii-o cuèndá cundecu-o ndìhì-gá, te cùu-o dútú xínú cuèchi-o núú-gǎ, te mee-gǎ cúú-gǎ Yaá ío cùnuu, te cùu-o ñáyíu quide ndáá xǐndecu ichi-gá te cùu tucu-o ñáyíu yǐndaha-gá. Te duca<sup>n</sup> nǐ quide ñaha-gǎ xii-o cuèndá sá cǔñaha-o xii nchaa ñáyíu sá ïo càhnu cuu-gá, te ío vǎi núú sǎ vǎha quide-gá, te dǐu-gá ní quide ní dáñá-ó nchàa ichi cuehé ichi duha ndècu-o ní cuu, te ní sanu ichi ñaha-gǎ xii-o ìí<sup>n</sup> ichi váha, te vitna cùtnuní iní-ó sǎ ïo càhnu cuu-gá. <sup>10</sup>Te nchoo cùu-o ñáyíu ñǎ túú ndècu ndìhì Yá Ndiöxí ní cùu, dico vitna ní ngúndecu ndìhì-o-gǎ, te dàvá-á<sup>n</sup> vǎtǎ sàá-gá nduu càda váha ñaha-gǎ xii-o, dico vitna sa ní sáá nduu quide váha ñaha-gǎ xii-o, chí ío cùndahú iní ñáhá-gǎ.

**Cada váha-o cùndecu-o cunu cuechi-o núú Yǎ Ndiöxí**

<sup>11</sup>Te nchòhó ío cùu iní ñáhà-í xii-ndo, te càchí tnúhu-í xii-ndo sǎ nchóó cùu-o datná cue ñáyíu ndècu tnaduha ìí<sup>n</sup> ñuú, te duca<sup>n</sup> sǎtnahá-xi cùu-o chí tnaa-ní ndècu-o ñuyúú-a, te sáá nduu ndùu táhú-ó cùndecu-o

núu ndécú Yă Ndiöxí táxí tnùnî-gá, te xíă<sup>n</sup> càhá<sup>n</sup> ndàhú-í núu-ndó sã vã cádá-ndó ñi ì<sup>n</sup> sá cuèhé sá dúhá sàni iní-ndó, chi nchaa xíă<sup>n</sup> ñá túú cùu-xi sá vãha sá cúu-xí-ndó. <sup>12</sup>Te cada vãha-ndo cùndecu-ndo núu nchaa ñáyiu ñá túú ndècu ichi Yă Ndiöxí, te cuèi na càhá<sup>n</sup> ñáyiu sá nchòhó nchìcú<sup>n</sup> nihnu-ndo ichi cuehé ichi duha, dico quini-yu nchaa sá vãha quide-ndo, dico na sãá nduu dândixi túu Yă Ndiöxí iní-yu sá ñà túú quide vãha-yu ndècú-yu, te dàvá-á<sup>n</sup> cachí-yu sá quidé vãha-ndo ndècu-ndo, te cada càhnú-yu Yă Ndiöxí.

<sup>13</sup>Te Xítohó Jesucristú cuinî-gá sá nchòhó ío quindáá iní-ndó nchaa cue tée cùchiu<sup>n</sup> taxi tnunî ñáhá xii-ndo, te duca<sup>n</sup>-ni quindáá iní-ndó cuèi mee tée cùnuu vihi-gá yíndàha ñaha xii ñáyiu. <sup>14</sup>Te duca<sup>n</sup>-ni quindáá iní-ndó nchaa dava-gá cue tée cùnuu, chi Yă Ndiöxí duca<sup>n</sup> ñí cachí-gá cunduu sá cuè tée-á<sup>n</sup> cada ndáá-güedé nchaa cuèchi ñáyiu quide cuehé quidé dùha ndecu, te càhá<sup>n</sup> vãha-güedé cuendá nchaa ñáyiu xiquide vãha ndècu. <sup>15</sup>Te Yă Ndiöxí cuinî-gá sá cádá vãha-ndo cùndecu-ndo cuendá nchaa ñáyiu ío ñi ñí dîquí-xi càhá<sup>n</sup> cuèhé cuendá-ndó sã ndécú-ndó ichi Yă Ndiöxí vã ñihí-gá-yu tnúhu càhá<sup>n</sup>-yu.

<sup>16</sup>Te nchòhó, Yă Ndiöxí ñí quide-gá sá cúu-ndó ñáyiu cuu cada nàcuáa véxi iní méé-xí, dico ñá díú sã dúcá<sup>n</sup> ñí quide ñaha-gã xii-ndo, te ngóo-ndo càni iní-ndó càda-ndo nándi sá cuèhé sá dúhá, chi cada-ndo sã cúu-ndó ñáyiu xínu cuechi núu Yă Ndiöxí. <sup>17</sup>Te canehe-ndo sã yíñuhu núu nchaa

ñáyiu, ndihi núu tée cùnuu vihi yindaha ñaha xií-yu, te cuu iní tnáhá ndè mee-ndo nacuáa ndècu-ndo ichi Yă Ndiöxí, te ío canehe-ndo sã yíñuhu núu-gã.

### Nchaa nàcuáa ndoho-o cùndecu-o ichi Xítohó Jesucristú

<sup>18</sup>Te nchaa nchòhó ñáyiu xínu cuechi canehe-ndo sã yíñuhu núu cuè patróo<sup>n</sup>-ndó, te quindáá iní-ndó càda-ndo nchaa chiu<sup>n</sup> tahu-güedé. Te ì<sup>n</sup>-ni càda-ndo núu cuè tée vãha iní-xi, ndihi núu cuè tée ío cuihna ñí-xi. <sup>19</sup>Te núu nchòhó ná càda ndee iní-ndó ndòho-ndo nchaa sá ñà túú tàu-ndó ndòho-ndo cuendá sá cuinî-ndó cùndáá-ndó núu Yă Ndiöxí ñá, te ío nduu vétú iní-gá. <sup>20</sup>Te núu nchòhó ñí quide-ndo ì<sup>n</sup> cuèchi, te sàhni iní-ndó dândoho ñaha ñáyiu xii-ndo, ðte ná sá vãha cùu xíă<sup>n</sup>-i? Dico núu nchòhó ná cádá ndèe iní-ndó ndòho-ndo nchaa sá cádá ñaha ñáyiu xii-ndo sã cuendá sá quidé-ndó sã vãha ña, te núu duca<sup>n</sup> na càda-ndo te cùu-xi ì<sup>n</sup> sá vãha núu Yă Ndiöxí. <sup>21</sup>Te Yă Ndiöxí ñí cachí-gá sá cádá ndèe iní-ó ndòho-o nándi ndoho-o sã cuendá sá quidé-ó sã vãha, chi ío ñí ndoho Xítohó Jesucristú cuendá-ó, te duca<sup>n</sup> tàu-ó cànichicú<sup>n</sup> nihnu-o càda ndee iní-ó ndòho-o nándi ndoho-o, chi duca<sup>n</sup> ñí quide-gá. <sup>22</sup>Te mee-gã ñá túú quide-gá ñi ì<sup>n</sup> sá cuèhé sá dúhá, te ñi ì<sup>n</sup> tnúhu ndehnde ñà túú càhá<sup>n</sup>-gá. <sup>23</sup>Te òré ñí xóo cúcuèhé ñáhá-güedé xii-gá, te ñá túú ñí xóo danchòcáva-gá tnúhu cuèhé, te òré ñí xóo dandòho ñaha-güedé xii-gá, te ñá túú ñí xãha<sup>n</sup>-gã xii-güedé sá ío ná cada

ñaha-gã, chi núu ndáhá Yá Ndiöxí ní xóo nachihi-gá méé-gã, ndihi nchaá sá sání iní-güedé cada ñaha-güedé xii-gá. Te Yá Ndiöxí cúú-gã Yaá ío váha cada ndáá cuéchi nchaá ñáyiú na sàá nduu. <sup>24</sup>Te Xítóhó Jesucristú cúú-gã Yaá ní xíhí núu cùrúxí cuendá nchaá cuéchi nchoo ñáyiú ndècu ñuyíú-a. Te duca<sup>n</sup> ñí xíhí-gá cuendá nchoo dùu<sup>n</sup> duu<sup>n</sup> dañá-o nchaá ichi cuehé ichi duha, te cada ndáá-ó cùndecu-o ichi-gá. Te ní dánicüehé ñáhá-güedé xii-gá, te sá dúcá<sup>n</sup> ñí ndoho-gá xíã<sup>n</sup> ní ngúndecu váha nchoo vitna. <sup>25</sup>Te nchoo cùu-o datná cue mbéé cue quití ní xíta ni cùu, dico vitna ní tuha-o Xítóhó Jesucristú, te Yaá-á<sup>n</sup> cúú-gã dàtná ìí<sup>n</sup> toli xító ñaha-gá xii-o vitna cuendá sá vã cuíta nihnu-o.

**Nàcuáa tàú ñáyiú tnándaha  
cadá-yu cundecú-yu**

**3** Te nchaá nchòhó ñáyiú òhí ní tnandaha ío quindáá iní-ndó yíi-ndo cuendá sá ñú ñá túú sàndáá iní-güedé tnúhu Yá Ndiöxí te quindáá iní-güedé cuendá sá ndéhe-güedé quidé ndáá-ndó ndècu-ndo, te ni ñá túú xini ñuhu-xi cáhá<sup>n</sup>-ndó tnúhu-gá núu-güedé. <sup>2</sup>Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñuhu núu Yá Ndiöxí. <sup>3</sup>Te vá cání iní-ndó mèe-ni cunduu vii-ndo, te ndada-ndo ðíquí-ndó nàcuáa tàú-xi cunduu, te vá cání iní-ndó nãndi canehe-ndo, te ni vã cání iní-ndó cuìhnu-ndo mee-ni dóó váha sá ío vii ndáa. <sup>4</sup>Chi iní-ndó xini ñuhu-xi cunduu vii cunduu váha-xi núu Yá Ndiöxí cuèi vitna

te cuèi núu cuáhá<sup>n</sup> núu vèxi, te cuu-ndo ñáyiú ío càhnu iní-xi, te núu duca<sup>n</sup> na càda-ndo te ío cuu váha iní Yá Ndiöxí. <sup>5</sup>Te duca<sup>n</sup> ío vii ío váha ní xínduu iní nchaá ñáyiú òhí ní xíndecu ndéé sanaha, te ñáyiú-á<sup>n</sup> ío ní sándáá iní-yu Yá Ndiöxí te ní cudíú-yu núu-gã, te ní tñíí-yu nchaá tnúhu ní cáhá<sup>n</sup> yíí-yu. <sup>6</sup>Te duca<sup>n</sup> ñí xóo cada ndíi Sără ní xóo quindáá iní ndíi yíi ndíi, ndíi Àbrahám, te ní cánehe ndíi òhí-á<sup>n</sup> sã yíñuhu núu yíi ndíi. Te núu nchòhó quidé vãha-ndo ndècu-ndo te ñá túú yùhú-ndó ñã cada ñaha tnàha ñáyiú-ndo xii-ndo, te núu duca<sup>n</sup> quide váha-ndo ndècu-ndo te quide-ndo datná ní quide ndíi Sără.

<sup>7</sup>Te nchòhó cue téé ndècu ñadíhí-xi ío váha cuáha-ndo cuendá nàcuáa cundecu váha-ndo ndíhí-yu, te ío vii cáhá<sup>n</sup> ndíhí-ndò-yu, chi ñáyiú-á<sup>n</sup> íí-gã-yu dàcúúxí nchòo cue téé, te duca<sup>n</sup> càda-ndo chi ndí ndúú-ndó ndúu táhú-ndó cùndecu-ndo ndíhí Yá Ndiöxí, te núu duca<sup>n</sup> na càda-ndo te òré cáhá<sup>n</sup> ndíhí-ndo Yá Ndiöxí te tedóho ñaha-gã xii-ndo.

**Ñáyiú quide sá vãha ndòhó-yu**

<sup>8</sup>Te càchí tnúhu tucu-í xii-ndo sã ío cuu ìí<sup>n</sup>nuu-ndo cùndecu-ndo, te cundàhú iní tnáhá-ndó ìí<sup>n</sup> ìí<sup>n</sup>-ndo, te cuu iní tnáhá tucu-ndo nacuéa ndècu-ndo ichi Yá Ndiöxí, te cuu-ndo ñáyiú ndàhú iní-xi. <sup>9</sup>Te núu ìí<sup>n</sup> sá ñá túú váha quide ñaha ñáyiú xii-ndo, te ñá ðíú-ní dùca<sup>n</sup> nanchocáva-ndo càda-ndó-yu, àdi xícüehé ñáhã-yu xii-ndo, te vá ná dànochocáva-ndo òu-ni tnúhu cuèhé, chi cáca<sup>n</sup> táhú-ndó ñúú Yá Ndiöxí

cuendá sá ná cáda vâha ñaha-gă xií-yu, te duca<sup>n</sup> càda-ndo chi Yá Ndiöxí ní cáhá<sup>n</sup> ñáhá-gă xii-ndo cuendá sá cáda vâha ñaha-gă xii-ndo tnàhá-ndo. <sup>10</sup>Te núú tütú Yá Ndiöxí càchí-xi:

Nchaa ñáyiú cuíní cundecu váha ndi nchàa nduu nini cundecú-yu ñuyíú-a, xini ñuhu-xi sá vâ càhá<sup>n</sup>-yu tnúhu cùtexínu, te ni vâ dácuañdehndé-yu.

<sup>11</sup>Te xini ñuhu-xi duu<sup>n</sup> duu<sup>n</sup> dañá-yu nchaa ichi cuèhé ichi duha, te cadá-yu mee-ni sã vâha,

te ío ndúcú-yu nàcuáa cadá-yu cundecu váha-yu ndiñi tnàha ñáyiú-yu te diu-ni duca<sup>n</sup> cànchicú<sup>n</sup> nihnú-yu cadá-yu.

<sup>12</sup>Te Yá Ndiöxí xító-gă nchaa ñáyiú quide ndáá núú-gă te tedóho-gă nchaa tnúhu càhá<sup>n</sup>-yu,

dico nchaa ñáyiú ñá túú cuíní cada ndáá, ñáyiú-á<sup>n</sup> ñà túú cùu váha iní-gá núú-yu.

Duha càchí-xi núú tütú-gá.

<sup>13</sup>Te vâ yõ níhí ndéé càda ñaha xii-o ñ<sup>n</sup> sá ñà túú vâha te núú mee-ni sã vâha na càda-o cundecu-o. <sup>14</sup>Àdi núú ná cúú sã ná cáda ñaha ñáyiú xii-o sã cuendá sá quidé vâha-o ndècu-o ña, te sá dúcá<sup>n</sup> ná cáda ñáhá-yu xii-o cùu-xi ñ<sup>n</sup> sá vâha sá cúú-xi-ó núú Yá Ndiöxí. Te na càchí tnúhu-í xii-ndo sã vâ yùhú-ndö-yu, te ni vâ cùndiyí-ndó cuendá nchaa sá ná càda ñáhá-yu xii-ndo. <sup>15</sup>Te nèhe-ndo sá yíñùhu núú Xítohó Jesucristú. Te ío cundecu túha-ndo dànehé-ndó ñáyiú véxi ndècu tnúhu núú-ndó

nàcuáa nduu tnúhu ndee iní ní taxi Xítohó Jesucristú ndécú ndiñi-ndo, te cuu vii cuu váha iní-ndó cãhá<sup>n</sup> ndiñi-ndö-yu, te cáhá<sup>n</sup>-ndó núú-yu mee-ni tnúhu yíñùhu nacuáa cùu váha iní Yá Ndiöxí. <sup>16</sup>Te ío cada váha-ndo cundecu-ndo cuendá sá vâ cùndiyí-ndó, te núú duca<sup>n</sup> na càda-ndo, te nchaa ñáyiú xicuehé ñáhá xii-ndo cuendá sá quidé vâha-ndo ndècu-ndo ichi Xítohó Jesucristú quendóo canúú-yu ndiñi nchaa tnúhu càhá<sup>n</sup>-yu, chi nchòhó quidé vâha-ndo ndècu-ndo. <sup>17</sup>Te váha-gá sá ndóhó-ó cuendá sá quidé-ó sã vâha te núú mee Yá Ndiöxí duca<sup>n</sup> cuíní-gá cunduu, te ñá dífú sã ndóhó-ó cuendá sá ñà túú quide-o sã vâha.

<sup>18</sup>Te Xítohó Jesucristú ní xíhí-gá sá cuendá nchaa cuéchi nchaa nchoo ñáyiú ndècu ñuyíú-a, te ñ<sup>n</sup> xito-ni duca<sup>n</sup> ñí xíhí-gá te duca<sup>n</sup> te vâ cùu tnàhí-gá, te mee-gă cúú-gă Yaá ñá túú tnàhí cuéchi-xi, te duca<sup>n</sup> ñí ndoho-gá cuendá nchaa cuéchi ñáyiú ndècu ñuyíú-a ñáyiú ñá túú cuíní cada ndáá núú Yá Ndiöxí, te duca<sup>n</sup> ñí cuu cuendá sá núcundecu váha-yu núú Yá Ndiöxí te núú na quíndáá iní ñáhă-yu xii-gá. Te mee-gă ní xíhí-gá dico Espíritú-gá chi ní xíndecu-ni-xi, <sup>19</sup>te Espíritú-gá ní sáhá<sup>n</sup>-xi ní cáhá<sup>n</sup>-xi tnúhu Yá Ndiöxí núú nchàa espíritú ñáyiú ndècu núú ùhú núú ndàhú. <sup>20</sup>Te ñáyiú-á<sup>n</sup> cúú ñáyiú ní xíndecu ndéé sanaha cùtnàhá ní xíndecu ndíi Nöé, chi ñáyiú-á<sup>n</sup> ño ní quide sàá iní-yu núú Yá Ndiöxí. Te Yá Ndiöxí ío váha iní-gá, chi ní dácácá-gă nduu ñí xíndecuu ndíi Nöé ní cadúha ndíi bàrcú cuendá ndétú-gă

ndixi cuèchi iní-yu sá ñà túú quide váha-yu ndècú-yu ní cùu. Te dàvá-á<sup>n</sup> ñí ndaa ndute ñuyíú te ní cácu úná duha ná tnàhá ñáiyu, chi ní quée-yu xítí bàrcú-á<sup>n</sup>, te ñà túú ní cǎhá-yu. <sup>21</sup>Te sá dúcá<sup>n</sup> ñí cácu ñáiyu úná-á<sup>n</sup> ñà túú ní cǎhá-yu ndute ní ndaa ñuyíú dàvá-á<sup>n</sup>. Te xǎ<sup>n</sup> quée-xí sǎ cuándùte ñáiyu vitna, te naníhí tàhú-yu te núu na quèndáá iní-yu tnúhu ndáá tnúhu Yá Ndiòxí. Te ñà dǎú sǎ cuándùte-o te nduu ndoo nduu nine yiquí cùnú-ó te naníhí tàhú-ó, chi xìni ñuhu-xi nǎhmá-ó nǔú Yǎ Ndiòxí nchaa yíca cuèchi-o, te nduu ndoo nduu nine iní-ó, te duca<sup>n</sup> te naníhí tàhú-ó, chi Xítóhó Jesucrístú ní xíhí-gǎ cuèndá-ó te ní ndoto-gǎ. <sup>22</sup>Te Yaá-á<sup>n</sup> cuǎndaa-gǎ andiu, te ní ngóo-gǎ xio cùha Yá Ndiòxí, te tàxi tnuní-gǎ nchaa espíritú cúnùu ndìhi nchaa dava-gǎ cue espíritú xínú cuèchi.

#### Cada-o nàcuáa cuíní méé Yǎ Ndiòxí

**4** Te Xítóhó Jesucrístú ní ndoho-gǎ cútnàhá ní xíndecu-gǎ ñuyíú-a, te vitna nchòhó cundecu túha-ndo ndòho-ndo cuendá-gǎ, chi nchaa ñáiyu ndòho nándi sá ndóhó cuèndá-gǎ dàñá-yu nchaa sá cuèhé sá dúhá. <sup>2</sup>Te duca<sup>n</sup> ñà túú-gǎ ndécú-yu ichi cuèhé ichi duha, chi mee-ñà nàcuáa cǎhá<sup>n</sup> Yǎ Ndiòxí quidě-yu ndècú-yu ñuyíú-a. <sup>3</sup>Te nchòhó sa nàha-ndo sá ïo cuèhé nǔú sǎ cuèhé sá dúhá ñí xóo cada-o cǔtnàhá vátá cúndècu-gǎ-ó ichi Yá Ndiòxí, chi ní xóo cada-o nchàa sá cuèhé sá dúhá cùdíí iní nchaa ñáiyu ñà túú sàndáá iní tnúhu-gǎ, te dàvá-á<sup>n</sup> ñí xóo cada-o nchàa núú sǎ cuèhé sá

dúhá, te ní xóo cani cuèhé ní xóo cani duha iní-ó, te ní cuu-o cuè ñáiyu quihu, te ní xóo cundecu-o vico núú ñí xóo cada-o nchàa sá ñà túú váha, te ní xóo níhí tnàhá-ó ndìhi nchaa tnaha quihu-o, te ní xóo chiñuhu-o nchàa sá cǎchí-yu cùu ndiòxí te ñà ndàá sá ndiòxí cúú nchàa xǎ<sup>n</sup>, te nándi-gǎ nchaa sá cuèhé sá dúhá ñí xóo cada-o dàvá-á<sup>n</sup>. <sup>4</sup>Te ñáiyu-á<sup>n</sup> cúññuhu-yu vitna sá ñà túú-gǎ ñìhí tnàhá-ó ndìhí-yu cada-o nchàa sá cuèhé sá dúhá quidě-yu, te xǎ<sup>n</sup> cǎhá<sup>n</sup> cuèhé-yu cuèndá-ó vitna. <sup>5</sup>Dico sáá nduu te ñáiyu-á<sup>n</sup> nǎhmá-yu nchaa sá quidě-yu núú Xítóhó Jesucrístú, chi diu-gǎ sa ndècu túha-gǎ sá cǎdá ndǎá-gǎ cuèchi nchaa ñáiyu sa ní xíhí, ndìhi cuèchi nchaa ñáiyu xíndecu vívú. <sup>6</sup>Te cue ñáiyu sa ní xíhí ní xíndedóho tnúhu Xítóhó Jesucrístú, te cuèi ní xíhí-yu dàtná xíhí dava-gǎ ñáiyu, dico espíritú-yu chi ní nduu táhú-xi ndècu váha-xi dàtná ndécú Yǎ Ndiòxí.

<sup>7</sup>Te vitna ta cùyatni danaa Yá Ndiòxí ñuyíú-a núu xǎ<sup>n</sup> ío váha cuáha-ndo cuèndá nàcuáa cundecu-ndo, te cǎhá<sup>n</sup> ndìhi-ndo-gǎ. <sup>8</sup>Te xìni ñuhu-xi sá ïo cuu iní tnàhá-ndó ì<sup>n</sup> ì<sup>n</sup>-ndo, chi núu duca<sup>n</sup> na cùu iní tnàhá-ndó ì<sup>n</sup> ì<sup>n</sup>-ndo, te vá cǎní-gǎ iní-ndó cǎda cuendá-ndó nchàa sá ñà túú váha quide ñaha ñáiyu xii-ndo, <sup>9</sup>te nchòhó ñáiyu xíndecu vehe-xi cuáha ñuu-ndo vehe xii cue ñáiyu ñuhu ichi na ndetatú-yu, te ío váha cuu iní-ndó dùca<sup>n</sup> cada-ndo. <sup>10</sup>Te Yá Ndiòxí ní taxi-gǎ ndí díí<sup>n</sup> nǔú táhú ndécú ndìhi-ndo ì<sup>n</sup> ì<sup>n</sup>-ndo, te nàcuáa ndùu táhú ñí nduu táhú-ndó ì<sup>n</sup>

ii<sup>n</sup>-ndo te duca<sup>n</sup> chindee tnaha-ndo, te vá dáñá ndèé-ndó càda-ndo nchaa nacuáa tàuchiu<sup>n</sup> Yá Ndiöxí cada-ndo, te chindee ñàha-gá xii-ndo. <sup>11</sup>Te dava nchòhó ñáyiú càhá<sup>n</sup> tnúhu Yá Ndiöxí núú ñáyiú, xìni ñuhu-xi cáhá<sup>n</sup>-ndó nàcuáa ndùu tnúhu-gá núú-yu, te dava nchòhó ñáyiú quide nchaa núú chiú<sup>n</sup> chindee tnaha ñáyiú-xi, xìni ñuhu-xi cada-ndo sá Yá Ndiöxí chindèe ñàha-gá xii-ndo, te duca<sup>n</sup> càda-ndo nchaa núú sá vǎha, chi Xítóhó Jesucristú tnàhá-gá chindèe ñàha-gá xii-ndo, te duca<sup>n</sup> ïo cuu càhnu Yá Ndiöxí. Te vitna tàù-ó cǎhá<sup>n</sup>-ó sǎ ïo càhnu cuu Xítóhó Jesucristú, chi diu-gá cúnùu-gá nchaa nduu nchaa quíú, te duca<sup>n</sup> na cùnduu.

**Ndoho tnahá-ó cùndecu-o  
ichi Xítóhó Jesucristú**

<sup>12</sup>Te nchòhó ñáyiú ío cùu iní-í, vá cúnùhu-ndo sǎ ïo ndòho-ndo ndecu-ndo ichi Xítóhó Jesucristú, chi sá dúcá<sup>n</sup> ndòho-ndo-á<sup>n</sup> cúnùnì ndisa sá sàndáá iní-ndó-gǎ, te vá cánì iní-ndó nǎ cuendá duca<sup>n</sup> ndòho-ndo. <sup>13</sup>Chi da cudíí iní-ndó te núú ndòho-ndo datná ní ndoho Xítóhó Jesucristú, te duca<sup>n</sup> sùúní cùdíí iní-ndó òré ná quixi tucu-gá ñuyíú-a te dàvá-á<sup>n</sup> quíní-ndó sǎ ïo càhnu cuu-gá. <sup>14</sup>Te núú xícuèhé ñáhá ñáyiú ndècu ichi cuehé ichi duha xii-ndo cuendá sá ndécú-ndó ichi Xítóhó Jesucristú, te xíá<sup>n</sup> cúú-xí ìi<sup>n</sup> sá vǎha sá cúú-xí-ndó núú-gǎ, te duca<sup>n</sup> chi Espíritú Yá Ndiöxí sá ïo cùnùu ndecu ndíhi ñàha-xi xii-ndo, te nchaa ñáyiú ndècu ichi cuehé ichi duha-ǎ<sup>n</sup> càhá<sup>n</sup> cuèhé-yu cuendá

Xítóhó Jesucristú, dico nchòhó càchí-ndó sǎ ïo càhnu cuu-gá.

<sup>15-16</sup>Te núú nchòhó dándòho ñàha ñáyiú xii-ndo sǎ cuendá sá ndécú-ndó ichi Xítóhó Jesucristú ñá, te vá cúú càhá<sup>n</sup> núú-ndó, chi ndacá<sup>n</sup> táhú-ndó núú Yá Ndiöxí cuendá sá ndécú-ndó ichi-gá. Te cuèi ndòho-ndo ndecu-ndo, dico ñá túú cùu-ndo ñáyiú sàhni ndíyi te ni ñà túú cùu-ndo ñáyiú dùhu, te ni ñà túú cùu-ndo ñáyiú quide cuehé quidé dùha, te ni ñà túú cùu-ndo ñáyiú chindee tnúhu tnàha ñáyiú-xi ìi<sup>n</sup> sá ñà túú tàù-ndó càda-ndo.

<sup>17</sup>Te vitna sa quèsaha Yá Ndiöxí cada ndáá-gá nchaa sá quidé nchò ñáyiú ndècu ndíhi-gá, te núú duca<sup>n</sup> te ndèé-gá cada-gá nchaa ñáyiú ñá túú sàndáá iní ñáhá xì-gá òré ná sàà nduu dùca<sup>n</sup> cada ñàha-gá xí-yu. <sup>18</sup>Te nchòhó xìni-ndó sǎ ñáyiú quide váha ndècu ichi Xítóhó Jesucristú ndòho tnahá-yu ndécú-yu, dico sáá nduu te nduu táhù-yu cundecú-yu ndíhi-gá. Te núú duca<sup>n</sup> ndòho nchaa ñáyiú quide váha ñà, ìte nása-gá yáha nchaa ñáyiú ndècu ichi cuehé ichi duha na sàà nduu càda ndáá Yá Ndiöxí cuèchi-yu-i? <sup>19</sup>Te nchaa nchòhó ñáyiú ndòho nacuáa cuínì Yá Ndiöxí xìni ñuhu-xi sá vǎ dáñá ndèé-ndó càda váha-ndo cùndecu-ndo, te ío quindáá iní-ndó sǎ xító ñàha-gá xii-ndo. Te diu-gá cúú-gǎ Yáá ní cadúha ñàha xì-o, te quide-gá ìi<sup>n</sup> sá càhá<sup>n</sup>-gá.

**Nàcuáa tàù-xi cada ñáyiú  
ndècu ichi Xítóhó Jesucristú**

**5** Te yúhú càhá<sup>n</sup>-í dóho nchaa nchòhó cue tée yàndaha nchaa dava-gá ñáyiú ndècu ichi



Xítohó Jesucristú, chi tnàhá yúhú yíndàha-í ñáyi ndècu ichi-gá, te sàndáá iní-í tnúhu-gá, te ní xiní-í nchaa nàcuáa ní ndoho-gá, te sáá nduu te tnàhá-í cunu-í ndihi-gá.

<sup>2</sup>Te ío canehe cuèndá-ndó nchàa ñáyi ndècu ichi Yá Ndiöxí yíndàha-ndo te cada-ndo dàtná quidé cuè toli, chi cue téé-á<sup>n</sup> ío váha xito-güedé mbéé-güedé. Te canehe cuèndá-ndó-yu sá cúú iní méé-ndó te ñá díú sá ío ì<sup>n</sup> ñáyi cada yica ñaha xii-ndo, te ni ñá díú sá cuíní-ndó cùhu<sup>n</sup> yáhu-ndo, chi ni yùhu ni iní-ndó còto-ndó-yu, chi duca<sup>n</sup> cuíní Yá Ndiöxí cunduu.

<sup>3</sup>Te vá cadá-ndó sá ío cunu-ndo núú-yu, chi cada-ndo mée-ni sá váha cuèndá duca<sup>n</sup> càncicú<sup>n</sup> nihnú-yu cadá-yu tnàhá-yu. <sup>4</sup>Te òré ná quíxí tùcu Xítohó Jesucristú Yá néhé cuèndá ñáhá xii-o nchaa-o ñuyú-a, te taxi-gá sá ío váha nduu táhú-ó, te cunu-o ndihi-gá ni caa ni quíhí<sup>n</sup>.

<sup>5</sup>Te nchòhò ñáyi ndècu ichi Xítohó Jesucristú càhá<sup>n</sup>-í dóho-ndo sá ío quindáá iní-ndó cuè téé yíndaha ñaha xii-ndo nacuaa ndècu-ndo ichi-gá, te nchaa-ndo tàú-ndó quindáá iní tnàhá-ndó ì<sup>n</sup> ì<sup>n</sup>-ndo, chi núú tütú Yá Ndiöxí càchí-xi ì<sup>n</sup> xichi:

Nchaa ñáyi quide cahnu mee-xi ñá túú cùu váha iní Yá Ndiöxí núú-yu,

dico nchaa ñáyi ndàhú iní-xi te chindee ñaha-gá xii-yu.

Duha càchí-xi núú tütú-gá. <sup>6</sup>Te dañà-ndo mée-ndo núú ndáhá Yá Ndiöxí, chi mee-gá ío cunu-gá. Te núú duca<sup>n</sup> na càda-ndo, te sáá nduu te cada nínu ñaha-gá xii-ndo. <sup>7</sup>Te

nchaa sá yáha-ndo ndècu-ndo te nachihi-ndo ndàha Yá Ndiöxí, chi mee-gá xító ñaha-gá xii-ndo.

<sup>8</sup>Te ío váha cuáha-ndo cuèndá cundecu-ndo, te quíhi iní-ndó chi sácuíhná xícá cùu-xi cuíní-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ì<sup>n</sup> quítí déé<sup>n</sup> xícá ndècu sá cáxí-xí. <sup>9</sup>Te ío quindáá iní-ndó Xítohó Jesucristú, te vá dáñá-ndó mée-ndo dandahú ñáhá sàcuíhná xii-ndo càda-ndo nacuaa cuíní-xi, chi nàha-ndo sá ncháá ñáyi ndècu ichi Xítohó Jesucristú xíndecu nihí ñuyú ndóhò-yu dàtná ndóhó nchò ndecu-o ichi-gá. <sup>10</sup>Dico sacú-ni nduu duha cundoho-o te dàtnùní ñá túú-gá ná cumání-ó cundecu-o núú Yá Ndiöxí, te dàvá-á<sup>n</sup> vā cání ì<sup>n</sup> cani úú iní-ó cundecu-o ichi-gá. Te ío-gá ngúndecu ndihi-o tnúhu ndee iní cada-o nchàa nacuaa càhá<sup>n</sup>-gá, te duca<sup>n</sup> càda-o chi mee Yá Ndiöxí ío chindee ñaha-gá xii-o, te diu-ni Yáá-á<sup>n</sup> ío cùu iní ñáhá-gá xii-o, chi ní cáhá<sup>n</sup> ñáhá-gá xii-o cundecu-o núú ío váha càa ndecu-gá cundecu-o ni caa ni quíhí<sup>n</sup>, te duca<sup>n</sup> ní quide-gá chi ní sándáá iní-ó Xítohó Jesucristú. <sup>11</sup>Te ío ndacá<sup>n</sup> táhú-ó núú Yá Ndiöxí chi ío càhnu cuu-gá, te cunu-gá nchaa nduu nchaa quíú. Te duca<sup>n</sup> na cunduu.

#### Tnúhu ndéé núú ní ndihi-ná

<sup>12</sup>Te té Silvanú xiní-í sá cúú-dé ì<sup>n</sup> téé quide ndáá ndécú ìchi Xítohó Jesucristú, te diu-dé ní cáhá<sup>n</sup> ndàhú-í núú-dé ní tee-dé ì<sup>n</sup> úú tnúhu sá ní xáha<sup>n</sup>-í xii-dé núú tütú-a cuèndá daquixi-í ndaha-ndo, te núú tütú-a càchí tnúhu ndáá-í

xii-ndo sǎ Yǎ Ndiǒxí ío cùu iní  
 ñáhá-gǎ, te chìndee ñaha-gá xii-ndo  
 ndècu-ndo, te cǎchí tnúhu tucu-í  
 xii-ndo sǎ ío quíndáá iní-ndó sǎ  
 ndàá duca<sup>n</sup> quèide ñaha-gá xii-ndo.

<sup>13</sup>Te cue ñáyíu ndècu ñúú  
 Babiloniá, ñáyíu ndècu ichi Yá  
 Ndiǒxí, ðíu-ni ñáyíu ní cachí Yǎ  
 Ndiǒxí sǎ nánìhí tàhú ðàtná cúú  
 nchòhó, ío quèide ndee iní ñáhǎ-yu

xii-ndo, te tnàhá té Mǎcú téé cùu  
 datná ìí<sup>n</sup> déhe-í quídé ndèe iní  
 ñáhá-dě xii-ndo. <sup>14</sup>Te ndíhi tnúhu  
 yíñùhu cada ndee iní tnáhá-ndó  
 ìí<sup>n</sup> ìí<sup>n</sup>-ndo, te xìcá<sup>n</sup> táhù-í núú Yǎ  
 Ndiǒxí sǎ ío na cùndecu nahi  
 nchaa nchohó ñáyíu ndècu ndíhi  
 Xítóhó Jesucrístú. Te duca<sup>n</sup> na  
 cùnduu. Te ío chí cǎdá ndèe iní-nǎ  
 vitna.

# TUTÚ CÚÚ ÒÚ NÍ CADÚHA TÉ PÈLÚ

Té Pèlú cádúha-dé tutú quíhí<sup>n</sup> ndaha  
ñáyiú sàndáá iní tnúhu Yá Ndiöxí

**1** Yúhú té Xímú, àdi Pelú chi úú  
dìu-í, xínú cuèchi núú Xítóhó  
Jesucristú, chi mee-gă ní tendaha  
ñaha-gă xii-í xicá cùu-í cáhá<sup>n</sup>-í  
tnúhu-gă. Te cádúha-í tutú-a sá  
cúú-xí nchàa nchóhó ñáyiú sàndáá  
iní ñáhá xii-gă dàtná sàndáá  
iní-ndí-gă, te duca<sup>n</sup> chi Tătă-ó  
Dütú Ndiöxí ní dácàhá<sup>n</sup>-gă iní-ó  
ní sàndáá iní-ó-gă, chi cùu-gă Yaá  
ío váha quide ndáá ndíhi Xítóhó  
Jesucristú Yaá dácăcu nihnu ñaha  
xii-o núú ùhú núú ndàhú. <sup>2</sup>Te xicá<sup>n</sup>  
táhù-í núú Yá Ndiöxí sá ùu<sup>n</sup>-gă  
uu<sup>n</sup>-gă ná cuíta chindee chitúu  
ñaha-gă xii-ndo quíhí<sup>n</sup>, te duca<sup>n</sup> ïo  
váha cuu iní-ndó cùndecu-ndo, te  
duca<sup>n</sup> càda-gă chi ta cùtnúní-gă  
iní-ndó nàcuáa ndùu cuendá-gă,  
te duca<sup>n</sup> ta cùtnúní tucu iní-ndó  
nchàa nacúaa ndùu cuendá Xítóhó  
Jesucristú Yaá cúú Xítóhó-ó.

**Nàcuáa quide ñáyiú ndècu  
ichi Xítóhó Jesucristú**

<sup>3</sup>Te Yá Ndiöxí ío cànhu cuu-gă  
chi chindee ñaha-gă xii-o quide  
ndáá-ó ndècu-o datná cuiní méé-gă,  
te duca<sup>n</sup> chi cùtnúní iní-ó nàcuáa

sàni iní Xítóhó Jesucristú Yaá ní  
cáhá<sup>n</sup> ñáhá xii-o. Te òré ní cáhá<sup>n</sup>  
ñáhá-gă xii-o te ní cutnúní iní-ó sã  
ïo cànhu cuu-gă te ío váha quide-gă.  
<sup>4</sup>Te duca<sup>n</sup> ní cutnúní tucu iní-ó  
nàcuáa ní cáhá<sup>n</sup>-gă cada ñaha-gă  
xii-o, te tnúhu ní cáhá<sup>n</sup>-gă-án ïo  
cànhu cuu-xi te ío váha, te nchoo  
ní sàndáá iní-ó tnúhu-án ñuu xíã<sup>n</sup>  
ñã túú-gă ndécú-ó ìchi cuehé ichi  
duha te ni ñã túú-gă sání iní-ó  
càda-o nándi sá cuèhé sá dúhá,  
te ní cuu vii ní cuu váha iní-ó  
vítna. <sup>5</sup>Te sá dúcá<sup>n</sup> quide-gă te  
xíã<sup>n</sup> ío nducu ndèe-ndo cada-ndo  
nchaa nacúaa cáhá<sup>n</sup>-í-a, te nchòhó  
sàndáá iní-ndó-gă dico ñã díú  
mèe-ni xíã<sup>n</sup> chi tnàhá xíní ñùhu-xi  
cada ndáá-ndó cùndecu-ndo. Te  
núu quide ndáá-ndó ndècu-ndo  
te xìni ñùhu-xi tecú tnúní-ndó  
tnúhu-gă. <sup>6</sup>Te núu tècú tnúní-ndó  
te cùu-ndo ñáyiú xìni cotnií mee-xi,  
te núu cùu-ndo ñáyiú sàcòo tnií  
mee-xi te xìni ñùhu-xi cunduu  
cànhu iní-ndó cuèí nándi sá ná  
yãha-ndo cùndecu-ndo, te núu  
cànhu iní-ndó te xìni ñùhu-xi cada  
ndáá-ndó cùndecu-ndo datná cuiní  
mèé Yá Ndiöxí cada-ndo. <sup>7</sup>Te núu  
quide ndáá-ndó ndècu-ndo, te  
xìni ñùhu-xi ío cuu iní tnáhá ndì

mee-ndo nacuaá ndècu-ndo ichi-gá, te núu cùu iní tnáhá ndì mee-ndo te xìni ñuhu-xi cuu iní-ndo nchàa dava-gá tnàha ñáyi-ndo.

<sup>8</sup>Te núu sa duca<sup>n</sup> quide-ndo ndecu-ndo te uu<sup>n</sup>-gá cuita duca<sup>n</sup> càda-ndo quíhí<sup>n</sup> núu cuahá<sup>n</sup> núu vèxi, te núu duca<sup>n</sup> quide-ndo te cùu-ndo cue ñáyi-ndo ñá túú dàna iní-xi xíndecu, te cuita cutnùní-gá iní-ndo nchàa nacuaá sàni iní Xítóhó Jesucristú quíhí<sup>n</sup>. <sup>9</sup>Te nchaa ñáyi-ndo ñá túú cuíní duca<sup>n</sup> càda cuú-yu ñáyi-ndo ñá túú tnàhí ndìxi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuèhé sá dúhá ní xóo cadá-yu, te ñáyi-á<sup>n</sup> cúú-yu dàtná ìí<sup>n</sup> ñáyi-ndo cuàá àdi datná ìí<sup>n</sup> ñáyi-ndo ñá túú cùtnuní váha núu-xi, te duca<sup>n</sup> sãtnahá-xi cùu-yu cuendá sá dúcá<sup>n</sup> quidé-yu. <sup>10</sup>Te xíá<sup>n</sup> nùu yúhú càhá<sup>n</sup>-í dóho nchaa nchòhó ñáyi-ndo ndècu ichi Xítóhó Jesucristú, te ío nducu ndè-ndo cada váha-ndo cùndecu-ndo cuendá cutnùní ndáá iní-ndo sã Yá Ndióxi ní càhá<sup>n</sup> ñáhá-gã xii-ndo, te duca<sup>n</sup> ní quide-gá chi duca<sup>n</sup> ní cachí-gá cada-gá. Te vá ìí<sup>n</sup> ndùu cani iní-ndo dàña-ndo ichi-gá, te núu vá dàná ndèé-ndo càda-ndo nchaa nacuaá càhá<sup>n</sup>-í-a. <sup>11</sup>Te núu duca<sup>n</sup> na càda-ndo cundecu-ndo, te ío vii ío váha cada Yá Ndióxi quehe<sup>n</sup> cuendá ñáhá-gã xii-ndo òré ná sàá-ndó nùú ndécú Xítóhó Jesucristú táxi tnùní-gá nchaa nduu nchaa quíú, te ñu-ni Yáá-á<sup>n</sup> cúú Xítóhó-ó te ní dáçacu nihnu ñaha-gã xii-o nùú ùhú núú ndàhú.

<sup>12</sup>Te duca<sup>n</sup>-ni quíhi-í dandàcu iní ñáhá-í xii-ndo nchàa tnúhu

càhá<sup>n</sup>-í-a cuèi sa xìní-ndó tnúhu-á<sup>n</sup>, te cuèi sàndáá váha iní-ndo nchàa tnúhu ndáá dácuaàha-ndo. <sup>13</sup>Te yúhú quidé cuendá-í sá ìo tàú-xi càhá<sup>n</sup>-í dóho-ndo nìni ndecu-í ñuyú-a cuendá sá vã nácuaàna-ndo nacuaá cada-ndo cùndecu-ndo. <sup>14</sup>Chi Xítóhó Jesucristú ní cachí-gá sá ñà túú-gã vãi nduu cundecu-í ñuyú-a te cuú-í. <sup>15</sup>Te ío nducu ndè-í nducu-í nácuaá cada-í cuendá quendóo ndíhi-ndo nchàa tnúhu càhá<sup>n</sup>-í-a, te cuèi na yãha cuú-í dico vá nácuaàna-ndo cada-ndo nchaa nacuaá càhá<sup>n</sup> tnúhu sá dánèhé ñáhá-í xii-ndo vïtna.

#### Cue téé ní xìní núú sã ìo càhnu cuu Xítóhó Jesucristú

<sup>16</sup>Te sa ní dánèhé ñáhá-ndí xii-ndo sã ìo càhnu cuu Xítóhó Jesucristú. Te ní cachí tnúhu tucu-ndí nácuaá cada-gá òré quixi tucu-gá, te tnúhu-á<sup>n</sup> cúú-xí tnúhu ndáá cuítì te ñá dífú tnúhu sá ní sani iní cue ñáyi-ndo ñuyú-a cùu-xi, chi nchúhú ní xìní núú-ndí nácuaá ní quide-xi cùtnàhá ní cutnùní iní-ndí sá ìo càhnu cuu Xítóhó Jesucristú. <sup>17</sup>Chi dàvá-á<sup>n</sup> ìo váha ní quide Tãtá-ó Dütú Ndióxi ní quide càhnu-gá Xítóhó Jesucristú, te ñu-ni dàvá-á<sup>n</sup> ní càhá<sup>n</sup> Dütú Ndióxi ndéé andi-ú ní xáha<sup>n</sup>-gã xii Xítóhó Jesucristú: “Yòhó cúú-n Dèhe-í téé ío cùu iní-í, te ío cùdífí iní ñáhá-í xii-n”, duha ní xáha<sup>n</sup> Yá Ndióxi xii Xítóhó Jesucristú. <sup>18</sup>Te nchúhú ní tecú dóho-ndí ní càhá<sup>n</sup> Yá Ndióxi ndéé andi-ú cùtnàhá duca<sup>n</sup> ní xáha<sup>n</sup>-gã xii Xítóhó Jesucristú, chi tnàhá-ndí ndécú-ndí ndíhi-gá yucu núú dúcá<sup>n</sup> ní quide càhnu ñaha Yá Ndióxi xii-gá.

<sup>19</sup>Te ndècu ndihi-o nchaa tnúhu ní cáhá<sup>n</sup> cue téé ní xóo cáhá<sup>n</sup> tnúhu Yá Ndiöxí ndéé sanaha te nchaa tnúhu-á<sup>n</sup> càhá<sup>n</sup>-xi nchaa nàcuáa cada-xi vitna, te cùtnuní iní-ó sá tnúhu ndáá cúú-xí, te xìni ñuhu-xi cada cuendá váha-ndo nchaa nacuáa càhá<sup>n</sup> tnúhu-á<sup>n</sup>, chi tnúhu-á<sup>n</sup> cúú-xí dàtná ì<sup>n</sup> ñuhú dáyèhé-xi ndéé òré véxi túndaá quéné chòdíní cáhnú dáyèhé-dì. Te duca<sup>n</sup> sàtnahá-xi cùu tnúhu-á<sup>n</sup> chi quide-xi nacuáa cutnùní iní-ó cuendá Xitohó Jesucristú. <sup>20</sup>Te xìni ñuhu-xi sá ïo-gá cada cuendá-ndó sá ñà túú ñáyiú tecú tnùní ni ì<sup>n</sup> tnúhu sá ñí chídó tnùní cue téé ní cáhá<sup>n</sup> tnúhu Yá Ndiöxí ndéé sanaha, te núu Yá Ndiöxí vá cadá-gã nàcuáa cutnùní iní-yu nàcuáa càhá<sup>n</sup> nchaa tnúhu-á<sup>n</sup>. <sup>21</sup>Te cue téé-á<sup>n</sup> ïo ní xíndecu yiñuhu-güedé núú Yá Ndiöxí, te nchaa tnúhu sá ñí cáhá<sup>n</sup>-güedé-á<sup>n</sup> ñà túú cùu-xi tnúhu sá ñí cahu iní méé-güedě, chi Espiritú Yá Ndiöxí ní dácáhu ìní ñáhá-xí xì-güedé nàcuáa cunduu tnúhu cáhá<sup>n</sup>-güedé.

**Cue téé cächí sá càhá<sup>n</sup> tnúhu  
Yá Ndiöxí te ñá ndàá**

**2** Te ndéé sanduu chi ní xíndecu cue téé ní xóo dandàhú ñáhá xii ñáyiú isràèl cächí sá càhá<sup>n</sup> tnúhu Yá Ndiöxí te ñá ndàá sá càhá<sup>n</sup>-güedé tnúhu-gá, te diu-ni duca<sup>n</sup> tucu cundecu cue téé dandàhú ñáhá xii-ndo vitna, chi cachí-güedé sá càhá<sup>n</sup>-güedé tnúhu Yá Ndiöxí te ñá ndàá. Te cue téé-á<sup>n</sup> ïo yídáhu cáhá<sup>n</sup>-güedé, te nchaa tnúhu cáhá<sup>n</sup>-güedé-á<sup>n</sup> dacuítá nihnu ñaha-xi xii-ndo te núu na

tèdóho-ndo, chi cue téé-á<sup>n</sup> vã nñuu-güedé sá Xitohó Jesucristú ní xíhí-gá cuendá-güedé. Te sá dúcá<sup>n</sup> càda-güedé ío-gá ndíhi dacuítá nihnu-güedé méé-güedě. <sup>2</sup>Te vai ñáyiú xínu iní-yu cadá-yu nándi sá cuèhé sá dúhá cuendá sá dúcá<sup>n</sup> càda cue téé-á<sup>n</sup>, te cuendá xíá<sup>n</sup> ngóo ñáyiú cáhá<sup>n</sup> úhú-yu cuendá ichi Yá Ndiöxí. <sup>3</sup>Te mee-ni tnúhu sá ñí cahu iní cue ñáyiú ñuyíú-a danèhé ñáhá-güedě xii-ndo, te quesaha-güedě sá cúú-xí tnúhu ndáá te ñá ndàá cuendá-ni sá cuñaha-ndo dñhú<sup>n</sup> xii-güedé, chi diu-ni xíá<sup>n</sup> tnàhí cuhu<sup>n</sup> iní-güedé, dico Yá Ndiöxí sa ní cunaha ndècu túha-gá cuendá cada ndáá-gá cuèchi-güedé, te na sàà nduu te cuíta nihnu duu<sup>n</sup>-güedé, chi Yá Ndiöxí vá nàcuànaa-gá ì<sup>n</sup> sá ñí cachí-gá cada-gá.

<sup>4</sup>Te Yá Ndiöxí ñá túú ní quide cahnu iní-gá sá ñí quide cue espíritú ñá túú ní cuíní cada ndáá xínu cuèchi núú-gã ní cùu, chi ní dáquìh<sup>n</sup> ñáhá-gã xii-xi ì<sup>n</sup> xichi núú ïo ndòho-xi ndecu-xi, te xíá<sup>n</sup> cundedí nihnu-xi ndéé sáà nduu cuíta nihnu duu<sup>n</sup>-ná-xi. <sup>5</sup>Te Yá Ndiöxí ñá túú ní quide cahnu tucu iní-gá nchaa sá ñí quide ñáyiú ñuyíú dñhna, chi dàvá-á<sup>n</sup> ñí dándáá-gã ndute ñuyíú ñí cáhá nchaa ñáyiú ndècu ichi cuehé ichi duha te ì<sup>n</sup> dñi-ni té Nòé ndíhi úsá-gá tucu cue ñáyiú cùu ndí mee-dé ní dácäcu nihnu-gá. Te té Nòé-á<sup>n</sup> cúú-dě téé ní cáhá<sup>n</sup> dóho-yu nàcuáa cada váha-yu cundecú-yu ni cùu te ñá túú ní cuíní-yu. <sup>6</sup>Te Yá Ndiöxí ní dängává-gã ñuhú ní dánáá-gã ñáyiú ñuú Sòdomá ndíhi ñáyiú ñuú Gòmorrá te mee-nã yáá

nĩ nduu ñuú-á<sup>n</sup>. Te sá dúcá<sup>n</sup> nĩ cuu xíá<sup>n</sup> cútnùní iní-ó nàcuáa cada ñaha Yá Ndiöxí xii nchaa ñáyiú ñá túú quide váha. <sup>7</sup>Dico té Löt téé ní quide ndáá ní xíndecu ñ<sup>n</sup> ñuú-á<sup>n</sup> dàvá-á<sup>n</sup> chi ní dácácu nihnu ñaha-gă xii-dé. Te nchaa ñáyiú ñuú núú nĩ xíndecu-dé-á<sup>n</sup> io ní xínduu cuihna iní-yu, te mee-ni ìchi díí iní ní xíndecú-yu, te sá dúcá<sup>n</sup> nĩ xóo cadá-yu xíá<sup>n</sup> io ní ndíhú iní té Löt. <sup>8</sup>Te ñ<sup>n</sup> nduu ñ<sup>n</sup> nduu ní xóo cada ndáhú-xi iní té Löt-á<sup>n</sup> cuendá nchaa tnúhu cuèhé tnúhu duha ní xóo cáhá<sup>n</sup>-yu ní xóo cundedóho-dé, ndíhi cuendá nchaa sá cuèhé sá dúhá nĩ xóo cadá-yu ní xóo quíní-dé, te mee-dě ní cuu-dé ñ<sup>n</sup> téé ní xínduu vii ní xínduu váha iní-xi núú Yá Ndiöxí. <sup>9</sup>Te sá dúcá<sup>n</sup> nĩ yáha té Nöe ndíhi té Löt, xíá<sup>n</sup> cútnùní iní-ó sã Yá Ndiöxí io chindee-gá cue ñáyiú quide ndáá ndécú ìchi-gá cuendá sá vã cadă-yu nándi sá cuèhé sá dúhá cuèi nándi na ndòhó-yu cundecú-yu. Te Yá Ndiöxí cächí-gá sá ncháá ñáyiú ndècu ichi cuehé ichi duha sa ndècu túha-yu sá quíh<sup>n</sup>-yu núú ùhú núú ndàhú nduu nà yáha cundáá cuéchi-yu.

<sup>10</sup>Te uu<sup>n</sup>-gá cada ñaha Yá Ndiöxí xii nchaa cue téé ndècu ichi díí iní, te dàquee tíhú-güedě nchaa tnúhu sá sánú ìchi ñaha xii-o nacúaa cada-o cùndecu-o, te cùu-güedé cue téé ñíí iní-xi, te yíí iní-güedé, te ñá túú yùhú-güedé cáhá<sup>n</sup> úhú-güedé cuendá nchaa espíritú cúnú. <sup>11</sup>Te cue espíritú xínú cuèchi núú Yá Ndiöxí io cùnuu-xi dacúxí cuè téé-á<sup>n</sup>, dico ñá túú cùyíi-xi cáhá<sup>n</sup>-xi dàtná cáhá<sup>n</sup> cue téé-á<sup>n</sup> òrè ndàcá<sup>n</sup> cuéchi-xi núú Yá Ndiöxí cuendá

nchaa sá quidé cuè espíritú cùndíhi yucu ñáváha.

<sup>12</sup>Te nchaa cue téé dandàhú ñáhá xii-ndo-á<sup>n</sup> cúú-güedě dàtná cue quiti, chi cue quiti-á<sup>n</sup> ñá túú ndècu sá xìní tnùnigüedi, chi cue quiti-á<sup>n</sup> nĩ cacu-güedi sá tníí-ó-güedi te cahni-o-güedi. Te duca<sup>n</sup> sãtnahá-xi cùu nchaa cue téé-á<sup>n</sup>, chi cáhá<sup>n</sup> cuèhé-güedé cuendá ndédani càa espíritú cuèi ñá túú xìnigüedé ná espíritú cúú-xí, te ñu-ni mee-güedě dácúita nihnu-güedé mée-güedě sá dúcá<sup>n</sup> quide-güedé, <sup>13</sup>te sáá nduu te nacháhu-güedé nchaa sá quidé-güedě-á<sup>n</sup>, te cuèi nduu cuèi niú cúdíí iní-güedé quidé-güedě nchaa núú sã cuèhé sá dúhá sàni iní-güedé. Te òrè nàtacá-ndó càda-ndo ñ<sup>n</sup> vico chíñuhu-ndo Yá Ndiöxí te chitnahá ñáhá-güedě xii-ndo, te cada dusa<sup>n</sup>-güedě sá cúdíí iní-güedé sá dándàhú ñáhá-güedě xii-ndo, te dìcò sácá<sup>n</sup>-núú cuăha ñaha-güedě xii-ndo dùca<sup>n</sup> na cada-güedé.

<sup>14</sup>Te nchaa cue téé-á<sup>n</sup> òrè xìnigüedé ñ<sup>n</sup> ñáyiú ñíhí te ndíhi-ni sàni iní-güedé cáhá<sup>n</sup> ndíhi ñaha-güedě xii-yu, te ñá túú nduu vétú iní-güedé cuendá nchaa sá cuèhé sá dúhá quide-güedé chi uu<sup>n</sup>-gá uu<sup>n</sup>-gá sání iní-güedé cada-güedé. Te cuáhá<sup>n</sup>-güedé dándàhú-güedé nchaa ñáyiú ñá túú ñíhí ndéé càda ndáá cuendá canchicú<sup>n</sup> nihnú-yu nchaa tnúhu cáhá<sup>n</sup>-güedé. Te mee-ni ncháa sá ndécú ndíhi tnaha ñáyiú-güedé cúú iní-güedé, te cue téé-á<sup>n</sup> cúú-güedě cue téé duu<sup>n</sup> duu<sup>n</sup> sa ní xíta nihnu núú Yá Ndiöxí. <sup>15</sup>Chi cùu-güedé cue téé vá cánigă iní-xi cada

ndáá, te nchìcú<sup>n</sup> nihnu-ná-güedé quidé-güedé nàcuáa ní xóo cada ndíi Bàlaám déhe ndíi Bèór, chi ndíi Bàlaám-á<sup>n</sup> nǐ xóo tnahá iní ndíi cada ndíi chù<sup>n</sup> cuehé nàcuáa ní xóo níhí ndíi díhú<sup>n</sup>. <sup>16</sup>Te Yá Ndiöxí ní quide-gá ní cáhá<sup>n</sup> búrru ndíi ní tenàà ñáhá-dí xii ndíi cuèndá sá vǎ cadá ndíi ì<sup>n</sup> cuéchi sàni iní ndíi cada ndíi ni cùu. Te sá dúcá<sup>n</sup> nǐ cuu xíá<sup>n</sup> ní nguítuu ndíi ñá túú ní quide ndíi ì<sup>n</sup> sá ñà túú nàndíhi sàni iní ndíi ni cùu.

<sup>17</sup>Te nchaa cue téé duca<sup>n</sup> xǐquide cùu-güedé dàtná ì<sup>n</sup> doco yìchí, te cùu tucu-güedé dàtná ì<sup>n</sup> vícò sǎ xídó tǎchí te ñá túú dǎú nchídó-xí, te sa ndècu túha ì<sup>n</sup> xichi núú ïo nee quíh<sup>n</sup>-güedé cundecu-güedé ni caa ni quíh<sup>n</sup>. <sup>18</sup>Te cue téé-á<sup>n</sup> càhá<sup>n</sup>-güedé dàtná càhá<sup>n</sup> ì<sup>n</sup> téé ío cùu cahnu dico ñá túú vèdana nàndíhi nchaa tnúhu càhá<sup>n</sup>-güedé, te cue téé-á<sup>n</sup> dándàhú-güedé nchaa ñáyiú íchí nǐ dáñá ìchi cuehé ichi duha, te xǎha<sup>n</sup>-güedé xíi-yu sá cúú-ní càdá-yu nchaa sá cuèhé sá dúhá quide nchaa ñáyiú ndècu ichi díí iní, <sup>19</sup>te xǎha<sup>n</sup> tucu-güedé sá cúú-ní càdá-yu nání véxi iní-yu cuèí sá vǎha te cuèí sá cuèhé, dico mee-güedé chi mee-ni sǎ cuèhé sá dúhá cùnuu quide-güedé. Te nchaa ñáyiú ñá ndácú dàña nándi sá cuèhé sá dúhá cùu-yu dàtná ì<sup>n</sup> ñáyiú xínu cuechi ñá túú tnàhí dàña quee núú chíú<sup>n</sup> pàtróó<sup>n</sup>-xi. Te duca<sup>n</sup> sǎtnahá-xi cùu-yu chi ñá ndácú-yu dàñá-yu nándi sá cuèhé sá dúhá quidé-yu. <sup>20</sup>Te núu ñáyiú sa ní dáñá nchaa ichi cuehé ichi duha cuèndá sá nǐ cutnùnì iní-yu nàcuáa ndùu tnúhu Xítóhó

Jesucristú, Yáá ní dácácu nihnu ñaha xii-o núú ùhú núú ndàhú ná nànchocáva iní-yu cundecu tucú-yu ichi cuèhé ichi duha, te mee-nǎ sá cuèhé sá dúhá tàxi tnunì ñáhá-xí xíi-yu, te núu duca<sup>n</sup> te vǎa-gá tucu cadá-yu dàcúxí dàtná ní xóo cadá-yu cútnàhá vátá cútnùnì-gá iní-yu nàcuáa ndùu tnúhu-gá. <sup>21</sup>Te vǎha-gá sá vǎ ngùnu ichí-yu ichi ndáá ní cùu te ñá díú sǎ sà ní ngúnu ichí-yu te ní dáñá-yu nchaa tnúhu-gá sá sà ní níhí-yu ndècu ndíhí-yu sànu ichi ñaha-xi nacuáa cundecú-yu ni cùu. <sup>22</sup>Te ñáyiú duca<sup>n</sup> xǐquide quèe ndáá-xi nàcuáa cuáhá<sup>n</sup> ì<sup>n</sup> cuèndú sá càchí-xi: “Iná ní nacaxi-dí sá nǐ ndusa<sup>n</sup>-dí, te cùchí quítì íchí nǐ xichi ndute càndoo cuáhá<sup>n</sup>-ni tucu-dí cuchi ñuhu-dí núú ndèhyú”, duha cuáhá<sup>n</sup> cuèndú-á<sup>n</sup>.

### Xítóhó Jesucristú quixi tucu-gá

**3** Te nchaa nchòhò ñáyiú ío cùu iní-í cùtnunì iní-í sá ïo vǎha sàni iní-ndó, te xéhé cúú-xí tútú cúú úu càdúha-í sá cúú-xí-ndó, te ì<sup>n</sup>-ni càhá<sup>n</sup>-í dándàcu iní ñáhà-í xii-ndo nchaa tnúhu sá sà ní xíndedóho-ndo. <sup>2</sup>Chi cuìní-í sá vǎ nàcuànaa-ndo nchaa tnúhu ní cáhá<sup>n</sup> nchaa cue téé ní xóo cáhá<sup>n</sup> tnúhu Yá Ndiöxí ndéé sanaha, te ni vǎ nàcuànaa-ndo nchaa tnúhu ní cáhá<sup>n</sup> cue téé ní cáhá<sup>n</sup> tnúhu Xítóhó Jesucristú Yáá ní dácácu nihnu ñaha xii-o núú ùhú núú ndàhú, chi diu nchaa tnúhu-á<sup>n</sup> sánú ìchi ñaha-xi xii-o nacuáa cada-o cundecu-o.

<sup>3</sup>Te ío-gá xínì ñuhu-xi cutnùnì iní-ndó nàcuáa cada-xi òrè vátá

sàa-gá nduu quixi tucu Xítohó Jesucristú ñuyíu-a, te cächí tnúhu-í xii-ndo sã cündècu ñáyi u cuhu<sup>n</sup> iní mee-ni nchàa sá cuèhé sá dúhá te mee-ni xǎ<sup>n</sup> cadá-yu, te cáhá<sup>n</sup> cuèhé cáhá<sup>n</sup> duhá-yu cuèndá tnúhu Yá Ndiöxí. <sup>4</sup>Te cachí-yu: “Ñá ndàa sá quíxí Xítohó Jesucristú ñuyíu-a, chi núu quixi-gá te sá ndéé ama-gá sa ní quexio-gá ní cùu. Te dàtná-ni quide-xi vitna ñu-ni duha ní quesaha-xi quide-xi ndéé cúnàhá ní ngáva ñuyíu, te ñu-ni duha quide-xi ndéé cúnàhá ní xíndecu cue ñaní tnáhá-ó ndéé sanaha, te ñu-ni duha quide-xi ndéé ní sáa nduu ní xíhí-güedé, te ñu-ni duha quide-xi ndéé vitna”, duha cáhá<sup>n</sup>-yu. <sup>5</sup>Te ñucùu<sup>n</sup> cadá-yu vá cadá cuèndá-yu sá Yá Ndiöxí ní cáhá<sup>n</sup>-gá te ní ngúndecu andiu ndíhi ñuyíu-a, te ñu-gá ní quide ní quene ñuhu yíhí xítí ndute ní ngúndecu-xi ñí<sup>n</sup> xio. <sup>6</sup>Te ñí<sup>n</sup> xito ní dándáá Yá Ndiöxí ndute ñuyíu-a ní dánáá-gã nchaa sá ió. <sup>7</sup>Te Yá Ndiöxí ní cachí-gá sá cündècu-ni ñuyíu-a ndíhi andiu ndéé ná sáa nduu càda-gá nchaa nàcuáa ní cáhá<sup>n</sup>-gá sá cúu-xí nchàa ñáyi u ndècu ichi cuehé ichi duha, te dàvá-á<sup>n</sup> danàa-gá nchaa ñáyi u-á<sup>n</sup> chi cáyú andiu ndíhi ñuyíu-a. <sup>8</sup>Te nchaa nchòhó ñáyi u ío cùu iní-í, ío cuhu<sup>n</sup> iní-ndó tnúhu na càhá<sup>n</sup>-í-a, chi Yá Ndiöxí ñá túú sàni iní-gá dàtná sání iní mée-ó, te ñí<sup>n</sup> nduu cùu-xi datná úxí cièndú cuíá, te úxí cièndú cuíá-á<sup>n</sup> cúu-xí dàtná ñí<sup>n</sup> nduu sá cúu-xí-gã. <sup>9</sup>Te Yá Ndiöxí ñá túú dàna ndodo iní-gá vá cadá-gã ñí<sup>n</sup> sá càhá<sup>n</sup>-gá dàtná cächí cue ñáyi u sá dáná ndòdo iní-gá cada-gá ñí<sup>n</sup> sá càhá<sup>n</sup>-gá, chi ñucùu<sup>n</sup>

tnahí dàcaca-gá nduu cuèndá sá ío cündahú iní ñáhá-gã xii-o, te cuíní-gá sá ncháá ñáyi u ndixi túu iní-yu sá ñà túú quide váha-yu ndècú-yu te tuhá-yu ichi-gá, te duca<sup>n</sup> quide-gá chi cuíní-gá sá vá cuíta nihnu ni ñí<sup>n</sup>-yu.

<sup>10</sup>Te dàtná quidé cue ñadúhú quíhu-güedé ñí<sup>n</sup> vehe dùhu-güedé òré ñá túú yíhi iní xítohó vehe-á<sup>n</sup>, te duca<sup>n</sup> càda Xítohó Jesucristú chi nduu ñà túú yíhi iní ñáyi u ñuyíu-a quixi tucu-gá, te dàvá-á<sup>n</sup> cada-xi andiu dàtná quidé-xí òré níhi vìhi cahá<sup>n</sup> ñúhu, te ñu-ni òré-á<sup>n</sup> ndoñuhu àndiu, te cáyú nchaa chódíní, te cáyú tucu tnàhá ñuyíu-a ndíhi nchaa sá ió.

<sup>11</sup>Te vitna nchòhó sa xíní-ndó sã náa ñuyíu-a te xíá<sup>n</sup> ío xíni ñuhu-xi cada váha-ndo cündecu-ndo, te cada-ndo nàcuáa cuíní mée Yá Ndiöxí cunduu. <sup>12</sup>Te ío nducu ndèe-ndo duca<sup>n</sup> cada-ndo cuèndá duca<sup>n</sup> ndíhi-ni sáa nduu càda-gá nchaa nàcuáa càhá<sup>n</sup>-gá, te duca<sup>n</sup> nchòhó cundecu túha-ndo sáa nduu-á<sup>n</sup>. Te ñu-ni nduu-á<sup>n</sup> ndoñuhu àndiu chi cáyú-xí, te ñu-ni duca<sup>n</sup> ndoñuhu tucu nchaa chódíní chi ndíhi-dí cáyú. <sup>13</sup>Te nchoo ndètu-o sáa nduu cündecu-o ñí<sup>n</sup> ñuyíu sáa, te quíní-ó ñí<sup>n</sup> andiu saa datná ní cachí Yá Ndiöxí, te yàcá<sup>n</sup> chi mee-ñá cue ñáyi u quide váha cundecu.

<sup>14</sup>Te nchòhó ñáyi u ío cùu iní-í, nini ndètu-ndo sáa nduu dùca<sup>n</sup> cada-xi ío nducu ndèe-ndo cada-ndo mee-ni sá váha cundecu-ndo ichi Yá Ndiöxí, te cundecu nahi-ndo, te cada-ndo nchàa nàcuáa vá cündècu cuéchi-ndo núú-gã. <sup>15</sup>Te ío cada



cuendá-ndó sǎ dácaca-gá nduu dùca<sup>n</sup> cada-gá chi cuíní-gá sá ncháá ñáyi  
 naníhí tàhú-yu. Te té Pǎblú téé ío  
 cùu iní-ó ndècu ndihí-o ichi Xítohó  
 Jesucristú diu-ni nàcuáa càhá<sup>n</sup>-í-a  
 diu-ni duca<sup>n</sup> ñí tee-dé ìí<sup>n</sup> núú tütú  
 ní dáquíxí-dě ndaha-ndo, te ní  
 tee-dé nàcuáa ní dácáhú iní ñáhá  
 Yă Ndiöxí xii-dé. <sup>16</sup>Te diu-ni duca<sup>n</sup>  
 càhá<sup>n</sup>-dé nchaá dava-gá núú tütú  
 cádũha-dé, te dava tnúhu càhá<sup>n</sup>-dé  
 ío úhú tecú tnùní-ó, núú xíǎ<sup>n</sup> ñáyi  
 ñá túú cùtnuní váha iní-xi, ñáyi  
 ío yáchí sàndáá iní-xi ìí<sup>n</sup> tnúhu,  
 ñáyi-á<sup>n</sup> tècú tnùní dátñí-yu nchaá  
 tnúhu ní chídó tnùní-dé, ndihí  
 nchaá dava-gá tnúhu yòdo tnuní  
 núú tütú Yă Ndiöxí, te sá dúcá<sup>n</sup>  
 quidé-yu te dacuítá nihnú-yu  
 mée-yu.

<sup>17</sup>Te nchòhó ñáyi ío cùu iní-í,  
 sa cùtnuní iní-ndó nàcuáa quide  
 dava ñáyi, núú xíǎ<sup>n</sup> ío xìní

ñuhu-xi quíhi iní-ndó cùndecu-ndo  
 cuendá duca<sup>n</sup> cùndecu-ni-ndo  
 ichi-gá, te vá dáñá-ndó mée-ndo  
 dandahú ñáhá nchàa cue téé  
 ndècu ichi cuehé ichi duha, chi  
 cue téé-á<sup>n</sup> ñà túú sàni váha  
 iní-güedé cuendá tnúhu Yă Ndiöxí.  
 Te núu na dàña-ndo mee-ndo  
 dandahú ñáhá-güedě xii-ndo te vá  
 cùndècu váha-gá-ndó ìchi-gá dátñá  
 ndécú-ndó vitna. <sup>18</sup>Te nchòhó  
 uu<sup>n</sup>-gá uu<sup>n</sup>-gá cuita cutnùní-gá  
 iní-ndó quǐhí<sup>n</sup> nchaá nàcuáa ta  
 chìndee ñaha Xítohó Jesucristú  
 xii-ndo cuáhá<sup>n</sup>. Te duca<sup>n</sup> ño-gá  
 cuita cutnùní iní-ndó nchàa  
 nacuáa sàni iní-gá, te diu-gá  
 cúú-gǎ Yaá ní dácăcu nihnu ñaha  
 xii-o núú ùhú núú ndàhú. Te chí  
 ná cächí-ó sǎ ño cànno cuu-gá cuèi  
 vitna té cuèi ndéé núú cuahá<sup>n</sup> núú  
 vëxi. Te duca<sup>n</sup> na cùnduu. Te ío chí  
 cádá ndèe iní-ñǎ vitna.

# TUTÚ DÍHNA NÍ CADÚHA TÉ JUÀÁ

**Tnúhu sá càhá<sup>n</sup> nàcuáa naníhí tàhú-ó**

**1** Te yúhú té Juàá càchí tnúhu-í xii-ndo cuèndá Crístú Yaá càhá<sup>n</sup> nàcuáa cundecu ndíhi-o Yă Ndiöxí. Te Crístú-á<sup>n</sup> sa ndècu-gá ndéé cútñàhá ní ngáva ñuyúú. Te yúhú ní xiní nùu-í ndíhi cue téé ní xica cuu ndíhi-í nàcuáa càa nacuáa ndùu-gá. Te ní xíndedóho-ndí tnúhu ní cáhá<sup>n</sup>-gá, te ní tendaha-ndí-gá te ní cutnùnì ndáá iní-ndí sá ì<sup>n</sup> yiqui cuñú cúú-gă. <sup>2</sup>Te ní quixi túu-gá ñuyúú-a, te ní xiní-ndí-gá, te xíă<sup>n</sup> càchí tnúhu ndáá-ndí xii-ndo. Te càchí tnúhu tucu-ndí sá ndécú-gă ndíhi Tătá-gă Dútú Ndiöxí ní cùu, te ní quixi-gă ñuyúú-a ní xíndecu-ndí ndíhi-gá. Te ní cachí tnúhu-gá xii-ndí sá ndúú tãhú-ó cùndecu ndíhi-o Yă Ndiöxí ni caa ni quíhí<sup>n</sup> te núu na quíndáá iní-ó-gă. <sup>3</sup>Te xíă<sup>n</sup> dátúu-ndí núu-ndó nchàa sá ní xiní-ndí, ndíhi nchaa sá ní xíndedóho-ndí cuèndá cuu ì<sup>n</sup>nuu-o nchàa-o datná nchúhú cúú ì<sup>n</sup>nuu-ndí ndíhi Tătá-ó Dútú Ndiöxí, ndíhi Déhe-gá Xítóhó Jesucristú. <sup>4</sup>Te xíă<sup>n</sup> nùu tèe-í nchaa tnúhu-a cuèndá cudí iní-ó nchàa-o.

**Yă Ndiöxí cúú-gă dàtná ì<sup>n</sup> ñuhú**

<sup>5</sup>Te nchaa tnúhu ní dánèhé ñáhá Xítóhó Jesucristú xii-ndí,

xíă<sup>n</sup> dánèhé ñáhà-í xii-ndo. Te ní cachí-gá sá Yă Ndiöxí cúú-gă dàtná ì<sup>n</sup> ñuhú dáyèhé-gá iní-ó, te duca<sup>n</sup> sãtnahá-xi cùu-gá chi ío váha quide-gá, te ñá túú quide-gá ni ì<sup>n</sup> sá cuèhé sá dúhá. <sup>6</sup>Te núu càchí-ó sá ndécú-ó ìchi Yă Ndiöxí, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó nùú-gă. <sup>7</sup>Te núu na càda váha-o dàtná quidé mèe-gá, te cuu ì<sup>n</sup>nuu-o nchàa-o. Te ndada ndoo ndada nine-gá iní-ó, chi cada càhnu iní-gá nchaa sá cuèhé sá dúhá quide-o, chi ñu cuèndá-á<sup>n</sup> ní xíhí Déhe-gá Xítóhó Jesucristú núú cùrúxí.

<sup>8</sup>Te núu càchí-ó sá ñà túú quide-o ni ì<sup>n</sup> sá cuèhé sá dúhá, te dàndahú-ó mèe-o, te ñá túú quide ndáá-ó nùú Yă Ndiöxí. <sup>9</sup>Te núu na nàhmá-ó nchàa yíca cuèchi-o nùú-gă, te mee-gă cada càhnu iní-gá, te ndada ndoo-gá iní-ó, cuèndá cada ndáá-ó cùndecu-o ichi-gá, chi mee-gă ío váha quide-gá te ío ndáá quidé-gă, duca<sup>n</sup> ní cáhá<sup>n</sup>-gá te duca<sup>n</sup> quide-gá. <sup>10</sup>Te núu na càchí-ó sá ñà túú quide-o ni ì<sup>n</sup> sá cuèhé sá dúhá, te quide-o Yă Ndiöxí ì<sup>n</sup> ñándéhdé, dico ñá túú ndèhnde-gá. Te ñá túú ndècu

tnúhu-gá iní-ó te núu duca<sup>n</sup> na càda-o.

**Xítohó Jesucristú càhá<sup>n</sup>  
ndàhú-gá cuendá-ó**

**2** Te nchòhò ñáyiu cùu datná déhe-í, chìdo tñuní-í nchaa tnúhu-a cuendá sá vǎ cádá-ndó nì ì<sup>n</sup> sá cuèhé sá dúhá. Dico núu ì<sup>n</sup>-ndo quide-ni-ndo nándi sá cuèhé sá dúhá, te ndècu ì<sup>n</sup> Yaá càhá<sup>n</sup> ndàhú cuendá-ó nùú Yǎ Ndiòxí. Te Yaá-án cùú-gǎ Xítohó Jesucristú Yaá quidé ndáá. <sup>2</sup>Te ní xíhí-gá sá cuendá nchaa yíca cuèchi-o cuendá ngúndecu váha-o nùú-gǎ te núu na quèndáá iní-ó-gǎ. Te ñá díú-ní sǎ cuendá yíca cuèchi nchoo nǐ xíhí-gá, chi tnàhá cuendá nchaa yíca cuèchi ñáyiu nì càa xico ñuyíú.

<sup>3</sup>Te núu cada-o nchàa nacuaá càhá<sup>n</sup> Yǎ Ndiòxí, te cutnùnì iní-ó sǎ ndécú-ó ìchi-gá. <sup>4</sup>Te núu càchí-ó sǎ ndécú-ó ìchi-gá te ñá túú quide-o nacuaá càhá<sup>n</sup>-gá, te dàcuandehnde-o, te ñá túú quide ndáá-ó nùú-gǎ. <sup>5</sup>Te núu sàndáá ndisa iní-ó tnúhu-gá, te quide-o nchaa nacuaá càhá<sup>n</sup>-gá, te duca<sup>n</sup> te cùu iní ndisa-o-gǎ, te cutnùnì ndáá iní-ó sǎ ndécú-ó ìchi-gá. <sup>6</sup>Te núu càchí-ó sǎ ndécú-ó ìchi Yǎ Ndiòxí, te xini ñuhu-xi cada ndáá-ó cùndecu-o ñuyíú-a dàtná ní quide ndáá Xítohó Jesucristú cútnàhá ní xíndecu-gǎ ñuyíú-a.

**Nduú sáá**

<sup>7</sup>Te nchòhò ñáyiu ndècu ndìhi-í ìchi Xítohó Jesucristú, ñá túú chìdo tñuní-í ì<sup>n</sup> tnúhu saa sà cùú-xí-ndó, chi ñu-ni tnúhu sá nǐ ngúndecu ndìhi-ndo ndéé díhna, tnúhu ní

xíndedòho-ndo ndéé cútnàhá ní sàndáá iní-ndó-gǎ, xíǎ<sup>n</sup> chídó tñuní-í. <sup>8</sup>Te tnúhu-a cùu-xi datná ì<sup>n</sup> tnúhu saa tèe-í dándàcu iní ñáhà-í xii-ndo nàcuáa ní quide Xítohó Jesucristú cútnàhá ní quixi-gá ñuyíú-a ní quide váha-gá, te tnàhá nchòhò ní tñii-ndo tnúhu-gá te quide váha-ndo tnàhá-ndó. Te vitna ì<sup>n</sup> nduu ì<sup>n</sup> nduu ta cùu vai ñáyiu ta dàña nchaa sá cuèhé sá dúhá cuáhá<sup>n</sup>, chi Xítohó Jesucristú tá dándixi túu-gá iní-yu cuendá cutnùnì iní-yu nàcuáa ndùu cuendá Yǎ Ndiòxí.

<sup>9</sup>Te núu càchí-ó sǎ quidé vǎha-o, te cùu úhú iní-ó tnàha ñáyiu-o, te xíǎ<sup>n</sup> ñá túú quide ndáá-ó, chi ndècu-ni-o ìchi cuèhé ìchi duha sá dúcá<sup>n</sup> quide-o. <sup>10</sup>Te núu na cùu iní-ó tnàha ñáyiu-o dàtná cùú iní ñáhá mée Yǎ Ndiòxí xii-o ña, te quide ndáá-ó nùú-gǎ, te vǎ cànúìchi-o tnaha ñáyiu-o ì<sup>n</sup> ìchi cuèhé ìchi duha. <sup>11</sup>Te núu cùu úhú iní-ó tnàha ñáyiu-o, te ñá túú quide váha-o nùú Yǎ Ndiòxí, chi ndècu-ni-o ìchi cuèhé ìchi duha, te ñá túú cutnùnì iní-ó sǎ quidé-ó. Chi cùu-o datná ì<sup>n</sup> tée ndècu núu nées chi ñá cutnùnì núú-dě ndéé ìchi quíhí<sup>n</sup>-dé. Duca<sup>n</sup> sàtnahá-xi cùu nchoo chi ñá cútnùnì iní-ó ndéé ìchi quíhí<sup>n</sup>-ó te núu duca<sup>n</sup> na càda-o cuu úhú iní-ó tnàha ñáyiu-o.

<sup>12</sup>Te nchòhò ñáyiu cùu datná déhe-í, yúhú chídó tñuní-í tnúhu-a ì<sup>n</sup> núú tütú càchí tnúhu-í xii-ndo sǎ nǐ quide càhnu iní Yǎ Ndiòxí nchaa cuèchi-ndo, chi ñu cuendá-án ní xíhí Xítohó Jesucristú. <sup>13</sup>Te nchòhò ñáyiu sacuéhé, yúhú tèe-í tnúhu-a sá cùú-xí-ndó chi càhá<sup>n</sup> ndìhi-ndo

Jèsús, te Yaá-á<sup>n</sup> sa ndècu-gá ndéé cútnàhá ní ngáva ñuyíú. Te nchòhó ñáyiu nchìcú<sup>n</sup>-gá téé tùcu-í tnúhu-a sá cúú-xí-ndó chi ñá túú sàndáá iní-ndó tnúhu càhá<sup>n</sup> yucu ñävàha.

Te nchaa nchòhó ñáyiu cùu datná déhe-í, tèe tucu-í tnúhu-a sá cúú-xí-ndó, chi sa càhá<sup>n</sup> ndìhi-ndo Tàtá-ó Dütú Ndiöxí. <sup>14</sup>Te nchòhó ñáyiu ni sàhnu, yúhú chídó tnùnì-í tnúhu-a ì<sup>n</sup> núú tùtú chi càhá<sup>n</sup> ndìhi-ndo Jèsús, te Yaá-á<sup>n</sup> sa ndècu-gá ndéé cútnàhá ní ngáva ñuyíú. Te nchòhó ñáyiu nchìcú<sup>n</sup>-gá, yúhú chídó tnùnì-í tnúhu-a chi ío nihí ndéé-ndó ndècu-ndo, chi tnè-ndo tnúhu càhá<sup>n</sup> Yä Ndiöxí. Te ñá túú sàndáá iní-ndó tnúhu càhá<sup>n</sup> yucu ñävàha.

<sup>15</sup>Te vá cùhú<sup>n</sup> iní-ndó nì ì<sup>n</sup> sá cuèhé sá dúhá ío ñuyíú-a, te ni vâ cání iní-ndó càda-ndo. Chi núu na cùhu<sup>n</sup> iní-ó nchàa sá cuèhé sá dúhá ío ñuyíú-a ña, te ñá túú Tàtá-ó Dütú Ndiöxí ñúhú iní-ó te núu duca<sup>n</sup> na càni iní-ó. <sup>16</sup>Te nchaa ñáyiu ñuyíú-a quidé-yu nchaa sá cuèhé sá dúhá, chi diu nchaa xíá<sup>n</sup> cúdǎ iní-yu cadá-yu. Te nchaa sá cuèhé sá dúhá sàni iní-yu, ndìhi nchaa sá xìnì-yu quidé-yu. Te xíquide nínu-yu mèé-yu cuèndá nchaa sá ndécú ndìhí-yu. Te nchaa sá ñà túú vâha ní cacu nihnu-xi ñuyíú-a. <sup>17</sup>Te nchaa sá ñà túú vâha ío ñuyíú-a, ndìhi nchaa sá sání cuèhé sání dùha iní-yu cuita ndìhi nihnu-xi quǎhí<sup>n</sup>. Te nchaa ñáyiu tnèi tnúhu càhá<sup>n</sup> Yä Ndiöxí cundecú-yu ndìhi-gá ní caa ni quǎhí<sup>n</sup>.

**Tnúhu ndáá tnúhu Yá Ndiöxí  
ndìhi tnúhu ndehnde**

<sup>18</sup>Te nchòhó ñáyiu cùu datná déhe-í, sa nihí-ndó tnúhu sá quíxí

ì<sup>n</sup> téé cunuu-gǎ-dé cuu úhú iní-dé Cristú. Te sa xĩndecu-gá ñáyiu cùu úhú iní ñáhá xì-gá, núu xíá<sup>n</sup> cútnùnì iní-ó sǎ sà ta cuyatni nduu naa ñuyíú-a. <sup>19</sup>Te ñáyiu-á<sup>n</sup> nĩ xĩndecu ndìhi ñáhá-yu xii-o, te ní queé-yu cuáhá<sup>n</sup>-yu chi ñá túú ní cùu ì<sup>n</sup>nuu-o ndìhí-yu. Chi núu òcò ní cùu ì<sup>n</sup>nuu-o ndìhí-yu te cundecu ndìhi ñáhá-yu xii-o ni cùu. Te duha ní cuu cuèndá cutnùnì ndáá iní-ó nchàa-o sá ñà túú cùu ì<sup>n</sup>nuu-o ndìhí-yu, chi ñá túú sàndáá iní-yu Yá Ndiöxí.

<sup>20</sup>Te Xítóhó Jesucristú ní taxi-gá Espíritú Yä Ndiöxí ndécú ndìhi-o, núu xíá<sup>n</sup> tècú tnùnì-ó tnúhu-gá.

<sup>21</sup>Te cuèndá sá xìnì-ndó tnúhu ndáá tnúhu Yá Ndiöxí nũu xíá<sup>n</sup> tèè-í tnúhu-a, te ñá díú ì<sup>n</sup> sá ñà cútnùnì iní-ndó cùu-xi. Te sa nàha-ndo sá nì ì<sup>n</sup> tnúhu ndehnde ñà túú ñùtnahá-xi núú tnúhu Yá Ndiöxí, chi mee nìne-ni tnúhu ndáá cúú-xí.

<sup>22</sup>Te nchaa ñáyiu càchí sá ñà díú Jèsús cúú Cristú Yaá ní tendaha Yä Ndiöxí ní quixí ñuyíú-a dàcuandehndé-yu, te cùu úhú iní-yu Jèsús. Te diu-ní-yu càchí-yu sá ñà díú Dèhe Yá Ndiöxí cúú Jèsús, te sá dúcá<sup>n</sup> quidé-yu te cùu úhú iní-yu Yá Ndiöxí ndìhi Déhe-gá Jèsús. <sup>23</sup>Te nchaa ñáyiu ñá túú sàndáá iní sá Dèhe Yá Ndiöxí cúú Jèsús, ñáyiu-á<sup>n</sup> ñà túú ndécú-yu ichi Tàtá-ó Dütú Ndiöxí. Te nchaa ñáyiu càhá<sup>n</sup> sá Dèhe Yá Ndiöxí cúú Jèsús, ñáyiu-á<sup>n</sup> ndécú-yu ichi Tàtá-ó Dütú Ndiöxí.

<sup>24</sup>Te nchaa tnúhu Yá Ndiöxí ní tecú dóho-ndo ndèé díhna, tnúhu-á<sup>n</sup> cuhu<sup>n</sup> iní-ndó. Te núu nchaa tnúhu-á<sup>n</sup> ná cùhu<sup>n</sup>-ni iní-ndó, te cundecu ndìhi-ndo Yä Ndiöxí ndìhi

Déhe-gá cuëi vá cùndècu túu-ndo ndìhi-gá ñuyíú-a. <sup>25</sup>Te Jèsús ní cachí-gá sá ndúú tǎhú-ó cùndecu ndìhi-o-gá ni caa ni quíhí<sup>n</sup> andíu.

<sup>26</sup>Te cuendá nchaa ñáyiú dándahú ñáhá xii-ndo ní chídó tnùn-í tnúhu-a, <sup>27</sup>dico nchòhó chi ndècu ndìhi-ndo Espíritú Yá Ndiòxí sá ñí taxi Xítóhó Jesucristú. Núu xíǎ<sup>n</sup> ñá túú xìni ñuhu-ndo ñáyiú danèhé ñáhá xii-ndo, chi mee Espíritú-gá dánèhé ñáhá-xí nchàa sá vǎha. Te nchaa sá dánèhé ñáhá-xí xii-ndo cuu-xi sá ndàá, te ñá díú ìí<sup>n</sup> tnúhu ndehnde. Te vitna chí cáncchícú<sup>n</sup> nihnu-ni ichi Yá Ndiòxí dàtná ní sanu ichi ñaha mée Espíritú-gá xii-ndo.

<sup>28</sup>Te nchòhó ñáyiú cùu datná déhe-í, chí cáncchícú<sup>n</sup> nihnu-ni ichi Xítóhó Jesucristú, chi cuendá òré ná quíxí tucu-gá ñuyíú-a te vá yùhú-ndó te ñí vá cúú càha<sup>n</sup> núú-ndó nǔú-gǎ. <sup>29</sup>Te nchòhó sa nàha-ndo sá méé-gǎ quídé ndǎá-gá, te sa xìní-ndó sǎ nchǎá ñáyiú quìde ndǎá cúú-yu déhe Yá Ndiòxí.

### Ñáyiú cùu déhe Yá Ndiòxí

**3** Te chí cuǎha cuendá sá ìo cùu iní ñáhá Tǎtá-ó Dǔtú Ndiòxí xii-o cuendá sá cúú-ó dèhe-gá, chi duca<sup>n</sup> ñí cachí-gá, te déhe ndisa-gá cúú-ó. Te núu xíǎ<sup>n</sup> ñáyiú ndècu ichi cuehé ichi duha ñá cúú quini ñáhǎ-yu xii-o, chi ñá túú xìní-yu nàcuáa ndùu cuendá Yá Ndiòxí. <sup>2</sup>Te nchòhó ñáyiú ìo cùu iní-í, vitna cùu-o déhe Yá Ndiòxí, te vátá cùtnùní váha-gá iní-ó nàsa cunduu-o ndéé núú cuáhá<sup>n</sup> núú vǎxi. Dico sa cùtnuní iní-ó sǎ òré ná quixi tucu Xítóhó Jesucristú

te nduu-o dàtná cáá mée-gá, chi quini-ó-gǎ nàcuáa-ni càa nacuáa-ni ndùu-gá. <sup>3</sup>Te nchaa ñáyiú sa ndètu ñaha xii-gá sa ta ngùndecu túha-yu cuáhá<sup>n</sup>, chi ta ndùu ndoo nduu nine iní-yu cuáhá<sup>n</sup> dàtná cáá ndòo caa nine mee-gá.

<sup>4</sup>Te nchaa ñáyiú quìde nándi sá cuèhé sá dúhá ñà túú quìde váha-yu núú Yá Ndiòxí, chi ní cachí-gá sá vǎ dúcá<sup>n</sup> càda-o. <sup>5</sup>Te sa nàha-ndo sá ñí quixi túu Xítóhó Jesucristú ñuyíú-a cuendá cada càhnu iní-gá nchaa sá cuèhé sá dúhá quìde-o, chi mee-gǎ ñá túú quìde-gá ni ìí<sup>n</sup> sá cuèhé sá dúhá. <sup>6</sup>Te nchaa ñáyiú ndècu ichi Yá Ndiòxí ñá túú ñùhú-yu ichi cuèhé ichi duha. Te nchaa ñáyiú ñùhu ichi cuehé ichi duha ñá túú xìní-yu nàcuáa ndùu cuendá Xítóhó Jesucristú te ni ñá túú xìní-yu nása càa-gá. <sup>7</sup>Te nchòhó ñáyiú cùu datná déhe-í, vá dǎñá-ndó mée-ndo dandahú ñáhá ñáyiú ndècu ichi cuehé ichi duha, chi càchí-yu sá cúú cùndecu-o ichi Yá Ndiòxí te cada-o nándi sá cuèhé sá dúhá dico ñá ndàá. Te nchaa ñáyiú quìde váha quìde ndǎá-yu dàtná quídé mée Jèsús. <sup>8</sup>Te nchaa ñáyiú ndècu ichi cuehé ichi duha ndècu ndìhí-yu yucu ñǎvǎha, chi duca<sup>n</sup> quìde mee-xi ndéé cùtnáhá vátá ngǎva-gá ñuyíú. Te xíǎ<sup>n</sup> ní quixi Jèsús Déhe Yá Ndiòxí ní dáquéeé tǎhú-gǎ nchaa sá quídé yècu ñávǎha.

<sup>9</sup>Te nchaa ñáyiú ní natuha ichi Yá Ndiòxí ní nduú-yu déhe-gá, te ñá túú-gǎ quídè-yu nándi sá cuèhé sá dúhá chi ní ndada ndoo ní ndada nine-gá iní-yu. Núu xíǎ<sup>n</sup> ñá túú-gǎ quídè-yu nándi sá cuèhé sá dúhá, chi ní ngùndecu ndìhi ñaha-gǎ

xií-yu. <sup>10</sup>Te cùtnuní iní-ó nǎndi cùu ñáyiú cùu déhe Yá Ndiöxí, te cùtnuní iní-ó nǎndi cùu ñáyiú cùu déhe yucu ñǎvǎha. Te nchaa ñáyiú ñá túú quide ndáá, te cùu úhú iní-yu tnàha ñáyiú-yu, te ñáyiú-á<sup>n</sup> ñà díú déhe Yá Ndiöxí cúú-yu.

#### Cuu iní tnáhá-ó ì<sup>n</sup> ì<sup>n</sup>-o

<sup>11</sup>Te ndéé òré ní natuha-o ìchi Yá Ndiöxí ní tecú dóho-o sǎ cúú iní-ó tnàha ñáyiú-o. <sup>12</sup>Te vá cùndùu úhú iní-ó dàtná ní quide ndíi Cǎin, chi ndíi-á<sup>n</sup> nǐ xíndecu ndíi ndíhi yucu ñǎvǎha núu xǎ<sup>n</sup> ní sahní ndíi ñaní ndíi. Te duca<sup>n</sup> nǐ quide ndíi chi ní xíndecu ndíi ìchi cuèhé ìchi duha, te ñaní ndíi ní xíndecu-dé ìchi váha.

<sup>13</sup>Te nchòhó ñáyiú ndècu ndíhi-í ìchi Xítóhó Jesucristú, vá cádá cuendá-ndó sǎ cúú ùhú iní ñáhá nchàa ñáyiú ndècu ìchi cuehé ìchi duha xii-ndo. <sup>14</sup>Te cunaha-ndo na cǎchí tnúhu-í xii-ndo sǎ núu na cùu iní-ó tnàha ñáyiú-o, te cùtnuní iní-ó sǎ sà ní dáñá-ó ìchi sá tá dàcuíta nihnu ñaha xii-o cuáhá<sup>n</sup> ní cùu, te vitna ní tñii-o ìchi váha. Te nchaa ñáyiú ñá túú cùu iní tnàha ñáyiú-xi ñúhu-ní-yu ìchi cuáhá<sup>n</sup>-yu núú ùhú núú ndàhú. <sup>15</sup>Te nchaa ñáyiú ñá cúú quini ndéé tnàha ñáyiú-xi cúú-yu dàtná ì<sup>n</sup> ñáyiú sahní ndíyi. Te nchòhó sa nàha-ndo sá nì ì<sup>n</sup> ñáyiú sahní ndíyi ñá túú ndècu ndíhi-yu tnúhu ndee ìní sá nánihí tǎhú-yu. <sup>16</sup>Te Xítóhó Jesucristú ní xíhi-gá cuendá nchaa yíca cuèchi-o, núu xǎ<sup>n</sup> cùtnuní iní-ó sǎ ìo cùu iní ñáhá-gǎ xii-o. Te xǎ<sup>n</sup> cùtnuní iní-ó nàcuáa cada-o cùu iní-ó tnàha ñáyiú-o, te cuèi na cùú-ó cuendá sǎ cúú-xí ì<sup>n</sup>-yu, cuendá-nǎ sǎ ná

dàcácu nihnu-ò-yu núú tnündòho ndecú-yu. <sup>17</sup>Te núu ndècu ndíhi-o sǎ cóhó sǎ cǎxí-ó ndíhi nchaa sǎ nándíhi-o, te ndècu ñáyiú ndàhú ñá túú vèdana ná ndécú ndíhi, te ñá túú chindee-ó-yu, te ñá túú cùu iní-ó Yá Ndiöxí te núu duca<sup>n</sup> na càda-o. <sup>18</sup>Te nchòhó ñáyiú cùu datná déhe-í vá cuendá-ni cùnàha cǎhá<sup>n</sup>-ndó sǎ cúú ìní tnáhá-ndó, chi cuu iní tnáhá ndísa-ndo te coto tnàha-ndo.

#### Vá yùhú-ó núú Yá Ndiöxí

<sup>19</sup>Te núu duca<sup>n</sup> na càda-o, te cutnùní iní-ó sǎ ndécú-ó ìchi ndáá ìchi Yá Ndiöxí, te ñá túú-gǎ ná quíhi iní-ó núú-gǎ. <sup>20</sup>Te núu ndíhú iní-ó cuendá ì<sup>n</sup> sǎ nǐ quide-o, te sa nàha Yá Ndiöxí te núu ní quide váha-o àdi ní quide cuèhé-ó, chi sa nàha ndáá-gǎ nàcuáa càa iní-ó. <sup>21</sup>Te nchòhó ñáyiú ìo cùu iní-í, na cǎchí tnúhu-í xii-ndo, te núu ñá túú nǎ sání iní-ó te ñá túú nǎ quidé-ó, te vá yùhú-ó núú Yá Ndiöxí. <sup>22</sup>Te nchaa sǎ váha na càcá<sup>n</sup>-ó núú Yá Ndiöxí, te mee-gǎ taxi-gǎ chi tñii-o tnúhu cǎhá<sup>n</sup>-gǎ, te quide-o nchaa nacuáa cùu iní-gǎ. <sup>23</sup>Te ní cachí Yá Ndiöxí sǎ quindáá iní-ó Dèhe-gǎ Xítóhó Jesucristú, te cuu iní-ó tnàha ñáyiú-o dàtná ní cachí-gǎ. <sup>24</sup>Te nchaa ñáyiú tñii tnúhu-gǎ ndécú-yu ìchi-gǎ, te ndècu ndíhi ñaha-gǎ xií-yu. Te cùtnuní iní-ó sǎ ndécú-ó ndíhi-gǎ chi ní taxi-gǎ Espíritú-gǎ ndécú ndíhi-o.

Ñáyiú ndècu ndíhi Espíritú Yá Ndiöxí ndíhi ñáyiú cùu úhú iní ñáhá xii Xítóhó Jesucristú

**4** Te nchòhó ñáyiú ìo cùu iní-í, vá cùtexínu quindáá

iní-ndó tnúhu càhá<sup>n</sup> nchaa ñáyiu càchí sá ndécú ndìhi Espíritú Yá Ndiöxí. Chi díhna-gá cada cuendá váha-ndo te núu càhá<sup>n</sup> ndáá-yu nàcuáa càhá<sup>n</sup> tnúhu Yá Ndiöxí, chi ío vâi ñáyiu ñuyúú-a cachí-yu sá càhá<sup>n</sup>-yu tnúhu-gá dico ñá ndáá. <sup>2</sup>Te duha cutnùní iní-ó nãndi cùu ñáyiu ndècu ndìhi Espíritú Yá Ndiöxí. Nchaa ñáyiu càhá<sup>n</sup> ndáá sá Xítoho Jesucristú ní quixi-gá ñuyúú-a te ní cuu-gá ì<sup>n</sup> yiqui cùñú, ñáyiu-á<sup>n</sup> cúú-yu ñáyiu cùu cuendá Yá Ndiöxí. <sup>3</sup>Te nchaa ñáyiu ñá túú càhá<sup>n</sup> nàcuáa càa Jesús cútnàhá ní quixi-gá ñuyúú-a ñáyiu-á<sup>n</sup> dándàhú ñáhã-yu, chi ñá túú cùu-yu ñáyiu cùu cuendá Yá Ndiöxí. Te ñu-ní-yu cùu úhú iní-yu Jèsús. Te nchòhó sa nàha-ndo sá cùndècu ñáyiu cuu úhú iní ñáhá xii-gá, dico yúhú càchí tnúhu-í xii-ndo sã sà ndecú-yu.

<sup>4</sup>Te nchòhó ñáyiu cùu datná déhe-í, ndècu ndìhi-ndo Yá Ndiöxí, te ñá dáñá-ndó dándahú ñáhá nchaa ñáyiu càchí sá càhá<sup>n</sup> tnúhu-gá te ñá ndáá. Te ñá túú sàndáá iní-ndó chi Yá Ndiöxí Yaá ndécú ndìhi-ndo taxi tnuní víhí-gã dácúúxí yècu ñávãha ndècu ndìhi nchaa ñáyiu ñùhu ichi cuehé ichi duha. <sup>5</sup>Te nchaa ñáyiu dándahú ñáhá sã càhá<sup>n</sup> tnúhu Yá Ndiöxí ndécú-yu ichi cuèhé ichi duha, te mee-ní cuendá nchaa sá ío ñuyúú-a càhá<sup>n</sup>-yu. Te tédóho ñaha nchaa dává-gá ñáyiu ndècu ñu-ní ichi cuehé ichi duha. <sup>6</sup>Te nchoo cùu-o ñáyiu cùu cuendá Yá Ndiöxí. Te nchaa ñáyiu xíndecu ichi-gá tnèi-yu tnúhu càhá<sup>n</sup>-ó, te nchaa ñáyiu ñá túú ndècu ichi-gá ñá túú tnèi-yu tnúhu càhá<sup>n</sup>-ó. Te duha te cùtnuní

iní-ó nãndi cùu ñáyiu càhá<sup>n</sup> ndáá, te cùtnuní tucu iní-ó nãndi cùu ñáyiu dándahú ñáhá.

**Cuu iní-ó tnàha ñáyiu-o datná cúú iní ñáhá mèe Yá Ndiöxí xii-o**

<sup>7</sup>Te nchòhó ñáyiu ío cùu iní-í, xìni ñuhu-xi cuu iní tnáhá-ó datná cúú iní ñáhá mèe Yá Ndiöxí xii-o, chi mee-gã táxí-gã sá xìní tnùní-ó cuendá cuu iní-ó tnàha ñáyiu-o. Te nchaa ñáyiu cùu iní tnàha ñáyiu-xi cùu-yu déhe Yá Ndiöxí, te cùtnuní ndáá iní-yu sá ndécú ndìhi ñaha-gá xíí-yu. <sup>8</sup>Te nchaa ñáyiu ñá túú cùu iní tnàha ñáyiu-xi ñá túú ndècu ndìhi-yu Yá Ndiöxí. Te nchaa ñáyiu ndècu ndìhi Yá Ndiöxí, ñáyiu-á<sup>n</sup> sãñaha-gã sá xìní tnùní-yu cuendá cuu iní-yu tnàha ñáyiu-yu. <sup>9</sup>Te cùtnuní iní-ó sã cúú iní ñáhá Yá Ndiöxí xii-o nchaa-o, chi ní tendaha-gã ì<sup>n</sup> ddi díí-ni Déhe-gá Xítoho Jesucristú ní quixi-gá ñuyúú-a cuendá sá díú-gã cada te naníhí tàhú-ó, te núu na quíndáá iní-ó tnúhu-gá. <sup>10</sup>Te ío cùu iní ñáhá Yá Ndiöxí xii-o nchaa-o. Te ñá díú sã mée-ó cùu iní-ó-gã, chi díhna-gá mée-gã sa cùu iní ñáhá tnàhí-gá xii-o, núu xíã<sup>n</sup> ní tendaha-gã Déhe-gá ní quixi-gá ñuyúú-a ní xíhí-gá sá cuendá nchaa yíca cuèchi-o.

<sup>11</sup>Te nchòhó ñáyiu ío cùu iní-í, xìni ñuhu-xi cuu iní tnáhá-ó, chi mee Yá Ndiöxí ío cùu iní ñáhá-gã xii-o. <sup>12</sup>Te ní ì<sup>n</sup> nchoo ñáyiu ndècu ñuyúú-a ñá túú xìní-ó nàcuáa càa Yá Ndiöxí, dico nchoo ñáyiu ní tuha ichi-gá chi cùtnuní iní-ó sã ndécú ndìhi ñaha-gá xii-o. Núu xíã<sup>n</sup> cúú iní tnáhá-ó ì<sup>n</sup> ì<sup>n</sup>-o, te cùtnuní

iní-ó sǎ cúú iní ndisa-o-gǎ. <sup>13</sup>Te cùtnuní iní-ó sǎ ndécú-ó ìchi-gǎ, te ndècu ndìhi ñaha-gǎ xii-o, chi ní taxi-gǎ Espiritú-gǎ ndécú ndìhi-o. <sup>14</sup>Te yúhú ndìhi dava-gǎ cue tée ní xica cuu ndìhi-gǎ càhá<sup>n</sup>-ndí sǎ ní xiní-ndí Jèsús Déhe Yá Ndiöxí ní quixi-gǎ ñuyíú-a, chi Tǎtá-ó Dütú Ndiöxí ní tendaha ñaha xii-gǎ ní quixi-gǎ cuendá dàcácu nihnu-gǎ nchaa nchoo ñáyiú ndècu ñuyíú-a núú ùhú núú ndàhú. <sup>15</sup>Te nchaa ñáyiú càhá<sup>n</sup> ni yùhu ni iní-xi sǎ Déhe Yá Ndiöxí cúú Jèsús, ñáyiú-á<sup>n</sup> ndécú-yu ichi-gǎ te ndècu ndìhi ñaha-gǎ xíí-yu.

<sup>16</sup>Te sàndáá iní-ó nì yuhu ni iní-ó sǎ Yá Ndiöxí cúú iní ñáhá-gǎ xii-o, chi duca<sup>n</sup> iní-gǎ. Te nchaa ñáyiú cùu iní ñáhá xii Yá Ndiöxí ndécú ndìhi ñaha-gǎ xíí-yu. <sup>17</sup>Te núú ndisa cùu iní-ó Yá Ndiöxí te vǎ yùhú-ó òré ná sǎà nduu tàudi<sup>n</sup> ñaha-gǎ xii-o tnúú nchaa ñáyiú ndècu ichi cuehé ichi duha, chi quide ndáá-ó ndècu-o núú-gǎ ñuyíú-a dàtná ní quide mee Jèsús. <sup>18</sup>Chi nchaa ñáyiú cùu iní ñáhá xii Yá Ndiöxí ñá túú-gǎ yùhú-yu, te núú cùu iní ndisá-yu-gǎ. Te núú yùhú-yu te xíǎ<sup>n</sup> sa ndòhó-yu, chi ñùhú-yu ichi cuáhá<sup>n</sup>-yu núú ùhú núú ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

<sup>19</sup>Te cuu iní-ó Yá Ndiöxí, chi mee-gǎ ndéé cútnàhá vátá quindáá-gǎ iní-ó tnùhu-gǎ sa cùu iní ñáhá-gǎ xii-o. <sup>20</sup>Te nchaa ñáyiú cǎchí sǎ cúú iní-yu Yá Ndiöxí, te cùu úhú iní-yu tnàha ñáyiú-yu, ñáyiú-á<sup>n</sup> dácuañdehdé-yu. Te núú ñá túú cùu iní-yu tnàha ñáyiú-yu ndècu ñuyíú-a ña, te uu<sup>n</sup>-gǎ quidè-yu Yá Ndiöxí Yaá ñá túú xiní

núú-yu. <sup>21</sup>Te cǎchí-gǎ núú tnùhu-gǎ sǎ ñáyiú na cùu iní ñáhá xii Yá Ndiöxí, te duca<sup>n</sup>-ni cùu iní-yu tnàha ñáyiú-yu.

### Nchaa ñáyiú ní ndacu ní dáñá ìchi cuehé ichi duha

**5** Te nchaa ñáyiú sàndáá iní sǎ Jèsús cúú-gǎ Crístú Yaá ní quixi ñuyíú-a, ñáyiú-á<sup>n</sup> cúú-yu déhe Yá Ndiöxí. Te cùu iní-yu Tǎtá-ó Dütú Ndiöxí, te cùu iní-yu Déhe-gǎ. <sup>2</sup>Te núú cùu iní-ó Yá Ndiöxí te quide-o nacúáa càhá<sup>n</sup>-gǎ, te cùtnuní iní-ó sǎ cúú iní tnáhá ndisa-o nacúáa ndècu-o ichi-gǎ. <sup>3</sup>Te núú cùu iní-ó Yá Ndiöxí te tnè-o tnùhu càhá<sup>n</sup>-gǎ, chi cùtnuní iní-ó sǎ ñà díú ì<sup>n</sup> sǎ ùhú cúú-xí dàtná cǎchí ñáyiú. <sup>4</sup>Te nchaa nchoo ñáyiú cùu déhe-gǎ sa ní dáñá-ó ìchi cuehé ichi duha, chi ní sàndáá iní-ó Jèsús núu xíǎ<sup>n</sup> ní ndacu-o ní dáñá-ó ìchi-á<sup>n</sup>. <sup>5</sup>Te nchaa ñáyiú sàndáá iní sǎ Déhe Yá Ndiöxí cúú Jèsús ní ndacú-yu ní queé-yu ichi cuehé ichi duha.

### Nàcuáa ní càhá<sup>n</sup> Yá Ndiöxí cuendá Jèsús

<sup>6</sup>Te Xítóhó Jesucristú ní quixi-gǎ ñuyíú-a, te ní sandute-gǎ. Te ñá díú-ní xíǎ<sup>n</sup>, chi ní xíhí-gǎ sǎ cuendá nchaa yícá cuèchi-o. Te Espiritú Yá Ndiöxí càhá<sup>n</sup>-xi mee-ni sǎ ndàá, chi càhá<sup>n</sup> Espiritú-gǎ-á<sup>n</sup> sǎ Jèsús cúú-gǎ Crístú Yaá ní quixi ñuyíú-a. <sup>7</sup>Te úní testìú ndécú àndiú, Tǎtá-ó Dütú Ndiöxí, ndìhi Déhe-gǎ Xítóhó Jesucristú, ndìhi Espiritú-gǎ. Te ì<sup>n</sup>-ni tnùhu càhá<sup>n</sup> ndí nùní testìú-á<sup>n</sup>. <sup>8</sup>Te duca<sup>n</sup> cùu-xi ñuyíú-a tucu, chi



càhá<sup>n</sup> Espíritú Yă Ndiöxí sá Jèsús cúú-gă Cristú. Te ní sandute-gă, te ní xíhí-gă sá cuendá nchaa yícá cuèchi-o. Te xíă<sup>n</sup> cútnùnì ndáá iní-ó să díú Jèsús cúú-gă Cristú. <sup>9</sup>Te núu tn̄i-o tn̄hu váha càhá<sup>n</sup> ñáyiú, te váha-gă tnī-o tn̄hu càhá<sup>n</sup> Yă Ndiöxí, chi càhá<sup>n</sup> ndáá-gă sá Dêhe-gă cúú Jèsús. <sup>10</sup>Te nchaa ñáyiú sândáá iní sá Jèsús cúú-gă Déhe Yă Ndiöxí, ñáyiú-á<sup>n</sup> cútnùnì iní-yu sá cúú-xí ì<sup>n</sup> sá ndáá. Te nchaa ñáyiú ñá túú sândáá iní tn̄hu càhá<sup>n</sup> Yă Ndiöxí quidé-yu-gă ì<sup>n</sup> ñándéhdé, dico ñá túú ndèhnde-gă, chi mée-yu ñá túú sândáá iní-yu sá Dêhe-gă cúú Jèsús dàtná càchí mée-gă. <sup>11</sup>Te Yă Ndiöxí càchí tn̄hu ndáá-gă sá cùndècu-o ndihi-gă ni caa ni quíhí<sup>n</sup>. Te duha càhá<sup>n</sup>-gă chi sândáá iní-ó Dêhe-gă. <sup>12</sup>Te nchaa ñáyiú na quíndáá iní ñáhá xì Dêhe-gă cundecú-yu ndihi-gă ni caa ni quíhí<sup>n</sup>. Te nchaa ñáyiú ñá túú sândáá iní ñáhá xì Dêhe-gă vá cùndècú-yu ndihi-gă.

#### Sáhu ndèé núú n̄i ndihi-ná

<sup>13</sup>Te cuendá sá sândáá iní-ndó Dêhe Yă Ndiöxí núu xíă<sup>n</sup> chídó tn̄nì-í tn̄hu-a cuendá cutnùnì iní-ndó să cùndècu ndihi-o-gă ni caa ni quíhí<sup>n</sup>.

<sup>14</sup>Te ñá túú tn̄hu yùhú càhá<sup>n</sup> ndihi-o Yă Ndiöxí, chi tedóho ñaha-gă xii-o núu ì<sup>n</sup>-ná sá ná càcá<sup>n</sup>-ó núú-gă dàtná cuiní mée-gă. <sup>15</sup>Te cùnùnì iní-ó sá táxí-gă sá xicá<sup>n</sup>-ó núú-gă, chi ñaha-o sá tedóho ñaha-gă xii-o

núu na càcá<sup>n</sup>-ó nàcuáa cùu iní-gă.

<sup>16</sup>Te núu xìnì-ó ñáyiú ndècu ichi Yă Ndiöxí te quidé-yu sá ñà túú váha núú-gă, te ndèhe-o sá ñà túú ní xíta nihnu duú<sup>n</sup>-yu, te càhá<sup>n</sup> ndihi-o Yă Ndiöxí cuendá-yu, te dàcácu nihnu ñaha-gă xí-yu te núu na nùcúnu ichi váha-yu. Chi ió ñáyiú xidó quidé ñandi sá ñà túú váha te xíta nihnu duú<sup>n</sup>-yu, te vá càhá<sup>n</sup> ndihi-gă-ó Yă Ndiöxí cuendá-yu. <sup>17</sup>Te nchaa sá cuèhé sá dúhá cùu-xi yícá cuèchi, dico ñá ncháá-xí cùu-xi sá dácúita nihnu ñaha dùu<sup>n</sup>.

<sup>18</sup>Te ñaha-o sá nchóó ñáyiú cùu déhe Yă Ndiöxí ñá túú-gă sánì ìnì-ó càda-o ñandi sá cuèhé sá dúhá. Te duca<sup>n</sup> chi mee Jèsús déhe Yă Ndiöxí xító ñàha-gă xii-o, núu xíă<sup>n</sup> ñá ndácú-gă yucu ñávàha dàxínu iní ñáhá-xí xii-o cada-o sá ñà túú váha.

<sup>19</sup>Te nchoo ñaha-o sá ndécú ndihi-o Yă Ndiöxí. Te nchaa ñáyiú ndècu ichi cuehé ichi duha tàxi tnunì ñáhá-nă yucu ñávàha xí-yu.

<sup>20</sup>Te ñaha tucu-o sá ñùyíú-a ní quixi Jèsús Déhe Yă Ndiöxí ní taxi-gă sá xìnì tnùnì-ó cuendá cutnùnì iní-ó să mée-gă cúú-gă Ndiöxí-ó. Te ndècu ndihi-o mee-gă ndihi Déhe-gă Jèsús, te ì<sup>n</sup>dii dí-ni mee-gă cúú-gă Yă Ndiöxí, te ndècu dava-gă sá nácuàca ñaha-gă xii-o cùndècu-o ndihi-gă ni caa ni quíhí<sup>n</sup>. <sup>21</sup>Te nchòhó ñáyiú cùu datná déhe-í, vá quíndáá iní-ndó nchàa sá càchí-yu cùu ndiöxí, chi dicó ndaha cue téé ñuyíú-a ní cuáha nchaa xíă<sup>n</sup>. Te duca<sup>n</sup> na cùnduu. Te ío chí cádá ndèe iní-nă vitna.

# TUTÚ CÚÚ ÛÚ NÍ CADÚHA TÉ JUÀÁ

---

## Tnúhu Yá Ndiöxí ndihi nàcuáa cuu iní tnáhá-ó

<sup>1</sup>Te yúhú té Juàá téé yìndaha ñaha xii ñáyiú sàndáá iní tnúhu Jèsús, tèe-í tnúhu-a ìí<sup>n</sup> núú tütú daquixi-í ndaha yòhó ñaha ní cáhá<sup>n</sup> ñáhá Yá Ndiöxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiöxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú ìní ñáhá-ndí xii-ndo.

<sup>2</sup>Te cùu iní ñáhá-ndí xii-ndo chi ndècu ndihi-ndo tnúhu ndáá tnúhu Yá Ndiöxí, te duca<sup>n</sup>-ni cùndecu-o ndihi tnúhu-á<sup>n</sup> ni caa ni quíhí<sup>n</sup>.

<sup>3</sup>Te xicá<sup>n</sup> táhù-í núú Tátá-ó Dütú Ndiöxí, ndihi núú Dèhe-gá Xítohó Jesucristú sá ná chíndèe ñaha-gá xii-ndo, te coto ñaha-gã te ío váha cuu iní-ndó cùndecu-ndo. Te duha xicá<sup>n</sup> táhù-í núú-gã chi ndècu ndihi-o tnúhu ndáá tnúhu Yá Ndiöxí, te cùu iní-ó-gã.

<sup>4</sup>Te ío cùdífí iní-í, chi ní nanfihì-í ìí<sup>n</sup> úú déhe-n, te quidé-yu nàcuáa sànu ichi ñaha tnúhu ndáá dàtná ní táúchíú<sup>n</sup> mèe Tátá-ó Dütú Ndiöxí. <sup>5</sup>Te vitna yòhó ñaha ní cáhá<sup>n</sup> ñáhá Yá Ndiöxí, càchí tnúhu-í

xii-n sá xíní ñùhu-xi cuu iní-ó tnàha ñáyiú-o. Te ñá díú ìí<sup>n</sup> tnúhu saa cùu-xi, chi díu-ni tnúhu sá ñí ngúndecu ndihi-o ndèe cùtnàhá ní tuha-o ìchi Yá Ndiöxí. <sup>6</sup>Te núu cùu iní-ó Yá Ndiöxí, te cùu iní-ó tnàha ñáyiú-o dàtná ní cachí méé-gã, te tñì-o nchaa tnúhu càhá<sup>n</sup>-gá. Te ní cachí-gá sá cúú ìní-ó-gã, te cuu iní-ó tnàha ñáyiú-o. Te tnúhu-a ní tecú dóho-o ndèe cùtnàhá ní tuha-o ìchi-gá.

## Cue téé dándahú tnàha ñáyiú-xi

<sup>7</sup>Te ío vài ñáyiú dándahú ñáhá xìca cuú-yu ñuyíú-a, te càchí-yu sá ñã ndáá sá Xítohó Jesucristú ní cuu-gá ìí<sup>n</sup> ñáyiú ndisa. Te nchaa ñáyiú duha càhá<sup>n</sup> dácùandehndé-yu, te cùu úhú iní-yu Jèsús. <sup>8</sup>Te quíhì iní-ndó sã vã dándahú ñáhá ñáyiú-á<sup>n</sup> xii-ndo cuèndá sá vã cuíta chiú<sup>n</sup> Yá Ndiöxí ní quide-o. Te òrè ná quíxí tùcu Jesús ñuyíú-a te taxi-gá nchaa sá váha cùu iní méé-gã cundecu ndihi-o.

<sup>9</sup>Te nchaa ñáyiú dàña tnúhu Xítohó Jesucristú, te nàtníí-yu ingá ichi, ñáyiú-á<sup>n</sup> ñã túú ndècu ndihí-yu Yá Ndiöxí. Te nchaa ñáyiú ñã túú dàña tnúhu Xítohó Jesucristú ndècu ndihí-yu Yá Ndiöxí ndihi

Déhe-gá Xítohó Jesucristú. <sup>10</sup>Te núu véxi ñáyiú núú ndécú-ndó cächí-yu sá cáhá<sup>n</sup>-yu tnúhu Yá Ndiõxí te ñá ndàá, te vá cuãha-ndo tnúhu danèhé ñáhã-yu xii-ndo, te ni vã cuãha-ndõ-yu tnúhu ndee ìní cuendá chù<sup>n</sup> quidé-yu. <sup>11</sup>Chi núu na cáhá<sup>n</sup> ndíhi váha-ndõ-yu, te dàtná tnúhu sá chíndèe-ndó-yu quidé-yu nchaa sá cuèhé sá dúhá.

**Tnúhu ndéé núú ñí ndíhi-ná**

<sup>12</sup>Te ío vâi-gá tnúhu cuìní-í cachí tnúhu-í xii-ndo, dico vá tée-gã-í chi cuìní-í quixi-í núú ndécú-ndó ndàtnúhu-o cuendá cudíí víhí ìní-ó nchaa-o.

<sup>13</sup>Te nchaa cue déhe cùhú-n, ñáyiú ní cáhá<sup>n</sup> ñáhã Yã Ndiõxí quidé ndèe ìní ñáhã-yu xii-n.

# TUTÚ CÚÚ ÒNÍ NÍ CADÚHA TÉ JUÀÁ

## Càhá<sup>n</sup> váha-yu cuendá té Gǎyú

<sup>1</sup>Te yúhú té Juàá tée yìndaha ñaha xii ñáyiú sàndáá iní tnúhu Jèsús, chìdo tnuñí-í tnúhu-a ì<sup>n</sup> núú tütú sá cúú-xí yòhó té Gǎyú tée ío cùu iní-í, chi ndècu ndìhi-n tnúhu ndáá tnúhu Yá Ndiöxí.

<sup>2</sup>Te yòhó tée ío cùu iní-í, xicá<sup>n</sup> táhù-í núú Yá Ndiöxí sá cùndècu váha-n ñá túú ñá cumání xii-n, te vá cùhú-n, chi sa ñaha-í sá ndécú váha-n núú Yá Ndiöxí. <sup>3</sup>Te ío ní cudíí ìní-í òré ní sáá ñáyiú ndècu ichi Yá Ndiöxí, te ní cachí tnúhu-yu sá sàndáá ndisa iní-n tnúhu ndáá díu-ni tnúhu-gá te tñi-n nchaa nacuáa càhá<sup>n</sup> tnúhu-á<sup>n</sup>. <sup>4</sup>Te ío cudíí ìní-í ní níhì-í tnúhu sá ncháá-ní ñáyiú ní sanu ichi-í ichi Yá Ndiöxí ndécú-ní-yu ichi-gá, te quide-ní-yu nchaa ñacuáa càhá<sup>n</sup>-gá.

<sup>5</sup>Te yòhó tée ío cùu iní-í, ío váha quide-n núú Yá Ndiöxí, chi chindee-n nchaa ñáyiú véxi dava-gá ñuú xicá, ñáyiú sàndáá iní tnúhu Yá Ndiöxí. <sup>6</sup>Te nchaa ñáyiú-á<sup>n</sup> càhá<sup>n</sup>-yu núú tàcá ñáyiú càhá<sup>n</sup> ndìhi Yá Ndiöxí iha sá ío cùu iní-n ncháa tnaha ñáyiú-n dàtná càhá<sup>n</sup> Yá Ndiöxí. Te yúhú càhá<sup>n</sup> ndàhú-í núú-n sá cadá ndèe-ni iní-n

chindee-n nchaa ñáyiú-á<sup>n</sup> nchaa sá xíní ñùhú-yu ichi. Te núu duca<sup>n</sup> na càda-n te quide-n nacuáa cùu iní Yá Ndiöxí, te xìnu cuechi-n tnahá-n nùú-gǎ. <sup>7</sup>Chi nchaa ñáyiú-á<sup>n</sup> ní tñí-yu ichi cuáhá<sup>n</sup>-yu càhá<sup>n</sup>-yu tnúhu Jèsús. Te ñá túú tñí-yu ní ì<sup>n</sup> sá sǎñaha ñáyiú ñá túú ndècu ichi Yá Ndiöxí. <sup>8</sup>Te núu xíǎ<sup>n</sup> nchoo xìni ñuhu-xi chindee-o nchaa ñáyiú xìnu cuechi núú-gǎ ñáyiú càhá<sup>n</sup> tnúhu-gá, te duca<sup>n</sup> te cutnùni iní-ó sǎ tñàhá-ó xìnu cuechi-o ndìhí-yu núú-gǎ.

## Ñá túú quide váha té Diótrefés

<sup>9</sup>Te yúhú ní tendaha-í tutú cuáhá<sup>n</sup> núú tàcá ñáyiú chìñuhú-yu Yá Ndiöxí, dico ì<sup>n</sup> tée ndècu-á<sup>n</sup> nání-dé Diótrefés, te ñá sàndáá iní-dé nchaa tnúhu càhá<sup>n</sup>-í, chi cuini-dé cunuu-dě núú-yu. <sup>10</sup>Te òré quixi-í te cada ndáá-ó ncháa tnúhu cuèhé tnúhu duha càhá<sup>n</sup>-dé cuendá-í. Te ñá díú-ní xíǎ<sup>n</sup> quidé-dě, chi nchaa ñáyiú véxi ingá ñuú càhá<sup>n</sup> tnúhu Yá Ndiöxí ñá túú càhá<sup>n</sup> ñáhá-dě vehe-dé, te ní ñá dáñá-dě cáhá<sup>n</sup> ndìhi ñaha dává-gá ñáyiú xíí-yu. Te nchaa ñáyiú cuini cáhá<sup>n</sup> ndìhi ñaha xíí-yu, te quèñuhu ñaha duu<sup>n</sup>-ni-dé ñá dáñá-gǎ-dé níhí tñáhǎ-yu ndìhi nchaa ñáyiú tàcá dácùàha tnúhu Yá Ndiöxí.

<sup>11</sup>Te yòhó tée ío cùu iní-í, vá cùndècu-n ichi cuehé ichi duha dàtná quidé nchàa dava-gá ñáyiú, cada-n mèe-ni sá vǎha. Chi nchaa ñáyiú quide váha ndècú-yu ichi Yá Ndiöxí. Te nchaa ñáyiú quide nchaa sá cuèhé sá dúhá ñà túú ndècú-yu ichi Yá Ndiöxí.

**Nchaa ñáyiú càhá<sup>n</sup> váha-yu  
cuèndá té Demètriú**

<sup>12</sup>Te nchaa ñáyiú càhá<sup>n</sup> váha-yu cuèndá té Demètriú, chi quide ndáá-dé dàtná càhá<sup>n</sup> Yǎ Ndiöxí. Te tnàhá yúhú càhá<sup>n</sup>-í cuèndá-dé sá ïo váha quide-dé, te nchòhó sa nàha-ndo sá yúhú càhá<sup>n</sup> ndáá-í.

**Tnúhu ndéé núú nǐ ndìhi-ná**

<sup>13</sup>Te vǎi-gá tnúhu cuìní-í cachí tnúhu-í xii-n ni cùu, dico ñá ní tèe-gá-í, <sup>14</sup>chi cuìní-í quixi ndìhi-í, te cáhá<sup>n</sup>-ó núú núú-ó.

<sup>15</sup>Te ío cada ndee ìní, te xìcá<sup>n</sup> táhù-í núú Yǎ Ndiöxí sá ná cùndecu váha-n ñà túú nǎ cuu cundecu-n. Te nchaa cue ñáyiú xìní tnáhá ndìhi-o ndecu iha quide ndee iní ñáhǎ-yu xii-n. Te yòhó cúñaha-n nchàa ñáyiú xìní tnáhá ndìhi-í ndécú xǎá<sup>n</sup> ná càda ndee iní-yu. Te ío cada ndee ìní-nǎ vitna.

# TUTÚ NÍ CADÚHA TÉ JÙDÁS

**Té Jùdás cádúha-dé tutú  
quíh<sup>n</sup> ndaha ñáyiú ní cachí  
Yá Ndiòxí nduu cuendá-gá**

<sup>1</sup>Yúhú té Jùdás ñaní té Jàcobó xínú cuèchi-í nùú Xítóhó Jesucristú, te cádúha-í tutú-a sá cúú-xí nchòhó ñáyiú ní cachí Yá Ndiòxí Yaá cúú Tátá-ó ndùu cuendá-gá, ñáyiú ío cùu iní-gá. Te dàtná-ni xìto ñaha-gá xii-ndo vitna ñàni duca<sup>n</sup> còto ñaha-gá xii-ndo ndéé ná sàá nduu quíxi tucu Xítóhó Jesucristú ñuyúú-a. <sup>2</sup>Te xicá<sup>n</sup> táhù-í nùú Yá Ndiòxí sá ño-gá ná chindee chitúu ñaha-gá xii-ndo, te na cùtnuní-gá iní-ndó sá ño cùu iní ñáhá-gá xii-ndo, te duca<sup>n</sup> ño váha cuu iní-ndó cùndecu-ndo.

**Ñáyiú ñá túú càhá<sup>n</sup> tnúhu ndáá  
tnúhu Yá Ndiòxí**  
(2 Pedro 2:1-17)

<sup>3</sup>Te nchòhó ñáyiú ío cùu iní-í, duca<sup>n</sup>-ni ño sàni iní-í cadúha-í ñ<sup>n</sup> tutú sá cúú-xí-ndó cuendá danèhè ñáhà-í xii-ndo nàcuáa ní cuu ní naníhí táhù-ó dico ñá túú cádúha-í, dico vitna quide cuendá-í sá xíní ñùhu-gá-xi càhá<sup>n</sup>-í nùú tütú-í sá nchòhó ío cundehe-ndo tnúhu càhá<sup>n</sup>-ndó ndíhi ñáyiú, te càhá<sup>n</sup>-ndó nàcuáa ndùu tnúhu sàndáá iní mée-ndó, chi ñàni-ndó tnúhu-á<sup>n</sup> ní càhá<sup>n</sup> Yá Ndiòxí

sá cúú-xí nchàa ñáyiú ndècu ichi-gá. Te vitna ñá túú-gá ná tnúhu càhá<sup>n</sup>-gá sá cúú-xí-yu, chi sa ní càhá<sup>n</sup> duu<sup>n</sup>-gá. <sup>4</sup>Te duha càhá<sup>n</sup>-í nùú tütú-a sá cúú-xí-ndó, chi ñíhí-í tnúhu sá xicá cùu ñáyiú chitnahá ñáhá xii-ndo, te ni ñà túú xíní-ndó ñá ñáyiú cùu-yu, te ñáyiú-á<sup>n</sup> cúú-yu ñáyiú cùu úhú iní ñáhá xii Yá Ndiòxí. Te ñ<sup>n</sup> xichi nùú tütú Yá Ndiòxí càchí-xi sá ñáyiú-á<sup>n</sup> quíh<sup>n</sup>-yu nùú ùhú nùú ndàhú, te ñàni-ndó ñáyiú-á<sup>n</sup> càchí-yu sá ño váha iní Yá Ndiòxí ñùu xicá<sup>n</sup> cuu-ni cadá-yu nchaa sá cuèhé sá dúhá. Te dàquee tñh<sup>n</sup>-yu Yá Ndiòxí Yaá ío cùnuu, ndíhi Xítóhó Jesucristú.

<sup>5</sup>Te nchòhó sa xíní váha-ndo nàcuáa ní quide Yá Ndiòxí ndéé sanaha dico dàndacu iní ñáhà-í xii-ndo, chi dàvá-á<sup>n</sup> ní queñuhu-gá ñáyiú isràèl nàció<sup>n</sup> Ègiptú, te dava ñáyiú-á<sup>n</sup> ñà túú ní sàndáá iní ñáhà-yu xii-gá te ní dánáá ñaha-gá xii-yu. <sup>6</sup>Te nchaa espíritú ñá túú ní cuini cada ndáá cunu cuechi ñùú Yá Ndiòxí ní quee-xi nùú ndécú-xí, te mee-gá ní sadí ñàni ñaha-gá xii-xi ñ<sup>n</sup> xichi nùú née te vá càcu-xi, chi sáá nduu te nayáha-xi cundecu-xi nùú ùhú nùú ndàhú ni caa ni quíh<sup>n</sup>. <sup>7</sup>Te dàndacu iní ñáhá tucu-í xii-ndo nàcuáa ní yáha ñáyiú ñuú Sòdomá, ndíhi ñáyiú ñuú Gòmorrá, ndíhi nchaa ñáyiú ñuú ní cáa yatni xicá<sup>n</sup>, chi

tnàhá-yu ñá túú ní quide váha-yu dàtná ní quide nchaa cue espíritú-á<sup>n</sup>. Chi cue téé ní xóo cáhá<sup>n</sup> ndihí tnàha ndi mee-güedé, te ñu-ni duca<sup>n</sup> ní xóo cada cue ñáyiú ðihí tucu. Te sá dúcá<sup>n</sup> ní quidé-yu núu ní dángóyó Yá Ndiöxí ñuhú ñuu-yu ní dánáá ñàha-gá xií-yu. Te xiá<sup>n</sup> cútnùní iní-ó sã nchàa ñáyiú ñá túú cuiní cada váha núú-gã quíh<sup>n</sup>-yu núú ùhú núú ndàhú ni caa ni quíh<sup>n</sup>.

<sup>8</sup>Te ñu-ni duca<sup>n</sup> quide ñáyiú chìtnahá ñáhá xii-ndo cuiní-yu dandàhú ñáhã-yu, chi càchí-yu sá dácòto ñaha saní-yu nàcuáa cadá-yu, núu xiá<sup>n</sup> nándi nchaa sá cuèhé sá dúhá quidé-yu sá cúú-xí yèqui cuñú-yu, te dàquee tíhũ-yu nchaa nàcuáa càhá<sup>n</sup> Yá Ndiöxí cada-o, te càhá<sup>n</sup> úhú-yu cuendá nchaa espíritú cúnù. <sup>9</sup>Te mee espíritú cúnù-gá xínú cuèchi núú Yá Ndiöxí nání Mìguél ní nàá-xi ndihí sácuíhná cuendá yèqui cùnù ndíi Moisés. Te espíritú-á<sup>n</sup> ñà túú ní cùyi-xi cáhá<sup>n</sup> úhú-xi sácuíhná-ã<sup>n</sup>, chi ní xáha<sup>n</sup>-ni-xi: “Mee Yá Ndiöxí nàhá-gã te núu nása cada ñaha-gã xii-n”, duha ní xáha<sup>n</sup>-xi. <sup>10</sup>Te nchaa ñáyiú duca<sup>n</sup> dandahú ñáhá xii-ndo-á<sup>n</sup> càhá<sup>n</sup> cuèhé-yu cuendá nchaa sá vátá cútnùní-gá iní-yu nása ndù, te quidé-yu dàtná quidé cuè quiti chi cue quiti-á<sup>n</sup> quidé-güèdi nání véxi iní-güedi, te ni ñà túú cùtnuní iní-güedi nchaa sá quidé-güedi. Te duca<sup>n</sup> sà tnahá-xi cùú-yu, chi nchaa sá cuèhé sá dúhá vèxi iní-yu quidé-yu, te sá dúcá<sup>n</sup> quidé-yu xiá<sup>n</sup> tá xíta nihnú-yu cuáhá<sup>n</sup>.

<sup>11</sup>Te ndàhú ní cuú-yu chi ío ndohó-yu!, chi quidé-yu dàtná ní quide ndíi Cãin. Te nándi sá quidě-yu

cuendá sá cuiní-yu díhú<sup>n</sup> dàtná ní xóo cada ndíi Bàlaám. Te ío cùu sáá iní-yu núú Yá Ndiöxí dàtná ní xóo cada ndíi Còré, núu xiá<sup>n</sup> tá xíta nihnú-yu cuáhá<sup>n</sup>. <sup>12</sup>Te ðicó sácá<sup>n</sup>-núú sãha ñàhá-yu xii-ndo òré nàtàcá-ndó quide-ndo vico chiñuhu-ndo Yá Ndiöxí. Te òré xéxi ndihí ñahá-yu xii-ndo te mee-ni sã cúú-xí mèè-yu quide cuendá-yu, te ñá túú nèhé-yu sá yíñuhu núú Yá Ndiöxí. Te cùú-yu dàtná ií<sup>n</sup> vícò sã cuáhá<sup>n</sup>-xi duha cuáhá<sup>n</sup>-xi dàcá<sup>n</sup> te ñá túú dǎu nchídó-xí, duca<sup>n</sup> sà tnahá-xi cùú-yu. Te cùu tucú-yu dàtná ií<sup>n</sup> yutnu vídí sá ñà túú tnàhí cùu<sup>n</sup> sávidí-xi, te nchaa yutnu duca<sup>n</sup> ñà túú cùu<sup>n</sup> sávidí-xi te tnùhu-güedé ndéé yóho-xi te xihí duu<sup>n</sup>-xi. Te duca<sup>n</sup> sãtnahá-xi cùú-yu, chi ñá túú quide váha-yu. <sup>13</sup>Te cùu tucú-yu dàtná ndute làmár, chi ndute-á<sup>n</sup> òré càndá-xi te quecòo tíñú-xi ií<sup>n</sup> xio. Te cùu tucú-yu dàtná ií<sup>n</sup> chódíní cuáhá<sup>n</sup>-di duha cuáhá<sup>n</sup>-di dàcá<sup>n</sup>. Te duca<sup>n</sup> sãtnàhá-xi cùú-yu, chi ñá túú cuiní-yu cada váha-yu. Te ñáyiú-á<sup>n</sup> daquíh<sup>n</sup> ñáhá Yá Ndiöxí xií-yu ií<sup>n</sup> xichi núú néé núú sà ndecu túha cundecú-yu ni caa ni quíh<sup>n</sup>.

<sup>14</sup>Te ndíquí<sup>n</sup> yávã ndíi Àdán téé cùu usá ní xínani Ènóc ní dácáhu iní ñáhá Yá Ndiöxí xii-dé ní cáhá<sup>n</sup>-dé ñu-ni cuendá nchaa ñáyiú-á<sup>n</sup>. Te ní cachí-dé: “Na càchí tnùhu-í xii-ndo sã Yá Ndiöxí quixi-gá ndihí cuèhé víhí espíritú xínú cuèchi núú-gã. <sup>15</sup>Te dàvã-á<sup>n</sup> cada ndáá-gá cuèchi nchaa ñáyiú te daquíh<sup>n</sup>-gá nchaa ñáyiú ndècu ichi cuèhé ichi duha núú ùhú núú ndàhú, te duca<sup>n</sup> càda ñaha-gá xií-yu, chi mee-ni sã cuèhé sá dúhá quidé-yu, te càhá<sup>n</sup> úhú ñáhã-yu xii-gã”, duha

ní cachí te Ènóc. <sup>16</sup>Te ñáyiú-á<sup>n</sup> ïo yica ìní-yu chi ñá túú ndùu vétú ìní-yu nàcuáa ndècú-yu ñuyíú-a, te sàtnuhú-yu tnàha ñáyiú-yu te mee-ni sã cuèhé sá dúhá sàni ìní-yu quidé-yu, te quide cahnú-yu mée-yu, te mee-ni càhá<sup>n</sup> váha-yu núú tnàha ñáyiú-yu cuèndá cuìní-yu sá cáda váha ñaha ñáyiú-á<sup>n</sup> xií-yu.

**Té Jùdás càhá<sup>n</sup>-dé dóho ñáyiú ndècu ichi Yá Ndiöxí**

<sup>17</sup>Te nchòhó ñáyiú ïo cùu ìní-í, càhá<sup>n</sup> ndàhú-í núú-ndó sã ïo cuhu<sup>n</sup> ìní-ndó tnùhu sá sà ní dánèhé ñáhá cuè téé ní tendaha Xítohó Jesucristú càhá<sup>n</sup> tnùhu-gá núú ñáyiú. <sup>18</sup>Te sa nàha-ndo sá ñí cachí-güedé sá cùmání-gã quixi tucu Xítohó Jesucristú ñuyíú-a, te coo ñáyiú cáhá<sup>n</sup> cuèhé cáhá<sup>n</sup> duha cuèndá tnùhu-gá. Te ñáyiú-á<sup>n</sup> cadá-yu mee-ni sã cuèhé sá dúhá vèxi ìní mée-yu. <sup>19</sup>Te ñáyiú-á<sup>n</sup> cúú-yu ñáyiú càhá<sup>n</sup> nándi tnùhu sá ñà túú nàndíhi cuèndá sá vã cúú ì<sup>n</sup>nuu-ndo cundecu-ndo, te mee-ni sã cuèhé sá dúhá ñùhu ìní-yu, te ñá túú ndècu ndíhí-yu Espíritú Yã Ndiöxí.

<sup>20</sup>Te nchòhó ñáyiú ïo cùu ìní-í, ïo dacuàha-ndo tnùhu Yá Ndiöxí sá ñí sándáá ìní-ndó cuèndá duca<sup>n</sup> cuíta cuehnu nihnu-ndo ichi-gá quíhí<sup>n</sup>, te cáhá<sup>n</sup> ndíhi-ndo Yã Ndiöxí nàcuáa dàcahu ìní ñáhá Espíritú-gá xii-ndo. <sup>21</sup>Te ïo coto-ndo mée-ndo cundecu-ndo cuèndá cuu váha ìní ñáhá Yã Ndiöxí xii-ndo, te cundetu-ndo sàá nduu quixi Xítohó Jesucristú ñuyíú-a nacuaca ñaha-gã

xii-ndo cùndecu-ndo ndíhi-gá ñí caa ñí quíhí<sup>n</sup>, chi Yaá-á<sup>n</sup> ïo cùndahú ìní ñáhá-gã xii-o.

<sup>22</sup>Te ñáyiú sàni ì<sup>n</sup> sani úú ìní-xi cúñaha-ndo xíí-yu nàcuáa cadá-yu cundecú-yu ichi Yá Ndiöxí. <sup>23</sup>Te nchaa ñáyiú ta xíta nihnu ñùhu ichi cuáhá<sup>n</sup> núú ùhú núú ndàhú, ïo cundíhí ìní-ndó cúñaha-ndo xíí-yu tnùhu Yá Ndiöxí cuèndá sá ná cãcu nihnú-yu, te cundàhú ìní-ndó-yu, te quíhi ìní-ndó vã cáda-ndó tnàhá-ndó nàcuáa quidé-yu, chi daquèe tìhú-ndó nchàa sá cuèhé sá dúhá quidé-yu-á<sup>n</sup>.

**Nàcuáa ndacá<sup>n</sup> táhú-ó núú Yã Ndiöxí**

<sup>24</sup>Te Yá Ndiöxí chindee ñaha-gá xii-ndo cuèndá sá vã cùndècu-ndo ichi cuehé ichi duha, te cunduu ndoo cunduu nine ìní-ndó càndeca ñaha-gá xii-ndo quíhí<sup>n</sup> cundecu-ndo núú ïo váha càa ndecu-gá, te ïo cudíí ìní-ndó. <sup>25</sup>Te Yá Ndiöxí ïo ndècu ndíhi-gá nchaa sá xini tnùní-gá te diu-gá ní dácãcu nihnu ñaha-gã xii-o núú ùhú núú ndàhú, te duca<sup>n</sup> ñí quide ñaha-gã xii-o chi ndècu ndíhi-o Xítohó Jesucristú. Te ïo ndacá<sup>n</sup> táhú-ó núú Yã Ndiöxí, chi ïo càhnu cuu-gá ndécú-gã táxí tnùní-gá, te súúni váha ìní-gá, te ndàcu-gá quidé-gã nchaa sá váha, te duca<sup>n</sup>-ni ïo càhnu cuu-gá ndéé cútnàhá vátá ngáva-gã ñuyíú, te duca<sup>n</sup>-ni ïo càhnu cuu-gá ndéé vitna, te diu-ni duca<sup>n</sup> ïo càhnu cuu-gá ñí caa ñí quíhí<sup>n</sup>, duha xini ñuhu-xi ndacá<sup>n</sup> táhú-ó núú-gã. Te duca<sup>n</sup> na cùnduu. Te ïo chí cáda ndèe ìní-ñá vitna.



# NCHAA SÁ NĚ XINÍ TÉ JUÀÁ NDIHI NCHAA SÁ NĚ TECÚ DÓHO-DÉ

Xítohó Jesucristú xáha<sup>n</sup>-gǎ xii té  
Juàá nchaa nàcuáa cada-xi ñuyúú

**1** Te Yá Ndiöxí ní xáha<sup>n</sup>-gǎ xii  
Xítohó Jesucristú nchaa sá  
tá cùyatni vií-nǎ cada-xi ñuyúú-a  
cuèndá sá cǔñaha-gǎ xii cue tée  
xìnu cuechi núú-gǎ, te Xítohó  
Jesucristú ní tendaha-gǎ ì<sup>n</sup> espíritú  
xínú cuèchi núú-gǎ ní quixi-xi  
ní cachí tnúhu-xi nchaa tnúhu-á<sup>n</sup>  
xii yúhú té Juàá tée xìnu cuechi  
núú-gǎ, te nchaa tnúhu-á<sup>n</sup> ndèé núú  
tútú-a. <sup>2</sup>Te yúhú càchí tnúhu ndáá-í  
xii-ndo nàcuáa ní cáhá<sup>n</sup> Yǎ Ndiöxí,  
te càhá<sup>n</sup> ndáá tucu-í cuèndá Xítohó  
Jesucristú, ndìhi cuèndá nchaa sá  
ní xiní-í.

<sup>3</sup>Te váha táhú ñǎyiu dàcuaha  
nchaa tnúhu ndèé núú tútú-a, te  
váha tucu táhú ñǎyiu ndèdóho, te  
váha tucu táhú nchaa ñǎyiu tñì  
nacuáa càhá<sup>n</sup>-xi, chi sa ta cùyatni  
vií-nǎ nduu càda-xi nchaa nacuáa  
càhá<sup>n</sup>-xi.

**Té Juàá cádǔha-dé tutú quíh<sup>n</sup>  
ndaha ndì ùsá xichi cue ñǎyiu  
ndècu ichi Yá Ndiöxí**

<sup>4</sup>Te yúhú té Juàá cádǔha-í tutú  
daquixi-í ndì ùsá xichi núú ndécú

nchòhó ñǎyiu ndècu ichi Yá Ndiöxí  
ndécú dìstrítú Àsiá. Te mee-gǎ ná  
chìndee chítúu ñaha-gǎ xii-ndo, te  
ío váha cuu iní-ndó cùndecu-ndo.  
Te cuèi ndéé sanaha òu-ni-gǎ  
ndécú, te òu-ni-gǎ ndécú cuèi  
vitna, te duca<sup>n</sup>-ni cùndecu-gǎ cuèi  
ndéé núú cuàhá<sup>n</sup> núú vèxi, te òu-ni  
duca<sup>n</sup> ò na chìndee chítúu ñaha  
ndì usá cue espíritú ndécú ñúú-gǎ  
xii-ndo, te ío váha cuu iní-ndó  
cùndecu-ndo. <sup>5</sup>Te òu-ni duca<sup>n</sup> na  
càda tucu Xítohó Jesucristú, te  
òu-gǎ cúú-gǎ Yá cáhá<sup>n</sup> ndáá, te  
òu-ni-gǎ ní xíhí-gǎ te díhna-gǎ ní  
ndoto, te dàtnùní ndéé cuèé-gǎ te  
ndoto cue ñǎyiu ní xíhí, te òu-ni-gǎ  
táxi tñùní-gǎ nchaa cue tée yìndaha  
ñaha xii ñǎyiu ndècu ñuyúú-a. Te  
ío cùu iní ñǎhá-gǎ xii-o, te mee-gǎ  
ní satì ñíñí-gǎ te ní xíhí-gǎ núú  
cùrúxí sá cuèndá nchaa sá cuèhé  
sá dúhá quide-o, te ní ndada ndoo  
ní ndada nine-gǎ iní-ó, <sup>6</sup>te vitna ní  
quide ñaha-gǎ xii-o dàtná cue tée  
yìndaha ñǎyiu, te ní quide ñaha  
tùcu-gǎ xii-o dàtná cue dútú xínú  
cuèchi-o núú Tǎtá-gǎ Dútú Ndiöxí.  
Te vitna nchaa-o chí ná càchí-ó  
sǎ ò càhnu cuu Xítohó Jesucristú,  
te ío cùnuu-gǎ, te duca<sup>n</sup>-ni na

cùnuu-gá ni caa ni quíhí<sup>n</sup>. Te duca<sup>n</sup> na cùnduu.

<sup>7</sup>Te cundehe-ndo àndiu! Chi ichi xítí vícò quixi Xítohó Jesucristú, te nchaa ñáyiú ndècu ñuyú-a quini ñáhà-yu xii-gá, te tnàhá nchaa ñáyiú ìí<sup>n</sup>-ni cùu ndíhi ñáyiú ní dánícuèhé ñáhà xii-gá quini ñáhà-yu, te nchaa ñáyiú xíndecu nihí ñuyú, ñáyiú ñá túú cùu váha iní ñáhà xii-gá ndíhú iní-yu òré quini ñáhà-yu xii-gá, te ndáá sá dúcá<sup>n</sup> càda-xi.

<sup>8</sup>Te Yá Ndiòxí càchí-gá: “Yúhú ío cùnuu-í chi ñu-í sa ndècu ndéé cútnàhá ní ngáva ñuyú, te ñu-ni-í cundecu ndéé ná sàá nduu nàa-xi ndíhi nchaa sá íó, chi yúhú cundecu-í ni caa ni quíhí<sup>n</sup>”, duha càchí Yá Ndiòxí Yaá ndácú quide nchaandi túhú sá vǎha. Chi ñu-ni-gá sa ndècu ndéé cútnàhá ní ngáva ñuyú, te ñu-ni-gá ndécú-gǎ vitna, te duca<sup>n</sup>-ni cùndecu-gá ni caa ni quíhí<sup>n</sup>.

### Té Juàá ní xiní-dé Xítohó Jesucristú Yaá ío cùnuu

<sup>9</sup>Te yúhú té Juàá té ndècu ndíhi-ndo ichi Xítohó Jesucristú, tnàhá-í ndóhò-í cuèndá-gá dàtná ndóhò-ndó, te tnàhá-í nduu táhú-í cundecu ndíhi ñaha-í xii-ndo núú ndécú Yá Ndiòxí táxi tnùní-gá. Te ío quide cahnu iní-ó cuèi nǎndí yáha-o ndècu-o sá cuèndá Xítohó Jesucristú. Te yúhú ní ngava-í veaá ìí<sup>n</sup> ñuú nání Pǎtmós, te ñuú-á<sup>n</sup> cáá xítí ndute lámár. Te duca<sup>n</sup> ní cuu cuèndá sá càhá<sup>n</sup>-í tnúhu Yá Ndiòxí, te càhá<sup>n</sup> váha-í cuèndá Xítohó Jesucristú. <sup>10</sup>Te ìí<sup>n</sup> nduu ndumìngú nduu nàtacá-ó chíñuhu-o

Yá Ndiòxí ní quide ñaha Espiritú-gá xii-í nàcuáa càchí iní-xi, te ní tecú dóho-í níhi ní càhá<sup>n</sup> ìí<sup>n</sup> sá ní càhá<sup>n</sup> ndàa sàtà-í te dàtná níhi càhá<sup>n</sup> ìí<sup>n</sup> cútú duca<sup>n</sup> níhi ní càhá<sup>n</sup>-xi. <sup>11</sup>Te càchí sá càhá<sup>n</sup>-á<sup>n</sup>:

—Yúhú sa ndècu-í ndéé cútnàhá ní ngáva ñuyú, te ñu-ni-í cundecu-í ndéé ná sàá nduu nàa-xi ndíhi nchaa sá íó, te chido tnùní-n ìí<sup>n</sup> núú tütú sá ná dànehé núú ñáhà-í xii-n, te daquìhí<sup>n</sup>-n tütú-á<sup>n</sup> ndi ùsá xichi núú xíndecu cue ñáyiú ndècu ichi Yá Ndiòxí xíndecu distritú Àsiá, ndaha ñáyiú ñuú Éfesú, ndaha ñáyiú ñuú Èsmirná, ndaha ñáyiú ñuú Pěrgamú, ndaha ñáyiú ñuú Tiàtirá, ndaha ñáyiú ñuú Sǎrdís, ndaha ñáyiú ñuú Filàdelfiá, ndaha ñáyiú ñuú Laodiceá, nchaa ñáyiú ñuú-á<sup>n</sup> daquìhí<sup>n</sup>-n tütú-á<sup>n</sup> ndahá-yu —càchí sá càhá<sup>n</sup>-á<sup>n</sup>.

<sup>12</sup>Te ní nchócuìhnu-í ndèhé-í nùu ná cúú sǎ càhá<sup>n</sup>-á<sup>n</sup>, te ní xiní-í xínutnǎi úsá tnàhá sá ní cuáha mee-ni dǎhú<sup>n</sup> cuáá<sup>n</sup> sá ndéé dité-xi, te núú dité-xi-á<sup>n</sup> yíndòdo ìí<sup>n</sup> caa candíl. <sup>13</sup>Te cuádava tnuú nchaa xíǎ<sup>n</sup> ní xiní-í núnǎi Yaá cáá dàtná cáá nchàa nchoo ñáyiú ndècu ñuyú-a, te ñihnu-gá ìí<sup>n</sup> dóó cání càa-xi ndéé núú sàhá-gá, te yǎdúcú<sup>n</sup> nuu ìí<sup>n</sup> sìncú ní cuáha mee-ni dǎhú<sup>n</sup> cuáá<sup>n</sup> pèchú-gá. <sup>14</sup>Te idi díquí-gǎ cuixí<sup>n</sup> quiyí dàtná cuixí<sup>n</sup> idi dava mbéé, àdi yúhá sǎ queé òré quidé vǎxi<sup>n</sup>-xi, te tinùu-gá quidé-xí dàtná quidé-xí òré sàá itá ñuhú. <sup>15</sup>Te sàhá-gǎ súuní dàtása<sup>n</sup>-xi dàtná dátása<sup>n</sup> sá nání bròncé òré càyú-xi duca<sup>n</sup> dátása<sup>n</sup>-xi sàhá-gǎ, te dónaha tnúhu càhá<sup>n</sup>-gá quidé-xí dàtná quidé-xí dǎndaha titní víhí yúte. <sup>16</sup>Te xio ndaha cùha-gá núnàha-gá úsá

tnàhá chódíní, te mei yùhu-gá quéné ìí<sup>n</sup> yuchí cahnú ndéé úú xio núú-xi, te núú-gă quidé-xí dàtná quidé-xí nùú nchíanchii òré súúní ngòyo cahni.

<sup>17</sup>Te sá dúcá<sup>n</sup> càa Yaá-á<sup>n</sup> ní xiní-í nùu xíă<sup>n</sup> ní yùhú-í ní nduá-í núú-gă, te ní cuu-í dàtná ìí<sup>n</sup> téé ní xíhí sá dúcá<sup>n</sup> ò ní yùhú-í, dico mee-gă ní sacá<sup>n</sup> ndodo-gă ndaha cùha-gă núú yiqui cùñú-í, te ní cachí-gá:

—Vá yùhú-n, chi ðiu-ni yúhú sa ndècu-í ndéé cùtnàhá ní ngáva ñuyúú, te ðiu-ni yúhú cundecu-í ndéé ná sàà nduu nàa-xi ndìhi nchaa sá ò. <sup>18</sup>Te yúhú cùu-í Yaá ní xíhí te ní ndoto-í, te vitna ndècu vívù-í, te duca<sup>n</sup>-ni cùndecu-í ni caa ni quíhí<sup>n</sup>. Te yúhú cùnùu-í núú nchàa ñáyiu ní xíhí te ðiu-ni-í cùnùu-í núú ndécü-yu. <sup>19</sup>Te chido tnùní-n nchàa sá ní xiní-n-á<sup>n</sup> ìí<sup>n</sup> núú tütú, ndìhi nchaa nàcuáa cùu vitna, ndìhi nchaa sá cádá-xí ndéé núú cuàhá<sup>n</sup> núú vëxi-gá. <sup>20</sup>Te na cächí tnúhu-í xii-n nàcuáa quèe-xi ndi usá chódíní ní xiní-n yòtníi-í xio ndaha cùha-í, ndìhi nàcuáa quèe-xi ndi usá sá ní cuáha mee-ni díhú<sup>n</sup> cuàá<sup>n</sup>, sá ndéé dité-xi te yìndodo ìí<sup>n</sup> caa candíl núú dité-xi-á<sup>n</sup>. Te ndi usá chódíní-ă<sup>n</sup>, xíă<sup>n</sup> cúu-xí sá cùtnùní iní-ó sá ndécú úsá cue téé xinu cuechi núú Yă Ndiöxí, te ndi usá cue téé-á<sup>n</sup> ndécú-güedë ndi usá xichi núú ndécú ñáyiu ndècu ichi Yă Ndiöxí. Te cuendá ndi usá sá ndéé dité-xi-á<sup>n</sup>, xíă<sup>n</sup> cúu-xí sá cùtnùní iní-ó sá ndécú úsá xichi ñáyiu ndècu ichi Yă Ndiöxí — duha cächí Yaá càhá<sup>n</sup>-á<sup>n</sup>.

**Tnúhu sá cúu-xí ñáyiu xíndecu ichi Yă Ndiöxí ndécú ñùú Éfesú**

**2** Te ní cachí tucu Yaá càhá<sup>n</sup>-á<sup>n</sup> xii-í sá chídó tnùní-í nchaa

tnúhu sá vítná cǎhá<sup>n</sup>-gá ìí<sup>n</sup> núú tütú, te tendaha-í quíhí<sup>n</sup> ndaha téé xinu cuechi núú Yă Ndiöxí ndécú ñùú Éfesú sá cúu-xí cuè ñáyiu xíndecu ichi-gá ndécú ñùú-á<sup>n</sup>, te duha ní cachí-gá: “Yúhú cùu-í Yaá nùndàha úsá chódíní xio ndaha cùha-í, te xica cuu-í núú ndécú ndi usá sá ní cuáha mee-ni díhú<sup>n</sup> cuàá<sup>n</sup>, sá ndéé dité-xi te yìndodo ìí<sup>n</sup> caa candíl núú dité-xi. <sup>2</sup>Te yúhú xiní-í nchaa nàcuáa quide nchohó ñáyiu xíndecu ichi Yă Ndiöxí ndécú ñùú Éfesú, te xiní-í sá ò ndècu ndee-ndo quide chiu<sup>n</sup>-ndo cuendá-gá, te ò quide cahnu iní-ndó ndècu-ndo quide-ndo chiu<sup>n</sup>-gá. Te xiní-í sá ñà túú tnàhí tnàhá iní-ndó nàcuáa quide nchaa ñáyiu ndècu ichi cuehé ichi duha. Te xiní tucu-í sá xító ndéé-ndó cuè téé cächí sá ní tendaha-í véxi càhá<sup>n</sup> tnúhu-í te ñă ndàá sá càhá<sup>n</sup>-güedé tnúhu-í, te duca<sup>n</sup> te cùtnuní iní-ndó sǎ ñă ndàá sá càhá<sup>n</sup>-güedé tnúhu-í. <sup>3</sup>Te xiní tucu-í sá ò ndòho-ndo quide-ndo chiu<sup>n</sup> cuendá-í, te duca<sup>n</sup> ò quide cahnu iní-ndó cuèi nándi yăha-ndo, te ñă túú cùu dusa<sup>n</sup>-ndo quide-ndo chiu<sup>n</sup>-á<sup>n</sup>. <sup>4</sup>Dico ñă túú cùu váha iní-í chi nchòhó ñă túú-gǎ quidé-ndó dàtná ní xóo cada-ndo cùtnàhá vitna cùu víi-ni ní sándáá iní ñáhá-ndó xì-í, chi vitna ñă túú-gǎ cúu iní ñáhá víhi-ndo datná ní xóo cada-ndo dàvá-á<sup>n</sup>. <sup>5</sup>Te chí dándàcu iní nàcuáa ní xóo cada-ndo cùtnàhá vitna cùu saa ní sándáá iní ñáhá-ndó xì-í, te ndixi cuéchi iní-ndó sǎ ñà túú-gǎ quidé vǎha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sǎ ndécú ndìhi-ndo

ii<sup>n</sup> sá nǐ cuáha mee-ni dǐhú<sup>n</sup> cuàá<sup>n</sup>, sá ndèé dité-xi te yǐndodo ii<sup>n</sup> caa candíl núú dité-xi. Te núú vá ndíxí cuèchi iní-ndó nàcuáa quǐde-ndo ndecu-ndo ña, te quixi-í xocàni-í xǐá<sup>n</sup>, te duca<sup>n</sup> sǎtnahá-xi cada ñaha-í xii-ndo te núú vá ndíxí cuèchi iní-ndó nàcuáa quǐde-ndo ndecu-ndo, te duca<sup>n</sup> te vá yǒo-gá nàtacá chiñuhu ñaha xii-í ñuú-ndó. <sup>6</sup>Dico quǐde váha-ndo ii<sup>n</sup> xichi chi dàquee tǐhú-ndó nchàa sá quǐdé cuè ñáyiú cùu nicolaitás, te yúhú tnàhá-í dáquèe tǐhù-í nchaa sá quǐdé ñáyiú-á<sup>n</sup>. <sup>7</sup>Te nchòhó cada cuèndá váha-ndo nàcuáa xǎha<sup>n</sup>-í xii Espírítú Yǎ Ndiòxí xǎha<sup>n</sup>-xi xii cue ñáyiú ndècu ichi-gá xǐndecu nchaa xichi. Te duha ndùu tnúhu xǎha<sup>n</sup>-í xii Espírítú-gá xǎha<sup>n</sup>-xi xǐi-yu: Cúñaha-n xii nchaa ñáyiú sá ñuú na càda ndee iní-yu yáha-yu nándi sá ná yǎha-yu sá cuèndá-í, te yúhú cada-í te nduu táhǔ-yu cundecu váha-yu núú ndécú Yǎ Ndiòxí, duha xǎha<sup>n</sup>-í xii Espírítú-gá cúu-xi ñáyiú”, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> nǐ chídó tnùn-í sá cúu-xí ñáyiú xǐndecu ichi Yá Ndiòxí ndécú ñuú Èfésú.

**Tnúhu sá cúu-xí ñáyiú xǐndecu ichi Yá Ndiòxí ndécú ñuú Èsmirná**

<sup>8</sup>Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ii<sup>n</sup> núú tùtú, te tendaha-í quǐhí<sup>n</sup> ndaha téé xǐnu cuechi núú Yǎ Ndiòxí ndécú ñuú Èsmirná sá cúu-xí cuè ñáyiú xǐndecu ichi-gá ndécú ñuú-á<sup>n</sup>, te duha càchí-gá: “Yúhú ndécù-í ndéé cútnàhá ní ngáva ñuyúú, te diu-ni-í cundecu-í ndéé ná sàá nduu nàa-xi

ndihí nchaa sá íó, te diu-ni-í ní xǐhí te ní ndoto-í ndécù-í vitna. <sup>9</sup>Te yúhú xǐn-í nchaa nàcuáa quǐde nchohó ñáyiú ndècu ichi Yá Ndiòxí ndécú ñuú Èsmirná. Te xǐn-í sá ío ndòho-ndo ndecu-ndo sá cuèndá-í, te xǐn-í tucu-í sá ío ndàhú-ndó dico cùu-ndo ñáyiú xǐndecu váha núú Yǎ Ndiòxí. Te xǐn-í tucu-í sá ío càhá<sup>n</sup> cuèhé ñáyiú isràèl cuèndá-ndó, dico ñá túú quǐdé-yu nàcuáa tàù-yu cadá-yu sá cúú-yu ñáyiú isràèl, chi cùú-yu ñáyiú xǐnu cuechi mee-ni núú sàcuíhná. <sup>10</sup>Dico nchòhó vá yúhú-ndó cuèi nándi cùu nchaa sá ná ndòho-ndo cuèndá-í, chi sàcuíhná cada-xi te ngava dava-ndo vècaá, te duca<sup>n</sup> càda-xi chi cuín-í coto ndéé ñáhá-xí xii-ndo núú ndisa sá vǎ ná tǔhú iní-ndó sǎ nchìcú<sup>n</sup> nihnu-ndo ìchi Yá Ndiòxí. Te ndoho-ndo ùxí nduu dico vá dáñá ndèé-ndó cànchìcú<sup>n</sup> nihnu-ni-ndo ìchi-gá cuèi na cùú-ndó sǎ cuèndá-gá, te yúhú cada-í te nduu táhú-ndó cundecu-ndo ndihí-gá ni caa ni quǐhí<sup>n</sup>. <sup>11</sup>Te nchaa nchòhó cada cuèndá váha-ndo nàcuáa xǎha<sup>n</sup>-í xii Espírítú Yǎ Ndiòxí xǎha<sup>n</sup>-xi xii cue ñáyiú ndècu ichi-gá xǐndecu nchaa xichi, te duha ndùu tnúhu xǎha<sup>n</sup>-í xii Espírítú-gá xǎha<sup>n</sup>-xi xǐi-yu: Cúñaha-n xii nchaa ñáyiú sá ñuú na cùndee iní-yu yáha-yu nándi sá ná yǎha-yu sá cuèndá-í te vá cuíta nihnú-yu na sàá nduu cuíta nihnu nchaa dava-gá ñáyiú, duha xǎha<sup>n</sup>-í xii Espírítú-gá cúu-xi ñáyiú”, duha ní cachí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> nǐ chídó tnùn-í sá cúu-xí ñáyiú xǐndecu ichi Yá Ndiòxí ndécú ñuú Èsmirná.

**Tnúhu sá cúu-xí ñáyiú xĩndecu ichi**

**Yá Ndiöxí ndécú ñùú Përgamú**

<sup>12</sup>Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-ï quíhí<sup>n</sup> ndaha téé xĩnu cuechi núú Yá Ndiöxí ndécú ñùú Përgamú sá cúu-xí cuè ñáyiú xĩndecu ichi-gá ndécú ñùú-á<sup>n</sup>, te duha càchí-gá: “Yúhú cúu-í Yaá néhé ì<sup>n</sup> yuchí cání te ndèé úú xio núú-xi. <sup>13</sup>Te yúhú xìn-í nchaa nàcuáa quide nchohó cue ñáyiú xĩndecu ichi Yá Ndiöxí ndécú ñùú Përgamú, te xìn-í tucu-í sá ndécú-ndó núú ïo cùnnu yucu ñávàha, te ñá túú dàña ndeé-ndó nchícú<sup>n</sup> nihnu-ndo ìchi-í, te duca<sup>n</sup> ïo sàndáá iní ñáhá-ní-ndó xii-í, te ñu-ni duca<sup>n</sup> ñí quide-ndo cǔtnàhà ní sahn-í-güedé té Àntipás núú ndécú-ndó ñu-ni núú dúcá<sup>n</sup> ïo cùnnu yucu ñávàha. Te ndí-á<sup>n</sup> ñí quide ndáá ndí ní xĩndecu ndíi ichi-í chi ní càhá<sup>n</sup> váha ndíi cuendá-í. <sup>14</sup>Dico ñá túú cùu váha iní-í cuendá ì<sup>n</sup> úú sá quidé-ndó, chi ndècu ndíhi-ndo ñáyiú nchícú<sup>n</sup> nihnu-ni nchaa nàcuáa ní càhá<sup>n</sup> ndíi Bàlaám. Chi ndí-á<sup>n</sup> ñà túú ní quide váha ndíi chi ní dácáhu iní ndíi ingá téé ní xĩnani Bàlác nàcuáa cada-dé canu ichi-dé cue ñáyiú isràél ingá ichi sá ñà túú váha, chi ní xáha<sup>n</sup> tẽ Bàlác-á<sup>n</sup> xii-yu sá caxí-yu nchaa sá ndúú tãhú nchaa sá ñí cadúha cue téé ñuyú-a dànani ñáyiú ndiöxí te ñá ndàá sá ndiöxí cúu-xí, te ní dácáhu iní ñáhá-dẽ xii-yu sá cundécú-yu ichi díí iní. <sup>15</sup>Te ndècu ndíhi tucu-ndo ñáyiú nchícú<sup>n</sup> nihnu sá dácuaaha cue ñáyiú

cùu nicolaitás. Te nchaa sá dácuaaha ñáyiú-á<sup>n</sup> dáquèe tíhù-í, <sup>16</sup>te nchòhó chí dándixi cuèchi iní sá ñà túú quide váha-ndo ndècu-ndo, chi núú ñáhá te quixi-í nàá-í ndíhi cue ñáyiú-á<sup>n</sup> ndíhi yuchí cání sá quéné yùhu-í. <sup>17</sup>Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xii xii cue ñáyiú ndècu ichi-gá xĩndecu nchaa xichi. Te duha ndùu tnúhu xáha<sup>n</sup>-í xii Espíritú-gá xáha<sup>n</sup>-xii xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yáha-yu sá cuendá-í, te yúhú cuãñaha-ï sá ndúú yùhu xii-yu caxí-yu ì<sup>n</sup> sá vátá quín-í-gá-yu caxí-yu. Te xíá<sup>n</sup> cúu-xí mànáá sá ñí xóo caxi cue ñáyiú ní xĩndecu ndéé sanaha, te cuãñaha tucu-í ì<sup>n</sup> caa yúú cuixí<sup>n</sup> xii-yu, te núú yúú-á<sup>n</sup> cundeé ì<sup>n</sup> ñu saa. Te ñu-á<sup>n</sup> vã yóo tnàhí xìn-í chi ì<sup>n</sup> ñu díí-ñi ñáyiú na quèhe<sup>n</sup> cuendá ñu-á<sup>n</sup> quín-í-yu, duha xáha<sup>n</sup>-í xii Espíritú-gá cúu-xi ñáyiú”, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> ñí chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Përgamú.

**Tnúhu sá cúu-xí cuè ñáyiú xĩndecu ichi Yá Ndiöxí ndécú ñùú Tiàtirá**

<sup>18</sup>Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-ï quíhí<sup>n</sup> ndaha tẽé xĩnu cuechi núú Yá Ndiöxí ndécú ñùú Tiàtirá sá cúu-xí cuè ñáyiú xĩndecu ichi-gá ndécú ñùú-á<sup>n</sup>, te duha càchí-gá: “Yúhú cúu-í Déhe Yá Ndiöxí, te càa tinuu-í dàtná cáá itá ñuhú, te sáhá-í cáá dàtná cáá sá nání bròncé òrè ñúhú-xí núú

ñùhú càyú-xi. <sup>19</sup>Te yúhú xìní-í nchaa nàcuáa quide nchohó ñáyiu xĩndecu ichi Yá Ndiöxí ndécú ñúu Tiàtirá. Te xìní tucu-í sá ïo cùu iní-ndó Yă Ndiöxí te sàndáá iní-ndó-gă. Te xìní tucu-í nàcuáa ndùu chiu<sup>n</sup> quide-ndo sá cúu-xí-gă. Te xìní tucu-í sá ïo quide cahnu iní-ndó cuëi nándi cùu sá yăha-ndo ndècu-ndo. Te xìní tucu-í sá ïo-gá ndúcú ndèe-ndo quide váha-ndo vitna dacúúxí cǔtnàhá vitna cùu saa ní sándáá iní-ndó Yă Ndiöxí. <sup>20</sup>Dico ñá túú cùu váha iní-í cuendá ì<sup>n</sup> sá quidé-ndó, chi ñá túú tnàhí ná sání iní-ndó ndècu ndìhi-ni-ndo ñáyiu nchicú<sup>n</sup> nihnu nchaa nàcuáa dānehé ñáhá ñàha nani Jezabél. Te ñaha-á<sup>n</sup> cāchí-a<sup>n</sup> sá cāhá<sup>n</sup>-a<sup>n</sup> tnúhu Yá Ndiöxí dico ñá ndàá sá cāhá<sup>n</sup>-a<sup>n</sup> tnúhu-gá, te cuáhá<sup>n</sup>-a<sup>n</sup> dāndahú-a<sup>n</sup> nchaa ñáyiu xĩnu cuechi núu-í ndìhi nchaa sá dānehé ñáhá-á<sup>n</sup> cuendá cundecú-yu ichi díí iní, te caxi-yu nchaa sá ndúu tǎhú nchaa sá ñí cadúha cue tée ñuyúú-a dānani ñáyiu ndiöxí te ñá ndàá sá ndiöxí cúu nchaa xǎ<sup>n</sup>. <sup>21</sup>Te ní cuu vai nduu ta dacaca-í ndécú-á<sup>n</sup> cuendá ndixi cuëchi iní-a<sup>n</sup> sá ñà túú quide váha-a<sup>n</sup> ndècu-a<sup>n</sup>, te cuëi duca<sup>n</sup> quide-í dico ñá túú cuiní-a<sup>n</sup> daña-a<sup>n</sup> ñi ì<sup>n</sup> sá cuèhé sá dúhá quide-a<sup>n</sup>. <sup>22</sup>Te vitna yúhú ïo dandòho-í-a<sup>n</sup> chi tñii ñaha cuèhé xii-a<sup>n</sup>, te ñiu-ni duca<sup>n</sup> ïo dandòho-í nchaa ñáyiu quide datná quidé-á<sup>n</sup> te núu vá ndíxí cuëchi iní-yu sá ñà túú quide váha-yu ndécú-yu, te dāñá-yu nchaa sá cuèhé sá dúhá quidé-yu. <sup>23</sup>Te nchaa ñáyiu cundìhi ñaha xii ñaha-á<sup>n</sup> cahni-í-yu, te duca<sup>n</sup> te nchòhó ndìhi dava-gá nchaa ñáyiu

xĩndecu ichi Yá Ndiöxí ndécú nchaa xichi cutnuni iní-ndó ndìhi-yu sá yúhú cúu-í Yaá xìní ndáá nchaa nàcuáa sàni iní ñáyiu, ndìhi nchaa nàcuáa quide-xi iní-yu. Te nchòhó nàcuáa ndùu sá quidé-ndó ì<sup>n</sup> ì<sup>n</sup>-ndo te duca<sup>n</sup> cunduu sá táxi-í nduu táhú-ndó. <sup>24</sup>Te dava nchòhó ñáyiu ndècu ñúu Tiàtirá, ñáyiu ñá túú nchicú<sup>n</sup> nihnu nàcuáa dānehé ñáhá ñàha nani Jezabél-á<sup>n</sup> ñà túú xìní-ndó ñá cúu sá cāchí ñáyiu ndùu yuhu dacahu iní ñáhá yècu ñávàha. Te nchòhó, ñá túú ñǎgá cachí tnúhu-í xii-ndo càda-ndo <sup>25</sup>ñiu-ná sá ïo nducu ndèe-ndo cada-ndo nchaa nacuáa cāhá<sup>n</sup> tnúhu sá ndécú ndìhi-ndo, te duca<sup>n</sup>-ni càda-ndo ndéé òré quixi tucu-í. <sup>26</sup>Te nchaa nchòhó ñáyiu na càda ndee iní yáha nándi sá ná yăha sá cuendá-í, te núu na càda-ni-ndo nchaa nacuáa cuiní-í cada-ndo ndéé nduu vǎ cundècu-gá-ndó ñuyúú-a, te yúhú taxi-í tnúhu ndee ñi xii-ndo sǎ táxi tnùní-ndó nchaa ñáyiu ñuyúú <sup>27</sup>dàtná ní quide mee Tǎtà-í Dútú Ndiöxí ní taxi-gá tnúhu ndee ñi ndécú ndìhi-í, te duca<sup>n</sup> càda ñaha-í xii-ndo tàxi-í tnúhu ndee ñi xii-ndo cuendá ïo taxi tnùní-ndó, te cada iní-ndó sǎ cādá-ndó cuè ñáyiu dàtná quidé-xí ì<sup>n</sup> quídí òré tǎhú-xi cāchi duu<sup>n</sup>-xi, te duca<sup>n</sup> chi nchòhó cada-ndo sǎ ncháá ñáyiu ñá túú quide váha cuíta nihnú-yu. <sup>28</sup>Te cada iní-ndó sǎ dàtná dáyèhé chódíní quití quène oré sa ta tũndaá-ñá cuáhá<sup>n</sup> duca<sup>n</sup> càda-xi oré ná sàá nduu ngũita-xi cada váha-xi, te duca<sup>n</sup> chi yúhú cada-í nàcuáa nduu táhú-ndó cundecu ndìhi ñaha-ndo xii-í núu ïo váha càa

ndecu-í. <sup>29</sup>Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> nĩ chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Tiàtirá.

**Tnúhu sá cúu-xí ñáyiú xĩndecu ichi Yá Ndiöxí ndécú ñùú Sárdís**

**3** Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-ĩ quíhí<sup>n</sup> ndaha téé xĩnu cuechi núú Yá Ndiöxí ndécú ñùú Sárdís sá cúu-xí cuè ñáyiú xĩndecu ichi-gá ndécú ñùú-á<sup>n</sup> te duha càchí-gá: “Yúhú cúu-í Yaá ndécú ndìhi ndi usá espíritú cúu cuendá Yá Ndiöxí, te ñu-ni-í cúu-í Yaá ndécú ndìhi ndi usá chódíní. Te yúhú xìn-í nchaa nàcuáa quide nchóhó ñáyiú xĩndecu ichi Yá Ndiöxí ndécú ñùú Sárdís, te xìn-í sá cúu-ndo dàtná ñáyiú ní xíhí cuèi càchí ñáyiú sá ñáhá. <sup>2</sup>Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ì<sup>n</sup> úu-gá nchaa sá vâha nchicú<sup>n</sup> nihnu-ndo vitna, chi sa ndètu víi-nâ dañ-ndo nchàa-ndi túhú sá vâha quide-ndo ni cuu, te quide cuendá-í sá ñà túú quide-ndo nchaa nacuáa cuení Yá Ndiöxí cada-ndo. <sup>3</sup>Te chí dándacu iní nàcuáa càhá<sup>n</sup> tnúhu sá nĩ xĩndedóho-ndo cǔtnàhá ní tuha-ndo ìchi Yá Ndiöxí, te canchicú<sup>n</sup> nihnu-ndo càda-ndo nacuáa càhá<sup>n</sup> tnúhu-á<sup>n</sup>, te ndixi cuéchi iní-ndó sã ñà túú quide váha-ndo ndècu-ndo, te núu vá nàcuáha-ndo cuendá

nàcuáa quide-ndo ndecu-ndo ña, te cada-í dàtná quidé ñàdúhú, chi òré ñà túú nã yíhí iní-ndó quèxio-í núú ndécú-ndó. <sup>4</sup>Dico ndècu ndìhi-ndo ì<sup>n</sup> úú ñáyiú càndoo caa nine iní-xi, chi ñáyiú-á<sup>n</sup> nĩ nduu táhũ-yu cuihnú-yu dóo cuixí<sup>n</sup> cuendá cundecu ndìhi-í-yu, te duca<sup>n</sup> chi cùdiú-yu núu-í. <sup>5</sup>Te nchaa ñáyiú na càda ndee iní-xi yáha nándi sá ná yáha sá cuendá-í, te ñáyiú-á<sup>n</sup> nduu táhũ-yu cuihnú-yu dóo cuixí<sup>n</sup>, te vá náquète-í dũu-yu núú tütú núú yódó tnùn-í cue ñáyiú ní nduu táhú cundecu ndìhi-í ni caa ni quíhí<sup>n</sup>, te cúñaha-ĩ xii Tãtà-í Dútú Ndiöxí ndìhi cue espíritú xínú cuèchi núu-í sá ñáyiú-á<sup>n</sup> cúu-yu ñáyiú cùu cuendá-í. <sup>6</sup>Te nchaa nchòhó cada cuendá váha-ndo nàcuáa xáha<sup>n</sup>-í xii Espíritú Yá Ndiöxí xáha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> nĩ chídó tnùn-í sá cúu-xí ñáyiú xĩndecu ichi Yá Ndiöxí ndécú ñùú Sárdís.

**Tnúhu sá cúu-xí cuè ñáyiú xĩndecu ichi Yá Ndiöxí ndécú ñùú Filàdelfiá**

<sup>7</sup>Te ní cachí tucu Yaá càhá<sup>n</sup>-á<sup>n</sup> xii-í sá chídó tnùn-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-ĩ quíhí<sup>n</sup> ndaha téé xĩnu cuechi núú Yá Ndiöxí ndécú ñùú Filàdelfiá sá cúu-xí cuè ñáyiú xĩndecu ichi-gá ndécú ñùú-á<sup>n</sup>, te duha càchí-gá: “Yúhú cúu-í Yaá ío váha quide ndáá te ñà túú tnàhí cuéchi-í. Te díhna-gá ndí Dàvíí ní taxi tnùn-í ndí ñáyiú, te vitna yúhú táxi tnùn-í-yu, te yúhú cáhá<sup>n</sup>-í te núu ndèndida cà ñáyiú ndíhu ndaha-ĩ te ndèndida cà

ñáyiú vá ndĩhu ndaha-ĩ. <sup>8</sup>Te yúhú xìní-í nchaa nàcuáa quide nchohó ñáyiú xĩndecu ichi Yá Ndiõxí ndécú ñúú Filàdelfiá, te yúhú ní quide-í nàcuáa ní nĩhí-ndó ì<sup>n</sup> ichi cahnu quide-ndo chiu<sup>n</sup>-í, te vá yõ ì<sup>n</sup> cada nàcuáa vá nihí-gá-ndó nàcuáa cada-ndo chiu<sup>n</sup>-í. Te cuẽi ñá túú ïo nihí ndéé-ndó cùndecu-ndo ichi Yá Ndiõxí dico tn̄i-ndo nchaa tnúhu càhá<sup>n</sup>-í, te ni ì<sup>n</sup> xito ñá túú càhá<sup>n</sup>-ndó sã ñà túú ndècu ndĩhi ñaha-ndo xii-í. <sup>9</sup>Te nchaa ñáyiú quide nchaa nacuáa cuini yucu ñávaha, ñáyiú-á<sup>n</sup> cúú-yu ñáyiú isràél, te cuẽi cúú-yu ñáyiú isràél dico ñá túú quidé-yu nàcuáa tàù-yu cada-yu, te yúhú cada-í sá ncháá ñáyiú-á<sup>n</sup> canehé-yu sá yĩñuhu núú-ndó, te cutnùní iní-yu sá yũhú ío cùu iní ñáhà-í xii-ndo. <sup>10</sup>Te ío quide ndee-ni iní-ndó nchicú<sup>n</sup> nihnu-ndo quide-ndo nchaa nacuáa ní càhá<sup>n</sup>-í, te xíã<sup>n</sup> coto ñaha-í xii-ndo ñà túú ñã tnahá-ndó ndùu na quixi nchaa tnúndòho tnúhu ndàhú ñuyíú-a. Te òré quexìo nchaa tnúndòho-á<sup>n</sup> ñuyíú-a te dàvá-á<sup>n</sup> cutnùní nàcuáa ndùu sá quidé ì<sup>n</sup> ì<sup>n</sup> ñáyiú. <sup>11</sup>Te ío ndĩhi quixi tucu-í. Te vá dãná ndèé-ndó càda-ndo nchaa sá vãha nchicú<sup>n</sup> nihnu-ndo quide-ndo cuendá sá vã cuĩta sá ñĩ cachí Yá Ndiõxí nduu táhú-ndó. <sup>12</sup>Te nchaa nchòhó ñáyiú na càda ndee iní yáha nándi sá ná yãha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tãtà-í Dútú Ndiõxí, te vá í<sup>n</sup> ndùu-gá xocuiñí-ndó núú ndécú-gã. Te cada iní-ndó sã dàtná sá chídó tnùní-í ðiú Tãtà-í Dútú Ndiõxí ñi-ndo chi duca<sup>n</sup>-ni cùndecu-ndo

ndi-í-gá, te cada tucu iní-ndó sã dàtná sá chídó tnùní-í nàcuáa nani ñuú-gá ñi-ndo, chi ðiú ñuú-gá-á<sup>n</sup> cundecu-ndo, te ñuú-á<sup>n</sup> nání-xí Jèrusalén Sáá, duha nani ñuú-gá. Te ñuú-á<sup>n</sup> quee-xi andiú núú ndécú Yá Ndiõxí Yaá cúú Tãtà-í quée-xi ñuyíú. Te cada tucu iní-ndó sã dàtná sá chídó tnùní-í ðiú mee-í ñi-ndo, te xíã<sup>n</sup> cúú-xí ì<sup>n</sup> ðiú saa, te duca<sup>n</sup> càda iní-ndó chi cundecu ndi-í ñaha-ndo xii-í. <sup>13</sup>Te nchaa nchòhó cada cuendá váha-ndo nàcuáa xãha<sup>n</sup>-í xii Espiritú Yá Ndiõxí xãha<sup>n</sup>-xi xii cue ñáyiú ndècu ichi-gá xĩndecu nchaa xichi”, duha càchí Yaá càhá<sup>n</sup>-á<sup>n</sup>. Te nchaa tnúhu-á<sup>n</sup> ni chídó tnùní-í sá cúú-xí ñáyiú xĩndecu ichi Yá Ndiõxí ndécú ñúú Filàdelfiá.

**Tnúhu sá cúú-xí ñáyiú xĩndecu ichi  
Yá Ndiõxí ndécú ñúú Laodiceá**

<sup>14</sup>Te càchí tucu Yaá càhá<sup>n</sup>-á<sup>n</sup> xii-í sá chídó tnùní-í nchaa tnúhu sá vítná càhá<sup>n</sup>-gá ì<sup>n</sup> núú tütú, te tendaha-í quĩhí<sup>n</sup> ndaha téé xĩnu cuechi núú Yá Ndiõxí ndécú ñúú Laodiceá sá cúú-xí cuè ñáyiú xĩndecu ichi-gá ndécú ñuú-á<sup>n</sup>, te duha càchí-gá: “Yúhú cúú-í Yaá quidé núú Yá Ndiõxí, te cùu-í Yaá quidé ndáá chi càhá<sup>n</sup> ndáá cuiti-í nàcuáa càhá<sup>n</sup> Yá Ndiõxí. Te yúhú cúú-í Yaá ní quide ní ngúndecu nchaa sá ñĩ cadúha Yá Ndiõxí. <sup>15</sup>Te yúhú xìní-í nchaa nàcuáa quide nchohó ñáyiú xĩndecu ichi Yá Ndiõxí ndécú ñúú Laodiceá, te xìní-í sã ñà túú cuini-ndó cànchicú<sup>n</sup> nihnu-ndo nchàa nacuáa càhá<sup>n</sup>-í, te ni ñà túú cuini-ndó dàña duu<sup>n</sup>-ndo. Te váha-gá sá dúú<sup>n</sup> dùu<sup>n</sup> cada-ndo nchaa nacuáa càhá<sup>n</sup>-í àdi núú ñáhá



te duu<sup>n</sup> duu<sup>n</sup> dañà-ndo. <sup>16</sup>Te sá dúcá<sup>n</sup> quide-ndo ñá túú cuíní-ndó dùu<sup>n</sup> duu<sup>n</sup>-ni cada-ndo nàcuáa càhá<sup>n</sup>-í, te ni ñà túú cuíní-ndó dùu<sup>n</sup> duu<sup>n</sup>-ni dañà-ndo te sáá nduu vǎ cùndèe-gǎ iní-í cuendá nchaa sá quidé-ndó-ǎ<sup>n</sup>, te daquèe tǐhú ñàhà-í xii-ndo. <sup>17</sup>Te cǎchí-ndó sǎ cuicá-ndó, te ío váha ta yǎha-ndo nchàa nduu cuáhá<sup>n</sup>, te ñá túú tǎhí ná cùmǎní xii-ndo, te ñá túú cùtnumí iní-ndó sǎ cúú-ndó dàtná cue ñáyíu ío ndàhú yǎha, te cùu-ndo datná ñáyíu ndàhú, ñáyíu ío cùndahú iní ñàhá tǎha ñáyíu-xi, te cùu-ndo datná cue ñáyíu cuàá, te cùu tucu-ndo datná cue ñáyíu ndàhú ñá túú tǎhí dóó-xi. <sup>18</sup>Te na cǎchí tǎhu-í xii-ndo sǎ cǎdá-ndó dàtná xǐquide cue ñáyíu sàa<sup>n</sup> ìí<sup>n</sup> sá ní cuáha mee-ni dǐhú<sup>n</sup> cuàá<sup>n</sup> sá ío váha càa, te duca<sup>n</sup> quidé-yu te ío-gǎ cúú cuicá-yu. Te cada tucu-ndo dàtná xǐquide cue ñáyíu sàa<sup>n</sup> dóó cuixí<sup>n</sup> sácuihnu-yu cuendá sá vǎ cúú-yu dàtná ñáyíu ndàhú ñá túú dóó-xi, te cada tucu-ndo dàtná quidé cuè ñáyíu sàa<sup>n</sup> yúcu quèe núú-xi nàcuáa cutnùní váha núú-yu, te duha càhá<sup>n</sup>-í xǎha<sup>n</sup>-í xii-ndo chi cuíní-í sá nàtuha ñaha-ndo xii-í, te ío váha cundecu-ndo sǎ cúú-xí Yǎ Ndióxi. <sup>19</sup>Te càhá<sup>n</sup>-í dóho nchaa ñáyíu cùu iní-í òrè ñá túú quide ndáá-yu, te dàndoho-í-yu, núu xíǎ<sup>n</sup> cuíní-í sá nchòhó ndixi cuéchi iní-ndó sǎ ñà túú quide váha-ndo ndècu-ndo. <sup>20</sup>Te na cǎchí tǎhu-í xii-ndo sǎ yǐhú cùu-í dàtná ìí<sup>n</sup> tée nùtnǐ yuyèhe ndaa quehe te càhá<sup>n</sup>-í ñáyíu yǐhí xití vehe, te núu na càda cuendá-yu sá càhá<sup>n</sup>-í te nacaá<sup>n</sup>-yu yuyèhe te quǐhu-í xití vehe cudìni-í ndihí-yu, te duha càhá<sup>n</sup>-í chi cuíní-í

cundecu ndihi ñaha-í xii-ndo. <sup>21</sup>Te nchaa nchòhó ñáyíu na càda ndee iní-xi yǎha nándi sá ná yǎha sá cuendá-í, te yúhú taxi-í xii-ndo ìí<sup>n</sup> xichi núú ndècù-í cundecu-ndo te cunuu-ndo tǎhá-ndó dàtná cùnuu-í, chi yúhú duca<sup>n</sup> ní quide ndee iní-í ní yǎha-í nándi sá ní yǎha-í te vitna ní nduu tǎhù-í ndècù-í núú ndécú Tǎtà-í Dútú Ndióxi cùnuu-í. <sup>22</sup>Te nchaa nchòhó cada cuendá váha-ndo nàcuáa càhá<sup>n</sup> Espiritú Yǎ Ndióxi xǎha<sup>n</sup>-xi xii cue ñáyíu ndècu ichi-gǎ xǐndecu nchaa xichi<sup>n</sup>, duha cǎchí Yaá càhá<sup>n</sup>-á<sup>n</sup>. Te nchaa tǎhu-á<sup>n</sup> ní chídó tǎníní-í sá cúú-xí ñáyíu xǐndecu ichi Yá Ndióxi ndécú ñúú Laodiceá.

#### Nàcuáa chǐñuhu ñáyíu

#### Yá Ndióxi andiu

**4** Te sátá ní yǎha duca<sup>n</sup> ní cuu te ní xiní-í nchǐí andiu, te ní càhá<sup>n</sup> tucu Yaá ní càhá<sup>n</sup> ndihi ñaha xii-í dǐhna, te Yaá-á<sup>n</sup> ní càhá<sup>n</sup> níhi-gǎ dàtná càhá<sup>n</sup> níhi ìí<sup>n</sup> cútú, te ní cachí-gǎ xii-í:

—Taquène iha te na dànehé ñàhà-í xii-n nchàa nacuáa cada-xi ndéé núú cuàhá<sup>n</sup> núú vèxi —cǎchí-gǎ.

<sup>2</sup>Te òrè-ni-á<sup>n</sup> ní quide ñaha tucu Espiritú Yǎ Ndióxi xii-í nàcuáa cǎchí iní-xi, te dǐu-ni òrè-á<sup>n</sup> ní xiní-í nùtnǐ ìí<sup>n</sup> xilè váha andiu te càa datná cáá xilè sácò nchihí cue ñáyíu ío cùnuu, te núú xilè váha-á<sup>n</sup> núcò Yaá táxi tǎníní. <sup>3</sup>Te Yaá-á<sup>n</sup> cáá-gǎ dàtná cáá yúú chàhnhí yúú váha sá nání jǎspé, te càa tucu-gǎ dàtná cáá yúú váha sá nání còrnalíná, te ñuhu doco ñaha ìí<sup>n</sup> cóo yǎhnhí xii-gǎ, te tǎsa<sup>n</sup>-dì dàtná tǎsa<sup>n</sup> ìí<sup>n</sup> yúú váha sá nání

èsmeraldá. <sup>4</sup>Te ní xiní tucu-í nútní ócó cúmí xilé váha ní càndéé núú núcõo-gá, te núú xilé-á<sup>n</sup> xínucóo ócó cúmí cue téé cùu sacuéhé te xíxíhnu-güedé mee-ni dõõ cuixí<sup>n</sup>, te ìí<sup>n</sup> caa coróná sá ní cuáha mee-ni díhú<sup>n</sup> cuáá<sup>n</sup> xíxúhu<sup>n</sup> díquí-güedě.

<sup>5</sup>Te núú núcõo Yaá táxí tñuní-á<sup>n</sup> sáá nduté, te càhá<sup>n</sup> ñúhu te xica chíhi-xi dónaha, te càyú úsá iti núú núcõo-gá, te sá úsá iti-á<sup>n</sup> xǎ<sup>n</sup> cútnùni sá ndécú úsá espíritú cúu cuendá-gá. <sup>6</sup>Te ndècu ìí<sup>n</sup> sá ndécú ndàa núú-gǎ te xǎ<sup>n</sup> cáá dàtná cáá làmár, te dàtná cáá vidiú cáá ñìhií.

Te ní càndéé ðíñi Yaá núcõo-á<sup>n</sup> xínutñí cúmí quiti te titní víhí tìnuu-güedi ndéé ndàa sátá-güedi ndíhi ndàa núú-güedi. <sup>7</sup>Te quiti díhna nuu càa-dí datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú tée, te quiti cùu cumí cáá-dí dàtná cáá yàcolo oré cuáhá<sup>n</sup>-dí núú tàchí. <sup>8</sup>Te ndi cúmí quiti-á<sup>n</sup> ndéé ñíhu ndíxí<sup>n</sup>-güedi ìí<sup>n</sup> ìí<sup>n</sup>-güedi, te ñìhí xití ndíxí<sup>n</sup>-güedi ndíhi ndàa sátá ndíxí<sup>n</sup>-güedi ndéé tinùu-güedi, te nduu núú chíñùhu-güedi Yá Ndiõxí, te xǎha<sup>n</sup>-güedi xii-gá:

Yòhó Dútú Ndiõxí duca<sup>n</sup>-ni ta quide ndáá-n vèxi, te duca<sup>n</sup>-ni quide ndáá-n cuéi vitna, te diu-ni duca<sup>n</sup> càda ndáá-n núú cuáhá<sup>n</sup> núú vèxi, te cùu-n Yaá quidé nchàa-ndí túhú sá váha, te diu-ni-n sà ndecu-n ndéé cútnàhá ní cuáha ñuyúyú, te diu-ni-n ndècu-n cuéi vitna, te diu-ni-n cùndecu-n cuéi ndéé núú cuáhá<sup>n</sup> núú vèxi. Duha xǎha<sup>n</sup> cué quiti-á<sup>n</sup> xii Yaá núcõo núú xilé váha-á<sup>n</sup> chíñùhu ñaha-güedi.

<sup>9</sup>Te cue quiti-á<sup>n</sup> ìo ndácá<sup>n</sup> táhú-güedi núú Yàá núcõo núú xilé váha-á<sup>n</sup> cuendá nchaa sá quidé-gǎ. Te Yaá-á<sup>n</sup> cúu-gǎ Yaá ndécú nchàa nduu nchaa quíú. Te cue quiti-á<sup>n</sup> càchí-güedi sá ìo càhnu cuu-gá te nèhe-güedi sá yíñùhu núú-gǎ. Te ndi tnahá òré duca<sup>n</sup> càhá<sup>n</sup>-güedi, <sup>10</sup>te ndi òcó cúmí cue téé cùu sacuéhé xínucóo-á<sup>n</sup> ngüñí xítí-güedě núú Yàá núcõo-á<sup>n</sup>, chí diu-gá cúu-gǎ Yaá ndécú nchàa nduu nchaa quíú te chíñùhu ñaha-güedě xii-gá, te tàva-güedé coróná ñúhú díquí-güedě te tàxi ndecu-güedě núú-gǎ, te xǎha<sup>n</sup>-güedě xii-gá:

<sup>11</sup>Yòhó cúu-n Dütú Ndiõxí Yaá cúu cuendá ñáhá xii-ndí, te ìo càhnu cuu-n, te ìo váha quide-n, te nèhe-ndí sá yíñùhu núú-n, chí duca<sup>n</sup> tàú-xi cada-ndí, chí yòhó cúu-n Yàá ní cadúha nchaandi túhú sá ìo, te duca<sup>n</sup> ñí ngùndecu nchaa xǎ<sup>n</sup> chí mee-n dùca<sup>n</sup> ní sani iní-n càda-n.

**Cuendá Yaá cáá dàtná cáá ìí<sup>n</sup> mbéé quiti ní dánicuèhé-güedé ndíhi cuendá ìí<sup>n</sup> tutú**

**5** Te ní xiní tucu-í sá Yàá núcõo núú xilé váha-á<sup>n</sup> nùndàha-gá ìí<sup>n</sup> tutú ní nacaúnuu xio ndaha cùha-gá, te ndéé lètrá ndàa sátá-xi ndíhi ndàa xití-xi, te úsá tnahá tutú líhli ñùhu seyú ndéé sátá tütú-á<sup>n</sup> cuendá sá vǎ dáñá-xí nàcaá. <sup>2</sup>Te ní xiní-í ìí<sup>n</sup> espíritú xínú cuèchi núú Yá Ndiõxí, te ndee vìhi-xi te níhi càhá<sup>n</sup>-xi, te càchí-xi: —éYoo tàú-xi xocàni nchaa tutú líhli ñùhu seyú ndéé sátá tütú-a te nadacáa-xi? —càchí espíritú-á<sup>n</sup>.

<sup>3</sup>Dico ni àndiu, te ni nǔú ñùyíú-a, te ni ndàa xítí ñuhu ñá túú ìí<sup>n</sup> ñáyíu tàú-xi nadacáá tutú-á<sup>n</sup> te cundèhé-yu. <sup>4</sup>Te yúhú ní ngüíta-í ndàhyú víhì-í cuendá sá ñà túú nì ìí<sup>n</sup> ñáyíu tàú-xi nadacáá tutú-á<sup>n</sup> cundèhé-yu. <sup>5</sup>Te ìí<sup>n</sup> cue tée cùu sacuéhé xǐnucóo xíá<sup>n</sup> nǐ cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ñáyíu cùu ñaní tnáhá ndíi Jüdá, diu-ni Yaá cúú ñàní tnáhá ndíi Dàvíí, Yaá-á<sup>n</sup> cúú-gǎ Yaá ní ndacu ní yáha nchaa nándi sá nǐ yáha, núu xíǎ<sup>n</sup> diu-gǎ tàú-gá xocàni-gá nchaa tutú líhli ñùhu seyú ndèè sátá tütú-á<sup>n</sup> te nadacáá-gá —duha càchí tée cùu sacuéhé-ǎ<sup>n</sup>.

<sup>6</sup>Te tnuú ndi òcò cùmí cue tée cùu sacuéhé xǐnucóo-á<sup>n</sup>, ndíhi tnuú ndi cùmí quiti xǐnutnǐ-á<sup>n</sup>, ndíhi núu núcõ Yaá táxí tnùnì-á<sup>n</sup> nǐ xiní-í nǔtnǐ ìí<sup>n</sup> Yaá cáá dàtná cáá ìí<sup>n</sup> mbéé quiti ní dánícuèhé-güedé te ní xíhí-dì ni cùu te ní ndoto-dì, te ndèè úsá ndiqui-dì, te ndèè úsá tinùu-dì, te sá úsá tinùu-dì-á<sup>n</sup> cùtnùnì sá ndécú úsá espíritú cúú cuendá Yǎ Ndiõxí, duca<sup>n</sup> càa Yaá-á<sup>n</sup> nǐ xiní-í. Te cue espíritú-á<sup>n</sup> nǐ tendaha-gǎ xícá cùu-xi ni caa xico ñuyíú. <sup>7</sup>Te Yaá cáá dàtná cáá ìí<sup>n</sup> mbéé quiti ní dánícuèhé-güedé-á<sup>n</sup> nǐ sáhá<sup>n</sup>-gá núu Yàa núcõ núu xilé váha-á<sup>n</sup>. <sup>8</sup>Te òré ní quehe<sup>n</sup>-gá tutú-á<sup>n</sup> te ndi cùmí quiti xǐnutnǐ xíá<sup>n</sup> nǐ ngüíñí xítí-güèdì núu-gǎ, te duca<sup>n</sup> nǐ ngüíñí xítí tucu ndi òcò cùmí cue tée cùu sacuéhé xǐnucóo-á<sup>n</sup>, te ndi díí<sup>n</sup> nǔú-güedé xǐnehe-güedé yaá sá nání àrpá, te xǐnehe tucu-güedé

ndí díí<sup>n</sup> nǔú-güedé ìí<sup>n</sup> caa tǐcùú ní cuáha mee-ni díhú<sup>n</sup> cuàá<sup>n</sup>, te chitu dǔsa sá sàhá<sup>n</sup> tnámí. Te ñúhmá dǔsa sá sàhá<sup>n</sup> tnámí-ǎ<sup>n</sup> cúú-xí dàtná nchaa tnúhu càhá<sup>n</sup> nchaa ñáyíu ndècu ichi Yá Ndiõxí òré càhá<sup>n</sup> ndíhi ñàhá-yu xii-gá. <sup>9</sup>Te xíta-güedé ìí<sup>n</sup> ndudú sáá ndíhi cue quiti-á<sup>n</sup> chíñùhu ñaha-güedé xii-gá, te càchí-güedé ndíhi cue quiti-á<sup>n</sup>:

Yòhò tàú-n quèhe<sup>n</sup>-n tutú-a te xocàni-n nchaa tutú líhli ñùhu seyú ndèè sátá-xi, chi yòhò ní sati nǐñí-n te ní xíhí-n, te cuendá xíǎ<sup>n</sup> ní nduu cuendá Yǎ Ndiõxí cue ñáyíu ìí<sup>n</sup> ìí<sup>n</sup> nació<sup>n</sup>, ndíhi ñáyíu xǐndecu ìí<sup>n</sup> ìí<sup>n</sup> ñuu, ndíhi ñáyíu càhá<sup>n</sup> ndí díí<sup>n</sup> ndí díí<sup>n</sup> nǔú tnùhu, ndíhi ñáyíu xǐndecu ìí<sup>n</sup> ìí<sup>n</sup> xichi.

<sup>10</sup>Te ní quidè-n-yu dàtná cue tée yǐndaha ñáyíu, te ní quide túcú-n-yu dàtná cue dútú sǎ cúú-xí Yǎ Ndiõxí.

Te sáá nduu te taxi tnùnì-yu ñuyíú-a.

Duha càhá<sup>n</sup> cue tée-á<sup>n</sup> ndíhi cue quiti-á<sup>n</sup> chíñùhu-güedé ndíhi-güedi Yaá-á<sup>n</sup>.

<sup>11</sup>Te sátá dúcá<sup>n</sup> te ní tecú dóho-í ní càhá<sup>n</sup> cuèhé víhí espíritú xínú cuèchi ni candéé núu núcõ Yaá táxí tnùnì-á<sup>n</sup>, ndíhi núu xǐnutnǐ ndi cùmí cue quiti-á<sup>n</sup>, ndíhi núu xǐnucóo cue tée cùu sacuéhé-ǎ<sup>n</sup>, te ní xiní-í sá sǔúnì cuèhé víhí espíritú-á<sup>n</sup> xǐndecu xíá<sup>n</sup>, <sup>12</sup>te níhi ní càhá<sup>n</sup> cue espíritú-á<sup>n</sup>, te càchí-xi:

Yòhò Yaá cáá dàtná cáá ìí<sup>n</sup> mbéé quiti ní dánícuèhé-güedé te ní xíhí ní cùu te ní ndoto, te yòhò ío càhnu cuu-n, te ndècu ndíhi-n nchaandi túhú,

te ío ndècu ndihi-n sá xìní  
 tnùní-n,  
 te ndàcu-n quide-n nchaá sá  
 cuíní-n,  
 te nèhe-ndí sá yíñùhu núú-n, te  
 ío váha quide-n,  
 te chiñùhu ñaha-ndí xii-n, chi  
 duca<sup>n</sup> tàù-ndí cada-ndí chi ío  
 càhnu cuu-n.

Duha càchí nchaá cue espíritú-á<sup>n</sup>  
 xáha<sup>n</sup>-xi xii-gá chíñùhu ñaha-xi.

<sup>13</sup>Te ní tecú dóho-í ní cáhá<sup>n</sup>  
 nchaandi túhú sá ní cadúha Yá  
 Ndiòxí ndécú àndiu, ndihi nchaá sá  
 ndécú ñùyíú, ndihi nchaá sá ndécú  
 xítí ñuhu, ndihi nchaá sá ñúhú xítí  
 ndute lámár, te xícachí-xi:

Yòhó Yaá núcõo núú xilé  
 váha, ndihi yòhó Yaá cáá  
 dàtná cáá ì<sup>n</sup> mbéé quiti  
 ní dánícuèhé-güedé táxí  
 tnùní-ndó, te nèhe-ndí sá  
 yíñùhu núú-ndó,  
 te duca<sup>n</sup> ìo ndácá<sup>n</sup> táhú-ndí  
 núú-ndó, chi ío váha  
 quide-ndo te ío cùnuu-ndo,  
 te ñu-ni duha cáhá<sup>n</sup> váha-ndí  
 cuendá-ndó ñi caa ñi quíh<sup>n</sup>.

Duha càchí nchaá sá ní cadúha Yá  
 Ndiòxí.

<sup>14</sup>Te ndí cùmí cue quiti xínutnfi-á<sup>n</sup>  
 càchí-güedi:

—iDuca<sup>n</sup> na cùnduu!  
 —cachí-güedi.

Te ndí òcò cùmí cue tée cùu  
 sacuéhé xíndecu-á<sup>n</sup> ñí ngüíñí  
 xítí-güedé chíñùhu-güedé Yaá  
 ndécú nchàa nduu nchaá quíú.

Cuendá úsá tutú lĩhli ñùhu seyú

**6** Te sáta dúcá<sup>n</sup> te ní xiní-í sá  
 Yáá cáá dàtná cáá ì<sup>n</sup> mbéé  
 quiti ní dánícuèhé-güedé-á<sup>n</sup> ñí

xócání-gǎ ì<sup>n</sup> tutú lĩhli ñùhu seyú  
 ndéé sáta tütú sá ñí nadúcú<sup>n</sup> nuu-á<sup>n</sup>,  
 te ní tecú dóho-í ní cáhá<sup>n</sup> ì<sup>n</sup> quiti  
 cùmí xínutnfi-á<sup>n</sup>, te níhi ní cáhá<sup>n</sup>-di  
 dàtná cáhá<sup>n</sup> ñùhu, te càchí-di:

—iTaquiixi cundehe-n! —cachí-di.

<sup>2</sup>Te òré-ni-á<sup>n</sup> ñí xiní-í ì<sup>n</sup> cuáyú  
 cuixí<sup>n</sup> yódó ñaha ì<sup>n</sup> sá yódó ñaha  
 xii-di, te sá yódó ñaha xii-di-á<sup>n</sup>  
 néhé-xí ì<sup>n</sup> arcú sá cúu tnùxií-xi, te  
 ní nduu táhú-xi ì<sup>n</sup> coròná, te ní  
 ndacu-xi ní cunu-xi te duca<sup>n</sup>-ni ta  
 cùnuu-xi cuáhá<sup>n</sup>.

<sup>3</sup>Te òré ní xócání-gǎ tutú lĩhli cùu  
 uú ñúhú sèyú ndéé sáta tütú sá ñí  
 nadúcú<sup>n</sup> nuu-á<sup>n</sup>, te ní tecú dóho-í  
 ní cáhá<sup>n</sup> tucu ingá quiti cùu uú  
 xínutnfi-á<sup>n</sup>, te càchí-di:

—iTaquiixi cundehe-n! —cachí-di.

<sup>4</sup>Te òré-ni-á<sup>n</sup> ñí xiní tucu-í ì<sup>n</sup>  
 cuáyú tícuèhé ní quee-di cuáhá<sup>n</sup>-di,  
 te yòdo ñaha ì<sup>n</sup> sá yódó ñaha xii-di,  
 te sá yódó ñaha xii-di-á<sup>n</sup> ñí níhí-xi  
 tnùhu ndee ìní sá dátécánuu-xi  
 ñáyiú vá cùndècu ndihi tnaha  
 váha-gá-yu, te ngüíta ñáyiú cahni  
 tnàhá-yu, te ní nduu táhú-xi ì<sup>n</sup>  
 yuchí cáhnú víhi.

<sup>5</sup>Te òré ní xócání tucu Yaá-á<sup>n</sup> ingá  
 tutú lĩhli cùu uní ñúhú sèyú ndéé  
 sáta tütú sá ñí nadúcú<sup>n</sup> nuu-á<sup>n</sup>, te ní  
 tecú dóho-í ní cáhá<sup>n</sup> quiti cùu uní  
 xínutnfi xíá<sup>n</sup>, te càchí-di:

—iTaquiixi cundehe-n! —cachí-di.

Te òré-ni-á<sup>n</sup> ñí xiní tucu-í ì<sup>n</sup>  
 cuáyú tnúú te yòdo ñaha tucu  
 ì<sup>n</sup> sá yódó ñaha xii-di, te sá yódó  
 ñaha-á<sup>n</sup> núndàha-xi úú yaxi<sup>n</sup> libré.

<sup>6</sup>Te ní tecú dóho-í ní cáhá<sup>n</sup> ì<sup>n</sup> sá ñí  
 cáhá<sup>n</sup> tnuú cue quiti xínutnfi-á<sup>n</sup>, te  
 càchí-xi:

—ì<sup>n</sup> cuàrtú-nǎ tríú níhí-ndó sǎ  
 ì<sup>n</sup> dǐhú<sup>n</sup> denàriú, te uní cuàrtú-nǎ

cebàdá níhí-ndó sǎ íí<sup>n</sup> tùcu díhú<sup>n</sup>  
denàriú, dico acìti ndìhi ndudí  
ndéhé yoho yàha stilé chi vá ndhí  
nihnu —duha càchí sá càhá<sup>n</sup>-á<sup>n</sup>.

<sup>7</sup>Te òré ní xócání tùcu Yaá-á<sup>n</sup> tutú  
líhli cùu cumí ñúhú sèyú ndèé sátá  
tútú sá ñí nadúcú<sup>n</sup> nuu-á<sup>n</sup>, te ní tecú  
tucu dóho-í ní cáhá<sup>n</sup> tucu íngá quiti  
cùu cumí xínutnǎí-á<sup>n</sup>, te càchí-dí:

—iTaquixi cundehe-n! —cachí-dí.

<sup>8</sup>Te òré-ni-á<sup>n</sup> ñí xiní tucu-í íí<sup>n</sup>  
cuàyú yàhá, te yòdo ñaha tucu  
íí<sup>n</sup> sá yódó ñàha xii-dí, te sá yódó  
ñàha xii-dí-á<sup>n</sup> nání-xí Sǎ xihí, te xǎ<sup>n</sup>  
sáhní-xí ñáyíu, te sátá xǎ<sup>n</sup> nchícú<sup>n</sup>  
sá nèhé núú ndécú ñáyíu ní xihí. Te  
cúmí xichí cùu ñuyú, te sá sáhní  
ñàha xii ñáyíu-á<sup>n</sup> ñí níhí-xi tnúhu  
ndee ìní danàa-xi ñáyíu íí<sup>n</sup> xichí  
ñuyú, te davá-yu cahni ñaha-xi  
ndìhi yuchí, te cada-xi sá cóo  
tnámá te cuú-yu, te cada tucu-xi sá  
cóo cuéhé cahni-xi ñáyíu, te ñi-u-ni  
tucu-xi cada sá ncháá quiti déé<sup>n</sup>  
cahni-dí ñáyíu.

<sup>9</sup>Te òré ní xócání tùcu Yaá-á<sup>n</sup> tutú  
líhli cùu uhú<sup>n</sup> ñúhú sèyú ndèé sátá  
tútú sá ñí nadúcú<sup>n</sup> nuu-á<sup>n</sup>, te òré-á<sup>n</sup>  
ñí xiní-í núnǎí íí<sup>n</sup> núú sácódó sǎ  
ndúú tǎhú Yǎ Ndiòxí, te ndàa caha  
xǎ<sup>n</sup> ní xiní-í xíndecu nchaa àlmá  
ñáyíu ní sahní-güedé núú ñuyú  
sǎ cuendá tnúhu Yá Ndiòxí, ndìhi  
sá cuendá sá ñí cáhá<sup>n</sup> váha-yu  
cuendá-gá. <sup>10</sup>Te nchaa àlmá-á<sup>n</sup> ñíhi  
xícáhá<sup>n</sup>-xi, te xǎhá<sup>n</sup>-xi xii Yá Ndiòxí:

—Yòhó Dútú Ndiòxí cúu-n Yàá ñá  
túú tnàhí cuéchi-xi, te ñá túú tnàhí  
quée cáva-n quide-n íí<sup>n</sup> sá càhá<sup>n</sup>-n.  
¿Te ná ndéé ama dandòho-n ñáyíu  
ndècu ñuyú nachinaa-n cuendá sá  
ñí quide ñàhá-yu xii-ndí-í? —càchí  
cue àlmá-á<sup>n</sup> xǎhá<sup>n</sup>-xi xii-gá.

<sup>11</sup>Te sátá dúcá<sup>n</sup> te nchaa cue àlmá  
ñáyíu-á<sup>n</sup> ñí níhí-xi dóo cuixí<sup>n</sup> ní  
quée cuíhnu-xi, te ní xítñúhu ñaha  
xii-xi sá ná ndètatú-xi te cundetu  
tnaa-xi ndéé ná xínu cava cuú  
ñáyíu nàcuáa ndèé tnuní dàtná ní  
xihí cue ñáyíu díi àlmá-xi cùu-xi.  
Te ñáyíu sa ní xihí-á<sup>n</sup> íí<sup>n</sup>-ni cùú-yu  
ndìhi ñáyíu vitna cuú-á<sup>n</sup> chi mee-ni  
chìu<sup>n</sup> Xítóhó Jesucristú quidě-yu, te  
ñi-u-ni ichi-gá ndécú-yu.

<sup>12</sup>Te òré ní xócání tùcu Yaá-á<sup>n</sup>  
tutú líhli cùu iñú ñúhú sèyú ndèé  
sátá tútú sá ñí nadúcú<sup>n</sup> nuu-á<sup>n</sup>, te ní  
xiní-í súní ñíhi ní quidi-xi ñuyú,  
te ní cutnuu ñíhi núú nchícanhii  
dàtná íí<sup>n</sup> dóo tnúú, te ní cuu ticuèhé  
ñíhi ñíhi núú yóó. <sup>13</sup>Te ní xiní-í  
ní ngoyo chódíní ñuyú-a dàtná  
ngóyó ngúxí yǎhí òré quéné tǎchí  
ñíhi. <sup>14</sup>Te ní xiní-í ní nadúcú<sup>n</sup> nuu  
andíu dàtná nádúcú<sup>n</sup> nuu íí<sup>n</sup> tutú  
te ní ndóñúhú-xí, te nchaa tindúú  
ñí xica ndehe-xi núú ndécú-xí, te  
duca<sup>n</sup> ñí xica ndehe tucu nchaa  
tindúú yìchí ndécú xiti ndute  
làmar. <sup>15</sup>Te nchaa cue téé yìndaha  
ñáyíu ní nguivǎha-güedé, ndìhi  
nchaa dava-gá cue téé ío tàxi tnuní,  
ndìhi nchaa ñáyíu cuica, ndìhi  
nchaa cue téé tàxi tnuní sandádú,  
ndìhi cue sandádú cue téé ío váha  
sàá díquí-xi nàcuáa cada-güedé  
nàá-güedé, ndìhi nchaa ñáyíu ñá  
túú tnàhí dàñá quee núú chíú<sup>n</sup>  
pàtróó<sup>n</sup>-xi, ndìhi nchaa ñáyíu dàñá  
quée núú chìu<sup>n</sup> patróó<sup>n</sup>-xi. Te dava  
ñáyíu-á<sup>n</sup> ñí nguivǎha-yu xiti yaú, te  
davá-yu ní nguivǎha-yu nchaa tnuú  
cava. <sup>16</sup>Te xǎhá<sup>n</sup>-yu nchaa tindúú  
ndìhi nchaa cava:

—Chí tǎcùu<sup>n</sup> chiváha ñaha-ndo  
xii-ndí cuendá sá vǎ quíní ñàhá Yàá

ío tàxi tnuní núcõo núú xilé váha, ndíhi cuendá sá vǎ dándòho ñaha Yaá cáá dàtná cáá ì<sup>n</sup> mbéé quiti ní dánìcuèhé-güedé, chi Yaá-á<sup>n</sup> ïo cùdée<sup>n</sup>-gǎ núú-ndí —duha càchí nchaa ñáyiú-á<sup>n</sup> xǎhǎ<sup>n</sup>-yu xii nchaa tindúú-á<sup>n</sup> ndíhi nchaa cava-á<sup>n</sup>.

<sup>17</sup>Te vitna ní sáá nduu ío cùu cahnu nduu tnúndòho tnúhu ndàhú, te vǎ yõ ì<sup>n</sup> cundee ìní-xi yáha nchaa tnúndòho-a.

### Ñáyiú isràél ñáyiú naníhí tàhú

**7** Te sátá xǎ<sup>n</sup> te ní xiní-í cúmí tnáhá espíritú xínú cuèchi núú Yǎ Ndiõxí xǎnutnǎi-xi ndí cùmí xio ñuyú, te cue espíritú-á<sup>n</sup> ní ngani-xi táchí cuendá sá vǎ cuícó-gǎ-xi ní làmár, te ní ðǎquí yutnu, te ní ì<sup>n</sup> xichi ñuyú vǎ cuícó-gǎ-xi. <sup>2</sup>Te cue espíritú-á<sup>n</sup> ndécú ndíhi-xi tnúhu ndee ìní danàa-xi sá ìo làmár ndíhi sá ìo ñuhu yìchí, te ní xiní tucu-í ìngá espíritú xínú cuèchi núú Yǎ Ndiõxí ní quee nchita-xi ndàa nacuaa quène nchíanchii, te nùndaha-xi seyú Yǎ Ndiõxí Yaá ndécú nchàa nduu nchaa quíú, te níhi ní cáhǎ<sup>n</sup>-xi xǎhǎ<sup>n</sup>-xi xii ndí cùmí cue espíritú-á<sup>n</sup>:

<sup>3</sup>—Vǎ dánàa-ndo sá ìo làmár, te ní vǎ dánàa-ndo yutnu, te ní ì<sup>n</sup> sá ìo ñuyú vǎ dánàa-ndo, chi cundetu-ndo ndèè ná tàxi ndecu-ndí ì<sup>n</sup> sèñǎ tneé nchaa ñáyiú xínu cuechi núú Tǎtá-ó Dǔtú Ndiõxí —duha càchí espíritú-á<sup>n</sup> xǎhǎ<sup>n</sup>-xi xii ndí cùmí espíritú xǎnutnǎi ndí cùmí xichi ñuyú.

<sup>4</sup>Te ní tecú dóho-í ní cáhǎ<sup>n</sup> ì<sup>n</sup> sá ní cáhǎ<sup>n</sup>, te ní cachí-xi sá nǔú ndí ùxúú xichi cue ñáyiú isràél te ní xínu ì<sup>n</sup> ciendú údico cúmí

mǎl-yu ní ngúndecu sèñǎ tneé-yu.

<sup>5</sup>Te núú ì<sup>n</sup> ciendú údico cúmí mǎl ñáyiú-á<sup>n</sup>, te ní xínu ùxúú mǎl cue ñaní tnáhá ndíi Jùdá ní ngúndecu sèñǎ tneé-yu, te ùxúú mǎl cue ñaní tnáhá ndíi Rùbén, te ùxúú mǎl cue ñaní tnáhá ndíi Gǎd, <sup>6</sup>te ùxúú mǎl cue ñaní tnáhá ndíi Àsér, te ùxúú mǎl cue ñaní tnáhá ndíi Neftàlì, te ùxúú mǎl cue ñaní tnáhá ndíi Manàsés, <sup>7</sup>te ùxúú mǎl cue ñaní tnáhá ndíi Mìó, te ùxúú mǎl cue ñaní tnáhá ndíi Lèví, te ùxúú mǎl cue ñaní tnáhá ndíi Isàcár, <sup>8</sup>te ùxúú mǎl cue ñaní tnáhá ndíi Zabùlón, te ùxúú mǎl cue ñaní tnáhá ndíi Chéé, te ùxúú mǎl cue ñaní tnáhá ndíi Benjàmín, nchaandi túhú ñáyiú-á<sup>n</sup> ní ngúndecu sèñǎ tneé-yu.

### Cuéhé víhí ñáyiú nihnu dóo cuixí<sup>n</sup>

<sup>9</sup>Te sátá xǎ<sup>n</sup> te ní xiní-í cuéhé víhí ñáyiú, ñáyiú ì<sup>n</sup> ì<sup>n</sup> nàció<sup>n</sup>, ndíhi ñáyiú ì<sup>n</sup> ì<sup>n</sup> ñuu, ndíhi ñáyiú càhǎ<sup>n</sup> ndí ðíí<sup>n</sup> ndí ðíí<sup>n</sup> nǔú tnúhu, ndíhi ñáyiú ní xíndecu ì<sup>n</sup> ì<sup>n</sup> xichi, te nchaa ñáyiú-á<sup>n</sup> xǎnutnǎi-yu ndàa núú Yǎá táxí tnuní núcõo núú xilé váha, ndíhi núú Yǎá cáá dàtná cáá ì<sup>n</sup> mbéé quiti ní dánìcuèhé-güedé, te vǎ yõ ì<sup>n</sup> ndàcu cahu ñaha xií-yu chi cuéhé víhí-yu, te nchaá-yu xǎxíhnu-yu mee-ni dóo cuixí<sup>n</sup>, te nùndahá-yu nchaá-yu ì<sup>n</sup> caa ndàha yutnu ñúú. <sup>10</sup>Te nchaá-yu níhi xǎcǎhǎ<sup>n</sup>-yu, te càchí-yu:

Yaá táxí tnuní núcõo núú xilé váha cùu-gǎ Ndiõxí-ó, te ðiu-gǎ ndíhi Yaá cáá dàtná cáá ì<sup>n</sup> mbéé quiti ní dánìcuèhé-güedé ní dácacu nihnu ñaha-gǎ xii-o nǔú ùhú núú ndàhú.

Duha càchí nchaa ñáyi-u-á<sup>n</sup>. <sup>11</sup>Te nchaa espíritú xínú cuèchi núú Yă Ndiöxí ní nadú-cú<sup>n</sup>ndèè-xi xĩnutnĩ-xi ní càndéé núú núcõo Yaá núcõo núú xilé váha, ndihí núú xĩnucõo cue téé cùu sacuéhé, ndihí cue ndí cùmí quiti xĩnutnĩ-á<sup>n</sup>, te nchaa-xi ní ngüfĩní xítí-xí te ní ngúnu ndeyi-xi núú Yàá núcõo núú xilé váha-á<sup>n</sup>, te nchaa-xi ní ngüíta-xi chĩñuhu ñaha-xi xii-gá, <sup>12</sup>te càchí-xi:

Na càhá<sup>n</sup> ndáá-ndí núú yòhó Tătá-ndĩ Dútú Ndiöxí sá ïo càhnu cuu-n, te ndàcu-n quide-n nchaa sá vâha cuiní-n, te ío váha quide-n, te ndècu ndihí-n nchaa sá xìní tñuní-n, te chĩñuhu ñaha-ndí xii-n, te duca<sup>n</sup> ndàcá<sup>n</sup> táhú-ndĩ núú-n cuendá nchaa sá quidé-n, te nèhe-ndí sá yĩñuhu núú-n, te tñuhu càhá<sup>n</sup>-ndí-a cùu-xi tñuhu ndáá, te ñiu-ni duha cáhá<sup>n</sup>-ndí ndéé núú cuahá<sup>n</sup> núú vèxi.

Duha càchí nchaa cue espíritú-á<sup>n</sup> xăha<sup>n</sup>-xi xii Yaá núcõo núú xilé váha-á<sup>n</sup>.

<sup>13</sup>Te ïí<sup>n</sup> cue téé cùu sacuéhé xĩndecu-á<sup>n</sup> ní xícá<sup>n</sup> tñuhú-dě núú-í, te càchí-dé:

—¿Yóndi cùu ñáyi-u dácá<sup>n</sup> xĩxĩhnu dóo cuixí<sup>n</sup>-ă<sup>n</sup>, te ndéé véxi-yu núú dácá<sup>n</sup> xĩndăă-yu-i? —càchí-dé.

<sup>14</sup>Te yúhú ní xáha<sup>n</sup>-ĩ:

—Tătá, ñá túú xìní-í, dico mee-n xìní-n —duha ní xáha<sup>n</sup>-ĩ xii-dé.

Te dătnùní ní cachí tñuhu-dé xii-í ná cúú ñáyi-u-á<sup>n</sup>, te càchí-dé:

—Nchaa ñáyi-u-a cúu-yu ñáyi-u ní quee núú ïó víhí tñuhu ndòho tñuhu ndàhú sá vă cúndèe iní-ó te véxi-yu

iha, te cùu-yu ñáyi-u sa ní nduu ndoo ní nduu nine iní-xi cuendá sá ñí sati ñĩní Yàá cáá dătná cáá ïí<sup>n</sup> mbéé quiti ní dănicuèhé-güedé, cuendá xĩă<sup>n</sup> vitna ní ndihí-yu ní nduu cuixí<sup>n</sup> dóo xĩxĩhnu-yu. <sup>15</sup>Te núú xĩă<sup>n</sup> vitna ní nduu táhũ-yu ndécú-yu núú ndécú Yă Ndiöxí Yáá táxí tñuní núcõo núú xilé váha, te cuèi nduu cuèi niú xínú cuèchí-yu núú-gă vitna, te ñiu-gá xító ñaha-gá xii-yu. <sup>16</sup>Te vitna ní sáá-yu núú-gă cundecú-yu te vă ndóhó-gă-yu docó, te ni vă quiní-gă-yu ndohó-yu yíchí-yu ndute, te ni vă quiní-gă-yu ndohó-yu cahni nchíanchii, te ñá túú-gă ná cahni ndohó-yu. <sup>17</sup>Te duca<sup>n</sup> chi Yáá cáá dătná cáá ïí<sup>n</sup> mbéé quiti ní dănicuèhé-güedé ndécú-gă núú nútñĩ xilé váha núcõo Yă Ndiöxí Yáá táxí tñuní, Yáá-á<sup>n</sup> coto ñaha-gă xii-yu dătná quidé ïí<sup>n</sup> toli oré xító-dě mbéè-dě, te candeca ñaha-gă xii-yu quĩhí<sup>n</sup> núú tõo ndute, te ndute-á<sup>n</sup> cúú-xí ndute candeca iní-yu, te Yă Ndiöxí cada-gá sá vă quiní-gă-yu tñuhu ndăhyú —duha ní cachí tñuhu téé cùu sacuéhé-ă<sup>n</sup> xii-í.

**Cuendá tí-cúú sá ñí cuáha mee-ni dĩhú<sup>n</sup> cuáá<sup>n</sup>**

**8** Te sátá dúcá<sup>n</sup> te Yáá cáá dătná cáá ïí<sup>n</sup> mbéé quiti ní dănicuèhé-güedé ní xócání-gă tutú líhli cùu usá ñũhú sèyú ndéé sátá tütú sá ñí nadú-cú<sup>n</sup>nuu-á<sup>n</sup>, te òrè-á<sup>n</sup> ní cunahi sũúní ñavíí-nă ní cuu andiu dătná cuádava òrè. <sup>2</sup>Te ní xini-í úsá tñahá espíritú xínú cuèchi núú Yă Ndiöxí xĩnutnĩ-xi núú núcõo-gă, te ní níhí-xi ïí<sup>n</sup> caa cútú xĩnehe-xi. <sup>3</sup>Te dătnùní ní xini

tucu-í ingá espíritú xínú cuèchi núú-gǎ ní quexìo-xi nehe-xi ì<sup>n</sup> tǐcùú ní cuáha mee-ni dǐhú<sup>n</sup> cuàá<sup>n</sup> te ñuhu vai dusa sá sàhá<sup>n</sup> tnámí, te ní ngúnutnǐ espíritú-á<sup>n</sup> núú ndécú sǎ ní cuáha mee-ni dǐhú<sup>n</sup> cuàá<sup>n</sup> núú sácòdó sǎ ndúú tǎhú Yǎ Ndiòxí, te xǐǎ<sup>n</sup> nútñǐ-xi ndàa núú-gǎ, te dusa sá sàhá<sup>n</sup> tnámí-á<sup>n</sup> cahmi espíritú-á<sup>n</sup> núú sácòdó sǎ ndúú tǎhú-gǎ-á<sup>n</sup> cuèndá ñúhmá dǔsa-á<sup>n</sup> cundǐhi-xi nchaa tnúhu càhá<sup>n</sup> ñáyiú càhá<sup>n</sup> ndǐhi ñaha xì-gá, nchaa ñáyiú cùu cuendá-gá. <sup>4</sup>Te nùndaha espíritú-á<sup>n</sup> tǐcùú ñúhú dǔsa sá sàhá<sup>n</sup> tnámí càyú, te quène ñúhmá nútñǐ-xi núú Yǎ Ndiòxí, te ñúhmá-ǎ<sup>n</sup> cùndǐhi-xi nchaa tnúhu càhá<sup>n</sup> ñáyiú càhá<sup>n</sup> ndǐhi ñaha xì-gá, nchaa ñáyiú cùu cuendá-gá. <sup>5</sup>Te ní quehe<sup>n</sup> espíritú-á<sup>n</sup> tǐcùú te ní dáchitù-xi ñuhú yódó núú sácòdó sǎ ndúú tǎhú Yǎ Ndiòxí, te ní xítenuu-xi ñuyúú, te òré duca<sup>n</sup> ní quide-xi te ní càhá<sup>n</sup> víhí ñuhu, te ío dusa<sup>n</sup> ní quide-xi ñuyúú, te ní sáá ndúté, te níhi vǐhi ní tnáa.

**Ndi ùsá espíritú ní tiú-xi ì<sup>n</sup> caa cùtú xǐnehe-xi**

<sup>6</sup>Te ndi ùsá cue espíritú xǐnehe ì<sup>n</sup> caa cùtú-ǎ<sup>n</sup> ní ngúndecu túha-xi cuèndá tiú-xi.

<sup>7</sup>Te espíritú díhna nuu ní tiú-xi cútú néhé-xí, te ñuyúú-a ní ngoyo ñǐñǐ dàcánuu-xi ndǐhi ñuhú ndǐhi níñǐ, te luha-ná te cuu dava ñuyúú ní càyú, te luha-ná te cuu dava tucu nchaa yutnu ío ñuyúú ní càyú, te luha-ná te cuu dava tucu nchaa cùhú ío ñuyúú ní càyú.

<sup>8</sup>Te espíritú cùú úú ní tiú-xi cútú néhé-xí, te dàtná cáá ì<sup>n</sup> tindúú cáá ì<sup>n</sup> sá ní ngava xítí làmár te

nchicú<sup>n</sup> ñuhú, te luha-ná te cuu dava ndute làmár-á<sup>n</sup> ní nduu-xi níñǐ. <sup>9</sup>Te luha-ná te cuu dava nchaa quiti xǐxúhu<sup>n</sup> xítí làmár-á<sup>n</sup> ní xǐhí-güedi, te luha-ná te cuu dava nchaa bàrcú ní quée naa-xi xítí ndute.

<sup>10</sup>Te espíritú cùú ùní ní tiú-xi cútú néhé-xí, te ní ngava ì<sup>n</sup> chódíní cáhnú ndèe andiu ñuyúú te nchicú<sup>n</sup> ñuhú-dí, te ñuhú-á<sup>n</sup> cáá dàtná cáá ñùhú iti. Te luha-ná te cuu dava nchaa yúte ní ngava chódíní-ǎ<sup>n</sup>, te luha-ná te cuu dava tucu nchaa núú quèniñni ndute ní ngava-dí.

<sup>11</sup>Te chódíní-ǎ<sup>n</sup> nání-dí: Yúcú Úá. Te ndute xica nchaa yúte-á<sup>n</sup> ndǐhi nchaa ndute quèniñni-á<sup>n</sup> ní cuu úá-xi dàtná yúcú úá, te ío cuéhé ñáyiú ní xǐhí sá dúcá<sup>n</sup> ní cuu úá ndute-á<sup>n</sup>.

<sup>12</sup>Te espíritú cùú cùmí ní dácàhá<sup>n</sup>-xi cútú néhé-xí, te luha-ná te cuu dava nchícanchii ñá túú ní dàyehé-xi, te duca<sup>n</sup> lùha-ná tucu cuu dava yóó ñà túú ní dàyehé-dí, te duca<sup>n</sup> lùha-ná te cuu dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchícanchii, te duca<sup>n</sup> lùha-ná te cuu dava niú ñà túú ní dàyehé yóó ndǐhi nchaa chódíní.

<sup>13</sup>Te sátá dúcá<sup>n</sup> te ní xiní-í xícó ì<sup>n</sup> espíritú xínú cuèchi núú Yǎ Ndiòxí núú tàchí, te ní tecú dóho-í níhi càhá<sup>n</sup>-xi, te càchí-xi:

—Íío ndàhú ndoho nchaa ñáyiú xǐndecu ñuyúú òré ná dàcahá<sup>n</sup> úní-gá cue espíritú cùmǎní cútú xǐnehe-xi, chi sa xǐndecu túha-ná-xi sá dácàhá<sup>n</sup>-xi!— duha càchí espíritú-á<sup>n</sup>.

**9** Te espíritú cùú ùhú<sup>n</sup> ní tiú-xi cútú néhé-xí, te òré-á<sup>n</sup> ní



xiní-í ní quee ìí<sup>n</sup> espíritú andiu te càa-xi datná cáá ìí<sup>n</sup> chodíní, te ní ngava-xi ñuyú, te ní níhí-xi ìí<sup>n</sup> ndacaá néhé-xí cuendá nacaá<sup>n</sup>-xi yuyèhe yaú cùnú víhí. <sup>2</sup>Te ní nacaá<sup>n</sup>-xi yaú-á<sup>n</sup> te ní ngúíta-xi ní quene ñúhmá dàtná quéné ñúhmá ìí<sup>n</sup> xítnú cáhnú vèhi, te ní quene táchí ñí xítenuu-xi ñúhmá-á<sup>n</sup> te ní sadí-xi núú nchìcanchii, te ní cunee ñuyú. <sup>3</sup>Te xítí ñúhmá-á<sup>n</sup> ñí quene tíca làngóstá, te ní xítenuu-dí ñuyú, te déé<sup>n</sup>-güedi dàtná déé<sup>n</sup> nchacua. <sup>4</sup>Te ní ngúndecu ndíhi-güedi tnúhu ndee ìní cuendá sá dándòho-güedi mee-ni ñáyiú ñá túú ndéè sèñá Yá Ndiòxí tneé-xi, te ñá túú ñá cada-dí nchaa yutnu ndíhi nchaa cùhú. <sup>5</sup>Te ñá túú tnúhu ndee ìní ndécú ndíhi-güedi sá cáhní-güedi ñáyiú, chi mee-ni sá dándòho ñaha-güedi xíi-yu úhú<sup>n</sup> yóó. Te òré ní ngúíta-güedi dándòho ñaha-güedi xíi-yu te tàhú tnúhú núú dáquèe-güedi ìñu-güedi dàtná quidé-xí núú dáquèe nchacua ìñu-güedi. <sup>6</sup>Te ñáyiú-á<sup>n</sup> xicá<sup>n</sup> táhú-yu sá ndíhi cuú-yu cuendá sá ïo ndòhó-yu dàquèe ñaha nchàa quítí-á<sup>n</sup> ìñu-dí xíi-yu te ñá cuíní-xi cuú-yu, te ìí<sup>n</sup> nduu ìí<sup>n</sup> nduu sàni ìní-yu cuú-yu te ñá túú cuíní-xi cuú-yu chi ñá túú tnúhu xihí sá cúú-xí-yu.

<sup>7</sup>Te nchaa tíca làngóstá-á<sup>n</sup> xíndáa-güedi dàtná ndáa nchaa cuàyú cue tée cuáhá<sup>n</sup> nàà, te díquí-güedi ñúhu ìí<sup>n</sup> sá cáá dàtná cáá còroná ní cuáha mee-ni díhú<sup>n</sup> cuáá<sup>n</sup>, te núú-güedi càa datná cáá núú cuè tée. <sup>8</sup>Te idi díquí-güedi càa datná cáá ìdi díquí ñáyiú dèhí, te núhu-güedi càa datná cáá núhu

ndicaha. <sup>9</sup>Te yidúcu<sup>n</sup>nuu-güedi ìí<sup>n</sup> sá cáá dàtná cáá càá, te ndíxí<sup>n</sup>-güedi quide-xi datná quidé-xí núú vèxi cuéhé víhí càrretá sá táñhu cuayú cuáhá<sup>n</sup>-güedé ndíhi-güedi núú nàa-güedé. <sup>10</sup>Te ndéè ìñu núú lùhmá-güedi dàtná ndéè ìñu núú lùhmá nchacua, te ìñu núú lùhmá-güedi-á<sup>n</sup> dáquèe-güedi ñáyiú dándòho ñaha-güedi xíi-yu, te duca<sup>n</sup>-ni càda-güedi dándòho ñaha-güedi xíi-yu ndéè xínu úhú<sup>n</sup> yóó. <sup>11</sup>Te nchaa tíca làngóstá-á<sup>n</sup> táxí tnùní ñáhá espíritú sá táxí tnùní yaú cùnú víhí, te espíritú-á<sup>n</sup> nání-xí Àbadón tnúhu hèbreú, te tnúhu grìégú nání-xí Àpoliòn, te ndí ndùú tnúhu-á<sup>n</sup> quée-xí: Sá dánàa ñáyiú.

<sup>12</sup>Te tnúndòho-a cuu-xi tnúndòho díhna nuu, te vitna cùmání úú-gá.

<sup>13</sup>Te espíritú cúú ìñú ní tiú-xi cútú néhé-xí. Te núú Yá Ndiòxí nútní ìí<sup>n</sup> sá ñí cuáha mee-ni díhú<sup>n</sup> cuáá<sup>n</sup> núú sácòdó sá ndúú tàhú-gá, te ndí cùmí xíquí-xi xíndecu ìí<sup>n</sup> caa ndíqui, te ní tecú dóho-í ní cáhá<sup>n</sup> ìí<sup>n</sup> sá ñí cáhá<sup>n</sup> nihnu ndí cùmí ndíqui-á<sup>n</sup>. <sup>14</sup>Te sá càhá<sup>n</sup> nihnu ndíqui-á<sup>n</sup> xáha<sup>n</sup>-xi xii espíritú cúú ìñú sá ñí tiú cútú-á<sup>n</sup>: —Cuáhá<sup>n</sup> nandaxi-n ndí cumí espíritú ndútú ndècu yúte càhnu nani Eúfratés —càchí sá càhá<sup>n</sup>-á<sup>n</sup> xáha<sup>n</sup>-xi xii espíritú-á<sup>n</sup>.

<sup>15</sup>Te sáta dúcá<sup>n</sup> te ní nandaxí ndí cùmí cue espíritú-á<sup>n</sup> cuendá cahni-xi cuéhé víhí ñáyiú, te sa yatni dàtná cuádava ñáyiú xíndecu ñuyú cahni-xi, te duca<sup>n</sup> chi sa ndècu túha tnàhí cue espíritú-á<sup>n</sup> ndétú-xí sàà òré, àdi nduu, àdi yóó, àdi cuíá duca<sup>n</sup> càda-xi cahni-xi ñáyiú. <sup>16</sup>Te ní xiní-í nchaa cue sandàdú cùndíhi-xi xixódó-güedé

cuàyu, te ní nìhì-í tñúhu sá xínu úú  
cièndú millón-güedě.

<sup>17</sup>Te duha xĩndáa cue cuàyu-án ndihi  
cue tée yòdo ñaha-án ní xiní-í: Te cue  
té-án yídúcú<sup>n</sup> nuu ì<sup>n</sup> sá yídúcú<sup>n</sup> nuu  
pèchú-güedé, te luha ticuèhé te luha  
cuì datná cuì andiu, te luha cuàá<sup>n</sup>, te  
nchaa cuàyu-án cáá dǐquí-güedi dàtná  
cáá dǐquí ndicaha, te yuhu-güedi  
quène ñuhú ndihi ñúhmá, ndihi  
àzufré nchicú<sup>n</sup> ñuhú. <sup>18</sup>Te ío cuèhé  
ñáyiú ñuyú ní xíhí chi luha-ná te  
cudavá-yu ní xíhí sá cuèndá ñuhú-án  
ndihi ñúhmá-án ndihi àzufre-án.

<sup>19</sup>Te ndihi núú lùhmá-güedi ndihi  
yuhu-güedi dàndoho-güedi ñáyiú, te  
núú lùhmá-güedi nèhe-xi dǐquí cǒó,  
te diu-ni dàtná cáá cǒó cáá ñhíí  
lùhmá-güedi.

<sup>20</sup>Te nchaa dava-gá ñáyiú ní cácu  
ñá túú ni xíhí núú nchaa tñúndòho-án  
ñá túú ní cuíní-yu dàñá-yu ichi  
cuèhé ichi duha ndécú-yu, chi quède  
cahnu-ní-yu nchaa espíritú cúnđihi  
yucu ñávàha, ndihi nchaa sá càchí-yu  
cùu ndiòxí ní cadúha cue tée ñuyú-a,  
te dava xíá<sup>n</sup> ní cuáha mee-ni dǐhú<sup>n</sup>  
cuàá<sup>n</sup>, te dava ní cuáha mee-ni dǐhú<sup>n</sup>  
cuixí<sup>n</sup>, te dava ní cuáha sá nání  
bròncé, te dava ní cuáha mee-ni yúú,  
te dava ní cuáha mee-ni yùtnu, te  
nchaa xíá<sup>n</sup> ñá túú cùtnuní núú-xi, te ni  
ñá túú tècú dóho-xi, te ni ñá ndácú-xí  
càca-xi. <sup>21</sup>Te ni sá sáhní tnahá-yu, te  
ni sá sáhní ndùu tnahá-yu, te ni sá  
ndécú-yu ichi dǐí ñní, te ni sá dúhú  
ndàchiu<sup>n</sup> tnahá-yu ñá túú ní cuíní-yu  
dàñá-yu.

**Ì<sup>n</sup> espíritú xínú cuèchi núú  
Yá Ndiòxí néhé-xí ì<sup>n</sup> librú**

**10** Te sátá dúcá<sup>n</sup> te ní xiní  
tucu-í ì<sup>n</sup> espíritú cúnùu

xinu cuechi núú Yá Ndiòxí ní  
quee-xi andiu, te yìhi-xi xití vícò  
cuànguee-xi ñuyúú te ndaa dǐquí-xi  
ndècu ì<sup>n</sup> còó yáhnchí, te núú-xi  
súúní chàhnchí dàtná chàhnchí  
núú nchìcanchii, te ndi ndùú  
dǐhí<sup>n</sup>-xi càa datná cáá itá ñuhú. <sup>2</sup>Te  
nùndaha-xi ì<sup>n</sup> librú líhli ní nandícá,  
te sáhá cùha-xi ní sani-xi núú ndute  
làmar, te sáhá dàtni-xi ní sani-xi  
núú ñuhu yìhí. <sup>3</sup>Te espíritú-án ñhi  
vìhi ní cáhá<sup>n</sup>-xi, te ní quide-xi dàtná  
quidé ì<sup>n</sup> ndicaha oré cánásàa-di, te  
òré duca<sup>n</sup> ñhi vìhi ní cáhá<sup>n</sup>-xi te  
úsá xito ní cáhá<sup>n</sup> ñúhu. <sup>4</sup>Te sátá ní  
yáha ní cáhá<sup>n</sup> ñúhu-án ùsá xito, te  
chido tñuní-í ì<sup>n</sup> núú tùtú nàcuáa  
ní cáhá<sup>n</sup>-xi ni cùu, te mei òré-án ní  
tecú dóho-í ní cáhá<sup>n</sup> ì<sup>n</sup> sá ní cáhá<sup>n</sup>  
andiu te càchí-xi:

—Vá chídó tñuní-n nàcuáa ní cáhá<sup>n</sup>  
ñúhu-án, iní mée-ní-n ná cùhu<sup>n</sup> —  
duha càchí sá ní cáhá<sup>n</sup>-án.

<sup>5</sup>Te espíritú sá nùtní ì<sup>n</sup> xio  
sáhá-xi núú ndute làmar-án ndihi  
ingá xio sáhá-xi núú ñuhu yìhí-án<sup>n</sup>  
ní xiní-í ní ndonehe-xi ndaha  
cùha-xi, <sup>6</sup>te càchí-xi:

—Yá Ndiòxí Yáá ndécú nchaa  
nduu nchaa quíú Yáá ní cadúha  
ñuyúú, ndihi andiu, ndihi làmar,  
ndihi nchaa sá íó, Yáá-án náhá  
ndáá-gá sá yùhú càhá<sup>n</sup> ndáá-í, te  
vá cùyàa vihi <sup>7</sup>te cada-xi nchaa  
nàcuáa ndùu tñúhu ndùu yuhu ní  
cáhá<sup>n</sup>-gá, tñúhu ní xáha<sup>n</sup>-gá xii cue  
téé ní xinu cuechi nùú-gá, cue tée  
ní xóo cáhá<sup>n</sup> tñúhu-gá ndéé sanaha,  
chi òré ná tìú espíritú cúú ùsá cútú  
néhé-xí, te òré-án cada-xi nchaa  
nàcuáa ndùu tñúhu ndùu yuhu sá  
ní xáha<sup>n</sup>-gá xii nchaa cue tée-án —  
duha càchí espíritú-án.

<sup>8</sup>Te sáta dúcá<sup>n</sup> te ní tecú tucu dóho-í ní cáhá<sup>n</sup> tucu sá nǐ cáhá<sup>n</sup> andiu-á<sup>n</sup>, te càchí-xi xii-í:

—Cuàhá<sup>n</sup> te quehe<sup>n</sup>-n libré líhli sá nǐ nàndicá nùndàha espíritú-á<sup>n</sup>, espíritú sá nútnǐ ìi<sup>n</sup> xio sáhá-xi núú ndute làmár, te ìi<sup>n</sup> xio sáhá-xi núú ñuhu yìchí —duha càchí sá nǐ cáhá<sup>n</sup>-á<sup>n</sup>.

<sup>9</sup>Te yúhú ní sáhá<sup>n</sup>-í núú ndécú espíritú-á<sup>n</sup> xicá<sup>n</sup>-í libré líhli nèhe-xi-á<sup>n</sup>, te ní cachí-xi:

—Iha te caxi-n, te cuvídí yuhu-n dàtná cuvídí òré xíhí-n ndudí ñũnú, dico xití-n chi cada úa-xi —càchí-xi.

<sup>10</sup>Te ní quehe<sup>n</sup>-í libré líhli nùndaha espíritú-á<sup>n</sup> nǐ xexi-í, te yuhu-í ní quide vídí-xi dàtná vídí ndudí ñũnú, dico sáta nǐ ngava-xi xití-í te ní quide úa-xi. <sup>11</sup>Te ní cachí tucu espíritú-á<sup>n</sup> xii-í:

—Dacuití cáhá<sup>n</sup> tucu-n nàcuáa càchí Yá Ndiöxí cuèndá ñáyiú titní víhí nàció<sup>n</sup>, ndìhi cuèndá ñáyiú titní víhí ñùú, ndìhi cuèndá ñáyiú càhá<sup>n</sup> ndí díí<sup>n</sup> ndí díí<sup>n</sup> núú tñuhu, ndìhi cuèndá cue téé yìndaha ñáyiú.

**Cuèndá úú cue téé càhá<sup>n</sup>  
nàcuáa càchí Yá Ndiöxí**

**11** Te ní ñhì-í ìi<sup>n</sup> tnuyoo nàcuáa chicùhá-í ìi<sup>n</sup> sá chicùhá-í, te ní cáhá<sup>n</sup> ìi<sup>n</sup> sá nǐ cáhá<sup>n</sup>, te càchí-xi:

—Ndacuíñí te chicùhá-n vèhe Yá Ndiöxí, te chicùhá tucu-n núú sácódó sǎ ndúú tǎhú-gǎ, te cahu-n nǎ daha tñàhá ñáyiú chĩñuhu ñaha xii-gá xĩndecu. <sup>2</sup>Dico vá chicùhá-n ndàa quehé vehe-gá, chi xía<sup>n</sup> ní nduu cuèndá cue ñáyiú ñá túú cùú ñáyiú isràél, te ñáyiú-á<sup>n</sup> nduu nuu-nǎ-yu núú nǐ cuu ñuú-gá, te

cadá-yu dàtná càchí iní mée-yu, te údico úú yóó duca<sup>n</sup> càdá-yu. <sup>3</sup>Te yúhú tendaha-í úú tñàhá cue téé cáhá<sup>n</sup> yuhu-í nàcuáa càchí Yá Ndiöxí, te úxúú cièndú únidico nduu duca<sup>n</sup> cǎhá<sup>n</sup>-güedé yuhu-í cada-güedé núú-í, te cuihnu-güedé dóó tñúú sǎ sácuĩhnu cue ñáyiú ndìhú iní-xi —duha càchí sá càhá<sup>n</sup>-á<sup>n</sup>.

<sup>4</sup>Te ndí ndúú cue téé-á<sup>n</sup> cúú-güedé dàtná úú yutnu òlvívú sá xĩnutnǐ núú Yá Ndiöxí, ndìhi dàtná úú sá ndèè dité-xi, sá yíndòdo ìi<sup>n</sup> caa candíl núú dité-xi ndècu tucu núú-gǎ, te diu-gá cúú-gǎ Yáa yíndàha ñuyú. <sup>5</sup>Te ñáyiú na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xii-yu, te duca<sup>n</sup> càda-güedé cahni-güedé nchaa ñáyiú na cùú úhú iní ñàhá xì-güedé. <sup>6</sup>Te ndí ndúú-güedé ndécú ndìhi-güedé tñuhu ndee iní cada-güedé sá vǎ cúú<sup>n</sup> dǎú, te duca<sup>n</sup> càda-güedé ñini cǎhá<sup>n</sup>-güedé nàcuáa càchí Yá Ndiöxí, te ndacu-güedé nadatìu-güedé ndute nduu-xi níñí, te ndacu-güedé dandòho-güedé nchaa ñáyiú titní núú tñuhu ndòho, te duca<sup>n</sup> càda-güedé ná daha xito càchí iní mée-güedé. <sup>7</sup>Te ná yáha sá cǎhá<sup>n</sup>-güedé nàcuáa ní cachí Yá Ndiöxí, te dàvá-á<sup>n</sup> quene ìi<sup>n</sup> quití déé<sup>n</sup> yàú cùnú víhí sǎ ò nèhé cáá, te quití-á<sup>n</sup> ngüita-di nàà-di ndìhi ndí ndúú cue téé-á<sup>n</sup> te cahni ñaha-di xì-güedé. <sup>8</sup>Te yiqui cùnú cue téé-á<sup>n</sup> cautùu-xi ìi<sup>n</sup> tnuú ñuú cáhnú núú ní sahani-güedé Xítohó Jesucristú núú cùrúxí, te diu Yáa-á<sup>n</sup> cúú Xítohó-ó ndìhi-güedé, te càchí ñáyiú sá ñuú-á<sup>n</sup> cúú-xí

dàtná ñuú Sòdomá ndihi nàció<sup>n</sup> Ègíptú. <sup>9</sup>Te úní nduu dava cautùu yiqui cuñú-güedé xía<sup>n</sup>, te ñáyiú nchaa nàció<sup>n</sup>, ndihi ñáyiú nchaa ñuú, ndihi ñáyiú càhá<sup>n</sup> ndí díf<sup>n</sup> ndí díf<sup>n</sup> núú tnùhu, ndihi ñáyiú xĩndecu nchaa xichi quiní-yu yiqui cùñú-güedé, te vá dǎñǎ-yu nguĩndǔxi. <sup>10</sup>Te nchaa ñáyiú-á<sup>n</sup> nduu vétú iní-yu sá dúcá<sup>n</sup> cùú cue tée càhá<sup>n</sup> nàcuáa càchí Yǎ Ndiöxí-á<sup>n</sup>, te ío cudíí iní-yu, te nándi sá cuǎha táhú tnáhǎ-yu sá cúdíí iní-yu sá dúcá<sup>n</sup> ní xíhí-güedé, te duca<sup>n</sup> chi ñuú-güedé ní quide ío ní ndohó-yu. <sup>11</sup>Te sátá ná yǎhá úní nduu dava sá dúcá<sup>n</sup> cùú-güedé te Yá Ndiöxí dandòto ñaha-gá xii-güedé, te ndacóo-güedé, te nchaa ñáyiú na quíní sá ndótó-güedé te yùhú víhí-yu. <sup>12</sup>Te ndí ndúú cue tée-á<sup>n</sup> tecú dóho-güedé càhá<sup>n</sup> ì<sup>n</sup> sá càhá<sup>n</sup> ndéé andiú, te cúñaha-xi xii-güedé: —Chí táquène iha —duha cúñaha sǎ càhá<sup>n</sup>-á<sup>n</sup> xii-güedé.

Te cue tée-á<sup>n</sup> quǎhu-güedé ì<sup>n</sup> xití vícò caa-güedé andiú, te nchaa ñáyiú cùu úhú iní ñáhá xii-güedé quiní ñáhǎ-yu xii-güedé caa-güedé andiú. <sup>13</sup>Te òré-á<sup>n</sup> níhi víhi tnáa ñuyíú, te úxí xichi cùu-xi ñuú núú cùndècu-güedé-á<sup>n</sup> te ì<sup>n</sup> xichi ñuú-á<sup>n</sup> naa, te cuú úsá mǐl ñáyiú, te nchaa dava-gá ñáyiú cácu vá cùú yùhú víhí-yu, te cachí-yu sá ío càhnu cuu Yá Ndiöxí Yaá ndécú àndiú.

<sup>14</sup>Te tnúndòho-a cuu-xi tnúndòho cuu úú yáha, te vitna sa ndètu víi-ñǎ tucu sáá tnúndòho cuu úní.

**Espíritú cùú ùsá tíú-xi cútú néhé-xí**

<sup>15</sup>Te espíritú cùú ùsá ní tíú-xi cútú néhé-xí, te òré-á<sup>n</sup> ní tecú níhi

ní càhá<sup>n</sup> titní sá ní càhá<sup>n</sup> andiú, te càchí-xi:

Nchaa sá cùú cuendá nchaa ñáyiú ñuyíú táxí tnùní-yu ní cùu ní nduu cuendá Tǎtá-ó Dútú Ndiöxí táxí tnùní-gá, Te tnàhá Yaá ní tendaha-gǎ ní sáhá<sup>n</sup> ñuyíú táxí tnùní-gá nchaa xía<sup>n</sup>, te ñuú-gá taxi tnùní-gá ní caa ní quǎhí<sup>n</sup>.

Duha ní càhá<sup>n</sup> nchaa sá ní càhá<sup>n</sup>-á<sup>n</sup>. <sup>16</sup>Te ndí òcò cùmí cue tée sacuéhé xĩnucóo núú xilé váha ní nguĩñí xítí-güedé núú Yǎ Ndiöxí, te ní nuu núú-güedé ndàa núú ñùhú te ní nguíta-güedé chíñùhu ñaha-güedé xii-gá, <sup>17</sup>te càchí-güedé:

Ío ndàcá<sup>n</sup> táhú-ndí núú yòhó Dútú Ndiöxí, Yaá ndácú quide nchaandi túhú sá vǎha, te ñuú-ni-n ndècu-n ndéé cùtnáhá ní ngáva ñuyíú, te ñuú-ni-n ndècu-n vitna, te ñuú-ni-n cùndecu-n ndéé núú cuahá<sup>n</sup> núú vǎxi, te ío càhnu cuu-n te ní nguíta-n ño-gá táxí tnùní-n.

<sup>18</sup>Te nchaa ñáyiú xĩndecu ñuyíú xícudé<sup>n</sup>-yu núú-n, te vitna ní sáá nduu dándohó-n-yu chí ñá túú cùu váha iní-n núú-yu, te cada ndáá-n cuèchi nchaa ñáyiú sa ní xíhí, te ní sáá tucu nduu cuǎñaha-n sǎ ndúú táhú nchaa ñáyiú ní xinu cuechi núú-n ní càhá<sup>n</sup>-yu tnùhu-n, ndihi nchaa dava-gá ñáyiú cùu cuendá-n, chí ñáyiú-á<sup>n</sup> néhé-yu sá yǎñùhu núú-n,

te cuēi ñáyiū cūnuū ndīhi ñáyiū  
 ñá túú cūnuū cuáñaha-n sǎ  
 ndúú tǎhŷ-yu,  
 te ní sǎá tucu nduu dànaa-n  
 nchaa ñáyiū sǎhni tnahā  
 ñáyiū-xi.

Duha cǎchí ndi òcò cǔmí cue tée  
 sacuéhé-ǎ<sup>n</sup> xǎha<sup>n</sup>-güedě xii Yá  
 Ndiöxí.

<sup>19</sup>Te ní xiní-í ní naca<sup>n</sup> yuyèhe  
 vehe Yá Ndiöxí andiū, te xití  
 vehe-gá-á<sup>n</sup> ñi xiní-í ndécú cǎjá ñúhú  
 sǎ yódó tñuní ñacuáa ní cundáá  
 cada-gá sá cúú-xí ñǎyiū, te òré-á<sup>n</sup> ñi  
 xiní-í ní sǎá ndúté, te ní cáhá<sup>n</sup> ñúhu  
 te ío dusa<sup>n</sup> ñi quide-xi, te níhi víhi  
 ní tnáa, te súuní cǎhnu dáú ñíñí ñi  
 cuu<sup>n</sup>.

**Cuèndá ii<sup>n</sup> ñadìhi ndihi cuèndá  
 ii<sup>n</sup> quiti déé<sup>n</sup> nání dràgón**

**12** Te ío víhi ní quide-xi ii<sup>n</sup>  
 sá ñi quide-xi andiū, te  
 ní xiní-í ii<sup>n</sup> ñadìhi te dóo níhnú-á<sup>n</sup>  
 quide-xi datná quidé-xí ñú  
 nchíanchii, te ndàa núú sǎhá-a<sup>n</sup>  
 quide-xi datná quidé-xí ñú yòó, te  
 ñúhu ii<sup>n</sup> coroná díquí-a<sup>n</sup> te ndèé  
 úxúú chódíní. <sup>2</sup>Te ñúhu déhe-a<sup>n</sup> te  
 cǎna saa-a<sup>n</sup> sá quidé úhú ñǎhá-xí  
 xii-a<sup>n</sup> chi sa ndètu víí-nǎ cacu  
 déhe-a<sup>n</sup>. <sup>3</sup>Te dǎtnùní ní quide  
 tucu-xi sá ñi quide-xi andiū, te ní  
 xiní-í ii<sup>n</sup> quiti cǎhnu quiti ticuehé,  
 quiti déé<sup>n</sup> nání dràgón, te ndèé úsá  
 díquí-di ndihi úxí ndiqui-di, te ii<sup>n</sup>  
 caa coróná ñúhú ii<sup>n</sup> caa díquí-di-á<sup>n</sup>.  
<sup>4</sup>Te quiti-á<sup>n</sup> luha-ná te cuu dava  
 nchaa chódíní dǎngòyo-di ñuyíú  
 ndihi lúhmá-di, te quiti-á<sup>n</sup> ñi ngúnu  
 tñi-di núú ñaha ndètu víí-nǎ cacu  
 déhe-xi-á<sup>n</sup> cuèndá caxi-di déhe-a<sup>n</sup>  
 òré cacu ni cū. <sup>5</sup>Te ñaha-á<sup>n</sup> ñi cacu

déhe-a<sup>n</sup> te tée cū-dé, te té lǐhli-á<sup>n</sup>  
 ío cūnuū-dě taxi tñuní-dé nchaa  
 ñáyiū ñuyíú, te mee Yá Ndiöxí  
 ní nacuaca ñaha-gǎ xii té lǐhli-á<sup>n</sup>  
 cuèndá cundecu ndihi ñaha-dě  
 xii-gá núú ndécú-gǎ táxí tñuní-gá.

<sup>6</sup>Te ñadìhi-á<sup>n</sup> ñi xinu-a<sup>n</sup> cuáhá<sup>n</sup>-a<sup>n</sup>  
 xití yucu núú ñi quide túha Yá  
 Ndiöxí cundecu-a<sup>n</sup> cuèndá xía<sup>n</sup>  
 ñíhi-a<sup>n</sup> caxi-a<sup>n</sup>, te duca<sup>n</sup> ñíhi-a<sup>n</sup> sá  
 cǎxí-á<sup>n</sup> ùxúú cièndú únídico nduu  
 chi duca<sup>n</sup> ndūu cundecu-a<sup>n</sup> xía<sup>n</sup>.

<sup>7</sup>Te sǎtá dúcá<sup>n</sup> te andiū ñi xiní-í  
 espíritú cúnūu xinu cuechi núú Yá  
 Ndiöxí nání Mìguél, ndihi nchaa  
 dava-gá espíritú cúndìhi-xi, te  
 nchaa espíritú-á<sup>n</sup> nàa-xi ndihi quiti  
 déé<sup>n</sup> nání dràgón ndihi nchaa  
 espíritú cúndìhi-di. <sup>8</sup>Te quiti-á<sup>n</sup>  
 ñá túú ní ndàcu-di ndihi nchaa  
 espíritú cúndìhi-di, te ñá túú ní  
 ñíhi-gǎ-di núú cúndècu-di andiū  
 ndihi nchaa espíritú cúndìhi-di-á<sup>n</sup>.

<sup>9</sup>Te cue espíritú xínú cuèchi núú  
 Yá Ndiöxí-á<sup>n</sup> ñi dǎngává-xí quiti  
 déé<sup>n</sup> nání dràgón-á<sup>n</sup> ndihi nchaa  
 espíritú cúndìhi-di ñuyíú, te quiti-á<sup>n</sup>  
 cúú-dí mèi sǎcuíhná àdi sá cǎchí-ó  
 cūu yucu ñávǎha, te diu xía<sup>n</sup> ní  
 dǎndàhú-xi ñáyiū ñihì ñuyíú,  
 te diu-ni xía<sup>n</sup> ní nduu-xi cóó ñi  
 dǎndàhú-xi ñáyiū ndéé sanaha.

<sup>10</sup>Te ní tecú dóho-í níhi ní cáhá<sup>n</sup>  
 tucu ii<sup>n</sup> sá ñi cáhá<sup>n</sup> andiū, te  
 cǎchí-xi:

—Vitna te Yá Ndiöxí ní quide-gá  
 ní ngúndecu ñáyiū ndihi-gá, te ío  
 cǎhnu cuu-gá, te ío tàxi tñuní-gá,  
 te tñahá Cristú Yaá ní tendaha  
 Yá Ndiöxí ní quixi ñuyíú-a ío  
 tàxi tñuní-gá, te duca<sup>n</sup> chi sa ní  
 xócuñí sǎcuíhná sǎ súuní nùnūu  
 sacá<sup>n</sup> cuèchi núú Tǎtá-ó Dǔtú

Ndiöxí cuendá nchaa ñáyiú ndècu ndìhi-o ichi-gá, te nduu niú duca<sup>n</sup> sàcá<sup>n</sup> cuéchi-xi núú-gã cuendá-yu ni cùu. <sup>11</sup>Dico ní ndacú-yu ní cunùú-yu núú sàcuíhná sã dúcá<sup>n</sup> sàcá<sup>n</sup> cuéchi cuendá-yu-á<sup>n</sup> ní cùu, te duca<sup>n</sup> ñ cunùú-yu sá cuendá Yaá cáá dàtná cáá ì<sup>n</sup> mbéé quiti ní dánícuèhé-güedé, chi Yaá-á<sup>n</sup> ñ sati ñíí-gã te ní xíhí-gá sá cuendá-yu, te duca<sup>n</sup> ñ cunuu tùcú-yu sá cuendá sá sàndáá iní ñáhã-yu xii Yaá-á<sup>n</sup>, te ñã túú ní yùhú-yu cuú-yu sá cuendá-gá. <sup>12</sup>Te vitna ío chí cúdíí iní nchaa nchòhó espíritú xínú cuèchi núú Yã Ndiöxí, ndìhi nchaa nchòhó ñáyiú ndècu andiú, dico indàhú ní cuu nchaa ñáyiú xĩndecu nihí ñuyúú! Chi sùúní cùdéé<sup>n</sup> sàcuíhná ñ ngava-xi te nándi cada ñaha-xi xíí-yu, te duca<sup>n</sup> chi cùtnuní iní-xi sá sàcú duha-ná nduu cudíí-xi cundecu-xi —duha càchí sá ñ cáhá<sup>n</sup> andiú.

<sup>13</sup>Te sátá ñ quee quiti déé<sup>n</sup> nání dràgón-á<sup>n</sup> andiú ñ ngava-di ñuyúú quiti cùu mei sàcuíhná-á<sup>n</sup>, te quiti-á<sup>n</sup> ñ chinchícú<sup>n</sup>-di ñadìhí ñaha ní cacu déhe téé-xi-á<sup>n</sup>. <sup>14</sup>Te ñadìhí-á<sup>n</sup> ñ nduu táhú-a<sup>n</sup> ní quene úú ndíxí-a<sup>n</sup>, te càa datná cáá ndíxí<sup>n</sup> ì<sup>n</sup> yacòlo cahnu vihi cuendá ndava-a<sup>n</sup> núhú-a<sup>n</sup> yucu núú ñ cachí Yã Ndiöxí cundecu-a<sup>n</sup>, te yàcá<sup>n</sup> cundecu-a<sup>n</sup> úní cuíá dava cuendá sá vã ñhí ñáhá quiti déé<sup>n</sup> quiti nàni dràgón-á<sup>n</sup> te xíá<sup>n</sup> ñíhí-a<sup>n</sup> sá cáxí-á<sup>n</sup>, te quiti-á<sup>n</sup> cúú tùcu-di datná ì<sup>n</sup> cóo dèé<sup>n</sup>. <sup>15</sup>Te quiti-á<sup>n</sup> ñ quene cuéhé ndute yuhu-di, te ndute ní quene yuhu-di-á<sup>n</sup> ñ cuu-xi ì<sup>n</sup> yúte, te duca<sup>n</sup> ñ quide-di cuendá ndute-á<sup>n</sup> cuido-xi ñadìhí-á<sup>n</sup> ní cùu. <sup>16</sup>Te ñuhu

yìchí ní chindee-xi ñadìhí-á<sup>n</sup>, chi ní ndátá te ní quee naa-ni ndute ní quene yuhu quiti-á<sup>n</sup>. <sup>17</sup>Te sá dúcá<sup>n</sup> ñ quide-xi xíá<sup>n</sup> ní cudéé<sup>n</sup> víhí quiti-á<sup>n</sup> núú ñadìhí-á<sup>n</sup>, te ní xica-di cuáhá<sup>n</sup>-di núú xĩndecu nchaa dava-gá cue déhe ñadìhí-á<sup>n</sup> cuendá nàá ndìhi ñaha-di, te ñáyiú-á<sup>n</sup> cúú-yu ñáyiú tñi nchaa tñuhu càhá<sup>n</sup> Yã Ndiöxí, te nchicú<sup>n</sup> nihnú-yu nchaa tñuhu sá càhá<sup>n</sup> váha cuendá Xítóhó Jesucrístú.

### Cuendá úú quiti

**13** Te yúhú ní ngúnu tñí-í yuhu làmár, te ní xiní-í ní quene ì<sup>n</sup> quiti te ndèé úsá díquí-di te úxí ndiqui-di, te núú ì<sup>n</sup> ì<sup>n</sup> ndiqui-di-á<sup>n</sup> ndécú ì<sup>n</sup> caa coroná. Te ì<sup>n</sup> ì<sup>n</sup> díquí-di-á<sup>n</sup> ndèé tñuhu sá càhá<sup>n</sup> úhú-xi cuendá Yã Ndiöxí. <sup>2</sup>Te quiti-á<sup>n</sup> cáá-dí dàtná cáá cuíí, te sáhá-di càa datná cáá sãhá òso, te yuhu-di càa datná cáá yùhu ndicaha. Te quiti déé<sup>n</sup> nání dràgón ní sãñaha-di tñuhu ndee iní xii quiti-á<sup>n</sup> cuendá taxi tñuní víhí-dí, te dràgón-á<sup>n</sup> ñ sãñaha-di núú ndécú-dí tàxi tñuní-di xii quiti ní quene xití làmár-á<sup>n</sup>, te duca<sup>n</sup> ñ quide-di cuendá sá ñhí ndéé quiti-á<sup>n</sup> cunuu-di. <sup>3</sup>Te ì<sup>n</sup> díquí quiti ní quene xití làmár-á<sup>n</sup> càhú víhí càa ní nícuèhé, te sa ndètu víí-nã cuú-di sànuu dico ní ndúha-di, te ñhí ñuyúú ñ níhí ñáyiú tñuhu sá dúcá<sup>n</sup> ñ cuu, te ío ní cuíhú-yu te ní tuhá-yu quiti-á<sup>n</sup>. <sup>4</sup>Te nchaa ñáyiú-á<sup>n</sup> ñ cachí-yu sá ìo càhnu cuu quiti déé<sup>n</sup> quiti nàni dràgón-á<sup>n</sup> cuendá sá ñ sãñaha-di tñuhu ndee iní sá táxí tñuní quiti ní quene xití làmár-á<sup>n</sup>, te ní ngúíta-yu ní chiñuhú-yu quiti ní quene xití làmár-á<sup>n</sup>, te càchí-yu:

—Vá yõo ìí<sup>n</sup> nũtnahá ñáhá xii  
quiti-a, te ní vǎ yõo ìí<sup>n</sup> ndacu nàa  
ndihi ñaha xii-di —cachí-yu.

<sup>5</sup>Te ní níhí-di tnúhu ndee ìní sá  
càhá<sup>n</sup> úhú-di Yá Ndiõxí, te cada  
càhnu-di mee-di, te údico úú yóo  
duca<sup>n</sup> ní níhí-di tnúhu ndee ìní-á<sup>n</sup>  
cunuu-di. <sup>6</sup>Te duca<sup>n</sup> ní quide-di  
ní càhá<sup>n</sup> úhú-di Yá Ndiõxí ndihi  
cuendá nchaa sá quidé-gǎ, te diu-ni  
duca<sup>n</sup> ní càhá<sup>n</sup> úhú-di núú ndécú-gǎ,  
te ní càhá<sup>n</sup> úhú tucu-di nchaa ñáyi  
ndècu ndihi-gá andiú. <sup>7</sup>Te duca<sup>n</sup> ní  
níhí-di tnúhu ndee ìní sá nàa-di  
ndihi nchaa ñáyi cuu cuendá Yá  
Ndiõxí, te duca<sup>n</sup> nàa ndihi ñaha-di  
xii-yu ndéé òré vǎ ndácú-gǎ-yu nàa  
ndihi ñàhá-yu xii-di, te tnàhá ní  
ngúndecu ndihi-di tnúhu ndee ìní  
sá táxi tnúni-di ñáyi nchaa nàció<sup>n</sup>,  
ndihi ñáyi nchaa ñúú, ndihi nchaa  
ñáyi càhá<sup>n</sup> ndí díí<sup>n</sup> ndí díí<sup>n</sup> núú  
tnúhu, ndihi ñáyi xíndecu nchaa  
xichi. <sup>8</sup>Te cue ñáyi nihí ñuyú ní  
cachí-yu sá ìo càhnu cuu quiti-á<sup>n</sup>, te  
ñáyi-á<sup>n</sup> cúú-yu ñáyi ñá túú yòdo  
tnuní núú tütú Yá cáá dàtná cáá ìí<sup>n</sup>  
mbéé quiti ní dánicuèhé-güedé Yá  
ní xihí ní cuu te ní ndoto. Te ndéé  
cútnàhá ní ngáva ñuyú sa yòdo  
tnuní ñáyi nanihí tàhú, dico ñáyi  
càhí sá ìo càhnu cuu quiti-á<sup>n</sup> ñà  
túú yòdo tnuní-yu núú tütú-gǎ.

<sup>9</sup>Te nchaa nchòhó ñáyi  
xíndedóho chí cúndedóho váha  
nchaa nàcuáa cuáhá<sup>n</sup> tnúhu-á<sup>n</sup>. <sup>10</sup>Te  
nchaa ñáyi na chìhi tnaha ñáyi-xi  
vecaá te sáá nduu te quíhí<sup>n</sup>-yu  
tnàhá-yu vecaá, te nchaa ñáyi  
sàhni tnaha ñáyi-xi ndihi yuchí te  
diu-ni ndihi yuchí cuú-yu tnàhá-yu,  
te xíá<sup>n</sup> núú ìo xìni ñuhu-xi sá  
ncháá ñáyi cuu cuendá Yá Ndiõxí

cunduu càhnu ìní-yu, te quíndáá ìní  
ñáhǎ-yu xii-gǎ.

<sup>11</sup>Te ní xini tucu-í ìngá quiti ní  
quene-di núú ñuhu yìhí, te ndèé  
úú ndiqui-di te càa datná cáá  
ndiqui canerú, te càhá<sup>n</sup>-di dàtná  
càhá<sup>n</sup> quiti déé<sup>n</sup> nání dràgón. <sup>12</sup>Te  
dàtná ndécú ndihi quiti ní quene  
xití làmár-á<sup>n</sup> tnúhu ndee ìní sá táxi  
tnúni-di duca<sup>n</sup> ndècu ndihi quiti  
ní quene ñuhu yìhí-á<sup>n</sup> tnúhu ndee  
ìní taxi tnúni-di cada-di núú quiti  
ní quene xití làmár-á<sup>n</sup>, te quiti  
ní quene ñuhu yìhí-á<sup>n</sup> ní quide  
yica-di sá ncháá ñáyi xíndecu nihí  
ñuyú chiñuhú-yu quiti ní quene xití  
làmár-á<sup>n</sup>, quiti càhú víhí ní tnàhá ní  
nícuehé te ní ndúha-di. <sup>13</sup>Te quiti ní  
quene xití ñuhu yìhí-á<sup>n</sup> ní quide-di  
títní núú sǎ vǎ yõo tnàhí ndàcu  
cada, te nchaa ñáyi ní xini-yu sá  
ndèé andiú ní dǎngóyó-dí ñuhú  
ñuyú. <sup>14</sup>Te sá dúcá<sup>n</sup> ní ngúndecu  
ndihi-di tnúhu ndee ìní ní quide-di  
nchaa xíá<sup>n</sup> ní quide-di núú quiti  
ní quene xití làmár-á<sup>n</sup>, te sá dúcá<sup>n</sup>  
ní quide-di te xíá<sup>n</sup> ní dándàhú-di  
nchaa ñáyi xíndecu nihí ñuyú, te  
ní xáha<sup>n</sup>-di xii-yu sá ndúcú-yu ìí<sup>n</sup> sá  
cádúha-yu nàcuáa-ni càa nacuáa-ni  
nduu quiti ní quene xití làmár-á<sup>n</sup>,  
quiti càhú víhí ní tnàhá ní nícuehé  
díquí-xi-á<sup>n</sup> ní quée machití te ñá  
túú ní xihí-di chi ní xíndecu-ni-di.  
<sup>15</sup>Te quiti ní quene xití ñuhu  
yìhí ní ngúndecu ndihi tucu-di  
tnúhu ndee ìní sá chíhí-dí ìní sá ní  
cadúha-yu-á<sup>n</sup>, sá ní natavá-yu dàtná  
cáá quiti ní quene xití làmár-á<sup>n</sup>,  
te duca<sup>n</sup> ní quide quiti-á<sup>n</sup> cuendá  
càhá<sup>n</sup> sá ní cadúha-yu-á<sup>n</sup>, te xíá<sup>n</sup>  
cada-xi cuú nchaa ñáyi ñá túú  
ní cuini chiñuhu ñaha xii-di. <sup>16</sup>Te

quiti ní quene xití ñuhu-á<sup>n</sup> quidé-dí sá ncháá ñáiyu ngúndeé ì<sup>n</sup> tnuní ndaha cùhá-yu àdi tneé-yu, te duca<sup>n</sup> nĩ quide-dí cuèi ñáiyu cùnuu te cuèi ñáiyu ñá túú cùnuu, te cuèi ñáiyu cuica te cuèi ñáiyu ndàhú, te cuèi ñáiyu ñá túú dàñá quee núú chíú<sup>n</sup> pàtróó<sup>n</sup>-xi, te cuèi nchaa ñáiyu dàñá queé nũú chíú<sup>n</sup> pàtróó<sup>n</sup>-xi ncháá-yu duca<sup>n</sup> nĩ ngúndeé tnuní ñíí-yu. <sup>17</sup>Te ní quide-dí sá ncháá ñáiyu ñá túú ndèé tnuní ñíí-xi vá cúú cuàá<sup>n</sup>-yu sá càchí iní-yu te ni vǎ cúú òcò-yu ì<sup>n</sup> sá cuìní-yu òcò-yu, te tnuní-á<sup>n</sup> cúú-xí òcò-yu quiti ní quene xití làmár-á<sup>n</sup> àdi númerú-dí. <sup>18</sup>Te xini ñuhu-xi sá ncháá ñáiyu ío váha cùtnuní iní-xi ío váha cuáha-yu cuèndá nàcuáa quèe-xi númerú quiti-á<sup>n</sup>, te númerú-á<sup>n</sup> cúú-xí ìñú cièndú únídico ìñú, te cùu-xi cuèndá ì<sup>n</sup> ñáiyu ñuyú.

**Cuèndá ì<sup>n</sup> cièndú údico  
cúmí mǐl ñáiyu**

**14** Te sátá dúcá<sup>n</sup> te ní xiní-í Yaá cáá dàtná cáá ì<sup>n</sup> mbéé quiti ní dánìcuèhé-güedé nùtní-gá ì<sup>n</sup> yucu ñuú nání Sìón ndécú àndíu, te nutnì-gá ndìhi ì<sup>n</sup> cièndú údico cúmí mǐl ñáiyu, te tneé-yu ndèé òcò-gá ndìhi òcò-tátá-gǎ Dútú Ndiòxí. <sup>2</sup>Te ní tecú dóho-í ní quide-xi andíu dàtná quidé-xí nũú xíca cuèhé víhí ndùte, te quide tucu-xi datná quidé-xí òré níhi vǐhi cahá<sup>n</sup> ñúhu, te quide tucu-xi datná quidé-xí òré cuèhé víhí ñáiyu càní-yu àrpá. <sup>3</sup>Te ní tecú dóho-í xixita yuhu sǎ xítá yùhu núú Yàá núcòo núú xilé váha, ndìhi núú ndí cùmí cue quiti xnutnì-á<sup>n</sup>, ndìhi núú nchàa cue tée cùu sacuéhé

xñucóo-á<sup>n</sup>, te xixita-xi ì<sup>n</sup> ndudú sáá. Te mee-ni cuè ñáiyu ì<sup>n</sup> cièndú údico cúmí mǐl-á<sup>n</sup> quèe díquí-yu ndudú-á<sup>n</sup>, te ñáiyu-á<sup>n</sup> cúú-yu ñáiyu ní dácácu nihnu ñaha Yàá cáá dàtná cáá ì<sup>n</sup> mbéé quiti ní dánìcuèhé-güedé núú ñáiyu ndècu ichi cuèhé ichi duha xñdecu ñuyú, te vá yòo ì<sup>n</sup>-gá quèe díquí-xi ndudú sáá-á<sup>n</sup> chi mee-ni ñáiyu ní cácu nihnu-á<sup>n</sup> quèe díquí-yu. <sup>4</sup>Te ñáiyu ní cácu nihnu-á<sup>n</sup> cúú-yu ñáiyu ñá túú ní xñdecu ichi díí ìní, te cùu-yu ñáiyu cándoo canine iní-xi, te ndèni ní cuu cuáhá<sup>n</sup> Yaá cáá dàtná cáá ì<sup>n</sup> mbéé quiti ní nìcuèhé-á<sup>n</sup>, te duca<sup>n</sup>-ni ndèndaha ñàhá-yu xii-gá cuáhá<sup>n</sup>, te ñáiyu-á<sup>n</sup> nĩ cácu nihnú-yu núú nchàa ñáiyu ñuyú, ñáiyu ndècu ichi cuèhé ichi duha, te ñáiyu ní cácu nihnu-á<sup>n</sup> cúú-yu ñáiyu díhna nuu nĩ nduu táhú Yǎ Ndiòxí cuu cuèndá-gá ndìhi Yaá cáá dàtná cáá ì<sup>n</sup> mbéé quiti ní dánìcuèhé-güedé. <sup>5</sup>Te cùu-yu ñáiyu ñá túú càhá<sup>n</sup> ni ì<sup>n</sup> tnúhu ndehnde, te cándoo canine iní-yu ndècu-yu núú núcòo Yǎ Ndiòxí táxí tnuní-gá.

**Cuèndá úní cue espíritú xínú  
cuèchi núú Yǎ Ndiòxí**

<sup>6</sup>Te sátá dúcá<sup>n</sup> te ní xiní-í ì<sup>n</sup> espíritú xínú cuèchi núú Yǎ Ndiòxí xícó-xí cuàdava andíu, te ndècu ndìhi-xi tnúhu sá càhá<sup>n</sup> nàcuáa naníhí tàhú-ó, tnúhu sá ñà túú tnàhí ndìhi nihnu te tnúhu-á<sup>n</sup> danèhé espíritú-a<sup>n</sup> nchaa ñáiyu ndècu ñuyú, ñáiyu nchaa nàcìó<sup>n</sup>, ndìhi ñáiyu nchaa ñuú, ndìhi nchaa ñáiyu càhá<sup>n</sup> ndí díí<sup>n</sup> ndí díí<sup>n</sup> nũú tnúhu, ndìhi ñáiyu xñdecu nchaa xichí. <sup>7</sup>Te níhi ní càhá<sup>n</sup>-xi te càchí-xi:



—Nchaa nchòhò ñáyiú ndècu ñuyíú canehe-ndo sá yíñùhu núú Yá Ndiòxí, te cachí-ndó sá ïo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gã chi ñu-gá ní cadúha-gá andiu, ndíhi ñuhu yèhí, ndíhi làmár, ndíhi nchaa ndóhyo — duha càhí espíritú-á<sup>n</sup>.

<sup>8</sup>Te nchìcú<sup>n</sup> tucu ingá espíritú xínú cuèchi núú Yá Ndiòxí, te càhí-xi:

—Vitna ní naa ñuú Babiloniá ñuú ío cùnuu, te duca<sup>n</sup> ñí naa chi cue ñáyiú ñuú-á<sup>n</sup> ñí quidé-yu ní xíta nihnu nchaa ñáyiú ñihí ñuyíú, chi ní sanu ichi ñàhá-yu ichi cuèhé ichi duha —duha càhí espíritú-á<sup>n</sup>.

<sup>9</sup>Te nchìcú<sup>n</sup> tucu ingá espíritú xínú cuèchi núú Yá Ndiòxí te níhi càhá<sup>n</sup>-xi, te càhí-xi:

—Nchaa ñáyiú chiñuhu ñaha xii quití ní quene xití làmár, ndíhi sá ñí natava ñàhá-yu nàcuáa càa-di-á<sup>n</sup>, ñáyiú ní dǎná mèe-xi ní ngúndéé tñuní ndahá-yu àdi tneé-yu, <sup>10</sup>ñáyiú-á<sup>n</sup> sùúní dándoho ñaha Yá Ndiòxí xií-yu chi ío cùdéé<sup>n</sup>-gã, te duca<sup>n</sup> ío dandòho ñaha-gá xií-yu chi daquhí<sup>n</sup> ñàhá-gã xií-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gã duca<sup>n</sup> dándoho ñaha-gá xií-yu, ndíhi núú Yáa cáá dàtná cáá ñí mbéé quití ní dǎncuèhé-güedé. <sup>11</sup>Te ñí caa ñí quíhí<sup>n</sup> quene ñúhmá núú dúcá<sup>n</sup> cùndecú-yu ndohó-yu-á<sup>n</sup>, te cuèi nduu cuèi níú duca<sup>n</sup> ndòhó-yu. Te duca<sup>n</sup> ndòho nchaa ñáyiú chiñuhu ñaha xii quití ní quene xití làmár, ndíhi sá ñí natava ñàhá-yu nàcuáa càa-di-á<sup>n</sup>, te ñu-ni ñáyiú-á<sup>n</sup> cúú-yu ñáyiú ní ngúndéé tñuní ndaha-xi àdi tneé-xi —duha càhí espíritú-á<sup>n</sup>.

<sup>12</sup>Te xǎ<sup>n</sup> xíní ñùhu-xi sá ncháá ñáyiú cùu cuená Yá Ndiòxí cunduu càhnu iní-yu, chi ñu-ni-yu cúú-yu ñáyiú tñèi nchaa tñùhu càhá<sup>n</sup>-gá, te ñí yùhu ñí iní-yu sàndáá iní-yu Xítóhó Jesucristú.

<sup>13</sup>Te sátá dúcá<sup>n</sup> te ní tecú dóho-í ní cáhá<sup>n</sup> ñí sá ñí cáhá<sup>n</sup> andiu, te càhí-xi:

—Chido tñuní-n ñí núú tütú nàcuáa na càhá<sup>n</sup>-í-a. “Není vitna ío váha táhú nchaa ñáyiú sàndáá iní tñùhu Xítóhó Jesucristú te xihí-yu” —duha càhí sá ñí cáhá<sup>n</sup>-á<sup>n</sup>.

Te Espíritú Yá Ndiòxí ní cáhá<sup>n</sup>-xi, te càhí-xi:

—Ndáá, chi ndetatú-yu chi ñá túú-gã nágá chiú<sup>n</sup> ndohó-yu cadá-yu, te Yá Ndiòxí sa nàha-gá nchaa nàcuáa ndùu chiú<sup>n</sup> ní quidé-yu —duha càhí Espíritú-gá.

#### Nchaa sá cúú núú ñùhú

<sup>14</sup>Te sátá dúcá<sup>n</sup> te dàtñuní ní xiní-í ñí vícò cuixí<sup>n</sup>, te núú vícò-ǎ<sup>n</sup> ñí xiní-í núcòo ñí Yáa, te càa-gá dàtná cáá ñí tée ñuyíú, te díquí-gã ñùhú ñí coroná ní cuáha mee-ni díhú<sup>n</sup> cuàá<sup>n</sup>, te nùndaha-gá ñí yuchí ndíquí te sùúní dǎé<sup>n</sup>. <sup>15</sup>Te ní xiní-í ñí espíritú xínú cuèchi núú Yá Ndiòxí ní quee-xi xití vehe-gá, te níhi ní cáhá<sup>n</sup>-xi xǎha<sup>n</sup>-xi xii Yáa núcòo núú vícò-ǎ<sup>n</sup>:

—Sa ní cuu nàquehndé-n nchàa sá ñí cuu ñuyíú ndíhi yuchí ndíquí-n, chi sa ní cuu nucóo tñaha-xi — duha càhí espíritú-á<sup>n</sup> xǎha<sup>n</sup>-xi xii Yáa<sup>n</sup>.

<sup>16</sup>Te Yáa núcòo núú vícò-ǎ<sup>n</sup> ní dáyaha ndodo-gá yuchí ndíquí-gã núú ñuyíú ñí nataxi tñaha-gá nchaa sá ñí cuu.

<sup>17</sup>Te ní xiní tucu-í ingá espíritú xínú cuèchi núú Yă Ndiöxí ní quee-xi xití vehe-gá sá cáá àndiu, te nùndaha-xi tnahá-xi ì<sup>n</sup> yuchí ndíquí dĕé<sup>n</sup>. <sup>18</sup>Te ní xiní tucu-í ní quee tucu ingá espíritú xínú cuèchi núú Yă Ndiöxí núú nùtnĭ núú sácödó sǎ ndúú tǎhú-gǎ, te ndĕcu ndĭhi-xi tnúhu ndee ìní táxí tnùnĭ-xi ñuhú, te espíritú-á<sup>n</sup> nĭhi ní cáhá<sup>n</sup>-xi xǎha<sup>n</sup>-xi xìi espíritú néhé yùchí ndíquí dĕé<sup>n</sup>-á<sup>n</sup>:

—Ngúíta naquehndé-n ndĭhi yuchí ndíquí-n ndĕhé yoho yàha stilé sá ìò ñuyú chi sa ní cuu nàtehndé — duha càchí espíritú-á<sup>n</sup> xǎha<sup>n</sup>-xi xìi espíritú néhé yùchí ndíquí-ǎ<sup>n</sup>.

<sup>19</sup>Te espíritú néhé yùchí ndíquí-ǎ<sup>n</sup> nĭ dáyǎha ndodo-xi yuchí ndíquí-xí nŭú ñuyú nĭ nàquehndé-xi nchaa ndĕhé yoho yàha stilé, te ní chihi-xi ì<sup>n</sup> xichi núú nĭ chihi-xi cuendá xíá<sup>n</sup> quihni-xi quee ndudí-xi, te sá dúcá<sup>n</sup> nĭ quide-xi xíá<sup>n</sup> cútnùnĭ ìní-ó sǎ ìo cùdĕé<sup>n</sup> Yă Ndiöxí núú ñáyiú ñuyú.

<sup>20</sup>Te ndĕhé yoho yàha stilé-á<sup>n</sup> nĭ quihni-xi ì<sup>n</sup> xio yuhu ñúú, te ndudí ndĕhé yoho yàha stilé-á<sup>n</sup> nĭ nduu-xi nĭñĭ te ní quee-xi núú quĭhnĭ ñihnu espíritú-á<sup>n</sup>. Te únĭ ciendú mĭl mĕtrú ní xica nĭñĭ-ǎ<sup>n</sup>, te dàtná ì<sup>n</sup> mĕtrú dava ní sáá cuehnu nĭñĭ-ǎ<sup>n</sup> nĭ xica-xi.

### Úsá tnúndòho

**15** Te ío vĭhi ní quide-xi ì<sup>n</sup> sá nĭ quide-xi andiu te ní cuñúhu vĭhi-í, te ní xiní-í úsá tñàhá espíritú xínú cuèchi núú Yă Ndiöxí, te ì<sup>n</sup> ì<sup>n</sup> cue espíritú-á<sup>n</sup> ndĕcú ndĭhi-xi tnúhu ndee ìní dandòho-xi ñáyiú ñuyú, te nà yàha nchaa tnúndòho-á<sup>n</sup>, te vǎ cùdĕé<sup>n</sup>-gǎ Yă

Ndiöxí núú-yu dāndoho ñaha-gá xii-yu.

<sup>2</sup>Te ní xiní-í ì<sup>n</sup> làmár te ndute làmár-á<sup>n</sup> cáá dàtná cáá vĭdriú, te dàcānuu-xi ndĭhi ñuhú, te yuhu làmár-á<sup>n</sup> xĭnutnĭ nchaa ñáyiú ní ndacu ní dáquĕé tĭhú ñáhá xìi quĭti ní quene xití làmár-á<sup>n</sup>, te duca<sup>n</sup> nĭ ndacú-yu ní dáquĕé tĭhŭ-yu sá nĭ natava ñáhá-yu nàcuáa càa-dĭ-á<sup>n</sup>, te duca<sup>n</sup> nĭ ndacu tucú-yu ní dáquĕé tĭhú tucú-yu númerú-dĭ sá cúú dàtná dĭu-dĭ, te nchaa ñáyiú-á<sup>n</sup> nĭ nduu tǎhŭ-yu núú Yă Ndiöxí àrpá xĭnehé-yu cuendá canĭ-yu. <sup>3</sup>Te xĭxitá-yu ndudú sá nĭ xita ndĭi Moisés ndĭi ní xinu cuechi nŭú Yă Ndiöxí ndĕé sanaha, te xita tucú-yu ndudú Yaá cáá dàtná cáá ì<sup>n</sup> mbéé quĭti ní dánĭcuĕhé-güedé, te càchĭ-yu:

Yòhó Dútú Ndiöxí ío càhnu cuu-n, chi quide-n nchaa sá vǎ yò tñàhĭ ndàcu cada, te cùu-n Yaá ndácú quide nchaandi túhú sá vǎha, te ío ndáá quidĕ-n te ío ndáá càhá<sup>n</sup>-n, te yàndaha-n nchaa ñáyiú ñihĭ ñuyú.

<sup>4</sup>Te nchaa ñáyiú nèhé-yu sá yĭñúhu núú-n, te nchaá-yu càchĭ-yu sá ìo càhnu cuu-n, chi ì<sup>n</sup> dĭi dĭi-ni yòhó cúú-n Yàá ío váha quide ndáá, te nchaa ñáyiú ñihĭ ñuyú natacá-yu chiñúhu ñáhá-yu xii-n, te duca<sup>n</sup> càdà-yu chi ndĕhé-yu nchaa sá vǎha quide-n.

Duha càchĭ ñáyiú-á<sup>n</sup> xĭxitá-yu.

<sup>5</sup>Te sá tá dúcá<sup>n</sup> te ní xiní-í ní nacaá<sup>n</sup> yuyĕhe vehe Yá Ndiöxí

andiu, te xití vehe-gá-á<sup>n</sup> ndécú sã ndèè tnúhu-gá. <sup>6</sup>Te xití vehe-gá-á<sup>n</sup> nĩ quee úsá tnàhá espíritú xínú cuèchi núú-gã, te ì<sup>n</sup> ì<sup>n</sup>-xi ndècu ndihi-xi tnúhu ndee ìní dandòho-xi ñáyiú, te xíxíhnu-xi mee-ni dóó vãha, te súuní vãha càndoo, te chàhnchí, te yìdúcú<sup>n</sup> nuu cínchú ní cuáha mee-ni díhú<sup>n</sup> cuàá<sup>n</sup> pèchú ndi úsá cue espíritú-á<sup>n</sup>. <sup>7</sup>Te ì<sup>n</sup> quiti cúmí xĩnutnĩ núú nútñĩ xilé vãha ní sãñaha-di ì<sup>n</sup> caa sá nàhá tícúú ní cuáha mee-ni díhú<sup>n</sup> cuàá<sup>n</sup> xii ì<sup>n</sup> ì<sup>n</sup> espíritú-á<sup>n</sup>, te xití nchaa tícúú-á<sup>n</sup> ñúhú ì<sup>n</sup> sá ñúhú te xíá<sup>n</sup> cútnùní sá Yã Ndiõxí dandòho-gá ñáyiú ñuyúú, te ñiu-gá cúú-gã Yaá ndécú nchaa nduu nchaa quíú. <sup>8</sup>Te xití vehe-gá-á<sup>n</sup> nĩ chítú ññhmá, te duca<sup>n</sup> ní quide-gá cuendá cutnùní ìní ñáyiú sá ìo càhnu cuu-gá táxí tnùní-gá, te vã yõ ì<sup>n</sup> cuu quíhu xití vehe-gá-á<sup>n</sup> ndèè ndihi ndi úsá tnúndòho cada ndi usá cue espíritú-á<sup>n</sup> ñuyúú.

#### Tnúndòho cada-xi ñuyúú

**16** Te sátá dúcá<sup>n</sup> te ní tecú dóho-í níhi ní cáhá<sup>n</sup> ì<sup>n</sup> sá nĩ cáhá<sup>n</sup> xití vehe Yã Ndiõxí, te xãha<sup>n</sup>-xi xii ndi usá cue espíritú-á<sup>n</sup>:  
—Chí cuàhá<sup>n</sup> coyo-ndo sã ñúhú xití nchaa tícúú néhé-ndó-ã<sup>n</sup> núú ñuyúú, chí sá ñúhú-ã<sup>n</sup> cúú-xí tnúndòho tendaha Yã Ndiõxí sá cúú-xí nchaa ñáyiú ñuyúú —duha càchí sá càhá<sup>n</sup>-á<sup>n</sup>.

<sup>2</sup>Te espíritú díhna ní sáhá<sup>n</sup>-xi ní coyo-xi sá ñúhú xití tícúú néhé-xí-ã<sup>n</sup> ñuyúú, te nchaa ñáyiú ñùhu tnuní quiti ní quene xití làmár ñáyiú ní chíñuhu sá nĩ natava ñàhá-yu xii-di, nchaa ñáyiú-á<sup>n</sup> nĩ quené-yu ndíhyi

tèhyú te súuní dándòho ñaha-xi xíí-yu.

<sup>3</sup>Te espíritú cúú ùú ní coyo-xi sá ñúhú xití tícúú néhé-xí núú làmár, te ndute làmár-á<sup>n</sup> nĩ nduu-xi níñí te càa-xi datná cáá níñí ñáyiú sa ní xíhí, te nchaa quiti ñùhu xití làmár-á<sup>n</sup> nĩ xíhí-güedi.

<sup>4</sup>Te espíritú cúú ùní ní coyo-xi sá ñúhú xití tícúú néhé-xí nchaa yúte ndihi nchaa núú quènihni ndute, te ndute nchaa yúte-á<sup>n</sup> ndihi nchaa ndute quènihni-á<sup>n</sup> nĩ nduu-xi níñí.

<sup>5</sup>Te sátá dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> espíritú xínú cuèchi núú Yã Ndiõxí, espíritú yíndàha ndute, te xãha<sup>n</sup>-xi xii Yã Ndiõxí:

—Yòhó Dútú Ndiõxí cúú-n Yàá quidé ndãá cuiti núu duha quide-n tendaha-n tnúndòho-a, te ñiu-ni-n cùu-n Yáá ndécú ndèè cútnàhá ní ngáva ñuyúú, te ñiu-ni-n cùu-n Yáá ndécú vitna te ñã túú tnàhí cuèchi-n. <sup>6</sup>Chí cue ñáyiú ñuyúú nĩ dácácã-yu níñí nchaa ñáyiú ní cáhá<sup>n</sup> tnúhu-n ndihi nchaa dava-gá ñáyiú cùu cuendá-n, te ní sahní-yu nchaa ñáyiú-á<sup>n</sup>, te vitna ní dátíú-n ndute ní nduu-xi níñí te duca<sup>n</sup>-ni càa ndute-á<sup>n</sup> xíhí-yu, te duca<sup>n</sup> tàú-xi ndohó-yu cuendá sá nĩ sahní-yu cue ñáyiú cùu cuendá-n —duha càchí espíritú-á<sup>n</sup> xãha<sup>n</sup>-xi xii-gá.

<sup>7</sup>Te ní tecú tucu dóho-í ní cáhá<sup>n</sup> ì<sup>n</sup> sá nĩ cáhá<sup>n</sup> núú nútñĩ núú sácödó sã ndúú tãhú Yã Ndiõxí, te xãha<sup>n</sup>-xi xii-gá:

—Ndáá sá yòhó Dútú Ndiõxí Yáá ndácú quide nchaandi túhú sá vãha dándòho-n ñáyiú nàcuáa tàú-xi cunduu —duha càchí sá càhá<sup>n</sup>-á<sup>n</sup> xãha<sup>n</sup>-xi xii-gá.

<sup>8</sup>Te espíritú cúú cùmí ní coyo-xi sá ñúhú xítí tícùú néhé-xí nǔú nchíanchii cuèndá nchíanchii-á<sup>n</sup> cahmi-xi nchaa ñáyiú ñuyíú. <sup>9</sup>Te nchaá-yu ní ndoho viðí-yu ní cáyú-yu, te cuéi duca<sup>n</sup> ñí ndohó-yu dico ñá túú ní cuíní-yu ndixi cuéchi iní-yu cuèndá nchaa sá ñà túú vǎha quidé-yu, te ni ñà túú ní càchí-yu sá ío càhnu cuu Yá Ndióxi chi da ní cáhá<sup>n</sup> úhú-yu cuèndá-gá, te ñíu-gá cúú-gǎ Yaá duca<sup>n</sup> ñí tendaha tnúndòho-á<sup>n</sup> sǎ cúú-xí-yu.

<sup>10</sup>Te espíritú cúú ùhú<sup>n</sup> ní coyo-xi sá ñúhú xítí tícùú néhé-xí nǔú ndécú quítí ní quene xítí lámár-á<sup>n</sup> táxí tnúní-dí, te nchaa núú táxí tnúní-dí ní cuu nee, te nchaa ñáyiú ñuyíú ndéé yàá-ná-yu nàcaxi nihnú-yu sá ndóhó-yu. <sup>11</sup>Dico ni ñúca<sup>n</sup> ñá túú ní cuíní-yu ñàñá-yu ni ñí<sup>n</sup> sá cuèhé sá dúhá quidé-yu, chi da ní cáhá<sup>n</sup> úhú-yu cuèndá Yá Ndióxi Yaá ndécú àndíu sá cuèndá sá dándòho ñaha ndíhyi tèhyú ndéé-yu-á<sup>n</sup> ndíhi nchaa dava-gá sá yǎha-yu.

<sup>12</sup>Te espíritú cúú ñúú ní coyo-xi sá ñúhú xítí tícùú néhé-xí xítí yúte càhnu nani Eúfratés, te ndute yúte-á<sup>n</sup> ñí yíchí cuèndá yǎha cue téé yíndaha ñáyiú xíndecu ndàa xio nacuáa quène nchíanchii.

<sup>13</sup>Te ní xiní-í ní quee ñí<sup>n</sup> espíritú cúndíhi yucu ñávǎha yuhu quítí déé<sup>n</sup> nání drágón, te ní xiní tucu-í ní quee tucu íngá espíritú cúndíhi yucu ñávǎha yuhu quítí ní quene xítí lámár, te ní xiní tucu-í ní quee tucu íngá espíritú cúndíhi yucu ñávǎha yuhu téé dándahú ñáyiú càchí sá càhá<sup>n</sup> tnúhu Yá Ndióxi te ñá ndàá, te ndí núní espíritú-á<sup>n</sup>

xíndáa-xi dàtná cáá làhvá. <sup>14</sup>Te ndí núní espíritú-á<sup>n</sup> quidé-xí sǎ vǎ yóo tnàhí ndàcu cada, te xica datacá-xi nchaa cue téé yíndaha ñaha xii ñáyiú xíndecu nihíi ñuyíú cuèndá nàá-güedé mei ndúu cachí Yá Ndióxi coo tnúndòho cahnu vihi-gá, te ñíu mee Yá Ndióxi cúú-gǎ Yaá ío càhnu cuu. <sup>15</sup>Te Yaá cúú Xítòhó-ó ñí cachí-gá: “Cunaha-ndo chi nduu ñà túú yíhi iní-ndó quixi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiú xíndecu túha, chi cùu-ndo datná cue ñáyiú xíndecu túha xixíhnu-ni dóó-xi cuèndá sá vǎ cúcàha<sup>n</sup> núú-yu dàtná cúcàha<sup>n</sup> núú cuè ñáyiú ñá túú nihnu dóó-xi, te duha càhá<sup>n</sup>-í cuèndá sá nchòhó cundecu túha-ndo òré quexio-í”, duha càchí-gá. <sup>16</sup>Te ndí núní cue espíritú cúndíhi yucu ñávǎha-á<sup>n</sup> ñí dátacá-xi nchaa cue téé yíndaha ñaha xii ñáyiú, te ní taxi ndecu ñaha-xi ñí<sup>n</sup> xichi núú nání Àrmagedón, duha nàni xíá<sup>n</sup> tnúhu hèbreú.

<sup>17</sup>Te espíritú cúú ùsá ní coyo-xi sá ñúhú xítí tícùú néhé-xí nǔú tàchí, te ní tecú dóho-í níhi ní cáhá<sup>n</sup> Yaá núcòo núú xilé váha xítí vehe-gá, te càchí-gá:

—Xéhé-ñǎ cúmání te xínu cava nchaa tnúndòho tnúhu ndàhú — duha càchí-gá.

<sup>18</sup>Te sáta dúcá<sup>n</sup> te ní sáá nduté te ní cáhá<sup>n</sup> ñúhu, te súuní ñúca<sup>n</sup> ní quide-xi, te níhi viðí ní tnáa ñuyíú, te ndéé cútnàhá ní ngúndecu ñáyiú ñuyíú te vátá íí<sup>n</sup> xító-gá níhi tnáa dàtná ní quide-xi. <sup>19</sup>Te ñúú cáhnú ío cùnuu nani Babiloniá ní quee dava-xi ní cuu-xi úní xichi, te nchaa

ñuú cáá ñihí ñuyú ní ngoyo nchaa vehe, chi Yá Ndiöxí ní ndacu iní-gá nchaa sá cuèhé sá dúhá quide nchaa ñáyi ñuú Babiloniá-á<sup>n</sup>, te duca<sup>n</sup> ní quide ñaha-gã xií-yu chi ío cùdéé<sup>n</sup>-gã núú-yu. <sup>20</sup>Te nchaa tindúú ní ndóñúhú-xí cuéi nchaa tindúú ñuhu yíhí ndécú xítí làmár. <sup>21</sup>Te ní xiní-í ní cuu<sup>n</sup> ñiñi ñàhnu vihi ní ngaundodo-xi cue ñáyi ñuyú, te nchaa ñiñi-á<sup>n</sup> vëe-xi dàtná údico kílú, te cue ñáyi ñuyú ní cáhá<sup>n</sup> úhú-yu cuendá Yá Ndiöxí sá dúcá<sup>n</sup> ní dácúú<sup>n</sup>-gã ñiñi ñàhnu vihi-á<sup>n</sup>, chi ní cuu-xi ñiñi ñàhnu cahnu vihi sá cúú-xí-yu.

#### Ñadìhí ndécú ichi díí iní

**17** Te núú úsá espíritú néhé tícùú-á<sup>n</sup>, te ñiñi-xi ní quixi-xi núú ndécú-í, te càchí-xi xii-í:

—Néhé ná quèh<sup>n</sup>-ó dànehé ñàhà-í xii-n nchàa tñúndòho sá ndóhó ñadìhí ñaha ndècu ichi díí iní, te ñaha-á<sup>n</sup> cùnù-a<sup>n</sup> nucóo-a<sup>n</sup> núú ñúhú vihi ndute. <sup>2</sup>Te ñaha-á<sup>n</sup> ndécú díí iní-a<sup>n</sup> ndihi nchaa cue téé yàndaha ñaha xii ñáyi xíndecu ñihí ñuyú, te nchaa dava-gá ñáyi ñuyú ío iní-yu nchìcú<sup>n</sup> nihnú-yu quidé-yu nchaa nàcuáa quide ñaha-á<sup>n</sup> —duha càchí espíritú-á<sup>n</sup>.

<sup>3</sup>Te òré duca<sup>n</sup> quide ñaha Espíritú Yá Ndiöxí xii-í nàcuáa càchí iní-xi, te ñiñi espíritú xínú cuèchi núú-gã ndécá ñaha-xi xii-í cuáhá<sup>n</sup> ñiñi xítí yucu, te xítí yucu-á<sup>n</sup> ní xiní-í ñiñi ñadìhí yódó-á<sup>n</sup> ñiñi quiti tícuèhé, te ndèé úsá díquí-dí te úxí ndíquí-dí, te ñihí-dí ndèé tñuní-dí mee-ni tñúhu sá càhá<sup>n</sup> úhú cuendá Yá Ndiöxí. <sup>4</sup>Te ñadìhí-á<sup>n</sup> ñihnú-á<sup>n</sup> dǒó muradú ndihi dóó

tícuèhé, te mee-ni sá ní cuáha díhú<sup>n</sup> cuáá<sup>n</sup>, ndihi yúú vaha sá nání pèrlá, ndihi nchaa dava-gá núú yúú vaha, mee-ni nchàa xíá<sup>n</sup> ní cuáha sá yíhí löho-a<sup>n</sup>, ndihi sá ñúhú dǔcú<sup>n</sup>-a<sup>n</sup>, ndihi sá ñúhú dǔcú<sup>n</sup> ndáhá-á<sup>n</sup>, te nùndaha-a<sup>n</sup> ñiñi tícùú ní cuáha mee-ni díhú<sup>n</sup> cuáá<sup>n</sup> te ñuhu mee-ni sá cuèhé sá dúhá, te xíá<sup>n</sup> cùtnùní iní-ó sá cúú-á<sup>n</sup> ñiñi ñadìhí ñaha ndècu ichi cuèhé ichi duha. <sup>5</sup>Te tneé-a<sup>n</sup> ndèé tñuní ñiñi tñúhu, te càchí-xi: “Ñuú Babiloniá ñuú ío cùnùu, cada iní-ndó sá cúú-xí mèi ñadìhí-a, te díu ñadìhí-a cùu-a<sup>n</sup> ñaha sanu ichi ñaha xii nchaa ñáyi ñadìhí ñáyi ndècu ichi díí iní, te nándi-gá nchaa sá cuèhé sá dúhá sànu ichi-a<sup>n</sup> nchaa ñáyi cadá-yu”, duha càhá<sup>n</sup> tñúhu ndèé tñuní tneé ñadìhí-á<sup>n</sup>. Te vá yǒ tècú tñuní ná cuendá duca<sup>n</sup> càhá<sup>n</sup> tñúhu-á<sup>n</sup>. <sup>6</sup>Te ní cutnùní iní-í sá díú ñàhà-á<sup>n</sup> ní dácáca-á<sup>n</sup> ñiñi ñáyi cùu cuendá Yá Ndiöxí ní sahani ñaha-a<sup>n</sup> xii-yu, te ñáyi ní xíhí-á<sup>n</sup> cúú-yu ñáyi ní cáhá<sup>n</sup> vaha cuendá Xítóhó Jesucristú, te sá dúcá<sup>n</sup> ní quide-a<sup>n</sup> te ní nduu-a<sup>n</sup> dàtná ñiñi ñáyi quihu. Te ío ní cuñúhu-í sá dúcá<sup>n</sup> ní cuu ní xiní-í. <sup>7</sup>Te sáta dúcá<sup>n</sup> te espíritú xínú cuèchi núú Yá Ndiöxí-á<sup>n</sup> càchí tucu-xi xii-í:

—Vá ndèé dúcá<sup>n</sup> cùñúhu-n, chi vitna na càchí tñúhu-í xii-n nàcuáa quèe-xi cuendá quiti ndèé úsá díquí-xi ndihi úxí ndíquí-xi-á<sup>n</sup>, ndihi nàcuáa quèe-xi cuendá ñadìhí ñaha yòdo ñaha xii-dí-á<sup>n</sup>. <sup>8</sup>Te quiti ní xiní-n-á<sup>n</sup> cúú-dí ñiñi quiti sa ní xíndecu te vitna ñá túú-gã-dí ndècu, te sáá nduu te quene-dí yaú cùnú víhí sá ño nèhé cáá, te dàtnùní sáá

nduu te quíhí<sup>n</sup>-di núú ùhú núú ndàhú ni caa ni quíhí<sup>n</sup>, te cue ñáyiú xíndecu ñuyíú cuñúhu víhí-yu quítí-á<sup>n</sup> chí cùu-di ìí<sup>n</sup> quítí sa ní xíndecu ni cùu te sáá nduu cùndecu tucu-di, te ñáyiú duca<sup>n</sup> cùñúhu ñaha xii-di-á<sup>n</sup> ñà túú yòdo tñuní-yu núú tútú núú yódó tñuní cue ñáyiú naníhí tàhú, chí ndéé cùtnàhá vátá ngáva-gá ñuyíú duca<sup>n</sup> sa yòdo tñuní cue ñáyiú naníhí tàhú.

<sup>9</sup>Te nchaa ñáyiú tècú tñuní xini ñuhu-xi cani váha iní-yu cuèndá tñuhu-a. Te ndí ùsá díquí quítí-á<sup>n</sup> cada iní-ó sǎ cúú-xí ùsá tǐndúú nǔú núcõ ñadìhí-á<sup>n</sup>. <sup>10</sup>Te ndí ùsá díquí quítí-á<sup>n</sup> cada iní-ó sǎ cúú-xí ùsá tñàhá cue téé yìndaha ñaha xii ñáyiú, te úhú<sup>n</sup> cue téé-á<sup>n</sup> ñà túú-gǎ cùnùu-güedé vitna, te ìí<sup>n</sup> téé-á<sup>n</sup> cùnùu-dé vitna te ìngá-dé vátá sàá-gá nduu cùnuu-dé, te na sàá nduu dùca<sup>n</sup> cunuu-dé te sacú-ni nduu cunuu-dé. <sup>11</sup>Te quítí ní xíndecu ni cùu te ñá túú-gǎ-di ndècu vitna, cùu-di datná téé cùu uná yíndàha ñaha xii ñáyiú, te ìí<sup>n</sup>-ni cùu-di ndìhi cue téé úsá yíndàha ñáyiú-á<sup>n</sup>, te quítí-á<sup>n</sup> sǎá nduu cuíta nihnu-di quíhí<sup>n</sup>-di núú ùhú núú ndàhú ni caa ni quíhí<sup>n</sup>.

<sup>12</sup>Te ndí ùxí ndíquí quítí-á<sup>n</sup> cada iní-n sǎ cúú-xí ùxí tñàhá cue téé quíndaha ñaha xii ñáyiú, dico vátá sàá-gá nduu cùnuu-güedé quíndaha ñaha-güedé xii-yu. Te cue téé-á<sup>n</sup> nǐhí-güedé tñúhu ndee ìní taxi tñuní-güedé ndìhi quítí-á<sup>n</sup>, dico tnaa-ni taxi tñuní-güedé ndìhi quítí-á<sup>n</sup>. <sup>13</sup>Te ndí ùxí cue téé-á<sup>n</sup> cuu ìí<sup>n</sup>nuu-güedé taxi tñuní-güedé, te chindee-güedé quítí-á<sup>n</sup> cuèndá cuu ìí<sup>n</sup>nuu-güedé ndìhi-di cuèndá

taxi tñuní-gá-di. <sup>14</sup>Te cue téé-á<sup>n</sup> nàá-güedé ndìhi Yaá cáá dàtná cáá ìí<sup>n</sup> mbéé quítí ní dánícüèhé-güedé dico vá ndácú-güedé nàá-güedé ndìhi-gá chí cuíta-güedé. Te diu-gá cúú-gǎ Yaá ío cùnuu taxi tñuní cuéi nchaa téé yìndaha ñaha xii ñáyiú, te duca<sup>n</sup>-ni tàxi tñuní-gá cuéi nchaa dava-gá-yu. Te mee Yǎ Ndiòxí ní cachí-gá nándí cùu nchaa ñáyiú cundecu ndìhi Yaá cáá dàtná cáá ìí<sup>n</sup> mbéé quítí ní dánícüèhé-güedé-á<sup>n</sup>, te diu-ni ñáyiú-á<sup>n</sup> cúú-yu ñáyiú ní cáhá<sup>n</sup>-gá te cúú-yu ñáyiú quíde ndáá ndécú ìchi-gá —duha càchí espíritú xínú cuèchi núú-gǎ.

<sup>15</sup>Te ní cachí tucu espíritú-á<sup>n</sup> xii-í: —Ndute ñuhu núú núcõ ñadìhí ñaha ndècu ichi díí ìní-á<sup>n</sup>, ndute-á<sup>n</sup> cada iní-n sǎ cúú-xí ñáyiú nchaa nàció<sup>n</sup>, ndìhi ñáyiú nchaa ñuú, ndìhi ñáyiú xíndecu nchaa xichi, ndìhi ñáyiú càhá<sup>n</sup> ndí díí<sup>n</sup> ndí díí<sup>n</sup> nǔú tñúhu. <sup>16</sup>Te dàtná ní cachí-í sá ndí uxí ndíquí quítí ní xiní-n-ǎ<sup>n</sup> cúú-xí ùxí tñàhá cue téé quíndaha ñaha xii ñáyiú, te cue téé-á<sup>n</sup> cuu úhú iní-güedé ñadìhí ñaha ndècu ichi díí ìní-á<sup>n</sup>, te ni vǎ cadá cuèndá ñàhá-gǎ-güedé xii-a<sup>n</sup>, te ndada ndàhú ñàhá-güedé, te dacàchi ñaha-güedé xii-a<sup>n</sup>, te cahmi ñaha-güedé. <sup>17</sup>Te mee Yǎ Ndiòxí duca<sup>n</sup> dàcahá<sup>n</sup>-gá iní cue téé-á<sup>n</sup> cuèndá cada-güedé nàcuáa cuíní méé-gǎ, te xíá<sup>n</sup> nǔú cuu ìí<sup>n</sup>nuu-güedé cuèndá cúñaha-güedé xii quítí-á<sup>n</sup> cada-di núú-güedé taxi tñuní-di, te duca<sup>n</sup>-ni càda-di núú-güedé taxi tñuní-di ndéé ná sàá nduu càda Yǎ Ndiòxí nàcuáa ní cachí-gá. <sup>18</sup>Te ñadìhí ñaha ní xiní-n-ǎ<sup>n</sup> cada iní-n sǎ cúú-á<sup>n</sup> ñuú

cáhnú ñúú ío cùnuu, te ñúú-á<sup>n</sup> ndécú tée ío-gá cùnùu taxi tnuní nchaa cue tée yìndaha ñaha xii ñáyiú xĩndecu ñuyúú —duha ní cachí espíritú xínú cuèchi núú Yă Ndiõxí xii-í.

### Ní naa ñúú Babiloniá

**18** Te duca<sup>n</sup> te dàtnùní ní xiní tucu-í ingá espíritú xínú cuèchi núú Yă Ndiõxí, te ndéé andiu nì dátăsa<sup>n</sup>-xi te ní dáyèhé-xi ñuyúú, te espíritú-á<sup>n</sup> ío cùnùu-xi. <sup>2</sup>Te níhí ní cáhá<sup>n</sup>-xi, te càchí-xi: —Ní sáá nduu nàa ñúú cáhnú ñúú cùnùu nani Babiloniá, te xíá<sup>n</sup>-nă nataká nchaa núú espíritú cùndìhi yucu ñávăha cundecu-xi, te vâ quée-gă-xi xíá<sup>n</sup>, te diu-ni xíá<sup>n</sup> nataká nchaa quiti ndăva núú tàchí nchaa quiti ndehe quide, quiti ñá túú tnahá iní ñáyiú te xíá<sup>n</sup>-nă cundecu-güedí. <sup>3</sup>Te duca<sup>n</sup> chi ñáyiú ñúú-á<sup>n</sup> sánú ìchí-yu nchaa ñáyiú nihí ñuyúú ichi cuèhé ichi duha, te duca<sup>n</sup>-ni xĩnchícú<sup>n</sup> nihnu nchaa ñáyiú ñuyúú xĩquidé-yu, te nchaa cue tée cùnùu yìndaha ñaha xii ñáyiú, cue tée-á<sup>n</sup> cúú ì<sup>n</sup>nuu-güedé ndìhi nchaa ñáyiú ñúú-á<sup>n</sup> quidé-güedé ndìhí-yu nándí sá cuèhé sá dúhá. Te nchaa ñáyiú dícó nándí sá dícó quèhe<sup>n</sup> ñáyiú ñúú-á<sup>n</sup> ío cùu cuicá-yu, te duca<sup>n</sup> quèhe<sup>n</sup> nchaa ñáyiú ñúú Babiloniá-á<sup>n</sup> nchaa sá dícó ñáyiú-á<sup>n</sup> cuendá xíá<sup>n</sup> cănehé-yu ndécú-yu ichi cuèhé ichi duha —duha càchí espíritú-á<sup>n</sup>.

<sup>4</sup>Te sátá dúcá<sup>n</sup> te ní tecú dóho-í ní cáhá<sup>n</sup> ì<sup>n</sup> sá nĩ cáhá<sup>n</sup> andiu, te càchí-xi:

—Nchaa nchòhó ñáyiú cùu cuendá-í quee-ndo ñúú Babiloniá

cuendá sá vâ cùndecu-ndo tnahá-ndó ìchi cuehé ichi duha dàtná ndécú ñáyiú ñúú-á<sup>n</sup>, te duca<sup>n</sup> te vâ quini-ndó tnùndòho tnúhu ndàhú sá quixí cùu xii ñáyiú-á<sup>n</sup>. <sup>5</sup>Chi ío cuèhé cuèchi-yu ní cuu ndècu núú Yă Ndiõxí, te mee-gă náhá-gă năcuáa ndùu nchaa sá quidě-yu. <sup>6</sup>Te nchòhó ñáyiú cùu cuendá-í, chí nánchòcáva dandòho-ndo ñáyiú-á<sup>n</sup> dàtná quidé mèe-yu dândohó-yu cue ñáyiú, te úú xito nanchòcáva-ndo dândoho-ndó-yu, te duca<sup>n</sup> càda-ndo cuendá ío-gá ndohó-yu. <sup>7</sup>Te ío quide cahnú-yu mèe-yu, te ío cùdíf iní-yu quidé-yu nchaa núú să cuèhé sá dúhá, te sá dúcá<sup>n</sup> xidó-yu quidé-yu nchaa sá cuèhé sá dúhá nũu xíá<sup>n</sup> nchòhó ío dandòho-ndó-yu, te duca<sup>n</sup> chi ñáyiú ñúú-á<sup>n</sup> sání iní-yu, te càchí-yu: “Nchúhú cúú-ndĩ dàtná ì<sup>n</sup> ñadìhí ñá túú quée, ñaha ío cùnùu yìndaha ñaha xii ñáyiú. Te duca<sup>n</sup> sàtnahá-xi cùu-ndĩ chi nchaa-ni nduu ío váha cùu iní-ndĩ ndécú-ndĩ, te ni vâ sáá ì<sup>n</sup> nduu te ndíhú iní-ndĩ”, duha càchí ñáyiú ñúú-á<sup>n</sup>. <sup>8</sup>Te sá cuendá nchaa sá quidě-yu-á<sup>n</sup> nũu xíá<sup>n</sup> ì<sup>n</sup>-ni ndùu sáá tnùndòho sá cúú-xí-yu, te ío ndohó-yu chi ñúú-yu coo tnamá, te coo cuèhé cahni ñaha-xi xii-yu, te ío ndìhú iní-yu, te cáyú ñúú-yu, te duca<sup>n</sup> ndòhó-yu chi Dútú Ndiõxí ío cùnùu-gá, te diu-gá duca<sup>n</sup> dândoho ñaha-gá xii-yu —duha càchí sá nĩ cáhá<sup>n</sup> àndiu-á<sup>n</sup>.

<sup>9</sup>Te nchaa cue tée cùnùu yìndaha ñaha xii ñáyiú ío ndáhyú-güedé sá ndìhú iní-güedé òré nă quini-güedé quene ñúhmá cáyú ñúú cue ñáyiú Babiloniá, chi diu

cue tée-á<sup>n</sup> cúú-güedě cue tée cùu  
 ii<sup>n</sup>nuu ndihí-yu quide-güedé nchaa  
 núú sá cuèhé sá dúhá ndihí-yu,  
 te duca<sup>n</sup> chi ío tnàhá iní-güedé  
 cundecu-güedé ndihí-yu ichi  
 díí iní. <sup>10</sup>Te cue tée-á<sup>n</sup> xica-nă  
 cundecu-güedé cundehe-güedě  
 năcuáa ndoho nchaa năyiu nūú-á<sup>n</sup>  
 sá yùhú-güedé nchaa tnúndòho-á<sup>n</sup>,  
 te cachí-güedé:

—iNdàhú nchòhò năyiu nūú  
 cahnú nūú cúnùu nani Babiloniá!  
 Chi uu<sup>n</sup>ni ní sáá nchaa tnúndòho  
 tnúhu ndàhú sá cúú-xí-ndó —duha  
 cachí-güedé.

<sup>11</sup>Te nchaa năyiu dîco nchaa  
 sá nândîhi năyiu nūú Babiloniá  
 tnàhá-yu ío ndáhyú-yu sá ndîhú  
 iní-yu chi vá yôo-gá cuaa<sup>n</sup> nchaa  
 sá dîcô-yu. <sup>12</sup>Te dîcô-yu nchaa sá  
 nî cuáha mee-ni dîhú<sup>n</sup> cuàá<sup>n</sup>, ndîhi  
 nchaa sá nî cuáha mee-ni dîhú<sup>n</sup>  
 cuixí<sup>n</sup>, te dîco tucú-yu sá nî cuáha  
 mee-ni yúú vâha yúú nání pěrłá,  
 ndîhi nchaa dava-gá sá nî cuáha  
 dava-gá yúú vâha, te dîcô-yu tnàhá  
 dóo sèdá, ndîhi ingá núú dőó vâha  
 sá nání lînú, ndîhi dóo murádú,  
 ndîhi dóo tícuèhé te mee-ni dőó  
 vâha cùu-xi, te dîco tucú-yu tnàhá  
 yutnu sá sàhá<sup>n</sup> tnámí, te dîco  
 tucú-yu sá nî cuáha sá nání màrřl,  
 te dîco tucú-yu sá nî cuáha mee-ni  
 yutnu vâha sá ío ndèyáhu, te dîco  
 tucú-yu sá nî cuáha mee-ni càa,  
 ndîhi sá nî cuáha mee-ni sá nání  
 bròncé, ndîhi sá nî cuáha mee-ni  
 yúú vâha yúú nání màrmól. <sup>13</sup>Te  
 dîco tucú-yu canèlá, ndîhi yúú sá  
 sàhá<sup>n</sup> tnámí, ndîhi dúsa sá sàhá<sup>n</sup>  
 tnámí, ndîhi yúú sá nání mîrrá, te  
 dîco tucú-yu ingá núú dúsa sá sàhá<sup>n</sup>  
 tnámí nàni olivánú, te dîco tucú-yu

ndudí ndéhé yoho yàha stilé, ndîhi  
 acítí yutnu nàni olívú, ndîhi yuchi  
 triú vâha, te dîco tucú-yu nchaa  
 dava-gá núú triú, te dîcô-yu tnàhá  
 mběé, ndîhi cuàýú, ndîhi nchaa  
 dava-gá quití tatá, te dîco tucú-yu  
 tnàhá carrètá, te dîco tucú-yu  
 tnàhá năyiu xînu cuechi, năyiu  
 nă túú tnàhí dàná quee núú chíú<sup>n</sup>  
 pàtróó<sup>n</sup>-xi. <sup>14</sup>Te nchaa năyiu dîco-á<sup>n</sup>  
 cūñàhá-yu xii năyiu nūú Babiloniá:  
 —iNchaa sá ío cùdíí iní-ndó  
 cundecu ndîhi-ndo ni cuu vá  
 ndácú-gă-ndó nîhí-ndó vitna, te  
 nchaa sá sání iní-ndó sá ío vâha  
 càa ndecu ndîhi-ndo ndîhi nchaa  
 dava-gá sá ndécú ndîhi-ndo ní ndîhi  
 nihnu-xi vitna, te ni ì<sup>n</sup> nduu-gá  
 vá nihí-ndó nî ì<sup>n</sup> xíá<sup>n</sup> cundecu  
 ndîhi-ndo! —duha cúñaha năyiu-á<sup>n</sup>  
 xí-yu.

<sup>15</sup>Te nchaa năyiu ní cuu cuica ní  
 xóo dîco nândî nchaa sá nî xóo dîco  
 nî quehe<sup>n</sup> cue năyiu nūú Babiloniá,  
 nchaa năyiu-á<sup>n</sup> xica-nă cundecú-yu  
 cundèhé-yu sá yùhú-yu cuendá  
 nchaa tnúndòho sá yâha cue năyiu  
 nūú-á<sup>n</sup>, te ío ndáhyú-yu sá ndîhú  
 iní-yu sá dúcá<sup>n</sup> ndòho năyiu-á<sup>n</sup>. <sup>16</sup>Te  
 cúñaha tucú-yu:

—iNdàhú nchòhò năyiu xîndecu  
 nūú cahnú nūú nání Babiloniá! Chi  
 nchòhò cúú-ndó dàtná ì<sup>n</sup> nădîhí  
 ñaha nihnu dóo vâha dóo murádú,  
 ndîhi dóo tícuèhé, te mee-ni sá nî  
 cuáha díhú<sup>n</sup> cuàá<sup>n</sup>, ndîhi mee-ni sá  
 nî cuáha yúú vâha yúú nání pěrłá,  
 ndîhi sá nî cuáha dava-gá yúú vâha  
 sá ío vii ndăa mee-ni nchaa xíá<sup>n</sup>  
 ní cuáha sá yíhí lõho-a<sup>n</sup>, ndîhi sá  
 nūhú dúcú<sup>n</sup>-a<sup>n</sup>, ndîhi sá nūhú dúcú<sup>n</sup>  
 ndáhá-á<sup>n</sup>. <sup>17</sup>iTe uu<sup>n</sup>ni ní ndîhi nihnu  
 nchaandi túhú sá ndécú ndîhi



ñadihí-á<sup>n</sup>, te duca<sup>n</sup> sãtnahá-xi cùu nchohó ní cùu! —duha cùñàhá-yu xii cue ñáyiú ñuú Babiloniá.

Te nchaa cue tée dàcaca barcú ndihí nchaa cue tée tàxi tnuní bàrcú-á<sup>n</sup>, ndihí nchaa ñáyiú ñuhu xití bàrcú-á<sup>n</sup>, ndihí nchaa dava-gá cue tée nándí chùu<sup>n</sup> quide ndecu lamár, nchaa ñáyiú-á<sup>n</sup> xica cùndecú-yu <sup>18</sup>te quini-yu òré quene ñúhmá cáyú ñuú cue ñáyiú Babiloniá, te níhi cáhá<sup>n</sup>-yu, te cachí-yu:

—Ni ì<sup>n</sup> ñuú ñá túú nũtnahá-xi ñuú Babiloniá —duha cáhá<sup>n</sup>-yu.

<sup>19</sup>Te nchaa ñáyiú-á<sup>n</sup> chidó-yu ñuhu díquí-yu, te nguíta-yu ndáhí-yu sá ndìhú iní-yu, te níhi cáhá<sup>n</sup>-yu, te cachí tucú-yu:

—iNdàhú nchòhó ñáyiú xĩndecu ñuú cáhnú ñuú nání Babiloniá! Chi ío cuica-ndo ni cùu, te ñu-ndo ní quide ní cuu cuica nchaa ñáyiú ndècu ndihí barcú, te vitna uu<sup>n</sup> ni ní naa-ndo ndìhi ñuú-ndó —duha cachí-yu.

<sup>20</sup>Te nchaa nchòhó ñáyiú ndècu andiu ío chí cúdĩ iní sá dúcá<sup>n</sup> dandoho Yá Ndiòxí nchaa ñáyiú ñuú Babiloniá-á<sup>n</sup>, te ñu-ni duca<sup>n</sup> chĩ cúdĩ iní nchaa nchòhó cue tée ní cachí Xítóhó Jesucristú cáhá<sup>n</sup> tnúhu-gá, te ñu-ni duca<sup>n</sup> chĩ cúdĩ iní nchaa nchòhó cue tée càhá<sup>n</sup> tnúhu Yá Ndiòxí nàcuáa dàcahu iní ñáhá-gã xii-ndo, te ñu-ni duca<sup>n</sup> chĩ cúdĩ iní nchaa dava-gá nchòhó ñáyiú cùu cuendá-gá cuendá sá dúcá<sup>n</sup> dandoho-gá nchaa ñáyiú ñuú-á<sup>n</sup>. Te duca<sup>n</sup> càda ñaha-gá xii cue ñáyiú-á<sup>n</sup> cuendá nchaa sá quidé ñàhá-yu xii-ndo.

<sup>21</sup>Te sátá dúcá<sup>n</sup> te ní xini-í ì<sup>n</sup> espíritú xínú cuèchi núú Yá Ndiòxí,

te espíritú-á<sup>n</sup> ío ndee-xi te ní quehe<sup>n</sup>-xi ì<sup>n</sup> yúú cáhnú dàtná càhnu yódó te ní dáquèe-xi xití ndute làmár, te càchí-xi:

—Dàtná ní quide-í ní dáquèe-í yúú xití ndute duca<sup>n</sup> càda-xi ñuú cáhnú ñuú Babiloniá, chi ñáyiú ñuú-á<sup>n</sup> ío ndìhi naá-yu ndìhi ñuú-yu, te vá ì<sup>n</sup> ndùu ì<sup>n</sup> quíú-gã quini ñáhá ñáyiú xii-yu. <sup>22</sup>Te ni ì<sup>n</sup>-gá ñáyiú càni arpá, te ni ì<sup>n</sup>-gá ñáyiú tũú vĩlu, te ni ì<sup>n</sup>-gá ñáyiú tũú cútú, te ni ì<sup>n</sup>-gá yaá vá cóo ñuú-á<sup>n</sup>, te ni ì<sup>n</sup>-gá cue ñáyiú xini cada ì<sup>n</sup> núú chùu<sup>n</sup> vá cóo-gã, te ni vã yòo-gã canehe chùu<sup>n</sup> yúú cúú yódó mulinú. <sup>23</sup>Te ni ì<sup>n</sup>-gá ñuhú vá cùndècu ñuú-á<sup>n</sup>, te ni ì<sup>n</sup> nduu-gá vá cóo vico tnándaha, te ñáyiú ñuú-á<sup>n</sup> ñáyiú quide ndáhú cúú-yu ñáyiú ío-gá cuicá-yu dàcúxí ñáyiú quide ndáhú xĩndecu ñihí ñuyúú, dico nchaá-yu naá-yu chi quide nduú-yu te ío dandahú-yu cue ñáyiú ñuyúú sã dúcá<sup>n</sup> quidé-yu.

<sup>24</sup>Te ñu-ni ñuú-á<sup>n</sup> ní dàcãcã-yu níhi cue tée ní cáhá<sup>n</sup> tnúhu Yá Ndiòxí, te ñu-ni duca<sup>n</sup> ní quidé-yu nchaa dava-gá cue ñáyiú cùu cuendá-gá, te ñu-ni-yu quide xísahni tnàha ñáyiú ñuyúú —duha càchí espíritú-á<sup>n</sup>.

**19** Te sátá dúcá<sup>n</sup> te ní tecú dóho-í níhi ní cáhá<sup>n</sup> cuèhé víhi ñáyiú andiu, te càchí-yu:

Ío càhnu cuu Yá Ndiòxí!, chi ñu-gá cúú-gã Yaá ní dàcãcu nihnu ñaha xii-o núú ùhú núú ndàhú, te ío cùnuu-gá, te mee-ni sã vãha quide-gá,

<sup>2</sup>te mee-gã ío váha ndáá quidé-gã quidé ndáá-gá cuèchi nchaa ñáyiú,

chi ñu-gá ní dáquihí<sup>n</sup>-gá ñadìhí ñaha ndècu ichi díí iní núú ùhú núú ndàhú,

chi diu-a<sup>n</sup> ní sanu ichi-a<sup>n</sup> ñáyi  
 ñuyú ichi cuèhé ichi duha,  
 te duca<sup>n</sup> ñí dáquihí<sup>n</sup> ñáhá-gǎ  
 xii-a<sup>n</sup> núú ùhú núú ndàhú chi  
 nàchinaa-gá sá ñí sahani-a<sup>n</sup>  
 cue ñáyi ní xinu cuechi  
 núú-gǎ.

Duha càchí-yu.

<sup>3</sup>Te càchí tucú-yu:

—Ío càhnu cuu Yá Ndiöxí, chi  
 nchaa nduu nchaa quúú duca<sup>n</sup>-ni  
 quène ñúhmá núú ñúhú ñàha-á<sup>n</sup>  
 càyú-a<sup>n</sup> —duha càchí-yu.

<sup>4</sup>Te ndi òcò cùmí cue téé cùu  
 sacuéhé xĩndecu-á<sup>n</sup> ñí ngüñí  
 xítí-güedé núú Yá Ndiöxí núú  
 núcòo-gá táxí tnùní-gá, te tnàhá  
 cue quití cùmí xĩnutñí-á<sup>n</sup> ñí ngüñí  
 xítí-güedé núú-gǎ, te cue téé-á<sup>n</sup>  
 càchí-güedé ndihí cue quití-á<sup>n</sup>:

—Sá ndáá sá ño càhnu cuu Yá  
 Ndiöxí —duha càchí-güedé ndihí  
 cue quití-á<sup>n</sup>.

<sup>5</sup>Te sátá dúcá<sup>n</sup> te ní tecú dóho-í ní  
 cáhá<sup>n</sup> ñí sá ñí cáhá<sup>n</sup> mei núú nútní  
 xilé váha núcóo Yá Ndiöxí, te càchí  
 sá cáhá<sup>n</sup>-á<sup>n</sup>:

Nchaa nchòhó ñáyi xĩnu cuechi  
 núú Yá Ndiöxí, diu-ni nchòhó  
 ñáyi nèhe sá yĩñuhu núú-gǎ,  
 càhá<sup>n</sup>-ndó sǎ ño càhnu cuu-gá  
 cuèí cùnuu-ndo àdi ñá túú  
 cùnuu-ndo.

Duha càchí sá cáhá<sup>n</sup>-á<sup>n</sup>.

**Íñ vico cùu datná vico tnàndaha**

<sup>6</sup>Te sátá dúcá<sup>n</sup> te ní tecú dóho-í  
 ní cáhá<sup>n</sup> cuèhé víhí ñáyi andiu, te  
 òré duca<sup>n</sup> ñí cáhá<sup>n</sup>-yu te ní quide-xi  
 dàtná quídé-xí núú xícá cuèhé víhí  
 ndùte, te ní quide tucu-xi dàtná  
 quídé-xí òré càhá<sup>n</sup> níhi víhi ñúhu,  
 te càchí-yu:

Ío càhnu cuu Dútú Ndiöxí Yaá  
 cúú Tátá-ó! Te ío cùnuu-gá  
 táxí tnùní-gá, te quide-gá  
 nchaandi túhú sá vǎha.

<sup>7</sup>Te ío chí ná cùdífí ñí-ó, te chí  
 ná càchí-ó sǎ ño càhnu cuu Yá  
 Ndiöxí,

chi vitna ní sáá nduu càda Yaá  
 cáá dàtná cáá ñí mbéé quití  
 ní dánicuèhé-güedé ñí vico,  
 te cùu-xi datná vico tnàndaha.

Te nchaa ñáyi cùu cuendá-gá  
 sa ní ndihí-yu sa ndècu  
 túha-yu cundecú-yu vico-á<sup>n</sup>,  
 te cada ñí-ó sǎ ñáyi-á<sup>n</sup>  
 cúú-yu dàtná ñí ñadihí xíchí  
 tnàndaha ndihí-gá,

<sup>8</sup>te ñáyi-á<sup>n</sup> ñí nduu táhú-yu  
 cuihnú-yu dóó vǎha dóó  
 chàhnchí sá ño vǎha càndoo.

Duha càchí-yu.

Te sá dúcá<sup>n</sup> ñí nduu táhú ñáyi  
 cùu cuendá Yá Ndiöxí dóó vǎha  
 ñihnú-yu, xǎ<sup>n</sup> cùtnùní ñí-ó sǎ  
 cúú-yu ñáyi quide ndáá núú-gǎ.

<sup>9</sup>Te ñí espíritú xínú cuèchi núú  
 Yá Ndiöxí ní cachí tnúhu-xi xii-í, te  
 càchí-xi:

—Chido tnùní-n ñí núú tütú  
 nàcuáa na càhá<sup>n</sup>-í-a: “Váha táhú  
 nchaa ñáyi ní cáhá<sup>n</sup> ñáhá Yàá  
 cáá dàtná cáá ñí mbéé quití ní  
 dánicuèhé-güedé cundecú-yu  
 vico, te vico-á<sup>n</sup> cúú-xí dàtná vico  
 tnàndaha cada-gá”, te duha chido  
 tnùní-n chi tnúhu-a cùu-xi tnúhu  
 ndáá tnúhu Yá Ndiöxí —duha càchí  
 espíritú-á<sup>n</sup>.

<sup>10</sup>Te ní ngüñí xítí-í núú espíritú-á<sup>n</sup>  
 cuendá chiñuhu-í-xi ni cùu, te ní  
 cachí-xi:

—Vá dúcá<sup>n</sup> càda-n, chi tnàhá-í  
 dícó xínú cuèchi-í núú Yá Ndiöxí

dàtná quidé-n xínu cuechi-n núú-gǎ ndihi nchaa dava-gǎ ñáyiú ndècu ndihi-n ichi-gǎ, ñáyiú nchìcú<sup>n</sup> nihnu quide ni yuhu ni iní nchaa nàcuáa càhá<sup>n</sup> Xítóhó Jesucristú, te núú xíǎ<sup>n</sup> càchí-í sǎ vǎ dúcá<sup>n</sup> càda-n, chi mee Yǎ Ndiǒxí chiñuhu-n — duha càchí espíritú-á<sup>n</sup>.

Te nchaa cue tée càhá<sup>n</sup> tnúhu Yá Ndiǒxí càhá<sup>n</sup>-güedé nàcuáa ndúu tnúhu càhá<sup>n</sup> Xítóhó Jesucristú.

### Cuèndá Yaá yódó ì<sup>n</sup> cuayú cuixí<sup>n</sup>

<sup>11</sup>Te ní xiní-í nchìí andiú, te ní xiní-í ní quee ì<sup>n</sup> Yaá yódó-gǎ ì<sup>n</sup> cuayú cuixí<sup>n</sup>. Te Yaá-á<sup>n</sup> nání-gǎ Yaá quidé ndǎá cuiti, duha nàni-gǎ. Te quide-gǎ nchaa sǎ càhá<sup>n</sup>-gǎ, te ío váha quide ndǎá-gǎ cuèchi nchaa ñáyiú, te nchaa ñáyiú nǎá ndihi ñaha xii-gǎ ío váha xiní-gǎ nàcuáa cada ñaha-gǎ xií-yu chi ío ndǎá quidé-gǎ. <sup>12</sup>Te tinùu-gǎ dáyèhé-xi dàtná dáyèhé ñuhú, te titní coròná ñuhú dǐquí-gǎ, te nèhe-gǎ ì<sup>n</sup> sǎ ndèe dùu-gǎ, te vǎ yǒ ì<sup>n</sup> cùnuni iní-xi nása cuáhá<sup>n</sup> tnúhu-á<sup>n</sup>, chi ì<sup>n</sup>dii díí-ni mee-gǎ nǎhá-gǎ nàcuáa càhá<sup>n</sup>-xi. <sup>13</sup>Te Yaá-á<sup>n</sup> níhnú-gǎ ì<sup>n</sup> dóo ní cuu mee-ni ñǎí, te Yaá-á<sup>n</sup> càchí tnúhu-gǎ nchaa nàcuáa sàni iní Yǎ Ndiǒxí, núú xíǎ<sup>n</sup> nání-gǎ Tnúhu Yá Ndiǒxí. <sup>14</sup>Te sátá-gǎ nchìcú<sup>n</sup> nchaa espíritú xínú cuèchi núú Yǎ Ndiǒxí, te cue espíritú-á<sup>n</sup> cúu-xí dàtná sandadú, te xíxíhnu-xi dóo cuixí<sup>n</sup> dóo vǎha sǎ cándò, te xíxódó-xi cuayú cuixí<sup>n</sup>. <sup>15</sup>Te yuhu Yaá yódónùu-á<sup>n</sup> quéné ì<sup>n</sup> yuchí cáhnú, te ndihi yuchí-á<sup>n</sup> dǎnicuèhé-gǎ nchaa ñáyiú xǐndecu ñuyú, te ío dandòhò ñaha-gǎ xií-yu, te dàtná quidé tǎe quihni ndéhé

yoho yàha stilé duca<sup>n</sup> sǎtnahá-xi cada ñaha-gǎ xií-yu, chi ío dandòhò ñaha-gǎ xií-yu cuèndá sǎ ío cùdée<sup>n</sup>-gǎ. Te mee-gǎ ío cùnùu-gǎ táxi tnùnì-gǎ, te quide-gǎ nchaandi túhú sǎ vǎha. <sup>16</sup>Te sátá dǒó níhnú Yáá-á<sup>n</sup> ndihi núú tìcáca<sup>n</sup>-gǎ yódó tnùnì nàcuáa nàni-gǎ, te duha càhá<sup>n</sup>-xi: “Tée ío cùnùu taxi tnunì ñǎhá xii nchaa cue tée yǐndaha ñaha xii ñáyiú ndihi nchaa dava-gǎ ñáyiú”, duha ndèe tnunì sátá dǒó-gǎ-á<sup>n</sup> ndihi tìcáca<sup>n</sup>-gǎ-á<sup>n</sup>.

<sup>17</sup>Te dàtnùnì ní xiní-í ì<sup>n</sup> espíritú xínú cuèchi núú Yǎ Ndiǒxí nútñí-xi núú nchìcanchii, te níhi ní cáhá<sup>n</sup>-xi, te xǎha<sup>n</sup>-xi xii nchaa quiti ndava núú tàchí:

—Nchaa nchòhó quiti ndàva, chí táquixi chi caxi-ndo nchàa sǎ ní quide túha Yá Ndiǒxí, <sup>18</sup>chi caxi-ndo cùñú nchaa cue tée yǐndaha ñaha xii ñáyiú, ndihi cuñú nchaa cue tée tàxi tnunì ñǎhá xii cue sandadú, ndihi cuñú nchaa cue tée ío ñǎí xǐndáa, ndihi cuñú nchaa cuayú, ndihi cuñú nchaa cue tée ní xódó ñaha xii-güedí, ndihi cuñú nchaa dava-gǎ ñáyiú, ñáyiú ñá túu tnáhí ni dàñá quee núú chíú<sup>n</sup> pàtróó<sup>n</sup>-xi, ndihi cuñú nchaa ñáyiú ní dàñá ní quee núú chíú<sup>n</sup> pàtróó<sup>n</sup>-xi, ndihi cuñú nchaa ñáyiú cùnùu, ndihi cuñú nchaa ñáyiú ñá túu cùnùu, te nchaa cuñú-á<sup>n</sup> caxi-ndo —càchí espíritú-á<sup>n</sup> xǎha<sup>n</sup>-xi xii nchaa quiti-á<sup>n</sup>.

<sup>19</sup>Te sátá dúcá<sup>n</sup> te ní xiní tucu-í quiti ní quee xití làmár, ndihi nchaa cue tée yǐndaha ñaha xii ñáyiú, ndihi nchaa cue tée cùu sandadú-güedé ní naníhí tnáhá-güedé ndihi quiti-á<sup>n</sup>

cuèndá cuu i<sup>n</sup>nuu-güedë ndihi-di nàá-güedé ndihi Yaá yódó cuàyú-á<sup>n</sup>, ndihi nchaa cue espíritú cúú sàndadú ndihi-gá. <sup>20</sup>Te cue espíritú cúú sàndadú ndihi Yaá-á<sup>n</sup> nǐ tñii-xi quiti-á<sup>n</sup>, ndihi téé ío dándahú ñáhá xii ñáyiú càchí sá càhá<sup>n</sup> tnúhu Yá Ndióxi te ñá ndáá sá càhá<sup>n</sup>-dé tnúhu-gá, te ñu-ni téé-á<sup>n</sup> nǐ quide-dé titní núú sǎ vǎ yõ tñàhí ndàcu cada núú quiti-á<sup>n</sup>. Te sá dúcá<sup>n</sup> nǐ quide téé-á<sup>n</sup> xíá<sup>n</sup> ní dándahú-dé ñáyiú ní sándáá iní-yu ní quée-yu tñuní quiti-á<sup>n</sup>, te ní chiñuhú-yu sá nǐ dándácú ñáhá-yu xii-di, te cue espíritú-á<sup>n</sup> nǐ dáquëe-xi quiti-á<sup>n</sup> núú ñuhú núú ñuhú àzufre càyú-xi, ndihi téé duca<sup>n</sup> dándahú ñáhá xii ñáyiú-á<sup>n</sup>, te xíá<sup>n</sup> cuhu<sup>n</sup> téé-á<sup>n</sup> ndihi quiti-á<sup>n</sup>, te ío ndoho-dé ndihi-di. <sup>21</sup>Te ndihi yuchí cáhnú sǎ quéné yùhu Yaá yódó cuàyú-á<sup>n</sup> nǐ sahní-gá nchaa dava-gá cue téé cùndihi quiti-á<sup>n</sup>, te nchaa cue quiti ndàva ní chítú xítí-güedi ní xexi-güedi cuñú nchaa cue téé-á<sup>n</sup>.

Úxí cièndú cuíá

**20** Te sátá dúcá<sup>n</sup> te ní xiní-í i<sup>n</sup> espíritú xínú cuèchi núú Yá Ndióxi ní quee-xi andiu, te nùndaha-xi ndacaá nacaá<sup>n</sup>-xi yèhe i<sup>n</sup> yaú cùnú víhí núú cùndècu sácúíhná, te nùndaha tucu-xi i<sup>n</sup> cadená cáhnú. <sup>2</sup>Te espíritú-á<sup>n</sup> nǐ tñii-xi quiti déé<sup>n</sup> nání dragón, te ñu-ni quiti-á<sup>n</sup> cúú-dí mèi yucu ñávàha sá nání sácúíhná, te ñu xíá<sup>n</sup> ní nduu-xi cóo ndéé sanaha. Te espíritú-á<sup>n</sup> nǐ dácútú ñàha-xi xii-di, te duca<sup>n</sup>-ni cùndutu-di ndéé xínu úxí cièndú cuíá. <sup>3</sup>Te sátá nǐ dácútú ñàha espíritú-á<sup>n</sup> xii-di te ní

dáquëe ñàha-xi xii-di yaú-á<sup>n</sup> chi ñu yaú-á<sup>n</sup> tàú-di quée-di cundecu-di. Te ní nacadí-xi yuyèhe yaú-á<sup>n</sup>, te ní tee-xi sèyú yuyèhe-á<sup>n</sup> cuèndá sá vǎ quéné-gǎ-di dandàhú-di cue ñáyiú ñuyíú, te xíá<sup>n</sup> cundedí nihnu-di ndéé xínu úxí cièndú cuíá. Te sátá ná yǎha úxí cièndú cuíá-á<sup>n</sup> te nandáxi-di te quene-di yaú núú ñuhú-dí-á<sup>n</sup> caca cuu tnaa-di i<sup>n</sup> ùú nduu.

<sup>4</sup>Te dàtnùní ní xiní-í xñutnǐ titní xilé váha, te xíá<sup>n</sup> xñucóo nchaa ñáyiú ní ngùndecu ndihi tnúhu ndee iní cada ndáá cuèchi nchaa ñáyiú, te ní xiní-í xñndecu tñàhá cue ñáyiú ní xehndé-güedé dúcú<sup>n</sup>-xi cuèndá sá nǐ càhá<sup>n</sup>-yu tnúhu Yá Ndióxi, ndihi cuèndá sá nǐ càhá<sup>n</sup> váha-yu cuèndá Xítohó Jesucristú. Te ñu-ni ñáyiú-á<sup>n</sup> cúú-yu ñáyiú ñá túú ní chiñuhú-yu quiti ní quene xítí làmár-á<sup>n</sup>, te ni ñà túú ní chiñuhú-yu sá nǐ dándácú ñáyiú ní natava ñáhá-yu xii-di, te ni ñà túú ní dàñá-yu mèe-yu quée-yu tñuní quiti-á<sup>n</sup> chi ni tñéé-yu te ni ndàhá-yu ñá túú ní dàñá-yu quée tñuní-di. Te ní xiní-í ní ndoto cue ñáyiú-á<sup>n</sup> cuèndá tñàhá-yu cunúú-yu taxi tñuní-yu ndihi Xítohó Jesucristú úxí cièndú cuíá. <sup>5</sup>Te dava ñáyiú ní xíhí ñá túú ní ndòtó-yu, chi ndéé yáha úxí cièndú cuíá te dàtnùní ndotó-yu. Te ñáyiú ní xiní-í ní ndoto-á<sup>n</sup> cúú-yu ñáyiú ní ndoto díhna nuu. <sup>6</sup>Te ío váha ní tñàhá nchaa ñáyiú ní nduu táhú nǐ ndoto díhna nuu!, chi cue ñáyiú-á<sup>n</sup> ío cùdúú-yu núú Yá Ndióxi, te nchaa ñáyiú-á<sup>n</sup> vǎ quíhí<sup>n</sup>-yu núú ùhú núú ndàhú, te ñáyiú-á<sup>n</sup> cúú-yu dútú ndécú-yu núú Yá Ndióxi ndihi

núú Xítohó Jesucristú, te ñáyiú-á<sup>n</sup> cúnúú-yu dàtná cúnùu Xítohó Jesucristú, te cunuu ndìhi ñáhá-yu xii-gá úxí cièndú cuíá.

<sup>7</sup>Te sáta ná yáha úxí cièndú cuíá-á<sup>n</sup> te sácuihná quee-xi núú yíndèdí nihnu-xi-á<sup>n</sup>, <sup>8</sup>te ngüíta tucu-xi dandàhú-xi nchaa ñáyiú xíndecu ñihí ñuyíú, te cuéi ñáyiú ñúú Góg, te cuéi ñáyiú ñúú Màgóg duca<sup>n</sup> quíhí<sup>n</sup>-xi dandàhú ñáhá-xí xii-yu, te datàcá-xi nchaa ñáyiú cuèndá nàá-yu, te cuéhé víhí-yu dàtná cuéhé ñuhu cúchí làmár.

<sup>9</sup>Te nchaa ñáyiú-á<sup>n</sup> tñí<sup>n</sup>-yu ichi quíhí<sup>n</sup>-yu ì<sup>n</sup> ichi sá cuáhá<sup>n</sup> núú cáá ì<sup>n</sup> yodo cahnu vihi, te sáá-yu núú xíndecu ñáyiú cùu cuendá Yá Ndiöxí, te ñáyiú-á<sup>n</sup> chidòcò-yu cue ñáyiú cùu cuendá-gá-á<sup>n</sup> ndìhi ñúú-yu, te ñúú-á<sup>n</sup> ïo cùu iní-gá, dico mee Yá Ndiöxí dangòyo-gá ñuhú cahmi-gá nchaa ñáyiú duca<sup>n</sup> chidoco ñaha xii ñáyiú cùu cuendá-gá-á<sup>n</sup>, te nchaa ñáyiú-á<sup>n</sup> cuú.

<sup>10</sup>Te sácuihná sã dúcá<sup>n</sup> dándahú ñáhá xii ñáyiú chidoco ñaha xii ñáyiú cùu cuendá Yá Ndiöxí-á<sup>n</sup> dàquée ñaha-gã xii-xi núú ñùhú núú ñùhú àzufré càyú-xi, te ñiu-ni xía<sup>n</sup> sa ñuhu quitì ní quene xití làmár, ndìhi téé ní dándahú ñáyiú ní xáha<sup>n</sup>-dè xii-yu sá càhá<sup>n</sup>-dé tñúhu Yá Ndiöxí te ñá ndàá sá càhá<sup>n</sup>-dé tñúhu-gá, te xía<sup>n</sup> cuhu<sup>n</sup>-xi ndoho-xi ni caa ni quíhí<sup>n</sup> ndìhi quitì ní quene xití làmár, ndìhi téé càchí sá càhá<sup>n</sup> tñúhu Yá Ndiöxí te ñá ndàá sá càhá<sup>n</sup>-dé tñúhu-gá.

#### Cùndáá cuéchi ñáyiú

<sup>11</sup>Te ní xiní-í nútñí ì<sup>n</sup> xilé váha xilé cuixí<sup>n</sup>, te núú xilé-á<sup>n</sup> núcõo ì<sup>n</sup>

Yaá. Te ndèhe Yaá-á<sup>n</sup> nì ndóñúhú àndiu ndìhi ñuyíú-a, te duca<sup>n</sup> nì ndóñúhú-xí chi vá cùndècu-gá-xi. <sup>12</sup>Te sáta dúcá<sup>n</sup> te ní xiní-í nchaa ñáyiú ní xihí ní cùu, ñáyiú cùnno ndìhi ñáyiú ñá túú cùnno xínutñí-yu núú Yáá núcõo núú xilé váha-á<sup>n</sup>, te Yaá-á<sup>n</sup> cúú-gã Yá Ndiöxí, te òré-á<sup>n</sup> nì nandicá nchaa tutú núú yódó tñuní nchaa nàcuáa ndùu sá nì quide ì<sup>n</sup> ì<sup>n</sup> ñáyiú-á<sup>n</sup>, te ní nandicá tucu ingá tutú núú yódó tñuní nchaa ñáyiú ní naníhí tàhú, te nchaa ñáyiú ní xihí ní cùu xínutñí-yu núú Yá Ndiöxí cundáá cuéchi-yu, te nchaa nàcuáa ndùu nchaa cuéchi-yu yòdo tñuní núú nchaa tutú-á<sup>n</sup> duca<sup>n</sup> cùndáá. <sup>13</sup>Te nchaa ñáyiú ní xihí xití ndute làmár, ndìhi nchaa ñáyiú ní xihí núú ñuhu yìchí nchaa ñáyiú-á<sup>n</sup> cundáá cuéchi-yu nàcuáa ní quidé-yu ì<sup>n</sup> ì<sup>n</sup>-yu. <sup>14</sup>Te vitna te vá cúú-gã ñáyiú chi ñá túú-gã tñúhu xihí, te nchaa ñáyiú ñuhu núú ñùhú núú càyú ñáyiú-á<sup>n</sup> cúú-yu ñáyiú ní xíta nihnu ni caa ni quíhí<sup>n</sup>. <sup>15</sup>Te duca<sup>n</sup> chi nchaa ñáyiú ñá túú yòdo tñuní núú tütú núú yódó tñuní nchaa ñáyiú naníhí tàhú ní dàquée ñaha Yá Ndiöxí xii-yu núú ñùhú núú càyú.

#### Andiu sàa ndìhi ñuyíú sáá

**21** Te sáta dúcá<sup>n</sup> te ní xiní-í andiu sàa ndìhi ñuyíú sáá, te andiu sã ndécú ñihna ndìhi ñuyíú sã ndécú ñihna ní ndóñúhú-xí, te tñàhà làmár ní ndóñúhú-xí. <sup>2</sup>Te yúhú té Juáá ní xiní-í ñúú Jerusalén sáá nì quee-xi núú ndécú Yá Ndiöxí, te ñúú-á<sup>n</sup> cúú-xí ñúú méé-gã, te ío vii càa chi càa datná cáá ì<sup>n</sup> ñadìhí xíchí tñàndaha. <sup>3</sup>Te ní tecú dóho-í

níhi ní cáhá<sup>n</sup> ì<sup>n</sup> sá nǐ cáhá<sup>n</sup> andiù, te cächí-xi:

—Chí cündèdóho ì<sup>n</sup> tnúhu na cáhá<sup>n</sup>-í-a: Yá Ndiöxí ndécú ndìhi-gá cue ñáyiu vitna, te duca<sup>n</sup>-ná cundecu ndìhi ñaha-gǎ xíi-yu, te diú-yu cùu-yu ñáyiu cùu cuendá-gá, te vá í<sup>n</sup> ndùu ì<sup>n</sup> quíú-gǎ te dañá ñaha-gá xíi-yu. <sup>4</sup>Te mee Yǎ Ndiöxí cada-gá sá ñà túú tnàhí-gá ná caní iní-yu cundecú-yu, te ni vǎ quíní-gá-yu tnúhu xihí, te ni vǎ quíní-gá-yu tnúhu ndàhyú, te ni vǎ quíní-gá-yu tnúhu ndìhú iní-xi, te ni vǎ quíní-gá-yu tnúhu cùhú, chi nchaa sá nǐ xiní-yu ñuyíú ðìhna vá quíní-gá-yu vitna —duha cächí sá nǐ cáhá<sup>n</sup>-á<sup>n</sup>.

<sup>5</sup>Te Yaá núcöo núú xilé váha-á<sup>n</sup> nǐ cachí tnúhu-gá xii-í, te cächí-gá: —Yúhú quídè-í nàcuáa nduu saa nchàa sá cündècu vitna. Te vitna chido tnùní-n ì<sup>n</sup> núú tütú nchaa tnúhu sá nǐ cáhá<sup>n</sup>-í-a, chi nchaa tnúhu-a cùu-xi tnúhu ndáá cuiti —duha cächí-gá.

<sup>6</sup>Te dàtnùní ní cachí tnúhu tucu-gá xii-í:

—Sa ní xínu cava nchaa chùu<sup>n</sup> ní sani iní-í cada-í, te diu-ni yúhú cùu-í Yaá sa ndècu ndéé cùtnàhá ní ngáva ñuyíú, te diu-ni-í cundecu-í ní caa ni quíhí<sup>n</sup>. Te nchaa ñáyiu cuíní tuha ñaha xii-í te cada iní-yu sá dàtná ndute cùu-xi sá cuañaha tǎhù-í xii-yu candeca-xi iní-yu ní caa ni quíhí<sup>n</sup>. <sup>7</sup>Te nchaa ñáyiu na cundee iní yáha nándi sá ná yǎha-yu sá cuendá-í, te ñáyiu-á<sup>n</sup> nduu tǎhù-yu cundecu váha-yu, te yúhú cuu-í Ndiöxí-yu, te duca<sup>n</sup> mée-yu cuú-yu déhe-í. <sup>8</sup>Te nchaa ñáyiu na yùhú ndoho cuendá-í

quíhí<sup>n</sup>-yu núú ñùhú núú càyú ndìhi ñáyiu ñá túú sàndáá iní ñáhá xii-í, ndìhi ñáyiu quide nándi nchaa sá cuèhé sá dúhá, ndìhi ñáyiu sàhni tnaha, ndìhi ñáyiu ndècu ichi ðíí ìní, ndìhi ñáyiu quide nduu, ndìhi ñáyiu chìñuhu nchaa sá cächí-yu cùu ndióxí ní cadúha cue tée ñuyíú-a, ndìhi ñáyiu dàcuandehnde, nchaa ñáyiu duca<sup>n</sup> xíquide-á<sup>n</sup> cuita nihnú-yu chi quíhí<sup>n</sup>-yu núú ñùhú núú ñúhú àzufré càyú-xi —duha ní cáhá<sup>n</sup> Yǎ Ndiöxí ní cachí tnúhu-gá xii-í.

### Ñúú Jerusalén sáá

<sup>9</sup>Te núú ùsá espíritú xínehe tícùú ñùhú tnúhu ndòho, te ì<sup>n</sup>-xi ní quixi-xi te cächí-xi:

—Taquixi, te na dànehé ñàhà-í xii-n nchàa ñáyiu cùu cuendá Yaá cáá dàtná cáá ì<sup>n</sup> mbéé quiti ní dánycuèhé-güedé, ñáyiu-á<sup>n</sup> cada iní-n sǎ cùú-yu dàtná ì<sup>n</sup> xíchí cuéchí vitna tnándaha, te duca<sup>n</sup> càda iní-n sǎ cùú-yu chi cundecú-yu ndìhi-gá —duha ní cachí tnúhu espíritú-á<sup>n</sup> xii-í.

<sup>10</sup>Te òré quidé ñàha espíritú Yǎ Ndiöxí xii-í nàcuáa cächí iní-xi, te espíritú néhé tícùú-á<sup>n</sup> ndécá ñàha-xi xii-í cuáasa ì<sup>n</sup> tindúú dùcú<sup>n</sup>, te xiá<sup>n</sup> nǐ dánèhé núú ñáhá-xí xii-í ñúú Jerusalén te ñúú-á<sup>n</sup> ní quee-xi núú ndécú Yǎ Ndiöxí, te ñúú-á<sup>n</sup> cùú-xí ñúú mée-gǎ. <sup>11</sup>Te ñúú-á<sup>n</sup> ìo càhnu cuu-xi chí duca<sup>n</sup> ìo càhnu cuu mee-gá, te dàtása<sup>n</sup>-xi dàtná dátása<sup>n</sup> yúú váha sá nání jǎspé yúú cáá dàtná cáá vidriú sá tùu ingá xio ndàa sáta-xi. <sup>12</sup>Te ní càndéé yuhu ñúú-á<sup>n</sup> súúní dùcú<sup>n</sup> nchaa sá ñúhú dòco, te nchíí úxúú yuyèhe-xi, te

ndi tnahá ì<sup>n</sup> ì<sup>n</sup> yuyèhe-á<sup>n</sup> xĩndecu ì<sup>n</sup> caa espíritú xínú cuèchi núú Yá Ndiòxí. Te ndi tnahá ì<sup>n</sup> ì<sup>n</sup> yuyèhe-á<sup>n</sup> yódó tñuní ðiu ì<sup>n</sup> caa xichi cue ñáyiú isràél. <sup>13</sup>Te úní yuyèhe-xi nchií ndàa xio nacuaáa quène nchíanchii, te úní tucu yuyèhe-xi nchií ndàa nacuaáa quée nchíanchii, te úní tucu yuyèhe-xi nchií ndàa xio cuha nacuaáa quène nchíanchii, te úní tucu yuyèhe-xi nchií ndàa xio datni nacuaáa quène tucu nchíanchii. <sup>14</sup>Te sá ñúhú dòco-á<sup>n</sup> chi úxúú tñáhá yúú cúú cìmientú-xi, te ndi tnahá ì<sup>n</sup> ì<sup>n</sup> yúú-á<sup>n</sup> ndèè ì<sup>n</sup> caa ðiu cue téé ní cáhá<sup>n</sup> tñúhu Yaá cáá ðàtná cáá ì<sup>n</sup> mbéé quiti ní dánícuèhé-güedé, te ðiu mee-gã ní táuchíú<sup>n</sup>-gã ní cáhá<sup>n</sup>-güedé tñúhu-gã.

<sup>15</sup>Te espíritú sá cáhá<sup>n</sup> ndihi ñaha xii-í-á<sup>n</sup> néhé-xí ì<sup>n</sup> sá cání ñí cuáha mee-ni díhú<sup>n</sup> cuàá<sup>n</sup>, te ndihi xíá<sup>n</sup> chicùhá-xi ñúú-á<sup>n</sup>, ndihi sá ñúhú dòco ñúú-á<sup>n</sup>, ndihi nchaa yuyèhe-xi. <sup>16</sup>Te ñúú-á<sup>n</sup> ì<sup>n</sup>-ni nèhe-xi cuendá quèhé<sup>n</sup>-xi ndihi cuendá càni-xi, te espíritú-á<sup>n</sup> ní chicùhá-xi ndihi sá néhé-xí-á<sup>n</sup> ñúú-á<sup>n</sup>, te nèhe-xi ócú úú cièndú mĩl mètrú sá cání te ðiu-ni duca<sup>n</sup> nèhe-xi cuendá quèhé<sup>n</sup>-xi, te ðiu-ni duca<sup>n</sup> nèhe-xi sá ðucú<sup>n</sup> nchaa vehe càa ñúú-á<sup>n</sup>. <sup>17</sup>Te ðàtnùní ní chicùhá-xi sá ñúhú dòco ñúú-á<sup>n</sup>, te xíá<sup>n</sup> néhé-xí ùnídico cúmí mètrú sá ðucú<sup>n</sup>, te ní chicùhá-xi ðàtná chicùhá cue ñáyiú ñuyíú-a.

<sup>18</sup>Te sá ñúhú dòco-á<sup>n</sup> ñí cuáha mee-ni yúú vãha yúú sã nání jãspé, te ñihí ñúú-á<sup>n</sup> cúú-xí mèè-ni díhú<sup>n</sup> cuàá<sup>n</sup>, te càa ðàtná cáá vidriú sá ïo váha càndoo te túu ndàa ingá xio. <sup>19</sup>Te ndi ùxúú yúú cúú cìmientú

sá ñúhú dòco-á<sup>n</sup> ndèè ndí dí<sup>n</sup> núú yúú vii càa sátá-xi, te yúú díhna ndèè mee-ni yúú vãha sá nání jãspé sátá-xi, te yúú cúú úú ndèè tucu ingá núú yúú vãha sá nání zàfirú sátá-xi, te yúú cúú ùní ndèè tucu ingá núú yúú vãha sá nání àgatá sátá-xi, te yúú cúú cùmí ndèè ingá núú yúú vãha sá nání èsmeraldá sátá-xi. <sup>20</sup>Te yúú cúú ùhú<sup>n</sup> ndèè tucu ingá núú yúú vãha sá nání ònícé sátá-xi, te yúú cúú ìñú ndèè tucu ingá núú yúú vãha sá nání còrnalíná sátá-xi, te yúú cúú ùsá ndèè tucu ingá núú yúú vãha sá nání crisólítú sátá-xi, te yúú cúú ùná ndèè tucu ingá núú yúú vãha sá nání bèrilú sátá-xi, te yúú cúú ì<sup>n</sup> ndèè tucu ingá núú yúú vãha sá nání tòpacíú sátá-xi, te yúú cúú ùxí ndèè tucu ingá núú yúú vãha sá nání crisopásá sátá-xi, te yúú cúú ùxí ì<sup>n</sup> ndèè tucu ingá núú yúú vãha sá nání jàcintú sátá-xi, te yúú cúú ùxúú ndèè tucu ingá núú yúú vãha sá nání àmatístá sátá-xi. <sup>21</sup>Te ndi ùxúú yuyèhe sá ñúhú dòco-á<sup>n</sup> cúú-xí mèè-ni yúú vãha sá nání pèrlá, te ndùu ñii yúú cúú ì<sup>n</sup> ì<sup>n</sup> yuyèhe-á<sup>n</sup>. Te tnuú cáhnú ndècu xití ñúú-á<sup>n</sup> cúú-xí mèè-ni díhú<sup>n</sup> cuàá<sup>n</sup>, te càa-xi ðàtná cáá vidriú sá túu ndàa ingá xio.

<sup>22</sup>Te ní xiní-í sá ñà túú vèhe núú chíñúhu ñáyiú Dútú Ndiòxí cáá ñúú-á<sup>n</sup>, chi mee-nã Dútú Ndiòxí Yaá quídé nchàa-ndi túhú sá vãha ndècu ñúú-á<sup>n</sup>, ndihi Yaá cáá ðàtná cáá ì<sup>n</sup> mbéé quiti ní dánícuèhé-güedé. <sup>23</sup>Te ñúú-á<sup>n</sup> ñà túú-gã xíní ñúhu-xi nchíanchii dayèhé-xi, te ni yóò ñà túú-gã xíní ñúhu-xi, chi mee-nã Yá Ndiòxí dáyèhé-gã ñúú-á<sup>n</sup> ndihi

Yaá cáá dàtná cáá ì<sup>n</sup> mbéé quiti ní dánìcuèhé-güedé. <sup>24</sup>Te cue ñáyiú nchaa ñuú cáá ñùyíú, ñáyiú ní naníhí tàhú xíndecu ñuú-á<sup>n</sup> dáyèhé-gá núú-yu, te nchaa cue téé yíndaha ñaha xí-yu nèhe-güedé sá yíñùhu sá cúú-xí ñùú-á<sup>n</sup>, te quide cahnu ñaha-güedé xii-gá. <sup>25</sup>Te yuyèhe ñuú-á<sup>n</sup> ñà túú tñàhí nàndedí, te ñuú-á<sup>n</sup> ñà túú tñàhí cùndiquí<sup>n</sup>. <sup>26</sup>Te nchaa ñáyiú nèhé-yu sá yíñùhu sá cúú-xí ñùú-á<sup>n</sup> te quide cahnú-yu Yá Ndiöxí. <sup>27</sup>Te ñuú-á<sup>n</sup> vǎ cúú cùndecu ni ì<sup>n</sup> ñáyiú ndècu ichi cuehé ichi duha, te ni ì<sup>n</sup> ñáyiú ndehnde, te ni ì<sup>n</sup> ñáyiú quide sá ñà túú cùu váha iní Yǎ Ndiöxí vǎ cúú cùndecú-yu ñuú-á<sup>n</sup>, chi mee-ni ñáyiú naníhí tàhú ñáyiú yòdo tnuní núú tütú Yaá cáá dàtná cáá ì<sup>n</sup> mbéé quiti ní dánìcuèhé-güedé, mee-ni ñáyiú-á<sup>n</sup> cundecú-yu ñuú-á<sup>n</sup>.

**22** Te sátá dúcá<sup>n</sup> te ñuú-á<sup>n</sup> ní dánhèhé núú ñáhá-xí xì-í yúte núú ñùhú ndùte candoo canine, te ndute-á<sup>n</sup> candeca-xi iní ñáyiú ni caa ni quíhí<sup>n</sup>, te ndute-á<sup>n</sup> quée-xí mèi núú núcõo Yá Ndiöxí ndíhi Yaá cáá dàtná cáá ì<sup>n</sup> mbéé quiti ní dánìcuèhé-güedé. <sup>2</sup>Te cuádava tnuú cáhnú yǎha xití ñuú-á<sup>n</sup> cáá yúte-á<sup>n</sup>, te xio xio yuhu yúte-á<sup>n</sup> níhnú yùtnu cuu<sup>n</sup> sávidí-xi, te sávidí nchaa yutnu-á<sup>n</sup> cúú tucu-xi sá cándèca iní ñáyiú ni caa ni quíhí<sup>n</sup>, te nchaa yutnu-á<sup>n</sup> cúú<sup>n</sup> sávidí-xi úxúú xito ì<sup>n</sup> cuíá chi ndí tnahá yóó cúú<sup>n</sup> sávidí-xi, te nchaa ndaha-xi cùu-xi tátna sá cúú-xí nchàa ñáyiú. <sup>3</sup>Te vǎ yõ ì<sup>n</sup>-gá cada ì<sup>n</sup> sá ñà túú cùu váha iní Yǎ Ndiöxí ñuú-á<sup>n</sup>. Chi ñuú-á<sup>n</sup> núcõo mee Yá Ndiöxí ndíhi Yaá cáá dàtná cáá

ì<sup>n</sup> mbéé quiti ní dánìcuèhé-güedé xítaxi tñuní-gá, te nchaa ñáyiú xínu cuechi núú-gǎ cada càhnu ñáhá-yu xii-gá. <sup>4</sup>Te nchaa ñáyiú-á<sup>n</sup> cundehe núú-yu Dútú Ndiöxí, te tneé-yu cundeé ñuú-gá. <sup>5</sup>Te ñuú-á<sup>n</sup> vǎ quíni-gá-yu niú, te ni vǎ cǎnèhe chiu<sup>n</sup>-gá-yu ñuhú cutnùní núú-yu, te ni nchícanhíi ñà túú-gǎ xíní ñùhu-xi dayehé ñuú-á<sup>n</sup> chi mee Dútú Ndiöxí dáyèhé-gá, te ni caa ni quíhí<sup>n</sup> cunúú-yu cundecú-yu ñuú-á<sup>n</sup>.

**Sa ta cùyatni nduu quixi tucu Xítohó Jesucristú**

<sup>6</sup>Te sátá dúcá<sup>n</sup> te ní cachí tñuhu espíritú xínú cuèchi núú Yǎ Ndiöxí-á<sup>n</sup> xii-í:

—Nchaandi tñuhu tñuhu-a cùu-xi mee-ni tñuhu ndáá cuíti. Te Yá Ndiöxí Yaá dácàhu iní nchaa cue téé càh<sup>n</sup> tñuhu-gá nàcuáa cáh<sup>n</sup>-güedé ní tendaha-gǎ ì<sup>n</sup> espíritú xínú cuèchi núú-gǎ ní quixi-xi ní dánhèhé-xi nchaa ñáyiú xínu cuechi núú-gǎ nchaa nàcuáa cada-gá, te vǎ cùyàa-gá duca<sup>n</sup> càda-gá —duha càchí espíritú-á<sup>n</sup>.

<sup>7</sup>Te ní cáh<sup>n</sup> Xítohó Jesucristú, te càchí-gá:

—Ílo ndíhi quixi tucu-í!

’iTe ío váha tnahá nchaa ñáyiú tñèi nchaa tñuhu càh<sup>n</sup> Yǎ Ndiöxí yódó tñuní núú tütú-a! —duha càchí-gá.

<sup>8</sup>Te yúhú té Juáá ní tecú dóho-í nchaa nàcuáa ní ngódó tñuní núú tütú-a, te ní xíní núú-í nchaa nàcuáa cada-xi ndéé cuèé-gá. Te sátá dúcá<sup>n</sup> ní cuu te ní ngúíñí xítì-í núú espíritú sá ní dánhèhé núú ñáhá nchàa xíá<sup>n</sup> cuèndá chíñuhu-í-xi ni cùu. <sup>9</sup>Te ní cachí-xi:

—Vǎ dúcá<sup>n</sup> càda-n, chi yúhú dicó xínú cuèchi-í núú Yǎ Ndiöxí dàtná



cúu yòhó ndìhi nchaa dava-gá ñáyiú ndècu ndìhi-n ichi-gá càhá<sup>n</sup>-ndó tñùhu-gá, ndìhi nchaa ñáyiú tñì nchaa tñùhu ndèé núú tütú-a, te xíá<sup>n</sup> càchí-í sá vǎ dúcá<sup>n</sup> càda-n, chi mee Yǎ Ndiòxí duca<sup>n</sup> chiñuhu-n-gá —càchí espíritú-á<sup>n</sup> xii-í.

<sup>10</sup>Te ní cachí tñùhu tucu-xi xii-í, te càchí-xi:

—Vá chídǎhu-n nì ì<sup>n</sup> tñùhu Yá Ndiòxí ndèé núú tütú-a, chi sa ní cuyatni cada-xi nchaa nàcuáa ndèé tnumí. <sup>11</sup>Te daña sǎ ncháá ñáyiú ndècu ichi cuehé ichi duha na cùndecu-ní-yu ichi-á<sup>n</sup>, te duca<sup>n</sup>-ni dàña-n nchaa ñáyiú quide nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiú quide váha te duca<sup>n</sup>-ni na càda váha-yu cundecú-yu, te nchaa ñáyiú quide nchaa nacuáa cùu váha iní Yǎ Ndiòxí te ñu-ni duca<sup>n</sup> na càda-yu cundecú-yu —duha càchí espíritú-á<sup>n</sup>.

<sup>12</sup>Te ní cachí Xítóhó Jesucristú:

—Cundedóho-n tñùhu na càhá<sup>n</sup>-í-a. Ío ndìhi quixi tucu-í, te canehe-í nchaa sá ndúú tǎhú ñáyiú quixi, te nàcuáa ndùu chiu<sup>n</sup> ní quidé-yu ì<sup>n</sup> ì<sup>n</sup>-yu te duca<sup>n</sup> cùnduu sá cuñaha-í nduu tǎhù-yu. <sup>13</sup>Te yúhú cùu-í Yáa sa ndècu ndéé cùtnàhá ní ngáva ñuyú, te ñu-ni-í cundecu-í ni caa ni quíhí<sup>n</sup> —duha càchí-gá.

<sup>14</sup>Te váha tǎhú nchaa ñáyiú sa ní nduu ndoo ní nduu nine iní-xi, chi ñáyiú-á<sup>n</sup> nǐ nduu tǎhù-yu quíhu-yu xití ñuú-á<sup>n</sup>, te caxí-yu sávidí yutnu nùtní-á<sup>n</sup> te xíá<sup>n</sup> candeca-xi iní-yu ni caa ni quíhí<sup>n</sup>. <sup>15</sup>Te ñuú-á<sup>n</sup> vǎ cúu quíhu ni ì<sup>n</sup> ñáyiú ndècu ichi cuehé ichi duha, ni cuè ñáyiú quide nduu,

te ni cuè ñáyiú ndècu ichi díí iní, te ni cuè ñáyiú sǎhni tñaha ñáyiú-xi, te ni cuè ñáyiú chiñuhu nchaa sá nǐ cadúha cue téé ñuyú-a càchí-yu cùu ndiòxí, te ni cuè ñáyiú tñàhá iní dacuàndehnde, te ni ì<sup>n</sup> ñáyiú duca<sup>n</sup> xǐquide vá ndúú tǎhù-yu quíhu-yu xití ñuú-á<sup>n</sup>.

<sup>16</sup>Te ní cáhá<sup>n</sup> tucu Xítóhó

Jesucristú, te càchí-gá:

—Yúhú Xítóhó Jesucristú ní tendaha-í espíritú xínú cuèchi núu-í cuendá cachí tñùhu-xi xii-n nàcuáa ndùu tñùhu cùñaha-n xii nchaa ñáyiú ndècu ndìhi-n ichi-í dácuaaha tñùhu-í ì<sup>n</sup> ì<sup>n</sup> ñuú. Te yúhú cùu-í mei ñàní tñàhá ndìi Dàvií, te cada iní-n sǎ cùu-í dàtná ì<sup>n</sup> chódíní quiti quène datnee —duha càchí-gá.

<sup>17</sup>Te nchaa ñáyiú cùu cuendá Xítóhó Jesucristú Yáa cáá dàtná cáá ì<sup>n</sup> mbéé quiti ní dánicuèhé-güedé, ñu-ni ñáyiú-á<sup>n</sup> cúu-yu ñáyiú cada iní-ó sǎ cúu-yu ì<sup>n</sup> ñadhí xíchí tñandaha ndìhi ñaha xii-gá, te ñáyiú-á<sup>n</sup> ì<sup>n</sup>-ni càhá<sup>n</sup>-yu ndìhi Espíritú Yǎ Ndiòxí, te xǎhǎ<sup>n</sup>-yu ndìhi Espíritú-gá xii nchaa dava-gá ñáyiú:

—Chí táquixi —cachí-yu xǎhǎ<sup>n</sup>-yu ndìhi Espíritú Yǎ Ndiòxí.

Te nchaa ñáyiú duca<sup>n</sup> ndèdóho tñùhu-á<sup>n</sup> vitna, te xini ñuhu-xi duca<sup>n</sup> cáhá<sup>n</sup>-yu tñàhá-yu cùñàhá-yu xii nchaa dava-gá ñáyiú-á<sup>n</sup>, te nchaa ñáyiú cuini tuha ichi-gá te na quixí-yu, te dicó duca<sup>n</sup> cùu tǎhù-yu sá cándèca iní-yu ni caa ni quíhí<sup>n</sup>.

<sup>18</sup>Te nchaa nchòhó ñáyiú ndèdóho nchaa nàcuáa càhá<sup>n</sup> tñùhu Yá Ndiòxí ndèé núú tütú-a càhá<sup>n</sup>-í dóho-ndo. Te núu ì<sup>n</sup> ñáyiú na còdo-gá tñùhu chido tñuní-yu núu

tùtú-a, te Yá Ndiõxí ío dandòho ñaha-gá xí-yu chi yáha-yu nchaa tnúndòho yodo tnuní núú tùtú-a te núú duca<sup>n</sup> na càdá-yu. <sup>19</sup>Te núú ìí<sup>n</sup> ñáyíu na chídáhu dava tnúhu Yá Ndiõxí ndèé núú tùtú-a te ñáyíu-á<sup>n</sup> vǎ ndúú tǎhǔ-yu cundecú-yu ñuú-gá, te ni vǎ ndúú tǎhǔ-yu sá cándèca iní-yu ni caa ni quíhí<sup>n</sup> dàtná yódó tnùní núú tùtú-a.

<sup>20</sup>Te Xítóhó Jesucristú Yaá càhá<sup>n</sup> sá ncháá tnǎhu-a cù-xi tnúhu

ndáá ní cáhá<sup>n</sup>-gá ní tecú dóho-í, te càchí-gá:

—Ndáá sá ìo ndǎhi quixi tucu-í — duha càchí-gá.

Te yúhú ní xáha<sup>n</sup>-ǎ xii-gá:

—Duca<sup>n</sup> na cùnduu, taquixi yohó Xítóhó Jesucristú —duha ní xáha<sup>n</sup>-ǎ xii-gá.

<sup>21</sup>Te Xítóhó Jesucristú ío na chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu. Te ío chí cádá ndèe iní-ǎ vitna.